



# Dios

melivaisibaxuto pejanalivaisiba

Guahibo New Testament

## Contents

Pexanialivaisi Jesucristo pelivaisi, San Mateo peyaquinaelivaisi	1
Pexanialivaisi Jesucristo pelivaisi, San Marcos peyaquinaelivaisi	107
Pexanialivaisi Jesucristo pelivaisi, San Lucas peyaquinaelivaisi	170
Pexanialivaisi Jesucristo pelivaisi, San Juan peyaquinaelivaisi	280
Pacuenia exanavanapa Jesús pitorobivi, apóstolevi	351
Mapabaxutoje San Pablo toyaquina Roma tomarapijivijavabelia	445
Mapabaxutoje San Pablo copiaya toyaquina Corinto tomarapijivijavabelia	488
Mapabaxutoje San Pablo cotocaevi toyaquina Corinto tomarapijivijavabelia	533
Mapabaxutoje San Pablo toyaquina Galacia nacuapijivijavabelia	561
Mapabaxutoje San Pablo toyaquina Efeso tomarapijivijavabelia	579
Mapabaxutoje San Pablo toyaquina Filipos tomarapijivijavabelia	593
Mapabaxutoje San Pablo toyaquina Colosas tomarapijivijavabelia	603
Mapabaxutoje San Pablo copiaya toyaquina Tesalónica tomarapijivijavabelia	613
Mapabaxutoje San Pablo cotocaevi toyaquina Tesalónica tomarapijivijavabelia	620
Mapabaxutoje San Pablo copiaya toyaquina Timoteojavabelia	624
Mapabaxutoje San Pablo cotocaevi toyaquina Timoteojavabelia	635
Mapabaxutoje San Pablo toyaquina Titojavabelia	643
Mapabaxutoje San Pablo toyaquina Filemónjavabelia	648
Mapabaxutoje Dioso pijajivitonē toyaquina judíovijavabelia	650
Mapabaxutoje Santiago toyaquina Dioso pejumecovēnētsivijavabelia	683
Mapabaxutoje San Pedro copiaya toyaquina Dioso pejumecovēnētsivijavabelia	694
Mapabaxutoje San Pedro cotocaevi toyaquina Dioso pejumecovēnētsivijavabelia	706
Mapabaxutoje San Juan copiaya toyaquina Dioso pejumecovēnētsivijavabelia	714
Mapabaxutoje San Juan cotocaevi toyaquina Dioso pejumecovēnētsivijavabelia	723
Mapabaxutoje, acueyabibaxuto, San Juan toyaquina Dioso pejumecovēnētsivijavabelia	725
Mapabaxutoje San Judas toyaquina Dioso pejumecovēnētsivijavabelia	727
San Juan peyaquinaelivaisi pacuenia tajēvelia Dioso tsitajētatsi pacuenia itsijitsia mapanacuataje	731



## **Dios pejumelivaisibaxuto pejanalivaisibaxuto**

### **New Testament in Guahibo**

Language: Guahibo

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit [www.dbs.org](http://www.dbs.org) (USA), [www.bibleleague.ca](http://www.bibleleague.ca) (Canada), and [www.opendoors.org](http://www.opendoors.org) (Europe).

### **Copyright and Permission to Copy**

Copyright © 2011 Wycliffe Bible Translators, Inc.

Copyright © 2011 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society ([www.dbs.org](http://www.dbs.org)).

---

PDF generated on 2017-08-24 from source files dated 2017-08-24.

1f11653e-55ba-5104-ba4c-6b03a2cbd5f7

ISBN: 978-1-5313-0266-5

## Pexanialivaisi Jesucristo pelivaisi, San Mateo peyaquinaelivaisi

### Jesucristo pijasalinaivimi yabara pelivaisi

(Lc 3.23-38)

**1** Mapalivaisije Jesucristo pijasalinaivimi pelivaisi. Jesucristo rabaja Davidpijinë pemomoxiyajuvënë. Davidpijinë pijinia Abrahampijinë pemomoxiyajuvënë. <sup>2</sup>Copiaya Abrahampijinë xaina pexënato. Pevënë Isaac. Isaacpijinë juya pexënato xaina. Pevënë Jacob. Jacobpijinë juya pexi xaina. Pexiyajuvënë pevënë Judá. Judápijinë pematapijinëbeje, pejuyapijivi ata, xaina. <sup>3</sup>Judápijinë juya pexënato xaina. Itsanë pevënë Fares. Itsanë Zara. Bajaraponëmibeje penapijiva pevënë Tamar. Farespijinë juya pexënato xaina. Pevënë Esrom. Esrompijinë juya pexënato xaina. Pevënë Aram. <sup>4</sup>Arampijinë juya pexënato xaina. Pevënë Aminadab. Aminadabpijinë juya pexënato xaina. Pevënë Naasón. Naasónpijinë juya pexënato xaina. Pevënë Salmón. <sup>5</sup>Salmónpijinë juya pexënato xaina. Pevënë Booz. Boozpijinë penapijiva pevënë Rahab. Boozpijinë juya pexënato xaina. Pevënë Obed. Obedpijinë penapijiva pevënë Rut. Obedpijinë juya pexënato xaina. Pevënë Isaí. <sup>6</sup>Isaípijinë juya pexënato xaina. Pevënë David. Bajaraponëmi nacuaevetsinëmi. Davidpijinë yacajërëta Uríaspijinë pijavami. Nexata bajarapajivibeje juya pexënato xainabeje. Pevënë Salomón. <sup>7</sup>Salomónpijinë juya pexënato xaina. Pevënë Roboam. Roboampijinë juya pexënato xaina. Pevënë Abías. Abíaspijinë juya pexënato xaina. Pevënë Asa. <sup>8</sup>Asapijinë juya pexënato xaina. Pevënë Josafat. Josafatpijinë juya pexënato xaina. Pevënë Joram. Jorampijinë juya pexënato xaina. Pevënë Uzías. <sup>9</sup>Uzíaspijinë juya pexënato xaina. Pevënë Jotam. Jotampijinë juya pexënato xaina. Pevënë Acaz. Acazpijinë juya pexënato xaina. Pevënë Ezequías. <sup>10</sup>Ezequíaspijinë juya pexënato xaina. Pevënë Manasés. Manaséspijinë juya pexënato xaina. Pevënë Amón. Amónpijinë juya pexënato xaina. Pevënë Josías. <sup>11</sup>Josíaspijinë juya pexi xaina. Pexiyajuvënë pevënë Jeconías. Jeconías pematapijinë, pejuyapijivi ata, xaina. Pamatacabi Israel nacuapijivi cobecëbiaya caponatsi Babilonia nacuayabelia, bajarapamatacabi naexana Jeconíaspijinë.

<sup>12</sup>Bajaraxuacujinae Jeconíaspijinë juya pexënato xaina. Pevënë Salatiel. Salatielpijinë juya pexënato xaina. Pevënë Zorobabel. <sup>13</sup>Zorobabelpijinë juya pexënato xaina. Pevënë Abiud. Abiudpijinë juya pexënato xaina. Pevënë Eliaquim. Eliaquimpijinë juya pexënato xaina. Pevënë Azor. <sup>14</sup>Azorpijinë juya pexënato xaina. Pevënë Sadoc. Sadocpijinë juya pexënato xaina. Pevënë Aquim. Aquimpijinë juya pexënato xaina. Pevënë Eliud. <sup>15</sup>Eliudpijinë juya pexënato xaina. Pevënë Eleazar. Eleazarpijinë juya pexënato xaina. Pevënë Matán. Matánpijinë juya pexënato xaina. Pevënë Jacob. <sup>16</sup>Jacobpijinë juya pexënato xaina. Pevënë José. Bajaraponëmi María pamona. Bajarapovami Jesús pena, ponë yabara: “Cristo, ponë Dioso athëbëvetsica itorobatsi jivi pecapanepaenexa,” jaitsi.

<sup>17</sup>Nexata Abrahampijinëmita petaxuxuabicujinae jivi penaexanaponaejava, trecenëta naexana Davidpijinë. Bajaraxuacujinae icatsia Davidpijinëmita petaxuxuabicujinae jivi penaexanaponaejava, trecenëta icatsia naexana Jeconíaspijinë. Pamatacabi Israel nacuapijivi cobecëbiaya caponatsi Babilonia nacuayabelia, naexana Jeconíaspijinë. Bajaraxuacujinae icatsia Jeconíaspijinëmita petaxuxuabicujinae

jivi penaexanaponaejava, trecenē pijavata naexana Jesucristo jane baja, ponē Dioso athēbēvetsica itoroba jivi pecapanepaenexa.

### **Pacuenia Jesús naexana yabara pelivaisi**

(Lc 2.1-7)

<sup>18</sup> Jesucristo itsa naexana mapanacuataje, naexana mapacueniaje. Copiata Josébeje Mariabeje najumejaitabeje penapitsinexabeje. Nexata baja María je-jai Josébeje penapitsinexabeje. Bajaraxuacujinae penapitsivajēnaeyabeje, María nayapētane penacoxitsijava Espiritu Santo pejamatabēcueneta. <sup>19</sup> José, María jane baja pamonanexa, bitso penajamatabēcuenereviabinē. Bajaraxuata José apo jitsipae daxitajivi pitabarata pevajunupaebijava María penacoxitsijava. Nexata picani José bēpēnēa jamatabējumai tsaponaponae:

—Itsanējavabelia María nacoxita. Nexata ajumejibia copatsianajē. Apo pitsinē baja tsane María tajavanexa, jamatabējai picani bēpēnēa tsaponaponae José.

<sup>20</sup> Pamatacabi abaxē José bajarapacuenia najamatabēxainaponapona, majitsinaebota José tsitanaitajētatsi Dioso pitorobinētsica, ángel. Nexata ángel jumaitsi Joséjavabelia:

—José, xamē raja Davidpijinē pemomomē. Pētsa cujunavame nepitsijava María nijavanexa. Tsipaji raja panacueto María yacotaponapona, Espiritu Santo saya pejamatabēcueneta nacoxita. <sup>21</sup> Bajarapova exanaena penacuetonēyo. Vēnērubianame bajarapanacuetonēyo Jesús. Tsipaji raja bajaraponē capanepaena daxita pijajivi pibisiacuene pexanaeneconimivecua. <sup>22</sup> Bajarapacuenia María penacuetonēyo exanaena pecopiapatsinexa pacuenia baja cajena bajayata Diosojumepaebinēmi profetanēmi Dioso pejamatabēcueneta tajēvelia vajunupaeba. Profetanēmi bajayata tajēvelia bajarapanacuetonēyo yabara jumaitsi mapacueniaje:

<sup>23</sup> Petiriva apo naperabēquenatsinejeva pebijavabelia, nacoxitsiana. Exanaena penacuetonēyo. Vēnērubianatsi Emanuel. “Emanuel,” pejaijume: “Dioso nacayajava,” pejaijume, jai bajayata tajēvelia profetanēmi Dioso pejamatabēcueneta, jai ángel majitsinaebota Joséjavabelia.

<sup>24</sup> Nexata José piamajitsinaecujinae naēcota. José jumecovēnēta pacuenia itorobatsi ángel. Nexata baja José pijaboyaberena María barēpata pijavanexa. <sup>25</sup> Itsiata abaxē José apo imoxoyobi pijava penamataxainaenacuetonēyo pevecuanaexanaevajēnaeyatsi. Bajarapanacuetonēyo jane baja José vēnēruba JESUS.

### **Pacuenia tulupu perubenaejava pecanaëcobivi najetarubena petaenexa Jesúsnyō yabara pelivaisi**

**2** Jesús naexana Belén tomarata, Judea nacuata peeaetomarata. Bajarapamatacabi nacuaevetsinē Herodes Judeanacua eveta. Nexata Jesús penaexanaecujinae, pebijivi, tulupu perubenaejava pecanaëcobivi, pata tajēnacujavavetsina. Pata Jerusalén tomarajavabetsina. <sup>2</sup> Tulupu perubenaejava pecanaëcobivi yanijobapona jivijavabelia:

—¿Detsa jota barēcatsi panacuetonēyo naexana judíovi pepo pevetsinēnexa? Payapētaniji bajaraponēyo penaexanaejava. Tsipaji baja cajena pataniji bajaraponēyo penaexanaejavata penaitajētsituluputo. Bajarapatuluputo pataniji patajanacuatareca. Bajaraxuata paponainajē mabetsinaje patataenexa bajaraponēyo,

bajaraponëyo pitabarata yaiyataeya patamatabacabëta patatonubenaenexa, jai tsaponae jivijavabelia tulupu perubenaejava pecanaëcobivi.

<sup>3</sup>Nexata Herodes, Judeanacua pevetsinë, vënëlivaisitane tulupu perubenaejava pecanaëcobivi bajarapacuenia pejumaitsaponaejava jivijavabelia Jesúsnyëyo yabara. Nexata Herodes bitso najamatabëxaina. Daxita Jerusalén tomarata pejinavanapaevi ata bitso najamatabëxaina. <sup>4</sup>Nexata Herodes junata daxita sacerdotevi penamatacaitorobivi, judfovi pecujarubivi yajava, penacaetuatsinexa Herodes pijabota. Nexata Herodes jumaitsi penacaetuatsivijavabelia:

—Bajayata profetanë tajëvelia itsa vajunupaeba Cristo penaexanaejavanexa, ¿detsa jota yabara: “Bajarajota Cristo naexanaena,” jai? jai Herodes.

<sup>5</sup>Nexata penacaetuatsivi jumaitsi Herodesjavabelia:

—Belén tomarata raja naexanaeyapaeba, Judea nacuata pecaetomarata. Bajayata baja cajena Diosojumepaebinëmi profetanëmi tajëvelia vajunupaeba bajaraponë penaexanaejavanexa Belén tomarata. Bajayata Diosojumepaebinëmi profetanëmi peyaquinaelivaisita bajaraponë penaexanaejavanexa yabara tajëvelia jumaitsi mapacueniaje:

<sup>6</sup>Belén tomarata naexanaena jivi pepo pevetsinënexa. Bajaraponë jane baja evetsiana Dioso pijajivi, Israel nacuapijivi. Bajaraxuata Judea nacuata penaetomaraxi, daxita tomaraxivecua, Be léntomara cajena bitso peyaiyataetomaratsi tsane,

jai baja cajena mapacueniaje bajayata tajëvelia Diosojumepaebinëmi profetanëmi peyaquinaelivaisita, jai penacaetuatsivi Herodesjavabelia.

<sup>7</sup>Bajaraxuacujinae Herodes muetsia junata tajënacuvetsina pepatsivi, tulupu perubenaejava pecanaëcobivi. Nexata Herodes jumaitsi tulupu perubenaejava pecanaëcobivijavabelia:

—¿Detsa baja pajuametobeje xaina bajarapatuluputo penaitajëtsicujinae? jai.

<sup>8</sup>Nexata petsipaebicujinaetsi Herodes itorobalia bajarapamonae Belén tomarebelia. Herodes jumaitsi tulupu perubenaejava pecanaëcobivijavabelia:

—Paponaremelia Belén tomarebelia. Xaniavaetsia pajaitsianame bajaraponëyo. Itsa pacaxitajarabianame, panevajunucaponaeremena. Nexata xanë ata nalianë tsane. Yaiyataeya tamatabacabëta tonanucaejitsianë bajaraponëyo pitabarata, jai Herodes tulupu perubenaejava pecanaëcobivijavabelia.

<sup>9</sup>Nexata jane baja tulupu perubenaejava pecanaëcobivi ponalia Belén tomarebelia. Nexata bajarapamonae namutualia penajetarubenaejavata, jemata icatsia napebeta tuluputo, patuluputo bajarapamonae tane pijanacuatareca. Nexata bajarapatuluputo bajarapamonae maticanajetarucatsi. Matapania itsajota Jesúsnyëyo pena barëecatsi pematatsënëatsia, bajarapatuluputo rucojopa. <sup>10</sup>Tulupu perubenaejava pecanaëcobivi ita tane bajarapatuluputo, bitso barëya. <sup>11</sup>Nexata bajarapamonae boyalia ita joneya, tane Jesúsnyëyo, pena yajava. Nexata tulupu perubenaejava pecanaëcobivi yaiyataeya pematatabacabëta tonubenajunua Jesúsnyëyo pitabarata. Bajaraxuacujinae pecapatsicajonixi matapana, penamatamotsijavanë pejebicajonixi. Nexata Jesúsnyëyo rajuta orojava. Rajutanua petuxujuvijavabeje. Itsajava inciensovënëjava. Itsajava mirravënëjava. <sup>12</sup>Bajaraxuacujinae tulupu perubenaejava pecanaëcobivi meraví majitsinaebota Dioso itavetatsi penaviabianiva nacuaeavetsinë Herodesjavabelia. Nexata tulupu perubenaejava pecanaëcobivi saicaya namutua baja naviaba pijanacuayabereca.

**Pacuenia José barënajetabajirava Jesúsnyö  
Egipto nacuyabelia yabara pelivaisi**

<sup>13</sup> Tulupu perubenaajava pecanaëcobivi penaviabicujinae, Dioso pijaängel meravi José majitsinaebota tsitanaitajëtatsi. Nexata ángel jumaitsi Joséjavabelia:

—José, nonotapunare baja. Barëponare baja penacuetonëyo, pena yajava. Barënajetabajiravare Egipto nacuyabelia. Bajarajotalia barëponaponaename. Matapania icatsia itsa catsipaebianatsi, barënaviatsiaremena. Tsipaji raja nacuaevetsinë Herodes tsiquirinëyo tsmaxërenajitsiatsi pebeyaxuabinexatsi, jai ángel Joséjavabelia.

<sup>14</sup> Nexata José nonotapuna. Piamajitsinaemeravi baja José barëpona Jesúsnyö, pena yajava. Barënajetabajirava Egipto nacuyabelia. <sup>15</sup> Bajarajotalia José barëponapona bajayajebi. Matapania baja Herodes itsa tëpa, José barëpatsijitsiarena Israel nacuyaberena. Bajarapacuenia tocopiapatatsi tsipaji baja cajena bajayata Diosojumepaebinëmi profetanëmi Dioso pejamatabëcueneta tajëvelia jumaitsi Jesús yabara mapacueniaje: “Taxënato icatsia junatsiarenajë penaviatsinexa Egipto nacuaeverena,” jai ra Dioso, jai baja cajena bajayata tajëvelia profetanëmi Jesús yabara.

**Pacuenia nacuaevetsinë Herodes pijajivi  
itoroba pebinacuetoxi pebeponaenexa yabara pelivaisi**

<sup>16</sup> Nacuaevetsinë Herodes picani jumaitsi tulupu perubenaajava pecanaëcobivijavabelia: “Itsa pacaxitajarabianame bajarapanacuetonëyo, panevajunucaponaeremena,” jai picani Herodes Jesúsnyö yabara. Itsiata tulupu perubenaajava pecanaëcobivi caxitajarabi ata Jesúsnyö, apo vajunucapona Herodesjavabelia. Nexata Herodes itsa yapëtane tulupu perubenaajava pecanaëcobivi apo pevajunucaponaevajatsirena, caxitajarabi ata Jesúsnyö, Herodes bitso anaepana. Nexata Herodes pijajivi itoroba. Jumaitsi:

—Pabeponaename daxita pebinacuetoxi Belén tomarata, Belén tomarajumavelia penaebonëjava ata. Daxita papebinacuetoxi abaxë apo xainae acueyabi pavaije, pabeponaename. Pejananaexanaenacuetoxi ata pabeponaenane, jai Herodes pijajivijavabelia.

Bajarapacuenia Herodes pijajivi itoroba pebinacuetoxi pebeponaenexa, Jesúsnyö picani peyajavabeyaxuabinexatsi. Tsipaji tulupu perubenaajava pecanaëcobivi Herodesjavabelia tsipaeba paepatota taxuxuaba petaejava tuluputo. <sup>17</sup> Itsa bajarapacuenia pebinacuetoxi beponatsi Belén tomarata, copiapata jane baja pacuenia baja cajena Diosojumepaebinëmi profeta Jeramíaspijinë bajayata tajëvelia yaquina pebinacuetoxi pebejavanexatsi yabara. Bajayata baja cajena profeta Jeramíaspijinë peyaquinaelivaisita tajëvelia jumaitsi mapacueniaje:

<sup>18</sup> Belén tomarajumaverena, Ramá tomarata, ayaiacuenia matanueyabiana. Raquelpijiva pemomoxi pexi matanueyabiana. Itavetsi atatsi tsane, itsiata apo copatsi tsane bitso penajamatabëxainaejava. Tsipaji pexi totëpaenatsi, jai bajayata tajëvelia profeta Jeramíaspijinë peyaquinaelivaisita pecoxibeponaejavaxatsi yabara bajarapatomarata.

<sup>19</sup>Nacuaevevtsinē baja Herodes peputatēpae, Dioso icatsia pijaángel itoroba Joséjavabelia. Nexata ángel meravi majitsinaebota José tsitanaitajētatsi Egipto nacuata. <sup>20</sup>Nexata ángel jumaitsi Joséjavabelia:

—José, nonotapunare. Barēponaename baja tsiquirinēyo, pena yajava. Barēnaviaremelia baja icatsia Israel nacuayabelia. Tēpa rabaja ponē picani jamatabēbeyaxuabatsi tsiquirinēyo, jai ángel majitsinaebota Joséjavabelia.

<sup>21</sup>Nexata baja José nonotapuna. Barēpona tsiquirinēyo, pena yajava. José icatsia barēnaviata Israel nacuayabelia. <sup>22</sup>Nacuaevevtsinēmi Herodespijinē pexēnato pevēñē Arquelao. Nexata Arquelao eveta Judeanacia paxa pevēnamuto. Nexata José ita vēñēlivaisitane nacuaevevtsinēmi Herodespijinē pexēnato pevetsijava Judeanacia, José cujunava Jesúsñeyo pebarēponaejava Judea nacuayabelia. Majitsinaebota José Dioso itavetatsi Jesúsñeyo pebarēponaeyaniva Judea nacuayabelia. Nexata José barēpona Jesúsñeyo Galilea nacuayabelia. <sup>23</sup>José ita barēpata Jesúsñeyo Galilea nacuayabelia, Nazaret tomarata barēpatajopa pebarēcaenexa Nazaret tomarata. Bajarapacuenia José Nazaret tomarata ita barēca Jesúsñeyo, copiapata jane baja pacuenia baja cajena bajayata Diosojumepaebivimi profetavi tajēvelia jumaitsi. Diosojumepaebivimi profetavi bajayata baja cajena tajēvelia jumaitsi Jesús yabara mapacueniaje: “Ponē Dioso itorobijitsiatsica jivi pecapanepaenexa, bajaraponē yabara jivi jumai tsane: ‘Mara ponēje Nazaret tomara-pijinjē,’ jai tsane,” jai baja cajena bajayata tajēvelia profetavimi Jesús yabara.

**Pacuenia Juan jivibautisabinē Dioso pitorobilivaisi jivi  
tsipaeba petusato nacuata yabara pelivaisi**

*(Mr 1.1-8; Lc 3.1-9, 15-17; Jn 1.19-28)*

**3** Jesús ita baja xaina bejamatabēcuene treinta pavaibeje, Juan jivibautisabinē najetaruca Judea nacuatusatojava. <sup>2</sup>Juan jivibautisabinē Dioso pitorobilivaisi jivi tsipaebanajetaruca. Jumai tsanajetaruca mapacueniaje:

—Dioso rabaja pijajivi pevetsimatacabinexa, imoxoyo baja pevajēnae pecopiapatsinexa. Nexata baja pacopabare pibisiacuene paneexanabiabijava. Panajamatabēcuenepeñēyorore Diosojavabelia, jai tsanajetaruca Juan jivijavabelia.

<sup>3</sup>Bajarapacuenia Juan Dioso pitorobilivaisi jivi ita tsipaebanajetaruca, copiapata jane baja pacuenia Diosojumepaebinēmi profeta, Isafaspijinē, bajayata tajēvelia yaquina Juan pelivaisi. Juan jivibautisabinē Dioso pitorobilivaisi jivi petsipaebanajetarucaejavanexa yabara, yaquina. Profeta Isafaspijinē peyaquinaelivaisita tajēvelia jumaitsi mapacueniaje:

Tanejumulivaisipaebinē vavajai tsane petusato nacuata. Jumaitsi tsane jivijavabelia: “Jivi baxaneba panamutoverena najetarucaejitsia petuxanenē. Batoroviaexananua namuto. Bajara pijinia pacuenia paxamē ata panajamatabēcuenexaniavaere pepo petuxanenē pepatsivajēnaeyarena,” jai tsane tanejumulivaisipaebinē,

jai profeta Isafaspijinē bajayata peyaquinaelivaisita Dioso pitorobilivaisi Juan jivi petsipaebanajetarucaejavanexa yabara.

<sup>4</sup>Juan naxatata camellonata pexanaejava. Naepacēta cuerobocoto. Pexaejava ēbosese, jabēra yajava. <sup>5</sup>Juan petsipaebilivaisi pejumetaenexatsi, muxunapatabiabatsi Jerusalén tomarapijivi, Judea nacuapijivi ata, Jordánmene imoxoyopijivi ata.



<sup>6</sup>Nexata bajarapamonae pibisiacuene pexanaejavami, roviaia Diosojavabelia navecuapaebapona. Nexata bajarapamonae Juan bautisabapona Jordán meneta.

<sup>7</sup>Jivibitsaëtoxfaneto pata Juanjavaberena pebautisabinexa picani Juan. Bajarapamonae apo jumecovënëtsi ata Dioso pitorobilivaisi, jamatabëcuenenavëxaniabiaya jamatabëjumaitsi:

—Juan itsa nacabautisabiana, Dioso nacacapanepaena, jamatabëjai.

Nexata Juan itsa tane ayaibitsaëtoxfaneto fariseovi, saduceovi ata, pepatsijavarena Juan picani pebautisabinexa, nexata Juan jumaitsi bajarapamonaejavabelia:

—¡Paneamatabëcuenenavëxaniabivi! Pacuenia jomo rëcëpa itsa tane isoto petajuenaJETARUCAEJAVAJAVA, bajara saya paitsimë. Dioso rabaja papecananeconitsia exanaematacabinexa, pacaimoxoyotapona. Itsiata acuenebi tsane panevecuapanepaenexa Dioso papecananeconitsia exanaematacabinexa. <sup>8</sup>Itsa pajitsipame Dioso papecapanepaejava, pacopabare pibisiacuene paneexanabiabijava. Dioso pajumecovënëtanavapare. Nexata daxitajivi pacayapëtaena pepacuene baja panecopabijava pibisiacuene paneexanabiabijavami. Pacayapëtaenanua panenajamatabëcuene pënëyorotsijava Diosojavabelia. <sup>9</sup>Jamatabëcuenenavëxaniabiaya pëtsa panajumaitsimë: “Vaxaitsi cajena Abrahampijinë pemomoxitsi. Nexata Dioso nacacapanepaena,” panajamë pëtsa. Abrahampijinë picani papemomoxi atamë, itsiata pibisiacuene itsa paexanavanapame, nexata bajarapacuene apo pacatonamatamotsi tsipae Diosojavabelia papecapanepaenexa. Dioso baja cajena cajëpatsi jivi pexanaenexa mapai botonëmi ataje, Abrahampijinë bepemomoxi Dioso petaenexa. Nexata bajarapamonae ata Dioso itsa apo jumecovënëtsi, Dioso apo capanepae tsipae. Nexata pacopabare pibisiacuene paneexanabiabijava papecapanepaenexa Dioso. <sup>10</sup>Peubinaenë pexainaenë itsa apo tonacuaitsitsi pexaniacuai, nicata sipalita daxita ponaeenë apo tonacuaitsitsi pexaniacuai. Nexata baja penicatsicujinae itsa niona bajaraponaenë, caetuata. Xuaba isotojavabelia. Nexata bajaraponaenëmi tajuatsi. Bajara pijinia pacuenia paxamë ata Dioso pacaxuabiana infiernojavabelia papecatauena, Dioso apo panejumecovënëtsivi. <sup>11</sup>Xanë raja saya jivi bautisabaponajë merata. Tsipaji baja bajarapamonae copaba pibisiacuene pexanabiabijava. Najamatabëcuenepënëyorotania Diosojavabelia. Itsiata baitsi jane ponë tacovëverena najetarucaena, tabautisabivi Espiritu Santo tsijamatabëjoneyaexanaenatsi, pitarunutsicotia yajava. Xanë raja saya beveliajamatabëcuenenë bajaronëvecua. Nexata bajaraponë vecuaauranë pijazapato ata tatocaponaenexa bepijajivitonëcuenianë. <sup>12</sup>Arrozxainanë baja itsa vereta arroz pesiricaejava, jëaba arroz pejëabijavata pepitsinexa ëpexu. Nexata pijaarroz pejëabijavata, saicaya tsatapona ëpexu pesivecua. Nexata ëpexu xaniavaeteta peetsibojavabelia. Pesi pijinia penetapona vayafuabelia petajuitsinexa. Bajara pijinia pacuenia paxamë ata Dioso pejumecovënëtsivivecua Dioso pacatsatsiana papecaxuabinexa infiernojavabelia pananaxuabinexa baja daxitamatacabijavabelianexa. PamonaE pijinia Dioso pejumecovënëtsivi, Dioso capanepaenatsi pijanacuayabetsia. PamonaE pijinia Dioso apo jumecovënëtsi, Dioso naneconitsiaexanaenatsi daxitamatacabijavabelianexa apo pev-  
evererecaeisotojavabelia, jai Juan daxita bajarapamonaejavabelia.

### **Pacuenia Juan bautisaba Jesús yabara pelivaisi**

*(Mr 1.9-11; Lc 3.21-22)*

<sup>13</sup> Jesús naropota Galilea nacujavaverena. Nexata pata Jordán menejavaberena. Jordán menejavata Juan ponapona. Nexata Jesús pata Juanjavaberena pebautisabinexatsi Juan. <sup>14</sup> Juan picani apo jitsipae pebautisabijava Jesús. Juan nexata jumaitisi Jesúsjavabelia:

—¿Detsa xuajitsia patame tacabautisabinexa? Xamë rajane biji xanë benebautisabame, jai Juan Jesúsjavabelia.

<sup>15</sup> Itsiata Jesús jumaitisi Juanjavabelia:

—Aeconoxae itsiata pacuenia baja cavajëtatsi, netoexanaename. Xanepana va-jaexanaenexa daxita Dioso vajanacaitorobicuenia, jai Jesús Juanjavabelia.

Nexata baja Juan jejai pebautisabinexa Jesús. <sup>16</sup> Nexata jane baja Juan bautisaba Jesús. Jesús pebautisabicujinaetsi nonotajuna menevetsina. Bajarapaepatota Jesús tane athëbëtatsia itaboxo penapatsijava. Nexata Jesús tane Espíritu Santo perunaejavatsica beucucuto. Tsimatarunaicatsi. <sup>17</sup> Nexata Juan jumetane athëbëvetsica Dioso pejumaitisijava: “Mara ponë taxënató tasivanëje. Sivajamatabëcuenebarëyanë bitso,” pejaijava.

### **Pacuenia Jesús jamatabëcueneëjëbatsi dovathi yabara pelivaisi**

*(Mr 1.12-13; Lc 4.1-13)*

**4** Jesús pebautisabicujinaetsi, Espíritu Santo ponaeyaexanatsi petusato nacuyabelia. Bajarabelia ponaeyaexanatsi pejamatabëcueneëjëbinexatsi dovathi.

<sup>2</sup> Nexata petusato nacuata Jesús ponapona cuarenta pamatacabibeje, cuarenta pameravibeje yajava. Bajara pijinia pamatacabibeje Jesús apo xae pexaejava. Nexata Jesús bitso pijani. <sup>3</sup> Nexata dovathi Jesús imoxoyotatsi pejamatabëcueneëjëbinexatsi Jesús picani pibisiacuene pexanaenexa. Dovathi jumaitisi Jesúsjavabelia:

—Itsa pepacuene Dioso pexënatómë, itorobare mapaibotonëje penaexanaenexa pan, jai dovathi.

<sup>4</sup> Jesús nexata jumaitisi dovathijavabelia:

—Jume raja. Dioso raja pejumelivaisibaxutota jumaitisi mapacueniaje: “Jivi raja apo namatavenonae ëpexaejava pexaenexa. Jivi raja namatavenona daxita Dioso pejumelivaisi ata pejumecovënëtsinexa pexainaenexa matacabi apo pevereverecaejava,” jai raja Dioso pejumelivaisibaxutota, jai Jesús dovathijavabelia.

<sup>5</sup> Bajaraxuacujinae icatsia Jesús barëliatsi dovathi Jerusalén tomarabelia. Barëjunayatsi templobo matatuyabetsia. <sup>6</sup> Nexata templobo matatutatsia dovathi icatsia jumaitisi Jesúsjavabelia:

—Itsa pepacuene Dioso pexënatómë, jirevaremeca irabereca. Bajarapacuenia jirevaremeca irabereca tsipaji xamë nitsacueneyaniva pecaevetsinexa Dioso pejumelivaisibaxutota jumaitisi mapacueniaje:

Dioso itorobianica pijaángelevi pecaevetsinexa. Nexata ángelevi pecobeta cayot-

siana pecataxutsaquitsiyaniya ibotonëjavabelia,

jai Dioso pejumelivaisibaxutota xamë pecaevetsinexa ángelevi, jai dovathi Jesúsjavabelia.

<sup>7</sup> Jesús nexata icatsia jumaitisi dovathijavabelia:

—Jume raja. Dioso raja pijinia pejumelivaisibaxutota jumaitsi mapacueniaje: “It-sajivi ata jamatabëcuenenavëxaniabiaya pijacuata apo bejamatabëjumaitsi: ‘Xanë Dioso jamatabëcueneëjësianajë. Nexata exanaenajë pacuene bitso netsiayai tatë-paenexa. Itsiata Dioso neyavenonaena tavecuapanepaenexa bajaraxua. Nexata bajarapacuenia yapëtaenajë Dioso taneyavenonaejava,’ apo bejamatabëjai,” jai Dioso pejumelivaisibaxutota, jai Jesús dovathijavabelia.

<sup>8</sup> Jesús icatsia barëliatsi dovathi pinijitsutoxanetojavabelia. Barëjunayatsi bajarapatsutojumabetsia. Nexata bajarapatsutojumavetsica dovathi Jesús tsitajëtatsi daxitanacuanë. Daxita bajarapanacuanëta daxitacuene pexinaejava yajavatsitajëtatsi. <sup>9</sup>Nexata icatsia dovathi jumaitsi Jesúsjavabelia:

—Ayaijamatabëcueneënë netaeya taitabarata nematabacabëta itsa netonucajunuame, nexata daxita mapanacuanëtaje, daxitacuene xua xaina, cayajavarajutsianatsi, jai dovathi Jesúsjavabelia.

<sup>10</sup> Nexata Jesús jumaitsi dovathijavabelia:

—Dovathi, nevecuanatixire. Dioso raja pejumelivaisibaxutota jumaitsi mapacueniaje: “Daxitajivi vajëcae pematabacabëta caenë pepo petuxanenë Diosojavabelia. Tonacuenebinua bajaraëponënexa,” jai raja Dioso pejumelivaisibaxutota, jai Jesús dovathijavabelia.

<sup>11</sup> Nexata baja dovathi Jesús vecuaponatsi. Bajaraxuacujinae ángelevi patsica Jesús peyavenonaenexatsi.

### **Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi**

*(Mr 1.14-15; Lc 4.14-15)*

<sup>12</sup> Jesús vënëlivaisitane Juan peetsijavatsi penaneconitsivi pejebabiabibota. Nexata Jesús pona Galilea nacuayabelia. <sup>13</sup> Itsiata Jesús apo ponaponae Nazaret tomarata. Ponapona Capernaum tomarata. Capernaum tomara eca Zabolónvënë nacuabeje Neftalivënë nacuabejevavata. Capernaumtomara eca pucaxanetoitapata.

<sup>14</sup> Bajarapacuenia Jesús itsa patajopa Capernaum tomarata Dioso pitorobilivaisi jivi petsipaebinexa, copiapata jane baja pacuenia bajayata Diosojumepaebinë profeta, Isafaspjinë, tajëvelia yaquina Jesús pelivaisi. Dioso pitorobilivaisi Jesús Capernaum tomarata jivi petsipaebijavanexa yabara, Isafaspjinë peyaquinaelivaisita tajëvelia jumaitsi mapacueniaje:

<sup>15-16</sup> Zabolón nacuapijivi, Neftali nacuapijivi ata, Jordánmene itsapanaverenapijivi ata, bitso apo yapëtae Dioso pitorobilivaisi. Galilea nacuata pejinavanapaevi ata, itsaxuayo jinavanapa ayaibitsaëtoxonetonë apo judfovi, bitso apo yapëtae Dioso pitorobilivaisi. Daxita bajarapanacuanëprijivi pexaniajailivaisi, Dioso pitorobilivaisi, apo peyapëtaexae, bepitaquirinacuanëjava jinavanapa. Nexata pacuenia pinijicotiaxaneto itayotsipatsi petaenexa xaniavaetsia, bajara pijinia pacuenia bajarapamonae jamatabëcueneitayotsianatsi itsa tsipaebianatsi Diosojavabelia pecapanepaelivaisinexatsi,

jai tajëvelia Isafaspjinë peyaquinaelivaisita Dioso pitorobilivaisi Jesús petsipaebijavanexa yabara bajarapanacuanëprijivijavabelia.

<sup>17</sup> Nexata Capernaum tomarata Jesús taxuxuaba Dioso pitorobilivaisi jivi petsipaebijava. Dioso pitorobilivaisi Jesús itsa tsipaeba, jivijavabelia jumai tsaponae mapacueniaje:

—Dioso rabaja papecaevetsimatacabinexa, imoxoyo baja pevajënae pecopi-apatsinexa. Nexata baja pacopabare pibisiacuene paneexanabiabijava. Panajamatabëcuenepënyorore Diosojavabelia, jai tsaponae Jesús jivijavabelia.

**Pacuenia Jesús junata cuatro ponëbeje  
dujuai peyamatajucabiabivi yabara pelivaisi**

*(Mr 1.16-20; Lc 5.1-11)*

<sup>18</sup> Jesús najetaruca Galilea pucaxaneto itapaya. Nexata Galilea pucaitapata Jesús taenuta anijanëbeje nacaebananëbeje, Simónbeje Andrésbeje. Simón itsavënë Pedro. Bajaraponëbeje daxitamatacabi canacujitsia dujuai yamatajucabiababeje. Dujuai peyamatajucabiabijavatabeje, yamatajucaponaponabeje. <sup>19</sup> Nexata Jesús jumaiti Simónbeje Andrésbejevavelia:

—Naxanitsia. Panepënaponarebeje. Nexata pacacujarubianatsibeje jivi paneju-caenexabeje. Pacuenia dujuai payamatajucabiabamebeje, bajarapacuenia jivi paju-caename Dioso pijajivinexa, jai Jesús.

<sup>20</sup> Nexata Simónbeje Andrésbeje dujuai peyamatajucabiabijavamibeje, bajarajota puenetabuatabeje. Nexata baja naponabeje Jesús pepëta.

<sup>21</sup> Bajaraxuacujinae icatsia bebeliayo pevajënaeyabelia Jesús barëpona. Icatsia taenuta anijanëbeje nacaebananëbeje, Zebedeo pexënatobeje. Bajaraponëbeje Santiagobeje Juanbeje. Pijajeraënëta paxa yajava xanebaponaponabeje dujuai peyamatajucaejavanexabeje. Nexata icatsia Jesús junata Santiagobeje Juanbeje. <sup>22</sup> Nexata bajarajota paxa puenetanutabeje jera yajava. Santiagobeje Juanbeje naponabeje baja Jesús pepëta.

**Pacuenia Jesús livaisi tsipaeba jivi  
ayaibitsaëtoxfanetoxavabelia yabara pelivaisi**

*(Lc 6.17-19)*

<sup>23</sup> Jesús jane baja najetaruca daxita Galilea nacujajava. Dioso pitorobilivaisi tsipaebapona judíovi penacaetuatabibonëjava. Jesús tsipaebapona jivijavabelia pex-anialivaisi. Tsipaebapona Dioso pijajivi pevetsijavanexa. Jamatejemayaexanaponanua daxitaviriavitane pexainaevimi. <sup>24</sup> Nexata daxita Siria nacujajava pejinavanapaevi ata vënëlivaisitanetsi Jesús. Jesús tocapatatsi daxitaviriavitane pexainaevi. Tocapatatsinua dovathi peyajavajinavanapaevi. Tocapatatsinua pedeva-caibivitsi. Tocapatatsinua petabusipacuenabivitsi. Jesús nexata jamatejemayaexanapona daxita bajarapamonae. <sup>25</sup> Nexata Jesús pënaponatsi jivi ayaibitsaëtoxfaneto Galilea nacupijivi, Decápolis nacupijivi ata, Jerusalén tomarapijivi ata, Judea nacupijivi ata, Jordánmene itsapanaverenapijivi ata.

**Pacuenia Jesús jivi livaisi tsipaeba petsutoyenepanajavata yabara pelivaisi**

*(Lc 6.20-23)*

**5** Jesús itsa tane jivibitsaëtoxfaneto, nexata junaya petsutotsia. Bajarapatsutoyenepanata epatota ecaya. Nexata bajarajota Jesús pijajivi matatoyorotsia nacaetuatsi. <sup>2</sup> Nexata Jesús taxuxuaba livaisi petsipaebijava. <sup>3</sup> Jesús jumaiti pijajivijavabelia mapacueniaje:

—Jamatabëcuenebarëya tsavanapae tsane pamonaе picani mapanacuata yajamatabëcuenebëjai tsavanapae pibisiacuene pexanabiabijava. Bajarapamonaе jonena Dioso pijanacuayabetsia.

<sup>4</sup>Jamatabëcuenebarëya tsavanapae tsane pamonaе picani mapanacuata bejamatabëjiobi tsavanapae itsamonaе pibisiacuene petoexanaexaetsi. Bajarapamonaе Dioso jamatabëcueneavenonaenatsi.

<sup>5</sup>Jamatabëcuenebarëya tsavanapae tsane pamonaе apo jamatabëbëjai tsabiabi mapanacuata, itsacueniababiabi atatsi itsamonaе. Apo cuenecanaviatabiabinua. Bajarapamonaе jinavanapaena Dioso pijanacuatatsia pacuenia Dioso najumecapanepaeya jumaiti bajarapamonaе yabara.

<sup>6</sup>Jamatabëcuenebarëya tsavanapae tsane pamonaе mapanacuata bitso daxitacuene matatoxenetsia jitsipabiaba pexanaenexa Dioso pitorobicueniatsi. Dioso baja cajena yavenonabiabianatsi pexanaenexa bajarapacuene.

<sup>7</sup>Jamatabëcuenebarëya tsavanapae tsane pamonaе mapanacuata itsamonaе ata itaxutotsoniataeyabiaba. Dioso nexata juya itaxutotsoniataeyabiabianatsi bajarapamonaе.

<sup>8</sup>Jamatabëcuenebarëya tsavanapae tsane pamonaе mapanacuata ëpexaniacuene pexanaenexa najamatabëxainabiaba. Bajarapamonaе taena Dioso.

<sup>9</sup>Jamatabëcuenebarëya tsavanapae tsane pamonaе mapanacuata penaitoyavimi ata, nabarajamatabëcuene xanepanaeyaexanapona. Bajarapamonaе yabara: “Taxi,” jai tsane Dioso.

<sup>10</sup>Jamatabëcuenebarëya tsavanapae tsane pamonaе mapanacuata bejiobiaexanabiabatsi Dioso pitorobicueniatsi pexanabiabijava yabara. Bajarapamonaе jonena Dioso pijanacuayabetsia.

<sup>11</sup>Patajajivixaemë, itsamonaе pibisiacuena itsa pacabaracuaicuaijai, itsiata pajamatabëcuenebarëyamë tsavanapae tsane. Bajarapamonaе pacabejiobiaexanae ata tsane, najumetsënëtsiaya pacabaracuaicuaijai atanua tsane, itsiata pajamatabëcuenebarëyamë tsavanapae tsane. <sup>12</sup>Bajara tsipaji pacuenia panevajënaeyapijivimi ata, Diosojumepaebivimi profetavi, bajayata bejiobiaexanatsi. Nexata pasivajamatabëcuenebarëyamë tsavanapae tsane paxamë ata bajarapacuenia itsa pacaexanaena. Tsipaji raja athëbëtatsia itsamatacabi Dioso pacarajutsiana bitso pexaniacuene, jai Jesús pijajivijavabelia.

**Pacuenia Dioso pejumecovënëtsivi mapanacuata pejamatabëcuene  
beyajo, bepecotianua, yabara pelivaisi**

*(Mr 9.50; Lc 14.34-35)*

<sup>13</sup>Icatsia Jesús jumaiti petsutoyenepanajavata pijajivi ayaiBITSÄETOXANETOJAVABELIA:

—Yajobeno xanepana vajaexabinexa pevi piabejeyaniva. Paxamë rabaja pijinia bepayajomë tsavanapae mapanacuapijivijavabeliaje, mapanacuapijivi bitso piabejeyaniva pibisiacuene pexanaeneconi yabara. Paxamë xaniavaetsia panetsipae-bavanapaexae Dioso pejumelivaisi, bajarapamonaе bitso pibisiacuene apo exanae. Itsiata yajo pexaicaejavami itsa ajibi tsipae, ¿detsa nexata pacuenia icatsia naxaicaeyaexanaejitsipa? Acuenebi. Itsacueniejavayonexa ata baja apo xanepanae tsi-pae. Saya pexuabinexa, jivi petaxunanonobinexa, xanepanaejitsipa. Bajara pijinia paxamë ata paitsimë tsipae itsa pacopatsipame Dioso panejumecovënëtsijava. Paja-

matabëcuenesaëjibimë tsipae. Nexata itsacueneyavayonexa ata, apo paxanepanaemë tsipae.

<sup>14</sup> Pacuenia piatayotsicotia itayota piataquirijavata, bajara pijinia pacuenia paxamë ata Dioso panejumecovënëtsivi pajamatabëcueneitayotsianame pi-ajamatabëcueneitaquirivimi. Bajarapacuenia pajamatabëcueneitayotsianame itsa patsitajinavanapaename xaniavaetsia daxitajivi pitabarata. Petsutojumata peecae-tomara acuenebi penacaranatecaejava tsipae. <sup>15</sup> Itsajivi ata lámparabë pitanojotsicujinae, apo etsi cajoniënëalia. Biji rajane athëbëyo etsia daxitaboënë pitayotecaenexa.

<sup>16</sup> Bajara pijinia pacuenia paxamë ata paitsimëre. Xaniavaetsia patsitajinavanapare daxitajivi pitabarata. Nexata bajarapamonae pacacuenetaena pexaniacuenepanexanavanapaejava. Nexata bajarapamonae itsa pacacuenetaena pexaniacuenepanexanavanapaejava, jumai tsane paxamë yabara paneaxa Diosojavabelia: “Diosomë, bitso ayaijamatabëcuenenëmë. Yavenonabiabame nijajivi,” jai tsane bajarapamonae paneaxa, athëbëtatsia peecaenëjavabelia, jai Jesús pijajivijavabelia.

### **Pacuenia Jesús tsipaeba pijajivi bajayata Dioso Moiséspijinëta penajumecopatsilivaisi yabara pelivaisi**

<sup>17</sup> Icatsia Jesús jumaitsi petsutoyenepanajavata pijajivi ayaiBITSaëtoXanetojavabelia:

—Pëtsa panesivajamatabëjumaitsimë: “Maponë patajopaje piajibiaexanaenexa Dioso Moiséspijinëta penajumecopatsilivaisi. Palivaisi ata Diosojumepaebivimi profetavi bajayata tsipaebapona piajibiaexanaenexa,” panesivajamatabëjamë pëtsa. Apo patajopaenë tajibiaexanaenexa bajarapalivaisibeje. Biji rajane patajopajë taexanaenexa jane baja daxita pacuenia tajëvelia nevajunupaeba bajarapalivaisitabeje. <sup>18</sup> Xaniajanë pacuenia pacatsipaebijitsiatsi. Dioso Moiséspijinëta penajumecopatsilivaisi epatua itsalivaisicuenia, caeitanetoyo ata, Dioso apo ithothianae tsane. Pacuenia baja Dioso najumecapanepaeya jumaitsi, bajarapacuenia tsitecaena. Nexata copiapatsiana daxita xua Dioso tajëvelia najumecapanepaeya jumaitsi bajarapalivaisitabeje. <sup>19</sup> Nexata pajivi jumecovënëtsi ata Dioso Moiséspijinëta penajumecopatsilivaisi, itsiata itsa apo jumecovënëtsi caelivaisiyo bajarapayajuvënëlivaisiyo, naneconitsiana Diosojavabelia. Bajarapajivi itsa itavetsiananua itsamonae ata pejumecovënëtsianiva bajarapalivaisiyo, nexata bajarapaneconi yabara bajarapajivi beveliajamatabëcuenejivi taenatsi daxitajivivecua Dioso pijanacuatatsia. Pajivi jumecovënëta daxita bajarapalivaisi, itsa tsipaebanua itsamonae ata pejumecovënëtsinexa bajarapalivaisi, nexata bajarapajivi ayaijamatabëcuenejivi taenatsi Dioso pijanacuatatsia. <sup>20</sup> Xaniajanë pacuenia pacatsipaebijitsiatsi. Paxamë xaniavaetsia Dioso pajumecovënëre. Xaniavaetsia Dioso pajumecovënëre judfovi pecujarubivi Dioso pejumecovënëtsijava matatoxenetsia. Xaniavaetsia Dioso pajumecovënëre fariseovi ata Dioso pejumecovënëtsijava matatoxenetsia. Paxamë xaniavaetsia Dioso itsa apo pajumecovënëtsimë tsane, nexata pacuenia bajarapamonae apo jone tsane Dioso pijanacuayabetsia, bajara paxamë ata paitsimë tsane. Apo panajonemë tsane Dioso pijanacuayabetsia, jai Jesús pijajivijavabelia.

**Pacuenia Jesús muxujioba pijajivi pecopatsinexa  
penabaraanaepanabiabijava yabara pelivaisi**

(Lc 12.57-59)

<sup>21</sup> Icatsia Jesús jumaitsi petsutoyenepanajavata pijajivi ayaiBITSaëtOxanetojavabelia:

—Paxamë rabaja payapëtaneme pacuenia bajayata Moiséspijinë jumaitsi panijasalinaivimijavabelia jumaitsi mapacueniaje: “Pëtsa pabeyaxuabame jivitonë. Pajivi beyaxuaba jivitonë, bajarapajivi pananeconitsiaexanaename,” jai Moiséspijinë panijasalinaivimijavabelia. <sup>22</sup> Itsiata baitsi jane xanë pacatsipaebatsi mapacueniaje. Pajivi baranaeana itsajivijavabelia, bajarapajivi naneconita Diosojavabelia. Nutsianatsi Dioso pitabarata penaneconitsiayaexanaenexatsi. Pajivi itsajivi bijatane pibisiacuenia, bajarapajivi naneconita Diosojavabelia. Bajarapaneconi yabara nutsianatsi itsajota nacaetuatabiaba tomara pevetsivi. Nexata naneconitsiayaexanaenatsi. Pajivi itsajivi pitoyaxae, anaeya jumaitsi: “Xamë saya bitso pecamatajemabinë,” jai, bitso tsiayaitsi. Bajarapaneconi yabara bajarapajivi Dioso naneconitsiayaexanaenatsi inferno isotojavabelia.

<sup>23</sup> Itsa paponame altarpvënëjavajavabelia panerajutsinexa ofrenda Diosojavabelia, nexata bajarapaepatota itsa panajamatabënapitame itsajivijavabelia itsacuenie panexanaejava, nexata mapacuenia paexanaenameje. <sup>24</sup> Altarpvënëjava pitabarata abaxë papuenerie ofrenda panerajutsijavanexa Diosojavabelia. Paponare caecuenia pajivijavabelia pananeconitame panenabarajamatabëcuene xanepanaenexabeje icatsia. Bajaraxuacujinae icatsia panaviatsiaremena altarpvënëjavajavaberena panerajutsinexa jane baja ofrenda Diosojavabelia.

<sup>25</sup> Itsa pananeconitame itsajivijavabelia, nexata itsa pacacapona bajarapajivi jueznëjavabelia papecaneconitsinexa, namutua xaniavaetsia panabarëcuaicuaijamërebeje panenasivajamatabë xanepanaenexabeje xua yabara picani pacaneconitsijitsia. Bajarapacuenia xaniavaetsia panabarëcuaicuaijamërebeje papecanutsianiva jueznë pitabarata. Tsipaji raja jueznë itorobjitsipa policíavi panijaneconi yabara papecacaponanexa penaneconitsivi pejebabiabiboyabelia. Nexata policíavi pacananeconitsiaexanetsipa penaneconitsivi pejebabiabibota. <sup>26</sup> Xaniajanë pacuenia pacatsipaebijitsiatsi. Nexata penaneconitsivi pejebabiabibota itsa pacananeconitsiaexanetsipa, bajaraverena bepíjia apo papitsapaemë tsipae. Matapania pamatamotsipame daxita xua yabara pacananeconitsiaexaneta, papitsapaëjitsipame, jai Jesús pijajivijavabelia.

**Pacuenia Jesús pijajivi muxujioba penacojiobinë itsava  
pejaitsianiva pijavavecua yabara pelivaisi**

<sup>27</sup> Icatsia Jesús jumaitsi petsutoyenepanajavata pijajivi ayaiBITSaëtOxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi. Dioso Moiséspijinëta penajumecopatsilivaisi jumaitsi mapacueniaje: “Pëtsa jaitame itsava nijavavecua,” jai. <sup>28</sup> Itsiata baitsi jane xanë mapacuenia pacatsipaebatsije. Ponë petiriva itsa taenuta, nexata itsa jamatabëjumaitsi: “Jema xania tavitota pibisiacuenie apo caexanaetsi mapovajavabeliaje,” itsa ja-

matabējai, bajaraponē naneconita Diosojavabelia. Nexata najēpaeya naneconitabeje Diosojavabelia ponēbeje pepacune itsavajavabelia pibisiacune pevitota exana pijavavecua.

<sup>29</sup> Panecujauitaxutota panetaejava yabara pibisiacune itsa paexaname, panaitax-utocajure. Tajē baja paxuare. Xanepana panenavecuaxuabinexa bajarapaitaxuto, padaxitaperabētojivimē Dioso papecaxuabianiva infernojavabelia. <sup>30</sup> Panecujua-cobeta pibisiacune itsa paexaname, panacobecaucure. Tajē baja paxuare. Xanepana panenavecuaxuabinexa, bajarapacobe padaxitaperabētojivimē Dioso papecaxu-abianiva infernojavabelia, jai Jesús pijajivijavabelia.

**Pacuenia Jesús pijajivi muxujioba  
penacojobinē pijava pexuabianiva yabara pelivaisi**

*(Mt 19.9; Mr 10.11-12; Lc 16.18)*

<sup>31</sup> Icatsia Jesús jumaitsi petsutoyenepanajavata pijajivi  
ayaibitsaētoxanetojavabelia:

—Bajayata Dioso Moiséspijinēta penajumecopatsilivaisi jumaitsi mapacueniaje: “Ponē jamatabēxuaba pijava, copiaya toyaquinae cuyalatobaxuto pijavajavabelia. Toyaquinae pijava pitavetsilivaisi. Nexata xuacujinae xuabi pijava,” jai bajayata Dioso Moiséspijinēta penajumecopatsilivaisi. <sup>32</sup> Itsiata baitsi jane xanē mapacue-  
nia pacatsipaebatsije. Ponē pijava xuaba, itsanējavabelia bajarapova pevitota pibisi-  
acuene apo vecuaexanae atatsi, bajaraponē naneconita Diosojavabelia pijava pexu-  
abixae. Petiriva pamona pexuabixaeitsi, nacojobijitsipa itsanējavabelia. Nexata jane  
baja bajaraponē pijava pibisiacune vecuaexanaejitsipatsi itsanējavabelia. Tshipaji  
abaxē bajaraponē pijavacuenia Dioso totanetsi. Nexata pijinia ponē pita bajaraponē  
pexuabicovēvami, bajaraponē ata pibisiacune exana pevitota. Tshipaji abaxē bajara-  
ponē pijavacuenia Dioso totanetsi, jai Jesús pijajivijavabelia.

**Pacuenia Jesús pijajivi muxujioba, Jesús pijajivi itsa  
navajunupaeba xua exanaejitsia, itsajumeyo ata yajava  
pejumaitsiyaniva jivi pejumexaniataenexatsi yabara pelivaisi**

<sup>33</sup> Icatsia Jesús jumaitsi petsutoyenepanajavata pijajivi  
ayaibitsaētoxanetojavabelia:

—Paxamē rabaja payapētaneme pacuenia bajayata Moiséspijinē jumaitsi  
panijasalinaivimijavabelia. Panijasalinaivimi penajumetsēnētsiyaniva, bajayata  
Moiséspijinē panijasalinaivimijavabelia jumaitsi mapacueniaje: “Itsa baja  
pepacune najumecapanepaeya panavajunupaebame xua paexanaejitsiamē,  
itsamonae papecajumexaniataenexa itsa pajumaitsimē: ‘Xaniajanē raja.  
Cajumaitsiitsi mapacueniaje Dioso pitabarata,’ itsa pajamē, pētsa epatua  
panajamatabēcopatame bajaraxua paexanaenejevamē,” jai bajayata Moiséspijinē  
panijasalinaivimijavabelia. <sup>34</sup> Itsiata baitsi jane xanē mapacuenia pacaitorobatsije.  
Najumecapanepaeya itsa panavajunupaebame xua paexanaejitsiamē, rovia  
panavajunupaebare. Pētsa pematatsēnēa itsajumeyo ata yajava pajumaitsimē jivi  
papecajumexaniataenexa. Papecajumexaniataenexa itsajivi pētsa pajumaitsimē  
mapacueniaje: “Xaniajanē raja. Cajumaitsiitsi mapacueniaje Dioso pitabarata,”  
pajamē pētsa. Pētsa pajumaitsimēnu: “Xaniajanē raja. Cajumaitsiitsi mapacueniaje  
athēbēnacua pevēnēta,” pajamē pētsa. Tshipaji bajarajotatsia Dioso eca pija-



tronovënëjavata, itsajota ecabiaba pitorobinexa pijajivi. <sup>35</sup> Pëtsa pajumaitsimënu: “Xaniajanë raja. Cajumaitsitsi mapacueniaje mapairaje pevënëta,” pajamë pëtsa. Tsipaji raja Dioso pijaira. Pëtsa bajarapacuenia pajumaitsimë Jerusaléntomara ata pevënëta. Tsipaji Jerusaléntomara Dioso pepo nacuaeavetsinë pijatomara. <sup>36</sup> Pëtsa pajumaitsimënu: “Xaniajanë cajena. Itsa apo xaniajanë tsane, nexata nacaevetsianajë tanematathinaxuabinexamë tatëpaenexa,” pajamë pëtsa. Tsipaji panematabocoto ata Dioso eveta. Nexata paxamë apo pacacajëpae caematanatoyo ata panenamatananiojaiyaexanaenexa, panenamatanatsaejaiyaexanaenexa ata. <sup>37</sup> Itsa pepacuenie paexanaejitsiamë, “Jājā, exanaenajë,” pajamë roviaia. Itsa apo pajamatabëexanaemë, “Jume, apo exanaenë tsane,” pajamë roviaia. Pematatsënëa pëtsa pajumaitsimë itsajumeyo ata jivi papecajumexaniataenexa. Tsipaji bajarapajume dovathi pejamatabëcueneta pajumaitsimë tsipae, jai Jesús pijajivijavabelia.

**Pacuenia Jesús pijajivi muxujioba pecuenecanaviatsiyaniva  
itsajivi itsacueniabi atatsi yabara pelivaisi**

*(Lc 6.29-30)*

<sup>38</sup> Icatsia          Jesús          jumaitsi          petsutoyenepanajavata          pijajivi  
ayaibitsaëttoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi. Bajayata Dioso Moiséspijinëta penajumecopatsilivaisi jumaitsi mapacueniaje: “Pajivi itsanë itaxutobijianatsi, juya bajarapajivi namatamoitaxutobijiana. Pajivi ata itsanë vonotanabiabatsi, juya bajarapajivi namatamovonotanabiabi,” jai bajayata Dioso Moiséspijinëta penajumecopatsilivaisi. <sup>39</sup> Itsiata baitsi jane xanë mapacuenia pacaitorobatsije. Itsanë itsa jamatabëpacabia, pëtsa panayajivibiamë. Itsanë itsa pacaitabarapacabiaxuaba anaeya, nexata icatsia itsanenia ata papecaitarapacataxuabinexa, panaitabaracaeverë. <sup>40</sup> Itsajivi itsa pacaneconitsijitsia jueznëjavabelia paneamoneyabijamatabëcuenie papecavecuapitsinexa panijacamisa, nexata patocopare panijacamisajumavelia panaxatatsijava ata papecavecuapitsinexa. <sup>41</sup> Vajabitsaë itsa pacacaponaeaxana pijajava anijakilómetrobecuena, nexata patocaponare pematatsënëa ata. Cuatro pakilómetrobecuena ata patocaponare. <sup>42</sup> Bitso bepejiobjivi itsa pacavajëta itsacuenëjavayo, parajure. Itsa pacacovaeta, patsicopare. “Jume,” pajamë pëtsa, jai Jesús pijajivijavabelia.

**Pacuenia Jesús pijajivi muxujioba piasivanexa pitoyavi atatsi yabara pelivaisi**

*(Lc 6.27-28, 32-36)*

<sup>43</sup> Icatsia          Jesús          jumaitsi          petsutoyenepanajavata          pijajivi  
ayaibitsaëttoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi mapacueniaje: “Pasivamëre papecayapëtaenë bitso. Paitoyamëre papecaitojavi,” jai bajayata Dioso Moiséspijinëta penajumecopatsilivaisi. <sup>44</sup> Itsiata baitsi jane xanë mapacuenia pacaitorobatsije. Pasivamëre papecaitojavi ata. Pamonaë ata pibisiacuenia pacabaracuaicuaijai, bajarapamonae paxamë xaniavaetsia pabaracuaicuaijamëre. Pamonaë ata pacaitoya, bajarapamonae pexaniacuenie patoexanare. Pamonaë ata pibisiacuenia pacabijatane, pibisi-

acuene pacaexanae ata, patovajëre Diosojavabelia peyavenonaenexatsi. <sup>45</sup> Bajarpacuenia nexata paneaxa, athëbëtatsia peecaenë, papeximëcuenia patsitajinavanapaename. Bajaraponë, paneaxa, yavenonabiaba daxitajivi. Nexata pexaniajamatabëcuenevi, pibisiajamatabëcuenevi ata, najëpaeya pijapabianë petonaxanibinexatsi icotia copata. Bajarapacuenia pijinia ema ata copata. <sup>46</sup> Itsa pasivamë tsipae ëpapecaasivavi, nexata pexaniacuene apo paxainaemë tsipae Diosojavabelia. Pataneme rabaja. Gobierno pejamatabëcueneta impuestomatamo peyanijobiabivibitso pibisiacuene exana. Itsiata bajarapamonae ata asiva piasivavitsi. <sup>47</sup> Xaniavaetsia itsa pacopiapitsipame ëpaneyapëtaevi, nexata pexaniacuene apo paexanaemë tsipae pamonae Dioso apo pejumecovënëtsivivecua. Tsipaji Dioso apo pejumecovënëtsivi ata xaniavaetsia copiapitabiaba peyapëtaevitsi. <sup>48</sup> Pacuenia jamatabëcueneitsi pejamatabëcuenexanepanaenë, paneaxa, athëbëtatsia peecaenë, bajara paxamë ata pajamatabëcueneitsimëre, jai Jesús pijajivijavabelia.

**Pacuenia Jesús pijajivi muxujioba  
pexaniacuene pexanaenexa yabara pelivaisi**

**6** Icatsia Jesús jumaitsi petsutoyenepanajavata pijajivi  
ayaibitsaëttoxanetojavabelia:

—¡Xania baja tsane! Pëtsa pexaniacuene paexaname saya jivi papecacuene-taenexa, “Maponë bitso pexaniajamatabëcuenenëje,” papecasivajamatabëjainexa saya paneexanaejava yabara. Bajarapacuenia itsa paexanaejitsipame, nexata paneaxa, athëbëtatsia peecaenëjavabelia, apo paxainaemë tsipae itsacuenejavayo ata, pexaniacuenejavayo, papecarajutsinexa athëbëtatsia. <sup>2</sup> Bajaraxuata itsa payavenoname bepejiobivi, pëtsa panavajunupaebame daxitajivijavabelia paneyavenonaejava bepejiobivi. Itsamonae xua exana, navajunupaebabiaba daxitajivi pitabarata judíovi penacaetuatabibonëjava, callejava ata. Bajarapamonae navajunupaebabiaba bepejiobivi peyavenonaejava, bepexaniajamatabëcuenevi saya petaenexatsi jivi. Xaniajanë pacuenia pacatsipaebijitsiatsi. Pamonae bajarapacuenia navajunupaebabiaba, bajarapacuenia penavajunupaebabiabixae, Diosojavabelia apo xainae tsane athëbëtatsia perajutsijavanexatsi. <sup>3</sup> Itsa payavenoname bepejiobivi, pëtsa panavajunupaebame itsajivijavabelia ata, bitso papecayapëtaejivijavabelia ata. <sup>4</sup> Muetsia payavenonare bepejiobivi. Nexata paneaxa, papecataenë muetsia paneexanaejava ata, pacarajutsiana bepejiobivi muetsia paneyavenonaematamo, jai Jesús pijajivijavabelia.

**Pacuenia Jesús pijajivi tsipaeba pacuenia  
Diosojavabelia vajëcaejitsia yabara pelivaisi**

(Lc 11.2-4)

<sup>5</sup> Icatsia Jesús jumaitsi petsutoyenepanajavata pijajivi  
ayaibitsaëttoxanetojavabelia:

—Itsa pavajëcame Diosojavabelia, pëtsa pavajëcame pacuenia itsamonae vajëcabiaba. Bajarapamonae saya jema vajëcabiaba Diosojavabelia jivi petaenexatsi Dioso bepejumecovënëtsivi. Bajarapamonae jitsipabiaba nucaeya pevajëtsinexa Diosojavabelia daxitajivi pitabarata judíovi penacaetuatabibonëjava, calle penaepacaxitarabijava ata. Bajarapacuenia vajëcabiaba Diosojavabelia Dioso bepejumecovënëtsivi petaenexatsi jivi. Xaniajanë pacuenia pacatsipaebijitsiatsi. Pa-

monae bajarapacuenia exanabiaba, bajarapacuenia pexanaexae, Diosojavabelia apo xainae tsane athëbëtatsia perajutsijavanexatsi. <sup>6</sup> Nexata paxamë Diosojavabelia itsa pavajëcame, pacænëmë canacujitsia, pajonemeya panijaboyalìa. Pabaupaxatare. Bajaraxuacujinae pavajëcare paneaxajavabelia. Nexata paneaxa pacayajava tsane bajarajota. Nexata paneaxa, papecataenë muetsia paneexanaejava ata, pacarajut-siana bajaraxua paneexanaematamo.

<sup>7</sup> Itsa pavajëcame Diosojavabelia, pëtsa napëna pavajëcame saya piapianexa panevajëcaejava pacuenia Dioso apo peyapëtaevi vajëcabiaba. Dioso apo peyapë-taevi jamatabëcuenenavëxaniabiaya jamatabëjumai tsabiabi: “Itsa bitso apia va-javajëcaejava Diosojavabelia, nexata matapania Dioso nacajumetaena javajëcaejava,” jamatabëjai tsabiabi Dioso apo peyapëtaevi. <sup>8</sup> Pëtsa bajarapacuenia paxamë pajamatabëcuenetsimë. Panevajëcaevajënaeya ata raja paneaxa, Dioso, yapëtane xua panamatavenoname. <sup>9</sup> Bajaraxuata itsa pavajëcame Diosojavabelia, pavajëre mapacueniaje:

Taxamë, athëbëtatsia neecaenë, jitsipajë pecayaiyataejava daxitajivi. <sup>10</sup> Jitsipajë naxanitsiayo pecopiapatsijava daxita nijajivi nevetsijava mapanacuataje. Jitsipajë daxitajivi mapanacuata nejitsipaecuenia pecatoexanabiabinexa, pacuenia baja athëbëtatsia nijajivi nejitsipaecuenia catoexanabiaba, bajarapacuenia pecatoexanavanapaenexa mapanacuapijivi ataje. <sup>11</sup> Ajena, pamatacabinxaxa, panerajure pataxaejavanexa pacuenia panamatavenonajë. <sup>12</sup> Panevecuaajibiaexanare pibisiacuene pataexanaeconimi. Pacuenia paxanë pajamatabëcuenecaevajë, pabarajamatabëcuenexanepanana, itsamonae paxanëjavaberena pibisiacuene patanexanaejava, bajara pijinia pacuenia xamë ata nitabarata pibisiacuene pataexanaejava jamatabëcuenecaevare. Panebarajamatabëcuenexanepanarena. <sup>13</sup> Panevecuatsare dovathi patanejamatabëcuenëjëbivaniva. Panecapanepare jane pibisiacuenevecua. Pamatacabi xamë taxuxuabianame daxita nijajivi nevetsijava mapanacuataje, nejamatabëcuenesaëta evetsianame. Nexata nijajivi jumai tsane xamë yabara: “Dioso cajena bitso ayajamatabëcuenenë,” jai tsane. Bajarapacuenia nijajivi evetsianame daxitamatacabijavabelianexa, pajamë tsane mapacueniaje itsa pavajëcame Diosojavabelia,

jai Jesús pijajivijavabelia.

<sup>14</sup> Jesús icatsia jumaitsi pijajivijavabelia:

—Nexata paxamë itsamonae pibisiacuene pacaexanae ata, pajamatabëcuenecaevare. Pabarajamatabëcuenexanepanarena. Nexata paxamë itsamonae pibisiacuene papecaexanaejava, itsa pajamatabëcuenecaevianame, itsa pabarajamatabëcuenexanepanaenamenua, nexata paneaxa, athëbëtatsia peecaenë, pitabarata pibisiacuene paneexanaejava jamatabëcuenecaeviana. Pacabarajamatabëcuenexanepanana. <sup>15</sup> Paxamë itsa apo pajamatabëcuenecaevimë tsane itsamonae pibisiacuene papecaexanaejava, itsa apo pabarajamatabëcuenexanepanaemënu tsane, nexata paneaxa ata apo jamatabëcuenecaevi tsane. Apo pacabarajamatabëcuenexanepanana tsane, pitabarata pibisiacuene paneexanaejava, jai Jesús pijajivijavabelia.

**Pacuenia Jesús pijajivi tsipaeba pacuenia Jesús pijajivi  
exanaejitsia pamatacabibeje Diosojavabelia  
vajëtaƨona pexaejava xaenejeva yabara pelivaisi**

<sup>16</sup> Icatsia      Jesús      jumaitsi      petsutoyenepanajavata      pijajivi  
ayaibitsaëtoƨanetojavabelia:

—Itsa apo paxaemë panexaejava pamatacabibeje pavajëcame Diosojavabelia, pëtsa pajinavanapame panaitabaraquiatsinejevamë, panamatatiatsinejevamënuu. Itsamonae Diosojavabelia itsa vajëcabiaba pexaejava xaenejeva, pamatacabibeje vajëcabiaba Diosojavabelia, apo naitabaraquiatabiabi, apo namatatiatabiabinua. Bajarapacuenia jinavanapabiaba pamatacabibeje vajëcabiaba Diosojavabelia tsipaji saya bajarapamonae jitsipa petaevitsi pesivajamatabëjumaitsinexatsi: “Mapamonaeje Dioso bitso pejumecovënëtsivi. Diosojavabelia bitso pevajëcaevi pexaejava xaenejeva. Nayapëtane Diosojavabelia bitso pevajëcaejava. Tsipaji naitabaraquiatsinejeva, namatatiatsinejevanua, jinavanapa,” pesivajamatabëjainexatsi petaevitsi. Xaniajanë pacuenia pacatsipaebijitsiatsi. Bajarapamonae pexaejava xaenejeva vajëcabiabi ata Diosojavabelia, itsiata bajaraxua apo tonamatamotsitsi Diosojavabelia. Tsipaji saya jivi petaenexatsi Dioso bepejumecovënëtsivi, bajarapacuenia vajëcabiaba. <sup>17</sup> Paxamë itsa apo paxaemë panexaejava pamatacabibeje pavajëcame Diosojavabelia, itsiata panaitabaraquiare. Panamatatiarenua xaniavaetsia. <sup>18</sup> Bajarapacuenia paexanaename jivi peyapëtaeyaniva Diosojavabelia panevajaëcaponaejava panexaejava paxaenejevamë. Caenë paneaxa, papecayajavanë, yapëtaena. Nexata bajaraponë itsamatacabi pacarajutsiana panijamatamo, jai Jesús pijajivijavabelia.

**Pacuenia Jesús pijajivi tsipaeba xaniavaetsia Dioso  
petonacuenebavanapaenexa itsamatacabi ayaijava  
pexainaenexa athëbëtatsia yabara pelivaisi**

*(Lc 12.33-34)*

<sup>19</sup> Icatsia      Jesús      jumaitsi      petsutoyenepanajavata      pijajivi  
ayaibitsaëtoƨanetojavabelia:

—Pëtsa pacaetuataƨoname ayaijava panexainaejavanexa mapanacuataje. Tsipaji pacatobijianaejitsipa piucubaxaevi. Pacatotasibijitsipsinua. Pacatonacobetoxotsipanua penacobetoxotsivi. <sup>20</sup> Dioso jane xaniavaetsia patonacuenebavanapare. Nexata Diosojavabelia ayaijava pexaniacuene paxainaename athëbëtatsia. Nexata bajarajotatsia apo pacatobijiana tsane piucubaxaevi. Apo pacatotasibitsinua tsane. Penacobetoxotsivi ata apo pacatonacobetoxotsi tsane. <sup>21</sup> Panacuatsia paxatoxaniavaeta panexainaejavanexa, bajarapanacua panejamatabëëthëtovetsina pajamatabënjinavanapaename, jai Jesús pijajivijavabelia.

**Pacuenia vajaitaxuto belámparabë yabara pelivaisi**

*(Lc 11.34-36)*

<sup>22-23</sup> Icatsia      Jesús      jumaitsi      petsutoyenepanajavata      pijajivi  
ayaibitsaëtoƨanetojavabelia:

—Lámparabë bo ënëtuatuajëta itayoteca xaniavaetsia vajataenexa. Bajara pijinia itsi paneitaxuto ata. Paneitaxutoƨanepanaexae xaniavaetsia panatsivajënaetaneme.

Itsa paitaxutobejemë tsipae, nexata xaniavaetsia apo panatsivajënaetaemë tsipae. Pacatsitaaitaquiri saya tsipae. Bajara pijinia itsi panejamatabëcuene ata. Dioso itsa pacajamatabëcueneitayota, pajitsipaename paneexanabiabinexa pacuenia Dioso pacaitoroba. Nexata xaniavaetsia pajinavanapaename. Itsa panajamatabëxainaejitsipame bitso panexainaejava ëpaxamënexa, nexata bitso pajamatabëcueneitaquirimë tsipae, jai Jesús pijajivijavabelia.

**Pacuenia Jesús pijajivi muxujioba bitso  
pejitsipaeyaniva palata yabara pelivaisi**

(Lc 16.13)

<sup>24</sup> Icatsia Jesús jumaitsi petsutoyenepanajavata pijajivi  
ayaibitsaëttoxanetojavabelia:

—Itsajivi ata acuenebi caecuenia petonacuenebijava anijanëbeje pijatuxanenëbejejavabelia. Caenëjavabelia, ponë jitsipa petonacuenebinexa, tonacuenebijitsipa. Ponëjavabelia apo jitsipae petonacuenebijava, apo tonacuenebi tsipae. Bajara pijinia itsi pajivi bitso jitsipa Dioso. Pajivi bitso jitsipa Dioso, nexata itsa tonacueneba Dioso, acuenebi bitso pejitsipaeyaniva palata, jai Jesús pijajivijavabelia.

**Pacuenia Dioso pijajivi eveta mapanacuataje yabara pelivaisi**

(Lc 12.22-31)

<sup>25</sup> Icatsia Jesús jumaitsi petsutoyenepanajavata pijajivi  
ayaibitsaëttoxanetojavabelia:

—Xaniajanë pacuenia pacatsipaebijitsiatsi. Pëtsa pasivanajamatabëxainame ëpanexaejava, ëpaneapaejava ata, panevënajinavanapaenexa. Pëtsa pasivanajamatabëxainamenua ëpanenaxatabijavanexa ata. Apo jinavanapaetsi cajena ëvaxaejavanexa. Apo jinavanapaetsinua ëvajanaperabëxatabinexa. <sup>26</sup> Pataema baratsuimonae pepunaevi. Apo ubi pexaejavanexa. Apo notsinua penaveretaponaejava peetsinexa bota. Itsiata Dioso, paneaxa, athëbëtatsia peecaenë, rajutabiaba pexaejavanexa. ¡Paxamë rabiji bitsoyo Dioso pacaasiva baratsuimonae matatoxenetsia papecarajutsinexa daxita xua panamatavenoname! Bajaraxuata pëtsa bitso pasivanajamatabëxainame ëpanexaejavanexa. <sup>27</sup> ¿Detsa jane ponë paxamëyajuvënënë caëjëpatsi pijacujiruta medio metrocuenia matavëjëa penavitsabiaexanaenexa? Ajibi. Bitso jamatabëbëjai ata tsipae pevitsabinexa, itsiata apo navitsabiaexanae tsipae pijacujiruta.

<sup>28</sup> Bajaraxuata pëtsa bitso pasivanajamatabëxainame ëpanenaxatabijavanexa. Pacanaëjere pacuenia vitsabapona pematono vayafjava. Bajarapamatono apo natsijumanacuenebi. Penaxatatsijavanexa ata apo natsijumaexanae. <sup>29</sup> Bajayata nacuaevetsinëmi Salomónpijinë, bitso pexainanenëmi. Naitabëtsiaya naxatabiabiaba bitso pexaniavirijavanë. Itsiata baitsi jane Salomónpijinë penaitabëtsijava mata-toxenetsia bitso aitabë mapamatonotoxije. <sup>30</sup> Paxamë bevelia panejumecovënëtsivi Dioso, asaëya bepajumecovënëtamë Dioso papecaevetsijava. Ajena pitsijavata vayafota tanetsi pexaniaponamatotonotoxi. Bajaraxuacujinae, caematacabibejucujinae, tajuatsi baja bajarapamonamatotonotoximi. Pacuenia Dioso aitabëyaexana ponamatotonotoxi, bajara pijinia pacuenia paxamë ata Dioso pacaxatabiana pi-aitabëjava itsa pajumecovënëtamë Dioso. <sup>31</sup> Bajaraxuata pëtsa jamatabëbëjaiya pajamatabëjumaitsimë: “¿De tsaeta xua xaenatsi? ¿De tsaeta xua matavëjëa apae-

natsi? ¿De tsaeta xua naxatabianatsi?” pajamatabëjamë pëtsa. <sup>32</sup>Pamonae Dioso apo pejumecovënëtsivi, bajarapacuenia bitso sivanajamatabëxainabiaba epexaejavanaxa, epenaxabijavanexa ata. Itsiata baitsi jane paneaxa paxainame, athëbëtatsia peecaenë. Bajaraponë yapëtane daxita xua panamatavenoname. <sup>33</sup>Bjaraxuata, daxita xua panamatavenoname, matatoxenetsia, Dioso pijacuene bitso pasivanajamatabëxainabiabianame panetoexanavanapaenexa pacuenia Dioso pacaitoroba. Nexata Dioso pacarajutsiana daxita xua panamatavenoname. <sup>34</sup>Itsa baja pajamatabëcuenebëjamë ajena pitsijavata itsacuenejavayo yabara, pëtsa caecuenia payajavajamatabëcuenebëjamë xua yabara meravia pitsijavata pacatocopiapatsijitsia. Tsipaji xua caematacabi canacujitsia nacatocopiapatabiaba vajajamatabëcuenebëjainexa, ayaijava baja tsabiabi. Bjaraxuata ajena pitsijavata apo besivajamatabëcuenebëjaitsi xua meravia pitsijavata nacatocopiapatsijitsia, jai Jesús pijajivijavabelia.

**Pacuenia Jesús pijajivi muxujioba pitaxutotsoniataenexa itsamonae ata, pacuenia bajarapamonae ata Dioso itaxutotsoniatantsi, yabara pelivaisi**

(Lc 6.37-38, 41-42)

**7** Icatsia Jesús jumaitsi petsutoyenepanajavata pijajivi ayaibitsaëttoxanetojavabelia:

—Pëtsa panataneme pepacuene bepeneaneconijibivi. Nexata itsamonae pibisiacuene pexanaejava xaniavaetsia payapëtaenejevamë, pëtsa pabaracuaicuaijamë mapacueniaje: “Bjarapitsipibisiacuene pexanaevi, Dioso bitso ayaiacuenia naneconitsiaexanaenatsi,” pajamë pëtsa. Tsipaji paxamë ata pijinia bajarapitsineconi itsa paxainame, Dioso bitso ayaiacuenia pacananeconitsiaexanaejitsipa. <sup>2</sup>Itsamonae pexanaejava xaniavaetsia payapëtaenejevamë, pëtsa pabaracuaicuaijamë mapacueniaje: “Bjarapitsicuene pexanaevi Dioso naneconitsiaexanaenatsi,” pajamë pëtsa. Tsipaji paxamë ata bajarapitsicuene itsa paexaname, itsamonae pijinia bajarapacuenia pacabaracuaicuaijai tsipae. <sup>3</sup>Bjaraxuata paxamë pepacuene bepeneaneconijibivi nataeya pëtsa pamuxujibame itsajivi pijaneconi yabara. Tsi-paji raja apo payapëtaemë paxamë ata pijinia paneconivajëto paxainame. <sup>4</sup>Nexata paxamë ata ayaineconixaneto itsa paxainame, nexata itsajivijavabelia apo bepajumaitsimë: “Papistiacuene exaname, copare baja,” apo bepajamë. <sup>5</sup>Yamaxëtorobiaya saya bepexaniajamatabëcuenevi nataeya pacuaicuaijamë tsabiabi. Itsamonae pijaneconi yabara pabaracuaicuaijamë tsabiabi. Itsiata pijinia paxamë ata paneconivajëto paxainame, apo payapëtaemë. Paxamë copiaya pacopabare pibisiacuene paneexanabiabijava. Bajara jane xuacujinae paitavetsianame itsamonae ata pibisiacuene pexanaejava pecopabinexa, jai Jesús pijajivijavabelia.

<sup>6</sup>Icatsia Jesús jumaitsi petsutoyenepanajavata pijajivi ayaibitsaëttoxanetojavabelia:

—Pëtsa matavëjëa patsipaebaponame Dioso pejumelivaisi, pamonae patsipaebi atamë, apo yaiyatae bajarapalivaisi. Tsi-paji saya capocaponabiaba bajarapalivaisi. Vaxaitsi itsanë pijaaviri pexaejavanexa rajutsi atatsi tsipae, saya nacaitoya tsipae. Nacasinijitsipanua. Bajara pijinia jamatabëcueneitsi pamonae apo yaiyatae Dioso pejumelivaisi, patsipaebi atamë. Pacuenia marrano ata itsa rajutsipatsi perlavënëjava, bitso penamatamotsijava, saya taxunanonobijitsipa, bajara saya jamatabëcueneitsi bajarapamonae, jai Jesús pijajivijavabelia.

**Pacuenia Jesús pijajivi tsipaeba pacuenia  
Diosojavabelia vajëtaponaejitsia yabara pelivaisi**

*(Lc 11.9-13; 6.31)*

<sup>7</sup>Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pavajëtaponare Diosojavabelia bajayajebi ata pacuenia bajayajebi ata pajait-sipame panecaxitarabinexa itsa pacatonaxuaba itsacueneyavayo. Pavajëtaponare Diosojavabelia asaëyata pacuenia asaëyata padocodocotsipame baupa papecatobau-patsinexa itsa baupa xatatanuta. <sup>8</sup>Bajarapacuenia asaëyata pavajëtaponare Dio-sojavabelia tsipaji pajivi vajëtabiaba, rajutabiabatsi. Pajivi ata jaitabiaba, caxita-jarababiaba. Pajivi ata baupa docodocotabiaba, tobaupatabiabatsi.

<sup>9</sup>Paxamë papebijivimë panexi panexainaevi. Panexënatonëyo itsa pacavajëta panbë, apo panacoxirajutsimë tsipae iboto. <sup>10</sup>Itsa pacavajëta dujuainëyo, apo pana-coxirajutsimë tsipae jomo. <sup>11</sup>Paxamë paneajamatabëcuenebejevi ata, payapëtaneme panenacoxirajutsinexa pexaniajava. Paneaxa, athëbëtsia peecaenë, bitso biji ca-jena pexaniajamatabëcuenenë paxamë matatoxenetsia. Bajaraponë pacarajutsiana pexaniacuene itsa pavajëtame.

<sup>12</sup>Xua pexaniacuene, paxamë pajitsipame itsamonae papecatoexanaenexa, copi-aya paxamë bajarapapexaniacuene patoexanare bajarapamonaejavabelia. Bajara-pajamatabëcuene jëpa Dioso Moisésipjinëta penajumecopatsilivaisi. Diosojumepae-bivimi profetavi peyaquinaelivaisianë ata jëpa bajarapajamatabëcuene, jai Jesús pijajivijavabelia.

**Tsiquiribaupayo epatajërëtsialia yabara pelivaisi**

*(Lc 13.24)*

<sup>13</sup>Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pajonemeya tsiquiribaupayovalia panepatsinexa Dioso pijanacuayabelia. Tsi-paji pinijibaupa, pinijnamutonua, pata infiernojavabelia. Nexata jivi ayaibitsaëtox-anetonë bajaraxuayo jonepona. <sup>14</sup>Pabaupa tsiquiribaupayo, tsiquirinamutoyonua, bajarapanamuto pata matababi apo peverevereaejava pexainaevi pijanacuaya-belia. Nexata saya caejiviyobeje bajaraxuayo jonepona, jai Jesús pijajivijavabelia petsutoyenepanajavata.

**Pacuenia peubinaënë itsa nacuaita, nayapëtanë  
pavirianaecuene yabara pelivaisi**

*(Lc 6.43-44)*

<sup>15</sup>Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Xania panayajivitaema. Pamonaë saicayacuena Dioso pejumelivaisivecua jivi tsipaebapona, bajarapamonae najumetsënëtsiaya pacajumai tsabiabi: “Pax-anë raja Dioso patanitorobicuenia livaisi jivi patsipaebaponajë,” pacajai tsabi-abi. Bajarapamonae Dioso pejumecovënëtsivi cuenecataeya najonena paxamëjav-aberena. Itsiata baitsi jane pacuenia nevëthë pianaepanaevi jamatabëcueneitsi, bajara jamatabëcueneitsi. Jamatabëpacopatsiaexana Dioso panejumecovënëtsi-

javami. <sup>16</sup> Vaxaitsi rabaja yapëtanetsi mapacueneje. Peubinaenë itsa nacuaita, yapëtanetsi ponaecuai xanepana vajaxaenexa. Nexata bajaraponae cuaixanetsi. Ponaë pijinia pibisiacuai nacuaita, yapëtanetsi piabejecuene. Nexata bajaraponae apo cuaixaetsi. Nexata pacuenia peubinaenë itsa nacuaita, nayapëtane ponaecuai xanepana vajacuixaenexa, bajara pijinia pacuenia paxamë payapëtaename pacuenia jamatabëcueneitsi bajarapamonae itsa pacuenetaename xua exanavanapa. Uvaru apo paucutsimë cucunanaeta. Higovënëcuaito ata apo paucutsimë jomovaënaeta. <sup>17</sup> Nexata ponaë pexanianaë, pexaniacuai pijinia nacuaita vajaxaenexa. Ponaë pijinia pibisianaë, ëpiabejecuai nacuaita. <sup>18</sup> Pexanianaë pexaniacuai nacuaita. Apo nacuaiti piabejecuai. Pibisianaë pijinia apo nacuaiti pexaniacuai. <sup>19</sup> Daxita ponaenë nacuaita pibisiacuai, apo vajaxaecuai, yapëtanetsi. Nexata daxita bajaraponenëmi nicatatsi. Nexata tajuitatsi isotota. <sup>20</sup> Bajara pijinia pacuenia paxamë ata payapëtaename itsa pacuenetaename xua exanavanapa pamonaë saicayacuenia Dioso pejumelivaisivecua jivi tsipaebapona, jai Jesús pijajivjavabelia.

### **Pacuenia daxitajivi apo jone tsane Dioso pijanacuayabetsia yabara pelivaisi**

(Lc 13.25-27)

<sup>21</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Daxita pamonaë: “Tajatuxanenë,” tanejaivi ata, itsa apo jumecovënëtsi tsane taxa Dioso, athëbëtatsia peecaenë, nexata apo jone tsane taxa Dioso pijanacuayabetsia. Itsiata pamonaë exanavanapa taxa, athëbëtatsia peecaenë, pejitsipaecuenia, ëbajarapamonae jonena taxa pijanacuayabetsia. <sup>22</sup> Pamatacabi copiapatsiana pijaneconi pexainaevi Dioso penaneconitsiaexanaematacabinexa, bajarapamatacabi jivi ayaibitsaëtoxanetonë nejumaitsi tsane: “Patajatuxanenë, xamë baja cajena nejamatabëcueneta jivi patsipaebabiabajë Dioso pejumelivaisi. Nevënëtanua dovathi jivivecua pacapitsapaponajë. Nevënëtanua pinijicuene pataexanaejavanë, Dioso pesaëta paexanaponajë,” nejai tsane jivi ayaibitsaëtoxanetonë. <sup>23</sup> Itsiata baitsi jane xanë jumaitsinë tsane bajarapamonaejavabelia: “Apo pacayapëtaetsi cajena paxamë. Panevecuaponare pibisiacuene paneexanabiabivi,” janë tsane bajarapamonaejavabelia, jai Jesús pijajivjavabelia.

### **Pacuenia Jesús livaisi tsipaeba anijanëbeje bo pexanaenëbeje pelivaisicuenia yabara pelivaisi**

(Mr 1.22; Lc 6.47-49)

<sup>24</sup> Jesús icatsia jumaitsi petsutoyenepanajavata pijajivi ayaibitsaëtoxanetojavabelia:

—Pajivi nejumecovënëtsiana patacatsipaebilivaisi, nexata itsa exanaena taitorobicuenia, apo nacueratsi tsane. Bajarapajivi piatajairata pijabo bepexanetsinë tsane. Tsipaji ponë pijabo exanaejitsia, peyapëtaexae itsajota pijabo exanetsijitsia pebuttsijavanexa, nexata baja bajarajota apo exanetsi pijabo. Nexata pijabo exaneta bitso piatajairata. Nexata bajaraponë bo pexanaejava apo nacueratsi. <sup>25</sup> Bo peveretetsicujinaë ayaiemaxaneto jopa. Menianë avajubua tsaponae. Ira bubuta. Ayaijovibo bitso bubujai pijabojavaberena. Itsiata pijabo apo toxuabitsitsia. Tsipaji pijabo exaneta piatajairata. <sup>26</sup> Pajivi nejumetaë ata patacatsipaebilivaisi, apo nejumecovënëtsi tsane, nexata itsa apo exanaë tsane taitorobicuenia, bajarapajivi nacueratsiana. Pacuenia



tajetabota bo pexanetsinē nacuerata bo pexanaejava, bajara itsi tsane. Ponē tajetabota pijabo exaneta, yapētae ata emarapae pecopiapatsijavanexa, bajaraponē nacuerata bo pexanaejava. <sup>27</sup>Tsipaji bo peveretetsicujinae ayaiaemaxaneto jopa. Menianē avajubua tsaponae. Ira bubuta. Ayaijovibo bitso bubujai pijabojavaberena. Pijabo nexata toxuabayatsi. Pepacuene baja nexata bomi abeje, jai Jesús mapacueniaje pijajivijavabelia.

<sup>28</sup>Itsa baja Jesús najumevereta petsutoyenepanajavata bajarapalivaisi petsipaebijava, pejumetaevitsi bitso jamatabēcuenenabenajaca. <sup>29</sup>Jesús pejumetaevitsi bitso jamatabēcuenenabenajaca tsipaji Jesús livaisi tsipaeba pinijijamatabēcuenene pexainenēcuenia. Apo tsipaebi pacuenia judíovi pecujarubivi tsipaebabiaba.

**Pacuenia Jesús jamatejemayaexana bajayajebi  
bitso peperabětsabanaenē yabara pelivaisi**

*(Mr 1.40-45; Lc 5.12-16)*

**8** <sup>2</sup>Itsa baja Jesús runaica petsutojumavetsica, jivi ayaibitsaētoxfaneto pēnaponatsi. <sup>2</sup>Nexata imoxoyotatsi bajayajebi bitso peperabětsabanaenē. Pitabarata pe-matabacabēta tonucatsi. Bitso peperabětsabanaenē jumaitsi Jesúsjavabelia:

—Jesús, cacaējēpa raja tanejamatejemayaexanaenexamē. Itsa jitsipame, nejamatejemayaexanare mapavitanevecuaje, jai bitso peperabětsabanaenē.

<sup>3</sup>Nexata Jesús pecobeta perabějajalia bitso peperabětsabanaenē. Jesús jumaitsi bajaraponējavabelia:

—Jājā, jitsipajē cajena. Jamatejemamē rabaja, jai Jesús bajayajebi bitso peperabětsabanaenējavabelia.

Bajarapacuenia Jesús pejumaitsijavata peperabětsabanaenēmi baja peraběxanepananajereca. <sup>4</sup>Nexata icatsia Jesús jumaitsi bajaraponējavabelia:

—Nejumetaema. Pětsa tsipaebame itsajivijavabelia ata tacajamatejemayaexanaejava. Naitajětsiaremelia jane sacerdotenējavabelia, templobota penacuenebinējavabelia. Nexata jivi yapētaena pepacuene baja pecavecuaaajibijava niavitanejavami. Diosonexa rajuremelia ofrenda sacerdotenējavabelia pecavecuaaajibiaexanaexae niavitanejavami. Bajara tsipaji pacuenia bajayata vajasalinainēmi Moiséspijinē nacaitoroba. Nexata sacerdotenē cataena pecavecuaaajibijava baja niavitanejavami, jai Jesús bajaraponējavabelia.

**Pacuenia vajabitsaē pijacapitán pijabota petonacuenebaponaponenětsi,  
Jesús tojamatejemayaexana yabara pelivaisi**

*(Lc 7.1-10)*

<sup>5</sup>Itsa baja Jesús pata Capernaum tomarabelia, Romano nacuapijivajabitsaēvi pijacapitán Jesús imoxoyorenatsi pevajětsinexatsi. <sup>6</sup>Vajabitsaēvi pijacapitán bitso ayaicuenia vajēta Jesúsjavabelia. Jumaitsi:

—Petuxanenē, tajajivitonē raja tajabota camata boboca. Bitso cuenabatsi. Pini-jicuenia navixaetaeyabiaba, jai.

<sup>7</sup>Nexata Jesús jumaitsi capitánjavabelia:

—Xanē ponaenajē nijaboyabelia. Nexata catojamatejemayaexanaenatsi nijajivitonē, jai Jesús.

<sup>8</sup>Nexata capitán jumaitsi Jesúsjavabelia:

—Petuxanenë, xanë raja bitso beveliajamatabëcuenenënë xamëvecua. Nexata apo xanepanae tsipae nejonejava tajaboyabelia. Nexata saya maveliaje ënijume itorobare. Nexata tajajivitonë netojamatejema tsane. <sup>9</sup>Xanë ata xainajë taneitorobabi-abivi taneitorobicuena tajumecovënëtabiabinexa. Xanë ata juya xainajë vajabitsaëvi tajajivi taitorobicuena tanetoexanabiabinexa. Nexata itsa itorobajë caenë vajabitsaënë peponaenexa, bajaraponë ponabiaba. Itsa junarenajë itsanë vajabitsaënë pepatsinexa xanëjavaberena, bajaraponë patabiabarena. Itsa itorobajë tajajivitonë tanetoexanaenexa itsacuenejavayo, nexata netoexanabiaba. Bajara pijinja pacuenia xamë ata nexanaenexa cacaëjëpa. Nexata saya maveliaje ënijume itorobare saya ënijumeta tajajivitonë tanetojamatejemayaexanaenexamë, jai capitán Jesúsjavabelia.

<sup>10</sup> Jesús itsa jumetane bajarapacuenia capitán pejumaitsijavatsi, nexata Jesús jamatabëcuenenabenajaca. Nexata Jesús jumaitsi pepënaponaevitsijavabelia:

—Xaniajanë pacuenia pacatsipaebijitsiatsi. Israel nacuapijivi nejumecovënëtsi ata, itsiata caeto ata apo caxitajarabaxuabinë xanëjavaberena bitso tanesivanajamatabëcuenecopatsinë pacuenia mapacapitán nesivajamatabëcuenecopatsiaya jumaitsije. <sup>11</sup>Nexata pacatsipaebatsi paneyapëtaenexa. Apo judíovi ata raja, ayaibitsaëtoxanetonë daxitanacuanëpijivi, Dioso jumecovënëtsiana. Nexata apo judíovi ata capanepaenatsi Dioso pijanacuayabetsia. Nexata bajarapamonae Dioso pijanacuatsia, Abrahampijinë yajava, nabaniana. Isaacpijinë ata, Jacobpijinë ata yajava, nabaniana. <sup>12</sup>Itsiata baitsi jane judíovi, pamona picani Dioso athëbë-tatsia toxaniavaetatsi peyjavajinavanapaenexatsi, bajarapamonae caranata apo jumecovënëtsi Dioso. Nexata bajarapamonae infiernojavabelia Dioso xuabianatsi. Bajarajota nuena. Navonosiniana bitso penavixaetaexae, jai Jesús mapacueniaje pepënaponaevitsijavabelia.

<sup>13</sup> Nexata icatsia Jesús jumaitsi capitánjavabelia:

—Ponare baja nijaboyabelia. Catoexanatsi rabaja pacuenia xanëjavaberena nesivanajamatabëcopsiaya jumaitsimë tacatoexanaenexa, jai Jesús capitánjavabelia.

Nexata bajarapaepatota capitán pijabotalia pijajivitonë baja tojamatejematsi.

**Pacuenia Simón Pedro pijava pena Jesús  
tojamatejemayaexana yabara pelivaisi**

*(Mr 1.29-31; Lc 4.38-39)*

<sup>14</sup> Jesús pona Pedro pijaboyabelia. Nexata Pedro pijabota Jesús taeyabuata Pedro pijava pena peromaebanucaejavatsi camata. <sup>15</sup>Nexata Jesús cobejayata peromaebanucaevatsi. Jesús pecobejayatsijavata, bajarapova vecuajibitsireca baja domae. Nexata baja bajarapova jamatejema. Jesús bana pexaejava bajarapova toexanatsi.

**Pacuenia ayaibitsaëto jivi, piavitanevi,  
Jesús jamatejemayaexana yabara pelivaisi**

*(Mr 1.32-34; Lc 4.40-41)*

<sup>16</sup> Itsa baja ajena meravitsia, Jesúsjavaberena tocapatatsi ayaibitsaëto dovathi peyjavajinavanapaevi. Caejumeta saya Jesús caecuenia dovathi vecuacapitsapa bajarapamonae. Bajarajota jamatejemayaexananua daxita piavitanevi. <sup>17</sup> Bajarapacuenia Jesús itsa exana, copiapata jane baja pacuenia Jesús yabara bajayata Dioso jumepaebinëmi profeta Isaiaspjinë tajëvelia vajunupaeba. Profeta Isaiaspjinë ba-

jayata tajëvelia jumaitsi mapacueniaje: “Bajaraponë nacavecuajibiaexanaena va-  
jaavitanejavami,” jai bajayata tajëvelia Isafaspijinë Jesús yabara.

**Pacuenia picani Jesús jamatabëpënaponatsi itsamonae yabara pelivaisi**

(Lc 9.57-62)

<sup>18</sup> Nexata Jesús itsa tane jivi ayailbitsaëto pematatoyoronaejavatsi, pijajivi junata  
pepënoxuabinexatsi pucaxaneto itsapanabelia. <sup>19</sup> Nexata bajarapaepatota judíovi  
pecujarubinë Jesús imoxoyorenatsi. Judíovi pecujarubinë jumaitsi Jesúsjavabelia:

—Petuxanenë, itsabelia poname, capënaponaenatsi cajena, jai.

<sup>20</sup> Nexata Jesús jumaitsi judíovi pecujarubinëjavabelia:

—Itsa nepënaponaejitsipame, apo napatabibimë tsipae tajabota nenacuer-  
aevetabiabinexa. Tsipaji tajabo apo xainaenë. Namopi jamëthëanë xaina pepatabi-  
abinexa pemajitabiabinexa. Baratsui ata pematapenanë xaina. Itsiata baitsi jane  
xanë, Daxitajivi Pematapijinënë, itsajavabelia ata apo xainaenë itsajota nacuer-  
aevetabiabijitsianë, jai Jesús judíovi pecujarubinëjavabelia.

<sup>21</sup> Nexata Jesús pijajiviyajuvënëne jumaitsi Jesúsjavabelia:

—Tajatuxanenë, caepatoyo abaxë necopare tamëthësinexa taxa petëpaenë, jai.

<sup>22</sup> Jesús nexata jumaitsi pijajivitonëjavabelia:

—Naxanitsia. Nepënaponare. Copare matakabi apo peverevereaejava  
apo pexainaevinexa pemëthëcaenexatsi nijamonaemi itsa tëpa, jai Jesús  
pijajivitonëjavabelia.

**Pacuenia Jesús itaveta joviboxaneto, malataca  
yajava, piayajjavami yabara pelivaisi**

(Mr 4.35-41; Lc 8.22-25)

<sup>23</sup> Jesús, pijajivi yajava, runa jera ënëabereca. Nexata Jesús pijajivi jerata yaja-  
vanajetaruca pucajava. <sup>24</sup> Nexata jemata pinijijoviboxaneto najetaruca. Malatacax-  
anetonë bitso ayai. Nexata malataca jera ënëaberena mera epabajarabapona. Itsiata  
Jesús jamatejema majitanuca. <sup>25</sup> Nexata Jesús pijajivi yaitavabatsi pemajitanucaenë.  
Jesús pijajivi jumaitsi:

—¡Patajatuxanenë, panecapanepare! ¡Vaxaitsimi rabaja yaothopaenatsi! jai Jesús  
pijajivi.

<sup>26</sup> Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso pa-  
pecaevetsijava? jai Jesús pijajivijavabelia.

Nexata Jesús namatacotapuna. Pinijijumeta itavetaxuaba jovibo, malataca ya-  
java. Nexata baja daxita puca vainae ecaxuaba. <sup>27</sup> Nexata Jesús pijajivi itsa tane  
bajaraxua, jamatabëcuenenabenajaca. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Jumecovënëtatsi  
baja rovia maponëje! ¡Nexata baja jovibo, malataca yajava, ajibi tsaxuabi! najai  
Jesús pijajivi.

**Pacuenia Gadara tomarapijinēbeje, dovathivi peyajavaponaponaenēbeje,  
Jesús vecuacapsapa Gerasa nacuata yabara pelivaisi**

*(Mr 5.1-20; Lc 8.26-39)*

<sup>28</sup> Jesús pijajivi barēpata pucaxaneto itsapanabelia, Gerasa nacuayabelia. Jesús itsa pata Gerasa nacuata, Gadara tomarapijinēmibeje pitsaparenabeje jivimēthēanējavaverena. Imoxoyorenatsibeje Jesús. Bajaraponēbeje dovathivi peyajavaponaponaenēbeje. Bitso anaepanabiababeje. Nexata itsajivi ata apo ponabiabi bajaraxuayo perucaenamutojava. <sup>29</sup> Nexata dovathivi peyajavaponaponaenēbeje vavajaiibeje.

—Jesús, Dioso pexēnatomē, ¿detsa xua namatavenoname paxanēbejejavaberena? ¿Dioso tsaja daxitajivi penaconitsia exanaematacabinexavajēnaeya patame patanenaneconitsiaexanaenexamēbeje? jaiibeje Jesúsjavabelia dovathivi peyajavaponaponaenēbeje.

<sup>30</sup> Nexata bajarajota, imoxoyo petsutojavata, marranobitsaētoxfaneto xaevanapa.

<sup>31</sup> Nexata dovathivi bitso vajēca Jesúsjavabelia. Jumaitsi:

—Itsa panexuabijitsiamē maçonēbejevecuaje, panetocopare patajonenexa marranobitsaētoxfanetojavabelia, jai.

<sup>32</sup> Nexata Jesús jumaitsi dovathivijavabelia:

—Paponare baja panejonenexa marranobitsaētoxfanetojavabelia, jai.

Nexata bajaraponēbeje dovathivi vecuapitsapatsibeje. Nexata baja marranobitsaētoxfanetojavabelia junua dovathivi. Nexata daxita bajara pamarranobitsaētoxfanetomi cujinaeyeca. Pucaxaneto itapajanituareca othopareca. Bajarajota daxita marranobitsaētoxfanetomi meneta bubuna.

<sup>33</sup> Bajara pamarranobitsaētoxfanetomi pevetavanapaevi, rēcēpeca. Itsa bajarapamonae Gadara tomarabelia pata, tsipaeba pacuenia tane. Tsipaebanua pacuenia Jesús dovathivi vecuacapsapa dovathivi peyajavaponaponaenēbeje. <sup>34</sup> Nexata daxita bajarapatomarapijivi ponarena Jesúsjavaberena. Nexata itsa tanetsi Jesús, daxita bajarapamonae jumaitsi Jesúsjavabelia:

—Pexaniacuene pacavajētatsi. Ponare baja patajanacuavecuca, jai bajarapamonae Jesúsjavabelia tsipaji cjunavatsi.

**Pacuenia Jesús jamatejemayaexana petabusipacuenabinētsi yabara pelivaisi**

*(Mr 2.1-12; Lc 5.17-26)*

**9** Jesús runareca jera ēnēabereca. Nicabilia puca itsapanabelia. Pata nexata pijatomarabelia. <sup>2</sup> Bajarajota Jesús tocapatatsi petabusipacuenabinētsi. Pacamayota bocabiaba, yavētacarapatatsi. Jesús jamatabēcueneyapētane pacuenia sivanajamatabēxainatsi petocapatsivitsi. “Nacatojamatejemayaexanaenatsi cajena,” pesivajamatabējaijavatsi Jesús jamatabēcueneyapētane. Bajaraxuata petabusipacuenebinētsijavabelia Jesús jumaitsi mapacueniaje:

—Tajabananē, jamatabēcuenēbarēyamēre. Pibisiacuene rabaja nexanaeconimi cavecuajibiaexanatsi, jai Jesús petabusipacuenabinētsijavabelia.

<sup>3</sup> Nexata judíovi pecujarubivi itsa jumetaeyena bajarapacuenia Jesús pejumaitsi-  
java, najamatabēxainena.

—Maçonē Jesúsje Dioso apo pejitsipaecuenia cuaicuaijai, jamatabējai tsenae judíovi pecujarubivi Jesús yabara.

<sup>4</sup> Jesús jamatabëcueneyapëtane judíovi pecujarubivi bajarapacuenia pesivanajamatabëxainaejavatsi. Nexata Jesús jumaitsi judíovi pecujarubivijavabelia:

—Panesivanajamatabëxainame xanëjavaberena pibisiajamatabëcuene. <sup>5</sup> Paxamë apo pacacaejëpae ata itsajivi pibisiacuene pexanaeconi panevecuaajibiaexanaenexa, pacacaejëpa picani saya jema panejumaitsinexa petabusipacuenebinëtsijavabelia mapacueniaje: “Cavecuaajibiaexanatsi rabaja pibisiacuene nexanaeconi,” panejainexa. Tsipaji itsajivi ata apo yapëtae tsipae saya jema panejumait-sijava. Itsiata baitsi jane itsa apo pacacaejëpae panejatejemayaexanaenexa petabusipacuenebinëtsi, acuenebi panejumaitsinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacaëjëpaecuene panejatejemayaexanaenexa, jai nexata Jesús judíovi pecujarubivijavabelia.

<sup>6</sup> Icatsia Jesús jumaitsi judíovi pecujarubivijavabelia:

—Xanë Daxitajivi Pematapijinënë, mapanacuata necaëjëpa tavecuaajibiaexanaenexa itsajivi pibisiacuene pexanaeconi ata pacuenia baja exanajë maponëjavabeliaje. Nexata patanecueneyapëtaenexamë tanecaëjëpaecuene tavecuaajibiaexanaenexa itsajivi pibisiacuene pexanaeconi ata, pataema pacuenia jamatejemayaexanaejitsianë maponëje, jai Jesús judíovi pecujarubivijavabelia.

Nexata icatsia Jesús jumaitsi petabusipacuenabinëtsijavabelia:

—Nonotapunare baja. Nijacamayo pire. Nijaboyabelia baja ponare, jai Jesús.

<sup>7</sup> Nexata bajarapacuenia Jesús pejumaitsijavata, petabusipacuenabinëmitsi nonotapuna. Pijaboyabelia baja pona. <sup>8</sup> Nexata jivi itsa tane bajaraxua, junava cajena bitso. Nexata bajarapamonae jumaitsi Diosojavabelia:

—Diosomë, bitso ayaijamatabëcuenenëmë. Tsipaji jivi caëjëpaeyaexaname pini-jicuene pexanaenexa, jai.

### **Pacuenia Jesús pijajivitonënexa junata Mateo yabara pelivaisi**

*(Mr 2.13-17; Lc 5.27-32)*

<sup>9</sup> Jesús baja vecuapona itsajota jamatejemayaexana petabusipacuenabinëtsi. Nexata Jesús penajetarucavejavata taeyeta Mateo. Mateo gobierno pejamatabëcuene impuestomatamo pematamoyanijobabiabinë. Pabota jivijavabelia Mateo impuestomatamo matamoyanijobabiaba, bajarapabota eca Mateo. Nexata Jesús jumaitsi Mateojavabelia:

—Mateo, nepënaponare, jai.

Jejai Mateo. Nexata nonotapuna. Mateo baja napona Jesús pepëta.

<sup>10</sup> Nexata Mateo junata Jesús pebarënaninexa pijabota. Nexata Mateo pijabota Jesús pexaejava naxane. Mateo pijabota naena ayabitsaëto gobierno pejamatabëcuene jivijavabelia impuestomatamo petomatamoyanijobivi. Itsamonae ata nanabane, pijamatabëcuenebejevi. Jesús pijajivi nayajavaeca bajarapamesajavata.

<sup>11</sup> Nexata fariseovi itsa tane bajarapacuenia, jamatabëcuenenavëxaniabiaya jumaitsi Jesús pijajivijavabelia:

—Papecacujarubinë rabaja Jesús naneconita Diosojavabelia. Tsipaji gobierno pejamatabëcueneta impuestomatamo pematamoyanijobabiabivijavata, pijamatabëcuenebejevijavatanua, naxaeyeca pexaejava, jai fariseovi Jesús pijajivijavabelia.

<sup>12</sup> Jesús nexata jumetaeyeca bajarapacuenia fariseovi pejumaitsijava. Nexata Jesús jumaiti fariseovijavabelia:

—Pevaëbinë raja apo vaëbi pejamatabëjemavi. Pevaëbinë raja piavitanevi vaëba. Bajara pijinia xanë ata itsinë. Sivapatajopajë tajunatsinexa pibisiajamatabëcuenevi pecapanepaenexatsi Diosojavabelia. <sup>13</sup> Paponare. Palebianame Dioso pejumelivaisibaxuto. Nexata payapëtaename pajamatabëcuene yabara jumaiti Dioso pejumelivaisibaxutota mapacueniaje: “Jitsipajë paneitaxutotsoniataejava itsamonae. Apo jitsipaenë saya patanetobeyabiabijavamë dajubicuene ofrendacuenia patanerajutabiabinxamë,” jai Dioso pejumelivaisibaxutota. Xanë raja apo sivapatajopaenë tajunatsinexa pamonaë baja aneonijibi tsavanapae. Biji rajane sivapatajopajë tajunatsinexa pijaneconi pexainaevi. Junataponajë bajarapamonae pecopabinexa pibisiacuene pexanaejava penajamatabëcuenepeñeyorotsinexa Diosojavabelia, jai Jesús fariseovijavabelia.

**Pacuenia Jesús yanijobatsi pamatacabibeje jivi vajëtapona  
Diosojavabelia pexaejava apo pexaeyabiabixae yabara pelivaisi**

*(Mr 2.18-22; Lc 5.33-39)*

<sup>14</sup> Juan pijajivi Jesús imoxoyorenatsi. Nexata Juan pijajivi jumaiti Jesúsjavabelia mapacueniaje:

—Petuxanenë, paxanë pataxaejava apo paxaeyabiabinë pamatacabibeje pava-jëtaponajë Diosojavabelia. Bajara pijinia itsi fariseovi ata pamatacabibeje vajëtapona Diosojavabelia. Pexaejava apo xaeabiabi. ¿Detsa xuajitsia xamë nijajivi pamatacabibeje vajëtapona Diosojavabelia pexaejava xaeabiaba? jai Juan pijajivi Jesúsjavabelia.

<sup>15</sup> Nexata Jesús jumaiti Juan pijajivijavabelia:

—Pamonae junatatsi penacasabifiestajavabelia penanabaninexa, apo atsobi pexaejava itsa abaxë yajavaecatsi pejananacasabinë. Itsiata baitsi jane pejananacasabinë itsa tsimaxëpatsipatsi pevecuacaponaeenexatsi itsajavabelia, nexata bajarapamonae pexaejava apo xae tsipae. Tsipaji bitso najamatabëxainaejitsipa pevecuacaponaeaxetsi. Bajara pijinia itsi tajajivi ata. Tayajavaponaponaepato abaxë apo atsobabiabi pexaejava pamatacabibeje Diosojavabelia vajëtapona. Itsiata pamatacabi xanë necaponaena bajarapamonaevacqua, nexata jane baja bajarapamatcabi pexaejava apo xae tsane bitso tanesivanajamatabëxainaeaxae, jai Jesús Juan pijajivijavabelia.

<sup>16</sup> Nexata Juan pijajivi perujamatabëcuene baja penavecuacopatsinexa, Jesús livaisi tsipaeba comparacióncuenia, Juan pijajivi pejumecovënëtsinexa ëpejanalivaisi, Jesús petsipaëbillivaisi. Juan pijajivi anijajamatabëcuenebeje pexainaeyaniva, perujamatabëcuene baja pecopabinexa, Jesús livaisi tsipaeba comparacióncuenia. Perujamatabëcuene yabara Jesús jumaiti Juan pijajivijavabelia mapacueniaje:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapana yanarobotsipa perujuesetojavaverena. Nexata biji bitso pinijivojoto titinaejitsipa. <sup>17</sup> Itsajivi ata pijinia apo epacae pejanavinoranë perujubocodorianëjavabelia bajayajebi peyajebinexa. Pejanavinoranë itsa epacaejitsipa perujubocodorianëjavabelia, nexata pejanavinoranë yatititibia tsipae. Tsipaji perujubocodorianë apo yanayeretsi tsipae. Tsipaji pejanavinoranë pejumalitsëxë abaxë xaina. Nexata itsa yatititibia tsipae,

naxuabijitsipa vinoranëmi. Bjaraxuata bepaca pejanavinoranë pejanabocodoruanëjavabelia. Nexata vinoranë peyaxanepanaenexa bajayajebi ata pejanabocodoronëta, jai Jesús Juan pijajivijavabelia.

Bjarapacuenia Jesús jumaitsi Juan pijajivi pejumecovënëtsinexa ëpejanalivaisi, Jesús petsipaebilivaisi, perujujamatabëcuene baja pecopabinexa.

**Pacuenia Jesús copiaya namutoepatota jamatejemayaexana  
piavitaneva, pacuenia icatsia cotocaevi toasaëyaexana  
Jairo pexënatovayo, petëpaevayomi, yabara pelivaisi**

*(Mr 5.21-43; Lc 8.40-56)*

<sup>18</sup> Jesús livaisi petsipaebanucaejavata Juan pijajivijavabelia, judíovi penacaetuatabiabibo pevetsinë parena Jesúsjavaberena. Nexata bajaraponë Jesús pitabarata yayataeya pematocabëta nucajunua. Jumaitsi Jesúsjavabelia:

—Taxënatovayo rabaja aeconoxae netotëpa. Itsiata baitsi jane itsa poname tabajoyabelia, nexata itsa netoperabëjyatsianame necobeta, icatsia netoasaë tsane, jai bajaraponë Jesúsjavabelia.

<sup>19</sup> Nexata Jesús nonotapuna. Judíovi penacaetuatabiabibo pevetsinë pepëta Jesús, pijajivi yajava, napona. <sup>20</sup> Nexata Jesús namutua penajetarucaejavata, pepënevërena imoxoyotatsi petiriva, piavitaneva. Bjarapova pijanacuene pecapunaecuji-naetsi doce baja pavaibeje xaina. Nexata bajarapova Jesús pepënevëvelia ponataba, jivibitsaëtoxaneto tuatujëjavalialia. Nexata bajarapova tojayataba Jesús penaxatatsijavacopia. <sup>21</sup> Bjarapacuenia tojayataba Jesús penaxatatsijavacopia tsipaji bajarapova jamatabëjumaitsi mapacueniaje:

—Itsa tojayatabianajë Jesús penaxatatsijavacopia, nexata tavitanejavami nevecuaajibi tsane, jamatabëjai bajarapova.

<sup>22</sup> Nexata Jesús napënyorotaxuaba. Taenuta bajarapova. Nexata Jesús jumaitsi bajarapovajavabelia:

—Jamatabëcuenebarëyamëre. Xamë nesivajamatabëjumaitsimë: “Itsa tojayatabianajë Jesús penaxatatsijava, nexata tavitanejavami nevecuaajibi tsane,” nesivajamatabëjamë. Bjaraxuata jamatejemamë baja, jai Jesús bajarapovajavabelia.

Bjarapacuenia Jesús pejumaitsijavata bajarapova jamatejema baja. <sup>23</sup> Bjaraxuacujinae Jesús jane baja pata judíovi penacaetuatabiabibo pevetsinë pijaboyabelia. Nexata Jesús itsa pata, tane pevajënae pepatsivi, flauta piobivinexa itsabelia caponaejitsia petëpaevayo pemëthëtsinexa piobinexa. Tanenua jivi bitso pinijicuenia pe-matanueyabavanapaejava petëpaevayo.

<sup>24</sup> Nexata Jesús jumaitsi bajarapamonaejavabelia:

—Papitsapare mapabovecuaje. Pejanava raja apo tëpae. Saya raja majita, jai Jesús tsipaji yapëtane Jesús piasaëyaexanaejavanexa bajarapovayo.

Nexata saya bajarapamonae Jesús jumecapocaponatsi bajarapacuenia pejumaitsijava. <sup>25</sup> Jesús nexata bajarapamonae bovecua pitsapaeyaexana. Nexata itsaxuayolia petëpaevayo boca, Jesús joneya. Cobepita petëpaevayo. Bjarapovayo baja namatacota. <sup>26</sup> Nexata daxita bajarapanacuapijivi Jesús vënëlivaisitanetsi piasaëyaexanaejava petëpaevayomi.

**Pacuenia Jesús itaxutoxaniavaeta bitso  
pitaxutotsēcēnaenēmibeje yabara pelivaisi**

<sup>27</sup> Itsa baja Jesús pona judíovi penacaetuatabiabibo pevetsinē pijabovecua, anijanēbeje bitso pitaxutotsēcēnaenēbeje Jesús pēnaponatsi. Bajaraponēbeje vavajaiya jumai tsaponaebeje Jesúsjavabelia:

—¡Jesús, Davidpijinē pemomo, paneitaxutotsoniataemabeje! jaibeje tsaponae Jesúsjavabelia.

<sup>28</sup> Itsa baja Jesús joneya pabojavabelia pona, nexata bajaraponēbeje pēnajoneyat-sibeje. Nexata Jesús bajarajota jumaitsi bajaraponēbejejavabelia:

—¿Payapētanemebeje tsaja tanecājēpaeucene patacaitaxutoxanepanaeya exanaejavanexabeje? jai Jesús bitso pitaxutotsēcēnaenēbejejavabelia.

Nexata bitso pitaxutotsēcēnaenēbeje jumaitsiibeje Jesúsjavabelia:

—Jājā, payapētanijibeje cajena, jaibeje.

<sup>29</sup> Nexata Jesús itaxutojayata bitso pitaxutotsēcēnaenēbeje. Jesús jumaitsi bitso pitaxutotsēcēnaenēbejejavabelia:

—Pacuenia baja xanējavaberena nesivanajamatabēcuenecopatsiaya panesivana-jamatabēxainamebeje patacaitaxutoxaniavaetsinexabeje, bajarapacuenia pacatoex-anatsibeje, jai Jesús.

<sup>30</sup> Nexata bitso pitaxutotsēcēnaenēmibeje itaxutoxanepanabeje baja. Bajaraxuacujinae Jesús asaēya jumeitaveta bajaraponēbeje. Jumaitsi:

—Pētsa panavajunupaebamebeje itsamonaejavabelia patacaitaxutoxaniavaetsi-javabeje, jai Jesús.

<sup>31</sup> Itsiata saya ajena bajarapabovecua pitsapaliabeje, navajunupaebaponabeje. Pacuenia Jesús itaxutoxaniavaetatsibeje, navajunupaebaponabeje daxita bajarapanacuajava.

**Pacuenia Jesús natsipaebiaexana apo pecuaicuaijainēmi yabara pelivaisi**

<sup>32</sup> Itsa baja bovecua pitsapabeje ponēbeje Jesús itaxutoxanepanaeyaexana, bitso pitaxutotsēcēnaenēmibeje, nexata icatsia itsamonae Jesús tocaparenatsi apo pecuaicuaijainē. Bajaraponē dovathi peyajavaponaponenē. <sup>33</sup> Nexata apo pecuaicuaijainē Jesús dovathi itsa vecuacapitsapa, cuaicuaijai baja xaniavaetsia. Nexata petaevitsi bitso jamatabēcuenenabenajaca. Najumaitsi bajarapamonae:

—Caeto ata cajena Israel nacuata itsajivi ata apo tae mapitsicueneye, najai bajarapamonae.

<sup>34</sup> Itsiata baitsi jane fariseovi jamatabēcuenenavēxaniabiaya jumaitsi Jesús yabara:

—Mara ponēje dovathi jivivecua capitsapabiaba dovathivi pepo penamata-caitorobinē pesaēta, jai fariseovi Jesús yabara.

**Pacuenia Jesús itaxutotsoniatane jivi yabara pelivaisi**

<sup>35</sup> Jesús najetaruca daxita tomaranējava, tsiqiritomaraxijava ata. Nexata bajarapatomaranējava judíovi penacaetuatabiabibonējava pexanialivaisi Jesús jivi tsi-paebanajetaruca. Tsipaebanajetaruca daxita Dioso pijajivi pevetsijavanexa. Piavitanevi ata Jesús jamatejemayaexanapona, daxitaviriavitane pexainaevimi. <sup>36</sup> Jesús jivi itsa tane, itaxutobejobiatane. Tsipaji jivi bitso baja cajena cuerana. Apo caējē-



paetsinua jivi penatoexanaenexa itsacueneyavayo ata. Jesús jivi sivajamatabëjumaitsi mapacueniaje:

—Pacuenia itsi ovejabitsaëtoخانeto itsa toajibitsi pevetsinëtsi, bajara itsi mapamonaeje, sivajamatabëjai Jesús.

<sup>37</sup> Nexata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pabita peubijava penaveretsijava abaxë bitso ayaijava sajina penotsinexa. Tsipaji saya caejiviyobeje penotsivi. Bajara pijinia itsi jivi ata Diosojavabelia penajamatabëcopabivinexa. Abaxë sajina ayaibitsaëtoخانeto. Itsiata baitsi jane Dioso panetonacuenebivi pacaejiviyomëbeje saya. <sup>38</sup> Bajaraxuata Diosojavabelia pavajëcabiabare icatsia itsamonae Dioso pijajivi pitorobinexa papecayavenonaenexa, jai Jesús pijajivijavabelia.

**Pacuenia Jesús pijajivi ayaibitsaëtoخانetoyajuvënëvi itapeta  
saya doce ponëbeje apóstolevinexa yabara pelivaisi**

*(Mr 3.13-19; Lc 6.12-16)*

**10** Jesús pijajivi ayaibitsaëtoخانetoyajuvënëvi junata saya doce ponëbeje Jesús pebarënacaetuatsinexa. Jesús pijajivi pecaëjëpaejamatabëcuenetsi jamatabëcuenecaëjëpaeyaexana dovathi peyajavajinavanapaevi pevecuacapitsapaponaenexa, pejamatejemayaexanaponaenexanua daxitaviriavitane pecapunaevitsi.

<sup>2</sup> Mara doce ponëbeje Jesús pijajivi, apóstolevi, pevënëanëje. Itsanë pevënë Simón. Itsavënë bajaraponë Pedro. Itsanë pevënë Andrés, Simón pejuyapijinë. Itsanëbeje pijinia Santiagobeje Juanbeje nacaebananëbeje, Zebedeo pexënatobeje.

<sup>3</sup> Itsanë pevënë Felipe. Itsanë Bartolomé. Itsanë Tomás. Itsanë Mateo, impuestomatamo gobierno pejamatabëcuene jivijavabelia petomatamoyanijobinëmi. Itsanë pevënë Santiago, Alfeo pexënato. Itsanë pevënë Lebeo. Bajaraponë itsavënë Tadeo.

<sup>4</sup> Itsanë Simón, celotenë. Itsanë pevënë Judas Iscariote. Bajaraponë bexëajavabelia canajetsijitsiatsi Jesús pijavajabitsaë pecobeyabelia pebeyaxuabinexatsi.

**Pacuenia Jesús pijajivi itoroba Dioso pitorobilivaisi jivi  
petsipaebanajetarubenaenexa yabara pelivaisi**

*(Mr 6.7-13; Lc 9.1-6)*

<sup>5</sup> Jesús pijajivi pitorobivajënaeya jumaitsi pijajivijavabelia mapacueniaje:

—Pëtsa paponame apo judíovi pijanacuayabelia. Pëtsa paponame Samaria nacuata penaetomaranëjavabelia ata. <sup>6</sup> Paponare jane Israel nacuapijivijavabelia. Pacuenia ovejabitsaëtoخانeto pevetsinëtsi vecuanaxuabavanapa, bajara pijinia pacuenia Israel nacuapijivi Diosovecua naxuabavanapa. <sup>7</sup> Patsipaebanajetarubenaename bajarapamonae imoxoyo baja pevajënae pecopiapatsijavanexa Dioso pijajivi pevetsimatacabinexa. <sup>8</sup> Pajamatejemayaexanaponaenename piavitanevi. Pasaëyaexanaponaenamenua petëpaevimi ata. Pajamatejemayaexanaponaenamenua bajayajebi bitso peperabëtsabanaevi. Pavecuacapitsapaponaenamenua dovathi peyajavajinavanapaevi. Amoneya raja pacacaëjëpaeyaexanatsi bajarapacuenia paneexanaponaenexa. Bajaraxuata amoneya jivi pajamatejemayaexanaponaenename. Pëtsa pamatamoyanijobame panejamatejemaya exanaejamatabëcuene, jai Jesús pijajivijavabelia pitorobivajënaeya.

<sup>9</sup> Jesús icatsia jumaitsi pijajivijavabelia pitorobivajënaeya:

—Panijanamutonexa pëtsa pacaponame palata. <sup>10</sup>Pëtsa pacaponame panijadoro ata. Saya pajumaponaename caenaxatatsi. Panenataxuxatatsijava ata, pataxunaponaeename caejava. Naeboyo ata pëtsa pacaponame. Pamonaejavabelia livaisi patsipaebianame, pacarajutsiana panexaejava. Bajarapacuenia pacarajutsiana tsipaji pajivi xaniavaetsia itsanëjavabelia tonacueneba, bajarapajivi juya pexaejava barajutatsi.

<sup>11</sup>Itsa papatabiabianame pinijitomarata, tsiquiritomarayojavata ata, bajara-jota pajaitabiabianame ponë peyaiyataenëtsi. Nexata bajaraponë pijabota pamajitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponaeename, bajarapabovecua papitsapaename. <sup>12</sup>Itsa pabota papatsijitsiamë, ajena pajonejitsiamëlia, pajumaitsimë tsabiabi tsane: “Diosojavabelia raja pacatovajëtsijitsiatsi xaniavaetsia panejinavanapaenexa,” pajamë tsabiabi tsane. <sup>13</sup>Itsa bajarapabopijivi pacacopiapitsiana xaniavaetsia, nexata pacuenia Diosojavabelia patovajëtime, yavenonaenatsi Dioso. Itsiata baitsi jane itsa apo pacacopiapitsi tsane xaniavaetsia, nexata pëtsa patovajëtime Diosojavabelia peyavenonaenexatsi. <sup>14</sup>Itsa apo pacacopiapitsi tsane, itsa apo jitsipauenua tsane papecanamuxunaevetsinexa panetsipaebilivaisi, bajarapabo pavecuaponaename. Bajarapatomara ata baja pavecuaponaename. Nexata baja itsa paponaejitsiamë bajarapatomaravecua, paneponaevajënae, bajarapatomarata panataxuatsapërëvarëbianame. Bajarapacuenia itsa panataxuatsapërëvarëbianame, bajarapatomarapijivi yapëtaena Diosojavabelia penaneconitsicuene apo papecacopiapitsixae papecanamuxunaevetsinexa panetsipaebilivaisi. <sup>15</sup>Xaniajanë pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainaevi, bajarapamatacabi Dioso ayaicuenia naneconitsiaexanaenatsi patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodoma tomarapijivimi, Gomorra tomarapijivimi ata, bajarapaneconivajëto mata-toxenetsia itsamatacabi Dioso naneconitsiaexanaena patomarapijivi apo pacacopiapitsi tsane, jai Jesús pijajivijavabelia pitorobivajënaeya.

### **Pacuenia Jesús pijajivi bejiobiaexanaejitsiatsi yabara pelivaisi**

<sup>16</sup>Icatsia Jesús jumaitsi pijajivijavabelia:

—¡Xania panayajivitaename! Pacaitorobianatsi raja bitso pibisiacuene pexanabiabivijavabelia. Pacuenia ovejaxi tsiayaitsi itsa jinavanapa pianaeponaevi nevëthë tuatuajëata, bajarapaitsimë tsane. Nexata pacuenia unupijivi nayajivitaeyajinavanapa pitsacueniabiyanivatsi, bajara paitsimë tsane. Pacuenia ata ucucu aneconijibia jinavanapa, bajara paitsimë tsavanapae tsane. <sup>17</sup>Xania baja tsane. Patajajivixaemë raja jivi pacaneconitsiana papecananeconitsiaexanaenexa. Nexata itsajota nacaetuatabiaba tomara pevetsivi, bajarabelia pacacaponaeena. Judíovi penacaetuatabiabibonëjava pacajumatitibabeyabiabiana penaneconitsivi pejumaconitabiabimacata. <sup>18</sup>Patajajivixaemë pacanubiananua nacuaevetsivi pitabarata, presidentevi pitabarata ata. Bajarajota nexata xanë talivaisi patsipaebianame bajarapamonaejavabelia, apo judíovi ata pitabarata. <sup>19</sup>Itsiata baitsi jane itsa pacanubiana nacuaevetsivi pitabarata, pëtsa pajamatabëbëjamë panenayajivicuaicuajainexa bajarapamonaejavabelia. Tsiipaji raja paepatota panayajivicuaicuajiamëjitsia, bajarapaepatota Dioso pejamatabëcueneta pacacuaicuajiaexanaena. <sup>20</sup>Itsa panayajivicuaicuajiamë tsane, paxamë panijacuata apo pacuaicuajiamë tsane. Espiritu Santo raja pacacuaicuajiaexanaena.

<sup>21</sup> Itsamonae pematapijivi, pejuyapijivi ata, canajetsiana nacuaevevsi vijavabelia pebeyaxuabinexatsi. Itsamonae nacoxicanajetsiana nacuaevevsi vijavabelia pebeyaxuabinexatsi. Itsamonae canajetsiana paxa, pena ata, nacuaevevsi vijavabelia pebeyaxuabinexatsi. <sup>22</sup> Daxita nacuapijivi pacaitoya tsane patajajivixaemē. Pajivi bejiobiaexanae atatsi tsane, itsiata itsa casaē tsaponaponae tsane tanejumecov-  
 ěnĕtsijava, bajarapajivi capanepaenatsi Dioso pijanacuayabetsia. <sup>23</sup> Itsa patomarata pacabejiobiaexanaena, bajarapatomaravecuā parĕcĕpecaename itsatomarabelia. Xaniajanĕ pacuenia pacatsipaebijitsiatsi. Daxita Israel nacuata penaetomaranĕjāva abaxĕ patsipaebiveretsinejevamĕ pexanialivaisi, xanĕ, Daxitajivi Pematapijinĕnĕ, itacarajeta icatsia patsianicajĕ.

<sup>24</sup> Itsajivi ata apo jamatabĕcuenematatoxenetsi pecujarubinĕtsi. Itsajivi ata pijinia itsanĕ itsa pijajivitonĕ, apo jamatabĕcuenematatoxenetsi pijatuxanenĕ. <sup>25</sup> Pacuenia pecujarubinĕ itsamonae copiaya bejiobiaexanatsi, bajarapacuenia icatsia bajaraponĕ pecujarubivi ata bejiobiaexanaenatsi. Pacuenia petuxanenĕ copiaya bejiobiaexanatsi, bajarapacuenia icatsia pijajivitonĕ ata cotocaevi bejiobiaexanaenatsi. Xanĕ panijatuxanenĕnĕ: “Beelzebú, daxita dovathivi pijatuxanenĕ,” nejai tsabiabi itsamonae. Nexata pijinia patajajivixaemĕ bitso pibisiavĕnĕta paxamĕ ata cotocaevi pacajunatabiabiana, jai Jesús pijajivijavabelia.

**Pacuenia Jesús pijajivi tsipaeba  
 pecujunaviyaniva pebeyaxuabijavatsi yabara pelivaisi**

*(Lc 12.2-7)*

<sup>26</sup> Icatsia Jesús jumaitsi pijajivijavabelia:

—Pĕtsa pacujunavame jivi, pacaatiobi ata. Daxita xua jivi muetsia pibisiacuenē exana, bexĕjavabelia cuenyapĕtaeponaenatsi daxitajivi. <sup>27</sup> Palivaisianĕ muetsia vajaepatojavata pacatsipaebaponatsi, bajarapalivaisianĕ paxamĕ pinijijumeta patsipaebaponaename jivi penacaetuatabijavata. <sup>28</sup> Pĕtsa pacujunavame jivibevi ata. Bajarapamonae pacabeyaxuabi ata tsipae, acuenēbi matavĕjĕa papecaitsacueni-  
 abinexa pepo panejamatabĕcuenejavabelia. Biji rajane pacujunavare Dioso, ponĕ caĕjĕpatsi papecaxuabinexa infiernojavabelia papecabeyaxuabicujinae.

<sup>29</sup> Anijanĕbeje baratsuitobeje namatamota saya caepalatanĕyo. Itsiata baitsi jane caenĕ ata baratsuito Dioso pepĕya jemata muetsia apo jopaetsica petĕpaenĕ. Tsipaji paneaxa, Dioso, asiva baratsui ata. <sup>30</sup> Dioso cajena bitso pacaasiva baratsui matatoxenetsia. Nexata panematanatoxi ata, caematanatoyo canacujitsia, Dioso namataĕjĕta. <sup>31</sup> Bajaraxuata pĕtsa pacujunavame itsacuenĕjavayo ata. Tsipaji paxamĕ Dioso bitso pacaasiva baratsuitoxi matatoxenetsia, jai Jesús pijajivijavabelia.

**Pacuenia Jesús pijajivi apo benayavajunuaxainae  
 Jesús pijajivicuene yabara pelivaisi**

*(Lc 12.8-9)*

<sup>32</sup> Icatsia Jesús jumaitsi pijajivijavabelia:

—Daxita pamonaē tajajivi, jivi pitabarata itsa navajunupaebiana tajajivicuene, xanĕ ata vajunupaebianajĕ bajarapamonae tajajivicuene taxa, athĕbĕtatsia peecaenĕjavabelia. <sup>33</sup> Pamonaē jumai tsane itsamonaejavabelia: “Xanĕ cajena Jesús apo pijajivitonĕnĕ,” jai tsane, nexata pijinia bajarapamonae yabara xanĕ jumaitsinĕ

tsane taxa Diosojavabelia: “Mara pamonaē apo tajajivije,” janē tsane, jai Jesús pijajivijavabelia.

**Pacuenia Jesús apo penajuajumecovēnētsixae, nacaemonae  
ata apo najamatabēcuenejēpae tsane yabara pelivaisi**

(Lc 12.51-53; 14.26-27)

<sup>34</sup>Icatsia Jesús jumaitsi pijajivijavabelia:

—Pētsa panesivajamatabējumaitsimē mapacueniaje: “Jesús rabaja patsica mapanacuayabetsicaje daxitajivi mapanacuataje najamatabēcuenejēpaeya pejinavana-paeyaexanaenexa,” panesivajamatabējamē pētsa. Bajaraxuanexa apo patsinētsica. Biji rajane xanē tapatsixaetsica mapanacuayabetsicaje, jivi itsa nejumecovēnēt-siana, apo najamatabēcuenejēpae tsane pamonaējavabelia apo nejumecovēnētsi, nacaemonae ata. Napijavajabitsaē tsane namataenetsia. <sup>35</sup>Xanē apo tanenajuajumecovēnētsixaebeje, pebibeye paxabeje apo najamatabēcuenejēpaebeje tsane. Petirivabeje ata, pexēnatoyobeje xanē apo tanenajuajumecovēnētsixae penabeje apo najamatabēcuenejēpaebeje tsane. Pamebeje ata pecopenabeje apo najamatabēcuenejēpaebeje tsane. <sup>36</sup>Nexata xanē apo tanenajuajumecovēnētsixae, caejivi canacujitsia bepijavajabitsaējivi taenatsi pijamonaējivi ata.

<sup>37</sup>Pajivi nejumecovēnētsi ata, apo niasiva tsane paxa, pena ata, piasivajava matatoxenetsia, bajarapajivi apo tajajivi tsane. Pajivi nejumecovēnētsi ata, apo niasiva tsane pexēnato, pexēnatoyo ata, piasivajava matatoxenetsia, bajarapajivi apo tajajivi tsane. <sup>38</sup>Pajivi nejumecovēnētsi ata, pecajunavi apo nepēnaponaē tsane pebeyaxuabixaejitsiatsi xanē tajumelivaisi yabara, bajarapajivi apo taja-jivi tsane. <sup>39</sup>Pajivi nayavajunuaxaina tajajivicuene pebejiobiaexanaeyanivatsi, pebeyaxuabianivatsinua, bajarapajivi naxuabiana daxitamatacabijavabelianexa. It-siata baitsi jane pajivi beyaxuabatsi tajajivixae, bajarapajivi daxitamatacabijavabelianexa Dioso capanepaenatsi, jai Jesús pijajivijavabelia.

**Pacuenia Dioso matamotsijitsiatsi pamonaē xaniavaetsia  
copiapita Jesús pijajivi yabara pelivaisi**

(Mr 9.41)

<sup>40</sup>Icatsia Jesús jumaitsi pijajivijavabelia:

—Pajivi pacacopiapitsiana patajajivixaemē, bajaraxua xanē taniji tanecopiapitsi-  
java. Pajivi necopiapitsiana, bajaraxua taxa Dioso tane pecopiapitsijavatsi. <sup>41</sup>Dioso-  
jumepaebinē Dioso matamotsianatsi petonacuenebimatamo. Nexata pajivi xani-  
avaetsia copiapita Diosojumepaebinē, bajarapajivi ata Dioso matamotsianatsi. Nex-  
ata xuavajēto Diosojumepaebinē Dioso matamotsianatsi, bajara pijinia xuavajēto  
Dioso matamotsianatsi pajivi copiapita Diosojumepaebinē. Pajivi ata exanabiaba  
Dioso pitorobicueniatsi, bajarapajivi ata Dioso matamotsianatsi. Nexata pajivi xa-  
niavaetsia copiapita pajivi exanaponapona Dioso pitorobicueniatsi, bajarapajivi  
ata Dioso matamotsianatsi. Nexata xuavajēto Dioso matamotsianatsi pajivi ex-  
anaponapona Dioso pitorobicueniatsi, bajara pijinia xuavajēto bajarapajivi Dioso  
matamotsianatsi.

<sup>42</sup>Pajivi yavenonaena tajajivi, tsiquirijavayo ata mera rajutsiana piapaenexa, ba-  
jarapajivi pepacune matamotsianatsi Dioso, jai Jesús pijajivijavabelia.

**Pacuenia Juan jivibautisabinë itoroba  
pijajiviyajuvënëvi Jesúsjavabelia yabara pelivaisi**

(Lc 7.18-35)

**11** Jesús baja najumevereta pijajivi doce ponëbejejavabelia livaisi petsipae-bijava. Nexata baja Jesús pona livaisi petsipaebinexa bajarapanacuata penaetomaranëjava.

<sup>2</sup>Bajarapamatacabi Juan jivibautisabinë naneconitsiaponapona penaneconitsivi pejebabiabibota. Nexata Juan vënëlivaisitane Dioso pesaëta Jesús pinijicuene pexanaponaejava. Bajaraxuata Juan itoroba pijajiviyajuvënëvi Jesúsjavabelia. <sup>3</sup>Juan itoroba pijajivi peyanijobinexa Jesúsjavabelia. Nexata Juan pijajivi jumaiti Jesúsjavabelia:

—¿Xamë tsabaja Cristomë? ¿Xamë tsabaja tajëvelia cavajunupaebaona nepatsi-javanexatsica daxitajivi necapanepaenexa? Itsa apo Cristomë, ¿abaxë tsaja pacopievetavanapaenajë itsanë pepatsinexatsica? jai Juan pijajivi Jesúsjavabelia.

<sup>4</sup>Nexata Jesús jumaiti Juan pijajivijavabelia:

—Paponare baja. Patsipaebianame Juan pacuenia baja pataneme taexanaponaejava. Patsipaebianamenua pacuenia baja pajumetaneme tatsipaebilivaisi jivijavabelia. <sup>5</sup>Apo petaevimi ata itaxutoxaniavaetaponajë xaniavaetsia petaenexa. Petabusipacuenabivitsinua daxita jinavanapaeyaexanaponajë. Bajayajebi bitso peperabëtsabanaevinua vecuaajibiaexanaponajë. Bitso pemuxusipanaevinua jumetaeyaexanaponajë baja xaniavaetsia pejumetaenexa. Petëpaevimi ata icatsia asaëyaexanaponajë. Pexanialivaisinua pecapanepaelivaisinexatsi pibisiacuene pexanaeconimivecua tsipaebaponajë bepejiobivijavabelia. Daxita bajaraxua taexanaponaejava patanetaejavamë, patsipaebianame Juanjavabelia. <sup>6</sup>Pajumait-simënu tsane Juanjavabelia: “Jesús raja jumaiti: ‘Jamatabëcuenebarëya pajivi tsiteca jumecovënëta xanë Dioso pexënatocuenenë,’ jai raja Jesús,” pajamë tsane Juanjavabelia, jai Jesús Juan pijajivijavabelia.

<sup>7</sup>Itsa baja Juan pijajivi naviabalia, nexata bajarapamonae pecovëta Jesús taxuxuaba jivijavabelia petsipaebijava Juan pelivaisi. Jesús jumaiti jivijavabelia mapacueniaje:

—Itsa paponame petusato nacuyabelia, pamatacabi Juan ponapona petusato nacuata, ¿detsa pitsicuene pajamatabënaponaremelia panetaenexa bajarajotalia? ¿Paponaremelia tsaja saya panetaenexa musuli penajëabijava jovibota? <sup>8</sup>Itsa apo paponamëlia panetaenexa musuli penajëabijava jovibota, ¿detsa nexata pitsicuene panetaenexa paponaremelia? ¿Paponaremelia tsaja saya panetaenexa naitabëtsiaya pexaniajava penaxatatsinë? Paxamë rabaja payapëtaneme mapacuenieje. Pamonae naitabëtsiaya pexaniajava naxatabiaba, bajarapamonae jinavanapa nacuanë pevetsivi pijabonëjava. <sup>9</sup>¿Detsa nexata xua pajamatabënaponaremelia panetaenexa petusato nacuyabelia? Paponaremelia raja panetaenexa Diosojumepaebinë profetanë. Xaniajanë pacuenia pacatsipaebijitsiatsi. Juan itsa pataneme, pepacuene jane baja pepo profetanë, Diosojumepaebinë, pataneme. Nexata saya bevelia profetanë apo pataemë. <sup>10</sup>Juan pexanaejavanexa, bajayata tajëvelia Dioso pejumelivaisibaxutota vajunupaeba. Dioso tanejumaitsijava ata xanëjavaberena Juan yabara, Dioso pejumelivaisibaxutota jumaiti mapacueniaje:

Itorobianajë nevjënaeyabelia tanejumulivaisipaebinënexa, jivi pecatsivajënae najamatabëcuenexaniavaetsinexa, jai bajayata Dioso pejumelivaisibaxutota tapatsivajënaeya Juan tanelivaisi paebanajetarucaejavanexa yabara.

<sup>11</sup> Xaniajanë pacuenia pacatsipaebijitsiatsi. Juan ayaijamatabëcuenenë mapanacuataje. Nexata bajayata Juan pevajënaeya paprofetavi jinavanapa, itsanë ata Juan apo jamatabëcuenematatoxenetsitsi. Itsiata baitsi jane pajivi beveliajamatabëcuenejivi ata, itsa nejumecovënëta tacapanepaejavanexa, bajarapajivi ayaijamatabëcuenejivi Dioso exanaenatsi Juan matatoxenetsia.

<sup>12</sup> Juan jivibautisabinë petaxuxuabijavaveliacujinae, Dioso pitorobilivaisi jivi pet-sipaebanajetarucaejava mapamatacabijavaberena ataje, ayaibitsaëtoxfaneto picani jivi jitsipa Dioso pitorobilivaisi pejumecovënëtsinexa. Itsiata itsamonae pesaëta caranatapona bajarapamonae pejumecovënëtsiyaniva Dioso pitorobilivaisi. <sup>13</sup> Juan penaexanaevajënaeya, daxita Diosojumepaebivimi profetavi tajëvelia vajunupaebapona itsamatacabi Dioso pijajivi pevetsijavanexa. Dioso Moiséspijinëta penajumecopatsilivaisi ata, tajëvelia vajunupaeba Dioso pijajivi pevetsijavanexa. <sup>14</sup> Itsa baja jamatabëpajumecovënëtame, pajumecovënëre xua aeconoxae pacatsipaebijitsiatsi. Dioso pejumelivaisibaxutota tajëvelia jumaitsi mapacueniaje: “Elíaspijinë icatsia patsiana,” jai. Bajarapacuenia tajëvelia itsa jumaitsi, Juan jivibautisabinë yabara jumaitsi. Tsipaji pacuenia jamatabëcuenetsi profeta Elíaspijinë, bajara jamatabëcuenetsi Juan ata. Nexata Juan pepatsivajënaeya, tajëvelia yapëtanetsi pacuenia Juan exanaejitsia. <sup>15</sup> Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús jivijavabelia.

<sup>16</sup> Jesús icatsia jumaitsi jivijavabelia:

—¿Detsa meta pacuenia yapëtaeyaexanaenajë itsamonaejavabelia bajarapamonae xaniavaetsia papecayapëtaenexa pacuenia paxamë pajamatabëcuenetsimë tsavana-pae? Jumaitsinë meta tsane paxamë yabara mapacueniaje: “Bajarapamonae abaxë saya bepejevaxijivixi, pajivixi tomara tuatuajëjava banamuxusitenavanapa. Pejevaxijivixi itsa namuxusitenavanapa, bavavajai tsenae penajua namuxusitenaevijavabelia. <sup>17</sup> Pevavajaijavata bajumaitsi: ‘Pacatoobecatsi picani flauta. Itsiata apo payavajibimë. Pacatonaxëancatsi picani penemuxunanuevajinexa ata. Itsiata apo panuemë,’ bajai tsenae pejevaxi penajua namuxusitenaevixijavabelia. Bajara saya jamatabëcuenetsi pamonae aeconoxae jinavanapa mapanacuataje,” janë meta tsane paxamë yabara. <sup>18</sup> Juan jivibautisabinë Dioso pitorobilivaisi jivi tsipaebanajetaruca. Pexaejava itsajavata apo xaeyabiabi, pamatacabibeje Diosojavabelia vajëtapona. Vinora ata apo apaeyabiabi. Nexata bajaraponë yabara jamatabëcuenenavëxaniabiaya pajumaitsimë tsabiabi: “¿Juan raja dovathi yajavaponaponal!” pajamë tsabiabi jamatabëcuenenavëxaniabiaya. <sup>19</sup> Bajaraxuacujinae icatsia xanë, Daxitajivi Pematapijinënë, najetarucajë. Itaxutojema xaniji. Matavëjëa apaeyabiabajënu. Nexata xanë yabara icatsia jamatabëcuenenavëxaniabiaya pajumaitsimë tsabiabi: “¿Pataema maponëje! Ayaijava xaeyabiaba. Ayaira matavëjëa apaeyabiabanua piatajibinexa. Barënajamatabëcuenëjëpanua gobierno pejamatabëcuenenapestomatamo pematamoyanijobabiabivi. Pamonae ata piagamatabëcuenenëbejevi, barënajamatabëcuenëjëpa,” pajamë tsabiabi xanë yabara. Itsiata baitsi jane xuanë paxanëbeje Juanbeje paexanaponajëbeje, bajaraxuanë Dioso pejamatabëcueneta pataexanaejavabeje itsamonae xaniavaetsia yapëtaena. Nexata daxita bajarapa-

monae yapëtaena pacuenia Dioso paneyapëtaeyaexanabeje pepacuenepo pex-  
aniajajamatabëcuene, jai Jesús mapacueniaje jivijavabelia.

**Pacuenia Jesús jumaitsi patomarapijivijavabelia apo  
jumecovënëtsitsi yabara pelivaisi**

*(Lc 10.13-15)*

<sup>20</sup> Itsatomaranëjava Dioso pesaëta Jesús pinijicuene pexanaejavanë navitsia ex-  
anapona. Itsiata bajarapatomaranëpivivi apo copabi pibisiacuene pexanabiabijava.  
Apo najamatabëcuene pënëyorotsi Diosojavabelia. Nexata Jesús ajumesaëya ju-  
maitsi bajara patomaranëpivijavabelia:

<sup>21</sup> ¡Bitso bepajobimë tsane paCorazín tomarapijivimë! ¡Bitso bepajobimë tsane  
paBetsaida tomarapijivimë ata! Pinijicuene Dioso pesaëta taexanaejavanë patae  
atamë, itsiata apo panejumecovënëtsimë. Apo pacopabimë pibisiacuene pane-  
exanabiabijava. Apo panajamatabëcuene pënëyorotsimë Diosojavabelia. Bajayata  
Tiro tomarapijivimi, Sidón tomarapijivimi ata, petuatuajëta bajarapitsipinijicuene  
itsa tsitaexanaejitsipajë, nexata bajarapamonaemi copabijitsipa pibisiacuene pex-  
anaejava. Najamatabëcuene pënëyorotsipa Diosojavabelia. Bajarapamonaemi nex-  
ata pibisiacuene pexanabiabineconi bitso yajamatabëcuenebëjai tsipae. Nex-  
ata Diosojavabelia petsitanajamatabëcueneitajëtsinexa peyajamatabëcuenebëjai-  
java pibisiacuene pexanabiabineconi, naxatabijitsipa piayopapaëbërëjavanë. Ene-  
jitsipa irata. Ipumana ata natsimataothocaejitsipa bitso peyajamatabëcuenebë-  
jaixae pibisiacuene pexanabiabineconi. <sup>22</sup> Xaniajanë pacuenia pacatsipaebijitsi-  
atsi. PaCorazín tomarapijivimë, paBetsaida tomarapijivimë ata, patae atamë pini-  
jicuene Dioso pesaëta taexanaejavanë, apo panejumecovënëtsimë. Nexata pamat-  
acabi Dioso naneconitsiaexanaena daxita pijaneconi pexainaevi, bajarapamatacabi  
bitso ayaiacuenia Dioso pacananeconitsiaexanaena. Paneconivajëtota bajayata Dioso  
naneconitsiaexana Tiro tomarapijivimi, Sidón tomarapijivimi ata, bajarapaneconi-  
vajëto matatoxenetsia Dioso bitso ayaiacuenia pacananeconitsiaexanaena. <sup>23</sup> Pax-  
amë paCapernaum tomarapijivimë, jamatabëcuenenavëxaniabiaya pajamatabëju-  
maitsimë tsabiabi: “Vaxaitsi cajena ayajamatabëcuenevitsi. Nexata Dioso nacaca-  
panepaena athëbëabetsia,” pajamatabëjamë tsabiabi. Itsiata baitsi jane athëbëabet-  
sia Dioso apo pacacapanepae tsane. Dioso raja pacaxuabiana infernojavabelia apo  
patanejumecovënëtsixaemë. Bajayata Sodoma tomarapijivimijavata itsa exanaejit-  
sipajë Dioso pesaëta pinijicuene taexanaejava, pacuenia paxamëjavata exanapon-  
ajë, nexata Sodoma tomarapijivimi copabijitsipa pibisiacuene pexanaejava. Naja-  
matabëcuene pënëyorotsipa Diosojavabelia. Nexata bajarapamonae Dioso apo vere-  
biabi tsipaetsi pibisiacuene pexanaeneconi yabara. Nexata abaxë mapamatacabi  
ataje jivi jinavanapaejitsipa bajarapatomarata. <sup>24</sup> Xaniajanë pacuenia pacatsipaebi-  
jitsiatsi. Pamatacabi Dioso naneconitsiaexanaena pijaneconi pexainaevi, ayaiacuenia  
Dioso pacananeconitsiaexanaena. Tspaji Dioso pesaëta navitsia pinijicuene taex-  
anaponaejava patae atamë, apo panejumecovënëtsimë. Nexata Sodoma tomarapi-  
jivimi matatoxenetsia Dioso bitso ayaiacuenia pacananeconitsiaexanaena, jai Jesús  
patomarapijivijavabelia apo jumecovënëtsitsi.

**Pacuenia Jesús pijajivi junata pejamatabëcueneasaëyaexanaenexa  
pejamatabëcuene cueranaejavavecua yabara pelivaisi**

(Lc 10.21-22)

<sup>25</sup> Jesús pevajëtsijavata paxa Diosojavabelia jumaitsi:

—Axa, nevetsinë athëbëtatsia. Nevetsinë mapanacuajava ataje. “Ayaijamatabëcuenenëmë bitso,” cajiatsi. Tsipaji pamona bitso apo penacujarubivi ata, yapëtaeyaexanaename nevetsijavanexa daxita nijajivi mapanacuataje. Bajarapamona yapëtaeyaexanaename pexanialivaisi, xanë talivaisi, palivaisi vecuamatayata bitso peyapëtaevi mapanacuapijilivaisije. Bajarapalivaisi vecuamatayata bitso penacujarubivi ata mapanacuapijicue yabaraje. <sup>26</sup> Bajarapacuenia exaname tsipaji baja exaname nejitsipacuenia, jai Jesús paxa Diosojavabelia pevajëtsijavata.

<sup>27</sup> Icatsia Jesús jumaitsi pijajivijavabelia:

—Taxa Dioso baja cajena netocopata tayapëtaenexa daxitacuene. Itsajivi ata apo nejamatabëcuenyapëtae pacuenia xanë jamatabëcueneitsinë, Dioso pexënatonë. Caenë taxa Dioso nejamatabëcuenyapëtane. Itsajivi ata apo jamatabëcuenyapëtae pacuenia taxa Dioso jamatabëcueneitsi. Caenënë xanë, pexënatonë, jamatabëcuenyapëtani. Pamona tojitsipajë tayapëtaeyaexanaenexa pacuenia taxa Dioso jamatabëcueneitsi, bajarapamona ata yapëtaeyaxanaponaenajë. <sup>28</sup> Pabita penacuenebabiabinë, piarevejava pejotabiabinë, bitso bavemaxëcuerana. Bajara pijinia pacuenia paxamë ata bitso itsa pajamatabëcuene cuerana pibisiacuene paneexanabiabijava yabara, xanëjavaberena paponare paneajamatabëcuene saënexa icatsia. <sup>29</sup> Bueyubeje banavësijumacaevetabeje petsivësijumabuatsinexatsibeje yugovënëjava penacuenebinexabeje. Bajara pijinia pacuenia paxamë ata panajamatabëcuene caevere patacatsijamatabëcuenebuatsinexa patacatsipaebilivaisi. Panejumecovënëtsianame pacuenia pacaitorobatsi patanetonacuenebinexamë. Nexata panevajënaeyabelia panejamatabëcuenyapëtaeponaename. Tsipaji xanë xaniavaetsia pacatsipaebaponaenatsi. Xanë beayaijamatabëcuenenë apo nataenë. Nexata bajarajota panajamatabëcueneevetsianame paneajamatabëcuene saënexa icatsia. <sup>30</sup> Pacuenia bueyu tsivësijumabuatsi yugovënëjava petoyapëxanepanaenexatsi penacuenebijava, bajara pijinia pacuenia paxamë ata pacatoyapëxanepanaeyaexanaenatsi paneexanaenexa xua pacaitorobijitsiatsi, jai Jesús pijajivijavabelia.

**Pacuenia Jesús pijajivi trigoxu namutua siricanajetarubena  
penacueraevetsimatacabita yabara pelivaisi**

(Mr 2.23-28; Lc 6.1-5)

**12** Judíovi penacueraevetsimatacabita Jesús, pijajivi yajava, najetaruca trigo pabianëjava. Jesús pijajivi bitso pijajani. Nexata trigoxu siricanajetarubena. Xuxaeyabuatapona. <sup>2</sup> Nexata fariseovi tane Jesús pijajivi pesiricanajetarubenaajava trigoxu. Nexata fariseovi jumaitsi Jesúsjavabelia:

—Taema mapamonaaje. Dioso Moiséspijinëta penajumecopatsilivaisi vajanacaitavetsicuene nijajivi exana. Apo nacaitavetsi ata trigoxu vajaxaejava, itsiata ajena penacueraevetsimatacabixae, nijajivi apo bexanae mapacuenije, jai fariseovi Jesúsjavabelia.



<sup>3</sup>Nexata Jesús jumaitsi fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tspaji bitso pijaani. ¿Apo palebimë tspaji Dioso pejumelivaisibaxuto paneyapëtaenexa pacuenia vajasalinainë Davidpijinë, pebarëponaevi yajava, exana pamatacabi bitso pijaani? <sup>4</sup>Davidpijinë joneya Dioso pijatemploboyalia. Nexata Dioso pijatemploboënëta, mesajumata, bobena Diosonexa ofrendacuenia petojebipanbëanë. Bajarapapanbëanë apo tocopatsitsi picani Davidpijinë, pijajivi ata, pexaenexa penaneconitsiyani Diosojavabelia. Èsacerdotevi picani tocopatatsi pexaenexa. Davidpijinë apo sacerdotenë ata, pijajivi barëxae ata bajarapapanbëanë, itsiata apo vënananeconitsi Diosojavabelia. <sup>5</sup>¿Apo palebimë tspaji Dioso Moiséspijinëta penajumecopatsilivaisi paneyapëtaenexa pacuenia jumaitsi sacerdotevi yabara? Sacerdotevi templobota penacuenebivi, penacueraevetsimatacabita ata apo nacueraevetabiabi. Penacueraevetsimatacabita sacerdotevi nacuenebabiabi ata templobota, itsiata apo naneconitsi Diosojavabelia. <sup>6</sup>Xanë cajena ayaijamatabëcuenenënë. Nexata Dioso netojitsipa jivi taneyaiyataenexa templobo matatoxenetsia. <sup>7</sup>Dioso pejumelivaisibaxutota jumaitsi mapacueniaje: “Jitsipajë paneitaxutotsoniataenexa itsamonae ata. Apo jitsipaenë cajena saya patanetobeyabiabinexamë dajubicuene ofrendacuenia patanerajutabiabinexamë,” jai Dioso pejumelivaisibaxutota. Xua yabara jumaitsi bajarapacuenia, apo pajumeyapëtaemë baja cajena. Tspaji itsa pajumeyapëtaejitsipame xua yabara jumaitsi, nexata tajajivi ata paitaxutotsoniataejitsipame. Nexata tajajivi trigoxu pexaejava yabara apo panejumaitsimë tsipae: “Dioso Moiséspijinëta penajumecopatsilivaisi vajanacaitavetsicuene nijajivi exanapona,” apo panejamë tsipae. Tspaji tajajivi apo naneconitsi Diosojavabelia. Tspaji tajajivi bitso pijaanaxae, trigoxu xane. <sup>8</sup>Nexata xanë, Daxitajivi Pematapijinënë, netoxanepana cajena tatsipaebinxua xua xanepana jivi pexanaenexa penacueraevetsimatacabita ata, jai Jesús mapacueniaje fariseovijavabelia trigo pabianëjavata.

**Pacuenia Jesús jamatejemayaexana pebi pecobetsaquenaenë yabara pelivaisi**

*(Mr 3.1-6; Lc 6.6-11)*

<sup>9</sup>Trigo pabianëjavata Jesús livaisi petsipaebicujinae fariseovijavabelia, Jesús baja vecuapona pabianë. Nexata Jesús joneya judíovi penacatuatabiabiboyalia. <sup>10</sup>Nexata bajarajota pebi naeca, pecobetsaquenaenë. Itsamonae fariseovi bajarajota jamatabëneconitatsi Jesús. Nexata Jesús naitaxutocaevetatsi xua yabara neconitsijitsiatsi. Nexata fariseovi Jesús jamatabëcueneëjëbiaya yanijobatsi mapacueniaje.

—¿Vajanacueraevetsimatacabita ata tsaja xanepana piavitanevi vajajamatejemayaexanaenexa? jai fariseovi Jesúsjavabelia.

<sup>11</sup>Jesús nexata jumaitsi fariseovijavabelia:

—Paxamëyajuvënëvi pijaoveja itsa tojopaejitsiparecatsi meramëthëareca, penacueraevetsimatacabita ata ponaejitsipa. Nexata jutsipaina pijaoveja. ¿Baja tsabaitsi jane? <sup>12</sup>¡Biji ra jivitonë bitso namatamota oveja matatoxenetsia! Bajaraxuata itsiata nacatoxanepana vajaexanaenexa pexaniacuene vajanacueraevetsimatacabita ata, jai Jesús fariseovijavabelia.

<sup>13</sup>Nexata Jesús jumaitsi pecobetsaquenaenëjavabelia:

—Namaxërovire, jai Jesús.

Itsa bajaraponë namaxërovita, pacuenia itsanenia cobeitsi, bajara cobeitsi. Cobexanepanareca baja. Pecobetsaquenaevajami baja ajibi. <sup>14</sup>Nexata fariseovi ita tane Jesús pecobexanepanaeyaexanaejava pecobetsaquenaenë, fariseovi anaepana. Nexata pitsaparena judíovi penacaetuatabibovecua. Nexata jane baja fariseovi najumejaita Jesús pebeyaxuabinexatsi.

**Pacuenia Diosojumepaebinë profetanë bajayatami  
tajëvelia vajunupaebatsi Jesús yabara pelivaisi**

<sup>15</sup>Jesús jamatabëcuenepëtane pacuenia fariseovi sivanajamatabëxainatsi. Jesús picani fariseovi jamatabëbeyaxuabatsi. Nexata baja Jesús bajarapamonae vecuapona itsajavabelia. Jivi ayaibitsaëtoxaneto Jesús pënaponatsi. Jesús nexata jamatejemayaexana daxita piavitanevi. <sup>16</sup>Jesús jumeitaveta bajarapamonae petsipaebiyaniava itsamonaejavabelia Jesús Dioso pexënatocuene. <sup>17</sup>Bajarapacuenia Jesús pejamatejemayaexanaevi ita jumeitaveta petsipaebiyaniava itsamonaejavabelia, copiapata jane baja pacuenia bajayata Diosojumepaebinëmi profeta Isaíaspijinë tajëvelia jumaitsi. Dioso pejumaitsijava Jesús yabara profeta Isaíaspijinë bajayata tajëvelia jumaitsi mapacueniaje:

<sup>18</sup>Maponë taitapetsinë, taitorobicuenia exanabiaba. Bajaraponë tasivanë. Sivanajamatabëcuenenabarëyanë. Espíritu Santo runaeyaexanaenicajë bajaraponë pematatsënëatsica. Bajaraponë apo judíovijavabelia tsipaebiana tananeconitsiaexanaejavanexa daxita pibisiacuene pexanaevi. <sup>19</sup>Bajaraponë itsajivijavabelia ata apo jumeanaenotsi tsane. Livaisi ita tsipaebapona, pinijijumeta apo vavajai tsane. <sup>20</sup>Pamonae xanë tajumelivaisi pejumecovënëtsijava abaxë apo ajamatabëcuenesaë ata, itsiata bajaraponë bajarapamonae apo xuabi tsane. Capanepaena. Pamatacabi tocopiapatsianatsi bajaraponë pijajivi pevet-simatacabinexa, xaniavaetsia bajaraponë evetsiana daxita pijajivi. <sup>21</sup>Nexata daxitajivi, apo judíovi ata, sivanajamatabëcuenecopatsianatsi bajaraponë pecapanepaenexa,

jai bajayata tajëvelia profeta Isaíaspijinë Dioso pejumaitsijava Jesús yabara. Bajarapacuenia bajayata tajëvelia jumaitsi Isaíaspijinë peyaquinaebaxutota.

**Pacuenia itsamonae Jesús yabara jamatabëcuenenavëxaniabiaya  
jumaitsi: “Beelzebú raja pesaëta Jesús dovathi  
jivivecua capitsapapona,” jai yabara pelivaisi**

*(Mr 3.20-30; Lc 11.14-23; 12.10)*

<sup>22</sup>Jesús tocapatatsi bitso pitaxutotsëcënaenë, apo penatsipaebinë. Bajaraponë dovathi yajavaponapona. Bajaraponë Jesús jamatejemayaexana. Xaniavaetsia baja nexata tane. Natsipaebanua baja. <sup>23</sup>Jivi ita tane Jesús pejamatejemayaexanaejava bajaraponë, jamatabëcuenenabenajaca. Nexata jivi najumaitsi Jesús yabara:

—¿Matsaeta ponë Davidpijinë pemomoje, Dioso pitorobinëtsicaje? najai bajarapamonae Jesús yabara.

<sup>24</sup>Nexata fariseovi ita jumetane bajarapacuenia jivi pejumaitsijava, fariseovi jumaitsi jivijavabelia:

—Mara ponë Jesúsje, dovathi jivivecua capitsapabiaba Beelzebú pesaëta. Beelzebú raja daxita dovathivi pitorobinë, jai fariseovi jivijavabelia jamatabëcuenenavëxaniabiaya Jesús yabara.

<sup>25</sup> Jesús jamatabëcueneyapëtane pacuenia fariseovi sivanajamatabëxainatsi. Nexata Jesús jumaitsi fariseovijavabelia:

—Nacaenacuapijivi ata itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaenacuapijivi ata. Bajara pijinia itsipae nacaetomarapijivi ata. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaetomarapijivi ata. Bajara pijinia itsipae nacaemonae ata. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaemonae ata. <sup>26</sup> Bajara pijinia itsipae dovathi ata. Dovathi jivivecua itsa capitsaponaejitsipa pijajivi, dovathivi, nexata bepijavajabitsaëñë taejitsipatsitsi pijajivi. Itsajamatabëcuene vecuaxainaejitsipa pijajivi. Pesaë ata apo xainaponae tsipae. <sup>27</sup> Paxamë ata panijajivi dovathi jivivecua capitsapabiaba. Nexata xanë Beelzebú pesaëta dovathi jivivecua itsa capitsapabiabajë, ¿detsa nexata ponë pesaëta panijajivi ata dovathi jivivecua capitsapabiaba? Caenë rabaja Dioso pesaëta. Nexata panijajivi ata pacayapëtane bajarapacuenia jamatabëcuenenavëxaniabiaya panejumaitsijava xanë yabara. <sup>28</sup> Espíritu Santo raja pesaëta xanë dovathi jivivecua capitsapabiabajë. Nexata baja picani jivi beyapëtane Dioso baja petaxuxuabijava pijajivi pevetsijava paxamë tuatuajëta, jai Jesús fariseovijavabelia.

<sup>29</sup> Fariseovi pecanaëjëtsinexa Jesús bitso piasaënëcuene dovathi matatoxenetsia, Jesús icatsia jumaitsi fariseovijavabelia mapacueniaje:

—Itsajivi ata apo caëjëpaetsi pejonenexa bitso piasaënë pijaboyaliala peyacajërëtsinexa xua xaina pijabota. Itsiata itsa patsipa bajaraponë matatoxenetsia bitso piasaënë, nexata cobecëtabuatsipatsi. Taxucëtabuatsipatsi yajava. Matapania bajarapacuenia yacajërëtsipatsi daxita xua xaina pijabota.

<sup>30</sup> Pajivi apo neyavenonaeyacaetuatsi jivi Diosojavabelia, bajarapajivi betajavajabitsaëjivi. Tsipaji apo taneyavenonaeyacaetuatsixae, jivi nevecuanacayajata Dioso picani pejumecovënëtsiviminexa.

<sup>31</sup> Bajaraxuata pacatsipaebijitsiatsi, Dioso caëjëpatsi daxitajivi pibisiacuenepexanaeconimi pevecuaajibiaexanaenexa. Pibisiacuenia jivi Dioso baracuaicuajiai ata, bajarapaneconi ata Dioso caëjëpatsi pevecuaajibiaexanaenexa. Itsiata baitsi jane pajivi pibisiacuenia baracuaicuajiai Espíritu Santo, pacuenia paxamë pajumaitsimë, Dioso apo vecuaajibiaexanae tsane bajarapaneconi. <sup>32</sup> Pajivi pibisiacuenia nebaracuaicuajiai ata, xanë, Daxitajivi Pematapijinëñë, bajarapaneconi ata itsiata Dioso vecuaajibiaexanaenatsi itsa vajëta Diosojavabelia. Itsiata baitsi jane pajivi pibisiacuenia baracuaicuajiai Espíritu Santo, bajarapaneconi Dioso apo vecuaajibiaexanae tsanetsi. Daxitamatacabijavabelianexa apo vecuaajibiaexanae tsanetsi bajarapaneconi, jai Jesús fariseovijavabelia.

### **Pacuenia peubinaenë itsa nacuaita, nayapëtane pavirianaecueneyabara pelivaisi**

*(Lc 6.43-45)*

<sup>33</sup> Icatsia Jesús jumaitsi fariseovijavabelia:

—Pexaniavirianaenë itsa ubatsi, nacuaita pijinia pexaniacuai. Ponae pijinia pibisiana, nacuaita pibisiacuai. Caeviriana canacujitsia yapëtanetsi itsa nacuaita. <sup>34</sup> Bajara pijinia pacuenia paxamë ata dovathi papijajivimë, panayapëtaneme paneajamatabëcuenebejjava. Nexata apo pacacaëjëpae panecuaicuajainexa pexani-

acuene yabara. Pajamatabëcuene bēpēnēa panejamatabēēthētota panajamatabëxainame, panecuibovojotuatsina pitsapa panecuaicuaijainexa. <sup>35</sup> Itsamonae pijinia majamatabëcueneitsije. Pacuenia vajaaninae, pexaniana, pexaniacuai pijinia nacuaita, bajara pijinia jamatabëcueneitsi itsamonae. Ponē pexaniajamatabëcuene, pexaniacuene yabara cuaicuaijai. Tsipaji pexaniajamatabëcuene xaina pejamatabēēthētota. Ponē pijinia pibisiajamatabëcuene pibisiacuene yabara cuaicuaijai. Tsipaji pibisiajamatabëcuene najamatabëxaina pejamatabēēthētota. <sup>36</sup> Xaniajanē pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainaevi, caejivi canacujitsia, naneconitsiaexanaena caejumeyo canacujitsia pibisiacuena pecuaicuaijajava yabara. <sup>37</sup> Pibisiacuena panecuaicuaijajava yabara Dioso pacananeconitsiaexanaena. Pexanialivaisi itsa pacuaicuaijamē tsabiabi tsane, nexata paneconijibimē tsane Diosojavabelia, jai Jesús fariseovijavabelia.

**Pacuenia pibisiajamatabëcuenevi Jesús picani itorobatsi Dioso pesaēta pinijicuene pexanaejava petsitaexanaenexa yabara pelivaisi**

*(Mr 8.12; Lc 11.29-32)*

<sup>38</sup> Fariseovi, judíovi pecujarubivi ata, jumaitsi Jesúsjavabelia:

—Jesús, pajitsipajē patataenexa Dioso pesaēta pinijicuene nexanaejava, patacayapētaenexa pepacuene Dioso athëbëvetsica peccatorobinëcuenetsica, jai bajarapamona.

<sup>39</sup> Jesús nexata jumaitsi bajarapamonaejavabelia:

—Bitso pibisiacuene paneexanaevi, Dioso panejumecovënëtsijavami panecopabivi. Paneitorobame picani Dioso pesaēta pinijicuene taexanaejava patacatsitaexanaenexa pataneyapētaexamē Dioso pepacuene athëbëvetsica taneitorobinëcuenetsica. Itsiata baitsi jane Dioso pesaēta pinijicuene taexanaejava apo pacatsitaexanae tsanetsi. Bajayata pacuenia Diosojumepaebinēmi profeta Jonáspijinē exanatsi, bajara ëpitsicuene taneexanaejava pacatsitajëtsianatsi. <sup>40</sup> Bajayata Jonáspijinē boca ayainē dujuainē pënēta acueyabi pamatacabibeje, acueyabi pameravibeje yajava. Bajara pijinia pacuenia xanē ata, Daxitajivi Pematapijinēnē, bocaenajē mëthēta acueyabi pamatacabibeje, acueyabi pameravibeje yajava. <sup>41</sup> Bajayata Nínive tomarapijivimi itsa jumetane Dioso pitorobilivaisi, Jonáspijinē petsipaebilivaisi, copaba pibisiacuene pexanaejava. Najamatabëcuene pënëyorota Diosojavabelia. Copiapatsiana rabaja Dioso papecananeconitsia exanaematacabinexa daxita panijaneconi panexainaevi. Panijaneconi panexainaevi pacanubiana Dioso pitabarata. Nexata bajarapamatacabi Nínive tomarapijivimi nonobapunaena Diosojavabelia papecananeconitsinexa Dioso apo panejumecovënëtsivi. Xanē majotaje ponaponajē, bitso ayajamatabëcuene nēnē Jonáspijinēmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovënëtsimē. Apo panajamatabëcuene pënëyorotsimēna pibisiacuene paneexanaejavavecu. Bajaraxuata ayaineconi paxainame Diosojavabelia. <sup>42</sup> Pamatacabi Dioso naneconitsiaexanaena pijaneconi pexainaevi, bajayata peponaponaevami, Saba nacuapijivi pevetsivami, nonotapunaena Diosojavabelia papecaconitsinexa Dioso apo panejumecovënëtsivi. Bajarapova pacaneconitsiana. Tsipaji bajayata bajarapovami tajē nacuataverena ata muxunarena pejumetaenexa Salomónpijinē, bitso daxitalivaisi peyapētaenēmi, petsipaebilivaisi. Xanē majotaje

ponaponajë, bitso ayaijamatabëcuenenënë Salomónpijinëmi matatoxenetsia. Nexata pacatsipaebi atasi Dioso pejumelivaisi, itsiata apo panejumecovënëtsimë. Apo panenamuxunaevetsimënu. Bajaraxuata Dioso pacananeconitsiaexanaena, jai Jesús tajëvelia fariseovijavabelia, judíovi pecujarubivijavabelia ata.

**Pacuenia dovathi jivitonë pevejamatabëpitsapaecujinaetsi, icatsia naviarena pecovëyaberena petsijamatabëcaenexatsi icatsia yabara pelivaisi**

*(Lc 11.24-26)*

<sup>43</sup> Jesús jumaitsi fariseovijavabelia, judíovi pecujarubivijavabelia ata:

—Dovathi itsa vejamatabëpitsapa jivitonë, nexata dovathi jinaruta petseviiranëjava. Jaitapona itsanëjavabelia petsijamatabëjonexa penacueraevetsinexa bajaraponëjavata. Itsa apo caxitajarabi ponëjavabelia tsijamatabëjonejtsia, nexata dovathi jamatabëjumaitsi: <sup>44</sup>“Naviatsianajë meta icatsia tajabomijavabelia, paboverena pitsapajë,” jamatabëjai dovathi, ponëjavaverena pitsapa icatsia petsijamatabëjonexatsi. Dovathi baja caevëa itsa naviarena, caxitajaraba peyajavaponaponaenëmitsi. Nexata peyajavaponaponaenëmitsi pejamatabëëthëto, dovathi tane bepënësajinecaebo, bepënëxaniavaetetsibo, bepiracajuetetsibo. <sup>45</sup>Nexata dovathi icatsia sivapona peyajavapatsinexarena itsadovathivi, siete ponëbeje. Bajarapadovathivi bitso piacujirubejevi copiaya padovathi matatoxenetsia. Daxita bajarapadovathivi pebi tsijamatabëjunuatsi peyajavaponaponaenexa. Belia jane baja pebi dovathivi bitso bejiobiaexanatsi. Copiaya abaxë caenë itsa tsijamatabëecatsi pacuenia bejiobiaexanabiabatsi, matatoxenetsia bejiobiaexanatsi. Bajara pijinia pacuenia tocopiapatsianatsi pamonaë aeconoxae jinavanapa, piacujirubejevi, jai Jesús fariseovijavabelia, judíovi pecujarubivijavabelia ata.

**Pacuenia Jesús pejuyapijivi, pena yajava, nubena bojumavelia yabara pelivaisi**

*(Mr 3.31-35; Lc 8.19-21)*

<sup>46</sup> Jesús abaxë jivi livaisi itsa tsipaeba bo ënëtuatuajëalia, pata Jesús pejuyapijivi, pena yajava. Nexata bojumavelia nubena bajarapamonae. Jamatabëbarëcuaiçuaiçuaisi picani Jesús. <sup>47</sup>Nexata itsajivi Jesús tsipaebatsi.

—Patajatuxanenë, ena raja, nejuyapijivi yajava, nuca bojumaverena. Bajarapamonae pina jitsipa pecabarëcuaiçuaiçuaiçuaisi Jesús.

<sup>48</sup> Nexata Jesús jumaitsi petsipaebijivitsijavabelia:

—¿Detsa pitsijamatabëcuenevi taena, tajuyapijivinu? jai Jesús.

<sup>49</sup> Nexata Jesús pecobeta itaropita pijajivi. Jumaitsi petsipaebijivitsijavabelia:

—Mara jane pamonaë taenajivije, tajuyapijivinu. <sup>50</sup>Tsipaji raja pajivi exana taxa, athëbëtatsia peecaenë, pitorobicueniatsi, bajarapajivi cajena tajuyapijinë, tajuyapijiva, taenanua, jai Jesús petsipaebijivitsijavabelia.

**Pacuenia Jesús jivi livaisi tsipaeba pabi peubinë pelivaisicuenia yabara pelivaisi**

*(Mr 4.1-9; Lc 8.4-8)*

**13** Jesús baja itsa najumevereta jivijavabelia livaisi petsipaebijava, pitsapa baja bajarapabovecua. Pona baja itsajavabelia. Nexata Jesús ecojopa pucaxaneto itapata. <sup>2</sup>Nexata puçaitapata jivi ayabitsaëtoxaneto Jesús itaxutuanacaetuatatsi.

Nexata Jesús runareca jera ënëabereca. Ecareca jera ënëtareca. Daxita jivibitsaë-toxaneto nubena tajetabovelía. <sup>3</sup>Nexata Jesús daxitacuene livaisianë tsipaeba jivijavabelía. Jesús jumai tsaponae bajarapamonaejavabelía mapacueniaje:

—Peubinë pona pabiabelía peubinexa. <sup>4</sup>Nexata itsa pata pabita, peubixu pexucayajabajarabícuenía ubanajetaruca. Pexucayajabajarabijavata itsaxu othopa pabi tuatujëjáva penajetarucaenamutojumata. Nexata bajarajota pata baratsui. Xane bajarapaxumi juvinejeva. <sup>5</sup>Itsaxu pijinia othopa ibopananëjumata, itsajota bitso ira apo aitayaë. Nexata bajarapaxu bepíjía juva. Tsipaji bitso ira apo aitayaë. <sup>6</sup>Nexata icotía bitso itsa ataju, nexata bajarapaxu juvi ata, tsaquenapona. Tsipaji irabereca bitso apo atabunepepiareca. <sup>7</sup>Itsaxu pijinia othopa xanëëbacabomijavata. Nexata peubixu xanëëbotonë caecuenía itsa yajavajuva, bitso xanëëbotonë matacënënatssi peubijavami. <sup>8</sup>Itsaxu pijinia othopa pexaniairata. Bajarapaxu itsa juva, vitsaba. Xaniavaetsía nacuíta. Itsabotonë capítsapa cien paxutoyobeje tsaponae. Itsabotonë capítsapa sesenta paxutoyobeje tsaponae. Itsabotonë capítsapa treinta paxutoyobeje tsaponae. <sup>9</sup>Pajivi jamatabënejumeyapëtane patacatsipaebilivaisi, nenamuxunaevetsi xaniavaetsía, jai Jesús bajarapalivaisi petsipaebivijavabelía.

**Pacúene yabara Jesús jivijavabelía livaisi  
tsipaeba ëcomparacióncuenía yabara pelivaisi**

*(Mr 4.10-12; Lc 8.9-10)*

<sup>10</sup> Jesús pijajivi imoxoyotatsi. Nexata Jesús pijajivi jumaitssi Jesúsjavabelía:

—Patajatuxanenë, jivijavabelía livaisi itsa tsipaebame, ¿detsa xuajítsía tsipaebame ëcomparacióncuenía? jai Jesús pijajivi.

<sup>11</sup> Nexata Jesús jumaitssi pijajivijavabelía:

—Paxamë rabaja xaniavaetsía Dioso pacayapëtaeyaexana Dioso papijajivimë papecaevetsijava. Itsiata itsamonae apo yapëtae bajarapacúene. <sup>12</sup>Pajivi xaniavaetsía nejumeyapëtane tatsipaebilivaisi, bajarapajivi icatsía itsalivaisi pematatsënëa Dioso yapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa tatsipaebilivaisi, bajarapajivi xuayovajëto jumeyapëtane picani, nacofënët-siana. <sup>13</sup>Bajaraxuata livaisi itsa tsipaebajë bajarapamonae, ëcomparacióncuenía tsipaebajë. Nexata bajarapamonae tae ata Dioso pesaëta pinijicúene taexanaejava, itsiata apo yapëtae pajamatabëcúene yabara exanajë pinijicúene taexanaejava. Namuxunaevetsi ata tatsipaebilivaisi, itsiata apo jumeyapëtae pajamatabëcúene xaina tatsipaebilivaisi. <sup>14</sup>Bajarapacúenia apo jumeyapëtae tsipaji jane baja tocopiapatatsi pacúenia bajayata tajëvelía Diosojumepaebinëmi profeta Isafáspijinë yaquina. Dioso pejumaitssijava apo tanejumeyapëtaevinexa yabara, bajayata profeta Isafáspijinë peyaquinaelivaisita jumaitssi mapacueniaje:

Bajarapamonae picani jumetaena. Itsiata apo jumeyapëtae tsane xua yabara tsipaebianatsi. Bajarapamonae taena picani. Itsiata apo yapëtae tsane pajamatabëcúene xaina petaejava. <sup>15</sup>Bajarapamonae ajamatabëcúenetaja tsane. Bajaraxuata benamuxuacabiaya pejinavanapaevi tsane. Benaitaxutotsaquebiaya pejinavanapaevi tsane. Itsa bajarapacúenia apo itsipae, nexata yapëtaejitsipa pajamatabëcúene xaina xua taena. Jumeyapëtaejitsipanua palivaisi jumetaena. Pejamatabëëthëtojavavetsina jumeyapëtaejitsipa. Nexata xanëjavaberena najamatabëcúenepënëyorotsipa perujumatabëcúenevecua. Nexata xanë jamatabëcúene xanepanaeyaexanaejitsipajë,

jai bajayata tajëvelia Isaiáspijinë peyaquinaelivaisita xua yabara tsipaebajë bajaramonae apo tanejumeyapëtaejavanexa yabara.

<sup>16</sup>Itsiata baitsi jane paxamë baja pajamatabëcuenebarëyamë. Tsi-paji payapëtaneme pajamatabëcuene xaina xua pataneme. Pajumeyapëtanemenua pajamatabëcuene xaina palivaisi pajumetaneme. <sup>17</sup>Xaniajanë pacuenia pacatsipaebi-jitsiatsi. Bajayatami ayaibitsaëto profetavimi necopiaevetavanapa tanetaenexa picani tapatsijavatsica. Itsamonae ata aneconijibia pejinavanapaevi Dioso pitabarata, necopiaevetavanapa picani tanetaenexa tapatsijavatsica. Itsiata apo netaenejeva, daxita bajarapamonaemi tëpa baja. Jamatabëjumetaeyabiabanua picani palivaisianë baja aeconoxae paxamë pacatsipaebaponatsi. Itsiata apo jumetaenejeva bajarapalivaisianë, bajarapamonaemi tëpa baja, jai Jesús pijajivijavabelia.

**Pacuenia Jesús yapëtaeyaexana pijajivi pajamatabëcuene xaina palivaisi tsipaeba peubinë pelivaisicuenia yabara pelivaisi**

*(Mr 4.13-20; Lc 8.11-15)*

<sup>18</sup>Icatsia Jesús jumaitsi pijajivijavabelia:

—Xaniavaetsia panenamuxunaevere panejumeyapëtaenexa pajamatabëcuene xaina palivaisi pacatsipaebatsi pabita peubinë pelivaisicuenia. <sup>19</sup>Pamonae jumetae ata Dioso pejumelivaisi, itsiata itsa apo jumeyapëtae pejamatabëëthëtota, bajarapamonae bepiothopaexu pabi tuatuajëjava penajetarucaenamutojumata. Nexata najetaruca dovathi. Nexata bajarapamonae tsijamatabëjuvinejevatsi, dovathi vecuapitatsi bajarapalivaisimi, petsijamatabëubilivaisimitsi. <sup>20</sup>Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Nexata picani bajarapalivaisi barëyaya jumecovënëta. <sup>21</sup>Itsiata baitsi jane pacuenia irabereca apo atabunepiariaca paxu othopa ibopananëjumata, nexata nabijiana, bajara tsijamatabëcueneitsitsi bajarapamonae Dioso pitorobilivaisi. Tsi-paji pepacuene pejamatabëëthëtovetsina apo jumecovënëtsi bajarapalivaisi. Nexata apo ajamatabëcuenesaë tsavanapae bajayajebi pejumecovënëtsinexa bajarapalivaisi. Nexata itsa tocopiapatatsi daxita petoayapëbejecuenetsi, itsa yalivaisibatsinua Dioso pitorobilivaisi yabara, nexata pejumecovënëtsijava bajarapalivaisi bepijia copaba. Pevajënaeyabelia apo jumecovënëtavanapae. <sup>22</sup>Pacuenia pijinia paxu othopa xanëebacabomijavata, itsa juva, bitso matacënënatsi xanëebotonë, bajara tsijamatabëcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. Itsiata baitsi jane bitso jamatabëcueneenatsi mapanacuapijicue yabaraje. Tsi-paji najamatabëxaina ayajava palata pexainaenexa. Nexata pijacuata najamatabëcueneyamaxëitojoroba. Bajaraxuata Dioso pitorobilivaisi apo tovitsabitsi pejamatabëëthëtota. Nexata pacuenia itsi pabita piacuaijibibotonë, bajara itsi bajarapamonae. Tsi-paji Dioso xaniavaetsia apo tojinavana-pae. <sup>23</sup>Pacuenia pijinia itsi paxu othopa pexaniairata, bajara tsijamatabëcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Jumeyapëtanenua. Nexata pevajënaeyabelia tsijamatabëcuenevitsabaponatsi Dioso pitorobilivaisi. Nexata pacuenia peubijava capitsapa itsabotonë cien paxutoyobeje tsaponae, itsabotonë sesenta paxutoyobeje tsaponae, itsabotonë treinta paxutoyobeje tsaponae, bajara tsijamatabëcueneitsitsi bajarapamonae Dioso pitorobilivaisi, jai Jesús pijajivijavabelia.

### **Pacuenia peubijava tuatuajëa piabejjava juva yabara pelivaisi**

<sup>24</sup> Dioso apo pejumecovënëtsivi, pamonaenajinavanapa Dioso pejumecovënëtsivijavata, itsamatacabi Dioso naneconitsiaexanaena. Nexata jivi peyapëtaenexa bajaramonaen Dioso penaneconitsiaexanaejavanexa, Jesús comparacióncuenia livaisi tsi-paeba jivi ayaibitsaëtoxanetojavabelia. Jesús jumaiti mapacueniaje:

—Mara pacuene jëpaje Dioso pijajivi pevetsijavaje. Pabi pexainaenë, ëpexaniaviriatrigoxu uba pijapabita. <sup>25</sup> Itsiata baitsi jane daxitajivi pemajitsijavata meravi, pabi pexainaenë pijavajabitsaënë tojunuatsi pijapabita. Nexata toubatsi trigo tuatuajëjava pibisiavirijava, betrigobotonë pecataejava. Bajaraxuacujinae vemaxëpona baja. <sup>26</sup> Nexata trigoxu juva. Vitsaba. Itsa baja trigobotonë namatonota, nexata matapania bajarajota nayapëtane pibisiavirijava yajava penamatonotsijava. <sup>27</sup> Nexata pabi pexainaenë pijajivi pata petsipaebinxatsi. Pabixainaenë pijajivi jumaiti: “Nijapabita ubame ëpexaniaviriatrigoxu. ¿De tsaeta pacuenia pitsapa pibisiavirixu pibisijava peyajavajuvixaxa trigoxava?” jai pabixainaenë pijajivi. <sup>28</sup> Nexata pabixainaenë jumaiti pijajivijavabelia: “Tajavajabitsaënë raeta bajaraxua uba,” jai. Nexata pabixainaenë pijajivi jumaiti: “¿Jitsipame tsaja bajaraxua pataxunaejava?” jai. <sup>29</sup> Itsiata baitsi jane pabixainaenë jumaiti pijajivijavabelia: “Jume. Tsi-paji panexunaejavata payavaxunaejitsipame trigobotonë. <sup>30</sup> Copatsianatsi abaxë penacuaitsinexa. Nexata penotsimatacabi itorobianajë tanetonotsivi copiaya pecaetuatsinexa piabejjava. Pepacunanë exanaena. Bajaraxuacujinae bajaraxua tajuitsiana. Bajaraxuacujinae ëtrigoxu netonotsiana taetabiabibota tanetoetsinexa,” jai pabixainaenë pijajivijavabelia, jai Jesús jivi ayaibitsaëtoxanetojavabelia.

### **Pacuenia mostazaxutoyo pejuvicujinae, mostazanae bepijia vitsaba yabara pelivaisi**

*(Mr 4.30-32; Lc 13.18-19)*

<sup>31</sup> Jesús livaisi tsipaeba comparacióncuenia jivi ayaibitsaëtoxanetojavabelia. Jumaiti mapacueniaje:

—Dioso raja pijajivi pevetsijava maitsije. Pacuenia mostazaxutoyo pejuvicujinae, bepijia vitsaba mostazanae, bajara pijinia itsane Dioso pijajivi ata. Bepijia Dioso pijajivi ayaibitsaëtoxaneto naexanaena. Pabi pexainaenë mostazaxu uba pijapabita. <sup>32</sup> Mostazaxu raja bitso tsiquirixutoxi daxita peubixuvecua. Itsiata baitsi jane mostazanae itsa juva, bepijia vitsaba. Caevaita pinijinae naexana itsapeubinaenë matatoxenetsia. Nexata baratsui ata pata bajaraponaeta. Pematapanenë exana bajaraponaemaxërananëjava. Bajara pijinia itsane jivi ata. Bepijia ayaibitsaëto Dioso pijajivi naexanaena, jai Jesús jivi ayaibitsaëtoxanetojavabelia.

### **Pacuenia pan pexanaematabënexa, levaduravënëjava fufunaeyaexana yabara pelivaisi**

*(Lc 13.20-21)*

<sup>33</sup> Jesús livaisi tsipaeba comparacióncuenia jivi ayaibitsaëtoxanetojavabelia. Jumaiti mapacueniaje:

—Dioso raja pijajivi pevetsijava maitsije. Pacuenia pan pexanaematabënexa, levaduravënëjava yacaëjëpa daxita panmatabëjava, bajara pijinia itsi Dioso pijajivi pevetsijava. Yacaëjëpaena daxitanacuanëjava. Petiriva pan pexanaenexa,



acueyabi patarroxanetobeje trigobenonë matajërëaba levaduravënëjavata. Nexata pan pexanaematabënexa, ayaimatabë ata, levaduravënëjava pijinia tsiquirijavayo ata, itsiata levaduravënëjava yacaëjëpa daxitamatabëjava. Nexata levaduravënëjava fufunaeyaexana daxita panmatabënexa. Bajara pijinia itsi Dioso pijajivi pevetsijava. Yacaëjëpa daxitanacuanëjava Dioso pijajivi pevetsicuene, jai Jesús jivi ayaibitsaëtoxanetojavabelia.

### **Pacuenia Jesús jivi livaisi tsipaebabiaba comparacióncuenia yabara pelivaisi**

*(Mr 4.33-34)*

<sup>34</sup> Jesús itsa tsipaeba jivijavabelia Dioso pijajivi pevetsijavanexa, livaisianë tsi-paebapona ëcomparacióncuenia. <sup>35</sup> Bajarapacuenia Jesús jivi livaisianë itsa tsipaebapona ëcomparacióncuenia, tocopiapatatsi jane baja pacuenia Diosojumepaebinë profetanë bajayata tajëvelia yaquina Jesús petsipaebaponaejavanexa yabara. Jesús comparacióncuenia jivi livaisi petsipaebaponaejavanexa yabara, profetanë peyaquinaebaxutota jumaitsi mapacueniaje:

Jivi itsa tsipaebajë, livaisi tsipaebianajë comparacióncuenia. Tsipaebianajë pitsicuene Dioso nacua pexanaejavaveliacujinae itsajivi ata abaxë apo yapëtae, jai tajëvelia bajayata profetanë peyaquinaebaxutota Jesús jivi livaisi comparacióncuenia petsipaebaponaejavanexa yabara.

### **Pacuenia Jesús pijajivi yapëtaeyaexana pajamatabëcuene xaina palivaisi tsipaeba trigobotonë tuatuajëa pejuvijava pelivaisicuenia yabara pelivaisi**

<sup>36</sup> Jesús naviabiaexana jivi ayaibitsaëtoxaneto. Bajaraxuacujinae Jesús boya joneya. Bajarapabota Jesús pijajivi imoxorenatsi. Nexata Jesús pijajivi jumaitsi:

—Patajatuxanenë, panetsipaebare pajamatabëcuene xaina palivaisi tsipaebame jivi ayaibitsaëtoxanetojavabelia. Baitsi palivaisi tsipaebame trigobotonë tuatuajëa pejuvijava pelivaisicuenia, jai Jesús pijajivi.

<sup>37</sup> Nexata Jesús jumaitsi pijajivijavabelia:

—“Ponë uba pexaniaviriatrigoxu,” itsa janë, xanë rabaja, Daxitajivi Pematapijinënë, yabara nayabarajumaitsinë. <sup>38</sup> “Pijapabi,” itsa janë, mapanacua yabaraje jumaitsinë. “Pexaniaviriatrigoxu,” itsa janë, Dioso pijanacuayabetsia pejonevinexa yabara jumaitsinë. “Pibisiavirijava pejuvijava,” itsa janë, dovathi pijajivinexa yabara jumaitsinë. <sup>39</sup> “Pijavajabitsaënë, ponë pabi pexainanë toubatsi pibisiavirijava pejuvinexa,” itsa janë, dovathi yabara jumaitsinë. “Penotsimatacabi,” itsa janë, mapanacua peverevereaejavanexa yabara jumaitsinë. “Tanetonotsivi itorobianajë,” itsa janë, ángelevi yabara jumaitsinë. <sup>40</sup> Nexata pacuenia piabejejava caetuaata pexuabinexa isotojavabelia, bajara pijinia pacuenia tocopiapatsianatsi dovathi pijajivi pexuabinexatsi isotojavabelia mapanacuaje peverevereaeatacabi. <sup>41</sup> Bajarapamatacabi xanë, Daxitajivi Pematapijinënë, itorobianajë tajaángelevi taevetsinacua tanetovecuajutsinexa daxita pamona pibisiacuene pexanabiabivi. Pamona ata itsamonaejavabelia pibisiacuene exanaeyaexana, bajarapamona ata taevetsinacua netovecuajutsiana tajaángelevi. <sup>42</sup> Bajarapamona xuabianatsi infiernojavabelia. Bajarajota nuena. Navonosiniana bitso penavixaetaexae. <sup>43</sup> Pamona jume-covënëtsiajinavanapa Dioso pitorobicueniatsi, bajarapamona perabënitayotsiana taxa Dioso pijanacuatatsia. Pacuenia matacabipijjuameto naitayota, bajarapacue-

nia perabənaitayotsiana. Pajivi jamatabənejumeyapētane, patacatsipaebilivaisi nenamuxunaevetsi xaniavaetsia, jai Jesús pijajivijavabelia.

**Pacuenia pebi caxitajaraba bitso penamatamotsijavanē, itsanē irata pemēthētetsijavami, yabara pelivaisi**

<sup>44</sup> Icatsia Jesús comparacióncuenia jumaitsi pijajivijavabelia:

—Pebi irata mēthēteta bitso penamatamotsijavanē. Bajaraxuanē bitso xanepana. Nexata juya itsanē bexējajavabelia bajaraxuanē caxitajarabeta irata. Nexata abaxē bajaraponē apo jutsi bajaraxua. Abaxē saya mataaceteta bajarajota. Nexata jamatabēcuenebarēyaya pona pijaboyabelia. Nexata xuacujinae bajaraponē canajeta daxita pexinaejaxaximi. Nexata bajaraponē yacomuata bajarapaira. Tsipaji xua bajaraponē caxitajarabeta irata, bitso xanepana. Bitso namatamota. Nexata pacuenia bitso xanepana, bitso namatamotanua, xuanē bajaraponē bajarapaira yacomuata, bajara pijinia itsi Dioso pijajivi pevetsijava. Bitso xanepana. Bitso namatamotanua, jai Jesús pijajivijavabelia.

**Perlavēnējava bitso penamatamotsijava yabara pelivaisi**

<sup>45</sup> Icatsia Jesús jumaitsi pijajivijavabelia:

—Pacuenia itsi bitso pexaniaviriajava perlavēnējava, bajara pijinia itsi Dioso pijajivi pevetsijava, bitso pexaniacuene. Perlavēnējavanē pecanajetarutsinē jaitapona pexaniaviriajavanē juya pecanajetaponaenexa. <sup>46</sup> Nexata itsa caxitajarabaxuaba pexaniaviriaperlajava, bitso penamatamotsijava, pona pijaboyabelia pecanajetsinexa daxita pexinaejaxavami. Nexata comuata bajarapaperlajava, jai Jesús pijajivijavabelia.

**Dujuai peyamatajucaejava yabara pelivaisi**

<sup>47</sup> Icatsia Jesús comparacióncuenia jumaitsi pijajivijavabelia:

—Dujuai peyamatajucaejavata, pibisiaviriadujuai itsa yamatajuta, bavecuatsatapona. Bajara pijinia itsi Dioso pijajivi pevetsijava.

Dioso pijajivi vecuatsatapona apo pejumecovēnētsivitsi pexuabinexa infiernojavabelia. Dujuai peyamatajucaejava manuameneta copareca. Nexata daxitaviriadujuai yamatajuta. <sup>48</sup> Itsa vēnēca bajaraxua, nexata juta tajetabojavabelia. Bajarajota itapetapona pexaniaviriadujuai. Pexaniaviriadujuai jebapona bemapirejavabelia. Pibisiaviriadujuai pijinia xuabapona. <sup>49</sup> Bajara pijinia itsane nacua pevereverecaematacabi. Angelevi ponaena. Nexata pibisiacuene pexanaevi saicaya tsatsianatsi pexuabinexatsi. Dioso pijinia pitorobicueniatsi pejinavanapaevi saicaya tsatsianatsi pecapanepaenexatsi. <sup>50</sup> Nexata pibisiacuene pexanaevi xuabianatsi infiernojavabelia. Bajarajota nuena. Navonosiniana bitso penavixaetaexae, jai Jesús pijajivijavabelia.

**Bitso penamatamotsijavanē, pejanajavanē, perujujavanē ata, yabara pelivaisi**

<sup>51</sup> Jesús yanijoba pijajivijavabelia.

—¿Panėjumeyapētaneme tsabaja daxita xua yabara pacatsipaebatsi? jai Jesús. Nexata Jesús pijajivi jumaitsi:

—Jājā, pacajumeyapētanetsi rabaja, jai.

<sup>52</sup> Nexata Jesús jumaitsi pijajivijavabelia:

—Ponë judíovi pecujarubinë ata, itsa nejumecovënëta, bajaraponë ata tajajivitonë tsane. Nexata pacuenia bo pexainanë pijabovëcua jutapona bitso penamatamotsi-javanë, pejanajavanë, perujujavanë ata, bajara pijinia jamatabëcuenëtsi tsane ponë nejumecovënëtsiana, judíovi pecujarubinë ata. Tsipaji bajaraponë yapëtaena pexanialivaisianë jivijavabelia petsipaebinexa. Bajaraponë yapëtaena xanë talivaisianë, pejanalivaisianë, perujulivaisianë ata, jai Jesús pijajivijavabelia.

**Pacuenia Jesús naviata pijanacuayabelia,  
Nazaret tomarabelia, yabara pelivaisi**

*(Mr 6.1-6; Lc 4.16-30)*

<sup>53</sup> Jesús baja penajumeveretsicujinae jivijavabelia livaisianë petsipaebijava comparacióncuenia, pona baja icatsia itsajavabelia. <sup>54</sup> Jesús baja naviata pevitsabinacuayabelia. Nexata Jesús pevitsabinacuata taxuxuaba livaisi petsipaebijava judíovi penacactuatabibota. Nexata pejumetaevitsi sivajamatabëcuenenabena-jacatsi. Nexata bajarapamonae Jesús jamatabëcuenëabiatanetsi. Bajarapamonae Jesús yabara najumaitsi mapacueniaje:

—¿De tsaeta jota maponë nacujaruba peyapëtaenexa mapalivaisije? ¿De tsaeta pacuenia caëjëpatsi mapacuenia Dioso pesaëta pinijicuene pexanaenexaje? <sup>55</sup> Maponëje vaxaitsiyajuvënënë, carpinteronëmi pexënato. Maponëje María pexënato. Bajaraponë pejuyapijivi, Santiago, José, Simón, Judas. <sup>56</sup> Papatiriavi ata vajatomarata jinavanapa, maponëje pejuyapijivi. ¿Detsa verena nexata capitsapa palivaisianë nacatsipaebapona maponëje? najai bajarapamonae Jesús yabara.

<sup>57</sup> Nacaetomarapijivixae, bajarapamonae Jesús apo jumexaniataetsi. Nexata Jesús jumaitsi bajarapamonaejavabelia:

—Bajara maitsabiabije. Diosojumepaebivi profetavi itsanacuapijivi yaiyataeyabiabatsi. Itsiata pijanacuapijivi, pijamonae ata, apo yaiyataeyabiabitsi, jai Jesús pijatomarapijivijavabelia.

<sup>58</sup> Jesús pevitsabitomarata pejinavanapaevi apo jumecovënëtsitsi. Bajaraxuata Jesús Dioso pesaëta pinijicuene pexanaejava bajarapatomarata bitso apo tsitaexanae.

**Pacuenia Juanpijinë jivibautisabinëmi beyaxuabatsi yabara pelivaisi**

*(Mr 6.14-29; Lc 9.7-9)*

**14** Herodes, Galileanacua pevetsinë. Nexata Herodes Jesús vënëlivaisitanetsi Dioso pesaëta pinijicuene pexanaponaejava. <sup>2</sup> Nexata Herodes pijajivijavabelia jamatabëcuenenavëxaniabiaya jumaitsi Jesús yabara:

—Juanpijinëmi raeta jivibautisabinëmi icatsia asaë petëpaecujinae. Bajaraxuata caëjëpatsi Dioso pesaëta pinijicuene pexanaenexa, jai Herodes Jesús yabara.

<sup>3</sup> Bajarapacuenia Herodes jumaitsi tsipaji abaxë Juanpijinë itsa asaë, Herodes pijajivi, vajabitsaëvi, itoroba Juanpijinë pevaetabinexatsi. Nexata vajabitsaëvi Juanpijinë cobecëtsiaya caponatsi penaneconitsivi pejebabiabiboyabelia. Bajara-pacuenia Herodes pijajivi itoroba Herodes pijava, Herodíasva, pejamatabëcueneta. Herodíasva picani copiata pita Felipe, Herodes pejuyapijinë. Nexata Herodes pejuyapijinë pijava yacajërëta. <sup>4</sup> Nexata Herodes pejuyapijinë pijava peyacajërëtsixae, Juanpijinë abaxë itsa apo vaetabitsi, Herodes muxujioba. Juanpijinë jumaitsi Herodesjavabelia:

—Acuenebi raja nejuyapijinē pijava nepitsijava, jai Juanpijinē Herodesjavabelia.

<sup>5</sup>Bajarapacuenia Juanpijinē Herodes pemuxujibixae, Herodes picani jamatabēbeyaxuabatsi Juanpijinē. Itsiata baitsi jane abaxē apo beyaxuabitsi. Tsipaji Herodes cujunava jivi. Daxitajivi Juanpijinē yapētanetsi Diosojumepaebinecuene.

<sup>6</sup>Nexata Herodes itsa najamatabēnapita penaexanaematacabi, fiesta exana. Herodes junata jivi ayaibitsaēto. Nexata bajarapafiestamatacabi pejonēyo, pijava pexēnatoyo, pijacujirucuenia caevayo yavajiba daxita Herodes pejunatsivi pitabarata. Nexata Herodes bitso barēitajitsipa peyavajibijava pejonēyo. <sup>7</sup>Nexata Herodes najumecapanepaeya pexaniajaijumeta jumaitsi pejonēyojavabelia:

—Xua jitsipame nevajētsianame. Nexata itsa nevajētsianame, itsacuenejava ata carajutsianatsi, jai Herodes najumecapanepaeya pejonēyojavabelia.

<sup>8</sup>Nexata bajarapovayo pena pitorobicueniatsi jumaitsi mapacueniaje Herodesjavabelia:

—Nerajure platota Juan jivibautisabinē pematabocoto, jai bajarapovayo Herodesjavabelia.

<sup>9</sup>Bajarapacuenia Herodes pejonēyo itsa jumaittsi, Herodes bejamatabējiobi tsanjetsireca. Herodes nexata acuenebi: “Jume,” pejaijava. Tsipaji baja najumecapanepaeya jumaitsi pejonēyojavabelia pexaniajaijumeta daxita Herodes pejunatsivi pitabarata. Nexata Herodes jejai. <sup>10</sup>Nexata Herodes pijajivi, vajabitsaēvi, itoroba penaneconitsivi pejebabiabiboyabelia pevēsicutaxuabinexatsi Juanpijinē.

<sup>11</sup>Bjaraxuacujinae vajabitsaēvi Juanpijinē pematabocoto tocaparenatsi platota. Nexata Herodes rajutsiaexana pejonēyojavabelia. Bajarapova juya pena rajuta. Nexata baja Herodíasva yapētane capanepaeya baja Juanpijinē pebeyaxuabijavatsi.

<sup>12</sup>Nexata Juanpijinē pijajivi parena itsajota Juanpijinē boca petēpaenē. Pitatsi petēpaenē. Nexata Juanpijinē pijajivi mēthētatsi. Bjaraxuacujinae bajarapamonae pona Jesúsjavabelia petsipaebinxaxa Juanpijinē pebeyaxuabijavatsi.

### **Pacuenia Jesús pexaejava rajuta cinco mil ponēbeje yabara pelivaisi**

*(Mr 6.30-44; Lc 9.10-17; Jn 6.1-14)*

<sup>13</sup>Jesús vënëlivaisitane Juanpijinē pebeyaxuabijavatsi. Nexata Jesús ēpijajivi jerata barēpona itsabelia ajibi jivi. Itsiata baitsi jane jivi ayaibitsaētoxfaneto yapētane itsabelia Jesús pona. Nexata pijatomaranē vecuapona. Matatsēnēa najetarubena pepējaisivitsi Jesús. <sup>14</sup>Itsa Jesús nonotajuna jeravecua, tane jivibitsaētoxfaneto. Nexata Jesús itaxutobejiobiatane bajarapamonae. Tocapatatsi piavitanevi. Nexata Jesús tojamatejemayaexana piavitanevi. <sup>15</sup>Itsa baja caniviyo tsaponae, Jesús pijajivi cujibarenatsi. Nexata Jesús pijajivi jumaitsi:

—Caniviyo rabaja bitso. Majotaje ajibi pexaejava. Tsipaji itsajivi ata pijabo apo xainae. Itorobare baja jivi peponaenexa tomaraxijavabelia pecomuacaenexa pexaejava, jai Jesús pijajivi.

<sup>16</sup>Nexata Jesús jumaitsi pijajivijavabelia:

—Apo beponae raja abaxē. Paxamē parajure pexaejava, jai Jesús pijajivijavabelia.

<sup>17</sup>Nexata Jesús pijajivi jumaitsi:

—Paxainajē saya cinco papanbēbeje, anijanēyobeje dujuainēyobeje yajava, jai.

<sup>18</sup>Nexata Jesús jumaitsi pijajivijavabelia:

—Panetocarenamēre pan maberanaje, dujuainēyobeje yajava, jai Jesús.

<sup>19</sup> Nexata Jesús itoroba daxitajivi penaenexa ponajavata. Nexata Jesús pita cinco papanbêbeje, anijanëyobeje dujuainëyobeje yajava. Athëbëa benaëcotsia. Jumaiti Diosojavabelia:

—Pexaniacuene panetoexaname. Panerajutame pataxaejava, jai Jesús Diosojavabelia.

Bajaraxuacujinae Jesús pan epatsicacapona. Pijajivijavabelia rajuta bajarapapan. Nexata juya Jesús pijajivi tsicobetsana jivijavabelia. <sup>20</sup> Daxita xaniavaetsia nabane. Bajaraxuacujinae Jesús pijajivi caetuata pan, dujuai yajava, jivi peyajuvënëcopabejebijavanë. Nexata vënëba doce xuabeje bemapirecuenia pexanaejavanë. <sup>21</sup> Pamonae pexaejava xane, ayaibitsaëtoxaneto. Cinco mil ponëbeje namataëjëtatsi xaniavaetsia. Petiriavi, pejevaxi ata, apo namataëjëtsitsi.

### **Pacuenia Jesús mene itaboxoya najetaruca yabara pelivaisi**

*(Mr 6.45-52; Jn 6.16-21)*

<sup>22</sup> Jesús jivi ayaibitsaëtoxaneto pexaejava perajutsicujinae, Jesús pijajivi bepíjia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Nexata Jesús abaxë caenë nacopatanuca bajarajota. <sup>23</sup> Itsa baja jivi napëvereta penaviabijava, Jesús junaya petsutojumabetsia caenë pevajëtsinexa Diosojavabelia. Nexata Jesús yameravibatsi bajarapatsutojumatatsia. <sup>24</sup> Bajarapaepatota Jesús pijajivi jerata epatua nabuatapona pepatsinexa puca itsapanabelia. Nexata Jesús pijajivi pevajënaeverena joviboxaneto najetaruca, malataca bitso ayai. Nexata malataca mene epabajarabapona jera ënëaberena. Nexata mera vënëcapona jera ënëaberena. <sup>25</sup> Bajaraxuacujinae bajayacunua, ajena mat-acabijitsia, Jesús pijajivi pecovëvelia imoxoyotanjetaruca. Jesús najetaruca mene itaboxoya. <sup>26</sup> Jesús pijajivi itsa tanetsi mene itaboxoya penajetarucaejava, nabena-jaca. Vavajai pecajunavi.

—¡Petëpaenë raeta pejumape najetaruca! jai Jesús pijajivi.

<sup>27</sup> Nexata Jesús jumaiti pijajivijavabelia:

—Xanë raja. Pëtsa panecujunavame. Pajamatejemamëre saya, jai Jesús pijajivijavabelia.

<sup>28</sup> Nexata Pedro jumaiti Jesúsjavabelia:

—Tajatuxanenë, itsa pepacuene xamë, nexata nejunaremelia talianexa mene itaboxoyalia, xamëjavabelia, jai Pedro.

<sup>29</sup> Nexata Jesús jumaiti Pedrojavabelia:

—Renamëre baitsi baja, jai Jesús.

Pedro nexata jeravecu runareca meniabereca. Lia mene itaboxoyalia pepatsinexa Jesúsjavabelia. <sup>30</sup> Itsiata baitsi jane Pedro itsa tane jovibo piasaëjava, bitso kujunavataba. Nexata bubunanajereca. Pedro ajena bubunanajereca, vavajai.

—¡Tajatuxanenë, nevaetabare! jai Pedro.

<sup>31</sup> Bepíjia Jesús cobepitajaraba. Jumaiti Pedrojavabelia:

—Tsiquirijavayo saya nejumecovënëtame tacaevetsijava. ¿Detsa xuajitsia ne-jumeaebiataneme? jai Jesús.

<sup>32</sup> Nexata baja Jesúsbeje Pedrobeje jera ënëabelia itsa nonoliabeje, joviboxanetomi baja ajibi tsaxuabi. <sup>33</sup> Nexata daxita jerata peponaevi pematatabacabëta tonubena Jesús pitabarata. Jumaiti bajarapamonae:

—Xaniajai rabaja. Xamë Dioso pexënatomë, jai bajarapamonae Jesúsjavabelia.

**Pacuenia Jesús jamatejemayaexana piavitanevi  
Genesaret nacuata yabara pelivaisi**

(Mr 6.53-56)

<sup>34</sup> Jesús, pijajivi yajava, pata puca itsapanabelia. Pata Genesaret nacuata. <sup>35</sup> Genesaret nacuapijivi itsa yapëtanetsi Jesús cuene, nexata daxita bajarapanacuajava vajunupaebatsi pepatsijava. Nexata tocpatatsi daxita piavitanevi Jesús javaberena. <sup>36</sup> Piavitanevi pecapatsivi pinijicuenia jumai tsabiabi Jesús javabelia:

—Pexaniacuene bitso netoexanare. Tocopatsianame maponëje pecatojayatsinexa nenaxatatsijavacopia, jai tsabiabi.

Nexata daxita pamonae Jesús penaxatatsijavacopia tojayataponatsi, jamatejema tsaponae piavitanejavavecua.

**Pacuenia Jesús tsipaeba xua jivi jamatabëcuenebijianatsi yabara pelivaisi**

(Mr 7.1-23)

**15** Fariseovi, judíovi pecujarubivi yajava, pata Jerusalén tomaraverena. Bajarapamonae Jesús imoxoyorenatsi. Nexata bajarapamonae jumaiti Jesús javabelia:

<sup>2</sup>—Jesús, nijajivi naneconita Diosojavabelia. Tsipaji nijajivi apo jumecovënëtsi-ajinavanapae vajasalinaivi pijacuene. Nijajivi itsa xane pexaejava, xane anijatonë napëna nacobequiatsinejeva, jai bajarapamonae Jesús javabelia.

<sup>3</sup>Nexata Jesús jumaiti fariseovijavabelia, judíovi pecujarubivijavabelia ata:

—Paxamë apo pajumecovënëtsimë Dioso pitorobilivaisi saicaya vajasalinaivi pijacuene panecatsitecaenexa. <sup>4</sup>Dioso Moiséspijinëta penajumecopatsilivaisi jumaiti mapacueniaje: “Axa yaiyataema. Ena ata yaiyataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspijinëta penajumecopatsilivaisi. <sup>5</sup>Itsia ta baitsi jane paxamë jivi pamuxubijiapenatabiabame peyaiy-ataeyaniva paxajivi, penajivi ata. Paxamë jivijavabelia pajumaitimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipaemë neyavenonaejava, jumaitimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata acuenebi patacarajutsinexabeje,’ jamë tsane neyavenonaeyaniva,” pajamë tsabiabi jivijavabelia. <sup>6</sup>Nexata caranata Dioso pejumaitisijume: “Axa yaiyataema. Ena ata yaiyataema,” pejaijume jivi pejumecovënëtsijavami paxamë pacopatsiaexanaponame. Tsipaji paxamë patsipaebaponame saicaya vajasalinaivi pijalivaisi. <sup>7</sup>Paxamë saya jivi paneyamaxëitorobivi! Diosojumepaebiniëmi profeta Isaíaspijinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumaitisijava paxamë yabara, profeta Isaíaspijinë peyaquinaelivaisita jumaiti mapacueniaje:

<sup>8</sup>Bajarapamonae nejitsipaena saya pijumeta. Itsiata pepo tanejitsipaejamatabëcuene nevecuatajë tsane. <sup>9</sup>Saya baitsi bajarapamonae pijajumaitisita tsane: “Pacajitsipatsi,” nejai tsane itajara. Itsiata apo xaniajai tsane. Bajarapamonae saya jivi tsipaebaponaena pejamatabëcuene pijilivaisi. Pepo taitorobilivaisi apo tsipaebi tsane,

jai tajëvelia Isaíaspijinë

peyaquinaelivaisita Dioso pejumaitsijava paxamë yabara, jai Jesús fariseovijavabelia, judíovi pecujarubivijavabelia ata.

<sup>10</sup> Nexata icatsia Jesús junata jivi. Jumaitsi jivijavabelia:

—Panenamuxunaevere xaniavaetsia patanejumeypätaenexamë patacatsipaebilivaisi. <sup>11</sup> Xua jivi xane pecuibovojotota, pexaevajënaeya napëna anijatonë apo nacobequiatsi ata, apo jamatabëcuenebijianaetsi. Apo vënananeconitsi Diosojavabelia. Baitsi rajane xua jivi pecuibota pibisiacuenia cuaicuaijai, bajara jane xua jivi bajamatabëcuenebijianatsi, jai Jesús bajarapamonaejavabelia.

<sup>12</sup> Nexata Jesús pijajivi imoxoyorenatsi. Jesús pijajivi jumaitsi:

—Patajatuxanenë, ¿yapëtaneme tsabaja fariseovi pecabaraanaepanaejava itsa cajumetane bajarapacuenia nejumaitsijava? jai Jesús pijajivi.

<sup>13-14</sup> Nexata fariseovi yabara Jesús jumaitsi pijajivijavabelia:

—Panamuxujemare saya bajarapamonae. Bajarapamonae saya apo yapëtae. Bajarapamonae bepitatsëcënaevi. Nexata bepematacaponaevi pitatsëcënaevi pijinia. Pitatsëcënaenë itsa matacaponaejitsipa itsanë pijinia pitatsëcënaenë, nexata najujapoejitsiparecabeje mëthëxanetøjavareca. Pabita piabejjava itsa juva, nexata yatabutopaya jonatsi vajaveretsinexa. Bajara pijinia pacuenia taxa, athëbëtatsia peecaenë, verebiabianatsi daxita bajarapamonae, jai Jesús pijajivijavabelia fariseovi yabara.

<sup>15</sup> Pedro nexata jumaitsi Jesúsjavabelia:

—Patajatuxanenë, paneyapëtaeyaexanare pajamatabëcuene xaina palivaisi tsi-paebame jivijavabelia. Palivaisi baitsi jumaitsimë: “Xua jivi xane pecuibota, apo jamatabëcuenebijianaetsi,” jamë, jai Pedro Jesúsjavabelia.

<sup>16</sup> Nexata Jesús jumaitsi:

—¿Paxamë ata tsarovia abaxë apo panejumeyapëtaemë? <sup>17</sup> Daxitacuene xua jivi xane pecuibovojotota, junua pecotsorotubereca. Bajaraxuacujinae vecuapitsapatsi. <sup>18</sup> Baitsi rajane xua jivi pecuibuatsina pitsapa pecuaicuaijainexa pacuenia najamatabëxaina pejamatabëëthëtovetsina, bajara jane xua jivi jamatabëcuenebijianatsi. <sup>19</sup> Tsipaji rabaja jivi pejamatabëëthëtøjavavetsina pitsapa pibisiacuenenexa. Pitsapa jivi pebexuabijamatabëcueneenexa. Pitsapa pebi pijava pevecuanamatayajitsi jamatabëcueneenexa. Pitsapa petiriavijavabelia pebi penaperabëquenetsiatae jamatabëcueneenexa. Pitsapa penacobetoxotsijamatabëcueneenexa. Pitsapa itsamonae pexanaejava yabara najumetsënëtsiaya pepaebijamatabëcueneenexa. Pitsapa itsamonae yabara najumetsënëtsiaya pebaracuaicuaijai jamatabëcueneenexa. Daxita bajarapajamatabëcuene pitsapa jivi pejamatabëëthëtøjavavetsina. <sup>20</sup> Daxita bajarapajamatabëcuene jivi jamatabëcuenebijianatsi. Jivi raja pexaejava xae ata, anijatonë napëna nacobequiatsinejeva, apo jamatabëcuenebijianaetsi, jai Jesús pijajivijavabelia.

**Pacuenia Jesús itsanacuapijiva pexënatoyo  
tojamatejemayaexana yabara pelivaisi**

(Mr 7.24-30)

<sup>21</sup> Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Jesús baja pata bajarapanacuayabelia. <sup>22</sup> Nexata bajarapanacuata ponapona cananeaviriava. Bajarapova

apo judíoova. Bajarapova Jesúsjavaberena pata. Piniijumeta bajarapova jumaitsi Jesúsjavabelia:

—¡Petuxanenë, Davidpijinë pemomomë, nitaxutotsoniataema! Taxënatovayo dovathi yajavaponapona. Bitso bejiobiayaexanabiabatsi, jai bajarapova Jesúsjavabelia.

<sup>23</sup> Itsiata Jesús apo jumepitsi. Nexata Jesús pijajivi imoxoyorenatsi. Jesús pijajivi jumaitsi Jesúsjavabelia:

—Patajatuxanenë, ponaeyaexanare baja mapovaje. Bitso raxua nacapëvabanajetaruca, jai Jesús pijajivi.

<sup>24</sup> Nexata Jesús jumaitsi bajarapovajavabelia:

—Dioso baja cajena nitoroba tayavenonaenexa ëjudíoovi, Israel nacuapijivi, pamonae Dioso tane beoveja. Tsipaji bajarapamonae Diosovecua naxuabavanapa, jai Jesús bajarapovajavabelia.

<sup>25</sup> Itsiata bajarapova imoxoyorenatsi Jesús. Bajarapova Jesús yaiyataeya pematabacabëta nucajunua Jesús pitabarata. Nexata bajarapova jumaitsi Jesúsjavabelia:

—¡Petuxanenë, neyavenonare! jai.

<sup>26</sup> Nexata Jesús jumaitsi bajarapovajavabelia:

—Apo xanepanae copiaya xamë itsanacuapijivamë tacayavenonaenexa. Abaxë copiaya veyavenonajë tajanacuapijivi, judíoovi. Xamë copiaya itsa cayavenonaejitsipatsi, nexata pacuenia pejevaxi pexaejavaminexa yacajërëtsipajë tarajutsinexa avirixijavabelia, bajara itsinë tsipae, jai Jesús bajarapovajavabelia.

<sup>27</sup> Itsiata bailsi jane bajarapova ajumesaë tsaponae. Icatsia jumaitsi Jesúsjavabelia:

—Xaniajamë rabaja picani. Itsiata neyavenonare. Tsipaji avirixi ata baxane pexainanenëtsi pexaeyecaemesa bëxëpanareca piothopaepërë. Bajara pijinia pacuenia itsiata itsanacuapijiva atanë, neyavenonare, jai bajarapova Jesúsjavabelia.

<sup>28</sup> Nexata icatsia Jesús jumaitsi bajarapovajavabelia:

—¡Petiriva, bitso najamatabëcuenecopatame Diosojavabelia pecayavenonaenexa! Nexata pacuenia jumaitsimë, bajarapacuenia Dioso baja cajena catoexanaena, jai Jesús.

Bajarapaepatota bajarapova pexënatovayo Jesús pejamatabëcueneta tojamatejematsi baja pijabotalia.

### **Pacuenia Jesús jamatejemayaexana ayaibitsaëtoxfaneto piavitanevi yabara pelivaisi**

<sup>29</sup> Itsa panacuata eca Tiro tomarabeje Sidón tomarabeje, Jesús baja vecuapona. Nexata Jesús najetaruca Galilea pucaxaneto muxubërëa. Nexata Jesús petsutojumabetsia junaya. Nexata petsutojumatsia Jesús ecojopa. <sup>30</sup> Nexata jivi ayaibitsaëtoxfaneto pata Jesúsjavaberena. Tocapatatsi pejayuyajunaevi. Tocapatatsinua bitso pitaxutotsëcënaevi. Tocapatatsinua apo pecuaicuaijaiivi. Tocapatatsinua penabejenaevi. Tocapatatsinua ayaibitsaëtoxfaneto piavitanevi. Bajarapamonae tojebatsi Jesús pitabarata. Nexata Jesús jamatejemayaexana daxita bajarapamonae.

<sup>31</sup> Nexata jivi jamatabëcuenenabenajaca itsa tane pecuaicuaijaijava apo pecuaicuaijaiivimi. Jesús xanepanaeyaexana penabejenaevimi ata. Xanepanaeyaexana pejayuyajunaevimi ata. Itaxutoxanepanaeyaexana bitso pitaxutotsëcënaevimi ata. Nex-



ata jivi itsa tane bajarapacuene, jumaitsi Diosojavabelia: “Diosomë, bitso ayaijamatabëcuenenëmë, paIsraël nacuapijivinë patajaDiosomë,” jai bajarapamonae.

**Pacuenia Jesús rajuta pexaejava  
bejamatabëcuene cuatro mil pajivibeje yabara pelivaisi**

*(Mr 8.1-10)*

<sup>32</sup> Jesús jivi ayaibitsaëtoxaneto pënjainavanapatsi. Nexata Jesús junata pijajivi. Jumaitsi pijajivijavabelia mapacueniaje:

—Netsitabejiohi baja rovia mapamonaeje. Tsipaji baja ajena acueyabi pamatacabibeje xaina xanëjavata pejinavanapaecujinae. Pamarue baja tovereverecatsi. Pexaejava xaenejeva, apo jitsipaenë taitorobijava peponaenexa pijabonëjavabelia. Namuto epatua meta cunenabijitsipatsi piajani, jai Jesús pijajivijavabelia.

<sup>33</sup> Nexata Jesús pijajivi jumaitsi:

—¿Detsa jane pacuenia pexaejava tocaxitajarabianatsi mapajivibitsaëtoxanetoje? Majotaje ajibi pexaejava. Tsipaji itsajivi ata pijabo apo xinae majotaje, jai Jesús pijajivi.

<sup>34</sup> Nexata Jesús yanijoba pijajivijavabelia.

—¿Detsa papanbëbeje paxainame? jai.

Nexata Jesús pijajivi jumaitsi:

—Siete papanbëbeje paxainajë, dujuainëxi yajava, jai.

<sup>35</sup> Nexata Jesús itoroba daxitajivi penaenexa irata. <sup>36</sup> Nexata Jesús pita siete papanbëbeje, dujuainëxi yajava. Nexata Jesús jumaitsi Diosojavabelia:

—Pexaniacuene panetoexaname. Panerajutame pataxaejava, jai.

Bajaraxuacujinae Jesús epatsicacapona pan, dujuainëxi yajava. Nexata Jesús pepatsicacaepan rajuta pijajivijavabelia. Nexata juya Jesús pijajivi tsicobetsana bajarapajivi bitsaëtoxanetovabelia. <sup>37</sup> Daxita bajarapamonae nabane xaniavaetsia. Nexata peyajuvënëcopabijavanë Jesús pijajivi caetuata. Vënëba siete xuabeje bemapirecuenia pexanaejavanë. <sup>38</sup> Pamona pexaejava xane, ayaibitsaëtoxaneto. Cuatro mil ponëbeje namataëjëtatsi xaniavaetsia. Petiriavi, pejevaxi ata, apo namataëjëtsitsi. <sup>39</sup> Pexaecujinae pexaejava, Jesús baja naviabiayaexana jivi. Nexata Jesús runareca jera ënëabereca. Pona baja Magdala nacuyabelia.

**Pacuenia fariseovibeje saduceovibeje Jesús itorobatsi Dioso pesaëta  
pinijicuene pexanaejava petsitaexanaenexa picani yabara pelivaisi**

*(Mr 8.11-13; Lc 12.54-56)*

**16** Fariseovibeje saduceovibeje pata Jesúsjavaberena. Nexata bajarapamonae Jesús jamatabëcueneëjëbiaya itorobatsi picani pinijicuene pexanaejava Dioso pesaëta Jesús petsitaexanaenexa. Bajarapacuenia picani Jesús itorobatsi peyapëtaenexatsi Dioso pepacuene athëbëvetsica pitorobinëcuenetsitsica.

<sup>2</sup> Nexata Jesús jumaitsi bajarapamonaejavabelia:

—Pamatacabi caniviyo itaboxo tsobia, paxamë pajumaitsimë tsabiabi: “Meravia pexaniamatacabi tsane. Tsipaji itaboxo tsobia,” pajamë tsabiabi. <sup>3</sup> Pamatacabi bajyacunua nacuaitaboxo itacaënanuca, pajumaitsimë tsabiabi: “Ajena anacuayajitsia daxita matacabi. Tsipaji nacuaitaboxo itacaënanuca,” pajamë tsabiabi. Payapëtaneme picani xaniavaetsia pacuenia matacabi itsijitsia. Tsipaji itarërëbo pepit-sapaexae, payapëtaeyabiabame. Itsiata baitsi jane patae atamë Juan jivibauti-

sabinēmi pexanaponaejava, xanē ata taexanaponaejava patae atamē, itsiata apo payapētaemē Dioso athēbēvetsica taneitorobinēcuenetsica. <sup>4</sup>Bitso pibisiajamatābēcuenē xaina pamonaē copaba Dioso pejumecovēnētsijavami. Bajarapamonae picani nitoroba Dioso pesaēta pinijicuene taexanaejava tatsitaexanaenexa taneyapētaenexa pepacuene Dioso athēbēvetsica taneitorobinēcuenetsica. Itsiata baitsi jane Dioso pesaēta pinijicuene taexanaejava, apo tsitaexanaenē tsane. Pacuenia bajayata Diosojumepaebinē profeta Jonáspijinē exanatsi, bajara ēpitsicuene taneexanaejava, tsitajētsianajē, jai Jesús petēpaecujinae icatsia Dioso piasaēyaexanaejavanexatsi yabara.

Jesús baja nexata bajarapamonae vecuapona.

**Pacuenia Jesús pijajivi muxujioba fariseovi petsipaebilivaisi  
pejumecovēnētsianiva yabara pelivaisi**

(Mr 8.14-21)

<sup>5</sup>Jesús pijajivi nicabilia puca itsapanabelia. Nexata nacofēnēta pamarue. Apo caponaē pan. <sup>6</sup>Nexata Jesús pijajivi muxujioba pejumecovēnētsianiva fariseovi, saduceovi ata, itsa tsipaebatsi saicayacuenia Dioso pejumelivaisivecua. Jesús jumaitsi pijajivijavabelia mapacueniaje:

—Panejumetaema. Xania panayajivitaema fariseovi pijalevadura. Panayajivitaema saduceovi ata pijalevadura, jai Jesús pijajivijavabelia.

Bajarapacuenia Jesús jumaitsi fariseovi petsipaebaponaelivaisi, saduceovi ata petsipaebaponaelivaisi, Jesús pijajivi pejumecovēnētsianiva. <sup>7</sup>Itsiata Jesús pijajivi apo jumeyapētaetsi. Bajaraxuata Jesús pijajivi nabarēcuaicuajai bajarapacuenia Jesús pejumaitzijume yabara. Jesús pijajivi jamatabēcuenenavēxaniabiaya najumaitsi:

—Jesús nacajumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai. Baja raeta pacuenia Jesús nacajumaitsi pan apo vajacaponaeaxae, najai Jesús pijajivi jamatabēcuenenavēxaniabiaya.

<sup>8</sup>Jesús pijajivi jamatabēcueneyapētane bajarapacuenia jamatabēcuenenavēxaniabiaya pejumaitsijava levadura yabara. Nexata Jesús jumaitsi pijajivijavabelia:

—¿Detsa xuajitsia panajumaitsimē: “Baja raeta pacuenia Jesús nacajumaitsi pan apo vajacaponaeaxae,” panajamē? ¡Apo payapētaemē tsipaji tanecaējēpaejava taexanaenexa pan itsa namatavenonatsi! <sup>9</sup>Paxamē abaxē apo panejumeyapētaemē. ¿Apo panajamatabēnapitsimē tsipaji pacuenia exanajē pamatacabi pan namatavenonatsi? Tsicobetsanajē cinco papanbēmibeje cinco mil ponēbeje pexaenexa. ¿Detsa xuabeje pavēnēbame peyajuvēnēnacopabijavanē bemapirecuenia pexanaejavanē? <sup>10</sup>¿Apo panajamatabēnapitsimēnua tsipaji pacuenia tsicobetsanajē siete papanbēmibeje cuatro mil pajivibeje pexaenexa? ¿Detsa xuabeje bajarapamatacabi pavēnēbame peyajuvēnēnacopabijavanē bemapirecuenia pexanaejavanē? <sup>11</sup>Itsa pacajumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” itsa pacajaitsi, pan yabara apo pacajumaitsi, jai Jesús pijajivijavabelia.

<sup>12</sup>Nexata jane baja Jesús pijajivi xaniavaetsia jumeyapētanetsi. Nexata Jesús pijajivi najumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai tsaena Jesús, fariseovi, saduceovi ata, itsa nacatsipaeba saicayacuenia Dioso pejumelivaisivecua vajajumecovēnētsianiva, najai Jesús pijajivi.

**Pacuenia Pedro jumaitsi Jesúsjavabelia:  
“¡Xamë raja Cristomë!” jai yabara pelivaisi**

*(Mr 8.27-30; Lc 9.18-21)*

<sup>13</sup> Jesús, pijajivi yajava, najetaruca Cesarea de Filipovënë tomaramuxunenia. Nexata Jesús pijajivijavabelia jumaitsi mapacueniaje:

—Xanë, Daxitajivi Pematapijinënë. ¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

<sup>14</sup> Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinëmi raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta, profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta profeta Jeremíaspijinë, ponëmi bajayata ponapona, icatsia asaë. Itsa jume, nexata meta bajayata Diosojumepaebivimi profetavimiyajuvënë icatsia asaë,” jai tsabiabi itsamonae xamë yabara, jai Jesús pijajivi.

<sup>15</sup> Nexata Jesús jumaitsi pijajivijavabelia:

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

<sup>16</sup> Nexata Simón Pedro jumaitsi Jesúsjavabelia:

—Xamë cajena Cristomë, athëbëvetsica Dioso pecaitorobinëtsica jivi necapanepaenexa. Xamë Dioso piasaëtsaponaponaenë pexënatomë, jai Pedro Jesúsjavabelia.

<sup>17</sup> Jesús nexata jumaitsi Pedrojavabelia:

—Simón, Juan pexënatomë, xamë jamatabëcuenebarëyamë. Tspaji itsajivi ata apo cayapëtaeyaexanae xanë taneyapëtaenexamë Cristocuenënë. Biji rajane taxa, athëbëtatsia peecaenë, cayapëtaeyaexana. <sup>18</sup>Nexata catsipaebianatsi mapacueniaje. Xamë rabaja Pedromë, beibotomë. Pacuenia ibopanaxanetojumata pexanetsibo bajayajebi ajamatabësäe tsecae, bajara pijinia itsane tajajivi tanejumecovënëtsivi Cristocuenënë. Nexata dovathi apo jamatabëcuenematatoxenetsitsi tsane. <sup>19</sup>Pacuenia baupaevetsinë evetsiaexanatsi llavianë, bajara pijinia pacuenia caevetsiaexanaenatsi athëbënacupijilivaisianë. Xua itavetsianame mapanacuataje, bajaraxua Dioso ata athëbënacuatatsia itaveta. Xua tocopatsianame pexanaenexa mapanacuataje, bajaraxua Dioso ata athëbënacuatatsia tocopata pexanaenexa, jai Jesús Pedrojavabelia.

<sup>20</sup>Nexata Jesús pijajivi jumeitaveta petsipaebiyana itsajivijavabelia ata: “Mara ponë Cristoje, Dioso athëbëvetsica pitorobinëtsica jivi pecapanepaenexa,” pejaiyaniva.

**Pacuenia Jesús tajëvelia navajunupaeba  
pebeyaxuabijavanexatsi yabara pelivaisi**

*(Mr 8.31–9.1; Lc 9.22-27)*

<sup>21</sup> Jesús pebeyaxuabijavanexatsi, tajëvelia navajunupaeba pijajivijavabelia. Jumaitsi mapacueniaje:

—Ponaejitsianë Jerusalén tomarabelia. Nexata bajarajotalia nebejiobiaexanaena judíovi pijaancianovi, sacerdotevi penamatacaitorobivi ata, judíovi pecujarubivi

ata. Bajaraxuacujinae nebeyaxuabiana. Itsiata baitsi jane tatēpaecujinae, acueyabi matabacaba, icatsia asaēnē tsane, jai Jesús tajēvelia pijajivijavabelia.

<sup>22</sup> Nexata Pedro junata Jesús pebarēponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—¡Tajatuxanenē, Dioso caitaxutotsoniataena bajarapamonae pecaexanaeyaniva daxita pacuenia tajēvelia navajunupaebame! jai Pedro Jesúsjavabelia.

<sup>23</sup> Nexata Jesús Pedrovecua napēnēyorotaxuaba. Taenuca pijajivi penaējavabelia. Nexata Jesús napēnēyorotsia jumai tsanuca Pedrojavabelia:

—¡Dovathi, nevecuanatixire! Nejamatabēcueneējēbijitsipame. Necopare Dioso taneitorobicuenia taexanaenexa. Xamē apo jitsipaemē pacuenia Dioso jitsipa taexanaenexa. Saya jitsipame pacuenia jivi jitsipa taexanaenexa, jai Jesús.

<sup>24</sup> Nexata Jesús jumaitsi pijajivijavabelia:

—Pajivi jitsipa tanepēnaponaejava, bajarapajivi copatsi pejitsipaecuenia penajamatabēxainabiabijavami. Exanaponaponae taitorobicuenia. Najamatabēcueneveretsinua, bejioabiaexanaejitsia atatsi, beyaxuabijitsia atatsinua, Dioso pejumelivaisi yabara piagamatabēcuenesaē tsaponaponaejava. Nexata jane baja xuacujinae nepēnaponae. <sup>25</sup> Pajivi exanaponaponae penatojitsipaecuenia, apo xainae tsane matababi apo peverevereaejava. Pajivi xanē tajamatabēcueneta copata penatojitsipaecuenia pexanaejavami, bajarapajivi xainaena matababi apo peverevereaejava. <sup>26</sup> Pajivi exanaponaponae penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainae ata, mapanacuapijicuenije, itsiata nacuerata. Tshipaji pexainaecuenie apo capanepae tsanetsi Diosojavabelia. Tshipaji acuenebi tsane itsajivi ata pematamotsinexa penaxuabianiva Diosovecua. <sup>27</sup> Xanē, Daxitajivi Pematapijinēnē, yajavapatsianicajē taxa Dioso pijapenivenivenaecotia. Yajavapatsianicajēnua tajaängelevi. Nexata matamotaponaeajē caejivi canacujitsia, tanetonacuenebivi. Naneconitsiaexanaenajē pijinia pijaneconi pexinaevi. <sup>28</sup> Xaniajanē pacuenia pacatsipaebijitsiatsi. Daxita paxamē patēpaenejevamē, xanē, Daxitajivi Pematapijinēnē, tajajivi ayaibitsaētoxfaneto naexanaena. Nexata paxamēyajuvenēvi pepuatae tsane xanē tajajivi ayaibitsaētoxfaneto taevetsijava, tēpaena, jai Jesús pijajivijavabelia.

### **Pacuenia Jesús caepatoyo perabēnivenivenataba yabara pelivaisi**

*(Mr 9.2-13; Lc 9.28-36)*

**17** Jesús petēpaejavanexa tajēvelia penavajunupaebicujinae, seis pamatabibejecujinae, Jesús pijajivi, acueyabi ponēbeje, barējunaya pinijitsutoxanetojumabetsia. Jesús barējunaya mapamatabēxēyoje: Pedro, Santiago, Juan. Bajarapamatabēxēyo Jesús barējunaya pinijitsutoxanetojumabetsia. Santiago raja pejuyapijinē Juan. <sup>2</sup> Nexata petsutojumatsia Jesús perabēnivenivenareca bajarapamonae pitabarata. Pacuenia matababipijijuameto banaitayota, bajarapacuenia Jesús itabaranaitayota. Penaxatatsijavareca, daxita nivenivenaeya niojai. <sup>3</sup> Nexata bajarajota Jesús pijajivi tane bajayata petēpaenēmibeje, Moiséspijinēbeje Elíaspijinēbeje. Jesús barēcuaijaiatsi bajaraponēbeje. <sup>4</sup> Nexata Pedro jumaitsi Jesúsjavabelia mapacueniaje:

—¡Patajatuxanenē, pijacuaxae panebarēponame! Itsa jitsipame, pacatoexanaenatsi acueyabi pabobērētoheje. Itsabobērēto xamēnexa tsane. Itsabobērēto Moisésnexa tsane. Itsabobērēto Elíasnexa tsane, jai Pedro Jesúsjavabelia.

<sup>5</sup>Itsa abaxë Pedro cuaicuajjai tsanuca, penaitayotsiitarërëbo mataacataxua-batsi daxita bajarapamonae. Nexata bajarapamonae jumetane bajarapaitarërëbo-javavetsica Dioso pejumaitsijava: “Mara ponë taxënato, tasivanëje. Bitso sivajamatabëcuenebarëyanë. Pajumetaema bajaraponë,” pejaijavatsica bajarapamonae jumetane.

<sup>6</sup>Jesús pijajivi itsa jumetane bajarapacuenia Dioso pejumaitsijavatsica, irataeya othopa irata. Jesús pijajivi bitso najunaviaca. <sup>7</sup>Nexata Jesús imoxoyolia pijajivi. Jajalia. Jumaitsi pijajivijavabelia:

—Panonobapunare. Pëtsa pajunavame, jai Jesús pijajivijavabelia.

<sup>8</sup>Nexata Jesús pijajivi itsa naëcobarëcëpalia Jesúsjavabelia, ajibi baja Moisésbeje Elíasbeje. Caenë baja Jesús nuca.

<sup>9</sup>Nexata Jesús pijajivi itsa barërunanucaponaica petsutojumavetsica, jumeitaveta pijajivi. Jumaitsi pijajivijavabelia:

—Pëtsa patsipaebame itsajivi ata pacuene pataneme. Matapania xanë, Daxitajivi Pematapijinënë, icatsia asaënë tsane tatëpaecujinae, nexata jane baja matapania patsipaebianame, jai Jesús pijajivijavabelia.

<sup>10</sup>Nexata Jesús pijajivi yanijoba Jesúsjavabelia. Jumaitsi:

—Patajatuxanenë, çdetsa xuajitsia judíovi pecujarubivi jumai tsabiabi: “Bajayata ponëmi ponapona, Elíaspijinë, petëpaecujinae icatsia asaë tsane. Bajaraponë copiata patsiana. Bajaraxuacujinae patsiana Cristo, pepo vajanacacapanepaenënexa jane baja,” jai tsabiabi? jai Jesús pijajivi.

<sup>11</sup>Nexata Jesús jumaitsi pijajivijavabelia:

—“Copiata Elíaspijinë patsiana. Nexata bajaraponë jamatabëcuenexanetsiana daxitajivi,” itsa jai, Juanpijinëmi jivibautisabinëmi yabara jumaitsi. Xaniajai rabaja pacuenia judíovi pecujarubivi jumaitsi. <sup>12</sup>Xaniajanë pacuenia pacatsipaebijitsiatsi. Elíaspijinë rabaja patajopa. Itsiata jivi apo yapëtaetsi ponëcuene. Nexata pacuenia jivi jitsipa pexanaenexa bajaraponëjavabelia, exana baja. Beyaxuabatsi. Bajara pi-jinia pacuenia xanë ata, Daxitajivi Pematapijinënë, nebejiobiaexanaena bajarapamonae, jai Jesús pijajivijavabelia.

<sup>13</sup>Nexata Jesús pijajivi jumeypëtanetsi. Nexata Jesús pijajivi jamatabëjumaitsi:

—“Elíaspijinë rabaja patajopa,” itsa jai Jesús, Juanpijinëmi jivibautisabinëmi yabara jumaitsi, jamatabëjai Jesús pijajivi.

### **Pacuenia Jesús jamatejemayaexana pejevaxinë, dovathi peyajavaponaponaenë, yabara pelivaisi**

*(Mr 9.14-29; Lc 9.37-43)*

<sup>14</sup>Jesús pijajivi, acueyabi ponëbeje, barënaviata petsutojumavetsica. Nexata bajarapatsutoxanetotabuta vajënaeevetatsi jivi ayaibitsaëtoxaneto. Nexata pebi Jesús imoxoyorenatsi. Bajaraponë Jesús yayataeya pematabacabëta nucajunua Jesús pitabarata. Bajaraponë jumaitsi Jesúsjavabelia:

<sup>15</sup>—Jesús, netoitaxutotsoniataema taxënatonëyo. Netodevacaiababatsi raja. Bitso bejiobi tsabiabi. Anijatonë isotuabelia natajuitiabiaba. Itsajavata menialia jopabiabalia. <sup>16</sup>Nijajivijavaberena picani capatajë tanetojamatejemayaexanaenexa. Itsiata baitsi jane apo caëjëpaetsi tanetojamatejemayaexanaenexa, jai bajaraponë Jesúsjavabelia.

<sup>17</sup>Nexata Jesús jumaitsi pijajivijavabelia:

—¡Paxamë baja rovia apo pajumecovënëtsimë Dioso papecayavenonaejavanexa! Bajaraxuata apo pacajamatabëcuenecaējēpae pejevaxinē panevecuacapsapaenexa dovathi. ¡Paneajamatabëcuenetajavi baja rovia! Pexaniajailivaisivecua saicayacuenia panajamatabëxainame. ¿Detsa paepatojebi abaxë paxamëjavata ponaponae-najë? ¿Detsa paepatojebi abaxë paxamëjavabelia ajamatabëcuenesaënë tsaponaponae tsane patanejumecovënëtsinexamë? Panetocarenamëre pejevaxinë, jai Jesús pijajivijavabelia.

<sup>18</sup> Nexata Jesús itaveta dovathi pejevaxinë pevecuapitsapaenexatsi. Nexata baja pejevaxinë dovathi vecuapitsapatsi. Pejevaxinë baja jamatejema.

<sup>19</sup> Bajaraxuacujinae Jesús pijajivi barëcuaicuaijatsi pijaepatojavata. Jesús pijajivi jumaitsi:

—Patajatuxanenë, ¿detsa xuajitsia meta paxanë apo panecaējēpae patavecuacapsapaenexa dovathi? jai Jesús pijajivi.

<sup>20</sup> Nexata Jesús jumaitsi pijajivijavabelia:

—Apo pacacaējēpae pejevaxinë panevecuacapsapaenexa dovathi. Tsipaji xaniavaetsia apo pajumecovënëtsimë Dioso papecayavenonaejavanexa. Xaniajanë pacuenia pacatsipaebijitsiatsi. Paxamë tsiquirijavayo ata itsa pajumecovënëtsipame Dioso papecayavenonaejavanexa, nexata pacacaējēpaejitsipa Dioso pesaëta pini-jicuenene paneexanaenexa. Nexata itsa pajumaitsimë tsipae mapatsutoxanetojavabeliaje: “Vecuanatixire majotaje. Itsajavabelia ecaename,” itsa pajamë, pacajumecovënëtsipa. Nexata natixitsipa. Nexata paxamë paneexanaenexa itsacuenëjavayo ata, apo pacatsitaayapëbeje tsipae itsa pepacuenë xaniavaetsia pajumecovënëtsipame Dioso papecayavenonaejavanexa. <sup>21</sup> Mara paviriadovathije apo jitsipae pepit-sapaejava. Matapania panexaejava apo paxaemë tsipae pamatacabibeje asaëyata Diosojavabelia pavajëtaponame dovathi pepitsapaenexa, pitsapaejitsipa, jai Jesús pijajivijavabelia.

### **Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi**

*(Mr 9.30-32; Lc 9.43-45)*

<sup>22</sup> Jesús abaxë pijajivi itsa barëponapona Galilea nacuata, pijajivijavabelia tajëvelia navajunupaebapona pebeyaxuabijavanexatsi. Jesús pijajivijavabelia jumai tsaponae mapacueniaje:

—Xanë, Daxitajivi Pematapijinënë, necanajetsiana itsamonae pecobeyabelia.

<sup>23</sup> Bajarapamonae nebeyaxuabiana. Itsiata baitsi jane tanebeyaxuabicujinae, acueyabi matacabita, icatsia asaënë tsane,” jai tsaponae Jesús pijajivijavabelia.

Nexata Jesús pijajivi itsa jumetanetsi bajarapacuenia Jesús penavajunupaebapona-aejava petëpaejavanexa, Jesús pijajivi bitso najamatabëxaina.

### **Pacuenia Jesús matamota impuestomatamo yabara pelivaisi**

<sup>24</sup> Jesús, pijajivi yajava, pata Capernaum tomarata. Nexata Capernaum tomarata impuestomatamo pematamoyanijobabiabivi pona Pedrojavabelia. Nexata bajarapamonae yanijobatsi Pedro.

—Pedro, ¿xaniajai tsaja? ¿Panijatuxanenë impuestomatamo apo matamotabiabi, paimpuestomatamo judíovi matamobabiaba templobo pevetsivijavabelia? jaitsi.

<sup>25</sup> Pedro nexata jumaitsi:

—Jājā. Matamotabiaba cajena, jai.

Nexata Pedro joneya Jesús peecaeboyalía. Nexata Pedro pejonejavatalía Jesús peecaeboyalía, Jesús jumaitsi Pedrojavabelía:

—Pedro, ¿detsa xamē jamatabēcueneitsimē? Nacuaeetsivi palata pepitsinexa, pijajivi itoroba impuestomatamo petoyanijobinexatsi. ¿Detsa nexata pamonaejavabelía nacuaeetsivi pijajivi yanijobabiaba impuestomatamo? ¿Nacuaeetsivi tsaja pijamonaejavabelía? Itsa jume, ¿saicayavijavabelía tsaja, nacuaeetsivi pevetsinacuata pejinavanapaevijavabelía? jai Jesús Pedrojavabelía.

<sup>26</sup> Pedro nexata jumaitsi Jesúsjavabelía:

—Nacuaeetsivi raja pijajivi impuestomatamo yanijobabiaba saicayavijavabelía, nacuaeetsivi pevetsinacuata pejinavanapaevijavabelía. Apo yanijobabiabi nacuaeetsivi pijamonaejavabelía, jai Pedro Jesúsjavabelía.

Jesús nexata jumaitsi Pedrojavabelía:

—Pacuenía nacuaeetsivi pijamonaē apo matamotsitsi impuestomatamo, bajara pijinia pacuenía xanē ata apo jitsipaenē picani tamatamotsinexa impuestomatamo templobo pevetsivijavabelía taxa Dioso pijatemploboxae. <sup>27</sup> Itsiata baitsi jane xamē matamotsianame itsajivi ata vajanacabaraanaepanaeyanivabeje. Liamēre pucaxanetojavabelía. Ējēbianame culupabota. Padujuainēyo copiaya catoxaena, jutsianame. Pecuibota caxitajarabianame palatanēyo. Bajarapapalatanēyota caējēpaena vajamatamotsinexabeje impuestomatamo xanē tamatamotsinexa, xamē ata nematamotsinexa. Nexata bajarapapalatanēyo caponaename impuestomatamo nematamotsinexa templobo pevetsivijavabelía, jai Jesús Pedrojavabelía.

**Pacuenía Jesús pijajivi jumaitsi: “¿Detsa ponē paxanējajuvēnēnē panevecuaayaijamatabēcuenenē?” jai Jesúsjavabelía yabara pelivaisi**

*(Mr 9.33-37; Lc 9.46-48)*

**18** Jesús baja itsa najumevereta Pedrojavabelía pecuaicuaijajava impuesto yabara, daxita Jesús pijajivi imoxoyorenatsi. Nexata Jesús pijajivi jumaitsi Jesúsjavabelía:

—Patajatuxanenē, ¿detsa ponē paxanējajuvēnēnē bitso ayaijamatabēcuenenē tsane daxitavecua Dioso pijanacuatatsia? jai.

<sup>2</sup> Nexata Jesús junata pejevaxinēyo. Pijajivi tuatuajēta nuteta pejevaxinēyo.

<sup>3</sup> Jesús nexata jumaitsi pijajivijavabelía:

—Xaniajanē pacuenía pacatsipaebijitsiatsi. Mapapejevaxinēyoje beveliajamatabēcuenenēyo nataeya najamatabēcueneecopata Diosojavabelía Dioso pevetsinexatsi. Nexata paxamē itsa apo panajamatabēcuenepeñēyorotsimē tsane perujamatabēcuenevecua beveliajamatabēcuenevi panenataenexa pacuenía mapapejevaxinēyo itsije, nexata apo pajonemē tsane Dioso pijanacuayabetsia.

<sup>4</sup> Nexata ponē jitsipa Dioso pijanacuatatsia ayaijamatabēcuenenē penaexanaenexa daxitavecua, bajaraponē beveliajamatabēcuenenē natae, pacuenía mapapejevaxinēyo jamatabēcueneitsije. <sup>5</sup> Pajivi copiapita tanejumecovēnētsijiviyo, mapitsijamatabēcuenejiviyoje, bajaraxua xanē taniji tanecopiapitsijava, jai Jesús pijajivijavabelía.

**Pacuenia Jesús pijajivi muxujioba itsajivi ata pibisiacuene  
pexanaeyaexanaeyaniva yabara pelivaisi**

(Mr 9.42-48; Lc 17.1-2)

<sup>6</sup> Jesús jumaitsi pijajivijavabelia:

—Pajivi pibisiacuene exanaeyaexanaejitsipa mapitsipejevaxijivixi ataje, tanejumečovënëtsiyajuvënëjiviyo, bajarapajivi Diosojavabelia bitso naneconitsipa. Nexata Dioso ayaicuenia bajarapajivi naneconitsiaexanaejitsipatsi. Nexata pajivi najamatabëxaina pibisiacuene pexanaeyaexanaenexa tanejumečovënëtsivijavabelia, abaxë pibisiacuene exanaeyaexanaenejeva, bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatuajëareca. Bajarapajivi bexuarecatsi bitso penaneconitsiyaniva Diosojavabelia pibisiacuene itsa exanaeyaexana tanejumečovënëtsiviyajuvënëvi. <sup>7</sup> Dioso bitso naneconitsiaexanaenatsi mapanacuapijivi pibisiacuene pexanaevi! Pibisiacuene vajanacaexanaeyaexanae jamatabëcuenenexa, navita mapanacuataje. Bajarapajamatabëcuene tsitecaponaena pevajënaeyabelia. Nexata pajivi pejamatabëcueneta itsamonae pibisiacuene exanaeyaexana, bajarapajivi bitso Dioso naneconitsiaexanaenatsi.

<sup>8</sup> Bjaraxuata panecobeta, panetaxuta ata, pibisiacuene itsa paexaname, panacobecacure. Panataxucaure. Tajë panavecuaxuare. Itsiata xanepana panejonenexa cobemataxucaeya, taxumataxucaeya ata, apo pevereverecaenacuajavabelia. Biji rajane apo xanepanae tsipae anijacobebeje, anijataxubeje ata yajava, panejonenexa apo peverevereaeisotojavabelia. <sup>9</sup> Paneitaxutota panetaejava yabara ata pibisiacuene itsa paexaname, panaitaxutocajure. Itsiata xanepana panejonenexa pacaeitaxutojivimë apo pevereverecaenacuajavabelia. Biji rajane apo xanepanae tsipae anijaitaxutobeje yajava panejonenexa infernojavabelia, jai Jesús pijajivijavabelia.

**Pacuenia Jesús pijajivi livaisi tsipaeba  
oveja penaxuabinë pelivaisicuenia yabara pelivaisi**

(Lc 15.3-7)

<sup>10</sup> Jesús jumaitsi pijajivijavabelia:

—Itsamonae mapanacuata bijiaya taeyabiaba mapitsipejevaxijivixi ataje, tanejumečovënëtsijivixi. Saya beveliajamatabëcuenevi taeyabiaba. Pëtsa bajarapacuenia paxamë ata bijiaya pataneme tanejumečovënëtsivi. Bijiaya pëtsa pataneme mapitsipejevaxinëyo ataje, tanejumečovënëtsijiviyo. Tshipaji bajarapamonae ángelevi yajavajinavanapa peyavenonabiabinexatsi. Bajarapaángelevi taxa Dioso, athëbëttasia peecaenë, pitabarata jinavanapa. <sup>11</sup> Xanë, Daxitajivi Pematapijinëñ, patajopajë tacapanepaenexa daxita Diosovecua naxuabiaya pejinavanapaevimi, jai Jesús pijajivijavabelia.

<sup>12</sup> Jesús icatsia jumaitsi pijajivijavabelia:

—Pacanaëjëre mapacueneye. Pebi xanaejitsipa cien ponëbeje oveja. Nexata itsa toyajuvënënxuabijitsipatsi caenë, oveja pexainaenë puenetsipa noventa y nueve ponëbeje oveja. Bjaraxuacujinae jaitsipa petonaxuabinëtsi. <sup>13</sup> Xaniajanë pacuenia pacatsipaebijitsiatsi. Bjaraponë itsa caxitajarabijitsipa pijaoveja, petonaxuabinëmitsi, bitso barëyataejitsipa. Nexata noventa y nueve ponëbeje, apo



petonaxuabivitsi, pesivajamatabëcuenebarëyajava, matatoxenetsia bitso sivajamatabëcuenebarëya tsipae petonaxuabinëmitsi. <sup>14</sup> Bajara pijinia pacuenia paneaxa ata, athëbëtsia peecaenë, apo jitsipae pevecuanaxuabinexatsi caejivi ata mapit-sipejevaxijivixi ataje, tanejumecovënëtsivi, jai Jesús pijajivibelia.

**Pacuenia Dioso pejumecovënëtsijivi bebarajamatabëcuenexanepana,  
itsacueniabi atatsi itsajivi, yabara pelivaisi**

(Lc 17.3)

<sup>15</sup> Icatsia Jesús jumaitsi pijajivijavabelia:

—Itsanë Dioso pejumecovënëtsinë pibisiacuene papecatoexanaejava, itsa pavënëlvaisitaename, xaniavaetsia payanijobianame caenëjavata. Nexata xaniavaetsia itsa panabarëcuaicuaijamëbeje, panabarajamatabëcuene xanepanaenamebeje. <sup>16</sup> Xaniavaetsia itsa apo pacabarëcuaicuaijai tsane, nexata Dioso pejumecovënëtsinë pajunatsianame caenë, anijanëbeje ata, paneyajavaponaenexa pibisiacuene papecatoexanaenëjavabelia pemuxujjobinexatsi. Nexata bajaraponëbeje pacajumetaena xaniavaetsia panebarëcuaicuaijajava pibisiacuene papecatoexanaenëjavabelia. Bajarapacuenia itsa paexanaename, nexata pacuenia Dioso pejumelivaisibaxutota jumaitsi, paexanaename. <sup>17</sup> Ponë pibisiacuene pacatoexana, itsa apo namuxunaevetsi tsane paneyajavaponaenëbeje ata pemuxujjobijava, nexata daxita Dioso pejumecovënëtsivi penacatuatsijavata, payanijobianame papibisiacuene pacatoexana. Nexata ponë pibisiacuene pacatoexanaena, daxita Dioso pejumecovënëtsivi muxujjobianatsi. Bajaraponë itsa apo namuxunaevetsi tsane, muxujjobi atatsi Dioso pejumecovënëtsivi, nexata bajaraponë pataename Dioso apo pejumecovënëtsinëcuenia. Panavecuaitavetsianame pepatsiyaniva panenacatuatsijavata, jai Jesús pijajivijavabelia.

<sup>18</sup> Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Xua jivi paitavetsianame pexanaeyaniva mapanacuataje, bajaraxua Dioso athëbënacuatsia ata itaveta. Xua jivi patocopatsianame pexanaenexa mapanacuataje, bajaraxua Dioso ata athëbënacuatsia tocopata pexanaenexa, jai Jesús pijajivijavabelia.

<sup>19</sup> Icatsia Jesús jumaitsi pijajivijavabelia:

—Pacatsipaebijitsiatsinua mapacueniaje. Mapanacuata paanijanëmëbeje itsa panajamatabëcuenejëpamebeje xua pavajëtsijitsiamëbeje Diosojavabelia, nexata taxa, athëbëtsia peecaenë, pacajumecovënëtsianabeje xua pavajëtamebeje. <sup>20</sup> Tsipaji itsajota anijajivibeje, acueyabi ata, nacaetuata, tanejumecovënëtsivi, bajarajota xanë bajarapamonae yajavaecaenajë, jai Jesús pijajivijavabelia.

<sup>21</sup> Nexata Pedro imoxoyolia Jesús. Pedro jumaitsi Jesúsjavabelia:

—Tajatuxanenë, panetsipaebame rabaja. Panejumaitsimë mapacueniaje: “Itsajivi Dioso pejumecovënëtsijivi pibisiacuene itsa pacaexanaena, pajamatabëcaevianame. Barajamatabëcuenexanepanaeya pataename. Itsa pavënëlvaisitaename pibisiacuene papecatoexanaejava, xaniavaetsia payanijobianame caenëjavata. Nexata xaniavaetsia itsa panabarëcuaicuaijamëbeje, panabarajamatabëcuene xanepanaenamebeje,” panejamë. ¿Detsa xuabeje pibisiacuene nexanae ata, pibisiacuene netoexanae atanua, jamatabëcaevianajë barajamatabëcuenexanepanaeya tataenexa bajarapajivi? ¿Siete tsaja xuabeje ata? jai Pedro Jesúsjavabelia.

<sup>22</sup> Jesús nexata jumaitsi Pedrojavabelia:

—Siete xuabejenexa yabara apo jumaitsinē. Biji rajane siete pasetentabeje pibisiacuene pacaexanae ata, pibisiacuene pacatoexanae atanua, pajamatabēcaevare barajamatabēcuenexanepanaeya panetaenexa, baitsi cuatrocientos noventa xuabeje ata, jai Jesús Pedrojavabelia.

**Ponē apo jitsipae pebarajamatabēcuenexanepanaenexa  
itsanējavabelia yabara pelivaisi**

<sup>23</sup> Jesús livaisi tsipaeba comparacióncuenia pijajivijavabelia. Jumaitsi mapacueniaje:

—Dioso pijanacuatatsia pijajivijavabelia exanaena pacuenia nacuaevevsinē pijajivijavabelia baexana. Nacuaevevsinē jitsipa piamoneyabivitsi pematamotsinexatsi xua amoneyabatsi. <sup>24</sup> Nexata itoroba pijajivi petotsipaebaponaenexatsi daxita pamonaē amoneyabatsi. Nexata pijajivi tobarēparenatsi ponē bitso ayaijava amoneyabatsi, baitsi millones de pesos piamoneyabinētsi. <sup>25</sup> Nexata bajaraponē apo xainae pematamotsijavanexatsi. Nexata nacuaevevsinē itoroba pijajivi. Jumaitsi: “Mara ponē bitso ayaijava niamoneyabaje. Nexata pacanajetaxuabianame dajubicuenia itsamonaejavabelia amoneya petonacuenebaponaenexa daxitamatacabijavabelianexa. Daxita pexi, pijava ata, pecobecovē ata yajava, pacanajetaxuabianame. Bajarapacuenia pitsianajē tsiquirijavayo ata taneamoneyabijavamamo,” jai nacuaevevsinē pijajivijavabelia. <sup>26</sup> Nexata ponē amoneyaba, nacuaevevsinē pitabarata pematabacabēta nucajunua. Pinijicuenia vajēta nacuaevevsinējavabelia. Jumaitsi: “Nejamatabēcueneevere abaxē. Camatamotsianatsi rabaja daxita xua camoneyabatsi,” jai. <sup>27</sup> Nexata nacuaevevsinē itaxutotsoniatane piamoneyabinētsi. Nexata nacuaevevsinē jumaitsi piamoneyabinētsijavabelia: “Daxita rabaja taneamoneyabijavamē, iquinajē. Nexata baja apo nematamotsimē tsane,” jai nacuaevevsinē piamoneyabinētsijavabelia. Bajaraxuacujinae copata baja penaviatsinexa. <sup>28</sup> Nexata bajaraponē penaviatsinexa, ajena pitsapalia nacuaevevsinē pijabovecua, caxitajarabaxuaba itsanē penajuanacuenebabiabinēbeje nacuaevevsinē pijajava. Bajaraponē nexata jamatabējumaitsi: “Maponē tsiquirijavayovajēto niamoneyabi ataje, yanijobianajē tanematamotsinexa,” jamatabējai. Nexata cuibocamisavaetaba. Cuibocuetsaca asaēyata. Jumaitsi bajaraponējavabelia: “Nematamore taneamoneyabijavamē,” jai. <sup>29</sup> Nexata piamoneyabinētsi bajaraponē pitabarata pematabacabēta nucajunua. Pinijicuenia vajēta. Jumaitsi: “Nejamatabēcueneevere abaxē. Camatamotsianatsi raja itsiata daxita xua camoneyabatsi,” jai. <sup>30</sup> Itsiata baitsi jane bajaraponē piamoneyabinētsi apo itaxutotsoniatae. Barēpona baja penaneconitsivi pejebabiabibojavabelia penaneconitsiaexanaenexa. Bajarapacuenia pematamotsinexatsi daxita piamoneyabijavatsi. <sup>31</sup> Nexata nacuaevevsinē pijajivi itsa tane bajarapacuenia pexanaejava penajua nacuenebabiabinēbejejavabelia, bajarapamonae bitso najamatabēxaina. Nexata nacuaevevsinē pijajivi ponalia petsipaebinexa bajaraxua pijatuxanenējavabelia. <sup>32</sup> Nexata nacuaevevsinē pijajivi itsa tsipaebatsi, itoroba icatsia pijajivi petojunatsinexatsi bajaraponē. Nexata itsa tocatatatsi, nacuaevevsinē jumaitsi bajaraponējavabelia: “Niajamatabēcuenebejenē baja rovia. Catoiquinatsi rabaja picani taneamoneyabijavamē. Tsiipaji pinijicuenia nevajētame. <sup>33</sup> Pacuenia caitaxutotsoniatanetsi, bajara pijinia pacuenia itaxutotsoniataejitsipame pecaamoneyabinē,” jai nacuaevevsinē. <sup>34</sup> Nexata

nacuaevevtsinē bitso baraanaepana millones de pesos piamoneyabinētsijavabelia. Nexata nacuaevevtsinē jumaitsi pijajivijavabelia: “Bajaraponē pacaponaeremelia penaneconitsivi pejebabiabibojavabelia penaneconitsiaexanaenexatsi. Bajarajota naneconitsiaponaponaena epematamoveretsijavabelianexa daxita taneamoneyabijava,” jai nacuaevevtsinē, jai Jesús pijajivijavabelia.

<sup>35</sup> Jesús icatsia jumaitsi pijajivijavabelia:

—Bajara pijinia pacuenia paxamē ata taxa, athēbētatsia peecaenē, pacaexanaena, itsa apo pajamatabēcaevimē tsane panebarajamatabēcuene xanepanaenexa pamonaē pacaitsacueniaba, jai Jesús pijajivijavabelia.

**Pacuenia Jesús jivi livaisi tsipaeba  
penacojobinē pijava pexuabiyaniava yabara pelivaisi**

*(Mr 10.1-12; Lc 16.18)*

**19** Jesús pijajivi pemuxujibicujinae pebarajamatabēcuene xanepanaenexa itsa monae itsacueniabi atatsi, Jesús baja pona Galilea nacua vecua. Jesús nexata pata Judea nacua yabelia, Jordánmene itsapanabelia. <sup>2</sup> Jivi ayaibitsaēto xaneto pēnaponatsi. Bajarajotalia Jesús jamatejemayaexana piavitanevi.

<sup>3</sup> Nexata fariseovi Jesús imoxoyorenatsi. Jamatabēcuenejēbiaya yanijobatsi. Jesús bijiaya itsa jumecanaviata, peneconitsinexatsi picani. Nexata fariseovi jumaitsi Jesúsjavabelia:

—¿Xanepana tsaja penacojobinē pijava pexuabinexa itsacuenējavayo ata yabara? jai fariseovi.

<sup>4</sup> Jesús nexata jumaitsi fariseovijavabelia:

—¿Apo palebimē tsipaji paneyapētaenexa pacuenia Dioso pejumelivaisibaxutota jumaitsi? Pamatacabi Dioso taxuxuaba nacua pexanaejava, bajarapamatacabi Dioso exana pebi, pijava yajava. <sup>5</sup> Nexata Dioso pejumelivaisibaxutota jumaitsi mapacueniaje: “Pebi itsa nacojoba pijavajavabelia, banatsata paxavecuca, pena atavecuca. Nexata Dioso tane anijajivimibeje becaejivi,” jai Dioso pejumelivaisibaxutota. <sup>6</sup> Nexata Dioso apo tae beanijajivibeje. Becaejivi saya tane Dioso. Bajaraxuata itsanē ata apo bexuabi pijava. Tsipaji Dioso pejamatabēcueneta napitsiaexanatsibeje, jai Jesús fariseovijavabelia.

<sup>7</sup> Nexata icatsia fariseovi jumaitsi Jesúsjavabelia:

—¿Detsa xuajitsia bajayata Moiséspijinē copata penacojobinē petoyaquinaenexa cuyalatobaxuto pijava pitavetsilivaisi pexuabinexa bajarapacuenia? jai fariseovi.

<sup>8</sup> Jesús nexata jumaitsi fariseovijavabelia:

—Paneajamatabēcuenetajaxae, Moiséspijinē pacatocopata bajarapacuenia paneexanaenexa panexuabinexa panijavajivi. Itsiata baitsi jane Dioso pexanaejivibejevavacujinae, apo tocopatsi picani bajarapacuenia pexanaenexa. <sup>9</sup> Nexata mapacuenia pacatsipaebianatsije. Ponē pijava xuaba, itsanējavabelia bajarapova pevitota pibisiacuene apo vecuaexanae atatsi, bajaraponē naneconita Diosojavabelia pijava pexuabixae. Nexata pijava pexuabinē itsa nacojoba icatsia itsavajavabelia, bajaraponē pibisiacuene exana pevitota. Tsipaji pepo pijavavecuca jaita itsava. Dioso cajena abaxē bajaraponē pexuabiva pijavacuenia totanetsi. Ponē ata itsanē pexuabiva pita, bajaraponē ata pibisiacuene exana pevitota. Tsipaji itsanē pijavami pita, pova abaxē Dioso totanetsi itsanē pijavacuenia, jai Jesús fariseovijavabelia.

<sup>10</sup> Nexata Jesús pijajivi jumaitsi Jesúsjavabelia:

—Itsa bajarapacuenia pebi apo tocopatsitsi itaxutojema pijava pexuabinexa, nexata meta baja apo benacojiobi, jai Jesús pijajivi.

<sup>11</sup> Jesús nexata jumaitsi pijajivijavabelia:

—Daxitajivi apo nejumeyapëtae tsane xua yabara jumaitsinë. Itsiata nejumeyapëtaena pamonae Dioso jamatabëcueneyavenonatsi. <sup>12</sup> Apo caejamatabëcuene raja xua yabara pebijivi apo nacojiobi. Itsamonae penabejenaenë naexana. Nexata apo caëjëpaetsi penacojiobijava. Itsamonae jivi pejamatabëcueneta bepenabejenaenëcuenia exanatsi. Nexata apo caëjëpaetsi penacojiobijava. Itsamonae ëDioso pijacuene petonacuenebinexa, apo nacojiobi. Nexata ponë jamatabëcuenecaëjëpatsi nacojiobinejeva peponaponaenexa ëDioso pijacuene petonacuenebinexa, bajaraponë nejumecovënëti, jai Jesús pijajivijavabelia.

### **Pacuenia Jesús jumaitsi pejevaxijivixijavabelia yabara pelivaisi**

*(Mr 10.13-16; Lc 18.15-17)*

<sup>13</sup> Jesúsjavaberena itsamonae pejevaxijivixi tocapataponatsi Jesús pecobeta pejayataponaenexa. Petovajëtsinexatsinua Diosojavabelia, tocapataponatsi. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavaberena, jai.

<sup>14</sup> Nexata Jesús jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapit-sipejevaxijivixije jumeaebinejeva, xaniavaetsia bajumecovënëta palivaisi tsipae-batsi. Nexata pamonae jitsipa pejonejava Dioso pijanacuayabetsia, bajara pijinia pacuenia jumeaebinejeva, xaniavaetsia bejumecovënëta Dioso pejumelivaisi, jai Jesús pijajivijavabelia.

<sup>15</sup> Jesús nexata pecobeta jayatapona pejevaxijivixi, caejiviyo canacujitsia. Bajaraxuacujinae Jesús baja pona bajarapanacuavecua.

### **Pacuenia pevëjëato, bitso pexainenë, cuaicuaijai Jesúsjavabelia yabara pelivaisi**

*(Mr 10.17-31; Lc 18.18-30)*

<sup>16</sup> Pevëjëato pata Jesúsjavaberena. Nexata pevëjëato jumaitsi Jesúsjavabelia:

—Petuxanenë, pexaniajamatabëcuenenëmë. ¿Detsa pitsicuene, pexaniacuene, exanaenajë taxainaenexa matababi apo pevereverecejava? jai pevëjëato.

<sup>17</sup> Jesús nexata jumaitsi pevëjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. Itsiata itsa jitsipame nexainaenexa matababi apo pevereverecejava, jumecovënëre pacuenia Dioso pejumelivaisita itoroba jivi pejumecovënëtsinexa, jai Jesús pevëjëatojavabelia.

<sup>18</sup> Nexata pevëjëato jumaitsi Jesúsjavabelia:

—¿Detsa palivaisi nexata jumecovënëtsianajë? jai.

Nexata Jesús jumaitsi pevëjëatojavabelia:

—Dioso pejumelivaisibaxutota jumaitsi mapacueniaje: “Pëtsa beyaxuabame jivitonë. Pëtsa jaitame itsava nijavavecua. Pëtsa nacobetoxotame. Pëtsa itsamonae pexanaejava yabara najumetsënëtsiaya paebame. <sup>19</sup> Axa yayiataema. Ena ata yayi-

ataema. Asivamëre itsajivi ata pacuenia xamë nijacuata nasivamë,” jai Dioso pe-jumelivaisibaxutota, jai Jesús pevëjëatojavabelia.

<sup>20</sup> Pevëjëato nexata jumaitsi Jesúsjavabelia:

—Daxita rabaja bajarapalivaisianë jumecovënëtajë. ¿Detsa xua netosaica abaxë taexanaenexa? jai pevëjëato.

<sup>21</sup> Nexata Jesús jumaitsi pevëjëatojavabelia:

—Itsa jitsipame pepacuenë nejamatabëcuenexanepanaejava, nejamaatabëcuenevitsabijavanua, nexata ponare. Canajetsianame daxita xua xainame. Bajarapamatamomi tsicobetsanaename bepejiobivi. Nexata bajarapacuenia xainaname bitso nexainaejava Dioso pijanacuataatsia. Bajaraxuacujinae nepënaponaename, jai Jesús pevëjëatojavabelia.

<sup>22</sup> Nexata pevëjëato itsa jumetane bajarapacuenia Jesús pejumaitsijava, najamatabëxainaejava vecuapona Jesús. Tsipaji pevëjëato daxitacuene bitso pexainanë. Nexata pevëjëato apo jamatabëjumecovënëtsi palivaisi Jesús tsipaeba.

<sup>23</sup> Nexata pevëjëato pecovëta Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Ponë bitso daxitacuene pexainanë, tsiaypëbejetsi bitso penajamatabëcuenecopatsinexa Diosojavabelia pecapanepaenexatsi Dioso pijanacuayabetsia. <sup>24</sup> Icatsia matavëjëa pacajumaitsi. Pacuenia camello acuenebi pejonejava palutaetoitaxutovojotualia, bajara pijinia pacuenia bitso pexainanë acuenebi tsane pejonejava Dioso pijatomarabetsia, jai Jesús pijajivijavabelia.

<sup>25</sup> Jesús pijajivi itsa jumetane bajarapacuenia Jesús pejumaitsijava, bitso jamatabëcuenenabenajaca. Jesús pijajivi jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexainaevi ata itsa apo panepae tsane Diosojavabelia? jai.

<sup>26</sup> Jesús asaëya naëcota pijajivijavabelia. Jumaitsi pijajivijavabelia:

—Jivi raja apo caëjëpaetsi pijacuata penacapanepaenexa Diosojavabelia. Caenë Dioso caëjëpatsi. Dioso raja caëjëpatsi daxitacuene pexanaenexa, jai Jesús pijajivijavabelia.

<sup>27</sup> Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxainaejavami. Nexata baja pacapënajinavanapatsi. ¿Detsa xua meta panerajutsiana? jai Pedro Jesúsjavabelia.

<sup>28</sup> Nexata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pamatacabi daxitacuene pejanajava icatsia naexanaena, xanë, Daxitajivi Pematapijinënë, ecaenajë tronovënëjavata taevetsinexa daxitajivi. Bajarapamatacabi paxamë ata, doce paponëmëbeje patanepënajinavanapaevimë, paenaename, pacaenëmë canacujitsia, panijatronota vajanajuavevetsinexa xua evetsianajë. Nexata paxamë paenaename jueznëcuenia panenaneconitsiaexanaenexa pijaneconi pexainaevi. Pananeconitsiaexanaename Israelpijinëmi pexi, doce ponëmibeje, pemomoxi. <sup>29</sup> Daxita pamonaë taja-matabëcueneta pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijairanë ata, Dioso nexata bajarapamonae rajutsianatsi ayaijava bitso pepuenetsijavanëmi matatoxenetsia. Caëjavayomijamatabëcuene tsaponae, rajutsianatsi cien xuabeje tsaponae pevajënaeyabelia. Rajutsianatsinua matacabi apo pevereverecejava. <sup>30</sup> Pamonaë aeconoxae mapamatacabitaje ayaija-

matabëcuenevi tanetsi, bajarapamonae itsamatacabi Dioso beveliamatabëcuenevi exanaenatsi. Pamonaе pijinia mapamatacabitaje beveliamatabëcuenevi tanetsi, bajarapamonae itsamatacabi Dioso ayajiamatabëcuenevi exanaenatsi, jai Jesús pijajivijavabelia.

**Pacuenia Jesús livaisi tsipaeba pabi pexainaenë petonacuenebivitsi najëpaeya pematamotsijava pelivaisicuenia yabara pelivaisi**

**20** Icatsia Jesús jumaitsi pijajivijavabelia: —Aeconoxae Dioso pejumelivaisi comparacióncuenia pacatsipaebianatsi patanejumeyapëtaenexamë. Dioso pijajivi pematamotsijava pijanacuatsia, jëpa mapalivaisije. Pabixaneto pexainaenë ponapona. Ajena matacabi tsarucaponaе, naropota jivi pejaitsinë petonacuenebinexatsi uvavënëjava peubipabita. <sup>2</sup>Caxitajarabaxuaba baja nexata jivi. Junata petonacuenebinexatsi. Caematacabi matamotsiapaeba caedenario. Jejai nexata bajarapamonae. Nexata itoroba pijapabiabelia petonacuenebinexatsi. <sup>3</sup>Bajaraxuacujinae juameto baja tajë itsa rucaina, a las nueve, naropota icatsia. Taenuba tomara tuatujëta pebijivi, saya jema pejinavanapaevi. <sup>4</sup>Nexata jumaitsi bajarapamonaejavabelia: “Paxamë ata paponaremelia tajapabiabelia. Panetonacuenebianame. Pacamatamotsianatsi raja xaniavaetsia,” jai pabixainaenë. <sup>5</sup>Nexata bajarapamonae ata ponalia petonacuenebinexatsi. Bajaraxuacujinae, matonejeepatota, junata icatsia itsamonae. Bajarapamonae ata ponalia petonacuenebinexatsi. Bajaraxuacujinae, bejamatabëcuene a las tres, junata icatsia itsamonae. Bajarapamonae ata ponalia petonacuenebinexatsi. <sup>6</sup>Bajaraxuacujinae, caniviyo, bejamatabëcuene a las cinco, pabixainaenë icatsia pona tomara tuatujëareca. Caxitajarabaxuaba icatsia pebijivi, saya jema pejinavanapaevi. Nexata pabixainaenë jumaitsi bajarapamonaejavabelia: “¿Detsa xuajitsia saya daxitamatacabi pajinavanapame panacuenebinejevamë?” jai. <sup>7</sup>Nexata bajarapamonae jumaitsi: “Tsipaji itsajivi ata apo panejunatsi patatonacuenebinexa,” jai. Nexata pabixainaenë jumaitsi: “Paxamë ata paponaremelia tajapabiabelia patanetonacuenebinexamë. Pacamatamotsianatsi raja xaniavaetsia,” jai pabixainaenë. Nexata bajarapamonae jejai. Ponalia petonacuenebinexatsi. <sup>8</sup>Nexata baja juameto itsa tabujuniya, pabixainaenë jumaitsi pijajivitonëjavabelia: “Junare baja tanetonacuenebivi. Matamobare baja. Copiaya matamobare pamonaе pepacotocaevi pejonevi. Pamonaе pepacopiaya pejonevi cotocaevi matamobianame,” jai pabixainaenë pijajivitonëjavabelia. <sup>9</sup>Nexata pamonaе pepacotocaevi junua a las cinco penacuenebinexa, parena pematamobinexatsi. Nexata caenë canacujitsia matamobatsi caedenario. <sup>10</sup>Nexata daxita pamonaе bajayacunua pepacopiaya junua penacuenebinexa, pepacotocaevi juya parena pematamobinexatsi. Nexata bajarapamonae jamatabëjumaitsi: “Caedenario meta pematatsënëa vaxaitsi nacamatamobiana. Tsipaji copiaya vaxaitsi junuatsi vajanacuenebinexa,” jamatabëjai bajarapamonae. Itsiata baitsi jane bajarapamonae ata, caenë canacujitsia, matamobatsi caedenario tsaponaе. <sup>11</sup>Nexata bajarapamonae penacuenebimatamo baja itsa nota, baranae pana pabixainaenëjavabelia. <sup>12</sup>Jumaitsi bajarapamonae: “Mapamonae cotocaevi pepatsivi, nacueneba saya caehora. Paxanë baja rovia yaicuenia panacuenebajë. Icotia daxitamatacabi panetsajava. Itsiata mapamonae matamobame pacuenia panematamobame,” jai bajarapamonae. <sup>13</sup>Itsiata baitsi jane pabixainaenë jumaitsi bajara pamonaeya-juvënëjavabelia: “Itacuenejavayo ata pibisiacuene apo pacaexanaetsi. Pataca-

junatsijavata patanetonacuenebinexamë, caedenario pacatsipaebatsi patacamata-motsinexa patanetonacuenebimatamomë. Nexata baja bajarapacuenia pacarajutatsi. <sup>14</sup> Panijamatamo baja papitame. Paponare baja panijabonëjavabelia. Pamona cotocaevi junua tanetonacuenebinexa, bajarapamonaë ata matamobajë pacuenia pacamatamobatsi. Bajarapacuenia matamobajë pacuenia xanë jitsipajë. <sup>15</sup> Tajapalataxae, netoxanepana pacuenia jitsipajë tarajutsinexa. ¿Pacobecaëbame tsaja bajarapamonaë ayaijava tarajutsixae? jai pabixainaenë petonacuenebivitsi yajuvënëjavabelia. <sup>16</sup> Bajara pijinia pacuenia Dioso ata, pacuenia jitsipa, exanaena pijajivijavabelia. Pamonaë mapanacuata ayaijamatabëcuenevi tanetsi, bajarapamonaë itsamatacabi Dioso beveliajamatabëcuenevi exanaenatsi. Pamonaë pijinia mapanacuata beveliajamatabëcuenevi tanetsi, bajarapamonaë itsamatacabi Dioso ayaijamatabëcuenevi exanaenatsi. Bajarapacuenia Dioso exanaena tsipaji picani jivi ayabitsaëtoxaneto Dioso junata. Itsiata bajarapamonaeyajuvënëvi, caejiviyobeje saya, Dioso jumecovënëta, jai Jesús pijajivijavabelia.

**Pacuenia icatsia Jesús tajëvelia navajunupaeba  
pebeyaxuabijavanexatsi yabara pelivaisi**

*(Mr 10.32-34; Lc 18.31-34)*

<sup>17</sup> Jesús pona Jerusalén tomarabelia. Nexata Jesús, pijajivi ayabitsaëto yajava, najetaruca namutua, itsamonaë yajava. Nexata bajarapamonaëvecua ëpijajivi, doce ponëbeje, Jesús junata pimoxoyotsinexatsi. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniaje:

<sup>18</sup> —Panejumetaema. Mara Jerusalén tomarabelia ponatsije. Bajarajotalia xanë, Daxitajivi Pematapijinënë, tanevaetabinexa necanajetsiana sacerdotevi penamatacaitorobivi pecobeyabelia. Necanajetsiana judïovi pecujarubivi pecobeyabelia ata. Nexata xanë neneconitsiana tanebeyaxuabinexa. <sup>19</sup> Bajaraxuacujinaë icatsia necanajetsiana itsanacuaverena pepatsivi pecobeyabelia. Bajarapamonaë necanecapon-aena. Nejumatitibabena penaneconitsivi pejumaconitabiabimacata. Bajaraxuacujinaë cruzajavabelia necobematabiabarutsiana tatëpaenexa. Itsiata baitsi jane tanebeyaxuabicujinaë, acueyabi matababita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

**Pacuenia Santiagobeje Juanbeje pena vajëta Jesúsjavabelia  
pexaniacuene petoexanaenexatsi yabara pelivaisi**

*(Mr 10.35-45)*

<sup>20</sup> Santiagobeje Juanbeje paxa pevënë Zebedeo. Nexata bajaraponëbeje pena barëliatsibeje Jesúsjavabelia. Bajarapova pematatabacabëta nucajunua Jesús pitabarata. Vajëta pexaniacuene petoexanaenexatsi. <sup>21</sup> Nexata Jesús jumaitsi bajarapovajavabelia:

—¿Detsa pitsicuene jitsipame tacatoexanaenexa? jai Jesús.

Nexata bajarapova jumaitsi Jesúsjavabelia:

—Pamatacabi daxitacuene evetsianame, tocopatsianame taxënatobeje nemuxuneneta penaecaenexabeje panenajuaevevsinexa. Itsanë tocopatsianame necujane-nia peecaenexa. Itsanë tocopatsianame netsavenonenia peecaenexa, jai bajarapova Jesúsjavabelia.

<sup>22</sup> Nexata Jesús jumaitsi Santiagobeje Juanbejejavabelia:

—Paxamēbeje apo payapētaemēbeje xua pavajēcaeyaexanamebeje ena xanējavaberena. ¿Pacacaējēpabeje tsaja panenacaevetsinexabeje papecabējiobiaexanaenexabeje pacuenia xanē nacaevetsianajē tanebejiobiaexanaenexa? ¿Pacacaējēpabejenua tsaja panenacaevetsinexabeje papecabeyaxuabinexabeje pacuenia xanē nacaevetsianajē tanebeyaxuabinexa? jai Jesús Santiagobeje Juanbejejavabelia.

Nexata Santiagobeje Juanbeje jumaitisibeje:

—Jājā, panecaējēpabeje cajena, jaibeje.

<sup>23</sup> Nexata icatsia Jesús jumaitsi Santiagobeje Juanbejejavabelia:

—Paxaniajamēbeje rabaja. Paxamēbeje pacabējiobiaexanaenabeje pacuenia xanē nebejiobiaexanaena. Pacabeyaxuabianabejenua pacuenia xanē nebeyaxuabiana. Itsiata baitsi jane xua panevājētamebeje panenaecaenexabeje, itsanē tacujuanenia, itsanē tatsavenonenia, bajaraxua Dioso apo netocopatsi patacatocopatsinexabeje. Tsipaji raja taxa Dioso ēpitapetsivinexa abaxē bajaraxua toxaniavaeta, jai Jesús Santiagobeje Juanbejejavabelia.

<sup>24</sup> Nexata diez ponēbeje Jesús pijajivi vēnētane pepēya bajaraxua Santiagobeje Juanbeje Jesúsjavabelia pevājēcaejavabeje. Nexata bajarapamonae jamatabēcuenēbaraanaepana Santiagobeje Juanbejejavabelia. <sup>25</sup> Nexata Jesús daxita pijajivi junata. Jesús jumaitsi pijajivijavabelia:

—Payapētaneme rabaja pacuenia nacuaevetsivi exana. Eveta caenacua canacujitsia. Nexata nacuaevetsivi pijajivicuenia eveta pamonaē jinavanapa pevetsinacuanējava. Nexata bajarapanacuanē pevetsivi ayaijamatabēcuenēvi nataeyabiaba. Xua jamatabēitoroba pevetsinacuanējava pejinavanapaevi petoexanaenexatsi, ajumesaēya itorobabiaba petoexanaenexatsi. <sup>26</sup> Pētsa paxamē bajarapamonae cuenejēpaeya bajarapacuenia paexaname itsamonaejavabelia. Biji rajane ponē paxamēyajuvēnēnē jitsipa ayaijamatabēcuenēnē penaexanaenexa daxita paxamēvecua, bajaraponē daxita paxamē bepanijajivitonēcuenia bepacayavenonabiaba. <sup>27</sup> Ponē paxamēyajuvēnēnē jitsipa penaexanaenexa papecanamatacaitorobinēnēnē, bajaraponē daxita paxamē bepanijajivitonēcuenia bepacayavenonabiaba. <sup>28</sup> Tsipaji rabaja xanē ata, Daxitajivi Pematapijinē atanē, apo patajopaenē jivi taneyavenonaenexa. Biji rajane xanē patajopajē tayavenonaenexa daxitajivi. Patajopajē tasivatēpaenexa jivi ayaiBITSaētoXaneto pibisiacuene pexanaeconimi taneconimatamotsinexa, jai Jesús pijajivijavabelia.

### **Pacuenia Jesús itaxutoXanepanaeYaexana bitso pitaxutotsēcēnaenēbeje, apo petaenēbeje, yabara pelivaisi**

*(Mr 10.46-52; Lc 18.35-43)*

<sup>29</sup> Jesús, pijajivi yajava, pitsapa Jericó tomaravecuca. Nexata jivi ayaibitsaēto pēnaponatsi. <sup>30</sup> Panamutojava Jesús najetaruca, bajarapanamutojavata ecabeje bitso pitaxutotsēcēnaenēbeje, apo petaenēbeje. Nexata bajaraponēbeje itsa jumetanebeje bajarapanamutua imoxoyo Jesús penajetarucaejava, vavajaibeje tsecae.

—¡Jesús, Davidpijinē pemomomē, paneitaxutotsoniaemabeje! jaibeje tsecae pitaxutotsēcēnaenēbeje.

<sup>31</sup> Jivi picani jumeitavetsibeje pemoyanexabeje tsecae. Itsiata biji bitsoyo orijibia vavajaibeje tsecae.

—¡Jesús, Davidpijinē pemomomē, paneitaxutotsoniaemabeje! jaibeje tsecae Jesúsjavabelia.



<sup>32</sup>Nexata Jesús muxunanucojopa. Junata pitaxutotsēcēnaenēbeje. Jesús jumaitsi bajaraponēbejejavabelia:

—¿Detsa xua pajitsipamebeje patacaexanaenexabeje? jai.

<sup>33</sup>Nexata bajaraponēbeje jumaitsi beje Jesúsjavabelia:

—Jesús, pajitsipajēbeje pataitaxutoxanepanaejavabeje, jaibeje tsecae.

<sup>34</sup>Nexata Jesús itaxutotsoniatane bajaraponēbeje. Jesús itaxutojayata bajaraponēbeje. Bajarajota caecuenia bajaraponēbeje itaxutoxanepanabeje baja. Nexata bajaraponēbeje Jesús pepēta naponabeje.

### Pacuenia Jesús pata Jerusalén tomarata yabara pelivaisi

(Mr 11.1-11; Lc 19.28-40; Jn 12.12-19)

**21** Jesús baja pijajivi barēimoxoyotanajetaruca Jerusaléntomara. Barēpata baja Betfagé tomarata. Patsutojumata nubena olivonaenē, bajarapatsutoyenepanata eca Betfagétomara. Nexata Betfagé tomarata Jesús jumaitsi pijajivitonēbejejavabelia mapacueniaje:

<sup>2</sup>—Paponarebeje mapatomarayo ecaliajejavabelia. Bajarajotalia, ajena papatsiaremeliabeje, pataenutsianamebeje burro pecētanutsinētsi, pexēnatonēyo yajava. Paisinaenamebeje bajarapaburrobeje. Payamaēyacarenamēbeje tsane. <sup>3</sup>“¿Detsa xua jitsia burrobeje paisinamebeje?” itsa pacajaiibeje tsane itsajivi, nexata pajumaitsimēbeje tsane: “Vajatuxanenē raja namatavenona. Aeconoxae raja icatsia canavitsiarena,” pajamēbeje tsane, jai Jesús pijajivitonēbejejavabelia.

<sup>4</sup>Bajarapacuenia Jesús itsa jumaitsi, tocopiapatatsi jane baja pacuenia Diosojumepaebinēmi profetanē bajayata tajēvelia yaquina Jesús pepatsijavanexa yabara Jerusalén tomarata. Jerusalén tomarata Jesús pepatsijavanexa yabara, profetanēmi bajayata peyaquinaelivaisita jumaitsi mapacueniaje:

<sup>5</sup>Pajumaitsimē tsane Jerusalén tomarapijivijavabelia: “Pataename pepo paneevetsinē paxamējavaberena penajetarucaejava. Beveliajamatabēcuenenēcuenia najetarucaena. Pejanaburroyota yapatanajetarucaena,” pajamē tsane Jerusalén tomarapijivijavabelia,

jai bajayata tajēvelia profetanēmi peyaquinaelivaisita Jerusalén tomarata Jesús pepatsijavanexa yabara.

<sup>6</sup>Nexata Jesús pijajivitonēbeje liabeje. Jumecovēnētabeje pacuenia Jesús itorobatsibeje. <sup>7</sup>Yamaēya carenabeje burro, pexēnatonēyo yajava. Nexata bajarapaburrobeje Jesús pijajivi tsijumajeba pijacama,” pajamē tsane Jerusalén tomarapijivijavabelia,

jai bajayata tajēvelia profetanēmi peyaisajumavelia penaxatabijavanē. Jesús yanajetaruca burrota. <sup>8</sup>Panamutuarena Jesús najetaruca, bajarapanamutuarena jivi ayabitsaētoxfaneto, pijacamisajumavelia penaxatabijavanē, Jesús pevajēnaeya namutua yerequejebapona. Itsamonae naemaxērananē, pebaxu yajava, ucubaba. Nexata namutua Jesús tsivajēnaeitabētsiaya jebaponatsi yayataeya pecopiapitsinexatsi. <sup>9</sup>Jesús penajetarucaejavata jivi ayabitsaētoxfaneto Jesús pevajēnaeya namataxainaeja najetarubena. Itsabitsaētoxfaneto Jesús pecovēya cotocaevanajetarubena. Daxita bajarapamonae vavajai tsanajetarubena. Jumaitsi tsanajetarubena:

—¡Dioso yavenonaenatsi maponēje, pepo nacuaevetsinēmi Davidpijinē pemomo!  
¡Dioso yavenonaenatsi maponē najetarucaje nacua pevetsinēnexa Dioso peja-

matabëcueneta! Nexata vaxaitsi pexaniajamatabëcuene rajutatsi Diosojavabelia, jai tsanajetarubenaë bajarapamonae.

<sup>10</sup>Nexata Jesús itsa pata Jerusalén tomarata, daxita Jerusalén tomarapijivi jamatabëcuenenabenajaca. Nexata nayanijoba.

—¿Detsa meta maponë najetarucaje? najai bajarapamonae.

<sup>11</sup>Nexata jivi jumaitsi:

—Jesús ra manajetarucaje, Diosojumepaebinë profetanë. Galilea nacuata peecae-tomara, Nazaret tomarapijinë, jai bajarapamonae.

**Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivinua, yabara pelivaisi**

*(Mr 11.15-19; Lc 19.45-48; Jn 2.13-22)*

<sup>12</sup>Jesús itsa pata Jerusalén tomarata, joneya temploboyalia. Nexata templobota Jesús tane pecanajetabiabivi, pecomuacaevinua. Nexata daxitaitsi:

—Jesús ra manajetarucaje, Diosojumepaebinë profetanë. Galilea nacuata peecae-tomara, Nazaret tom bajarapamonae Jesús pitsapaeyaexana templobovecua. Palata pecambiabibiabivi ata pijamesanëmi Jesús topënëyorobajaraba. Ucucu pecanajetabiabivi ata penabiabijavanëminua topënëyorobajaraba.

<sup>13</sup>Jesús jumaitsi bajarapamonaejavabelia:

—Dioso baja cajena pejumelivaisibaxutota mapatemplobo yabara tajëvelia jumaitsi mapacueniaje: “Tajabo raja jivi xanëjavaberena penavajëcaebo tsane,” jai Dioso pejumaitsijava Dioso pejumelivaisibaxutota. Itsiata baitsi jane paxamë yamaxëitojorobiaya panenacobetoxotsinexa panacaetuatabiabame mapabotaje, jai Jesús templobota pecanajetabiabivijavabelia.

<sup>14</sup>Bajarajota templobota Jesús imoxoyorenatsi pitaxutotsëcënaevi, pejayujayunaevinua. Nexata Jesús bajarapamonae xanepanaeyaexana. <sup>15</sup>Templobota nubena sacerdotevi. Nubena judíovi pecujarubivinua. Bajarapamonae taenubena Jesús pitaxutoxanepanaeyaexanaejava pitaxutotsëcënaevi. Taenubenanua Jesús pexanepanaeyaexanaejava pejayujayunaevi. Jumetaenubenanua pejevaxi templobota pevavajaijavata pejumaitsijava Jesús yabara: “¡Dioso yavenonaenatsi maponëje, pepo nacuaevetsinëmi Davidpijinë pemomo!” pejaijava Jesús yabara. Bajaraxuata sacerdotevi baraanaepanatsi Jesús. Judíovi pecujarubivi ata baraanaepanatsi Jesús.

<sup>16</sup>Nexata bajarapamonae jumaitsi Jesúsjavabelia:

—¿Tsipaji apo jumetaemë mapapejevaxi xamë yabara pejumaitsaponaejavaje? ¿Apo necajumeitavetsi? jai.

Nexata Jesús jumaitsi bajarapamonaejavabelia:

—Jājā. Jumetaniji picani. Itsiata apo jumeitavetsinë. ¿Paxamë tsipaji Dioso pejumelivaisibaxuto apo palebimë paneyapëtaenexa pacuenia tajëvelia jumaitsi xanë yabara bajarapapejevaxi pevavajaijavanexa? Dioso pejumaitsijava xanëjavaberena, tajëvelia Dioso pejumelivaisibaxutota jumaitsi mapacueniaje:

Pejevaxi, mitopaenacuetoxi ata, naxëanaeyaexanaename penaxëanaejavata xamëjavaberena pecajumaitsinexa: “Ayaijamatabëcuenenëmë bitso,” pecajainexa, jai Dioso pejumelivaisibaxutota xanëjavaberena Dioso pejumaitsijava. Bajaraxuata mapapejevaxije jumaitsi bajarapacuenia, jai Jesús sacerdotevijavabelia, judíovi pecujarubivijavabelia ata.

<sup>17</sup> Nexata baja Jesús bajarapamonaevueca pona. Jerusalén tomaraveueca pitsapa. Navialia Betania tomarayojavabelia. Nexata Jesús Betania tomarayota majita.

**Pacuenia Jesús bijataenuta higueranae piacuaijibixae yabara pelivaisi**

*(Mr 11.12-14, 20-26)*

<sup>18</sup> Jesús pijajivi Betania tomarata pebarëmajitsicujinae, meravia pitsijavata, bajayacunua, Jesús pijajivi barëlia icatsia Jerusalén tomarabelia. Jesús nexata namutua penajetarucaejavata, piajani. <sup>19</sup> Jesús nexata taenuta higueranae namuto muxuneneta. Nexata Jesús imoxoyolia higueranae, pecuai itsa xaina, pexaenexa. Pecuai itsiata apo xainae higueranae. Èpebaxu saya tsanucae. Bajaraxuata nexata Jesús jumaitsi higueranaejavabelia:

—¿Xamë baja apo nacuaitsimë tsane! jai Jesús.

Bajarapacuenia Jesús pejumaitsijavata, bepijia higueranae tēpanajereca yatabuto-paya. <sup>20</sup> Nexata Jesús pijajivi itsa tane bajaraxua, jamatabëcuenenabenajaca. Nexata Jesús pijajivi nayanijoba.

—¿Detsa pacuenia maponae bepijia tēpanajerecaje? najai.

<sup>21</sup> Nexata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Itsa pajamatabëjumaitsimë tsipae Dioso yabara: “Dioso nejumecovënëtsiana xua vajëtsianajë Diosojavabelia,” itsa pajamatabëjamë tsipae, nexata paxamë ata pacacaëjēpaejitsipa paneexanaenexa pacuenia exanajë mapahigueranaejavabeliaje. Itsiata ëbajarapacuenia paneexanaenexa, apo pacacaëjēpae tsipae. Pematatsënëa itsacuenejavanënuua paneexanaenexa, pacacaëjēpaejitsipa. Nexata itsa pajumaitsimë tsipae mapatsutojavabelia ataje: “Natixire majotavecuaje. Pucaxanetojavabelia jopare,” itsa pajamë tsipae, pacajumecovënëtsipa. Nexata mapatsuto ataje paneitorobicuenia pacajumecovënëtsipa. <sup>22</sup> Nexata daxitacuene xua pavajëtsianame Diosojavabelia, pasivajamatabëjumaitsimë tsane mapacueniaje: “Xua vajëtajë Diosojavabelia, pepacuenia Dioso nejumecovënëtsiana,” pasivajamatabëjamë tsane. Nexata xua pavajëtsianame Diosojavabelia, Dioso pacajumecovënëtsiana, jai Jesús pijajivijavabelia.

**Pacuenia Jesús caëjēpatsi daxitacuene pexanaenexa yabara pelivaisi**

*(Mr 11.27-33; Lc 20.1-8)*

<sup>23</sup> Jesús junua temploboyalia. Nexata templobota Jesús jivi livaisi tsipaeba. Nexata templobota Jesús imoxoyorenatsi sacerdotevi, judfovi pijaancianovi yajava. Nexata bajarapamonaevueca jumaitsi Jesúsjavabelia:

—¿Jipatsa pejamatabëcueneta pecanajetabiabivi, pecomuacaevinua, capitsapame mapatemplobopanabovuecuaje? jai bajarapamonaevueca Jesúsjavabelia.

<sup>24</sup> Nexata Jesús jumaitsi bajarapamonaevuecajavabelia:

—Xanë copiaya caejumeyo pacayanijobianatsi. Itsa paxamë panejumecanaviatsianame, nexata xanë juya pacatsipaebianatsi ponë nitoroba taexanaenexa bajarpacuenia. <sup>25</sup> ¿Jipatsa jane pejamatabëcueneta Juanpijinë jivi bautisabaponapona? ¿Dioso tsaja pejamatabëcueneta? Itsa jume, ¿jivi tsaja pejamatabëcueneta? jai Jesús bajarapamonaevuecajavabelia.

Nexata ëpamonaevueca nabarëcuaicuaijai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabëcueneta,” itsa jai tsipaetsi, nexata Jesús nacajumai tsipae: “¿Detsa

nexata xuajitsia apo pajumecovënëtsimë Juanpijinë pepaebilivaisi?” nacajai tsi-pae. <sup>26</sup>“Jivi raja saya pejamatabëcueneta Juanpijinë jivi bautisabaponapona,” itsa jai tsipaetsi, nexata jivi belia nacabeyejebijitsipa. Bajarapacuenia nacabeyejebijitsipa tsipaji raja Juanpijinë yabara daxitajivi sivajamatabëjumaitsi: “Juanpijinë raja pepacueene Diosojumepaebinëmi,” sivajamatabëjai, najai sacerdotevi, judíovi pijaancianovi yajava.

<sup>27</sup> Nexata saya bajarapamonae jumaitsi Jesúsjavabelia:

—Apo payapëtaenë ponë Juanpijinë itorobatsi jivi pebautisabaponaenexa, jai.

Nexata Jesús jumaitsi bajarapamonaejavabelia:

—Nexata xanë ata apo pacatsipaebi tsanetsi ponë nitoroba taexanaenexa bajarapacueene, jai Jesús.

### **Pacuenia Jesús jivi livaisi tsipaeba anijanëbeje pexënatobeje pexainanë pelivaisicuenia yabara pelivaisi**

<sup>28</sup> Jesús icatsia jumaitsi sacerdotevijavabelia, judíovi pijaancianovijavabelia ata:

—Panejumecanaëjëtsianame palivaisi aeconoxae pacatsipaebijitsiatsi. Pebi xaina anijanëbeje pexënatobeje. Nexata pexënatojavabelia jumaitsi: “Taxënato, ajena netonacuenebianame tajauvabacabota,” jai pexënatojavabelia. <sup>29</sup> Nexata bajaraponë paxajavabelia jumaitsi: “¡Jume! ¡Apo jitsipaenë tanacuenebijava! jai. Itsiata xuacujinae bajaraponë icatsia najamatabëxaina. Nexata jamatabëjumaitsi: “Xanë baja rovia pibisiajamatabëcuenenajamatabëxainajë. Nexata baja ponajë taxa tatonacuenebinexa,” jamatabëjai. Naropota baja penacuenebinë. <sup>30</sup> Bajaraxuacujinae pexënatobeje pexainanë pona icatsia itsanë pexënatojavabelia. Bajaraponëjavabelia ata jumaitsi: “Taxënato, ajena netonacuenebianame tajauvabacabota,” jai pexënatojavabelia. Nexata jejai itajara pexënato. Itsiata apo ponae. <sup>31</sup> ¿Detsa ponë bajaraponëbejeyajuvënëne paxa jumecovënëta? jai Jesús bajarapamonaejavabelia.

Nexata bajarapamonae jumaitsi Jesúsjavabelia:

—Copiata ponë paxa itorobatsi, apo jejai ata, itsiata paxa tonacueneba, bajaraponë paxa jumecovënëta, jai.

Nexata Jesús jumaitsi bajarapamonaejavabelia:

—Xaniajanë pacuenia pacatsipaebijitsiatsi. Bajara pijinia itsane pamona co-pabiana pibisiacuenen pexanabiabijavami, pamona najamatabëcuenepënëyorotsiana Diosojavabelia. Impuestomatamo gobierno pejamatabëcuenen petomatamoyanijobabiabivimi ata jonena Dioso pijanacuayabetsia itsa najamatabëcuenepënëyorota Diosojavabelia. Petiriavi palata pepitsinexa pevitota pibisiacuenen pexanabiabivimi ata jonena Dioso pijanacuayabetsia itsa najamatabëcuenepënëyorota Diosojavabelia pibisiacuenen pexanabiabijavamivecua. Itsiata baitsi jane paxamë apo pajonemë tsane. <sup>32</sup> Juanpijinë jivibautisabinë patajopa Dioso pejumelivaisi papecatsipaebinexa panenajamatabëcuenen pënëyorotsinexa pibisiacuenen paneexanabiabijavavecua. Itsiata paxamë apo pajumecovënëtsimë bajarapalivaisi. Itsiata bajarapalivaisi jumecovënëta impuestomatamo gobierno pejamatabëcuenen pematamoyanijobabiabivi. Petiriavi palata pepitsinexa pevitota pibisiacuenen pexanabiabivimi ata jumecovënëta bajarapalivaisi. Paxamë patae atamë bajarapamonae pejumecovënëtsijava, itsiata apo panajamatabëcuenepënëyorotsimë panejumecovënëtsinexa Dioso, jai Jesús bajarapamonaejavabelia.

**Pacuenia exana pijamatabëcuenebejevi,  
itsanë pijauvabacabo petoevetsivi, yabara pelivaisi**

(Mr 12.1-12; Lc 20.9-19)

<sup>33</sup> Icatsia Jesús jumaiti sacerdotevijavabelia, judíovi pijaancianovijavabelia ata:

—Xaniavaetsia panemuxunaevere mapalivaisije. Pijaira pexainaenë pijairata uba ayaiabacoboxaneto uvavënëjava. Bajaraxuacujinae pijaira matatoyorotsia, ibopanaxanetonë mataropotsia pefaratsijavata, yacaranata. Bajarapayacaranatsijava athëbëabetsia apia jivitonë matatoxenetsia. Bajaraxuacujinae irata mëthë cueyeta. Nexata pecueyetsimëthëjavata exana uvacuaibarëmene pecayujucabiabijavanexa. Bajaraxuacujinae pijauvabacabo tuatujëta exananuta piapiabotsia, penacuaitsimatacabi ita tonaveretatsi, athëbëyo pevetaabiabecaenexa pijauvabacabo.

<sup>34</sup> Nexata bajaraponë itsamonae evetsiaexana pijauvabacabo. Uvabacabo pexainaenë jumaiti petoevetsivitsijavabelia: “Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonë itorobiarenajë xua panetotsatsianame tanetopitsinexa,” jai uvabacabo pexainaenë petoevetsivitsijavabelia. Nexata uvabacabo pexainaenë tajë nacuyabelia pona. <sup>35</sup> Itsa baja uvabacabo pexainaenë yapëtane pecopiapatsijava uvacuai penaveretsimatacabi penotsinexa, nexata uvabacabo pexainaenë itoroba pijajivi. Itoroba petoevetsivitsijavabelia petsicobetsatsinexatsi. <sup>36</sup> Nexata uvabacabo pexainaenë pijajivi uvabacabo petoevetsivitsi totaicatsi. Caenë bajarapamonaeyajuvënëne toconibabiatsi. Itsanë pepacuene tobeyaxuabatsi. Itsanë ibotonëta totseconatsi. <sup>37</sup> Nexata uvabacabo pexainaenë icatsia itsabitsaëto pijajivi itorobalia. Bajara icatsia pacuenia exana uvabacabo pevetsivi.

<sup>38</sup> Nexata uvabacabo pexainaenë itoroba icatsia pexënato jane baja. Uvabacabo pexainaenë jamatabëjumaiti: “Netoyaiyataena meta taxënato,” jamatabëjai. <sup>39</sup> Itsiata baitsi jane uvabacabo petoevetsivitsi uvabacabo pexainaenë pexënato ata apo toyaiyataetsi. Itsa tane uvabacabo pexainaenë pexënato, bajarapamonaenë najumaiti: “Mara ponëje paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane,” najai uvabacabo petoevetsivitsi. <sup>40</sup> Nexata icatsia uvabacabo pexainaenë pexënato ata tovaetabatsi. Caponaliatsi bajarapauvabacabo pënëyabelia. Nexata uvabacabo pexainaenë pexënato ata bajarapacuenia icatsia tobeyaxuabatsi, jai Jesús.

<sup>41</sup> Nexata bajarapalivaisi yabara Jesús yanijoba sacerdotevijavabelia, judíovi pijaancianovijavabelia ata. Jesús jumaiti:

—Uvabacabo pexainaenë ita patsiarena, ¿de tsaeta xua exanaena uvabacabo petoevetsivitsijavabelia? jai Jesús bajarapamonaejavabelia.

<sup>42</sup> Nexata bajarapamonaenë jumaiti Jesúsjavabelia:

—Pijauvabacabo raeta pexainaenë apo itaxutotsoniatae tsane. Nexata verebiabiana bajarapamonaemi pibisiacuene pexanaevi. Nexata icatsia itsamonae evetsiaexanaena bajarapauvabacabo. Nexata uvacuai penaveretsimatacabi bajarapamonaenë ita nota, tsicobetsatsianatsi pacuenia baja tocajëjëtatsi uvabacabo pexainaenë perajutsinexatsi, jai bajarapamonaenë.

<sup>43</sup> Nexata Jesús jumaiti bajarapamonaejavabelia:

—Payapëtaneme rabaja pacuenia Dioso pejumelivaisibaxutota tajëvelia jumaiti xanë yabara. Iboto pelivaisicuenia Dioso pejumelivaisibaxutota jumaiti xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanē pitsiana. Nexata bajarapaibotota xaniavaetsia nayaētsiana botabu daxita itsaibo matatoxenetsia. Vajatuxanenē Dioso raja exanaena bajarapacue. Nexata bitso nacatsita pexaniacue tsane bajarapacue, jai tajēvelia Dioso pejumelivaisibaxutota xanē yabara.

<sup>7</sup>Bajarapacuenia tajēvelia Dioso pejumelivaisibaxutota itsa jumaitsi, paxamē apo patanejumecovēnētsijavanexamē yabara jumaitsi. Dioso taneitapetsijava daxitajivi tacapanepaenexa yabara ata jumaitsi. <sup>43</sup>Nexata pacuenia uvabacabo pexainaenē icatsia itsamonae evetsiaexanaena, bajara pijinia pacuenia Dioso exanaena paxamējavabelia. Xua picani Dioso pacaevetsiaexana, copiarucaena. Nexata juya itsamonae Dioso evetsiaexanaena bajaraxua, pamonaē xaniavaetsia jumecovēnēta Dioso pitorobicueniatsi. <sup>44</sup>Pamonaē apo nejumecovēnētsi Dioso pexēnatocuenenē, bajarapamonaē bitso bejamatabējiobi tsane apo tanejumecovēnētsixae. Pacuenia ibotojumata pefirapecaejivi, itsa tsapatecatsi, pevixae bitso yanabejiobita, bajara itsane. Pamonaē naneconitsiaexanaenajē, bajarapamonaē pepacue naxuabiana daxitamatacabijavabelianexa. Pacuenia iboto pematacēnēbinētsi apo asaē, bajara itsane, jai Jesús bajarapamonaējavabelia.

<sup>45</sup>Sacerdotevi penamatacaitorobivi, fariseovi yajava, itsa jumetane bajarapacuenia Jesús pejumaitsijava, bajarapamonaē jamatabējumai tsenae: “Vaxaitsi yabara raeta jumaitsi,” jamatabējai tsenae bajarapamonaē. <sup>46</sup>Nexata picani bajarapamonaē Jesús jamatabēvaetabatsi. Itsiata bajarapamonaē jamatabējumai: “Bajaraponē jivi tanetsi Diosojumepaēbinēcuenē. Nexata nacaitfacueniabijitsipa vaxaitsi itsa vaetabijitsipatsi maponēje,” jamatabējai tsenae bajarapamonaē. Bajaraxuata Jesús apo vaetabitsi.

### **Pacuenia Jesús jivi livaisi tsipaeba penacasabifiesta pexanaenē pelivaisicuenia yabara pelivaisi**

*(Lc 14.15-24)*

**22**<sup>1-2</sup> Jesús icatsia livaisi tsipaeba sacerdotevijavabelia, judíovi pijaancianovijavabelia ata. Bajarapacuenia Jesús tsipaeba bajarapamonaē peyapētaenexa pacuenia itsamatacabi itsijitsia, pamatacabi Dioso pijajivi evetsiana. Jesús jumaitsi mapacueniaje:

—Pepo nacuaeetsinē fiesta exana pexēnato petonacasabifiestanexatsi. <sup>3</sup>Nexata nacuaeetsinē jumai si pijajivijavabelia: “Pamonaē baja tajēvelia junatajē, patsipaebare baja tanetopatsinexarena fiestanexa jane baja,” jai nacuaeetsinē pijajivijavabelia. Pijajivi baja nexata pona petsipaēbinexa. Itsiata pejunatsivi apo jitsipae ponaējava. Nexata nacuaeetsinē pijajivi naviabarena petsipaēbinexa pijatuxanenējavabelia. <sup>4</sup>Nexata nacuaeetsinē itsamonae icatsia pijajivi itorobalia pesivaponaeexalia. Nacuaeetsinē jumai si pijajivijavabelia: “Pajumaitsimē tsane tajunatsivijavabelia: ‘Veretejeba rabaja panexaejavanexa. Beyaexana rabaja baca penasitsivi, becerro yajava. Daxita rabaja veretejeba panenabaninexa. Naxanitsia. Daxita pina paponae remelia,’ pajamē tsane tajunatsivijavabelia,” jai nacuaeetsinē pijajivijavabelia. <sup>5</sup>Itsiata baitsi jane bajarapamonaē icatsia sivaponaē atalia, nacuaeetsinē pejunatsivi apo jejai. Pejunatsiviyajuvēnēnē itsanē pona pijapabianējavabelia. Itsanē pijinia pona penavijatsinexa. <sup>6</sup>Itsamonae nacuaeetsinē pijajivi taicatsi. Bejiobi-aexanatsi pibisiacuenia. Beyejebatsi baja belia. <sup>7</sup>Bajaraxuata nexata nacuaeetsinē

bitso baraanaešana pejunatsivimijavabelia. Nexata nacuaevecsine itorobalia vajabitsaevi pebenexa pamonaetobeyejebatsi pijajivi. Itorobanua pijatomaranemi atapetotajuitsinexa.<sup>8</sup> Bajaraxuacujinae nacuaevecsine icatsia pijajivijavabelia jumaitsi: “Daxitacuene baja picani veretejebiaexanaje taxenato penacasabifiestanexa. Itsiata baitsi jane tajunatsivimi apo netopatsirena.<sup>9</sup> Paponaremelia pinijicallexanetonjavabelia. Nexata daxita pamonaepacaxitajarabaponaename bajarapacallexanetonjava, pajunataponaename taxenato penacasabifiestajavaberena pepatsinexa,” jai nacuaevecsine pijajivijavabelia.<sup>10</sup> Nexata nacuaevecsine pijajivi ponalia. Naje-tarubena callexanetonjava. Junatapona daxita pamonaecaxitajarabapona. Junatapona pajamatabecuenebejevi, pejamatabecuene xanepanaevi ata. Nexata bajarapamonaebarepona fiesta pexanaebojavabelia. Nexata pabota fiesta exana, veneca jivi.

<sup>11</sup> Nexata nacuaevecsine jonena bajarapaboyarena petaenexa petopatsivitsi. Daxita pamonaetopatsi, jumapata xua banaxataba itsa pona penacasabifiestajavabelia. Nexata nacuaevecsine taenuta bajarajota itsane, saicayavirijava penaxatatsine. Apo naxatatsi xua naxataba daxita.<sup>12</sup> Nexata nacuaevecsine jumaitsi bajaraponjavabelia: “Detsa xuajitsia najunuame apo nenaxatatsine pacuenia daxita naxataba penacasabifiestajavaberena penajonevi?” jai nacuaevecsine. Nexata bajaraponemoya nuca.<sup>13</sup> Nexata nacuaevecsine jumaitsi mesa pevetsivijavabelia: “Mapone pataxucereje. Pacobecere yajava. Paxuaremelia bopeneyabelia, pitaquirijavabelia. Bajarajotalia nuena. Navonosiniana bitso penavixaetaexae,” jai nacuaevecsine.<sup>14</sup> Pacuenia fiesta pexanaene ayaibitsaetoxaneto junatsi ata, caejiviyobeje saya topatatsi, bajara pijinia itsi Dioso pejunatsivi ata. Dioso picani ayaibitsaetoxaneto junata pijajivinexa. Itsiata saya caejiviyobeje jumeconvenetatsi, jai Jesus sacerdotevijavabelia, judiovi pijaancianovijavabelia ata.

**Pacuenia Jesus jamatabecueneejebiyaya yanijobatsi  
impuestomatamo pematamotsijava yabara pelivaisi**

*(Mr 12.13-17; Lc 20.20-26)*

<sup>15</sup> Fariseovi nacaetuata penabarecuacuajainexa. Bajarapamonaenajamatabecuenejeba Jesusjavabelia jamatabecueneejebiyapeyanijobinexa. Nexata Jesus bijiaya itsa jumecanaviata, Jesus picani peneconitsinexatsi nacuaevecsinejavabelia.<sup>16</sup> Nexata fariseovi itoroba pijajivi, Herodes pijajivi yajava, Jesusjavabelia jamatacueneejebiyalivaisi peyanijobinexa. Nexata fariseovi pijajivi, Herodes pijajivi yajava, Jesusjavabelia jamatabecueneejebiyajumaitsi:

—Jesus, payapetaniji cajena nexaniajaicuene, xua yabara tsipaebabiabame livaisiane. Pexaniajaicuene tsipaebabiabame pacuenia Dioso jitsipa jivi petojinavanapaenexatsi. Petuxanevi ata xame apo cujunavime. Apo aurame livaisi netsipaebabiabijava. Nexata daxitajivi najepaeya livaisi tsipaebabiabame.<sup>17</sup> Panetsipaebare pacuenia najamatabexainame mapacuene yabaraje. Xanepana tsaja vajamatamotsinexa impuestomatamo Romanonacua pepo pevetsinejavabelia? Itsa jume, xapoxanepanae tsaja vajamatamotsinexa? jai bajarapamonaenamatabecueneejebiyaya Jesusjavabelia.

<sup>18</sup> Itsiata baitsi jane Jesus jamatabecuene yapetane bajarapamonaenamatabecueneejebiyapeyanijobijavatsi peneconitsinexatsi picani. Nexata Jesus jumaitsi bajarapamonaejavabelia:

—Paneyamaxëitojorobivi, ¿detsa xuajitsia jamatabëcueneëjëbiaya paneyanijobame? <sup>19</sup> Panetsitajëre pitsipalatanëyota pamatamotabiabame impuestomatamo, jai Jesús bajarapamonaejavabelia.

Nexata bajarapamonaë Jesús tocaponarenatsi palatanëyo. <sup>20</sup> Jesús itsa tane bajarapapalatanëyo, nexata jumaitsi bajarapamonaejavabelia:

—¿Jipatsa mapitabaraje, pevënënu, ruca mapapalatanëyoyumataje? jai Jesús.

<sup>21</sup> Nexata bajarapamonaë jumaitsi Jesúsjavabelia:

—Romanonacua raja pepo pevetsinë pitabara, pevënënu, jai.

Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

<sup>22</sup> Nexata Jesús xaniavaetsia itsa jumecanaviata, bajarapamonaë jamatabëcuenenabenajaca bajarapacuenia Jesús pejumaitsijavata. Nexata baja copatatsi Jesús jamatabëcueneëjëbiaya peyanijobijavatsi. Naviaba baja bajarapamonaë.

### **Pacuenia Jesús tsipaeba jivi petëpaecujinae icatsia piasaëjavanexa yabara pelivaisi**

*(Mr 12.18-27; Lc 20.27-40)*

<sup>23</sup> Saduceovi saicaya itsalivaisi xaina. Bajarapamonaë jamatabëcuenenavëxaniabiaya jumai tsabiabi: “Petëpaevi rabaja petëpaecujinae, icatsia apo asaë tsane,” jai tsabiabi. Nexata saduceovi imoxoyorenatsi Jesús. Saduceovi Jesúsjavabelia jumaitsi mapacueniaje:

<sup>24</sup> —Jesús, Moiséspijinë bajayata vajanacatoyaquinaelivaisi, jumaitsi mapacueniaje: “Ponë pematapijinë pepua penacojiobinë baja, totëpatsi pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata pexi itsa xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoyaquinaelivaisi. <sup>25</sup> Nexata jinavanapa ënacaemonaë siete ponëbeje paxanëjavata. Pepo matapijinë copiaya nacojioba. Nexata bajaraponë pijava vecuatëpa pexi xainaenejeva. Nexata pematapijinëmi pepënarucaenë pita pematapijinëmi pijavami. <sup>26</sup> Nexata icatsia bajaraponë ata tëpa pexi xainaenejeva bajarapovajavabelia. Nexata icatsia itsanë tuatujëmatapijinë pita bajarapova. Bajara icatsia ponë ata tëpa pexi xainaenejeva bajarapovajavabelia. Bajarapacuenia tëpa daxita siete ponëmibeje nacaemonaëmi, bajarapova pepitaponaevi. Itsiata itsanë ata pexi apo xinae bajarapovajavabelia. <sup>27</sup> Bajaraxuacujinae bajarapova ata tëpa baja. <sup>28</sup> “Jivi raja petëpaecujinae, Dioso icatsia asaëyaexanaenatsi,” jamë. ¿Detsa nexata ponë bajarapamonaeyajuvënënë pijava tsane bajarapova bajarapamatacabi? Daxita pamonaë siete ponëmibeje nacaemonaë pitapona picani bajarapovami, jai saduceovi Jesúsjavabelia.

<sup>29</sup> Nexata Jesús jumaitsi saduceovijavabelia:

—Paxamë saya pajamatëbëcuenenavëxaniabame. Paxamë raja apo payapëtaemë pacuenia Dioso pejumelivaisibaxutota jumaitsi. Apo payapëtaemënu pacuenia Dioso caëjëpatsi daxitacuene pexanaenexa. Bajaraxuata jamatabëcuenenavëxaniabiaya paneyanijobame: “¿Detsa ponë pitsiana bajarapova?” panejamë. <sup>30</sup> Pamatacabi raja petëpaevimi Dioso icatsia asaëyaexanaenatsi, apo nacojiobi baja tsane. Bajarapamatacabita itsajivi ata pexënatoyo apo canajetsi tsane pebijavabelia petona-



cojiobinexatsi. Bajarapamonae nacojiobinejeva, jinavanapaena athëbëtatsia pacuenia ángelevi jinavanapa. <sup>31</sup>Itsa pepacue ne paxamë xaniavaetsia paneyanijobame paneyapëtaenexa Dioso icatsia piasaëyaexanaejavanexatsi petëpaevimi, nexata pacatsipaebianatsi. Paxamë rabaja payapëtaneme pacuenia bajayata Dioso jumaitsi. Abraham baja pepuatëpae, Isaac ata baja pepuatëpae, Santiago ata baja pepuatëpae, bajarapamonae yabara bajayata Dioso jumaitsi Moiséspijinëjavabelia mapacueniaje: <sup>32</sup>“Xanë rabaja abaxë Abraham pijaDiosonë. Isaac ata pijaDiosonë. Jacob ata pijaDiosonë,” jai baja cajena Dioso bajayata petëpaevimi yabara. Bajarapacuenia Dioso pejumaitsixae, nayapëtane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinavana athëbëtatsia, jai Jesús saduceovijavabelia.

<sup>33</sup>Jivi ayaibitsaëtöxaneto itsa jumetane bajarapacuenia Jesús pejumaitsijava saduceovijavabelia, jivi bitso jamatabëcuenenabenajaca Jesús petsipaebilivaisi yabara.

**Palivaisi bitso jivi bejumecovënëta daxita Dioso pitorobilivaisianë  
pejumecovënëtsijava matatoxenetsia yabara pelivaisi**

*(Mr 12.28-34)*

<sup>34</sup>Saduceovi Jesús peyanijobijumetsi, xaniavaetsia Jesús jumecanaviata. Nexata baja moya saduceovi. Nexata fariseovi itsa vënëtane saduceovijavabelia Jesús xaniavaetsia pejumecanaviatsijava, nexata fariseovi nacaetuata penabarëcuaicuaijainexa. Nexata fariseovi najumejaita pacuenia yanijobijitsia Jesúsjavabelia. <sup>35</sup>Nexata fariseoviyajuvënënë, judíovi pecujarubinë, Jesúsjavabelia jamatabëcueneëjëbiaya yanijoba. Jumaitsi Jesúsjavabelia mapacueniaje:

<sup>36</sup>—Jesús, ¿detsa palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia? jai.

<sup>37-38</sup>Jesús nexata jumaitsi judíovi pecujarubinëjavabelia:

—Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia, jumaitsi mapacueniaje: “Pasivamëre panijatuxanenë panijaDioso daxita panejamatabëëthëtojavavetsina, daxita panejamatabëcueneta ata, daxita panenajamatabëxainaesaëta ata,” jai. Bajarapalivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia. <sup>39</sup>Bajaraxuacujinae pecotocaevilivaisi, palivaisi bitso jivi bejumecovënëta, jumaitsi icatsia mapacueniaje: “Pasivamëre itsajivi ata pacuenia paxamë panijacuatata panasivamë,” jai. Bajarapalivaisi ata jivi bitso bejumecovënëta. <sup>40</sup>Pajivi jumecovënëta bajarapalivaisibeje, Dioso baja tanetsi pejumecovënëtsijivicuene daxita Dioso pitorobilivaisianë. Nexata palivaisi ata bajayata Dioso Moiséspijinëta najumecopata, bajarapalivaisi ata pejumecovënëtsijivicuene Dioso tanetsi. Diosojumepaebivimi profetavi ata palivaisianë bajayata tsipaeba, bajarapalivaisi ata pejumecovënëtsijivicuene Dioso tanetsi, jai Jesús judíovi pecujarubinëjavabelia.

**Pacuenia Jesucristo yabara Davidpijinë  
bajayata tajëvelia: “Tajatuxanenë,” jai, yabara pelivaisi**

*(Mr 12.35-37; Lc 20.41-44)*

<sup>41</sup>Fariseovi penacaetuatsijavata, fariseovijavabelia Jesús pijacuata nayabarajumaitsi mapacueniaje:

<sup>42</sup>—¿Detsa pacuenia pasivanajamatabëxainaname Cristo itsa patsianica? ¿Jipatsa pexënato tsane? nayabarajai Jesús pijacuata fariseovijavabelia.

Nexata fariseovi jumaitsi Jesúsjavabelia:

—Davidpijinë pemomo tsane, jai.

<sup>43</sup>Nexata Jesús jumaitsi fariseovijavabelia:

—Pajamatabëcuenenavëxaniabame raja. Cristo raja Dioso pexënato. Bajayata Dioso pejumaitsijava Cristo yabara, Davidpijinë Espíritu Santo pejamatabëcueneta tajëvelia jumaitsi mapacueniaje:

<sup>44</sup>Dioso jumaitsi tajatuxanenëjavabelia:

“Ecare abaxë tacujuanenia. Vecatsivajënae jumecovënëtsiaexanaenatsi abaxë copi-aya nijavajabitsaë nitorobicuenianexa,” jai Dioso tajatuxanenëjavabelia, jai bajayata tajëvelia Davidpijinë mapacueniaje Cristo yabara.

<sup>45</sup>Nexata Davidpijinë bajayata Cristo yabara: “Tajatuxanenë,” itsa jai, nexata Cristo, Davidpijinë apo pemomo. Tsipaji baja cajena saicaya Cristo Dioso pexënato, nayabarajai Jesús pijacuata fariseovijavabelia fariseovi pecanaëjëtsinexa Cristo Dioso pexënatocuene.

<sup>46</sup>Nexata itsanë ata fariseoviyajuvënënë Jesús apo jumepitsitsi caejumeyo ata. Bajaraxuacujinae fariseovi, saduceovi ata, cjunava Jesúsjavabelia baja jamatabëcueneëjëbiaya livaisi peyanijobijava.

**Pacuenia Jesús tsipaeba fariseovijavabelia, judíovi pecujarubivijavabelia ata, bajarapamonae penaneconitsijava Diosojavabelia yabara pelivaisi**

*(Mr 12.38-40; Lc 11.37-54; 20.45-47)*

**23** Jesús jumaitsi jivi ayaibitsaëtojavabelia, pijajivijavabelia ata:

<sup>2</sup>—Judíovi pecujarubivi, fariseovi ata, Dioso tocopatatsi jivi xaniavaetsia peyapëtaeyaexanaponaenexa pajamatabëcuenelivaisi xaina Dioso Moiséspijinëta penajumecopatsilivaisimi. <sup>3</sup>Nexata pajumecovënëtsianame daxita pacuenia bajarapamonae pacatsipaebapona. Itsiata baitsi jane pëtsa paexaname pacuenia bajarapamonae exanavanapa. Tsipaji xua bajarapamonae pacaitaveta paxamë paneexanaeyaniva, bajaraxua itsiata bajarapamonae exanabiaba. <sup>4</sup>Palivaisianë ayapëbeje itsajivi ata pejumecovënëtsinexa, bajarapalivaisianë pacatsipaebabiaba panejumecovënëtsinexa. Pamonae bajarapacuenia pacatsipaeba, itsanë ata bajarapamonaeyajuvënënë apo jamatabënajinae pexanaenexa bajarapacuenia. <sup>5</sup>Daxita xua bajarapamonae exana, exanabiaba saya jivi petaenexatsi. Bajarapamonae jamatabëjumi tsabiabi: “Bajaraxua itsa exanaenatsi, jivi nacayiyataena,” jamatabëjai tsabiabi. Bajarapamonae pitapata, pecofiatata, becajonixicuenia pexanaejavaxita yacajonia cëbarubejebabiaba Diosojumelivaisi peyaquinaebaxutoxi. Bajarapamonae itsamonae matatoxenetsia piajumanavaitabënexa, piapiafleco pijanavatabuyalia cëbarubabiaba. Bajarapacuenia bitso jitsipabiaba pexanabiabinexa. <sup>6</sup>Bajarapamonae itsa najunatatsi fiestajavabelia penanabaninexa, nexata jitsipabiaba penaenexa pexaniavirijavanëta. Nexata natsiitapetabiaba penaenexa peyayataevitsi penaenexa petsinubijavanëta. Bajarapamonae itsa najoneyabiaba judíovi penacaetuatabibibota, jitsipabiaba penaenexa peyayataevitsi penaenexa petsinubijavanëta. <sup>7</sup>Bajarapamonae bitso jitsipabiaba jivi pebajacobinexatsi yayiyataeya callejava ata. “Patanecujarubinë,” pejaijavatsi ata, bitso jitsipabiaba, jai Jesús mapacueniaje fariseovi yabara, judíovi pecujarubivi ata yabara.

<sup>8</sup> Icatsia Jesús jumaitsi jivi ayaibitsaëtoxfanetojavabelia, pijajivijavabelia ata:

—Pëtsa paxamë pajitsipame jivi papecajumaitsinexa paxamëjavabelia: “Patanecujarubinë,” papecajainexa. Tspaji daxita paxamë bepanacaemonaemë Dioso panejumecovënëtsivixae. Xanë, caenënë Cristonë, athëbëvetsica Dioso taneitorobinëtsica jivi tacapanepaenexa, panexainame patacacujarubinënexa. <sup>9</sup> Itsanë itsa pacacujaruba, “Axa,” pajamë pëtsa bajaraponëjavabelia. Tspaji caenë paneaxa paxainame, ponë eca athëbëtatsia. <sup>10</sup> Pëtsa pajitsipame itsamonae papecajumaitsinexa: “Jivi pevetsinë,” papecajainexa. Tspaji xanë, caenënë Cristonë, patacaevetsinë. <sup>11</sup> Ponë paxamëyajuvënëne pacavecuayajamatabëcuenenë, bajaraponë pacayavenonabiaba padaxitamë. <sup>12</sup> Pajivi daxitajivi matatoxenetsia pijacuata ayajamatabëcuenenë jivi natane, bajarapajivi itsamatacabi daxitajivivecua beveliajamatabëcuenenë jivi Dioso exanaenatsi. Pajivi pijinia daxitajivivecua pijacuata beveliajamatabëcuenenë jivi natane, bajarapajivi itsamatacabi daxitajivi matatoxenetsia ayajamatabëcuenenë jivi Dioso exanaenatsi, jai Jesús jivi ayaibitsaëtoxfanetojavabelia, pijajivijavabelia ata.

<sup>13</sup> Jesús icatsia jumaitsi fariseovijavabelia, judíovi pecujarubivijavabelia ata:

—¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Pacuenia bo babaupaxatata jivi pejoneyaniva, bajara bepacuenia paxamë paexaname. Itsamonae jitsipae ata pejonenexa Dioso pijanacuayabetsia, apo pacopatsimë pejonenexa saicayalivaisi panecujarubixae. Paxamë ata apo pajitsipaemë panejonenexa Dioso pijanacuayabetsia.

<sup>14</sup> ¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Yamaxëitojorobiaya pavecuanotabiabame pamonajivi pevecuatëpaevanëtsi pecobecovëjavaximi. Bajaraxuacujinae pinijicuenia itajara Diosojavabelia pavajëcabiabame. Itsiata pepo panexaniajajamatabëcueneta apo pavajëcabiabimë Diosojavabelia. Bajarapacuenia pavajëcabiabame saya jivi papecataenexa Dioso itajara bitso bepanejumecovënëtsivi. Bajaraxuata bitso ayaicuenia Dioso pacananeconitsiaexanaena pamatacabi Dioso naneconitsiaexanaena daxita pamonae Dioso apo pejumecovënëtsivi.

<sup>15</sup> ¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Palivaisi pacajinavanapame, caejivi ata panejumecovënëtsiaexanaenexa, papecacuenejëpaenexanua, ayaicuenia daxitajava jivi patsipaebarutame. Nexata pajivi pacajumecovënëta, bajarapajivi pevajënaeyabelia bitso naneconitapona Diosojavabelia. Nexata paxamë panejamatabëcueneta bajarapajivi paxamë matatoxenetsia bitso Dioso naneconitsiaexanaenatsi pexuabinexatsi infiernojavabelia.

<sup>16</sup> ¡Paxamë apo payapëtae atamë, Dioso pejumelivaisi jamatabëcuenenavëxaniabiaya pacujarubabiabame itsamonae! Nexata paxamë panecujarubijamatabëcueneta bajarapamonae pananeconitsiaexaname Diosojavabelia. ¡Bajaraxuata ayaineconi panatsixainame Diosojavabelia! Paxamë jivijavabelia jamatabëcuenenavëxaniabiaya pajumaitsimë tsabiabi: “Pajivi itsanëjavabelia najumecapanepaeya jumaitsi pejumexaniataenexatsi: ‘Catoexanaenatsi pepacuene. Cajumaitsitsi cajena templobo pevënëta,’ jai, apo itsacuene. Bajarapajivi pejumaitsicovëya apo exanae ata, itsiata apo naneconitsi Diosojavabelia,” pajamë tsabiabi. “Pajivi rajane itsanëjavabelia jumaitsi pejumexaniataenexatsi: ‘Catoexanaenatsi pepacuene. Cajumaitsitsi cajena

templobopijiorojavanë pevenëta,' jai, bajara jane xua abeje. Nexata bajarapajivi exanae pejumaitscovëya penaneconitsiyaniwa Diosojavabelia," pajamë tsabiabi jivijavabelia. <sup>17</sup> Pajamatabëcuenenavëxaniabame raja saya bajarapacuenia itsa pajumaitsimë. Biji rajane templobo beyaiyatanetsi bajarapatemplobopijiorojavanë matatoxenetsia. Bajarapaorojavanë ata yayiyanetsi. Tsipaji bajarapaorojavanë templobopijiorojavanë. <sup>18</sup> Jamatabëcuenenavëxaniabiaya pajumaitsimë tsabiabinua: "Pajivi itsanëjavabelia najumecapanepaeya jumaitsi pejumexaniataenexatsi: 'Catoexanaenatsi pepacue. Cajumaitsi altarnëjjava pevenëta,' jai, apo itsacue. Bajarapajivi pejumaitscovëya apo exanae ata, itsiata apo naneconitsi Diosojavabelia," pajamë tsabiabi. "Pajivi rajane pejumexaniataenexatsi itsanëjavabelia jumaitsi: 'Catoexanaenatsi pepacue. Cajumaitsi altarnëjjavajumata pebuatsiofrenda pevenëta,' jai, bajara jane xua abeje. Nexata bajarapajivi pepacue exanae pejumaitscovëya penaneconitsiyaniwa Diosojavabelia," pajamë tsabiabinua jivijavabelia. <sup>19</sup> Paneamatabocotajivi, bepeneitatsëcënavanapaevinua panexamatabëëthëtota. Biji rajane beyaiyatanetsi altarnëjjava, bajarapaaltarnëjjavajumata pebuatsiofrenda matatoxenetsia. Bajarapaofrenda ata yayiyanetsi. Tsipaji altarnëjjavajumata boca. <sup>20</sup> Pajivi jumaitsi: "Cajumaitsi altarnëjjava pevenëta," jai, caecuenia yajavavënëjona bajarapaaltarnëjjavajumata pebocaeofrenda. <sup>21</sup> Pajivi pijinia najumecapanepaeya jumaitsi pejumexaniataenexatsi: "Cajumaitsi templobo pevenëta," jai, caecuenia yajavavënëjona bajarapatemplobota peponaponaenë Dioso. <sup>22</sup> Pajivi pijinia najumecapanepaeya jumaitsi pejumexaniataenexatsi: "Cajumaitsi athëbëtatsia panacua pevenëta," jai, caecuenia yajavavënëjona Dioso pijatrono. Caecuenia yajavavënëjonanua Dioso, ponë ecabiaba bajarapatronota pitorobabiabinexa pijajivi.

<sup>23</sup> ¡Paxamë jivi paneyamaxëtojobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Panenacanabijava diez xuabejeyajuvënëjjava, caejavayo, parajutabiabame ofrendacuenia Diosojavabelia. Daxitaviria paneubijavaxi ata, diez xuabejeyajuvënëjjava, caejavayo, parajutabiabame ofrendacuenia Diosojavabelia. Bajarapacuenia parajutabiabi atamë, apo pajumecovënëtsimë itsalivaisianë, Dioso papecatonajumecopatsilivaisianë, palivaisianë picani bitso Dioso pacatojitsipa panejumecovënëtsinexa. Bajarapalivaisianë picani pacaitoroba itsamonaejavabelia pexaniacue panetoexanabiabinexa. Pacaitorobanua picani panaitaxutotsoniataeyabiabinexa itsamonae ata. Pacaitorobanua picani xaniavaetsia panenajamatabëcuenecopatsinexa Diosojavabelia. Bajarapacuenia picani bepaexanavanapame pacopatsinejevamë bajaraxua, ofrendacuenia panerajutabiabijava Diosojavabelia. <sup>24</sup> ¡Paxamë apo payapëtae atamë Dioso pejumelivaisi, jamatabëcuenenavëxaniabiaya pacujarubabiabame itsamonae! Palivaisianë Dioso najumecopata panejumecovënëtsinexa, bajarapalivaisianë yajuvënëlivaisixi, saya beveliajamatabëcuenelivaisixi, pacaasaëmë tsavanapae. Palivaisianë picani Dioso bitso pacatojitsipa panejumecovënëtsinexa, caranata panamuxujematame. Nexata panecujarubivi panecujarubicuenia pexanavanapaxae, panecujarubivi ata naneconita Diosojavabelia pacuenia paxamë pananeconitame Diosojavabelia.

<sup>25</sup> ¡Paxamë jivi paneyamaxëtojobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! "Naja-

matabëcuenebijianaesjitsipajë Diosojavabelia,” panejamatabëjaitisabiabixae, panecaxaevajënae panecaxaenëanë, taza ata, naniavelia paquiatabiabame xaniavaetsia panijasalinaucenia. Tsipaji jamatabëcuenenavëxaniabiaya pajamatabëjumaitsimë tsabiabi: “Itsa caxaejitsipajë xaniavaetsia quiatsinejevanë, Diosojavabelia naneconitsipajë,” pajamatabëjamë tsabiabi. Itsiata baitsi jane panejamatabëëthëtota bëpënëa panajamatabëxainabiabame pibisiacuene. Panajamatabëxainabiabame itsanë pecobecovë paneyacajërëtsinexa. Panajamatabëxainabiabamenua panexainaenexa ayaijava ëpaxamënexa. <sup>26</sup> Paxamë pafariseovimë, bepaneitaxutotsëcënaevi panejamatabëëthëtota. Pajivi quiata pecaxaenë, taza yajava, piaxuirajibinexa, copiaya xaniavaetsia quiata pënëvelia. Bajaraxuacujinae xaniavaetsia quiata pejumavelia. Bajara pijinia pacuenia paxamë ata copiaya Dioso pacajamatabëcuenequiatsi panejamatabëcuenuirajibinexa. Nexata bajaraxuacujinae pacajamatabëcuenecajëpëaena paneexanaenexa ëpexaniacuene pacuenia Dioso pacaitoroba.

<sup>27</sup> ¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënua, ayaineconi panatsixainame Diosojavabelia! Itsajota jivimëthëanë bobena, jivimëthëanëjumavereca itsamonae caiquina peniojairata bajarapacuenia pitabëtsinexa. Itsiata baitsi jane bëpënëareca petëpaevimi petsabanaejava, pesi ya- java, abeje. Bajaraxua apo jitsipaetsi vajajaysinexa. Bajara pijinia paxamë ata Dioso patsitajamatabëcueneitsimë. <sup>28</sup> Itsamonae naniavelia itsa pacatane, pacatane bepaxaniajamatabëcuenevimë itajara. Itsiata baitsi jane panejamatabëëthëtota bëpënëa panajamatabëxainabiabame jivi paneyamaxëitojorobinexa. Itsajava ata pe- matatsënëa pibisiacuene paneexanaenexa, panajamatabëxainabiabame.

<sup>29</sup> ¡Paxamë saya jivi paneyamaxëitojorobivi! ¡Paxamë judíovi panecujarubivi, paxamë ata pijinia pafariseovimë, ayaineconi panatsixainame Diosojavabelia! Bajayata panijasalinaivi Diosojumepaebivimi profetavi beyejeba. Nexata mëthëca. Nexata mapamatacabitaje bajarapaprofetavimi pemëthëanëjumavereca bo paexanabiabame itabëtsiaya, jivi itsa tane, penajamatabënapitabiabinexa bajarapaprofetavimi. Pamonaemi ata bajayata tëpa, pamonae aneconijibia pejinavanapaevimi Dioso pitabarata, pemëthëanëjumavereca aeconoxae mapamatacabitaje itabëtsiaya parubabiabame itsacuenëjavaxi. <sup>30</sup> Bajarapacuenia itabëtsiaya paneexanaecujinae, jivijavabelia pajumaitsimë tsabiabi mapacueniaye: “Vajasalinaivimi bajayata pibisiacuene exana. Beyaxuababiaba profetavimi. Paxanë bajarapamatacabi pajinavana- pae atanë tsipae, apo payavenonaenë tsipae bajarapamonaemi pebeyabiabijava profetavimi,” pajamë tsabiabi. <sup>31</sup> “Vajasalinaivimi beyaxuababiaba profetavimi,” pane- jaixae, panavajunupaebame papemomoxicuenemë bajayata pamonaemi beyaxu- ababiaba profetavimi. Bajarapamonaemi papemomoxixaemë, pacuenia bajarapa- monaemi jamatabëcueneitsi, bajara paxamë ata pajamatabëcueneitsimë. <sup>32</sup> Pax- amë ata papibisiajamatabëcuenevixaemë, xanë ata jamatabëpanebeyaxuabame. ¡Panebeyaxuare paneverëtsinexa xua panijasalinaivimi taxuxuaba!

<sup>33</sup> ¡Paxamë bitso pibisiacuene paneexanaevi! Pacuenia jomo rëcëpeca itsa tane petajuenajetaruaejava isoto, bajara paitsimë. Itsiata apo papanepaemë tsane infiernovecua panijaneconi yabara. <sup>34</sup> Paxamë picani pacatoitorobianatsi Diosojumepaebivi profetavi. Pacatoitorobianatsinua picani bitso Dioso pijacuene peyapëtaeyaexanaevitsi. Pacatoitorobianatsinua picani xanë talivaisi papecatsipae- bivinexa. Itsiata baitsi jane bajarapamonaeyajuvënëvi itsamonae pabeyaxuabapon-

aename. Itsamonaē cruzajavabelia pacobematabiaxuababiabianame. Itsamonaē pajumatitibabeyabiabianame penaneconitsivi panejumaconitabiabimacata judíovi penacaetuatabibonējava. Itsamonaē pabaraponabiabianame itsa tomaranējavabelia ata panebejiobiaexanaenexa. <sup>35</sup>Bajarapacuenia nexata paxamē ayaineconi panatsixainaname Diosojavabelia. Daxita pamonaē aneconijibia pejinavanapaevimi Dioso pitabarata, bajayata panijasalinaivimi beyaxuababiaba. Nexata bajarapaneconimi yajava paxamē pacatsijumajopaena. Dioso pitabarata aneconijibia pejinavanapaevimi, panijasalinaivimi pebeyaxuabaponaējava, taxuxuaba Abelpijinēta. Bajaraxuacujinaē icatsia pevājēnaeyabelia beyaxuabapona itsamonaē ata, Dioso pitabarata aneconijibia pejinavanapaevimi. Nexata hexējavaberena ata Berequíaspijinē pexēnatomi, Zacaríaspijinē, panijasalinaivi beyaxuaba. Zacaríaspijinēmi panijasalinaivimi beyaxuaba templobopanabota, templobobeje altarpvējavabeje tuatujēta. <sup>36</sup>Xaniajanē pacuenia pacatsipaebijitsiatsi. Daxita pamonaemi Dioso pitabarata aneconijibia pejinavanapaevimi, panijasalinaivimi beyaxuababiaba. Bajarapaneconimi yajava, paxamē aeconoxae panejinavanapaevi, pacatsijumajopaena Dioso papecananeconitsiaexanaenexa, jai Jesús judíovi pecujarubivijavabelia, fariseovijavabelianua.

**Pacuenia Jesús najamatabēxainaeja sivanua  
Jerusalén tomarapijivi yabara pelivaisi**

*(Lc 13.34-35)*

<sup>37</sup> Jesús najamatabēxainaeja sivanua Jerusalén tomarapijivi. Jumaitsi pesivanuejavata mapacueniaje:

—¡PaJerusalén tomarapijivimē, pabeyabiabame Diosojumepaebivimi profetavi! ¡Ibotonēta ata patseconabiabame bajarapacuenia panebeyaxuababiabinexa Diosojumelivaisi pecaponaevi paxamējavaberena! ¡Pacuenia vacara banacoxicaetuata pecorofetobēxēpanaberena, bajara pijinia pacuenia xanē ata picani bitso jitsipabiabajē patacaetuatsinexa, patacacapanepaenexa picani panijaneconivecua! ¡Itsiata baitsi jane paxamē apo pajejamē cajena! <sup>38</sup>Panejumetaema. Dioso rabaja pacaopata papecaevetabiabijavami. Nexata baja panijatemplobota Dioso apo ponponae. <sup>39</sup>Xaniajanē pacuenia pacatsipaebijitsiatsi. Paxamē rabaja apo panetaemē tsane matavējēa. Matapania itsa panejumecovēnētsianame Cristonēcuenē, Dioso taneitorobinētsica, icatsia panetaename. Itsa panesivajamatabējumaitsimēnua tsane: “Dioso, bitso yavenonare maponē najetarucaje, nejamatabēcueneta penajetarucaenē,” itsa panesivajamatabējamē tsane xanē yabara, nexata jane baja icatsia panetaename itsa patsianicajē, jai Jesús mapacueniaje najamatabēxainaeja pesivanuejavata Jerusalén tomarapijivi.

**Pacuenia Jesús pijajivi tajēvelia tsipaeba itsamatacabi  
itsanacuapijivi templobo pexuabijavanexatsica yabara pelivaisi**

*(Mr 13.1-2; Lc 21.5-6)*

**24** Jesús pitsaparena temploboverena. Itsa baja Jesús vecuaponaējitsia templobo, pijajivi imoxorenatsi. Nexata Jesús pijajivi jumaitsi:

—Patajatuxanenē, templobo nataema pemuxuneneta penaeboxanetonē ata, jai.

<sup>2</sup>Nexata Jesús tajēvelia vajunupaeba itsamatacabi itsanacuapijivi bajarapaboxanetonēmi pepenetsijavanexatsica. Jesús jumaitsi pijajivijavabelia mapacueniaje:

—Xaniajanë pacuenia pacatsipaebijitsiatsi. Daxita raja paboxanetonë pataneme, bajarapoboxanetonëmi itsamatacabi itsanacuapijivi penetsianica irabetsica. Nexata paibotonë catsanaruba mapaboxanetonëtaje, itsaiboto ata pejumavereca apo bocae tsane, jai Jesús tajëvelia pijajivijavabelia.

**Pacuenia itsijitsia Jerusalén tomarata, daxitanacuanëjava ata, mapanacua pecopiarucaevajënaeje yabara pelivaisi**

*(Mr 13.3-23; Lc 21.7-24; Lc 17.22-24)*

<sup>3</sup> Jesús eca petsutojumata, patsutojumata olivonaenë apaaxayo. Jesús itsa eca pet-sutojumata, nexata pijajivi pijaepatojavata imoxoyorenatsi peyanijobinexatsi. Nexata Jesús pijajivi jumaitsi:

—Patajatuxanenë, pajitsipajë patanetsipaebinexamë patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajë icatsia itsa patsijitsiamëtsica? ¿Detsa peneta pitsicuene pataenajë mapanacua ata itsa vereverecaajtisaje? jai Jesús pijajivi.

<sup>4</sup> Nexata Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaeneme. Pëtsa panacopatame itsajivi ata papecayamaxëitojorobinexa. <sup>5</sup> Tsipaji raja peyamaxëitojorobivinexa, ayaibitsaëto patsiana beخانë itajara tsane. Bajarapamonae najumetsënëtsiaya jumai tsane: “Xanë raja Cristonë, athëbëvetsica Dioso taneitorobinëtsica jivi tacapanepaenexa,” jai tsane. Bajaramonae jivi ayaibitsaëto yamaxëitojorobiana. <sup>6</sup> Vajabitsaë pexanaejava imoxoyonacuanëjava, tajënacuanëjava ata, pavënëlivaisitaeneme. Itsiata pëtsa pajunavame. Bajara peneta itsane mapanacua pevereverecaevajënaeje. Itsiata baitsi jane bepijia bajarapamatacabi mapanacuaeje abaxë apo vereverecajuni tsane. <sup>7</sup> Mapanacuaeje pevereverecaevajënaeje peneta copiaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. Ayaijaniboxaneto najetarucaena itsanacuanëjava. Vitane cuene ata najetarucaena itsanacuanëjava. Ira najëbiana ayai cuenia itsanacuanëjava. <sup>8</sup> Daxita bajarapacuenia itsa pataeneme, saya abaxë taxuxuabaponaena piayai cuene, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

<sup>9</sup> Icatsia Jesús taxëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Nexata paxamë pacacaponae na cuae vetsivijavabelia papecabebiobiaexanaenexa. Nexata pacabeyejebiana. Daxitanacuanëpijivi pacaitoia tsabiabi tsane patajajivixaemë. <sup>10</sup> Nexata bajarapamatacabita jivi ayaibitsaëto navecuacopabiana tanejumecovënëtsijava. Namataenetsia naitoia tsane. Namataenetsia nacanajetsiana nacuae vetsivi pecobeyabelia. <sup>11</sup> Nexata ayaibitsaëto najetarubenaena jivi petsipaebaponaevinexa saicayalivaisi Dioso pejumelivaisivecua. BeDioso jumelivaisipaebivicuenia tsipaebaponaena. Bajarapamonae yamaxëitojorobiana jivi ayaibitsaëto xaneto. <sup>12</sup> Jivi pibisiacuene pexanavanapaevi, pevajënaeyabelia ayaibitsaëto xaneto tsaponae tsane. Nexata ayaibitsaëto Dioso pejumecovënëtsivi, namataenetsia penaasivajava vereverecaponaena. <sup>13</sup> Itsiata pajivi ajamatabëcuenesaë tsane Dioso pejumecovënëtsijava petëpaejavabelianexa, bajarapajivi Dioso capanepaenatsi. <sup>14</sup> Itsamonae daxita nacuanëjava tsipaebiana jivi peyapëtaenexa imoxoyo baja pevajënae Dioso pijajivi pecapanepaejavanexa. Bajaraxuacujinae jane baja ma-

panacua vereverecaenaje, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

<sup>15-16</sup> Icatsia Jesús tajëvelia vajunupaeba papiayaicuene itsamatacabi copiapatsijitsia Jerusalén tomarata. Jesús jumaiti pijajivijavabelia mapacueniaje:

—Diosojumepaebinëmi profeta Danielpijinë piayaicuene tajëvelia pevajunupaebilivaisi bajayata yaquina. Xua panijatamaranëmi vereverecaeyaexanaejitsiatsi, bajaraxua pelivaisi yaquina. (Pajivi lebianamapalivaisije, yapëtaena papiayaicuene vajunupaebamapalivaisitaje.) Nexata paxamë ita pataename bajarapapiayaicuene penuceajava templobota, nexata Judea nacuata pejinavanapaevi pëtsa nubena. Naxanitsiayo rëcëpecaena petsutonëjavabelia. <sup>17</sup> Pajivi pijabojumata athëbëyo ecaya, ita vënëlivaisitaena bajarapapiayaicuene penuceajava templobota, bajarapajivi perunaecujinaetsica, bepijia najetabajiraviana. Pëtsa joneya pijaboyalia pejutsinexa pecobecovë. <sup>18</sup> Pajivi pijinia nacuenebaponapona pijapabita, ita vënëlivaisitaena bajarapapiayaicuene penuceajava templobota, bepijia najetabajiraviana. Pëtsa navitata pijaboyabelia pejutsinexa penaxatabijava. <sup>19</sup> ¡Papetiriavi penacueto yacotajinavanapa, bitso bejiobi tsane bajarapamatacabi! ¡Bitso nabejiobitsiaya jinavanapaena! ¡Papetiriavi ata mitoapaenacuetoxi isajinavanapa, bitso bejiobi tsane bajarapamatacabi! <sup>20</sup> Bajaraxuata tajëvelia Diosojavabelia pavajëcare piayapëbejematacabitapapacatocopiapatsiyaniva bajarapapiayaicuene. Nexata pamatacabi parëcëpecaename, pexaniamatacabi Dioso pacatocopatsiana bitso nabejiobitsiaya paneponaeyaniva. Pavajëcarenu penacueraevetsimatacabitabajarapapiayaicuene papecatocopiapatsiyaniva, nexata papecatoayapëbejeyaniva. <sup>21</sup> Tsipaji raja bajarapamatacabi bitso jivi bejiobi tsane. Pabejiobicuene abaxë jivi caeto ata apo tae Dioso nacua pexanaecujinae, bajarapabejiobicuene taena. Bajaraxuacujinae icatsia itsamonae bejiobiaexanae atatsi tsane, itsiata bajarapacuenia bitso apo bejiobiaexanaetsi tsane. <sup>22</sup> Dioso epatua yatuucutsiana jivi bitso nabejiobitsiaya pejinavanapaematacabi-anëminexa bitso jivi nabejiobitsi pejinavanapaeyaniva. Dioso epatua ita apo yatuucutsi tsipae bitso jivi nabejiobitsiaya pejinavanapaematacabi-anëminexa, caejivi ata apo asaë tsipae. Itsiata baitsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejiobitsiaya pejinavanapaematacabi-anëminexa, jai Jesús pijajivijavabelia tajëvelia pevajunupaebijavata papiayaicuene itsamatacabi copiapatsijitsia mapanacuataje.

<sup>23</sup> Icatsia Jesús tajëvelia navajunupaeba icatsia pepatsijavanexatsica. Jesús jumaiti pijajivijavabelia mapacueniaje:

—Nexata itsajivi yamaxëitorobiaya ita pacajumaiti tsane: “Pataema. Mara Cristo nucaje,” ita pacajai tsane, pëtsa pajumecovënëtame. Itsa pacajumaitsinua tsane: “Bajarajota nuca Cristo,” ita pacajai tsane, pëtsa pajumecovënëtame. <sup>24</sup> Itsamonae jumai tsane: “Xanë raja Cristonë,” jai tsane. Itsiata jemajai tsane. Itsamonae jumai tsane: “Diosojumepaebinënë raja, profetanënë,” jai tsane. Itsiata jemajai tsane. Bajarapamonae itajara exanaena pinijicuene pexanaejavanë peyamaxëitorobinexa saya jivi. Nexata bajarapacuenia itsamonae yamaxëitorobaponaenatsi. Itsiata pamonaepacuene Dioso pijajivi, Dioso pitapetsivitsi, bajarapamonae apoyamaxëitorobi tsanetsi. <sup>25</sup> Tajëvelia rabaja maje pacatsipaebatsije. <sup>26</sup> Nexata itsamonae ita pacajumai tsane: “Cristo raja ponapona petusato nacuatatia. Naxanitsia. Panataename,” ita pacajai tsane, pëtsa paponaremelia. Itsa pacajumaitsinua tsane: “Cristo raja ponapona mapaënëyatuucutsibotaje. Naxanitsia. Panataename,”



itsa pacajai tsane, pëtsa pajumecovënëtime. <sup>27</sup> Payapëtaneme rabaja mapacueneje. Yamaxë itsa nivejai tsajuni athëbëvetsica, caecuenia jivi bacotiatane daxitajava. Bajara pijinia peneta pacuenia daxitanacuanëpijivi caecuenia netaena pamatacabi patsianicajë xanë, Daxitajivi Pematapijinënë. <sup>28</sup> Payapëtaneme rabaja mapacuene ataje. Quequeremonae bepïjia bayapëtane itsajota petuxutsaebinë boca. Nexata bajarajota bepïjia banacaetuana. Bajara pijinia pacuenia daxitanacuanëpijivi tajajivi bepïjia yapëtaena tapatsijavatsica. Nexata bepïjia nacaetuanaena xanëjavaberena, jai Jesús pijajivijavabelia tajëvelia penavajunupaebijavata icatsia pepatsijavanexatsica.

**Pacuenia Jesús tajëvelia navajunupaeba icatsia  
pepatsijavanexatsica petëpaecujinae yabara pelivaisi**

*(Mr 13.24-37; Lc 21.25-33; 17.26-30, 34-36)*

<sup>29</sup> Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivajënaetsica jivi taena pecujunavicuene. Jivi nabejiobitsiaya jina-  
vanapaena. Nexata jivi nabejiobitsiaya pejinavanapaematacabicujinae, matacabi-  
ijijuameto aitaquiri tsane. Meravipijijuameto ata aitaquiri tsane. Tulupu ata oth-  
opaenica irabetsica. Daxitacuene, xua rubena athëbëtatsia, najëbiana. Xaniavaet-  
sia apo rubenae tsane. <sup>30</sup> Bajaraxuacujinae jane baja xanë athëbëvetsica najetarua-  
caenajë, Daxitajivi Pematapijinënë. Nexata daxitaviriavi mapanacuapijivi natsin-  
uena pecajunavi pijaneconi yabara. Nexata bajarapaepatota, xanë, Daxitajivi Pe-  
matapijinënë, jivi netaena athëbëvetsica itarërëbota tanajetaruaejava. Patsianicajë  
daxitacuene taevetsinexa. Tanivenivenaecotia yajavapatsianicajë. <sup>31</sup> Bajaraxuacu-  
jinae trompeta itsa najumetsiana ayajumeta, itorobianajë tajaángelevi. Angelevi  
daxitanacuanëjavaverena xanëjavaberena netocaetuatsiana tajajivi, pamonaë Dioso  
pitapetsivitsi, jai Jesús pijajivijavabelia tajëvelia penavajunupaebijavata itsamata-  
cabi icatsia pepatsijavanexatsica.

<sup>32</sup> Jesús icatsia tajëvelia vajunupaeba pacuenia itsamatacabi itsijitsia mapanacu-  
ataje. Jesús jumaitsi pijajivijavabelia mapacueniaje:

—Pacanaëjëre pacuenia itsi higeranae. Itsa maxëranajuva, nexata pejanabaxu  
pitsapa. Nexata bajarapacuenia payapëtaneme vai baja imoxoyo pevajënae pe-  
jonenexa. <sup>33</sup> Bajara pijinia pacuenia peneta itsa pataename pecopiapatsijava xua  
tajëvelia vajunupaebajë, nexata payapëtaename imoxoyo baja tavajënae tsane tap-  
atsijavanexatsica. <sup>34</sup> Xaniajanë pacuenia pacatsipaebijitsiatsi. Pitsijamatabëcuenevi  
aeconoxae mapamatacabitaje jinavanapa, bajarapitsijamatabëcuenevi abaxë, bexëa-  
javabelia ata, apo vereverecae tsane. Matapania xua tajëvelia vajunupaebajë itsa  
baja copiapatsiana, bajarapamonae jane baja vereverecaena. <sup>35</sup> “Itaboxo, ira ya-  
java, tsitecaena daxitamatacabijavabelianexa,” jamatabëjai ata tsane itsamonae, it-  
siata jamatabëcuenenavëxaniabiana. Tsipaji jemata itaboxo, ira yajava, verevere-  
caena. Nexata palivaisi pacatsipaebatsi, apo najumetsënëtsinë tsane. Nexata xua  
tajëvelia vajunupaebajë, pacuenia baja najumecapanepaeya jumaitsinë, daxita ba-  
jaraxua copiapatsiana, jai Jesús pijajivijavabelia.

<sup>36</sup> Icatsia Jesús jumaitsi pijajivijavabelia:

—Itsajivi ata apo yapëtae pamatacabita, paepatota ata, copiapatsijitsia daxita xua  
tajëvelia vajunupaebajë. Athëbëpijivi ata, ángelevi, apo yapëtae. Xanë, Dioso pexë-

nato atanë, apo yapëtaenë. Caenë taxa Dioso yapëtane, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

<sup>37</sup> Jesús icatsia tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Pacuenia bajayata jemata itsi pamatacabi Noépijinë ponapona, bajara icatsia jemata itsane pamatacabi xanë, Daxitajivi Pematapijinënë, patsianicajë. <sup>38</sup> Pamat-acabi Noépijinë ponapona ira pebubutsivajënaeya, jivi picani xaniavaetsia jamatejema pexaejava xaevanapa. Apaevanapanua. Nacojobapona itsamonae. Itsamonae pexëntoyonë pebijavabelia canajetapona petonacojobinexatsi. Bajarapamonae jamatejema saya jinavanapa. Nexata bajarapamatacabi Noépijinë ëpijamonae pini-jibarcoxanetovjavelia barëjunua. <sup>39</sup> Daxitajivi abaxë itsiata apo yapëtae paepatota tocopiapatsijitsiatsi peyabubutsijavanexatsi. Nexata itsajivi ata yapëtaenejeva jemata ayaiemaxaneto itsa jopa ira pebubutsinexa, yapëtane jane baja. Bajarapamatacabi bubuna daxitajivi. Bajara pijinia pacuenia itsajivi ata yapëtaenejeva xanë, Daxitajivi Pematapijinënë, tapatsijavanexatsica, jemata patsianicajë. <sup>40</sup> Nexata bajarapamatacabita anijanëbeje najuanacuenebanucaenabeje pabita. Itsanë tanejumecovënëtsinë tsane. Itsanë apo tanejumecovënëtsinë copatanutsianatsi. <sup>41</sup> Bajara pijinia itsane petirivabeje ata. Najucacuabanucaenabeje caejavata. Nexata tanejumecovënëtsiva pitsianatsi ángelnë. Apo tanejumecovënëtsiva copatanutsianatsi.

<sup>42</sup> Nexata nejamatabëcueneevetsiaya panecopiaevetavanapaename. Tsipaji raja apo panevajënaeyapëtaemë tsane paepatota xanë panijatuxanenënë icatsia patsijitsianëtsica. <sup>43</sup> Pacanaëjëre mapacuenije. Bo pexainaenë itsa yapëtaejitsipa paepatota meravi pijaboyaberena patsijitsia pecobecovë petonacobetoxotsinënexatsi, nexata naëcotsiaya vajënaeevetsipa. Apo copatsi tsipae pijaboyaberena petojoneyanivatsi penacobetoxotsinënexa. <sup>44</sup> Bajara pijinia pacuenia paxamë ata najamatabëcuene-xaniavaetsiaya panecopiaevetavanapaename. Tsipaji xanë, Daxitajivi Pematapijinënë, paepatota apo panejamatabënajinaemë tapatsijavanexatsica, jemata icatsia patsianicajë, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

### **Pacuenia Jesús pijajivijavabelia livaisi tsipaeba petuxanenë pijajivitonëbeje pelivaisicuenia yabara pelivaisi**

*(Lc 12.41-48)*

<sup>45</sup> Jesús livaisi tsipaeba pijajivijavabelia petuxanenë pijajivitonëbeje pelivaisicuenia. Bajarapacuenia pijajivijavabelia tsipaeba copiaevetsiaya petonacuenebavapanexatsi icatsia pepatsimatacabitsicajavabelianexa. Jesús jumaitsi mapacueniaje:

—Petuxanenë pijajivitonë, ponë xaniavaetsia pijatuxanenë pecovëta tonacuenebaponaponaena, majamatabëcueneitsi tsaneje. Bajaraponë itsajamatabëcuene xainaenejeva, copiaevetaponaponaena pijatuxanenë pepatsijavabelianexa. Bajaraponë pijatuxanenë pijajivi pecovëta tovetaponaponaena piabatabiabinexa pexaejava caematacabi canacujitsia pacuenia pijatuxanenë itorobatsi. <sup>46</sup> Bajaraponë bitso barëya tsane pamatacabi pijatuxanenë patsiana, xaniavaetsia pijajivi petoetaponaponaexae pecovëta. <sup>47</sup> Xaniajanë pacuenia pacatsipaebijitsiatsi. Ponë xaniavaetsia tonacuenebiana pijatuxanenë pecovëta, bajaraponë evetsiaexanaenatsi daxita xua xaina pijatuxanenë. <sup>48</sup> Itsa bajaraponë

pijamatabëcuenebejenë tsipae, nexata pijatuxanenë pecovëta jamatabëjumaitsi tsipae: “Tajatuxanenë ajibi tsarucæ tsane bajayajebi,” jamatabëjai tsipae. <sup>49</sup>Nexata toconibabeyabiabijitsipa pijatuxanenë pijajivi. Ayaijava xaeyabiabijitsipa. Naapaeyabiabijitsipana piaitajibivita. <sup>50</sup>Nexata itsajota apo jamatabënajinae tsipae pijatuxanenë pepatsijavanexa, patsipa pijatuxanenë. <sup>51</sup>Nexata bajaraponë ayaicuenia naneconitsiaexanaejitsipatsi pijatuxanenë. Pacuenia jivi peyamaxëitojorobabiavi, Dioso ayaicuenia naneconitsiaexanaenatsi, bajarapacuenia pijatuxanenë naneconitsiaexanaejitsipatsi. Nexata natsinuejitsipa. Navononinijitsipana bitso penavixætaexæ, jai Jesús pijajivijavabelia petuxanenë pijajivitonëbeje pelivaisicuenia petsipaebijavata.

Bajarapacuenia Jesús tsipaeba pijajivi xaniavaetsia pecopiaevetavanapaenexatsi Jesús icatsia pepatsimatacabitsicajavabelianexa.

**Pacuenia Jesús pijajivi livaisi tsipaeba diez papejanavabeje  
pijalámparabëxi pecaponaevi pelivaisicuenia yabara pelivaisi**

**25** Jesús icatsia jumaitsi pijajivijavabelia:  
—Pamatacabi icatsia patsianicajë, tajajivi peyapëtaexæ tapatsijavanexatsica, jamatabëcueneaitavaya necopiaevetavanapaena. Itsamonæ tajajivi yapëtae ata tapatsijavanexatsica, itsiata jamatabëcueneaitavaya apo necopiaevetavanapæ tsane. Bajarapacuenia yabara pacatsipaebianatsi mapalivaisije. Diez papejanavabeje yapëtane itsava pejanava penacasabijavanexa. Nexata diez papejanavabeje pijalámparabëxi, caeva canacujitsia, xaniavaeta penaponaenexa. Nexata capona pijalámparabëxi pabojavabelia eca penacasabivanexa. Bajarajota vajënaeevetsijitsia pepatsijava penacasabinënexa. Nexata itsa ponabeje penacasabijivibejenexa, bajarapapejanavi penaponaenexa bajarapajivibeje pepëta penacasabifestajavabelia. <sup>2-4</sup>Bajarapamonaeyajuvënëvi, cinco povabeje, yapëtae ata picani petsicaponæjavanexa aceiteranë pijalámparabëxinexa, itsiata apo tsicaponæ itsa tovereverecatsi aceitera peepatsinexa icatsia pijalámparabëxijavabelia. Cinco pijinia povabeje peyapëtaexæ petsicaponæjavanexa aceiteranë pijalámparabëxinexa, tsicapona. <sup>5</sup>Nexata bajarapapetiriavi itayotena pijalámparabëxita. Bajayajebi picani vajënaeevetena penacasabinënexa pepatsijava. Nexata pijalámparabëxita paaceiteranë capona, tovereverecaponatsi baja. Tsipaji penacasabinënexa abaxë cuenenajemata pepatsinexa. Nexata baja daxita bajarapapetiriavi belia itamajitsipana. Nexata baja majita. <sup>6</sup>Bajaraxuacujinae ayaimeravi tuatujëta jumetane pevavajajava. “¡Najetaruca rajane baja penacasabinënexa! ¡Papitsaparemena jane baja panecopiapitsinexa!” pejaijava jumetane. <sup>7</sup>Nexata daxita bajarapapetiriavi nonobapuna pecopiapitsinexa jane baja. Papetiriavi aceiteranë tsicapona, epaca pijalámparabëxijavabelia. Caeva canacujitsia pijalámparabëxi ayaicotia exana. <sup>8</sup>Nexata papetiriavi apo tsicaponæ aceiteranë, jumaitsi aceiteranë petsicaponævijavabelia mapacueniaje: “Panenarajure tsiquirijavaxi aceiteraxi. Tsipaji patajalámparabëxi panetaitacæcænæpona,” jai bajarapamona. <sup>9</sup>Itsiata aceiteranë petsicaponævi jumaitsi: “Jume. Apo caëjæpæ. Paxanë ata meta apo panetocæjæpæ tsipae. Paponaremelia. Panijacuata pacomuare itsajotalia canajetabiaba aceiteranë,” jai aceiteranë petsicaponævi pijalámparabëxinexa. <sup>10</sup>Nexata papetiriavi aceiteranë apo tsicaponæ pijalámparabëxinexa, ponalia aceiteranë pecomuacaenexa. Nexata pecovëta penacasabinënexa patanajetaruca. Nexata papetiriavi aceiteranë tsicapona pijalám-

parabëxinexa, napona baja penacasabifiestanexa pexanaebojavabelia. Pejonecujinaelia baupaxatata. <sup>11</sup> Bajaraxuacujinae aceiteranë pijalámparabëxi petsicomua-caevi pata. Nexata bajarapapetiriavi jumaitsi penacasabinënexajavabelia: “¡Panetobaupare! ¡Panetobaupare! jai tsanubenae bojumavelia. <sup>12</sup> Nexata penacasabinënexa jumaitsi: “Xaniajanë pacuenia pacatsipaebijitsiatsi. Apo pacayapëtaetsi cajena paxamë,” jai bajarapapetirivijavabelia, jai Jesús mapalivaisije pijajivijavabelia.

<sup>13</sup> Jesús icatsia jumaitsi pijajivijavabelia:

—Pacuenia cinco povabeje peyapëtaexae, aceiteranë tsicapona pijalámparabëxinexa, bajara pijinia pacuenia paxamë ata paneyapëtaexae, jamatabëcueneaitavaya panecopiaevetavanapaename. Tsipaji apo payapëtaemë tsane pamatacabita, paepatota ata, xanë, Daxitajivi Pematapijinënë, icatsia patsijitsianëtsica, jai Jesús pijajivijavabelia.

**Pacuenia Jesús pijajivi livaisi tsipaeba pijapalata pijajivi  
pevetsiaexanaenë pelivaisicuenia yabara pelivaisi**

*(Lc 19.11-27)*

<sup>14</sup> Jesús icatsia jumaitsi pijajivijavabelia:

—Tacovëta patajajivimë, itsamonae ata, pamonaë tajajivi, panet-onacuenebianame. Nexata pamatacabi icatsia patsianicajë, pacuenia pacasivanajamatabëxainaejitsiatsi, aeconoxae pacatsipaebianatsi. Pacatsipaebianatsi comparacióncuenia mapacueniaje. Petuxanenë itsa ponaëjitsiatajënacuayabelia, junata pijajivi. Evetsiaexana pijapalata petoevetsinexatsi pecovëta.

<sup>15</sup> Caenë canacujitsia evetsiaexanapona petocanacuenebinexatsi pecovëta pacuenia bajarapamonae caëjëpatsi. Nexata petuxanenë pijinia evetsiaexana cinco mil ponëbeje pepovi, bitso penamatamotsivi. Itsanë pijinia evetsiaexana dos mil ponëbeje. Itsanë pijinia evetsiaexana mil ponëbeje. Bajaraxuacujinae petuxanenë pona tajënacuayabelia.

<sup>16</sup> Nexata jane baja ponë evetsiaexana cinco mil ponëbeje, canacueneba jane baja pecovëta bajarapapalata. Nexata pematatsënëa topitsapatsi icatsia itsacinco mil ponëbeje. Nexata baja daxitata diez mil ponëbeje caejavata. <sup>17</sup> Bajara pijinia pacuenia itsanë canacueneba dos mil ponëbeje. Nexata pematatsënëa topitsapatsi icatsia itsados mil ponëbeje. <sup>18</sup> Itsiata baitsi jane ponë toeveta mil ponëbeje, pona pematayatsinexa pijatuxanenë pijapalata. Matayatsia mëthëteta irata.

<sup>19</sup> Bexëa nexata najetaruca petuxanenë. Junata pijajivi peyapëtaenexa pacuenia tovetatsi pecovëta pijapalata. <sup>20</sup> Copiaya pata ponë cinco mil ponëbeje evetsiaexanatsi. Nexata bajaraponë tocanaviata pijatuxanenëjavabelia diez mil ponëbeje. Jumaitsi bajaraponë pijatuxanenëjavabelia: “Nevetsiaexaname cinco mil ponëbeje tacatoevetsinexa. Bajara macatocanaviatatsi bajarapapalataje. Cato-canaviatatsi yajava icatsia itsacinco mil ponëbeje, xua nacanabajë bajarapapalata,” jai bajaraponë pijatuxanenëjavabelia. <sup>21</sup> Nexata petuxanenë jumaitsi: “Xanepana rabaja. Xaniavaetsia netoevetaponaponame. Itsajamatabëcuene apo najamatabëxainaemë. Tsiquirijavayo ata xaniavaetsia netoevetame. Nexata aeconoxae caevetsiaexanaenatsi pematatsënëa ayajava. Jonemena xanëjavaberena barëyaya neponaponaenexa xanëjavata,” jai petuxanenë pijajivitonëjavabelia. <sup>22</sup> Bajaraxuacujinae pata ponë dos mil ponëbeje evetsiaexanatsi. Nexata bajaraponë jumaitsi

pijatuxanenëjavabelia: “Nevetsiaexaname dos mil ponëbeje tacatoevetsinexa. Bajara macatocanaviatatsi bajarapapalataje. Catocanaviatatsi yajava icatsia itsados mil ponëbeje, xua nacanabajë bajarapapalatata,” jai bajaraponë pijatuxanenëjavabelia. <sup>23</sup>Nexata petuxanenë jumaitsi: “Xanepana rabaja. Xaniavaetsia netoevetaponaponame. Itsajamatabëcuene apo najamatabëxainaemë. Tsiquirijavayo ata xaniavaetsia netoevetame. Nexata aeconoxae caevetsiaexanaenatsi pematatsënëa ayaijava. Jonemena xanëjavaberena barëyaya neponaponaenexa xanëjavata,” jai petuxanenë pijajivitonëjavabelia. <sup>24</sup>Icatsia pata ponë evetsiaexana mil ponëbeje. Bajaraponë jumaitsi pijatuxanenëjavabelia: “Cacueneyapëtanetsi. Xamë nijajivi apo itaxutobejiobiataeyabiabimë. Xamë nijajivi ubiaexanabiabame neubiaexanabiabijava nexata bajarapamonae pejamatabëcueneta ayaijava palata pecatopitsapaenexa. Bajara pijinia pacuenia xanë ata nevecuapitsipame xua nacanabijitsipajë nijapalatata itsa canacuenebijitsipajë. <sup>25</sup>Bjaraxuata junavajë. Ponajë irata tamatayatsiamëthëtetsinexa nijapalata. Bajara manijapalata catocanaviatatsije,” jai bajaraponë pijatuxanenëjavabelia. <sup>26</sup>Nexata petuxanenë jumaitsi: “Tajajivitonë atamë, itsiata ajamatabëcuenebejemë. Afaetabimënu. Xamë baja cajena yapëtaneme tajajivi taubiaexanabiabijava, taubiaexanabiabijava nexata bajarapamonae pejamatabëcueneta ayaijava palata tanetopitsapaenexa. <sup>27</sup>Bjaraxuata xanepanaejitsipa itsa netocanacuenebiaexanaejitsipame tajapalata banco pevetsivijavabelia. Nexata aeconoxae banco pevetsivi tajapalata pecacovaetsijamatabëcuene netocanaviatsipa tajapalata pematatsënëa,” jai petuxanenë pijajivitonëjavabelia.

<sup>28</sup>Nexata petuxanenë jumaitsi bajarajota penubenaevijavabelia: “Pavecuapire bajarapamil ponëbeje. Nexata juya parajure ponëjavabelia xaina diez mil ponëbeje. Tshipaji bajaraponë cajëpatsi tanetoevetsinexa pematatsënëa. <sup>29</sup>Tshipaji pajivi ayaijava baja xaina, pematatsënëa icatsia itsajava rajutsianatsi. Nexata xainaena ayaijava. Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi. <sup>30</sup>Maponë tajajivitonëje, itsacuenëjavayonexa ata, apo netoxanepanae. Paxuabaremelia pitaquirijavabelia. Bajarajota natsinuenta. Navonosiniananua bitso penavixaetaexae,” jai petuxanenë, jai Jesús comparacióncuenia pijajivijavabelia.

Bajarapacuenia Jesús jumaitsi pamonaepijaneconi pexainaevi Jesús penaneconitsiaexanaenexa pamatacabi icatsia patsianica.

### **Pacuenia Dioso naneconitsiaexanaena pijaneconi pexainaevi yabara pelivaisi**

<sup>31</sup>Jesús tajëvelia navajunupaeba pacuenia itsamatacabi exanaejitsia mapanacuataje. Jesús jumaitsi pijajivijavabelia mapacueniaje:

—Xanë, Daxitajivi Pematapijinënë, icatsia itsa najetarucaenajë daxitanacua taevetsinexa, ángelevi nematatoyoronaeya yajavanajetarucaenajë. Nexata ecaenajë tajapenivenivenaetronovënëjavata. <sup>32–33</sup>Nexata daxitanacuanëpijivi caetuatsianatsi taitabarata. Tstatoponaenajë bajarapamonae. Oveja pevetsinë ovejavecua chivo saicaya tsatopona. Nexata oveja pevetsinë petsavenononia chivo nubenaeyaexana. Pecujuanenia pijinia oveja nubenaeyaexana. Bajara pijinia pacuenia xanë tsatoponaenajë Dioso apo pejumecovënëtsivi, Dioso pejumecovënëtsivivecua. Dioso apo pejumecovënëtsivi tatsavenononia nubenaeyaexanaenajë. Dioso pijinia pejumecovënëtsivi tacujuanenia nubenaeyaexanaenajë. <sup>34</sup>Nexata jumaitsinë tsane tacujuanenia penubenaevijavabelia, Dioso pejumecovënëtsivi: “Naxanitsia. Paxamë taxa papecaitaxutotsoniataevi. Payajavajinavanapaenema taxa pijanacuatatsia, itsajotat-

sia pacatoxaniavaeta tajëvelia. Dioso pacatoxaniavaeta nacua pexanaejavaveliacujinae. <sup>35</sup>Itsa tajani, paxamë taxaejava panerajutame. Itsa mera jitsipajë, panerajutame mera. Itsanacuaverena itsa patajë, panecopiapitame xaniavaetsia. <sup>36</sup>Itsa ajibi bitso tanaxatatsijava, panerajutame tanaxatatsijavanexa. Itsa avitanenë, papatame patanevetsinexamë. Itsa neeta penaneconitsivi pejebabiabibota, papatame patanetaenexamë,” janë tsane tacujanenia penubenaevijavabelia. <sup>37</sup>Nexata bajarapamonae nejumai tsane: “Tajatuxanenë, ¿detsa pacujinae niajanijavata patajacarajutsi nexaejava?” nejai tsane. ¿Detsa pacujinae mera nejitsipaejavata patajacarajutsi mera? nejai tsane. <sup>38</sup>Itsa jume, nejumai tsane: “¿Detsa pacujinae itsanacuaverena nepatsinë patajacacopiapitsi xaniavaetsia?” nejai tsane. Itsa jume, nejumai tsane: “¿Detsa pacujinae piajibijavata bitso nenaxatatsijava patajacarajutsi nenaxatatsijavanexa?” nejai tsane. <sup>39</sup>Itsa jume, nejumai tsane: “¿Detsa pacujinae niavitanejavata patajaponae patacaevetsinexa?” nejai tsane. Itsa jume, nejumai tsane: “¿Detsa pacujinae pecaetsijavata penaneconitsivi pejebabiabibota patajaponae patacataenexa?” nejai tsane. <sup>40</sup>Nexata xanë jumaitsinë tsane bajarapamonaejavabelia: “Xaniajanë pacuenia pacatsipaebijitsiatsi. Daxita xua patoexaname paneyavenonaenexa tajajiviyajuvënëjivi, beveliajamatabëcuenevi petaevitsijavabelia, bajaraxua xanë taniji xanëjavaberena bepatanetoexanaejavamë,” janë tsane.

<sup>41</sup>Nexata tatsavenonenia penubenaevi, Dioso apo pejumecovënëtsivijavabelia, jumaitsinë tsane: “Panevecuanatsare panijaneconi paneyajavajinavanapaevi. Paponaremelia apo peverevereaeisotojavabelia. Bajarapaisoto Dioso tajëvelia toxaniavaeta dovathinexa, dovathi pijajivinexa ata. <sup>42</sup>Xanë itsa tajani, paxamë apo panerajutsimë taxaejava. Itsa mera jitsipajë, apo panerajutsimë mera. <sup>43</sup>Itsanacuaverena itsa patajë, apo panecopiapitsimë xaniavaetsia. Itsa ajibi bitso tanaxatatsijava, apo panerajutsimë tanaxatatsijavanexa. Itsa avitanenë, apo papatsimë patanevetsinexamë. Itsa neeta penaneconitsivi pejebabiabibota, apo papatsimë patanetaenexamë,” janë tsane tatsavenonenia penubenaevijavabelia. <sup>44</sup>Nexata bajarapamonae pijaneconi peyajavajinavanapaevi nejumai tsane: “Tajatuxanenë, ¿detsa pacujinae niajanijavata apo pacarajutsitsi nexaejava?” nejai tsane. Itsa jume, nejumai tsane: “¿Detsa pacujinae mera nejitsipaejavata mera apo pacarajutsitsi?” nejai tsane. Itsa jume, nejumai tsane: “¿Detsa pacujinae itsanacuaverena nepatsinë, apo pacacopiapitsitsi xaniavaetsia?” nejai tsane. Itsa jume, nejumai tsane: “¿Detsa pacujinae bitso pecatoajibijavata nenaxatatsijava, apo pacarajutsitsi nenaxatatsijavanexa?” nejai tsane. Itsa jume, nejumai tsane: “¿Detsa pacujinae niavitanejavata, apo paponenë patacaevetsinexa?” nejai tsane. Itsa jume, nejumai tsane: “¿Detsa pacujinae penaneconitsivi pejebabiabibota pecaetsijavata, apo paponenë patacataenexa?” nejai tsane bajarapamonae. <sup>45</sup>Nexata xanë jumaitsinë tsane bajarapamonaejavabelia: “Xaniajanë pacuenia pacatsipaebijitsiatsi. Bajarapacuenia itsa apo patoexanaemë paneyavenonaenexa tajajiviyajuvënëjivijavabelia, nexata bajaraxua xanë taniji xanëjavaberena apo patanetoexanaejavamë,” janë tsane pijaneconi peyajavajinavanapaevijavabelia. <sup>46</sup>Bajaraxuacujinae bajarapamonae ponaena penaneconitsiajinavanapaenexa daxitamatacabijavabelianexa. Pamonae Dioso pejumecovënëtsivi, bajarapamonae Dioso rajutsianatsi matacabi apo peverevereaejava, jai Jesús pijajivijavabelia tajëvelia penavajunupaebijavata itsamatacabi penaneconitsiaexanaejavanexa pijaneconi pexainaevi, pamatacabi icatsia patsianica.

### Pacuenia picani Jesús pijavajabitsäe jamatabëvaetabatsi yabara pelivaisi

(Mr 14.1-2; Lc 22.1-2; Jn 11.45-53)

**26** Itsa baja Jesús najumevereta pijajivijavabelia livaisi petsipaebijava, Jesús icatsia tajëvelia navajunupaeba itsamonae cruzajavabelia pecobematabi-abarutsijavanexatsi. Jesús jumaitsi pijajivijavabelia mapacueniaje:

<sup>2</sup>—Payapëtaneme rabaja anijamatacabibeje pesajinaejava pejonenexa baja pascuavënëfiesta. Nexata xanë, Daxitajivi Pematapijinënë, necanajetsiana itsamonae pecobeyabelia tanecobematabiabarutsinexa cruzajavabelia, jai Jesús pijajivijavabelia tajëvelia penavajunupaebijavata cruzajavabelia pecobematabiabarutsijavanexatsi.

<sup>3</sup>Nexata bajarapaepatota nacaetuata sacerdotevi penamatacaitorobivi. Nacaetuata judfovi pecujarubivinua. Nacaetuata judfovi pijaancianovinua. Daxita bajarapamonae nacaetuata Caifásvënëne pijaboxanetota. Bajaraponë Caifás, sacerdotevi pepo penamatacaitorobinë. <sup>4</sup>Bajarajota daxita bajarapamonae najumejaita. Penajumetsënësilivaisita picani Jesús jamatabëvaetabatsi pebeyaxuabinexatsi. <sup>5</sup>Itsiata bajarapamonae najumaitsi:

—Fiestajavata meta abaxë apo vaetabi tsanetsi jivi vajanacaitsacueniabiyanima, najai daxita bajarapamonae.

### Pacuenia Jesús petiriva tsimataepanatsi petuxujuviaceitera yabara pelivaisi

(Mr 14.3-9; Jn 12.1-8)

<sup>6</sup>Jesús ponapona Betania tomarata, Simón pijabota. Simón bajayajebi bitso peperabëtsabanaenëmi. <sup>7</sup>Nexata Jesús petiriva cobenaimoxoyorenatsi petuxujuviaceitera, alabastrobotellabëta pejeaceitera. Bajarapora bitso penamatamotsira. Nexata Jesús penabanecaejavata mesata, bajarapova tsimataepanaicatsi bajarapaaceitera.

<sup>8</sup>Nexata Jesús pijajivi itsa taeyena Jesús petsimataepanaejavatsitsica bajarapaaceitera, Jesús pijajivi jamatabëcueneanaepanareca. Nexata epamonae najumai tsenae:

—¿Detsa xuajitsia saya xuaba bajarapacuenia maporaje? <sup>9</sup>Canajetsipa rajane. Nexata matamopitsipa ayaimatamo. Bajarapapalata rajutsipa bepejiobivi bajarapacuenia peyavenonaenexa, najai tsenae Jesús pijajivi.

<sup>10</sup>Nexata Jesús jumetane bajarapacuenia pijajivi pejumaitsijava. Nexata Jesús jumaitsi pijajivijavabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuene nexanaje. <sup>11</sup>Daxitamatacabi raja bepejiobivi jinavanapa itsaxuayo pajinavanapame. Itsiata baitsi jane xanë daxitamatacabi apo ponaponenë tsane paxamëjavata. <sup>12</sup>Itsamonae petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviaceitera, abaxë apo tēpae atanë. Nexata baja bajarapova neperabëxaniavaeta itsamonae tanemëthëtsivajënae. <sup>13</sup>Xaniajanë pacuenia pacatsipaebijitsiatsi. Daxitanacuanëjava tajajivi itsa paebanajetarubenaena pexanialivaisi jivi tacapanepaelivaisinexa, vajunupaebabiabiananua pacuenia exana xanëjavaberena mapapetirivaje, jai Jesús pijajivijavabelia tajëvelia penavajunupaebijavata pebeyaxuabijavanexatsi.

**Pacuenia Judas Jesús yajumejailia pijavajabitsaë pecobeyabelia pecanajetsinexa yabara pelivaisi**

*(Mr 14.10-11; Lc 22.3-6)*

<sup>14</sup> Jesús pijajivi, doce ponëbejeyajuvënë, pevënë Judas Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi. <sup>15</sup> Nexata Judas jumaiatsi sacerdotevi penamatacaitorobivijavabelia:

—¿Detsa pacuenia panerajutsipame panecobeyabelia itsa canajetsipajë Jesús? jai Judas.

Nexata bajarapamonae Judas matamotatsi treinta ponëbeje pepo palatanëanë, bitso penamatamotsinëanë. <sup>16</sup> Nexata bajaraxuacujinae Judas Jesús naitaxuto-caevetsia ponapona. Nexata paepatota Judas toyapëxanepanatsi, perajutsinexa jane baja Jesús bajarapamonae pecobeyabelia.

**Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaisi**

*(Mr 14.12-25; Lc 22.7-23; Jn 13.21-30; 1 Co 11.23-26)*

<sup>17</sup> Junua jane baja fiesta, pafiestajava judíovi baxane levadurata matajërëabinejeva pexanaepan. Nexata Jesús pijajivi imoxoyorenatsi. Yanijobatsi pijajivi.

—¿Detsa belia paponanajë patacamitsaexanaenexa, xua jivi baxane pascua fiestamatacabi, nexaenexa? jai Jesús pijajivi.

<sup>18</sup> Nexata Jesús jumaiatsi pijajivijavabelia:

—Paponare tomarabelia. Pacatsipaebianatsi ponë pijabota papatsijitsiamë. Pajumaiatsimë tsane bo pexainanëjavabelia mapacueniaje: “Vajanacacujarubinë raja jumaiatsi: ‘Imoxoyo rabaja tavajënae tanebeyaxuabinexa. Nexata bajaraponë pijabo netsicopatsiana patacabarëxaenexa xua jivi baxane pascua fiestamatacabi,’ jai raja vajanacacujarubinë,” pajamë tsane bo pexainanëjavabelia, jai Jesús pijajivijavabelia.

<sup>19</sup> Nexata baja Jesús pijajivi pona pacuenia Jesús jumaiatsi. Nexata xua jivi baxane pascua fiestamatacabi daxita Jesús pijajivi pebarëxaenexa, Jesús pijajivi exana jane baja.

<sup>20</sup> Nexata baja ajena meraviyotsia, Jesús pijajivi, doce ponëbeje, barëca mesa muxuneneta. <sup>21</sup> Nexata pexaeyenaejavata Jesús jumaiatsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënë necanajetsiana tajavajabitsaë pecobeyabelia, jai Jesús pijajivijavabelia Judas yabara.

<sup>22</sup> Nexata Jesús pijajivi bejamatabëjiobireca. Nexata Jesús pijajivi, caenë canacujitsia, Jesúsjavabelia yanijobapona.

—Tajatuxanenë, ¿xanë tsaja tsane? jai tsaponae Jesús pijajivi.

<sup>23</sup> Nexata Jesús jumaiatsi pijajivijavabelia:

—Ponëbeje peneta caecuenia panajuacajabutsianajëbeje panbë platojavabelia, bajaraponë necanajetsiana tajavajabitsaë pecobeyabelia. <sup>24</sup> Xanë, Daxitajivi Pematapijinë, tēpaenajë pacuenia baja cajena xanë yabara Dioso pejumelivaisibaxutota tajëvelia jumaiatsi. Itsiata ponë tajavajabitsaë pecobeyabelia necanajetsiana, bajaraponë bitso bejiobi tsane pinijicuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipa bajaraponë itsa apo



naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia Judas yabara.

<sup>25</sup> Nexata Judas, ponë jane baja canajetsijitsiatsi Jesús pijavajabitsaë pecobeyabelia, jumaitsi:

—Petuxanenë, ¿xanë tsaja tsane? jai.

Nexata Jesús jumaitsi:

—Jājā, xamë rabaja tsane, jai.

<sup>26</sup> Pexaeyenaevavata Jesús pita panbë. Jesús jumaitsi Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae Jesús epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

<sup>27</sup> Bajaraxuacujinae icatsia Jesús copavënëjavata yapita piapaeranexa. Diosojavabelia jumaitsi:

—Pexaniacuene panetoexaname. Panerajutame maporaje, jai.

Bajaraxuacujinae pijajivi bajarapora rajuta. Jumaitsi pijajivijavabelia:

—Papaema padaxitamë maporaje. <sup>28</sup> Tsipaji tajana othopaena jivi ayaibitsaë toxaneto pibisiacuene pexanaeneconi pevecuaajibiaexanaenexatsi. Nexata tatëpaejava pejamatabëcueneta, jivi yapëtaena pepacuene xaniajai Dioso jivi pecaapanepaejavanexa, pacuenia baja cajena tajëvelia Dioso najumecapanepaeya jumaitsi. <sup>29</sup> Xaniajanë pacuenia pacatsipaebijitsiatsi. Xanë rabaja mapanacuataje matavëjëa apo apaenë tsane uvacuaira, matapania icatsia pejanauvacuaira pacayajavaapaenatsi taxa pijanacuatatsia, jai Jesús pijajivijavabelia penavajunupaebijavata pebeyaxuabijavanexatsi.

**Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai yabara pelivaisi**

*(Mr 14.26-31; Lc 22.31-34; Jn 13.36-38)*

<sup>30</sup> Jesús pijajivi barënaxëana Diosojumevajianë. Bajaraxuacujinae Jesús pijajivi barëpona petsutojumabelia. Patsutojumata olivonaenë apaaxayo, bajarapatsutojumabelia barëpona. <sup>31</sup> Nexata bajarapatsutojumata Jesús jumaitsi pijajivijavabelia:

—Daxita raja paxamë ajena, pameravi, panexuabarëcëpecaename. Tsipaji rabaja patanexuabarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovejabitsaëto nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavanexamë yabara. Nexata ajena, pameravi, tajavajabitsaë itsa nevaetabiana tanebeyaxuabinexa, daxita paxamë panexuabarëcëpecaename.

<sup>32</sup> Itsiata baitsi jane tatëpacujinae, icatsia asaënë tsane. Nexata paxamë panevajënaeyabelia, copiata ponaenajë Galilea nacuyabelia, jai Jesús pijajivijavabelia.

<sup>33</sup> Nexata Pedro jumaitsi Jesúsjavabelia:

—Daxita mapamonaaje caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

<sup>34</sup> Nexata Jesús jumaitsi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, nanianaevëpata, vacara pefiabivajënaeya, nayavajunuaxainaename tajajivitonëcuenemë. “Apo yapë-

taenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

<sup>35</sup> Itsiata Pedro jumaitsi Jesúsjavabelia:

—Nebeyaxuabijitsia ata tsane xamë yajava, itsiata cajena apo nayavajunuax-ainanë tsane nijajivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

### **Pacuenia Jesús vajëta Diosojavabelia Getsemanívenëjavata yabara pelivaisi**

*(Mr 14.32-42; Lc 22.39-46)*

<sup>36</sup> Jesús pijajivi pecunuameravita yajavapata Getsemanívenëjavata. Bajarajota Jesús jumaitsi pijajivijavabelia:

—Paneevetenare abaxë majotaje. Abaxë raja imoxoyo majotaliaje vajëtsijitsianë Diosojavabelia, jai Jesús pijajivijavabelia.

<sup>37</sup> Nexata Jesús barëpona acueyabi ponëbeje pijajivi. Jesús pijajivi barëpona pe-saicaeyojavabelia mapamatabëxëyoje. Pedro, Santiago, Juan, bajarapamatabëxëyo. Santiagobeje Juanbeje Zebedeo pexënatobeje. Bajaraxuacujinae Jesús bitso najamatabëxaina. Nexata bejamatabëjibireca.

<sup>38</sup> Nexata Jesús jumaitsi pijajivi acueyabi ponëbejejavabelia:

—Xanë bitso pinijcuenia najamatabëxainajë. Nexata bitso tanajamatabëxainae-java, jamatabëyatëpajë. Paxamë abaxë majotaje panacopabare. Paitavamë tsane. Pëtsa abaxë pamajitame, jai Jesús pijajivi acueyabi ponëbejejavabelia.

<sup>39</sup> Nexata Jesús caenë pevajënaeyabelia icatsia tsiquirijavayo ponataba. Nexata Jesús irataeya bocajunua pevajëtsinexa Diosojavabelia. Jumaitsi Diosojavabelia:

—Taxa Diosomë, netocopatame picani tanebeyaxuabinexa betajibicueneta. Dax-itacuenë raja cacaëjëpa nexanaenexa. Nexata necapanepare bajarapabejibicuen-avecua. Itsiata xanë apo tajitsipacuenë ata, pacuenia xamë jitsipame, netocopat-sianame, jai Jesús Diosojavabelia pevajëtsijavata pebeyaxuabijavanexatsi.

<sup>40</sup> Bajaraxuacujinae Jesús naviarena acueyabi ponëbeje pijajivijavaberena. Caxitajaraba Jesús pijajivi pemajitanubenaevi. Nexata Jesús jumaitsi Pedrojavabelia:

—¿Apo pacacaëjëpae tsabaja rovia caepatoyo ata paneaitavatsenaenexa? <sup>41</sup> Pëtsa pamajitame. Paitavamëre. Pavajëre Diosojavabelia papecayavenonaenexa pibisi-acuene paneexanaeyaniva. Tsipaji raja dovathi pacajamatabëcueneëjëbiana. Pax-amë picani panejamatabëcueneta pexaniacuene jamatabëpaexanabiabame. Itsiata baitsi jane apo pajamatabëcuenesaëmë pexaniacuene paneexanaenexa, jai Jesús Pedrojavabelia.

<sup>42</sup> Nexata icatsia Jesús pona pecovëyabelia pevajëtsinexa icatsia Diosojavabelia. Vajëta Diosojavabelia mapacueniaje.

—Axa, itsa apo jitsipaemë tanevecuatsatsinexamë betajibicueneta tatëpaeja-vanexa, nexata pacuenia jitsipame, netocopatsianame, jai Jesús Diosojavabelia.

<sup>43</sup> Bajaraxuacujinae Jesús icatsia naviarena pijajivijavaberena. Caxitajaraba icat-sia Jesús pijajivi pemajitanubenaevi. Tsipaji baja Jesús pijajivi bitso itamajitsipana.

<sup>44</sup> Nexata abaxë bajarapamonae pemajitanubenaëjavata, Jesús icatsia pona pecov-ëyabelia pevajëtsinexa icatsia Diosojavabelia. Nexata icatsia vajëta Diosojavabelia pacuenia vajëta copiaya xuabeje vajëta. <sup>45</sup> Bajaraxuacujinae icatsia Jesús naviarena pijajivijavaberena. Jumaitsi Jesús pijajivijavabelia:

—¿Abaxë tsarovia tsiteca pamajitanubename? Copiapata rabaja paepatota xanë, Daxitajivi Pematapijinënë, necanajetsijitsia pibisiacuene pexanaevi pecobeyabelia. <sup>46</sup> Panonobapunare baja. Ponaenatsi baja. Imoxoyo rabaja najetaruca tajavajabitsaë pecobeyabelia tanecanajetsinënexa, jai Jesús pijajivijavabelia Judas yabara.

### **Pacuenia Jesús vaetabatsi pijavajabitsaë yabara pelivaisi**

*(Mr 14.43-50; Lc 22.47-53; Jn 18.2-11)*

<sup>47</sup> Jesús pijavajabitsaë pevaetabijavatanexatsi, cuaicuaijai tsanucæ pijajivijavabelia. Nexata bajarapaepatota patanajetaruca Judas, Jesús pijajivi doce ponëbejeyajuvënëni. Judas pënanajetarubenatsi jivi ayaibitsaëtoخانeto. Bajarapamonæyajuvënëvi itsamonaë canajetarubena espadanë. Itsamonaë canajetarubena naëbonë yajava. Bajarapamonæ itorobatsi sacerdotevi penamatacaitorobivi, judfovi pijaancianovinua. <sup>48</sup> Judas pebarërenavajënaë bajarapamonæ, copiaya baja cajena Judas tsipaeba pacuenia bajarapamonæ yapëtaejitsia Jesúscuene. Judas jumaitsi mapacueniaje:

—Ponë raja peneta bajacobiaya itabaratsutsunexuabianajë, bajaraponë Jesús tsane. Bajaraponë pavaetabianame. Pacobecëtsiana xaniavaetsia, jai baja cajena Judas pematacanajetarucaevijavabelia pebarërenavajënaë.

<sup>49</sup> Nexata jane baja Judas itsa patanajetaruca, exana pacuenia jumaitsi pematacanajetarucaevijavabelia. Judas Jesús itabaratsutsuniaya bajacobatsi Judas jane baja pematacanajetarucaevi peyapëtaenexa Jesúscuene. <sup>50</sup> Jesús nexata jumaitsi Judasjavabelia:

—Judas, ¿detsa xua yabara patame? jai.

Nexata jane baja Jesús petsimaxëponaevitsi, cujibarëcëpaliatsi. Vaetabatsi. Cobecëtatsi xaniavaetsia pecaponaenexatsi.

<sup>51</sup> Bajarajota Jesús pijajiviyajuvënëni pijaespada navemarajonotaxuabina. Muxuyoropaebiaxuaba sacerdotevi pepo penamatacaitorobinë pijajivitonë. <sup>52</sup> Nexata Jesús jumaitsi pijajivitonëjavabelia:

—Nijaespada baja xataremeca pevënojojavareca. Tspaji pamonæ namaxëvanita espadata, daxita bajarapamonæ juya espadata babiatsi, jai Jesús.

<sup>53</sup> Icatsia Jesús jumaitsi:

—Itsa vajëtsipajë taxa Diosojavabelia taneyavenonaevinexa tanetoitorobinexatsica, nexata tavajëtsiepatota netoitorobijitsipaica bitso ayaibitsaëtoخانetonë angelevi. <sup>54</sup> Itsa vajëtsipajë taxa Diosojavabelia tanetoitorobinexatsica taneyavenonaevinexa, nexata baja apo netocopiapatsi tsipæ pacuenia Dioso pejumelivaisibaxutota tajëvelia nevajunupaeba pacuenia nevaetabijitsia tanebeyaxuabinexa, jai Jesús pijajivitonëjavabelia.

<sup>55</sup> Nexata Jesús bajarajota jumaitsi petsimaxëponaevitsijavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naëbonë yajava, patanevaetabineexamë pacuenia pavaetababiabame penacobetoxotsinë. Xanë caematacabi canacujitsia Dioso pejumelivaisi paxamëjavabelia pacatsipaebabiabatsi templobota. Itsiata bajarapamatacabi apo panevaetabimë. <sup>56</sup> Mara pacuenia panevaetabameje tanetocopiapatsixæ baja pacuenia Dioso pejumelivaisibaxutota bajayata tajëvelia nevajunupaeba, jai Jesús pevaetabivitsijavabelia.

Nexata jane baja Jesús pijavajabitsaë pevaetabijavatatsi, daxita Jesús pijajivi xubarëcëpecatsi pacuenia baja cajena Jesús tajëvelia jumaitsi pijajivijavabelia.

**Pacuenia Jesús nutatsi judíovi penamatacaitorobivi  
pitabarata yabara pelivaisi**

(Mr 14.53-65; Lc 22.54-55, 63-71; Jn 18.12-14, 19-24)

<sup>57</sup> Jesús pevaetabivitsi caponaliatsi Caifás pijaboyabelia. Bajaraponë Caifás sacerdotevi pepo penamatacaitorobinë. Nexata Caifás pijabota nacaetwana judíovi pecujarubivi, judíovi pijaancianovi yajava. <sup>58</sup> Itsa baja Jesús caponaliatsi, nexata Pedro bajarapamonae pecovëya tajiyo najetaruca. Sacerdotevi pepo penamatacaitorobinë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanaxobjavabelia, itsabelia Jesús cajunuatsi. Nexata sacerdotevi pepo penamatacaitorobinë pijabopanabota, Pedro naeca templobopijipolicíavita. Bajarajota Pedro naeca petaenexa pacuenia Jesús pijavajabitsaë exanatsi.

<sup>59</sup> Nexata bajarapabo ënëtuatuajëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarëcuaicuajai. Bajarapamonae nayanijoba.

—¿Jipatsa yapëtane Jesús pibisiacuene pexanaejava, paneconi yabara beyaxuabijitsiatsi? najai tsaponae.

Itsiata bajarapamonae apo caxitajarabi itsaneconi ata, Jesús pijaneconi. Najumetsënëtsiaya picani peneconitsilivaisinexa, jaita penajumetsënëtsilivaisita picani Jesús pebeyaxuabinexatsi. <sup>60</sup> Ayaibitsaëto pata penajumetsënëtsilivaisi pepaebinexa Jesús yabara. Itsiata caelivaisi ata najumejëpaeya apo paebi bajarapamonae. Nexata bajarapamonae apo caxitajarabi paneconi yabara Jesús naneconitsiaexanaejitsiatsi pebeyaxuabiaexanaenexatsi. Bajaraxuacujinae belia anijanëbeje caelivaisi najumejëpaeya neconitatsibeje.

<sup>61</sup> Jumaitsibeje bajaraponëbeje Jesús yabara:

—Maponë jumaitsije: “Xanë necaëjëpa taxuabinexatsica Dioso pijatemplobo. Necaëjëpanua acueyabi matacabita icatsia taveretetsinexa itsabo,” jai maponëje, jaiibeje bajaraponëbeje Jesús yabara.

<sup>62</sup> Nexata jane baja sacerdotevi pepo penamatacaitorobinë nonotapuna bajarapamonae pitabarata. Nexata jumaitsi Jesúsjavabelia:

—¿Apo yapëtaemë tsaja itsalivaisiyo ata nejumecanaviatsinexa? ¿Xaniajai tsabaja pacuenia maponëbeje caneconitsiajumaitsibeje? jai sacerdotevi pepo penamatacaitorobinë.

<sup>63</sup> Jesús itsiata moya. Nexata bajaraponë icatsia jumaitsi Jesúsjavabelia:

—Caitorobatsi caecuenia tanenavajunupaebinexamë nexaniajaijumeta. Itsajume, Diosojavabelia naneconitsianame. Panenavajunupaebare xaniavetsia itsa xamë Cristomë, athëbëvetsica Dioso pecaitorobinëtsica jivi necapanepaenexa. ¿Xamë tsaja Dioso pexënatomë? jai.

<sup>64</sup> Nexata Jesús jumaitsi:

—Jājā, xanë rabaja pacuenia nejumaitsimë. Nexata icatsia pacajumaitsitsi. Paxamë raja panetaename xanë, Daxitajivi Pematapijinënë, taecaejava Dioso pecujuaenena, daxitajamatabëcuene pecaëjëpaenëtsi. Panetaenamenua tanajetarucaejava athëbëvetsica itarërëbota, jai Jesús.

<sup>65</sup> Bajarapacuenia Jesús pejumaitsijava itsa jumetane, sacerdotevi pepo penamatacaitorobinē penaxatatsijava anaeya titinaxuaba. Bajarapacuenia titinaxuaba pi-anaepanaexae Jesús pejumaitsijava yabara. Nexata sacerdotevi pepo penamatacaitorobinē jumaitsi daxita penacaetuatsivijavabelia:

—Mara ponē Dioso apo pejitsipaecuenia cuaicuaijaije. Dioso bepexēnato nataeya cuaicuaijai. Pijacuata rabaja naneconita bajarapacuenia pecuaicuaijaixae. Pematatsēnēa baja apo namatavenonaetsi itsamonae vajanacatsipaebinexa paneconi yabara maponēje naneconitsiaexanaejitsiatsi. Paxamē rabaja pajumetaneme maponēje Dioso apo pejitsipaecuenia pecuaicuaijaijava. <sup>66</sup> ¿Detsa nexata paxamē pajamatabēitsimē? jai sacerdotevi pepo penamatacaitorobinē daxita penacaetuatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

<sup>67</sup> Nexata bajarapamonae Jesús itabarasuabatsi. Bajaraxuacujinae papaēbērēpanata itaxutocētatsi. Pitaxutocētsicujinaetsi itabaratsaquibabeponatsi pecobethaitonēta. Itsamonae itabarapacabixuababiabatsi. <sup>68</sup> Nexata bajarapamonae jumai tsaponae Jesúsjavabelia:

—¡Xamē raja itsa Cristomē, athēbēvetsica Dioso itsa pecaitorobinētsica jivi necapanepaenexa, nexata vēnējonare ponē caitabarapacabixuaba! jai tsaponae bajarapamonae.

### **Pacuenia Pedro nayavajunuaxaina Jesús pijajivitonēcuene yabara pelivaisi**

*(Mr 14.66-72; Lc 22.56-62; Jn 18.15-18, 25-27)*

<sup>69</sup> Itsa abaxē Jesús sacerdotevi pepo penamatacaitorobinē pijabo ēnētuaatujēalia yanijobaponatsi xua yabara naneconitsiaexanaejitsiatsi, Pedro naitaxutocaevetsiaya naeca bopanabota. Nexata bajarapabota penacuenebiva Pedro kujirenatsi. Bajarpova jumaitsi Pedrojavabelia:

—Xamē ata rabaja naponaponame Jesúsata, Galilea nacuapijinēta, jai.

<sup>70</sup> Nexata Pedro itsiata nayavajunuaxaina Jesús pijajivitonēcuene. Daxita bajarajota penubenaevi pitabarata Pedro jumaitsi:

—Xanē cajena apo yapētaenē pacuene yabara nejumaitsimē, jai.

<sup>71</sup> Sacerdotevi pepo penamatacaitorobinē pijabo matatoyorotsia yacaranata ibopanaxanetonē mataropotsia pefaratsijavaxanetota. Nexata bajarapayacaranatsijavaxaneto baupajavabelia Pedro natixilia. Nuca bajarapabaupa muxuneneta. Bajarajota icatsia itsava, bajarapabota penacuenebiva, Pedro taenutatsi. Nexata bajarapova ata Pedro yabara icatsia jumaitsi bajarajota penubenaevijavabelia:

—Mara ponē ata naponapona Jesúsataje, Nazaret tomarapijinēta, jai bajarapova.

<sup>72</sup> Nexata icatsia Pedro nayavajunuaxaina Jesús pijajivitonēcuene. Pedro jumaitsi: —Xaniajanē. Dioso pitabarata cajumaitsitsi. Apo yapētaenē cajena bajaraponē, jai.

<sup>73</sup> Bajaraxuacujinae icatsia, caepatoyocujinae, bajarajota penubenaevi cujibarēcēpaliatsi Pedro. Jumaitsi bajarapamonae:

—Xaniajai raeta baja cajena. Xamē Jesús pijajiviyajuvēnēnēmē. Tsipaji rabaja Galilea nacuapijivi penatsipaebicuenia natsipaebame, jai bajarapamonae Pedrojavabelia.

<sup>74</sup>Nexata Pedro jumaitsi:

—Itsa apo xaniajanë tsipae paxamëjavabelia, nexata Diosojavabelia naneconitsipajë. Apo yapëtaenë cajena bajaraponë, jai Pedro.

Itsa baja Pedro najumevereta bajarapacuenia pejumaitsijava, vacara fiaba. <sup>75</sup>Nexata bajarajota Pedro najamatabënapitajaraba Pedrojavabelia Jesús pejumaitsijava mapacueniaje: “Ajena rabaja, pameravi, vacara pefiabivajënaeya, nayavajunuaxainaname tajajivitonëcuenemë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejaijava Jesús Pedrojavabelia, Pedro najamatabënapitajaraba. Nexata baja Pedro pitsapalia bo matatoyorotsia peyacaranatsijava pënëyabelia. Pini jucuenia Pedro nua.

### **Pacuenia Jesús caponaliatsi Pilatojavabelia yabara pelivaisi**

(*Mr 15.1; Lc 23.1-2; Jn 18.28-32*)

**27** Ajena baja matakabi tsarucaponae, sacerdotevi penamatacaitorobivi, judíovi pijaancianovi yajava, najamatabëjëpa pacuenia exanaejitsia Jesús pebeyaxuabiaexanaenexatsi. <sup>2</sup>Nexata Jesús cobecëtsiaya caponaliatsi nacuaejetsinë Poncio Pilatojavabelia.

### **Pacuenia Judas nabeyaxuaba yabara pelivaisi**

<sup>3</sup>Judas canajetaxuabatsi Jesús pijavajabitsaë pecobeyabelia. Bajaraponë itsa tane Jesús penaneconitsijava pebeyaxuabinexatsi, nexata bitso najamatabëxaina. Nexata pona petocanaviatsinexa perajutsipalatamitsi, treinta ponëbeje pepo palatanëanë, bitso penamatamotsinëanë. Tocanaviatsijitsia sacerdotevi penamatacaitorobivijavabelia, judíovi pijaancianovijavabelia ata. <sup>4</sup>Judas jumaitsi bajarapamonaejavabelia:

—Pibisiacueña baja rovia exanajë. Bajaraponë itsacueñejavayo ata apo exanaenejeva, panecobeyabelia baja canajetaxuabajë, jai Judas.

Nexata bajarapamonae jumaitsi Judasjavabelia:

—¡Paxanë raja patajamatabëcueneta apo naneconitsimë tsane! ¡Xamë raja nijacuata naneconitame! jai bajarapamonae Judasjavabelia.

<sup>5</sup>Nexata Judas templobota othotajarabeta perajutsipalatanëanëmitsi. Bajaraxuacujinae pitsapalia. Pona baja. Nexata pijacuata nabeyaxuaba. Pepuanavësicëtsi athëbëvetsica perucaemaëtoxanetota, athëbëvetsica jirevica irabetsica penacuibosi catarërëtarabaxuabinexa. Bajarapacuenia pijacuata Judas nabeyaxuaba.

<sup>6</sup>Nexata sacerdotevi penamatacaitorobivi caetuata Judas piothotajarabetsipalatanëanë. Najumaitsi bajarapamonae:

—Acuenebi mapapalataje vajabuatsinexa ofrenda vajajebabiabicajónita. Tsipaji bajarapapalata pejamatabëcueneta jivitonë beyaxuabijitsiatsi, najai bajarapamonae.

<sup>7</sup>Nexata bajarapamonae najamatabëjëpa bajarapapalatanëanëta pecomuatsinexa ira. Nexata bajarapamonae bajarapapalatanëanëta comuata canalitonë pefaratabiabinë pijairami. Bajarapamonae comuata bajarapaira, itsanacuaverena pepatsivi itsa tëpa Jerusalén tomarata, bajarapairata pemëthëtabiabinexa. <sup>8</sup>Bajaraxuata mapamatacabijavaberena ataje vënërubu bajarapaira mapejumaitsi vënëje: “Papalata pejamatabëcueneta jivitonë beyaxuabatsi, bajarapapalata pecomuatsiira,” pejai vënë vënërubu. <sup>9</sup>Bajarapacuenia itsa comuata bajarapaira, copiapata jane baja pacuenia Diosojumepaebinëmi profeta Jeremiaspijinë bajayata tajëvelia vajunupaeba bajarapapalata. Profeta Jeremiaspijinë baja cajena bajarapapalata yabara

tajëvelia jumaitsi mapacueniaje: “Israelnacia pevetsivi rajutsiana jivitonë pecana-jetsinëjavabelia treinta ponëbeje, pepo platananitota pexanaenëanë. Bajarapapalatanëanë icatsia bajarapamonae pitsiana. <sup>10</sup> Nexata bajarapapalatanëanëta bajarapamonae comuatsiana canalitonë pefaratabiabinë pijairami, pacuenia Dioso tajëvelia nejumaitsi,” jai bajayata profeta Jeremíaspijinë tajëvelia pevajunupaebijavata Jesús pematamopitsipalatanexatsi.

### **Pacuenia Jesús nutatsi Pilato pitabarata yabara pelivaisi**

*(Mr 15.2-5; Lc 23.3-5; Jn 18.33-38)*

<sup>11</sup> Jesús nutatsi nacuaevevtsinë Pilato pitabarata. Nexata Pilato jumaitsi Jesúsjavabelia:

—¿Xamë tsaja judíovi pepo nevetsinë? jai Pilato.

Nexata Jesús jumaitsi Pilatojavabelia:

—Jājā, xanë rabaja pacuenia nejumaitsimë, jai Jesús Pilatojavabelia.

<sup>12</sup> Sacerdotevi penamatacaitorobivi, judíovi pijaancianovi yajava, Jesús neconitaponae atatsi, apo jumepitsi. <sup>13</sup> Nexata Pilato jumaitsi Jesúsjavabelia:

—¿Apo jumetaemë tsaja pacuenia mapamonae caneconitaponaje? jai.

<sup>14</sup> Jesús neconitsi atatsi, itsiata apo jumepitsi. Bajaraxuata Pilato jamatabëcuenenabenajaca. Apo yapëtae pacuenia Pilato exanaejitsia Jesúsjavabelia.

### **Pacuenia baja Pilato tocopata Jesús pebeyaxuabinexatsi yabara pelivaisi**

*(Mr 15.6-20; Lc 23.13-25; Jn 18.38–19.16)*

<sup>15</sup> Nacuaevevtsinë Pilato xaina pijacujirucuenë. Caevai canacujitsia, pascua fiestamatacabi, Pilato copatabiaba caenë penaneconitsinë pepitsapaenëxa penaneconitsivi pejebabiabibovecua. Pajivi yabara jivi vajëtabiaba Pilatojavabelia, bajarapajivi Pilato copatabiaba pascua fiestamatacabi. Bajarapacuenia Pilato caenë copatabiaba jivi pesivajamatabëcuenë xanepanaenexatsi. <sup>16</sup> Pamatacabi Jesús naneconitsiaexanatsi, bajarapamatacabi penaneconitsivi pejebabiabibota naneconitsiaponapona jivibenë, Barrabásvënënë. Bajaraponë bitso piacujirubejenëcuenë yapëtanetsi daxitajivi. <sup>17</sup> Nexata daxita Jerusalén tomarapijivi penacaeuatsijavata Pilato jumaitsi:

—¿Detsa ponë pajitsipame patacatocapitsapaenëxa penaneconitsivi pejebabiabibovecua pepitsapaenëxa? ¿Barrabás tsaja? Itsa jume, ¿Jesús tsaja, ponë yabara jivi jumaitsi: “Cristo raja athëbëvetsica Dioso pitorobinëtsitsica jivi pecapanepaenëxa,” jaitsi? jai Pilato bajarapamonaejavabelia.

<sup>18</sup> Pilato jamatabëjumaitsi:

—Xua Jesús exanaponapona, sacerdotevi penamatacaitorobivi cueneyoyatsi. Bajaraxuata netocaparena, jamatabëjai.

<sup>19</sup> Pilato abaxë eca itsajota ecabiaba penaneconitsivi penaneconitsiaexanaenëxa. Nexata Pilato pijava tonajumeitorobarenatsi. Pilato pijava Jesús yabara jumaitisirena mapacueniaje: “Copare bajaraponë, ponë itsacuenenëconiyoyata apo penaneconitsinë. Ajena raja, meravi, amajitsinaebejenë bajaraponë yabara,” jaitisirena Pilato pijava. Nexata picani Pilato jamatabëcopata Jesús.

<sup>20</sup> Itsiata baitsi jane bajarapaepatota sacerdotevi penamatacaitorobivi, judíovi pijaancianovi yajava, jivijavabelia muxubijiapenetsia jumai tsaponae:

—Pavajëtsianame Barrabás pecapitsapaenëxatsi. Pavajëtsianame Jesús pebeyaxuabinexatsi, jai tsaponae bajarapamonae.

<sup>21</sup> Nexata nacuaevevtsinē Pilato icatsia yanijoba jivijavabelia:

—¿Detsa ponē nexata pajitsipame patacatocapitsapaenexa? jai Pilato.

Nexata bajarapamonae jumaitsi:

—Panetocapitsapare Barrabás, jai.

<sup>22</sup> Pilato nexata jumaitsi bajarapamonaejavabelia:

—¿Detsa nexata xua exanaenajē Jesúsjavabelia, ponē yabara: “Cristo, ponē Dioso athēbēvetsica itorobatsi jivi pecapanepaenexa,” jaitsi? jai Pilato bajarapamonaejavabelia.

Nexata daxita bajarapamonae jumaitsi Pilatojavabelia:

—¡Cruzajavabelia cobematabiabarutsiaexanare! jai bajarapamonae.

<sup>23</sup> Nexata Pilato jumaitsi bajarapamonaejavabelia:

—¿Detsa pitsineconi yabara cobematabiabarutsiaexanaejitsipajē cruzajavabelia? jai Pilato Jesús yabara.

Itsia bajarapamonae icatsia pinijijumeta vavajai.

—¡Cruzajavabelia cobematabiabarutsiaexanare! jai tsaponae.

<sup>24</sup> Pilato tane piajumesaējava bajarapamonae. Muxujiobi ata, apo jumecovēnēt-sitsi. Bitsoyo biji caranata bajarapamonae jamatabēnanaecajematapona bajarapatomarata. Nexata Pilato penacobequiatsinexa, pijajivi itoroba petocarenanexatsi mera. Pilato nacobequiata daxitajivi pitabarata bajarapamonae peyapētaenexa Jesús apo penaneconitsiaexanaecuene. Pilato jumaitsi bajarapamonaejavabelia:

—Xanē raja tajamatabēcueneta apo beyaxuabiaexanaenē tsane maponēje, pianeconijibinē. Paxamē panejamatabēcueneta pabeyaxuabiaexanaename, jai Pilato.

<sup>25</sup> Nexata daxita bajarapamonae jumaitsi:

—¡Itsa bajaraponē pianeconijibinē Diosojavabelia, nexata bajaraponē patabeyaxuabineconi jema panetsijumajopaena, pataxi yajava! jai bajarapamonae Pilatojavabelia.

<sup>26</sup> Nexata baja Pilato tocopata Barrabás pepitsapaenexa penaneconitsivi pejebabiabibovecua. Itorobanua vajabitsaēvi ayaicuenia Jesús pejumatatibabenexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaēvi pecobematabiabarutsinexatsi cruzajavabelia.

<sup>27</sup> Nexata baja Pilato pijajivi, vajabitsaēvi, Jesús caponaliatsi nacuaevevtsinē Pilato pijaboxanetojavabelia. Nexata bajarajota Jesús matatoyorotsia nacaetuatatsi daxita vajabitsaēvi. <sup>28</sup> Jesús penaxatatsijava vajabitsaēvi vejumajonotatsi saicayajava pexatatsinexatsi. Nexata jane baja vajabitsaēvi Jesús quenetsiataeya xatatatsi petsobiajava benacuaevevtsinēcuenia petaenexatsi. <sup>29</sup> Becoronacuenia pemataxatatsinexatsi, peejuvitoyoroto tsmataexanatsi. Bajarapatoyoroto Jesús mataxatatatsi. Tsicoberutatsinua naebo pecujuanenia benacuaevevtsinēcuenia petaenexatsi. Nexata bepeyaiyataecueniatsi bajarapamonae pematabacabēta tonubenatsi Jesús pitabarata. Quenetsiataeya jumai tsaponaetsi:

—¡Bajaco, judíovi pepo pevetsinē! jai tsaponaetsi bajarapamonae.

<sup>30</sup> Suabaponatsi. Vecuapitatsi naebo. Bajarapanaebota mataconitarababiabatsi.

<sup>31</sup> Bajarapacuenia quenetsiataeya pecapocaponaecujinaetsi, vejumajonotatsi baja pexatatsijavatsi. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.



**Pacuenia jane baja Jesús cruzajavabelia  
cobematabiabarutatsi yabara pelivaisi**

(Mr 15.21-32; Lc 23.26-43; Jn 19.17-27)

<sup>32</sup> Vajabitsaëvi Jesús itsa caponaliatsi tomaravexua, namutota caxitajaraba Simónvënëñë, Cirene tomarapijinë. Nexata vajabitsaëvi Simón itorobatsi, pacruzajavabelia Jesús cobematabiabarutatsijitsiatsi, peyavenonaeyacaponanexa.

<sup>33</sup> Jesús caponaliatsi Gólgotavënë tsutojavabelia, bajarapatsutojumata pecobematabiabarutatsinexatsi cruzajavabelia. “Gólgota,” itsa jai hebreojumeta, mapajumetaje pejumaitisijume: “Jivimatasipatsuto,” pejaijume. <sup>34</sup> Bajarajota picani Jesús rajutatsi vinora, pematajërëabira piatsaxarata. Jesús picani rajutatsi bitso penavixaetaeyaniva pecobematabiabarutatsijavatatsi cruzajavabelia. Jesús pajane bajara-pora. Itsiata apo apae.

<sup>35</sup> Nexata jane baja Jesús vajabitsaëvi cobematabiabarutatsi cruzajavabelia. Bajaraxuacujinae vajabitsaëvi bajarajota canamuxusita beibotoxi. Bajarapacuenia canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami. Bajarapacuenia vajabitsaëvi itsa natsicobetsana Jesús penaxatatsijavami, tocopiapatatsi jane baja pacuenia Diosojumepaëbinëmi profetanë bajayata tajëvelia vajunupaeba Jesús penaxatatsijava. Jesús penaxatatsijava yabara, profetanëmi bajayata tajëvelia jumaitis mapacueniajaje: “Natsicobetsanaena penaxatatsijava. Canamuxusitsiana beibotoxi peyapëtaenexa ponë pitaponaejitsia,” jai profetanëmi. <sup>36</sup> Bajaraxuacujinae vajabitsaëvi bajarajota evetena penaitaxuto-caevetsinexatsi Jesús. <sup>37</sup> Bajarajota Jesús pematabocoto matatsënëyo cruzajavata, yaquinaruta tablapayota itsamonae ata peyapëtaenexa pajamatabëcuene yabara naneconitsiaexanatsi Jesús. Jumai tsarutsi peyaquinaeitane cruzajavata mapacueniajaje: “Mara ponë Jesúsje, judíovi pepo pevetsinë,” jai tsarutsi Jesús yabara.

<sup>38</sup> Anijanëbeje penacobetoxotsinëbeje Jesús yajavacobematabiabarutatsi. Caenë canacujitsia pijacruzata rubatsi. Bajaraponëbeje Jesús pemuxuneneta rutatsibeje. Itsanë Jesús pecujanenia rutatsi. Itsanë Jesús petsavenonenia rutatsi. <sup>39</sup> Jesús pecobematabiabarutatsijavatatsi cruzajavabelia, bajaraxuayo penajetarubenaevi Jesús itaropitsiaya bijataeyabiabatsi. <sup>40</sup> Jumai tsabiabi bajarapamonae:

—Xamë raja imata jumaitisimë: “Xuabianicajë templobo. Acueyabi matacabita icatsia veretetsianajë itsabo,” jamë. Nacapanepare jane baja nijacuata. Itsa xaniajai Dioso pexënatomë, nexata cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

<sup>41</sup> Bajara pijinia pacuenia sacerdotevi penamatacaitorobivi capocaponatsi Jesús. Judíovi pecujarubivi ata capocaponatsi. Fariseovi ata capocaponatsi. Judíovi pijaancianovi ata capocaponatsi Jesús. Ëpamonae najumaitis:

<sup>42</sup> —Maponëje itsamonae yabara jumai tsabiabi: “Capanepaenajë jivi,” jai tsabiabi. Caranata pijacuata penacapanepaenexa apo caëjëpaetsi. Itsa xaniajai Israel nacuapijivi pepo pevetsinë, nexata aeconoxae cruzajavavetsica runaenica vajataenexa. Nexata jane baja jumecovënëtsianatsi Cristonëcuene. <sup>43</sup> Bajaraponë pina najamatabëcuene copata Diosojavabelia peyavenonaenexatsi. “Xanë raja Dioso pexënatonë,” jai tsabiabinua. Nexata taenatsi aeconoxae Dioso pecapanepaejavatsi, najai bajarapamonae capocaponaeja Jesús yabara.

<sup>44</sup> Ponēbeje penacobetoxotsinēbeje Jesús yajavacobematabiabarutatsi, bajara-ponēbeje ata Jesús bijataerucatsibeje bajarapacuenia.

### **Pacuenia baja Jesús tēpa yabara pelivaisi**

*(Mr 15.33-41; Lc 23.44-49; Jn 19.28-30)*

<sup>45</sup> Jesús baja itsa tēpaejitsia, ajena matonejejitsia, daxita nacuanējava aitaquiri tsajuni. Matapania caniviyojavabelia, bejamatabēcuene a las tres, nacua napebeta icatsia. <sup>46</sup> Nexata paepatota icatsia nacua napebeta, bajarapaepatota pinijicuenia Jesús aėjai. Jumaitsi:

—Eli, Eli, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitsijume: “TajaDioso, tajaDioso, ¿detsa xuajitsia baja tajaepato necopatame?” pejajjume.

<sup>47</sup> Nexata itsamonae bajarajota penubenaevi bijiaya jumetane bajarapacuenia Jesús pejumaitsijava. Nexata saya jamatabēcuenenavēxaniabiaya jumaitsi bajarapamonae:

—Mara ponē junata profeta Elíaspijinēmi, Diosojumepaebinēmi, jai bajarapamonae.

<sup>48</sup> Nexata bajarapamonaeajuvēnēnē bepijia cujinaelia pecarenanexa esponjavēnējava. Nexata esponjavēnējava jabutaba piajatuvonorayalia. Bajaraxuacujinae esponjavēnējava naeboupita cētaruta. Toyotsiatsi Jesús petsutsuninexa picani bajaraxua. <sup>49</sup> Itsiata itsamonae jumaitsi:

—Copare abaxē. Taenatsi Elíaspijinē itsa najetaruca pecapanepaenexatsi, jai bajarapamonae capocaponaeya.

<sup>50</sup> Icatsia Jesús pinijicuenia aėjai. Bajaraxuacujinae jane baja Jesús tēpanajereca. <sup>51</sup> Paepatota Jesús tēpanajereca, bajarapaepatota templobo ēnētuaatujēalia peyatuucutarutsipana, ayaipapaēbērēpanaxaneto, titititica tuatujāēareca, athēbēvetsicacujinae irabereca. Ira najēaba. Ibotoxanetonē ata sarapajunujunua. <sup>52-53</sup> Ayaibitsaēto Dioso pepua pejumecovēnētsivi petēpaevimi pemēthēanē ata napananubena. Nexata Jesús acueyabi matababita icatsia itsa asaē petēpaecujinae, pamonae pemēthēanē napananubena, bajarapamonae ata cotocaevi asaē. Nexata pitsapa mēthēvetsina. Nexata bajarapamonae pona Jerusalén tomarabelia. Bajarajotalia naitajēbapona jivi ayaibitsaētojavabelia.

<sup>54</sup> Jesús cruzata petēpaejavata vajabitsaēvi pijacapitán, pijajivi yajava, nuca. Taenubena Jesús petēpaejava. Jesús petēpaejavata ira najēaba. Nexata bajarapamonae itsa tane ira penajēabijava, itsajavanē ata itsa taepona, bajarapamonae bitso junava. Jumaitsi:

—Matsaena ponē tēpaje, pepacuenē baja rovia Dioso pexēnato, jai bajarapamonae.

<sup>55</sup> Bajarajota petiriavibitsaētoxaneto tajiyoverena taenubena Jesús petēpaejava. Bajarapapetiriavi Jesús pepēta napona Galilea nacuaverena, Jesús peyavenonae-imitsi. <sup>56</sup> Bajara papetiriavibitsaētoxaneto tuatujāta nanubena mapamatabēxēyoje. Itsava Mariāvēnēva, Magdala tomarapijiva. Itsava icatsia Mariāvēnēva. Bajara-pova Santiagobeje Josébeje pena. Itsava pijinia Salomévēnēva. Bajarapova pijinia Santiagobeje Juanbeje pena. Bajarapova Salomévēnēva, Zebedeo pijava.

### Pacuenia Jesús petëpaenë mëthëtatsi yabara pelivaisi

(Mr 15.42-47; Lc 23.50-56; Jn 19.38-42)

<sup>57</sup> Itsa baja caniviyotsia, José, Arimatea tomarapijinë, pona nacuaeveltsinë Pilatojavabelia. Bajaraponë José bitso pexainaenë pexinaejava. José jumecovënë-taponapona Jesús Cristocuene. <sup>58</sup> Nexata José itsa pata nacuaeveltsinë Pilatojavabelia, vajëta petocopatsinexatsi pemëthëtsinexa Jesús petëpaenë. Nexata Pilato itoroba pijajivi petocopatsinexatsi. <sup>59</sup> Nexata José cruzajavavetsica pitsica Jesús petëpaenë. Mataquionae daxitanëreca matacacëba pexaniaviria piapiasábana-panata, piaxuirajibipanata. <sup>60</sup> Bajaraponë José, pamatacabi tëpa pemëthëtsinexatsi picani, iboitapajanitojavata pinijiibovaju toexanabuatatsi cajena. Nexata bajarapai-bovajulia José buata Jesús petëpaenë. Nexata bajaraxuacujinae pinijiibopanaxaneto José tixirena. Yavajuvëpaacatabuata. Nexata baja José naviata pijaboyabelia. <sup>61</sup> Bajarajota ibovaju itapajavata eecabeje anijavabeje ëMariävënëvabeje. Itsava María, Magdala tomarapijiva.

### Pacuenia vajabitsaëvi Jesús pemëthë evetavanapa yabara pelivaisi

<sup>62</sup> Pascuafiesta pejonematacabinexa pevajënaeya pamatacabi, judíovi baja banacuenevereta penacuenebijava. Nexata baja pamatacabi judíovi banacuenevereta penacuenebijava, bitso baja itsa caniviyotsia, sacerdotevi penamatacaitorobivi, fariseovi ata, ponalia Pilatojavabelia. <sup>63</sup> Nexata bajarapamonae jumaitsi Pilatojavabelia Jesús yabara:

—Pamatacabi abaxë bajaraponë asaë tsaponapona bitso najumetsënëtabiaba. Jumai tsabiabi: “Tatëpaecujinae, acueyabi matcabita, icatsia asaënë tsane,” jai tsabiabi. Bajarapejumaitsijava paxanë apo panacofënëtsinë. <sup>64</sup> Nexata nijajivi itorobare bajaraponë pemëthë xaniavaetsia pevetsinexa. Nexata nijajivi bajaraponë pemëthë xaniavaetsia evetsiana acueyabi matcabijavabelia, bajaraponë pecapaebimatacabi-javabelia. Nexata acuenebi tsane pijajivi meravi pejutsinexatsi mëthëvecua. “Namat-acota rabaja Jesús,” pejajiva ata jivijavabelia, acuenebi tsane. Itsa bajarapacuenia pijajivi jumai tsipae, nexata najumetsënëtsipa copiaya Jesús penajumetsënëtsi-ja matatoxenetsia. Nexata bajarapacuenia yamaxëitorobijitsipa jivi ayaibitsaëttoxaneto, jai bajarapamonae Pilatojavabelia.

<sup>65</sup> Pilato nexata jumaitsi bajarapamonaejavabelia:

—Mapamonae tajajivi, vajabitsaëvije, payajavaponare. Nexata paitorobare bajarapamonae Jesús pemëthë pevetsinexa xaniavaetsia, jai.

<sup>66</sup> Nexata bajarapamonae vajabitsaëvi barëponalia Jesús pemëthëjavabelia. Bajarapamonae pemaëtoupi catsataruta Jesús pebuatsiibovajutsi pevëpaacatsiibopanajumata. Itsaupi pijinia catsata iboitapajanitojavabelia. Bajarapacuenia exana peyapëtaenexa petixitsijava muetsia Jesús peyavajuvëpa acatabuatsiibopanatsi. Bajaraxuacujinae itoroba vajabitsaëvi Jesús pemëthëvëpa pevetavanapaenexa.

### Pacuenia Jesús petëpaecujinae icatsia asaë yabara pelivaisi

(Mr 16.1-8; Lc 24.1-12; Jn 20.1-10)

**28** Judíovi baja penacueravetsimatacabi itsa verevereca, meravia pitsijavata, bajayacunua, ajena matcabita tsarucaponae, María, Magdala tomarapijiva, itsaMaría yajava, taeyojopaliabeje Jesús pebuatsiibovajutsijavabelia. <sup>2</sup> Jemata ira

najëaba. Tspaji Dioso pijaängel runaica athëbëvetsica. Angel itsa pata Jesús pebuatsiibovajutsijavata, tixita Jesús peyavajuvëpa acatsiibopanaxanetomi. Bajaraxuacujinae ángel eca bajarapaibopanajumata. <sup>3</sup> Bajaraponë ángel naitayota. Pacuenia yamaxëcotia itsi, bajara cotiaitsi ángel. Penaxatatsijava niojai daxita peniojaijava matatoxenetsia. <sup>4</sup> Vajabitsaë, pamonaevetanubena Jesús pebuatsiibovajutsivëpa, itsa tane ángel, neconecojai pecajunavi. Bobenajunua bepetëpaevi. <sup>5</sup> Nexata ángel jumaiti petirivabejevavelia:

—Pëtsa pajunavamebeje. Yapëtaniji xua yabara paponamebeje. Jesús pecobematabiabarutsinëmitsi cruzajavelia, pajaitamebeje. <sup>6</sup> Ajibi raja tsarucae majotaje. Asaë rabaja icatsia pacuenia baja cajena tajëvelia jumaiti. Parenamërebeje pane-taenexabeje itsajota picani buatatsi. <sup>7</sup> Bajaraxuacujinae paliamëbeje tsane bepíjia. Pijajivijavelia patsipaebianamebeje mapacueniaje: “Petëpaenëmi rabaja icatsia asaë. Panevajënaeyavelia pina pona Galilea nacuyavelia. Baja pina jotalia pacaxitajarabianame,” pajamëbeje tsane pijajivijavelia. Bajarapalivaisiyo xainajë patacatispaebinxabeje, jai ángel bajarapovabejevavelia.

<sup>8</sup> Nexata bajarapovabeje naviatabajiravabeje Jesús pebuatsiibovajutsivecua. Junavabeje picani. Itsiata barëyabeje bitso. Cujinaetabajiravabeje petsipaebinxabeje Jesús pijajivijavelia. <sup>9</sup> Bajarapovabeje namutualia pecujinaejinaenajetarucejavevatabeje, Jesús jemata tsitanaitajëtatsibeje. Nexata bajarapovabeje kujitabaliabeje Jesúsjavavelia. Bajacobatsibeje. Nexata pematatabacabëta nucajunuabeje. Sitaicaliabeje yayataeya Jesús pecopiapitsinexabeje bajarapacuenia. <sup>10</sup> Jesús nexata jumaiti bajarapovabejevavelia:

—Pëtsa pajunavamebeje. Paliamërebeje tajajivijavelia. Pajumaitsimëbeje tsane tajajivijavelia: “Jesús raja jumaiti. Paponæremelia pina Galilea nacuyavelia. Baja pina jotalia pacacaxitajarabiana Jesús,” pajamëbeje tsane tajajivijavelia, jai Jesús.

### **Pacuenia vajabitsaëvi navajunupaeba yabara pelivaisi**

<sup>11</sup> Paepatota ëMaríavënëvabeje naviatabeje Jesús pebuatsiibovajutsijavavelia, vajabitsaëvi, Jesús pemëthë pevetsiviyajuvënëvi, pona tomaravelia. Bajarapamonæ tsipaeba sacerdotevi penamatacaitorobivijavelia pacuenia tane bajarapamonæ. <sup>12</sup> Nexata sacerdotevi penamatacaitorobivi pona judíovi pijaancianovijavelia penabarëcuaicuaijainexa penajamatabëjëpaenexa pacuenia exanaejitsia. Nexata jane baja bajarapamonæ najamatabëcuenejëpa. Nexata bajarapamonæ rajuta ayaijava palata vajabitsaëvijavelia. <sup>13</sup> Bajarapamonæ jumaiti vajabitsaëvijavelia:

—Jivijavelia pajumaitsimë tsane: “Meravi pataitamajitsita, Jesús pijajivi pata. Nexata bajarapamonæ juta Jesús petëpaenë,” pajamë tsane. <sup>14</sup> Nexata nacuaevetsinë Pilato itsa jumetaena mapajumeje, paxanë itsiata pacayavenonæ natsi itsacuenepapecaexanaeyaniva, jai bajarapamonæ vajabitsaëvijavelia.

<sup>15</sup> Nexata vajabitsaëvi jejai. Nota bajarapalata. Nexata jane baja vajabitsaëvi pona najumetsënëtsiaya jivijavelia pejumaitsinexa pacuenia itorobatsi. Nexata vajabitsaëvi najumetsënëtsiaya jumai tsaponæ jivijavelia:

—Meravi pataitamajitsita, Jesús pijajivi pata. Nexata Jesús pijajivi petëpaenë jutatsi, jai tsaponæ jivijavelia.

Bajarapacuenia vajabitsaëvi pepaebixæ, judíovi juya bajarapacuenia natsipaebapona. Nexata mapamatacabijavaberena ataje judíovi jumai tsabiabi:

—Jesús pijajivi petëpaenë jutatsi, jai tsabiabi.

**Pacuenia Jesús petëpaecujinae icatsia itsa asaë, pijajivi itoroba pejumelivaisi jivi petotsipaebanajetarubenaenexatsi daxitanacuanëjava yabara pelivaisi**

*(Mr 16.14-18; Lc 24.36-49; Jn 20.19-23)*

<sup>16</sup> Jesús pijajivi once ponëbeje pona Galilea nacuyabelia. Jesús pijajivi pona pet-  
sutojumabelia, patsutojumatalia Jesús caxitajarabiapaebatsi. <sup>17</sup> Nexata bajarapatsuo-  
tojumata Jesús pijajivi itsa taenuta Jesús, yaiyataeya pitabarata pematabacabëta  
tonubena. Itsiata itsamonae Jesús pijajiviyajuvënëvi jamatabëcuenenavëxaniabiaya  
jamatabëjumaitsi:

—Apo Jesús meta, jamatabëjai.

<sup>18</sup> Nexata Jesús pijajivi kujirena. Jumaitsi pijajivijavabelia:

—Dioso baja cajena nevetsiaexana daxitacuene athëbëtatsia, daxita mapanacua-  
java ataje, taevetsinexa. <sup>19</sup> Nexata pacaitorobatsi. Paponare daxitanacuanëjava dax-  
itanacuanëpijivi tajumelivaisi patanetotsipaebinexamë tanejumecovënëtsinexa. Ba-  
jarapamonae pabautisabaponaename taxa pevënëta, xanë ata pexënatonë tavënëta,  
Espíritu Santo ata pevënëta. <sup>20</sup> Bajarapamonae patsipaebaponaename pejumecov-  
ënëtavanapaenexa daxita pacuenia pacaitorobatsi. Pëtsa panacofënëtame daxi-  
tamatacabi patacayajavaponaponaajava. Nacua pevereverecaejavabelianexa ata  
pacayajavaponaponaenatsi, jai Jesús pijajivijavabelia.

## Pexanialivaisi Jesucristo pelivaisi, San Marcos peyaquinaelivaisi

### Pacuenia Juan jivibautisabinë jivi livaisi tsipaeba petusato nacuata yabara pelivaisi

(Mt 3.1-12; Lc 3.1-9, 15-17; Jn 1.19-25)

**1** Mara pacuenia taxuxuaba pexanialivaisi, Jesucristo Dioso pexënato pelivaisije. <sup>2</sup> Bajayata Diosojumepaebinëmi, profeta Isafaspijinë, tajëvelia yaquina Dioso pejumaitisijava pexënatojavabelia. Dioso jumaitsi pexënatojavabelia mapacueniaje: Itorobianajë nevajënaeyabelia tanejumelivaisipaebinënexa. Catsivajënaexanebijitsia nijanamuto. <sup>3</sup> Nexata tanejumelivaisipaebinë vavajai tsane petusato nacuata. Jumaitsi tsane jivijavabelia: “Jivi baxaneba panamutoverena najetaruaejitsia petuxanenë. Batoroviaexanua namuto. Bajara pijinia pacuenia paxamë ata panajamatabëcuenexaniavaere pepo petuxanenë pepatsivajënaeya paxamëjavaberena,” jai tsane tanejumelivaisipaebinë xamë yabara, jai bajayata tajëvelia Dioso pexënatojavabelia pejumaitisijava Juan jivibautisabinë jivijavabelia Dioso pejumelivaisi petsipaebanajetaruaejavanexa yabara.

<sup>4</sup> Bajaraxuata nexata Juan jivibautisabinë Dioso pejumelivaisipaebinë najetaruca petusato nacujava Jesús pevajënaeya. Juan jivijavabelia jumai tsaponae mapacueniaje:

—Pacopabare pibisiacuene paneexanabiabijava. Panajamatabëcuenepënëyorore Diosojavabelia. Bajaraxuacujinae pacabautisabianatsi. Nexata Dioso pacavecuajibiaexanaena panijaneconimi, jai tsaponae Juan jivijavabelia.

<sup>5</sup> Nexata ayailbitsaëttoxaneto Judea nacuapijivi, Jerusalén tomarapijivinia, muxunaponabiabatsi Juan petsipaebilivaisi penamuxunaevetabibinexatsi. Nexata bajarapamonae pibisiacuene pexanaejavami, rovia Diosojavabelia navecuapaeabapona. Bajaraxuacujinae Juan bautisabapona bajarapamonae Jordán meneta.

<sup>6</sup> Juan naxatata camellonata pexanaejava. Naepacëta cuerobocoto. Pexaejava ëbosese, jabëra yajava. <sup>7</sup> Juan Jesús pelivaisi jivi tsipaebapona. Jumai tsaponae tajëvelia Jesús yabara:

—Tacovëverena patsiana itsanë. Bajaraponë daxitacuene pexanaenexa pecaëjëpaenëtsi tsane. Xanë raja saya beveliajamatabëcuenenënë bajaraponëvecua. Nexata vecuaauranë bajaraponë bepijajivitonënë tanataenexa. Nexata auranë pijazapato ata tataxujonotsinexa. <sup>8</sup> Xanë raja saya pacabautisabatsi merata. Ponë rajane xanëcujinae patsiana, bajaraponë pacatsijamatabëjoneyaexanaponaena Espiritu Santo, jai tsaponae Juan jivijavabelia Jesús yabara tajëvelia pevajunupaebijavata Jesús penajetaruaejavanexa.

### Pacuenia Juan bautisaba Jesús yabara pelivaisi

(Mt 3.13-17; Lc 3.21-22)

<sup>9</sup> Jesús najetaruca Nazaret tomaraverena, Galilea nacuata peecaetomaraverena. Nexata Juan bautisaba Jesús Jordán meneta. <sup>10</sup> Jesús pebautisabicujinaetsi men-evetsina penonotajunaejavata, tane itaboxo penapatsijava. Bajarajota Jesús tane Espiritu Santo ata perunaejavatsica pematatsënëatsica beucucuto. <sup>11</sup> Jesús jumeta-

nenua athëbëvetsica Dioso pejumlahitsijavatsi: “Xamë raja taxënatomë, bitso tacaasi-  
vanë. Bitso casivajamatabëcuenebarëyatsi,” pejaijavatsi.

**Pacuenia Jesús jamatabëcueneëjëbatsi dovathi yabara pelivaisi**

*(Mt 4.1-11; Lc 4.1-13)*

<sup>12</sup> Jesús Juan pebautisabicujinaetsi, bepijiayo Espíritu Santo ponaeyaexanatsi pe-  
tusato nacuayabelia. <sup>13</sup> Bajarajotalia daxitacueneviria unupijivi jinavanapa. Nex-  
ata bajarajota Jesús ponapona, caenë, cuarenta pamatacabibeje. Bajarapamatacabi-  
anëta dovathi picani Jesús jamatabëcueneëjëbatsi pibisiacuene pexanaenexa. Ba-  
jaraxuacujinae ángelevi runaica Jesús peyavenonaenexatsi.

**Pacuenia Jesús Galilea nacuata taxuxuaba**

**Dioso pitorobilivaisi jivi petsipaebijava yabara pelivaisi**

*(Mt 12.12-17; Lc 4.14-15)*

<sup>14</sup> Juan penaneconitsiaexanaenexatsi vajabitsaë vaetabatsi. Nexata penaneconit-  
sivi pejebabiabibota Juan naneconitsiaponapona. Nexata abaxë Juan penaneconit-  
sivi pejebabiabibota itsa ponapona, Jesús najetaruca Galilea nacujavaberena. Jesús  
jivi tsipaebaponarena pexanialivaisi. Tsipaebaponarena daxita Dioso pijajivi pevet-  
sijavanexa. <sup>15</sup> Jesús jumai tsaponae jivijavabelia mapacueniaje:

—Imoxoyo rabaja pevajënae pecopiapatsinexa Dioso papecaevetsimatacabinexa.  
Nexata pacopabare pibisiacuene paneexanabiabijava. Panajamatabëcuenepeñëy-  
orore Diosojavabelia. Pajumecovënëre mapapexanialivaisije papecacapanepeliv-  
aisinexa, jai tsaponae Jesús jivijavabelia.

**Pacuenia Jesús junata cuatro ponëbeje**

**dujuai peyamatajucabiabivi yabara pelivaisi**

*(Mt 4.18-22; Lc 5.1-11)*

<sup>16</sup> Jesús najetaruca Galilea pucaxaneto itapaya. Nexata Galileapuca itapata  
Jesús taenuta anijanëbeje nacaebananëbeje, Simónbeje Andrésbeje. Bajaraponëbeje  
daxitamatacabi canacujitsia dujuai yamatajucabiabibeje. <sup>17</sup> Nexata Jesús jumaitsi  
bajaraponëbejejavabelia:

—Naxanitsia. Panepënaponarebeje. Nexata pacacujarubianatsibeje jivi paneju-  
caenexabeje. Pacuenia dujuai payamatajucabiabamebeje, bajarapacuenia jivi paju-  
caenamebeje Dioso pijajivinexa, jai Jesús bajaraponëbejejavabelia.

<sup>18</sup> Nexata bajaraponëbeje dujuai peyamatajucabiabijavamibeje bajarajota  
puenetabuatabeje. Nexata baja naponabeje Jesús pepëta.

<sup>19</sup> Nexata icatsia bebeliayo pevajënaeyabelia Jesús barëpona. Icatsia Jesús taenuta  
anijanëbeje Santiagobeje Juanbeje, Zebedeo pexënatobeje. Bajaraponëbeje pijajer-  
aënëta xanebanucabeje dujuai peyamatajucaejavabeje. <sup>20</sup> Nexata icatsia Jesús ju-  
nata bajaraponëbeje ata. Nexata bajaraponëbeje bajarajota jerata puenetanutabeje  
paxa Zebedeo jane baja. Nexata Zebedeo, pijajivi yajava, nacopatanuca bajarajota.  
Nexata baja Santiagobeje Juanbeje naponabeje Jesús pepëta.

**Pacuenia pebi dovathi peyajavaponaponaenë  
Jesús jamatejemayaexana yabara pelivaisi**

*(Lc 4.31-37)*

<sup>21</sup> Nexata Jesús, pijajivi yajava, pata Capernaum tomarabelia. Judíovi penacuer-  
aevetsimatacabita Jesús joneya judíovi penacaetuatabibiboyalia. Nexata bajarajota  
Jesús jivi livaisi tsipaeba. <sup>22</sup> Nexata Jesús pejumetaevitsi jamatabëcuenenabenajaca  
Jesús petsipaebilivaisi yabara. Bajarapamonae jamatabëcuenenabenajaca tsipaji xa-  
niavaetsia Jesús tsipaeba Dioso pitorobinëtsicuenia. Apo tsipaebi pacuenia judíovi  
pecujarubivi tsipaebabiaba. <sup>23</sup> Bajarajota pebi dovathi peyajavaponaponaenë naeca.  
Nexata bajaraponë Jesúsjavabelia vavajai tsaxuabi. Jumaitsi:

<sup>24</sup> —¡Jesús, Nazaret tomarapijinëmë, panevecuaponare baja! ¿Detsa xua pane-  
exanaejitsiamë? ¿Najetarucame tsaja pataneveretsinexamë? Xanë cajena cayapë-  
tanetsi. Xamë raja Dioso pexënatomë, pepo pexaniajamatabëcuenenëmë, jai dovathi  
peyajavaponaponaenë Jesúsjavabelia.

<sup>25</sup> Jesús nexata jumeitaveta dovathi. Jumaitsi:

—¡Moyamëre! ¡Vecuapitsapare baja maponëje! jai Jesús.

<sup>26</sup> Nexata dovathi pebi pinijicuenia devacaibiaexanatsi. Dovathi vavajai pinijicue-  
nia. Nexata baja dovathi pitsatabijirava jivitonëvecua. <sup>27</sup> Nexata daxitajivi bajara-  
pacuene itsa tane, bitso jamatabëcuenenabenajaca. Najumaitsi bajarapamonae:

—¿Detsa mapitsicuenije? ¿Detsa mapitsipejanacujarubicuenije? ¡Maponëje  
Jesús, beDioso pitorobinëtsitsica! ¡Dovathi ata jumecovënëtsi! ¡Nexata Jesús  
pitavetsixae dovathi, pebi baja vecuapitsapatsi! najai bajarapamonae.

<sup>28</sup> Nexata daxita Galilea nacuapijivi bepíjia Jesús vënëlivaisitanetsi Dioso pesaëta  
pinijicuenie pexanaponaejava.

**Pacuenia Simón Pedro pijava pena Jesús  
tojamatejemayaexana yabara pelivaisi**

*(Mt 8.14-15; Lc 4.38-39)*

<sup>29</sup> Jesús baja pitsapa judíovi penacaetuatabibibovecua. Nexata Santiagobeje  
Juanbeje Jesús yajavapona. Jesúsbana naponna Simónbeje Andrésbeje pijaboyabelia.

<sup>30</sup> Nexata Simón pijabota Simón pijava pena Jesúsbana pevajënae romaebanucatsi  
camata. Nexata itsamonae bepíjia Jesús tsipaebarecëpatsi bajarapova peromae-  
banucaejavatsi. <sup>31</sup> Nexata Jesús imoxoyotabilia peromaebanucaevatsi. Cobeyotsi-  
aya matacota. Nexata bajarajota peromaebanucaevatsi vecuaajibi tsanajetsitsireca  
baja domae. Nexata bajarapova Jesúsbana pexaejava toexanatsi.

**Pacuenia ayaibitsaëto jivi piavitanevi Jesús  
jamatejemayaexana yabara pelivaisi**

*(Mt 8.16-17; Lc 4.40-41)*

<sup>32</sup> Itsa baja ajena meravitsia, Jesúsjavaberena tocapatatsi daxita piavitanevi. Toca-  
patatsinua dovathi peyajavajinavanapaevinua. <sup>33</sup> Daxita tomarapijivi Jesús pepatsi-  
bota baupajavaberena nacaetuata. <sup>34</sup> Nexata Jesús jamatejemayaexana ayaibitsaëto  
daxitacuenevitane pexinaevimi. Vecuacapsapanua dovathi peyajavajinavana-  
paevi. Jesús apo tocopatsi dovathi pecuaicuaijainexa jivijavabelia pevajunupae-  
biyanivatsi. Tsipaji dovathi xaniavaetsia Jesús yapëtanetsi Dioso pexënatocuene.



**Pacuenia Dioso pitorobilivaisi Jesús jivi  
tsipaeba Galilea nacuata yabara pelivaisi**

(Lc 4.42-44)

<sup>35</sup> Pepo bajayacunua, abaxë itsa apo napebetsi maticabi, Jesús naëcota. Nexata pitsapalia bovecua. Pesaicaeyojavabelia pona pevajëtsinexa Diosojavabelia. Jesús nexata pecovëta maticabi baja. <sup>36</sup> Itsa baja maticabi, Simónbana Jesús pëjaitapon-alia. <sup>37</sup> Itsa baja bajarapamonae Jesús caxitajaraba, jumaitsi bajarapamonae:

—Daxita raja cajaitaruta pecataenexa, jai bajarapamonae Jesúsjavabelia.

<sup>38</sup> Nexata Jesús jumaitsi:

—Ponatsi baja imoxoyo penaetomaraxijavabelia bajarajotalia tatsipaebinexa Dioso pitorobilivaisi. Bajaraxuanexa bovecua pitsaparenajë, jai Jesús.

<sup>39</sup> Nexata daxita Galilea nacujava Jesús jivi tsipaebaona Dioso pitorobilivaisi judíovi penacaetuatabibonëjava. Jesús jivi dovathi vecuacapitsapaponanua.

**Pacuenia Jesús jamatejemayaexana bajayajebi  
bitso peperabëtsabanaenë yabara pelivaisi**

(Mt 8.1-4; Lc 5.12-16)

<sup>40</sup> Jesús imoxoyorenatsi bajayajebi bitso peperabëtsabanaenë. Nexata bajaraponë pematabacabëta nucajunua Jesús pitabarata. Bajaraponë pinijicuenia vajëta Jesúsjavabelia. Jumaitsi:

—Cacaëjëpa tanejamatejemayaexanaenexamë. Itsa jitsipame, nejamatejemayaexanare mapavitanevecuaje, jai peperabëtsabanaenë Jesúsjavabelia.

<sup>41</sup> Nexata Jesús bajaraponë itaxutobejiobiatane. Pecobeta perabëjayalia. Jumaitsi:

—Jājā, jitsipajë cajena. Jamatejemamë rabaja, jai Jesús peperabëtsabanaenëjavabelia.

<sup>42</sup> Bajarapacuenia Jesús pejumaitsijavata peperabëtsabanaenëmi baja perabëxanepananajereca. Jamatejema baja. Peperabëtsabanaejavami baja ajibi. <sup>43</sup> Nexata baja Jesús naviatsiaexana bajaraponë. Pinijicuenia Jesús muxujioba bajaraponë penaviatsivajënaeya. Jesús jumaitsi:

<sup>44</sup> —Nejumetaema. Pëtsa itsajivijavabelia tsipaebame tacajamatejemayaexanaejava. Naitajëremelia jane sacerdotenëjavabelia templobota penacuenëbinëjavabelia. Nexata sacerdotenë cataena pecavecuajibijava baja niavitanejavami. Diosonexa rajuremelia ofrenda sacerdotenëjavabelia pecavecuajibiaexanaexae niavitanejavami. Bajara tsipaji pacuenia bajayata vajasalinainëmi Moiséspijinë nacaitoroba. Nexata jivi yapëtaena pepacuenë baja pecavecuajibijava niavitanejavami, jai picani Jesús bajayajebi bitso peperabëtsabanaenëmijavabelia.

<sup>45</sup> Nexata bajaraponë lia. Itsiata tsipaebanajetaruca daxitajivijavabelia Jesús pejamatejemayaexanaejavatsi. Bajaraxuata Jesús apo jitsipae naitajëtsiaya pejonejava itsatomarabelia ata, jivi ayaibitsaëtoxaneto pematatoyoronaeyanivatsi. Jesús saya ponapona tomanë piajibijava. Itsiata cajena daxita nacuanëjavaverena jivi muxu-  
napatababatsi Jesús.

## Pacuenia Jesús jamatejemayaexana petabusipacuenabinëtsi yabara pelivaisi

(Mt 9.1-8; Lc 5.17-26)

**2** Itsamatacabi icatsia Jesús naviarena Capernaum tomaraberena. Nexata jivi yapëtane pabota Jesús patajopa. <sup>2</sup>Nexata jivibitsaëtoxaneto nacaetuata Jesús pepatsibota. Bo baupa ata cajena bitso jivi vënëca. Nexata bajarapamonaeejavabelia Jesús tsipaeba Dioso pitorobilivaisi. <sup>3</sup>Nexata cuatro ponëbeje parena, camayota peyavëtaranajetarubenaevi petabusipacuenebinëtsi. <sup>4</sup>Nexata petabusipacuenabinëtsi acuenebi bajarapamonaee pecapatsijava Jesús pitabarayabelia. Tsi-paji bo ënëtuatuajë bitso jivi yavënëca. Nexata petabusipacuenabinëtsi pecapatsivi, bomatatu javavetsica vojoexana Jesús pecanacujitsiatsica. Nexata bajarapavoju-tatsica camayota yacopatsica petabusipacuenebinëtsi. <sup>5</sup>Jesús jamatabëcueneyapëtane pacuenia bajarapamonaee sivanajamatabëxainatsi. “Nacatojamatejemayaexanaenatsi cajena,” pesivajamatabëjaijavatsi Jesús jamatabëcueneyapëtane. Bajaraxuata petabusipacuenebinëtsijavabelia Jesús jumaitsi mapacueniaje:

—Tajabananë, pibisiacuene rabaja nexanaeconimi cavecuaajibiaexanatsi, jai Jesús.

<sup>6</sup>Bajarajota judíovi pecujarubiviyajuvënëvi naena. Bajarapamonaee itsa jumetaeyena bajarapacuenia Jesús pejumaitsijava, nexata jamatabëcuenenavëxaniabiaya bëpënëa jamatabëjumai tsenae mapacueniaje:

<sup>7</sup>—Maponëje Jesús Dioso apo pejisipacuenia cuaicuajiai. Itsanë ata cajena apo caëjëpaetsi itsajivi pibisiacuene pexanaeconimi pevecuaajibiaexanaenexa. Caenë Dioso caëjëpatsi pevecuaajibiaexanaenexa bajarapacueni, jamatabëjai tsenae bajarapamonaee.

<sup>8</sup>Jesús jamatabëcueneyapëtane bajarapamonaee jamatabëcuenenavëxaniabiaya bajarapacuenia pesivanajamatabëxainaejavatsi. Nexata Jesús jumaitsi bajarapamonaeejavabelia:

—Pëtsa bajarapacuenia panesivanajamatabëxainame. Tsi-paji cajena xanë necaëjëpa jivi pibisiacuene pexanaeconimi tavecuaajibiaexanaenexa.

<sup>9</sup>Paxamë apo pacacaëjëpae ata itsajivi pibisiacuene pexanaeconimi pan-vecuaajibiaexanaenexa, pacacaëjëpa picani saya jema panejumaitsinexa petabusipacuenebinëtsijavabelia mapacueniaje: “Cavecuaajibiaexanatsi rabaja pibisiacuene nexanaeconimi,” panejainexa. Tsi-paji itsajivi ata apo yapëtae tsipae saya jema panejumaitsijava. Itsiata baitsi jane itsa apo pacacaëjëpae panejamatejemayaexanaenexa petabusipacuenebinëtsi, acuenebi panejumaitsinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tsi-paji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacaëjëpaeacueni panejamatejemayaexanaenexa, jai nexata Jesús judíovi pecujarubivijavabelia.

<sup>10</sup>Icatsia Jesús jumaitsi bajarapamonaeejavabelia:

—Xanë, Daxitajivi Pematapijinënë, mapanacuata necaëjëpa tavecuaajibiaexanaenexa itsajivi pibisiacuene pexanaeconimi ata pacuenia baja exanajë maponëjavabeliaje. Nexata patanecueneyapëtaenexamë tanecaëjëpaeacueni tavecuaajibiaexanaenexa itsajivi pibisiacuene pexanaeconimi ata, pataema pacuenia jamatejemayaexanaejitsianë maponëjë, jai Jesús judíovi pecujarubivijavabelia.

Nexata icatsia Jesús jumaitsi petabusipacuenebinëtsijavabelia:

<sup>11</sup>—Xamë cajumaitsitsi. Nonotapunare. Nijacamayo pire. Nijaboyabelia baja ponare, jai Jesús.

<sup>12</sup>Nexata bajarapacuenia Jesús pejumaitsijavata petabusipacuenebinëmitsi nonotapuna. Pebocaecamayo baja pita. Pitsapalia baja daxitajivi pitabarata. Nexata daxitajivi itsa tane bajarapacueni, jamatabëcuenenabenajaquena. Bajarapamonae jumai tsenae mapacueniaje:

—Dioso cajena bitso ayaijamatabëcuenenë. Caeto ata abaxë mapitsicueni pexanaejava apo taetsije, jai tsenae bajarapamonae.

**Pacuenia Jesús pijajivitonënexa junata Levívënënë yabara pelivaisi**

*(Mt 9.9-13; Lc 5.27-32)*

<sup>13</sup>Jesús pona pucaxaneto itapajavabelia. Nexata jivi ayaibitsaëtoxaneto pënapatatsi bajarabelia. Nexata Dioso pejumelivaisi Jesús tsipaeba bajarapamonaejavabelia. <sup>14</sup>Bajaraxuacujinae penajetarucaejavata Jesús taeyeta Levívënënë, Alfeo pexë nato. Leví eca pabota gobierno pejamatabëcueni jivijavabelia matamoyanijobabiaba impuestomatamo. Nexata Jesús jumaitsi Levíjavabelia:

—Leví, naxanitsia. Nepënaponare, jai Jesús.

Jejai Leví. Nexata nonotapuna. Leví baja napona Jesús pepëta.

<sup>15</sup>Nexata Leví junata Jesús pebarënanabinexa pijabota. Nexata Leví pijabota Jesús pexaejava naxane. Leví pijabota ayaibitsaëto naena gobierno pejamatabëcueni jivijavabelia impuestomatamo pematamoyanijobabiabivi. Itsamonae ata nanabane piagamatabëcuenibejevi. Nexata Jesús pijajivi nabarëca bajarapamonaejavata. <sup>16</sup>Nexata fariseovi, judíovi pecujarubivina, Jesús taeyetatsi daxita bajarapamonaejavata pijajivi penabarënanaceajava. Nexata bajarapamonae jamatabëcuenenavëxaniabiaya jumaitsi Jesús pijajivijavabelia:

—Papecacujarubinë Jesús naneconita Diosojavabelia. Tsipaji gobierno pejamatabëcueneta impuestomatamo pematamoyanijobabiabivijavata, piagamatabëcuenibejevijavatanua, naxaeyeca pexaejava, jai bajarapamonae Jesús pijajivijavabelia.

<sup>17</sup>Itsa Jesús jumetane mapajumeje, nexata jumaitsi bajarapamonaejavabelia:

—Pevaëbinë raja apo vaëbi pejamatejemavi. Pevaëbinë raja piavitanevi vaëba. Bajara pijinia xanë ata itsinë. Apo sivapatajopaenë tajunatsinexa pamonae baja aneconijibi tsavanapae. Sivapatajopajë raja tajunatsinexa pijaneconi pexainaevi. Bajarapamonae junataponajë pecopabinexa pibisiacueni pexanaejava penajamatabëcuenepënyorotsinexa Diosojavabelia, jai Jesús bajarapamonaejavabelia.

**Pacuenia Jesús yanijobatsi pamatacabibeje jivi vajëta pona Diosojavabelia pexaejava apo pexaeyabiabixae yabara pelivaisi**

*(Mt 9.14-17; Lc 5.33-39)*

<sup>18</sup>Itsamatacabi Juan pijajivi, fariseovi pijajivina, pexaejava apo xaevanapae pamatacabibeje Diosojavabelia vajëcapona. Nexata itsamonae Jesúsjavaberena pata. Yanijobatsi pexaejava piatsobicueni yabara. Jumaitsi mapacueniaje:

—Juan pijajivi, fariseovi pijajivina, pexaejava apo xaeabiabi pamatacabibeje Diosojavabelia vajëta pona. ¿Detsa xuajitsia itsiata xamë nijajivi pexaejava xaeabiaba pamatacabibeje Diosojavabelia vajëta pona? jai Jesús peyanijobivitsi.

<sup>19</sup>Nexata Jesús jumaitsi bajarapamonaejavabelia:

—Pamonae junatatsi penacasabifiestajavabelia penanabaninexa, apo atsohi pexaejava itsa abaxë yajavaecatsi pejananacasabinë. Itsa abaxë pejananacasabinë yajavaponaponatsi, acuenebi pexaejava piatsobinexa bajarapamonae. <sup>20</sup> Itsiata baitsi jane itsa pejananacasabinë tsmaxëpatsipatsi pevecuacaponanexatsi itsajavabelia, nexata bajarapamonae pexaejava apo xae tsipae. Tsipaji bitso najamatabëxainaejitsipa pevecuacaponaeaxetsi. Bajara pijinia itsi tajajivi ata. Tayajavapononaepato abaxë apo atsobabiabi pexaejava pamatacabibeje Diosojavabelia vajëtafona. Itsiata pamatacabi xanë necaponae bajara-pamonaevecua, nexata jane baja bajara-pamatacabi pexaejava apo xae tsane bitso tanesivanajamatabëxainaeaxae, jai Jesús peyanijobivitsijavabelia.

<sup>21</sup> Nexata bajarapamonae perujamatabëcuene baja pecopabinexa, Jesús livaisi tsipaeba comparacióncuenia bajarapamonae pejumecovënëtsinexa ëpejanalivaisi, Jesús petsipaebilivaisi. Bajarapamonae anijamatabëcuenebeje pexainaeayaniva perujamatabëcuene baja pecopabinexa, Jesús livaisi tsipaeba comparacióncuenia. Perujamatabëcuene yabara Jesús jumaitsi bajarapamonaejavabelia mapacueniaje:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapana yanarobotsipa perujuesetojavaverena. Nexata biji bitso pinijivojoto titinaejitsipa. <sup>22</sup> Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae. Tsipaji pejanavinoranë pejumalitsëxë abaxë xaina. Nexata itsa yatititibia tsipae, mene naxuabijitsipa, vinoranëmi. Bajaraxuata bepaca pejanavinoranë pejanabocodoruanëjavabelia, jai Jesús peyanijobivitsijavabelia bajarapamonae pejumecovënëtsinexa ëpejanalivaisi, Jesús petsipaebilivaisi, perujamatabëcuene baja penacopabinexa.

**Pacuenia Jesús pijajivi namutua siricanajetarubena  
trigoxu penacueraevetsimatacabita yabara pelivaisi**

*(Mt 12.1-8; Lc 6.1-5)*

<sup>23</sup> Judíovi penacueraevetsimatacabita Jesús, pijajivi yajava, najetaruca namutua trigo pabianëjava. Nexata Jesús pijajivi pijaanaxae, trigoxu siricanajetarubena. Xuxaejabatapona. <sup>24</sup> Nexata fariseovi jumaitsi Jesúsjavabelia:

—¡Taema mapacuenije! Dioso Moiséspijinëta penajumecopatsilivaisita vajanaçaitavetsicuene, nijajivi exana. Apo naçaitavetsi ata trigoxu vajaxaejava, itsiata ajena penacueraevetsimatacabixae, nijajivi apo bexanae mapacuenije, jai fariseovi Jesúsjavabelia.

<sup>25</sup> Nexata Jesús jumaitsi fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tsipaji bitso piäjani. ¿Apo palebimë tsipaji Dioso pejumelivaisibaxuto paneyapëtaenexa pacuenia vajasalinainëmi Davidpijinë, pebarëponaponaevi yajava, exana pamatacabi bitso piäjani? <sup>26</sup> Davidpijinë joneya Dioso pijatemployalia pamatacabi Abiatarpijinë daxita sacerdotevi penamataçaitorobinë tsaponapona. Nexata Dioso pijatemploënetä, mesajumata, bobena Diosonexa ofrendacuenia petojebipanbëanë. Bajarapapanbëanë itsajivi ata apo tocopatsitsi pexaenexa penaneconitsiyanima Diosojavabelia. Ësacerdotevi picani tocopatsi pex-

aenexa. Davidpijinē apo sacerdotenē ata, xae ata bajarapapanbēanē pijajivi barē, itsiata apo vėnananeconitsi Diosojavabelia, jai Jesús fariseovijavabelia.

<sup>27</sup> Icatsia Jesús jumaitsi fariseovijavabelia:

—Dioso raja tocopata caematacabi jivi penacueraevetsinexa. Tsipaji Dioso yapėtane pacuenia jivi namatavenona penacueraevetsinexa. Dioso apo exanae jivi saya jema peyayataenexa penacueraevetsimatacabianē. <sup>28</sup> Nexata xanē, Daxitajivi Pematapijinēnē, netoxanepana cajena tatsipaebinexa pacuene xanepana jivi pexanaenexa penacueraevetsimatacabita ata, jai Jesús fariseovijavabelia.

**Pacuenia Jesús jamatejemayaexana pebi pecobetsaquenaenē yabara pelivaisi**

(Mt 12.9-14; Lc 6.6-11)

**3** Penacueraevetsimatacabita Jesús joneya judıovi penacatuatabiboyalia. <sup>1</sup> Nexata bajarajota pebi naeca pecobetsaquenaenē. <sup>2</sup> Nexata Jesús naitaxuto-caevetatsi fariseovi petaenexatsi pecobetsaquenaenē pejamatejemayaexanaejava penacueraevetsimatacabita. Nexata Jesús pecobetsaquenaenē itsa jamatejemayaexana penacueraevetsimatacabita, “Jesús raja naneconita Diosojavabelia. Tsipaji penacueraevetsimatacabita nacueneba,” pejainexa bajarapamonae. <sup>3</sup> Nexata Jesús jumaitsi pecobetsaquenaenējavabelia:

—Nonotapunare. Nucare mapamonae pitabarataje, jai.

<sup>4</sup> Nexata Jesús jumaitsi fariseovijavabelia:

—Penacueraevetsimatacabita ata xanepana vajaexanaenexa pexaniacuene. Xanepana vajajamatejemayaexanaenexa piavitanevi, jai Jesús fariseovijavabelia.

Nexata fariseovi Jesús apo jumepitsitsi. <sup>5</sup> Nexata Jesús anaeya naėcota bajarapamonae. Bajaraxuacujinae Jesús bejamatabėjıobireca. Tsipaji yapėtane piajamatabėcuenetajajava fariseovi. Nexata Jesús jumaitsi pecobetsaquenaenējavabelia:

—Namaxėrovire, jai.

Nexata pecobetsaquenaenē namaxėrovita. Bajarajota cobexanepananajereca baja. Pecobetsaquenaejavami ajibi. <sup>6</sup> Nexata fariseovi itsa tane Jesús pecobexanepanaeyaexanaejava pecobetsaquenaenē, fariseovi anaepana. Nexata bajarapabovecua pitsapa. Pona penabarėcuaicuaijainexa nacuaeveťsinē Herodes pijajivijavabelia. Bajarapamonae najumejaita Jesús pebeyaxuabinexatsi.

**Pacuenia jivi nacaetuata Galilea pucaxaneto itapata yabara pelivaisi**

<sup>7</sup> Jesús, pijajivi yajava, pona Galilea pucaxaneto itapayabelia. Nexata Jesús pėnaponaliatsi ayaibitsaėtohaneto Galilea nacuapijivi. <sup>8</sup> Nexata Jesús pėnaponaliatsi Judea nacuapijivinua, Jerusalėn tomarapijivinua, Idumea nacuapijivinua, Jordánmene itsapanaverenapijivinua, imoxoyo Tiro tomaravecua pejinavanapaevinua, imoxoyo Sidón tomaravecua pejinavanapaevinua. Daxita bajarapamonae Jesús pėnaponaliatsi tsipaji Jesús vėnėlivaisitanetsi Dioso pesaėta pinijicuene pexanaponaejava. <sup>9</sup> Nexata Jesús pijajivi itoroba jera petoxaniavaetarutsinexatsi menetareca. Itsa bajarapajivibitsaėtohaneto Jesús bitso matacėnėnaponatsi, nexata bajarapamoėnėabereca Jesús perunaenexareca. <sup>10</sup> Jesús baja ayaibitsaėto piavitanevi jamatejemayaexana. Bajaraxuata itsamonae, piavitanevi, Jesúsjavabelia natorotaponabiaba pejayatsinexatsi.

<sup>11</sup> Dovathi peyajavajinavanapaevi Jesús itsa taeyabiabatsi, bajarapamonae irata othopabiaba Jesús pitabarata. Bajarapamonae aėjai tsabiabi.

—Xamë tsaena Dioso pexënatomë, jai tsabiabi dovathi peyajavajinavanapaevi.

<sup>12</sup>Nexata Jesús jumeitaveta bajarapamonae. Jumaitsi:

—“Dioso raja pexënato,” pajamë pëtsa xanë yabara itsajivijavabelia, jai Jesús bajarapamonaejavabelia.

**Pacuenia Jesús pijajivi ayaibitsaëtoخانetoyajuvënëvi itapeta  
saya doce ponëbeje apóstolevinexa yabara pelivaisi**

*(Mt 10.1-4; Lc 6.12-16)*

<sup>13</sup>Jesús pijajivi ayaibitsaëtoخانetoyajuvënëvi, doce saya ponëbeje, itapeta apóstolevinexa. Jesús pitapetsivajënae apóstolevinexa, junaya petsutojumabetsia. Bajaravetsica Jesús junatanuca ponëbeje jamatabëitapeta apóstolevinexa. Nexata pamonaev Jesús itapeta apóstolevinexa, junaya petsutojumabetsia, Jesúsjavabetsia. <sup>14</sup>Nexata Jesús caetuata caebitsaëtoخانo, doce ponëbeje pijajivi, pepënajinavanapaevinexatsi. Jesús itorobijitsianua bajarapamonae daxitanacuanëjava jivi petsipaebanajetarubenaenexa Dioso pitorobilivaisi. <sup>15</sup>Jesús pijajivi jamatabëcuenecaëjëpaeyaexana Dioso pesaëta pejamatejemayaexanaponaenexa pivitanevi. Jamatabëcuenecaëjëpaeyaexananua Dioso pesaëta dovathi jivi pevecuacapitsapaponaenexa. <sup>16</sup>Jesús pijaapóstolevi, doce ponëbeje, mapevënëanëje. Copiaya ponë pevënë Simón. Bjaraponë Jesús vënëruba itsavënë, Pedro. <sup>17</sup>Itsanë Santiago. Itsanë Juan. Santiagobeje Juanbeje nacaebananëbeje, Zebedeo pexënatobeje. Bjaraponëbeje Jesús vënëruba Boanerges. “Boanerges,” itsa jai, bajarapamonae pijajumeta mapajumetaje pejumaitisijume: “Yamaxë pexënatobeje,” pejaijume. <sup>18</sup>Itsanë pevënë Andrés. Itsanë Felipe. Itsanë Bartolomé. Itsanë Mateo. Itsanë Tomás. Itsanë Santiago, Alfeo pexënato. Itsanë Tadeo. Itsanë Simón, celotenë. <sup>19</sup>Itsanë Judas Iscariote. Bjaraponë bexëajavabelia Jesús canajetsijitsiatsi pijavajabitsaë pecobeyabelia pebeyaxuabinexatsi.

**Pacuenia itsamonae Jesús yabara jamatabëcuenenavëxaniabiaya  
jumaitsi: “Beelzebú raja pesaëta, Jesús  
dovathi jivivecua capitsapapona,” jai yabara pelivaisi**

*(Mt 12.22-32; Lc 11.14-23; 12.10)*

<sup>20</sup>Jesús boya joneya pijajivi yajava. Icatsia jivibitsaëtoخانeto nacaetuata. Nexata acuenebi Jesús pijajivi pebarënananijava. <sup>21</sup>Itsamonae Jesús yabara jumaitsi: “Jesús raja matajemabatsi,” jai. Nexata bajarapacuenia itsamonae Jesús yabara pejumaitisijava, Jesús pijamonae vënëlivaisitanetsi. Nexata Jesús pijamonae ponarena Jesúsjavaberena pebarëponaenexatsilia picani.

<sup>22</sup>Judíovi pecujarubivi, Jerusalén tomaraverena peponaevi, jamatabëcuenenavëxaniabiaya Jesús yabara jumaitsi:

—Mara ponë Jesúsje, Beelzebú yajavapona. Beelzebú raja daxita dovathivi pevetsinë. Bjaraxuata Jesús Beelzebú pesaëta dovathi jivivecua capitsapapona, jai judíovi pecujarubivi jamatabëcuenenavëxaniabiaya Jesús yabara.

<sup>23</sup>Nexata Jesús junata bajarapamonae jamatabëcuenenavëxaniabiaya pejumaitisijava pecanaëjëtisnexa. Nexata bajarapamonaejavabelia Jesús jumaitsi mapacueniaje:

—Beelzebú raja dovathivi jivivecua apo capitsapaponaev tsipae. Tsipaji Beelzebú dovathi jivivecua itsa capitsapaponaevjitsipa, nexata Beelzebú beprijavajabitsaë tae-

jitsipa pijajivi. <sup>24</sup> Pacanaējēre mapacueneje. Nacaenacuapijivi ata itsa navecuanat-sanaejitsipa penasivanavajabitsaētsinexa, namataenetsia naverebiabijitsipa nacaenacuapijivi ata. <sup>25</sup> Bajara pijinia nacaemonae ata itsipae. Itsa navecuanatsanaejitsipa penasivanavajabitsaētsinexa, namataenetsia naverebiabijitsipa nacaemonae ata. <sup>26</sup> Bajara pijinia itsipae dovathi ata. Dovathi jivivecua itsa capitsapaponaejitsipa pijajivi dovathivi, nexata bepijavajabitsaēnē taejitsipatsi pijajivi. Nexata apo sivaajamatabēcuenesaē tsipae pexanaponaejavanexa. Nacopiarucaeyaexanaejitsipa dovathi, jai Jesús judfovi pecujarubivijavabelia.

<sup>27</sup> Bajaramonae pecanaējētsinexa Jesús bitso piasaēnēcuenē dovathi matatoxenetsia, Jesús icatsia jumaitsi bajarapamonaejavabelia mapacueniaje:

—Itsajivi ata apo caējēpaetsi pejonenexa bitso piasaēnē pijaboyalía peyaca-jērētsinexa xua xaina pijabota. Itsiata itsa patsipa bajaraponē matatoxenetsia bitso piasaēnē, nexata cobecētabuatsipatsi. Taxucētabuatsipatsi yajava. Matapania bajarapacuenia yacajērētsipatsi daxita xua xaina pijabota. Bajara pijinia pacuenia xanē ata bitso tasaēnē dovathi matatoxenetsia. Bajaraxuata necaējēpa jivivecua tacapitsapaenexa dovathivi.

<sup>28</sup> Xaniajanē pacuenia pacatsipaebatsi. Dioso cajena caējēpatsi daxitajivi pibisiacuene pexanaeconi pevecuaajibiaexanaenexa. Pibisiacuenia jivi Dioso baracuaicuajiai ata, bajarapaneconi ata Dioso caējēpatsi pevecuaajibiaexanaenexa. <sup>29</sup> Itsiata baitsi jane pajivi pibisiacuenia baracuaicuajiai Espiritu Santo, bajarapajivi Dioso apo vecuaajibiaexanae tsane bajarapaneconi. Bajarapajivi naneconitsiana daxita matabijavabelianexa, jai Jesús bajarapamonaejavabelia.

<sup>30</sup> Bajarapacuenia Jesús jumaitsi tsipaji Jesús Espiritu Santo yajavaponaponae atatsi, judfovi pecujarubivi jumaitsi Jesús yabara: “Jesús raja Beelzebú yajavaponapona,” jai. Nexata bajaraxuata bajarapamonae naneconita Espiritu Santojavabelia.

**Pacuenia Jesús pejuyapijivi, pena yajava,  
nubena bojumavelia yabara pelivaisi**

*(Mt 12.46-50; Lc 8.19-21)*

<sup>31</sup> Jesús pejuyapijivi, pena yajava, pata Jesúsjavaberena. Itsiata bajarapamonaeboyalía apo jonelía Jesús penucaeboyalía. Nexata bajarapamonaejunatsiaexana Jesús pejumetaeyenaevitsijavabelia. <sup>32</sup> Nexata pamonaejesús petsipaebilivaisi matatoyorotsia jumetaeyenatsi, Jesúsjavabelia jumaitsi:

—Patajatuxanenē, ena raja, nejuyapijivi yajava, nuca patapēnēverena. Cajaita raja xamē, jai bajarapamonaejesúsjavabelia.

<sup>33</sup> Nexata Jesús jumaitsi bajarapamonaejavabelia:

—¿Detsa pitsijamatabēcuenēvi taena, tajuyapijivina? jai Jesús.

<sup>34</sup> Bajaraxuacujinaejesús naēcota pematatoyorotsiaenaevitsi. Jumaitsi bajarapamonaejavabelia:

—Mara jota pamonaejxanējavata penaevije, bajarapamonaejane taenajivi, tajuyapijivina. <sup>35</sup> Tsipaji raja pamonaejexana pacuenia Dioso itorobatsi, bajarapamonaejane baja tajuyapijivi, taenajivina, jai Jesús bajarapamonaejavabelia.

## Pacuenia Jesús jivi livaisi tsipaeba peubinë pelivaisicuenia yabara pelivaisi

(Mt 13.1-9; Lc 8.4-8)

**4** Icatsia Jesús taxuxuaba livaisi petsipaebijava Galilea pucaxaneto itapajavata. Nexata jivi ayaibitsaëtoxaneto nacaetuata itsajota Jesús livaisi tsipaebanuca. Nexata Jesús runareca jera ënëabereca. Ecareca jera ënëtareca. Daxita jivibitsaëtoxaneto tajetaboveliala nubena. <sup>2</sup>Nexata Jesús daxitacuenelivaisianë tsipaeba jivijavabeliala. Jesús jumai tsaponae bajarapamonaejavabeliala mapacueniajaje:

<sup>3</sup>—Panenamuxunaevere mapalivaisije. Peubinë pona pabiabeliala peubinexa. Nexata itsa pata pabita, peubixu pexucayajabajarabicueniala ubanajetaruca. <sup>4</sup>Nexata pexucayajabajarabijavata itsaxu othopa pabi tuatujëjava, penajetarucaenamutojumata. Nexata bajarajota pata baratsui. Xane bajarapaxumi juvinejeva. <sup>5</sup>Itsaxu pijinia othopa ibopananëjumata, itsajota bitso ira apo aitayaë. <sup>6</sup>Nexata icotiala bitso itsa ataju, nexata bajarapaxu juvi ata, tsaquenapona. Tsipaji irabereca bitso apo atabunepiariereca. <sup>7</sup>Itsaxu pijinia othopa xanëebacabomijavata. Nexata peubixu xanëebotonë caecueniala itsa yajavajuva, bitso xanëebotonë matacënënatso peubijavami. Nexata peubijava apo xainae pecuai. <sup>8</sup>Itsaxu pijinia othopa pexaniairata. Nexata juva. Xaniavaetsiala vitsabaponanua. Xainanua pecuai. Itsabotonë capitsapa treinta paxutobeje tsaponae. Itsabotonë capitsapa sesenta paxutobeje tsaponae. Itsabotonë capitsapa cien paxutobeje tsaponae, jai Jesús bajarapalivaisi petsipaebivijavabeliala.

<sup>9</sup>Nexata icatsia Jesús jumaitso jivibitsaëtoxanetojavabeliala:

—Pajivi jamatabënëjumeyapëtane patacatsipaebilivaisi, nenamuxunaevetsi xaniavaetsiala, jai Jesús.

## Pacuenia yabara Jesús jivijavabeliala livaisi tsipaeba ëcomparacióncueniala yabara pelivaisi

(Mt 13.10-17; Lc 8.9-10)

<sup>10</sup>Jesús livaisi petsipaebicujinae, jivibitsaëtoxaneto baja Jesús vecuanaviabatsi. Nexata Jesús pijaepato barënëacopata doce ponëbeje pijajivi, itsamonae itsiata yajava. Nexata bajarapamonae Jesús yanijobatsi. Bajarapamonae jumaitso Jesúsjavabeliala:

—Palivaisi jivijavabeliala tsipaebame peubinë pelivaisicueniala, pajamatabëcuene xaina, patayapëtaenexa panetsipaebare, jai bajarapamonae Jesúsjavabeliala.

<sup>11</sup>Nexata Jesús jumaitso bajarapamonaejavabeliala:

—Paxamë rabaja xaniavaetsiala Dioso pacayapëtaeayaexana Dioso papijajivimë papecaevetsijava. Bajarapacuenel abaxë daxitajivi apo yapëtae. Baitso ra saicaya pamonae apo tajajivi, tsipaebajë livaisianë ëcomparacióncueniala. <sup>12</sup>Bajaraxuata nexata bajarapamonae tae ata Dioso pesaëta pinijicuenel taexanaejava, itsiata apo yapëtae pajamatabëcuene yabara exanajë pinijicuenel taexanaejava. Nenamuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi. Bajarapacueniala apo jumeyapëtae penajamatabëcuenecopatsiyaniava Diosojavabeliala pibisiacuenel pexanaeneconimi Dioso pevecuaajibiaexanaeyanivatsi, jai Jesús.



**Pacuenia Jesús yapëtaeyaexana pijajivi, itsamonae yajava, pajamatabëcuene xaina palivaisi tsipaeba peubinë pelivaisicuenia yabara pelivaisi**

*(Mt 13.18-23; Lc 8.11-15)*

<sup>13</sup> Jesús icatsia jumaitsi pijajivijavabelia:

—Itsa apo pajumeyapëtaemë pajamatabëcuene xaina palivaisi pacatsipaebatsi peubinë pelivaisicuenia, ¿detsa nexata pacuenia pajumeyapëtaename daxita palivaisianë pacatsipaebijitsiatsi comparacióncuenia? jai Jesús pijajivijavabelia.

<sup>14</sup> Nexata icatsia Jesús jumaitsi pijajivijavabelia pijajivi peyapëtaenexa pajamatabëcuene xaina palivaisi tsipaeba peubinë pelivaisicuenia:

—Pajivi raja peubixu uba, bajarapajivi bepepaebinë Dioso pitorobilivaisi.

<sup>15</sup> Pacuenia itsi pabita peubixu, paxu othopa pabi tuatujëjava penajetarucaenamutojumata, bajara tsijamatabëcueneitsitsi itsamonae Dioso pitorobilivaisi. Bajaramonae itsa tsipaebatsi Dioso pitorobilivaisi, jumetane picani. Tsijamatabëubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepíjia dovathi najetaruca bajarapamonaejavaberena. Nexata bajarapamonae tsijamatabëjuvinejevatsi, dovathi vecuapitatsi bajarapalivaisimi, petsijamatabëbilivaisimitsi. <sup>16</sup> Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcueneitsitsi itsamonae Dioso pitorobilivaisi. Bajaramonae jumetane Dioso pitorobilivaisi. Nexata picani bajarapalivaisi barëyaya jumecovënëta. <sup>17</sup> Itsiata baitsi jane pacuenia irabereca apo atabunepepiareca paxu othopa ibopananëjumata, nexata nabíjiana, bajara tsijamatabëcueneitsitsi bajarapamonae Dioso pitorobilivaisi. Tsipaji pepacuene pejamatabëëthëtovetsina apo jumecovënëtsi bajarapalivaisi. Nexata apo ajamatabëcuenesaë tsavanapae bajayajebi pejumecovënëtsinexa bajarapalivaisi. Nexata itsa tocopiapatatsi daxita petoayapëbejecuenetsi, itsa yalivaisibatsinua Dioso pitorobilivaisi yabara, nexata pejumecovënëtsijavami bajarapalivaisi bepíjia copaba. Pevajënaeyabelia apo jumecovënëta vanapae. <sup>18</sup> Pacuenia pijinia paxu othopa xanëebacabomijavata, itsa juva, bitso matakënënatsi xanëebotonë, bajara tsijamatabëcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. <sup>19</sup> Itsiata baitsi jane bitso jamatabëcueneenatsi mapanacuapíjicuene yabaraje. Tsipaji najamatabëxaina ayaijava palata pexainaenexa. Nexata pijacuata najamatabëcueneyamaxëitojoroba. Daxitacuene mapanacuapíjicuene bitso jitsipa pexainaenexa. Bajaraxuata Dioso pitorobilivaisi apo tovsitabitsi pejamatabëëthëtota. Nexata pacuenia itsi pabita piacuajibibotonë, bajara itsi bajarapamonae. Tsipaji Dioso xaniavaetsia apo tojinavanapae. <sup>20</sup> Pacuenia pijinia itsi paxu othopa pexaniarata, bajara tsijamatabëcueneitsitsi itsamonae Dioso pitorobilivaisi. Bajaramonae itsa tsipaebatsi Dioso pitorobilivaisi, tsijamatabëjunuatsi. Nexata tsijamatabëcuenevitsabaponatsi Dioso pitorobilivaisi. Nexata pacuenia peubijava capitsapa itsabotonë treinta paxutobeje tsaponae, itsabotonë sesenta paxutobeje tsaponae, itsabotonë cien paxutobeje tsaponae, bajara tsijamatabëcueneitsitsi bajarapamonae Dioso pitorobilivaisi, jai Jesús pijajivijavabelia.

**Pacuenia Jesús pijajivi livaisi tsipaeba  
lámparabê pelivaisicuenia yabara pelivaisi**

(Lc 8.16-18)

<sup>21</sup> Jesús icatsia jumaitsi doce ponêbeje pijajivijavabelia, itsamonaejavabelia ata:

—Itsajivi ata lámparabê pitanojotsicujinae apo etsi cajoniênêalia. Apo etsi cama bexêpanalia ata. Jume baja cajena. Biji rajane athêbêyo etsia daxitaboênê pitayote-caenexa. <sup>22</sup> Bajara pijinia itsi palivaisianê tsipaebaponajê comparacióncuenia daxitajivi picani peyapêtaenexa. Najumematayatsia apo tsipaebaponaenê. Itsamona nejumetae ata, aeconoxae abaxê apo nejumeyapêtae pajamatabêcuene xaina tatsipaebilivaisianê. Itsiata itsamatacabi, bexêajavabelia, daxitajivi nejumeyapêtaena pajamatabêcuene xaina palivaisianê comparacióncuenia tsipaebaponajê. <sup>23</sup> Pajivi jamatabênejumeyapêtane patacatsipaebilivaisi, xaniavaetsia nenamuxunaevetsi, jai Jesús pijajivijavabelia.

<sup>24</sup> Icatsia Jesús jumaitsi bajarapamonaejavabelia:

—Panejumecanaejêre patacatsipaebilivaisi. Itsamonae ata itsa pacatsipaebiana, bajarapamonae ata pajumecanaejêtsianame papecatsipaebilivaisi. Palivaisivajêto panejumecanaejêtsianame, nexata bajarapalivaisivajêto pajumeyapêtaename. Itsiata icatsia pematatsênêa bajarapitsilivaisivajêto Dioso pacayapêtaeyaexanaena. <sup>25</sup> Pajivi xaniavaetsia nejumeyapêtane patacatsipaebilivaisi, bajarapajivi icatsia itsalivaisi pematatsênêa Dioso jumeyapêtaeyaexanaenatsi. Itsiata pajivi apo jitsipae pematatsênêa pejumeyapêtaeponaenexa, bajarapajivi palivaisiyovajêto picani jumeyapêtane, nacofênêtsiana, jai Jesús.

**Pacuenia peubixu pejuvicujinae, Dioso pesaêta vitsaba yabara pelivaisi**

<sup>26</sup> Jesús icatsia jivi comparacióncuenia livaisi tsipaeba Dioso pijajivi pevetsicuenie yabara. Jumaitsi mapacueniaje:

—Pacuenia peubixu pejuvicujinae, Dioso pesaêta vitsaba, bajara pijinia pacuenia Dioso pijajivi ata Dioso pesaêta jinavanapa. Peubinê pabita peubixu xucayajabajarabanajetaruca. <sup>27</sup> Peubinê peubicujinae vemaxêmajitabiaba meravi canacujitsia. Naêcotabiaba matakabita. Bajarapacuenia panepapona matakabianê. Nexata pijinia peubixu pabita juva. Vitsabapona. Itsiata baitsi jane peubinê apo yapêtae pacuenia peubixu pijacuata juva. <sup>28</sup> Ira raja pejamatabêcueneta naxaniaba peubijava. Copiata pepaboto vitsabaya. Xuacujinae namatonota. Xuacujinae cuainavereta. <sup>29</sup> Itsa baja yaniona peubijava, penotsivi pona penotsinexa. Tsipaji baja penotsimatacabinexa tocopiapatatsi, jai Jesús jivijavabelia.

**Pacuenia mostazaxutoyo pejuvicujinae,  
mostazanae bepíjia vitsaba yabara pelivaisi**

(Mt 13.31-32; Lc 13.18-19)

<sup>30-31</sup> Jesús icatsia jumaitsi doce ponêbeje pijajivijavabelia, itsamonaejavabelia ata:

—¿De meta xua pelivaisi jêpa Dioso pijajivi bepíjia ayaibitsaêtoxfaneto penaexanaejavanexa? Jivi meta peyapêtaenexa ayaibitsaêtoxfaneto bepíjia Dioso pijajivi penaexanaejavanexa, mostazaxutoyo meta pelivaisicuenia tsipaebianajê. Jumaitsinê meta tsane: “Pacuenia mostazaxutoyo pejuvicujinae, bepíjia vitsaba mostazanae, ba-

jara pijinia itsane Dioso pijajivi ata. Bepijia Dioso pijajivi ayaibitsaëtoxaneto naexanaena. Mostazaxu raja bitso tsiquirixutoxi daxita peubixuvecua. <sup>32</sup>Itsia baitsi jane mostazanae itsa juva, bepijia vitsaba. Caevaita pinijinae naexana itsapeubinaenë matatoxenetsia. Nexata baratsui ata pematapenanë exana mostazanae-maxërananëjavata. Bajara pijinia itsane jivi ata. Bepijia ayaibitsaëto Dioso pijajivi naexanaena,” janë meta tsane mapacueniaje, jai Jesús pijajivijavabelia, itsamonaejavabelia ata.

**Pacuenia Jesús jivi livaisi tsipaebabiaba ëcomparacióncuenia yabara pelivaisi**

*(Mt 13.34-35)*

<sup>33</sup>Dioso pitorobilivaisi Jesús tsipaebabiaba jivijavabelia. Dioso pitorobilivaisi Jesús jivi tsipaebabiaba ëcomparacióncuenia. Pacuenia baja jivi caëjöpatsi pejumeyapëtaenexa, bajarapacuenia Jesús tsipaebabiaba. <sup>34</sup>Jesús ëcomparacióncuenia livaisi tsipaebabiaba bajarapamonaejavabelia. Itsia saicaya Jesús ëpijajivijavabelia xaniavaetsia yapëtaeyaexanabiaba pajamatabëcuene xaina daxita bajarapalivaisianë.

**Pacuenia Jesús itaveta joviboxaneto, malataca yajava, piyaijavami yabara pelivaisi**

*(Mt 8.23-27; Lc 8.22-25)*

<sup>35</sup>Dioso pitorobilivaisi Jesús tsipaeba jivijavabelia. Bajarapamatacabi Jesús pet-sipaebicujinae itsa baja caniviyotsia, Jesús jumaiti pijajivijavabelia:

—Nicabaliatsi mapapucaxaneto itsapanabeliaje, jai Jesús.

<sup>36</sup>Nexata baja Jesús, pijajivi yajava, vecuapona jivi. Pajerata Jesús ecareca, pija-jivi yajava pona. Itsia itsamonae pënaponatsi itsajeranëta. <sup>37</sup>Nexata pinijijoviboxaneto jemata najetaruca. Nexata malataca jera ënëaberena mera epabajarabapona. Nexata baja jera ënëaberena mera vënëcapona. <sup>38</sup>Jesús itsia majitanuca jamatejema jeratabufejavavetsina. Namatabëxëyaëtanuca penamatabëxëyaëtabiabijavata. Nexata Jesús pijajivi yaitavabatsi. Jesús pijajivi jumaiti:

—¡Patajatuxanenë, vaxaitsimi rabaja yaothopaenatsi! ¿Apo jamatabëcuenebë-jamë tsaja? jai Jesús pijajivi.

<sup>39</sup>Nexata Jesús pemajitanucaenëmi naëcotapuna. Pinijijumeta itavetaxuaba jovibo. Jesús jumaiti pucajavabelia, jovibojavabelia ata:

—¡Vainae ecare baja! jai.

Bajarapacuenia Jesús pejumaitisjavata jovibo baja ajibi tsaxuabi. Daxitapuca baja nexata vainae ecaxuaba. <sup>40</sup>Nexata Jesús jumaiti pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús.

<sup>41</sup>Nexata Jesús pijajivi najunaviaca bajarapacuenie petaexae. Ëpamonae najumaiti:

—¿De meta tsipaji maponëje? ¡Itaveta jovibo, malataca ata! ¡Jumecovënëtatsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

**Pacuenia pebi, dovathivi peyajavaponaponaenë, Jesús  
vecuacupitsapa Gerasa nacuata yabara pelivaisi**

*(Mt 8.28-34; Lc 8.26-39)*

**5** Jesús pijajivi barëpata pucaxaneto itsapanabelia, Gerasa nacuayabelia. <sup>2</sup>Nexata Jesús jerajavavetsina nonotajuna. Pebi dovathivi peyajavaponaponaenë, cunitabarenatsi jivimëthëanëjavaverena. <sup>3</sup>Bajaraponë ponaponabiaba jivimëthëanëjavata. Itsajivi ata apo caëjëpaetsi pecëtsinexa bajaraponë cadenamaëtota ata. <sup>4</sup>Cadenamaëtonëta picani taxucëtabiatsi anijatonë. Cobecëtabiatsi picani yajava. Itsiata cajena pecobecëtsicadenamaëtotsi ucutarababiaba pesaëta. Bajarax-uacujinae petaxucëtsicadenamaëtotsi pecobeta tsaquibiaxuababiaba. Nexata cadenamaëtomi tsiquirijavaxi exanapenetabiaba. Itsajivi ata cajena apo caëjëpaetsi pecëtsinexa bajaraponë. Tsipaji bitso asaë. <sup>5</sup>Bajaraponë petsutonëjava, jivi petëpaevi pemëthëcaejava, matabijebi, meravijebi yajava, ponaponabiaba. Vavajai tsabiabaponapona. Ibotonëjavabelia natsaquibajarababiabaponapona. <sup>6</sup>Bajaraponë itsa taetaba Jesús penajetarucaejava, nexata tajëverena cujinaeponarena Jesúsjavaverena. Jesús pitabarata pematabacabëta nucajunua. <sup>7</sup>Bajaraponë aëjai pinijijumeta Jesús pitabarata.

—Jesús, pepo Dioso, athëbëtatsia peecaenë, pexënomë. ¿Detsa xua jaitame xanëjavaverena? Pexaniacuene bitso cavajëtatsi Dioso pitabarata. Nejamatabëcuenebejibitsipame, jai dovathivi peyajavaponaponaenë Jesúsjavabelia.

<sup>8</sup>Bajarapacuenia jumaitsi dovathivi peyajavaponaponaenë tsipaji Jesús jerajavavetsina penonotajunaejavata, dovathivi peyajavaponaponaenë pemataenenaejavatatsi, Jesús itaveta dovathivi. Jesús jumaitsi dovathivijavabelia mapacueniaje:

—¡Dovathivi, bajaraponë baja pavecuapitsapare! jai Jesús.

<sup>9</sup>Nexata Jesús jumaitsi bajaraponëjavabelia:

—¿Detsa pavënëmmë? jai.

Nexata dovathivi peyajavaponaponaenë navënëpaeba.

—Tavënë raja Legión. Tsipaji raja bitso paayaibitsaëttoxanetonë, jai dovathivi peyajavaponaponaenë.

<sup>10</sup>Nexata dovathivi pinijicuenia vajëta Jesúsjavabelia itsairabelia pejutsiyanivatsi bajarapairavecu. <sup>11</sup>Nexata bajarajota, imoxoyo petsutojavata, marranobitsaëttoxaneto xaevanapa. <sup>12</sup>Dovathivi bitso vajëca Jesúsjavabelia.

—Paneitorobare marranobitsaëttoxanetojavabelia. Panetocopare patajonenexa bajara pamarranobitsaëttoxanetojavabelia, jai dovathivi.

<sup>13</sup>Nexata Jesús tocopata pacuenia dovathivi vajëcatsi. Dovathivi baja pebi vecuapitsapecatsi. Nexata baja marranobitsaëttoxanetojavabelia dovathivi junua. Bajara pamarranobitsaëttoxaneto jinavanapa anijamilbeje ponëbeje. Nexata daxita marranobitsaëttoxanetomi cujinaeyeca. Pucaxaneto itapajanituareca othopareca. Nexata daxita marranobitsaëttoxanetomi meneta bubuna.

<sup>14</sup>Bajara pamarranobitsaëttoxanetomi pevetavanapaevi rëcëpeca. Pona, pacuene tane, petsipaebinexa tomarapijivijavabelia, petsipaebinexa vayafotusatojava penaevijavabelia ata. Nexata jivi ponarena petaenexa bajarapacuene. <sup>15</sup>Nexata dovathivi peyajavaponaponaenëmi bajarapamonae taeyeta Jesús pemuxuneneta. Bajaraponë penaxatatsijava baja naxatateca. Jamatejema baja. Xaniavaetsia eca. Nexata bajara-

pamonae cujunavatsi Jesús. <sup>16</sup> Pamonae cuenetanetsi Jesús pejamatejemayaexanaejava dovathivi peyajavaponaponaenëmi, bajarapamonae paeba pepatsivijavabelia daxita pacuene tane. Paeba pacuene ata Jesús exana marranobitsaëtoxfanetojavabelia. <sup>17</sup> Nexata Gerasa nacuapijivi jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecuva, jai Gerasa nacuapijivi Jesúsjavabelia tsipaji cujunavatsi.

<sup>18</sup> Jesús baja itsa runareca jera ënëabereca, ponë dovathivi peyajavaponaponaenëmi, bitso picani navajëca Jesús pepëta penaponaenexa. <sup>19</sup> Itsiata Jesús apo jejai. Jumaitsi bajaraponëjavabelia:

—Ponare nijaboyabelia. Nijamonae tsipaebare papinijicuene Dioso caexana. Tsipaebare pacuenia ata caitaxutotsонатane Dioso, jai Jesús dovathivi peyajavaponaponaenëmijavabelia.

<sup>20</sup> Nexata baja dovathivi peyajavaponaponaenëmi pona. Taxuxuaba penavajunupaebijava papinijicuene Jesús exanatsi. Bajaraponë navajunupaebaona Decápolisvënë nacujava. Decápolisvënë nacuata eca diez patomarabeje. Daxitajivi jamatabëcuenenabenajaca itsa jumetanetsi bajaraponë penavajunupaebaonaejava.

**Pacuenia Jesús copiaya namutoepatota jamatejemayaexana  
piavitaneva, pacuenia icatsia cotocaevi toasaëyaexana  
Jairo pexënatovayo, petëpaevayomi, yabara pelivaisi**

*(Mt 9.18-26; Lc 8.40-56)*

<sup>21</sup> Jesús icatsia pecovëyaberena jerata naviarena pucaxaneto itsapanaverena. Nexata tajetabojavatarena jivibitsaëtoxfaneto Jesús matatoyoronatsi. <sup>22</sup> Nexata bajara-jota napatajopa Jairovënë. Bajaraponë judíovi penacaetuatabiabibo pevetsiviya-juvënë. Jairo itsa taetaba Jesús, nexata Jairo pematabacabëta yaiyataeya Jesús pitabarata nucajunua. <sup>23</sup> Pinijicuenia Jairo vajëta Jesúsjavabelia. Jumaitsi:

—Taxënatoyo raja netobitso. Najumalipeneta rabaja petëpaenexa. Pexaniacuene netoexanare. Naxanitsia. Netoperabëjayatsianame necobeta petëpaeyaniva, jai Jairo.

<sup>24</sup> Jejai Jesús. Jesús nexata napona Jairo pepëta. Nexata jivibitsaëtoxfaneto Jesús pepënaponaevitsi matatoyorotsia cënënanajetarubenatsi. <sup>25</sup> Bajarapajivibitsaëtoxfaneto tuatujëta itsava, pijanacuene pecapunaevatsi, nanajetaruca. Bajarapova pijanacuene pecapunaecujinaetsi doce baja pavaibeje xaina. <sup>26</sup> Bitso nexata bajarapova bejiobi pexainaecuene yabara pevaëbivitsi pejamatabëcueneta. Tsipaji belia daxita pexainaevaximi navecuavereta pematamobaponaeta pevaëbivitsi. Itsiata apo caevi piavitaneacuene. Biji caranata pevajënaeyabelia capunaponatsi piavitaneacuene. <sup>27</sup> Nexata bajarapova jumetane itsamonae pecuaicuajijajava Jesús piavitanevi pejamatejemayaexanaponaejava yabara. Nexata bajarapova ponataba Jesús pepënëvelia, jivibitsaëtoxfaneto tuatujëalia. Nexata bajarapova tojayataba Jesús penaxatatsijava. <sup>28</sup> Tsipaji cajena bajarapova jamatabëjumaitsi: “Itsa Jesús penaxatatsijava tojayatabianajë, tavitaneejavami nevecuaajibi tsane,” jamatabëjai. <sup>29</sup> Nexata bajarapova itsa tojayataba Jesús penaxatatsijava, bajarajota pijanacuenemi vecuaajibitsi baja. Nexata bajarapova pijanacuenemi pecaevijavareca, nayapëtane. <sup>30</sup> Jesús ata nayapëtane pesaëta pejamatejemayaexanaejava pepënëyabelia. Nexata pejayatabijavatatsi Jesús napënëyorotaxuaba. Naëcobaruta. Yanijoba jivijavabelia.

—¿Jipatsa tanaxatatsijava netojayataba? jai.

<sup>31</sup> Nexata Jesús pijajivi jumaitsitsi:

—Taneme rabaja jivibitsaëtoxaneto pecacënënanajetarubenaajava. ¿Detsa xuajitsia: “¿Jipatsa tanaxatatsijava netojayataba?” jamë? jaitsi Jesús pijajivi.

<sup>32</sup> Jesús naëcobaruta daxitajivijava petaenexa pajivi tojayatabatsi penaxatatsijava.

<sup>33</sup> Nexata bajarapova neconecojai tsanucæ pecajunavi penayapëtaexæ Jesús pe-jamatejemayaexanaejavatsi. Nexata bajarapova najetabarena Jesús pitabarayabere-na. Pematabacabëta nucajunua. Nexata daxita pacuene exana, bajarapova tsipaeba Jesúsjavabelia. <sup>34</sup> Nexata Jesús jumaitsi bajarapovajavabelia:

—Xamë nesivajamatabëjumaitsimë: “Jesús penaxatatsijava itsa tojayatabianajë, tavitanëjavami nevecuaajibi tsane,” nesivajamatabëjamë. Bajaraxuata jamatejema-mamë baja. Ponare baja jamatejema. Niavitanejavami rabaja ajibi, jai Jesús bajarapovajavabelia.

<sup>35</sup> Bajarapacuenia Jesús pejumaitsanucæjavata namutoepatota, Jairo pijaboverena peponævi mataenenatsi. Bajarapamonæ jumaitsi Jairojavabelia:

—Jairo, nexënatoyo rabaja tëpa. Pëtsa baja matavëjëa jamatabëitonotaponame Jesús, jai bajarapamonæ Jairojavabelia.

<sup>36</sup> Jesús jumetae ata bajarapajume, itsiata jumaitsi Jairojavabelia:

—Jairo, pëtsa najamatabëxainame. Najamatabëcuenecopare saya ëxanëjavaberena nexënatovayo pecatoasaënexa, jai Jesús Jairojavabelia.

<sup>37</sup> Nexata Jesús, pajivibitsaëtoxaneto pënanajetarubensatsi, pueneta bajarajota. Jesús pona Jairo pijaboyabelia. Jesús saya yajavalia mapamatabëxëyoje: Pedro, Juan, Santiago, Jairo jane baja. Juanbeje Santiagobeje nacaebananëbeje. <sup>38</sup> Itsa baja Jesús palia Jairo pijaboyabelia, tane jivibitsaëto pinijijumeta pematianueyabijava petëpaevayo. <sup>39</sup> Jesús itsa joneya boyalia, jumaitsi bajarapamonæjavabelia:

—Pëtsa bitso pamanueyabame. Pejanava raja apo tëpæ. Saya raja majitanuca, jai Jesús tsipaji yapëtane Jesús piasaëyaexanaejavanexa bajarapovayo.

<sup>40</sup> Bajarapacuenia Jesús pejumaitstijava, bajarapamonæ saya jumecapocaponatsi. Nexata daxita Jesús bovecua pitsapaeyaexana. Itsaxuayolia petëpaevayo boca, Jesús barëjoneya caejiviyobeje saya. Jesús saya barëjoneya mapamatabëxëyoje: petëpaevayo paxa, pena, Jesús pijajivi, acueyabi ponëbeje. Bajarapamatabëxëyo saya Jesús barëjoneya. <sup>41</sup> Nexata Jesús petëpaevayo cobepita. Jesús pijajumeta jumaitsi:

—Talita cumi, jai, mapajumetaje pejumaitstijume: “Pejanava, nonotapunare,” pejaijume.

<sup>42</sup> Bajarapacuenia Jesús pejumaitstijavata, pejanavayo nonotabapuna. Ponapona baja. Bajarapovayo doce pavaibeje xaina. Nexata Jesús peyajavajonevilia pinijicuenia jamatabëcuenenabenajaca bajarapacuenia itsa tane. <sup>43</sup> Nexata Jesús pinijicuenia jumaitsi:

—Pëtsa itsajivi ata patsipaebame mapacuenije, jai Jesús.

Bajaraxuacujinae Jesús jumaitsi pejanavayo penajavabelia:

—Nexënatovayo pexæjava rajure, jai.

**Pacuenia Jesús naviata pijanacuayabelia,  
Nazaret tomarabelia, yabara pelivaisi**

(Mt 13.53-58; Lc 4.16-30)

**6** Jesús baja, pijajivi yajava, pona Capernaum tomaravecua. Naviata pijanacuayabelia, pevitsabitomarabelia. <sup>2</sup> Judíovi penacueraevetsimatatabita Jesús taxuxu-

aba jivi livaisi petsipaebijava judíovi penacaetuatabibota. Ayaibitsaëtoxaneto pejumetaevitsi sivajamatabëcuenenabenajacatsi. Nexata bajarapamonae Jesús jamatabëcuenaebiatanetsi. Bajarapamonae Jesús yabara najumaitsi mapacueniaje:

—¿Detsa meta verena maponë capsapa mapajamatabëcuenelivaisije? ¿Detsa pacuenia meta yapëtane daxita mapacuenije? ¡Pitsipinijicuene maponë exanaje, vaxaitsi abaxë caeto ata apo taetsi! ¡Matapania matanetsije! <sup>3</sup>Maponëje vaxaitsiyajuvënë. Carpinteronë. María pexënato. Bajaraponë pejuyapijivi Santiago, José, Judas, Simón. Papetiriavi ata vajatomarata jinavanapa, bajaraponë pejuyapijivi, najai bajarapamonae Jesús yabara.

Nacaetomarapijivixae, bajarapamonae Jesús apo jumexaniataetsi. <sup>4</sup>Nexata Jesús jumaitsi bajarapamonaejavabelia:

—Bajara maitsabiabije. Diosojumepaebivi profetavi itsanacuapijivi yaiyataeyabiabatsi. Itsiata pijanacuapijivi, pijaviriavi, pijamonae ata, apo yaiyataeyabiabitsi, jai Jesús.

<sup>5</sup>Nexata Jesús bajarajota jivi ayaibitsaëtojavabelia pinijicuene pexanaejava apo tsitaexanae. Tsipaji apo jumecovënëtsitsi. Saya caejiviyobeje piavitanevi pecobeta jayata. Jamatejemaya exana. <sup>6</sup>Nexata Jesús bitso najamatabëxaina. Tsipaji jivi apo jumecovënëtsitsi. Bajaraxuacujinae Jesús tsiquiritomaraxijava Dioso pitorobilivaisi jivi tsipaebanajetaruca.

### **Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi**

*(Mt 10.5-15; Lc 9.1-6)*

<sup>7</sup>Jesús junata pijajivi doce ponëbeje penacaetuatsinexa. Nexata Jesús pijajivi itoroba anijanëbeje tsaponae. Jesús pijajivi pecaëjëpaejamatabëcuenetsi jamatabëcuenecaëjëpaeayaexana dovathi peyjavajinavanapaevi pevecuacapsapaponaenexa. <sup>8</sup>Jesús jane baja pijajivi penaropobivajënae, Jesús jumaitsi pijajivijavabelia mapacueniaje:

—Pëtsa itsacuenejava ata pacaponame panijanamutonexa. Pëtsa pacaponame panemarue ata, dorota, palata ata. Ènaeboyosaya pacaponare. <sup>9</sup>Itsiata pataxunaponare panenataxuxatabijava. Caejava panenaxatatsijava pajumaponare. Pëtsa anijacamisabeje pacaponame. <sup>10</sup>Itsajota papatabiabianame, caebota pamajitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponanename, bajarapabovecua papitsapaenename. <sup>11</sup>Patomarata apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, nexata paponanename bajarapatomaravecua. Paneponaevajënae bajarapatomarata panataxuatsapërvërvëbianame. Bajarapacuenia itsa panataxuatsapërvërvërvëbianame, bajarapatomarapijivi yapëtaena Diosojavabelia penaneconitsicuene apo papecacopiapitsixae papecanamuxunaevetsinexa panetsipaebilivaisi. Xaniajanë pacuenia pacatsipaebijitsiatsi. Pamatacabi Dioso jivi naneconitsiaexanaena, bajarapamatacabi Dioso bitso naneconitsiaexanaenatsi patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodoma tomarapijivimi, Gomorra tomarapijivimi ata, bajarapaneconivajëto matatoxenetsia Dioso naneconitsiaexanaenatsi patomarapijivi apo pacacopiapitsi tsane, jai Jesús pijajivijavabelia.

<sup>12</sup> Nexata jane baja Jesús pijajivi naropoba Dioso pitorobilivaisi jivi petsipaebana-jetarubenaenexa. Jesús pijajivi naropoba anijanēbeje tsaponae. Nexata Jesús pijajivi jumai tsaponae jivijavabelia:

—Pacopabare baja pibisiacuene paneexanabiabijava. Panajamatabēcuenepēñey-oreore Diosojavabelia, jai tsaponae.

<sup>13</sup> Jesús pijajivi dovathi peyajavajinavanapaevi vecuacapitsapapona. Piavitanevi ata mataexabapona aceiteranēta. Bajarapacuenia Jesús pijajivi jamatejemayaex-anapona piavitanevi.

**Pacuenia bajayata Juanpijinē jivibautisabinēmi beyaxuabatsi yabara pelivaisi**

*(Mt 14.1-12; Lc 9.7-9)*

<sup>14</sup> Herodes, Galileanacia pevetsinē. Nexata Herodes jumetane itsamonae jamatabēcuenenavēxaniabiaya pejumaitsijava Jesús yabara: “Juanpijinē raeta jivibautisabinēmi icatsia asaē petēpacujinae. Bajaraxuata caējēpatsi Dioso pesaēta pinijicuene pexanaenexa,” pejaijava itsamonae jamatabēcuenenavēxaniabiaya Jesús yabara, Herodes jumetane.

<sup>15</sup> Itsamonae pijinia jumai tsaponae Jesús yabara:

—Bajayata raeta ponēmi ponapona, profeta Elíaspijinēmi, baja raeta ponē, jai tsaponae itsamonae.

Itsamonae pijinia jumai tsaponae Jesús yabara:

—Diosojumepaebinē profeta raja. Tsipaji rabaja pacuenia bajayata profetavi jina-vanapa, bajara icatsia maponē itsije, jai tsaponae itsamonae.

<sup>16</sup> Bajarapacuenia itsamonae jamatabēcuenenavēxaniabiaya pejumaitsaponaejava Jesús yabara, Herodes itsa jumetane, Herodes ata jamatabēcuenenavēxaniabiaya jumaiti Jesús yabara:

—Maraeta Juanpijinēmije, ponēmi bajayata xanē tajajivi vēsiucutaxuabiaexanajē. Icatsia raeta asaē petēpacujinae, jai Herodes jamatabēcuenenavēxaniabiaya Jesús yabara.

<sup>17</sup> Bajarapacuenia Herodes jumaiti tsipaji abaxē Juanpijinē itsa asaē, Herodes pijajivi, vajabitsaēvi, itoroba Juanpijinē pevaetabinexatsi. Nexata vajabitsaēvi Juanpijinē cobecētsiaya caponatsi penaneconitsivi pejebabiabiboyalia. Bajarapacuenia Herodes pijajivi itoroba Herodes pijava, Herodíasva, pejamatabēcueneta. Herodíasva picani copiata pita Felipe, Herodes pejuyapijinē. Nexata Herodes pejuyapijinē pijava yacajērēta. <sup>18</sup> Nexata Herodes pejuyapijinē pijava peyacajērēt-sixae, Juanpijinē abaxē itsa apo vaetabitsi, muxujioba Herodes. Juanpijinē jumaiti Herodesjavabelia:

—Acuenebi raja nejuyapijinē pijava nepitsijava,” jai Juanpijinē Herodesjavabelia.

<sup>19</sup> Nexata bajarapacuenia Juanpijinē pejumaitsixae, itoyatsi Herodíasva. Nexata abaxē Juanpijinē itsa ponapona penaneconitsivi pejebabiabibota, bajarapova picani Juanpijinē jamatabēbeyaxuabiaexanatsi. Itsiata apo caējēpaetsi. <sup>20</sup> Tsipaji Herodes yapētane Juanpijinē bitso pejamatabēxanepanaenēcuene. Nexata Herodes yaiyatane Juanpijinē. Bajaraxuata Herodes apo tocopatsi pijava pejamatabēcueneta pebeyaxu-abinexatsi Juanpijinē. Juanpijinē itsa cuaicuaijai tsabiabi Herodesjavabelia, nexata picani Herodes jamatabēbējai tsabiabi pijaneconi yabara. Itsiata Herodes xaniavaetsia namuxunaevetabiaba. <sup>21</sup> Nexata pamatacabi Herodes najamatabēnapita penaexanaematacabi, najamatabēxaina pexaniafiesta pexanaenexa. Bajarapafies-



tajava Herodes junata pijaboyaberena jivi ayaibitsaëtoخانeto penabaninexa. Junata Herodes pijajivi, pamonaе toevetatsi pijairanë. Junata vajabitsaëvi pevetsivinua. Junata petuxanevinua, Galilea nacuata pejinavanapaevi. Nexata bajarapafiestajavata Herodíasva toypëxanepanatsi Juanpijinë pebeyaxuabiaexanaenexatsi. <sup>22</sup> Herodíasva toypëxanepanatsi tsipaji pexënatoyo joneya Herodes pejunatsivi pebarënanabecaеjavalia pijacujirucuenia caevayo peyavajibinexa. Nexata Herodes pejunatsivi bitso barëitajitsipa pejionëyo peyavajibijava. Nexata Herodes najumecapanepaeya pexaniaajijumeta jumaiti pejionëyojavabelia:

—Nevajëre xua jiitsipame. Carajutsianatsi raja. <sup>23</sup> Pacuenejava nevajëtsianame, carajutsianatsi. Itsa nevajëtsianame taneevetsiaexanaenacua ata, tuatujëjjava carajutsianatsi, jai Herodes najumecapanepaeya pejionëyojavabelia.

<sup>24</sup> Nexata bajarapovayo pitsatabalia. Jumaiti penajavabelia:

—¿Detsamë ra xua vajëtsianajë? jai penajavabelia.

Nexata Herodíasva pexënatoyojavabelia jumaiti:

—Juan jivibautisabinë pematabocoto vajëre, jai.

<sup>25</sup> Nexata bepijia bajarapovayo jopajoneya Herodes peceaejavabelia. Jumaiti Herodesjavabelia:

—Jitsipajë cajena tanerajutsinexamë platota Juan jivibautisabinë pematabocoto, jai bajarapovayo Herodesjavabelia.

<sup>26</sup> Nexata Herodes pinijicuenia bejamatabëjiobi tsanajetsireca. Herodes nexata acuenebi: “Jume,” pejaijava. Tsipaji baja Herodes najumecapanepaeya jumaiti pejionëyojavabelia pexaniaajijumeta daxita pejunatsivi pitabarata. <sup>27</sup> Nexata Herodes bepijia itoroba vajabitsaënë petocarenanexatsi Juan pematabocoto. <sup>28</sup> Vajabitsaënë nexata pona penaneconitsivi pejebabiabiboyabelia. Juanpijinëmi vësiucutaxuabatsi. Juanpijinëmi pematabocoto vajabitsaënë carena platota. Nexata pejanava rajutatsi. Nexata bajarapovayo juya pena rajuta. Nexata baja Herodíasva yapëtane capanepaeya baja Juanpijinë pebeyaxuabijavatsi.

<sup>29</sup> Nexata Juanpijinë pijajivi itsa vënëtanetsi pebeyaxuabijavatsi, bajarapamonaе ponarena Juanpijinë peboceajavaberena. Pitatsi petëpaenë. Pepitsicujinaetsi Juanpijinë pijajivi mëthëtsatsi.

### **Pacuenia Jesús pexaejava rajuta cinco mil ponëbeje yabara pelivaisi**

*(Mt 14.13-21; Lc 9.10-17; Jn 6.1-14)*

<sup>30</sup> Jesús pitorobivi, apóstolevi, naviabanajetarubena Jesúsjavaberena. Nexata bajarapamonaе Jesúsjavabelia navajunupaeba daxita pacuene exanavanapa, pacuenia ata jivi livaisi tsipaebavanapa. <sup>31</sup> Nexata Jesús jumaiti bajarapamonaеjavabelia:

—Naxanitsia. Ponatsi pesajinaejavabelia. Nacueraevetsianatsi caepatoyo, jai Jesús.

Bजारapacuenia Jesús jumaiti pijajivijavabelia tsipaji jivibitsaëtoخانetonë topatabiabatsi. Itsamonae naviabaponabiaba. Itsamonae juya patabiaba. Nexata Jesús pijajivi pebarënanabaninexa, apo cuenecaëjëpabiabitsi. <sup>32</sup> Nexata Jesús ëpijajivi jerata yajavapona itsabelia jivi ajibi. <sup>33</sup> Itsiata jivi ayaibitsaëtoخانeto pëtanetsi Jesús peponaejava. Nexata itsabelia Jesús pona, matatsënëa pënacujinaerubenatsi daxita tomaranëpijivi. Caranata Jesús pevajënaeyabelia pata bajarapamonaе. <sup>34</sup> Itsa baja Jesúsбана nonobajunaya jeravecua, Jesús tane jivibitsaëtoخانeto. Nexata Jesús

bajrapamonae itaxutobejiobiatane. Nexata Jesús bajrapamonae sivajamatabëjumaitsi mapacueniaje:

—Pacuenia baitsi ovejabitsaëtoخانeto itsa toajibitsi pevetsinëtsi, bajara itsi mapamonaeje, sivajamatabëjai Jesús.

Nexata Jesús ayaicuenia livaisi tsipaeba bajrapamonaejavabelia. <sup>35</sup>Itsa baja bitso caniviyotsia, Jesús pijajivi cubibarenatsi. Jumaitsitsi:

—Caniviyo rabaja bitso. Majota ajibi pexaejava. Tsipaji itsajivi ata pijabo apo xainae. <sup>36</sup>Itorobare baja jivi peponaenexa imoxoyo penaetomaranëjavabelia pecomuacaenexa pexaejava, jaitsi Jesús pijajivi.

<sup>37</sup>Jesús nexata jumaitsi pijajivijavabelia:

—Paxamë parajure pexaejava, jai.

Nexata Jesús pijajivi jumaitsi:

—¿Paponaeñajë tsaja tomarabelia patacomuatsinexa pan doscientos denariota bajarapamonae pexaenexa? jai Jesús pijajivi.

<sup>38</sup>Jesús icatsia jumaitsi pijajivijavabelia:

—¿Detsa papanbëbeje paxainame paxamë? Pataema copiata, jai Jesús.

Jesús pijajivi petaecujinae tsipaeba Jesúsjavabelia. Jumaitsi:

—Paxainajë saya cinco papanbëbeje, anijanëyobeje dujuainëyobeje yajava, jai Jesús pijajivi.

<sup>39</sup>Nexata Jesús itoroba daxitajivi penaenexa ponajavata. <sup>40</sup>Nexata bajarapamonae pepobitsaëtonë natsanaeya ena. Caebitsaëtota enapona cien pajivibeje. Itsabitsaëtota enapona cincuenta pajivibeje. Bajrapacuenia caebitsaëto canacujitsia enapona. <sup>41</sup>Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús.

Bajaraxuacujinae Jesús pan epatsicacapona. Pijajivijavabelia rajutapona pepatsicacaejava. Nexata juya Jesús pijajivi pan tsicobetsana jivijavabelia. Dujuaijavaxi ata tsicobetsana jivijavabelia. <sup>42</sup>Daxita xaniavaetsia nabane. <sup>43</sup>Bajaraxuacujinae Jesús pijajivi caetuata pan, dujuai yajava, jivi peyajuvënëcopabejibijavanë. Nexata vënëba doce xuabeje bemapirecuenia pexanaejavanë. <sup>44</sup>Pamonae pexaejava xane, ayaibitsaëtoخانeto. Itsiata ëpebijivi namataëjëtatsi cinco mil ponëbeje.

### **Pacuenia Jesús mene itaboxoya najetaruca yabara pelivaisi**

*(Mt 14.22-27; Jn 6.16-21)*

<sup>45</sup>Jesús jivi ayaibitsaëtoخانeto pexaejava perajutsicujinae, Jesús pijajivi bepíjia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Jesús baja jivi naviabiaexana. Bajaraxuata abaxë caenë nacopatanuca bajarajota. <sup>46</sup>Itsa baja jivi napëvereta penaviabijava, Jesús junaya petsutojumabetsia pevajëtsinexa Diosojavabelia. <sup>47</sup>Itsa baja bitso meravi, Jesús pijajivi pucaxaneto itapavecua tajë baja yanajetarubenalia. Jesús abaxë bajarapaepatota caenë nacopatanucarena pucaxanetoitapatarena. <sup>48</sup>Nexata Jesús tane pijajivi petoayapëbejejavatsi pevaetsijava. Tsipaji bitso joviboxaneto ayai pevajënaeverena. Bajaraxuacujinae bajayacunua, ajena matabijitsia, Jesús pijajivi pecovëvelia imoxoyotanaajetaruca. Jesús najetaruca mene itaboxoya. Rovia picani xenetsijitsia. <sup>49</sup>Jesús pijajivi itsa tanetsi mene itaboxoya penajetarucaejava, Jesús pijajivi jamatabëjumaitsi:

—¡Petépaenëmi raeta pejumape najetaruca! jamatabëjai.

Nexata Jesús pijajivi vavajai tsaxuabi ayaijumeta.<sup>50</sup> Tsipaji daxita Jesús pijajivi tane bajarapacuenia penajetarucaejava. Nexata Jesús pijajivi jamatabëcuenenajunaviaca. Nexata Jesús bepijiayo jumaitsi pijajivijavabelia:

—Xanë raja. Pëtsa panecujunavame. Pajamatejemamëre saya, jai Jesús pijajivijavabelia.

<sup>51</sup>Nexata baja Jesús nonolia bajarapajera ënëabelia. Ajibi baja tsaxuabi jovibo. Nexata Jesús pijajivi pinijicuenia jamatabëcuenenajunaviaca. Tsipaji tane jovibo, malataca yajava, Jesús piajibiaexanaejava.<sup>52</sup> Jesús baja picani pijajivi copiyata tane, pan tsiquirijavayomi ata, jivibitsaëtoxanetojavabelia Jesús perajutsijava. Itsi-ata Jesús pijajivi apo jamatabëcueneyapëtae Jesús pecaëjëpaenëcuenetsi pinijicuenepexanaenexa. Abaxë bajarapamonae ajamatabëcuenetaja.

**Pacuenia Jesús jamatejemayaexana piavitanevi  
Genesaret nacuata yabara pelivaisi**

*(Mt 14.34-36)*

<sup>53</sup>Jesús pijajivi jerata yajavapata puca itsapanabelia. Pata Genesaret nacuayabelia. Peyapatsijera bajarajota puca itapata querataruta.<sup>54</sup> Nexata Jesús, pijajivi yajava, nonotajunaya jeravecua. Bajarajota bepijia jivi yapëtanetsi Jesúsucuenë.<sup>55</sup> Nexata Jesús pepatsijava penatsipaebinxë, navajunucacujinaejinaruta daxita bonëjaya. Nexata piavitanevi pijacamaxita yavëtarapatatsi itsajota jivi jumetane Jesús pepatsijava.<sup>56</sup> Jesús pata tsiquiritomaraxijava, pinijitomaranëjaya ata, tomara-pënëya penaebonëjaya ata. Daxitajava, itsa patomarata Jesús patabiaba, bajarapatomaranëjaya callejavata, jivi tojebabiabatsi piavitanevi. Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuenë bitso netoexanare. Tocopatsianame maponëje pecatojayatsinëxanëxatatsijavacopia, jai tsabiabi.

Nexata daxita pamonaë Jesús penaxatatsijavacopia tojayataponatsi, jamatejema baja tsaponae piavitanejavamivecua.

**Pacuenia Jesús tsipaeba xua jivi jamatabëcuenëbijanatsi yabara pelivaisi**

*(Mt 15.1-20)*

**7**<sup>1-4</sup>Daxita judíovi catsiteca pijasalinaivimi pijacuene. Judíoviyajuvënëvi, pamonaë fariseovi naexana, bajarapamonae bitso catsiteca pijasalinaivimi pijacuene daxita judíovi matatoxenetsia. Jamatabëcuenënavëxaniabiaya jamatabëjumai tsabiabi:

—Itsa catsitecajë tajasalinaivimi pijacuene, nexata Dioso aneconijibia netaena, jamatabëjai tsabiabi.

Nexata bajarapamonae pijasalinaicuenia anijatonë xaniavaetsia itsa apo napënanacobequiatsi, pexaejava apo xaeyabiabi. Itsajota pexaejavacuene canajetabiaba, bajaraverena itsa naviaba pecomuacaecujinaë, bajarapamonae pijasalinaicuenia xaniavaetsia itsa apo napënanacobequiatsi, pexaejava apo xaeyabiabi. Bajarapamonae pematatsënëa navitsia itsacujiruxi ata, pijasalinaivimi pijacujiru, catsiteca. Bajarapamonae tazaxi, mera peyajebinëanë ata, pecasetsinëanë ata, camanë ata, pijasalinaivimi pijacuenia xaniavaetsia quietabiaba. Nexata judíovi pecujarubivi Jerusalén tomaraverena pata. Nexata judíovi pecujarubivi, fariseovi yajava, cu-

jibarenatsi Jesús. Nexata bajarapamonae tane Jesús pijajivi judíovi pijasalinaicuenia anijatonë napënanacobequiatsinejeva penabanijava. Bajaraxuata bajarapamonae jumaitsi Jesúsjavabelia:

—Jesús, nijajivi naneconita Diosojavabelia. <sup>5</sup> Tsipaji nijajivi apo jumecovënëtsiajinavanapae vajasalinaivi pijacuene. Nijajivi itsa xane pexaejava, anijatonë napëna apo nacobequiatabiabi, jai bajarapamonae Jesúsjavabelia.

<sup>6</sup> Jesús nexata jumaitsi bajarapamonaejavabelia:

—¡Paxamë saya jivi paneyamaxëitojorobivi! Diosojumelivaisipaebinëmi profeta Isafaspjinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumaitsijava paxamë yabara profeta Isafaspjinë peyaquinaelivaisita jumaitsi mapacueniaje:

Bajarapamonae nejtisipaena saya pijumeta. Itsiata pepo tanejitsipaenamatabëcuene nevecuatajë tsane. <sup>7</sup> Saya baitsi bajarapamonae pijajumaitsiata tsane: “Pacajitsipatsi,” nejai itajara tsane. Itsiata apo xaniajai tsane. Bajarapamonae saya jivi tsipaebaponaena pejamatabëcuene pijilivaisi. Pepo taitorobilivaisi apo tsipaebi tsane,

jai tajëvelia Dioso pejumaitsijava paxamë yabara Isafaspjinë peyaquinaelivaisita, jai Jesús bajarapamonaejavabelia.

<sup>8</sup> Jesús icatsia jumaitsi fariseovijavabelia, judíovi pecujarubivijavabelia ata:

—Paxamë Dioso papecaitorobicuenia apo paexanaemë. Caranata ëvajasalinaivi pijacuene pacatsitecame. Nexata vajasalinaivi pijacuenia xaniavaetsia paquiatabiabame mera peyajebinëanë. Xaniavaetsia paquiatabiabame tazaxi ata. Pematatsënëa navitsia itsacujiru ata pacatsitecame. <sup>9</sup> Apo pajumecovënëtsimë Dioso pitorobilivaisi vajasalinaivi pijacuene panecatsitecaenexa. Apo pajumecovënëtsi atamë Dioso pitorobilivaisi, jamatabëcuenenavëxaniabiaya pajamatabëjumaitsimë tsabiabi: “Pexaniacuene raja exanajë,” pajamatabëjamë tsabiabi. <sup>10</sup> Bajayata Dioso najumecopata Moisésipjinëta. Bajarapalivaisi jumaitsi: “Axa yaiyataema. Ena ata yaiyataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moisésipjinëta penajumecopatsilivaisi. <sup>11-12</sup> Itsiata baitsi jane paxamë jivi pamuxubijiapenatabiabame peyaiyataeyaniva paxajivi, penajivi ata. Paxamë pajumaitsimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipaemë neyavenonaejava, jumaitsimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata baja acuenebi patacarajutsinexabeje,’ jamë tsane neyavenonaeyaniva,” pajamë tsabiabi jivijavabelia. <sup>13</sup> Nexata caranata Dioso pejumaitsi jume: “Axa yaiyataema. Ena ata yaiyataema,” pejaijume, paxamë jivi pacopabiaexanaponame. Tsipaji paxamë patsipaebaponame saicaya vajasalinaivimi pijalivaisi. Itsalivaisianë ata pematatsënëa saicayacuenia patsipaebaponame Dioso pitorobilivaisivecua, jai Jesús judíovi pecujarubivijavabelia, fariseovijavabelia ata.

<sup>14</sup> Nexata icatsia Jesús junata jivi. Jumaitsi jivijavabelia:

—Daxita paxamë panenamuxunaevere xaniavaetsia patanejumeyapëtaenexamë.

<sup>15</sup> Xua jivi pecuibota xane, pexaevajënae napëna anijatonë apo nacobequiatsi ata, apo jamatabëcuenebijianaetsi. Apo vënananeconitsi Diosojavabelia. Baitsi rajane xua jivi najamatabëxaina pejamatabëthëtovetsina, xua ata pibisiacuenia cuaicuai-

jai, bajara baitsi jane xua jivi bajamatabëcuenebijnatsi. <sup>16</sup> Pajivi jamatabëne-jumeyapëtane patacatsipaebilivaisi, nenamuxunaevetsi xaniavaetsia, jai Jesús.

<sup>17</sup> Itsa baja Jesús jivivecua natixita, boya joneya. Nexata boyalia pijajivi yanijobatsi bajarapalivaisi. <sup>18</sup> Nexata Jesús jumaiti pijajivijavabelia:

—¿Paxamë ata tsarovia abaxë apo panejumeyapëtaemë? Daxitacuene raja pexaejava jivi xae ata, apo jamatabëcuenebijnatsi. Diosjavabelia apo vënananeconitsi. <sup>19</sup> Tsipaji raja jivi pexaejava apo tsijamatabëëthëjonetsi. Saya pënëareca joneca. Bajaraxuacujinae icatsia vecuapitsapatsi, jai Jesús.

Bajarapacuenia Jesús jumaiti Jesús pijajivi peyapëtaeyaexanaenexa pacuenia daxitacuene jivi pexaejava xae ata, apo pibisiacuene.

<sup>20</sup> Icatsia Jesús jumaiti:

—Baitsi rajane jivi pejamatabëëthëtojavavetsina, papibisiajamatabëcuene pitsapa, bajara baitsi jane xua jivi jamatabëcuenebijnatsi. <sup>21</sup> Tsipaji rabaja jivi pejamatabëëthëtojavavetsina pitsapa pibisiacuene penajamatabëxainanexa. Pitsapa pebi pijava pevecuanamatayajitsi jamatabëcuenenexa. Pitsapa petiriravijavabelia pebi penaperabëquenetsiatae jamatabëcuenenexa. Pitsapa petiriravijavabelia pebi penaperabëquenetsiatae jamatabëcuenenexa. <sup>22</sup> Pitsapa penacobetoxotsijamatabëcuenenexa. Pitsapa itsamonae pecobecovë penaxainaejabijamatabëcuenenexa. Pitsapa piacujirubejamatabëcuenenexa. Pitsapa itsamonaejavabelia peyamaxëitojorobjamatabëcuenenexa. Pitsapa itsamonae pexainaeacuene pecobecaëbijamatabëcuenenexa. Pitsapa itsajivi pibisiacuenia pebaracuacuajai jamatabëcuenenexa. Pitsapa ayaijamatabëcuenejivi penataejamatabëcuenenexa. Pitsapa saya jema peponaponejamatabëcuenenexa. <sup>23</sup> Daxita bajarapajamatabëcuene jivi pejamatabëëthëtojavavetsina pitsapa. Nexata bajarapacuenia jivi jamatabëcuenebijnatsi, jai Jesús pijajivijavabelia.

**Pacuenia Jesús itsanacuapijiva pexënatoyo  
tojamatejemayaexana yabara pelivaisi**

*(Mt 15.21-28)*

<sup>24</sup> Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Nexata Jesús bajarapanacuatatia bota patajopa. Muetsia picani Jesús patsijitsia. Itsiata acuenebi muetsia pepatsijava. <sup>25</sup> Nexata bepimia petiriva vënëlivaisitaetabatsi Jesús pepatsijava. Nexata petiriva pata Jesúsjavaberena. Nexata bajarapova yayataeya Jesús pitabarata pe-matabacabëta nucajunua. Bajarapova pexënatoyo dovathi yajavaponapona. <sup>26</sup> Bajarapova sirofeniciaviriava, apo judíova. Nexata Jesúsjavabelia jumaiti:

—Pexaniacuene bitso netoexanare. Taxënatovayo netovecuacapitsapare dovathi, jai bajarapova.

<sup>27</sup> Nexata Jesús jumaiti bajarapovajavabelia:

—Copiaya abaxë veyavenonajë tajanacuapijivi, judíovi. Tsipaji apo xanepanae xamë itsanacuapijivamë copiaya tacayavenonaenexa. Xamë copiaya itsa cayavenonaejitsipatsi, nexata pacuenia pejevaxi pexaejavaminexa yacajërëtsipajë tarajutsinexa avirixijavabelia, bajara itsinë tsipae, jai Jesús bajarapovajavabelia.

<sup>28</sup> Itsiata baitsi jane bajarapova ajumesaë taponae. Icatsia jumaiti Jesúsjavabelia:

—Xaniajamë rabaja picani. Itsiata neyavenonare. Tshipaji avirixi ata mesa bëxëpanata itsa nubena, nexata pejevaxi pexaepanpërë itsa othopareca mesa bëxëpanareca, banaxane avirixi ata. Bajara pijinia pacuenia itsiata itsanacuapijiva atanë, neyavenonare, jai bajarapova Jesúsjavabelia.

<sup>29</sup> Nexata icatsia Jesús jumaitsi bajarapovajavabelia:

—Xaniavaetsia nejumecanaviatame. Naviare baja nijaboyabelia. Dovathi rabaja catovecuapitsapatsi nexënatovayo, jai Jesús.

<sup>30</sup> Itsa baja bajarapova pijaboyabelia pata, pexënatovayo taeyabuata jamatejema baja pebocaejava camata. Nexata yapëtane pexënatovayo baja petovecuapitsapaejavatsi dovathi.

### **Pacuenia Jesús jamatejemayaexana bitso siyanë, apo pejumetaenë, piajumecëcënë, yabara pelivaisi**

<sup>31</sup> Jesús baja naropota Tiro nacuavevua. Najetaruca Sidón nacuajava. Bajaraxuacujinae najetaruca Decápolis nacuajava. Bajaraxuacujinae patajopa Galilea pucaxanetojavabelia. <sup>32</sup> Bajarajota jivi tocapatatsi siyanë, bitso apo pejumetaenë, piajumecëcënë. Nexata bajarapamonae jumaitssitsi Jesúsjavabelia:

—Jesús, pexaniacuene panetoexanare. Panetojayare maponëje pejumetaenexa, pecuaicuajainexanua, jai bajarapamonae.

<sup>33</sup> Nexata Jesús jivivevua bajaraponë barëpona pesaicaeyojavabelia. Nexata Jesús pecobesitota namataenetsia muxuvojobëta. Bajaraxuacujinae nacobesioniata. Ebarëtojayata. <sup>34</sup> Nexata Jesús athëbëa benaëcotsia. Jesús athëbë venajumalixuabica. Nexata Jesús pijajumeta jumaitsi bajaraponëjavabelia:

—¡Efata! jai.

“Efata,” pejaijume Jesús pijajumeta, mapajumetaje pejumaitssijume: “¡Muxuvojorucaremelia!” pejaijume.

<sup>35</sup> Bajarapacuenia Jesús pejumaitssijavata, bajaraponë muxuvojorucalia baja. Jumetane jane baja. Peebarëto ata jane baja xanepana. Natsipaeba baja xaniavaetsia. <sup>36</sup> Nexata Jesús jumaitsi bajaraponë petocapatsivitsijavabelia:

—Pëtsa papaebame itsamonaejavabelia pacuene exanajë maponëjavabeliaje, jai picani Jesús asaëyata.

Itsiata bajarapamonae jumeitavetsi atatsi, bitso tsipaebapona jivijavabelia. <sup>37</sup> Nexata pamonae jumetane bajarapalivaisi, pinijicuenia jamatabëcuenenabenajaca. Bajarapamonae jumaitsi:

—Bajaraponë, Jesús, daxitacuenevitane pexainaevi ata xaniavaetapona. Siyavi ata, bitso apo pejumetaevimi ata, jumetaeyaexanapona. Apo pecaëjëpaevitsi ata pecuaicuajaijava, cuaicuajaiyaexanapona xaniavaetsia, jai bajarapamonae Jesús yabara.

### **Pacuenia Jesús rajuta pexaejava bejamatabëcuene cuatro mil pajivibeje yabara pelivaisi**

*(Mt 15.32-39)*

**8** Itsamatacabi Jesús jivibitsaëtoxaneto muxunanacaetuatatsi. Nexata bajarapamonae penabaninexa, bajarajota pexaejava apo xainae. Nexata Jesús junata pijajivi. Jesús jumaitsi pijajivijavabelia mapacueniaje:

<sup>2</sup>—Netsitabejiobi baja rovia mapamonaaje. Tsipaji baja ajena acueyabi pamat-acabibeje xaina xanëjavata pejinavanapaecujinae. Pemarue baja tovereverecatsi. <sup>3</sup>Itsa meta itorobijitsipajë pijabonëjavabelia peponaenexa pexaejava xaenejeva, apo asaë meta tsipae namutua peponaajava. Tsipaji raja itsamonaë pata tajëverena, jai Jesús pijajivijavabelia.

<sup>4</sup>Nexata Jesús pijajivi jumaitsi:

—¿Detsa jane pacuenia pexaejava berajutatsi? Majotaje ajibi pexaejava. Tsipaji itsajivi ata pijabo apo xainae, jai Jesús pijajivi.

<sup>5</sup>Nexata Jesús yanijoba pijajivijavabelia.

—¿Detsa papanbëbeje paxainame? jai.

Nexata Jesús pijajivi jumaitsi:

—Siete papanbëbeje paxainajë, jai.

<sup>6</sup>Nexata Jesús itoroba daxitajivi penaenexa irata. Nexata Jesús pita siete papanbëbeje. Nexata Diosojavabelia Jesús jumaitsi:

—Pexaniacuene panetoexaname. Panerajutame pataxaejava, jai.

Bajaraxuacujinae Jesús epatsicacapona pan. Nexata Jesús pepatsicacaepan rajutapona pijajivijavabelia. Nexata juya Jesús pijajivi bajarapapan tsicobetsana daxitajivi pexaenexa. <sup>7</sup>Dujuainëxinua xaina. Icatsia Jesús jumaitsi Diosojavabelia dujuainëxi yabara:

—Pexaniacuene panetoexaname. Panerajutame dujuainëxi, jai.

Nexata icatsia pijajivi itoroba petsicobetsanaenexa daxitajivi bajarapadujuainëxi. <sup>8</sup>Daxitajivibitsaëtoxaneto nabane xaniavaetsia. Nexata peyajuvënëcopabijavanë Jesús pijajivi caetuata. Vënëba siete xuabeje bemapirecuenia pexanaejavanë. <sup>9</sup>Pexaejava nabane bejamatabëcuene cuatro mil pajivibeje. Nexata jane baja pexaejava pexaecujinae, Jesús jivi naviabiaexana pijabonëjavabelia. <sup>10</sup>Bajaraxuacujinae Jesús, pijajivi yajava, runareca jera ënëabereca. Jesús pijajivi barëpona Dalmanuta nacuyabelia.

**Pacuenia fariseovi Jesús itorobatsi Dioso pesaëta pinijicuene  
pexanaejava petsitaexanaenexa picani yabara pelivaisi**

*(Mt 16.1-4; Lc 12.54-56)*

<sup>11</sup>Fariseovi Jesúsjavaberena pata. Bajarapamonae jamatabëcueneëjëbiaya jumenotaponatsi. Nexata bajarapamonae jumaitsi Jesúsjavabelia:

—Jesús, Dioso pesaëta pinijicuene exanare. Nexata pacacueneyapëtaenatsi Dioso pepacuene athëbëvetsica pecaitorobinëcuenetsica, jai.

<sup>12</sup>Nexata bajarapamonae yabara Jesús bitso jamatabëcuenebëjai. Nexata Jesús athëbë venajumalixuabica. Jumaitsi:

—¿Detsa xuajitsia panevajëcame pinijicuene patacatsitaexanaenexa pataneyapëtaenexamë pepacuene Dioso athëbëvetsica taneitorobinëcuenetsica. Xaniajanë pacuenia pacatsipaebijitsiatsi. Itsiata apo pacatsitaexanaetsi tsane pinijicuene taexanaejava, jai Jesús.

<sup>13</sup>Nexata baja Jesús bajarapamonae vecuapona. Icatsia runareca jera ënëabereca. Pucaxaneto itsapanabelia baja Jesús pona.

**Pacuenia Jesús pijajivi muxujioba fariseovi petsipaebilivaisi  
pejumecovënëtsiyaniva yabara pelivaisi**

(Mt 16.5-12)

<sup>14</sup> Jesús pijajivi nacofënëta pamarue. Nexata saya caepanbëyo capona jer-ata. <sup>15</sup> Nexata Jesús pijajivi muxujioba pejumecovënëtsiyaniva fariseovi itsa tsi-paebatsi saicayacuenia Dioso pejumelivaisivecua. Jesús jumaitsi pijajivijavabelia mapacueniaje:

—Panejumetaema. Xania panayajivitaema fariseovi pijalevadura, jai Jesús pijajivijavabelia.

Bajarapacuenia Jesús jumaitsi fariseovi petsipaebilivaisi, nacuaevetsinë ata, Herodes, petsipaebilivaisi, Jesús pijajivi pejumecovënëtsiyaniva.

<sup>16</sup> Itsiata Jesús pijajivi apo jumeyapëtaetsi. Bajaraxuata Jesús pijajivi nabarëcuaicuajai bajarapacuenia Jesús pejumaitsiyume yabara. Jesús pijajivi najumaitsi:

—Jesús nacajumaitsi: “Xania panayajivitaema fariseovi pijalevadura,” nacajai. Baja raeta pacuenia Jesús nacajumaitsi pan apo vajacaponaeaxae, najai Jesús pijajivi.

<sup>17</sup> Jesús pijajivi jamatabëcueneyapëtane bajarapacuenia jamatabëcuenenavëxani-abiaya penajumaitsiyava levadura yabara. Nexata Jesús jumaitsi pijajivijavabelia:

—¿Detsa xuajitsia panajumaitsimë: “Baja raeta pacuenia Jesús nacajumaitsi pan apo vajacaponaeaxae,” panajamë? Paxamë abaxë apo panejumeyapëtaemë xua yabara pacajumaitsi. Pajamatabëcuenetajamë bitso. <sup>18</sup> Pan yabara raja apo paca-jumaitsi. Pan itsa namatavenonaejitsipatsi, necaëjëpa taexanaenexa. ¿Apo pana-jamatabënapitsimë tsipaji pacuenia exanajë pamatacabi pan namatavenonatsi? <sup>19</sup> Pacujinae epatsicacajë cinco papanëmibeje panetsicobetsanaenexa cinco mil ponëbejejavabelia, bajarapacujinae peyajuvënëcopabijavanë, ¿detsa xuabeje pavënëtamë bemapirecuenia pexanaejavanë? jai Jesús pijajivijavabelia.

Nexata Jesús pijajivi jumaitsi:

—Doce xuabeje pavënëtajë, jai.

<sup>20</sup> Jesús icatsia jumaitsi:

—Pacujinae epatsicacajë siete papanëmibeje panetsicobetsanaenexa cuatro mil pajivibejejavabelia, bajarapacujinae peyajuvënëcopabijavanë, ¿detsa xuabeje pavënëtamë bemapirecuenia pexanaejavanë? jai Jesús.

Nexata Jesús pijajivi jumaitsi:

—Siete xuabeje pavënëtajë, jai.

<sup>21</sup> Nexata Jesús jumaitsi pijajivijavabelia:

—¿Panejumeyapëtaneme tsabaja pan yabara apo patacajumaitsiyava? Xanë paca-jumaitsi: “Xania panayajivitaema fariseovi pijalevadura,” pacajaitsi. Bajarapacue-nia pacajumaitsi panejumecovënëtsiyaniva fariseovi petsipaebilivaisi, panejume-covënëtsiyaniva nacuaevetsinë ata Herodes. Tsipaji bajarapamonae pacatsipaebiana saicayacuenia Dioso pejumelivaisivecua, jai Jesús pijajivijavabelia.

**Pacuenia Jesús itaxutoxaniavaeta bitso pitaxutotsëcënaenë, apo  
petaenë tsiquirijavayo ata, yabara pelivaisi**

<sup>22</sup> Jesús, pijajivi yajava, patajopa Betsaida tomarata. Nexata Jesús tocanajetarube-natsi bitso pitaxutotsëcënaenë, apo petaenë. Pinijcuenia vajëcatsi Jesús pitaxuto-



jayatsinexa bajaraponë pitaxutoxanepanaenexa. <sup>23</sup>Nexata Jesús cobepita. Barëpona pesaicaeyojavabelia, tomarapënëyabelia. Nexata bajarajotalia Jesús peionitota itaxutoexaba. Itaxutojayata. Bajaraxuacujinae Jesús yanijoba.

—¿Cacaëjëpa tsabaja netaejava? jai Jesús.

<sup>24</sup>Nexata bajaraponë naëcota. Jumaitsi:

—Taniji pebijivi pejinavanapaejava. Itsiata saya benetsita naejavanë, jai bajaraponë.

<sup>25</sup>Nexata icatsia Jesús itaxutojayata. Bajara jane xaniavaetsia naitaxutobabatsiya naëcota. Itaxutoxanepana jane baja. Xaniavaetsia baja tane. <sup>26</sup>Nexata Jesús jumaitsi bajaraponëjavabelia:

—Naviare nijaboyabelia. Pëtsa abaxë poname tomarabelia. Pëtsa paebame itsajivijavabelia ata pacuene caexanatsi, jai Jesús.

**Pacuenia Pedro jumaitsi Jesúsjavabelia:  
“¿Xamë raja Cristomë! jai yabara pelivaisi**

*(Mt 16.13-20; Lc 9.18-21)*

<sup>27</sup>Jesús, pijajivi yajava, najetaruca. Pona pepatsinexa Cesarea de Filipovënë tomarajumaverena penaetomaraxijavabelia. Namutua abaxë penajetarubenaejavata Jesús jumaitsi pijajivijavabelia:

—¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

<sup>28</sup>Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinëmi raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepabinëmi raeta, profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Bajayata raeta Diosojumepabivimi profetavimiya-juvënë icatsia asaë,” jai tsabiabi xamë yabara, jai Jesús pijajivi.

<sup>29</sup>Nexata icatsia Jesús jumaitsi pijajivijavabelia.

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

Nexata Pedro jumaitsi Jesúsjavabelia:

—Xamë cajena Cristomë, athëbëvetsica Dioso peccatorobinëtsica jivi necapanepaenexa, jai Pedro Jesúsjavabelia.

<sup>30</sup>Nexata Jesús pijajivijavabelia jumaitsi:

—Pëtsa bajarapacuenia itsajivijavabelia papaebame. “Cristo raja,” pajamë pëtsa xanë yabara, jai Jesús.

**Pacuenia Jesús tajëvelia navajunupaeba  
pebeyaxuabijavanexatsi yabara pelivaisi**

*(Mt 16.21-28; Lc 9.22-27)*

<sup>31</sup>Jesús pebeyaxuabijavanexatsi, tajëvelia navajunupaeba pijajivijavabelia. Jumaitsi mapacueniaje:

—Xanë, Daxitajivi Pematapijinënë, pinijicuenia bejiobinë tsane. Judíovi pijaancianovi, sacerdotevi penamatacaitorobivinia, judíovi pecujarubivinia, apo nejumecovënëtsi tsane Cristonëcuenënë. Nexata bitso nebejiobiaexanaena. Bajaraxuacujinae nebeyaxuabiana. Itsiata baitsi jane tatëpaecujinae, acueyabi matabacita,

icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

<sup>32</sup> Jesús jumenapebetsiaya pijajivi xaniavaetsia tsipaeba mapajumeje. Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—Pëtsa bajarapacuenia cuaicuaijamë netëpaejavanexa yabara, jai Pedro Jesúsjavabelia.

<sup>33</sup> Nexata Jesús Pedrovecua napënëyorotaxuaba. Taenuca pijajivi penaejavabelia. Nexata Jesús napënëyorotsia jumai tsanucæ Pedrojavabelia:

—¡Dovathi, nevecuanatixire! Tsipaji xamë apo jitsipaemë pacuenia Dioso jitsipa taexanaenexa. Saya ëjivi pacuenia jitsipa taexanaenexa, jitsipame, jai Jesús.

<sup>34</sup> Nexata Jesús junata pijajivi, daxita jivibitsaëto yajava. Jumaitsi bajarapamonaejavabelia:

—Pajivi jitsipa tanepënaponaejava, bajarapajivi copatsi pejitsipaecuenia pexanaenexa penajamatabëxainabiabijavami. Exanapononae taitorobicuenia. Najamatabëcueneveretsinua bejiobiaexanaejitsia atatsi, beyaxuabijitsia atatsinua, Dioso pejumelivaisi yabara piyajamatabëcuenesaë tsaponaponæenexa. Nexata jane baja xuacujinae nepënaponaena. <sup>35</sup> Pajivi exanaponona penatojitsipaecuenia, apo xainæ tsane matacabi apo peverevereæejava. Pajivi xanë tajamatabëcueneta copata penatojitsipaecuenia pexanabiabijavami, jivi tacapanepaelivaisitanexa pejamatabëcuenetanua, bajarapajivi xainaena matacabi apo peverevereæejava. <sup>36</sup> Pajivi exanaponona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainæ ata mapanacuapijicuenije, itsiata nacuerata. Tsipaji pexinaecuenie apo capanepæ tsanetsi Diosojavabelia. <sup>37</sup> Tsipaji acuenebi tsane itsajivi ata pematamotsinexa penaxuabiyaniava Diosovecua. <sup>38</sup> Pajivi tajajivitonë ata, Dioso apo pejumecovënëtsivi tuatuajëta, pibisiacuene pexanaevi tuatuajëta ata, navënëlivaisicaura tsane xanë tajajivitonëcuene, tanejumecovënëtsijava ata yabara, nexata juya xanë bajarapajivi, tajajivitonë ata, tajajivitonëcuene vënëlivaisicauranë tsane taxa Diosojavabelia. Bajarapajivi vënëlivaisicauranë tsane pamatacabi icatsia patsianicajë. Baitsi pamatacabi xanë, Daxitajivi Pematapijinënë, ångelevi yajava, patsianicajë, pamatacabi yajavapatsianicajënuu taxa Dioso pijapenivenivenæcotia, jai Jesús pijajivijavabelia.

**9** Icatsia Jesús jumaitsi jivijavabelia:

—Xaniajanë pacuenia pacatsipaebijitsiatsi. Daxita paxamë patëpaenejevamë, Dioso taxuxuabiana pijajivi pevetsijava mapanacuataje. Nexata paxamëyajuvënëvi pepuatae tsane Dioso petaxuxuabijava pijajivi pevetsijava mapanacuataje, tæpaena. Dioso raja pijajivi evetsiana pinijijamatabëcuenesaëta, jai Jesús jivijavabelia.

### **Pacuenia Jesús caepatoyo perabënivenivenataba yabara pelivaisi**

*(Mt 17.1-13; Lc 9.28-36)*

<sup>2</sup> Jesús petëpaejavanexa tajëvelia penavajunupaebicujinae, seis pamatacabibejecujinae, Jesús pijajivi, acueyabi ponëbeje, barëpona pinijitsutoxanetojumabetsia. Jesús barëjunaya mapamatabëxëyoje: Pedro, Santiago, Juan. Bajarapamatabëxëyo Jesús barëjunaya pinijitsutoxanetojumabetsia. Nexata petsutojumatsia Jesús perabënivenivena bajarapamonæ pitabarata. <sup>3</sup> Jesús penaxatatsijava bitso nivenivena. Bitso niojai. Mapanacuataje pexaniaquiatsiva ata apo caëjæpaetsi bajarapacuenia pe-

niojaiyaexanaenexa. <sup>4</sup> Jesús pijajivi bajarajota tane jemata penaitajétsijava bajayata petēpaenēmibeje, Elíaspijinēbeje Moiséspijinēbeje. Jesús barēcuaicuaijaisi bajaronēbeje. <sup>5</sup> Nexata Pedro jumaiti Jesúsjavabelia mapacueniaje:

—¡Patajatuxanenē, pijacuaxae panebarēponame! Pacatoexanaenatsi acueyabi pabobērētoheje. Itsabobērēto xamēnexa tsane. Itsabobērēto Moisésnexa tsane. Itsabobērēto Elíasnexa tsane, jai Pedro Jesúsjavabelia.

<sup>6</sup> Bajarapacuenia Pedro jumaiti Jesúsjavabelia canaējētsinejeva. Tsipaji bitso bajarapamonae najunaviaca. Nexata apo yapētae pacuenia jumaitisijitsia. <sup>7</sup> Nexata daxita bajarapamonae pematatsēnēvetsica itarērēbo mataacataxuabatsi. Nexata bajarapamonae jumetane bajarapaitarērēbojavavetsica Dioso pejumaitisijava.

—Mara ponē taxēnato, tasivanēje. Panamuxunaevere bajaraponē, jaisica Dioso Jesús pijajivijavabelia.

<sup>8</sup> Bajarajota bajarapamonae itsa naēcobarēcēpalia Jesúsjavabelia, ajibi baja bajaraponēbeje. Caenē baja Jesús nuca.

<sup>9</sup> Nexata Jesús pijajivi itsa barērūnanucaponaica petsutojumavetsica, jumeitaveta pijajivi. Jumaiti pijajivijavabelia:

—Pētsa patsipaebame itsajivi ata pacuene pataneme. Matapania xanē, Daxitajivi Pematapijinēnē, icatsia asaēnē tsane tatēpaecujinae, nexata jane baja matapania patsipaebianame, jai Jesús pijajivijavabelia.

<sup>10</sup> Bajarapamonae, acueyabi ponēbeje, jumecovēnēta pejumaitsicueniatsi. Itsiata ēpamonae nayanijobabiaba.

—Jesús jumai tsabiabi: “Tatēpaecujinae icatsia asaēnē tsane,” jai tsabiabi. ¿De tsamēra pajamatabēcuene xaina bajarapalivaisi? najai tsabiabi bajarapamonae.

<sup>11</sup> Nexata Jesús pijajivi yanijoba Jesúsjavabelia. Jesús pijajivi jumaiti:

—Patajatuxanenē, ¿detsa xuajitsia judíovi pecujarubivi jumai tsabiabi: “Bajayata ponēmi ponapona, Elíaspijinē, petēpaecujinae icatsia asaē tsane. Bajaraponē copiata patsiana. Bajaraxuacujinae patsiana Cristo, ponē Dioso athēbēvetsica itorobijitsiatsica pepo vajanacacapanepaenēnexa jane baja,” jai tsabiabi? jai Jesús pijajivi Jesúsjavabelia.

<sup>12</sup> Nexata Jesús jumaiti pijajivijavabelia:

—“Copiata Elíaspijinē patsiana. Nexata bajaraponē jamatabēcuenexanetsiana daxitajivi,” itsa jai, Juanpijinēmi jivibautisabinēmi yabara jumaiti. Nexata baja xaniajai pacuenia judíovi pecujarubivi jumaiti. Tsipaji baja Juanpijinē tavajēnaeya jivi jamatabēcuenexanetanajetaruca. Xanē, Daxitajivi Pematapijinēnē, athēbēvetsica Dioso nitoroba jivi tacapanepaenexa. Nexata xanē yabara tajēvelia Dioso pejumelivaisibaxutota jumaiti mapacueniaje: “Bejiobi tsane pinijicuenia. Apo jitsipaetsi tsane. Naitaxutojematsianatsi,” jai xanē yabara tajēvelia Dioso pejumelivaisibaxutota, jai Jesús pijajivijavabelia.

<sup>13</sup> Jesús icatsia jumaiti pijajivijavabelia Juanpijinēmi yabara:

—Xaniajanē pacuenia pacatsipaebijitsiatsi. Elíaspijinē rabaja patajopa. Pepatsicujinae baja exanatsi daxita pacuenia jamatabēexanatsi. Nexata exanatsi pacuenia baja cajena Dioso pejumelivaisibaxutota tajēvelia jumaiti bajaraponēmi yabara, jai Jesús pijajivijavabelia Juanpijinēmi yabara.

**Pacuenia Jesús jamatejemayaexana pejevaxinē, dovathi  
peyajavaponaponaeñē, yabara pelivaisi**

(Mt 17.14-21; Lc 9.37-43)

<sup>14</sup> Jesús pijajivi, acueyabi ponēbeje, petsutojumabetsia pebarēponaecujinae, icatsia barēnaviatsica. Itsamonae Jesús pijajivi pepuenetsivijavabetsica, barēnaviat-sica. Nexata Jesús tane pijajivi jivibitsaētoخانeto pevajēnae pematatoyoronaēja-vatsi. Jesús tanenua judfovi pecujarubivi anaeya pejumenotsijavatsi Jesús piija-jivi. <sup>15</sup>Nexata bajarapamonae itsa taerēcēpa Jesús, daxita jamatabēcuenēbarēyaya cujinaeyeca Jesúsjavabelia pebajacobinexatsi Jesús. <sup>16</sup>Nexata Jesús jumaitsi bajarapomonaējavabelia:

—¿Detsa xua yabara panajumeanaenotame pinijicuenia? jai Jesús.

<sup>17</sup>Caenē bajarapajivi bitsaētoخانetoyajuvēñēñē jumaitsi Jesúsjavabelia:

—Jesús, mara picani taxēnatonēyo, dovathi peyajavaponaponaeñēyo, catocanaje-tarucatsije. Maponēyoje dovathi apo netonatsipaēbiaexanaetsi. <sup>18</sup>Itsa raja dovathi vaetababiabatsi, irata xuababiabatsi. Nexata bajarajota pecuiboathamu tsabiabi. Vonoquiraquirajainua tsabiabi. Daxitanēyo aperabēbaba tsatababiabireca. Picani raja nijajivijavabelia jumaitsinē: “Panetovecuacapitsapare dovathi,” janē. Itsi-ata bajarapamonae apo caējēpaetsi tanetovecuacapitsapaenexa, jai bajaraponē Jesúsjavabelia.

<sup>19</sup>Jesús nexata jumaitsi pijajivijavabelia:

—¡Paxamē baja rovia apo pajumecovēñētsimē Dioso papecayavenonaejavanexa! Bajaraxuata apo pacajamatabēcuenēcaējēpae pejevaxinē panevecuacapitsapaenexa dovathi. ¿Detsa paepatojebi abaxē paxamējavata ponaponaeñajē? ¿Detsa paepato-jebi abaxē paxamējavabelia ajamatabēcuenesaēñē tsaponaponae tsane patanejume-covēñētsinexamē? Panetocarenamēre pejevaxinē, jai Jesús pijajivijavabelia.

<sup>20</sup>Nexata tocarenatsi Jesús pejevaxinē. Dovathi itsa tanetsi Jesús, nexata icatsia bajarajota dovathi pejevaxinē tēpajoneyaexanatsi. Irata xuabatsi pejevaxinē. Nex-ata pejevaxinē natorenaba irata. Pethamu pitsapa pecuibuatsina. <sup>21</sup>Nexata Jesús yanijoba pejevaxinē paxajavabelia.

—¿Detsa pamatacabibeje xaina petaxuxuabicujinaetsi mapacuneje? jai Jesús.

Nexata pejevaxinē paxa jumaitsi:

—Penacuetojavaveliacujinae cajena taxuxuabatsi. <sup>22</sup>Bajayajebi picani isoto-javalia dovathi netoxuababiabaliatsi. Menialia ata netoxuababiabaliatsi. Beyaxuabi-jitsiatsi bajarapacuenia. Xamē itsa cacaējēpa itsacuenia ata taneyavenonaeñexamē, ¡nitaxutotsoniataema! ¡Neyavenonare! jai pejevaxinē paxa Jesúsjavabelia.

<sup>23</sup>Nexata Jesús jumaitsi pejevaxinē paxajavabelia:

—Pajivi jumecovēñēta Dioso peyavenonaejavanexatsi, bajarapajivi Dioso yavenonatsi daxita xua namatavenona, jai Jesús.

<sup>24</sup>Nexata pejevaxinē paxa aējai. Jumaitsi:

—¡Jumecovēñētajē baja cajena! ¡Neyavenonare bitso orijibia tajumecov-ēñētsinexa! jai bajaraponē Jesúsjavabelia.

<sup>25</sup>Nexata Jesús itsa tane jivibitsaētoخانeto penacaetuataponaejava Jesúsjavaber-ena, nexata Jesús itaveta dovathi. Jumaitsi:

—Dovathi, xamë pejevaxinë apo nenatsipaebiaexanaenë. Apo nejumetaeyaexanaenëna. Xanë caitavetatsi. Pitsapare mapapejevaxinëvecuaje. Pëtsa baja icatsia junuame matavëjëa maponëyojavaberenaje, jai Jesús dovathijavabelia.

<sup>26</sup> Nexata dovathi pejevaxinë icatsia aëjayaexanatsi. Tëpajoneyaexanatsi. Vecuapitsapatsi jane baja. Puenetabuatatsi bepetëpaenëyo. Nexata itsamonae bajara-jota jumaitsi:

—Pejevaxinë rabaja tëpa, jai bajarapamonae.

<sup>27</sup> Nexata Jesús cobepita pejevaxinë. Cobeveatabiaya yotsina. Nexata pejevaxinë nonotabapuna.

<sup>28</sup> Nexata xuacujinae Jesús boya itsa joneya, Jesús pijajivi jumaitsi:

—¿Detsa xuajitsia meta paxanë apo panecaëjëpae patavecuacapitsapaenexa dovathi? jai Jesús pijajivi.

<sup>29</sup> Nexata Jesús jumaitsi pijajivijavabelia:

—Mara paviria dovathije apo jitsipae pepitsapaejavaje. Matapania panexaejava apo paxaemë tsipae panevajëtsinexa asaëyata Diosojavabelia panecapitsapaenexa dovathi, pitsapaejitsipa, jai Jesús pijajivijavabelia.

### **Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi**

*(Mt 17.22-23; Lc 9.43-45)*

<sup>30</sup> Jesús pejevaxinë dovathi pevecuacapitsapaecujinae, Jesús baja, pijajivi yajava, pona. Nexata Jesús, pijajivi yajava, najetaruca Galilea nacujajava. Jesús jitsipa pijajivi pebarënajetarucaenexa bajaraxuayo itsajivi ata yapëtaenejevatsi. <sup>31</sup> Tsipaji Jesús pebeyaxuabijavanexatsi, tajëvelia navajunupaebaona pijajivijavabelia. Jumai tsaponae Jesús pijajivijavabelia mapacueniaje:

—Xanë, Daxitajivi Pematapijinënë, necanajetsiana itsamonae pecobeyabelia. Bajarapamonae nebeyaxuabiana. Itsiata baitsi jane tanebeyaxuabicujinae, acueyabi matabacaba, icatsia asaënë tsane, jai tsaponae Jesús pijajivijavabelia.

<sup>32</sup> Itsiata pijajivi apo jumeypëtaetsi. Bajarapamonae ajumeura Jesúsjavabelia peyanijobinexa bajarapalivaisi yabara.

### **Pacuenia Jesús pijajivi: “¿Detsa ponë vaxaitsiyajuvënëne nacavecuayajamatabëcuenenë bitso?” najai tsanajetarubenaë yabara pelivaisi**

*(Mt 18.1-5; Lc 9.46-48)*

<sup>33</sup> Jesús pijajivi barëpata Capernaum tomarata. Jesús pijajivi pebarëpatsicujinae, boyalia itsa barëjoneya Jesús, yanijoba pijajivijavabelia.

—¿Detsa pitsicuene yabara namutua bitso panajumenotanajetarubenaë? jai Jesús.

<sup>34</sup> Nexata Jesús pijajivi moya. Tsipaji Jesús pijajivi namutua najumaitsi tsanajetarubenaë:

—¿Detsa ponë vaxaitsiyajuvënëne nacavecuayajamatabëcuenenë bitso? najai tsanajetarubenaë Jesús pijajivi.

<sup>35</sup> Nexata Jesús eca. Junata pijajivi, doce ponëbeje. Jumaitsi pijajivijavabelia:

—Pajivi jitsipa ayaijamatabëcuenejivi penaexanaenexa daxitajivi matatoxenetsia, bajarapajivi beveliajamatabëcuenejivi natae peyavenonaenexa daxitajivi, jai Jesús pijajivijavabelia.

<sup>36</sup> Bajaraxuacujinae Jesús cobepita pejevaxinëyo. Pijajivi pitabarata nuteta. Bajaraxuacujinae Jesús isapita. Jumaitsi pijajivijavabelia:

<sup>37</sup> —Pajivi copiapita tanejumecovënëtsijiviyo, mapitsipejevaxinëyo ataje, xanë taniji tanecopiapitsijava. Pajivi necopiapita, ëxanë apo necopiapitsi. Ponë nitoroba, neyjavacopiapita, jai Jesús pijajivijavabelia.

**Pacuenia Jesús jumaitsi pijajivijavabelia itsa vënëlvaisitane itsanë dovathi jivivecua pecapitsapaejava Jesús pevënëta yabara pelivaisi**

*(Mt 10.42; Lc 9.49-50)*

<sup>38</sup> Jesús pijajivitonë, Juan, jumaitsi Jesúsjavabelia:

—Tajatuxanenë, pataniji itsanë nevënëta dovathi jivivecua pecapitsapaejava. Itsiata bajaraponë apo paxanëyajuvënënë. Nexata paitavetajë bajaraponë dovathi jivivecua pecapitsapaponaejava, jai Juan.

<sup>39</sup> Nexata Jesús jumaitsi Juanjavabelia:

—Pëtsa paitavetame bajaraponë. Tsiipaji raja pajivi pinijicueene pexanaejava exana tavënëta, bajaraxuacujinae acuenebi bajarapajivi tanebaranatsipaebinexa pibisiacuenia. <sup>40</sup> Tsiipaji raja pajivi pibisiacueene apo najamatabëxainae vaxaitsijavaberena, bajarapajivi nacajamatabëcueneyavenona. Bajarapajivi bevaxaitsijamatabëcuenejivi. <sup>41</sup> Xaniajanë pacuenia pacatsipaebijitsiatsi. Pajivi tsiquirijavayo ata mera pacarajutsiana paneapaenexa patajajivixaemë, bajarapajivi pepacueene Dioso matamotsianatsi mera papecarajutsimatamo, jai Jesús Juanjavabelia.

**Pacuenia Jesús pijajivi muxujioba itsajivi ata pibisiacueene pexanaeyaexanaeyaniva yabara pelivaisi**

*(Mt 18.6-9; Lc 17.1-2)*

<sup>42</sup> Icatsia Jesús jumaitsi pijajivijavabelia:

—Pajivi pibisiacueene exanaeyaexanaejitsipa mapitsipejevaxijivixi ataje, tanejumecovënëtsiyajuvënëjiviyo, bajarapajivi Diosojavabelia bitso naneconitsipa. Nexata Dioso ayaicuenia naneconitsiaexanaejitsipatsi. Nexata pajivi najamatabëxaina pibisiacueene pexanaeyaexanaenexa tanejumecovënëtsivijavabelia, abaxë pibisiacueene exanaeyaexanaenejeva, bajarapajivi bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatua-jëareca. Bajarapajivi bexuarecatsi bitso penaneconitsiyaniva Diosojavabelia pibisiacueene itsa exanaeyaexana tanejumecovënëtsiviyajuvënëvi. <sup>43</sup> Bajaraxuata panecobeta pibisiacueene itsa paexaname, panacobecacure. Itsiata xanepana panejonenexa cobemataxucaeya apo pevereverecaenacuajavabelia. Biji rajane apo xanepanae tsiipae panejonenexa infiernojavabelia anijacobebeje yajava, itsajota isotocotia apo itaxupae caeto ata. <sup>44</sup> Bajarajota apo tēpae oro, jivivixaevi. Isotocotia ata apo itaxupae caeto ata. <sup>45</sup> Itsa panetaxuta ata pibisiacueene paexaname, panataxucacure. Itsiata xanepana panejonenexa taxumataxucaeya apo pevereverecaenacuajavabelia. Biji apo xanepanae tsiipae panejonenexa infiernojavabelia anijataxubeje yajava. <sup>46</sup> Bajarajota apo tēpae oro, jivivixaevi. Isotocotia ata apo itaxupae caeto ata. <sup>47</sup> Paneitaxutota ata panetaejava yabara pibisiacueene itsa paexaname, panaitaxuto-

cajure. Itsiata xanepana panejonenexa pacaetitaxutojivimë apo pevereverecaenacua-javabelia, Dioso pijanacuayabelia. Biji rabiji apo xanepanae tsipae panejonenexa anijaitaxutobeje yajava infiernojavabelia. <sup>48</sup> Bajarajota apo tēpae oro, jivivixaevi. Isotocotia ata apo itaxupae caeto ata.

<sup>49</sup> Dajubinë jivi itsa beyaxuaba Diosojavabelia ofrendacuenia pevi perajutsinexa, viexaba yajota pevixanepanaenexa. Bajara pijinia pacuenia pejamatabëcuenex-anepanaenexa, daxita Dioso pijajivi ata jamatabëcueneëjēbianatsi mapanacu-ataje. <sup>50</sup> Yajo raja xanepana. Itsiata yajo pexaicaejavami itsa ajibi tsipae, apo xanepanae tsipae itsacueneyavayonexa ata. Bajara pijinia pacuenia paxamë ata pajamatabëcueneitsimë tsipae Diosojavabelia, itsa apo pavecuapanepaemë tsipae papecajamatabëcuene ëjētaponaejava. Nexata pajamatabëcuenesaëmëre paneja-matabëcuenexanepanaenexa Diosojavabelia. Pajinavanapare xaniavaetsia itsamon-aejavabelia ata, jai Jesús pijajivijavabelia itsajivi ata Jesús pijajivi pibisiacuenepexanaeyaexanaeyaniva.

**Pacuenia Jesús jivi livaisi tsipaeba  
penacojiobinë pijava pexuabiyaniya yabara pelivaisi**

*(Mt 19.1-12; Lc 16.18)*

**10** Jesús baja pona Capernaum tomaravecua. Pona Judea nacuyabelia. Bajaraxuacujinae Jordánmene itsapanabelia, paira, Jesús pona. Bajarajotalia icatsia jivibitsaëtoxaneto pata Jesúsjavaberena. Nexata icatsia Jesús livaisi tsipaeba bajarapamonae. Tsipaji baja cajena Jesús livaisi petsipaebanajetaruaenë. <sup>2</sup> Nexata fariseovi Jesús cujibarenatsi petsipaebilivaisi yabara jamatabëcueneëjēbiaya peyanijobinexatsi. Nexata Jesús bijiaya itsa jumecanaviata, neconitsijitsiatsi. Nexata fariseovi jumaitsi Jesúsjavabelia:

—¿Xanepana tsaja penacojiobinë pijava pexuabinexa? jai.

<sup>3</sup> Jesús nexata jumaitsi fariseovijavabelia:

—¿Detsa pacuenia bajayata Moiséspijinë pacaitoroba panijavajivi panexuabiyaniya? jai Jesús.

<sup>4</sup> Nexata fariseovi jumaitsi Jesúsjavabelia:

—Moiséspijinë tocopata, ponë pijava jamatabëxuaba, pexuabinexa. Itsiata baitsi jane Moiséspijinë tocopata, ponë pijava xuabijitsia, copiaya petoyaquinaenexa cuyalatobaxuto pijavajavabelia. Nexata ponë pijava xuabijitsia, copiaya pijava toyaquinabiaba pitavetsilivaisi pexuabinexa jane baja pijava. Bajarapacuenia pexanaenexa, ponë pijava jamatabëxuaba, Moiséspijinë tocopata, jai fariseovi Jesúsjavabelia.

<sup>5</sup> Nexata Jesús jumaitsi fariseovijavabelia:

—Moiséspijinë raja bajarapacuenia pacatocopata panejamatabëcuenelivaisitajaxae. <sup>6</sup> Pamatacabi Dioso taxuxuaba nacua pexanaejava, bajarapamatacabita Dioso exana pebi, pijava yajava. <sup>7</sup> Bajaraxuata pebi itsa nacojioba pijavajavabelia, banatsata paxavecua, pena atavecua. <sup>8</sup> Nexata Dioso tane anijajivimibeje becaejivi. Nexata Dioso apo tae beanijajivibeje. Becaejivi saya tane Dioso. <sup>9</sup> Bajaraxuata itsanë ata apo bexuabi pijava. Tsipaji Dioso pejamatabëcueneta napitsiaexanatsibeje, jai Jesús fariseovijavabelia.

<sup>10</sup> Bajaraxuacujinae Jesús pijajivi pijaepato itsa barënacopata bota, nexata Jesús pijajivi yanijobatsi bajarapacueneyabara. <sup>11</sup> Nexata Jesús jumaitsi pijajivijavabelia:

—Ponë pijava pexuabicujinae, itsava icatsia itsa pita, bajaraponë pibisiacuene exana pevitota. Nexata naneconita Diosojavabelia. Tsipaji itsava jaita pepo pijavavecua. Dioso cajena abaxë bajaraponë pexuabiva pepo pijavacuena totanetsi.<sup>12</sup> Bajara pijinia itsi petiriva ata pamona pevecuanaviatsicujinae, itsanë icatsia itsa pitatsi. Bajarapova pibisiacuene exana pevitota. Nexata naneconita Diosojavabelia. Tsipaji itsanë jaita pepo pamonavecua, ponë abaxë Dioso totanetsi pamonacuena, jai Jesús pijajivijavabelia.

**Pacuenia Jesús jumaitsi pejevaxijivixijavabelia yabara pelivaisi**

*(Mt 19.13-15; Lc 18.15-17)*

<sup>13</sup> Jesúsjavaberena itsamonae pejevaxijivixi tocapataponatsi Jesús pejayataponenexa pecobeta. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavaberena, jai.

<sup>14</sup> Nexata Jesús itsa tane bajarapacuenia pijajivi pejumaitisjiva, Jesús jamaatabëcueneanaepanaxuareca. Jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivixije jumeaebinejeva, xaniavaetsia bajumecovënëta palivaisi tsipaebatsi. Nexata pamonaе jitsipa pejonejava Dioso pijanacuayabetsia, bajara pijinia pacuenia jumeaebinejeva xaniavaetsia bejumecovënëta Dioso pejumelivaisi.<sup>15</sup> Xaniajanë pacuenia pacatsipaebijitsiatsi. Mapitsipejevaxijivixije itsa jumecovënëta palivaisi tsipaebatsi, bajumecovënëta xaniavaetsia jumeaebinejeva. Bajara pijinia pacuenia jumeaebinejeva, xaniavaetsia bejumecovënëta Dioso pejumelivaisi pamonaе jitsipa pejonejava Dioso pijanacuayabetsia, jai Jesús pijajivijavabelia.

<sup>16</sup> Nexata Jesús isapitapona pejevaxijivixi, caejiviyo canacujitsia. Pecobeta jayatapona. Jesús pejevaxijivixijavabelia jumai tsaponaе:

—Dioso xaniavaetsia caevetsiana, jai tsaponaе.

**Pacuenia pevějëato, bitso pexainanë,  
cuaicuaijai Jesúsjavabelia yabara pelivaisi**

*(Mt 19.16-30; Lc 18.18-30)*

<sup>17</sup> Pabota Jesús pejevaxijivixi isapitapona, bajarapabovecua itsajavabelia baja icatsia Jesús ponaеjitsia. Nexata baja Jesús itsa naropotsijitsia, pevějëato cujinærucarena Jesúsjavaberena. Jesús pitabarata pematatabacabëta nucajunua. Jumaitsi pevějëato Jesúsjavabelia:

—Petuxanenë, pexaniajamatabëcuenenëmë. ¿Detsa pitsicuene bexanajë taxainanexa matabacabi apo peverevereцаejava? jai pevějëato.

<sup>18</sup> Nexata Jesús jumaitsi pevějëatojavabelia:

—¿Detsa xujitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë.<sup>19</sup> Xamë baja yapëtaneme pacuenia Dioso pejumelivaisita itoroba jivi pejumecovënëtsinexa. Jumaitsi mapacueniaje: “Pëtsa jaitame itsava nijavavecua. Pëtsa beyaxuabame jivitonë. Pëtsa nacobetoxotame. Pëtsa itsamonae pexanaejava yabara najumetsënëtsiaya paebame. Pëtsa yamaxëitojorobiaya vecuapitame itsajivi pexainaejava. Axa yaiyataema. Ena ata yaiyataema,” jai Dioso pejumelivaisita. Xamë baja yapëtaneme bajarapalivaisi, jai Jesús pevějëatojavabelia.



<sup>20</sup> Nexata pevejëato jumaitsi Jesúsjavabelia:

—Petuxanenë, daxita rabaja bajarapalivaisianë jumecovënëtajë pejevaxinëjavaveliacujinaenë, jai pevejëato.

<sup>21</sup> Nexata Jesús asivaya tane pevejëato. Jumaitsi:

—Caejava raja catosaica nexanaenexa. Ponare necanajetsinexa daxita nexainaecuenemi. Bajarapamatamomi tsicobetsanaename bepejiobivi. Nexata bajarapacuenia xainaename bitso nexainaecuene Dioso pijanacuatatsia. Nexata najamatabëcueneverere, cabejiobiaexanae ata, cabeyaxuabijitsia atanua tajumelivaisi yabara, nijamatabëcuenesaë tsaponaponaenexa. Nexata jane baja xuacujinae nepënaponaename, jai Jesús pevejëatojavabelia.

<sup>22</sup> Nexata pevejëato ita jumetane bajarapacuenia Jesús pejumaitsijava, najamatabëxainaeya baja vecuapona Jesús. Tsipaji pevejëato daxitacuene bitso pexainaenë. Nexata pevejëato apo jamatabëjumecovënëtsi palivaisi Jesús tsipaeba.

<sup>23</sup> Nexata pevejëato pecovëta Jesús pijajivi matatoyorotsia naëcota. Jumaitsi:

—¿Pamonae bitso daxitacuene pexainaevi, tsiayapëbejetsi penajamatabëcueneco-patsinexa Diosojavabelia pecapanepaenexatsi Dioso pijanacuayabetsia! jai Jesús pijajivijavabelia.

<sup>24</sup> Nexata Jesús pijajivi jamatabëcuenenabenajaca ita jumetane bajarapacuenia Jesús pejumaitsijava. Nexata icatsia Jesús jumaitsi pijajivijavabelia:

—Tajamonae, pamonae bitso ëpexainaevajanexa najamatabëxaina, bajarapamonae bitso tsiayapëbejetsi tsane pejonenexa taxa Dioso pijanacuayabetsia.

<sup>25</sup> Pacuenia camello ayainëxae, acuenebi pejonejava palutaetotaxutovojotualia, bajara pijinia pacuenia bitso pexainaenë acuenebi tsane pejonejava Dioso pijatomarabetsia. Tsipaji najamatabëxaina bitso ayaijava pexainaenexa, jai Jesús pijajivijavabelia.

<sup>26</sup> Jesús pijajivi ita jumetane bajarapacuenia Jesús pejumaitsijava, bitso jamatabëcuenenabenajaca. Nexata bajarapamonae jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexainaevi ata ita apo panepae tsane Diosojavabelia? jai.

<sup>27</sup> Nexata Jesús asaëya naëcota pijajivijavabelia. Jumaitsi pijajivijavabelia:

—Jivi raja apo caëjëpaetsi pijacuata penacapanepaenexa Diosojavabelia. Caenë Dioso caëjëpatsi jivi pecapanepaenexa. Dioso raja caëjëpatsi daxitacuene pexanaenexa, jai Jesús pijajivijavabelia.

<sup>28</sup> Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxainaejavami. Nexata baja pacapënajinavanapatsi, jai Pedro.

<sup>29</sup> Nexata Jesús jumaitsi:

—Xaniajanë pacuenia pacatsipaebijitsiatsi. Pajivi xanë tajamatabëcueneta, jivi tacapanepaelivaisitanexa pejamatabëcuenetanua, pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijapabianë ata, nexata bajarapajivi bitso ayaijava Dioso rajutsianatsi pepuenetsijavanëmi mata-toxenetsia. <sup>30</sup> Caejavayomijamatabëcuene tsaponae, rajutsianatsi mapanacuataje cien xuabeje tsaponae pevajënaeyabelia. Bajarapajivi icatsia xainaena bonë, pematapijivi ata, pejuyapijivi ata, pena ata, pexi ata, pabianë ata. Itsiata bajarapajivi itoya tsanetsi mapanacuapijivije. Bejiobiaexanabianatsinua. Itsiata baitsi jane bexëajavabelia xainaena matababi apo pevereverecaejava. <sup>31</sup> Pamonae ae-

conoxae mapamatacabitaje ayaijamatabëcuenevi tanetsi, bajarapamonae Dioso beveliajamatabëcuenevi exanaenatsi. Pamonae pijinia mapamatacabitaje beveliajamatabëcuenevi tanetsi, bajarapamonae Dioso ayaijamatabëcuenevi exanaenatsi, jai Jesús pijajivijavabelia.

**Pacuenia icatsia Jesús tajëvelia navajunupaeba  
pebeyaxuabijavanexatsi yabara pelivaisi**

*(Mt 20.17-19; Lc 18.31-34)*

<sup>32</sup> Jesús, pijajivi yajava, najetaruca namutua. Pona Jerusalén tomarabelia. Jesús pijajivi, pepënaponaevitsi, jamatabëcuenenabenajaca. Tsipaji Jesús apo junavi bajarabelia peponaejava, yapëtae ata, pacuenia exanaejitsiatsi Jerusalén tomarata. Nexata Jesús icatsia junata pijajivi, doce ponëbeje, pesaicaeyojavabelia. Navajunupaeba tajëvelia pacuenia exanaejitsiatsi Jerusalén tomarata. <sup>33</sup> Jumaitsi Jesús tajëvelia pijajivijavabelia:

—Panejumetaema. Mara Jerusalén tomarabelia ponatsije. Bajarajotalia xanë, Daxitajivi Pematapijinënë, sacerdotevi penamatacaitorobivi, judïovi pecujarubivinia, pecobeyabelia necanajetsiana tanevaetabinexa. Nexata xanë neneconitsiana tanebeyaxuabinexa. Bajaraxuacujinae icatsia necanajetsiana itsanacuaverena pepatsivi pecobeyabelia. <sup>34</sup> Bajarapamonae necanecaponaena. Nesuabiana. Nejumatitibabena penaneconitsivi pejumaconitabiabimacata. Bajaraxuacujinae nebeyaxuabiana jane baja. Itsiata baitsi jane tanebeyaxuabicujinae, acueyabi matacabita, icatsia asaënë tsane, jai tajëvelia pijajivijavabelia Jesús penavajunupaebijavata pebeyaxuabijavanexatsi.

**Pacuenia Santiagobeje Juanbeje vajëtabeje Jesúsjavabelia  
pexaniacuene petoexanaenexatsibeje yabara pelivaisi**

*(Mt 20.20-28)*

<sup>35</sup> Zebedeo pexënatobeje, Santiagobeje Juanbeje, imoxoyoliabeje Jesús. Jumaitsibeje Jesúsjavabelia:

—Patajatuxanenë, pacuenia pacavajëtsijitsiatsibeje, bajarapacuenia pajitsipajëbeje patanetoexanaenexamëbeje, jaiibeje Santiagobeje Juanbeje Jesúsjavabelia.

<sup>36</sup> Nexata Jesús jumaitsi:

—¿Detsa pitsicuene pajitsipamebeje patacatoexanaenexabeje? jai.

<sup>37</sup> Nexata Santiagobeje Juanbeje jumaitsibeje:

—Pamatacabi daxitacuene evetsianame, panetocopatsianamebeje patanaecaenexabeje nemuxuneneta vajanajuavevtsinexa. Itsanë naecaena necujuanenia. Itsanë naecaena netsavenononia, jaiibeje.

<sup>38</sup> Nexata Jesús jumaitsi:

—Paxamëbeje apo payapëtaemëbeje xua panevajëtamebeje. ¿Pacacaëjëpabeje tsaja panenacaevetsinexabeje papecabעיביאexanaenexabeje pacuenia xanë nacaevetsianajë tanebejiobiaexanaenexa? ¿Pacacaëjëpabeje tsaja panenacaevetsinexabeje papecabeyaxuabinexabeje pacuenia xanë nacaevetsianajë tanebeyaxuabinexa? jai Jesús pijajivitonëbejejavabelia.

<sup>39</sup> Nexata Santiagobeje Juanbeje jumaitsibeje:

—Jājā, panecaëjëpabeje cajena, jaiibeje.

Nexata icatsia Jesús jumaitsi Santiagobeje Juanbejejavabelia:

—Paxamēbeje pacabejiobiaexanaenabeje pacuenia xanē nebejiobiaexanaena. Pacabeyaxuabianabejenua pacuenia xanē nebeyaxuabiana. <sup>40</sup>Itsiata baitsi jane xua panevajētamebeje panenaecaenexabeje, itsanē tacujuanenia, itsanē tatsavenone-  
nia, bajaraxua Dioso apo netocopatsi patacatocopatsinexabeje. Tsipaji raja taxa  
Dioso ĕpitapetsivinexa abaxē bajaraxua toxaniavaeta, jai Jesús Santiagobeje  
Juanbejejavabelia.

<sup>41</sup>Diez ponēbeje, Jesús pijajivi, itsa vēnētane pepēya bajaraxua Santi-  
agobeje Juanbeje Jesúsjavabelia pevajēcaejavabeje, nexata bajarapamonaē ja-  
matabēcuenebaraanaepana Santiagobeje Juanbejejavabelia. <sup>42</sup>Nexata Jesús daxita  
pijajivi junata. Jesús jumaitsi pijajivijavabelia:

—Payapētaneme rabaja pacuenia nacuaevetsivi exana. Eveta caenacua canacujit-  
sia. Nexata nacuaevetsivi pijajivicuenia eveta pamonaē jinavanapa pevetsinacuanē-  
java. Nexata bajarapanacuanē pevetsivi ayaijamatābēcuenēvi nataeyabiaba. Xua  
jamatabēitoroba pevetsinacuanējava pejinavanapaevi petoexanaenexatsi, ajume-  
saēya itorobabiaba petoexanaenexatsi. <sup>43</sup>Pētsa paxamē bajarapamonaē cuenejē-  
paeya bajarapacuenia paexaname itsamonaējavabelia. Biji rajane ponē paxam-  
ēyajuvēnēnē jitsipa ayaijamatābēcuenēnē penaexanaenexa daxita paxamēvecua,  
bajaraponē daxita paxamē bepanijajivitonēcuenia bepacayavenonabiaba. <sup>44</sup>Ponē  
paxamēyajuvēnēnē jitsipa penaexanaenexa papecanamatacaitorobinēnēna, baja-  
raponē daxita paxamē bepanijajivitonēcuenia bepacayavenonabiaba. <sup>45</sup>Tsipaji rabaja  
xanē ata, Daxitajivi Pematapijinē atanē, apo patajopaenē jivi taneyavenonaenexa.  
Biji rajane xanē patajopajē tayavenonaenexa daxitajivi. Patajopajē tasivatēpaenexa  
jivi ayaiBITSaētoXaneto pibisiacuene pexanaeconimi taneconimatamotsinexa, jai  
Jesús pijajivijavabelia.

**Pacuenia Jesús itaxutoXanepanaeYaexana Bartimeo,  
bitso pitaxutotsēcēnaenē, apo petaenē, yabara pelivaisi**

*(Mt 20.29-34; Lc 18.35-43)*

<sup>46</sup>Jesús, pijajivi yajava, pata Jericó tomarabelia. Jesús icatsia, pijajivi yajava, it-  
samonaenua ayaibitsaētoXaneto yajava, pitsapa Jericó tomaravecua. Nexata Bar-  
timeovēnēnē, Timeo pexēnato, eca namuto muxuneneta. Bartimeo, bitso pitaxu-  
totsēcēnaenē, apo petaenē. Jivijavabelia amoneya palata pevajēcabiabinē. <sup>47</sup>Nex-  
ata Bartimeo itsa jumetane Nazaret tomarapijinē Jesús imoxoyo penajetaruaejava,  
vavajai tsecae.

—¡Jesús, Davidpijinē pemomomē, nitaxutotsoniataema! jai tsecae Bartimeo.

<sup>48</sup>Nexata picani itsamonaē jumeitavetatsi Bartimeo pemoyanexa. Itsiata bitsoyo  
orijibia vavajai tsecae.

—¡Davidpijinē pemomomē, nitaxutotsoniataema! jai tsecae Jesúsjavabelia.

<sup>49</sup>Nexata Jesús muxunanucojopa. Jumaitsi jivijavabelia:

—Pajunaremena bajaraponē, jai.

Nexata bajarapamonaē junarena Bartimeo. Pejunatsivirena jumaitsi  
Bartimeojavabelia:

—Najamatābēsāētaxuare. Nonotapunare. Jesús raja cajunarena, jai  
bajarapamonaē.

<sup>50</sup>Nexata Bartimeo penajumaxuabipana xuabapuna. Bepijia najetabarena Jesús-  
javaberena. <sup>51</sup>Nexata Jesús yanijoba Bartimeojavabelia.

—¿Detsa xua jitsipame tacaexanaenexa? jai Jesús.

Nexata Bartimeo bitso pitaxutotsęcänaenē, jumaiti Jesúsjavabelia:

—Jesús, jitsipajē taitaxutoxanepanaejava, jai.

<sup>52</sup> Nexata Jesús jumaiti:

—Ponare baja. Nesivajamatabējumaitsimē: “Jesús nitaxutoxanepanaeyaexanaena,” nesivajamatabējamē. Bajaraxuata itaxutoxanepaname baja, jai Jesús Bartimeojavabelia.

Bajarapacuenia Jesús pejumaitisjavata, Bartimeo baja xaniavaetsia tane. Nexata baja bajaraponē Jesús pepēta napona.

### Pacuenia Jesús pata Jerusalén tomarata yabara pelivaisi

(Mt 21.1-11; Lc 19.28-40; Jn 12.12-19)

**11** Jesús baja pijajivi barēimoxoyotanajetaruca Jerusaléntomara. Barēpata baja Betfagé tomarayobeje Betania tomarayobeje muxuneneta. Itsajota petsutojumata nubena olivonaenē, bajarajota Jesús barēpata. Bajarajota pebarēpatsicujinae Jesús itoroba anijanēbeje pijajivitonēbeje. <sup>2</sup> Jesús jumaiti pijajivitonēbejejavabelia mapacueniaje:

—Paponarebeje mapatomarayo ecaliajejavabelia. Ajena papatsiaremeliabeje, pataenutsianamebeje burro, pecētanutsinētsi. Bajarapaburro itsajivi ata abaxē apo jumaponae. Paisinaenamebeje. Payamaēcarenamēbeje tsane. <sup>3</sup> “¿Detsa xuajitsia paisinamebeje burro?” ita pacajaibeje tsane itsajivi, nexata pajumaitsimēbeje tsane: “Vajatuxanenē raja namatavenona. Aeonoxae raja icatsia canaviatsiarena,” pajamēbeje tsane, jai Jesús pijajivitonēbejejavabelia.

<sup>4</sup> Nexata Jesús pijajivitonēbeje liabeje. Caxitajarabanutabeje burro baupa muxuneneta. Cētanutatsi burro namuto muxuneneta. Nexata bajaraponēbeje burro isinabeje.

<sup>5</sup> Nexata bajarajota pejinavanapaevi yanijobatsibeje.

—¿Detsa xuajitsia paisinamebeje burro? jaitsibeje.

<sup>6</sup> Nexata bajaraponēbeje jumaitsidebeje pacuenia baja Jesús itorobatsibeje. Nexata tocopatatsibeje pecaponaenexabeje. <sup>7</sup> Nexata jane baja burro capatabeje Jesúsjavaberena. Nexata Jesús pijajivi pijacamisajumavelia penaxatabijavanē burro tsijumajeba. Bajarapajumata Jesús ecaya. <sup>8</sup> Jesús penajetarucaenamutojavarena jivi ayaibitsaētoxaneto pijacamisajumavelia penaxatabijavanē namutua tsivajēnaeyerequejebaponatsi. Itsamonae naemaxērananē, pebaxu yajava, ucubaba. Nexata namutua Jesús tsivajēnaeitabētsiaya jebaponatsi yayataeya Jesús pecopiapitsinexatsi. <sup>9</sup> Jesús penajetarucaejavata jivi ayaibitsaētoxaneto Jesús pevajēnaeya namataxainaeya najetarubena. Itsabitsaētoxaneto Jesús pecovēya cotocaevanajetarubena. Daxita bajarapamonae vavajai tsanajetarubena. Jumai tsanajetarubena:

—¡Dioso yavenonaenatsi maponē najetarucaje! ¡Vajatuxanenē pejamatabēcueneta najetaruca! <sup>10</sup> ¡Dioso yavenonaenatsi maponē najetarucaje nacua pevetsinēnexa! ¡Pacuenia bajayata vajasalinainēmi Davidpijinēmi nacua eveta, bajarapacuenia evetsijitsia! ¡Nexata vaxaitsi pexaniajamatabēcuenē rajutatsi Diosojavabelia! jai tsanajetarubena bajarapamonae.

<sup>11</sup> Nexata jane baja Jesús patajopa Jerusalén tomarata. Templobojavalia joneya. Nexata Jesús templobota naitaxutocaeveta, pacuene jivi exana templobota, petaenexa. Nexata baja Jesús pepuatae pacuene jivi exana templobota, Jesús baja

icatsia pona. Naviata abaxë Betania tomarabelia pijajivi, doce ponëbeje, yajava. Tsi-paji baja caniviyotsia.

**Pacuenia Jesús bijataenuta higueranae piacuaijibixae yabara pelivaisi**

*(Mt 21.18-19)*

<sup>12</sup> Jesús pijajivi barëmajita Betania tomarata. Nexata bajayacunua Jesús icatsia pijajivi barëlia Jerusalén tomarabelia. Nexata Jesús namutua penajetarucaejavata, piäjani. <sup>13</sup> Jesús namutovecua tajiyotalia higueranae yabaxua taenuta. Nexata Jesús taeyojopalia bajaraponae pecuai perubenaeyava. Itsa Jesús pata bajaraponaejavabelia, ëpebaxu saya tsanucæ. Tsi-paji cajena abaxë apo penacuaitsimatacabi. <sup>14</sup> Nexata Jesús jumaitsi higueranaejavabelia:

—Itsajivi ata apo cacuaixæ tsane matavëjëa, jai Jesús.

Nexata pijajivi jumetanetsi bajarapacuenia Jesús pejumaitsiyava higueranaejavabelia.

**Pacuenia Jesús Jerusalén tomarata templovecua pitsapaeyaexana pecanajetabiabivi, pecomuacabiabivina, yabara pelivaisi**

*(Mt 21.12-17; Lc 19.45-48; Jn 2.13-22)*

<sup>15</sup> Jesús, pijajivi yajava, pata Jerusalén tomarata. Nexata Jesús joneya temploboyalia. Nexata templobota Jesús tane pecanajetabiabivi, pecomuacævinua. Nexata daxita bajarapamonæ Jesús pitsapaeyaexana templovecua. Palata pecambiabibiabivi ata pijamesanëmi Jesús topënëyorobajaraba. Ucucu pecanajetabiabivi ata penabiabijavanëminua topënëyorobajaraba. <sup>16</sup> Jesús apo tocopatsi itsajivi ata itsacueneyava pecaponaenexa templojova. <sup>17</sup> Jesús livaisi tsipaeba. Jumaitsi bajarajota pepatsivijavabelia:

—Dioso baja cajena pejumelivaisibaxutota mapatemplobo yabara tajëvelia jumaitsi mapacueniaje: “Tajabo raja daxitanacuanëpijivi xanëjavaberena penavajëcaebo tsane,” jai Dioso pejumaitsiyava Dioso pejumelivaisibaxutota. Itsiata baitsi jane paxamë yamaxëitorobiaya panenacobetoxotsinexa panacætuatabiabame mapabotaje, jai Jesús templobota pecanajetabiabivijavabelia.

<sup>18</sup> Sacerdotevi penamatacæitorobivi, judíovi pecujarubivina, jumetane daxita pacuenia Jesús exana jivijavabelia templobota. Nexata bajarapamonæ najumejaita pacuenia Jesús beyaxuabijitsiatsi. Bajarapamonæ cjunavatsi Jesús. Tsi-paji daxitajivi jamatabëcuenenabenajaca Jesús petsipaebilivaisi yabara. <sup>19</sup> Ajena baja meravitsia, Jesús yajavapona pijajivi Jerusalén tomaravecua.

**Pacuenia higueranae tēpanuca yabara pelivaisi**

*(Mt 21.20-22)*

<sup>20</sup> Jesús pijajivi barëmajita Betania tomarata. Nexata bajayacunua Jesús icatsia, pijajivi yajava, najetaruca pecovënamutua. Bajarapamonæ taenuta higueranae baja petēpanucaeyava daxita yatabutopaya. <sup>21</sup> Nexata Pedro najamatabënapita higueranae Jesús pebijataenutsijava. Nexata Pedro jumaitsi Jesúsjavabelia:

—Tajatuxanenë, jica, taema. Pona higueranae bijataenutame, tēpanuca baja. ¿Detsa meta pacuenia tēpa baja? jai Pedro.

<sup>22</sup> Nexata Jesús jumaitsi pijajivijavabelia:

—Paxamë bitso pajumecovënëre Dioso papecatoexanaenexa pacuenia pavajë-tame. <sup>23</sup>Xaniajanë pacuenia pacatsipaebijitsiatsi. Itsa pajamatabëjumaitsemë tsi-pae Dioso yabara: “Dioso nejumecovënëtsiana xua vajëtsianajë Diosojavabelia,” itsa pajamatabëjamë tsipae, pacajumecovënëtsipa mapatsuto ataje. Nexata itsa pajumaitsemë tsipae mapatsutojavabeliaje: “Natixire majotavecuaje. Pucaxane-tojavabelia jopare,” itsa pajamë tsipae, pacajumecovënëtsipa. Nexata mapat-suto ataje paneitorobicuenia, pacajumecovënëtsipa. Itsa pajumecovënëtsianame Dioso papecatoexanaejavanexa, itsa panajamatabëxainamenua Dioso ëpapeca-jumecovënëtsijavanexa, xua pavajëtsianame Diosojavabelia, Dioso pacajumecovënëtsiana. <sup>24</sup>Bajaraxuata pacajumaitsi. Daxita xua pavajëtsianame Diosojavabelia, pasivajamatabëjumaitsemë tsane: “Xua vajëtajë Diosojavabelia, pepacuene Dioso nejumecovënëtsiana,” pasivajamatabëjamëre. Nexata xua pavajëtsianame Diosojavabelia, Dioso pacajumecovënëtsiana. <sup>25</sup>Itsajivi pibisiacuene papecaexanae-java, pajamatabëcuenecaevare panevajëtsijavata Diosojavabelia. Nexata pabara-jamatabëcuenexanepanare bajarapajivi. Nexata pijinia paneaxa, athëbëtatsia peecaenë, jamatabëcuenecaeviana paxamë ata pitabarata pibisiacuene pane-exanaejava. <sup>26</sup>Paxamë itsa apo pajamatabëcuenecaevimë tsane itsanë pibisi-acuene papecaexanaejava, itsa apo pabarajamatabëcuenexanepanaemënu tsane, nexata pijinia paneaxa, athëbëtatsia peecaenë, apo jamatabëcuenecaevi tsane paxamë pitabarata pibisiacuene paneexanaejava. Apo pacabarajamatabëcuenex-anepanaenua tsane, jai Jesús pijajivijavabelia.

### **Pacuenia Jesús caëjëpatsi daxitacuene pexanaenexa yabara pelivaisi**

*(Mt 21.23-27; Lc 20.1-8)*

<sup>27</sup>Jesús, pijajivi yajava, pata Jerusalén tomarata. Jesús itsa ponapona tem-plobota, nexata sacerdotevi penamatacaitorobivi, judíovi pecujarubivinua, judíovi pijaancianovinua, parena Jesúsjavaberena. <sup>28</sup>Nexata bajarapamonae jumaitsi Jesúsjavabelia:

—¿Jipatsa pejamatabëcueneta pecanajetabiabivi, pecomuacaevinua, capitsapame mapatemplobovecuaje? jai bajarapamonae Jesúsjavabelia.

<sup>29</sup>Nexata Jesús jumaitsi bajarapamonaejavabelia:

—Xanë copiaya caejumeyo pacayanijobianatsi. Itsa paxamë panejumecaviat-sianame, nexata xanë juya pacatsipaebianatsi ponë nitoroba taexanaenexa bajara-pacuene. <sup>30</sup>¿Jipatsa jane pejamatabëcueneta Juanpijinë jivi bautisabaponapona? ¿Dioso tsaja pejamatabëcueneta? Itsa jume, ¿jivi tsaja pejamatabëcueneta? Pane-jumecanaviare baitsi jane, jai Jesús bajarapamonaejavabelia.

<sup>31</sup>Nexata ëpamonae nabarëcuaijai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabëcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovënëtsimë Juanpijinë pepaebilivaisi?” nacajai tsipae. <sup>32</sup>“Jivi raja saya pejamatabëcueneta Juanpijinë jivi bautisabaponapona,” acuenebi vajajajava. Tsi-paji mapatomarapijivije ayaibitsaëtoxfaneto Juanpijinë yabara siva-jamatabëjumaitsi: “Juanpijinë raja pepacuene Diosojumepaebinëmi,” sivajamatabë-jai. Nexata bajarapamonae nacabeyejebijitsipa, najai Jesús peyanijobivitsi.

<sup>33</sup>Nexata saya bajarapamonae jumaitsi Jesúsjavabelia:

—Apo payapëtaenë ponë Juanpijinë itorobatsi jivi pebautisabaponaenexa, jai.

Nexata Jesús jumaitsi bajarapamonaejavabelia:

—Nexata xanë ata apo pacatsipaebi tsanetsi ponë nitoroba taexanaenexa bajara-pacuene, jai Jesús.

**Pacuenia exana piamatabëcuenebejevi,  
itsanë pijauvabacabo petoevetsivi, yabara pelivaisi**

*(Mt 21.33-46; Lc 20.9-19)*

**12** Jesús livaisi tsipaeba sacerdotevi penamatacaitorobivijavabelia, judfiovi pecujarubivijavabelia ata, judfiovi pijaancianovijavabelia ata. Jumaitsi mapacueniaje:

—Pijaira pexainaenë pijairata uba ayaibacaboxaneto uvavënëjava. Bajarax-uacujinae pijaira matatoyorotsia ibopanaxanetonë mataropotsia pefaratsijavata yacaranata. Bajarapayacaranatsijava athëbëabetsia apia jivitonë matatoxenetsia. Bajaraxuacujinae irata mëthë cueyeta. Nexata pecueyetsimëthëjavata exana uvac-uaibarëmene pecayujucabiabijavanexa. Bajaraxuacujinae pijauvabacabo tuatua-jëta exananuta piapiabotsia, penacuaitsimatacabi itsa tonaveretatsi, athëbëyo pevetaibiaecaenexa pijauvabacabo. Nexata bajaraponë itsamonae evetsiaexana pi-jauvabacabo. Uvabacabo pexainaenë jumaitsi petoevetsivitsijavabelia: “Pamata-cabi cuainaveretsiana, natsicobetsatsianatsi. Pamatacabi raja cuainaveretsiana, ta-jajivitonë itorobiarenajë xua panetotsatsianame tanetopitsinexa,” jai uvabacabo pexainaenë petoevetsivitsijavabelia. Nexata uvabacabo pexainaenë tajë nacuyabelia pona. <sup>2</sup>Itsa baja uvabacabo pexainaenë yapëtane pecopiapatsijava uvac-uai penaveretsimatacabi penotsinexa, nexata uvabacabo pexainaenë itoroba pi-jajivitonë. Itoroba petoevetsivitsijavabelia petsicobetsatsinexatsi. <sup>3</sup>Nexata uvaba-cabo pexainaenë pijajivitonë tovaetabatsi. Toconibabiatsi. Petoconibabecujinaetsi cobesa naviatsiaexanaliatsi. <sup>4</sup>Itsiata uvabacabo pexainaenë icatsia itoroba itsanë pijajivitonë petsicobetsatsinexatsi. Bajaraponë ata icatsia tomatajorobiauxuabatsi. Pibisiacuenia tobijatanetsi. <sup>5</sup>Itsiata icatsia uvabacabo pexainaenë itoroba itsanë pijajivitonë. Bajaraponë jane baja tobeyaxuabatsi. Bajaraxuacujinae abaxë icatsia uvabacabo pexainaenë itoroba itsamonae. Bajarapamonaeyajuvënëvi itsamonae tot-saquiababiatsi. Itsamonae tobeyejebatsi.

<sup>6</sup>Abaxë uvabacabo pexainaenë icatsia pitorobinexa, caenë tonacopatatsi. Pexë-nato bitso piasivanë. Nexata jane baja uvabacabo pexainaenë pexënato icatsia itoroba. Uvabacabo pexainaenë jamatabëjumaitsi: “Tajauvabacabo tanetoevetsivi tajajivi apo netoyaiyatae ata, itsiata meta taxënato netoyaiyataena,” jamatabëjai uvabacabo pexainaenë. <sup>7</sup>Itsiata uvabacabo petoevetsivitsi uvabacabo pexainaenë pexënato ata, apo toyaiyataetsi. Itsa tane uvabacabo pexainaenë pexënato, bajarapamonaenajumaitsi: “Mara ponëje paxa pevënamuto paxa pijauvabacabo pitsi-paje. Naxanitsia. Beyaxuabatsi. Nexata raja vaxaitsi vajauvabacabo tsane,” najai uvabacabo petoevetsivitsi. <sup>8</sup>Nexata icatsia uvabacabo pexainaenë pexënato ata to-vaetabatsi. Icatsia pexënato ata tobeyaxuabatsi. Petëpaenë xuabatsi bajarapauvaba-cabo pënëyabelia, jai Jesús sacerdotevi penamatacaitorobivijavabelia, judfiovi pecu-jarubivijavabelia ata, judfiovi pijaancianovijavabelia ata.

<sup>9</sup>Icatsia Jesús jumaitsi bajarapamonaejavabelia:

—¿De meta nexata xua exanaena uvabacabo pexainaenë pijauvabacabo petoevet-sivitsijavabelia? Uvabacabo raja pexainaenë patsiarena. Verebiabiana daxita ba-

jarapamonaemi. Nexata icatsia itsamonae evetsiaexanaena bajarapauvabacabo, jai Jesús bajarapamonaejavabelia.

<sup>10</sup> Icatsia Jesús jumaitsi:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia. <sup>11</sup> Vajatuxanenë Dioso raja exanaena bajarapacuenie. Nexata nacatsita pexaniacuene bitso tsane bajarapacuenie, jai tajëvelia Dioso pejumelivaisibaxutota xanë yabara.

Bajarapacuenia tajëvelia Dioso pejumelivaisibaxutota itsa jumaitsi, paxamë apo patanejumecovënëtsijavanexamë yabara jumaitsi. Dioso taneitapetsijava daxitajivi tacapanepaenexa yabara ata jumaitsi, jai Jesús bajarapamonaejavabelia.

<sup>12</sup> Bajarapamonaie picani Jesús jamatabëvaetabatsi. Tsipaji bajarapamonaie jumeyapëtanetsi Jesús pejumaitsijava bajarapamonaie yabara. Itsiata abaxë apo vaetabitsi. Tsipaji cujunava jivi. Nexata baja Jesús bajarapamonaie vecuapona.

### **Pacuenia Jesús jamatabëcueneëjëbiaya yanijobatsi impuestomatamo pematamotsijava yabara pelivaisi**

*(Mt 22.15-22; Lc 20.20-26)*

<sup>13</sup> Fariseoviyajuvënëvi, Herodes pijajiviyajuvënëvinua, najetarubena Jesúsjavaberena. Bajarapamonaie pevetsivitsi itorobatsi livaisi peyanijobinexatsi Jesús. Nexata Jesús bajarapamonaie bijiaya itsa jumecanaviata, peneconitsinexatsi picani nacuaevetsinëjavabelia. <sup>14</sup> Nexata bajarapamonaie pata Jesúsjavaberena. Bajarapamonaie jamatabëcueneëjëbiaya jumaitsi Jesúsjavabelia:

—Jesús, payapëtaniji cajena nexaniajaicuene, xua yabara tsipaebabiabame livaisianë. Petuxanevi ata xamë apo cujunavimë. Apo auramë livaisi netsipaebabiabijava. Nexata daxitajivi najëpaeya livaisi tsipaebabiabame. Pexaniajailivaisi tsipaebabiabame pacuenia Dioso jitsipa jivi pejinavanapaenexa. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonaie jamatabëcueneëjëbiaya Jesúsjavabelia.

<sup>15</sup> Itsiata baitsi jane Jesús jamatabëcueneyapëtanie bajarapamonaie jamatabëcueneëjëbiaya peyanijobijavatsi peneconitsinexatsi picani. Nexata Jesús jumaitsi bajarapamonaiejavabelia:

—¿Detsa xuajitsia jamatabëcueneëjëbiaya paneyanijobame? Panetocarenamëre palatanëyo. Taejitsianë, jai Jesús.

<sup>16</sup> Nexata bajarapamonaie Jesús tocaponarenatsi palatanëyo. Nexata Jesús jumaitsi bajarapamonaiejavabelia:

—¿Jipatsa mapitabaraje, pevënënu, ruca mapapalatanëyotaje? jai Jesús.

Nexata bajarapamonaie jumaitsi Jesúsjavabelia:

—Romanonacua raja pepo pevetsinë pitabara, pevënënu, jai.

<sup>17</sup> Nexata Jesús jumaitsi bajarapamonaiejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.



Nexata Jesús itsa jumecanaviata bajarapacuenia, bajarapamonae jamatabëcuenenabenajaca bajarapacuenia Jesús pejumaitsijavata. Nexata bajarapamonae jamatabëjumaitsi:

—¡Xaniavaetsia baja rovia Jesús panejumecanaviata! jamatabëjai.

**Pacuenia Jesús tsipaeba jivi petëpaecujinae  
icatsia piasaëjavanexa yabara pelivaisi**

(Mt 22.23-33; Lc 20.27-40)

<sup>18</sup> Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, icatsia apo asaë tsane,” jai tsabiabi. Nexata saduceovi imoxoyorenatsi Jesús. Saduceovi jumaitsi Jesúsjavabelia mapacueniaje:

<sup>19</sup> —Jesús, Moiséspijinë bajayata vajanacatoyaquinaelivaisi, jumaitsi mapacueniaje: “Ponë pematapijinë pepua penacojiobinë baja, totëpatsi pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata pexi itsa xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoyaquinaelivaisi. <sup>20</sup> Nexata jinavanapa ënacaemonae siete ponëbeje. Pepo matapijinë copiaya nacojioba. Nexata bajaraponë pijava vecuatëpa pexi xainaenejeva. <sup>21</sup> Nexata pematapijinëmi pepënarucaenë pita pematapijinëmi pijavami. Nexata icatsia bajaraponë ata tëpa pexi xainaenejeva bajarapovajavabelia. Nexata icatsia itsanë tuatujëmatapijinë pita bajarapova. Bajaraponë ata icatsia tëpa pexi xainaenejeva bajarapovajavabelia. <sup>22</sup> Bajarapacuenia tëpa daxita siete ponëmibeje nacaemonae, bajarapova pepitaponaevi. Itsiata itsanë ata pexi apo xinae bajarapovajavabelia. Bajaraxuacujinae belia bajarapova ata tëpa baja. <sup>23</sup> “Jivi raja petëpaecujinae, Dioso icatsia asaëyaexanaenatsi,” jamë. ¿Detsa nexata ponë, bajarapomonaeyajuvënënë, pijava tsane bajarapova bajarapamatacabí? Daxita pamonae siete ponëmibeje, nacaemonae, pitapona picani bajarapovami, jai saduceovi Jesúsjavabelia.

<sup>24</sup> Nexata Jesús jumaitsi saduceovijavabelia:

—Paxamë saya pajamatabëcuenenavëxaniabame. Paxamë raja apo payapëtaemë pacuenia Dioso pejumelivaisibaxutota jumaitsi. Apo payapëtaemënuu pacuenia Dioso caëjëpatsi daxitacuene pexanaenexa. Bajaraxuata jamatabëcuenenavëxaniabiaya paneyanijobame: “¿Detsa ponë pitsiana bajarapova?” panejamë. <sup>25</sup> Pamatacabí raja petëpaevimi Dioso icatsia asaëyaexanaenatsi, apo nacojiobi baja tsane. Bajarapamatacabita itsajivi ata pexënatoyo apo canajetsi tsane pebijavabelia petonacojiobinexatsi. Bajarapamonae nacojiobinejeva, jinavanapaena athëbëtatsia pacuenia ángelevi jinavanapa. <sup>26</sup> Itsa pepacuene paxamë paneyanijobame Dioso icatsia piasaëyaexanaejavanexatsi petëpaevimi, nexata pacatsipaebianatsi. Paxamë rabaja payapëtaneme pacuenia bajayata Moiséspijinë peyaquinaebaxutota jumaitsi. Bajarapabaxutota jumaitsi pacuenia Moiséspijinë Dioso barëcuaiicuaijaitsi tsiquirinaemëyo petajueyecaecotijavaverena. Abraham baja pepuatëpae, Isaac ata baja pepuatëpae, Jacob ata baja pepuatëpae, bajarapamonae yabara bajayata Dioso jumaitsi Moiséspijinëjavabelia mapacueniaje: “Xanë rabaja abaxë Abraham pijaDiosonë, Isaac ata pijaDiosonë, Jacob ata pijaDiosonë,” jai Dioso Moiséspijinëjavabelia bajayata petëpaevimi yabara. <sup>27</sup> Bajarapacuenia Dioso pejumaitsixae, nayapë-

tane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athēbētatsia. Nexata paxamē itsa pajumaitsimē: “Petēpaevi rabaja petēpaeucujinae, icatsia apo asaē tsane,” itsa pajamē, paniijucuenia pajamatabēcuenenavēxaniabame, jai Jesús saduceovijavabelia.

**Palivaisi bitso jivi bejumecovēnēta daxita Dioso pitorobilivaisianē  
pejumecovēnētsijava matatoxenetsia yabara pelivaisi**

(Mt 22.34-40)

<sup>28</sup> Judíovi pecujarubinē pata Jesúsjavaberena. Nexata bajaraponē Jesús jumetanetsi xaniavaetsia pejumecanaviataponaejava saduceovijavabelia. Nexata judíovi pecujarubinē jumaitsi Jesúsjavabelia:

—¿Detsa palivaisi bitso jivi bejumecovēnēta daxita Dioso pitorobilivaisianē pejumecovēnētsijava matatoxenetsia? jai.

<sup>29</sup> Jesús nexata jumaitsi judíovi pecujarubinējavabelia:

—Palivaisi bitso jivi bejumecovēnēta, daxita Dioso pitorobilivaisianē pejumecovēnētsijava matatoxenetsia jumaitsi mapacueniaje: “Paxamē, Israelpijinē papemoximē, pajumetaema. Vajatuxanenē rabaja caenē Dioso. <sup>30</sup> Bajaraponē panijatuxanenē, panijaDioso, daxita panejamatabēēthētojavavetsina pasivamēre. Pasivamērē daxita panejamatabēcueneta ata, daxita panenajamatabēxainaesaēta ata, daxita panesaēta ata,” pejailivaisi bitso jivi bejumecovēnēta daxita Dioso pitorobilivaisianē pejumecovēnētsijava matatoxenetsia. <sup>31</sup> Bajaraxuacujinae pecotocaevilivaisi, palivaisi bitso jivi bejumecovēnēta, jumaitsi icatsia mapacueniaje: “Pasivamēre itsajivi ata pacuenia paxamē panijacuata panaasivamē,” jai. Bajarapalivaisi ata jivi bitso bejumecovēnēta. Ajibi rabaja itsalivaisi pematatsēnēa, Dioso pitorobilivaisi, palivaisi bitso jivi bejumecovēnēta,” jai Jesús judíovi pecujarubinējavabelia.

<sup>32</sup> Nexata icatsia judíovi pecujarubinē jumaitsi Jesúsjavabelia:

—Jesús, xaniajamē rabaja pacuenia jumaitsimē. Caenē tsaena Dioso ponapona. Ajibi tsaena pematatsēnēa itsanē Dioso. <sup>33</sup> Bejumecovēnētatsi Dioso daxita vajajamatabēēthētojavavetsina, daxita vajanajamatabēxainaesaēta ata, daxita vajasaēta ata. Biasivatsi itsajivi ata pacuenia vaxaitsi vajacuata nasivatsi. Daxita bajaraxua itsa jumecovēnētatsi, bitso nacatonamatamota Diosojavabelia. Bajaraxua bitso nacatonamatamota ofrenda Diosojavabelia vajarajutabiabijava matatoxenetsia. Baitsi xua Diosonexa ofrendacuenia totajuitabiabatsi, dajubicuene itsa tobeyabiabatsi, bajaraxua matatoxenetsia bitso nacatonamatamota, jai judíovi pecujarubinē Jesúsjavabelia.

<sup>34</sup> Jesús itsa jumetane judíovi pecujarubinē xaniavaetsia pejumecanaviatsijavatsi, nexata Jesús jumaitsi judíovi pecujarubinējavabelia:

—Tsiquirijavayo catoaica Diosojavabelia nenajamatabēcuenecopatsinexa nijatuxanenē Dioso nexanaenexa, jai Jesús judíovi pecujarubinējavabelia.

Bajaraxuacujinae daxitajivi baja Jesús cujunavatsi. Nexata baja Jesús jivi jamatabēcuenējēbiaya livaisi apo yanijobitsi.

**Pacuenia Jesucristo yabara Davidpijinē  
bajayata tajēvelia: “Tajatuxanenē,” jai, yabara pelivaisi**

(Mt 22.41-46; Lc 20.41-44)

<sup>35</sup> Jesús livaisi tsipaeba templobota. Jesús pijacuata nayabarajumaitsi:

—¿Detsa xuajitsia judíovi pecujarubivi apo jumecovënëtsi Cristo Dioso pexënatocuene, ponë athëbëvetsica Dioso itorobijitsiatsica jivi pecapanepaenexa? Bajaramonae saya jamatabëcuenenavëxaniabiaya jumai tsabiabi Cristo yabara: “Cristo raja itsa patsiana, Davidpijinë pemomo tsane,” jai tsabiabi. <sup>36</sup> Davidpijinë bajayata Espíritu Santo pejamatabëcueneta tajëvelia jumaitsi Cristo yabara mapacueniaje: Dioso jumaitsi tajatuxanenëjavabelia: “Ecare abaxë tacujuanenia. Vecatsivajënae jumecovënëtsiaexanaenatsi abaxë copiaya nijavajabitsaë nitorobicuenianexa,” jai Dioso tajatuxanenëjavabelia, jai bajayata tajëvelia Davidpijinë mapacueniaje Cristo yabara.

<sup>37</sup> Nexata Davidpijinë bajayata Cristo yabara: “Tajatuxanenë,” itsa jai, nexata Cristo Davidpijinë apo pemomo. Tsipaji baja cajena Cristo saicaya Dioso pexënatato, nayabarajai Jesús judíovi pecujarubivi pecanaëjëtsinexa Cristo Dioso pexënatocuene.

Nexata jivibitsaëtoxaneto Jesús pejumetaevitsi jumebarëyatanetsi.

**Pacuenia Jesús jumaitsi jivijavabelia: “Judíovi pecujarubivi bitso pinijicuenia Dioso naneconitsiaexanaenatsi,” jai yabara pelivaisi**

*(Mt 23.1-36; Lc 11.37-54; 20.45-47)*

<sup>38</sup> Jesús jivi ayabitsaëtoxanetojavabelia, pijajivijavabelia ata, livaisi tsipaeba. Nexata Jesús livaisi petsipaebijavata jumaitsi mapacueniaje:

—Xania, panayajivitaema, palivaisi judíovi pecujarubivi tsipaeba, panejumecovënëtsiyaniva. Bajaramonae jitsipabiaba tomara tuatuajëjava piapiajavanë penaxatabiabavanapaenexa jivi peyayataenexatsi. Jitsipabiabanua bitso yayi-ataeya pebajacobinexatsi callejava. <sup>39</sup> Bajaramonae itsa najoneyabiaba judíovi penaactuatabibonëjava, jitsipabiaba penaenexa pexaniavirijavanëta. Nexata natsiitapetabiaba penaenexa peyayataevitsi penaenexa petsinubijavanëta. Bajaramonae itsa napatabiaba fiestajava ata, jitsipabiaba penaenexa peyayataevitsi penaenexa petsinubijavanëta. <sup>40</sup> Bajaramonae yamaxëitojorobiaya vecuanotabiabanua pamonajivi pevecuatëpaevanëtsi pecobecovëjavaxi. Bajaramonae itajara pinijicuenia vajëcabiaba Diosojavabelia. Itsiata pepo pexaniajajamatabëcueneta apo vajëcabiabi. Bajaramonae vajëcabiaba saya jivi petaenexatsi Dioso itajara bitso bepejumecovënëtsivi. Nexata bajararamonae bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamonae Dioso apo pejumecovënëtsivi, jai Jesús judíovi pecujarubivi yabara.

**Pacuenia ofrenda rajuta Diosojavabelia  
pamona pevecuatëpaevatsi yabara pelivaisi**

*(Lc 21.1-4)*

<sup>41</sup> Itsamatacabi Jesús eca templobota. Pacajonita jivi palata jeyabiaba ofrendacuenia perajutsijava Diosojavabelia, bajarapacajoni pecanacujitsita Jesús eca. Nexata Jesús cobetaeyeca jivi palata pejeponaejava bajarapacajonita. Ayajava palata pexainaevi, caejivi canacujitsia, ayajava palata jepona. <sup>42</sup> Bajarajota napata pamona pevecuatëpaevatsi, bepejiobiva. Nexata bajarapova najia anijapalatanëyobeje piamatamobinëyobeje. <sup>43</sup> Nexata Jesús junata pijajivi. Jumaitsi pijajivijavabelia:

—Xaniajanë pacuenia pacatsipaebijitsiatsi. Mapovaje pamona pevecuatëpaevatsi bejiobi bitso. Xuayo jia cajonita ofrendacuenia perajutsinexa Diosojav-

abelia, bajaraxuayo bitso Dioso sivajamatabëcuenebarëya daxita xua itsamonae jia bajarapacajonita matatoxenetsia. <sup>44</sup>Tsipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje bepejibiva daxitajavayomi penaevetsijavayotaminexa, jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

**Pacuenia Jesús pijajivitonëjavabelia tajëvelia tsipaeba itsamatacabi itsanacuapijivi templobo pexuabijavanexatsica yabara pelivaisi**

*(Mt 24.1-2; Lc 21.5-6)*

**13** Itsa baja Jesús, pijajivi yajava, pitsaparena templobovecua, Jesús pijajivitonë jumaitsi Jesúsjavabelia:

—¡Tajatuxanenë, jica, nataema mapaibotoxanetonë, mapaboxanetonë ataje! jai Jesús pijajivitonë.

<sup>2</sup>Nexata Jesús tajëvelia jumaitsi pijajivitonëjavabelia:

—Daxita raja mapaboxanetonë tanemeje, bajarapoboxanetonëmi itsamatacabi itsanacuapijivi penetsianica irabetsica. Nexata mapaibotoxanetonëmije itsaiboto ata pejumavereca apo boca tsane, jai Jesús tajëvelia pijajivitonëjavabelia.

**Pacuenia itsijitsia Jerusalén tomarata, daxitanacuanëjava ata, mapanacua pecopiarucaevajënaeje yabara pelivaisi**

*(Mt 24.3-28; Lc 21.7-24; 17.22-24)*

<sup>3</sup>Jesús eca petsutojumata. Patsutojumata olivonaenë apaaxayo templobo canacujitsijavalia, bajarapatsutojumata Jesús eca. Nexata Pedro, Santiago, Juan, Andrés, bajarapamatabëxëyo pijaepatojavata Jesúsjavabelia jumaitsi:

<sup>4</sup>—Patajatuxanenë, pajitsipajë patanetsipaebinexamë patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajë itsa copiapatsijitsia xua jumaitsimë templobo yabara? jai bajarapamonae Jesúsjavabelia.

<sup>5</sup>Jesús nexata tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaename. Pëtsa panacopatame itsajivi ata papecayamaxëitorobinexa. <sup>6</sup>Tsipaji raja peyamaxëitorobivinexa ayaibitsaëto patsiana beخانë itajara tsane. Bajarapamonae najumetsënëtsiaya jumai tsane: “Xanë raja Cristonë, Dioso athëbëvetsica taneitorobinëtsica jivi tacapanepaenexa,” jai tsane. Bajarapamonae jivi, ayaibitsaëto yamaxëitorobiana.

<sup>7</sup>Vajabitsaë pexanaejava imoxoyonacuanëjava, tajënacuanëjava ata, pavënëli-vaistaename. Itsiata pëtsa pajunavame. Bajara peneta itsane mapanacua pevereverecaevajënaeje. Itsiata baitsi jane bepjiia bajarapamatacabi mapanacuaje abaxë apo vereverecajuni tsane. <sup>8</sup>Mapanacuaje pevereverecaevajënae peneta copiyaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. Ira najëbiana ayaiacuenia nacuanëjava. Ayaijaniboxaneto najetarucaena nacuanëjava. Ayaiacuenia bitso jivi bejiobi tsane nacuanëjava. Daxita bajarapacuenie itsa pataename, saya abaxë taxuxuabaponaena piayaicuenie, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuata.

<sup>9</sup>Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Nexata paxamē xania panayajivitaename. Tsipaji raja xanē patajajivix-aemē, tomara pevetsivijavabelia pacacaponabiabiana. Bajarapamonae pacajumaconibabeyabiabiana judiōvi penacaetuatabiabibonēta. Paxamē patajajivix-aemē pacanubiana nacuaevevtsivi pitabarata, presidentevi ata pitabarata. Nex-ata bajarajota bajarapamonaejavabelia patsipaebianame xanē talivaisi. <sup>10</sup> Nex-ata daxitanacuanēpijivijava patsipaebanajetarubenaename pecapanepaelivaisinex-atsi. <sup>11</sup> Itsa pacataicaena papecaneconitsinexa nacuaevevtsivijavabelia, pētsa pajamatabēcuenebējamē panenayajivicuaicuajainexa bajarapamonaejavabelia. Palivaisi panejamatabēcuenevtsina pacatonaitajētsiana, patsipaebianame bajarapamonaejavabelia. Tsipaji raja bajarapepatota Espiritu Santo pacacuaicuajiaiyax-anaena. Paxamē baitsi panejamatabēcueneta apo pacuaicuajiamē tsane. <sup>12</sup> Bajara-pamatacabi patajajivixaemē, panacaemonae atamē, itsajivi panijamonaevjivi ata pacacanajetsiana nacuaevevtsivijavabelia papecabeyaxuabinexa. Paneaxa ata, paneena ata, pacacanajetsiana nacuaevevtsivijavabelia papecabeyaxuabinexa. Panexi ata pacacanajetsiana nacuaevevtsivijavabelia papecabeyaxuabinexa. <sup>13</sup> Daxitajivi pacaitoya tsane patajajivixaemē. Itsiata pajivi ajamatabēcuenesaē tsane Dioso pe-jumecovēnētsijava nacua pecopiarucaejavabelianexa, bajarapajivi Dioso capanepae-natsi, jai Jesús pijajivijavabelia tajēvelia pevajunupaebijavata pacuenia itsamata-cabi itsijitsia mapanacuataje.

<sup>14</sup> Icatsia Jesús tajēvelia vajunupaeba papiayaicuene itsamatacabi copiapatsijitsia Jerusalén tomarata. Jesús jumaitsi pijajivijavabelia mapacueniaje:

—Diosojumepaebinēmi, profeta Danielpijinē, tajēvelia Dioso pitorobicueniatsi pi-ayaicuene pevajunupaebilivaisi bajayata yaquina. Xua panijatamaranēmi verevere-caeyaexanaejitsiatsi, bajaraxua pelivaisi yaquina. (Pajivi lebiana mapalivaisije, yapētaena papiayaicuene vajunupaeba mapalivaisitaje.) Nexata paxamē pataename bajarapapiayaicuene penucaejava templobota, itsajota picani apo benucae. Nex-ata Judea nacuata pejinavanapaevi ita vēnēlivaisitaena bajarapapiayaicuene penucaejava templobota, pētsa nubena. Naxanitsiayo bajarapamonae rēcēpecaena ibot-sutonējavabelia. <sup>15</sup> Pajivi pijabojumata athēbēyo ecaya, ita vēnēlivaisitaena ba-jarapapiayaicuene penucaejava templobota, bajarapajivi perunaecujinaetsica bepi-jia najetabajiraviana. Pētsa joneya pijaboyalia pejutsinexa pecobecovē. <sup>16</sup> Pajivi pijinia nacuenebaponapona pijapabita, ita vēnēlivaisitaena bajarapapiayaicuene penucaejava templobota, bepjjia najetabajiraviana. Pētsa naviata pijaboyabelia pe-jutsinexa penaxatabijava. <sup>17</sup> ¡Papetiriavi penacueto yacotajinavanapa, bitso bejiobi tsane bajarapamatacabi! ¡Bitso nabejiobitsiaya jinavanapaena! ¡Papetiriavi ata mi-toapaenacuetoxi isajinavanapa, bitso bejiobi tsane bajarapamatacabi! <sup>18</sup> Bajaraxu-ata tajēvelia Diosojavabelia pavajēcare piayapēbejematacabitata papecatocopiapat-siyaniva bajarapapiayaicuene. Nexata pamatacabi parēcēpecaename, pexaniamata-cabi Dioso pacatocopatsiana bitso nabejiobitsiaya paneponaeyaniva. <sup>19</sup> Tsipaji raja bajarapamatacabi bitso jivi bejiobi tsane. Pabejiobicuene abaxē jivi caeto ata apo tae Dioso nacua pexanaecujinae, bajarapabejiobicuene taena. Bajaraxuacujinae icatsia itsamonae bejiobiaexanae atatsi tsane, itsiata bajarapacuenia bitso apo bejiobiaex-anaetsi tsane. Tsipaji Dioso epatua yatuucutsiana jivi bitso nabejiobitsiaya pejinavanapaematacabianēminexa, bitso jivi nabejiobitsia pejinavanapaeyaniva. <sup>20</sup> Dioso epatua ita apo yatuucutsi tsipae bitso jivi nabejiobitsiaya pejinavanapaematacabi-anēminexa, caejivi ata apo asaē tsipae. Itsiata baitsi jane Dioso piasivaxae pijajivi,

pitapetsivi, Dioso epatua yatuucutsiana bitso jivi nabejibitsiaya pejinavanapaematacabianëminexa, jai Jesús pijajivijavabelia tajëvelia pevajunupaebijavata papiyaicuene itsamatacabi copiapatsijitsia Jerusalén tomarata.

<sup>21</sup> Icatsia Jesús tajëvelia vajunupaeba pacuenia itsamatacabi mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi. Jesús jumaitsi pijajivijavabelia mapacueniaje:

—Nexata itsajivi yamaxëitojorobiaya itsa pacajumaitsi tsane: “Pataema. Mara Cristo nucaje,” itsa pacajai tsane, pëtsa pajumecovënëtame. Itsa pacajumaitsi tsane: “Bajarajota nuca Cristo,” itsa pacajai tsane, pëtsa pajumecovënëtame. <sup>22</sup> Itsamonae jumai tsane: “Xanë raja Cristonë,” jai tsane. Itsiata jemajai tsane. Itsamonae jumai tsane: “Diosojumepaebinënë raja, profetanënë,” jai tsane. Itsiata jemajai tsane. Bajarapamonae itajara exanaena pinijicuene pexanaejavanë peyamaxëitojorobinexa saya jivi. Nexata bajarapacuenia itsamonae yamaxëitojorobaponaenatsi. Itsiata pamonae pepacuenie Dioso pijajivi, Dioso pitapetsivitsi, bajarapamonae apo yamaxëitojorobi tsanetsi. <sup>23</sup> ¡Xania baja tsane! Xanë rabaja pacatsipaebatsi tajëvelia daxitacuene panenayajivitaenexa, jai Jesús pijajivijavabelia tajëvelia pevajunupaebijavata pacuenia itsamatacabi mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi.

**Pacuenia Jesús tajëvelia navajunupaeba icatsia  
pepsijavanexatsica petëpaecujinae yabara pelivaisi**

*(Mt 24.29-35, 42, 44; Lc 21.25-36)*

<sup>24</sup> Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivajënaetsica, jivi taena pecujunavicuene. Jivi nabejibitsiaya jinanapaena. Nexata jivi nabejibitsiaya pejinavanapaematacabicujinae matacabipijijuameto aitaquiri tsane. Meravipijijuameto ata aitaquiri tsane. <sup>25</sup> Tulupu ata othopaenica irabetsica. Daxitacuene, xua rubena athëbëtsatsia, najëabiana. Xaniavaetsia apo rubenae tsane. <sup>26</sup> Nexata bajarapaepatota xanë, Daxitajivi Pematapijinënë, jivi netaena athëbëvetsica itarërëbota tanajetarucaejava. Patsianicajë daxitacuene taevetsinexa. Tanivenivenaecotia yajavapatsianicajë. <sup>27</sup> Bajaraxuacujinae ángelevi itorobianajë, pamonae tajajivi, Dioso pitapetsivitsi, daxitanacuanëjavaverena tane-tocaetuatsinexa xanëjavaberena, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

<sup>28</sup> Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjère pacuenia itsi higueranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonejavanexa. <sup>29</sup> Bajara pijinia pacuenia peneta itsa pataename pecopiapatsijava, xua yabara pacatsipaebatsi, nexata payapëtaename imoxoyo baja tavajënae tsane tapatsijavanexatsica. <sup>30</sup> Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëjavabelia ata, apo vereverecae tsane. Matapania xua yabara pacatsipaebatsi, itsa baja copiapatsiana, bajarapamonae jane baja vereverecaena. <sup>31</sup> “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonae, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena.

Nexata palivaisi pacatsipaebatsi, apo najumetsënëtsinē tsane. Nexata xua yabara pacatsipaebatsi, pacuenia baja najumecapanepaeya jumaitsinē, daxita bajaraxua copiapatsiana, jai Jesús pijajivijavabelia tajēvelia pevajunupaebijavata pacuenia it-samatacabi itsijitsia mapanacuataje.

<sup>32</sup> Jesús icatsia jumaitsi pijajivijavabelia:

—Itsajivi ata apo yapētae pamatacabita, paepatota ata, copiapatsijitsia daxita xua yabara tajēvelia pacatsipaebatsi. Athēbēpijivi ata, Ángelevi, apo yapētae. Xanē, Dioso pexēnato atanē, apo yapētaenē. Caenē taxa Dioso yapētane, jai Jesús pijajivijavabelia.

<sup>33</sup> Icatsia Jesús jumaitsi pijajivijavabelia:

—Xania baja tsane. Daxitamatacabi saya panecopiaevetavanapaename. Tsipaji raja apo payapētaemē tsane paepatota patsijitsianētsica. <sup>34</sup> Nexata pacuenia bo pexainanē, pijabo evetsiaexana pijajivi, bajara xanē itsinē tsane. Bo pexainanē itsa ponaejitsia tajēnacuayabelia, pijajivi evetsiaexana pijabo. Nexata pijajivi, caejivi canacujitsia, rajutapona petonacuenebavanapaejavanexatsi pecovēta. Nexata pijajiviyajuvēnēnē itoroba baupa pevetsinēnexa petoetabiabinexatsi pijabobaupa. Bo pexainanē jumaitsi bajaraponējavabelia: “Xaniavaetsia netoetabiabianame baupa matapania tapatsimatacabijavabelianexa,” jai bo pexainanē. <sup>35</sup> Nexata paxamē ata bajarapacuenia panecopiaevetavanapaename matapania tapatsimatacabitsicajavabelianexa. Tsipaji raja apo payapētaemē tsane pamatacabita patsijitsianēt-sica. Ajena meravi, caecanivia, patsipajē. Meravi tuatujēta ata patsipajē. Matacabivēpata ata patsipajē. Bajayacunua ata patsipajē. <sup>36</sup> Bajaraxuata xania baja tsane. Daxitamatacabi saya panecopiaevetavanapaename. Jemata itsa patsipajē, paepatota apo panecopiaevetsimē, pacacaxitarabijitsipatsi panemajitsijavata. <sup>37</sup> Palivaisi pacatsipaebatsi paxamējavabelia, daxitajivinexa jumaitsinē. ¡Daxitamatacabi saya panecopiaevetavanapaename! jai Jesús pijajivijavabelia.

**Pacuenia picani Jesús pijavajabitsaē jamatabēvaetabatsi yabara pelivaisi**

(Mt 26.1-5; Lc 22.1-2; Jn 11.45-53)

**14** Anijamatacabibeje abaxē ajibi pejonenexa pascuafiesta, itsafiestanua, pafiestajava judfovi baxane levadurata matajērēbinejeva pexanaepan. Nexata bajarapafiestabejevajēnaeya, sacerdotevi penamatacaitorobivi, judfovi pecujarubiv-inua, najumejaita picani bajarapafiestajava pevaetabinexatsi Jesús. Penajumetsënēt-silivaisita picani jamatabēvaetabatsi Jesús pebexuabinoxatsi. <sup>2</sup> Itsiata bajarapamonae najumaitsi:

—Fiestajava meta abaxē apo vaetabi tsanetsi jivi vajanacaitsacueniabianiva, na-jai bajarapamonae.

**Pacuenia Jesús petiriva tsimataepanatsi petuxujuviaceitera yabara pelivaisi**

(Mt 26.6-13; Jn 12.1-8)

<sup>3</sup> Jesús ponapona Betania tomarata, Simón pijabota. Simón bajayajebi bitso peperabētsabanaenēmi. Nexata Jesús pexaeyecaejavata mesata, petiriva cobenaimoxoyorenatsi petuxujuviaceitera, nardovēnēra, alabastrobotellabēta pejeaceitera. Bajarapora bitso penamatamotsira. Nexata bajarapova yavētoxobixuaba bajarapora, petuxujuviaceitera. Bajaraxuacujinae Jesús tsimataepanaicatsi bajarapaaceitera.

<sup>4</sup> Bajarajota itsamonae penaenaevi itsa taeyena Jesús petsimataepanaejavatsitsica, bajarapamonae jamatabëanaepanareca. Nexata ëpamonae najumai tsenae:

—¿Detsa xuajitsia saya xuaba bajarapacuenia maporaje? <sup>5</sup> Canajetsipa rajane. Nexata matamopitsipa trescientos padenariobeje matatoxenetsia. Bajarapapalata rajutsipa bepejobivi bajarapacuenia peyavenonaenexa, najai tsenae ëpamonae.

Bajarapamonae anaepana bajarapovajavabelia.

<sup>6</sup> Nexata Jesús jumaitsi bajarapamonaejavabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuenenexanaje. <sup>7</sup> Daxitamatacabi raja bepejobivi jinavanapa itsaxuayo pajinavanapame. Pamatacabi pajitsipame pexaniacuenenepanexa bepejobivijavabelia, nexata patoexanaename. Itsiata baitsi jane xanë daxitamatacabi apo ponaponaenë tsane paxamëjavata. <sup>8</sup> Mara papetirivaje pexaniacuenenepanexa pacuenia baja cuenecaëjëpatsi. Itsamonae petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviaceitera, abaxë apo tëpae atanë. Nexata baja bajarapova neperabëxaniavaeta itsamonae tanemëthëtsivajënae. <sup>9</sup> Xaniajanë pacuenia pacatsipaebijitsiatsi. Daxitanacuanëjava tajajivi itsa paebanana-jetarubenaena pexanialivaisi jivi tacapanepaelivaisinexa, vajunupaebabiabiananua pacuenia exana xanëjavaberena mapapetirivaje, jai Jesús pijajivijavabelia.

### **Pacuenia Judas pona Jesús pijavajabitsaë pecobeyabelia pecanajetsinexatsi yabara pelivaisi**

*(Mt 26.14-16; Lc 22.3-6)*

<sup>10</sup> Jesús pijajivi doce ponëbejeyajuvënënë pevënë Judas. Itsavënë Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi. Nexata jane baja Judas Jesús canajetatsi sacerdotevi penamatacaitorobivi pecobeyabelia. <sup>11</sup> Nexata sacerdotevi penamatacaitorobivi itsa tane bajarapacuenenepanexa, barëya. Jumaitsi bajarapamonae Judasjavabelia:

—Palata pacarajutsianatsi, jai.

Nexata jane baja xuacujinae Judas Jesús naitaxutocaevetaponaponatsi. Nexata paepatota Judas toyapëxanepanatsi, perajutsinexa jane baja bajarapamonae pecobeyabelia.

### **Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaisi**

*(Mt 26.17-29; Lc 22.7-23; Jn 13.21-30; 1 Co 11.23-26)*

<sup>12</sup> Junua jane baja fiesta, pafiestajava judíovi baxane levadurata matajërëabinejeva pexanaepan. Bajarapamatacabi ovejaxi babia pexaenexa pascua fiestamatacabi. Nexata Jesús yanijobatsi pijajivi.

—¿Detsa belia paponanajë patacamitsaexanaenexa pascua fiestamatacabi pexaejava nexaenexa? jai Jesús pijajivi.

<sup>13</sup> Nexata Jesús itoroba anijanëbeje pijajivitonëbeje. Jumaitsi:

—Tomarabelia paponarebeje. Bajarajotalia pacaxitajarabianamebeje mera canalito pecanajetarucaenë. Bajaraponë papënanajetarucaenenamebeje. <sup>14</sup> Pabota bajaraponë joneyojopaena, bajarapabo pexainanëjavabelia pajumaitsimëbeje tsane: “Vajanacacujarubinë raja jumaitsi: ‘¿Detsa jota pënëyatuucutsibo eca, pabota tajajivi



barëxaejtsianë xua jivi baxane pascua fiestamatacabi? jai raja vajanacacujarubinë,” pajamëbeje tsane bajarapabo pexainaenëjavabelia. <sup>15</sup>Nexata athëbëabetsia anijairabeje pënëyatuucutsibojavata, pacatsitajëtsianabeje. Bajarapaboënëta athëbëyotsia paira ayaiënëtuatujë tsane. Daxitacuene bajarajota xainaena. Nexata vajaxaejavanexa bajarajotatsia paexanaenamebeje, jai Jesús pijajivitonëbejejavabelia.

<sup>16</sup>Nexata jane baja ponabeje Jesús pijajivitonëbeje. Patabeje baja tomarabelia. Caxitajarababeje daxita pacuenia Jesús jumaitsitsibeje. Nexata xua jivi baxane pascua fiestamatacabi daxita Jesús pijajivi pebarëxaenexa, bajaraponëbeje exanabeje jane baja.

<sup>17</sup>Itsa baja meravitsia, Jesús patajopa bajarajota pijajivi, doce ponëbeje, yajava.

<sup>18</sup>Daxita mesata pexaeyenaejavata, Jesús jumaiti pijajivijavabelia:

—Xaniajanë pacuenia pacatsipaebijtsiatsi. Caenë paxamëyajuvënënë, xanëjavata pexaeyecaenë, necanajetsiana tajavajabitsaë pecobeyabelia, jai Jesús.

<sup>19</sup>Nexata Jesús pijajivi bejamatabëjiobireca. Nexata Jesús pijajivi, caenë canacujitsia, Jesúsjavabelia yanijobapona.

—¿Xanë tsaja tsane? jai tsaponae Jesús pijajivi.

<sup>20</sup>Nexata Jesús jumaiti pijajivijavabelia:

—Doce paponëmëbejeyajuvënënë raja. Ponëbeje peneta caecuenia panajuacajabutsianajëbeje panbë platojavabelia, bajaraponë tsane. <sup>21</sup>Nexata xanë, Daxitajivi Pematapijinënë, tēpaenajë pacuenia baja cajena xanë yabara Dioso pejumelivaisibaxutota tajëvelia jumaiti. Itsiata ponë tajavajabitsaë pecobeyabelia necanajetsiana, bajaraponë bitso bejiobi tsane pinijicuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipatsi bajaraponë itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia.

<sup>22</sup>Nexata pexaeyenaejavata Jesús pita panbë. Jesús jumaiti Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae epatsënëquejeba bajarapapanbë. Rajuta pijajivi. Jesús jumaiti pijajivijavabelia:

—Paxaema. Mara tavitoje, jai.

<sup>23</sup>Bajaraxuacujinae icatsia Jesús copavënëjavata yapita pijajivi pebarëapaeranaxa. Diosojavabelia jumaiti:

—Pexaniacuene panetoexaname. Panerajutame maporaje, jai.

Bajaraxuacujinae pijajivi bajarapora rajuta. Daxita Jesús pijajivi bajarapora apa.

<sup>24</sup>Jesús pijajivijavabelia jumaiti:

—Tajana raja othopaena jivi ayaibitsaëtoxaneto pecapanepaenexatsi. Nexata tatëpaejava pejamatabëcueneta, jivi yapëtaena pepacuene xaniajai Dioso jivi pecapanepaejavanexa, pacuenia baja cajena tajëvelia Dioso najumecapanepaeya jumaiti. <sup>25</sup>Xaniajanë pacuenia pacatsipaebijtsiatsi. Xanë rabaja matavëjëa apo apaenë tsane uvacuaira mapanacuataje, matapania icatsia apaenajë Dioso pijanacuatatsia pejanauvacuaira, jai Jesús pijajivijavabelia.

**Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai, yabara pelivaisi**

*(Mt 26.30-35; Lc 22.31-34; Jn 13.36-38)*

<sup>26</sup> Jesús pijajivi barënaaxëana Diosojumevajianë. Bajaraxuacujinae Jesús pijajivi barëpona petsutojumabelia. Patsutojumata olivonaenë apaaxayo, bajarapatsutojumabelia barëpona. <sup>27</sup> Nexata bajarapatsutojumata Jesús jumaitsi pijajivijavabelia:

—Daxita raja paxamë ajena, pameravi, panexuabarëcëpecaename. Tsipaji rabaja patanexuabarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovejabitsaëto nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavanexamë yabara. Nexata ajena, pameravi, tajavajabitsaë itsa nevaetabiana tanebeyaxuabinexa, daxita paxamë panexuabarëcëpecaename. <sup>28</sup> Itsiata baitsi jane tatëpacujinae icatsia asaënë tsane. Nexata paxamë panevajënaeyabelia copiata ponaenajë Galilea nacuyabelia, jai Jesús pijajivijavabelia.

<sup>29</sup> Nexata Pedro jumaitsi Jesúsjavabelia:

—Daxita mapamonaaje caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

<sup>30</sup> Nexata Jesús jumaitsi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, nanianaevëpata, anijajumebeje vacara pefiabivajënaeya, nayavajunuaxainaename tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

<sup>31</sup> Itsiata Pedro ajumesaëya jumaitsi Jesúsjavabelia:

—Nebeyaxuabijitsia ata tsane xamë yajava, itsiata cajena apo nayavajunuaxainaenë tsane nijajivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

**Pacuenia Jesús vajëta Diosojavabelia Getsemanívenëjavata yabara pelivaisi**

*(Mt 26.36-46; Lc 22.39-46)*

<sup>32</sup> Jesús, pijajivi yajava, pata Getsemanívenëjavata. Bajarajota Jesús jumaitsi pijajivijavabelia:

—Paneevetenare abaxë majotaje tavajëtsiepatoyo Diosojavabelia, jai.

<sup>33</sup> Nexata Pedro, Santiago, Juan, bajara saya pamatabëxëyo, Jesús barëpona pesaicaeyojavabelia. Bajaraxuacujinae Jesús bitso najamatabëxaina. Nexata bejamatabëjibireca. <sup>34</sup> Nexata Jesús jumaitsi pijajivi acueyabi ponëbejejavabelia:

—Xanë bitso pinijicuenia najamatabëxainajë. Nexata tanajamatabëxainaejava yatëpaejitsianë. Paxamë abaxë majotaje panacopabare. Paitavamë tsane. Pëtsa pamajitame, jai Jesús pijajivi acueyabi ponëbejejavabelia.

<sup>35</sup> Nexata Jesús, caenë, pevajënaeyabelia icatsia tsiquirirjavayo ponataba. Tsipaji Jesús tajëvelia yapëtane pacuenia Dioso tocopatatsi bitso ayaicuenia pebejibiaexanaenexatsi paepatota pijavajabitsaë beyaxuabijitsiatsi. Nexata Jesús irataeya bocajunua pevajëtsinexa Diosojavabelia. Vajëta picani Diosojavabelia bitso bejibitsiaya pebeyaxuabiyaniatsi. <sup>36</sup> Nexata Jesús pevajëtsijavata Diosojavabelia, jumaitsi:

—Taxa Diosomë, netocopatame picani tanebeyaxuabinexa betajibicueneta. Daxitacuenë raja cacaëjëpa nexanaenexa. Nexata necapanepare bajarapabejibicuen-

evacqua. Itsiata xanë apo tajitsipaeuene ata, pacuenia xamë jitsipame, netocopat-sianame, jai Jesús pevajëtsijavata Diosojavabelia.

<sup>37</sup> Bajaraxuacujinae Jesús naviarena acueyabi ponëbeje pijajivijavaberena. Caxitajaraba Jesús pijajivi pemajitanubenaevi. Nexata Jesús jumaitsi Pedrojavabelia:

—Simón, ¿pamajitanubename tsaja? ¿Apo pacacaëjêpae tsabaja rovia caeep-atoyo ata paneaitavatsenaenexa? <sup>38</sup> Pëtsa pamajitame. Paitavamëre. Pavajëre Diosojavabelia pibisiacuene paneexanaeyaniva. Tsipaji raja dovathi pacajamatabëcueneëjêbiana. Paxamë picani panejamatabëcueneta pexaniacuene jamatabëpaexanabiabame. Itsiata baitsi jane apo pajamatabëcuenesaëmë pexaniacuene paneexanaenexa, jai Jesús Pedrojavabelia.

<sup>39</sup> Nexata icatsia Jesús pona pecovëyabelia pevajëtsinexa icatsia Diosojavabelia. Bajara icatsia pacuenia Jesús vajëta Diosojavabelia pacuenia vajëta copiata. <sup>40</sup> Icatsia Jesús naviarena pijajivijavaberena. Caxitajaraba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana. Nexata Jesús pijajivi apo yapëtae pacuenia jumecanaviatsijitsia Jesúsjavabelia. <sup>41</sup> Icatsia abaxë Jesús naviaata pecovëyabelia pevajëtsinexa icatsia Diosojavabelia. Bajaraxuacujinae, acueyabi baja xuabeje pevajëtsicujinae, Jesús icatsia rena pijajivijavaberena. Jumaitsi Jesús pijajivijavabelia:

—¿Abaxë tsarovia tsiteca pamajitanubename? Ajibi rabaja. Copiapata rabaja paepatota xanë, Daxitajivi Pematapijinënë, necanajetsijitsia pibisiacuene pexanaevi pecobeyabelia. <sup>42</sup> Panonobapunare baja. Ponaenatsi baja. Imoxoyo rabaja najetaruca tajavajabitsaë pecobeyabelia tanecanajetsinënexa, jai Jesús pijajivijavabelia Judas yabara.

### **Pacuenia Jesús vaetabatsi pijavajabitsaë yabara pelivaisi**

*(Mt 26.47-56; Lc 22.47-53; Jn 18.2-11)*

<sup>43</sup> Jesús pijavajabitsaë pevaetabijavatanexatsi, cuaicuajai tsanucae pijajivijavabelia. Nexata bajarapaepatota patanajetaruca Judas, Jesús pijajivi doce ponëbejeyajuvënënëmi. Judas pënanajetarubensatsi jivi ayaibitsaëtoxaneto. Bajarapamon-aejayuvënëvi itsamonae canajetarubena espadanë. Itsamonae canajetarubena naebonë yajava. Bajarapamonae itorobatsi sacerdotevi penamatacaitorobivi, judfovi pecujarubivi ata, judfovi pijaancianovi ata. <sup>44</sup> Judas pebarërenavajënae bajarapamonae, copiaya baja cajena Judas tsipaeba pacuenia bajarapamonae yapëtaejitsia Jesúscuene. Judas jumaitsi mapacueniaje:

—Ponë raja peneta bajacobiaya itabaratsutsunexuabianajë, bajaraponë Jesús tsane. Bajaraponë pavaetabianame. Pacobecëtsianame xaniavaetsia. Nexata panecobecëtsinë pacaponaeremena, jai baja cajena Judas pematacanajetarucaevijavabelia pebarërenavajënae.

<sup>45</sup> Nexata jane baja Judas itsa patanajetaruca, exana pacuenia baja cajena jumaitsi pematacanajetarucaevijavabelia. Judas Jesús itabaratsutsuniaya bajacobatsi, Judas jane baja pematacanajetarucaevi peyapëtaenexa Jesúscuene. <sup>46</sup> Nexata jane baja Jesús pijavajabitsaë vaetabatsi. Cobecëtatsi xaniavaetsia.

<sup>47</sup> Bajarajota Jesús pijajiviyajuvënënë pijaespada navemarajonotaxuabina. Muxuyoropaebixuaba sacerdotevi pepo penamatacaitorobinë pijajivitonë. <sup>48</sup> Nexata Jesús jumaitsi pevaetabivitsijavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinexamë pacuenia pavaetababiabame penacobetoxotsinë. <sup>49</sup>Xanë caematacabi canacujitsia Dioso pejumelivaisi paxamëjavabelia pacatsipaebabiabatsi templobota. Itsiata bajarapamatacabi apo panevaetabimë. Mara pacuenia panevaetabameje tanetocopiapatsixae baja pacuenia Dioso pejumelivaisibaxutota bajayata tajëvelia jumaitsi xanë yabara, jai Jesús pevaetabivitsijavabelia.

<sup>50</sup>Nexata jane baja Jesús pijavajabitsaë pevaetabijavatatsi, daxita Jesús pijajivi xuabarëcëpecatsi pacuenia baja cajena Jesús jumaitsi tajëvelia pijajivijavabelia.

### **Pacuenia pevëjëato najetabajirava yabara pelivaisi**

<sup>51</sup>Pevëjëato pënanajetaruca Jesús pecaponaevitsi. Sábanata namataquinanajetaruca. Nexata pevëjëato bajarapamonae yasábanavaetabatsi. <sup>52</sup>Nexata pevëjëato sábanana naisinaxuaba. Najetabajirava jumasänë.

### **Pacuenia Jesús nutatsi judíovi penamatacaitorobivi pitabarata yabara pelivaisi**

*(Mt 26.57-68; Lc 22.54-55, 63-71; Jn 18.12-14, 19-24)*

<sup>53</sup>Jesús caponaliatsi sacerdotevi pepo penamatacaitorobinë pijaboyabelia. Nacaeuata bajarajota daxita sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava. <sup>54</sup>Itsa baja Jesús caponaliatsi, nexata Pedro bajarapamonae pecovëya tajiyo najetaruca. Sacerdotevi pepo penamatacaitorobinë pijabo matatoyorotsia yacaranata ibopanaxanetonë, mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanabojavabelia, itsabelia Jesús cajunuatsi. Nexata sacerdotevi pepo penamatacaitorobinë pijabopanabota, Pedro nanonopeca isoto muxuneneta templobopijipolicíavita.

<sup>55</sup>Nexata bajarapabo ënëtuatuajëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarëcuaijai. Bajarapamonae nayanijoba.

—¿Jipatsa yapëtane Jesús pibisiacuene pexanaejava, paneconi yabara beyaxuabijitsiatsi? najai tsaponae.

Itsiata bajarapamonae apo caxitajarabi itsaneconi ata Jesús pijaneconi. <sup>56</sup>Itsamonae saya penajumetsënëtsilivaisi paeba Jesús yabara. Itsiata caelivaisi najua-paebi ata, najumejëpaeya apo paebi bajarapamonae. <sup>57</sup>Itsamonae nonobapuna. Penajumetsënëtsilivaisi paeba Jesús yabara. Penonobapunaeviyajuvënënë jumaitsi mapacueniaje:

<sup>58</sup>—Paxanë raja, pamatabëxëyo panubenajë majotaje, pajumetaniji Jesús pejumaitsiyava. Bajaraponë jumaitsi: “Xanë raja xuabianicajë mapatemploboje, jivi pexanaebo. Acueyabi matacabita icatsia itsabo veretetsianajë. Jivi apo pexanaebo tsane,” jai maponë Jesúsje, jai penonobapunaeviyajuvënënë.

<sup>59</sup>Itsiata daxita bajarapamonae najumejëpaeya apo paebi.

<sup>60</sup>Nexata jane baja sacerdotevi pepo penamatacaitorobinë nonotapuna bajarapamonae pitabarata. Nexata jumaitsi Jesúsjavabelia:

—¿Apo yapëtaemë tsaja itsalivaisiyo ata nejumecanaviatsinexa? ¿Xaniajai tsabaja pacuenia mapamonae caneconitsiajumaitsiye? jai Jesúsjavabelia sacerdotevi pepo penamatacaitorobinë.

<sup>61</sup> Jesús itsiata moya. Apo jumepitsi cajena. Nexata icatsia sacerdotevi pepo penamatacaitorobinē jumaitsi Jesúsjavabelia:

—¿Xamē tsabaja pepacuene Cristomē, athēbēvetsica Dioso pecaitorobinētsica jivi necapanepaenexa? ¿Xamē tsaja, Dioso pexēnatomē? jai.

<sup>62</sup> Nexata Jesús jumaitsi bajaraponējavabelia:

—Jājā, xanē rabaja. Paxamē raja panetaename, Daxitajivi Pematapijinēnē, taecaejava Dioso pecujanenia, daxitajamatabēcuene pecaējēpaenētsi. Panetaenamenua tanajetaruaejava athēbēvetsica itarērēbota, jai Jesús.

<sup>63</sup> Bajarapacuenia Jesús pejumaitsijava itsa jumetane, sacerdotevi pepo penamatacaitorobinē penaxatsijava anaeya titinaxuaba. Bajarapacuenia titinaxuaba pi-anaepanaexae Jesús pejumaitsijava yabara. Nexata sacerdotevi pepo penamatacaitorobinē jumaitsi daxita penacaetuatsivijavabelia:

—Pijacuata rabaja pejumaitsiyumeta naneconita. Pematatsēnēa apo namatavenonaetsi itsamonaē vajanacatsipaebinexa paneconi yabara maponēje naneconitsiaexanaejitsiatsi. <sup>64</sup> Paxamē rabaja pajumetaneme maponēje Dioso apo pejisipaecuenia pecuaicuaijaijava. Tsipaji Dioso bepexēnato nataeya cuaicuaijai. ¿Detsa nexata paxamē pajamatabēitsimē? jai sacerdotevi pepo penamatacaitorobinē daxita penacaetuatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

<sup>65</sup> Nexata bajarapamonaeajuvēnēvi Jesús itabarasuabatsi. Bajaraxuacujinae papaēbērēpanata itaxutocētatsi. Pitaxutocētsicujinaetsi itabaratsaquibabeponatsi pecobethaitonēta. Nexata bajarapamonae jumai tsaponae Jesúsjavabelia:

—¡Vēnējonare ponē caitabaratsaquibabepona! jai tsaponae bajarapamonae.

Bajaraxuacujinae templobopijipolicíavi itabarapacabixuabatsi Jesús.

### **Pacuenia jane baja Pedro nayavajunuaxaina Jesús pijajivitonēcuene yabara pelivaisi**

*(Mt 26.69-75; Lc 22.56-62; Jn 18.15-18, 25-29)*

<sup>66</sup> Itsa abaxē Jesús sacerdotevi pepo penamatacaitorobinē pijabo ēnētua-  
jēalia yanijobaponatsi xua yabara naneconitsiaexanaejitsiatsi, Pedro naitaxuto-  
caevetsiaya naeca bopanabota. Nexata bajarajota taeyetatsi petiriva, sacerdotevi  
pepo penamatacaitorobinē pijabota penacuenebiva. <sup>67</sup> Bajarapova Pedro taeyetatsi  
penanonopecaejavata. Nexata bajarapova naitaxutobabatsia asaēya taenucatsi Pe-  
dro. Jumaitsi:

—Xamē ata rabaja naponaponame Jesúsata, Nazaret tomarapijinēta, jaitsi.

<sup>68</sup> Nexata Pedro itsiata nayavajunuaxaina Jesús pijajivitonēcuene. Nexata Pedro jumaitsi bajarapovajavabelia:

—Jume raja. Apo yapētaenē cajena bajaraponē. Apo yapētaenē pacuene yabara nejumaitsimē, jai Pedro.

Bajaraxuacujinae Pedro pejonebaupajavaverenajavabelia natixilia. Nexata vacara fiaba. <sup>69</sup> Icatsia bajarapova Pedro tanetsi. Nexata pamonaē bajarajota nubena, bajarapomonaējavabelia bajarapova jumaitsi:

—Mara ponēje Jesús pijajiviyajuvēnēnēje, jai bajarapova Pedro yabara.

<sup>70</sup> Icatsia nexata Pedro jumaitsi:

—Jume raja. Apo yapëtaenë cajena bajaraponë, jai.

Bjaraxuacujinae, icatsia caeapatoyocujinae, bajarajota penubenaevi Pedro jumaitsitsi:

—Xaniajai raeta baja cajena. Xamë Jesús pijajiviyajuvënënëmë. Tsipaji rabaja Galilea nacuapijinëmë. Galilea nacuapijivi pecuaicuaijaicuenia cuaicuaijamë, jaitsi.

<sup>71</sup> Nexata Pedro pejumexaniataenexatsi, ajumesaëya jumaitsi:

—Itsa apo xaniajanë tsipae paxamëjavabelia, nexata Diosojavabelia naneconitsipajë. Apo yapëtaenë cajena ponë yabara panejumaitsimë, jai Pedro.

<sup>72</sup> Itsa baja Pedro najumevereta bajarapacuenia pejumaitsijava, vacara icatsia fiaba. Nexata bajarajota Pedro najamatabënapitajaraba pacuenia Jesús jumaitsitsi: “Anijajumebeje vacara pefiabivajënaeya, nayavajunuaxainaename tajajivitonëcuenemë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejaijavatsi Jesús, Pedro najaaraba. Nexata bajarajota Pedro bitso najamatabëxaina Jesús pejumaitsijumetsi yabara. Pedro nexata nua.

### **Pacuenia Jesús nutatsi Pilato pitabarata yabara pelivaisi**

*(Mt 27.1-2, 11-14; Lc 23.1-5; Jn 18.28-38)*

**15** Ajena baja matakabi tsarucaponae, sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nacaetuata. Icatsia pematatsënëa itsamonae bajarapitsijamatabëcuenevi yajavanacaetuata penabarëcuaicuaijainexa. Bjaraxuacujinae bajarapamonae Jesús cobecëtsiaya caponaliatsi nacuaejetsinë Pilatojavabelia. <sup>2</sup>Nexata Pilato yanijobatsi Jesús.

—¿Xamë tsaja judíovi pepo nevetsinë? jaitsi.

Nexata Jesús jumaitsi Pilatojavabelia:

—Jājā, xanë rabaja pacuenia nejumaitsimë, jai Jesús Pilatojavabelia.

<sup>3</sup> Sacerdotevi penama itsamonae bajarapitsijamatabëcuenevi yajtacaitorobivi jumaitsi Pilatojavabelia:

—Jesús raja bitso pibisiacuene exanabiaba, jai.

<sup>4</sup> Nexata icatsia Pilato yanijobatsi Jesús.

—¿Itsalivaisiyo ata tsaja apo yapëtaemë nejumecanaviatsinexa? ¿Apo jumetaemë mapacuenia pecaneconitsijavaje? jaitsi.

<sup>5</sup> Itsiata Jesús matavëjëa apo jumepitsi Pilatojavabelia. Bjaraxuata Pilato apo yapëtae pacuenia exanaejitsia Jesúsjavabelia.

### **Pacuenia baja Pilato tocopata Jesús pebexuabinexatsi yabara pelivaisi**

*(Mt 27.15-31; Lc 23.13-25; Jn 18.38–19.16)*

<sup>6</sup> Nacuaejetsinë Pilato xaina pijacujirucuenë. Caevai canacujitsia, pascua fiesta-matakabi, Pilato copatabiaba caenë penaneconitsinë pepitsapaenexa penaneconitsivi pejebabiabibovecua. Pajivi yabara jivi Pilatojavabelia vajëcabiaba, Pilato nexata copatabiaba bajarapajivi pascua fiestamatakabi. Bjarapacuenia Pilato caenë copatabiaba jivi pesivajamatabëcuenë xanepanaenexatsi. <sup>7</sup> Pamatakabi Jesús naneconitsiaexanatsi, bajarapamatakabi Barrabásvënënë jivi pebarëbevi barë-naneconitsiaponapona penaneconitsivi pejebabiabibota. Barrabás, itsamonae yajava, barënbabian picani gobierno pijajivijavabelia. Nexata taicatsi. Naneconitsiaexanejebatsi penaneconitsivi pejebabiabibota. <sup>8</sup> Nexata jivi pona Pilatojavabelia. Jumaitsi bajarapamonae Pilatojavabelia:

—Pacuenia pascua fiestamatacabi copatabiabame caenë pepitsapaenexa penaneconitsivi pejebabiabibovecua, bajarapacuenia panetocopare caenë pepitsapaenexa penaneconitsivi pejebabiabibovecua, jai bajarapamonae Pilatojavabelia.

<sup>9</sup>Nexata Pilato jumaitsi bajarapamonaejavabelia:

—¿Pajitsipame tsaja patacatocopatsijava pepitsapaenexa Jesús, pajudíovimé pepo papecaeavetsinë? jai Pilato.

<sup>10</sup>Bajarapacuenia Pilato jumaitsi tsipaji yapètane pajamatabècuene yabara sacerdotevi penamatacaitorobivi tocaponarenatsi Jesús. Pilato jamatabècuenyapètane sacerdotevi penamatacaitorobivi Jesús pecueneitoyaxaetsi petocaponaejavatsirena.

<sup>11</sup>Nexata bajarapamonae asaëya vajëca Barrabás pecapitsapaenexatsi. Tsipaji baja cajena sacerdotevi penamatacaitorobivi muxubijiapenetsia jumaitsi jivijavabelia:

—Asaëya pavajëcaename Barrabás pecopatsinexatsi. Nexata Barrabás copatsianatsi pepitsapaenexa penaneconitsivi pejebabiabibovecua. Pëtsa pavajëcame Jesús pecopatsinexatsi, jai baja cajena sacerdotevi penamatacaitorobivi jivijavabelia.

<sup>12</sup>Nexata icatsia Pilato yanijoba jivijavabelia:

—¿Detsa nexata xua pajitsipame taexanaenexa maponëjavabeliaje: “Judíovitsi pepo vajanacaevetsinë,” paneyabarajainëjavabelia? jai Pilato judíovijavabelia Jesús yabara.

<sup>13</sup>Nexata bajarapamonae vavajai pinijijumeta.

—¿Cruzajavabelia cobematabiabarutsiaexanare! jai Pilatojavabelia.

<sup>14</sup>Nexata Pilato jumaitsi bajarapamonaejavabelia:

—¿Detsa pitsineconi yabara nexata cobematabiabarutsiaexanaejitsipajë? jai Pilato Jesús yabara.

Itsiata bajarapamonae icatsia pinijijumeta vavajai.

—¿Cruzajavabelia cobematabiabarutsiaexanare! jai tsaponae.

<sup>15</sup>Nexata baja Pilato tocopata Barrabás pepitsapaenexa penaneconitsivi pejebabiabibovecua jivi barajamatabècuenexanepanaeya petaenexatsi. Nexata Pilato pijajivi, vajabitsaëvi, itoroba copiaya Jesús ayaicuenia pejumatitibabenexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaëvi pecobematabiabarutsinexatsi cruzajavabelia.

<sup>16</sup>Nexata baja vajabitsaëvi Jesús caponaliatsi nacuaeavetsinë Pilato pijaboxanetojavabelia. Nexata bajarajota nacaetuata daxita vajabitsaëvi. <sup>17</sup>Bajaraxuacujinae Jesús quenetsiataeya xatatatsi peraënaetsautsaucaejava. Xua nacuaeavetsinë banaxatata, bajaraxua xatatatsi benacuaeavetsinëcuenia petaenexatsi. Coronacuenia pemataxatatsinexatsi, peejuvitoyoroto tsmataexanatsi. Bajarapatoyoroto Jesús mataxatatsi. <sup>18</sup>Bajaraxuacujinae quenetsiataeya bajacobaponatsi.

—¡Bajaco, judíovi pepo pevetsinë! jai tsaponae bajarapamonae Jesúsjavabelia.

<sup>19</sup>Bajarapamonae caenë canacujitsia mataconibiauxuabaponatsi naebota. Suabaponatsinua. Beyaiyataeya itajara pematabacabëta tonubenajoneyabiabatsi Jesús pitabarata. <sup>20</sup>Jesús quenetsiataeya pecapocaponaecujinaetsi, vejumajonotatsi baja xua xatatatsi, peraënaetsautsaucaejava. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

**Pacuenia jane baja Jesús cruzajavabelia  
cobematabiabarutatsi yabara pelivaisi**

(Mt 27.32-44; Lc 23.26-43; Jn 19.17-27)

<sup>21</sup> Alejandrobeje Rufobeje paxa, Simónvënënë, Cirene tomarapijinë. Nexata Simón najetaruca vayafotusatovavaverena. Nexata vajabitsaëvi Simón junatatsi, pacruza-javabelia Jesús cobematabiabarutsijitsiatsi, peyavenonaeyacaponaeenexa.

<sup>22</sup> Caponaliatsi Jesús Gólgotavënë tsutojavabelia. “Gólgota,” itsa jai hebreo-jumeta, mapajumetaje pejumaitsijume: “Jivimatasipatsuto,” pejaijume. <sup>23</sup> Bajara-jota picani Jesús rajutatsi vinora piapaenexa, pematajërëabira mirravënëjavata, bitso penavixaetaeyaniva pecobematabiabiavatatsi cruzajavabelia. Itsiata Jesús apo apae. <sup>24</sup> Nexata jane baja Jesús vajabitsaëvi cobematabiabarutatsi cruzajavabelia. Bajaraxuacujinae vajabitsaëvi bajarajota canamuxusita beibotoxi. Bajarapacuenia canamuxusita peyapëtaenexa ponë pitaponaejitsia caejava canacujitsia Jesús penax-atatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami.

<sup>25</sup> Bajayacunuaepatota, a las nueve, Jesús cobematabiabarutatsi cruzajavabelia.

<sup>26</sup> Bajarajota Jesús pematabocoto matatsënëyo yaquinaruta tablapayota itsamonae ata peyapëtaenexa pajamatabëcuene yabara Jesús cobematabiabarutatsi cruzajavabelia. Jumai tsarutsi peyaquinarutsiitane cruzajavata mapacueniaje: “Mara ponëje judíovi pepo pevetsinëje,” jai tsarutsi Jesús yabara. <sup>27</sup> Anijanëbeje penacobetox-otsinëbeje, Jesús yajavacobematabiabarutatsi. Caenë canacujitsia pijacruzata rubatsi. Bajaraponëbeje Jesús pemuxuneneta rutatsibeje. Itsanë Jesús pecujuanenia rutatsi. Itsanë Jesús petsavenonenia rutatsi. <sup>28</sup> Bajarapacuenia Jesús itsa yajavacobe-matabiabarutatsi penacobetoxotsinëbeje, nexata Jesús tocopiapatatsi pacuenia baja cajena Dioso pejumelivaisibaxutota tajëvelia jumaiti Jesús yabara. Dioso pejumelivaisibaxutota tajëvelia jumaiti Jesús yabara mapacueniaje: “Naneconitsiaexanae-natsi bepibisiacuene pexanaenëcuena,” jai baja cajena tajëvelia Dioso pejumelivaisibaxutota Jesús yabara.

<sup>29</sup> Jesús pecobematabiabarutsijavatatsi cruzajavabelia, bajaraxuayo penaje-tarubenaevi Jesús itaropitsiaya bijataeyabiabatsi. Jumai tsabiabi bajarapamonae:

—Yiara jane maitsimëje. Xamë raja imata jumaitsimë: “Xuabianicajë templobo. Acueyabi matabita icatsia veretetsianajë itsabo,” jamë. <sup>30</sup> Nacapanepare jane baja nijacuata. Cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

<sup>31</sup> Bajara pijinia pacuenia sacerdotevi penamatacaitorobivi, judíovi pecujarubivi ata, capocaponatsi Jesús. Ëpamonae najumaiti:

—Maponëje itsamonae yabara jumai tsabiabi: “Capanepaenajë jivi,” jai tsabiabi. Caranata pijacuata penacapanepaenexa, apo caëjëpaetsi. <sup>32</sup> Itsa xaniajai pepacuene Cristo, athëbëvetsica Dioso pitorobinëtsica jivi pecapanepaenexa, Israel nacuapijivi pepo pevetsinënexanua, aeconoxae runaenica cruzajavavetsica vajataenexa. Nexata jane baja jumecovënëtsianatsi Cristonëcuene, najai bajarapamonae capocaponaeya Jesús yabara.

Ponëbeje ata Jesús yajavacobematabiabarutatsi, bajaraponëbeje ata, Jesús bijataerucatsibeje.



### **Pacuenia baja Jesús tēpa yabara pelivaisi**

*(Mt 27.45-56; Lc 23.44-49; Jn 19.28-30)*

<sup>33</sup> Jesús baja itsa tēpaejitsia, ajena matonejejitsia, daxita nacuajava aitaquiri tsajuni. Matapania caniviyojavabelia, bejamatabēcuene a las tres, nacua napebeta icatsia. <sup>34</sup> Nexata icatsia paepatota nacua napebeta, bajarapaepatota pinijicuenia Jesús aėjai. Jumaitsi:

—Eloi, Eloi, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitsijume: “TajaDioso, tajaDioso, ¿detsa xuajitsia baja tajaepato necopatame?” pejaijume.

<sup>35</sup> Nexata itsamonaē bajarajota penubenaēvi bijiaya jumatane bajarapacuenia Jesús pejumaitsijava. Nexata saya jamatabēcuenenavēxaniabiaya jumaitsi bajarapamonaē:

—Jica, pajumetaema. Mara ponē junata profeta Elíaspijinēmije, Diosojumepaebinēmi, jai bajarapamonaē.

<sup>36</sup> Nexata bajarapamonaeyajuvēnēnē piajatuvinorayalia bepijia jabutaxuaba esponjavēnējava. Bajaraxuacujinae esponjavēnējava naeboupita cētaruta. Toyotsiatsi picani Jesús petsutsuninexa bajaraxua. Ponē picani Jesús toyotsiatsi bajaraxua petsutsuninexa, bajaraponē jumaitsi penajuanubenaēvijavabelia:

—Bajarapacuenia abaxē copatarutatsi Jesús. Taenatsi Elíaspijinē itsa najetaruca cruzavecuā penutsinexatsitsica Jesús, jai bajaraponē capocaponaēya.

<sup>37</sup> Jesús icatsia pinijicuenia aėjai. Bajaraxuacujinae jane baja Jesús tēpanajereca. <sup>38</sup> Paepatota Jesús tēpanajereca, bajarapaepatota templobo ēnētuaatujēalia peyatucutarutsipana, ayaipapaēbērēpanaxaneto, titititica tuatujēareca, athēbēvetsicacujinae irabereca. <sup>39</sup> Nexata paepatota Jesús tēpanajereca, vajabitsaēvi pijacapitán Jesús pitabara canacujitsialia nuca. Nexata bajaraponē taenuca Jesús pinijicuenia peaėjaijava. Taenucanua Jesús petēpanajetsijavareca. Nexata vajabitsaēvi pijacapitán jumaitsi:

—Matsaena ponē tēpaje, pepacueña baja rovia Dioso pexēnato, jai.

<sup>40</sup> Bajarajota petiriavibitsaētozaneto tajiyoverena taenubena Jesús petēpaejava. Bajarapapetiriavi tuatujēta nanubena mapamatabēxēyoje. Itsava Maríavēnēva, Magdala tomarapijiva. Itsava Salomévēnēva. Itsava icatsia Maríavēnēva. Bajarapova Santiagobeje Josébeje pena. Bajaraponē Santiago, pevējēato abaxē itsanē Santiagovēnēvēcuā. <sup>41</sup> Pamatacabi abaxē Jesús ponapona Galilea nacuaata, bajarapapetiriavi Jesús pēnainavanapatsi peyavenonaenexatsi. Papetiriavibitsaētojavata Maríabana nanubena, bajarapapetiriavi ata Maríabana Jesús najuapēnaponarena Galilea nacuaeverena Jerusalén tomaraberena.

### **Pacuenia Jesús petēpaenē mēthētatsi yabara pelivaisi**

*(Mt 27.57-61; Lc 23.50-56; Jn 19.38-42)*

<sup>42-43</sup> José Arimatea tomarapijinē, judíovi pevetsinē, peyaiyataenētsi. Bajaronē José copiaevetaponapona pecopiapatsijava pamatacabi caenē Dioso evetsijitsia daxita pijajivi mapanacuataje. Judíovi baja penacueraevetsimatacabinexa pevājēnaēya pamatacabi, caniviyotsia baja. Bajarapamatacabi judíovi banacuenevereta baja penacuenēbijava. Nexata bajarapaepatota José acueneura ata, najamatabēsaēta. Nexata lia nacuaevetsinē Pilatojavabelia. Nexata José vajēta Pila-

tojavabelia petocopatsinexatsi Jesús petëpaenë pemëthëtsinexa. <sup>44</sup>Nexata Pilato jamatabëjumaitsi:

—Xaniajai tsamë rabaja Jesús tëpa, jamatabëjai tsipaji abaxë bajayajebi Jesús apo rucae cruzajavabelia pecobematabiabarutsicujinaetsi.

Nexata Pilato junata vajabitsaëvi pijacapitán. Nexata Pilato yanijoba vajabitsaëvi pijacapitánjavabelia, Jesús petëpaecuene Pilato peyapëtaenexa. <sup>45</sup>Nexata vajabit-saëvi pijacapitán tsipaeba Pilatojavabelia.

—Jesús rabaja capanepaeya tëpa, jai.

Nexata jane baja Pilato José tocopatatsi cruzajavavetsica pepitsinexa Jesús petë-paenë. <sup>46</sup>Nexata José comuata pexaniaviriasábana. Bajaraxuacujinae José jane baja cruzajavavetsica pitsica Jesús petëpaenë. Daxitanëreca mataquionaeya matakacëba pexaniaviria piapiasábanapanata. Bajaraxuacujinae itsajota cajena José iboitapajan-itojavata pinijiibovaju exanaeyaexanabuata petëpaevi pebuataponaenexa, bajara-paibovajualia José buata Jesús petëpaenë. Bajaraxuacujinae pinijiibopanaxaneto José tixirena. Yavajuvëpaacatabuata. <sup>47</sup>María Magdala tomarapijiva, itsava pijinia María, José pena, bajarapovabeje tanebeje itsajota Jesús buatatsi petëpaenë.

### Pacuenia Jesús petëpaecujinae icatsia asaë yabara pelivaisi

(Mt 28.1-10; Lc 24.1-12; Jn 20.1-10)

**16** Judíovi baja penacueraevetsimatacabi itsa verevereca, acueyabi povamaxëto comuata petuxujuvira. Itsava Mariävënëva, Magdala tomarapijiva. Itsava Sa-loméväenëva. Itsava icatsia Mariävënëva. Bajarapova Santiago pena. Bajarapamonae petuxujuvira comuata peperabëexabinexa picani Jesús petëpaenë. <sup>2</sup>Nexata baja judíovi penacueraevetsimatacabi itsa verevereca, meravia pitsijavata, ajena baja matakabi tsarucaponae, bajarapamonae ponalia Jesús pebuatsiibovajutsijavabelia. <sup>3</sup>Nexata bajarapamonae namutualia najumaitsi tsanajetarubena:

—¿Jipatsa meta nacatotixitsiana Jesús peyavajuvëpa acatabuatsiibopanaxane-totsi? najai tsanajetarubena bajarapamonae.

<sup>4</sup>Nexata bajarapamonae itsa imóxoyotabuatapona, naëcobarëcëpalia ibovajujav-abelia. Nexata taeyabuata ibopanaxanetomi petixitabuatsijavalia ibovajuvëpave-cua. Bajarapaibopana bitso pinijiibopanaxaneto. <sup>5</sup>Nexata petiriavi itsa joneya Jesús pebuatsiibovajutsijavalia, taeyeta pecujanenia pevëjëato. Bajaraponë naxatatea piapiajava penioponaajava. Nexata petiriavi najunaviaca. <sup>6</sup>Nexata pevëjëato ju-maitsi petiriavijavabelia:

—Pëtsa panajunaviacame. Paxamë picani pajaitame Jesús, Nazaret tomarapijinë, ponë cobematabiabarutatsi cruzajavabelia. Asaë rabaja icatsia bajaraponë petë-paecujinae. Ajibi rabaja tsarucae majotaje. Pataema jane itsajota picani buatatsi. <sup>7</sup>Paponare baja. Patsipaebianame pijajivijavabelia, Pedrojavabelia ata. Pajumait-simë tsane bajarapamonaejavabelia: “Jesús pina panevajënaeyabelia pona Galilea nacuayabelia. Baja pina jotalia pacaxitajarabianame Jesús pacuenia baja pacaju-maitsitsi,” pajamë tsane pijajivijavabelia, jai pevëjëato petiriavijavabelia.

<sup>8</sup>Nexata saya bajarapapetiriavi rëcëpeca Jesús pebuatsiibovajutsivecua. Neconecojai saya pecajunavi. Nexata namutoepatua apo tsipaebi itsajivijavabelia ata. Tsipaji bitso junava.

**Pacuenia Jesús petëpaecujinae, icatsia itsa asaë, tsitanaitajëta  
María Magdala tomarapijivajavabelia yabara pelivaisi**

*(Jn 20.11-18)*

<sup>9</sup> Judfovi baja penacueraevetsimatacabi itsa verevereca, meravia pitsijavata, ajena baja matacabi tsarucaponae, Jesús icatsia asaë petëpaecujinae. Bajarapamatacabi copiata Jesús tsitanaitajëta María, Magdala tomarapijivajavabelia. Bajarapova ca-jena copiaya Jesús vecuacapitsapa siete padovathibeje itsa abaxë Jesús apo beyaxu-abitsi. <sup>10</sup> Nexata María, Magdala tomarapijiva, Jesús petsitanaitajëtsicujinaetsi, pona Jesús pijajivijavabelia. Nexata María pevajënae Jesús pijajivi abaxë vënueyena Jesús. Nexata María itsa pata Jesús pijajivijavabelia, tsipaeba pacuenia María tane Jesús. <sup>11</sup> María jumaitsi Jesús pijajivijavabelia:

—Jesús rabaja icatsia asaë petëpaecujinae. Taniji rabaja tajacuata, jai. Itsiata Jesús pijajivi apo jumexaniataetsi María.

**Pacuenia Jesús petëpaecujinae icatsia itsa asaë, tsitanaitajëta  
pijajivitonëbejejavabelia yabara pelivaisi**

*(Lc 24.13-35)*

<sup>12</sup> Jesús pijajivitonëbeje najetarucabeje namutua. Nexata Jesús pijajivitonëbeje namutua penajetarucavejavatabeje, Jesús tsitanaitajëta beitsanëcuenia pijajivitonëbejejavabelia. <sup>13</sup> Nexata Jesús pijajivitonëbeje itsa tanebeje Jesús, naviatecabeje. Nexata pacuenia tanebeje Jesús, tsipaebabeje itsamonae Jesús pijajivijavabelia. Itsiata bajarapamonae apo jumexaniataetsibeje.

**Pacuenia Jesús petëpaecujinae, icatsia itsa asaë, pijajivi itoroba pexanialivaisi  
jivi petsipaebanajetarubenaenexa daxitanacuanëjava yabara pelivaisi**

*(Mt 28.16-20; Lc 24.36-49; Jn 20.19-23)*

<sup>14</sup> Bexëjavabelia icatsia Jesús tsitanaitajëta pijajivi once ponëbejejavabelia penabanenaevjavata mesata. Nexata Jesús pinijicuenia muxujioba pijajivi piajamatabëcuenetajaxae. Muxujiobanua apo pejumecovënëtsixae petsipaebijavatsi pamonae tane Jesús icatsia piasaëjava petëpaecujinae. <sup>15</sup> Nexata Jesús jumaitsi pijajivijavabelia:

—Paponare daxitanacuanëjava daxitajivi panetsipaebanajetarubenaenexa pexanialivaisi pecapanepaelivaisinexatsi. <sup>16</sup> Pajivi jumecovënëtsiana bajarapalivaisi, nexata pabautisabianame. Bajarapajivi Diosojavabelia capanepaenatsi. Pajivi apo jumecovënëtsi tsane bajarapalivaisi, daxitamatacabijavabelianexa naneconitsiana Diosojavabelia. <sup>17</sup> Pamonae peneta jumecovënëtsiana bajarapalivaisi, mapacuenia exanavanapaenaje. Tavënëta jivivecua capitsapaponaena dovathi. Itsaviria-jumetanua, apo penatsipaebijumemi ata, jemata natsipaebiana. <sup>18</sup> Bajarapamonae jomo pecobeta pitsi ata tsane, apae atanua tsane jivi petëpaeyaexanaera, itsiata apo tēpae tsane. Bajarapamonae itsa nacobebuatsiana piavitanejivi pematatsënëvereca, pejayatsijivi jamatejema tsane piavitanejavavecua, jai Jesús pijajivijavabelia.

**Pacuenia Jesús petēpaecujinae, icatsia  
itsa asaë, naviata baja athëbëabetsia yabara pelivaisi**

*(Lc 24.50-53)*

<sup>19</sup>Vajatuxanenë Jesús livaisi petsipaebicujinae pijajivijavabelia, Dioso baja pe-  
saëta catsiatsi athëbëabetsia. Nexata athëbëtatsia Jesús eca Dioso pecujuane-  
nia penajuaevetsinexabeje daxitacuene. <sup>20</sup>Nexata jane baja Jesús pijajivi daxi-  
tanacuanëjava jivi tsipaebanajetarubena bajarapapexanialivaisi. Nexata daxita pa-  
monae jumetaeyabiabatsi, jumecovënëtabiabatsi pexaniajailivaisi petsipaebicuene.  
Tsipaji Jesús pijajivi jamatabëcueneyavenonabiaba Jesús pijajivi pinijicuene pex-  
anaenexa jivijavabelia livaisi petsipaebabiabijavata.

## Pexanialivaisi Jesucristo pelivaisi, San Lucas peyaquinaelivaisi

### Pacuenia Lucas taxuxuaba mapabaxutotaje Jesucristo pelivaisi, petoyaquinaejava Teófilovënëñejavabelia, yabara pelivaisi

**1**<sup>1-2</sup> Pamatacabi abaxë Jesús ponapona mapanacuataje, jivi ayaibitsaëtoخانeto tanetsi peponaponaejava. Bajarapamonae tanetsi Jesús petaxuxuabijavaveliacujinae jivi livaisi petsipaebaponaejava. Nexata bajarapamonae paebanajetarubena tomaranëjava Jesús pelivaisi, pexanialivaisi. Nexata tomaranëjava Jesús pelivaisi pejumetaevi, ayaibitsaëto, baja cajena yaquina juya mataropotsi petsipaebinexa itsamonaejavabelia. Pacuenia Jesús petaevitsi vajunupaebatsi, bajarapamonae yaquina baja cajena Jesucristo pelivaisi.<sup>3</sup> Nexata xanë ata mapamatacabitaje yanijobaponajë bajarapalivaisi daxita peyapëtaevijavabelia. Yanijobaponajë xaniavaetsia tayapëtaenexa pacuenia Jesús exanapona petaxuxuabijavaveliacujinae mapanacuataje. Teófilo, catoyaquinatsi. Catoyaquinatsi mapabaxutotaje xamë ata xaniavaetsia neyapëtaenexa daxita bajarapalivaisi, Jesucristo pelivaisi. Netsitaxanepana tacatoyaquinaenexa daxita bajarapalivaisi neyapëtaenexa pacuenia jumai tsaponae caelivaisi canacujitsia Jesús pexanaponaejavanë yabara, caejava canacujitsia.<sup>4</sup> Copiaya baja picani itsamonaecatSPAeba bajarapalivaisi. Itsiata icatsia xanë catoyaquinatsi neyapëtaenexa jane baja xaniavaetsia bajarapalivaisi pexaniajailivaisicue.

### Pacuenia ángel tajëvelia jumaitsi Zacaríasjavabelia: “Nexënatonëyo raja xainaename,” jai yabara pelivaisi

<sup>5</sup> Pamatacabi abaxë Herodes eveta Judeanacia, bajarapamatacabi ponapona sacerdotenë Zacarías. Bajaraponë sacerdotevi Abíasvënëviyajuvënëñë. Zacarías pijava pevënë Elisabet. Bajarapova sacerdotenëmi Aarónpijinë pemomoxiyajuvënëva.<sup>6</sup> Bajarapajivibeje xaniavaetsia aneconijibia Dioso pitabarata toponaponabeje. Dioso jumecovënëtsiaya ponaponabeje pacuenia Dioso itorobatsi judíovi xaniavaetsia pejivanapanaenexa.<sup>7</sup> Itsiata bajarapajivibeje pexi apo xainaebaje. Tsipaji Elisabet mavecova. Nexata bajarapajivibeje bitso baja perujujiviyobeje.

<sup>8</sup> Nexata itsamatacabi Zacarías templobota nanacuenebijitsia sacerdotevi penacuenebicuene Dioso pitabarata. Pasemanata daxita sacerdotevi, Abíasvënëvi, nacobenaevetsijitsia templobo, bajarapasemana Zacarías daxitasemana nanacuenebijitsia templobota.<sup>9</sup> Nexata abaxë sacerdotevi petaxuxuabivajënaeya penacuenebijava, pijacujirucuenia exana penayapëtaeponaenexa xua caenë canacujitsia nacuenebijitsia templobota. Nexata sacerdotevi pijacujirucuenia pexanaecujinae, itsa baja yapëtane xua caenë canacujitsia nacuenebijitsia templobota, nexata Zacarías tocopatatsi temploboënëalia petajuitsinexa inciensovënëñjava, petuxujuvijava. Bajaraxuata Zacarías joneya temploboyalia petajuitsinexa jane baja inciensovënëñjava temploboënëalia.<sup>10</sup> Paepatota Zacarías tajuitanuca inciensovënëñjava temploboënëalia, jivi ayaibitsaëtoخانeto templobojumavelia vajëcanubena Diosojavabelia.<sup>11</sup> Nexata Zacarías temploboënëalia, altarvënëñjava muxuneneta, tsitanaitajëtatsi ángel. Paaltarvënëñjavajumata incienso tajuitabiaba Diosonexa, bajarapaaltarvënëñjava pecujuanenia pamuxunenejavata, Zacarías taenuta ángel.<sup>12</sup> Nexata

Zacarías ita taenuta ángel, apo yapëtae pacuenia exanaejitsia Zacarías. Bitso jamatabëcuenenajunaviaca. <sup>13</sup>Nexata ángel jumaiti Zacaríasjavabelia:

—Zacarías, pëtsa junavame. Dioso baja cajena cajumetane nevajëtsijava. Nexata nijava Elisabet catonacoxitsiana. Nexënatonëyo baja xainaename. Vënërubianame bajaraponëyo Juan. <sup>14</sup>Piniicuenia, jivi ayaiBITSaëto yajava, barëyamë tsane bajaraponëyo ita catonaexanaena. <sup>15</sup>Tsipaji bajaraponëyo ayaijamatabëcuenenë tsane Dioso pitabarata. Apo apae tsane pïataneranë. Vinora ata apo apae tsane. Pe-naexanaejavaveliacujinae tsijamatabëvënëcaenatsi Espiritu Santo. Nexata Espiritu Santo pitorobicueniatsi, exanabiabiana. <sup>16</sup>Bajaraponë, Juan, Israel nacuapijivi namatabëcuenecopatsiaexanaena Diosojavabelia. <sup>17</sup>Bajayata Diosojumepaebinëmi, profeta Elíaspijinë, ayaijamatabëcuenenëmi, Dioso pesaë yajavaponapona. Espiritu Santo ata pitorobicueniatsi, exanaponapona. Bajara icatsia itsane Juan ata. Bajaraponë pejamatabëcueneta, penacoxiitoyavimi ata, icatsia nacoxiasiva tsane. Bajaraponë pejamatabëcueneta, itsamonae pijinia pibisiajamatabëcuene pexainaevi ata, jamatabëcuene xanepanaeyaexanaena pexaniajamatabëcuene pexainaenexa. Bajarapacuenia bajaraponë jivi jamatabëcuene xanepanaeyaexanaena pepo petuxanenë penajetarucaevajënaeya. Nexata bajarapamonae xaniavaetsia copiapitsiana pepo petuxanenë pamatacabi najetarucaena, jai ángel Zacaríasjavabelia.

<sup>18</sup>Zacarías nexata yanijoba ángeljavabelia. Jumaiti:

—Itsa taxënato xainaejitsianë, ¿detsa peneta pitsicuene taenajë tayapëtaenexa? Tsipaji rabaja xanë perujunë. Tajava ata baja perujuva, jai Zacarías.

<sup>19</sup>Nexata ángel jumaiti Zacaríasjavabelia:

—Xanë raja Gabrielnë, Dioso pijajivitonë. Dioso baja cajena nitoroba tacatsipaebinexa mapapexanialivaisije. <sup>20</sup>Xamë saya nejumeaebame, xaniavaetsia catsipaebi atatsi xua pepacuene catocopiajopaejitsia. Nexata baja aeconoxae apo ca-cajëpae tsane necuaicuaijajava. Matapania jane baja pamatacabi catocopiajopaena xua yabara najumecapanepaeya catsipaebatsi, natsipaebianame icatsia, jai ángel Zacaríasjavabelia.

<sup>21</sup>Bajarapaepatota jivi templobo jumavelia evetanubenatsi Zacarías pepitsapaejavarena. Najumaiti bajarapamonae:

—¿De meta xuajitsia Zacarías bepïjia apo pitsapaerena templobovecua? najai bajarapamonae.

<sup>22</sup>Itsa jane baja Zacarías pitsaparena templobovecua, apo cajëpaeitsi pecuaicuaijajava. Nexata pamonaevetanubenatsi templobo jumavelia, najumaiti:

—Zacarías raeta bemajitsinaebota temploboënëlia itsacuene tane, najai.

Nexata Zacarías apo pecajëpaeaxaetsi pecuaicuaijajava, pecobeta tsipaeba besïyanëcuenia jivi peyapëtaeyaexanaenexa.

<sup>23</sup>Itsa baja Zacarías vereta penacuenebijava templobota pamatacabibeje itorobatsi penacuenebinexa, naviata baja pijaboyabelia. <sup>24</sup>Bajaraxuacujinae Zacarías pijava, Elisabet, nacoxita jane baja. Nexata bajarapova penacoxitsijava ita yapëtane, cinco pajuametobejecuenia itsajavabelia pijabovecua apo ponaponae. <sup>25</sup>Elisabet jamatabëjumaiti:

—Dioso raja taneitaxutotsoniataexae, neyavenona tanacoxitsinexa mapacueniaje. Nexata baja apo auranë tsane tacoxibijava yabara, jamatabëjai Elisabet.

### Pacuenia ángel tajëvelia jumaitsi Maríajavabelia yabara pelivaisi

<sup>26</sup> Elisabet baja seis pajuametobeje pepuaxainae penacoxitsicujinae, Dioso icatsia itoroba pijaángel Gabriel. Pijaángel itoroba Nazaret tomarabelia, Galilea nacuata peecaetomarabelia. <sup>27</sup> Dioso itoroba ángel petsipaebinxeta Maríajavabelia. María abaxë pebi apo pequenetsiataevatsi. Ángel pepatsivajënaeya Maríajavabelia, Maríabeje baja cajena Josébeje nabarëcuaicuaijaibeje penapitsinexabeje. Nacuaevetsinëmi Davidpijinë pemomoxiyajuvënënë José. <sup>28</sup> Ángel nexata joneya María peponaponaebota. Ángel jumaitsi Maríajavabelia:

—María, cabajacobatsi. Pexaniajamatabëcuenia Dioso pecataeva. Dioso caya-javaponaponaena. Bitso cayavenonaena xamë daxita nevëna petiriavi matatoxenetsia, jai ángel.

<sup>29</sup> Nexata María ita jumetane bajarapacuenia ángel pejumaitsijavatsi, María jamatabëjumaitsi:

—¿Detsa meta pitsijamatabëcuene yabara nejumaitsi ángel mapacueniaje? jamatabëjai María.

<sup>30</sup> Icatsia ángel tajëvelia jumaitsi Maríajavabelia:

—María, pëtsa junavame. Tsipaji raja Dioso pexaniajamatabëcuenia catane.

<sup>31</sup> Xamë raja nacoxitsianame. Cavecuanaexanaena raja pebinëyo. Bajaraponëyo vënërubianame Jesús. <sup>32</sup> Bajaraponëyo ayajamatabëcuenenë tsane. “PinijiDioso, athëbëtatsia peecaenë, mapexënatoje,” jaitsi tsane jivi. Nexata vajatuxanenë Dioso nacuaevetsinë exanaenatsi. Pacuenia pijasalinainëmi Davidpijinë bajayata nacuaevetsinëmi, bajara icatsia itsane. <sup>33</sup> Bajaraponë evetsiana Israel nacuapijivi daxita matabajavabelianexa, jai ángel tajëvelia Maríajavabelia.

<sup>34</sup> Nexata María jumaitsi ángeljavabelia:

—¿Detsa pacuenia nacoxitsipajë? Xanë raja tamona apo xainaenë, jai María ángeljavabelia.

<sup>35</sup> Ángel nexata tajëvelia jumaitsi Maríajavabelia:

—Espíritu Santo raja patsianica xamëjavabetsica. Nexata Espiritu Santo Dioso pesaëta caevetsiana. Bajaraxuata panacuetonëyo cavecuanaexanaena, tsatsianatsi Diosonexa. “Dioso ra mapexënatoje,” jaitsi tsane jivi. <sup>36</sup> Nijamonaeva ata Elisabet, perujuva ata, exanaena penacuetonëyo. “Mavecova raja,” jai atatsi jivi, itsiata baja penacoxitsicujinae xaina baja seis pajuametobeje. <sup>37</sup> Dioso raja caëjëpatsi daxitacuene pexanaenexa, jai ángel tajëvelia Maríajavabelia.

<sup>38</sup> Nexata María jumaitsi ángeljavabelia:

—Xanë raja Dioso pijajivitovanë. Pacuenia nejumaitsimë, bajarapacuenia Dioso xanëjavaberena exanaena, jai María.

Nexata baja María vecuaponatsi ángel.

### Pacuenia María sivaxaina Elisabetjavabelia yabara pelivaisi

<sup>39</sup> María penacoxitsijavanexa petsipaebicujinaetsi ángel, caematacabibecujinae, María pona petsutonënacuata peecaetomarabelia. Bajarapatomara eca Judea nacuata. <sup>40</sup> Nexata María joneya Zacarías pijaboyalía. Bajacobanuta pijamonaeva Elisabet. <sup>41</sup> María ita bajacobanuta Elisabet, nexata Elisabet peyacotajinaenacuetoyo tscitonayucutajarabatsi. Nexata jane baja Elisabet tsijamatabëvënëcatsi Espiritu

Santo. <sup>42</sup>Nexata Elisabet Espíritu Santo itorobatsi pinijijumeta Maríajavabelia peju-maitsinexa mapacueniaje:

—Dioso cajena bitso cayavenona daxita petiriavi matatoxenetsia. Panacuetonëyo ata exanaename, bajarapanacuetonëyo Dioso bitso peyavenonabiabinëtsi tsane. <sup>43</sup>Xamë tajatuxanenë penamë tsane. ¿Detsa xuajitsia beveliajamatabëcueneva atanë, nesivaxainamerë? <sup>44</sup>Itsa nebajacobanutame, tayacotajinaenacuetoyo nayucutajaraba pebarëyaxae. <sup>45</sup>Barëyamë Dioso pecajumaitsicuenia nejumecovënëtsiva. Tsipaji pepacue ne catocopiapatsiana daxita pacuenia vajatuxanenë Dioso pitorobinëtsica ángel tajëvelia catsipaeba, jai Elisabet Maríajavabelia.

<sup>46</sup>Nexata María jumaitsi Elisabetjavabelia:

Tajamatabëthëtojavavetsina jumaitsinë Diosojavabelia: “Ayaijamatabëcuenenëmë bitso,” janë. <sup>47</sup>Sivajamatabëcuenebarëyanë Dioso tanecapanepaenënexa. <sup>48</sup>Sivajamatabëcuenebarëyanë. Tsipaji pijajivitovanë, beveliajamatabëcueneva atanë, Dioso nitapeta. Tatëpaecujinae ata tsane, tavënamuto, pevajënaeyabelia daxitajivi xanë yabara jumai tsabiabi tsane: “Dioso bitso peyavenonaevamitsi,” jai tsabiabi tsane. <sup>49</sup>Bajarapacuenia daxitajivi jumai tsabiabi tsane xanë yabara. Tsipaji ayaijamatabëcuenenë Dioso netoexanabiabiana ayaicuene pexanaejavanë. Dioso raja apo pejitsipaenë jivi pibisiacuene pexanaejava. <sup>50</sup>Daxita pamonaë Dioso yaiyataena, bajarapamonaë juya Dioso itaxutotsoniataeyabiabiana. <sup>51</sup>Dioso raja pecaëjëpaenëtsi pinijicuene ata pexanaenexa pecobeta. Pamonaë jamatabëjumaitsi tsavanapae: “Vaxaitsi cajena ayaijamatabëcuenevitsi,” jamatabëjai tsavanapae, bajarapamonaë Dioso nacayajatsiaexana baja. <sup>52</sup>Pinijinacuanë pevetsivimi ata, bajarapanacuanë pevetsijavami Dioso vecuapitsapaeyaexana. Nexata bajaraxuacujinae Dioso juya evetsiaexana bajarapanacuanë beveliajamatabëcuenevimi ata. <sup>53</sup>Pamonaë pijinia bitso piajani, bajarapamonaë Dioso rajuta pexanianabanijava. Pamonaë pijinia bitso pexainaevi mapanacuapijicuene, bajarapamonaë Dioso apo pejumecovënëtsixae, bajarapamonaë Dioso apo rajutsi. <sup>54</sup>Dioso yavenona pijajivi, Israel nacuapijivi. Apo nacofënëtsi cajena. Dioso itaxutotsoniataeyabiaba Israel nacuapijivi. <sup>55</sup>Bajarapacuenia Dioso pijajivi itaxutotsoniataeyabiaba daxitamatacabijavabelianexa. Tsipaji baja cajena bajarapacuenia Dioso najumecapanepaeya jumaitsi vajasalinainëmi Abrahampijinëjavabelia, daxita pemomoxijavabelianexa ata pitaxutotsoniataeyabiabijavanexa yabara, jai María Elisabetjavabelia.

<sup>56</sup>Nexata María acueyabi pajuametobeje naponapona Elisabet pijabota. Bajaraxuacujinae María baja naviaata pijaboyabelia.

### **Pacuenia Juan naexana jivibautisabinënexa yabara pelivaisi**

<sup>57</sup>Juameto baja ecaica, pajuametota Elisabet penacuetu vecuanaexanaejitsiatsi. Penacuetonëyo jane baja vecuanaexanatsi. <sup>58</sup>Itsa Elisabet yapëtane Dioso pitaxutotsoniataecuenetsi, bitso Elisabet jamatabëcuenebarëya. Daxita pamonaë ata ena imoxoyo, pijabo muxuneneta, bajarapova pijamonaeyajuvënëvi ata, siva-jamatabëcuenebarëyatsi. <sup>59</sup>Itsa baja penacuetonëyo caesemana xaineca penaexanaecujinae, Elisabetbeje Zacaríasbeje pexënatonëyo perabëcaucutsiaexanabeje judíovicuenia. Baisi boupiperabëcaucutsiaexanabeje. Nexata daxita bajarapamonaë pata Elisabetbeje Zacaríasbejevaberena. Bajarajota picani penacuetonëyo



tovënërubijitsiatsibeje paxa pevenëcuenia paxa picani pevenëxainenexa. <sup>60</sup> Itsiata Elisabet jumaiti pamonaejavabelia picani tovënërubijitsiatsibeje:

—Jume. Pevënë raja tsane Juan, jai Elisabet bajarapamonaejavabelia.

<sup>61</sup> Nexata bajarapamonae jumaiti:

—¿Detsa xuajitsia jitsipame bajarapavënë? Itsanë ata cajena nijamonaeyajuvënë apo xainae bajarapavënë, jai bajarapamonae Elisabetjavabelia.

<sup>62</sup> Nexata bajarapamonae penacuetonëyo jane baja junata. Pecobeta yanijoba pavënë Zacarías jitsipa petovënërubinexatsi. <sup>63</sup> Nexata Zacarías vajëta tablapayo peyaquinaenexa. Nexata yaquinaruta: “Juan rabaja pevenë,” pejaiitane. Nexata daxita bajarapamonae jamatabëcuenenabenajaca. <sup>64</sup> Bajarajota jemata icatsia Zacarías cuaicuaijai baja. Nexata jivi pitabarata Zacarías jumai tsaponae Diosojavabelia:

—Diosomë, ayaijamatabëcuenenëmë bitso, jai tsaponae.

<sup>65</sup> Daxita pamonae bajarapatomarata imoxoyo penaevi, itsa jumetane pacuenia Zacarías Dioso yavenonaponatsi, pinijicuenia jamatabëcuenenabenajaca. Itsamonae bajarapanacuata petsutonëjava penaevi ata, daxita bajarapamonae ata, vënëlivaisitane bajarapacueneyabara. <sup>66</sup> Daxita pamonae jumetane bajarapacueneyabara, apo nacofënëtsi. Jamatabënajinavanapabiaba bajarapacueneyabara. Nexata bajarapamonae nayanijobabiaba.

—¿De meta jamatabëcueneyabara tsane bajarapanacuetonëyo itsa vitsabiana? najai tsabiabi bajarapamonae.

Bajarapacuenia nayanijobabiaba tsipaji bitso Dioso yavenonaponatsi bajarapanacuetonëyo.

### **Pacuenia Zacarías tajëvelia jumaiti yabara pelivaisi**

<sup>67</sup> Zacarías, Juan jivibautisabinënexa paxa, tsijamatabëvënëcatsi Espiritu Santo. Nexata Zacarías Espiritu Santo itorobatsi jivijavabelia pejumaitsinexa mapacueniaje:

<sup>68</sup> Pexaniajamatabëcueneyabara rajutatsi vaxaitsi pepo vajatumaxanenëjavabelia, Israel nacupijivitsi vaxajDiosojavabelia. Tsipaji pijajivitsi nacatoitorobianica vajanacapanepaenënexa vajanecanivecua. <sup>69</sup> Dioso cajena nacatoitorobianica pinijicueneyabara pexanaejava pecaëjëpaenëtsi vajanacapanepaenexa. Bajaraponë Dioso pijajivitonëmi Davidpijinë pemomoxiyajuvënë tsane. <sup>70</sup> Bajayata Diosojumepaebivimi profetavi, Dioso pitorobicueniatsi pejinavanapaevi, tajëvelia najumecapanepaeya jumaiti bajaraponë vajanacapanepaejavanexa yabara. <sup>71</sup> Tajëvelia profetavimi najumecapanepaeya jumaiti bajaraponë vajanacapanepaejavanexa vajavajabitsaëvivecua, daxita vajanacaitoyavi atavecua. <sup>72</sup> Dioso nacaitaxutotsoniataena pacuenia tajëvelia najumecapanepaeya jumaiti vajasalinaivimijavabelia. Dioso cajena apo nacofënëtsi pacuenia najumecapanepaeya jumaiti vajasalinaivimijavabelia. <sup>73</sup> Bajayata copiaya bajarapacueneyabara Dioso najumecapanepaeya jumaiti vajasalinainëmi Abrahampijinëjavabelia. <sup>74</sup> Dioso baja najumecapanepaeya jumaiti vajanacapanepaenexa vajavajabitsaëvecua. Bajarapacuenia Dioso nacacapanepaena ajunavijibia vajatonacuenebavanapaenexa. <sup>75</sup> Nexata bajarapacuenia Dioso itsa tonacuenebavanapaenatsi, jinavanapaenatsi pibisiacueneyabara exanaenejevatsi Dioso pitabarata vaxaasaëtsavanapaepato abaxë mapanacuataje,

jai Zacarías jivijavabelia tajëvelia pevajunupaebijavata Jesús Dioso pitorobijavanexatsitsica vajanacacapanepaenexa.

<sup>76</sup> Icatsia Zacarías jumaitsi pexënatonëyojavabelia mapacueniaje:

Taxënatonëyo, xamë yabara itsamonae jumai tsabiabi tsane: “Mara ponëje pinijiDiosio, athëbëtatsia peecaenë, pijaprofetanëje,” jai tsabiabi tsane. Xamë raja it-saxuayo pepo petuxanenë najetarucaejitsia, pevajënaeya jivi tsipaebanajetarucaename pesivanajamatabëcuenecopatsinexa bajaraponëjavabelia pamatacabi bajaraponë najetarucaena. <sup>77</sup> Tsipaebanajetarucaename jivijavabelia pacuenia Dioso bajarapamonae capanepaejitsiatsi. Tsipaji bajarapamonae pibisiacuene pexanaeneconimi Dioso vecuaajibiaexanaenatsi. <sup>78</sup> Dioso vajanacaitaxutotsoniataexae, nexata nacayapëtaeyaexanaena vajanacacapanepaenënexa athëbëvetsica pepatsijavanexatsica. <sup>79</sup> Nexata bajaraponë jivijavabelia itsa tsipaebanajetarucaena pexaniajailivaisi, jamatabëcueneyotsiana daxita pija-matabëcueneyaitquirivimi. Baitsi pamonae picani cujunava petëpaejaya, bajaraponë petsipaebilivaisi pejamatabëcueneta, bajarapamonae yapëtaena jamatabëcuenexanepanaeya pejinavanapaenexa,

jai Zacarías pexënatonëyojavabelia tajëvelia pevajunupaebijavata Jesús jivijavabelia Dioso pejumelivaisi petsipaebanajetarucaejavanexa.

<sup>80</sup> Nexata jane baja xuacujinae Juan jivibautisabinënexa vitsabanajetaruca. Yajavaajamatabëcuenesaë baja cajena tsanajetaruca Dioso pejumelivaisi yabara. Nexata baja Juan itsa penaveretsinë, ponapona petusato nacuata. Matapania itsa taxuubijitsia jivi petsipaebinexa Jesús pelivaisi, naitajëta jivijavabelia pevënëlivaisi-taenexatsi daxita Israel nacuapijivi.

### Pacuenia Jesús naexana yabara pelivaisi

(Mt 1.18-25)

**2** Imoxoyo baja pevajënae Jesús penaexanaejavanexa. Nexata bajarapamatacabi-java Romanonacua pepo pevetsinë, Augusto, taxuxuaba pijajivi pitorobijava jivi petonamataëjëtsinexatsi. Jumaitsi pijajivijavabelia:

—Daxitajivi, pamonae taevetsinacuanëjaya jinavanapa, panetonamataëjët-sianame, jai.

<sup>2</sup> Bajarapamatacabi pijinia nacuaevetsinë Cireniovënënë saicaya itsanacua eveta, Siriävënënacua. <sup>3</sup> Nexata nacuaevetsinë Augusto pevetsinacuanëjaya penaetomaranëta pejinavanapaevi, apo jinavanapae ëpijatomaranëjaya. Itsamonae najinavanapa itsatomaranëjaya. Bajaraxuata pamonae najinavanapa itsatomaranëjaya, caejivi canacujitsia, pijasalinaivimi pijatomaranëjavabelia pona. Bajarapamonae pona penamataëjëtsinexatsi pijasalinaivimi pijatomaranëjaya.

<sup>4</sup> Bajaraxuata José ata barëpona Belén tomarabelia. José barënaropota Nazaret tomarata, Galilea nacuata peecaetomarata. José barëpona Belén tomarabelia, Judea nacuata peecaetomarabelia. Tsipaji baja cajena José pijasalinainëmi, Davidpijinë, bajayata Belén tomarata ponapona. <sup>5</sup> José barëpona María, pova pita pijavanexa. Bajarapova yacotapona itsa baja imoxoyo pevajënae penacueto pevecua-naexanaenexatsi. <sup>6-7</sup> Nexata baja itsa patabeje Belén tomarata, ponaponabeje dajubi pevetafiabibota. Tsipaji baja pabota jivi patabiaba, pevajënaebeje baja jivi yavënëca. Nexata apo nayacaëjëpaetsibeje bajarapabota penaecaenexabeje. Bajaraxuata patabeje dajubi pevetafiabibota. Nexata dajubi pevetafiabibota María

jane baja vecuanaexanatsi penacuetonëyo, copiaya penacoxitsinacueto. Barëeca dajubi pevetabiabibota. Jumaquioneta papaëbërëpanaxita. Buateta dajubi pexaejavanea pemitsothocabiabimoënëta.

**Pacuenia ángelevi patsica Jesús penaexanaelivaisi petsipaebinexa oveja pevetsivijavabelia yabara pelivaisi**

<sup>8</sup> Belén tomarajumaverena imoxoyovayafota, oveja pevetsivi evetavanapa. Bajaramonae meravi nacobenaevetabiaba pijaovejabitsaëtonë. <sup>9</sup> Jemata oveja pevetsivi tsitanaitajëtatsi Dioso pijaángel. Nexata Dioso pijapenivenivenaecotia oveja pevetsivi matatoyorotsia itayotatsi. Najunaviaca bajarapamonae pinijicuenia. <sup>10</sup> Nexata ángel jumaitsi oveja pevetsivijavabelia:

—Pëtsa panajunaviacame. Pexanialivaisi raja pacatocanajetarucatsi pesivabarëyanexa daxitajivi. <sup>11</sup> Ajena rabaja, mapameravitaje, naexana baja daxitajivi pecapanepaenënexa. Naexana Belén tomarata, patomarata bajayata nacuaevetsinëmi Davidpijinëmi ponapona. Ponë naexana, bajaraponë pepo petuxanenë Cristo, Dioso athëbëvetsica pitorobinëtsitsica jivi pecapanepaenexa. <sup>12</sup> Paneyapëtaenexa pacuenia pacatsipaebatsi, penacuetonëyo pataeyabuatetsianame mapacueniaje. Penacuetonëyo pataeyabuatetsianame papaëbërëpanaxita pejumaquionaenacuetonëyotsi. Boquecaena dajubi pexaejava pemitsothocabiabimoënëta, jai ángel oveja pevetsivijavabelia.

<sup>13</sup> Bajara saya jota jemata oveja pevetsivi tsitanaitajëtatsi ayaibitsaëtoxaneto ángelevi, copiaya petsipaebiángelnëtsijavata. Bajarapamonae ángelevi pexaniajamatabëcuene rajuta Diosojavabelia. Penaxëanaejavata ángelevi jumaitsi mapacueniaje:

<sup>14</sup> ¡Dioso, athëbëtatsia peecaenë, pinijicuenia rabaja exana! Pamona Dioso jumecovënëta, Dioso sivajamatabëcuenebarëyatsi. Daxita bajarapamonae jamatabëcuenexanepanaeya jinavanapaeyaexanaena Dioso, jai ángelevi penaxëanaejavata.

<sup>15</sup> Itsa baja ángelevi naviaba athëbëabetsia, oveja pevetsivi ángelevi pecovëta najumaitsi:

—Ponaliatsi Belén tomarabelia. Taenatsi pecopiapatsijava pacuene yabara vajatuxanenë Dioso pitorobiángelnëtsica nacatsipaeba, najai oveja pevetsivi ángelevi pecovëta.

<sup>16</sup> Nexata bajarapamonae bepijiayo ponalia Belén tomarabelia. Pata itsajota Mariabeje Josébeje barëecabeje penacuetonëyo. Penacuetonëyo boqueca dajubi pexaejava pemitsothocabiabimoënëta. <sup>17</sup> Oveja pevetsivi itsa taeyabuateta penacuetonëyo pacuenia baja cajena ángelnë tsipaebatsi, nexata pona petsipaebaponaenexa daxitajivijava pacuenia bajarapanacuetonëyo taeyabuateta. <sup>18</sup> Nexata daxita pamona jumetane oveja pevetsivi pepaebilivaisi, jamatabëcuenenabenajaca. <sup>19</sup> María baja cajena pejamatabëëthëtota yapëtaeponapona daxita bajarapacuenia yabara. <sup>20</sup> Oveja baja pevetsivi naviabaponalia. Oveja pevetsivi namutualia jumai tsanajetarubena Diosojavabelia:

—Diosomë, bitso ayaijamatabëcuenenëmë. Pexaniajamatabëcuene pacarajutatsi patanetoexanaexaemë pexaniacuene, jai tsaponaelia oveja pevetsivi.

Bajarapacuenia jumaitsi tsipaji baja tane daxita pacuenia ángelnë tsipaebatsi.

### Pacuenia Jesúsnyö caponaliatsi temploboyabelia yabara pelivaisi

<sup>21</sup> Jesúsnexta penaexanaecujinae, ocho matabita, perabëcaucutatsi judíovicuenia. Baitsi boupiherabëcaucutatsi. Vënërübatsinua jane baja pevënë pexainaenexa. Vënërübatsi “Jesús,” pejaivënëta. Tsipaji baja cajena abaxë María nacoxitsinejeva Jesúsnexta, tajëvelia ángel jumaiti Maríajavabelia: “Bajaraponëyo vënërübianame Jesús,” jai.

<sup>22</sup> Nexata jane baja tocopiajopatsibeje Josébeje Maríabeje pexanaenexabeje pacuenia bajayata Dioso Moiséspijinëta penajumecopatsilivaisi itorobatsi daxita judíovi pexanaenexa penacuetonëyo ita tonaexanatsi. Nexata Jerusalén tomara-belia barëponabeje penacuetonëyo. Nexata Jerusalén tomarata, templobota, María ofrenda rajuta Diosojavabelia penajamatabëcuene xaniavaetsinexa Diosojavabelia. Rajutabejenua penacuetonëyo Diosojavabelia pijajivitonënexa petonacuenebinexa ita penaveretsinë. <sup>23</sup> Bajarapacuenia Josébeje Maríabeje exanabeje tsipaji Dioso Moiséspijinëta penajumecopatsilivaisi jumaiti: “Penacasabijivibeje pexi ita xainabeje, nexata copiaya panacuetonëyo xainabeje, totsatsibeje Dioso pijajivitonënexa,” jai. <sup>24</sup> Josébeje Maríabeje rajutabeje ofrenda Diosojavabelia pacuenia Dioso Moiséspijinëta penajumecopatsilivaisi itorobatsibeje. Rajutabeje tsiquiriviria ucucutoyobeje. Itsa jume, rajutabeje meta pinijiyoviria ucucutoyobeje.

<sup>25</sup> Bajarapamatacabi ponapona Jerusalén tomarata Simeónvënë. Bajaraponë jumecovënëtsiaponapona pacuenia Dioso pejumelivaisibaxutota jumaiti. Nexata bajarapamatacabi Israelnacua eveta Romano nacuaverena ëpepatsivi. Nexata Romano nacuaverena pepatsivi pevetsixae Israelnacua, bejiobiaexanabiabatsi Israel nacuapijivi. Bajaraxuata Simeón copiaevetaponapona Dioso pejamatabëcueneta petovecuajutsinexatsi Israelnacua pevetsivi. Nexata baja Romano nacuaverena pepatsivi, pevecuapitsapaenexa Israelnacua pevetsicueneta. Espiritu Santo yajavaponaponatsi Simeón. <sup>26</sup> Nexata Espiritu Santo pejamatabëcueneta Simeón tajëvelia yapëtaeyaexanatsi pacuenia Simeón petëpaevajënae taejitsia Cristo, ponë Dioso athëbëvetsica itorobiapaebica jivi pecapanepaenexa. <sup>27</sup> Nexata Espiritu Santo pejamatabëcueneta Simeón joneyaexanatsi temploboyabelia. Bajaraxuata Simeón tane Maríabeje Josébeje pebarëjonejavatabeje Jesúsnyö temploboyarena pexanaenexabeje pacuenia Dioso Moiséspijinëta penajumecopatsilivaisi itorobatsibeje. <sup>28</sup> Nexata Simeón isapita Jesúsnyö. Pexaniajamatabëcuene rajuta Diosojavabelia. Pexaniajamatabëcuene Simeón perajutsijavata Diosojavabelia, Simeón jumaiti mapacueniaje:

<sup>29</sup> Tajatuxanenë, baja rajane netocopatsianame nijajivitonënë jamatabëcuenexanepanaeya tatëpaenexa. Tsipaji baja netaeyaexaname pacuenia baja cajena tajëvelia najumecapanepaeya nejumaitsimë. <sup>30</sup> Taitaxutota rabaja taniji maponëje, ponë itorobimica jivi pecapanepaenënexa xamëjavabelia. <sup>31</sup> Ponë itorobimica jivi pecapanepaenënexa, daxitajivi taenatsi. <sup>32</sup> Maponëje petsipae-bilivaisita, pamona apo judíovi ata, jamatabëcueneitayotsiana. Yapëtaeyaexanaena pacuenia jamatabëcueneitsimë. Nexata maponëje pejamatabëcueneta apo judíovi yayataena nijajivi judíovi,

jai Simeón templobota Diosojavabelia pexaniajamatabëcuene perajutsijavata Jesúsnyö yabara.

<sup>33</sup>Nexata Josébeje Maríabeje itsa jumetanebeje bajarapacuenia Simeón peju-maitsijava Jesúsnyö yabara, jamatabëcuenenabenajacabeje. <sup>34-35</sup>Bajaraxuacujinae Simeón tovajëta Diosojavabelia peyavenonaenexatsibeje Josébeje Maríabeje, Jesúsnyö yajava. Bajaraxuacujinae Simeón jumaitsi Maríajavabelia:

—Mapanacuetonëyoje, Dioso itapetatsi. Maponëje petsipaebilivaisi jivi ayaibitsaëtoxfaneto apo jumecovënëtsi tsanetsi. Nexata jivi ayaibitsaëtoxfaneto naxuabi-ana, Israel nacuapijivi. Ayaibitsaëtoxfaneto pijinia jumecovënëtsianatsi. Nexata pijinia ayaibitsaëtoxfaneto capanëpaena. Maponëje Dioso pesaëta pinijicue pexanaejava, tsitaexanaena jivi peyapëtaenexa Dioso pitorobinëtsitsica. Maponëje itajëtsiana pacuenia jivi ayaibitsaëtoxfaneto, caejivi canacujitsia, bëpënëa pibisiajamatabëcuene najamatabëxainabiaba. Jivi ayaibitsaëtoxfaneto apo jumecovënëtsi tsanetsi. Pibisiacuenia saya baranatsipaebianatsi. María, xamë nexata pepo nejamatabëthëtojavavetsina bitso sivajamatabëcuenebëjamë tsane itsa yapëtaename pacuenia exanaejitsiatsi, jai Simeón Maríajavabelia Jesús yabara tajëvelia pevajunupaebijavata pacuenia Jesús exanaejitsiatsi.

<sup>36-37</sup>Bajara pijinia pamatacabi templobota ponapona Diosojumepaebiva profetava, Anavënëva. Bajarapova Fanuelpijinë pexënatoyo, Aserpijinë pemomoxiyajuvënëva. Bajarapova bitso baja perujuva. Ochenta y cuatro baja pavaibeje xaina. Nacasaba picani abaxë itsa pejanava. Penacasabicujinae siete pavaibeje pepuaxainae pamonajavabelia, vecuatëpatsi pamona. Itsajavabelia apo vecuaponabiabi templobo. Matacabijebi, meravijebi yajava, Dioso tonacuenebabiaba templobota. Itsajavata pexaejava apo xaeyabiabi pamatacabibeje vajëcabiaba Diosojavabelia. <sup>38</sup>Nexata bajarapova ata pata itsajota Josébeje Maríabeje nucabeje templobota. Simeón pisanucaejavata Jesúsnyö, isataenuta bajarapova. Nexata bajarapova pexaniajamatabëcuene rajuta Diosojavabelia Jesúsnyö yabara. Romano nacuaverena pepatsivi Israelnacua pevetsixae, Israel nacuapijivi copiaevetavanapa Dioso pejamatabëcueneta petovecuajutsinexatsi, nexata baja Romano nacuaverena pepatsivi pevecuapitsapaenexa Israelnacua pevetsicuene. Nexata daxita pamona copiae- vetavanapa Dioso pejamatabëcueneta petovecuajutsinexatsi Israelnacua pevetsivi, daxita bajarapamonaejavabelia, bajarapova tsipaebabiaba Jesúsnyö pelivaisi.

### **Pacuenia Jesús ponapona Nazaret tomarata pebarënaviatsicujinaetsi templobojavaverena yabara pelivaisi**

<sup>39</sup>Josébeje Maríabeje Jerusalén tomarata templobota exanaeveretabeje baja daxita pacuenia Dioso Moiséspijinëta penajumecopatsilivaisi itorobatsibeje. Nexata baja pijatomarabelia Jesúsnyö barënaviatabeje, Nazaret tomarabelia, Galilea nacuata peeaetomarabelia. <sup>40</sup>Nexata jane baja Jesúsnyö vitsaba Nazaret tomarata. Ajamatabëcuenesaë tsaponae Dioso pijacuene yabara. Jamatabëcuenevitsabaponanua. Dioso yavenonaponatsi ayaicuenia.

### **Pacuenia Jesúsnyö templobota barëcuai- cujinaetsi judíovi pecujarubivijavabelia yabara pelivaisi**

<sup>41</sup>Caevai canacujitsia Josébeje Maríabeje ponabiababeje Jerusalén tomarabelia. Ponabiababeje pascuavënëfiesta penataeyabiabinexabeje. <sup>42</sup>Nexata baja Jesúsnyö doce pavaibeje itsa xaina, barëponabeje icatsia Jerusalén tomarabelia pascuafiesta penataenexa. <sup>43</sup>Itsa baja copiaruca pascuafiesta, daxita baja penataevi bajarapafi-

esta, naviaba baja pijabonëjavabelia. Nexata Jesúsnyö nacopatanucalia Jerusalén tomaratalia. Maríabeje Josébeje abaxë apo yapëtaebeje Jesúsnyö pevecuanacopat-sijavatsiliabeje. <sup>44</sup> Jamatabëjumaitsiabeje saya:

—Jesúsnyö raeta nanajetaruca vajanajuaponaevita, jamatabëjaibeje.

Bajaraxuata caematacabi baja pepuaponaebeje namutua, itaxanabeje Jesúsnyö. Nexata yanijobabeje pijamonaëjavabelia, peyapëtaevitsibejejavabelia ata. <sup>45</sup> Itsiata apo caxitajarabibeje. Nexata naviatecabeje Jerusalén tomarabelia pejaitsinexabeje Jesúsnyö.

<sup>46</sup> Acueyabi matacabita caxitajarababeje templobota. Jesúsnyö naeca judfovi pecujarubivi tuatuajëta. Jumetaeyeca bajarapamonaë penabarëcuaicuaijailivaisi. Nexata Jesúsnyö yanijobapona bajarapamonaë penabarëcuaicuaijailivaisi yabara.

<sup>47</sup> Nexata daxita Jesúsnyö pejumetaeyenaevitsi, taeyena Jesúsnyö xaniavaetsia pejumeyapëtaejava judfovi pecujarubivi penabarëcuaicuaijailivaisi. Taeyenanua xaniavaetsia pejumecanaviataponaejava, abaxë tsiquirinëyovajëto ata. Bajaraxuata jamatabëcuenenabenajaquena bajarapamonaë. <sup>48</sup> Josébeje Maríabeje itsa tanebeje bajarajota Jesúsnyö penaecaejava, nexata jamatabëcuenenabenajacabeje. María nexata jumaitsi:

—Taxënato, ¿detsa xuajitsia panevëpënacoparemenabeje? Paxanëbeje patacajaitarutsijavatabeje, bitso pacaitaxanatsibeje, jai María.

<sup>49</sup> Nexata Jesúsnyö jumaitsi penajavabelia:

—¿Detsa xuajitsia bajarapacuenia panejaitarutamebeje? Panejaitsipamebeje raja mapabotaje. Tsipaji raja xanë taxa Dioso pijacuen taexanaenexa mapabotaje, nejamatabëcuenenabiaba, jai Jesúsnyö.

<sup>50</sup> Itsiata bajarapajivibeje apo jumeyapëtaebeje pajamatabëcuene yabara jumaitsi Jesúsnyö.

<sup>51</sup> María baja cajena pejamatabëthëtota yapëtaeponapona daxita bajarapacuenia yabara. Nexata baja bajarapajivibeje pepëta Jesúsnyö napona baja Nazaret tomara-belia. Nazaret tomarata Jesúsnyö xaniavaetsia jumecovënëtsiaponapona pacuenia Josébeje Maríabeje itorobabiababeje. <sup>52</sup> Jesús abaxë vitsabanajetaruca. Jamatabëcuene vitsabanajetarucanua. Nexata Dioso pexaniajamatabëcuenia tanetsi. Daxita pamonaë Jesúsnyö yapëtanetsi, pexaniajamatabëcuenia tanetsi.

### **Pacuenia Juan jivibautisabinë jivi livaisi tsipaebe petusato nacuata yabara pelivaisi**

*(Mt 3.1-12; Mr 1.1-8; Jn 1.19-28)*

**3** Pamatacabi pepo nacuaevetsinë Tiberiovënënë xaina quince pavaibeje pevet-sicujinae Romanonacua, bajara pijinia pamatacabi itsanacuanë eveta itsamonae. Bajarapamatacabi nacuaevetsinë Poncio Pilato eveta Judeanacua. Bajara pijinia pamatacabi nacuaevetsinë Herodes eveta Galileanacua. Bajara pijinia pamatacabi Herodes pejuyapijinë, nacuaevetsinë Felipe, eveta Itureanacua, Traconitenacua yajava. Bajara pijinia pamatacabi nacuaevetsinë Lisantias eveta Abilinianacua. <sup>2</sup> Bajara pijinia pamatacabi Anásbeje Caifásbeje Israel nacuata sacerdotevi pepo penamatacatorobinëbeje tsaponaponaë. Bajara pijinia pamatacabi Juan, Zacarías pexë-nato, petusato nacuata ponapona. Nexata Dioso itorobatsi jivi petsipaebanajetarucaenexa Dioso pitorobilivaisi. <sup>3</sup> Nexata Juan jivi tsipaebanajetaruca Dioso pitorobili-

vaisi daxita Jordánmene imoxoyo penaenacuanëta pejinavanapaevijava. Juan jumai tsanajetaruae jivijavabelia:

—Panajamatabëcuenepënyorore Diosojavabelia. Pacopabare pibisiacuene paneexanabiabijava. Nexata pacabautisabianatsi Dioso papecavecuajibiaexanaenexa pibisiacuene paneexanaeneconimi, jai tsanajetaruae Juan jivijavabelia.

<sup>4</sup>Bajarapacuenia Juan jivi ita tsipaebanajetarua, copiajopa jane baja pacuenia Diosojumepaebinëmi profeta Isafaspijinë bajayata tajëvelia yaquina Juan yabara. Juan jivibautisabinë Dioso pitorobilivaisi jivijavabelia petsipaebanajetaruaejavanexa yabara, yaquina. Profeta Isafaspijinë peyaquinaelivaisita tajëvelia jumaitsi mapacueniajaje:

Tanejumelivaisipaebinë vavajai tsane petusato nacuata. Jumai tsane jivijavabelia:

“Jivi baxaneba panamutoverena najetaruaejitsia petuxanenë. Batoroviaexananua namuto. <sup>5</sup>Daxita namutua pafotonë rubena, atsa baothoca penamatajêpaeyaexanaenexa namuto. Daxita petsutonëmi, pinijiibotsutoxanetonëmi ata, banamatajêpaeyaexana. Baroviayaexananua penatoxorotsinamutomi ata. Banamatajêpayaexananua namutua pebobenaemëthëanëmi ata. Bajara pijinia pacuenia paxamë ata panajamatabëcuenexaniavaere pepo petuxanenë pepsivajënaeya paxamëjavaberena. <sup>6</sup>Nexata daxitanacuanëpijivi yapëtaena Dioso pecapanepaejavanexatsi pijaneconivecu,”

jai baja cajena profeta Isafaspijinë bajayata peyaquinaelivaisita, Dioso pitorobilivaisi, Juan jivi petsipaebanajetaruaejavanexa yabara.

<sup>7</sup>Jivi ayaibitsaëtoxaneto pata Juanjavaberena Juan picani pebautisabinexa bajarapamonae. Bajarapamonae apo jumecovënëtsi ata Dioso pitorobilivaisi, jamatabëcuenenavëxaniabiaya jamatabëjumaitsi:

—Juan ita nacabautisabiana, Dioso nacacapanepaena, jamatabëjai.

Nexata Juan jumaitsi bajarapamonaejavabelia:

—¡Panejamatabëcuenenavëxaniabivi! Pacuenia jomo rëcëpeca ita tane isoto petajuenajetaruaejava, bajara saya paitsimë. Dioso rabaja papecananeconitsia exanaematacabinexa pacaimoxoyotapona. Itsiata acuenebi tsane panevecuapanepaenexa Dioso papecananeconitsia exanaematacabinexavecu. <sup>8</sup>Itsa pajitsipame Dioso papecacapanepaejava, pacopabare pibisiacuene paneexanabiabijava. Dioso pajumecovënëtsiajinavanapare. Nexata daxitajivi pacayapëtaena pepacuene baja panecopabijava pibisiacuene paneexanabiabijavami. Pacayapëtaenanua panenajamatabëcuene pënyorotsijava Diosojavabelia. Jamatabëcuenenavëxaniabiaya pëtsa panajumaitsimë: “Vaxaitsi cajena Abrahampijinë pemomoxitsi. Nexata Dioso nacacapanepaena,” panajamë pëtsa. Abrahampijinë picani papemomoxi atamë, itsiata pibisiacuene ita paexanavanapame, nexata bajarapacuene apo pacatonamatomtsi tsipae papecacapanepaenexa Diosojavabelia. Dioso baja cajena caëjêpatsi jivi pexanaenexa mapaibotonëmi ataje, Abrahampijinë bepemomoxi Dioso petaenexa. Nexata bajarapamonae ata Dioso ita apo jumecovënëtsi, Dioso apo capanepae tsipae. Nexata pacopabare pibisiacuene paneexanabiabijavami papecacapanepaenexa Dioso. <sup>9</sup>Peubinaenë pexainaenë ita apo tonacuaitsitsi pexaniacuai, nicata sipalita daxita ponaenë apo tonacuaitsitsi pexaniacuai. Nexata baja penicatsicujinae, ita niona bajaraponaenë, caetuata. Xuaba isotojavabelia. Nexata bajaraponaenëmi tajuatsti. Bajara pijinia pacuenia paxamë ata Dioso pacaxuabiana infiernojavabelia papecatajuenexa, Dioso apo panejumecovënëtsivi, jai Juan bajarapamonaejavabelia.

<sup>10</sup> Nexata bajarapamonae jumaitsi Juanjavabelia:

—¿Detsa nexata pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai bajarapamonae.

<sup>11</sup> Nexata Juan jumaitsi bajarapamonaejavabelia:

—Pajivi anijacamisabeje xaina, rajutsi pajiviyo apo xinae camisa. Pajivi pexaejava xaina, tsicobetsatsi pajiviyojavabelia apo xinae pexaejava, jai Juan.

<sup>12</sup> Gobierno pejamatabëcuene impuestomatamo pematamoyanijobabiabivi ata, pata Juanjavaberena Juan picani pebautisabinexa bajarapamonae. Nexata bajapamonae ata jumaitsi Juanjavabelia:

—Juan, ¿detsa pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai bajarapamonae.

<sup>13</sup> Nexata Juan jumaitsi bajarapamonaejavabelia:

—Itsa pamatamoyanijobabiabame impuestomatamo, pamatamoyanijobabiabare pamatamota papecaitorobivi pacatocopata paneyanijobabiabinexa. Pëtsa mata-toxenetsia bajarapamatamovecua yamaxëitojorobiaya payanijobabiabame paxamë saya panepitsinexa bajarapapalata, jai Juan bajarapamonaejavabelia.

<sup>14</sup> Nexata icatsia vajabitsaë ata jumaitsi Juanjavabelia:

—Juan, ¿jica paxanë tsane? ¿Detsa pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai vajabitsaë.

Nexata Juan jumaitsi vajabitsaëjavabelia:

—Pëtsa panejumesaëta itsajivi ata palata payacajërëtime. Pëtsa najumetsënëtsi-aya itsajivi ata pananeconitsiaexaname saya palata papecarajutsinexa pecajunavi. Saya pasivabarëyamëre pacueneta pacamatamotapona papecaitorobivi, jai Juan vajabitsaëjavabelia.

<sup>15</sup> Jivi itatsacajinaeya copiaevetavanapa Cristo, ponë Dioso athëbëvetsica itorobijitsia pepatsijavatsica jivi pecapanepaenexa. Nexata bajarapamonae Juan itsa tanetsi, bajarapamonae jamatabëcuenenavëxaniabiaya jamatabëjumaitsi Juan yabara:

—Baja raeta jane maCristoje, daxitajivi pecapanepaenënexa, jamatabëjai bajarapamonae Juan yabara.

<sup>16</sup> Nexata Juan jumaitsi daxita bajarapamonaejavabelia:

—Xanë raja saya pacabautisabatsi merata. Itsiata baitsi jane itsanë tacovëverena najetarucaena. Bajara jane ponë pacatsijamatabëjoneyaexanaena Espíritu Santo, pitarunutsicotia yajava. Xanë raja saya beveliajamatabëcuenenënë bajaraponëvecua. Nexata bajaraponë vecuaauranë pijazapato ata tataxujonotsinexa beprijavitonëcuenianë. <sup>17</sup> Arrozxainanë baja itsa vereta arroz penotsijava, jëaba arroz pejëabijavata ëpexu pepitsinexa. Nexata pijaarroz pejëabijavata, tsatapona saicaya ëpexu pesivecua. Nexata ëpexu xaniavaeteta peetsibojavabelia. Pesi pijinia penetapona vayafuabelia petajuitsinexa. Bajara pijinia pacuenia paxamë ata, Dioso pejumecovënëtsivivecua Dioso pacatsatsiana papecaxuabinexa infiernojavabelia panexuabinexa baja daxitamatacabijavabelianexa. Pamonae pijinia Dioso pejumecovënëtsivi, Dioso capanepaenatsi pijanacuayabetsia. Pamonae pijinia Dioso apo jumecovënëtsi, Dioso naneconitsiaexanaenatsi daxitamatacabijavabelianexa apo pev-evererecaeisotojavabelia, jai Juan daxita bajarapamonaejavabelia.



<sup>18</sup> Bajarapacuenia ayailivaisianëta Juan muxujiobapona jivi. Tsipaebanajetaruca pexanialivaisi pecapanepaelivaisinexatsi Diosojavabelia. <sup>19</sup> Bajaraxuacujinae icatsia Juan itaveta nacuaevetsinë Herodes. Tsipaji Herodes pejuyapijinë pijava yacajërëta, Herodíasvënëva. Daxita Herodes pibisiacuene pexanaejavanë ata, itaveta Juan. <sup>20</sup> Itsiata baitsi jane Juan Herodes apo jumecovënëtsitsi. Caranata biji orijibia icatsia Herodes pibisiacuene exana. Herodes itoroba pijajivi Juan pevaetabinexatsi, penaneconitsivi pejebabiabibota peetsinexatsi.

### **Pacuenia Juan bautisaba Jesús yabara pelivaisi**

*(Mt 3.13-17; Mr 1.9-11)*

<sup>21</sup> Juan pevaetabivajënaetsi penaneconitsivi pejebabiabibota peetsinexatsi, jivi bautisabaponapona. Bajarapamatacabi Juan bautisaba Jesús ata. Jesús pebautisabicujinaetsi itsa vajëta Diosojavabelia, athëbëtatsia itaboxo napatsia. <sup>22</sup> Athëbëvetsica Espiritu Santo naitajëtsiaya Jesús tsmatarunaicatsi beucucuto. Nexata Jesús jumetane athëbëvetsica Dioso pejumaitisijavatsi: “Xamë raja taxënatomë, bitso tacaasivanë. Bitso casivajamatabëcuenebarëyatsi,” pejaijavatsi.

### **Jesucristo pijasalinaivimi pevënëanë yabara pelivaisi**

*(Mt 1.1-17)*

<sup>23</sup> Itsa baja Jesús xaina bejamatabëcuene treinta pavaibeje, taxuxuaba jane baja jivi Dioso pitorobilivaisi petsipaebijava. Jivi tanetsi Jesús beJosé pexënato. José paxapijinë pevënë Elí. <sup>24</sup> Elí paxapijinë pevënë Matat. Matat paxapijinë pevënë Leví. Leví paxapijinë pevënë Melqui. Melqui paxapijinë pevënë Jana. Jana paxapijinë pevënë José. <sup>25</sup> José paxapijinë pevënë Matatías. Matatías paxapijinë pevënë Amós. Amós paxapijinë pevënë Nahum. Nahum paxapijinë pevënë Esli. Esli paxapijinë pevënë Nagai. <sup>26</sup> Nagai paxapijinë pevënë Maat. Maat paxapijinë pevënë Matatías. Matatías paxapijinë pevënë Semei. Semei paxapijinë pevënë Josec. Josec paxapijinë pevënë Judá. <sup>27</sup> Judá paxapijinë pevënë Joanán. Joanán paxapijinë pevënë Resa. Resa paxapijinë pevënë Zorobabel. Zorobabel paxapijinë pevënë Salatiel. Salatiel paxapijinë pevënë Neri. <sup>28</sup> Neri paxapijinë pevënë Melqui. Melqui paxapijinë pevënë Adi. Adi paxapijinë pevënë Cosam. Cosam paxapijinë pevënë Elmadam. Elmadam paxapijinë pevënë Er. <sup>29</sup> Er paxapijinë pevënë Josué. Josué paxapijinë pevënë Eliezer. Eliezer paxapijinë pevënë Jorim. Jorim paxapijinë pevënë Matat. <sup>30</sup> Matat paxapijinë pevënë Leví. Leví paxapijinë pevënë Simeón. Simeón paxapijinë pevënë Judá. Judá paxapijinë pevënë José. José paxapijinë pevënë Jonam. Jonam paxapijinë pevënë Eliaquim. <sup>31</sup> Eliaquim paxapijinë pevënë Melea. Melea paxapijinë pevënë Mena. Mena paxapijinë pevënë Matata. Matata paxapijinë pevënë Natán. <sup>32</sup> Natán paxapijinë pevënë David. David paxapijinë pevënë Isaí. Isaí paxapijinë pevënë Obed. Obed paxapijinë pevënë Booz. Booz paxapijinë pevënë Sala. Sala paxapijinë pevënë Naasón. <sup>33</sup> Naasón paxapijinë pevënë Aminadab. Aminadab paxapijinë pevënë Admin. Admin paxapijinë pevënë Arni. Arni paxapijinë pevënë Esrom. Esrom paxapijinë pevënë Fares. Fares paxapijinë pevënë Judá. <sup>34</sup> Judá paxapijinë pevënë Jacob. Jacob paxapijinë pevënë Isaac. Isaac paxapijinë pevënë Abraham. Abraham paxapijinë pevënë Taré. Taré paxapijinë pevënë Nacor. <sup>35</sup> Nacor paxapijinë pevënë Serug. Serug paxapijinë pevënë Ragau. Ragau paxapijinë pevënë Peleg. Peleg paxapijinë pevënë Heber. Heber paxapijinë pevënë Sala. <sup>36</sup> Sala paxapi-

jinë pevēnē Cainán. Cainán paxapijinē pevēnē Arfaxad. Arfaxad paxapijinē pevēnē Sem. Sem paxapijinē pevēnē Noé. Noé paxapijinē pevēnē Lamec. <sup>37</sup>Lamec paxapijinē pevēnē Matusalén. Matusalén paxapijinē pevēnē Enoc. Enoc paxapijinē pevēnē Jared. Jared paxapijinē pevēnē Mahalaleel. Mahalaleel paxapijinē pevēnē Cainán. <sup>38</sup>Cainán paxapijinē pevēnē Enós. Enós paxapijinē pevēnē Set. Set paxapijinē pevēnē Adán. Adánpijinē Dioso pexanaenētsi.

### **Pacuenia picani Jesús jamatabēcueneējēbatsi dovathi yabara pelivaisi**

*(Mt 4.1-11; Mr 1.12-13)*

**4** Jesús baja naviarena Jordán meneverena Juan pebautisabicujinaetsi. Tsijamatabēvēnēcatsi bitso Espírítu Santo. Nexata Espírítu Santo ponaeyaexanatsi petusato nacuyabelia. <sup>2</sup>Bajarajotalia Jesús ponapona cuarenta pamatacabibeje. Bajara pijinia pamatacabibeje Jesús pexaejava apo xae. Jesús nexata bitso piájani. Dovathi nexata jamatabēcueneējēbatsi pibisiacuene picani pexanaenexa. <sup>3</sup>Dovathi jumaiti Jesúsjavabelia:

—Itsa pepacuene Dioso pexēnatomē, itorobare mapaibotoyoje penaexanaenexa panbē, jai dovathi Jesúsjavabelia.

<sup>4</sup>Jesús nexata jumaiti dovathijavabelia:

—Jume raja. Dioso raja pejumelivaisibaxutota jumaiti mapacueniaje: “Jivi raja apo namatavenonae ēpexaejava pexaenexa. Jivi raja namatavenona daxita Dioso pejumelivaisi ata pejumecovēnētsinexa pexainaenexa matababi apo peverevereceajava,” jai raja Dioso pejumelivaisibaxutota, jai Jesús dovathijavabelia.

<sup>5</sup>Bajaraxuacujinae icatsia Jesús barēliatsi dovathi pinijitsutoxanetojavabelia. Barējunayatsi bajarapatsutojumabetsia. Nexata bajarapatsutojumavetsica dovathi Jesús tsitajētatsi bepíjia daxitanacuanē. <sup>6</sup>Nexata icatsia dovathi jumaiti Jesúsjavabelia:

—Xanē raja carajutsianatsi daxita mapanacuanēje nevetsinexa. Daxita bajarapanacuanēta paitabēcuene taneme, cayajavarajutsianatsi. Nexata bitso nexainaenē tsane nexainajava. Daxita tanerajutsijavanēmi, necaējēpa juya tarajutsinexa pajivijavabelia jamatabērajutajē. <sup>7</sup>Ayaijamatabēcuenenēnē netaeya taitabarata nematabacabēta ita netonucajunuame, nexata daxita mapanacuanēje nijanacuanē tsane, jai dovathi Jesúsjavabelia.

<sup>8</sup>Nexata Jesús jumaiti dovathijavabelia:

—Dovathi, nevecuanatixire. Dioso raja pejumelivaisibaxutota jumaiti mapacueniaje: “Daxitajivi vajēcae pematabacabēta caenē, pepo petuxanenē Diosojavabelia. Tonacuenebinua bajaraēponēnexa,” jai raja Dioso pejumelivaisibaxutota, jai Jesús dovathijavabelia.

<sup>9</sup>Bajaraxuacujinae abaxē icatsia Jesús barēliatsi dovathi Jerusalén tomarabelia. Jerusalén tomarata barējunayatsi temploboxaneto matatuyabetsia. Nexata templobo matatutatsia dovathi icatsia jumaiti Jesúsjavabelia:

—Itsa pepacuene Dioso pexēnatomē, jirevaremeca irabereca. <sup>10</sup>Bajarapacuenia jirevaremeca irabereca. Tsipaji xamē peitsacueneyaniva pecaevetsinexa, Dioso pejumelivaisibaxutota jumaiti mapacueniaje:

Dioso itorobianica pijaángelevi pecaevetsinexa. <sup>11</sup>Nexata ángelevi pecobeta cayotiana pecataxutsaquitsiyaniya ibotonējavabelia,

jai Dioso pejumelivaisibaxutota xamë pecaevetsinexa ángelevi, jai dovathi Jesúsjavabelia.

<sup>12</sup> Jesús nexata icatsia jumaitsi dovathijavabelia:

—Jume raja. Dioso raja pijinia pejumelivaisibaxutota jumaitsi mapacueniaje: “It-sajivi ata jamatabëcuenenavëxaniabiaya pijacuata apo bejamatabëjumaitsi: ‘Xanë Dioso jamatabëcueneëjësianajë. Nexata natoexanaenajë pacuene bitso netsiayai tatëpaenexa. Itsiata Dioso neyavenonaena tavecuapanepaenexa bajaraxua. Nexta bajarapacuenia yapëtaenajë Dioso taneyavenonaejava,’ apo bejamatabëjai,” jai Dioso pejumelivaisibaxutota, jai Jesús dovathijavabelia.

<sup>13</sup> Bajaraxuacujinae itsa baja dovathi daxitacuene Jesús jamatabëcueneëjëbivere-tatsi pibisiacuene picani Jesús pexanaenexa, nexata abaxë yatucopatatsi itsamata-cabijavabelia icatsia pejamatabëcueneëjësinesatsi.

**Pacuenia Jesús Galilea nacuata taxuxuaba  
Dioso pitorobilivaisi jivi petsipaebijava yabara pelivaisi**

*(Mt 4.12-17; Mr 1.14-15)*

<sup>14</sup> Jesús baja itsa naviata petusato nacuaverena, Galilea nacuyaberena, Espiritu Santo pesaë yajavaponapona. Nexata daxita Galilea nacupijivi vënëlivaisitanetsi Jesús. <sup>15</sup> Judíovi penacaetuatabiibonëjjava Jesús jivi livaisi tsipaebanajetaruca. Daxitajivi nexata Jesús yabara jumai tsabiabi: “Maponëje bitso ayaijamatabëcuenenë,” jai tsabiabi.

**Pacuenia Jesús naviata pijatomarabelia,  
Nazaret tomarabelia, yabara pelivaisi**

*(Mt 13.53-58; Mr 6.1-6)*

<sup>16</sup> Nexata Jesús naviata pevitsabitomarabelia, Nazaret tomarabelia. Nexata pe-paticujinae Nazaret tomarata, judíovi penacueraevetsimatacabita Jesús najoneya judíovi penacaetuatabiiboyalia. Tsipaji baja cajena Jesús bajarapacuenia exanabiaba. Nexata judíovi penacaetuatabiibota Jesús nonotapuna Dioso pejumelivaisibaxuto petsimuxulebinexa daxita bajarajota penaevi pejumetaenexa. <sup>17</sup> Nexta Jesús tsicoberutatsi profeta Isafaspijinë bajayata peyaquinaebaxuto. Nexata Jesús bajarapabaxuto baxupata. Nexata jane baja daxita bajarajota penaevi pejumetaenexa, Jesús tsimuxuleba itsajota bajarapabaxutota tajëvelia Jesús yabara jumaitsi mapacueniaje:

<sup>18</sup> Dioso pijaEspiritu Santo netsijamatabëeca. Tsipaji Dioso nitapeta tatsipaebinexa pexanialivaisi pibisiacuene pexanabiabijava bepeyajamatabëcuenejibivijavabelia. Nitorobanua tajamatabëcuenexaniavaetsinexa bajarapamonae pibisiacuene pexanabiabineconi yabara bepeyajamatabëcuenejibivijavaveca. Nitorobanua tajamatabëcuenexaniavaetsinexa pamonaepijamatabëcueneitaquirivi, pamonaebaxaxë apo yapëtae pexaniajailivaisi. Nitorobanua tacapanepaenexa pamonaepijamatabëcuenebejibitabiabatsi pijavajabitsaë. <sup>19</sup> Nitorobanua tatsipaebinexa pacuenia baja Dioso najamatabëcuenevereta pecapanepaenexa pijajivi, pejaiitanejavata tajëvelia Jesús yabara Isafaspijinë peyaquinaebaxutota Jesús tsimuxulebanuca daxita bajarajota penaevi pejumetaenexa.

<sup>20</sup> Bajaraxuacujinae Jesús baja bajarapabaxuto baxuacata. Tocanaviata baja judíovi penacaetuatabiabibota penacuenebinějavabelia. Bajaraxuacujinae Jesús baja icatsia ecareca. Daxita pamonaē judíovi penacaetuatabiabibota ena, Jesús asaēyata taeyenatsi. <sup>21</sup> Nexata icatsia Jesús jumaitsi bajarapamonaējavabelia:

—Aeconoxae Dioso pejumelivaisibaxuto pacatsimumulebiveretatsi. Xua yabara bajarapabaxutota jumaitsi, bajaraxua baja aeconoxae mapamatacabitaje copiapata baja, jai Jesús bajarapamonaējavabelia.

<sup>22</sup> Nexata daxitajivi pexaniajamatabēcuenia Jesús yabara cuaicuajiai. Jamatabēcuenenabenajaca pexanialivaisi Jesús petsipaebixae. Nexata bajarapamonaē Jesús jamatabēcueneaebiatanetsi. Nexata bajarapamonaē nayanijobena. Najumaitsi:

—¿Matsa baja ponē Josépijinē apo pexēnatoje? najai tsenae bajarapamonaē Jesús yabara.

Tsipaji saya bajarapamonaē jamatabējumai tsenae:

—Josépijinē raja pexēnato, jamatabējai tsenae.

<sup>23</sup> Nexata Jesús jamatabēcueneyapētane pacuenia sivanajamatabēxainatsi bajarapamonaē. Nexata Jesús jumaitsi bajarapamonaējavabelia:

—Xaniajanē cajena pacuenia pacatsipaebijitsiatsi. Pacuenia pajumaitsimē tsabiabi pajiviyojavabelia pajamatabēcueneaebiataneme, bajara pijinia pacuenia xanējavaberena ata panejumaitsimē tsane patanejamatabēcueneaebiataexaemē. Panejumaitsimē tsane mapacueniaje: “Pacuenia pacavēnēlivaisitanetsi Dioso pesaēta pini-jicue ne xanaejava Capernaum tomarata, bajara icatsia pitsicue exanare majotaje nevitsabitomarata,” panejamē tsane, jai Jesús judíovi penacaetuatabiabibota penaevijavabelia.

<sup>24</sup> Icatsia Jesús jumaitsi bajarapamonaējavabelia:

—Xaniajanē cajena pacuenia pacatsipaebijitsiatsi. Itsanē ata Diosojumepaebinēmi profetanē pijanacuapijivi apo jumecovēnētsitsi petsipaebilivaisi. Jamatabēcuene aebiataeyabiabatsi pijanacuapijivi. <sup>25</sup> Bajayata profetanēmibeje pinijicue exanae atabeje, pinijicue apo exanaebeje pijanacuata. Bajara pijinia pacuenia xanē ata pinijicue apo exanaenē tsane tavitsabitomarata. Bajayata, abaxē pamatacabiprofeta Elíaspijinē ponapona Israel nacuata, bajarapamatacabiprofeta, emarapae ata, ema apo jopae. Nexata acueyabi pavaibeje epatua ajibi ema. Nexata daxita nacuanējjava bitso janibo. Bajarapamatacabiprofeta janibovajēnaeya pamonajivi pevecuatēpaevanētsi ayaibitsaēto jinavanapa Israel nacuata. Bitso bejiobi tsavanapae. <sup>26</sup> Itsiata Elíaspijinē Dioso apo itorobitsi peyavenonaenexa bajarapamonaeyajuvēnēva. Elíaspijinē Dioso itorobatsi peponaenexa Sarepta tomarapijivijavabelia, Sarepta tomarata pamona pevecuatēpaevatsi Elíaspijinē peyavenonaenexa. Sareptatomara eca Sidón nacuata. <sup>27</sup> Bajayata, Elíaspijinē pevēnamuto, profeta Eliseopijinē ponapona Israel nacuata. Bajayajebi bitso peperabētsabanaevi, ayaibitsaēto picani jinavanapa Israel nacuata. Itsiata bajarapamatacabiprofeta Eliseopijinē caenē ata pijanacuapijinē, bajayajebi bitso peperabētsabanaeviyajuvēnēnē, apo jamatejemayaexanae. Caenē bajayajebi bitso peperabētsabanaenē Naamán, Siria nacuaverena pepatsinē, jamatejemayaexana, jai Jesús judíovi penacaetuatabiabibota penaevijavabelia.

<sup>28</sup> Nexata bajarapamonaē itsa jumetane bajarapacuenia Jesús pejumaitsijava, bitso Jesús baranaepanatsi bajarapamonaē. <sup>29</sup> Bajarapamonaē nonobapuna. Vaetabatsi Jesús. Caponaliatsi tomarajumabelia. Patsutoyenepanata eca Nazaret-

tomara, bajarapatsutojumabetsia Jesús caponayatsi pexuabinexatsireca picani bajarapatsuto itapajanitjavareca. <sup>30</sup>Itsiata baitsi jane Jesús bajarapamonae tuatua-jëta najetarucæ ata, pëtaenejevatsi vecuapona baja Capernaum tomarabelia. Nexata baja Jesús vecuapanepa bajarapamonae.

**Pacuenia pebi, dovathi peyajavaponaponænë,  
Jesús jamatejemayaexana yabara pelivaisi**

*(Mr 1.21-28)*

<sup>31</sup> Jesús pata Capernaum tomarata. Capernaum tomara eca Galilea nacuata. Nexata Capernaum tomarata Jesús jivi livaisi tsipaeba judíovi penacueraevetsimatacabita. <sup>32</sup>Itsa bajarapamonae jumetane palivaisi Jesús tsipaeba, jamatabëcuenenabenajaca. Tsipaji xaniavaetsia tsipaeba Dioso pitorobinëtsicuenia.

<sup>33</sup> Bajarajota judíovi penacaetuatabiabibota pebi, dovathi peyajavaponaponænë, naeca. Nexata bajaraponë Jesúsjavabelia vavajai tsaxuabi. Jumaitsi:

<sup>34</sup> —¡Jesús, Nazaret tomarapijinëmë, panevecuaponare baja! ¿Detsa xua pane-xanaejitsiamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso pexënatomë, pepo pexaniajamatabëcuenenëmë, jai dovathi peyajavaponaponænë Jesúsjavabelia.

<sup>35</sup> Jesús nexata jumeitaveta dovathi. Jumaitsi:

—¡Moyamëre! ¡Vecuapitsapare baja maponëje! jai Jesús.

Nexata dovathi pebi xuabatsi irata daxita bajarapamonae pitabarata. Dovathi baja pebi vecuapitsapatsi itsiata itsacuenene exanaenejevatsi. <sup>36</sup>Nexata daxitajivi bajarpacuenene itsa tane, bitso jamatabëcuenenabenajaca. Najumaitsi bajarapamonae:

—¿De meta pacuenia maponë caejëpatsi pijumeta pexanaenexa mapacueniaje? ¡Maponëje Jesús, beDioso pitorobinëtsitsica! ¡Itaveta dovathi pepitsapaenexa jivivecua! ¡Nexata baja dovathi pitsapa jivivecua! najai bajarapamonae.

<sup>37</sup> Nexata Jesús vënëlivaisitanetsi daxita bajarapanacuapijivi.

**Pacuenia Simón Pedro pijava pena Jesús  
tojamatejemayaexana yabara pelivaisi**

*(Mt 8.14-15; Mr 1.29-31)*

<sup>38</sup> Judíovi penacaetuatabiabibo pevecuapitsapaecujinae, Jesús joneya Simón Pedro pijaboyalía. Nexata bajarajota Jesús pevajënae, Simón pijava pena bitso romaebanucatsi. Nexata bajarajota itsamonae Jesús tsipaebarecëpatsi bajarapova peromaebanucaejavatsi. <sup>39</sup>Jesús nexata cujilia peromaebanucaevatsi. Vecuaitaveta peromaebijavatsi. Nexata bajarajota peromaebanucaevatsi domae baja vecuajibi tsanajetsitsireca. Bajarapova baja jamatejema. Nexata bajarapova Jesús bana pexaejavaneja toexanatsi.

**Pacuenia ayaibitsaëto jivi, piavitanevi,  
Jesús jamatejemayaexana yabara pelivaisi**

*(Mt 8.16-17; Mr 1.32-34)*

<sup>40</sup> Itsa baja ajena meravitsia, jivi piavitanevi, daxitaviriavitane pexainaevi, tocapatsi Jesúsjavaberena. Jesús nexata perabëjayatapona caejivi canacujitsia, piavitanevi. Bajarapacuenia Jesús jamatejemayaexana daxita piavitanevi. <sup>41</sup>Itsamonae

ayaibitsaëto, dovathi peyjavajinavanapaevi, Jesús vecuacapitsapapona. Nexata dovathi itsa pitsapa, vavajai tsabiabi Jesúsjavabelia.

—Xamë raja Dioso pexënatomë, jai tsabiabi.

Nexata Jesús jumeitavetabiaba dovathi. Apo tocopatabiabi pecuaicuajainexa pet-sipaebiyaniwa itsamonaejavabelia. Tsipaji dovathi xaniavaetsia yapëtanetsi Cristo athëbëvetsica Dioso pitorobijavatsi jivi pecapanepaenexa.

**Pacuenia Dioso pitorobilivaisi Jesús jivi  
tsipaeba Galilea nacuata yabara pelivaisi**

*(Mr 1.35-39)*

<sup>42</sup> Bajayacunua, ajena baja matabi tsarucapona, Jesús pitsapa tomaravecu. Pona pesaicaeyojavabelia. Nexata jivi pëjaitatsi. Yapënapatatsi itsajota Jesús eca. Asivatsi bajarapamona Jesús pevecuaponaeyaniwa itsajavabelia. <sup>43</sup> Nexata Jesús jumaiti bajarapamonaejavabelia:

—Itsatomaranëjava ata raja tsipaebijitsianë pexanialivaisi pacuenia Dioso evetsi-jitsia pijajivi mapanacuataje. Bajarapalivaisi tatsipaebineja jivi, Dioso baja cajena nitoroba, jai Jesús bajarapamonaejavabelia.

<sup>44</sup> Bajarapacuenia Jesús Judea nacujava livaisi jivi tsipaebanajetaruca judíovi penacatuatabibonëjava.

**Pacuenia dujuai bitso ayajavaxaneto juta  
peyamatajucaejavata yabara pelivaisi**

*(Mt 4.18-22; Mr 1.16-20)*

**5** Itsamatabi Jesús nuca Genesaret pucaxaneto itapata. Nexata jivi ayaibit-saëtoxaneto cënënaponatsi imoxoyo pejumetaenexatsi Jesús petsipaebilivaisi, Dioso pitorobilivaisi. <sup>2</sup> Nexata Jesús anijajerabeje taeruta bajarajota pucaitapata. Bajarapamobeje dujuai peyamatajucaevi Simónbana vecuanonobajunarëcëpa. Nexata bajarajota imoxoyo Simónbana quiatanubena dujuai peyamatajucaejava. <sup>3</sup> Nexata Jesús runareca jera ënëabereca, Simón pijajera ënëabereca. Jesús itoroba Simón jera peyatorotsinexatsilia tsiquirijavayo puca tuatujëyojavabelia. Jesús eca jer-aënëta. Nexata Jesús jera ënëjavaverena livaisi tsipaebeca bajarapajivi bitsaëtoxanetojavabelia. <sup>4</sup> Itsa baja Jesús copata jivi livaisi petsipaebijava, nexata jumaiti Simónjavabelia:

—Pavaeremelia jera piavajubuajavabelia. Pacoparemeca dujuai paneyamatajucaejava. Payamatajutsianame dujuai, jai Jesús Simónjavabelia.

<sup>5</sup> Nexata Simón jumaiti Jesúsjavabelia:

—Jesús, payamatajucajë rabaja picani meravijebi. Itsiata apo payamatajutsinë caenëyo ata. Itsiata pacuenia paneitorobame, pacopatsiarecajë dujuai patayamatajucaejava, jai Simón Jesúsjavabelia.

<sup>6</sup> Nexata copareca pitorobicueniatsi. Itsa jutsina dujuai peyamatajucaejava, ayajavaxaneto bitso dujuai yajutsina. Nexata dujuai peyamatajucaejava imoxo peyamaëucucucae. <sup>7</sup> Nexata itacovaebarena penajuayamatajucaevi peponaenexarena itsamota peyavenonaenexatsi. Bajarapamona nubenalia puca itapatalia. Nexata bajarapamona ponarena. Vënëta bajarapamobeje dujuai. Imoxo dujuai peyabubunae bajarapamobeje. <sup>8</sup> Nexata Simón Pedro itsa tane bajarapacuenia, pematabacabëta tonuca Jesús pitabarata. Jumaiti Jesúsjavabelia:

—Tajatuxanenë, nevecuanatixire. Tsipaji xanë pibisiacuene taexanaenë, jai Simón Jesúsjavabelia.

<sup>9</sup>Bajarapasamota peyavenonaenexatsi. Bajarapamonae nubenalia puca itapatalia. Nexata bajarapamonae ponarena. Vëncuenia Simón jumaitsi tsipaji penajuayamatajucaevi yajava bitso jamatabëcuenenabenajaca, bitso ayaijavaxaneto dujuai peyamatajutsixae. <sup>10</sup>Ponëbeje Simón yanatatsi, Santiagobeje Juanbeje. Bajaraponëbeje Zebedeo pexënatobeje. Bajaraponëbeje ata jamatabëcuenenabenajacabeje. Nexata Jesús jumaitsi Simónjavabelia:

—Pëtsa najunaviacame. Cacujarubianatsi jivi nejucaenexa. Nexata pacuenia dujuai jucabiabame, bajarapacuenia jivi jucaename Dioso pijajivinexa, jai Jesús Simónjavabelia.

<sup>11</sup>Nexata bajarapamonae robobocalia jerabeje tajetabojavabelia. Bajaraxuacujinae bajarapamonae pecajinavanapaejavaximi rajuta itsamonaejavabelia. Bajaraxuacujinae pënapona baja Jesús.

**Pacuenia Jesús jamatejemayaexana bajayajebi  
bitso peperabëtsabanaenë yabara pelivaisi**

*(Mt 8.1-4; Mr 1.40-45)*

<sup>12</sup>Jesús itsa ponapona tomarata, nexata bajarajota patajopa pebi, bajayajebi bitso peperabëtsabanaenë. Itsa bajaraponë tane Jesús, pematabacabëta irataeya bocajunua Jesús pitabarata. Vajëta pinijicuenia Jesúsjavabelia. Jumaitsi:

—Tajatuxanenë, cacaëjëpa raja tanejamatejemayaexanaenexamë mapavitanevecuaje. Itsa jitsipame, nejamatejemayaexanare mapavitanevecuaje, jai bitso peperabëtsabanaenë Jesúsjavabelia.

<sup>13</sup>Nexata Jesús pecobeta perabëjayalia bitso peperabëtsabanaenë. Jumaitsi bajaraponëjavabelia:

—Jājā, jitsipajë cajena. Jamatejemamë rabaja, jai Jesús peperabëtsabanaenëjavabelia.

Bajarapacuenia Jesús pejumaitsijavata peperabëtsabanaenëmi baja perabëxanepananajereca. <sup>14</sup>Nexata Jesús jumeitaveta bajayajebi bitso peperabëtsabanaenëmi petsipaebiyaniiva itsajiviyojavabelia ata pacuenia Jesús jamatejemayaexana bajaraponë. Jesús jumaitsi:

—Naitajëremelia jane sacerdotenëjavabelia, templobota penacuenebinëjavabelia. Nexata sacerdotenë cataena pecavecuajibijava baja niavitanejavami. Diosonexa rajuremelia ofrenda sacerdotenëjavabelia pecavecuajibixae niavitanejavami. Bajara tsipaji pacuenia bajayata vajasalinainëmi Moiséspijinë nacaitoroba. Nexata jivi yapëtaena pepacuene baja pecavecuajibijava niavitanejavami, jai picani Jesús bajayajebi bitso peperabëtsabanaenëmijavabelia jivi ayaiBITSaëto pevënëlivaisitaeyanivatsi.

<sup>15</sup>Itsiaata Jesús vënëlivaisitanetsi daxita bajarapanacuapijivi. Nexata Jesús jivi itsa vënëlivaistanetsi, ayaiBITSaëtoXaneto patapona Jesúsjavaberena penamuxunaevetsinexatsi petsipaebilivaisi. Bajarapamonae pata Jesús pejamatejemayaexanaenexanua piavitanejavavecu. <sup>16</sup>Itsiaata Jesús itsajavata jivivecu natixitabiaba pesaicaeyojavabelia. Bajarajota vajëtabiaba Diosojavabelia.

## Pacuenia Jesús jamatejemayaexana petabusipacuenabinëtsi yabara pelivaisi

(Mt 9.1-8; Mr 2.1-12)

<sup>17</sup> Itsamatacabi Jesús jivi livaisi tsipaeba. Bajarajota naena fariseovi. Naenanua judíovi pecujarubivi ata. Bajarapamonae pata Galilea nacuata penaetomaranëjavav-erena, Judea nacuata penaetomaranëjavaverena ata, Jerusalén tomaraverena ata. Nexata bajarapamatacabi Jesús Dioso pesaëta caëjëpaeyaexanatsi jivi pejamatejemayaexanaenexa piavitanejavavecu. <sup>18</sup> Nexata bajarajota Jesúsjavaberena pebijivi camayota yavëtaraparena petabusipacuenabinëtsi. Bajarapamonae picani bajaraponë boyalia yavëtarajonejitsialia peyabuatsinexa Jesús pitabarata. <sup>19</sup> Itsi-ata acuenebi boyalia pecajonejava. Tsipaji bitso jivi bajarapabo yavënëca. Nexata bajarapamonae petabusipacuenabinëtsi bojumabetsia cajunaya. Bomatatu javavetsica vojoexana. Nexata bajarapavojotuatsica petabusipacuenabinëtsi camayota yacopatsicatsi jivi tuatujëatsica Jesús pitabarayatsica. <sup>20</sup> Jesús jamatabëcuenyapë-tane pacuenia bajarapamonae sivanajamatabëxainatsi. “Nacatojamatejemayaex-anaenatsi cajena,” pesivajamatabëjaijavatsi Jesús jamatabëcuenyapëtane. Bajarax-uaata petabusipacuenabinëtsijavabelia Jesús jumaitsi mapacueniaje:

—Pibisiacuene rabaja nexanaeconimi cavecuajibiaexanatsi, jai Jesús bajaraponëjavabelia.

<sup>21</sup> Nexata judíovi pecujarubivi, fariseovinua, itsa jumetaeyena Jesús pejumaitsi-java bajarapacuenia, najamatabëxainena bëpënëa mapacueniaje:

—¿De meta maponëje? Maponëje Dioso apo pejitsipacuenia cuaicuajiai. Itsanë ata cajena apo caëjëpaetsi itsajivi pibisiacuene pexanaeconimi pevecuajibiaex-anaenexa. Caenë Dioso caëjëpatsi itsajivi pibisiacuene pexanaeconimi pevecuaj-ibiaexanaenexa, jamatabëjai tsenae bajarapamonae bëpënëa Jesús yabara.

<sup>22</sup> Nexata Jesús jamatabëcuenyapëtane bajarapamonae bëpënëa pesivanajamatabëxainenaejava bajarapacuenia. Nexata Jesús jumaitsi bajarapamonaejavabelia:

—Pëtsa bajarapacuenia panesivanajamatabëxainame. Tsipaji cajena xanë necaëjëpa jivi pibisiacuene pexanaeconimi tavecuajibiaexanaenexa. <sup>23</sup> Paxamë apo pacacaëjëpae ata itsajivi pibisiacuene pexanaeconimi panevecuajibiaexanaenexa, pacacaëjëpa picani saya jema panejumaitsinexa pejamatejemavijavabelia mapacueniaje: “Cavecuajibiaexanatsi rabaja pibisiacuene nexanaeconimi,” panejainexa. Tsipaji itsajivi ata apo yapëtae tsipae saya jema panejumaitsijava. Itsiata baitsi jane itsa pepacuene apo pacacaëjëpae panejamatejemayaexanaenexa petabusipacuenabinëtsi, nexata acuenebi panejumaitsinexa bajaraponëjavabelia mapacueniaje: “Nonotapunare. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacaëjëpaecuene panejamatejemayaexanaenexa bajaraponë, jai nexata Jesús bajarapamonaejavabelia.

<sup>24</sup> Icatsia Jesús jumaitsi bajarapamonaejavabelia:

—Xanë, Daxitajivi Pematapijinënë, mapanacuata necaëjëpa tavecuajibiaex-anaenexa itsajivi pibisiacuene pexanaeconimi ata pacuenia baja exanajë maponë-javabeliaje. Nexata patanecuenyapëtaenexamë tanecaëjëpaejava tavecuajibiaex-anaenexa itsajivi pibisiacuene pexanaeconimi ata, pataema pacuenia jamateje-mayaexanaejitsianë maponëje, jai Jesús bajarapamonaejavabelia.



Nexata icatsia Jesús jumaiti petabusipacuenebinëtsijavabelia:

—Xamë cajumaititsi. Nonotapunare. Nijacamayo pire. Nijaboyabelia baja ponare, jai Jesús.

<sup>25</sup> Nexata bajarapacuenia Jesús pejumaitisijavata, petabusipacuenebinëmitsi nonotabapuna baja daxitajivi pitabarata. Pebocaecamayo pita. Pona baja pijaboyabelia. Penajetarucæjavata namutua, Diosojavabelia jumai tsanajetarucæ: “Diosomë, pexaniacuenenetoexaname,” jai tsanajetarucæ bajaraponë. <sup>26</sup> Nexata daxita pamonaetane petabusipacuenabinëmitsi baja pejamatejemajava, pinijicuenia jamatabëcuenenabenajaca. Nexata bajarapamonaetajumaiti Diosojavabelia:

—Diosomë, pexaniacuenen bitso nexanenë, jai Diosojavabelia.

Daxitajivi ita bajaraponë pejamatejemajava, pejamatabëcueneta bëpënëa bitso junava. Nexata bajarapamonaetajumaiti:

—Ajena, mapamatacabitaje, tanetsi Dioso pinijicuenen pexanaejava, najai bajarapamonaetajumaiti.

### **Pacuenia Jesús pijajivitonënexa junata Levívënënë yabara pelivaisi**

*(Mt 9.9-13; Mr 2.13-17)*

<sup>27</sup> Jesús baja vecuapona pabota jamatejemayaexana petabusipacuenabinëtsi. Nexata Jesús penajetarucæjavata taeyeta Levívënënë. Bajaraponë pematamoyanijobinë impuestomatamo gobierno pejamatabëcuene. Pabota jivijavabelia matamoyanijobabiaba impuestomatamo, bajarapabota eca Leví. Nexata Jesús jumaiti Levíjavabelia:

—Leví, nepënaponare, jai Jesús.

<sup>28</sup> Jejai Leví. Nexata nonotapuna. Copata baja daxita pacuene bajarajota nacuenebabiaba. Pënapona Jesús.

<sup>29</sup> Bajaraxuacujinae Leví pijabota napata Jesús. Nexata Leví pinijifiesta toexana Jesús nexa. Tsipaji Leví jamatabëcuenenarëya Jesús pejunatsixaetsi pijajivitonënexa. Nexata Leví pijabota naena ayaibitsaëto jivijavabelia impuestomatamo pematamoyanijobivi gobierno pejamatabëcuene. Itsamonae ata Leví pijabota naena mesa muxuneneta. <sup>30</sup> Nexata fariseovi, judíovi pecujarubavinua, Leví pijabo jumapënevëlia penubenaevi, jamatabëcuenenavëxaniabiaya baracuaicuaijaiti Jesús pijajivijavabelia. Bajarapamonaetajumaiti:

—Jesús rabaja naneconita Diosojavabelia. Tsipaji gobierno pejamatabëcuene impuestomatamo pematamoyanijobabiabivijavata, pijamatabëcuenebejevijavatanua, naxaeyeca pexaejava, jai bajarapamonaetajumaiti jamatabëcuenenavëxaniabiaya Jesús pijajivijavabelia.

<sup>31</sup> Jesús ita jumetane fariseovi, judíovi pecujarubavinua, pebaracuaicuaijajivatsi, nexata Jesús jumaiti bajarapamonaetajavabelia mapacueniaje:

—Pevaëbinë raja apo vaëbi pejamatejemavi. Pevaëbinë raja piavitanevi vaëba.

<sup>32</sup> Bajara pijinia xanë ata itsinë. Apo sivapatajopaenë tajunatsinexa pamonaetajumaiti bajarapamonaetajumaiti pejamatabëcuene. Sivapatajopajë raja tajunatsinexa pijaneconi pexainaevi. Bajarapamonaetajumaiti pejamatabëcuene. Sivapatajopajë pejamatabëcuene pexanaejava, penajamatabëcuenepënyorotsinexa Diosojavabelia, jai Jesús bajarapamonaetajavabelia.

**Pacuenia Jesús yanijobatsi pamatacabibeje jivi vajëtaþona  
Diojojavelia pexaejava apo pexaeyabiabixae yabara pelivaisi**

(Mt 9.14-17; Mr 2.18-22)

<sup>33</sup> Fariseovi, judíovi pecujarubivinu, jumaitsi Jesúsjavavelia:

—Juan pijajivi, fariseovi pijajivinu, pexaejava apo xaeyabiabi pamatacabibeje Diojojavelia vajëcapona. ¿Detsa xuajitsia xamë nijajivi pexaejava xaeyabiaba Diojojavelia pevajëcaematacabianë ata? jai bajarapamona.

<sup>34</sup> Jesús nexata comparacióncuenia jumaitsi bajarapamonaejavelia:

—Pamona junatatsi penacasabifistajavelia penanabaninexa, apo atsobi pexaejava itsa abaxë yajavaecatsi pejananacasabinë. <sup>35</sup> Itsiata bailsi jane itsa pejananacasabinë tsimaxëpatsipatsi pijavajabitsaë pevecuacoponaenexatsi itsajavelia, nexata pecovëta bajarapamona apo xae tsipae pexaejava. Tsipaji bitso najamatabëxainaejitsipa. Bajara pijinia itsi tajajivi ata. Tayajavaponaponaepato abaxë apo atsobabiabi pexaejava pamatacabibeje Diojojavelia vajëtaþona. Itsiata pamatacabi xanë necaponaena bajarapamonaevectu, nexata jane baja bajaramatacabi pexaejava apo xae tsane bitso tanesivanajamatabëxainae, jai Jesús peyanijobivitsijavelia.

<sup>36</sup> Nexata bajarapamona perujujamatabëcuene baja penavecuacopatsinexa, Jesús livaisi tsipaeba comparacióncuenia, bajarapamona pejumecovënëtsinexa ëpejanalivaisi, Jesús petsipaebilivaisi. Bajarapamona anijajamatabëcuenebeje pexainaejaniva, perujujamatabëcuene baja penavecuacopabinexa, Jesús livaisi tsipaeba comparacióncuenia. Perujujamatabëcuene yabara Jesús jumaitsi bajarapamonaejavelia mapacueniaje:

—Itsajivi ata apo caucutsi pejananaxatatsijava pejanapana pecatsatarutsinexa perujunaxatatsiesetojavelia. Itsa caucutsipa pecatsatarutsinexa pejanapana perujunaxatatsiesetojavelia, nexata bijianaejitsipa pejananaxatatsijava. Apo itajitsipaenua tsipae pejanapana perucejava perujunaxatatsiesetojavelia. <sup>37</sup> Itsajivi ata pijinia apo epacae pejanavinoranë perujubocodoruanëjavavelia bajayajebi peyajebinexa. Pejanavinoranë itsa epacaejitsipa perujubocodoruanëjavavelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae xaniavaetsia. Tsipaji pejanavinoranë pejumalitsëxë abaxë xaina. Nexata itsa yatititibia tsipae, naxuabijitsipa vinoranëmi. <sup>38</sup> Bajaraxuata bepaca pejanavinoranë pejanabocodoruanëjavavelia. <sup>39</sup> Itsajivi perujuvinora piapaecujinae, apo jitsipae piapaenexa pejanavinora. Tsipaji jamatabëjumaitsi: “Perujuvinora bitso xanepana pejanavinora matatoxenetsia,” jamatabëjai, jai Jesús bajarapamonaejavelia comparacióncuenia. Bajarapacuenia Jesús jumaitsi comparacióncuenia tsipaji bajarapamona catsiteca perujujamatabëcuene. Nexata Jesús jitsipa bajarapamona pejumecovënëtsinexa ëpejanalivaisi, palivaisi Jesús tsipaeba.

**Pacuenia Jesús pijajivi namutua siricanajetarubena trigoxu  
judíovi penacueraevetsimatacabita yabara pelivaisi**

(Mt 12.1-8; Mr 2.23-28)

**6** Judíovi penacueraevetsimatacabita Jesús, pijajivi yajava, najetaruca namutua trigo pabianëjava. Nexata Jesús pijajivi pijanixae, trigoruanë siri-

canajetarubena. Xunacobenacaquiatanajetarubena. Xuxaeyabuatapona. <sup>2</sup>Nexata fariseoviyajuvënëvi jumaitsi Jesús pijajivijavabelia:

—Paxamë raja paexaname Dioso Moiséspijinëta penajumecopatsilivaisi vajanacaitavetsicuene. Apo nacaitavetsi ata trigoxu vajaxaeyaniva, itsiata ajena penacueraevetsimatacabixae, apo bepaexanaemë mapacueniaje, jai fariseovi Jesús pijajivijavabelia.

<sup>3</sup>Jesús nexata jumaitsi fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tspajivi bitso piajani. ¿Apo palebimë tspajivi Dioso pejumelivaisibaxuto paneyapëtaenexa pacuenia vajasalinainëmi Davidpijinë, pebarëponaponaevi yajava, exana pamatacabi bitso piajani? <sup>4</sup>Bajaraonë Davidpijinë joneya Dioso pijatemploboyalia. Nexata Dioso pijatemploboënëta, mesajumata bobena Diosonexa ofrendacuenia petojebipanbëanë. Bajarapapanbëanë itsajivi ata apo tocopatsitsi pexaenexa penaneconitsiyaniva Diosojavabelia. Èsacerdotevi picani pexaenexa tocopatatsi. Davidpijinë apo sacerdotenë ata, pijajivi barëxae ata bajarapapanbëanë, itsiata apo vënananeconitsi Diosojavabelia, jai Jesús fariseovijavabelia.

<sup>5</sup>Icatsia pematatsënëa Jesús jumaitsi fariseovijavabelia:

—Xanë, Daxitajivi Pematapijinënë, netoxanepana cajena tatsipaebinxae pacuene xanepana jivi pexanaenexa penacueraevetsimatacabita ata, jai Jesús.

### **Pacuenia Jesús jamatejemayaexana pebi pecobetsaquenaenë yabara pelivaisi**

*(Mt 12.9-14; Mr 3.1-6)*

<sup>6</sup>Itsamatacabi Jesús joneya judíovi penacaetuatabibiboyalia judíovi penacueraevetsimatacabita. Nexata bajarajota Jesús jivi livaisi tsipaeba. Bajarajota pebi pecujanenia pecobetsaquenaenë, naeca. <sup>7</sup>Nexata Jesús naitaxutocaevetenatsi judíovi pecujarubivi, fariseovinua, petaenexatsi Jesús pejamatejemayaexanaejava pecobetsaquenaenë judíovi penacueraevetsimatacabita. Nexata Jesús pecobetsaquenaenë itsa jamatejemayaexana penacueraevetsimatacabita, “Jesús raja pibisiacuene exana,” pejainexa bajarapamonae. <sup>8</sup>Nexata Jesús yapëtane pacuenia bajarapamonae sivanajamatabëxainatsi. Nexata Jesús jumaitsi pecobetsaquenaenëjavabelia:

—Nonotapunare. Nucare majotaje mapamonae pitabarataje, jai Jesús.

Nexata pecobetsaquenaenë nonotapuna. Nuca bajarapamonae pitabarata. <sup>9</sup>Nexata Jesús jumaitsi penaitaxutocaevetenaevitsijavabelia:

—Penacueraevetsimatacabita ata xanepana vajaexanaenexa pexaniacuene. Xanepana vajajamatejemayaexanaenexa piavitanevi, jai Jesús penaitaxutocaevetenaevitsijavabelia.

<sup>10</sup>Jesús matatoyorotsia naëcoba daxita pamonaenë bajarajota. Jesús jumaitsi pecobetsaquenaenëjavabelia bajarapamonae pitabënejeva:

—Namaxërovire, jai Jesús.

Nexata baja pecobetsaquenaenë namaxërovita. Bajarajota cobexanepananajereca baja. Pecobetsaquenaenëjavami ajibi. <sup>11</sup>Nexata judíovi pecujarubivi, fariseovinua, itsa tane Jesús pecobexanepanaejaexanaejava pecobetsaquenaenë, bitso anaepana. Nexata jane baja najumejaita pacuenia Jesús beyaxuabijitsiatsi.

**Pacuenia Jesús pijajivi ayaibitsaëtoxfanetoyajuvënëvi itapeta  
saya doce ponëbeje apóstolevinexa yabara pelivaisi**

*(Mt 10.1-4; Mr 3.13-19)*

<sup>12</sup> Jesús pijajivi ayaibitsaëtoxfanetoyajuvënëvi, doce saya ponëbeje, itapeta apóstolevinexa. Jesús pitapetsivajënaeya apóstolevinexa, junaya petsutojumabetsia pevajëtsinexa Diosojavabelia. Nexata Jesús meravijebi bajarapatsutojumatatsia vajëtapona Diosojavabelia. <sup>13</sup> Bajayacunua, ajena baja matakabi tsarucaponae, Jesús junata daxita pijajivibitsaëtoxfaneto bajaraponëjavabelia. Nexata bajarajota itapeta pijajivibitsaëtoxfanetoyajuvënëvi, doce saya ponëbeje. Bajarapamonae Jesús vënëruuba apóstolevi. <sup>14</sup> Pamonae Jesús itapeta apóstolevinexa mapevënëanëje. Copiaya ponë, pevënë Simón. Bajaraponë Jesús vënëruuba itsavënë, Pedro. Itsanë Andrés, Simón Pedro jane baja pejuyapijinë. Itsanë Santiago. Itsanë Juan. Itsanë Felipe. Itsanë Bartolomé. <sup>15</sup> Itsanë Mateo. Itsanë Tomás. Itsanë Santiago, Alfeo pexënato. Itsanë Simón, celotenë. <sup>16</sup> Itsanë Judas, Santiago pejuyapijinë. Itsanë Judas Iscariote. Bajaraponë bexëjavabelia Jesús canajetsijitsiatsi pijavajabitsaë pecobeyabelia pebeyaxuabinexatsi.

**Pacuenia Jesús jivi ayaibitsaëtoxfaneto livaisi tsipaeba yabara pelivaisi**

*(Mt 4.23-25)*

<sup>17</sup> Jesús baja, pijajivi ayaibitsaëtoxfaneto yajava, runaica petsutojumavetsica. Nexata epatua petsutoyenepanajavata, itsajota ira namatajëpa, Jesús yajavanuca pijajivi ayaibitsaëtoxfaneto. Bajarajota nexata jivi nacaetuata ayaibitsaëtoxfaneto. Bajarapamonae Judea nacuapijivi, itsamonae Jerusalén tomarapijivi, itsamonae Tiro tomarapijivi, itsamonae Sidón tomarapijivi. Tiro tomarabeje Sidón tomarabeje, manuameneitapata ecabeje. Daxita bajarapatomaranëpijivi nacaetuata pejumetaenexa Jesús petsipaebilivaisi. Bajarapamonae patanua Jesús pejamatejemayaexanaenexa piavitanejavavecua. <sup>18</sup> Bajarapamonaeyajuvënëvi itsajamatabëcuene tsabiabi dovathi pejamatabëcueneta. Bajarapamonaenua Jesús jamatejemayaexana. <sup>19</sup> Daxita pamonae bajarajota nacaetuata, Jesús picani jamatabëjayabatsi. Tsipaji Jesús daxitajivi piavitanejavavecua jamatejemayaexanapona pecaëjëpaejamatabëcuenetatsi.

**Pacuenia Jesús pijajivi tsipaeba  
Jesús pijajivi pejamatabëcuenebarëyajavanexa, apo  
pejamatabëcuenebarëyajavanexanua, yabara pelivaisi**

*(Mt 5.1-12)*

<sup>20</sup> Jesús pijajivi naëcota asaëya. Jumaitsi bajarapamonaeyavabelia:

—Panajamatabëcuenecopabame baja Diosojavabelia paneponaenexa Dioso pitatomarabetsia. Bajaraxuata paxamë bepanejamatabëcuenejobivimi panijaneconi yabara, aeconoxae baja pajamatabëcuenebarëyamë Diosojavabelia.

<sup>21</sup> Pajitsipame Dioso pijacuene. Pajamatabëcuenebarëyamë baja. Tsipaji Dioso athëbëtatsia pacarajutsiana daxitacuene xua panamatavenoname.

'Paneyanuevimi pibisiacuene paneexanaeneconi yabara, pacavecuajibiaexana baja bajarapaneconi. Bajaraxuata itsamatakabi pajamatabëcuenebarëyamë tsane.

<sup>22</sup> Xanë, Daxitajivi Pematapijinënë, patajajivixaemë, itsa pacaitoya tsane jivi, itsiata pasivajamatabëcuenebarëyamë tsane. Bajarapamonae pacanavecuaitavetsi ata tsane, itsiata pasivajamatabëcuenebarëyamë tsane. Pibisiacuena pacabijatae ata tsane, pibisiacuena pacabaracuaicuaijai ata tsane, itsiata pasivajamatabëcuenebarëyamë tsane. <sup>23</sup> Bajarapacuena pacaexanae ata tsane, itsiata pasivajamatabëcuenebarëyamë tsane. Tsipaji raja Dioso athëbëtatsia pacarajutsiana bitso pexaniacuene jivi papecaitojamatabëcuene. Pamonae pacaitoya tsane, bajarapamonae pijasalinaivimi bajayata itoya Diosojumepaebivimi profetavi. Nexata bajarapamonae pijasalinaivimi bajayata bejiobiaexanapona Diosojumepaebivimi profetavi. Bajarapamonae aeconoxae ata pijasalinaivimi cuenejëpavanapa. Bajaraxuata paxamë ata icatsia bajarapamonae pacaitoya tsane pijasalinaivimi pecuenejëpavanapaexae.

<sup>24</sup> Daxitacuene mapanacuata panexinaevi, Dioso bitso ayaicuena pacabejiobiaexanaena. Tsipaji pacabarëyamë tsavanapae ëpanexinaejava mapanacuataje.

<sup>25</sup> Bitso bepajamatabëcuenejiobimë tsane daxitacuene mapanacuata panenatojitsipaecuene panexinaevi. Pasivajamatabëcuenebarëyamë picani tsavanapae panexinaejava. Itsiata baitsi jane itsamatacabi itsa patëpaename, panetëpaecujinae panajamatabëxainaename ayaicuena.

’Bepajamatabëcuenejiobimë tsane panejëjëjajaitsabiabivi sivabarëyaya mapanacuapijicueneje. Paneasaëtsavanapaeepato abaxë mapanacuataje panesivajamatabëcuenebarëya tsabiabixae bajarapacuene, panetëpaecujinae bitso payanue-name pibisiacuene paneexanaeconi.

<sup>26</sup> Mapanacuapijivi pexaniacuena pacabaracuaicuaijai tsabiabi saicayacuena Dioso pejumelivaisivecua panetsipaebabiabixae. Itsiata baitsi jane pamatacabi Dioso pacananeconitsiaexanaena, bitso bepajamatabëcuenejiobimë tsane. Tsipaji pacuenejëpame bajayata pamonaemi jinavanapa. Bajarapamonaemi bajayata jivi tsipaebabiaba saicayacuena Dioso pejumelivaisivecua. Nexata bajarapamonaemi pexaniacuena baracuaicuaijaitsi tsabiabi mapanacuapijivije, jai Jesús pijajivi ayaibitsaëtoxanetojavabelia.

**Pacuena Jesús pijajivi muxujioba piasivanexa pitoyavi atatsi yabara pelivaisi**

*(Mt 5.38-48; 7.12)*

<sup>27</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pacatsipaebijitsiatsi icatsia patanenamuxunaevetsivimë. Pasivamëre papecaitojavi ata. Pexaniacuene patoexanare pamonaie pacaitoya. <sup>28</sup> Payavenonare pamonaie pacabijatane pibisiacuena. Pamonae pacabaracuaicuaijai pibisiacuena, patovajëre Diosojavabelia peyavenonaenexatsi. <sup>29</sup> Itsajivi itsa pacaitabarapacabi axuaba anaeya, nexata icatsia itsanenia ata patonaitabaracaevere papecaitarapacabi axuabinexa. Itsajivi itsa pacayacajërëta panijacamisajumavelia panenaxatatsijava, nexata patocopare panijacamisata papeayacajërëtsinexa. <sup>30</sup> Pajivi itsacuenejavayo amoneya pacavajëta, parajure. Itsajivi itsa pacayacajërëta itsacuenejavayo, pëtsa payanijobame papecatocanaviatsinexa. <sup>31</sup> Xua pexaniacuene, paxamë pajitsipame itsamonae papecatocanaviatsinexa, copiaya paxamë bajarapapexaniacuene patoexanare bajarapamonaejavabelia, jai Jesús pijajivi ayaibitsaëtoxanetojavabelia.

<sup>32</sup> Icatsia Jesús jumaitsi pijajivijavabelia:

—Itsa pasivamë tsipae epäpecaasivavi, nexata pexaniacuene apo paxainaemë tsipae Diosojavabelia. Tsipaji piamatabëcuenebejevi ata, pamonaе asivatsi, banamataenetsianasiva. <sup>33</sup> Pexaniacuene itsa patoexanaejitsipame pexaniacuene epäpecatoexanaevijavabelia, nexata apo paxainaemë tsipae pexaniacuene Diosojavabelia. Tsipaji piamatabëcuenebejevi ata, pexaniacuene batoexana penajamatabëcuenejëpaevijavabelia. <sup>34</sup> Itsa patsicopatsipame epänejamatabëcuene yapëtaevijavabelia baja, papecatocanaviatsinexa pacuenia patsicopatame, nexata apo paxainaemë tsipae pexaniacuene Diosojavabelia. Tsipaji piamatabëcuenebejevi ata, batsicopata penajamatabëcuenejëpaevijavabelia, pamonaе jamatabëcueneypätane baja petocanaviatsinexatsi. <sup>35</sup> Nexata pasivamëre panijavajabitsaë ata. Bajarapamonaеjavabelia pexaniacuene patoexanare. Bajarapamonaе patsicopare panajamatabëxainaenejevamë papecatocanaviatsinexa panetsicopatsicuenia. Bajarapacuenia bitso paxainaename pexaniacuene Diosojavabelia papecarajutsinexa athëbëtatsia. Bajarapacuenia itsa paexanavanapaename, Dioso, athëbëtatsia peecaenë, pexicuenia pacaexanaena. Tsipaji Dioso pitaxutotsoniataenë piamatabëcuenebejevi ata. Itsamonaе Dioso yavenonaе atatsi, itsiata apo canaëjëtisi Dioso peyavenonaеjavatsi. Bajarapamonaе apo canaëjëtisi ata Dioso peyavenonaеjavatsi, itsiata tsiteca Dioso itaxutotsoniataeyabiaba. <sup>36</sup> Pacuenia Dioso daxitajivi itaxutotsoniataeyabiaba, bajarapacuenia paxamë ata itsamonaе ata paitaxutotsoniataename, jai Jesús pijajivi ayaibitsaëtoxanetojavabelia.

**Pacuenia Jesús pijajivi muxujioba pitaxutotsoniataenexa itsamonaе ata, pacuenia bajarapamonaе ata Dioso itaxutotsoniatanetsi, yabara pelivaisi**

(Mt 7.1-5)

<sup>37</sup> Icatsia Jesús jumaitsi pijajivi ayaibitsaëtoxanetojavabelia petsutoyenepanajavata:

—Pëtsa panataneme pepacuene bepaneaneconijibivi. Nexata itsamonaе pibisiacuene pexanaеjava xaniavaetsia payapëtaenejevamë, pëtsa pabaracuaicuaijamë mapacueniaje: “Bajarapitsipibisiacuene pexanaevi, Dioso bitso ayaicuenia naneconitsiaexanaenatsi,” pajamë pëtsa. Nexata paxamë ata juya bajarapacuenia itsamonaе apo pacabaracuaicuaijai tsane pibisiacuene paneexanaеjava yabara. Itsamonaе pibisiacuene pacaexanae ata, pajamatabëcuenecaevare. Pabaramatabëcueneexanepanarenuu. Nexata pijinia Dioso pitabarata pibisiacuene paneexanaеjava Dioso jamatabëcuenecaeviana. Pacabarajamatabëcueneexanepananaanua. <sup>38</sup> Parajutaponare itsamonaеjavabelia penamatavenonaеjavaxi. Nexata juya paxamë Dioso pacarajutaponaena pacuenia jitsipa papecarajutsinexa. Pacarajutsiana xuavajëto itsamonaе parajutame matatoxenetsia, jai Jesús daxitajivijavabelia petsutoyenepanajavata.

<sup>39</sup> Jesús icatsia comparacióncuenia tsipaeba bajarapamonaеjavabelia mapalivaisije:

—Ponë bitso itaxutotsëcëna, apo caëjëpaetsi pematacaponaenexa itsanë, ponë pijinia bitso itaxutotsëcëna. Itsa matacaponaеjitsipa, nexata najuajopaejitsiparecabeje bajaraponëbeje caemëthëxanetojavareca. <sup>40</sup> Itsajivi pijinia itsa nacujaruba, yapëtae ata baja penacujarubijava, apo jamatabëcueneamatatoxenetsi pecujarubinëtsi.

Itsa baja penacujarubijivi vereta xaniavaetsia penacujarubijava, nexata saya najamatabëcuenejêpabeje pecujarubinëtsibeje, jai Jesús pijajivijavabelia.

<sup>41</sup> Jesús pijajiviyajuvënëvi pepacue ne bepianeconijibivi natane. Nexata itsa curutane itsamonae itsacue nejavayo pexanaejava, jumai tsabiabi: “Mapitsicue ne pexanaevi Dioso bitso ayaicuenia naneconitsiaexanaenatsi,” jai tsabiabi. Nexata bajara pacuenia pejumaitsabiabixae, Jesús pijajivi piurabinexa jumaitsi mapacueniaje:

—Pëtsa paxamë pepacue ne bepianeconijibivi nataeya pamuxujiobame itsajivi pijaneconi yabara. Tsi paji raja apo payapëtaemë paxamë ata pijinia paneconivajëto paxainame. <sup>42</sup> Nexata paxamë ata ayaineconixaneto itsa paxainame, nexata itsanëjavabelia apo bepajumaitsimë: “Tajabananë, papibisiacue ne exaname, compare,” apo bepajamë. Yamaxëitojorobiaya saya bepexaniajamatabëcuenevi nataeya pacuaicuaijamë tsabiabi. Itsamonae pijaneconi yabara pabaracuaicuaijamë tsabiabi. Itsiata pijinia paxamë ata paneconivajëto paxainame, apo payapëtaemë. Paxamë copiaya pacopabare pibisiacue ne paneexanabiabijava. Bajara jane xuacujinae paitavetsianame itsamonae ata pibisiacue ne pexanaejava penavecuacopatsinexa, jai Jesús pijajivijavabelia.

### **Pacuenia peubinaenë itsa nacuaita, nayapëtane pavirianaecue ne yabara pelivaisi**

*(Mt 7.17-20; 12.34-35)*

<sup>43</sup> Icatsia Jesús jumaitsi pijajivi ayai bitsaëto xanetojavabelia petsutoyenepanajavata:

—Pexaniavirianaenë itsa ubatsi, nacuaita pijinia pexaniacuai. Apo nacuaitsi pibisiacuai. Ponae pijinia pibisiana, apo nacuaitsi pexaniacuai. <sup>44</sup> Caeviriana e canacujitsia yapëtanetsi itsa nacuaita. Higovëne cuaito apo paucutsimë cucunanaeta. Uvaru pijinia apo paucutsimë saya pejuviënëbotota. <sup>45</sup> Bajara pijinia itsi jivi ata. Pexaniajamatabëcuene në pexaniacue ne yabara cuaicuaijai. Tsi paji pexaniajamatabëcuene xaina pejamatabëthëtota. Pibisijamatabëcuene në pijinia pibisiacue ne yabara cuaicuaijai. Tsi paji pibisijamatabëcuene najamatabëxaina pejamatabëthëtota. Nexata pacue ne yabara pebi pecuaibovojotota cuaicuaijai, bajara pacue ne pitsapa pejamatabëthëttojavavetsina, jai Jesús pijajivijavabelia.

### **Pacuenia Jesús livaisi tsipaeba anijanëbeje bo pexanaenëbeje pelivaisicuenia yabara pelivaisi**

*(Mt 7.24-27)*

<sup>46</sup> Icatsia Jesús jumaitsi pijajivi ayai bitsaëto xanetojavabelia petsutoyenepanajavata:

—¿Detsa xuajitsia: “Tajatuxanenë,” panejamë tsabiabi ata, itsiata apo panejumecovënëtsimë patacaitorobicuenia? <sup>47-48</sup> Pajivi xanëjavaberena pata tanenamuxunaevetsinexa, tanejumecovënëtsinexanua, bajarapajivi apo nacueratsi tsane. Bajara pajivi piatajairata bo bepexanaenë tsane. Bajarapajivi yabara pacatsipaebianatsi. Bo pexanaenënexa, peyapëtaexae itsajota pijabo exanae jitsia pebubutsijavanexa, nexata naesituru atajaya xaniavaetsia mëthëca piatajairata. Nexata pijabo toyabubutsi ata, petojopaeyanivatsi. Bajaraxuacujinae bo baja vereteta. Itsa baja mene avajubutsica, pijabo toyabubutatsi. Mera asaëtsica bojavabetsica. Itsiata pijabo apo tonanequetsitsi. Tsi paji naesituru xaniavaetsia mëthëca piatajairata. Nexata bajara-

ponë apo nacueratsi bo pexanaejava. <sup>49</sup> Pajivi nejumetae ata tsane tatsipaebilivaisi, itsiata itsa apo nejumecovënëtsi tsane tatsipaebilivaisi, nacueratsiana. Bajara-pajivi tajetabota bo bepexanaenë tsane. Ponë tajetabota pijabo exaneta, yapëtae ata emarapae pecopiapatsijavanexa, bajaraponë nacuerata bo pexanaejava. Tsipaji bo peveretetsicujinae, mene avajubuatsica. Nexata pijabo toyabubutatsi. Bo nexata jopaiça. Pepacuene baja nexata abeje, jai Jesús pijajivijavabelia.

**Pacuenia vajabitsaë pijacapítan pijabota petonacuenebaponaponaenëtsi,  
Jesús tojamatejemayaexana yabara pelivaisi**

(Mt 8.5-13)

**7** Jesús baja itsa najumevereta pijajivi ayaibitsaëtoxaneto livaisi petsipaebilivajava petsutoyenepanajavata, pona baja Jesús Capernaum tomarabelia. <sup>2</sup> Capernaum tomarata ponapona Romano nacuapijinë, vajabitsaë pijacapítan. Bajara-ponë pijajivitonë, bitso piasivanë, toavitanetsi. Totëpaejitsiatsi baja. <sup>3</sup> Bajara-ponë capitán vënëlivaisitanetsi Jesús pejamatejemayaexanaponaejava piavitanevi. Nexata capitán jumaitsi judíovi pijaancianovijavabelia:

—Panetojunaremelia Jesús. Pabarëpatsiaremena tajaboyaberena tanetojamatejemayaexanaenexa tajajivitonë, jai capitán judíovi pijaancianovijavabelia.

<sup>4</sup> Nexata bajarapamonae pona Jesúsjavabelia. Itsa pata Jesúsjavabelia, pinijicuenia junata. Jumaitsi Jesúsjavabelia:

—Bajara-ponë capitán bitso pexaniajamatabëcuenenë. Nexata tojamatejemayaexanaenena pijajivitonë. <sup>5</sup> Tsipaji raja bajaraponë nacaasiva vaxaitsi judíovitsi. Mata-mota cajena pijapalatata vajanacatoexanetsinexa vajanacaetuatabibonexa, jai judíovi pijaancianovi Jesúsjavabelia.

<sup>6</sup> Nexata Jesús nalia bajarapamonae pepëta. Itsa baja imoxoyotanajetarubena capitán pijabo, nexata capitán icatsia peyapëtaevitsi itoroba Jesús pemataenenaenexatsi. Capitán peyapëtaevitsi itoroba Jesúsjavabelia pejumaitsinexa mapacueniaje:

—Petuxanenë, pëtsa paremena tajaboyaberena. Apo caquenetsiataejitsipaetsi. Beveliajamatabëcuenenë raja saya xanë xamëvecua. Nexata apo xanepanae tsi-pae nenajonejava tajaboyaberena. <sup>7</sup> Apo nejamatabëcuenecaëjëpaenua taponaejava xamëjavabelia ata. Saya bajaraverena itorobare ënijume. Nexata tajajivitonë neto-jamatejema tsane. <sup>8</sup> Xanë ata xainajë taneitorobabiabivi taneitorobicuenia tajumecovënëtabiabinexa. Xanë ata juya xainajë vajabitsaë, tajajivi, taitorobicuenia tane-toexanabiabinexa. Nexata itsa itorobajë caenë vajabitsaënë peponaenexa, bajaraponë ponabiaba. Itsa junarenajë itsanë vajabitsaënë pepatsinexa maberena, bajaraponë patabiabarena. Itsa itorobajë tajajivitonë tanetoexanaenexa itsacuenejavayo, nexata netoexanabiaba. Bajara pijinia pacuenia xamë ata nexanaenexa, ca-caëjëpa. Nexata saya bajaraverena ënijume itorobare saya ënijumeta tajajivitonë tanetojamatejemayaexanaenexamë, jai capitán mapacueniaje petonajumeitorobijume Jesúsjavabelia.

<sup>9</sup> Jesús itsa jumetane bajarapacuenia capitán petonajumeitorobijumetsi, jamatabëcuenenabenajaca capitán petonajumeitorobijumetsi yabara. Nexata napënëyorotaxuaba Jesús. Jumaitsi pepënanajetarubenaevitsijavabelia:

—Xaniajanë pacuenia pacatsipaebijitsiatsi. Caeto ata cajena Israel nacuapijinë apo caxitarabaxuabinë xanëjavaberena bitso tanesivanajamatabëcuenecopatsinë



pacuenia mapacapitán nesivajamatabëcuenecopatsiaya jumaitsije, jai Jesús capitán yabara. <sup>10</sup>Nexata baja pamona capitán itorobalia Jesús petsipaebinxatsi capitán penajumeitorobilivaisi, naviabarena baja capitán pijaboyaberena. Itsa baja pata boyaberena, caxitaraba baja capitán pijajivitonë pejamatejemanë.

**Pacuenia pamona pevecuatëpaevatsi pexënato Jesús  
toasaëyaexana, petëpaenëmi, yabara pelivaisi**

<sup>11</sup>Jesús pona Naín tomarabelia. Nexata yanatatsi pijajivi, itsamonae yajava, ayabitsaëtoخانeto. <sup>12</sup>Itsa baja Jesús patanajetaruca Naín tomara imoxoyojavata, nexata camataenenatsi petëpaenë pecanajetarubenaevi. Bajarapamona petëpaenë tomaravelia capitsapa pemëthëtsinexa tomarapënëyabelia. Ponë tëpa, bajaraponëmi pamona pevecuatëpaevatsi pexënato, pepo cainë. Nexata pamona pevecuatëpaevatsi pexënato, petëpaenë, itsa caponaliatsi pemëthëtsinexatsi, tomaraverena jivi ayabitsaëtoخانeto pënaponatsi. <sup>13</sup>Nexata Jesús itsa tane bajarapova, tsitabejiobitsi bitso. Nexata Jesús jumaitsi bajarapovajavabelia:

—Matanueyabijitsipame, jai Jesús.

<sup>14</sup>Nexata Jesús cujitalabalia petëpaenë peyacajoniacanajetarubenaevi. Pecobeta jayata cajoni. Nexata petëpaenë peyacajoniacanajetarubenaevi, nubenaothopa. Nexata Jesús jumaitsi petëpaenëjavabelia:

—Pevëjëato, xanë raja cajumaitsitsi. Namatacore, jai Jesús.

<sup>15</sup>Nexata baja petëpaenëmi namatacota. Cuaicuajjai. Jesús baja tocanaviata pi-asaenë penajavabelia. <sup>16</sup>Nexata daxita petaevitsi jamatabëcuenenabenajaca. Najumaitsi bajarapamona:

—Dioso bitso ayaijamatabëcuenenë. Pinijijamatabëcuene pexainaenë, profeta, nacatsitanajamatabëcueneitajëta. Dioso pinijicuene pexanaejava ata nacatsitajëta vajataenexa, najai bajarapamona Jesús yabara.

<sup>17</sup>Daxita Judea nacuapijivi, imoxoyo nacuanëjava ata pejinavanapaevi, Jesús vënëlivaisitanetsi xua exana.

**Pacuenia Juan jivibautisabinë itoroba  
pijajivitonëbeje Jesúsjavabelia yabara pelivaisi**

*(Mt 11.2-19)*

<sup>18</sup>Juan jivibautisabinë naneconitsia ponapona penaneconitsivi pejebabiabibota. Nexata pijajivi tsipaebatsi daxita Jesús pexanaponaejava yabara. Nexata Juan junata anijanëbeje pijajivitonëbeje pitorobinexa Jesúsjavabelia. <sup>19</sup>Juan pitorobivajënae pijajivitonëbeje, jumaitsi bajaraponëbejejavabelia:

—Pajumaitsimëbeje tsane Jesúsjavabelia: “¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë athëbëvetsica Dioso pitorobinexatsicatsi jivi pecapanepaenexa?” jai raja Juan,” pajamëbeje tsane Jesúsjavabelia, jai Juan pijajivitonëbejejavabelia.

<sup>20</sup>Nexata Juan pijajivitonëbeje itsa patabeje Jesúsjavabelia, Juan pijajivitonëbeje jumaitsibeje Jesúsjavabelia:

—Juan raja jivibautisabinë paneitorobabeje patacayanijobinexabeje. “¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica

daxitajivi necapanepaenexa? Itsa apo Cristomë, ¿abaxë tsaja pacopiaevetavanapae-najë itsanë pepatsijavanexatsica?” jai raja Juan, jai-beje jane baja Jesúsjavabelia.

<sup>21</sup> Nexata bajaraponëbeje pitabëta Jesús jamatejemayaexanapona ayaibitsaëtox-aneto piavitanevi. Dovathi peyajavajinavanapaevi ata vecuacapitsapa dovathi. Itaxutoxanepanaeyaexanana pamona bitso itaxutotsëcëna. <sup>22</sup> Nexata Jesús jumaitsi Juan pijajivitonëbejejavabelia:

—Paponarebeje baja. Patsipaebianamebeje Juanjavabelia pacuenia baja patane-mebeje taexanaponaejava. Patsipaebianamebejenua pacuenia baja pajumetaneme-beje tatsipaebilivaisi jivijavabelia. Apo petaevimi ata itaxutoxaniavaetaponajë xaniavaetsia petaenexa. Petabusipacuenabivitsinua daxita jinavanapaeyaexanaponajë. Bajayajebi bitso peperabëtsabanaevinua vecuaajibiaexanaponajë baja. Bitso pemuxusipanaevinua jumetaeyaexanaponajë baja xaniavaetsia pejumetaenexa. Petëpaevimi ata icatsia asaëyaexanaponajë. Pexanialivaisinua pecapanepaelivaisinexatsi pibisiacuene pexanaeconimivecua, tsipaebaponajë bepejiobivijavabelia. Daxita bajaraxua taexanaponaejava patanetaejavamëbeje, patsipaebianame-beje Juanjavabelia. <sup>23</sup> Pajumaitsimëbejenua tsane Juanjavabelia: “Jesús raja jumaitsi: ‘Jamatabëcuenenëbarëya pajivi tsiteca nejumecovënëta xanë Dioso pexënatocuenenë,’ jai raja Jesús,” pajamëbeje tsane Juanjavabelia, jai Jesús Juan pijajivitonëbejejavabelia.

<sup>24</sup> Itsa baja Juan pijajivitonëbeje naviatabeje, nexata bajaraponëbeje pecovëta Jesús taxuxuaba jivijavabelia petsipaebijava Juan pelivaisi. Jesús jumaitsi jivijavabelia:

—Itsa paponame petusato nacuyabelia pamatacabi Juan ponapona petusato nacuata, ¿detsa pitsicuene pajamatabënaponaremelia panetaenexa bajarajotalia? ¿Paponaremelia tsaja saya panetaenexa musuli penajëabijava jovibota? <sup>25</sup> Itsa apo paponamëlia panetaenexa musuli penajëabijava jovibota, ¿detsa nexata pitsicuene panetaenexa paponaremelia? ¿Paponaremelia tsaja saya panetaenexa naitabëtsiaya pexaniajava penaxatatsinë? Paxamë rabaja payapëtaneme mapacuneje. Pamona naitabëtsiaya pexaniajava naxatabiaba, pamona ata nabanebiaba pexaniana-banijavanë, bajarapamona jinavanapa nacuanë pevetsivi pijabonëjava. <sup>26</sup> ¿Detsa nexata xua pajamatabënaponaremelia panetaenexa petusato nacuyabelia? Paponaremelia raja panetaenexa Diosojumepaebinë profetanë. Xaniajanë pacuenia pacatsipaebijitsiatsi. Juan itsa pataneme, pepacune jane baja pepo profetanë, Diosojumepaebinë, pataneme. Nexata saya bevelia profetanë apo pataemë. <sup>27</sup> Juan pexanaejavanexa, bajayata tajëvelia Dioso pejumelivaisibaxutota vajunupaeba. Dioso tanejumaitsijava ata xanëjavaberena, Dioso pejumelivaisibaxutota jumaitsi mapacueniaje:

Itorobianajë nevajënaeyabelia tanejumelivaisipaebinënexa jivi pecatsivajënae najamatabëcuenexaniavaetsinexa, jai bajayata Dioso pejumelivaisibaxutota athëbëvetsica tapatsivajënaeyatsica Juan tanelivaisi paebanajetarucaejavanexa yabara.

<sup>28</sup> Juan ayaijamatabëcuenenë mapanacuataje. Nexata bajayata Juan pevajënaeya paprofetavimi jinavanapa, itsanë ata Juan apo jamatabëcuenematatoxenetsi. Itsiata baitsi jane pajivi beveliajamatabëcuenëjivi ata, itsa najamatabëcöpata baja Diosojavabelia pijatuxanenë pexanaenexa, bajarapajivi juya Dioso ayai-

jamatabëcuenejivi exanaenatsi Juan matatoxenetsia, jai Jesús Juan jivibautisabinë yabara.

<sup>29</sup> Juan vënëlivaisitanetsi daxitajivi. Impuestomatamo pematamoyanijobivi ata gobierno pejamatabëcuene, vënëlivaisitanetsi. Bajarapamonae jumecovënëta palivaisi Dioso najumecopata Juanjavabelia. Nexata Juan bautisaba bajarapamonae.

<sup>30</sup> Itsiata fariseovi, judíovi pecujarubivinua, namuxujemata bajarapalivaisi. Nexata picani pacuenia Dioso tojitsipatsi bajarapamonae pexanaenexa, apo exanae. Nexata Juan apo bautisabi bajarapamonae.

<sup>31</sup> Jesús icatsia jumaitsi jivijavabelia:

—¿Detsa meta pacuenia yapëtaeyaexanaenajë itsamonaejavabelia bajarapamonae xaniavaetsia papecayapëtaenexa pacuenia paxamë pajamatabëcueneitsimë tsavana-pae? Jumaitsinë meta tsane paxamë yabara mapacueniaje: <sup>32</sup> “Bajarapamonae abaxë saya bepejevaxijivixi, pajivixi tomara tuatujëjava banamuxusitenavanapa. Pejevaxijivixi itsa namuxusitenavanapa, bavavajai tsenae penajua namuxusitenaevijavabelia. Pevavajaijavata bajumaitsi: ‘Pacatoobecatsi picani flauta. Itsiata apo payavajibimë. Pacatonaxëanecatsi picani panemuxunanuevajinexa ata. Itsiata apo panuemë,’ bajai tsenae pejevaxi penajua namuxusitenaevijavabelia. Bajara saya jamatabëcueneitsi pamonae aeconoxae jinavanapa mapanacuataje,” janë meta tsane paxamë yabara. <sup>33</sup> Juan jivibautisabinë Dioso pitorobilivaisi jivi tsipaebanajetarua. Pexaejava itsajavata apo xaeyabiabi pamatacabibeje Diosojavabelia vajëta-pona. Vinora ata apo apaeyabiabi. Nexata bajaraponë yabara jamatabëcuenenavëxaniabiaya pajumaitsimë tsabiabi: “¡Juan raja dovathi yajavaponapon!” pajamë tsabiabi jamatabëcuenenavëxaniabiaya. <sup>34</sup> Bajaraxuacujinae icatsia xanë, Daxitajivi Pematapijnënë, najetarucajë. Itaxutojema xaniji. Matavëjëa apaeyabiabajënu. Nexata xanë yabara icatsia jamatabëcuenenavëxaniabiaya pajumaitsimë tsabiabi: “¡Pataema maponëje! Ayajava xaeyabiaba. Ayaira matavëjëa apaeyabiabanua piaitajibinexa. Barënajamatabëcuenejëpanua gobierno pejamatabëcuene impuestomatamo pematamoyanijobabiabivi. Pamonae ata piamatabëcuenebejevi, barënajamatabëcuenejëpa,” pajamë tsabiabi xanë yabara. <sup>35</sup> Itsiata baitsi jane itsamonae xaniavaetsia yapëtaena paxanëbeje Juanbeje Dioso pejamatabëcueneta bitso pataneyapëtaeyaexanaejavabeje. Nexata daxita bajarapamonae yapëtaena pacuenia Dioso paneyapëtaeyaexanaebeje pepacuene pepo pexaniajijamatabëcuene, jai Jesús mapacueniaje jivijavabelia.

### **Pacuenia Jesús exanatsi Simón pijabota yabara pelivaisi**

<sup>36</sup> Fariseonë, Simónvënënenë, pijabota Jesús penanabaninexa, junatatsi. Nexata Jesús napona Simón pijaboyabelia. Jesús naeca mesa muxuneneta penanabaninexa. <sup>37</sup> Bajarapatomarata ponapona petiriva, pibisiacuene pexanabiabiva pevitota palata pepitsinexa. Bajarapova itsa jumetane penanabanijavanexa Jesús Simón pijabota, nexata bajarapova capata alabastrovënë ibotota pexanaebotellabë. Pevënëcaebë pexaniapetuxujuvaceitera. Bajarapova capata bajarapaaceitera Jesús petsitaxuepacaenexa. <sup>38</sup> Nexata bajarapova Jesús petaxusalibënenia, pematatabacabëta nucajunua petsitaxuepacaenexa jane baja bajarapaaceitera. Nexata saya bajarajota itacarajeta bajarapova nua. Tspaji pibisiacuene pexanabiabineconi bitso yanajamatabëxaina. Nexata bajarapova pitaxutobarëmene othopa Jesús petaxujavabereca. Nexata bajarapova pematadata taxuquica. Bajaraxuacujinae yayataeya taxutsut-

sune. Tsitaxuepaca jane baja petuxujuviaceitera. <sup>39</sup> Nexata Simón, ponë Jesús junatatsi, itsa tane pacuenia petiriva exana Jesúsjavabelia, nexata Simón jamatabëjumaitsi mapacueniaje:

—Itsa peneta pepacuenie maponë Jesús, pepo profetanë tsipaeje, nexata yapëtaejitsipa pitsijamatabëcueneva taxujayabatsi. Yapëtaejitsipa bajarapova pibisiacuene pexanabiabivacuene. Nexata apo tocopatsi tsipae petaxujayabinexatsi, jamatabëjai Simón Jesús yabara.

<sup>40</sup> Nexata Jesús jumaitsi Simónjavabelia:

—Simón, xainajë livaisiyo tacatsipaebinexa, jai Jesús.

Simón nexata jumaitsi:

—Jesús, netsipaebare, jai.

<sup>41</sup> Nexata Jesús jumaitsi Simónjavabelia comparacióncuenia:

—Palata petsicopababiabinë amoneyabatsi anijanëbeje. Caenë amoneyabatsi quinientos padenariobeje. Itsanë amoneyabatsi saya cincuenta padenariobeje.

<sup>42</sup> Nexata bajaraponëbeje apo xainabeje juya petocanaviatsinexabeje petsicopatsimatamotsibeje. Nexata palata petsicopatsinë jumaitsi bajaraponëbejevabelia: “Iquinajë baja bajaraxuami pataniamoneyabijavamëbeje. Naxuabi baja jema,” jai. ¿Detsa nexata ponë bitso sivajamatabëcuenebarëya palata petsicopatsinëtsibejevabelia? jai Jesús Simónjavabelia.

<sup>43</sup> Simón nexata jumaitsi Jesúsjavabelia:

—Ponë meta picani ayaijava amoneyaba, sivajamatabëcuenebarëya palata petsicopatsinëtsijavabelia, jai Simón.

Nexata Jesús jumaitsi:

—Xaniajamë rabaja, jai Jesús Simónjavabelia.

<sup>44</sup> Jesús napënëyorota petirivajavabelia. Nexata jumaitsi Simónjavabelia:

—Simón, ¿taneme tsabaja pacuenia exana xanëjavaberena mapovaje? Xanë junaajë nijaboyaberena. Itsiata yaiyataeya xaniavaetsia apo necopiapitsimë. Apo nerajutsimë mera ata tanataxuquiatsinexa. Mapovaje netaxuquiata baja pitaxutobarëmeneta. Netaxuquicanua pematánata. <sup>45</sup> Xamë nijabota patsi atanë, apo nitabaratsutsunimë tanecopiapitsinexamë xaniavaetsia. Mapovaje tapatsicujinae apo copatsi cajena yaiyataeya tanetaxutsutsuneponaejava. <sup>46</sup> Xamë xaniavaetsia tanecopiapitsinexamë, apo netsimataepanaemë aceitera. Mapovaje netsitaxuepaca pexaniapetuxujuviaceitera. <sup>47</sup> Nexata catsipaebatsi neyapëtaenexa mapacuenieje. Mapovaje pinijicuenia nesivajamatabëcuenebarëya. Tsipaji ayaineconi ata pibisiacuene pexanaeneconimi, vecuaajibiaexanajë. Pajivi saya tsiquirineconiyo vecuaajibiaexanajë, pibisiacuene pexanaeneconi, nayapëtane. Tsipaji saya bajarapajivi tsiquirijavayo nesivajamatabëcuenebarëya, jai Jesús Simónjavabelia.

<sup>48</sup> Nexata Jesús jumaitsi petirivajavabelia:

—Pibisiacuene rabaja nexanaeneconimi cavecuaajibiaexantsi, jai Jesús.

<sup>49</sup> Itsamonae ata, pamonaë Simón junata penabaninexa Simón pijabota, naena mesa muxuneneta. Nexata bajarapamonae najumai tsenae Jesús yabara:

—¿Detsa meta maponëje? Jamatabëcuenenavëxaniabiaya natane bepejamatabëcuenecajëjpaenëtsi jivi pibisiacuene pexanaeneconi pevēcuaajibiaexanaenexa, najai tsenae bajarapamonae.

<sup>50</sup> Nexata Jesús jumaitsi petirivajavabelia:

—Dioso pecacapanepaeva tsane pibisiacuene nexanaeconimivecua. Tsipaji ne-sivanajamatabëcuenecopatame xanëjavaberena. Jamatejema baja ponare. Cave-cuaajibiaexanatsi rabaja pibisiacuene nexanaeconimi, jai Jesús petirivajavabelia.

**Pacuenia Jesús, pijajivi, pebijivi, petiriavinua,  
yajavanajetaruca yabara pelivaisi**

**8** Simón pijabota Jesús penanabanicujinae, najetaruca pinijitomaranëjjava, tsiquir-itomaraxijava ata. Tsipaebanajetaruca pacuenia Dioso pijajivi evetsijitsia. Jesús, pijajivi doce ponëbeje, apóstolevi, yajavanajetaruca. <sup>2</sup> Jesús yajavanajetaruca petiriavinua, papetiriavi dovathi vecuacapsapa yajuvënëvi. Papetiriavi ata piavitanëjavavecua Jesús jamatejemaya exana yajuvënëvi, Jesús yajavanajetaruca. Bajarapapetiriaviyajuvënëva, caeva pevënë María, Magdala tomarapijiva. Bajarapova Jesús vecuacapsapa siete ponëbeje dovathivi. Bajarapadovathivi Jesús pevecuacapsapaecujinae, María pënaponatsi. <sup>3</sup> Itsava pevënë Juana, Cuzavënënë pijava. Bajaraponë Cuzavënënë, nacuaevetsinë Herodes pijajivitonë. Itsava pevënë Susana. Bajarapapetiriavi pematatsënëa, itsapetiriavi, ayaibitsaëto, yajavanajetaruca Jesús. Bajarapapetiriavi pexainaepalatayajuvënëjjava, rajuta Jesúsjavabelia. Nexata xuaxi Jesús pijajivi barënamataavenona pebarëcomuatsinexa bajarapapalatata.

**Pacuenia Jesús jivi livaisi tsipaeba peubinë pelivaisicuenia yabara pelivaisi**

*(Mt 13.1-9; Mr 4.1-9)*

<sup>4</sup> Jivi naropoba tomaranëjavaverena. Pata Jesúsjavaberena petanexatsi. Itsa baja ayaibitsaëtoxfaneto nacaetuata Jesúsjavaberena, nexata Jesús livaisi tsipaeba peubinë pelivaisicuenia. Jesús jumaitsi mapacueniaje:

<sup>5</sup>—Peubinë pona pabiabelia peubinexa. Nexata itsa pata pabita, peubixu pexucayajabajarabicuenia ubanajetaruca. Nexata itsaxu othopa pabi tuatuajëjjava penajetarucaenamutojumata. Bajarapaxu jivi taxunanonoba. Nexata bajarapaxumi juvinejeva barsatsui xane. <sup>6</sup> Itsaxu pijinia othopa ibopananëjumata, itsajota bitso ira apo aitayaë. Nexata bajarapaxu juvi ata, tsaquenapona. Tsipaji ira tseva. <sup>7</sup> Itsaxu pijinia othopa xanëebacabomijavata. Nexata peubixu xanëebotonë caecuenia itsa yajavajuva, bitso xanëebotonë matakënënatsi peubijavami. <sup>8</sup> Itsaxu pijinia othopa pexaniairata. Bajarapaxu itsa juva, vitsaba. Nexata xaniavaetsia nacuaita. Itsabotonë capsapa cien paxutoyobeje ata, jai Jesús jivi ayaibitsaëtoxfanetojavabelia.

Itsa Jesús tsipaeba bajarapalivaisi, pinijijumeta jumaitsi:

—Pajivi jamatabëjumeyapëtane patacatsipaebilivaisi, nenamuxunaevetsi xaniavaetsia, jai Jesús bajarapalivaisi petsipaebivijavabelia.

**Pacuenia yabara Jesús jivijavabelia livaisi  
tsipaeba ëcomparacióncuenia yabara pelivaisi**

*(Mt 13.10-17; Mr 4.10-12)*

<sup>9</sup> Nexata Jesús pijajivi yanijobatsi. Jesús pijajivi jumaitsi Jesúsjavabelia:

—Palivaisi jivijavabelia tsipaebame peubinë pelivaisicuenia, pajamatabëcuene xaina, patayapëtaenexa panetsipaebare, jai Jesús pijajivi Jesúsjavabelia.

<sup>10</sup> Jesús nexata jumaitsi pijajivijavabelia:

—Paxamë rabaja xaniavaetsia Dioso pacayapëtaeyaexana Dioso papijajivimë papecaevetsijava. Bajarapacuenia abaxë daxitajivi apo yapëtae. Bajaraxuata bajarapa-

monae itsa tsipaebajë livaisi, ëcomparaciõncuenia tsipaebaponajë. Nexata bajaramonae tae ata Dioso pesaëta pinijicuene taexanaejava, itsiata apo yapëtae pajamatabëcuene yabara exanajë pinijicuene taexanaejava. Namuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi, jai Jesús pijajivijavabelia.

**Pacuenia Jesús yapëtaeyaexana pijajivi pajamatabëcuene xaina palivaisi tsipaeba peubinë pelivaisicuenia yabara pelivaisi**

*(Mt 13.18-23; Mr 4.13-20)*

<sup>11</sup> Icatsia Jesús jumaitsi pijajivijavabelia:

—Mara pajamatabëcuenelivaisi xainaje, palivaisi pacatsipaebatsi pabita peubinë pelivaisicuenia. Pacuenia itsi pabita peubixu, bajara pijinia itsi Dioso pitorobilivaisi jivi pejamatabëthëtota. Dioso pitorobilivaisi jivi itsa tsipaebatsi, tsijamatabëubatsi Dioso pitorobilivaisi. <sup>12</sup> Nexata pacuenia itsi pabita peubixu, paxu othopa pabi tuatujëjava penajetarucaenamutojumata, bajara tsijamatabëcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsijamatabëubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepijia dovathi najetaruca bajarapamonaejavaberena. Nexata bajarapamonae tsijamatabëjuvinejevatsi, petsijamatabëubilivaisitsi dovathi baja vecuapitatsi bajarapalivaisimi. Vecuapitatsi pevajënaeyabelia Dioso pejumecovënëtsiyaniva, Dioso pecapanepaeyanivatsi pibisiacuene pexanaeconivecua. <sup>13</sup> Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcueneitsitsi itsamonae Dioso pitorobilivaisi. Bajarapamonae Dioso pitorobilivaisi jumetane. Nexata picani bajarapalivaisi barëyaya jumecovënëta. Itsiata baitsi jane pacuenia irabereca apo atabunepiarea paxu othopa ibopananëjumata, nexata nabijiana, bajara tsijamatabëcueneitsitsi bajarapamonae Dioso pitorobilivaisi. Tsipaji saya caeepatoyo jumecovënëta bajarapalivaisi. Nexata paepatota dovathi jamatabëcueneëjëtatsi, copaba baja bajarapalivaisi pejumecovënëtsijavami. <sup>14</sup> Pacuenia pijinia paxu othopa xanëebacabomijavata, itsa juva, bitso matacënënatsi xanëebotonë, bajara tsijamatabëcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. Itsiata baitsi jane bitso jamatabëcueneenatsi mapanacuapijicuene yabaraje. Tsipaji najamatabëxaina ayaijava palata pexainanexa. Najamatabëxainanua pexanaenexa pacuene mapanacuapijivi exana saya jema pebarëyanexa. Bajaraxuata Dioso pitorobilivaisi apo tovitsabitsi pejamatabëthëtota. Nexata pacuenia itsi pabita piacuaijibibotonë, bajara itsi bajarapamonae. Tsipaji Dioso xaniavaetsia apo tojinavanapae. <sup>15</sup> Pacuenia pijinia itsi paxu othopa pexanairata, bajara tsijamatabëcueneitsitsi itsamonae Dioso pitorobilivaisi. Bajarapamonae ajamatabëcuenexuirajibi. Ëpexaniajamatabëcuene najamatabëxaina. Casaë tsavanapae pevajënaeyabelia Dioso pejumelivaisi pejumecovënëtsijava. Nexata Dioso pejumelivaisi tsijamatabëcuenevitsabaponatsi pevajënaeyabelia. Tsipaji exanavanapa Dioso pitorobicueniatsi, jai Jesús pijajivijavabelia itsa tsipaeba peyapëtaeyaexanaenexa palivaisi jivijavabelia tsipaeba pabita peubinë pelivaisicuenia.

**Pacuenia Jesús pijajivijavabelia livaisi  
tsipaeba lámparabë pelivaisicuenia yabara pelivaisi**

(Mr 4.21-25)

<sup>16</sup> Icatsia Jesús jumaitsi pijajivijavabelia:

—Itsajivi ata lámparabë pitanojotsicujinae, apo mataacatetsi itsacuenejavata. Cama bëxëpanalia ata apo etsi. Biji rajane athëbëyo etsia jivi boyaberena pe-jonevi petsivajënaeitayotecaenexa. <sup>17</sup> Bajara pijinia itsi palivaisianë tsipaebaponajë comparacióncuenia daxitajivi picani peyapëtaenexa. Najumematayatsia apo tsipaebaponaenë. Itsamonaë nejumetaë ata, aeconoxae abaxë apo nejumeyapëtaë pajamatabëcuene xaina tatsipaebilivaisianë. Itsiata itsamatacabi, bexëajavabelia, daxitajivi nejumeyapëtaëna pajamatabëcuene xaina palivaisianë comparacióncuenia tsipaebaponajë, jai Jesús pijajivijavabelia.

<sup>18</sup> Icatsia Jesús jumaitsi pijajivijavabelia:

—Panejumecanaëjère patacatsipaebilivaisi. Itsamonaë ata itsa pacatsipaebiana, bajarapamonaë ata pajumecanaëjëtsianame papecatsipaebilivaisi. Palivaisivajëto panejumecanaëjëtsianame, nexata bajarapalivaisivajëto panejumeyapëtaename. Itsiata icatsia pematatsënëa bajarapitsilivaisivajëto Dioso pacayapëtaeyaexanaena. Pajivi xaniavaetsia nejumeyapëtaëna patacatsipaebilivaisi, bajarapajivi icatsia itsalivaisi pematatsënëa Dioso jumeyapëtaeyaexanaenatsi. Itsiata pajivi apo jitsipae pematatsënëa pejumeyapëtaëponaenexa, bajarapajivi palivaisiyovajëto picani jumeyapëtaëna, nacofënëtsiana, jai Jesús pijajivijavabelia.

**Pacuenia Jesús pejuyapijivi, pena yajava,  
nubena bojumavelia yabara pelivaisi**

(Mt 12.46-50; Mr 3.31-35)

<sup>19</sup> Jesús pejuyapijivi, pena yajava, pata Jesúsjavaberena. Itsiata acuenebi bajarapamonaë pimoxoyotsijava Jesús. Tsipaji bitso jivi ayaibitsaëto Jesús matatoyorotsia vënëcatsi. <sup>20</sup> Nexata pamonaë Jesús petsipaebilivaisi matatoyorotsia jumetaeyenatsi, jumaitsi Jesúsjavabelia:

—Patajatuxanenë, ena raja, nejuyapijivi yajava, nuca patapënëverena. Bajarapamonaë pina jitsipa pecataejava, jai Jesúsjavabelia.

<sup>21</sup> Nexata Jesús jumaitsi daxita bajarapamonaëjavabelia:

—Pamonaë jumetaëna Dioso pejumelivaisi, jumecovënëtanua pacuenia Dioso itorobatsi, bajarapamonaë jane baja tajuyapijivi, taenajivinua, jai Jesús bajarapamonaëjavabelia.

**Pacuenia Jesús itaveta joviboxaneto, malataca  
yajava, piayaijavami yabara pelivaisi**

(Mt 8.23-27; Mr 4.35-41)

<sup>22</sup> Itsamatacabi Galilea nacuata Jesús, pijajivi yajava, runareca jera ënëabereca. Jumaitsi pijajivijavabelia:

—Nicabaliatsi mapapucaxaneto itsapanabeliaje, jai Jesús.

<sup>23</sup> Itsa baja naropobalia, Jesús majitanuca. Nexata pinijijoviboxaneto jemata najetaruca. Malataca nexata bitso ayai. Nexata malataca jera ënëaberena mera epaba-

jarabapona. Mera nexata vënëcapona jera ënëaberena. Bubunaejtsia baja bajaramo. <sup>24</sup>Nexata Jesús pemajitanucaenë pijajivi yaitavabatsi. Jesús pijajivi jumaitsi:

—¡Patajatuxanenë, vaxaitsimi rabaja yaothopaenatsi! jai Jesús pijajivi.

Nexata Jesús pemajitanucaenëmi naëcotapuna. Pinijijumeta itavetaxuaba jovibo, malataca yajava. Jovibo baja nexata ajibi tsaxuabi. Mene ata baja nexata vainae ecaxuaba. <sup>25</sup>Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús pijajivijavabelia.

Nexata Jesús pijajivi itsa tane Jesús pitavetsijava jovibo, malataca yajava, Jesús pijajivi jamatabëcuenenajunaviaca bëpënëa. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Nexata jumecovënetatsi! ¡Nexata baja jovibo, malataca yajava, ajibi tsaxuabi! najai Jesús pijajivi.

**Pacuenia pebi, dovathivi peyajavaponaponaenë, Jesús  
vecuacapitsapa Gerasa nacuata yabara pelivaisi**

*(Mt 8.28-34; Mr 5.1-20)*

<sup>26</sup>Jesús pijajivi barëyaëta pucaxaneto itsapanabelia, Gerasa nacuyabelia. Gerasanacua boca puca itsapanaverena, Galileanacua pecanacujtsialia. <sup>27</sup>Itsa Jesús jeravecua nonotajunaya, mataenenarenatsi bajarapanacuapijinë, dovathivi peyajavaponaponaenë. Bajaraponë bajayajebi baja jumasa ponaponabiaba. Pijabota apo ponaponae. Jivimëthëanëjavata saya ponaponabiaba. <sup>28</sup>Nexata bajaraponë itsa pata Jesúsjavaberena, pematabacabëta nucajunua Jesús pitabarata. Pinijijumeta aëjai.

—Jesús, Dioso athëbëtsia peacaenë pexënatomë. ¿Detsa xua jaitame xanëjavaberena? Pexaniacuene bitso cavajëtatsi. Nejamatabëcuenebejiobitsipame, jai dovathivi peyajavaponaponaenë Jesúsjavabelia.

<sup>29</sup>Bajarapacuenia jumaitsi dovathivi peyajavaponaponaenë tsipaji Jesús jerajavavetsina penonotajunaejavata, dovathivi peyajavaponaponaenë pemataenaejavatatsi, Jesús itaveta dovathivi. Jesús jumaitsi dovathivijavabelia mapacueni-aje: “¡Dovathivi, bajaraponë baja pavecuapitsapare!” jai. Bajaraponë anijatonë dovathivi vaetababiabatsi. Jivi picani bajaraponë cadenamaëtonëta cobecëtabiabatsi. Yajavataxucëtabiabatsi cadenamaëtonëta xaniavaetsia picani peacaenexa. Itsiata baitsi dovathivi peyajavaponaponaenë ucubabiaba cadenamaëtonëmi. Dovathivi pejamatabëcueneta najetabajiravabiaba petusatuabelia. <sup>30</sup>Nexata Jesús jumaitsi bajaraponëjavabelia:

—¿Detsa pavënëmmë? jai Jesús.

Nexata bajaraponë navënëpaeba.

—Tavënë raja Legiön, jai.

Bajarapacuenia navënëpaeba tsipaji dovathivi ayaiBITSÄTOXANETO tsijamatabëjina-  
navanapatsi. <sup>31</sup>Bajarapadovathivi vajëta Jesúsjavabelia infiernojavabelia Jesús pitorobiyani-  
va. <sup>32</sup>Nexata bajarajota, imoxoyo petsutojavata, marranobitsäetoxaneto xaevanapa. Dovathivi bitso vajëta Jesúsjavabelia.

—Panetocopare patajonenexa marranobitsäetoxanetojavabelia, jai dovathivi.

Jesús nexata pevajëtsicueniatsi tocopata. <sup>33</sup>Nexata dovathivi pebi vecuapit-  
sapecatsi. Nexata marranobitsäetoxanetojavabelia baja junua dovathivi. Nexata daxita bajarapamarranobitsäetoxanetomi cujinaeyeca. Pucaxaneto itapajanituareca othopareca. Bajarajota daxita marranobitsäetoxanetomi meneta bubuna.



<sup>34</sup> Marrano pevetsivi itsa tane bajarapacuene, rēcēpeca. Pona, pacuene tane, petsipaebinea tomarapijivijavabelia, petsipaebinea vayafotusatojava penaevijavabelia ata. <sup>35</sup> Nexata jivi ponarena petaenexa bajarapacuene. Jivi itsa parena Jesúsjavaberenena, taeyeta dovathivi peyajavaponaponaenēmi peecaejava Jesús pemuxuneneta. Penaxatatsijava baja bajaraponē naxatateca. Jamatejema baja. Xaniavaetsia eca. Nexata bajarapamonae cujunavatsi Jesús. <sup>36</sup> Pamonae cuenetanetsi Jesús pejamatejemayaexanaejava dovathivi peyajavaponaponaenēmi, bajarapamonae paeba pepatsivijavabelia daxita pacuenia tane. <sup>37</sup> Bajarapamonae bitso cujunavatsi Jesús. Nexata daxita Gerasa nacuapijivi jumaitsi Jesúsjavabelia:

—Pexaniacuene pacavajētatsi. Ponare baja patajanacuavecu, jai Gerasa nacuapijivi Jesúsjavabelia tsipaji cujunavatsi.

Nexata baja Jesús runareca jera ēnēabereca. Ponaejitsia baja. <sup>38</sup> Nexata dovathivi peyajavaponaponaenēmi bitso picani navajēca Jesúsjavabelia penaponaenexa picani Jesús pepēta.

—Petuxanenē, netocopare tanaponaenexa nepēta, jai picani Jesúsjavabelia.

Itsiata Jesús apo jejai. Jumaitsi bajaraponējavabelia:

<sup>39</sup> —Ponare nijamonaejavabelia. Tsipaebianame pacuenia ayaicuene nijatuxanenē Dioso catoexana, jai Jesús.

Nexata baja bajaraponē pona. Tsipaebaona daxita pijatomarapijivijavabelia pacuenia Jesús jamatejemayaexanatsi.

**Pacuenia Jesús copiaya namutoepatota jamatejemayaexana  
piavitaneva, pacuenia icatsia cotocaevi toasaēyaexana  
Jairo pexēnatovayo, petēpaevayomi, yabara pelivaisi**

*(Mt 9.18-26; Mr 5.21-43)*

<sup>40</sup> Jesús icatsia pecovēyaberena naviarena jerata pucaxaneto itsapanaverena. Nexata jivi ayailbitsaētoxfaneto copiapitatsi barēyaya. Tsipaji baja cajena copiaevetavanapatsi pepatsijavarena. <sup>41</sup> Nexata bajarajota napatajopa Jairovēnēnē. Bajaraponē judíovi penacatuatabiabibo pevetsinē. Jairo pematabacabēta yayataeya Jesús pitabarata nucajunua. Pinijicuenia junata. Jumaitsi Jesúsjavabelia:

—Tapēta ponare tajaboyabelia, jai.

<sup>42</sup> Bajarapacuenia Jairo jumaitsi Jesúsjavabelia tsipaji caevayo pexēnatovayo totēpaejitsiatsi. Bajarapovayo xaina doce pavaibeje. Itsa Jesús napona Jairo pepēta, jivibitsaētoxfaneto Jesús pepēnaponaevitsi matatoyorotsia cēnēnanajetarubenatsi.

<sup>43</sup> Bajarapajivibitsaētoxfaneto tuatua jēta, itsava pijanacuene pecapunaevatsi nana-jetaruca. Bajarapova pijanacuene pecapunaecujinaetsi, doce baja pavaibeje xaina. Beyajiohi tsabiabi bajarapajana. Daxita pexainaejavaximi navecuavereta pematomobita pevaēbivitsi. Itsiata baitsi jane itsanē ata pevaēbivitsi apo jamatejemayaexanaetsi bajarapavitanevecua. <sup>44</sup> Nexata bajarapova ponataba Jesús pepēnēvelia, jivibitsaētoxfaneto tuatua jēalia. Nexata bajarapova tojayataba Jesús penaxatatsi-javacopia. Nexata bajarapaepatota pijanacuenemi vecuaajibitsi baja.

<sup>45</sup> Jesús nexata jumaitsi:

—¿Jipatsa tanaxatatsijava netojayataba? jai Jesús.

Daxitajivi jumaitsi Jesúsjavabelia:

—Xanē cajena apo cajayatabitsi, jai.

Nexata Pedrobana jumaitsi:

—Patajatuxanenë, jivibitsaëtoxfaneto raja camatatoyorotsia cënënanajetarubena. Apo becaajayatsijibi. ¿Detsa xuajitsia: “¿Jipatsa tanaxatatsijava netojayataba?” jamë? Itsajiviyo raeta baja cajayataba, jai Pedrohana.

<sup>46</sup> Nexata Jesús jumaitsi:

—Itsajiviyo baja cajena tanaxatatsijava netojayataba. Yapëtaniji bajarapajiviyo tajamatejemayaexanaejava tasaëta, jai Jesús.

<sup>47</sup> Nexata petiriva jamatabëjumaitsi:

—Jesús baja yapëtane tanejamatejemayaexanaejava, jamatabëjai.

Nexata bajarapova najetabarena Jesús pitabarayerena. Neconecojai pecajunavi. Pematabacabëta tonucajunua Jesús pitabarata. Bajarapova nexata navajunupaeba daxitajivi tuatujëta pacuene yabara tojayataba Jesús penaxatatsijava. Nava-junupaebanua pacuenia jamatejemayaexanatsi pejayatabijavata. <sup>48</sup> Nexata Jesús jumaitsi bajarapovajavabelia:

—Xamë nesivajamatabëjumaitsimë: “Jesús penaxatatsijava itsa tojayatabianajë, tavitanëjavami nevecuaajibi tsane,” nesivajamatabëjamë. Bajaraxuata jamatejemamë baja. Ponare baja jamatejema, jai Jesús bajarapovajavabelia.

<sup>49</sup> Bajarapacuenia Jesús pejumaitsanucaejavata namutoepatota, pataba jivitonë Jairo pijaboverena. Bajaraponë jumaitsi Jairojavabelia:

—Jairo, nexënatoyo rabaja tëpa. Pëtsa baja matavëjëa jamatabëitonotaponame Jesús, jai bajaraponë Jairojavabelia.

<sup>50</sup> Jesús jumetae ata bajarapajume, itsiata jumaitsi Jairojavabelia:

—Jairo, pëtsa najamatabëxainame. Najamatabëcuenecopare saya ëxanëjavaberena. Nexënatovayo raja jamatejema tsane, jai Jesús Jairojavabelia.

<sup>51</sup> Itsa Jesús pata Jairo pijabota, apo tocopatsi ayaibitsaëto penajonenexa Jesús pepëta petëpaevayo pebocaejavabelia. Tocopata saya penajonenexa mapamatabëxëyoje. Pedro, Santiago, Juan, petëpaevayo paxa, pena, bajara saya pamatabëxëyo tocopata penajonenexa Jesús pepëta. Pamonae Jesús pevajënae ena Jairo pijabota, bajarapamonae Jesús pitsapaeyaexana. <sup>52</sup> Daxitajivi pinijicuenia matanueyaba petëpanucaevayo. Nexata Jesús jumaitsi:

—Pëtsa pamatanueyabame. Pejanava raja apo tëpae. Saya raja majitanuca, jai Jesús bajarapamonaejavabelia tsipaji yapëtane Jesús piasaëyaexanaejavanexa bajarapovayo.

<sup>53</sup> Bajarapacuenia Jesús pejumaitsiijava, bajarapamonae saya Jesús jumecapocaponatsi. Tsipaji bajarapamonae yapëtane bajarapovayo baja picani pepacuene petëpaejava. <sup>54</sup> Nexata Jesús petëpaevayo cobepita. Jumaitsi pinijijumeta:

—Pejanavayo, nonotabapunare, jai Jesús.

<sup>55</sup> Nexata bajarapacuenia Jesús pejumaitsiijavata, petëpanucaevayomi nonotabapuna. Asaë baja icatsia petëpaevayomi. Nexata Jesús jumaitsi pejanavayo penajavabelia:

—Nexënatovayo pexaejava rajure, jai Jesús.

<sup>56</sup> Nexata pejanavayo paxa, pena ata, bitso jamatabëcuenenabenajacabeje. Nexata Jesús jumaitsi bajarapajivibejejavabelia:

—Pëtsa papaebamebeje itsajivijavabelia ata pacuene pacatoexanatsibeje, jai Jesús.

**Pacuenia Jesús pijajivi itoroba Dioso pitorobilivaisi jivi  
petsipaebanajetarubenaenexa yabara pelivaisi**

*(Mt 10.5-15; Mr 6.7-13)*

**9** Jesús junata pijajivi, doce ponëbeje, penacaetuatsinexa. Nexata Jesús jumaitsi bajarapamonaejavabelia mapacueniaje:

—Pacajamatabëcuene caëjëpaeyaexanatsi rabaja papecacaëjëpaejamatabëcuene dovathi peyajavajinavanapaevi ata panevecuacapitsaponaenexa. Pacajamatabëcuene caëjëpaeyaexanatsinua piavitanevi ata panejamatejemayaexanaponaenexa. <sup>2</sup>Patsipaebanajetarubenaename daxitajivijava pacuenia Dioso pijajivi evetsijitsia. Piavitanevi ata pajamatejemayaexanaponaename, jai Jesús pijajivijavabelia.

<sup>3</sup>Jesús jane baja pijajivi penaropobivajënae, Jesús jumaitsi pijajivijavabelia mapacueniaje:

—Pëtsa itsacuenejava ata pacaponame panijanamutonexa. Pëtsa pacaponame naebo, doro ata, panemarue ata, palata ata. Caejava saya panenaxatatsijava pajumaponare. Pëtsa anijacamisabeje pacaponame. <sup>4</sup>Itsa papatabiabianame tomarata, caebota pamajitabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa ponaename, bajarapabovecua papitsapaename. <sup>5</sup>Patomarata apo pacacopiapitsi tsane pexanialivaisi panetsipaebinexa, nexata pavecuaponaename bajarapatomara. Panevecuaponaevajënae bajarapatomara, bajarapatomarata panataxuatsapërëvarëbianame. Bajarapacuenia itsa panataxuatsapërëvarëbianame, yapëtaena bajarapatomarapijivi Diosojavabelia penaneconitsicue apo papecacopiapitsixae papecanamuxunaevetsinexa panetsipaebilivaisi, jai Jesús pijajivijavabelia.

<sup>6</sup>Bajaraxuacujinae Jesús pijajivi naropoba jane baja. Najetarubena daxitatomaraxijava. Tsipaebanajetarubena jane baja pexanialivaisi jivi pecapanepaelivaisinexatsi pibisiacuene pexanaeconimivecua. Jamatejemayaexanaponaevitanevi daxitajava.

**Pacuenia Juanpijinë jivibautisabinëmi beyaxuabatsi yabara pelivaisi**

*(Mt 14.1-12; Mr 6.14-29)*

<sup>7</sup>Herodes, Galileanacua pevetsinë, vënëlivaisitanetsi daxita Jesús pinijicuene pexanaponaejava. Nexata Herodes najamatabëcueneepatajërërëcaeya najamatabëxaina Jesús yabara. Tsipaji itsamonae jamatabëcuenenavëxaniabiaya Jesús yabara jumai tsaponae: “Juanpijinë raeta jivibautisabinëmi petëpaecujinae icatsia asaë,” jai tsaponae Jesús yabara. Nexata bajarapacuenia itsamonae pejumaitsaponaejava Herodes pejumetaexae, najamatabëcueneepatajërërëcaeya najamatabëxaina Jesús yabara.

<sup>8</sup>Itsamonae pijinia jumai tsaponae Jesús yabara:

—Bajayata raeta ponëmi ponapona, profeta Elíaspijinëmi, icatsia asaë, jai tsaponae itsamonae.

Itsamonae pijinia jumai tsaponae Jesús yabara:

—Bajayata raeta pamonaemi jinavanapa, profetavimiyajuvënëne, icatsia asaë, jai tsaponae itsamonae Jesús yabara.

Bajarapacuenia itsamonae jamatabëcuenenavëxaniabiaya pejumaitsaponaejava Jesús yabara, Herodes jumetane.

<sup>9</sup>Nexata Herodes jamatabëjumaiti:

—Xanë bajayata tajajivi itorobajë Juanpijinë jivibautisabinëmi pebeyaxuabinexa. Nexata baja tajajivi Juanpijinëmi vësiucutaxuaba. Beyaxuaba baja. ¿De tsaeta nexata ponë pinijicuene pexanaponaejava, vënëlivaisitaeyabiabajë? jamatabëjai Herodes Jesús yabara.

Bajaraxuata Herodes bitso jamatabëtane Jesús.

### **Pacuenia Jesús pexaejava rajuta cinco mil ponëbeje yabara pelivaisi**

*(Mt 14.13-21; Mr 6.30-44; Jn 6.1-14)*

<sup>10</sup>Jesús pitorobivi, apóstolevi, jivi pexanialivaisi petsipaebanajetarubenaecujinae, naviabanajetarubena baja Jesúsjavaberena. Nexata bajarapamonae pepatsicujinae Jesúsjavaberena, navajunupaeba Jesúsjavabelia daxita pacuenia exanavanapa. Nexata Jesús barëpona pijajivi pesajinaejavabelia, Betsaidatomara imoxoyojavabelia.

<sup>11</sup>Itsiata baitsi jane jivi ayaiBITSaëtoxaneto pëtanetsi. Nexata bajarapamonae Jesús pecovëvelia pëjaitatsi. Nexata bajarapamonae itsa pata Jesúsjavata, Jesús copiapita xaniavaetsia. Nexata Jesús tsipaeba bajarapamonaejavabelia pacuenia Dioso eveta pijajivi mapanacuataje. Jesús jamatejemayaexananua piavitanevi.

<sup>12</sup>Itsa baja caniviyo tsaponae, Jesús pijajivi doce ponëbeje cujibarenatsi. Jumaititsi:

—Itorobaremelia baja jivi peponaenexa imoxoyo penaetomaraxijavabelia, imoxoyo penaebonëjavabelia ata. Bajarabelia bajarapamonae namajitsiana. Pexaejavana namitsavajëtsiana. Majotaje ajibi pexaejava. Tsipaji itsajivi ata pijabo apo xainae majotaje, jai Jesús pijajivi.

<sup>13</sup>Nexata Jesús jumaiti pijajivijavabelia:

—Paxamë parajure pexaejava, jai Jesús.

Nexata Jesús pijajivi jumaiti:

—Paxainajë saya cinco papanbëbeje, anijanëyobeje dujuainëyobeje yajava. ¿Jit-sipame tsaja patacomuacaenexa pexaejava daxita mapamonae penaxaenexaje? jai Jesús pijajivi.

<sup>14</sup>Bajarapajivibitsaëtoxaneto bejamatabëcuene cinco mil ponëbeje. Nexata Jesús jumaiti pijajivijavabelia:

—Paenaeyaexanare pepobitsaëtonë, bejamatabëcuene cincuenta ponëbeje tsaponae caebitsaëtota, jai Jesús pijajivijavabelia.

<sup>15</sup>Nexata Jesús pijajivi bajarapacuenia exana. Enaeyaexana jane baja daxita jivibitsaëtoxaneto. <sup>16</sup>Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaiti Diosojavabelia:

—Pexaniacuene panetoexaname. Panerajutame pataxaejava, jai Jesús.

Bajaraxuacujinae Jesús pan epatsicacaponae, dujuainëyobeje yajava. Pepatsicaejava pijajivijavabelia rajutapona petsicobetsanaenexa daxitajivi. <sup>17</sup>Daxita xaniavaetsia nabane. Bajaraxuacujinae jivi peyajuvënëcopabejebijavanë, Jesús pijajivi vënëba doce xuabeje bemapirecuenia pexanaejavanë.

**Pacuenia Pedro jumaitsi Jesúsjavabelia:  
“¡Xamë raja Cristomë!” jai yabara pelivaisi**

*(Mt 16.13-19; Mr 8.27-29)*

<sup>18</sup> Itsamatacabi Jesús caenë vajëta Diosojavabelia pijajivi pitabëta. Nexata xuacujinae Jesús jumaitsi pijajivijavabelia:

—¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

<sup>19</sup> Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinë raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta. Profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Bajayata raeta Diosojumepaebivimi profetavimiyajuvënëni icatsia asaë,” jai tsabiabi xamë yabara, jai Jesús pijajivi.

<sup>20</sup> Nexata icatsia Jesús jumaitsi pijajivijavabelia:

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

Nexata Pedro jumaitsi Jesúsjavabelia:

—Xamë raja cajena Cristomë, athëbëvetsica Dioso pecaitorobinëtsica jivi necapanapænexa. Xamë cajena Dioso pexënatomë, jai Pedro Jesúsjavabelia.

**Pacuenia Jesús tajëvelia navajunupaeba  
pebeyaxuabijavanexatsi yabara pelivaisi**

*(Mt 16.20-28; Mr 8.30–9.1)*

<sup>21</sup> Jesús jumeitaveta pijajivi. Jumaitsi mapacueniaje:

—Pëtsa pajumaitsimë jivijavabelia: “Jesús raja Dioso pexënato,” pajamë pëtsa, jai Jesús.

<sup>22</sup> Nexata Jesús pebeyaxuabijavanexatsi, tajëvelia navajunupaeba. Jumaitsi pijajivijavabelia mapacueniaje:

—Xanë, Daxitajivi Pematapijinënë, pinijicuenia bejiobinë tsane. Judíovi pijaancianovi, sacerdotevi penamatacaitorobivina, judíovi pecujarubivina, apo nejumecovënëtsi tsane xanë Cristonëcuenenë. Nexata bitso nebejiobiaexanaena. Bajaraxuacujinae nebeyaxuabiana. Itsiata baitsi jane tatëpaecujinae, acueyabi matacabita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

<sup>23</sup> Bajaraxuacujinae Jesús jumaitsi daxitajivijavabelia:

—Pajivi jitsipa tanepënaponaejava, bajarapajivi copatsi penatojitsipaecuenia pexanaenexa penajamatabëxainabiabijavami. Exanaponaponae taitorobicuenia. Bajarapajivi caematacabi canacujitsia najamatabëcueneveretsinua, bejiobiaexanaejitsia atatsi, beyaxuabijitsia atatsinua, Dioso pejumelivaisi yabara piamatabëcuenesaë tsaonaponænexa. Nexata jane baja xuacujinae nepënaponæna. <sup>24</sup> Pajivi exanaponapona penatojitsipaecuenia, apo xainæ tsane matacabi apo peverevereaejava. Pajivi xanë tajamatabëcueneta copata penatojitsipaecuenia pexanaejavami, bajarapajivi xainaena matacabi apo peverevereaejava. <sup>25</sup> Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuenæ xainæ ata mapanacuapijicuenæje, itsiata nacuerata. Tsiapaji pexainaecuenæ

apo capanepae tsanetsi Diosojavabelia. <sup>26</sup> Pajivi tajajivitonë ata, navënëlivaisicaura tsane jivijavabelia xanë tajajivitonëcuene, tanejumecovënëtsijava ata yabara, nexata juya xanë, Daxitajivi Pematapijinënë, bajarapajivi tajajivitonë ata, tajajivitonëcuene vënëlivaisicauranë tsane taxa Diosojavabelia. Bajarapajivi vënëlivaisicauranë tsane pamatacabi icatsia patsianicajë taxa Dioso pijapenivenivenaecotia yajava, tananeconitsiaexanaenexa daxita pijaneconi pexainaevi. Yajavapatsianicajënuu Dioso pijaängelevi. <sup>27</sup> Xaniajanë pacuenia pacatsipaebijitsiatsi. Daxita paxamë patëpaenejevamë, Dioso taxuxuabiana daxita pijajivi pevetsicuene mapanacuataje. Nexata paxamëyajuvënëvi pepuatae tsane Dioso petaxuxuabijava daxita pijajivi pevetsicuene mapanacuataje, tēpaena, jai Jesús bajarapamonaejavabelia.

### **Pacuenia Jesús caeapatoyo perabënivenivenataba yabara pelivaisi**

*(Mt 17.1-8; Mr 9.2-8)*

<sup>28</sup> Jesús petëpaejavanexa tajëvelia penayajunupaebicujinae, bejamatabëcuene ocho pamatacabibejucujinae, Jesús pijajivi, acueyabi ponëbeje, barëjunaya petutojumabetsia. Barëjunaya mapamatabëxëyoje: Pedro, Santiago, Juan. Bajaramatabëxëyo Jesús barëjunaya petsutojumabetsia pevajëtsinexa Diosojavabelia. <sup>29</sup> Diosojavabelia pevajëtsijavata, Jesús itabaranivenivena. Penaxatatsijava ata bitso nivenivenaeya niojai. <sup>30</sup> Bajarajota jemata naitajëta anijanëbeje, ponëmibeje bajayata tēpa. Bajaraponëbeje Jesús barëcuaicuajitsi. Bajaraponëbeje tsaena Moiséspijinëbeje Elíaspijinëbeje. <sup>31</sup> Bajaraponëbeje matatoyorotsia nivenivenabeje. Jesús-bana nabarëcuaicuajiai Jesús petëpaejavanexa yabara. Pacuenia Jesús bejibioaexanaejitsiatsi Jerusalén tomarata, bajarapacuenia yabara nabarëcuaicuajiai. <sup>32</sup> Pedro-bana penajuajinavanapaevi bitso itamajitsipanae ata, itsiata naëcotavanapa. Nexata bajarapamonae tane Jesús matatoyorotsia penivenivenaejava. Tanenua Moisésbeje Elíasbeje pebarëcuaicuajjavatsi Jesús. <sup>33</sup> Itsa baja Moisésbeje Elíasbeje Jesúsvecua ponaejitsiatsibeje, nexata bajarapaepatota Pedro jumai tsaxuabi Jesúsjavabelia:

—¡Patajatuxanenë, pijacuaxae panebarëponame! Pacatoexanaenatsi acueyabi pabobërëtobeje. Itsabobërëto xamënexa tsane. Itsabobërëto Moisésnexa tsane. Itsabobërëto Elíasnexa tsane, jai Pedro.

Pedro xaniavaetsia najamatabëxainaejeva, bajarapacuenia jumaitsi. <sup>34</sup> Pedro abaxë itsa cuacuajiai tsanucuae, itarërëbo mataacataxuabatsi daxita bajarapamonae. Jesús pijajivi najunaviaca itsa mataacataxuabatsi itarërëbo. <sup>35</sup> Nexata bajarapaitarërëbojavavetsica Dioso jumaitsitsica:

—Mara ponë taxënato, tasivanëje. Bajaraponë panamuxunaevere, jaitsica Dioso itarërëbojavavetsica Jesús pijajivijavabelia.

<sup>36</sup> Itsa baja Dioso najumevereta bajarapacuenia pejumaitsijavatsica, Jesús pijajivi tane caenë baja Jesús penucuaejava bajarajota. Jesús pijajivi tae ata bajarapacuenia, moya saya jinavanapa. Bajarapamonae abaxë apo tsipaebi itsamonaejavabelia, tae ata bajarapacuenia.

**Pacuenia Jesús jamatejemayaexana pejevaxinē, dovathi  
peyajavaponaponanē, yabara pelivaisi**

*(Mt 17.14-21; Mr 9.14-29)*

<sup>37</sup> Jesús pebarēcuaicuaijaicujinae Moisésbeje Elíasbeje, pijajivi acueyabi ponēbeje yajava, naviatsica petsutojumavetsica. Nexata mataenenatsi jivi ayaibitsaētoxaneto. <sup>38</sup> Nexata caenē bajarapajivi bitsaētoxanetoyajuvēnēnē pinijijumeta jumaitsi Jesúsjavabelia:

—Jesús, nitaxutotsoniataema. Netotaema taxēnatonēyo. Caenēyo rabaja tsipaji xainajē. <sup>39</sup> Dovathi vaetababiabatsi. Nexata jemata aėjai tsabiabi. Tēpajoneyaexanabiabatsi. Daxitanē neconecojaivi aperabēbaba tsatababiabireca. Nexata bajara-jota pecuiboathamu tsabiabi. Bitso bejiobiaexanabiabatsi. Dovathi abaxē apo jamatabēcopatsitsi. <sup>40</sup> Picani raja nijajivijavabelia jumaitsinē: “Panetovecuacapitsapare dovathi,” janē. Itsiata apo caējēpaetsi tanetovecuacapitsapaenexa, jai bajaraponē Jesúsjavabelia.

<sup>41</sup> Nexata Jesús jumaitsi daxita pijajivijavabelia:

—¡Paxamē baja rovia apo pajumecovēnētsimē Dioso papecayavenonaejavanexa! Bajaraxuata apo pacajamatabēcuenecaējēpae pejevaxinē panevecuacapitsapaenexa dovathi. ¡Paneajamatabēcuenetajavi baja rovia! ¿Detsa paepatojebi abaxē paxamējavabelia ajamatabēcuenesaēnē tsaponaponae tsane patanejumecovēnētsinexamē? jai Jesús daxita pijajivijavabelia.

Nexata Jesús jumaitsi pejevaxinē paxajavabelia:

—Barērenamēre nexēnatonēyo, jai Jesús.

<sup>42</sup> Ajena pejevaxinē imoxoyotabarena Jesúsjavaberena, dovathi icatsia irata xua-batsi pejevaxinē. Daxitanē aperabēbaba tsatabireca. Nexata Jesús itaveta dovathi pejevaxinē pevecuapitsapaenexatsi. Nexata baja Jesús jamatejemayaexana pejevaxinē. Tocanaviata baja pejamatejemanē paxajavabelia. <sup>43</sup> Daxitajivi bitso jamatabēcuenabenajaca Dioso pesaēta Jesús pevecuacapitsapaexae dovathi bajaraponēyo.

**Pacuenia icatsia Jesús tajēvelia navajunupaeba  
pebeyaxuabijavanexatsi yabara pelivaisi**

*(Mt 17.22-23; Mr 9.30-32)*

Jivibitsaētoxaneto Jesús jamatabēcuenēbarēyaya tanetsi daxita Jesús pexanaejava yabara. Nexata Jesús pebeyaxuabijavanexatsi, tajēvelia navajunupaeba pijajivijavabelia. Jesús jumaitsi mapacueniaje:

<sup>44</sup> —Xaniavaetsia panenamuxunaevere. Pētsa panacofēnētame. Xanē, Daxitajivi Pematapijinēnē, necanajetsiana itsamonae pecobeyabelia, jai Jesús pijajivijavabelia tajēvelia penavajunupaebijavata pebeyaxuabijavanexatsi.

<sup>45</sup> Itsiata baitsi jane Jesús pijajivi apo jumeyapētae xua yabara Jesús jumaitsi. Baitsi bajarapamonae Dioso apo tocopatsitsi pejumeyapētaeyaniva xua yabara Jesús jumaitsi. Bajarapamonae ajumeura Jesúsjavabelia peyanijobijava xua yabara Jesús jumaitsi.

**Pacuenia Jesús pijajivi: “¿Detsa ponë vaxaitsiyajuvënë  
nacavecuayaijamatabëcuenenë bitso?” najai  
tsanajetarubena namutua yabara pelivaisi**

*(Mt 18.1-5; Mr 9.33-37)*

<sup>46</sup> Jesús pijajivi anaeya namutua najumenotsiaya nalivaisitanajetarubena. Najumaitsi tsanajetarubena bajarapamonae:

—¿Detsa ponë vaxaitsiyajuvënë nacavecuayaijamatabëcuenenë bitso? najai tsanajetarubena Jesús pijajivi.

<sup>47</sup> Nexata Jesús pijajivi jamatabëcueneyapëtane pacuenia najamatabëxaina. Nexata Jesús cobepita pejevaxinëyo. Pemuxuneneta nuteta. <sup>48</sup> Jumaitsi pijajivijavabelia:

—Pajivi copiapita tanejumecovënëtsijiviyo, mapitsipejevaxinëyo ataje, xanë taniji tanecopiapitsijava. Pajivi necopiapita, èxanë apo necopiapitsi. Ponë nitoroba, neyjavacopiapita. Nexata pëtsa bepaayaijamatabëcuenemimë panataneme. Tsipaji ponë paxamëyajuvënë beveliajamatabëcuenenë natane paxamëvecua, bajaraponë bitso ayaijamatabëcuenenë taenatsi Dioso daxita paxamë matatoxenetsia, jai Jesús pijajivijavabelia.

**Pacuenia Jesús jumaitsi pijajivijavabelia itsa vënëlivaisitane itsanë dovathi  
jivivecua pecapitsapaejava Jesús pevënëta yabara pelivaisi**

*(Mr 9.38-40)*

<sup>49</sup> Jesús pijajivitonë, Juan, jumaitsi Jesúsjavabelia:

—Tajatuxanenë, pataniji itsanë nevënëta dovathi jivivecua pecapitsapaejava. Itsiata bajaraponë apo paxanëyajuvënë. Nexata paitavetajë bajaraponë dovathi jivivecua pecapitsapaponaejava, jai Juan.

<sup>50</sup> Nexata Jesús jumaitsi Juanjavabelia:

—Pajivi pibisiajamatabëcuene apo najamatabëxainae vaxaitsijavaberena, bajarapajivi nacajamatabëcueneyavenona. Bajarapajivi bevaxaitsijamatabëcueneyivi. Bajaraxuata pëtsa baja paitavetame bajaraponë xanë tavënëta jivivecua dovathi itsa capitsapapona, jai Jesús Juanjavabelia.

**Pacuenia Jesús jumeitaveta Santiagobeje Juanbeje yabara pelivaisi**

<sup>51</sup> Itsa baja imoxoyo pevajënae pamatacabi Jesús athëbëabetsia Dioso caponaejitsiatsi, ajamatabëcuenesaë baja peponaenexa Jerusalén tomarabelia. <sup>52</sup> Jesús nexata pevajënaeyabelia pijajivitonëbeje natsivajënaeitroba, Santiagobeje Juanbeje. Bajaraponëbeje ponabeje Samaria nacuata peecaetomarajavabelia petocov-aetsinexabeje pabota picani Jesús patsijitsia. <sup>53</sup> Itsiata baitsi jane Samaria nacuapijivi apo jamatabëcopiapitsitsi Jesús. Tsipaji baja bajarapamonae yapëtane Jesús peponaejavanexa Jerusalén tomarabelia. <sup>54</sup> Nexata Jesús pijajivitonëbeje itsa yapëtanebeje Samaria nacuapijivi Jesús apo pecopiapitsijavanexatsi, nexata jumaitsiibeje Jesúsjavabelia:

—Patajatuxanenë, bajayata profeta Elíaspijinë vajëta Diosojavabelia Dioso pitorobinexatsica isotocotia peverebiabinexa pijamatabëcuenebejevi. ¿Baja tsaja pitsicuene jitsipame patavajëtsinexa Diosojavabelia peveriapaenexatsi pamona apo jitsipae pecacopiapitsijava? jaibeje Jesús pijajivitonëbeje.



<sup>55</sup> Nexata Jesús naécota pijajivitonëbejejavabelia. Jumeitaveta pijajivitonëbeje. Jesús jumaitsi:

—Paxamëbeje apo pajamatabëcueneyapëtaemëbeje Espiritu Santo, ponë pacaya-javaponaponabeje. <sup>56</sup> Xanë, Daxitajivi Pematapijinënë, apo patsinëtsica taverebiabinexa jivi. Biji rajane patsicajë tacapanepaenexa jivi pibisiacuene pexanaeneconivecua, jai Jesús pijajivitonëbejejavabelia.

Nexata baja Jesús, pijajivi yajava, pona itsatomarabelia.

### **Pacuenia picani itsamonae Jesús jamatabëpënaponatsi yabara pelivaisi**

(Mt 8.19-22)

<sup>57</sup> Jesús pijajivi namutua peyajavanajetarucæjavata, judfovi pecujarubinë jumaitsi Jesúsjavabelia:

—Jesús, itsabelia poname, capënaponaenatsi cajena, jai judfovi pecujarubinë.

<sup>58</sup> Nexata Jesús jumaitsi bajaraponëjavabelia:

—Itsa nepënaponaejitsipame, apo napatabiabimë tsipae tajabota nenacuerævetabiabinexa. Tsipaji tajabo apo xainaenë. Namo pijamëthëanë xaina pepatabiabinexa pemajitabiabinexanua. Baratsui ata pematapenanë xaina. Itsiata bailsi jane xanë, Daxitajivi Pematapijinënë, itsajavabelia ata apo xainaenë, itsajota nacuerævetabiabijitsianë, jai Jesús.

<sup>59</sup> Bajaraxuacujinae Jesús jumaitsi icatsia itsanëjavabelia:

—Nepënaponare, jai Jesús.

Nexata bajaraponë jumaitsi:

—Tajatuxanenë, caeepatoyo abaxë necopare tamëthëtsinexa taxa petëpaenë, jai bajaraponë Jesúsjavabelia.

<sup>60</sup> Jesús nexata jumaitsi bajaraponëjavabelia:

—Copare matacabi apo peverevereæjava apo pexainaevinexa pemëthëcaenexatsi nijamonaemi itsa tëpa. Xamë saicaya nepënaponare jivi netsipaebinxaxa pacuenia Dioso evetsijitsia daxita pijajivi mapanacuataje, jai Jesús bajaraponëjavabelia.

<sup>61</sup> Bajaraxuacujinae icatsia itsanë jumaitsi Jesúsjavabelia:

—Tajatuxanenë, jitsipajë tacapënaponaæjava. Itsiata abaxë caeepatoyo necopare tanapëjiobinxaxa tajabota pejinavanapaevijavabelia, jai bajaraponë.

<sup>62</sup> Nexata Jesús jumaitsi bajaraponëjavabelia:

—Pajivi Dioso tonacuenebi ata, itsiata jamatabënajinabiaba pijaperujujamatatabëcuene, xua exanabiaba, bajarapajivi apo caëjëpaetsi xaniavaetsia Dioso petonacuenebinxaxa pitorobicueniatsi. Tsipaji najamatabëcueneepatajërëræcaeya nacueneba, jai Jesús bajaraponëjavabelia.

### **Pacuenia Jesús pijajivi itoroba, setenta ponëbeje, Dioso pejumelivaisi jivi petsipaebanajetarubenaenexa yabara pelivaisi**

**10** Jesús icatsia itsamonae itapeta pijajivinxaxa, setenta ponëbeje. Bajarapamonae Jesús itoroba anijanëbeje tsaponae Jesús pevajënaeya Dioso pejumelivaisi jivi petsipaebanajetarubenaenexa. Itoroba petsipaebanajetarubenaenexa daxita tomanëjava, tsiqiritomaraxijava ata, itsaxuayo Jesús najetarucæjitsia.

<sup>2</sup> Jesús pijajivi penaropobivajënae, Jesús jumaitsi pijajivijavabelia mapacueniaje:

—Xaniajanë pacuenia pacatsipaebijitsiatsi. Ayai pabi pexainaenë caecuenia uba ayaijava peubijava. Nexata baja itsa tonaveretatsi peubijava, caejiviyobeje ton-

tatsi. Nexata notsi ata, abaxë bitso ayaijava tosajinatsi penotsinexa. Bajara pijinia itsi jivi ata Diosojavabelia penajamatabëcuenecopabivinexa. Abaxë sajina ayabitsaëtoxaneto. Itsiata baitsi jane paxamë Dioso panetonacuenebivi pacaeviviyomëbeje saya. Bajaraxuata Diosojavabelia pavajëre icatsia Dioso pijajivi pematat-sënëa itsamonae pitorobinexa papecayavenonaenexa. <sup>3</sup>Paponare baja Dioso pejumelivaisi jivi panetsipaebanajetarubenaenexa. Panayajivitaeyajinavanapaename. Pacaitorobianatsi raja bitso pibisiacuene pexanabiabivijavabelia. Pacuenia ovejaji tsaiyaisi itsa jinavanapa pianaeapanaevi nevëthë tuatuajëata, bajarapaitsimë tsane. <sup>4</sup>Pëtsa pacapone itsacuenejava ata, doro ata, palata ata, zapato ata. Itsa pabajacobianame itsajivi namutoepatota, pëtsa bajayajebi pabarëcuaicuaijamë tsanunubena panenajematsiyanima. <sup>5</sup>Itsa pajonejitsiamë itsamonae pijaboyalía, panejonevajënaelia copiaya pajumaitsimë tsane Diosojavabelia: “Dioso, yavenonare mapabopijivije jamatabëcuenexanepanaeya pejinavanapaenexa,” pajamë tsane copiaya Diosojavabelia. <sup>6</sup>Bजारapabo pexainaenë itsa jitsipaena pejamatabëcuene xanepanaeyaexanaenexatsi Dioso, nexata bajaraponë jamatabëcuene xanepanaeyaexanaenatsi Dioso. Itsa apo muxujitsipae tsane bajarapacuenia panejumaitisijava, nexata Dioso apo jamatabëcuene xanepanaeyaexanae tsanetsi bajaraponë. <sup>7</sup>Itsajota papatabiabianame, caebota pamajitabianame. Pëtsa panatixitaponame itsaboxijavabelia. Aurajibia paxaeyabiabianamenua xua pacaabata bajarapabota. Pëtsa pauramë panexaejava papecarajutsijava yabara. Tsi-paji panetsipaebixae patacaitorobilivaisi, pacarajutsiana panexaejava. Tsi-paji itsajivi itsa tonacueneba itsanëjavabelia, barajutatsi pexaejava. <sup>8</sup>Itsa papatabiabianame tomarata, itsa pabota bajarapatomarapijivi xaniavaetsia pacacopiapita, nexata panaxaename xua pacaabata. <sup>9</sup>Bजारapatomarata pajamatejemayaexanaename pivitanevi. Pajumaitsimë tsane bajarapatomarapijivijavabelia: “Dioso daxita pijajivi pevetsimatacabinexa, imoxoyo baja pevajënae pecopiapatsinexa,” pajamë tsane. <sup>10</sup>Itsiata baitsi jane patomarata panepatsicujinae apo pacacopiapitsi tsane, bajarapatomarapijicallejavata panubenaename. Pajumaitsimë tsane bajarapatomarapijivijavabelia mapacueniaje: <sup>11</sup>“Panijatomarapijiatsapërë patataxuta rubena. Nexata panavetaxuvarëbajë. Bजारapacuenia panavetaxuvarëbajë panenayapëtaenexa Diosojavabelia pananeconitsijava. Pananeconitame Diosojavabelia. Tsi-paji apo panecopiapitsimë patanenamuxunaevetsinexamë palivaisi picani pacatsipaebijitsiatsi. Itsiata panenamuxunaevere paneyapëtaenexa mapalivaisije. Dioso daxita pijajivi pevetsimatacabinexa, imoxoyo baja pevajënae pecopiapatsinexa,” pajamë tsane. <sup>12</sup>Xaniajanë pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaiacuenia Dioso naneconitsiaexanaena patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodoma tomarapijivimi, bajarapaneconivajëto matatoxenetsia Dioso naneconitsiaexanaena patomarapijivi apo pacacopiapitsi tsane, jai Jesús pijajivijavabelia, setenta ponëbejejavabelia.

**Pacuenia Jesús jumaitsi patomarabejipijivi Dioso xuabijitsia infiernojavabelia apo pejumecovënëtsixaetsi yabara pelivaisi**

*(Mt 11.20-24)*

<sup>13</sup>Icatsia Jesús jumaitsi pijajivijavabelia, setenta ponëbejejavabelia:

—¡Bitso bejiobi tsane Corazín tomarapijivi! ¡Bitso bejiobi tsane Betsaida tomara-  
pijivi ata! Pini ICUENE Dioso pesaëta taexanaejavanë, xua itsajivi ata apo caëjê-  
paetsi pexanaenexa, bajarapatomarabejepijivi tae ata, itsiata apo nejumecovënëtsi.  
Apo copabi pibisiacuene pexanabiabijava. Apo najamatabëcuenepënëyorotsi Dioso-  
javabelia. Bajayata Tiro tomarapijivimi, Sidón tomarapijivimi ata, petuatuajëta  
bajarapitsipini ICUENE itsa tsitaexanaejitsipajë, nexata bajarapamonaemi copabijit-  
sipa pibisiacuene pexanaejava. Najamatabëcuenepënëyorotsipa Diosojavabelia. Ba-  
jarapamonaemi nexata pibisiacuene pexanaebiabineconi bitso yajamatabëcuenebë-  
jai tsipae. Nexata Diosojavabelia petsitanajamatabëcueneitajëtsinexa peyaja-  
matabëcuenebëjaijava pibisiacuene pexanabiabineconi, naxatabijitsipa piayopa-  
paëbërëjavanë. Enaëjitsipa irata. Ipumana ata natsimataothocaejitsipa bitso peyaja-  
matabëcuenebëjaixae pibisiacuene pexanabiabineconi. <sup>14</sup> Itsiata baitsi jane Corazín  
tomarapijivi, Betsaida tomarapijivi ata, tae ata pini ICUENE Dioso pesaëta taexanaeja-  
vanë, apo nejumecovënëtsi. Nexata pamatacabi Dioso naneconitsiaexanaena daxita  
pijaneconi pexainaevi, bajarapamatacabi bitso ayaiacuenia Dioso naneconitsiaex-  
anaenatsi. Paneconivajëtota bajayata Dioso naneconitsiaexana Tiro tomarapijivimi,  
Sidón tomarapijivimi ata, bajarapaneconivajëto matatoxenetsia Dioso bitso ayaiacue-  
nia naneconitsiaexanaena Corazín tomarapijivi, Betsaida tomarapijivi ata. <sup>15</sup> Caper-  
naum tomarapijivi picani najamatabëxaina Dioso pecaponaejavatsi athëbëabetsia.  
Itsiata baitsi jane bajarapamonaemi apo tanejumecovënëtsixae, Dioso xuabianatsi in-  
fiernojavabelia, jai Jesús Corazín tomarabeje Betsaida tomarabejepijivi yabara.

<sup>16</sup> Icatsia Jesús jumaitsi pijajivijavabelia, setenta ponëbejejavabelia:

—Pajivi pacanamuxunaevetsiana, bajarapajivi taenajë xanë tanenamuxunaevet-  
sijava. Pajivi pacanayajiviitavetsiana, bajarapajivi taenajë xanë tanenayajiviitavet-  
sijava. Bajarapajivi Dioso ata taenatsi Dioso penayajiviitavetsijava. Bajarapacuenia  
Dioso ata taenatsi penayajiviitavetsijava tsipaji xanë Dioso nitoroba, jai Jesús pija-  
jivijavabelia Jesús pijajivi setenta ponëbeje pitorobivajënaeya.

Nexata jane baja Jesús pijajivi naropoba. Dioso pejumelivaisi jivi tsipaebanaje-  
tarubena daxita tomanëjjava. Saicaya navecuanajetarubena anijanëbeje tsaponae.

**Pacuenia Jesús pijajivi, setenta ponëbeje, naviabanajetarubena,  
Dioso pejumelivaisi jivi daxitanacuanëjjava  
petsipaebanajetarubenaecujinae, yabara pelivaisi**

<sup>17</sup> Jesús pijajivi, setenta ponëbeje, Dioso pejumelivaisi jivi daxitanacuanëjjava pet-  
sipaebanajetarubenaecujinae, barëyaya naviabanajetarubena Jesúsjavaberena. Nex-  
ata pepatsicujinae bajarapamonaemi jumaitsi Jesúsjavabelia:

—Tajatuxanenë, dovathivi baja cajena itsa paitavetaponajë nevënëta, panejume-  
covënëtabiaba, jai bajarapamonaemi Jesúsjavabelia.

<sup>18</sup> Jesús nexata jumaitsi pijajivijavabelia:

—Xanë baja cajena taniji dovathi athëbëvetsica pejopaejavatsica pacuenia ya-  
maxë bajopaica. <sup>19</sup> Xanë baja cajena pacajamatabëcuene caëjêpaeyaexanatsi pa-  
pecacaëjêpaejamatabëcuene panejamatabëcuene matatoxenetsinexa vajavajabit-  
saënë dovathi. Nexata jomo pacuetsacuetsanae atamë tsane, aqueto ata pacuet-  
sacuetsanae atamë tsane, apo pacaitsacueniabi tsane. <sup>20</sup> Itsiata pëtsa bitso pa-  
sivajamatabëcuenebarëyamë dovathi itsa paitavetame papecajumecovënëtsijava.  
Bitso jane pasivajamatabëcuenebarëyamëre tsavanapae Dioso papijajivixamë

Dioso papecavënëyaquinarubijava athëbëtatsia, jai Jesús pijajivijavabelia, setenta ponëbejejavabelia.

### **Pacuenia Jesús jamatabëcuenebarëya yabara pelivaisi**

(Mt 11.25-27; 13.16-17)

<sup>21</sup> Jesús bitso jamatabëcuenebarëyayaexanatsi Espíritu Santo. Nexata Jesús jumaitsi paxa Diosojavabelia:

—Axa, nevetsinë athëbëtatsia. Nevetsinë mapanacuajava ataje. “Ayaijamatabëcuenenëmë bitso,” cajiatsi. Tspaji pamonae bitso apo penacujarubivi ata, yapëtaeyaexaname pacuenia itsamatacabi daxita nijajivi evetsijitsiamë mapanacuataje. Bajarapamonae yapëtaeyaexanaename pexanialivaisi, xanë talivaisi, palivaisi vecuamatayatame bitso peyapëtaevi mapanacuapijilivaisije. Bajarapalivaisi vecuamatayatame bitso penacujarubivi ata mapanacuapijicueene yabaraje. Bajarapacuenia exaname tspaji baja exaname nejitsipaecuenia, jai Jesús paxa Diosojavabelia pevajëtsijavata.

<sup>22</sup> Icatsia Jesús jumaitsi pijajivijavabelia, jivijavabelia ata:

—Taxa Dioso baja cajena netocopata tayapëtaenexa daxitacuene. Itsajivi ata apo nejamatabëcueneypëtae pacuenia xanë jamatabëcueneitsinë, Dioso pexënatonë. Caenë, taxa Dioso, nejamatabëcueneypëtane. Itsajivi ata apo jamatabëcueneypëtae pacuenia taxa Dioso jamatabëcueneitsi. Caenënë, xanë pexënatonë, jamatabëcueneypëtaniji pacuenia taxa Dioso jamatabëcueneitsi. Pamonae tojitsipajë tayapëtaeyaexanaenexa pacuenia taxa Dioso jamatabëcueneitsi, bajarapamonae ata yapëtaeyaexanaenajë, jai Jesús pijajivijavabelia, jivijavabelia ata.

<sup>23</sup> Nexata Jesús napënëyorota. Ēpijajivijavabelia jumaitsi:

—Paxamë baja pajamatabëcuenebarëyamë panetaexae pacuene baja pataeponame. <sup>24</sup> Xaniajanë pacuenia pacatsipaebijitsiatsi. Bajayata ayaibitsaëto profetavimi necopiaevetavanapa picani tanetaenexa tapatsijavatsica. Nacuaeetsivimi ata necopiaevetavanapa picani tanetaenexa tapatsijavatsica. Itsiata netaenejeva tapatsijavatsica, bajarapamonaemi tēpa baja. Jamatabëjumetaeyabiabanua picani palivaisianë baja aeconoxae paxamë pacatsipaebaponatsi. Itsiata apo jumetaenejeva bajarapalivaisinë, bajarapamonaemi tēpa baja, jai Jesús pijajivijavabelia.

### **Pacuenia pexaniajamatabëcuenenë, Samaria nacuapijinë, yavenona itsanë yabara pelivaisi**

<sup>25</sup> Itsamatacabi Jesús livaisi tsipaebanuca pijajivijavabelia. Nexata bajarajota judíovi pecujarubinë nonotapuna. Bajaraponë Jesúsjavabelia jamatabëcueneëjēbi-aya jumaitsi:

—Jesús, ¿detsa xua exanaenajë Dioso tanerajutsinexa matacabi apo peverevere-caejava? jai judíovi pecujarubinë.

<sup>26</sup> Nexata Jesús jumaitsi judíovi pecujarubinëjavabelia:

—¿Detsa jane jumaitsi bajarapacueene yabara bajayata Dioso Moiséspijinëta penajumecopatsilivaisi jivi pejumecovënëtsinexa? jai Jesús.

<sup>27</sup> Nexata judíovi pecujarubinë jumaitsi Jesúsjavabelia:

—Bajayata Dioso Moiséspijinëta penajumecopatsilivaisi jumaitsi mapacueniaje: “Daxita panejamatabëëthëtojavavetsina, daxita panejamatabëcueneta ata, daxita panesaëta ata, daxita panenajamatabëxainesaëta ata, pasivamëre panijatuxanenë

panijaDioso. Pasivamëre itsajivi ata pacuenia paxamë panijacuata panasivamë,” jai bajayata Dioso Moiséspijinëta penajumecopatsilivaisi, jai judíovi pecujarubinë Jesúsjavabelia.

<sup>28</sup> Nexata icatsia Jesús jumaitsi judíovi pecujarubinëjavabelia:

—Xaniavaetsia nejumecanaviatame. Bajarapacuenia exanapononare. Nexata pepacuenie xainaename matacabi apo peverevereceaevava, jai Jesús.

<sup>29</sup> Itsiata baitsi jane judíovi pecujarubinë bijiaya jumecovënëta bajarapalivaisi. Asivaya apo tae itsamonae ata. Bajaraxuata judíovi pecujarubinë matavëjêa jumaitsi Jesúsjavabelia:

—¿Detsa nexata pitsijivi asivanë tsane? jai judíovi pecujarubinë.

<sup>30</sup> Nexata icatsia Jesús jumaitsi judíovi pecujarubinëjavabelia mapacueniaje:

—Pebi namutua najetaruca Jerusalén tomaraverena. Naropota pepatsinexa Jericó tomaraberena. Nexata jivi pecaponaejava peyacajërëbabiabivi, bajaraponë epatua vaetabatsi. Daxita pecobecovë yacajërëtatsi. Penaxatabijavanëmi ata yacajërëtatsi. Nexata pinijicuenia conibabiatsi. Puenetabuatatsi picani petëpanuacuenaxa bajarajota. <sup>31</sup> Nexata bajarapanamutua sacerdotenë najetaruca, templobota penacuenebabiabinë. Nexata sacerdotenë bajaraponë itsa taeyabuata, matavaquetanucapona. Pona baja rovia. <sup>32</sup> Bajaraxuacujinae icatsia bajarapanamutua itsanë, templobota penacuenebabiabinë, najetaruca. Bajaraponë taenucajopa. Bajaraxuacujinae matavaquetanucapona. Pona baja icatsia rovia bajaraponë ata. <sup>33</sup> Bajaraxuacujinae icatsia bajarapanamutua Samaria nacuapijinë najetaruca. Nexata bajaraponë itsa taeyabuata, tsitabejiobitsi bitso. <sup>34</sup> Nexata bajaraponë cujilia. Vajënëvaëba aceiterata, vinorata yajava. Vajënëcëba papaëbërëpanaxita. Bajaraxuacujinae Samaria nacuapijinë pijaburrojumata buatsia. Nexata bajaraponë capona jivi pepatabiabiboyabelia. Bajarajota Samaria nacuapijinë eveta xaniavaetsia. <sup>35</sup> Meravia pitsijavata Samaria nacuapijinë itsa baja ponaejitsia itsabelia najetaruca, juta anijapalatanëbeje, bitso penamatamotsinëbeje. Matamota bajarapabo pexainaenë. Jumaitsi bajaraponëjavabelia: “Netoevetsianame maponëje. Itsa matamoverevereceaena, pematatsënëa nevetsimatamo, bajarapapalata icatsia caevëarena camatamotsianatsi,” jai Samaria nacuapijinë bo pexainaenëjavabelia, jai Jesús mapacueniaje judíovi pecujarubinëjavabelia.

<sup>36</sup> Bajaraxuacujinae judíovi pecujarubinëjavabelia Jesús yanijoba bajarapalivaisi yabara. Jumaitsi mapacueniaje:

—Pamonae, acueyabi ponëmaxëto, taeyabuata pecobecovë peyacajërëtsinëtsi. ¿Detsa ponë bajarapamonae yajuvënënë asivaya tane bajaraponë? jai Jesús.

<sup>37</sup> Nexata judíovi pecujarubinë jumaitsi Jesúsjavabelia:

—Ponë pitaxutotsoniataexae yavenona, bajaraponë asivaya tane, jai judíovi pecujarubinë Jesúsjavabelia.

Nexata Jesús jumaitsi judíovi pecujarubinëjavabelia:

—Ponare baja. Xamë ata bajarapacuenia asivaya itaxutotsoniataeyabiabianame itsamonae ata, jai Jesús judíovi pecujarubinëjavabelia.

### **Pacuenia Jesús jumaitsi Martabeje Maríabeje pijabota yabara pelivaisi**

<sup>38</sup> Jesús, pijajivi yajava, najetaruca pevajënaeyabelia. Nexata tomarayota pata. Bajarapatomarayota Jesús xaniavaetsia copiapitatsi petiriva, Martavënëva. Nexata Marta pijabota Jesús napata. <sup>39</sup> Marta pejuyapijiva xaina, Maríavënëva. Nex-

ata María eca Jesús pitabarata penamuxunaevetecaenexa Jesús petsipaebilivaisi. <sup>40</sup>Nexata Marta bitso jamatabëcueneenatsi penacuenabijava, Jesús pexaejavanexa ata pemitseaxanaenexa. Nexata Marta cujilia Jesús. Jumaitsi:

—Tajatuxanenë, tajuyapijiva netocopata caevanë taexanaenexa daxita xua exanaejitsianë. Itorobare taneyavenonaenexa, jai Marta Jesúsjavabelia.

<sup>41</sup>Nexata Jesús jumaitsi Martajavabelia:

—Marta, xamë bitso cajamatabëcueneena nexanaenexa daxita xuanë jamatabëexaname. <sup>42</sup>Caejava bitso xanepana nexanaenexa, tanenamuxunaevetsinexamë. María baja cajena tanenamuxunaevetecaexae tatsipaebilivaisi, catsuitapeta pexaniacuene daxitacuene matatoxenetsia. Nexata acuenebi itsajivi ata peyacajërëtsijavatsi tatsipaebilivaisi pejumetaejava, jai Jesús Martajavabelia.

### **Pacuenia Jesús pijajivi tsipaeba pacuenia Diosojavabelia vajëcaejitsia yabara pelivaisi**

*(Mt 6.9-15; 7.7-11)*

**11** Jesús vajëtabiaba Diosojavabelia. Nexata itsamatacabi, itsa baja Jesús najumevereta pevajëtsijava Diosojavabelia, Jesús pijajiviyajuvënë jumaitsi Jesúsjavabelia:

—Patajatuxanenë, panejumecujarubare pacuenia pavajëtabiabijitsianë Diosojavabelia. Pacuenia Juanpijinë jivibautisabinëmi jumecujarubabiaba pijajivi pacuenia vajëtabiabijitsia Diosojavabelia, bajara pijinia pacuenia xamë ata panejumecujarubare pavajëtabiabijitsianë Diosojavabelia, jai Jesús pijajiviyajuvënë.

<sup>2</sup>Jesús nexata jumaitsi pijajivijavabelia mapacueniaje:

—Itsa pavajëtabiabianame Diosojavabelia, pajumaitsimë tsabiabi tsane: Taxamë, athëbëtatsia neecaenë, jitsipajë pecayaiyataejava daxitajivi. Jitsipajë naxanitsiayo pecopiapatsijava daxita nijajivi nevetsijava mapanacuataje. Jitsipajë daxitajivi mapanacuata nejitsipaecuenia pecatoexanabiabijava, pacuenia baja athëbëtatsia nijajivi nejitsipaecuenia catoexanabiaba, bajarapacuenia pecatoexanavanapaenexa mapanacuapijivi ataje. <sup>3</sup>Caematacabi canacujitsia panerajure pataxaejavanexa pacuenia panamatavenonajë. <sup>4</sup>Panearajamatabëcuene xanepanarena nitabarata pibisiacuene pataxanaejava. Nexata panevecuaajibiaexanare pibisiacuene pataxanaeconi. Tsipaji paxanë ata itsamonae paxanëjavaberena pibisiacuene patanexanaejava pajamatabëcueneceavajë. Nexata pabarajamatabëcuenexanepanjë. Panevecuatsare dovathi patanepanatabëcueneëjëbiyaniva. Panecapanepare jane pibisiacuenevecua, pajamë tsane mapacueniaje itsa pavajëtabiabianame Diosojavabelia,

jai Jesús pijajivijavabelia.

<sup>5</sup>Icatsia Jesús pijajivijavabelia jumaitsi comparacióncuenia Jesús pijajivi peyapëtaenexa pacuenia vajëcabiabijitsia Diosojavabelia:

—Paxamëyajuvënë meravi tuatujëta ponaejitsipa bitso peyapëtaenëtsi pijaboyabelia. Nexata jumai tsipae: “Cacovaetatsi acueyabi papanbëyobeje. <sup>6</sup>Itsanë raja, taneyapëtaenë, tajëverena peponaenë, aeconoxae tajabota netopata. Nexata bitso pijajani. Itsiata xanë apo xainanë itsacuenejavayo ata pexaejava tarajutsinexa,” jai tsipae paxamëyajuvënë meravi tuatujëta peyapëtaenëtsijavabelia. <sup>7</sup>Nexata bo ënëverena bajaraponë jumepitsipatsi. Jumaitsi tsipae: “Nejamatabëitonotsipame. Baupa rabaja xaniavaetsia xatatanutajë. Taxi raja barëmaji-

tanucajē caecamata. Nexata acuenebi tanonotapunaejava tacarajutsinexa xua neva-jētame. Itsa nonotapunaejitsipajē, yaitavabijitsipajē taxi,” jai tsipae peyapētaenētsi. Itsiata baitsi jane bajaraponē perajutsinexatsi ajumesaēya vajēcaponaejitsipa. <sup>8</sup> Xaniajanē pacuenia pacatsipaebijitsiatsi. Bajaraponē apo jamatabēnonotapunaē ata, itsiata nonotapunaejitsipa perajutsinexa pecovaebijavatsi. Itsiata peyapētaenēx-aetsi, bajarapacuenia apo rajutsi tsipae. Biji rajane rajutsipa daxita pacuenia na-matavenona ajumesaēya pevajēcaponaexaetsi. <sup>9</sup> Xaniajanē pacuenia pacatsipaebi-jitsiatsi. Itsa cuenejavayo itsa pacatonaxuabijitsipa, nexata bajayajebi ata pajaitsi-pame matapania panecaxitajarabijavabelianexa. Bajara pijinia pacuenia bajayajebi ata pavajētabiabianame Diosojavabelia papecajumecovēnētsinexa. Bo ata itsa baupa xatatanuta, nexata asaēyata pabaupadocodotsipame matapania papecatobaupatsijavabelianexa. Bajara pijinia pacuenia asaēyata pavajētabiabianame Diosojavabelia papecajumecovēnētsinexa. <sup>10</sup> Bajarapacuenia asaēyata pavajētabiabianame Diosojavabelia. Tshipaji pajivi vajētabiaba, rajutabiabatsi. Pajivi ata jaitabiaba, caxi-tajarababiaba. Pajivi ata baupa docodocotabiaba, tobaupatabiabatsi, jai Jesús pija-jivijavabelia comparacióncuenia.

<sup>11-12</sup> Icatsia Jesús jumaitsi pijajivijavabelia:

—Paxamē papebijivimē, panexi panexainaevi. Panexēnatonēyo itsa pacavajēta panbē, apo panacoxirajutsimē tsipae iboto. Itsa pacavajēta dujuainēyo, apo panacoxirajutsimē tsipae jomo. Itsa pacavajēta vacaratobēto, apo panacoxirajutsimē tsipae aqueto. <sup>13</sup> Paxamē panejamatabēcuenebejevi ata, payapētaneme panenacoxirajutsinexa pexaniajava. Paneaxa, athēbētatsia peecaenē, bitso biji cajena pexania-jamatabēcuenenē paxamē matatoxenetsia. Bajaraponē pacarajutsiana pexaniacuenē itsa pavajētame. Bajaraponē rajutsiana Espiritu Santo daxita pamonaē vajētatsi, jai Jesús pijajivijavabelia.

**Pacuenia itsamonae Jesús yabara jamatabēcuenenavēxaniabiaya jumaitsi: “Beelzebú raja pesaēta Jesús dovathi jivivecua capitsapapona,” jai yabara pelivaisi**

*(Mt 12.22-30; Mr 3.20-27)*

<sup>14</sup> Pebi ponapona, dovathi pejamatabēcueneta apo penatsipaebinē. Nexata bajaraponē Jesús dovathi vecuacapitsapa. Pebi baja dovathi Jesús itsa vecuacapitsapa, natsipaeba baja. Jivibitsaētoxaneto petaevi bajarapacuenē, bitso jamatabēcuenenabenajaca. <sup>15</sup> Itsiata baitsi jane itsamonae fariseovi Jesús baracuaicuajaitsi pibisiacuenia.

—Maponē Jesúsje, dovathi jivivecua capitsapabiaba Beelzebú pesaēta. Beelzebú raja daxita dovathivi pepo penamatacaitorobinē, jai fariseovi jamatabēcuenenavēxaniabiaya Jesús yabara.

<sup>16</sup> Itsamonae icatsia fariseovi Jesús picani jamatabēcuenējēbiaya itorobatsi pini-jicuenē Dioso pesaēta pexanaejava Jesús petsitaexanaenexa. Bajarapacuenia picani itorobatsi fariseovi peyapētaenexa pepacuenē Jesús Dioso pitorobinēcuenetsitsica. <sup>17</sup> Itsiata Jesús jamatabēcueneyapētane pacuenia fariseovi sivanajamatabēxainatsi. Nexata fariseovijavabelia Jesús jumaitsi mapacueniaje:

—Nacaenacuapijivi ata itsa navecuanatsanaejitsipa penasivanavajabitsaētsinexa, nexata namataenetsia naverebiabijitsipa daxita bajarapamonae. Bajara pijinia pacuenia nacaemonae ata itsipae. Itsa navecuanatsanaejitsipa penasivanavajabit-

saëtsinexa, nexata namataenetsia naverebiabijitsipa nacaemonae ata. <sup>18</sup> Bajara pijinia itsipae dovathi ata. Dovathi jivivecua itsa capitsaponaejitsipa pijajivi, dovathivi, nexata bepijavajabitsaë taejitsipa pijajivi. Itsajamatabëcuene vecuaxainaejitsipa pijajivi. Pesaë ata apo xainaponae tsipae. Mapacuenia pacatsipaebatsije tsipaji paxamë xanë yabara apo pacanaëjëtsinejevamë jamatabëcuenenavëxaniabiaya pajumaitsimë: “Jesús raja dovathi jivivecua capitsapabiaba Beelzebú pesaëta,” pajamë xanë yabara. <sup>19</sup> Paxamë ata panijajivi dovathi jivivecua capitsapabiaba. Nexata xanë Beelzebú pesaëta dovathi jivivecua itsa capitsapabiabajë, ¿detsa nexata ponë pesaëta panijajivi ata dovathi jivivecua capitsapabiaba? Caenë rabaja Dioso pesaëta. Nexata panijajivi ata pacayapëtane bajarapacuenia jamatabëcuenenavëxaniabiaya panejumait sijava xanë yabara. <sup>20</sup> Espíritu Santo pesaëta xanë dovathi jivivecua capitsapabiabajë. Nexata baja picani jivi beyapëtane Dioso baja petaxuxubijava pijajivi pevetsijava paxamë tuatujëta, jai Jesús fariseovijavabelia.

<sup>21</sup> Fariseovi pecanaëjëtsinexa Jesús bitso piasaënëcuene dovathi matatoxenetsia, Jesús icatsia comparacióncuenia jumaitsi fariseovijavabelia mapacueniaje:

—Ponë bitso piasaënë, aitatsacaya pijanae cobenaevetabijitsipa pijabo, itsamonae peyacarëjëtsiyanivatsi pecobecovë. Nexata daxita pecobecovë xaniavaetsia tobobenaejitsipatsi, jai Jesús dovathi pijajivi pevetsijava yabara.

<sup>22</sup> Icatsia Jesús pijacuata nayabarajumaitsi mapacueniaje:

—Itsiata baitsi jane itsa najetarucaejitsipa itsanë bitso piasaënë boxainaenë mata-toxenetsia, nexata cueneamoneyabijitsipatsi. Aitatsacaya pijanae cobenaevetabiabi ata tsipae, itsiata vecuapitsipatsi pijanae, daxita pecobecovëjavaxi yajava, nayabara-jai Jesús pijacuata comparacióncuenia dovathi pejamatabëcueneamoneyabijava yabara.

<sup>23</sup> Icatsia Jesús jumaitsi fariseovijavabelia:

—Pajivi apo neyavenonaeyacaetuatsi jivi Dioso pijajivinexa, bajarapajivi beta-javajabitsaëjivi. Tsipaji apo taneyavenonaeyacaetuatsixae, jivi nevecuanacayajata Dioso picani pejumecovënëtsiviminexa, jai Jesús fariseovijavabelia.

**Pacuenia dovathi jivitonë pevejamatabëpitsapaecujinaetsi, icatsia naviarena pecovëyaberena petsijamatabëcaenexatsi icatsia yabara pelivaisi**

*(Mt 12.43-45)*

<sup>24</sup> Icatsia Jesús jumaitsi fariseovijavabelia:

—Dovathi itsa vejamatabëpitsapa jivitonë, nexata dovathi jinaruta petseviranëjava. Jaitapona itsanëjavabelia petsijamatabëjonenexa dovathi penacueravetsinexa bajaraponëjavata. Itsa apo caxitajarabi, ponëjavabelia tsijamatabëjonejitsia, nexata dovathi jamatabëjumaitsi: “Naviatsianajë meta icatsia tajabomijavabelia, paboverena pitsapajë,” jamatabëjai dovathi, ponëjavaverena pitsapa icatsia petsijamatabëjonexatsi. <sup>25</sup> Dovathi baja caevëa itsa naviarena, caxitajaraba peyjavaponaponaenëmitsi. Nexata peyjavaponaponaenëmitsi pejamatabëëthëto, dovathi tane bepënësjainecaëbo, bepënëxaniavaetetsibo, bepiracajuetetsibo. <sup>26</sup> Nexata dovathi icatsia sivapona peyjavapatsinexarena itsadovathivi, siete ponëbeje. Bajarapadovathivi bitso piacujirubejevi copiaya padovathi matatoxenetsia. Daxita bajarapadovathivi pebi tsijamatabëjunuatsi peyjavaponaponaenexa. Belia jane baja pebi dovathivi bitso bejiobiaexanatsi. Copiaya abaxë caenë itsa tsijamatabë-



catsi pacuenia bejiobiaexanabiabatsi, matatoxenetsia bejiobiaexanatsi, jai Jesús fariseovijavabelia.

**Pacuenia Jesús tsipaeba xua yabara jivi jamatabëcuenebarëya yabara pelivaisi**

<sup>27</sup> Itsa abaxë Jesús livaisi tsipaeba fariseovijavabelia, petiriva bajarapajivi bitsaëtoخانetoyajuvënëva pinijijumeta vavajai tsaxuabi. Jumaitsi Jesúsjavabelia:

—Jamatabëcuenebarëya baja cajena ena, pecanavitaniabiva, pecavitsatsiva! jai petiriva Jesúsjavabelia.

<sup>28</sup> Nexata Jesús jumaitsi bajarapovajavabelia:

—Xaniajamë rabaja. Itsiata baitsi jane pamonaë jumetane Dioso pejumelivaisi, nexata itsa jumecovënëta bajarapalivaisi, bajarapamonaë jane bitso jamatabëcuenebarëya tsavanapae taena matatoxenetsia, jai Jesús petirivajavabelia.

**Pacuenia pibisijamatabëcuenevi Jesús picani itorobatsi Dioso pesaëta pinijicuene pexanaejava petsitaexanaenexa yabara pelivaisi**

*(Mt 12.38-42; Mr 8.12)*

<sup>29</sup> Jivi ayaibitsaëtoخانeto Jesús itsa matatoyorotsia nacaetuatatsi, nexata Jesús jumaitsi:

—Pamonaë aeconoxae jinavanapa, bitso pibisijamatabëcuenevi. Bajarapamonaë picani nitoroba Dioso pesaëta pinijicuene taexanaejava tatsitaexanaenexa, taneyapëtaenexa Dioso pepacuene athëbëvetsica taneitorobinëcuenetsica. Itsiata baitsi jane Dioso pesaëta pinijicuene taexanaejava, apo tsitaexanaenë tsane. Bajayata pacuenia Diosojumepaëbinëmi profeta Jonáspijinë exanatsi, bajara ëpitsicuene taneexanaejava, tsitajëtsianajë. <sup>30</sup> Bajayata daxita Nínive tomarapijivi yapëtane profeta Jonáspijinë Dioso pitorobinëcuenetsi. Tsipaji ayaicuene exanatsi Dioso. Bajara pijinia pacuenia xanë ata, Daxitajivi Pematapijinënë, pinijicuene Dioso nexanaena. Nexata daxita pamonaë aeconoxae jinavanapa, neyapëtaena pepacuene Dioso athëbëvetsica taneitorobinëcuenetsica. <sup>31</sup> Itsamatacabi copiapatsiana Dioso penaneconitsiaexanaematacabinexa daxita pijaneconi pexainaevi. Bajarapamonaë nubianatsi Dioso pitabarata. Nexata bajarapamatacabi bajayata povami ponapona, Saba nacuapijivimi pevetsivami, nonotapunaena. Nexata bajarapova Diosojavabelia neconitsiana pamonaë aeconoxae jinavanapa, Dioso apo pejumecovënëtsivi. Bajarapova neconitsiana tsipaji bajayata bajarapovami tajë nacuataverena ata muxunanajetaruca pejumetaenexa Salomónpijinë, bitso daxitalivaisi peyapëtaenëmi, petsipaëbilivaisi. Xanë raja majotaje ponaponajë, bitso ayaijamatabëcuenenënë Salomónpijinëmi matatoxenetsia. Itsiata baitsi jane pamonaë aeconoxae jinavanapa mapanacuataje, apo nenamuxunaevetsi. Bajaraxuata ayaineconi xaina Diosojavabelia, jai Jesús.

<sup>32</sup> Icatsia Jesús jumaitsi jivi ayaibitsaëtoخانetovjavabelia:

—Bajayata Nínive tomarapijivi itsa jumetane Dioso pitorobilivaisi, Jonáspijinë petsipaëbilivaisi, copaba pibisiacuene pexanaejava. Najamatabëcuenepënëyorota Diosojavabelia. Pamatacabi copiapatsiana Dioso penaneconitsiaexanaematacabinexa daxita pijaneconi pexainaevi, bajarapamatacabi Nínive tomarapijivimi ata nonobapunaena Diosojavabelia peneconitsinexa pamonaë aeconoxae jinavanapa, Dioso apo pejumecovënëtsivi. Tsipaji xanë majota ponaponajë bitso ayaijamatabëcuenenënë Jonáspijinëmi matatoxenetsia. Itsiata baitsi

jane pamonaē aeconoxae jinavanapa mapanacuataje, tsipaebi atanē Dioso pejumelivaisi, apo najamatabēcuēnepēnyorotsi pibisiacuene pexanaejavavecua. Bajaxuata Dioso naneconitsiaexanaenatsi bajarapamonaē, jai Jesús jivi ayaibitsaētoxanetojavabelia tajēvelia pevajunupaebijavata itsamatacabi Dioso jivi penaneconitsiaexanaejavanexa.

### **Pacuenia vajaitaxuto belámparabē yabara pelivaisi**

*(Mt 5.15; 6.22-23)*

<sup>33</sup>Icatsia Jesús jumaitsi jivibitsaētoxanetojavabelia:

—Itsajivi ata lámparabē pitanojotsicujinaē, apo mataacatetsi itsacuenejavata. Cajoniēñēalia ata apo etsi lámparabē. Biji rajane athēbēyo etsia. Jivi boyaberena pejonevi tsivajēnaeitayotecaejitsia. <sup>34</sup>Lámparabē boēnēta itayoteca xaniavaetsia vajataenexa. Bajara pijinia itsi paneitaxuto ata. Paneitaxutoxanepanaexae, xaniavaetsia panatsivajēnaetaneme. Itsa paitaxutobejemē tsipae, nexata xaniavaetsia apo panatsivajēnaetaemē tsipae. Pacatsitaaitaquiri saya tsipae. Bajara pijinia itsi panejamatabēcuene ata. Dioso itsa pacajamatabēcueneitayota, pajitsipaenane paneexanabiabinexa pacuenia Dioso pacaitoroba. Nexata xaniavaetsia pajinavanapaenane. Itsa panajamatabēxainaejitsipame bitso panexainaejava ēpaxamēnēxa, nexata bitso pajamatabēcueneitaquirimē tsipae. <sup>35</sup>Panayajivitaema xua panajamatabēxainabiabame, papecajamatabēcuene aitaquiriyaexanaeyaniva. <sup>36</sup>Itsa paexanavanapaenane pacuenia Dioso pacaitoroba, nexata pacajamatabēcueneitayotsiana Dioso. Tsiquirijavayo ata apo aitaquiri tsane panejamatabēcuene. Nexata pacuenia lámparabē daxita boēnē xaniavaetsia itayoteca pecotiata, bajara pijinia pacuenia paxamē ata pacajamatabēcueneitayotsiana Dioso, jai Jesús jivi ayaibitsaētoxanetojavabelia.

### **Pacuenia Jesús tsipaeba fariseovijavabelia, judíovi pecujarubivijavabelia ata, pacuenia bajarapamonaē naneconita Diosojavabelia yabara pelivaisi**

*(Mt 23.1-36; Mr 12.38-40; Lc 20.45-47)*

<sup>37</sup>Itsa baja Jesús najumevereta livaisi petsipaebijava, nexata fariseonē junatatsi Jesús penanabaninexa fariseonē pijabota. Jesús nexata najoneya fariseonē pijaboyalia. Naeca mesa muxuneneta penanabaninexa. <sup>38</sup>Fariseonē ita tane Jesús penabanijava anijatonē nacobequiatsinejeva, fariseonē jamatabēcuenenabenajaca. Pacuenia daxita judíovi pijacuenia anijatonē nacobequiatabiaba penabanivajēnaē, apo itsi Jesús. <sup>39</sup>Nexata Jesús jumaitsi fariseovijavabelia:

—Paxamē pafariseovimē panecaxaejavajēnaē plato, taza ata, naniavelia ba paquiatame xaniavaetsia panijacuenia. Tsipaji jamatabēcuēnavēxaniabiaya pajamatabējumaitsimē tsabiabi: “Itsa caxaejitsipajē xaniavaetsia quiatsinejevanē, Diosojavabelia naneconitsipajē,” pajamatabējamē tsabiabi. Bajarpacuenia paquiatabiabi atamē xaniavaetsia panecaxaejavanēnēxa papecajamatabēcuene bijianaeyaniva picani, itsiata pananeconitaponame Diosojavabelia. Tsipaji bajarapacuenia paquiatabiabi atamē, caranata panejamatabēēthētota panajamatabēxainabiabame pibisiacuene. Panajamatabēxainabiabame itsanē pecobecovē paneyacajērētsinexa. Panajamatabēxainabiabamenua paneexanaenexa pibisiacuene ata. <sup>40</sup>¡Apo paneyapētaevi baja rovia! Dioso cajena pexanaenē daxitacuene. Dioso baja cajena pacaperabēexana. Pacajamatabēēthēexananua. <sup>41</sup>Pejanajamatabēcuene ita paxainaejitsipame, nexata pexaniacuene patoexanabiabijitsipame itsamonae-

javabelia. Daxita xua ata papecajamatabëcuene bijianaeyaniva, pajanijunavame panexaeyaniva, xua ata pacobejunavame panejayatsiyaniva, apo pacatsitapibisiacuene tsipae, jai Jesús fariseovijavabelia.

<sup>42</sup> Icatsia Jesús jumaitsi fariseovijavabelia:

—¡Paxamë pafariseovimë ayaineconi panatsixainame Diosojavabelia! Panenacanabijava diez xuabejeyajuvënëjava, caejavayo, parajutabiabame ofrendacuenia Diosojavabelia. Daxitaviria paneubijavaxi ata diez xuabejeyajuvënëjava, caejavayo, parajutabiabame ofrendacuenia Diosojavabelia. Xanepana baja picani bajarapacuenia panerajutabiabijava Diosojavabelia. Itsiata bajarapacuenia parajutabiabi atamë, pepacuene apo pajitsipaemë Dioso. Bajaraxuata pananeconitame Diosojavabelia. Pananeconitamenua Diosojavabelia tsipaji pacuene ata picani xanepana panetoexanabiabinexa itsamonaejavabelia, apo pasivanajamatabëxainamë. Bajaraxua picani paxamë bepanajamatabëxainame panetoexanabiabinexa itsamonaejavabelia, jai Jesús fariseovijavabelia.

<sup>43</sup> Icatsia Jesús jumaitsi fariseovijavabelia:

—¡Paxamë pafariseovimë ayaineconi panatsixainame Diosojavabelia! ¡Tsipaji bepaayaijamatabëcuenevimë panataeyabiabame! Judíovi penacaetuatabiabinëjava itsa panajoneyabiabame, pajitsipabiabame paneenaenexa peyayataevitsi penaenexa petsinubijavanëta. Pajitsipabiabamenua jivi papecabajacobinexa callejava bitso yayataeya, jai Jesús fariseovijavabelia.

<sup>44</sup> Icatsia Jesús jumaitsi judíovi pecujarubivijavabelia, fariseovijavabelia ata:

—¡Paxamë judíovi panecujarubivi, paxamë ata pijinia pafariseovimë, ayaineconi panatsixainame Diosojavabelia! Paxamë itajara jivi bepatsita pexaniajamatabëcuenevimë tsabiabi pibisiajamatabëcuene panexainaevi ata. Pacuenia itsamona pona jivi pemëthëanë matatsënëa apo peyapëtaexae xua xaina bëpënëareca, bajara pijinia itsi pamona pacayaiyatane apo peyapëtaexae pacuenia pajamatabëcuenebejemë bëpënëa. Bajarapamonae pacayaiyatane tsipaji apo yapëtae bajarapamonae bëpënëa paneajamatabëcuenebejeyava, jai Jesús judíovi pecujarubivijavabelia, fariseovijavabelia ata.

<sup>45</sup> Nexata bajarapacuenia Jesús pejumaitsijavata, judíovi pecujarubiviyajuvënëne jumaitsi Jesúsjavabelia:

—Jesús, itsa mapacuenia jumaitsimëje, paxanë yabara ata pibisiacuenia jumaitsimë, jai Jesúsjavabelia judíovi pecujarubiviyajuvënëne.

<sup>46</sup> Jesús nexata jumaitsi judíovi pecujarubinëjavabelia:

—¡Paxamë ata, judíovi panecujarubivi, ayaineconi panatsixainame Diosojavabelia! Palivaisianë ayapëbeje itsajivi ata pejumecovënëtsinexa, bajarapalivaisianë jivi patsipaebabiabame pejumecovënëtsinexa. Bajarapalivaisianë patsipaebabiabi atamë itsamona pejumecovënëtsinexa, paxamë itsiata apo panajamatabëxainamë paneexanaenexa bajarapacuenia, jai Jesús judíovi pecujarubinëjavabelia.

<sup>47</sup> Icatsia Jesús jumaitsi judíovi pecujarubivijavabelia:

—¡Paxamë judíovi panecujarubivi, ayaineconi panatsixainame Diosojavabelia! Bajayata pamatacabi jinavanapa panijasalinaivimi, beyaxuababiaba Diosojumepaebivimi profetavi. Nexata juya paxamë bajarapaprofetavimi pemëthëanëjumavereca bonë paexanajebame, jivi itsa tane bajarapabonë, penajamatabënapiabiabinexa bajarapaprofetavimi. <sup>48</sup> Bajarapacuenia paneexanaexae, pacuenejëpame bajayata panijasalinaivimi pexanaecuene. Panijasalinaivi bajayata beyaxuababiaba

profetavimi. Nexata juya paxamë bonë paexanajebame bajarapaprofetavimi pemëthëanëjumavereca, jai Jesús judíovi pecujarubivijavabelia.

<sup>49</sup> Icatsia Jesús jumaiti judíovi pecujarubivijavabelia:

—Bajarapacuenia paneexanaejavanexa yabara, daxitacuene Dioso peyapëtaenëxae, bajayata tajëvelia jumaiti paxamë yabara mapacueniaje: “Bajarapamonaejavabelia toitorobianajë profetavi. Toitorobianajënuua apóstolevi ata. Bajarapamonae itsiata beyaxuababiabiana tatoitorobiviyajuvënëvi. Bejioabiaexanabiananua tatoitorobiviyajuvënëvi,” jai baja cajena bajayata tajëvelia Dioso bajarapacuenia paxamë paneexanaejavanexa yabara. <sup>50</sup> Dioso baja cajena nacua pexanaejavaveliacujinae, panijasalinaivimi beyaxuabapona profetavimi. Nexata bajarapaneconi yajava paxamë pananeconitame Diosojavabelia. Nexata bajarapaneconi yajava Dioso pacananeconitsiaexanaena, paxamë aeconoxae mapamatacabitaje panejinavanapaevi. <sup>51</sup> Panijasalinaivimi profetavimi pebeyaxuabaponaeva, taxuxuaba Abelpijinëta. Bajaraxuacujinae icatsia pevajënaeyabelia beyaxuabapona itsaprofetavimi ata. Nexata bexëajavaberena ata icatsia panijasalinaivimi beyaxuaba Zacaríaspijinëmi. Zacaríaspijinëmi panijasalinaivimi beyaxuaba templobopanabota, baitsi templobobeje altavënëjavabeje petuatuajëta. Xaniajanë pacuenia pacatsipaebijitsiatsi. Nexata bajarapaneconi yajava Dioso pacananeconitsiaexanaena paxamë, aeconoxae mapamatacabitaje panejinavanapaevi, jai Jesús judíovi pecujarubivijavabelia.

<sup>52</sup> Icatsia Jesús jumaiti judíovi pecujarubivijavabelia:

—¡Paxamë judíovi panecujarubivi, ayaineconi panatsixainame Diosojavabelia! “Vaxaitsi xaniavaetsia Dioso pejumelivaisi yapëtanetsi,” pajamatabëjamë tsabiapi picaní. Itsiata baitsi jane apo payapëtaemë. Saicayalivaisi Dioso pejumelivaisivecua jivi patsipaebabiabame. Pacuenia bo baupaxatata jivi pejoneyaniva, bajara saya pacuenia paxamë paexaname jivijavabelia. Nexata itsamonae jitsipae ata pejonejava picaní Dioso pijanacuayabetsia, paxamë saicayalivaisi panetsipaebabiabixae, apo pacopatsimë pejonenexa Dioso pijanacuayabetsia. Paxamë ata apo pajitsipaemë panejonenexa Dioso pijanacuayabetsia, jai Jesús judíovi pecujarubivijavabelia.

<sup>53-54</sup> Bajarapacuenia Jesús pejumaitisicujinae, pitsapa baja bovecua. Bajaraxuacujinae judíovi pecujarubivi, fariseovi yajava, Jesús itoyatsi. Nexata jamatabëitonotabiabatsi. Jamatabëcueneëjëbiaya livaisi yanijobabiabatsi. Nexata Jesús bijiaya itsa jumecanaviata, bajarapalivaisi yabara peneconitsinexatsi picaní nacuaevetsinëjavabelia.

### **Pacuenia Jesús tsipaeba jivi pejumecovënëtsiyaniva fariseovi patsipaebilivaisitsi yabara pelivaisi**

**12** Penacaetuataponaevavata jivi pepo ayaibitsaëtoxfaneto cajena tsaponae, baitsi miles pajivibeje. Nexata jivi nataxucuetatabaxuabapona. Nexata Jesús pijajivijavabelia copiaya tsipaeba livaisi, pejumecovënëtsiyaniva fariseovi itsa tsipaebatsi saicayalivaisi Dioso pejumelivaisivecua. Jesús pijajivijavabelia jumaiti mapacueniaje:

—Xania panayajivitaema fariseovi pijalevadurayaniva. “Levadura,” itsa janë, peyamaxëtojobilivaisi yabara pacajumaititsi. Fariseovi raja bepacatsita pexaniajamatabëcuenevi itajara tsane, pibisiajamatabëcuene pexainaevi ata. <sup>2</sup> Daxita abaxë palivaisianë jivi aeconoxae apo yapëtae, bajarapalivaisianë itsamatacabidaxita-

jivi yapëtaeponaena xaniavaetsia. Pibisiacuene muetsia itsajivi pexanaejava ata, itsamatacabi xaniavaetsia yapëtaena daxitajivi. <sup>3</sup>Xua ata muetsia pavajunupaebame meravi, bajaraxua ata, itsamatacabi itsajivi vajunupaebiana matacabita daxitajivijavata. Xua ata pënëyatuucutsiboënëta baupa xatatsiaya muetsia vëpaxapaxajaiya pavajunupaebame, bajaraxua ata itsamatacabi itsajivi pinijijumeta vajunupaebiana jivi penacaetuatsijavata, jai Jesús pijajivijavabelia.

**Pacuenia Jesús tsipaeba pijajivi pecujunaviyaniva jivivevi yabara pelivaisi**

*(Mt 10.26-31)*

<sup>4</sup>Icatsia Jesús jumaitsi pijajivijavabelia:

—Tajamonae, pacatsipaebijitsiatsi. Pëtsa pacujunavame jivivevi ata. Bajarapamonae pacabayaxuabi ata tsipae, acuenebi matavëjëa papecaitsacueni-abinexa. <sup>5</sup>Biji rajane pacatsipaebijitsiatsi panecujunavinexa Dioso. Tsipaji Dioso cajëjëpatsi papecaxuabinexa infiernojavabelia papecabeyaxuabicujinae, jai Jesús pijajivijavabelia.

<sup>6</sup>Icatsia Jesús jumaitsi pijajivijavabelia:

—Cinco ponëbeje baratsui saya namatamota anijapalatanëyobeje. Tsipaji amatomobi. Bajarapacuenia amatamobi ata, itsiata caenëyo ata Dioso apo nacofënëtsi bajarapabaratsuiyajuvënënë. <sup>7</sup>Paxamë rabiji bitso Dioso pacaasiva baratsui mata-toxenetsia. Tsipaji panamatamotame baratsui matatoxenetsia. Dioso bitso papecaasivaxae, panematanatoxi ata, caematanatoyo canacujitsia, Dioso baja cajena namatajëjëta. Bajaraxuata pëtsa pacujunavame itsacuenëjava ata, jai Jesús pijajivijavabelia.

**Pacuenia Jesús pijajivi apo benayavajunuaxainae  
Jesús pijajivicuene yabara pelivaisi**

*(Mt 10.32-33; 12.32; 10.19-20)*

<sup>8</sup>Icatsia Jesús jumaitsi pijajivijavabelia:

—Pacatsipaebijitsiatsi raja. Daxita pamonaë tajajivi, jivi pitabarata navajunupaebiana tajajivicuene. Bajarapamonae juya xanë, Daxitajivi Pematapijinënë, vajunupaebianajë tajajivicuene Dioso pijaängelevi pitabarata. <sup>9</sup>Pamonae jumai tsane itsamonaëjavabelia: “Xanë cajena Jesús apo pijajivitonënë,” jai tsane, bajarapamonae yabara juya xanë, jumaitsinë tsane: “Mara pamonaë cajena apo tajajivije,” janë tsane Dioso pijaängelevi pitabarata, jai Jesús pijajivijavabelia.

<sup>10</sup>Icatsia Jesús jumaitsi pijajivijavabelia:

—Pajivi pibisiacuena nebaracuaicuaijai ata, xanë, Daxitajivi Pematapijinënë, bajarapaneconi yabara itsa navajëta Diosojavabelia, itsiata vecuaajibiaexanaetsi Dioso. Itsiata baitsi jane pajivi pibisiacuena baracuaicuaijai Espíritu Santo, bajarapajivi bajarapaneconi Dioso apo vecuaajibiaexanaetsi tsane, jai Jesús pijajivijavabelia.

<sup>11</sup>Icatsia Jesús jumaitsi pijajivijavabelia:

—Itsa pacacaponaelia tomaraevetsivijavabelia, judíovi penacaetuatabi-abibojavabelia ata, papecayanijobinexa, pëtsa pajamatabëcuenebëjamë panenayajivicuaicuaijajavanexa yabara. <sup>12</sup>Tsipaji raja bajarapaepatota, Espíritu Santo pacacuaicuaijajiaexanaena pacuenia panayajivicuaicuaijamëjitsia, jai Jesús pijajivijavabelia.

**Pacuenia Jesús jivi livaisi tsipaeba bitso pesivanajamatabëxainaeayaniva  
ayaijava pexainaejava pexainanexa yabara pelivaisi**

<sup>13</sup> Jivi ayaibitsaëttoxanetoyajuvënëne jumaitsi Jesúsjavabelia:

—Jesús, taxapijinë picani petëpaevajënae netocopata pevënamuto tapitsinexa pecobecovëyajuvënëjavanë. Nexata tamatapijinë pita bajaraxuanë. Nexata itorobare tamatapijinë tanerajutsinexa taxapijinë tanerajutsiapaebijavanë, jai bajaraponë Jesúsjavabelia.

<sup>14</sup> Nexata jumaitsi bajaraponëjavabelia:

—Itsajivi ata cajena apo nitorobi jueznëxanë, tananeconitsiaexanaenexa ponë naneconita. Itsajivi ata cajena apo nitorobi axapijinë pecobecovë patacatsicobet-satsinexabeje, jai Jesús.

<sup>15</sup> Nexata icatsia Jesús jumaitsi daxitajivijavabelia:

—Xania pataema. Pëtsa bitso panajamatabëxainame ëpaxamënexa ayaijava panexainanexa. Tsipaji jivi pexainaejava ayaijava xainae ata tsipae, bajarapamonae pexainaejava yabara jamatabëcuenexanepanaeya apo jinavanapae tsipae, jai Jesús.

<sup>16</sup> Nexata Jesús tsipaeba livaisi bajarapamonaejavabelia mapacueniaje:

—Ponapona bitso riconë. Pijapabianë tocapitsapabiabatsi ayaijava pexinaeacuenë. <sup>17</sup> Riconë nexata jamatabëjumaitsi: “¿De meta pacuenia exanaenajë? Netoajibi baja rovia taetaponaejavabelianexa taubijava,” jamatabëjai riconë. <sup>18</sup> Riconë nexata icatsia jamatabëjumaitsi: “Yapëtaniji rajane baja pacuenia exanaejitsianë. Paboxita jebabiabajë taubijava, penetsianicajë taexanaenexa icatsia ayaiboxanetonë bajarapacovëta. Bajarapaboxanetonëta jane baja jebianajë daxita taubijava, daxita tacobecovë yajava. <sup>19</sup> Nexata baja xainanajë bajayajebinexa daxitacuene xua namatavenonajë. Nexata jane baja xuacujinae nacueraevetsianajë. Pexaniacuene nabanebiabianajë. Pexaniaviriaranënu matavëjëa apaeyabiabianajë taitajibinexa. Nexata barëyanë tsabiabi tsane,” jamatabëjai riconë. <sup>20</sup> Nexata bajarapaepatota Dioso jumaitsi riconëjavabelia: “Apo neyapëtaenë baja rovia xamë. Ajena baja, mapameravitaje, tëpaename. ¿Jipatsa nexata nevënamuto pitsiana daxita nexaniavaetejebijavanëmi?” jai Dioso riconëjavabelia, jai Jesús mapalivaisije daxitajivijavabelia.

<sup>21</sup> Icatsia Jesús jumaitsi bajarapamonaejavabelia:

—Bajara pijinia pacuenia paxamëyajuvënëvi ata tocopiapatsianatsi pamonaeyaijava natocaetuatapona ëpamonae pexainanexa. Bajarapamonae itsiata pepacuenë bepejiobivi tsane Diosojavabelia, jai Jesús bajarapamonaejavabelia.

**Pacuenia Dioso pijajivi eveta mapanacuataje yabara pelivaisi**

(Mt 6.25-34)

<sup>22</sup> Jesús nexata jumaitsi pijajivijavabelia:

—Xaniajanë pacuenia pacatsipaebijitsiatsi. Pëtsa pasivanajamatabëxainame ëpanexaejava panevënaninavanapaenexa. Pëtsa pasivanajamatabëxainamenua ëpanexatabijavanexa ata. <sup>23</sup> Apo jinavanapaetsi cajena ëvajaxaejavanexa. Apo jinavanapaetsinua ëvajanaperabëxatabinexa. <sup>24</sup> Pacanaëjere pacuenia barsui apo ubi pexaejavanexa. Apo notsinua penaveretaponaejava. Apo xainanua penaveretaponaejava peetsibonexa. Itsiata Dioso rajutabiabatsi pexaejavanexa. ¡Paxamë rabiji

bitsoyo Dioso pacaasiva baratsuimonae matatoxenetsia papecarajutsinexa daxita xua panamatavenoname! Bajaraxuata pëtsa pasivanajamatabëxainame ëpanexaejavanexa, ëpanenaxatabijavanexa ata. <sup>25</sup> ¿Detsa jane ponë paxamëyajuvënëne caëjëpatsi pijacujiruta medio metrocuenia matavëjëa penavitsabiaexanaenexa? Ajibi. Bitso jamatabëbëjai ata tsipae pevitsabinexa, itsiata apo navitsabiaexanae tsipae pijacujiruta. Nexata saya najamatabëcuenecueratsipa pejamatabëcuenebëjaijava penavitsabiaexanaejavanexa. Tsipaji apo tonamatamotsitsi bajaraxua. <sup>26</sup> Bajara pijinia pacatoitsi paxamë ata daxita xua pasivajamatabëcuenebëjamë. Apo pacatonamatomtsi. Bajaraxuata apo bepajamatabëcuenebëjamë itsacuenejavayo ata yabara, jai Jesús pijajivijavabelia.

<sup>27</sup> Icatsia Jesús jumaitsi pijajivijavabelia:

—Pacanaëjère pacuenia bitso pexaniamatono pitsapa, mapamatonoje. Bajarapamatono apo natsijumanacuenebi. Penaxatatsijavanexa ata apo natoexanae. Bajayata nacuaevevsinë Salomónpijinë bitso pexainanenëmi. Naitabëtsiaya naxatababiaba bitso pexaniavirijavanë. Itsiata baitsi jane Salomónpijinë penaitabëtsijava matatoxenetsia bitso aitabë mapamatonotoxije. <sup>28</sup> Paxamë, bevelia Dioso panejume-covënëtsivi, asaëya bepajumecovënëtame Dioso papecaevetsijava. Ajena pitsijavata vayafota tanetsi pexaniaponamatonotoxi. Bajaraxuacujinae, caematacabibejucujinae, tajuatsi baja bajarapaponamatonotoximi. Pacuenia Dioso aitabëyaexana ponamatonotoxi, bajara pijinia pacuenia paxamë ata itsamatacabi Dioso pacaxatabiana piatabëjava. <sup>29</sup> Bajaraxuata pëtsa pasivanajamatabëxainavanapame ëpanexaejavanexa, ëpanematavëjëaapaejavanexa ata. Biji rajane pajumecovënëtavanapare Dioso. <sup>30</sup> Pamonaë Dioso apo pejumecovënëtsivi, bitso sivanajamatabëxainabiaba ëpexaejavanexa, ëpenaxatabijavanexa ata. Itsiata baitsi jane paneaxa Dioso paxainame. Bajaraponë yapëtane daxita xua panamatavenoname. <sup>31</sup> Bajaraxuata, daxita xua panamatavenoname, matatoxenetsia Dioso pijacuene bitso pasivanajamatabëxainabiabianame Dioso pijacuene panetoexanavanapaenexa. Nexata Dioso pacarajutsiana daxita xua panamatavenoname, jai Jesús pijajivijavabelia.

**Pacuenia Jesús tsipaeba pijajivi xaniavaetsia Dioso  
petonacuenebavanapaenexa itsamatacabi ayaijava  
pexainanenexa athëbëtatsia yabara pelivaisi**

*(Mt 6.19-21)*

<sup>32</sup> Icatsia Jesús jumaitsi pijajivijavabelia:

—Tajamonae, paxamë patajajivimë pacaëjiviyomëbeje ata, pëtsa pajunavame. Tsipaji paneaxa pacaitapeta panecobenaevetsinexa pamatacabi bajaraponë evetsiana daxitacuene. <sup>33</sup> Pacanajere panexainaeyajuvënëjava, bitso paneasivajava ata. Nexata bajarapapalata parajutsianame bitso bepejiobivijavabelia. Nexata juya Dioso athëbëtatsia pacarajutsiana bitso penamatamotsijava, apo pevereverecaejava. Bajarajotatsia acuenebi pejonejava penacobetoxotsivi papecayacajërëtsinexa. Itsanë ata ajibi papecatoucubaxaenënexa. <sup>34</sup> Panacuatatsia pacatoxaniavaeta panexainaejavanexa, bajarapanacua panejamatabëëthëtovetsina pajamatabënjavavapanename, jai Jesús pijajivijavabelia.

**Pacuenia Jesús pijajivi tsipaeba pacujinae icatsia patsijitsiatsica  
najamatabëcuenexaniavaetsiaya pevajënae pijajivi  
pecopiaevetavanapaenexatsi yabara pelivaisi**

<sup>35</sup> Jesús icatsia pepatsijavanexatsica tajëvelia navajunupaeba. Jesús jumaitsi pijajivijavabelia mapacueniaje:

—Icatsia raja jemata patsianicajë. Nexata najamatabëcuenexaniavaetsiaya panecopiaevetavanapaename. <sup>36</sup> Payapëtaneme rabaja mapacuenije. Petuxanenë itsa pona penacasabifiestajavabelia, pijajivi tonajumecopata meravijebi ata pecopiaevetavanapaenexatsi pepatsijavarena. Nexata petuxanenë pijajivi meravi ata copi-aevetavanapatsi. Nexata petuxanenë jemata meravi najetaruae ata, baupa itsa docodocota, nexata bajarapamonae bepija tobaupata pijatuxanenë. <sup>37</sup> Bajarapamonae barëya pijatuxanenë naëcotsiaya pecopiaevetavanapaejavata pepatsixae. Xaniajanë pacuenia pacatsipaebijitsiatsi. Nexata petuxanenë pijajivi caecuenia petobaupatsixaetsi, petuxanenë pijajivi sivajamatabëcuenebarëya. Nexata petuxanenë pepatsicujinae xaniavaeta mesa. Enaeyaexanaena pijajivi. Nexata caranata petuxanenë bajarapamonae bepijajivitonë nataeya rajuta pexaejava pijajivi. <sup>38</sup> Meravi tuatua-jëta petuxanenë patsi ata, itsa jume, matabivëpata patsi ata, nexata petuxanenë pijajivi naëcotsiaya pecopiaevetavanapaejavata pijatuxanenë pecaxitajarabixaetsi, petuxanenë pijajivi barëya. <sup>39</sup> Pacanaëjëre mapacuenije. Bo pexainanë itsa yapëtaejitsipa paepatota meravi pijabojavaberena patsijitsia pecobecovë petonacobetoxotsinënexatsi, nexata apo majitsi tsipae. Vajënaevetecaejitsipa meravijebi. Apo copatsi tsipae pijaboyaberena petojoneyanivatsi penacobetoxotsinënexa. <sup>40</sup> Bajara pijinia pacuenia paxamë ata najamatabëcuenexaniavaetsiaya panecopiaevetavanapaename tapatsijavatsica. Tsipaji xanë, Daxitajivi Pematapijinënë, paepatota apo panejamatabënajinaemë tapatsijavanexatsica, jemata icatsia patsianicajë, jai Jesús pijajivijavabelia tajëvelia penavajunupaebijavata icatsia pepatsijavanexatsica.

**Pacuenia Jesús pijajivijavabelia livaisi tsipaeba, petuxanenë  
pijajivitonëbeje pelivaisicuenia, yabara pelivaisi**

*(Mt 24.45-51)*

<sup>41</sup> Pedro jumaitsi Jesúsjavabelia:

—Tajatuxanenë, çpalivaisi aeconoxae panetsipaebame, baja tsaja palivaisi ëpaxanë panijajivinexanë? Itsa jume, çitsamonaenexa ata tsaja yajava? jai Pedro.

<sup>42</sup> Jesús nexata jumaitsi Pedrojavabelia:

—Mara pejamatabëcueneitsivinexa yabara pacatsipaebatsije. Petuxanenë pijajivitonë, ponë xaniavaetsia pijatuxanenë pecovëta tonacuenebaaponapona pijacuene, maitsije. Petuxanenë pijajivitonë itsajamatabëcuene xainaenejeva, copiaevetaponapona pijatuxanenë pepatsimatabijavabelianexa. Bajaraponë pijatuxanenë pijajivi pecovëta tovetaponapona xaniavaetsia. Toabataponapona pexaejava caemat-acabi canacujitsia pacuenia itorobatsi pijatuxanenë. <sup>43</sup> Bajaraponë bitso barëya pamatacabi pijatuxanenë pata xaniavaetsia pijajivi pecovëta petoetaponaponaeaxae. <sup>44</sup> Xaniajanë pacuenia pacatsipaebijitsiatsi. Ponë bajarapacuenia xaniavaetsia tonacueneba pijatuxanenë pecovëta, bajaraponë icatsia evetsiaexanatsi daxita xua xaina pijatuxanenë. <sup>45</sup> Petuxanenë pijajivitonë itsa pijamatabëcuenebejenë tsipae, nexata bajaraponë pijatuxanenë pecovëta jamatabëjumai tsipae: “Tajatuxanenë



ajibi tsarucae tsane bajayajebi,” jamatabėjai tsipae. Nexata pijatuxanenė pijajivi, pamonaevetsiaexanatsi xaniavaetsia picani petoevetsinexa, toconibabeyabiabijitsipa. Conibabeyabiabijitsipa pebijivi, petiriavi ata. Bajaraponė ayaijava pexaejava xaeyabiabijitsipa. Aitajibinua tsabiabi tsipae. <sup>46</sup> Nexata itsajota apo jamatabėnaji-nae tsipae pijatuxanenė pepatsijavanexa, bajarapaepatota jemata patsipa pijatuxanenė. Nexata bajaraponė pijatuxanenė pinijicuenia naneconitsiaexanaejitsipatsi. Bajara pijinia pacuenia Dioso ata itsamatacabi pinijicuenia naneconitsiaexanaena pamonaevetsia Dioso apo pejumecovėnėtsivi, jai Jesús Pedrojavabelia.

<sup>47</sup> Icatsia Jesús jumaitsi pijajivijavabelia:

—Ponė itsanė pijajivitonė, yapėtae ata picani pacuenia itorobatsi pijatuxanenė petoexanaenexa, itsiata itsa apo toexanae pijatuxanenė pitorobicueniatsi, bajaraponė pinijicuenia jumaconibabeyitsipatsi ayaicuerobocotota. <sup>48</sup> Ponė ata pijinia itsanė pijajivitonė, itsa apo jumeyapėtae xaniavaetsia petoexanaenexa pacuenia pijatuxanenė itorobatsi, nexata pijatuxanenė pitorobicueniatsi saicayacuenia itsa toexana, bajaraponė ata jumaconibabeyitsipatsi. Itsiata pinijicuenia apo jumaconibabe tsipaetsi. Pajivi pijinia ayaijava rajutatsi, bajarapajivi yabara vaxaitsi basivajamatabėjumaitsi: “Juya meta mapajivije ayaijava rajutabiabiana itsamonaejavabelia,” basivajamatabėjaitsi. Pajivi pijinia evetsiaexanatsi ayaijava, bajarapajivi pevetsiaexanaenėtsi sivajamatabėjumaitsi: “Itsa netocanacuenebiana taevetsiaexanaejava, ayaijava netopitsapaena,” sivajamatabėjaitsi pevetsiaexanaenėtsi, jai Jesús pijajivijavabelia.

**Pacuenia Jesús apo penajuajumecovėnėtsixae, nacaemonae  
ata apo najamatabėcuenejėpae tsane yabara pelivaisi**

(Mt 10.34-36)

<sup>49</sup> Icatsia Jesús jumaitsi pijajivijavabelia:

—Xanė raja patajopajė daxitanacuapijivi pibisiacuene pexanaeconi yabara tasivatėpaenexa. Nexata bajarapamonaeyajuvėnėvi itsamonae nejumecovėnėtsiana. Nexata nacaemonae ata apo najamatabėcuenejėpae tsane. Itsa baja capanepaeya cruzata daxitajivi sivatėpaejitsipajė, jamatabėcuenebarėyanė baja tsipae. <sup>50</sup> Itsiata baitsi jane abaxė netosajina bajaraxua yabara tanejamatabėcuenejėtsinexa tanebeyaxuabijavata. ¡Bitso baja rovia najamatabėxainajė! ¡Matapania nebeyaxuabiana, jamatabėcuenecaevianajė! <sup>51</sup> Pėtsa panesivajamatabėjumaitsimė mapacueniaje: “Jesús rabaja patsica mapanacuayabetsicaje daxitajivi mapanacuataje najamatabėcuenejėpaeya pejinavanapaeyaexanaenexa,” panesivajamatabėjamė pėtsa. Bajaraxuanexa apo patsinėtsica. Biji rajane xanė tapatsixaetsica mapanacuayabetsicaje, jivi itsa nejumecovėnėtsiana, apo najamatabėcuenejėpae tsane pamonaevjavabelia apo nejumecovėnėtsi, nacaemonae ata. Itsamonae napijavajabitsaė tsane. Nexata apo najamatabėcuenejėpae tsane. <sup>52</sup> Ajena mapamatacabijavaveliacujinaeje jivi apo najamatabėcuenejėpae tsane. Cinco pajivibeje, nacaemonae ata, caebota pejinavanapaevi ata, apo najamatabėcuenejėpae tsane xanė apo tanenajuajumecovėnėtsixaebeje. Pamonaevetsia cinco pajivibeje nacaemonae, bajarapamonaeyajuvėnėvi, acueyabi pajivibeje, nejumecovėnėtsiana. Anijajivibeje apo nejumecovėnėtsi tsane. Itsa jume, anijajivibeje nejumecovėnėtsiana. Acueyabi pajivibeje apo nejumecovėnėtsi tsane. <sup>53</sup> Bajarapabopijivi, paxabeje pexėnatobeje, apo najamatabėcuenejėpaebeje tsane xanė apo tanenajuajumecovėnėtsixaebeje. Petirivabeje pijinia, pen-

abeje pexēnatoyobeje ata, apo najamatabēcuenejēpaebeje tsane xanē apo tanenajua-jumecovēnētsixaabeje. Pamebeje pecopenabeje ata apo najamatabēcuenejēpaebeje tsane xanē apo tanenajua-jumecovēnēnētsixaabeje, jai Jesús pijajivijavabelia.

**Pacuenia Jesús asaëya jivi muxujioba apo pecanaëjētsixae  
Jesús Dioso pexēnatocuene yabara pelivaisi**

(Mt 16.1-4; Mr 8.11-13)

<sup>54</sup> Jesús icatsia jumaitsi jivi ayaibitsaëtoxfanetojavabelia:

—Itsa pataneme vaëvetsica itarērēbo pepitsapaejava, nexata pajumaitsimē tsabiabi: “Ajena raja emajitsia,” pajamē tsabiabi. Nexata bajarapamatacabi ema jopabiaba. <sup>55</sup>Itsa pataneme jovibo pepitsapaejava epatajērētsiarena la surverena, pajumaitsimē tsabiabi: “Ajena raja icotia ataju tsane,” pajamē tsabiabi. Nexata bajarapamatacabi icotia ataju tsabiabi. <sup>56</sup>Nexata itsamonae pacatane bepat-sita pexaniajamatabēcuenevimē itajara, papibisiajamatabēcuenevi atamē. Payapētaeyabiabame pacuenia matacabi itsijitsia itarērēbo pepitsapaejava panetaeyabiabixae. Bajarapacuenia picani payapētaeyabiabame. Itsiata baitsi jane patae atamē daxita xua Juanpijinēmi jivibautisabinēmi exanapona, patae atamēnua daxita xua xanē ata exanaponajē, caranata xanē apo paneyapētaemē Dioso athēbēvetsica taneitorobinēcuenetsica, jai Jesús jivi ayaibitsaëtoxfanetojavabelia.

**Pacuenia penaneconitsijivi xaniavaetsia bebarēcuaicuajjai  
pajivijavabelia naneconita penasivajamatabēxanepanaenexabeje,  
peneconitsiyanivatsi jueznējavabelia, yabara pelivaisi**

(Mt 5.25-26)

<sup>57</sup> Jesús icatsia jumaitsi jivi ayaibitsaëtoxfanetojavabelia:

—Pacanaëjere panijacuata paneexanaenexa pacuene xanepana. <sup>58</sup>Itsa pananeconitame itsajivijavabelia, nexata itsa pacacapona bajarapajivi jueznējavabelia papecanconitsinexa, namutua xaniavaetsia panabarēcuaicuajjamērebeje panenasivajamatabē xanepanaenexabeje xua yabara pacaneconitsijitsia. Bajarapacuenia xaniavaetsia panabarēcuaicuajjamērebeje papecanutsiyaniva jueznē pitabarata. Tsipaji raja jueznē itorobijitsipa policíavi panijaneconi yabara papecacaponaenexa penaneconitsivi pejebabiabiboyabelia. Nexata policíavi pacananeconitsiaexanetsipa penaneconitsivi pejebabiabibota. <sup>59</sup>Xaniajanē pacuenia pacatsipaebijitsiatsi. Nexata penaneconitsivi pejebabiabibota itsa pacananeconitsiaexanetsipa, bajaraverena bepíjia apo papitsapaemē tsipae. Matapania pamatamotsipame daxita xua yabara pacananeconitsiaexaneta, papitsapaejitsipame, jai Jesús jivi ayaibitsaëtoxfanetojavabelia.

**Pacuenia jivi benajamatabēcuenepēnēyorota pibisiacuene  
pexanabiabijavavecua yabara pelivaisi**

**13** Itsamonae jumaitsi Jesúsjavabelia:

—Galilea nacuaverena pepatsivi, baca beyaxuaba Jerusalén tomarata templobota. Bajarapamonae baca beyaxuaba ofrendacuena pevi perajutsinexa Diosojavabelia. Nexata bajarapaepatota nacuaevevtsinē Pilato pibisiacuene exana. Itoroba vajabitsaë Galilea nacuapijivimi pebeyejebinexatsi templobota. Itsajota Galilea nacuapijivimi baca beyaxuababuata, bajarapacovēta icatsia beyejebatsi bajarapa-

monaemi. Nexata bajarapamonaemi pijana namatajërëata bacajana yajava, jai itsa-monaie Jesúsjavabelia.

<sup>2</sup> Jesús nexata jumaitsi bajarapamonaiejavabelia:

—“Pamonaemi bajarapacuenia beyejebatsi, bitso meta pibisiacuene pexanaevimi daxita pijanacuapijivi matatoxenetsia. Bajaraxuata beyejebatsi penaxuabinexa Diosovecua,” ¿pajamatabëjamë tsaja? <sup>3</sup> Jume baja cajena. Bajarapamonaemi ata picani bitso pibisiacuene apo exanae pijanacuapijivi matatoxenetsia. Itsiata Dioso tocopatatsi bajarapamonaemi pebeyejebinxatsi, penacopabivi pecanaëjëtsinexa Diosojavabelia penaneconitsijava. Paxamë ata itsa apo pacopabimë tsane pibisiacuene penexanabiabijava, itsa apo panajamatabëcuenepënyorotsimë tsane Diosojavabelia, nexata bajarapacuenia paxamë ata panaxuabianame Diosovecua itsa patëpaename. <sup>4</sup> Pamatacabi ata jemata Jerusalén tomarata jopanucaya athëbëabetsia piapiabotsia, Torre de Siloëvënëbo, dieciocho pajivibeje matacënëbatsi. Nexata baja tëpa bajarapamonaemi. “Pamonaemi matacënëbatsi, pibisiacuene meta bitso pexanaevimi daxita Jerusalén tomarapijivi matatoxenetsia. Bajaraxuata matacënëbatsi penaxuabinexa Diosovecua,” ¿pajamatabëjamë tsaja? <sup>5</sup> Jume baja cajena. Bajarapamonaemi ata picani bitso pibisiacuene apo exanae pijatomarapijivi matatoxenetsia. Paxamë ata itsa apo pacopabinë tsane pibisiacuene paneexanaejava, itsa apo panajamatabëcuenepënyorotsimë tsane Diosojavabelia, nexata daxita paxamë ata bajarapacuenia panaxuabianame Diosovecua itsa patëpaename, jai Jesús bajarapamonaiejavabelia.

### **Pacuenia Jesús jivi livaisi tsipaeba piacuaijibihigueranae pelivaisicuenia yabara pelivaisi**

<sup>6</sup> Jesús jivi livaisi tsipaeba piacuaijibihigueranae pelivaisicuenia. Jesús jivi piacuaijibihigueranae pelivaisicuenia petsipaebijavata, pijaperujujamatabëcuenie apo penavecuacopatsivi yabara Jesús jumaitsi mapacueniaje:

—Pebi pijapabi tuatuajëta caenae peubinae xainanuta, higueravënënae. Nexata picani taeyojopalia bajaraponae penacuaijsijava. Itsiata baitsi jane apo nacuaijsi. <sup>7</sup> Nexata jumaitsi pijapabi petoevetsinëtsijavabelia: “Taema maponaieje. Acueyabi picani pavaibeje taeyopajë tacuainotabiabinexa maponaecuaije. Itsiata acuaijibi tsabiabi. Nexata baja netonicataxuare. Apo becopatantsitsi bajaraponae. Ira caranatanuca saya,” jai pijapabi pexainaenë. <sup>8</sup> Itsiata baitsi jane pijapabi peto-evetsinëtsi jumaitsi: “Copatantsianatsibeje abaxë mapavaije. Nexata bacatuirabianajë bacatasitoxita. <sup>9</sup> Baja raeta xuacujinae xanepanaena. Nexata aeconoxae pavai nacuaijsiana. Nexata aeconoxae pavai ata itsa apo nacuaijsi tsane, nexata jane baja caticataxuabianatsi,” jai pijapabi petoevetsinëtsi, jai Jesús.

Bajarapacuenia Jesús jumaitsi tsipaji Dioso xuabijitsia pamonaie pijaperujujamatabëcuenie apo pecopatsivi.

### **Pacuenia Jesús jamatejemayaexana judíovi penacueraevetsimatatabita penajumafurtsivami yabara pelivaisi**

<sup>10</sup> Itsamatacabi judíovi penacueraevetsimatatabita, Jesús jivi livaisi tsipaeba judíovi penacaetuatabibibota. <sup>11</sup> Bajarajota naeca petiriva. Dovathi pejamatabëcueneta bajarapova dieciocho pavaibeje xaina penajumafurtsicujinae.

Nexata apo caëjêpaetsi tsiquirijavayo ata penaepasirovitsijava. <sup>12</sup>Itsa Jesús taeyeta bajarapova, nexata junarena. Jesús jumaiti bajarapovajavabelia:

—Niatanejavami rabaja cavecuaajibi, jai Jesús bajarapovajavabelia.

<sup>13</sup>Jesús tsiatanacobeuata bajarapova. Nexata bajarajota petiriva naepasirovit-sixanepana baja. Nexata bajarapova jumai tsaponae Diosojavabelia:

—¡Diosomë, bitso pexaniacuene netoexaname ayaijamatabëcuenenëxaemë! jai tsaponae bajarapova Diosojavabelia.

<sup>14</sup>Itsiata baitsi jane judíovi penacaetuatabiabibo pevetsinë Jesús baraanaepanatsi judíovi penacueraevetsimatacabita Jesús pejamatejemayaexanaexae penajumafurtsiva. Tsiptaji judíovi apo jitsipae itsajivi ata itsacuenejavayo pexanaenexa penacueraevetsimatacabita. Nexata judíovi penacaetuatabiabibo pevetsinë jamatabëjumaiti:

—Jesús nacueneba penacueraevetsimatacabita. Jesús apo jumecovënëtsi patajasalinaivi patanitavetsicuene, jamatabëjai.

Nexata judíovi penacaetuatabiabibo pevetsinë najumejematsiaya jumaiti jivijavabelia:

—Caesemana canacujitsia xainaponatsi seis pamatacabibeje vajanacuenebinexa. Bajarapamatacabijava bepatatsi vajanacajamatejemayaexanaenexa. Nexata abaxë penacueraevetsimatacabita apo bepatsitsi vajanacajamatejemayaexanaenexa, jai judíovi penacaetuatabiabibo pevetsinë najumejematsiaya jivijavabelia.

<sup>15</sup>Nexata Jesús jumaiti judíovi penacaetuatabiabibo pevetsinëjavabelia:

—Paxamë saya jivi paneyamaxëitojobivi. Bepatsita pexaniajamatabëcuenenimë itajara itsamonae, papibisiajamatabëcueneni atamë. Paxamë ata panacuenebabibabame penacueraevetsimatacabita ata. Paxamë penacueraevetsimatacabita ata panijabaca, burro ata, paisinabiabame panecaponaenexa merajavabelia mera pia-paenexa. <sup>16</sup>Mapovaje Abrahampijinë pemomoxiyajuvënëva jamatejemayaexanajë. Tsiptaji bajarapova namatamota Dioso pitabarata dajubinë matatoxenetsia. Dovathi pejamatabëcueneta penajumafurtsicujinae, xaina baja dieciocho pavaibeje. Bajaraxuata penacueraevetsimatacabita ata jamatejemayaexanajë piatanecuenecua, jai Jesús judíovi penacaetuatabiabibo pevetsinëjavabelia.

<sup>17</sup>Bajarapacuenia Jesús itsa jumaiti, nexata daxita pecueneitoyavitsi moya ena. Aura tsenae bajarapamonae. Itsamonae pijinia Jesús sivajamatabëcuenenarëyatsi pinijicue Dioso pesaëta pexanaponaejavanë yabara.

**Pacuenia mostazaxutoyo pejuvicujinae,  
mostazanae bepíjia vitsaba yabara pelivaisi**

*(Mt 13.31-32; Mr 4.30-32)*

<sup>18</sup>Jesús jumaiti jivijavabelia:

—¿De meta xua pelivaisi jêpa Dioso pijajivi bepíjia ayaibitsaëtoxfaneto penaexanaejavanexa? Jivi meta peyapëtaenexa ayaibitsaëtoxfaneto bepíjia Dioso pijajivi penaexanaejavanexa, mostazaxutoyo meta pelivaisicuenia tsiptabianajë. <sup>19</sup>Pebicapona mostazaxutoyo peubinexa pijapabita. Nexata baja mostazaxutoyo pebi itsa uba pijapabita, bajarajota mostazanae bepíjia vitsaba. Bepíjia baja mostazanae pinijinae naexana. Baratsui ata exana pematapenanë bajaraponaemaxëranaxijava. Bajara pijinia pacuenia Dioso pijajivi ata itsane. Bepíjia ayaibitsaëtoxfaneto naexanaena Dioso pijajivi, jai Jesús jivijavabelia.

**Pacuenia pan pexanaematabēnexa, levaduravēņēja  
fufunaeyaexana yabara pelivaisi**

*(Mt 13.33)*

<sup>20</sup> Icatsia Jesús jumaitsi jivijavabelia:

—¿De meta palivaisi jēpa pecacaējēpaejava Dioso pijajivi pevetsicue ne daxitanacuanējáva? ¿De meta pacuenia jivi livaisi tsipaebianajē peyapētaenexa Dioso pijajivi pevetsicue ne peyacaējēpaejava daxitanacuanējáva? <sup>21</sup> Levaduravēņēja meta pelivaisicuenia tsipaebianajē. Petiriva pan pexanaenexa, acueyabi patarrobeje trigobenonē matajērēaba levaduravēņjavata. Nexata pan pexanaematabēnexa, ayaimatabē.

**Tsiquiribaupayo epatajērētsialia yabara pelivaisi**

*(Mt 7.13-14, 21-23)*

<sup>22</sup> Jesús jivi livaisi tsipaebanajetaruca pinijitotaranējáva, tsiquiritomaraxijáva ata, pepatsinexa Jerusalén tomarabelia. <sup>23</sup> Nexata Jesús jivi livaisi petsipaebijavata, itsanē yanijobatsi Jesús. Bajaraponē jumaitsi Jesúsjavabelia:

—Jesús, ¿Dioso tsaja capanepaena caebitsaētoyo saya? jai.

Nexata Jesús jumaitsi daxita jivijavabelia:

<sup>24</sup> —Xaniajanē pacuenia pacatsipaebijitsiatsi. Pajamatabēcuenesaēmēre bitso panevajēnaeyabelia itsamatacabi athēbētatsia panejonenexa tsiquiribaupayovalia. Jivi picani itsamatacabi athēbētatsia ayaibitsaētoxoneto jamatabējonena tsiquiribaupayovalia. Itsiata apo caējēpaetsi tsane pejonenexa. <sup>25</sup> Bo pexainanē itsa nonotapunaena baupa pexatatsinexa, paxamē bo jumapēnēvelia panubenaename. Nexata picani panejonenexa pabaupadocodocotsianame. Pajumaitsimē tsane: “Tajatuxanenē, panetobaupare,” pajamē tsane. Itsiata bajaraponē pacajumaitsi tsane: “Apo pacayapētaetsi cajena paxamē. Itsaverena ata papatame, apo yapētaenē,” pacajai tsane. <sup>26</sup> Nexata paxamē pajumaitsimē tsane: “Xamē baja cajena panebarēnabaneme. Panebarēmatavējēaapamenua. Patajatotaranējáva ata baja cajena jivi livaisi tsipaebabiabame,” pajamē tsane. <sup>27</sup> Itsiata bajaraponē pacajumaitsi tsane: “Apo pacayapētaetsi cajena paxamē. Itsaverena ata papatame, apo yapētaenē. Pibisiacue ne paneexanabiabivi, panevecuaponare baja,” pacajai tsane. <sup>28</sup> Dioso pijanacuatatsia pataename Abrahampijinē, Isaacpijinē ata, Jacobpijinē ata, daxita Diosojumepaebivimi profetavi ata. Daxita bajarapamonae penajuajinavanapaejava Dioso pijanacuatatsia pataename. Nexata paxamē bajarajota pinijicuenia panatsinuename. Panavonosinianamenua bitso paneanaepanaexae. Tsipaji paxamē Dioso pijanacuavecu panenaxuabinexa pacaxuabiana infiernojavabelia. <sup>29</sup> Itsavirijumevi patsiana daxitanacuanējavaverena. Nexata daxita bajarapamonae naenaena penabaninexa Dioso pijanacuatatsia. <sup>30</sup> Pamonaē aeconoxae mapamatacabitaje ayaijamatabēcue nevi tanetsi, bajarapamonaeyajuvēņēvi, ayaiBITSaētoxoneto, itsamatacabi Dioso beveliajamatabēcue nevi exanaenatsi. Pamonaē pijinia mapamatacabitaje beveliajamatabēcue nevi tanetsi, bajarapamonaeyajuvēņēvi, ayaiBITSaētoxoneto, itsamatacabi Dioso ayaijamatabēcue nevi exanaenatsi, jai Jesús daxitajivijavabelia.

**Pacuenia Jesús najamatabëxainaeya sivanua  
Jerusalén tomarapijivi yabara pelivaisi**

(Mt 23.37-39)

<sup>31</sup> Itsa baja Jesús najumevereta jivi livaisi petsipaebijava, fariseovi pata Jesúsjavaberena. Nexata fariseovi jumaitsi Jesúsjavabelia:

—Jesús, mapatomara baja vecuaponareje. Nacuaevetsinë raja Herodes cabeyaxuabiapaeba, jai fariseovi.

<sup>32</sup> Jesús nexata jumaitsi fariseovijavabelia:

—Paponaremelia. Bajaraponë Herodes, jivi peyamaxëitorobabiabinëjavabelia, pajumaitsimë tsane mapacueniaje: “Jesús raja jumaitsi: ‘Ajena raja abaxë, meravia ata icatsia, vecuacapitsaponaenajë dovathi peyajavajinavanapaevi. Piavitanevi ata jamatejemayaexanaponaenajë. Nexata abaxë pameravia bajarapacuenia taexanaejava copatsianajë,’ jai raja Jesús,” pajamë tsane Herodesjavabelia. <sup>33</sup> Diosojumepaebivimi profetavimi beyejebabiabatsi Jerusalén tomarata. Tsipaji profetavi acuenebi saicayatamarata petëpaejava Jerusalén tomaravecua. Bajaraxuata xanë ata ponaenajë tavajënaeyabelia Jerusalén tomarabelia. Nexata ponaenajë ajena. Itsa jume, meravia, pameravia ata, tanebeyaxuabinexa Jerusalén tomarata, jai Jesús fariseovijavabelia.

<sup>34</sup> Nexata Jesús najamatabëxainaeya sivanua Jerusalén tomarapijivi. Jerusalén tomarapijivi Jesús najamatabëxainaeya pesivanuejavata, jumaitsi mapacueniaje:

—¡PaJerusalén tomarapijivimë, pabeyajebabiabame Diosojumepaebivimi profetavi! ¡Ibotonëta ata patseconabiabame bajarapacuenia panebeyaxuababiabinexa Diosojumelivaisi pecaponaevi paxamëjavaberena! ¡Pacuenia vacara banacoxicaetuata pecorofetobëxëpanaberena, bajara pijinia pacuenia xanë ata picani bitso jitsipabiabajë patacacaetuatsinexa, patacapanepaenexa picani panijaneconivecua! ¡Itsiata baitsi jane paxamë apo pajejamë cajena! <sup>35</sup> Panejumetaema. Dioso rabaja pacacopata papecaevetabiabijavami. Nexata baja panijatemplobota Dioso apo ponaponae. Xaniajanë pacuenia pacatsipaebijitsiatsi. Paxamë baja apo panetaemë tsane matavëjëa. Matapania itsa panejumecovënëtame Cristonëcuenenë, Dioso taneitorobinëtsica, icatsia panetaename. Itsa panesivajamatabëjumaitsimëna tsane: “Dioso, bitso yavenonare maponë najetarucaje. Bajaraponë nejamatabëcueneta najetaruca,” itsa panesivajamatabëjamë tsane, nexata jane baja icatsia panetaename itsa patsianicajë, jai Jesús mapacueniaje najamatabëxainaeya pesivanuejavata Jerusalén tomarapijivi.

**Pacuenia Jesús jamatejemayaexana pebi, bitso  
daxitanë peyajinaenë, yabara pelivaisi**

**14** Itsamatacabi, judíovi penacueraevetsimatacabita, Jesús pona fariseovi penamatacaitorobinë pijaboyabelia penanabaninexa. Nexata bajarapabota itsamonae fariseovi Jesús naitaxutocaevetatsi. <sup>2</sup> Nexata Jesús pitabarata eca pebi, daxitanë peyajinaenë. <sup>3</sup> Jesús nexata jumaitsi judíovi pecujarubivijavabelia, fariseovijavabelia ata:

—¿Penacueraevetsimatacabita ata tsaja piavitanevi vajajamatejemayaexanaenexa, Dioso nacatocopata? Jume. ¿Apo nacatocopatsi tsaja? jai Jesús judíovi pecujarubivijavabelia, fariseovijavabelia ata.

<sup>4</sup>Itsiata bajarapamonae moya ena. Nexata Jesús cobepita peyajinaenë. Jamate-jemayaexana baja. Itoroba baja peponaenexa bajarapabovecua. <sup>5</sup>Jesús nexata jumaitsi judíovi pecujarubivijavabelia, fariseovijavabelia ata:

—Itsa panijaburro, panijabaca ata, pacatojopaejitsipareca meramëthëareca, nexata penacueraevetsimatacabita ata, bepíjia pajutarëcëpaejitsipame. ¿Baja tsabaitsi jane? jai Jesús judíovi pecujarubivijavabelia, fariseovijavabelia ata.

<sup>6</sup>Nexata bajarapamonae acuenebi pejumecanaviatsijava Jesúsjavabelia.

**Pacuenia Jesús jivi muxujioba peyaiyataevitsi penaenexa  
petsinubijavanëta penaenexa penatsiitapetsiyaniva yabara pelivaisi**

<sup>7</sup>Fariseonë pijabota Jesús tane fariseonë pejunatsivi. Bajarapamonae natsiitapeta peyaiyataevitsi penaenexa petsinubijavanëta penaenexa mesa muxuneneta. Nexata Jesús muxujioba bajarapamonae beveliajamatabëcuenevi penataenexa. Jesús jumaitsi daxitajivijavabelia mapacueniaje:

<sup>8</sup>—Itsa pacajunata panenanabaninexa penacasabifiestajavabelia, pëtsa panatsiitapetame paneenaenexa peyaiyataevitsi penaenexa petsinubijavanëta. Tshipaji itsanë ayaijamatabëcueneñë paxamë matatoxenetsia itsa najunatatsi, napatsipa.

<sup>9</sup>Nexata papecajunatsinë pacacujitsiparena. Nexata pacajumai tsipae: “Tocopare bajaraxua maponë peecaenexaje,” pacajai tsipae. Nexata paxamë pauramë tsipae itsa pacanatixitsiaexana paneecaenexa beveliajamatabëcuenevi penaenexa petsinubijavanëta. <sup>10</sup>Itsa pacajunata, paenaename beveliajamatabëcuenevi penaenexa petsinubijavanëta. Matapania papecajunatsinë itsa pacajumai tsane: “Natixiremena. Peyaiyataevitsi penaenexa tatsinubijavanëta ecare,” itsa pacajai tsane, paenaename bajaraxuanëta. Nexata bajarapacuenia daxita mesa muxuneneta panenajuaenaevi pacataena papecayaiyataejava papecajunatsinë. <sup>11</sup>Pajivi ayaijamatabëcuenejivi natane, bajarapajivi beveliajamatabëcuenejivi taenatsi Dioso. Pajivi pijinia beveliajamatabëcuenejivi natane, bajarapajivi ayaijamatabëcuenejivi taenatsi Dioso, jai Jesús judíovi pecujarubivijavabelia, fariseovijavabelia ata.

<sup>12</sup>Nexata Jesús icatsia jumaitsi pejunatsifariseonëtsijavabelia:

—Itsa junatame itsamonae nebarënanabaninexa nijabota matonejepijijava, itsa jume, caniviyopijijava ata, pëtsa junatame ëneyapëtaevi. Pëtsa junatame nebarënanabaninexa ënijamonae. Pëtsa junatame ënijamonaevirivi ata. Pëtsa junatame ëricovi, pamonaevi nijabo muxuneneta jinavanapa. Tshipaji bajarapamonae juya canamatamojunatsipa pijabota pecabarënanabaninexa. Nexata bajarapacuenia canamatamotsipa bajarapamonae. <sup>13</sup>Itsa junatame itsamonae fiesta nebarëxanaenexa, junatsianame bepejiovivi, penabejenaevi ata, pejayujayunaevi ata, bitso pitaxutotsëcënaevi ata. <sup>14</sup>Nexata bajarapacuenia pepacuene jamatabëcuenebarëyamë tsane. Tshipaji bajarapatsivi acuenebi juya pecamatamojunatsijava tsane. Nexata nijamatamo xainaename pamatacabí icatsia Dioso asaëyaexanaena pamonaevi tëpa, pexaniajamatabëcuenevimi, jai Jesús pejunatsifariseonëtsijavabelia.

**Pacuenia Jesús jivi livaisi tsipaeba pinijifiesta  
pexanaenë pelivaisicuenia yabara pelivaisi**

(Mt 22.1-10)

<sup>15</sup>Daxita mesa muxuneneta penaevi jumetane Jesús petsipaebilivaisi. Nexata fariseoviyajuvënëñë jumaitsi Jesúsjavabelia:

—Jamatabëcuenebarëya tsane pajivi nanabaniana Dioso pijanacuatatsia, jai fariseoviyajuvënë.

<sup>16</sup> Nexata fariseovi peyapëtaenexa itsamonae Dioso apo pejumecovënëtsijava, junatsi atatsi, Jesús jumaitsi comparacióncuenia mapacueniaje:

—Fiesta pexanaenë pijajivi itoroba ayaijava pexaejava pexanaenexa. Nexata tajëvelia junatsiaexana jivi ayaibitsaëttoxaneto petopatsinexatsi. <sup>17</sup> Bajaraxuacuji-nae pexaejava baja ita vereta, fiesta pexanaenë itoroba pijajivitonë peponaenexa pejunatsivijavabelia: “Naxanitsia baja. Pexaejava rabaja vereta,” pejainexa. <sup>18</sup> Itsiata baitsi jane daxita pejunatsivi apo topatsitsirena. Itsanë saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë aeconoxaeta comuatabajë ira. Nexata ponaejitsianë bajarabelia tataenexa bajara-paira. Pexaniacuene netoexanaename. Pëtsa jamatabëcueneanaepaname xanëjavaberena,” pejailivaisi tonajumeitorobarenatsi pijajivitonëta. <sup>19</sup> Itsanë pijinia saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë comuatajë diez ponëbeje bueyu tanetoroborobocaevinexa. Nexata ponaejitsianë taëjëtsinexa bajarapabueyu. Pexaniacuene netoexanaename. Pëtsa jamatabëcueneanaepaname xanëjavaberena,” pejailivaisi tonajumeitorobarenatsi pijajivitonëta. <sup>20</sup> Itsanë pijinia saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë raja aeconoxaeta nacasabajë. Bajaraxuata acuenebi taponaejava,” pejailivaisi tonajumeitorobarenatsi pijajivitonëta. Bajarapacuenia daxita pamona picani fiesta pexanaenë junata, peponaeyaniva saya tonajumeitorobarenatsi pijajivitonëta. <sup>21</sup> Nexata fiesta pexanaenë pijajivitonënaviarena pijatuxanenëjavaberena. Tsipaeba pijatuxanenëjavabelia daxita pacuenia najumerubatsi. Nexata fiesta pexanaenë anaepana. Jumaitsi pijajivitonëjavabelia: “Naxanitsiayo liamëre tomarabelia. Junatanajetarucaename jivi pinijicallexanetonëjava, tsiquiricallexijava ata. Junatsianame bepejiobivi, penabejenaevi ata, pejayujayunaevi ata, bitso pitaxutotsécënaevi ata, penanabaninexa tajabota,” jai fiesta pexanaenë pijajivitonëjavabelia. Nexata baja pijajivitonë pona pejunatsinexa jivi. <sup>22</sup> Jivi pebarëpatsicujinaerena, jumaitsi pijatuxanenëjavabelia: “Tajatuxanenë, exanjë rabaja taneitorobicueniamë. Itsiata abaxë sajinanubena itsamesanë itsamonaenexa,” jai bajaraponë pijatuxanenëjavabelia. <sup>23</sup> Nexata petuxanenë icatsia jumaitsi pijajivitonëjavabelia: “Liamëre icatsia carreteranëjavabelia, namutonëjavabelia ata. Junatanajetarucaename asaëyata carreterajava peponaevi, namutojava ata peponaevi, penanabaninexa tajabota pevënëcaenexa tajabo. <sup>24</sup> Pamona picani copiata junatajë penanabaninexa, caenë ata bajarapamonaeyajuvënë, apo naxae tsane bajarapaxaejava,” jai petuxanenë pijajivitonëjavabelia, jai Jesús fariseoviyajuvënëjavabelia jivi peyapëtaenexa itsamonae Dioso apo pejumecovënëtsijava, junatsi atatsi.

**Pacuenia Jesús tsipaeba jivijavabelia, pajivi Jesús jamatabëpënaponatsi, copiaya penajamatabëcueneveretsinexa Jesús pepënaponaejavajënaeyatsi yabara pelivaisi**

*(Mt 10.37-38)*

<sup>25</sup> Jivibitsaëttoxaneto Jesús pënjinavanapatsi. Nexata Jesús napënëyorota bajarapamonaejavabelia. Jesús jumaitsi mapacueniaje:



<sup>26</sup>—Ponë xanëjavaberena patsi ata, itsiata itsa apo niasiva tsane daxita pijamona matatoxenetsia, nexata bajaraponë apo tajajivitonë tsane. Bajaraponë itsa apo niasiva tsane paxa, pena ata, pematapijivi ata, pejuyapijivi ata, piasivajava matatoxenetsia, nexata apo tajajivitonë tsane. Bajaraponë itsa apo niasiva tsane pijava, pexi ata, pijacuata penaasivajava ata, matatoxenetsia, nexata bajaraponë apo tajajivitonë tsane. <sup>27</sup> Ponë xanë yabara itsamona jamatabëpebeyaxuabix-aetsi, jamatabëpebejiobiaexanaexaetsinua, nexata pecajunavi itsa apo nepënapona tsane, bajaraponë apo tajajivitonë tsane. <sup>28</sup> Paxamëyajuvënënë itsa jamatabëexana bo, athëbëabetsia piapiaboxanetotsia, nexata copiaya najamatabëcueneveretsipa pacuenia exanaejitsia. “¿Netocaëjëpa tsamëra baja tajapalatata taveretsinexa tajabo?” jamatabëjai tsipae copiaya. <sup>29</sup> Itsa apo najamatabëcueneveretsi tsipae copiaya, nexata bo pexanaejava taxuxuabi ata, apo veretsi tsipae itsa apo tocaëjëpaetsi pijapalata. Nexata pijabo petotaevitsi, capocaponaejitsipatsi. <sup>30</sup> Baracuaicuaijaiti tsipae: “Bajaraponë picani taxuxuaba pijabo pexanaejava. Itsiata apo tocaëjëpaetsi pijapalata peveretsinexa pijabo,” jaitsi tsipae capocaponaeya petotaevitsi. <sup>31</sup> Nacuaevetsinë pijinia, itsanacuaverena itsa sivanavajabitsaëtsijitsiatsi, nexata copiaya najamatabëxainaejitsipa. Jamatabëjumaiti tsipae mapacueniaje: “Tajajivi saya diez mil ponëbeje. Tanebarëtsimaxëponaevinexa, veinte mil ponëbeje. ¿Baja tsamëra tajajivi nebarëcueneceajëpaena tabarëbenexa tajavajabitsaënë pijajivi, veinte mil ponëbejejavabelia?” jamatabëjai tsipae copiaya. <sup>32</sup> Nexata bajarapacuenia penajamatabëxainaeucujinae, bajaraponë yapëtaejitsipa apo pebarëcueneceajëpaejavatsi pebarëbenexa pijavajabitsaënë pijajivijavabelia. Itsa abaxë tajë pevajëna pepatsijavarena pijavajabitsaënë, nexata najumexuabijitsipalia pijajivita penabaramatabëcuene xanepanaenexabeje vajabitsaëcuene pexanaeyanivabeje. <sup>33</sup> Bajara pijinia pacuenia paxamëyajuvënëvi ata itsa apo najamatabëcueneveretsi copiaya penajamatabëcuenepeñëyorotsinexa daxita pexainaejavavecu, nexata acuenebi tajajivi taexanaenexa, jai Jesús jivi ayaibitsaëtoxanetojavabelia.

**Pacuenia Jesús jivi livaisi tsipaeba comparacióncuenia  
pacuenia jamatabëcueneitsi tsipae Jesús pijajivitonë itsa  
copatsipa Jesús pejumecovënëtsijavami yabara pelivaisi**

*(Mt 5.13; Mr 9.50)*

<sup>34</sup> Jesús icatsia comparacióncuenia jumaiti jivi ayaibitsaëtoxanetojavabelia mapacueniaje:

—Yajo abaxë itsa xaica, xanepana. Itsiata yajo pexaicaejavami itsa ajibi tsipae, ¿detsa pacuenia icatsia naxaicaeyaexanaejitsipa? Acuenebi. <sup>35</sup> Itsacueniejavayonexa ata baja apo xanepanae tsipae. Nexata peubijava petsibacaothocaenexa ata, apo xanepanae tsipae. Tspaji pacuenia peubijava petsibacaothocaebeno, itsa tsibacaothoca, peubijava naxaniabiaexana, bajara apo itsi tsipae bajarapayajomi. Pacuenia bacatasi ata itsa tsibacaothoca, peubijava naxaniabiaexana, bajara apo itsi tsipae bajarapayajomi. Nexata saya jema xuabijitsipa bajarapayajomi. Pajivi jamatabënjumeyapëtane patacatsipaebilivaisi, nenamuxunaevetsi xaniavaetsia, jai Jesús comparacióncuenia bajarapamonaejavabelia.

Bajarapacuenia Jesús jumaiti comparacióncuenia jivi peyapëtaenexa pacuenia jamatabëcueneitsipae Jesús pijajivitonë itsa copatsipa Jesús pejumecovënëtsijavami. Nexata Diosovecu naxuabijitsipa.

**Pacuenia Jesús jivi livaisi tsipaeba oveja  
penaxuabinë pelivaisicuenia yabara pelivaisi**

(Mt 18.10-14)

**15** Gobierno pejamatabëcuene impuestomatamo pematamoyanijobabiabivi, pata Jesúsjavaberena. Yajavaparenanua piamatabëcuenebejevi. Bajarapamonaë pata penamuxunaevetsinexa Jesús petsipaebilivaisi. <sup>2</sup>Nexata fariseovibeje judíovi pecujarubivibeje itsa tane gobierno pejamatabëcuene impuestomatamo pematamoyanijobabiabivi pepatsijava Jesúsjavaberena, itsa tanenua piamatabëcuenebejevi ata pepatsijava Jesúsjavaberena, nexata fariseovibeje judíovi pecujarubivibeje Jesús baracuaicuaijaisi. Bajarapamonaë najumaisi mapacueniaje:

—Mara ponëje naneconita Diosojavabelia. Tsipaji copiapitabiaba piamatabëcuenebejevi ata. Naxaeyabiabanua pexaejava bajarapamonaeta, najai fariseovibeje judíovi pecujarubivibeje Jesús yabara jamatabëcuenenavëxaniabiaya.

<sup>3</sup>Nexata Jesús pebaracuaicuaijaixetsi, Jesús bajarapamonaëjavabelia livaisi tsipaeba mapacueniaje:

<sup>4</sup>—Paxamëyajuvënënë xainaejitsipa cien ponëbeje oveja. Nexata itsa toyajuvënë-naxuabijitsipatsi caenë, oveja pexainanë petusatota puenetsipa noventa y nueve ponëbeje. Nexata jaittsipa petonaxuabinëtsi matapania pecaxitajarabijavabelianexa.

<sup>5</sup>Nexata oveja pexainanë itsa baja caxitajarabijitsipa petonaxuabinëmitsi, barëyataejitsipa. Boyaberena vëtarapatsipa petonaxuabinëmitsi. <sup>6</sup>Nexata oveja pexainanë petonaxuabinëmitsi itsa capatsipa boyaberena, junatsipa peyapëtaevitsi. Junatsipa pijabo muxuneneta imoxoyo penaevi ata. Nexata oveja pexainanë jumai tsipae bajarapamonaëjavabelia: “Panecobenabarëyamëre. Tsipaji tajaovejajo, tanetonaxuabinëyomi picani, caxitajarabajë baja,” jai tsipae oveja pexainanë bajarapamonaëjavabelia. <sup>7</sup>Xaniajanë pacuenia pacatsipaebijitsiatsi. Mapanacuataje Dioso pitabarata pijaneconi pexainaejivi ata, itsa copatsiana pibisiacuene pexanabiabijava, itsa najamatabëcuenepënëyorota Diosojavabelia, bajara pijinia pacuenia sivabarëyatsi tsane athëbëtatsia pejinavanapaevi. Bajarapajivi, athëbëtatsia pejinavanapaevi, sivabarëyatsi tsane noventa y nueve pajivibeje Dioso pitabarata planeconijibitsavanapaevi pesivabarëyatsiabiabijava matatoxenetsia, jai Jesús fariseovijavabelia, judíovi pecujarubivijavabelia ata.

**Pacuenia Jesús livaisi tsipaeba penaxuabipalatanëyo  
pelivaisicuenia yabara pelivaisi**

<sup>8</sup>Icatsia Jesús jumaisi fariseovijavabelia, judíovi pecujarubivijavabelia ata:

—Petiriva xainaejitsipa diez ponëbeje palatanëanë, bitso penamatamotsinëanë. Nexata itsa toyajuvënë-naxuabijitsipatsi caenë, itanojotsipa lámpara. Bo ira cajuet-sipa xaniavaetsia pejaittsinexa. Matapania itsa pitabuatsipa petonaxuabipalatanëtsi, copatsipa pejaittsijava. <sup>9</sup>Itsa baja caxitajarabijitsipa petonaxuabipalatanëmitsi, nexata junatsipa peyapëtaevitsi. Junatsipa pijabo muxuneneta imoxoyo penaevi ata. Bajarapova nexata jumai tsipae bajarapamonaëjavabelia: “Panecobenabarëyamëre. Tsipaji tajapalatanëyo, tanetonaxuabinëyomi picani, caxitajarabajë baja,” jai tsipae petiriva bajarapamonaëjavabelia. <sup>10</sup>Xaniajanë pacuenia pacatsipaebijitsiatsi. Pajivi copatsiana pibisiacuene pexanabiabijavami, itsa najamatabëcuenepënëyorot-

siananua Diosojavabelia, bajara pijinia pacuenia athëbëtatsia ángelevi sivabarëyatsi tsane, jai Jesús fariseovijavabelia, judíovi pecujarubivijavabelia ata.

**Pacuenia picani juyapijinë paxavecua naxuabaponapona yabara pelivaisi**

<sup>11</sup> Icatsia Jesús livaisi tsipaeba fariseovijavabelia, judíovi pecujarubivijavabelia ata. Jesús jumaiti mapacueniaje:

—Pebi xaina anijanëbeje pexënatobeje. <sup>12</sup> Nexata juyapijinë jumaiti paxajavabelia: “Axa, xuanë picani netocopatame tapitsinexa nevënamuto, bajaraxuanë abaxë apo tēpae atamë, nerajure baja tajajavanexa,” jai juyapijinë. Nexata pexënatobeje pexainanë pexënatobejejavabelia rajuta daxita pexainaejavanëmi. <sup>13</sup> Nexata paxa perajutsicujinaetsibeje, caematacabibejecujinae, juyapijinë canajeta daxita pexainaejavanëmi pecaetuatsinexa palata. Bajaraxuacujinae jane baja pona tajënacuyabelia. Bajarajotalia pibisiacuene exanaponapona. Nexata vereta daxita paxa perajutsijavanëmitsi. <sup>14</sup> Nexata daxita bajarapanacuapijivi janibocuene tsipatsi. Bajaraponë peveretsicujinae daxita pijapalatami, bitso namatavenona pexaejava. <sup>15</sup> Nexata jaita penacuenebinexa bajarapanacuata peecaenëjavabelia. Bajaraponë itorobatsi pijairanëjava petoetaponaponaenexa pijamarrano. <sup>16</sup> Nexata bajaraponë bitso pīajanixae, pepenenexa picani ayaijava jamatabëxayabiaba bopocuai, marrano pexaejabijava. Bajarajota itsajivi ata apo rajutsitsi pexaejavanexa. <sup>17</sup> Nexata belia bajaraponë xaniavaetsia najamatabëxaina. Jamatabëjumaiti mapacueniaje: “Taxa pijabota pexaejava ayaijava xaina pijajivi ayaibitsaëto piabatsinexa. Tonacopatabiabatsi ayaijava pexaejava. Itsiata xanë majotaje tēpaejitsianë baja tajani. <sup>18</sup> Nexata taxajavabelia naviatsianajë. Jumaitsinë meta tsane taxajavabelia: ‘Axa, pibisiacuene exanajë Diosojavabelia, xamëjavabelia ata. <sup>19</sup> Abejenë raja. Auranë baja rovia xamëjavabelia: “Taxënato,” tanejamëjava. Nexata saya nija-jivitonënë nexanare,’ janë meta tsane taxajavabelia,” jamatabëjai juyapijinë. <sup>20</sup> Nexata baja naviata paxajavabelia.

‘Itsa abaxë tajëverena najetaruca, pexënato pexainanë copiatane. Nexata bajaraponë pexënato itaxutobejiobiatane. Mataenetsia cujinaejinalia pexënato. Nacoxivaetabarucapona. Copiapitsiaya itabaratsutsunexuaba pexënato. <sup>21</sup> Nexata bajaraponë jumaiti paxajavabelia: “Axa, pibisiacuene raja exanajë Diosojavabelia, xamëjavabelia ata. Abejenë raja. Nexata baja rovia auranë xamëjavabelia: “Taxënato,” tanejamëjava,” jai paxajavabelia. <sup>22</sup> Itsiata baitsi jane pexënato pexainanë bajarajota jumaiti pijajivijavabelia: “Naxanitsia. Bepijaiyo taxënato patocaponaremena daxita matatoxenetsia pexaniapana, penajumaxuabipana. Pajumaacare bajarapanata. Anillonua pacobesixatare. Zapatonua pataxuxatare. <sup>23</sup> Penasitsinë becerro papiremelia. Pabeyaxuabianame vajaxaenexa. ¡Fiesta exanaenatsi vajabarëyanexa! <sup>24</sup> Tsipaji raja maponë taxënatoje: ‘Tēpa meta baja,’ sivajamatabëjanë picani. Itsiata tsaena ponapona. ‘Naxuaba meta baja,’ sivajamatabëjanë picani. Itsiata baja icatsia patajopa,” jai pexënato pexainanë pijajivijavabelia. Nexata taxuxuaba fiesta pexanaejava.

<sup>25</sup> Bajarapamatacabī matapijinë pabiabelia nacuenebaponapona. Nexata penavitsinë bo itsa imoxoyotanjataruca, jumetane música. Jumetanenua peyavajibijava. <sup>26</sup> Nexata bajaraponë junata paxa pijajiviyajuvënë. Jumaiti: “¿Detsa pitsicuene yabara fiesta paexaname?” jai matapijinë. <sup>27</sup> Nexata paxa pijajivitonë jumaiti: “Neyuyapijinë baitsi patajopa. Axa nexata paneitoroba patabeyaxuabinexa becerro, pen-

asitsinē. Jamatejema tsaena ponapona nejuyapijinē,” jai bajaraponē matapijinējavabelia. <sup>28</sup>Nexata matapijinē bitso anaepana. Apo jitsipae boyabelia pejonejava. Nexata paxa sivapitsaparenatsi. Jumaitsi pexēnatojavabelia: “Naxanitsia. Najonemeya,” jai pexēnatojavabelia. <sup>29</sup>Nexata matapijinē jumaitsi paxajavabelia: “Jume. Bajayajebi baja rovia catonacuenebaponaponatsi xanē. Caeto ata cajena apo cajumeapajaitsi. Itsiata baitsi jane caeto ata apo nerajutsimē chivoyo ata fiesta tabarēexanaenexa tayapētaevi. <sup>30</sup>Itsiata aeconoxae patajopa baja nexēnato, ponē vereta nijapalatami petirivijavabelia. Nexata tobeyaxuabame becerro, penasitsinē,” jai matapijinē paxajavabelia. <sup>31</sup>Nexata bajaraponē jumaitsi pexēnatojavabelia: “Taxēnato, xamē cajena xanējavata ponaponame daxitamatacabi. Nexata daxita xua taxinaejava nijajava baja cajena. <sup>32</sup>Itsiata aeconoxae namatavenonatsi vajabarēyanexa. Tsi-paji nejuyapijinē: ‘Tēpa meta baja,’ tasivajamatabējainēmi, itsiata tsaena asaē. Penaxuabaponaponaenēmi icatsia baja patajopa,” jai bajaraponē pexēnatojavabelia, jai Jesús mapalivaisije fariseovijavabelia, judíoivi pecujarubivijavabelia ata.

### Pacuenia pijatuxanenē pecobecovē petoevetsinē toveretapona pevetsiaexanaejavanētsi yabara pelivaisi

**16** Jesús pijajivijavabelia livaisi tsipaeba. Jumaitsi mapacueniaje: —Petuxanenē, bitso pexainaenē, ponapona. Bajaraponē xaina pijajivitonē petoevetsinexatsi pecobecovē. Itsiata pepēya pijajivitonē pecobecovē toveretaponatsi. Nexata itsamonae tsipaebatsi pepēya pijajivitonē pecobecovē petoveretaponaejavatsi. <sup>2</sup>Nexata petuxanenē pijajivitonē junata. Jumaitsi pijajivitonējavabelia: “Xamē pina tapēya netoveretapona tacaevetsiaexanaejava. Pabaxutojavabelia matamoyaquinarubame xuanē canajetapona tacobecovē, xuanēnua netocomuatapona, bajarapabaxuto netocanaviatsianame. Nexata baja itsa netocanaviatsianame bajarapabaxuto, matavējēa apo netoevetsimē tsane tacobecovē,” jai petuxanenē pijajivitonējavabelia. <sup>3</sup>Nexata pijajivitonē sivapona bajarapabaxuto petocanaviatsinexa pijatuxanenē. Nexata bajarapabaxuto petocanaviatsivajēnae jamatabējumaitsi: “¿De tsaeta xua exanaenajē? Tajatuxanenē baja necapitsapaejitsia pecobecovē tatoevetaponaepojavavecu. Apo necaējēpae tsane tanacuenebinexa pabi tajacuata tanaevetsinexa. Bitso auranēnua tsipae itsamonaejavabelia amoneya tavajētaponaenexa palata tanamitsacomuatabinexa taxaejava. <sup>4</sup>Taneamoneyabivi meta abaxē, xua niamoneyaba, bevelia tovēnējonaponaenajē. Nexata tajatuxanenē tanecapitsapaecujinae, bajarapamonae pijaboyabelia itsa ponaenajē, xaniavaetsia necopiapitsiana. Nexata bajarapamonaejavata naponaponaenajē,” jamatabējai bajaraponē. <sup>5</sup>Nexata bajaraponē junata daxita pamonaē abaxē amoneyabatsi. Nexata pamonaē amoneyabatsi, bajarapamonae, caenē canacujitsia, patapona bajaraponējavaberena. Nexata bajaraponē copiaya petopatsinētsijavabelia jumaitsi: “¿Detsa pacuenia niamoneyabame abaxē, xua tajatuxanenē pijajava catsicopatatsi? jai bajaraponē. <sup>6</sup>Nexata ponē amoneyabatsi, jumaitsi: “Camoneyabatsi abaxē tacarajutsinexa aceiteranē ochocientos pagalónbeje,” jai. Nexata bajaraponē jumaitsi piamoneyabinētsijavabelia: “Bevelia saya catocopatsianatsi. Mara picani pacuenia niamoneyabameje, tanetoitanerubixutotamēje. Pire cajena. Icatsia itsabaxutojavabelia saya cuatrocientos pagalónbejenexa bepíjia yaquinarure. Nexata saya bajarapacuenia tajatuxanenē rajutsianame,” jai bajaraponē piamoneyabinētsijavabelia. <sup>7</sup>Bajaraxuacujinae icatsia itsanē topatatsi. Nexata icatsia

jumaitsi bajaraponëjavabelia: “¿Jica xamë? ¿Detsa pacuenia niamoneyabame?” jai. Nexata bajaraponë jumaitsi: “Camoneyabatsi abaxë tacarajutsinexa cien pabulto-beje trigoxubultonë,” jai. Nexata bajaraponë jumaitsi piamoneyabinëtsijavabelia: “Mara picani pacuenia niamoneyabameje, tanetoitanerubibaxutotamëje. Pire cajena. Icatsia itsabaxutojavabelia saya ochenta pabultobejenexa yaquinarure. Nexata saya bajarapacuenia tajatuxanenë rajutsianame,” jai bajaraponë piamoneyabinëtsijavabelia. Bajarapacuenia exanapona daxita piamoneyabivitsijavabelia pesivajamatabëcuene xanepanaenexatsi, xaniavaetsia pecopiapitsinexatsi pijabota penaponaponaenexa, pijatuxanenë itsa navecuacapitsapatsi. Nexata jane baja daxita piamoneyabivitsi tocanaviabatsi. Bevelia matamota petoyaitaneturutaponae baxutonëtsi. <sup>8</sup>Bajaraxuacujinae pijatuxanenëjavabelia pona perajutsinexa jane baja bajarapabaxutonë. Nexata pijatuxanenë jumaitsi: “Xamë baja rovia pibisiacuene exaname. Itsiata baitsi jane niatitsacaxae, exaname pacuenia catoxanepanaejitsia nevajënaeyabelia,” jaitsi pijatuxanenë. Nexata pacuenia pijatuxanenë pepëya pecobecovë petocanajetabiabinë ajamatabëcueneitatsaca, bajara pijinia pacuenia Dioso apo pejumecovënëtsivi ajamatabëcueneitatsaca Dioso pejumecovënëtsivi matatoxenetsia mapanacuapijicuene yabaraje, jai Jesús pijajivijavabelia.

<sup>9</sup>Icatsia Jesús jumaitsi pijajivijavabelia:

—Pacamuxujibatsi xaniavaetsia. Mapanacuapijipalatata payavenonare itsamonae. Nexata pacuenia pijatuxanenë pecobecovë petoevetsinë, pesivajamatabëcuene xanepanaevitsi xaina, xaniavaetsia pecopiapitsinexatsi pijabota penaponaponaenexa pijatuxanenë pecapitsapaecujinaetsi, bajara pijinia pacuenia paxamë ata athëbëtsia paxainaename papecasivajamatabëcuene xanepaenaevi. Nexata pamatacabi patëpame, itsajota apo panamatavenonaemë palata, Dioso pacopiapitsiana apo pevereverecaëbonëjavatatsia, jai Jesús pijajivijavabelia.

<sup>10</sup>Icatsia Jesús jumaitsi pijajivijavabelia:

—Pajivi xaniavaetsia toeveta tsiquirijavayo ata itsanë pecobecovë, bajarapajivi xaniavaetsia toevetsipa ayaijava ata. Pajivi bijiaya toeveta tsiquirijavayo ata itsanë pecobecovë, bajarapajivi bijiaya toevetsipa ayaijava ata. <sup>11</sup>Itsanë pecobecovë, mapanacuapijicueneje, palata ata, xaniavaetsia itsa apo patoevetsimë tsipae, nexata itsajivi ata apo pacaevetsiaexanae tsipae Dioso pijacuene, xua bitso namatamota mapanacuapijicuene matatoxenetsiaje. <sup>12</sup>Itsa xaniavaetsia apo patoevetsimë tsipae itsanë pecobecovë, nexata pitsijava picani pacaevetsiaexana, bajarapitsijava itsajivi ata apo pacarajutsi tsipae pepo panijajavanexa, jai Jesús pijajivijavabelia.

<sup>13</sup>Icatsia Jesús jumaitsi pijajivijavabelia:

—Itsajivi ata acuenebi caecuenia petonacuenebijava anijanëbeje pijatuxanenëbeje. Caenëjavabelia jitsipaejitsipa petonacuenebijava. Itsanëjavabelia apo jitsipae tsipae petonacuenebijava. Bajara pijinia itsi pajivi bitso jitsipa Dioso. Pajivi bitso jitsipa Dioso, nexata itsa tonacueneba Dioso, acuenebi bitso pejitsipaejava palata, jai Jesús pijajivijavabelia.

<sup>14</sup>Fariseovi, bitso palata pejitsipaevi, jumetaeyena Jesús petsipaebilivaisi pijajivijavabelia. Nexata fariseovi jumecapocaponatsi Jesús. <sup>15</sup>Jesús nexata jumaitsi fariseovijavabelia:

—Paxamë pajitsipabiabame jivi pejumaitsinexa paxamë yabara: “Fariseovi raja pexaniajamatabëcuenevi,” pejainexa. Itsiata baitsi jane Dioso pacajamatabëcueneypëtane pexaniajamatabëcuene apo panexainaevicuene. Pacuene

bitso jivi tsitapexaniacuenetsi, bajarapacue Dioso apo tsitapexaniacuenetsi, jai Jesús fariseovijavabelia.

**Pacuenia Jesús tsipaeba fariseovijavabelia bajayata Dioso  
Moiséspijinëta penajumecopatsilivaisi, pacuenia ata  
Dioso pijajivi evetsijitsia, yabara pelivaisi**

<sup>16</sup> Icatsia Jesús jumaitsi fariseovijavabelia:

—Juanpijinë jivibautisabinëmi pepatsivajënaeya, jivi xaina Dioso Moiséspijinëta penajumecopatsilivaisi pejumecovënëtsinexa. Bajayata Diosojumepaebivi profetavi ata petsipaebilivaisianë ata, xaina jivi pejumecovënëtsinexa. Itsiata Juanpijinë pepatsicujinae, pexanialivaisi tsipaebaponajë. Tsipaebaponajë Dioso pijajivi pevet-sijavanexa. Nexata daxitajivi bitso jitsipa penajonenexa Dioso pijanacuayabetsia, jai Jesús fariseovijavabelia.

<sup>17</sup> Icatsia Jesús jumaitsi fariseovijavabelia:

—Mapanacuaje, itaboxo yajava, jemata revererecaena. Itsiata baitsi jane palivaisi Dioso Moiséspijinëta najumecopata, bajarapacuenia apo revererecae tsane. Nexata daxita pacuene yabara tajëvelia vajunupaeba bajarapalivaisita, pepacuene xaniajai tsane, jai Jesús fariseovijavabelia.

**Pacuenia Jesús livaisi tsipaeba penacojobinë  
pijava pexuabiyaniya yabara pelivaisi**

*(Mt 19.1-12; Mr 10.1-12)*

<sup>18</sup> Icatsia Jesús jumaitsi fariseovijavabelia:

—Ponë pijava xuaba, nexata icatsia itsava itsa pita, bajaraponë pibisiacuene exana pevitota. Nexata naneconita Diosojavabelia. Tsipaji pepo pijavavecua jaita itsava. Dioso cajena abaxë bajaraponë pexuabiva pepo pijavacuenia totanetsi. Ponë ata itsanë pexuabiva pita, bajaraponë ata pibisiacuene exana pevitota. Nexata naneconita Diosojavabelia. Tsipaji itsanë pijava yacajërëta, pova abaxë Dioso tanetsi itsanë pepo pijavacuenia, jai Jesús fariseovijavabelia.

**Bitso riconë Lázarojeje yabara pelivaisi**

<sup>19</sup> Icatsia Jesús livaisi tsipaeba fariseovijavabelia. Jesús jumaitsi mapacueniaje:

—Bitso pexainaenë, riconë, ponapona. Daxitamatacabi naxatabiaba bitso pexaniavirijavanë. Pexaejava, pexaniavirijava, xaeabiaba. <sup>20</sup> Riconë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapacaranatsijavaxaneto jumavelia baupa muxuneneta, bepejobinë, Lázarovënënë, boquecabiaba. Lázaro daxitanë perabëtsabana. <sup>21</sup> Lázaro picani jamatabëxaeabiaba riconë pexaeabiabijavata piothopaepërë mesa bëxëpanareca. Avirixi ata patabiaba itsajota Lázaro bocabiaba. Petsabanaejava raebabiabatsi. <sup>22</sup> Nexata baja belia Lázaro tëpa. Petëpaecujinae Lázaro ángelevi caponayatsi Dioso pijanacuayabetsia, itsabetsia Abrahampijinë petëpaecujinae ponapona. Bajaraxuacujinae riconë ata tëpa. Mëthëtatsi. <sup>23</sup> Riconëmi petëpaecujinae pata petëpaevi pepatabiabinacuayabelia. Nexata bajarapanacuata riconëmi bitso navixaetaeya bejiobi tsaponapona. Nexata riconëmi athëbëa benaëcotsia. Tajëtatsia taenuta Abraham penucaejava. Lázaro nucaya Abraham pemuxunenetatsia. <sup>24</sup> Nexata riconëmi vavajai. Jumaitsi Abrahamjavabelia: “Amo Abraham, nitaxutotsoniataema. Ne-

toitorobimica Lázaro. Nacobeupijabutsi merata neebarëtocainejebiaexanaejitsia. Bitso jamatabëfaenajë mapatajutaje,” jai riconëmi. <sup>25</sup> Nexata Abraham jumaitsi riconëmijavabelia: “Tamomo, najamatabënapire. Pamatacabi pinaena abaxë asaëmë tsaponaponae nenaexanaeirata, ëpexaniacuene picani xainame. Lázaro pijinia pamatacabi abaxë asaë tsaponaponae, bitso picani bejiobi. Itsiata juya mapamatacabi pexaniacuenia majotaje catsuponapona. Xamë biji navixaetaeya ponaponame. <sup>26</sup> Itsajivi jamatabëponae ata bajarabereca, acuenebi itsiata pepanepaenexa bajarabereca. Tsipaji bitso ayaitapajanitoxanetoreca. Bajaraxuata paxamë ata apo pacacaëjëpae panepanepaenexa mabetsinaje,” jai Abraham. <sup>27</sup> Nexata icatsia riconëmi jumaitsi Abrahamjavabelia: “Amo Abraham, pexaniacuene cavajëtatsi. Tonajumeitorobianame Lázarota taxa pijaboyabelia. <sup>28</sup> Bajarajotalia xainajë cinco ponëbeje tajuyapijivi. Xaniavaetsia Lázaro tsipaebiana. Muxujiobiana bajarapamonae ata peponaeyaniva mapanavixaetaeyabiabinacuaya berenaje,” jai riconëmi Abrahamjavabelia. <sup>29</sup> Nexata icatsia Abraham jumaitsi riconëmijavabelia: “Bajarapamonae baja xaina Moiséspijinë peyaquinaelivaisianë. Diosojumepaebivimi profetavi ata peyaquinaelivaisianë ata, xaina baja. Nexata nejuyapijivi itsa apo jitsipae tsane peponaenexa bajarapanacuayabelia, nexata nejuyapijivi jumecovënëtsiana bajarapamonaemi peyaquinaelivaisianë,” jai Abraham riconëmijavabelia. <sup>30</sup> Riconëmi icatsia jumaitsi Abrahamjavabelia: “Jume raja. Apo jumecovënëtsi tsane cajena bajarapalivaisianë. Itsiata itsajivi itsa asaë tsane petëpaecujinae penaviatsinexa pecovëyabelia, tsipaebiana tajuyapijivijavabelia. Nexata tajuyapijivi copabiana pibisiacuene pexanabiabijava. Najamatabëcuenepënëyorotsiana Diosojavabelia,” jai riconëmi Abrahamjavabelia. <sup>31</sup> Nexata icatsia Abraham jumaitsi riconëmijavabelia: “Nejuyapijivi itsa apo jumecovënëtsi Moiséspijinë peyaquinaelivaisianë, Diosojumepaebivimi profetavi peyaquinaelivaisi ata, nexata pajivi asaë petëpaecujinae, mavelia ponae ata tsipaeje petsipaebinexa nejuyapijivijavabelia, itsiata nejuyapijivi apo jumecovënëtsi tsipae bajarapajivi ata,” jai Abraham riconëmijavabelia, jai Jesús fariseovijavabelia.

**Pacuenia Dioso pijajivixae, itsamonae jamatabëcuenëjëbjitsiatsi pibisiacuene pexanaenexa yabara pelivaisi**

*(Mt 18.6-7, 21-22; Mr 9.42)*

**17** Jesús jumaitsi pijajivijavabelia:  
 —Xanë tajajivixae, itsamonae jamatabëcuenëjëbabiabianatsi pibisiacuene pexanaenexa. Nexata itsamonae pejamatabëcueneta tajajivi pibisiacuene exanaena. Nexata pajivi pejamatabëcueneta tajajivi pibisiacuene exanaena, bajarapajivi Diosojavabelia bitso naneconitsiana. Nexata bajarapajivi pinijicuenia Dioso naneconitsiaexanaenatsi. <sup>2</sup> Itsamonae Dioso pejumecovënëtsivi, abaxë bepejevaxijamatabëcuenë xaina Dioso pejumecovënëtsijava yabara. Nexata apo ajamatabëcuenesaë. Nexata pajivi tajajivijavabelia pibisiacuene jamatabëexanaeyaexana, abaxë tajajivijavabelia pibisiacuene exanaeyaexanaenejeva, bajarapajivi bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatuajëareca. Bajarapacuenia bexuarecatsi, tajajivijavabelia pibisiacuene itsa exanaeyaexana bitso penaneconitsiyaniva Diosojavabelia. <sup>3</sup> Nexata xania. Panayajivitaema pibisiacuene, jai Jesús pijajivijavabelia.

Icatsia Jesús jumaitsi pijajivijavabelia:

—Itsanë Dioso panenajuajumecovënëtsivi pibisiacuene itsa pacaexanaena paxamëjavaberena, bajaraponë xaniavaetsia paitavetsianame. Nexata baja itsa aura tsane pibisiacuene papecaexanaejava yabara, nexata pexaniajajumeta itsa pacanavajunupaebiana pecopatsijavanexa bajarapacuene, pajamatabëcuenecaevianame pibisiacuene papecaexanaejava. Pabarajamatabëcuenexanepanaename bajaraponë. <sup>4</sup>Caematacabita siete xuabeje pibisiacuene pacaexanae ata tsane, itsiata siete xuabeje itsa aura tsane pibisiacuene papecaexanaejava yabara, nexata pexaniajajumeta itsa pacanavajunupaebiana pecopatsijavanexa bajarapacuene, itsiata pajamatabëcuenecaevianame. Pabarajamatabëcuenexanepanaename bajaraponë, jai Jesús pijajivijavabelia.

### **Pacuenia Jesús jumaitsi pijaapóstolevijavabelia yabara pelivaisi**

<sup>5</sup> Jesús pijaapóstolevi jumaitsi Jesúsjavabelia:

—Patajatuxanenë, paneyavenonare: “Xanë cajena necaëjëpa daxitacuene taexanaenexa,” nejaitsabiabijava orijibia patacajumecovënëtsinexa, jai Jesús pijaapóstolevi.

<sup>6</sup> Nexata Jesús jumaitsi pijaapóstolevijavabelia:

—Tsiquirijavayo ata xanë yabara itsa pajamatabëjumaitsimë tsipae: “Xaniajai cajena. Jesús caëjëpatsi daxitacuene pexanaenexa,” itsa pajamatabëjamë tsipae, nexata paxamë ata pacacaëjëpaejitsipa ayaiacuene paneexanaenexa. Nexata itsa pajumaitsimë tsipae mapanaejavaxanetojavabeliaje: “Yatabutopaya natixire. Nucaename pucaxaneto tuatuajëta,” itsa pajamë tsipae, nexata naejava ata pacajumecovënëtsipa cajena, jai Jesús pijaapóstolevijavabelia.

### **Pacuenia itsajivi pijatuxanenë pitorobicueniatsi toexanabiaba yabara pelivaisi**

<sup>7</sup> Jesús icatsia jumaitsi pijaapóstolevijavabelia:

—Paxamëyajuvënënë xainaejitsipa pijajivitonë. Nexata itorobijitsipa petonacuenebaponaponaenexatsi. Nexata bajaraponë pijatuxanenë ira petocueponaponaecujinae, patsipa pijatuxanenë pijaboyaberena. Itsa jume, baca petoetaponaecujinae patsipa. Nexata paxamëyajuvënënë petuxanenëxae, pijajivitonëjavabelia apo jumai tsipae: “Jonemena baja. Ecare nexaejava tacarajutsinexa,” apo jai tsipae pijajivitonëjavabelia. <sup>8</sup> Jume baja cajena. Biji rajane jumai tsipae pijajivitonëjavabelia: “Netoexanare taxaejavanexa. Nexata abaxë nevetanucaename tanabanijavata. Bajaraxuacujinae xamë nabanianame,” jai tsipae pijajivitonëjavabelia. <sup>9</sup> “Xanepana rabaja. Pexaniacuene bitso netoexaname,” apo jai tsabiabinua pijajivitonëjavabelia petonacuenebabiabijavatsi yabara. Bajarapacuenia apo jumai tsabiabi tsipae tsipaji saya pijajivitonë tsaponapona. Nexata pacuenia pijatuxanenë itorobatsi, bajaraponë exanabiabijitsipa. <sup>10</sup> Bajarapacuenia paxamë ata patoexanare Dioso papecaitorobicuenia. Itsa patoveretsianame Dioso papecaitorobicuenia panetoexanavanapaejava, nexata saya namataenetsia panajumaitsimë tsane: “Vaxaitsi saya vajatuxanenë pijajivitsi. Nexata vajanacaitorobicuenia toexanavanapatsi,” panajamë tsane. Pëtsa panajumaitsimë: “Itsajivi meta nacajumai tsane: ‘Xanepana rabaja. Xaniavaetsia Dioso patonacuenebame,’ nacajai meta tsane,” panajamë pëtsa, jai Jesús pijaapóstolevijavabelia.



**Pacuenia Jesús jamatejemaya exana diez ponëbeje,  
bajayajebi bitso peperabëtsabanaevi, yabara pelivaisi**

<sup>11</sup> Jesús pona Jerusalén tomarabelia. Itsajota Samaria nacuabeje Galilea nacuabeje namuxunenecaxitarababeje, bajaraxuayo Jesús najetaruca. <sup>12</sup> Itsa baja Jesús patsijitsia tsiquiritomarayo javabelia, mataenenatsi diez ponëbeje bajayajebi bitso peperabëtsabanaevi. Itsiata tajiyo bajarapamonae vecuanubenaothopatsi. <sup>13</sup> Bajarapamonae ayaijumeta jumaiti Jesúsjavabelia:

—¡Jesús, paneitaxutotsoniataema! jai.

<sup>14</sup> Nexata Jesús itsa tane bajarapamonae, Jesús jumaiti bajarapamonaejavabelia: —Panaitajëtsianame sacerdotevijavabelia papecaperbëtaenexa, jai Jesús bajarapamonaejavabelia.

Nexata bajarapamonae pona sacerdotevijavabelia. Nexata bajarapamonae namutua penajetarubenaevavata pepatsinexa sacerdotevijavabelia, namutua baja perabëxanepananajetarubena. <sup>15</sup> Daxita bajarapamonae peperabëxanepanaejava itsa tane, nexata caenë saya bajarapomonaeyajuvënënë naviateca Jesúsjavabelia. Bajaraponë namutua ayaijumeta Diosojavabelia jumai tsanajetaruca: “¡Diosomë, bitso ayaijamatabëcuenenëmë! ¡Tavitanejavami baja vecua, nejamatejemayaexaname!” jai tsanajetaruca bajaraponë Diosojavabelia.

<sup>16</sup> Bajaraponë itsa pata Jesúsjavabelia, pematatabacabëta irataeya bocajunua Jesús pitabarata.

—Pexaniacuene netoexaname. Nejamatejemayaexaname baja tavitanejavamivecua, jai Jesúsjavabelia.

Bajaraponë Samaria nacuapijinë. <sup>17</sup> Nexata Jesús jumaiti bajarajota penubenaevijavabelia:

—Diez ponëbeje bitso peperabëtsabanaevi jamatejemayaexanajë. ¿Detsa meta xujitsia daxita apo najuapatsi? <sup>18</sup> Maponëje caenë saicaya nacuapijinë, apo judíonë ata, naviateca Diosojavabelia pejumaitsinexa: “¡Diosomë, bitso ayaijamatabëcuenenëmë! ¡Tavitanejavami baja vecua, nejamatejemayaexaname!” pejainexa Diosojavabelia, jai Jesús bajarajota penubenaevijavabelia Samaria nacuapijinë yabara.

<sup>19</sup> Nexata Samaria nacuapijinëjavabelia Jesús jumaiti:

—Nonotapunare. Ponare baja. Jamatejemamë rabaja tanejumecovënëtsixaemë tacajamatejemayaexanaevanexa, jai Jesús.

**Pacuenia Jesús tsipaeba pijajivijavabelia,  
fariseovijavabelia ata, pecopiapatsijava baja Dioso  
pijajivi pevetsijava mapanacuataje yabara pelivaisi**

(Mt 24.23-28, 36-41)

<sup>20</sup> Fariseovi jumaiti Jesúsjavabelia:

—¿Detsa paepatota copiapatsiana Dioso pijajivi pevetsijava pijajivi mapanacuataje? jai fariseovi.

Nexata Jesús jumaiti fariseovijavabelia:

—Dioso taxuxuabi ata pijajivi pevetsijava mapanacuataje, apo taetsi vajaitaxutota. <sup>21</sup> Nexata jivi apo jumai tsane: “Copiapata rabaja majotaje Dioso pijajivi pevetsijava mapanacuataje,” apo jai tsane. “Copiapata rabaja majotaliaje Dioso pijajivi

pevetsijava mapanacuataje,” apo jainua tsane. Dioso rabaja capanepaeya aeconoxae evetapona pijajivi paxamē tuatujēta, jai Jesús fariseovijavabelia.

<sup>22</sup> Nexata Jesús itsamatacabi mapanacuaje pevetsijavanexa, tajēvelia nava-junupaeba pijajivijavabelia. Jesús jumaitsi mapacueniaje:

—Itsamatacabi xanē, Daxitajivi Pematapijinēnē, mapanacuaje taevetsinē tsane. Nexata paxamē picani bitso pajitsipaename patanetaenexamē mapanacuaje taevetsicuene. Itsiata baitsi jane apo pataemē tsane mapanacuaje taevetsicuene. <sup>23</sup> Nexata itsamonae pacajumai tsane: “Bajarajotalia eca mapanacua pepo pevetsinēje,” pacajai tsane xanē yabara. Itsa jume, pacajumai tsane: “Majota ecaje, mapanacua pepo pevetsinēje,” pacajai tsane xanē yabara. Itsiata pētsa paponame. Pētsa pamuxunaponamenua bajarapamonae pepēta. <sup>24</sup> Pacuenia yamaxē itsa nivejai tsajuni athēbēvetsica, caecuenia jivi cotiatane daxitajava, bajara pijinia pacuenia daxitanacuanēpijivi caecuenia netaena pamatacabi patsianicajē xanē, Daxitajivi Pematapijinēnē. <sup>25</sup> Itsiata copiaya ayaicuenia navixaetaeya bejiobinē tsane. Mapanacuataje pejinavanapaevi apo nejumecovēnētsinua tsane Dioso athēbēvetsica taneitorobinēcuenetsica. <sup>26</sup> Pacuenia bajayata jemata itsi pamatacabi Noépijinē ponapona, bajara icatsia jemata itsane pamatacabi xanē, Daxitajivi Pematapijinēnē, jemata icatsia patsianicajē. <sup>27</sup> Bajayata pamatacabi Noépijinē ponapona, jivi picani xaniavaetsia jamatejema pexaejava xaevanapa. Apaevanapanua. Nacojiobapona itsamonae. Itsamonae pexēnatoyonē pebijavabelia canajetapona petonacojiobinexatsi. Bajarapamonae jamatejema saya jinavanapa. Nexata bajarapamatacabi Noépijinē ēpijamonae pinijibarcojavabelia barējunua. Nexata daxitajivi merata bubuna jemata ira itsa bubuta. <sup>28</sup> Bajara pijinia itsi bajayata pamatacabi Lotpijinē ponapona. Jivi saya jamatejema jinavanapa. Pexaejava xaevanapa. Apaevanapanua. Comuacapona. Canajetapona. Ubapona pijapabianē. Pijabonē ata exanapona. <sup>29</sup> Itsiata baitsi jane pamatacabi Lotpijinē Sodomatomara vecuapitsapa, jemata athēbēvetsica pinijicuenia isotonē othopaica. Othopaica pitarutsiibotonēnua. Nexata daxita Sodoma tomarapijivimi tajuatsi. Nexata baja verebiabatsi. <sup>30</sup> Bajara pijinia pacuenia icatsia jemata itsane pamatacabi xanē, Daxitajivi Pematapijinēnē, jemata icatsia patsianicajē, jai Jesús pijajivijavabelia tajēvelia penavajunupaebijavata icatsia pepatsijavanexatsica.

<sup>31</sup> Icatsia Jesús jumaitsi pijajivijavabelia:

—Pamatacabi xanē jemata patsianicajē, itsajivi ata pētsa sivanajamatabēxaina mapanacuapijicuenieje. Nexata pajivi athēbēyo bojumatatsia ecaya, perunaecuinaetsica, pētsa sivanajamatabēxaina pijaboēnēalia pebobenaevanē pejutsinexa. Pajivi pijinia pijapabita nacuenebaponapona, pētsa najamatabēxaina penavitsinexa pijaboyabelia. <sup>32</sup> Panajamatabēnapire pacuenia bajayata Lotpijinē pijavami exanatsi. Lotpijinē pijavami pesivanajamatabēxainaexae mapanacuapijicuenie, napijivitaeyojopa. Nexata baja tēpa. <sup>33</sup> Pajivi exanaponapona penatojitsipaecuenia, apo xainae tsane matacabi apo peverevereaejava. Itsiata baitsi jane pajivi xanē tajamatabēcueneta copatsiana penatojitsipaecuenia pexanabiabijavami, bajarapajivi xainaena matacabi apo peverevereaejava, jai Jesús pijajivijavabelia.

<sup>34</sup> Icatsia Jesús jumaitsi tajēvelia pijajivijavabelia:

—Xanijanē beje majitanucaenabeje caecamata. Itsanē tanejumecovēnētsinē tsane. Itsanē apo tanejumecovēnētsinē tsane. Nexata tanejumecovēnētsinē pitsianatsi

ángelně. Apo tanejumečověnětsině copatabuatsianatsi. <sup>35</sup> Anijavabeje pijinia najuacuabanucaenabeje caejavata. Nexata tanejumečověnětsiva pitsianatsi. Apo tanejumečověnětsiva copatanutsianatsi. <sup>36</sup> Anijaněbeje pijinia najuanacuenebanucaenabeje pabita. Nexata tanejumečověnětsině pitsianatsi. Apo tanejumečověnětsině copatanutsianatsi, jai Jesús tajěvelia pijajivijavabelia.

<sup>37</sup> Jesús nexata pijajivi itsa jumetane bajarapacuenia Jesús pejumaitsijava, bajaramonae jumaitsi Jesúsjavabelia:

—Patajatuxaneně, ¿detsa jota bajarapacuenia yajuvěněpitsianatsi? jai Jesús pijajivi.

Nexata Jesús jumaitsi tajěvelia pijajivijavabelia:

—Pacuenia quequeremonae bepíjia yapětane itsajota petuxutsaebině boca bajara-jota penacaetuatsinexa, bajara pijinia pacuenia daxita tajajivi bepíjia yapětaena tap-sijavatsica penacaetuatsinexa xanějavaberena, jai Jesús pijajivijavabelia.

### **Pacuenia Jesús pijajivijavabelia livaisi tsipaeba juezně pelivaisicuenia yabara pelivaisi**

**18** Jesús pijajivi livaisi tsipaeba mapacueniaje Jesús pijajivi jamataběcuenecuer-anaenejeva pevajětabiabinexa Diosojavabelia. <sup>2</sup> Nexata Jesús jumaitsi pijajivijavabelia:

—Tomarata ponapona juezně. Bajaraponě pevetsině jivi penaneconitsiaexanae-cuene. Bajaraponě Dioso apo cujunavi. Jivi ata apo cujunavi. <sup>3</sup> Bajarapatomarata ponapona pamona pevecuatěpaevatsi. Bajarapova ponabiaba jueznějavabelia pejumaitsiabinexa: “Naneconitsiaexanare poně xanějavaberena naneconita. Naneconitsiaexanare pacuenia caitoroba nijatuxaneně bajarapitsivi nenaneconitsi-aexanaenexa,” pejaitsiabinexa, bajarapova ponabiaba jueznějavabelia. <sup>4</sup> Itsiata abaxě bajayajebi juezně apo jamataběcueneyavenonae bajarapova. Belia baja bexěa juezně jejai. Nexata juezně jamatabějumaitsi: “Dioso picani apo cujunavině. Jivi ata picani apo cujunavině. <sup>5</sup> Itsiata mapovaje tanejamatáběitonotabiabixae, yavenonae-najě pacuenia nitorobabiaba. Nexata baja bajarapova matavějěa apo patabiabirena tsane xanějavaberena tanecueranaeyaexanaenexa,” jamatabějai juezně, jai Jesús pijajivijavabelia.

<sup>6</sup> Jesús icatsia jumaitsi pijajivijavabelia:

—Bajara jamataběcuenetsi juezně, pibisijamataběcueneně ata. Yavenona bajarapova asaěya pevajěcabiabixatsi. <sup>7</sup> Bajara pijinia pacuenia Dioso ata pijajivi yavenonaena itsamonae pibisiacuene itsa exanatsi. Bajarapacuenia Dioso pijajivi yavenonaena bajarapamonae itsa vajětabiabiana Diosojavabelia matabijebi, mer-avi yajava. Dioso cajena apo cuenenajematsi tsane itsa yavenonaena pijajivi. <sup>8</sup> Xani-ajaně pacuenia pacatsipaebijitsiatsi. Dioso apo cuenenajematsi tsane itsa yavenon-aena pijajivi itsamonae pibisiacuene pexanaeyanivatsi. Pamatacabi xaně, Daxitajivi Pematapijiněně, icatsia patsianicajě, ¿caxitajarabianajě tsaja abaxě tanecopiaeveta-vanapaevi? jai Jesús pijajivijavabelia.

**Pacuenia itsanē fariseonē, itsanē impuestomatamo gobierno  
pejamatabēcuene pematamoyanijobinē,  
vajētabeje Diosojavabelia yabara pelivaisi**

<sup>9</sup> Itsajota Jesús pijajivijavabelia livaisi tsipaeba, bajarajota nubena itsamonae. Bajarapamonae jamatabējumai tsabiabi: “Vaxaitsi cajena pexaniajamatabēcuenevitsi itsamonaevēcua. Itsamonae bitso nacavecuapibisiajamatabēcuenevi,” jamatabējai tsabiabi. Nexata bajarapamonaejavabelia Jesús livaisi tsipaeba. Jumaitsi mapacueniaje:

<sup>10</sup> —Anijanēbeje tsiabeje templobojavabetsia pevajētsinexabeje Diosojavabelia. Caenē fariseonē. Itsanē gobierno pejamatabēcuene impuestomatamo pematamoyanijobabinē. <sup>11</sup> Nexata fariseonē nuca. Fariseonē pevajētsijavata Diosojavabelia, bitso bepexaniajamatabēcuenenē nataeya jumaitsi mapacueniaje: “Diosomē, pexaniajamatabēcuene carajutatsi. Tsipaji pacuenia itsamonae jamatabēcueneitsi tsenae, bajara xanē apo jamatabēcueneitsinē. Yamaxēitojorobiaya jivi apo tavecuanacobe-toxotsinē. Apo tacujirubejenē cajena. Apo tajaitsinē itsava tajavavecua. Pacuenia maponēje gobierno pejamatabēcuene impuestomatamo pematamoyanijobabinē jamatabēcueneitsije, bajara xanē apo tajamatabēcueneitsinē. <sup>12</sup> Caesemana canacujitsia, anijamatacabibeje, najamatabēcuenexaniavaetsiaya ponaponabiabajē xaenejevanē taxaejava tacavajētsinexa xamējavabelia. Daxita pacuene nacanabajē, diez xuabejeyajuvēnējaya, caejava, xamējavabelia carajutabiabatsi ofrendacuenia,” jai mapacueniaje fariseonē templobota pevajētsijavata Diosojavabelia. <sup>13</sup> Nexata ponē gobierno pejamatabēcuene impuestomatamo pematamoyanijobabinē, pevajētsijavata Diosojavabelia tajiyo nucalia piauraxae. Athēbēabetsia ata penavēyotsijava cujunava. Namēpabēbenuca pecobeta pejamatabēbējaixae pibisiacuene pexanaeneconi yabara. Nexata bajaraponē Diosojavabelia pevajētsijavata jumaitsi mapacueniaje: “¡Diosomē, nitaxutotsoniataema! ¡Pibisiacuene cajena bitso xanē exanabiabajē!” jai bajaraponē templobota pevajētsijavata Diosojavabelia, jai Jesús mapacueniaje bepexaniajamatabēcuenevi penataevijavabelia.

<sup>14</sup> Icatsia Jesús jumaitsi bajarapamonaejavabelia:

—Xaniajanē pacuenia pacatsipaebijitsiatsi. Ponē gobierno pejamatabēcuene impuestomatamo pematamoyanijobabinē, bajarapacuenia pevajētsixae Diosojavabelia, Dioso baja vecuajibiaexanatsi pibisiacuene pexanaeneconimi. Nexata baja bajaraponē naviata pijaboyabelia planeconijibinē. Ponē fariseonē, navajētsi ata Diosojavabelia, itsiata pijaneconi yajava naviata pijaboyabelia. Tsipaji beayaijamatabēcuenenē natane pevajētsijavata Diosojavabelia. Bajaraxuata pajivi beayaijamatabēcuenejivi natane itsamonaevēcua, bajarapajivi beveliajamatabēcuenejivi exanaenatsi Dioso. Pajivi saya beveliajamatabēcuenejivi natane itsamonaevēcua, bajarapajivi ayaijamatabēcuenejivi exanaenatsi Dioso, jai Jesús bepexaniajamatabēcuenevi penataevijavabelia.

**Pacuenia Jesús jumaitsi pejevaxijivixijavabelia yabara pelivaisi**

*(Mt 19.13-15; Mr 10.13-16)*

<sup>15</sup> Itsamonae pejevaxijivixi tocapataponatsi Jesús pecobeta pejayataponae nexa. Nexata Jesús pijajivi itsa tane bajarapacuenē, Jesús pijajivi itaveta pexi pecapat-sivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavabelia, jai.

<sup>16</sup> Nexata Jesús jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivixije jumeabinejeva xaniavaetsia bajumecovënëta palivaisi tsipaebatsi. Nexata pamonaе jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovënëta Dioso pejumelivaisi. <sup>17</sup> Xaniajanë pacuenia pacatsipaebijitsiatsi. Mapitsipejevaxijivixije itsa jumecovënëta palivaisi tsipaebatsi, bajumecovënëta xaniavaetsia jumeabinejeva. Nexata pamonaе jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovënëta Dioso pejumelivaisi. Nexata pamonaе jumeabinejeva xaniavaetsia jumecovënëtsiana Dioso pejumelivaisi, bajarapamonaе jonena Dioso pijanacuayabetsia. Itsiata baitsi jane pamonaе Dioso pejumelivaisi jumeabinejeva xaniavaetsia apo jumecovënëtsi tsane, apo jone tsane Dioso pijanacuayabetsia, jai Jesús pijajivijavabelia.

**Pacuenia pevëjëato, bitso pexainaenë,  
cuaicuajjai Jesúsjavabelia yabara pelivaisi**

*(Mt 19.16-30; Mr 10.17-31)*

<sup>18</sup> Pevëjëato, judíovi pevetsinë, yanijoba Jesúsjavabelia. Pevëjëato jumaitsi mapacueniaje:

—Petuxanenë, pexaniajamatabëcuenenëmë, ¿detsa pitsicuene exanaenajë taxainaenexa maticabi apo peverevereaejava? jai pevëjëato.

<sup>19</sup> Nexata Jesús jumaitsi pevëjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. <sup>20</sup> Xamë baja yapëtaneme pacuenia Dioso pejumelivaisita itoroba jivi pejumecovënëtsinexa. Jumaitsi mapacueniaje: “Pëtsa jaitame itsapetiriva nijavavecua. Pëtsa beyaxuabame jivitonë. Pëtsa nacobetoxotame. Pëtsa itsamonae pexanaejava yabara najumetsënëtsiaya paebame. Axa yaiyataema. Ena ata yaiyataema,” jai Dioso pejumelivaisita. Xamë baja yapëtaneme bajarapalivaisi, jai Jesús pevëjëatojavabelia.

<sup>21</sup> Nexata pevëjëato jumaitsi Jesúsjavabelia:

—Daxita rabaja bajarapalivaisianë jumecovënëtajë pejevaxinënëjavaveliacujinae, jai pevëjëato.

<sup>22</sup> Itsa Jesús jumetane bajarapacuenia pejumecanaviatsijavatsi, nexata icatsia jumaitsi pevëjëatojavabelia:

—Abaxë raja catosaica caejava nexanaenexa. Canajere daxita nexainaejavami. Bajarapamatamomi tsicobetsanaename bepejiobivi. Bajaraxuacujinae nepënaponaename. Nexata bajarapacuenia xainaename bitso nexainaecuene Dioso pijanacuatatsia, jai Jesús pevëjëatojavabelia.

<sup>23</sup> Bajarapacuenia Jesús itsa jumaitsi pevëjëatojavabelia, nexata pevëjëato bitso bejamatabëjiobi tsanajetsireca. Tsipaji pevëjëato daxitacuene bitso pexainaenë. Nexata pevëjëato apo jamatabëjumecovënëtsi palivaisi Jesús tsipaeba. <sup>24</sup> Itsa Jesús tane pevëjëato bepejamatabëjiobi tsanajetsijavareca, nexata pevëjëato pecovëta jumaitsi pijajivijavabelia:

—;Pamonaе bitso daxitacuene pexinaeви, tsiayapëbejetsi bitso pe-najamatabëcuenecopatsinexa Diosojavabelia pecapanepaenexatsi Dioso

pijanacuayabetsia! <sup>25</sup> Pacuenia camello acuenebi pejonejava palutaetotaxutovojo-tualia, bajara pijinia pacuenia bitso pexainaenë acuenebi tsane pejonejava Dioso pijatomarabetsia, jai Jesús pijajivijavabelia.

<sup>26</sup> Nexata Jesús pijajivi jumaitsi Jesúsjavabelia:

—¿Detsa nexata pitsivi panepaena Diosojavabelia, bitso pexinaeivi ata, itsa apo panepae tsane Diosojavabelia? jai Jesús pijajivi.

<sup>27</sup> Jesús nexata jumaitsi pijajivijavabelia:

—Pacue jivi apo caëjêpaetsi pexanaenexa, bajarapacue Dioso caëjêpatsi pexanaenexa, jai Jesús pijajivijavabelia.

<sup>28</sup> Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajê daxitacue pataxainaejavami. Nexata baja pacapênajinapanatsi, jai Pedro.

<sup>29-30</sup> Jesús nexata jumaitsi:

—Xaniajanë pacuenia pacatsipaebijitsiatsi. Pajivi Dioso pijacue petonacuenebinexa pueneta pijabomi, paxa ata, pena ata, pematapijivi ata, pejuyapijivi ata, pijava ata, pexi ata, nexata bajarapajivi mapanacuataje pepuenetsijavami matatoxenetsia Dioso rajutsianatsi. Nexata bajarapajivi bexëajavabelia petêpacujinae ata Dioso rajutsianatsi matabi apo peverevereaejava, jai Jesús pijajivijavabelia.

### **Pacuenia icatsia Jesús tajêvelia navajunupaeba pebeyaxuabijavanexatsi yabara pelivaisi**

*(Mt 20.17-19; Mr 10.32-34)*

<sup>31</sup> Jesús itsamonaevueca ëpijajivi, doce ponêbeje, junata pimoxoyotsinexatsi. Nexata Jesús pebeyaxuabijavanexatsi, tajêvelia navajunupaeba pijajivijavabelia. Jesús jumaitsi mapacueniaje:

—Panejumetaema. Mara Jerusalén tomarabelia ponatsije. Bajayata Dioso-jumepaebivimi profetavi, xanë, Daxitajivi Pematapijinënë, talivaisi tajêvelia yaquina. Pacuenia nexanaejitsia, daxita bajarapalivaisi bajayata profetavimi tajêvelia yaquina. Nexata daxita pacuenia xanë talivaisi bajayata tajêvelia profetavimi yaquina, daxita jane baja bajarapacue Jerusalén tomaratalia netocopiapatsiana. <sup>32</sup> Itsanacuaverena pepatsivi pecobeyabelia necanajetsiana tanebeyaxuabinexa. Bajarapamonaecanecaponaena. Nebijataena pibisiacuenia. Nesuabi-ana. <sup>33</sup> Nejumatitibabena penaneconitsivi pejumaconitabiabimacata. Bajaraxuacujinae nebeyaxuabiana. Itsiata baitsi jane tanebeyaxuabicujinae, acueyabi matabita, icatsia asaenë tsane, jai Jesús pijajivijavabelia tajêvelia penavajunupaebijavata pebeyaxuabijavanexatsi.

<sup>34</sup> Itsiata Jesús pijajivi apo jumeyapêtae pajamatabêcuene yabara Jesús jumaitsi.

### **Pacuenia Jesús itaxutoxanepanaeyaexana bitso pitaxutotsêcënaenë, Jericó tomarapijinë, yabara pelivaisi**

*(Mt 20.29-34; Mr 10.46-52)*

<sup>35</sup> Jesús imoxoyotanajetaruca Jericótomara. Nexata namuto muxuneneta eca bitso pitaxutotsêcënaenë, apo petaenë. Bajaraponë amoneya palata vajêcabiabeca jivijavabelia. <sup>36</sup> Nexata bitso pitaxutotsêcënaenë itsa jumetane jivibitsaëtoxaneto pecuaicuajai tsanajetarubenaeejava namutua, bajaraponë epajunateca.

—¿Detsa xua pajaitame? jai tsecae bajaraponë.

<sup>37</sup> Nexata jivi jumaitsi bajaraponëjavabelia:

—Jesús raja, Nazaret tomarapijinë, maxuayo najetarucaje, jai jivi.

<sup>38</sup> Nexata pitaxutotsëcënaenë vavajai tsecae.

—¡Jesús, Davidpijinë pemomomë, nitaxutotsoniataema! jai tsecae bajaraponë.

<sup>39</sup> Nexata picani itsamonaë, Jesús pevajënaeya penajetarubenaevi, jumeitaveta bajaraponë pemoyanexa. Itsiata biji bitsoyo orijibia vavajai tsecae.

—¡Davidpijinë pemomomë, nitaxutotsoniataema! jai tsecae pitaxutotsëcënaenë.

<sup>40</sup> Nexata Jesús muxunanucojopa. Jumaitsi pijajivijavabelia:

—Panetocomaponaremena pitaxutotsëcënaenë, jai Jesús.

Itsa baja imoxoyo tocanajetarubenatsi, Jesús jumaitsi pitaxutotsëcënaenëjavabelia:

<sup>41</sup> —¿Detsa xua jitsipame tacaexanaenexa? jai Jesús.

Nexata bitso pitaxutotsëcënaenë jumaitsi Jesúsjavabelia:

—Jesús, jitsipajë taitaxutoxanepanaejava, jai pitaxutotsëcënaenë.

<sup>42</sup> Jesús nexata jumaitsi pitaxutotsëcënaenëjavabelia:

—Itaxutoxanepaname rabaja. Tsipaji nesivajamatabëjumaitsimë mapacueniaje: “Jesús nitaxutoxanepanaeyaexanaena,” nesivajamatabëjamë, jai Jesús pitaxutotsëcënaenëjavabelia.

<sup>43</sup> Bajarapacuenia Jesús pejumaitsijavata, bitso pitaxutotsëcënaenëmi xaniavaetsia baja tane. Nexata bajaraponë napona baja Jesús pepëta. Bajaraponë namutua jumai tsanajetarucaë Diosojavabelia:

—¡Diosomë, bitso pexaniacuene netoexaname! jai tsanajetarucaë bajaraponë.

Pamonae ata tane bajaraponë pitaxutoxanepanaejava baja, daxita bajarapamonae ata Diosojavabelia jumai tsanajetarubenaë:

—¡Diosomë, bitso ayajamatabëcuenenëmë! jai tsanajetarubenaë Diosojavabelia.

### Pacuenia nabarëcuaijaiibeje Jesúsbeje Zaqueobeje yabara pelivaisi

**19** Jesús najetaruca Jericó tomarajava. <sup>2</sup>Jericó tomarata ponapona Zaqueovënënë. Bajaraponë gobierno pejamatabëcuene impuestomatamo pematomayanijobabiabivi penamatacaitorobinë. Zaqueo bitso pexainanë pexainaejava. <sup>3</sup>Nexata Zaqueo jamatabëtane Jesús. Itsiata apo caëjëpaetsi petaejava. Tsipaji Zaqueo petoyaeacænëyo. Jivibitsaëtoxaneto matatoyorotsia nubenatsi Jesús Zaqueo pevajënaë. <sup>4</sup>Nexata Zaqueo cujinaeponalia jivibitsaëtoxaneto pevajënaeyabelia Jesús peponaenamutuabelianexa. Junaya naejavatsia athëbëvetsica petaenucaenexa Jesús penajetarucaejava. <sup>5</sup>Nexata Jesús namutua itsa imoxoyotanajetaruca, itsa ponaeta Zaqueo athëbëyo nucaya, bajaraponaëjavatsia Jesús naëcotsia. Nexata Jesús taenutsia Zaqueo. Jesús nexata jumaitsi Zaqueojavabelia:

—Zaqueo, naxanitsiayo runaimica. Nijaboyabelia raja patsijitsianë, jai Jesús.

<sup>6</sup>Nexata Zaqueo naxanitsiayo runajopaica. Barëyaya copiapita pijaboyabelia pebarëponaenexa Jesús. <sup>7</sup>Daxita pamonae Jesús matatoyorotsia najetarubenatsi, itsa tane bajarapacuenë, Jesús baracuaicuajaisi tsanajetarubenaë. Ëpamonae najumaitsi tsanajetarubenaë Jesús yabara:

—Jesús raja naponaponaëjitsia Zaqueo pijabota, caranata pibisiacuene pexanaenë pijabota, najai tsanajetarubenaë bajarapamonae Jesús yabara.

<sup>8</sup>Nexata Zaqueo pijabota Jesús eca mesa muxuneneta. Bajarajota Jesús pitabarata Zaqueo nonotapuna. Jumaitsi Jesúsjavabelia:

—Tajatuxanenë nejumetaema. Tsatsianejë namatajëpaeya taxainaijava tarajutsinexa bepejiobivijavabelia. Pamonaë yamaxëitojorobiaya vecuanotajë tamatomoyanijobijavata impuestomatamo, bajarapamonaë tocanaviabianajë. Nexata tayamaxëitojorobijamatabëcuene bajarapamonaë rajutsianajë juya cuatro xuabeje tsaponai caijavayomijamatabëcuene, jai Zaqueo Jesúsjavabelia.; <sup>9</sup>Nexata Jesús jumaitsi Zaqueojavabelia:

—Zaqueo, ajena rabaja pamatacabi, caxitajarabame, nijamonaë yajava, nijaneconivecua pecacapanepaejavanexa Diosojavabelia. Tsipaji baja nijamonaë barëjumecovënëtame Dioso. Zaqueo, xamë Abrahampijinë pemomomëcuenia. Itsiata baitsi jane ajena baja Diosojavabelia nenajamatabëcuenecopatsixae, Dioso jane baja catane pepacuene Abrahampijinë pemomomëcuenia. <sup>10</sup>Xanë, Daxitajivi Pematapijinënë, sivapatajopajë tajaitsinexa Diosovecua penaxuabivi tacapanepaenexa pijaneconivecua, jai Jesús Zaqueojavabelia.

### **Oro palatanëanë, diez ponëbeje, yabara pelivaisi**

*(Mt 25.14-30)*

<sup>11</sup>Zaqueo pijabota itsamonaë namuxunaevetena Jesús petsipaebilivaisi Zaqueojavabelia. Pamonaë namuxunaevetena, jamatabëcuenenavëxaniabiaya jamatabëjumai tsenae: “Imoxoyo rabaja ecalia Jerusaléntomara. Nexata Jesús itsa patsialia Jerusalén tomarabelia, copiajopaena jane baja daxita Dioso pijajivi pevetsijava,” jamatabëjai tsenae bajarapamonaë. Bajarapacuenia jamatabëjumai tsenae tsipaji baja Jerusaléntomara imoxoyo ecalia Jesús pepatsinexa. <sup>12</sup>Bajaraxuata Jesús livaisi tsipaeba bajarapamonaëjavabelia. Jesús jumaimatabëcuenenavëxaniabiaya jamatabëjumai tsenae: “Imoxoyo rabaja ecaliatsi mapacueniaje:

—Petuxanenë ponapona pijanacuata. Nexata pepo nacuaevetsinë tonajumeitorobarenatsi tajënacuverena. Petonajumeitorobijumetsirena jumaitsirena mapacueniaje: “Ponaename maberenaje nacua nevetsinënexa tacaexanaenexa nijanacua nevetsinexa. Bajaraxuacujinaë naviatsiaremelia nijanacua jane baja nevetsinexa,” jaitsirena petonajumeitorobijumetsirena. <sup>13</sup>Nexata petuxanenë peponaevajënaë, junata pijajivi, diez ponëbeje. Nexata petuxanenë pijajivi evetsiaexana pijapalatanëanë, oronëanë, bitso penamatamotsinëanë. Caenë canacujitsia caepalatanë evetsiaexanapona. Nexata petuxanenë pijajivi jumaitsi pijajivijavabelia: “Bajarapalatata pacomuataponaename. Xua pacomuataponaename, icatsia pacanajetaponaename. Nexata bajarapacuenia netoayaijava tsaponae tsane tajapalata,” jai petuxanenë pijajivijavabelia. Bajaraxuacujinaë pona jane baja. <sup>14</sup>Itsiata baitsi jane pevetsinacuatanaexa pejinavanapaevi, bitso itoyatsi petuxanenë. Nexata bajarapamonaë petuxanenë pecovëvelia itsamonaë itorobalia, itsajotalia petuxanenë nacua pevetsinënexa exanaejitsiatsi, bajarajotalia pejumaitsinexa: “Apo pajitsipaenë bajaraponë patanevetsinënexa patajanacuata,” pejainexa petuxanenë yabara. <sup>15</sup>Itsiata baitsi jane petuxanenë pijanacua baja pevetsinënexa exanatsi. Nexata baja naviarena pijanacuayaberena pevetsinexa jane baja pijanacua. Nexata baja parena. Nexata petuxanenë pepatsicujinaerena, junata icatsia pijajivi peyapëtaenexa jane baja pacuenia caenë canacujitsia pijapalatanëanë pijajivi tocanacuenebatsi pecov-



ëta. <sup>16</sup> Copiaya pepatsinë jumaitsi pijatuxanenëjavabelia: “Tajatuxanenë, nijapalatanë, taneevetsiaexanaenëmë, catopitsapa baja diez ponëbeje. Nexata baja daxitata once ponëbeje,” jai. <sup>17</sup> Nacuaevetsinë nexata jumaitsi pijajivitonëjavabelia: “Xanepana rabaja. Xaniavaetsia netoebetaponaponame. Tsiquirijavayo ata xaniavaetsia netoebetame. Nexata icatsia diez patomarabeje netoebetaponaponame,” jai nacuaevetsinë pijajivitonëjavabelia. <sup>18</sup> Icatsia itsanë pijatuxanenë pijapalatanë petoevetsinë pata. Nexata bajaraponë jumaitsi: “Tajatuxanenë, nijapalatanë, taneevetsiaexanaenëmë, catopitsapa baja cinco ponëbeje pematatsënëa,” jai. <sup>19</sup> Nacuaevetsinë nexata jumaitsi pijajivitonëjavabelia: “Xamë icatsia cinco patomarabeje netoebetaponaponame,” jai nacuaevetsinë pijajivitonëjavabelia. <sup>20</sup> Nexata icatsia itsanë pijatuxanenë pijapalatanë petoevetsinë pata. Jumaitsi pijatuxanenëjavabelia: “Tajatuxanenë, mara nijapalatanëje, taneevetsiaexanaenëmë. Pañuelopanayota yamatacëtsiaya catoevetatsi. <sup>21</sup> Bajarapacuenia catoevetatsi tsi-paji cacujunavatsi. Nijamatatabëcuensaënë. Xamë apo itaxutobejiobiataeyabiabimë nijajivi, pamonae catoeveta nijajava. Itorobabiabame nijajivi pecatopitsinexa apo nijajava ata. Itorobabiabamenua pecatonotsinexa apo neubiaexanaejava ata,” jai pijatuxanenë pijapalatanë petoevetsinë. <sup>22</sup> Nexata nacuaevetsinë jumaitsi pijajivitonëjavabelia: “¡Acujirubejemë xamë! Bijiaya netoebetame. Naneconitame bajarapacuenia tanejumaitsijavamë yabara. Xamë baja cajena yapëtaneme tajamatatabëcuensaënëjava tajajava yabara. Pacuenia itorobabiabajë tajajivi tanetopitsinexa apo tajajava ata, yapëtaneme baja. Pacuenia ata itorobabiabajë tanetonotsinexa apo taubiaexanaejava ata, yapëtaneme baja. <sup>23</sup> Xanepanaejitsipa xamë banco pevet-sivi itsa netocanacuenibiaexanaejitsipame tajapalatanë. Nexata banco pevetsivi aeconoxae tajapalatanë netocanaviatsipa. Nexata pecacovaetsijamatatabëcuene itsajava palata netoyajavacanaviatsipa,” jai nacuaevetsinë pijajivitonëjavabelia. <sup>24</sup> Nexata nacuaevetsinë jumaitsi pijajivijavabelia: “Tajapalatanë panetovecuapire maponëje. Nexata juya parajure ponë xaniavaetsia netoeveta tajapalatanë. Bajaraponë xaniavaetsia netocanacueniba. Nexata baja pematatsënëa diez papalatanëbeje netopitsapaeyaexana. Nexata taevetsiaexanaenëta once ponëbeje,” jai nacuaevetsinë. <sup>25</sup> Nexata nacuaevetsinë pijajivi jumaitsi pijatuxanenëjavabelia: “Patajatuxanenë, bajaraponë xaina baja ayaijava. ¿Detsa xuajitsia rajutsijitsiamë pematatsënëa?” jai pijajivi. <sup>26</sup> Nexata nacuaevetsinë jumaitsi pijajivijavabelia: “Pacatsipaebatsi rabaja. Pajivi baja ayaijava xaina, pematatsënëa icatsia itsajava rajutsianatsi. Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi. <sup>27</sup> Tajavajabitsaë, pamonae picaní apo jitsipae mapanacua taevetsijavaje, bajarapamonae pacaponaremena maberanaje patanevecuaverebiabinexamë taitabëta,” jai nacuaevetsinë pijajivijavabelia, jai Jesús livaisi petsipaebijavata Zaqueo pijabota.

### **Pacuenia Jesús pata Jerusalén tomarata yabara pelivaisi**

*(Mt 21.1-11; Mr 11.1-11; Jn 12.12-19)*

<sup>28</sup> Jesús baja itsa najumevereta livaisi petsipaebijava Zaqueo pijabota, pona baja Jerusalén tomarabelia. <sup>29</sup> Jerusalén tomaravecua imoxoyo eca petsuto. Bajarapatsutojumata nubena olivonaenë. Bajarapatsuto canacujitsita anijatomarayobeje ecabeje, Betfagé tomarayobeje Betania tomarayobeje. Jesús itsa imoxoyotanje-taruca bajarapatomarayobeje, nexata itoroba pijajivitonëbeje bajarapatomarayobejavabelia. <sup>30</sup> Jesús jumaitsi pijajivitonëbejavabelia:

—Paponarebeje mapatomarayo ecaliajejavabelia. Itsa rabaja papatsiaremeliabeje, pataenutsianamebeje burro pecetanutsinëtsi. Bajarapaburro itsajivi ata abaxë apo jumaponae. Paisinaenamebeje. Payamaëcarenamëbeje tsane. <sup>31</sup> “¿Detsa xuajitsia paisinamebeje burro?” itsa pacajaibeje tsane itsajivi, nexata pajumaitsimëbeje tsane: “Vajatuxanenë raja namatavenona,” pajamëbeje tsane, jai Jesús pijajivitonëbejejavabelia.

<sup>32</sup> Nexata Jesús pijajivitonëbeje liabeje. Pacuenia Jesús jumaitsi, bajarapacuenia caxitajarabanucabeje burro. <sup>33</sup> Nexata ita isinabeje, burro pexainaevi jumaitsitsibeje:

—¿Detsa xuajitsia paisinamebeje burro? jaitsibeje.

<sup>34</sup> Nexata Jesús pijajivitonëbeje jumaitsibeje burro pexainaevijavabelia:

—Vajatuxanenë raja namatavenona. Bajaraxuata paisinajëbeje, jaibeje.

<sup>35</sup> Nexata jane baja burro capatabeje Jesúsjavaberena. Nexata Jesús pijajivi burro tsijumajeba pijacamisajumavelia penaxatabijavanë. Jesús baja bajarapaburrojumata ecaya. <sup>36</sup> Jesús ita yanajetaruca burrota, panamutovelial Jesús patsijitsia Jerusalén tomarabelia, bajarapanamutua jivi pijacamisajumavelia penaxatabijavanë namutua tsivajënaeyerequejebaponatsi yayataeya pecopiapitsinexatsi. <sup>37</sup> Patsutojumata olivonaenë nubena, bajarapatsutojavatsica namuto namatononocarucaica. Nexata bajarapanamutuatsica Jesús imoxoyotanajetaruca pepatsinexa Jerusalén tomarata. Nexata jivi ayaibitsaëtoخانeto, Jesús pijajivi yajava, vavajai tsanajetarubena. Sivabarëyaya vavajai Diosojavabelia:

—¡Diosomë, bitso ayaijamatabëcuenenëmë! jai tsanajetarubena bajarapamonae.

Bajarapacuenia vavajai tsanajetarubena tsipaji bajarapamonae cujirutaeyabiaba Jesús Dioso pesaëta ayaiyuene pexanaponaevajanë. <sup>38</sup> Bajarapamonae jumai tsanajetarubena Jesús yabara:

—¡Maponë najetarucaje, bitso ayaijamatabëcuenenë Dioso pejamatabëcueneta najetaruca jivi pevetsinënexa! ¡Jamatabëcuenexanepanaeya jinavanapa daxita pamonae athëbëtsatia jinavanapa! ¡Pinijicuene rabaja exana Dioso! jai tsanajetarubena namutua daxita Jesús pijajivi.

<sup>39</sup> Nexata fariseovi najetarubena bajarapajivibitsaëtoخانeto tuatuajëta. Nexata fariseovi jumaitsi Jesúsjavabelia:

—Jesús, jumeitavere baja nijajivi bajarapacuenia pejumaitsiyaniva xamë yabara, jai fariseovi.

<sup>40</sup> Nexata Jesús jumaitsi fariseovijavabelia:

—Xaniajanë pacuenia pacatsipaebijitsiatsi. Mapamonaeye moya ita najetarubenaejitsipa, nexata juya ibotonë vavajai tsenae tsipae, jai Jesús fariseovijavabelia.

<sup>41</sup> Itsa baja Jesús imoxoyo taeyeta Jerusaléntomara, nexata Jesús sivanua Jerusalén tomarapijivi. <sup>42</sup> Jesús pesivanuejavata Jerusalén tomarapijivi, Jesús jumaitsi Jerusalén tomarapijivi yabara mapacueniaje:

—¡Bitso picani jitsipajë Jerusalén tomarapijivi mapamatacabitaje peyapëtaenexa pacuenia Dioso pepacuene jamatabëcuene xanepanaeyaexanaejitsipatsi, itsa nejumecovënëtsipa! Abaxë raja aeconoxae Dioso apo tocopatsitsi peyapëtaeyaniva bajarapacuene. <sup>43</sup> Nexata tocopiapatsianatsi pibisiamatacabí. Pijavajabitsaë tsimaxëpatsianatsi. Nexata pijatomara matatoyorotsia foto yacaranatsia cuerutsianatsi pet-simaxënubenaenexatsi bajarapafotota. Pijatomara matatoyorotsia peyacaranatsiibopanaxanetopënëya, pijavajabitsaë foto matatoyorotsia cuenatsi. Bajarapacuenia

yacaranatsianatsi pijavajabitsaë. <sup>44</sup>Nexata irabetsica topenetsianatsi pijabonëmi. Nexata daxita Jerusalén tomarapijivi benatsi. Pijatomara matatoyorotsia pey-acaranatsiibopanaxanetomi ata tosarababenatsi. Nexata itsaibopana ata apo bocae tsane itsaibopana jumavereca. Bajarapacuenia itsane tsipaji xanë apo neyapëtae Dioso athëbëvetsica taneitorobinëtsica, Daxitajivi Pematapijinënë, jai Jesús pesivanuejavata Jerusalén tomarapijivi.

**Pacuenia Jesús Jerusalén tomarata templobovecua pitsapaeyaexana pecanajetabiavi, pecomuacabiabivina, yabara pelivaisi**

*(Mt 21.12-17; Mr 11.15-19; Jn 2.13-22)*

<sup>45</sup>Jesús pepatsicujinae Jerusalén tomarata, joneya temploboyalia. Nexata templobota Jesús tane pecanajetabiavi, pecomuacabiabivina. Nexata daxita bajarapamonae Jesús pitsapaeyaexana templobovecua. <sup>46</sup>Jesús jumaitsi bajarapamonaejavabelia:

—Dioso baja cajena pejumelivaisibaxutota mapatemplobo yabara tajëvelia jumaitsi mapacueniaje: “Tajabo raja jivi xanëjavaberena penavajëcaebo tsane,” jai Dioso pejumelivaisibaxutota. Itsiata baitsi jane paxamë yamaxëitojorobiaya panenacobetoxotsinexa, panacaetuatabiabame mapabotaje, jai Jesús templobota pecanajetabivijavabelia.

<sup>47</sup>Bajaraxuacujinae caematacabi canacujitsia Jesús jivi livaisi tsipaebabiaba bajarapatemplobota. Nexata sacerdotevi penamatacaitorobivi, judíovi pecujarubivina, tomaraevetsivina, najumejaita picani Jesús pebeyaxuabinexatsi. <sup>48</sup>Itsiata acuenebi Jesús pebeyaxuabijavatsi. Tsipaji Jesús itsacueneneconi ata apo xainae. Daxitajivi yayatanetsi. Jesús jivi petsipaebilvaisianë xaniavaetsia namuxunaevetabiabatsi.

**Pacuenia Jesús caëjëpatsi daxitacuene pexanaenexa yabara pelivaisi**

*(Mt 21.23-27; Mr 11.27-33)*

**20** Itsamatacabi Jesús templobota jivi livaisi tsipaeba. Tsipaeba pexanialivaisi jivi pecapanepaelivaisinexatsi pibisiacuene pexanaeneconivecua. Nexata bajarajota pata sacerdotevi penamatacaitorobivi, judíovi pecujarubivina, judíovi pijaancianovinua. <sup>2</sup>Nexata bajarapamonae jumaitsi Jesúsjavabelia:

—Panetsipaebare cajena. ¿Jipatsa pejamatabëcueneta pecanajetabiavi, pecomuacabiabivina, capitsapame mapatemplobovecuaje? jai.

<sup>3</sup>Jesús nexata jumaitsi bajarapamonaejavabelia:

—Xanë copiaya caejumeyo pacayanijobianatsi patanejumecanaviatsinexamë.

<sup>4</sup>¿Jipatsa jane pejamatabëcueneta Juanpijinë jivi bautisabaponapona? ¿Dioso tsaja pejamatabëcueneta? Itsa jume, ¿jivi tsaja pejamatabëcueneta? jai Jesús bajarapamonaejavabelia.

<sup>5</sup>Nexata ëpamonae nabarëcuaicuaijai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabëcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovënëtsimë Juanpijinë pepaebilvaisianë?” nacajai tsipae. <sup>6</sup>“Jivi raja saya pejamatabëcueneta Juanpijinë jivi bautisabaponapona,” itsa jai tsipaetsi, nexata daxitajivi anaeya ibotonëta nacetseconaejitsipa vajanacabeyejebinxä. Bajarapacuenia nacabeyejebijitsipa tsipaji daxitajivi Juanpijinë yabara

sivajamatabējumaiṡi: “Juanpijinē raja pepacuene Diosojumepaebinēmi,” sivajamatabējai, najai sacerdotevi penamatacaitorobivi, judíoivi pecujarubivinuua, judíoivi pijaancianovinua.

<sup>7</sup>Nexata saya bajarapamonae jumaiṡi Jesúsjavabelia:

—Apo payapētaenē ponē Juanpijinē itorobatsi jivi pebautisabaponaenexa, jai.

<sup>8</sup>Nexata Jesús jumaiṡi bajarapamonaejavabelia:

—Nexata xanē ata apo pacatsipaebi tsanetsi ponē nitoroba tacapitsapaenexa bajarapamonae templobovecua, jai Jesús.

**Pacuenia exana piamatabēcuenebejevi,  
itsanē pijauvacabo petoevetsivi yabara pelivaisi**

(Mt 21.33-44; Mr 12.1-11)

<sup>9</sup>Jesús taxuxuaba livaisi petsipaebijava jivijavabelia. Jumaiṡi mapacueniaje:

—Pijaira pexainaenē pijairata uba ayai bacoboxaneto uvavēnējava. Bjaraxuacuji-nae itsamonae evetsiaexana pijauvacabo. Jumaiṡi bajarapamonaejavabelia: “Pamatacabi cuainaveretsiana, natsicobetsanaenatsi. Pamatacabi raja cuainaveretsiana, tajajivitonē itorobiarenajē xua panetotsatsianame tanetopitsinexa,” jai uvabacabo pexainaenē petoevetsivitsijavabelia. Nexata uvabacabo pexainaenē tajēnacuyabelia pona bajayajebi piajibitsarucaenexa. <sup>10</sup>Itsa baja uvabacabo pexainaenē yapētane pecopiapatsijava uvacuai penaveretsimatacabi penotsinexa, nexata uvabacabo pexainaenē itoroba pijajivitonē. Itoroba petoevetsivitsijavabelia petsicobetsatsinexatsi. Nexata uvabacabo pexainaenē pijajivitonē tovaetabatsi. Toconibabiatsi. Petoconibabecujinaetsi cobesa naviatsiaexanaliatsi. <sup>11</sup>Itsiata uvabacabo pexainaenē icatsia itoroba itsanē pijajivitonē petsicobetsatsinexatsi. Bjaraponē ata icatsia pibisiacuenia tobijatanetsi. Toconibabiatsi. Peconibabecujinaetsi cobesa naviatsiaexanaliatsi. <sup>12</sup>Itsiata uvabacabo pexainaenē icatsia itoroba itsanē pijajivitonē. Icatsia bajaraponē ata tomatajorobabiatsi. Uvacabopēnēyabelia xuabatsi.

<sup>13</sup>Nexata uvabacabo pexainaenē jamatabējumaiṡi: “¿Detsa nexata xua exanaenajē? Itorobianajē cajena taxēnato, tasivanē. Itsa raeta itorobianajē taxēnato, bajarapamonae netoyaiyataena,” jamatabējai uvabacabo pexainaenē. <sup>14</sup>Itsiata baitsi jane uvabacabo petoevetsivitsi, uvabacabo pexainaenē pexēnato ata apo toyaiyataetsi. Itsa tane uvabacabo pexainaenē pexēnato, bajarapamonae najumaiṡi: “Mara ponēje itsamatacabi paxa pevēnamuto paxa pijauvacabo pitsipaje. Naxanitsia. Beyaxuabatsi. Nexata raja vaxaitsi vajauvacabo tsane,” najai uvabacabo petoevetsivitsi. <sup>15</sup>Nexata uvabacabo pexainaenē pexēnato ata tovaetabatsi. Caponaliatsi bajarapauvacabo pepēnēyabelia. Bjarapacuenia icatsia tobeyaxuabatsi, jai Jesús.

Nexata Jesús yanijoba bajarapalivaisi petsipaebivijavabelia. Jumaiṡi:

—¿De meta nexata xua exanaena uvabacabo pexainaenē pijauvacabo petoevetsivitsijavabelia? <sup>16</sup>Uvacababo raja pexainaenē, patsiarena. Verebiabiana daxita bajarapamonaemi. Nexata icatsia itsamonae evetsiaexanaena bajarapauvacabo, jai Jesús bajarapamonaejavabelia.

Jesús penamuxunaevetsivitsi itsa jumetane bajarapacuenia Jesús pejumaiṡisijava, bajarapamonae jumaiṡi:

—¡Dioso pētsa copata bajarapacuenia pexanaenexa paxanējavaberena! jai bajarapamonae.

<sup>17</sup> Nexata Jesús asaëyata naëcota bajarapamonaejavabelia. Jumaitsi bajarapamonaejavabelia:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia, jai tajëvelia Dioso pejumelivaisibaxutota xanë yabara.

<sup>18</sup> Bajarapacuenia tajëvelia Dioso pejumelivaisibaxutota itsa jumaitsi, judíovi penamatacatorobivi apo tanejumecovënëtsijavanexa yabara jumaitsi. Dioso taneitapetsijava daxitajivi tacapanepaenënexa yabara ata jumaitsi, jai Jesús.

<sup>19</sup> Icatsia Jesús jumaitsi mapacueniaje:

—Pamonae apo nejumecovënëtsi Dioso pexënatocuenenë, bajarapamonaе bitso bejamatabëjiovi tsane apo tanejumecovënëtsixae. Pacuenia ibotojumata pefirapecaejivi, itsa tsapatecatsi, pevixae bitso yanabejiovi, bajara itsane. Pamonae naneconitsiaexanaenajë, bajarapamonaе pepacune naxuabiana daxitamatacabijavabelianexa. Pacuenia iboto pematacënëbinëtsi apo asaë, bajara itsane, jai Jesús bajarapamonaejavabelia.

### **Pacuenia Jesús jamatabëcueneëjëbiaya yanijobatsi impuestomatamo pematamotsijava yabara pelivaisi**

*(Mt 22.15-22; Mr 12.13-17)*

<sup>19</sup> Palivaisi Jesús tsipaeba templobota, bajarapalivaisi sacerdotevi penamatacatorobivi, judíovi pecujarubivi ata, jumeyapëthane. Nexata bajarapamonaе najumaitsi:

—Vaxaitsi raja Jesús nacajai, najai.

Nexata picani bajarajota bajarapamonaе Jesús jamatabëvaetabatsi. Itsiata bajarapamonaе abaxë apo vaetabitsi. Tsipaji cujunava jivi. <sup>20</sup> Nexata itsamatacabi bajarapamonaе itorobarena pijajivi yaenebiaya petonamuxunaevetsinexatsi Jesús. Nexata bajarapamonaе pijajivi bepexaniajamatabëcuenevi itajara jinavanapa Jesúsjavata. Bajarapamonaе namuxunaevetena Jesús jivi livaisi petsipaebijavata. Bijiaya Jesús jivi livaisi itsa tsipaeba, bajarapalivaisi yabara picani Jesús pecapon-aenexatsi nacuaevetsinëjavabelia peneconitsinexatsi. <sup>21</sup> Nexata bajarapamonaе jamatabëcueneëjëbiaya jumaitsi Jesúsjavabelia mapacueniaje:

—Jesús, pacayapëtanetsi jivi pepacune pexaniajailivaisi netsipaebijava. Daxitajivi, ricovi ata, bepejiovi ata, najëpaeya yaiyataeya pexaniajailivaisi tsipaebabiabame bajarapamonaе pejinavanapaenexa pacuenia Dioso jitsipa. <sup>22</sup> Panetsipaebare. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonaе jamatabëcueneëjëbiaya Jesúsjavabelia.

<sup>23</sup> Itsiata baitsi jane Jesús jamatabëcueneypëthane bajarapamonaе jamatabëcueneëjëbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—¿Detsa xuajitsia panejamatabëcueneëjëbame? <sup>24</sup> Panetsitajëre palatanëyo, jai Jesús.

Nexata bajarapamonae tsitajētatsi palatanēyo. Nexata Jesús jumaitsi bajarapamonaejavabelia:

—¿Jipatsa mapitabaraje, pevenēnua, ruca mapapalatanēyojumataje? jai Jesús.

Nexata bajarapamonae jumaitsi Jesúsjavabelia:

—Romanonacua raja pepo pevetsinē pitabara, pevenēnua, jai.

<sup>25</sup> Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinē pijajava. Parajutabiabianame pijinia saicaya Diosojavabelia Dioso pijajava, jai Jesús.

<sup>26</sup> Nexata bajarapamonae ajibi Jesús peyabaravaetabijavatsi jivijavabelia livaisi petsipaebijava yabara. Tsipaji xaniavaetsia Jesús jumeceaviata bajarapamonae jamatabēcueneējēbiaya peyanijobijavatsi. Caranata bajarapamonae jamatabēcuenenabenajaca xaniavaetsia Jesús pejumeceaviatsixae bajarapamonaejavabelia. Moya baja nexata ena bajarapamonae.

### **Pacuenia Jesús tsipaeba jivi petēpaecujinae icatsia piasaējavanexa yabara pelivaisi**

*(Mt 22.23-33; Mr 12.18-27)*

<sup>27</sup> Saduceovi saicaya itsalivaisi xaina. Bajarapamonae jamatabēcuenenavēxaniabiaya jumai tsabiabi: “Petēpaevi rabaja petēpaecujinae, apo asaē icatsia tsane,” jai tsabiabi. Nexata saduceovi imoxoyobatsi Jesús. Saduceovi jumaitsi Jesúsjavabelia mapacueniaje:

<sup>28</sup> —Jesús, Moiséspijinē bajayata vajanacatoyaquinaelivaisi, jumaitsi mapacueniaje: “Ponē pematapijinē pepua penacojiobinē baja, itsa tēpa pexi xainaenejeva, nexata juyapijinē bepita pematapijinēmi pijavami. Bajarapacuenia juyapijinē bepita pematapijinēmi pijavami pexi pexainaenexa bajarapovajavabelia. Nexata pexi itsa xainabeje, bematapijinēmi pexi petaenexa daxitajivi,” jai Moiséspijinē bajayata vajanacatoyaquinaelivaisi. <sup>29</sup> Nexata jinavanapa ēnacaemonae, siete ponēbeje. Pepo matapijinē copiata nacojioba. Nexata bajaraponē pijava vecuatēpa pexi xainaenejeva. <sup>30</sup> Nexata pematapijinēmi pepēnarucaenē pita pematapijinēmi pijavami. Nexata icatsia bajaraponē ata tēpa pexi xainaenejeva bajarapovajavabelia. <sup>31</sup> Nexata icatsia itsanē tuatuajēmatapijinē pita bajarapova. Bajara icatsia ponē ata tēpa pexi xainaenejeva bajarapovajavabelia. Bajarapacuenia daxita baja siete ponēbeje, nacaemonae, pitaponae ata bajarapova, itsiata itsanē ata pexi apo xinae bajarapovajavabelia. Bajarapacuenia daxita siete ponēmibeje tēpa. Verevereca baja. <sup>32</sup> Belia baja bajarapova ata tēpa. <sup>33</sup> “Jivi raja petēpaecujinae, Dioso icatsia asaēyaexanaenatsi,” jamē. ¿Detsa nexata ponē, bajarapomonaeyajuvēnēnē, pijava tsane bajarapova bajarapamatacabi? Daxita pamonaē siete ponēmibeje, nacaemonae, pitapona picani bajarapovami, jai saduceovi Jesúsjavabelia.

<sup>34</sup> Nexata Jesús jumaitsi saduceovijavabelia:

—Aeconoxae mapanacuatate pebijivi, petiriavi ata, nacojiobapona. Itsamonae pexēnatoyonē pexainaevi pebijavabelia canajetapona petonacojiobinexatsi. <sup>35</sup> Itsiata baitsi jane pamonaē Dioso itapetatsi, apo pevereverecaenacuatatsia jinavana-paena. Bajarapamonae petēpaecujinae, Dioso icatsia asaēyaexanaenatsi. Bajarapamonae bajarapanacuatatsia apo nacojiobi baja tsane. Bajarajotatsia itsajivi ata pexēnatoyo apo canajetsi tsane pebijavabelia petonacojiobinexatsi. <sup>36</sup> Bajarapamonae acuenibi tsane petēpaejava. Tsipaji bajarapamonae jinavanapaena athēbētatsia

pacuenia ángelevi jinavanapa. Bajarapamonae baja Dioso pexi tsane. Tsipaji baja petëpaecujinae Dioso icatsia asaëyaexanaenatsi. <sup>37</sup> Moiséspijinë bajayata yaquina pacuenia Dioso tsipaebatsi tsiquirinaemëyo petajueyecaecotiajavaverena. Nexata Moiséspijinë peyaquinaelivaisita, jumaiti pacuenia Dioso icatsia asaëyaexanaejitsia petëpaevimi. Nexata Moiséspijinë nacayapëtaeyaexana Dioso icatsia piasaëyaexanaejavanexa petëpaevimi. Tsipaji baja Abraham peputëpae, Isaac ata baja peputëpae, Jacob ata baja peputëpae, bajarapamonae yabara bajayata Moiséspijinë peyaquinaelivaisita jumaiti mapacueniaje: “Xanë rabaja Abraham pijaDiosonë, Isaac ata pijaDiosonë, Jacob ata pijaDiosonë,” jai baja cajena Dioso bajayata Moiséspijinëjavabelia. <sup>38</sup> Bajarapacuenia Dioso pejumaitisixae, nayapëtane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athëbëtatsia. Daxita petëpaevi Dioso cajena apo tsitatëpaetsi, jai Jesús saduceovijavabelia.

<sup>39</sup> Nexata judíovi pecujarubivi jumaiti Jesúsjavabelia:

—Jesús, saduceovi xaniavaetsia jumecanaviatame, jai judíovi pecujarubivi.

<sup>40</sup> Bajaraxuacujinae saduceovi cjunava baja icatsia peyanijobijava Jesúsjavabelia.

### **Pacuenia Jesucristo yabara Davidpijinë bajayata tajëvelia: “Tajatuxanenë,” jai yabara pelivaisi**

*(Mt 22.41-46; Mr 12.35-37)*

<sup>41</sup> Jesús pijacuata nayabarajumaiti judíovi pecujarubivijavabelia mapacueniaje:

—¿Detsa xuajitsia jivi apo canaëjëtsi Cristo Dioso pexënatocuene? Jivi saya jatababëcuenenavëxaniabiaya jumai tsabiabi Cristo yabara: “Cristo raja itsa patsiana, saya Davidpijinë pemomo tsane,” jai tsabiabi. <sup>42</sup> Davidpijinë bajayata tajëvelia pejumaitisijava Cristo yabara Salmosvënëbaxutota, jumaiti mapacueniaje:

Dioso jumaiti tajatuxanenëjavabelia: “Ecare abaxë tacujuanenia. <sup>43</sup> Vecatsivajënae jumecovënëtsiaexanatsi abaxë copiaya nijavajabitsaë nitorobicuenianexa,” jai Dioso tajatuxanenëjavabelia,

jai Salmosvënëbaxutota Davidpijinë bajayata pejumaitisijava Cristo yabara.

<sup>44</sup> Nexata Davidpijinë bajayata Cristo yabara: “Tajatuxanenë,” itsa jai, nexata Cristo Davidpijinë apo pemomo. Tsipaji baja cajena Cristo saicaya Dioso pexënato, nayabarajai Jesús judíovi pecujarubivijavabelia, judíovi pecujarubivi pecanaëjëtsinexa Cristo Dioso pexënatocuene.

### **Pacuenia Jesús tsipaeba pijajivijavabelia judíovi pecujarubivi penaneconitsijava Diosojavabelia yabara pelivaisi**

*(Mt 23.1-36; Mr 12.38-40; Lc 11.37-54)*

<sup>45</sup> Itsa abaxë daxitajivi namuxunaevetatsi Jesús petsipaebilivaisi, Jesús jumaiti pijajivijavabelia:

<sup>46</sup> —Xania, panayajivitaema palivaisi judíovi pecujarubivi tsipaebaupon panejumecovënëtsianiva. Bajarapamonae jitsipabiaba tomara tuatuajëjava piapijavanë penaxatabiabavanapaenexa jivi peyaiyataenexatsi. Jitsipabiabanua bitso yayyataeya pebajacobinexatsi callejava. Bajarapamonae itsa najoneyabiaba judíovi penacaetuatabibonëjava, jitsipabiaba penaenexa pexaniavirijavanëta. Nexata natsiitapetabiaba penaenexa peyaiyataevitsi penaenexa petsinubijavanëta. Bajara-

pamonae itsa napatabiaba fiestajava ata, jitsipabiaba penaenexa peyaiyataevitsi penaenexa petsinubijavanëta. <sup>47</sup> Bajarapamonae yamaxëitorobiaya vecuanotabiabanua pamonajivi pevecuatëpaevanëtsi pecobecovëjavaxi. Bajarapamonae itajara pinijicuenia vajëcabiaba Diosojavabelia. Itsiata pepo pexaniajaijamatabëcueneta apo vajëcabiabi. Bajarapacuenia vajëcabiaba saya jivi petaenexatsi Dioso itajara bitso bepejumecovënëtsivi. Nexata bajarapamonae bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamonae Dioso apo pejumecovënëtsivi, jai Jesús pijajivijavabelia judfovi pecujarubivi yabara.

**Pacuenia ofrenda rajuta Diosojavabelia  
pamona pevecuatëpaevatsi yabara pelivaisi**

*(Mr 12.41-44)*

**21** Templobota Jesús cobetane bitso pexinaeavi ayajava palata pejeponaejava cajonijavabelia. Bajarajota jivi palata jeyabiaba ofrendacuenia perajutsijava Diosojavabelia. <sup>2</sup> Bajarajota Jesús cobetanenua pamona pevecuatëpaevatsi, bepejiobiva, penajejava anijapalatanëyobeje. Bajarapova najia anijapalatanëyobeje piamatamobinëyobeje. <sup>3</sup> Jesús nexata jumaitsi pijajivijavabelia:

—Xaniajanë pacuenia pacatsipaebijitsiatsi. Mapovaje pamona pevecuatëpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabëcuenëbarëya daxita xua itsamonae jia bajarapacajonita matatoxenetsia. <sup>4</sup> Tsipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje, bepejiobiva, daxitajavayo penaevetsijavayotaminexa jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

**Pacuenia Jesús tajëvelia tsipaeba pijajivi itsamatacabi  
itsanacuapijivi pexuabijavanexatsica templobo yabara pelivaisi**

*(Mt 24.1-2; Mr 13.1-2)*

<sup>5</sup> Jerusalén tomarata templobo itabëtsiaya exaneta pexaniaviriaibotonëta. Jivi Diosojavabelia ofrendacuenia perajutsijavanë ata, templobota itabëtsiaya ruba templobo pitaitabëtsecaenexa. Nexata Jesús pijajiviyajuvënëvi nabarëcuaicuaijai tsaponae templobo pitabëtetsijava yabara. Nexata Jesús tajëvelia vajunupaeba pacuenia itsamatacabi itsanacuapijivi xuabijitsiatsica templobo, daxita bajarapaaibatëcuene yajava. Jesús jumaitsi pijajivijavabelia mapacueniaje:

<sup>6</sup>—Itsamatacabi itsanacuapijivi xuabianica mapatemplobomije. Nexata daxita xua pataneme, pitabëcuene yajava, penetsianica. Nexata templobopijiibotonë caeiboto ata pejumavereca apo boca tsane, jai Jesús pijajivijavabelia.

**Pacuenia itsijitsia Jerusalén tomarata, daxitanacuanëjava ata,  
mapanacua pecopiarucaevajënaeje yabara pelivaisi**

*(Mt 24.3-28; Mr 13.3-23)*

<sup>7</sup> Jesús pijajivi jumaitsi:

—Patajatuxanenë, pajitsipajë patanetsipaebijavamë patayapëtaenexa paepatota copiapatsijitsia xua vajunupaebame. ¿Detsa pitsicuenë peneta pataenajë itsa copiapatsijitsia xua jumaitsimë templobo yabara? jai Jesús pijajivi.



<sup>8</sup> Jesús nexata tajëvelia vajunupaeba pacuenia itsamatacabi itsijitsia mapanacuatate. Jesús pijajivijavabelia jumaitsi mapacueniaje:

—Xania panayajivitaename. Pëtsa panacopatame itsajivi ata papecayamaxëitorobinexa. Tspaji raja peyamaxëitorobinexa, ayaibitsaëto patsiana hexanë itajara tsane. Bajarapamonae najumetsënëtsiaya jumai tsane: “Xanë raja Cristonë, athëbëvetsica Dioso taneitorobinëtsica jivi tacapanepaenexa,” jai tsane. “Imoxoyo rabaja pevajënae nacua pevereverecaenexa,” jai tsane itsamonae. Itsiata pëtsa pajumecovënëtime bajarapamonae. Pëtsa papënaponamenua. <sup>9</sup> Vajabitsaë pexanaejava imoxoyonacuanëjava, tajënacuanëjava ata, pavënëlivaisitaename. Itsiata pëtsa pajunavame. Peneta bajara itsane mapanacua pevereverecaevajënaeje. Itsiata baitsi jane bepijia bajarapamatacabi mapanacuae abaxë apo vereverecajuni tsane, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuata.

<sup>10</sup> Jesús icatsia tajëvelia vajunupaeba pacuenia itsamatacabi itsijitsia mapanacuatate. Jesús jumaitsi pijajivijavabelia mapacueniaje:

—Mapanacuae pevereverecaevajënae, peneta copiaya itsavirivi nabena itsavirivijavabelia. Itsanacuanëpiviji pijinia nabena itsanacuanëpivijavabelia. <sup>11</sup> Ira najëbiana ayaicuenia nacuanëjava. Nacuanëjava ayaijaniboxaneto najetarucaena, pivitanecuene yajava. Itaboxotatsia pitsapaena piyaijunavicuene, pinijicuene pexanaejavanë yajava, jai Jesús pijajivijavabelia.

<sup>12</sup> Icatsia Jesús tajëvelia vajunupaeba pacuenia itsamatacabi itsijitsia mapanacuatate. Jesús jumaitsi pijajivijavabelia mapacueniaje:

—Bajarapacuenie pecopiajopaevajënaeya patajajivixaemë, pacataicaena. Pacabejiobiaexanaena. Pacacaponae judiovi penacaetuatabibonëjavabelia papecaneconitsinexa. Penaneconitsivi pejebabiabibota pacajebiana. Patajajivixaemë, pacanubiana presidentevi pitabarata, nacuaeetsivi pitabarata ata. <sup>13</sup> Nexata bajarajota xanë talivaisi, pexanialivaisi, patsipaebianame xaniavaetsia. <sup>14</sup> Nexata pëtsa tajëvelia panatsinajamatabëxainame pacuenia panayajivicuaicuaijamëjitsia bajarapamonaejavabelia. <sup>15</sup> Tspaji paepatota panayajivicuaicuaijamëjitsia, bitso peyapëtaevicuenia pacacuaicuaijaiyaexanaenatsi. Nexata caenë ata panijavajabitsaënë apo caëjëpaetsi tsane papecajumecanaviatsinexa. <sup>16</sup> Bajarapamatacabi patajajivixaemë, panacaemonae atamë, itsajivi panijamonaejivi ata pacacanajetsiana nacuaeetsivijavabelia papecabeyaxuabinexa. Paneaxa ata, paneena ata, panijabanajivi ata, bitso papecayapëtaejivi ata, bajarapamonae caranata pacacanajetsiana. Nexata pacayajuvënëbeyaxuabiana. <sup>17</sup> Daxitajivi pacaitoya tsabiabi tsane patajajivixaemë. <sup>18</sup> Itsiata baitsi jane pepo panejamatabëcuenelivaisi bajarapamonae apo itsacueniabi tsane. <sup>19</sup> Itsa pajamatabëcuenesaemë tsavanapae tsane, nexata matacabi apo pevereverecajava paxainaename, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuatate.

<sup>20</sup> Icatsia Jesús tajëvelia vajunupaeba papiayaicuene itsamatacabi copiapatsijitsia Jerusalén tomarata, Jesús jumaitsi pijajivijavabelia mapacueniaje:

—Itsa pataename vajabitsaë, itsanacuaverena pepatsivi, Jerusaléntomara mata-toyorotsia peyacaranatsijavatsi, nexata pajamatabëitsimë tsane: “Imoxoyo rabaja pevajënae Jerusaléntomara pevereverecaenexa,” pajamatabëjamë tsane. <sup>21</sup> Nexata bajarapamatacabi Judea nacuata pejinavanapaevi, itsa tane bajarapacuenie,

berēcēpeca cajena ibotsutonējavabelia. Jerusalén tomarapijivi ata berēcēpeca pijatomaravecua. Itsamonae pijinia, Jerusalén tomarapijivi, bajarapamatacabi Jerusalén tomarapēnyabelia itsa jinavanapa, apo benaviabirena pijaboyaberena. <sup>22</sup> Bajarapacuenia Jerusalén tomarapijivi itsa tocopiajopaenatsi, tocopiajopaenatsi jane baja Dioso penaneconitsiaexanaematacabitsi. Nexata jane baja tocopiajopaenatsi daxita pacuenia baja cajena pepo bajayatami tajēvelia vajunupaeba Diosojumelivaisibaxutota. <sup>23</sup> Bajarapavajabitsaēmatacabi bitso ayaicuenia bejiobi tsane mapanacuapijivije. ¡Papetiriavi penacueto yacotajinavanapa, bitso bejiobi tsane bajarapamatacabi bitso nabejiobitsiaya peponaexae tsane! ¡Papetiriavi ata mitopaenacuetoxi isajinavanapa, bitso bejiobi tsane bajarapamatacabi! Bajarapacuenia daxita mapanacuapijivije pinijicuenia Dioso naneconitsiaexanaenatsi. <sup>24</sup> Bajarpavajabitsaēmatacabi itsanacuaverena Jerusalén tomarapijivi vajabitsaē tsmaxēpatsianatsi. Nexata itsabitsaētomi, Jerusalén tomarapijivimi, beyejebianatsi. Itsabitsaētomi pijinia, Jerusalén tomarapijivimi, caponaenatsi itsanacuanējavabelia. Nexata bajaraxuacujinae itsanacuanēpijivi patsiana Jerusalén tomarata. Nexata juya bajarapamonae jinavanapaena Jerusalén tomarata. Nexata itsanacuaverena pepatsivi evetsiana Jerusaléntomara. Matapania daxita itsanacuaverena pepatsivi vecuapitsapaena Jerusaléntomara, copatsiana baja bajarapamonae pevetsijava Jerusaléntomara, jai Jesús pijajivijavabelia tajēvelia pevajunupaebijavata papiayaicueene itsamatacabi copiapatsijitsia Jerusalén tomarata.

**Pacuenia Jesús tajēvelia navajunupaeba icatsia  
pepatsijavanexatsica petēpaecujinae yabara pelivaisi**

*(Mt 24.29-35, 42-44; Mr 13.24-37)*

<sup>25</sup> Jesús tajēvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanē tapatsivajēnaetsica, jivi taena pecujunavicuene. Matababipijijuametotatsia, xua naitajētsiana, meravipijijuametotatsia ata, xua naitajētsiana, tulupujavatatsia ata, xua naitajētsiana, bajaraxuanē jivi bitso cujunaviana. Daxita nacuanēpijivi bitso najunaviacaena itsa jumetaena manuameneta pinijimalataca bitso penajumetsijava. <sup>26</sup> Daxitanacuanējava bitso jivi najamatabēxainaena itsa taena piayaicueene petocopiajopaejavatsi. Nexata daxita nacuanējava jivi tēpajoneyabiabi-ana pecajunavi. Daxita xua athēbētatsia rubena, najēbiana. Xaniavaetsia apo rubenae tsane. <sup>27</sup> Nexata bajarapaepatota jivi netaena, Daxitajivi Pematapijinēnē, athēbēvetsica itarērēbota tanajetarucaejava. Patsianicajē daxitacuene taevetsinexa. Tanivenivenaecotia yajavapatsianicajē. <sup>28</sup> Itsa pataename pecopiajopaejava bajarapacuenie, nexata panajamatabēcuenesaētsianame. Tspaji rabaja imoxoyo pevajēnae tsane papecacapanepaenexa jivi papecabejibobia exanaebiabijavamivecua, jai Jesús pijajivijavabelia tajēvelia penavajunupaebijavata itsamatacabi icatsia pepatsijavanexatsica.

<sup>29</sup> Icatsia Jesús tajēvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaējere pacuenia itsi higeranae, itsavirianaenē ata. <sup>30</sup> Itsa baja imoxoyo pevajēnae tsaponae vai pejonejavanexa, bajaraponaenē pejanabaxu juva. Nexata bajarapacuenia payapētaneme vai baja imoxoyo pevajēnae pejonejavanexa. <sup>31</sup> Bajara pijinia pacuenia peneta itsa pataename pecopiajopaejava xua yabara pacatsipaebatsi,

nexata payapëtaename imoxoyo baja pevajënae pecopiapatsijavanexa tsane pamatacabi daxita Dioso pijajivi evetsijitsia mapanacuataje, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

<sup>32</sup> Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëajavabelia ata, apo vereverecae tsane. Matapania xua yabara pacatsipaebatsi itsa baja copiapatsiana, bajarapamonae jane baja vereverecaena. <sup>33</sup> “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonae, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia.

<sup>34</sup> Icatsia Jesús jumaitsi pijajivijavabelia:

—Nayajivitaeya pajinavanapaename. Pëtsa panajamatabëxainame pibisiacuene paneexanaenexa, paneaitajibinexa ata. Pëtsa pasivanajamatabëxainame maëpanacuapijijamatabëcueneje. Belia bajarapacuenia paneexanavanapaejavata, jemata copiapatsipa tapatsimatacabinexatsica. <sup>35</sup> Pacuenia dujuai peyamatajucaejava, meniareca jemata jivi xuareca dujuai peyamatajutsinexa, bajara pijinia pacuenia xanë tapatsimatacabinexatsica, jemata daxitanacuanëjava copiapatsiana. <sup>36</sup> Bajaraxuata nayajivitaeya pajinavanapaename. Daxitamatacabi canacujitsia panayajivivajëcabiabianame Diosojavabelia paneajamatabëcuenesä tsaponaenexa, panevecuapanepaponaenexa daxita papibisiacuene pacatocopiapataponaena. Daxita bajarapapibisiacuene panevecuapanepaecujinae ata, pavajëcabiabianame Diosojavabelia. Nexata pamatacabi xanë, Daxitajivi Pematapijinënë, patsianicajë, papeca-cäjäpaenexa panenubenaejava taitabarata, jai Jesús pijajivijavabelia.

<sup>37</sup> Caematacabi canacujitsia Jesús livaisi tsipaebabiaba templobota. Nexata icatsia caemeravi canacujitsia Jesús tomaravecuä pitsapabiaba pemajitabiabinexa petsutojumabelia. Nexata patsutojumata olivonaenë nubena, bajarapatsutojumata Jesús majitabiaba. <sup>38</sup> Daxita bajayacunua canacujitsia jivi patabiaba templobota penamuxunaevetabiabinexatsi Jesús petsipaebilivaisi.

### **Pacuenia Judas pona Jesús pijavajabitsä pecobeyabelia pecanajetsinexatsi yabara pelivaisi**

*(Mt 26.1-5, 14-16; Mr 14.1-2, 10-11; Jn 11.45-53)*

**22** Imoxoyo baja pevajënae pejonenexa pascuavënëfiesta. Bajarapafiestamat-  
acabi jivi baxane levadurata matajërëabinejeva pexanaepan. <sup>2</sup> Sacerdotevi penamatacaitorobivi, judíovi pecujarubivinua, najumejaita pacuenia picani bajarapamonae Jesús beyaxuabijitsiatsi. Itsiata abaxë bajarapamonae Jesús apo beyaxuabitsi. Tsipaji bajarapamonae jivi cujunava.

<sup>3</sup> Nexata dovathi tsijamatabëjunuatsi Judas. Judas, ponë vënërubatsi itsavënë, Iscariote. Bajaraponë Jesús pijajivi, doce ponëbejejayuvënë. <sup>4</sup> Judas yapëtane itsajota nacaetuata sacerdotevi penamatacaitorobivi, templobopijipolicíavi penamatacaitorobivi yajava. Nexata bajarabelia Judas pona pebarëcuai cuaijainexa bajarapamonae. Nexata Judas tsipaeba pacuenia rajutsijitsia Jesús bajarapamonae pecobeyabelia. <sup>5</sup> Nexata bajarapamonae barëya. Rajutsipaebatsi palata. <sup>6</sup> Jejai Judas. Nex-

ata Judas Jesús naitaxutocaevetsia ponapona. Paepatota Judas toyapëxanepanatsi, perajutsinexa jane baja Jesús bajarapamonae pecobeyabelia. Bajarapacuenia Judas najamatabëxaina pexanaenexa itsajota bitso jivi apo navitsi.

**Pacuenia Jesús barënabane pijajivi pecopiarutsinabani baja  
pebeyaxuabivajënaetsi yabara pelivaisi**

(Mt 26.17-29; Mr 14.12-25; Jn 13.21-30; 1 Co 11.23-26)

<sup>7</sup> Junua jane baja pascuavënëfiesta, pafiestamatacabi jivi baxane levadurata matajërëabinejeva pexanaepan. Bajarapamatacabi ovejaxi babia pexaenexa pascua fiestamatacabi. <sup>8</sup> Nexata Jesús itoroba pijajivitonëbeje, Pedrobeje Juanbeje. Jesús jumaitsi pijajivitonëbejejavabelia:

—Paponarebeje paneexanaexabeje vajaxaejavanexa. Xua jivi baxane pascua fiestamatacabi, bajaraxua vajaxaenexa paexanaenamebeje, jai Jesús pijajivitonëbejejavabelia.

<sup>9</sup> Nexata Pedrobeje Juanbeje jumaitsi beje Jesúsjavabelia:

—¿Detsa jota jitsipame bajaraxua pataexanaenexabeje? ¿Detsajota bajaraxua xae-natsi? jaibeje.

<sup>10</sup> Jesús nexata jumaitsi pijajivitonëbejejavabelia:

—Tomarabelia itsa papatsianamebeje, pacaxitajarabianamebeje mera canalito pecanajetaruaenë. Bajaraponë papënanajetaruaenamebeje. Pabota bajaraponë jonejojopaena, bajarapabota panapatsianamebeje. <sup>11</sup> Nexata pajumaitsimëbeje tsane bajarapabo pexainaenëjavabelia: “Vajanacacujarubinë raja Jesús jumaitsi: ‘¿Detsa jota pënëyatuucutsibo eca, pabota tajajivi barëxaejitsianë xua jivi baxane pascua fiestamatacabi?’ jai raja Jesús,” pajamëbeje tsane bajarapabo pexainaenëjavabelia. <sup>12</sup> Nexata athëbëabetsia anijairabeje pexinaebojavata, pacatsitajëtsianabeje. Bajarapaboënëta, athëbëyotsia paira, ayaiënëtuatuajë tsane. Daxitacuene bajarajota xainaena. Nexata xua jivi baxane pascua fiestamatacabi, bajarajota paexanaenamebeje vajaxaenexa, jai Jesús pijajivitonëbejejavabelia.

<sup>13</sup> Nexata jane baja bajaraponëbeje ponabeje. Caxitajarababeje daxita pacuenia Jesús jumaitsi. Nexata xua jivibaxane pascua fiestamatacabi, daxita Jesús pijajivi pebarëxaenexa, bajaraponëbeje exanabeje jane baja.

<sup>14</sup> Itsa baja copiajopa pexaeepatotanexa, Jesús, pijajivi doce ponëbeje, apóstolevi, yajava, eca mesa muxuneneta. <sup>15</sup> Nexata Jesús jumaitsi pijajivijavabelia:

—Tatëpaevajënae bitso jitsipajë patacayajavaxaejava mapapascua fiestamatacabi pexaejavaje. <sup>16</sup> Xaniajanë pacuenia pacatsipaebijitsiatsi. Matavëjëa rabaja mapanacuataje apo xanë tsane pascua fiestamatacabi pexaejava. Matapania daxita patajajivimë Dioso itsa pacacapanepaena panijaneconivecua, bajara jane icatsia matapania taxa Dioso pijanacuatatsia xaenajë pascua fiestamatacabi pexaejava, jai Jesús pijajivijavabelia.

<sup>17</sup> Nexata Jesús copavënëjavata yapita pijajivi pebarëapaeranexa. Jesús jumaitsi Diosojavabelia:

—Pexaniacuene panetoexaname. Panerajutame maporaje, jai Jesús.

Bajaraxuacujinae pijajivijavabelia jumaitsi:

—Maporaje payapire. Papaema padaxitamë mapacopataje. <sup>18</sup> Xaniajanë pacuenia pacatsipaebijitsiatsi. Matavëjëa rabaja mapanacuataje apo apaenë tsane uvacuaira.

Matapania itsa copiajopaena daxita Dioso pijajivi pevetsimatacabi, apaenajë icatsia, jai Jesús pijajivijavabelia.

<sup>19</sup> Bajaraxuacujinae Jesús pita panbë. Jesús jumaitsi Diosojavabelia:

—Pexaniacuene panetoexaname. Panerajutame pan, jai Jesús.

Bajaraxuacujinae epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, patacasivatëpaejava paxamënexa. Tatëpaecujinae mapacuenia paexanabianameje patanenajamatabënäpitiabinexamë, jai Jesús pijajivijavabelia.

<sup>20</sup> Nexata jane baja daxita Jesús pijajivi barë nabane. Penabanicujinae Jesús icatsia yapita pijajivi pebarëpaeranexa. Jesús jumaitsi pijajivijavabelia:

—Dioso baja cajena najumecapanepaeya jumaitsi pejanalivaisi papecacapanepaenexa bajaraponëjavabelia. Bajarapacuenia pacacapanepaena tajana pejamatabëcueneta. Tajana raja runaena papecacomuatsinexa pibisiacuene paneexanaenecanimivecua. Mapacapaejavataje padaxitamë papaema panenajamatabënäpitiabinexa pacuenia Dioso bajarapapejanalivaisita najumecapanepaeya jumaitsi papecacapanepaenexa bajaraponëjavabelia, jai Jesús pijajivijavabelia.

<sup>21</sup> Icatsia Jesús jumaitsi pijajivijavabelia:

Panejumetaema. Ponë necanajetsijitsia tajavajabitsaë pecobeyabelia, bajaraponë naeca mapamesa muxunenetaje. <sup>22</sup> Xanë, Daxitajivi Pematapijinënë, tēpaenajë pacuenia tajëvelia Dioso netocopata. Itsiata baitsi jane ponë necanajetsiana tajavajabitsaë pecobeyabelia, bitso bejiobi tsane, jai Jesús.

<sup>23</sup> Nexata Jesús pijajivi najumai tsenae:

—¿De meta ponë vaxaitsiyajuvënë, canajetsiana Jesús pijavajabitsaë pecobeyabelia? najai tsenae Jesús pijajivi.

### **Pacuenia Jesús pijajivi: “¿Detsa ponë vaxaitsiyajuvënë nacavecuaayaijamatabëcuenenë bitso?” najai yabara pelivaisi**

<sup>24</sup> Jesús pijajivi anaeya najumenotsiaya nalivaisita. Najumaitsi:

—¿Detsa ponë vaxaitsiyajuvënë nacavecuaayaijamatabëcuenenë? najai Jesús pijajivi.

<sup>25</sup> Nexata Jesús jumaitsi pijajivijavabelia:

—Nacuaeavetsivi pacuenia jamatabëpacaitoroba panetoexanaenexa, ajumesaëya pacaitorobabiaba papijajivimë, bajarapamonae pevetsinacuanëjava panejinavanapaevi. Itsiata baitsi jane bajarapacuenia pacabejiobiaexanabiabi ata, bajarapamonae jitsipabiaba paxamë bajarapamonae yabara panejumaitsinexa: “Bajaraponë vajanacayanacuaeavetsinë, bitso pexaniacuene nacatoexanabiaba,” panejainexa. <sup>26</sup> Pëtsa paxamë bajarapamonae cuenëjēpaeya bepaayaijamatabëcuenevimë panataneme. Ponë raja peneta paxamëyajuvënë daxita paxamë pacavecuaayaijamatabëcuenenë, bajaraponë peneta daxitajivi bepijajivitonëcuenia yavenonaena. <sup>27</sup> Mapanacuata petuxanenë itsa xaeyeca mesata, petuxanenë jamatabëcuenevetatsi pijajivitonë. Tsipaji petuxanenë ayaijamatabëcuenenë pijajivitonë matatoxenetsia. Itsiata xanë bajarapitsijamatabëcuene apo xainanë. Ponaponajë paxamëjavata daxita paxamë bepanijajivitonëcuenia patacayavenonaenexa, jai Jesús.

<sup>28</sup> Icatsia Jesús jumaitsi pijajivijavabelia:

—Pacuenia jivi nitoya, nebejiohiaexananua, bajarapacuenia paxamë ata patajajivixaemë, pacaexana. Bajarapacuenia pacaexanae ata tsane, itsiata apo panavecuacopabimë tsane. Tsitecaeya paneyajavajinavanapame. <sup>29</sup> Bajaraxuata nexata pacuenia taxa Dioso nitoroba jivi taevetsinexa, bajara pijinia pacuenia juya xanë ata paxamë pacaitorobatsi jivi paneevetsivinexa. <sup>30</sup> Nexata paxamë pacajamatabëcueneeaējēpaena taevetsinacuatatsia tajamesata panenanabaninexa, panenamatavejēaapaenexanua. Paenaename jueznëcuenia pananeconitsiaexanaenexa pijaneconi pexainaevi. Nexata pananeconitsiaexanaename Israelpijinjēmi pexi, doce ponēmibeje, pemomoxiyajuvēnēvi, jai Jesús pijajivijavabelia.

**Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai yabara pelivaisi**

(Mt 26.31-35; Mr 14.27-31; Jn 13.36-38)

<sup>31</sup> Jesús jumaitsi Pedrojavabelia:

—Simón, dovathi baja cajena jamatabëcapita xanëvecua. Bitso cajamatabëcueneējēbiana tanenavecuacopatsinexamë. Pacuenia arrozxainaenë arrozxu jēaba pesi pevecuaxuabinexa, bajara pijinia pacuenia pecaxuabinexa xanëvecua cajamatabëcueneējēbiana dovathi. <sup>32</sup> Itsiata baitsi jane catovajētatsi Diosojavabelia necopatsiyaniwa tanejumecovēnētsijavamë. Itsa navecuapaebianame nenaneconitsijava Diosojavabelia, nexata jane baja bajaraxuacujinae jamatabëcuene babataponaponaename Dioso pejumecovēnētsivi, jai Jesús Pedrojavabelia.

<sup>33</sup> Pedro nexata jumaitsi Jesúsjavabelia:

—Tajatuxanenë, najamatabëcueneveretajë baja. Penaneconitsivi pejebabiabibota caetsi ata, tanaponaponaenexa xamëta. Najamatabëcueneveretajë baja tacayajavatēpaenexanua, jai Pedro Jesúsjavabelia.

<sup>34</sup> Nexata icatsia Jesús jumaitsi:

—Pedro, xaniajanë pacuenia catsipaebijitsiatsi. Ajena, mapameravitaje, vacara pefiavajēnaeya nayavajunuaxainaename tajajivitonëcuenemë. “Xanë cajena apo yapētaenë bajaraponë,” jamë tsane acueyabi xuabeje xanë yabara, jai Jesús Pedrojavabelia.

**Pacuenia baja itsa imoxoyo pevajēnae Jesús pebeyaxuabinexatsi, tsipaeba pijajivijavabelia yabara pelivaisi**

<sup>35</sup> Jesús yanijoba pijajivijavabelia. Jesús jumaitsi mapacueniaje:

—Imata panamuto itsa pacaitorobatsi Dioso pejumelivaisi jivi daxitanacuanējējava panetsipaebanajetarubenaenexa, pacaitavetatsi panecaponaeyaniva doru, palata ata, zapato ata. ¿Bajarapamatacabi panamatavenoname tsaja itsacuenēja? jai Jesús pijajivijavabelia.

Nexata Jesús pijajivi jumaitsi:

—Jume. Apo panamatavenonaenë cajena itsacuenēja ata bajarapamatacabi, jai.

<sup>36</sup> Jesús nexata jumaitsi:

—Baja rajane aeconoxae panamuto, pajivi doru xaina, bajarapajivi caponae pijadoro. Palata ata caponae. Pajivi espada apo xainae, bajarapajivi penajumaxuabipana canajetsi. Comuatsi espada. <sup>37</sup> Xaniajanë pacuenia pacatsipaebijitsiatsi. Pacuenia xanë yabara Diosojumelivaisibaxutota tajëvelia jumaitsi, bajarapacuenia netocopiapatsiana. Dioso pejumelivaisibaxutota tajëvelia xanë yabara jumaitsi mapacue-

niaje: “Naneconitsiaexanaenatsi bepibisiacuene pexanaenēcuenia,” jai tajëvelia xanë yabara Diosojumelivaisibaxutota. Nexata bajarapacuene imoxoyo baja pevajënae tanetocopiapatsinexa, jai Jesús pijajivijavabelia.

<sup>38</sup> Nexata Jesús pijajivi jumaitsi:

—Tajatuxanenë, mara anijaespadabejeje, jai Jesús pijajivi.

Nexata Jesús jumaitsi pijajivijavabelia:

—Xanepana rabaja, jai Jesús.

### **Pacuenia Jesús vajëta Diosojavabelia Getsemanívenëjavata yabara pelivaisi**

*(Mt 26.36-46; Mr 14.32-42)*

<sup>39</sup> Jesús pitsapa bovecua. Pacuenia ponabiaba, bajarapacuenia icatsia pona pet-  
sutojumabelia. Patsutojumata olivonaenë apaaxayo, bajarapatsutojumabelia pona.  
Nexata Jesús pijajivi pënaponatsi. <sup>40</sup> Jesús pijajivi itsa barëpata bajarapatsutojuma-  
belia, Jesús jumaitsi pijajivijavabelia:

—Pacajamatabëcueneëjëbiana raja dovathi pejamatabëcueneta. Pavajëta-  
ponare aeconoxae Diosojavabelia paneajamatabëcuenesaënexa panecopabiyanima patane-  
jumecovënëtsijavamë, jai Jesús.

<sup>41</sup> Nexata Jesús pijajivi vecuanatixilia bejamatabëcuene treinta metro. Jesús nuca-  
junua pematabacabëta pevajëta-ponaenexa Diosojavabelia. <sup>42</sup> Jesús pevajëtsijavata  
jumai tsaponae Diosojavabelia:

—Taxa Diosomë, netocopatame picani tanebeyaxuabinexa betajibicueneta. Itsa  
jitsipame, necapanepare bajarapabejibicuenevécua. Itsiata xanë apo tajitsipae-  
cuene ata, pacuenia xamë jitsipame, netocopatsianame, jai Jesús pevajëtsijavata  
Diosojavabelia.

<sup>43</sup> Nexata Jesús athëbëpijiängel tsitanaitajëtatsi pejamatabëcuene asaëyaex-  
anaenexatsi. <sup>44</sup> Jesús pebeyaxuabijavanexatsi yabara, bitso natsinajamatabëxaina.  
Nexata Jesús bitso orijibia asaëyata vajëta-pona Diosojavabelia. Jesús bitso janetatsi.  
Pacuenia itsi pijana, bajara itsi Jesús pejanetsibarëmenetsi. Topitopijai irabereca.

<sup>45</sup> Jesús pevajëtsicujinae itsa nonotapuna, lia pijajivijavabelia. Nexata Jesús pi-  
jajivi caxitajaraba pemajitanubenaevi. Tsipaji Jesús pijajivi bitso penajamatabëx-  
ainaejava, cuerana. <sup>46</sup> Nexata Jesús jumaitsi pijajivijavabelia:

—¿Detsa xuajitsia pamajitanubename? Panonobapunare. Pavajëta-ponare Dioso-  
javabelia, dovathi pejamatabëcueneta pacajamatabëcueneëjëbi ata paneaja-  
matabëcuenesaënexa, jai Jesús pijajivijavabelia.

### **Pacuenia Jesús vaetabatsi pijavajabitsaë yabara pelivaisi**

*(Mt 26.47-56; Mr 14.43-50; Jn 18.2-11)*

<sup>47</sup> Jesús pijavajabitsaë pevaetabijavatanexatsi, cuaicuajiai tsanucæe pijajivijav-  
abelia. Nexata bajarapaepatota jivi ayaibitsaëttoxaneto, Jesús petsimaxëponae-  
vitsi, najetarubena. Ponë vënërubatsi Judas, Jesús pijajivi doce ponëbejeyaju-  
vënënëmi, matacanajetaruca bajarapamonæe. Nexata Judas najetabilia Jesús-  
javabelia. Itabaratsutsuniaya bajacobatsi. <sup>48</sup> Nexata Jesús bajarajota jumaitsi  
Judasjavabelia.

—Judas, ¿matsa pacuenia nitabaratsutsuniaya nebajacobame xanë, Daxitajivi Pe-  
matapijinënë, tanecanajetsinexamë tajavajabitsaë pecobeyabeliaje? jai Jesús.

<sup>49</sup> Jesús pijajivi itsa tane pacuenia Jesús exanaejitsiatsi, nexata bajarapamonae jumaitsi Jesúsjavabelia:

—Tajatuxanenë, ¿namaxëvanitsianatsi tsaja espadata? jai Jesús pijajivi.

<sup>50</sup> Nexata caenë Jesús pijajiviyajuvënënë namaxëvanita. Sacerdotevi pepo penamatacaitorobinë pijajivitonë muxuyoropaebiaxuaba pecujuanenia pamuxuyoroto.

<sup>51</sup> Nexata Jesús jumaitsi pijajivitonëjavabelia:

—Copabare baja, jai Jesús.

Nexata Jesús bajaraponë muxuyoroyataba. Jesús baja muxuyororuta icatsia bajaraponë. <sup>52</sup> Pamonae Jesús tsimaxëpatatsi, itsamonae sacerdotevi penamatacaitorobivi, itsamonae templobopijipolicíavi penamatacaitorobivi, itsamonae judíovi pijaancianovi. Bajarapamonae caponaejitsiatsilia Jesús. Nexata Jesús jumaitsi bajarapamonaejavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinexamë pacuenia pavaetababiabame penacobetoxotsinë. <sup>53</sup> Xanë caematacabi canacujitsia Dioso pejumelivaisi paxamëjavabelia pacatsipaebabiabatsi templobota. Itsiata bajarapamatacabi apo panevaetabimë. Nexata mapaepatotaje panetsimaxëpatame dovathi, jivi piajamatabëcuene itaquiriyaexanaenë, papecaitorobixae, jai Jesús petsimaxëpatsivitsijavabelia.

### **Pacuenia jane baja Pedro nayavajunuaxaina Jesús pijajivitonëcuene yabara pelivaisi**

*(Mt 26.57-58, 69-75; Mr 14.53-54, 66-72; Jn 18.12-18, 25-27)*

<sup>54</sup> Jesús pevaetabicujinaetsi, caponaliatsi sacerdotevi pepo penamatacaitorobinë pijaboyabelia. Nexata Pedro bajarapamonae pecovëvelia tajiyo pënanajetaruca.

<sup>55</sup> Nexata pabota Jesús capatatsi, bajarajota, panabo tuatuajëta, vajabitsaë isoto itajuruteta. Bajarapamonae isoto matatoyorotsia ena. Pedro nexata naitaxutocaevetsi-aya naeca bajarapamonaejavata. <sup>56</sup> Nexata bajarapabota penacuenebiva, Pedro itsa taeyetatsi penanonopecaejavata isoto muxuneneta, naitaxutobabatsia asaëya taenucatsi. Nexata itsamonaejavabelia bajarapova jumaitsi Pedro yabara:

—Mara ponë ata Jesús pijajivitonëje, jai bajarapova.

<sup>57</sup> Nexata Pedro jumaitsi bajarapovajavabelia:

—Jume raja. Xanë cajena apo yapëtaenë bajaraponë, jai Pedro bajarapovajavabelia Jesús yabara.

<sup>58</sup> Bajaraxuacujinae icatsia itsajivi Pedro taeyetatsi. Bajarapajivi ata icatsia jumaitsi Pedrojavabelia:

—Xamë ata rabaja cajena Jesús pijajiviyajuvënënëmë, jai.

Nexata Pedro jumaitsi bajarapajivijavabelia:

—Jume raja. Xanë raja cajena apo Jesús pijajiviyajuvënënënë, jai Pedro.

<sup>59</sup> Bejamatabëcuene caehoracujinae, icatsia itsanë jumaitsi:

—Xaniajai rabaja cajena. Maponëje Jesússta naponaponaje. Tsipaji rabaja bajaraponë ata Galilea nacuapijinë, jai bajaraponë Pedro yabara.

<sup>60</sup> Nexata Pedro nayajumetane. Pedro nexata jumaitsi bajaraponëjavabelia:

—Apo yapëtaenë cajena pacuene yabara jumaitsimë, jai Pedro.

Bajarapacuenia Pedro pejumaitsijavata, vacara baja fiaba. <sup>61</sup> Nexata Jesús boverena namuxufeta Pedrojavaberena. Taeyerenatsi Pedro. Nexata bajarapaepatota



Pedro najamatabênapitajaraba Jesús pejumaitsijavatsi: “Pedro, ajena, mapameravitaje, vacara pefiabivajënaeya nayavajunuaxainaename tajajivitonëcuenemë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejajjavatsi Jesús, najamatabênapitajaraba Pedro. <sup>62</sup>Nexata baja Pedro pitsapalia bopanabovecua. Piniijicuenia nua.

### **Pacuenia Jesús pijavajabitsaë capocaponatsi yabara pelivaisi**

*(Mt 26.67-68; Mr 14.65)*

<sup>63</sup>Pamonae Jesús vaetabatsi, capocaponatsi. Itabaratsaquibabeponatsi pecobethaitonëta. <sup>64</sup>Papaëbërëpanata itaxutocëtatsi. Pitaxutocëtsicujinaetsi icatsia itabaratsaquibabeponatsi pecobethaitonëta. Nexata bajarapamonae jumai tsaponae Jesúsjavabelia:

—|Vënëjonare ponë caitabaratsaquibaba! jai tsaponae.

<sup>65</sup>Pibisiacuenianua bajarapamonae jumai tsaponae Jesúsjavabelia.

### **Pacuenia Jesús nutatsi judíovi penamatacaitorobivi pitabarata yabara pelivaisi**

*(Mt 26.59-66; Mr 14.55-64; Jn 18.19-24)*

<sup>66</sup>Ajena baja matababi tsarucaponae, nacaetuata judíovi pijaancianovi, sacerdotevi penamatacaitorobivi yajava, judíovi pecujarubivi yajava. Nexata Jesús caponarenatsi bajarapamonae penacaetuatsijavaberena. Bajarajota bajarapamonae jumaiti Jesúsjavabelia:

<sup>67</sup>—Panetsipaebare. ¿Xamë tsabaja rovia Cristomë, athëbëvetsica Dioso pecaitorobinëtsica jivi necapanepaenënexa? jai bajarapamonae.

Nexata Jesús jumaiti bajarapamonaejavabelia:

—“Xanë rabaja Cristonë, athëbëvetsica Dioso taneitorobinëtsica jivi tapanepaenexa,” pacajai atatsi tsipae, itsiata apo panejumecovënëtsimë tsipae.

<sup>68</sup>Itsalivaisiyo pacayanijobi atatsi tsipae, itsiata apo panejumecanaviatsimë tsipae. Apo panecopatsimënua tsipae. <sup>69</sup>Itsiata baitsi jane tavajënaeyabelia xanë, Daxitajivi Pematapijinënë, ecaenajë taxa Dioso pecujuanenia patanajuaeavetsinexabeje daxitacuene. Bajaraponë pecaëjëpaenëtsi daxitajamatabëcuene, jai Jesús bajarapamonaejavabelia.

<sup>70</sup>Nexata daxita bajarapamonae jumaiti Jesúsjavabelia:

—¿Xamë tsabaja Dioso pexënatomë? jai bajarapamonae.

Nexata Jesús jumaiti bajarapamonaejavabelia:

—Jājā, xanë rabaja pacuenia panejumaitsimë. Bajaraponënë, jai Jesús.

<sup>71</sup>Nexata bajarapamonae najumaiti:

—Ajibi rabaja abaxë vajeavetaponaejava jivi neconitsiaya vajanacatsipaebaponenexa pacuene yabara naneconitsiaexanaejitsiatsi maponëje. Vaxaitsi rabaja vajacuata jumetanetsi pacuenia maponëje cuaicuaijai Dioso apo pejitsipaecuenia. Tsi-paji beDioso pexënato natane, najai bajarapamonae.

### **Pacuenia Jesús nutatsi Pilato pitabarata yabara pelivaisi**

*(Mt 27.1-2, 11-14; Mr 15.1-5; Jn 18.28-38)*

**23** Daxita judíovi pijaancianovi nonobapuna. Sacerdotevi penamatacaitorobivi ata nonobapuna. Judíovi pecujarubivi ata nonobapuna. Nexata bajarapa-

monae Jesús caponaliatsi itsaboyabelia, Judeanacua pevetsinē Pilato pijaboyabelia.

<sup>2</sup>Bajarajota Pilato pitabarata bajarapamonae neconitsiaya jumaitsi Jesús yabara:

—Mara ponēje naneconita. Tsipaji muxubijiapenetapona jivi pianaepanaenexa nacuaevetsivijavabelia. Paneitavetaponanua patamatamotsiyaniva Romanonacua pepo pevetsinē pejamatabēcueneta impuestomatamo pataneyanijobijava. Jumai tsaponaenua: “Xanē raja Cristonē, nacua taevetsinē,” jai tsaponaē maponēje, jai bajarapamonae Jesús yabara neconitsiaya Pilatojavabelia.

<sup>3</sup>Nexata Pilato jumaitsi Jesúsjavabelia:

—¿Xamē tsaja judíovi pepo nevetsinē? jai.

Nexata Jesús jumaitsi Pilatojavabelia:

—Jājā, xanē rabaja pacuenia nejumatsimē, jai Jesús Pilatojavabelia.

<sup>4</sup>Pilato nexata jumaitsi sacerdotevi penamatacaitorobivijavabelia, jivi ayaibitsaē-toxanetojavabelia ata:

—Apo caxitajarabinē cajena itsacujiruneconi ata pexainaejava maponēje, paneconi yabara naneconitsijitsia, jai Pilato.

<sup>5</sup>Itsiata bajarapamonae ajumesaē. Orijibia neconitsia jumaitsi Jesús yabara:

—Bajaraponē daxita Judea nacuapijivi muxubijiapenetapona bajarapamonae pianaepanaenexa Judeanacua pevetsivijavabelia. Taxuxuaba cajena bajaraponē bajarapacuenē pexanaejava Galilea nacuata. Nexata maberena ataje bajarapacuenia icatsia exanapona, jai bajarapamonae Jesús yabara Pilatojavabelia.

### **Pacuenia Jesús nutatsi Herodes pitabarata yabara pelivaisi**

<sup>6</sup>Pilato itsa jumetane bajarapamonae peneconitsijavatsi Jesús, nexata Pilato jumaitsi bajarapamonaejavabelia:

—¿Matsa ponēje Jesús, Galilea nacuapijinēje? jai Pilato.

<sup>7</sup>Nexata bajarapamonae tsipaeba Pilatojavabelia Jesús Galilea nacuapijinēcuenē. Nexata Pilato itoroba pijajivi Jesús pecaponaenexatsilia Herodesjavabelia. Tsipaji Herodes Galileanacua pevetsinē. Bajarapamatacabi Herodes ponapona Jerusalén tomarata. <sup>8</sup>Nexata Herodes itsa tane Jesús, barēya. Tsipaji Herodes vënëlivaisi-taeyabiaba Dioso pesaēta Jesús pinijicuene pexanaponaejavanē. Nexata Jesús pinijicuene pexanaejava Dioso pesaēta jamatabētane Herodes. <sup>9</sup>Nexata Herodes ayaiçuenia yanijobapona Jesúsjavabelia. Itsiata Jesús apo jumepitsi caejumeyo ata. <sup>10</sup>Bajarajota nubena sacerdotevi penamatacaitorobivi, judíovi pecujarubivi yajava. Bajarapamonae ayaijumeta neconitaponatsi Jesús Herodesjavabelia. <sup>11</sup>Nexata Herodes, pijajivi yajava, Jesús capocaponatsi. Bitso pexaniajava, xua nacuaevetsinē banaxatata, bajaraxua Jesús quenetsiataeya xatatatsi. Bajarapacuenia Jesús quenetsiataeya xatatatsi pepo nacuaevetsinēcuenia petaenexatsi. Bajaraxuacujinae icatsia canaviabarenatsi Pilatojavaberena. <sup>12</sup>Pilatobeje Herodesbeje naitoyabeje picani. Itsiata bajarapamatacabi nabarajamatabēcuenexanepanabeje. Naxaniababeje baja.

### **Pacuenia baja Pilato tocopata Jesús pebeyaxuabinexatsi yabara pelivaisi**

*(Mt 27.15-26; Mr 15.6-15; Jn 18.39-19.16)*

<sup>13</sup>Pilato junata penacaetuatsinexa sacerdotevi penamatacaitorobivi. Junata penacaetuatsinexa judíovi pevetsivi ata. Junata penacaetuatsinexa bajarapatomarata pejinavanapaevi ata. <sup>14</sup>Nexata Pilato jumaitsi bajarapamonaejavabelia Jesús yabara:

—Paxamë panetocapatame maponëje. “Mara ponëje naneconita. Tsipaji muxubiji- apenetapona jivi pianaepanaenexa nacuaevecsivijavabelia,” panejamë. Itsiata baitsi jane xanë picani tajacuata yanijobajë xaniavaetsia paneitabëta. Nexata xua yabara paneconitame, ajibi picani. Maponëje itsacujiruneconi ata apo xainae, paneconi yabara naneconitsijitsia. <sup>15</sup> Herodes ata apo naneconitsiaexanaetsi. Saya icatsia nacatocanaviarena. Pataneme rabaja. Itsacujiruneconi ata apo xainae maponëje, paneconi yabara beyaxuabijitsiatsi. <sup>16</sup> Nexata tajajivi itorobianajë bajaraponë saya tajajivi pejumaconibabenexa penaneconitsivi pejumaconibabeyabiabimacata. Bajaraxuacujinae copatsianajë, jai Pilato bajarapamonaejavabelia.

<sup>17</sup> Caevai canacujitsia, pascuavënë fiestamatacabi, Pilato copatabiaba caenë penaneconitsinë pepitsapaenexa penaneconitsivi pejebabiabibovecua. Pilato copatabiaba ponë jivi vajëtatsi pecopatsinexa. Nexata bajarapacuenia copatabiaba jivi pesivajamatabëcuene xanepanaenexatsi. <sup>18</sup> Nexata bajarapamonaes ita jümetane Pilato picani Jesús pecopatsiapaebijava, nexata daxita bajarapamonaes caecuenia vavajai Jesús yabara. Bajarapamonaes pevavajaijavata, Jesús yabara jumaitsi Pilatojavabelia mapacueniajæ:

—¡Majane ponë beyaxuareje! ¡Barrabás jane panetocapitsapare! jai bajarapamonaes.

<sup>19</sup> Bajaraponë Barrabás Jesús pevajënaeya bajarapatomarata barënbacia gobierno pijajivijavabelia. Nexata Barrabás jivitonë beyaxuaba. Bajaraxuata naneconitsiaponapona penaneconitsivi pejebabiabibota. <sup>20</sup> Pilato picani jamatabëcopata Jesús. Bajaraxuata picani icatsia Pilato tsipaebijitsia jivijavabelia Jesús baja pecopatsinexa. <sup>21</sup> Itsiata baitsi jane bajarapamonaes orijibia vavajai.

—¡Cruzajavabelia cobematabiabarutsiaexanare! ¡Cruzajavabelia cobematabiabarutsiaexanare! jai tsaponae bajarapamonaes Pilatojavabelia.

<sup>22</sup> Icatsia Pilato jumaitsi bajarapamonaesjavabelia:

—¿Detsa xuajitsia? ¿Detsa papibisiacuene exana maponëje? Apo caxitajarabinë cajena itsacujiruneconi ata, paneconi yabara beyaxuabijitsiatsi. Nexata tajajivi itorobianajë bajaraponë saya tajajivi pejumaconibabenexa penaneconitsivi pejumaconibabeyabiabimacata. Bajaraxuacujinaes copatsianajë peponaenexa baja, jai Pilato.

<sup>23</sup> Itsiata bajarapamonaes ajumesä. Vavajai tsaponae.

—¡Cruzajavabelia cobematabiabarutsiaexanare! jai tsaponae bajarapamonaes Pilatojavabelia.

Nexata bajarapamonaes, sacerdotevi penamatacaitorobivi yajava, bitso pevavajait-saponaes, belia baja Pilato jejai. <sup>24</sup> Nexata baja Pilato tocopata pacuenia bajarapamonaes vajëtatsi. <sup>25</sup> Nexata Pilato itoroba pijajivi Barrabás, ponë jivitonë beyaxuaba, pecapitsapaenexatsi pepitsapaenexa baja penaneconitsivi pejebabiabibovecua. Caranata Jesús, pianeconijibinë, pebeyaxuabinexatsi Pilato itoroba pijajivi.

**Pacuenia jane baja Jesús cruzajavabelia  
cobematabiabarutatsi yabara pelivaisi**

(Mt 27.32-44; Mr 15.21-32; Jn 19.17-27)

<sup>26</sup> Vajabitsä ita caponaliatsi Jesús cruzajavabelia pecobematabiabarutsinexatsi, Simón pijinia najetaruca vayafoverena. Nexata vajabitsä vaetabatsi Simón. Simón Cirene tomarapijinë. Nexata Simón vajabitsä itorobatsi, pacruzajavabelia Jesús

cobematabiabarutsijitsiatsi, petocaponaenexa. Nexata bajarapacruza Simón tovë-tacaranajetaruca Jesús pecovëya.

<sup>27</sup> Jesús pënanajetarubenatsi, jivi ayaibitsaëtoxaneto. Bajarapamonaeyajuvënëvi, petiriavi ayaibitsaëto, Jesús bitso pënueyababuataponatsi ayaijumeta. <sup>28</sup> Nexata Jesús napënëyorota. Jumaitsi bajarapapetirivijavabelia:

—Paxamë petiriavi, paJerusalén tomarapijivimë, pëtsa panepënueyabame xanë. Paxamë jane panatsinuema. Panexi ata patsinuema. <sup>29</sup> Itsa copiajopaena piayaimat-acabi, jivi bitso bejiobi tsane. Nexata jivi jumai tsane: “Mavecovi itsiata bevelia nacatsunabejiobitane pexi apo pexainaexae,” jai tsane jivi bajarapamatacabi mave-covi yabara. <sup>30</sup> Nexata bajarapamatacabi jivi bitso itsa nabejiobitaena, belia jitsi-paena petëpaejava. Nexata jivi najumai tsane: “Vajatëpaenexa, nacatoxanepanae-jitsipa pinijiibotsutonë itsa nacamatacënëbajarabijitsipa,” najai tsane jivi. <sup>31</sup> Xanë itsacujiruneconi apo xainae atanë, nebejiobiaexanaena itsa necobematabiabarut-siana cruzajavabelia. Nexata pamonaë pibisiacuene pexanaevi bitso xanë mata-toxenetsia, bejiobiaexanaenaenatsi itsa tocopiaatsianatsi piayaimatacabi, jai Jesús bajarapapetirivijavabelia.

<sup>32</sup> Itsabelia vajabitsaë Jesús caponatsi, bajarabelia anijanëbeje penaneconitsinëbeje, Jesús yajava, caponatsi. Bajaraponëbeje pijamatabëcuenebe-jenëbeje vajabitsaë caponatsibeje Jesús peyajavabeyaxuabinexatsibeje. <sup>33</sup> Itsa baja capaliatsi Jivimatasipavënë tsutojavabelia, nexata cruzajavabelia Jesús yajavacobematabiabarutatsi bajaraponëbeje. Itsanë rutatsi itsacruzata Jesús pecujuanenia. Itsanë rutatsi itsacruzata Jesús petsavenonenia. <sup>34</sup> Jesús baja cruzajavabelia pepuacobematabiabarutsi, jumaitsi paxa Diosojavabelia:

—Axa, mapamonaëje itaxutotsoniataema. Vecuaxuare paneconi xaina pibisi-acuene taneexanaexae mapacueniaje. Tsipaji raja apo yapëtae. Bajaraxuata ma-pacuenia nexanaje, jai Jesús paxa Diosojavabelia.

Nexata vajabitsaë, pamonaë Jesús cobematabiabarutatsi cruzajavabelia, bajara-jota namuxusita. Penamuxusitsijavaxi irata natsipenepeneta. Bajarapacuenia va-jabitsaë penamuxusitsijavaxi canamuxusita peyapëtaenexa ponë pitaponaëjitsia caejava canacujitsia Jesús penaxatatsijavami, xua jumaponapona. <sup>35</sup> Bajarajota dax-itajivi taenubena. Judíovi pevetsivi Jesús capocaponatsi. Bajarapamonaë capoc-aponaeja jumaitsi Jesús yabara:

—Ëitsamonae yabara jumai tsabiabi: “Capanepaenajë jivi,” jai tsabiabi. Baja ra-jane pijacuata nacapanepae itsa xaniajai pepacuene Cristo, Dioso athëbëvetsica pitorobinëtsitsica jivi pecapanepaenexa, jai judíovi pevetsivi Jesús yabara.

<sup>36</sup> Vajabitsaë ata Jesús capocaponatsi. Nexata capocaponaëya cujibarenatsi. Rajutsijitsiatsi piajatuvinora piapaenexa Jesús. <sup>37</sup> Nexata vajabitsaë jumaitsi Jesúsjavabelia:

—Itsa xamë judíovi pepo nevetsinë, nexata nacapanepare nijacuata, jai vajabitsaë Jesúsjavabelia.

<sup>38</sup> Bajarajota Jesús pematabocoto matatsënëyo tablapajumata, Pilato pijajivi yaquinaruta acueyabi paviriavibeje pijajumeta. Itsaitane yaquinaruta griego-jumeta. Itsaitane yaquinaruta latínjumeta. Itsaitane yaquinaruta hebreojumeta. Peyaquinarubiitane jumai tsarubi mapacueniaje: “Mara ponëje judíovi pepo pevetsinëje,” jai tsarubi Jesús yabara. <sup>39</sup> Itsanë pijamatabëcuenebejenë cruzajav-abelia pecobematabiabarutsinëtsi, Jesús anaëya bijataerucatsi.

—Itsa xamē Cristomē, athëbëvetsica Dioso peccatorobinëtsica jivi necapanepaenexa, nijacuata nacapanepare. Paxanëbeje ata panecapaneparebeje, jai tsarucae Jesúsjavabelia.

<sup>40</sup> Itsanë pijinia itsacruzajavabelia pecobematabiabarutsinëtsi, jumeitavetaruca. Jumai tsarucae penajuananeconitsinëbejevavelia:

—¿Dioso tsaja apo cujanvimë netëpaenexa, cacobematabiabi ata nijaneconi yabara mapacueniaje? <sup>41</sup> Vaxaibeje rabiji vajaneconi xainatsibeje vajatëpaenexabeje. Nacarutabeje mapacueniaje pibisiacuene vajaexanaexabeje. Mabiji ponëje caeto ata pibisiacuene apo exanae, jai tsarucae bajaraponë jumeitavetsiaya penajuananeconitsinëbejevavelia.

<sup>42</sup> Icatsia xuacujinae bajaraponë jumaitsi Jesúsjavabelia:

—Jesús, xanë nenajamatabënapitsianame pamatacabi xamë evetsianame mapanacuaje, jai bajaraponë Jesúsjavabelia.

<sup>43</sup> Nexata Jesús jumaitsi bajaraponëjavavelia:

—Xaniajanë pacuenia catsipaebijitsiatsi. Ajena, pamatacabi, neyjavaponaponae-name paraísojavatatsia, jai Jesús bajaraponëjavavelia.

### **Pacuenia baja Jesús tëpa yabara pelivaisi**

*(Mt 27.45-56; Mr 15.33-41; Jn 19.28-30)*

<sup>44</sup> Jesús baja itsa tëpaejitsia, matonejeepatota, daxita nacuanëjava aitaquiri tsajuni. Matapania acueyabi pahorabejecujinae, caniviyojavabelia, nacua napebeta icatsia. <sup>45</sup> Paepatota Jesús tëpanajereca, bajarapaepatota templobo ënëtuatuajëalia pënëyatuucutarutsipana, ayaipapaëbërëpana, tuatuajëatsica titititicaica. <sup>46</sup> Nexata Jesús ayaijumeta jumaitsi Diosojavabelia:

—Axa, xamëjavabelia daxita tjamatabëcuene carajutatsi, jai Jesús.

Itsa baja Jesús najumevereta bajarapajume, tëpanajereca jane baja.

<sup>47</sup> Nexata Romano nacuapijinë, vajabitsaë pijacapitán, itsa tane daxita bajarpacueni, bajaraponë Diosojavabelia jumaitsi:

—Diosomë, bitso ayaijamatabëcuenenëmë. Xaniajai tsaena baja. Maponë tëpaje, planeconijibinë, jai vajabitsaë pijacapitán.

<sup>48</sup> Daxita pajivibitsaëtoxaneto taenubena pacuenia Jesús jumaliverevereca, bajarapamonae bitso najamatabëxainaeya naviaba pijabonëjavabelia. <sup>49</sup> Daxita pamonaie Jesús peyapëtaevitsi, pebijivi, petirivi ata, pamonaie Galilea nacuaverena pënaponatsi, tajiyojavaverena taenubena, petaenexa Jesús pebeyaxuabijavatsi.

### **Pacuenia Jesús petëpaenë buatasti ibovajualia yabara pelivaisi**

*(Mt 27.57-61; Mr 15.42-47; Jn 19.38-42)*

<sup>50</sup> Jerusalén tomarata ponapona José, Arimatea tomarapijinë. Bajaraponë pexaniajamatabëcuenenë, xaniavaetsia peponaponaenë Dioso pitabarata. Bajaraponë judíovi pevetsinë. <sup>51</sup> José copiaevetaponapecopiajopaejava pamatacabi caenë Dioso evetsijitsia daxita pijajivi mapanacuataje. Nexata José apo jamatabëcuenejëpae pacuenia judíovi exana Jesúsjavabelia. <sup>52</sup> José nexata lia nacuaeavetsinë Pilatojavabelia. Vajëta petocopatsinexatsi pemëthëtsinexa petëpaenë Jesús. <sup>53</sup> Bajaraxuacujinae José cruzajavavetsica pitsica Jesús petëpaenë. Daxitanëreca mataquionae matacacëba pexaniaviria piapiasábanapanata. Nexata cajena itsajota José iboitapajanitovavata pinijibovaju toexanabuatatsi petëpaevi pebuataponaenexa, ba-

jarapaibovajualia buata Jesús petëpaenë. Bajarapavajualia abaxë itsajiviyo ata petëpaejiviyo José apo buatsi. <sup>54</sup> Pamatacabi José bajarapacuenia vajëta Pilatojavabelia Jesús petëpaenë pemëthëtsinexa, bajarapamatacabi judíovi penacuenebija banaanacuenevereta baja pecopiajonevajënaeya penacueraevetsimatacabinexa. Nexata paepatota José ibovajualia buata Jesús petëpaenë, bajarapaepatota José baja tocopiapataponatsi penacueraevetsimatacabinexa.

<sup>55</sup> Papetiriavi Jesús pënaponatsi Galilea nacuaverena, bajarapapetiriavi tajivo José pecovëya najetarubena. Nexata bajarapapetiriavi tane Jesús petëpaenë José beuatsijava bajarapaibovajualia. <sup>56</sup> Bajaraxuacujinae bajarapapetiriavi naviaba baja pijaboyabelia. Nexata pepatsicujinae pijaboyabelia, bajarapapetiriavi xaniavaeta pexaniapetuxujuvira, pexaniapetuxujuvitsapato yajava, Jesús petëpaenë peperabëexabinexa. Nexata abaxë bajarapapetiriavi nacueraeveta judíovi penacueraevetsimatacabita pacuenia itorobatsi Dioso Moiséspijinëta bajayata penajumecopatsilivaisi.

### Pacuenia Jesús petëpaecujinae icatsia asaë yabara pelivaisi

(Mt 28.1-10; Mr 16.1-8; Jn 20.1-10)

**24** Judíovi baja penacueraevetsimatacabi verevereca. Nexata meravia pitsijavata, ajena juameto pitsapaina, papetiriavi xaniavaeta pexaniapetuxujujavajava, icatsia ponalia Jesús petëpaenë pebuatsiibovajutsijavabelia. Patuxujujujavajava xaniavaeta Jesús petëpaenë peperabëexabinexa, caponalia Jesús petëpaenë peperabëexabinexa jane baja picani. Itsapetiriavi yajava ponalia peyanabinexatsi. <sup>2</sup> Itsa baja palia, nexata bajarapapetiriavi tane Jesús petëpaenë pebuatsiibovajutsi peyavëpaacatsiibopanaxanetomi petixitanutsijavalia. <sup>3</sup> Bajarapamonae joneya picani Jesús pebuatsiibovajutsijavalia. Itsiata baitsi jane apo caxitajarababuatsi petëpaenë, pepo petuxanenë Jesús. <sup>4</sup> Nexata bajarapapetiriavi bitso jamatabëcuenenajunaviaca. Apo yapëtae pacuenia exanaejitsia. Bajarajota nexata bajarapapetiriavi taenuta anijanëbeje ángelnëbeje. Bajaraponëbeje penaxatatsijavabeje nivenivena bitso. <sup>5</sup> Bajarapapetiriavi bitso cjunava bajarapaángelnëbeje. Nexata pecajunavi pematatababëta irataeya bobena. Nexata bajarapaángelnëbeje jumaitsi petiriavijavabelia:

—¿Detsa xuajitsia petëpaenë pebuatsijavatatsi, pajaitame? Bajaraponë asaë baja icatsia. <sup>6</sup> Bajaraponë majotaje ajibi baja tsarucae. Dioso rabaja icatsia asaëyaexanatsi. Panajamatabënapire pacuenia pacatsipaeba Galilea nacuata pamatacabi abaxë asaë tsaponaponae. <sup>7</sup> Bajaraponë baja cajena tajëvelia pacajumaitsi: “Xanë, Daxitajivi Pematapijinënë, necanajetsiana pibisijamatabëcueneni pecobeyabelia. Nexata bajarapamonae cruzajavabelia necobematabiabarutsiana tanebeyaxuabinexa. Itsiata baitsi jane tanebeyaxuabicujinae, acueyabi matacabita, icatsia asaënë tsane,” pacajai baja cajena tajëvelia Jesús itsa abaxë pamatacabi pacayajavaponapona, jai ángelnëbeje petiriavijavabelia.

<sup>8</sup> Nexata bajarapapetiriavi najamatabënapita pacuenia Jesús tajëvelia jumaitsi. <sup>9</sup> Nexata baja bajarapapetiriavi naviabarena Jesús petëpaenë pebuatsiibovajutsijavaverena. Nexata bajarapapetiriavi tsipaeba daxita bajarapacueni yabara once ponëbeje, Jesús pijaapóstolevijavabelia. Tsipaebanua daxita itsamonae Jesús pijajivijavabelia ata. <sup>10</sup> Bajarapapetiriavijavuvënëvi itsava Mariävënëva. Bajarpova Magdala tomarapijiva. Itsava pijinia Juanävënëva. Itsava pijinia icatsia Mariävënëva. Bajarapova Santiago pena. Itsapetiriavi yajava tsipaeba bajara-

pacuene yabara apóstolevijavabelia. <sup>11</sup> Bajarapapetiriavi apóstolevijavabelia tsi-paebi ata bajarapacue yabara, itsiata apóstolevi apo jumexaniataetsi. Apóstolevi saya bajarapalivaisi yabara jamatabējumaisi: “Saya meta bajarapapetiriavi pijacu-ata exana bajarapalivaisi,” jamatabējai apóstolevi.

<sup>12</sup> Itsiata baitsi jane Pedro pitsapalia bovecua. Nexata cujinaejinalia Jesús petē-paenē pebuatsiibovajutsijavabelia. Nexata Pedro bajarapaibovajualia itsa naēco- lia, taeyejeba pebobenaejava bajarajota daxitanēreca Jesús mataquionaeya pemata- cacēbipanamitsireca. Nexata baja Pedro naviata boyaberena. Najamatabēxaina ba- jarapacue yabara.

**Pacuenia Jesús petēpaecujinae icatsia itsa asaē, pijajivitonēbeje  
pēcaxitajarabaxuaba, Emaús tomarabelia peponaenēbeje, yabara pelivaisi**

*(Mr 16.12-13)*

<sup>13</sup> Pamatacabi bajarapapetiriavi tane ángelnēbeje, bajarapamatacabi Jesús pija- jivitonēbeje Jerusalén tomaravelia naropotabeje. Ponabeje Emaús tomarabelia. Ba- jarapatomara eca once pakilómetrobeje Jerusalén tomaravecua. <sup>14</sup> Bajaraponēbeje baracuaicuajaiibeje tsanajetaruae daxita pacuene copiapata. <sup>15</sup> Itsa abaxē bajara- palivaisi cuaicuajai tsanucaponaebje, Jesús pēcaxitajarabalia. Nexata Jesús mux- unenianajetarua bajaraponēbeje. <sup>16</sup> Bajaraponēbeje tae atabeje Jesús, itsiata apo yapētaebje Jesúsucue. <sup>17</sup> Nexata Jesús yanijoba bajaraponēbejevavelia. Jesús jumaisi:

—¿Detsa pitsicuene pabaracuaicuajiamēbeje tsanucaponae namutua? ¿Detsa xu- ajitsia bepajamatabēcuenejibimēbeje? jai Jesús bajaraponēbejevavelia.

<sup>18</sup> Bajaraponēbeje itsanē pevēnē Cleofas. Nexata Cleofas jumaisi Jesúsjavavelia:

—Daxitajivi baja cajena yapētane pacuene copiapata Jerusalén tomarata mapa- matacabitaje. ¿Xamē tsaja caenēmē apo nijanayapētae bajarapacue, naponaponae atamē bajarapatomarata? jai Cleofas caranata Jesúsjavavelia.

<sup>19</sup> Nexata Jesús jumaisi bajaraponēbejevavelia:

—¿Detsa pitsicuene copiapata? jai.

Nexata icatsia bajaraponēbeje jumaisi Jesúsjavavelia:

—Jesúspijnē raja, Nazaret tomarapijnēmi, profetanēmi. Piniijicuene exanapona Dioso pesaēta. Bitso xaniavaetsia jivi pexanialivaisi tsipaebapona. Nexata daxita- jivi sivajamatabēcuenebarēya bajaraponēmi. Dioso ata sivajamatabēcuenebarēy- atsi. <sup>20</sup> Nexata sacerdotevi penamatacaitorobivi, vajanacaevetsivi yajava, cana- jetatsi Jesúspijnēmi. Canajetaxuabatsi Jesúspijnē cruzajavavelia pecobematabi- abarutsinexatsi pebeyaxuabinexatsi. <sup>21</sup> Paxanē picani bajaraponēmi yabara pa- jamatabējumaisinē: “Bajaraponē nacavecuacapitsapaena itsanacuaverena pepat- sivi, pamonaē apo judíoivi, vajanacayanacuaevetsijavavecua pepitsapaenexa,” pa- jamatabējanē tsavanapae picani Jesúspijnē yabara. Nexata Jesúspijnē pebeyaxu- abicujinaetsi, ajena baja xaina acueyabi pamatacabibeje. <sup>22</sup> Paxanējajuvēnēvi, pe- tiriavi, ajena, bajayacunua, panenabenajacaeyaexana. Bajarapamonae bajayacunua, ajena juameto pitsapaina, ponalia Jesús petēpaenē pebuatsiibovajutsijavavelia. <sup>23</sup> It- siata apo caxitajarababuatsi bajarajota Jesús petēpaenē. Nexata bajarapapetiri- avi naviabarena. Bajarapamonae panetsipaeba pacuenia bemajitsinaebota tane án- gelnēbeje. Angelnēbeje pina nexata jumaisibeje petiriavijavavelia: “Jesús rabaja asaē tsaponaponae icatsia,” jai pina. <sup>24</sup> Nexata itsamonae paxanējuvēnēvi pona

Jesús petëpaenë pebuatsiibovajutsijavabelia. Nexata tane pacuenia baja petiriavi panetsipaeaba. Jesús itsiata petëpaenë apo taeyabuatsi, jaiibeje Jesúsjavabelia Emaús tomarabelia peponaenëbeje.

<sup>25</sup> Nexata Jesús jumaitsi bajaraponëbejejavabelia:

—¡Paxamëbeje saya paneajamatabëcuenetajanëbeje! Apo pajumecovënësimëbeje daxita profetavi peyaquinaelivaisianë. <sup>26</sup> Nexata apo payapëtaemëbeje pacuenia Cristo, Dioso athëbëvetsica pitorobinëtsitsica jivi pecapanepaenexa, copiaya bitso bejiobiaexanaejitsiatsi peponaevajënaeya paxa Diosojavabetsia athëbëtatsia paxa pemuxuneneta peecaenexa, nayabarajai Jesús bajaraponëbejejavabelia.

<sup>27</sup> Nexata Jesús xaniavaetsia navajunupaeba bajaraponëbejejavabelia daxita pacuenia Dioso pejumelivaisibaxutota tajëvelia jumaitsi Jesús yabara. Taxuxuaba jane baja penavajunupaebijava pacuenia Moisésipijinë peyaquinaebaxutota tajëvelia jumaitsi Jesús yabara. Bajaraxuacujinae icatsia navajunupaeba pacuenia daxita it-saprofetavi peyaquinaebaxutonëta ata jumaitsi Jesús yabara.

<sup>28</sup> Itsa baja imoxoyotanajetarubena patomarata bajaraponëbeje patsijitsiabeje, Jesús itajara rovia bepeponaiejitsia bajaraponëbejevecua. <sup>29</sup> Nexata bajaraponëbeje bitso asivabeje Jesús penajuamajitsinexa bajarapatomarata. Jumaitsiabeje bajaronëbeje Jesúsjavabelia:

—Namajire abaxë mapatomarataje. Caniviyo rabaja bitso. Meravijitsia rabaja, jaiibeje bajaraponëbeje Jesúsjavabelia.

Nexata baja Jesús najoneya pabota bajaraponëbeje patabeje. <sup>30</sup> Itsa bajaronëbeje yajavaecabeje mesa muxuneneta, Jesús pita panbë. Jumaitsi paxa Diosojavabelia:

—Pexaniacuene panetoexaname. Panerajutame pan, jai Jesús.

Bajaraxuacujinae epatsënëquejeba panbë. Rajutatsi bajaraponëbeje. <sup>31</sup> Bajarajota matapania bajaraponëbeje yapëtanebeje Jesúscuene. Itsiata baitsi jane bajarajota vecuacaevatsibeje Jesús. Apo taebeje baja matavëjëa.

<sup>32</sup> Nexata bajaraponëbeje najumaitsiabeje:

—Namutua vajanacavajunu paebanucaponaejavatabeje pacuenia jumaitsi Diosojumelivaisibaxutota, bitso muxunajamatabëcuenëbarëyatsibeje, najaiibeje bajaraponëbeje.

<sup>33</sup> Nexata bajarajota bepijia naropotabeje Emaús tomaravecua. Naviatabeje baja Jerusalén tomarabelia. Nexata Jerusalén tomarabelia itsa patabeje, caxitajarababeje penacaetuatsijavata once ponëbeje apóstolevi, itsamonae yajava Jesús pijajivi.

<sup>34</sup> Nexata penacaetuatsivi jumaitsi bajaraponëbejejavabelia:

—Xaniajai baja cajena. Vajatuxanenë icatsia asaë tsaponapona. Simón baja tsi-tanaitajëtatsi, jai bajarapamonae.

<sup>35</sup> Nexata ponëbeje Emaús tomaraverena patabeje, tsipaebabeje bajarapamonaejavabelia pacuenia namutoepatualia pëcaxinatsibeje Jesús. Tsipaebabejenua pacuenia matapania yapëtanebeje Jesúscuene, pitabëta itsa epatsënëquejeba panbë.

**Pacuenia Jesús petëpaecujinae tsitanaitajëta pijajivijavabelia yabara pelivaisi**

(Mt 28.16-20; Mr 16.14-18; Jn 20.19-23)

<sup>36</sup> Ponëbeje Emaús tomaraverena patabeje, tsipaebabeje Jesús pijajivijavabelia pacuenia tanebeje Jesús Emaús tomaratalia. Nexata bajarapaepatota Jesús tsi-



tanaitajëta pijajivijavabelia. Jesús jemata nuca pijajivi tuatuajëta. Jesús bajacoba pijajivi.

<sup>37</sup> Nexata Jesús pijajivi bitso nabenajaca.

—Petëpaenëmi raeta pejumape maje, jamatabëjai bajarapamonae Jesús yabara.

<sup>38</sup> Nexata Jesús jumaitsi pijajivijavabelia:

—¿Detsa xuajitsia pajunavame? ¿Detsa xuajitsia panejamatabëëthëtota pajumeae-bame icatsia tasaëjava? <sup>39</sup> Panecobetaema. Tataxubeje ata pataema. Xanë rabaja maje. Panejayabare. Paneyorobarenuua xaniavaetsia. Petëpaenëmi raja peneta pejumape avijibi. Asijibinua. Apo perabëitsi cajena pacuenia xanë perabëitsinë, jai Jesús pijajivijavabelia.

<sup>40</sup> Jesús itsa jumaitsi mapacueniaje, nacobeitajëta pijajivijavabelia. Nataxuitajëta yajava. <sup>41</sup> Jesús pijajivi bitso tsitapexaniacuenetsi. Itsiata baitsi jane Jesús pijajivi abaxë apo jumexaniatae xaniavaetsia Jesús cuene. Jesús nexata jumaitsi pijajivijavabelia:

—¿Paxainame tsabaja itsacueniejavayo patanerajutsinexamë taxaenexa? jai Jesús.

<sup>42</sup> Nexata Jesús pijajivi rajutatsi pesebidujuaijavayo, jabëperiyo yajava. <sup>43</sup> Pita baja Jesús. Nexata Jesús pijajivi pitabarata xane. <sup>44</sup> Nexata Jesús jumaitsi pijajivijavabelia:

—Mapacuenene taneexanaejavanexa yabaraje, pacatsipaebabiabatsi baja cajena tajëvelia pamatacabi abaxë pacayajavaponaponatsi. “Pacuenia bajayata tajëvelia xanë yabara jumaitsi Moiséspijinë peyaquinaebaxutota, Diosojumepaebivimi profetavi peyaquinaebaxutota ata, Salmosvënëbaxutota ata, bajarapacuenia netocopiapatsiana,” pacajaitsi tsabiabi baja cajena pamatacabi abaxë pacayajavaponaponatsi. Daxita rabaja bajarapacuenia netocopiapata jane baja, jai Jesús pijajivijavabelia.

<sup>45</sup> Nexata Jesús pijajivi jamatabëcuenecaëjëpaeyaexana Jesús pijajivi xaniavaetsia pejumeyapëtaenexa pacuenia Dioso pejumelivaisibaxutota tajëvelia jumaitsi Jesús yabara. <sup>46</sup> Jesús jumaitsi pijajivijavabelia mapacueniaje:

—Dioso pejumelivaisibaxutota tajëvelia jumaitsi pacuenia xanë, Cristonë, athëbëvetsica Dioso taneitorobinëtsica jivi tacapanepaenexa, nebejiobitsiaya nebeyaxuabijitsia. Jumaitsinua pacuenia tatëpaecujinae, acueyabi matacabita, icatsia Dioso niasaëyaexanaejitsia tatëpaejavavecua. <sup>47</sup> Jumaitsinua pacuenia patajajivimë tajumelivaisi patsipaebaponaejitsiamë daxitajivijavabelia. Nexata tajumelivaisi patsipaebaponaenename daxitajivi penajamatabëcuenepëñëyorotsinexa Diosojavabelia, pibisiacuenia pexanaeconimi pevecuajibiaexanaenexatsi Dioso. Copi-aya Jerusalén tomarata pataxuxuabianame panetsipaebijava. Bajaraxuacujinae patsipaebanajetarubenaenename daxitanacuanëjava. <sup>48</sup> Paxamë rabaja pataneme daxita pacuene netocopiapata. Nexata jivi patsipaebaponaenename daxita bajarapacuenia yabara. <sup>49</sup> Espiritu Santo, ponë taxa Dioso najumecapanepaeya pacarajutsiapaeba, pacatoitorobianicatsi papecatsijamatabëjonexa. Abaxë pajinavanapaenename majotaje Jerusalén tomarata. Matapania Dioso athëbëvetsica pacajamatabëcuenecaëjëpaeyaexanaena pinijicuene paneexanaponaenexa, paponanename jane baja tajumelivaisi jivi panetsipaebanajetarubenaenexa daxitanacuanëjava, jai Jesús pijajivijavabelia.

**Pacuenia Jesús petëpaecujinae icatsia itsa asaë,  
tsia baja athëbëabetsia yabara pelivaisi**

*(Mr 16.19-20)*

<sup>50</sup> Jesús pijajivi matalalia Betania tomarabelia. Jesús nacobeyotsiaya pijajivi to-  
vajëcanuca Diosojavabelia Jesús pijajivi peyavenonaenexatsi Dioso. <sup>51</sup> Nexata saya  
bajarajota Jesús pijajivi athëbëabetsia baja vecuapona. Jesús baja Dioso caponatsi  
athëbëabetsia.

<sup>52</sup> Jesús pijajivi jamatabëjumaitsi:

—¡Vajatuxanenë bitso ayaijamatabëcuenenë! jamatabëjai.

Bajaraxuacujinae Jesús pijajivi barëyaya naviaba Jerusalén tomarabelia. <sup>53</sup> Tem-  
plobojavabelia Jesús pijajivi joneyabiaba pevajëcabiabinexa Diosojavabelia. Jesús  
pijajivi pexaniajamatabëcuene rajutabiaba Diosojavabelia.

## Pexanialivaisi Jesucristo pelivaisi, San Juan peyaquinaelivaisi

### Pacuenia vaxaitsi banaexanatsi mapanacuataje, bajarapacuenia Cristo penaexanaejava mapanacuataje paxa Dioso pejamatabëcuenelivaisi itajëtsinexa yabara pelivaisi

**1** Itsa abaxë ajibi itsacuenejavayo ata mapanacuataje, Cristo baja cajena ponapona athëbëtatsia. Cristo raja paxa Dioso pejamatabëcuenelivaisiitajëtsinë jivijavabelia. Cristobeje paxa Diosobeje najuaponaponabeje. Cristo ata rabaja Dioso baja cajena. <sup>2</sup> Daxitacuene baja cajena pexanaejava petaxuxuabivajënaeya ata, Cristobeje paxa Diosobeje najuaponaponabeje. <sup>3</sup> Cristo baja cajena daxitacuene mapanacuapijicueneje exana. Exana athëbëpijicuene ata. Bajarapacuenia exanaeyaexanatsi paxa Dioso. Bajaraxuata itsacuenejavayo ata apo vecuaexanaetsi itsanë ata. <sup>4</sup> Cristo baja cajena rajuta piasaëjumali daxitacueneviria mapanacuataje. Cristo baja cajena bepecotia picani. Nexata jivi jamatabëcueneitayota pexaniajailivaisita. <sup>5</sup> Pacuenia pecotia itayota piaitaquirijavata, bajarapacuenia Cristo petsipaebilivaisita jivi jamatabëcueneitayota. Nexata dovathi, jivi piagamatabëcuene itaquiriyaexanaenë, apo caëjëpaetsi pevereverecaeyaexanaenexa bajarapalivaisi.

<sup>6</sup> Nexata Dioso itoroba caenë pebi. Bajaraponë pevënë Juan. <sup>7</sup> Nexata Juan pona petsipaebinxaxa jivijavabelia Cristo pelivaisi. Nexata Juan tsipaeba daxitajivi pejumetaenexa Cristo pelivaisi, pejumecovënëtsinexanua. <sup>8</sup> Juan raja jivi apo pejamatabëcueneitayotsinë. Juan raja pona saya jivi petsipaebanajetarucaenexa xaniavaetsia Cristo pelivaisi. <sup>9</sup> Bajaraponë Cristo jamatabëcueneitayotsiana daxitajivi. Bajaraponë xaniajai jivi pejamatabëcueneitayotsinë. Bajaraponë Cristo patsica baja mapanacuayabetsicaje.

<sup>10</sup> Cristo, ponë paxa Dioso jamatabëcuenelivaisiitajëta jivijavabelia, ponapona baja mapanacuataje. Itsiata baitsi jane mapanacuapijivi apo yapëtae bajaraponë mapanacua pexanaenëcueneje. <sup>11</sup> Cristo patsica pexanaenacuayabetsica. Itsiata baitsi jane mapanacuapijivi apo jumecovënëtsitsi Dioso pexënatocuene. <sup>12</sup> Itsiata itsamonae jumecovënëtatsi. Nexata Cristo tocopata bajarapamonae paxa Dioso pexi pexanaenexatsi. <sup>13</sup> Bajarapamonae penaexanaematacabi, abaxë Dioso pexicuenia apo taetsi. Pebi petiriva pepitsicujinae, pexi itsa jamatabëxainabeje, pexi xainabeje. Itsiata bajarapamonae itsa naexana, abaxë Dioso apo pexi. Matapania pacuenia Dioso tojitsipatsi, bajarapamonae itsa jumecovënëta Cristo Dioso pexënatocuene, Dioso pexi exanatsi.

<sup>14</sup> Cristo, paxa Dioso pejamatabëcuenelivaisi itajëtsinënexa jivijavabelia, itsa patsica mapanacuayabetsicaje, naexana pacuenia vaxaitsi baexanatsi mapanacuataje. Nexata bajarapacuenia Cristo ponapona vaxaitsi tuatuajëta. Bajaraponë vënërubatsi Jesús. Paxanë payapëtaniji Cristo ayaijamatabëcuenenëcuene. Tspaji pataniji pinijicuene pexanaejavanë. Bajaraponë Cristo, pepo caenë Dioso pexënato. Pinijicuenia asiva mapanacuapijivije. Cuaicuaijai ëpexaniajailivaisi. <sup>15</sup> Bajaraxuata Juan, Jesús itsa vajunupaebanajetaruca jivijavabelia, jumai tsanajetaruca mapacueniaje:

—Baja rajane maponë yabara pacajumaitsitsije: “Ponë tacovëverena patsiana, bajaraponë bitso xanë nevecuaayaijamatabëcuenenë. Tspaji baja cajena tanaexanae-

vajënaeya ata bajaraponë ponapona,” jai tsanajetaruae Juan jivijavabelia Jesús yabara.

<sup>16</sup> Bajaraponë Jesús cajena pepo pexaniajamatabëcuenenë. Pexaniacue ne naca-toexanabiaba. Nacayavenonabiaba. <sup>17</sup> Bajayatami baja cajena picani Dioso Moiséspijinëta najumecopata jivi pejumecovënëtsinexa. Itsiata baitsi jane mapamat-acabita Jesucristo patajopaica mapanacuayabetsicaje vajanacatsipaebinexa paxa Dioso vajanacaasivajava, vajanacatsipaebinexanua pexaniajailivaisi. <sup>18</sup> Itsajivi ata vaxaitsiyajuvënëjivi Dioso apo tae. Bajaraxuata apo yapëtaetsi pacuenia Dioso jamatabëcuenelivaisiitsi. Itsiata caenë Dioso pexë nato, ponëbeje najuaponaponabeje, bajaraponë nacayapëtaeyaexanaica pacuenia jamatabëcuenelivaisiitsi paxa Dioso.

**Pacuenia Juan jivibautisabinë Jesucristo pelivaisi xaniavaetsia tsipaebanajetaruca jivijavabelia yabara pelivaisi**

*(Mt 3.11-12; Mr 1.7-8; Lc 3.15-17)*

<sup>19</sup> Judíovi, Jerusalén tomarapijivi, Juanjavabelia itoroba sacerdotevi, itsamona e templobo pevetsivi yajava, bajarapamonae peyanijobinexa Juanjavabelia. Nexata bajarapamonae itsa pata Juanjavabelia, yanijoba Juanjavabelia. Jumaitsi:

—¿Jipatsamë xamë? ¿Xamë tsaja Dioso pecaitapetsinë? jai bajarapamonae Juanjavabelia.

<sup>20</sup> Juan nexata bajarapamonaejavabelia xaniavaetsia roviaia navajunupaeba. Jumaitsi:

—Xanë ra apo Cristonë, ponë Dioso athëbëvetsica itorobijitsiatsica jivi peca-panepaenexa, jai Juan.

<sup>21</sup> Nexata icatsia matavëjëa yanijobatsi.

—¿Detsa nexata ponëmë? ¿Xamë tsaja profeta Elíaspijinëmë, ponëmi bajayata ponapona? jai bajarapamonae Juanjavabelia.

Nexata Juan jumaitsi:

—Jume raja. Xanë raja bajara apo ponënë, jai Juan.

Nexata icatsia yanijobatsi matavëjëa.

—¿Xamë tsabaja nexata profetanëmë? ¿Xamë tsabaja pacacopiaevetavanapatsi nepatsijavanexatsica? jai bajarapamonae Juanjavabelia.

Nexata icatsia Juan jumaitsi:

—Jume raja. Xanë raja apo bajaraponënë, jai.

<sup>22</sup> Nexata bajarapamonae jumaitsi:

—¿Detsa nexata ponëmë? Pajitsipajë patanenavajunupaebinexamë xaniavaetsia patayapëtaenexa ponëcuenëmë patatsipaebinexa patanitorobivijavabelia. ¿Detsa nexata pacuenia navajunupaebianame? jai bajarapamonae Juanjavabelia.

<sup>23</sup> Juan nexata jumaitsi bajarapamonaejavabelia:

—Xanë raja saya petusato nacuata itsa jumelivaisipaebajë, tavavajainë: “Panajamatabëcuenexaniavaere pepo petuxanenë pepatsivajënaeyarena,” tajainë. Bajara-pacuenia tajumaitsijavanexa, bajayatami tajëvelia yaquina profeta Isafaspijinë, jai Juan.

<sup>24</sup> Nexata fariseovi pitorobivitsi icatsia yanijobatsi Juan.

<sup>25</sup> —Itsa xamë apo Cristomë, apo Elíaspijinëmëna, apo profetanëmëna, ponë pacopiaevetavanapajë pepatsijavanexatsica, ¿detsa nexata xuajitsia xamë jivi bautisabapona? jaitsi bajarapamonae.

<sup>26</sup> Juan nexata jumaitsi:

—Xanë saya bautisabaponajë ëmerata. Itsiata paxamë tuatujëta ponapona ponë apo payapëtaemë. <sup>27</sup> Bajaraponë tacovëverena jane baja pata. Itsiata xanë bajaraponëvecua beveliajamatabëcuenenënë. Nexata acobeuranë tatoisinaenexa ata pijazapatomaëto tataxujonotsinexa pijazapato, jai Juan bajarapamonaejavabelia Jesús yabara.

<sup>28</sup> Bajarapacuenia Juan yanijobatsi Jordánmene itsapanatalia, Betaniavënë tomarajavata, Juan jivi itsa bautisabaponapona.

### **Pacuenia Jesús beovejayo tanetsi yabara pelivaisi**

<sup>29</sup> Fariseovi pijajivi Juan peyanijobicujinaetsi peyapëtaenexatsi ponëcuene, meravia pitsijavata, Juan taetaba Jesús penajetarucaejava Juanjavaberena. Nexata Juan jumaitsi jivijavabelia:

—Pataema, mara ponëje, Dioso athëbëvetsica pitorobinëtsitsicaje. Bajaraponë Dioso bepijaovejayo tsane. Pacuenia jivi ovejajo babeyaxuaba pevi ofrendacuenia perajutsinexa Diosojavabelia, bajara itsanetsi maponëje. Nacaevetsiana pebeyaxuabinevatsi. Nexata bajarapacuenia matamotsiana daxita nacuanëpijivi pibisiacuene pexanaeneconimi. <sup>30</sup> Baja rajane maponë yabara itsa pacatsipaebatsi, pacajumaitsi tsabiabi mapacueniaje: “Tacovëverena patsiana itsanë. Bajaraponë nevecuaayajamatabëcuenenënë bitso. Tsiapaji baja cajena tanaexanaevajënaeya ata, bajaraponë ponapona,” pacajaitsi tsabiabi. <sup>31</sup> Apo yapëtaenë picani bajaraponë. Itsiata apo yapëtae atanë, pacabautisabanajetarucatsi merata paIsrael nacuapijivimë. Ponë yabara pacatsipaebatsi, bajara jane maponë najetarucaje, jai Juan jivijavabelia Jesús penajetarucajavata.

<sup>32</sup> Icatsia Juan jumaitsi jivijavabelia Jesús yabara:

—Xanë taniji Espíritu Santo perunaejavatsica athëbëvetsica beucucuto. Nexata tsiatanacopatsicatsi bajaraponë. <sup>33</sup> Xanë abaxë itsiata apo yapëtaenë bajaraponë Cristocuene. Itsiata Dioso, taneitorobinë merata jivi tabautisabaponaeenexa, nejumaitsi baja cajena copiata: “Papebi pematatsënëtsica taename Espíritu Santo perunaejavatsitsica petsijamatabëcaenexatsi, bajaraponë jane baja jivi tsijamatabëjoneyaexanaena Espíritu Santo,” nejai baja cajena copiata Dioso. <sup>34</sup> Pacuenia baja cajena taniji, pacatsipaebatsi. Bajaraponë baja cajena Dioso pexënato, jai Juan jivijavabelia Jesús yabara.

### **Pamonae copiaya Jesús yajavaponapona yabara pelivaisi**

<sup>35</sup> Juan jivijavabelia petsipaebicujinae Jesús Dioso pexënatocuene, meravia pitsijavata, Juan yajavaponapona anijanëbeje pijajivitonëbeje. <sup>36</sup> Itsa Juan tane Jesús pexenetanajetarucajavatsi, nexata Juan jumaitsi pijajivitonëbejejavabelia:

—Pataemabeje. Mara ponë najetarucaje, Dioso bepijaovejajo tsane, jai Juan pijajivitonëbejejavabelia Jesús pebeyaxuabijavanexatsi yabara, tsiapaji Jesús tocopia-patsijitsiatsi pacuenia Dioso tocopatatsi.

<sup>37</sup> Nexata Juan pijajivitonëbeje itsa jumetanebeje bajarapacuenia Juan pejumait-sijava, Juan pijajivitonëmibeje pënaponabeje Jesús. <sup>38</sup> Jesús napënyorotojopa. Taenucajopa. Yanijoba bajaraponëbejejavabelia.

—¿Detsa xua pajaitamebeje? jai Jesús.

Nexata bajaraponëbeje jumaitsiibeje:

—Petuxanenë, ¿detsa jota ecame? jaibeje Jesúsjavabelia.

<sup>39</sup> Jesús nexata jumaitsi bajaraponëbejejavabelia:

—Naxanitsia. Panataenamebeje itsajota ponaponajë, jai Jesús.

Nexata bajaraponëbeje naponabeje baja Jesús pepëta caniviyoepatota. Nexata baja tanebeje itsajota ponapona Jesús. Nexata bajarapamatacabi nayacaniyobeje tsaponapona Jesúsjavata.

<sup>40</sup> Bajaraponëbejeyajuvënëë itsanë pevënë Andrés. Andrés raja Simón Pedro peyujapijnë. <sup>41</sup> Andrés nexata bepíjia pona pematapijnë Simón pejaitsinexa. Itsa baja Andrés pematapijnë caxitajaraba, jumaitsi pematapijnëjavabelia:

—Pacaxitajarabajë rabaja Mesías, jai Andrés pematapijnëjavabelia.

Bajarapamonae pijajumeta: “Mesías,” itsa jai, mapajumetaje pejumaitsjume: “Cristo, ponë athëbëvetsica Dioso itorobijitsiatsica jivi pecapanepaenexa,” pejaijume.

<sup>42</sup> Nexata Andrés barëlia pematapijnë Simón Jesúsjavabelia. Itsa Jesús tane Simón, nexata Jesús jumaitsi Simónjavabelia:

—Simón, xamë raja Jonás pexënatomë. Cavënërubianatsi Cefas, jai Jesús Simónjavabelia.

“Cefas,” itsa jai, bajarapamonae pijajumeta mapajumetaje pejumaitsjume: “Pedro,” pejaijume.

### **Pacuenia Jesús junata Felipebeje Natanaelbeje Jesús pijajivitonëbejenexa yabara pelivaisi**

<sup>43</sup> Jesús baja ponaejitsia Galilea nacuyabelia. Jesús nexata peponaevajënae, caxitajarabaxuaba Felipe. Nexata Jesús jumaitsi Felipejavabelia:

—Nepënaponaename, jai Jesús.

<sup>44</sup> Bajaraponë Felipe Betsaida tomarapijnë. Andrésbeje Pedrobeje ata Betsaida tomarapijnëbeje. <sup>45</sup> Felipe nexata pona pejaitsinexa Natanael. Itsa baja Felipe caxitajaraba, jumaitsi Natanaeljavabelia:

—Pacaxitajarabajë rabaja ponë pelivaisi bajayatami tajëvelia Moiséspijinë yaquina. Dioso penajumecopatsilivaisi jivi pejumecovënëtsinexa bajayata Moiséspijinë itsa yaquina, yaquinanua bajaraponë ata pelivaisi. Bajaraponë pelivaisi bajayata profetavi ata tajëvelia yaquina. Bajaraponë Jesús Nazaret tomarapijnë, Josépijinë pexënató, jai Felipe Natanaeljavabelia.

<sup>46</sup> Nexata Natanael jumaitsi:

—Itsanë ata cajena pexaniajamatabëcuenenë Nazaret tomarata apo ponapona, jai Natanael.

Felipe nexata jumaitsi Natanaeljavabelia:

—Naxanitsia. Nataename jane, jai Felipe.

<sup>47</sup> Jesús itsa tane Natanael pecujitanajetaruaejavatsi, nexata Jesús Natanael yabara jumaitsi pijajivijavabelia:

—Mara ponë najetaruaaje, Israelpijnë pemomo, Dioso pitabarata xaniavaetsia peponaponaenë. Apo peyamaxëitojorobinë itsajivi ata, jai Jesús pijajivijavabelia Natanael yabara.

<sup>48</sup> Nexata Natanael jumaitsi Jesúsjavabelia:

—¿Detsa pacuenia nejamatabëcueneyapëtaneme? jai Natanael.

Nexata Jesús jumaitsi Natanaeljavabelia:

—Felipe cajena pecajunatsivajënaeya, catanetsi neecaejava higueranae bëxëpanata. Nexata cajamatabëcueneyapëtanetsi, jai Jesús.

<sup>49</sup> Natanael nexata jumaitsi Jesúsjavabelia:

—Petuxanenë, xamë rabaja Dioso pexënatomë. Israelnacia pepo nevetsinë, jai Natanael Jesúsjavabelia.

<sup>50</sup> Jesús nexata jumaitsi:

—“Catanetsi cajena neecaejava higueranae bëxëpanata,” tacajaixae, jamatabëjumaitsimë xanë yabara: “Maponëje Dioso cajena pexënato,” jamatabëjamë. Xamë taename bajarapacue ne matatoxenetsia Dioso pesaëta pinijicue taexanaejavanë, jivi apo pexanaecapanepaejavanë. Nexata bajaraxuanë taexanaejava itsa taename, pepacue jane baja neyapëtaename Dioso pexënatocuenenë, jai Jesús Natanaeljavabelia.

<sup>51</sup> Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pataename itaboxo penapatsijava. Pataenamenua Dioso pijaängelevi pejunaejavatsia athëbëabetsia. Pataenamenua perunaejavatsica ata xanëjavabetsica, Daxitajivi Pematapijinënëjavabetsica, jai Jesús pijajivijavabelia.

### **Pacuenia Jesús exana Caná tomarata pamatacabi Caná tomarapijinë nacasaba yabara pelivaisi**

**2** Jesús pebarëcuaiquaijaicujinae Natanael, acueyabi pamatacabibejecujinae, Caná tomarapijinë exana penacasabifiestanexa. Galilea nacuada eca Canátomara. Jesús pena naponapona fiesta pexanaejavata. <sup>2</sup>Nexata Jesús pijajivi nabarëjunatatsi penacasabifiestajavabelia. Jesús nexata pijajivi nabarëpata penacasabifiestajavabelia. <sup>3</sup>Fiesta pexanaenë itsa baja tovereverecatsi vinora, Jesús pena jumaitsi:

—Vinora rabaja tovereverecatsi, jai pexënatojavabelia.

<sup>4</sup> Jesús nexata jumaitsi penajavabelia:

—Ena, ¿detsa xuajitsia netsipaebame bajarapacue? Abaxë raja apo netocopiapatsi paepatota exanaejitsianë bajaraxua, jai Jesús penajavabelia.

<sup>5</sup> Nexata Jesús pena jumaitsi mesa pevetsivijavabelia:

—Daxita pacuenia taxënato aeconoxae pacaitorobiana, paexanaename, jai.

<sup>6</sup> Nexata bajarajota nubena seis pacanalitobeje, ibocanalitonë. Caecanalitota mera caëjëpapona bejamatabëcuene quince pagalónbeje. Nexata bajarapacanalitonëta peyaenaemeranëta, judíovi pijacuenia anijatonë xaniavaetsia nacobequiatabiaba penabanivajënae. <sup>7</sup> Jesús nexata jumaitsi mesa pevetsivijavabelia:

—Pavënbare mera mapacanalitonë nubenaje, jai Jesús.

Nexata mesa pevetsivi xaniavaetsia mera vënëba bajarapacanalitonë. Piupiyoro-toxijava copabapona.

<sup>8</sup> Nexata Jesús jumaitsi bajarapamonaejavabelia:

—Papuare tsiquirirayo. Patocaponaremelia fiesta pevetsinë pepajaninexa, jai Jesús.

Nexata baja mesa pevetsivi tocaponalia. <sup>9</sup> Nexata jane baja fiesta pevetsinë pajane bajarapora, merami pexanaevinora. Bajaraponë abaxë apo yapëtae itsaverena capitsapa bajarapavinora. Itsiata mesa pevetsivi yapëtane mera pevënbëbixae bajarapacanalitonëta. Pepajanicujinae vinora, fiesta pevetsinë ju-

nata fiesta pexanaenë, ponë pejananacasabinë. <sup>10</sup>Nexata fiesta pevetsinë jumaitsi pejananacasabinëjavabelia:

—Mapavinoraje bitso xanepana. Daxita pamonae fiesta pexanaevi, copiaya batsanaeyaexana pexaniavinora. Nexata baja fiesta pexanaenë pejunatsivi itsa apa ayaijava, cotocaevi batsanaeyaexana bevelia penamatamotsivinoranë. Tspajji baja ayaijava piapaexae, cotocaevi apae ata beveliara, apo yapëtae beveliaracuene. Itsiata baitsi jane xamë bajarapacuenia apo exanaemë. Evetame abaxë cotocaevi patanerajutsinexamë pexaniavinora, jai fiesta pevetsinë pejananacasabinëjavabelia.

<sup>11</sup>Bajarapapinijiuene Dioso pesaëta Jesús exana Caná tomarata. Canátomara era Galilea nacuata. Caná tomarata Jesús jane baja taxuxuaba Dioso pesaëta pinijicuene pejanaponaevajava. Bajarajota jane baja Jesús najamatabëcueneitajëta Dioso pesaëta ayaicuene pexanaevajava pecaëjëpaenëcuenetsi. Nexata pijajivi orijibia sivanamatabëcuene copabaponatsi. Jesús pijajivi jamatabëjumaitsi:

—Xaniajai rabaja. Pepacuene Cristo, ponë copiaevetavanapatsi pepatsijavatsica vajanacacapanepaenexa, jamatabëjai.

<sup>12</sup>Bajaraxuacujinae Jesús baja pona Capernaum tomarabelia. Yajavapona pena, pejuyapijivina, pijajivina. Capernaum tomarata caematacabibeje jinavanapa.

**Pacuenia Jesús Jerusalén tomarata templobovecua  
pitsapaeyaexana pecanajetsivi, pecomuacaevinua, yabara pelivaisi**

*(Mt 21.12-13; Mr 11.15-18; Lc 19.45-46)*

<sup>13</sup>Judíovi baja pijafiesta pexanaenexa, toimoxoyotsi pascuavënëfiesta. Bajaraxuata Jesús pona Jerusalén tomarabelia. <sup>14</sup>Nexata Jerusalén tomarata, templobota, Jesús caxitajarabaxuaba pecanajetanubenaevi baca, oveja ata, ucucu ata. Tane palata pecambiabenaevinua. <sup>15</sup>Jesús itsa tane bajarapacuene, nexata quiobataba peyorotsimacanexa. Nexata Jesús daxitajivibitsaëto capitsaparena temploboënëverena. Bajarapamonae pijaoveja yajava, pijabaca yajava, Jesús capitsaparena. Nexata palata pecambiabenaevi pijapalata irabelia tocayabajaraba. Pijamesaxi ata topënëyorobajaraba. <sup>16</sup>Nexata ucucu pecanajetanubenaevijavabelia Jesús jumaitsi:

—Mapaucuje pacapitsaparemelia. ¡Pëtsa pacanajetame mapaboënëtaje, taxajavabelia jivi penavajëcaebota! jai Jesús.

<sup>17</sup>Nexata Jesús pijajivi itsa jumetane bajarapacuenia Jesús pejumaitsiyava, jume-najamatabënapita pacuenia Dioso pejumelivaisibaxutota jumaitsi. Bajarapacuenia Jesús pejanaponaevajanexa yabara, tajëvelia Dioso pejumelivaisibaxutota jumaitsi mapacueniaje: “Neyabarabeyaxuabijitsia ata tsane, jitsipajë Dioso pijabo petoyaiataejavatsi,” jai Dioso pejumelivaisibaxutota.

<sup>18</sup>Nexata judíovi itsa tane Jesús jivi pecapitsapaejava temploboënëverena, judíovi jumaitsi Jesúsjavabelia:

—¿Dioso tsaja caitoroba nejutsinexa bajarapamonae temploboënëvecua? Itsa caitoroba Dioso bajarapacuenia nexanaenexa, nexata pinijicuene ata exanare Dioso pesaëta patacayapëtaenexa Dioso pecaitorobinëcuene, jai judíovi Jesúsjavabelia.

<sup>19</sup>Nexata Jesús jumaitsi judíovijavabelia:

—Itsa paxuabimica mapatemploboje, nexata icatsia veretetsianajë acueyabi mat-acabita, nayabarajai Jesús judíovijavabelia petëpaecujinae icatsia Jesús piasaëjavanaxa yabara.



<sup>20</sup> Nexata judíovi apo jumeypätae xua yabara Jesús jumaiti. Bajaraxuata judíovi jumaiti mapacueniaje:

—Xamë acueyabi maticabita apo maticotsimë tsipae. Itsamonae baja cajena mapatemploxanetoje peveretsinexa, nacueneba cuarenta y seis pavaibeje, jai judíovi.

<sup>21</sup> Itsiata baiti jane Jesús peperabëto yabara: “Mapatemploboje,” jai saya. <sup>22</sup> Bajaraxuata icatsia Jesús itsa asaë petëpaecujinae, Jesús pijajivi jumenajamatabënapitatsi. Jesús pijajivi jumenajamatabënapitatsi tajëvelia Jesús penavajunupaebiava mapacueniaje: “Itsiata baiti jane tatëpaecujinae, acueyabi maticabita, icatsia asaënë tsane,” pejaijava, Jesús pijajivi jumenajamatabënapitatsi. Nexata Jesús pijajivi jumecovënëta pacuenia Dioso pejumelivaisibaxutota jumaiti. Jesús ata pacuenia jumaiti, jumecovënëta.

### **Pacuenia Jesús jamatabëcueneyapëtane daxitajivi yabara pelivaisi**

<sup>23</sup> Pamatacabi pascuafiesta exana, Jesús ponapona Jerusalén tomarata. Nexata Jerusalén tomarata jivi ayaibitsaëttoxaneto jumecovënëta Cristocuene. Tsipaji bajarapamonae Jesús cuenetanetsi Dioso pesaëta pinijicuene pexanaejavanë, jivi apo pexanaecapanepaejavanë. Itsiata baiti jane bajarapamonae pepacuenie xaniavaetsia apo jumecovënëtsi. <sup>24</sup> Bajaraxuata Jesús apo yajavaponaponae bajarapamonae. Tsipaji Jesús jamatabëcueneyapëtane bajarapamonae xaniavaetsia apo pejumecovënëtsijavatsi. <sup>25</sup> Jesús apo namatavenonae itsajivi petsipaebinexatsi peyapëtaenexa pacuenia jamatabëcuenetsi jivi. Tsipaji Jesús pejamatabëcueneyapëtaenë pacuenia daxitajivi jamatabëcuenetsi.

### **Pacuenia Jesús barëcuaijai Nicodemo yabara pelivaisi**

**3** Nicodemo fariseonë. Nexata catsitecaponapona fariseovi pijacuene. Nicodemo judíovi pevetsiviyajuvënë. <sup>2</sup> Nexata Nicodemo meravi pona Jesúsjavabelia. Nexata itsa pata, Jesúsjavabelia Nicodemo jumaiti:

—Petuxanenë, pacayapëtanetsi baja cajena athëbëvetsica Dioso pecaitorobinëcuenetsica patanetsipaebaponaenexamë Dioso pejumelivaisi. Itsa Dioso apo cayajavaponaponae tsipae, nexata apo exanaemë tsipae pinijicuene nexanaejavanë, xuanë baja exanapona, jai Nicodemo Jesúsjavabelia.

<sup>3</sup> Nexata Jesús jumaiti Nicodemojavabelia:

—Xaniajanë pacuenia catsipaebijitsiatsi. Pajivi Dioso pejamatabëcueneta apo naexanae tsane icatsia bepejananaexanaejiviyo, bajarapajivi Dioso apo pijajivitonë tsane, jai.

<sup>4</sup> Nexata Nicodemo jumaiti Jesúsjavabelia:

—¿Detsa jane pacuenia penaveretsijivi baja icatsia naexanaejitsipa bepejananaexanaejiviyo? ¡Apo caëjëpaetsi rabaja icatsia pejonenexa pena pecototualia penaexanaenexa icatsia bepejananaexanaejiviyo! jai Nicodemo Jesúsjavabelia.

<sup>5-6</sup> Jesús nexata jumaiti Nicodemojavabelia:

—Xaniajanë pacuenia catsipaebijitsiatsi. Pajivi pena pecototoverena naexana, yaperabëanaexana baja cajena. Pajivi pijinia Espíritu Santo pejamatabëcueneta naexana bepejananaexanaejiviyo, bajarapajivi Diosojavabelia ajamatabëcuenesaëyaexanatsi, Espíritu Santo petsijamatabëcaexaetsi. Pajivi Dioso pejamatabëcueneta jamatabënaexana icatsia bepejananaexanaejiviyo, bajarapajivi xanepana pebautisabinexatsi merata. Nexata bajarapajivi Espíritu Santo

rajutsianatsi pejanajamatabëcuene. Nexata bajarapajivi Dioso pijajivitonëcuenia evetsianatsi. <sup>7</sup>“Xamë ata baja cajena icatsia benaexaname bepejananaexanaejiviyocuenia,” tacajajava yabara, pëtsa jamatabëcuenenabenajacame. <sup>8</sup>Jovibo banajetaruca itsabelia jamatabënajetaruca. Jumetaneme saya ëpijume. Itsiata apo yapëtaemë itsaverena pona, itsabelia ata pona. Bajara pijinia pacuenia apo yapëtaemë pacuenia jivi Espíritu Santo pejamatabëcueneta naexanaeayaexanatsi bepejanaexanaejivicuenia, jai Jesús Nicodemojavabelia.

<sup>9</sup>Nexata icatsia Nicodemo jumaiti Jesúsjavabelia:

—¿Detsa pacuenia itsipae bajaraxua? jai Nicodemo.

<sup>10</sup>Jesús nexata jumaiti:

—Xamë picani Israel nacuapijivi necujarubinë. ¿Itsiata tsaja apo jumeyapëtaemë palivaisi catsipaebatsi? <sup>11</sup>Xaniajanë pacuenia catsipaebijitsiatsi. Juan jivibautisabinë. Bajaraponëbeje patayapëtaelivaisibeje, jivi patsipaebaponajëbeje. Xua pepacuenie patanijibeje, bajaraxua ata jivijavabelia patsipaebaponajëbeje. Itsiata baitsi jane patatsipaebilivaisianëbeje, apo panejumecovënëtsimë. <sup>12</sup>Catsipaebi atatsi xua Dioso exanapona mapanacuataje, itsiata apo nejumecovënëtsimë. ¿Detsa nexata pacuenia nejumecovënëtsianame itsa catsipaebianatsi xua Dioso exanapona athëbëtsatsia? jai Jesús.

<sup>13</sup>Icatsia Jesús pijacuata nayabarajumaiti Nicodemojavabelia:

—Itsajivi ata cajena apo ponae Dioso pijanacuayabetsia icatsia pepatsinexasica mapanacuayabetsicaje petsipaebinexa jivijavabelia pacuenia itsi athëbëtsatsia. Caenë, Daxitajivi Pematapijinë, caëjëpatsi jivi petsipaebinexa pacuenia itsi athëbëtsatsia. Tsipaji baja cajena bajaraponë athëbëvetsica pepatsinë. Tsipaji baja cajena athëbëtsatsia peponaponaenë. <sup>14</sup>Bajayata petusato nacuata jivi ayaibitsaëto yatëpaponajomo pesinijavatsi. Nexata bajarapaepatota Moiséspijinë jomo jumapecataeya pexanaenë, naejavata athëbëyo ruta. Nexata jomo pesinivitsi peyatëpaeviminexa, itsa taepona bajaraponë, asaë tsaponae. Bajara pijinia pacuenia, Daxitajivi Pematapijinë ata, athëbëyo rutsianatsi cruzajavabelia. Bajarapacuenia rutsianatsi cruzata petëpaenexa. <sup>15</sup>Nexata pajivi bajaraponëjavabelia sivanajamatabëcopata, apo naxuabi tsane. Bajarapajivi xainaena maticabi apo pevereverecejava, nayabarajai Jesús pijacuata Nicodemojavabelia.

### **Pacuenia Dioso exana piasivaxae mapanacuapijivije yabara pelivaisi**

<sup>16</sup>Icatsia Jesús pijacuata nayabarajumaiti Nicodemojavabelia:

—Pinijicuenia Dioso asiva mapanacuapijivije. Bajaraxuata itorobica pepo caenë pexënato mapanacuayabetsicaje mapanacuapijivije Diosovecua penaxuabiyana. Pamona sivanajamatabëcopata Dioso pexënatojavabelia, apo naxuabi tsane. Bajarapamonae maticabi apo pevereverecejava, Dioso rajutsianatsi. <sup>17</sup>Dioso apo itorobitsica pexënato mapanacuayabetsicaje mapanacuapijivije pijaneconi yabara penaneconitsiaexanaenexa. Biji rajane Dioso itorobica pexënato, pejamatabëcueneta Dioso pecapanepaenexa mapanacuapijivije pibisiacuene pexanaeconeconimecua, nayabarajai Jesús pijacuata Nicodemojavabelia.

<sup>18</sup>Icatsia Jesús pijacuata nayabarajumaiti Nicodemojavabelia:

—Pajivi sivanajamatabëcopata Daxitajivi Pematapijinëjavabelia, bajarapajivi Dioso apo naneconitsiaexanaetsi tsane pibisiacuene pexanaeconimi yabara. Pajivi apo sivanajamatabëcopatsi Daxitajivi Pematapijinëjavabelia, bajarapajivi

baja naneconita Diosojavabelia. Nexata Dioso naneconitsiaexanaenatsi. Tsipaji apo sivanajamatabëcopatsi pepo caenë Dioso pexënatoyavabelia. <sup>19</sup> Ponë Daxitajivi Pematapijinë, bepecotia picani. Tsipaji jivi tsipaebapona pexaniajailivaisi jivi pejamatabëcueneitayotsinexa. Itsiata mapanacuapijivi apo jitsipae pejamatabëcueneitayotsinexatsi. Jitsipa saya piitaquirijamatabëcuene. Tsipaji bajarapamonae pibisiacuene exanavanapa. Bajaraxuata bajarapamonae naneconitsiaexanaenatsi Dioso. <sup>20</sup> Daxita pamona pibisiacuene pexanavanapaevi, apo jitsipae Daxitajivi Pematapijinë pejamatabëcueneitayotsinexatsi. Bajaraxuata Daxitajivi Pematapijinëjavabelia apo patsi. Tsipaji cujunava peyapëtaeyaexanaeyanivatsi penaneconitsijava Diosojavabelia pibisiacuene pexanaeneconi yabara. <sup>21</sup> Pamona jumeconvënëta Dioso pexaniajailivaisi, bajarapamonae apo cujunavi. Bajarapamonae pata Daxitajivi Pematapijinëjavabelia pejamatabëcueneitayotsinexatsi. Bajarapamonae jitsipa daxitajivi peyapëtaenexatsi Dioso peyavenonaponaejavatsi xua exanavanapa, nayabarajai Jesús pijacuata Nicodemojavabelia.

### **Pacuenia Juan jivibautisabinë vajunupaeba Jesús yabara pelivaisi**

<sup>22</sup> Jesúsbeje Nicodemobeje pecuaicuajiaicujinaebeje, Jesús baja, pijajivi yajava, pona Judea nacuyabelia. Nexata Judea nacuata bajayajebi Jesús pijajivi barëponapona. Bajarapamonae bautisabapona jivi. <sup>23</sup> Juan pijinia itsamonae bautisabapona Enón tomarata. Enóntomara eca Salimtomara imoxoyojavata. Bajarajota Juan jivi bautisabapona tsipaji ayaimera. Juan jivi topataponatsi pebautisabinexa. Nexata pepataponaevi, Juan bautisabapona. <sup>24</sup> Bajarapacuenia Juan jivi bautisabapona abaxë itsa apo etsitsi penaneconitsivi pejebabiabibota.

<sup>25</sup> Nexata Juan pijajiviyajuvënëvi anaeya najumenotsiya cuaicuajjai judfonëjavabelia. Juan pijajivi jumaitsi:

—¿De meta ponë itsa nacabautisaba, nacajamatabëcueneixaniavaetsiana Dioso vajanacabarajamatabëcuene xanepanaenexa? jai Juan pijajivi judfonëjavabelia.

<sup>26</sup> Nexata Juan pijajivi pona Juanjavabelia. Nexata bajarapamonae Juanjavabelia jumaitsi Jesús yabara:

—Ponë caxitajarabame Jordánmene itsapanatalia, ponë vajunupaebame paxanëjavaberena, bajaraponë ata aeconoxae jivi bautisabapona. Nexata daxitajivi bajaraponëjavabelia pona, jai Juan pijajivi.

<sup>27</sup> Nexata Juan jumaitsi pijajivijavabelia:

—Xuavajëto xaina caejivi canacujitsia, Dioso perajutsixaetsi xaina. <sup>28</sup> Pamatacabi jumaitsinë tsabiabi jivijavabelia: “Xanë raja apo Cristonë, ponë Dioso athëbëvetsica itorobijitsiatsica jivi pecapanepaenexa. Saya raja taneitorobinë Cristo pevajënaeya, talivaisipaebanajetarucaenënexa,” itsa janë, paxamë ata panejumetaeyabiabame. <sup>29</sup> Ponë pita petiriva pijavanexa, nacasaba. Nexata pejananacasabinë peyapëtaenëtsi, namuxunaevetanuca imoxoyo. Bajaraponë ata nabarëya itsa jumetane pejananacasabinë pebarëyajava. Bajara pijinia pacuenia xanë ata aeconoxae bitso jamatabëcuenebarëyanë, itsa vënëlvaisitaniji jivi peponaejava Jesúsjavabelia. <sup>30</sup> Pevajënaeyabelia jivi ayabitsaëtoxfaneto Jesús pënaponaeenatsi. Xanë nexata tanepënaponaevi bevelia tsaponae tsane, jai Juan pijajivijavabelia.

**Pacuenia Juan tsipaeba pijajivjavabelia Jesús  
athëbëvetsica pepatsijava yabara pelivaisi**

<sup>31</sup> Icatsia Juan jumaiti pijajivjavabelia:

—Athëbëvetsica pepatsinë, bitso cajena ayaijamatabëcuenenë daxitajivi mata-toxenetsia. Pamonae naexana mapanacuataje, bajarapamonae saya mapanacuapi-jivije. Nexata saya cuaicuajiai ëmapanacuapijicuene yabaraje. Itsiata baitsi jane ponë athëbëvetsica pepatsinë, bajaraponë daxitajivi matatoxenetsia bitso ayaijamatabëcuenenë. <sup>32</sup> Bajaraponë picani tsipaeba jivjavabelia pacuene tane athëbë-tatsia. Tsipaebanua picani palivaisi ata jumetane athëbëtatsia. Itsiata baitsi jane daxitajivi jumeabatsi petsipaebilivaisianë. <sup>33</sup> Pajivi jumecovënëta athëbëvetsica pepatsinë pepaebilivaisi, bajarapajivi Dioso ata yabara jamatabëjumaiti: “Dioso ca-jena pexaniajailivaisi pepaebinë,” jamatabëjai. <sup>34</sup> Ponë Dioso itorobatsi, bajaraponë tsipaeba jivjavabelia Dioso pitorobilivaisi. Tsipaji Dioso rajutatsi Espiritu Santo. Yajavaponaponaeyaexanatsinua Espiritu Santo ayaicuenia. <sup>35</sup> Dioso bitso asiva pexë-nato. Tocopata daxitacuene pevetsinexa, pitorobinexanua. <sup>36</sup> Pajivi najamatabëco-pata Dioso pexënatojavabelia, xainaena matakabi apo peverevereaejava. Pajivi apo najamatabëcopatsi Dioso pexënatojavabelia, matakabi apo peverevereaejava apo xinae tsane. Bajarapajivi Dioso naneconitsiaexanaenatsi daxita matakabijav-abelianexa, jai Juan pijajivjavabelia.

**Pacuenia Jesús barëcuaicuajiai Samaria nacuapijiva yabara pelivaisi**

**4** Fariseovi jumetane jivi pejumaitisijava: “Jesús baja pijajivi ayaibitsaëtoxaneto xainaponapona. Bautisabaponanua jivi ayaibitsaëto Juan matatoxenetsia,” pe-jaijava. <sup>2</sup> Itsiata Jesús pecobeta apo bautisabi caejivi ata. Jesús rajane pijajivi bautisabapona jivi. <sup>3</sup> Nexata Jesús itsa yapëtane fariseovi pevënëlivaisitaevajatsi pacuenia jivi baracuaicuajiaitsi, nexata naviata Judea nacuaverena. Pona Galilea nacuyabelia.

<sup>4</sup> Nexata Galilea nacuyabelia peponaenë, Jesús, pijajivi yajava, patanajetaruca Samaria nacujava. Tsipaji bajaraxuayo namuto najetaruca. <sup>5</sup> Nexata Jesús ecojopa Samaria nacuata peecaetomarata, Sicarvënë tomarata. Sicar tomaravecua imox-oyo boca pairayo Jacobpijinë bajayata rajuta pexënato Josépijinë. <sup>6</sup> Bajarapairay-ota eca meramëthë, pamëthë Jacobpijinë bajayata cueyeta. Jesús sicuerana pepon-aejava namuto. Nexata Jesús ecojopa meramëthë muxuneneta. Matonejeepatota Jesús ecojopa. <sup>7-8</sup> Jesús caenë eca meramëthëjavata. Tsipaji Jesús pijajivi tomara-belia pona pecomuacaenexa pexaejava. Nexata bajaraberena Samaria nacuapi-jiva rena pepuatsinexa mera bajarapamëthëta. Nexata Jesús jumaiti Samaria nacuapijivjavabelia:

—Mera nerajure, jai Jesús.

<sup>9</sup> Nexata Samaria nacuapijiva jumaiti:

—¿Detsa xuajitsia mera nevajëtame niapaenexa? Xamë judíonëmë. Xanë saicaya Samaria nacuapijivanë, jai bajarapova Samaria nacuapijiva Jesúsjavabelia.

Bajarapacuenia Samaria nacuapijiva jumaiti Jesúsjavabelia tsipaji judíovibeje Samaria nacuapijivibeje naitajitsibiaya nanaëcotabiaba. <sup>10</sup> Nexata Jesús jumaiti Samaria nacuapijivjavabelia:

—Pajamatabëcuene Dioso jitsipa pecarajutsinexa, apo yapëtaemë. Xanë ata mera tacavajëtsinë apo nejamatabëcueneyapëtaemë. Itsa nejamatabëcueneyapëtaejitsipame, nexata xanëjavaberena copiaya mera nevajëtsipame tacarajutsinexa. Nexata carajutsipatsi piaitavamera, jivi pejamatabëcueneasaëyaexanaemera daxitamatabacijavabelianexa, jai Jesús Samaria nacuapijivajavabelia.

<sup>11</sup> Nexata Samaria nacuapijiva jumaitsi Jesúsjavabelia:

—Xamë apo caponaemë nijavaxiyo mera nepuatsinexa. Meramëthë raja tajëreca bitso. ¿Detsa jota pitsipame nexata piaitavamera tanerajutsinexamë? <sup>12</sup> Vajasalinainëmi Jacobpijinë ayaijamatabëcuenenëmi. Bajayata nacatocopata mapameramëthëje. Bajaraponëmi, pexi ata, pijadajubi ata, mera apa mapamëthëtaje. ¿Xamë tsaja nexata Jacobpijinëmi matatoxënetsia bitso ayaijamatabëcuenenëmë? jai Samaria nacuapijiva Jesúsjavabelia.

<sup>13</sup> Jesús nexata jumaitsi:

—Jivi apaeyabiabi ata mapamëthëpijimeraje, itsiata mera pejitsipaejava apovereverecabiabitsi. <sup>14</sup> Pajivi apaena xanë tarajutsimera, bajarapajivi xainaena matabi apo pevereverecejave. Nexata pacuenia meramëthë eca daxitamatabacijavabelianexa, bajara itsi tsane bajarapajivi, jai Jesús.

<sup>15</sup> Nexata Samaria nacuapijiva jumaitsi Jesúsjavabelia:

—Bajarapamera nerajure icatsia mera tanamatavenonaponaeyaniva. Nexata baja mera apo puanabiabinë tsane mapamëthëberenaje, jai Samaria nacuapijiva.

<sup>16</sup> Jesús nexata jumaitsi Samaria nacuapijivajavabelia:

—Amona junaremelia. Yajavarenamë tsane, jai Jesús.

<sup>17</sup> Nexata Samaria nacuapijiva jumaitsi:

—Apo xainaenë raja tamona, jai.

Nexata Jesús jumaitsi:

—“Apo xainaenë raja tamona,” itsa jamë, apo najumetsënëtsimë cajena.

<sup>18</sup> Xainame picani amonajivi cinco ponëbeje. Ponë aeconoxae xainame, apo amona cajena. Tsipaji saya nijajara. Bajaraxuata xaniavaetsia netsipaebame, jai Jesús Samaria nacuapijivajavabelia.

<sup>19</sup> Nexata Samaria nacuapijiva itsa jumetane bajarapacuenia Jesús pejumaitsijava, nexata Samaria nacuapijiva jumaitsi Jesúsjavabelia:

—¿Xamë tsabaja Diosojumepaëbinëmi profetanëmi? <sup>20</sup> Patajasalinaivimi baja cajena navajëcabiaba Diosojavabelia mapatsutojumataliaje. Itsiata baitsi jane pajudíovimë pajumaitsimë tsabiabi: “Jivi itsa navajëca Diosojavabelia, benavajëcabiaba Jerusalén tomarata Dioso pejumecovënëtsinexatsi,” pajamë tsabiabi, jai Samaria nacuapijiva.

<sup>21</sup> Jesús nexata jumaitsi:

—Nejumecovënëtsianame pacuenia catsipaëbijitsiatsi. Imoxoyo rabaja pevajënae papecatocopiapatsinexa Diosojavabelia panevajëcabiabinexa, paponaejevamë mapatsutojavabeliaje, paponaejevamë Jerusalén tomarabelia ata. <sup>22</sup> PaSamaria nacuapijivimë, pavajëcabiabi atamë Diosojavabelia, xaniavaetsia apo payapëtaemë Dioso. Paxanë rajane pajudíovinë xaniavaetsia payapëtaniji Dioso, ponëjavabelia pavajëcabiabajë. Tsipaji xanë daxitajivi tacapanepaenë tsane, judíoviyajuvënë. <sup>23</sup> Ajena mapamatabacijavaveliacujinaeje, pevajënaeyabelia ata taponae, daxita pamonaë jamatabëvajëta Diosojavabelia, bajarapamonae xaniavaetsia vajëtsiana daxita pejamatabëthëtojavavetsina. Pepo pexaniajajamatabëcueneta va-

jëtsiana Diosojavabelia. Bajarapitsivi Dioso jitsipa pevajëtsijavatsi. <sup>24</sup>Dioso cajena apo vajataenë. Pamonaevajëta Diosojavabelia, xaniavaetsia pexaniajajimatabëcueneta bevajëta, pepo pejamatabëëthëtojavavetsina, jai Jesús Samaria nacuapijivajavabelia.

<sup>25</sup>Nexata Samaria nacuapijiva jumaitsi:

—Yapëtaniji rabaja pepatsijavanexatsica Mesías, ponë Cristo, baitsi ponë athëbëvetsica Dioso itorobijitsiatsica jivi pecapanepaenexa. Itsa bajaraponë patsianica, nacatsipaebiana daxitacuenelivaisianë, jai Samaria nacuapijiva Jesúsjavabelia.

<sup>26</sup>Jesús nexata jumaitsi Samaria nacuapijivajavabelia:

—Xanë rabaja Cristonë, jai.

<sup>27</sup>Nexata bajarapaepatota tomaraverena parena Jesús pijajivi. Bajarapamonaevajimatabëcuenenabenajata Jesús pecuaicuaijaitsanucaexae Samaria nacuapijivajavabelia. Itsiata itsanë ata: “¿Detsa xua jitsipame?” apo jai Samaria nacuapijivajavabelia. Jesúsjavabelia ata apo yanijobi: “¿Detsa xuajitsia bajarapova barëcuaicuaijamë?” apo jai itsanë ata. <sup>28</sup>Nexata bajarajota Samaria nacuapijiva pueneteta pijacanalito. Navialia pijatomarabelia. Tsipaebalia jivi. Nexata jumaitsi Jesús yabara:

<sup>29</sup>—Panataemelia ponë netsipaeba daxita pacuenia exanajë. ¿Baja tsamëra jane apo Cristo, ponë athëbëvetsica Dioso itorobijitsiatsica jivi pecapanepaenexa? jai Samaria nacuapijiva.

<sup>30</sup>Nexata bajarapamonaevajatomaravelia ponalia. Taeothopalia Jesús. <sup>31</sup>Itsa abaxë bajarapamonaevajapatsilia Jesúsjavabelia, Jesús pijajivi jumaitsi:

—Patajatuxanenë, naxaema itsajavayo, jai.

<sup>32</sup>Nexata Jesús jumaitsi pijajivajavabelia:

—Xainajë raja saicaya taxaejavanexa paxamë apo paneyapëtaejava, jai Jesús.

<sup>33</sup>Nexata Jesús pijajivi, ëpamonaevajayanijoba.

—¿Itsanë tsamëra tsipaji vajacovëta Jesús pexaejava tocapatatsi penabaninexa? najai Jesús pijajivi.

<sup>34</sup>Nexata Jesús jumaitsi:

—Pacuenia taneitorobinëtsica nitoroba, jitsipajë taexanaenexa. Jitsipajë baja tanacueneveretsinexa xua nitoroba. Bajara jane xua betaxaejava taniji. <sup>35</sup>Paxamë pajumaitsimë tsabiabi peubijava yabara: “Saica raja abaxë cuatro pajuametobeje peubijava penaveretsinexa,” pajamë tsabiabi. Itsiata xanë pacatsipaebianatsi jivi yabara. Pataema mapamonaevajatarubenaje. Pacuenia baja peubijava navereta penotsinexatsi, bajara itsi mapamonaevajejumecovënëtsiana itsa tsipaebianatsi Dioso pejumelivaisi. <sup>36</sup>Pajivi tsipaebiana tajumelivaisi jivi pejumecovënëtsiaexanaenexa, matacabi apo pevereverecejava jivi pexainaenexa, bajarapajivi sivajamatabëcuenenabarëya tsane ayaibitsaëto itsa jumecovënëtsianatsi. Itsamonae baja picani namataxainaevajatsipaeba bajarapamonaevajavabelia Dioso pejumelivaisi. Itsiata baitsi jane apo jumecovënëtsiatsi. Nexata bajarapamonaevajajitsa vënëlvaisitaena pejumecovënëtsijava tajumelivaisi, bajarapamonaevajajivajimatabëcuenenabarëya tsane. <sup>37</sup>Jivi bajumaitsi peubijava yabara mapacueniaevajajeyajitsa: “Copiayajitsanë uba. Itsa baja navereta peubijava, saicaya icatsia itsanë nota,” bajai. <sup>38</sup>Nexata baja itsaxuayo itsamonae copiaya Dioso pejumelivaisi asaëyata tsipaebapona, bajara icatsia xuayo paxamë ata talivaisi panetsipaebinexa, pacaitorobatsi. Nexata pamonaevajajicopiaya Dioso pejumelivaisi tsijamatabëubatsi, ayaibitsaëto

bajarapamonae najamatabëcuenecopaba baja Diosojavabelia panetsipaebixae tali-vaishi, jai Jesús pijajivijavabelia.

<sup>39</sup> Samaria nacuapijiva, pova Jesús barëcuaicuajai mera mëthëjavata, pijatomarapijivijavabelia tsipaeba ayaibitsaëtoخانetojavabelia Jesús yabara. Nexata Samaria nacuata pejinavanapaevi, Sicar tomarapijivi, ayaibitsaëtoخانeto jumecovënëta Cristocuene. Jumecovënëta Cristocuene penavajunupaebixae bajarapova bajarapatomarapijivijavabelia: “Daxita pacuene exanajë, Jesús netsipaeba,” pejaixae.

<sup>40</sup> Nexata Samaria nacuapijivi itsa parena Jesúsjavaberena, bajarapamonae Jesús asivatsi penaponaponaenexa bajarapomonejavata. Nexata Jesús bajarapomonejavata naponapona anijamatacabibeje. <sup>41</sup> Itsa bajarapomone pijacuata jumetane Jesús petsipaebilivaisi, nexata icatsia ayaibitsaëtoخانeto jumecovënëta Cristocuene.

<sup>42</sup> Nexata bajarapomone jumaitsi penavajunupaebivajavabelia:

—Pajumecovënëtajë apo ëpatanetsipaebijumemë yabara. Biji rajane pajumecovënëtajë tsipaji baja patajacuata ata pajumetaniji Jesús vajanacatsipaebilivaisi. Payapëtaniji baja cajena bajaraponë pexaniajajava Cristocuene. Payapëtaniji bajaraponë mapanacuapijivije pecapanepaejavanexa, pibisiacuene pexanaeconimivecua, jai bajarapomone penavajunupaebivajavabelia.

### **Pacuenia Jesús tojamatejemayaexana gobierno pijajivitonë pexënatonëyo yabara pelivaisi**

<sup>43</sup> Samaria nacuata anijamatacabibeje Jesús peponaponaecujinae, vecuapona baja Samarianacua. Nexata jane baja pona Galilea nacuayabelia. <sup>44</sup> Jesús jumai tsabiabi pijajivijavabelia:

—Pajivi Dioso jumepaebabiaba, bajarapajivi apo yaiyataetsi pijanacuapijivi, jai tsabiabi Jesús.

<sup>45</sup> Itsa baja Jesús palia Galilea nacuayabelia, bajarapanacuapijivi xaniavaetsia copiapitatsi. Tsipaji baja cajena bajarapomone ata Jerusalén tomarata pascua fiestamatacabi Jesús tanetsi. Nexata Jesús ayaicuene Dioso pesaëta pexanaejava bajarapomone cujirutanetsi fiestamatacabi.

<sup>46</sup> Nexata icatsia Jesús naviata Caná tomaraberena. Canátomara eca Galilea nacuata. Bajarapatomarata Jesús copiaya merami exana vinora. Caná tomarata ponapona gobierno pijajivitonë, ayaijamatabëcuenenë. Bajaraponë pexënatonëyo toavitanane tsanucaetsi Capernaum tomaratalia. <sup>47</sup> Nexata gobierno pijajivitonë vënëlivaisitanetsi Jesús Judea nacujavaverena pepatsijava, Galilea nacuayaberena. Nexata bajaraponë lia Jesúsjavabelia. Pinijicuenia junata pijaboyabelia pebarëponaenexa Jesús petojamatejemayaexanaenexatsi pexënatonëyo. Tsipaji baja gobierno pijajivitonë pexënatonëyo totëpaejitsiatsi. <sup>48</sup> Nexata Jesús jumaitsi bajaraponëjavabelia:

—Paxamë cajena apo panejumecovënëtsimë. Matapania itsa pataneme ayaicuene Dioso pesaëta taexanaejava, jivi apo pexanaecapanepaejava, panejumecovënëtsianame, jai Jesús.

<sup>49</sup> Nexata gobierno pijajivitonë jumaitsi:

—Jesús, naxanitsiayo tapëta ponare taxënatonëyo abaxë petëpaevajënaeya, jai.

<sup>50</sup> Jesús nexata jumaitsi bajaraponëjavabelia:

—Naviaremelia nexënatonëyojavabelia. Nexënatonëyo rabaja icatsia catojamatejema, jai Jesús.

Bajaraponë jumecovënëta pacuenia Jesús jumaitsi. Nexata baja lia pijaboyabelia. <sup>51</sup>Itsa bajaraponë patanajetarucalia, nexata pijajivi mataenenarenatsi. Nexata pijajivi jumaitsitsi:

—Nexënatonëyo rabaja icatsia jamatejema tsecae, jaitsi.

<sup>52</sup>Nexata bajaraponë yanijoba pijajivijavabelia.

—¿Detsa xuayota jumeto itsa ruca, jamatejema baja? jai tsapatsi bajaraponë.

Nexata pijajivi jumaitsi:

—Canivi, matonejeeapatota, vecuaajibitsi baja peromaebijavatsi, jai pijajivi.

<sup>53</sup>Nexata bajaraponë jamatabëjumaitsi:

—Bajarapaepatota canivi Jesús nejumaitsi: “Nexënatonëyo rabaja icatsia catojamatejema,” nejai, jamatabëjai.

Bajaraxuata bajaraponë, pijamonae yajava, jumecovënëta Jesús Cristonëcuene.

<sup>54</sup>Jesús penaviatsicujinae Judea nacujavaverena, Galilea nacujavaberena, cotocae vi bajarapapinjicuene Dioso pesaëta exana Galilea nacuata.

### **Pacuenia Betzatavënë pucayojavata Jesús jamatejemayaexana petabusipacuenabinëtsi yabara pelivaisi**

**5** Judíovi fiesta exana Jerusalén tomarata. Nexata Jesús nalia. <sup>2</sup>Jerusalén tomarata, ovejaxi pecajoneyabiabaupa imoxoyojavata, pecueyetsipucayo eca. Bajarapapucayo hebreojumeta pevënë Betzata. Bajarapapucayo matatoyorotsia cinco pabobërëtobeje eca. <sup>3</sup>Bajarapabobërëtonëjavata piavitanevi ayaibitsaëtöxaneto bobena. Itsamonae bitso pitaxutotsëcënaevi. Itsamonae pejayujayunaevi. Itsamonae peperabëcuenabivitsi. Daxita bajarapamonae evetanubena pucayo pemenenacujirubijava. <sup>4</sup>Athëbëvetsica ángel jemata runabiabica pucayojavabetsica. Nexata pucayo menenacujirubabiaba. Pemenenacujirubijavata, pajivi copiaya runareca pucayojavabereca, bajarapajivi pavitanecuene capunatsi, vecuaajibiaexanabiabatsi. <sup>5</sup>Bajarajota naboca treinta y ocho pavaibeje piavitanetsanucaenë, petabusipacuenabinëtsi. <sup>6</sup>Itsa Jesús taeyabuata bajaraponë, nexata yapëtaeyabuata bajayajebi piavitanenëcuene. Nexata Jesús jumaitsi bajaraponëjavabelia:

—¿Jitsipame tsaja nejamatejemajava? jai Jesús.

<sup>7</sup>Nexata bajaraponë jumaitsi:

—Itsajivi ata apo xainaenë tanecopatsinexareca pucayojavabereca itsa mene nacujiruba. Ajena narunabiabijitsianëreca, bajarapaepatota itsajivi netsurunabiabareca copiaya, jai piavitanetsanucaenë.

<sup>8</sup>Jesús nexata jumaitsi piavitanetsanucaenëjavabelia:

—Namatacore. Pire nijapanayo. Ponare baja, jai Jesús.

<sup>9</sup>Bajarapacuenia Jesús pejumaitsijavata, jamatejema baja piavitanetsanucaenëmi. Pita baja pijapanayo. Ponaexanepana baja. Bajarapacuenia petabusipacuenabinëtsi Jesús jamatejemayaexana judíovi penacueraevetsimatacabita. <sup>10</sup>Nexata judíovi jamatabëcuenenavëxaniabiaya jumaitsi petabusipacuenabinëmitsijavabelia:

—Ajena raja vajanacueraevetsimatacabí. Nexata apo xanepanae necaponaponenexa nijapanayo, jai judíovi, tsipaji bajarapamonae apo jitsipae itsajivi ata pexanaenexa itsacuenëjavayo ata penacueraevetsimatacabita.

<sup>11</sup>Nexata petabusipacuenëbinëmitsi jumaitsi judíovijavabelia:

—Tanejamatejemayaexanaenë raja nejumaitsi: “Nijapanayo pire. Ponare baja,” nejai, jai petabusipacuenëbinëmitsi judíovijavabelia.



<sup>12</sup>Nexata icatsia judíovi jumaitsi:

—¿Jipatsa nexata cajumaitsi: “Nijapanayo pire. Ponare baja,” cajai? jai.

<sup>13</sup>Itsiata baitsi jane bajaraponë apo vënëyapëtae pavënënë jamatejemayaex-anatsi. Apo vënëyapëtae Jesús. Tshipaji bitso jivi ayaibitsaëtoxaneto bajarajota jinavanapa. Jesús baja cajena pepuaponae itsajavabelia, yanijobatsi. <sup>14</sup>Bajaraxuacujinae icatsia Jesús caxitajarabaxuaba bajaraponë templobota. Nexata Jesús jumaitsi bajaraponëjavabelia:

—Taema. Aeconoxae baja jamatejemamë. Icatsia pëtsa baja matavëjëa exaname pibisiacuene. Icatsia raja itsa exaname, bitsomë tsipae, jai Jesús bajaraponëjavabelia.

<sup>15</sup>Nexata bajaraponë pona baja. Tsipaeba judíovijavabelia.

—Jesús tsaena raja nejamatejemayaexana, jai judíovijavabelia.

<sup>16</sup>Bajaraxuata nexata judíovi Jesús jamatabëitonotatsi. Jamatabëbeyaxuabatsinua. Tshipaji jamatejemayaexana piavitanevi judíovi penacueraevetsimatacabita. <sup>17</sup>Nexata Jesús jumaitsi judíovijavabelia:

—Taxa Dioso raja piavitanevi jamatejemayaexanabiaba daxitamatacabi. Bajaraxuata xanë ata piavitanevi jamatejemayaexanajë daxitamatacabi, jai Jesús judíovijavabelia.

<sup>18</sup>Bajarapacuenia Jesús penalivaisipaebixae judíovijavabelia, itoyatsi bitso. Bajarapamonae jamatabëbeyaxuabatsi. Tshipaji Jesús jamatejemayaexana piavitanevi judíovi penacueraevetsimatacabita. Orijibia Jesús jumaitsi: “Taxa raja Dioso,” jai. Bajarapacuenia Jesús pejumaitsixae, nexata judíovi bitso jamatabëbeyaxuabatsi.

### **Pacuenia Dioso pexënato jamatabëcuenecaëjëpatsi daxitacuene pexanaenexa yabara pelivaisi**

<sup>19</sup>Jesús jumaitsi judíovijavabelia:

—Xaniajanë pacuenia pacatsipaebijitsiatsi. Xanë, Dioso pexënatonë, itsacuenejavayo ata apo exanaenë ëxanë tajamatabëcueneta. Pacuenia taniji taxa pexanaejava, bajarapacuenia xanë ata exanajë. <sup>20</sup>Taxa niasiva. Nexata neyapëtaeyaxana daxita pacuene taxa yapëtane. Tavajënaeyabelia neyapëtaeyaxanaponaena bajarapacuenie matatoxenetsia ayaicuene taexanaponaenexa. Nexata exanaenajë ayaicuene taexanaejavanë. Paxamë itsa pataename ayaicuene taexanaejavanë, pajamatabëcuenenabenajacaename. <sup>21</sup>Taxa petëpaejivi ata icatsia asaëyaxana. Xanë ata necaëjëpa tasaëyaxanaenexa petëpaejivi ata, pajivi jamatabësaëyaxanajë. <sup>22</sup>Taxa raja apo naneconitsiaexanae tsane itsajivi ata. Xanë raja, pexënatonë, nitoroba tananeconitsiaexanaenexa pibisiacuene pexanaevi. <sup>23</sup>Bajarapacuenia nitoroba tananeconitsiaexanaenexa taneyaiyataenexa daxitajivi pacuenia bajarapamonae yaiyatane taxa. Pajivi apo neyayatae, Dioso pexënatonë, bajarapajivi taxa ata apo yaiyatae, jai Jesús judíovijavabelia.

<sup>24</sup>Icatsia Jesús jumaitsi judíovijavabelia:

—Xaniajanë pacuenia pacatsipaebijitsiatsi. Pajivi nenamuxunaeveta tapaebilivaisi, itsa jumecovënëtanua Dioso athëbëvetsica taneitorobinëcuenetsica, nexata bajarapajivi xainaena matacabi apo pevereverecejaveja. Nexata bajarapajivi apo naneconitsiaexanaenë tsane pibisiacuene pexanaeconi yabara. Bajarapajivi tēpae ata tsane, capanepaenatsi Diosojavabelia. <sup>25</sup>Xaniajanë pacuenia pacatsipaebijitsiatsi. Pamonae apo xinae matacabi apo pevereverecejaveja, pijamatacabi baja

tocopiapatatsi tanejumetaenexa, xanë Dioso pexënatonë, tatsipaebilivaisi. Nexata pajivi nesivanajamatabëcopata, xainaena matacabi apo peverevereaejava. <sup>26</sup>Taxa raja caëjëpatsi jivijavabelia perajutsinexa matacabi apo peverevereaejava. Nexata xanë ata taxa necaëjëpaeyaexana jivi tarajutsinexa matacabi apo peverevereaejava. <sup>27</sup>Nitorobanua tananeconitsiaexanaenexa pibisiacue ne pexanaevi. Tsipaji xanë, Daxitajivi Pematapijinënë. <sup>28</sup>Pëtsa pajamatabëcuenenabenajacame patacat-sipaebilivaisi yabara. Itsamatacabi nejumetaena daxita petëpaevimi ata tatsipaebilivaisi. <sup>29</sup>Nexata bajarapamonae pemëthëanëmi vecuapitsapaena. Pamonae pexaniacue ne pexanaevimi, Dioso icatsia asaëyaexanaenatsi. Nexata bajarapamonae xainaena matacabi apo peverevereaejava. Pamonae pibisiacue ne pexanaevimi, icatsia Dioso asaëyaexanae atatsi tsane, bajarapamonae naneconitsiaya jinavana-paena daxitamatacabijavabelianexa, jai Jesús judíovijavabelia.

**Pacuenia Jesús jivi tsitanajamatabëcuenetitajëta pecaëjëpaenëcuenetsi  
daxitacue ne pexanaenexa yabara pelivaisi**

<sup>30</sup>Icatsia Jesús jumaitsi judíovijavabelia:

—Xanë tajamatabëcueneta apo exanaenë tsane itsacuenëjavayo ata. Taneitorobinëtsica taneitorobicuenia, pijaneconi pexainaevi naneconitsiaya jinavanapaeyaexanaenajë. Nexata saya itaxutojema apo naneconitsiaexanaenë tsane. Itsa naneconitsiaexanaenajë jivi, paneconivajëto xaina caejivi canacujitsia, bajarapaneconivajëtota caejivi canacujitsia naneconitsiaexanaenajë. Apo exanaenë tsane pacuenia jamatabëexanajë tajacuata. Pacuenia jitsipa taxa taneitorobinëtsica, bajarapacuenia exanaenajë. <sup>31</sup>Itsa navënëlivaisipaebijitsipajë, “Xanë rabaja ayaijamatabëcuenenënë,” itsa janë tsipae, itsiata itsamonae saya nejumeeabijitsipa. <sup>32</sup>Itsiata baja Juanpijinë jivibautisabinëmi nevajunupaeba xaniavaetsia. Yapëtaniji bajaraponë tanevajunupaebijava pexaniajajamatabëcueneta. <sup>33</sup>Paxamë itsamonae paitorobame tanevënëlivaisiyanijobinexa Juan jivibautisabinëmijavabelia. Nexata Juanpijinë xanë talivaisi, pexaniajailivaisi, tsipaeba paneitorobivijavabelia. <sup>34-36</sup>Pacanjamatabënapitsiaexanatsi pacuenia Juanpijinë nevënëlivaisipaeba panejumecovënëtsinexa patacacapanepaejavanexa taxa Diosojavabelia. Juanpijinë abaxë itsa ponapona mapanacuataje, belámparabë picani. Pacajamatabëcuenetitayota. Caepatoyo picani pasivajamatabëcuenëbarëyamë papecatsipaebilivaisi. Juanpijinë ita nevënëlivaisipaeba, pacayapëtaeyaexana baja cajena pexaniajailivaisi tapaëbinëcuenë. Itsiata bailsi jane Juanpijinë bajarapacuenia apo pacatsipaebi ata tsipae, xanë xainajë itsanë tanevënëlivaisipaëbinënëxa. Bajaraponë bitso ayaijamatabëcuenenë Juanpijinëmi matatoxenetsia. Bajaraponë taxa. Taxa netocopata pinijicue ne taexanaenexa. Nexata pinijicue ne exanajë daxitajivi tanevivajamatabëjumaitsinexa: “Xaniajai tsaena. Maponëje pepacue ne Dioso athëbëvetsica pitorobinëtsicsajë.” tanevivajamatabëjainexa. <sup>37</sup>Taxa, ponë nitorobica, tajëvelia baja cajena nevënëlivaisi yaquinaeyaexana pejumelivaisibaxutota. Caeto ata taxa livaisi papecatsipaebijava, apo pajumetaemë. Apo pataemëna. <sup>38</sup>Nexata pejumelivaisi apo pacatsijamatabëjone. Tsipaji apo panejumecovënëtsimë taxa athëbëvetsica taneitorobinëtsica. <sup>39</sup>Paxamë picani xaniavaetsia palebabiabame Dioso pejumelivaisibaxuto. Bajarapacuenia palebabiabame tsipaji jamatabëcuenenavëxaniabiaya pajamatabëjumaitsimë tsabiabi: “Xaniavaetsia ita lebajë Dioso pejumelivaisi, nexata Dioso nerajutsiana

matacabi apo peverevereaejava,” pajamatabëjamë tsabiabi. Itsa palebabiabame Dioso pejumelivaisibaxuto, ponë yabara palebabiabame, xanë rabaja cajena. <sup>40</sup>Paxamë itsiata apo panejumecovënëtsimë panexainaenexa matacabi apo peverevereaejava, jai Jesús judíovijavabelia.

<sup>41</sup>Icatsia Jesús jumaitsi judíovijavabelia:

—Apo exanaenë ayaiucene taexanaejava saya jivi tanesivajamatabëjumaitsinexa: “Jesús raja ayaijamatabëcuenenë,” tanesivajamatabëjainexa. <sup>42</sup>Pacajamatabëcueneyapëtanetsi. Yapëtaniji cajena apo panejitsipaejava Dioso. <sup>43</sup>Xanë athëbëvetsica patsicajë mapanacuayabetsicaje taxa Dioso taneitorobixaetsica. Itsiata apo panejumecovënëtsimë. Itsanë itsa pacatopatsiana saya bajaraponë pejamatabëcuenepijilivaisi papecatsipaebinxexa, nexata pajumecovënëtsianame. <sup>44</sup>Paxamë pajitsipame mapanacuata ëjivi papecasivabarëyanexa, papecayaiyataenexanua. Apo panajamatabëxainaemë cajena Dioso papecasivabarëyanexa. Bajaraxuata apo pacacajëpae panejumecovënëtsinexa Dioso pejumelivaisi. <sup>45</sup>“Mara ponëje nacaneconitsijitsia Diosojavabelia,” panesivajamatabëjamë pëtsa. Xanë raja apo pacaneconitsi tsanetsi. Paxamë jamatabëcuenenavëxaniabiaya pajamatabëjumaitsimë tsabiabi: “Bajayata Dioso Moiséspijinëta najumecopata jivi pejumecovënëtsinexa. Bajarapalivaisi baja jumecovënëtsiajinavanapatsi. Bajaraxuata nacacapanepaena Dioso,” pajamatabëjamë tsabiabi jamatabëcuenenavëxaniabiaya. Itsiata bajarapalivaisivecua saya pajinavanapame. Nexata bajarapalivaisi pacaneconitsiana Diosojavabelia. <sup>46</sup>Itsa pepacune pajumecovënëtsipame Dioso Moiséspijinëta penajumecopatsilivaisi, nexata xanë ata panejumecovënëtsipame. Tsipaji cajena bajayatami tajëvelia nevajunupaeba Moiséspijinë peyaquinaebaxutota. <sup>47</sup>Apo pajumecovënëtsimë Moiséspijinë peyaquinaelivaisi. Bajaraxuata nexata apo panejumecovënëtsimë xanë patacatsipaebilivaisi, jai Jesús judíovijavabelia.

### **Pacuenia Jesús pexaejava rajuta cinco mil ponëbeje yabara pelivaisi**

*(Mt 14.13-21; Mr 6.30-44; Lc 9.10-17)*

**6**<sup>1-4</sup> Bitso baja imoxoyo pevajënae pejonenexa judíovi pijafieta, pascuavënëfiesta. Bajarapamatacabi Jesús pona Galilea pucaxaneto itsapanabelia. Bajara-papuca itsavënë Tiberiaspuca. Nexata jivi ayaibitsaëtohaneto Jesús pënaponatsi. Tsipaji Dioso pesaëta Jesús ayaiucene exanapona. Piavitanevi jamatejemayaexana pona. Nexata Jesús junaya petsutojumabetsia. Jesús, pijajivi yajava, ecaya petsutojumatsia. <sup>5</sup>Itsa Jesús tane jivibitsaëtohaneto pecujibijavatsirena, Jesús jumaitsi Felipejavabelia:

—¿Detsa belia comuatsianatsi pexaejava pexaenexa mapabitsaëtohanetoje? jai Jesús.

<sup>6</sup>Bajarapacuenia Jesús jumaitsi tsipaji jamatabëyapëthane pacuenia Felipe jumecanaviatsijitsiatsi. Jesús baja cajena picani yapëthane pacuenia pexaejava mitsaexanaeajitsia bajarapajivibitsaëtohaneto. <sup>7</sup>Nexata Felipe jumaitsi Jesúsjavabelia:

—Doscientos denariocuenia comuatsi atatsi tsipae pan, apo yacajëpaetsi tsipae pexaenexa daxita mapajivibitsaëtohanetoje, jai Felipe.

<sup>8</sup>Itsanë Jesús pijajivitonë Andrés, Simón Pedro pejuyapijinë, jumaitsi Jesúsjavabelia:

<sup>9</sup>—Majotaje napatajopa pejevaxinëyo. Xaina bajaraponëyo cinco papanbëbeje, cebadavënëbenota pexanaepanbëanë. Xaina anijanëyobeje dujuainëyobeje yajava. Bajaraxuaxi apo caëjëpae tsipae cajena vajarajutsinexa mapajivibitsaëtoخانetoje, jai Andrés.

<sup>10</sup>Nexata Jesús jumaitsi pijajivijavabelia:

—Daxita bajarapamonae paenaeyaexanare, jai Jesús.

Nexata Jesús pijajivi itoroba jivi penaenexa ponajumavereca. Bajarapajivibitsaëtoخانeto bejamatabëcuene cinco mil meta ponëbeje. <sup>11</sup>Nexata Jesús pita panbëxi. Bajaraxuacujinae pexaenexa vajëta Diosojavabelia.

—Pexaniacuene panetoexaname. Panerajutame pataxaejavanexa, jai Jesús Diosojavabelia.

Bajaraxuacujinae Jesús pan rajuta pijajivijavabelia. Nexata juya Jesús pijajivi tsi-cobetsana daxita penaëjivibitsaëtoخانetojavabelia. Bajara icatsia pacuenia Jesús vajëta Diosojavabelia dujuainëyobeje pexaenexa.

—Pexaniacuene panetoexaname. Panerajutame pataxaejavanexa, jai Jesús Diosojavabelia.

Bajaraxuacujinae icatsia dujuaijavaxi tsi-cobetsana daxita penaëjivibitsaëtoخانetojavabelia. Daxita bajarapamonae xaniavaetsia nabane. <sup>12</sup>Itsa baja bajarapamonae penia, Jesús jumaitsi pijajivijavabelia:

—Pacaetuare baja peyajuvënënacopabenaëjavanë penaxuabenaëyaniva, jai Jesús pijajivijavabelia.

<sup>13</sup>Nexata Jesús pijajivi caetuata peyajuvënënacopabenaëjavanë. Vënëba doce xuabeje bemapirecuenia pexanaëjavanë. Cinco papanbëmibeje picani cebadavënëbenota pexanaepanbëanë. <sup>14</sup>Nexata bajarapajivibitsaëtoخانeto itsa tane Jesús ayaicuene Dioso pesaëta pexanaëjava, najumaitsi Jesús yabara:

—Diosojumepaëbinë profeta, ponë vaxaitsi copiaevetavanapatsi pepatsijavanexatsica, bajara jane maponëje. <sup>15</sup>Vaetabianatsi maponëje. Vajanacayanacuaevetsinë exanaenatsi bajaraponë, najai picani bajarapamonae.

Nexata Jesús jamatabëcueneyapëtane bajarapacuenia pesivanajamatabëxainaejavatsi. Bajaraxuata Jesús baja vecuapona. Najetaruca pinijitsutonëjava caenë.

### **Pacuenia Jesús mene itaboxoya najetaruca yabara pelivaisi**

*(Mt 14.22-27; Mr 6.45-52)*

<sup>16</sup>Itsa baja meravi, Jesús pijajivi puca itapayabereca pona. <sup>17</sup>Jesús abaxë patsinejeva pijajivijavata, aitaquiri baja. Nexata pijajivi runareca jera ënëabereca. Nicabi-jitsia Capernaum tomarabelia. <sup>18</sup>Jesús baja pijajivi pepuaponae jerata, taxuxu-aba jovibo pebubujajava. Nexata malataca bitso ayai. <sup>19</sup>Pavëpata Jesús pijajivi naropoba, bajarapavëpa baja bejamatabëcuene cinco pakilómetrobeje, seis pakilómetrobeje ata, pepuavecyanajetarubenaëlia, Jesús pijajivi kujitanajetaruca. Jesús najetaruca mene itaboxoya. Nexata Jesús pijajivi tanetsi. Jesús pijajivi kujunavatsi.

<sup>20</sup>Nexata Jesús jumaitsi pijajivijavabelia:

—¡Xanë raja najetarucajë! ¡Pëtsa panecujunavame! jai Jesús pijajivijavabelia.

<sup>21</sup>Nexata Jesús pijajivi jamatabëcuenëbarëya. Jesús baja nexata nonorena jera ënëaberena. Nexata bajarapaepatota Jesús baja, pijajivi yajava, pata Capernaum tomarabelia.

### Pacuenia Jesús pëjaitatsi jivi yabara pelivaisi

<sup>22</sup> Pamonae Jesús pexaejava rajuta, abaxë nacopabilia puca itsapanatalia. Nexata meravia pitsijavata bajarapamonae najumaitsi:

—Canivi caejera perucaejava, tanetsi majotaje. ËJesús pijajivi runareca penicabinexalia. Nexata Jesús nacopatenuca majotaje, najai bajarapamonae.

<sup>23</sup> Bajara saya paepatota itsamonae jeranë yaparena Tiberias tomaraverena. It-sajota Jesús pevajëtsicujinae Diosojavabelia pexaejava rajuta jivi ayaibitsaëttoxaneto, bajarajota vecuaimoxoyo yaëba. <sup>24</sup> Nexata pamonae Jesús pexaejava rajuta, bajarapamonae tane Jesús pijajivi pebarëajibitsarucaejava bajarajota. Nexata bajarapamonae runareca jera ënëabereca penicabinexalia Capernaum tomarabelia. Bajarapatomarabelia pona pepëjaitsinexatsi Jesús.

### Pacuenia Jesús bepitavapan yabara pelivaisi

<sup>25</sup> Jesús pepëjaitshivitsi itsa pata Capernaum tomarabelia, caxitajarabatsi Jesús. Nexata bajarapamonae jumaitsi Jesúsjavabelia:

—Jesús, ¿detsa pacujinae patame baja maberenaje? jai.

<sup>26</sup> Jesús nexata jumaitsi bajarapamonaejavabelia:

—Xaniajanë pacuenia pacatsipaebijitsiatsi. Paxamë panejaitame tsipaji xaniaavaetsia panabaneme xanëjavata. Apo panejaitsimë panejumecovënëtsinexamë Cristocuenenë, Dioso taneitorobinëtsica. Patae atamë ayai cuene Dioso pesaëta taexanaejava, apo panejumecovënëtsimë. <sup>27</sup> Pëtsa pacajamatabëcueneena ëpevereverecaejava yabara. Pacuenia panexaejava baverevereca, bajarapitsijava. Biji rajane pacajamatabëcueneena apo pevereverecaejava yabara. Nexata xanë, Daxitajivi Pematapijinënë, pacarajutsianatsi matacabi apo pevereverecaejava. Taxa Dioso baja cajena nitoroba patacarajutsinexa matacabi apo pevereverecaejava, jai Jesús bajarapamonaejavabelia.

<sup>28</sup> Nexata bajarapamonae jumaitsi Jesúsjavabelia:

—¿Detsa nexata xua bepaexanjë Dioso pejitsipaecue? jai bajarapamonae.

<sup>29</sup> Nexata Jesús jumaitsi bajarapamonaejavabelia:

—Mara pacuene Dioso jitsipa paneexanaenexaje. Panejumecovënëre xanë Dioso taneitorobicuenetsica, jai Jesús.

<sup>30</sup> Nexata icatsia bajarapamonae jumaitsi Jesúsjavabelia:

—¿Detsa nexata xua pinijicuene Dioso pesaëta nexanaejava panetsitaexanaename patacajumecovënëtsinexa Dioso peaitorobicuenetsica? <sup>31</sup> Vajasalinaivimi pina bajayata baxaevanapa manävënëjava petusato nacuata pacuenia baja Dioso pejumelivaisibaxutota jumaitsi. Dioso baja cajena pejumelivaisibaxutota jumaitsi mapacueniaje: “Bajarapamonae rajutabiabatsi pexaejava athëbëpijijava,” jai Dioso pejumelivaisibaxutota vajasalinaivimi yabara, jai bajarapamonae Jesúsjavabelia.

<sup>32</sup> Jesús nexata bajarapamonaejavabelia jumaitsi:

—Xaniajanë pacuenia pacatsipaebijitsiatsi. Moiséspijinë petusato nacuata vajasalinaivimi pexaejava apo rajutsi athëbëpijijava. Taxa Dioso raja rajutabiaba bajarapamonae pexaejavanexa. Nexata pijinia aeconoxae paxamë ata Dioso pacarajutsiana athëbëpijipan, pepacuene pexaniajaipan. <sup>33</sup> Ponë athëbëvetsica pepatsinë, Dioso rabaja pijapan. Bajaraponë mapanacuapijivijavabeliaje rajutsiana matacabi apo pevereverecaejava, nayabarajai Jesús pijacuata bajarapamonaejavabelia.

<sup>34</sup> Nexata bajarapamonae jumaitsi:

—Jesús, bajarapapan panerajutaponaename daxitamatacabi canacujitsia, jai.

<sup>35</sup> Nexata Jesús jumaitsi bajarapamonaejavabelia:

—Papan jivi rajutsianatsi matacabi apo peverevereaejava, xanë rabaja bajarapannë. Pajivi xanëjavaberena pata, apo piajani cajena tsane pejamatabëëthëtota. Pajivi nesivanajamatabëcopata xanëjavaberena, apo jitsipae tsane icatsia mera. <sup>36</sup> Paxamë apo panejumecovënëtsimë, patae atamë Dioso pesaëta pinijicue ne taexanaejava. <sup>37</sup> Daxita pamona taxat anerajutsivi, patsiana xanëjavaberena. Pajivi patsiana xanëjavaberena, apo navecuaitavetsinë tsane. <sup>38</sup> Xanë apo patsinëtsica athëbëvetsica taexanaenexa ëtajamatabëcujirupijijava. Biji rajane patsicajë taexanaenexa pacuenia nitoroba taneitorobinëtsica. <sup>39</sup> Mara pacuene taxa Dioso jitsipa tatoexanaenexaje. Apo jitsipae cajena tatsuabijava caejivi ata anerajutsiviyajuvënëvi. Pamat-acabi icatsia patsianicajë, daxita bajarapamonae toasaëyaexanaenajë icatsia petëpaejavamivecua. <sup>40</sup> Mara pacuene taxa Dioso jitsipaje. Daxita pamona tanetaevi Dioso pexënatonë, nexata itsa nesivanajamatabëcopata, bajarapamonae xainaena matacabi apo peverevereaejava. Bajarapamonae icatsia asaëyaexanaenajë petëpaejavamivecua pamatacabi icatsia patsianicajë, jai Jesús bajarapamonaejavabelia.

<sup>41</sup> “Xanë rabaja athëbëvetsica tapatsipan,” penayabarajajava Jesús jivijavabelia, judíovi baracuacuajaitis pepënëvelia. <sup>42</sup> Nexata judíovi najumaitsi:

—Mara ponë Jesús, Josépijinë pexënatote. Vaxaitsi baja cajena yapëtanetsi paxapijinë, pena ata. Nexata bajaraponë acuenebi pejumaitsijava: “Athëbëvetsica tapatsinë,” pejaijava, najai judíovi Jesús yabara.

<sup>43</sup> Nexata Jesús jumaitsi bajarapamonaejavabelia:

—Jamatabëcuenenavëxaniabiaya pëtsa panebaracuacuajamë tapënëverena.

<sup>44</sup> Itsajivi ata raja apo caëjëpaetsi pijacuata xanëjavaberena tanesivanajamatabëcopatsinexa. Matapania taxa Dioso, taneitorobinëtsica, itsa caëjëpaeyaexanaenatsi, nesivanajamatabëcopatsiana. Pajivi nesivanajamatabëcopatsiana, asaëyaexanaenajë petëpaejavamivecua pamatacabi icatsia patsianicajë. <sup>45</sup> Bajayata Diosojumepaebivimi peyaquinaelivaisi jumaitsi mapacueniaje: “Dioso cajena yapëtaeyaexanaena daxitajivi pexaniajailivaisi,” jai. Nexata pajivi jumecovënëta taxa peyapëtaeyaexanaelivaisi, bajarapajivi xanë ata nesivanajamatabëcuenecopatsiana, jai Jesús judíovijavabelia.

<sup>46</sup> Icatsia Jesús jumaitsi judíovijavabelia:

—Itsajivi ata cajena taxa apo tae. Xanë raja caenënë taxa Dioso taniji. Tsipaji bajaravetsica tapatsinë. <sup>47</sup> Xaniajanë pacuenia pacatsipaebijitsiatsi. Pajivi nesivanajamatabëcopatsiana, xainaena matacabi apo peverevereaejava. <sup>48</sup> Xanë rabaja pitavapannënë. Nexata jivi rajutsianajë matacabi apo peverevereaejava. <sup>49</sup> Bajayata panijasalinaivimi xaevanapa picani manávënëjava petusato nacuata. Itsiata baitsi jane bajarapamonae bajayajebi bajaraxua xaevanapae ata, tëpa itsiata. <sup>50</sup> Xanë raja pacanavajunupaebatsi athëbëvetsica tapatsinë. Pajivi nesivanajamatabëcuenecopatsiana, pepacuene apo tēpae tsane. <sup>51</sup> Xanë rabaja cajena pitavapannënë, athëbëvetsica tapatsinë. Pajivi jumecovënëtsiana tasivatëpaejava pijaneconi yabara, jamatabëcuenaitava tsaponaponae tsane daxitamatacabi javabelianexa. Papan rajutsianajë tanejumecovënëtsivi, tavito rabaja tsane. Navirajutsianajë daxitanacuapijivi pexainaenexa matacabi apo peverevereaejava, nayabarajai Jesús judíovijavabelia.

<sup>52</sup> Nexata judíovi najumeanaenota epämonae bajarapacuenia Jesús pejumaitsijava yabara. Najumaitsi bajarapamonae:

—¿Detsa pacuenia maponë nacanavirajutsipa vajavixaenexaje? Acuenebi raja vajanacanavirajutsijava vajavixaenexa, najai judíovi.

<sup>53</sup> Jesús nexata jumaitsi judíovijavabelia:

—Xaniajanë pacuenia pacatsipaebijitsiatsi. Xanë, Daxitajivi Pematapijinënë. Itsa paxamë apo panevixaemë tsane, apo panejanaapaemënu tsane, nexata matakabi apo peverevereaejava, apo paxainaemë tsane. <sup>54</sup> Pajivi nevixaena, nejanaapaenanua, xainaena matakabi peverevereaejava. Pamatacabi icatsia patsianicajë, bajarapajivi icatsia asaëyaexanaenajë petëpaejavamivecua. <sup>55</sup> Tavito rabaja cajena pepo pexaniajaijava jivi pexaenexa. Tajana rabaja pijinia pepo pexaniajaijava jivi piapaenexa. <sup>56</sup> Pajivi nevixaena, nejanaapaenanua, bajarapajivi yajavaponaponaeajë. Bajarapajivi ata pijinia neyajavaponaponae. <sup>57</sup> Taxa, ponë nitorobica, bajaraponë daxitamatacabijavabelianexa piasaëtsaponaponae. Bajaraponë pejamatabëcueneta xanë ata daxitamatacabijavabelianexa asaënë tsaponaponae. Nexata pajivi nevixaena, bajarapajivi pijinia tajamatabëcueneta asaë tsaponaponae tsane daxitamatacabijavabelianexa. <sup>58</sup> Athëbëvetsica pepatsipan, xua yabara baja pacatsipaebatsi, bajarapapan apo jëpae papan bajayata panijasalinaivimi xaevanapa. Bajarapapanmi bajayajebi xaevanapae ata, bajarapamonaemi itsiata tëpa baja cajena. Biji rajane pajivi xanë nevixaena, ponaponae daxitamatacabijavabelianexa, jai Jesús judíovijavabelia.

<sup>59</sup> Bajarapacuenia Jesús jumaitsi judíovijavabelia livaisi petsipaebijavata Capernaum tomarata, judíovi penacaetuatabibota.

### **Matacabi apo peverevereaejava yabara pelivaisi**

<sup>60</sup> Ayaibitsaëto, pamonaie Jesús pepëta najinavanapa, itsa jumetane Jesús petsipaebilivaisi, apo jumexaniatae. Najumaitsi epämonae:

—Penajumetsënëtsilivaisi saya nacatsipaeba. ¿Jipatsa jumecovënëtsiana? Ajibi cajena, najai epämonae.

<sup>61</sup> Nexata Jesús jamatabëcueneyapëtane pacuenia pepënevëlia baracuaicuaijaitsi. Nexata Jesús yanijoba pepënaponaevitsijavabelia. Jumaitsi:

—¿Apo bepexaniajailivaisi tsaja pajumetaneme patacatsipaebilivaisi? <sup>62</sup> Xanë Daxitajivi Pematapijinënë. ¿Detsa paitsimë tsipae itsa pataejitsipame tatsiajava athëbëabetsia taponaponaeacuamijavabetsia? <sup>63</sup> Espíritu Santo baja cajena pejamatabëcueneta jivi xaina matakabi apo peverevereaejava. Ejjivi raja pejamatabëcueneta apo caëjëpaetsi pexainaenexa matakabi apo peverevereaejava. Patacatsipaebilivaisi baja cajena papecatsijamatabëjonenexa picani, panexainaenexa matakabi apo peverevereaejava. <sup>64</sup> Itsiata baitsi jane paxamëyajuvënëvi abaxë apo nejumecovënëtsi, jai Jesús.

Jesús bajarapalivaisi petsipaebivajënae ata, jamatabëcueneyapëtane pamonaie apo jumecovënëtsijitsiatsi. Jamatabëcueneyapëtanenua tajëvelia ponë canajetsijitsiatsi pijavajabitsaë pecobeyabelia. <sup>65</sup> Nexata Jesús icatsia jumaitsi pepënaponaevitsijavabelia:

—Bajaraxuata cajena pacajumaitsi: “Itsjivi ata raja apo caëjëpaetsi pijacuata xanëjavaberena tanesivanajamatabëcopatsinexa. Matapania taxa Dios,

taneitorobinëtsica, itsa caējēpaeyaexanaenatsi, nesivanajamatabēcopatsiana,” paca-jaitsi, jai Jesús pepēnaponaevitsijavabelia.

<sup>66</sup> Bajara nexata jota ayaibitsaëto Jesús pepēnaponaevitsi vepēnaviabatsi baja. Nexata bajarapamonae pematatsënëa baja apo pēnaponaetsi Jesús. <sup>67</sup> Nexata Jesús yanjoba doce ponēbeje pijajivijavabelia. Jumaitsi:

—¿Paxamë ata tsabaja pajamatabēnaviabame? jai Jesús.

<sup>68</sup> Nexata Simón Pedro jumaitsi Jesúsjavabelia:

—Tajatuxanenë, itsa panaviabajë, ¿jipatsa nexata papēnaponaejitsipajë xam-ëvecua? Xamë rabaja caenëmë panetsipaebame matabaci apo pevereverecaejava pataxainanenexa. <sup>69</sup> Paxanë rabaja pacajumecovënëtatsi patanetsipaebilivaisimë. Pacayapētanetsinua baja cajena Cristocuenemë, Dioso piasaëtsaponaponaenë daxi-tamatabacijavabelianexa pexēnatomë, jai Simón Pedro Jesúsjavabelia.

<sup>70</sup> Jesús nexata jumaitsi pijajivijavabelia:

—Xanë rabaja pacaitapetatsi doce paponëmëbeje. Itsiata baitsi jane paxamëyaju-vënënë, itsanë, dovathi pijajivitonë tsaponapona, jai Jesús.

<sup>71</sup> Bajarapacuenia Jesús itsa jumaitsi, Judas Iscariote, Simón pexēnato, yabara ju-maitsi. Judas Jesús canajetsijitsiatsi pijavajabitsaë pecobeyabelia. Judas rabaja pi-cani Jesús pijajivitonë, doce ponēbejeyajuvënënë.

### **Pacuenia Jesús pejuyapijivi apo jumecovënëtsitsi yabara pelivaisi**

**7** Jesús ponapona Galilea nacujava. Apo jitsipae peponaponaejava Judea nacua-  
java. Tshipaji bajarajota judíovi jamatabëbeyaxuabatsi. <sup>2</sup> Imoxoyo baja peva-  
jēnae pejonenexa fiesta, pafiestamatabaci judíovi bobërëtonë exanabiaba. Nex-  
ata judíovi bajarapabobërëtonëta jinavanapabiaba bajarapafiestamatabaci. <sup>3</sup> Nexata  
Jesús pejuyapijivi junatatsi penaponaenexa bajarapafiestajavabelia. Jesús pejuyapi-  
jivi jumaitsi:

—Pëtsa nacopatame majotaje. Judea nacujavabelia liamëre. Bajarajotalia pijinia  
Dioso pesaëta pinijicuene nexanaponaejava nijajivi tsitaexanaename. <sup>4</sup> Pajivi pex-  
anaejava yabara jitsipa pevënëlivaisitaenexatsi daxitanacuapijivi, bajarapajivi pex-  
anaejava muetsia apo exanae. Nexata pepacuene Dioso pesaëta pinijicuene itsa ex-  
anapona, nexata icatsia pinijicuene tsitaexanaename fiestajavata daxitanacuapi-  
jivi pitabarata. Nexata daxitajivi cayapëtaena, jaitsi Jesús pejuyapijivi.

<sup>5</sup> Jesús pejuyapijivi ata apo jamatabëjumecovënëtsi Cristocuene. Bajarax-  
uata bajarapacuenia pejuyapijivi ata jumaitsitsi. <sup>6</sup> Nexata Jesús jumaitsi  
pejuyapijivijavabelia:

—Abaxë raja tajamatabaci apo netocopiapatsi tanaitajëtsinexa daxitajivijav-  
abelia. Itsiata paxamë apo paitsimë. Paepatota jamatabëpaponame, pacatoxanepana  
paneponaenexa. <sup>7</sup> Mapanacuapijivi cajena acuenebi paxamë papecaitoajava. Itsi-  
ata baitsi jane xanë nitoya. Tshipaji itavetaponajë pibisiacuene pexanavanapaejava.  
<sup>8</sup> Paxamë baja paponare fiestajavabelia. Xanë ra abaxë apo ponaenë. Tshipaji abaxë  
apo netocopiapatsi paepatota ponaejitsianë, jai Jesús pejuyapijivijavabelia.

<sup>9</sup> Bajarapacuenia Jesús pejumaitsicujinae, abaxë Jesús nacopatandu Galilea nacua-  
ata pecotocaevinexa.



### Pacuenia Jesús napona fiestajavabelia yabara pelivaisi

<sup>10</sup> Jesús pejuyapijivi fiestajavabelia pepuaponae, Jesús ata cotocaevi napona fiestajavabelia. Jesús nexata jivibitsaëto tuatuajëta apo naponae muetsia pepatsinexa.

<sup>11</sup> Jesús picani jaitatsi judíovi pevetsivi fiestajava. Najumaitsi judíovi pevetsivi:

—¿Detsa xania jota ponapona bajaraponë? najai judíovi pevetsivi Jesús yabara.

<sup>12</sup> Ayaibitsaëto jivi vëpaxapaxajaiya baracuaicuaijaitsi Jesús. Itsamonae jumaitsi Jesús yabara:

—Pexaniajamatabëcuenenë raja, jai itsamonae.

Itsamonae pijinia jumaitsi:

—Apo pexaniajamatabëcuenenë raja Jesús. Peyamaxëitojorobinë ra saya jivi, jai Jesús yabara.

<sup>13</sup> Itsajivi ata apo cuaicuaijai ayaijumeta Jesús yabara. Tshipaji jumejunava judíovi pevetsivi pejumetaeyanivatsi.

<sup>14</sup> Itsa baja fiesta epatua tsaponae pevereverecaenexa, nexata Jesús joneya temployalia. Taxuxuaba jane baja livaisi petsipaebijava. <sup>15</sup> Judíovi pevetsivi jamatabëcuenenabenajaca itsa jumetane Jesús pepaebilivaisi. Nexata judíovi pevetsivi najumaitsi:

—Maponëje bitso livaisi yapëtane. Picani livaisi apo nacujarubi pacuenia vaxaitsi nacujarubatsi, najai tsanubenae judíovi pevetsivi Jesús yabara.

<sup>16</sup> Jesús nexata jumaitsi judíovi pevetsivijavabelia:

—Tatsipaebilivaisi raja apo tajamatabëcuenepijilivaisi. Dioso raja, ponë nitorobica, bajaraponë pejumelivaisi tsipaebaponajë. <sup>17</sup> Pajivi jamatabëexana Dioso pejisipaecuenia, bajarapajivi yapëtaena pepacuene Dioso pejumelivaisi tatsipaebijava. Nexata yapëtaenanua tajamatabëcuenepijilivaisi itsa tsipaebajë. <sup>18</sup> Pajivi tsipaeba ëpejamatabëcuenepijilivaisi, tsipaeba saya jivi peyaiyataenexatsi. Itsiata baitsi jane pajivi tsipaeba jivi peyaiyataenexa Dioso, bajarapajivi cajena tsipaeba pexaniajailivaisi. Bajarapajivi apo yamaxëitojorobi jivi. Tshipaji pacuenia Dioso itorobatsi, tsipaeba, jai Jesús judíovi pevetsivijavabelia.

<sup>19</sup> Jesús icatsia jumaitsi judíovijavabelia:

—Moiséspijinë baja cajena bajayata yaquina Dioso penajumecopatsilivaisi jivi pejumecovënëtsinexa. Itsiata baitsi jane paxamëyajuvënëjivi, caejivi ata, apo jumecovënëtsi bajarapalivaisi. Bajarapalivaisi pacaitavetsi ata jivi panebeyaxuabiyana, ¿detsa xuajitsia itsiata xanë jamatabëpanebeyaxuabame? jai Jesús judíovijavabelia.

<sup>20</sup> Nexata judíovi jumaitsi Jesúsjavabelia:

—Dovathi baja cajena yajavaponaponame. Itsajivi ata raja apo jamatabëcabeyaxuabi, jai judíovi.

<sup>21</sup> Jesús nexata jumaitsi bajarapamonaejavabelia:

—Caejavayo Dioso pesaëta pinijicuenae taexanaejava exanajë penacueraevetsimatocabita. Nexata itsa pataneme bajarapacuene, daxita paxamë pajamatabëcuenenabenajacame penacueraevetsimatocabita taexanaexae bajarapacuene. <sup>22</sup> Paxamë ata penacueraevetsimatocabita ata panacuenebabiabame. Tshipaji penacuetonëyo paperabëcaucutabiabame penacueraevetsimatocabita ata ocho pamatacabibeje itsa xaina penaexanaecujinae. Baitsi paboupiiperabëcaucutabiabame, Moiséspijinë baja cajena papecaitorobicuene. (Itsiata Moiséspijinë apo taxuxuabi bajarapacuene. Bajaraponëmi cajena pevajënaeya ata, panijasalinaivimi taxuxuaba bajarapacuene.)

<sup>23</sup> Bajarapacuenia penacuetonëyo paperabëcaucutabiabame penacueraevetsimatacabitata, panejumecovënëtsinexa Moiséspijinë pitorobicuenia. ¿Detsa nexata xuajitsia xanë panebaraanaepaname penacueraevetsimatacabitata pebi tajamatejemaaxanaejava yabara? <sup>24</sup> Xaniavaetsia abaxë payapëtaenejevamë itsajivi pibisiacuene pexanaejava, pëtsa abaxë pananeconitsiaexaname. Matapania xaniavaetsia payapëtaename, payanijobianamenua, itsa baja xaniajai naneconita, baja rajane pananeconitsiaexanaename, jai Jesús judfóvijavabelia.

### **Pacuenia Jesús navajunupaeba itsaverena pata yabara pelivaisi**

<sup>25</sup> Itsamonae Jerusalén tomarata pejinavanapaevi najumaitsi Jesús yabara:

—¿Matsa ponë apo jaitarutsitsi pebeyaxuabinexatsije? <sup>26</sup> ¡Pataema! Bajaraponë cuaicuaijai tsanucea daxitajivi pitabarata. Itsiata itsajivi ata apo jumeitavetsi. Vajanacaevetsivi ata meta jumecovënëta bajaraponë pepacuene Dioso athëbëvetsica pitorobijavatsitsica jivi pecapanepaenexa. Bajaraxuata bajarapamonae apo jumeitavetsi. <sup>27</sup> Vaxaitsi cajena yapëtanetsi itsaverena pata maponëje. Nexata acuenebi pijacuata: “Cristonë raja,” pejajjava. Tspajji Cristo yabara tajëvelia jumaitsi mapacueniaje: “Itsajivi ata apo yapëtae tsane itsaverena patsijitsia Cristo,” jai, najai Jerusalén tomarapijivi Jesús yabara.

<sup>28</sup> Nexata Jesús livaisi petsipaebijavata templobota, jumetane bajarapamonae pebaracuaicuajijavatsi. Nexata Jesús ayaijumeta jumaitsi bajarapamonaejavabelia:

—Xanë yabara pajumaitsimë: “Yapëtanetsi bajaraponë. Yapëtanetsinua itsaverena pata bajaraponë,” pajamë. Itsiata baitsi jane apo patsinë tajamatabëcueneta. Biji rajane taneitorobinëtsica ponapona athëbëtatsia. Paxamë cajena apo payapëtaemë bajaraponë. <sup>29</sup> Xanë yapëtanijji bajaraponë. Tspajji athëbëvetsica tapatsinë. Bajaraponë baja cajena nitorobica mapanacuayabetsicaje, jai Jesús bajarapamonaejavabelia.

<sup>30</sup> Nexata picani Jesús bajarapamonae jamatabëvaetabatsi penaneconitsiaexanaenexatsi. Itsiata abaxë itsajivi ata apo vaetabitsi. Tspajji abaxë Jesús apo tocopiapatsitsi pijamatacabi pevaetabinexatsi. <sup>31</sup> Itsiata baitsi jane bajarapamonaejajuvënëvi ayaibitsaëto jumecovënëta Cristocuene. Nexata bajarapamonae najumaitsi:

—Itsa pina Cristo patsianica, Dioso pesaëta pinijicuene pexanaejava exanaena. Bajara maponë pepacuene Cristoje, ponë Dioso athëbëvetsica itorobijitsiatsica jivi pecapanepaenexa. Tspajji nacatsitajëta pesaë. Pinijicuene pexanaejava exana Dioso pesaëta. Tspajji cajena itsanë ata mapanacuata apo caëjëpaetsi bajarapitsipinijicuene pexanaenexa, najai bajarapamonae Jesús yabara.

### **Pacuenia fariseovi itoroba policíavi Jesús pevaetabinexatsi yabara pelivaisi**

<sup>32</sup> Fariseovi jumetane jivi pejumaitsijava: “Pepacuene rabaja maponë Cristoje,” pejajjava Jesús yabara. Nexata fariseovibeje judfóvi penamatacaitorobivibeje najamatabëcuenejëpabeje pitorobinexa policíavi. Nexata policíavi pona templobojavabelia pevaetabinexatsi picani Jesús. Itsiata abaxë Jesús apo vaetabitsi. <sup>33</sup> Jesús nexata templobota jumaitsi judfóvijavabelia:

—Abaxë raja bajayayo itsiata pacayajavaponaponaenatsi. Bajaraxuacujinae jane baja naviatsianiajë taneitorobinëtsicajavabetsia. <sup>34</sup> Paxamë picani panejaittsianame. Itsiata apo panecaxitajarabimë tsane. Tspajji apo pacacaëjëpae tsane paneponaenexa itsabetsia ponaejitsianë, jai Jesús judfóvijavabelia.

<sup>35</sup> Nexata judfóvi nayanijoba ëpamonae.

—¿De tsaeta belia maponë pijaponaejitsiaje peponaenexa, itsajota vaxaitsi apo caxitajarabijitsiatsi? Ponaejitsia raeta griegovi pijatomaranëjavabelia, itsabelia judíovi jinavanapa. Griegovi raeta livaisi tsipaebijitsia Jesús. <sup>36</sup> Jesús nacajumaitsi: “Paxamë picani panejaitsianame. Itsiata apo panecaxitajarabimë tsane. Tsipaji apo pacacaëjèpae tsane paneponaenexa itsabetsia ponaejitsianë,” nacajai. ¿De tsaeta pitsijamatabëcuene yabara bajarapacuenia Jesús nacajumaitsi? najai judíovi.

### **Apo pevereverecaemera yabara pelivaisi**

<sup>37</sup> Pafiestamatacabi judíovi bobërëtonë exanabiaba, pecopiarucaematacabi, jivi bitso najamatabëcueneruviabiaya bajinavanapa. Nexata bajarapamatacabi jivi ayaibitsaëto pitabarata Jesús nonotabapuna. Ayaijumeta Jesús jumai tsanucæ:

—Pajivi mera jitsipa, xanëjavaberena ponae piapaenexa. <sup>38</sup> Dioso pejumelivaisibaxutota jumaitsi mapacueniaje: “Pajivi nesivanajamatabëcuenecopatsiana, bajarapajivi pejamatabëëthëtota xainaena daxitamatacabi pepitsaparucaemera. Baitsi bajarapajivi asivaya taeyabiabiana itsamonae ata. Nexata jamatabëcueneyavenonabiabiana itsamonae ata tanesivanajamatabëcuene copatsinexa, bajarapamonae ata pexainaenexa matacabi apo pevereverecaejava,” jai Jesús judíovijavabelia.

<sup>39</sup> “Pajivi nesivanajamatabëcuenecopatsiana, bajarapajivi pejamatabëëthëtota xainaena daxitamatacabi pepitsaparucaemera,” itsa jai Jesús, jumaitsi Espíritu Santo yabara. Baitsi pajivi jumecovënëta Jesús petsipaebilivaisi, tsijamatabëecaenatsi Espíritu Santo. Itsiata baitsi jane abaxë Espíritu Santo apo patsitsica. Tsipaji abaxë Jesús apo ponae athëbëabetsia.

### **Pacuenia daxitajivi Jesús yabara apo najamatabëcuenejèpae yabara pelivaisi**

<sup>40</sup> “Pajivi nesivanajamatabëcopatsiana, bajarapajivi pejamatabëëthëtota xainaena daxitamatacabi pepitsaparucaemera,” pejaijava Jesús, jivi itsa jumetane, itsamonae jumaitsi:

—Xaniajai rabaja. Maponë Diosojumepaebinë profetanëje, ponë copiaevetavana-patsi pepatsijavanexatsica, jai bajarapamonae.

<sup>41</sup> Itsamonae pijinia jumaitsi:

—Jume raja. Bajara maponë Cristoje, ponë Dioso athëbëvetsica itorobijitsiatsica jivi pecapanepaenexa, jai itsamonae.

Itsiata itsamonae jumaitsi:

—¡Apo Cristo raja! Tsipaji Cristo Galilea nacuaverena apo patsi tsipae. <sup>42</sup> Dioso baja cajena pejumelivaisibaxutota jumaitsi pacuenia Davidpijinë pemomoxiyajuvënënë naexanaejitsia Cristo. Bajaraponë peneta naexanaena Belén tomarata, patomarata Davidpijinë bajayata ponapona, jai bajarapamonae.

<sup>43</sup> Bajarapacuenia nexata jivi ayaibitsaëto apo najamatabëcuenejèpae Jesús yabara. <sup>44</sup> Itsamonae picani Jesús jamatabëvaetabatsi penaneconitsiaexanaenexatsi. Itsiata itsajivi ata apo vaetabitsi.

### **Pacuenia Jesús yabara judíovi pevetsivi apo jumecovënëtsi Cristonëcuene yabara pelivaisi**

<sup>45</sup> Papolicíavi picani fariseovibeje judíovi penamatacaitorobivibeje itorobalia Jesús pevaetabinexatsi, itsiata apo vaetabitsi. Naviabalia baja cobesa. Nexata

fariseovibeje judíovi penamatacaitorobivibeje jumaitsi policíavijavabelia Jesús yabara:

—¿Detsa xuajitsia apo pacaponaemërena bajaraponë? jai fariseovibeje judíovi penamatacaitorobivibeje.

<sup>46</sup>Nexata policíavi jumaitsi:

—Bajaraponë Dioso pitorobicueniatsi, xaniavaetsia jivi livaisi tsipaeba, itsajivi ata apo pepaebicuenia. Bajaraxuata apo pavaetabinë patacaponaenexarena, jai policíavi.

<sup>47</sup>Nexata fariseovi jumaitsi:

—¿Paxamë ata tsabaja pacayamaxëitoroba bajaraponë? <sup>48</sup>Caenë ata vajanacaevetsiviyajuvënënë, fariseoviyajuvënënë ata, apo jumecovënëtsi baja cajena bajaraponë Cristonëcuene. <sup>49</sup>Pamonae jumecovënëta bajaraponë Cristonëcuene, apo yapëtae pacuenia bajayata Dioso Moiséspijinëta penajumecopatsilivaisi jumaitsi jivi pejumecovënëtsinexa. Nexata bajarapamonae apo peyapëtaexae bajara-palivaisi, naneconita Diosojavabelia. Nexata Dioso naneconitsiaexanaenatsi, jai fariseovi policíavijavabelia Jesús Cristonëcuene pejumecovënëtsivi yabara.

<sup>50</sup>Nicodemo, ponë copiaya Jesús taeyojopalia meravi, bajaraponë naeca bajara-jota. Bajaraponë Nicodemo fariseoviyajuvënënë. Nicodemo nexata jumaitsi pevëna fariseovijavabelia:

<sup>51</sup>—Vajalivaisi cajena nacaitaveta itsajivi ata vajananeconitsiaexanaeyaniva, abaxë copiaya xaniavaetsia navajunupaebinejeva paneconi xaina bajarapajivi, jai Nicodemo.

<sup>52</sup>Nexata bajarapamonae jumaitsi Nicodemojavabelia:

—¿Xamë ata tsabaja Galilea nacuapijinëmë necajumecovënëtsi bajaraponë Cristonëcuene? Lebare Dioso pejumelivaisibaxuto. Yapëtaename pacuenia jumaitsi. Caenë ata cajena Diosojumepaebinë profeta apo patsi Galilea nacujavaverena, jai bajarapamonae.

### **Petiriva pibisiacuene pexanaeva pamona pepëya yabara pelivaisi**

<sup>53</sup>Fariseovibeje judíovi penamatacaitorobivibeje pebijataecujinae policíavi, fariseovi baja caenë canacujitsia naviaba pijabonëjavabelia.

**8** Jesús pona Olivovënë tsutojavabelia. <sup>2</sup>Nexata meravia pitsijavata, bajayacunua, Jesús icatsia naviarena temploboyaberena. Nexata daxitajivi itaxutuanacaetuanatsi. Nexata Jesús ecojopa templobota. Livaisi tsipaeba bajarapamonaejavabelia. <sup>3</sup>Nexata temploboyaberena judíovi pecujarubivi, fariseovi yajava, caparena petiriva Jesúsjavaberena. Bajarapamonae petiriva vaetaba pamona pepëya itsanëjavabelia pivitota pibisiacuene pexanaponaponaejavata. Nexata petiriva nutatsi daxitajivi pitabarata. <sup>4</sup>Nexata judíovi pecujarubivi, fariseovi yajava, jumaitsi Jesúsjavabelia:

—Jesús, mara povaje pavaetabajë pamona pepëya itsanëjavabelia pibisiacuene pexanaponaponaejavata. <sup>5</sup>Dioso Moiséspijinëta penajumecopatsilivaisi nacaitoroba baja cajena vajatseconaenexa ibotonëta bajarapitsiva vajabeyaxuabinexa bajarapacuenia. ¿Detsa paitsinë tsane mapovaje? jai bajarapamonae Jesúsjavabelia.

<sup>6</sup>Bajarapamonae jumaitsi bajarapacuenia Jesús saya pejamatabëcueneëjëtsinexatsi. Nexata Dioso Moiséspijinëta penajumecopatsilivaisivecua, saicayacuenia, Jesús itsa jumecanaviata, bajarapamonae neconitsijitsiatsi picani. Itsiata Jesús jamatabëcueneyapëthane pacuenia bajarapamonae sivanajamatabëxainatsi. Nex-

ata Jesús ira taeyecaxuaba. Pecobesitota ira yaquineca. <sup>7</sup>Bajarapamonae bitso yanijobapona Jesúsjavabelia. Nexata jane baja Jesús nonotapuna. Jumaitsi bajarapamonaejavabelia:

—Ponë paxamëyajuvënënë pibisiacue ne apo pexanaenë, bajaraponë copiata iboto bixanae bajarapovajavabelia, jai Jesús.

<sup>8</sup>Nexata icatsia Jesús ecareca. Ira taeyeca icatsia. Ira yaquineca icatsia. <sup>9</sup>Nexata bajarapamonae itsa jumetane bajarapacuenia Jesús pejumaitisijava, bajarapamonae najamatabënapita, caenë canacujitsia, pibisiacue pexanavanapaejava. Nexata bajarapamonae, caenë canacujitsia, templobovecua pitsapapona. Copiava perujuvi pitsapa. Bajaraxuacujinae pevëjëavi pitsapa. Itsa baja daxita pitsapa, caenë Jesús templobota nacopateca petiriva yajava. Bajarapova abaxë nuca bajarajota. <sup>10</sup>Nexata Jesús itsa nonotapuna, caeva taenuta. Nexata Jesús jumaitsi petirivajavabelia:

—¿Detsa belia pona pamona caneconita picani? ¿Itsanë ata tsaja apo cabixanae ibotota nijaneconi yabara pecananeconitsiaexanaenexa? jai Jesús petirivajavabelia.

<sup>11</sup>Nexata bajarapova jumaitsi:

—Jume raja. Caenë ata apo nebixanae ibotota, jai bajarapova.

Nexata Jesús jumaitsi:

—Xanë ata apo cananeconitsiaexanaetsi. Ponare baja. Pëtsa baja icatsia pibisiacue exaname, jai Jesús bajarapovajavabelia.

### **Jesús mapanacuapijivije pexaniajailivaisita pejamatabëcueneitayotsinë yabara pelivaisi**

<sup>12</sup>Jesús icatsia templobota jumaitsi jivijavabelia:

—Xanë raja pexaniajailivaisita daxitanacuapijivi jamatabëcueneitayotsianajë. Pajivi nepënaponaena, bajarapajivi jamatabëcueneitayotsianajë. Nexata xainaena matababi apo peverevereaejava. Bajarapajivi itsamatabacijavabelia ata apo jamatabëcueneitaquiri tsane, jai Jesús jivijavabelia.

<sup>13</sup>Nexata fariseovi jumaitsi Jesúsjavabelia:

—Xamë saya nijacuata najamatabëcuenelivaisipaebame. Nexata apo payapëtaenë nexaniajaicue. Bajaraxuata apo pacajumecovënëtsitsi, jai fariseovi.

<sup>14</sup>Jesús nexata jumaitsi fariseovijavabelia:

—Najamatabëcuenelivaisipaebi atanë tajacuata, itsiata cajena xaniajanë. Tsipaji xanë yapëtaniji itsaverena patajë. Itsabelia ata ponaejitsianë, yapëtaniji. Itsiata paxamë apo payapëtaemë itsaverena patajë. Itsabelia ata ponaejitsianë, apo payapëtaemë. <sup>15</sup>Paxamë paexanabiabame pacuenia baexana mapanacuapijivije. Itaxutojema jivi pananeconitsiaexanabiabame payapëtaenejevamë pepacue paneconivajëto xaina. Xanë abaxë apo naneconitsiaexanaenë itsajivi ata. <sup>16</sup>Itsiata itsamatababi, itsa naneconitsiaexanaenajë Diosojavabelia pijaneconi pexainaevi, naneconitsiaexanaenajë paneconivajëtota xaina. Tsipaji caenënë apo naneconitsiaexanaenë tsane. Taxa Dioso, ponë nitorobica, bajaraponë neyajava tsane jivi tananeconitsiaexanematababi. <sup>17</sup>Dioso Moiséspijinëta penajumecopatsilivaisi peyaquinaebaxutota jumaitsi mapacueniaje: “Palivaisi anijajivibeje najumejëpaeya paebabeje, bajarapalivaisi bepajumecovënëtame,” jai. <sup>18</sup>Xanë baja cajena najamatabëcuenelivaisipaebajë. Taxa ata, ponë nitorobica, nevajunupaeba. Nexata baja panijanënëbeje najumejëpaeya pacatsipaebatsibeje xanë talivaisi, jai Jesús fariseovijavabelia.

<sup>19</sup>Nexata fariseovi jumaitsi:

—¿Detsa jota nexata ponapona axa? jai.

Nexata Jesús jumaitsi fariseovijavabelia:

—Paxamë ra cajena apo paneyapëtaemë. Taxa ata apo payapëtaemë. Itsa paneyapëtaejitsipame, nexata taxa ata payapëtaejitsipame, jai Jesús fariseovijavabelia.

<sup>20</sup> Bajarapacuenia Jesús jumaitsi livaisi petsipaebijavata templobota. Itsajota ofrendacuenia palata pejebabiabicajonianë bobena, bajarajota Jesús livaisi tsipae-banuca. Itsiata abaxë itsajivi ata Jesús apo vaetabitsi penaneconitsiaexanaenexatsi. Tsiptaji abaxë pijamatacabí apo tocopiapatsitsi pevaetabinexatsi.

**Pacuenia Jesús tajëvelia jumaitsi: “Paxamë apo pacacaëjëpae tsane paneponaenexa itsabelia ponaejitsianë,” jai yabara pelivaisi**

<sup>21</sup> Jesús icatsia templobota tajëvelia jumaitsi fariseovijavabelia:

—Xanë pacavecuaponaenatsi. Nexata paxamë panejaitsoniane. Paxamë pibisiacuenene paneexanaeconi, Dioso apo pacavecuajibiaexanae tsane. Nexata panijaneconi payajavatëpaename. Bajaraxuata paxamë apo pacacaëjëpae tsane paneponaenexa itsabelia ponaejitsianë, jai Jesús fariseovijavabelia.

<sup>22</sup> Nexata judíovi jamatabëcuenenavëxaniabiaya najumaitsi Jesús yabara:

—Covë nabeyaxuabijitsia. Bajaraxuata nacajumaitsi: “Apo pacacaëjëpae tsane paxamë paneponaenexa itsabelia ponaejitsianë,” nacajai, najai judíovi.

<sup>23</sup> Nexata Jesús jumaitsi judíovijavabelia:

—Paxamë baja cajena mapanacuapijivimëje. Xanë saicaya athëbëvetsica tapatsinë. Paxamë mapanacuata panejinavanapaevije. Xanë raja maapo panacuapijinëneje. <sup>24</sup> Bajaraxuata pacajumaitsi: “Paxamë pibisiacuenene paneexanaeconi, Dioso apo pacavecuajibiaexanae tsane. Nexata panijaneconi payajavatëpaename,” pacajaitsi. Nexata paxamë panijaneconi payajavatëpaename itsa apo panejume-covënëtsimë patacavecuajibiaexanaejavanexa pibisiacuenene paneexanaeconi, jai Jesús fariseovijavabelia.

<sup>25</sup> Nexata fariseovi jumaitsi Jesúsjavabelia:

—¿Detsa xamë ponëmë? jai.

Jesús nexata jumaitsi:

—Pacanavajunupaebatsi rabaja. Tataxuxuabijavaveliacujinae livaisi patacatsipae-bijava, pacanavajunupaebaponatsi baja cajena. <sup>26</sup> Paxamë bitso pibisiacuenene paexanabiabame. Nexata ayailivaisi xainajë itsamonaejavabelia patacavajunupaebinexa pibisiacuenene paneexanaejava. Nexata pibisiacuenene paneexanaeconi yabara, necaëjëpa picani patacananeconitsiaexanaenexa. Itsiata baitsi jane ponë nitorobica, petsipaebinë pexaniajailivaisi. Pacuenia bajaraponë netsipaeba xanëjavaberenena, bajarapacuenia juya xanë tsipaebajë mapanacuapijivijavabeliaje, jai Jesús fariseovijavabelia.

<sup>27</sup> Itsiata baitsi jane fariseovi apo jumeypëtae bajarapacuenia Jesús petsipaebijava paxa Dioso yabara. <sup>28</sup> Bajaraxuata Jesús jumaitsi bajarapamonaejavabelia:

—Itsa xanë, Daxitajivi Pematapijinëne, paneyotarutsiaexanaename cruza javabelia patanebeyaxuabiaexanaenexamë, nexata matapania bajarapamatacabí paneyapëtaename ponëcuenenë. Nexata bajarapamatacabí payapëtaenamenua patacatsipaebijava apo tajamatabëcuenepijilivaisi. Biji rajane pacuenia taxa copiata netsipaeba, bajarapacuenia juya pacatsipaebatsi paxamëjavabelia. <sup>29</sup> Taxa, ponë ni-

torobica, neyjavaponapona baja cajena. Tajaepato apo neponaponaeyaexanae. Tsi-paji exanabiabajë pacuene yabara taxa nesivajamatabëcuenebarëyajitsia, jai Jesús bajarapamonaejavabelia.

<sup>30</sup>Itsa Jesús jumaitsi bajarapacuenia, ayaibitsaëtoxaneto judfovi jumecovënëtatsi Cristonëcuene: “Xaniajai cajena. Maponëje Dioso itorobicatsi,” jamatabëjai judfovi Jesús yabara.

### **Dioso pexi yabara pelivaisi, dovathi ata pexi yabara pelivaisi**

<sup>31</sup>Pajudfovi jumecovënëta Cristonëcuene, bajarapajudfovijavabelia Jesús jumaitsi:

—Itsa paxamë tsiteca pajumecovënëtavanapaename patacatsipaebilivaisi, nexata baja pepacuene patajajivimë tsane. <sup>32</sup>Nexata palivaisi pacatsipaebatsi, payapëtaename baja pexaniajailivaisicuene. Nexata baja itsa payapëtaename bajarapapexaniajailivaisi, pacopabianame baja itsanë papecaitorobicuenia panetoexanabiabijavami, jai Jesús bajarapajudfovijavabelia.

<sup>33</sup>Nexata pajudfovi apo jumecovënëtsi Cristonëcuene, jumaitsi Jesúsjavabelia:

—Paxanë rabaja cajena Abrahampijinë papemomoxinë. Paxanë dajubicuenia apo panecanajetsi itsanëjavabelia amoneya patatonacuenebabiabinexa. “Pacopabianame baja itsanë papecaitorobicuenia panetoexanabiabijavami,” itsa panejamë, ¿detsa pitsilivaisi yabara panejumaitsimë? jai Jesúsjavabelia pajudfovi apo jumecovënëtsi Cristonëcuene.

<sup>34</sup>Jesús nexata jumaitsi bajarapajudfovijavabelia:

—Xaniajanë pacuenia pacatsipaebijitsiatsi. Daxita pamonae pibisiacuene pexanaevi, jamatabëcueneitorobabiabatsi dovathi pejamatabëcueneta. <sup>35</sup>Ponë itsanë pijajivitonë naexana, bajaraponë itsiata pijatuxanenë apo pexiyajuvënënë. Ponë petuxanenë pexiyajuvënënë, daxitamatacabijavabelianexa petuxanenë pexë nato tsaponapona. <sup>36</sup>Nexata pijinia xanë, Dioso pexënatonë, itsa copiarucaeyaexanaenajë dovathi papecaitorobabiabijavami, copiarucaeyaexanaenajë daxitamatacabijavabelianexa. Nexata baja dovathi apo pacaitorobabiabi tsane matavëjêa pibisiacuene paneexanaenexa. <sup>37</sup>Yapëtaniji cajena Abrahampijinë papemomoxicuene. Itsiata baitsi jane jamatabëpanebeyaxuabame. Tsi-paji apo panejumecovënëtsimë patacatsipaebilivaisi. <sup>38</sup>Xanë rabaja pacuenia taxa netsitajëta, jivi tsipaebabiabajë. Paxamë ata paexanabiabame pacuenia paneaxajivi pacaitoroba, jai Jesús judfovijavabelia.

<sup>39</sup>Nexata judfovi jumaitsi:

—Pataxajivi baja cajena pexaniajamatabëcuenevi. Abrahampijinë rabaja cajena patamopijinëmi, patajasalinainëmi, jai judfovi.

Jesús nexata jumaitsi bajarapamonaejavabelia:

—Itsa pepacuene paxamë Abrahampijinë papemomoximë tsipae, paexanaejitsipame peneta pacuenia exanabiaba Abrahampijinëmi. <sup>40</sup>Pacatsipaebi atatsi pexaniajailivaisi, pacuenia taxa Dioso netsipaeba, itsiata paxamë jamatabëpanebeyaxuabame. ¡Abrahampijinë cajena caeto ata apo exanae bajarapitsicuene! <sup>41</sup>Paxamë paexanabiabame pacuenia itsanë paneaxa pacaitorobabiaba, jai Jesús judfovijavabelia dovathi yabara.

Nexata judfovi jumaitsi:

—Paxanë cajena mapanacuataje pataenajivi apo panenacoxitsi itsanëjavabelia pataxajivivecua pibisiacuene pexanaecujinae. Paxainajë caenë pataxa, athëbëpijinë. Pataxa rabaja Dioso, jai bajarapamonae.

<sup>42</sup> Nexata Jesús jumaitsi bajarapamonaejavabelia:

—Itsa pepacuene Dioso paneaxa tsipae, nexata paxamë asivaya panetaejitsipame. Tsipaji Diosojavavetsica tapatsinë. Majotaje ponaponajë. Xanë raja saya tamatabëcueneta apo patsinëtsica. Dioso raja nitorobica. <sup>43</sup> ¿Detsa xuajitsia paxamë apo panejumeyapëtaemë patacatsipaebilivaisi? Apo pajitsipaemë patanenamuxunaevetsinexamë bajarapalivaisi. <sup>44</sup> Paxamë rabaja cajena paneaxa dovathi. Papijajivimë. Pejitsipaecueria jamatabëpatoexanabiabame. Dovathi rabaja cajena jivibenë Dioso nacua pexanaejava petaxuxuabijavaveliacujinae. Pexaniajailivaisi apo najamatabëxainae. Caeto ata cajena pexaniajailivaisi apo paebi. Itsa najumetsënëta, bajaraponë pijacujiru baja cajena. Tsipaji penajumetsënëtsinë. Jivi ata najumetsënëtsiaexanabiaba. <sup>45</sup> Xanë baja cajena pexaniajailivaisi pacatsipaebatsi. Itsiata apo panejumecovënëtsimë. <sup>46</sup> ¿Jipatsa paxamëyajuvënënë netane pibisiacuene taexanaejava? Ajibi cajena. Itsacuenejavayo ata, xua pibisiacuene, apo exanaenë. Pexaniajailivaisi pacatsipaebabiabi atatsi, ¿detsa xuajitsia itsiata apo panejumecovënëtsimë? <sup>47</sup> Pajivi Dioso pijajivitonë, bajarapajivi namuxunaeveta Dioso pejumelivaisi. Itsiata baitsi jane paxamë Dioso apo papijajivimë. Bajaraxuata apo pajitsipaemë patanenamuxunaevetsinexamë Dioso pejumelivaisi, jai Jesús judíovijavabelia.

### **Pacuenia Cristo, ponë Dioso itorobica, ponapona baja cajena Abrahampijinë pevajënaeya ata yabara pelivaisi**

<sup>48</sup> Judíovi jumaitsi Jesúsjavabelia:

—Paxanë ita pacajumaitsi: “Xamë raja Samaria nacuapijinëmë, dovathi neyjavaponaponaenë,” ita pacajaitsi, paxaniajanë cajena, jai judíovi Jesúsjavabelia.

<sup>49</sup> Jesús nexata jumaitsi judíovijavabelia:

—Xanë cajena dovathi apo yajavaponaponaenë. Xanë taxa Dioso yayiyataeya ponaponajë. Itsiata paxamë apo paneyaiyataemë. <sup>50</sup> Xanë raja xua exanaponajë, apo exanaenë jivi saya taneyaiyataenexa. Itsiata baitsi jane taxa netojitsipa jivi taneyaiyataenexa. Bajaraponë naneconitsiaexanaena pamonaepo apo neyiyatae. <sup>51</sup> Xaniajanë pacuenia pacatsipaebijitsiatsi. Pajivi jumecovënëtsiana tatsipaebilivaisi, bajarapajivi tēpae ata tsane, pepacujiru apo tēpae tsane daxitamatacabijavabelianexa. Nexata xainaena matababi apo peverevereaejava, jai Jesús judíovijavabelia.

<sup>52</sup> Nexata judíovi jumaitsi:

—Aeconoxae pepacuene dovathi pecayajavaponaponaejava, payapëtaniji. Tsipaji Abrahampijinëmi tēpa. Daxita Diosojumepaebivimi profetavi ata, tēpa. Itsiata xamë jumaitsimë tsaponae: “Pajivi jumecovënëtsiana tatsipaebilivaisi, bajarapajivi tēpae ata tsane, pepacujiru apo tēpae tsane daxitamatacabijavabelianexa,” jamë tsaponae. <sup>53</sup> Vamopijinëmi Abrahampijinë, ayaijamatabëcuenenëmi ata, bajayata tēpa. Daxita Diosojumepaebivimi profetavi ata tēpa. ¿Xamë tsaja Abrahampijinëmi matatoxenetsia beayaijamatabëcuenenëmë nataneme? ¿Detsa beponëmë nataneme? jai judíovi.

<sup>54</sup> Jesús nexata jumaitsi judíovijavabelia:

—Itsa xanë tajacuata najumaitsinë tsipae: “Xanë bitso ayaijamatabëcuenenënë,” ita janë tsipae, nexata ajumematamobinë tsipae. Itsiata baitsi jane taxa Dioso, ponë yabara paxamë ata: “PatajaDioso raja,” pajamë, bajaraponë neyaiyatane.



<sup>55</sup> Itsiata paxamë apo payapëtaemë bajaraponë. Xanë cajena yapëtaniji. Nexata xanë Dioso yapëtae atanë, itsa yavajunuaxainaejitsipajë, “Apo yapëtaenë cajena bajaraponë,” itsa janë tsipae Dioso yabara, najumetsënëtsipajë pacuenia paxamë panajumetsënëtabiabame. Itsiata xanë pepacuene Dioso yapëtaniji. Jumecovënëtajënuua pacuenia Dioso nitorobabiaba. <sup>56</sup> Bajayata Abrahampijinë panijasalinainëmi jamatabëcuenebarëya. Tspaji tajëvelia yapëtane mapanacuayabetsicaje tapatsijavanexatsica. Nexata Abrahampijinëmi nesivajamatabëcuenebarëya baja cajena, jai Jesús judíovijavabelia.

<sup>57</sup> Nexata judíovi jumaitsi Jesúsjavabelia:

—Abaxë raja xamë apo xainaeëmë cincuenta pavaibeje ata. ¿Detsa pacuenia nexata taejitsipame Abrahampijinë? Abrahampijinë baja cajena pepo bajayatami tëpa, jai judíovi Jesúsjavabelia jumeabiaya.

<sup>58</sup> Jesús nexata jumaitsi judíovijavabelia:

—Xaniajanë pacuenia pacatsipaebijitsiatsi. Xanë raja cajena ponaponajë Abrahampijinë pevajënaeya ata, jai Jesús judíovijavabelia.

<sup>59</sup> Nexata bajarapacuenia Jesús itsa jumaitsi judíovijavabelia, judíovi nota ibotonë. Tseconaejitsiatsi picani Jesús ibotonëta. Itsiata baitsi jane Jesús namatayatsia pitsapa templobovecua bajarapamonae petuatuajëalia. Jesús baja nexata judíovi itsajavabelia vecuapona.

### **Pacuenia Jesús itaxutoxanepanaeyaexana ecënaenë yabara pelivaisi**

**9** Jesús najetaruca namutua. Nexata tane penaexanaejavaveliacujinae bitso pitaxutotsëcënaenë. <sup>2</sup> Nexata Jesús pijajivi jumaitsi Jesúsjavabelia:

—Patajatuxanenë, ¿detsa meta xuajitsia maponë naexana bitso pitaxutotsëcënaenëje? ¿Paxa tsaeta pibisiacuene pexanaejamatabëcuene? Itsa jume, ¿pena tsaeta pibisiacuene pexanaejamatabëcuene maponë itaxutotsëcënaeje? Itsa jume, ¿baja tsaeta ponë pijacuata pibisiacuene natoexana? jai Jesús pijajivi.

<sup>3</sup> Jesús nexata jumaitsi pijajivijavabelia:

—Jume raja. Mara ponëje paxa, pena ata, pibisiacuene pexanaejamatabëcuene, apo itaxutotsëcënaeje. Naexana bitso pitaxutotsëcënaenë saya daxitajivi petanexatsi Dioso icatsia pitaxutoxanepanaeyaexanaejavatsi. <sup>4</sup> Payapëtaneme rabaja mapacueneje. Matabacabita xanepana vajanacuenebinexa. Itsa baja meravì, acuenebi vajanacuenebinexa. Bajara pijinia itsinë xanë ata. Taponaponaematacabì xanepana tatonacuenebinexa ponë nitorobica. Itsa pamatacabì nebeyaxuabiana, acuenebi tsane tatonacuenebinexa. <sup>5</sup> Abaxë paepatojebi ponaponaenajë mapanacuataje, daxitajivi jamatabëcueneitayotsianajë pexaniajailivaisita, jai Jesús pijajivijavabelia.

<sup>6</sup> Bajarapacuenia Jesús pejumaitsicujinae irabelia suabaxuaba. Peionitota tsorobojavayo exana. Nexata itaxutoexaba bitso pitaxutotsëcënaenë. <sup>7</sup> Nexata Jesús jumaitsi bitso pitaxutotsëcënaenëjavabelia:

—Ponare baja. Naitaxutoquiaremelia pecueyetsipucayojavabelia, Siloévnë pu-cayojavabelia, jai Jesús.

“Siloé,” itsa jai bajarapamonae pijajumeta, mapajumeta pejumaitsi jume: “Pitorobinëtsitsica,” pejaijume.

Nexata bitso pitaxutotsëcënaenë lia baja. Naitaxutoquiatojopalia. Naviarena baja pitaxutoxanepanaenë. <sup>8</sup> Nexata itsajota ponapona bitso pitaxutotsëcënaenëmi, imoxoyo penaevi, pamonaeta taeyabiabatsi, daxita bajarapamonae nayanijoba.

—¿Matsa ponë palata amoneya pevajécabiabeaenëmi? najai bajarapamonae.

<sup>9</sup>Nexata itsamonae jumaitsi:

—Jājā, bajara covë ponë, jai.

Itsiata itsamonae jumaitsi:

—Apo ponë raja. Bajara saya itsiata beponë, jai.

Nexata pitaxutotsécënaenëmi pijacuata jumaitsi:

—Jājā, xanë rabaja, jai bajaraponë.

<sup>10</sup>Nexata bajarapamonae jumaitsi pitaxutotsécënaenëmijavabelia:

—¿Detsa nexata pacuenia taneme baja? jai.

<sup>11</sup>Nexata pitaxutotsécënaenëmi jumaitsi:

—Ponë raja Jesúsvënënë, exana tsorobojavayo. Nitaxutoexaba. Nexata neju-maitsi: “Liamëre pecueyetsipucayojavabelia, Siloévnënë pucayojavabelia. Naitaxutoquiaremelia,” nejai Jesús. Nexata baja lianë. Itsa naitaxutoquiatajê bajarapapucayota, taniji baja, jai pitaxutotsécënaenëmi.

<sup>12</sup>Nexata bajarapamonae jumaitsi:

—¿Detsa jota bajaraponë ponapona? jai.

Nexata icatsia pitaxutotsécënaenëmi jumaitsi:

—Apo yapëtaenë itsajota ponapona, jai.

### **Pacuenia bitso pitaxutotsécënaenëmi caponaliatsi fariseovijavabelia peyanijobinexatsi yabara pelivaitsi**

<sup>13</sup>Pitaxutotsécënaenëmi pitaxutoxanepanaejava jivi itsa tane, yanijobatsi peyapëtaenexa pacuenia itaxutoxanepana. Pamonaë yanijobaponatsi, bajarapamonae pitaxutotsécënaenëmi caponaliatsi fariseovijavabelia. <sup>14</sup>Pamatacabi Jesús exana tsorobojavayo pitaxutoxanepanaeyaexanaenexa bitso pitaxutotsécënaenëmi, bajarapamatacabi judíovi penacueraevetsimatacabi. <sup>15</sup>Nexata jane baja fariseovi yanijoba pitaxutotsécënaenëmijavabelia.

—¿Detsa pacuenia nexata itaxutoxanepaname? jai fariseovi.

Nexata pitaxutotsécënaenëmi jumaitsi:

—Nitaxutoexaba raja tsorobojavayota. Bajaraxuacujinaë naitaxutoquiatajê. Nexata aeconoxae taniji baja, jai pitaxutotsécënaenëmi fariseovijavabelia.

<sup>16</sup>Nexata fariseovi najumaitsi:

—Ponë bajarapacuene exana, Dioso apo pitorobinëtsi cajena. Tspijai apo yaiyataë penacueraevetsimatacabi, najai fariseovi.

Itsiata bajarapamonaeyajuvënëvi itsamonae najumaitsi:

—Itsa pibisiacuene pexanaenë tspiae, apo caëjêpae tsipaetsi bajarapitsipiniacuene pexanaenexa, najai itsamonae.

Nexata daxita fariseovi apo najamatabëcuenejêpae. <sup>17</sup>Nexata icatsia fariseovi yanijoba pitaxutotsécënaenëmijavabelia.

—¿Detsa jane xamë bejamatabëitsimë ponë caitaxutoxanepanaeyaexana yabara? jai fariseovi.

Nexata pitaxutotsécënaenëmi jumaitsi:

—Bajaraponë cajena Diosojumepaëbinë profeta, jai.

<sup>18</sup>Judíovi apo jumexaniataë pitaxutoxanepanaeyaexanaejavatsi yabara. Nexata bajarapamonae junata pitaxutotsécënaenëmi paxa, pena yajava. <sup>19</sup>Judíovi jane baja yanijoba pitaxutotsécënaenëmi paxabeje penabejêjavabelia. Jumaitsi:

—¿Baja tsa maponë panexënatobejeje, ponë penaexanaejavaveliacujinae pitaxutotsëcënaenëmi? ¿Detsa pacuenia aeconoxae baja tane? jai judíovi.

<sup>20</sup> Nexata pitaxutotsëcënaenëmi paxabeje penabeje jumaitsibeje:

—Maponëje pataxënatobeje payapëtanijibeje cajena. Payapëtanijibejenua penaexanaejavaveliacujinae pitaxutotsëcënaejava. <sup>21</sup> Itsiata baitsi jane aeconoxae apo payapëtaenëbeje pacuenia baja itaxutoxanepana. Apo payapëtaenëbejenua ponë itaxutoxanepanaeyaexanatsi. Bajaraponë taxënato payanijobare. Penaveretsinë rabaja. Pijacuata pacatsipaebiana, jai pitaxutotsëcënaenëmi paxabeje penabeje judíovijavabelia.

<sup>22</sup> Judíovi baja cajena najamatabëcuenejëpa pevajënaeitavetsinexa penajoneyaniva judíovi penacaetuatabibojavaberena pajivi jumaitsi: “Jesús rabaja cajena Cristo, ponë Dioso athëbëvetsica itorobijitsiatsica jivi pecapanepaenexa,” pejajivi. Bjaraxuata pitaxutotsëcënaenëmi paxabeje penabeje bajarapacuenia jumecanaviatabeje pecujunavixaebeje judíovi. <sup>23</sup> Bjaraxuata bajarapajivibeje jumaitsibeje: “Taxënatojavabelia payanijobare. Penaveretsinë rabaja,” jaiibeje.

<sup>24</sup> Nexata judíovi icatsia junata pitaxutotsëcënaenëmi. Jumaitsi bajaraponëjavabelia:

—Panetsipaebare xaniavaetsia Dioso pitabarata. Paxanë baja cajena payapëtaniji bajaraponë pibisiacuene pexanaenëcuene, jai judíovi Jesús yabara.

<sup>25</sup> Nexata pitaxutotsëcënaenëmi jumaitsi:

—Pibisiacuene meta pexanaenë. Xanë apo yapëtaenë. Itsiata baitsi jane nitaxutoxanepanaeyaexana taitaxutotsëcënaenëmi, jai pitaxutotsëcënaenëmi.

<sup>26</sup> Nexata icatsia judíovi jumaitsi:

—¿Detsa pacuenia catoexana netaenexa? jai judíovi.

<sup>27</sup> Nexata pitaxutotsëcënaenëmi jumaitsi judíovijavabelia:

—Pacatsipaebatsi rabaja picani xaniavaetsia. Itsiata apo panejumecovënëtsimë. ¿Detsa xuajitsia pajitsipame patacatsipaebaponaenexa icatsia? ¿Paxamë ata tsaja pajitsipame panejumecovënëtsinexa bajaraponë papijajivinexamë? jai pitaxutotsëcënaenëmi judíovijavabelia.

<sup>28</sup> Nexata judíovi bijatanetsi pitaxutotsëcënaenëmi. Jumaitsitsi:

—Xamë raeta baja cajena bajaraponë pijajivitonëmë. Paxanë raja saicaya Moiséspijinë petsipaebilivaisi pajumecovënëtavanapajë. <sup>29</sup> Paxanë baja cajena payapëtaniji pepacuene Dioso pebarëcuaicuajijavatsi Moiséspijinë. Itsiata baitsi jane ponë cabarëcuaicuajiai, apo payapëtaenë itsaverena pata, jai judíovi.

<sup>30</sup> Nexata pitaxutotsëcënaenëmi jumaitsi judíovijavabelia:

—¿Detsa xuajitsia nitaxutoxanepanaeyaexanae ata, apo payapëtaemë itsaverena pata bajaraponë? <sup>31</sup> Yapëtanetsi baja cajena mapacueneje. Diosojavabelia vajëtsi ata pamona pibisiacuene pexanaevi, Dioso baja cajena apo namuxunaevetsi. Dioso baja cajena banamuxunaeveta itsa vajëtatsi pejitsipaecuenia yayataeya petojinanapavevtsi. <sup>32</sup> Caeto ata mapanacuapijivi apo vënëlvivaisitaetsi ponë caëjëpatsi pitaxutoxanepanaeyaexanaenexa penaexanaejavaveliacujinae bitso pitaxutotsëcënaenë. <sup>33</sup> Peneta bajaraponë itsa apo patsi tsipae Diosojavavetsica, nexata apo caëjëpaetsi tsipae pexanaenexa Dioso pesaëta pinijicuene pexanaejava, jai pitaxutotsëcënaenëmi judíovijavabelia.

<sup>34</sup> Nexata judíovi jumaitsi:

—Xamë cajena pibisiacuene exaname nenaexanaejavaveliacujinae. ¿Itsiata tsaja caranata pibisiacuene nexanaenë jamatabëpanemuxujobame? jai judíovi pitaxutotsëcënaenëmijavabelia.

Nexata torotajarabaxuabatsi judíovi penacaetuatabiabibo pevecuapitsapaenexa.

### **Pacuenia Dioso apo pejumecovënëtsivi jamatabëcueneaitaquiri tsavanapae yabara pelivaisi**

<sup>35</sup> Jesús vënëlivaisitane pitaxutoxanepanaeyaexanaenë judíovi petorobajara-bijavatsi judíovi penacaetuatabiabibo pevecuapitsapaenexa. Nexata Jesús itsa caxitajaraba pitaxutoxanepanaeyaexanaenë, Jesús jumaitsi pitaxutoxanepanaeya exanaenëjavabelia:

—¿Najamatabëcopatame tsabaja Dioso pexënatojavabelia? nayabarajai Jesús.

<sup>36</sup> Nexata ponë Jesús itaxutoxanepanaeyaexana, jumaitsi:

—¿Detsa ponë Dioso pexënato tanajamatabëcopatsinexa bajaraponëjavabelia? jai.

<sup>37</sup> Jesús nexata pijacuata nayabarajumaitsi:

—Ponë rabaja cabarëcuaiuaijai, Dioso rabaja pexënato, nayabarajai Jesús.

<sup>38</sup> Nexata ponë Jesús itaxutoxanepanaeyaexana, pematatabacabëta nuca Jesús pitabarata. Jumaitsi Jesúsjavabelia:

—Tajatuxanenë, casivanajamatabëcopatatsi baja cajena, jai.

<sup>39</sup> Nexata Jesús jumaitsi pitaxutoxanepanaeya exanaenëjavabelia:

—Xanë patajë mapanacuayabetsicaje jivi penayapëtaenexa pijaneconi pexinae-  
java. Nexata pamona pexaniajailivaisi tatsipaebijavata najamatabëcueneypëtaena  
pijamatabëcueneitaquirijava, bajarapamona jamatabëcueneitayotsianajë pexani-  
ajailivaisita. Pamona jemajai. Apo yapëtae ata pexaniajailivaisi, jamatabëjumaitsi:  
“Vaxaitsi rabaja yapëtanetsi pexaniajailivaisi,” jamatabëjai, bajarapamona apo ja-  
matabëcueneitayotsinë tsane, jai Jesús.

<sup>40</sup> Nexata fariseovi, bajarajota penubenaevi, jumetane bajarapacuenia Jesús peju-  
maitsijava. Nexata fariseovi jumaitsi Jesúsjavabelia.

—¿Paxanë ata tsabaja pajamatabëcueneitaquirinë tsavanapae? jai.

<sup>41</sup> Jesús nexata jumaitsi fariseovijavabelia:

—Jājā, bitso pajamatabëcueneitaquirimë tsavanapae. Tsipaji jamatabëcuene-  
navëxaniabiaya pajamatabëjumaitsimë tsabiabi: “Vaxaitsi rabaja jumecovënëtsi  
Dioso,” pajamatabëjamë tsabiabi. Nexata Dioso pejumelivaisi payapëtae atamë, it-  
siata pibisiacuene paexanabiabame. Nexata bitso pananeconitame Diosojavabelia.  
Paxamë Dioso pejumelivaisi apo paneyapëtaexae, itsa pajamatabëcueneitaquir-  
imë tsipae, nexata bitso apo pananeconitsimë tsipae Diosojavabelia, jai Jesús  
fariseovijavabelia.

### **Oveja pecajoneyabiabical corral yabara pelivaisi**

**10** Jesús jumaitsi fariseovijavabelia:

—Xaniajanë pacuenia pacatsipaebijitsiatsi. Oveja pecajoneyabiabical  
corral ënëabelia saicayanë pejonenexa, apo jone corral baupajava. Junaya saya  
peyenapanatsia pejonenexalia. Bajaraponë penacobetoxotsinëxexa oveja. <sup>2</sup> Ponë  
peneta joneya corral baupayalia, bajaraponë cajena oveja pevetsinë. <sup>3</sup> Nexata corral  
baupa pevetsinë tobaupatatasi pijaoveja pecapitsapaenexa. Itsa baja pijaoveja capit-  
sapa corralvecua, pijaoveja jumeyapëtanetsi. Tsipaji junatapona pijaoveja caenë

canacujitsia pevenëta. <sup>4</sup> Pecapitsapaecujinae daxita pijaoveja, bajaraponë oveja pevajënaeya namataxainanajetaruca. Nexata pijaoveja pënaponatsi. Tspaji jumeyapëtanetsi pijaoveja. <sup>5</sup> Oveja apo pënaponae tsipae saicayanë. Tspaji apo jumeyapëtae. Vecuarëcëpecaejitsipa saya, nayabarajai Jesús fariseovijavabelia.

<sup>6</sup> Bajarapacuenia Jesús oveja pevetsinëcuenia nataeya comparacióncuenia nalivaisipaeba fariseovijavabelia. Itsiata fariseovi apo jumeyapëtaetsi Jesús comparacióncuenia penalivaisipaebijava.

### **Pacuenia Jesús xaniavaetsia eveta pijajivi yabara pelivaisi**

<sup>7</sup> Jesús jumaitsi fariseovijavabelia:

—Xaniajanë pacuenia pacatsipaebijitsiatsi. Pacuenia oveja junua corral baupajava, pepanepaenexa corral ënëaberena, bajara xanë itsinë jivi pejonenexa xanëjaya, pepanepaenexa Dioso pijatomarabetsia. <sup>8</sup> Itsamonae xanë tavajënaeya penajumetsënëtsilivaisi jivi tsipaebaona. Bajarapamonae oveja bepenacobetoxotsivi. Jamatabëneyacajërëta tajajivi. Itsiata baitsi jane tajajivi apo jumecovënëtsi bajarapamonae. <sup>9</sup> Xanë rabaja cajena baupanë. Pajivi nesivanajamatabëcopatsiana, jonena xanëjaya pepatsinexa Dioso pijatomarabetsia. Bajarapajivi capanepaenatsi Diosojavabelia. Pijaoveja xaniavaetsia pevetsinë, caebajayacunua canacujitsia capitsapa corralvecua oveja pexaejava pejaitsinexa. Icatsia caecaniviyo canacujitsia cajunua corraljavaberena. Bajara pijinia pacuenia xanë ata xaniavaetsia evetsianajë pajivi nesivanajamatabëcopatsiana, jai Jesús fariseovijavabelia.

<sup>10</sup> Icatsia Jesús jumaitsi fariseovijavabelia:

—Penacobetoxotsinë bapata oveja penacobetoxotsinexa, pebeyaxuababiabinexanua. Bajarapacuenia oveja peveretaponaenexa bapata. Bajara pijinia jamatabëcuenetsi pamonae pata penajumetsënëtsilivaisi jivi petsipaebaponaeenexa. Itsiata baitsi jane xanë patajopaicajë mapanacuayabetsicaje xanë tajamatabëcueneta jivi pexainanexa matababi apo pevereverecejaya, bitso jamatabëcuenearëyaya pejinavanapaenexanua. <sup>11</sup> Pacuenia itsi xaniavaetsia pevetsinë pijaoveja, bajara pijinia xanë itsinë taevetsinexa tajajivi. Xaniavaetsia pevetsinë pijaoveja jamatabëjumaitsi: “Itsanë netobeyaxuabijitsia ata tsane tajaoveja, apo copatsinë tsane tanetoyajuvënëbeyaxuabianiva tajaoveja. Nexata xanë tajaoveja yapijivinacaevetsianajë tanebeyaxuabinexa,” jamatabëjai. Bajara pijinia xanë ata jamatabëitsinë tajajivi yabara. <sup>12</sup> Itsiata ponë saya toevetsipa itsanë pijaoveja, bajaraponë apo xainae tsipae bajarapaovejabitsaëto. Saya tovetaponaponaejitsipa pematamotsinexatsi. Nexata nevëthë oveja itsa tsimaxënajetarucaejitsipa, bajaraponë xuabatabajiravijitsipa ovejabitsaëtom. Nexata oveja nevëthë itsa yajuvënëvaetabijitsipatsi, nacayajatecaejitsipa ovejabitsaëtom. <sup>13</sup> Oveja pevetsinë najetabajiravijitsipa. Tspaji saya pematamotsinexatsi nacuenebaponaponaejitsipa. Nexata apo jamatabëbëjai tsipae oveja yabara, jai Jesús fariseovijavabelia.

<sup>14-15</sup> Icatsia Jesús jumaitsi:

—Pacuenia itsi xaniavaetsia pevetsinë pijaoveja, bajara pijinia itsinë xanë ata taevetsinexa tajajivi, pamonae taniji beovejacuenia. Pacuenia taxa neyapëtane, bajara pijinia pacuenia xanë ata yapëtaniji taxa. Pacuenia pijinia xaniavaetsia yapëtaniji tajajivi, bajara pijinia pacuenia tajajivi ata neyapëtane. Xanë sivatëpaenajë tajajivi. <sup>16</sup> Xainajë baja itsabitsaëto tajajivi. Itsiata abaxë bajarapamonae apo ya-

javajinavanapae mapabitsaëtojavataje. Itsiata itsamatacabi capatsianajë bajarapamonae mapabitsaëtojavaberenaje. Nexata daxita bajarapamonae nejumecovënët-siana taitorobicuena. Caebitsaëtoxaneto jane baja tajajivi netonaexanaena. Bajarapamonae xanë caenënë evetsianajë, jai Jesús.

<sup>17</sup> Icatsia Jesús jumaitsi:

—Taxa niasiva. Tsipaji tajajivi yabara nacaevetsianajë tanebeyaxuabinexa. Itsiata icatsia tatëpaecujinae asaënë tsane. <sup>18</sup> Itsa apo nacaevetsinë tsipae tanebeyaxuabinexa, itsajivi ata apo caëjëpaetsi tsipae tanebeyaxuabinexa. Itsiata tajacuata nacaevetsianajë tanebeyaxuabinexa. Necaëjëpa tatëpaenexa. Necaëjëpanua icatsia tasaënexa tatëpaecujinae. Bajarapacuenia taxa netocopata, jai Jesús.

<sup>19</sup> Judíovi itsa jumetane bajarapacuenia Jesús pejumaitsijava, judíovi apo najamatabëcuenejëpae. <sup>20</sup> Judíovi ayaibitsaëto najumaitsi Jesús yabara:

—Dovathi raja bajaraponë yajavaponaponatsi. Matajemabatsi ra saya. ¿Detsa xujitsia bajaraponë panamuxunaevetame? najai bajarapamonae.

<sup>21</sup> Itsiata bajarapamonae yajuvënëvi itsamonae najumaitsi:

—Ponë dovathi yajavaponaponatsi, apo caëjëpaetsi tsipae cajena pecuaicuainexa mapacueniaje. Apo caëjëpaetsinua tsipae pitaxutoxanepanaeyaexanaenexa bitso pitaxutotsëcënaenëmi, najai bajarapamonae yajuvënëvi Jesús yabara.

### **Pacuenia Jesús judíovi navecuaitavetatsi yabara pelivaisi**

<sup>22</sup> Emarapaeta Jerusalén tomarata fiesta exana. Bajarapafiesta exana judíovi pe-najamatabënapitsinexa bajayata judíovi pijasalinaivi templobo pexanebetsijava. <sup>23</sup> Nexata pamatacabi fiesta exana, Jesús ponapona bajarapatemplojavata, Portal de Salomónvënëjavata. <sup>24</sup> Nexata Jesús judíovi matatoyorotsia nacaetuatatsi. Judíovi jumaitsi Jesúsjavabelia:

—Apo payapëtaenë pacuenia panajamatabëxainaejitsianë xamë yabara. ¿Detsa pacujinae paneyapëtaeyaexanaename patacayapëtaenexa pepacuene ponëmë? Itsa pepacuene Cristomë, Dioso athëbëvetsica pecaitorobinëtsica jivi necapanepaenexa, panetsipaebare cajena roviaia, jai judíovi.

<sup>25</sup> Jesús nexata jumaitsi judíovijavabelia:

—Pacatsipaebatsi rabaja picani roviaia. Itsiata apo panejumecovënëtsimë. Taxa Dioso pesaëta pinijicuene exanajë. Bajara papinijicuene exanajë taxa taneitorobicuena. Nexata itsa exanajë bajarapapinijicuene, pacatsitaexanatsi picani taxa taneitorobicuene. <sup>26</sup> Itsiata baitsi jane apo panejumecovënëtsimë Cristonëcuenenë. Tsipaji paxamë apo patajajivimë. <sup>27</sup> Tajajivi, pamona taniji beovejacuenia, bajarapamonae nejumeyapëtane. Bajarapamonae pijinia yapëtaniji. Nexata nepënapona. <sup>28</sup> Bajarapamonae rajutsianajë matacabi apo peverevereaejava. Bajarapamonae taxa Diosovecua apo naxuabi tsane. Itsajivi ata apo neyacajërëtsi tsane tajajivi. <sup>29</sup> Taxa baja cajena ayajamatabëcuenenë daxitajivi matatoxenetsia. Bajaraponë nerajuta bajarapamonae. Nexata itsajivi ata apo caëjëpaetsi tsane taxa pecobevecua pepitsinexa bajarapamonae. <sup>30</sup> Taxa, xanë, caenë rabaja panaexanajëbeje, jai Jesús judíovijavabelia.

<sup>31</sup> Nexata picani bajarajota judíovi jamatabëbeyaxuabatsi Jesús. Judíovi nota ibotonë Jesús picani petseconaenexatsi ibotonëta. <sup>32</sup> Jesús nexata jumaitsi judíovijavabelia:

—Ayaijava pexaniacuene taxa Dioso pesaëta exanaponajë paxamë paneitabarata. ¿Detsa nexata pitsineconi yabara panetseconaejitsiamë ibotonëta? jai Jesús judíovijavabelia.

<sup>33</sup> Judíovi nexata jumaitsi:

—Pexaniacuene raja nexanaejava yabara apo pacatseconaejitsiatsi. Pacatseconaejitsiatsi raja nenaneconitsixae Diosojavabelia. Tsipaji pibisiacuenia, Dioso apo pejit-sipaecuenia, cuaicuaijamë. Xamë saya jivitonë atamë, beDiosonëmë nataneme, jai judíovi Jesúsjavabelia.

<sup>34</sup> Jesús nexata jumaitsi judíovijavabelia:

—Dioso pejumaitsijava, Dioso pejumelivaisibaxutota jumaitsi mapacueniaje: “Paxamë ata rabaja padiosovimë,” jai Dioso pejumelivaisibaxutota Dioso pejumecovënëtsivi yabara. <sup>35</sup> Nexata Dioso pejumelivaisibaxutota bajarapacuenia itsa jumaitsi Dioso pejumecovënëtsivi yabara, acuenebi bajarapamonae yabara vajajumaitsinexa: “Bajarapamonae apo diosovi,” vajajainexa. <sup>36</sup> Dioso cajena nitapeta. Nexata nitorobica mapanacuayabetsicaje. ¿Detsa nexata xuajitsia panejumaitsimë: “Xamë raja naneconitame Diosojavabelia. Pibisiacuenia cuaicuaijamë Dioso apo pejit-sipaecuenia. Tsipaji jumaitsimë: ‘Xanë raja Dioso pexënatonë,’ jamë,” panejamë. <sup>37</sup> Itsa apo exanaenë tsipae pacuenia taxa nitoroba, nexata acuenebi tsipae patanesivanajamatabëcopatsinexamë. <sup>38</sup> Itsiata baitsi jane exanaponajë pacuenia taxa nitoroba. Nexata apo panesivanajamatabëcopatsi atamë, itsiata bepajumecovënëtame Dioso pesaëta taexanaejava, pacuene baja exanaponajë. Itsa pajumecovënëtsianame bajarapacuenie Dioso pesaëta taexanaponaejava, nexata payapëtaename taxa Dioso taneyajavaponaponaejava. Payapëtaenamenua xanë ata pijinia taxa Dioso taya-javaponaponaejava, jai Jesús judíovijavabelia.

<sup>39</sup> Bajarapacuenia Jesús jumaitsi ata, itsiata judíovi jamatabëvaetabatsi penaneconitsiaexanaenexatsi. Itsiata Jesús vecuapanepa.

<sup>40</sup> Nexata Jesús navialia Jordánmene itsapanabelia, panacuatalia copiaya Juanpijinë jivi bautisababiaba. Bajarajotalia Jesús ponapona. <sup>41</sup> Jivi ayaibitsaëtoخانeto ponalia petanexatsi Jesús. Nexata bajarapamonae jumaitsi:

—Juanpijinë Dioso pesaëta pinijicuene apo exanaponaeta, itsiata daxita pacuenia tajëvelia vajunupaeba maponë yabaraje, xaniajai cajena, jai bajarapamonae Jesús yabara.

<sup>42</sup> Nexata jane baja bajarajota jivi ayaibitsaëtoخانeto jumecovënëta Jesús Dioso athëbëvetsica pitorobinëcuenetsi.

### Pacuenia baja Lázaro tēpa yabara pelivaisi

**11** Lázaro, Betania tomarapijinë, avitane tsanucuae Betania tomarata. Bajarapatomarata ponaponabeje pematapijivabeje, Maríabeje Martabeje. <sup>2</sup> Bajarpova María itsamatacabi Jesús tsitaxuepanaena petuxujuvira. Daxitarayomi tsitaxuepanaena. Bajaraxuacujinae bajarapova pematatanata taxuiquicaenanua. <sup>3</sup> Nexata pamatacabi Lázaro avitane tsanucuae, Maríabeje Martabeje tonajumeitorobaliabeje Jesús. Jumaitsiabeje:

—Tajatuxanenë, niasivanë raja Lázaro catoavitane, jaibeje.

<sup>4</sup> Jesús itsa jumetane bajarapovabeje petonajumeitorobijumetsi, nexata Jesús jumaitsi pijajivijavabelia:

—Mapavitane taje Lázaro apo tēpae tsane daxitamatacabijavabelianexa. Biji rajane bajarapavitane pejamatabēcueneta jivi yapētaena Dioso pinijicue pexanaenexa pecaējēpaenēcuenetsi. Yapētaenanua xanē ata, Dioso pexēnatonē, pini-jicue taexanaenexa tanecaējēpaenēcue, jai Jesús pijajivijavabelia.

<sup>5</sup> Jesús bitso asivaya taeyabiaba Martabana, Mariábana, Lázarobana. <sup>6</sup> Jesús vënëlivaisitae ata Lázaro bitso piavitanejava, itsiata abaxē apo ponae Betania tomarabelia. Anijamatacabibeje abaxē ponapona Jordánmene itsapanatalia. <sup>7</sup> Bajaraxuacujinae Jesús jumaitsi pijajivijavabelia:

—Ponaliatsi icatsia Judea nacuyabelia, jai Jesús.

<sup>8</sup> Jesús nexata pijajivi jumaitsi:

—Patajatuxanenē, canivita saya judíovi bajarajotalia jamatabēcátsecona picani ibotonēta. ¿Itsiata tsabaja icatsia ponaeliatsi bajarabelia? jai pijajivi.

<sup>9</sup> Jesús nexata jumaitsi pijajivijavabelia:

—Matacabi raja xaina doce pahorabeje. Nexata pajivi matacabita ponapona, apo firapecae. Tsiapaji icotiata napebeta xaniavaetsia. <sup>10</sup> Itsiata pajivi meravi ponapona, firapecae. Tsiapaji meravi apo napebetsi xaniavaetsia. Bajara pijinia xanē ata itsinē. Ponae ata tsanetsi Betania tomarabelia, itsiata apo nitsacueniabi tsane. Tsiapaji abaxē tajamatacabi apo netocopiapatsi, jai Jesús pijajivijavabelia petēpaejavanexa yabara.

<sup>11</sup> Bajaraxuacujinae Jesús peponaevajēnae jumaitsi pijajivijavabelia:

—Vajayapētaenē rabaja Lázaro majitanuca. Nexata baja ponajē. Itavabijitsianē Lázaro, jai Jesús.

<sup>12</sup> Nexata pijajivi jumaitsi:

—Patajatuxanenē, itsa raeta saya Lázaro majitanuca, itsiata jamatejema tsane, jai Jesús pijajivi.

<sup>13</sup> “Vajayapētaenē rabaja Lázaro majitanuca,” itsa jai Jesús, Jesús picani pejumaitsi jume, “Lázaro rabaja tēpa,” pejai jume. Itsiata Jesús pijajivi apo jumeyapētaetsi. Bajarapamonae Jesús pijajivi jamatabēcuenenavēxaniabiaya jamatabējumaitsi: “Lázaro meta saya majitanuca pacuenia majitanucabiaba meravi,” jamatabējai. <sup>14</sup> Bajaraxuata nexata Jesús roviaia jumaitsi pijajivijavabelia:

—Lázaro rabaja tēpa. <sup>15</sup> Paepatota Lázaro tēpa, bajarajotalia apo ponaponaenē. Bajaraxuata barēyanē paxamē yabara. Barēyanē tsiapaji Lázaro petēpaexae, xaniavaetsia panejumecovēnētsianame. Baja nexata ponatsi, jai Jesús pijajivijavabelia.

<sup>16</sup> Jesús pijajiviyajuvēnēnē, Tomás, ponē icatsia itsavēnē vēnērubatsi Sapalanē. Bajaraponē jumaitsi penajuaponaevijavabelia:

—Naponatsi Jesús pepēta. Ibotonēta itsa tseconatsi, vajayajavatēpaenexa bajaraponē, jai Tomás.

### **Pacuenia Jesús caējēpatsi petēpaevi ata icatsia piasaēyaexanaenexa yabara pelivaisi**

<sup>17</sup> Pepuaxainae baja cuatro pamatacabibeje Lázaropijinē pemēthētsicujinaetsi, Jesús matapania patajopa Betania tomarata. <sup>18</sup> Betaniatomara eca imoxoyo Jerusalén tomaravecua. Bejamatabēcue anijakilómetrobeje epatua navecuacabeje bajarapatomarabeje. <sup>19</sup> Jesús pepatsivajēnaeya Betania tomarata, yaibitsaētoxfaneto judíovi pata Martabeje Mariabejejavaberena Lázaro petēpaexae. Bajarapamonae jumaitsi bajarapovabejejavabelia:



—Paxanë itsiata pacayanabatsi. Panajamatabëxainajë paxanë ata papecavecuatë-paexaebeje panejuyapijinëbeje, Lázaro, jai bajarapamonae.

<sup>20</sup>Itsa Marta vënëlvaisitane Jesús penajetarucaejava, pitsapa pijabovecua pe-mataenenaenexa Jesús. María itsiata bota nacopateca. <sup>21</sup>Nexata Marta itsa matae-nenatsi Jesús, Marta jumaitsi Jesúsjavabelia:

—Tajatuxanenë, itsa majota ponaponaejitsipameje, apo tēpae tsipae tajuyapi-jinë. <sup>22</sup>Itsiata yapētaniji aeconoxae ata Dioso carajutsiana daxita pacuene vajētame Diosojavabelia, jai Marta.

<sup>23</sup>Nexata Jesús jumaitsi Martajavabelia:

—Nejuyapijinë raja itsiata icatsia asaë tsaponaponae tsane, jai Jesús.

<sup>24</sup>Nexata Marta apo jumeypētae Jesús piasaëyaexanaejavanexa Lázaro. Bajarax-uata Marta jumaitsi Jesúsjavabelia mapacueniaje:

—Yapētaniji rabaja pacuenia icatsia Lázaro Dioso asaëyaexanaejitsiatsi pamata-cabita icatsia asaëyaexanaenatsi daxita petēpaevimi, jai Marta.

<sup>25</sup>Nexata Jesús jumaitsi Martajavabelia:

—Xanë rabaja petēpaevi ata icatsia tasaëyaexanaenë, tarajutsinë matakabi apo pevereverecejava. Pajivi nejumecovënëtsiana Cristonëcuenenë, bajarapajivi tē-pae ata, itsiata icatsia asaë tsane. <sup>26</sup>Pajivi abaxë pamatakabi asaë tsaponaponae mapanacuataje, itsa nejumecovënëtsiana Cristonëcuenenë, bajarapajivi tēpae ata, xainaena matakabi apo pevereverecejava. ¿Xamë tsabaja bajarapalivaisi jumecov-ënētame? jai Jesús Martajavabelia.

<sup>27</sup>Marta nexata jumaitsi:

—Tajatuxanenë, jumecovënētajë rabaja. Xamë rabaja cajena Cristomë, Dioso pexēnatomë, ponë pacopiaevetavanapajë athëbëvetsica pepatsijavanexatsica ma-panacuayabetsicaje jivi pecapanepaenexa, jai Marta.

### **Pacuenia Jesús vënuu Lázaro pemëthëjavata yabara pelivaisi**

<sup>28</sup>Itsa baja Marta najumelivaisivereta bajarapalivaisi, naviata pijaboyabelia peju-natsinexa pejuyapijiva María. Nexata Marta muetsia jumaitsi Maríjavabelia:

—Vajanacacujarubinë rabaja pata. Cajunalia raja bajaraponë, jai Marta.

<sup>29</sup>Caejumetae María Jesús pejunatsijavatsilia, nonotabapuna. Pona Jesúsjavabelia petaenexa. <sup>30</sup>Jesús abaxë apo patsi Betania tomaraberena. Ecojopa abaxë itsajotalia Marta mataenenatsi. <sup>31</sup>Pajudíovi bajarapovabeje pijabota pata peyanabinexatsibeje Lázaro petēpaexae, bajarapamonae tane María penonotabapunaejava bepíjia pepit-satabijavalia bovecua. Nexata bajarapamonae María pēnaponatsi. Tsipaji bajarapa-monae jamatabëjumaitsi:

—María raeta pejuyapijinëmi pemëthëjavabelia pona pematantueyabinexa, jamatabëjai:

<sup>32</sup>Itsa María palia, itsajotalia Jesús ecojopa, nexata María pematatababëta nuca-junua Jesús pitabarata. Jumaitsi:

—Tajatuxanenë, itsa majota ponaponaejitsipameje, apo tēpae tsipae tajuyapijinë Lázaro, jai María Jesúsjavabelia.

<sup>33</sup>Jesús itsa tane María penueyaxuabijava, judíovi ata María peyajavapatsivi penuejava itsa tane, Jesús nexata bitso najamatabëxainaxuaba. <sup>34</sup>Nexata Jesús ju-maitsi bajarapamonaejavabelia:

—¿Detsa jota pemëthëtame Lázaro? jai Jesús.

Nexata bajarapamonae jumaitsi Jesúsjavabelia:

—Naxanitsia. Taename itsajota paméthëtajë Lázaro, jai.

<sup>35</sup> Jesús nexata vënuia Lázaro. <sup>36</sup> Nexata judíovi najumaitsi:

—Pataema Jesús penuejava. Jesús picani bitso asiva petëpaenëmi, najai judíovi.

<sup>37</sup> Itsamonae judíovi najumaitsi Jesús yabara:

—Mara ponëje itaxutoxaniavaeta bitso pitaxutotsécënaenëmi ataje xaniavaetsia petaenexa. ¿Apo caëjëpaetsi tsamëra tsipae Lázaropijinë pejamatejemayaexanaenexa petëpaeyaniva? najai bajarapamonae.

### **Pacuenia Lázaro petëpaecujinae Jesús icatsia asaëyaexana yabara pelivaisi**

<sup>38</sup> Jesús bitso sivanajamatabëxaina Lázaropijinë. Nexata Jesús cujilia Lázaropijinë peméthëtsiibovajutsijavabelia. Iboanaxanetota Lázaro yaméthëvëpa acatabuatatsi.

<sup>39</sup> Jesús nexata jumaitsi bajarajota penapatsivijavabelia:

—Pavecuatixiremelia mapaibopanaxanetoje, jai Jesús.

Nexata Marta, petëpaenë pematapijiva, jumaitsi:

—Tajatuxanenë, tuxutsaeba raeta baja bitso Lázaro. Tsipaji rabaja petëpaecujinae, ajena baja cuatro pamatacabibeje xaina, jai Marta Jesúsjavabelia.

<sup>40</sup> Jesús nexata jumaitsi Martajavabelia:

—Catsipaebatsi rabaja pacuenia taejitsiamë Dioso ayaiçuene pexanaejava ita jumecovënëtame Dioso, jai Jesús.

<sup>41</sup> Nexata bajarapamonae Lázaropijinë peméthëvëpavecua tixilia ibopanaxaneto. Jesús itaboxo naëcotsiaya jumaitsi:

—Taxa, pexaniajamatabëçuene carajutatsi tanejumetaexaemë. <sup>42</sup> Yapëtaniji cajena tanenamuxunaevetabiabijavamë. Itsiata icatsia cavajëtatsi mapamonaeye ayabitsaëtöxaneto pejumecovënëtsinexa taneitorobinëçuenumëtsica, jai Jesús Diosojavabelia.

<sup>43</sup> Bajarapacuenia Jesús pejumaitsicujinae, ayaijumeta jumaitsi Lázaro pebuatsiibovajutsijavabelia:

—¡Lázaro, bajara jane mëthëvecua pitsaparemena! jai Jesús.

<sup>44</sup> Nexata baja Lázaro petëpaenëmi pitsaparena mëthëvecua. Piapiasábanata daxitanëreca mataquionaeya pematacacëbicujinaetsireca abaxë, pitsaparena. Pitabaraacatsipapaëbërëpanatsi abaxë tsiteca itabaraacatatsi. Jesús nexata jumaitsi bajarapamonaejavabelia:

—Pavecuaisinare bajarapapana. Pacopare peponaenexa pijaboyabelia, jai Jesús.

### **Pacuenia picani Jesús pijavajabitsaë jamatabëvaetabatsi yabara pelivaisi**

*(Mt 26.1-5; Mr 14.1-2; Lc 22.1-2)*

<sup>45</sup> Judíovi, pamonae María yanabatsi, tane Lázaro petëpaenëmi Jesús piasaëyaexanaejava. Nexata bajarapamonaeyajuvënëvi ayabitsaëtö jumecovënëta Jesús Dioso pexënatocuene. <sup>46</sup> Itsiata itsamonae bajarapamonaeyajuvënëvi pona fariseovijavabelia. Nexata tsipaeba pacuenia Jesús Lázaro petëpaenëmi asaëyaexana. <sup>47</sup> Nexata fariseovi, sacerdotevi penamatacaitorobivi yajava, nacaetuata. Nexata bajarapamonae junata penacaetuatsinexa judíovi pijaancianovi, judíovi pecujarubivi atajava. Nexata bajarapamonae najumaitsi:

—¿Detsa meta vaxaitsi itsanetsi? Bajaraponë Dioso pesaëta pinijicuene pexanaejava exanapona. <sup>48</sup> Itsa vaxaitsi cuenecopsipatsi bajarapacueni pexanapon-

aejava, daxitajivi jumecovënëta pona ejitsipa bajaraponë. Apo jumecovënëtsi tsipae Romanonacua pevetsivi. Nexata Romanonacua pevetsivi anaepanaejitsipa. Itorobijitsiparena pijajivi, vajabitsaë. Nexata vajabitsaë itsa patsiparena, vajatemploblo nacatoxuabijitsipaica. Nacaverebiabijitsipana, najai bajarapamonaë.

<sup>49</sup> Bajarapamonaëyajuvënënë pevënë Caifás. Bajarapamatacabi bajaraponë Caifás, sacerdotevi pepo penamatacaitorobinë tsaponaponaë. Nexata Caifás jumaitsi penajuanaactuatsivijavabelia:

—Paxamë raja apo payapëtaemë. <sup>50</sup> Nexata Romanonacua pevetsivi vajabitsaë itsa itorobarena, vajanacaverebiabiyana, bepanajamatabëxainame mapacueniaje. Bajaraponë caenë itsa beyaxuabiaexanaenatsi, bajaraponë pejamatabëcueneta daxita judíovitsi vajavajabitsaë apo nacaverebiabi tsane, jai Caifás Jesús yabara.

<sup>51</sup> Itsiata baitsi jane Caifás apo jumaitsi bajarapacuenia pijacuata penajamatabëxainacuena. Biji rajane bajarapamatacabi Caifás daxita sacerdotevi pepo penamatacaitorobinëxæ, Dioso bajarapacuenia jumaitsiayaexanatsi. Bajarapacuenia Caifás tajëvelia jumaitsi tsipaji Jesús sivatëpaejitsia daxita judíovi. <sup>52</sup> Itsiata Jesús apo sivatëpae tsane ëjudíovi. Daxitanacuanëjava, pamonaë nacayajataruta Dioso pexi, bajarapamonaë ata pecaetuatsinexa, sivatëpaena Jesús. <sup>53</sup> Bajarapacuenia bajara pamatacabijavaveliacujinae cajena judíovi pevetsivi najamatabëvereta pona pacuenia bajarapamonaë Jesús beyaxuabijitsiatsi.

<sup>54</sup> Bajaraxuata Jesús apo ponabiabi baja itsabelia judíovi nacaetuatabiaba. Nexata Judea nacuavecua pitsapa. Jesús baja nexata pona petusatonacua imoxoyojavabelia, Efraïnvënë tomarajavabelia. Nexata bajarapatomarata Jesús ponapona pijajivi yajava.

<sup>55</sup> Imoxoyo baja pevajënaë judíovi pijafiesta pejonematacabinexa, pascuavënëfiesta. Nexata jivi ayaibitsaëttoxaneto pona Jerusalén tomarabelia. Pona pexanaenexa pacuenia exanabiaba fiestavajënaëya penajamatabëcuene xaniavaetsinexa Diosojavabelia. Bajarapamonaë naropoba tsiquiritomaraxijavaverena. <sup>56</sup> Nexata bajarapamonaë jaitarutatsi Jesús. Itsa bajarapamonaë nacaetuata templobota, nayanijoba. Najumaitsi:

—¿Detsa xamë jamatabëitsimë? ¿Jesús tsamëra patsiana mapafiestajavaje? Jume. Apo patsi tsamëra tsane, najai ëpamonaë.

<sup>57</sup> Nexata fariseovibeje sacerdotevi penamatacaitorobivibeje najumecopata jivijavabelia petonaitaxutocaevetsinexatsi Jesús. Nexata pajivi yapëtane itsajota Jesús ponapona, petsipaëbinexa bajarapamonaëjavabelia. Nexata fariseovibeje sacerdotevi penamatacaitorobivibeje itsa yapëtane itsajota Jesús ponapona, pevaetabinexatsi Jesús penaneconitsiaexanaenexatsi.

**Pacuenia Jesús petiriva tsitaxuepanatsi petuxujuviaceitera yabara pelivaisi**

(Mt 26.6-13; Mr 14.3-9)

**12** Pejonenexa baja pascuavënëfiesta, saica seis pamatacabibeje. Nexata bajarapamatacabi Jesús baja pona Betania tomarabelia. Bajarapatomarata ponapona Lázaro, ponë Jesús asaëyaexana petëpaenëmi. <sup>2</sup> Bajarajota Jesús pexaëjava toexanatsi caniviyopijjava. Bajarajota Marta pexaëjava tsanaponapona. Lázaro nanabaneca pamesata Jesús nabaneca. <sup>3</sup> Nexata María carena epatuabotellabëyota petuxujuviaceitera, nardovënëra. Bajarapora bitso penamatamotsira. Nexata bajarapaaceitera María tsitaxuepana Jesús. Bajaraxuacujinae icatsia pematana

taxuiquica. Daxita bo tuatuajë tuxuderecaruta. <sup>4</sup>Nexata Jesús pijajiviyajuvënënë, Judas Iscariote, Simón pexëno, ponë itsamatacabi Jesús canajetsijitsiatsi pijavajabitsaë pecobeyabelia, jumaitsi:

<sup>5</sup>—¿Detsa xuajitsia apo canajetsi bajarapatuxujuvira. Matamopitsipa trescientos denario. Bajarapapalata rajutsipa bepejiobivi bajarapacuenia peyavenonaenexa, jai Judas Iscariote.

<sup>6</sup>Itsiata bajarapacuenia Judas apo jumaitsi pesivanajamatabëxainaexae bepejiobivi. Judas raja penacobetoxotsinë. Jesúsbana pijapalatadoro pevetsiaexanaenëxaetsi, Judas nacobetoxotabiaba bajarapapalatayajuvënëjava. <sup>7</sup>Nexata Jesús jumaitsi Judasjavabelia petiriva yabara:

—Copare bajarapova xanëjavaberena pexanaenexa bajarapacuenia. Itsamonae petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje xaniavaeta bajarapora tanetsiperabëepanaenexa, apo tëpae atanë, taneperabëxaniavaetsinexa itsamonae tanemëthëtsivajënae. Tsipaji baja imoxoyo tavajënae tanemëthëtsinexa. <sup>8</sup>Daxitamatacabi raja bepejiobivi jinavanapa itsaxuayo pajinavanapame paneyavenonaenexa. Itsiata baitsi jane xanë daxitamatacabi apo ponaponaenë tsane paxamëjavata, jai Jesús Judasjavabelia.

### **Pacuenia judfovi najamatabëxaina pebeyaxuabinexatsi Lázaro yabara pelivaisi**

<sup>9</sup>Ayaibitsaëtoxaneto judfovi vënëlivaisitanetsi Jesús pepatsijava Betania tomarata. Judfovi nexata ponalia Betania tomarabelia petaenexatsi Jesús. Itsiata bajarapamonae apo ponaelia petaenexa ëJesús. Ponalia petaenexanua Lázaro, ponë Jesús asaëyaexana, petëpaenëmi. <sup>10</sup>Nexata sacerdotevi penamatacaitorobivi daxita baja sivanajamatabëjëpa pebeyaxuabinexatsi Lázaro, Jesús yajava. <sup>11</sup>Bajarapamonae najamatabëjëpa pebeyaxuabinexatsi Lázaro. Tsipaji judfovi ayaibitsaëto natsanapona sacerdotevivecua petaexae Lázaro piasaëtsaponaponaejava petëpaecujinae. Nexata bajarapajudfovi jumecovënëtapona Jesús Dioso pexënatocuene.

### **Pacuenia Jesús pata Jerusalén tomarata yabara pelivaisi**

*(Mt 21.1-11; Mr 11.1-11; Lc 19.28-40)*

<sup>12</sup>Jivi ayaibitsaëtoxaneto pata Jerusalén tomarata pascuafiesta petaenexa. Nexata bajarapamonae Jesús vënëlivaisitanetsi pepatsijavanexa Jerusalén tomarata. Jesús naropota Betania tomaraverena. <sup>13</sup>Nexata bajarapamonae Jesús pevajënae baxuucubaba benaxarebobaxutonë. Bajarapamonae pona baja pecopiapitsinexa Jesús. Itsa panamutoverena Jesús najetaruca, bajarapanamutuabelia bajarapamonae pona. Itsa baja bajarapamonae Jesús copiapita, bajarapamonae vavajai tsbuataponae.

—¡Dioso yavenonaenatsi! ¡Maponë najetarucaje, vajatuxanenë pejamatabëcueneta najetaruca Israel nacuapijivi pepo pevetsinënexa! jai tsanajetarubena bajarapamonae Jesús yabara.

<sup>14</sup>Nexata Jesús caxitajarabaxuaba burro. Bajarapaburro Jesús jumaponatsi pepatsinexa Jerusalén tomarata. Jesús burrojumata pepatanajetarucavejanexa Jerusalén tomarata, Dioso pejumelivaisibaxutota tajëvelia jumaitsi mapacueniaje:

<sup>15</sup> PaJerusalén tomarapijivimë, pëtsa pajunavame. Pataename pepo papecaevetsinënexa penajetarucaejava. Pejanaburroyota yapatanajetarucaena, jai tajëvelia Dioso pejumelivaisibaxuto Jesús burrojumata pepatanajetaruceajavanexa Jerusalén tomarata.

<sup>16</sup> Itsa bajarapacuenia Jesús pata Jerusalén tomarata, copiapata jane baja pacuenia Dioso pejumelivaisibaxutota tajëvelia jumaiti Jesús yabara. Bajarapamatacabi Jesús pijajivi tae ata bajarapacueni, itsiata abaxë apo yapëtae pecopiapatsijava bajarapacueni. Matapania baja Jesús pepuaponae athëbëabetsia, Jesús pijajivi yapëtanecopiapatsijava baja pacuenia Dioso pejumelivaisibaxutota tajëvelia jumaiti Jesús yabara.

<sup>17-18</sup> Pamonae tane pamatacabi Jesús Lázaro asaëyaexana petëpaenëmi, bajarapamonae tsipaeba Jerusalén tomarapijivijavabelia. Tsipaeba pacuenia bajarapamonae tane Jesús Lázaro piasaëyaexanaejavata petëpaenëmi. Bajaraxuata jivi ayabitsaëto pitsapa tomaravelia pecopiapitsinexatsi Jesús. <sup>19</sup> Nexata fariseovi itsa tane bajarapacueni, najumaiti:

—Pataema. Daxitajivi pënaponatsi Jesús. Vaxaitsi baja nexata acuenebi vajaexanaejava Jesús jivi pepënaponaejavatsi yabara, najai fariseovi.

### **Pacuenia Grecia nacuapijivi Jesús jamatabëtanetsi yabara pelivaisi**

<sup>20</sup> Ayaibitsaëto jivi pata Jerusalén tomarata Diosojavabelia pevajëtsinexa pascuavënë fiestamatacabita. Bajarapamonaeyajuvënëvi itsamonae Grecia nacuapijivi.

<sup>21</sup> Nexata Grecia nacuapijivi kujibaliatsi Felipe. Felipe Betsaida tomarapijinë. Betsaidatomara eca Galilea nacuata. Nexata Grecia nacuapijivi jumaiti Felipejavabelia: —Felipe, pajamatabëtaniji raja Jesús, jai.

<sup>22</sup> Felipe nexata pona Andrésjavabelia petsipaebinxaxacuenia Grecia nacuapijivi jumaiti. Nexata Felipebeje Andrésbeje ponabeje petsipaebinxabeje Jesúsjavabelia.

<sup>23</sup> Nexata Jesús jumaiti bajaraponëbejejavabelia:

—Xanë, Daxitajivi Pematapijinënë, tajamatacabi baja netocopiapata tanavitsinexa baja athëbëabetsia ayaijamatabëcuenenënë Dioso taneexanaenexa. <sup>24</sup> Xaniajanë pacuenia pacatsipaebijitsiatsi. Trigoxuto itsa apo ubitsi irabelia, saya tsitecanuca caexutoyo. Itsiata itsa ubatsi, pejuvicujinae xutsabana vajaubixutoyomi penacopatsinexa pejanaboto. Nexata itsa nacuita bajarapaboto, ayajava pexu capitsapa. <sup>25</sup> Bajara pijinia itsi jivi ata. Pajivi jamatabëjumaiti ata tsane petëpaeyaniva: “Xanë nayajivitaeyaponaponaenajë tanebejiobiaexanaeyaniva, tanebeyaxuabiyoniva ata,” jamatabëjai ata tsane, itsiata tëpaena. Nexata Diosovecua naxuabiana. Biji rajane pajivi nesivanajamatabëcopatsiaya jamatabëjumaiti tsane: “Jema nebejiobiaexanaena. Jema nebeyaxuabiananua Jesús pijajivitonëxanë,” jamatabëjai tsane, bajarapajivi xainaena matacabi apo pevereverecejava. <sup>26</sup> Pajivi jamatabënetonacueneba, bajarapajivi nepënoponaena. Nexata pajivi netonacuenebiana, neyjavaponaponaena itsajota ponaponaenajë. Pajivi netonacuenebiana, bajarapajivi yabara taxa Dioso jumaiti tsane: “Bajarapajivi sivajamatabëcuenëbarëyanë,” jai tsane, jai Jesús Felipebeje Andrésbejejavabelia.

### **Pacuenia Jesús tajëvelia navajunupaeba pacuenia beyaxuabijitsiatsi yabara pelivaisi**

<sup>27</sup> Jesús bëpënëa jamatabëjumaiti:

—Aeconoxae bitso najamatabëxainajë. ¿Detsa meta jumaitsinë tsane taxajavabelia? Jumaitsinë meta tsane: “Taxa, betajobicuena tanebeyaxuabijavaminexa, vecuanecapanepaename,” janë meta tsane taxajavabelia. Jume raja. Bajarapacuenia meta apo vajëtsinë tsane. Tspaji betajobicuena tanebeyaxuabinexa, patajë mapanacuayabetsicaje, jamatabëjai Jesús.

<sup>28</sup> Nexata Jesús Diosojavabelia jumaitsi:

—Taxa, pacuenia jitsipame nexanaenexa jivi pecayaiyataenexa, exanare, jai Jesús. Nexata bajarajota Jesús jumetane athëbëvetsica ayaijume. Jumaitסיםica mapacueniajaje:

—Jivi rabaja cajena neyaiyatane. Itsiata matavëjëa neyaiyataena, jaitsica.

<sup>29</sup> Jivibitsaëto bajarajota penubenaevi jumetane bajarapajume. Nexata bajarapamonae jumaitsi:

—Yamaxë raeta najumeta, jai.

Itsamonae pijinia jumaitsi:

—Angel raeta barëcuaijaiitsi Jesús, jai.

<sup>30</sup> Nexata Jesús jumaitsi bajarapamonaejavabelia:

—Xanë raja tajumetaenexa bajarapajume apo jumaitסיםica. Paxamë raja panejumetaenexa jumaitסיםica. <sup>31</sup> Aeconoxae rabaja copiapatsiana Dioso penaneconitsiaexanaematacabinexa daxita pijaneconi pexainaevi. Vecuaxuabiananua dovathi, ponë mapanacuata jivi itorobabiaba pibisiacuene pexanaenexa. <sup>32</sup> Itsa neyotarut-siana cruzajavabelia tanebeyaxuabinexa, nexata daxitajivi jitsipaeyaexanaenajë xanë tanesivanajamatabëcuene copatsinexa, jai Jesús.

<sup>33</sup> Bajarapacuenia Jesús tajëvelia jumaitsi jivijavabelia jivi peyapëtaenexa pacuenia Jesús tēpaejitsia. <sup>34</sup> Nexata bajarapamonae jumaitsi Jesúsjavabelia:

—Dioso Moiséspijinëta penajumecopatsilivaisi tajëvelia jumaitsi mapacueniajaje: “Cristo, ponë athëbëvetsica Dioso itorobijitsiatsica jivi pecapanepaenexa, asaë tsaponaponae tsane daxitamatacabijavabelianexa pevetsinexa mapanacuaje,” jai. Itsiata xamë Cristo atamë, jumaitsimë: “Xanë, Daxitajivi Pematapijinëne, neyotarut-siana cruzajavabelia tanebeyaxuabinexa,” jamë. ¿Detsa nexata ponë Cristo daxita matacabijavabelianexa asaë tsaponaponae tsane? jai bajarapamonae Jesúsjavabelia.

<sup>35</sup> Nexata Jesús jumaitsi bajarapamonaejavabelia:

—Imoxoyo rabaja pevajënae taponamatacabinexa. Abaxë raja itsiata taponaponamatacabibeje, pacatsipaebianatsi pexaniajailivaisi patacajamatabëcueneitayotsinexa. Nexata itsa pacatsipaebianatsi pexaniajailivaisi, panejumecovënëtsianame paneajamatabëcueneitaquiriyani. Pajivi ajamatabëcueneitaquiri, apo xainae tsane matacabi apo pevereverecejave. <sup>36</sup> Xanë rabaja pexaniajailivaisita pacajamatabëcueneitayotsianatsi. Taponaponamatacabibeje abaxë mapanacuatajaje, pansivanajamatabëcopatsianame. Bajarapacuenia nexata jamatabëcuenenaitayotsiaya pajinavanapaename, jai Jesús bajarapamonaejavabelia.

Bajarapacuenia pejumaitsicujinae, Jesús baja pona pevecuanamatayabinexa bajarapamonae.

**Pacuenia judíovi jamatabëjumaitsi Jesús yabara: “Maponëje apo Cristo, ponë copiaevetavanapatsi vajanacapanepaenexa,” jamatabëjai yabara pelivaisi**

<sup>37</sup> Jesús ayaiacuene pexanaejave Dioso pesaëta judíovi pitabarata exanapona. Judíovi tae ata bajarapacueni, itsiata apo jumecovënëtsi Cristocuene. <sup>38</sup> Nexata

judíovi itsa apo jumecovënëtsi Cristocuene, copiapata jane baja pacuenia bajayata tajëvelia yaquina Diosojumepaebinëmi, profeta Isafaspijinë. Judíovi Cristocuene apo pejumecovënëtsijavanexa yabara, bajayata Isafaspijinë peyaquinaelivaisita tajëvelia jumaitsi mapacueniaje:

Dioso, patatsipaebilivaisi cajena jivi apo panejumecovënëtsi tsane. Bajarapamonae apo panejumecovënëtsi tsane,

tae ata nesaëta pinijicuene pataexanaejava, jai bajayata tajëvelia Isafaspijinë peyaquinaelivaisita judíovi Cristocuene apo pejumecovënëtsijavanexa yabara.

<sup>39</sup> Bajaraxuata Cristo patsi ata, judíovi apn jumecovënëtsi Cristocuene. Isafaspijinë peyaquinaelivaisita, judíovi yabara icatsia tajëvelia jumaitsi mapacueniaje:

<sup>40</sup> Bajarapamonae Dioso itaxutotsëcënaeyaexanaena. Ajamatabëcuenetajaya exanaenana. Bjarapacuenia Dioso exanaena bajarapamonaejavabelia. Nexata bajarapamonae tae ata tsane pinijicuene Dioso pesaëta pexanaejava, itsiata bajarapamonae apo yapëtae tsane pajamatabëcuenelivaisi xaina petaejava. Nexata bajarapamonae Diosojavabelia apo najamatabëcuenepënyorotsi tsane perujumatabëcuenevuca. Nexata apo jamatabëcuenexaniavaetsinë tsane,

jai bajayata tajëvelia Isafaspijinë peyaquinaelivaisita judíovi Cristocuene apo pejumecovënëtsijavanexa yabara.

<sup>41</sup> Bjarapacuenia Isafaspijinë yaquina tsipaji bajayata Isafaspijinë bemajitsinaebota tane Jesús ayaijamatabëcuene pexainanëcuene. Bjaraxuata bajayata Isafaspijinë bajarapacuenia Jesús vajunupaeba baja cajena.

<sup>42</sup> Itsiata judíoviyajuvënëvi ayaibitsaëto jumecovënëta Cristocuene. Judíovi pevetsivi ata jumecovënëta Cristocuene. Bjarapamonae judíovi pevetsivixae, apo navajunupaebi pejumecovënëtsijava Cristocuene. Tsipaji cujunava fariseovi. Bjarapamonae bëpënëa jamatabëjumaitsi:

—Apo navajunupaebinë tsane tajumecovënëtsijava Cristocuene tanecapit-sapaeyaniva fariseovi judíovi penacaetuatabiboveuca, jamatabëjajai bëpënëa bajarapamonae.

<sup>43</sup> Tsipaji bajarapamonae jitsipa penajuaevetsivi pesivabarëyajavatsi Dioso pesivabarëyajavatsi matatoxenetsia.

### **Pacuenia jivi naneconitsijitsia Diosojavabelia itsa apo jumecovënëtsi Jesús petsipaebilivaisi yabara pelivaisi**

<sup>44</sup> Jesús jumaitsi ayaijumeta jivijavabelia:

—Pajivi jumecovënëtsiana Cristocuenenë, bajarapajivi ëxanë yabara apo jumecovënëtsi tsane. Taxa, ponë nitorobica, bajaraponë yabara ata jumecovënëtsiana.

<sup>45</sup> Pajivi necueneyapëtaena, bajarapajivi taneitorobinëtsica ata cueneyapëtaena.

<sup>46</sup> Xanë rabaja pexaniajailivaisita jamatabëcueneitayotsianajë mapanacuapijivije. Nexata pajivi jumecovënëtsiana Cristocuenenë, apo ajamatabëcueneitaquiri tsane.

<sup>47</sup> Pajivi jumeyapëtae ata tsane tatsipaebilivaisi, itsiata itsa apo jumecovënëtsi tsane bajarapalivaisi, bajarapajivi naneconitsiana Diosojavabelia. Itsiata xanë bajarapajivi apo naneconitsiaexanaenë tsane. Tsipaji xanë apo patsinëtsica tananeconitsiaexanaenexa mapanacuapijivije. Biji rajane xanë patsicajë tacapanepaenexa mapanacuapijivije. <sup>48</sup> Pajivi nenayajiviitavetsiana, apo nejumecovënëtsinua tsane tatsipaebilivaisi ata, bajarapajivi taxa Dioso naneconitsiaexanaenatsi. Bjarapajivi taxa Dioso naneconitsiaexanaena pamatacabi naneconitsiaexanaena daxita pi-

janeconi pexainaeivi tatsipaebilivaisi apo pejumecovënëtsixae. <sup>49</sup> Tsipaji xanë taja-matabëcueneta apo paebinë bajarapalivaisi. Taxa raja, ponë nitorobica, nitoroba bajarapalivaisi jivi tatsipaebinxeta. <sup>50</sup> Yapëtaniji baja cajena jivi pexainaejavanexa maticabi apo pevereverecejava itsa jumecovënëta taxa pitorobilivaisi. Nexata bajarapalivaisi itsa tsipaebaponajë jivijavabelia, tsipaebaponajë pacuenia taxa Dioso nitoroba tatsipaebinxeta, jai Jesús jivijavabelia.

**Pacuenia Jesús beveliajamatabëcuenenë nataeya taxuquiatapona pijajivi, caenë canacujitsia, yabara pelivaisi**

**13** Caematacabi baja saica pejonenexa pascuavënëfiesta. Jesús nexata yapë-tane pamatacabita pijavajabitsaë beyaxuabijitsiatsi. Yapëtanenua peponae-javanexa paxa Diosojavabetsia. Jesús bitso asiva pijajivi, mapanacuapijivije. Jesús nexata bajarapamatacabi pijajivi tsitanajamatabëcuenetitajëta piasivacuene.

<sup>2</sup> Jesús pijajivi barë nabane caniviyopijijava. Nexata Judas Iscariote, Simón pexë-nato, dovathi pejamatabëcueneta najamatabëxainaeaxanatsi. Nexata Judas najamatabëxaina Jesús pecanajetsinxeta pijavajabitsaë pecobeyabelia. <sup>3</sup> Jesús yapë-tane paxa Dioso perajutsijavatsi daxitacuene pevetsinxeta. Yapëtanenua paxa Diosojavavetsica pepatsijava. Icatsia pacuenia ata naviatsijitsia paxa Diosojav-abetsia, yapëtane. <sup>4</sup> Nexata Jesús pijajivi pebarë nabanijavata, Jesús nonotapuna mesajavata. Najumajonota penaxatatsijava. Nexata toalla naepacëta. <sup>5</sup> Jesús mera epata penacobequiatsinëjavabelia petaxuquiatsinxeta pijajivi. Jesús nexata beveli-ajamatabëcuenenë nataeya taxuquiatapona pijajivi, caenë canacujitsia. Taxuquicapona icatsia pijatoallata penaepacëtsipanata.

<sup>6</sup> Itsa Jesús taxuquiatsijitsia Simón Pedro, nexata Simón Pedro jumaitsi:

—Tajatuxanenë, apo jitsipaenë tanetaxuquiatsijavamë. Tsipaji ayaijamatabëcuenenëmë, jai Simón Pedro Jesúsjavabelia.

<sup>7</sup> Jesús nexata jumaitsi:

—Aeconoxae abaxë apo yapëtaemë pajamatabëcuene yabara cataxuquiatsijitsiatsi. Itsiata baitsi jane bexëjavabelia yapëtaename, jai Jesús.

<sup>8</sup> Nexata Pedro jumaitsi:

—Aponataxucopatsi tsanetsi tanetaxuquiatsinxamë, jai Pedro.

Jesús nexata jumaitsi:

—Itsa apo cataxuquiatsi tsanetsi, nexata apo tajajivitonëmë tsane, jai Jesús Pedrojavabelia.

<sup>9</sup> Simón Pedro nexata jumaitsi:

—Tajatuxanenë, ëtataxu nexata apo netoquiatsimë tsane. Tacobe ata, tamatabocoto ata, netoquiatsianame, jai Pedro.

<sup>10</sup> Jesús nexata jumaitsi Pedrojavabelia:

—Pajivi baja navane, apo namatavenonae baja pequiatsinexatsi daxitanë. Saya namatavenona ëpetaxuquiatsinexatsi. Tsipaji baja daxitanë axuirajibi. Paxamë rabaja pajamatabëcuenexuirajibimë. Itsiata baitsi jane apo padaxitamë, jai Jesús Pedrojavabelia.

<sup>11</sup> “Pajamatabëcuenexuirajibimë. Itsiata baitsi jane apo padaxitamë,” jai Jesús. Tsipaji yapëtane tajëvelia ponë canajetsijitsiatsi pijavajabitsaë pecobeyabelia.

<sup>12</sup> Petaxuquiatsicujinae pijajivi, Jesús baja icatsia penaxatatsijava naxatata. Eca icatsia mesa muxuneneta. Jumaitsi pijajivijavabelia:



—¿Payapëtaneme tsabaja paxamë pajamatabëcuene yabara pacataxuquiatatsi? <sup>13</sup>“Vajanacacujarubinë,” pajamë tsabiabi itsa panabarëcuaicuajiamë xanë yabara. Itsajavata: “Vajatuxanenë,” pajamë tsabiabi. Paxaniajamë rabaja cajena. Bajara tsipaji taitsinë. <sup>14</sup>Xanë, patacacujarubinë ata, panijatuxanenë atanëna, beveliamatabëcuenenënë nataeya pacataxuquiatatsi bepanijajivitonënëcuena. Nexata bajarapacuenia paxamë ata beveliamatabëcuenevi nataeya panataxuquiatabiabianame namataenetsia. <sup>15</sup>Pacatsitaexanatsi bajarapacuenie paxamë ata bajarapacuenia namataenetsia panenatoexanaenexa. <sup>16</sup>Xaniajanë pacuenia pacatsipaebijitsiatsi. Paxamë cajena apo panejamatabëcuene matatoxenetsimë. Tsipaji itsanë ata apo jamatabëcuenematatoxenetsi pitorobinëtsi. <sup>17</sup>Payapëtaneme rabaja pajamatabëcuene yabara panijatuxanenë atanë, beveliamatabëcuenenënë nataeya pacataxuquiatatsi. Nexata pijinia paxamë ata bajarapacuenia beveliamatabëcuenevi nataeya namataenetsia nasivaya itsa panayavenonabiabianame, pajamatabëcuenebarëyamë tsavanapae tsane, jai Jesús pijajivijavabelia.

<sup>18</sup>Icatsia Jesús jumaitsi pijajivijavabelia:

—Daxita raja itsiata apo pajamatabëcuenebarëyamë tsavanapae tsane. Tsipaji caenë paxamëyajuvënë, ponë naxaena xanëta, bajaraponë necanajetsiana tajavajabitsaë pecobeyabelia pacuenia tajëvelia jumaitsi Dioso pejumelivaisibaxutota. Yapëtaniji ponë necanajetsijitsia. Tsipaji xanë patacaitapetsivi patajajivinxamë, pacajamatabëcuenyapëtanetsi pacaenëmë canacujitsia. Nexata pacuenia tajëvelia Dioso pejumelivaisibaxutota jumaitsi xanë yabara, bajarapacuenia netocopiapitsiana. <sup>19</sup>Pacatsipaebatsi bajarapacuenia taneexanaevajënaeya. Nexata itsa nebeyaxuabiana, panejumecovënëtsianame xanë Cristocuenenë pacuenia baja cajena pacatsipaebatsi. <sup>20</sup>Xaniajanë pacuenia pacatsipaebijitsiatsi. Pajivi copiapitsiana taitorobinë, xanë neyjavacopiapitsiana. Pajivi necopiapitsiana, bajarapajivi neyjavacopiapitsiana taxa Dioso, ponë nitorobica, jai Jesús pijajivijavabelia.

**Pacuenia Jesús navajunupaeba Judas pecanajetsijavanexatsi  
pijavajabitsaë pecobeyabelia yabara pelivaisi**

(Mt 26.20-25; Mr 14.17-21; Lc 22.21-23)

<sup>21</sup>Jesús pejamatabëthëtota bëpënëa bitso natsinajamatabëxaina. Nexata roviaalia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënë necanajetsiana tajavajabitsaë pecobeyabelia, jai Jesús pijajivijavabelia.

<sup>22</sup>Nexata Jesús pijajivi nataeyena. Tsipaji apo yapëtae ponë yabara Jesús jumaitsi.

<sup>23</sup>Jesús pijajiviyajuvënë, caenë bitso asivaya tane. Bajaraponëbeje Jesúsbeje namuxunenixaeyecabeje. <sup>24</sup>Nexata bajaraponë Jesúsjavabelia petoyanijobinexatsi, Simón Pedro pecobeta itorobica.

—Yanijobare ponë yabara Jesús jumaitsi, jai tsecae Simón Pedro pecobeta.

<sup>25</sup>Nexata bajaraponë natixireca. Eca bitso Jesús pemuxuneneta peyanijobinexa Jesúsjavabelia.

—Tajatuxanenë, ¿jipatsa yabara jumaitsimë? jai bajaraponë Jesúsjavabelia.

<sup>26</sup>Nexata Jesús jumaitsi pijajivitonëjavabelia, bitso piasivanëjavabelia:

—Ponë ra peneta panjavayo tocabajubtsianajë, bajaraponë tsane, jai Jesús pijajivitonëjavabelia, bitso piasivanëjavabelia.

Nexata Jesús panjavayo pita. Cajabuta. Nexata jane baja rajuteta Judas Iscariote, Simón pexenatojavabelia. <sup>27</sup> Judas itsa pita pan, nexata bajarajota Judas dovathi tsijamatabëjunuatsi. Nexata Jesús jumaiti Judasjavabelia:

—Xua baja exanaejitsiamë, naxanitsiayo baja exanare, jai Jesús.

<sup>28</sup> Itsiata baiti jane pamonaë najuaxaeyena bajarapamesata, apo jumeypëtaë xua yabara Jesús jumaiti Judasjavabelia. <sup>29</sup> Judas tovetabiaba bajarapamonae pi-japalatadoro. Bajaraxuata Judas yabara Jesús pijajivi jamatabëjumaiti:

—Jesús raeta itoroba Judas pecomuatsinexa vajaxaëjavanexa fiestajavata. Itsa jume, itoroba meta perajutsinexa itsacuenëjavaxi bepejiobivijavabelia, jamatabëjai Jesús pijajivi.

<sup>30</sup> Itsa baja Judas pan pita, bovecua pitsapalia vayafuabelia, meravi baja.

### **Pacuenia Jesús pijajivi itoroba namataenetsia penaasivatsavanapaenexa yabara pelivaisi**

<sup>31</sup> Pabota Jesús pijajivi barënacaetuata, bajarapabovecua Judas pitsapalia. Nexata Judas pepitsapaecujinaelia Jesús jumaiti pijajivijavabelia:

—Aeconoxae rabaja xanë, Daxitajivi Pematapijinënë, najamatabëcueneitajët-sianajë ayaijamatabëcuene taxinaejava. Taxa Dioso ata bajarajota yajavajamatabëcueneitajët-sianajë ayaijamatabëcuene pexinaejava. <sup>32</sup> Nexata taxa Dioso juya nejamatabëcueneitajët-siana ayaijamatabëcuene taxinaejava. Bajarapacuenë baja naxanitsiayo taxa Dioso exanaena. <sup>33</sup> Bepataximë patacataevi. Bajara maapo pacayajavaponaponaetsi tsane bajayajebije. Paxamë panejajitsianame. Pacuenia jumaitisnë itsamonae judïovijavabelia, bajarapacuenia paxamëjavabelia ata pacajumaitisijitsiatsi. Apo pacacajëpae tsane paneponaenexa itsabelia ponaejitsianë. <sup>34</sup> Pacatsipaebijitsiatsi icatsia pejanalivaisi. Paexanavanapaename mapacueniaje. Pasivamë tsavanapae tsane itsamonae ata. Pacuenia xanë pacaasivatsi, bajarapacuenia namataenetsia panaasivamë tsavanapae tsane. <sup>35</sup> Namataenetsia itsa panaasivamë tsavanapae tsane, nexata daxitanacuanëpijivi pacayapëtaena patajajivicuenemë, jai Jesús pijajivijavabelia.

### **Pacuenia Jesús tajëvelia jumaiti Pedrojavabelia: “Pedro, xamë nayavajunuaxainaname tajajivitonëcuenemë,” jai yabara pelivaisi**

*(Mt 26.31-35; Mr 14.27-31; Lc 22.31-34)*

<sup>36</sup> Simón Pedro yanijoba Jesúsjavabelia.

—Tajatuxanenë, ¿detsa belia ponaejitsiamë? jai Pedro.

Nexata Jesús jumaiti Pedrojavabelia:

—Itsa belia ponaejitsianë, econoxae apo cacajëpae tanepënaponanexamë. Itsi-ata baiti jane itsamatacabi nepënaponanename, jai Jesús Pedrojavabelia.

<sup>37</sup> Nexata Pedro jumaiti Jesúsjavabelia:

—Tajatuxanenë, ¿detsa xuajitsia apo necajëpae econoxae tacapënaponanexa? Daxita pacuenia nitorobame, catonexanaejitsipatsi. Nebeyaxuabijitsia ata tsipae xamë yabara, apo cacopatsi tsipaetsi, jai Pedro Jesúsjavabelia.

<sup>38</sup> Jesús nexata jumaiti Pedrojavabelia:

—¿Xaniajamë tsaja? ¿Nacaejetsipame pecabeyaxuabinexa taneasivaxaemë? Xaniajanë pacuenia catsipaebijitsiatsi. Vacara raja pefiabivajënaeya, nayavajunuax-

ainaename tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

### Pacuenia Jesús benamuto paxa Diosojavabetsia yabara pelivaisi

**14** Jesús jumaitsi pijajivijavabelia:

—Pëtsa bitso panajamatabëxainame patacavecuaponaejavanexa yabara. Panajamatabëcuenecopare Diosojavabelia, xanëjavaberena ata. <sup>2</sup>Taxajavatatsia pexaniabobitsaëtonë xaina panejinavanapaenexa. Itsa bajara apo itsipae, apo pacatsipae bi tsipaetsi. Nexata bajarabetsia ponaejitsianë patacatsivajënaexaniavaetsinexa itsajota papatsijitsiamë. <sup>3</sup>Xanë taponaeucujinae mavetsiaje, itsa baja veretsianajë patacatsivajënaexaniavaetsijava itsajota papatsijitsiamë, icatsia patsianicajë patacaponaeenexatsia jane baja. Nexata bajarajotatsia pacayajavaecaenatsi, itsajota ecaenajë. <sup>4</sup>Paxamë baja payapëtaneme itsabelia ponaejitsianë. Payapëtanemenua baja panepatsinexa itsajotatsia ecaejitsianë, jai Jesús pijajivijavabelia.

<sup>5</sup>Nexata Tomás, Jesús pijajivitonë, jumaitsi:

—Tajatuxanenë, apo payapëtaenë cajena itsabelia ponaejitsiamë. ¿Detsa nexata pacuenia payapëtaenajë namuto pataponaenexa itsabelia ponaejitsiamë? jai Tomás Jesúsjavabelia.

<sup>6</sup>Jesús nexata jumaitsi:

—Xanë rabaja benamutonë. Tshipaji xanë tajamatabëcueneta jivi panepaena athëbëbetsia. Xanë rabaja pepo pexaniajailivaisi jivi tatsipaebaponaenë. Xanë rabaja xainajë maticabi apo peverevereaejava tarajutsinexa pamonaesivanajamatabëcopata. Itsajivi ata apo patsicapanepe tsane taxajavabetsia xanë itsa apo nejumecovënëtsi. <sup>7</sup>Paxamë picani bajayata apo paneyapëtaemë. Nexata picani taxa ata apo payapëtaemë. Aeconoxae rabaja paneyapëtaneme. Nexata baja taxa ata payapëtaneme. Patanemenua baja, jai Jesús.

<sup>8</sup>Nexata Felipe jumaitsi Jesúsjavabelia:

—Tajatuxanenë, panetsitajëre axa. Pajitsipajë baja cajena bitso axa patataenexa, jai Felipe Jesúsjavabelia.

<sup>9</sup>Jesús nexata jumaitsi:

—Felipe, bajayajebi rabaja pacayjavaponaponatsi. ¿Itsiata tsaja abaxë xaniavaetsia apo paneyapëtaemë? Pajivi netane, bajarapajivi taxa ata tane. ¿Detsa xuajitsia nexata nevajëcame taxa netaenexa? <sup>10</sup>Taxa baja cajena neyjavaponapona. Xanë ata taxa yajavaponaponajë. ¿Abaxë tsaja apo jumecovënëtsimë? Palivaisi pacatsipae batsi, tajamatabëcueneta baja cajena bajarapalivaisi apo pacatsipae batsi. Taxa raja, ponë neyjavaponapona, bajaraponë pejamatabëcueneta bajarapalivaisi neyapëtaeyaxana. Nexata bajarapalivaisi pacatsipae batsi. <sup>11</sup>Panejumecovënëre taxa taya javaponaponaejava. Panejumecovënërenua taxa ata taneyjavaponaponaejava. Patacatsipae bilivaisianë apo panejumecovënëtsi atamë, itsiata ayai cuene Dioso pesaëta taexanaexae, panejumecovënëre taxa tayjavaponaponaejava. <sup>12</sup>Xaniajanë pacuenia pacatsipae bijitsiatsi. Pajivi nejumecovënëtsiana, bajarapajivi exanaena pacuenia xanë exanajë. Ayai cuene taexanaejava matatoxenetsia bajarapajivi exanaena. Tshipaji xanë naviatsianijë taxajavabetsia. <sup>13-14</sup>Daxita xua xanë tavënëta pavajëtsianame taxajavabelia, pacatoexanaenatsi cajena. Xanë, Dioso pexëtonë, bajarapacuenia pacatoexanaenatsi taxajavabelia panejamatabëcuenëbarëyanexa, jai Jesús pijajivijavabelia.

**Pacuenia Jesús najumecapanepaeya jumaitsi pitorobinexatsica  
Espíritu Santo jivijavabetsica yabara pelivaisi**

<sup>15</sup> Icatsia Jesús jumaitsi pijajivijavabelia:

—Itsa paneasivamë, paexanabiabianame pacuenia pacaitorobatsi. <sup>16</sup> Vajëtsianajë taxajavabelia itsanë juya papecatoitorobinexatsica papecayavenonaenënexa daxitamatacabijavabelianexa. Bajaraponë Espiritu Santo. <sup>17</sup> Espiritu Santo cajena pepo pexaniajailivaisi jivi peyapëtaeyaexanaenë. Bajaraponë mapanacuapijivi abaxë apo tsijamatabëecaetsi. Tsipaji bajarapamonae apo nejumecovënëtsi. Nexata apo yapëtae ponë Espiritu Santo. Apo yapëtaenua cajena Espiritu peponaponaejava ata. Itsiata baitsi jane paxamë Espiritu Santo payapëtaneme baja. Tsipaji baja bajaraponë pacayajavaponapona. Espiritu Santo cajena pacatsijamatabëecaena daxitamatacabijavabelianexa. <sup>18</sup> Ponaë atanë tsane taxajavabetsia, itsiata apo pacaxuabi tsanetsi. Icatsia raja patsianicajë patacayajavaponaponaenexa. <sup>19</sup> Caematacabibejecujinae baja jivi apo netae tsane. Itsiata icatsia paxamë panetaename. Paxamë paxainaename matacabi apo peverevereaejava. Tsipaji tatëpaecujinae icatsia asaenë tsaponaponaë tsane. <sup>20</sup> Pamatacabi Espiritu Santo patsianica paxamëjavabetsica, bajarapamatacabi payapëtaename taxa tayajavaponaponaëjavanexa. Payapëtaenamenua pataneyajavajinavanapaejavanexamë. Payapëtaenamenua xanë ata patacayajavaponaponaëjavanexa. <sup>21</sup> Pajivi yapëtane, taitorobicuenia nejumecovënëtanua, bajarapajivi niasiva. Pajivi niasiva, bajarapajivi taxa juya asivatsi. Xanë ata bajarapajivi asivanë. Tsitanaitajëtsianajë bajarapajivijavabelia, jai Jesús pijajivijavabelia.

<sup>22</sup> Itsanë Judasvënënë, itsiata apo Judas Iscariote, jumaitsi Jesúsjavabelia:

—Tajatuxanenë, ¿detsa xuajitsia ëpaxanë panetsitanaitajëtsianame? ¿Detsa xua-jitsia apo tsitanaitajëtsimë tsane itsamonaëjavabelia? jai Judas Jesúsjavabelia.

<sup>23</sup> Jesús nexata jumaitsi Judasjavabelia:

—Pajivi niasiva tsane, nejumecovënëtsiananua tatsipaebilivaisi, bajarapajivi juya taxa asiva tsanetsi. Nexata paxanëbeje, taxabeje, bajarapajivi payajavaponaenajëbeje. <sup>24</sup> Pajivi apo niasiva tsane, bajarapajivi apo nejumecovënëtsinua tsane tatsipaebilivaisi. Xanë palivaisi pacatsipaebaponatsi, xanë raja apo tajumelivaisi. Taxa raja, ponë nitorobica, pejumelivaisi, jai Jesús Judasjavabelia.

<sup>25</sup> Icatsia Jesús jumaitsi pijajivijavabelia:

—Abaxë patacayajavaponaponaepato pacatsipaebijitsiatsi mapacueniaje. <sup>26</sup> Taxa tajamatabëcueneta, Espiritu Santo pacatoitorobianica papecayavenonabiabinexa. Nexata Espiritu Santo pacayapëtaeyaexanaena daxitacueni. Pacanajamatabënapitsiaexanaenanua daxita palivaisi pacatsipaebaponatsi, jai Jesús.

<sup>27</sup> Icatsia Jesús jumaitsi pijajivijavabelia:

—Pacanapëjiobatsi jamatabëcuenexanepanaeya. Pacajamatabëcuene barëyayaexanaenatsi. Bajarapajamatabëcuenebarëyajava, apo jëpae mapanacuata pebarëyajava. Nexata bepjjia apo vereverecae tsane paxamë panejamatabëcuenebarëyajava. Pëtsa pajamatabëcuenebëjamë. Pëtsa pacujunavamenua itsacuene ata. <sup>28</sup> Panejumetaneme rabaja patacajumaitsijava mapacueniaje: “Xanë baja ponaenajë taxajavabetsia. Itsiata baitsi jane icatsia pacasivapatsianicatsi,” patacajjajava. Itsa bitso panejitsipaëjitsipame, nexata pasivajamatabëcuenebarëyamë tsipae taponae-

javanexa taxajavabetsia. Tsipaji taxa nevecuaayajamatabëcuenenë. <sup>29</sup> Bajarapacuenia pacajumaitsitsi taponaevajënaeya. Nexata itsa copiapatsiana patacajumaitsicovëya, panejumecovënëtsianame Dioso pexënatocuenenë, jai Jesús pijajivijavabelia.

<sup>30</sup> Icatsia Jesús jumaitsi pijajivijavabelia:

—Apo necuenecaëjëpae rabaja pematatsënëa livaisi patacatsipaebaponaenexa. Tsipaji rabaja imoxoyo dovathi najetaruca, ponë mapanacuapijivi pijatuxanenë. Itsiata baitsi jane bajaraponë apo caëjëpaetsi xanë taneitorobinexa tatoexanaenexa pacuenia picani bajaraponë jitsipa. Apo caëjëpaetsinua taneitsacueniabinxexa. <sup>31</sup> Biji rajane pacuenia taxa nitoroba tatoexanaenexa, bajarapacuenia exanaenajë. Nexata daxita mapanacuapijivije yapëtaena taxa tasivajava. Panonobapunare. Ponatsi baja mapacovëvecuaje, jai Jesús pijajivijavabelia.

### Pacuenia Jesús bepeubinae yabara pelivaisi

**15** <sup>1-2</sup> Jesús jumaitsi comparacióncuenia pijajivijavabelia:

—Xanë rabaja bepexaniaviriauvanaenë. Nexata paxamë patajajivimë, bepatamaxëranamë. Pacuenia peubijava pevetsinë xaniavaetsia eveta, bajara pijinia pacuenia taxa nacaeveta. Nexata pacuenia peubijava pevetsinë vecuacucuba pibisiamaxëranaxi, penacopatsinexa ëpexaniamaxëranë, bajara itsi taxa. Nexata pacuene taxa apo pacatojitsipae, pacavecuajibiaexanaponaena. Nexata pacuenia taxa Dioso pacatojitsipa, panevajënaeyabelia paexanavanapaename. <sup>3</sup> Paxamë rabaja panejumecovënëtame patacatsipaebilivaisi. Bajaraxuata taxa baja pacavecuaxuaba pibisijamatabëcuenemi. <sup>4</sup> Paxamë paneyajavajinavanapaename. Nexata xanë ata pacayjavaponaponaenatsi. Pamaxërana apo tabunucae tsipae pepo naejavabelia, apo nacuaitsi tsipae. Bajara pijinia pacuenia paxamë ata paitsimë tsipae itsa apo paneyajavajinavanapaemë tsipae. Xaniavaetsia apo pajinavanapaemë tsipae, jai Jesús pijajivijavabelia.

<sup>5</sup> Icatsia Jesús jumaitsi pijajivijavabelia:

—Xanë rabaja beuvanaenë. Paxamë nexata bepatamaxërananëmë. Nexata pajivi neyjavaponaponaena, xanë ata pijinia bajarapajivi yajavaponaponaenajë. Bajarapajivi exanabiabiana bitso Dioso pejitsipaecuenia. Itsa apo paneyajavajinavanapaemë tsipae, nexata apo pacacaëjëpae tsipae panijacuata pexaniacuene paneexanaenexa. <sup>6</sup> Peubijava pevetsinë, piabejemaxëranaxi caucuba penacopatsinexa ëpexaniamaxërananë. Bajaraxuacujinae bajarapamaxëranaxi xuaba. Nexata baja itsa niona bajarapamaxëranaxi, caetuata pexuabinexa isotojavabelia. Bajara pijinia pacuenia taxa Dioso exanaenatsi pamonaë apo neyjavajinavanapae tsane, jai Jesús pijajivijavabelia.

<sup>7</sup> Icatsia Jesús jumaitsi:

—Itsa paxamë tsitecaeya panejumecovënëtavanapaename, nexata apo panacofënëtsimë tsane patacatsipaebilivaisi. Nexata panevajëtabiabianame xua pajitsipame. Nexata pacarajutsianatsi xua panevajëtame. <sup>8</sup> Itsa paxamë jivi patsitaexanavanapaename taxa Dioso pejitsipaecuenia, jivi yaityaenatsi taxa. Nexata daxitajivi paxamë yabara jumai tsane: “Xaniajai rabaja. Bajarapamonae pepacuene Jesús pijajivi,” jai tsane. <sup>9</sup> Pacuenia taxa niasiva, bajara pijinia pacuenia xanë ata pacaasivatsi. Tsiteca paexanavanapaename xua pacaitorobatsi. Tsipaji bitso pacaasivatsi. <sup>10</sup> Taxa niasiva. Tsipaji baja jumecovënëtajë taneitorobicuenia. Nexata yapëtaniji taxa taneasivajava. Bajara pijinia pacuenia paxamë ata itsa panejumecovënëtavana-

paename pacuena pacaitorobatsi, nexata payapëtaename patacasivajava, jai Jesús pijajivijavabelia.

<sup>11</sup> Icatsia Jesús jumaitsi pijajivijavabelia:

—Xanë bitso jamatabëcuenebarëyanë. Nexata pacatsipaebatsi paxamë ata panejamatabëcuenebarëyanexa pacuena xanë jamatabëcuenebarëyanë. Pacatojitsipatsi bitso panejamatabëcuenebarëya tsavanapaenexa. <sup>12</sup> Mapacuenia paexanavanapaenameje. Pacuena xanë pacaasivatsi, bajara pijinia pacuena paxamë ata namataenetsia panaasivamë tsavanapae tsane pacaenëmë canacujitsia. <sup>13</sup> Pajivi peyapëtaejivitsi bitso asiva, jamatabëcuene yavenonabiabijitsipa daxitacuene yabara. Peyapëtaejivitsi pijaneconi yabara ata, yapijivinabeyaxuabiaexanaejitsipa. Nexata bajarapacuenia daxitajivi yapëtaejitsipa pepacujiru bajarapajivi bitso pi-asivaxae peyapëtaejivitsi. Nexata baja pematatsënëa itsajivi ata apo caëjpaetsi bajarapacuenia pexanaejivi matatoxenetsia pi-asivanexa peyapëtaejivitsi. <sup>14</sup> Itsa paexanavanapaename patacaitorobicuena, nexata baja patajamonamë tsane. <sup>15</sup> Aeconoxae baja cajena saya bepatajajivicueniamë apo pacataetsi. Bepatajamonamë baja bitso pacatanetsi. Tspaji baja pacayapëtaeyaexanatsi daxita pacuena taxa nitoroba taexanaenexa. Tspaji mapanacuata petuxanenë pijajivi apo yapëtaeyaexanae daxita pacuena petuxanenë exanaejitsia. <sup>16</sup> Paxamë raja apo panejunatsimë. Biji rajane xanë pacajunatsi patanepënaponanexamë. Nexata xanë pacaitorobatsi paneexanavanapaenexa Dioso pejitsipacuena. Nexata xua paexanavanapaename, apo peverevereaejavanexa tsane. Daxita pacuene tavënëta pavajëtsianame taxa Diosojavabelia, pacarajutsiana cajena. <sup>17</sup> Mara pacuene paneexanaenexa pacaitorobatsije. Namataenetsia panaasivamë tsavanapae tsane pacaenëmë canacujitsia, jai Jesús pijajivijavabelia.

### **Pacuena Jesús pijajivi mapanacuapijivi itoyajitsiatsi yabara pelivaisi**

<sup>18</sup> Jesús icatsia tajëvelia jumaitsi pijajivijavabelia:

—Mapanacuapijivi, Dioso apo pejumecovënëtsivi, itsa pacaitoya tsane, panajamatabënapsianame xanë copiaya taneitoyajava bajarapamonae. <sup>19</sup> Mapanacuapijivi, pamona Dioso apo pejumecovënëtsivi, namataenetsia nasiva tsavanapae. Paxamë ata bajarapamonae ita pajamatabëcuenejëpa vanapaejitsipame, nexata paxamë ata bajarapamonae pacaasiva tsipae. Itsiata baitsi jane xanë baja pacajunatsi bajarapamonaevecua. Nexata baja paxamë apo pajamatabëcuenejëpaemë bajarapamonae. Bajaraxuata pacaitoya tsane bajarapamonae. <sup>20</sup> Panajamatabënapitabiabianame najumecapanepaeya patacajumaitsijava: “Itsanë ata apo jamatabëcuematatoxenetsi pijatuxanenë,” patacajajava. Nebejioxiaexana itsamonae. Nexata paxamë ata itsamonae pacabejioxiaexanaena. Itsamonae nejumecovënëta tatsipae-bilivaisi. Nexata pijinia paxamë ata itsamonae pacajumecovënëtsiana panetsipae-bilivaisi. <sup>21</sup> Bajarapacuenia pacaexanaena mapanacuapijivije xanë patajajivixaemë. Tspaji bajarapamonae apo yapëtae Dioso, ponë nitorobica, jai Jesús tajëvelia pijajivijavabelia.

<sup>22</sup> Icatsia Jesús jumaitsi pijajivijavabelia:

—Xanë ita apo patsinëtsica tsipae mapanacuayabetsicaje, mapanacuapijivi apo naneconitsi tsipae Diosojavabelia. Tspaji bajarapamonae Dioso apo peyapëtaexae, pibisiacuene exanaejitsipa. Nexata xanë tapatsixaetsica mapanacuayabetsicaje, ba-

jarapamonae yapētane baja Dioso. Nexata bajarapamonae yapētae ata Dioso, pibisiacue pexanaexae, nexata naneconita Diosojavelia. Nexata acuenebi bajarapamonae pejumlahitsijava pibisiacue pexanaejava yabara: “Apo tayapētaexae Dioso, pibisiacue exanajē,” pejaijava. <sup>23</sup>Nexata pamona nitoya, bajarapamonae taxa ata itoya. <sup>24</sup>Bajarapamonaejavata Dioso pesaēta pinijicue taexanaejava exanabiabajē. Bajaraxua itsajivi ata apo exanae mapanacuata. Bajarapamonaejavata pinijicue taexanaejava ita apo exanaenē tsipae, apo naneconitsi tsipae Diosojavelia. Tsipaji bajarapamonae apo yapētae tsipae Dioso. Bajarapamonae taē ata Dioso pesaēta pinijicue taexanaejava, itsiata apo nejumecovēnētsi. Bajarapamonae nitoya. Taxa ata itoya. Nexata naneconita Diosojavelia. <sup>25</sup>Bajarapacuenia nitoya tsipaji baja cajena bajayata tajēvelia bajarapamonae taneitoyajavanexa yabara, Dioso pejumlahivaisibaxutota jumlahsi mapacueniaje: “Nitoya tsane bajarapamonae, ajibi taneyabaraitoyajava ata,” jai tajēvelia Dioso pejumlahivaisibaxutota xanē yabara, jai Jesús pijajivijavabelia.

<sup>26</sup>Icatsia Jesús jumlahsi pijajivijavabelia:

—Vajētsianajē taxajavelia pitorobinexatsica Espiritu Santo, pexaniajailivaisi pepaebinēnēxa. Itsa patsianica Espiritu Santo taxajavavetsica, nexata pacayavenon-aena. Pacajamatabēcuene asaēyaexanaenanua. Espiritu Santo xanē nevajunupaebiana xaniavaetsia. <sup>27</sup>Paxamē baja cajena tataxuxuabijavaveliacujinae jivi livaisi tatsipaebijava, paneyajavajinavanapame. Bajaraxuata paxamē ata xaniavaetsia panevajunupaebianame, jai Jesús pijajivijavabelia.

**16** Icatsia Jesús jumlahsi pijajivijavabelia: —Bajarapacuenia pacatsipaebatsi panecopabianiva patanejumecovēnēt-silivaisimē. <sup>2</sup>Paxamē papecaitoiyavi, pacacapitsapabiabiana judiōvi penacaetuatabi-abibovecua. Belia jane baja itsamatacabijavabelia pacabeyejebiana. Nexata pamonaē pacabeyejebiana, jamatabēcuenenavēxaniabiaya jumlahsi tsane: “Dioso pejitsipaecuenia tobeyejebajē mapamonaeje,” jai tsane. <sup>3</sup>Bajarapamonae xanē apo neyapētae. Apo yapētae cajena taxa ata. Bajaraxuata bajarapacuenia pacaexanaena. <sup>4</sup>Bajarapacuenia tajēvelia pacatsipaebatsi baja cajena. Nexata jane baja pamatacabi pacatsipatsiana bajarapacue, panajamatabēnapitsianame pacuenia baja cajena tajēvelia pacatsipaebatsi, jai Jesús pijajivijavabelia.

### **Pacuenia Espiritu Santo exanaejitsia jivijavabelia yabara pelivaisi**

Icatsia Jesús jumlahsi pijajivijavabelia:

—Tataxuxuabijavaveliacujinae jivi livaisi tatsipaebijava, abaxē apo pacatsipaebitsi mapacue yabaraje. Bajarapacuenia apo pacatsipaebitsi tsipaji abaxē pacayajavaponaponatsi. <sup>5</sup>Itsiata baitsi jane aeconoxae baja payapētae atamē tanaviatsijavanexa taneitorobinējavabetsia, itsanē ata paxamēyajuvēnēnē apo neyanijobi. “¿Detsa belia ponejitsiamē?” apo nejai. <sup>6</sup>Pacanavajunupaebatsi baja cajena tanaviatsijavanexa. Bajaraxuata bitso panajamatabēxainame. <sup>7</sup>Palivaisi aeconoxae pacatsipaebijitsiatsi, pexaniajailivaisi cajena. Pacatoxanepanaena ita baja pacavecuaponae tsipaetsi, apo pacatopatsitsica tsipae Espiritu Santo papecaiyajavaponaponanexa. Espiritu Santo pacayavenonabiabiana. Pacajamatabēcuene asaēyaexanaenanua. Itsa ponaenajē taxajavabetsia, nexata Espiritu Santo pacatoitorobianicatsi. <sup>8</sup>Nexata Espiritu Santo patsianica. Nexata Espiritu Santo pejamatabēcuenetjailivaisi cajena. Pacatoxanepanaena

itsa baja pacavecuaponaenatsi. Itsa apo pacavecuaponaes tsipaetsi, apo pa, pamonaes Dioso apo pejumecovënëtsivi, nacueneyapëtaena pibisiacuene pexanaejava. Yapëtaenanua pacuene xanepana pexanavanapaenexa Dioso pitabarata. Yapëtaenanua pacuenia Dioso naneconitsiaexanaejitsiatsi bajarapamonaes pibisiacuene pexanaeneconi yabara. <sup>9</sup> Espiritu Santo pejamatabëcueneta, bajarapamonaes nacueneyapëtaena pibisiacuene pexanaevicuene. Tsipaji xanë bajarapamonaes apo nejumecovënëtsi pibisiacuene pexanaeneconi tavecuajibiaexanaejavanexa. <sup>10</sup> Nexata Espiritu Santo pejamatabëcueneta, bajarapamonaes yapëtaena pacuene xanepana pexanavanapaenexa Dioso pitabarata. Tsipaji baja xanë naviatiansianjë taxajavabetsia. Nexata baja bajarapamonaes pematatsënëa apo netaes tsane. <sup>11</sup> Bajarapamonaes Espiritu Santo pejamatabëcueneta, yapëtaena pacuenia Dioso naneconitsiaexanaejitsia daxita pamonaes pibisiacuene pexanaevi dovathi pejamatabëcueneta. Tsipaji Dioso naneconitsiaexanaena dovathi, ponë mapanacuapijivi itorobabiaba pibisiacuene pexanaenexa, jai Jesús pijajivijavabelia.

<sup>12</sup> Icatsia Jesús jumaitsi pijajivijavabelia:

—Ayailivaisi picani abaxë xainajë patacatsipaebinxä. Itsiata baitsi jane abaxë apo pacajamatabëcuenecaëjöpae bajarapalivaisi panejumeyapëtaenexa. <sup>13</sup> Matapania pamatacabi patsianica Espiritu Santo, ponë pexaniajailivaisi pepaebinë, bajaraponë pacayapëtaeyaexanaena daxita pexaniajailivaisi. Espiritu Santo raja apo pacayapëtaeyaexanaes tsane saicaya pejamatabëcuenepijilivaisi. Daxita raja pacuenia taxa Dioso jumaitsi, juya Espiritu Santo pacayapëtaeyaexanaena. Nexata tajëvelia Espiritu Santo pacayapëtaeyaexanaena pacuene pevajënaeyabelia copiapataponaejitsia. <sup>14</sup> Espiritu Santo pejamatabëcueneta jivi neyayataena. Tsipaji xanë talivaisi, pexaniajailivaisi, Espiritu Santo pacayapëtaeyaexanaena. <sup>15</sup> Daxita taxa pexanaejava, xanë ata rabaja tajajava. Bajaraxuata pacajumaitsi: “Xanë talivaisi, pexaniajailivaisi, Espiritu Santo pacayapëtaeyaexanaena,” pacajaitsi, jai Jesús pijajivijavabelia.

### **Pacuenia bepejamatabëcuenejjobivimi jamatabëcuenekarëyajitsia yabara pelivaisi**

<sup>16</sup> Icatsia Jesús jumaitsi pijajivijavabelia:

—Caematacabibejecujinaes rabaja apo panetaemë tsane. Itsiata icatsia itsamatacabibejecujinaes panetaename. Bajara jane xuacujinaes ponaenajë baja taxajavabetsia, jai Jesús.

<sup>17</sup> Nexata pijajiviyajuvënëvi nayanijoba epamonaes.

—¿Detsa majumaitsi pajumeje? Jesús nacajumaitsi: “Caematacabibejecujinaes rabaja apo panetaemë tsane. Itsiata icatsia itsamatacabibejecujinaes panetaename. Bajara jane xuacujinaes ponaenajë baja taxajavabetsia,” nacajai. <sup>18</sup> ¿De tsaeta pejumaitsi jume: “Caematacabibejecujinaes rabaja apo panetaemë tsane. Itsiata icatsia itsamatacabibejecujinaes panetaename,” nacajai? Apo jumeyapëtaetsi cajena xua yabara nacajumaitsi, najai Jesús pijajivi.

<sup>19</sup> Jesús jamatabëcueneyapëtane pacuenia picani pijajivi jamatabëyanijobatsi. Nexata Jesús tajëvelia jumaitsi pijajivijavabelia:

—Pacajumaitsi mapacueniaje: “Caematacabibejecujinaes rabaja apo panetaemë tsane. Itsiata icatsia itsamatacabibejecujinaes panetaename,” pacajaitsi. ¿Baja tsa pajume yabara panayanijobame? <sup>20</sup> Xaniajanë pacuenia pacatsipaebijitsiatsi. Xanë itsa



tēpaenajē, paxamē panuename. Bitso xanējitsia panajamatabēxainaename. Itsiata baitsi jane pamonae apo nejumecovēnētsi, barēya tsane tatēpaejava yabara. Itsiata baitsi jane xuacujinae paxamē icatsia bitso panesivajamatabēcuenebarēyamē tsane itsa panetaename icatsia. <sup>21</sup> Pamatacabi petiriva vixaenotatsi penacueto pevecuanaexanaenexatsi, bitso bayanajamatabēxaina. Itsiata penacueto pevecuanaexanaecujinaetsi, pevixae apo najamatabēnapitsi. Panacueto baja vecuanaexanatsi, sivajamatabēcuenebarēya. <sup>22</sup> Bajara pijinia pacuenia paxamē ata bitso panajamatabēxainaename itsa tēpaenajē. Itsiata icatsia itsa panetaename, bitso panesivajamatabēcuenebarēyamē tsane. Nexata itsajivi ata apo caējēpaetsi tsane papecavecuajibiaexanaenexa panejamatabēcuenebarēyajava, jai Jesús pijajivijavabelia.

<sup>23</sup> Icatsia Jesús jumaitsi pijajivijavabelia:

—Pamamatacabi icatsia panetaename, apo paneyanijobimē baja tsane itsacuenejavayo ata. Tspaji baja Espiritu Santo pacayapētaeyaexanaena daxitacuene. Xanijanē pacuenia patsipaebijitsiatsi. Taxa pacarajutsiana daxita xua tavēnēta pavajētabiabianame taxajavabelia. <sup>24</sup> Abaxē tavēnēta taxajavabelia apo pavajēt-simē itsacuenejavayo ata. Aeconoxae rajane baja tavēnēta taxajavabelia pava-jētabiabianame. Nexata taxa itsa pacarajutsiana xua pavajēt-sianame, bitso paja-matabēcuenebarēyamē tsane taxajavabelia, jai Jesús pijajivijavabelia.

**Pacuenia Jesús jamatabēcueneamoneyaba dovathi, ponē itorobabiaba mapanacuapijivije pibisiacuene pexanaenexa, yabara pelivaisi**

<sup>25</sup> Icatsia Jesús jumaitsi pijajivijavabelia:

—Palivaisi baja pacatsipaebabiabatsi, najumematayatsiaya pacatsipaebabiabatsi. Itsiata itsamatacabi livaisi apo pacatsipaebi tsanetsi najumematayatsiaya. Biji rajane pacatsipaebianatsi jumenapebetsiaya taxa pelivaisi. <sup>26</sup> Bajarapamatacabi paxamē baja taxajavabelia pavajētabiabianame tavēnēta. Nexata baja xanē apo pat-acatovajētabiabi tsanetsi taxajavabelia. <sup>27</sup> Paxamē paneasivamē. Panejumecovēnētamenua taxa taneitorobinēcuenetsica. Bajaraxuata paxamē taxa pacaasiva. Nexata panijacuata taxajavabelia itsa pavajētabiabianame, taxa pacajumetaena. <sup>28</sup> Xanē baja cajena ponaponajē taxajavatatsia. Nexata taxajavavetsica ponajē tapatsinexa mapanacuayabetsicaje. Nexata icatsia ponaenajē mapanacuavecuaje. Naviatsiani-ajē baja taxajavabetsia, jai Jesús pijajivijavabelia.

<sup>29</sup> Nexata Jesús pijajivi jumaitsi:

—Baja rajane jumenapebetsiaya panetsipaebame. Najumematayatsia baja apo panetsipaebimē. <sup>30</sup> Nexata baja pacajamatabēcueneyapētanetsi daxitacuene neyapētaenēcuenene. Xamē panejamatabēcueneyapētaneme palivaisi picani jamatabēpacayanijobatsi. Bajaraxuata pacajumecovēnētatsi baja Dioso athēbēvetsica pecaitorobinēcuenetsica, jai Jesús pijajivi.

<sup>31</sup> Jesús nexata jumaitsi pijajivijavabelia:

—¿Nexata tsabaja aeconoxae panejumecovēnētame taxa Dioso athēbēvetsica taneitorobinēcuenetsica? <sup>32</sup> Imoxoyo rabaja pevājēnae panenacayatsinexa panenaviabinexa panijabonējavabelia. Paxamē panexuabanutsianame caenēnē. Itsiata baitsi jane apo caenēnē tsane. Tspaji taxa yajavaponaponajē. <sup>33</sup> Bajarapacuenetajēvelia paneyapētaenexa, pacatsipaebabiabatsi baja cajena. Nexata xanējavaberenapanenajamatabēcueneocopatsixae, ajunavijibia pajinavanapaename. Mapanacuata panejinavanapaepato mapanacuapijivije pacabejioxiaexanabiabiana. Itsiata

pajamatabëcuenesaëmë tsavanapae tsane. Xanë rabaja jamatabëcueneamoneyabajë dovathi, ponë itorobabiaba mapanacuapijivije pibisiacuene pexanaenexa, jai Jesús pijajivijavabelia.

**Pacuenia Jesús pijajivi tovajëta paxa Diosojavabelia yabara pelivaisi**

**17** Jesús dovathi pejamatabëcueneamoneyabijava pijajivijavabelia petsipae-bicujinae, Jesús athëbëa benaëcotsia. Nexata jumaitsi paxa Diosojavabelia:

—Taxa, netocopiapata rajane baja daxita pacuenia netocopatame. Tsitajëre jivi pacuenia xanë nexënatoxaenë, bitso ayaijamatabëcuenenënë. Bajarapacuenia itsa tsitajëtsianame, nexata jivi yapëtaena pacuenia xamë Diosomë bitso ayaijamatabëcuenenëmë. <sup>2</sup>Xamë rabaja netocopatame daxitajivi taevetsinexa. Nexata necaëjëpa tarajutsinexa matababi apo peverevereaejava daxita pamonaerajutate. <sup>3</sup>Matababi apo peverevereaejava pexinaevinexa, cayapëtane baja caenëmë pepo Diosonëcuenemë. Bajarapamonaerajutate nuyapëtanenua baja Jesucristonë athëbëvetsica taneitorobinëmëtsica, jai Jesús paxa Diosojavabelia.

<sup>4</sup>Icatsia Jesús jumaitsi paxa Diosojavabelia:

—Xanë rabaja mapanacuapijivijavabeliaje, apo pecajumecovënëtsivijavabelia, cajamatabëcueneitajëtatsi bitso ayaijamatabëcuene nexinaejava. Veretajënuu baja daxita xua nitorobame tacatoexanaenexa. <sup>5</sup>Taxa, pamatababi abaxë ajibi mapanacuaje, itsa cayajavaponaponatsi, necotia yajavaponaponajë ayaijamatabëcuenenëxaenë. Bajarapacuenia icatsia aeconoxae ata netocopatsianame vajanajuavevaponaponaeenexabeje daxitacuene, jai Jesús paxa Diosojavabelia.

<sup>6</sup>Icatsia Jesús jumaitsi paxa Diosojavabelia:

—Xamë itapetame itsamonae mapanacuataje tanesivanajamatabëcopatsinexa. Xanë nexata yapëtaeyaxanajë bajarapamonaerajutate pacuenia jamatabëcueneitsimë. Bajarapamonaerajutate nijajivi nerajutate. Xaniavaetsia cajumecovënëta nijumelivaisi. <sup>7</sup>Aeconoxae baja bajarapamonaerajutate nijajivi yapëtane xamë nejamatabëcueneta taexanaponaejava daxita xuanë exanaponajë. <sup>8</sup>Daxita palivaisi netsipaebame, xanë juya bajarapalivaisi tsipaebajë bajarapamonaerajutate. Nexata nejumecovënëta. Nexata yapëtane bajarapamonaerajutate pepacuene tapatsijava xamëjavavetsica. Nejumecovënëta xamë athëbëvetsica taneitorobinëcuenemëtsica, jai Jesús paxa Diosojavabelia.

<sup>9</sup>Icatsia Jesús jumaitsi paxa Diosojavabelia:

—Cavajëtatsi bajarapamonaenexa. Apo cavajëtsitsi raja apo pecajumecovënëtsivinexa. Cavajëtatsi raja tanerajutsivimënexa. <sup>10</sup>Daxita pamonaerajutate, bajarapamonaerajutate xanë ata tajajivi. Daxita pamonaerajutate, bajarapamonaerajutate xamë ata nijajivi. Daxitajivi nuyapëtane ayaijamatabëcuene taxinaejava. Tsipaji tajajivi xaniavaetsia netojinavanapa, jai Jesús paxa Diosojavabelia.

<sup>11</sup>Icatsia Jesús jumaitsi paxa Diosojavabelia:

—Xanë baja apo ponaponaeenë tsane mapanacuataje. Tsipaji baja ponaejitsianë xamëjavabetsia. Itsiata baitsi jane tajajivi jinavanapaena abaxë mapanacuataje. Taxamë, bitso nianeconijibinë. Tanerajutsivimë nesaëta evetsianame pibisiacuenevevucua. Vaxaitsibeje caejamatabëcuene xainatsibeje. Nexata bajarapamonaerajutate tojitsipajë caejamatabëcuene pexinaenexa. Pacuenia vaxaitsibeje jamatabëcueneitsibeje, bajara pejamatabëcueneitsinexa. <sup>12</sup>Itsa abaxë yajavaponaponajë bajarapamonaerajutate, nesaëta evetaponaponajë. Nexata apo nevecuanaxuabi daxita. Caenë saya nevecuanaxuabiana. Bajaraponë nevecuanaxuabiana tsipaji to-

copiapatsianatsi pacuenia baja cajena tajëvelia jumaitsi nijumelivaisibaxutota bajaraponë yabara, jai Jesús paxa Diosojavabelia Judas yabara.

<sup>13</sup> Icatsia Jesús jumaitsi paxa Diosojavabelia mapacueniaje:

—Aeconoxae baja ponaenajë xamëjavabetsia. Itsiata abaxë taponaponatabiepa-toyo mapanacuataje, cavajëtatsi. Bajarapacuenia cavajëtatsi tajajivi bitso pejamatabëcuenebarëyanexa pacuenia xanë bitso jamatabëcuenebarëyanë. <sup>14</sup> Xanë baja tajajivi tsipaebajë nijumelivaisi. Pacuenia mapanacuapijivije, apo pecajumecovënëtsivi, jamatabëcueneitsi, xanë apo jamatabëcueneitsinë. Bajaraxuata tajajivi ata itoyatsi mapanacuapijivije. Tsipaji apo jamatabëcuenejëpae. <sup>15</sup> Apo cavajëtsitsi raja ne-jutsinexa tajajivi mapanacuapijivivecuaje. Cavajëtatsi raja nevetabiabinexa tajajivi dovathivecu. <sup>16</sup> Pacuenia xanë apo jamatabëcuenejëpaenë mapanacuapijivije, bajara pijinia pacuenia tajajivi ata apo jamatabëcuenejëpae mapanacuapijivije. <sup>17</sup> Nijumelivaisi cajena pexaniajailivaisi. Bajaraxuata tanejumecovënëtsivi baja yavenon-aename penatsatsinexa dovathi pejamatabëcuenevecua. Nexata bajarapamonae ex-avanapaena xamë netojtsipaecuenia nijumelivaisi baja petsijamatabëcaexaetsi. <sup>18</sup> Pacuenia xamë nitorobame pexaniajailivaisi tatsipaebinexa mapanacuapijivijavabeliaje, bajara pijinia pacuenia juya xanë ata itorobajë tajajivi pexaniajailivaisi petsipaebinexa mapanacuapijivijavabeliaje. <sup>19</sup> Pacuenia xamë netojtsipame, tajajivi yapijivinacaevetsianajë xanë tanebeyaxuabinexa. Nexata bajarapamonae pacuenia xamë tojtsipame, catoexanavanapaena. Tsipaji baja bajarapamonae yapëtane nijumelivaisi pexaniajailivaisicue, jai Jesús paxa Diosojavabelia.

<sup>20</sup> Icatsia Jesús jumaitsi paxa Diosojavabelia mapacueniaje:

—Itsiata apo cavajëtsitsi ëtajajivinexa. Cavajëtatsi raja bexëjavabelia tanejumecovënëtsivinexa ata. Tajajivi itsamatacabi bajarapamonaejavabelia itsa tsipaebaponaena tajumelivaisi, nexata bexëjavabelia bajarapamonae nejumecovënëtsiana. <sup>21</sup> Nexata cavajëtatsi daxita bajarapamonae penajamatabëcuenejëpaenexa. Xamë neyjavaponaponame. Xanë ata pijinia cayjavaponaponatsi. Bajara pijinia pacuenia tojtsipajë daxita bajarapamonae ata vajanacayjavajinavanapaenexabeje. Tojtsipajë bajarapamonae penajamatabëcuenejëpaenexa. Nexata bajarapamonae najamatabëcuenejëpaeya pejinavanapaeyava, itsa tane daxita mapanacuapijivije, pejumecovënëtsinexa xamë athëbëvetsica taneitorobinëcuenemëtsica. <sup>22</sup> Pacuenia xamë yapëtaeyaexaname tajajivijavabelia xanë bitso ayaijamatabëcuene taxainaejava, bajara pijinia pacuenia xanë ata bajarapamonaejavabelia yapëtaeyaexanajë baja bajarapamonae ata ayaijamatabëcuenevi baja penaexanaeyava tanejumecovënëtsixae. Nexata bajarapamonae tanejumecovënëtsixae, najamatabëcuenejëpa baja pacuenia vaxaitsibeje najamatabëcuenejëpatsibeje. <sup>23</sup> Tajajivi yajavaponaponajë. Xamë pijinia neyjavaponaponame. Nexata tajajivi caejamatabëcuene xainaena. Nexata daxita mapanacuapijivije itsa taena tajajivi najamatabëcuenejëpaeya pejinavanapaeyava, yapëtaena xamë athëbëvetsica taneitorobinëcuenemëtsica. Yapëtaenanua bajarapamonae niasivajava pacuenia xanë ata niasivamë, jai Jesús paxa Diosojavabelia.

<sup>24</sup> Icatsia Jesús jumaitsi paxa Diosojavabelia:

—Taxa, bajarapamonae xamë nerajutame. Nexata jitsipajë bajarapamonae ata pe-najinavanapaenexa itsabelia ponaejitsianë. Jitsipajë bajarapamonae taneyjavajinavanapaenexa, taneyapëtaenexa bitso ayaijamatabëcuene taxainaejava. Tsipaji nacua nexanaevajënaeya ata, xamë niasivamë. Bajaraxuata ayaijamatabëcuenenënë nex-

aname. <sup>25</sup>Taxa, itsaneconi ata apo nexainaenë. Mapanacuapijivi, pamonaе apo cajumecovënëtsi, apo cayapëtae. Itsiata xanë cayapëtanetsi. Mapamonaеje, tajajivi, yapëtanе baja xamë athëbëvetsica taneitorobijavamëtsica. <sup>26</sup>Xanë tajajivi yapëtaeyaexanajë pecayapëtaenexa. Abaxë itsiata pevajënaeyabelia pecayapëtaeponaenexa, yapëtaeyaexanaponaenajë. Pacuenia xanë niasivamë, bajara pijinia pacuenia bajarapamonaе ata namataenetsia penaasivanexa, yapëtaeyaexanaponaenajë. Xanë bajarapamonaе yajavaponaponaenajë, jai Jesús paxa Diosojavabelia.

**Pacuenia Jesús pijavajabitsaë vaetabatsi  
pebeyaxuabinexatsi jane baja yabara pelivaisi**

(Mt 26.47-56; Mr 14.43-50; Lc 22.47-53)

**18** Jesús pevajëtsicujinae paxa Diosojavabelia, pijajivi barëpona Cedrónvënëna-jato itsapanabelia. Nexata bajarajotalia peubinaenë bacabobëxëpanata, Jesús pijajivi barëpata. <sup>2</sup>Bajarajota cajena Jesús pijajivi barënacaetuatabiaba. Bajaraxuata Judas, Jesús pijajivitonë ata, ponë canajetsijitsiatsi pijavajabitsaë pecobeyabelia, yapëtanе itsajota Jesús pijajivi barënacaetuatabiaba. <sup>3</sup>Nexata Judas peyapëtaexae, bajarajota barëpata vajabitsaë. Barëpatanua templobopijipolicíavi. Bajarapamonaе itorobatsi sacerdotevi penamatacaitorobivibeje fariseovibeje. Judas pematacaponaеvi capona espadanë, naebonë yajava. Lámparabëanënuа capona. Beisotabuqueranënuа capona penatsivajënaeitayotsinexa. <sup>4</sup>Nexata baja Jesús yapëtanе daxita pacuenia exanaejitsiatsi bajarapamonaе. Nexata Jesús najetabilia. Jumaitси bajarapamonaеjavabelia:

—¿Jipatsa pajaitame? jai Jesús.

<sup>5</sup>Nexata bajarapamonaе jumaitси:

—Jesús raja, Nazaret tomarapijinë, pajaitajë, jai bajarapamonaе.

Jesús nexata jumaitси:

—Xanë rabaja maje, jai.

Judas, ponë Jesús pijavajabitsaë pecobeyabelia canajetatsi, nanuca bajarapamonaеjavata. <sup>6</sup>“Xanë rabaja maje,” pejaijavata Jesús, bajarapamonaе pematabëxëpa toquequenaponalia. Othopa irata. <sup>7</sup>Nexata icatsia Jesús jumaitси:

—¿Jipatsa nexata pajaitame? jai.

Nexata icatsia bajarapamonaе jumaitси:

—Jesús raja, Nazaret tomarapijinë, pajaitajë, jai bajarapamonaе.

<sup>8</sup>Nexata Jesús jumaitси bajarapamonaеjavabelia:

—“Xanë rabaja maje,” pacajaitsi rabaja. Xanë itsa panejaitame, pacopatsianame mapamonaеje peponaenexa, jai Jesús pijajivi yabara.

<sup>9</sup>Bajarapacuenia Jesús itsa jumaitси, copiajopa jane baja pacuenia tajëvelia jumaitси Jesús. Jesús baja cajena pijajivi yabara tajëvelia jumaitси mapacueniaje: “Pamonaе taxa nerajuta, itsanë ata apo nevecuanaxuabi tsane,” jai cajena Jesús tajëvelia pijajivi yabara. Bajarapacuenе jane baja copiajopa. <sup>10</sup>Nexata Jesús pijajivitonë, Simón Pedro, namaracëtaponaе espada. Nexata Simón Pedro espada namarajonotaxuabina. Pecujanenia pamuxuyorotomi, muxuyoropaеbiaxuaba sacerdotevi pepo penamatacaitorobinë pijajivitonë. Ponë Simón Pedro muxuyoropaеbiaxuaba, pevënë Malco. <sup>11</sup>Nexata Jesús jumaitси Pedrojavabelia:

—Nijaespada baja pevënojojavareca xataremeca. Taxa baja cajena netocopata tanebejiobiaexanaenexa. Bajaraxuata nacaevetsianajë tanebejiobiaexanaenexa, jai Jesús Pedrojavabelia.

**Pacuenia Jesús nutatsi sacerdot. Pecujuanenia pamuxuyorotomi,  
muxuyoropaebiaxuaba sacerdotevi pepo penamataevi  
pepo penamatacaitorobinë pitabarata yabara pelivaisi**

(Mt 26.57-58; Mr 14.53-54; Lc 22.54)

<sup>12</sup>Vajabitsaëvi pijacapitán, pijajivi yajava, judíovi pijapolicíavinua, nacobe-  
navaetabatsi Jesús. Nexata cobecëtatsi. <sup>13</sup>Caponatsi baja Anásvënëñë pijaboyab-  
belia. Anás paxuyo Caifás. Bajarapamatacabi Caifás sacerdotevi pepo penamat-  
acaitorobinë tsaponaponae. <sup>14</sup>Bajaraponë Caifás jumaitsi baja cajena copiaya  
judíovijavabelia Jesús yabara: “Bajaraponë caenë itsa beyaxuabiaexanaenatsi, ba-  
jaraponë pejamatabëcueneta daxita judíovitsi vajavajabitsaë apo nacaverebiabi  
tsane,” jai.

**Pacuenia jane baja Pedro nayavajunuaxaina  
Jesús pijajivitonëcuene yabara pelivaisi**

(Mt 26.69-70; Mr 14.66-68; Lc 22.55-57)

<sup>15</sup>Itsa baja Jesús caponaliatsi sacerdotevi pepo penamatacaitorobinë pijaboy-  
abelia, Simón Pedrobeje, itsanëbeje, Jesús pijajivitonëbeje, tajiyo pënanajetaruc-  
abeje. Ponë Simón Pedro yanatatsi, bajaraponë yapëtanetsi sacerdotevi pepo  
penamatacaitorobinë. Sacerdotevi pepo penamatacaitorobinë pijabo matatoyorot-  
sia yacaranata ibopanaxanetonë, mataropotsia pefaratsijavaxanetota. Nexata ponë  
Pedro yanatatsi, bajarapayacaranatsijavaxaneto baupa najoneya. Nexata panepa  
bopanabojavabelia, itsabelia Jesús cajunuatsi. <sup>16</sup>Nexata Pedro nucojopa sacerdotevi  
pepo penamatacaitorobinë pijabo matatoyorotsia peyacaranatsijavaxaneto baupa  
jumavelia. Nexata ponë Pedro yanatatsi, caevëa pitsaparena. Nexata bajaraponë  
cuaicuaijai baupa pevetsivajavabelia Pedro ata penajonenexalia. Nexata baja Pedro  
ata tocopatatsi bopanabojavabelia penajonenexalia. Nexata baja Pedro ata najoneya  
bopanabojavabelia. <sup>17</sup>Nexata baupa pevetsiva jumaitsi Pedrojavabelia:

—¿Xamë ata tsabaja Jesús apo pijajivitonëmë? jai.

Pedro nexata jumaitsi:

—Jume raja. Xanë raja Jesús apo pijajivitonënë, jai Pedro.

<sup>18</sup>Bajarapaepatota bitso bajarapameravi cainejeba. Nexata bajarapabota pe-  
nacuenebivi, policíavi yajava, isoto itajuruteta bopanabota. Bajarapamonae  
nonopanubena. Nexata Pedro nanuca bajarapamonaejavata. Nanonopanuca.

**Pacuenia sacerdotevi pepo penamatacaitorobinë  
Jesús yanijobatsi yabara pelivaisi**

(Mt 26.59-66; Mr 14.55-64; Lc 22.66-71)

<sup>19</sup>Anás jane baja sacerdotevi pepo penamatacaitorobinë jumaitsi Jesúsjavabelia:

—¿Detsa pamatabëxëyo nijajivi? ¿Detsa palivaisi tsipaebabiabame nijajivi? jai.

<sup>20</sup>Jesús nexata jumaitsi Anásjavabelia:

—Xanë daxitajivi pexanialivaisi tsipaebabiabajë itsajota nacaetuatabiaba. Tsi-  
paebabiabajë penacaetuatsibonëjava, templobota ata. Muetsia cajena itsamatacabi

ata apo tsipaebinë. <sup>21</sup> ¿Detsa xuajitsia nexata neyanijobame? Yanijobare pamona-aejavabelia tsipaebabiabajë. Nexata bajarapamonae catsipaebiana pacuenia ne-jumetaeyabiaba. Bajarapamonae yapëtane xua yabara pexanialivaisi tsipaebabi-abajë, jai Jesús sacerdotevi pepo penamatacaitorobinëjavabelia.

<sup>22</sup> Itsa bajarapacuenia Jesús jumaitsi, nexata bajarajota penucaenë templobopi-jipolicíanë itabarapacataxuabatsi. Policíanë jumaitsi Jesúsjavabelia:

—Pëtsa bajarapacuenia cuaicuaijamë sacerdotevi pepo penamatacaitorobinëjavabelia, jai.

<sup>23</sup> Jesús nexata jumaitsi policíanëjavabelia:

—Itsa pibisiacuenia cuaicuaijanë, netsipaebare papibisiacuenia yabara cuaicuai-janë. ¿Detsa xuajitsia saya xaniavaetsia tajumaitsiyava yabara, nebiame? jai Jesús.

<sup>24</sup> Nexata Anás itoroba Jesús cobecëtsiaya tsiteca pecaponaenexatsi Caifásjavabelia, ponë sacerdotevi pepo penamatacaitorobinëjavabelia.

**Pacuenia icatsia Pedro nayavajunuaxaina  
Jesús pijajivitonëcuene yabara pelivaisi**

*(Mt 26.71-75; Mr 14.69-72; Lc 22.58-62)*

<sup>25</sup> Pedro abaxë nanonopanuca isotojavata. Nexata bajarajota penubenaevi jumaitsi:

—¿Xamë ata tsabaja Jesús apo pijajivitonëmë? jaitsi.

Pedro nexata nayavajunuaxainaeya jumaitsi:

—Jume raja. Xanë raja Jesús apo pijajivitonënë, jai Pedro.

<sup>26</sup> Nexata icatsia bajarajota sacerdotevi pepo penamatacaitorobinë pijajivitonë, ponë Pedro muxuyoropaebiaxuaba pijamonaenë, jumaitsi:

—Xamë cajena covë catanetsi Jesúsjavata, peubinaenë bacabojavata, jai.

<sup>27</sup> Pedro icatsia nayavajunuaxainaeya jumaitsi:

—Jume raja. Xanë cajena apo yapëtaenë Jesús, jai Pedro.

Itsa baja Pedro najumeveretaba bajarapacuenia pejumaitsiyava, vacara baja fiaba.

**Pacuenia Jesús nutatsi Pilato pitabarata yabara pelivaisi**

*(Mt 27.1-2, 11-14; Mr 15.1-5; Lc 23.1-5)*

<sup>28</sup> Itsa baja ajena matabi tsina, Jesús capitsapatsi Caifás pijabovecua. Nexata Jesús caponaliatsi nacuaevetsinë Pilato pijaboyabelia. Judíovi, pamonaenë najetarubena Jesús peneconitsinexatsi, apo najonelia nacuaevetsinë Pilato pijaboyalia. Tsipaji Pilato apo judíonë. Judíovi apo joneyabiabi apo judíonë pijaboyalia. Bajarapamonae itsa jonejitsipa Pilato pijaboyalia, bajarapamonae judíovixae, jamatabëjumai tsipae: “Najamatabëcuenebijianajë Dioso pitabarata apo judíonë pijaboyalia tanaxonexae. Nexata tavëna judíovi apo netocopatsi tsane tanaxaenexa pascua fiestamatabi pexaejava,” jamatabëjai tsipae bajarapamonae. <sup>29</sup> Nexata Pilato pitsaparena. Jumaitsi judíovijavabelia:

—¿Detsa pitsineconi yabara pacapatame maponëje? jai Pilato judíovijavabelia.

<sup>30</sup> Nexata judíovi jumaitsi:

—Itsa raja pibisiacuenia apo pexanaenë tsipae, apo pacatocapatsi tsipaetsi maber-enaje, jai judíovi.

<sup>31</sup> Nexata icatsia Pilato jumaitsi:

—Paca ponaremelia caevēalia. Pananeconitsiaexanaename panijacuata pacuenia panijalivaisi pacaitoroba paneexanaenexa, jai Pilato judíovijavabelia.

Nexata judíovi icatsia jumaitsi:

—Paxamē baitsi jane apo panetocopatsimē patabeyaxuabinexa itsanē ata pi-janeconi yabara, jai judíovi.

<sup>32</sup> Bajarapacuenia Jesús tocopiapatatsi pacuenia baja cajena tajēvelia pijajivijavabelia navajunupaebapona pebeyaxuabijavanexatsi. <sup>33</sup> Nexata Pilato icatsia joneya pijaboyalia. Jumaitsi Jesúsjavabelia:

—¿Xamē tsaja judíovi pepo nevetsinē? jai.

<sup>34</sup> Jesús nexata jumaitsi Pilatojavabelia:

—¿Xamē tsaja nejamatabēcueneta neyanijobame? Jume. ¿Catsipaeba tsaja itsa-monaē xanē judíovi pepo taevetsinēcuene? jai Jesús.

<sup>35</sup> Pilato nexata jumaitsi:

—Xanē raja apo judíonēnē. Bajarapacuenia apo tacasivanajamatabēxainaeta. Judíovi raja, caranata nijanacuapijivi, sacerdotevi penamatacaitorobivi yajava, cacapata maberenaje pecaneconitsinexa xanējavaberena. ¿Detsa jane xua exaname? jai Pilato Jesúsjavabelia.

<sup>36</sup> Nexata Jesús jumaitsi Pilatojavabelia:

—Mara panacua xanē apo taevetsinēje. Itsa ra peneta mapanacua taevetsinē tsipaēje, nexata paepatota judíovi nevaetaba, daxita tajajivi neyapijivinamaxēvanitsipa tapanepaenexa. Xanē raja mapanacua apo taevetsinēje, jai Jesús Pilatojavabelia.

<sup>37</sup> Nexata Pilato jumaitsi:

—¿Xamē tsaja nexata jivi nevetsinē? jai.

Jesús nexata jumaitsi:

—Jājā, xanē raja jivi taevetsinē pacuenia nejumaitsimē. Bajaraxuata patajē mapanacuayabetsicaje tatsipaebinexa jivi pexaniajailivaisi. Daxita pamonaē jitsipa pexaniajailivaisi, nenamuxunaevetabiaba bajarapalivaisi, jai Jesús Pilatojavabelia.

<sup>38</sup> Nexata Pilato jumaitsi Jesúsjavabelia:

—¿Detsa pacuenia nayapētane pexaniajailivaisicuene? jai.

### **Pacuenia baja Pilato tocopata Jesús pebeyaxuabinexatsi yabara pelivaisi**

*(Mt 27.15-31; Mr 15.6-20; Lc 23.13-25)*

Pilato peyanijobicujinae Jesúsjavabelia, Pilato icatsia pitsapalia. Nexata Pilato jumaitsi judíovijavabelia:

—Apo caxitajarabinē cajena itsacujiruneconi ata pexanaejava, paneconi yabara bajaraponē naneconitsijitsia. <sup>39</sup> Penaneconitsivi pejebabiabibota naneconitsia peponaponaenē pepitsapaenexa itsa panevajētame, nexata pascua fiestamatacabi caenē pacatocapitsapabiabatsi. ¿Pajitsipame tsaja patacatocapitsapaenexa penaneconitsivi pejebabiabibovecua pepitsapaenexa pajudíovimē papecaevetsinē? jai Pilato judíovijavabelia Jesús yabara.

<sup>40</sup> Nexata bajarajota daxitajudíovi vavajai.

—¡Pētsa abaxē copatame bajaraponē! ¡Panetocapitsapaename jane Barrabás! jai judíovi.

Bajaraponē Barrabás bitso penacobetoxotsinē. Bajaraxuata penaneconitsivi pejebabiabibota, naneconitsiaponapona.

**19** Pilato pijajivi itoroba Jesús pejumatatibabenexatsi penaneconitsivi pejumacnontabiabimacata. <sup>2</sup>Nexata pejumatatibabecujinaetsi vajabitsaë Jesús beconacuenia tsimataexanatsi peejuvitoyoroto. Mataxatatatsi bajarapaejuvitoyoroto. Bajaraxuacujinae quenetsiataeya benacuaevetsinëcuenia xatatatsi peraënaeyatsautsaucejava. <sup>3</sup>Nexata vajabitsaë imoxoyoliatsi Jesús. Vajabitsaë capocaponaeya jumaitsi tsabuataponae Jesúsjavabelia:

—¡Bajaco, judíovi pepo pevetsinë! jai tsabuataponae.

Vajabitsaë pecobeta Jesús itabarapacabebeyabuataponatsi.

<sup>4</sup>Pilato nexata icatsia pitsapalia. Jumaitsi judíovijavabelia:

—Pacatonaviarenatsi icatsia maberenaje paneyapëtaenexa. Apo caxitajarabinë itsacujiruneconi ata pexanaejava, paneconi yabara naneconitsijitsia maponëje, jai Pilato Jesús yabara.

<sup>5</sup>Nexata peejuvitoyoroto Jesús namataxatatsiaya pitsaparena. Naxatata peraënaeyatsautsaucejava. Nexata Pilato jumaitsi judíovijavabelia:

—¡Baja rajane nuca maponëje! jai Pilato.

<sup>6</sup>Nexata sacerdotevi penamatacaitorobivi, policíavi yajava, itsa tanetsi Jesús, nexata bajarapamonae vavajai.

—¡Cruzajavabelia cobematabiabarutsiaexanare! ¡Cruzajavabelia cobematabiabarutsiaexanare! jai bajarapamonae Jesús yabara.

Pilato nexata jumaitsi bajarapamonaejavabelia:

—Paxamë pacaponaremelia. Cruzajavabelia pacobematabiabarutsianame. Tsipaji raja xanë apo caxitajarabinë itsacujiruneconi ata pexanaejava, jai Pilato.

<sup>7</sup>Nexata judíovi jumaitsi Pilatojavabelia:

—Mara ponë Dioso apo pejitsipaecuenia jumaitsi: “Xanë raja Dioso pexënatonë,” jai. Paxanë pajudíovinë patajalivaisita itaveta bajarapacuenia pejumaitsiyaniva itsajivi ata. Bajaraxuata bajaraponë baja bebeyaxuabatsi, jai judíovi Jesús yabara.

<sup>8</sup>Pilato itsa jumetane bajarapamonae pejumaitsijava: “Mara ponë Dioso apo pejitsipaecuenia jumaitsi: ‘Xanë raja Dioso pexënatonë,’ jai,” pejajava Jesús yabara, nexata bitso Pilato junava. <sup>9</sup>Nexata icatsia Pilato pijaboyalia barëjoneya Jesús. Yanijoba icatsia Jesúsjavabelia.

—¿Detsa nexata verena neponaenë? jai Pilato.

Itsiata Jesús apo jumepitsi.

<sup>10</sup>Nexata Pilato jumaitsi:

—¿Detsa xuajitsia apo nejumepitsimë? ¿Apo yapëtaemë tsipaji mapanacua taevetsinëcueneje? Nejamatabëcuenecaëjëpa raja taitorobinexa tajajivi cruzajavabelia pecacobematabiabarutsinexa. Nejamatabëcaëjëpanua taitorobinexa pecacopatsinexa ata, jai Pilato.

<sup>11</sup>Jesús nexata jumaitsi:

—Itsa Dioso apo catocopatsi tsipae mapanacua nevetsinexaje, nexata xanëjavaberena ata apo cacaëjëpae tsipae taneitsacueniabinxamë. Itsiata baitsi jane ponë necanajeta xamë necobeyabelia, bitso naneconita Diosojavabelia xamë matatoxenetsia, jai Jesús Pilatojavabelia.

<sup>12</sup>Itsa bajarapacuenia Jesús jumaitsi, nexata picani Pilato jamatabëcopatatsi Jesús.

Itsiata baitsi jane judíovi vavajai Jesús pecopatsiyanivatsi. Jumaitsi:



—¡Itsamonae raja paxanëyajuvënëvi jitsipa maponëje pevetsinënexatsi! ¡Nexata itsa copatsianame maponëje, naneconitsianame nijatuxanenëjavabelia, Romanonacua pepo pevetsinëjavabelia, pepo vajanacayanacuaevevtsinëjavabelia jane baja! ¡Nexata maponëbejeje nijatuxanenëbeje naitoyabeje tsane! jai judíovi Pilatojavabelia.

<sup>13</sup>Nexata Pilato itsa jumetane bajarapacuenia judíovi pejumaitsijava, Pilato eca tribunalvënëjavata, xuata Pilato ecabiaba jivi itsa naneconitsiaexanaejitsia. Xuata Pilato ecabiaba jivi itsa naneconitsiaexanaejitsia, hebreojumeta pevënë Gabata. Bajarajota pirafaratsiira. Nexata Pilato itorobeca pijajivi pecapitsapaenexatsi Jesús Pilato pijabovecua. <sup>14</sup>Pascuavënëfiesta pejonematacabinexa pevajënaeya pamatacabi, matoneje, bajarapacuenia Jesús exanatsi. Nexata Pilato jumai tsecae judíovijavabelia:

—¡Mara jota nucaje papecaevtsinëje! jai Pilato Jesús yabara.

<sup>15</sup>Itsiaata saya bajarapamonae vavajai.

—¡Beyaxuabiaexanare! ¡Jema tēpae! ¡Cruzajavabelia cobematabiabarutsiaexanare! jai judíovi.

Pilato nexata jumaitsi:

—¿Pajitsipame tsaja cruzajavabelia tacobematabiabarutsiaexanaejava papecaevtsinëmi? jai Pilato.

Nexata sacerdotevi penamatacaitorobivi jumaitsi Pilatojavabelia:

—Caenë raja Romanonacua pevetsinë paxainajë pepo patanevtsinë. Paxanë raja apo paxainanë itsanë pematatsënëa pepo patanevtsinë, jai sacerdotevi penamatacaitorobivi.

<sup>16</sup>Nexata baja Pilato rajuta judíovi pecobeyabelia Jesús pecobematabiabarutsinexatsi cruzajavabelia. Itsiaata Pilato pijajivi itoroba Jesús pecaponaenexatsilia petsutojumabelia.

### **Pacuenia jane baja Jesús cruzajavabelia cobematabiabarutatsi yabara pelivaisi**

*(Mt 27.32-44; Mr 15.21-32; Lc 23.26-43)*

<sup>17</sup>Jesús nexata vajabitsaë itsa caponaliatsi, caponaeyaexanatsi cruza, pacruza-javabelia Jesús cobematabiabarutatsijitsiatsi. Caponaliatsi Jivimatasipavënë tsutojavabelia. Hebreojumeta bajarapatsuto pevënë Gólgota. <sup>18</sup>Bajarapatsutojumata Jesús cruzajavabelia cobematabiabarutatsi. Anijanëbeje yajavacobematabiabarutatsi. Caenë canacujitsia pijacruzata rubatsi. Itsanë Jesús pecujuanenia ruca. Itsanë Jesús petsavenonenia ruca. <sup>19</sup>Pilato pijajivi itoroba petoyaquinaenexatsi tablapayojumata. Nexata Pilato pijajivi itoroba bajarapatablapayo petomatabiabarutatsinexatsi Jesús perucaecruzaupita. Jumai tsarucae bajarapaitane mapacueniaje: “Mara ponëje Jesús, Nazaret tomarapijinëje, judíovi pepo pevetsinë,” jai tsarucae bajarapaitane. <sup>20</sup>Pajumatsutota Jesús cobematabiabarutatsi cruzajavabelia, bajarapajumatsuto eca tomaravecua imoxoyo. Bajaraxuata judíovi ayaibitsaëtoxaneto tomara-pijivi leba bajarapaitane. Bajarapaitane yaquinaruta acueyabi paviriavibeje pija-jumeta. Yaquinaruta hebreojumeta, griegojumetana, latínjumetana. <sup>21</sup>Nexata sacerdotevi penamatacaitorobivi jumaitsi Pilatojavabelia:

—Apo xanepanae raja neyaquinarutsiaexanaenexa mapejumaitsiitaneje, “Mara ponëje, judíovi pepo pevetsinëje,” pejaiitane. Biji rajane icatsia yaquinarutsiaex-

anare pejumaitsiitane mapacueniaje: “Mara ponë jumaitsiije: ‘Xanë raja judíovi pepo taevetsinë,’ jai,” pejaiitane icatsia yaquinarutsiaexanare, jai sacerdotevi penamatacaitorobivi Pilatojavabelia.

<sup>22</sup> Nexata Pilato jumaitsi sacerdotevi penamatacaitorobivijavabelia:

—Pacuenia baja yaquinarutsiaexanajë, bajarapacuenia jema rucae, jai Pilato sacerdotevi penamatacaitorobivijavabelia.

<sup>23</sup> Vajabitsaë Jesús pecobematabiabarutsicujinaetsi cruzajavabelia, Jesús penaxatatsijavami, xua jumaponapona, vajabitsaë nota. Cuatro xuabeje tsanaeya jeba. Caenë canacujitsia natsicobetsanaejitsia. Saicaya tsatabuata itsajava, xua Jesús naxatatabiaba piapiajavareca. Bajaraxua apo xainae pecaucutsiajoronaejava. Pecuejava saya caepanacujinae. <sup>24</sup> Nexata vajabitsaë najumaitsi:

—Apo titicae tsanetsi bajaraxua. Canamuxusitsianatsi beibotoxi vajayapëtaenexa ponë pitsijitsia bajaraxua, najai vajabitsaë.

Bajarapacuenia vajabitsaë itsa exana, Jesús jane baja tocopiapatatsi pacuenia baja cajena Dioso pejumelivaisibaxutota, tajëvelia jumaitsi Jesús penaxatatsijava yabara. Dioso baja cajena pejumelivaisibaxutota, tajëvelia jumaitsi Jesús penaxatatsijava yabara mapacueniaje: “Natsicobetsanaena tanaxatatsijava. Canamuxusitsiana beibotoxi peyapëtaenexa ponë pitsijitsia,” jai baja cajena tajëvelia Dioso pejumelivaisibaxutota Jesús penaxatatsijava yabara. Nexata vajabitsaë canamuxusita beibotoxi peyapëtaenexa ponë pitsijitsia piapiajavareca, Jesús penaxatatsijavami.

<sup>25</sup> Pacujinae abaxë Jesús athëbëyo ruca cruzata, cruza bëxëpanata nubena acueyabi povamaxëto ëMaríavënëvanë. Itsava Jesús pena. Itsava Jesús penava, Cleofas pijava. Itsava María, Magdala tomarapijiva. <sup>26</sup> Nexata Jesús itsa taerucaica, taenutsica pena, pijajivitonë bitso piasivanë yajava. Jesús pena pemuxuneneta nuca bajaraponë. Jesús nexata jumaitsi penajavabelia:

—Ena, maponë nuca nemuxunenetaje, benexënatocuenia taename, jai Jesús penajavabelia.

<sup>27</sup> Bajaraxuacujinae icatsia Jesús jumaitsi pijajivitonëjavabelia:

—Mapovaje beenacuenia taename, jai Jesús.

Bajaraxuacujinae Jesús pijajivitonë pijaboyabelia barëpona Jesús pena, Jesús pena penaecaenexa bajaraponë pijabota.

### **Pacuenia baja Jesús tëpa yabara pelivaisi**

*(Mt 27.45-56; Mr 15.33-41; Lc 23.44-49)*

<sup>28</sup> Jesús baja yapëtane petocopiarucaejavatsi daxita pacuenia tajëvelia vajunupae-batsi Dioso pejumelivaisibaxutota. Nexata jane baja Jesús pecopiarutsinexa daxita abaxë xua tosaicatsi, Jesús jumaitsi:

—Mera bitso jitsipajë, jai Jesús.

<sup>29</sup> Nexata bajarajota vaxi eca. Vënëqueca piajatuvinora. Nexata vajabitsaënnë esponjavënëjava jabuta bajaraporayalia. Bajaraxuacujinae naeboupita ruta bajara-paesponjavënëjava. Toyotsiatsi Jesús. Tsicuiburutatsi Jesús petsutsuninexa. <sup>30</sup> Jesús nexata tsutsune bajaraxua. Bajaraxuacujinae Jesús jumaitsi:

—Daxita rajane baja taexanaejava, veretajë, jai Jesús.

Nexata irataeya tëpanajereca.

### **Pacuenia Jesús becuerebota yencacuatatsi yabara pelivaisi**

<sup>31</sup> Pascuavënë fiesta junua. Nexata abaxë caematacabi sajina pejonenexa judíovi penacueraevetsimatacabinexa. Bajaraxuata judíovi apo jitsipae Jesúsšana baja matavëjëa perubenaexa cruzata. Tsipaji pascuavënë fiestamatacabi ita junua judíovi penacueraevetsimatacabinexa, judíovi bitso banajamatabëcuenereviaba daxita penacueraevetsimatacabanë matatoxenetsia. Bajaraxuata judíovi vajëta Pilatojavabelia Pilato vajabitsaë pitorobinexa pethaëpatsicabenexatsi Jesúsšana, cruzata perubenaevi, bepíjia bajarapamonae petëpaenexa. Itsa baja bajarapamonae tëparubena, penotsinexatsitsica cruzavecua pecaponaenexatsi itsajavabelia. <sup>32</sup> Nexata vajabitsaë ita ponalía, Jesús peyajava cobematabiabarutsinëtsibeje asaëbeje abaxë tsaruae. Bajaraxuata copíaya itsanë thaëpatsicabiabatsi. Bajaraxuacujinae icatsia itsanë thaëpatsicabiabatsi. <sup>33</sup> Nexata Jesús vajabitsaë ita cujibaliatsi, taerutatsi baja Jesús petëpaenë. Bajaraxuata Jesús apo thaëpatsicabiabitsi.

<sup>34</sup> Itsiata baitsi jane vajabitsaëviyajuvënë becuerebota Jesús yencacuatatsi. Bajarapavajënëyarena pitsapa pijana, mera yajava. <sup>35</sup> Xanë raja, Juannë, pacatoyaquinatsi mapalivaisije. Tataenë bajarapacuenae. Nexata xanë yapëtaníjii bajarapacuenae pexaniajaicuenae. Nexata bajarapalivaisi pacatoyaquinatsi panejumecovënëtsinexa paxamë ata. <sup>36</sup> Bajarapacuenia Jesús apo thaëpatsicabiabitsi petocopiapatsixaetsi pacuenia baja cajena Dioso pejumelivaisibaxutota tajëvelia jumaitsi Jesús yabara. Dioso baja cajena pejumelivaisibaxutota Jesús yabara tajëvelia jumaitsi mapacueniaje: “Apo siepatsicabiabi tsanetsi itsiata caesitoyo ata,” jai baja cajena tajëvelia Dioso pejumelivaisibaxutota Jesús yabara. <sup>37</sup> Itsabaxutota pijinia tajëvelia jumaitsi Jesús yabara mapacueniaje: “Bajarapamonae taena pecacuatsiva-jënëtsi,” jai baja cajena itsabaxutota Jesús peyenecacuatsijavanexatsi yabara.

### **Pacuenia Jesús petëpaenë mëthëtatsi yabara pelivaisi**

*(Mt 27.57-61; Mr 15.42-47; Lc 23.50-56)*

<sup>38</sup> José, Arimatea tomarapíjinë. Bajaraponë judíovi pevetsiviyajuvënë. Nexata José jumecovënëtaaponapona Jesús Cristocuene. Itsiata apo najamatabëcueneitajëtsi pejumecovënëtsijava Jesús Cristocuene. Tsipaji cjunava penajuaevetsivi judíovi. Nexata baja Jesús ita tëpa, José itsiata najamatabëcueneitajëta. José vajëta Pilatojavabelia Jesús petëpaenë pepitsinexatsica cruzajavavetsica pemëthëtsinexa. Nexata baja tocopatatsi. Nexata José lia Jesús perucaejavabelia pecaponaenexa Jesús petëpaenë. <sup>39</sup> Nicodemo, ponë meravi pona pebarëcuaicuaijainexa Jesús, bajaraponë ata judíovi pevetsiviyajuvënë. Nexata Nicodemo Joséta nalia. Caponabeje treinta pakilobeje petuxujuvibenonë, pematajërëabibenonë petuxujuvijavata. <sup>40</sup> Nexata Josébeje Nicodemobeje cruzajavavetsica pitsicabeje Jesús petëpaenë. Petsiotho-caecujinaebeje petuxujuvibenonë, pexaniaviria piapiasábanapanata mataquionaeya daxitanëreca matacacëbabeje. Bajarapacuenia exanabeje tsipaji judíovi baxaniavaeta petëpaejiviyo pemëthëtsinexa bajarapacuenia. <sup>41</sup> Itsajota Jesús cruzajavabelia cobematabiabarutatsi, bajarajota imoxoyo peubinaenë ayaiabacoboxaneto eca. Bajarapabacabojavata Jesús petëpaevajënaeya, José cajena exanaeyaexanabuta iboitapajanitojavata piníjii bovaju. José pijamonaejivi ita totëpatsi, pebuatsinexa bajarapaibovajulia. José ata ita tëpa, pebuatsinexatsi bajarapaibovajulia. Nexata bajarapaibovajulia abaxë itsajiviyo ata petëpaejiviyo apo buatsitsi. <sup>42</sup> Nex-

ata bajarapaibovajualia Josébeje Nicodemobeje Jesús petēpaenē buatabeje. Tsi-paji bajarapaibovaju boca imoxoyo. Judíovi ata baja penacueraevetsimatacabinexa, bitso baja imoxoyo pejonenexa. Bajaraxuata bajarapaibovajualia Jesús petēpaenē buatasti.

### **Pacuenia Jesús petēpaecujinae icatsia asaē yabara pelivaisi**

*(Mt 28.1-10; Mr 16.1-8; Lc 24.1-12)*

**20** Judíovi baja penacueraevetsimatacabi verevereca. Nexata meravigia pitsijavata, bajayacunua, ajena matacabi tsarucaponae, itsiata abaxē itsa aitaquiri, María Magdala tomarapijiva pona Jesús petēpaenē pebuatsiibovajutsijavabelia. Nexata María tane ibopanaxanetomi petixitanutsijavalia ibovajuvēpavecua. <sup>2</sup>Nexata María cujinaejinarena itsaberena Simón Pedro ponapona. Bajarajota Simón Pedro yajavaponapona itsanē Jesús pijajivitonē, ponē bitso asiva Jesús. Nexata María jumaitsi bajaraponēbejejavabelia:

—Vajatuxanenēmi ra covē jutatsi pebuatsiibovajutsivecua. Apo payapētaenē raja itsabelia icatsia buatasti, jai María.

<sup>3</sup>Nexata Pedrobeje Jesús pijajivitonēbeje ponabeje Jesús pebuatsiibovajutsijavabelia. <sup>4</sup>Najuacujinaejinaliabeje. Itsiata itsanē Jesús pijajivitonē bitsojinaeja cujinaejina Pedro matatoxenetsia. Bajaraponē copiaya palia Jesús pebuatsiibovajutsijavabelia. <sup>5</sup>Itsa bajaraponē nabēxētsutsiaya naēcolia ibovaju bēxēpanalia, nexata taeyabualia Jesús daxitanē pematacacēbipanamitsireca pebocaejava bajarapaibovajualia. Bajaraponē itsiata abaxē apo jonelia. <sup>6</sup>Bajaraxuacujinae Simón Pedro cotocaevi pata. Nexata ibovajualia Pedro joneya. Pedro ata tane Jesús pematacacēbipanamitsireca pebocaejava bajarajota. <sup>7</sup>Papanata Jesús saicaya matacētatsi, apo yajavabocae bajarajota. Saicayajavata xaniavaetsia quionabuata. <sup>8</sup>Nexata ponē copiaya pata Jesús pebuatsiibovajutsijavata, najoneya jane baja. Tane pacuenia Jesús vecuapitsapa bajarapaibovaju. Nexata jane baja bajaraponē jumecovēnēta xaniavaetsia Jesús icatsia piasaējava petēpaecujinae. <sup>9</sup>Abaxē picani bajaraponē apo jumeyapētae pacuenia Dioso pejumelivaisibaxutota jumaitsi Jesús petēpaecujinae icatsia piasaējavanexa yabara. <sup>10</sup>Bajaraxuacujinae Jesús pijajivitonēbeje navitabeje baja pijaboyabelia.

### **Pacuenia Jesús petēpaecujinae tsitanaitajēta María Magdala tomarapijivajavabelia yabara pelivaisi**

*(Mr 16.9-11)*

<sup>11</sup>María nuenuca Jesús petēpaenē pebuatsiibovajutsijumavelia. Nexata María yaitaxutonueya nabēxētsutsiaya naēcolia ibovaju bēxēpanalia. <sup>12</sup>Nexata María taeyelia anijanēbeje ángelnēbeje, penioponaejava penaxatatsinēbeje. Ecabeje itsajota picani Jesús petēpaenē buatasti. Itsanē eca Jesús pematabocotomijavavereca. Itsanē eca Jesús petaxumijavatsina. <sup>13</sup>Nexata ángelnēbeje jumaitsiibeje Maríajavabelia:

—¿Detsa xuajitsia nuame? jaibeje.

María nexata jumaitsi:

—Tsi-paji covē itsamonae jutatsi tajatuxanenēmi. Nexata apo yapētaenē itsabelia icatsia buatasti, jai María ángelnēbejejavabelia.

<sup>14</sup> María ajena najumeveretanajelia bajarapacuenia pejumaitsijava, napënëyorot-siaya naëcolia. Taenuta Jesús penucaejava bajarajota. Itsiata abaxë María apo yapë-tae Jesúsucuenë. <sup>15</sup> Nexata Jesús jumaitsi Maríajavabelia:

—¿Detsa xuajitsia nuame? ¿Jipatsa jaitame? jai Jesús.

María nexata Jesús yabara saya jamatabëjumaitsi:

—Matsamëra ponë mapaunubacabo pevetsinëje, jamatabëjai María.

Bajaraxuata María caranata Jesúsjavabelia jumaitsi mapacueniaje:

—Xamë itsa jutame Jesús petëpaenë, netsipaebare itsajota buatame. Pitsijitsianë tacaponaenexa, jai María.

<sup>16</sup> Jesús nexata junataxuaba María pevënëta.

—¡María! jai Jesús.

María nexata napënëyorolia Jesúsjavabelia. Judíovi pijajumeta María jumaitsi Jesúsjavabelia:

—¡Rabuni! jai. “Rabuni,” itsa jai hebreojumeta, mapajumetaje pejumaitsijume: “Xamë tanecujarubinëmë,” pejaijume.

<sup>17</sup> Jesús nexata icatsia jumaitsi Maríajavabelia:

—Pëtsa nejayaremena. Tsipaji raja abaxë apo ponaenë taxa peecaejavabetsia. Ponare jane tajajivijavabelia. Tsipaebianame tajajivijavabelia taponaejavanexa tax-ajavabetsia. Taxa rabaja, paxamë ata paneaxa. Ponë tajaDioso, bajaraponë paxamë ata panijaDioso, jai Jesús Maríajavabelia.

<sup>18</sup> Nexata María Magdala tomarapijiva pona baja petsipaebinexa Jesús pijajivi-javabelia. Pona baja petsipaebinexa pacuenia tane pepo petuxanenë Jesús. Nexata María Jesús pijajivijavabelia tsipaebanua daxita pacuenia Jesús jumaitsi.

### **Pacuenia Jesús petëpaecujinae tsitanaitajëta pijajivijavabelia yabara pelivaisi**

*(Mt 28.16-20; Mr 16.14-18; Lc 24.36-49)*

<sup>19</sup> Pamatacabi María tane Jesús, icatsia itsa asaë petëpaecujinae, bajarapamer-avi nacaetuata daxita Jesús pijajivi. Daxita baupanë xaniavaetsia nayabaupaxataba. Tsipaji Jesús pijajivi judfovi cujunava. Jesús itsiata joneya. Jemata nuca pijajivi tu-atuajëta. Jesús jumaitsi pijajivijavabelia:

—¡Paxamë saya pajamatabëjemamëre! ¡Pëtsa pajunavame! jai Jesús.

<sup>20</sup> Bajarapacuenia Jesús pejumaitsicujinae, pijajivijavabelia tsitajëta pecobe-va-jënëbeje. Nayenevajënëitajëtanua pijajivijavabelia. Bajarajota Jesús pijajivi bitso barëya icatsia petaexae pijatuxanenë. <sup>21</sup> Nexata Jesús icatsia jumaitsi:

—¡Paxamë saya pajamatabëjemamëre! ¡Pëtsa pajunavame! Pacuenia taxa ni-toroba, bajarapacuenia juya pacaitorobatsi jivijavabelia pexanialivaisi panetsipaebaponaenexa, jai Jesús pijajivijavabelia.

<sup>22</sup> Nexata Jesús uxunelia asaëyata pijajivi pematatsënëalia. Jumaitsi pijajivijavabelia:

—Espíritu Santo pacopiapire panejamatabëthëtota papecatsijamatabëecaenexa.

<sup>23</sup> Nexata itsamonae pibisiacuenë pexanaeneconi itsa pavecuajibiaexanaename, nexata baja pibisiacuenë pexanaeneconimi pepacuenë vecuajibitsi tsane. Itsa apo pavecuajibiaexanaemë tsane itsamonae pibisiacuenë pexanaeneconi, nexata pibisiacuenë pexanaeneconi apo vecuajibitsi tsane, jai Jesús pijajivijavabelia.

**Pacuenia Tomás Jesús tane Dioso  
piasaëyaexanaecujinaetsi petëpaecujinae yabara pelivaisi**

<sup>24</sup> Jesús pijajiviyajuvënënë, pevënë Tomás, ponë vënërubatsi itsavënë, Sapalanë. Bajaraponë piajibitsarucaejavata, Jesús pijajivijavabelia tsitanaitajëta. <sup>25</sup> Nexata Tomás itsa pata, Jesús pijajivi jumaitsi Tomásjavabelia:

—Pacatsutanetsi rabaja necovëta vajatuxanenë, jai Jesús pijajivi.

Nexata Tomás jumeaebiaya jumaitsi:

—Itsa pepacueene taenajë cruzajavabelia clavota pecobematabiabarutsivajënëtsibeje, nacobesibëtsianajë pecobevajënëyalia. Nacobesibëtsianajë peyenevajënëyalia ata. Nexata jane baja matapania jumecovënëtsianajë Jesús icatsia piasaëjava petëpaecujinae, jai Tomás Jesús yabara.

<sup>26</sup> Bajaraxuacujinae, ocho pamatacabibejecujinae, Jesús pijajivi icatsia bota nacaetuata. Tomás ata jane baja naponapona. Nexata daxita baupanë icatsia xaniavaetsia nayabaupaxataba. Jesús itsiata joneya. Jemata nuca pijajivi tuatuajëta. Jesús jumaitsi pijajivijavabelia:

—¡Paxamë saya pajamatabëjemamëre! ¡Pëtsa pajunavame! jai Jesús.

<sup>27</sup> Bajaraxuacujinae Jesús jumaitsi Tomásjavabelia:

—Tomás, taema rajane baja tacobevajënëbeje. Nacobesibëtsiaremelia jane baja tacobevajënëyalia. Nacobesirovire jane baja tayenevajënëyalia nebëtsinexa. Pëtsa baja xuacujinae jumeaebame. Jumecovënëre jane baja icatsia tasaëjava tatëpaecujinae, jai Jesús Tomásjavabelia.

<sup>28</sup> Nexata Tomás jumaitsi Jesúsjavabelia:

—¡Tajatuxanenë, tajaDioso! jai Tomás.

<sup>29</sup> Jesús nexata icatsia jumaitsi:

—Tomás, aeconoxae rajane baja jumecovënëtame icatsia tasaëjava tatëpaecujinae. Tsipaji baja nijacuata netaneme. Xamë matatoxenetsia bitso nesivajamatabëcuenebarëya tsane pamonaee apo netae ata, itsiata jumecovënëta icatsia tasaëjava tatëpaecujinae, jai Jesús Tomásjavabelia.

**Pajamatabëcuene yabara yaquina mapacuyalatoje yabara pelivaisi**

<sup>30</sup> Jesús pijajivi pitabëta exanapona orijibia itsajavanë pinijicuene Dioso pesaëta pexanaejavanë. Itsiata bajaraxuanë pelivaisi apo yajavayaquinaenë mapacuyalatojade. <sup>31</sup> Itsiata mapalivaisi pacatoyaquinatsije panejumecovënëtsinexa Jesús athëbëvetsica Dioso pitorobijavatsica vajanacacapanepaenexa, panejumecovënëtsinexanua Jesús Dioso pexënatocuene. Nexata itsa pajumecovënëtsianame mapalivaisije, paxainaename matacabi apo peverevereceajava Jesús pejamatabëcueneta.

**Pacuenia Jesús petëpaecujinae icatsia itsa asaë, tsitanaitajëta  
pijajivijavabelia, siete ponëbejevabelia, yabara pelivaisi**

**21** Jesús petëpaecujinae icatsia itsa asaë, tsitanaitajëta pijajivijavabelia Tiberiasvënë pucaxanetoitapata. Jesús icatsia pijajivi itsa tsitanaitajëta, maitsije. <sup>2</sup> Caejavata Jesús pijajivi najuajinavanapa mapamatabëxëyoje. Najuaponaponabeje Simón Pedrobeje Tomásbeje, ponë vënërubatsi itsavënë, Sapalanë. Najuaponaponabeje pijinia anijanëbeje, Zebedeo ëpexënatobeje. Najuaponaponabeje pijinia it-

sanëbeje icatsia pematatsënëa. Natanael ata naponapona bajarajota. Canávënë tomarapijinë Natanael. Canátomara eca Galilea nacuata. <sup>3</sup>Nexata Simón Pedro jumaiti penajuajinavanapaevijavabelia:

—Djuuai raja yamatajucaejsianë, jai Pedro.

Nexata penajuajinavanapaevi jumaiti:

—Paxanë ata panaponaenajë xamëta, jai.

Nexata pucaxanetojavabelia pona. Bajarajotalia jerata naropoba. Itsiata bajara-pameravi caenë ata dujuainë bajarapamonae apo yamatajutsi. <sup>4</sup>Ajena baja matacabi tsina, Jesús pijajivi tsitanaitajëta Tiberiaspuca itapata. Itsiata Jesús pijajivi apo yapëtaetsi Jesúsucene. <sup>5</sup>Nexata Jesús jumaiti pijajivijavabelia:

—¿Jica? ¿Djuuainë apo payamatajutsimë caenë ata? jai Jesús.

Nexata Jesús pijajivi jumaiti:

—Ajibi cajena, jai.

<sup>6</sup>Nexata icatsia Jesús jumaiti pijajivijavabelia:

—Djuuai paneyamatajucaejava, panecujanenia pamuxunene, pacoparemece jayenepanareca. Bajarapacuenia payamatajutsianame dujuai, jai Jesús pijajivijavabelia.

Nexata Jesús pijajivi dujuai peyamatajucaejava bajarapacuenia copareca. Bajarax-uacujinae pejutsinexatsina menevecua apo caëjëpaetsi. Tshipaji bitso ayaijava dujuai tojunuatsi. <sup>7</sup>Nexata Jesús pijajivitonë, ponë Jesús bitso asiva, bajaraponë jumaiti Pedrojavabelia:

—¡Vajatuxanenë tsaena rabaja maje! jai Pedrojavabelia.

Nexata Simón Pedro caejumetaetabi bajarapacuenia pejumaitisijava Jesús yabara, jumasa penucaenë, naxatataxuaba penaxatatsijava. Jopanucalia menialia naxanitsi-ayo pepatabinexa Jesúsjavabelia. <sup>8</sup>Jesús pijajivi meneitapavecua tajë apo yarubena. Cien metrocuenia saya yarubenalía. Nexata itsamonae Pedrobana penajuajinavanapaevi jerata pata tajetabuabelia. Robobocabuatapona dujuai peyamatajucaejava. Tovënëcatsi cajena dujuai. <sup>9</sup>Bajarapamonae itsa nonobajunalia tajetabuabelia, taeyeta isotoitaire. Bajara paisotoitairejumavereca taeyabuata dujuainë, panbëanë yajava. <sup>10</sup>Nexata Jesús jumaiti pijajivijavabelia:

—Aeconoxae dujuai itsa payajutsiaremena, pacaponaenimina panexani-avaetsinexa, jai Jesús pijajivijavabelia.

<sup>11</sup>Pedro nexata jeraënëa berunareca tajetabuaberena peyarobocaenexarena dujuai peyamatajucaejava. Nexata bajaraxua dujuai vënëca pinijidujuainëanë. Ciento cincuenta y tres ponëbeje. Itsiata dujuai peyamatajucaejava, dujuai ayaijava ata, apo yaucuucuae. <sup>12</sup>Nexata Jesús jumaiti pijajivijavabelia:

—Naxanitsia. Vepanabanianame, jai Jesús pijajivijavabelia.

Itsanë ata Jesús pijajivitonë apo yanijobi Jesúsjavabelia. “¿Jipatsamë?” apo jai. Tshipaji baja bajarapamonae yapëtane pijatuxanenë Jesúsucene. <sup>13</sup>Jesús nexata cujilia bajarapaisoto. Pita baja panbëanë. Tsicobetsana pijajivi. Bajarapacuenia icatsia Jesús dujuaijavanë ata tsicobetsana pijajivi.

<sup>14</sup>Bajarapacuenia Jesús pijajivijavabelia acueyabijava tsitanaitajëta, petëpaecuji-nae icatsia itsa asaë.

**Pacuenia Jesús petëpaecujinae itsa naitajëta  
cuacuajai Simón Pedrojavabelia yabara pelivaisi**

<sup>15</sup> Penabaniveretsicujinae Jesús jumaitsi Simón Pedrojavabelia:

—Simón, Jonás pexënatomë, çxamë tsaja bitso niasivamë mapamonae taneasivajava matatoxenetsiaje? jai Jesús.

Pedro nexata jumaitsi:

—Jājā. Xamë rabaja nejamatabëcueneyapëtaneme tacaasivajava, jai Pedro Jesúsjavabelia.

Jesús nexata jumaitsi Pedrojavabelia:

—Nexata pacuenia pijaoveja pevetsinë xaniavaetsia baeveta pijaoveja, bajara pijinia pacuenia xamë xaniavaetsia netoevetabianame tajajivi, pamona tanepejanajumecovënëtsivi. Bजारapamonae taniji betajaovejaxicuenia, jai Jesús.

<sup>16</sup> Nexata icatsia Jesús jumaitsi Pedrojavabelia:

—Simón, Jonás pexënatomë, çxamë tsaja niasivamë? jai.

Pedro nexata icatsia jumaitsi:

—Jājā. Xamë rabaja nejamatabëcueneyapëtaneme tacaasivajava, jai Pedro Jesúsjavabelia.

Jesús nexata icatsia jumaitsi:

—Nexata xamë netoevetsianame tajajivi, pamona nesivanajamatabëcopata xanëjavaberena. Bजारapamonae taniji betajaovejacuenia, jai Jesús.

<sup>17</sup> Icatsia matavëjëa Jesús jumaitsi Pedrojavabelia:

—Simón, Jonás pexënatomë, çxamë tsaja niasivamë? jai icatsia.

Pedro nexata bejamatabëjibireca matavëjëa peyanijobaponaexaetsi Jesús piasivajava yabara. Nexata Pedro jumaitsi Jesúsjavabelia:

—Xamë baja cajena yapëtaneme daxitacuene. Nexata baja nejamatabëcueneyapëtaneme bitso tacaasivajava, jai Pedro.

Jesús nexata tajëvelia jumaitsi Pedrojavabelia:

—Nexata xamë netoevetsianame tajajivi, pamona taniji betajaovejacuenia. <sup>18</sup> Xaniajanë pacuenia catsipaebijitsiatsi. Itsa abaxë pamatacabi pevëjëatomë, naxatatabiabame nenaxatatsijava nijacuata. Nexata nejitsipaejavabelia ponabiabame. Itsa pamatacabi perujunëmë tsane, pacuenia bitso perujunëyo banamaxëcaeveta itsajivi pijacamisa pexatatsinexatsi, bajarapacuenia namaxëcaevetsianame itsamonae pecacobecëtsinexa pecaponaenexa itsabelia picanı apo jitsipaemë tsane neponaejava, j Xaniajanë pacuenia catsipaebijitsiatsi. Itsa abaxë pamatacabi pevëjëatomë, naxatai Jesús tajëvelia Pedrojavabelia.

<sup>19</sup> Bजारapacuenia Jesús jumaitsi Pedrojavabelia Pedro tajëvelia peyapëtaenexa pacuenia beyaxuabijitsiatsi Dioso pejumelivaisi pejumecovënëtsixae. Itsa baja Jesús najumevereta bajarapacuenia pejumaitsijava, Jesús jumaitsi Pedrojavabelia:

—Pedro, naxanitsia. Nepënaponare, jai Jesús.

Nexata baja Pedrobeje Jesúsbeje ponatabeje pesaicaeyojavabelia.

**Jesús pijajivitonë, ponë bitso Jesús asiva,  
penavajunupaebijava yabara pelivaisi**

<sup>20</sup> Xanë Juannë, Jesús pijajivitonë, bitso taneasivanë. Pamatacabi caniviyopijijava panabaniji Jesús pebeyaxuabivajënaetsi, xanë Jesús pemuxuneneta ecajë.



Nexata bajarajota yanijobecajë. “Tajatuxanenë, ¿jipatsa cacanajetsiana nijavajabitsaë pecobeyabelia?” janë Jesúsjavabelia. Nexata Jesús pebeyaxuabicujinaetsi, icatsia itsa asaë, panetsitanaitajëta. Nexata bajarapamatacabi Jesúsbeje Pedrobeje pe-saicaeyojavabelia ponatababeje. Nexata xanë pecovëvelia cotocaevajë. Nexata Pedro Jesús pecovëya najetaruca. Pedro itsa napënëyorotaba caevëarena, netaetaba bajaraponëbeje pecovëya tanajetarucajava. <sup>21</sup> Nexata Pedro itsa netane, xanë tatë-paejavanexa yabara, yanijoba Jesúsjavabelia.

—Tajatuxanenë, ¿detsa pacuenia tēpaena maponëje? jai Pedro Jesúsjavabelia.

<sup>22</sup> Jesús nexata jumaitsi Pedrojavabelia xanë yabara:

—Itsa xanë tojitsipaejitsipajë bajaraponë piasaëtsaponaponanexa, asaë tsaponaponae tsipae matapania icatsia tapatsimatacabitsicajavabelianexa. Pëtsa bajaraponë tatocopatsijava yabara, najamatabëxainame. Tsipaji xua bajaraponë tocopatsipajë, apo xamënexa tsipae. Nexata xamë saicaya caasaëmë tsaponaponae tsane nexanaejava, pacuene caitorobatsi, jai Jesús Pedrojavabelia.

<sup>23</sup> Bajaraxuata patanajuajinavanapaevi, Jesús pijajivi, xanë yabara jamatabëcuenavëxaniabiaya najumai tsabiabi: “Juan raeta apo tēpae tsane,” najai tsabiabi. Itsiata baitsi jane Jesús apo jumaitsi: “Juan raja apo tēpae tsane.” apo jai. Jumaitsi rajane mapacueniaje: “Itsa xanë tojitsipaejitsipajë bajaraponë piasaëtsaponaponanexa, asaë tsaponaponae tsipae matapania icatsia tapatsimatacabitsicajavabelianexa. Pëtsa bajaraponë tatocopatsijava yabara, najamatabëxainame. Tsipaji xua bajaraponë tocopatsipajë, apo xamënexa tsipae,” jai Jesús xanë yabara Pedrojavabelia.

<sup>24</sup> Xanë Jesús pijajivitonënë. Patanajuajinavanapaevi xanë yabara jamatabëcuene-navëxaniabiaya najumai tsabiabi: “Juan raeta apo tēpae tsane,” najai tsabiabi. Bajarapacuenia tanesivajamatabëjumaitsinë, Juannë, yaquinajë daxita mapalivaisije. Yapëtanetsi baja cajena palivaisianë Jesús nacatsipaeba, pexaniajailivaisianë.

<sup>25</sup> Jesús pinijicuene pexanaejavanë Dioso pesaëta, ayajava exana mapanacuataje. Itsajavanë ata exana pematatsënëa. Nexata bajaraxuanë, caejavayo canacujitsia pelivaisi, itsamonae itsa yaquinaejitsipa, bajaraxuanë pelivaisibaxutonë bitso ayajava tsipae. Nexata meta bajarapalivaisibaxutonë vënëcaejitsipa mapanacuaje.

## Pacuenia exanavanapa Jesús pitorobivi, apóstolevi

### Pacuenia Jesús tajëvelia vajunupaeba Espíritu Santo pepatsijavanexatsica mapanacuayabetsicaje yabara pelivaisi

**1** Teófilo, xanë Lucasnë, catoyaquinatsi mapabaxutoje. Copiaya baja cajena catoy-  
aquinatsi itsabaxutota daxita Jesús pexanaejavanë pelivaisi. Nexata copiyapi-  
jibaxutota catoyaquinatsi xumaxëto Jesús exana petaxuxuabijavaveliacujinae pex-  
anaejava. Daxita bajaraxuanë pelivaisi, catoyaquinatsi. Pacuenia ata Jesús pex-  
anialivaisi jivi tsipaebaponapona, abaxë ita ponapona mapanacuataje, bajara-  
palivaisi ata catoyaquinatsi. <sup>2</sup>Matapania pamatacabi Jesús athëbëabetsia Dioso  
caponatsi, bajarajota Jesús baja copiaruta pexanaejava. Nexata baja itsajota Jesús  
copiaruta pexanaejava, bajarajota pijinia copiarutajë copiyapijibaxutota tacatoy-  
aquinaejava, Jesús pexanaejavanë pelivaisi. Athëbëabetsia Jesús Dioso pecapona-  
vajënaetsi, Jesús itapeta pijajiviyajuvënëvi apóstolevinexa. Nexata Jesús itoroba pi-  
jajivi, apóstolevi, jivi pexanialivaisi petsipaebanajetarubenaenexa daxitanacuanë-  
java. Espíritu Santo pejamatabëcueneta Jesús yapëtaeyaexanatsi pacuenia itoro-  
bijitsia pijajivi, apóstolevi. <sup>3</sup>Bajaraxuacujinae Jesús pijavajabitsaë beyaxuabatsi.  
Jesús petëpaecujinae icatsia ita asaë, anijatonë tsitanaitajëtabiaba pijajivijavabelia.  
Cuarenta baja pamatacabibeje ita panepa Jesús icatsia piasaëcujinae, pona jane  
baja athëbëabetsia. Bajarapacuenia anijatonë Jesús pijajivi petsitanaitajëtsixae petë-  
paecujinae, nexata pijajivi yapëtanetsi Jesús icatsia piasaëjava petëpaecujinae.  
Jesús pijajivi ita tsitanaitajëtabiaba, Jesús pijajivi tsipaebabiaba Dioso pijajivi  
pevetsijavanexa.

<sup>4</sup>Nexata Jesús pijajivi ita tsitanaitajëta Jerusalén tomarata, Jesús jumaiti pija-  
jivijavabelia mapacueniaje:

—Pëtsa abaxë paponame mapatomaravecuaje. Pacopiaevetavanapaename abaxë  
Espíritu Santo. Bajaraponë yabara taxa Dioso najumecapanepaeya jumaiti pa-  
pecatoitorobinexatsica. Xanë ata bajaraponë yabara pacatsipaebatsi baja cajena  
panecopiaevetavanapaenexa. <sup>5</sup>Juanpijinë raja jivi bautisabanajetaruca ëmerata. It-  
siata baiti jane caematacabibejecujinae paxamë Dioso pacatsijamatabëjoneyaex-  
anaena Espíritu Santo, jai Jesús pijajivijavabelia.

### Pacuenia Jesús petëpaecujinae icatsia ita asaë, athëbëabetsia baja pona yabara pelivaisi

<sup>6</sup>Jesús petëpaecujinae icatsia ita asaë, tsitanaitajëta pijajivijavabelia. Nexata  
Jesús pijajivi penacaetuatsijavata, Jesús pijajivi yanijobatsi. Jesús pijajivi jumaiti  
mapacueniaje:

—Patajatuxanenë, ¿xaniajai tsabaja? ¿Itsanacupijivi pevetsijava mapanacuaje  
pecopatsinexa, xamë vecuapitsapaeyaexanaename mapamatacabitaje? ¿Nexata  
tsaja vajaviriavi judíovi juya evetsiaexanaename vajanacayanacuaevetsinexa? jai  
Jesús pijajivi.

<sup>7</sup>Nexata Jesús jumaiti pijajivijavabelia:

—Xua yabara paneyanijobame, paneyapëtaenexa, taxa Dioso apo pacatocopatsi.  
Apo pacatocopatsi paneyapëtaenexa pamatacabita, paepatota ata, taxa Dioso pex-

anaejava, copiapatsijitsia. Caenë taxa Dioso yapètane pamatacabi bajaraxua copiapatsijitsia. <sup>8</sup>Itsiata baitsi jane paxamë ajumejunavijibia papaebianame xanë talivaisi Espíritu Santo itsa pacatsijamatabèpatsianica paxamëjavabetsica. Nexata panelivaisipaebanajetarubenaename Jerusalén tomarajava, Judea nacujava ata, Samaria nacujava ata, tajënacuatubujava ata, jai Jesús pijajivijavabelia.

<sup>9</sup>Bajarapacuenia Jesús pejumaitsicujinae pijajivijavabelia, Jesús baja pijajivi pitabënejeva, athëbëabetsia Dioso caponatsi. Itarërëbo baja Jesús pëcaevaya. Nexata baja Jesús pijajivi acuenebi matavëjëa petaejava. <sup>10</sup>Nexata Jesús pijajivi pëtaenubena athëbëabetsia Jesús pepëcaevijavatsia. Nexata ángelnëbeje, penioponaejava penaxatatsinëbeje, Jesús pijajivi jemata bajarajota tsitanaitajëtatsi. <sup>11</sup>Nexata ángelnëbeje jumaitsi beje Jesús pijajivijavabelia:

—PaGalilea nacujapijivimë, ¿detsa xuajitsia athëbëabetsia pataenubename? Bajaraponë Jesús paxamëjavavetsia Dioso pacavecuacaponatsi athëbëabetsia. Bajaraponë icatsia itsamatacabi patsianica. Pacuenia pataneme petsiajava, bajara icatsia pacuenia patsianica, jai ángelnëbeje Jesús pijajivijavabelia.

### **Pacuenia Jesús pijajivi natsicueyaitapeta Matíasvënëñë apóstolenënexa yabara pelivaisi**

<sup>12</sup>Jesús baja peponaecuujinae athëbëabetsia, Jesús pijajivi, apóstolevi, naviaba Jerusalén tomaraberena. Naviaba olivonaenë penubenaetsutojavaverena. Bajaratatsuto eca caekilómetrocuenia Jerusalén tomaravecu. <sup>13</sup>Nexata Jesús pijajivi pata Jerusalén tomarata. Nexata pabota Jesús pijajivi najinavanapa, athëbëyo pexanaeirajavabetsia junaya. Tsipaji baja cajena tsicopatatsi bajarapairatatsia pejinavanapaenexa. Pamonae Jesús pijajivi apóstolevi, mapevënëanëje. Itsanë pevënë Pedro. Itsanë Santiago. Itsanë Juan. Itsanë Andrés. Itsanë Felipe. Itsanë Bartolomé. Itsanë Mateo. Itsanë Santiago, Alfeo pexënato. Itsanë Simón. Bajaraponë celotenë. Itsanë pevënë Judas, Santiago pejujapijnë. <sup>14-15</sup>Pabota Jesús pijajivi apóstolevi najinavanapa, athëbëyo pexanaeirajavatatsia, nacaetuatabiaba caejavata pevajëtabiabinexa Diosojavabelia. Jesús pena María, Jesús pejujapijivi ata, itsapetiriavi ata yajava, nacaetuatabiaba pevajëtabiabinexa Diosojavabelia. Bajarapajivibitsaëto ciento veinte pajivibeje. Nexata penacaetuatsijavata bajarapamonae tuatujëta Pedro nonotapuna. Pedro nexata jumaitsi penacaetuatsivijavabelia:

<sup>16</sup>—Tajamonae, copiapata rajane baja pacuenia baja cajena tajëvelia jumaitsi Dioso pejumelivaisibaxutota. Pacuenia bajayata Davidpijnë Espíritu Santo pejamatabëcueneta tajëvelia vajunupaebiaexanatsi Judaspijnë pexanaejavanexa, copiapata jane baja. Tsipaji Judaspijnë itsa matacapona pamonae Jesús vaetabijitsiatsi, Judaspijnë tocopiapatatsi baja pacuenia Davidpijnë tajëvelia jumaitsi. <sup>17</sup>Judaspijnë picani paxanëyajuvënëñëmi. Jesús picani bajaraponëmi itapeta penanacuenebinexa paxanëta. <sup>18</sup>Judaspijnë ira comuata pibisiacuene pexanaematamopalatata. Bajaraponëmi pijacuata nabeyaxuaba. Nexata penabeyaxuabicujinae, pematono ira bejopaica. Nexata cototititicajunua. Daxita pënëmi pitsatjarabarena. <sup>19</sup>Daxita Jerusalén tomarapijivi vënëlvaisitanetsi daxita xua tocopiapatatsi Judaspijnëmi. Nexata Judaspijnëmi pecomuatsiira, Jerusalén tomarapijivi vënëruba Acéldama. “Acéldama,” itsa jai bajarapamonae pijajumeta, mapajumetaje pejumaitsi jume: “Papalata pejamatabëcueneta jivitonë beyaxuabatsi, bajarapapalatata pecomuatsiira,” pejaijume, jai Pedro penacaetuatsivijavabelia.

<sup>20</sup> Icatsia Pedro jumaitsi penacaetuatsivijavabelia:

—Salmosvënëbaxutota tajëvelia Judaspijinë yabara comparacióncuenia jumaitsi mapacueniaje:

Pijabo jivinebo xuabetsiana. Itsajivi ata apo ponaponae tsane bajarapabota, jai tajëvelia Salmosvënëbaxutota Judaspijinë apóstolenë penaexanaejavavecua pepitsapaejavanexa yabara.

Itsajavata Salmosvënëbaxutota icatsia tajëvelia jumaitsi Judaspijinë yabara mapacueniaje:

Bajaraponëmi penacuenebijavami, itsanë pitsiana,

jai itsajavata Salmosvënëbaxutota itsanë icatsia apóstolenë penaexanaejavanexa yabara Judaspijinë pepitsapaejamatabëcuene, jai Pedro penacaetuatsivijavabelia.

<sup>21</sup> Icatsia Pedro jumaitsi:

—Caenë panetsicueyaajibi doce paponëbejenexanë Jesús petëpaecujinae Dioso icatsia piasaëyaexanaejavatsi patataejava patanajuapaebinexa. Bajaraxuata bitapetatsi itsanë pataneyabinexa. Paxamë tuatujëta ena patanajuapënjinanavanapaevi vajatuxanenë Jesús pamatacabi abaxë ponapona mapanacuataje.

<sup>22</sup> Juanpijinë raja bautisaba Jesús. Bajara pamatacabijavaveliacujinae, panajuapënjinanavanapajë Jesús, matapania athëbëabetsia Dioso patanevecua caponaematacabitsijavabelia. Nexata bajarapitsinë bitapetatsi Jesús petëpaecujinae Dioso icatsia piasaëyaexanaejavatsi patataejava patanajuapaebinexa, jai Pedro penacaetuatsivijavabelia.

<sup>23</sup> Nexata pamonae nacaetuata, Dioso pejumecovënëtsivi, anijanëbeje itapeta, Pedrohana jane baja Jesús penajuapënjinanavanapaevi. Bajaraponëbejeyajuvënënë caenë acueyabi pavënëbeje xaina. Itsavënë José. Itsavënë Barsabás. Itsavënë Justo. Itsanë caevënë xaina. Bajaraponë pevënë Matías. <sup>24</sup> Bajaraxuacujinae bajarapamonae najumaitsi:

—Vajëtsianatsi Diosojavabelia vajanacayapëtaeayaexanaenexa, najai.

Nexata jane baja bajarapamonae peyapëtaenexa, ponë Dioso itapetsijitsiatsi apóstolenënexa, vajëta Diosojavabelia. Bajarapamonae pevajëtsijavata Diosojavabelia, jumaitsi mapacueniaje:

—Patajatuxanenë, daxitajivi nejamatabëcueneyapëtaenë. Maponëbejeyajuvënënëje, ponë itapetame apóstolenënexa, panetsitajëre. <sup>25</sup> Nexata ponë itapetame, pitsiana xua Judaspijinë vecuapitsapa. Bajaraxua Judaspijinë vecuapitsapa peponaexae infernojavabelia, jai bajarapamonae pevajëtsijavata Diosojavabelia.

<sup>26</sup> Bajaraxuacujinae bajarapamonae pijacuenecujirua exana peyapëtaenexa jane baja ponë apóstolenënexa. Nexata bajarapamonae yapëtane Matías apóstolenënexa. Nexata baja Matías najunua once ponëbeje Jesús pijajivi apóstolevijavabelia. Nexata baja apóstolevi doce ponëbeje.

### **Pacuenia jane baja athëbëvetsica Espíritu Santo patsica Jesús pijajivi petsijamatabëjonexatsi yabara pelivaisi**

**2** Itsa baja panepa cincuenta pamatacabibeje pascuavënëfiesta peverevereacucujinae, icatsia junua Pentecostésvënëfiesta. Nexata bajarapamatacabi daxita Jesús pijajivi nacaetuata caejavata. <sup>2</sup> Nexata bajarapamatacabi athëbëvetsica jemata najumeta bepinijjoviboxaneto. Nexata pabota Pedrohana nacaetuatenä, daxitabo najumeteca. <sup>3</sup> Bajarapamonae tane athëbëvetsica perunaejavatsica bepitarunutsi-

cotia. Nexata bajarapamonae caejivi canacujitsia bajarapacotia tsmatanatsanae-yarunaicatsi. <sup>4</sup>Nexata daxita bajarapamonae tsijamatabëvënëcatsi Espíritu Santo. Nexata bajarapamonae jemata taxuxuaba penatsipaebijava itsaviriajumenëta, apo penatsipaebijumemi picani. Espíritu Santo saya pejamatabëcueneta bajarapacuenia itsaviriajumenëta natsipaebiaexanatsi.

<sup>5</sup>Bajarapamatacabita Jerusalén tomarata jinavanapa ayaibitsaëtoxaneto judíovi. Bajarapamonae saicaya daxitanacuanëjava penaexanaevi. Bajarapamonae saya napata Jerusalén tomarata penataenexa Pentecostésvënëfiesta. Bajarapamonae bitso pejumecovënëtsivi Dioso. <sup>6</sup>Nexata bajarapamonae ita jumetane bepinijijoviboxaneto athëbëvetsica penajumetsijava, nexata pabota Jesús pijajivi nacaetuatena, bajarapabota muxunanacaetuana ayailbitsaëtoxaneto bajarapamonae. Paviriajumenëta Jesús pijajivi Espíritu Santo pejamatabëcueneta natsipaebiaexanatsi, bajarapamonae pijajumenë. Nexata bajarapamonae xaniavaetsia jumetane xua yabara Jesús pijajivi tsipaebapona. Bajaraxuata bajarapamonae bitso jamatabëcuenenabenajaca. Tsipaji bajarapamonae caenacuapijivi canacujitsia xaniavaetsia jumetaepona pepo pijajumeta Jesús pijajivi petsipaebilivaisianë. <sup>7</sup>Athëbëvetsica bepinijijoviboxaneto penajumetsijava pemuxunanacaetuanaevi, pinijicuenia najamatabëxainaeja jamatabëcuenenabenajaca. Nexata bajarapamonae najumaitsi:

—Daxita mapamonae nacatsipaebanubenaje, Galilea nacuapijivi. Apo penatsipaebivi picani vajajumenë. <sup>8</sup>Vaxaitsi itsaverena patatsi, caenacuapijivitsi canacujitsia saicaya xainatsi vajajumenë, apo penatsipaebijumenë mapamonaeje. ¿Detsa pacuenia itsiata vaxaitsi, caenacuapijivitsi canacujitsia, vjanaexanaejavaveliacujinae vjanatsipaebijumenëta caëjöpatsi penatsipaebinexa mapamonaeje? <sup>9</sup>Vaxait-siyajuvënëvi raja itsamonae Partia nacuapijivi. Itsamonae Media nacuapijivi. Itsamonae Elam nacuapijivi. Itsamonae Mesopotamia nacuapijivi. Itsamonae Judea nacuapijivi. Itsamonae Capadocia nacuapijivi. Itsamonae Ponto nacuapijivi. Itsamonae Asiavënë nacuapijivi. <sup>10</sup>Itsamonae Frigia nacuapijivi. Itsamonae Panfilia nacuapijivi. Itsamonae Egipto nacuapijivi. Itsamonae Africa nacuapijivi, Cirene tomarapënëverenapijivi. Itsamonae vaxait-siyajuvënëvi judíovi, Roma tomarapijivi. Itsamonae apo judíovi, Roma tomarapijivi. Bajarapamonae apo judíovi ata, Dioso jumecovënëtavanapa pacuenia vaxaitsi judíovitsi jumecovënëtavanapatsi Dioso. <sup>11</sup>Itsamonae vaxait-siyajuvënëvi Creta nacuapijivi. Itsamonae Arabia nacuapijivi. Itsiata daxitatsi jumetanetsi xaniavaetsia Jesús pijajivi vjanacatsipaebilivaisianë vajajumenëta. Caejivi canacujitsia bajarapamonae Dioso pinijicuenie pexanaejava yabara nacatsipaebapona, najai athëbëvetsica bepinijijoviboxaneto penajumetsijava pemuxunanacaetuanaevi.

<sup>12</sup>Nexata daxita bajarapamonae jamatabëcuenenajunaviacanubena. Nexata bajarapamonae najumaitsi:

—¿Detsa meta mapitsijamatabëcuene yabara itsije? najai.

<sup>13</sup>Itsamonae saya jumecaponaeya jumaitsi Jesús pijajivi yabara:

—Aitajibi ra saya mapamonaeje, jai.

**Pacuenia Pedro tsipaeba athëbëvetsica bepinijijoviboxaneto penajumetsijava pemuxunanacaetuaevijavabelia yabara pelivaisi**

<sup>14</sup> Apóstolenë Pedro nonotapuna once ponëbeje apóstolevi yajava. Nexata Pedro piniijumeta jumaitsi athëbëvetsica bepinijijoviboxaneto penajumetsijava pemuxunanacaetuaevijavabelia:

—Tajamonae judíovi, Jerusalén tomarata panenapatsivi, panenamuxunaevere. Paxamë ata Jerusalén tomarata paneenaevi, xaniavaetsia panenamuxunaevere paneyapëtaenexa xua yabara pacatsipaebijitsiatsi. <sup>15</sup> Paxamë mapamonae yabaraje pajumaitsimë: “Aitajibi ra saya mapamonaeje,” pajamë. Mara pamona apo aita-jibi. Bajayacunuaepato raja abaxë maje. Bajarapapatota jivi apo aitajibi tsabi-abi. <sup>16</sup> Mara pamona paxamë panijajumenëta Espíritu Santo pejamatabëcueneta natsipaebiaexanatsije pecopiapatsixae baja xua bajayata tajëvelia Joelpijinë Dioso-jumepaebinëmi vajunupaeba. Bajaraxua yabara Dioso pejumaitsiyava Joelpijinë bajayata tajëvelia jumaitsi mapacueniaje:

Dioso jumaitsi: <sup>17</sup> “Itsa baja imoxoyo pevajënae tsane mapanacua peverevereacene-aje, itorobianicajë Espíritu Santo daxitanacuapijivi, pamona tajajivi petsijamatabëjonexatsi. Daxita panexi, pebijivi, petiriavi, paebiana palivaisi Espíritu Santo paebiaexanaenatsi, xanë talivaisi. Pevëjëavi pebijivi taena xua tsitajëtsianajë bemajitsinaebocuenia. Perujuvi pebijivi piamajitsinaejavata tsipaebianajë. <sup>18</sup> Nexata daxita pamona tanetonacuenebivi, pebijivi, petiriavi ata, bajarapamatacabi Espíritu Santo toitorobianicajë petsijamatabëjonexatsi. Nexata bajarapamonae paebiana xanë talivaisi. <sup>19</sup> Tsitajëtsianajë itaboxotatsia pini-jicuene taexanaejava. Daxita mapanacuajava ata pini-jicuene taexanaejava tsitajëtsianajë. Ayai tsane pijana. Ayai tsane isotocotia. Ayai tsane petsëxë mapanacuataje. <sup>20</sup> Nexata matcabipijijuameto aitaquiri tsane. Meravipijijuameto bepijana itatsobia tsane. Bajara itsane mapanacuataje itsa baja peneta imoxoyo pevajënae tsane icatsia pepatsimatacabinexatsica pepo petuxanenë. Bajarapamatacabi bajaraponë pini-jicuene pexanaejava pecajëpäenëcuenetsi, tsitajëtsiana daxitajivijavabelia. <sup>21</sup> Nexata pajivi navajëtsiana pepo petuxanenëjavabelia, bajarapajivi capanepaenatsi,” jai Dioso,

jai bajayata tajëvelia Joelpijinë Dioso-jumepaebinëmi Dioso pejumaitsiyava bajaraxua yabara, jai Pedro athëbëvetsica bepinijijoviboxaneto penajumetsijava pemuxunanacaetuaevijavabelia.

<sup>22</sup> Icatsia Pedro jumaitsi bajarapamonaejavabelia:

—Tajamonae judíovi, panenamuxunaevere paneyapëtaenexa xua yabara pacatsipaebijitsiatsi. Jesús, Nazaret tomarapijinë, Dioso pesaëta pini-jicuene pexanaejava exanapona paxamë tuatuajëta. Nexata Jesús pacayapëtaeyaexana Dioso ayaicuene pexanaejava pecajëpäenëcuenetsi. Bajarapacuenia paxamë baja payapëtaneme Jesús Dioso pitorobinëcuenetsi. Xaniavaetsia rabaja payapëtaneme paxamëjavata Jesús pexanaejava bajarapapini-jicuene. <sup>23</sup> Bajaraponë Jesús paxamë panecobeyabelia canajetatsi. Nexata paxamë pabeyaxuabame. Tspaji patocopatame piamatabëcuenebejevi Jesús cruzajavabelia pecobematabiabarutsinexatsi. Bajarapacuenia Jesús pabeyaxuabame tspaji baja cajena Dioso tajëvelia najamatabëxaina bajarapacuenia Jesús panebeyaxuabinexa. <sup>24</sup> Itsiata baitsi jane Jesús petëpae-cujinae Dioso icatsia asaëyaexanatsi. Dioso capanepatsi petëpaejavavecua. Tspaji

Jesús Dioso pexēnatoxae, acuenebi pematatoxenetsijavatsi petēpaejava. <sup>25</sup> Bajayata Davidpijinē tajēvelia yaquina Dioso pejumelivaisibaxutota Jesús icatsia piasaējavanexa petēpaeucujinae. Davidpijinē itsa yaquina Jesús pejumaitsijava Diosojavabelia icatsia piasaējavanexa petēpaeucujinae, yaquina mapejumaitsiitaneje:

Yapētaniji Dioso taneyajavaponaponaejava. Tamuxuneneta ponapona, tacujuanenia. Bajaraxuata apo junavinē tsane. <sup>26</sup> Bajaraxuata jamatabēcuenebarēyanē tsane. Nexata jivijavabelia tsipaebianajē tajamatabēcuenebarēyajava. Bajaraxuata yapētaniji tatēpaeucujinae icatsia tasaējavanexa. <sup>27</sup> Xamē, Diosomē, apo necopatsimē tsane petēpaevi peponaenacuayabelia. Apo necopatsimēnua tsane taperabētsabanaenexa nexēnatonē. <sup>28</sup> Netsitajētame baja cajena taponamenamutonexa taxainaenexa maticabi apo peverevereaejava. Nejamatabēcuenebarēyaexaname itsa neyajavaponaponame,

pejaiitane bajayata Davidpijinē yaquina Dioso pejumelivaisibaxutota Jesús pejumaitsijava Diosojavabelia, jai Pedro athēbēvetsica bepinijijoviboxaneto penajumetsijava pemuxunanacaetuanaevijavabelia.

<sup>29</sup> Icatsia Pedro jumaitsi bajarapamonaejavabelia:

—Tajamonae, jumenapebetsiaya pacatsipaebianatsi vajasalinainēmi Davidpijinē yabara. Bajayata baja tēpa Davidpijinēmi. Nexata mēthētatsi. Yapētanetsi itsajota mēthētatsi. <sup>30</sup> Davidpijinēmi raja Diosojumepaebinēmi profetanēmi. Davidpijinēmi baja cajena yapētane pacuenia Dioso pexaniajajumeta najumecapanepaeya jumaitsi. Davidpijinēmijavabelia Dioso najumecapanepaeya jumaitsi mapacueniaje: “Pacuenia xamē evetame Israelnacua, bajara icatsia pacuenia bexējavabelia caenē nemomoxiyajuvēnēnē evetsiana nevetsinacuami, Israelnacua,” jai Dioso najumecapanepaeya mapacueniaje Davidpijinēmijavabelia Jesús yabara. <sup>31</sup> Davidpijinē baja cajena tajēvelia yapētane Jesús athēbēvetsica Dioso pitorobijavanexatsi jivi pecapanepaenexa. Tajēvelia yapētanenua Jesús petēpaeucujinae Dioso icatsia piasaēyaexanaejavanexatsi. Bajaraxuata bajayata Davidpijinē tajēvelia cajena vajunupaeba Jesús petēpaeucujinae Dioso icatsia piasaēyaexanaejavanexatsi. Davidpijinēmi peyaquinaebaxutota tajēvelia Jesús yabara jumaitsi mapacueniaje: “Nexata apo copatsi tsanetsi petēpaevi peponaenacuayabelia. Apo copatsi tsanetsinua peperabētsabanaenexa,” jai baja cajena Davidpijinē peyaquinaebaxutota Jesús yabara. <sup>32</sup> Bajaraxuata Jesús baja icatsia Dioso asaēyaexanatsi petēpaeucujinae. Jesús Dioso piasaēyaexanaejavatsi, daxita baja paxanē pataniji. Bajaraxuata pacatsipaebatsi. <sup>33</sup> Jesús caponatsi athēbēabetsia Dioso pecujanenia peecaenexa. Nexata baja paxa Dioso rajutatsi Espiritu Santo pacuenia baja cajena najumecapanepaeya Dioso jumaitsi. Nexata bajaraxuacujinae Jesús juya itorobica Espiritu Santo paxanējavabetsica. Nexata xua pinijicuene pexanaejava, aeconoxae pataenubename, pajumetane menua, palivaisianē mapamonae panijajumenēta pacatsipaebaje, bajaraxua Espiritu Santo pejamatabēcueneta exana. <sup>34</sup> Itsiata bailsi jane ponē athēbēabetsia Dioso caponatsi, apo Davidpijinē. Davidpijinē bajayata tajēvelia Jesús yabara jumaitsi mapacueniaje:

Dioso jumaitsi tajatuxanenējavabelia: “Evetecare abaxē tacujanenia. <sup>35</sup> Vecatsivajēnae jumecovēnētsiaexanaenatsi abaxē copiaya nijavajabitsaē nitorobicuenianexa,” jai Dioso tajatuxanenējavabelia, jai bajayata tajēvelia Davidpijinē Jesús yabara.

<sup>36</sup> Bajaraxuata daxita Israel nacuapijivi xaniavaetsia beyapëtane Jesús pelivaisi, ponë paxamë pacobematabiabarutame cruzajavabelia. Bajaraponë Jesús, Dioso exanatsi pepo petuxanenë. Bajaraponë Jesús, Cristo cajena, ponë Dioso itorobica vajanacacapanepaenexa, jai Pedro athëbëvetsica bepinijjoviboxaneto penajumetsijava pemuxunanacaetuanaevijavabelia.

<sup>37</sup> Itsa bajarapamonae jumetane Pedro bajarapacuenia pejumaitsijava, nexata bajarapamonae bejamatabëjjobireca pinijicuenia. Nexata bajarapamonae yanijoba Pedrojavabelia, itsamonae Jesús pijajivi apóstolevijavabelia ata.

—Tajamonae, ¿detsa nexata pitsicue paexanaenajë patajaneconi yabara? jai nexata bajarapamonae Pedrobanajavabelia.

<sup>38</sup> Pedro nexata jumaitsi bajarapamonaejavabelia:

—Daxita paxamë pibisiacue paneexanaejava pacopabare. Panajamatabëcuenepënëyorore Diosojavabelia. Nexata pacabautisabiana Jesucristo pejamatabëcueneta papecavecuajibiaexanaenexa daxita pibisiacue paneexanaeconi. Bajara jane xuacujinae Dioso pacarajutsiana Espíritu Santo papecatsijamatabëjonenexa. <sup>39</sup> Dioso raja cajena jitsipa papecarajutsinexa Espíritu Santo. Dioso raja jitsipa panexijavabelia ata perajutsinexa Espíritu Santo. Dioso raja jitsipa itsanacuanëpijivi, tajënacuanëjava pejinavanapaevi ata, perajutsinexa Espíritu Santo. Daxita pamonaе Dioso junatsiana pijajivinexa, tsijamatabëjonenatsi Espíritu Santo, jai Pedro bajarapamonaejavabelia.

<sup>40</sup> Bajarapacuenia Pedro itsa tsipaeba, itsalivaisi pematatsënëa tsipaeba bajarapamonaejavabelia. Pedro pinijicuenia muxujioba bajarapamonae. Pedro jumaitsi mapacueniaje:

—Pamonaе Jesús beyaxuaba, pibisiacue pexanaevi, bajarapamonae naxuabiana. Nexata paxamë ata bajarapamonae paneyajavanaxuabiyaniya, pavecuanajamatabëcuenepënëyorore Diosojavabelia, jai Pedro.

<sup>41</sup> Nexata Pedro petsipaebilivaisi bajarapamatacabi jumecovënëtatsi tres mil pajivimaxëto. Nexata daxita bajarapamonae Jesús pijajivi bautisaba. Nexata bajarapamonae najunua baja Jesús pijajivijavabelia. <sup>42</sup> Nexata bajarapamonae jumecovënëta palivaisi Jesús pijajivi apóstolevi tsipaebaпona. Daxita bajarapamonae Jesús pijajivi yajava, apóstolevinua yajava, najamatabëcuenëjëpaeya jinavanapa. Daxita nacaetuatabiaba pevajëcabiabinexa Diosojavabelia. Nacaetuatabianua caejavata pexaenexa, penajamatabënapitabiabinexa xua yabara Jesús sivatëpatsi.

### **Pacuenia jinavanapa pamonaе copiaya Jesús pelivaisi jumecovënëta yabara pelivaisi**

<sup>43</sup> Daxitajivi cujunava Dioso. Tsipaji Dioso yavenonabiaba apóstolevi. Nexata apóstolevi Dioso pesaëta pinijicue pexanaejava, exanabiaba. <sup>44</sup> Daxita pamonaе jumecovënëta Jesús pelivaisi, nacaetuatabiaba najamatabecuenëjëpaeya. Bajarapamonae daxita pexainaejava nacobenaxainaeya evetabiaba. <sup>45</sup> Paepatota itsajivi bitso namatavenona, peyavenonaenexa bajarapamonae yajuvënëvi pexainaejava canajetapona. Pijairanë ata canajetapona. Pijabonë ata canajetapona. Pacuenejavaxi xaina, canajetapona. Nexata bajaraxumatamopalata, daxita bajarapamatamo, natsicobetsanabiaba pacuenia caejivi canacujitsia namatavenona.

<sup>46</sup> Bajarapamonae caematacabi canacujitsia nacaetuatabiaba templobota. Daxita bajarapamonae pijabonëjava jamatabëcuenëbarëyaya xaeyabiaba pexaejava naja-



matabëcuenejëpaeya. <sup>47</sup> Nexata bajarapamonae jumai tsabiabi Diosojavabelia: “Diosomë, bitso ayaijamatabëcuenenëmë. Paneyavenonabiabame,” jai tsabiabi. Nexata daxita Jerusalén tomarapijivi, bajarapamonae pexaniacuenia yaiyataeyabiabatsi. Nexata itsamonae ata, caematacabi canacujitsia Jesús pelivaisi jumecovënëta pona pecapanepaenexatsi pibisiacuene pexanaeconivecua. Bajarapamonae najonepona Jesús pelivaisi pejumecovënëtsivijavabelia.

**Pacuenia apóstolenëbeje Jesús pejamatabëcueneta xanepanaeyaexanabeje apo pecajëpaenëtsi peponaponaejava yabara pelivaisi**

**3** Judíovi caniviyoeapatota, bejamatabëcuene a las tres, templobota vajëcabiaba Diosojavabelia. Nexata itsamatacabi, bajarapaepatota, Pedrobeje Juanbeje naponabeje templobojavabelia. <sup>2</sup> Ponë apo pecajëpaenëtsi peponaponaejava penaexanaejavabeliacujinae, capatabiabatsi pijamonae peetabiabinexatsi templobobaupa muxuneneta. Bajarapabaupa pevënë Pexaniabaupa. Caematacabi canacujitsia bajarapabaupa muxuneneta bajaraponë etabiabatsi pijamonae. Nexata bajaraponë amoneya palata vajëcabiabeca bajarapabaupajava pejoneponaevita templobojavaberena. <sup>3</sup> Nexata itsa bajaraponë taeyeca Pedrobeje Juanbeje pejonejaretarucaejavabeje templobojavaberena, vajëqueca palata. <sup>4</sup> Nexata Pedrobeje Juanbeje naëcotabeje bajaraponëjavabelia. Nexata Pedro jumaitsi bajaraponëjavabelia:

—Panetaemabeje, jai Pedro.

<sup>5</sup> Nexata bajaraponë naitaxutocaevetsiaya jamatabëjumai tsecae:

—Nerajutsianabeje tsamë raja itsacuenejavayo, jamatabëjai tsecae bajaraponë.

<sup>6</sup> Pedro nexata jumaitsi bajaraponëjavabelia:

—Palata raja apo xainanë. Itsiata baitsi jane xua xainajë, carajutsianatsi. Jesucristo, Nazaret tomarapijinë, pecaxanepanaeyaexanaexae baja, nonotapunare. Ponaponare baja, jai Pedro.

<sup>7</sup> Nexata bajaraponë pecujanenia pacobe, Pedro cobeveatabiyotsia. Bajara-jota bajaraponë daxitaneniabeje asisaëreca baja. <sup>8</sup> Nexata bajaraponë jirevajunua. Petaxuta nuca. Ponapona baja. Nexata bajaraponë templobo ënëabelia najoneya Pedrobeje Juanbeje pepëta. Bajaraponë jirevanajetaruca. Jumai tsanajetaruca Diosojavabelia:

—Diosomë, ¡bitso ayaijamatabëcuenenëmë! ¡Tsipaji baja nexanepanaeyaexaname! jai tsanajetaruca Diosojavabelia.

<sup>9</sup> Nexata daxitajivi tanetsi peponaponaejava. Jumetanetsinua pexaniajamatabëcuene perajutsijava Diosojavabelia. <sup>10</sup> Bajarapamonae itsa tanetsi, yapëtanetsi palata pevajëcabiabecaenëmi templobobaupa muxuneneta, Pexaniabaupavënë muxuneneta. Nexata daxita bajarapamonae itsa tane bajaraponë baja pexanepanaejava, bitso jamatabëcuenenajunaviaca.

**Pacuenia Jesús pelivaisi Pedro jivi tsipaeba templobo ënëtuatuajëta, Portal de Salomónvënëjavata, yabara pelivaisi**

<sup>11</sup> Ponë penaexanaejavaveliacujinae apo peponaponaenëmi, Pedro pexanepanaeyaexanaecujinae, Pedrobeje Juanbeje apo copatsitsibeje. Nexata templobo ënëtuatuajëta, Portal de Salomónvënëjavata, ponë Pedro xanepanaeyaexana, Pedrobeje Juanbeje najuamaxëvaetabanucatsibeje. Nexata jivi ayabitsaëto itaxutuaothopatsi. Jamatabëcuenenabenajaca bajarapamonae. <sup>12</sup> Nexata Pedro

itsa tane bajarapamonaē pejamatabēcuenenabenajacaejava, nexata Pedro jumaitsi bajarapamonaējavabelia:

—Tajamonaē judfovi, ¿detsa xuajitsia pajamatabēcuenenabenajacame maponē yabaraje? ¿Detsa xuajitsia bitso panenaēcobamebeje mapacueniaje? Paxanēbeje yabara meta pajamatabējumaitsimē mapacueniaje: “Maponēbeje xanepanaeyaexanabeje apo pecaējēpaenēmitsi peponaponaējava. Tsipaji baja caējēpatsibeje bajarapacuenē pexanaenexabeje. Bajarapacuenē caējēpatsibeje tsipaji meta Dioso pitabarata aneconijibia ponaponabeje,” pajamatabējamē meta paxanēbeje yabara. Paxanēbeje raja patajamatabēcuenetabeje apo paexanaenēbeje bajarapacuenē. Jesús raja exana bajarapacuenē. <sup>13</sup> Vajasalinaivi baja cajena Abrahampijinē, Isaacpijinē, Jacobpijinē. Bajarapamonaē pijaDioso pexēnato Jesús. Nexata Dioso jivi yapētaeyaexana Jesús bitso ayaijamatabēcuenē pexainaenēcuenē. Bajaraponē Jesús paxamē parajutame vajanacayanacuaevetsivi pecobeyabelia. Vajanacayanacuaevetsinē Pilato copatsijitsia ata Jesús, itsiata paxamē pajumesaēmē. Apo pajitsipaemē Pilato pecopatsijava Jesús. <sup>14</sup> Apo pavajēcaemē Pilatojavabelia pecopatsinexatsi Jesús, itsacueneneconiyo apo pexainaenē, pepo planeconijibinē. Caranata biji pibisiacuenē pexanaenē, jivibenē, pecopatsinexatsi, pajumesaēmē. Pavajēcame Pilatojavabelia jivibenē pepitsapaenēxa penaneconitsivi pejebabiabibovecua. <sup>15</sup> Ponē Dioso itorobica vajanacarajutsinēxa matacabi apo peverevereaejava, bajaraponē caranata pabeyaxuabame. Itsiata baitsi jane Jesús petēpaecujinae, Dioso icatsia asaēyaexanatsi. Bajarapacuenē patataexae, pacatsipaebatsi. <sup>16</sup> Bajaraponē Jesús pejamatabēcueneta xanepanaeyaexanatsi baja maponēje, apo pecaējēpaenēmitsi peponaponaējava. Maponēje najamatabēcuenecopata Jesúsjavabelia. Bajaraxuata maponēje Jesús baja xanepanaeyaexanatsi paneitabarata, panetaeyabiabinē, paneyapētaenē, jai Pedro bajarapamonaējavabelia Portal de Salomónvēnjavata.

<sup>17</sup> Icatsia Pedro jumaitsi bajarapamonaējavabelia:

—Tajamonaē, yapētāniji pacuenē pacabarēexana itsamonaē, papecaevetsivi yajava. Tsipaji apo payapētaemē xaniavaetsia. Bajaraxuata pabeyaxuabame Jesús. <sup>18</sup> Bajayata Diosojumepaebivimi profetavi tajēvelia vajunupaeba Jesús athēbēvetsica Dioso pitorobijavanexatsi jivi pecapanepaenēxa. Profetavimi tajēvelia vajunupaebanua Jesús bitso pebejiobiaexanaējavanexatsi daxitajivi pijaneconi yabara. Bajarapacuenē Jesús baja tocopiapatatsi itsa pabeyaxuabame. Tsipaji baja Dioso bajarapacuenia tocopatatsi. <sup>19</sup> Nexata baja aeconoxae paneyapētaexae Jesús petēpaejava daxitajivi pijaneconi yabara, pacopabare baja panijaperujamatabēcuenēmi. Panajamatabēcuenepēnēyorore baja Diosojavabelia. Nexata pibisiacuenē paneexanaeneconimi, Dioso pacavecuajaibiaexanaena. Nexata pacajamatabēcuenē asaēyaexanaena Dioso. <sup>20</sup> Tsipaji raja icatsia itsamatacabi Dioso athēbēvetsica itorobianica Jesús, ponē bajayata Dioso itapeta papecayavenonaenēxa. <sup>21</sup> Jesús raja abaxē ecaya athēbētatsia. Matapania pamatacabi Dioso xanebijitsia daxitacuenē, icatsia patsianica Jesús. Bajarapacuenia Jesús pepatsijavanexatsica, Diosojumepaebivimi profetavi bajayata tajēvelia vajunupaeba. <sup>22</sup> Vajasalinaivimijavabelia baja cajena bajayata tajēvelia profeta Moiséspijinē Jesús yabara jumaitsi mapacueniaje: “Pacuenia nitoroba xanē profetanēnēxanē, bajarapacuenia icatsia vajatuxanenē Dioso itorobiana itsanē profetanē, paxamē panemomoxiyajuvēnēnē tsane. Nexata pacuenē yabara bajaraponē profeta pacatsipaebiana, pajumecovēnētsianame xaniavaetsia. <sup>23</sup> Tsipaji daxita pamonaē apo jumecovēnētsi tsane bajaraponē profeta

petsipaebilivaisi, pepacuene Dioso pijajivivecua tsatsiana. Nexata bajarapamonae Dioso verebabena,” jai baja cajena bajayata tajëvelia Moiséspijinë vajasalinaivimi-javabelia Jesús pepatsijavanexatsica yabara, jai Pedro bajarapamonaejavabelia Portal de Salomónvënëjavata.

<sup>24</sup>Icatsia Pedro jumaitsi bajarapamonaejavabelia:

—Xua baja aeconoxae mapamatacabitaje copiatapona, bajayata tajëvelia profeta Samuelpijinë copiaya vajunupaeba. Bajara icatsia xuacujinae cotocaevi pa-profetavimi ata bajarapacuenia tajëvelia vajunupaebapona bajaraxua. <sup>25</sup>Paxamë rabaja profetavimi papemomoximë. Nexata xua Dioso najumecapanepaeya jumaitsi perajutsinexa panijasalinaivimijavabelia, bajaraxua paxamë Dioso pacarajutsiana. Bajayata tajëvelia Dioso jumaitsi vajasalinainëmi Abrahampijinëjavabelia Jesús yabara: “Caenë nemomoxiyajuvënëne itorobianajë jivi peyavenonaenexa. Nexata nemomoxiyajuvënëne yavenonaena caenacuapijivi canacujitsia, mapanacuata pejinavanapaevi,” jai Dioso tajëvelia Abrahampijinëmijavabelia Jesús yabara. <sup>26</sup>Nexata baja copiaya paxamëjavabetsica Dioso pexënato pacatoitorobica. Bajarapacuenia Dioso pexënato pacatoitorobica paxamë pacaejivimë canacujitsia papecayavenonaenexa panenajamatabëcuene pënëyorotsinexa pibisiacuene paneexanaejavavecua, jai Pedro bajarapamonaejavabelia Portal de Salomónvënëjavata.

#### **Pacuenia Pedrobeje Juanbeje Jesús pelivaisi tsipaebabeje tomaraevetsivijavabelia yabara pelivaisi**

**4** Pedrobeje Juanbeje abaxë Jesús pelivaisi tsipaebabeje bajarapamonaejavabelia Portal de Salomónvënëjavata. Nexata bajaraberena jemata patanajetarubena sacerdotevi. Patanajetarubena saduceovinua. Pematatsënëa patanajetaruca itsanë capitán. Bajaraponë capitán templobopijipolicíavi pevetsinë. <sup>2</sup>Daxita bajarapamonae baraanaepanatsibeje Pedrobeje Juanbeje. Tsipaji Pedrobeje Juanbeje Jesús pelivaisi petsipaebijavatabeje, jumai tsaponaebeje:

—Jivi tēpae ata tsane, icatsia asaë tsane petēpaecujinae. Bajarapalivaisi cajena pexaniajailivaisi. Tsipaji baja icatsia Jesús asaëyaexanatsi petēpaecujinae, jaibeje tsaponae.

<sup>3</sup>Nexata bajarapamonae vaetabatsibeje. Caponaliatsibeje peetsinexatsibeje penaneconitsivi pejebabiabibota. Meravia pitsijavata jutsijitsiatsibeje. Tsipaji baja bitso caniviyo. <sup>4</sup>Itsiaata baitsi jane baja jivibitsaëtoxonetonë capanepaeya jumecovënëtsibeje pevaetabivajënaeyatsibeje. Nexata daxita pamonaë jumecovënëta Jesús pelivaisi, ëpebijivi namataëjëtatsi cinco mil ponëbeje.

<sup>5</sup>Nexata meravia pitsijavata nacaetuata judíovi pevetsivi. Nacaetuata judíovi pi-jaancianovinua. Nacaetuata judíovi pecujarubivinua. Daxita bajarapamonae nacaetuata Jerusalén tomarata. <sup>6</sup>Nexata bajarajota napata sacerdotenë Anás. Bajaraponë Anás sacerdotevi pepo penamatacaitorobinëmi. Napata Caifás ata. Napata Juan ata. Napata Alejandro ata. Napata itsamonae ata, Anás pijamonae. <sup>7</sup>Nexata Pedrobeje Juanbeje nutatsibeje daxita bajarapamonae pitabarata. Nexata bajarapamonae jumaitsi Pedrobeje Juanbejejavabelia:

—¿Jipatsa pejamatabëcueneta paxanepanaeyaexanamebeje apo pecaëjē-paenëmitsi peponaponaejava? jai bajarapamonae Pedrobeje Juanbejejavabelia.

<sup>8-9</sup>Nexata Pedro Espíritu Santo bitso jamatabëcueneyavenonatsi. Nexata Pedro jumaitsi bajarapamonaejavabelia:

—Paxamë judíovi paneevetsivi, paxamë ata pijinia paancianovimë, paneyanijobamebeje paneyapëtaenexa ponë pejamatabëcueneta paxanepanaeyaexana-jëbeje apo pecaëjëpaenëmitsi peponaponaejava. Paneyanijobamebejenua paneyapëtaenexa pacuena paxanepanaeyaexana-jëbeje bajaraponë. <sup>10</sup>Nexata pacatsipae-bianatsi daxita paxamë paneyapëtaenexa daxita Israel nacuapijivi ata peyapëtaenexa. Jesús, Nazaret tomarapijinë, ponë paxamë pacobematabiabarutame cruza-javabelia, bajaraponë icatsia Dioso asaëyaexanatsi petëpaecujinae. Bajaraponë Jesús pejamatabëcueneta maponë paneitabarata nucaje, xanepanaeyaexanatsi, jai Pedro.

<sup>11</sup>Icatsia Pedro jumaitsi bajarapamonaejavabelia:

—Bajaraponë Jesús yabara Dioso pejumelivaisibaxutota bajayata tajëvelia jumaitsi comparacióncuenia mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia yaëtsiana botabu daxita itsaibo matatoxenetsia, jai tajëvelia Dioso pejumelivaisibaxutota.

Bajarapacuenia Dioso pejumelivaisibaxutota comparacióncuenia itsa jumaitsi Jesús yabara, judíovi penamatacaitorobivi Jesús apo pejumecovënëtsijavanexa yabara, jumaitsi. Dioso pitapetsijavatsi Jesús daxitajivi pecapanepaenexa yabara ata jumaitsi. <sup>12</sup>Caenë Jesús caëjëpatsi vajanacacapanepaenexa pibisiacuene vajaexanaeneconivecua. Bajaraxuata Dioso itorobica Jesús. Tsipaji baja ajibi pematat-sënëa mapanacuataje itsanë ata pejamatabëcueneta vajanacacapanepaenexa Dioso-javabelia, jai Pedro bajarapamonaejavabelia.

<sup>13</sup>Bajarapamonae yapëtane Pedrobeje Juanbeje ajumejunavijibia Jesús pelivaisi petsipaebijavabeje bajarapamonaejavabelia. Bajarapamonae yapëtanenua bajaraponëbeje bajayajebi apo penacujarubinëbeje peyaquinaejava. Itsiata bitso yapë-tanebeje pexanialivaisi. Saya bajaraponëbeje penacuenebinëbeje. Nexata judíovi pevetsivi jamatabëcuenenabenajaca. Bajarapamonae nexata jamatabëjumaitsi Pedrobeje Juanbeje yabara:

—Bajaraponëbeje cajena penaponaponaenëbeje Jesússta. Bajaraxuata bitso baja yapëtanebeje bajarapalivaisi, jamatabëjai.

<sup>14</sup>Bajarapamonae tane apo pecaëjëpaenëmitsi peponaponaejava penanucuaejava Pedrobeje Juanbejevavata. Nexata bajarapamonae acuenebi pejumaitsijava: “Jume raja. Jesús raja pejamatabëcueneta apo xanepanae maponëje,” acuenebi pejaijava. Tsipaji apo pecaëjëpaenëmitsi peponaponaejava Jesús pejamatabëcueneta ponapona baja. <sup>15</sup>Nexata bajarapamonae Pedrobeje Juanbeje caeepatoyo navecuacapit-sapatsibeje pecovëta ëpamonae penabarëcuaijuainexa.

<sup>16</sup>Nexata Pedrobeje Juanbeje pecovëta caeepatoyo penavecuacapitsapaejavatatsibeje, bajarapamonae najumaitsi:

—¿Detsamë raja pacuene exanaenatsi bajaraponëbejevavabelia? Daxita Jerusalén tomarapijivi xaniavaetsia yapëtane bajaraponëbeje pexanepanaeyaexanaejevabeje apo pecaëjëpaenëmitsi peponaponaejava. Nexata acuenebi jivijavabelia vajajumait-sijava: “Apo xanepanaeyaexanaebeje raja bajaraponëbeje,” vajajaijava. <sup>17</sup>Piniicue-nia vaxaitsi bajaraponëbeje itavetsianatsi petsipaebiyavabeje matavëjëa Jesús pelivaisi itsajiviyojavabelia ata. Nexata bajarapacuenia apo tsipaebibeje baja tsane itsamonaejavabelia Jesús pelivaisi, najai bajarapamonae Pedrobeje Juanbeje pecovëta caeepatoyo penavecuacapitsapaejavatatsibeje.

<sup>18</sup> Nexata icatsia Pedrobeje Juanbeje caevëalia pejonenexaliabeje, junaliatsibeje. Nexata jane baja bajarapamonae jumaitsi Pedrobeje Juanbejejavabelia:

—Pëtsa baja icatsia matavëjëa jivi patsipaebaponamebeje Jesús pelivaisi. Pacoparebeje baja jivi panetsipaebaponaejavabeje Jesús pelivaisi, jai bajarapamonae.

<sup>19</sup> Nexata Pedrobeje Juanbeje jumaitsiabeje bajarapamonaejavabelia:

—Paxamë panijacuata panajamatabëxainare pacuene xanepana pataexanapon-aenexabeje Dioso pitabarata. Itsa pacajumecovënëtsipatsibeje paxamë patanitavetsijavamëbeje, nexata apo pajumecovënëtsinëbeje tsipae Dioso patanitorobijavabeje. <sup>20</sup> Acuenebi cajena patacopatsijavabeje jivi patatsipaebaponaejavabeje xua patanijibeje, palivaisi ata pajumetanijibeje, jaiabeje Pedrobeje Juanbeje bajarapamonaejavabelia.

<sup>21</sup> Icatsia judfovi pevetsivi orijibia itavetsibeje jivi petsipaebaponaeyanivabeje Jesús pelivaisi. Bajaraxuacujinae copatatsibeje baja peponaenexabeje. Ajibi peyabarananeconitsia exanaejavanexatsibeje. Tshipaji daxitajivi jumai tsaponae Diosojavabelia:

—Diosomë, bitso ayaijamatabëcuenenëmë, jai tsaponae.

Bajarapacuenia daxitajivi pexaniajamatabëcuene rajuta Diosojavabelia Pedrobeje Juanbeje pexanepanaeyaexanaexabeje apo pecaëjëpaenëmitsi peponaponaejava. <sup>22</sup> Ponë xanepanaeyaexanatsi Dioso pesaëta pinijicuene pexanaejavata, bajaraponë penaexanaecujinae xaina baja cuarenta pavaibeje pematatsënëa.

**Pacuenia Dioso pejumecovënëtsivi vajëca Diosojavabelia  
pecaëjëpaeyaexanaenexatsi Jesús pelivaisi ajumejunavijibia  
jivi pepaebaponaenexa yabara pelivaisi**

<sup>23</sup> Itsa baja Pedrobeje Juanbeje judfovi pevetsivi copatatsibeje peponaenexabeje, navialiabeje baja itsabelia jinavanapa Dioso pejumecovënëtsivi. Nexata Pedrobeje Juanbeje Jesús pelivaisi jivi petsipaebaponaeyanivabeje sacerdotevi penamatacaitorobivi pitavetsijavatsibeje, navajunupaebabeje Dioso pejumecovënëtsivijavabelia. Navajunupaebabejenua judfovi pijaancianovi ata pitavetsijavatsibeje. <sup>24</sup> Nexata Dioso pejumecovënëtsivi itsa jumetane Pedrobeje Juanbeje penavajunupaebijavabeje, nexata daxita Dioso pejumecovënëtsivi Pedrobana najamatabëcuenejëpaeya vajëca Diosojavabelia. Daxita bajarapamonae pevajëcaejavata Diosojavabelia, jumaitsi mapacueniaje:

—Xamë pinijiDiosomë, nexanaenë cajena itaboxo. Nexanaenë daxita itaboxopijicuene ata. Nexanaenë ira ata. Nexanaenë daxita irapijicuene ata. Nexanaenë manuamene ata. Nexanaenë daxita manuamenepijicuene ata. <sup>25</sup> Xamë Diosomë, bajayata Espíritu Santo pejamatabëcueneta tajëvelia yapëtaeyaexaname patajasalinainëmi Davidpijinë. Nexata nijajivitonë Davidpijinë tajëvelia nexënato Jesús yabara jumaitsi mapacueniaje:

Itsanacuanëpijivi, pamonaë apo judfovi, bitso anaepanabiabiana. Saya jema najamatabëxainabiabiana pexanaenexa picani xua apo caëjëpaetsi pexanaenexa. <sup>26</sup> Pinijinacuanë pevetsivi nacaetuatsiana. Tomaranë pevetsivi ata nacaetuatsiana. Bajarapamonae najamatabëxainaena, xamë Diosomë, nijacuene pecatobijianaenexa. Najamatabëxainaenanua pebejiobiaexanaenexa Cristo, ponë itorobianimica jivi pecapanepaenexa,

jai bajayata tajëvelia Davidpijinë Espíritu Santo pejamatabëcueneta, Jesús pebejio-biaexanaejavanexatsi yabara, jai Pedrobana pevajëcaejavata Diosojavabelia.

<sup>27</sup> Icatsia Pedrobana jumaiti pevajëcaejavata Diosojavabelia:

—Mapatomarataje Herodesbeje, Poncio Pilatobeje, barënacaetuatabeje it-sanacuanëpijivi. Barënacaetuatabeje apo judíovi. Barënacaetuatabeje judíovi ata yajava. Bajarapamonae nacaetuata penajumejaitisnexa pacuenia beyaxuabijitsiatsi nexë nato Jesús, ponë athëbëvetsica itorobimica. Bajarapacuenia ita barënacaetuatabeje, copiapata jane baja xua bajayata tajëvelia Davidpijinë vajunupaeba. <sup>28</sup> Bajarapamonae nacaetuata pexanaenexatsi daxita pacuenia baja cajena bajayata nexë nato tocopatame pexanaenexatsi. <sup>29</sup> Patajatuxanenë, yapëtaneme judíovi pevetsivi patanitavetsijava jivi patatsipaebaponaeyaniva nexë nato pelivaisi. Paxanë panijajiv-inë. Nexata panerajutsianame patanecaëjëpajamatabëcuene ajumejunavijibia jivi patatsipaebaponaenexa nexë nato pelivaisi. <sup>30</sup> Itsa patomarata patsipaebianajë nexë nato pelivaisi, jamatejemayaexanaename piavitanevi. Pinijicuene nexanaejava exanaename jivi peyapëtaenexa bitso ayaijamatabëcuene nexanaenëcuene. Bajarapapinijicuene exanaename nexë nato Jesús pejamatabëcueneta, jai Pedrobana pevajëcaejavata Diosojavabelia.

<sup>31</sup> Itsa baja bajarapamonae vereta pevajëcaejava Diosojavabelia, bajarajota ira nanequetajaraba. Daxita bajarapamonae Espíritu Santo tsijamatabëvënëcatsi. Nexata bajarapamonae Espíritu Santo petsijamatabëvënëcaexaetsi, ajumejunavijibia jane baja jivi tsipaebapona Jesús pelivaisi.

### **Pacuenia Dioso pejumecovënëtsivi, xua xaina, daxita nacobenaxainaeyaveta yabara pelivaisi**

<sup>32</sup> Ayaibitsaëtoxaneto Dioso pejumecovënëtsivi najamatabëjëpaeya jinavanapa. Bajarapamonae xua xaina, apo najamatabëxainae caejivi pexainaenexa. Nexata daxita bajarapamonae xua xaina, nacobenaxaina daxita. <sup>33</sup> Nexata apóstolevi asaëya tsipaebabiaba jivijavabelia Jesús pelivaisi. Tsipaebabiaba pacuenia icatsia Dioso asaëyaexanatsi vajatuxanenë Jesús petëpaecujinae. Dioso bitso yavenonabiabatsi daxita bajarapamonae. <sup>34</sup> Nexata bajarapamonae Dioso pejumecovënëtsivi caenë ata apo yajuvënëbejio pexinaejava yabara. Tsipaji pamonae bitso xaina iranë, bonë ata, canajetabiaba. Nexata bajarapamonae xua canajeta, bajarapamatamopalata capatabiaba. <sup>35</sup> Nexata bajarapapalata rajutabiaba apóstolevijavabelia. Nexata juya apóstolevi tsicobetsanabiaba penajuajinavanapaevijavabelia pacuenia baja caejivi canacujitsia namatavenonapona. <sup>36</sup> Bajarapamonae yajuvënë itsanë pevënë José, Chiprevënë tunaetota penaexanaenë. Bajaraponë Levípijinë pemomoxiyajuvënë. Bajaraponë apóstolevi vënërubatsi itsavënë, Bernabé. Bajarapavënë hebreojumeta pejumaitisjume: “Jivi pejamatabëcuenebarëyayaexanaenë,” pejaijume. <sup>37</sup> Nexata José ata pijaira canajeta. Bajaraxuacujinae José capata pijairamatamopalata. Nexata bajarapapalata rajuta apóstolevijavabelia.

### **Pacuenia tëpabeje Ananíasbeje pijava Safirabeje, penajumetsënëtsixaebje apóstolenë Pedro pitabarata yabara pelivaisi**

**5** José pijaira pecanajetsicujinae, Ananías ata pijava Safirabeje yajuvënëcana-jetabeje pijaira. <sup>2</sup> Nexata Ananíasbeje pijavabeje pijairamatamoyajuvënëpalata

muetsia copatabeje. Bajaraxuacujinae Ananías peyajuvënëcopatsipalata calia apóstolevijavabelia. Nexata Ananías jumaitsi apóstolevijavabelia:

—Tajaira yajuvënëcanajetajë. Nexata pacarajutatsi daxita bajarapairamata-mopalata panetsicobetsanaenexa vajanajuajinavanapaevijavabelia, jai.

<sup>3</sup>Nexata Pedro jumaitsi Ananíasjavabelia:

—Ananías, ¿detsa xuajitsia jumecovënëtame dovathi pecayamaxëitojorobijava nenajumetsënëtsinexa Espíritu Santojavabelia? Xamë baja rovia nijairamata-mopalata yajuvënëcopatame. <sup>4</sup>Nijairami necanajetsivajënaeya, nijaira baja cajena picani saicaya. Nijaira necanajetsicujinae ata, xua nijairamatamo pitame, nijajava baja cajena picani saicaya. ¿Detsa xuajitsia nexata mapacuenia neyamaxëitojorobijava najamatabëxainameje? Èpaxanëjavaberena baja cajena apo najumetsënëtsimë. Najumetsënëtame baja cajena Diosojavabelia ata, jai Pedro.

<sup>5</sup>Ananías itsa jumetane bajarapacuenia Pedro pejumaitisijava, Ananías petëpaenë irata jopa. Nexata daxita pamonaë vënëlivaisitane bajarapacuenia Ananías petëpaejava, pinijicuenia jamatabëcuenenajunaviaca. <sup>6</sup>Nexata pabota Ananías petëpaenë boca, bajarapaboyarena pevëjëavi jonena. Mataquiona petëpaenë. Bajaraxuacujinae capitsapalia pemëthëtsinexa.

<sup>7</sup>Bajaraxuacujinae bexëa, acueyabi pahorabejecujinae, Ananíaspijinë pijava jonena. Bajarapova abaxë apo yapëtae pamona pevëcuatëpaejavatsi. <sup>8</sup>Pedro icatsia yanijoba bajarapovajavabelia. Jumaitsi:

—Netsipaebare. ¿Xaniajai tsabaja? ¿Mapamatamotaje pacanajetamebeje panijairamibeje? jai Pedro.

Nexata bajarapova jumaitsi:

—Xaniajai rabaja. Bajarapacuenia pacanajetajëbeje, jai bajarapova.

<sup>9</sup>Nexata Pedro jumaitsi bajarapovajavabelia:

—¿Detsa xuajitsia amonabeje panajamatabëcuenëjëpamebeje panenajumetsënëtsinexabeje Espíritu Santojavabelia? Namuxunaevere. Jumia naviabanajetarubena rabaja amonami pemëthëcaevilia. Bajarapamonae icatsia xamë ata caponaelia pecamëthëtsinexa, jai Pedro.

<sup>10</sup>Nexata bajarajota Pedro pitabarata bajarapova ata icatsia petëpaejava irata jopa. Itsa jonena pevëjëavi penaviabanajetarubenaevi, Ananíaspijinë pemëthëcaevilia, caxitajarababuata petëpanucaeva. Nexata icatsia bajarapamonae capitsapalia bajarapova pemëthëtsinexa pamonami pemëthë muxuneneta. <sup>11</sup>Nexata daxita Dioso pejumecovënëtsivi, itsamonae ata, pamonaë bajarapajivibeje petëpaejava vënëlivaisitanetsi, bitso junava.

### **Pacuenia apóstolevi pinijicuene pexanaejavanë exanapona Dioso pesaëta yabara pelivaisi**

<sup>12</sup>Apóstolevi Dioso pesaëta exanapona pinijicuene pexanaejavanë Jerusalén tomarapijivi pitabarata. Daxita Dioso pejumecovënëtsivi nacaetuatabiaba templobo ënëtuatuajëta, Portal de Salomónvënëjavata. <sup>13</sup>Itsamonae, pamonaë Dioso apo pejumecovënëtsivi, junava penanacaetuatsijava bajarapamonaeta. Itsiata daxita Jerusalén tomarapijivi pexaniacuenia yayataeyabiaba Dioso pejumecovënëtsivijavabelia. <sup>14</sup>Pevajënaeyabelia jivibitsaëttoxaneto jumecovënëta pona Jesús pelivaisi, pebijivi, petiriavi ata. Nexata daxita bajarapamonae nanacaetuatabiaba Dioso pejumecovënëtsivijavabelia. <sup>15</sup>Apóstolevi Dioso pesaëta pinijicuene pexanaponaexae,

itsamonae tocapatabiabatsi piavitanevi callejavaberena. Nexata piavitanevi tojebabiabatsi callejavata camata. Itsamonae tulimanëta tojebabiabatsi. Nexata Pedro itsa najetaruca callejava, piavitanevi jitsipabiaba Pedro pitacaënae ata petsijopaejavatsi pejamatejemanexa bajarapamonae piavitanejavavecu. <sup>16</sup>Nexata jivibitsaëtoxonetonë patabiaba Jerusalén tomaraberena imoxoyo penaetomaraxijavaverena penaropobivi. Bajarapamonae Pedro tocapatabiabatsi piavitanevi. Tocapatabiabatsinua bitso dovathi peyajavajinavanapaevi. Nexata Pedro daxita bajarapamonae jamatejemayaexanabiaba.

### **Pacuenia apóstolevi taicatsi penaneconitsiaexanaenexatsi yabara pelivaisi**

<sup>17</sup>Sacerdotevi pepo penamatacaitorobinë yajavaponapona saduceovi. Nexata daxita bajarapamonae pinijicuenia anaepana apóstolevijavabelia. Tsipaji cuenecaëbatsi. <sup>18</sup>Bajaraxuata taicatsi apóstolevi. Jebatsi penaneconitsivi pejebabiabibota. <sup>19</sup>Itsiata baitsi jane bajarapameravi Dioso pijaángel apóstolevi tobaupanatsi penaneconitsivi pejebabiabibo baupanë. Nexata ángel apóstolevi matakacapsapaliatsi. Angel jumaitsi apóstolevijavabelia:

<sup>20</sup>—Paponare templobojavabelia. Patsipaebianame jivijavabelia mapapejanalivaisi, Dioso vajanacayajavaponaponaejava, jai ángel apóstolevijavabelia.

<sup>21</sup>Apóstolevi itsa jumetane bajarapacuenia ángel pejumaitsijava, nexata ajena matakabi tsina, apóstolevi ponalia templobojavabelia. Nexata apóstolevi templobota Jesús pelivaisi jivi tsipaebanubena.

Nexata pijinia bajarapaepatota sacerdotevi pepo penamatacaitorobinë peyajavaponaponaevi barënacaetuata itsabota. Nexata junata penacaetuatsinexa judíovi pijaancianovi. Junatanua penacaetuatsinexa judíovi pecujarubivi. Nexata bajarapamonae jumaitsi templobopijipolicíavijavabelia:

—Panetosivaponaremelia apóstolevi penaneconitsivi pejebabiabibojavabelia. Nexata panetobarëpatsiaremena maberenaje, jai.

<sup>22</sup>Nexata templobopijipolicíavi itsa ponalia, apo caxitajarabi apóstolevi penaneconitsivi pejebabiabibota. Nexata apo pecaxitajarabixae, naviabarena cobesa petsipaebinexa penacaetuatsivijavabelia. <sup>23</sup>Nexata templobopijipolicíavi jumaitsi bajarapamonaejavabelia:

—Itsa papaliajë penaneconitsivi pejebabiabibojavabelia, daxitabaupanë xaniavaetsia nabaupaxatabanubena. Bajarajota nubena picani pevetanubenaevi baupanë. Itsiata baitsi jane itsa pabaupatajë, caenë ata apo ecae bajarapabo ënëtuat-uajëalia, jai policíavi.

<sup>24</sup>Nexata templobopijipolicíavi pijacapitán, sacerdotevi penamatacaitorobivinua, itsa jumetane bajarapacuenia policíavi pejumaitsijava, bajarapamonae jamatabëjumaitsi:

—¿Detsamëra nexata itsi apóstolevi? jamatabëjai bajarapamonae.

<sup>25</sup>Nexata bajarapaepatota itsanë pebi parena, templobojavaverena peponaenë. Jumaitsi bajaraponë bajarapamonaejavabelia:

—¡Panejumetaema! Pamona pacajunuame penaneconitsivi pejebabiabibota, bajarapamonae cajena nubena templobotalia. Jivijavabelia tsipaebanubena Jesús pelivaisi, jai bajaraponë.

<sup>26</sup>Nexata templobopijipolicíavi pijacapitán barëlia pijajivi. Nexata policíavi apóstolevi xaniavaetsia saya caponarenatsi. Tsipaji jamatabëjumaitsi:



—Anaeya itsa taicaejitsipatsi apóstolevi, nexata jivi nacabaraanaepanaejitsipa. Nexata nacatseconaejitsipa ibotonëta, jamatabëjai policíavi.

<sup>27</sup>Itsa baja apóstolevi caparenatsi, nexata nubatsi sacerdotevi penamatacaitorobivi pitabarata, judíovi pijaancianovinua pitabarata, judíovi pecujarubivinua pitabarata. Nexata bajarajota sacerdotevi pepo penamatacaitorobinë jumaiti apóstolevijavabelia:

<sup>28</sup>—Paxanë baja cajena pacajumaitsitsi: “Pëtsa baja matavëjëa jivi patsipabame Jesús pelivaisi,” pacajaitsi. ¿Itsiata tsabaja rovia apo panejumecovënëtsimë? Pataema jane pacuenia Jerusalén tomarata yacajëpapona panetsipaebilivaisi. Paxamë jamatabëpaneneconitame Jesús pebeyaxuabijavatsi yabara, jai sacerdotevi pepo penamatacaitorobinë apóstolevijavabelia.

<sup>29</sup>Nexata sacerdotevi pepo penamatacaitorobinë bajarapacuenia pejumaitsixae, Pedro, itsaapóstolevi yajava, jumaiti bajarapamonaejavabelia:

—Namatavenonatsi vajajumecovënëtsinexa xua vajaDioso nacaitoroba. Nexata Dioso vajanacaitorobicuenia, saicayacuenia jivi itsa nacaitoroba, apo bejumecovënëtsitsi. <sup>30</sup>Paxamë Jesús pabeyaxuabame pamatacabita pacobematabiabarutame cruzajavabelia. Vajasalinaivimi pijaDioso Jesús icatsia asaëyaexanatsi petëpaecujinae. <sup>31</sup>Nexata Dioso jumaiti Jesúsjavabelia: “Ecare tacujuanenia. Xamë rabaja ayaijamatabëcuenenëmë. Jivi nevetsinë tsane. Necapanepaenënu tsane,” jai Dioso Jesúsjavabelia. Bajarapacuenia Dioso jumaiti Jesúsjavabelia vaxaitsi judíovitsi pibisiacuene vajaexanabiabijava vajacopabijavanexa yabara jumaiti. Vajanajamatabëcuene pënëyorotsijavanexa ata Diosojavabelia yabara jumaiti. Tsipaji Dioso jitsipa Jesús pejamatabëcueneta daxitajivi aneconijibia petaenexa. <sup>32</sup>Nexata bajarapacuenia yabara jivijavabelia itsa patsipaebaponajë, Espíritu Santo paneyajava tsabiabi. Dioso cajena rajutapona Espíritu Santo pamona jumeconvënëta Dioso, jai Pedro, itsaapóstolevi yajava, daxita bajarapamonaejavabelia.

<sup>33</sup>Nexata daxita bajarapamonae itsa jumetane bajarapacuenia Pedrobana pejumaitsijava, nexata bitso anaepana. Jamatabëbeyejebatsi picani apóstolevi. <sup>34</sup>Itsiata apo beyejebitsi. Tsipaji bajarapamonae yajuvënënë judíovi pecujarubinë, Gamalielvënënë, nonotapuna daxita penajuavi pitabarata. Bajaraponë fariseonë, Dioso Moiséspijinëta penajumecopatsilivaisi pecujarubinë. Daxitajivi peyaiy-ataenëtsi. Nexata Gamaliel itoroba apóstolevi caepatoyo pepitsapaenexalia. <sup>35</sup>Nexata apóstolevi caepatoyo pepitsapaejavatalia, pecovëta, Gamaliel jumaiti penajuavijavabelia:

—Tajamonae judíovi, panajamatabëxainare xaniavaetsia. Pëtsa paexaname pacuenia panajamatabëxainame mapamonaejavabeliaje. <sup>36</sup>Panajamatabënapire pacuenia Teudasvënënëmi bajayata exanatsi. Bajaraponëmi picani nacua pevetsinënexa, ayaijamatabëcuenenë bitso jamatabënaexana. Nexata picani pijajivinexa pënjajinapanatsi cuatrocientos ponëbeje. Itsiata Teudaspijinëmi beyaxuabatsi. Bajaraponëmi pepënjajinapanapavitsi, pamona pijajivinexa picani, daxita nacayajateca. Nexata copiaruca baja bajarapacuenemi. <sup>37</sup>Bajaraxuacujinae icatsia pamatacabi gobierno pejamatabëcueneta daxitajivi namatajëtsi, Judasvënënëmi, Galilea nacuapijinëmi, bajarapacuenia pijinia jivi ayaibitsaëtoxaneto pënjajinapanatsi. Bajaraponëmi ata beyaxuabatsi. Nexata daxita pepënjajinapanapavitsi nacayajateca. Nexata baja copiaruca bajarapacuenemi. <sup>38</sup>Bajaraxuata nexata mapamonaeje apóstolevi yabara

pacatsipaebijitsiatsi. Pëtsa paitsacueniabame bajarapamonae. Itsa bajarapamonae saya mapanacuapijivi pejamatabëcueneta tsipaebavanapaje, bepíjia peneta bajaramonae petsipaebilivaisi vereverecaena. <sup>39</sup>Itsa jume, Dioso pejamatabëcueneta bajarapamonae bajarapalivaisi jivi itsa tsipaebavanapa, nexata acuenebi tsipae paxamë bajarapacuenene panevereverecaeyaexanaejava. Belia ayaineconi panatsixanaejitsipame Diosojavabelia, jai Gamaliel daxita penajuavijavabelia.

<sup>40</sup>Nexata daxita bajarapamonae jumecovënëtatsi Gamaliel. Apóstolevi icatsia caevëlia pejonexalia junaliatsi. Bajaraxuacujinae apóstolevi, caenë canacujitsia, ayaicunia jumatitibabeponatsi penaneconitsivi pejumaconitabiabimacata. Itave-tatsi icatsia matavëjëa jivi petsipaebiyániva Jesús pelivaisi. Bajaraxuacujinae copabatsi jane baja peponaenexa. <sup>41</sup>Apóstolevi nexata pitsaparena bajarapabovecua. Barëyaya ponalia apóstolevi. Tsipaji Dioso tocopatatsi bajarapacuenia bepejiobiaexanaponaenexatsi Jesús pijajivixae. <sup>42</sup>Nexata caematacabi canacujitsia templobota, bonëjava ata, apóstolevi asaëya Jesús pelivaisi tsipaebapona jivijavabelia. Apóstolevi jivijavabelia tsipaebapona pexanialivaisi, Jesucristo, ponë Dioso itorobica jivi pecapanepaenexa, pelivaisi.

### Pacuenia itapetatsi siete ponëbeje díaconovinexa yabara pelivaisi

**6** Jesús pelivaisi pejumecovënëtaponaeivi, pevajënaeyabelia ayaibitsaëttoxanetonë tsaponae. Bajarapamatacabi Jesús pelivaisi jumecovënëtaponae griegovi, judíovi ata. Nexata pamonajivi pevecuatëpaevanëtsi, pamonae bitso bejiobi, bajarapamonaejavabelia apóstolevi rajutabiaba penamatavenonaevajanë. Nexata Jesús pelivaisi penajuajumecovënëtsivi, pamonae griegovi, jumaitsi judíovijavabelia:

—Caematacabi canacujitsia apóstolevi pamonajivi pevecuatëpaevanëtsijavabelia, tsicobetsanabiaba pexaejavanexa. Nexata xuavajëtonë panijaviriavijavabelia rajutabiaba, bajaraxuavajëtonë patajaviriavijavabelia apo rajutabiabi, jai griegovi judíovijavabelia.

<sup>2</sup>Doce ponëbeje, apóstolevi, najamatabëcuenëjëpa pacuenia exanaejitsia judíovibeje griegovibeje penacobecaëbabiabixae. Nexata apóstolevi junata penacaetuatsinexa daxita pamonae Jesús pelivaisi pejumecovënëtsivi. Nexata baja itsa nacaetuata daxita bajarapamonae, apóstolevi jumaitsi bajarapamonaejavabelia:

—Tajamonae, paxanë itsa patsicobetsanabiabijitsipajë pexaejava bitso penamatavenonaevijavabelia, nexata apo panacuenecaëjëpabiabi tsipae jivi patatsipaebinexa Dioso pitorobilivaisi. <sup>3</sup>Nexata paitapetsianame siete ponëbeje, paxamëyajuvënëvi. Paitapetsianame papebijivi caejamatabëcuenene pexainaeivi, bitso petsijamatabëvënëcaevitsi Espíritu Santo, bitso peyapëtaeyaexanaevitsi Espíritu Santo pejamatabëcuenene. Bajarapamonae paitorobianame bepejiobivijavabelia petsicobetsanabiabinexa penamatavenonaecuenene. <sup>4</sup>Nexata paxanë saicaya patsitecavanapae-najë patavajëcabiabijava Diosojavabelia. Patsipaebabiabianajënu Dioso pitorobilivaisi jivijavabelia, jai apóstolevi penacaetuatsijavata daxita Jesús pelivaisi pejumecovënëtsivijavabelia.

<sup>5</sup>Nexata daxita pamonae nacaetuata, itsa jumetane bajarapacuenia apóstolevi pejumaitsijava, tsitaxanepanatsi. Nexata bajarapamonae itapeta mapamatabëxëyoje. Itapeta Estebanvënënë, ponë bitso Dioso pejumecovënëtsinë, Espíritu Santo petsijamatabëvënëcaenëtsi. Itapeta Felipevënënë. Itapeta Prócorovënënë. Itapeta Nicanorvënënë. Itapeta Timónvënënë. Itapeta Parmenasvënënë. Itapeta

Nicolásvënënë. Nicolás itsanacupijinë, Antioquía tomarapijinë. Bajaraponë apo judíonë. Itsiata judíovicuenia Dioso najumecovënëtaPONAPONA. <sup>6</sup>Daxita bajarapamatabëxëyo pitapetsicujinaetsi, nubatsi apóstolevi pitabarata. Nexata pamonaē itapetatsi, caenë canacujitsia pematabocotojumavereca apóstolevi nacobe-  
 buatanubena Diosojavabelia petovajëtsijavata.

<sup>7</sup>Nexata jane baja apóstolevi, itsamonae yajava, Dioso pitorobilivaisi jivi tsipaebapona Jerusalén tomarata. Nexata Jerusalén tomarata ayaibitsaëtoXANETO tsaponae Jesús pelivaisi pejumecovënëtsivi. Sacerdotevi ata ayaibitsaëto jumecovënëtaPONA Jesús pelivaisi.

### **Pacuenia Esteban vaetabatsi penaneconitsiaexanaenexatsi yabara pelivaisi**

<sup>8</sup>Dioso bitso yavenonabiabatsi Esteban. Nexata Esteban Dioso pesaëta pinijicuene pexanaejava, exanabiaba. Daxitajivi pitabarata Dioso pesaëta pinijicuene pexanaejava, Esteban exanapona. <sup>9</sup>Nexata itsamonae Esteban anaeya jumenotatsi. Bajarapamonaē nacaetuatabiaba judíovi penacaetuatabiabibota. Bajarapabo pevënë Esclavos Libertados. Bajarapamonaē caenacuaverena apo pepatsivi. Itsamonae Cirene nacuaverena pepatsivi. Itsamonae Alejandría tomaraverena pepatsivi. Itsamonae Cilicia nacuaverena pepatsivi. Itsamonae Asiavënë nacuaverena pepatsivi. Bajarapamonaeyajunëñëvi Esteban anaeya jumenotatsi. <sup>10</sup>Nexata bajarapamonaeyajunëñëvi Esteban anaeya itsa jumenotatsi, Espíritu Santo yavenonatsi pejumecanaviatsijavata bajarapamonaējavabelia. Bajaraxuata nexata daxita bajarapamonaē Esteban apo jumecanaviatsicapanepaetsi juya. <sup>11</sup>Nexata pamonaē Esteban anaeya jumenotatsi, matamota itsamonae Esteban peneconitsinexatsi jivijavabelia. Nexata pamonaē matamotatsi penajumetsënëtsinexa Esteban yabara, najumetsënëtsia jane baja jumaitsi jivijavabelia:

—Pajumetaniji pibisiacuenia Esteban pebaracuaicuaijitsabiabijava Moiséspijinë. Pajumetanijinua pibisiacuenia pebaracuaicuaijitsabiabijava Dioso ata, jai bajarapamonaē Esteban yabara.

<sup>12</sup>Bajarapacuenia bajarapamonaē pejumaitsixae, nexata daxitajivi anaepana. Judíovi pijaancianovi ata anaepana. Judíovi pecujarubivi ata anaepana Estebanjavabelia. Nexata daxita bajarapamonaē Esteban cujibarenatsi. Vaetabatsi. Caponaliatsi penutsinexatsi sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata. <sup>13</sup>Nexata icatsia bajarapamonaē junata pamonaē jane baja matamota najumetsënëtsiaya peneconitsinexatsi Esteban. Nexata bajarapamonaē itsa pata, jumaitsi Esteban yabara:

—Mara ponëje Esteban apo cueranae Dioso apo pejitsipaecuenia pebaracuaicuaijitsabiabijava templobo. Apo cueranaenua Dioso Moiséspijinëta penajumecopatsilivaisi ata pebaracuaicuaijitsabiabijava. <sup>14</sup>Pajumetaniji maponëje pejumaitsijava: “Jesús, Nazaret tomarapijinë, xuabianica mapatemploboje. Dioso Moiséspijinëta penajumecopatsilivaisi ata vajajumecovënëtsijava, nacacopabiaexanaena Jesús,” jai maponëje, jai najumetsënëtsiaya Esteban yabara pamonaē matamotatsi.

<sup>15</sup>Nexata sacerdotevi penamatacaitorobivi, judíovi pijaancianovi ata, judíovi pecujarubivi ata, naëcobarëcëpatsi Esteban. Nexata bajarapamonaē Esteban pitabaranaëcobarëcëpaejavatatsi, betsita ángelnëitabara tsarucae Esteban.

**Pacuenia Esteban jumecanaviata sacerdotevi  
pepo penamatacaitorobinē yabara pelivaisi**

**7** Sacerdotevi pepo penamatacaitorobinē jumaitsi Estebanjavabelia:

—¿Xaniajai tsabaja? ¿Jumaitsimē tsabiabi pacuenia mapamonae caneconitsi-ajumaitsi? jai sacerdotevi pepo penamatacaitorobinē.

<sup>2</sup>Nexata sacerdotevi penamatacaitorobivijavabelia, judíoivi pijaancianovijavabelia ata, judíoivi pecujarubivijavabelia ata, Esteban jumaitsi mapacueniaje:

—Tajamonae, patanevetsivimē, panenamuxunaevere. VajaDioso bitso ayaijamatābēcuenē. Tsitanaitajēta baja cajena bajayata vajasalinainē Abrahampijinējavabelia. VajaDioso tsitanaitajēta Abrahampijinējavabelia abaxē Abrahampijinē itsa ponapona Mesopotamia nacuata. Bajarapanacuata Abrahampijinē ponapona pevarapaevajēnaeya Harán nacuyabelia. <sup>3</sup>Dioso jumaitsi Abrahampijinējavabelia: “Nijairavecua ponare. Daxita nijamonae ata vecuaponare. Ponare pairajavabelia catsitajētsianatsi,” jai Dioso Abrahampijinējavabelia. <sup>4</sup>Bajaraxuata Abrahampijinē Caldea nacujavaverena pona. Nexata pata Harán nacuyaberena. Bajarapanacuata Abrahampijinē itsa ponapona, nexata paxapijinēmi Harán nacuata vecuatēpatsi. Paxapijinēmi pevecuatēpaecujinaetsi, Dioso icatsia Abrahampijinē varapaeyaexanatsi mapairajavaberena, itsajota vaxaitsi aeconoxae jinavanapatsi. <sup>5</sup>Itsiata Abrahampijinē Dioso apo rajutsitsi itsairayo ata pepo pijairanexa. Jume cajena. Tsiquiriirayo ata apo rajutsitsi. Itsiata tajēvelia Dioso najumecapanepaeya jumaitsi Abrahampijinējavabelia: “Carajutsianatsi nijairanexa daxita mapaira tane-meje. Nevēnamuto nexi bajarapaira xainaena,” jai Dioso. Abaxē Abrahampijinē pexi itsa apo xinae, bajarapacuenia Dioso najumecapanepaeya jumaitsi Abrahampijinējavabelia. <sup>6</sup>Icatsia Dioso tajēvelia jumaitsi Abrahampijinējavabelia: “Itsamatacabi nemomoxi mapairaje vecuaponaena. Nexata najinavanapaena itsanacuapijivi pijanacuata. Bajarapanacuata nemomoxi itsanacuaverena pepatsivixae tsane, bajarapanacuapijivi pijajivi exanaenatsi. Bepejiobicuenia nacuenibiaexanabiabi-anatsi. Cuatrocientos pavaibeje nemomoxi bepejiobicuenia jinavanapaena bajarapanacuatalia. <sup>7</sup>Xanē nexata naneconitsiaexanaenajē panacuapijivi nemomoxi pijajivi exanaenatsi. Bajaraxuacujinae nemomoxi bajarapanacuavecua pitsapaena. Nexata icatsia mapanacuayaberena patsiana. Nexata mapanacuataje xanējavaberena najamatabēcuenecopatsiaya navajēcabiabiana,” jai baja cajena tajēvelia Dioso Abrahampijinējavabelia. <sup>8</sup>Nexata Abrahampijinē Dioso itorobatsi peperabēcaucutaponaenexa daxita papebinacuetoxi naexana Abrahampijinē pijabota, baitsi peboupiperabēcaucutaponaenexa. Bajarapacuenia Abrahampijinē pexanaenexa Dioso itorobatsi Abrahampijinē penajamatabēnapitabiabinexa Dioso peyavenonaeyapaebijavatsi. Nexata Abrahampijinē pijava vecuanaexanatsi pebinēyo. Bajaraponēyo pevēnē Isaac. Nexata baja penacuetonēyo penaexanaecujinae, ocho pamatacabibeje itsa xaina, Abrahampijinē boupiperabēcaucuta pexēnatonēyo pacuenia Dioso itorobatsi. Bajaraxuacujinae icatsia juya Isaacpijinē pexēnato xaina. Isaacpijinē pexēnato pevēnē Jacob. Bajara icatsia pacuenia Isaacpijinē ata boupiperabēcaucuta pexēnatonēyo. Bajaraxuacujinae icatsia Jacobpijinē pexi xaina doce ponēbeje. Bajara icatsia pacuenia Jacobpijinē ata boupiperabēcaucuba pexi. Bajarapadoce ponēbejejavaverena penaexanaponaevi doce pabitsaētobeje naexana, jai Esteban sacerdotevi

penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

<sup>9</sup> Icatsia Esteban jumaitsi bajarapamonaejavabelia:

—Nexata Jacobpijinē pexi, ponēbeje nacaemonaemi, vaxaitsi vajasalinaivi. Bajarapamonaemi pejuyapijinē Josépijinē. Nexata Josépijinē cuencaēbatsi pematapijivi. Bajaraxuata Josépijinē pecaponaenexatsi Egipto nacuyabelia, canajetaxuabatsi pematapijivi. Itsiata Josépijinē Dioso yajavaponaponatsi. <sup>10</sup> Nexata Josépijinē bepejiobiaexanaejavaminexatsi Egipto nacuata, vecuapanepaponapona. Dioso daxitacuene Josépijinē Egipto nacuata yapētaeyaexanaponatsi. Bajaraxuata Egiptonacua pevetsinēmi, Josépijinē pexaniajamatabēcuenia tanetsi. Nexata Egiptonacua pevetsinēmi tocopatatsi Josépijinē pecobenaevetsinexa Egiptonacua. Egiptonacua pevetsinēmi pijabo ata petoevetsinexa, Josépijinē tocopatatsi, jai Esteban bajarapamonaejavabelia.

<sup>11</sup> Icatsia Esteban jumaitsi bajarapamonaejavabelia:

—Nexata pinijijaniboxaneto pata daxita Egipto nacujava, Canaán nacujava ata. Nexata bitso bejiobi jivi. Canaán nacuata vajasalinaivi jane baja apo xainae pexaejava. <sup>12</sup> Itsiata Egipto nacuata janibovajēnaeya, Josépijinē pecomuaquejebijava ayaijava xaniavaetejeba trigoxu. Nexata Jacobpijinē vēnētane Egipto nacuata pexaejava pexinaejava trigoxu. Nexata Jacobpijinē pexi itoroba Egipto nacujavabelia pesivaponaenexalia pexaejava. Bajarapanamuto ponalia, copiaya jane baja pexaejava pesivaponaenamutolia Jacobpijinē pexi, pamonaē jane baja vajasalinaivi. Itsiata Jacobpijinē pexi pejuyapijinējavata comuacae ata, apo yapētae pejuyapijinēcuene. <sup>13</sup> Bajaraxuacujinae vajasalinaivi icatsia cotocaevi panamuto itsa sivaponalia pexaejava, nexata Josépijinē jumaitsi pematapijivijavabelia: “Xanē raja Josēnē panejuyapijinēnē,” jai Josépijinē. Bajaraxuata nexata Egipto nacuaevetsinēmi yapētane bajarapamonaē Josépijinē pijamonaecuene. <sup>14-15</sup> Nexata Josépijinē tonajumexuaba paxa Jacobpijinē penavarapaenexa Egipto nacuyabelia. Nexata Jacobpijinē daxita pexi, pemomoxi yajava, varapa Egipto nacuyabelia. Nexata Jacobpijinē, daxita pexi, pemomoxi yajava, itsa pata Egipto nacuata pejinavanapaenexa, nanamataējēta setenta y cinco pajivibeje. Bajaraxuacujinae Egipto nacuata Jacobpijinē tēpa. Pexi ata vajasalinaivimi jane baja bajarapanacuata icatsia tēpa. <sup>16</sup> Bexējavabelia vajasalinaivimi jane baja petēpaevimi pesijebinxatsi ibovajuta, Siquem tomarata, sicaponatsi Siquem tomarabelia. Bajarapaibovajuta cajena jivi petēpaevi, jebabiaba. Abrahampijinē abaxē itsa asaē vajasalinaivimi pevajēnaeya, comuata bajarapaibovaju. Hamorpijinē pexita comuata bajarapaibovaju, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

<sup>17</sup> Icatsia Esteban jumaitsi bajarapamonaejavabelia:

—Nexata baja itsa panepapona bejamatabēcuene trescientos veinte pavaibeje vajasalinaivimi pejinavanapaecujinae Egipto nacuata, nexata Abrahampijinē pemomoxi, vajasalinaivimi jane baja, ayaibitsaētochaneto tsaponae Egipto nacuata. Nexata jane baja pijinia imoxoyo pevajēnae tsaponae pecopiapatsinexa pacuenia Dioso pexaniajaijumeta najumecapanepaeya jumaitsi Abrahampijinējavabelia, bailsi jane baja Dioso pejamatabēcueneta vajasalinaivimi pejuvsinexatsi Egipto nacuverena pejinavanapaenexa Canaán nacuata. <sup>18</sup> Nexata bajarapamatacabi itsanē junua pevetsinexa Egiptonacua. Ponē Egiptonacua pejanaevetsinē, bajaraponē

apo yapëtae Josépíjinë Egiptonacua pevetsinëmicuene. Tsipaji baja bajayata, bajaraponë pevajënaeya, tēpa baja Josépíjinë. <sup>19</sup> Nexata Egiptonacua pejanaevetsinë, vajasalinaivimi apo itaxutotsoniataetsi. Ayaicuenia nacuenebiaexanabiabatsi. Bejio-biaexanabiabatsinua. Vajasalinaivi pexi pebinëyo itsa tonaexanatsi, nacuaevevetsinë pejamatabëcueneta penetsiaexanabiabatsi bajarapacuenia petëpaenexa pebinacuetoxi. <sup>20</sup> Bajarapamatacabi naexana Moisésíjinë. Moisésíjinë bitso pexanianacuetonëyo. Dioso barëya tanetsi. Nexata Moisésíjinë penaexanaecujinae, paxabeje penabeje muetsia evetatsi bota acueyabi pajuametobeje. <sup>21</sup> Bajaraxuacujinae Moisésíjinë paxabeje penabeje xuabatsi baja. Nexata nacuaevevetsinë pexënatoyo Moisésíjinë pitatsi nacoxyabijitsiatsi. Nexata nacuaevevetsinë pexënatoyo Moisésíjinë vitatsi pexënatonëyocuenia. <sup>22</sup> Nexata Moisésíjinë cujarubatsi daxitacuene, xua Egipto nacuapijivi yapëtane. Nexata Moisésíjinë bitso yapëtane livaisi petsipaebinexa jivijavabelia. Pexanaejava ata pecobeta bitso yapëtane, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

<sup>23</sup> Icatsia Esteban jumaiti bajarapamonaejavabelia:

—Itsa baja Moisésíjinë cuarenta pavaibeje xaina penaexanaecujinae, sivanajamatabëxaina petaenexa pijamonae itsajota jinavanapa. <sup>24</sup> Nexata baja Moisésíjinë pona petaenexa pijamonae. Nexata baja Moisésíjinë itsa ponapona panacuatata pijamonae jinavanapa, Moisésíjinë pitabëta Egipto nacuapijinë tobejiobiaexanatsi pijamonaenë. Nexata Moisésíjinë bajarajota pijamonaenë yamata-mobeyaxuaba Egipto nacuapijinë. <sup>25</sup> Moisésíjinë nexata jamatabëjumaiti: “Daxita tajamonae, Israelpíjinë pemomoxi, nesivajamatabëjumaiti tsane: ‘Moisés cajena nacayavenonaena vajavecuapitsapaenexa Egiptonacua,’ nesivajamatabëjai tsane,” jamatabëjai picani Moisésíjinë. Itsiata baitsi jane Moisésíjinë pijamonae bajarapacuenia apo sivajamatabëjumaitisitsi. <sup>26</sup> Moisésíjinë pebeyaxuabicujinae Egipto nacuapijinë, icatsia meravia pitsijavata, Moisésíjinë caxitajaraba anijanëbeje penabejavatabeje. Bajaraponëbeje Moisésíjinë ëpijamonaenëbeje, Israelpíjinë pemomobeje. Nexata Moisésíjinë xaniavaetsia itaveta penabeyanivabeje matavëjëa. Jumaiti: “¡Panabejitsipamebeje! Panapijamonaenëmëbeje raja. ¿Detsa xuajitsia panabiamebeje?” jai Moisésíjinë. <sup>27</sup> Nexata ponë matapita penabejavabeje, torotajarabatsi Moisésíjinë. Bajaraponë jumaiti Moisésíjinëjavabelia: “¿Jipatsa catocopata patanevetsinënexamë? ¿Jipatsa catocopata, pibisiacuene itsa paexanajë, pataneconitsiaexanabiabinexamëna? <sup>28</sup> ¿Nebeyaxuabijitsiamë tsaja icatsia xanë ata pacuenia canivi beyaxuabame Egipto nacuapijinë?” jaitsi Moisésíjinë pijamonaenë. <sup>29</sup> Nexata Moisésíjinë itsa jumetane bajarapacuenia pejumaitisijavatsi pijamonaenë, nexata Moisésíjinë najetabajirava Madián nacuayabelia. Bajarapanacuatalia ponapona. Nexata bajarapanacuatalia Moisésíjinë nacojioba. Xaina anijanëbeje pexënatobeje, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

<sup>30</sup> Icatsia Esteban jumaiti bajarapamonaejavabelia:

—Bajaraxuacujinae icatsia cuarenta baja pavaibeje itsa panepa Moisésíjinë peponaponaecujinae Madián nacuata, Dioso tsitanaitajëtatsi beángelnëcuenia. Bajarapacuenia tsitanaitajëtatsi petusato nacuata, Sinaivënëtsuto canacujitsita. Tsiquirinaemëyo petajueyecaecotia tuatuajëta, tsitanaitajëtatsi Dioso Moisésíjinë. Itsiata tsiquirinaemëyo apo veriajavatsi. <sup>31</sup> Moisésíjinë itsa tane, jamatabëcuenen-

abenajaca. Nexata cujitabilia xaniavaetsia imoxoyo petaenexa tsiquirinaemëyo petajueyecaecotia. Nexata bajarapacotiajavaverena Dioso jumaitsi Moiséspijinëjavabelia: <sup>32</sup>“Xanë raja nijasalinaivimi pijaDiosonë. Abrahampijinë, Isaacpijinë ata, Jacobpijinë ata, pijaDiosonë,” jai Dioso. Nexata bajarajota Moiséspijinë neconecojai pecajunavi. Apo naëcotsilia baja icatsia matavëjëa. <sup>33</sup>Nexata icatsia bajarapacotiajavaverena Dioso jumaitsi Moiséspijinëjavabelia: “Nataxujonore nijazapato. Tsipaji raja taitabarata nucame. <sup>34</sup>Taniji rabaja tajajivi nijamonae Egipto nacuata bitso bepejiobicuena pejinavanapaejava. Jümetaniji bajarapamonae penatsinueyabiabijava. Nexata runaicajë bajarapamonae tajutsinexa Egipto nacuaverena. Naxanit-sia. Caitorobijitsiatsi Egipto nacuayabelia,” jai Dioso Moiséspijinëjavabelia tsiquirinaemëyo petajueyecaecotiajavaberena, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

<sup>35</sup>Icatsia Esteban jumaitsi bajarapamonaejavabelia:

—Nexata Moiséspijinë Dioso itorobatsi peponaenexa Egipto nacuayabelia, vajasalinaivimi Egipto nacuata pebejiobiaexanabiabijavatsivecua pejutsinexa Egipto nacuaverena. Moiséspijinë peponaevajënaeya Egipto nacuayabelia, pamatacabi abaxë Moiséspijinë ponapona panacuata vajasalinaivimi jinavanapa, bajarapamatacabi vajasalinaivimi Moiséspijinë navecuaitavetatsi. Vajasalinaivimi jumaitsi Moiséspijinëjavabelia: “¿Jipatsa catocopata patanevetsinëexamë? ¿Jipatsa catocopata, pibisiacuene itsa paexanjë, pataneconitsiaexanabiabinexamënu?” jai vajasalinaivimi. Bajarapacuenia vajasalinaivimi navecuaitavetsi ata, itsiata Dioso itorobatsi Moiséspijinë peponaenexa vajasalinaivimijavabelia. <sup>36</sup>Moiséspijinë nexata pona Egipto nacuayabelia. Nexata Egipto nacuata Moiséspijinë Dioso pesaëta pinijicuene pexanaejava, exanapona. Bajaraxuacujinae Moiséspijinë Egipto nacuaverena vajasalinaivimi jane baja matacanajetaruca. Nexata Moiséspijinë epatuaarena Rojovënë manuamene maxëranajavata, Dioso pesaëta pinijicuene pexanaejava exana. Bajaraxuacujinae cuarenta pavaibeje itsa jinavanapa petusato nacuata, itsajavanë icatsia Dioso pesaëta pinijicuene pexanaejavanë, Moiséspijinë exanapona. <sup>37</sup>Bajarapamatacabi cajena Moiséspijinë jumaitsi vajasalinaivimijavabelia: “Pacuenia xanë Dioso nitoroba Diosojumelivaisi jivi tatsipaebinënexa profetanënexanë, bajarapacuenia Dioso pacatoitorobianica itsanë profetanë Diosojumelivaisi papecatsipaebinënexa. Bajaronë paxamëyajuvënë tsane. Bajaronë pajumecovënëtsianame,” jai cajena Moiséspijinë bajayata tajëvelia vajasalinaivimijavabelia Jesús yabara. <sup>38</sup>Moiséspijinë barënacaetuata vajasalinaivimi petusato nacuata, Sinaívënë tsutomuxuneneta. Nexata Sinaívënë tsutojumabetsia caenë Moiséspijinë junaya. Nexata Sinaívënë tsutojumatsia Moiséspijinë ángeljavabelia tocaicuajai vajasalinaivimi. Nexata Moiséspijinëta Dioso penajumecopatsilivaisi jivi pejumecovënëtsinexa, Sinaívënë tsutojumatsia tonajumecopatatsi. Bajarapalivaisi Dioso najumecopata Moiséspijinëta vaxaitsi ata bajarapalivaisi vajasalinaenexa mapamatacabijavaberenaje, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

<sup>39</sup>Icatsia Esteban jumaitsi bajarapamonaejavabelia:

—Vajasalinaivimi apo jamatabëjumecovënëtsi Moiséspijinë. Apo jitsipae cajena matavëjëa penamatacaitorobinënexatsi. Vajasalinaivimi picani najamatabëxaina epatua Moiséspijinë pepepënaviabinexatsi Egipto nacuayabelia. <sup>40</sup>Moiséspijinë bajayajebi ponaponaya Sinaívënë tsutojumatsia. Nexata Moiséspijinë pecovëta va-

jasalinaivimi jumaitsi Aarónpijinējavabelia: “Exanare diosovi vajanacamatacaponaenexa. Apo yapētaetsi rabaja pacuenia exanatsi Moisés vajanacamatacaponaenē Egipto nacuaverena,” jai. <sup>41</sup>Nexata vajasalinaivimi becerro jumapecataeya exana oronē. Nexata bajarapajumapenējavabelia pevi perajutsinexa, ofrendacuenia tobia dajubi. Bajaraxuacujinae vajasalinaivimi jamatabēcuenēbarēyaya fiesta exana pecobeta pexanaexae oronē. Tsipaji bajarapajumapenē vajasalinaivimi bepjiadisonē tane. <sup>42</sup>Bajaraxuata Dioso baja copata peyavenonaejava vajasalinaivimi. Nexata baja Dioso tocopata vajasalinaivimi najamatabēcuenecopatsiaya penavajēcabiabinexa itaboxopijitulupujavabelia. Diosojumepaebinē profeta peyaquinaebaxutota, Dioso pejumaitsijava vajasalinaivimi yabara jumaitsi mapacueniaje:

Israelpijinē papemomoximē, pamatacabi abaxē pajinavanapame cuarenta pavaibeje petusato nacuatalla, pabeyabiabi atamē baca, oveja yajava, bajarapavi xanē apo panerajutabiabimē ofrendacuenia. <sup>43</sup>Bajarapavi parajutabiabame ofrendacuenia panenatoexanaediosovijavabelia. Tsipaji bajarapamatacabi pacajinavanapame carpabo bepanijadisonē panetaenē Molocvënēdisonē pijabonexa. Pacajinavanapamenua tuluputo, jumapecataeya panenatoexanaetuluputo, Renfánvënētuluputo. Nexata bajarapatuluputo pataneme bepanijadioso. Panecobeta saya paneexanaediosovi, pacajinavanapame najamatabēcuenecopatsiaya bajarapadiosovijavabelia panenavajēcabiabinexa. Bajaraxuata panijanacuavecua pacacaponaeayaexanaenatsi Babilonianacua pēnēyabelia pairajavabelia, jai Dioso pejumaitsijava mapacueniaje profetanē peyaquinaebaxutota vajasalinaivimi yabara, jai Esteban sacerdotēvi penamatacaitorobivijavabelia, judíovi pi jaancianovijavabelia ata, judíovi pecujarubivijavabelia ata.

<sup>44</sup>Icatsia Esteban jumaitsi bajarapamonaejavabelia:

—Bajayata vajasalinaivimi itsa jinavanapa petusato nacuata, cajinavanapa Dioso pijacarpaboxaneto, bajarapabota Diosojavabelia pevajětābiabinexa. Nexata Dioso Moiséspijinēta penajumecopatsilivaisi, Dioso peyaquinaeibopanayobeje, vajasalinaivimi xaniavaetabuatibiaba bajarapacarpabo ēnētūatūajēta. Copiaya Moiséspijinē jumapecataeya Dioso tsitajētatsi pacuenia bajarapacarpabo exanetsijitsia. Nexata juya Moiséspijinē itoroba vajasalinaivijavabelia. Nexata vajasalinaivimi exaneta bajarapacarpabo pacuenia Dioso cuenecataeya tsitajētatsi Moiséspijinē. <sup>45</sup>Bajaraxuacujinae bajarapacarpabo rajutatsi vajasalinaivimi pecajinavana-paenexa. Nexata vajasalinaivimi itsabelia varapa, caponabiaba bajarapacarpabo. Moiséspijinē baja itsa tēpa, Josuépijinē juya matacapona vajasalinaivimi. Josuépijinē nexata pamatacabi vajasalinaivimi matacanajetaruca, caparena bajarapacarpabo mapanacuayaberenaje. Nexata vajasalinaivimi vajabitsaē exana mapanacuataje pejinavanapaevimijavabelia. Nexata vajasalinaivimi mapairaje yacajērēta. Pamatacabi Josuépijinē vajasalinaivimi matacanajetaruca mapanacuayaberenaje, Dioso rēcēpecaeyaexanatsi mapanacuapijivimije Josuébana pevājēnaetarena. Nexata bexējavaberena ata, pamatacabi Davidpijinē mapanacua evetaje, vajasalinaivimi abaxē cajinavanapa bajarapacarpabo. <sup>46</sup>Nexata Dioso pexaniajamatabēcuenia tanetsi Davidpijinē, mapanacuaje pevetsinēmi. Nexata picani Davidpijinē bitso jitsipa Dioso pijabonexa templobo pexanaeyaexanaenexa. Baitsi paDioso bajayata Jacobpijinē jumecovēnēta, Davidpijinē jane baja pamopiinēmi. <sup>47</sup>Itsiata baitsi jane Davidpijinē Dioso apo tocopatsitsi templobo pexanaeyaexanaenexa. Davidpijinē pexenato, Salomónpijinē, Dioso pijabonexa templobo exanaeyaexana, Davidpijinē



baja peputäpae. <sup>48</sup> Pepo Dioso athëbëtatsia peecaenë, bajaraponë apo ponaponae bota, jivi pexanaebota. Diosojumepaebinë profetanë bajayata jumaiti mapacueni-aje Dioso pejumaitisijava:

<sup>49</sup> Athëbëtatsia daxitacuene taevetsinë. Mapanacuajava ata taevetsinë. ¿Detsa nexata xuajitsia bo panetoexanetsipame? Apo namatavenonaenë cajena bo tanacueraevetsinexa. <sup>50</sup> Xanë daxitacuene taexanaenë,

jai profeta bajayata Dioso pejumaitisijava, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

<sup>51</sup> Icatsia Esteban jumaiti bajarapamonaevjavabelia:

—Paneajamatabëcuenetajavi. Paneamatabocotajavinua. Apo pajumecovënëtsimë Dioso pejumelivaisi. Apo pacopatsimë Espíritu Santo papecatsijamatabëjonexa. Pacuenia panijasalinaivimi bajayata itsi, bajara saya icatsia paxamë paitsimë.

<sup>52</sup> Diosojumepaebivi profetavi tajëvelia vajunupaebapona Cristo, pepo pianeconijibinë pepatsijavanexatsica. Nexata panijasalinaivimi daxita bajarapaprofetavimi bejiobiaexanabiaba. Beyejebabiabanua. Nexata jane baja Cristo itsa patsica, paxamë pijavajabitsaë pecobeyabelia pacanajetaxuabame. Bajarapacuenia Cristo pabeyaxuabame. <sup>53</sup> Angelevi pacarajutsi ata Dioso Moiséspijinëta penajumecopatsilivaisi jivi pejumecovënëtsinexa, itsiata paxamë apo pajumecovënëtsimë bajarapalivaisi, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

### **Pacuenia Esteban beyaxuabatsi yabara pelivaisi**

<sup>54</sup> Sacerdotevi penamatacaitorobivi, judíovi pijaancianovi ata, judíovi pecujarubivi ata, itsa jumetane Esteban petsipaebilivaisi, anaepana bitso Estebanjavabelia. Nexata bajarapamonaë pecaanaë, navonoquiarabaxane. <sup>55</sup> Itsiata Esteban bitso jamatabëcuenevënëca Espíritu Santo. Esteban athëbëa benaëcotsia. Nexata tane Dioso pijapenivenivenaëcotia. Taenutsianua Jesús penucaejava paxa Dioso pemuxuneneta, pecujuanenia. <sup>56</sup> Nexata Esteban jumaiti daxita bajarapamonaevjavabelia:

—¡Panataema! Taniji itaboxo penapatsijavatsia. Daxitajivi Pematapijinë, ponë naexana mapanacuataje, pacuenia vaxaitsi banaexanatsi, nucaya paxa Dioso pemuxuneneta, pecujuanenia, jai Esteban.

<sup>57</sup> Nexata sacerdotevi penamatacaitorobivi, judíovi pijaancianovi ata, judíovi pecujarubivi ata, pecobenëta namuxuvojoacaba. Bajarapamonaë vavajai pinijicuenia. Daxita caecuenia cujibarenatsi Esteban pevaetabinexatsi. <sup>58</sup> Bajarapamonaë Esteban caponaliatsi tomarapënëyabelia. Nexata tomarapënëtalia Esteban tseconatsi ibotonëta. Nexata daxita pamonaë jumetane Esteban petsipaebilivaisi, najumajonejeba pijacamisajumavelia penaxatabijavanë. Nexata Esteban petseconaevajënaetsi ibotonëta, bajarapamonaë penajumajonejebijavanë pevëjëato Saulovënënë evetsiaexanatsi. <sup>59</sup> Petseconanubenaëjavatatsi ibotonëta, Esteban vajëta Diosojavabelia. Jumaiti:

—Tajatuxanenë Jesús, daxita pepo tajamatabëcuene pire, jai Esteban.

<sup>60</sup> Bajaraxuacujinaë Esteban pematabacabëta nuca. Aëjai pinijijumeta.

—Tajatuxanenë, itaxutobejiobiataema mapamonaëje. Vecuaajibiaexanare paneconi natsixana xamëjavabelia tanebejiobiaexanaexaë mapacueniaje, jai Esteban.

Bajaraxuacujinaë Esteban tëpanajereca baja.

**Pacuenia Saulo jaita Jesús pelivaisi pejumecovënëtsivi  
penaneconitsiaexanaenexa yabara pelivaisi**

**8**<sup>1-3</sup> Sacerdotevi penamatacaitorobivi, judíovi pijaancianovi ata, judíovi pecu-  
jarubivi ata, Estebanpijinë baja itsa beyaxuabatsi, Saulo tsitaxanepanatsi. Nex-  
ata pebijivi, pamonaе Dioso bitso jumecovënëta, bajarapamonae Estebanpijinë  
mëthëtatasi. Matanueyabatsi bitso.

Bajarapamatacabi jane baja sacerdotevi penamatacaitorobivi, judíovi pijaan-  
cianovi ata, judíovi pecujarubivi ata, taxxuaba pebejiobiaexanaponaеjava Jesús  
pelivaisi pejumecovënëtsivi Jerusalén tomarata. Saulo jane baja jaitaruta Jesús pe-  
livaisi pejumecovënëtsivi Jerusalén tomarata. Caebo canacujitsia jonepona. Nex-  
ata taicapona pebejivi, petiriavi ata, pamonaе Jesús pelivaisi pejumecovënët-  
sivi. Penaneconitsivi pejebabiabiboyabelia Saulo cajonepona bajarapamonae. Nex-  
ata ayaibitsaëtoxaneto Jesús pelivaisi pejumecovënëtsivi, Jerusalén tomarapijivi,  
rëcëpeca itsatomaranëjavabelia. Itsamonae rëcëpeca Samaria nacuayabelia. Itsiata  
apóstolevi nacopaba Jerusalén tomarata.

**Pacuenia pexanialivaisi, Jesús pelivaisi, pejumecovënëtsivi,  
tsipaebapona Samaria nacujava yabara pelivaisi**

<sup>4</sup> Pamonaе Jesús pelivaisi pejumecovënëtsivi, rëcëpeca Jerusalén tomaravecuа.  
Nexata itsaxuayo bajarapamonae najetarubena, jivi tsipaebanajetarubena pexaniali-  
vaisi, Jesucristo pelivaisi. <sup>5</sup> Pamonaе rëcëpeca yajuvënëñë, pevënë Felipe. Bajara-  
ponë lia Samaria nacuata peecaetomarajavabelia. Bajarapatomarapijivijavabelia Fe-  
lipe tsipaeba Jesús pelivaisi. Jumaitsi:

—Jesús raja Cristo, ponë Dioso itorobica jivi pecapanepaenexa, jai tsaponae Felipe  
Samaria nacuata peecaetomarapijivijavabelia.

<sup>6</sup> Itsa patomarata Felipe Jesús pelivaisi tsipaebabiaba, jivi ayaibitsaëtoxaneto  
nacaetuatabiaba. Daxita bajarapamonae xaniavaetsia namuxunaevetabiaba Felipe  
itsa tsipaebabiaba Jesús pelivaisi. Bajarapamonae tane Felipe Dioso pesaëta pini-  
jicuene pexanaejavanë. <sup>7</sup> Pamonaе dovathi peyajavajinavanapaevi, Felipe vecua-  
capitsapabiaba. Dovathi pinijijumeta aëjai tsabiabi itsa vecuacapitsapabiaba Felipe.  
Nexata dovathi peyajavajinavanapaevimi, jamatejema baja tsabiabi. Pamonaе ata  
petabusipacuenabivitsi, pejayujayunaevi ata, jamatejemayaexanapona Felipe. <sup>8</sup> Ba-  
jaraxuata daxita bajarapatomarapijivi jamatabëcuenebarëya.

<sup>9</sup> Bajarapatomarata Simónvënëñë ponapona. Bajaraponë jivi pejorobabiabinë. Ba-  
jayajebi daxita Samaria nacuapijivi yamaxëitojorobaponapona. Simón jumai tsabi-  
abi bajarapatomarapijivijavabelia:

—Xanë bitso jivi taxaniavaetsinë, jai tsabiabi.

<sup>10</sup> Daxitajivi, petuxanevi ata, Simón pejumaitisijava namuxunaevetabiabatsi. Ba-  
jarapamonae nexata Simón yabara jumai tsabiabi:

—Maponëje Simón pinijicuene pexanaejava caëjëpatsi. Dioso raeta yavenonatsi,  
jai tsabiabi bajarapamonae Simón yabara.

<sup>11</sup> Bajarapacuenia Samaria nacuapijivi xaniavaetsia jumecovënëtabiaba tsipaji  
Simón pejorobicuena baja yajajebi jivi yamaxëitojorobabiaba. <sup>12</sup> Nexata Felipe  
Samaria nacuapijivijavabelia tsipaeba Dioso pijajivi pevetsijavanexa. Jesucristo pe-

livaisi ata tsipaeba. Nexata Samaria nacuapijivi jumecovënëta Felipe petsipaebilivaisi. Bajarapamonae pebijivi, petiriavi ata, Felipe bautisaba.

<sup>13</sup> Nexata jane baja Simón jivi pejorobabiabinë ata jumecovënëta Felipe petsipaebilivaisi. Nexata baja Simón ata Felipe bautisaba. Bajaraxuacujinae Felipe pepëta naponapona Simón. Nexata Simón jamatabëcuenenabenajacabiaba itsa taeyabiaba Dioso pesaëta Felipe pinijicuene pexanaponaejavanë.

<sup>14</sup> Nexata apóstolevi Jerusalén tomarata pejinavanapaevi, vënëlivaisitane Samaria nacuapijivi Dioso pitorobilivaisi pejumecovënëtsijava. Nexata apóstolevi jumaitsi peyajuvënënebejevavelia:

—Pedro, paxamëbeje Juanbeje, pataemeliabeje Samaria nacuapijivi, pejumecovënëtsivi Dioso pitorobilivaisi, jai apóstolevi.

Nexata Pedrobeje Juanbeje ponabeje. <sup>15</sup> Itsa bajaraponëbeje patabeje Samaria nacuyavelia, tovajëtabeje Diosojavelia Espiritu Santo petsijamatabëpatsinexatsitsica Samaria nacuapijivi, Dioso pitorobilivaisi pejumecovënëtsivi. <sup>16</sup> Bajarpacuenia tovajëtabeje tsipaji abaxë Samaria nacuapijivi Espiritu Santo apo tsijamatabëpatsitsitsica. Abaxë saya bautisabatsi bajarapamonae Jesús pevënëta. <sup>17</sup> Nexata Pedrobeje Juanbeje petovajëtsijavatabeje Diosojavelia, tsmatanacobebutabeje Samaria nacuapijivi. Nexata jane baja Samaria nacuapijivi Espiritu Santo tsijamatabëpatsicatsi.

<sup>18</sup> Nexata Simón itsa tane Samaria nacuapijivi Espiritu Santo petsimatarunaevatsitsica apóstolenëbeje Samaria nacuapijivi tsmatanacobebutsiaya petovajëtsijavatabeje Diosojavelia, nexata Simón palata tsipaeba apóstolenëbejevavelia.

<sup>19</sup> Simón jumaitsi:

—Panerajurebeje mapacaëjëpaejamatabëcueneje. Pajivi tsmatanacobebutajë tatovajëtsijavata Diosojavelia, bajarapajivi petsimatarunaenexatsitsica Espiritu Santo, jai Simón apóstolenëbejevavelia.

<sup>20</sup> Nexata Pedro jumaitsi Simónjavavelia:

—Xamë cajena Dioso caxuabiana infiernojavavelia. Nexata vereverecaename nijapalata yajava. Tsipaji najamatabëxainame necomuatsinexa ëpalatata Dioso amoneya jivi perajutsijavatsica. <sup>21</sup> Tsipaji pepacuene apo najamatabëcuenecopatsimë xaniavaetsia Diosojavelia. Nexata Dioso patajumecovënëtsivita, apo nanacuenebimë tsane. <sup>22</sup> Copare baja papibisiacuene najamatabëxainame. Najamatabëcuenepënëyorore Diosojavelia. Vajëre Diosojavelia pecavecuaajibiaexanaenexa papibisiacuene najamatabëxainame. <sup>23</sup> Xanë cajena yapëtaniji necueneëbijava Jesús pelivaisi pejumecovënëtsivi. Yapëtanijinua pecajamatabëcuenecënënaejava pibisiacuene nexanaeconi, jai Pedro.

<sup>24</sup> Nexata Simón jumaitsi:

—Panetovajërebeje Diosojavelia tanevecuaajibiaexanaenexa paneconi xainajë Dioso tanexuabiyaniava infiernojavavelia pacuenia panejumaitsimëbeje, jai Simón.

<sup>25</sup> Bajaraxuacujinae Pedrobeje Juanbeje bajarapatomarapijivijavelia tsipaebabeje pacuenia tanebeje Dioso pexanaejava. Tsipaebabejenua Dioso pitorobilivaisi. Bajaraxuacujinae Pedrobeje Juanbeje itsa navialiabeje Jerusalén tomaravelia, Samaria nacuata penaetomaranëjava tsipaebanajetarucabeje pexanialivaisi, Jesús pelivaisi.

### Pacuenia Felipe bautisaba Etiopía nacuapijinē yabara pelivaisi

<sup>26</sup> Dioso pijaángel jumaitsi Felipejavabelia:

—Nonotapunare. Maxuayolia rovalia liamēreje. Panamuto Jerusalén tomaraverena naropota pepatsinexa Gaza tomarabelia, bajarapanamutualia liamēre, jai ángel Felipejavabelia.

Bajarapanamuto petusato nacuajava rucalia pepatsinexa Gaza tomarabelia.

<sup>27</sup> Nexata Felipe xaniavaeta pijajavaxi peponaenexa baja. Bajaraxuacujinae naropolia jane baja. Nexata bajarapanamutualia Felipe caxitajaraba Etiopía nacuapijinē. Bajaraponē palata pevetsinē. Etiopíanacua pevetsiva pijapalata toevetabiaba. Bajaraponē, Etiopía nacuapijinē, Jerusalén tomarajavabelia pona najamatabēcuenecopatsiaya pevajētsinexa Diosojavabelia templobota. <sup>28</sup> Nexata baja Etiopía nacuapijinē Jerusalén tomaraverena naviatanajetaruca. Navialia baja pijanacuayabelia. Pijamoyota, carrozavēnēmoyota, yanajetaruca. Nexata lebanajetaruca Diosojumelivaisipaebinē profeta Isaíaspijinē bajayata peyaquinaebaxuto. <sup>29</sup> Nexata Espiritu Santo jumaitsi Felipejavabelia:

—Bitsojinaremelia. Pēcaxinaeremelia mapamoje. Imoxoyo pemuxunenia nacaponae name, jai Espiritu Santo.

<sup>30</sup> Felipe nexata cujinaejinalia. Nexata baja Felipe pēcaxinalia Etiopía nacuapijinē. Nexata Felipe jumetane Etiopía nacuapijinē peleanajetarucaejava profeta Isaíaspijinē peyaquinaebaxuto. Nexata Felipe jumaitsi Etiopía nacuapijinējavabelia:

—¿Xamē tsaja pepacuene jumeypētaneme palivaisi lebanajetarucame? jai Felipe.

<sup>31</sup> Nexata Etiopía nacuapijinē jumaitsi:

—¿Detsa pacuenia jumeypētaejitsipajē itsa apo netsipaebi xaniavaetsia itsanē ata? jai.

Nexata Etiopía nacuapijinē junatatsi Felipe carrozavēnēmoyo ēnēabetsia Felipe penajunaenexatsia penamuxuneniaecaenexabeje.

<sup>32</sup> Profeta Isaíaspijinē peyaquinaebaxutota, palivaisi Etiopía nacuapijinē lebanajetaruca, tajēvelia Jesús yabara jumaitsi mapacueniaje:

Pacuenia oveja moya, caponae atatsilia pebeyaxuabinexatsi, bajara pijinia pacuenia bajaraponē ata moya tsane, caponae atatsilia pebeyaxuabinexatsi. Pacuenia ovejaya naxunae atatsi, moya, bajara pijinia pacuenia bajaraponē ata moya tsane, yapētae ata pebejiobiaexanaejavanexatsi. <sup>33</sup> Bejiobiaexanaenatsi. Pibisiacuene apo exanae ata, naneconitsiaexanatsi. Itsajivi ata bajaraponē yabara apo jumaitsi tsane: “Mara pamonaaje bajaraponēmi pemomoxije,” apo jai tsane. Tsipaji beyaxuabianatsi,

jai tajēvelia mapacueniaje Isaíaspijinē peyaquinaebaxutota Jesús yabara, palivaisi Etiopía nacuapijinē lebanajetaruca.

<sup>34</sup> Nexata Etiopía nacuapijinē jumaitsi Felipejavabelia:

—Pexaniacuene netoexanare. Netsipaebare ponē yabara yaquina profeta Isaíaspijinē mapacueniaje. ¿Baja tsa ponē pijacuata nayabarajumaitsi? Itsa jume, ¿itsanē yabara tsaja jumaitsi? jai Etiopía nacuapijinē Felipejavabelia.

<sup>35</sup> Nexata palivaisi Etiopía nacuapijinē lebanajetaruca, bajarapalivaisi Jesús yabara pejumaitsijava copiaya Felipe yapētaeyaexana. Bajaraxuacujinae icatsia tsi-paeba pexanialivaisi, Jesús pelivaisi. <sup>36</sup> Penajetarucaejavatabeje bajarapanamutua, patabeje itsajota merayo eca. Nexata Etiopía nacuapijinē jumaitsi Felipejavabelia:

—Mara jota meraje. Jitsipajë picani xanë tanebautisabinexamë. Itsiata baitsi jane yapëtaneme xua yabara apo xanepanae tanebautisabinexamë, jai Etiopía nacuapijinë Felipejavabelia.

<sup>37</sup> Nexata Felipe jumaitsi:

—Itsa jumecovënëtame xaniavaetsia daxita nejamatabëëthëtojavaverena, nexata necaëjëpa tacabautisabinexa, jai Felipe.

Nexata bajaraponë jumaitsi:

—Jumecovënëtajë rabaja. Jesucristo raja xaniajai Dioso pexënato, jai Etiopía nacuapijinë Felipejavabelia.

<sup>38</sup> Nexata bajaraponë pijamo nucojopaeyaexana. Bajaraponëbeje Felipebeje runarecabeje merajavabereca. Felipe bautisaba Etiopía nacuapijinë. <sup>39</sup> Nexata penonotajunaecujinaetsinabeje, Espíritu Santo pitatsi Felipe Etiopía nacuapijinë pitabarata. Itsiata Etiopía nacuapijinë apo tae pacuenia Felipe pitatsi Espíritu Santo. Bajaraxuacujinae Etiopía nacuapijinë apo taetsi baja Felipe matavëjëa. Itsiata Etiopía nacuapijinë pona baja barëyaya pijanacuayabelia. <sup>40</sup> Felipe Espíritu Santo caliatasi Azoto tomarabelia. Felipe nexata daxita tomanëjjava tsipaebanajetaruca pexanialivaisi, Jesús pelivaisi. Matapania Felipe itsa patajopa Cesarea tomarata, caejavata ponapona.

### **Pacuenia Saulo jumecovënëta Jesús yabara pelivaisi**

*(Hch 22.6-16; 26.12-18)*

**9** Saulo cajena Jerusalén tomarata apo copatsi petaicaponaejava daxita pamonaë Jesús pelivaisi jumecovënëta pebeyejibiaexanaenexa. Bajaraxuata Saulo pona daxita sacerdotevi pepo penamatacaitorobinëjavabelia. <sup>2</sup> Nexata Saulo sacerdotevi pepo penamatacaitorobinëjavabelia jumaitsi:

—Netsicobeyaquinare cuyalatobaxutonë tacaponaenexa Damasco tomarabelia. Damasco tomaratalia judfovi penacaetuatabiabibonë pevetsivi tarajutsinexa. Nexata bajarapamonae itsa tane neyaquinaebaxutonë, tanetocopatsinexa daxita Jesús pelivaisi pejumecovënëtsivi tataicaenexa. Nexata itsa taicajë pebijivi, petiriavi ata, tacapatsinexa mapatomaraberenaje penaneconitsivi pejebabiabibota tajebinexa, jai Saulo.

Nexata sacerdotevi pepo penamatacaitorobinë jejai. Nexata cuyalatobaxutonë tsicobeyaquinatsi Saulo pecaponaenexa Damasco tomarabelia. <sup>3</sup> Bajaraxuacujinae Saulo jane baja pona Damasco tomarabelia. Nexata ajena Saulo imoxoyotanajetaruca Damascotomara, jemata Saulo penajetarucajavata namutua matatoyorotsia naitayotatsi athëbëvetsica. <sup>4</sup> Nexata Saulo irataeya bocajunua irata. Jumetaenuca athëbëvetsica pejumaitsijava Jesús. Jumaitsi mapacueniaje:

—Saulo, Saulo, ¿detsa xuajitsia tajajivi netobejiobiaexanaponame? jai Jesús.

<sup>5</sup> Nexata Saulo jumaitsi:

—Tajatuxanenë, ¿detsa ponëmë? jai.

Nexata icatsia athëbëvetsica Jesús jumaitsi Saulojavabelia:

—Xanë raja Jesúsne. Tajajivi netobejiobiaexanaponame. ¿Detsa xuajitsia apo tajit-sipaecuenia exanaponame? Xamë nijacuata najamatabëcuenebijanaponame, jai Jesús athëbëvetsica.

<sup>6</sup> Saulo nexata neconecojai pecajunavi. Nexata jumaitsi:

—Tajatuxanenë, ¿detsa xua nexata jitsipame taexanaenexa? jai.

Nexata Jesús jumaitsi:

—Nonotapunare baja. Ponaename baja Damasco tomarabelia. Bajarajotalia catsipaebiana pacuenia exanaejitsiamë, jai Jesús.

<sup>7</sup>Nexata papebijivi Saulo yajavanajetaruca, najunaviacanubena. Nexata moya nubena. Tsipaji jumetane pajume athëbëvetsica jumaitsi Saulojavabelia. Bajarapajume jumetae ata, itsiata bajarapamonae apo tae jivitonë. <sup>8</sup>Nexata Saulo, irata pebocaenëmi, nonotapuna. Naëcobaruta picani. Itsiata apo naëcotsixanepanae. Tsipaji itaxutomeravibatsi. Nexata papebijivi Saulo yajavanajetaruca, bajarapapebijivi saya Saulo comacaponaliatsi Damasco tomarabelia. <sup>9</sup>Nexata Saulo natsivajënaetaenejeva, Damasco tomarata ponapona acueyabi pamatacabibeje. Apo xae pexaejava. Apo apaenua mera.

<sup>10</sup>Damasco tomarata ponapona Ananías, Dioso pejumecovënëtsinë. Nexata Jesús bemajitsinaebocuenia tsitanaitajëta Ananíasjavabelia. Nexata Jesús junataxuaba.

—¡Ananías! jai.

Nexata Ananías jumaitsi Jesúsjavabelia:

—Tajatuxanenë, canamuxunaevetatsi rabaja, jai Ananías.

<sup>11</sup>Nexata Jesús bajarajota jumaitsi Ananíasjavabelia:

—Nonotapunare. Ponaename pacallejavabelia jivi vënëruba Perovicalle. Bajarajotalia Judas pijabota vënëyanijobianame Saulovënënë, Tarso tomarapijinë. Bajaraponë Saulo maparucaeje xanëjavaberena navajëqueca. <sup>12</sup>Bajaraponë Saulo bemajitsinaebocuenia tsitajëtajë pacuenia exanaejitsiamë bajaraponëjavabelia. Nexata Saulo bemajitsinaebota catane pacuenia nejonecujinaelia bajaraponë tsimatanacobeuatsijitsiamë petaenexa icatsia xaniavaetsia, jai Jesús Ananíasjavabelia.

<sup>13</sup>Nexata Ananías itsa jumetane bajarapacuenia Jesús pejumajitsijava, nexata Ananías jumaitsi Jesúsjavabelia:

—Tajatuxanenë, anijatonë vënëlivaisitaniji pacuenia bajaraponë Saulo exanapona. Vënëlivaisitaniji bajaraponë pebejiobiaexanaponaevava Jerusalén tomarata daxita pecajumecovënëtsivi. <sup>14</sup>Maberena ataje icatsia itorobatsi sacerdotevi penamatacaitorobinë petotaicaenexa daxita pamonaecajumecovënëtsivi jinavanapa mapatomarataje, jai Ananías Jesúsjavabelia.

<sup>15</sup>Nexata Jesús jumaitsi Ananíasjavabelia:

—Ponare baja. Tsipaji bajaraponë Saulo itapetajë baja tanelivaisipaebinxeta itanacuanëprijivijavabelia, tanelivaisipaebinxanua bajarapanacuanë pevetsivijavabelia ata, tanelivaisipaebinxanua Israel nacuaprijivijavabelia. <sup>16</sup>Xanë Saulo tsitajëtsianajë pacuenia itsamatacabi Saulo itsamonae bejiobiaexanaejitsiatsi. Bajaraponë bitso bejiobiaexanaenatsi talivaisi yabara, jai Jesús Ananíasjavabelia bemajitsinaebocuenia petsitanaitajëtsijavata.

<sup>17</sup>Bajaraxuacujinae Ananías jane baja lia. Joneya pabota Saulo ponapona. Ananías nexata nacobeuata Saulo pematocabotajumavereca. Ananías jumaitsi Saulojavabelia:

—Tajabanänë Saulo, pepo petuxanenë raja Jesús, ponë catsitanaitajëta namutua nenajetarucavavata, bajaraponë nitoroba. Bajaraponë nitoroba tacatsimatancobeuatsinexa pecavecuajibinxeta baja pecaitaxutomeravibijava icatsia baja netaenexa xaniavaetsia. Nitorobanua tacatsimatancobeuatsinexa pecatsijamatabëvënëcaenexa Espiritu Santo, jai Ananías Saulojavabelia.

<sup>18</sup> Bajarapacuenia Ananías pejumlahitsijavata Saulojavabelia, Saulo veitaxu-toothopatsi xua itaxutocaranatatsi, bedujuaitseboco. Nexata jane baja icatsia Saulo xaniavaetsia tane. Saulo nexata nonotapuna. Bajaraxuacujinae bautisabatsi baja. <sup>19</sup> Bajaraxuacujinae pexaejava baja xane. Nexata baja icatsia Saulo aper-abësaëreca. Saulo nexata Damasco tomarata caematacabibeje naponapona Dioso pejumecovënëtsivita.

### **Pacuenia Saulo paeba Jesús pelivaisi Damasco tomarata yabara pelivaisi**

<sup>20</sup> Saulo pejumecovënëtsicujinae Jesús Dioso pexënatocuene, bepijiayo Saulo taxu-xuaba jivi petsipaebijava Jesús pelivaisi judíovi penacaetuatabibonëjava. Saulo jivi itsa tsipaebapona Jesús pelivaisi, jumai tsaponae.

—Pepacuene raja Dioso pexënato Jesús, jai tsaponae Saulo.

<sup>21</sup> Nexata daxita pamonaе jumetane Saulo petsipaebilivaisi, jamatabëcuenen-abenajaca. Najumaitsi bajarapamonae Saulo yabara:

—Mara ponëje bejiohiaexanapona Jerusalén tomaratalia daxita pamonaе jumecovënëta Jesús pelivaisi. Icatsia picani pata mapatomaraberenaje petaicaenexa daxita pamonaе jumecovënëta Jesús pelivaisi. Nexata itsa taica, pecaponaenexa picani Jerusalén tomarabelia, sacerdotevi penamatacaitorobivijavabelia, najai bajarapamonae Saulo yabara.

<sup>22</sup> Itsiata Saulo ajumejunavijibia bitso asaëyata tsipaebapona Jesús pelivaisi. Nexata Saulo xaniavaetsia jivi yapëtaeyaexana xaniajai Jesús Dioso pitorobinëtsitsica jivi pecapanepaenexa. Nexata judíovi Damasco tomarata penaevi moya. Apo yapëtae pacuenia jumecanaviatsijitsiatsi Saulo.

### **Pacuenia Saulo vecuapanepa judíovi yabara pelivaisi**

<sup>23</sup> Saulo Damasco tomarata petaxuubicujinae Jesús pelivaisi jivi petsipaebaponaеjava, bexëjavabelia judíovi sivanajamatabëcueneyanabatsi pebeyaxu-abinexatsi Saulo. <sup>24</sup> Nexata caematacabi canacujitsia, caemeravi canacujitsia ata, Saulo judíovi vajënaeetabiabatsi pebeyaxuabinexatsi picani. Pabaupaxaneto-javalia jivi pitsapabiaba Damasco tomaravelia penaropobivi, bajarapabaupaxaneto muxuneneta Saulo judíovi vajënaeetabiabatsi pebeyaxuabinexatsi picani. Itsiata Saulo nayalivaisiajumetane judíovi pebeyaxuabiapaebijavatsi. Bajaraxu-ata Saulo bajarapabaupaxanetojavalia apo pitsapaëlia. <sup>25</sup> Damascotomara mata-toyorotsia yacaranata piatayaëibopanaxanetota. Bajarapayacaranatsijavaxaneto athëbëabetsia apia, pacuenia pinijinaejavaxaneto apia. Bajarapayacaranatsijavaxaneto ibopananë mataropotsia catsanaeya farata. Nexata Dioso pejumecovënëtsivi, Saulo pepënaponaevitsi, itsa baja meravi, Saulo ecaeyaexanatsi bemapirecuenia pexanaejavaxanetoënëta. Nexata Damasco tomara matatoyorotsia peyacaranatsiibopanaxaneto yenepanata athëbëyo perucaeventanavojotualia, Saulo yacoparecatsi irabereca Damasco tomarapënëyabelia. Bajarapacuenia Saulo Damasco tomarata judíovivecua panepa pebeyaxuabiyavatsi.

### **Pacuenia Saulo Jerusalén tomarata copiapitatsi yabara pelivaisi**

<sup>26</sup> Saulo itsa patajopa Jerusalén tomarata, Saulo picani jitsipa penaponaponaеjava Jesús pelivaisi pejumecovënëtsivijavata. Itsiata daxita bajarapamonae Saulo cujunavatsi. Tsipaji apo jumexaniataetsi Saulo pejumecovënëtsijava Jesús pelivaisi. <sup>27</sup> It-

siata Bernabé barëlia apóstolevijavabelia apóstolevi peyapëtaenexatsi Saulo. Nexata Bernabé tsipaeba apóstolevijavabelia pacuenia Saulo namutua penajetarucaejavata tane Jesús bemajitsinaebota. Pacuenia ata Saulo Jesús barëcuaicuaijaisi, Bernabé tsipaeba apóstolevijavabelia. Pacuenia ata Saulo ajumejunavijibia tsipaebapona Damasco tomarata Jesús pelivaisi, Bernabé tsipaeba apóstolevijavabelia. <sup>28</sup> Nexata baja Saulo ponapona Jerusalén tomarata. Naponapona apóstolevijavata. <sup>29</sup> Saulo tsipaebapona ajumejunavijibia Jesús pelivaisi. Saulo barëcuaicuaijai tsabiabi judíovi, griegojume penatsipaebivi. Barënajumenotabiaba bajarapamonae. Itsiata baitsi jane bajarapamonae najamatabëxaina pacuenia beyaxuabijitsi Saulo. <sup>30</sup> Jesús pelivaisi pejumecovënëtsivi, jumetane Saulo pebeyaxuabiapaebijavatsi. Nexata Jesús pelivaisi pejumecovënëtsivi, Saulo pënaxuabatsi Cesarea tomarabelia. Bajarajotacujinae Saulo itorobatsi pevajënaeyabelia penajetarucaenexa pepatsinexa Tarso tomarabelia.

<sup>31</sup> Bajaraxuacujinae nexata daxitajava, itsaxuayo Jesús pelivaisi pejumecovënëtsivi jinavanapa, xaniavaetsia baja jinavanapa. Copabatsi baja pebejiobiaexanabibijavatsi. Nexata Judea nacuata, Galilea nacuata ata, Samaria nacuata ata, Jesús pelivaisi pejumecovënëtsivi caebitsaëto canacujitsia xaniavaetsia jinavanapa. Nexata daxita jamatabëcuenevitsabapona Jesús pelivaisi pejumecovënëtsijava. Bajarapamonae xaniavaetsia jumecovënëtavanapa Jesús pelivaisi pibisiacuene pexanaeyaniva. Espíritu Santo yavenonaponatsi. Nexata itsamonae ata Jesús pelivaisi apo pejumecovënëtsivimi, ayaiBITSaëtoXaneto jumecovënëtapona Jesús pelivaisi.

### **Pacuenia Jesucristo pejamatabëcueneta Pedro jamatejemayaexana Eneasvënënë yabara pelivaisi**

<sup>32</sup> Pedro najetaruca daxitatomaranëjava pesivaxainanexa Dioso pejumecovënëtsivi. Nexata najetaruca Lida tomarajava ata pesivaxainanexa Lida tomarata pejinavanapaevi, Dioso pejumecovënëtsivi. <sup>33</sup> Nexata Pedro Lida tomarata taeyabuta Eneasvënënë. Bajaraponë ocho pavaibeje xaina camata pebocaecujinae. Tsipaji tabusipacuenabatsi. <sup>34</sup> Pedro nexata jumaisi bajaraponëjavabelia:

—Eneas, cajamatejemayaexana rabaja Jesucristo. Nonotapunare. Xanebare nijacama, jai Pedro.

Nexata Eneas bajarajota nonotapuna. <sup>35</sup> Nexata daxita Lida tomarapijivi, Sarón nacuapijivi ata, tanetsi Eneas pejamatejemajava. Bajarapamonae nexata pijaperujamatabëcuene pecatsitecaejavami, copaba baja. Najamatabëcuenecopaba baja Jesucristojavabelia.

### **Pacuenia Pedro Dorcasvënëva petëpaecujinae icatsia asaëyaexana yabara pelivaisi**

<sup>36</sup> Jope tomarata ponapona Dioso pejumecovënëtsiva, Tabitavënëva. Bajarpova pevënë griegojumeta Dorcas. Dorcas daxita matabi canacujitsia pexaniacuene toexanabiaba itsamonaejavabelia. Bepejiobivijavabelia rajutabiaba penamatavenonaejavaxi bajarapacuenia peyavenonaenexa. <sup>37</sup> Pamatabi Pedro ponapona Lida tomarata, Dorcas avitane Jope tomarata. Nexata baja Dorcas tëpa Jope tomarata. Peperabëquitsicujinaetsi petëpaeva buatatsi anijairabeje pexainaebo ënëtuatuajëta. Athëbëyo pairatsia, bajarapaënëtuatuajëtatsia buatatsi. <sup>38</sup> Jopetomara eca imoxoyo Lida tomaravecua. Dioso pejumecovënëtsivi vënëli-



vaisitanetsi Pedro peponaponaejava Lida tomarata. Nexata Dioso pejumecovënëtsivi itoroba anijanëbeje pejumaitsinexabeje Pedrojavabelia: “Pedro, naxanitsia. Liamëre Jope tomarabelia,” pejainexabeje Pedrojavabelia. Nexata bajaraponëbeje Lida tomarabelia sivaliabeje Pedro.

<sup>39</sup>Nexata Pedro narena bajaraponëbeje pepëta. Pedro itsa napata pabota petëpaeva boca, tsitajëtatsi itsajota petëpaeva boca. Nexata pamonajivi pevecutëpaevanëtsi, Dorcaspijiva pevënuvitsi, Pedro matatoyorotsia itaxutuanuenubenatsi. Bajarapamonae Pedro tsitajëbatsi Dorcaspijiva pejorocaejevanë, penaxatabijavanë, penajumaacabipananë ata, xuanë Dorcaspijiva rajuta bajarapamonaejavabelia pamatacabi abaxë asaë tsaponapona. <sup>40</sup>Nexata paënëtuatuajëta petëpaeva boca, bajarpaënëtuatuajëvecua Pedro daxita bajarapamonae pitsapaeyaexana. Bajarapamonae itsa pitsapalia, Pedro pematatababëta nuca pevajëtsinexa Diosojavabelia. Nexata Pedro pevajëtsicujinae Diosojavabelia, napënëyorota petëpaevajavabelia. Pedro jumaitsi petëpaevajavabelia:

—Tabita, nonotapunare, jai Pedro.

Nexata petëpaevami naëcota. Itsa tanetsi Pedro, bajarapova namatacota. <sup>41</sup>Pedro nexata bajarapova cobevaetabiaya nonotapunaeyaexana. Nexata Pedro junarena daxita Dioso pejumecovënëtsivi, pamonajivi pevecutëpaevanëtsi ata. Nexata tsitajëta bajarapamonaejavabelia petëpaevami icatsia piasaëjava. <sup>42</sup>Nexata Dioso pesaëta bajarapapiniijucue Pedro pexanaejava, daxita Jope tomarapijivi yapë-tane. Nexata jivibitsaëtoxaneto jumecovënëta Jesús Dioso pexënatocuene. <sup>43</sup>Nexata Pedro bajayajebi ponapona Jope tomarata. Simón bacabocotonë peyacueyacuëcaeyaexanaenë, pijabota Pedro naponapona.

### Pacuenia Pedro barëcuacuajai Corneliovënënë yabara pelivaisi

**10** Cesarea tomarata ponapona Corneliovënënë. Apo judfönë. Bajaraponë Italia nacuaverena pepatsivi vajabitsaëvi pijacapitán. <sup>2</sup>Cornelio pijabopijivi barëjumecovënëta ponapona Dioso. Dioso bitso yayiataeya Cornelio ponapona. Cornelio palata ayaijava rajutabiaba judfövi javabelia peyavenonaenexa judfövi bepejiovivi. Cornelio vajëtabiaba Diosojavabelia. <sup>3</sup>Itsamatacabi caniviyopatota, bejamatabëcuene a las tres, Cornelio bemajitsinaebota tane Dioso pijaängel pejonejavarena pijaboyarena. Nexata junataxuabatsi.

—¡Cornelio! jaitsi.

<sup>4</sup>Cornelio nexata naëcota ángeljavabelia. Bitso cjunava. Nexata Cornelio jumaitsi ángeljavabelia:

—¿Detsa xua jitsipame? jai.

Nexata ángel jumaitsi:

—Nevajëtabijava Diosojavabelia, nerajutabijava ata penamatavenonaecue bepejiovivijavabelia, daxita bajaraxua Dioso tsitaxanapanatsi. Dioso nexata apo nacofënëtsi bajaraxua. <sup>5</sup>Itorobare nijajivi Jope tomarabelia pecatojunatsinexa Simón, ponë itsavënë vënërubatsi, Pedro. <sup>6</sup>Bajaraponë Simón naponapona Jope tomarata, itsanë Simón, bacabocotonë peyacueyacuëcaeyaexanaenë, pijabota. Bajaraponë Simón pijabo eca manuamene itapata. Nexata Simón, ponë itsavënë vënërubatsi, Pedro, itsa patsiarena, catsipaebiana pacuenia exanaejitsiamë, jai ángel Corneliojavabelia bemajitsinaebota.

<sup>7</sup> Bajarapacuenia ángel bemajitsinaebota pejumaitsicujinae Corneliojavabelia, ángel baja pona. Nexata Cornelio junata anijanēbeje pijabota petonacuenebaponapon-aenētsibeje. Pematatsēnēa junata caenē vajabitsaēnē. Bajaraponē vajabitsaēnē Dioso peyaiyataenē. Bajaraponē Cornelio yavenonabiabatsi. <sup>8</sup> Nexata Cornelio copiata tsi-paeba bajarapamonaevajabelia daxita pacuenia tsipaebatsi ángel. Bajaraxuacujinae Cornelio itoroba bajarapamonae peponaenexa jane baja Jope tomarabelia, Simón pesivaponaenexa. Nexata baja bajarapamonae naropoba.

<sup>9</sup> Meravia pitsijavata, matonejeepatota, bajarapamonae Jope tomara imoxoyotanajetarubena. Bajara pijinia paepatota Pedro pabota naponapona, bajarapabo jumabetsia junaya. Bajarapabo pejumanamatajēpaebo. Pedro junaya bajarapabojumatatsia pevajētsinexa Diosojavabelia. <sup>10</sup> Pedro bitso piajani. Jamatabēnabane picani. Itsiata pexaejava pexanaevi abaxē apo veretsi pexaejava. Nexata Pedro bemajitsinaebota tane. <sup>11</sup> Pedro tane itaboxo penapatsijava. Nexata athēbēvetsica runaica irabetsica ayaipanaxaneto, besábanapanaxaneto. Bajarapapanaxaneto cuatro pamaētotabeje namataenetsia upicēta. Bajarapacuenia yamaēya copatsica. <sup>12</sup> Bajarapapanaxaneto tuatuajēta nubena daxitacueneviria. Nubena daxitaviria cuatro pataxutabeje pejinavanapaevi. Bobena daxitaviria pecotobēxēta pejinavanapaevi. Nubena daxitaviria pepunaevi. <sup>13</sup> Nexata Pedro jumetane athēbēvetsica pejumaitsi- java: “Pedro, nonotapunare. Beyaxuare daxita mapamonaeye nexaenexa,” pejajjava athēbēvetsica, Pedro jumetane.

<sup>14</sup> Nexata Pedro jumaitsi:

—Jume raja. Caeto ata raja xanē apo xanē bajarapavirianēxi tanejamatabēcuenebijianaeyaniva. Tsipaji Dioso Moiséspijinēta patanetonajumecopatsilivaisi, paneitaveta bajarapavirianēxi pataxaeyaniva, jai Pedro.

<sup>15</sup> Icatsia athēbēvetsica jumaitsi Pedrojavabelia:

—Pavirianēxi caitorobatsi nexaenexa, xaema. Pētsa jumaitsimē: “Apo xanē raja bajarapavirianēxi tanejamatabēcuenebijianaeyaniva,” jamē pētsa, jai athēbēvetsica.

<sup>16</sup> Acueyabi xuabeje bajarapacuenia athēbēvetsica napēna jumaitsi Pedrojavabelia. Bajaraxuacujinae bajarapapanaxaneto athēbēabetsia baja icatsia yapēcaevaya. <sup>17</sup> Pedro nexata najamatabēxainaeja jamatabējumaitsi tsecae:

—¿Detsa meta pitsijamatabēcueneyabara netsitajēta bajaraxua? jamatabējai tsecae Pedro.

Pedro abaxē itsa najamatabēxaineca bajarapacuenia, Cornelio pijajivi pata. Pabota Pedro naponapona, bajarapabo matatoyorotsia yacaranata ibopanaxanetonē mataropotsia pefaratsijavaxanetota. Nexata bajarapayacaranatsijavaxaneto baupa muxuneneta nubena bajarapamonae. Bajarapamonae namutuarena yanijobanajetarubena jivijavabelia peyapētaenexa itsajota eca Simón, bacabocotonē peyacueyacuecaeyaxanaenē, pijabo. <sup>18</sup> Nexata bajarapamonae pepatarēcēpaecujinae, baupa pēnēvelia ayajumeta yanijoba. Jumaitsi:

—¿Baja tsa mapabota Simón naponaponaje, ponē vēnērübatsi itsavēnē, Pedro? jai bajarapamonae.

<sup>19</sup> Pedro abaxē bojumatatsia athēbēyo najamatabēxainecaya bemajitsinaebota petaejava yabara. Nexata Espíritu Santo jumaitsi Pedrojavabelia:

—Taema. Acueyabi ponēbeje casivaparena. <sup>20</sup> Nexata nonotapunare. Runaremeca baja nenaponaenexa bajarapamonae pepēta. Jamatejema saya ajamatabēcuenecov-

ëbia naponae name. Tsipaji raja xanë itorobarenajë bajarapamonae, jai Espiritu Santo Pedrojavabelia.

<sup>21</sup> Nexata baja Pedro runareca Cornelio pijajivijavabereca. Pedro jumaitsi bajarapamonaejavabelia:

—Ponë pajaitame, xanë rabaja maje. ¿Detsa xuajitsia panesivaparemena? jai Pedro.

<sup>22</sup> Nexata Cornelio pijajivi jumaitsi Pedrojavabelia:

—Vajabitsaëvi raja pijacapitán Cornelio pejamatabëcuene panajetarubenajë. Bajaraponë pexaniajamatabëcuenenë. Dioso bitso pejumecovënëtsinë. Nexata bajaraponë Diosojavabelia vajëcabiaba. Daxita judíovi yayiatanetsi. Nexata judíovi jumai tsabiabi bajaraponë yabara: “Pexaniajamatabëcuenenë raja Cornelio,” jai tsabiabi. Dioso raja pijaángel itorobatsi Cornelio pecajunatsinexa. Bajaraxuata paxanë pacasivaponarenatsi Cornelio pijaboyabelia nenaponae nexa. Cornelio cajumetaejitsia pali vaisi tsipaebijitsiamë bajaraponëjavabelia, jai Cornelio pijajivi Pedrojavabelia.

<sup>23</sup> Nexata Pedro copiapita boyaberena pejonenexa bajarapamonae. Bajarapamonae abaxë namajita bajarapabota. Bajayacunua jane baja Pedro naponae bajarapamonae pepëta. Pedro pëyanatatsi itsamonae Jope tomarapijivi, Dioso pejumecovënëtsivi. Itsiata abaxë bajarapamatacabi apo patsilia. Epatua abaxë majitaothopa.

<sup>24</sup> Nexata meravia pitsijavata Pedrojana jane baja palia Cesarea tomarabelia. Cornelio nexata pijabota yajavanuca pejunatsivi, pijamonaeviriavi. Yajavanucanua itsamonae, pamonae bitso Cornelio peyapëtaevitsi. Pedro jane baja barëvajënaeevetanucatsi. <sup>25</sup> Pedro itsa patanajetaruca Cornelio pijabopanabota, Cornelio copiapitatsi. Nexata Cornelio pematabacabëta nucajunua Pedro pitabarata. Tsipaji bitso yayiyataeya copiapitsijitsia picani. <sup>26</sup> Nexata Pedro apo jitsipae bajarapacuenia bitso yayiyataeya pecopiapitsijavatsi. Nexata Pedro maxëvaetaba. Nonotapunaeyaexana. Nexata Pedro jumaitsi Corneliojavabelia:

—Nonotapunare. Tsipaji saya pacuenia xamë jamatabëcueneitsimë, bajara saya xanë ata jamatabëcueneitsinë, jai Pedro.

<sup>27</sup> Nexata Pedro Cornelio barëcuaicuajjai tsanucaponae panabojavarena. Pedro itsa najoneya Cornelio pijaboyalia, tane jivibitsaëtoxaneto Cornelio pijabota penacaetuatsivi. <sup>28</sup> Nexata Pedro jumaitsi Cornelio pijabota penacaetuatsivijavabelia:

—Paxamë baja cajena xaniavaetsia payapëtaneme mapacuenije. Paxanë pajudíovinë patajasalinaivimi apo panetocopatsi patayajavajinavanapaenexa apo judíovi. Bijiaya pataeyabiabajë apo judíovi. Apo panetocopatsinua patajonenexa apo judíovi pijaboyalia. Itsiata baitsi jane aeconoxaeta baja Dioso nitaveta tacopatsinexa baja bajarapajamatabëcuene. Nexata Dioso netocopata tayajavaponaponae nexa apo judíovi ata. Netocopatanua tanajonenexa apo judíovi ata pijaboyalia. <sup>29</sup> Bajaraxuata itsa nejunata taponae nexa maberenaje, narenanë bepíjia ajamatabëcuene covëbia. Nexata jamatabëyapëtaniji xua yabara panejunatame, jai Pedro Cornelio pijabota penacaetuatsivijavabelia.

<sup>30</sup> Nexata bajarajota Cornelio jumaitsi Pedrojavabelia:

—Xanë imata, caniviyopatota, bejamatabëcuene a las tres, vajëtajë Diosojavabelia. Nexata bajarapaepatota jemata taitabarata netsitanaitajëta ángel. Ajena baja cuatro pamatacabibeje xaina bajarapacuenie tataecujinae. Angel penaxatatsijava nivenivena. <sup>31</sup> Nexata ángel nejumaitsi: “Cornelio, Dioso rabaja cajumetane nevajëtsijava. Yapëthane baja nerajutabiabijava bepejiobivijavabelia penamatavenonae-

cuene. <sup>32</sup>Nexata nijajivi itorobare Jope tomarajavabelia pecatojunatsinexa Simón, ponë vënërubatsi itsavënë, Pedro. Bajaraponë naponapona itsanë Simón, bacabocotonë peyacueyacuecaeyaexanaenë, pijabota. Bajaraponë Simón pijabo eca man-uamene itapata. Nexata Simón, ponë itsavënë vënërubatsi, Pedro, itsa patsiarena, catsipaebiana pacuenia exanaejitsiamë,” nejai ángel. <sup>33</sup>Bjaraxuata bepijiayo casivaponaeyaexanatsi. Xamë baja nexata pexaniajamatabëcuenia netopatame. Bjaraxuata nevajënae daxita paxanë panacaetuatajê Dioso pitabarata. Pacaevetatsi patacajumetaenexa daxita palivaisi Dioso caitoroba patanetsipaebinxamë, jai Cornelio Pedrojavabelia.

### **Pacuenia Pedro livaisi tsipaeba Cornelio pijabota yabara pelivaisi**

<sup>34</sup>Pedro jane baja taxuxuaba livaisi petsipaebijava. Jumaitsi:

—Matapania rajane baja yapëtaniji. Najëpaeya tsaena Dioso nacajitsipa daxitaviriavitsi. <sup>35</sup>Caenacuapijivi canacujitsia, pamonaë Dioso yaiyataeyajinavanapa, jumecovënëtsiajinavanapanua pacuenia Dioso itorobatsi, bajarapamonaë Dioso jitsipa. <sup>36</sup>Dioso cajena pexanialivaisi, Jesucristo pelivaisi, tonajumecopata Israel nacuapijivijavabelia. Nexata bajarapalivaisi tsipaebatsi Israel nacuapijivi pibisiacuene pexanaeconivecua Jesucristo pejamatabëcueneta pecapanepaenexatsi Dioso. Jesucristo raja daxitajivi pijatuxanenë. <sup>37</sup>Payapëtaneme rabaja mapacueneje. Juanpijinë jivibautisabinëmi jivi livaisi petsipaebanajetarucaecujinae, pebautisabaponaecujinaenua, Jesús cotocaevi tsipaebanajetaruca Galilea nacujava, Judea nacujava ata. <sup>38</sup>Payapëtaneme rabaja mapacueneje. Jesús, Nazaret tomarapijinë, Dioso rajuta Espíritu Santo. Nexata Espíritu Santo pejamatabëcueneta Jesús caëjëpatsi daxitacuene pexanaenexa. Nexata Jesús jamatejemayaexanapona daxita pamonaë dovathi pejamatabëcueneta avitane. Bjarapacuenia Jesús exanapona tsipaji Dioso yajavaponaponatsi. <sup>39</sup>Paxanë baja cajena pataniji daxita xua Jesús exanapona Judea nacuata, Jerusalén tomarata ata. Itsamonae beyaxuabatsi Jesús. Cobematabiabarutatsi cruzajavabelia. <sup>40</sup>Itsiata baitsi jane Jesús pemëthëtsicujinaetsi, acueyabi matabacaba, Dioso icatsia asaëyaexanatsi. Dioso Jesús caëjëpaeyaexanatsi patanetsitanaitajëtabiabinexa paxanëjavaberena. <sup>41</sup>Itsiata Jesús apo tsitanaitajëtsi daxitajivijavabelia. Èpaxanëjavaberena saya panetsitanaitajëtabiaba. Tajëvelia baja cajena Dioso paneitapeta patataevinexa Jesús petëpaecujinae icatsia itsa asaë. Bjaraxuata Jesús petëpaecujinae icatsia itsa asaë, panetsitanaitajëtabiaba. Nexata panebarë nabane. Panebarëmatavëjëapanua. <sup>42</sup>Nexata Jesús paneitoroba patatsipaebaponaenexa daxitajivijavabelia pexanialivaisi, Jesús pelivaisi. Paneitorobanua patatsipaebaponaenexa Dioso pejamatabëcueneta itsamatacabi Jesús penaneconitsiaexanaejavanexa daxita pijaneconi pexainaevi. Itsamatacabi Jesús naneconitsiaexanaena piasevi, petëpaevimi ata. <sup>43</sup>Athëbëvetsica Jesús pepatsivajënaetsica, bajayata jinavanapa Diosojumepaebivimi profetavi. Nexata profetavimi tajëvelia vajunupaebapona Jesús pejamatabëcueneta Dioso pevecuajibiaexanaejavanexa pibisiacuene pexanaeconimi, pajiviyo jumecovënëta Jesús pelivaisi, jai Pedro Cornelio pijabota penacaetuatsivijavabelia.

### **Pacuenia Espíritu Santo tsijamatabëjunuatsi apo judíovi ata yabara pelivaisi**

<sup>44</sup>Pedro abaxë livaisi petsipaebanucaejavata Corneliobanajavabelia, Espíritu Santo tsijamatabëjunuatsi daxita pamonaë jumetaeyena Pedro petsipaebilivaisi.

<sup>45</sup>Nexata judíovi Dioso pejumecovënëtsivi, Pedro peyajavapatsivi, itsa tane bajarapacue, jamatabëcuenenabenajacanubena. Jamatabëcuenenabenajaca tsipaji apo judíovi ata Espíritu Santo tsijamatabëjunuatsi. <sup>46</sup>Nexata Pedro peyajavapatsivi yapëtane Espíritu Santo petsijamatabëjonejavatsi Corneliobana. Tsipaji Corneliobana cuacuajjai itsaviriajumenëta, apo penatsipaebijumenëmi. Corneliobana jumai tsaponae Diosojavabelia:

—Diosomë, bitso ayaijamatabëcuenenëmë, jai tsaponae.

<sup>47</sup>Bajaraxuata Pedro jumaiti peyajavapatsivijavabelia:

—Pacuenia vaxaitsi Dioso nacarajuta Espíritu Santo, bajara pijinia pacuenia mapamonae ataje Dioso rajutatsi Espíritu Santo. Bajaraxuata itsajivi ata acuenebi pejumaitisijava bajarapamonae yabara: “Pëtsa mapamonaeje pabautisabame merata,” pejajjiva, jai Pedro.

<sup>48</sup>Nexata Jesucristo pevënëta Pedro bautisaba Corneliobana. Pedro pebautisabicujinae Corneliobana, asivatsi abaxë Pedro penaponaponanexa bajarajota caematacabibeje.

### **Pacuenia Pedro navajunupaeba Dioso pejumecovënëtsivijavabelia Jerusalén tomarata yabara pelivaisi**

**11** Apóstolevi vënëlivaisitane apo judíovi ata Corneliobana pejumecovënëtsijava Jesús pelivaisi. Judea nacuata pejinavanapaevi ata, pamonae jumecovënëta Jesús pelivaisi, vënëlivaisitane apo judíovi ata Corneliobana pejumecovënëtsijava Jesús pelivaisi. <sup>2</sup>Nexata pamatacabi Pedro pata Jerusalén tomarata, judíovi, pamonae jumecovënëta Jesús pelivaisi, jumaiti Pedrojavabelia:

<sup>3</sup>—¿Detsa xuajitsia Cesarea tomarata naponaponame apo judíovi pijabota? ¿Detsa xuajitsia nanabaneme apo judíovita? jai judíovi Pedrojavabelia.

<sup>4</sup>Nexata Pedro tsipaeba judíovijavabelia pacuenia taxuxuaba bajarapacue yabara. Pedro jumaiti judíovijavabelia:

<sup>5</sup>—Pamatacabi naponaponajë Jope tomarata Simón, bacabocotonë peyacuey-acuecaeyaexanaenë, pijabota, vajëtajë Diosojavabelia. Nexata Diosojavabelia tava-jëtsijavata bemajitsinaebota taniji athëbëvetsica perunaejavatsica ayaipanaxaneto, besábanapanaxaneto. Bajarapapanaxaneto cuatro pamaëtotabeje namataenetsia upicëta. Nexata bajarapapanaxaneto xanëjavabetsica yamaëya copatsica. <sup>6</sup>Itsa naitaxutobabatsia naëcotajë xaniavaetsia tataenexa xua yajavanajetaruca bajarapapanaxaneto tuatujëta, nexata taniji cuatro pataxutabeje pejinavanapaevi. Taniji unupijvinua, pianaeanaevi. Taniji pecotobëxëta pejinavanapaevinua. Taniji pepunaevinua. <sup>7</sup>Nexata jumetaniji athëbëvetsica tanejumaitisijava: “Pedro, nonotapunare. Beyaxuare daxita mapamonaeje nexaenexa,” nejai. <sup>8</sup>Nexata jumaitsinë: “Jume raja. Caeto ata raja xanë apo xaenë bajarapavirianëxi tanejamatatabëcuenebijianaeyaniva. Tsipaji Dioso Moiséspijinëta patanetonajumecopatsilivaisi, paneitaveta bajarapavirianëxi pataxaeyaniva,” janë. <sup>9</sup>Nexata athëbëvetsica icatsia nejumaiti: “Pavirianëxi caitorobatsi nexaenexa, xaema. Pëtsa jumaitsimë: ‘Apo xaenë raja bajarapavirianëxi tanejamatatabëcuenebijianaeyaniva,’ jamë pëtsa,” nejai athëbëvetsica. <sup>10</sup>Acueyabi xuabeje bajarapacuenia athëbëvetsica napëna nejumaiti. Bajaraxuacujinae bajarapapanaxaneto daxita bajarapamonae athëbëabetsia baja icatsia yapëcaevaya. <sup>11</sup>Bajarapaepatota jane baja acueyabi ponëbeje nesivapata pabota naponaponajë. Bajarapamonae itorobatsi Cesarea tomaraverena. <sup>12</sup>Nexata Espíritu Santo

nitoroba bajarapamonae pepëta ajamatabëcuenecovëbia tanaponaenexa Cesarea tomarabelia. Mapamonaeje vajamonae, seis ponëbeje Dioso pejumecovënëtsivi, nepëyanata Cesarea tomarabelia. Nexata panajoneyajë Cornelio, vajabitsaëvi pija-capitán, pijaboyalia. <sup>13</sup>Nexata Cornelio panetsipaeba pijabota petsitanaitajëtsijavatsi ángel. Angel pina jumaitsi Corneliojavabelia: “Itorobare nijajivi Jope tomara-belia pecatojunatsinexa Simón, ponë vënërubatsi itsavënë, Pedro. <sup>14</sup>Bajaraponë itsa patsiarena, catsipaebiana pacuenia exanaeitsiamë Dioso pecavecuajibiaex-anaenexa daxita pibisiacue nexanaeconimi, daxita nijabopijivi yajava,” jai pina ángel Corneliojavabelia. <sup>15</sup>Nexata jane baja itsa taxuxuabajë livaisi tatsipaebijava Corneliohanajavabelia, Espíritu Santo tsijamatabëpatsicatsi Corneliohana. Pacue-nia voxaitsi copiaya nacatsijamatabëpatsica Espíritu Santo, bajara pijinia pacuenia bajarapamonae ata tsijamatabëpatsicatsi Espíritu Santo. <sup>16</sup>Nexata najamatabënáp-itajë Jesús patanejumaitsijava mapacueniaje: “Juanpijinë raja jivi bautisabanaje-taruca émerata. Itsiata baitsi jane caematacabibejecujinae paxamë Dioso pacatsi-jamatabëjoneyaexanaena Espíritu Santo,” patanejajiva Jesús, najamatabënáp-itajë. <sup>17</sup>Xaniajai baja cajena. Dioso rajutapona Espíritu Santo apo judíovi ata pacuenia voxaitsi nacarajuta Espíritu Santo vajajumecovënëtsixae vajatuxanenë Jesucristo. Nexata acuenebi tacaranatsijava Dioso perajutsijava Espíritu Santo apo judíovi ata, jai Pedro judíovijavabelia, Jesús pelivaisi pejumecovënëtsivijavabelia.

<sup>18</sup>Nexata judíovi itsa jumetane bajarapacuenia Pedro pejumaitisijava, moya baja. Nexata judíovi jamatabëcuenegarëya Diosojavabelia. Nexata Dioso yabara jumaitsi: —Xaniajai rabaja. Dioso bajarapacuenia exana apo judíovi ata matakabi apo pevereverecejava pexainaenexa, itsa copaba pibisiacue pexanabiabijava penajamatabëcuenepënëyorotsinexa Diosojavabelia, jai judíovi.

### **Pacuenia Dioso pejumecovënëtsivi Antioquía tomarata jinavanapa yabara pelivaisi**

<sup>19</sup>Pamatakabi Estebanpijinë beyaxuabatsi, Dioso pejumecovënëtavanapaevi Jerusalén tomarata rëcëpeca daxitanacuanëjjava. Bajarapacuenia rëcëpeca tsipaji bitso bejiobiaexanaponatsi. Jesús pelivaisi pejumecovënëtsixae, itoyatsi. Itsamonae tajëbelia rëcëpeca Fenicia tomarabelia. Itsamonae rëcëpeca Chipre tunaetota pecaetomarabelia. Itsamonae rëcëpeca Antioquía tomarajavabelia. Nexata bajarapamonae Jesús pelivaisi tsipaebapona bajarapatomaranëjjava ëjudíovijavabelia. Itsavirivijavabelia apo tsipaebapona. <sup>20</sup>Itsamonae Jesús pelivaisi pejumecovënëtsivi, Chipre tunaetota pecaetomarapijivi, Cirene tomarapijivi ata, pona Antioquía tomarabelia. Bajarapamonae pijinia Antioquía tomarata apo judíovijavabelia tsipaebapona pexanialivaisi, Jesús pelivaisi. <sup>21</sup>Pamonae apo judíovijavabelia tsipaeba Jesús pelivaisi, Dioso yavenonatsi. Nexata apo judíovi ayaibitsaëtoخانeto jumecovënëta Jesús pelivaisi. Najamatabëcuenepënëyorota Diosojavabelia pibisiacue pexanabiabijavavecua.

<sup>22</sup>Jerusalén tomarata pejinavanapaevi, Jesús pelivaisi pejumecovënëtsivi, vënëlivaisitane apo judíovi ata Antioquía tomarapijivi Jesús pelivaisi pejumecovënëtsijava. Nexata bajarapamonae Bernabé itorobaliatsi Antioquía tomarabelia petaenexa apo judíovi ata Jesús pelivaisi pejumecovënëtsijava. <sup>23</sup>Nexata Bernabé itsa pata Antioquía tomarabelia, tane apo judíovi ata Dioso peyavenonaejavatsi. Nexata Bernabé sivajamatabëcuenegarëya apo judíovi ata. Nexata Bernabé muxujioba

apo judíovi ata daxita bajarapamonae pejamatabëethëtovetsina ajamatabëcuene-saëya peyajavajinavanapaenexa Dioso. <sup>24</sup> Bernabé bitso pexaniajamatabëcuenenë. Jamatabëcuenevënëca Espíritu Santo. Nexata exanabiaba Espíritu Santo pitoro-bicueniatsi. Dioso bitso pejumecovënëtsinë Bernabé. Bajaraxuata nexata jivibitsaë-toxaneto jumecovënëta Dioso.

<sup>25</sup> Bajaraxuacujinae Bernabé baja pona Tarso tomarabelia pejaitsinexa Saulo. Nexata baja Bernabé itsa caxitajaraba Saulo, barërena Saulo Antioquía tomaraberenä. <sup>26</sup> Nexata Antioquía tomarata caevai naponaponabeje Dioso pejumecovënëtsivijavata. Jivi ayaibitsaëtoxaneto livaisi tsipaebabiababeje. Antioquía tomarata daxita pamonae Jesús pelivaisi jumecovënëttavanapa, bajarapamonae pijatomarapíjivi pepo copiava jane baja vënërubatsi Cristianovi.

<sup>27</sup> Pamatacabi abaxë Bernabébeje Saulobeje ponaponabeje Antioquía tomarata, Diosojumepaebivi profetavi, Jerusalén tomaraverena penaropobivi, pata Antioquía tomarata. <sup>28</sup> Bajarapapofetavijavuvënënë pevënë Agabo. Nexata Agabo nonotapuna Dioso pejumecovënëtsivi penacaetuatsijavata. Nexata Agabo tajëvelia vajunupaeba ayaijaniboxaneto pecopiapatsijavanexa tajëvelia Espíritu Santo peyapëtaeyaexanaexaetsi. Agabo jumaitsi mapacueniaje:

—Ayaijaniboxaneto raja copiapatsiana daxitanacuanëjjava, jai tajëvelia Agabo.

Bajarapajaniboxaneto bexëa copiapata Agabo pejumaitsicuenia pamatacabi nacuaevetsinë Claudio evetaponapona Romanonacua. <sup>29</sup> Bajaraxuata cajena jani-bovajënaeya, Antioquía tomarapíjivi daxita Dioso pejumecovënëtsivi najamatabëcuenejëpa peyavenonaenexa Judea nacuapíjivi Dioso pejumecovënëtsivi. Nexata Antioquía tomarapíjivi, caenë canacujitsia, najamatabëcuenevereta Judea nacuapíjivijavabelia perajutsinexa palata pacuenia cuenecaëjëpatsi. <sup>30</sup> Nexata baja Antioquía tomarapíjivi itsa tocaetuatsivereta, bajarapamonae itorobatsibeje Bernabébeje Saulobeje petocaponaenexabeje bajarapapalata Judea nacuapíjivijavabelia, Dioso pejumecovënëtsivi pijaancianovijavabelia. Nexata ancianovi petsicobet-sanaenexa bepejiobivijavabelia.

### Pacuenia Pedro etatsi penaneconitsivi pejebabiabibota yabara pelivaisi

**12** Nacuaevetsinë Herodes bejiobiaexanapona Jesús pelivaisi pejumecovënëtsivi. <sup>2</sup> Herodes pijajivi itoroba espadata pebeyaxuabinexatsi Santiago, Juan pematapíjinëmi. <sup>3</sup> Herodes itsa tane judíovi petsitaxanepanaejavatsi Santiago pebeyaxuabijavatsi, nexata icatsia Herodes itoroba pijajivi Pedro pevaetabínexatsi. Bajarapacuenia Herodes exana fiestamatacabi, pafiestamatacabi judíovi baxane levadurata matajërëabinejeva pexanaepan. <sup>4</sup> Pedro pevaetabicujinaetsi, penaneconitsivi pejebabiabibota etatsi. Bajarapabota cuatro pabitsaëtobeje vajabitsaëvi Pedro nacobenaevetabiabatsi. Itsabitsaëto itsa pitsapa, juya itsabitsaëto evetabiabatsi. Caebitsaëtota jinavanapa vajabitsaëvi cuatro ponëbeje tsaponae. Nexata picani Herodes najamatabëxaina Pedro penutsinexatsi daxita judíovi pitabarata pascuavënëfiesta pevereverecaecujinae. <sup>5</sup> Nexata Pedro eca penaneconitsivi pejebabiabibota. Vajabitsaë xaniavaetsia Pedro yabaupaevetabiabatsi bajarapabovecua Pedro pepitsapaeyaniva. Itsiata baitsi jane daxita Dioso pejumecovënëtsivi, asaëyata Diosojavabelia tovajëtaponatsi Pedro.

**Pacuenia Dioso pejamatabëcueneta Pedro capanepatsi  
penaneconitsivi pejebabiabibovecua yabara pelivaisi**

<sup>6</sup>Pamatacabi picani Herodes Pedro nutsijitsiatsi daxita judíovi pitabarata, bajarapamatacabivajënaeya pameravi, penaneconitsivi pejebabiabibo ënëtuatuajëta Pedro majitanuca anijanëbeje vajabitsaënëbeje, pevetsinëtsibeje, petuatuajëta. Vajabitsaënëbeje Pedro yamaëcabocatsibeje anijacadenamaëtotabeje. Itsanëbeje pijinia yabaupaevetatsi. <sup>7</sup>Jemata Dioso pijaängel naitajëta Pedrojavata. Nexata penaneconitsivi pejebabiabibo ënëtuatuajëta naitayota. Pedro pemajitanucaenë ángel yenejayatabatsi Pedro penaëcotsinexa. Angel jumaitsi Pedrojavabelia:

—Naxanitsiayo nonotapunare, jai ángel.

Nexata Pedro pecobecëscadenamaëtotsibeje vecobejoparecatsi baja. <sup>8</sup>Nexata icatsia ángel jumaitsi Pedrojavabelia:

—Nijacorrea xaniavaetsia naepacatarërëre. Nataxuxatare baja nijazapato, jai ángel.

Pedro nexata xaniavaetsia naepacatarërëtaxuaba pijacorrea. Nataxuxatataxuaba pijazapato. Nexata icatsia ángel jumaitsi:

—Naxatare nijacamisajumavelia nenaxatatabijava. Nepënaponare, jai ángel Pedrojavabelia.

<sup>9</sup>Pedro nexata napona ángel pepëta. Itsiata Pedro xaniavaetsia apo najamatabëcueneyapëtae. Nexata Pedro xaniavaetsia apo yapëtae pepacuene ángel pebarëponaejavatsi. Nexata saya Pedro jamatabëjumaitsi:

—Amajitsinaenë meta, jamatabëjai.

<sup>10</sup>Itsiata baitsi jane xenetsiabeje penamataxainae ënëtuatuajëtareca peyabau-paevetecaevajabitsaënëtsi. Icatsia xenetabeje pecotocaevi ënëtuatuajëtatsina peyabaupaevetecaevajabitsaënëtsi. Bajaraxuacujinae pepitsapaenexabeje callejavabelia, nucojopabeje pepo baupaxanetojavata jane baja. Bajarapabaupaxaneto hierrobaupaxaneto. Nexata bajarapabaupaxaneto tonabaupatatsibeje pijacuata. Pitsatabaliabeje jane baja callejavabelia. Nexata callejavareca penajetarucaejavatabeje, ángel jemata ajibi tsojopae. <sup>11</sup>Pedro jane baja xaniavaetsia najamatabëcueneyapëtane. Nexata Pedro jamatabëjumaitsi:

—Baja rajane matapania aeconoxae xaniavaetsia najamatabëcueneyapëtaniji. Dioso tsaena itorobica pijaängel tanecapanepaenexa Herodes pecobevecua. Nexata baja judíovi apo netae tsane Herodes pijajivi tanebeyaxuabijava, jamatabëjai Pedro.

<sup>12</sup>Pedro najamatabëxaina pacuenia exanaejitsia. Nexata lia María pijaboyabelia. Bajarapova María, Juan pena, ponë vënërubatsi itsavënë, Marcos. María pijabota ayaiBITSaëtoXaneto Dioso pejumecovënëtsivi nacaetuata Diosojavabelia petovajëcaenexatsi Pedro. <sup>13</sup>María pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa, Pedro docodocota petobaupatsinexatsi. Nexata bajarapabota penacuenebivayo, Rode, pitsaparena petaenexa ponë baupa docodocotanunuca. <sup>14</sup>Nexata Rode itsa jumeyapëtane Pedrocuene, nexata abaxë apo tobaupatsi. Rode cujinaelia boyabelia pejamatabëcuenebarëyatsajonexae. Nexata Rode tsipaeba María pijabota penacaet-uatsivijavabelia. Jumaitsi:

—¡Pedro rajane baja nucalia baupa pënëverena! jai Rode.

<sup>15</sup>Nexata bajarapamonae jumaitsi:



—¡Camatajemaba raja saya! jai.

Itsiata icatsia Rode jumaitsi:

—¡Xaniajanë raja pepacuene! Pedro raja nualia baupa pënëverena, jai Rode.

Bajaramonae nexata jumaitsi:

—Apo Pedro raeta. Pevetsiángeltsi raeta, jai bajaramonae.

<sup>16</sup>Nexata bajaramonae pecuaicuaijajavata, Pedro tsiteca baupa docodocotanunua. Nexata jane baja bajaramonae tobaupata Pedro pejonexarena. Bajaramonae ita tanetsi Pedro, bajaramonae jamatabëcuenenajunaviaca. <sup>17</sup>Nexata Pedro nacobeyota bajaramonae pemoyanexa. Pedro tsipaeba pacuenia Dioso pejamatabëcueneta capanepatsi penaneconitsivi pejebabiabibovecua. Pedro jumaitsi:

—Patsipaebianame mapalivaisije Santiagojavabelia. Patsipaebianame itsamonaejavabelia ata, Dioso pejumecovënëtsivijavabelia, jai Pedro.

Bajaraxuacujinae Pedro pitsapalia. Itsajavabelia icatsia pona.

<sup>18</sup>Itsa baja matabi tsina, vajabitsaëvi, pamonae Pedro evetabiabatsi pananeconitsivi pejebabiabibota, bitso jamatabëcuenebëjai. Tsipaji bajaramonae apo yapëtae itsabelia Pedro pona. <sup>19</sup>Nexata Herodes itoroba bajaramonae pejaitsinexatsi Pedro. Itsiata bajaramonae Pedro apo caxitajarabitsi. Nexata picani Herodes xaniavaetsia yanijoba pamonae Pedro evetabiabatsi penaneconitsivi pejebabiabibota. Nexata baja bajaramonae Pedro pevecuapanepaexae, Herodes anaepana. Nexata Herodes itsamonae vajabitsaëvi itoroba bajaramonae pebeyejebinxatsi Pedro bajaramonae pevecuapanepaexae. Nexata baja beyejebatsi. Bajaraxuacujinae nacuaevevtsinë Herodes Judea nacuaevecua pona. Pona Cesarea tomarabelia peponaponaenexa Cesarea tomarata.

### **Pacuenia tëpa nacuaevevtsinë Herodes yabara pelivaisi**

<sup>20</sup>Nacuaevevtsinë Herodes ita ponapona Cesarea tomarata, baraanaepana bitso Tiro tomarapijivijavabelia, Sidón tomarapijivijavabelia ata. Nexata Herodes pebaraanaepanaexae, bajara patomarabejepijivijavabelia copatsiaexana pexaejava petocaponabiabijava bajara patomarabejepijivijavabelia. Nexata bajarapatomarabejepijivi sivanajamatabëcueneyanaba xaniavaetsia pebarëcuaicuaijainexa nacuaevevtsinë Herodesjavabelia. Tsipaji bajarapatomarabejepijivi jitsipa icatsia pexaejava petocapatabiabinexatsi pijatomarabejevaberena Herodes pevetsinacujavaverena. Nacuaevevtsinë Herodes pijabo petoevtsinëtsi pevënë Blasto. Nexata Tiro tomarapijivibeje Sidón tomarapijivibeje copiaya cuaicuaijai Blastojavabelia Blasto pexaniajamatabëcuene petoxainaenexa petocuaicuaijainexa Herodesjavabelia. Nexata Blasto jejai. Tocuaicuaijai Herodesjavabelia Herodes icatsia pebarajamatabëxanepanaenexa bajara patomarabejepijivijavabelia. <sup>21</sup>Nexata Herodes tocaëjëta pamatacabi patsijitsia bajarapatomarabejepijivi Herodes pijaboyabelia. Nexata pamatacabi Herodes tocaëjëta bajaramonae pepatsinexa, Herodes naitabëtsia naxatata nacuaevevtsinë penaxatatsicuenia. Nexata jane baja bajarapatomarabejepijivi pata pebarëcuaicuaijainexa Herodes. Nexata daxita bajarapamonae pitabarata nacuaevevtsinë peecaejavata, Herodes eca. Nexata Herodes xaniavaetsia barëcuaicuaijai bajara patomarabejepijivijavabelia. <sup>22</sup>Nexata bajarapatomarabejepijivi Herodes yabara pinijjumeta yamaxëitojorobiaya jumai tsaponae pebarajamatabëxanepanaenexatsi:

—¡Maponëje nacabarëcuaicuaijaije, apo jivitonë! ¡Diosonë tsaena! jai tsaponae bajarapatomarabejepijivi Herodes yabara.

<sup>23</sup> Bajarapacuenia pejumaitisjiva bajarapatomarabejepijivi Herodes apo pejumeitavetsixae, Dioso pijaängel naneconitsiaexanatsi Herodes. Avitaniayaexanatsi. Herodes nexata oro ënëverenetsi. Herodes nexata oro pënëverenijavatsi yatëpa.

<sup>24</sup> Nexata Dioso pejumecovënëtsivi, daxitanacuanëjjava tsipaebapona Dioso pitorobilivaisi. Nexata Dioso pitorobilivaisi pejumecovënëtsivi ayaibitsaëtoxaneto tsaponae.

<sup>25</sup> Itsa baja Bernabébeje Saulobeje palata petocaponaevijavabelia livaisi petsipaebijavabeje najumeveretabeje, naviatabeje baja Jerusalén tomaraverena. Navi-aliabeje baja Antioquía tomarabelia. Barëliabeje Juan, ponë vënërubatsi itsavënë, Marcos.

### **Pacuenia Bernabébeje Saulobeje junatatsibeje Dioso pitorobilivaisi jivi petsipaebaponaenexabeje daxitanacuanëjjava yabara pelivaisi**

**13** Antioquía tomarata Dioso pejumecovënëtsivijavata, jinavanapa mapamatabëxyoje. Itsanë Bernabé. Itsanë Simón, ponë vënërubatsi itsavënë, Negro. Itsanë Lucio. Bajaraponë Cirene tomarapijinë. Itsanë Saulo. Itsanë Manaén. Bajarapamonae cajena profetavi, Dioso pejumecovënëtsivijavabelia livaisi petsipaebabiabivina. Herodes Galileanacua pevetsinë. Herodesbeje Manaénbeje penajuavitsabinëbeje. <sup>2</sup> Itsamatacabi daxita bajarapapofetavi, Dioso pejumecovënëtsivi yajava, culto pexanaevajënaeya, pexaejava apo xae japasa Diosojavabelia pevajëcaenexa. Nexata bajarajota Espíritu Santo jumaitis daxita bajarapamonaejavabelia: —Panetotsare saicaya Bernabébeje Saulobeje. Xua yabara junatajëbeje, bajaraxua jane baja tanetonacuenëbinexabeje, jai Espíritu Santo.

<sup>3</sup> Nexata jane baja daxita bajarapamonae japasa vajëca Diosojavabelia. Bajaraxuacujinae Bernabébeje Saulobeje bajarapamonae tsmatanacobebuatatsibeje. Tovajë-tatsibeje Diosojavabelia. Nexata jane baja copatatsibeje peponaenexabeje jivi daxitanacuanëjjava petsipaebaponaenexabeje Dioso pitorobilivaisi.

### **Pacuenia apóstolenëbeje Dioso pitorobilivaisi jivi tsipaebabeje Chipre tunaetoxanetota penaetomaranëjjava yabara pelivaisi**

<sup>4</sup> Bernabébeje Saulobeje Espíritu Santo pejamatabëcueneta itorobatsibeje. Nexata baja ponabeje Seleucia tomarabelia. Nexata Seleucia tomarata naropotabeje. Naponabeje velapanata peponaëbarcota. Nanicababeje Chipre tunaetoxanetojavabelia. <sup>5</sup> Nexata napaliabeje Salamina tomarata. Bajarapatomarata tsipaebaponaabeje Dioso pitorobilivaisi judíovi penacaetuatabiabinëjjava. Juan napona Bernabébeje Saulobeje pepëta peyavenonabiabinexa. <sup>6</sup> Nexata bajarapamonae Chipre tunaetoxaneto matatuverelia. Nexata pata Pafos tomarata. Bajarapatomarata bajarapamonae caxitajaraba judíonë, Barjesúsvënënë. Bajaraponë jivi pejorobinë. Bajaraponë jivi yamaxëitojorobiaya jumai tsabiabi: “Xanë raja tsipaebabiabajë Dioso taneitorobicuenia,” jai tsabiabi. <sup>7</sup> Nexata Barjesúsbeje najuaponaponabiababeje Sergio Paulobeje. Sergio Paulo Chipre tunaetoxaneto pevetsinë. Sergio Paulo cajena bitso bepíjia peyapëtaenë palivaisi tsipaebatsi. Nexata Sergio Paulo pijajivi itoroba petojunatsinexatsi Bernabébeje Saulobeje. Tsipaji Sergio Paulo bitso jamatabëjumetane Dioso pitorobilivaisi. <sup>8</sup> Itsiata baitsi jane Barjesús, jivi pejorobinë,

ponë vënërubatsi itsavënë, Elimas, najamatabëcuene epatajërërëcaeyaexana Sergio Paulo Bernabébeje petsipaebaponaelivaisibeje yabara. Bajarapacuenia Barjesús najamatabëcuene epatajërërëcaeyaexana Sergio Paulo pejumecovënëtsiyaniva Dioso pitorobilivaisi. <sup>9</sup>Nexata Saulo, ponë vënërubatsi itsavënë, Pablo, tsijamatabëvënëcatsi Espíritu Santo. Nexata Pablo naécota asaëyata Barjesúsjavabelia. <sup>10</sup>Pablo jumaiti Barjesúsjavabelia:

—¡Xamë jivi neyamaxëitojorobinë, pibisiacue nexanaenë, dovathi pijajivitonëmë, pexaniajamatabëcuene pexanaejava nitoyanë! Apo jamatabëcopatsimë najumetsënëtsijava pejumecovënëtsiyaniva pamonae picani jamatabëjumecovënëta Dioso pijapexaniajailivaisi. <sup>11</sup>Dioso raja aeconoxae cananeconitsiaexanaena. Nexata apo natsivajënaetaemë tsane. Matapania anijajuametonë panepaena, icatsia natsivajënaetaename, jai Pablo Barjesúsjavabelia.

Nexata bajarajota Barjesús itaxotomeravibajunuatsi. Bitso itaxutoaitaquiri. Nexata saya Barjesús nacobenajayaruta itsanë pecobevaetabinexatsi pecomacapon-aenexatsi pijaboyabelia. <sup>12</sup>Sergio Paulo itsa tane bajarapacuenia, nexata jumecovënëta Jesús pelivaisi. Sergio Paulo bitso jamatabëcuenenajunaviaca itsa jumetane Jesús pelivaisi Bernabébeje Pablobeje petsipaebijavatabeje.

**Pacuenia Pablobeje Bernabébeje ponaponabeje Antioquía tomarata, Pisidia nacuata peecaetomarata, yabara pelivaisi**

<sup>13</sup>Pablobana Chipre tunaetota Jesús pelivaisi petsipaebavanapaecujinae, Pafos tomarata nanaropoba velapanata peponaebarcocoxanetota. Nicaba Panfilia nacuyabelia. Nexata Panfilia nacuatatia pata Perge tomarata. Juan baja Perge tomarata itsajamatabëcuene najamatabëxaina. Nexata baja naviateca Jerusalén tomarabelia. <sup>14</sup>Nexata Pablobeje Bernabébeje icatsia nanaropotabeje Perge tomarata. Nexata icatsia patabeje Antioquía tomarabelia, Pisidia nacuata peecaetomarabelia. Judíovi penacueraevetsimatacabita Pablobeje Bernabébeje najunuabeje judíovi penacaetutabiabibota. Bajarajota naecabeje. <sup>15</sup>Nexata daxita bajarapabota pejonevi, namuxunaeveta Dioso Moiséspijinëta penajumecopatsilivaisi. Namuxunaevetana Diosojumepaebivimi profetavi bajayata peyaquinaelivaisi ata. Bajaraxuacujinae judíovi penacaetutabiabibo pevetsivi, pijajivitonë itoroba. Nexata bajaraponë jumaiti Pablobeje Bernabébejavabelia:

—Tajabananëbeje, itsa payapëtanemebeje itsalivaisiyo panetsipaebinxabeje, aeconoxae patsipaebianamebeje jivi pijajamatabëcuenesaënexa Diosojavabelia, jai bajaraponë Pablobeje Bernabébejavabelia.

<sup>16</sup>Nexata jane baja Pablo nonotapuna. Nacobeyota jivi pemoyanexa. Pablo nexata jumaiti:

—Tajamonae judíovi, panenamuxunaevere. Tajamonae, paxamë ata apo pajudíovimë, Dioso panejitsipaevi, abaxë panenamuxunaevere pacuenia jumaitsinëjitsia. <sup>17</sup>PaDioso aeconoxae judíovitsi vajaDioso, bajarapaDioso bajayata baja cajena itapetatsi vajasalinaivimi pijajivinxaxa. Nexata Dioso pejamatabëcueneta vajasalinaivimi pexi ayaibitsaëtoxaneto xainapona. Nexata vajasalinaivimi ayaibitsaëtoxaneto tsaponae pamatacabí jinavanapa Egipto nacuata. Nexata Dioso pesaëta vajasalinaivimi matacaponatsi Egipto nacuaverena. <sup>18</sup>Vajasalinaivimi Dioso pejitsipaecuenia apo exanabiabi ata, itsiata Dioso cuarenta pavaibeje xaniavaetsia evetatsi petusato nacuata. <sup>19</sup>Dioso cajena verebiaba siete panacuabejepi-

jivi, Canaávnvënë nacuata pejinavanapaevimi. Nexata baja Dioso vajasalinaivimi totsatsatsi bajarapanacuanējáva juya pejinavanapaenexa. <sup>20</sup> Bajaraxuacujinae Dioso itoroba vajasalinaiviyajuvēnēnēvi juezmonae penaexanaponaenexa, vajasalinaivimi pevetsivinxatsi. Juezmonae nexata penaexanaponaevi, vajasalinaivimi evetavanapatsi cuatrocientos cincuenta pavaibeje. Matapania profeta Samuelpijinē evetatsi vajasalinaivimi, copata baja juezmonae pevetsijavatsi. Tsipaji baja profeta Samuelpijinē pecotocaevijueznē. <sup>21</sup> Nexata vajasalinaivimi jumaitsi profeta Samuelpijinējavabelia: “Pajitsipajē nitorobijava vajayajuvēnēnē penaexanaenexa vajanacayanacuaevetsinēnēxá,” jai. Nexata profeta Samuelpijinē Dioso pejamatabēcueneta itoroba Saúlpijinē vajasalinaivimi cuarenta pavaibeje peyanacuaevetaponaponaenexatsi. Bajaraponēmi Saúlpijinē, Cispijinē pexēnato, vajasalinainēmi Benjamínpijinē pemomoxiyajunēnēnē. <sup>22</sup> Bajaraxuacujinae Saúlpijinē Dioso copatsiaexanatsi pecopatsinexa baja vajasalinaivimi peyanacuaevetsijavatsi. Nexata juya Dioso itoroba Davidpijinē vajasalinaivimi peyanacuaevetsinexatsi. Dioso jumaitsi Davidpijinē yabara mapacueniaje: “Isaí pexēnato, David, jamatabēcueneyapētani. Bjarapatsinē jitsipajē. Bjaraponē David daxita pacuenia jitsipajē, netoexanaena,” jai Dioso Davidpijinē yabara. <sup>23</sup> Davidpijinē raja pemomoyota naexana Jesús. Dioso cajena itorobica Jesús Israel nacuapijivitsi vajanacapanepaenexa pacuenia Dioso tajjēvelia najumecapanepaeya jumaitsi vajasalinaivimijavabelia. <sup>24</sup> Jesús petaxuxuabivajēnaeya jivi livaisi petsipaebaponaejáva, copiaya Juanpijinē jivibautisabinēmi tsipaebanajetaruca daxita Israel nacuapijivijava. Jumai tsanajetaruca Juanpijinē: “Pacopabare baja daxita pibisiacuene paneexanabiabijava. Panajamatabēcuenepēnyorore Diosojavabelia. Bjaraxuacujinae pacabautisabianatsi,” jai tsanajetaruca Juanpijinē. <sup>25</sup> Juanpijinē abaxē ita apo beyaxuabitsi, jumai tsaponae jivijavabelia: “Ponē pacopiaevetavanapame, xanē raja apo bajaraponēnē. Xanēcujinae rajane bajaraponē najetarucaena. Xanē raja saya beveliajamatabēcuenenēnē bajaraponēvecua. Nexata bajaraponē bepijajivitonēnēcuenia ata tataxujonotsinexa pijazapato, vecuaauranē,” jai tsaponae Juanpijinē Jesús yabara, jai Pablo judfovijavabelia judfovi penacaetuatabiabibota.

<sup>26</sup> Icatsia Pablo jumaitsi judfovijavabelia judfovi penacaetuatabiabibota:

—Tajamonae Abrahampijinē papemomoximē, Dioso paneyaiyataevi. Dioso raja nacatoitoroba mapalivaisije vajanacacapanepaenexa Diosojavabelia. <sup>27</sup> Itsiata Jerusalén tomarapijivi apo yapētae Jesús pecapanepaejavanexatsi. Jerusalén tomara pevetsivi ata apo yapētae Jesús pecapanepaejavanexatsi. Bjarapamonae apo jumeyapētaenua pacuenia jumaitsi Jesús yabara bajayata profetavi peyaquinaebaxutota. Penacueraevetsimatacabanē canacujitsia lebabibi ata bajarapabaxuto judfovi penacaetuatabiabibota, itsiata bajarapamonae apo jumeyapētae. Bjarapamonae ita neonita Jesús pebeyaxuabinexatsi, nexata judfovi exana pacuenia baja cajena Diosojumepaebivi profetavi tajjēvelia vajunupaeba Jesús pexanaejavanexatsi. <sup>28</sup> Judfovi apo caxitajarabi ata Jesús itsacueneneconi pexainaejava, itsiata bajarapamonae vajēta nacuaevetsinē Pilatojavabelia Jesús pebeyaxuabinexatsi. <sup>29</sup> Nexata jane baja Jesús ita beyaxuabatsi, copiapata jane baja daxita pacuenia Jesús yabara tajjēvelia jumaitsi Dioso pejumelivaisibaxutota. Bjaraxuacujinae Jesús petēpaenē pitsicatsi cruzajavavetsica. Bjaraxuacujinae mēthētatsi. <sup>30</sup> Itsiata baitsi jane Dioso icatsia asaēyaexanatsi Jesús petēpaecujinae. <sup>31</sup> Jesús petēpaecujinae Dioso icatsia ita asaēyaexanatsi, bajayajebi anijatonē tsitanaitajētabiaba pijajivijavabelia,

pamonae yanatatsi pamatacabi Jesús pona Galilea nacujavaverena Jerusalén tomaraberena. Bajarapamonae nexata maparucaje tsipaeba pona jivijavabelia Jesús pelivaisi, jai Pablo bajarapamonaejavabelia judíovi penacaetuatabibota.

<sup>32</sup> Icatsia Pablo jumaitsi bajarapamonaejavabelia judíovi penacaetuatabibota:

—Nexata pacatsipaebianatsi pexanialivaisi. Dioso cajena vajasalinaivimijavabelia tajëvelia najumecapanepaeya jumaitsi pacuenia Dioso toexanaejitsia vajasalinaivijavabelia. <sup>33</sup> Vaxaitsi rabaja cajena bajarapamonaemi pemomoxitsi. Nexata pacuenia Dioso tajëvelia najumecapanepaeya jumaitsi vajasalinaivimijavabelia, nacatocopiapata jane baja. Tsipaji baja Jesús Dioso icatsia asaëyaexanatsi petëpaecujinae pacuenia baja cajena jumaitsi Salmosbaxutota. Dioso pejumaitsijava Jesúsjavabelia, Salmosbaxutota jumaitsi mapacueniaje: “Ajena raja, pamatacabi, canutatsi daxitajivi pitabarata pecayapëtaenexa xanë taxënatocuenemë,” jai cajena Salmosbaxutota Dioso pejumaitsijava Jesúsjavabelia. <sup>34</sup> Dioso baja asaëyaexanatsi Jesús petëpaejavavecua. Jesús baja nexata icatsia apo tēpae tsane itsamatacabijavabelia ata. Bajarapacuenie yabara baja cajena vaxaitsi yapëtanetsi. Tsipaji Dioso pejumelivaisibaxutota tajëvelia jumaitsi mapacueniaje: “Caexanaenatsi pacuenia baja cajena najumecapanepaeya jumaitsinë Davidpijinëjavabelia,” jai Dioso pejumelivaisibaxutota bajayata Dioso pejumaitsijava Jesúsjavabelia. <sup>35</sup> Bajaraxua yabara Jesús pejumaitsijava Diosojavabelia Salmosbaxutota icatsia jumaitsi mapacueniaje: “Nexënatonë apo necopatsimë tsane taperabëtsabanaejavabelia,” jai Salmosbaxutota. <sup>36</sup> Davidpijinë abaxë itsa asaë tsaponapona, jumecovënëtsiaponapona pacuenia Dioso itorobatsi. Bajaraxuacujinae Davidpijinë tēpa baja. Nexata Davidpijinë mëthëtatsi pamojivimi pemëthëanë muxuneneta. Nexata Davidpijinë mëthëabelia perabëtsabana baja. <sup>37</sup> Itsiata baitsi jane Jesús, ponë Dioso icatsia asaëyaexanatsi, petëpaecujinae bajaraponë apo perabëtsabanae cajena mëthëabelia. <sup>38</sup> Tajamonae, bepapapëtaneme ponë yabara pacatsipaebatsi. Jesús raja pejamatabëcueneta Dioso baja pacavecuajibiaexana pibisiacuene paneexanaeconomie. <sup>39</sup> Pajivi Jesús jumecovënëtsiana, bajarapajivi daxita pibisiacuene pexanaeconomie Dioso vecuajibiaexanaenatsi Jesús pejamatabëcueneta. Pajivi apo jumecovënëtsicapanepea ata Dioso Moiséspijinëta penajumecopatsilivaisi, jamatabëjumaitsi: “Xanë baja jumecovënëtajë Dioso Moiséspijinëta penajumecopatsilivaisi. Nexata pibisiacuene taexanaeconomie Dioso nevecuajibiaexanaena,” jamatabëjai, itsiata bajarapajivi pibisiacuene pexanaeconomie Dioso apo vecuajibiaexanaetsi tsane. Tsipaji Dioso Moiséspijinëta penajumecopatsilivaisi itsajivi ata apo jumecovënëtsicapanepea. <sup>40</sup> Xania baja tsane. Xaniavaetsia pajinavanapae name papecatocopiapatsiyaniva pacuenia Dioso jumepaebivi profetavi peyaquinaebaxutota tajëvelia jumaitsi. Tsipaji raja profetavi peyaquinaebaxutota, tajëvelia jumaitsi mapacueniaje:

<sup>41</sup> Panecapocaponaevi, ¡xania baja pataename! Panajunaviacaename raja. Tsipaji raja panevecuanaxuabianame. Panejinavanapaeepatota xanë, Diosonë, exanaenajë ayaiacuene taexanaejavanë. Nexata taexanaejavanë pelivaisi, itsamonae xaniavaetsia pacatsipaebi ata tsane, itsiata apo pajumecovënëtsimë tsane, jai Diosojumepaebivi profetavi peyaquinaebaxutota Dioso penaneconitsiaexanaejavanexa yabara pamona Dioso apo pejumecovënëtsivi, jai Pablo bajarapamonaejavabelia judíovi penacaetuatabibota.

<sup>42</sup> Pablobeje baja Bernabébeje pitsapaejitsiabeje judíovi penacaetuatabibovecua. Nexata bajarajota pamona apo judíovi, junatatsibeje icatsia itsamata-

cabi judíovi penacueraevetsimatacabita petsipaebinexabeje bajarapalivaisi. <sup>43</sup> Penacaetuatsivi baja naviaba judíovi penacaetuatabibibovecua. Nexata Pablobeje Bernabébeje judíovi penacaetuatabibibovecua itsa pitsapabeje, jivi ayabitsaëto pënaponatsibeje. Bajarapamonaeyajuvënëvi itsamonae judíovi, itsamonae apo judíovi. Pamonae apo judíovi, bajarapamonaecatiteca judíovicuenia Dioso pejumecovënëtsijava. Nexata Pablobeje Bernabébeje muxujiobabeje bajarapamonaepavajënaeyabelia ajamatabëcuenesaëya pejumecovënëtavanapaenexa Dioso pitaxutotsoniataejavatsi.

<sup>44</sup> Bajara jane xuacujinae icatsia judíovi penacueraevetsimatacabita, bajarapatomarapijivi muxunanacaetuatsibeje ayaibitsaëtoxonetonë Dioso pitorobilivaisi penamuxunaevetsinexatsibeje. <sup>45</sup> Nexata judíovi itsa tane bajarapajivibitsaëtoxonetonë Pablobeje Bernabébeje pemuxunanacaetuatsijavatsibeje, judíovi bitso cuenecaëbatsi. Nexata judíovi jumaitsi jivijavabelia pejumecovënëtsiyaniva bajarapalivaisi:

—Pacuenia Pablo pacatsipaeba, apo xaniajai cajena, jai judíovi Pablo petsipaebilivaisi yabara.

Judíovi bitso pibisiacuenia baracuaicuajitsi Pablo. <sup>46</sup> Itsiata Pablobeje Bernabébeje ajumejunavijibia tsipaebaponabeje Dioso pitorobilivaisi. Jumaitsidebe tsaponae mapacueniaje:

—Copiaya baja picani pacatsipaebatsibeje Dioso pitorobilivaisi paxamë pajudíovimëjavabelia. Itsiata apo pajitsipaemë bajarapalivaisi panejumecovënëtsinexa. Tsipaji apo pajitsipaemë panexainaenexa matacabi apo pevereverecejava. Paxanëbeje baja nexata pacavecuaponatsibeje patatsipaebinexabeje bajarapalivaisi apo judíovijavabelia. <sup>47</sup> Bajarapacuenia pacavecuaponatsibeje tsipaji baja pepo petuxanenë bajarapacuenia paneitorobabeje. Dioso cajena pejumelivaisibaxutota tajëvelia jumaitsi mapacueniaje:

Caitorobianatsi nejamatabëcueneitayotsinexa pamonae apo judíovi. Baitsi jane tsipaebanajetarucaename tajumelivaisi daxitanacuanëjava, nacuatubujava ata pejinavanapaevi, pecapanepaenexatsi pibisiacuenepexanaeconivecua, jai Dioso pejumelivaisibaxutota, jai Pablo judíovijavabelia.

<sup>48</sup> Apo judíovi itsa jumetane bajarapacuenia Pablo pejumaitsiyava, nexata apo judíovi jamatabëcuenenarëya. Nexata apo judíovi jumaitsi:

—Dioso cajena pitorobilivaisi pexanialivaisi bitso, jai.

Nexata jane baja apo judíovi ata jumecovënëta Dioso, pamonae baja cajena tajëvelia Dioso itapeta matacabi apo pevereverecejava pexainaenexa. <sup>49</sup> Nexata jane baja daxita bajarapanacuata pejinavanapaevi jumetane Dioso pitorobilivaisi.

<sup>50</sup> Itsiata baitsi jane pajudíovi Pablobeje Bernabébeje cueneitoyatsibeje, muxubijjapenetsiaya barëcuacuajiai tomaraevetsivijavabelia, petuxanevi pijavajivijavabelia ata. Nexata bajarapamonaeanepana Pablobeje Bernabébejejavabelia. Nexata baja Pablobeje Bernabébeje capitsapatsibeje bajarapanacuavecua. <sup>51</sup> Nexata Pablobeje Bernabébeje bajarapatomarata nataxuatsapërëvarëbabeje. Bajarapacuenia nataxuatsapërëvarëbabeje bajarapatomarapijivi peyapëtaenexa penaneconitsijava Diosojavabelia, apo pejumecovënëtsixae Dioso pitorobilivaisi. Bajaraxuacujinae Pablobeje Bernabébeje Iconio tomarabelia baja ponabeje. <sup>52</sup> Itsiata daxita pamonae Dioso pejumecovënëtsivi, Antioquía tomarata pejinavanapaevi, ja-

matabëcuenebarëya. Espiritu Santonua jamatabëcuenevënëcavanapa. Nexata exanabiaba pacuenia Espiritu Santo itorobatsi.

**Pacuenia Pablobeje Bernabébeje ponaponabeje  
Iconio tomarata yabara pelivaisi**

**14** Iconio tomarata Pablobeje Bernabébeje judíovi penacatuatabiabibota najoneyabeje. Bajarajota xaniavaetsia tsipaebabeje Jesús pelivaisi. Nexata jivibitsaëtoxaneto judíovi, apo judíovi ata, jumecovënëta Jesús pelivaisi. <sup>2</sup>Itsiata baitsi jane itsamonae judíovi, Dioso apo pejumecovënëtsivi, itoroba apo judíovi pianaepanaenexa Jesús pelivaisi pejumecovënëtsivijavabelia. <sup>3</sup>Bajarapacuenie peyapëtaexaebaje, Pablobeje Bernabébeje bajayajebi ponaponabeje bajarajota. Tsipaebabiababeje ajumejunavijibia Jesús pelivaisi. Tsipaji yapëtanebeje Dioso peyjavaponaponaejavatsibeje. Nexata daxitajivi yapëtaeyaexanaponabeje Dioso pitaxutotsoniataejavatsi bajarapamonae. Nexata daxita bajarapamonae yapëtane Jesús pelivaisi pexaniajailivaisicuene. Tsipaji bajaraponëbeje ayaicuene pexanaejava Dioso pesaëta exanaponabeje. <sup>4</sup>Itsiata bajarapatomarapijivi apo najamatabëcuenejëpae. Itsamonae jitsipa pejumecovënëtsinexa judíovi petsipaebilivaisi. Itsamonae jitsipa pejumecovënëtsinexa apóstolenëbeje petsipaebilivaisi. <sup>5</sup>Nexata judíovi, apo judíovinua, tomara pevetsivinua, jamatabëbijatanetsibeje Pablobeje Bernabébeje. Jamatabëtseconatsibejenua ibotonëta. <sup>6</sup>Nexata Pablobeje Bernabébeje nayajumetanebeje pacuenia exanaejitsiatsibeje. Nexata vecuanajetabajiravabeje Lистра tomarabelia, Derbe tomarabelia ata. Bajarapatomarabeje ecabeje Licaonia nacuata. Bajarapatomarabeje pepënëya penaetomaraxijava ata najetarucabeje. <sup>7</sup>Daxita bajaraxuayo tsipaebanajetarucabeje pexanialivaisi, Jesús pelivaisi.

**Pacuenia Pablo ibotonëta tseconatsi Lистра tomarata yabara pelivaisi**

<sup>8</sup>Lистра tomarata naeca petaxucuenabinëtsi. Penaexanaejavaveliacujinae apo ponaponae caeto ata. <sup>9</sup>Bajaraponë najumetaeyeca Pablo petsipaebilivaisi. Nexata Pablo naitaxutobabatsiaya naëcota bajaraponëjavabelia. Nexata Pablo jamatabëcuenyapëtane petaxucuenabinëtsi pejamatabëjumaitsijava: “Dioso pepacuene caëjëpatsi tanetaxuxanepanaeyaexanaenexa,” pejamatabëjaijava. <sup>10</sup>Nexata Pablo pinijijumeta jumaitsi petaxucuenabinëtsijavabelia:

—Nonotapunare. Ponaponare baja, jai Pablo.

Nexata bajaraponë jirevapuna. Ponapona baja. <sup>11</sup>Jivibitsaëtoxanetonë itsa tane Pablo petaxuxanepanaeyaexanaejava petaxucuenabinëmitsi, nexata bajarapamonae pijajumeta, Licaonijumeta, pinijijumeta jumaitsi mapacueniaje:

—¡Diosonëbeje cajena! ¡Bevaxaitsi jivitonëbejecuenia patsica vaxaitsijavabetsica! jai bajarapamonae.

<sup>12</sup>Bajarapanacuapijivi xaina pijadiosovi. Itsiata apo pepo diosovi. Nexata Bernabé tanetsi beZeusvënëdiosonë. Pablo pijinia tanetsi beHermesvënëdiosonë. Tsipaji Pablo penamatacanajetarucaenë. Nexata jivi barëcuaicuaijai tsabiabi. <sup>13</sup>Zeusvënëdiosonë pijatemplobo eca Listratomara jumaverena, Lистра tomarabelia pejonebaupa imoxoyovecua. Nexata sacerdotenë, Zeusvënëdiosonë pijatemplobota penacuenebabiabinë, capata torobitsaëto Lистра tomarabelia pejonebaupajavaberena. Bajarapatorobitsaëto matabocoitabëtsiaya tsmataruba pematono. Nexata sacerdotenë, Lистра tomarapijivi yajava, tobejitsiatsibeje picani bajarapatorobitsaëto

Pablobeje Bernabébeje ofrendacuenia bajarapavi petotajuitsinexatsibeje. Bajarpacuenia picani totajuitsijitsiatsibeje tsipaji bediosonébeje tanetsibeje. <sup>14</sup>Nexata Bernabébeje Pablobeje itsa jumetanebeje bajarapacuenepetoexanaejavanexatsibeje, apo jitsipaebeje. Nexata penaxatatsijavabeje mëpabëtitinaxuabarecabeje. Tsipaji Dioso apo pejitsipacuenia bajarapamonae toexanaejitsiatsibeje. Nexata cujinaejinaliabeje jivibitsaëtoxanetoné penacatuanaejavabelia. Nexata bajarapajivibitsaëtoxanetoné tuatuajëta nucabeje. Piniijjumeta Pablo jumaitsi:

<sup>15</sup>—¿Detsa xuajitsia bajarapacuenepanetoexanaejitsiamé? Paxanébeje ata raja saya pajivitonénébeje. Pacuenia paxamé pajamatabëcueneitsimé, bajara saya paxanébeje ata patajamatabëcueneitsinébeje. Papatajopajébeje patacatsipaebinebeje pexanialivaisi. Panajamatabëcuenepeñeyorore bajarapacuenia paneexanabiabijavavecua panejumecovënëtsinexa pepo Dioso apo peyamatacabiavereverecaené. Dioso raja daxitacuenepexanaené. Exana mapanacuaje, mapanacuapijicueneyajava. Exana itaboxo ata, itaboxopijicueneyajava. Exana manuamene ata, manuamenepijicueneyajava. <sup>16</sup>Dioso copata vajavajënaeya daxitanacuapijivi pejina vanapaenexa pijacuata penatojitsipacuenia. <sup>17</sup>Nexata Dioso daxitacuenepexanaejava, nacobecovëtaeyaexanabiaba daxitajivijavabelia. Nexata picani bajarapamonaebecanajëta Dioso peponaponaejava. Tsipaji Dioso pexaniacuenepexanabiaba bajarapamonaemijavabelia. Bajara icatsia pacuenia vaxaitsijavaberena ata pexaniacuenepexanabiaba. Ema nacatorunaeyaexanabiabica. Nexata vajuabijava nacatonaxaniabiaba. Nexata bajarapacuenia vajaxaejava nacarajutabiaba. Nacajamatabëcuenebarëyayaexananua, jai Pablo pamonaejavabelia picani torobitsaëto bejitsiatsibeje.

<sup>18</sup>Bajarapacuenia Pablo jumaitsi ata, itsiata picani bajarapamonaejamatabëto biatsibeje torobitsaëto petotajuitsinexatsibeje bajarapavi ofrendacuenia Pablobeje Bernabébejenexa. Itsiata baja belia copatsiaexanabeje.

<sup>19</sup>Nexata judíovi, Dioso apo pejumecovënëtsivi, parena Antioquía tomaraverena, Iconio tomaraverena ata. Bajarapajudíovi Lистра tomarapijivijavabelia najumetsënëtsiaya neconitatsibeje Pablobeje Bernabébeje pebaraanaepanaenexatsibeje. Nexata Lистра tomarapijivi ibotonëta tseconatsi Pablo. Bajaraxuacujinae tomarapënyabelia robobocaliatsi. Tsipaji baja bepetëpaené taeyabuatatsi. <sup>20</sup>Itsiata baitsi jane Dioso pejumecovënëtsivi Pablo matatoyorotsia itsa taenubenatsi pexuababuatsijavatatsi, nexata Pablo nonotapuna icatsia. Icatsia Pablo caevëa jonena Lистра tomaraberena. Meravia pitsijavata Pablobeje Bernabébeje ponabeje baja Derbe tomarabelia.

<sup>21</sup>Nexata Derbe tomarata tsipaebaponaponabeje pexanialivaisi, Jesús pelivaisi. Nexata jumecovënëtsibeje jivibitsaëtoxaneto. Bajaraxuacujinae icatsia navitanajetarucabeje Lистра tomarajava, Iconio tomarajava ata, Antioquía tomarajava ata. <sup>22</sup>Bajarapatomaranëjava Jesús pelivaisi tsipaebanajetarucabeje pejamatabëcueneasaëyaexanaponaebeje Dioso pejumecovënëtsivi. Muxujiobaponabeje bajarapamonaepevajënaeyabelia ajamatabëcueneasaëya pecatsitecaenexa Dioso pejumecovënëtsijava. Pablobeje Bernabébeje jumai tsaponaebeje Dioso pejumecovënëtsivijavabelia:

—Dovathi pejamatabëcueneta, pinijicuenia nacajamatabëcuenejëtaponaena daxita vajajonevinexa Dioso pijanacuayabetsia, jaiabeje tsaponae Dioso pejumecovënëtsivijavabelia.



<sup>23</sup>Caebitsaëto canacujitsia, Dioso pejumecovënëtsivijava, toitapetaponabejenua ancianovinexa, Dioso pejumecovënëtsivi pevetsivinexa. Nexata itsa pabitsaëtojavata toitapetsijitsiabeje, penacaeuatsivajënaeya apo xaeyabiabibeje pexaejava. Nexata penacaeuatsivajavata itsa toitapetabeje, japasa tovajëtabiababeje Diosojavabelia bajarapamonae peyavenonaenexatsi Dioso. Jumai tsabiabibeje Diosojavabelia:

—Diosomë, xaniavaetsia yavenonaename mapaancianovije xaniavaetsia pecato-evetsinexa nijajivi, jaibeje tsabiabi Diosojavabelia.

**Pacuenia Pablobeje Bernabébeje naviatabeje Antioquía  
tomarabelia, Siria nacuata peecaetomarabelia, yabara pelivaisi**

<sup>24</sup>Pablobeje Bernabébeje Pisidianacua pexenetsicujinaeabeje, patabeje Panfilia nacuayabelia. <sup>25</sup>Nexata Panfilia nacuata, Perge tomarata, Dioso pitorobilivaisi jivi tsipaebabeje. Bjaraxuacujinae icatsia patabeje Atalia tomarata. <sup>26</sup>Nexata Atalia tomarata naropotabeje barcota. Menia jane baja ponabeje. Naviatabeje jane baja Antioquía tomarabelia. Tsipaji baja cajena pamatacabi taxuxuabi-jitsiabeje Dioso pitorobilivaisi jivi petsipaebanajetarucaenexabeje, naropotabeje Antioquía tomarata. Nexata pamatacabi naropotabeje Antioquía tomarata, penaropotsivajënaeyabeje, Dioso pejumecovënëtsivi tsmatanacobebuatatsibeje Dioso peyavenonaponaeenexatsibeje jivi petsipaebanajetarucaejavatabeje Dioso pitorobilivaisi. Pablobeje Bernabébeje Antioquía tomarata patabeje. Tsipaji baja toveretabeje daxita pacuenia Dioso itorobatsibeje. <sup>27</sup>Itsa baja Antioquía tomarata patabeje, junatabeje penacaeuatsinexa daxita Dioso pejumecovënëtsivi. Nexata bajarapamonaejavabelia tsipaebabeje daxita Dioso peyavenonaponaejavatsibeje. Tsipaebabejenua apo judíovi ata pejumecovënëtsijava Dioso pitorobilivaisi. Tsipaji baja cajena Dioso tocopata apo judíovi ata pejumecovënëtsinexa bajarapalivaisi. <sup>28</sup>Pablobeje Bernabébeje Antioquía tomarata bajayajebi naponaponabeje Dioso pejumecovënëtsivijavata.

**Pacuenia apóstolevi, ancianovi yajava,  
nacaetuata Jerusalén tomarata yabara pelivaisi**

**15** Pamatacabi Pablobeje Bernabébeje ponaponabeje Antioquía tomarata, judíovi, Judea nacuaverena peponaevi, pata Antioquía tomarata. Nexata bajarapamonae Dioso pejumecovënëtsivijavabelia livaisi tsipaeba. Petsipaebijavata bajarapamonae jamatabëcuenenavëxaniabiaya jumaisi mapacueniaje:

—Panamatavenoname paxamë ata papecaperabëcaucubinexa pacuenia Dioso Moiséspijinëta najumecopata. Itsa jume, nexata acuenebi tsane papecacapanepaejava Diosojavabelia, jai tsaponae judíovi, pepatsivi Judea nacuaverena.

<sup>2</sup>Bajarapacuenia pejumaitsaponaexae, nexata Pablobeje Bernabébeje pinijicuenia namataenetsia barënajumenotabeje pajudíovi pata Judea nacuaverena. Nexata Antioquía tomarapijivi Dioso pejumecovënëtsivi, Pablobeje Bernabébeje itapetatsibeje pitorobinexatsibeje Jerusalén tomarabelia. Nexata Pablobeje Bernabébeje yjavaponabeje Dioso pejumecovënëtsiviyajuvëñevi. Itorobatsibeje peyanijobinexabeje peperabëcaucubicuene yabara apóstolevijavabelia, ancianovijavabelia ata, Jerusalén tomarata pejinavanapaevijavabelia.

<sup>3</sup>Itorobatsibeje Dioso pejumecovënëtsivi. Nexata Pablobana itsa pona, najetarubena Fenicia nacuajava, Samaria nacuajava ata. Bjaraxuayo Dioso pejume-

covēnētsivijavabelia tsipaebapona apo judíovi ata pijaperujamatabēcuene pecopabijava, pejumecovēnētsinexa Dioso. Nexata daxita Dioso pejumecovēnētsivi jamatabēcuenebarēya itsa jumetane bajarapalivaisi.

<sup>4</sup> Pablobana itsa pata Jerusalén tomarabelia, Dioso pejumecovēnētsivi, apóstolevinua, ancianovinua, xaniavaetsia copiapitatsi. Nexata Pablobeje Bernabébeje bajarapamonaejavabelia tsipaebabeje daxita Dioso peyavenonaponaejavatsibeje pamatacabi Dioso pitorobilivaisi jivi tsipaebanajetarucabeje. <sup>5</sup> Nexata fariseovi, Dioso pejumecovēnētsivi, nonobapuna. Fariseovi jumaitsi mapacueniaje:

—Dioso pejumecovēnētsivi apo judíovi ata, namatavenona peperabēcaucubinexatsi. Namatavenonana bajarapamonae pejumecovēnētsinexa Dioso Moiséspijinēta penajumecopatsilivaisi, jai fariseovi Dioso pejumecovēnētsivi.

<sup>6</sup> Nexata nacaetuata apóstolevi, ancianovi yajava, apo judíovi ata peperabēcaucubijavatsi yabara penabarēcaucaijainexa. <sup>7</sup> Bajayajebi baja namataenetsia penabarēcaucaijaijucujinae, nexata Pedro nonotapuna. Jumaitsi:

—Tajamonae, payapētaneme rabaja mapacuenije. Xanē baja cajena bajaya Dioso nitapeta, paxamēyajuvēnēnē, apo judíovijavabelia tatsipaebinexa pexanalivaisi, Jesús pelivaisi. Nexata apo judíovi ata Dioso pecapanepaenexatsi Jesús pelivaisi itsa jumecovēnēta. <sup>8</sup> Dioso cajena daxitajivi pejamatabēcuenyepētaenē. Yapētanetsi Dioso aneconijibia petaejava apo judíovi ata. Yapētanetsi bajarapacuenet sipaji apo judíovi ata Dioso rajuta Espíritu Santo. Pacuenia vaxaitsi judíovitsi Dioso nacarajuta Espíritu Santo, bajara pijinia pacuenia Dioso rajuta Espíritu Santo apo judíovi ata. <sup>9</sup> Pacuenia vaxaitsi judíovitsi Dioso nacajitsipa, bajara pijinia pacuenia Dioso jitsipa apo judíovi ata. Bajaraxuata apo judíovi ata pibisiacuene pexanaeconimi Dioso vecuaajibiaexanatsi Jesús pelivaisi pejumecovēnētsixae. <sup>10</sup> Pētsa pajumeaebame Dioso aneconijibia petaejava apo judíovi ata. Pētsa bajarapamonae paitorobame pejumecovēnētsinexa piayapēbejelivaisi, Dioso Moiséspijinēta penajumecopatsilivaisi. Tsipaji bajarapalivaisi vaxaitsi ata apo nacacaējēpae vajajumecovēnētsinexa. Vajasalinaivimi ata apo caējēpaetsi pejumecovēnētsinexa bajarapalivaisi. <sup>11</sup> Vaxaitsi baja jumecovēnētatsi Jesús pelivaisi. Nexata vajatuxanenē Jesucristo pejamatabēcueneta Dioso vajanacaitaxutotsoniataexae, nacacapanepaena pibisiacuene vajaexanaeconivecua. Bajara pijinia pacuenia apo judíovi ata Jesucristo pejamatabēcueneta Dioso capanepaenatsi pibisiacuene pexanaeconivecua, jai Pedro apóstolevijavabelia, ancianovijavabelia ata.

<sup>12</sup> Dioso pitorobilivaisi Bernabébeje Pablobeje apo judíovijava itsa tsipaebanajetarucabeje, Dioso pesaēta pinijicuene pexanaejavanē exanaponabeje. Nexata bajaraxua Bernabébeje Pablobeje itsa navajunupaebabeje, daxita apóstolevi, ancianovi ata, moya ena. Xaniavaetsia namuxunaevetena. <sup>13</sup> Itsa baja Pablobeje Bernabébeje najumeveretabeje petsipaebijavabeje, nexata Santiago jumaitsi apóstolevijavabelia, ancianovijavabelia ata:

—Tajamonae, panenamuxunaevere. <sup>14</sup> Simón Pedro raja nacatsipaeba Dioso aneconijibia petaejava apo judíovi ata pecapanepaenexa pibisiacuene pexanaeconivecua Jesús pelivaisi itsa jumecovēnēta. <sup>15</sup> Bajarapacuenia apo judíovi ata aneconijibia Dioso petaejavanexa yabara, bajayata tajēvelia Diosojumepaebivi profetavi peyaquinaelivaisita vajunupaeba baja cajena. Dioso pejumaitsijava apo judíovi yabara Dioso pejumelivaisibaxutota jumaitsi mapacueniaje:

<sup>16</sup>“Bajayata abaxë pamatacabi Davidpijinë evetaponapona Israelnacua, xaniavaetsia jivi nejumecovënëtavanapa. Bajara icatsia pacuenia jivi xaniavaetsia tanejumecovënëtavanapaenexa, yavenonaenajë. <sup>17</sup>Nexata apo judíovi ata, daxita pamonaë junatsianajë tajajvinexa, bajarapamonaë ata jitsipaena tanejumecovënëtsinexa,” jai bajayata Dioso mapacueniaje. <sup>18</sup>Dioso baja cajena tajëvelia yapëtaeyaexana daxita mapacuene yabaraje, jai profetavi peyaquinaelivaisita, jai Santiago apóstolevijavabelia, ancianovijavabelia ata.

<sup>19</sup>Icatsia Santiago jumaitsi apóstolevijavabelia, ancianovijavabelia ata:

—Nexata xanë jamatabëitsinë mapacueniaje. Apo jamatabëitonotsi tsanetsi baja matavëjëa apo judíovi, pamonaë baja najamatabëcuenepeñeyorota Diosojavabelia. <sup>20</sup>Itsiata baitsi jane caelivaisiyobeje toyaquinaenatsi cuyalatobaxutota vajayapëtaeyaexanaenexa bajarapamonaë. Itsamonaë xaina pecobeta saya jumapecataeya pexanaenëanë bepjadiosovi petaenexa. Nexata bajaraxuanëjavabelia ofrendacuënia pevi perajutsinexa, tobeyabiaba baca, oveja ata. Toyaquinaenatsi bajarapayajuvënëvi pexaeyaniva. Toyaquinaenatsinua daxita pebijivi peyapëtaenexa, daxita petiriavi ata peyapëtaenexa. Papebijivi baja nacojioba, pematayajibianivatsi it-savajavabelia pijavavecu. Papebijivi pijinia abaxë apo nacojiobi, pematayajibianivatsi petirivajavabelia. Bajara pijinia pacuenia petiriavi ata. Papetiriavi baja nacojioba, pematayajibianivatsi itsanëjavabelia pamonavecu. Papetiriavi pijinia abaxë apo nacojiobi pematayajibianivatsi pebijavabelia. Toyaquinaenatsinua bajarapamonaë pexaeyaniva cuibocuetsacaeya pebexuabinë pevi, pexaeyaniva peja ata. Bajarapacuenia toyaquinaenatsi apo judíovi ata Dioso pejumecovënëtsivi peyapëtaenexa xua vaxaitsi judíovitsi cjunavatsi. Nexata itsamatacabijavabelia ata apo judíovi pejamatabëcuenebijianaeyaniva judíovijavabelia. <sup>21</sup>Tsipaji bajarapalivaisi Dioso Moiséspijinëta penajumecopatsijavaveliacujinae, vajasalinaivimi caetomara canacujitsia itavetabiabatsi bajarapacuene. Itavetabiabatsi bajarapacuene penacuer-aevetsimatacabianë canacujitsia penacaetuatabiabibonëjava, jai Santiago apóstolevijavabelia, ancianovijavabelia ata.

<sup>22</sup>Nexata daxita apóstolevi, ancianovinua, daxita Dioso pejumecovënëtsivinua, najamatabëjëpa penaitapetsinexa bajarapamonaeyajuvënëvi pitorobinexa Antioquía tomarabelia Pablobeje Bernabébeje pepëta. Nexata itapetatsibeje Silasbeje Judasbeje. Judas vënërubatsi itsavënë, Barsabás. Bajaraponëbeje Dioso pejumecovënëtsivi penamatacaitorobivi yajuvënënebeje. <sup>23</sup>Pacuyalatobaxuto bajaraponëbeje tocaponaëjitsiabeje Antioquía tomarapijivijavabelia, Siria nacuapijivijavabelia ata, Cilicia nacuapijivijavabelia ata, jumaitsi mapacueniaje:

—Tajamonaë, paxanë paapóstolevinë, pacajamatabënajinaliatsi. Vajamonaë ancianovi ata pacajamatabënajinalia. Pacajamatabënajinaliatsi daxita apo pajudíovimë, Antioquía tomarata panejinavanapaevi. Paxamë ata Siria nacuatata panejinavanapaevi, pacajamatabënajinaliatsi. Paxamë ata Cilicia nacuatata panejinavanapaevi, pacajamatabënajinaliatsi. <sup>24</sup>Pavënëlivaisitaniji pacuenia pacajumaitsi paxanëyajuvënëvi papecasivaxainaevelia. Bajarapamonaë pina nexata pacanamatabëcuene epatajërërëcaeyaexanapona. Tsipaji pina bajarapamonaë pacajumaitsi: “Panamatavenoname paxamë ata papecaperabëcaucubinexa. Panamatavenonamenua panejumecovënëtsinexa Dioso Moiséspijinëta penajumecopat-silivaisi,” pacajai pina. Pamonaë pacajumaitsi bajarapacuenia, paxanë cajena

apo paitorobinē paxamējavabelia. <sup>25</sup>Nexata paxanē patanacaetuatsijavata, panajamatabēcuenejēpajē pataitapetsinexa ponēbeje paitorobijitsianē paxamējavabelia pecaponaenexabeje patacatoyaquinaelivaisi. Bajaraponēbeje naliabeje Bernabēbeje Pablobeje pepēta. <sup>26</sup>Vajabananēbeje, Bernabēbeje Pablobeje, bitso vaxaitsi asivatsi. Bajaraponēbeje vajatuxanenē Jesucristo pejumelivaisi yabara itsamonae jamatabēbeyaxuababiabi atatsibeje, itsiata ajamatabēcuenesaēbeje tsaponaponae. <sup>27</sup>Nexata bajaraponēbeje pepēta pacatoitorobatsi Judasbeje Silasbeje. Nexata Judasbeje Silasbeje xaniavaetsia pacatsipaebiana pacuene yabara pacatoyaquinatsi cuyalatobaxutota. <sup>28</sup>Itsa panacaetuatajē Espiritu Santo paneyavenona patayapētaenexa peyapēxanepanaelivaisi patacatoitorobinexa panejumecovēnētsinexa. Nexata baja apo panamatavenonaemē panejumecovēnētsinexa piayapēbejelivaisi, palivaisi daxita pajudíovinē pajumecovēnētajē. Pacaitorobatsi palivaisi bitso panamatavenoname panejumecovēnētsinexa. <sup>29</sup>Pecobeta saya jumapecataeya pexanaenēanējavabelia ofrendacuenia pevi perajutsinexa itsamonae itsa tobias baca, oveja ata, pētsa paxaneme bajarapayajuvēnēvi. Pētsa paxaneme peja. Pētsa paxaneme cuibocuetsacaeya pebeyaxuabinē pevi. Papebijivi baja nacojioba, pētsa matayajibatsi itsavajavabelia pijavavecu. Papebijivi pijinia abaxē apo nacojiobi, pētsa matayajibatsi petirivajavabelia. Bajara pijinia pacuenia petiriavi ata. Papetiriavi baja nacojioba, pētsa matayajibatsi itsanējavabelia pamonavecu. Papetiriavi pijinia abaxē apo nacojiobi, pētsa matayajibatsi pebijavabelia. Itsa pajumecovēnētame bajarapalivaisi, nexata xaniavaetsia pajinavanapaename. Bajara saya palivaisiyo pacatoyaquinatsi, jai apóstolevi, ancianovi yajava, apo judíovijavabelia petoyaquinaebaxutota Jerusalén tomaravelia.

<sup>30</sup>Nexata jane baja bajarapacuyalatobaxuto petocaponaenexabeje apo judíovijavabelia, Judasbeje Silasbeje itorobatsibeje penaponaenexabeje Pablobeje Bernabēbeje pepēta. Nexata baja naponabeje. Bajarapamonae pata Antioquía tomaravelia. Nexata Antioquía tomarapijivi junata daxita Dioso pejumecovēnētsivi penacaetuatsinexa. Nexata penacaetuatsijavata rajutabeje bajarapacuyalatobaxuto. <sup>31</sup>Antioquía tomarapijivi itsa leba bajarapacuyalatobaxuto, bajarapamonae bitso jamatabēcuenebarēya. <sup>32</sup>Judasbeje Silasbeje Diosojumepaebinēbeje profetanēbeje. Nexata ayailivaisi tsipaebabeje Antioquía tomarapijivijavabelia. Nexata baja bajarapamonae ajamatabēcuenesaē Diosojavabelia pejumetaexae palivaisi tsipaebabeje Judasbeje Silasbeje bajarapamonaejavavelia. <sup>33</sup>Bajayajebi baja Antioquía tomarata Judasbeje Silasbeje naponaponabeje. Bajaraxuacujinae Dioso pejumecovēnētsivijavabelia xaniavaetsia napējiobabeje penaviatsinexabeje baja pitorobivitsijavabelia. <sup>34</sup>Pepuanapējiobibeje baja, Silasbeje abaxē itsiata icatsia nacopatabeje bajarajota. <sup>35</sup>Pablobeje Bernabēbeje ata abaxē ponaponabeje Antioquía tomarata. Dioso pitorobilivaisi tsipaebaponaponabeje. Itsamonae Dioso pejumecovēnētsivi yajavaponaponabeje Dioso pitorobilivaisi penajutsipaebabiabinexa.

**Pacuenia icatsia Pablo cotocaevi panamuto pona jivi icatsia  
petsipaebinexa Dioso pitorobilivaisi yabara pelivaisi**

<sup>36</sup>Antioquía tomarata Pablobeje Bernabēbeje bajayajebi ponaponabeje. Pablo jumaitsi Bernabējavavelia:

—Ponatsibeje icatsia vajataenexabeje vajamonae Dioso pejumecovēnētsivi. Daxita tomanējava, itsaxuayo baja imata tsipaebanajetarucatsibeje Dioso pitoro-

bilivaisi, bajaraxuayo icatsia najetarucaenatsibeje. Taenajetarucaenatsibeje pacuenia jinavanapa bajarapamonae, jai Pablo Bernabéjavabelia.

<sup>37</sup> Bernabé nexata bitso jitsipa pebarëponaenexabeje icatsia Juan, ponë vënërubatsi itsavënë, Marcos. <sup>38</sup> Itsiata bailsi jane Pablo apo jitsipae baja icatsia Marcos pebarëponaenexabeje. Tsipaji imata copiaya panamuto barëponabeje picani, Marcos epatua naviateca Panfilia nacuata. Nexata Marcos xaniavaetsia apo yavenonaeyaveretsi Dioso pitorobilivaisi jivi petsipaebaponaejava. <sup>39</sup> Nexata Pablobeje Bernabébeje apo najamatabëcuenejëpaebeje Marcos pebarëponaejavabejenexa yabara. Nexata baja Pablobeje Bernabébeje navecuanatsabeje. Bernabé jane baja nexata Marcos barëpona. Velapanata peponaebarcota Bernabébeje Marcosbeje naponabeje. Nexata nicababeje Chipretunaeto nacuyabelia. <sup>40</sup> Nexata pijinia Pablo itapeta Silas peyanatsinexatsi. Dioso pejumecovënëtsivi tovajëttasibeje Diosojavabelia peyavenonaponaeenexatsibeje penajetarucaejavabeje. <sup>41</sup> Nexata Pablobeje Silasbeje Siria nacujava, Cilicia nacujava ata, Dioso pitorobilivaisi jivi tsipaebanajetarucabeje. Nexata bajarapanacuanëpijivi Dioso pejumecovënëtsivi, caebitsaëto canacujitsia, Diosojavabelia ajamatabëcuenesaë tsaponae.

### **Pacuenia Timoteo Listra tomarata nanaropota Pablobeje Silasbeje pepëta yabara pelivaisi**

**16** Pablobeje Silasbeje patabeje Derbe tomarata. Patabeje Listra tomarata ata. Listra tomarata caxitajarababeje Dioso pejumecovënëtsinë, Timoteo. Timoteo pena judíofova, Dioso pejumecovënëtsiva. Itsiata bailsi jane Timoteo paxapijinë griegonë. <sup>2</sup> Daxita Dioso pejumecovënëtsivi, Listra tomarapijivi, Iconio tomarapijivi ata, Timoteo yabara jumai tsabiabi:

—Timoteo raja xaniavaetsia Dioso jumecovënëtaponapona, jai tsabiabi.

<sup>3</sup> Pablo jitsipa Timoteo pebarëponaejava. Nexata Pablo Timoteo pebarëponaejavajënae, judíofovi pijacuenia perabëcaucutsiaexana. Bailsi bouperabëcaucutsiaexana. Bajarapacuenia Pablo perabëcaucutsiaexana pebaraanaepanaeyanivatsi pevëna judíofovi. Tsipaji itsaxuayo barënajetarucaejitsia, judíofovi penaperabëcaucubivi jinavanapa. Nexata judíofovi apo jitsipae peyjavajinavanapaejava apo peperabëcaucutsinëtsi. Nexata Pablo Timoteo perabëcaucutsiaexanaenejeva itsa barënajetarucaejitsipa bajarapamonaejava, yapëtaejitsipatsi Timoteo, apo peperabëcaucutsijavatsi. Tsipaji Timoteo paxapijinë griegonë, apo peperabëcaucutsinëtsi. <sup>4</sup> Pablobana tomanëjava itsa najetarubena, caetomarapijivi canacujitsia, tsipaebapona Dioso pejumecovënëtsivijavabelia palivaisi toyaquinatsi Jerusalén tomaraverena. Tsipaebanajetarubena caetomarapijivi canacujitsia pejumecovënëtsinexa pacuenia apóstolevi, ancianovi ata, itorobatsi Jerusalén tomaraverena. <sup>5</sup> Bajaraxuata Dioso pejumecovënëtsivi, caebitsaëto canacujitsia, bitso ajamatabëcuenesaë tsaponae Diosojavabelia. Caematacabi canacujitsia Dioso pitorobilivaisi ayaibitsaëto jumecovënëtapona.

### **Pacuenia Pablo bemajitsinaebota tane Macedonia nacupijinë yabara pelivaisi**

<sup>6</sup> Espiritu Santo apo tocopatsitsi Pablobana petsipaebinexa Dioso pitorobilivaisi Asiavënë nacuata. Bajaraxuata Pablobana najetarubena Frigia nacujava, Galacia nacujava ata. <sup>7</sup> Pablobana itsa najetarubena Misianacua muxubëra, jamatabë-

pata picani Bitinia nacujava. Itsiata baitsi jane Espiritu Santo apo tocopatsitsi pepatsinexa Bitinia nacujava. <sup>8</sup>Nexata Misianacua canacujitsialia roviaalia ponalia. Pata Troas tomarabelia. <sup>9</sup>Nexata Troas tomarata meravi Pablo bemajitsinaebota taenuta Macedonia nacupijinjē. Macedonia nacupijinjē asaēyata jumaitsi Pablobjavabelia:

—Naxantsia. Macedonia nacuyabelia ponare. Paneyavenonaename, jai Macedonia nacupijinjē.

<sup>10</sup>Pablo bemajitsinaebota petaenutsicujinae Macedonia nacupijinjē, bepijia paxaniavaetajē patajavaxi patanicabinexalia Macedonia nacuyabelia. Nexata panajumaitsinē:

—Xaniajai cajena. Dioso nacaitoroba Macedonia nacupijivijavabelia vajatsipaebinexa pexanialivaisi, Jesús pelivaisi, panajanē.

### **Pacuenia Pablobeje Silasbeje ponaponabeje Filipos tomarata yabara pelivaisi**

<sup>11</sup>Troas tomarata panaropobajē. Panaponajē barcota. Roviaalia panayanicabali-ajē patapatsinexa Samotrasiatunaeto nacuyabelia. Troas tomarata patanaropobicujinae, meravia pitsijavata, panapatajē Neápolis tomarabelia. <sup>12</sup>Bajaraxuacujinae matatsēnēa paponajē Filipos tomarabelia. Filipostomara Macedonia nacuata eca. Filipostomara daxita tomaranēvecua ayaitomaraxaneto. Filipos tomarata najinavanapa ayaibitsaētoxaneto Roma tomaraverena pepatsivi. Bajarapatomarata panajinavanapajē caematacabimaxēto. <sup>13</sup>Nexata abaxē itsa panajinavanapajē Filipos tomarata, judíovi penacueraevetsimatacabita papitsapajē tomarapēnēyabelia. Paponajē mene itapayavelia patajaitsinexa itsajota nacaetuatabiaba judíovi pevajēcabiabinexa Diosojavabelia. Nexata mene itapaya itsa pajaitanajetarubenajē, petirivi penacaetuatenaevi mene itapata, patayejebajē. Nexata pajamatabējumaitsinē:

—Bajara macovē jotaje judíovi nacaetuatabiaba pevajēcabiabinexa Diosojavabelia, pajamatabējanē.

Nexata bajarajota panaenajē. Nexata bajarajota Dioso pitorobilivaisi patsipae-bajē petirivijavabelia. <sup>14</sup>Bajarapapetiriviyajuvēnēva pevēnē Lidia. Bajarapova Tiatira tomarapijiva, penamatamotsipapaēbērē, perajejaipapaēbērē, pecanajetabiabiva. Dioso bitso pejumecovēnētsiva. Bajarapova panenamuxunaeveta xaniavaetsia. Dioso jamatabēcueneyavenonatsi. Nexata bajarapova jumecovēnēta Pablo petsipaebilivaisi. <sup>15</sup>Bajaraxuacujinae bajarapova, pijabopijivi yajava, itsa bautisabatsi baja, bajarapova panejumaitsi:

—Itsa paxamē panetaneme pepacuenē Dioso tajumecovēnētsivacuene, nexata tajabota abaxē panajinavanapaename, panejai bajarapova.

Bitso bajarapova asaēyata panejunata patanajinavanapaenexa pijabota. Nexata panaponajē bajarapova pijaboyabelia bajarapova pijabota patanajinavanapaenexa.

<sup>16</sup>Paponabiabajē mene itapayabelia Dioso pitorobilivaisi patatsipaebabibinexa itsajota judíovi nacaetuanabiaba. Belia itsanamutota panemataenena petiriva, dovathi peyjavaponaponaeva. Bajarapadovathi pejamatabēcueneta tajēvelia petiriva yapētaeyabiaba itsacuenejavaxi yabara. Bajarapova pijamonae pecanajetsivatsi pijatuxanevi amoneya petonacuenebabibinexa. Nexata bajarapova pijumata pijatuxanevi ayaijava palata pitabiaba. Tsipaji itsajivi itsa yanijoba bajarapovajavabelia itsacuenejavayo yabara, bajarapova tajēvelia xaniavaetsia tsipaebabiaba. Nexata pacuenia bajarapova tajēvelia jumai tsabiabi itsajivijavabelia, xania-

jai tsabiabi. Nexata papalata matamotabiabatsi petsipaebabiabijamatabëcuene, pijatuxanevi pitabiaba. <sup>17</sup> Bajarapova nexata panepënanajetarucabiaba. Bajarapova pinijijumeta jumai tsanajetarucabiabi paxanë yabara:

—Mapapebijivije, athëbëtatsia peecaenë Dioso pijajivi. Pacatsipaebapona papeca-capanepaelivaisinexa pibisiacuene paneexanaeneconivecua, jai tsanajetarucabiabi petiriva paxanë yabara.

<sup>18</sup> Bajarapacuenia najuamatacabianë jumai tsanajetarucabiabi itsa panepënanajetarucabiaba. Nexata bitso pejamatabëitonotabiabixaetsi, belia napënëyoro-taxuaba bajarapovajavabelia. Jumaitsi:

—Dovathi, caïtavetatsi Jesucristo pevënëta. Vecuapitsapare baja mapovaje, jai Pablo.

Bajarapacuenia Pablo pejumaitsijavata dovathi baja petiriva vecuapitsapatsi.

<sup>19</sup> Nexata bajarapova pijatuxanevi yapëtane baja pecopiarucaejava bajarapova pijumata palata penotabiabijava. Nexata bajarapova pijatuxanevi vaetabatsibeje Pablobeje Silasbeje. Robobocaponaliatsibeje tomara tuatuajëabelia. Caponatsibeje tomara pevetsivijavabelia. <sup>20</sup> Jivi penaneconitsiaexanabiabivi, juezmonae, pitabarata nutatsibeje. Pamonae Pablobeje Silasbeje vaetabatsibeje, najumetsënëtsiaya jumaitsi juezmonaejavabelia Pablobeje Silasbeje yabara:

—Mara papebibeje judíonëbeje. Anaepanaeyaexanaponabeje vajatamarapijivi. <sup>21</sup> Tsipaebaponabeje vajanacuapijivi pejumecovënëtsinexa palivaisi vaxaitsi Romano nacuapijivitsi apo nacatocopatsi vajajumecovënëtsinexa, jai najumetsënëtsiaya bajarapamonae Pablobeje Silasbeje yabara.

<sup>22</sup> Nexata jivi ayaibitsaëtoxaneto baranaepanatsibeje Pablobeje Silasbeje. Nexata juezmonae itoroba vajabitsaë Pablobeje Silasbeje penaxatatsijavabeje pevejumajonotsinexatsibeje. Bajaraxuacujinae itoroba ayaicuenia pejumaconibabenexatsibeje naebota. <sup>23</sup> Ayaicuenia pejumaconibabecujinaetsibeje, juezmonae icatsia itoroba vajabitsaë Pablobeje Silasbeje penaneconitsivi pejebabiabibota peetsinexatsibeje. Bajaraxuacujinae icatsia juezmonae itoroba penaneconitsivi pejebabiabibo pevetsinë Pablobeje Silasbeje xaniavaetsia pevetsinexatsibeje penaneconitsivi pejebabiabibo ënëtuatuajëta. <sup>24</sup> Penaneconitsivi pejebabiabibo pevetsinë juezmonae pitorobixaetsi xaniavaetsia pevetsinexa, nexata penaneconitsivi pejebabiabibo pënëyatuucubijavanë, pecopiarucaejavatareca, Pablobeje Silasbeje etatsibeje. Peponaponaeyanivabeje penaitabarataeyaexanaetablapabeje tusatualia sixataliatsibeje. Bajaraxuacujinae xaniavaetsia yasicatarëretatsibeje cepovënëjavata.

<sup>25</sup> Nexata meravituatuajëta Pablobeje Silasbeje vajëtabeje Diosojavabelia. Diosojumevajianë naxëanecabeje Diosojavabelia. Itsamonae pijinia penaneconitenaevi bajarapabota, jumetanatsibeje penaxëanecaejavabeje. <sup>26</sup> Nexata jemata bajara-paepatota ira najëabapeneta pinijicuenia. Penaneconitsivi pejebabiabibo, daxitabo, nanequebeca. Caecuenia daxita baupanë nabaupana pijacuata. Daxita penaneconitsivi pacadenamaëtonëta cobecëbejebatsi, vecobeothopatsi. <sup>27</sup> Penaneconitsivi pejebabiabibo pevetsinë näcotapuna pemajitecaenëmi. Nexata itsa tane daxita baupanë penabaupanaejava, navemarajonotaxuabina pijaespada penabeyaxuabinexa picani. Tsipaji jamatabëjumaitsi:

—Daxita meta baja penaneconitsivi rëcëpeca. Nexata bajarapajamatabëcuene yabara nenaneconitsiaexanaena tomara pevetsivi, jamatabëjai.

<sup>28</sup> Nexata bajarajota itacarajeta Pablo pinijijumeta jumai tsaxuabi:

—Pëtsa nabeyaxuabame. Daxita raja patananeconitsivi panubenajë, jai Pablo.

<sup>29</sup> Nexata penaneconitsivi pejebabiabibo pevetsinë itoroba pijajivitonë petocarenanexatsi pitayotabiabijava. Nexata bepïjia tocarenatsi. Penaneconitsivi pejebabiabibo pevetsinë bitso neconecojai pecajunavi. Nexata bajaraponë pematatabacabëta nucajunua Pablobeje Silasbeje pitabarata. <sup>30</sup> Bajaraxuacujinae penaneconitsivi pejebabiabibo pevetsinë barëpitsapaliatsibeje Pablobeje Silasbeje. Penaneconitsivi pejebabiabibo pevetsinë jumaitsi:

—¿Detsa xua exanaenajë tanecapanepaenexa Diosojavabelia? jai Pablobeje Silasbejejavabelia.

<sup>31</sup> Nexata Pablobeje Silasbeje jumaitsibeje:

—Najamatabëcuenecopare pepo petuxanenë Jesucristojavabelia pecapanepaenexa Diosojavabelia. Xamë nijabota pejinavanapaevi ata Jesucristojavabelia najamatabëcuenecopatsi pecapanepaenexatsi Diosojavabelia, jaibeje.

<sup>32</sup> Nexata Pablobeje Silasbeje tsipaebabeje Dioso pitorobilivaisi bajaraponëjavabelia, daxita pijabota pejinavanapaevijavabelia ata. <sup>33</sup> Penaneconitsivi pejebabiabibo pevetsinë bajarapaepatota, meravi, Pablobeje Silasbeje jumavajënëquiatatsibeje. Nexata bajaraponë, pijabopijivi yajava, bautisababeje Pablobeje Silasbeje. <sup>34</sup> Bajaraxuacujinae penaneconitsivi pejebabiabibo pevetsinë pijaboyabelia Pablobeje Silasbeje barëliatsibeje. Nexata pexaejava rajutatsibeje. Bajaraponë, pijabopijivi yajava, pinijicuenia jamatabëcuenebarëya Dioso pejumecovënëtsixae.

<sup>35</sup> Nexata pepo bajayacunua juezmonae itorobalia vajabitsaë penaneconitsivi pejebabiabibo pevetsinëjavabelia pejumaitsinexa: “Capitsapaename pina baja Pablobeje Silasbeje,” pejainexa. <sup>36</sup> Nexata penaneconitsivi pejebabiabibo pevetsinë jumaitsi Pablojavabelia:

—Juezmonae rabaja netonajumeitorobarena patacapitsapaenexabeje. Paponarebeje baja xaniavaetsia, jai penaneconitsivi pejebabiabibo pevetsinë.

<sup>37</sup> Itsiata baitsi jane Pablo jumaitsi juezmonae pitorobivajabitsaëvijavabelia:

—Juezmonae naneconita pijatuxanevijavabelia, paxanëbejejavaberena ata. Tsi-paji abaxë copiata xaniavaetsia yapëtaenejeva paneconi paxainajëbeje, paxanëbeje paRomano nacuapijinë atanëbeje, juezmonae itoroba paxamëyajuvënëvi patanejumaconibabenexabeje daxita tomarapijivi pitabarata. Bajaraxuacujinae paretabeje mapabotaje. Nexata aeconoxae juezmonae saya paxamë pacaitorobarena pepëya patanecapitsanaenexamëbeje. Juezmonae ponaerena pijacuata patanecapitsapaenexabeje, jai Pablo juezmonae pitorobivajabitsaëvijavabelia.

<sup>38</sup> Nexata vajabitsaë tsipaeba juezmonaejavabelia pacuenia Pablo jumaitsi. Nexata juezmonae itsa jumetane Pablobeje Silasbeje Romano nacuapijinëbejecuene, bitso jamatabëcuenenajunaviaca. <sup>39</sup> Nexata juezmonae parena. Jumaitsi Pablobeje Silasbejejavabelia:

—Pauranë paxamëbejejavabelia vajabitsaë pataitorobixae pibisiacuene papecaexanaenexabeje, jai juezmonae.

Nexata juezmonae pijacuata Pablobeje Silasbeje penaneconitsivi pejebabiabibovecua capitsapatsibeje. Juezmonae barajamatabëcuenexanepanaeya Pablobeje Silasbeje itorobatsibeje peponaenexabeje baja tomaravecua. <sup>40</sup> Pablobeje Silasbeje pecapitsapaecujinaetsibeje, ponabeje baja Lidia pijaboyabelia. Nexata Lidia pijabota itsa tanebeje Dioso pejumecovënëtsivi, muxujiobabeje bajarapa-



monae pijamatabëcuenesaënexa Diosojavabelia. Bajaraxuacujinae ponabeje baja bajarapatomaravecu.

**Pacuenia Pablobeje Silasbeje Tesalónica  
tomarata jaitatsibeje pevaetabinexatsibeje yabara pelivaisi**

**17** Pablobeje Silasbeje najetarucabeje Anfípolis tomarajava, Apolonia tomara-  
java ata. Bajaraxuacujinae patabeje Tesalónica tomarabelia. Nexata  
Pablobeje Silasbeje Tesalónica tomarata naponaponabeje acueyabi pasemanabeje.  
Tesalónica tomarata eca judíovi penacaeuatabiabibo. <sup>2</sup>Nexata Pablo pijacujiru-  
cuenia judíovi penacueraevetsimatacabianë canacujitsia najoneyabiaba bajarapab-  
ota. Dioso pitorobilivaisi Pablo tsipaebabiaba bajarapabota penacaeuatabiavijav-  
abelia. Tsipaebabiaba pacuenia Dioso pejumelivaisibaxutota jumaisi. <sup>3</sup>Pablo jumai  
tsabiabi judíovi penacaeuatabiabibota:

—Dioso baja cajena pejumelivaisibaxutota tajëvelia vajunupaebatsi Cristo, ponë  
baja Dioso itorobica jivi pecapanepaenexa. Tajëvelia baja cajena Dioso pejume-  
livaisibaxutota Cristo vajunupaebatsi pijavajabitsaë ayaicuenia pebejiobiaexanae-  
javanexatsi. Vajunupaebatsinua baja cajena Cristo petëpaecujinae icatsia piasaë-  
javanexa. Bajaraponë raja Jesús, ponë pelivaisi pacatsipaebatsi. Bajaraponë raja  
Cristo, ponë Dioso itorobica jivi pecapanepaenexa, jai tsabiabi Pablo itsa tsipa-  
ebabiaba Dioso pitorobilivaisi judíovi penacaeuatabiabibota.

<sup>4</sup>Nexata judíoviyajuvënëvi jumecovënëta Pablo petsipaebabiabilivaisi. Ayaibit-  
saëto griegovi ata, Dioso pejitsipaevi, jumecovënëta Pablo petsipaebabiabilivaisi.  
Ayaibitsaëto petiriavi ata, petuxanevi pijavajivi, jumecovënëta Pablo petsipaebili-  
vaisi. Nexata daxita bajarapamonae nacaetuatabiaba Pablobeje Silasbejevavata.  
<sup>5</sup>Nexata judíovi, pamonaë apo jumecovënëtsi Pablo petsipaebabiabilivaisi, Pablo  
cuenecaëbatsi. Tsipaji Pablojavabelia jivi ayaibitsaëto jonepona. Nexata bajara-  
pajudíovi junata jivi ayaibitsaëto xaneto pibisiajamatabëcuenevi, saya jema pe-  
jinavanapaevi tomarapijicallejava. Nexata pejunatsicujinae bajarapajudíovi peju-  
natsivi jane baja barënacaeuata. Nexata daxita bajarapajudíovi, pejunatsivi jane  
baja yajava, barënamatabëcueneyanaba. Nexata itoroba bajarapatomarapijivi pi-  
anaepanaenexa Dioso pejumecovënëtsivijavabelia. Pablobeje Silasbeje naponapon-  
abeje Jasónvënëne pijabota. Nexata daxita pamonaë anaepana bajarapatomarata,  
Pablobeje Silasbeje jemata tsimaxëpatatsibeje Jasón pijabota. Vaetabijitsatsibeje  
picani penutsinexatsibeje tomara pevetsivi pitabarata. <sup>6</sup>Jasón pijabota Pablobeje  
Silasbeje apo pecaxitajarabixaetsibeje, nexata pamonaë anaepana, vaetabatsi Jasón,  
itsamonae yajava, pamonaë Dioso pejumecovënëtsivi. Robocaponaliatsi Jasón-  
bana tomara pevetsivijavabelia. Nexata pamonaë anaepana, tomara pevetsivi  
pitabarata najumetsënëtsiaya pinijijumeta jumaisi Pablobeje Silasbeje yabara:

—Pablobeje raja Silasbeje daxitanacuanëjava pejinavanapaevi itorobaponabeje  
pianaepanaenexa. Nexata jane baja aeconoxae vajatomarajavaberena ata patabeje.  
<sup>7</sup>Nexata Jasón, maponë nucaje, tocopata pijabota penaponaponaenexabeje  
Pablobeje Silasbeje. Daxita pamonaë Jasón mayajavanucaje, Pablobana ata, daxita  
bajarapamonae, apo jumecovënëtsi cajena Romanonacua pepo pevetsinë pitorobili-  
vaisi. Daxita bajarapamonae jumai tsabiabi: “Romanonacua pepo pevetsinë rabaja  
apo nacayanacuaevetsi. Itsanë rabaja nacayanacuaeveta. Bajaraponë pevënë Jesús,”

jai tsabiabi daxita bajarapamonae, jai najumetsënëtsiaya tomara pevetsivijavabelia pamonae anaepana.

<sup>8</sup>Nexata bajarapacuenia pejumaitsijava itsa jumetane, daxita tomarapijivi tomara pevetsivinua bitso anaepana. <sup>9</sup>Nexata Jasón, Dioso pejumecovënëtsivi yajava, palata matamotsiaexanatsi tomara pevetsivijavabelia, Pablobeje Silasbeje pevecuapitsapaenexabeje bajarapatomara. Tomara pevetsivi jumaitsi:

—Itsa rabaja ponaenabeje bajaraponëbeje mapatomaravecuaje, pacatocanaviabi-anatsi panijapalata, jai tomara pevetsivi Jasónbanajavabelia.

Bajaraxuacujinae copabatsi baja Jasónbana penaviabinexa pijabonëjavabelia.

### **Pacuenia Pablobeje Silasbeje ponaponabeje Berea tomarata yabara pelivaisi**

<sup>10</sup>Jasónbana tomara pevetsivi pecopabicujinaetsi, bajarapameravi, Dioso pejumecovënëtsivi bepijia itorobatsi Pablobeje Silasbeje peponaenexabeje, Berea tomarabelia. Pablobeje Silasbeje pepatsicujinaeliabeje Berea tomarata najunuabeje judíovi penacaetuatabiabojavabelia. <sup>11</sup>Ajamatabëcuenetaja pajudíovi jinavanapa Tesalónica tomarata. Nexata apo jumecovënëtsi Dioso pitorobilivaisi. Pajudíovi jinavanapa Berea tomarata, bajarapacuenia apo ajamatabëcuenetaja. Bajarapajudíovi bitso jitsipa pejumetaenexa Dioso pitorobilivaisi. Nexata Pablo caematacabi canacujitsia judíovi penacaetuatabiibota Dioso pitorobilivaisi tsipaebabiaba bajarapajudíovijavabelia. Nexata Pablo itsa copata petsipaebabiabijava, bajarapajudíovi pijacuata Dioso pejumelivaisibaxutota xaniavaetsia nacujarubabiaba peyapëtaenexa xaniajai bajarapacuenia itsa jumaitsi Pablo petsipaebabiabilivaisi. <sup>12</sup>Berea tomarapijivi judíovi ayaibitsaëto jumecovënëta Pablo petsipaebabiabilivaisi. Ayaibitsaëto pijinia griegovi ata jumecovënëta. Jumecovënëta pebijivi. Jumecovënëta petiriavi ata. Bajarapapetiriavi petuxanenëanë pijavajivi. <sup>13</sup>Pajudíovi jinavanapa Tesalónica tomarata, Pablo vënëlivaisitanetsi Dioso pitorobilivaisi petsipaebabiabijava Berea tomarata. Nexata bajarapajudíovi ponalia Berea tomarabelia. Nexata bajarapajudíovi itoroba Berea tomarapijivi ayaibitsaëto pianaeponaenexa Pablojavabelia.

<sup>14</sup>Nexata Berea tomarapijivi, pamonae jumecovënëta Pablo petsipaebabiabilivaisi, bajarapamonae Pablo bepijia itorobatsi peponaenexa manuamene itapata peecae-tomarabelia. Silasbeje abaxë Timoteobeje nacopatabeje Berea tomarata. <sup>15</sup>Pamonae Pablo yanataponaliatsi, pënxuabatsi Atenas tomarabelia. Nexata Atenas tomaraverena bajarapamonaeta Pablo tonajumexuaba Silasbeje Timoteobeje. Jumaitsi:

—Itsa cuencaëjëpaenatsibeje, bepijia renabeje tsane tanecaxitajarabinexabeje Atenas tomarata, jai Pablo bajarapamonaejavabelia.

Bajaraxuacujinae pamonae Pablo pënxuabatsi, naviaba baja Berea tomarabelia.

### **Pacuenia Pablo ponapona Atenas tomarata yabara pelivaisi**

<sup>16</sup>Pablo abaxë Atenas tomarata evetaponapona Silasbeje Timoteobeje pepatsijavabeje Atenas tomaraberena. Nexata Pablo itsa ponapona Atenas tomarata, tane pecobeta jumapecataeya pexanaenëanë piapaxayojava daxita Atenas tomara tu-atuajëjava. Nexata Atenas tomarapijivi pematabacabëta nubenabiaba pevajëcabi-abinexa bajarapajumapecataevijavabelia. Nexata Pablo itsa tane bajarapacuenia, bejamatabëjiovi bitso. <sup>17</sup>Nexata judíovi penacaetuatabiibota Pablo Dioso pitorobilivaisi yabara barënajumenotabiaba pevëna judíovi. Barënajumenotabiabanua apo judíovi ata, pamonae Dioso pejitsipaevi. Caematacabi canacujitsia barënajuv

menotabiabanua pamonae Pablo caxitajarabatsi tomara tuatuajëta. <sup>18</sup> Nexata Pablo caxitajaraba pebijivi, epicúreomnae pecujarubilivaisi pejumecovënëtavanapaevi. Caxitajarabanua itsapebijivi, estoicosmonae pecujarubilivaisi pejumecovënëtavana-  
paevi. Bajarapamonae ata Pablo barënajumenota. Nexata Pablo pebarënajumenot-  
sijavata, bajarapamonaeyajuvënëvi Pablo yabara muetsia najumaitsi:

—¿Detsa meta pitsilivaisi maponëje namatatsapatsia nacabarëcuaicuaijaije? najai bajarapamonae Pablo yabara.

Itsamonae pijinia Pablo yabara najumaitsi:

—Itsanacuapijivi racovë pijadiosovi pelivaisipaebinë, najai bajarapamonae.

Bajarapacuenia najumaitsi tsipaji Pablo tsipaebapona pexanialivaisi, Jesús peliv-  
aisi. Tsipaebaponanua petëpaevimi icatsia itsamatacabi piasaëjavanexa petëpaecu-  
jinae. <sup>19</sup> Nexata bajarapamonae Pablo barëponaliatsi Areópagovënë tsutojavabelia,  
patsutojavabelia tomara pevetsivi nacaetuatabiaba penabarëcuaicuaijainexa. Itsa  
baja palia bajarabelia, bajarapamonae jumaitsi Pablojavabelia:

—Panetsipaebare patayapëtaenexa papejanalivaisi tsipaebapona. <sup>20</sup> Panet-  
simuxuaitothia abaxë palivaisi tsipaebapona. Nexata pajitsipajë patayapëtaenexa  
pajamatabëcuenelivaisi xaina palivaisi tsipaebapona, jai Atenas tomarapijivi  
Pablojavabelia.

<sup>21</sup> Atenas tomarapijivi, itsanacuaverena pepatsivinua, pamonae bajarapatomarata  
najinavanapa, daxita bajarapamonae jamatabëcueneenabiabatsi pejanalivaisi pe-  
jumetaeyabiabinexa. Jamatabëcueneenabiabatsinua petsipaebabiabinexa itsamon-  
aejavabelia ata.

<sup>22</sup> Nexata Pablo nonotapuna bajarapamonae tuatuajëta Areópagovënë tsutojavata.  
Jumaitsi:

—PaAtenas tomarapijivimë, pacatanetsi rabaja panijadiosovi bitso papeca-  
jamatabëcueneenabibijava. <sup>23</sup> Tanajetarucabiabijavata panijatamaracallejava,  
taeyabiabajë itsaxuayo pavajëcabiabame panijadiosovijavabelia. Nexata  
caxitajarabajë altarvënëjava, itsajota jivi vajëcabiaba abaxë apo yapëtae ata  
padiosojavabelia vajëcabiaba. Bajarapaaltarvënëjavata peyaquinarutsiitane jumai  
tsaruce mapacueniaje: “Padioso abaxë apo yapëtaetsi, bajarapadiosojavabelia  
vajëcabiabianatsi mapaaltarjavataje,” jai tsaruce peyaquinarutsiitane. PaDioso  
yabara yaquinaruta bajarapaaltarvënëjavata, nexata bajarapaDiosojavabelia  
paxamë baja najamatabëcuenecopatsiaya panavajëcabiabame, abaxë apo  
payapëtae atamë bajarapaDioso, bajarapaDioso yabara jane baja aeconoxae  
pacatsipaebijitsiatsi, jai Pablo Atenas tomarapijivijavabelia.

<sup>24</sup> Icatsia Pablo jumaitsi Atenas tomarapijivijavabelia:

—PaDioso yabara pacatsipaebijitsiatsi, mapanacua exanaje. Exana daxita ma-  
panacuapijicuene yajava. BajarapaDioso pepo pevetsinë jane baja daxita ma-  
panacujaje. Pevetsinë itaboxo ata. BajarapaDioso cajena apo ponaponae jivi pex-  
anaetemplota. <sup>25</sup> BajarapaDioso apo namatavenonae jivi peyavenonaenexatsi. Tsi-  
paji apo namatavenonae itsacuenëjavayo ata. Biji rajane bajaraponë nacara-  
juta caeepatoyo vajaasaëtsavanapaejumalijonexa. Nacarajutanua daxita xua na-  
matavenonatsi, jai Pablo pepo Dioso, athëbëtatsia peecaenë, yabara.

<sup>26</sup> Icatsia Pablo jumaitsi Atenas tomarapijivijavabelia:

—BajarapaDioso abaxë copiaya caenë pebi exana. Bajaraxuacujinae bajarapape-  
bijavaverena naexanapona daxitavirijumevi pijasalinaivimi. Nexata bajarapape-

bijavaverena penaexanaponaevi yacaējēpa pejinavanapaejava daxitanacuanējava. Nexata Dioso caevirijumevi canacujitsia tocopatapona pamatacabibeje asaē tsavanapaejitsia. Tocopataponanua panacuanējava jinavanapaejitsia. <sup>27</sup> Bajarapacuenia Dioso tocopata mapanacuataje daxita bajarapamonae Dioso pejitsipaenexa penajamatabēcuenecopsinexa Diosojavabelia. Dioso cajena tajē apo nacavecuaponaponaē. <sup>28</sup> Dioso raja pejamatabēcueneta asaē tsavanapaetsi. Bajarapacuenia Dioso pejamatabēcueneta asaē tsavanapaetsi tsipaji baja cajena paxamēyajuvēnēvi bajayata peyaquinaelivaisita jumaiṣi: “Vaxaiṣi ata rabaja Dioso pexitsi,” jai. <sup>29</sup> Nexata Dioso itsa pexitsi, Dioso yabara jamatabēcuenenavēxaniabiaya apo bejamatabējumaiṣiṣi mapacueniaje: “Dioso raja oronanitota, platananitota ata, ibotota ata pexanaenēṣi. Nexata pacuenia bitso pecujanivitsi pecobeta pexanaenēanē pexaniacuenia exana, bajara pitsinē Dioso,” apo bejamatabējaiṣi jamatabēcuenenavēxaniabiaya Dioso yabara. <sup>30</sup> Jivi abaxē bajayata apo yapētae Dioso peponaponaējava. Nexata bajayata jivi pibisiacuene exanabiabi ata, Dioso abaxē najamatabēcuenecataita. Nexata abaxē Dioso apo naneconitsiaexanae bajarapamonae pibisiacuene pexanabiabijava yabara. Itsiata baiṣi jane maparucaeje Dioso itoroba daxitajivi daxitanacuanējava pejinavanapaevi pibisiacuene pexanabiabijava pecopabinexa baja, penajamatabēcuenepēnēyorotsinexa Diosojavabelia. <sup>31</sup> Bajarapacuenia Dioso itoroba tsipaji baja Dioso jivi penaneconitsiaexanaematacabinexa tocaējētaruta. Pamatacabi Dioso tocaējētaruta, itsa copiapatsiana, naneconitsiaexanaena daxitanacuanēpijivi. Nexata Dioso jivi itsa naneconitsiaexanaena, caejivi canacujitsia paneconivajēto xainapona, bajarapaneconivajētota naneconitsiaexanaponaena. Ponē jivi naneconitsiaexanaejitsia, Dioso baja cajena itapeta. Daxitajivi beyapētane ponē Dioso itapeta. Tsipaji baja bajaraponē Dioso icatsia asaēyaexana petēpaecuinae, jai Pablo Atenas tomarapijivijavabelia Jesús yabara.

<sup>32</sup> Nexata Atenas tomarapijivi itsa jumetane bajarapacuenia Pablo pejumaiṣisijava Jesús petēpaecuinae Dioso icatsia piasaēyaexanaejavatsi yabara, Atenas tomarapijivi Pablo jumecaponatsi. Itsamonae pijinia itsiata jumaiṣi Pablojavabelia:

—Icatsia itsamatacabijavabelia pacanamuxunaevetsianatsi bajarapalivaisi, jai itsamonae.

<sup>33</sup> Nexata baja Pablo bajarapamonae vecuapona. <sup>34</sup> Itsamonae itsiata pēnaponatsi. Bajarapamonae jumecovēnēta Pablo petsipaebilivaisi. Pamonaē jumecovēnēta Pablo petsipaebilivaisi yajuvēnēnē, pevēnē Dionisio. Bajaraponē Dionisio, Areópagovēnē tsutojavata penacaetuatabiabiivi pevetsiviyajuvēnēnē. Petiriva ata, Dámarisvēnēva, jumecovēnēta Pablo petsipaebilivaisi. Itsamonae yajava jumecovēnēta.

### Pacuenia Pablo ponapona Corinto tomarata yabara pelivaisi

**18** Atenas tomarata Pablo jivi petsipaebaponaponaecuinae Dioso pitorobilivaisi, pona baja. Nexata pata Corinto tomarabelia. <sup>2</sup> Nexata Corinto tomarata Pablo caxitajaraba judíonē, Aquilavēnēnē, Ponto nacuapijinē. Bajaraponē Aquila caematacabibeje abaxē xaina Corinto tomarata pepatsicujinae Italia nacuaverena. Yajavapata pijava Priscilavēnēva. Bajarapajivibeje Italia nacuaverena patabeje. Bajaraverena patabeje tsipaji Romanonacua pepo pevetsinē, Claudiovēnēnē, capitsapapona daxita judíovi pepitsapaenexa Roma tomaravecua. Romatomara eca Italia nacuata. Nexata Pablo pona Aquila pijaboyabelia. <sup>3</sup> Nexata Aquila pijabota Pablo

naponapona. Nexata carpabonë Pablo nayavenonaeya jorocabiaba Aquila. Pablo nanacueneba tsipaji Pablo ata yapëtane pejorocaejava carpabonë. <sup>4</sup> Judíovi penacae-tuatabiabibota, penacueraevetsimatacabianë canacujitsia, Pablo judíovi tsipaebabi-aba Dioso pitorobilivaisi. Pablo tsipaebabiaba judíovijavabelia, apo judíovijavabelia ata, bajarapamonae pejumecovënëtsinexa palivaisi Pablo tsipaebabiaba.

<sup>5</sup> Silasbeje Timoteobeje Corinto tomarata itsa patabeje Macedonia nacuaverena, Pablo baja copata Aquila peyavenonaeyajorocabiabijava carpabonë. Nexata Pablo caematacabi canacujitsia Jesús yabara jumai tsaponae judíovijavabelia:

—Jesús raja pepacueene Cristo, ponë copiaevetavanapatsi pepatsijavatsica va-janacacapanepaenexa, jai tsaponae Pablo Jesús yabara.

<sup>6</sup> Nexata bajarapacuenia Pablo pejumaitsaponaejava Jesús yabara, judíovi baraanaepanatsi. Pablo pibisiacuenia bijatanetsi. Nexata Pablo penaxatatsijava najumajonotaxuaba. Nënëbabiaba bajarapamonae peyapëtaenexa penaneconitsijava Diosojavabelia. Tsipaji apo jumecovënëtsitsi, Pablo tsipaebi ata Jesús yabara. Pablo nexata jumaitsi judíovijavabelia:

—Paxamë saya panejamatabëcueneta panaxuabianame Diosovecua. Xanë taja-matabëcueneta apo panaxuabimë tsane. Panijacuata panaxuabianame. Tsipaji ca-jena pacatsipaebi atatsi Jesús yabara, apo panejumecovënëtsimë. Aeonoxae rabaja copatajë patacatsipaebabiabijava paxamëjavabelia bajarapalivaisi. Tavajënaeya-belia baja ponaenajë tatsipaebaponaenexa bajarapalivaisi apo judíovijava, jai Pablo judíovijavabelia.

<sup>7</sup> Nexata Pablo judíovi penacaetuatabiabibovecua pitsapa. Nexata pona Justovënënë pijaboyabelia. Nexata Justo pijabota Pablo naponapona. Bajaraponë Justo penavajëcabiabinë Diosojavabelia. Pijabo eca judíovi penacaetuatabiabibo mux-uneneta. <sup>8</sup> Nexata Crispovënënë, judíovi penacaetuatabiabibo pevetsinë, daxita pijabopijivi barëjumecovënëta Jesús pelivaisi. Ayaibitsaëto Corinto tomarapi-jivi, pamonae jumetane Pablo petsipaebabiabilivaisi, jumecovënëta. Nexata ba-jarapamonae nabautisaba. <sup>9</sup> Nexata meravi bemajitsinaebota Dioso jumaitsi Pablojavabelia:

—Pëtsa junavame. Pëtsa copatame netsipaebaponaejava tajumelivaisi. <sup>10</sup> Xanë raja cayajavatsi. Nexata itsajivi ata apo caitsacueniabi tsane. Tsipaebaponaename tajumelivaisi. Tsipaji rabaja tajajivi ayaibitsaëto tsaponae mapatomarataje, jai Dioso.

<sup>11</sup> Nexata Pablo ponapona Corinto tomarata dieciocho pajuametobeje. Tsipaebapona Dioso pitorobilivaisi Corinto tomarapijivijavabelia.

<sup>12</sup> Pamatacabi Galióvënënë Acayanacua evetaponapona, judíovi najamatabëcuenejëpaeya tsmaxënaeatuatsi Pablo pevaetabinexatsi. Nexata itsa vaetabatsi, Pablo caponaliatsi penutsinexatsi nacuaevevtsinë Galión pitabarata.

<sup>13</sup> Nexata judíovi jumaitsi nacuaevevtsinë Galiónjavabelia:

—Mara ponëje jivi livaisi tsipaebapona jepejumecovënëtsinexa Dioso. Itsiata baitsi jane saicayacuenia Dioso pejumelivaisivecua tsipaebapona. Paxanë cajena bajarapacuenia apo panetonajumecopatsi Dioso Moiséspijinëta penajumecopatsili-vaisi, jai judíovi nacuaevevtsinë Galiónjavabelia Pablo yabara.

<sup>14</sup> Ajena picani Pablo jumepitsijitsia judíovi, itacarajeta nacuaevevtsinë Galión ju-maitsi judíovijavabelia:

—Paxamē pajudíovimē, bepapyāetaneme mapacueneje. Itsa maponēje nacobetoxtotsipa, jivitonē ata itsa beyaxuabijitsipa, pacajumexaniataejitsipatsi. Nexata naneconitsiaexanaejitsipajē. <sup>15</sup>Paxamē saya pabarēnajumenotame maponēje papecatsipaebaponaelivaisi yabara. Pabarēnajumenotamenua panijasalinaivi pijalivaisi yabara ata. Nexata saya paxamē panijacuata bajaraxua yabara pabarēcuai-  
jamēre pacuenia pajitsipame. Xanē raja apo evetsinē bajarapalivaisi, jai nacuaevevsinē Galión judíovijavabelia.

<sup>16</sup>Nexata baja nacuaevevsinē Galión navecuapitsapaeyaexana judíovi. <sup>17</sup>Nacuaevevsinē Galión judíovi navecuapitsapaeyaexanae ata, caecuenia abaxē judíovi apo ponae pijabonējavabelia. Nexata griegovi, bajarajota penubenaevi, nacobenavaetaba judíoviyajuvēnēnē, Sóstenesvēnēnē. Bajaraponē Sóstenes judíovi penacuetuatabibibo pevetsinē. Nexata griegovi Sóstenes conibabia nacuaevevsinē Galión pitabarata, ajibi ata peyabaraconibabevaja. Nexata nacuaevevsinē Galión tae ata bajarapacuene, apo itavetsi.

**Pacuenia Pablo pepatsicujinae Antioquía tomarata,  
icatsia naropota acueyabinamutonexa jivi  
petsipaebaponaenexa Dioso pitorobilivaisi yabara pelivaisi**

<sup>18</sup>Pablo abaxē bajayajebi ponapona Corinto tomarata. Bajaraxuacujinae Dioso pejumecovēnētsivita napējioba. Napona barcota Siria nacuyabelia. Pablo yajavapona Priscilabeje Aquilabeje. Nexata epatua Cencrea tomarata, Pablo mataxunatsi. Daxitamatanami matacasibatsi jivi peyapētaenexatsi petoveretsijava Dioso petonacuenebijava pacuenia baja cajena Diosojavabelia Pablo najumecapanepaeya jumaitsi. <sup>19</sup>Pabloana Aquilabana Priscilabana itsa pata Efeso tomarata, Pablo baja vecuanatsata Priscilabeje Aquilabeje. Nexata Pablo Efeso tomarata joneya judíovi penacuetuatabibiboyalia. Nexata bajarajota barēnalivaisita judíovi. <sup>20</sup>Nexata picani Efeso tomarata Pablo judíovi asivatsi abaxē penaponaponaenexa anijamatabianē. Itsiata Pablo apo jejai. <sup>21</sup>Nexata Pablo itsa napējioba, bajarapamonaejavabelia jumaitsi:

—Naxanetajē tapatsinexa Jerusalén tomarabelia tataenexa pafieta baja imoxoyo pevājēnae pejonenexa. Itsiata icatsia najetarucaenajē paxamējavaberena itsa Dioso jitsipa, jai Pablo judíovijavabelia.

Nexata Pablo Efeso tomarata barcota nanaropota. <sup>22</sup>Itsa baja Pablo pata Cesarea tomarabelia, pona icatsia Jerusalén tomarabelia pebajacobinexa daxita Dioso pejumecovēnētsivi. Bajaraxuacujinae icatsia naviata Antioquía tomarabelia. <sup>23</sup>Antioquía tomarata bajayajebi ponapona. Bajaraxuacujinae icatsia naropota. Najetaruca daxita tomaranējava. Najetaruca Galacia nacuata penaetomaranējava, Frigia nacuata penaetomaranējava ata. Bajarapatomaranējava pejinavana-paevi Dioso pijalivaisita Pablo jamatabēcuene asaēyaexananajetaruca daxita Dioso pejumecovēnētsivi.

**Pacuenia Apolos Dioso pitorobilivaisi tsipaeba  
Efeso tomarapijivijavabelia yabara pelivaisi**

<sup>24</sup>Judíonē Apolosvēnēnē pata Efeso tomarata, Alejandría tomarapijinē. Bajaronē xaniavaetsia Dioso pitorobilivaisi jivi tsipaebabiaba. Jumeyapētane bitso pacuenia Dioso pejumelivaisibaxutota jumaitsi. <sup>25</sup>Apolos itsamonae epatua tsipaeba-

batsi Jesús pelivaisi. Itsiata baitsi jane xaniavaetsia daxitalivaisi apo tsipaebitsi. Palivaisi Juanpijinë jivijavabelia tsipaebaþona, bajarapalivaisi Apolos xaniavaetsia tsipaebatsi. Juanpijinë jivi pebautisabaponaejava ata Apolos xaniavaetsia tsipaebatsi. Apolos xaniavaetsia Jesús pelivaisi apo tsipaebi atatsi, itsiata ajamatabëcuenesaëya xaniavaetsia tsipaebanajetaruca Jesús pelivaisi. <sup>26</sup> Apolos ajumejunavijibia Dioso pitorobilivaisi jivi tsipaeba judíovi penacactuatabibibota. Nexata Priscilabeje Aquilabeje itsa jumetanebeje Apolos petsipaebilivaisi, nexata bajarapajivibeje junatabeje Apolos. Nexata Apolos napona Priscilabeje Aquilabeje pijaboyabelia. Nexata bajarapajivibeje daxitalivaisi jane baja, Jesús pelivaisi, xaniavaetsia tsipaebabeje Apolosjavabelia xaniavaetsia Apolos peyapëtaenexa Jesús pelivaisi. <sup>27</sup> Itsa baja Apolos naropotsijitsia Efeso tomaravecu peponaenexa Acaya nacuyabelia, Dioso pejumecovënëtsivi, Efeso tomarapijivi, yavenonatsi peponaenexa. Tsicobeyaquinatsi cuyalatobaxuto pecaponaenexa, Dioso pejumecovënëtsivijavabelia perajutsinexa Acaya nacuata. Bajarapacuenia tsicobeyaquinatsi Acaya nacuapijivi, Dioso pejumecovënëtsivi, xaniavaetsia Apolos pecopiapitsinexatsi. Apolos baja itsa pata Acaya nacuyabelia, Apolos bitso yavenona Acaya nacuapijivi Dioso pejumecovënëtsivi. <sup>28</sup> Daxitajivijavabelia Apolos tsipaebaþona Jesús pelivaisi. Nexata pacuenia Dioso pejumelivaisibaxutota jumaitsi Jesús yabara, Apolos tsipaebaþona daxitajivijavabelia. Nexata Apolos daxitajivi yapëtaeyaexanaþona Jesús pepacuene Dioso athëbëvetsica pitorobijavatsitsica jivi pecapanepaenexa. Nexata baja judíovi moya ena. Tsipaji acuenebi judíovi: “Jume raja,” pejaijava Apolos petsipaebilivaisi yabara.

### Pacuenia Pablo ponapona Efeso tomarata yabara pelivaisi

**19** Pamatacabi abaxë Apolos ponapona Corinto tomarata, bajarapamatacabi pijinia Pablo ibotsutonë nacujavaverena najetaruca pepatsinexa Efeso tomaraberena. Efeso tomarata Pablo itsa pata, caxitajaraba caejvibeje Jesús pelivaisi pejumecovënëtsivi. <sup>2</sup> Nexata Pablo yanijoba bajarapamonaejavabelia.

—¿Espíritu Santo tsabaja pacatsijamatabëjunua pamatacabi ajena pajumecovënë-tame Jesús pelivaisi? jai Pablo.

Nexata bajarapamonae jumaitsi:

—Jume. Apo payapëtaenë patanetsijamatabëjonejava Espíritu Santo. Apo pavënë-taenë cajena Espíritu Santo ata, jai bajarapamonae Pablojavabelia.

<sup>3</sup> Nexata Pablo jumaitsi:

—¿Detsa pitsijamatabëcuene yabara pacabautisaba? jai Pablo bajarapamonaejavabelia.

Nexata bajarapamonae jumaitsi:

—Pajamatabëcuene yabara raja Juanpijinë panetsipaeba, bajarapajamatabëcuene yabara panebautisaba, jai bajarapamonae.

<sup>4</sup> Pablo nexata jumaitsi bajarapamonaejavabelia:

—Juanpijinë raja bautisabapona pamonaë baja copaba pibisiacuene pexanaejava, pamonaë baja najamatabëcuenepënëyorota Diosojavabelia. Itsiata baitsi jane Juanpijinë jumai tsaponaë jivijavabelia: “Panamatavenoname panejumecovënëtsinexa ponë xanë tacovëverena patsiana, baitsi Jesús. Bajaraponë Cristo, ponë Dioso itorbica,” jai tsaponaë Juanpijinë jivijavabelia, jai Pablo bajarapamonaejavabelia.

<sup>5</sup> Bajarapamonae itsa jumecovënëta Jesús pelivaisi, nexata Pablo bautisaba bajarapamonae petuxanenë Jesús pevënëta. <sup>6</sup> Nexata Pablo pevajëtsijavata Diosojavabelia,

tsimatanacobeuata bajarapamonae. Nexata bajarapamonae Espiritu Santo tsijamatabējunuatsi. Nexata bajarapamonae itsa cuaicuaijai, ajumeitothia pecuaicuaijaijava. Tsipaji itsavirijajumenēta, apo penatsipaebijumenēmi, cuaicuaijai. Bajarax-uacujinae jane baja bajarapamonae Dioso pitorobilivaisi tsipaebapona jivijavabelia. <sup>7</sup>Daxita meta bajarapamonae bejamatabēcuenē doce ponēbeje.

<sup>8</sup>Efeso tomarata Pablo acueyabi pajuametobeje ponapona. Nexata Pablo Efeso tomarata, judíoivi penacaetuatabiabibota, judfovijavabelia ajumejunavijibia tsipaebabiaba Dioso pitorobilivaisi. Pablo judíoivi barēnajumenotabiaba Dioso pijajivi pevetsijavanexa yabara. Bajarapacuenia Pablo barēnajumenotabiaba judfoivi pejumecovēnētsinexa Dioso pijajivi pevetsijavanexa. <sup>9</sup>Itsamonae itsiata amatabocotaja. Apo jitsipae pejumecovēnētsijava bajarapalivaisi. Bajarapamonae daxitajivi pitabarata pibisiacuenia baracuaicuaijai pexanialivaisi, Jesús pelivaisi. Nexata baja Pablo vecuanatsata bajarapamonae apo pejumecovēnētsixae Jesús pelivaisi. Pablo nexata, Jesús pelivaisi pejumecovēnētsivi yajava, pona Tirannovēnēnē pijaescuelabojavabelia, bajarapabota penacaetuatabibinexa. Bajarapabota nexata Pablo caematacabi canacujitsia pexanialivaisi, Jesús pelivaisi, jivi tsipaebabiaba. <sup>10</sup>Bajarapacuenia Pablo tsipaebapona anijavaibeje. Nexata daxita Asiavēnē nacuapijivi, judíoivi, apo judíoivi ata, jumetane petuxanenē Jesús pelivaisi. <sup>11</sup>Dioso yavenonatsi Pablo Dioso pesaēta pinijicuenē pexanaejavanē pexanaponaenexa. <sup>12</sup>Nexata pamonaē toavitantsi, pijamonae Pablo penaxatabijavanē, pijapañueloxi ata, daxita xuaxi Pablo naperabēcajayaba, tocaponabiaba piavitanevi peperabēcajayabinexa. Nexata piavitanevi bajaraxua itsa tsiperabēbuatatsi, jamatejema baja tsabiabi. Dovathivi peyajavajinavanapaevi ata vecuapitsapabiabatsi.

<sup>13-14</sup>Itsamonae judíoivi tomaranējava najetarubena. Bajarapamonae Jesús pelivaisi apo jumecovēnētsi ata, itsiata dovathi jivivecua capitsapapona. Pajudfoivi bajarapacuenia dovathi jivivecua capitsapapona, siete ponēbeje tsavanapae. Bajarapamonae Esceavēnēnē, sacerdotevi penamatacaitorobinē, ēpexi tsavanapae. Nexata bajarapamonae vēnētane Jesús. Nexata bajarapamonae najumaitsi:

—Dovathi jivivecua capitsapaenatsi petuxanenē Jesús pevēnēta, najai.

Nexata jane baja itsa tane dovathi peyajavaponaponaenē, bajarapamonae jumaitsi:

—Dovathi, pacaitavetatsi, ponē Pablo vajunupaebapona, petuxanenē Jesús pevēnēta. Vecuapitsapare baja maponēje, jai Esceavēnēnē pexi dovathi peyajavaponaponaenējavabelia.

<sup>15</sup>Nexata Esceva pexi itsa itaveta dovathi, dovathi jumaitsi mapacueniaje:

—Yapētaniji raja Jesús. Yapētaniji Pablo ata. Itsiata paxamē apo pacayapētaetsi. ¿Detsa jane paxamē papamonaemē? jai dovathi.

<sup>16</sup>Nexata bajarajota dovathi peyajavaponaponaenē, tsimaxējirevarenatsi bajarapamonae. Pinijisaēta dovathi peyajavaponaponaenē biatsi. Nexata amoneyabatsi. Pinijicuenia tsauqibabiatsi. Vejumatititsi penaxatabijavanēmi. Nexata bajaraponaē pijabovecua bajarapamonae yarēcēpeca pebejavatsi. Jumasa nexata rēcēpeca. <sup>17</sup>Nexata daxita Efeso tomarapijivi, judíoivi, apo judíoivi ata, vēnēlivaisitane pacuenia dovathi peyajavaponaponaenē exanatsi Esceva pexi. Nexata Efeso tomarapijivi bitso jamatabēcuenenajunaviaca. Nexata daxita bajarapamonae yaiyatane Jesús pevēnē.



<sup>18</sup> Nexata ayaibitsaëtoخانeto Dioso pejumecovënëtsivi, patapona Pablobanajavaberena. Nexata bajarapamonae daxitajivi pitabarata navecuapaebapona pibisiacuepe xanaxabiabijava. <sup>19</sup> Nexata ayaibitsaëto penajorobicuene peyapëtaevi, capata pijacuyalatobaxutonë, penajorobicuene yabara pecajinavanapaebaxutonë. Pamatacabi bajarapamonae comuaca bajarapabaxutonë, ayaimatamota comuaca. Nexata daxita bajarapamonae bajarapacuyalatobaxutonëmi tajuita isotota daxitajivi pitabarata. Petajuitsicujinae itsa namataëjëta petajuitsibaxutonëmi pematamo, xubapina cincuenta mil ponëbeje palatanëanë. Bajarapapalatanëanë bitso penamata-motsinëanë. <sup>20</sup> Nexata bajarapacuenia Dioso pitorobilivaisi yacaëjëpaponaba baja daxitanacuanëjava. Nexata ayaibitsaëto tsaponae Dioso pejumecovënëtsivi.

<sup>21</sup> Bajaraxuacujinae Pablo najamatabëxaina peponaenexa Macedonia nacujava, Acaya nacujava ata, petaenajetarucaenexa Dioso pejumecovënëtsivi. Bajaraxuacujinae ponaëjitsia Jerusalén tomarabelia. Pablo nexata jumaitsi:

—Tapatsicujinae Jerusalén tomarabelia, ponaenajë icatsia Roma tomarabelia ata, jai Pablo.

<sup>22</sup> Nexata Pablo itoroba Macedonia nacuyabelia anijanëbeje pijajivitonëbeje, Timoteobeje Erastobeje. Pablo abaxë bajayajebi ponapona Asiavënë nacuata.

### **Pacuenia picani Pablo Efeso tomarata jamatabëbeyaxuabatsi yabara pelivaisi**

<sup>23</sup> Pablo itsa ponapona Asiavënë nacuata, Efeso tomarapijivi bitso anaepana Jesús pelivaisi pejumecovënëtsivijavabelia. <sup>24</sup> Efeso tomarapijivi anaepana Pablobanajavabelia Demetrio pejamatabëcueneta. Demetrio platananita templobo jumapecataeya exanabiaba, tsiquiriboxi. Saya pecobeta jumapecataeya pexanaediosova, Artemisavënë diosova, pijatemplobo jumapecataeya Demetrio exanabiaba bajarapaboxi. Demetrio templobo jumapecataeya itsa exanabiaba, bajarapaboxi pebarënacuenebivi bitso ayaicuenia palata barëpitabiaba bajarapaboximatamo. <sup>25</sup> Nexata Demetrio junata pebarënacaetuatsinexa daxita pebarënacuenebiabivivi bajarapaboxi. Junatanua itsamonae ata, pamonaepijinia jumapecataeya pexanaejavanë nacuenebiabiba. Nexata Demetrio jumaitsi bajarapamonaejavabelia:

—Paxamë rabaja payapëtaneme mapacueneye. Jumapecataeya vajaexanabiabijavanë vajacanajetabiabixae, ayaijava palata xainaponatsi. <sup>26</sup> Pataneme rabaja. Pajumetanemenua baja Pablo pejumaitsaponaejava mapacueniaje: “Jivi raja pecobeta jumapecataeya pexanaenëanë, apo diosovi cajena,” pejaitsaponaejava. Nexata jivi ayaibitsaëtoخانeto mapatomarapijivije jumecovënëtapona Pablo bajarapacuenia petsipaebaponaejava. Itsiata apo ëmapatomarapijivije. Daxita Asiavënë nacuapijivi ata jumecovënëtapona. <sup>27</sup> Bajarapacuenia jivi ayaibitsaëto pejumecovënëtaponaejava apo nacatoxanepanae. Tsipaji jivi apo nacacomuatsi tsipae Artemisavënë diosova pijacuepe vajanacuenebijava. Piniijamatabëcuene pexainaediosova Artemisa pijatemplobo ata, apo yayatae tsipae. Baitsi padiosova daxita Asiavënë nacuapijivi, daxitanacuanëpijivi ata, pematabacabëta tonubenabiaba pevajëcabiabinexa bajarapovajavabelia, vereverecaëjitsipa. Nexata baja bajarapovajavabelia jivi apo vajëcabiabi tsipae, jai Demetrio templobo jumapecataeya tsiquiriboxi pexanabiabivijavabelia.

<sup>28</sup> Nexata bajarapamonae itsa jumetane bajarapacuenia Demetrio pejumaitsijava, nexata bitso bajarapamonae anaepana. Piniijumeta vavajai tsaponae. Jumaitsi:

—¡Pinijjamatabëcuene raja pexainaediosova Artemisa, Efeso tomarapijivitsi vajadiosova! jai tsaponae bajarapamonae.

<sup>29</sup> Nexata daxita Efeso tomarapijivi itsa jumetane, bitso anaepana Pablobanajavabelia. Nexata ponëbeje Pablo yanatatsi, Gayobeje Aristarcobeje, Efeso tomarapijivi vaetabatsibeje. Bajaraponëbeje Macedonia nacuapijinëbeje. Daxitajivi vaetabiaya nacobenacaponatsibeje pinijiboxanetojavabelia, itsabelia baja cajena daxita tomara-pijivi nacaetuatabiaba. <sup>30</sup> Pablo picani jumaitsi Dioso pejumecovënëtsivijavabelia:

—Xanë najonejitsianë mapaboyalijae taneyanatsinëbeje tayajivicuaicuajainexa penacaetuatsivijavabelia, jai.

Itsiata Dioso pejumecovënëtsivi apo tocopatsitsi Pablo penajonenexalia. <sup>31</sup> Asivävënë nacuapijivi pevetsivi, Pablo yapëtanetsi. Nexata bajarapamonae asaëya Pablo tonajumeitorobarenatsi penajoneyaniva bajarapaboyabelia pebeyaxuabiyaniavatsi. <sup>32</sup> Efeso tomarapijivi penacaetuatsijavata, nalivaisijëpaeya apo cuaicuajai. Nexata pevavajaijavata itsamonae itsalivaisicuenia vavajaiya jumai tsaponae. Itsamonae pijinia itsalivaisicuenia vavajai tsaponae. Tspijivi jivi ayaibitsaëttoxaneto apo yapëtae palivaisi yabara nacaetuata. <sup>33</sup> Nexata Efeso tomarapijivi penacaetuatsijavata, caejiviyobeje judíovi nanacaetuata. Bajarapajudíovi yapëtane palivaisi yabara jivi ayaibitsaëto nacaetuata. Nexata bajarapajudíovi tsipaeba Alejandrovënënjavabelia Alejandro peyapëtaenexa xua yabara jivi ayaibitsaëto nacaetuata. Tspijivi Alejandro ata judíonë. Nexata Alejandro pevëna judíovi pëntorobajarabiaya itorobatsi daxitajivi pitabarata penucaenexa. Nexata Alejandro nacobeyota jivi pemoyanexa petsipaebineja Efeso tomarapijivi pianaepanaeyaniva daxita judíovijavabelia. <sup>34</sup> Itsiata baitsi jane Efeso tomarajivi apo tocopatsi Alejandro pecuaicuajainexa. Itsa daxitajivi yapëtane Alejandro judíonëcuene, nexata daxita vavajaiya jumai tsaponae anijahorabejecuenia mapacuenijae:

—¡Pinijjamatabëcuene raja pexainaediosova Artemisa, Efeso nacuapijivitsi vajadiosova! jai tsaponae bajarapamonae.

<sup>35</sup> Bajaraxuacujinae nexata tomara jane baja pevetsinë daxitajivi moyaexana. Nexata jumeitavetsiaya jumaitsi:

—PaEfeso tomarapijivimë, daxitanacuanëpijivi baja cajena yapëtane vajanacatocopatsijava vajeavetsinexa mapatomarataje peecaëbo, pinijjamatabëcuene pexainaediosova Artemisa pijatemplobo. Daxitanacuanëpijivi baja cajena yapëtane diosojumapeibotova, Artemisa, athëbëvetsica pejopaejava mapatomarataje. <sup>36</sup> Nexata bajarapadiosojumapeibotova athëbëvetsica pejopaejava yabara, acuenibi itsajivi ata: “Jume,” pejaijava. Nexata pajamatejemamëre. Pëtsa abaxë itsacueni paexaname copiaya panajamatabëxainenejevamë xaniavaetsia. <sup>37</sup> Mapapebibeje paxamë pacapatameje, apo penacobetoxotsinëbeje templobopijijava. Pibisiacuenia apo baracuaicuajaijibenjua vajadiosova Artemisa, jai Efeso tomara pevetsinë Efeso tomarata penacaetuatsivijavabelia.

<sup>38</sup> Icatsia tomara pevetsinë jumaitsi bajarapamonaejavabelia:

—Demetriobana itsa jamatabëneconita itsajivi, nexata neconitsi juezmonae pitabarata, jivi peneconitabiabibota. Bajara saya xua juezmonae evetavanapa. <sup>39</sup> Itsa apo paneconitsijitsiamë jivi, saya itsa panacaetuata me itsacuenelivaisiyo yabara, nexata saya rovalia papaebare xaniavaetsia daxitajivi penacaetuatsijavata, pacuenia gobierno nacaitoroba. <sup>40</sup> Xaniajanë pacuenia pacatsipaebijitsiatsi. Ajena, mapamatacabitaje, mapacuenia itsa exanaponaejitsipatsije, nacananeconit-

siaexanaejitsipa gobierno. Bajarapacuenia nacananeconitsiaexanaejitsipa tsipaji itsacueneneconi itsajivi xainaenejeva, mapacuenia anaeya nacaetuatsisije, jai Efeso tomara pevetsinē penacaetuatsivijavabelia.

<sup>41</sup>Itsa baja Efeso tomara pevetsinē najumevereta bajarapacuenia petsipaebijava, itoroba baja daxitajivi penaviabinexa pijabonējavabelia.

### **Pacuenia Pablo najetaruca Macedonia nacujava, Grecia nacujava ata, yabara pelivaisi**

**20**Itsa baja Efeso tomarapijivi jamatabēcaeva pianaepanaejava, nexata Pablo junata penacaetuatsinexa daxita Dioso pejumecovēnētsivi. Nexata Pablo muxujioba Dioso pejumecovēnētsivi pevājēnaeyabelia pijamatabēcuenesaē tsavanapaenexa Dioso pejumecovēnētsijava. Pablo nexata pexaniacuenia napējioba bajarapamonae. Bajaraxuacujinae Pablo baja pona Macedonia nacuyabelia. <sup>2</sup>Nexata Pablo itsa pata Macedonia nacuyabelia, pexanialivaisi tsipaebanajetaruca Macedonia nacuapijivi Dioso pejumecovēnētsivi pevājēnaeyabelia pijamatabēcuenesaē tsavanapaenexa Dioso pejumecovēnētsijava. Bajaraxuacujinae icatsia Pablo pata Grecia nacuyabelia. <sup>3</sup>Nexata Grecia nacuada Pablo ponapona acueyabi pajuame-tobeje. Bajaraxuacujinae picani Pablo barcota naponaejitsia Siria nacuyabelia. Nexata Pablo nayajumetane Siria nacuada judíovi pevājēnaeevetsijavatsi pebeyaxu-abinexatsi. Bajaraxuata Pablo najamatabēxaina icatsia pecovēya penaviatsinexa matatsēnēa Macedonia nacujava. <sup>4</sup>Pamonae Pablo yanatatsi, mapevēnēanēje. Sópater, Berea tomarapijinē. Aristarcobeje pijinia Segundobeje, Tesalónica tomarapijinēbeje. Gayo pijinia Derbe tomarapijinē. Timoteo pijinia Listra tomarapijinē. Tíquicobeje pijinia Trófimobeje, Asiavēnē nacuapijinēbeje. Bajarapamonae Pablo yanatatsi. Nexata Pablo itsa barēpata Filipos tomarata, xanē Lucasnē, necaxitaraba. <sup>5</sup>Nexata daxita pamonae Pablo yanatatsi, namataxainaeya baja ponalia Troas tomarabelia. Nexata paxanēbeje Pablobeje abaxē panacopatajēbeje Filipos tomarata, Macedonia nacuada peecaetomarata. Nexata pamonae namataxainaeya baja ponalia, paneevetavanapabeje Troas tomaratalia. <sup>6</sup>Nexata paxanēbeje Filipos tomarata barcota pananaropotajēbeje pepuavereverecae baja pafiestamatacabi judíovi baxane levadurata matajērēabinejeva pexanaepan. Panaponajēbeje jane baja Troas tomarabelia. Cinco matacabita panapaliajēbeje Troas tomarabelia. Nexata pamonae paneevetavanapabeje Troas tomaratalia, papēcaxinajēbeje baja. Nexata abaxē Troas tomarata pajinavanapajē siete pamatacabibeje.

### **Pacuenia Pablo ponapona Troas tomarata yabara pelivaisi**

<sup>7</sup>Troas tomarata domingomatacabi panacaetuatajē daxita Dioso pejumecovēnētsivi yajava, patanamatabēnapitsinexa xua yabara Cristo sivatēpa. Pablo nexata livaisi tsipaeba. Meravia baja pitsijavata Pablo Mileto tomarabelia naropotsijitsia. Bajaraxuata Pablo livaisi tsipaeba meravijebi. <sup>8</sup>Panacaetuatajē athēbēabetsia pēnēy-atuucubibota. Nexata athēbēyo paira paenayajē, itsajotatsia pitayotsijavanē ayaijava rubena xaniavaetsia pitayotsinexa. <sup>9</sup>Nexata pevējēato ventanajavata eca, Euticovēnēnē. Pablo nexata bajayajebi livaisi tsipaeba. Nexata belia pevējēato bitso itamajitsipaneca. Nexata baja majiteca. Pemajitecaenē nexata pevējēato jopareca acueyabi pairabejevavereca. Nexata pevējēato itsa sivarunarecatsi, petēpaenē baja

pitatsi. <sup>10</sup>Nexata Pablo sivarunareca. Pematabacabëta ecaeya isapita petëpaenë. Nexata Pablo jumaitsi Dioso pejumecovënëtsivijavabelia:

—Pëtsa panajamatabëxainame. Asaë rabaja icatsia pevëjëato, jai Pablo.

Nexata pevëjëato icatsia asaë. <sup>11</sup>Nexata Pablo icatsia caevëa junaya. Pejunaecu-jinaetsia epatsënëca jane baja pan. Tsicobetsana jane baja daxita Dioso pejumecovënëtsivi pexaenëca. Pexaecujinae abaxë icatsia Pablo bajayajebi cuaicuajjai. Pecuaicuajjainë belia yamatacabibecatsi. Bajaraxuacujinae Pablo jane baja pona Mileto tomarabelia. <sup>12</sup>Nexata baja pevëjëato piasaënë barënaviabatsi pijaboyabelia. Barëya bitso bajarapamonae piasaëxae pevëjëato petëpaecujinae.

### **Pacuenia Pablobana naropoba Troas tomarata pepatsinexa Mileto tomarabelia yabara pelivaisi**

<sup>13</sup>Paxanë Pablo paneitoroba barcota menia namataxainaeya patanaponaenëca Asón tomarabelia. Bajarapacuenia Pablo paneitoroba tsipaji Pablo matatsënëa najetarucaejitsia pepatsinexa Asón tomarabelia. Nexata Pablo itsa pata Asón tomarata, bajarapatomarata patayapitsinexa. <sup>14</sup>Nexata jane baja Pablo itsa pata Asón tomarata, Pablo baja nanonorena barco ënëaberena. Nexata baja panaponajë Mitilene tomarabelia. <sup>15</sup>Bajaraxuacujinae icatsia Mitilene tomarata pananaropobajë. Nexata meravia pitsijavata panapatajë Quíotomara canacujitsialia peecaetomarabelia. Bajarapatomarata icatsia patananaropobicujinae, meravia icatsia pitsijavata, panapatajë Samos tunaetota peecaetomarabelia. Bajarapatomarata icatsia patananaropobicujinae, panapatajë icatsia Trogilio tomarabelia. Nexata abaxë Trogilio tomarata panacueraevetajë. Nexata icatsia Trogilio tomarata patananaropobicujinae, caematacabicujinae, icatsia panapatajë jane baja Mileto tomarabelia. <sup>16</sup>Pablo rovia jamatabëxeneta Efesotomara, Asiavënë nacuata peecaetomara. Tsipaji apo jamatabëponaponae bajayajebi Asiavënë nacuata. Pablo bepíjia jamatabëpata Jerusalén tomarabelia Pentecostésvënë fiestavajënaeya.

### **Pacuenia Pablo Mileto tomarata livaisi tsipaeba Efeso tomaraverena pepatsivi, ancianovijavabelia, yabara pelivaisi**

<sup>17</sup>Mileto tomaravelia Pablo tonajumeitoroba Efeso tomarapíjivi ancianovi pepatsinexarena Mileto tomaraberena. <sup>18</sup>Nexata baja ancianovi itsa parena Pablojavaberena, Pablo jumaitsi bajarapaancianovijavabelia:

—Paxamë baja cajena payapëtaneme mapacuenëje. Asiavënë nacuata tapatsimatacabijavaveliacujinae, Dioso pitorobilivaisi tsipaebaponaponajë Asiavënë nacuata. Daxitamatacabi tonacuenebajë Dioso pijacuene. <sup>19</sup>Dioso pijacuene itsa tonacuenebaponaponajë, apo jamatabëjumaitsinë: “Xanë bitso ayajamatabëcuenënë,” apo jamatabëjanë. Itsa taeyabiabajë itsamonae pecopabijava Dioso pejumecovënëtsijavami, bitso sivanueyabiabajë. Bitso bejiobinënuu tsabiabi tsipaji judíovi jamatabënebeyaxuababiaba. <sup>20</sup>Daxita Dioso pitorobilivaisi pacatsipaebabiabatsi papecajamatabëcueneyavenonaenëca. Caelivaisi ata apo pacavecuacopatsitsi. Pacatsipaebabiabatsi baja cajena daxitajivi pitabarata. Pacatsipaebabiabatsinua baja cajena panijabonëjava ata. <sup>21</sup>Asaëya tsipaebabiabajë judíovi, apo judíovi ata, daxita bajarapamonae pecopabinëca pibisiacuene pexanabiabijava penajamatabëcuenepënëyorotsinëca Diosojavabelia. Bajaraxuacujinae jane baja pejumecovënëtsinëca vajatuxanënë Jesucristo pelivaisi. <sup>22</sup>Mara jotacujinaeje ponaenajë

Jerusalén tomarabelia Espíritu Santo taneitorobixae bajarabelia taponaeenexa. Itsiata xaniavaetsia apo yapëtaenë pacuenia nexanaejitsia Jerusalén tomarapijivi. <sup>23</sup> Itsiata caejavayo yapëtaniji. Caetomara canacujitsia Dioso pitorobilivaisi tatsipaebanajetaruaejavata Espíritu Santo nejumai tsabiabi: “Caetsiana raja penaneconit-sivi pejebabiabibota. Xamë bitso benejiobicuene taename,” nejai tsabiabi Espíritu Santo. <sup>24</sup> Itsiata baitsi jane cajena apo junavinë bajarapacuenene yabara. “Belia nebeyaxuabijitsipa,” apo jamatabëjanë cajena. Jamatabëveretajë pacuene vajatuxanenë Jesús nitoroba tatonacuenebinexa daxitajivi tatsipaebanajetaruaenexa pex-anialivaisi, Dioso vajanacaitaxutotsoniataejava, jai Pablo ancianovijavabelia.

<sup>25</sup> Icatsia Pablo jumaitsi ancianovijavabelia:

—Paxamëjava naponaponajë patacatsipaebinexa Dioso pevetsijavanexa daxita pijajivi. Tajëvelia baja cajena yapëtaniji. Apo panetaemë rabaja tsane matavëjëa. <sup>26</sup> Bajaraxuata ajena baja pacatsipaebatsi. Itsajivi paxamëyajuvënëjivi itsa naxuabiana Diosovecua, apo naxuabi tsane xanë tajamatabëcueneta. <sup>27</sup> Apo naxuabi tsane xanë tajamatabëcueneta tsipaji baja daxita Dioso pitorobilivaisi xaniavaetsia baja cajena pacatsipaebatsi. Caelivaisiyo ata apo pacavecuacopatsitsi, jai Pablo ancianovijavabelia.

<sup>28</sup> Icatsia Pablo jumaitsi ancianovijavabelia:

—Xaniavaetsia nayajivitaeya pajinavanapare pibisiacuene paneexanaeyaniva. Pacuenia oveja pexainaevi xaniavaetsia evetavanapa pijaoveja, bajara pijinia pacuenia xaniavaetsia paevetavanapaename daxita pamona Dioso pejumecovënëtsivi. Espíritu Santo raja pacaitoroba panetoevetsinexa vajatuxanenë Jesús pijajivi, pamona comuata pijanata. <sup>29</sup> Tajëvelia baja cajena yapëtaniji tacovëya penajetarubenaejavanexa saicayacuenia Dioso pejumelivaisivecua petsipae-bivi. Bajarapamona najetarubenaena jivi Dioso pejumecovënëtsijava pevereverecaeyaexanaenexa. Pacuenia nevëthë pianaepanaevi verene oveja, bajara jamatabëcueneitsane bajarapamona pevereverecaeyaexanaenexa jivi Dioso pejumecovënëtsijavami. <sup>30</sup> Paxamëyajuvënëvi ata saicayacuenia Dioso pejumelivaisivecua tsipaebaponaena peyamaxëitojorobinexa Dioso pejumecovënëtsivi. Nexata Dioso pejumecovënëtsivi navecuanatsanaena pepënaponaenexa bajarapamona. <sup>31</sup> Bajaraxuata xaniavaetsia paevetavanapare Dioso pejumecovënëtsivi. Panajamatabënapire mapacueneye. Xanë baja cajena acueyabi pavaibeje, caematacabi canacujitsia, meravi yajava, caeto ata apo copatsinë patacamuxujobijava bitso patacaasivaxae. Itsajavata tanuejavata ata pacamuxujobabiabatsi, jai Pablo Efeso tomarapijiancianovijavabelia.

<sup>32</sup> Icatsia Pablo jumaitsi bajarapamonaejavabelia:

—Tajamona, nexata baja pacacopatatsi Dioso pecobeyabelia Dioso papecaevetsinexa. Dioso pejumelivaisi nacatsipaeba Dioso vajanacaasivajava. Nexata bajarapalivaisi pacajamatabëcueneyavenonaena. Bajarapalivaisi caëjëpatsi papecajamatabëcuene asaëyaexanaenexa Diosojavabelia. Dioso pacacapanepaena pacuenia Dioso capanepaena daxita pamona Dioso aneconijibia tane. <sup>33</sup> Xanë itsa naponaponajë paxamëjavata, apo najamatabëxainanë tanaxainaeyabinexa itsanë pijapalata, penaxatabijava ata. <sup>34</sup> Payapëtaneme baja cajena mapacueneye. Tacobeta nacuenebajë tanamatavenonaejavaxi tacomuataponaenexa, tayajavapononaevi ata tatocomuatsinexa. <sup>35</sup> Pacatsitanacueneitajëtatsi baja cajena pacuenia paxamë ata bepanacuenebame. Bepayavenonamenua itsamonae bitso bepejiobivi. Tsipaji

baja cajena vajatuxanenë Jesús jumaitsi mapacueniaje: “Xanepana bitso itsamonaejavabelia vajarajutabiabijava vaxaitsi itsamonae vajanacarajutabiabijava mata-toxenetsia. Tspaji bitso jamatabëcuenebarëyatsi itsa rajutatsi itsamonaejavabelia vajanacarajutsijava matatoxenetsia,” jai raja Jesús, jai Pablo ancianovijavabelia.

<sup>36</sup>Itsa baja Pablo najumevereta bajarapacuenia petsipaebijava, Pablo daxita ancianovi pematabacabëta barënuca pebarënavajëtsinexa Diosojavabelia. <sup>37</sup>Bajaraxuacujinae Pablo baja pona. Nexata ancianovi pënuayabatsi. Nexata Pablo itsa napëjioba ancianovi, yaitaxutonueya vaetabiaya itabaratsutsunepontsi. <sup>38</sup>Bitso ancianovi najamatabëxaina. Tspaji Pablo jumaitsi:

—Apo panetaemë rabaja tsane matavëjëa, jai.

Bajaraxuacujinae Pablo barcojavabelia peponaejavata, bajarapamonae pënaxualiaitsi barcojavabelia.

### Pacuenia Pablo pona Jerusalén tomarabelia yabara pelivaisi

**21** Itsa baja panapëjiobiveretajë ancianovi, panarunarecajë baja barco ënëabereca. Pananicabaliajë roviaia patapatsinexalia Cos tomarabelia. Bajaraxuacujinae, meravia pitsijavata, panapatajë abaxë epatua Rodas tomarata. Bajaraxuacujinae abaxë icatsia panapatajë Pátara tomarabelia. <sup>2</sup>Nexata Pátara tomarata icatsia pacaxitajarabajë itsabarco. Bajarapabarco ponaejitsia Fenicia nacuyabelia. Nexata icatsia bajarapabarcota patanaponaenexa, panarunarecajë bajarapamo ënëabereca. Panaponajë jane baja. <sup>3</sup>Nexata barcota patanajetarubenaevavata, pataeyetajë patatsavenononia Chipretunaeto. Paxenetanajetarubenajë rovia. Paponajë Siria nacuyabelia. Nexata baja papatajë Siria nacuyabelia Tiro tomarata. Nexata Tiro tomarata juteta barcoënëta pecaponaevava. <sup>4</sup>Nexata Tiro tomarata pacaxitajarabajë Dioso pejumecovënëtsivi. Bajarapamonaejavata pajinavanapajë siete pamatacabibeje. Bajarapamonae tajëvelia Espíritu Santo pejamatabëcueneta yapëtaeyaexanatsi Pablo pebejiobiaexanaevavanexatsi Jerusalén tomarata. Nexata bajarapamonae jumaitsi Pablojavabelia:

—Pëtsa poname Jerusalén tomarabelia, jai picani bajarapamonae.

<sup>5</sup>Itsiata baja icatsia siete pamatacabibejecujinae panaropobajë. Nexata Tiro tomarapijivi, daxita Dioso pejumecovënëtsivi, pijavajivi yajava, pexi yajava, patapëta naponalia mene itapayabelia patanepëtaenexa pataponaevava. Nexata mene itapatalia, tajetabota, daxita bajarapamonae yajava, panubenajë patamatabacabëta patavajëtsinexa Diosojavabelia. <sup>6</sup>Bajaraxuacujinae panapëjiobajë baja daxita Dioso pejumecovënëtsivi. Icatsia baja panarunarecajë barco ënëaberena. Bajarapamonae baja naviabalia pijabonëjavabelia.

<sup>7</sup>Tiro tomarata patananaropobicujinae, panapatajë Tolemaida tomarabelia. Bajarapatomarata pabajacobajë Dioso pejumecovënëtsivi. Bajarapamonaejavata panajinavanapajë caematacabi. <sup>8</sup>Meravia icatsia pitsijavata pananaropobajë. Panapatajë icatsia Cesarea tomarabelia. Cesarea tomarata patapatsicujinae, panaponajë Felipe pijaboyabelia. Felipe, Dioso pitorobilivaisi jivi petsipaebinë, siete ponëbeje diáconoviyajuvënë. Bajaraponë pijabota panajinavanapajë. <sup>9</sup>Felipe xaina cuatro povabeje pexi. Bajarapapetiriavi abaxë apo nacojiobi. Bajarapamonae tsipaebabiaba jivijavabelia Dioso pitorobilivaisi, palivaisi Espíritu Santo pejamatabëcueneta yapëtaeyaexanatsi. <sup>10</sup>Itsa baja paxainajë anijamatacabianë Felipe pijabota patanapat-sicujinae, Judea nacuverena pata Diosojumepaebinë profeta, Agabovënë. <sup>11</sup>Ba-

jaraponë pata paxanëjavaberena Felipe pijabota. Nexata Agabo Pablo pijacorreo-coto veepajonotatsi. Bajarapabocotota Agabo nacobecëtabeje. Nataxucëtabeje yajava. Nexata Agabo jumaitsi:

—Espíritu Santo raja nejumaitsi tajëvelia mapacueniaje: “Jerusalén tomarata pejinavanapaevi, judíovi, mapacuenia cëtsianatsi mapacorreo-coto pexainanëje. Bajaraxuacujinae canajetsianatsi itsanacuapijivi pecobeyabelia, apo judíovijavabelia,” jai raja tajëvelia Espíritu Santo, jai Agabo Pablo yabara.

<sup>12</sup> Nexata itsa pajumetaniji bajarapacuenia Agabo patanetsipaebijava, nexata paxanë, Cesarea tomarapijivi yajava, panacobenaaasivanë picani Pablo peponaeyaniva Jerusalén tomarabelia. <sup>13</sup> Nexata Pablo panejumaitsi:

—¿Detsa xuajitsia panuame? ¿Panenajamatabëxainaeaya exanaejitsiamë tsaja? Xanë raja evetajë tanecëtsinexa. Evetajë tanebeyaxuabijava ata Jerusalén tomarata vajatuxanenë Jesús pelivaisi yabara, panejai Pablo.

<sup>14</sup> Pasiva atanë tsabiabi, Pablo itsiata apo najamatabëcopsati peponaeyava Jerusalén tomarabelia. Nexata baja belia pacopatajë pataasivatsabiabijava. Pajumaitsinë nexata:

—Pacuenia Dioso tojitsipatsi pexanaenexatsi, beexanaenatsi baja, pajanë.

<sup>15</sup> Caematacabibejucujinae paxaniavaetajë patacobecovëjavaxi. Nexata jane baja panaropobajë Jerusalén tomarabelia. <sup>16</sup> Itsamonae Dioso pejumecovënëtsivi, Cesarea tomarapijivi, paneyanalia. Bajarapamonae panebarëpona Mnasónvënënë, Chipretunaeto nacuapijinë, pijaboyabelia. Nexata bajaraponë pijabota panajinavanapajë. Bajaraponë copiaya Dioso pejumecovënëtsiviyajuvënënë.

### **Pacuenia Pablo Jerusalén tomarata Santiago barëcuaicuaijai yabara pelivaisi**

<sup>17</sup> Itsa papatajë Jerusalén tomarabelia, Dioso pejumecovënëtsivi panecopiapita jamatabëcuenebarëyaya. <sup>18</sup> Nexata meravia pitsijavata Pablo panebarësivaxaina Santiagojavabelia. Nexata Santiago pijabota naena ancianovi. <sup>19</sup> Nexata Pablo bajarapamonae bajacoba. Pebajacobicujinae Pablo bajarapamonaejavabelia navajunupaeba daxita pacuene Pablo exanapona apo judíovijava ata Dioso peyavenonaexaetsi. <sup>20</sup> Itsa jumetane bajarapacuenia Pablo penavajunupaebijava, nexata Santiago, ancianovi yajava, jamatabëcuenebarëya. Nexata daxita bajarapamonae pejumetaexae bajarapacueni, pexaniajamatabëcuene rajuta Diosojavabelia. Nexata Santiagobana jumaitsi Pablojavabelia:

—Patajabananë, yapëtaneme baja cajena mapacuenije. Judíovi bitso ayaibit-saëtoxaneto, miles pajivibeje Dioso pejumecovënëtsivi. Yapëtanemenua baja mapacuenije. Daxita bajarapajudíovi jumecovënëtsi ata Jesús pelivaisi, itsiata abaxë tsiteca jumecovënëtanapa Dioso Moiséspijinëta penajumecopatsilivaisi. <sup>21</sup> Pajudíovi apo jumecovënëtsi Jesús pelivaisi, xamë netsipaebaponaelivaisi cayabarana-jumetsënëtabiaba. Nexata bajarapajudíovi najumetsënëtsiaya jumai tsabiabi Jesús pelivaisi pejumecovënëtsijudíovijavabelia: “Itsa raja Pablo livaisi tsipaebapona judíovijava, itsanacuanëjava pejinavanapaevi, Pablo itavetabiaba judíovi pecopatsinexa Dioso Moiséspijinëta penajumecopatsilivaisi pejumecovënëtsijavami. Itavetabiabanua bajarapamonae pecopabinexa peperabëcaucubijava pexi. Pablo itavetabiabanua bajarapamonae pecatsitecaeyaniva vajasalinaivi pijacuene,” jai tsabiabi bajarapamonae najumetsënëtsiaya xamë yabara Jesús pelivaisi pejumecovënëtsijudíovijavabelia, jai Santiagobana Pablojavabelia.

<sup>22</sup> Icatsia Santiagobana jumaitsi Pablojavabelia:

—¿Detsa nexata vaxaitsi itsanetsi? Itsa raeta judíovi Jesús pelivaisi pejumecovënëtsivi, cavënëlivaisitane nepatsijava, nacaetuatsiana penabarëcuaicuajainexa xamë yabara. <sup>23</sup> Nexata daxitajivi pecayapëtaenexa nejumecovënëtsijava Dioso Moiséspijinëta penajumecopatsilivaisi, exanaename pacuenia pacaitorobijitsiatsi. Majotaje cuatro ponëbeje paxanëyajuvënëvi vereta baja pexanaejava pacuenia baja najumecapanepaeya jumaitsi Diosojavabelia. Nexata bajarapamonae ponaejitsia temploboyabelia ofrenda perajutsinexa Diosojavabelia. <sup>24</sup> Nexata naponaname bajarapamonaeta temploboyabelia. Nexata templobota nanajamatabëcuenexaniavaetsianame nijamatabëcuenesaënexa Diosojavabelia. Pacuenia bajarapamonae najamatabëcuenexaniavaetsijitsia piamatabëcuenesaënexa Diosojavabelia, bajarapacuenia nanajamatabëcuenexaniavaetsianame. Nexata daxita xua bajarapamonae notsiana templobota ofrenda perajutsinexa Diosojavabelia, ponëjavabelia notsiana, bajaraxua xamë daxita cobecovëmatamotsianame. Bajaraxuacujinae bajarapamonae daxitamatanami matabasibianatsi. Bajarapacuenia itsa exanaename, daxita judíovi cayapëtaena nejumecovënëtsijava Dioso Moiséspijinëta penajumecopatsilivaisi. Nexata daxita judíovi yapëtaena najumetsënëtsiaya pecabaracuacuajai tsabiabijava pajudíovi apo jumecovënëtsi Jesús pelivaisi. <sup>25</sup> Pamonae apo judíovi, pijasalinaivi apo itavetsitsi daxita pacuene vaxaitsi judíovitsi vajasalinaivi nacaitaveta. Nexata pamonae apo judíovi ata, Dioso pejumecovënëtsivi, pataitavetsinexa, caelivaisiyobeje patoyaquinajë cuyalatota. Itsa patoyaquinajë, pajumaitsinë mapacueniaje: “Pecobeta saya pexanaenëanëjavabelia pevi perajutsinexa ofrendacuenia itsa tobia baca oveja ata, pëtsa paxaneme bajarapayajuvënëvi. Pëtsa paxaneme peja. Pëtsa paxaneme cuibocuetsacaeya pebeyaxuabinë pevi. Papebijivi baja nacojioba, pëtsa matayajibatsi itsavajavabelia pijavavecua. Papebijivi pijinia abaxë apo nacojiobi, pëtsa matayajibatsi petirivajavabelia. Bajara pijinia pacuenia petiriavi ata. Papetiriavi baja nacojioba, pëtsa matayajibatsi itsanëjavabelia pamonavecua. Papetiriavi pijinia abaxë apo nacojiobi, pëtsa matayajibatsi pebijavabelia,” pajanë itsa patoyaquinajë apo judíovijavabelia, jai Santiagobana Pablojavabelia.

### **Pacuenia Pablo templobota vaetabatsi penaneconitsivi pejebabiabibota peetsinexatsi yabara pelivaisi**

<sup>26</sup> Santiagobana Pablo pitorobicujinaetsi, meravia pitsijavata, Pablo naponae pebijivi cuatro ponëbeje pepëta pacuenia Santiagobana itorobatsi. Pablo nexata najamatabëcuenexaniavaetapona piamatabëcuenesaënexa Diosojavabelia cuatro ponëbeje yajava. Bajaraxuacujinae Pablo temploboyalia joneya sacerdotevijavabelia, petsipaebinexa pamatacabi copiarucaeijitsia Pablobana penajamatabëcuenexaniavaetsijava Diosojavabelia. Bajarapamatacabi cuatro ponëbeje Diosojavabelia ofrenda perajutsijavanënexa templobota notsijitsia. Nexata picani daxita bajaraxua Pablo cobecovëmatamotsijitsia bajaraxua pecanajetsivijavabelia.

<sup>27</sup> Nexata siete pamatacabibejecujinae, pamatacabi jane baja Pablo, cuatro ponëbeje yajava, Diosojavabelia ofrenda rajutsijitsia, Pablo templobota tanetsi judíovi, Asiavënë nacuaverena pepatsivi. Nexata bajarapajudíovi itoroba daxita Jerusalén tomarapijivi pianaepanaenexa Pablojavabelia. Nexata Jerusalén tomara-pijivi, Asiavënë nacuaverena pepatsivi yajava, nacobenavaetabatsi Pablo. <sup>28</sup> Nexata bajarapamonae vavajai pinijijumeta. Najumetsënëtsiaya jumaitsi:



—¡Tajamonae judíovi, naxanitsia! ¡Paneyavenonare! Maponėje daxitanacuanēja java livaisi tsipaebanajetaruca daxitanacuanėpijivi vajanacaitoyanexa vaxaitsi manacuapijivitsije. Itavetaponanua Dioso Moiséspijinėta penajumecopatsilivaisi jivi pejumecovėnėtsiyaniva. Itavetaponanua mapatemplobo ataje jivi peyaiyataeyaniva. Apo judíovi ata Pablo barėjoneyabiaba matemploboyarenaje. Nexata baja Dioso tsitaabejetsi mapatemploboje, Dioso pijatemplobo. Nexata baja Pablo naneconita Diosojavabelia, jai najumetsėnėtsiaya judíovi Pablo yabara Asiavėnė nacuaverena pepatsivi.

<sup>29</sup> Bajarapacuenia vavajaiya jumaitsi tsipaji baja copiaya bajarapajudíovi Pablo tanetsi pebarėponaponaejava Jerusalėn tomarata apo judfonė, Trófi-movėnėnė, Efeso tomarapijinė. Nexata jamatabėcuenenavėxaniabiaya bajarapamonae jamatabėjumaitsi:

—Pablo raeta apo judfonė barėjunua mapatemploboyarenaje, jamatabėjai Tró-fimo yabara.

Pablo cajena Trófimo apo barėjone temploboyalia.

<sup>30</sup> Nexata Asiavėnė nacuaverena pepatsivi, Pablo yabara penajumetsėnėtsilivaisi, daxita Jerusalėn tomarapijivi jumetane. Nexata bitso anaepana. Nexata daxita bajarapamonae kujinaejinarena templobojavaberena. Bajarapamonae vaetabatsi Pablo. Robobocatsi vayafuabelia temploboėnėvecua. Nexata templobobaupaxanetonė bepijia vecuabaupaxatabatsi. <sup>31</sup> Bajarapamonae picani Pablo jamatabėbeyaxu-abatsi. Nexata bajarapaepatota itsamonae tsipaeba vajabitsaė pepo pevetsinė, comandantejavabelia. Tsipaeba pacuenia daxita Jerusalėn tomarapijivi bitso anaepanavanapa. <sup>32</sup> Nexata comandante bepijia barėlia pijajivi vajabitsaėvi, vajabit-saėvi pijacapitánvi yajava. Cujinaejina jivi penacaetuatsijavabelia. Nexata judíovi itsa tane comandante vajabitsaėvi pebarėpatsijava, nexata judíovi copaba pebejavatsi Pablo. <sup>33</sup> Nexata comandante Pablo kujirenatsi. Vaetabiaexanatsi pijajivi. Comandante itoroba pijajivi Pablo pecėtsinexatsi anijacadenamaėtotabeje. Bajaraxu-acujinae yanijoba judíovijavabelia.

—¿Detsa maponėje? ¿Detsa xua exana maponėje? jai comandante.

<sup>34</sup> Nexata bajarapajivi bitsaėtoxfanetonėyajuvėnėvi comandantejavabelia najuatsi-paebanubena pinijjumeta. Nexata comandante apo jumetae xaniavaetsia bitso jivi pevavajaixae. Nexata comandante itoroba vajabitsaė Pablo pecaponaenexatsi vajabitsaė pijaboyabelia. <sup>35</sup> Pablo capatatsi vajabitsaė pijaboitapata. Vajabitsaė pijabo pepėnėvelia xaina beescaleracuenia pexanaejava. Nexata bajarajota Pablo vajabit-saė nacobenayotsiaya cajunayatsi vajabitsaė pijaboyalia pecajonenexatsi. Tsipaji icatsia bajarajota Pablo jivi bejitsiatsi bitso pianaepanaexae. <sup>36</sup> Jivibitsaėtoxfanetonė Pablo barabocabuataponatsi. Vavajai tsabuataponae bajarapamonae.

—¡Pabeyaxuare! jai tsabuataponae Pablo yabara.

**Pacuenia Pablo navajunupaeba jivibitsaėtoxfanetonėjavabelia yabara pelivaisi**

<sup>37</sup> Itsa baja Pablo vajabitsaėvi pijaboyalia cajonejitsiatsi, nexata Pablo griego-jumeta jumaitsi comandantejavabelia:

—Netocopare tacatsipaebinexa caejumeyo, jai Pablo.

Nexata comandante jumaitsi:

—¿Xamė tsaja natsipaebame griegojume? <sup>38</sup> ¿Xamė tsaja apo Egipto nacuapi-jinėmė? ¿Xamė tsaja imata jivi apo itorobimė pianaepanaenexa gobiernojavabelia?

¿Xamë tsaja imata penamaxëvanitsivi cuatro mil ponëmaxëto apo barënajetabajiravimë petusato nacuyabelia? jai comandante Pablojavabelia.

<sup>39</sup> Nexata Pablo jumaitsi:

—Jume raja. Xanë raja saicaya judíonënë, Tarso tomarapijinënë. Tarsotomara cajena pinijitomara daxita Cilicia nacuata penaetomaranëvecua. Pexaniacuene netoexanare. Netocopare livaisi tatsipaebinxaxa mapamonaejavabeliaje, jai Pablo.

<sup>40</sup> Nexata comandante tocopatatsi livaisi petsipaebinxaxa. Pablo nuca vajabitsaë pijabo pepënëvelia beescaleracuenia pexanaejavajumata. Pablo nacobeyota jivi pe-moyanexa. Nexata baja jivi itsa moya, Pablo navajunupaeba bajarapamonaejavabelia hebreojumeta.

Pablo jumaitsi:

**22** —Tajamona, panenamuxunaevere. Paxamë ata vajanacua paneevetsivi, panenamuxunaevere. Vepacanavajunupaebatsi daxita xua exanajë, jai Pablo hebreojumeta judíovijavabelia.

<sup>2</sup> Bajarapajudíovi itsa jumetane palivaisi Pablo tsipaeba hebreojumeta, nexata bitso ajumejibia namuxunaevetena. Nexata Pablo icatsia jumaitsi:

<sup>3</sup> —Xanë raja judíonënë. Naexanajë Tarso tomarata, Cilicia nacuata peecae-tomarata. Itsiata vitsabajë mapatomarataje, Jerusalén tomarata. Pecujarubinë Gamaliel necujaruba. Nexata xaniavaetsia necujaruba daxita vajasalinaivi pijacuene. Nexata picani jamatabëjumaitsinë tsabiabi: “Daxita tajamatabëcueneta Dioso pejisipaecuenia tonacuenebianajë,” jamatabëjanë tsabiabi. Bajarapacuenia aeconoxae daxita paxamë ata pajamatabëitsimë tsavanapae, jai Pablo.

<sup>4</sup> Pablo icatsia jumaitsi:

—Xanë abaxë picani bajayata barajinabiabajë pamona jumecovënëta pexanialivaisi, Jesucristo pelivaisi. Pamona jumecovënëta Jesús pelivaisi, taicaponajë pebijivi. Taicaponajë petiriavi ata. Jebaponajë bajarapamona penaneconitsivi pejebabiabibota. Jitsipajë picani pebeyejebinxatsi daxita bajarapamona. <sup>5</sup> Sacerdotevi pepo penamatacaitorobinë, daxita judíovitsi vajaanianovi ata, pacatsipaebijitsipa bajarapacuenia, pacuenia baja xaniavaetsia pacanavajunupaebatsi. Tsi-paji bajarapamonaejavabelia vajëtajë tanetsicobeyaquinaenexa cuyalato tatocapon-aenexa pamona judíovi jinavanapa Damasco tomaratalia. Nexata bajarapajudíovi itsa yoroba bajarapabaxuto, tanetocopatsinexa picani Jesús pelivaisi pejumecovënëtsivi tataicaenexa. Nexata jane baja picani lianë tataicaenexa daxita pexanialivaisi, Jesús pelivaisi, pejumecovënëtsivi, tacapatsinexa picani maberenaje Jerusalén tomaraberena penaneconitsiaexanaenexatsi, jai tsanucac Pablo judíovijavabelia.

**Pacuenia Pablo navajunupaeba pacuenia taxuxuaba  
Jesús pelivaisi pejumecovënëtsijava yabara pelivaisi**

(Hch 9.1-19; 26.12-18)

<sup>6</sup> Pablo icatsia jumaitsi hebreojumeta judíovijavabelia:

—Nexata jane baja ponajë Damasco tomarabelia. Itsa baja imoxoyotanajetarucajë Damasco tomara, jemata matonejeepatota pinijicotia nematatoyorotsia naitayota athëbëvetsica. <sup>7</sup> Nexata bajarajota irataeya bocajunujë irata. Jumetaenucajë athëbëvetsica tanejumaitsijava: “Saulo, Saulo, ¿detsa xuajitsia xanë tajajivi netobejiobiaexanaponame?” tanejaijava. <sup>8</sup> Nexata xanë jumaitsinë: “Tajatuxanenë, ¿detsa ponëmë?” janë. Nexata icatsia nejumaitsi: “Xanë raja Jesúsne, Nazaret tomarapi-

jinënë. Xanë raja tajajivi netobejiochiaexanaponame,” nejai. <sup>9</sup>Papebijivi yajavanajetarucajë, tane baja cajena athëbëvetsica penaitayotsicotia. Itsiata baitsi jane apo jumetae xua yabara nebarëcuaiçuaijai athëbëvetsica. <sup>10</sup>Nexata xanë jumaitsinë: “Tajatuxanenë, çdetsa xua nexata exanaenajë?” janë. Nexata pepo petuxanenë nejumaitsi: “Nonotapunare baja. Ponaename baja Damasco tomarabelia. Bajarajotalia catsipaebiana pacuenia exanaejitsiamë,” nejai. <sup>11</sup>Nexata bajarapacotia tataecuji-nae bitso nitaxutomeraviba. Apo necaëjëpae tataejava. Nexata saya tayajavaponaevi necomacaponalia Damasco tomarabelia, jai Pablo judfovijavabelia:

<sup>12</sup>Icatsia Pablo jumaitsi judfovijavabelia:

—Bajarajota Damasco tomarata ponapona Ananíasvënë, bitso pejumecovënëtsinë Dioso Moiséspijinëta penajumecopatsilivaisi. Bajaraponë Ananías yabara daxita judfovi, Damasco tomarapijivi, jumai tsabiabi: “Bitso raja Dioso pejumecovënëtsinë Ananías,” jai tsabiabi. <sup>13</sup>Nexata bajaraponë Ananías xanëjavaberena patajopa tanetaenexa. Nexata nejumai tsanuca: “Tajabanänë Saulo, icatsia rabaja itaxutoxanepaname,” nejai. Bajarapacuenia tanejumaitisjavata icatsia baja itaxutoxanepanjë. Nexata baja taniji Ananías. <sup>14</sup>Nexata icatsia Ananías nejumaitsi: “Vamojivimi rabaja pijaDioso caitapeta. Caitapeta baja neyapëtaenexa pacuenia catojitsipane toexanaenexa. Caitapetanua netaenexa Dioso pitabarata Jesús pepo planeconijibinë. Caitapetanua nejumetaenexa Jesús pecatsipaebilivaisi. <sup>15</sup>Nexata ponaname daxitanacuanëpijivijavabelia netsipaebanajetarucaenexa pacuenia taneme, pacuenia ata jumetaneme Jesús pelivaisi. <sup>16</sup>Çdetsa nexata xuajitsia abaxë najamatabëcuene copatsixae, daxita pibisiacuene nexanaeconimi cavecuajibiaexanaena,” nejai Ananías, jai Pablo judfovijavabelia.

### **Pacuenia Pablo itorobatsi Dioso pitorobilivaisi petsipaebaponaenexa apo judfovijava yabara pelivaisi**

<sup>17</sup>Pablo icatsia jumaitsi hebreojumeta judfovijavabelia:

—Bajaraxuacujinae Damasco tomaraverena naviarenajë baja Jerusalén tomaraberena. Nexata itsa patajë Jerusalén tomarata, ponajë templobojavabelia tavajëtsinexa Diosojavabelia templobota. Nexata tavajëtsijavata Diosojavabelia, taniji bemajitsinaebota pepo petuxanenë Jesús. <sup>18</sup>Nexata Jesús nejumaitsi: “Naxanitsiayo bepjiia vecuaponare Jerusaléntomara. Tsipaji raja mapatomarapijivije apo cajumecovënëtsi tsane netsipaebijava xanë talivaisi,” nejai Jesús bemajitsinaebota. <sup>19</sup>Nexata xanë jumaitsinë: “Tajatuxanenë, bajarapamonae judfovi xaniavaetsia baja cajena neyapëtane. Bajarapamonae neyapëtane judfovi penacaetuatabibonëjava tataicaponaejava daxita pamonaе cajumecovënëta taconibabeyabiabinexa naebota. <sup>20</sup>Bajarapamonae neyapëtane xanë ata bajarapamonae jamatabëcuenejëpaeya tataenucaejava pamatacabi Estebanpijinë, pecalivaisipaebinëmi, beyaxuabatsi. Bajarapamatacabi, pamonaе Estebanpijinë beyaxuabatsi, penajumajonejebijavanë tovetanucajë,” janë pepo petuxanenë Jesúsjavabelia. <sup>21</sup>Nexata pepo petuxanenë nejumaitsi: “Ponare baja Jerusalén tomaravecua. Caitorobijitsiatsi raja itsanacuanëpijivijavabelia, apo judfovijavabelia,” nejai pepo petuxanenë, jai Pablo judfovijavabelia.

**Pacuenia Pablo exanatsi vajabitsaë pepo  
pevetsinë comandante yabara pelivaisi**

<sup>22</sup> Judíovi namuxunaevetatsi Pablo penavajunupaebijava. Nexata itsa jumetane judíovi pacuenia Pablo navajunupaeba, nexata icatsia judíovi vavajai tsaponae piniijumeta. Jumai tsaponae:

—¡Maponėje pabeyaxuare! ¡Mara pitsinë apo becopsatsitsi peponaponaenexa matavějěaje! jai tsaponae judíovi Pablo yabara.

<sup>23</sup> Bajarapamonae piniijumeta vavajai tsaponae. Pijacamisajumavelia penaxatabijavaně, vebabia bitso pianaepanaexae. Atsabenoně cayabajarabarena Pablojavaberena pebaraanaepanaexaetsi. <sup>24</sup> Nexata vajabitsaë pepo pevetsinë, comandante, pijajivi itoroba Pablo pecajonenexatsi vajabitsaë pijaboyalía. Comandante itoroba pijajivi Pablo picani pejumatitibabenexatsi penaconitsivi pejumaconitabiabimacata. Bajarapacuenia picani Pablo exanaejitsiatsi Pablo petsipaebinexa vajabitsaëjavabelia xua yabara judíovi neconitsiaya pinijicuenia vavajai tsaponae Pablo yabara. <sup>25</sup> Nexata jane baja Pablo itsa cětetatsi vajabitsaë picani pejumatitibabenexatsi, nexata Pablo jumaitsi bajarajota penucaeně vajabitsaë pijacapitánjavabelia:

—Xaně raja Romano nacuapijině. Nexata itsa panejumaconibabejitsipame abaxě copiaya neneconitsinejeva juezmonae pitabarata, nexata panevemaxěnaneconitsipame. Tsipaji nijatuxaneně, Romanonacua pepo pevetsinë, pacaitaveta bajarapacuenia paneexanaeyaniva, jai Pablo vajabitsaë pijacapitánjavabelia.

<sup>26</sup> Capitán itsa jumetane bajarapacuenia Pablo pejumaisijava, nexata capitán lia vajabitsaë pepo pevetsinë comandantejavabelia. Capitán jumaitsi comandantejavabelia:

—Xania baja tsane pacuene exanaejitsiamě Pablojavabelia. ¡Maponėje Pablo Romano nacuapijině baja cajena! jai capitán comandantejavabelia.

<sup>27</sup> Nexata comandante rena Pablojavaberena. Jumaitsi Pablojavabelia:

—¿Xaniajai tsabaja? ¿Xamě Romano nacuapijiněmě? jai comandante.

—Jājā, jai Pablo.

<sup>28</sup> Nexata comandante jumaitsi Pablojavabelia:

—Xaně ata baja maparucajeje Romano nacuapijině naexanjě. Tsipaji baja matamotajě ayaimatamota bepepo Romano nacuapijině tanaexanaenexa, jai comandante.

Bajarapacuenia jumaitsi tsipaji comandante saicayanacuata penaexanaeně.

Pablo nexata jumaitsi comandantejavabelia:

—Xaně apo matamotsinë. Tsipaji baja cajena pepo Romano nacuapijině. Naexanjě cajena Romano nacuata, jai Pablo comandantejavabelia.

<sup>29</sup> Nexata picani pavajabitsaë Pablo jumaconibabejitsiatsi, vecuaponatsi baja. Vajabitsaëvi pepo pevetsinë ata, comandante, Pablo cujunavatsi itsa yapětanetsi Pablo Romano nacuapijiněcuene. Cujunavatsi pecětsiaexanaexaetsi cadenamaëtoněta.

**Pacuenia Pablo navajunupaeba daxita judíovi  
pevetsivi pitabarata yabara pelivaisi**

<sup>30</sup> Pablo penavajunupaebicujinae Romano nacuapijiněcuene, meravia pitsijavata, vajabitsaë pepo pevetsinë, comandante, jamataběyapětane xaniavaetsia paneconi

yabara judíovi neconitsijitsiatsi Pablo. Nexata comandante pijajivi itoroba Pablo pevecuaisnaenexatsi cadenamaëto. Nexata comandante junata sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, penacaetuatsinexa. Nexata caponarenatsi Pablo, penutsinexatsi daxita penacaetuatsivi pitabarata.

**23** Pablo naëcota daxita penacaetuatsivi. Nexata Pablo jumaitsi bajarapamonaejavabelia:

—Tajamonaë, xaniavaetsia cajena ponaponabiabajë najamatabëcuenebijaanejevanë Dioso pitabarata mapamatacabijavaberena ataje, jai Pablo bajarapamonaejavabelia.

<sup>2</sup>Nexata Ananías, sacerdotevi pepo penamatacaitorobinë, jumaitsi Pablo pimoxoyotanubenaevitsijavabelia:

—Pacuibotsaquibiaxuabare Pablo, jai Ananías, sacerdotevi pepo penamatacaitorobinë.

<sup>3</sup>Nexata Pablo jumaitsi Ananíasjavabelia:

—¡Dioso rajane juya pepacuene xamë catsaquibiaxuabiana! Xamë majotaje ecame taneneconitsinexamë. Tsipaji xamë xanë yabara jamatabëcuenenavëxaniabiaya jamatabëjumaitsimë: “Maponëje Pablo naneconita Diosojavabelia,” jamatabëjamë. Nexata xamë nijacuata naneconitame nijagobiernojavabelia. Tsipaji itorobame mapamonaëje tanetsaquibiaxubinexa taaneconijibinë, jai Pablo Ananíasjavabelia.

<sup>4</sup>Bajarajota penubenaevi jumaitsi Pablojavabelia:

—Xamë raja jumeitavetame Dioso pijajivitonë, sacerdotevi pepo penamatacaitorobinë, jai bajarapamonaë Pablojavabelia Ananías yabara.

<sup>5</sup>Nexata Pablo jumaitsi:

—Tajamonaë, xanë apo yapëtaenë Ananías sacerdotevi pepo penamatacaitorobinëcuene. Itsa yapëtaejitsipajë, apo jumaitsinë tsipae bajarapacuenia. Tsipaji Dioso pejumelivaisibaxutota jumaitsi mapacueniaje: “Pëtsa jumeitavetame pecaevetsinë,” jai Dioso pejumelivaisibaxutota, jai Pablo Ananías yabara.

<sup>6</sup>Nexata Pablo jamatabëcuenyapëtane penacaetuatsivi. Tsipaji penacaetuatsivi caelivaisi apo xainae. Jamatabëcuenyapëtaneme itsamonaë pecatsitecaejava saduceovi pecujarubicuene. Jamatabëcuenyapëtane itsamonaë pijinia pecatsitecaejava fariseovi pecujarubicuene. Nexata Pablo pinijijumeta jumaitsi:

—Tajamonaë, xanë raja fariseonënë. Fariseovi pecujarubicuene jumecovënëtajë. Taxapijinë baja cajena fariseonë. Tamojivimi ata cajena fariseovi. Majotaje neneconitsijitsia. Tsipaji jivi petëpaecujinaë Dioso icatsia piasaëyaexanaejavanexa, jumecovënëtajë, jai Pablo.

<sup>7</sup>Bajarapamonaë itsa jumetane bajarapacuenia Pablo pejumaitsiyava, nexata najumeanaenota fariseovibeje saduceovibeje. Bajarapamonaë nexata apo najamatabëcuenejëpae baja. Nexata anaëya bajarajota navecuanatsana baja. <sup>8</sup>Saduceovi jumeaëbabiaba fariseovi pejumecovënëtsilivaisi. Nexata saduceovi jumai tsabiabi:

—Jivi petëpaecujinaë, acuenebi icatsia Dioso piasaëyaexanaejava. Ajibi raja cajena ángelevi. Ajibi raja cajena petëpaevi ata pejumape, jai tsabiabi saduceovi.

Fariseovi jumecovënëta jivi petëpaecujinaë Dioso icatsia piasaëyaexanaejavanexa. Jumecovënëtanua ángelevi ata pejinavanapaejava. Jumecovënëtanua petëpaevi ata pejumape pejinavanapaejava. <sup>9</sup>Apo penajamatabëcuenejëpaeaxae, daxita bajarapamonaë bajarajota pinijijumeta vavajai tsaponae. Nexata pa-

monae judíovi pecujarubivi, fariseoviyajuvënëvi, nonobapuna. Anaeya jumaiti saduceovijavabelia:

—Itsacue ne ata cajena pibisiacue ne apo exanae maponë Pabloje. Xaniajai meta cajena. Petëpaejivi pejumape tsipaebatsi. Itsa jume, ángel meta tsipaebatsi. Paxanë nexata itsacue ne ata apo paexanaenë tsane Pablojavabelia Diosojavabelia patananecotsiyanima, jai fariseovi saduceovijavabelia.

<sup>10</sup> Nexata bajarapamonae pinijicueña nabijataeya najumeanaenotapona. Nexata vajabitsaë pepo pevetsinë, comandante, belia jamatabëjumaiti: “Pablo meta baja bajarapamonae beyaxuabianatsi,” jamatabëjai. Nexata comandante junata pijajivi peponaenexa. Pablo baja jutatsi bajarapamonaevecua. Comandante itoroba pijajivi Pablo pecaponaenexatsi vajabitsaë pijaboyabelia.

<sup>11</sup> Nexata bajarapameravi Jesús tsitanaitajëtatsi Pablo. Jesús nuca Pablo pemuxuneneta. Jumaiti:

—Ajamatabëcuenesaëmëre nevajënaeyabelia. Pacuenia tsipaebame xanë talivaisi majotaje Jerusalén tomarata, baja icatsia pacuenia tsipaebianame xanë talivaisi Roma tomarata ata, jai Jesús Pablojavabelia.

### **Pacuenia picani Pablo judíovi jamatabëbeyaxuabatsi yabara pelivaisi**

<sup>12</sup> Pablo petsitanaitajëtisicujinaetsi Jesús, meravia pitsijavata, judíovi nacaetuata. Najamatabëcueneyanaba jane baja picani Pablo pebeyaxuabinexatsi. Nexata picani pebeyaxuabivajënaetsi, bajarapamonae najumecapanepaeya najumaiti:

—Vaxaitsi apo xae tsanetsi itsacue nejavayo ata. Mera ata apo apae tsanetsi. Matapania baja Pablo beyaxuabianatsi, nabanianatsi. Mera ata apaanatsi, najai bajarapamonae.

<sup>13</sup> Pamona picani Pablo jamatabëbeyaxuabatsi, cuarenta ponëbeje pematat-sënëa. <sup>14</sup> Bajaraxuacujinae bajarapamonae pona sacerdotevi penamatacaitorobivijavabelia. Pona judíovi pijaancianovijavabelia ata. Tsipaji bajarapamonae caejavata nacaetuatenä. Nexata pamona cuarenta ponëbeje, pamona picani Pablo jamatabëbeyaxuabatsi, jumaiti sacerdotevi penamatacaitorobivijavabelia, judíovi pijaancianovijavabelia ata:

—Paxanë rajane baja najumecapanepaeya panajumaitisinë: “Vaxaitsi apo xae tsanetsi itsacue nejavayo ata. Matapania baja Pablo beyaxuabianatsi, nabani-anatsi,” panajanë. <sup>15</sup> Nexata paxamë sacerdotevi panenamatacaitorobivi, paxamë ata judíovi papijaancianovimë, panacaetuatsianame judíovi pecujarubivi yajava panenabarëcuaijaijainexa. Nexata daxita paxamë patonajumeitorobianame cuyalata vajabitsaë pepo pevetsinë, comandantejavabelia. Pavajëtisianame comandantejavabelia papecatocarenanexa Pablo. Pajumaitisimë tsane yamaxëitojorobiyaya comandantejavabelia: “Pajitsipajë icatsia matavëjëa patayanijobijava Pablo, pijaneconi patayapëtaenexa xaniavaetsia, paneconi xaina,” pajamë tsane. Nexata paxanë epatotalia pavajënaeevetsianajë Pablo. Itsa rena, patabeyaxuabinexa patsinejeva maberanaje, jai pamona cuarenta ponëbeje, pamona picani Pablo jamatabëbeyaxuabatsi.

Nexata sacerdotevi penamatacaitorobivi, judíovi pijaancianovi ata, jejai comandantejavabelia petonajumeitorobinexa Pablo pecarenanexatsi.

<sup>16</sup> Itsiata baiti jane Pablo pematapijiva pexënato jumetane Pablo pevajënaeevet-sipaebijavatsi pebeyaxuabinexatsi picani. Nexata bajaraponë pona vajabitsaë pi-

jaboyabelia. Itsa baja bajaraponë joneya vajabitsaë pijaboyalia, bajarapalivaisi tsi-paeba Pablojavabelia. <sup>17</sup>Nexata bajaraxuacujinae Pablo junata caenë vajabitsaë pi-jacapitán. Pablo jumaitsi:

—Barëponare mapapevëjëatoje papecanamatacaitorobinë, comandantejavabelia. Itsalivaisiyo xaina petsipaebinxexa, jai Pablo.

<sup>18</sup>Nexata Pablo piopaxa capitán barëponatsi vajabitsaë pepo pevetsinë, comandantejavabelia. Nexata capitán jumaitsi comandantejavabelia:

—Naneconitsia raja peponaponaenë Pablo nejunata. Nexata nitoroba tabarëponaenexa mapapevëjëatoje xamëjavaberena. Tsipaji pina catsipaebijitsia itsalivaisiyo, jai capitán comandantejavabelia.

<sup>19</sup>Nexata comandante cobepitatsi pevëjëato. Barëliatsi pesaicaeyojavabelia. Comandante nexata jumaitsi pevëjëatojavabelia:

—¿Detsa pitsilivaisi xainame tanetsipaebinxexamë? jai.

<sup>20</sup>Nexata pevëjëato jumaitsi:

—Sacerdotevi penamatacaitorobivibeje, judíovi pijaancianovibeje, najamatabëcuenyanaba pecavajëtsinexa meravia netocalianexa Pablo bajarapamonaejavabelia. Bajarapamonae cayamaxëitojorobiaya cajumaitsiapaebi: “Pajitsipajë icatsia matavëjëa patayanijobijava Pablo, pijaneconi patayapëtaenexa xaniavaetsia, paneconi xaina,” cajaiyapaebi bajarapamonae. <sup>21</sup>Itsia pëtsa jumecovënëtame bajarapamonae. Tsipaji cuarenta ponëbeje pematatsënëa namatayabiaya epatota Pablo vajënaeevetsiapaebatsi pebeyaxuabinxatsi. Bajarapamonae daxita najumecapanepaeya najumaitsi baja: “Apo xae tsanetsi itsacuenjavayo ata. Mera ata apo apae tsanetsi. Matapania baja Pablo beyaxuabianatsi, nabanianatsi. Mera ata apaenatsi,” najai baja capanepaeya bajarapamonae. Aeconoxae saya bajarapamonae eveta Pablo necaliajava, jai pevëjëato comandantejavabelia.

<sup>22</sup>Nexata comandante jumaitsi pevëjëatojavabelia:

—Pëtsa tsipaebame itsajivi ata tanetsipaebilivaisimë, jai comandante.

Bajaraxuacujinae pevëjëato baja itorobatsi caevëalia.

### **Pacuenia Pablo itorobatsi nacuaevetsinë Félixjavabelia yabara pelivaisi**

<sup>23</sup>Vajabitsaë pepo pevetsinë, comandante, junata anijanëbeje, vajabitsaë pija-capitánbeje. Jumaitsi:

—Panaxaniavaetsiaexanarebeje vajabitsaë petaxuta peponaevinexa doscientos ponëmaxëto, setenta pijinia ponëbeje caballojumata peponaevinexa, doscientos pijinia ponëmaxëto becuereboxanetonë, lanzavënëjavanë, pecaponaevinexa. Panaxaniavaere paneponaenexa Cesarea tomarabelia ajena, mapameravitaje, bejamatatabëcuene a las nuevejaya. <sup>24</sup>Itsacaballobeje pijinia Pablo peyaponaenexa, patoxaniavaere. Xaniavaetsia evetsiaya pacaponaename Pablo nacuaevetsinë Félixjavabelia, jai comandante capitánbejejavabelia.

<sup>25</sup>Bajaraxuacujinae comandante tsicobeyaquina cuyalatobaxuto pitorobinxexa nacuaevetsinë Félixjavabelia. Comandante peyaquinaecuyalatobaxutota jumaitsi mapacueniaje:

<sup>26</sup>“Félix, pecayiyataenë, nacua nevetsinë. Xanë raja Claudio Lisiasvënënënë catoyaquinatsi. Cabajacobatsi. <sup>27</sup>Judíovi raja vaetabatsi ponë catoitorobaliatsi, Pablvënënë. Beyaxuabijitsiatsi picani. Nexata itsa vënëlivaisitaniji Pablo Romano

nacuapijinēcuene, sivalianē. Tajajivi vajabitsaē taneyavenonaecueneta yacajērētajē judíovi pecobevecua, ajena baja picani beyaxuabijitsiatsi. Nexata caponaeyaexanajē tajajivi vajabitsaē pijaboyabelia. <sup>28</sup> Bajaraxuacujinae sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata, nutsiaexanajē. Bajarapacuenia nutsiaexanajē bajarapamonae pitabarata tayapētaenexa jane baja picani paneconi yabara Pablo judíovi neconitsijitsiatsi. <sup>29</sup> Itsiata baitsi jane Pablo itsacueneneconi ata apo xainae, paneconi yabara beyaxuabijitsiatsi, paneconi yabara ata etsijitsiatsi penaneconitsivi pejebabiabibota. Judíovi saya Pablo neconitsijitsiatsi judíovi pijasalinaivi pijacuene yabara. <sup>30</sup> Nexata itsajivi netsipaeba judíovi namutoepatota Pablo pevajēnaeevetsiapaebijavatsi pebeyaxuabinoxatsi. Bajaraxuata nexata najamatabēxainajē Pablo tacatoitorobinexa xamējavabelia. Nexata pajudíovi Pablo neconitsijitsiatsi, itorobajē peneconitsinexatsi xamē nitabarata. Bajara masaya daxitajumeyoje,” jai mapacueniaje comandante petoyaquinaebaxutota nacuaevetsinē Félixjavabelia.

<sup>31</sup> Nexata vajabitsaē exana baja pacuenia itorobatsi comandante. Bajarapameravi vajabitsaē baja Pablo caponaliatsi Antípatris tomarabelia. <sup>32</sup> Nexata meravia pitsijavata bajarapavajabitsaēyajuvenēvi, petaxuta peponaevi, Antípatris tomarata naviabarena baja pijaboyabarena. Pamonae caballojumata peponaevi, pevajēnaeyaabelia abaxē caponaliatsi Pablo. <sup>33</sup> Caponaliatsi Cesarea tomarabelia. Nexata Cesarea tomaratalia vajabitsaē rajuta petocaponaecuyalatobaxuto nacuaevetsinē Félixjavabelia. Yajavarajutanua Pablo bajaraponē pecobeyabelia. <sup>34</sup> Nexata nacuaevetsinē Félix leba baja petocapatsicuyalatobaxutotsi. Bajaraxuacujinae nacuaevetsinē Félix jumaitsi Pablojavabelia:

—¿Detsa panacuapijinēmē? jai.

Nexata Pablo jumaitsi:

—Xanē raja Cilicia nacuapijinēnē, jai.

Nexata yapētanetsi Pablo Cilicia nacuapijinēcuene. <sup>35</sup> Nexata icatsia nacuaevetsinē Félix jumaitsi Pablojavabelia:

—Cajumetaenatsi abaxē itsa parena judíovi pecaneconitsivinexa, jai nacuaevetsinē Félix.

Bajaraxuacujinae nacuaevetsinē Félix itoroba pijajivi xaniavaetsia pevetsinexatsi Pablo. Nexata Pablo evetatsi Herodespijinē pexanaeyaexanaebota.

### **Pacuenia Pablo navajunupaeba nacuaevetsinē Félix pitabarata yabara pelivaisi**

**24** Pablo Cesarea tomarata penaneconitsiaexanaecujinaetsi, cinco pamatacabibejecujinae, Ananías, sacerdotevi pepo penamatacaitorobinē, parena Cesarea tomaraberena. Parena judíovi pijaancianovi yajava, Tértulovēnēnē yajava. Tértulo abogadonē, jivi peneconitsicuene peyapētaenē. Bajaraxuata judíovi junata bajaraponē petocuaicuaijainexatsi nacuaevetsinē Félixjavabelia. Nexata judíovi, Tértulo yajava, nubena nacuaevetsinē Félix pitabarata peneconitsinexatsi jane baja Pablo. <sup>2</sup> Itsa caparenatsi Pablo, nexata Tértulo taxuxuaba peneconitsijavatsi Pablo. Tértulo jumaitsi nacuaevetsinē Félixjavabelia mapacueniaje:

—Pecayaiyataenē nacua nevetsinē. Xaniavaetsia nevetsixae mapanacuaje, bajayajebi xaniavaetsia pajinavanapajē. Xamē nejamatabēcueneta daxita mapanacuapijicuene, xua abeje picani, xanebiaexanaponame pevajēnaeyabelia. <sup>3</sup> Nexata



pabarëyanë patanetoexanaejavamë yabara daxita mapanacujavajave. Bajaraxuata pexaniajamatabëcuene pacarajutatsi. <sup>4</sup>Caepatoyo saya pacajamatabëitono-tatsi. Pexaniacuene panetoexanare. Panenamuxunaevere caejumeyobeje. <sup>5</sup>Payapë-taniji baja cajena maponëje Pablo bitso piacujirubejenëcuene. Daxitanacuanëjava, itsaxuayo judíovi jinavanapa, itorobapona pianaepanaenexa judíovi penavecuanatsanaenexa. Mara ponëje Nazaret tomarapijinëmi petsipaebilivaisi pejumecovënëtsivi, penamatacaitorobinëje. <sup>6</sup>Mara ponëje Dioso pijatemplobo Jerusalén tomaratalia jamatabëbijiana picani. Tspaji apo judíovi barëjoneya templobëñalia. Bajaraxuata pavaetabajë. Nexata pacuenia paneitoroba pajudíovinë patajalivaisi, jamatabëpabeyaxuabajë picani penaneconitsixae. <sup>7</sup>Itsiata baitsi jane itacarajeta vajabitsaë pepo pevetsinë, comandante Lisias, barëpata pijajivi. Pinijsaëta paneyacajërëta Pablo. Nexata comandante Lisias panejumaitsi: “Pajivi jamatabëneconita Pablo, ponae nacuaevetsinë Félixjavabelia bajaraponë pitabarata peneconitsinexa,” panejai. <sup>8</sup>Nexata itsa yanijobianame maponëje Pablo, yapëtaename baja daxita pacuenia xaniavaetsia pacatsipaebatsi Pablo pexanaejava yabara, jai Tértulo mapacueniaje nacuaevetsinë Félixjavabelia.

<sup>9</sup>Judíovi bajarajota Tértulo pemuxuneneta penubenaevi ata neconitatsi Pablo. Bajarapajudíovi jumaitsi nacuaevetsinë Félixjavabelia:

—Xaniajai rabaja Tértulo. Daxita pacuenia Tértulo cajumaitsi, bajarapacuenia exana Pablo, jai judíovi nacuaevetsinëjavabelia.

<sup>10</sup>Nacuaevetsinë Félix nacobeyota juya Pablo pitorobinexatsi Pablo jane baja penavajunupaebinxaxa nacuaevetsinë Félix pitabarata. Nexata Pablo jumaitsi nacuaevetsinë Félixjavabelia:

—Yapëtaniji baja cajena xamë bajayajebi mapanacuapijivi nenaneconitsiaexanabiabijava. Bajaraxuata barëyanë tacatsipaebinxaxa xua exanjë. <sup>11</sup>Nexata taxanijajumeta catsipaebianatsi. Itsa yanijobijitsipame itsamonaejavabelia ata, nexata catsipaebijitsipa pacuenia aeconoxae catsipaebianatsi. Ajena raja abaxë saya xainajë doce pamatacabibeje tapatsicujinae Jerusalén tomarata. Patajë najamatabëcueneconpatsiaya tanavajëtsinexa Diosojavabelia templobota. <sup>12</sup>Bajarapatemplobota judíovi apo netae tabarëcuaijaijajava itsajivi ata. Apo netaenua judíovi penacaetutabiabibonëjava jivi taitorobijava pianaepanaenexa. Apo netaenua tomaranëjava ata taitorobijava jivi pianaepanaenexa. <sup>13</sup>Nexata acuenebi itsajivi ata pejumait-sijava xanë yabara: “Xanë raja pepacuene taniji xua Pablo exana,” pejajava. Tspaji itsajivi ata apo netae pibisiacuene taexanaejava. <sup>14</sup>Nexata pacuene yabara catsipaebijitsiatsi, xaniajanë cajena. Patajasalinaivi pijaDioso jumecovënëtsiaponaponajë. Tonacuenebaponaponajë. Pejanajamatabëcueneata Dioso jumecovënëtsiaponaponajë. Baitsi pexanialivaisi, Jesucristo pelivaisi, jumecovënëtsiaponaponajë. Bajara palivaisi yabara judíovi jumaitsi tsabiabi: “Apo pexaniajailivaisi cajena bajarapalivaisi. Dioso baja cajena apo nacatocopatsi vajajumecovënëtsinexa bajarapalivaisi,” jai tsabiabi judíovi. Itsiata Jesucristo taneitorobicuenia jumecovënëtsi atanë, Dioso Moiséspijinëta penajumecopatsilivaisi yajava jumecovënëtaaponaponajë. Bajayata Diosojumepaebivi profetavi peyaquinaelivaisianë ata jumecovënëtajë. <sup>15</sup>Mapajudíovi nubenaje, jumecovënëta mapacuenia pejumaitsilivaisije: “Dioso icatsia asaëyaexanaena petëpaevimi,” pejailivaisi. Xanë ata bajarapalivaisi jumecovënëtajë. Baitsi daxita pamonaë tëpa, pexaniajamatabëcuenevimi, pibisiajamatabëcuenevimi ata, itsamatacabi icatsia Dioso asaëyaexanaena. <sup>16</sup>Bajaraxu-

ata bitso jitsipajë xaniavaetsia taponaponaejava tanajamatabëcuenebijianaeyaniva Dioso pitabarata, tanajamatabëcuenebijianaeyaniva daxitajivi ata pitabarata, jai Pablo nacuaevetsinë Félixjavabelia.

<sup>17</sup> Icatsia Pablo jumaitsi nacuaevetsinë Félixjavabelia:

—Caevaimaxëto baja cajena ajibinë tsarucae Jerusalén tomaravecua Dioso pitorobilivaisi jivi tatsipaebinexa daxitanacuanëjava. Bajaraxuacujinae icatsia naviatajë Jerusalén tomarabelia. Tocapaliajë ofrenda tarajutsinexa bepejiobivi. Patajë picani templobota ofrenda tarajutsinexa Diosojavabelia. <sup>18</sup> Itsa baja veretajë templobota tanajamatabëcuenexaniavaetsijava Diosojavabelia tajamatabëcuenesaënexa, tarajutsinexa picani bajarapaofrenda Diosojavabelia, nexata bajarapaepatota judíovi, Asiavënë nacuapijivi, necaxitajaraba templobota. Nexata nevaetaba tanenaneconitsiaexanaenexa. Itsa necaxitajaraba templobota, apo yajavanucaenë ayaibitsaëto. Daxita templobopijivi yāijai. Templobopijivi ajumejibia jinavanapa. <sup>19</sup> Bajara baitsi jane pamonaë judíovi, Asiavënë nacuapijivi, tanetaevi templobota, bepatsirena maberenaje taneneconitsinexa jane baja itsa necuene tane pibisiacuene taexanaejava. <sup>20</sup> Itsa jume, nexata mapamonaëje, nitabarata penubenaevi, vecae taitabëta catsipaebi, itsa netane pibisiacuene taexanaejava pamatacabi nucajë sacerdotevi penamatacatorobivi pitabarata, judíovi pijaancianovi ata pitabarata, judíovi pecujarubivi ata pitabarata. <sup>21</sup> Saya meta caelivaisiyo bajarapamonaë catsipaebiana xanë talivaisi. Tsipaji pamatacabi nucajë judíovi pijaancianovi pitabarata, ayaijumeta jumaitsinë: “Mapamatacabitaje neneconitsiana. Tsipaji jivi petëpaecujinae Dioso icatsia piasaëyaexanaejavanexa, jumecovënëtajë,” janë. Nexata meta bajarapacuenia tajumaitsiyava yabara bajarapamonaë jamatabëneneconita xamëjavabelia, jai Pablo nacuaevetsinë Félixjavabelia.

<sup>22</sup> Nacuaevetsinë Félix xaniavaetsia yapëtane daxitanacuanëjava jivi pejumecovënëtaaponaejava Jesucristo pelivaisi. Nexata nacuaevetsinë Félix pejumetaecujinae Pablo petsipaebilivaisi, nacuaevetsinë Félix naviabiaexana baja pamonaë picani Pablo neconitsijitsiatsi. Nexata nacuaevetsinë Félix jumaitsi Tértulobanajavabelia, Jerusalén tomaraverena pepatsivijavabelia:

—Itsa patsiarena vajabitsaë pepo pevetsinë, comandante Lisias, yapëtaenajë pacuenia exanaejitsianë Pablojavabelia, jai.

<sup>23</sup> Nexata nacuaevetsinë Félix jumaitsi vajabitsaë pijacapitánjavabelia:

—Pablo barëevetsianame xaniavaetsia penajetabajiraviyaniva. Itsiata tocopatsianame peponaponaenexa bajarajota pacëtsinejevamë. Tocopatsianamenua peyapëtaevitsi pesivaxainanexatsi perajutsinexatsinua penamatavenonaëjavaxi, jai nacuaevetsinë Félix vajabitsaë pijacapitánjavabelia.

<sup>24</sup> Bajaraxuacujinae, caematacabibejecujinae, nacuaevetsinë Félix icatsia pata piyava yajava, Drusilavënëva. Drusila judíova. Nexata nacuaevetsinë Félix itoroba pijajivitonë petojunatsinexatsi Pablo. Nexata Pablo itsa pata, Pablo livaisi tsipaeba nacuaevetsinë Félixjavabelia. Pablo tsipaeba jivi penajamatabëcuene copaponaëjava Jesucristojavabelia. <sup>25</sup> Pablo tsipaebanua Dioso pitorobijava jivi pejinavapanenexa pibisiacuene exanaenejeva Dioso pitabarata. Pablo tsipaebanua jivi xaniavaetsia penaevetsijavanexa pevitota pibisiacuene pexanaeyaniva. Pablo tsipaebanua itsamatacabi Dioso penaneconitsiaexanaejavanexa pibisiacuene pexanaevi. Nexata nacuaevetsinë Félix ita jumetane bajarapacuenia Pablo petsipaebilivaisi, najunaviaca. Nexata bajarajota nacuaevetsinë Félix jumaitsi Pablojavabelia:

—Pitsapare baja abaxë. Icatsia cajunatsianatsi itsajota cuenesajinajë, jai nacuaevetsinë Félix.

<sup>26</sup>Nacuaevetsinë Félix jamatabëjumaitsi Pablo yabara:

—Pablo meta nerajutsiana palata tacopatsinexa penaneconitsijavavecua, jamatabëjai.

Bajaraxuata Félix anijatonë pijajivi itorobabiaba Pablo petojunatsinexatsi pebarëcuaicuaijainexatsi. <sup>27</sup>Anijavaibeje bajarapacuenia Félix pijajivi itorobabiaba Pablo petojunatabiabinexatsi. Belia baja Félix vecuapitsapa nacua pevetsicuene. Nexata juya itsanë, Porcio Festovënë, tocopatatsi bajarapanacua pevetsinexa. Félix baja pitsapae ata, itsiata Félix pejamatabëcueneta Pablo apo tocopatsitsi pepit-sapaenexa penaneconitsijavavecua. Bajarapacuenia Félix exana judfovi pesivajamatabëcuene barëyanexatsi.

### **Pacuenia Pablo navajunupaeba pejananacuaevetsinë Festo pitabarata yabara pelivaisi**

**25** Festo patajopa Cesarea tomarata pexanaenexatsi nacuaevetsinënexa. Papat-sicujinae, acueyabi pamatacabibejecujinae, Festo baja pona Cesarea tomaravecua. Pona Jerusalén tomarabelia. <sup>2</sup>Nexata Jerusalén tomaratalia sacerdotevi penamatacaitorobivi Pablo neconitatsi pepëya nacuaevetsinë Festojavabelia. Neconitatsinua judfovi ata, pamona petuxanevi. <sup>3</sup>Bajarapamonae pini-jicuenia vajëta nacuaevetsinë Festojavabelia petocapatsinexatsirena Pablo Jerusalén tomaraberena. Bajarapacuenia vajëta tsipaji baja cajena bajarapamonae najamatabëcuenevereta picani Pablo pebeyaxuabiaexanaenexatsi namutoepatota. <sup>4</sup>Nexata nacuaevetsinë Festo jumaitsi bajarapamonaejavabelia:

—Pablo raja naneconitsia ponapona Cesarea tomarata. Xanë raja caematacabibejecujinae ponaejitsianë Cesarea tomarabelia. <sup>5</sup>Pablo pibisiacuene itsa exana, nexata papecanamatacaitorobivi tapëta naponae Cesarea tomarabelia peneconitsinexa Pablo, jai nacuaevetsinë Festo bajarapamonaejavabelia.

<sup>6</sup>Bajarapacuenia nacuaevetsinë Festo pejumaitsicujinae, nacuaevetsinë Festo abaxë ponapona Jerusalén tomarata ocho pamatacabibeje. Itsa jume, diez meta pamatacabibeje. Bajaraxuacujinae pona jane baja Cesarea tomarabelia. Nexata meravia pitsijavata nacuaevetsinë Festo eca itsajota nacuaevetsinë ecabiaba jivi penaneconitsiaexanaenexa. Nexata pijajivi itoroba petocapatsinexatsi Pablo. <sup>7</sup>Pablo itsa joneya, nexata judfovi, Jerusalén tomaraverena pepatsivi, matatoyorotsia imoxoyotatsi Pablo. Najumetsënëtsiaya neconitatsi beayaineconi pexainanëcuenia. Itsiata baitsi jane xua yabara picani Pablo neconitatsi picani, bajarapamonae apo jumenamatamotsi peneconitsijavatsi. <sup>8</sup>Nexata Pablo nayajivijumaitsi peneconitsiyanivatsi:

—Itsacuene ata pibisiacuene apo exanaenë. Nexata xanë judfovi pitorobilivaisi-javabelia, templojavabelia ata, Romanonacua pepo pevetsinëjavabelia ata, apo naneconitsinë, jai Pablo nacuaevetsinë Festojavabelia.

<sup>9</sup>Nexata nacuaevetsinë Festo yanijoba Pablojavabelia judfovi pejamatabëcuenebarëyanexa nacuaevetsinë Festojavabelia. Nacuaevetsinë Festo Pablojavabelia jumaitsi mapacueniaje:

—¿Jitsipame tsaja neponaejava Jerusalén tomarabelia bajarajotalia pecaneconitsinexa taitabarata mapacuene yabaraje? jai nacuaevevsinē Festo Pablojavabelia.

<sup>10</sup> Pablo nexata jumaitsi:

—Nucajē rabaja majotaje xamē nitabarata. Tsipaji nijatuxanenē, Romanonacua pepo pevetsinē, itoroba majotaje peneconitsinexatsi pibisiacuene pexanaevi. Bajaraxuata apo beneitorobimē itsajavabelia taneneconitsinexamē. Itsacuene ata pibisiacuene apo exanaenē judíovijavabelia. Bajarapacuene xamē xaniavaetsia yapētaneme baja cajena. <sup>11</sup> Itsa pepacuene naneconitsipajē, nexata itsa nebeyaxuabijitsia tajaneconi yabara, nexata apo najamatabēxainaenē tsipae tavecuapanepaenexa tatēpaejava. Itsiata baitsi jane pacuenia mapamonaē neneconitsiajumaitsi, apo xaniajai cajena. Nexata acuenebi itsajivi ata tanecanajetsijava mapamonaē pecobeyabeliaje saya aneconiibia tanebeyaxuabinexa. Nexata jane baja xanē cavajētatsi taneitorobinexamē nijatuxanenējavabelia, Romanonacua pepo pevetsinējavabelia, bajaraponē pitabarata taneneconitsinexa, jai Pablo nacuaevevsinē Festojavabelia.

<sup>12</sup> Nexata nacuaevevsinē Festo barēcuaiuaijai pijajivi, pejamatabēcueneyavenonavevtsi. Bajaraxuacujinae nacuaevevsinē Festo jumaitsi Pablojavabelia:

—Xamē nevajētame tacaitorobinexa tajatuxanenējavabelia, Romanonacua pepo pevetsinējavabelia, bajaraponē pitabarata pecaneconitsinexa pibisiacuene itsa exaname. Nexata bajaraponējavabelia ponaename, jai nacuaevevsinē Festo Pablojavabelia.

### **Pacuenia Pablo navajunupaeba nacuaevevsinē Agripajavabelia yabara pelivaisi**

<sup>13</sup> Pablo pevajētsicujinae nacuaevevsinē Festojavabelia pitobinexatsi Romanonacua pepo pevetsinējavabelia, caematacabibejecujinae, nacuaevevsinē Agripa, pijava Berenicevēnēva yajava, parena Cesarea tomaraberena. Parenabeje pebjacobinexabeje nacuaevevsinē Festo pejanapatsinēxae nacua pevetsinēnēxa. <sup>14</sup> Agripabeje Berenicebeje caematacabibeje ponaponabeje Cesarea tomarata. Nexata nacuaevevsinē Festo tsipaeba nacuaevevsinē Agripajavabelia Pablo yabara. Nacuaevevsinē Festo jumaitsi:

—Majotaje xainajē pebi naneconitsia peponaponaenē. Félix abaxē mapanacua itsa evetaje, bajaraponē naneconitsiaexanatsi. <sup>15</sup> Nexata itsa ponajē Jerusalén tomarabelia, sacerdotevi penamatacaitorobivi, judíovi pijaancianovinua, neconitatsi Pablo xanējavaberena. Bajarapamonaē nevajēta tananeconitsiaexanaenexa Pablo pebeyaxuabinexatsi. <sup>16</sup> Nexata xanē jumaitsinē bajarapamonaējavabelia: “Romanonacua raja pepo pevetsinē pejamatabēcueneta apo pacopatsinē itsajivi ata pebeyaxuabinexatsi abaxē xaniavaetsia payapētaenejevanē paneconi xaina. Itsajivi pibisiacuene itsa exana, nexata namatavenona pecuenetaevtsi pitabarata copiyaya peneconitsinexatsi. Nexata pajivi naneconita, bajarajota xanepana penayajivicuauaijainexa paneconi yabara neconitatsi,” janē bajarapamonaējavabelia, jai nacuaevevsinē Festo nacuaevevsinē Agripajavabelia.

<sup>17</sup> Icatsia nacuaevevsinē Festo jumaitsi nacuaevevsinē Agripajavabelia:

—Nexata bajarapajudíovi maberena pepatsicujinaeje, meravia pitsijavata, copiyaya joneyajē taecaenexa itsajota ecabiabajē jivi itsa naneconitsiaexanaejitsianē.

Nexata itorobajë tajajivi tanetocapsinexa Pablo xanëjavaberena. Tsipaji jamatabëjumaitsinë: “Pablo meta pibisiacuene pexanaexae, neconitatsi,” jamatabëjanë. <sup>18</sup> Itsiata baitsi jane Pablo itsa pata, peneconitsivitsi apo neconitsitsi pibisiacuene pexanaejava yabara pacuenia picani najamatabëxainajë. <sup>19</sup> Saya judfovi jumeanaenotatsi Pablo Dioso pejumecovënëtsijava yabara. Jumeanaenotatsinua Pablo petsipaebijava Jesús petëpaejava yabara ata. Jesús yabara Pablo jumaitsi: “Jesús raja apo tēpae. Petëpaeujinae baja icatsia Dioso asaëyaexanatsi,” jai Pablo bajarapajudfovijavabelia. <sup>20</sup> Nexata xaniavaetsia apo yapëtaenë pacuenia exanaejitsianë bajarapacuene yabara. Nexata jumaitsinë Pablojavabelia: “Jitsipame tsaja neponaejava Jerusalén tomarabelia, bajarajotalia icatsia pecaneconitsinexa pamonaecaneconita,” janë picani. <sup>21</sup> Itsiata baitsi jane Pablo nevajëta taitorobinexa picani vajatuxanenëbejejavabelia, Romanonacua pepo pevetsinëjavabelia, bajaraponë pitabarata peneconitsinexatsi, pibisiacuene itsa exana Pablo. Itsiata abaxë xanë mapatomarataje Pablo naneconitsiaya ponaponaeyaexanajë. Nexata pamatacabi necuenecaëjëpaena, itorobianajë vajatuxanenëbejejavabelia, jai nacuaevetsinë Festo nacuaevetsinë Agripajavabelia.

<sup>22</sup> Nexata nacuaevetsinë Agripa jumaitsi nacuaevetsinë Festojavabelia:

—Xanë ata jitsipajë tajumetaejava Pablo penavajunupaebijava, jai nacuaevetsinë Agripa.

Nexata nacuaevetsinë Festo jumaitsi nacuaevetsinë Agripajavabelia:

—Meravia rabaja jumetaename Pablo penavajunupaebijava, jai nacuaevetsinë Festo.

<sup>23</sup> Nexata meravia pitsijavata nacuaevetsinë Agripa pijava Berenicebeje bitso naitabëtabeje. Nexata naponabeje jivi penacaetuatabiaboxanetojavabelia. Pëyanatatsibeje vajabitsaë pepo pevetsivi. Pëyanatatsibeje Cesarea tomarapijipetuxanevi ata. Penacaetuatsiboxanetojavalia barëjoneyabeje. Nexata nacuaevetsinë Festo pijajivi itoroba petocaponaenexatsirena Pablo. <sup>24</sup> Nexata nacuaevetsinë Festo jumaitsi nacuaevetsinë Agripajavabelia, itsamonaejavabelia ata:

—Agripa, nacua nevetsinë, daxita paxamë ata majotaje vajanajuanacaetuatsivi. Pataneme rabaja mapapebi nuca paneitabarataje. Ayaibitsaëto judfovi, Jerusalén tomarapijivi, bajaraponë neconitatsi xanëjavaberena Jerusalén tomaratalia. Bajara icatsia pamonaecaneconita tapëta naponarena Cesarea tomaraberena. Bajara icatsia pacuenia neconitatsi xanëjavaberena. Bajarapamonae vavajaiya nejumai tsabiabi: “Pajitsipajë Pablo pebeyaxuabinexatsi,” nejai tsabiabi. <sup>25</sup> Itsiata baitsi jane xanë apo yapëtaenë paneconi yabara beyaxuabijitsiatsi. Maponë nevajëta picani taitorobinexa tajatuxanenëjavabelia, Romanonacua pepo pevetsinëjavabelia, bajaraponë pitabarata peneconitsinexatsi itsa pibisiacuene exana. Bajaraxuata itorbijitsianë Romanonacua pepo pevetsinëjavabelia. <sup>26</sup> Itsiata baitsi jane apo yapëtaenë pacuene yabara toyaquinaejitsianë cuyalatobaxutota tajatuxanenëjavabelia. Bajaraxuata xamë Agripa, nacua nevetsinë, mapamonae ataje, daxita paxamë paneitabarata Pablo penucaenexa pacatocapatatsi maberena. Pacatocapatatsi paneyanijobinexa paneconi yabara naneconita. Nexata meta paneyanijobicujinae xanë yapëtaenajë paneconi yabara naneconita. Nexata bajarajota yapëtaenajë tajatuxanenëjavabelia tatoyaquinaenexa cuyalatobaxutota paneconi yabara judfovi Pablo neconitsijitsiatsi tajatuxanenëjavabelia. <sup>27</sup> Tsipaji acuenebi taitorobi-

java maponėje Pablo tajatuxanenėjavabelia toyaquinaenejevanė cuyalato xaniavaetsia peyapėtaenexa paneconi yabara judíoivi neconitsijitsiatsi, jai nacuaevetsinē Festo nacuaevetsinē Agripajavabelia.

**Pacuenia Pablo navajunupaeba nacuaevetsinē  
Agripa pitabarata yabara pelivaisi**

**26** Nacuaevetsinē Agripa jumaitsi Pablojavabelia:  
—Catocopatatsi rabaja nenavajunupaebinxexa paneconi yabara judíoivi caneconita, jai nacuaevetsinē Agripa Pablojavabelia.

Nexata Pablo yaiyataeya bajacoba nacuaevetsinē Agripa. Nexata Pablo jumaitsi nacuaevetsinē Agripajavabelia mapacueniaje:

<sup>2</sup>—Barėyanė. Tspaji ajena pamatacabi netocopatame nitabarata tanavajunupaebinxexa daxita paneconi yabara judíoivi neneconitsijitsia. <sup>3</sup>Aeconoxaeta bitso barėyanė. Tspaji yapėtaneme xaniavaetsia daxita palivaisi paxainajė pajudíoivinė. Yapėtanemenua pajamatabėcuenelivaisi yabara panajumeanaenotabiabajė. Nexata cavajėtatsi ajamatabėcuenesaėya bajayaepato xaniavaetsia tanenamuxunaevete-caenexamė, jai Pablo nacuaevetsinē Agripajavabelia.

**Pacuenia Pablo navajunupaeba pacuenia ponapona pamatacabi  
abaxė apo jumecovėnėtsi Jesucristo yabara pelivaisi**

<sup>4</sup>Pablo icatsia jumaitsi nacuaevetsinē Agripajavabelia:

—Daxita judíoivi baja cajena neyapėtane pacuenia copiaya ponaponajė bajarapamonaejavata. Bajarapamona neyapėtane pacuenia ponaponajė patajanacuatatsiquirinėyojavaveliacujinaenė. Neyapėtanenua pacuenia ponaponajė Jerusalėn tomarata ata. <sup>5</sup>Judíoivyajuvėnėvi itsamona naexana fariseovi. Nexata bajarapamona Dioso Moiséspijinėta penajumecopatsilivaisi, bitso jumecovėnėtsiajinavanapa itsajudíoivecua. Nexata itsa yanijobijitsipame, daxita judíoivi catsipaebi-jitsipa pacuenia picani pejevaxinėjavaveliacujinaenė catsitecaponaponajė fariseovi pecujarubicuene. <sup>6</sup>Bajarapamona neneconitsijitsia tspaji baja xanė jumecovėnėtajė petėpaevimi itsamatacabi Dioso icatsia piasaėyaexanaejavanexa. Tspaji baja cajena bajarapacuenia Dioso najumecapanepaeya jumaitsi patajasalinaivimijavabelia. Nexata bajarapalivaisi jumecovėnėtajė. <sup>7</sup>Daxita raja paxanė, Israelpijinėmi pexi doce ponėmibeje papemomoxinė. Pacopiaevetavanapajė Dioso icatsia piasaėyaexanaejavanexa petėpaevimi pacuenia baja cajena tajėvelia Dioso najumecapanepaeya jumaitsi patajasalinaivimijavabelia. Bajaraxuata najamatabėcuenecopatsiaya pavajėtabiabajė Diosojavabelia. Patonacuenebavanapajėnua caematacabi canacujitsia, meravijava. Agripa, nacua nevetšinė, abaxė nenamuxunaevere. Dioso icatsia petėpaevimi piasaėyaexanaejavanexa, copiaevetaponaponajė. Bajaraxuata judíoivi neneconitsijitsia. <sup>8</sup>Pėtsa pajamatabėjumaitsimė Dioso yabara: “Dioso raja apo caėjėpaetsi petėpaevi icatsia piasaėyaexanaenexa,” pajamatabėjamė pėtsa, jai Pablo bajarapamonaejavabelia.

**Pacuenia Pablo navajunupaeba petaicaponaejava Jesús pejumecovėnėtsivi  
pejebinxexa penaneconitsivi pejebabiabibota yabara pelivaisi**

<sup>9</sup>Pablo icatsia jumaitsi nacuaevetsinē Agripajavabelia:

—Xanë abaxë Jesús itsa apo jumecovënëtsinë, jamatabëjumaitsinë tsabiabi: “Xanë bejiobiaexanaenajë daxita pamonaë jumecovënëta Jesús, Nazaret tomarapijinë, pelivaisi,” jamatabëjanë tsabiabi. <sup>10</sup> Nexata bajarapacuenia exanajë Jerusalén tomarata. Sacerdotevi penamatacaitorobivi taneitorobixae, ayaiBITSaëto Jesús pelivaisi pejumecovënëtsivi jebaponajë penaneconitsivi pejebabiabibota. Itsa bajarapamonae naneconitsiaexanatsi, itsa beyejebatsinua, netsitaxanepana bajarapacuenia pebeyejebijavatsi. <sup>11</sup> Pamonaë Jesús pelivaisi jumecovënëta, anijatonë jumaconibabeyaexanabiabajë judíovi penacaetuatabiabinonëjava. Bajarapacuenia picani exanaponajë bajarapamonae pecopabinexa Jesús pelivaisi pejumecovënëtsijava. Xanë picani cueneitoyanë bajarapamonae. Nexata itsanacujava penaetomaranëjava ata, jaitarutajë Jesús pelivaisi pejumecovënëtsivi tataicaenexa tajebinexa penaneconitsivi pejebabiabibota, jai Pablo nacuaevetsinë Agripajavabelia.

**Pacuenia icatsia Pablo navajunupaeba pacuenia Jesús  
pelivaisi jumecovënëta yabara pelivaisi**

*(Hch 9.1-19; 22.6-16)*

<sup>12</sup> Pablo icatsia jumaitsi nacuaevetsinë Agripajavabelia:

—Bajara picani icatsia pacuenia tataicaenexa Damasco tomarata Jesús pelivaisi pejumecovënëtsivi, ponajë picani Damasco tomarabelia. Nitoroba sacerdotevi penamatacaitorobivi. Bajarapamonae pejamatabëcueneta nitoroba tataicaenexa picani Jesús pelivaisi pejumecovënëtsivi tajebinexa penaneconitsivi pejebabiabibota. <sup>13</sup> Agripa, nacua nevetsinë, abaxë nenamuxunaevere. Nexata jane baja ponajë Damasco tomarabelia. Nexata tanajetaruaejavata namutua, taniiji matonejeepatota athëbëvetsica pinijicotia tanematatoyorotsianaitayotsijava. Naitayota matabicipijjuametocotia matatoxenetsia. Daxita tayajavaponaevi tayajavanajetaruaejavata, panematatoyorotsia naitayota. <sup>14</sup> Nexata daxita paxanë irata pabobenajunujajë. Bajarajota irata jumetaenucajë hebreojumeta athëbëvetsica tanejumaitsijava: “Saulo, Saulo, ¿detsa xuajitsia tajajivi netobejiobiaexanaponame? Xamë nijacuata najamatabëcuenebijianaponame,” tanejajjava, jumetaenucajë irata. <sup>15</sup> Nexata xanë jumaitsinë: “Tajatuxanenë, ¿detsa ponëmë?” janë. Nexata icatsia nejumaitsi: “Xanë raja Jesúsne. Xanë raja tajajivi netobejiobiaexanaponame. <sup>16</sup> Nonotabapunare. Catsitanaitajëtatsi raja tacaitapetsinexa tajajivitonënxamë. Xamë nexata tsipaebianame itsajivijavabelia pacuenia aeconoxae netaneme. Tsipaebianamenua pacuenia icatsia catsitanaitajëtsianatsi bexëa itsamatabijjavabelia. <sup>17</sup> Cacapanepaenatsi raja judíovi pecobevecua pecaitsacueniabiyaniva. Caitorobianatsi apo judíovi pijanacuanëjavabelia. Apo judíovi ata pecobevecua cacapanepaenatsi pecaitsacueniabiyaniva. <sup>18</sup> Caitorobatsi rabaja netsipaebinexa apo judíovijavabelia pexanialivaisi, xanë talivaisi. Nexata apo judíovi ata najamatabëcuene pënëyorotsiaexanaename Diosojavabelia. Nexata Dioso pexaniajailivaisita apo judíovi ata jamatabëcueneitayotsianatsi piaitaquirijamatabëcuenevecua, dovathi pejamatabëcuene itorobabiabijavatsivecua. Nexata apo judíovi ata talivaisi jumecovënëtsiana. Nexata bajarapamonae pibisiacuene pexanaeconimi, Dioso vecuaajibiaexanaenatsi itsa jumecovënëtsiana talivaisi. Nexata apo judíovi ata pibisiacuene pexanaeconimi, Dioso vecuaajibiaexanaenatsi, pacuenia baja daxita tanejumecovënëtsivi Dioso vecuaajibiaexanatsi pibisiacuene pexanaeconimi,” nejai Jesús mapacueniaje athëbëvetsica, jai Pablo nacuaevetsinë Agripajavabelia.

**Pacuenia Pablo navajunupaeba pacuenia jumecovënëta  
Jesús pitorobicueniatsi yabara pelivaisi**

<sup>19</sup> Icatsia Pablo jumaitsi nacuaevetsinë Agripajavabelia:

—Agripa, nacua nevetsinë, abaxë nenamuxunaevere. Nexata pacuenia Jesús athëbëvetsica nejumaitsi, jumecovënëtajë baja cajena. <sup>20</sup> Copiata Jesús pelivaisi tsipaebaponajë Damasco tomarapijivijavabelia, Jerusalén tomarapijivijavabelia ata, Judea nacuapijivijavabelia ata. Bajaraxuacujinae icatsia tsipaebaponajë apo judfövijavabelia ata. Nexata itorobajë daxita bajarapamonae pecopabinexa pibisiacuene pexanabiabijava penajamatabëcuenepënëyorotsinexa Diosojavabelia. Nexata itorobajë xaniavaetsia pejinavanapaenexa pibisiacuene pexanaeyaniva. Nexata baja bajarapacuenia itsa jinavanapa, daxitajivi yapëtanetsi pepacuene penajamatabëcuenepënëyorotsijava Diosojavabelia. <sup>21</sup> Bajarapalivaisi tatsipaebaponaexae, nevaetaba judfövi pamatacabi ponaponajë templobota. Nevaetaba tanebeyaxuabinexa picani. <sup>22</sup> Itsiata baitsi jane neyjavaponapona Dioso taneyavenonaenexa mapamatacabijavaberena ataje. Bajaraxuata nucajë majotaje tatsipaebinexa Jesús pelivaisi daxitajivijavabelia. Jesús pelivaisi jivi itsa tsipaebabiabajë, tsipaebabiabajë bepejiovijavabelia, pepo petuxanevijavabelia ata. Nexata daxita bajarapamonae najëpaeya tsipaebabiabajë peyapëtaenexa xua bajayata tajëvelia Diosojumepaebivi profetavi vajunupaeba. Profeta Moiséspijinë ata bajayata tajëvelia vajunupaeba bajaraxua. Pacuenia ata bajayata tajëvelia Diosojumepaebivimi profetavi copiaya jumaitsi, tsipaebabiabajë. Bajayata baja cajena profetavimi Cristo yabara jumaitsi mapacueniaje: <sup>23</sup> “Pamatacabi Cristo Dioso itorobianicatsi jivi pecapanepaenexa, beyaxuabianatsi. Itsiata baitsi jane pebeyaxuabicujinaetsi Dioso icatsia asaëyaexanaenatsi. Nexata Cristo Dioso itsa asaëyaexanaenatsi petëpaecujinae, namataxainaeasaëyaexanaenatsi daxita petëpaevivecua,” jai bajayata tajëvelia profetavi. Nexata jane baja Cristo Dioso itsa asaëyaexanatsi petëpaecujinae, namataxainaeasaëyaexanaenatsi daxita petëpaevivecua. Nexata pamona Dioso pepuajumecovënëtsi tëpa, Dioso icatsia cotocaevi asaëyaexanaenatsi petëpaecujinae. Nexata bajarapalivaisi tsipaebaponajë judfövijava, apo judfövijava ata. Daxita bajarapamonae itsa jumecovënëta bajarapalivaisi, pecapanepaenexatsi Diosojavabelia, jai Pablo nacuaevetsinë Agripajavabelia.

**Pacuenia Pablo petsipaebilivaisi pejumetaevitsi,  
sivanajamatabëxainatsi yabara pelivaisi**

<sup>24</sup> Pablo penavajunupaebijavata, nacuaevetsinë Festo jumevabaxuabatsi.

—¡Pablo, xamë raja saya camatajemaba! Camatajemaba bitso nenacujarubixae, jai nacuaevetsinë Festo.

<sup>25</sup> Pablo nexata jumaitsi:

—Festo, pecayaiyataenë, nacua nevetsinë. Apo nematajemabi raja xanë. Palivaisi raja pacatsipaebatsi, pepo pexaniajailivaisi. <sup>26</sup> Bajarapalivaisi ajumejunavijibia pacatsipaebatsi tsipaji maponë ecaje, nacua pevetsinë Agripa, xaniavaetsia yapëtane bajarapalivaisi. Agripa xaniavaetsia yapëtane daxita xua Jesús exana. Tsipaji abaxë pamatacabi Jesús ponapona mapanacuataje, daxita xua exana, muetsia apo exanae. <sup>27</sup> Agripa, nacua nevetsinë, xamë baja cajena jumecovënëtame profetavi bajayata



peyaquinaelivaisi. ¿Baja tsabaitsi jane? Cayapëtanetsi baja cajena nejumecovënëtsijava bajarapamonae peyaquinaelivaisi, jai Pablo nacuaevetsinë Agripajavabelia.

<sup>28</sup> Nexata nacuaevetsinë Agripa jumaitsi Pablojavabelia:

—¿Bepijia tsabaja Jesús pelivaisi jamatabënejumecovënëtsiaexaname? jai nacuaevetsinë Agripa.

<sup>29</sup> Nexata Pablo jumaitsi:

—Vajëtajë Diosojavabelia Jesús pelivaisi bepijia panejumecovënëtsinexa. Itsa jume, beaxayocuenia ata panejumecovënëtsinexa. Daxita paxamë patanejumetaeeyenaevimë, jitsipajë panejumecovënëtsijava Jesús pelivaisi. Pacuenia baja xanë jamatabëcueneitsinë, Jesús pelivaisi tajumecovënëtsinë, bajara paxamë ata panejamatabëcueneitsinexa. Itsiata apo pacatojitsipaetsi papecacëbinexa mapitsicadenamaëtonëtajë pacuenia xanë necëtanuta, jai Pablo.

<sup>30</sup> Itsa baja Pablo najumevereta bajarapacuenia petsipaebijava, nacuaevetsinë Festo nonotapuna. Nacuaevetsinë Agripa ata, pijava Berenice yajava, nonotapuna. Daxita baja penajuanacaetuatsivi ata nonobapuna peponaenexa. <sup>31</sup> Pepitsapaecuji-naelia bajarapamonae najumaitsi:

—Maponëje Pablo itsacuenie baja cajena apo exanae. Nexata picani ajibi paneconi yabara beyaxuabijitsiatsi. Ajibinua paneconi yabara etsijitsiatsi penaneconitsivi pejebabiabibota, najai bajarapamonae Pablo yabara.

<sup>32</sup> Nacuaevetsinë Agripa jumaitsi nacuaevetsinë Festojavabelia:

—Itsa apo cavajëtsi tsipae nitorobinexa vajatuxanenëbejejavabelia, Romanonacua pepo pevetsinëjavabelia, bajaraponë pitabarata peneconitsinexatsi, nexata baja picani copatsipatsi pepitsapaenexa penaneconitsivi pejebabiabibovecua, jai nacuaevetsinë Agripa Pablo yabara.

### Pacuenia Pablo caponaliatsi Roma tomarabelia yabara pelivaisi

**27** Nacuaevetsinë Festobana najamatabëcuenevereta baja pitorobinexatsi Pablo Italia nacuyabelia, Romanonacua pepo pevetsinëjavabelia. Nexata Pablo caponaejitsiatsi vajabitsaë pijacapitán, Juliovënënë. Itsamonae naneconitsia pejinavanapaevi, Pablo yajava, caponaejitsiatsi. Ponë Romanonacua pepo pevetsinë, bajaraponë pevënë Augusto. Nexata Augusto pijajivi vajabitsaë pijacapitánmonaeyajuvënë Julio. <sup>2</sup> Xanë Lucasnë, naponajë Pablota. Adramitio tomaraverena pepatsibarco ënëabereca parunarecajë. Bajarapamo yaëtanajetarucaejitsia manuamene muxubërëa penaetomaranëjava, pepatsinexa Asiavënë nacuyabelia. Payajavaponajëbeje Aristarco, Tesalónica tomarapijinë. Tesalónicatomara eca Macedonia nacuatata. <sup>3</sup> Meravia pitsijavata epatua panapatajë Sidón tomarata. Capitán Julio yaityatanetsi Pablo. Bajaraxuata Sidón tomarata Pablo tocopatatsi penonotajunaenexa barcoënëvecua, penasivaxainaenexa peyapëtaevitsijavabelia, perajutsinexatsinua xua namatavenona Pablo. <sup>4</sup> Bajaraxuacujinae icsia panaropobajë Sidón tomaravecua. Nexata patavajënaeverena jovibo najetaruca. Nexata Chipretunaeto pacujibaliajë bajarapatunaeto muxubërëa patanajetarubenaenexa. Nexata Chipretunaeto patatsavenononia paxenetanajetarubenaajë. Tsipaji bajarapamuxubërëvelia jovibo beyajetayo. <sup>5</sup> Cilicia nacuabeje Panfilia nacuabeje canacujitsialia papaliajë. Nexata payaëtajë Mira tomarata. Miratomara eca Licia nacuatata.

<sup>6</sup> Nexata Mira tomarata capitán Julio caxitajaraba barco, Alejandría tomaraverena pepatsimo. Bajarapamo ponaejitsia Italia nacuyabelia. Nexata baja

pabarcota pananajetarubenajë, pavecuanonobajunajë. Nexata icatsia capitán Julio panerunaeyaexana Alejandría tomaraverena pepatsibarco ënëabelia. <sup>7</sup>Anijamat-acabianë bajarapabarcota pananajetarubenajë. Tsipaji beaxayo najetaruca. Pini-jicuenecujinae itsiata panajetarubenajë Gnidotomara canacujitsita. Jovibo abaxë tsiteca najetaruca patavajënaeverena. Nexata pamatavaquetajë Cretavënëtunaeto. Panajetarubenajë itsapaitapavelia eca Salmóntomara. Tsipaji bajarapaitapavelia jovibo beyajetayo. <sup>8</sup>Piyapëbejecuenia panajetarubenajë manuamene muxubërëa. Nexata papatajë Buenos Puertosvënëjavata, Laseatomara imoxoyojavata.

<sup>9</sup>Pamatacabianë xanepana menia patanajetarubenaenexa, panevecuapanepapona baja. Nexata baja bitso panetsiayai menia pataponaenexa. Tsipaji bajarapajuame-tota bitso jovibo ayai tsabiabi. Emarapae ata baja copiajunua. Nexata picani Pablo tsipaeba barcota patanajuaponaevijavabelia. <sup>10</sup>Pablo picani jumaitis mapacueniaje: —Xanë raja yapëtaniji nacatsiayai baja bitso menia vajaponaenexa vajavajë-naeyabelia. Naxuabijitsipa raeta mapamoje. Naxuabijitsipa raeta mapamoënëtajë pecaponaejava yajava. Vaxaitsi ata meta naxuabijitsipatsi. Nexata abaxë majotajë evetavanapaenatsi emarapae pepanepaejava, jai picani Pablo.

<sup>11</sup>Itsiata capitán Julio apo jumecovënëtsi Pablo petsipaebijava. Caranata pacue-nia jumaitisibeje barco pexainaenë, barco pecaponaenë ata, capitán Julio jumecovënëta. <sup>12</sup>Buenos Puertosvënëjavata ayapëbeje barco perucaejava bajayajebi. Nexata acuenebi bajarajota pataevetavanapaenexa emarapae pepanepaejava. Nex-ata picani daxita bajarapamonae bitso jitsipa patavajënaeyabelia pataponaenexa. Jitsipa picani Cretatunaeto muxubërëa patanajetarubenaenexa, itsa cuenecaëjë-patsi, pepatsinexa picani Fenice tomarata. Bajarapatomarata picani jamatabëyaëta pataevetavanapaenexa emarapae pepanepaejava. Fenicetomara eca Creta tunaeto-totsotota. Nexata bajarapatotsotota xanepana barco perubenaenexa. Tsipaji bajara-patotsotojava apo joneyabiabi jovibo.

### **Pacuenia pinijijoviboxaneto barco caponatsi Creta tunaetovecua yabara pelivaisi**

<sup>13</sup>Itsa pajinavanapajë Buenos Puertosvënëjavata, barco pexainaenë bitso jitsipa peponaenexa pevajënaeyabelia. Nexata bajarapaepatota patacovëverena beaxayo jovibo najetaruca. Nexata bajarapamonae itsa tane bajarapajovibo, jitsipa pevajë-naeyabelia peyacaponaenexatsi bajarapamonae pejitsipaecuenia. Nexata jane baja panaropobajë. Cretatunaeto muxubërëa panajetarubenajë. <sup>14</sup>Nexata jemata caepa-toyocujinae pinijijoviboxaneto najetaruca Cretatunaeto epatajërëtsiarena barcojav-aberena. Bajarapajovibo Nordestevënëjovibo. <sup>15</sup>Bajarapajovibo barco torotaponatsi Cretatunaetovecua. Apo panecaëjëpae barco patamuxufetsinexa jovibo pevajë-naevelia. Nexata baja pacopatajë pataneyacaponaenexa jovibo. <sup>16</sup>Paponajë tsiquir-itunaetoyo, Claudavënë tunaetoyo, pepënënenia. Bajaraxuayo bitso jovibo apo ayai. Barco petabufevetsina robotanajetaruca jera. Nexata itsajota jovibo beya-jetayo, pinijicuenia payamaërobocainajë jera patajutabuatsinexa barco ënëa-betsina. <sup>17</sup>Bajaraxuacujinae bajarapamonae barco epacëbaponaya pinijibumacax-anetonëta barco pesarasaraëcaeyaniva malatacata. Bajarapamonae junava barco patayayaëyaëcaeyaniva Sirtevënë iratsaubonëjumata. Nexata bajarapamonae isica barcopijivelapananë. Bajaraxuacujinae bajarapamonae copata baja itsabelia jovibo pona, barco pataneyacaponaenexa jovibota. <sup>18</sup>Meravia abaxë pitsijavata tsiteca

pinijjovibo piyaijava. Nexata bajarapamonae barcoënëta pecaponaejavanë, menia yajuvënëpenereca barco pefafanaenexa. <sup>19</sup> Bajaraxuacujinae icatsia meravia pitsijavata bajarapamonae menia penereca barcoënëta pecanacuenebijavanë. <sup>20</sup> Bajajajebi baja cajena apo pataenë matacabipijjuameto, tulupu ata. Tsipaji bajajajebi pinijjovibo, ema yajava, tsitecanuca. Belia pajamatabëjumaitsinë: “Apo yapanepaetsi meta baja tsane,” pajamatabëjanë.

<sup>21</sup> Pamatacabibeje bajarapacuenepataniji, bajara pijinia pamatacabibeje apo paxaenë pataxaejava. Nexata Pablo nonotapuna bajarapamonae petuatuajëta. Pablo jumaitsi:

—Itsa paxamë panejumecovënëtsipame pacuenia pacatsipaebatsi, xanepanaejitsipa. Nexata maberenaje apo yaponae tsipaetsi Cretatunaetovecua. Apo bejiobitsinua tsipae. <sup>22</sup> Itsiata bailsi jane aeconoxae pëtsa panatsinajamatabëxainame. Itsajivi ata raja paxamëyajuvënëjivi itsiata apo tēpae tsane. Ēbarco rajane baja naxuabiana. <sup>23</sup> Ajena baja cajena, pameravi, netsitanaitajëta ángel, Dioso pitorobinëtsica. BajarapaDioso xanë pijajivitonënë. BajarapaDioso tonacuenebaponaponajë. <sup>24</sup> Nexata ángel nejumaitsi: “Pablo, pëtsa junavame. Itsiata raja apo tēpaemë tsane. Tsipaji raja naitajëtsijitsiamë Romanonacua pepo pevetsinë pitabarata. Xamë raja nejamatabëcueneta Dioso capanepaenatsi petēpaeyaniva daxita pamonaeyajavanajetarucame mapabarcotaje,” nejai ángel. <sup>25</sup> Nexata daxita paxamë panajamatabëcuenesaëre panejamatabëcuenebëjajjavavecua. Najamatabërutajë Diosojavabelia vajanacapanepaenexa Dioso. Yapëtaniji Dioso vajanacapanepaejavanexa pacuenia baja ángel netsipaeba. <sup>26</sup> Itsiata bailsi jane cajena jovibo nacayacaponae itsatunaetojavabelia, jai Pablo.

<sup>27</sup> Catorce baja pamatacabibeje itsa paxainajë patanaropobicujinae, meravi jovibo toquebiaya paneyacaponae Adriavënë manuamenejava. Nexata meravi tuatuajëta barcota penacuenebivi jamatabëjumaitsi:

—Pitapayabelia covë payapataponajë, jamatabëjai.

<sup>28</sup> Nexata bajarapamonae pemaëtota caëjëtaponae xuavajëto mene avajubua irabereca peyapëtaenexa. Nexata treinta y seis pametrobeje xaina mene piavajubuajava irabereca. Bajaraxuacujinae, caepatoyocujinae, icatsia caëjëta. Veintiseite icatsia pametrobeje xaina mene piavajubuajava irabereca. <sup>29</sup> Nexata barcota penacuenebivi jamatabëjumaitsi:

—Barco meta payanayaëtojoapaenajë ibotojumata, jamatabëjai.

Nexata bajarapamonae barco petabufevetsina, cuatro xuabeje anclavënëjavanë, yamaëya copabareca. Nexata anclavënëjavanë menebëxëpana irabelia itsa vaetaba, barco perucojoapaenexa. Bajarapamonae picani bitso jitsipa bepimia peyamatacabibijavatsi, penatsivajënae taenajetarubenaenexa. <sup>30</sup> Nexata bajarapaepatota bajarapamonae picani bitso jitsipa epamonae penonobajunaenexa barcovecua pepanepaenexa. Nexata bajarapamonae penajuaponaevijavabelia yamaxëitojorobiaya jumaitsi:

—Icacia raja pacopabijitsianëreca itsaanclajavanë barcoupitatsia, jai.

Nexata saya ëjera, pamo pajutabuatsinajë, bajarapamonae xuareca peyaponaeenexa picani pitapayabelia. <sup>31</sup> Nexata Pablo itsa tane bajarapamonae jera pexuabijavareca, jumaitsi vajabitsaë pijacapitánjavabelia, capitán pijajivijavabelia ata:

—Mapamonaeje barcota penacuenebivi itsa ponaena mapajerataje, paxamë pava-jabitsaëmë panapenetsianame meneta, jai Pablo.

<sup>32</sup>Nexata barcota penacuenebivi peponaeyaniva jerata, vajabitsaë caucutaxuaba jera pecëtarutsimaëto. Jera baja nexata pona barcovecua.

<sup>33</sup>Ajena baja matabi tsina, Pablo itoroba daxita barcota peponaevi pexaejava pexaenexa. Pablo jumaitsi bajarapamonaejavabelia:

—Catorce baja cajena pamatabibeje xaniavaetsia apo pamajitsimë. Panexaejava ata apo paxaemë. <sup>34</sup>Bajaraxuata pacaitorobatsi panexaejava panexaenexa, panesaë panexainaenexa panepanepaenexa. Itsiata raja daxita apo paitsacuenemë tsane, jai Pablo bajarapamonaejavabelia.

<sup>35</sup>Bajarapacuenia Pablo pejumaitsijavata, panbë pita. Panbë yabara Pablo pexanijamatabëcuene rajuta Diosojavabelia daxita bajarapamonaë pitabarata. Bajaraxuacujinae Pablo epatsënëca panbë. Pablo nexata xane pexaejava. <sup>36</sup>Daxita nexata bajarajota ajamatabëcuenesaëreca baja. Nexata bajarapamonaë ata xane pexaejava. <sup>37</sup>Doscientos setenta y seis papajivinëbeje daxitata paponajë bajarapabarcota. <sup>38</sup>Nexata daxita xaniavaetsia penabanicujinae, menia penereca trigoxu sacuanë pefafanaenexa barco.

### **Pacuenia barco bubuna manuameneta yabara pelivaisi**

<sup>39</sup>Itsa baja matabi tsarucaponaë, barcota penacuenebivi taeyelia petunaeto. Itsiata apo yapëtaë bajarapatunaeto. Nexata menetotsoto taerulia. Bajarajotalia tajetabo boca. Nexata picani bajarapamonaë najamatabëxaina peyaëtsinexa barco bajarapatajetabojavabelia. <sup>40</sup>Xuanë anclavënëjavanë, yamaëya copabareca, bajaraxuanë irabelia itsa vaetaba, barco patayarucojopaenexa. Bajaraxuanëmi yamaëcaucubapenereca. Sarasaranaeyaexananua barco petabufecajëbanajetarubenaepabeje. Nexata barcoupitatsia penucaenaeta velapana upicëtarutsia. Velapana nexata jovibota nayerebajaraba. Barco jane baja imoxoyotanajetaruca tajetabo.

<sup>41</sup>Nexata itacarajeta barco pata itsajota anijamenebeje pesaë namataenetsia patabeje. Barco baja payajumanayaëtarabajë iratsaubojumata. Nexata bajarajota barcoupi mëthëmëthëcajunua iratsaubojavabelia. Ataja tsanucaë. Barco petabufejavavetsina malataca pesaëta tabufesarabajarabatsi. <sup>42</sup>Nexata picani vajabitsaë bajarajota beyejebijitsiatsi daxita penaneconitsivi, pevecuapanepaeyanivatsi pejuejavata. <sup>43</sup>Itsiata vajabitsaë pijacapitán apo tocopatsi. Tsipaji apo jitsipae Pablo yajava pebeyaxuabijavatsi. Nexata capitán itoroba daxita pamonaë yapëtane pejuejava, copiaya pejuenexa pitapayabelia copiaya pepatsinexa matatsënëabelia. <sup>44</sup>Bajaraxuacujinae pamonaë apo yapëtaë pejuejava, cotocaevi itoroba tablapanëjumata, barcopanëmijumatanua, pejuenexa. Bajarapacuenia daxita panepa matatsënëabelia.

### **Pacuenia Pablo ponapona Maltavënë tunaetojavata yabara pelivaisi**

**28** Itsa baja daxita paxanë xaniavaetsia papanepajë matatsënëabelia, nexata pavënëtaniji bajarapatunaeto. Bajarapatunaeto Malta vënëtunaeto. <sup>2</sup>Maltatunaetopijivi bitso paneyavenona. Bajarapamonaë pinijiisotoxaneto itajuruteta. Tsipaji bitso ema tsanucaë. Nexata bitso cainejeba. Panejunata daxita patanonopaenexa. <sup>3</sup>Nexata Pablo nota petseviiso. Itamataeta bajarapaisoto. Nexata jomo bitso piatanenë, bebula, pitsatabijirava isotojavaverena piatajuejavavecua. Nexata Pablo cobesinetsi. Pecobesinijavatatsi tsiteca yajumaruca. <sup>4</sup>Maltatunaetopijivi itsa tane Pablo jomo pecobesinerucaejavatsi, nexata najumaitsi bajarapamonaë:

—Maraeta ponë jivibenëje. Bajaraxuata manuamene vecuapanepae ata, icatsia Dioso tocopatatsi jomo pesininxatsi. Nexata jivi pebejamatabëcuene, jomo pesinijavatsi peyatëpaenexa, najai Maltatunaetopijivi Pablo yabara.

<sup>5</sup>Nexata Pablo nacobenëñëbiaxuaba jomo pejopaenexa isotojavabelia. Pablo itsiata apo itsacuene. <sup>6</sup>Nexata daxita Maltatunaetopijivi jamatabëjumaiti Pablo yabara:

—Aeconoxae meta Pablo cobeyajinaena. Itsa jume, irata meta petëpaenë jopaena, jamatabëjai.

Nexata bajarapamonaе bajayaepato evetanubenaе ata Pablo petaenexatsi jomo pecobesinijavatsi peyaisacuenejava, itsiata Pablo apo itsacuene. Nexata icatsia bajarapamonaе itsacuenia najamatabëxaina Pablo yabara. Nexata najumaiti bajarapamonaе:

—¡Maraeta papebi diosonëje! najai.

<sup>7</sup>Maltatunaeto pevetsinë pevënë Publio. Nexata itsajota panubenajë, imoxoyo bobena Publio pijairanë. Nexata bajaraponë panecopiapita pexaniacuenia. Bajaraponë pijabota panajinavanapajë acueyabi pamatacabibeje. <sup>8</sup>Publio paxa avitane tsanucaе camata. Romaebanucatsi. Bitso suliabatsi. Nexata Pablo taeyojopalia. Vajëta Diosojavabelia. Bajaraxuacujinae piavitanenë pematabocotojumavereca Pablo nacobeuata. Nexata baja Pablo jamatejemayaexana piavitanenëmi. <sup>9</sup>Bajarapacuenia Pablo itsa exana, nexata daxita piavitanevi Maltatunaetopijivi pata Pablojavaberena. Daxita bajarapamonaе ata jamatejemayaexana Pablo. <sup>10</sup>Maltatunaetopijivi pinijicuenia paneyaiyataeya paneyavenona. Itsa baja icatsia bexëajavabelia itsabarcota panaponajë, nexata Maltatunaetopijivi panerajuta daxita patanamatavenonaеjavaxi pataponaejavata.

### **Pacuenia Pablo pata Roma tomarata yabara pelivaisi**

<sup>11</sup>Malta vënëtunaetota panajinavanapajë acueyabi pajuametobeje. Bajaraxuacujinae baja icatsia panaponajë barcota. Bajarapabarco patavajënae pata Alejandría tomaraverena. Bajarapamo Maltatunaetototsotota daxita emarapae ruca. Evertaruca emarapaejuametone pepanepaejava. Bajarapabarcoupita rucabeje jivi saya pecobeta jumapecataeya pexanaenëbeje. Cástorbeje Póluxbeje jumapecataeya jivi pecobeta pexanaenëbeje bediosonëbeje petaenexa. <sup>12</sup>Bajarapabarcota panaponajë. Nexata jane baja panapatajë Italia nacuayabelia. Panapatajë Siracusa tomarata. Siracusa tomarata abaxë panajinavanapajë acueyabi pamatacabibeje. <sup>13</sup>Bajaraxuacujinae icatsia panaropobajë. Paponajë manuamene muxubërëa. Nexata icatsia papatajë Regio tomarata. Nexata meravia pitsijavata patacovëverena pexaniajovibo najetaruca. Nexata bajarapajovibo paneyacapona patavajënaeyabelia. Nexata icatsia anjamatacabibejecujinae papatajë Puteoli tomarata. <sup>14</sup>Puteoli tomarata pacaxitarabajë Dioso pejumecovënëtsivi. Bajarapamonaе paneasiva caesemana patanajinavanapaenexa bajarapamonaеjavata. Bajaraxuacujinae jane baja matat-sënëa paponajë Roma tomarabelia. <sup>15</sup>Roma tomarapijivi, Dioso pejumecovënëtsivi, patavajënaelia panevënëlivaisitane patanajetarubenaеjava. Nexata bajarapamonaе panecopiajairena. Nexata penamataxainaebitsaëto panemataenena Foro de Apiovënëjavata. Bajaraxuacujinae icatsia itsabitsaëto panemataenena Tres Tabernasvënëjavatalia. Nexata Pablo itsa tane bajarapamonaе, pexaniajamatabëcuene rajuta Diosojavabelia. Nexata ajamatabëcuenesaëreca Pablo bajarapamonaе petae-

javata. <sup>16</sup>Nexata jane baja papatajē Roma tomarabelia. Nexata Roma tomarata capitán Julio rajuta baja pamonaē naneconitsia capona Cesarea tomaraverena. Rajuta baja penaneconitsivi pejebabiabibo pevetsivi penamatacaitorobinē pecobeyabelia. Itsiata Pablo tocopatatsi saicayabota peponaponaenexa. Caenē vajabitsaēnē evetaponaponatsi Pablo penajetabajiraviyaniva.

### **Pacuenia Pablo tsipaeba Jesús pelivaisi Roma tomarata yabara pelivaisi**

<sup>17</sup>Pablo baja itsa xaina acueyabi pamatacabibeje pepatsicujinae Roma tomarata, tonajumexuaba judíovi penamatacaitorobivi pepatsinexa Pablojavaberena. Itsa baja nacaetuata judíovi penamatacaitorobivi, Pablo nexata jumaitsi judíovi penamatacaitorobivijavabelia:

—Tajamonaē, itsacuene apo exanaē atanē vajavēna judíovijavabelia, vajasalinaivi pecujarubicuene jumecovēnēsiaponaponaē atanē, itsiata vajavēna judíovi nevaetaba Jerusalén tomaratalia. Nexata necanajeta tananeconitsinexa Romano nacuapijivi pecobeyabelia. <sup>18</sup>Nexata Romano nacuapijivi, jivi penaneconitsicuene pevetsivi, neyanijoba xua yabara vajavēna judíovi neneconita. Nexata baja picani Romano nacuapijivi necopatsijitsia. Tsipaji apo caxitajarabi itsacueneneconi ata taxainaejava, paneconi yabara nebeyaxuabiaexanaejitsia. <sup>19</sup>Itsiata baitsi jane vajavēna judíovi, pamonaē neneconita, apo jitsipae Romano nacuapijivi tanecopatsinexa. Jitsipa picani tanebeyaxuabinexa. Nexata xanē vajētajē taneitorobinexa maberenaje Romanonacua pepo pevetsinē pitabarata taneneconitsinexa pibisiacuene itsa exanajē. Itsiata xanē apo jitsipae nē juya bajarapamonaē taneconitsijava tajanacuapijivijavabelia. <sup>20</sup>Bajaraxuata nexata pacajunatatsi patacataenexa patacabarēcuaiquaijainexanua. Ponē daxita Israel nacuapijivi copiaevetavanapa athēbēvetsica pepatsijavanexatsica, xanē baja yapētaniji bajaraponē athēbēvetsica pepatsijavatsica. Nexata xanē vajunupaebaponajē bajaraponē athēbēvetsica pepatsijavatsica. Bajaraxuata necobecētsiaya yamaēya ponaponajē mapacadenamaētoje, jai Pablo Roma tomarata judíovi penamatacaitorobivijavabelia.

<sup>21</sup>Nexata judíovi penamatacaitorobivi jumaitsi Pablojavabelia:

—Itsalivaisi ata baja cajena xamē yabara apo panetonajumeitorobi Judea nacuaverena. Vajavēna judíovi patsi ata bajaraverena, itsiata apo panetsipaebi pibisiacuene xamē nexanaejava. <sup>22</sup>Itsiata baitsi jane pajitsipajē patanetsipaebinxamē pacuenia Jesús pelivaisi jumecovēnētame. Daxitanacuanēpijivi baja cajena baracuaicuajai tsabiabi bajara papejanapitsapaelivaisi: “Apo pexaniajailivaisi cajena bajarapalivaisi. Dioso cajena apo nacatocopatsi bajarapalivaisi vajajumecovēnētsinexa,” jai tsabiabi daxitanacuanēpijivi, jai judíovi penamatacaitorobivi Pablojavabelia.

<sup>23</sup>Nexata judíovi penamatacaitorobivi caējēta matababi icatsia nacaetuatsijitsia pabota Pablo ponapona. Nexata jane baja icatsia itsa nacaetuata, bajarapamonaē ayaibitsaētoxaneto parena pabota Pablo ponapona. Nexata Pablo bajayacunua petaxuxuabicujinae livaisi petsipaebijava, matapania caniviyojavabelia copata. Nexata Pablo tsipaeba bajarapamonaējavabelia Dioso pijajivi pevetsijava mapanacuataje. Pablo tsipaebanua bajarapamonaējavabelia pacuenia jumaitsi Dioso Moiséspijinēta penajumecopatsilivaisi Jesús yabara. Pablo tsipaebanua pacuenia jumaitsi Diosojumepaebivi profetavi bajayata peyaquinaelivaisita Jesús yabara. Bajarapacuenia Pablo tsipaeba bajarapamonaē pejumecovēnētsinexa Jesús pelivaisi.

<sup>24</sup> Itsamonae bajarapamonaeyajuvënëvi jumecovënëta baja bajarapacuenia Pablo petsipaebilivaisi. Itsiata itsamonae apo jumecovënëtsi. <sup>25-26</sup> Nexata daxita bajarapamonaepo najamatabëcuenejēpae. Nexata bajarapamonaepenaviabivajēnae Pablo icatsia jumaitsi bajarapamonaejavabelia mapacueniaje:

—Bajayata baja cajena profeta Isaíaspijinē Espírítu Santo pejamatabëcueneta tajëvelia yapëtaeyaexanatsi paxamē apo panejumecovënëtsijavanexa Jesús pelivaisi. Nexata profeta Isaíaspijinē Espírítu Santo itorobatsi petsipaebinexa vajasalinaivimijavabelia mapacueniaje:

Paxamē raja picani pajumetaeyabiabianame palivaisi pacatsipaebabiabiana. Itsiata apo pajumeyapëtaemē tsane xua yabara bajarapalivaisi pacatsipaebabiabiana.

Paxamē raja picani pataeyabiabianame xua pacatsitaexanabiabiana. Itsiata apo payapëtaemē tsane pajamatabëcuene yabara bajaraxua pacatsitaexanabiabiana, jai profeta Isaíaspijinē vajasalinaivimijavabelia.

<sup>27</sup> Bajarapacuenia jumaitsi profeta Isaíaspijinē tsipaji baja cajena Dioso tajëvelia jumaitsi paxamē apo panejumecovënëtsijavanexa yabara mapacueniaje:

Bajarapamonaepajamatabëcuenetaja tsane. Nexata benamuxuacabiaya pejinavanapaevi tsane. Benaitaxutotsaquebiaya pejinavanapaevi tsane. Itsa bajarapacuenia apo itsipae, nexata yapëtaejitsipa pajamatabëcuene yabara tsitaexanatsi xua tane. Jumeyapëtaejitsipanua palivaisi tsipaebatsi. Pejamatabëëthëtojavavetsina jumeyapëtaejitsipa. Nexata najamatabëcuenepëñëyorotsipa perujumatabëcuenevecua. Nexata xanē jamatabëcuene xanepanaeyaexanaejitsipajë pibisiacuenevecua,

jai baja cajena Dioso bajayata tajëvelia paxamē apo panejumecovënëtsijavanexa yabara, jai Pablo judíovijavabelia Roma tomarata.

<sup>28</sup> Pablo icatsia jumaitsi judíovijavabelia:

—Pajudíovimē, pajumeyapëtaema mapalivaisije. Ajena baja mapamatacabijavaveliacujinaeje, pevajënaeyabelia, Dioso jivi pecapanepaelivaisinexa apo judíovijavabelia ata tsipaebianatsi. Nexata apo judíovi ata xaniavaetsia namuxunaevetsiana bajarapalivaisi, jai Pablo judíovijavabelia.

<sup>29</sup> Itsa baja Pablo najumevereta bajarapacuenia petsipaebijava, nexata jane baja daxita judíovi naviaba. Nexata bajarapalivaisi yabara bajarapamonaepnamutua nabarëcuaicuaijai tsanajetarubenaep.

<sup>30</sup> Pablo penacovaetsibota anijavaiibeje ponapona Roma tomarata. Pablo matamotapona bo pecovaetsijamatabëcuene. Pablo xaniavaetsia copiapitabiaba daxita pamonaep sivaxainabiabatsi. <sup>31</sup> Pamonaep Pablo sivaxainabiabatsi, tsipaebabiaba Dioso pijajivi pevetsijava mapanacuataje. Tsipaebabiabianua pepo petuxanenē Jesucristo pelivaisi. Tsipaebabiaba ajumejunavijibia. Itsajivi ata Pablo apo jumeitavetsitsi petsipaebabiabilivaisi.

## Mapabaxutoje San Pablo toyaquina Roma tomarapijivijavabelia

### Pacuenia Pablo toyaquina mapabaxutoje Dioso pejumecovënëtsivi, Roma tomarapijivijavabelia, yabara pelivaisi

**1** Xanë Pablonë, Jesucristo pijajivitonënë. Dioso nejunata. Nexata nitoroba apóstolenëxanë tatsipaebaponaenexa jivi pexanialivaisi, Jesucristo pelivaisi, Diosojavabelia pecapanepaelivaisinexatsi.

<sup>2</sup> Bajayata vajavajënaeya, Dioso bajarapalivaisi tajëvelia yapëtaeyaexana profetavijavabelia. Nexata bajayata Diosojumepaebivi profetavi ita yaquina Dioso pejumelivaisibaxutonexa, bajarapamonae yaquina pacuenia Dioso tajëvelia yapëtaeyaexanatsi bajarapapexanialivaisi. <sup>3</sup> Bajarapalivaisi vajatuxanenë Jesucristo, Dioso pexënato pelivaisi. Jesucristo ita naexana mapanacuataje, Davidpijinë pemomoxiyajuvënëvata naexana. Bajaraponë, Davidpijinë, bajayata Israelnacia pepo pevetsinëmi. <sup>4</sup> Vajatuxanenë Jesucristo petëpaecujinae, Espiritu Santo icatsia asaëyaexanatsi. Bajarapacuenia piasaëyaexanaexaetsi petëpaecujinae, jivi yapëtanetsi Dioso pexënatocuene. Yapëtanetsinua piasaënëcuene ata. <sup>5</sup> Jesucristo pejamatabëcueneta Dioso paneitoroba saicaya paapóstolevinexanë, Dioso pata-tonacuenebinexa. Bajarapacuenia Dioso paneitoroba Dioso pejumelivaisi patatsipaebaponaenexa pamonaie apo judíovijava, apo judíovi ata pejumecovënëtsinexa Dioso. <sup>6</sup> Nexata paxamë ata Roma tomarata panejinavanapaevi pajumecovënëtame baja Dioso. Tsipaji paxamë ata Dioso pacajunata Jesucristo papijajivinexamë.

<sup>7</sup> Daxita paxamë, Roma tomarata panejinavanapaevi, pacatoyaquinatsi mapabaxutoje. Dioso pacajitsipa. Nexata pacajunata papijajivinexamë. Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexanua.

### Pacuenia picani Pablo bitso jamatabëtane Roma tomarapijivi yabara pelivaisi

<sup>8</sup> Namataxainaeya pacatoyaquinarutatsi pacuenia jumaitsinë tsabiabi paxamë yabara Diosojavabelia. Diosojavabelia jumaitsinë tsabiabi mapacueniaje: “Sivajamatabëcuenebarëyanë bitso bajarapamonae Jesucristo pejumecovënëtsixae,” janë tsabiabi Diosojavabelia paxamë yabara. Bajarapacuenia Diosojavabelia jumaitsinë tsabiabi tsipaji daxitanacuanëpijivi pacavajjunupaeba xaniavaetsia panejumecovënëtavanapaejava Dioso. <sup>9</sup> Xanë daxita tajamatabëcuenesaëta Dioso pijacuene tonacuenebaponaponajë jivi ita tsipaebabiabajë pexanialivaisi, Dioso pexënato pelivaisi. Dioso yapëtane patacatovajëtabijava ita pacanajamatabënapitabiabatsi tavajëtsijavata Diosojavabelia. <sup>10</sup> Vajëtabiabajë Diosojavabelia tapon-aenexa paxamëjavabelia. Nexata Dioso ita netocopatsiana tapon-aenexa, pon-aenajë paxamëjavabelia. Bajayajebi picani bitso jamatabëponabiabajë pata-cataenexa. <sup>11</sup> Nexata jitsipajë patacataenexa, patacatsipaebinexanua palivaisi Espiritu Santo neyapëtaeyaexana. Bajarapacuenia ita pacayapëtaeyaexanaenatsi, pajamatabëcuenesaëmë tsaponae tsane orijibia Diosojavabelia. <sup>12</sup> Namataenet-sia najamatabëcueneyavenonaenatsi Dioso pejumelivaisi vajajumecovënëtsijava. Pacayavenonaenatsi panejamatabëcuenesaënexa Diosojavabelia. Paxamë ata juya paneyavenonaename bajarapacuenia.



<sup>13</sup>Tajamonaē, pacatojitsipatsi paneyapētaenexa mapacuenēje. Bajayajebi picani bajayajebi jamatabēponabiabajē patacataenexa. Itsiata apo necuenecaējēpabiabi taponāenexa. Jitsipajē patacatsipaebinexa Jesucristo pelivaisi paxamēyajuvēnēvi, pamonaē abaxē apo jumecovēnētsi, pejumecovēnētsinexa Jesucristo. Pamonaē ata baja jumecovēnēta, Jesucristo pīajamatabēcuenesaēnexa pevājēnaeyabelia. Pacuenia apo judíoivi ata jumecovēnēta pona pevājēnaeyabelia itsaxuayo tsipaebanajetarucajē, bajara paneitsinexa paxamē ata. <sup>14</sup>Dioso nitoroba tatsipaebaponaenexa Dioso pejumelivaisi daxitajivijava. Nexata Dioso pejumelivaisi jivi tsipaebaponaē piniijit-omaranējava, sasavia penaevijava ata. Tsipaebaponaē mapanacuapijilivaisi bitso peyaētaevijava ata, apo peyapētaevijava ata. <sup>15</sup>Bajaraxuata bitso jitsipajē paxamē, Roma tomarata panejinavanapaēvi ata, patacatsipaebinexa pexanialivaisi.

**Pacuenia pexanialivaisi, Jesucristo pelivaisi, pinijsiaē xaina  
ayaicuene pexanaenexa yabara pelivaisi**

<sup>16</sup>Apo ajumeuranē tsabiabi jivi tatsipaebabiabijava pexanialivaisi, Jesucristo pelivaisi, jivi pecapanepaelivaisinexatsi Diosojavabelia. Tsipaji bajarapalivaisi pejamatabēcueneta pijaneconi vecuaajibiaexanaenatsi pajivi jumecovēnēta bajarapalivaisi. Copiaya patsipaebaponaē bajarapalivaisi judíoivi. Bajaraxuacujinaē icatsia cotocaēvi patsipaebaponaē apo judíoivi. <sup>17</sup>Bajarapalivaisi nacayapētaeyaexana pacuenia Dioso nacatoexana aneonijibia Dioso vajanacataenexa. Aneonijibia baja Dioso nacatane Jesucristojavabelia vajavājēnaeyabelia vajanajamatabēcuenē copataponaeaxae. Dioso ra pejumelivaisibaxutota jumaitsi mapacueniaje: “Pajivi jamatabējumaitsi: ‘Xanē pepacuene Dioso neyavenonaena pacuenia najumecapanepaēya jumaitsi,’ jamatabējai, bajarapajivi Dioso aneonijibia tanetsi. Bajarapajivi xainaena matabacabi pevereverecajava,” jai Dioso pejumelivaisibaxutota.

**Pacuenia daxitatsi mapanacuapijivitsi  
naneconitatsi Diosojavabelia yabara pelivaisi**

<sup>18</sup>Dioso, athēbētatsia peccaenē, vaxaitsi jamatabēcueneyapētanetsi. Yapētanetsi mapacueniaje. Dioso baranaepanapona daxita pibisiacuene pexanaevijavabelia. Bajarapamonaē pevājēnaeyabelia pibisiacuene pejamatabēexanaeaxae, apo jitsipae pejumecovēnētsinexa pexaniajailivaisi, Dioso pejumelivaisi. <sup>19</sup>Bajarapamonaē xaniavaetsia beyapētane picani pacuenia Dioso jamatabēcuenētsi. Tsipaji baja picani Dioso tsitanajamatabēcuenēitajēta bajarapamonaējavabelia. <sup>20</sup>Jivi apo caējēpaetsi pitaxutota petāenexa Dioso. Nexata jivi apo yapētaē pacuenia itsi Dioso. Itsiata baitsi jane picani caējēpatsi peyapētaenexa pacuenia Dioso jamatabēcuenētsi. Caējēpatsi picani peyapētaenexanua daxitamatabacijavabelianexa Dioso bitso piasaēt-saponaponaējava. Bajaraxua picani jivi caējēpatsi pijacuata peyapētaenexa, itsa canaējētsipa Dioso pexanaejavanē mapanacuataje. Nexata bajarapamonaē acuenēvi pejumaitsinexa: “Apo payapētaenē cajena pacuenia Dioso jamatabēcuenētsi,” pejainexa. <sup>21</sup>Bajarapamonaē yapētaē ata Dioso peponaponaējava, itsiata apo yayataē. Caeto ata cajena Diosojavabelia pexaniajamatabēcuenē apo rajutsi. “Pexaniacuene rabaja panetoexaname,” apo jai. Biji saya caranata ēnatsiquejemajava yabara najamatabēxainabiaba. Nexata pevājēnaeyabelia apo peyapētaēaxae pexanialivaisi, jamatabēcuenēitaquiri tsaponaē. <sup>22</sup>Jamatabēcuenēnavēxaniabiaya bajarapamonaē jamatabējumai tsabiabi: “Vaxaitsi cajena bitso vajayapētaēvi daxitacuene,” ja-

matabējai tsabiabi bajarapamonae. Itsiata baitsi jane cajena apo yapētae. <sup>23</sup> Bajarapamonae apo najamatabēcuenecopabi ayaijamatabēcuenenē Diosojavabelia, ponē apo petēpaenēnexa daxitamatacabijavabelianexa. Caranata saya jivi pecobeta jumapecataeya pexanaenēanējavabelia najamatabēcuenecopaba. Bajarapamonae navajēcabiaba itsamonae pecobeta jivi jumapecataeya pexanaenēanējavabelia. Navajēcabiabanua itsamonae pecobeta pepunaevi jumapecataeya pexanaenēanējavabelia ata. Navajēcabiabanua itsamonae pecobeta jomo jumapecataeya pexanaenēanējavabelia ata. Navajēcabiabanua itsamonae pecobeta cuatro pataxutabeje pejinavanapaevi jumapecataeya pexanaenēanējavabelia ata.

<sup>24</sup> Bajaraxuata Dioso tocopata bajarapamonae pibisiacuene pexanavanapaenexa. Nexata pacuenia jamatabēexana, exanavanapa. Nexata bajarapamonae pevitota pibisiacuene namataenetsia natoexanabiaba. <sup>25</sup> Bajarapacuenia Dioso tocopata pacuenia bajarapamonae jitsipa pexanavanapaenexa tsipaji bajarapamonae Dioso pejumelivaisi, pexaniajailivaisi, apo jamatabējumecovēnētsi. Jumecovēnēta saya caranata penajumetsēnētsilivaisi, jivi pecobeta jumapecataeya pexanaenēanē pelivaisi. Bajarapamonae apo yaiyatae pepo Dioso, ponē daxitacuene exana mapanacuataje. Caranata yaiyataeya navajēcabiaba Dioso pecobecovējavanējavabelia. Najamatabēcuenecopabanua ēbajaraxuanējavabelia. Bajarapamonae nexata saya namuxujemata caranata pepo Dioso, ponējavabelia jivi daxitamatacabijavabelianexa jumaitisijitsia: “Diosomē, bitso ayaijamatabēcuenenēmē,” jajitsia. Bajara itsi tsane.

<sup>26</sup> Bajaraxuata Dioso tocopata bajarapamonae pibisiacuene pexanabiabinexa. Pacuenia jamatabēexana, exanavanapa. Mapanacuata picani Dioso tocopata petirivi pebi pejitsipaenexa. Itsiata baitsi jane bajarapamonae ēpetirivi najitsipa. Nexata ēpetirivi namataenetsia naperabēquenetsiataeyabiaba. <sup>27</sup> Bajara pijinia pacuenia Dioso tocopata pebijivi petiriva pejitsipaenexa. Itsiata baitsi jane bajarapamonae ēpebijivi najitsipa. Nexata ēpebijivi namataenetsia naperabēquenetsiataeyabiaba. Bajarapacuenia pibisiacuene penatsixanaexae, Dioso ayaicuenia naneconitsiaexanaponatsi bajarapamonae.

<sup>28</sup> Bajarapamonae apo jamatabēnajinae Dioso. Pacuenia picani Dioso tojitsipatsi bajarapamonae pexanaenexa, apo exanae. Bajaraxuata Dioso tocopata bajarapamonae penajamatabēxainanexa ēpibisiacuene pexanaejava. <sup>29</sup> Bajarapamonae exanavanapa bitso daxita pibisiacuene. Ēpibisiacuene yabara najamatabēxainabiabanua. Naperabēquenetsiataenexa. Daxita pibisiacuene sivanajamatabēxainabiabanua. Jamatabēnaxainaeyababiabanua itsamonae pecobecovē. Pibisiacuene jamatabēxanabiabanua itsamonaejavabelia. Cuenecaēbabiabanua itsamonae pexainaejava. Jamatabēbeyaxuababiabanua jivi. Namataenetsia nabijataeya najumeanaenotabiabanua. Bitso cajena jivi yamaxēitojorobabiabanua. Ēpamonae ata bitso naitoya tsabiabinua. <sup>30</sup> Bajarapamonae itsamonae pepēya pibisiacuenia najumetsēnētsia baracuaicuajjai tsabiabinua. Bajarapamonae apo jitsipaenua Dioso. Nexata itoya Dioso pijacuene. Apo yaiyataeyabiabinua itsamonae ata. Naitaxutojematsia naēcotabiabanua itsamonae. Bajarapamonae jumaitsi tsabiabi: “Xanē bitso ayaijamatabēcuenenēnē itsamonae matatoxenetsia,” jai tsabiabi itsamonaejavabelia. Bajarapamonae najamatabēxainabiabanua itsamonae ata pibisiacuene pexanaeyaexanaenexa. Bajarapamonae apo jumecovēnētabiabinua paxajivi, penajivi ata. <sup>31</sup> Bajarapamonae apo jamatabējumeyapētaeyabiabinua caelivaisiyo ata, Dioso pejumelivaisi. Bajarapamonae itsajivijavabelia najumecapanepaeya pejumaitsicuenia, apo

exanabiabinua. Bajarapamonae asivaya apo taeyabiabinua itsajivi ata. Bajarapamonae itsajivi itsa itsacueniabatsi, apo jitsipabiabi pexaniabinexa icatsia. Bajarapamonae apo itaxutotsoniataeyabiabinua itsajivi ata.<sup>32</sup> Bajarapamonae bitso xaniavaetsia yapētane picani pacuenia Dioso itorobatsi pexanaenexa. Yapētanenua picani Dioso penavecuaxuabijavanexa bajarapitsipibisiacuene pexanaevi. Itsiata baitsi jane bajarapamonae tsiteca pibisiacuene exanapona. Orijibia sivabarëya tsabiabi itsamonae ata pibisiacuene itsa exana.

### **Pacuenia itsamatacabi Dioso naneconitsiaexanaejitsia pijaneconi pexainaevi yabara pelivaisi**

**2** Paxamë pajudíovimë, pacatsipaebianatsi mapacueniaje. Pajudíovimë pajumaitsimë tsabiabi itsajivi yabara: “Mara pajivi pibisiacuene exanaje. Nexata Dioso naneconitsiaexanaenatsi,” pajamë tsabiabi. Bajarapacuenia paxamë itsa pajumaitsimë tsabiabi itsajivi yabara, nexata paxamë ata Dioso pacananeconitsiaexanaena. Tsiapaji paxamë ata pibisiacuene paexaname bajarapacuenia itsa pajumaitsimë tsabiabi itsajivi yabara.<sup>2</sup> Yapētanetsi baja cajena mapacuenije. Itsamatacabi Dioso naneconitsiaexanaena pibisiacuene pexanaevi. Itsamatacabi Dioso itsa naneconitsiaexanaena pibisiacuene pexanaevi, caejivi canacujitsia, paneconivajëto xaina, bajarapaneconivajëtota Dioso naneconitsiaexanaponaena.<sup>3</sup> Bajara pijinia pacuenia paxamë ata pibisiacuene paexanabiabi atamë, pajumaitsimë tsabiabi itsajivi yabara: “Mara pajivi pibisiacuene exanaje. Nexata Dioso naneconitsiaexanaenatsi,” pajamë tsabiabi. Bajara pijinia pacuenia paxamë ata bajarapitsipibisiacuene paneexanabiabixae, pëtsa pajamatabëjumaitsimë tsabiabi: “Vaxaitsi judíovitsi Dioso pijajivixaetsi, apo nacananeconitsiaexanae tsane Dioso,” pajamatabëjamë pëtsa. Tsiapaji Dioso naneconitsiaexanaena daxita pibisiacuene pexanaevi.<sup>4</sup> Bepacanaëjë-tame xaniavaetsia pacuenia Dioso jamatabëcueneitsi. Dioso cajena abaxë bepijia apo naneconitsiaexanae pibisiacuene pexanaevi ata. Dioso raja abaxë jamatabëcuenevetaponapona pibisiacuene pexanaevi ata pevajëtsinexatsi pevecuaajibiaexanaenexa pijaneconi. Paxamë ata Dioso pacatojitsipa panecopabinexa pibisiacuene paneexanabiabijava, panenajamatabëcuene pënëyorotsinexa Diosojavabelia. Bajaraxuata abaxë Dioso pacaitaxutotsoniatane.<sup>5</sup> Itsiata paxamë pajamatabëcuenetajamë bitso. Apo pajamatabëcopatsimë pibisiacuene paneexanaejava. Nexata ayaineconi panatoexanaponame panevajënaeyabelia. Nexata ayaiacuenia Dioso pacananeconitsiaexanaena pamatacabi Dioso naneconitsiaexanaena daxita pijaneconi pexainaevi.<sup>6</sup> Bajarapamatacabi Dioso naneconitsiaexanaponaena caejivi canacujitsia. Paneconivajëto natoexanaponaena itsa abaxë asaë tsaponapona mapanacuataje, bajarapaneconivajëtota Dioso caejivi canacujitsia naneconitsiaexanaponaena.<sup>7</sup> Itsamonae jamatabëcueneenabiabatsi epexaniacuene pexanabiabinexa. Bajarapamonae jitsipabiabanua pejinavanapaenexa Dioso pijapenivenivenaenacuatatsia. Jitsipabiabanua Dioso pesivajamatabëcuenebarëyanexatsi. Jitsipabiabanua pexainanexa matacabi apo pevereverecejava. Bajarapamonae Dioso rajutsianatsi matacabi apo pevereverecejava.<sup>8</sup> Itsamonae natojitsipa daxitacuene pexainaejava ëbajarapamonaenexa. Apo jumecovënëtsinua pexaniajailivaisi. Saya exanavanapa epibisiacuene. Bajarapamonae Dioso anaeya ayaiacuenia naneconitsiaexanaenatsi.<sup>9</sup> Daxitajivi pibisiacuene exana, judíovi, apo judíovi ata. Daxita bajarapamonae pibisiacuene pexanaexae, Dioso bejiobiaexanaenatsi. Bitso yana-

jamatabëxainaanua pijaneconi. <sup>10</sup>Itsiata baitsi jane daxita pamonaex pexaniacuene pexanaevi, judíovi, apo judíovi ata, Dioso pijapenivenivenaenacuatastia jinavanapaena. Dioso sivajamatabëcuenebarëya tsanetsi. Jinavanapaenanua jamatabëcueneexanepanaeya.

<sup>11</sup>Dioso itsa naneconitsiaexanaena daxita pijaneconi pexainaevi, najëpaeya naneconitsiaexanaena. Paneconivajëta xaina caejivi canacujitsia, bajarapaneconivajëtota Dioso naneconitsiaexanaponaena caejivi canacujitsia. <sup>12</sup>Pamonaex apo judíovi, yapëtae ata xua pibisiacuene, itsiata bajarapapibisiacuene exanavanapa. Nexata bajarapapibisiacuene pexanavanapaexae, Dioso naneconitsiaexanaenatsi apo judíovi. Pamonaex judíovi, yapëtae ata pacuenia Dioso Moiséspijinëta penajumecopatsilivaisi jumaitsi pibisiacuene pexanaeyaniva, itsiata bajarapapibisiacuene exanavanapa. Nexata bajarapapibisiacuene pexanavanapaexae, Dioso naneconitsiaexanaenatsi judíovi. <sup>13</sup>Dioso raja judíovi aneconijibia apo tae saya jema judíovi peyapëtaejava yabara, palivaisi Dioso tonajumecopata Moiséspijinëta. Dioso raja judíovi aneconijibia tane matapania judíovi itsa exanavanapa pacuenia Dioso itoroba Moiséspijinëta petonajumecopatsilivaisita. <sup>14</sup>Pamonaex apo judíovi, apo tsipaebitsi Dioso Moiséspijinëta penajumecopatsilivaisi. Itsiata apo judíovi ata itsajavata exana pacuenia itoroba Dioso Moiséspijinëta penajumecopatsilivaisita. Apo judíovi apo muxujiobi atatsi, yapëtane pejamatabëëthëtota xua pexaniacuene pexanaenexa. Yapëtanenua xua ata pibisiacuene pexanaeyaniva. <sup>15</sup>Pamonaex pexaniacuene exanavanapa tsipaebinejevatsi Dioso Moiséspijinëta penajumecopatsilivaisi, bajarapamonaex exanavanapa pejamatabëëthëtota peyapëtaeacuenia, pacuenia itorobatsi Dioso Moiséspijinëta penajumecopatsilivaisita. Daxita apo judíovi yapëtane pejamatabëëthëtota pexaniacuene pexanaenexa. Yapëtanenua xua pibisiacuene pexanaeyaniva. <sup>16</sup>Jemata raja copiapatsiana pamatacabi Dioso itorobijitsia Jesucristo penaneconitsiaexanaenexa daxitajivi. Nexata Jesucristo daxitajivi naneconitsiaexanaena muetsia daxitajivi pibisiacuene pexanavanapaeneconi yabara. Naneconitsiaexanaenanua papibisiacuene ata muetsia daxitajivi najamatabëxainavanapa yabara. Nexata bajarapamatacabi daxitajivi nayapëtaena Dioso penaneconitsiaexanaejavanexatsi muetsia pexanavanapaeneconi yabara. Bajarapacuenia jivi tsipaebaponajë Dioso pitorobilivaisi itsa tsipaebaponajë.

### **Judíovi yabara, Dioso Moiséspijinëta penajumecopatsilivaisi ata, yabara pelivaisi**

<sup>17</sup>Pajudíovimë, pajumaitsimë tsabiabi: “Vaxaitsi raja judíovitsi. Vaxaitsi yapëtanetsi Dioso Moiséspijinëta penajumecopatsilivaisi. Bajaraxuata Dioso nacacapanepaena. Dioso raja ëjudíovitsi vajaDioso,” pajamë tsabiabi. <sup>18</sup>Payapëtaneme baja cajena xua Dioso pacatojitsipa paneexanaenexa. Payapëtanemenua Dioso Moiséspijinëta penajumecopatsilivaisi. Bajaraxuata payapëtaneme xua pexaniacuene paneitapetsinexa paneexanavanapaenexa. <sup>19</sup>Pajamatabëjumaitsimënua tsabiabi: “Vaxaitsi cajena bitso yapëtanetsi Dioso pejumelivaisi, vajatsipaebinexa pamonaex jumetae ata Dioso pejumelivaisi, abaxë apo pejumeyapëtaevi pexaniajailivaisicuene. Vaxaitsi jamatabëcueneitayotsianatsi pamonaex pijamatabëcueneitaquirivi, Dioso pejumelivaisivecua saya pejinavanapaevi,” pajamatabëjamënua tsabiabi. <sup>20</sup>Pajamatabëjumaitsimënua tsabiabi: “Vaxaitsi cajena nacacajëpa vajayapëtaeyaexanaenexa pamonaex abaxë apo yapëtae pacue-

nia Dioso jamatabëcueneitsi. Nacacaëjëpanua vajayapëtaeyaexanaenexa pamonae ata pejanajumecovënëtsivi Dioso. Nacacaëjëpa bajarapacuenia vajayapëtaeyaexanaenexa tsipaji yapëtanetsi pacuenia Dioso jumaitsi Moiséspijinëta penajumecopatsilivaisita. Bajarapalivaisi pexaniajailivaisi baja cajena. Yapëtaeyaexana pacuenia jivi exanaejitsia,” pajamatabëjamë tsabiabi. <sup>21</sup> Bajarapacuenia paxamë patsipaebabiabi atamë itsamonaejavabelia, itsiata paxamë ata apo paexanaemë bajarapacuenia. “¡Pëtsa panacobetoxotame,” pajamë tsabiabi itsamonaejavabelia. Itsiata paxamë panacobetoxotabiabame. <sup>22</sup> “Pëtsa panaperabëquenetsiataneme itsavajavabelia panijavajivivecua,” pajamë tsabiabi ata itsamonaejavabelia, itsiata paxamë panaperabëquenetsiataeyabiabame itsavajavabelia panijavajivivecua. Paxamë pajumaitsimë tsabiabi: “Jumaecataya pexanaenënejavabelia penavajëcaecuene bitso abeje. Itsa pajonejitsipame jumapecataeya pexanaenëne penubenaebota, pacajamatabëcuene bijianaejitsipa,” pajamë tsabiabi. Itsiata paxamë pajoneyabiabame jumapecataeya pexanaenëne penubenaebota penamatamotsijavanë, ofrendacuenia pejebijavanë, panenacobetoxotabiabinexa. <sup>23</sup> Paxamë pajudíovimë jivi picani patsipaebabiabame Dioso Moiséspijinëta penajumecopatsilivaisi, bitso pexanepanaelivaisi. Itsiata paxamë ata apo pajumecovënëtsimë bajarapalivaisi. Bajaraxuata jivi apo yayiatae Dioso. <sup>24</sup> Bajara paneitsixae, copiapata jane baja pacuenia baja cajena Dioso pejumelivaisibaxutota tajëvelia pacavajunupaeba. Dioso pejumelivaisibaxutota tajëvelia itsa pacavajunupaeba, jumaitsi paxamë yabara mapacueniaje: “Pamonae apo judíovi, pibisiacuenia Dioso baracuaicuaijai tsane judíovi xaniavaetsia apo petsitajinavanapaexae,” jai tajëvelia Dioso pejumelivaisibaxutota paxamë Dioso apo panejumecovënëtsijavanexa yabara.

<sup>25</sup> Paxamë pajudíovimë papebijivimë, pacaperabëcaucuba itsa abaxë patsiquirinaacuetoximë. Baitsi pacaboupiiperabëcaucuba. Bajarapacuenia pacaperabëcaucuba panenayapëtaenexa Dioso papijajivicuenemë. Bajarapacuenia pacatonamatamota matapania itsa pajumecovënëtavanapame Dioso Moiséspijinëta penajumecopatsilivaisi. Itsa apo pajumecovënëtsimë tsipae Dioso Moiséspijinëta penajumecopatsilivaisi, papecaperabëcaucubivi ata, itsiata Dioso apo papijajivimë tsipae. <sup>26</sup> Pamonae apo judíovi ata, apo peperabëcaucubivi atatsi, pejumecovënëtavanapaexae pacuenia Dioso Moiséspijinëta penajumecopatsilivaisi itorobatsi, nexata bajarapamonae ata Dioso pijajivicuenia tanetsi. <sup>27</sup> Pamonae apo judíovi, apo peperabëcaucubivi atatsi, itsiata pejumecovënëtavanapaexae Dioso Moiséspijinëta penajumecopatsilivaisi, bajarapamonae itsamatacabi pacaurabiana Diosojavabelia. Bajarapacuenia pacaurabiana Diosojavabelia tsipaji Dioso Moiséspijinëta penajumecopatsilivaisi payapëtae atamë, papecaperabëcaucubivi atanua, itsiata apo pajumecovënëtsimë Dioso Moiséspijinëta penajumecopatsilivaisi. <sup>28</sup> Pajivi perabëcaucutsi atatsi penayapëtaenexa Dioso pijajivitonëcuene, saya peperabëcaucutsijavatsi yabara Dioso pijajivitonëcuenia apo taetsi. <sup>29</sup> Pajivi pepacuenia Dioso pijajivitonë, bajarapajivi peneta pejamatabëëthëtovetsina Dioso jumecovënëta. Pajivi pepacuenia Dioso pijajivitonë, bajarapajivi saya naniavelia apo perabëcaucutsitsi. Biji rajane pejamatabëëjëtota pejanajamatabëcuene rajutatsi Espíritu Santo. Bajarapajivi xua exanaponapona, exanaponapona Dioso pesivabarëyanexatsi. Bajaraxua apo exanaponapona saya manacuapijivi pesivabarëyanexatsi.

**3** ¿Detsa xua judíovi xaina Diosojavabelia, pamonae apo judíovivecua? ¿Detsa xua yabara toxanepanatsi Diosojavabelia ponë peperabëcaucutsinëtsi apo peperabë-

caucutsinëtsivecua? <sup>2</sup> Palivaisianë judíovi toxanepanatsi Diosojavabelia, navita. Penamataxainaelivaisi, palivaisi judíovi toxanepanatsi Diosojavabelia, maitsije. Dioso tonajumelivaisicopatatsi bajarapamonaejavabelia. <sup>3</sup> Itsamonae judíovi apo jumecovënëtsi pacuenia Dioso najumecapanepaeya jumaitsi petoexanaenexatsi. Pëtsa bajarapacueni yabara pajamatabëjumaitsimë mapacueniaje: “Dioso meta itsiata apo exanae tsane pacuenia picani najumecapanepaeya jumaitsi pexanaenexa. Tspipaji judíovi apo jumecovënëtsi,” pajamatabëjamë pëtsa Dioso yabara. <sup>4</sup> Dioso cajena apo penajumetsënëtsinë. Jivi rajane banajumetsënëta. Dioso pexaniajailivaisi jivijavabelia petsipaebabiabijava yabara, tajëvelia Dioso pejumelivaisibaxutota jumaitsi mapacueniaje:

Xamë Diosomë, pexaniajailivaisi jivijavabelia tsipaebabiabame. Jivi cajumeaebi ata, itsiata daxitajivi peyapëtaenexa, xamë apo nenajumetsënëtsinë, jai Dioso pejumelivaisibaxutota.

<sup>5</sup> Pibisiacuene vajaexanaejava yabara Dioso nacananeconitsiaexanaena. Nexata Dioso vajanacananeconitsiaexanaejavata, najamatabëcueneitajëtsiana daxitajivi peyapëtaenexa Dioso apo pejitsipaenëcuene pibisiacuene pexanaejava. Bajaraxuata pamonae naneconita Diosojavabelia, Dioso naneconitsiaexanabiaba. Nexata Dioso jivi penaneconitsiaexanaejava yabara, itsa jumaitsinë tsipae: “Dioso pibisiacuene exana itsa naneconitsiaexana pijaneconi pexinaeavi,” itsa janë tsipae, nexata jamatabëcuenenavëxaniabiaya jumaitsinë tsipae. Tspipaji Dioso itsa apo naneconitsiaexanae tsipae pijaneconi pexinaeavi, Dioso apo najamatabëcueneitajëtsi tsipae pibisiacuene pexanaejava apo pejitsipaenëcuene. Nexata pacuenia Dioso apo pejumecovënëtsivi banajamatabëxaina, bajarapacuenia najamatabëxainaejitsipajë. <sup>6</sup> Tspipaji Dioso saya jema jivi apo penaneconitsiaexanaenë. Itsa saya jema Dioso jivi naneconitsiaexanaejitsipa, apo naneconitsiaexanae tsipae ëpijaneconi pexinaeavi. Nexata caejivi canacujitsia pibisiacuene pexanaeneconi yabara, paneconivajëto xainapona, bajarapaneconivajëtota Dioso apo naneconitsiaexanapona tsipae.

<sup>7</sup> Itsamonae meta jamatabëcuenenavëxaniabiaya jumaitsi tsane mapacueniaje: “Daxitajivi pecanaëjëtsinexa Dioso apo penajumetsënëtsinëcuene, vaxaitsi yamaxëitojorobiaya jivi livaisi tsipaebabiabianatsi. Bajarapacuenia yamaxëitojorobiaya jivi livaisi tsipaebabiabi atatsi tsane, itsiata Dioso apo nacananeconitsiaexanae tsane. Tspipaji vaxaitsi yamaxëitojorobiaya jivi livaisi vajatsipaebabiabijava pejamatabëcueneta, daxitajivi canaëjëtsiana Dioso bitso pexaniajainëcuene, apo penajumetsënëtsinëcuene. Bajaraxuata Dioso apo nacananeconitsiaexanae tsane vajana-jumetsënëtabiabiabijava yabara,” jai meta tsane itsamonae jamatabëcuenenavëxaniabiaya. <sup>8</sup> Bajarapacuenia itsa najamatabëxainaena bajarapamonae, nexata meta jamatabëcuenenavëxaniabiaya mataropotsia jumaitsi tsane: “Pibisiacuene meta vajaexanaejava ata xanepana. Nexata pibisiacuene exanabiabianatsi. Tspipaji vaxaitsi pibisiacuene vajaexanabiabijava pejamatabëcueneta, daxitajivi canaëjëtsiana Dioso pibisiacuene apo pexanaenëcuene,” jai meta tsane bajarapamonae jamatabëcuenenavëxaniabiaya. Bajarapacuenia itsa jumai tsane, nexata pexaniajailivaisi jivijavabelia apo tsipaebabiabi tsane. Itsiata baitsi jane itsamonae najumetsënëtsiaya xanë yabara jumai tsabiabi: “Pablo raja itorobapona jivi bajarapacuenia pibisiacuene pexanaenexa,” jai tsabiabi xanë yabara. Bajarapacuenia pejumaitsiivi xanë yabara, Dioso naneconitsiaexanaenatsi.

### **Pacuenia daxitajivi naneconita Diosojavabelia yabara pelivaisi**

<sup>9</sup> ¿Nexata tsaja ėjudġovi saicaya aneconijibia Dioso tane daxita mapanacuapijivi vecuaje? Jume raja. Jumaitsinġ baja cajena mapacueniaje. Daxitatsi mapanacuapijivitsije pibisiacuene ėvajaexanaevi. Judġovi, apo judġovi ata, bajara itsi. <sup>10</sup> Daxitatsi pibisiacuene vajaexanaejava yabara, Dioso pejumelivaisibaxutota jumaitsi mapacueniaje:

Caejivi ata aneconijibia apo ponaponae Dioso pitabarata. <sup>11</sup> Ajibi peyapġetaejivi pacuenia Dioso jamatabġcuenetsi. Ajibi pepacuene pejamatabġġethġtovetsina pejumecovġnġtsijivi Dioso. <sup>12</sup> Daxita Diosovecua naxuabiaya jinavanapa. Daxita ajamatabġcuenebeje. Ajibi pexaniacuene pexanabiabijivi. <sup>13</sup> Pacuenia petġpaenġ pemġthġ tuxutsaeba, bajara itsi bajarapamonae pecuibovojotota pecuaicuaijajava pibisialivaisi. Pijumeta jivi yamaxġtojobabiaba. Pacuenia jomo pecuibovojotota xaina piatanejava, bajara pijinia itsi bajarapamonae pecuaicuaijajava penajumetsġnġsilivaisi. <sup>14</sup> Pecuibovojotota cuaicuaijai ġpibisialivaisi pianaepanaenexa. <sup>15</sup> Itsacuene apo exanae atatsi, bepġija jitsipa jivi pebeyaxuabinexa. <sup>16</sup> Itsabelia jinavanapa, bejiobiaexanabiaba itsamonae. <sup>17</sup> Bajarapamonae apo yapġetae xaniavaetsia peyajavajinavanapaenexa jivi. <sup>18</sup> Bajarapamonae apo canaġġġtsi pejunavinexa Diosojavabelia,

jai mapacueniaje Dioso pejumelivaisibaxutota daxitatsi mapanacuapijivitsi yabara. <sup>19-20</sup> Vaxaitsi baja cajena yapġetanetsi mapacuenieje. Bajayata Dioso pejumelivaisi tonajumecopata ġjudġovi picani pejumecovġnġġtavanapaenexa. Itsiata judġovi apo jumecovġnġġsicanepae bajarapalivaisi. Bajaraxuata judġoviyajuvġnġnġ, caenġ ata, acuenebi pejumaitsinexa: “Xanġ cajena apo tonaneconitsinġ Dioso,” pejainexa. Daxita mapanacuapijivi, judġovi, apo judġovi ata, beyapġetane penaneconitsijava Diosojavabelia. Tspaji itsajivi ata apo caġġġpaetsi pejumecovġnġġsinexa pacuenia itoroba Dioso penajumecopatsilivaisita. Bajarapalivaisi Dioso najumecopata pibisiacuene vajaexanavanapaejava vajasivajamatabġjumaitsinexa mapacueniaje: “Xaniajai rabaja. Xanġ ata pibisiacuene taexanaenġ,” vajajamatabġjainexa bajarapalivaisi pejamatabġcueneta.

### **Pacuenia Dioso aneconijibia tane pajivi najamatabġcuenecopata Jesucristojavabelia yabara pelivaisi**

<sup>21</sup> Aeconoxae baja mapamatacabitaje Dioso nacayapġetaeyaexana pacuenia naca-toexana aneconijibia vajanacataenexa. Dioso apo jamatabġjumaitsi: “Pamonae jumecovġnġġsicanepa Moissġpijinġta tanajumecopatsilivaisi, bajara ġpamonae aneconijibia taenajġ,” apo jamatabġjai. Pacuenia Dioso capanepaeġtsia Dioso pejumecovġnġġsivi, bajayata Diosojumepaebivi profetavi tajġvelia yaquina Dioso pejumelivaisibaxutota. <sup>22</sup> Mara pacuenia Dioso jivi aneconijibia taneje. Pajivi jamatabġjumaitsi: “Xaniajai. Jesucristo itsa tġpa cruzata, pibisiacuene taexanaeconġ yabara tġpa,” jamatabġjai, bajarapajivi Dioso aneconijibia tanetsi. Dioso aneconijibia taenatsi daxita pamonaġ jumecovġnġta Jesucristo cruzata pesivatġpaejavatsi pijaneconġ yabara. Tspaji Dioso daxitajivi najġpaeyatane. <sup>23</sup> Daxitajivi baja cajena pibisiacuene exana. Bajaraxuata caejivi ata aneconijibia Dioso peġitsipae-cuenia apo toponaponae. Daxitajivi Diosovecua naxuabiaya jinavanapa. <sup>24</sup> Itsi-ata baitsi jane Dioso pinġjicuenia piasivaxae daxitajivi, aneconijibia tane daxita

pamonae jumecovënëta Jesucristo cruzata pesivatëpaejavatsi pijaneconi yabara. Jivi apo namatavenonae pijacuata penaneconimatamotsinexa Diosojavabelia. Tsi-paji baja aneconijibia tanetsi Jesucristo pecomuatsixaetsi pibisiacuene pex-anaeneconivecua. <sup>25</sup> Dioso copata Jesucristo petëpaenexa cruzata vajanacanecon-imatamotsinexa, pibisiacuene vajaexanaeneconimi. Nexata itsa jumecovënëtatsi Jesucristo cruzata vajanacasivatëpaejava, nacavecuaajibiaexana pibisiacuene va-jaexanaeneconimi. Bajarapacuenia Dioso copata Jesucristo cruzata vajanacasivatë- paenexa mapanacuapijivitsi. Tsi-paji Dioso apo jitsipae pibisiacuene vajaexanae- java. Bajaraxuata Dioso aneconijibia nacatane Jesucristo itsa nacaneconimatamota, pibisiacuene vajaexanaeneconimi. Pepo bajayata pejinavanapaevimiyajuvënëvi ata, najamatabëcuenecopaba Diosojavabelia. Nexata bajarapamonaemi pibisiacuene ex-anae ata, itsiata Dioso apo naneconitsiaexanaetsi. Tsi-paji Dioso tajëvelia yapëtane Jesucristo pesivatëpaejavanexa bajarapamonaemi ata pibisiacuene pexanaeconi yabara. <sup>26</sup> Ajena, mapamatacabitaje, Dioso jivi tsitanajamatabëcueneitajëta jivi pibisiacuene pexanaejava Dioso apo pejitsipaenëcuene. Tsitanajamatabëcueneita- jëtanua aneconijibia petaejavanexa pamonae jumecovënëta Jesucristo pesivatëpae- javatsi cruzata pijaneconi pevecuaajibiaexanaenexatsi.

<sup>27</sup> Bajarapacuenia Dioso nacatoexana aneconijibia vajanacataenexa. Dioso aneconijibia apo nacatae vajacuata vajaexanaejava yabara. Biji rajane Dioso aneconijibia nacatane vajajumecovënëtsixae Jesucristo vajanacasivatëpaejava cruzata vaneconi yabara. Nexata ayaijamatabëcuenejivitsi vajanacataenexa, acuenebi vajajumaitsinexa itsajivijavabelia: “Xanë taexanaejava peja- matabëcueneta, Dioso aneconijibia netane,” vajainexa acuenebi. <sup>28</sup> Vaxaitsi baja cajena yapëtanetsi mapacueneye. Dioso aneconijibia tane pajivi jumecovënëta Jesucristo pesivatëpaejavatsi cruzata pijaneconi yabara. Bajarapajivi apo jumecovënëtsi ata Dioso Moisés-pijinëta penajumecopatsilivaisi, Dioso itsiata aneconijibia tanetsi pejumecovënëtsixae Jesucristo pesivatëpaejavatsi cruzata pijaneconi yabara.

<sup>29</sup> Dioso raja ëjudfovi apo pijaDioso. Dioso raja apo judfovi ata pijaDioso. <sup>30</sup> Caenë rabaja Dioso. Pematatsënëa baja itsanë Dioso ajibi. Bajaraponë Dioso judfovi aneconijibia tane, pamonae jumecovënëta Jesucristo pesivatëpaejavatsi cruzata pi- janeconi yabara. Bajara pijinia pacuenia Dioso aneconijibia tane pamonae apo judfovi ata. <sup>31</sup> Vaxaitsi baja xaniavaetsia Jesucristo jumecovënëtatsi vajanacasivatë- paejava cruzata vaneconi yabara. Nexata Dioso Moisés-pijinëta penajumecopatsili- vaisi yabara, apo bejamatabëjumaitsitsi: “Dioso Moisés-pijinëta penajumecopatsili- vaisi tajumecovënëtsijavami, copatajë baja. Tsi-paji baja jumecovënëtajë Jesucristo tanesivatëpaejava cruzata tajaneconi yabara,” apo bejamatabëjaitsi. Biji rajane Je- sucristo vajanacasivatëpaejava cruzata, itsa jumecovënëtatsi, Dioso Moisés-pijinëta penajumecopatsilivaisi ata bajarajota yajavajumecovënëtatsi.

**Pacuenia Abraham-pijinë bajayata Dioso aneconijibia  
tanetsi pejumecovënëtsixae pacuenia Dioso  
najumecapanepaeya jumaitsitsi yabara pelivaisi**

**4** Pacatsipaebijitsiatsi pajamatabëcuenelivaisi yabara Abraham-pijinë Dioso aneconijibia tanetsi. <sup>2</sup> Abraham-pijinë pijacuata ëpexaniacuene itsa exanabiabi- jitsipa, nexata jumaitsi tsi-pae Diosojavabelia: “Ëpexaniacuene taexanabiabixae,



nexata aneconijibia netaneme,” jai tsipae. Itsiata baitsi jane Abrahampijinjē Diosojavabelia apo jumaiti bajarapacuenia. Tsipaji Abrahampijinjē ēpexaniacuene pijacuata exanabiabi ata tsipae, bajaraxua yabara Dioso aneconijibia apo taetsi tsipae. <sup>3</sup>Biji rajane Dioso pejumelivaisibaxutota Abrahampijinjē yabara jumaiti mapacueniaje: “Abrahampijinjē najamatabēcopatsiaya Diosojavabelia pejamatabējumaitisabiabixae: ‘Xaniajai. Pepacuene Dioso netoexanaena pacuenia najumecapanepaeya nejumaiti,’ pejamatabējajitsabiabixae, nexata Dioso aneconijibia tanetsi,” jai Dioso pejumelivaisibaxutota Abrahampijinjē yabara. <sup>4</sup>Pajivi itsanē pijajava tonacuenebaponapona, bajarapajivi xua rajutatsi, amoneya apo rajutsitsi. Petonacuenebixae matamotatsi. <sup>5</sup>Pajivi apo exanae ata pexaniacuene, itsiata jamatabējumaiti: “Dioso, ponē penaconeconsivi pijaneconivecua ajibiaexanabiaba, bajaraponē pepacuene necapanepaena pacuenia najumecapanepaeya jumaiti tanecapanepaenexa,” jamatabējai, bajarapajivi Dioso aneconijibia taenatsi pecapanepaenexatsi pijaneconivecua. <sup>6</sup>Pepo bajayata Davidpijinē vjunupaeba pejamatabēcuenebarējajava pamonaē baja Dioso aneconijibia tanetsi. Bajarapacuenia Dioso aneconijibia tanetsi bajarapamonae pejumecovēnētsixae Dioso najumecapanepaeya pejumaitisicueniatsi. Bajarapamonae Dioso aneconijibia apo taetsi, pijacuata ēpexaniacuene exanabiabi ata. <sup>7</sup>Davidpijinē pepo bajayata tajēvelia bajarapamonae yabara jumaiti mapacueniaje:

Jamatabēcuenebarēja baja tsavanapae pamonaē picani naneconita Diosojavabelia.

Barajamatabēcueneexanepanatsi baja Dioso. Tsipaji baja pibisiacuene pexanaeconimi, vecuaajibiaexanatsi. <sup>8</sup>Jamatabēcuenebarēja baja tsaponaponaē pajivi pibisiacuene pexanaejivi ata, itsiata Dioso aneconijibia itsa tanetsi,

jai mapacueniaje Davidpijinē bajayata.

<sup>9</sup>Bajarapacuenia Davidpijinē itsa jumaiti, pejamatabēcuenebarējatsavanapaevi baja, ējudiōvi, peperabēcaucubivitsi yabara, apo jumaiti. Pamonaē apo judiōvi, apo peperabēcaucubivi atatsi, yabara jumaiti. Xaniajanē pacuenia pacatsipae-bijitsiatsi. Abrahampijinjē bajayata Dioso jumecovēnēta najumecapanepaeya pejumaitisicueniatsi. Nexata baja Abrahampijinjē Dioso aneconijibia tanetsi pibisiacuene pexanaeconimivecua. <sup>10</sup>¿Abrahampijinjē tsajane baja pepuaperabēcaucutsitsi, Dioso aneconijibia tanetsi? Jume raja. Abaxē apo perabēcaucutsinejeva atatsi, aneconijibia tanetsi pejumecovēnētsixae Dioso najumecapanepaeya pejumaitisicueniatsi. <sup>11</sup>Dioso baja aneconijibia pepuataetsi, Abrahampijinjē perabēcaucutatsi. Bajarapacuenia Abrahampijinjē perabēcaucutatsi daxitajivi peyapētaenexatsi Dioso aneconijibia petaejavatsi. Bajaraxuata daxita pamonaē apo peperabēcaucubivi atatsi, itsa jamatabējumaiti: “Xaniajai. Pepacuene Dioso netoexanaena pacuenia najumecapanepaeya jumaiti,” itsa jamatabējai, bajarapamonae Abrahampijinjē bepexi Dioso tanetsi, apo peperabēcaucubivi atatsi. Abrahampijinjē abaxē apo perabēcaucutsi atatsi, Dioso pejumecovēnētsixae, aneconijibia tanetsi. <sup>12</sup>Xaniajai rabaja. Abrahampijinjē bepexi Dioso tanetsi daxita pamonaē peperabēcaucubivitsi. Bajarapamonae Abrahampijinjē bepexi Dioso tanetsi apo ēpeperabēcaucubijavatsi yabara. Biji rajane Abrahampijinjē bepexi Dioso tanetsi tsipaji bajarapamonae ata abaxē apo perabēcaucubi atatsi, jumecovēnēta pacuenia Dioso najumecapanepaeya jumaiti.

**Pacuenia tocopiapatatsi pajivi jumecovënëta pacuenia Dioso  
najumecapanepaeya jumaitsi petoexanaenexatsi yabara pelivaisi**

<sup>13</sup> Bajayata Dioso najumecapanepaeya jumaitsi Abrahampijinëjavabelia: “Carajutsianatsi daxita mapairaje nijairanexa. Nevënamuto ata, nexi, nemomoxi ata, pijairanexa,” jai Dioso Abrahampijinëjavabelia. Bajarapacuenia Dioso jumaitsi Abrahampijinëjavabelia tsipaji Dioso aneconijibia tanetsi Abrahampijinë pejumecovënëtsixae pacuenia Dioso najumecapanepaeya jumaitsi. Nexata acuenebi vajajumaitsinexa: “Abrahampijinë Dioso aneconijibia tanetsi tsipaji jumecovënëta Dioso Moiséspijinëta penajumecovënëtsilivaisi,” vajajainexa. Tsipaji baja Abrahampijinë peputatëpae, bexëa Moiséspijinë ponapona. <sup>14</sup> Dioso najumecapanepaeya itsa jumai tsipae perajutsinexa bajarapaira ëpamonae jumecovënëtapona Dioso Moiséspijinëta penajumecopatsilivaisi, nexata bajarapamonae, Abrahampijinë pemomoxi ata, apo rajutsitsi tsipae bajarapaira. Tsipaji itsajivi ata, bajarapamonaeajuvënëjivi, apo jumecovënëtsicapanepae Dioso Moiséspijinëta penajumecopatsilivaisi. Bajarapamonae Dioso pejumecovënëtsijava ata, nacueratsipa. Dioso najumecapanepaeya bajarapaira perajutsiapaebijavamitsi ata, toajumematamobi tsipaetsi. <sup>15</sup> Tsipaji daxita pamonae apo jumecovënëtsi pacuenia Dioso itoroba Moiséspijinëta penajumecopatsilivaisita, bajarapamonae Dioso naneconitsiaexanaena. Itsiata baitsi jane itsa ajibi tsipae pitavetsilivaisitsi, nexata pijinia ajibi tsipae peyabarananeconitsia exanaejavanexatsi.

<sup>16</sup> Dioso cajena najumecapanepaeya jumaitsi Abrahampijinëjavabelia amoneya perajutsinexa bajarapaira. Perajutsinexa Abrahampijinë pexijavabelianexa ata, pemomoxijavabelianexa ata. Bajarapaira Abrahampijinë Dioso rajutsiapaebatsi Dioso najumecapanepaeya pejumaitsijavatsi Abrahampijinë pejumecovënëtsixae. Bajarapaira Dioso najumecapanepaeya itsa rajutsiapaeba pamonae jumecovënëta Dioso Moiséspijinëta penajumecopatsilivaisi, bajara ëpamonae itsiata apo rajutsiapaebi. Biji rajane rajutsiapaeba pamonae ata jumecovënëta pacuenia Dioso najumecapanepaeya jumaitsi, pacuenia bajayata Abrahampijinë jumecovënëta Dioso najumecapanepaeya pejumaitsicueniatsi. Bajaraxuata daxitatsi, Dioso vajajumecovënëtsivi, Dioso nacatane Abrahampijinë bepexitsi. <sup>17</sup> Bajarapacuenia Abrahampijinë bepexitsi Dioso vajanacataejavanexa yabara, Dioso pejumaitsijava Abrahampijinëjavabelia Dioso pejumelivaisibaxutota tajëvelia jumaitsi mapacueniaje: “Ayaibitsaëttoxaneto jivi bepijasalinainëmë cataeyaexanaenatsi,” jai Dioso pejumelivaisibaxutota tajëvelia Dioso pejumaitsijava Abrahampijinëjavabelia vaxaitsi yabara. Dioso baja cajena icatsia piasaëyaexanaenë petëpaevimi ata. Xua picani abaxë ajibi mapanacuataje, Dioso baja exana pijumeta.

<sup>18</sup> “Abraham raeta baja pexi apo xainae tsane,” sivajamatabëjai atatsi daxitajivi bajayata, itsiata Abrahampijinë Dioso apo jumeaebi. Jumecovënëta Dioso pejumaitsicueniatsi. Evetaponapona jivi ayaibitsaëttoxaneto pamo pexanaenexatsi pacuenia Dioso najumecapanepaeya jumaitsitsi. <sup>19</sup> Bajarapamatacabi Abrahampijinë imoxo pexainae cien pavaibeje. Bajaraponë pijava Sara, mavecova. Perujuvayo baja pijinia. Pexi picani pexainaenexabeje, apo caëjëpaetsibeje. Tsipaji baja bitso perujujivibeje. Bajaraxua Abrahampijinë nacueneyapëtae ata, itsiata jumecovënëta Dioso pacuenia najumecapanepaeya jumaitsitsi petoexanaenexatsi. <sup>20</sup> Apo jumeaebi pacuenia Dioso najumecapanepaeya jumaitsitsi. Bitso biji pevajënaeya-

belia jamatabëcueneevetaponapona pacuenia Dioso najumecapanepaeya jumaitsitsi petocopiapatsinexatsi. Nexata Dioso yabara Abrahampijinë jumai tsabiabi: “Dioso cajena bitso ayaijamatabëcuenenë,” jai tsabiabi. <sup>21</sup>Abrahampijinë xaniavaetsia yapëtane Dioso pecaëjëpaenëcuenetsi petoexanaenexatsi daxita pacuenia najumecapanepaeya jumaitsitsi. <sup>22</sup>Abrahampijinë Dioso jumecovënëta petoexanaenexatsi pacuenia najumecapanepaeya jumaitsitsi. Bajaraxuata Dioso aneconijibia tanetsi.

<sup>23</sup>Dioso pejumelivaisibaxutota jumaitsi pacuenia Dioso aneconijibia tanetsi Abrahampijinë pejumecovënëtsixae Dioso najumecapanepaeya pejumaitsicueniatsi. Bajarapacuenia Dioso pejumelivaisibaxutota apo jumaitsi saya vajayapëtaenexa Abrahampijinë pelivaisi. <sup>24</sup>Biji rajane nacatoyaquina vaxaitsi ata vajanacamuxujobinexa. Nexata vaxaitsi ata itsa jumecovënëtsi pacuenia Dioso najumecapanepaeya jumaitsi, aneconijibia Dioso nacatane. Bajaraponë Dioso vajatuxanenë Jesucristo icatsia asaëyaexanatsi petëpaecujinae. <sup>25</sup>Dioso athëbëvetsica itorobica Jesús vajanacasivatëpaenexa mapanacuataje. Nexata Jesús itsa nacasivatëpa, nacaneconimatamota pibisiacuene vajaexanaeconomy. Bajaraxuacujinae Dioso icatsia asaëyaexanatsi petëpaejavavecua vajanacavecuajibiaexanaenexa vaneconomy. Nexata baja Dioso aneconijibia nacatane Jesús pejamatabëcueneta.

### **Pacuenia jamatabëcuenebarëya pajivi Dioso aneconijibiatanetsi yabara pelivaisi**

**5** Dioso aneconijibia nacatane vajajumecovënëtsixae pacuenia Dioso najumecapanepaeya jumaitsi. Nexata sivajamatabëcuenebarëyatsi tsavanapae Dioso. Vajatuxanenë Jesucristo vajanacasivatëpaexae vaneconomy yabara, bajaraponë pejamatabëcueneta nacajamatabëcuenebarëyayaexana. <sup>2</sup>Vajajumecovënëtsixae Jesucristo vajanacasivatëpaejava, Dioso nacaitaxutotsoniataeyabiaba. Nexata Dioso sivajamatabëcuenebarëyatsi. Tshipaji yapëtanetsi itsamatacabi Dioso vajayajavajinavanapaejavanexa penivenivenaenacuatatsia. <sup>3</sup>Mapanacuapijivi nacabejiobiaexanabiabi ata, itsiata sivajamatabëcuenebarëyatsi tsabiabi. Tshipaji yapëtanetsi vajanacabejiobiaexanabiabicueneta, nacajamatabëcueneasaëyaexanapona Diosojavabelia. Nexata nacajamatabëcuenecaëjëpa vajanajamatabëcuenesaëtsinexa, daxita pibisiacuene nacatocopiapatsi ata. <sup>4</sup>Itsa najamatabëcuenesaëtsi, nacatocopiapatsi ata pibisiacuene, Dioso pijinia nacasivabarëya. Nexata itsa yapëtanetsi Dioso vajanacasivabarëyajava, nexata jamatabëcueneevetatsi Dioso vajanacatoexanaenexa pacuenia najumecapanepaeya jumaitsi. <sup>5</sup>Nexata itsa jamatabëcueneevetatsi Dioso vajanacatoexanaenexa pacuenia najumecapanepaeya jumaitsi, apo nacueratsitsi tsane. Bajarapacuenia apo nacueratsitsi tsane tshipaji baja Dioso nacarajuta Espiritu Santo vajanacatsijamatabëcaenexa. Nexata Espiritu Santo xaniavaetsia nacayapëtaeyaxana Dioso vajanacaasivajava.

<sup>6</sup>Vaxaitsi bitso ajamatabëcuenesaëjibitsi pibisijamatabëcuenevixatsi. Acuenebi vajacuata vajanacapanepaenexa Diosojavabelia vaneconomy yajava. Itsiata baitsi jane Dioso pecaëjëtsimatacabita, Cristo nacasivatëpa pibisiacuene vajaexanaeconomy yabara. <sup>7</sup>Mapanacuataje itsajivi itsa jamatabëcueneyavenona itsanë, nexata itsa beyaxuabiapaebatsi pejamatabëcueneyavenonaexae, pecajunavi baja apo jamatabëcueneyavenonae tshipae. Itsajivi meta itsiata jamatabëcueneyavenonaejitsipa, beyaxuabijitsia atatsi. Bajarapacuenia jamatabëcueneyavenonaejitsipa itsa bitso pexaniajamatabëcuenenë, ponëjavabelia jamatabëcueneyavenonaejitsia. <sup>8</sup>It-

siata baitsi jane vaxaitsi Dioso nacayavenona, pibisiacuene vajaexanaevi ata. Nexata Dioso nacatsitanajamatabëcueneitajëta bitso vajanacaasivajava. Dioso pexënato athëbëvetsica itorobica vajanacasivatëpaenexa mapanacuataje. <sup>9</sup> Jesucristo vajanacasivatëpaexae, nexata baja maparucaeje Dioso aneconijibia nacatane. Bajaraxuata yapëtanetsi Jesucristo pejamatabëcueneta Dioso vajanacacapanepaejavanexa vajanacananeconitsia exanaejavanexamivecua. <sup>10</sup> Vaxaitsi picani Dioso pijavajabitsaëvitsi. Nexata pexënato vajanacasivatëpaexae, Dioso baja nacabaramatabëcuenexanepana. Bajaraxuata maparucaeje yapëtanetsi Dioso pepacuene vajanacacapanepaejavanexa vajanacananeconitsia exanaejavaminexavecua. Tsiipaji pexënato asaë tsaponaponae vajanacatocuaicuaijainënexa paxajavelia. <sup>11</sup> Orijibia vaxaitsi bitso sivajamatabëcuenetarëyatsi Dioso vajanacaasivajava. Tsiipaji vajatuxanenë Jesucristo pejamatabëcueneta Dioso baja nacabarajamatabëcuenexanepana.

### Adánpijnë Cristo ata yabara pelivaisi

<sup>12</sup> Copiaya caenë, Adánpijnë, pibisiacuene exana. Nexata mapanacuataje daxitajivi pibisiacuene pexanaejavanexa, taxuxuaba. Taxuxuabanua jivi petëpaejavanexa. Nexata jivi petëpaejava, yacaëjëpa daxitanacuapijivijava. Tsiipaji daxitanacuapijivi pibisiacuene exana. <sup>13</sup> Dioso Moisésipijnëta penajumecopatsilivaisi ata pevajënaeya, mapanacuapijivi pibisiacuene exanavanapa. Itsiata abaxë apo petonajumecopatsixaetsi Dioso pejumelivaisi, itsajivi ata acunebi pejumaitisjavatsi: “Pananeconitame raja Diosojavelia,” pejaijavatsi pibisiacuene pexanaejava yabara. <sup>14</sup> Adánpijnë peponaponaejavaveliacujinae, jivi jinavanapa. Bajarapamonaemi jinavanapa Moisésipijnë pevajënaeya. Daxita bajarapamonaemi ata pibisiacuene exana. Nexata tēpaponae. Bajarapamonaepibisiacuene itsa exana, itsiata Adánpijnë papibisiacuene exana, cuenejēpaeya apo exanae. Cristo, ponë tajëvelia vajunupaebatsi pepatsijavanexatsica, Adánpijnëbeje, apo najamatabëcuenejēpaebeje. Adánpijnë pejamatabëcueneta, daxitajivi pibisiacuene exanavanapa. Nexata daxitajivi naneconita Diosojavelia. Cristo pijinia pejamatabëcueneta, jivi ayaibitsaëtoxaneto Dioso aneconijibia tanetsi.

<sup>15</sup> Nexata Adánpijnë papibisiacuene exana, apo najēpaebeje papexaniacuene Dioso nacatoexana Jesucristo pejamatabëcueneta. Caenë, Adánpijnë, pibisiacuene pexanaejava pejamatabëcueneta, daxitajivi tēpaponae. Biji rajane Dioso vajanacaitaxutotsoniatæjava, bitso pexaniacuene. Tsiipaji Dioso athëbëvetsica itorobica vajatuxanenë Jesucristo vajanacasivatëpaenexa mapanacuataje, vajanacavecuaajibiaexanaenexa daxita vajaneconimi. Nexata bajarapacuenia caenë, Jesucristo, pexaniacuene exana pecapanepaenexa jivi ayaibitsaëtoxaneto. <sup>16</sup> Caenë saya picani Adánpijnë. Itsiata pibisiacuene itsa exana, yacaëjëpa daxitajivijava. Nexata daxitajivi pibisiacuene pexanaexae, naneconita Diosojavelia. Itsiata baitsi jane Jesucristo xaniavaeta daxita xua Adánpijnë pejamatabëcueneta bijiana picani. Jesucristo pejamatabëcueneta Dioso aneconijibia tane daxita pamonaepumecovënëta Jesucristo pesivatëpaejavatsi pibisiacuene pexanaeconi yabara. <sup>17</sup> Caenë Adánpijnë pibisiacuene pexanaexae, daxitajivi tēpaponae bajarapamonaepaenexa vajanacasivatëpaexae, maparucaeje Dioso baja nacaitaxutotsoniatane. Bajaraxuata itsacuenejavayo ata Dioso apo toexanae atatsi, Dioso aneconijibia nacatane. Daxita pamonaepumecovënëta Jesucristo peja-

matabëcueneta Dioso aneconijibia petaejavatsi, bajarapamonae ajamatabëcuenesaë tsavanapae tsane Dioso pejumecovënëtsijava Jesucristo peyavenonabiabixaetsi.

<sup>18</sup> Daxitajivi naneconita Diosojavabelia caenë, Adánpijinë, copiaya pibisiacuene pexanaexae. Caenë pijinia, Jesucristo, pexaniacuene pexanaexae, daxita pamonaë jumecovënëta Jesucristo pesivatëpaejavatsi pibisiacuene pexanaeconi yabara, Dioso aneconijibia tanetsi. Nexata bajarapamonae Dioso rajutsianatsi matababi apo peverevereaejava. <sup>19</sup> Caenë, Adánpijinë, copiaya apo jumecovënëtsi Dioso pitorobicueniatsi. Nexata bajaraponë pejamatabëcueneta, jivi ayaibitsaëtoxaneto pibisiacuene exana. Nexata icatsia bexëa caenë, Jesucristo, xaniavaetsia jumecovënëta Dioso pitorobicueniatsi. Nexata Jesucristo pejamatabëcueneta, jivi ayaibitsaëtoxaneto Dioso aneconijibia tanetsi.

<sup>20</sup> Bajayata Dioso Moiséspijinëta najumecopata jivi pejumecovënëtsinexa. Nexata bajarapalivaisi itavetatsi pibisiacuene picani pexanaeyaniva. Itsiata baitsi jane jivi apo caëjpaetsi penajamatabëcuenesaëtsinexa. Nexata pibisiacuene exanabiaba. Nexata bajarapalivaisi pitavetsixaetsi pibisiacuene picani pexanaeyaniva, itsiata jivi pibisiacuene itsa exana, nacueneyapëtane pibisiacuene pexanaejava. Nexata jivi pevajënaeyabelia pibisiacuene itsa exana, Dioso pijinia pevajënaeyabelia bitso itaxutotsoniataeponatsi. <sup>21</sup> Daxitatsi tēpaenatsi. Tsipaji daxitatsi pibisiacuene exanatsi. Bajara pijinia pacuenia daxitatsi Dioso vajanacaitaxutotsoniataexae, Dioso aneconijibia nacatane. Dioso nacarajutsiana matababi apo peverevereaejava vajatuxanenë Jesucristo vajanacasivatëpaxae.

### **Pacuenia Dioso pejumecovënëtsivi pejanajamatabëcuene yajavajinavanapa yabara pelivaisi**

**6** Itsajivi meta jamatabëcuenenavëxaniabiaya jamatabëjumaitsi tsane: “Dioso vajanacaitaxutotsoniataexae, aneconijibia nacatane. Nexata icatsia ayaicuenia Dioso vajanacaitaxutotsoniataenexa, vajavajënaeyabelia pibisiacuene exanavana-paenatsi,” jamatabëjai meta tsane jamatabëcuenenavëxaniabiaya. <sup>2</sup> Jume raja! Pëtsa baja vaxaitsi pibisiacuene exanatsi pematatsënëa. Petëpaenë baja apo najamatabëxainae pibisiacuene pexanaenexa. Bajara pijinia pacuenia vaxaitsi ata bejamatabëcueneitsitsi pibisiacuene vajaexanaeyaniva. <sup>3</sup> Paxamë bepayaepëtaneme pajamatabëcuene yabara nabautisabatsi. Itsa nabautisabatsi, becaeperabëto nacaexana Jesucristojavabelia. Nexata vaxaitsi bejamatabëjumaitsitsi mapacueniaje: “Jesucristo cruzata itsa tēpa, xanë ata betaneyajavatëpae cruzata,” bejamatabëjaiti. Bajarapajamatabëcuene yabara nabautisabatsi. <sup>4</sup> Itsa Jesucristo bevajanacayajavatëpae, nexata bevajanacayajavamëthëtsitsi. Nexata Jesucristo petëpaecujinae, Dioso pesaëta icatsia itsa asaëyaexanatsi, bevajanacayajavaasaëyaexanaetsi icatsia. Vaxaitsi pejanajamatabëcuene vajayajavajinavanapaenexa, copatatsi baja vajaperujujamatabëcuenemi. Bajarapajamatabëcuene yabara nabautisabatsi.

<sup>5</sup> Becaeperabëto vajanacaexanaexae Jesucristojavabelia, nexata daxitatsi Jesucristo cruzata bevajanacayajavatëpae. Nexata Jesucristo petëpaecujinae, Dioso icatsia itsa asaëyaexanatsi, bevajanacayajavaasaëyaexanaetsi. <sup>6</sup> Jesucristo itsa rutatsi cruzata pebexaxuabinexatsi, vajaperujujamatabëcuenemi yajavarutatsi vajanacave-cuaajibiaexanaenexa pibisiacuene vajanacaexanaeya exanaejamatabëcuenemi. Bajarapacuenia vajanacatoexanaexae, pematatsënëa baja apo bexanaetsi pibisiacuene. <sup>7</sup> Pacuenia baja petëpaenë pibisiacuene apo exanae, bajara pijinia vaxaitsi ata

bejamatabëcueneitsitsi pibisiacuene vajaexanaeyaniva. <sup>8</sup> Jesucristo cruzata bevanacayajavatëpaexae, nexata bejamatabëjumaititsi mapacueniaje: “Yajavajinavanapaenatsi Jesucristo daxitamatacabijavabelianexa,” bejamatabëjaiti. <sup>9</sup> Yapëtanetsi vajatuxanenë Jesucristo Dioso icatsia piasaëyaexanaejavatsi petëpaecujinae. Nexata baja icatsia Cristo pematatsënëa apo tēpae tsane. <sup>10</sup> Itsa baja Cristo tēpa daxitajivi pibisiacuene pexanaeconi yabara, caeuenia copiarutsiaya sivatēpa daxitamatacabijavabelianexa. Nexata baja Cristo icatsia pematatsënëa apo tēpae tsane. Biji rajane Dioso yajava daxitamatacabijavabelianexa asaë tsaponaponaē tsane athëbëtatsia, itsajotatsia ajibi petëpaecuene. <sup>11</sup> Nexata paxamë panejamatabëëthëtota pajamatabëjumaitisimëre tsavanapae: “Tajaperujumatabëcuenemi baja navecuatëpaeyabajë. Nexata baja pibisiacuene apo exanaenë tsane. Biji rajane asaënë baja tsaponaponaē Dioso taneitorobicuenia tatoexanabibinexa. Tsiapaji baja tajatuxanenë Jesucristo neyajavanapona,” pajamatabëjamëre tsavanapae.

<sup>12</sup> Bajaraxuata pëtsa baja panajamatabëxainabiabame pibisiacuene paneexanaenexa panijacuata panenatojitsipaecuena. <sup>13</sup> Pëtsa panacopatame daxita xua pibisiacuene paneexanaenexa. Tsiapaji paxamë bepanetëpaecujinae, Dioso icatsia bepepecaasaëyaexanaevi. Nexata pajumaitisimëre tsabiabi Diosojavabelia: “Tajatuxanenë, catonucatsi majotaje. Cajamatabëcuenevetaponaponaenatsi daxitamatacabijavabelianexa pacuenia xamë jitsipame tacatoexanabibinexa,” pajamëre tsabiabi Diosojavabelia. <sup>14</sup> Nexata pacacajëpaena panenajamatabëcuenesaëtsinexa icatsia caevëalia paneexanaeyaniva papibisiacuene panijacuata panatojitsipame. Tsiapaji Dioso papecaitaxutotsoniataexae, Dioso pacayavenonabiabiana. Nexata baja apo paexanavanapaemë tsane pacuenia pacaitoroba Dioso Moiséspijinëta penajumecopatsilivaisi.

### **Pacuenia itsane pajivi nacopata ëpibisiacuene pexanaejavabelia yabara pelivaisi**

<sup>15</sup> Itsajivi meta jamatabëcuenenavëxaniabiaya jamatabëjumai tsane: “Dioso vanacaitaxutotsoniataexae, aneconijibia nacatane. Nexata baja tsiteca apo exanavanapae tsanetsi pacuenia nacaitoroba Dioso Moiséspijinëta penajumecopatsilivaisi. Nexata baja itaxutojema pibisiacuene exanavanapaenatsi,” jamatabëjai meta tsane itsajivi jamatabëcuenenavëxaniabiaya. ¡Jume raja! Pibisiacuene apo bexanavanapaetsi. <sup>16</sup> Paxamë rabaja xaniavaetsia payapëtaneme mapacuneje. Itsa panacopatsipame itsanë papijajivinxamë, nexata pacuenia bajaraponë pacaitorobabiaba, pajumecovënëtabibijitsipame. Bajara pijinia paitsimë tsiapae itsa panacopatsipame pibisiacuene paneexanabibinexa. Nexata bajarapapibisiacuene bepapijajivimëcuenia, pacuenia pacajamatabëcueneitorobabiaba, paexanavanapaejitsipame. Nexata bajarapaneconi pejamatabëcueneta papitsipame panetëpaejavanaxa, Diosovecua panenaxuabinexa daxitamatacabijavabelianexa. Itsiata ita pajumecovënëtavapananame Dioso, nexata pacuenia Dioso pacatojitsipa, patoexanavanapananame. <sup>17</sup> Bajayajebi picani panacopatame pibisiacuene paneexanavanapanenexa. Nexata pibisiacuene bepapijajivimëcuenia, pacuenia pacajamatabecuenenitorobabiaba, ëpibisiacuene paexanavanapame. Nexata itsiata maparucaje daxita panejamatabëcueneta pajumecovënëtavapanapame baja papexanajailivaisi itsamonae pacatsipaeba. Bajaraxuata paxamë yabara Diosojavabelia jumaitsinë tsabiabi: “Xanepana rabaja. Ayaicuenia yavenoname bajarapamonae,”

jane tsabiabi. <sup>18</sup> Aeconoxae baja Dioso pacacopatsiaexana pibisiacuene paneexanavanapaejavami. Nexata jane baja panajamatabëxainame ëpexaniacuene paneexanavanapaenexa. <sup>19</sup> Peyapëxanepanaecuenia pacatoyaquinatsi mapalivaisije xaniavaetsia panejumeyapëtaenexa xua yabara pacatoyaquinatsi. Bajayajebi picani panacopatame pibisiacuene paneexanavanapaenexa. Nexata bajarapapibisiacuene bepapijajivimëcuenia pacuenia pacajamatabëcuenitorobabiaba, ëpibisiacuene picani paexanavanapame panevajënaeyabelia. Itsiata baja aeconoxae panajamatabëcuen-erajure Diosojavabelia ëpexaniacuene paneexanavanapaenexa panevajënaeyabelia. Bajarapacuenia Dioso pacatojitsipa paneexanavanapaenexa.

<sup>20</sup> Pamatacabi picani abaxë ëpibisiacuene paexanavanapame, Dioso papecatojitsipacuenua apo paexanavanapamë. Saya jamatejema pajinavanapame. <sup>21</sup> Itsiata apo pacatoxanepanae itsacuenejavayonexa ata daxita papibisiacuene picani paexanavanapame. Payaauramë tsabiabi pibisiacuene paneexanaejava. Pamona tsiteca pibisiacuene exanavanapa, bajarapamona Diosovecua naxuabiana daxitamatacabijavabelianexa. <sup>22</sup> Paxamë rabaja Dioso pacacapanepa pibisiacuene paneexanaeneconimivecua. Bajaraxuata Diosojavabelia panajamatabëcuen-erajutame baja Dioso papijajivinexamë. Nexata apo panacueratsimë tsane. Dioso papecatojitsipacuenua pajinavanapaename. Panetëpacujinae paxainaename matacabi apo pevereverecejava. <sup>23</sup> Pamona pibisiacuene pexanaevi, Dioso rajutsianatsi petëpaejav-  
vanexa, Diosovecua penaxuabinexa daxitamatacabijavabelianexa. Pamona jumecovënëta vajatuxanenë Jesucristo pesivatëpaejavatsi pijaneconi yabara, bajarapamona itsamatacabi Dioso amoneya rajutsianatsi matacabi apo pevereverecejava.

**Pacuenia Dioso pejumecovënëtsivi Dioso  
Moisëspijinëta penajumecopatsilivaisi apo  
bejumecovënëtsi pecapanepaenexatsi yabara pelivaisi**

**7** Tajamona, payapëtaneme rabaja Dioso Moisëspijinëta penajumecopatsilivaisi. Nexata baja pijinia payapëtaneme pacuenia jivi bajarapalivaisi bejumecovënëta-  
vanapa itsa abaxë asaë tsavanapae mapanacuataje. Itsiata baitsi jane itsa baja tëpa, acuenebi baja pematatsënëa bajarapalivaisi pejumecovënëta-  
vanapaenexa. <sup>2</sup> Pova baja pamona pexainaeva, acuenebi pevecuanaviatsinexa pamona, penacojiobinexa icatsia itsanëjavabelia. Tsipaji Dioso Moisëspijinëta penajumecopatsilivaisi itaveta bajarapacueni. Itsiata baitsi jane pova baja pamona vecuatëpatsi, nexata mata-  
pania tocopatatsi penacojiobinexa icatsia itsanëjavabelia itsa jitsipa penacojiobi-  
java. <sup>3</sup> Pova pamona pexainaeva, itsa nacojiobijitsipa itsanëjavabelia, pamona abaxë itsa asaë tsaponaponae, nexata bajarapova ayaineconi natsiexanaejitsipa Diosojav-  
abelia. Tsipaji pamonavecua itsanëjavabelia naperabëquenetsiatae ponaponaejit-  
sipa. Itsiata baitsi jane baja pova baja pamona vecuatëpatsi, Dioso Moisëspijinëta penajumecopatsilivaisi apo itavetsitsi penacojiobijava itsanëjavabelia. Nexata pova baja pamona vecuatëpatsi, nacojiobi ata icatsia itsanëjavabelia, ayaineconi apo nat-  
siexanae tsipae Diosojavabelia.

<sup>4</sup> Tajamona, bajara pijinia paitsimë paxamë ata. Pacuenia petiriva pamona pitorobabiabicueniatsi, jumecovënëtabiaba, bajara pijinia pacuenia pajumecov-  
ënëtabiabame picani Dioso Moisëspijinëta penajumecopatsilivaisi papecaitoro-  
bicuenia. Jesucristo bepaneyajavatëpaexae, nexata Dioso Moisëspijinëta penajume-  
copatsilivaisi bepanevecuatëpae. Nexata baja icatsia apo pajumecovënëta-  
vana-

paemë bajarapalivaisi papecaitorobicuena. Maparucaeje Cristo baja papijajivimë, ponë icatsia Dioso asaëyaexanatsi petëpaecujinae. Cristo icatsia Dioso bepapecayajavaasaëyaexanae pacuena Dioso pacatojitsipa paneexanavanapaenexa. <sup>5</sup> Pamatacabi abaxë Cristo pelivaisi apo jumeconvënëtsitsi, pibisiacuene exanavanapatsi vajacuata vajanatojitsipaecuena. Nexata bajarapamatacabi ita nacaitaveta Dioso Moiséspijinëta penajumecopatsilivaisi pibisiacuene vajaexanaeyaniva, caranata saya bevajanacaitorobi pibisiacuene vajaexanaenexa. Nexata bitso pibisiacuene exanavanapatsi. Bajaraxua yabara picani Diosovecua naxuabijainavanapatsi. <sup>6</sup> Itsiata baja maparucaeje palivaisi Dioso Moiséspijinëta najumecopata, bajarapalivaisi vajajumecovënëtsijavami, Dioso baja nacacopabiaexana Cristo bevajanacayajavatëpaexae. Nexata papexaniacuene aeconoxae exanavanapatsi, apo exanavanapaetsi saya vajanacaitorobixae bajayata peyaquinaelivaisimi, Dioso Moiséspijinëta penajumecopatsilivaisi. Jume baja cajena. Espíritu Santo raja pejanajamatabëcueneta vajanacaitorobixae, exanavanapatsi bajarapapexaniacuene.

**Dioso Moiséspijinëta penajumecopatsilivaisi, pacuena ata Pablo pibisiacuene pexanaenexa najamatabëxaina, penavajunupaebijava, yabara pelivaisi**

<sup>7</sup> Itsajivi meta jamatabëcuenenavëxaniabiaya jamatabëjumaitsi tsane: “Dioso Moiséspijinëta penajumecopatsilivaisi, itsacuenejavayonexa ata apo xanepanae,” jamatabëjai meta tsane. ¡Jume raja! Itsa ajibi tsipae bajarapalivaisi, nexata apo nacueneyapëtaenë tsipae pibisiacuene taexanaejava. Tspiji Dioso Moiséspijinëta penajumecopatsilivaisita, itsalivaisianë yajava, jumaitsi mapacueniaje: “Pëtsa cobecaëbame itsajivi pexinaejava,” jai. Nexata ita apo yapëtaenë tsipae bajarapalivaisi, xanë apo nacueneyapëtaenë tsipae pibisiacuene taexanaejava, itsajivi pexainaejava cobecaëbi atanë. <sup>8</sup> Dioso Moiséspijinëta penajumecopatsilivaisi, ita nitaveta itsamonae pexinaejava tacobecaëbiyaniva, nexata caranata bitso betanitorobi tacobecaëbinexa itsamonae pexinaejava. Pamatacabi abaxë apo yapëtaenë Dioso Moiséspijinëta penajumecopatsilivaisi, apo jitsipañë picani taexanaenexa bajarapacuene. <sup>9</sup> Bajayata abaxë ita apo yapëtaenë bajarapalivaisi, jamatejemanë saya. Itsiata pamatacabi xaniavaetsia yapëtaniji xua yabara Dioso nitaveta, nexata jitsipajë bitso pibisiacuene taexanaenexa. Bitso najamatabëxainajë. Bajarapalivaisi pejamatabëcueneta yapëtaniji pibisiacuene taexanaexae, Diosovecua naxuabiaya tatëpaejavanexa picani. <sup>10</sup> Bajarapalivaisi Dioso najumecopata Moiséspijinëta jivi picani jamatabëcuenenavëxaniabiaya xaniavaetsia pejinavanapaenexa. Itsiata xanë bajarapalivaisi pejamatabëcueneta apo jamatabëcuenenavëxaniabiaya. Tspiji pibisiacuene taexanaexae, bajarapalivaisi pejamatabëcueneta yapëtaniji Diosovecua tanaxuabijavanexa picani. Nexata bitso najamatabëxainajë. <sup>11</sup> Papibisiajamatabëcuene xainajë tajamatabëëthëtota, pibisiacuene neexanaeyaexanabiaba. Nexata pacuena jumaitsi bajarapalivaisi, naneconitajë picani Diosovecua tanaxuabinexa.

<sup>12</sup> Palivaisi Dioso Moiséspijinëta najumecopata, pexanialivaisi cajena. <sup>13</sup> Nexata bajarapapexanialivaisi pejamatabëcueneta yapëtaniji Diosovecua tanaxuabijavanexa picani. Tspiji xanë tajamatabëëthëtota papibisiajamatabëcuene xainajë pejamatabëcueneta, exanabiabajë pibisiacuene. Bajaraxuata Diosovecua naxuabijitsianë picani. Bajarapacuenia daxitajivi bajarapalivaisi pejamatabëcueneta, nacueneyapëtaena pibisiacuene pexanaejava. Taexanaexae xua bajarapalivaisita itaveta, naneconitajë Diosojavabelia. Bajarapalivaisi ita yapëtaniji, nexata taja-



matabëéthëtota papibisiajamatabëcuene xainajë, nitorobapona bitsoyo pibisiacuene taexanaponaenexa.

<sup>14</sup> Palivaisi Dioso Moiséspijinëta najumecopata jivi pejumecovënëtsinexa, yapëtanetsi bajarapalivaisi Dioso penajumecopatsijava. Bajarapalivaisi jivi pejumecovënëtsinexa, bexaina pejanajamatabëcuene. Itsiata baitsi jane xanë bajara apo jamatabëcueneitsinë. Tajacuata saya ëtanatojitsipaecuenia exanaponaponajë. Caranata saya najamatabëxainabiabajë ëpibisiacuene taexanabiabinexa, papibisiajamatabëcuene tajamatabëéthëtota xainajë taneitorobabiabicuenia. <sup>15</sup> Xua pexaniacuene, jamatabëexanabiabajë picani. Itsiata bajaraxua apo exanabiabinë. Biji papibisiacuene apo jitsipaenë picani taexanabiabinexa, bajaraxua caranata exanabiabajë. “¿De tsaeta xuajitsia bajarapacuenia exanabiabajë?” jamatabëjanë belia. <sup>16</sup> Itsa exanabiabajë papibisiacuene picani apo jitsipaenë taexanabiabinexa, nexata sivajamatabëëjanë tsabiabi. Bajaraxuata yapëtaniji jane baja Dioso penajumecopatsilivaisi pexanialivaisicuene. Tspijaji Dioso penajumecopatsilivaisi itaveta pibisiacuene pexanaejava. <sup>17</sup> Bajarapapibisiacuene exanae atanë, itsiata apo betanatsitaexanae itajara. Papibisiajamatabëcuene abaxë xainajë tajamatabëéthëtota, nexanaeyaexanapona bajarapapibisiacuene. <sup>18</sup> Tajamatabëcuene cajena bitso abeje. Yapëtaniji itsacuenejavayonexa ata apo netoxanepanae daxita tajamatabëcuene. Natojitsipajë picani pexaniacuene taexanabiabinexa. Itsiata apo nejamatabëcuenecajëpabiabi pexaniacuene taexanabiabinexa. <sup>19</sup> Papexaniacuene jitsipajë taexanabiabinexa picani, itsiata apo exanabiabinë. Caranata saya exanabiabajë pibisiacuene, xua picani apo jitsipaenë taexanaenexa. <sup>20</sup> Nexata itsa exanabiabajë xua picani apo jitsipaenë taexanabiabinexa, nexata bajaraxua apo betanatsitaexanae itajara. Tspijaji papibisiajamatabëcuene abaxë xainajë tajamatabëéthëtota, nexanaeyaexanapona bajarapapibisiacuene.

<sup>21</sup> Nexata jane baja yapëtaniji pacuenia jamatabëcueneitsinë tsabiabi. Paepatota picani jitsipajë pexaniacuene taexanabiabinexa, itsiata apo exanabiabinë. Tspijaji papibisiajamatabëcuene xainajë, abaxë yajavaponaponajë. <sup>22</sup> Tajamatabëcueneta jamatabëjumaitsinë tsabiabi: “Jitsipajë tajumecovënëtsinexa Dioso pejumelivaisi,” jamatabëjanë tsabiabi picani. <sup>23</sup> Itsiata baitsi jane belia najamatabëcueneyapëtaniji. Papibisiacuene exanabiabajë, bajarapapibisiacuene picani tajamatabëcueneta apo jitsipaenë taexanaenexa. Tajamatabëcueneta picani jitsipajë pexaniacuene taexanaenexa, Dioso tanetojitsipaecuenia. Caranata exanabiabajë ëpibisiacuene. Tajaperujujamatabëcuene saya beprijavitonënëcuenia toponaponajë.

<sup>24</sup> ¿Xanë bitso bejiobinë! Bajarapapibisiajamatabëcuene yabara Dioso picani nenaneconitsiaexanaejitsia tanaxuabinexa Diosovecua daxitamatacabijavabelianexa. “¿Jipatsa meta nevecuaajibiaexanaena bajarapapibisiajamatabëcuene?” jamatabëjanë belia. <sup>25</sup> Nexata Diosojavabelia jumaitsinë: “Pexaniacuene rabaja netoexaname,” janë. Tspijaji vajatuxanenë Jesucristo jamatabëcuenecajëpatsi taneyavenonaenexa. Bajaraxuata ëpibisiacuene jamatabëexanae atanë, jitsipajë daxita tajamatabëcuenevetsina tajumecovënëtsinexa pacuenia Dioso itoroba.

### Pacuenia Espíritu Santo nacajamatabëcueneyavenona yabara pelivaisi

**8** Pamona baja Jesucristo yajavajinavanapa, bajarapamona Dioso baja apo naneconitsiaexanaetsi tsane. Bajarapamona penatojitsipaecuenia, pibisiacuene apo exanavanapae. Biji rajane exanavanapa pacuenia Espíritu Santo tojitsipatsi.

<sup>2</sup>Nexata bajarapacuenia xanë ata Jesucristo itsa yajavaponaponajë, nexata Espíritu Santo pesaëta neyavenonabiaba xaniavaetsia taponaponaenexa. Nexata baja apo exanaponaenë pibisiacuene. Papibisiyajamatabëcuene picani nenaneconitsiaexanabiaba daxitamatacabijavabelianexa picani tananeconitsiaponaponaenexa, bajara-pajamatabëcuenemi Espíritu Santo baja nevecuaajibiaexana. <sup>3</sup>Vaxaitsi vajacuata apo nacajamatabëcuenecaëjëpae vajajumecovënëtsinexa Dioso Moiséspijinëta penajumecopatsilivaisi. Bajaraxuata apo nacacaëjëpae vajacuata vajanacapanepaenexa Diosojavabelia. Itsiata Dioso caëjëpatsi vajanacapanepaenexa. Athëbëvetsica Dioso itorobica pepo caenë pexënato. Nexata mapanacuata Dioso pexënato itsa naexana, nacaperabëjëpa picani pibisiacuene vajaexanaevi. Bajaraponë voxaitsi pibisiacuene vajaexanaeneconi yabara, nacasivatëpa. Nexata baja nacavecuajibiaexana papibisiyajamatabëcuene picani xainatsi, pajamatabëcuene picani nacaexanaeyaexanabiaba pibisiacuene. <sup>4</sup>Bajarapacuenia Dioso nacatonexana vajanacajamatabëcuenecaëjëpaenexa pexaniacuene vajaexanaejava pacuenia Dioso Moiséspijinëta penajumecopatsilivaisi jumaisi. Nexata nacacaëjëpa vajaexanaenexa pexaniacuene. Tshipaji apo exanavanapaetsi pacuenia vajacuata natojitsipatsi. Biji rajane exanavanapatsi pacuenia Espíritu Santo nacatojitsipa.

<sup>5</sup>Pamonae exanavanapa pijacuata penatojitsipaecuenia, bajarapamonae jamatabëcueneenabiabatsi epibisiacuene pexanaenexa. Pamonae pijinia exanavanapa Espíritu Santo pejitsipaecuenia, bajarapamonae jamatabëcueneenabiabatsi Espíritu Santo pejitsipaecuenia pexanavanapaenexa. <sup>6</sup>Pamonae saya exanavanapa pijacuata penatojitsipaecuenia, bajarapamonae bepejamatabëcuenetëpaevi Dioso pitabarata. Nexata Diosovecua naxuabiaya jinavanapa. Pamonae pijinia exanavanapa Espíritu Santo pejitsipaecuenia, bajarapamonae jamatabëcuenebarëyaya jinavanapa Dioso pitabarata. Bajarapamonae itsamatacabi xainaenanua matacabi apo peverevere-caejava. <sup>7</sup>Pamonae saya exanavanapa pijacuata penatojitsipaecuenia, bajarapamonae itoya Dioso. Tshipaji apo exanae pacuenia Dioso penajumecopatsilivaisi itorobatsi. Apo jamatabëcuenecaëjëpaetsi pejumecovënëtsinexa bajarapalivaisi. <sup>8</sup>Pamonae saya exanavanapa pijacuata penatojitsipaecuenia, bajarapamonae apo jamatabëcuenecaëjëpaetsi pexanaenexa Dioso pejitsipaecuenia.

<sup>9</sup>Maparucaeje paxamë apo paexanavanapaemë pacuenia panijacuata panatojitsipame. Espíritu Santo, ponë Cristo itorobica, pepacuene pacatsijamatabëeca. Nexata Espíritu Santo pejitsipaecuenia, paexanavanapame. Pajivi Espíritu Santo apo tsijamatabëecaetsi, bajarapajivi Cristo apo pijajivitonë. <sup>10</sup>Paneperabëto tēpaena pibisiacuene paneexanaejamatabëcuene. Itsiata Cristo papijajivixaemë, nexata pepo panejamatabëcuene athëbëtatsia jinavanapaena daxitamatacabijavabelianexa. Tshipaji Dioso aneconijibia pacatane. <sup>11</sup>Dioso asaëyaexanatsi Jesús petëpaecujinae. Nexata paxamë Espíritu Santo itsa pacatsijamatabëeca, pacuenia Jesús Dioso asaëyaexanatsi petëpaecujinae, bajara pijinia pacuenia paxamë ata Dioso pacaasaëyaexanaena panetëpaecujinae. Nexata panetëpaecujinae Dioso pacaperabëasaëyaexanaena Espíritu Santo papecatsijamatabëecaexae.

<sup>12</sup>Tajamonae, bajarapacuenia Dioso nacaexanaena. Bajaraxuata xanepana vajaexanavanapaenexa pacuenia Dioso nacatojitsipa. Copatatsi baja vajacuata vajanatojitsipaecuenia vajaexanabiabijavami. <sup>13</sup>Tshipaji pibisiacuene itsa paexanavanapaejitsipame panijacuata panenatojitsipaecuenia, nexata itsa patëpame, Diosovecua panaxuabijitsipame daxitamatacabijavabelianexa. Itsiata baitsi jane Espíritu

Santo papecayavenonaejamatabëcueneta itsa pacopatame panijacuata panenatojitsipaecuena pibisiacuene paneexanabiabijavami, nexata itsamatacabi paxainae name matacabi apo peverevereaejava.

<sup>14</sup> Pamonae exanavanapa Espíritu Santo pitorobicueniatsi, bajarapamonae Dioso pexi. <sup>15</sup> Itsa nacatsijamatabëjunua Espíritu Santo, Dioso pexitsi nacaexana. Saya bepijajivicueniatsi apo nacaexanae cujunaviaya vajatonacuenebinexa. ¡Jume baja cajena! Biji rajane pepacuene Dioso pexitsi nacaexana. Nexata Espíritu Santo pejamatabëcueneta: “¡Axa!” nacajaiyaexana vajavajëtsijavata Diosojavabelia. <sup>16</sup> Vajajamatabëëthëtota Dioso pijaEspíritu Santo nacayapëtaeyaexana Dioso pexicuenetsi. <sup>17</sup> Nexata Dioso pexixaetsi, itsamatacabi Jesucristo yajava Dioso nacatsicobetsanaena daxita xua Dioso toxaina pexi petsicobetsanaenexa. Nexata Dioso pexixaetsi, pacuenia Jesucristo bejiobiaexanatsi, bajara pijinia pacuenia vaxaitsi ata itsamonae nacabejiobiaexanaena. Nexata jane baja xuacujinae Dioso yajavajinavana paenatsi Dioso pijapenivenivenaenacuataatsia.

<sup>18</sup> Xaniajai. Maparuaeje itsamonae nacabejiobiaexanapona mapanacuataje. Itsiata bajaraxua yabara apo najamatabëxainaetsi. Tsipaji baja yapëtanetsi itsamatacabi bitso vajajamatabëcuenenarëyajavanexa Dioso pijanacuataatsia. <sup>19</sup> Daxita mapanacuapijivi itatsacajinaeya vajënaeevetavanapa petocopiapatsinexatsi pamatacabi Dioso nacaitajëtsijitsia bajarapamonaejavabelia Dioso pexitsi vajanacaexanaecuene. Bajarapamonae vajanacayapëtaenexa Dioso pexicuenetsi, Dioso nacaitajëtsijitsia bajarapamonaejavabelia. Vaxaitsi baja Dioso vajajumecovënëtsivi, Dioso baja nacajamatabëcuenexaniavaeta. <sup>20</sup> Daxitacuene Dioso pexanaejava mapanacuataje vereverecaponaena. Tsipaji bajarapacuenia Dioso copata pevereverecaponaenexa. Bajaraxua apo naneconitsi ata Diosojavabelia, itsiata vereverecaena. Tsipaji baja Dioso copata bajarapacuenia daxitacuene pevereverecaponaenexa Adánpijinë pibisiacuene pexanaejava pejamatabëcueneta. Itsiata baitsi jane itsamatacabi Dioso copiarucaeyaexanaena daxitacuene pevereverecaponaejava. <sup>21</sup> Dioso pexitsi nacaasaëyaexanaena vajatëpaecujinae, pacuenia copiaya Cristo ata Dioso asaëyaexanatsi. Bajarapamatacabi, daxitacuene Dioso pexanaejava mapanacuataje pevereverecaponaejava, Dioso copiarucaeyaexanaena. <sup>22</sup> Yapëtanetsi baja cajena pacuenia itsi daxitacuene mapanacuataje. Pacuenia itsi unupijivi, pejuvijavanë ata, bejiobi abaxë. Tsipaji xaina piavitanecuene, petëpaecuene ata. Nexata abaxë tsitecapona bajarapabejiobicuene mapamatacabi javaberena ataje. <sup>23</sup> Daxita xua tanetsi mapanacuataje, bajaraëxua bajarapacuenia apo bejiobi piavitanecuene yabara. Vaxaitsi ata cajena bejiobitsi tsavanapae. Espíritu Santo vajanacatsijamatabëcaexae, yapëtanetsi mapacueneje. Dioso pexixaetsi itsamatacabi nacaperabëithianaena pacuenia Cristo perabëithianatsi. Nexata bitso jitsipatsi vajajamatabëëthëtovetsina Dioso vajanacaperabëithianaenexa vajaperabëverevereaejavavecua. <sup>24</sup> Jumecovënëtatsi Jesucristo vajanacasivatëpaejava pibisiacuene vaxanaeneconi yabara. Nexata yapëtanetsi Dioso vajanacaperabëithianaevanexa. Bajarapacuenia nexata abaxë copiaevetavanapatsi. Itsa baja Dioso nacarajutsipa xua nacarajutsipaeba, nexata baja apo copiaevetavanapaetsi tsipae vajanacarajutsinexa. Tsipaji baja ajibi tsipae vajayabaracopiaevetavanapaejava itsa baja nacarajutsipa. <sup>25</sup> Nexata abaxë evetavanapatsi xua Dioso nacarajutsipaeba vajanacarajutsinexa. Nexata abaxë copiaevetavanapatsi bajayajebi ata itsajamatabëcuene vecuaxainaenejevatsi.

<sup>26</sup> Vajaajamatabęcuenesaējibixae, Espírítu Santo nacayavenonabiaba mapamat-acabi ataje abaxë bajaraxua vajacopiaevetavanapaenexa. Vaxaitsi apo yapëtaetsi xaniavaetsia vajavajëtsinexa Diosojavabelia. Nexata Espírítu Santo bēpēnēa bitso nacasivanajamatabëxainaeaya nacatovajëtabiaba asaëyata Diosojavabelia. Xua apo vënējonecapanepaetsi, Espírítu Santo nacatovajëtabiaba. <sup>27</sup> Dioso cajena vajanacajamatabęcueneyapëtaenë pacuenia najamatabëxainatsi. Nexata Dioso yapëtane xua Espírítu Santo nacatovajëtsijitsia. Tsipaji Dioso vajanacatojitsipaecuenia, Espírítu Santo nacatovajëtabiaba Diosojavabelia Dioso pijajivixae.

**Pacuenia Dioso pejumecovënëtsijivi daxita pibisiacuene  
tociapiatsi atatsi, bejamatabęcuenematatoxeneta daxita  
bajarapapibisiacuene Jesucristo peyavenonabiabixaeysi yabara pelivaisi**

<sup>28</sup> Yapëtanetsi mapacuenije. Daxita xua apo vajajitsipaecuenē, Dioso nacatocopata vajanacatocopiapatabiabinexa. Nexata bajaraxua nacatocopiapatabiaba saya vajanacajamatabęcuenējëtsinexa. Nexata bajaraxua itsa nacajamatabęcuenējëta, apo nacatsitapexaniacuene itajara. Itsiata Dioso vajajumecovënëtsivi yapëtanetsi bajaraxua vajanacajamatabęcuenējëtsijava pejamatabęcueneta vajanacajamatabęcuenē asaëyaexanaejavanexa Diosojavabelia. Vaxaitsi Dioso nacajunata pexitsi vajanacaexanaenexa pacuenia nacasivanajamatabëxaina. <sup>29</sup> Vajanaexanaevajënaeya ata, Dioso yapëtane pexitsi vajanacaexanaejavanexa. Nexata vajanaexanaevajënaeya ata, Dioso nacasivanajamatabęcuenevereta vajanacaexanaenexa pacuenia pexënato jamatabęcuenēitsi. Nexata vajanaexanaevajënaeya ata, Dioso nacasivanajamatabęcuenevereta Dioso pexënato pejuyapijivitsi ayaibitsaëtotsi vajanacaexanaenexa. <sup>30</sup> Bajarapacuenia vajanaexanaevajënaeya ata, Dioso vajanacasivanajamatabęcuenē veretsixae, najamatabëxaina pexitsi vajanacaexanaenexa. Nexata jane baja mapamatacabitaje nacajunata pexitsi vajanacaexanaenexa. Dioso vajanacajunatsixae, nexata nacavecuajibiaexana pibisiacuene vajaexanaeconimi. Nexata baja aneconijibia Dioso nacatane. Nexata itsamatacabi Dioso yajavajinavanapae-natsi Dioso pijapenivenivenaenacuatatsia.

<sup>31</sup> Nexata Dioso yabara bejumaitsitsi mapacueniaje: “Dioso cajena vajanacayavenonaenë. Nexata itsajivi ata apo caējëpaetsi vajanacajamatabęcuenē matatoxenetsinexa,” bejaiti. <sup>32</sup> Dioso baja cajena apo nacavecuasiva pexënato. Biji rajane copata pexënato vajanacasivatëpaenexa daxita vaxaitsi vajaneconi yabara. Nexata bajarapacuenia vajanacatoexanaexae, yapëtanetsi Dioso vajanacarajutsijavanexa daxita vajanamatavenonaecuenē ata. <sup>33</sup> Dioso baja cajena nacaitapeta. Nexata vaxaitsi yabara Dioso jumaiti: “Bajarapamonae baja aneconijibia taniji,” jai Dioso najumecapanepaeya. Nexata cajena itsajivi ata apo caējëpaetsi vajanacaneconitsinexa Diosojavabelia pibisiacuene vajaexanaejava yabara. <sup>34</sup> Itsajivi ata cajena apo caējëpaetsi vajanacaneconitsiaexanaenexa pibisiacuene vajaexanaejava yabara. Tsipaji baja capanepaeya Jesucristo nacasivatëpa vajanacaneconimatamotsinexa. Nexata Cristo petëpaecujinae Dioso icatsia asaëyaexanatsi. Maparuaeje Jesucristo eca athëbëtatsia, Dioso pemuxuneneta, pecujanenia. Cristo pijajivitsi Diosojavabelia nacayajivicuaucaijai. <sup>35</sup> Cristo baja cajena vajanacaasivanë. Nexata itsajivi ata apo caējëpaetsi Cristo vajanacaasivacuene vajanavecuacopiarucaeyaexanaenexa. Nacabejiobiaexanae ata tsipae, piayapëbejecuene nacatocopiapatsi ata tsipae, itsiata vajanacaasivanë

Cristo tsiteca nacaasiva tsipae. Vajanacaitoyaxae, nacabarajinae ata tsipae, vajani tsabiabi ata tsipae, itsiata vajanacaasivanë Cristo tsiteca nacaasiva tsipae. Bitso bejiobi atatsi tsipae, bitso nacatsiyayi ata tsipae, nacabeyaxuabiapaebi ata tsipae, daxita bajarapitsicuene nacatocopiapatsi ata tsipae, itsiata vajanacaasivanë Cristo tsiteca nacaasiva tsipae. <sup>36</sup>Vaxaitsi yabara mapajamatabëcuenelivaisi jëpaje. Bajayata Dioso pijajivi navajunupaeba Diosojavabelia pacuenia itsamonae bejiobiaexanaponatsi. Dioso pejumelivaisibaxutota bajarapamonaemi penavajunupaebijume itanerubena. Jumaitsi mapacueniajæ:

Xamë Diosomë, panijajivixanë, daxitamatacabi itsamonae jamatabëpanebeyejebabiaba picani. Pacuenia oveja pebeyaxuabinexa capona, bajarapacuenia jamatabëpaneexanabiaba, jai Dioso pejumelivaisibaxutota.

Bajara pijinia pacuenia vaxaitsi ata aeconoxae nacaexanapona. <sup>37</sup>Nexata daxita xua pibisiacuene, nacatocopiapatabiabiana. Nacabejiobiaexanabiabiana. Nexata itsiata vaxaitsi bajaraxua jamatabëcuene matatoxenetabianatsi. Tsipaji Cristo vajanacaasivanë, nacayavenonabiabiana. <sup>38</sup>Nexata yapëtaniji mapacuenije. Itsacuenejavayo ata apo caëjëpaetsi Cristo vajanacaasivacuene vajanacavecuacopiarucaeya exanaenexa. Vajatëpaecuene ata, vajaasaëtsavanapaecuene ata, ángelevi ata, dovathivi penamatacaitorobivi ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Piayapëbejecuene, xua baja nacatocopiapata, xua ata abaxë nacatocopiapatsijitsia, daxita bajaraxua ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. <sup>39</sup>Athëbëabetisia vajaponaejava ata, ira bëxëpanabereca vajaponaejava ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Dioso pexanaejava, itsacuenejavayo ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Yapëtanetsi Dioso vajanacaasivajava. Tsipaji Dioso vajanacaasivaxae, vajatuxanenë Jesucristo athëbëvetsica itorobicatsi vajanacasivatëpaenexa mapanacuataje.

### **Pacuenia Dioso pijajivinexa itapeta judíovi yabara pelivaisi**

**9** Najamatabëcuenecopatajë Cristojavabelia. Nexata apo najumetsënëtsinë. Pexaniajailivaisi cajena pacatoyaquinatsi. Palivaisi pacatoyaquinatsi pexaniajailivaisicuene tayapëtaenexa, Espíritu Santo tajamatabëëthëtota neyapëtaeyaexana. <sup>2</sup>Bitso sivanajamatabëxainajë tavëna judíovi, Israel nacuapijivi. Belia betaajamatabëtane tasivanajamatabëxainaejava bajarapamonae. <sup>3</sup>Bajarapamonae apo pejumecovënëtsixae Cristo, bitso sivanajamatabëxainajë. Bajaraxuata bajarapamonae yabara jamatabëjumaitsinë: “Itsa xanë Dioso netocopatsipa tanaxuabinexa Cristovecua, bajarapamonae juya pecapanepaenexatsi, nexata bajarapacuenia exanaejitsipajë bajarapamonae Dioso pecapanepaenexatsi,” jamatabëjanë belia tavëna judíovi yabara. <sup>4</sup>Bajarapamonae judíovi, Israelpijinë pemoxi. Bajarapamonae pijasalinaivimijavabelia bajayata picani Dioso ayaicuenia yavenonabiaba. Itsiata bajarapamonaemi Dioso apo jumecovënëtsi. Dioso picani itapeta bajarapamonaemi Dioso pexi pexanaenexa. Bajarapamonaemi tanenua baja picani Dioso pijapenivenivenaecotia. Dioso baja picani najumecapanepaeya jumaitsinua bajarapamonaemijavabelia peyavenonabiabinexa. Dioso Moiséspijinëta penajumecopatsilivaisi ata, rajuta picani bajarapamonaemi pejumecov-

ënētavanapaenexa. Dioso picani itorobanua bajarapamonaemi pexanaenexa templo, bajarapabota pevajęcabiabinexa Diosojavabelia. Dioso picani najumecapanepaeya jumaitsinua petoitorobinexatsica Cristo bajarapamonaemi picani peca-panepaenęcexatsi pibisiacuene pexanaeconimivecua. <sup>5</sup> Bajarapamonaemi pijasalinaivimi, pevęcęjonevimi Dioso pejumecovęcęnsijava. Cristo ita naexana mapanacuataje, judfönęcuenia naexana. Cristo nexata pijamonae judfovi. Bajaraponę Cristo, Diosonę baja cajena, daxitacuene pevetsinę. Nexata bajaraponęjavabelia jivi jumai tsabiabi tsane: “Xamę Cristomę, bitso baja cajena ayaijamatabęcuenenęcę,” jai tsabiabi tsane daxitamatacabijavabelianexa. Bajara itsi tsane.

<sup>6</sup> Itsiata daxita judfovi apo jumecovęcęnsi pacuenia Dioso najumecapanepaeya jumaiti. Nexata Dioso apo toexanae daxita judfovijavabelia pacuenia Dioso najumecapanepaeya jumaiti. Nexata Dioso yabara vaxaitsi jamatabęcuenenavęcxaniabiaya apo bejumaititsi mapacueniaje: “Pacuenia Dioso najumecapanepaeya jumaiti judfovijavabelia petoexanaenexa, bajarapacuenia itsiata Dioso apo toexanae daxita judfovijavabelia,” apo bejaiti vaxaitsi jamatabęcuenenavęcxaniabiaya Dioso yabara. Bajarapacuenia Dioso yabara vaxaitsi jamatabęcuenenavęcxaniabiaya apo bejumaititsi. Tsipaji Dioso tajęvelia apo itapetsi daxita judfovi pijajivinexa. Bajaraxuata pacuenia Dioso tajęvelia najumecapanepaeya jumaiti, apo toexanae daxita judfovijavabelia. <sup>7</sup> Tsipaji bajayata Abrahampijinę pemomoxi ayabitsaęto xainae ata, daxita itsiata Dioso apo totaętsi Abrahampijinę pepo pemomoxicuenia. Dioso tajęvelia jumaiti Abrahampijinęjavabelia mapacueniaje: “Anijanębeje nexęnatobeje xainae atamę tsane, taitapetsinęxae, caenę nexęnato, Isaac, pexi catotaenatsi pepo nemomoxicuenia,” jai Dioso. <sup>8</sup> Bajaraxuata yapętanętsi mapacuenęje. Pajivi naexanae ata Abrahampijinę pemomoxiyajuvęcęnjivi, itsiata bajarapajivi Dioso apo taętsi Abrahampijinę pepo pemomojivicuenia. Matapania pajivi jumecovęcęnęta pacuenia Dioso najumecapanepaeya jumaiti, bajarapajivi jane baja Abrahampijinę pepo pemomojivicuenia tanętsi Dioso. <sup>9</sup> Dioso tajęvelia najumecapanepaeya jumaiti Abrahampijinęjavabelia mapacueniaje: “Icatsia caevaicujinae patsianaję. Nexata nijava, Sara, xainaena pexęnatonacueto,” jai Dioso Abrahampijinęjavabelia Isaacpjinęnexa yabara.

<sup>10</sup> Nexata jane baja xuacujinae Isaacpjinę naexana. Bajaraxuacujinae icatsia bexęa Isaacpjinę baja pepuanacojiovi, Dioso icatsia tajęvelia jumaiti vajasalinainę Isaacpjinę pijava Rebecapijivajavabelia, Rebecapijiva baja pepuayacotaponaponae sapananębejenexa. <sup>11-13</sup> Itsa abaxę bajaraponębeje apo naexanaebeje, pexaniacuene ata abaxę itsa apo exanaebeje, pibisiacuene ata abaxę itsa apo exanaebeje, bajarapamatacabi Dioso tajęvelia jumaiti Rebecapijivajavabelia mapacueniaje: “Panacuetonęyo copiaya cavecuanaexanaena, bajaraponęyo jamatabęcueenevętsiana pejuyapijinę pitorobabiabinexatsi pijajivitonęcuenia,” jai Dioso tajęvelia Rebecapijivajavabelia. Bajarapacuenia Dioso pejumaitisijava Rebecapijivajavabelia najumęjępabeje pacuenia jumaiti Dioso pejumelivaisibaxutota. Rebecapijiva pexęnatobeje yabara Dioso pejumelivaisibaxutota jumaiti mapacueniaje: “Asivanę juyapijinę Jacob, matapijinę Esaú matatoxenętsia,” jai Dioso pejumelivaisibaxutota Dioso pejumaitisijava. Nexata bajaraponębeje tocopiapatatsibeje pacuenia Dioso tajęvelia jumaiti pacuenia Dioso itapetsijsiatsi juyapijinę. Baitsi Jacob Dioso pijajivitonęcxata itapętsi matapijinęvecua. Nexata bajarapacuenia yapętanętsi mapacuenęje. Dioso cajena baitapeta pajivi jamatabęitapeta pijajivitonęcxata. Dioso apo itapetsi bajara-

pajivi pexaniacuenē pexanaejava yabara. Bajarapacuenia Dioso tajēvelia itapeta juyapijiniē matapijiniēvecua penaexanaevajēnaeyabeje ata cajena.

<sup>14</sup> Pajivi Dioso jitsipa pitapetsinexa, nexata itsa itapeta, bajaraxua yabara vaxaitsi apo bejumaitstsi mapacueniaje: “Dioso baja pacuenia exana, apo xanepanae,” apo bejaitstsi vaxaitsi. <sup>15</sup> Tsipaji cajena Dioso bajayata jumaitstsi Moiséspijinējavabelia: “Pajivi jamatabēitaxutotsoniataniji, itaxutotsoniataenajē,” jai Dioso. <sup>16</sup> Nexata pajivi Dioso jamatabēitaxutotsoniatane, itaxutotsoniatane. Nexata itsajivi apo jamatabējumaitstsi ata: “Jitsipajē xanē Dioso taneitaxutotsoniataejava,” apo jamatabējai ata, itsiata Dioso itaxutotsoniatanetsi. Bajarapajivi itsacuenējavayo ata Dioso pejitsipaecuenia apo exanabiabi ata, itsiata Dioso itaxutotsoniatanetsi. <sup>17</sup> Palivaisi bajayata Dioso jumaitstsi Egiptonacua pevetsinējavabelia, bajarapalivaisi Dioso pejumelivaisibaxutota ruca. Jumai tsarucae mapacueniaje: “Xanē catocopatatsi nevetsinexa nijaira. Pinijicuenē taexanaejava exanaenajē paxamē tuatuajēta. Itsiata baitstsi jane apo nejumecovēnētstimē tsane. Nexata daxita nacuapijivi neyapētaena tasaēnēcuenē,” jai tsarucae Dioso pejumelivaisibaxutota Egiptonacua pevetsinējavabelia Dioso pejumaitstsijava. <sup>18</sup> Nexata pajivi Dioso jamatabēitaxutotsoniatane, itaxutotsoniatane. Pajivi pijinia Dioso jamatabējamatabēcuenetajayaexana pejumecovēnētstsiyanivatsi, ajamatabēcuenetajayaexana.

<sup>19</sup> Nexata meta Dioso yabara pajumaitstimē tsane: “Bajarapacuenia Dioso jivi itsa ajamatabēcuenetajayaexana pejumecovēnētstsiyanivatsi, nexata bajarapajivi Dioso apo benaneconitsia exanae. Tsipaji bajarapajivi apo jumecovēnētstsi Dioso piijamatabēcuenetajaya exanaexaetsi” pajamē meta tsane Dioso yabara. <sup>20</sup> Tajamonae, pētsa bajarapacuenia pajumaitstimē. Dioso yabara cajena bajarapacuenia apo bepajumaitstimē. Tsipaji Dioso pacaexana. Canalito itsa caējēpaejitsipatsi pecuaicuaijainexa, itsacanalitovecua saicayacuenia faratsi atatsi, pefaratsivatsijavabelia apo jumaitstsi tsipae: “¿Detsa xuajitsia itsacanalitovecua saicayacuenia nefaratame?” apo jai tsipae pefaratsivatsijavabelia. <sup>21</sup> Tsipaji atsananitota canalito pefaratsiva caējēpatsi canalito pefaratsinexa pacuenia jamatabēfarata. Nexata caējēpatsi pefaratsinexa copiaya pexaniacanalito bo tuatuajēta itabētstsiaya peetsinexa. Bajaraxuacujinae bajara paatsananitoyajuvēnējavata caējēpatsi pefaratsinexa itsacanalito, beveliacanalito, pecajayababiabinexa saya.

<sup>22</sup> Bajara pijinia pacuenia Dioso baja exana jivijavabelia pacuenia tsitaxanepanatsi. Ayaicuenia Dioso jamatabēnaneconitsiaexana daxita pamonae naneconita bajaraponējavabelia. Jamatabētsitajētana pesaē bajarapamonaejavabelia. Itsiata baitstsi jane abaxē bajayajebi Dioso najamatabēcuenecatata peverebiabivijavabelianexa. <sup>23</sup> Biji rajane pamonae Dioso jamatabēcapanepa, bajarapamonae capanepaena. Bajarapacuenia Dioso jamatabēexana vaxaitsi vajanacaitaxutotsoniataevijavaberena, vajanacatsitanajamatabēcuenē itajētstsinexa ayaijamatabēcuenē pexainaejava. Tsipaji baja cajena vajanaexanaevajēnaeya ata, Dioso nacaitapeta vajayajavajinavanapaenexa athēbētatsia. <sup>24</sup> Vaxaitsi judíoviyajuvēnēvitsi. Itsamonae vaxaitsiyajuvēnēvi apo judíovi. Itsiata Dioso nacajunata daxitatsi pijajivinxatsi. <sup>25</sup> Dioso pejumelivaisibaxutota, bajayata Oseaspijinē peyaquinaebaxutota, Dioso pejumaitstsijava apo judíovi yabara, tajēvelia jumaitstsi mapacueniaje:

Pamonae picani apo tajajivi, bajarapamonae yabara jumaitstinē tsane: “Tajajivi raja mapamonaeje,” janē tsane. Bajarapamonae picani apo jitsipaenē. Itsiata bajara-

pamonae yabara jumaitsinë tsane: “Tajajivi raja mapamonaeje, tasivavi,” janë tsane. <sup>26</sup> Panacuapijivijavabelia picani jumaitsinë tsane: “Paxamë raja apo patajajivimë,” janë tsane picani, itsiata bajarapanacuapijivi bexëa nejumecovënët-siana. Nexata bajarapanacuapijivi yabara itsamonae jumai tsane: “Mara pamonaeje Dioso piasaëtsaponaponaenë pexije,” jai tsane,

jai Oseaspijinë bajayata peyaquinaebaxutota, pamonae apo judíovi ata, Dioso pija-jivi pexanaejavanexatsi yabara.

<sup>27</sup> Isafaspijinë pijinia bajayata tajëvelia judíovi yabara jumaitsi mapacueniaje: “Israelpijinë pemomoxi bitso ayaibitsaëtoxaneto tsane. Pacuenia manuamenepiji-tajetaboatsapërë itsi, bajara itsane. Itsiata bailsi jane bajarapamonaeajuvënëvi, caejiviyobeje saya, Dioso capanepaenatsi. <sup>28</sup> Daxita pamonae naneconita Diosojavabelia, bajarapamonae naxantsiayo Dioso naneconitsiaexanaena,” jai Isafaspijinë peyaquinaebaxutota. <sup>29</sup> Itsabaxutota pijinia Isafaspijinë peyaquinaebaxutota, icatsia jumaitsi mapacueniaje:

Dioso raja ángelevi ayaibitsaëtoxaneto penamatacaitorobinë. Bajaraponë Dioso itsa apo nacaitaxutotsoniatae tsipae, nexata daxitatsi vaxaitsi, Israelpijinë pemomoxitsi, nacaverebiabijitsipa. Nacaverebiabijitsipa pacuenia bajayata verebiabatsi daxita Sodoma tomarapijivimi, Gomorra tomarapijivimi ata, jai Isafaspijinë peyaquinaebaxutota.

### **Pacuenia judíovi apo jumecovënëtsi pexanialivaisi jivi pecapanepaelivaisinexatsi yabara pelivaisi**

<sup>30</sup> Vaxaitsi yapëtanetsi mapacuenieje. Apo judíovi picani apo jumecovënëtsi ata Dioso aneconijibia petaenexatsi, itsiata Dioso aneconijibia tanetsi, pejumecovënëtsixae Jesucristo pesivatëpaejavatsi pibisiacuene pexanaeneconi yabara. <sup>31</sup> Itsiata bailsi jane judíovi jamatabëcuenenavëxaniabiaya jumai tsabiabi: “Itsa jumecovënëtavanapaenatsi Dioso Moiséspijinëta penajumecopatsilivaisi, nexata Dioso aneconijibia nacataena,” jai tsabiabi. Itsiata bajaraxua yabara Dioso aneconijibia apo taetsi. Tsipaji apo cajëpaetsi pejumecovënëtsicapaneapenexa bajarapalivaisi. <sup>32</sup> Apo cajëpaetsi Dioso aneconijibia petaenexatsi. Tsipaji judíovi apo jumecovënëtsi Jesucristo pesivatëpaejavatsi pibisiacuene pexanaeneconi yabara. Biji rajane jamatabëcuenenavëxaniabiaya jumai tsabiabi. “Itsa jumecovënëtavana-paenatsi Dioso Moiséspijinëta penajumecopatsilivaisi, nexata Dioso aneconijibia nacataena,” jai tsabiabi. Bajaraxuata judíovi Diosovecua naxuabijavanapa, Cristo Dioso athëbëvetsica pitorobijavatsitsica, apo pejumecovënëtsixae. Caranata saya anaepanabiaba bajarapalivaisi yabara. <sup>33</sup> Dioso tajëvelia Cristo yabara pejumaitsi-java, Dioso pejumelivaisibaxutota jumaitsi mapacueniaje:

Puenetanutsianajë Jerusalén tomarata ponë itorobijitsianë jivi pecapanepaenexa.

Bajaraponë itsamonae apo jumecovënëtsitsi tsane. Nexata bajarapamonae nevecuanaxuabiana. Itsiata bailsi jane pajivi jumecovënëtsiana bajaraponë, bajarapajivi apo nacueratsi tsane,

jai tajëvelia Dioso pejumelivaisibaxutota Cristo jivi pesivatëpaejavanexa pibisiacuene pexanaeneconi yabara.

**10** Tajamonae, jitsipajë bitso tajamatabëëthëtovetsina judíovi Dioso pecapanepaenexatsi. Bajaraxuata tovajëtabiabajë Diosojavabelia. <sup>2</sup> Judíovi picani Dioso ayaiacuenia bitso jamatabëtonacuenebabiaba Dioso pesivabarëyanex-



atsi. Itsiata baitsi jane apo yapëtae pacuenia Dioso tojitsipatsi petoexanavana-paenexa. Judíovi saya jamatabëcuenenavëxaniababiaba.<sup>3</sup> Bajarapamonae apo yapëtae pacuenia exanaejitsia Dioso aneconijibia petaenexatsi. Jamatabëcuenenavëxaniabiaya jumai tsabiabi: “Itsa jumecovënétavanapaenatsi Dioso Moiséspijinëta penajumecopatsilivaisi, nexata Dioso aneconijibia nacataena,” jai tsabiabi bajarapamonae. Apo jumecovënëtsi pacuenia Dioso itorobatsi pexanavanapaenexa Dioso aneconijibia petaenexatsi.<sup>4</sup> Pajivi jumecovënëta Cristo pesivatëpaejavatsi pibisiacuene pexanaeneconi yabara, bajarapajivi Dioso baja aneconijibia tanetsi. Bajaraxuata pematasënëta baja apo benajamatabëxainae pejumecovënëtsinexa icatsia Dioso Moiséspijinëta penajumecopatsilivaisi Dioso aneconijibia petaenexatsi.

<sup>5</sup>Pamonae jitsipa Dioso aneconijibia petaenexatsi pejumecovënëtsixae Dioso Moiséspijinëta penajumecopatsilivaisi, bajarapamonae yabara Moiséspijinë bajayata peyaquinaelivaisi jumaitsi mapacueniaje: “Pajivi jumecovënëtsicapanepeana daxita pacuenia bajarapalivaisita itorobatsi, bajarapajivi matapania Dioso aneconijibia tanetsi,” jai Moiséspijinë bajayata peyaquinaelivaisita.<sup>6</sup> Nexata baja pamonae jumecovënëta Cristo pesivatëpaejavatsi pibisiacuene pexanaeneconi yabara, bajarapamonae pejumeitavetsinexatsi, Dioso jumaitsi mapacueniaje: “Pëtsa pajamatabëjumaitsimë: ‘¿Jipatsa meta athëbëabetsia ponaena mapanacuayabetsicaje pebarëpatsinexatsica vajanacayavenonaenënexa?’ pajamatabëjamë pëtsa.<sup>7</sup> Pëtsa pajamatabëjumaitsimënu: ‘¿Jipatsa meta ponaena, itsabereca petëpaevi jinavanapa, piasaëyaexanaenexa petëpaevivëcua vajanacayavenonaenënexa?’ pajamatabëjamë pëtsa, jai Dioso jivi pejumeitavetsijava. Nexata itsajivi ata apo bejamatabëjumaitsi bajarapacuenia. Tsipaji baja Cristo athëbëvetsica patsica vajanacasivatëpaenexa mapanacuataje. Petëpaeucujinae ata baja icatsia Cristo asaë petëpaejavavecua vajanacapanepaenexa.<sup>8</sup> Dioso aneconijibia vajanacataejavanexa yabara, Dioso pejumelivaisibaxutota jumaitsi mapacueniaje: “Dioso rabaja pejumelivaisi panatoxainame. Bajara palivaisi yabara panabarëcuaicuaijamë tsabiabi. Panejamatabëëthëtota ata baja bajarapalivaisi yabara panajamatabëxainabiabame,” jai Dioso pejumelivaisibaxutota. Bajarapalivaisibeje nalivaisijëpabeje palivaisi paxanë pacatsipaebatsi panejumecovënëtsinexa Cristo papecasivatëpaejava pibisiacuene paneexanaeneconi yabara.<sup>9</sup> Itsamatacabi Diosojavabelia papecacapanepaevi tsane itsa paexanavana-paename mapacueniaje. Panavajunupaebabiabare itsamonaejavabelia panejumecovënëtsijava Jesús Dioso pexënatocuene. Pajumecovënërenua panejamatabëëthëttojavavetsina Jesús petëpaeucujinae icatsia Dioso piasaëyaexanaejavatsi.<sup>10</sup> Tsipaji baja jivi pejamatabëëthëtota jumecovënëta Cristo pesivatëpaejavatsi pibisiacuene pexanaeneconi yabara. Bajaraxuata Dioso baja aneconijibia tanetsi. Jivi pecuibovojotota navajunupaebabiaba pejumecovënëtsijava Cristo pesivatëpaejavatsi pibisiacuene pexanaeneconi yabara. Nexata bajarapacuenia nayapëtane bajarapajivi Dioso pepacuene pecapanepaejavanexatsi.

<sup>11</sup>Dioso pejumelivaisibaxutota jumaitsi mapacueniaje: “Pajivi jumecovënëtsiana, bajaraponë apo nacueratsi tsane,” jai Dioso pejumelivaisibaxutota Cristo jivi pesivatëpaejavanexa pibisiacuene pexanaeneconi yabara.<sup>12</sup> Dioso raja jivi najëpaeya tane. Pacuenia tane judíovi, bajarapacuenia tane apo judíovi ata. Caenë, Dioso, daxita bajarapamonae pijatuxanenë. Ayaicuenia Dioso itaxutotsoniatane daxita pamonae vajëta bajaraponëjavabelia.<sup>13</sup> Cristojavabelia jivi penavajëtsijavanexa, Dioso pejumelivaisibaxutota jumaitsi mapacueniaje: “Pajivi pepo petuxanenëjavabelia

navajëta pecapanepaenexatsi, bajarapajivi capanepaenatsi,” jai Dioso pejumelivaisibaxutota. <sup>14</sup> Itsiata acuenebi itsajivi ata penavajëtsinexa Cristojavabelia itsa abaxë apo jumecovënëtsi Cristo pesivatëpaejavatsi pibisiacuene pexanaeconi yabara. Itsajivi ata acuenebi pejumecovënëtsinexa Cristo pelivaisi itsa abaxë apo yapëtae Cristo pelivaisi. Itsajivi ata acuenebi peyapëtaenexa Cristo pelivaisi itsa abaxë apo tsipaebitsi. <sup>15</sup> Dioso pijajivi itsa apo itorobi tsipae daxitajivijava Cristo pelivaisi petsipaebaponaenexa, nexata itsajivi ata apo yapëtae tsipae Cristo pelivaisi. Dioso pejumelivaisi jivi petsipaebaponaevinexa yabara, Dioso pejumelivaisibaxutota jumaitsi mapacueniaje: “¡Pexaniacuene bitso itsa najetarubena pexanialivaisi jivi petsipaebivinexa!” jai.

<sup>16</sup> Pexanialivaisi tsipaebi atatsi, itsiata daxitajivi apo jitsipae pejumecovënëtsinexa pexanialivaisi pecapanepaelivaisinexatsi picani Diosojavabelia. Isafaspijnë ata, bajayata jivi apo jumecovënëtsitsi. Nexata Isafaspijnë Diosojavabelia jumaitsi mapacueniaje: “Tajatuxanenë, daxitajivi apo nejumecovënëtsi tatsipaebilivaisi. Caejiviyobeje saya nejumecovënëta,” jai bajayata Isafaspijnë Diosojavabelia. <sup>17</sup> Nexata jivi itsa tsipaebatsi Cristo pesivatëpaejavatsi pibisiacuene pexanaeconi yabara pejumetaexae, jumecovënëta baja.

<sup>18</sup> Judíovi ata baja picani jumetane Cristo pesivatëpaejavatsi pibisiacuene pexanaeconi yabara. Itsiata judíovi apo jumecovënëtsi. Dioso pejumelivaisibaxutota jumaitsi mapacueniaje:

Dioso pijajivi Dioso pejumelivaisi tsipaebanajetarubena daxitanacuanëjjava. Nexata baja Dioso pejumelivaisi yacaëjëpa daxitanacuanëjjava, jai Dioso pejumelivaisibaxutota.

<sup>19</sup> Judíovi baja picani jumetane Cristo pesivatëpaejavatsi pibisiacuene pexanaeconi yabara. Itsiata judíovi apo jumecovënëtsi. Moisésipijnë bajayata tajëvelia yaquina judíovi Dioso apo pejumecovënëtsijavanexa. Yaquinanua apo judíovi juya Dioso pejumecovënëtsijavanexa. Judíovijavabelia Dioso tajëvelia pejumaitzijava, bajayata Moisésipijnë yaquina mapacueniaje:

Itsanacuanëprijivi paxamë bijiaya panaëcotabiabame. Bajarapamonae tajajivi exanaenajë. Nexata bajarapamonae pacuenecaëbianame. Bajarapamonae tajumelivaisi apo jamatabëjumeyapëtae picani. Itsiata tajajivi exanaenajë. Nexata bajarapamonae pacuenecaëbiaanaepanaename,

jai Moisésipijnë bajayata peyaquinaebaxutota Dioso tajëvelia pejumaitzijava judíovijavabelia.

<sup>20</sup> Isafaspijnë ata bajayata ajumejunavijibia jumaitsi Dioso tajëvelia pejumaitzijava. Apo judíovi yabara Dioso pejumaitzijava, Isafaspijnë jumaitsi mapacueniaje:

“Pamonae picani apo nejitsipae, apo nejumecovënëtsinua, bajarapamonae itsiata itsamatacabi nejumecovënëtsiana. Nexata baja neyapëtaena. Bajarapamonae apo nevënëlivaisiyanijobi ata, najamatabëcueneitajëtsianajë bajarapamonaejavabelia,” jai Dioso tajëvelia,

jai bajayata Isafaspijnë.

Bajaraxuata nayapëtane tajëvelia Dioso penajamatabëcueneveretsijava pecapanepaenexa apo judíovi ata. <sup>21</sup> Biji rajane judíovi yabara Dioso pejumaitzijava, Isafaspijnë bajayata jumaitsi mapacueniaje: “Daxitamatacabi junatabiabajë pamonae apo nejumecovënëtsi. Bajarapamonae apo exanae taitorobicuena,” jai bajayata Isafaspijnë Dioso pejumaitzijava judíovi yabara. Nexata nayapë-

tane mapacueneye. Judíovi junatsi atatsi Dioso, itsiata apo jumecovënëtsi Dioso pecapanepaenexatsi.

**Pacuenia judíovi, Israel nacuapijiviyajuvënëvi,  
Dioso capanepaejitsiatsi yabara pelivaisi**

**11** ¿Dioso tsabaja pijajivi judíovi, Israel nacuapijivi, daxita Dioso navecuaxuaba? Jume raja. Apo navecuaxuabi. Xanë ata raja judíonënë, Israel nacuapijinënë. Tajasalinainë cajena Abrahampijinë. Benjamínpijinë ata pemomoxiyajuvënënë. <sup>2</sup>Bajayata baja cajena vajavajënaeyami, Dioso pijajivinexa itapeta judíovi, Israel nacuapijivi. Nexata Dioso apo navecuaxuabi tsane bajarapamona. Payapëtaneme rajaba pacuenia Dioso pejumelivaisibaxutota jumaitsi profeta Elíaspijinë yabara. Profeta Elíaspijinë pina pevajëtsijavata Diosojavabelia, neconitsiaya jumaitsi Israel nacuapijivi yabara mapacueniaje: <sup>3</sup>“Tajatuxanenë, mapamonaeye, Israel nacuapijivi, catobepona daxita pecajumelivaisipaebivimi profetavi. Toxobianua altarvënëjavanë, itsajota tajuitabiaba dajubivi pecarajutsinexa ofrendacuenia. Nexata baja xanë caenënë, nijajivitonënë, nacopatajë. Xanë ata baja jamatabënebeyaxuaba,” jai pina profeta Elíaspijinë Diosojavabelia Israel nacuapijivi yabara. <sup>4</sup>Itsiata baitsi jane Dioso pina jumaitsi profeta Elíaspijinëjavabelia mapacueniaje: “Apo caenëmë raja. Xainajë baja tajajivi, siete mil ponëbeje, Israel nacuapijiviyajuvënëvi. Bajarapamona xaniavaetia nejumecovënëtavanapa. Pematabacabëta apo tonubena penavajëcaenexa Baalvënënë, jumapectaeteya pexanaenëtsi, pitabarata,” jai pina Dioso bajayata profeta Elíaspijinëjavabelia. <sup>5</sup>Bajara pijinia itsi maparucae ataje. Caejiviyobeje pijinia Dioso itapetatsi pijajivinexa pitaxutotsoniataexaetsi. <sup>6</sup>Bajarapamona Dioso pexaniacuene petoexanavanapaejava yabara, apo itapetsitsi. Bajarapamona Dioso itsa itapetsipatsi epexaniacuene Dioso petoexanavanapaejava yabara, nexata saya bajarapamona Dioso itapetsipatsi epexaniacuene petoexanavanapaejava yabara. Nexata bajarapamona saya Dioso pitaxutotsoniataexaetsi, apo itapetsitsi tsipae.

<sup>7</sup>Mara pacuenia itsi Israel nacuapijivije, Dioso apo pejumecovënëtsivi. Bajarapamona apo jumecovënëtsi Dioso pecapanepaejavanexatsi. Itsiata baitsi jane bajarapamonaeyajuvënëvi, caejiviyobeje, Dioso itapetatsi pijajivinexa. Bajarapamona jumecovënëta pexaniajailivaisi, Dioso pejumelivaisi, pecapanepaelivaisinexatsi Diosojavabelia. Itsamona apo jumecovënëtsi bajarapalivaisi. Tsipaji jamatabëcuenetaja. Apo jumecovënëtsi Dioso pejumelivaisi, pexaniajailivaisi, pecapanepaelivaisinexatsi picani Diosojavabelia. <sup>8</sup>Israel nacuapijivi, Dioso apo pejumecovënëtsivi, yabara Dioso pejumelivaisibaxutota jumaitsi mapacueniaje: “Dioso jamatabëcuenetajayaexanatsi. Bajaraxuata bajarapamona lebabibi ata Dioso pejumelivaisibaxuto, apo jumecovënëtsi. Bajara itsi bajarapamona mapamatacabijavaberena ataje,” jai Dioso pejumelivaisibaxutota Israel nacuapijivi, Dioso apo pejumecovënëtsivi, yabara. <sup>9</sup>Israel nacuapijivi, Dioso apo pejumecovënëtsivi, yabara bajayata Davidpijinë ata jumaitsi mapacueniaje:

Israel nacuapijivi fiesta itsa exanabiaba, jamatabëcuenenavëxaniabiaya jamatabëjumi tsabiabi: “Dioso cajena nacasivabarëya. Bajaraxuata ayaijava vajaxainaejava xainatsi,” jamatabëjai tsabiabi. Itsiata baitsi jane pebarëjavavata, itsamatacabi jemata tocopiapatsianatsi pijaneconi yabara Dioso jane baja penaneconitsiaexanaejavanexatsi. <sup>10</sup>Bajarapamona apo yapëtae pijaneconi peyajavajina-

vanapaejava daxitamatacabi. Pacuenia bitso piarevejava pecaponaevi, nabëxët-sutsiaya bacapona, bajara itsi bajarapamonae pejamatabëëthëtotà pijaneconi yabara. Bitso yanajamatabëxaina pijaneconi, jai bajayata Davidpijinë Israel nacuapijivi, Dioso apo pejumecovënëtsivi, yabara.

### **Pacuenia apo judíovi ata Dioso capanepaejitsiatsi yabara pelivaisi**

<sup>11</sup> Judíovi apo jumecovënëtsi ata Cristo pesivatëpaejavatsi pecapanepaenexatsi Diosojavabelia, itsiata abaxë Dioso apo navecuaxuabi judíovi daxitamatacabijavabelianexa. Judíovi apo pejumecovënëtsixae Cristo pelivaisi, juya apo judíovi Dioso tocopatatsi pejumecovënëtsinexa Cristo pelivaisi pecapanepaenexatsi Diosojavabelia. Nexata apo judíovi ata pejumecovënëtsijava Cristo pelivaisi, judíovi itsa taena, nexata judíovi ata jumecovënëtsiana Cristo pelivaisi pecapanepaenexatsi Diosojavabelia. <sup>12</sup> Judíovi apo jumecovënëtsi Cristo pelivaisi pecapanepaenexatsi Diosojavabelia. Bajaraxuata juya Dioso tocopata apo judíovi ata pejumecovënëtsinexa Cristo pelivaisi pecapanepaenexatsi Diosojavabelia. Nexata apo judíovi ata bajarapacuenia caxitajaraba baja pexaniacuene, judíovi apo pejumecovënëtsixae Cristo pelivaisi. Bajarapacuenia apo judíovi ata aeconoxae baja toxanepanatsi Dioso petocopatsixaetsi pejumecovënëtsinexa Cristo pelivaisi. Itsiata baitsi jane pacuenia apo judíovi ata aeconoxae toxanepanatsi, bajaraxua matatoxenetsia bitso pexaniacuene caxitajarabiana pamatacabi judíovi ayaibitsaëto jane baja jumecovënëtsiana Cristo pelivaisi.

<sup>13</sup> Aeconoxae baja palivaisi pacatsipaebatsi, bajarapalivaisi paxamë apo pajudíovinexamë. Jitsipajë paneyapëtaenexa Dioso taneitorobicuene. Dioso nitoroba paxamë apo pajudíovimëjavabelia patacatsipaebinexa Dioso pejumelivaisi. Nexata jamatabëjumainsinë: “Dioso cajena netocopata ayaijamatabëcuene pexainaelivaisi jivi tatsipaebaponaenexa,” jamatabëjanë. <sup>14</sup> Bajarapacuenia Dioso pejumelivaisi pacatsipaebaponatsi tsipaji jitsipajë tajaviriavi ata, judíovi, Dioso petoexanaenexatsi pacuenia paxamë ata Dioso pacatoexana papecacapanepaenexa. Nexata meta bajarapacuenia judíoviyajuvënëvi ata jumecovënëtsiana Cristo pelivaisi pecapanepaenexatsi Diosojavabelia. <sup>15</sup> Judíoviyajuvënëvi Cristo navecuaitaveta. Nexata juya pamonaë apo judíovi, Dioso barajamatabëcuenexanepanaeyatane. Pamatacabi judíovi jumecovënëtsiana Cristo pelivaisi, Dioso pitsianatsi pijajivinexa. Bajaraxua bitso pinijicuene tsane. Judíovi aeconoxae bepetëpaevi Dioso tanetsi apo pejumecovënëtsixae Cristo pelivaisi. Nexata pamatacabi judíovi jumecovënëtsiana Cristo pelivaisi, Dioso taenatsi petëpaequinaë bepiasaëyaexanaevitsi. <sup>16</sup> Panbë jivi ofrendacuenia itsa rajuta Diosojavabelia, copiaya pexanaepanbë barajuta. Nexata bajarapapanmatabëta cotocaevi pexanaepan ata, apo rajutsi ata Diosojavabelia, Dioso pijapancuenia tane. Naejava ata petabunepe jivi ofrendacuenia itsa rajuta Diosojavabelia, nexata daxita pemaxërananë ata Dioso pijamaxërananëcuenia tane. Bajara pijinia itsi judíovi ata. Judíovi pijasalinaivimi Dioso itsa itapeta pijajivinexa, nexata judíovi pemomoxi ata Dioso pijajivicuenia tane.

<sup>17</sup> Dioso tane judíovi, beolivonaemaxërananë. Olivonaenë pexinaenë, pepo olivonaemaxërananë caucuba juya saicayaviria olivonaemaxëranaxi perubinexa bajarapacovëta. Nexata pepo olivonaë ënëtuatuajëpijimera junua bajarapamaxëranaxi ënëtuatuajëjava pejuvarubenaenexa pepo olivonaemaxëranajavaberena. Bajara pijinia pacuenia Dioso pacatoexana paxamë apo pajudíovimë. Judíovi apo pe-

jumecovënëtsixae Cristo pelivaisi, paxamë juya, apo pajudšovimë, Dioso papijajivimë pacaexana. <sup>18</sup> “Judšovivecua Dioso papijajivinë paneexana. Nexata paayaijamatabëcuenevinë judšovivecua,” pajamë pëtsa. Tsipaji payapëtaneme mapacueneje. Naejava, petabunepe pejamatabëcueneta, xaniavaetsia nuca. Pemaxërana pejamatabëcueneta, xaniavaetsia apo nucae. Bajara pijinia paxamë ata paitsimë. Apo pacacaëjëpae paneyavenonaenexa judšovijavabelia. Biji rajane judšovi bepacayavenonae. Tsipaji judšovi apo jumecovënëtsi Cristo pelivaisi. Nexata judšovi apo pejumecovënëtsixae, Cristo pelivaisi juya paxamë Dioso pacaitaxutotsoniatane. Nexata pacatocopata Cristo pelivaisi panejumecovënëtsinexa Dioso papecapanepaenexa panijaneconivecua.

<sup>19</sup> Nexata meta pajumaisimë: “Pacuenia olivonaenë pexainaenë, olivonaemaxërananë caucuba, bajarapacovëta juya perubinexa itsaviriaolivonaemaxëranaxi, bajara pijinia itsi Dioso. Dioso navecuatsata judšovi juya apo judšovitsi vajanacaitapetsinexa pijajivinexatsi,” pajamë meta. <sup>20</sup> Pacuenia olivonaenë pexainaenë, pibisiamaxërana caucuta, bajara pijinia itsi Dioso. Dioso navecuatsata judšovi apo pejumecovënëtsixae Cristo pelivaisi. Pacuenia olivonaenë pexainaenë, pecaucutsimaxërana pecovëta juya itsaviriaolivonaemaxërana ruta, bajara pijinia pacuenia paxamë ata judšovi pejamatabëcuenemi, pacapita Dioso papijajivinexamë panejumecovënëtsixae Cristo pelivaisi. Bajaraxuata pëtsa panataneme paayaijamatabëcuenevimë. Biji rajane xania. Cujunaviaya Dioso pajinavanapare panevecuajopaeyaniva Dioso panejumecovënëtsijava. <sup>21</sup> Pacuenia olivonaenë pexainaenë, pibisiamaxërana bacaucuta, bajara pijinia pacuenia Dioso judšovi navecuatsata apo pejumecovënëtsixae Cristo pelivaisi. Judšovi picani Dioso itapeta pijajivinexa. Nexata judšovi Cristo pelivaisi apo pejumecovënëtsixae, Dioso navecuatsata pitapetsivimi ata. Nexata bajarapacuenia paxamë ata Dioso pacanavecuatsatsipa panevajënaeyabelia itsa apo pajumecovënëtavanapaemë tsipae Cristo pelivaisi. <sup>22</sup> Bajaraxuata pacanaëjëre mapacueneje. Dioso bitso papecaitaxutotsoniataexae, pacatocopata Cristo pelivaisi panejumecovënëtsinexa. Pacanaëjërenua mapacueneje. Apo pejumecovënëtsixae Cristo pelivaisi, Dioso navecuatsata pitapetsivimi ata. Xaniajai cajena. Dioso naneconitsiaexanapona daxita pamonaë apo jumecovënëtsi Cristo pelivaisi. Itsiata paxamëjavabelia Dioso pacaitaxutotsoniatane. Nexata panevajënaeyabelia tsiteca Dioso pajumecovënëtavanapare. Itsa pacopabijitsipame Dioso panejumecovënëtsijava, nexata pacuenia olivonaenë pexainaenë, pibisiamaxërana bacaucuta pexuabinexa, bajara pijinia pacuenia paxamë ata Dioso pacanavecuaxuabijitsipa. <sup>23</sup> Judšovi Dioso pejumeaebijava itsa copatsiana, nexata jumecovënëtsiana Cristo pesivatëpaejavatsi pecapanepaenexatsi Diosojavabelia. Nexata bajarapamonae ata Dioso pijajivi tsane. Nexata pacuenia olivonaenë pexainaenë, pecaucutsimaxëranami icatsia caevëarena pecovëta ruta, bajara pijinia pacuenia Dioso icatsia pitsianatsi judšovi Dioso pijajivinexa. <sup>24</sup> Pacuenia saicayaviria olivonaemaxërana ruta pepo olivonaemaxëranacovëta, bajarapacovëta pejuvarucaenexa, bajara pijinia pacuenia Dioso pacapita paxamë apo pajudšovi atamë Dioso papijajivinexamë. Paxamë apo pajudšoviriavi atamë, itsiata Dioso pacapita papijajivinexamë. Judšovi biji toyapëxanepanatsi icatsia pepitsinexatsi Dioso pijajivinexa. Tsipaji bajarapamonae pijasalinaivimi ata Dioso itapeta pijajivinexa.

### Pacuenia Dioso capanepaejitsia judíovi, Israel nacuapijivi, yabara pelivaisi

<sup>25</sup>Tajamonae, panejamatabějumaitsiyaniva mapacueniaje: “Vaxaitsi bitso vajayapětaevi,” panejamatabėjaiyaniva, jitsipajě paneyapětaenexa mapalivaisije, Dioso muetsia pexainabuatsilivaisimi. Judíoviyajuvěněvi baja cajena ajamataběcuenetaja. Nexata bajarapamonae apo jumecověnětsi Cristo pelivaisi. Nexata ayaibitsaětoxaneto apo judíovi, itsa jumecověnětsiana Cristo pelivaisi, matapania jane baja judíovi ata jumecověnětsiana Cristo pelivaisi. <sup>26</sup>Nexata daxita pamonae judíovi, itsamatacabi Dioso capanepaenatsi pacuenia baja Dioso pejumelivaisibaxutota tajěvelia jumaitsi. Dioso pejumelivaisibaxutota tajěvelia jumaitsi mapacueniaje:

Jerusalén tomaraverena najetarucaena daxitajivi pecapanepaeněnexa. Bajaraponě daxita judíovi, pamonae Israelpijině pemomoxi, vecuaajibiaexanaena pibisiacuene pexanaeconomicsi. <sup>27</sup>Itsa bajaraponě vecuaajibiaexanaena pibisiacuene pexanaeconomicsi, nexata jane baja toexanaenajě pacuenia bajayata tajěvelia najumecapanepaeya jumaitsině bajarapamonae pijasalinaivimijavabelia, jai tajěvelia Dioso pejumelivaisibaxutota Dioso pejumaitsijava judíovi pecapanepaejavanexa Cristo pejamataběcueneta.

<sup>28</sup>Judíoviyajuvěněvi Dioso pijavajabitsaě naexana. Tshipaji apo jumecověnětsi Cristo pelivaisi pecapanepaenexatsi Diosojavabelia. Itsiata abaxě tsiteca Dioso asiva judíovi. Tshipaji bajayata copiata Dioso itapeta bajarapamonae pijasalinaivimi pijajivinexa. <sup>29</sup>Xua Dioso rajuta judíovijavabelia, apo vecuacnaviatsi. Pamonae pijinia Dioso junata pijajivinexa, apo navecuaxuabi tsane. Nexata itsamatacabi bajarapamonae Dioso athěbětatsia yajavaeacena daxitamatacabijavabelianexa. <sup>30</sup>Paxamě apo pajudíovimě, pamatacabi abaxě Cristo pelivaisi apo pajumecověnětsimě, Dioso picani apo papijajivimě. Judíovi apo pejumecověnětsixae Cristo pelivaisi, nexata apo pajudíovi atamě, Dioso pacaitaxutotsoniatane. Papijajivimě baja pacaexana. <sup>31</sup>Bajara pijinia pacuenia itsane judíovi ata. Maparucacaeje abaxě judíovi apo jumecověnětsi Cristo pelivaisi. Itsiata itsamatacabijavabelia judíovi ata Dioso itaxutotsoniatanatsi pacuenia paxamě ata Dioso pacaitaxutotsoniatane. <sup>32</sup>Dioso tocopata daxitajivi pijacuata penatojitsipacuenia pexanavanapaenexa Dioso pitorbicueniatsi apo pejumecověnětsixae. Nexata daxitajivi naneconita Diosojavabelia. Bajarapacuenia Dioso tocopata itsamatacabijavabelia icatsia pitaxutotsoniatanexa bajarapamonae.

<sup>33</sup>¡Dioso baja cajena pitaxutotsoniataně daxitajivi pecapanepaenexa! ¡Dioso cajena bitso peyapětaeně! ¡Daxitalivaisi bitso pejumeyapětaeněna! Pacuenia Dioso najamataběcuenevereta pexanaenexa, pacuenia ata baja exanapona, vaxaitsi bajaraxua Dioso apo jamataběcueneyapětaetsi. <sup>34</sup>Dioso pejumelivaisibaxutota jumaitsi mapacueniaje. “Vaxaitsi apo jamataběcueneyapětaetsi xua najamataběxaina Dioso. Apo nacacajěpaenua vajamuxujobinexa ata. <sup>35</sup>Dioso cajena itsajivijavabelia ata apo amoneyabi. Nexata xua Dioso rajuta itsajivijavabelia, apo rajutsi piamoneyabimatamo,” jai Dioso pejumelivaisibaxutota Dioso yabara. <sup>36</sup>Tshipaji cajena Dioso pijacuata exana daxitacuene. Evetanua daxitacuene. Daxitacuene baja cajena Dioso pijajava. Nexata Diosojavabelia vaxaitsi bejumaitsitsi tsabiabi mapacueniaje: “¡Diosomě, bitso ayaijamataběcueneněmě!” bejaitsi tsabiabi daxitamatacabijavabelianexa. Bajara itsi tsane.

**Pacuenia Dioso pejumecovënëtsinë benajamatabëcuenerajuta Diosojavabelia pijajvitonënexa daxitamatacabijavabelianexa yabara pelivaisi**

**12** Tajamonae, payapëtaneme rabaja Dioso ayaicuenia vajanacaitaxutotsoniataejava. Bajaraxuata pacaitorobatsi mapacueniaje. Pacuenia ofrenda barajutatsi Diosojavabelia Dioso pijajavanexa, bajara pijinia pacuenia panajamatabëcuenerajure Diosojavabelia, pacuenia Dioso pacaitorobapona paneexanabiabinexa daxitamatacabijavabelianexa. Nexata ëDioso pijacuene panetonacuenebi-java, pacaasaëmëre tsavanapae papecasivabarëyanexa Dioso. Bajarapacuenia Diosojavabelia panajamatabëcuenerajure panejamatabëëthëtojavavetsina panetsitanajamatabëcueneitajëtsinexa pepacuene panejitsipaejava Dioso. <sup>2</sup>Pëtsa paexanavanapame pacuenia exanavanapa Dioso apo pejumecovënëtsivi. Biji rajane panajamatabëcueneecopare Diosojavabelia papecarajutsinexa pejanajamatabëcuene. Nexata bajarapacuenia payapëtaename xua Dioso pacatojitsipa paneexanabiabinexa. Xua Dioso pacatojitsipa paneexanabiabinexa, bajaraxua bitso pexaniacuene. Bajaraxua itsa paexanabiabianame, Dioso pacasivabarëya tsane.

<sup>3</sup>Dioso raja taneitaxutotsoniataexae, nitoroba tatonacuenebinexa. Bajaraxuata mapacuenia pacajumaitsitsije. Pacuenia baja aeconoxae pajamatabëcueneit-simë tsavanapae, bajarapajamatabëcuene matatoxenetsia pëtsa panataneme paayajamatabëcuenevimë bitso. Biji rajane paeajivimë canacujitsia, xuavajëto Dioso pacajamatabëcuene caëjëpaeyaexanapona paneexanabiabinexa panenajamatabëcueneecopatsixae Diosojavabelia, bajarapacuenia saya baja panataema. <sup>4</sup>Jivi itsa naexana, yajavanaexana peperabëto, caeperabëtoreca. Itsiata bajarapaperabëtopijivi saicaya xainapona pevënëanë. Caevito canacujitsia saicaya xaina pexanabiabijavanexa. <sup>5</sup>Bajara pijinia pacuenia vaxaitsi ata itsitsi, Jesucristojavabelia vajana-jamatabëcueneecopatsivi. Ayaibitsaëto atatsi, itsiata caenë Cristo beperabëtotsi. Nexata namataenetsia nayavenonabiabianatsi.

<sup>6</sup>Caëjivitsi canacujitsia, pacuenia Dioso nacatojitsipa, saicaya nacajamatabëcuene caëjëpaeyaexanapona vajaexanabiabinexa. Nexata Dioso betonacuenebavanapatsi pacuenia nacajamatabëcuene caëjëpaeyaexanapona. Dioso itsa nacajamatabëcuene caëjëpaeyaexana jivi vajatsipaebabiabinexa Dioso pejumelivaisi, nexata betsipae-babiabatsi xaniavaetsia pacuenia nacajamatabëcuene caëjëpaeyaexana. <sup>7</sup>Itsa pijinia Dioso nacajamatabëcuene caëjëpaeyaexana vajayavenonabiabinexa itsamonae Dioso pejumecovënëtsivi, nexata xaniavaetsia beyavenonabiabatsi Dioso pejumecovënëtsivi. Pajivi pijinia Dioso jamatabëcuene caëjëpaeyaexanatsi Dioso pejumelivaisi jivi petsipaebabiabinexa, xaniavaetsia betsipae-babiaba daxita pejamatabëcuene-saëta. <sup>8</sup>Pajivi pijinia Dioso jamatabëcuene caëjëpaeyaexanatsi itsamonae pemuxujio-babiabinexa pejamatabëcueneasaëyaexanaenexa Dioso pejumecovënëtsi-java, bajarapajivi bemuxujio-babiaba xaniavaetsia bajarapamonaejavabelia. Pajivi pijinia rajutabiaba pexainaeyajuvënëjava bepejiobivijavabelia, berajutabiaba itsajamatabëcuene xainaenejeva. Pajivi pijinia itsacuenejava evetsiaexanatsi, bevetaponapona xaniavaetsia. Pajivi pijinia yavenonabiaba piavitanevi, pamonae ata bitso najamatabëxaina pijamonaejiviyo itsa totëpatsi, beyavenonabiaba barëyaya.

### Pacuenia Jesucristo pijajivi bexanavanapa yabara pelivaisi

<sup>9</sup>Xaniavaetsia namataenetsia panaasivamère tsavanapae. Paitoyamère pibisiacuene pexanaejava. Pacaasaëmère tsavanapae epexaniacuene paneexanaejava.

<sup>10</sup>Pacuenia nacaenapijivi bitso nasiva, bajarapacuenia panaasivamère tsavanapae Cristo papijajivixaemë. Itsamonae Dioso pejumecovënëtsivi, patojitsipare itsamonae petaenexatsi ayaijamatabëcuenevi paxamë matatoxenetsia. Namataenetsia panayaiyataeyabiabare.

<sup>11</sup>Pacaasaëmère tsavanapae Dioso pijacuene panetonacuenebijava. Pëtsa pafaetabimë. Daxita panejamatabëcuensaëta patonacuenebabiabare Dioso pijacuene.

<sup>12</sup>Pasivabarëyamère tsavanapae. Tspiji rabaja payapëtaneme itsamatacabi panexainaejavanexa matacabi apo peverevereaejava. Itsamonae itsa pacabejiobi-aexana Cristo papijajivixaemë, bajayajebi ata, pëtsa pacopatame. Daxitamatacabi pavajëtabiabare Diosojavabelia pacopatsinejevamë.

<sup>13</sup>Itsajota Dioso pejumecovënëtsivi namatavenona, payavenonabiabare. Pamonaepacasivaxaina panijaboyaberena, xaniavaetsia pacopiapitabiabare.

<sup>14</sup>Pamonaepibisiacuene pacaexana, patovajëtabiabare Diosojavabelia Diosopeyavenonaenexatsi. Patovajëtabiabare pexaniacuene. Pëtsa patovajëtabiabame pibisiacuene juya pibisiacuene pexanaenexatsi.

<sup>15</sup>Pamonaebarëya petocopiapatsixaetsi pexaniacuene, bajarapamonaepaxamë ata pajamatabëcueneyavenonaeya barëyamère. Pamonaepijinia nua petocopiapatsixaetsi apo pejitsipaecuene, bajarapamonaepaxamë ata pajamatabëcueneyavenonaeyanuema.

<sup>16</sup>Najamatabëcuenejëpaeya pajinavanapare. Pëtsa panataneme paayaijamatabëcuenevimë. Pamonaebeeveliajamatabëcuenevi ata, xaniavaetsia pataema. Xaniavaetsia payajavajinavanaparena. “Xanë bitso tayapëtaenë itsamonae matatoxenetsia,” pajamatabëjamë pëtsa.

<sup>17</sup>Itsajivi pibisiacuene itsa pacaexana, pëtsa juya pibisiacuene panamatamoexaname. Paexanabiabare epexaniacuene, xua jivi tsitaxanepanatsi. <sup>18</sup>Xua Dioso paca-jamatabëcuenecaëjëpaeyaexana paneexanaenexa, bajaraxua paexanabiabare xaniavaetsia panejinavanapaenexa, daxitajivijavabelia itsacuene paexanaenejevamë.

<sup>19</sup>Tajamonae bitso patacaasivavi, itsamonae pibisiacuene itsa pacaexana, pëtsa panamatamotame. Pacopare saya bajarapamonaediosopenaneconitsiaexanaenexatsi. Tspiji Dioso pejumaitisijava, Diosopejumelivaisibaxutota jumaitsi mapacueniaje: “Pamonaepibisiacuene exana itsamonaejavabelia, xanë naneconitsiaexanaenajë,” jai Diosopejumelivaisibaxutota.

<sup>20</sup>Diosopejumelivaisibaxutota itsabaxutota pijinia jumaitsi mapacueniaje: “Nijavajabitsaënë itsa piajani, rajure pexaejava. Mera itsa jitsipa, rajure mera piapaenexa. Bajarapacuenia itsa exaname, nexata caurataena nijavajabitsaënë ata,” jai Diosopejumelivaisibaxutota.

<sup>21</sup>Itsajivi pibisiacuene itsa pacaexana, pëtsa pibisiacuene panamatamoexaname. Tspiji bajarapacuenia panajamatabëcuene bijianaejitsipame. Biji rajane pajivi pibisiacuene pacaexana, pexaniacuene patoexanare. Nexata bajarapacuenia pibisiacuene papecaexanaejivi ata, pajamatabëcuenecaeviaexaname.

**13** Daxita pamonaegobierno pijajivi, papecayanacuaevetsivi, pacuenia bajarapamonaepacaitoroba, xaniavaetsia pajumecovënëtabiabare. Tspiji baja-



pamonaē, caenē canacujitsia, Dioso pejamatabēcueneta pacayanacuaeveta. Daxita pamonaē nacua pevetsivi, pacaeveta Dioso petocopatsixaetsi. <sup>2</sup>Nexata pajivi apo jumecovēnētsi pacuenia nacuaevetsinē itorobatsi, bajarapajivi Dioso ata apo jumecovēnētsi. Pamonaē apo jumecovēnētsi, nexata bajarapamonaē Dioso naneconitsiaexanaenatsi. <sup>3</sup>Pamonaē pexaniacuene exanavanapa, nacuaevetsivi apo cujunavi. Pamonaē pijinia pibisiacuene exanavanapa, nacuaevetsivi cujunava. Paxamē nexata pexaniacuene paexanavanapare ajunavijibia panejinavanapaenexa. Nexata pacasivabarēya tsane papecyanacuaevetsivi. <sup>4</sup>Bajarapamonaē Dioso pejamatabēcueneta nacuenēxanapa. Nexata pacaevetavanapa pibisiacuenevecua. Itsiata pibisiacuene itsa paexaname, papecyanacuaevetsivi bepacujunavame. Tsipaji bajarapamonaē Dioso tocopatatsi papecananeconitsiaexanaenexa. Dioso tocopatatsi bajarapamonaē penaneconitsiaexanaenexa daxita pamonaē pibisiacuene pexanaevi. <sup>5</sup>Bajaraxuata bejumecovēnētatsi pamonaē vajanacayanacuaevetsivi. Apo jumecovēnētatsi saya vajanacaneconitsiaexanaeyaniva. Jume baja cajena. Biji rajane jumecovēnētatsi tsipaji Dioso pijajivixaetsi, vajajamatabēcueneta yapētanetsi pacuenia bexanavanapatsi. <sup>6</sup>Bajaraxuata nacuaevetsivijavabelia impuestomatamo pamatamotabiabame panematamotsipalatata penaevetsinexa. Nacuaevetsivi, Dioso pejamatabēcueneta, tocopatatsi nacua pevetsinexa. Nexata nacua ēpevetsicuene nacuenēba.

<sup>7</sup>Pacuenia pacaevivimē canacujitsia bepatoexaname gobierno pejamatabēcueneta penacuenēbivijavabelia, bajarapacuenia patoexanabiabare. Bajarapamonaeyajuvēnēvi itsa caetuata impuestomatamo, xuavajēto pamoneyabame, pamatamotabiabare. Pamonaē pijinia peyaiyataevitsi, payaiyataeyabiabare. Pamonaē peyaiyataevitsi, bajarapamonaē pexaniacuena pabaracuaicuajiamēre tsabiabi. <sup>8</sup>Pētsa pamoneyabame itsajivi ata. Biji rajane pacuenia Cristo pacaasiva, bajarapacuenia paxamē ata panaasivamēre tsavanapae. Pajivi asiva itsajivi ata pacuenia nasiva pijacuata, bajarapajivi jumecovēnētsicapanepa Dioso Moiséspijinēta penajumecopatsilivaisi. <sup>9</sup>Dioso Moiséspijinēta penajumecopatsilivaisi, itaveta mapacueniaje: “Pētsa jaitame itsava nijavavecua. Pētsa beyaxuabame jivitonē. Pētsa nacobetoxotame. Pētsa najumetsēnētsiaya baracuaicuajiamē itsajivi. Pētsa cobecaēbame itsajivi pexainaejava,” jai Dioso Moiséspijinēta penajumecopatsilivaisi. Nexata paxamē itsa pajumecovēnētsicapanepaejitsipame daxita mapalivaisije, itsalivaisiyo ata yajava, pajumecovēnētsicapanepaejitsipame mapejumatsilivaisiyoje: “Asivamēre itsajivi ata pacuenia xamē nijacuata nasivamē,” pejailivaisiyo. <sup>10</sup>Tsipaji pajivi asiva itsajivi ata, pibisiacuene apo exanaē bajarapajivijavabelia. Bajaraxuata itsa asivatsi itsamonaē ata, nexata jumecovēnētsicapanepatsi daxita pacuenia Dioso nacaitoroba.

<sup>11</sup>Bajarapacuenia itsamonaē ata biasivatsi. Tsipaji baja yapētanetsi bitso baja imoxoyo pevajēnaē icatsia Jesucristo pepatsijavanexatsica. Vajanacacapanepaenēnēxā, najetarucaena vajanacacapanepaenēxā mapanacuavecuaje. Pamat-acabi taxuxuabatsi Jesucristo vajajumecovēnētsijava, nacatsita tajēvajēnaē abaxē itajara Jesucristo icatsia pepatsijavanexatsica. Aeconoxae baja bitso imoxoyo pevajēnaē icatsia Jesucristo pepatsijavanexatsica. <sup>12</sup>Meravi abaxē aitaquiri. Itsa baja icatsia matabajijitsia, pitaquirijavami baja ajibi taponae. Bajara pijinia pacuenia imoxoyo baja pevajēnaē pecopiarucaenēxā mapanacuapajivi pibisiacuene pexanaejava yabara pajamatabēcuenētaquirijavami. Tsipaji baja imoxoyo pevajēnaē icatsia Jesucristo pepatsijavanexatsica. Bajaraxuata bexanavanapatsi ēpexaniacuene Dioso pejitsipaecuenia. <sup>13</sup>Aeconoxae baja vajavajēnaeyabelia, jinavanapaenatsi xa-

niavaetsia vajayapëtaexae pexaniajailivaisi. Apo ponae tsanetsi piatajibivijava. Apo ponae tsanetsi fiestajava ata, itsajota pibisiacuene exanavanapa. Apo exanae tsanetsi pibisiacuene vajavitota. Apo exanae tsanetsi itsacuenejava ata, xua pibisiacuene. Nabijataeya apo najumeanaenotsi tsanetsi. Itsamonae ata apo cuenecaëbi tsanetsinua. <sup>14</sup>Biji rajane vajëtabiabianatsi vajatuxanenë Jesucristojavabelia vajanacayavenonabiabinexa. Vajatuxanenë Jesucristo nacajamatabëcueneasaëyaexanaena vajatojinavanapaenexa vajanacatojitsipaecuenia. Apo sivanajamatabëxanae tsanetsi pacuenia vajacuata natojitsipatsi pibisiacuene vajaexanaenexa.

**Pacuenia Pablo itaveta Roma tomarapijivi**  
**Dioso penajuajumecovënëtsivi itsa janitane pexaejava**  
**jumapecataeya pexanaenëanëjavabelia peyajuvënërajutsivi,**  
**“Pibisiacuene exana mapajivije,” pejaiyaniva, yabara pelivaisi**

**14** Pajivi jumecovënëtsi ata Jesucristo pesivatëpaejavatsi pijaneconi yabara, itsiata abaxë itsa apo ajamatabëcuenesaë pejumecovënëtsijava, bajarapajivi ata xaniavaetsia pacopiapire panenacaetuatsibojavaberena itsa najunua. Bajarapajivi pijaneconi yabara Jesucristo pesivatëpaejavatsi pejumecovënëtsicujinae, copata baja pexaeyabiabijavami jumapecataeya pexanaenëanëjavabelia perajutsiyajuvënëvi. Nexata baja cjunava pexaejava, bepibisiacuene pexanaejava petaexae. Pëtsa pajumeanaenotame bajarapitsijivijavabelia panexaeyaexanaenexa icatsia bajarapayajuvënëvi. <sup>2</sup>Itsamonae Cristojavabelia penajamatabëcuenecopatsivi, jamatabëjumaitsi: “Daxitacuene xanepana vajaxaenexa,” jamatabëjai. Itsamonae pijinia abaxë jamatabëjumaitsi: “Dioso nacananeconitsiaexanaejitsipa jumapecataeya pexanaenëanëjavabelia perajutsiyajuvënëvi itsa xanetsi,” jamatabëjai. Nexata ëpeubijava xane jumapecataeya pexanaenëanëjavabelia perajutsiyajuvënëvi pexaeyaniva. <sup>3</sup>Nexata pajivi xane jumapecataeya pexanaenëanëjavabelia perajutsiyajuvënëvi, pëtsa bijiaya tane pajivi apo xae jumapecataeya pexanaenëanëjavabelia perajutsiyajuvënëvi. Pajivi pijinia apo xae jumapecataeya pexanaenëanëjavabelia perajutsiyajuvënëvi, pëtsa neconitsiaya jumaitsi jivijavabelia: “Pibisiacuene exana pajivi xane jumapecataeya pexanaenëanëjavabelia perajutsiyajuvënëvi,” jai pëtsa. Tsipaji Cristojavabelia penajamatabëcuenecopatsijivi daxitacuene itaxutojema xae ata, itsiata Dioso tanetsi aneconijibia. Nexata bajarapajivi Dioso capanepaenatsi. <sup>4</sup>Dioso apo pacatocopatsi Dioso pijajivitonë neconitsiaya jivijavabelia panejumaitsinexa mapacueniaje: “Xua exana bajaraponë, pibisiacuene. Nexata Dioso naneconitsiaexanaenatsi,” panejainexa. Dioso pijajivitonë xaniavaetsia Dioso itsa tonacueneba, xaniavaetsia apo tonacuenebi atanua, caenë, Dioso, toxanepanatsi, pacuenia jamatabëjumaitsi, pejumaitsinexa pijajivitonëjavabelia. Dioso cajena caëjëpatsi peyavenonaenexa pijajivi pejitsipaecuenia xaniavaetsia petojinavanapaenexatsi pesivabarëyanexa.

<sup>5</sup>Itsamonae Dioso pejumecovënëtsivi yayataeyabiaba matakabi. Nexata itsamatacabianëvecua caematakabi yayataeyabiaba. Itsamonae pijinia najëpaeya tane daxitamatacabianë. Pamonaeyayataeyabiaba caematakabi itsamatacabianëvecua, bajarapamonae xaniavaetsia beyapëtane pajamatabëcuenelivaisi yabara yayataeyabiaba caematakabi. Pamonaeyata pijinia najëpaeya tane daxitamatacabianë, xaniavaetsia beyapëtane pajamatabëcuenelivaisi yabara najëpaeya tane daxitamatacabianë. <sup>6</sup>Pajivi nacueraeveta itsamatakabi, bajarapajivi nacueraeveta peyaiyataenexa

Dioso. Pajivi pijinia apo nacueraevetsi bajarapamatacabi, apo nacueraevetsi tsipaji jamatabëexana pacuenia Dioso itorobatsi. Pajivi pijinia xane jumapecataeya pexanaenëanëjavabelia perajutsiyajuvënëvi, bajarapajivi xane peyaiyataenexa Dioso. Tsipaji jamatabëjumaiti: “Dioso cajena netocopata daxitacuene taxaenexa,” jamatabëjai. Nexata pexaniajamatabëcuene rajutabiaba Diosojavabelia. Pajivi pijinia apo xae jumapecataeya pexanaenëanëjavabelia perajutsiyajuvënëvi, bajarapajivi apo xae peyaiyataenexa Dioso. Tsipaji jamatabëjumaiti: “Mapavije apo xanenë tananeconitsiyanova Diosojavabelia,” jamatabëjai. Nexata pexaniajamatabëcuene rajutabiaba Diosojavabelia ëpeubijava pexaeyabiabixae.

<sup>7</sup> Itsajivi ata vaxaitsiyajuvënëjivi, Dioso pejumecovënëtsijivi, apo ponaponae ëpijacuata penatojitsipacuena pexanaponaponaeenexa. Biji rajane exanaponapona pacuenia Cristo tojitsipatsi. Petëpaematacabinexa ata yabara, apo jamatabëjumaiti: “Tëpaenajë pamatacabi natojitsipajë tatëpaejava,” apo jamatabëjai. <sup>8</sup> Vaxaitsi abaxë vajaasaëtsavanapaeepato, tojinavanapatsi pacuenia vajatuxanenë nacatojitsipa. Itsiata baitsi jane itsamatacabi, tëpaenatsi. Tsipaji Dioso nacatojitsipaena vajatëpaenexa. Aeconoxae abaxë vajaasaëtsavanapaeivi, vajatuxanenë pijajivitsi tsavana-pae. Vajatëpaecujinae ata tsane, tsiteca vajatuxanenë pijajivitsi tsavanapae tsane. <sup>9</sup> Cristo baja cajena nacasivatëpa vajatuxanenë vajaexanaenexa. Nexata icatsia Cristo asaë tsaponaponae petëpaecujinae. Bajaraxuata Cristo daxitajivi pijatuxanenë. Piasaëtsavanapaeivi, petëpaevi ata, daxita pamonaë najamatabëcuenecopata bajaraponëjavabelia, Cristo cajena pijatuxanenë.

<sup>10</sup> Bajaraxuata nexata jumapecataeya pexanaenëanëjavabelia perajutsiyajuvënëvi paxamë panijabananë pexaejava yabara, baracuaicuajaiya apo bepajumaitsimë mapacueniaje: “Maponëje pibisiacuene exana. Nexata Dioso naneconitsiaexanaenatsi,” apo bepajamë. Bijiaya ata apo bepataemë bajaraponë. Tsipaji cajena itsamatacabi daxitatsi vaxaitsi Cristo pitabarata nubenaenatsi, caejivitsi canacujitsia, vajanavajunupaebaponaenexa daxita pacuenia exanavanapatsi mapanacuataje. <sup>11</sup> Bajaraxua yabara Dioso pejumelivaisibaxutota tajëvelia jumaiti mapacueniaje:

Dioso tajëvelia jumaiti: “Xanë daxitamatacabijavabelianexa tasaëtsaponaponaeenë. Nexata tajumaitisijume xaniajanë. Itsamatacabi daxitajivi taitabarata pematatabacabëta netonubenaena taneyaiyataexae. Daxitajivi nevajunupaebiana Diosonëcuenenë,”

jai Dioso pejumelivaisibaxutota mapacueniaje Dioso tajëvelia pejumaitisijava daxitajivi yabara.

<sup>12</sup> Nexata vaxaitsi itsamatacabi, caejivitsi canacujitsia, navajunupaebaponaenatsi Diosojavabelia daxita pacuenia exanavanapatsi mapanacuataje.

**Pacuenia Pablo itaveta Roma tomarapijivi Dioso  
penajuajumecovënëtsivi Diosovecua pejopaeyaexanaeyaniva  
petsitaexanaejava pejamatabëcueneta yabara pelivaisi**

<sup>13</sup> Itsamatacabi caejivitsi canacujitsia nubenaenatsi Cristo pitabarata vajanavajunupaebaponaenexa pacuenia exanavanapatsi mapanacuataje. Bajaraxuata itsanë vajabananë pexanaejava yabara, apo bebaracuaicuajaiti pibisiacuena. Biji rajane bejamatabëjumaitisitsi mapacueniaje: “Apo tsitaexanaenë tsane itsacuenejavayo ata, xua yabara itsajivi, Dioso pejumecovënëtsijivi, jamatabëcuenebijianaejitsipatsi,” bejamatabëjaiti. <sup>14</sup> Najamatabëcuenecopatajë xaniavaetsia vajatuxa-

nenē Jesucristojavabelia. Nexata yapētaniĵi Dioso tanetocopatsijava taxaenexa xua picani cujunavajē taxaejava Jesucristojavabelia tanajamatabēcuenecopatsivajēnaeya. Itsiata meta itsanē Dioso pejumecovēnētšinē bajaraxua itsa xane, jamatabējumaitsi tsipae: “Dioso apo netocopatsi taxaenexa bajaraxua. Itsa xaejitsipajē, naneconitsipajē Diosojavabelia,” jamatabējai tsipae. Nexata apo xae tsipae bajaraxua. <sup>15</sup> Panijabananē itsa apo pexaenē jumapecataeya pexanaenēanējavabelia perajutsiyajuvēnēvi, pētsa patsitaxaneme. Tsipaji paxamē itsa patsitaxaejitsipame jumapecataeya pexanaenēanējavabelia perajutsiyajuvēnēvi, panijabananē bepaca-sivajamatabējiobi tsipae. Tsipaji panijabananē bepibisiacuene patsitaexanaejitsipame itsa patsitaxaejitsipame jumapecataeya pexanaenēanējavabelia perajutsiyajuvēnēvi. Nexata jumapecataeya pexanaenēanējavabelia perajutsiyajuvēnēvi, panijabananē itsa patsitaxaejitsipame, nexata panijabananē asivaya apo pataemē tsipae. Tsipaji itsa pacajanitaejitsipa panexaejava jumapecataeya pexanaenēanējavabelia perajutsiyajuvēnēvi, nexata bajaraponē ata naxaejitsipa. Nexata Diosojavabelia bepaneconitsinē nataejitsipa penaxaexae jumapecataeya pexanaenēanējavabelia perajutsiyajuvēnēvi. Panetsitaxaejava pejamatabēcueneta Diosovecua panenaxuabiaexanaeyaniva panijabananē, pētsa patsitaxaneme jumapecataeya pexanaenēanējavabelia perajutsiyajuvēnēvi. Tsipaji rabaja vajatuxanenē Cristo sivatēpa bajaraponē ata penaxuabiyaniva. <sup>16</sup> Payapētae atamē, xua picani xanepana paneexanaenexa, itsiata panijabananē itsa cujunava bajaraxua pexanaenexa, pētsa patsitaexaname. Tsipaji panijabananē pacataejitsipa pibisiacuene bepaneexanaevi. <sup>17</sup> Vaxaitsi baja najamatabēcuenecopabatsi Cristojavabelia. Nexata jumecovēnētavanapatsi Dioso. Apo nacaitorobi vajanayanijobabiabinexa ēvajaxaejava yabara, vajaapaeyava ata yabara. Biji rajane nacaitoroba xaniavaetsia aneonijibia najamatabēcuenējēpaeya vajajinavanapaenexa. Nacaitorobanua jamatabēcuenēbarēyaya vajajinavanapaenexa Espiritu Santo vajanacatsijamatabēecaexae. <sup>18</sup> Pajivi Dioso pijacuene tonacuenebaponapona, sivajamatabēcuenēbarēyatsi Dioso. Jivi ata xaniavaetsia yaiyatanetsi.

<sup>19</sup> Xua Dioso nacayavenona vajajinavanapaenexa najamatabēcuenējēpaeya, bajaraxua exanavanapaenatsi. Xua ata nacayavenona namataenetsia vajanajamatabēcuenē asaēyaexanaenexa Diosojavabelia, bajaraxua ata exanavanapaenatsi. <sup>20</sup> Pētsa patsitaxaneme xua panijabananē tane bepitavetsijavatsi pexaeyaniva. Nexata itsa pacajanitaejitsipa panexaejava, bajarapajivi ata naxaejitsipa. Nexata bepaneconitsinē Diosojavabelia nataejitsipa. Panexaejava pejamatabēcueneta, bajarapajivi Diosovecua pajopaeyaexanaejitsipame. Bajaraxuayaniva pētsa patsitaxaneme xua cujunava panijabananē. Xaniajai rabaja. Daxitacuene rabaja picani xanepana vajaxaenexa. Itsiata pibisiacuene paexanaejitsipame itsa patsitaxaejitsipame xua panijabananē taejitsipa bepibisiacuene paneexanaeyava itsa paxaejitsipame. <sup>21</sup> Bajaraxuata pētsa paxaneme jumapecataeya pexanaenēanējavabelia perajutsiyajuvēnēvi. Pētsa papamenua piatanera paneaitajibiyaniva. Pētsa paexanamenua itsacuenejava ata, xua pejamatabēcueneta panijabananē pajopaeyaexanaejitsipame Diosovecua. Pētsa patsitaexaname xua panijabananē jamatabēcuenē fae-faenaeyaexanaejitsipatsi. <sup>22</sup> Itsa baja xaniavaetsia payapētaneme pexanepanaecuene panexaenexa, xua picani pacujunavame panexaejava Jesucristojavabelia panenamajamatabēcuenē copatsivajēnaeya, saya pamoyamē tsane. Tsipaji Dioso yapētane pacuenia panajamatabēxainame bajaraxua yabara. ¡Bitso jamatabēcuenēbarēya pa-

jivi pexanabiabijava yabara jamatabējumaiṣi: “Dioso pitabarata aneconijibia toponaponajē,” jamatabējai! <sup>23</sup> Pajivi pijinia jamatabējumaiṣi ata: “Apo xanepanae tsipae taxaenexa bajaraxua,” jamatabējai ata, itsiata itsa xaejitsipa, bajarapajivi pibisiacuene natoexanaejitsipa Diosojavabelia. Tsipaji pijacuata najamatabēcuenebijinaejitsipa. Daxita pijinia xua yabara vaxaiṣi jamatabējumaiṣiṣi: “Dioso apo jitsipae vajaexanaenexa bajaraxua,” jamatabējai ataiṣi, itsiata itsa exanaejitsipaiṣi bajaraxua, nexata pibisiacuene natoexanaejitsipaiṣi Diosojavabelia.

### **Pacuenia becanaējētaiṣi vajabananē vajajamatabēcueneyavenonaenexa yabara pelivaiṣi**

**15** Vaxaiṣi ajamatabēcuenesaēṣi Dioso vajajumecovēnēṣijava. Nexata beyavenonaiṣi pamonaē abaxē jamatabēcuenefaēfaena Dioso pejumecovēnēṣijava. Pēṣa exanaiṣi vaxaiṣi vajacuata vajanatōjitsipacuēnia. <sup>2</sup> Biji rajane caejivitsi canacujitsia becanaējētaiṣi vajabananē vajajamatabēcueneyavenonaenexa. Xua yabara vajabananē ajamatabēcuenesaējitsia, bajaraxua betoexanavanapaiṣi vajabananē pejamatabēcuenevitsabinexa Diosojavabelia. <sup>3</sup> Tsipaji Cristo ata, ponē Dioso athēbēvēṣica itorobica jivi pecapanepaenexa, abaxē itsa ponapona mapanacuataje, apo exanaē pijacuata penatōjitsipacuēnia. Biji rajane nacopata pebejiobiaexanaenexaiṣi pacuenia Dioso tojitsipaiṣi. Paxa Diosojavabelia Cristo pejumaiṣijava, Dioso pejumelivaiṣibaxutota tajēvelia jumaiṣi mapacuēniaje: “Pacuenia picani jivi xamē pibisiacuēnia jamatabēcabaracuaicuaijai, xanē nebaracuaicuaijai tsane,” jai tajēvelia Dioso pejumelivaiṣibaxutota paxa Diosojavabelia Cristo pejumaiṣijava. <sup>4</sup> Palivaiṣi bajayata yaquina Dioso pejumelivaiṣibaxutota, bajarapalivaiṣi vaxaiṣi ata nacatocopata vajajumecovēnēṣinexa, vajanačajamatabēcuenē yavenonaenexanua. Bajaraxuata bajayajebi nacabejiobiaexanabiabi ata Dioso pijajivixaiṣi, itsiata ajamatabēcuenesaēṣi tsavanapae. Tsipaji yapētanēṣi pacuenia Dioso najumecapanepaeya jumaiṣi bajarapalivaiṣita vajanačajapanepaenexa. <sup>5</sup> Itsacuēnejavaxi yabara bajayajebi itsa nacajamatabēcuenēējētaponā, nexata Dioso nacajamatabēcueneyavenonaponā. Nacajamatabēcuenēasaēyaexanaponā bajayajebinxā ata. Pacatovajētaiṣi Diosojavabelia Dioso papeçayavenonaenexa, najamatabēcuenējēpaeya daxita panejinavanapaenexa Jesucristo papeçatojitsipacuēnia. <sup>6</sup> Nexata daxita paxamē najamatabēcuenējēpaeya vajatuxanenē Jesucristo paxa Diosojavabelia pajumaiṣimē ṣabiabi tsane: “Diosomē, bitso ayaijamatabēcuenenēmē,” pajamē ṣabiabi tsane.

### **Pacuenia apo juđiovi ata pexanialivaiṣi ṣiṣipaeṣi pecapanepaelivaiṣinexaiṣi yabara pelivaiṣi**

<sup>7</sup> Pajuđiovinē, apo pajuđiovi atamē, najēpaeya Cristo nacapita pijajivinexaiṣi. Bajara pijinia pacuenia paxamē ata najēpaeya xaniavaēṣia namataenēṣia panacopiapitabianame. Nexata bajarapacuenia itsa paexanabiabianame, daxitajivi Dioso yayataena. Nexata daxitajivi jumai ṣabiabi tsane Dioso yabara: “Dioso çajena bitso ayaijamatabēcuenenē. Tsipaji pijajivi yavenona xaniavaēṣia petojinavanapaenexaiṣi,” jai ṣabiabi tsane. <sup>8</sup> Mara pacajumaiṣiṣije. Jesucristo athēbēvēṣica paṣica mapanacuayabēṣicaje peyavenonaenexa juđiovi. Bajarapacuenia Jesucristo athēbēvēṣica paṣica petocopiapaṣixaēṣi pacuenia bajayata Dioso najume-

capanepaeya jumaitsi judíovi pijasalinaivijavabelia. Nexata bajarapacuenia Dioso pexaniajainëcuene najamatabëcueneitajëta judíovijavabelia. <sup>9</sup> Jesucristo athëbëvet-sica patsica pecapanepaenexa apo judíovi ata. Nexata apo judíovi ata Jesucristo pejamatabëcueneta: “Diosomë, bitso ayaijamatabëcuenenëmë,” jai tsabiabi tsane Diosojavabelia. Bajarapacuenia apo judíovi ata jumai tsabiabi tsane Diosojavabelia pitaxutotsoniataexaetsi Dioso. Nexata bajaraxua yabara Cristo paxa Diosojavabelia pejumaitsijava, Dioso pejumelivaisibaxutota jumaitsi mapacueniaje:

Xanë tajamatabëcueneta, daxitanacuanëpijivi: “Diosomë, bitso ayaijamatabëcuenenëmë,” cajai tsabiabi tsane. Catonaxëanabiabiananua vajianë ata, jai Dioso pejumelivaisibaxutota paxa Diosojavabelia Cristo pejumaitsijava.

<sup>10</sup> Apo judíovi ata Dioso pijajivi pexanaejavanexatsi yabara, itsabaxutota Dioso pejumelivaisibaxutota jumaitsi mapacueniaje:

Apo pajudíovimë, pajamatabëcuenebarëyamëre Dioso pijajivi, judíovi yajava, jai Dioso pejumelivaisibaxutota apo judíovi ata Dioso pijajivi pexanaejavanexatsi yabara.

<sup>11</sup> Itsabaxutota pijinia Dioso pejumelivaisibaxutota jumaitsi icatsia mapacueniaje: Paxamë apo pajudíovimë, Diosojavabelia pajumaitsimëre: “Diosomë, bitso ayaijamatabëcuenenëmë,” pajamëre. Paxamë, padaxitamë, itsamonaejavabelia pajumaitsimëre: “Caenë Dioso bitso ayaijamatabëcuenenë,” pajamëre, jai Dioso pejumelivaisibaxutota.

<sup>12</sup> Isaíaspijinë pijinia itsabaxutota tajëvelia yaquina Jesucristo pelivaisi. Jumaitsi mapacueniajë:

Penacuetonëyo naexanaena. Nexata Isaípijinë bepemomonëyocuenia naexanaena. Itsa vitsabiana, Dioso evetsiaexanaenatsi jivi, daxitanacuanëpijivi. Pamonae apo judíovi, jumecovënëtsiana bajaraponë pesivatëpaejavatsi pecapanepaenexatsi pijaneconivecua,

jai tajëvelia Isaíaspijinë peyaquinaebaxutota Jesucristo yabara.

<sup>13</sup> Yapëtanetsi Dioso vajanacacapanepaejavaneja Jesucristo pejamatabëcueneta. Nexata pacatovajëtatsi Dioso papecajamatabëcuene barëyayaexanaenexa. Pacatovajëtatsinua jamatabëcuenexanepanaeya panejinavanapaenexa. Bajarapacuenia Dioso pacajamatabëcueneyavenonaena tsipaji Dioso pajumecovënëtame. Espíritu Santo ata, ponë pacatsijamatabëca, pesaëta panevajënaeyabelia pacajamatabëcuene asaëyaexanaponaena Dioso papecacapanepaejavabelianexa.

<sup>14</sup> Tajamonae, pacayapëtanetsi paxamë papexaniajamatabëcuenevijavamë. Pacayapëtanetsinua paxamë bitso paneyapëtaejava Cristo papecasivatëpaejava pibisiacuene paneexanaeconi yabara. Pacayapëtanetsinua paneyapëtaejava xaniavaetsia namataenetsia panenamuxujjibinexa. <sup>15</sup> Tajamonae, palivaisi baja payapëtaneme, bajarapayajuvënëlivaisi panenajamatabënápitsinexa, icatsia ajumeurajibia pacatoyaquinatsi mapabaxutotaje. Bajarapacuenia ajumeurajibia pacatoyaquinatsi tsipaji Dioso nitoroba. <sup>16</sup> Dioso taneitaxutotsoniataexae, bajarapacuenia nitoroba Jesucristo pijajivitonënexanë Jesucristo pelivaisi tatsipaebabiabinexa apo judíovijava. Nexata apo judíovi tsipaebabiabajë pexanialivaisi, Jesucristo pelivaisi, pecapanepaelivaisinexatsi Diosojavabelia. Espíritu Santo pejamatabëcueneta apo judíovi ata Cristo pijajivi exanatsi. Bajaraxuata Dioso sivabarëyatsi Dioso pepitsinexatsi bajarapamonae, apo judíovi ata.

<sup>17</sup> Jesucristo pijajivitonëxaenë, Jesucristo neyavenonabiaba itsa tonacuenebabi-abajë. Bajaraxuata barëyanë tatsipaebaponaenexa itsamonaejavelia Jesucristo taneyavenonabiabijava tatonacuenebinexa Dioso. <sup>18</sup> Rovialia tsipaebabiabajë ajumeurajibia. Tsipaebabiabajë vajatuxanenë Jesucristo taneyavenonabiabijava tatonacuenebinexa Dioso. Vajatuxanenë Jesucristo neyavenonabiaba tatsipaebabiabinexa apo judíovijavelia apo judíovi ata pejumecovënëtsinexa Dioso. Nexata apo judíovi itsa jumetane tatsipaebabiabilivaisi, itsa tanenua Dioso pesaëta pinijicuene taexanaponaejavanë, bajarapamonaë jumecovënëta baja Jesucristo pesivatëpaejavatsi pibisiacuene pexanaeneconi yabara. <sup>19</sup> Vajatuxanenë Dioso pesaëta nejamatabëcuenecaëjëpaeyaxana pinijicuene taexanaenexa. Espiritu Santo ata pesaëta nejamatabëcuene yavenona. Bajaraxuata apo judíovi tsipaebaponaë pexanialivaisi, Jesucristo pelivaisi, Diosojavavelia pecapanepelivaisinexatsi. Tsipaebaponaë baja bajarapalivaisi Jerusalén tomarajava. Bajaraxuacujinae tsipaebaponaë daxitanacuanëjava. Tajënacujavelia ata, Ilírico nacujavelia, tsipaebaponaë. <sup>20</sup> Itsa tsipaebaponaë pexanialivaisi, Jesucristo pelivaisi, jitsipajë tatsipaebaponaenexa itsaxuayo abaxë jivi apo vënëlvaisitae Cristo. Apo jitsipaenë tatsipaebaponaejava itsaxuayo baja tavajënaeya itsamonaë tsipaebapona. <sup>21</sup> Bajarapacuenia apo judíovi itsa tsipaebaponaë Jesucristo pelivaisi, copiapata jane baja pacuenia baja cajena Dioso pejumelivaisibaxutota tajëvelia jumaitsi tatsipaebaponaejavanexa yabara. Mapamatacabitaje apo judíovijava Jesucristo pelivaisi tatsipaebaponaejavanexa yabara, Dioso pejumelivaisibaxutota tajëvelia jumaitsi mapacueniajaje:

Pamonaë abaxë apo vënëlvaisitae, ponë athëbëvetsica Dioso itorobijitsiatsica jivi pecapanepaenexa, bajarapamonaë bajaraponë pelivaisi tsipaebianatsi. Nexata bajarapamonaë jumecovënëtsiana ponë pelivaisi tsipaebianatsi, jai tajëvelia Dioso pejumelivaisibaxutota Dioso pitorobinëtsitsica pelivaisi apo judíovijava mapamatacabitaje tatsipaebaponaejavanexa yabara.

### **Pacuenia picani Pablo jamatabëponabiaba Roma tomaravelia yabara pelivaisi**

<sup>22</sup> Bajayajebi picani bitso jamatabëpacataeyabiabatsi. Itsiata apo necuenecaëjë-pae taponaeenexa paxamëjavavelia daxitanacuanëjava Dioso pejumelivaisi tatsipaebanajetarucaexae. <sup>23</sup> Aeconoxae baja veretajë tanacuenebijava mapanacujavajaje. Nexata jane baja ponaenajë paxamëjavavelia. Tsipaji picani bajayajebi jamatabëpacataeyabiabatsi. <sup>24</sup> Pamatacabi ponaenajë España nacuyavelia, patsianajë copiyaya paxamëjavata patacataenexa. Itsa baja nataenatsi, bitso jamatabëcuenebarëya tsavanapae tsanetsi. Bajaraxuacujinae jitsipajë pataneyavenonaenexamë tajanamutonexa taponaeenexa jane baja España nacuyavelia. <sup>25</sup> Bajara masaya pamatacabitaje ponaenajë Jerusalén tomaravelia ofrenda tatocaponaenexa Dioso pejumecovënëtsivi. <sup>26</sup> Dioso pejumecovënëtsivi, Macedonia nacupijivi, Acaya nacupijivi ata, ofrenda baja toexana. Bajarapaofrenda toexana petoitorobinexa Dioso pejumecovënëtsivi, pamonaë bepejiobivi, Jerusalén tomarata pejinavanapaevi. <sup>27</sup> Macedonia nacupijivi, Acaya nacupijivi ata, apo judíovi. Itsiata tsitanepanatsi bajarapacuenia ofrenda petoexanaenexa peyavenonaenexa juya judíovijavelia, Jerusalén tomarapijivi. Tsipaji judíovi copiaya yapëtane pexanialivaisi pecapanepelivaisinexatsi Diosojavavelia. Nexata judíovi pejamatabëcueneta, pamonaë apo judíovi ata, yapëtane baja pecapanepelivaisinexatsi Diosojavavelia. Bajarax-

uata pamonaē apo judíovi beyavenona juya judíovijavabelia. Judíoviyajuvēnēvi aeconoxae bitso namatavenona peyavenonaenexatsi mapanacuata penamatavenonaejavaxi yabara. <sup>28</sup>Copiaya tocalianē tsane mapaofrendaje Jerusalén tomarapijivi-javabelia. Nexata bajaraxuacujinae itsa ponaenajē España nacuyabelia, copiaya patsianajē paxamējavata. <sup>29</sup>Itsa patsianajē paxamējavabelia, orijibia pacatsipae-bianatsi pexanialivaisi, Cristo pelivaisi, bitso panejamatabēcuenebarēyanexa.

<sup>30</sup>Tajamonae, pajumecovēnētame vajatuxanenē Jesucristo. Paneasivamēnua Espíritu Santo pejamatabēcueneta papecajamatabēcueneitorobixae pataniašivanexamē. Bajaraxuata pexaniacuene pacavajētatsi. Itsa pavajētame Diosojavabelia, xanē ata asaēyata panetovajētsianame, pacuenia tajacuata natovajētabiabajē. <sup>31</sup>Panetovajētsianame Diosojavabelia tanejavavenonaenexa taneitsacueniabiyaniva Judea nacuapijivi, Dioso apo pejumecovēnētsivi. Panetovajētsianamenua Dioso pejumecovēnētsivi, Jerusalén tomarapijivi, tanevecuapitsinexa xaniavaetsia paofrenda tocaponaējitsianē. Pamonaē apo judíovi pejebipalataxae, belia bajarapaofrenda apo nevecuapitsi tsipae bajarapamonae judíovi. <sup>32</sup>Panetovajētsianamenua, itsa Dioso jitsipa, barēyaya tapatsinexa paxamējavabelia. Panetovajētsianamenua tanejamatabēcuene asaēyaxanaenexa Diosojavabelia itsa ponaponajē paxamējavata. <sup>33</sup>Xanē pacatovajētabiabatsi Diosojavabelia papecayajavaponaponaeenexa Dioso. Dioso cajena nacayavenonabiaba jamatabēcuenebarēyaya vajajinavanapaenexa. Bajara itsi tsane.

### **Pacuenia Pablo jamatabēnajalia peyapētaevitsi, Roma tomarapijivi, yabara pelivaisi**

**16** Payavenonaename vajabanava Febe, pova ponaejitsia paxamējavabelia. Bajarapova yavenonabiaba Dioso pejumecovēnētsivi, Cencrea tomarapijivi. <sup>2</sup>Pacopiapitsianame xaniavaetsia bajarapova vajatuxanenē Jesucristo pejamatabēcueneta, pacuenia vaxaitsi copiapitabiabatsi Dioso vajanajuajumecovēnētsivi. Xua namatavenona bajarapova, payavenonaename. Tsipaji bajarapova yavenonabiaba ayaibitsaēto Dioso pejumecovēnētsivi. Xanē ata neyavenonabiaba.

<sup>3</sup>Nebajacobiana Prisca. Prisca pamona ata, Aquila, nebajacobiana. Bajarapajivibeje tayajavanacuenebijivibeje vajatuxanenē Jesucristo pijacuene. <sup>4</sup>Bajarapajivibeje toyai atatsibeje petēpaejavanexabeje picani, necapanepabeje tatēpaejavaminexavecu. Nexata jumaitsinē: “Pexaniacuene baja cajena bitso panetoexanamebeje,” janē bajarapajivibejevabelia. Itsiata ēxanē bajarapacuenia apo jumaitsinē. Daxita pamonaē apo judíovi, Dioso pejumecovēnētsivi, bajarapamonae ata, bajarapacuenia jumaitsitsibeje tanecapanepaexabeje. <sup>5</sup>Pamonaē Dioso pejumecovēnētsivi, pamonaē nacaetuatabiaba Priscabeje Aquilabeje pijabota, bajarapamonae ata nebajacobiana. Nebajacobiananua tasivanē Epeneto. Bajaraponē daxita Asiavēnē nacuapijivivecu copiaya najamatabēcuenecopata Jesucristojavabelia. <sup>6</sup>Nebajacobiananua María, pova bitso tonacuenebabiaba Dioso pijacuene paxamē tuatuajēta. <sup>7</sup>Nebajacobiananua tajanacuapijinēbeje, Andrónicobeje Juniasvēnēnēbeje. Bajayata bajaraponēbeje panenajuajeba pananeconitsivi pejebabiabibota. Bajaraponēbeje yayataeya baracuaicuajitsibeje pevēna apóstolevi ata. Xanē ata tanajamatabēcuenecopatsivajēnaeya, bajaraponēbeje najamatabēcuenecopatabeje Cristojavabelia.



<sup>8</sup>Nebajacobiananua Ampliato. Bitso tasivanë. Tsipaji bajaraponë ata Cristojavabelia najamatabëcuenecopata. <sup>9</sup>Nebajacobiananua Urbano. Bajaraponë ata tonacuenebaponapona vajatuxanenë Jesucristo pijacuene pacuenia vaxaitsi tonacuenebavanapatsi. Nebajacobiananua Estaquis, bitso tasivanë. <sup>10</sup>Nebajacobiananua Apeles, ponë picani dovathi pejamatabëcueneta jamatabëcueneëjëtatsi Cristo pelivaisi pejumecovënëtsijava yabara. Itsiata apo copatsi pejumecovënëtsijava Cristo pelivaisi. Nebajacobiananua Aristóbulu pijamonae. <sup>11</sup>Nebajacobiananua tajanacuapijinë Herodión. Nebajacobiananua Narciso pijamonae, pamonaë penajamatabëcopatsivi Cristojavabelia. <sup>12</sup>Nebajacobiananua Trifenabeje Trifosabeje, povabeje tonacuenebabiaba Dioso pijacuene. Nebajacobiananua vajaasivava Pérsida, pova bitso tonacuenebabiaba Dioso pijacuene. <sup>13</sup>Nebajacobiananua Rufo, ponë bitso xaniavaetsia jumecovënëta vajatuxanenë. Bajaraponë pena ata nebajacobiana. Bajarapova bepexënatonë netaeyabiaba. <sup>14</sup>Nebajacobiananua Asíncrito, Flegonte ata, Hermas ata, Patrobas ata, Hermes ata, itsamonae ata, pamonaë najinavanapa bajarapamonaejavata. <sup>15</sup>Nebajacobiananua Filólogo, Julia ata, Nereo ata, Nereo pejuyapijiva ata, Olimpas ata, daxita itsamonae ata, Dioso pejumecovënëtsivi, pamonaë najinavanapa bajarapamonaejavata.

<sup>16</sup>Paxamë ata Dioso panejumecovënëtsixae, xaniavaetsia namataenetsia bitso nasivaya panabajacobabiabare. Daxita pina Dioso pejumecovënëtsivi majotaje pejinavanapaevi pacabajacobalia.

<sup>17</sup>Tajamonae, pacatsipaebatsi itsalivaisi. Penajumetsënëtsilivaisi petsipae-baponaevi, panayajivitaename papecayamaxëitojorobianiva. Bajarapamonae namataenetsia pacanajumeanaenotsiaexanaena najamatabëcuenejëpaeya panejinavanapaeyaniva panenavecuantsanaenexa. Palivaisi baja paxamë pajumecovënëtamë, bajarapalivaisivecua saicayalivaisi bajarapamonae tsipaebapona. Panavecuatsare bajarapamonae. <sup>18</sup>Bajarapamonae apo jamatabëexanae pacuenia jitsipa vajatuxanenë Jesucristo. Biji rajane saya jamatabëexana bajarapamonae pijacuata penatojitsipaecuenia. Bajarapamonae jivi tsipaebapona bepexaniajailivaisi itajara. Itsiata baitsi jane bajarapamonae saya jamatabëyamaxëitojoroba pamonaë abaxë xaniavaetsia apo jumeyapëtae pexaniajailivaisi. <sup>19</sup>Daxitajivi paxamë pacavënëlivaisitane xaniavaetsia panejumecovënëtsijava Dioso. Bajaraxuata pacasivabarëyatsi. Pacatojitsipatsi paneypëtaenexa bitso ëpexaniacuene paneexanaenexa. Pëtsa panacopatame itsajivi ata papecayamaxëitojorobinexa pibisiacuene paneexanaenexa. <sup>20</sup>Dioso baja cajena vajanacayavenonaenë najamatabëcuenejëpaeya vajajinavanapaenexa, itsajivi ata vajanacayamaxëitojorobianiva penajumetsënëtsilivaisita. Nexata Dioso bepíjia pacayavenonaena panejamatabëcueneamoneyabinexa dovathi. Pacatovajëtabiabatsi Diosojavabelia vajatuxanenë Jesucristo papecayavenonabiabinexa.

<sup>21</sup>Pabajacobianame pina Timoteo, Dioso patatonajuanacuenebinëbeje. Pabajacobianamenua pina tajanacuapijivi Lucio, Jasón ata, Sosípater ata.

<sup>22</sup>Xanë, Tercionë, mapabaxutotaje Pablo pijume tajumeyaquinapon-aenë. Xanë ata pacajamatabënajinatsi. Tsipaji Jesucristojavabelia vajanajamatabëcuenecopatsivi.

<sup>23</sup>Pabajacobianame pina Gayo. Naponaponajë Gayo pijabota. Gayo tocopatabiaba daxita Dioso pejumecovënëtsivi penacaetuatabiabinexa Gayo pijabota. Pabaja-

cobianamenua pina Erasto, ponë evetabiaba palata, Corinto tomarapijpalata. Pabacobianamenua pina vajabananë Cuarto.

<sup>24</sup> Pacatovajëtabiabatssi Diosojavabelia daxita paxamë vajatuxanenë Jesucristo papecayavenonabiabinexa. Bajara itsi tsane.

### **Pacuenia cotocaevipijilivaisita Pablo jumaitssi yabara pelivaisi**

<sup>25</sup> Vaxaitssi Dioso yabara jumaitssitsi tsabiabi: “Dioso cajena bitso ayaijamatabëcuenenë,” jaitsi tsabiabi. Dioso, daxitamatacabijavabelianexa peponaponanë, caëjëpatsi papecajamatabëcuene asaëyaexanaenexa pejumelivaisita. Bajarapalivaisi pexanialivaisi, Jesucristo pelivaisi, jivi pecapanepaelivaisinexatsi Diosojavabelia. Bajarapalivaisi jivi tsipaebaponajë. Bajarapalivaisi bajayajebi picani Dioso muetsia xainabuata. Dioso nacula pexanaejavaveliacujinae, muetsia Dioso xainabuata Jesucristo pelivaisi. <sup>26</sup> Bajarapalivaisi bajayata Diosojumelivaisipaebivi profetavi tajëvelia yapëtane baja cajena. Nexata bajarapalivaisi profetavi yaquina. Nexata bajarapalivaisi mapamatacabitaje Dioso jane baja nacayapëtaeyaexana. Nexata Dioso pijajivi itorobapona daxitanacuanëpijivijava petsipaebinxaxa Jesucristo pelivaisi. Bajarapacuenia Dioso pijajivi itorobapona daxitanacuanëpijivi ata pejumecovënëtsinexa Jesucristo pelivaisi.

<sup>27</sup> ¡Caenë rabaja Dioso daxitacuene peyapëtaenë! Bajaraxuata daxitamatacabijavabelianexa vaxaitssi vajatuxanenë Jesucristo pejamatabëcueneta Diosojavabelia jumaitssitsi tsabiabi: “¡Diosomë, bitso ayaijamatabëcuenenëmë!” jaitsi tsabiabi. Bajara itsi tsane.

## **Mapabaxutoje San Pablo copiaya toyaquina Corinto tomarapijivijavabelia**

### **Pacuenia Pablo toyaquina mapabaxutoje Dioso pejumecovënëtsivi, Corinto tomarapijivijavabelia, yabara pelivaisi**

**1** Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi pexanialivaisi tatsipaebaponaenexa daxitanacuanëjava. Vajabananë Sóstenes neyavenona mapalivaisije patacatoyaquinaejava paxamëjavabelia. <sup>2</sup>Mapabaxutoje pacatoyaquinatsibeje Dioso panejumecovënëtsivi, paCorinto tomarapijivimë. Dioso baja papijajivimë Jesucristo pejamatabëcueneta aneconijibia Dioso papecataexae. Dioso pacajunata papijajivinexamë xaniavaetsia panetojinavanapaenexa. Pacayajavajunata baja cajena daxita Dioso pejumecovënëtsivi, itsanacuanëjava pejinavanapaevi, pamonaë navajëcabiaba Jesucristojavabelia. Vajatuxanenë Jesucristo rabaja bajarapamonae ata pijatuxanenë. <sup>3</sup>Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

### **Pacuenia Corinto tomarapijivi Cristo pijajivixae, Dioso yavenonabiabatsi yabara pelivaisi**

<sup>4</sup>“Xanepana rabaja pacuenia yavenonabiabame bajarapamonae Jesucristo pijajivixae,” janë tsabiabi Diosojavabelia tavajëtabiabijavata paxamë yabara. <sup>5</sup>Jesucristo papijajivixaemë, daxitacuene yabara Dioso pacajamatabëcueneyavenonabiaba. Pacayavenonabiabanua xaniavaetsia jivi panetsipaebinexa Dioso pejumelivaisi. Pacajumeyapëtaeyaexananua pepo pexaniajailivaisi. <sup>6</sup>Xua yabara pacatsipaebabiabatsi Cristo papecajamatabëcuene yavenonabiabinexa, baja rajane pacatocopiapata. Bajarapacuenia papecatocopiapatsixae, nexata baja pajamatabëcuensaëmë tsavanapae panejumecovënëtsijava bajarapalivaisi. <sup>7</sup>Nexata abaxë paepatojebi pacopiaevetavanapame vajatuxanenë Jesucristo icatsia pepatsijavanexatsica, Dioso pacacajëpaeyaexanabiaba panetoexanavanapaenexa daxita pacuene Dioso pacatojitsipa. <sup>8</sup>Dioso cajena pacayavenonaponaena paneajamatabëcuensaënexa Dioso panejumecovënëtsijava daxitamatacabijavabelianexa. Nexata pamatacabi vajatuxanenë Jesucristo icatsia patsianica, toacuenebi tsanetsi itsajivi ata papecaneconitsinexa. <sup>9</sup>Dioso cajena bajarapacuenia pacatexanaena. Tspaji pacuenia Dioso najumecapanepaeya jumai tsabiabi pexanaenexa, exanabiaba. Dioso pacajunata pexënato, vajatuxanenë Jesucristo, papijajivinexamë.

### **Pacuenia Dioso pejumecovënëtsivi navecuanatsanapona apo penajamatabëcuenejëpaexae yabara pelivaisi**

<sup>10</sup>Tajamonae, pacaitorobatsi vajatuxanenë papijajivixaemë, najamatabëcuenejëpaeya panejinavanapaenexa. Pëtsa panavecuanatsanaeyajoneponame itsajavabelia. Biji rajane najamatabëcuenejëpaeya pajinavanapare. Najamatabëcuenejëpaeya xaniavaetsia panajamatabëxainare caelivaisi. <sup>11</sup>Mapacuenia pacatoyaquinatsije tspaji Cloëvënëva pijajivi netsipaeba. Apo panajamatabëcuenejëpaemë pina. Daxitatsi baja cajena caenë vajatuxanenë Jesucristo pijajivitsi. Paxamë tuatuajëta pina itsa-

monae nabijataeya namataenetsia najumeanaenotabiaba. <sup>12</sup>Itsamonae pina xanë yabara jumai tsabiabi: “Xanë raja saicaya Pablo pijajivitonënë,” jai pina tsabiabi. Itsamonae pina jumai tsabiabi: “Xanë raja saicaya Apolos pijajivitonënë,” jai pina tsabiabi. Itsamonae pina jumai tsabiabi: “Xanë raja saicaya Pedro pijajivitonënë,” jai pina tsabiabi. Itsamonae pina jumai tsabiabi: “Xanë raja saicaya Cristo pijajivitonënë,” jai pina tsabiabi. <sup>13</sup>Bajarapacuenia paxamëyajuvënëvi apo bejumaitsi tsabiabi. Tsipaji bajarapalivaisi yabara nabijataeya namataenetsia penajumeanaenotabiabixae, navecuanatsanapona. Bajarapacuenia apo benavecuanatsanaponaes tsipaji baja cajena Cristo caenë tsaponaponaes. Apo navitsanae baja cajena. Nexata pamonaes ata Cristo pijajivi, caebitsaëto rabaja tsavanapae. Nexata apo benavecuanatsanaponaes. Nexata itsajivi ata xanë yabara apo bejumaitsi: “Xanë raja saicaya Pablo pijajivitonënë,” apo bejai. Tsipaji xanë itsajivi ata apo sivanabeyaxuabiaexanaenë cruzata. Itsajivi ata baja cajena apo bautisabitsi tavënëta tajajivitonë penaexanaenexa. <sup>14</sup>Xanë baja cajena apo bautisabinë jivi ayaibitsaëto. Saya bautisabajë anijanëbeje, Cristobeje Gayobeje. Bajaraponëbeje itsa bautisabajë, bautisabajë Cristo pevënëta. Nexata jivi ayaibitsaëto apo tabautisabixae, sivabarëyanë Diosojavabelia. <sup>15</sup>Nexata acuenebi itsajivi ata pejumaitsijava: “Xanë raja nebautisaba Pablo pevënëta. Nexata Pablo pijajivitonënë,” pejaijava. <sup>16</sup>Jemajanë tsaena. Bautisabajënu tsaena Estéfanos pijamonae. Pematatsënëa baja apo najamatabënapitsinë pajiviyo bautisabajë. <sup>17</sup>Cristo apo nitorobi bitso jivi tabautisabaponaenexa. Biji rajane Cristo nitoroba tatsipaebaponaenexa jivi pexanialivaisi pecapanepaelivaisinexatsi Diosojavabelia. Nexata pacuenia Dioso nejamatabëcuenecaëjëpaeya exanapona, bajarapacuenia pacatsipaebapontsi. Apo nitorobi baja cajena tatsipaebaponaenexa pematatsënëa itsalivaisicuenia. Pacuenia tsipaebabiaba pamonaes yapëtane saya maëpanacuapijilivaisije, bajarapacuenia tatsipaebinexa, Cristo apo nitorobi. Nexata itsa tsipaebaponaejitsipajë pacuenia tsipaebabiaba pamonaes yapëtane saya maëpanacuapijilivaisije, nexata Jesucristo vajanacasivatëpaejava cruzata tsipaebi atanë tsipae jivijavabelia, ajumematamobinë tsipae.

### **Pacuenia Cristo jivijavabelia tsitajëta Dioso piasaënëcuene, Dioso bitso daitacuene peyapëtaenëcuene ata, yabara pelivaisi**

<sup>18</sup>Itsamonae pijaneconi yajavatëpaena. Bajarapamonae jumetae ata Jesucristo cruzata vajanacasivatëpaejava, bajarapalivaisi apo jumecovënëtsi. Benatsiquejemalivaisi saya tane. Itsiata baitsi jane vaxaitsi Dioso vajanacacapanepaevinexa, bajarapalivaisi nacayapëtaeyaexana Dioso piasaënëcuene. <sup>19</sup>Dioso baja cajena pejumelivaisibaxutota tajëvelia jumaitsi mapacueniaje:

Itsamonae bitso yapëtane mapanacuapijilivaisije. Bajarapamonae peyapëtaelivaisimi, itsamatacabi vecuajibiaexanaenajë. Pamonaes ata bitso peyapëtaevi itajara tanetsi mapanacuapijivije, xanë itsamatacabi jamatabëcueneitajëtsianajë pacuenia jamatabëcueneitsi. Nexata bajarajota daitajivi jamatabëcueneypëtaenatsi bajarapamonae saya bevelia peyapëtaevicuene, jai baja cajena tajëvelia Dioso pejumelivaisibaxutota.

<sup>20</sup>Ponë yapëtane saya maëpanacuapijilivaisije, ajumematamobi cajena. Ponë ata bajayajebi nacujaruba maëpanacuapijilivaisije, nexata yapëtae ata, ajumematamobi cajena. Ponë ata bitso ajumelivaisisaëya cuaicuaijai, bajaraponë ata ajumematamobi cajena. Daxita bajarapitsivi ajumematamobi, itsa apo natovajëtsi Diosojav-

abelia peyavenonaenexatsi peyapëtaenexa jane baja xaniavaetsia. Dioso baja cajena nacayapëtaeyaexana mapanacuapijilivaisije natsiquejemalivaisicuene. Tsipaji Dioso apo penajamatabëxainaelivaisi. <sup>21</sup> Dioso baja cajena daxitacuene bitso peyapëtaenë mapanacuapijilivaisi peyapëtaevi matatoxenetsia. Nexata Dioso apo tocopatsi pejamatabëcueneyapëtaenexatsi pamona bitso yapëtane saya mapanacuapijilivaisije. Biji rajane Dioso jamatabëcapanepa pijaneconivecua pamona jumeconvënëta pexanialivaisi, palivaisi patsipaebaponajë, Jesucristo cruzata vajanacasivatëpaelivaisi. Bajarapalivaisi itsamonaë betsitanatsiquejemalivaisi atatsi, itsiata bajarapalivaisi pejamatabëcueneta capanepaenatsi pamonaë jumeconvënëtavanapa bajarapalivaisi.

<sup>22</sup> Judíovi itsa jumetaeyabiaba patatsipaebijava Diosojavabelia picani pecapanepaelivaisinexatsi, najumai tsabiabi ëpamonaë: “Itsa taejitsipatsi Dioso pesaëta pinijicuene pexanaejava pamonaë nacatsipaeba mapalivaisije, nexata matapania jumeconvënëtsipatsi bajarapalivaisi pexaniajailivaisicuene,” najai tsabiabi judíovi. Griegovia ata itsa patsipaebabiabajë bajarapalivaisi, najumai tsabiabi ëpamonaë: “Mapalivaisije itsa jumejëpaejitsipa palivaisi nacatsipaebabiaba vajayajuvënëvi, daxitalivaisi bitso peyapëtaevi, nexata matapania jumeconvënëtsipatsi pexaniajailivaisicuene mapalivaisije,” najai tsabiabi griegovi. <sup>23</sup> Itsiata baitsi jane paxanë itsa patsipaebaponajë bajarapalivaisi, “Cristo raja nacasivatëpa cruzata vajanacacapanepaenexa vajaneconivecua,” pajanë tsabiabi. Bajarapacuenia patatsipaebijava judíovi jumetaeyabiabi ata, itsiata apo jumeconvënëtsi. Anaepanabiaba saya. Apo judíovi ata itsa jumetaeyabiaba Cristo vajanacasivatëpaejava cruzata, benatsiquejemalivaisi saya jumetaeyabiabi. <sup>24</sup> Itsiata pamonaë Dioso junatatsi pecapanepaenexatsi, judíovi, apo judíovi ata, bajarapamonaë jumeyapëtaepona bajarapalivaisi. Nexata bajarapamonaë yapëtaepona Dioso piasaënëcuene. Tsipaji bajarapamonaë Dioso capanepaejitsiatsi pijaneconivecua Cristo pesivatëpaexaetsi cruzata. Bajarapamonaë yapëtaeponanua Dioso bitso daxitacuene peyapëtaenëcuene. Tsipaji Dioso tajëvelia najamatabëxaina bajarapamonaë pibisiacuene pexanaeconivecua pecapanepaenexa Cristo pejamatabëcueneta. <sup>25</sup> Pacuene Dioso exana jivi pecapanepaenexa pijaneconivecua, bajarapacuenia mapanacuapijivije, Dioso apo pejumeconvënëtsivi, betsitanatsiquejemacuenetsi. Pacuenia baja cajena Dioso tajëvelia najamatabëxaina jivi pecapanepaenexa, exana baja. Bajaraxua bitso pexaniacuene. Bitso peyapëtaevi ata mapanacuapijilivaisije, apo caëjëpaetsi bajarapacuenia penajamatabëxainanexa. Dioso itsa copata Cristo pebeyaxuabinexatsi cruzata, bajarapaepatota Dioso saya bepiasaëjibinë tanetsi mapanacuapijivije. Itsiata baitsi jane bajarapaepatota Dioso najamatabëcueneitajëta bitso piasaënëcuene daxita mapanacuapijivije matatoxenetsia. Tsipaji bajarapaepatota Dioso pinijicuene exana vajanacacapanepaenexa vajaneconivecua. <sup>26</sup> Tajamonaë, pacanaëjëre mapacueneje. Paxamëyajuvënëvi caejivibeje saya bitso peyapëtaevi mapanacuapijilivaisije. Caejiviyobeje pijinia saya ayaijamatabëcuenevi. Caejiviyobeje saya petuxanevi pexi. Paxamë paayaibitsaëtoxanetomë beveliajamatabëcuene saya panexainaevi. Bajarapacuenia beveliajamatabëcuene panexainaevi ata, itsiata Dioso pacajunata papijajivinexamë. <sup>27</sup> Pamonaë bitso peyapëtaevi mapanacuapijilivaisije, jumai tsabiabi paxamë bajarapalivaisi apo paneyapëtaevi yabara: “Mara pamonaë bitso apo peyapëtaevije,” jai tsabiabi. Itsiata Dioso pacaitapeta papijajivinexamë, apo paneyapëtaevi ata. Bajarapacuenia Dioso pacaitapeta, pamonaë bitso peyapëtaevi natane, piauranexa Dioso pitabarata, pamatacabi daxita Dioso papijajivimë

bitso paneyapëtaevi pacaexanaena. Dioso cajena pacaitapetanua papijajivinexamë, mapanacuapijivije bepaveliamatabëcuenevimë pacatae ata. Bajarapacuenia Dioso pacaitapeta, pamonaе bitso ayaijamatabëcuenevi natane, piauranexa Dioso pitabarata, pamatacabi daxita Dioso papijajivimë paayaijamatabëcuenevimë pacaexanaena. Bajarapamonaе aura tsane itsa nayapëtaena jamatabëcuenenavëxaniabiaya beveliamatabëcuenevi papecataejava Dioso papijajivimë.<sup>28</sup> Dioso baja cajena pacaitapeta papijajivinexamë, daxitajivi papecaitoaxae, bijiaya papecanaëcotsivi ata. Bajarapacuenia Dioso pacaitapeta, pamonaе bitso ayaijamatabëcuenevi itajara daxitajivi tanetsi mapanacuataje, Dioso piaurabinexa. Bajarapamonaе Dioso urabiana, pamatacabi daxita Dioso papijajivimë paayaijamatabëcuenevimë pacaexanaena. Bajarapamatacabi daxitajivi Dioso yapëtaeyaexanaena pijajumematamobijava, pamonaе ayaijamatabëcuenevi itajara tanetsi mapanacuataje.<sup>29</sup> Bjaraxuata Dioso pitabarata jamatabëcuenenavëxaniabiaya itsajivi ata apo bejumaitsi itsajivijavabelia: “Xanë bitso ayaijamatabëcuene taxainaenë,” apo bejai.<sup>30</sup> Dioso papecaitaxutotsoniataexae, pacaitapeta papijajivinexamë. Nexata Jesucristo payajavajinavanapame. Vaxaitsi Dioso jamatabëcuenyapëtanetsi. Tsipaji Jesucristo nacajamatabëcuenyavenona Dioso vajajamatabëcuenyapëtaenexa. Jesucristo pejamatabëcueneta Dioso aneconijibia nacatane. Pijajivitsinua Dioso nacaexana. Nacavecuajibiaexanua pibisiacuene vajaexanaeconimi.<sup>31</sup> Bjaraxuata jivijavabelia benavajunupaebatsi Dioso vajanacayavenonaеjava. Tsipaji Dioso pejumelivaisibaxutota jumaitsi mapacueniaje: “Pëtsa navajunupaebame saya nijacuata nexanaejava yabara jivi pecayaiyataenexa. Biji rajane navajunupaebare Dioso pecayavenonaponaеjava. Nexata jivi Dioso yayiataena,” jai Dioso pejumelivaisibaxutota.

### **Pacuenia Jesucristo sivatëpa mapanacuapijivije yabara pelivaisi**

**2** Tajamonaе, pamatacabi ponajë paxamëjavabelia, pacatsipaebatsi baja cajena pexaniajailivaisi, Dioso pejumelivaisi. Nexata bajarapamatacabi apo pacatsipaebitsi pacuenia tsipaebabiaba pamonaе bitso peyapëtaevi mapanacuapijilivaisije. Biji rajane pacatsipaebatsi xaniavaetsia jumenapebetsiaya panejumeyapëtaenexa patacatsipaebilivaisi.<sup>2</sup> Itsa ponaponajë paxamëjavata, najamatabëxainajë patacatsipaebinexa ëJesucristo pelivaisi. Nexata bitso pacatsipaebabiabatsi Jesucristo vajanacasivatëpaejava cruzata.<sup>3</sup> Paxamëjavata itsa ponaponajë patacatsipaebinexa pexaniajailivaisi, Jesucristo pelivaisi, najamatabëcuenyapëtaniji apo tanecaëjëpaejava tajacuata patacatsipaebinexa. Nexata natsijamatabëcuenebëjanë. Jamatabëcueneconeconajë Dioso pitabarata bajarapalivaisi patacatsipaebijavanexa yabara.<sup>4</sup> Bajarapamatacabi pexaniajailivaisi itsa pacatsipaebabiabatsi, Dioso neyavenonabiaba. Xanë ëtajamatabëcuenesaëta bajarapalivaisi apo pacajumecovënëtsiaexanaetsi. Biji rajane Espiritu Santo pacatsijamatabëcuacuajjai. Dioso pesaëta pinijicuene taexanaejava ata, pataneme. Bjaraxuata patacatsipaebilivaisi pexaniajailivaisicuene, payapëtaneme. Nexata bajarapalivaisi pajumecovënëtamе.<sup>5</sup> Bjarapacuenia pacatsipaebatsi panenajamatabëcueneocopatsinexa Dioso javabelia, Dioso pesaëta papecayavenonaponaenexa. Tsipaji apo pacatojitsipaetsi paneyajavajumecovënëtsinexa pamonaе mapanacuataje tanetsi bitso peyapëtaevi mapanacuapijilivaisije.

**Pacuenia Dioso najamatabëcueneitajëtaona pejumecovënëtsivitsijavabelia  
Espíritu Santo pejamatabëcueneta yabara pelivaisi**

<sup>6</sup>Dioso bitso pejumecovënëtsivi tuatuajëta ita pajinavanapajë, patsipaebavanapajë Dioso pejumelivaisi, pexaniajailivaisi. Bajarapalivaisi apo yapëtae mapanacuapijivije. Mapanacuanë pevetsivi ata apo yapëtae. Bajarapamonae saicaya itsalivaisi xaina. Bajarapamonae bajarapalivaisi yajavatëpaena. <sup>7</sup>Dioso pejumelivaisi, pexaniajailivaisi, ita patsipaebavanapajë, patsipaebavanapajë Cristo vajanacasivatëpaejava vajanacacapanepaenexa vajaneconivecua. Bajarapalivaisi baja cajena Dioso bajayata tajëvelia muetsia xainabuata. Matapania aeconoxae mapatacabitaje Dioso nacayapëtaeyaexana bajarapalivaisi. Dioso baja cajena nacua pexanaevajënaeya ata, najamatabëxaina pacuenia exanaejitsia vajanacarajutsinexa matababi apo peverevereaejava. <sup>8</sup>Nexata abaxë pamatababi Cristo ponapona mapanacuataje, itsanë ata mapanacuanë pevetsiviyajuvënënë apo jumeyapëtae bajarapalivaisi, Cristo pelivaisi. Bajarapamonae ita jumeyapëtaejitsipa bajarapalivaisi, nexata Cristo apo beyaxuabi tsipaetsi cruzata, ponë pepo petuxanenë, Dioso pexë nato. <sup>9</sup>Nexata bajarapamonae apo pejumeyapëtaexae Cristo pelivaisi, copiapata jane baja pacuenia Dioso pejumelivaisibaxutota tajëvelia jumaisi mapacueniaje: Xua abaxë itsajivi ata apo tae, apo jumetaenua, apo sivanajamatabëxainenua, bajaraxua Dioso baja cajena toxaniavaeta pamona Dioso pejitsipaevinexa, jai tajëvelia Dioso pejumelivaisibaxutota Cristo vajanacasivatëpaejavanexa cruzata.

<sup>10</sup>Nexata vaxaitsi Cristo vajanacasivatëpaejava, Dioso nacayapëtaeyaexana Espiritu Santo pejamatabëcueneta. Espiritu Santo baja cajena daxitacuene nacayapëtaeyaexana. Pacuenia Dioso najamatabëxaina vajanacacapanepaenexa, bajaraxua ata Dioso nacayapëtaeyaexana Espiritu Santo pejamatabëcueneta.

<sup>11</sup>Vaxaitsi apo nacacajëpae vajajamatabëcueneyapëtaenexa pacuenia bënëna najamatabëxaina itsajivi. Itsiata bajarapajivi pijacuata najamatabëcueneyapëtane. Bajara pijinia pacuenia vaxaitsi ata Dioso apo jamatabëcueneyapëtae tsipaetsi pacuenia Dioso najamatabëxaina Espiritu Santo ita apo nacayapëtaeyaexanae tsipae. <sup>12</sup>Tsipaji Dioso apo nacamocopatsi vajacuata vajajamatabëcueneyapëtaenexa pacuenia Dioso najamatabëxaina. Bajaraxuata Dioso nacarajuta Espiritu Santo vajanacatsijamatabëcaenexa. Nexata Espiritu Santo pejamatabëcueneta nacayapëtaeyaexana pacuenia Dioso nacayavenonaejitsia Jesucristo pejamatabëcueneta. <sup>13</sup>Nexata livaisi ita tsipaebaponatsi Dioso pejumecovënëtsivijavabelia, tsipaebaponatsi pacuenia Espiritu Santo nacayapëtaeyaexanapona. Apo tsipaebaponaetsi mapanacuapijicuene yabaraje, xua vajacuata banajamatabëxainatsi.

<sup>14</sup>Pajivi Dioso apo jumecovënëtsi, bajarapajivi apo jumecovënëtsi palivaisi picani Espiritu Santo ata yapëtaeyaexanaejitsiatsi. Tsipaji saya bajarapalivaisi betsitantsiquejemalivaisitsi. Bajarapajivi apo cajëpaetsinua pejumeyapëtaenexa palivaisi Espiritu Santo yapëtaeyaexanatsi. Tsipaji Espiritu Santo petsijamatabënaevitsi, cajëpatsi pejumeyapëtaenexa palivaisi Espiritu Santo yapëtaeyaexanatsi. <sup>15</sup>Pajivi tsijamatabëcatsi Espiritu Santo, bajarapajivi pejamatabëcueneta yapëtaeyaexanaponatsi xua Dioso tsitapexaniacuenetsi. Yapëtaeyaexanaponatsinua xua ata Dioso tsitapibisiacuenetsi. Nexata Dioso apo pejumecovënëtsivi apo cajëpaetsi peneconitsinexatsi bajarapajivi Diosojavabelia. <sup>16</sup>Dioso pejumelivaisibaxutota bajaraxua yabara jumaisi mapacueniaje: “Itsajivi ata apo yapëtae pacue-

nia najamatabëxaina pepo petuxanenë Dioso. Nexata itsajivi ata apo caëjëpaetsi pemuxujiobinexa Dioso,” jai Dioso pejumelivaisibaxutota. Nexata pacuenia Cristo jamatabëcueneitsi, bajara vaxaitsi ata jamatabëcueneitsitsi. Nexata itsajivi ata apo caëjëpaetsi vajanacajamatabëcueneypætaenexa. Apo caëjëpaetsinua vajanacamuxujiobinexa.

### **Pacuenia Dioso pejumecovënëtsivi najamatabëcuenejëpaeya Dioso betonacuenebavanapa yabara pelivaisi**

**3** Tajamonaë, palivaisi abaxë ayapëbeje jivi pejumeyapætaenexa, bajarapalivaisi tsipaebabiabajë Espíritu Santo pitorobicueniatsi pejinavanapaevijavabelia. Nexata bajarapamonaë nejumeyapætaeyabiaba. Itsiata baitsi jane paxamë bajayajebi baja Cristo pelivaisi panejumecovënëtsivi ata, piayapëbejelivaisi apo pacatsipaebabiabitsi. Tsipaji apo panejumeyapætaemë tsipae. Bajaraxuata abaxë pacatsipaebabiabatsi pacuenia tsipaebabiabajë pamonaë pejanajumecovënëtsivi Cristo pelivaisi. Tsitecaeya abaxë bepapejevaxijamatabëcuenemë Cristo panejumecovënëtsijava yabara. Tsipaji apo panejumeyapætaeponaemë panevajënaeyabelia Cristo pelivaisi. <sup>2</sup>Penacuetojiviyo abaxë ëmito barajutatsi. Apo rajutsitsi abaxë pexaenexa pevi. Bajara pijinia pacuenia paxamë ata pamatacabi ajena pajumecovënëtame Cristo pelivaisi, pacatsipaebatsi peyapëxanepanaelivaisi panejumeyapætaenexa. Tsipaji abaxë bajarapamatacabi apo pacacaëjëpae panejumeyapætaenexa palivaisi abaxë ayapëbeje. Itsiata baitsi jane abaxë aeconoxae ata saya patsitecavanapame. Apo pacacaëjëpae panejumeyapætaenexa pematatsënëa. Bajaraxuata paxamë abaxë bemito paneapaejivixi Cristo pelivaisi panejumecovënëtsijava yabara. <sup>3</sup>Bajarapacuenia pajamatabëcueneitsimë tsipaji abaxë mapanacuapijivije, Dioso apo pejumecovënëtsivi, jamatabëcuenejëpaeya pajinavanapame. Paxamë abaxë panacuenecaëbabiabame. Nabijataeyanua namataenetsia panajumeanaenotabiabame. Natsanaeyanua jamatabëpanavecuajinavanapame. Nexata abaxë pacatsitecavanapame mapanacuapijivi pijacuene. <sup>4</sup>Pacuenia Dioso apo pejumecovënëtsivi najamatabëcuenejëpaeya apo jinavanapae, bajarapacuenia paxamë ata najamatabëcuenejëpaeya apo pajinavanapaemë. Tsipaji paxamëyajuvënëvi, itsamonaë, xanë yabara jumai tsabiabi: “Pablo raja Apolosvecua ayaijamatabëcuenenë. Bajaraxuata xanë saicaya Pablo pijajivitonënë,” jai tsabiabi. Itsamonaë pijinia jumai tsabiabi: “Apolos raja Pablovecua ayaijamatabëcuenenë. Bajaraxuata xanë Apolos pijajivitonënë,” jai tsabiabi.

<sup>5</sup>Xanë Pablonë, apo ayaijamatabëcuenenënë. Apolos ata raja apo ayaijamatabëcuenenë. Paxanëbeje ata raja Apolosbeje saya Dioso papijajivitonënëbeje. Bajaraxuata pacatsipaebatsibeje vajatuxanenë Cristo pelivaisi. Nexata baja pajumecovënëtame vajatuxanenë Cristo pelivaisi. Paxanëbeje patonacuenebajëbeje vajatuxanenë Cristo pacuenia paneitorobabeje. <sup>6</sup>Pabixainaevi bauba pabita xua jamatabëuba. Bajaraxuacujinae pabita peubijava eveta petoayabacabejeyanivatsi. Itsiata baitsi jane xua uba pabita, Dioso pejamatabëcueneta tovitsabiaexanatsi. Bajara pijinia pacuenia xanë ubajë Dioso pejumelivaisi paxamë pejamatabëëthëtota. Bajaraxuacujinae Apolos pacaevetaponapona Dioso pejumelivaisita. Itsiata baitsi jane Dioso pejamatabëcueneta pacajamatabëcuene vitsabiaexanapona. <sup>7</sup>Nexata ponë uba, ponë ata evetaponapona, apo ayaijamatabëcuenenëbeje. Caenë baja cajena Dioso ayaijamatabëcuenenë. Tsipaji pacuenia pabita peubi-



java Dioso pejamatabëcueneta vitsabiaexana, bajara pijinia pacuenia Dioso pejamatabëcueneta pacatsijamatabëvitsabiaexanapona Dioso pejumelivaisi. <sup>8</sup> Pamonae jivi tsijamatabëuba Dioso pejumelivaisi, pamonae ata evetavanapa Dioso pijajivi, najamatabëcuenejëpa daxita. Itsanë ata apo ayaijamatabëcuenenë itsamonaevēcua. Itsiata Dioso matamotsianatsi caenë canacujitsia saicaya petonacuenebimatamo. <sup>9</sup> Paxanë raja Dioso pijacue ne panebarënacue neba. Paxamë ra pijinia bepapabimë, papabita Dioso panebarëubapona pejumelivaisi. Pacuenia pabita peubijava Dioso pejamatabëcueneta vitsabiaexana, bajara pijinia pacuenia panejamatabëëthëtota Dioso pejumelivaisi vitsabiaexanapona.

Paxamë raja Dioso bepapijabomënu, paboxaneto Dioso panebarëexanapona. <sup>10</sup> Bo pexanaevi, pexaniabo pexanaenexa, itsaxuayo bo ënëtuatuajënexa, copiaya feratonë bamatatorotsia cueruba ibotoxanetonë pemëthëcaenexa bajarapaferatonëjava. Bajaraxuacujinae bajara paibotoxanetonëjumavereca itsaibotonë banajumacatsanejebapona. Nexata xanë, pacuenia Dioso netocopata, copiaya pacatsipaebatsi pexanialivaisi Jesucristo pelivaisi. Nexata baja pajumecovënëtame bajarapalivaisi. Bajaraxuata xanë bo ënëtuatuajënexa matatoyorotsia taferacuejava, bitso betanecujaninë. Bajarapaferatonëjava ibotoxanetonë tamëthëcaejava ata, bitso betanecujaninë. Tsipaji xanë copiaya pacatsipaebatsi Cristo pelivaisi. Nexata juya pamonae cotocaevi pacatsipaebavanapa, pacatsipaeba panevajënaeyabelia panejamatabëcuenesaë tsaponaenexa Cristo pelivaisi panejumecovënëtsijava. Bajarapamonae boyenepananexa ibotonë bepecatsanaponaevi bo ënëtuatuajënexa matatoyorotsia tamëthëcaibotoxanetonëjumavereca. Boyenepananexa pecatsanaponaevi baitapetapona ëpexaniavirijava, pavirijava tsixanepana boyenepananexa. Bajara pijinia itsi pamonae pacaevetavanapa. Ëpexanialivaisi pacatsipaebabiaba panejamatabëcuenesaënexa Diosojavabelia. <sup>11</sup> Payapëtaneme rabaja mapacueje. Itsajivi baja capanepaeya boyenepananexa, itsa tsivajënaemëthëca ibotoxanetonë, nexata baja itsajivi ata bajarapajumabereca icatsia itsaibotoxanetonë apo bemëthëca. Bajara pijinia paitsimë paxamë ata. Capanepaeya baja pajumecovënëtame Jesucristo papecasivatëpaejava Dioso papecavecuaajibiaexanaenexa pibisiacue ne paneexanaeconimi. Nexata baja apo bepajumecovënëtsimë saicayalivaisi. Tsipaji baja ajibi pematatsënëa itsalivaisi papecacapanepaelivaisinexa panijaneconivecua. <sup>12</sup> Pamonae bo exana, maitsije. Itsamonaevi exana bitso penamatamotsijavanëta. Itsamonaevi exana bevelia penamatamotsijavanëta. Pamonae pacatsipaebapona pexaniajailivaisi pacuenia Dioso yapëtaeyaexanaponatsi, bajarapamonae bo bepexanaevi bitso penamatamotsijavanëta bajayajebi bo piagamatabësaëtsecaenexa. Bajarapamonae bo bepexanaevi oronanitonëta, platananitonëta ata, penamatamotsiibotonëta ata. Pamonae pijinia saya pejamatabëcueneta peyapëtaelivaisi pacatsipaebapona, bajarapamonae bo bepexanaevi bevelia penamatamotsijavanëta, bajayajebi apo piagamatabësaëjavanëta. Bajarapamonae bo bepexanaevi saya naejavanëta, patebaxutoxita ata, bearrozbotoxita ata. <sup>13</sup> Nexata pamatacabi Cristo patsianica, bajarapamatacabi nayapëtaena caejivi canacujitsia Cristo pijajivi, pamonae xaniavaetsia tonacuenebavanapa. Bajarapamatacabi Cristo isoto yajavapatsianica. Nexata bajarapaisotota Cristo ëjëtaponaena xua pijajivi, caejivi canacujitsia, tonacuenebatsi. Nexata bajarapacuenia Cristo yapëtaena xaniavaetsia pijajivi petonacuenebijavatsi. <sup>14</sup> Itsanë bo tonacuenebijitsipa itsanë pijabonexa. Nexata bo petoveretetsicujinae, isoto najetarucaea ata, itsiata bo apo tajue tsipae isoto apo petajuejavanëta bo pex-

anetsixae. Nexata bo penacuenebinë matamotsipatsi. <sup>15</sup> Itsiata baitsi jane peveretetsibo itsa totajuejitsipatsi isoto petajuejavanëta, bo pexanetsixae, nexata naxuabijitsipa penacuenebijava. Bo ata naxuabijitsipa. Penacuenebimatamo ata naxuabijitsipa. Itsiata bo pexanaenë apo naxuabi tsipae. Panepaejitsipa itsiata tsiquirijavayota. Bajara pijinia itsi Cristo pelivaisi papecatsipaebivi ata. Baitsi pamona xaniavaetsia pacatsipaeba, capanepaenatsi Dioso. Matamotsianatsinua Dioso. Tsipaji pacuenia Dioso yapëtaeyaexanatsi, pexanialivaisi pacatsipaebapona. Pamona pijinia apo pacatsipaebi xaniavaetsia, apo matamotsi tsanetsi. Tsipaji saya pejamatabëcueneta peyapëtaelivaisi, pacatsipaebapona. Itsiata bajarapamona ata tsiquirijavayota capanepaenatsi Dioso.

<sup>16</sup> Peyapëtaneme rabaja mapacueneye. Paxamë rabaja Dioso bepapijatemplobomë. Tsipaji Espiritu Santo pacayajavaponapona. <sup>17</sup> Pajivi bijianaena bajarapatemplobo, Dioso pijabo, nexata juya bajarapajivi Dioso navecuaxuabianatsi. Dioso baja cajena pijatemplobo saicaya Diosonexa. Paxamë rabaja Dioso bepapijatemplobomë.

<sup>18</sup> Pëtsa pajamatabëcuenenavëxaniabame. Itsajivi paxamëyajuvënëjivi itsa jamatabëjumaitsi: “Xanë cajena daxitajivi matatoxenetsia bitso tayapëtaenë mapanacuapijilivaisije,” itsa jamatabëjai, nexata bajarapajivi becopata bajarapamatabëcuene. Beveliamatabëcuenejivi saya benatane. Nexata Dioso jamatabëcuenecajëpaeya exanaenatsi peyapëtaenexa jane baja Dioso pejumelivaisi. <sup>19</sup> Daxita palivaisi bitso bepexaniajailivaisitane mapanacuapijivije, itsiata daxita bajarapalivaisi Dioso tsitanatsiquejemalivaisitsi saya. Dioso pejumelivaisibaxutota jumaiti mapacueniaje: “Dioso cajena naneconitsiaexanaena bitso peyapëtaevi mapanacuapijilivaisije peyamaxëitojorobavanapaejavata itsamona,” jai Dioso pejumelivaisibaxutota. <sup>20</sup> Icatsia itsalivaisita Dioso pejumelivaisibaxutota jumaiti mapacueniaje: “Pepo petuxanenë baja cajena yapëtane piamatamobicuene mapanacuapijilivaisije, bitso peyapëtaevi penajamatabëxainaecuene,” jai Dioso pejumelivaisibaxutota. <sup>21</sup> Bajaraxuata itsajivi ata paxamëyajuvënëjivi, Dioso pejumelivaisi patacatsipaebivi, paxanë bepatajajivitonë apo benatae. Bepaayajamatabëcuenevinëna, apo bepanetae. “Xanë raja saicaya bajaraponë pijajivitonënë,” apo bejai paxanëyajuvënëvi yabara. Biji rajane paxanë bepanijajivinë panataniji Dioso pejumelivaisi patacatsipaebaponaexae. Tsipaji baja cajena Dioso pacatocopata daxita xua panamatavenoname. <sup>22</sup> Xanë Pablonë, Apolos ata, Pedro ata, bajarapamatabëxëyo Dioso panecopata paxamë patacajamatabëcueneyavenonae. Daxita mapanacuata panejinavanapaenexa ata, Dioso pacatocopata. Paneasaëtsavanapaenexa, panetëpaenexa ata, Dioso pacatocopata. Panejinavanaenexa ajena, panevajënaeyabelia ata panejinavanapaenexa, Dioso pacatocopata. Daxita rabaja bajaraxua Dioso pacatocopata paxamënexa. <sup>23</sup> Pematatsënëa rabaja Dioso pacatocopatanua paxamë Cristo papijajivinexamë. Cristo rabaja pijinia Dioso bepajajivitonë, Dioso pejitsipacuenia petoexanaexae.

### **Pacuenia Cristo pijajivi, apóstolevi, nacuenebavanapa yabara pelivaisi**

**4** Paxamë saya panetaema Cristo papijajivinëcuenia. Cristo raja panetocopata jivi patatsipaebavanapaenexa pexanialivaisi. Bajarapalivaisi Dioso pepo bajayata muetsia xainabuata. <sup>2</sup> Pajivi itsanë pijajivitonë naexana, bajarapajivi pijatuxanenë pitorobicueniatsi, xaniavaetsia betonacuenebaponapona. <sup>3</sup> Bajaraxuata xanë ata exanaponajë pacuenia vajatuxanenë nitoroba. Nexata paxamë panebaracuauaijamë

tsabiabi ata, itsamonae ata nebaracuaicuajai tsabiabi ata jivi tatsipaebaponaelivaisi yabara, taexanaponaejava ata yabara, itsiata apo nasivajamatabëcuenebëjanë patanebaracuaicuajaisabiabijava yabara. Apo nacuenecanaëjëtšinëna pacuenia tonacuenebajë vajatuxanenë. Nexata tajamatabëcueneta apo jamatabëjumaitšinë: “Xaniavaetsia meta tajatuxanenë tonacuenebaponaponajë. Itsa jume, bijiata meta tonacuenebaponaponajë,” apo jamatabëjanë. <sup>4</sup>“Jumecovënëtajë daxita pacuenia Dioso nitoroba. Nexata taneitorobicuenia xaniavaetsia tonacuenebajë. Bajaraxuata ajilbi Dioso taneyabara naneconitsiaexanaejavanexa,” jamatabëjanë ata tsi-pae, itsiata ajumematamobinë tsipae. Bajaraxuata evetajë vajatuxanenë pijacuata tanejumaitšinexa itsa apo jumecovënëtšinë taneitorobicuenia. <sup>5</sup>Bajaraxuata pëtsa pabaracuaicuajiamë itsamonae ata Dioso petonacuenebavanapaevi. Pacopiaeveta-vanapare abaxë vajatuxanenë pepatsijavatsica. Bajaraponë itajëtšiana bajarapamonae muetsia pexanaejavanëmi ata. Pacuenia caejivi canacujitsia vajatuxanenë pijajivi bëpënëa najamatabëxaina petonacuenebavanapaejavata, vajatuxanenë itajëtšiananua. Bajaraxuacujinae nexata xaniavaetsia petonacuenebavanapaevi, caejivi canacujitsia, Dioso barëyataenatsi petonacuenebavanapaejava yabara.

<sup>6</sup>Tajamonae, bajarapacuenia pacatoyaquinatsi Apolos yabara, xanë ata yabara, patacayapëtaeyaexanaenexa. Bajarapacuenia pacatoyaquinatsi, Dioso pejumelivaisibaxutota pejumaitsicueniavecua, bitso bepaayaijamatabëcuenenënebeje patanetaeyanivamë. Bajarapacuenia pacatoyaquinatsi itsamonae ata, pamonaë Dioso petonacuenebavanapaevi, najëpaeya paneyaiyataenexa. Pëtsa itsamonaevēcua beayaijamatabëcuenenë pataneme caenë ata. Bajara pijinia pacuenia beveliajamatabëcuenenë pëtsa pataneme caenë ata. <sup>7</sup>Paxamë ata pëtsa itsamonaevēcua bepaayaijamatabëcuenevimë panataneme. Itsa panavajunupaebabiabame, apo panavajunupaebabiabimë Dioso papecayavenonabiabijava. Xua daxita paxainame, Dioso baja cajena pacarajuta panexainanexa. Pamonaë ata pata paxamëjavata papecat-sipaebinxexa Dioso pejumelivaisi, bajarapamonae ata Dioso pacatocopata. Nexata daxita bajaraxua Dioso papecatocopatsixae, bepaayaijamatabëcuenevimë pëtsa panataneme itsamonaevēcua.

<sup>8</sup>Paxamë jamatabëcuenenavëxaniabiaya panajamatabëxainame mapacueniaje: “Pacuenia ricovi ayaijava pecobcovë xaina, bajara vaxaitsi itsitsi Dioso pejumelivaisi vajajumecovënëtsijava. Tsipaji ayailivaisi xainatsi. Tsipaji baja itsamonae bitso nacatsipaebabiaba Dioso pejumelivaisi. Nexata baja pematatsënëa apo namatavenonaetsi itsajivi ata vajanacatsipaebaponaenexa,” pajamatabëjamë tsabiabi jamatabëcuenenavëxaniabiaya. Jamatabëcuenenavëxaniabiaya Dioso pijacuene bepeneevetsivi panataneme. Nexata meta paxanë matatoxenetsia bitso bepaayaijamatabëcuenevimë panataneme. Dioso pijacuene itsa paneevetsivi tsi-pae, nexata pacasivajamatabëcuenebareyatsi tsipae. Nexata vajanajuaevetsivi tsi-pae Dioso pijacuene. <sup>9</sup>Paxanë, paapóstolevinë, Dioso covë panetocopata daxitajivi patanetaenexa bijiaya. Panetocopata bepatananeconitsivicuenia patanebeyejebinxexa. Bajarapacuenia Dioso panetocopata bijiaya patanetaenexa ángelevi ata, daxitajivi ata. <sup>10</sup>Paxanë, Cristo xaniavaetsia patajumecovënëtsivi, itsamonae panetane bepatanematajemabivi. Paxamë, Cristo xaniavaetsia apo panejumecovënëtsivi ata, Cristo pijacuene bitso bepaneyapëtaevi itajara panataneme. Caranata paxanë itsamonae bepataajamatabëcuenesaëjibivi panetane. Caranata juya paxamë bepanea-jamatabëcuenesaëvi panataneme. Paxanë itsamonae apo paneyaiyatae. Paxamë

panayaiyaneme. <sup>11</sup> Cristo pelivaisi jivi itsa patsipaebaponajë mapamatacabijavaberena ataje, bitso baja cajena panabejiobitabiabajë. Patajani tsabiabi. Mera pajitsipabiabajë. Bitso pajumaesebejenë tsabiabi. Jivi panebeyabiaba pecobeta. Apo paxainabiabinë pabota panapatsijitsianë. <sup>12</sup> Pacueranabiabajë bitso patanacuenebabiabijava patacobeta. Jivi panebjitataeyabiaba pibisiacuena. Itsiata apo pajumeanaecanaviatabiabinë. Biji caranata paxanë bajarapamonae patovajëtabiabajë Diosojavabelia Dioso peyavenonaenexatsi. Jivi panebejiobiaexanabiaba. Itsiata pajamatabëcuenemoyanë tsabiabi. <sup>13</sup> Pibisiacuena panebaracuaicuaijai tsabiabi itsamonaejavabelia. Itsiata bajarapamonae pexaniajamatabëcuenia xaniavaetsia pamuxujobiababajë bajayajebi. Ajena, mapamatacabijavaberena ataje, panetaeyabiaba daxitajivivecua bepaveliajamatabëcuenevinë. Bepaavirinënu panetaeyabiaba.

<sup>14</sup> Apo pacatoyaquinaetsi raja mapacueniaje patacaurabinexa. Biji rajane pacatoyaquinatsi saya patacamuxujobinexa xaniavaetsia. Pacuenia muxujobiijitsipajë taxi, bajarapacuenia pacamuxujobatsi. <sup>15</sup> Xanë copiaya pacatsipaebatsi pexanialivaisi, Cristo pelivaisi. Nexata baja panajamatabëcuenecopatame Jesucristojavabelia. Bajaraxuata xanë bepatacavitsatsivixae, panetaneme bepaneaxanë. Paxainae atamë tsipae diez mil ponëbeje papecatsipaebivinexa Cristo pelivaisi, itsiata xanë caenënë panetaejitsipame bepaneaxanë. <sup>16</sup> Bajaraxuata asaëyata pacamuxujobatsi. Pacuenia baja pacatsitaexanaponaponatsi, bajarapacuenia necuenejëpaeya pajinavanapare.

<sup>17</sup> Bajaraxuata Timoteo baja pacatoitorobatsi paxamëjavabelia. Bajaraponë bitso tasivanë. Betaxënatocuenia tataenë. Xaniavaetsia pejumecovënëtaaponaponanë Dioso. Bajaraponë Timoteo pacatoitorobatsi baja papecatsipaebinexa pacuenia ponaponajë. Nexata Timoteo pacatsipaebiananua pacuenia xanë Jesucristo pijajivitonëxaenë, tsitaexanabiabajë daxita Dioso pejumecovënëtsijava, itsaxuayo tsipae-baponajë Cristo pelivaisi. <sup>18</sup> Itsamonae paxamëyajuvënëvi, taitorobicuenia apo exanae. Bajarapamonae beayaijamatabëcuenevi natane. Nexata itsa pacatoitorobatsi Timoteo, bajarapamonae xanë yabara jamatabëcuenenavëxaniabiaya jamatabëjumaitsi: “Pablo rabaja apo patsi tsane. Nacacujunava rabaja vajanacataenexa,” jamatabëjai bajarapamonae xanë yabara. <sup>19</sup> Itsiata baitsi jane Dioso itsa netocopatiana patacataenexa, ponaenajë naxanitsiayo paxamëjavabelia. Nexata tajacuata taenajë pacuenia jamatabëcueneitsi tsavanapae pamona beayaijamatabëcuenevi natane. Tsipaji raeta bajarapamonae pepacuene ajamatabëcuenesaë Diosojavabelia. Itsa jume, nexata meta saya pecuibovojotota jumaitsi. <sup>20</sup> Pamona Dioso pijajivi, bajarapamonae nayapëtane. Tsipaji peneta Dioso pesaëta ajamatabëcuenesaë tsavanapae. Ëpecuibovojotota apo jumaitsi. Biji rajane bajarapamonae pejamatabëthëtojavavetsina Dioso jumecovënëta. <sup>21</sup> ¿Detsa xua pajitsipame paxamë itsa ponanajë paxamëjavabelia? ¿Patacabijataejava tsaja pajitsipame? Itsa jume, ¿pajitsipame tsaja pexaniajamatabëcuenia asivaya patacataejava?

**Pacuenia Dioso pejumecovënëtsivi tuatujëta ponapona  
bitso pibisiacuene pexanaponaponanë yabara pelivaisi**

**5** Paxamë tuatujëta bitso pibisiacuene pexanaponaponanë pevitota, daxitajivi pina baracuaicuaijai tsabiabi. Dioso apo pejumecovënëtsivi ata, papibisiacuene apo exanae, bajaraponë pina exanaponapona. Bajaraponë paxamëyajuvënë pita pina pijavanexa paxa pijavami. <sup>2</sup> ¡Bajaraponë pibisiacuene pexanaejava, apo pacueneitavetsi atamë, itsiata bepaayaijamatabëcuenevimë panataneme!

¡Biji rajane bajaraponë pibisiacune pexanaejava, bitso bepasivanajamatabëxainame! ¡Bepayapijivauramënuu bajaraponë! Bajaraponë pibisiacune pexanaponaponaeñë, bepanavecuacapitsapame. <sup>3</sup>Paxamëjavata apo naponaponae atanë, itsiata paxamëjavata betanaponaponaeñë, nataniji. Nexata tajëvelia bitso sivanajamatabëxainabiabajë bajaraponë Dioso penaneconitsiaexanaejavanexatsi yabara pibisiacune pexanaponaponaeaxae. <sup>4</sup>Paxamë panacaetuaare vajatuxanenë Jesucristo papijajivixaemë. Apo pacayajava atatsi tsane, itsiata panenacaetuatsijavata, pacajamatabëñajinaenatsi. Diosojavabelia pacatovajëtsianatsinua bajarapaepatota. Vajatuxanenë Jesucristo ata pesaë, pacayajava tsane bajarajota. <sup>5</sup>Pibisiacune pexanaponaponaeñë paxamë tuatujëta, panavecuacapitsapare baja dovathijavabelia. Nexata daxita pibisiacune penatojitsipaecuenia pexanaejava yabara, dovathi pebejiobiaexanaenexatsi. Nexata belia icatsia Dioso jumecovënëtsiana. Bajarapajamatabëcuene jane baja capanepaenatsi pamatacabi vajatuxanenë Jesús patsianica.

<sup>6</sup>Papibisiacune bajaraponë exanaponapona, panaitaxutojematsi atamë, itsiata bepaayaijamatabëcuenevimë panataneme. Abeje raja pibisiacune pexanaponaponaeñë panecuenenaitaxutojematsijava. Payapëtaneme rabaja mapacueneye. Pan pexanaematabënexa, ayaimatabë ata, levadurajava pijinia tsiquirijavayo ata, itsiata pematajërëabijavata, bacaëjëpa daxitamatabëjava. Nexata levadura, tsiquirijavayo ata, bafufunaeyaexana daxitamatabë. Bajara pijinia itsi tsipae caenë itsa pacuenecopatsipame pibisiacune pexanaponaponaejava paxamë tuatujëta. Daxitajivi belia pibisiacune exanaponaejitsipa bajaraponë pejamatabëcueneta. <sup>7</sup>Bajaraxuata panavecuacapitsapare baja, ponë pibisiacune exanaponapona paxamë tuatujëta, daxitajivi pejamatabëcuenebijianaeyaniva bajaraponë pejamatabëcueneta. Pacuenia itsi perujupanmatabë, levadurata pematajërëabimatabë, bajara jamatabëcueneitsi bajaraponë, pibisiacune pexanaponaponaeaxae. Bajaraxuata bajaraponë panavecuacapitsapare baja. Paxamë rabaja Jesucristo pejamatabëcueneta pejanajamatabëcuene paxainame. Nexata pacuenia itsi levadurata apo pematajërëabipanmatabë, bajarapajamatabëcueneitsimë. Tsipaji baja Dioso aneconijibia pacatane. Paxamë baja aneconijibia Dioso pacatane. Tsipaji Cristo pacasivatëpa. Cristo baja cajena beovejayo tanetsi Dioso. Tsipaji nacasivatëpa cruzata pibisiacune vajaexanaeconimi vajanacavecuajibiaexanaenexa. <sup>8</sup>Nexata baja aeconoxae pibisiacune apo beexanavanapaetsi. Jesucristo pijajivixaetsi, itsajamatabëcuene xainaenejevatsi, pexaniajailivaisi jumecovënëtavanapaenatsi. Bajarapacuenia itsa jumecovënëtavanapaenatsi, nexata pacuenia itsi levadurata apo pematajërëabipanmatabë, bajarajamatabëcuene itsanetsi aneconijibia vajajinavanapaexae.

<sup>9</sup>Itsabaxutota baja cajena pacatoyaquinatsi pevitota pibisiacune pexanaponaeivi paneyajavajinavanapaeyaniva. <sup>10</sup>Dioso apo pejumecovënëtsivi, itsamonae, pibisiacune exana pevitota. Itsamonae najamatabëxaina ëpamonaenexa ayajjava pexainaecune pexainaenexa. Itsamonae nacobetoxota. Itsamonae, jumapecataeya pexanaenëñajavabelia, navajëca. Bajarapitsicune pexanaevi, Dioso apo pejumecovënëtsivi, panenavecuatsatsinexa, patacatoyaquinaebaxutota apo pacaitorobitsi. Bajarapitsicune pexanaevi, Dioso apo pejumecovënëtsivi, itsa panavecuatsatsipame, nexata pepacune mapanacuavecuaje athëbëbetsia ëpaneponaenexa tsipae. Tsipaji daxita mapanacuajavaje bajarapitsicune pexanaevi yacaëjëpa. <sup>11</sup>Patacatoyaquinaebaxutota raja pacaitorobatsi mapacueniaje. Pajivi jumaitsi ata: “Xanë cajena Jesucristo pelivaisi jumecovënëtajë,” jai ata, itsiata pibisiacune itsa exana pevitota,

ëpamonaenexa ata pexainaecuene itsa natojitsipa, jumapecataeya pexanaenëanëjavabelia ata itsa navajëca, itsamonae ata pibisiacuenia itsa baracuaicuajai, itsa aita-jibi tsabiabinua, itsa nacobetoxotana, bajarapajivi pëtsa payajavajinavanapame. Pëtsa payajavaxanemenua caejavata, pacajunatsi ata.<sup>12-13</sup> Pamonae abaxë Dioso apo pejumecovënëtsivi, bajarapamonae yabara tajumaitsinexa Dioso apo netocopatsi: “Bajarapamonae cajena pijaneconi xaina Diosojavabelia,” tajainexa. Dioso cajena abaxë saicaya pepacuene naneconitsiaexanaena bajarapamonae. Itsiata baitsi jane pamonae Dioso panenajuajumecovënëtsivi, panenacaetuatabiabibota panenajuajoneyabiabivi, pibisiacuenia itsa exana, paxamë bepacueneitavetame. Bajaraxuata nexata panavecuacapsapare baja ponë paxamë tuatuajëta pevitota pibisiacuenia exanaponapona.

**Pacuenia Dioso pejumecovënëtsivi itavetatsi Dioso  
penajuajumecovënëtavanapaevi peneconitsiyaniava  
juezmanaejavabelia yabara pelivaisi**

**6** Itsanë paxamëyajuvënënë, Dioso pejumecovënëtsinë, itsa pacaitsacueniaba paxamëjavaberena, nexata jueznëjavabelia paneconitabiabame. Pëtsa bajarapacuenia paexaname. Tsipaji raja juezmanae Dioso apo pejumecovënëtsivi. Bajaraxuata Dioso panenajuajumecovënëtsivi apo bepaneconitsimë juezmanaejavabelia. Biji rajane bepayanijobame Dioso pejumecovënëtsivijavabelia papecatoxanetsinexa bajarapalivaisi.<sup>2</sup> Payapëtaneme rabaja mapacuneje. Pamatacabi Cristo evetsiana mapanacuaje, daxita Dioso vajajumecovënëtsivi Dioso nacatocopatsiana vajananeconitsiaexanaenexa pamonae pijaneconi pexinaevi. Daxita mapanacuapijivije, pamonae Dioso apo pejumecovënëtsivi, vaxaitsi naneconitsiaexanaenatsi. Nexata aeconoxae ata pacacajëpa panelivaisixanetsinexa paneconi exana panetuatuajëta. Tsipaji mapanacuata jivi pevetsijamatabëcuene beveliajamatabëcuene saya. Apo ayapëbeje bitso.<sup>3</sup> Payapëtaneme rabaja mapacuneje. Pamatacabi Cristo patsianica, vaxaitsi naneconitsiaexanaenatsi daxitajivi. Naneconitsiaexanaenatsi ángelevi ata. Nexata abaxë aeconoxae panejinavanapaeepato mapanacuataje, pacacajëpa panelivaisixanetsinexa paneconi exana panetuatuajëta, mapanacuapijilivaisije.<sup>4</sup> Itsiata baitsi jane paxamëyajuvënëjivi itsa pacaitsacueniaba mapanacuataje, itsiata panijacuata apo palivaisixanetabiabimë pacuenia picani bepaexaname. Nexata pajivi pacaitsacueniaba, pacaponabiabame juezmanaejavabelia penaneconitsiaexanaenexatsi.<sup>5</sup> Mapacuenia pacajumaitsitsije patacaurabinexa. Paxamëyajuvënëjivi itsa pacaitsacueniaba, çajibi tsabaja caenë ata paxamëyajuvënënë pexanalivaisi peyapëtanë pelivaisixanetsinexa bajarapalivaisi?<sup>6</sup> Dioso panejumecovënëtsivixae, juezmanaejavabelia apo bepaneconitsimë Dioso panenajuajumecovënëtsivi.

<sup>7</sup> Bajarapacuenia panacaevenavi atamë paneneconitabiabixae juezmanaejavabelia, daxitajivi pacacueneyapëtane xaniavaetsia apo panejinavanapaejava Dioso pitabarata. Nexata panacaevenavimë itsa pacaitsacueniaba, itsa pacatonacobetoxotana, Dioso panejumecovënëtsivixae, xanepanaejitsipa itsa pajamatabëcuenemoyamë tsipae.<sup>8</sup> Itsiata baitsi jane paxamë Dioso panenajuajumecovënëtsivijavabelia ata, paitsacueniabiabame. Yamaxëitojorobiaya pavecuanacobetoxotabiabamenua.

<sup>9-10</sup> Payapëtaneme rabaja mapacueneje. Pibisiacuene pexanaevi apo yajavajinavanapaetsi tsane Dioso pijanacuataatsia. Bajaraxuata pëtsa paexaname panijacuata panenatojitsipaecuenia. Dioso pijanacuataatsia apo yajavajinavanapaetsi tsane pevitota pibisiacuene pexanaevi. Apo yajavajinavanapaetsi tsane jumapecataeya pexanaenënjavabelia penavajëcaevi. Apo yajavajinavanapaetsi tsane pejaitsivi itsava pijavavecua. Apo yajavajinavanapaetsi tsane pejaitsivi itsanë pamonavecua. Apo yajavajinavanapaetsi tsane penaquenetsiataevi nacaevënapebibeje. Apo yajavajinavanapaetsi tsane penacobetoxotsivi. Apo yajavajinavanapaetsi tsane ëpamonaenexa pexainaecue penatojitsipaevi. Apo yajavajinavanapaetsi tsane piatajibitsabiabi. Apo yajavajinavanapaetsi tsane itsamonae pibisiacuena pebaracuaicuaijaivi. Daxita bajarapitsivi apo yajavajinavanapaetsi tsane Dioso pijanacuataatsia. <sup>11</sup> Bajara picani bajayata paxamëyajuvënëvi pacuenia exanavanapa. Itsiata baitsi jane aeconoxae baja pibisiacuene paneexanaeconimi, Dioso baja pacavecuaajibiaexana. Pacatsata baja Dioso papijajivinexamë. Dioso baja aneonijibia pacatane vajatuxanenë Jesucristo pejamatabëcueneta. Espíritu Santo ata pesaëta pacayavenona panejumecovënëtsinexa vajatuxanenë papecaitorobicuenia.

**Pacuenia Dioso pejumecovënëtsivi xaniavaetsia  
bejivananapa Dioso pitabarata yabara pelivaisi**

<sup>12</sup> Itsamonae jumaiti: “Mapanacuata navita vajaexanaejavanexa. Itsajivi ata apo nacaitavetsi bajarapacuene vajaexanaenexa,” jai itsamonae. Xaniajai rabaja picani. Itsiata baitsi jane daxita bajarapacuene vajaexanaenexa, apo nacatoxanepanae. Mapanacuata navitsi ata vajaexanaejavanexa, xua itsajivi ata apo nacaitavetsi, itsiata bejamatabëjumaititsi mapacueniaje: “Papibisiacuene taexanaenexa tajamatabëcuene nitorobabiaba, apo exanaenë tsane Cristo pijajivitonëxaenë. Tsi-paji itsa exanaejitsipajë bajarapapibisiacuene, nexata tajamatabëcuene bepijajivitonënëcuenia jumecovënëtabiabijitsipajë,” bejamatabëjaiti pibisiacuene vajaexanaeyaniva. <sup>13</sup> “Vajaxaejava raja vajacotsorotopijijavanexa. Vajacotsoroto raja pijinia vajaxaejava peecaenexa,” pejailivaisi, xaniajai baja cajena. Itsiata baitsi jane itsamatacabi Dioso bajarapacuenebeje vereverecaeyaexanaena. Daxita raja vajaperabëtuareca pibisiacuene apo vajaexanavanapaenexa. Vajaperabëto raja Dioso nacatocopata vajatuxanenë vajatonacuenebavanapaenexa. Vajatuxanenë rabaja pijinia vajaperabëtota vajanacayavaponaponanexa. <sup>14</sup> Dioso baja cajena icatsia asaëyaexanatsi vajatuxanenë petëpaecujinae. Bajara pijinia pacuenia vaxaitsi ata itsamatacabi Dioso pesaëta nacaasaëyaexanaena vajatëpaecujinae.

<sup>15</sup> Payapëtaneme rabaja mapacueneje. Pacaenëmë canacujitsia, caenë Cristo peperabëtojavabelia becaeperabëto panaexaname papijajivixaemë. Xanë ata rabaja Cristo bepeperabëtoyajuvënënënë. Bajaraxuata pibisiacuene apo bexanaenë tavitota pibisiacuene pexanabiabivajavabelia, bajarapova bepeperabëtoyajuvënëjavanë tanaexanaeyaniva. <sup>16</sup> Payapëtaneme rabaja mapacueneje. Pebi pibisiacuene itsa exana pevitota pibisiacuene pexanabiabivajavabelia, bajarapajivibeje becaeperabëto naexanabeje. Dioso pejumelivaisibaxutota jumaiti penapitsijivibeje yabara mapacueniaje: “Anijajivimibeje becaejivi naexanabeje,” jai. <sup>17</sup> Nexata pijinia pajivi namamatabëcuenecopata vajatuxanenë Jesucristojavabelia, bajarapajivi becaejivi naexana vajatuxanenë Jesucristojavabelia.

<sup>18</sup> Pevitota pibisiacuene pexanaeyaexanaejamatabëcuene, pavecuanajetabajirav-abiabare. Itsajava raja pibisiacuene pexanaejava, bitso jivi apo jamatabëcuenebiji-  
 jianaetsi. Pacuenia pevitota pibisiacuene pexanaejava, jamatabëcuenebiji-  
 jianaetsi, apo itsi. Ponë jaita itsava pijavavecua pibisiacuene pexanaenexa pevitota, bitso  
 pibisiacuene exana. Petiriva ata, pova jaita itsanë pamonavecua pibisiacuene pex-  
 anaenexa pevitota, bitso pibisiacuene exana. Pajivi bajarapapibisiacuene exana,  
 bitso najamatabëcuenebiji-<sup>19</sup> Payapëtaneme rabaja mapacueje. Paneperabëto  
 baja cajena Espiritu Santo pijabo papecatsijamatabëcaexa. Dioso cajena pacara-  
 juta pijaEspiritu Santo papecatsijamatabëcaenexa. Dioso baja cajena papijajivimë.  
 Nexata paneperabëto ata paxamënexa. Apo panaperabëxainamë panijacuata pa-  
 nenatojitsipaecuenia paneexanavanapaenexa. <sup>20</sup> Tsipaji Dioso ayaimatamota paca-  
 comuata. Nexata Dioso papijajivixaemë, xaniavaetsia panejamatabëëthëtovetsina  
 Dioso jumecovënëtsiaya pajinavanapare. Nexata daxitajivi Dioso yaiyataeponaena  
 paxamë xaniavaetsia itsa patsitajinavanapame.

### Pemuxujiobilivaisi penapitsijivibeje yabara pelivaisi

**7** Xua yabara panetoyaquinaremena pataneyanijobinexamë, nexata aeconoxae  
 pacajumecanaviatsijitsiatsi. Xaniajai rabaja picani. Xanepana itsa apo naco-  
 jiobi pebi. <sup>2</sup> Itsiata baitsi jane jivi navita pevitota pibisiacuene pexanaevi. Ba-  
 jaraxuayaniva caepebi canacujitsia pijava bexaina. Bajara pijinia itsi petirivi  
 ata. <sup>3</sup> Nexata pebi pijava xaniavaetsia bevetaponapona pijavaxae. Bajara pijinia  
 itsi petiriva ata. Xaniavaetsia bevetaponapona pamonaxae. <sup>4</sup> Petiriva, penacoji-  
 o-biva, pijacuata apo naperabëxainae ëbajarapovanexa. Biji rajane petiriva baja  
 itsa nacojioba, pamona pijaperabëtocuenia xainatsi. Bajara pijinia itsi pebi ata.  
 Peperabëto apo naperabëxainae ëbajaraponënexa. Itsa baja nacojioba, pijava pi-  
 japerabëtocuenia xainatsi. Nexata namataenetsia naperabëxainabeje. <sup>5</sup> Papetiriav-  
 imë panenacojiobivi baja, pëtsa panaperabëasivamë paneamonajivivecua. Bajara  
 pijinia pacuenia paxamë ata papebijivimë. Pëtsa panaperabëasivamë panijava-  
 jivivecua. Matapania pamatacabimaxëto Diosojavabelia panavajëcaejitsiamëbeje,  
 pacatocopatabeje panenavecuanaperabëasivanexabeje. Bajarapacuenia paexanae-  
 namebeje itsa panajamatabëcuenejëpamebeje panenavajëcaenexabeje Diosojav-  
 abelia. Pamatacabimaxëto panavajëcaejitsiamëbeje Diosojavabelia, bajarapamata-  
 cabimaxëto pëtsa panaimoxoyotamebeje. Itsa baja paveretsianamebeje Diosojav-  
 abelia panenavajëcaejavabeje, pëtsa baja panavecuanaperabëasivamëbeje. Tsipaji  
 panevajënaeyabeliabeje itsa panavecuanaperabëasivamëbeje tsaponae tsipae, nex-  
 ata dovathi pacajamatabëcuene yamaxëtojobijitsipabeje. Nexata pibisiacuene  
 paexanaejitsipamebeje, pacuene picani apo bepaexanaemëbeje.

<sup>6</sup> Itsa pacamuxujibatsi panenacojiobinexa pibisiacuene paneexanaeyaniva  
 panevitota, apo pacaitorobitsi daxita panenacojiobinexa. Pamonae jitsipa  
 penacojiobijava, nacojiobi. <sup>7</sup> Pacuenia xanë imasia ponaponajë, bajarapacuenia  
 picani paxamë ata imasia panejinavanapaejava, pacatojitsipatsi. Itsiata baitsi  
 jane Dioso pacaenëmë canacujitsia papecayavenonaponaexae, pacacaëjëpa  
 baja pacuenia paexanavanapaejitsiamë. Itsamonae paxamëyajuvënëvi  
 itsacuenia Dioso jamatabëcuene caëjëpaeyaexanaponatsi Dioso pejitsipaecuenia  
 petoexanavanapaenexa. Itsamonae pijinia saicaya itsacuenia Dioso jamatabëcuene  
 caëjëpaeyaexanaponatsi.



<sup>8</sup>Mapacuenia saicaya jumaitsinēje pimasiarubenaevijavabelia, pamonajivi peve-cuatēpaevitsijavabelia ata. Bajarapamonae picani toxanepanatsi imasia pejinavana-paejava pacuenia xanē imasia ponaponajē. <sup>9</sup>Itsiaa baitsi jane itsa apo caējēpaetsi penajamatabēcuenesaētsijava, nexata pibisiacuene pevitota pexanaeyaniva, roviaalia benacojioba. Bajarapamonae toxanepanatsi roviaalia penacojiobijava. Tsipaji itsa apo nacojiobi tsipae, ēpibisiacuene pexanaenexa najamatabēxainaejitsipa. Nexata najamatabēcuene bijianaponaejitsipa.

<sup>10</sup>Paxamē baja panenacojiobivi mapacuenia pacajumaitsitsije. Itsiaa xanē apo tajamatabēcuene. Pacuenia vajatuxanenē jumaitsi, pacaitorobatsi. Papetiriavimē, pētsa pavecuanaviabame paneamonajivi. <sup>11</sup>Pacamuxujiobi atatsi, itsiaa pova ve-cuanaviata pamona, bajarapova beponapona imasia. Apo benacojiobi baja. Itsa jume, benapitabeje icatsia pamonacovēnēbeje. Bajara pijinia itsi pebi ata. Pebi apo bexuabi pijava.

<sup>12</sup>Paxamē tuatuajēta Dioso apo pejumecovēnētavanapaevi yabara, jumaitsinē ma-pacueniaje. Itsiaa vajatuxanenē apo pejumaitsijume. Dioso pejumecovēnētsinē pi-java, itsa apo pejumecovēnētsiva Dioso, itsiaa bajarapova itsa jitsipa peponapon-aenexa bajaraponējavabelia, nexata bajaraponē pijava apo benavecuaitavetsi peve-cuanaviatsinexatsi. <sup>13</sup>Dioso pijinia pejumecovēnētsiva pamona, itsa apo pejume-covēnētsinē Dioso, itsiaa bajaraponē itsa jitsipa peponaponaenexa bajarapovajav-abelia, nexata bajarapova pamona apo benavecuaitavetsi pevecuanaviatsinexatsi. <sup>14</sup>Dioso pejumecovēnētsiva pamona, apo jumecovēnētsi ata Dioso, itsiaa bajara-ponē Dioso copatsiaexanaenatsi mapanacuapijipibisiacuene pexanabiabijavami. Ba-jarapacuenia Dioso copatsiaexanaenatsi tsipaji bajaraponē pijava Dioso pejumecov-ēnētsiva. Bajara pijinia itsane Dioso pejumecovēnētsinē pijava. Apo jumecovēnētsi ata Dioso, bajarapova Dioso copatsiaexanaenatsi mapanacuapijipibisiacuene pexan-abiabijavami. Bajarapacuenia Dioso copatsiaexanaenatsi tsipaji bajarapova pamona Dioso pejumecovēnētsinē. Bajarapacuenia Dioso itsa apo copatsiaexanae tsipae pibisiacuene pexanabiabijavami, nexata pacuenia Dioso coxitane pamonae Dioso apo pejumecovēnētsivi, bajarapacuenia coxitaejitsipatsibeje Dioso. Nexata bajara-pajivibeje caejivi pejumecovēnētsixae, Dioso coxitaenatsibeje bepenajuajumecov-ēnētsijivibeje Dioso. <sup>15</sup>Itsiaa Dioso pejumecovēnētsiva pamona, itsa apo pejume-covēnētsinē Dioso, itsa jamatabēvecuanaviatatsi, nexata becopata roviaalia peve-cuanaviatsinexatsi. Dioso pijinia pejumecovēnētsinē pijava, itsa apo pejumecov-ēnētsiva Dioso, itsa jamatabēvecuanaviatatsi, nexata becopata roviaalia pevecua-naviatsinexatsi. Nexata Dioso pejumecovēnētsinē, pijava pevecuanaviatsinētsi, bep-i-masiarucaenē penaexanaenexa. Pova pijinia Dioso pejumecovēnētsiva, pamona pevecuanaviatsivatsi, bepimasiarucaeva penaexanaenexa. Bajarapacuenia bexana imasia peponaponaenexa. Tsipaji Dioso nacajunata jamatabēcuenexanepanaeya va-jajinavanapaenexa. <sup>16</sup>Papetiriavimē, paneamonajivi Dioso itsa apo pejumecovēnēt-sivi, paxamē xaniavaetsia panetsitajinavanapaexae tsane paneamonajivi, panea-monajivi ata meta najamatabēcuenecopatsiana Cristojavabelia. Papebijivimē pi-jinia, panijavajivi Dioso itsa apo pejumecovēnētsivi, paxamē xaniavaetsia panet-sitajinavanapaexae tsane panijavajivi, panijavajivi ata meta najamatabēcueneco-patsiana Cristojavabelia. Bajaraxuata jamatabēcuenexanepanaeya panacajinavana-pare. Pētsa panavecuanaviabame.

<sup>17</sup>Caenë canacujitsia tsiteca bexanaponapona pacuenia Dioso tocopatatsi pexanaponaponaenexa. Xua nacuenebaponapona Dioso pejunatsivajënaeyatsi Jesucristojavabelia penajamatabëcuenecopatsinexa, bajaraxua mapamatacabi ataje tsiteca benacuenebaponapona. Bajarapacuenia itorobaponajë daxita Dioso pejumecovënëtsivijava pexanialivaisi itsa tsipaebanajetarucajë. <sup>18</sup>Ponë Dioso junatatsi pepua peperabëcaucutsinëtsi baja judíovi pijacuenia, bajaraponë baja bajarapacuenia Dioso bejumecovënëtaponapona. Ponë pijinia Dioso junatatsi abaxë apo peperabëcaucutsinë atatsi judíovi pijacuenia, bajaraponë baja bajarapacuenia Dioso bejumecovënëtaponapona. Apo benaperabëcaucutsiaexanae. <sup>19</sup>Vajanacaperabëcaucutsijava amata-mobi Diosojavabelia. Dioso rajane vajanacaitorobicuenia vajajumecovënëtavana-paejava, bajara jane xua, namatamota Diosojavabelia. <sup>20</sup>Caejivi canacujitsia benacuenebaponapona xua nacuenebaponapona Dioso pejunatsivajënaeyatsi. <sup>21</sup>Itsamonaie baja paxamëyajuvënëvi Jesucristojavabelia penajamatabëcuenecopatsivajënaeya, dajubicuenia canajetatsi itsamonaiejavabelia amoneya petonacuenebavanapaenexa. Nexata bajarapamonae pijatuxanevi amoneya tonacuenebabiaba. Itsiata baitsi jane bajarapamonae Dioso baja pejunatsixaetsi Jesucristojavabelia penajamatabëcuenecopatsinexa, pëtsa natsinajamatabëxaina pijatuxanevi amoneya penacuenebiaexanabiabijavatsi yabara. Jamatejema saya tonacuenebavanapae pijatuxanevi. Itsiata baitsi jane itsamatacabi itsa tocopiapatsianatsi pevecuapitsapaenexa baja bajarapamonae, nexata vecuapitsapaena amoneya petonacuenebabiabivi. <sup>22</sup>Ponë itsamonaiejavabelia canajetatsi, nexata amoneya itsa tonacuenebaponapona, bajaraponë bitso pibisiacuenie pexanabiabineconimi Cristo baja vecuaajibiaexanatsi. Bajarapacuenia vecuaajibiaexanatsi pamatacabi najamatabëcuenecopata Cristojavabelia. Copata baja pibisiacuenie pexanabiabijavami. Nexata Dioso pitorobicueniatsi exanaponapona. Bajara pijinia itsi ponë ata apo canajetsitsi itsamonaiejavabelia. Itsa najamatabëcuenecopata Cristojavabelia, bajaraponë Cristo pijajivitonë baja naexana. Nexata bajaraponë ata exanaponapona Dioso pitorobicueniatsi. <sup>23</sup>Dioso baja cajena pacacomuata ayaimatamota. Bajaraxuata pëtsa baja panacopatame itsajivi ata papecajamatabëcuenebijianaenexa Dioso panejumecovënëtavana-paejavavecu. Itsa bajarapacuenia panacopatsipame papecajamatabëcuenebijianaenexa, nexata bajarapajivi bepapijajivimë tsipae paneexanavanapaenexa papecaitorobicuenia. <sup>24</sup>Bajaraxuata, xua baja panacuenebavanapame, tsiteca panevajënaeyabelia xaniavaetsia panacuenebavanapare Dioso pitabarata. Pacaenëmë canacujitsia panacuenebavanapare xua panacuenebavanapame pamatacabi abaxë Dioso apo pacajunatsi panejumecovënëtsinexa. Itsa apo pacaperabëcaucutsi judíovi pijacuenia, nexata bajarapacuenia pajinavanapare. Itsamonaiejavabelia papecacanajetsixae, nexata amoneya itsa patonacuenebavanapame, bajarapacuenia tsiteca patonacuenebavanapare.

<sup>25</sup>Itsa panetoyaquinaremena, paneyanijobame abaxë apo penacojiobavanapaeivi yabara. Apo yapëtaenë pacuenia vajatuxanenë jumaitsi bajarapitsivi yabara. Itsiata baitsi jane pacatsipaebianatsi pacuenia sivanajamatabëxainajë bajarapitsivi. Dioso tajamatabëcueneta neyapëtaeyaexana taneitaxutotsoniataexae. Bajaraxuata pacatoxanepana pacuenia pacatsipaebijitsiatsi patanejumecovënëtsinexamë. <sup>26</sup>Dioso vajajumecovënëtavana-paeivi, nacatsiayai bitso aeconoxae vajajinavanapaeepato abaxë mapanacuataje. Tspiji itsamonaie vajanacaitoyaxae, nacabejiobi-

aexanaponaena. Bajaraxuata netsitaxanepana bajarapamonae itsa apo nacojiobavanapae. <sup>27</sup> Itsa baja capanepaeya penacojiobivi, pëtsa xuaba pijava. Itsiata baitsi jane itsa abaxë apo nacojiobi, pëtsa jaita pijavanexa. <sup>28</sup> Ponë baja capanepaeya nacojioba, apo pibisiacuene. Petiriva ata baja itsa nacojioba, apo exanae pibisiacuene. Aeconoxae daxita Dioso vajajumecovënëtsivi bitso vajanacatsiyaiaxae, pamonae baja nacojioba, bajarapamonae toayapëbeje tsanetsi pevecuapanepaenexa bajarapapiayaicuene. Bajarapacuenia petoayapëbejeyanivatsi, bajarapamonae picani tojitsipajë imasia pejinavanapaenexa.

<sup>29</sup> Tajamonae, mara pacuenia jamatabëpacajumaitsitsije. Imoxoyo rabaja pevajënae vajatuxanenë icatsia pepatsijavanexatsica. Ajena, mapamatacubicujinaelia tsaneje, penacojiobivi ata bepimasiarubenaevicuenia asaëyata betonacuenebavanapa vajatuxanenë. <sup>30</sup> Daxitajivi bejamatabëcueneenatsi ëDioso pijacuene petonacuenebavanapaenexa. Pamona bitso najamatabëxaina peyajuvënëtëpaexae, bajarapamonae ata najamatabëxainaenejeva asaëyata betonacuenebavanapa vajatuxanenë. Apo bepenajamatabëxainaevicuenia, bejinavanapa. Pamonae ata jamatabëcuenebarëya tsavanapae, asaëyata betonacuenebavanapa vajatuxanenë. Apo bepejamatabëcuenebarëyavicuenia betonacuenebavanapa. Pamonae ata comuaca pexinaejavanexa, asaëyata betonacuenebavanapa vajatuxanenë. Asivaya apo betae xua natocomuaca. <sup>31</sup> Pamonae ata, mapanacuata pexinaejava, canacuenebavanapa, bajarapamonae becanacuenebavanapa jamatabëcueneecënënaenejevatsi bajarapajamatabëcuene. Tsipaji mapanacuapijicuene vajataejavami vereverecapona.

<sup>32</sup> Apo pacatojitsipaetsi papecajamatabëcueneenaenexa mapanacuapijicueneje. Ponë abaxë imasia ponapona, jamatabëcueneenatsi ëvajatuxanenë pijacuene. Tsipaji jitsipa pesivajamatabëcuenebarëyanexatsi vajatuxanenë. <sup>33</sup> Itsiata baitsi jane penacojiobinë yajavajamatabëcueneenatsi pevetsinexa pijava pesivajamatabëcuenebarëyanexatsi. <sup>34</sup> Apo najamatabëcuenejëpaebeje pijinia penacojiobivabeje pimasiarucaevabeje. Pova apo nacojiobi, jamatabëcueneenatsi ëvajatuxanenë pijacuene. Jitsipa pexaniacuene pexanaponaponaenexa. Jitsipania pexaniacuene penajamatabëxainaponaponaenexa Dioso pesivajamatabëcuenebarëyanexatsi. Itsiata baitsi jane penacojiobiva yajavajamatabëcueneenatsi pevetsinexa pamona pesivajamatabëcuenebarëyanexatsi.

<sup>35</sup> Bajarapacuenia itsa pacajumaitsitsi, apo penacojiobivi apo itavetsinë penacojiobijava. Patacajamatabëcueneyavenonaenexa raja, pacajumaitsitsi bajarapacuenia. Tsipaji pacatojitsipatsi xaniavaetsia panejinavanapaenexa. Vajatuxanenë bepatonacuenebavanapame daxita panejamatabëcueneta, panajamatabëcuene epatajërërëcaenejevamë.

<sup>36</sup> Ponë pexënatoyo xaina, itsa tsitaxanepanatsi pexënatoyo petonacojiobinexatsi, nexata betocopata penacojiobinexa. Tsipaji baja penaveretsiva tsaponapona. Bajarapova ata baja itsa jitsipa penacojiobinexa, betocopata penacojiobinexa. Itsa tocopata pexënatoyo penacojiobinexa, apo pibisiacuene. <sup>37</sup> Ponë pijinia pexënatoyo itsa apo jitsipae abaxë penacojiobinexa, bajaraponë ata itsa najamatabëcuenevereta apo petocopatsinexa pexënatoyo penacojiobijava, nexata bajaraponë ata pexaniacuene exana. <sup>38</sup> Nexata ponë apo tocopatsi pexënatoyo penacojiobinexa, bajaraponë itsanëvecua bitso pexaniacuene exana.

<sup>39</sup> Penacojiobiva baja acuenebi pevecuanaviatsinexa pamona. Tsipaji pamona piasaëtsaponaponaepato, bajaraponë abaxë tsiteca pijava tsaponapona. Tsipaji ba-

jarapacuenia Dioso najumecopata. Itsiata baitsi jane pamona itsa vecuatëpatsi, bajarapova tocopatatsi icatsia penacojobinexa. Tocopatatsi penacojobinexa ponëjavabelia jamatabënacojoba, itsa bajaraponë ata Dioso pejumecovënëtsinë. <sup>40</sup>Itsiata bajarapova pamona pevecuatëpaecujinaetsi, imasia abaxë itsa ponapona, jamatabëcuenebarëya tsaponaponae tsane ëDioso pijacuene pejamatabëcueneenaponaponaexaetsi. Nexata baja itsa nacojobiana, bevelia baja jamatabëcuenebarëya tsane. Pacuenia copiaya jamatabëcuenebarëya tsaponaponae, apo itsi tsane baja. Bajarapacuenia najamatabëxainajë bajarapacuenie yabara. Bajarapacuenia itsa pacajumaitsitsi, Espiritu Santo neyajavacuacuaijai.

### **Jumapecataeya pexanaenëanëjavabelia perajutsiviyajuvënëjava yabara pelivaisi**

**8** Jumapecataeya pexanaenëanë itsamonae tane bepigidiosovi. Nexata bajaramonae dajubi beyabiaba perajutsinexa bajarapavi jumapecataeya pexanaenëanëjavabelia. Bajarapaviyajuvënëjava panexaejava ata yabara, paneyanijobame itsa panetoyaquinaremena. Nexata bajaraxua yabara juya mapacatoyaquinatsije. Xaniajai rabaja cajena. Daxitatsi baja cajena bajarapacuenie yapëtanetsi. Pavi rajuta jumapecataeya pexanaenëanëjavabelia, bajarapaviyajuvënëjava xae atatsi tsipae, apo nacaitacueniabi tsipae. Itsiata vajaxaecujinae bajarapaviyajuvënëjava, itsa jamatabëjumaitsitsi: “Xanë bitso yapëtaniji pamonae mapavije atsobabiaba matatoxenetsia,” itsa jamatabëjai, abeje rajane bajarapajamatabëcuene. Tsipaji beayajamatabëcuenejivitsi nataejitsipatsi bajarapamonaevecua. Biji rajane xanepana vajajamatabëjumaitsinexa mapacueniaje: “Asivaya taniji Dioso patanajuajumecovënëtsivi, pamonae atsobabiaba jumapecataeya pexanaenëanëjavabelia perajutsiviyajuvënëjava. Nexata xanë ata apo xanë tsane bajarapaviyajuvënëjava. Nexata xaniavaetsia tsitaponaponaenajë bajarapamonae taneitaxutua ajamatabëcuenesaënexa Diosojavabelia,” vajajamatabëjaijava xanepana. Bajarapacuenia itsa tsitaponaponatsi Dioso pejumecovënëtsivi, nexata nacaitaxutuaajamatabëcuenesaë tsaponae Diosojavabelia. <sup>2</sup>Pajivi jamatabëjumaitsi: “Xanë cajena bitso yapëtaniji daxitacuene,” jamatabëjai, bajarapajivi pejamatabëcuenenavëxaniabijivi. Abaxë ayaijava tosaicatsi xaniavaetsia peyapëtaenexa. <sup>3</sup>Itsiata baitsi jane pajivi Dioso jitsipa, bajarapajivi Dioso ata jamatabëcuenyapëtanetsi Dioso pejitsipaejava.

<sup>4</sup>Nexata jitsipajë patacayapëtaeyaexanaenexa itsamonae jumapecataeya pexanaenëanëjavabelia perajutsiviyajuvënëjava pexaejava yabara. Vaxaitsi baja cajena yapëtanetsi jumapecataeya pexanaenëanë apo pexaniajaicuene. Tsipaji saya jivi pecobeta pexanaejavanë. Yapëtanetsi baja cajena caenë Dioso peponaponaejava. Pematatsënëa baja cajena itsadioso ajibi. <sup>5</sup>Jivi raja apo yapëtae. Bajaraxuata saya jamatabëcuenenavëxaniabiaya jumai tsabiabi: “Diosovi raja navitsiajinavanapa athëbëtatsia. Jinavanapa mapanacuajava ataje,” jai tsabiabi jivi jamatabëcuenenavëxaniabiaya. <sup>6</sup>Itsiata vaxaitsi yapëtanetsi caenë vaxa Dioso peponaponaejava. Bajaraponë daxitacuene pexanaenë. Bajaraponënexa tojinavanapatsi. Caenë rabaja pijinia pepo vajatuxanenë Jesucristo. Bajaraponë pejamatabëcueneta exana daxitacuene. Bajaraponë pejamatabëcuenetanua nacacapanepaena vajaneconivecua.

<sup>7</sup>Itsiata baitsi jane itsamonae Dioso pejumecovënëtsivi ata, abaxë apo yapëtae pacuenia picani apo caëjëpaetsi jumapecataeya pexanaenëanë

pejamatabëcuenebijianaenexatsi. Bajarapamonae pejevaxijavaveliacujinae jumapecataeya pexanaenëanë taeyabiaba bepiasaëtsavanapaevi. “Papexaejava itsamonae rajutabiaba jumapecataeya pexanaenëanëjavabelia, diosovijavabelia rajutabiaba bajaraxua,” sivajamatabëjai tsabiabi bajarapamonae jamatabëcuenenavëxaniabiaya. Bajaraxuata bajarapamonae aeconoxae Dioso jumecovënëtsi ata, itsa xane jumapecataeya pexanaenëanëjavabelia perajutsiviyajuvënëjava, bajarapamonae jamatabëcuenenavëxaniabiaya jamatabëjumai tsabiabi: “Pibisiacueene meta exanjë Dioso pitabarata mapavi taxaexaeje,” jamatabëjai tsabiabi. Tsipaji Dioso jumecovënëtsi ata, abaxë apo yapëtae pacuenia picani apo caëjëpaetsi jumapecataeya pexanaenëanë pejamatabëcuenebijianaenexatsi. <sup>8</sup>Yapëtanetsi rabaja vaxaitsi. Vajaxaejava yabara Dioso pexitsi apo nacaexanae. Xae atatsi, apo xae atatsinua, najëpabeje. Vajaxaejava apo nacavënananeconitsiaexanae Dioso. <sup>9</sup>Paxae atamënuu, apo paxae atamënuu, itsiata picani apo pacaitsacueniabi tsipae. Itsiata baitsi jane xania baja tsane. Dioso panenajuajumecovënëtsivi asivaya panetaexae, pëtsa patsitaexaname itsacuenëjavayo ata, xua bepibisiacueene taejitsipa bajarapamonae. Tsipaji itsa pacacuenetaejitsipa, exanaejitsipa bajarapajivi ata. Nexata Dioso pejumecovënëtsijavavecua pajopaeyaexanaejitsipame bajarapajivi. Tsipaji abaxë jamatabëcuenefaefaena Dioso pejumecovënëtsijava. <sup>10</sup>Paxamë pëtsa panabaneme pabojavata jumapecataeya pexanaenëanëjavabelia perajutsiviyajuvënëjava abatabiaba. Paxamë baja payapëtaneme pacuenia apo pacaitsacueniabi picani tsipae, bajarapaviyajuvënëjava paxae atamë. Nexata itsa paxaejitsipame bajarajota, panexaejavata pacataejitsipa itsanë Dioso pejumecovënëtsinë, ponë abaxë bepibisiacueene pexanaejava tane bajarapavi itsa naxaejitsipa. Nexata itsa pacajanitane, bajaraponë ata naxaejitsipa. Nexata penaxaexae, bepenaneconitsinë Diosojavabelia nataejitsipa. <sup>11</sup>Paxamë picani bajarapitsinë matatoxënetsia paneyapëtaexae, paxaejitsipame bajarapaviyajuvënëjava. Itsiata nexata bajarapacuenia pajamatabëcuenebijianaejitsipame, ponë Dioso pejumecovënëtsinë ata, abaxë jamatabëcuenefaefaena Dioso pejumecovënëtsijava. Bajaraponënexa ata cajena Cristo sivatëpatsi. <sup>12</sup>Bajarapacuenia itsa pajamatabëcuenebijianaejitsipame Dioso pejumecovënëtsijivi, nexata pananeconitsipame Cristojavabelia. <sup>13</sup>Bajaraxuata xanë itsa yapëtaniji pacuenia itsajivi, Dioso pejumecovënëtsijivi, belia jopaejitsipa Dioso pejumecovënëtsijavavecua xanë tatsitaxaejava pejamatabëcueneta, nexata caeto ata apo tsitaxanë tsipae bajarapaviyajuvënëjava asivaya tataexae bajarapajivi.

**Pacuenia apóstolevi tocopatatsi, xua namatavenona, pevajëtsinexa  
Dioso jumecovënëtsivijavabelia yabara pelivaisi**

**9** Payapëtaneme rabaja mapacueeneje. Xanë apo xae atanë jumapecataeya pexanaenëanëjavabelia perajutsiviyajuvënëjava, itsiata Dioso netocopata daxitacueene taexanaenexa Jesucristojavabelia tanajamatabëcueneocopatsixae. Payapëtanemenua vajatuxanenë Jesucristo taneitapetsijava apóstolenëxanë. Taitaxutota baja cajena taniji vajatuxanenë Jesús. Paxamë ata patacatsipaebixae Jesucristo pelivaisi, nexata baja panajamatabëcueneocopatame Jesucristojavabelia. Tsipaji asaëy-ata tonacuenëbaponaponajë vajatuxanenë. <sup>2</sup>Itsamonae apo beapóstolenënetae ata, itsiata paxamë apóstolenëcuenenë paneyapëtaneme. Patacatsipaebixae pexa-

nialivaisi, paxamē baja vajatuxanenē pajumecovēnētame. Bajaraxuata picani daxitajivi xaniavaetsia beneyapētane apóstolenēcuenenē.

<sup>3</sup>Itsajota pexanialivaisi jivi tsipaebaponaponajē, Dioso picani netocopata tanerajutsinexa tanamatavenonaejavaxi. Itsamonae paxamēyajuvēnēvi nejumeaebabiaba livaisi tatsipaebabibijava mapacueniaje. <sup>4</sup>Paapóstolevinē itsa panacuenebajē Dioso pijacuene, panetocopata itsajota pexanialivaisi patsipaebavanapajē patanerajutsinexa pataxaejava, pataapaejava ata. <sup>5</sup>Itsa tanacojiobinē tsipae, xanē ata pijinia Dioso netocopatsipa tabarēponaenexa tajava, Dioso pejumecovēnētsiva. Bajarapacuenia netocopatsipa tsipaji bajarapacuenia exanavanapa itsamonae apóstolevi. Vajatuxanenē pejuyajipijivi ata, apóstolenē Pedro ata, pijava barēponabibabame penamatavenonaejava yabara. Itsiata baitsi jane paxanēbeje Bernabēbeje panacuenebabibajēbeje patajacuatabeje patanaevetsinexabeje. Bajarapacuenia picani apo benacuenebinēbeje patajacuatabeje patanaevetsinexabeje. Nexata picani paxamē, paxanēbeje ata, bepanerajutame patanamataavenonaejavaxibeje. Tsipaji paxanēbeje Cristo pelivaisi patacatsipaebabibixabeje, Dioso picani panetocopatabeje patanerajutsinexamē patanamataavenonaejavaxibeje. <sup>7</sup>Payapētaneme baja cajena mapacuenije. Itsanē itsa tonacueneba pijatuxanenē, barajutatsi pexaejava. Pamonaē ata pijinia vajabitsaē naexanavanapa, itsa rajutaponatsi pexaejava, apo matamotaponae pexaejavamatamo pijapalatata. Jume cajena. Tomocuatabiabatsi ponē itorobatsi. Pamonaē pijinia xaina uvabacabo, itsajivi ata apo janiitavetsitsi pexaeyaniva penotsicuaiyajuvēnējava. Pamonaē pijinia itsanē pijaoveja toeveta, itsajivi ata apo janiitavetsitsi pemiyyujucaebarēmeneyajuvēnējava piapaeyaniva. Jume cajena. <sup>8</sup>“Maraeta pacuenia Pablo nacajumait-sije saya jivi petsitaxanepanaecueniatsi vajaexanavanapaenexa,” pajamatabējamē pētsa. Tsipaji rabaja Dioso pejumelivaisibaxutota ata bajarapacuenia jumaitsi. <sup>9</sup>Dioso pejumelivaisibaxutota jumaitsi pacuenia bueyu copatatsi pexaejava pexaenexa penacuenebijavata ata. Jumaitsi mapacueniaje: “Pabueyu canacuenebame trigoxu pecatotanabataxuabinexa, pētsa pumuxatatame nepumuxatatabibijavata. Pētsa pumuxatatame trigoxu pexaenexa pecatotanabataxuabijavata,” jai Dioso pejumelivaisibaxutota. Bajarapacuenia Dioso pejumelivaisibaxutota itsa jumaitsi, ēbueyu yabara apo jumaitsi. <sup>10</sup>Biji rajane bajarapacuenia Dioso pejumelivaisibaxutota jumaitsi vajanacayapētaeyaexanaenexa vajamatamotsijavanexa vajanacatonacuenebinē. Ponē canacueneba iracuemo itsanē pijatrigoxu petoubinexa, penacuenebijavata jamatabējumaitsi: “Pamatacabi naveretsiana trigoxu, bajara-paxuyajuvēnējava nerajutsiana tatonacuenebimatamo,” jamatabējai. Nexata penaveretsimatacabi trigoxu rajutatsi. Ponē ata icatsia juya trigoxu penaveretsimat-acabi totanabataxuaba, bajaraponē ata jamatabējumaitsi: “Mapatrigoxuyajuvēnējavaje nerajutsiana tatonacuenebimatamo,” jamatabējai. Nexata rajutatsi. Bajara pijinia pacuenia Dioso pijacuene patatonacuenebivi patanamataavenonaejavaxi, paxamē bepanerajutame Cristo pelivaisi patacatsipaebijamatabēcuene. <sup>11</sup>Paubajē baja cajena panejamatabēēthētota Dioso pejumelivaisi. Jica, nexata juya itsa pacajamatabēcueneevetsipatsi patanerajutsinexamē patanamataavenonaejavaxi, ¿pacatsitaayajava tsaja tsipae bajarapacuenē? <sup>12</sup>Paxamē rabaja Dioso pejumelivaisibaxutota papecaitorobicuenia, parajutabiabame itsamonae penamatavenonaejavaxi pa-

pecatsipaebijamatabëcuene Cristo pelivaisi. Paxanë biji picani panetoxanepana copiaya patanerajutsinexamë itsamonaevēcua.

Dioso picani panetocopata patanerajutsinexamë patanamatavenonaejavaxi Cristo pelivaisi patacatsipaebaponaejamatabëcuene. Itsiata apo pacavajëtsitsi patanerajutsinexamë. Biji rajane piayapëbejecuenia panatonacuenebaponajë patajacuata patanaevetsinexa bajarapacuenia. Apo pacavajëtsitsi caeto ata patanerajutsinexamë patanamatavenonaejavaxi. Itsa pacavajëtsipatsi, itsajamatabëcuene meta paxainaejitsipame paxanëjavaberena. Nexata meta apo pajumecovënëtsimë tsipae patacatsipaebilivaisi, pexanialivaisi, Cristo pelivaisi. <sup>13</sup> Payapëtaneme rabaja mapacueñeja. Templobota Dioso petonacuenebivi, tocopatatsi bajara patemplobopijipexaejava pexaenexa. Baitsi pamonaepacuenebivi altarvënëjavata, itsajota dajubi tobeyabiaba ofrendacuenia perajutsinexa bajarapavi Diosojavabelia, bajarapamonaepacuenebivi, tocopatatsi pexaenexa bajarapaviyajuvënëjava. <sup>14</sup> Bajara pijinia pacuenia vajatuxanenë Jesucristo itoroba Dioso pejumelivaisi petsipaebaponaeivi penamatavenonaejavaxi perajutsinexatsi. Pamonaepacuenebivi jumečovënëta pona petsipaebilivaisitsi, bajarapamonaepacuenebivi juya berajuta pona xua namatavenona petsipaebivitsi. <sup>15</sup> Itsiata baitsi jane xanë bajarapacuenia netocopatsi ata, apo pacavajëtsitsi itsacuenejavayo ata. Mapabaxutoje pacatoyaquinae atatsi, apo pacatoyaquinaetsi patanerajutaponaenexamë itsacuenejavaxi. Bitso cajena jamatabëcuenebarëyanë. Tsipaji Cristo pelivaisi pacatsipaebabiabatsi, apo panerajutsi atamë itsacuenejavayo ata. Bajaraxuata baja cajena apo jitsipaenë patanematamotsijavamë. Itsa panematamotsijitsiamë tsipae, nexata jitsipaenjitsipajë tatëpaejava patanematamotsiyanivamë. Tsipaji itsa panematamotsipame, copiarucaejitsipa baja patacasivajamatabëcuenebarëya tsabiabijavami. Tsipaji amoneya patacatsipaebabiabixae Cristo pelivaisi, pacasivajamatabëcuenebarëyatsi tsabiabi.

<sup>16</sup> Apo jamatabëjumaitsinë: “Ayaijamatabëcuenenënë tatsipaebinëxae jivi pexanialivaisi pecapanepaelivaisinexatsi Diosojavabelia,” apo jamatabëjanë. Jume baja cajena. Pexanialivaisi jivi tsipaebabiabajë. Tsipaji baja vajatuxanenë nitoroba. Bitso meta naneconitsipajë Diosojavabelia jivi itsa apo tsipaebinë tsipae bajarapalivaisi!

<sup>17</sup> Dioso nitorobinejeva, saya xanë tajamatabëcueneta jivi itsa tsipaebaponaejitsipajë pexanialivaisi, Jesucristo pelivaisi, nexata jamatabëcuene evetabiabijitsipajë jivi tanematamotabiabinexa pexanialivaisi tatsipaebabiabijamatabëcuene. Itsiata baitsi jane pexanialivaisi jivi tsipaebaponajë vajatuxanenë taneitorobixae. Jumečovënëta pona pona pacuenia Dioso nitorobapona. <sup>18</sup> Bajaraxuata apo nematamotsi ata, tsipaebaponajë pexanialivaisi jivi pecapanepaelivaisinexatsi Diosojavabelia. Dioso netocopatsi ata jivi tanematamotsinexa pexanialivaisi tatsipaebaponaejamatabëcuene, itsiata apo vajëtsinë tanerajutsinexa itsacuenejavayo ata. Jivi itsa tsipaebaponajë bajarapalivaisi, bitso jamatabëcuenebarëyanë tsaponaepacuene. Bajaraxuata apo jitsipaenë tanematamotsijava.

<sup>19</sup> Apo tanecanajëtsinë raja dajubinëcuena itsamonaejavabelia amoneya tatonacuenebinexa. Itsiata baitsi jane daxitajivi beprijavitonëncuenia ponaponajë. Bajarapacuenia exanaponaponajë itsamonaepacuenebivi ayaitsaetoxaneto ata tayavenonaenexa, penajamatabëcuene copatsinexa Cristojavabelia, pecapanepaenexatsi Diosojavabelia. <sup>20</sup> Judíovi jumečovënëtsiajinavanapa bajayata Dioso Moiséspijinëta penajumecopatsilivaisi. Xanë picani apo jitsipaenë taexanaponaponaenexa pacuenia itoroba Dioso Moiséspijinëta

penajumecopatsilivaisi. Tsipaji baja najamatabëcuenecopatajê Cristojavabelia tajaneconi tanevecuaajibiaexanaenexa. Itsiata judïovijava itsa naponaponabiabajê, pacuenia Dioso Moiséspijinêta penajumecopatsilivaisi itorobatsi, judïovi itsa exana, xanê ata bajarapacuenia naexanabiabajê. Bajarapacuenia naexanabiabajê bajarapamonae judïovi xaniavaetsia tanenamuxunaevetsinexa Cristo pelivaisi itsa tsipaebajê. Nexata judïovi itsa najamatabëcuenecopata Cristojavabelia, pecapanepaenexatsi Diosojavabelia. <sup>21</sup> Bajara pijinia pacuenia apo judïovijava ata itsa naponaponabiabajê, judïonê atanê, pacuenia apo judïovi jinavanapa, cuenejëpaeya naponaponabiabajê. Bajarapacuenia apo judïovi cuenejëpaeya naponaponabiabajê bajarapamonae xaniavaetsia tanenamuxunaevetsinexa Cristo pelivaisi itsa tsipaebajê. Nexata apo judïovi ata itsa najamatabëcuenecopata Cristojavabelia, pecapanepaenexatsi Diosojavabelia. Bajarapamonae apo judïovi apo jumecovênêtsiajinavanapae bajayata Dioso Moiséspijinêta penajumecopatsilivaisi. Bajarapamonaejava naponaponabiabi atanê, itsiata apo copatsinë tajumecovênêtsijava Dioso pejumelivaisi saicaya tajitsipacuenia taponaponaenexa. Jume baja cajena. Tsipaji jumecovênêtajê Cristo taneitorobicuenia. <sup>22</sup> Itsamonae abaxê ajena najamatabëcuenecopaba Cristojavabelia. Nexata abaxê apo ajamatabëcuenesaê tsavanapae Dioso pejumecovênêtsijava. Bajarapamonaejava cuenejëpaeya naponaponabiabajê. Bajarapacuenia cuenejëpaeya naponaponabiabajê tajamatabëcueneyavenonaenexa bajarapamonae pevajënaeyabelia piajamatabëcuenesaê tsavanapapenexa vajatuxanenêjavabelia. Baitsi pacuenia caeviria canacujitsia jivi pijasalinaicuenia jinavanapa, bajarapacuenia xanê ata cuenejëpaeya naponaponabiabajê. Bajarapacuenia cuenejëpaeya naponaponabiabajê bajarapamonae tajamatabëcueneyavenonaenexa. Jamatabëcueneyavenonaejitsianê bajarapamonaejavuvênêvi ayaibitsaëtoxaneto ata penajamatabëcuenecopatsinexa Cristojavabelia pecapanepaenexatsi Diosojavabelia. <sup>23</sup> Bajarapacuenia exanaponaponajê baja jivi pejumecovênêtsinexa pexanialivaisi pecapanepaelivaisinexatsi Diosojavabelia, bajarapamonae ata taneyajavacapanepaenexatsi Diosojavabelia.

<sup>24</sup> Payapëtaneme rabaja mapacuneje. Penayacobivi pecujinaejinaejava, bacujinaejina daxita. Itsiata baitsi jane ponê bitsojina pecujinaejinaejava daxita penayacobivi matatoxenetsia, bajaraponê caenê bapita xua tsipaebatsi pecujinaejinaematamo, premiovênêjava. Pacuenia penayacobivi pecujinaejinaejava, daxitasaëta bacujinaejina, bajara pijinia pacuenia paxamê ata daxita panesaëta panevajënaeyabelia patonacuenebavanapare Dioso. <sup>25</sup> Daxita pamonaenexa penayacobivinexa pecujinaejinaejava, tajêvelia banajamatabëveretavanapa pebitsojinaenexa itsamonae matatoxenetsia. Naxaniavaetavanapanua. Daxitamatacabi canacujitsia nasisaëjëbavanapa caenê canacujitsia. Bajarapamonae najamatabëcuenesaëtanavanapa, daxita xua abeje, pexanaeyaniva piajumalisaënexa. Bajarapacuenia naxaniavaetavanapa, penayacobijavata itsamonae matatoxenetsia pebitsojinaenexa, perajutsinexatsi corona, naebaxucorona. Itsiata baitsi jane bepijia saya piabejecoronanexa. Biji rajane vaxaitsi Dioso vajajumecovênêtsivi, Dioso tonacuenebavanapatsi athëbëtatsia vajanacarajutsinexa xua nacatsipaeba, apo peverevereceaevanexa. <sup>26</sup> Pacuenia pebitsojinaenê asaëyata cujinaejina rovia pepatsinexalia petocaëjëtsijavabeliatsi, bajara pijinia pacuenia xanê ata asaëyata tavajënaeyabelia exanaponaponajê vajatuxanenê taneitorobicuenia. Tonacuenebaponaponajê asaëy-



ata. Apo tonacuenebinē saya jema penaxuabinexa tatonacuenebijava. <sup>27</sup> Bajaraxuata naperabēevetsia naevetaponaponajē pibisiacuene taexanaeyaniva. Bajarapacuenia naperabēevetsia naevetaponaponajē tsipaji jitsipajē vajatuxanenē tanesivajamatabēcuenebarēya tsaponaejava itsamonae itsa tsipaebaponajē pexanialivaisi. Apo jitsipaenē tanecopatsiaexanaejava Dioso tatonacuenebijava. Itsamonae pexanialivaisi tatsipaebicujinae, bijiata itsa ponaponaejitsipajē, Dioso necopatsiaexanaejitsipa tatonacuenebijava.

**Pemuxujobilivaisi penavajēcaeyaniva jumapecataeya  
pexanaenēanējavabelia yabara pelivaisi**

**10** Tajamonae, pacatojitsipatsi icatsia panenajamatabēnapitsinexa pacuenia bajayatami vajasalinaivimi Moiséspijinē barēpitsaparena Egipto nacuaverena. Moiséspijinē Dioso tsitajētaponatsi itsaxuayo vajasalinaivimi barēnajetarucaejitsia. Vajasalinaivimi pematatsēnēatsia itarērēbo namataxainaeja najetaruca. Nexata bajarapaitarērēbo vajasalinaivimi pēnanajetarubena. Daxitabitsaēto vajasalinaivimi Moiséspijinē barēnicabarena Rojovēnē manuamenemaxērana epatuarena. <sup>2</sup> Pacuenia pebi itsa bautisabatsi merata, naexana Dioso pijajivitonē, bajara pijinia pacuenia vajasalinaivimi Moiséspijinē pijajivi naexana itsa pēnaponarena Egipto nacuaverena. Moiséspijinē pijajivi naexana vajasalinaivimi itarērēbo pebēxēpana itsa pēnanajetarubena Moiséspijinē. Rojovēnē manuamenemaxērana epatuarena ata itsa barēnicabarenatsi, Moiséspijinē pijajivi naexana vajasalinaivimi. <sup>3</sup> Daxita vajasalinaivimi caevirijava pexaejava najuanabanepona itsa najetarubena bajarapatusato nacuyarena. Papexaejava Dioso rajutaponatsi, bajarapamonaemi xaepona. <sup>4</sup> Itsa najetarubena, caeviriamera najuaapaepona, Dioso perajutsiratsi. Bajarapamera Dioso tocapitsapatsi ibotoxanetojavaverena. Bajarapamatacabi vajasalinaivimi Cristo yajavaponatsi. Cristo rabaja cajena bajarapaibotoxaneto. <sup>5</sup> Itsiata baitsi jane vajasalinaivimiyajuvēnēvi, caejiviyobeje, saya jumecovēnēta pacuenia Dioso najumecapanepaeya jumaitsitsi. Nexata bajarapajiviyobeje Dioso sivajamatabēcuenebarēyatsi. Daxita itsamonae apo jumecovēnētsi Dioso. Bajaraxuata vajasalinaivimi Dioso verebiabatsi petusato nacuata.

<sup>6</sup> Nexata vaxaitsi becanaējētatsi pacuenia vajasalinaivimi bajayata Dioso verebiabatsi pibisiacuene pexanaexae. Nexata vaxaitsi ata vajajamatabēēthētovetsina becanaējētatsi pibisiacuene vajaexanaeyaniva. <sup>7</sup> Bajaraxuata apo benavajēcaetsi jumapecataeya pexanaenēanējavabelia pacuenia bajayata vajasalinaivimiyajuvēnēvi navajēca jumapecataeya pexanaenēanējavabelia. Dioso pejumelivaisibaxutota jumaitsi pacuenia vajasalinaivimi pibisiacuene exanavanapa, fiesta itsa toexana jumapecataeya pexanaenēanēnexa. Dioso pejumelivaisibaxutota vajasalinaivimi yabara jumaitsi mapacueniaje: “Bajarapamonae enabiaba penabaninexa, piapaenexanua. Bajaraxuacujinae nonobapunabiaba peyavajibinexa,” jai Dioso pejumelivaisibaxutota vajasalinaivimi yabara. <sup>8</sup> Apo bexanaetsinua vajavitota pibisiacuene pacuenia bajayata vajasalinaivimiyajuvēnēvi exana. Bajarapitsivi tēpa caematacabita veintitrés mil pajivibeje. <sup>9</sup> Apo bejamatabēcuenejētsinua vajatuxanenē pacuenia bajayata vajasalinaivimiyajuvēnēvi Dioso jamatabēcuenejēta. Papibisiacuene vajasalinaivimi pejamatabēēthētota natojitsipa pexanaenexa, Dioso jamatabēcuenejētsiaya exanavanapa, peyapētaenexa pacuenia Dioso exanaejitsia bajarapamonaejavaberena. Bajaraxuata vajasalinaivimi jomo pesinicujiru-

atsi vereverecaona. <sup>10</sup>Pëtsa panaepaname Dioso pejumelivaisi papecatsipaebavanapaevijavabelia pacuenia bajayata vajasalinaivimiyajuvëñevi anaepanabiaba Moiséspijinëbeje Aarónpijinëbejejavabelia. Bajaraxuata Dioso itoroba pijaängel peverebiabinexatsi vajasalinaivimiyajuvëñevimi.

<sup>11</sup>Bajarapacuenia exanatsi bajayata vajasalinaivimi. Dioso baja cajena nacayapëtaeyaexana pacuenia bajayata vajasalinaivimi Dioso naneconitsiaexanatsi pibisiacuene pexanaexae. Bajarapalivaisi itanerubena Dioso pejumelivaisibaxutota vajanacamuxujobinexa, vaxaitsi ata bajarapacuenia pibisiacuene vajaexanaeyaniva. Vaxaitsi rabaja nacua pevereverecaetabarayota jinavanapatsi. <sup>12</sup>Itsa pajamatabëjumaitsimë: “Xanë cajena ajamatabëcuenesaënë Dioso tajumecovënëtsijava. Nexata apo exanaenë tsane pibisiacuene pacuenia bajayata tajasalinaivimi exana,” itsa pajamatabëjamë, xania baja tsane! Tsipaji paxamë ata bajarapacuenia pibisiacuene paexanaejitsipame. <sup>13</sup>Xua baja aconoxae pataepoename, dovathi pejamatabëcueneta papecajamatabëcuenëejëtsijava, bajaraxua daxita Dioso pejumecovënëtsivi tocopiapataponaatsi mapanacuataje. Itsiata baitsi jane Dioso pacayavenonaponaena pacuenia najumecapanepaeya jumaitsi. Dioso cajena apo pacacopatsi tsane dovathi papecajamatabëcuenëejëtaponaenexa paneajamatabëcuenesaëjava matatoxenetsia. Nexata dovathi itsa paca-jamatabëcuenëejëta, itsiata Dioso pacayavenonaponaena paneajamatabëcuenesaë tsaponaenexa. Nexata papecajamatabëcuenëejëtsijava, pavecuapanepaponaename pibisiacuene paexanaenejevamë.

<sup>14</sup>Tajamonae bitso patacaasivavi, jumapecataeya pexanaenëanëjavabelia itsamonae penavajëcaecuene, nayajivitaeya pajinavanapare. <sup>15</sup>Pacajamatabëcuenecaëjëpa baja cajena panejumeyapëtaenexa patacatsipaebilivaisi. Nexata panejumecanaëjëre patacatsipaebilivaisi paneyapëtaenexa itsa pexanajailivaisi. <sup>16</sup>Itsa nacaetuanatsi vajanajamatabënapitsinexa xua yabara Cristo nacasivatëpa, najuaxanetsi pan. Najumamatavëjëaapatsinua vajamatavëjëaapaera. Nexata pan yabara, vajamatavëjëaapaera ata yabara, Diosojavabelia jumaitsitsi: “Pexaniacuene bitso panetoexaname. Panerajutame pan. Panerajutame patamatavëjëaapaera ata,” jaitsi. Itsa nacaetuatatsi vajanajamatabënapitsinexa xua yabara Cristo nacasivatëpa, caebitsaëto naexanatsi Cristo yajava, ponë nacasivatëpa cruzata. <sup>17</sup>Ayaibitsaëtoxaneto atatsi, caepan itsiata najuaxanetsi. Nexata vaxaitsi Cristo vajayajavajinavanapaexae, caebitsaëtotsi Cristo pijajivitsi naexanatsi.

<sup>18</sup>Pacanaëjëre pacuenia judíovi baexana. Itsamonae dajubi beyabiaba bajarapavi ofrendacuenia perajutsinexa Diosojavabelia. Nexata pamonaenaxane bajarapavi, caebitsaëto Dioso pijajivi naexana. <sup>19</sup>Mara pajamatabëcuene yabara jumaitsinëje. Jumapecataya pexanaenëanë, itsacuenejavayo ata pexanaenexa, apo caëjëpaetsi. Bajara pijinia itsi pavi ata jumapecataeya pexanaenëanëjavabelia rajuta. Apo caëjëpaetsi jivi xae ata pejamatabëcuenëbijaenaxatsi. Tsipaji jumapecataeya pexanaenëanë, bajarapavi apo itothianae bajarapavivecua. <sup>20</sup>Nexata abaxë pamonaenaxane Dioso apo yapëtae, dajubinë itsa tobeyaxuaba ofrendacuenia pevi perajutsinexa jumapecataeya pexanaenëanëjavabelia, bajarapavi dovathinexa saya. Apo Diosonexa cajena. Bajaraxuata apo pacatojitsipaetsi panenaxaenexa bajarapamonaejavata. Itsa panaxaejitsipame bajarapamonaejavata, nexata caebitsaëto panaexanaejitsipame dovathi yajava. <sup>21</sup>Paxamë baja panenabanivi, paneapaevinua, va-

jatuxanenē pijamesata. Nexata baja acuenebi panenabaninexa, paneapaenexanua, itsajota Dioso apo pejumecovēnētsivi dovathi pijacuene exanavanapa. <sup>22</sup>Vaxaitsi Dioso vajajumecovēnētsivi, apo jitsipaetsi vajatuxanenē vajanacabaraanaepanaejava. Dioso pijacuene, dovathi pijacuene ata, anijacuenebeje itsa exanaponaejitsipatsi, nexata vajatuxanenē nacabaraanaepanaejitsipa. Vaxaitsi cajena apo vecuaasaētsi vajatuxanenē. Nexata apo vecuapanepaetsi tsipae vajatuxanenē itsa nacananeconitsiaexana.

### **Pacuenia Dioso pejumecovēnētsivi bejinavanapa itsamonae pejamatabēcuenebijianaeyaniva yabara pelivaisi**

<sup>23</sup>Xaniajai rabaja pacuenia itsamonae jumaitsi. Mapanacuata navita vajaexanaejavanexa. Itsajivi ata apo nacaitavetsi bajarapacuene vajaexanaenexa. Itsiata baitsi jane apo nacatoxanepanae daxita bajarapacuene vajaexanaenexa. Daxitacuene, xua itsajivi ata apo nacaitavetsi vajaexanaenexa, exanae atatsi tsipae, itsiata apo nacajamatabēcueneasaēyaexanae tsipae Dioso vajajumecovēnētsijava. <sup>24</sup>Pētsa pajamatabējumaitsimē: “¿De tsaeta xua natoexanaenajē, xua ēxanēnexa netoxanepanaejitsia?” pajamatabējamē pētsa. Biji rajane pajamatabējumaitsimēre. “¿De tsaeta xua toexanaenajē, xua itsamonaenexa toxanepanaejitsiatsi?” pajamatabējamēre.

<sup>25</sup>Dioso baja cajena pacatocopata panexaenexa itaxutojema. Nexata pacatocopata panexaenexa pavi canajeta pecanajetsibota. Nexata pētsa payanijobame. “¿Matsa pavi jumapecataeya pexanaenēanējavabelia peyajuvēnērajutsivije?” pajamē pētsa. Itsa payanijobijitsipame bajarapacuenia: “Jājā, bajarapayajuvēnēvi,” pacajai tsipae. Nexata paxamē pajamatabējumaitsimē tsipae bajarapavi yabara: “Mapavije itsa xaejitsipajē, nexata pibisiacuene exanaejitsipajē Dioso pitabarata,” pajamatabējamē tsipae. Saya pacomuare payanijobinejevamē. <sup>26</sup>Dioso baja cajena pacatocopata itaxutojema panexaenexa. Tsipaji mapanacuaje, daxita mapanacuapijicuene ataje, Dioso baja cajena pijajava.

<sup>27</sup>Dioso apo pejumecovēnētsijivi ata itsa pacajunata panenanabaninexa pijaboyabelia, panaponare panenanabaninexa itsa pajitsipame. Xua pacaabata, paxaema payanijobinejevamē. “¿Matsa pavi jumapecataeya pexanaenēanējavabelia peyajuvēnērajutsivije?” pajamē pētsa. <sup>28</sup>Itsamonae Dioso pejumecovēnētsivi bepibisiacuene pexanaejava taejitsipa itsa xaejitsipa bajarapayajuvēnēvi. Nexata panexaevajēnaeya, bajarapamonaejayuvēnēnē itsa pacajumaitsi: “Mara pavije jumapecataeya pexanaenēanējavabelia ofrendacuenia peyajuvēnērajutsivije,” itsa pacajai, pētsa patsitaxaneme. Itsa apo patsitaxamē tsane, nexata apo pajamatabēcuenebijianaemē tsane bajaraponē. <sup>29</sup>Itsa patsitaxaejitsipame, bajaraponē ata naxaejitsipa. Nexata bajaraponē jamatabējumai tsipae: “Pibisiacuene baja cajena exanajē Dioso pitabarata mapavije tanaxaexae,” jamatabējai tsipae.

Bajarapacuenia patacatsipaebijava, itsanē Dioso pejumecovēnētsinē itsa jumetaena, jamatabēcuenenavēxaniabiaya meta jumaitsi tsane mapacueniaje: “Jumapecataeya pexanaenēanējavabelia perajutsiviyajuvēnējava taxaeyabiabinexa, Dioso netocopata. Nexata baja xaeyabiabajē. Itsiata icatsia aeconoxae nitaveta itsanē Dioso pejumecovēnētsinē itsa tsitaxaniji bajarapayajuvēnēvi, bepibisiacuene petaeyaniva. ¿De meta xuajitsia xanē epatua copatsipajē bajarapayajuvēnēvi taxaeyabiabijavami? <sup>30</sup>Taxaevajēnae bajarapavi, ‘Xanepana rabaja,’ janē tsabiabi Diosojavabelia tanerajutsixae taxaenexa. ¿Detsa nexata xuajitsia

jivi nebaracuaicuajjai tsipae bepibisiacuene taexanaenë taxaejamatabëcuene bajarapayajuvënëvi?” jai meta tsane jamatabëcuenenavëxaniabiaya itsanë Dioso pejumecovënëtsinë. <sup>31</sup>Mara pacuenia pacatsipaebatsije panecopatsinexa paneexanabiabijavami ata, itsajivi ata panejamatabëcuenebijianaeyaniva panetsitaexanaejava pejamatabëcueneta. Itsa paxaneme, itsa papamenua, daxitacuene itsa paexanamenua, xaniavaetsia itsamonae patsitaexanavanapaname paxamë panetsitaexanaejava yabara jivi papecasivajamatabëjumaitsinexa: “Dioso cajena ayaijamatabëcuenenë. Tsipaji pijajivi yavenona xaniavaetsia petojinavanapaenexatsi,” papecasivajamatabëjainexa. <sup>32</sup>Bajaraxuata pëtsa patsitaexaname itsacueneyavayo ata itsajivi ata Diosoecua itsajamatabëcuene pexainaeyaniva. <sup>33</sup>Pacuenia xanë tsitaexanaponaponajë itsamonae tanesivajamatabëcuenebarëyanexa, bajarapacuenia paxamë ata patsitaexanavanapare itsamonae. Apo najamatabëxainabiabinë taexanaenexa xua ëxanënexa netoxanepana. Biji rajane najamatabëxainabiabajë tatoexanaenexa xua toxanepanatsi itsamonae ata. Bajarapacuenia toexanaponajë bajarapamonae ata Dioso pejumecovënëtsinexa pecapanepaenexatsi pijaneconivecua.

**11** Itsamonae patsitaexanavanapare pacuenia xanë pacatsitaexanaponatsi. Xanë raja pijinia cuenejëpaeya ponaponajë Cristo.

### **Pacuenia petiriavi namataacatsiaya bejunua Dioso pejumecovënëtsivi penacaetuatabiabibota yabara pelivaisi**

<sup>2</sup>Tajamonae, panejamatabënajinabiabame. Pacuenia pacaitorobatsi, bajarapacuenia paexanavanapamenua. Bajaraxuata pacasivajamatabëcuenebarëyatsi. <sup>3</sup>Pacatojitsipatsi paneyapëtaenexa mapacuenije. Athëbëvetsica Dioso itorobicatsi Cristo. Nexata juya mapanacuataje Cristo caepebi canacujitsia itorobapona. Bajara pijinia itsi pebi ata. Pebi juya itorobapona pijava. Pebi peyayataenexa Cristo, apo benamataacatsi papaëbërëpanayota jivi penacaetuatsibota. <sup>4</sup>Bajaraxuata pebi Diosojavabelia penavajëtsijavata, itsamonaejavabelia ata Dioso pejumelivaisi petsipaebijavata, itsa namataacatsipa papaëbërëpanayota, nexata Cristo athëbëvetsica yapijiviaura tsipaetsi. <sup>5</sup>Petiriva rajane pamona pejumecovënëtabiavacuene itsamonae peyapëtaenexatsi, benamataacata papaëbërëpanayota jivi penacaetuatsibota. Bajarapacuenia benamataacata penavajëtsijavata Diosojavabelia, itsamonaejavabelia petsipaebijavata ata Dioso pejumelivaisi. Itsa apo namataacatsi tsipae, nexata pamona yapijiviaura tsipaetsi. Pacuenia petiriva amataura tsipae itsa mataxunaejitsipatsi, bajara pijinia pacuenia petiriva pamona yapijiviaura tsipaetsi, papaëbërëpanayota itsa apo namataacatsi tsipae jivi penacaetuatsibota. <sup>6</sup>Petiriva itsa apo namataacatsi tsipae papaëbërëpanayota, pacuenia pebi apo namataacatsi, nexata itsa bemataxunatsi pacuenia pebi bamataxunatsi, bajarapova namatacaura tsipae. Bajaraxuata petiriva jivi penacaetuatsibota, benamataacata papaëbërëpanayota pamona peyapijiviaurayanivatsi. <sup>7</sup>Dioso itsa exana pebi, nacujirujëpaeyaexana. Nexata pacuenia itsi Dioso, bajara itsi pebi. Nexata pebi xaniavaetsia itsa ponapona, jivi pecanaëjëtsinexa Dioso bitso ayaijamatabëcuene pexainaenëcuene. Bajaraxuata pebi apo benamataacatsi papaëbërëpanayota penavajëtsijavata Diosojavabelia, itsamonaejavabelia Dioso pejumelivaisi petsipaebijavata ata. Itsiata baitsi jane petiriva benamataacata papaëbërëpanayota penayapëtaenexa pamonavecua beveliajamatabëcuene pexainaevacuene. <sup>8</sup>Copiata Dioso pebi itsa exana, petiriva

peyenyajuvënësitomita apo exanae. Biji rajane pebi peyenyajuvënësitomita cocoaevi Dioso exana petiriva. <sup>9</sup>Petiriva baja cajena Dioso exana pebinexa. <sup>10</sup>Bajarapajamatabëcuene yabara petiriva benamataacata papaëbërëpanayota. Petiriva namataacatsia itsa ponapona, ángelevi tanetsi pamona pejumecovënëtabiavivacuene. <sup>11</sup>Vaxaitsi Dioso vajajumecovënëtavanapaevi, xanepana namataenetsia vajanamatabëcuene asaëyaexanaenexa. Pebi namatavenona petiriva. Petiriva pijinia namatavenona pebi. <sup>12</sup>Xaniajai rabaja. Pebi peyenyajuvënësitota Dioso exana petiriva. Itsiata baitsi jane bajaraxuacujinae petiriavita naexanapona pebijivi. Tspijaji Dioso pejamatabëcueneta bajarapacuenia copata.

<sup>13</sup>Panijacuata pacanaëjère. ¿Xanepana tsaja petiriavi penavajëtsinexa Diosojavabelia papaëbërëpanayota namataacatsinejeva? Jume raja. Namataacatsiaya raja papaëbërëpanayota petiriavi benavajëta Diosojavabelia. <sup>14</sup>Vaxaitsi baja cajena vajajamatabëëthëtota yapëtanetsi mapacueneye. Pebi itsa amatanapiareca, amataura tsipae. <sup>15</sup>Vajajamatabëëthëtota yapëtanetsinua mapacueneye. Petiriva pijinia itsa amatanapiareca, toxanepanatsi. Yabarëya pematana. Dioso cajena petiriva tocopatatsi piamatanapianaxareca. Nexata bepemataacatsitsi pematana. <sup>16</sup>It-sajivi itsa jamatabëpanejumeeanaenota petiriavi papaëbërëpanayota penamataacatsijava yabara, nexata bajarapajivijavabelia pajumaitsinë tsane mapacueniaje: “Paxanë bajarapacuenia panajamatabëxainajë petiriavi papaëbërëpanayota penamataacatsijava yabara. Bajarapacuenia itsamonae ata, pamona Dioso pejumecovënëtsivi, najamatabëxaina. Tspijaji baja cajena patajacuene,” pajanë tsane pajivijavabelia jamatabëpanejumeeanaenota petiriavi papaëbërëpanayota penamataacatsijava yabara.

**Pacuenia itsamonae ayaijava xaeyabiaba itsa nacaetuatabiaba penajamatabënapitsinexa xua yabara Cristo sivatëpatsi yabara pelivaisi**

<sup>17</sup>Pacatoyaquinatsi mapalivaisije patacamuxujobinexa. Aeconoxae xua paexanabiabame, apo pacatoxanepanae. Panacaetuatabiabi atamë, itsiata apo pajamatabëcuenesaëmë tsaponae panevajënaeyabelia Dioso panejumecovënëtsijava. Caranata saya panevajënaeyabelia pajamatabëcuene cueranaponame. <sup>18</sup>Najamatabëxainajë copiaya patacajumaitsinexa mapacueniaje. Pacavënëlivaisitanetsi. Apo panajamatabëcuenejëpabiabimë pina itsa panacaetuatabiabame panenacaetuatabiabibota. Caebota pina panacaetuatabiabi atamë, navecuanatsanaeya pina panavecuaenabiabame pacaebitsaëtöximë canacujitsia. “Xaniajai raeta baja. Baja raeta pacuenia exanabiaba,” jamatabëjanë belia paxamë yabara. <sup>19</sup>Baja raeta pacuenia navecuanatsanaeya panavecuaenabiabame. Tspijaji meta pajamatabëjumaitsimë tsabiabi: “Vaxaitsi cajena Dioso pepacuene jumecovënëtsati. Nexata vajanacaetuatsijavata, Dioso apo pejumecovënëtsivi navecuatsatsianatsi Dioso apo ëpejumecovënëtsivi saicaya penaenexa,” pajamatabëjamë meta tsabiabi. <sup>20</sup>Xua yabara Cristo pacasivatëpa, panenajamatabënapitsinexa panacaetuatabiabi atamë, najamatabëcuenejëpaeya apo panacaetuatabiabimë. Nexata Dioso pacatane saya jema bepanenacaetuatsivi. <sup>21</sup>Tspijaji copiaya panepatsivi panenabaniepatota, ayaijavanë paxaeyabiabame. Apo paevetabiabimë abaxë itsamonae pepatsijava caecuenia panenajuanabaninexa. Itsamonae paxamëyajuvënëvi ayaijava xaeyabiaba. Ayaira vinora matavëjëa apaeyabiabanua. Nexata vënaaitajibi tsabiabi. Nexata pamona cocoaevi pepatsivi, yavereverecabiaba. Nexata pijani tsabiabi. <sup>22</sup>Ëpanexaejavanexa

itsa pasivanacaetuatabiabame, panijabonë paxainame panijabonëjava panenabaninexa, paneapaenexanua. Bijiaya pataeyabiabame pamonae nacaetuatabiaba penavajëcaenexa Diosojavabelia. Paurababiabamenua pamonae bepejiobivi, pexaejava apo penacapsivi. Pexaniacuene cajena apo paexanabiabimë bajarapacuenia itsa paexanabiabame. Bajarapacuenia saya paneexanabiabixae, pananeconitame Diosojavabelia.

**Pajamatabëcuene yabara nacaetuatabiaba Dioso pejumecovënëtsivi  
caejumeto canacujitsia yabara pelivaisi**

*(Mt 26.26-29; Mr 14.22-25; Lc 22.14-20)*

<sup>23</sup> Imata baja cajena pacatsipaebatsi pacuenia vajatuxanenë Jesús pijajivi barëxana. Pameravi vajatuxanenë pijavajabitsaë pecobeyabelia canajetsijitsiatsi, bajarapameravi vajatuxanenë cobenanuca panbë. <sup>24</sup> “Pexaniacuene panetoexaname. Pan panerajutame,” pejaicujinae Diosojavabelia, panbë epatsënëca. Jumaitsi pijajivijavabelia: “Mara tavije patacasivatëpaejava paxamënëxa. Mapacueniaje tacovëta paexanabiabianame patanenajamatabënapitsinexamë,” jai vajatuxanenë Jesús pijajivijavabelia. <sup>25</sup> Penabanicujinae bajara icatsia pacuenia Jesús cobenanuca pecaapaejava. Nexata icatsia jumaitsi pijajivijavabelia: “Dioso baja cajena najumecapanepaeya jumaitsi papecacapanepaenëxa. Nexata pacuenia Dioso najumecapanepaeya jumaitsi, pacacapanepaena tajana pejamatabëcueneta. Tajana raja nevecuarunaena tatëpaejavata papecomuatsinëxa panijaneconivecua. Mapacaapaejavataje, itsa papaeyabiabianame, panenajamatabënapitabiabianame,” jai vajatuxanenë Jesús pijajivijavabelia. <sup>26</sup> Nexata paxamë bajarapacuenia itsa paexanabiabame, patsitanaitajëtabiabame itsamonaejavabelia xua yabara vajatuxanenë pacasivatëpa cruzata. Bajarapacuenia paexanabiabare vajatuxanenë icatsia pepatsimatocabitsicajavabelianëxa.

**Pacuenia Dioso pejumecovënëtsivi benaxaniavaeta, itsa nacaetuata  
penajamatabënapitsinëxa xua yabara Cristo sivatëpatsi, yabara pelivaisi**

<sup>27</sup> Jivi itsa nacaetuata penajamatabënapitsinëxa xua yabara Cristo sivatëpatsi, becanaëjëtëna. Tsipaji canaëjëtsinejeva itsa naxane pan, itsa apanua vajatuxanenë pecaapaejavata, bajarapajivi naneconitsipa vajatuxanenëjavabelia, vajatuxanenë pevito, pijana ata, apo peyaiyataexae. <sup>28</sup> Bajaraxuata caejivi canacujitsia xaniavaetsia benajamatabëcuenejaita pecaxitajarabinëxa paneconi xainaponapona Dioso pitabarata. Bajarapacuenia benajamatabëcuenejaita pan penaxaevajënaeya, pematavëjëaapaera ata penaapaevajënaeya. <sup>29</sup> Itsa naxane pan, itsa naapanua pematavëjëaapaera, becanaëjëta pajamatabëcuene yabara vajatuxanenë sivatëpatsi cruzata. Pajivi canaëjëtsinejeva naxane pan, naapanua pematavëjëaapaera, bajarapajivi pijacuata naneconitapona Diosojavabelia. <sup>30</sup> Bajaraxuata paxamë ayaibitsaëto payajuvënëavitanemë. Nexata itsamonae payajuvënëcueraname. Itsamonae payajuvënëtëpame baja. <sup>31</sup> Bajaraxuata vaxaitsi vajanaxaevajënae pan, vjanaapaevajënae ata pematavëjëaapaera, benajamatabënapitatsi Jesucristo vajanacasivatëpaejava vaneconi yabara. Benajamatabëcuenejaitatsinua paneconi xainatsi Dioso pitabarata vajanavajunupaebinëxa Diosojavabelia. Bajarapacuenia itsa exanaenatsi, vajatuxanenë apo nacananeconitsiaexanae tsane. <sup>32</sup> Itsa naneconitsianatsi, nexata vajatuxanenë nacabejiobiaexanaponaena Dioso apo pejitsipaecuene vajaexanaejava

vajacopatsinexa. Bajarapacuenia vajatuxanenë nacaexanaena Dioso apo pejumecovënëtsivi yajava Diosovecua vajanaxuabiyanima.

<sup>33</sup> Bajaraxuata itsa panacaetuatame panenajamatabënapitsinexa xua yabara Cristo pacasivatëpa, paevetabianame abaxë daxita pepatsijava caecuenia panenajuaxaenexa. <sup>34</sup> Pajivi piajani, bajarapajivi copiya benabane pijabota pejonevajënaeya panenacaetuatsibojavaberena. Nexata panenacaetuatsijavata, bajarapajivi apo naneconitsi tsane Diosojavabelia. Itsajamatabëcuenejavaxi pematatsënëa, xua yabara paneyanijobame, abaxë apo pacatoyaquinaetsi mapabaxutotaje. Itsa pacataenatsi, pacatsipaebianatsi bajarajotalia.

**Pacuenia Dioso pejumecovënëtsivi Espíritu Santo  
pejamatabëcueneta jamatabëcuenecaëjëpaeyaexanatsi  
pexanaenexa pacuenia Dioso itorobaponatsi yabara pelivaisi**

**12** Tajamonae, jitsipajë patacatoyaquinaejava paneyapëtaenexa mapacueneye. Caejivi canacujitsia Dioso pejumecovënëtsivi Espíritu Santo pejamatabëcueneta jamatabëcuene caëjëpaeyaexanaponatsi pexanaenexa pacuenia Dioso itorobaponatsi.

<sup>2</sup> Paxamë rabaja payapëtaneme mapacueneye. Pamatacabi abaxë Dioso apo pajumecovënëtsimë, dovathi pacayamaxëitojrobabiaba. Nexata panevajëtsinexa jumapecataeya pexanaenëanëjavabelia, panematabacabëta patonubenabiabame. Jumapecataeya raja pexanaenëanë, apo caëjëpaetsi itsacuenejavayo ata pexanaenexa. <sup>3</sup> Bajaraxuata pacatoyaquinatsi paneyapëtaenexa mapacueneye. Pajivi jumaitsi: “Jesús raja Dioso apo pexënato,” jai, bajarapajivi Espíritu Santo apo yajavaponaponatsi. Pajivi rajane jumaitsi: “Jesucristo raja pepo petuxanenë,” jai, bajara jane pajivi Espíritu Santo yajavaponaponatsi.

<sup>4</sup> Daxita xua Dioso pejumecovënëtsivi Espíritu Santo pejamatabëcueneta jamatabëcuene caëjëpaeyaexanaponatsi, apo najëpae. Caenë canacujitsia saicayacuenia jamatabëcuene caëjëpaeyaexanaponatsi. Itsiata baitsi jane caenë Espíritu Santo pejamatabëcueneta jamatabëcuene caëjëpaeyaexanaponatsi daxita bajarapamonae.

<sup>5</sup> Xua jivi Dioso tonacuenebavanapa, apo caevirianacuenebijava. Navita cajena xua jivi Dioso tonacuenebavanapa. Itsiata caenë Dioso pijacuenetonaenexa.

<sup>6</sup> Dioso pijacuenetonaenexa, apo nacuenejëpae. Itsiata rabaja caenë Dioso daxita yavenonatsi petonacuenebavanapaenexa.

<sup>7</sup> Caejivi canacujitsia, Dioso pejumecovënëtsivi, Espíritu Santo pejamatabëcueneta jamatabëcuene caëjëpaeyaexanaponatsi xua Dioso tonacuenebavanapaejitsia. Nexata bajarapamonae, caejivi canacujitsia, caëjëpaetsi peyavenonaenexa bajarapajamatabëcueneta daxita Dioso pejumecovënëtsivijavabelia.

<sup>8</sup> Itsamonae Dioso pejumecovënëtsivi, Espíritu Santo pejamatabëcueneta jamatabëcuene caëjëpaeyaexanaponatsi pemuxujiobinexa xaniavaetsia itsamonaejavabelia, xaniavaetsia pejinavanapaenexa Dioso pitabarata. Itsamonae pijinia jamatabëcuene caëjëpaeyaexanaponatsi jivi xaniavaetsia peyapëtaeyaexanaenexa pexaniajailivaisi, Jesús pelivaisi. Itsiata baitsi jane caeEspíritu Santo pejamatabëcueneta bajarapacuenia jamatabëcuene caëjëpaeyaexanaponatsi bajarapamonae. <sup>9</sup> Itsamonae pijinia jamatabëcuene caëjëpaeyaexanaponatsi penajamatabëcuenerutsinexa Diosojavabelia Dioso peyavenonabibinexatsi daxitacuenetonaenexa. Itsamonae pijinia jamatabëcuene caëjëpaeyaexanaponatsi pejamatejemayaexanaenexa pivitanevi. CaeEspíritu Santo rabaja pejamatabëcueneta

bajarapacuenia jamatabëcuene caējēpaeyaexanaponatsi. <sup>10</sup> Itsamonae pijinia jamatabëcuene caējēpaeyaexanaponatsi Dioso pesaëta pinijicuene pexanaejavanë pexanaenexa. Itsamonae pijinia jamatabëcuene caējēpaeyaexanaponatsi petsipaebinexa itsamonaejavabelia pacuenia Dioso yapëtaeyaexanatsi. Itsamonae pijinia jamatabëcuene caējēpaeyaexanaponatsi pejumeyapëtaenexa itsajivi itsa tsipaebatsi penajumetsënëtsilivaisi dovathi pejamatabëcueneta. Jamatabëcuene caējēpaeyaexanatsinua pejumeyapëtaenexa itsajivi itsa tsipaebatsi pexaniajailivaisi Espiritu Santo pejamatabëcueneta. Itsamonae pijinia jamatabëcuene caējēpaeyaexanaponatsi pecuaicuaijainexa itsajivi ata mapanacuata apo pejumetaejumeta. Itsamonae pijinia jamatabëcuene caējēpaeyaexanaponatsi pejumetaenexa bajarapajume juya pejumevajunupaebaponaenexa itsamonaejavabelia. Nexata bajarapamonae tsipaebapona pajamatabëcuenelivaisi xainapona caelivaisi canacujitsia, palivaisianë tsipaebapona pamonae cuaicuaijai itsajivi ata mapanacuata apo pejumetaejumeta. <sup>11</sup> Itsiata baitsi jane caeEspiritu Santo pejamatabëcueneta jamatabëcuene caējēpaeyaexanaponatsi daxita bajarapamonae. Pacuenia Espiritu Santo jitsipa pejamatabëcuenecaējēpaeya exanaponaenexa Dioso pejumecovënëtsivijavabelia, bajarapacuenia Espiritu Santo caejivi canacujitsia jamatabëcuene caējēpaeyaexanaponatsi Dioso pejumecovënëtsivi.

**Pacuenia daxita Dioso pejumecovënëtsivi  
caenë Cristo bepeperabëto yabara pelivaisi**

<sup>12</sup> Pavi xainatsi vajaperabëtota, caevito canacujitsia pevenë xainapona. Vajavi xainatsi navitsiaya. Caevito canacujitsia saicaya pexanaejavanexa, xainapona. Itsiata baitsi jane caeperabëtotsireca. Bajara pijinia itsitsi daxita Dioso vajajumecovënëtsivi. Caejivitsi canacujitsia saicaya vajanacuenebijavanexa, Espiritu Santo pejamatabëcueneta nacajamatabëcuene caējēpaeyaexanaponaëta, itsiata caenë Cristo bepeperabëtotsi. <sup>13</sup> Daxitatsi rabaja Dioso vajajumecovënëtsivi, itsa nacabautisaba, caeEspiritu Santo nacatsijamatabëca caebitsaëtonexatsi, caenë Cristo bepeperabëtonexatsi. Judfovi atatsi, apo judfovi atatsi, dajubicuenia vajanacacanajetsivi ata itsamonaejavabelia amoneya vajatonacuenebinexa, apo vajanacacanajetsivi ata itsamonaejavabelia, daxitatsi, caeEspiritu Santo nacatsijamatabëca.

<sup>14</sup> Pavi jivi peperabëtuaëca xaina, caevito canacujitsia pevenë xainapona. Nexata caevënëvito jivi apo xinae peperabëtuaëca. <sup>15</sup> Nexata jivi petaxu itsa caējēpaejitsipatsi pecuaicuaijainexa, petaxu meta jumaitsi tsipae: “Apo pecobenë raja. Bajaraxuata maapo paperabëtoyajuvënëjavanëje,” jai meta tsipae. Itsiata baitsi jane cajena jemajai tsipae. Tsitecaeya bajarapaperabëtoyajuvënëjava tsipae. Pijumeta saya apo naexanae tsipae saicayajava. <sup>16</sup> Jivi pemuxuyoroto ata itsa caējēpaejitsipatsi pecuaicuaijainexa, pemuxuyoroto meta jumai tsipae: “Apo pitaxutonë raja. Bajaraxuata maapo paperabëtoyajuvënëjavanëje,” jai meta tsipae. Itsiata baitsi jane cajena jemajai tsipae. Tsitecaeya bajarapaperabëtoyajuvënëjava tsipae. Pijumeta saya apo naexanae tsipae saicayajava. <sup>17</sup> Jivi daxitanë peperabëtuaëca itsa xinaejitsipa ëpitaaxutonë, ¿detsa nexata pacuenia jumetaejitsipa? Acuenebi tsipae. Daxitanë peperabëtuaëca itsa xinaejitsipa ëpemuxuyorotonë, ¿detsa nexata pacuenia tuxunijitsipa? Acuenebi tsipae. <sup>18</sup> Bajaraxuata jivi peperabëtuaëca caevënëvito Dioso apo torutsi. Saicaya pevenë pexinaevitonë, caevito canacujitsia, jivi peperabëtuaëca Dioso torutapona itsajota jitsipa petorutsinexa. <sup>19</sup> Itsa meta jivi peperabëtuaëca



xainaejitsipa caevitoreca, aithothia meta tsipae. Nexata apo bejivitonē perabēto tsipae. <sup>20</sup> Itsiata baitsi jane maitsije. Jivi peperabētuareca navitsiaxainae ata saicaya caevito canacujitsia pevēnē pexainaevi, itsiata rabaja caeperabētoreca.

<sup>21</sup> Nexata jivi pitaxutobeje caējēpae atatsibeje tsipae pecuaicuaijainexabeje, itsiata acuenebi tsipae pejumaitsinexabeje pecobebejejavabelia: “Apo pacanamatavenonaetsibeje cajena,” pejainexabeje. Jivi pematabocotota ata caējēpae atatsi tsipae pecuaicuaijainexa, itsiata acuenebi tsipae pejumaitsinexa petaxubejejavabelia: “Apo pacanamatavenonaetsibeje cajena,” pejainexa. Tsipaji daxita pavi xainatsi vajaperabētota, namatavenonatsi. <sup>22</sup> Bajaraxuata vajaperabētota pavi xainatsi, pavi itajara apo bevajanacatsitanamatavenona, bajarapavi bitso pepacue namaavenonatsi. <sup>23</sup> Pavi xainatsi vajaperabētota, pavi vaxaitsi natanetsi beveliavi, bajarapavi banaperabēxatatatsi naitabētsiaya. Pavi naperabēcauratsi, naperabēcaranatsiaya banaperabēxatatatsi xaniavaetsia. <sup>24</sup> Pavi apo naperabēcauratsi, apo naperabēxatatatsi xaniavaetsia. Bajarapacuenia vajaperabētota Dioso nacavimataropobiaruba. Nexata picani pavi bevelia vajanamatavenonaevi, bajarapavi itsiata naitabētsia banaperabēxatatatsi. Nexata bajarapacuenia bajarapavi ata bevajanamatavenonaevi tanetsi. <sup>25</sup> Nexata pavi vajaperabētota xainatsi, apo navecuanatsanae. Nexata daxita pavi xainatsi vajaperabētota, namataenetsia naeveta. <sup>26</sup> Vajaperabētota pavi xainatsi, caevito itsa atane, nexata daxita itsavijavabelia ata baatane. Caevito ata pijinia itsa naitabētsianaxatatatsi, nexata daxitaperabētotsireca bayajavabarēyatsi.

<sup>27</sup> Daxita rabaja paxamē Dioso papijajivimē. Nexata caenē Cristo beperabēto panaexaname. Pavi Cristo peperabētota xaina, bajara bepajajuvēnēvi Dioso pacatane pacaenēmē canacujitsia. <sup>28</sup> Vajaperabētota pavi xainatsi, caevito canacujitsia saicaya xainapona pexanaponaevajanexa. Bajara pijinia itsi Dioso pejumecovēnētsivi. Caejivi canacujitsia Dioso itapetaponatsi saicaya caejivi canacujitsia pexanaponaenexa xua Dioso tocopatatsi. Copiata Dioso itapeta apóstolevinexa. Xuacujinae icatsia cotocaevi itapeta petsipaebivinexa itsamonaejavabelia pacuenia Dioso yapētaeyaexanatsi. Xuacujinae icatsia Dioso itapeta, pacuenia Dioso pejumelivaisibaxutota jumaitsi, peyapētaeyaexanaevinexa itsamonaejavabelia. Xuacujinae icatsia Dioso itapeta Dioso pesaēta pinijicue pexanaejava pexanaponaevinexa. Xuacujinae Dioso itapeta piavitanevi pejamatejemayaexanaevinexa. Xuacujinae icatsia Dioso itapeta bepejiobivi peyavenonaevinexa. Xuacujinae icatsia Dioso itapeta Dioso pejumecovēnētsivi penamatacaitorobivinexa. Xuacujinae icatsia Dioso itapeta pecuaicuaijaivinexa itsajivi ata mapanacuata apo pejumetaejumeta. <sup>29</sup> Nexata daxita apo ēpóstolevi. Nexata pijinia daxita apo ēpetsipaebivinexa itsamonaejavabelia pacuenia Dioso yapētaeyaexanatsi. Nexata pijinia daxita apo ēpeyapētaeyaexanaponaevinexa itsamonaejavabelia pacuenia Dioso pejumelivaisibaxutota jumaitsi. Nexata pijinia daxita Dioso pesaēta pinijicue pexanaejava, apo ēpexanaponaevinexa. <sup>30</sup> Nexata pijinia daxita apo ēpejamatejemayaexanaevinexa piavitanevi. Nexata pijinia daxita apo ēpecuaicuaijaivinexa itsajivi ata mapanacuata apo pejumetaejumeta. Nexata pijinia daxita apo ēpejumetaevinexa bajarapajume, juya itsamonaejavabelia pejumevajunupaebaponaenexa pajamatabēcuenelivaisi xainapona caelivaisi canacujitsia, palivaisianē tsi-paebapona pamona cuaiicuaijai itsajivi ata mapanacuata apo pejumetaejumeta. <sup>31</sup> Bajarapacuenia itsamonae pejamatabēcuenecaējēpaeaya exanaejavatsi matatox-  
enetsia panevajēnaeyabelia bitso pajitsipare Dioso papecajamatatabēcuenecaējēpaeaya

exanaenexa, paneyavenonaenexa daxita Dioso pejumecovënëtsivijavabelia. Daxita baja xua yabara pacatsipaebatsi, daxita bajaraxua matatoxenetsia panevajënaeyabelia bitso pajitsipare Dioso papecajamatabëcuenecaējëpaeya exanaenexa itsamonae ata paneasivanexa.

### Pacuenia jivi namataenetsia benaasiva yabara pelivaisi

**13** Dioso nejamatabëcuenecaējëpaeya exanaejitsipa tacuaicuaijainexa itsajivi ata mapanacuata apo pejumetaejumeta. Angelevi ata pijajumeta cuaicuaijanë tsipae. Nexata jivi netaejitsipa ayaijamatabëcuenenënë. Bajarapacuenia Dioso nejamatabëcuenecaējëpaeyaexanae ata tsipae, itsiata itsamonae ata itsa apo asivanë tsipae, nexata saya bajaraxua netoamatamobi tsipae Dioso pitabarata. Nexata palivaisi ata tsipaebaponaejitsipajë jivi pejumetaejumeta, apo nejumecovënëtsi tsipae. Nexata pacuenia tambor, itsa jume, plato itsajivi penajumetsiaexanaejava namuxujematatsi, bajarapacuenia nenamuxujematsipa tatsipaebilivaisi. <sup>2</sup>Dioso nejamatabëcuenecaējëpaeya exanaejitsipa xaniavaetsia tayapëtaenexa Dioso pejumelivaisi, asaëyata tatsipaebinexa itsamonaejavabelia. Yapëtaejitsipajëna daxita Dioso muetsia penajamatabëxainaelivaisianë ata. Yapëtaejitsipajëna daxita Dioso pijacuene ata. Bajarapacuenia xaniavaetsia yapëtae atanë tsipae, itsiata itsamonae ata itsa apo asivanë tsipae, nexata saya bajaraxua netoamatamobi tsipae Dioso pitabarata. Dioso bitso tajumecovënëtsinë tsipae. Nexata itsa jumaitsinë tsipae: “Dioso baja cajena mapatsutoxanetoje nevecuatixitsiana,” itsa janë tsipae, nexata Dioso nevecuatixitsipa. Bajarapacuenia exanae atanë tsipae, itsiata itsa apo asivanë tsipae itsamonae ata, nexata saya bajaraxua netoamatamobi tsipae Dioso pitabarata. <sup>3</sup>Rajutaponaejitsipajë bepejiobivijavabelia daxita taxainaejavaximi. Nacaevetsipajëna tanetajuitsinexa, tanebeyaxuabinexa ata, Dioso pejumelivaisi yabara. Bajarapacuenia nacaevetsi atanë tsipae, itsiata itsa apo asivanë tsipae itsamonae ata, nexata saya bajaraxua netoamatamobi tsipae Dioso pitabarata.

<sup>4</sup>Majamatabëcuenetsije pajivi asiva itsamonae ata. Bajarapajivi bajayajebi itsacueniabi atatsi, ajamatabëcuenesaë bajarapamonaejavabelia. Pajivi asiva itsamonae ata, itaxutotsoniatane bajarapamonae. Pajivi asiva itsamonae ata, apo cuenecaëbi bajarapamonae. Pajivi asiva itsamonae ata, “Xanë ayaijamatabëcuenenënë bajarapamonae matatoxenetsia,” apo jai itsajivijavabelia. <sup>5</sup>Pajivi asiva itsamonae ata, bajarapajivi apo ataejitsibi itsajivi ata. Apo exanae itsacuene ata piurabinexa bajarapamonaejavabelia. Pajivi asiva itsamonae ata, daxita xua xanepana, ëponënexa apo natonajamatabëxainae. Pajivi asiva itsamonae ata, bepjjia apo anaepanae bajarapamonaejavabelia. Pajivi asiva itsamonae ata, itsacueniabi atatsi, apo jamatabësitecae juya pecuenecanaviatsinexa bajarapamonaejavabelia. <sup>6</sup>Pajivi asiva itsamonae ata, bajarapamonae itsa tocopiapatatsi pibisiacuene, bajarapajivi apo sivajamatabëcuenekarëya bajarapamonae pibisiacuene petocopiapatsijavatsi yabara. Biji rajane pajivi asiva itsamonae ata, itsa bajarapamonae Dioso pejitsipaecuenia exanavanapa, bajarapajivi sivajamatabëcuenekarëya bajarapamonae Dioso pejitsipaecuenia pexanavanapaejava yabara. <sup>7</sup>Pajivi asiva itsamonae ata, bajarapajivi piasivaviyajuvënëvi itsacueniabi atatsi, najamatabëcuenesaëta pevajënaeyabelia piasivajava bajarapamonae. Pajivi asiva itsamonae ata, bajarapajivi apo peyapëtaevi ata, sivajamatabëjumaitsi mapacueniaje: “Maraeta pamonaë ata pexaniajamatabëcuenevije,” sivajamatabëjai. Pajivi asiva itsamonae ata, bajarapa-

jivi pibisiacuene pexanaevi ata, sivajamatabējumaitsi mapacueniaje: “Maraeta pamonae itsamatacabi pexaniacuene pexanaevi tsaneje,” sivajamatabējai. Pajivi asiva itsamonae ata, bajarapajivi tsiyapēbeje atatsi daxitacuene yabara, apo copatsi pi-asivajava itsamonae ata.

<sup>8</sup>Itsamonae Espiritu Santo pejamatabēcueneta jamatabēcueneta caējēpaeyaexanaponatsi petsipaebinxeta itsamonaejavabelia pacuenia Dioso yapētaeyaexanatsi. Itsamonae pijinia jamatabēcueneta caējēpaeyaexanaponatsi pecuaicuaijainexa itsajivi ata mapanacuata apo pejumetaejumeta. Itsamonae pijinia jamatabēcueneta caējēpaeyaexanaponatsi pacuenia Dioso pejumelivaisibaxutota jumaitsi peyapētaeyaexanaenexa itsamonaejavabelia. Daxita bajarapacuene, xua Dioso Espiritu Santo pejamatabēcueneta Dioso pejumecovēnētsivi jamatabēcueneta caējēpaeyaexanatsi, itsamatacabi tocopiarucaenatsi. Itsiata baitsi jane jivi namataenetsia penasivacuene, apo copiaruca tsane. <sup>9</sup>Dioso nacajamatabēcueneta caējēpaeyaexanae ata vajayapētaenexa, abaxē tsiquirijavayo yapētaeponatsi. Palivaisi ata tsipaebatsi itsamonaejavabelia Dioso pejumelivaisi, apo ayajjava. <sup>10</sup>Pamatacabi icatsia Cristo patsianica, Espiritu Santo pejamatabēcueneta vajanacajamatabēcueneta caējēpaeyaexanaejamatabēcuenemi, nacatocopiarucaena. Nexata jane baja bajarapamatacabi vajatuxanenē xaniavaetsia nacayapētaeyaexanaena daxitacuene Dioso pijacuene.

<sup>11</sup>Pamatacabi abaxē pejevaxinēyonē, cuaicuaijanē pejevaxinēyonēcuenia. Najamatabēxainajēnua pejevaxinēyonēcuenia. Jumetanijinua abaxē pejevaxinēyonēcuenia. Itsa baja tanaveretsinē, pejevaxijamatabēcuenemi baja copatajē. <sup>12</sup>Bajara pijinia itsinē Dioso tajamatabēcueneyapētaejava. Tsiquirijavayo abaxē Dioso jamatabēcueneyapētaniji. Pacuenia pitatsēcēnaetsaxuta itsa naitatanetsi, apo nacatonapebetsi, bajarajamatabēcuenetsinē Dioso tajamatabēcueneyapētaejava. Abaxē saya tsiquirijavayo Dioso jamatabēcueneyapētaniji. Itsiata baitsi jane itsamatacabi Dioso xaniavaetsia jamatabēcueneyapētaenajē. Pacuenia aeconoxae Dioso xaniavaetsia nejamatabēcueneyapētane, bajara pijinia pacuenia xanē ata itsamatacabi xaniavaetsia Dioso jamatabēcueneyapētaenajē. <sup>13</sup>Apo vereverecae daxitamatacabi vaxaitsi vajanajamatabēcuenecopatsijava Diosojavabelia. Vaxaitsi evetavanapatsinua Dioso vajanacapanepaenexa. Nexata vajanajamatabēcuenecopatsijava Diosojavabelia, vajaevetavanapaejjava ata Dioso vajanacapanepaenexa, bajaraxuabeje matatoxenetsia bitso xanepana vajaasivajava itsamonae ata.

### **Pacuenia Espiritu Santo pejamatabēcueneta itsamonae cuaicuaijaiyaexanatsi itsajivi ata mapanacuata apo pejumetaejumeta yabara pelivaisi**

**14** Panajamatabēcueneverere panevajēnaeyabelia panecasaētsavanapaenexa itsamonae ata paneasivajava pacuenia panijacuata panaasivamē. Panatojitsiparenua xua Dioso pacatojitsipa papecajamatabēcueneta caējēpaeyaexanaenexa Espiritu Santo pejamatabēcueneta. Bitso jane panatojitsipare palivaisi Dioso payapētaeyaexana panetsipaebinxeta itsamonaejavabelia. Nexata patsipaebianame palivaisi Dioso pacayapētaeyaexana. <sup>2</sup>Itsamonae Espiritu Santo pejamatabēcueneta jamatabēcueneta caējēpaeyaexanaponatsi pecuaicuaijainexa itsajivi ata mapanacuata apo pejumetaejumeta. Nexata bajarapajivi itsajivi ata mapanacuata apo pejumetaejumeta livaisi itsa paeba, tsipaeba Diosojavabelia. Nexata Dioso jumetanetsi palivaisi paeba. Bajarapajivi apo tsipaebi jivijavabelia. Nexata bajarapajivi livaisi itsa paeba itsajivi ata mapanacuata apo pejumetaejumeta, jivi jumetae atatsi, it-

siata itsajivi ata apo jumetaetsi palivaisi paeba. Tspaji itsajivi ata mapanacuata apo pejumetaejumeta paeba. Bajarapajivi Espiritu Santo pejamatabęcueneta livaisi paebiaexanatsi. Palivaisi Espiritu Santo bęcęcņa xainaponapona, paebiaexanatsi. <sup>3</sup> Itsamonae pijinia Espiritu Santo pejamatabęcueneta jamatabęcuenecaęcjępaeyaexanatsi jivi pejumetaejumeta petsipaebinexa palivaisi Dioso yapętaeyaexanatsi. Nexata bajarapajivi tsipaeba jivi pejumetaejumeta pejumetaenexatsi paivaisi tsipaeba. Nexata jivi pejumetaejumeta bajarapalivaisi bajarapajivi itsa tsipaeba, itsamonae pevęcjęnaeuabelia sivaajamatabęcuenesaęc tsaponae Dioso pejumecovęcņętavanapeajava. Bajarapajivi jamatabęcuenebabatanua bitso penajamatabęcainaevi. <sup>4</sup> Pajivi Espiritu Santo pejamatabęcueneta jamatabęcuenecaęcjępaeyaexanatsi livaisi pepaebinexa itsajivi ata mapanacuata apo pejumetaejumeta, bajarapajivi pijacuta jamatabęcuenevitsabapona Diosojavabelia bajarapalivaisita. Itsiata baitsi jane pajivi jamatabęcuenecaęcjępaeyaexanatsi jivi pejumetaejumeta petsipaebinexa palivaisi Dioso yapętaeyaexanatsi, bajarapajivi petsipaebilivaisita Diosojavabelia jamatabęcuenevitsabiaexanapona daxita Dioso pejumecovęcņętsivi.

<sup>5</sup> Pacatojitsipatsi picani daxita paxamęc Espiritu Santo pejamatabęcueneta papecajamatabęcuenecaęcjępaeyaexanaenexa panecuaicuajainexa itsajivi ata mapanacuata apo pejumetaejumeta. Itsiata rajane bajaraxua matatoxenetsia bitso pacatojitsipatsi papecajamatabęcuenecaęcjępaeyaexanaenexa jivi pejumetaejumeta panetsipaebinexa palivaisi Dioso pacayapętaeyaexana. Pajivi tsipaeba jivi pejumetaejumeta palivaisi Dioso yapętaeyaexanatsi, bajarapajivi bitso jamatabęcueneyavenona itsamonae Dioso pejumecovęcņętsivi. Pajivi livaisi tsipaeba itsajivi ata mapanacuata apo pejumetaejumeta, bajarapajivi apo jumetaetsi palivaisi tsipaeba. Nexata bajarapajivi Dioso pejumecovęcņętsivi apo jamatabęcuenevitsabiexanae Diosojavabelia. Itsiata bajarapajivi itsa caęcjępatsinua jivi pejumetaejumeta penajumevajunupaebinexa pejumetaenexatsi palivaisi tsipaeba, nexata bajarapajivi Dioso pejumecovęcņętsivi jamatabęcuenevitsabiaexana Diosojavabelia. <sup>6</sup> Bajaraxuata xanęc ata pijinia paxamęcjavata itsa patsipajęc livaisi patacatsipaebinexa apo panejumetaejumeta, nexata apo panejumetaemęc tsipae palivaisi pacatsipaebijitsipatsi. Nexata apo pacajamatabęcuenecaęcjępaeyaexanae tsipaetsi Diosojavabelia. Itsiata baitsi jane itsa patsipajęc panejumetaejumeta patacatsipaebinexa pacuenia Dioso bemajitsinaebota netsitajęcta, nexata pacajamatabęcuenecaęcjępaeyaexanae jitsipatsi Diosojavabelia. Itsa pacatsipaebijitsipatsinua pexaniajailivaisi, nexata pacajamatabęcuenecaęcjępaeyaexanae jitsipatsi Diosojavabelia. Palivaisi Dioso neyapętaeyaexana, palivaisi ata Dioso jumaitsi, pexaniajailivaisi, itsa pacatsipaebijitsipatsi, nexata pacajamatabęcuenecaęcjępaeyaexanae jitsipatsi Diosojavabelia.

<sup>7</sup> Pamonae Espiritu Santo pejamatabęcueneta jamatabęcuenecaęcjępaeyaexanatsi pecuaicuajainexa itsajivi ata mapanacuata apo pejumetaejumeta, bajarapamonae livaisi tsipaebi ata, itsajivi ata apo jumetaetsi palivaisi tsipaeba. Bajara pijinia itsi tsipae penaxęcanaejavanęc peracatsivi ata xaniavaetsia itsa apo racatsi tsipae. Flauta piobinęc, bijiata itsa obijitsipa, arpa pijinia peracatsinęc ata, bijiata itsa racatsipa, nexata itsajivi ata apo vajiyapętaetsibeje tsipae, pavaji picani naxęcanaeyaexanaebeje. Flauta piobijava, arpa ata peracatsijava, amatamobi tsipae. <sup>8</sup> Bajara pijinia itsi tsipae vajabitsaęc trompeta piobijava ata. Vajabitsaęc itsa ponaejitsia penavajabitsaęcsinexa, trompeta baoba penajunatsinexa. Nexata trompeta piobijava vajabitsaęc itsa jumetane, bamuxunaothopa penacaetuatsinexa. Nexata trompeta piobinęc xani-

avaetsia itsa apo obi tsipae, nexata trompeta piobijava vajabitsaë jumetae ata tsipae, apo muxunaothopae tsipae penacaetuatsinexa penavajabitsaëtsinexa. <sup>9</sup>Bajara pijinia paitsimë tsipae paxamë ata. Itsajivi ata mapanacuata apo pejumetaejumeta itsa patsipaebijitsipame itsamonaejavabelia palivaisi Dioso pacayapëtaeyaexana, nexata apo pacajumetae tsipae palivaisi patsipaebame. ¡Nexata saya pajumenaxuabijitsipame bajarapalivaisi panetsipaebijava! <sup>10</sup>Daxitaviriajumevi bitso navita mapanacuajavaje. Caeviriajumevi canacujitsia yapëtaepona xaniavaetsia pijajume. <sup>11</sup>Itsiata baitsi jane tajanacuapijinë ata itsa nebarëcuaicuajai tsipae itsaviriavi pijajumeta, apo tajumetaejumeta, nexata besaicaya nacuapijinë taejitsipajë bajaraponë. Bajaraponë ata pijinia itsaviriavi pijumeta, apo pejumetaejumeta, itsa barëcuaicuajianë tsipae, besaicaya nacuapijinënë netaejitsipa. <sup>12</sup>Itsa pajitsipame Dioso papecajamatabëcuene caëjëpaeyaexanaenexa daxitacuene, nexata panatovajëre Diosojavabelia papecajamatabëcuene caëjëpaeyaexanaenexa. Itsiata baitsi jane bitso panatojitsipare Dioso papecajamatabëcuene caëjëpaeyaexanaenexa itsamonaejavabelia panetsipaebinexa palivaisi Dioso pacayapëtaeyaexana. Nexata Dioso pejumecovënëtsivi itsa pacajumetane palivaisi patsipaebame, ajamatabëcuenesaë tsane Dioso pejumecovënëtsijava.

<sup>13</sup>Nexata pajivi Espiritu Santo pejamatabëcueneta jamatabëcuenecaëjëpaeyaexanatsi jivijavabelia livaisi petsipaebinexa itsajivi ata mapanacuata apo pejumetaejumeta, bajarapajivi bevajëta Diosojavabelia pejamatabëcuenecaëjëpaeyaexanaenexatsinua jivi pejumetaejumeta penajumevajunupaebinexa bajarapalivaisi. Nexata bajarapajivi Dioso itsa jamatabëcuenecaëjëpaeyaexanatsi jivi pejumetaejumeta penajumevajunupaebinexa daxitajivijavabelia, itsa najumevajunupaebiana, yapëtaeyaexanaena palivaisi tsipaeba. <sup>14</sup>Xanë ata apo tajumetaejumeta vajëtsi atanë tajamatabëthëtojavavetsina, itsiata apo yapëtaenë xua vajëtajë Diosojavabelia. <sup>15</sup>Mara pacuenia tavajënaeyabelia xanë exanaenajëje. Vajëtsianajë Diosojavabelia anijavirijumetabeje. Vajëtsianajë apo tajumetaejumeta. Vajëtsianajënua tajajumeta ata daxitajivi tanejumetaenexa. Tanaxëanaejavata ata pijinia bajarapacuenia exanaenajë. Naxëanaenajë apo tajumetaejumeta. Naxëanaenajënua tajajumeta ata daxitajivi tanejumetaenexa. <sup>16</sup>Pexaniacuene Dioso papecatoexanaejava yabara itsa pavajëtsipame Diosojavabelia itsajivi ata mapanacuata apo pejumetaejumeta, nexata pajivi pacajumetaeyeca, apo pacajumetae tsipae xua yabara pavajëtsipame Diosojavabelia. Nexata bajarapajivi toacuenebitsi tsipae papecayavenonaeyavajëtsinexa Diosojavabelia. <sup>17</sup>Paxamë picani Dioso pexaniacuene papecatoexanaexae, Diosojavabelia pavajëtsipame xaniavaetsia. Itsiata baitsi jane itsajivi ata mapanacuata apo pejumetaejumeta panevajëtsixae Diosojavabelia, pajivi pacajumetaeyeca, ajamatabëcuenecovëbi tsipae. Tsipaji apo pacajumetae tsipae xua yabara pavajëtsipame. Nexata apo pacamuxunajamatabëcuenevitsabi tsipae Diosojavabelia. <sup>18</sup>Dioso baja cajena xanë nejamatabëcuenecaëjëpaeyaexana tacuaicuajainexa itsajivi ata mapanacuata apo pejumetaejumeta. Bajarapacuenia cuaicuajianë itsajivi ata mapanacuata apo pejumetaejumeta daxita paxamë matatoxenetsia. Bajarapacuenia Dioso tanejamatabëcuene caëjëpaeyaexanaexae, jumaitsinë tsabiabi Diosojavabelia: “Xanepana rabaja. Pexaniacuene bitso netoexaname,” janë tsabiabi Diosojavabelia. <sup>19</sup>Itsiata baitsi jane Dioso pejumecovënëtsivi penacaetuatsijavata, ayailivaisi tsi-paebi atanë tsipae itsajivi ata mapanacuata apo pejumetaejumeta, bajarapamonae apo nejumetae tsipae palivaisi tsipaebajë. Bajaraxuata Dioso pejumecovënëtsivi pe-

nacaetuatsijavata, apo jitsipaenë tatsipaebinexa itsajivi ata mapanacuata apo pejumetaejumeta. Biji rajane jitsipajë bajarapamonae pejumetaejumeta tatsipaebinexa saya tsiquirilivaisiyo ata tanejumetaenexa, palivaisi tsipaebajë.

<sup>20</sup>Tajamonae, pacuenia pejevaxi bajamatabëcueneitsi, pëtsa bajara pajamatabëcueneitsimë. Xaniavaetsia panajamatabëxainaname. Pacuenia penaveretsivi bajamatabëcueneitsi, bajara pajamatabëcueneitsimë tsane. Itsiata baitsi jane pibisiacuene paneexanaeyaniva, bepapejevaxijiviximë panataname. Tspiji pejevaxijivixi abaxë bitso apo najamatabëxainae pibisiacuene pexanaenexa. <sup>21</sup>Dioso pejumelivaisibaxutota tajëvelia jumaisi mapacueniaje: “Itsamonae cuaicuaijayaexanaenajë itsajivi ata mapanacuata apo pejumetaejumeta. Nexata bajarapamonae tajumelivaisi netotsipaebiana tajajivijavabelia. Itsiata baitsi jane tajajivi apo jumecovënëtsi tsane tajumelivaisi,” jai tajëvelia Dioso pejumelivaisibaxutota judfovi Dioso apo pejumecovënëtsijavanexa yabara. <sup>22</sup>Nexata Dioso pejumecovënëtsivi Espiritu Santo pejamatabëcueneta jamatabëcuene caëjëpaeyaexanaponaenatsi pecuaicuaijainexa itsajivi ata mapanacuata apo pejumetaejumeta. Nexata Dioso apo pejumecovënëtsivi itsa taena bajarapacueni, canaëjëtsiana Diosojavabelia. Canaëjëtsiananua bajarapamonae penaneconitavanapaejava Diosojavabelia. Dioso pejumecovënëtsivi jamatabëcuene caëjëpaeyaexanaenatsi petsipaebinexa itsamonaejavabelia palivaisi Dioso yapëtaeyaexanatsi. Nexata itsamonae Dioso pejumecovënëtsivi xaniavaetsia pejumetaexae palivaisi tsipaebatsi, canaëjëtsiana pepacueni Dioso pitaxutotsoniataejavatsi pecapanepaenexatsi pijaneconivecua. <sup>23</sup>Nexata pijinia itsamonae Dioso apo pejumecovënëtsivi napatsipa panenacaetuatsijavata. Nexata bajarajota paxamë livaisi patsipaebijitsipame itsajivi ata mapanacuata apo pejumetaejumeta. Nexata pamonae penapatsivi apo papecajumetaexae palivaisi patsipaebame itsajivi ata mapanacuata apo pejumetaejumeta, nexata pacabarajamatabëjumai tsipae: “Mara pamonaeje saya pematajemabivitsije,” pacabarajamatabëjai tsipae. Tspiji apo pacajumetae tsipae palivaisi patsipaebame. <sup>24</sup>Jivi pejumetaejumeta panetsipaebijavata palivaisi Dioso pacayapëtaeyaexana, Dioso apo pejumecovënëtsijivi napatsipa. Nexata bajarapajivi papecajumetaexae palivaisi patsipaebame, najamatabëxainaejitsipa. Nayapëtaejitsipana bajarapajivi penaneconitsijava Diosojavabelia. Nexata pijaneconi bitso yanajamatabëxainaejitsipa Diosojavabelia. <sup>25</sup>Papecanamuxunaevetsijavata, bajarapajivi muetsia penajamatabëxainabiabijava najamatabëcuene yapëtaejitsipa. Nexata nayapëtaejitsipa penaneconitsijava Diosojavabelia. Nexata pematatabacabëta nucaejitsipa. Vajëtsipa Diosojavabelia. Pevajëtsijavata jumai tsipae Diosojavabelia: “Diosomë, bitso baja cajena ayajamatabëcuenenëmë,” jai tsipae Diosojavabelia. Nexata paxamëjavaberena ata bajarapajivi pacajumaisi tsipae: “Pepacueni majotaje paxamë Dioso pacayajavaponapona,” pacajai tsipae.

**Pacuenia Dioso pejumecovënëtsivi muxujibatsi peyapëtaenexa  
pacuenia exanaejitsia culto pexanaejavata yabara pelivaisi**

<sup>26</sup>Tajamonae, itsa panacaetuata Dioso pejumelivaisi yabara, mapacuenia paexanaenaeje. Itsamonae naxëanaena vaji. Itsamonae najamatabëcueneveretsiana jivi pejumetaejumeta livaisi petsipaebinexa daxitajivijavabelia. Itsamonae najamatabëcueneveretsiana palivaisi Dioso yapëtaeyaexanatsi juya petsipaebinexa it-

samonaejavabelia. Itsamonaē najamatabēcuēneveretsiana livaisi petsipaebinexa itsajivi ata mapanacuata apo pejumetaejumeta. Itsamonaē pijinia najamatabēcuēneveretsiana jivi pejumetaejumeta juya pejumevajunupaebaponaenexa daxitajivijavabelia, palivaisi tsipaeba itsajivi ata mapanacuata apo pejumetaejumeta pecuaicuaijaiivi. Bajarapacuenia paexanaename panenacaetuatsijavata daxita Dioso pejumečovēnētsivi pevājēnaeyabelia pejamatabēcuēnevitsabaponaenexa Dioso pejumecovēnētsijava. <sup>27</sup> Panenacaetuatsijavata, jivijavabelia itsamonaē livaisi itsa tsipaebijitsia itsajivi ata mapanacuata apo pejumetaejumeta, nexata Dioso tocopatatsi petsipaebinexa anijajivibeje, acueyabi pajivibeje ata. Baitsi pejumevajunupaebinexatsi palivaisi tsipaeba itsajivi ata mapanacuata apo pejumetaejumeta. Itsiata baitsi jane caecuenia acueyabi pajivibeje apo benajuatsipaebi. Nexata pajivi jivijavabelia livaisi tsipaebijitsia itsajivi ata mapanacuata apo pejumetaejumeta, bajarapajivi copiata betsipaeaba. Nexata pijinia pajivi jumevajunupaebaponaējitsia jivi pejumetaejumeta, bajarapajivi cotocaevi bejumevajunupaebapona jivijavabelia. Bajarapacuenia itsamonaē jivijavabelia livaisi itsa tsipaeba itsajivi ata mapanacuata apo pejumetaejumeta, nexata juya itsajivi jivi pejumetaejumeta bejumevajunupaebapona daxitajivijavabelia peyapētaenexa palivaisi tsipaeba itsajivi ata mapanacuata apo pejumetaejumeta. <sup>28</sup> Nexata itsa ajibi jivi pejumetaejumeta pejumevajunupaebijivinexatsi daxitajivi peyapētaenexa palivaisi tsipaeba itsajivi ata mapanacuata apo pejumetaejumeta, nexata panenacaetuatsijavata livaisi apo betsipaeabi itsajivi ata mapanacuata apo pejumetaejumeta. Bajarapamonae moya beena. Bēpēnēa saya pejamatabēthētota becuaiicuaijaii tsenae itsajivi ata mapanacuata apo pejumetaejumeta. Diosojavabelia ata pijinia bajarapacuenia bēpēnēa pejamatabēthētota bevājētena. <sup>29</sup> Bajara pijinia pacuenia Dioso tocopata itsamonaē ata jivijavabelia petsipaebinexa palivaisi Dioso yapētaeyaexanatsi. Bajarapamonae ata Dioso tocopata jivijavabelia petsipaebinexa anijajivibeje, acueyabi pajivibeje ata. Nexata petsipaebijavata, itsamonaē xaniavaetsia benamuxunaevetena pejumeyapētaenexa itsa xaniajai Dioso pejamatabēcueneta bajarapamonae tsipaebatsi bajarapalivaisi. <sup>30</sup> Nexata bajarapamonae livaisi petsipaebaponaējavata, bajarajota penamuxunaevetecaenē Dioso pejamatabēcueneta livaisi itsa yapētaeyaexanatsi, nexata ponē jivijavabelia livaisi tsipaebapona, benajumecopata baja. Nexata ponē penamuxunaevetecaejavata, Dioso livaisi yapētaeyaexanatsi, bajaraponē juya daxitajivijavabelia betsipaeaba palivaisi Dioso yapētaeyaexanatsi penamuxunaevetecaejavata. <sup>31</sup> Bajarapacuenia daxita paxamē Dioso pejumelivaisi papecayapētaeyaexanaevi Dioso pacatocopata jivijavabelia livaisi panetsipaebinexa pacaējivimē tsaponae. Bajarapacuenia Dioso pacatocopata daxitajivi peyapētaenexa Dioso papecayapētaeyaexanaelivaisi, pesivaajamatabēcuēnesaē tsaponaenexanua Dioso pejumecovēnētsijava panetsipaebilivaisita. <sup>32</sup> Pamonaē tsipaeba daxitajivijavabelia palivaisi Dioso yapētaeyaexanatsi, bajarapamonae yapētane paepatota najumecopatsijitsia. Tspaji Espiritu Santo pejamatabēthētota itorobatsi paepatota najumecopatsijitsia. Nexata itsa najumecopata bajaraponē, juya itsanē petsipaebinexa daxitajivijavabelia. <sup>33</sup> Dioso apo tocopatsi caecuenia anijajivibeje jivijavabelia livaisi penajuatsipaebinexa. Tspaji caecuenia anijajivibeje livaisi itsa najuatsipaebijitsipabeje, xaniavaetsia apo jumetaetsi tsipae penajuanacaetuatsivi. Bajaraxuata Dioso tocopata jivijavabelia livaisi petsipaebinexa caējivi tsaponae.

Pacatsipaebijtsiatsi pacuenia exanabiaba daxita Dioso pejumecovënëtsivi penacaetuatsijavata. <sup>34</sup>Petiriavi moya beena Dioso pejumecovënëtsivi penacaetuatsijavata. Tsipaji petiriavi Dioso apo tocopatsitsi Dioso pejumecovënëtsivi penacaetuatsijavata pecuaicuaijaitsetaenexa. Petiriavi pamonajivi bejumecovënëtsiajinavanapa pacuenia Dioso pejumelivaisibaxutota itorobatsi. <sup>35</sup>Petiriva itsa jamatabëyanijoba itsalivaisiyo, nexata bota beyanijoba pamonajavabelia. Piau-racueni exanaejitsipa Dioso pejumecovënëtsivi penacaetuatsijavata petiriva itsa cuaicuaijai tsecae tsipae.

<sup>36</sup>Pëtsa pacopatame Dioso pejumecovënëtsivi penacaetuatsijavata petiriva pecuaicuaijaitsetaenexa. Tsipaji itsatomaranëjava Dioso pejumecovënëtsivi bajarapacuenia apo exanae. Pëtsa bepaayajamatabëcuenevimë panataneme bajara-pacuenia paneexanavanapaenexa. <sup>37</sup>Itsamonae paxamëyajuvënëvi natane bepetsi-paebartusvinexa daxitajivijavabelia palivaisi Dioso yapëtaeyaexanatsi. Itsamonae natane Espiritu Santo pejamatabëcueneta bepejamatabëcuene caëjëpaeyaexanaevitsi pacuenia Dioso jitsipa. Nexata bajarapamonae itsa xaniajai Espiritu Santo yajavajinavanapa, beyapëtane picani patacatoyaquinaelivaisi, mapalivaisije vajatuxanenë pitorobilivaisi jivi pejumecovënëtsinexa. <sup>38</sup>Itsiata baitsi jane pajivi apo namuxunaevetsi pejumecovënëtsinexa mapalivaisije, pëtsa pajumecovënëtame bajarapajivi penavajunupaebijava Dioso pejamatabëcuenecaëjëpaeya exanaejavatsi.

<sup>39</sup>Bajaraxuata asaëyata panatojitsipare Dioso papecajamatabëcuene caëjëpaeyaexanaenexa panetsipaebinexa daxitajivijavabelia palivaisi Dioso pacayapëtaeyaexana. Itsiata baitsi jane pëtsa pajumeitavetame itsamonae itsa cuaicuaijai itsajivi ata mapanacuata apo pejumetaejumeta. <sup>40</sup>Nexata panenacaetuatsijavata, itsa patsipaebame daxitajivijavabelia palivaisi Dioso pacayapëtaeyaexana, xaniavaetsia pacaenëmë tsaponae patsipaebabiabianame.

### **Jesucristo petëpaecujinae Dioso icatsia piasaëyaexanaejavatsi yabara pelivaisi**

**15** Tajamonae, pacatojitsipatsi panenajamatabënapitsinexa palivaisi baja imata pacatsipaebatsi. Bajarapalivaisi, pexanialivaisi, papecacapanepaelivaisinexa panijaneconivecua. Pajumecovënëtame baja bajarapalivaisi. Nexata panevajënaeyabelia asaëya pajumecovënëtavanapaenename bajarapalivaisi. <sup>2</sup>Panevajënaeyabelia itsa pajumecovënëtavanapaenename bajarapalivaisi, nexata pibisiacuene paneexanaeneconivecua Dioso pacacapanepaena. Matababi apo pevereverecaejava paxainanename. Itsiata baitsi jane copiaya panejamatabëëthëtajavavetsina itsa apo pajumecovënëtsimë tsane bajarapalivaisi, nexata Dioso apo pacacapanepae tsane.

<sup>3</sup>Copiaya baja cajena pacatsipaebatsi palivaisi vajatuxanenë copiaya netsipaeba. Pacatsipaebatsi baja cajena Cristo vajanacasivatëpaejava pibisiacuene va-jaexanaeneconi yabara. Cristo baja cajena nacasivatëpa pacuenia Dioso pejumelivaisibaxutota tajëvelia jumaitsi. <sup>4</sup>Nexata Cristo petëpaenë pemëthëtsicujinaetsi, acueyabi matababita, icatsia Dioso asaëyaexanatsi. Bajarapacuenia Cristo Dioso icatsia asaëyaexanatsi pacuenia baja cajena tajëvelia Dioso pejumelivaisibaxutota jumaitsi Cristo yabara. <sup>5</sup>Nexata Cristo Dioso piasaëyaexanaecujinaetsi, copiaya Pedrojavabelia tsitanaitajëta. Bajaraxuacujinae Jesús pijajivi, doce ponëbeje apóstolevijavabelia, tsitanaitajëta. <sup>6</sup>Bajaraxuacujinae Jesús pijajivi quinientos pematat-sënëa pajivibejevavabelia penacaetuatsijavata, tsitanaitajëta. Bajarapamonaeyaju-



vënëvimi Jesús petaevitsi itsamonae baja tēpae ata, itsiata ayaibitsaëtoxfaneto abaxë asaë tsavanapae. <sup>7</sup> Bajaraxuacujinae icatsia Santiagojavabelia Jesús tsitanaitajëta. Bajaraxuacujinae icatsia daxita apóstolevijavabelia Jesús tsitanaitajëta.

<sup>8</sup> Xanë daxita apóstolevivecua bexëjavaberena apóstolenënë nexana. Nexata pacuenia pexi pexinaejivi cotocaevi pexainaenacueto itsi, bajarapacuenia nataniji bajarapamonaevécua. Itsiata baitsi jane daxita Jesús pijajivijavabelia petsitanaitajëtsicujinae, xanëjavaberena ata Jesús netsitanaitajëta tataanexa. <sup>9</sup> Daxita apóstolevivecua xanë beveliajamatabëcuenenënë nataniji. Tsi-paji abaxë xanë Jesús itsa apo jumecovënëtsinë, Jesús pijajivi bejiobiaexanabiabajë. Bajaraxuata: “Apóstolenë,” tanejainexa ata, auranë tsabiabi. <sup>10</sup> Itsiata baitsi jane Dioso taneitaxutotsoniataexae, nitapeta baja apóstolenëxanë. Xanëjavaberena Dioso taneitaxutotsoniataejava, apo nacueratsi. Biji rajane xanë daxita itsaapóstolevi matatoxenetsia bitso Dioso tonacuenebaponaponajë. Itsiata xanë tajamatabëcuenesaëta apo tonacuenebaponaponanënë. Dioso raja pesaëta tonacuenebaponaponajë. Nexata Dioso pesaëta nejamatabëcueneyavenonapona asaëya tatonacuenebaponaponanexa. <sup>11</sup> Xanë meta bitso Dioso tonacuenebaponaponajë itsamonae apóstolevi matatoxenetsia. Itsa jume, nexata meta bajarapamona bitso Dioso tonacuenebavanapa xanë matatoxenetsia. Itsiata baitsi jane bajarapacuenia yabara apo canaëjëtšinë. Bitso rajane pacatojitsipatsi paneyapëtaenexa palivaisi baja pacatsipaebatsi, pexanialivaisi, Jesucristo pelivaisi. Nexata baja bajarapalivaisi pajumecovënëtavanapame.

### **Pacuenia itsamatacabi Dioso icatsia asaëyaexanaejitsia petëpaevimini yabara pelivaisi**

<sup>12</sup> Pacatsipaebatsi baja cajena Cristo petëpaeucujinae Dioso icatsia piasaëyaexanaejavatsi. Itsiata baitsi jane itsamonae paxamëyajuvënëvi jamatabëcuenenavëxaniabi-aya jumai tsabiabi: “Jivi rabaja petëpaeucujinae ajibi icatsia piasaëjavanexa,” jai tsabiabi. Nexata bajarapacuenia apo bejumaitsi bajarapamona. <sup>13</sup> Tsi-paji peneta itsa pepacuene ajibi tsi-pae petëpaevi icatsia piasaëjavanexa, nexata baja Cristo ata icatsia Dioso apo asaëyaexanaetsi tsi-pae petëpaeucujinae. <sup>14</sup> Itsa baja Cristo petëpaeucujinae icatsia Dioso apo asaëyaexanaetsi tsi-pae, nexata palivaisianë pacatsipaebavanapatsi, amatamobi tsi-pae. Paxamë ata panenajamatabëcuenecopatsijava Cristojavabelia Dioso papecacapanepaenexa panijaneconivecua, amatamobi tsi-pae. <sup>15</sup> Pematatsënëa xua Dioso exana patavajunupaebijava, panajumetsënëtsipajë. Tsi-paji pajumaitsinë tsabiabi mapacueniaje: “Cristo raja petëpaeucujinae Dioso baja icatsia asaëyaexanatsi,” pajanë tsabiabi. Itsa pepacuene ajibi tsi-pae petëpaevi icatsia piasaëjavanexa, nexata baja Cristo Dioso icatsia apo asaëyaexanaetsi tsi-pae. <sup>16</sup> Itsa peneta pepacuene ajibi tsi-pae petëpaevi icatsia piasaëjavanexa, nexata Cristo ata petëpaeucujinae icatsia Dioso baja apo asaëyaexanaetsi tsi-pae. <sup>17</sup> Nexata Cristo petëpaeucujinae Dioso baja icatsia itsa apo asaëyaexanaetsi tsi-pae, nexata paxamë ata panenajamatabëcuenecopatsijava Cristojavabelia Dioso papecacapanepaenexa panijaneconivecua, panacueratsipame baja. Tsiteca abaxë panijaneconi paxinaejitsipame. <sup>18</sup> Bajarapacuenia itsa itsipae, nexata baja pamonaemi tēpa Cristo pepua pejumecovënëtsivi, bajarapamonaemi ata naxuabijitsipa baja. <sup>19</sup> Vaxaitsi ata pijinia Cristojavabelia vajanajamatabëcuene copatsicujinae, xua Dioso nacayavenonabi-aba, saya nacayavenonaejitsipa vajajinavanapaepatojebi mapanacuataje. Vajatëpaeucujinae, Cristo pejamatabëcueneta Dioso itsa apo nacacapanepaejitsia tsi-pae

vajaneconivecua, vajajamatabëcuenenavëxaniabivi baja tsipae. Tshipaji vaxaitsi jamatabëjumaitstsi tsabiabi mapacueniaje: “Cristo pejamatabëcueneta Dioso nacacapanepaena,” jamatabëjaitstsi tsabiabi. Nexata ayaicuenia Dioso vajatonacuenebabi-abijava ata, nacueratsipatsi. Maticabi apo pevereverecaejava Dioso vajanacarusjutsinexa vajeavetavanapaejava ata, nacueratsipatsi. Caranata meta jitsipaejitsipatsi Dioso apo pejumecovënëtsivi vajanacaitaxutobejiobiataenexa.

<sup>20</sup> Itsiata baitstsi jane mapalivaisije xaniajai cajena. Tshipaji baja Cristo petëpaecujinae, capanepaeya baja icatsia Dioso asaëyaexanatsi. Nexata pacuenia Cristo petëpaecujinae mëthëvecua pitsapa, bajara pijinia pacuenia itsamaticabi mëthëvecua pitsapaena daxita pamonaemi tēpa Dioso pepua pejumecovënëtsivi. Nexata baja Cristo petëpaecujinae, mëthëvecua itsa pitsapa, daxita petëpaevivecua Cristo baja namataxainaeya pitsapa mëthëvecua. <sup>21</sup> Caenë Adánpijinë pejamatabëcueneta taxuxuaba jivi petëpaejava mapanacuataje pibisiacuene pexanaexae. Bajara pijinia pacuenia caenë Cristo pejamatabëcueneta vajanacasivatëpaexae cruzata, taxuxuaba petëpaevimi itsamaticabi mëthëvecua pepitsapaejavanexa. <sup>22</sup> Daxitajivi tēpaponna Adánpijinë petaxuxuabicuenia. Bajara pijinia pacuenia daxita pamonaemi Cristo pijajivi, petëpaecujinae icatsia Dioso asaëyaexanaenatsi pacuenia Cristo Dioso asaëyaexanatsi. <sup>23</sup> Paepatota Dioso jitsipa petëpaevi piasaëyaexanaenexa, caejivi canacujitsia asaëyaexanaponaena. Cristo baja petëpaecujinae, Dioso itsa asaëyaexanatsi, daxita petëpaevivecua namataxainaeya baja asaëyaexanatsi. Bajaraxuacujinae icatsia pamaticabi Cristo patsianica, daxita pamonaemi Cristo pijajivi, Dioso icatsia asaëyaexanaenatsi. <sup>24</sup> Bajaraxuacujinae jane baja daxitacuene pecopiarucaeyaexanaejavanexa, copiapatsiana. Bajarapamaticabi Cristo copiarucaeyaexanaena daxita xua Cristo pijavajabitsaë evetavanapa. Nexata bajaraxua Cristo pecopiarucaeyaexanaecujinae, xua paxa Dioso tocopatatsi Cristo pevetsinexa, bajaraxua tocanaviatsiana baja paxa Diosojavabelia. <sup>25</sup> Cristo evetaponaponaena daxitacuene. Matapania Dioso cueneamoneyabiana daxita Cristo pijavajabitsaë, Cristo copatsiana daxitacuene pevetsijava. <sup>26</sup> Daxita Cristo pijavajabitsaë verebiabiana. Bajaraxuacujinae cotocaevi copiarucaeyaexanaena jivi petëpaecuenemi. <sup>27</sup> Dioso pejumelivaisibaxutota tajëvelia jumaitstsi mapacueniaje: “Dioso itsamaticabi pexënato Cristo tocopatsiana daxitacueneviria petoevetsinexatsi,” jai Dioso pejumelivaisibaxutota. Itsiata baitstsi jane Dioso pexënatojavabelia apo jumaitstsi: “Xanë ata nitorobianame,” apo jai Dioso. Dioso raja itorobiana pexënato petoevetsinexatsi daxitacueneviria. <sup>28</sup> Nexata itsamaticabi Cristo daxitacueneviria itsa evetsiana, daxitacueneviria Cristo pitorobicuenia jumecovënëtabianatsi. Nexata jane baja bajarapamaticabi Cristo jumecovënëtsiana paxa Dioso pitorobicueniatsi. Bajarapacuenia Cristo paxa Dioso pejumecovënëtsixae tsane, nexata bajarapamaticabi Dioso daxitanacuanëjava daxitacueneviria pitorobinë tsane.

<sup>29</sup> Itsamonae pepua penabautisabivi baja, pijamonaemi totëpatsi. Pijamonaemi ata baja pepuanajamatabëcuenecopabi Cristojavabelia, totëpatsi. Itsiata baitstsi jane bajarapamonaemi tēpa nabautisabinejeva. Nexata pajivi pijamonaemi totëpatsi, bajarapajivi penabautisabijivi ata baja, pijamonaemi pevënamuto icatsia nabautisaba. Bajarapacuenia anijatobeje nabautisaba pevëcuatëpaejivitsi bepenabautisabijivi petotaenexatsi Dioso. Petëpaevimi peneta icatsia Dioso itsa apo asaëyaexanaetsijitsia tsipae, penabautisabijivi baja pijamonaemi pevënamuto icatsia apo nabauti-

sabi tsipae, nabautisabinejeva pevecuatëpaejivitsi bepenabautisabijivi petotaenexatsi Dioso.

<sup>30</sup> Petëpaevimi peneta icatsia Dioso ita apo asaëyaexanaejitsiatsi tsipae, nexata Dioso pejumelivaisi apo patsipaebavanapaenë tsipae, daxitamatacabi panetsiayai tsabiabi ata. <sup>31</sup> Tajamonae, daxitamatacabi baja cajena netsiayai tsabiabi. Itsamonae picani jamatabënebeyaxuababiaba. Bajaraxua paneyapëtaenexa, pacatsipaebatsi. Tsipaji pacasivajamatabëcuenebarëyatsi vajatuxanenë Jesucristo xaniavaetsia panejumecovënëtavapaexae. <sup>32</sup> Majotaje Efeso tomarapijivi ata jamatabënebeyaxuaba picani. Bajarapamonae benevëthëjamatabëcuenevi. Tsiquirijavayota vecuapanepajë. Jivi petëpaeucujinae icatsia Dioso ita apo asaëyaexanaejitsiatsi tsipae, nexata xanë ata nacueratsipajë. Nacueratsipajë, netsiayai ata, jivi tatsipaebaponaejava Dioso pejumelivaisi. Vajatëpaeucujinae icatsia Dioso ita apo nacaasaëyaexanaejitsia tsipae, nexata xaniavaetsia jumecovënëtsipatsi pamonae jamatabëcuene navëxaniabiaya nacatsipaeba mapacuenia pejumaitsilivaisije: “Ayaijavanë vajaxaejava xaeyabiabianatsi. Aitajibitsinua tsabiabi tsane vajabarëyatsabiabinexa. Tsipaji raja bepijia tëpaenatsi,” pejailivaisi vajanacatsipaebivi jumecovënëtsipatsi.

<sup>33</sup> Itsiata baitsi jane pëtsa panacopatame papecayamaxëitojorobinexa bajarapacuenia pejumaitsvivi. Tsipaji raja itsamonae bajumaitsvi: “Ita yajavaponaponaejitsipame pibisiajamatabëcuenevi, cajamatabëcuenebijianaejitsipa. Nexata pexaniajamatabëcuenenë atamë, bajarapamonae cuenejëpaeya ponaponaejitsipame,” bajai itsamonae. <sup>34</sup> Panajamatabëxainare xaniavaetsia. Pëtsa baja pematatsënëa pibisiacuene paexaname. Itsamonae paxamëyajuvënëvi Dioso apo yapëtae. Mapacuenia pacajumaitsvitsije paneauranexa.

### **Pacuenia petëpaevimi Dioso icatsia ita asaëyaexanatsi, perabëithianaejitsiatsi yabara pelivaisi**

<sup>35</sup> Itsamonae raeta yanijobiana petëpaevimi icatsia Dioso piasaëyaexanaejavanexatsi yabara. Jumaitsvi meta tsane bajarapamonae: “¿Detsa meta pacuenia petëpaevimi icatsia asaëyaexanaenatsi? ¿Detsa meta nexata pitsiperabëto icatsia xainaena bajarapamonae?” jai meta tsane bajarapamonae. <sup>36</sup> Bajarapacuenia ita yanijobiana, apo canaëjëtsinejeva jamatabëcuenenavëxaniabiaya bajarapacuenia yanijobiana. Vajaubijava, pexuto ita ubatsi, pejuvicujinae bajarapaxutomi batsabana pepit-sapaenexa pejananae. <sup>37</sup> Arrozxuto, itsavirixutoxi ata, pexu saya ubatsi. Apo mëthëcaetsi pepabotonë. <sup>38</sup> Peubixu, caevirixu canacujitsia, peubicujinae capitsapapona pijaviriabotonë, pijaviriabaxu yajava. Dioso baja cajena pecopatsicuenia caeviriaboto canacujitsia naexanapona. <sup>39</sup> Mapanacuata Dioso copatsi ata daxitacueneviria pejinavanapaenexa, itsiata apo naperabëjëpae. Jivi saicaya itsaviriaperabëto xaina. Unupijidujuai pijinia saicaya itsaviriaperabëto xaina. Pepunaevi pijinia saicaya itsaviriaperabëto xaina. Menepijidujuai pijinia saicaya itsaviriaperabëto xaina. <sup>40</sup> Bajara pijinia itsi athëbëtatsia pejinavanapaevi ata. Bajarapamonae saicaya itsaviriaperabëto xaina mapanacuapijivivecuaje. Athëbëtatsia pejinavanapaevi nacavecuapexaniaperabëtovi. Mapanacuata pejinavanapaevi ata, itsamonae nacatsitapexaniaperabëtovi picani. Itsiata pijinia saicayacuenia. <sup>41</sup> Matabacipijijuameto itayota. Meravipijijuameto ata itayota. Itsiata saicayacuenia navecuaitayotabeje. Tulupu ata pijinia itayota. Itsiata caetuluputo canacujitsia saicayacuenia navecuaitayotapona. <sup>42</sup> Bajara pijinia nacavecuaitane petëpaevimi. Saicayaperabëto nacave-

cuaxainaena Dioso icatsia itsa asaëyaexanaenatsi. Petëpaejivi irabelia mëthëtatsi. Nexata baja tsabana. Bajaraxuacujinae Dioso icatsia itsa asaëyaexanaenatsi, apo petsabanaeperabëtonexa jane baja xainaena. <sup>43</sup> Petëpaejivi mëthëtatsi vajaataejitsi-biperabëto yajava. Bajaraxuacujinae Dioso icatsia itsa asaëyaexanaenatsi, pexania-penivenivenaeperabëto jane baja xainaena. Petëpaejivi mëthëtatsi pecueranaeperabëtomi yajava. Bajaraxuacujinae Dioso icatsia itsa asaëyaexanaenatsi, daxita matacabijavabelianexa jane baja pesaë pexainaeperabëto xainaena. <sup>44</sup> Petëpaejivi mëthëtatsi mapanacuapijiperabëto yajava. Bajaraxuacujinae Dioso icatsia itsa asaëyaexanaenatsi, athëbënacuarijiperabëto xainaena. Itsaviriaperabëto abaxë aeconoxae xainatsi mapanacuata vajajinavanapaenexa. Bajara icatsia pacuenia itsamatacabi itsaviriaperabëto xainaenatsi athëbënacuatatsia vajajinavanapaenexa.

<sup>45</sup> Dioso pejumelivaisibaxutota jumaitsi mapacueniaje: “Adánpijinë copiaya Dioso exanatsi mapanacuataje. Bajaraponë Dioso exanatsi pecueranaeperabëto yajava peponaponaenexa mapanacuataje,” jai Dioso pejumelivaisibaxutota. Itsiata baitsi jane Adánpijinë matatoxenetsia Cristo bitso ayaijamatabëcuenenë. Nexata Cristo petëpaeacujinae icatsia Dioso itsa asaëyaexanatsi, caëjëpatsi vajanacajamatabë cue-neasaëyaexanaenexa Diosojavabelia. Caëjëpatsinua vajanacarajutsinexa matacabi apo peverevereaejava. <sup>46</sup> Pacuenia athëbënacuarijivi perabëitsi, abaxë copiaya apo perabëitsitsi. Biji rajane pacuenia mapanacuapijivi perabëitsije, bajaraperabëitsitsi. Itsiata baitsi jane vajatëpaeacujinae Dioso icatsia itsa nacaasaëyaexanaena, pacuenia athëbënacuarijivi perabëitsi, bajara vaxaitsi ata perabëitsi tsanetsi. <sup>47</sup> Adánpijinë copiaya Dioso exanatsi mapanacuataje. Atsabenota exanatsi. Bajaraxuacujinae bexëajavabelia athëbëvetsica Cristo patsica, ponë vajatuxanenë. Bajaraponë saicaya athëbëvetsica pepatsinë. <sup>48</sup> Daxitatsi vaxaitsi, mapanacuapijivitsije, perabëjëpatsi Adánpijinë, atsabenota pexanaenëtsi. Itsiata baitsi jane itsamatacabi daxitatsi, Cristo vajajumecovënëtsivi, perabëjëpaenatsi Cristo. Nexata pacuenia athëbënacuarijivi perabëitsi, bajaraperabëitsi tsanetsi Cristo vajajumecovënëtsivi. <sup>49</sup> Aeconoxae abaxë perabëjëpatsi Adánpijinë, ponë atsabenota pexanaenëtsi. Bajara icatsia pacuenia itsamatacabi Cristo perabëjëpaenatsi, ponë athëbëvetsica pepatsinë.

<sup>50</sup> Tajamonae, jitsipajë patacatsipaebineja mapacuenieje. Acuenebi caejivi ata mapanacuapijivije mapanacuapijiperabëto yajava pejonenexa Dioso pijanacuayabetsia. Tshipaji vajaperabëto saya peverevereaejavanexa. Bajaraxuata acuenebi vajayajavajinavanapaenexa bajaraperabëto daxita matacabijavabelianexa. <sup>51</sup> Nexata panamuxunaevere mapalivaisije, Dioso bajayata muetsia pexainabuatsilivaisimi, palivaisi aeconoxae Dioso nacayapëtaeyaexanapona. Daxitatsi raja vaxaitsi Cristo icatsia pepatsimatacabinexatsica pevajënaeya, apo tēpaetsi tsane. Itsiata baitsi jane apo tēpae atatsi tsane, pamatacabi Cristo patsianica, daxitatsi nacaperabëithianaena Dioso. <sup>52</sup> Itsa najumetsiana cotocaevi piobjiava trompeta, bepijiayo tsatabi tsane, paepatoyovajëto banaitatsaquetajarabatsi, bajarapaepatoyovajëto Dioso nacaperabëithianajonena. <sup>53</sup> Vajaperabëto raja peverevereaejavanexa. Bajaraxuata xanepana vajanacaperabëithianaenexa, apo peverevereaeperabëto vajaxainanexa. <sup>54</sup> Nexata paepatota bajarapacuenia nacaperabëithianajonena, copiajopaena jane baja pacuenia Dioso pejumelivaisibaxutota tajëvelia jumaitsi. Dioso baja cajena pejumelivaisibaxutota tajëvelia jumaitsi mapacueniaje: “Jivi petëpaeacuenemi itsamatacabi copiarucaena. Pinijicuenia Dioso copiarucaeyaexanaena jivi petëpaeacuenemi. <sup>55</sup> Jivi petëpaeayaexanaecuenemi ajibi tsane pesaë vajanacaavita-

niaexanaeyaniva. Ajibi tsane vajanacatēpaeyaexanaecuenemi,” jai tajēvelia Dioso pejumelivaisibaxutota jivi petēpaeyaexanaecuenemi Dioso pecopiarucaeyaexanaejavanexa yabara. <sup>56</sup> Pibisiacuene vajaexanaeconi yabara tēpaenatsi. Palivaisi bajayata Dioso Moiséspijinēta najumecopata, bajarapalivaisi pejamatabēcueneta yapētanetsi vajatēpaecujinae Diosovecua picani vajanaxuabijavanexa pibisiacuene itsa exanatsi. <sup>57</sup> Itsiata baitsi jane baja vajatēpaecujinae Diosovecua apo naxuabitsi tsane. Tsipaji baja vajatuxanenē Jesucristo nacasivatēpa cruzata vajanacapanepaenexa vajaneconevcua. Bajaraxuata vaxaitsi Diosojavabelia jumaitsitsi tsabiabi mapacueniaje: “Pexaniacuene rabaja panetoexaname,” jaitsi tsabiabi.

<sup>58</sup> Tajamonaē, bitso patacaasivavi. Payapētaneme rabaja mapacuenije. Dioso panetonacuenebijava, apo panacueratsimē tsane. Bajaraxuata panevajēnaeyabelia asaēya patonacuenebavanapare Dioso. Pētsa pacopabame Dioso panejumecovēnēt-sijava. Panevajēnaeyabelia asaēya Dioso patonacuenebaponare.

### **Pacuenia Pablo itoroba Corinto tomarapijivi ofrenda pexanaenexa Jerusalén tomarata Dioso pejumecovēnētavanapaevi petoitorobinexa yabara pelivaisi**

**16** Pacatsipaebijitsiatsi pacuenia pacaetuatsijitsiamē ofrenda panetoitorobinexa Jerusalén tomarata Dioso pejumecovēnētavanapaevijavabelia bajarapacuenia paneyavenonaenexa. Pacuenia Galacia nacuata Dioso pejumecovēnētsivi, caebitsaēto canacujitsia, itorobajē ofrenda pecaetuataponaenexa, bajara pijinia pacuenia paxamē ata pacaetuataponaename ofrenda. <sup>2</sup> Pacaejivimē canacujitsia, caesemana canacujitsia panenacanabipalatayajuvēnējjava, ofrendanexa saicaya pat-sataponaename caedomingo canacujitsia. Pajivi tsiquirijavayo nacanaba, tsiquirijavayo pijinia saicaya tsatsiana. Pajivi ayaijava nacanaba, ayaijavayo pijinia saicaya tsatsiana. Bajarapacuenia paxaniavaetaponaename palata. Nexata pamatacabi paxamējavabelia patsianajē, palata ofrendanexa apo pacaetuataponaemē tsane. <sup>3</sup> Nexata pamatacabi paxamējavabelia patsianajē, paitapetsianame bajarapalata pecaponaevinexa Jerusalén tomarapijivijavabelia. Pamonae palata pecaponaevinexa, tsicobeyaquinaenajē cuyalato. Bajarapacuyalato bajarapamonae peyavajavacaponanexa, panecaetuatsiofrenda itsa tocaponaena Jerusalén tomarata Dioso pejumecovēnētsivijavabelia. Nexata bajarapapalata pecaponaevi, Jerusalén tomarapijivi yapētaenatsi xaniavaetsia Dioso pejumecovēnētsivicuene, peyjavacaponaeaxae tsane tatsicobeyaquinaebaxuto. <sup>4</sup> Xanē ata itsa jitsipaenajē taponanexa, ponaenajē Jerusalén tomarabelia. Nexata meta bajarapamonae naponanena tapēta.

### **Pacuenia Pablo tajēvelia navajunupaeba pacuenia exanaejitsia yabara pelivaisi**

<sup>5</sup> Itsa ponaenajē paxamējavabelia, tapatsivajēnaeya paxamējavabelia, copiaya pataponaenajē Macedonia nacujava. Bajaraxuacujinae jane baja patsianajē paxamējavabelia, Corinto tomarata. <sup>6</sup> Ponaponaenajē meta paxamējavata bajayajebi. Daxita emarapaejebi ata meta naponaponaenajē paxamējavata. Nexata bajaraxuacujinae paneyavenonaename tajanamutonexa, itsabelia jitsipajē taponanexa icatsia. <sup>7</sup> Caepatoyo saya tanaponaponatabinexa paxamējavata, apo jitsipaenē. Biji rajane jitsipajē bajayajebi taponaponaenexa paxamējavata pacuenia vajatuxanenē netojitsipa. <sup>8</sup> Itsiata baitsi jane abaxē aeconoxae ponaponaenajē majotaje Efeso tomarata. Pentecostésvënë fiestacujinae meta, matapania vecuaponaenajē Efesotomara. <sup>9</sup> Ma-

jotaje aeconoxae baja bitso xanepana tatsipaebinxexa Dioso pejumelivaisi. Tshipaji mapatomarapijivije bitso baja jitsipapona pejumetaenexa Dioso pejumelivaisi. Itsiata baitsi jane itsamonae ayabitsaëto apo jitsipae. Nexata tatsipaebilivaisi pejumecovënëtsivi, jamatabëcopabiaexanaponatsi.

<sup>10</sup>Timoteo itsa patsiana paxamëjavabelia, pacopiapitsianame xaniavaetsia jamatabëcuenebarëyaya peponaponaenexa paxamëjavata. Bajarapacuenia xaniavaetsia pacopiapitsianame. Tshipaji pacuenia xanë vajatuxanenë pejamatabëcueneta tonacuenebaponaponajë, bajara pijinia pacuenia bajaraponë ata vajatuxanenë pejamatabëcueneta tonacuenebaponapona. <sup>11</sup>Bajaraxuata pëtsa itsajivi ata pacopatame pequenetsiataenexatsi. Biji rajane payavenonaename pijanamutonexa jamatabëcuenebanepanaeya pepatsinexa xanëjavaberena. Xanë, itsamonae yajava, vajënaeevetaponaponajë Timoteo pepatsinexarena xanëjavaberena.

<sup>12</sup>Vajabananë Apolos pelivaisi pacatsipaebijitsiatsi. Bajaraponë picani itorobajë itsamonae Dioso pejumecovënëtsivi pepëta penaponaenexa paxamëjavabelia papacataenexa. Itsiata baitsi jane aeconoxae abaxë apo jamatabëponae. Ponaena meta itsiata itsajota cuenecaëjëpatsi.

### **Pacuenia Pablo jamatabënajina Corinto tomarapijivi yabara pelivaisi**

<sup>13</sup>Dovathi pejamatabëcueneyaniva, jamatabëcueneenaëcotsiaya pajinavanapare. Pajamatabëcuenesaëmëre tsavanapae Jesucristojavabelia panenajamatabëcueneecopatsijava. Pëtsa jamatabëcueneaitetepaebiaya pajinavanapame. Pajamatabëcueneaitatsacamëre tsavanapae pebicuenia. Itsamonae patsitaajamatabëcuenesaëmëre tsavanapae. <sup>14</sup>Daxita xua paexanavanapame, itsamonae ata asivaya paexanavanapare.

<sup>15</sup>Tajamonae, payapëtaneme rabaja mapacuejeje. Estéfnas pijabopijivi barëjumecovënëta Jesús pelivaisi. Bajarapamonae daxita pijanacuapijivivecua copiaya jumecovënëta Jesús pelivaisi Acaya nacuata. Nexata bajarapamonae jamatabëcueneenabiabatsi ëDioso pijacuene. Bajaraxuata bajarapamonae asaëyata bitso yavenonabiaba itsamonae Dioso pejumecovënëtsivi. <sup>16</sup>Pacatojitsipatsi xaniavaetsia panejumecovënëtsinexa xua pacaitoroba bajarapitsivi. Bajarapitsivi peyajavanacuenebivi ata, xua pacaitoroba, pajumecovënëtsianame. <sup>17</sup>Paxamëyajuvënëvi parena xanëjavaberena mapamatabëxëyoje. Estéfnas, Fortunato, Acaico, bajarapamatabëxëyo parena. Bajaraxuata sivajamatabëcuenebarëyanë. Bitso picani pacaitaxanabiabatsi. Itsiata baitsi jane bajarapamonae tanetopatsixaerena, neyavenonabiaba pacuenia paxamë itsa papatsiparemena, paneyavenonaejitsipame. <sup>18</sup>Nexata bajarapamonae itaxutuanajamatabëcuenesaëtajë. Paxamë ata bajarapamonae pacajamatabëcueneasaëyaexanaena icatsia itsa naviabiana paxamëjavabelia. Bajarapitsivi bepayaivaname.

<sup>19</sup>Caebitsaëto canacujitsia Dioso pejumecovënëtsivi, Asiavënë nacuapijivi, pacabajacobalia. Aquila pijava, Prisca, pacabajacobalia. Aquila ata pacabajacobalia. Daxita Dioso pejumecovënëtsivi, pamonaenacaetutabiaba bajarapajivibeje pijabota, bajarapamonae ata, daxita pacabajacobalia vajatuxanenë pevënëta. <sup>20</sup>Daxita Dioso pejumecovënëtsivi, majotaje pejinavanapaevi, pacabajacobalia. Paxamë ata Dioso panejumecovënëtsixae, xaniavaetsia namataenetsia bitso nasivaya panabajacobabiabare.

<sup>21</sup> Xanë Pablonë, tajacuata tacobeta pacatoyaquinatsi mapacotocaevilivaisiyoje. Apo itorobinë taneyavenonabiabinë tanetoyaquinaenexa. Bitso pacabajacobatsi.

<sup>22</sup> Pajivi apo jitsipae vajatuxanenë Jesucristo, bajarapajivi Dioso navecuaxuabi-anatsi. ¡Vajatuxanenë raja naxanitsiayo patsianica!

<sup>23</sup> Pacatovajëtabiabatsi Diosojavabelia vajatuxanenë Jesucristo papecayavenon-abiabinexa. <sup>24</sup> Daxita paxamë asivaya pacajamatabënajinatsi caenë Jesucristo pijajivixaetsi.

## Mapabaxutoje San Pablo cotocaevi toyaquina Corinto tomarapijivijavabelia

### Pacuenia Pablo toyaquina mapabaxutoje Dioso pejumecovënëtsivi, Corinto tomarapijivijavabelia, yabara pelivaisi

**1** Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi tatsipaebinexa pexanialivaisi. Vajabananë Timoteo xanëjavata ponapona. Nexata pacatoyaquinatsibeje mapalivaisije Dioso panejumecovënëtsivi, paCorinto tomarapijivimë. Patoyaquinajëbejenua mapalivaisije Acaya nacujava pejinavanapaevi ata. <sup>2</sup> Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

### Pacuenia Pablo navajunupaeba itsamonae pebejibiaexanaejavatsi yabara pelivaisi

<sup>3</sup> “Ayaicuenia panejamatabëcueneyavenoname,” pajanë vaxa Diosojavabelia. Bajaraponë Dioso, vajatuxanenë Jesucristo paxa. Dioso, vajanacaitaxutotsoniataenë, vajanacajamatabëcuenebabatsinë bitso vajanajamatabëxainaeayaniva. <sup>4</sup> Pamatacabi panetocopiapatabiaba daxita xua bitso panenajamatabëxainaeaya exanaejitsia, itsiata Dioso panejamatabëcuenebabatabiaba bajaraxuavecua. Bajara pijinia pacuenia paxanë ata panejamatabëcuenecaëjëpa itsamonae juya patajamatabëcuenebabatsinexa pamatacabi bajarapamonae ata tocopiapatatsi xua bitso najamatabëxainaeaya exanaejitsiatsi. <sup>5</sup> Itsamonae bitso panebejibiaexanabiaba Jesucristo patajumecovënëtsixae. Nexata pijinia Jesucristo pejamatabëcueneta Espíritu Santo panejamatabëcuenebabatabiaba bitso patanajamatabëxainaeayaniva. <sup>6</sup> Nexata paxanë itsamonae itsa panebejibiaexanabiaba, Dioso panejamatabëcueneyavenonabiaba patanejamatabëcuenebabatsinexa. Nexata paxanë ata panejamatabëcuenecaëjëpaena juya itsamatacabi paxamë patacajamatabëcuenebabatsinexa itsa pacatocopiapata xua bitso pacanajamatabëxainaeaya exanaejitsia. Nexata itsa pacajamatabëcuenebabatsianatsi, bajayajebi pajamatabëcuenesaëmë tsane Dioso panejumecovënëtsijava matapania Dioso papecacapanepaejavabelianexa. Paxamë ata raja itsamonae pacabejibiaexanabiabiana. <sup>7</sup> Payapëtaniji baja cajena paxamë ata Dioso papecacapanepaejavanexa. Pacuenia paxanë itsamonae panebejibiaexanabiaba, bajarapacuenia paxamë ata itsamonae pacabejibiaexanabiabiana. Nexata paxamë ata itsamonae itsa pacabejibiaexanabiabiana, Dioso pacajamatabëcuenebabatabiabiana panevajënaeyabelia paneajamatabëcuenesaënexa Dioso panejumecovënëtsijava. Bajarapacuenia Dioso pacajamatabëcuenebabatabiabiana matapania Dioso papecacapanepaejavabelianexa.

<sup>8</sup> Tajamonae, pajiitsipajë paxamë ata paneyapëtaenexa itsamonae Asiavënë nacuata patanebejibiaexanabiabijava. Ayaicuenia bitso panebejibiaexanabiaba. Nexata baja picani pasaëjibinë tsaponae. Apo panecaëjëpae baja picani patavajënaeyabelia pataponaenexa. Nexata pajamatabëjumaitsinë tsabiabi: “Patëpaenajë meta baja rovia,” pajamatabëjanë tsabiabi. <sup>9</sup> “Pepacuenae raeta baja panebeyejebiana,” pajamatabëjanë tsabiabi. Dioso baja cajena panetocopata bajarapacue-



nia itsamonae patanebejiobiaexanabiabinexa. Nexata paepatota panebejiobiaexana patajamatabējumaitsinexa mapacueniaje: “Xanē tajacuata apo necaējēpae tavecuapanepaenexa mapacueneye. Matapania Dioso neyavenonaena, necaējēpaena tavecuapanepaenexa mapacueneye,” patajamatabējainexa. Dioso caējēpatsi pataneyavenonaenexa. Tsipaji baja cajena Dioso pematacotsinē petēpaevi ata.<sup>10</sup> Dioso baja panecapanepa itsamonae patanebejiobiaexanaejavata patanebeyaxuabiyaniwa. Icatsia bajarapacuenia itsamonae itsa panebejiobiaexanaena, Dioso icatsia panecapanepaena. Bajaraponējavabelia panajamatabēcuenecopatājē bajarapacuenia pataneyavenonabiabinexa.<sup>11</sup> Paneyavenonaeyavajētaponae name Diosojavabelia bajarapacuenia Dioso pataneyavenonabiabinexa. Paayaibitsaētoxaetomē itsa panetovajētaponae name Diosojavabelia, nexata Dioso paneyavenonabiabiana. Nexata pijinia jivi ayaibitsaētoxaetopaxanē yabara jumai tsabiabi tsane Diosojavabelia: “Pexaniacuene bitso toexaname Pablobana. Ayaicuenia yavenoname pebeyejebiyaniwatsi,” jai tsabiabi tsane.

### **Pajamatabēcuenē yabara Pablo apo ponae Corinto tomarabelia yabara pelivaisi**

<sup>12</sup>Itsa pajinavanapajē daxitajivijava, paxamējava ata, xaniavaetsia pajinavanapajē Dioso pitabarata. Itsa pajinavanapajē paxamējava, pibisiacuene apo pacasivanajamatabēxainae. Bajaraxuata panasivajamatabēcuenēbarēyanē. Paxanē raja saya mapanacuapijilivaisita apo panejamatabēcueneyavenonae xaniavaetsia patajivananapaenexa. Dioso raja patanejamatabēcueneyavenonaexae, bajarapacuenia xaniavaetsia pajinavanapajē.<sup>13</sup> Palivaisianē baja pacatoyaquinabiabatsi, caelivaisita anijajamatabēcuenelivaisibeje apo xainaponae. Palivaisianē pajumetaneme itsa palebame patacatoyaquinaelivaisianē, bajarapalivaisianē saya caejamatabēcuenelivaisi xainapona. Pematatsēnēa itsajamatabēcuenelivaisi apo xainaponae. Pacatojitsipatsi xaniavaetsia panejumeyapētaenexa palivaisianē pacatoyaquinatsi.<sup>14</sup> Pacatojitsipatsi xaniavaetsia patanejamatabēcueneyapētaenamē. Tsipaji abaxē xaniavaetsia apo panejamatabēcueneyapētaemē pacuenia pajamatabēcuenēitsinē tsavanapae. Nexata pamatacabi vajatuxanenē Jesús icatsia patsianica, paxamē pane-sivajamatabēcuenēbarēyamē tsane. Bajara pijinia pacuenia paxanē ata pacasivajamatabēcuenēbarēyatsi tsane.

<sup>15</sup>Nexata xanē pacasivajamatabēcuenējumaitstsi mapacueniaje: “Corinto tomarapijivi baja cajena xaniavaetsia nejamatabēcueneyapētane. Yapētane pacuenia apo sivanajamatabēxainanē itsajamatabēcuenē bajarapamonaejavabelia,” pacasivajamatabējaitsi. Bajaraxuata picani jamatabēpatājē paxamējavata patanesivajamatabēcuenē barēyanexamē itsa patajē paxamējavata.<sup>16</sup> Pamatacabi ponajē Macedonia nacuyabelia, talianē picani jamatabēpacataeponatsi bajaraxuayo. Bajaraxuacuajinae icatsia tanaviatsinērena jamatabēpacataeponatsi picani icatsia bajaraxuayo. “Bajarajota bajarapamonae neyavenonaena tajanamutonexa, Judea nacuyabelia taponaeenexa,” pacasivajamatabējaitsi picani.<sup>17</sup> Pacuenia najamatabēxainabiabajē taponaeenexa itsajavabelia, ponabiabajē baja cajena. Itsiata aeconoxae bajarapacuenia apo exanaenē taponaeenexa paxamējavabelia. Mapanacuata itsamonae najamatabēxainae ata itsacuenejavayo pexanaenexa, itsiata apo exanabiabi. Bajarapacuenia itsiata xanē apo jamatabēcuenēitsinē. Paxamē baja cajena panecueneyapētaneme.<sup>18</sup> Dioso

ata panecueneyapētane apo patacayamaxëitojorobicuene. Dioso baja cajena pejumelivaisi pacatsipaebabiabatsi. Nexata icatsia xuacujinae bajarapalivaisi itša pacatsipaebabiabatsi, saicayalivaisicuenia icatsia apo pacatsipaebabiabitsi. <sup>19</sup> Xanë Pablonë, Silvano, Timoteo, bajarapamatabëxëyo, pacatsipaebabiabatsi Jesucristo, Dioso pexënato, pelivaisi. Bajaraponë Jesucristo caejamatabëcuene xainabiaba. Nexata pacuenia jumaitši, xaniajai tsabiabi. <sup>20</sup> Jesús pejamatabëcueneta Dioso baja daxita nacatoexana pacuenia tajëvelia najumecapanepaeya jumaitši vajanacatoexanaenexa. Bajaraxuata Diosojavabelia vajavajëtsijavata itša jumaitšitsi: “Diosomë, bitso ayaijamatabëcuenenëmë,” itša jaitši, nexata Jesucristo pejamatabëcueneta jumaitšitsi. <sup>21</sup> Dioso pacajamatabëcueneyavenonapona panevajënaeyabelia panejamatabëcuenesaënexa Cristojavabelia panenajamatabëcuenecopatsijava. Bajarapacuenia paxanë ata Dioso panejamatabëcueneyavenonapona. Dioso nacaitapeta Jesucristo pijajivinexatsi, Dioso pijacuene vajatonacuenebavana-paenexa. <sup>22</sup> Dioso raja Espiritu Santo nacatsijamatabëcaeyaexana. Nexata nayapëtanetsi Dioso pexicuenetsi. Bajaraxuata yapëtanetsi pepacuene xaniajai Dioso vajanacapanepaejavanexa.

<sup>23</sup> Mapacuenia pacajumaitšitsije Dioso pitabarata. Dioso baja cajena nejamatatabëcueneyapētane. Pamatacabi picani jamatabëponabiabajë paxamëjavabelia, caecuenia itša ponaëjitsipajë, nexata pacabijataëjitsipatsi. Tšipaji abaxë apo paex-  
 anavanapaemë patacaitorobicuenia. Bajaraxuata abaxë apo navecuaponaenë pax-  
 amëjavabelia, itša pacabijatanetsi, bitso panenajamatabëxainaeayaniva. <sup>24</sup> Nex-  
 ata apo jitsipaenë icatsia patacatsipaebaponaenexa paneyapëtaenexa pacuenia  
 bepaexanavanapame. Tšipaji baja xaniavaetsia Dioso pajumecovënëtavanapame.  
 Jamatabëpacayavenonatsi. Pacuenia baja pajamatabëcuenebarëyamë tsavanapae,  
 matatoxenetsia icatsia panejamatabëcuenebarëyanexa Dioso pitabarata.

**2** Najamatabëcopatajë baja taponaejava paxamëjavabelia. Tšipaji jamatabëju-  
 maitsinë paxamë yabara mapacueniaje: “Apo ponaenë abaxë tsane Cor-  
 into tomarapijivijavabelia tanajamatabëxainaeayaexanaeyaniva bajarapamonae,” ja-  
 matabëjanë. <sup>2</sup> Paxamë itša pajamatabëcuenebarëyamë, nexata xanë ata pacasiva-  
 jamatabëcuenebarëyatsi tsabiabi. Itsiata itša pacanajamatabëxainaeaya exanaejitsi-  
 patsi, nexata apo pajamatabëcuenebarëyamë tšipae. Nexata xanë ata apo pacasiva-  
 jamatabëcuenebarëyatsi tšipae. Tšipaji ajibi tšipae patacasivajamatabëcuenebarëya-  
 javanexa. <sup>3</sup> Bajaraxuata taponaevajënaeya paxamëjavabelia copiata baja cajena  
 pacatoitorobaliatsi itsabaxuto, patacatoyaquinaebaxuto. Bajarapacuenia pacatoy-  
 aquinatsi tšipaji abaxë apo jamatabëponaenë paxamëjavabelia patacasivana-  
 jamatabëxainaeayaniva, itša pacatanetsi panejivanapaejava apo patacaitoro-  
 bicuenia. Jitsipajë picani paxamë patacasivajamatabëcuenebarëyanexa. Paxamë  
 yabara jamatabëjumaitšinë mapacueniaje: “Corinto tomarapijivi baja cajena nej-  
 amatabëcueneyapētane. Bajarapamonae itša jamatabëcuenebarëya, xanë ata bajara-  
 pamonae sivajamatabëcuenebarëyanë tsabiabi,” jamatabëjanë. <sup>4</sup> Apo jitsipaenë pi-  
 cani patacatoyaquinaenexa bajarapabaxuto. Itsiata itša pacatoyaquinatsi, nuajë pax-  
 amëjitsia. Najamatabëxainajë cajena bitso tajamatabëëthëtovetsina. Apo pacatoy-  
 aquinaetsi raja saya patacanajamatabëxainaeaya exanaenexa. Ayaicuenia raja pata-  
 caasivajava patanejamatabëcueneyapëtaenexamë, pacatoyaquinatsi.

**Pacuenia Pablo itoroba Corinto tomarapijivi barajamatabëcuenexanepanaeya baja petaenexa pibisiacuene pexanaponaponaenëmi yabara pelivaisi**

<sup>5</sup>Ponë pibisiacuene exana, caenënë xanë apo nenajamatabëxainaeaexanae. Daxita paxamë ata bajarapacuenia pacanajamatabëxainaeaexana. <sup>6</sup>Ponë yabara itsabaxutota pacatoyaquinatsi, paxamë baja cajena najamatabëcueneyëpaeya panavecuaitavetame bajaraponë, pibisiacuene pexanaenë, penapatsiyaniva panenacaetuatsijavata. Nexata baja bajaraponë belia copata pibisiacuene pexanaejava. Xanepana rabaja. Pëtsa baja pematatsënëa icatsia panavecuaitavetame bajarapacuenia. <sup>7</sup>Aeconoxae baja pajamatabëcuenecaevare bajaraponë pibisiacuene pexanaejava. Pabarajamatabëcuenexanepanare baja. Bajaraponë juya pajamatabëcueneyavenonaenename piaurayaniva. Bajarapacuenia pajamatabëcueneyavenonaenename pejamatabëcuene matatoxenetsiyanivatsi bitso pejamatabëcuenebëjaijava pijaneconi yabara. <sup>8</sup>Bitso pacatojitsipatsi panetsitanajamatabëcueneitajëtsinexa paneasivajava bajaraponë. <sup>9</sup>Nexata pabaxuto copiaya pacatoyaquinatsi, bajarapabaxuto pacatoyaquinatsi saya patacajamatabëcuenejëtsinexa. Jitsipajë xaniavaetsia tayapëtaenexa itsa panejumecovënëtsijitsiamë daxita pacuenia pacaitorobatsi. <sup>10</sup>Nexata baja aeconoxae itsa pajamatabëcuenecaevame papibisiacuene bajaraponë exana paxamë tuatuajëta, xanë ata baja jamatabëcuenecaevajë bajaraponë pibisiacuene pexanaejava. Xanë baja jamatabëcuenecaevajë paneconi bajaraponë exana xanëjavaberena. Jamatabëcuenecaevajë baja bajaraponë pibisiacuene pexanaejava, daxita paxamë aneonijibia jamatabëcuenebarëyaya panejinavanapaenexa Cristo pitabarata. <sup>11</sup>Jamatabëcuenecaevatsi baja papibisiacuene bajaraponë exana vaxaitsijavaberena. Tsipaji vaxaitsi itsa apo jamatabëcuenecaevitsi tsipae bajarapapibisiacuene pexanaejava, vaxaitsi ata dovathi nacayamaxëitojorobijitsipa. Vaxaitsi baja dovathi cueneyapëtanetsi, xua exanabiaba vajanacacopabiaexanaenexa Dioso pejumelivaisi vajajumecovënëtsijava.

**Pacuenia bitso Pablo Tito sivanajamatabëxaina yabara pelivaisi**

<sup>12</sup>Patajopajë Troas tomarata tatsipaebinexa Cristo pelivaisi. Troas tomarata tapatsivajënaeya, taniji Dioso tanetoxanepanaeyaexanaejava tatsipaebinexa pejumelivaisi bajarapatomarata. Nexata Troas tomarata itsa tsipaebabiabajë Dioso pejumelivaisi, Troas tomarapijivi nenamuxunaevetabiaba xaniavaetsia. <sup>13</sup>Itsiata baitsi jane bajarajota abaxë apo jamatabëcuenebarëyanë. Najamatabëxainajë vajabananë Tito yabara. Tsipaji abaxë Tito apo caxitajarabaxuabinë Troas tomarata. Nexata baja napëjiobajë Troas tomarapijivi taponanexa baja Macedonia nacuyabelia.

**Pacuenia Cristo nacajamatabëcueneyavenona yabara pelivaisi**

<sup>14</sup>“Pexaniacuene rabaja panetoexaname,” pajanë Diosojavabelia, Cristo pejamatabëcueneta Dioso patanejamatabëcuene yavenonabiabixae. Itsajavabelia itsa paponajë, Dioso paneyajavaponabiaba. Panejamatabëcueneyavenonabiabanua itsamonaejavabelia xaniavaetsia patatsipaebinexa Dioso pejumelivaisi. Pamonaë jumecovënëta bajarapalivaisi, tsitapexanialivaisitsi bitso. <sup>15</sup>Dioso sivajamatabëcuenebarëyatsi pajivi itsamonaejavabelia tsipaeba Cristo pelivaisi. Paxanë ata Dioso panesiva-

jamatabëcuenebarëya. Tspaji patsipaebabiabajë Cristo pelivaisi daxitajivijavabelia. Itsamonae baja jumecovënëtaþona Cristo pelivaisi Dioso pecapanepaevinexatsi. Itsamonae pijinia apo jumecovënëtsi Cristo pelivaisi Diosovecua penaxuabivinexa. <sup>16</sup>Pamonae Diosovecua naxuabiana apo pejumecovënëtsixae Cristo pelivaisi, naxuabiana. Pamonae pijinia Dioso capanepaenatsi pejumecovënëtsixae Cristo pelivaisi, capanepaenatsi. Paxanë, paapóstolevinë, Dioso paneyavenonabiaba. Nexata panejamatabëcuenecaëjëpa patatsipaebabiabinexa pexanialivaisi, Cristo pelivaisi, jivi pecapanepaelivaisinexatsi. <sup>17</sup>Pacuenia itsamonae tsipaebabiaba Cristo pelivaisi ëpematamotsinexatsi, paxanë apo paitsinë. Biji rajane itsajamatabëcuene ata apo pasivanajamatabëxainanë jivijavabelia itsa patsipaebabiabajë Cristo pelivaisi. Dioso baja cajena panejamatabëcueneyapëtane. Dioso paneitoroba Cristo patatonacuenebinexa.

### **Pacuenia Dioso pejanalivaisi najumecapanepaeya jumaitsi jivi pecapanepaenexa yabara pelivaisi**

**3** Itsa pacanavajunupaebatsi paneyapëtaenexa Dioso patanitorobijava Cristo pelivaisi patacatsipaebinexa, paayaijamatabëcuenevinë apo panataenë. Itsamonae pata paxamëjavata penajumetsënëtsilivaisi papecatsipaebinexa beDioso pejumelivaisicuenia. Bajarapamonae pacatocapata cuyalato itsamonae petsicobeyaquinaebaxutotsi. Bajarapabaxutota pacatoyaquina: “Dioso raja pejumelivaisi pepaebivi,” pejailivaisi. Bjaraxuata xaniavaetsia pacopiapitame bajarapamonae. Itsiata baitsi jane paxanë itsa papatajë paxamëjavata, apo pacarajutsitsi itsamonae patanetsicobeyaquinaecuyalato. “Pablo raja apóstolenë,” pejailivaisi itsamonae patanetsicobeyaquinaebaxuto, apo pacarajutsitsi xaniavaetsia patanecopiapitsinexamë. Apo panamatavenonaenë paxamë ata cuyalato patanetsicobeyaquinaenexamë patacaponaenexa itsamonaejavabelia bajarapamonae pataneyapëtaenexa xaniavaetsia patanecopiapitsinexa. <sup>2</sup>Bjarapacuenia cuyalato apo panamatavenonaenë patacaponaenexa jivi pataneyapëtaenexa xaniavaetsia patanecopiapitsinexa. Tspaji baja jivi yapëtane xaniavaetsia Jesucristo pelivaisi patacatsipaebixae panenajamatabëcuene pënëyorotsijava Diosojavabelia pibisiacuene paneexanabiabijavamivecua. Nexata jivi bajarapamonae yapëtanenua Dioso patanitorobijava. <sup>3</sup>Paxamë xaniavaetsia panejumecovënëtame patacatsipaebilivaisi, Jesucristo pelivaisi. Nexata itsamonae, apo pataneyapëtaevi ata, itsa pacavënëlivaisitane patanejumecovënëtsijavamë, panesivajamatabëjumaitsi: “Pablobana Corinto tomarapijivi cuyalato apo tsicobeyaquinae atatsi, itsa jume, ibopanata ata apo tsicobeyaquinae atatsi vajayapëtaenexa, itsiata yapëtanetsi Dioso pitorobijavatsi pexaniajailivaisi, Jesucristo pelivaisi, jivi petsipaebavanapaenexa,” panesivajamatabëjai. Piasaëtsaponaponaenë baja cajena Espiritu Santo pacatsijamatabëeca. Nexata baja pacajamatabëcueneþenëyorota pejanajamatabëcuene panexainanexa. Nexata itsamonae xaniavaetsia itsa patsitajinavanapame, bajarapamonae ata baja pacayapëtane Cristo pelivaisi papecatsijamatabëecaeva.

<sup>4</sup>Paxanë payapëtaniji Dioso patanitorobijava pepacuene Cristo pelivaisi jivi patatsipaebavanapaenexa. Tspaji baja Dioso paneyavenonabiaba Jesucristo pejamatabëcueneta. <sup>5</sup>Paxanë patasaëta Dioso patatonacuenebinexa, apo panejamatabëcuenecaëjëpae. Nexata xua Dioso patoexanavanapajë, Dioso baja cajena paneyavenonabiaba. <sup>6</sup>Dioso panejamatabëcueneyavenonabiaba patatsipa-

babiabinexa itsamonaejavabelia Dioso najumecapanepaeya pejanalivaisi pejumait-sijava jivi pecapanepaenexa. Bajarapamonaejavabelia apo pajumaitsinē tsabiabi: “Pajumecovēnētavanapare Dioso Moiséspijinēta penajumecopatsilivaisi. Itsa apo pajumecovēnētšinē tsane, nexata panaxuabianame,” apo pajanē tsabiabi. Biji rajane jivi patsipaebabiabajā pacuenia Espiritu Santo jamatabēcuenesaēyaex-anaejitsiatsi. Palivaisi bajayata Dioso Moiséspijinēta najumecopata, itoroba pe-beyaxuabinexatsi pajivi apo jumecovēnētsi bajarapalivaisi. Itsiata baitsi jane pa-jivi jumecovēnēta papejanalivaisi jivi patsipaebabiabajā, Espiritu Santo pesaēta jamatabēcuenesaēyaexanaponatsi.

<sup>7</sup> Bajayatami Dioso Moiséspijinēta najumecopata. Bajarapalivaisi Dioso yaquina ibopanabejumata. Bajarapalivaisita Dioso itoroba pajivi apo jumecovēnētsi ba-jarapalivaisi pebeyaxuabaponaenexatsi. Bajarapacuenia Dioso Moiséspijinēta ita najumecopata bajarapalivaisi, Moiséspijinē itabaranivenivena bitso. Nexata Is-raelpijinē pemomoxi apo itabaranaēcotsicapanepaetsi. Itsiata baitsi jane bajarax-uacujinae itsamatacabianējavabelia, itabaracotiacaevapona baja. <sup>8</sup> Palivaisi bajay-ata Dioso Moiséspijinēta najumecopata, xanepana baja picani caepatoyonexa saya. Bajarapalivaisimi matatoxenetsia bitso xanepana papejanalivaisi mapamat-acabitaje jumecovēnētavanapatsi Dioso vajanacacapanepaenexa. Bajarapacuenia Dioso nacacapanepaena Espiritu Santo vajanacatsijamatabēcaexae daxitamatacabijavabelianexa. <sup>9</sup> Bajayata Dioso Moiséspijinēta najumecopata. Nexata ba-jarapalivaisi xanepana. Tshipaji bajarapalivaisi pejamatabēcueneta, jivi yapētane Dioso penaneconitsiaexanaejavanexatsi pibisiacuene pexanaeneconi yabara. It-siata baitsi jane bajarapalivaisimi matatoxenetsia bitso xanepana papejanali-vaisi pejamatabēcueneta Dioso nacacapanepaejitsia. Bajarapapejanalivaisi peja-matabēcueneta, Dioso baja aneconijibia nacatane. <sup>10</sup> Palivaisi bajayata Dioso Moiséspijinēta najumecopata, xanepana baja picani. Itsiata baitsi jane palivaisi Dioso cotocaevi najumecopata, bajarapalivaisi bitso xanepana. Bajaraxuata pali-vaisimi copiaya Dioso najumecopata Moiséspijinēta, aeconoxae baja nacatsitaa-jumematamobi. <sup>11</sup> Palivaisi copiaya Dioso Moiséspijinēta najumecopata, xanepana picani caepatoyonexa saya. Biji rajane palivaisi cotocaevi Dioso najumecopata, bitso xanepana. Tshipaji daxitamatacabijavabelianexa bajarapalivaisi tsitecaena.

<sup>12</sup> Payapētaniji papejanalivaisi Dioso cotocaevi najumecopata bitso pexanepanae-ja. Tshipaji daxitamatacabijavabelianexa apo vereverecae tsane bajarapalivaisi. Ba-jaraxuata apo pajumejunavabiabinē bajarapalivaisi patatsipaebinxeta jivijavabelia. Palivaisivajēto payapētaniji, patsipaebabiabajā jivijavabelia. <sup>13</sup> Bajayata Moiséspi-jinē yapētae ata livaisi. itsiata xaniavaetsia apo tsipaebi pijajivijavabelia. Itsiata paxanē bajarapacuenia apo paitsinē. Bajayata Moiséspijinē ita itabaranivenivena, naitabaraacata papaēbērēpanata. Bajarapacuenia naitabaraacata pijajivi, Israelpi-jinē pemomoxi, pitabarataeyanivatsi bajarapacotia pecaevaponaejava. <sup>14</sup> Itsiata baitsi jane bajarapamonaejavabelia Moiséspijinē tsipaebi ata, apo jumeyapē-taetsi pajamatabēcuenelivaisi yabara tsipaeba. Bitso ajamatabēcuenetaja bajara-pamonaemi. Nexata apo jumeyapētae palivaisi tsipaebatsi. Bajara pijinia pacue-nia ajena mapamatacabijavaberena ataje, tsiteca abaxē ajamatabēcuenetaja ba-jarapamonaē pemomoxi ata. Bajarapamonaē penacaetuatabibibota, ita lebabiba Dioso Moiséspijinēta penajumecopatsilivaisimi, apo jumeyapētaeyabiabi pa-jamatabēcuenelivaisi xaina. Bajarapamonaē ita jumecovēnētsipa Cristo pesivatē-

paejavatsi, nexata matapania jumeypætaejitsipa pajamatabæcuenelivaisi xaina palivaisi bajayata Moiséspijinë tsipaebabiaba. <sup>15</sup> Ajena mapamatacabijavaberena ataje, judíovi penacaetuatabibibota itsa lebabiaba Dioso Moiséspijinëta penajumecopatsilivaisimi, apo jumeypætaeyabiabi pajamatabæcuenelivaisi xaina. Bitso ajamatabæcuenetaja bajarapamonae. <sup>16</sup> Itsiata baitsi jane pajivi najamatabæcuenecopata vajatuxanenë Jesucristojavabelia, bajarapajivi Dioso vecuaajibiaexanatsi pibisiacue pexanaeconimi. Nexata bajarapajivi xaniavaetsia jumeypætane pajamatabæcuenelivaisi xaina palivaisi bajayata Moiséspijinë tsipaebabiaba. <sup>17</sup> Vajatuxanenë Jesucristobeje, Espíritu Santobeje, najamatabæcuenepæbeje. Jesucristo pejamatabæcueneta Espíritu Santo ponapona vajajamatabæthëtota. Nexata Espíritu Santo nacajamatabæcueneyavenonapona pibisiacue vajeaxanaeyaniva. <sup>18</sup> Nexata Jesucristo pejamatabæcueneta, Espíritu Santo nacayavenona. Nexata pacuenia Moiséspijinë jivi vecuanaitabaraacata pitabaracotiataeyanivatsi pitabaranivenivenaejava, bajara vaxaitsi apo itsitsi. Biji rajane tsitanacueneitajëtsiaya jinavanapatsi xaniavaetsia jivi peyapætaenexa Dioso ayaijamatabæcuenepexinaejava. Espíritu Santo nacajamatabæcueneyavenonapona vajavajënaeyabelia pejanajamatabæcuenepaxainaponaejava. Nexata pacuenia Jesucristo jamatabæcuenetsi, bajara vaxaitsi ata vajajamatabæcuenetsinexa.

**4** Dioso baja cajena patanitaxutotsoniataexae, panetocopata patatsipaebabiabinexa jivijavabelia pexanialivaisi, Jesucristo pelivaisi. Bajaraxuata itsajavata panetsiyai tsabiabi ata, itsiata apo pajamatabæcopatsinë patatsipaebabiabijava Jesucristo pelivaisi. Tsipaji baja Dioso panetocopata bajarapacuenia. <sup>2</sup> Muetisia apo paexanaenë itsacuenepæbeje ata. Apo paexanaenë daxita xua piauracuenepæbeje ata. Jivi patayamaxëitojorobinexa, itsacuenepæbeje ata apo paexanaenë. Apo patsipaebabiabinëna saicayalivaisi Dioso pejumelivaisivecua. Dioso baja cajena yapætane jivijavabelia epexaniajailivaisi patatsipaebabiabijava. Patanejumetaeyanaevi ata bajarapacuenia jumai tsipae. <sup>3</sup> Itsa patsipaebabiabajë jivi pecapanepaelivaisinexatsi, jumenapebetsiaya patsipaebabiabajë xaniavaetsia patanejumeypætaenexa. Nexata patsipaebi atanë, pajivi apo jumecovënëtsi bajarapalivaisi, bajarapajivi pijacuata nanaxuabiaexanaena Diosovecua. Nexata bajarapajivi daxitamatacabijavabelianexa, Diosovecua naxuabiana. <sup>4</sup> Bajarapacuenia apo jumecovënëtsi tsipaji dovathi pejamatabæcueneta ajamatabæcuenetaquiriayaxanatsi pejumecovënëtsiyaniva bajarapalivaisi. Bajarapaxanialivaisi, Cristo pelivaisi, bepinijicotia jivi pejamatabæcuenetayotsinexa itsa jumecovënëta bajarapalivaisi. Nexata dovathi, mapanacuapijivi pijatuxanenë, apo jitsipae bajarapalivaisi jivi pejumecovënëtsinexa pejamatabæcuenetayotsiyanivatsi. Cristo paxa Dioso jamatabæcuenepæbeje. Nexata pacuenia Dioso jamatabæcuenetsi, bajara Cristo ata jamatabæcuenetsi. <sup>5</sup> Livaisi itsa pacatsipaebabiabatsi, paxanë apo panalivaisipaebabiabinë pataneyaiyataenexamë. Biji rajane vajatuxanenë Jesucristo pelivaisi pacatsipaebabiabatsi. Paxanë saya panataniji bepanijajivinë. Jesucristo bitso pajitsipajë. Bajaraxuata paxamë ata jamatabæpacayavenonatsi. <sup>6</sup> Bajayata Dioso mapanacuaje itsa exana, pitaquirijavata pitayotsinexa, itoroba juameto penaexanaenexa. Bajara pijinia pacuenia paxanë ata patajamatabæcuenetaquirijavami, Jesucristo pelivaisi itsa pajumecovënëtajë, Dioso panejamatabæcuenetayota. Bajarapacuenia itsa panejamatabæcuenetayota, payapëtaniji Dioso bitso ayaijamatabæcuenepexinaejava. Jesucristo itsa

itabaranivenivena Dioso pexênatoxae, paxa Dioso jamatabëcueneitajëta Dioso bitso ayaijamatabëcuene pexainaejava.

**Pacuenia Dioso jamatabëcueneyavenona pijajivi, itsa tonacuenebavanapatsi, yabara pelivaisi**

<sup>7</sup>Paxanë Dioso patanejamatabëcueneitayotsivi ata, pataperabëto apo ajamatabësaë. Pacuenia atsavaxi bajayajebi apo ajamatabësaë, bajara saya itsi. Pataperabëto apo paperabësaë atanë, Dioso pataneyavenonaexae, pajamatabëcuensaënë tsavanapae. Nexata bajarapacuenia pataajamatabëcuensaë tsavanapaejava patanetaevi, jamatabëjumai tsane paxanë yabara: “Mapamonaeye ajamatabëcuensaë tsavanapae Dioso pesaëta,” jamatabëjai tsane. <sup>8</sup>Nexata panetocopiapatabiabi ata itsacuenepanetoyapëbejecuene, itsiata Dioso paneyavenonabiaba patavecuapanepaenexa bajarapacuenie. Apo payapëtaeyabiabi atanë pajamatabëcuene yabara panetocopiapata patanetoayapëbejecuene, itsiata paxanë apo pacopatsinë Dioso patajumecovënëtsijava. <sup>9</sup>Itsamonae panebejiobiaexanabiabi ata Dioso patajumecovënëtsijava yabara, itsiata Dioso apo panecopatsi patajaepato. Itsamonae irata panepenatabiabi ata patanebeyejebinexa picani, itsiata pepacuenie apo panebeyaxuababiabi Dioso pataneyavenonabiabixae. <sup>10</sup>Pacuenia Jesús pijavajabitsaë bajayajebi picani jamatabëbeyaxuababiabatsi, bajarapacuenia paxanë ata Jesús papijajivixanë, itsamonae jamatabëpanebejebabiaba picani. Itsiata apo panebeyejebicanepae. Bajaraxuata daxita jivi yapëtane Jesús pataneyavenonabiabijava. <sup>11</sup>Daxitamatacabi patajinavanapaematacabianë, panetsiyai tsabiabi itsamonae patanebeyejebinexa Jesús papijajivixanë. Bajarapacuenia panetocopiapatabiabi jivi pataneyapëtaenexa Jesús pataneyajavaponaponaejava. <sup>12</sup>Panetsiyai tsabiabi itsamonae patanebeyejebinexa patacatsipaebabiabixae papecacapanepaelivaisinexa Diosojavabelia. Nexata paxanë patacatsipaebilivaisi panejumecovënëtsixae, itsamatacabi athëbëtatsia Dioso pacarajutsiana matacabi apo peverevereaejava.

<sup>13</sup>Dioso pejumelivaisibaxutota jumaitsi mapacueniaje: “Jumecovënëtajë Dioso taneyavenonaejavanexa. Bajaraxuata tsipaebajë jivijavabelia Dioso taneyavenonaejavanexa,” jai. Bajara pijinia pacuenia paxanë ata pajamatabëcueneitsinë. Pajumecovënëtajë Dioso pataneyavenonaejavanexa. Bajaraxuata patsipaebabiabajë jivijavabelia Dioso pataneyavenonaejavanexa. <sup>14</sup>Vajatuxanenë Jesús petëpaecujinae Dioso icatsia asaëyaexanatsi. Bajaraxuata payapëtaniji baja pexaniajaicuene Dioso icatsia paxanë ata pataniasaëyaexanaejavanexa patatëpaecujinae, Dioso patayajavajinavanapaenexa pijanacuatatsia. <sup>15</sup>Paxanë itsamonae panebejiobiaexanabiabi ata, itsiata apo pacopatsinë patacatsipaebabiabijava pexaniajailivaisi. Nexata panevajënaeyabelia pajumecovënëtaaponame patacatsipaebilivaisi. Nexata baja itsa paayaibitsaëtomë tsaponae Dioso panejumecovënëtsivi, paayaibitsaëtomë baja pijinia tsaponae Diosojavabelia panejumaitsvinexa: “Xanepana rabaja. Tsipaji bitso pexaniacuene panetoexaname,” panejaivinexa Diosojavabelia. Nexata papecayametaevi ayaibitsaëto yapëtaena Dioso bitso ayaijamatabëcuene pexainaejava.

<sup>16</sup>Bajaraxuata itsamonae panebejiobiaexanabiabi ata, itsiata apo pajamatabëcopatsinë jivi patatsipaebabiabijava pexaniajailivaisi. Pataperabëto cueranaponae ata, itsiata patavajënaeyabelia, caematacabi canacujitsia, pajamatabëcuensaënë tsaponae Dioso patajumecovënëtsijava. <sup>17</sup>Xua nacatocopiapatabiaba itsamonae vajanacabejiobiaexanabiabinexa, saya caeepatoyo bajarapacuenia nacabejiobiaex-

anabiaba mapanacuataje vajajinavanapaeepatoyo. Bajaraxuacujinae athëbëtatsia xainaenatsi daxitacuenevēcua pexaniajava, baitsi matabi apo peverevereaejava. <sup>18</sup>Nexata apo vajënaeevetavanapaetsi vajanacatocopiapatsinexa, xua nacacaejēpa vajataenexa. Biji rajane jamatabënjavanapatsi vajanacatocopiapatsinexa xua apo nacacaejēpae vajataenexa. Tsipaji xua nacacaejēpa vajataenexa, daxita bajaraxua, vereverecaena. Itsiata baitsi jane xua apo nacacaejēpae vajataenexa, daxitamatabijavelianexa apo vereverecae tsane.

**5** Mapanacuata jivi pexanaebobërëto bepījia baabeje. Bajara pijinia itsi vajaperabëto ata. Bepījia vereverecaena. Itsiata baitsi jane yapëtanetsi mapacuenēje. Vajatëpaecujinae itsamatabi Dioso athëbëtatsia nacarajutsiana apo peverevereaeperabëtonexa. <sup>2</sup>Xaniajai cajena. Itsa abaxë jinavanapatsi mapanacuataje, bitso picani jitsipabiabatsi vajanacaperabëtothianaenexa athëbëpijiperabëtonexa. Jitsipabiabatsi picani vajaponaenexa athëbëabetsia pejanaperabëto vajayajavajinavanaenexa athëbëtatsia. <sup>3</sup>Athëbëtatsia raja aperabëjibia apo jinavanapae tsanetsi. Biji rajane pejanaperabëto vajavajinavanapaenatsi. <sup>4</sup>Itsa abaxë jinavanapatsi mapanacuataje, bitso picani jitsipabiabatsi vajanacaperabëtothianaenexa. Apo jitsipaetsi picani vajatëpaejava. Itsiata baitsi jane yapëtanetsi mapacuenēje. Vajatëpaecujinae itsamatabi athëbëtatsia vajavajinavanapaenatsi pejanaperabëto, apo peverevereaeperabëtonexa jane baja. Nexata mapanacuata vajayajavajinavanapaeperabëtomī ajibi baja tsane. Xainaenatsi juya apo peverevereaeperabëtonexa. <sup>5</sup>Bajarapacuenia vajanacaperabëtothianaenexa Dioso nacatoxaina. Nexata Dioso nacatocopata Espiritu Santo vajanacayjavaponaponaenexa. Nexata Dioso yabara bejamatabëjumaititsi mapacueniaje: “Mapacueniaje Espiritu Santo Dioso patanējavaponaponaeyaxanaexae, nexata payapëtanījī xaniajai pepacuenē itsamatabi Dioso patanēperabëtothianaējavanexa. Xaniajai baja cajena. Pepacuenē itsamatabi Dioso panēperabëtothianaēna pacuenia baja najumecapanepaeya jumaitsi,” bejamatabëjaitsi Dioso yabara.

<sup>6</sup>Bajaraxuata apo jamatabëcopatsi vajajumecovënëtsijava Dioso. Vajavajënaeyabelia jamatabëcuenēbarëyatsi. Yapëtanetsi mapacuenēje. Itsa abaxë vajaperabëto vajavajinavanapatsi mapanacuataje, panacuata itsamatabi vajatuxanēnē daxitamatabijavelianexa vajavajinavanapaejitsiatsi, bajarapanacua abaxë tajë vecuajinavanapatsi. <sup>7</sup>Apo taetsi abaxë athëbëtatsia vajatuxanēnē vajayajavajinavanapaejavanexa. Itsiata yapëtanetsi itsamatabi xaniajai vajatuxanēnē athëbëtatsia vajayajavajinavanapaejavanexa. <sup>8</sup>Bajaraxuata jitsipatsi vajatëpaejava. Tsipaji mapanacuata vajajinavanapaejava, matatoxenetsia bitso jitsipatsi vajatuxanēnē pijanacuatatsia vajayajavajinavanapaenexa. <sup>9</sup>Bajaraxuata mapanacuata vajajinavanapamatabibeje, asaëyata vajatuxanēnē tonacuenēbavanapatsi. Tsipaji jitsipatsi vajanacasivajamatabëcuenē barëyajava. Vajatëpaecujinae ata, pijanacuatatsia jamatabëtojinavanapatsi pejitsipacuenia. <sup>10</sup>Vajatuxanēnē pejitsipacuenia jamatabëtojinavanapatsi mapanacuata ata vajajinavanapaeepato. Tsipaji caejivitsi canacujitsia Cristo pitabarata tonaitajëtaponaenatsi. Nexata bajarapamatabi nacarajutsiana daxita pijajivitsi xua nacatoxaina vajanacarajutsinexa. Xaniavaetsia vajatuxanēnē itsa tonacuenēbavanapatsi, nacarajutsiana xua nacatoxaina vajanacarajutsinexa. Pamonaē xaniavaetsia apo tonacuenēbavanapae, nacueratsiana.



**Pacuenia Dioso nacabarajamatabëcuenexanepana vajaneconi  
yabara Cristo vajanacasivatëpaexae yabara pelivaisi**

<sup>11</sup> Payapëtaniji baja cajena itsamatacabi vajatuxanenë pitabarata cunjaviaya patananubenaejavanexa. Bajaraxuata asaëyata jivijavabelia patsipaebabiabajë Jesucristo pesivatëpaejavatsi pejumecovënëtsinexa. Itsajamatabëcuene apo panajamatabëxainabiabinë bajarapalivaisivecua. Dioso baja cajena panejamatabëcueneyapëtane pacuenia pajamatabëcueneitsinë. Pajitsipajë paxamë ata patanejamatabëcueneyapëtaenexamë. <sup>12</sup> Bajarapacuenia paxanë apo pacanavajunupaebitsi saya pataneyaiyataenexamë. Pacanavajunupaebatsi rajane pataneyapëtaenexamë vajatuxanenë papijajivicuenenë. Nexata bajarapacuenia paxamë papecajamatabëcuenecaëjëpaenexa panejumecanaviatsijava pamonae pibisiacuenia panebaracuaicuajai. Bajarapamonae paneyalivaisiaexanabiaba. Beayajamatabëcuenevi nataeyabiaba. Pexaniacueni exanabiabi ata, bajaraxua exanabiaba saya jivi petanenexatsi. Itsiata baitsi jane bitso naneconita Diosojavabelia pibisiacueni pexanaeneconi yabara. Apo canaëjëtsi pexaniajamatabëcuene pexainaenexa. <sup>13</sup> Paxanë picani xaniavaetsia Dioso jumecovënëtsiaya jivi patsipaebabiabajë Jesús pelivaisi. Itsiata Dioso apo pejumecovënëtsivi, panejumai tsabiabi: “Pematajemabivitsi raja saya,” panejai tsabiabi. Itsiata itsa pacatsipaebabiabatsi bajarapalivaisi, Jesucristo pelivaisi, pacatsipaebabiabatsi paxamë ata Dioso papecacapanepaenexa. Paxamë apo panetaemë bepatanematajemabivi. <sup>14</sup> Cristo raja paneasiva tsabiabi. Bajaraxuata patonacuenebavanapajë. Pajamatabëjumaitsinë tsabiabi: “Caenë Cristo nacasivatëpa daxitanexatsi. Bajaraxuata Dioso baja nacatane Cristo bevajayajavatëpaevi. Nexata baja bevajananeconimatamotsicapanepeavi Dioso nacatane,” pajamatabëjanë tsabiabi. <sup>15</sup> Cristo jivi sivatëpa. Petëpaecujinae Dioso icatsia asaëyaexanatsi. Nexata daxita pamonae jumecovënëta Cristo pesivatëpaejavatsi, matacabi apo pevereverecejava xainaena. Nexata bajarapamonae apo bexanavanapae pijacuata penatojitsipaecuenia. Biji rajane bexanavanapa pacuenia Cristo tojitsipatsi pesivajamatabëcuenebarëyanexatsi. <sup>16</sup> Bajaraxuata ajena mapamatacabijavaveliacujinaeje, patavajënaeyabelia tsaponae, Dioso pejumecovënëtsivi yabara apo bepanajamatabëxainaenë pibisiacuenia, pacuenia Dioso apo pejumecovënëtsivi banajamatabëxaina. Tspaji pamonae Dioso pejumecovënëtsivi pacuenia bëpënëaverena jamatabëcueneitsi, apo pajamatabëcueneyapëtaenë. Xanë ata rabaja picani Jesucristojavabelia tanajamatabëcuenecopatsivajënaeya, Jesucristo yabara najamatabëxainajë pibisiacuenia, pacuenia banajamatabëxaina Dioso apo pejumecovënëtsivi. Bepenajumetsënëtsinë taniji Cristo. Itsiata baitsi jane aeconoxae baja bajarapacuenia apo najamatabëxainaenë Cristo yabara. Tspaji baja yapëtaniji Cristo pexaniajainëcuene. <sup>17</sup> Pajivi najamatabëcuenecopata Jesucristojavabelia, bajarapajivi xaina pejanajamatabëcuene. Pijaperujujamatabëcuenemi baja vecuaajibiaexanatsi. Nexata bajarapajivi daxitacueni sivanajamatabëxaina pexaniajamatabëcueneta.

<sup>18</sup> Daxitatsi Dioso pejanajamatabëcuene nacarajuta. Dioso nacabarajamatabëcuenexanepana Cristo vajanacasivatëpaexae vajaneconi yabara. Nexata Dioso panetocopata pejumelivaisi patatsipaebanajetarubenaenexa daxitajivijava, bajarapamonae ata itsa jumecovënëta, Dioso pebarajamatabëcuenex-

anepanaenexatsi. <sup>19</sup>Nexata Cristo cruzata itsa sivatëpa mapanacuapijivije, Cristo pesivatëpaexaetsi, Dioso barajamatabëcuenexanepanaeya tanetsi daxita pamonaë jumecovënëta Cristo pesivatëpaejavatsi. Paneconi picani bajarapamonaë xaina, Dioso baja vecuaajibiaexanatsi Cristo pesivatëpaejamatabëcuenetatsi. Bajarapalivaisi Dioso panetocopata patatsipaebanajetarubenaenexa jivijavabelia. <sup>20</sup>Nexata paxanë Cristo papijajivinë tsanajetarubenaë. Cristo baja cajena pejamatabëcueneta, papatajë paxamëjavata patacatsipaebinxexa pexanialivaisi. Pacuenia Dioso itsa patsipa, pacamuxujiobjitsipa, bajarapacuenia xanë ata pacamuxujiobatsi Cristo papecasivatëpaexae panijaneconi yabara Dioso papecabarajamatabëcuenexanepanaenexa. <sup>21</sup>Cristo pibisiacuene apo exanaë, tsiquirijavayo ata. Itsiata baitsi jane Cristo Dioso tsijumaxuabatsi daxita vaxaitsi vajaneconimi. Nexata vajaneconi yabara Cristo bepibisiacuene pexanaenëcuenia cruzata beyaxuabatsi. Bajarapacuenia Cristo cruzata vajanacasivatëpaexae, nexata Dioso aneconijibia nacatane itsa jumecovënëtatsi Cristo vajanacasivatëpaejava vajaneconi yabara.

**6** Dioso pataneyajavanacuenebixae, asaëyata pacamuxujiobatsi. Dioso pinijicue-  
nia papecaitaxutotsoniataejava, pacatsipaebatsi panejumeaebiyana. Itsa pa-  
jumeaebijitsipame, nexata Dioso nacueratsipa papecaitaxutotsoniataejava. <sup>2</sup>Tsipaji  
Dioso jivi pitaxutotsoniataejavaenexa, tajëvelia Dioso pejumelivaisibaxutota jumaitsi  
mapacueniaje:

Pamatacabi jivi itaxutotsoniataenajë, cajumetaenatsi. Nexata pamatacabi jivi ca-  
panepaenajë, xamë ata cayavenonaenatsi,  
jai tajëvelia Dioso pejumelivaisibaxutota.

Aeconoxae rabaja nacatocopiapata Dioso vajanacaitaxutotsoniataejava vajanaca-  
capanepaenexa jane baja.

<sup>3</sup>Itsa patonacuenebavanapajë Dioso, pajitsipajë daxitajivi xaniavaetsia patatsi-  
tajanavanapaejava, daxitajivi Dioso pejumecovënëtsinexa. Apo paexanaenë pibisi-  
acuene, tsiquirijavayo ata, pataexanaejava yabara jivi patanejumeaebiyana Dioso  
pejumelivaisi itsa patsipaebajë. <sup>4</sup>Biji rajane daxita xua paexanavanapajë, xani-  
avaetsia patsitaexanavanapajë jivi pataneyapëtaenexa Dioso papijajivicuenenë. Itsa-  
monaë panebejioxiaexanabiaba. Itsajavata bitso panamatavenonabiabajë itsacuene-  
javaxi. Itsajavata bitso panetsiayai tsabiabi itsamonae patanebeyejebinxexa. Ba-  
jarapacuenia panetsiayai tsabiabi ata, itsiata bajayajebi pajamatabëcuenesaenë  
tsavanapae Dioso pejumelivaisi jivi patatsipaebavanapaejava. <sup>5</sup>Itsajavata paneju-  
matitibabeyabiaba. Itsajavata penaneconitsivi pejebabiabibota panejebabiaba. It-  
sajavata Cristo pelivaisi jivi itsa patsipaebajë, itsamonae anaeya panebarajinabi-  
aba patanebeyejebinxexa picani. Itsajavata bitso panacuenebabiabajë. Itsajavata  
meravi ata apo pamajitabiabinë Dioso pejitsipaecuenia pataexanaenexa. Itsaja-  
vata bitso patajani tsabiabi. Bajarapacuenia panetoayapëbeje tsabiabi ata, itsi-  
ata bajayajebi pajamatabëcuenesaenë tsavanapae Dioso pejumelivaisi jivi patat-  
sipaebavanapaejava. Nexata jivi paneyapëtane Dioso papijajivicuenenë. <sup>6</sup>Dioso  
papijajivicuenenë jivi pataneyapëtaenexa, jivi patsitajanavanapajëna mapacueni-  
aje. Pamatacabibeje pajinavanapajë, pibisiacuene apo paexanavanapaenë. Biji ra-  
jane jivi patsitajanavanapajë pexaniajailivaisi patayapëtaevicuenia. Bajayajebi itsa-  
monaë pibisiacuene paneexanabiabi ata, apo pacuene canaviatabiabinëna. Pexa-  
niacuene patoexanabiabajëna itsamonaejavabelia. Patsitajanavanapajëna pacue-

nia Espiritu Santo paneyapëtaeyaexanapona Espiritu Santo patanetsijamatabëe-caexae. Patsitanajamatabëcuene itajëtavanapajënuu itsamonae ata pataasivajava patajamatabëëthëtojavavetsina. Bajarapacuenia patatsitajinavanapaexae, jivi xaniavaetsia paneyapëtane Dioso papijajivicuenenë. <sup>7</sup>Dioso papijajivicuenenë jivi pataneyapëtaenexa, patsitajinavanapajënuu mapacueniaje. Èpexaniajailivaisi jivi patsipaebabiabajë. Patsitanacueneitajëtavanapajënuu daxita xua paexanavanapajë, Dioso pataneyavenonabiabijava. Dioso baja aneconijibia patanetaexae, Espiritu Santo paneyavenonabiaba patanayajivitaeyabiabinexa dovathi pijacuene. Paneyavenonabiabanua Espiritu Santo patacueneamoneyabinexa dovathi. Bajarapacuenia patatsitajinavanapaexae, jivi paneyapëtane Dioso papijajivicuenenë. <sup>8</sup>Itsamonae paneyaiyataeyabiaba. Itsamonae pijinia apo paneyaiyataeyabiabi. Itsamonae pexaniacuenia panebaracuaicuajai tsabiabi. Itsamonae pijinia pibisiacuenia panebaracuaicuajai tsabiabi. Itsamonae panetaeyabiaba pexaniajailivaisi patatsipaebivicuene. Itsamonae pijinia panetaeyabiaba bepatanajumetsënëtsivi. <sup>9</sup>Itsamonae pataneyapëtaevi ata, itsiata apo bepataneyapëtaevi panetaeyabiaba. Itsajavata itsamonae jamatabëpanebejebabiaba picani. Itsiata tsiteca asaëya bajara palivaisi patsipaebavanapajë. Dioso baja cajena panetocopata itsamonae ayaicuenia patanebejiobiaexanabiabinexa, itsiata apo patanebejebinexa. <sup>10</sup>Panajamatabëxainabiabi atanë bitso itsamonae pibisiacuenia pexanaejava yabara, itsiata bëpënëa pepacuene pajamatabëcuenebarëyanë tsavanapae daxitamatacabijavabelianexa. Patabejiobivi picani. Itsiata jivi ayaibitsaëtoxonetonë ricovi paexanapajë Dioso pejumelivaisi patatsipaebijamatabëcueneta pejumecovënëtsixae. Apo paxainanë picani mapanacuapijicuene. Itsiata baitsi jane Diosojavabelia daxitacuene paxainajë, apo peverevereaejavanexa jane baja.

<sup>11</sup>Tajamonae, paxamë paCorinto tomarapijivimë, pacanajamatabëcuene vajunupaebatsi baja cajena roviaalia. Apo pacavecuanajamatabëcuene matayatsitsi. <sup>12</sup>Asivaya pacatae atatsi, paxamë itsiata bajarapacuenia asivaya apo panetaemë. <sup>13</sup>Pacuenia pexi pexainanë asaëya banacoximuxujioba, bajara pijinia pacuenia paxanë ata pacamuxujiobatsi. Paxamë ata panejamatabëcuenevetsina asivaya pane-taema pacuenia baja paxanë asivaya pacatanetsi.

### **Pacuenia piasaëtsaponaponaenë Dioso necatane bepijatemplobotsi tsavanapae yabara pelivaisi**

<sup>14</sup>Dioso apo pacatojitsipae mapacuenije. Paxamëyajuvënëva, Dioso pejumecovënëtsiva, pëtsa pitatsi Dioso apo pejumecovënëtsinë. Paxamë ata papebijivimë, pëtsa papitame Dioso apo pejumecovënëtsiva. Bajayajebinxaxa ata pëtme Dioso apo pejumecovënëtsivi. Tspaji apo pacajamatabëcuenejëpae tsipae. Dioso pejumecovënëtsivi apo jamatabëcuenejëpae Dioso apo pejumecovënëtsivi. Tspaji Dioso jivi pejamatabëcuene itayotsijamatabëcuenetsi, mapanacuata pitaquirijamatabëcuenebeje, apo najamatabëcuenejëpaebeje. <sup>15</sup>Cristobeje dovathibeje apo najamatabëcuenejëpaebeje. Nexata pijinia pajivi Dioso pejumecovënëtsijivi, Dioso apo pejumecovënëtsijivibeje, acuenebi bajayajebi penajuanacuenebaponaponaenexabeje. Tspaji apo najamatabëcuenejëpaebeje. <sup>16</sup>Bajara pijinia navecuaitisibeje Dioso pijatemplobobeje, jumapecataeya pexanaenëanë penubenaetemplobobeje. Apo najamatabëcuenejëpaebeje. Vaxaitsi baja cajena piasaëtsaponaponaenë Dioso, necatane bepijatemplobotsi tsavanapae. Bajarapacuenia necatane tspaji pacuenia bajayata

Dioso templobota ponaponabiaba, bajara pijinia pacuenia aeconoxae Dioso nacaya-javaponapona. Bajarapajamatabëcuene yabara bajayata Dioso vaxaitsi yabara tajëvelia jumaitsi mapacueniaje:

Tsijamatabëcaenajë bajarapamonae tayajavaponaponaenexa. Bajarapamonae pija-Diosonë tsane. Bajara pijinia pamonaе tajajivi tsane, jai Dioso bajayata tajëvelia vaxaitsi yabara.

<sup>17</sup> Bajaraxuata Dioso apo pejumecovënëtsivi vajavecuapitsapaejavanexa, vajatuxanenë Dioso tajëvelia nacavajunupaeba. Vajanacavajunupaebijavata jumaitsi mapacueniaje:

Pamonae tuatujëta pajinavanapaename, pavecuapitsapaename. Bajarapamonae navecuatsatsia pajinavanapaename. Paxamë pëtsa pibisiacuene panaexanaename bajarapamonaeta papecajamatabëcuene bijianaeyaniva. Nexata xanë pacasivabarëya tsanetsi. <sup>18</sup> Paneaxanë tsane. Nexata daxita paxamë pataximë tsane,

jai bajayata vajatuxanenë Dioso tajëvelia vaxaitsi yabara, daxitacuene pevetsinë.

**7** Tajamonae bitso patacaasivavi, daxita baja pacuenia Dioso pejumelivaisibax-utota tajëvelia najumecapanepaeya jumaitsi pexicueniatsi vajanacataenexa, yapëtanetsi baja. Bajaraxuata Dioso pitabarata aneconijibia jinavanapaenatsi. Vajavitota pibisiacuene vajaexanabiabijavami, copatsianatsi baja. Vajajamatabëëthë-tota pibisijamatabëcuene vajanajamatabëxainabiabijavami ata, copatsianatsi baja. Dioso yaiyataeya jinavanapaenatsi Dioso vajanacatojitsipaecuenia.

### **Pacuenia Pablo sivajamatabëcuenebarëya Corinto tomarapijivi yabara pelivaisi**

<sup>2</sup> Panetsitanajamatabëcueneitajëre pataniasivajavamë. Caejivi ata paxamëyajuvenëjivi apo pacayajuvënëitsacueniabitsi. Apo pacayajuvënë jamatabëcuenebijiianaetsinua. Apo pacayajuvënë yamaxëitojorobitsinua bajarapacuenia panijapalata patacavecuapitsinexa. <sup>3</sup> Itsa pacajumaitsitsi mapacueniaje, apo pacabijataetsi. Jume baja cajena. Pacuenia baja cajena copiaya pacajumaitsitsi, daxita matabijavabelianexa asivaya pacajamatabëxainabiabatsi. <sup>4</sup> Payapëtanijinua caejamatabëcuene panenajamatabëxainaejava. Bajaraxuata bitso pacasivajamatabëcuenebarëyatsi. Paepatota ata itsamonae panebejiobiaexanabiaba, apo panasivabëjanë tsabiabi. Tsipaji bajarapaepatota itsa pacavënëlivaisitaeyabiabatsi xaniavaetsia panejinavanapaejava, pacasivanajamatabëcuene saëtabiabatsi. Nexata panebejiobiaexanabiabi ata, bitso pabarëyanë tsabiabi paxamë yabara.

<sup>5</sup> Macedonia nacuata patapatsicujinae, caeto ata cajena xaniavaetsia apo panacueraevetsinë. Daxitajava, itsaxuayo panajetarubenajë, paneyalivaisiaexanabiaba. Nexata itsa panayajumetaeyabiabajë itsacuenelivaisi, patajamatabëëthë-tota bëpënëa payajunavijinavanapabiabajë. <sup>6</sup> Itsiata baitsi jane Dioso, jivi pejamatabëcueneasaëyaexanaenëxae, panejamatabëcueneasaëyaexana. Bajarapacuenia Dioso panejamatabëcueneasaëyaexana paxamëjavaverena peponaenë, Tito, itsa patajopa paxanëjavata. <sup>7</sup> Tito pepatsixae paxamëjavaverena, panejamatabëcueneasaëyaexana. Itsiata Tito ëpëpatsijava, apo panejamatabëcueneasaëyaexanae. Biji rajane Tito paxamëjavabelia itsa patajopa, paxamë pina Tito pajamatabëcueneasaëyaexaname. Bajarapacuenia paneexanaejava, Tito itsa pacavajunupaeba paxanëjavaberena, pamuxunanajamatabëcueneasaëtajë. Bitso pina picani jamatabëpane-

taneme. Bajarapalivaisinua Tito panetsipaeba. Panetsipaebanua bitso paneyanajamatabëxainaejava pibisiacuene paneexanaeneconi. Panetsipaebanua bitso patanesivanajamatabëxainaejavamë itsa panevënëlivaisitaneme bitso patacasivanajamatabëxainaejava. Bajarapacuenia paneexanaejava, Tito itsa pacavajunupaeba paxanëjavaberena, bitso pamuxunajamatabëcuenebarëyanë.

<sup>8</sup>Pabaxutomi copiaya pacatoyaquinatsi, itsa palebame, bitso pacanajamatabëxainaejava. Itsiata saya caepatoyonexa. Bajarapacuenia papecanajamatabëxainaejava, bajarapabaxutomi yabara jamatabëjumaitsinë mapacueniaje: “Apo betoyaquinaenë picani bajarapabaxutomi,” jamatabëjanë. Itsiata baitsi jane aeconoxae baja bajarapabaxutomi yabara bajarapacuenia apo sivanajamatabëxainaejava. <sup>9</sup>Aeconoxae baja sivabarëyanë patacatoitobixae bajarapabaxutomi. Itsiata apo sivabarëyanë xua pacanajamatabëxainaejavatsi panijaneconi yabara. Biji rajane sivabarëyanë tsipaji patacanajamatabëxainaejava exanaejavata bajarapabaxutomita, pacopabame baja pibisiacuene paneexanabiabijava. Panajamatabëcuenepeñeyorotame baja Diosojavabelia. Nexata pacuenia Dioso pacatojitsipa, paexanavanapame. Itsiata apo pacaitsacueniabi patacatoyaquinaebaxutomi. Biji rajane bajarapabaxutomi pejamatabëcueneeta, pacajamatabëcueneavenonatsi. <sup>10</sup>Nexata pacuenia Dioso pacatojitsipa, bitso payanajamatabëxainame panijaneconi. Nexata baja pacopabame pibisiacuene paneexanaejavami. Panajamatabëcuenepeñeyorotame baja Diosojavabelia. Nexata paxamë Dioso pacapanepaena. Pamona Dioso capanepaenatsi, apo jumaitsi tsane: “Apo jitsipaenë picani Dioso tanecapanepaejava,” apo jai tsane. Itsiata baitsi jane pamona yanajamatabëxainavanapae ata pibisiacuene pexanaeneconi, itsiata itsa apo copabi tsane pibisiacuene pexanabiabijava, itsa apo najamatabëcuenepeñeyorotsi Diosojavabelia, bajarapamonae Diosovecua naxuabiana daxitamatabijavabelianexa. <sup>11</sup>Panajamatabëcueneanaejëre mapacuenieje. Pacuenia Dioso pacatojitsipa, bitso paxamë payanajamatabëxainame panijaneconi. Nexata baja aeconoxae paneconijibimë Dioso pitabarata. Najamatabëcueneveniabiaya baja pacanaejëtamë panijaneconi. Pepacuene panavajunupaebamenua Diosojavabelia pacuenia paexanavanapame. Paxamë picani bitso pabaraanaepanabiabame paxamëyajuvënënë, ponë pibisiacuene exanaponapona paxamë tuatuajëta. Panecujunavabiabamenua picani bajaraponë pijaneconi yabara. Itsiata bitso pajitsipame paneexanaenexa Dioso papecatojitsipaecuenia. Pasivanajamatabëcueneveretamenua panenaneconitsiaexanaenexa paxamëyajuvënënë, ponë pibisiacuene exanaponapona paxamë tuatuajëta. Bajarapacuenia itsa pasivanajamatabëxainame pibisiacuene pexanaponaponaenë, Dioso patsitanajamatabëcueneitajëtamë Diosojavabelia apo panenaneconitsijava. <sup>12</sup>Itsa pacatoyaquinatsi copiaya pabaxutomi, pacatoyaquinatsi padaxitamë patacamuxujobinexa. Apo toyquinaenë caenë paxamëyajuvënënë tamuxujobinexa, ponë pibisiacuene exanaponapona paxamë tuatuajëta. Apo toyaquinaenënu tamuxujobinexa ëponë ata pibisiacuene toexanatsi itsanë. Pacatoyaquinatsi bajarapabaxutomi padaxitamë patacamuxujobinexa. Pacatoyaquinatsi bajarapabaxutomi tsipaji pajitsipajë panijacuata panenajamatabëcueneypëtaenexa juya pataniasivajavamë. Baitsi pacuenia pajitsipame, Dioso pitabarata patanejumecovënëtsinexamë patacasivanajamatabëcuenebarëyanexa. <sup>13</sup>Nexata baja panejumecovënëtamë. Bajarapacuenia patanejumecovënëtsixaemë, bitso pacasivajamatabëcuenebarëyatsi.

Pibisiacuene itsa paexaname, Tito bitso pacasivanajamatabëxaina. Itsiata baja aeconoxae daxita paxamë Dioso pitabarata xaniavaetsia panejinavanapaexae, apo pacasivanajamatabëxainae baja. Bajaraxuata pacasivajamatabëcuenebarëya Tito. Nexata Tito papecasivajamatabëcuenebarëyajava yabara, paxanë ata bitso pacasivajamatabëcuenebarëyatsi. <sup>14</sup>Tito peponaevajënaeya paxamëjavabelia, jumaitsinë bajaraponëjavabelia: “Corinto tomarapijivi, Dioso pejumecovënëtsivi, tatoyaquinaebaxuto pejamatabëcueneta, itsiata najamatabëcuenexanebiana Diosojavabelia,” janë paxamë yabara Titojavabelia. Nexata bajarapacuenia paexaname baja. Bitso nexata Tito pacasivajamatabëcuenebarëya. Pacuenia xanë pacatsipaebabiabatsi pexaniajailivaisi, bajarapacuenia paxamë yabara tsipaebajë Titojavabelia. Bajarapacuenia itsa tsipaebajë, xaniajanë cajena. Tsipaji pacuenia pacatoyaquinatsi, paexananapame. Bajaraxuata pacasivajamatabëcuenebarëyatsi. <sup>15</sup>Tito najamatabënäpitiabiaba panejumecovënëtabibijava pacuenia pacaitoroba. Najamatabënäpitabianua yaityaeya panecopiapitsijava ata. Bajaraxuata Tito bitso pacaitaxanapona pevajënaeyabelia. <sup>16</sup>Pacasivajamatabëcuenebarëyatsi. Tsipaji xaniavaetsia yapëtaniji paneexanavanapaejava pacuenia Dioso pacatojitsipa.

### **Pacuenia Dioso pejumecovënëtsivi penajamatabëcuenerajutsixae Diosojavabelia, ofrenda tojeba Diosonexa yabara pelivaisi**

**8** Tajamonae, pacatoyaquinatsi mapalivaisije paneyapëtaenexa pacuenia Dioso jamatabëcuenyavenonatsi Dioso pejumecovënëtsivi, Macedonia nacuapijivi. <sup>2</sup>Macedonia nacuapijivi petoayapëbejecuenetsi tocopiapataponae atatsi ayaicuenia pejamatabëcuenejëtsinexatsi, itsiata jamatabëcuenebarëya tsavanapae. Bajarapamonae bitso bepejiobivi picani. Itsiata ofrenda itsa exana petoitorobinexa bepejiobivi Jerusalén tomarapijivijavabelia, ayaijava jebabiaba. <sup>3</sup>Xanë yapëtaniji bajarapamonae bepejiobivicuene. Itsiata bepejiobivi ata, ayaijava jebabiaba ofrenda itsa exanabiaba. Bajarapamonae jebabiaba bajarapacuenia, itsajivi ata apo itorobi atatsi ayaijava pejebinexa. <sup>4</sup>Bajarapamonae pinijicuenia paneitoroba patatocaponaeenexa pejebiofrenda. Panejumaitsi mapacueniaje: “Pexaniacuene panetoexanaename. Panetocaponaename mapaofrendaje Jerusalén tomarajavabelia Dioso pejumecovënëtsivi panerajutsinexa. Paxanë ata bitso jamatabëpayavenonajë bajarapamonae,” panejai. <sup>5</sup>Nexata bajarapamonae bepejiobivixae, pasivajamatabëjumaitsinë picani: “Tsiquirijavaxi meta bajarapamonae jebiana,” pasivajamatabëjanë picani. Itsiata bajarapamonae ayaijava jeba. Bajarapamonae ëofrenda apo rajutsi Diosojavabelia. Biji rajane copiaya najamatabëcuenerajuta Diosojavabelia pacuenia Dioso itorobaponatsi pexanabiabinexa daxitamatacabijavabelianexa. Bajaraxuacujinae pejebiofrenda paxanëjavaberena panerajuta patatocaponaenexa bepejiobivijavabelia. Bajarapacuenia itsa exana, exana Dioso petojitsipaecueniatsi. <sup>6</sup>Paxamë, paCorinto tomarapijivimë, paofrenda paxamë ata pacaetuatame panerajutsinexa Dioso pejumecovënëtsivi, Jerusalén tomarapijivi, Tito pacajamatabëcuenyavenona panecaetuatsijava. Itsiata abaxë apo paveretsimë panecaetuatsijava. Bajaraxuata aeconoxae baja icatsia Tito paitorobajë paxamëjavabelia paneveretsinexa jane baja bajarapaofrenda panecaetuatsijava. <sup>7</sup>Paxamë itsamonaevecu xaniavaetsia Dioso patojinavanapame. Xaniavaetsia panajamatabëcueneocopatame Diosojavabelia. Payapëtanemenua xaniavaetsia Dioso pejumelivaisi. Pacacëjëpanua xaniavaetsia Dioso pejumelivaisi panetsipaebinexa itsamonae. Bitso

pacajamatabëcueneenabiabanua Dioso pijacuene panetonacuenebavanapaenexa. Bitso paneasivamënu. Nexata paneyavenonaenexa bepejiobivi, Jerusalén tomara-pijivi, ayaijava bepajebame ofrenda ita paexaname.

<sup>8</sup>“Macedonia nacuapijivi, bepejiobivi ata, ayaijava ofrenda jeba,” ita janë, apo pacaitorobitsi paxamë ata ayaijava ofrenda panerajutsinexa. Biji rajane saya pacatsipaebatsi paneyapëtaenexa pacuenia Macedonia nacuapijivi bitso jamatabëcuenebarëyaya toexana ofrenda bepejiobivi peyavenonaenexa. Bajarapacuenia paxamë ata ita paexanaename, itsamonae patsitanajamatabëcuene itajët-sianame panexaniajaicuene Dioso paneasivajava. <sup>9</sup>Bajarapacuenia paxamë ata ofrenda parajutsianame. Tspiji payapëtaneme pacuenia vajatuxanenë Jesucristo nacayavenona vajanacaasivaxae. Bajaraponë picani ayaijamatabëcuenenë. Daxitacuene pevetsinë. Itsiata papecaasivaxae, nabejiobiaexana papecayavenonaenexa. Bajarapacuenia papecasivanabejiobiaexanaexae, nexata paxamë ata itsamatacabi paayaijamatabëcuenevimë tsane Dioso pijanacuatatsia.

<sup>10</sup>Pacatsipaebatsi paneyapëtaenexa pacuenia panetsitaxanepana paxamë paneexanaenexa bajarapaofrenda. Paxamë picani imata pavaimi bitso jamatabëpayavenoname Dioso pejumecovënëtsivi, Jerusalén tomarapijivi. Nexata paxamë daxitajivivajënaeya jamatabëpatoexaname ofrenda. <sup>11</sup>Paxamë picani imata pavaimi Jerusalén tomarapijivi bitso jamatabëpayavenoname ofrendanexa. Bajarapacuenia aeconoxae ata tsiteca paexanare paneveretsinexa jane baja palata panecaetuatsijava bajarapaofrendanexa. Parajutsianame pacuenia pacacajëpa. <sup>12</sup>Nexata ita pepacuene parajutsianame pacuenia pacacajëpa, Dioso pacasivajamatabëcuenebarëya tsane. Tspiji apo pacaitorobi xua apo paxainaemë panerajutsinexa.

<sup>13</sup>Apo pacaitorobitsi raja mapacueniaje: “Itsamonae paneyavenonaenexa, ofrenda ita paexaname, pabuare daxita panexainaepalatayomi,” apo pacajaitsi. Tspiji juya paxamë panamatavenonaejitsipame. <sup>14</sup>Jitsipatsi namataenetsia vajanayavenonaenexa vajanamatavenonaejavaxi yabara. Aeconoxae baja pacacajëpa paneyavenonaenexa bepejiobivi, Jerusalén tomarapijivi. Itsamatacabijavabelia, pamatacabi paxamë panamatavenonaename, cajëpaenatsi juya bajarapamonae papecayavenonaenexa. Bajarapacuenia nexata daxita paxamë panenamataavenonaejavaxi, apo panamatavenonaemë tsane. <sup>15</sup>Bajarapajamatabëcuenelivaisi yabara Dioso pejumelivaisibaxutota jumaisi mapacueniaje: “Itsajivi bitso ayaijava xainae ata, itsiata apo toyajuvënënacopatsitsi. Itsajivi pijinia tsiquirijavayo xainae ata, itsiata apo namataavenonae,” jai Dioso pejumelivaisibaxutota. Bajaraxuata paxamë ata panexainaeyajuvënëjava, beparajutame penamatavenonaevijavabelia.

### **Pacuenia Tito, anijanëbeje yajava, pona Corinto tomarabelia yabara pelivaisi**

<sup>16</sup>Xanë bitso jitsipajë paxamë patacayavenonaenexa. Tito ata bajarapacuenia jitsipa papecayavenonaenexa. Bajaraxuata pexaniajamatabëcuene rajutajë Diosojavabelia. Tspiji Espiritu Santo pejamatabëcueneta Titobeje panajamatabëcuenejëpajëbeje paxamë yabara. <sup>17</sup>Nexata Tito itorobajë papecataenexalia, papecayavenonaenexanua bajarapaofrenda panecaetuatsijava paneveretsinexa baja tavajënelia. Barëyaya Tito jejai peponaenexa paxamëjavabelia. Bajaraponë ata pijacuata pejitsipaexae peponaeyava paxamëjavabelia, ponaena papecayavenonaenexa.

<sup>18</sup>Tito pepëta paitorobajë itsanë Dioso pejumecovënëtsinë. Bajaraponë Macedonia nacuata daxita Dioso pejumecovënëtsivi bitso peyapëtaenëtsi.

Peyaiyataenëtsinua. Tspaji xaniavaetsia tsipaebabiaba Dioso pejumelivaisi jivi pecapanepaelivaisinexatsi. <sup>19</sup>Ponë, Tito yajava, ponaejitsia paxamëjavabelia, bajaraponë Macedonia nacuata itapetatsi daxita Dioso pejumecovënëtsivi. Nexata pamatacabi paponaeenajë Jerusalén tomarajavabelia, bajaraponë payjavaponaenajë. Nexata paofrenda pacaponaejitsianë, bajaraponë paneyavenonaeyacaponaena. Bajarapaofrenda pacaponaenajë Jerusalén tomarapijivi pesivajamatabëcuenebarëyanexa Dioso. Patsitanajamatabëcuene itajëtsianajëna patajitsipaejava patayavenonaenexa pamonae bepejiobivi. Nexata bajarapamonae jamatabëjumai tsane: “Matsaena pamonae jitsipa peyavenonaenexa bepejiobivije,” jamatabëjai tsane. <sup>20</sup>Bajarapacuenia Macedonia nacuapijinë payjavaponaenajë itsajivi ata patanebaracuicuajiyaiyaniva bajarapapalataxaneto yabara. “Pabloana raeta bajarapalata yajuvënëcõpata,” patanejayiyaniva. <sup>21</sup>Dioso baja cajena paneyapëtanë apo patanacobetoxotsivicuene. Itsiata pajitsipajë daxitajivi ata pataneyapëtanexa apo patanacobetoxotsivicuene.

<sup>22</sup>Titobeje icatsia itsanë patsicueyaitorobajë Dioso pejumecovënëtsinë peyajavaponaenexabeje paxamëjavabelia. Bajaraponë anijatonë pajamatabëcuenejëtabiabajë. Xaniavaetsia bitso paneyavenonabiaba. Nexata aeconoxae paxamë bitso jamatabëpacayavenona. Tspaji pacavënëlivaisitane paneyavenonaejavanexa Jerusalén tomarapijivi. <sup>23</sup>Nexata Tito yabara itsajivi itsa pacayanijobiana: “¿Detsa pacuenia maponë peponaponaenëje?” itsa pacajai tsane, pajumaitsimë tsane: “Pablobeje raja penajuaponaenëbeje. Bajaraponë Tito Pablo yavenonabiaba vaxaitsi juya Pablo vajanacayavenonaenexa,” pajamë tsane. Itsajivi itsa pacayanijobiana Tito peyajavaponaenëbeje yabara, pajumaitsimë tsane: “Bajaraponëbeje Dioso pejumecovënëtsivi pitorobinëtsibeje. Bajaraponëbeje xaniavaetsia Cristo petoponaenajavabeje jivi petaexae, nexata jivi yayiatane Cristo pelivaisi,” pajamë tsane. <sup>24</sup>Nexata bajaraponëbeje itsa patsianabeje paxamëjavata, patsitanajamatabëcuene itajëtsianame paneasivajava bajaraponëbeje. Nexata Dioso pejumecovënëtsivi, pamonae itorobatsibeje bajaraponëbeje, pacavënëlivaisitaena paneasivajava bajaraponëbeje. Nexata asivaya itsa pacopiapitsianame Dioso pejumecovënëtsivi pitorobinëtsibeje, nexata Dioso pejumecovënëtsivi jamatabëjumai tsane paxamë yabara: “Pacuenia baja Pabloana nacatsipaeba, xaniajai baja cajena. Corinto tomarapijivi asivaya tane daxitajivi,” jamatabëjai tsane.

### **Ofrenda pecaetuatsijava Dioso pejumecovënëtsivijavabelia peyavenonaenexa yabara pelivaisi**

**9** Ofrenda pacaetuataponame paneyavenonaenexa bepejiobivi, Dioso pejumecovënëtsivi, Jerusalén tomarapijivi. Apo jitsipaenë picani icatsia patacatoyaquinaenexa bajaraxua yabara. <sup>2</sup>Tspaji baja yapëtaniji pacuenia bitso jamatabëpayavenoname bajarapamonae. Bajaraxuata pacasivajamatabëcuenebarëyatsi. Nexata paxamë yabara jumaitsinë Macedonia nacuapijivijavabelia: “Acaya nacuapijivi, Corinto tomarata penacaetuatabiabivi, imata baja cajena pavaimi najamatabëcuenevereta perajutsinexa ofrenda Jerusalén tomarapijivijavabelia,” janë paxamë yabara. Nexata Macedonia nacuapijivi itsa pacavënëlivaisitane paneyavenonaejavanexa Jerusalén tomarapijivi, Macedonia nacuapijivi ata ayaibitsaëtoxaneto tocaetuatapona ofrenda peyavenonaenexa Jerusalén tomarapijivi. <sup>3</sup>Nexata paca-



toitorobatsi Titobana papecayavenonaenexa paneveretsinexa baja bajarapaofrenda panecaetuatsijava panerajutsinexa Jerusalén tomarapijivi. Tavajënaelia itsa apo paveretsimë tsipae ofrenda panecaetuatsijava, paxamë yabara pexaniacuenia tajumaitsijava, najumecovëauranë tsipae Macedonia nacuapijivijavabelia. <sup>4</sup>Tsipaji itsamonae Macedonia nacuapijivi belia naponaejitsipa tapëta paxamëjavabelia. Itsa bajarapamonae taejitsipa bajarapaofrenda apo paneveretsijava, nexata bitso paxamë yabara auranë tsipae. Tspijaji paxamë yabara bajaya baja jumaitsinë: “Corinto tomarapijivi jamatabëveretapona baja ofrenda pecaetuatsijava,” janë paxamë yabara. Nexata paxamë ata bitso pauramë tsipae. <sup>5</sup>Bajaraxuata jamatabëjumaitsinë: “Titobana Corinto tomarabelia tavajënaelyabelia itorobianajë,” jamatabëjanë. Nexata Titobana pacajamatabëcueneyavenonaena ofrenda panecaetuatsijava, paneveretsinexa baja pacuenia najumecapanepaeya panetocaëjëtame. Nexata baja tavajënaelia bajarapaofrenda itsa paxaniavaetabuatsianame, panajamatabëcuenaitajëtsianame Jerusalén tomarapijivi paneasivaxae paneyavenonajava, apo ëpatacaitorobixae.

<sup>6</sup>Pacanaëjere mapalivaisije. Tsiquirijavayo peubinë, tsiquirijavayo pijinia batopitsapatsi. Ayaijava pijinia peubinë, ayaijava batopitsapatsi. Nexata ayaijava itsa parajutsianame itsamonaejavabelia, Dioso juya pacarajutsiana ayaijava. <sup>7</sup>Nexata caejivi canacujitsia berajuta pacuenia najamatabëcuenevereta perajutsinexa. Pëtsa pajamatabëjumaitsimë: “Apo jamatabërajutsi atanë picani, itsiata taneitorobixae, rajutsianajë,” pajamatabëjamë pëtsa. Tspijaji pajivi rajuta itsajivijavabelia jamatabëcuenearëyaya, Dioso asivatsi. <sup>8</sup>Dioso baja cajena caëjëpatsi papecarajutaponaenexa pacuenia panamatavenoname matatoxenetsia. Nexata xua panamatavenoname, paxainaponaename. Pacatonacopatsiananua panerajutsinexa bepejiobivijavabelia. <sup>9</sup>Dioso pejumelivaisibaxutota jumaitsi mapacueniaje:

Ponë rajutabiaba bepejiobivi penamatavenonaecuenë, bajaraponë pexaniacuenë exanabiaba Dioso pitabarata. Nexata bajarapacuenë Dioso apo nacofënëtsi daxitamatacabijavabelianexa,

jai Dioso pejumelivaisibaxutota.

<sup>10</sup>Dioso rajuta jivi peubixunexa. Bajaraxuacujinae icatsia Dioso pejamatabëcueneta penaveretsixu capitsapa penotsinexa jivi pexaejavanexa. Bajara pijinia pacuenia Dioso pacarajutsiana panexinaejavanexa, panerajutsinexanua bajaraxuayajuvënëjava bepejiobivijavabelia. Pacacaëjëpaeyaexanaenanua ëpexaniacuenë ayaijava paneexanaenexa. <sup>11</sup>Bajarapacuenia Dioso pacarajutsiana panexinaenexa ayaijava. Nexata pacacaëjëpaena bajaraxuayajuvënëjava juya panerajutsinexa bepejiobivijavabelia. Nexata paofrenda panerajutame patatocaponaenexa Dioso pejumecovënëtsivi, Jerusalén tomarapijivi, itsa parajutsianajë bajarapamonae, pexaniajamatabëcuenë rajutsiana Diosojavabelia bajarapacuenia paneyavenonaexae. <sup>12</sup>Bajarapacuenia Dioso pejumecovënëtsivi, bepejiobivi, itsa parajutame, payavenoname bitso penamatavenonaejavata. Bajarapamonae paneyavenonaejava itsa taena, pexaniajamatabëcuenë Diosojavabelia perajutabiabijava pematatsënëa bitso pexaniajamatabëcuenë rajutsiana Diosojavabelia. <sup>13</sup>Bajarapacuenia Jerusalén tomarapijivi ofrenda itsa parajutsianame paneyavenonaenexa, bajarapamonae patsitanajamatabëcuenë itajëtsianame pepacuenë xaniajai panejumecovënëtsijava pexanialivaisi, Cristo pelivaisi. Nexata bajarapamonae pexaniajamatabëcuenë rajutsiana Diosojavabelia Cristo pelivaisi

panejumecovënétavanapaejava yabara. Ofrenda ata panerajutsijava Jerusalén tomarapijivi, paofrenda ata parajutame itsamonaejavabelia, bajaraxua ata yabara Jerusalén tomarapijivi pexaniajamatabëcuene rajutsiana Diosojavabelia. <sup>14</sup>Nexata bajarapamonae bitso asivaya pacajamatabënajinaeya pacatovajëtabiabiana Diosojavabelia. Tsipaji paxamë bajarapamonae payavenoname Dioso pejamatabëcueneta papecaitorobixae. <sup>15</sup>Vaxaitsi pexaniajamatabëcuene rajutabiabatsi Diosojavabelia. Tsipaji Dioso pexënato athëbëvetsica nacatoitorobica vajanacasivatëpaenexa mapanacuataje. ¡Cristo vajanacasivatëpaejava pexaniacuene bitso!

**Pacuenia Pablo navajunupaeba Cristo pitorobijavatsi Dioso pejumelivaisi daxitanacuanëjava jivi petsipaebanajetarucaenexa yabara pelivaisi**

**10** Pacuenia Cristo pexaniacuena pacaitorobijitsipa, bajarapacuenia xanë ata pexaniacuena ajumesaëya pacaitorobatsi. Itsiata bailsi jane itsamonae paxamëyajuvënëvi xanë yabara jamatabëcuenenavëxaniabiaya jumai tsabiabi: “Itsa abaxë Pablo tajë nacavecuaponapona, ajumelivaisisaëya nacatoyaquinabiabarena. Itsiata bailsi jane majotaje, vaxaitsijavata, itsa patajopaena, piaitejepaebinëcuena patajopaena. Ajumejibia ponaponaena piajumeuraxae,” jai tsabiabi paxamëyajuvënëvi xanë yabara jamatabëcuenenavëxaniabiaya. Itsiata bajarapacuenia apo itsinë tsane. <sup>2</sup>Nexata pexaniacuene pacavajëtatsi. Pëtsa itsajamatabëcuene pane-toexaname, itsa patsialiajë paxamëjavabelia, ayaijumeta pacabijataeya patacamux-ujjibyaniva. Itsamonae paxamëyajuvënëvi xanë yabara jamatabëcuenenavëxaniabiaya jumai tsabiabinua: “Pablo apo ponapona Dioso pejumecovënëtsinëcuena. Saya ponapona Dioso apo pejumecovënëtsinëcuena. Yajavaponapona pijaperuju-jamatabëcuene,” jai tsabiabi paxamëyajuvënëvi xanë yabara. Bajarapacuenia xanë yabara pecuaicuaijaittsabiabivijavabelia ayaijumeta bijataeya cuaiçuaijanë tsane. <sup>3-4</sup>Mapanacuapijivi, Dioso apo pejumecovënëtsivi, saicayacuenia nayajiviyapëtane pijavajabitsaëvecua penaevetsinexa pitsacueniabiyantivatsi. Vaxaitsi ata mapanacuata vajajinavanapaevi, Dioso vajajumecovënëtsivi, saicayacuenia pijinia nayajiviyapëtanetsi vajanaevetsinexa dovathivecua. Dovathivecua apo naevetsitsi mapanacuapijicueneta. Pajamatabëcuenesaë Dioso nacarajuta, bajarapajamatabëcuenesaëta jamatabëcueneamoneyabaponatsi dovathi. <sup>5</sup>Nexata Dioso pejamatabëcuenesaëta, paajibiaexanaponajë jivi Dioso yabara penajumetsënëtsilivaisimi. Bajarapamonae dovathi pejamatabëcueneta itorobatsi penajumetsënëtsilivaisi petsipaebabiabinexa itsamonaejavabelia. Nexata pamona Dioso yabara penajumetsënëtsivi, pajumecovënëtsiaexanaponajë Cristo pelivaisi Dioso pejamatabëcuenesaëta. Itsamonae pijinia dovathi pejamatabëcueneta beayaijamatabëcuenevi natane. Pamona bajarapacuenia najamatabëxaina, apo yapëtae Dioso. Bajaraxuata bajarapajamatabëcuenemi paajibiaexanaponajë baja. Nexata pamona ata bajarapacuenia beayaijamatabëcuenevi natane, pajumecovënëtsiaexanaponajë Cristo pelivaisi Dioso pejamatabëcuenesaëta. <sup>6</sup>Bajarapacuenia paxamëjava ata paexanaponae-najë. Paxanë panajamatabëcueneveretajë pataexanaenexa mapacueniaje. Paxamë baja xaniavaetsia Dioso itsa pajumecovënétavanapaename, paxanë pacavecuacapit-sapaenatsi pamona apo jitsipae patanejumecovënëtsinexa Cristo pelivaisi.

<sup>7</sup>Paxamë raja saya jema pataneme daxitajivi. Nexata daxitajivi pataneme pacuenia Dioso apo pejumecovënëtsivi tane daxitajivi. Nexata apo payapëtaemë pacuenia paxanë pajamatabëcueneitsinë. Pajivi nayapëtane Cristo pijajivitonëcuene, ba-

jarapajivi bepaneyapētane paxanē ata Cristo papijajivicuenenē. <sup>8</sup>Paxamē meta xanē yabara pajamatabējumaitsimē tsabiabi: “Pablo saya bitso navajunupaebabiaba Dioso pitapetsijavatsi apóstolenēnēxa,” pajamatabējamē meta tsabiabi xanē yabara. Dioso baja cajena paneitoroba patacajamatabēcuene asaēyaexanaenēxa. Apo paneitorobi patacajamatabēcuene faefaenaeyaexanaenēxa. Bajaraxuata apo ajumeuranē tsabiabi tanavajunupaebabiabijava apóstolenējavanē. <sup>9</sup>“Pablo saya nacajamatabēcuenenabenajacaeya exanabiaba vajanacatoyaquinaelivaisianēta,” panejaijava xanē yabara apo jitsipaenē. Tsipaji bajaraxua yabara apo pacatoyaquinaetsi. <sup>10</sup>Itsamonae xanē yabara jumai tsabiabi: “Pablo ajumelivaisisaēya nacatoyaquinabiabarena. Itsiata bajaraponē itsa patajopa majotaje, vaxait-sijavata, apo ajumesaē tsabiabi. Saya ajumelivaisixaebi tsabiabi,” jai tsabiabi itsamonae xanē yabara. <sup>11</sup>Itsiata baitsi jane pamonaē bajarapacuenia jumai tsabiabi xanē yabara, beyapētane pacuenia bajarapamonaejavabelia exanaejitsianē itsa patsialiaijē paxamējavabelia. Pacuenia baja pacatoyaquinaliatsi taexanaenēxa paxamējavabelia, bajarapacuenia exanaenajē paxamējavabelia.

<sup>12</sup>Palivaisi paxanē pacatsipaebabiabatsi, bajarapalivaisivecua saicayalivaisi itsamonae pacatsipaebabiaba. Bajarapamonae apo canaējētsi pacuenia Dioso pejumelivaisibaxutota jumaitsi. Nexata bajarapamonae namataenetsia natane bepexaniajamatabēcuenevi. Nexata pamonaē apo bajarapamonaeyajuvēnēvi, bepibisijamatabēcuenevi tane. Saya xua bajarapamonae tsitaxanepanatsi, bajaraxua yabara jumai tsabiabi: “Maxuaje pexaniacuene,” jai tsabiabi. Xua pijinia apo tsitaxanepanaetsi, bajaraxua yabara jumai tsabiabi: “Maxuaje pibisiacuene,” jai tsabiabi. Bajarapamonae cajena bitso apo yapētae. Paxanē raja bajarapacuenia apo pajamatabēcueneitsinē. <sup>13</sup>Paxanē Dioso paneitoroba Dioso pijacuene pata-tonacuenebinēxa. Nexata panacuanējjava Dioso paneitoroba, bajarapanacuanējjava Dioso pejumelivaisi patsipaebanajetarubenajē. Dioso paneitoroba tajē ata paxamē paCorinto tomarapijivimējavabelia ata pataponaenēxa patacatsipaebinēxa pejumelivaisi. Nexata itsa panavajunupaebabiabajē Dioso patanitorobijava, xuayovajēto Dioso panetocopata patatonacuenebinēxa, panavajunupaebabiabajē. Ayailivaisi apo panavajunupaebabiabinē saya itsamonae pataneyaiyataenēxa patanavajunupaebijava yabara. <sup>14</sup>Bajaraxuata itsa papatajē paxamējavata, pacatsipaebatsi pexanialivaisi, Cristo pelivaisi. Tsipaji bajarapanacuanējjava Dioso paneitoroba pejumelivaisi patacatsipaebinēxa. Bajarapalivaisi copiaya baja paxanē pacatsipaebatsi. <sup>15</sup>Itsamonae baja Cristo pelivaisi jumecovēnēta itsamonae petsipaebixaetsi. Nexata Cristo pelivaisi pejumecovēnētsivi yabara najumetsēnētsiaya apo pajumaitsinē tsipae mapacueniajē: “Paxanē raja patatsipaebixae, bajarapamonae jumecovēnēta Cristo pelivaisi,” apo pajanē tsipae. Pacatojitsipatsi panevajēnaeyabelia panejumecovēntavanapaenēxa Dioso. Nexata pajitsipajē orijibia patacatsipaebavanapaenēxa pexanialivaisi, Cristo pelivaisi. Itsiata baitsi jane ēpanacuanējjava Dioso paneitoroba patatsipaebavanapaenēxa pejumelivaisi, bajaraēpanacuanējjava patsipaebavanapae-najē. <sup>16</sup>Nexata paxamē majotaje patacatsipaebicujinae, panepēnēyabelia penaetomaranējjava ata jamatabēpatsipaebajē pexanialivaisi, Cristo pelivaisi. Apo pajitsipaenē patatsipaebinēxa bajarapalivaisi itsaxuayo baja patavajēnaeya itsamonae tsipaebapona bajarapalivaisi.

<sup>17</sup>Pajivi itsamonaejavabelia navajunupaeba pexanaejava, benavajunupaeba Dioso peyavenonaejavatsi. Bajarapacuenia benavajunupaeba pejumetaevitsi peyaiy-

ataenexa Dioso. Bajarapajivi apo benavajunupaebi pijacuata pexanaejava jivi saya peyaiyataenexatsi. <sup>18</sup> Pajivi pijacuata navajunupaebabiaba: “Xanë ra bitso pexaniacuene exanabiabajë,” jai tsabiabi, bajarapajivi ajumematamobi. Tshipaji saya pijacuata navajunupaebabiaba. Itsiata baitsi jane pajivi yabara vajatuxanenë jumaitsi: “Mara pajivije xaniavaetsia netoponapona,” jai, nexata tojumenamatamotatsi.

**Pablo pelivaisi, penajumetsënëtsilivaisi  
petsipaebaponaevi ata, yabara pelivaisi**

**11** Natsiquejemalivaisi pecuaicuaijainë, xua exana, pijacuata banavajunupaeba itsamonaejavabelia. Bajara pijinia pacuenia xanë ata, xua exanajë, tajacuata pacanavajunupaebijitsiatsi. Bajarapacuenia tajacuata pacanavajunupaebi ata tsanetsi, itsiata jitsipajë xaniavaetsia ajamatabëcuenesaëya patanenamuxunaevetsinexamë. <sup>2</sup> Bajarapacuenia pacanavajunupaebijitsiatsi tshipaji bitso pacaasivatsi pacuenia Dioso pacaasiva. Pacatojitsipatsi ëCristo panejitsipaenexa. Pacuenia petiriva caenë jitsipa ëpamonanexa, bajarapacuenia caenë Cristo pajitsipare. <sup>3</sup> Bajayata Evapijiva yamaxëitojorobatsi dovathi penajumetsënëtsicueneta. Pacacacujunavatsi paxamë ata bajarapacuenia dovathi papecayamaxëitojorobianiva. Nexata paxamë yabara jamatabëjumaitsinë mapacueniaje: “Dovathi meta jamatabëcuenebijianaenatsi Corinto tomarapijivi. Cristo meta pejitsipaejavami copabiana,” jamatabëjanë paxamë yabara. <sup>4</sup> Pacacacujunavatsi penajumetsënëtsilivaisi petsipaebaponaevi papecatsipaebianiva. Tshipaji bajarapamonae pata baja paxamëjavata. Xanë Jesús pelivaisi pacatsipaebabiabatsi. Nexata Jesús pelivaisivecua bajarapamonae saicayacuenia pacatsipaebabiabi ata, itsiata bajarapalivaisi panamuxunaevetabiabame xaniavaetsia. Espíritu Santo, ponë pacatsijamatabëeca, pelivaisi, xanë pacatsipaebabiabatsi. Nexata Espíritu Santo pelivaisivecua saicayacuenia bajarapamonae pacatsipaebabiabi ata, itsiata bajarapalivaisi ata panamuxunaevetabiabame xaniavaetsia. Xanë pacatsipaebabiabatsi pexanialivaisi papecacapanepaelivaisinexa Diosojavabelia. Nexata bajarapalivaisivecua bajarapamonae saicayalivaisi pacatsipaebabiabi ata, itsiata panamuxunaevetabiabame xaniavaetsia. <sup>5</sup> Pamonae penajumetsënëtsilivaisi pacatsipaebabiaba, ayaijamatabëcuenevi nataeyabiaba. Paxanë paapóstolevinë bajarapamonae bitso panevecuaayaijamatabëcuenevi natane. Itsiata baitsi jane xanë bajarapamonaevecua beveliajamatabëcuenenënë apo nataenë. <sup>6</sup> Jivijavabelia xaniavaetsia livaisi tatsipaebinxexa, apo necujani ata, itsiata xaniavaetsia yapëtaniji xua yabara tsipaebajë. Xaniavaetsia Jesús pelivaisi patayapëtaejava paneyapëtaenexa, pacatsitanajamatabëcuene itajëtabiabatsi paxamëjavata itsa pacatsipaebavanapatsi Jesús pelivaisi.

<sup>7</sup> Paxamëjavata itsa pacatsipaebaponaaponatsi pexanialivaisi papecacapanepaelivaisinexa Diosojavabelia, itsacuenejavayo ata paxamëjavabelia apo pacavajëtsitsi. Xanë tacobeta asaëyata nacuenebabiabajë tanaevetsinexa. Bajarapacuenia beta-jibicuenia nacuenebabiabajë tanaevetsinexa pamatacabi pacatsipaebaponaaponatsi Jesús pelivaisi. Nexata baja pajumecovënëtamë Jesús pelivaisi itsamatacabi panexainanexa matacabi apo pevereverecejava. <sup>8</sup> Itsamonaë Dioso pejumecovënëtsivi itsa netoitoroba palata, itsiata pitajë paxamëjavata tanaevetaponaenexa bajarapapalatata. Nexata pacayavenonaaponatsi. Bajarapacuenia paxamëjavata naevetaponaenajë. Paxamë apo panerajutsimë palata. <sup>9</sup> Nexata pamatacabi paxamëjavata pononaenajë, namatavenonae atanë, apo pacavajëtsitsi panexainaeayajuvënë-

java patanerajutsinexamë. Itsiata Dioso pejumecovënëtsivi, Macedonia nacuaverena pepatsivi, netocapata daxita tanamatavenonaejava. Bajarapacuenia paxamëjavata ponaponajë itsacuenejavayo ata pacavajëtsinejevatsi patacajamatabëitonotsiyaniva. Apo najamatabëxainanë bexëajavabelia ata patacavajëtsinexa. <sup>10</sup> Yapëtaniji Cristo pelivaisi pepacue ne pexaniajailivaisicue. Bajaraxuata daxita Acaya nacuajava Cristo pelivaisi amoneya asaëya tatsipaebaponaejava, sivajamatabëcuenenabarëyanë. <sup>11</sup> Itsamonae xanë yabara jamatabëcuenenavëxaniabiaya pacajumaitsi: “Pablo raja apo pacaasiva. Bajaraxuata apo pacavecuapitsi palata,” pacajai. Jemajai raja bajarapamonae. Dioso raja yapëtane bitso patacaasivajava.

<sup>12</sup> Itsiata tavajënaeyabelia Dioso pejumelivaisi pacatsipaebaponaeatsi pacavajëtsinejevatsi itsacuenejavayo ata. Pamonae penajumetsënëtsilivaisi pacatsipaebabiaba, bajarapamonae pacamatamoyanijobabiaba papecatsipaebimatamo. Bajarapacuenia papeccamatamoyanijobabiabixae, nexata toacuenebitsi pevajënaeyabelia papeccajumaitsiponaenexa: “Paxanë ata patonacuenebavanapajë Dioso pacuenia Pablo tonacuenebaponapona Dioso,” papeccajainexa. <sup>13</sup> Bajarapamonae apo pepo apóstolevi. “Paxanë raja paapóstolevinë,” itsa pacajai, saya raja pacayamaxëitojoroba. Paxanë Cristo papijajivinë, paapóstolevinë, bajarapamonae saya panecuenecataeya apóstolevi naexana. <sup>14</sup> Paxamë apo bebasivajamatabëcuenenabenajacaemë bajarapamonae. Bajarapacuenia saya bajarapamonae exanavanapa papeccayamaxëitojorobinexa. Dovathi raja caëjëpatsi Dioso bepijaängelnë penaexanaenexa, bepexaniajailivaisi itajara petsipaebinë jivi petaenexatsi. <sup>15</sup> Nexata dovathi pijajivi ata pexaniacuene itajara exanavanapae ata, itsiata apo besivajamatabëcuenenabenajacaetsi. Paneconivajëto bajarapamonae xaina, bajarapaneconivajëtota itsamatacabi Dioso naneconitsiaexanaena bajarapamonae.

### **Pacuenia Pablo apóstolenëxae nabejibitsiaponapona yabara pelivaisi**

<sup>16</sup> Icatsia pacajumaitsitsi. Xua aeconoxae pacajumai tsanetsi, bajaraxua yabara pëtsa panetaneme betanematajemabinë. Bajarapacuenia panetae atamë, itsiata panenamuxunaevere palivaisi pacatsipaebijitsiatsi. Pacuenia peyamaxëitojorobiapóstolevi ajumeurajibia pacanavajunupaebabiaba paneyaiyataenexa, bajara pijinia pacuenia xanë ata ajumeurajibia pacanavajunupaebijitsiatsi pataneyaiyataenexamë. <sup>17</sup> Vajatuxanenë picani apo nitorobi patacanavajunupaebinexa. Itsiata pacuenia pematajemabinëtsi ajumeurajibia banavajunupaeba xua exana, bajarapacuenia xanë ata aeconoxae ajumeurajibia pacanavajunupaebijitsiatsi pataneyaiyataenexamë. <sup>18</sup> Pamonae peyamaxëitojorobiapóstolevi, ayaijamatabëcuenevi nataeyabiaba. Nexata ajumeurajibia pacanajamatabëcuene vajunupaebabiaba bajarapamonae. Nexata xanë ata bajarapacuenia ajumeurajibia pacanajamatabëcuene vajunupaebijitsiatsi. <sup>19</sup> Paxamë bitso ayailivaisi bepaneyapëtaevi panataneme. Itsiata apo payapëtaemë. Tshipaji saya jamatabëcuenenabarëyaya panamuxunaevetabiabame palivaisi pacatsipaebabiaba peyamaxëitojorobiapóstolevi. Pacuenia pematajemabinëtsi ajumeurajibia banavajunupaeba xua exana, bajarapacuenia ajumeurajibia pacanavajunupaebabiaba peyamaxëitojorobiapóstolevi. <sup>20</sup> Bajarapamonae bepapijajivitonëmëcuenia pacaitorobiabiata, itsiata xaniavaetsia panamuxunaevetabiabame. Panexainaejavaxi pacavecuaveretaponae ata, itsiata xaniavaetsia panamuxunaevetabiabame. Bijiyaya pacanaëcotabiabiata, itsiata xaniavaetsia panamuxunaevetabiabame. Pacaitabarapacababeyabiabiata, itsiata xaniavaetsia panamuxunaevetabi-

abame. <sup>21</sup>Paxanë bajarapacuenia apo pacaexanaetsi pamatacabi pajinavanapajë paxamëjavata.

Xua yabara bajarapamonae ajumeurajibia pacanavajunupaebabiaba, xanë ata necaëjëpa bajarapitsicuene yabara ajumeurajibia patacanavajunupaebinexa pataneyaiyataenexamë. <sup>22</sup>Bajarapamonae ayaijamatabëcuenevi nataeya itsa pacanavajunupaebabiaba, pacajumai tsabiabi paneyaiyataenexa: “Paxanë raja pajudfovinë,” pacajai tsabiabi. Xanë ata raja judíonënë. Itsiata bajarapacuenia apo pacajumaitsitsi pataneyaiyataenexamë. Bajarapamonae pacajumai tsabiabinua: “Paxanë raja Israelpijinë papemomoxinë,” pacajai tsabiabi. Xanë ata raja Israelpijinë pemomonë. Itsiata bajarapacuenia apo pacajumaitsitsi. Bajarapamonae pacajumai tsabiabinua: “Paxanë raja Abrahampijinë papemomoxinë,” pacajai tsabiabi. Xanë ata raja Abrahampijinë pemomonë. Itsiata bajarapacuenia apo pacajumaitsitsi. <sup>23</sup>Bajarapamonae Cristo bepijajivi nataeya ajumeurajibia pacanavajunupaebabiaba. Xanë xaniavaetsia Cristo tonacuenebaponaponajë. Xanë picani apo jitsipaenë patacanavajunupaebinexa. Itsiata Cristo tatonacuenebaponaponaejava, xanë ajumeurajibia pacanavajunupaebijitsiatsi. Pacuenia pematajemabinëtsi ajumeurajibia banavajunupaeba xua exana, bajarapacuenia ajumeurajibia pacanavajunupaebijitsiatsi. Itsiata mapacuenia pacanavajunupaebijitsiatsije. Xanë bitso Cristo tonacuenebaponaponajë bajarapamonae matatoxenetsia. Bajarapamonae matatoxenetsia xanë bitso nejumaconibabeyabiaba penaneconitsivi pejumaconibabeyabiabimacata. Bajarapamonae matatoxenetsia nenaneconitsiaexanabiaba penaneconitsivi pejebabiabibota taneetsinexa. Bajarapamonae matatoxenetsia anijatonë imoxo tanebeyaxuababiabi. <sup>24</sup>Cinco xuabeje judíovi nevaetaba tanenaneconitsiaexanaenexa. Caenevaetabi canacujitsia nejumaconibabeyabiaba penaneconitsivi pejumaconibabeyabiabimacata. Itsa nejumaconibabeyabiaba, treinta y nueve xuabeje nejumaconibabeyabiaba caenevaetabita. <sup>25</sup>Acueyabi icatsia xuabeje apo judíovi nevaetaba tanenaneconitsiaexanaenexa. Bajaraxuanë saicaya naebota nejumaconibabia. Icatsia itsamatacabijavabelia caeto judíovi ibotonëta netsecona. Acueyabi pijinia panamutobeje menia barcota tanaponaejavata, acueyabi xuabeje nayabubunajë manuameneta. Caepayajopaetanë, caemeravi, caematacabi yajava, manuameneta juenajetarucajë. <sup>26</sup>Xanë ayaicuenia jinarutabiabajë Cristo pelivaisi jivi tatsipaebaponaenexa. Nexata itsajavata netsiayai tsabiabi menia taponabiabijava. Itsajavata namutua itsa ponajë, netsiayai tsabiabi tanevecuanacobetoxotsinexa tacobecovëjavaxi. Itsajavata netsiayai tsabiabi tajananacuapijivi taneitsacueniabinexa. Itsajavata netsiayai tsabiabi saicayanacuapijivi taneitsacueniabinexa. Itsajavata netsiayai tsabiabi tomaranëjava, petusato nacuanëjava ata, manuamenejava ata. Itsajavata netsiayai tsabiabi pamonaejava Dioso bepejumecovënëtsivi penataevijava. <sup>27</sup>Itsajavata bitso nacuenebabiabajë. Cueranabiabajënu. Itsajavata apo majitabiabinë. Itsajavata bitso tajani tsabiabi. Meranua jitsipabiabajë. Itsajavata taxaejava xaenejevanë ponaponabiabajë. Itsajavata bitso aquenë tsabiabi apo taxainaexae tanaxatatsijava.

<sup>28</sup>Bajaraxua icatsia pematatsënëa mapacuenije. Caematacabi canacujitsia bitso sivanajamatabëxainabiabajë caetomarapijivi canacujitsia, Dioso pejumecovënëtsivi. <sup>29</sup>Pajivi jamatabëcuenecuerana Dioso pejumecovënëtsijava, xanë ata sivanajamatabëcuenecueranabiabajë. Pajivi itsajivi pejamatabëcueneta pibisiacuene ex-

anaeyaexanatsi pejopaenexa Dioso pejumelivaisivecua, bajarapajivi yapijiviau-ranë tsabiabi Diosojavabelia. Baraanaepanabiabajënuu pajivi pejamatabëcueneta jopaeaexanatsi. <sup>30</sup>Itsajivi itsa nitoroba tanajamatabëcuenevajunupaebinexa, nexata najamatabëcuenevajunupaebianajë tanajamatabëcuenetajëtšinexa taja-matabëcuenefaefaenaejava. <sup>31</sup>Vajatuxanenë Jesucristo paxa Diosojavabelia pex-aniajamatabëcuene berajutabiabatsi daxitamatacabijavabelianexa. Dioso baja ca-jena yapëtane jivi tatsipaebilivaisi pexaniajaicuene. <sup>32</sup>Imata ponaponajë Damasco tomarata. Nexata pepo iraevetsinë, Aretasvënënë, eveta bajarapaira. Nexata pi-jajivitonë eveta Damascotomara. Damascotomara matatoyorotsia yacaranata pi-aitayaëibopanaxanetota. Bajara payacaranatsijavaxaneto ibopananë mataropotsia catsanaeya pefaratsijava. Bajaraxua apia athëbëabetsia pacuenia pinijinaejavax-aneto apia. Nexata Damascotomara pevetsinë pijajivi itoroba tanevajënaeevetsinexa pabaupajava pitsapaejitsianë picani bajarapatomaravecua. Bajaraponë itoroba pi-jajivi tanevaetabinexa tanecaponaenexa picani penaneconitsivi pejebabiabiboya-belia. <sup>33</sup>Itsiaata baitsi jane itsamonae Dioso pejumecovënëtsivi bemapirecuenia pexanaejavaxanetoënëta neecaeyaexana. Nexata Damascotomara matatoyorotsia peyacaranatsi ibopanaxanetojumabelia neyamaëyacopareca athëbëyo perucaeven-tanavojotualia. Bajarapacuenia Damasco tomarata vecuapanepajë Damascotomara pevetsinë pijajivi.

**Pacuenia Pablo navajunupaeba bemajitsinaebota vajatuxanenë  
petsitanaitajëtabijavatsi yabara pelivaisi**

**12** Apo netsitaxanepanae picani ajumeurajibia patacanavajunupaebinexa. It-siaata baitsi jane pamona peyamaxëitojorobiapóstolevi, ajumeurajibia pacanavajunupaebabiaba saya paneyaiyataenexa. Nexata xanë ata ajumeurajibia pacanavajunupaebatsi bemajitsinaebota vajatuxanenë Jesucristo tanetsitanaita-jëtabijava. Neyapëtaeyaexananua pajamatabëcuenelivaisi xaina xuanë ata net-sitajëtabiaba. <sup>2-3</sup>Catorce pavaibeje xainajë tanecapanepaecujinae athëbëabetsia Dioso pijanacuayabetsia. Apo nayapëtaenë athëbëabetsia tanecaponaejava taper-abëto yajava. Itsa jume, ëtajamatabëcuene meta saya capona. Caenë Dioso yapë-tane pacuenia necapona athëbëabetsia. <sup>4</sup>Itsiaata necapona paraísojavabetsia. Bajara-jotatsia jumetaniji Dioso muetsia pexainabuatsilivaisi. Bajarapalivaisi Dioso apo netocopatsi tatsipaebinexa itsajivi ata. <sup>5</sup>Bajarapacuenia athëbëabetsia tanecapon-aejava tanavajunupaebinexa, necaëjëpa picani jivi taneyaiyataenexa. Itsiaata apo navajunupaebabiabinë tsane bajaraxua. Ètasaëjibijava saya navajunupaebabiabi-anajë. <sup>6</sup>Ayailivaisi picani xainajë ajumeurajibia tanavajunupaebaponaenexa pacue-nia taniji athëbëatsia. Ajumeurajibia itsa navajunupaebaponaejitsipajë, apo nava-junupaebaponaenë tsipae betanematajemabinëcuenia. Tsipaji ëpexaniajailivaisi navajunupaebaponaejitsipajë. Itsiaata baitsi jane apo navajunupaebaponaenë tsane daxita xua yapëtaniji. Tsipaji apo jitsipaeenë bajarapalivaisita jivi taneyaiyataenexa. Biji rajane jitsipajë jivi taneyaiyataenexa taexanaponaejava yabara, livaisi tatsipae-baponaejava ata yabara.

<sup>7</sup>Dioso netocopata tanavixaetaeyabinexa. Bajarapacuenia Dioso netocopata tanavixaetaeyabiabinexa tajacuata tanabarajamatabëjumaitsiyaniva mapacueni-aje: “Xanë baja cajena pinijicuene Dioso netsitajëtabiaba xua itsajivi ata apo tae. Bajaraxuata bitso xanë ayaijamatabëcuenenënë daxitajivi matatox-

enetsia,” tanabarajamatabējaiyaniva, Dioso netocopata tanavixaetaeyabiabinexa. Dioso netocopata dovathi pejamatabēcueneta tanevixaeitonotabiabinexa daxitamatacabi. <sup>8</sup>Diosojavabelia picani vajētajē acueyabi xuabeje tanevecuaajibi-aexanaenexa bajarapavixae. <sup>9</sup>Itsiata baitsi jane vajatuxanenē nejumlahtsi macpacueniaje: “Jume. Apo cavecuaajibiaexanaetsi tsane. Bitso casivatsi. Nexata cayavenonaenatsi daxita xua namatavenoname. Pajivi apo jamatabēcuenecaējē-pae atatsi pesaēta tanetonacuenebinexa tajacuene, itsiata baja itsa caējēpatsi tanetonacuenebinexa, nayapētane tayavenonaecue,” nejai vajatuxanenē. Bajaraxuata vajatuxanenē pijacuene tatonacuenebinexa, xanē tasaēta apo tanejamatabēcuenecaējēpaejava, nasivajamatabēcuenenabarēyanē. Tspiji Cristo pesaēta neyavenonabiaba daxitacuene yabara. <sup>10</sup>Apo tanejamatabēcuenecaējēpaeaxae tasaēta tatonacuenebinexa vajatuxanenē pijacuene, nasivajamatabēcuenenabarēyanē tsabiabi. Itsamonae pibisiacuenia itsa nebijataeyabiaba Cristo pijajivitonēxaenē, nasivajamatabēcuenenabarēyanē tsabiabi. Itsacuenejavaxi itsa namatavenonabiabajē, itsiata nasivajamatabēcuenenabarēyanē tsabiabi. Itsamonae itsa nebejiobiaexanabiaba Cristo pijajivitonēxaenē, itsiata nasivajamatabēcuenenabarēyanē tsabiabi. Itsa netsiayapēbeje tsabiabi tatonacuenebinexa Cristo pijacuene, itsiata nasivajamatabēcuenenabarēyanē tsabiabi. Tspiji paepatota apo nejamatabēcuenecaējēpae, bajarapaepatota vajatuxanenē bitso nejamatabēcueneyavenonabiaba.

**Pacuenia bitso Pablo sivanajamatabēxaina Dioso  
pejumecovēnētsivi, Corinto tomarapijivi, yabara pelivaisi**

<sup>11</sup>Pamonae peyamaxēitorobiapóstolevi, saya jivi peyaiyataenexatsi ajumeurajibia navajunupaebabiaba pacuenia pematajemabinētsi banavajunupaeba ajumeurajibia. Bajarapacuenia xanē ata navajunupaebajē. Apo jitsipaenē picani tanavajunupaebinexa. Paxamē xaniavaetsia itsa panevajunupaebijitsipame pacuenia exanaponaponajē paxamējavata, nexata xanē tajacuata apo navajunupaebinē tspiae. Beveliajamatabēcuenenē atanē, itsiata pamonae peyamaxēitorobiapóstolevivecua, xanē apo beveliajamatabēcuenenēnē. <sup>12</sup>Paxamējavata itsa ponaponajē, netsiayapēbeje ata, bajayajebi pacatsitaexanaponaponatsi pacuenia Dioso nitoroba. Pacatsipaebaponaponatsi Jesús pelivaisi. Nexata pacatsitaexanabiabatsi pinijicuene taexanaejava Dioso pesaēta. Nexata paneyapētaneme Dioso taneyavenonabiabi-  
java. <sup>13</sup>Pacuenia taniji daxita Dioso pejumecovēnētsivi, bajarapacuenia paxamē ata pacatanetsi. Nexata itsamonae Dioso pejumecovēnētsivivecua bepaveliajamatabēcuenenimē, apo pacataetsi. Itsamonae Dioso pejumecovēnētsivi, neyavenonabiaba itsajota namatavenonajē. Itsiata bajarapacuenia paxamē ata pataneyavenon-aenexamē, apo pacavajētsitsi. Pamatacabi ponaponajē paxamējavata, apo pacavajētsitsi itsacuenejavayo ata. Pētsa itsiata bajaraxua pasivanajamatabēxainame. Biji rajane pasivajamatabēcuenenabarēyamēre itsacuenejavayo ata apo patacavajētsijava.

<sup>14</sup>Mabaja panamutotaje, acueyabi namuto taponaenexa paxamējavabelia naxaniavaetaponaponajē baja. Itsiata apo pacamatamoyanijobi tsanetsi Dioso pejumelivaisi patacatsipaebimatamo. Tspiji palata apo jitsipaenē. Jitsipajē rajane xaniavaetsia panejumecovēnētsinexa Dioso. Bepataximē pacatanetsi. Pacuenia pejevaxi paxajavabelia apo rajutsi palata paxa penaevetsinexa, bajara pijinia pacuenia paxamē ata apo panerajutsimē palata tanaevetsinexa. <sup>15</sup>Xanē patacayavenonaenexa, mapacuenia exanaejitsipajēje. Daxita taxinaejavami, veretsi-



pajë jamatabëcuenebarëyaya. Tasaëtsaponaponaeeptojebi abaxë mapanacuataje, pacayavenonabiabijitsipatsi. Bajarapacuenia pacayavenonabiabijitsipa patacajaanatabëcuene yavenonaenexa, xaniavaetsia Dioso panejumecovënëtsinexa. Tavajënaeyabelia bitso pacaasiva tsaponae atatsi, itsiata covë paxamë juya bevelia saya paneasivamë tsaponae.

<sup>16</sup> Itsamonae paxamëyajuvënëvi xanë yabara jamatabëcuenenavëxaniabiaya jumai tsabiabi: “Xaniajai. Vaxaitsi Pablo apo rajutsitsi palata, Dioso pejumelivaisi vajanacatsipaebimatamo. Itsiata Pablo piatatsacanë. Nexata meta itsacuenia nacayamaxëitojorobiaya nacavecuapitabiaba palata,” jai tsabiabi itsamonae xanë yabara.

<sup>17</sup> Itsanë ata cajena, paxamëjavabelia xanë taitorobiviyajuvënëni, yamaxëitojorobiaya palata apo pacavecuapitsi. <sup>18</sup> Itorobajë baja Tito peponaenexa paxamëjavabelia papacataenexa. Itorobajënuua itsanë Dioso pejumecovënëtsinë Tito peyajavaponaenexa. Nexata pamatacabi Tito ponapona paxamëjavata, ¿pacavajëta tsaja palata? Jume. Apo pacavajëtsi cajena. Paxanëbeje Titobeje panajamatabëcuenejëpajëbeje. Nexata panacuenejëpajëbeje.

<sup>19</sup> Panesivajamatabëjumaitsimë raeta: “Bajarapacuenia Pablobana nacanajaanatabëcuene livaisipaeba saya penayajivicuaicuaijainexa vaxaitsi vajananeconitsiaexanaeyaniva,” panesivajamatabëjamë raeta. Bajarapacuenia itsa pacanavajunupaebatsi, apo pacanavajunupaebitsi patacujunavixae patanenaneconitsiaexanaejavamë. Pacatsipaebatsi raja Dioso pitabarata pacuenia Cristo panetojitsipa. Tajamonae bitso patacaasivavi, daxita palivaisi baja pacatsipaebabiabatsi, pacatsipaebabiabatsi patacajaanatabëcuene yavenonaponaenexa. Nexata bajarapalivaisi panevajënaeyabelia pacatsijamatabëvitsabaponaena Dioso papijajivixaemë.

<sup>20</sup> Pamatacabi ponaenajë paxamëjavabelia, bitso meta najamatabëxaineya patsianajë paxamëjavata. Aeconoxae pajitsipame tapatsinexa paxamëjavata. Itsiata meta itsa patsianajë paxamëjavata, apo pajitsipaemë tsane patacananeconitsiaexanaenexa. Tsipaji meta apo pacacaxitarabi tsanetsi pexaniacuenia panejinavanapaejavata pacuenia pacatojitsipatsi. Itsa patsianajë paxamëjavata, pacataenatsi meta panenajumeanaenotabiabijava. Pacataenatsi meta panenacaëbabiabijava ata. Pacataenatsi meta panenabaraanaepanabiabijava ata. Pacataenatsi meta apo paneyavenonaejava itsajiviyo ata. Pacataenatsi meta itsamonae pepëya pibisiacuenia najumetsënëtsia panebaracuaicuaijaitabiabijava ata. Pacataenatsi meta itsamonaevecuua paayajamatabëcuenevimë panenataeyabiabijava ata. Pacataenatsi meta apo panenajamatabëcuenejëpaexae navecuantsanaeya panejinavanapaejavata ata. <sup>21</sup> Paxamëjavata icatsia itsa patsianajë, Dioso meta pitabarata pacayapijivaura tsanetsi pibisiacueni paneexanavanapaejava yabara. Bajaraxuata bitso pacasivanajamatabëxainatsi icatsia patacataenexalia. Tsipaji itsa apo pajinavanapaemë tsane pacuenia pacaitorobatsi, patacasivajamatabëcuenebarëyjavami, nevecuaajibi meta tsane. Paxamëyajuvënëvi bajayatajavaverenacujinae pibisiacueni pexanavanapaejava pevitota, apo sivajamatabëcuenebëjai. Apo jamatabëcopatsinua pibisiacueni pexanavanapaejava pevitota.

**Pacuenia icatsia Pablo itaveta Corinto tomarapijivi  
Diosojavabelia penaneconitsiyanima yabara pelivaisi**

**13** Aeconoxae baja icatsia ponaejitsianë paxamëjavabelia acueyabi namutonexa. Pibisiacuene pexanaejivi yabara, Dioso pejumelivaisibaxutota jumaitsi mapacueniaje: “Pajivi pibisiacuene exana, xanepana pevajunupaebinexatsi anijajivibeje, acueyabi pajivibeje ata, petaevitsi. Nexata xuacujinae xanepana jane baja penaneconitsiaexanaenexatsi,” jai Dioso pejumelivaisibaxutota. Nexata paxamëjavabelia itsa patsianajë, bajarapacuenia xanë pacananeconitsiaexanaenatsi. <sup>2</sup>Imata panamutomi pacaitavetatsi daxita paxamë pibisiacuene paneexanavana-paejava panecopatsinexa, Diosojavabelia pananeconitsiyanima. Bajarapacuenia itavetajë itsamonae ata pibisiacuene pexanavanapaeyanima. Aeconoxae tajë pacavecuaponapona atatsi, pacatoyaquinatsi icatsia patacaitavetsinexa pibisiacuene paneexanaeyanima. Icatsia paxamëjavabelia itsa patsianajë, pacananeconitsiaexanaenatsi padaxitamë. Caejivi ata apo bejiobiataenë tsane pibisiacuene pexanaeconi yabara. <sup>3</sup>Itsa pacananeconitsiaexanaenatsi, ajumesaënë tsane patacananeconitsiaexanaenexa. Nexata bajarajota xaniavaetsia paneyapëtaename tayajavacuauicuaijitsabiabijava Cristo. Cristo baja cajena pijamatabëcuenesaëjava, pacatsitanajamatabëcuenetajëta itsa pacayavenonaponapona paxamëjavata. <sup>4</sup>Xaniajai rabaja. Pacuenia vaxaitsi mapanacuapijivitsi ajamatabëcuenesaëjibitsi, bajara pijinia itsi Cristo ata mapanacuata itsa naexana pacuenia vaxaitsi banaexanatsi. Nexata Cristo cruzata itsa beyaxuabatsi, Dioso pesaëta icatsia asaëyaexanatsi petëpaecujinae. Paxanë pajamatabëcuenesaëjibi atanë, itsiata aeconoxae Dioso pesaëta Cristo payajavajinavanapajë patacajamatabëcueneyavenonaenexa.

<sup>5</sup>Jica jane. Panajamatabëcuenelivaisiëjere itsa xaniajai pepacuene Cristo papijajivimë. Itsa pepacuene Cristo papijajivimë, nexata payapëtaename Cristo papecajavaponaponaejava. Itsa Cristo apo papijajivimë, nexata Cristo apo pacayajavaponapona. <sup>6</sup>Paxanë pajamatabëjumaitsinë paxamë yabara mapacueniaje: “Corinto tomarapijivi vaxaitsi itsa nacacuenecanaëjëtsiana, xaniavaetsia yapëtaena pepacuene Cristo pijajivicuenetsi,” pajamatabëjanë. <sup>7</sup>Pacatovajëtaaponatsi Diosojavabelia pibisiacuene paneexanaponaeyanima. Bajarapacuenia itsa pacatovajëtaaponatsi Diosojavabelia, itsajamatabëcuene apo pacasivanajamatabëxainatsi. Nexata apo pajamatabëjumaitsinë paxamë yabara: “Itsa bajarapamonae xaniavaetsia jinavanapaena, nexata pijinia daxitajivi nacayapëtaena pepacuene apóstolevicuenetsi,” apo pajamatabëjanë paxamë yabara. Bajarapacuenia Diosojavabelia pacatovajëtatsi tsipaji pacatojitsipatsi ëpexaniacuene paneexanavanapaejava. Xaniavaetsia itsa pajinavanapaename, nexata itsa papatsianajë paxamëjavabelia, ajibi tsane patacayabarananeconitsiaexanaejava. Pacuenia Cristo panetocopata patananeconitsiaexanaenexa pijaneconi pexainaevi, bajarapacuenia apo pacaexanaetsi tsane. <sup>8</sup>Tsipaji acuenebi patananeconitsiaexanaejava pajivi baja jumecovënëta pexaniajailivaisi, Jesucristo pelivaisi. Pananeconitsiaexanaenajë ëpijaneconi pexainaevi. <sup>9</sup>Aneconijibia itsa pajinavanapaename, acuenebi patacananeconitsiaexanaenexa. Itsiata pacasivajamatabëcuenebarëyatsi. Tsipaji apo paxainaevi paneconi yabara pacananeconitsiaexanaejitsiatsi. Pacatovajëtaaponatsinua Diosojavabelia panevajënaeyabelia panejamatabëcuenevitsabaponaenexa Dioso panejumecovënëtsijava. <sup>10</sup>Pacatoyaquinaliatsi mapabaxutoje taponaevajënaeya paxam-

ējavabelia tavajēnaelia panenajamatabēcuenexanebinexa pibisiacuene paneexanae-javavecua. Nexata itsa patajopaeliajē paxamējavabelia, apo pacabijatae tsanetsi. Apo pacananeconitsiaexanaetsinua tsane. Dioso nitoroba patacaevetsinēnexa. Nex-ata itsa patsialiajē paxamējavabelia, apo jitsipaeñē tsane patacananeconitsiaex-anaenexa. Biji rajane jitsipajē patacajamatabēcue saēyaexanaejava panevajē-naeyabelia paneajamatabēcuenesaēnexa Dioso panejumecovēñetsijava.

<sup>11</sup>Tajamonae, pajamatabēcuenearēyamēre tsavanapae. Panevajēnaeyabelia panajamatabēcue vitsabiaexanaponare Dioso panejumecovēñetsijava. Panamux-unaevere palivaisi pacatoyaquinaliatsi. Najamatabēcueñepaeya pajinavanapare jamatabēcuenexanepanaeya. Dioso vajanacaasivanē. Bajaraponē jamatabēcuenex-anepanaeya nacajinavanapaeyaexana. Nexata Diosojavabelia pacatovajētabiabatsi Dioso papecayajavaponaponaenexa. <sup>12</sup>Paxamē ata Dioso panejumecovēñetsixaē, xaniavaetsia nasivaya namataenetsia panabajacobabiabare. <sup>13</sup>Daxita pamonaē Dioso pejumecovēñetsivi, majota pejinavanapaevije, pacabajacobalia.

<sup>14</sup>Pacatovajētabiabatsi Diosojavabelia vajatuxanenē Jesucristo papecayavenon-abiabinexa. Pacatovajētabiabatsinua itsamonae ata asivaya panetaenexa pacue-ña paxamē ata Dioso pacaasiva. Pacatovajētabiabatsinua Espiritu Santo ata papecayajavaponaponaenexa.

## Mapabaxutoje San Pablo toyaquina Galacia nacuapijivijavabelia

### Pacuenia Pablo toyaquina mapabaxutoje Dioso pejumecovënëtsivi, Galacia nacuapijivijavabelia, yabara pelivaisi

**1** Xanë Pablonë, apóstolenënë. Jivi pejamatabëcueneta apo nitorobi tatsi-paebaponaenexa Jesucristo pelivaisi. Nitorobabeje raja Jesucristobeje, paxa Diosobeje, ponë icatsia Jesucristo asaëyaexanatsi petëpaecujinae. <sup>2</sup>Pacatoyaquinatasi mapabaxutoje paGalacia nacuapijivimë, Dioso panejumecovënëtsivi. Daxita majota Dioso pejumecovënëtsivi pacajamatabënajinalia. <sup>3</sup>Pacatovajëtabi-abatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa. <sup>4</sup>Pacuenia vaxa Dioso itorobatsi, vajatuxanenë Jesucristo pijacuata tonacaeveta pebeyaxuabinexatsi pibisiacuene vaxaxanaeconi yabara. Nexata Jesucristo pejamatabëcueneta vaxa Dioso aneonijibia nacatane. <sup>5</sup>Bajaraxuata vaxaitsi Diosojavabelia jumaititsi tsabiabi: “¡Xamë Diosomë, bitso ayajamatabëcuenenëmë!” jaitsi tsabiabi daxitamatabijavabelianexa. Bajara itsi tsane.

### Pacuenia baja Jesús pelivaisivecua pematatsënëa ajibi itsalivaisi jivi pecapanepaelivaisinexatsi yabara pelivaisi

<sup>6</sup>Paxamë saya caematacabibejecujinae, pacopabame Dioso panejumecovënëtsijava. Bajaraxuata xanë bitso pacasivajamatabëcuene nabenajacatsi. Jesucristo picani pejamatabëcueneta, Dioso pacaitaxutotsoniatane itsa pacajunata papecacapanepaenexa. Itsiata baja aeconoxae jamatabëcuenenavëxaniabiaya pavecuanajamatabëcuene pënëyorotame saicayalivaisijavabelia, bepapecacapanepaelivaisinexa itajara panejumetaexae. <sup>7</sup>Itsiata baitsi jane baja pematatsënëa ajibi itsalivaisi papecacapanepaelivaisinexa. Itsamonae pata paxamëjavata livaisi papecatsipaebinexa. Bajarapamonae pata papecajamatabëcuene naepatajërëcaeyaexanaenexa. Bajarapamonae saicayalivaisi jamatabëpacatsipaebapona panecopabinexa panejumecovënëtsijava pexanialivaisi, Jesucristo pelivaisi. <sup>8</sup>Copiaya baja cajena paxanë pacatsipaebatsi pexanialivaisi, Jesucristo pelivaisi, papecacapanepaelivaisinexa Diosojavabelia. Nexata acuenebi paxanë pataitothianaenexa bajarapalivaisi. Athëbëvetsica pepatsinë ata tsipae, ángelnë, acuenebi paitothianaenexa bajarapalivaisi. Jesucristo pelivaisivecua, saicayalivaisi, itsa pacatsipaebijitsipatsi, nexata Diosojavabelia pananeconitsipajë. Nexata Dioso pananeconitsiaexanaejitsipa daxitamatabijavabelianexa. <sup>9</sup>Copiaya baja cajena pacuenia pacatsipaebatsi, bajara icatsia pacuenia aeconoxae ata pacatsipaebatsi. Pajivi Jesucristo pelivaisivecua, saicayalivaisi pacatsipaeba bepapecacapanepaelivaisinexa itajara, nexata bajarapajivi Dioso naneconitsiaexanaenatsi daxitamatabijavabelianexa. Tsi-paji pacacopatsiaexana panejumecovënëtsijava pexanialivaisi, Jesucristo pelivaisi.

<sup>10</sup>Payapëtaneme rabaja xua yabara bajarapacuenia pacajumaititsi. Bajarapacuenia itsa pacajumaititsi, apo pacajumaititsi saya jivi tanesivabarëyanexa. Jume cajena. Jivi apo nesivabarëya ata Jesucristo pelivaisi jivi tatsipaebaponaejava yabara, itsiata jitsipajë jivi tatsipaebinexa Jesucristo pelivaisi, Dioso tanesivajamatabëcuenebarëyanexa. Saya jema jivi livaisi itsa tsipaebijitsipajë saya tanesiv-

abarëyanexa, nexata pacuenia Jesucristo nitoroba, apo tsipaebaponaenë tsipae. Nexata Jesucristo apo pijajivitonënë tsipae.

### **Pacuenia Pablo Dioso junatatsi apóstolenënexa yabara pelivaisi**

<sup>11</sup> Tajamona, jitsipajë patacatsipaebinxexa mapalivaisije. Palivaisi tsipaebaponaajë jivi pecapanepaelivaisinxexa Dioso javabelia, bajarapalivaisi itsajivi ata pejamatabëcueneta apo pexanaelivaisi. <sup>12</sup> Itsajivi ata cajena bajarapalivaisi apo netsipaebi. Jesucristo raja neyapëtaeyaexana bajarapalivaisi. Nexata Jesucristo nitoroba jivi tatsipaebaponaenexa bajarapalivaisi.

<sup>13</sup> Panevënëlivaisitaneme rabaja pacuenia exanapononajë pamatacabi abaxë jumecovënëtajë Dioso Moiséspijinëta penajumecopatsilivaisi. Bajarapalivaisi Dioso Moiséspijinëta najumecopata pajudfovinë patajumecovënëtsinexa. Panevënëlivaisitanemenua pacuenia barajinabiabajë Jesucristo pijajivi. Apo itaxutobejiobiataeyabiabinë cajena tsiquirijavayo ata. Jamatabëverebiaxuababiabajë Jesucristo pijajivi. <sup>14</sup> Xanë abaxë itsa pevëjëatonë, jumecovënëtajë bitso Dioso Moiséspijinëta penajumecopatsilivaisi. Xanë bitso asaëyata jumecovënëtsiapononajë bajarapalivaisi pitorobicuenia. Daxita pamona pevëjëavi judíovi, Israel nacuapijivi, matatoxenetsia xanë bitso casaenë tajumecovënëtsijava bajarapalivaisi. <sup>15</sup> Itsiata baitsi jane tanaexanaevajënaeya ata, Dioso nitapeta Jesucristo tajumecovënëtsinexa. Dioso taneitaxutotsoniataexae, nejunata apóstolenëxanë. <sup>16</sup> Nexata pamatacabi ponajë Damasco tomarabelia, namutoepatota Dioso netsitajëta pexënato. Nexata Dioso neyapëtaeyaexana pexënato pelivaisi. Bajarapacuenia Dioso pexënato pelivaisi neyapëtaeyaexana tatsipaebaponaenexa apo judíovijava. Nexata Dioso taneyapëtaeyaexanaecujinae pexënato pelivaisi, apo ponaenë itsajivijavabelia ata tayanijobinexa Dioso pexënato pelivaisi. Apo ponaenë tanemuxujobinexanua Dioso pexënato pelivaisita. <sup>17-18</sup> Pamatacabi namutoepatota Dioso netsitajëta pexënato, apo naviatecaenë Jerusalén tomarabelia tayanijobinexa pamonaejavabelia xanëvecua copiaya exantsi apóstolevi. Biji rajane rovia paliajë Damasco tomarabelia. Nexata Damasco tomarata tapatsicujinae, caenë ponajë Arabia nacuayabelia, petusato nacuayabelia. Nexata petusato nacuata Dioso xaniavaetsia neyapëtaeyaxanapona pexënato pelivaisi. Bajaraxuacujinae icatsia bexëa Arabia nacuaverena naviarenajë Damasco tomaraberena. Bajaraxuacujinae tapuaxinae baja acueyabi pavaibeje tajumecovënëtsicujinae Dioso pexënato pelivaisi, ponajë jane baja Jerusalén tomarabelia apóstolenë Pedro tacaxitajarabinexa. Nexata Jerusalén tomarata, Pedrojavata, napononajë quince pamatacabibeje. <sup>19</sup> Itsiata Jerusalén tomarata pematatsënëa itsaapóstolenë apo taenë. ËSantiago saya, vajatuxanenë pejuyapijinë, taniji. <sup>20</sup> Xaniavaetsia pacajumaitsitsi Dioso pitabarata. Palivaisi pacatoyaquinatsi, pexaniajailivaisi cajena.

<sup>21</sup> Jerusalén tomarata taponaponaecujinae, ponajë icatsia Siria nacuayabelia Jesucristo pelivaisi jivi tatsipaebaponaenexa. Ponajë Cilicia nacuayabelia ata. <sup>22</sup> Jesucristo pelivaisi jivi itsa tsipaebanajetarucajë, Jesucristo pelivaisi pejumecovënëtsivi, Judea nacuapijivi, abaxë apo neyapëtae. Tsipaji abaxë Judea nacuata apo tsipaebaponaenë Jesucristo pelivaisi. <sup>23</sup> Bajarapamona saya nevënëlivaisitane itsamonae xanë yabara pejumaitsijava: “Ponë pina nacabarajinabiaba Jesucristo pelivaisi vajajumecovënëtsivi, aeconoxae pina baja bajaraponë ata jumecovënëta. Nexata pina itsamonae ata pejumecovënëtsinexa Jesucristo pelivaisi, bajaraponë tsipaebapona.

Bajarapalivaisi yabara bajaraponë jamatabënacaverebiaxuaba picani,” pejaijava, itsamonae xanë yabara nevënëlivaisitane Judea nacuapijivi, Jesucristo pelivaisi pejumecovënëtsivi. <sup>24</sup> Bajaraxuata Judea nacuapijivi, Jesucristo pelivaisi pejumecovënëtsivi, jumai tsabiabi Diosojavabelia: “Diosomë, bitso ayaijamatabëcuenenëmë. Tsipaji Pablo ata najamatabëcuenecopatsiaexaname nexënato Jesucristojavabelia,” jai tsabiabi xanë yabara.

### **Pacuenia Pablo pevëna apóstolevi Jerusalén tomarata xaniavaetsia copiapitatsi yabara pelivaisi**

**2** Jerusalén tomarata naropotajë Jesucristo pelivaisi jivi tatsipaebanajetarucaenexa Siria nacujava, Cilicia nacujava ata. Nexata Jesucristo pelivaisi jivi tatsipaebanajetarucaecujinae bajarapanacuabejjava, catorce pavaibejecujinae matapania icatsia patajë tacovëyaberena, Jerusalén tomarata. Bernabëbeje Titobeje barëpatajë. <sup>2</sup> Patajë Jerusalén tomarata tsipaji Dioso nitoroba tapatsinexa Jerusalén tomarata. Nexata Jerusalén tomarata Dioso pejumecovënëtsivi ëpenamatacaitorobivi penacaetuatsijavata, navajunupaebajë bajarapamonaejavabelia. Bajarapacuenia navajunupaebajë Dioso pejumecovënëtsivi penamatacaitorobivijavabelia, taneyapëtaenexa Jesucristo pelivaisi tatsipaebaponaejava apo judíovijava pecapanepaelivaisinexatsi Diosojavabelia. Bajarapacuenia navajunupaebajë Dioso pejumecovënëtsivi penamatacaitorobivijavabelia tsipaji jamatabëjumaitsinë: “Maraeta pamonaë apo pejitsipaecuenia, tsipaebaponajë apo judíovijavaje,” jamatabëjanë. Itsiata baitsi jane Dioso pejumecovënëtsivi penamatacaitorobivi, tsitanepanatsi pacuenia tsipaebaponajë apo judíovijava. <sup>3</sup> Bajarapacuenia tanavajunupaebixae, taneyanabinë Tito, apo judíonë ata, Dioso pejumecovënëtsivi penamatacaitorobivi pajudíovinë patajacuenia apo perabëcaucutsiaexanaetsi. Baitsi apo boupiperabëcaucutsiaexanaetsi. <sup>4</sup> Itsamonae, judíovi, Jesucristo pelivaisi apo jumecovënëtsi. Nexata bajarapamonae Jesucristo pelivaisi bepejumecovënëtsivicuenia, saya jema najunua paxanë Jesucristo pelivaisi patajumecovënëtsivijavaberena. Bajarapamonae picani jitsipa Tito peperabëcaucutsiaexanaenexatsi. Itsiata apo perabëcaucutsiaexanaetsi. Bajarapamonae saya jema najunua patanenaitaxutocaevetsinexa patanetaenexa jamatejema patavecuajinavanapaejava Dioso Moiséspijinëta penajumecopatsilivaisi, palivaisimi patajasalinaivi jumecovënëta. Bajarapalivaisi patajumecovënëtsijavami, pacopatajë baja Jesucristo pejamatabëcueneta. Nexata pamonaë panenaitaxutocaveta, jamatabëpanejumecovënëtsiaexana picani icatsia Dioso Moiséspijinëta penajumecopatsilivaisi. <sup>5</sup> Itsiata baitsi jane tsiquirijavayo ata apo paexanaenë pacuenia bajarapamonae paneitoroba. Nexata Jesucristo pelivaisi jivi itsa patsipaebaponajë, apo payajavatsipaebaponaenë Dioso Moiséspijinëta penajumecopatsilivaisi. Dioso Moiséspijinëta penajumecopatsilivaisi, itsa pacatsipaebijitsipatsi, jamatabëcuenenavëxaniabiaya pajamatabëjumaitsimë tsipae: “Naperabëcaucutsiaexanaenajë pacuenia judíovi naperabëcaucuba. Jumecovënëtsianajënuu Dioso Moiséspijinëta penajumecopatsilivaisi. Nexata Dioso pepacuenenecapanepaena,” pajamatabëjamë tsipae jamatabëcuenenavëxaniabiaya.

<sup>6</sup> Jerusalén tomarata Dioso pejumecovënëtsivi penamatacaitorobivijavabelia, navajunupaebajë Jesucristo pelivaisi tatsipaebaponaejava apo judíovijava pecapanepaelivaisinexatsi Diosojavabelia. Itsiata bajarapamatacabi Dioso pejumecovënëtsivi penamatacaitorobivi, apo netsipaebi itsalivaisiyo ata Jesucristo pelivaisi

tayajavatsipaebaponaenexa apo judíovijava. Bajarapamonae yabara itsamonae jamatabějumi tsabiabi: “Mapamonaeje Dioso pejumecovënětsivi bitso pepo penamatacaitorobivi. Nexata bitso ayaijamataběcuenevi,” jamatabėjai tsabiabi. Itsiata xaně apo sivanajamataběxainaeně bajarapamonae ayaijamataběcuenevi tataenexa. Tspiji cajena daxita vaxaitsi, Jesucristojavabelia vajanajamataběcuenecepatšivi, Dioso najěpaeya nacatane. <sup>7</sup> Dioso pejumecovënětsivi penamatacaitorobivi, apo nitorobi itsalivaisiyo ata tayajavatsipaebaponaenexa apo judíovijava itsa tsipaebajě Jesucristo pelivaisi pecapanepelivaisinexatsi Diosojavabelia. Biji rajane Dioso pejumecovënětsivi penamatacaitorobivi, neyapětane Dioso taneitorobiněcuene. Nexta Dioso pejumecovënětsivi penamatacaitorobivi, jumaitš xaně yabara: “Xaniajai. Pablo Dioso itorobatsi Jesucristo pelivaisi petsipaebaponaenexa apo judíovijava. Pacuenia copiaya Pedro Dioso itorobatsi Jesucristo pelivaisi petsipaebaponaenexa judíovijava, bajara pijinia pacuenia Pablo ata Dioso itorobatsi Jesucristo pelivaisi petsipaebaponaenexa apo judíovijava,” jai Dioso pejumecovënětsivi penamatacaitorobivi xaně yabara. <sup>8</sup> Apóstoleně Pedro Dioso pesaěta Jesucristo pelivaisi petsipaebaponaexae judíovijava, judíovi baja najamataběcuenecepatšipabapona Jesucristojavabelia. Bajara pijinia pacuenia xaně ata Dioso pesaěta Jesucristo pelivaisi tatsipaebaponaexae apo judíovijava, apo judíovi ata baja najamataběcuenecepatšipabapona Jesucristojavabelia.

<sup>9</sup> Mara pamataběxěyo Jerusalén tomarata Dioso pejumecovënětsivi penamatacaitorobivije. Santiago, Pedro, Juan, bajarapamataběxěyo. Dioso pejumecovënětsivi penamatacaitorobivi, itsa neyapětane Dioso taneitorobiněcuene tatsipaebaponaenexa Jesucristo pelivaisi apo judíovijava, nexata Dioso pejumecovënětsivi penamatacaitorobivi, panebajacobabeje pexaniacuenia Bernabébeje. Bajara pacuenia Dioso pejumecovënětsivi penamatacaitorobivi, pexaniacuenia panebajacobabeje tspiji paneyapětanebeje patatonajuanacuenebivicuene Dioso pijacuene. Bajaraxuata paxaněbeje Bernabébeje, Jesucristo pelivaisi patavajěnaeyabeliabeje patsipaebaponaějěbeje apo judíovijava. Santiagobana pijinia, Pedrobana, Juanbana, tsipaebapona judíovijava. <sup>10</sup> Bajarapamonae caelivaisiyo panejumaitšibeje Jerusalén tomarata. Paneitorobabeje patayavenonaenexabeje Dioso pejumecovënětsivi, bitso bepejiobivi, Jerusalén tomarata pejinavanapaevi. Bajaraxuata xaně jamataběcuenebarěyaya bajarapamonaenexa ofrenda toexanaeyaexanaponajě itsaxuayo tatsipaebilivaisi, Jesucristo pelivaisi, jumecovënětapona.

### **Pacuenia Pablo muxujioba Pedro Antioquía tomarata yabara pelivaisi**

<sup>11</sup> Perujulivaisimi, judíovi pijalivaisi, itavetatsi judíovi caejavata peyjavana baniyaniva apo judíovi. Pedro itsa ponapona Antioquía tomarata, muxujiobajě daxitajivi pitabarata. Tspiji Pedro apo pexanepanaecuene exana. Pedro apo judíovijavata itsa naponapona, jemata apo judíovi vecuanasaicayaba. <sup>12</sup> Pedro, judíoně ata, pecopatsixae baja pejumecovënětsijava perujulivaisimi, judíovi pijalivaisi, abaxě picani Pedro jamatejema nanabanebiaba apo judíovijavata. Nexata itsa pata Santiago pijajivi Antioquía tomarata, Pedro baja vecuanasaicayaba apo judíovi. Tspiji Pedro cujunava Santiago pijajivi petayenivatsi apo judíovijavata penanabanijava. Pedro baja nexata copata apo judíovijavata penanabanebiabijava. Santiago pijajivi perujulivaisi tsiteca jumecovënětavanapa. Nexata Santiago pijajivi jumai tsabiabi: “Pamonae apo judíovi ata, Jesús pelivaisi itsa jumecovëněta, bajarapa-

monae ata benaperabëcaucubiaexana,” jai tsabiabi. Nexata Pedro cujunava bajaramonae. Nexata Pedro jamatabëjumaitsi: “Itsa netaejitsipa Santiago pijajivi tananabanijava apo judíovijavata, neneconitsipa judíovijavabelia Jerusalén tomarata. Nexata judíovi ayaicuenia nebijataejitsipa,” jamatabëjai Pedro. Bajaraxuata Pedro vecuanasaicayaba baja apo judíovi. <sup>13</sup> Pedro yapëtae ata pacuenia picani apo bevecuanasaicayabi apo judíovi, itsiata vecuanasaicayaba. Nexata daxita judíovi, pamonaenajamatabëcuenecopaba Jesucristojavabelia, itsa tane Pedro pevecuanasaicayabijava apo judíovi, bajarapamonae ata vecuanasaicayaba apo judíovi. Bernabé ata yapëtae ata pacuenia picani apo bevecuanasaicayabi apo judíovi, itsiata vecuanasaicayaba apo judíovi. <sup>14</sup> Nexata pacuenia jumaitsi pexanialivaisi jivi pecapanepaelivaisinexatsi Diosojavabelia, bajarapamonae apo exanae. Nexata saya bajarapamonae vecuanasaicayaba apo judíovi. Bajaraxuata itsa taniji bajarapamonae pevecuanasaicayabijava apo judíovi, nexata muxujioabajë. Daxita Dioso pejumecovënëtsivi pitabarata, jumaitsinë Pedrojavabelia: “Xamë judíonë atamë, itsiata apo judíovijavata naponaponame. Nexata pacuenia apo judíovi jinavanapa, naponaponabiabame picani. Apo ponaponabiabimë judíonëcuenia. Pacuenia baja picani naponaponabiabame apo judíovijavata, xanepana baja picani. Xamë judíonë atamë, itsa apo ponaponaemë judíonëcuenia, ¿detsa nexata xuajitsia caranata apo judíovi aeconoxae jamatabëjinavanapaeyaexaname judíovicuenia?” janë Pedrojavabelia pevecuanasaicayabixae apo judíovi.

### **Pacuenia judíovi ata xanepana penajamatabëcuenecopatsinexa Cristojavabelia pecapanepaenexatsi Diosojavabelia yabara pelivaisi**

<sup>15</sup> Paxanë baja cajena pajudíovinë. Patanaexanaejavaveliacujinae itsa pavitsabaponajë, payapëtaniji patajumecovënëtsinexa pexaniajailivaisi, Dioso pejumelivaisi. Nexata pacuenia apo judíovi pejevaxijavaveliacujinae apo yapëtae pejumecovënëtsinexa pexaniajailivaisi, Dioso pejumelivaisi, apo paitsinë. <sup>16</sup> Pexaniajailivaisi patajumecovënëtsinexa, patajamonaenaja cajena paneyajavavitsata. Nexata payapëtaniji mapacueenje. Itsajivi jumecovënëtsi ata tsipae Dioso Moiséspijinëta penajumecopatsilivaisi, itsiata Dioso aneconijibia apo taetsi tsipae. Bajarapacueene paxanë pajudíovinë payapëtaniji. Bajaraxuata paxanë pajudíovi atanë, panajamatabëcuenecopatajë Jesucristojavabelia. Nexata Dioso aneconijibia panetane patanajamatabëcuenecopatsixae Jesucristojavabelia. Dioso aneconijibia apo panetae patajumecovënëtsixae Dioso Moiséspijinëta penajumecopatsilivaisi. Tsipaji itsajivi ata apo jumecovënëtsicapanepea bajarapalivaisi. Nexata itsamonae jumecovënëtsi ata bajarapalivaisi, itsiata Dioso aneconijibia apo taetsi.

<sup>17</sup> Pexaniajailivaisi patacatsipaebijavata, itsajivi jamatabëcuenenavëxaniabiaya nejumaitsi tsipae: “Xamë jumaitsimë tsabiabi: ‘Dioso aneconijibia netane tajumecovënëtsixae Cristo tanesivatëpaejava tajaneconi yabara. Nexata baja apo jumecovënëtsinë Dioso Moiséspijinëta penajumecopatsilivaisi,’ jamë tsabiabi. Dioso Moiséspijinëta penajumecopatsilivaisi apo nejumecovënëtsixae, nexata Dioso catane pibisiacuene nexanaenë,” nejai tsipae itsajivi jamatabëcuenenavëxaniabiaya. Itsiata baitsi jane bajarapacuenia itsajivi nejumaitsi ata tsipae, itsiata Dioso apo netae tsipae pibisiacuene taexanaenë. <sup>18</sup> Diosojavabelia rajane naneconitsipajë mapacuenia itsa exanaejitsipajë. Dioso Moiséspijinëta penajumecopatsilivaisi, tajume-



covēnētsijavami tacopatsicujinae, icatsia caevēalia itsa jumecovēnētsipajē, nexata Diosojavabelia naneconitsipajē. <sup>19</sup>Pamatacabi abaxē ajamatabēcuenesaēnē tsabiabi tajumecovēnētsijava Dioso Moiséspijinēta penajumecopatsilivaisi, naneconitajē picani Diosojavabelia. Tspaji ajamatabēcuenesaēnē tsabiabi ata tajumecovēnētsijava bajarapalivaisi, itsiata apo necaējēpae tajumecovēnētsicapanepeanexa daxita pacuenia jumaitsi bajarapalivaisi. Itsa meta abaxē tsiteca bajarapalivaisi jumecovēnētaponaponaējitsipajē, yajavatēpaejitsipajē meta tajaneconi. Bajaraxuata aeconoxae baja icatsia bajarapalivaisi tajumecovēnētsinexa, apo sivanajamatabēxainae. Pacuenia baja petēpaejivi itsacuenējavayo apo sivanajamatabēxainae, bajara itsinē taexanaeyaniva icatsia pacuenia bajarapalivaisi nitoroba. Biji rajane aeconoxae baja Dioso nerajuta pejanajamatabēcuenē taexanaponaenexa pacuene Dioso jitsipa. <sup>20</sup>Cristo cruzajavabelia itsa cobematabiabarutatsi, xanē ata tajaneconi yabara nesivatēpa. Nexata xanē ata Cristo betaneyajavatēpae. Bajaraxuata perujumatabēcuenemi, pibisiacuene taexanaenexa taneitorobabiabijamatabēcuenemi, nevecuatēpa baja cruzata. Nexata baja piasaējamatabēcuenē, pejanajamatabēcuenē, xainajē. Cristo baja neyjavaponapona. Pajamatabēcuenē yaasaēnē tsaponaponaē, Dioso pexēnatojavabelia najamatabēcuenecopatsiaya ponaponajē. Dioso pexēnato nejitsipa. Nesivatēpanua baja cajena. <sup>21</sup>Apo namuxujematsinē Dioso vajanacaitaxutotsoniataejava. Dioso Moiséspijinēta penajumecopatsilivaisi, jivi pejumecovēnētsixae, Dioso aneconijibia jivi itsa taejitsipa, nexata Cristo jivi apo sivatēpae tsipae pijaneconi yabara. Nexata Cristo saya jema tēpaejitsipa.

**Pacuenia Cristo pejumecovēnētsivi, Dioso aneconijibia tanetsi  
pēcapanepaenexatsi pijaneconivecua, itsa jumecovēnēta  
pacuenia Abrahampijinē jumecovēnēta, yabara pelivaisi**

**3** jPaxamē paGalacianacuapijivimē, bitso cajena paneajamatabēcuenetajavi! Itsamonaē raeta saicayalivaisi yamaxēitorobiaya pacatsipaeba, pexaniajailivaisi, palivaisi baja picani pajumecovēnētame, panecopabinexa. Xanē Jesucristo pelivaisi patacatsipaebijavata, xaniavaetsia baja cajena pacatsipaebatsi, pacuenia Jesucristo cruzajavabelia cobematabiabarutatsi. Nexata baja picani panijacuatā bepanetaē Jesucristo papecasivatēpaejava cruzata. <sup>2</sup>Caejumeyo pacayanijobatsi. ¿Detsa xua yabara pacatsijamatabējunua Espiritu Santo? Apo pacatsijamatabējone raja panejumecovēnētsixae Dioso Moiséspijinēta penajumecopatsilivaisi. Espiritu Santo raja pacatsijamatabējunua panejumecovēnētsixae Jesucristo papecacapanepaejavanexa panijaneconivecua. <sup>3</sup>Paxamē bitso pajamatabēcuenetajamē. Pamatacabi pataxuxuabame panejumecovēnētsijava Jesucristo papecacapanepaejavanexa panijaneconivecua, panajamatabēxainabiabame Espiritu Santo papecayavenonabiabinexa. Aeconoxae baja icatsia caevēalia panajamatabēxainame panejumecovēnētsinexa Dioso Moiséspijinēta penajumecopatsilivaisi. Itsiata apo caējēpaetsi bajarapalivaisi papecacapanepaenexa. <sup>4</sup>Itsamonaē bitso pacabejiobiaexanabiaba pexanialivaisi, Jesucristo pelivaisi, panejumecovēnētsixae. Bajaraxuata apo bepacopatsimē panejumecovēnētsijava Jesucristo pelivaisi, palivaisi yabara itsamonaē pacabejiobiaexanabiaba. Tspaji itsa pacopabijitsipame panejumecovēnētsijava Jesucristo pelivaisi, saya panacueratsipame. <sup>5</sup>Payapētaneme rabaja Dioso papecarajutsijava Espiritu Santo. Pini ICUENE pexanaejavanē ata Dioso pacatsitaexana paxamē tuatujēta. Baitsi piavitanevi jamatejemaya exanapona. Petēpaevimi ata

asaëyaexanapona. ¿Detsa xua yabara bajarapacue Dioso pacatsitaexana? Dioso raja apo pacatsitaexanae bajarapacue panejumecovënëtsixae Dioso Moiséspijinëta penajumecopatsilivaisi. Dioso raja pacatsitaexana bajarapacue panejumecovënëtsixae patacatsipaebilivaisi, Jesucristo pelivaisi.

<sup>6</sup>Bajayata Abrahampijinë Diosojavabelia najamatabëcuenecopatsiaya jamatabëjumaiti: “Xaniajai. Dioso netoexanaena pacuenia najumecapanepaeya nejumaiti,” jamatabëjai. Bajaraxuata Dioso Abrahampijinë aneconijibia tanetsi Dioso pijanacuayabetsia pecapanepaenexatsi. <sup>7</sup>Bajaraxuata paxamë bepayapëtaneme mapacueneye. Pamonae jumecovënëta pacuenia Dioso najumecapanepaeya jumaiti, bajarapamonae Abrahampijinë apo pemomoxi ata, itsiata Dioso tanetsi Abrahampijinë bepepo pemomoxi. Bajarapamonae Dioso capanepaenatsi. <sup>8</sup>Dioso pejumelivaisibaxutota tajëvelia jumaiti pacuenia apo judfovi ata Dioso capanepaejitsiatsi pijaneconivecua. Nexata apo judfovi ata Dioso itsa jumecovënëtsiana, capanepaenatsi pacuenia Dioso najumecapanepaeya jumaiti. Dioso jivi pecapanepaejavanexa yabara, tajëvelia Abrahampijinëjavabelia Dioso jumaiti mapacueniaje: “Tacatsipaebilivaisi tanejumecovënëtsixaemë, daxitanacuapijivi ata aneconijibia taenajë, bajarapamonae ata itsa nejumecovënëtsiana pacuenia xamë nejumecovënëtame,” jai Dioso Abrahampijinëjavabelia. Bajarapacuenia Dioso pejumelivaisibaxutota tajëvelia jumaiti. <sup>9</sup>Nexata baja vaxaitsi xaniavaetsia yapëtanetsi mapacueneye. Pamonae jumecovënëta Jesucristo pelivaisi, bajarapamonae Dioso aneconijibia tanetsi pecapanepaenexatsi pijaneconivecua. Tsipaji bajarapamonae ata jumecovënëta pacuenia bajayata Abrahampijinë jumecovënëta pacuenia Dioso najumecapanepaeya jumaiti.

<sup>10</sup>Pajivi Dioso Moiséspijinëta penajumecopatsilivaisi apo jumecovënëtsicapanepe ata, jamatabëjumaiti: “Bajayata Dioso Moiséspijinëta najumecopata jivi pejumecovënëtsinexa. Nexata baja xanë bajarapalivaisi jumecovënëtaponaponajë Dioso tanecapanepaenexa,” jamatabëjai, itsiata bajarapajivi Dioso naneconitsiaexanaenatsi. Tsipaji Dioso pejumelivaisibaxutota jumaiti mapacueniaje: “Pamonae apo jumecovënëtsicapanepe tsane daxita pacuenia itorobatsi Dioso Moiséspijinëta penajumecopatsilivaisi, bajarapamonae cajena Dioso naneconitsiaexanaenatsi,” jai Dioso pejumelivaisibaxutota. <sup>11</sup>Nexata baja vaxaitsi xaniavaetsia yapëtanetsi bajarapacue. Dioso Moiséspijinëta penajumecopatsilivaisi, jivi jumecovënëtsi ata, itsiata itsajivi ata Dioso aneconijibia apo taetsi pecapanepaenexatsi Diosojavabelia. Tsipaji itsajivi ata apo jumecovënëtsicapanepe daxita pacuenia itorobatsi Dioso Moiséspijinëta penajumecopatsilivaisi. Bajarapacue vaxaitsi yapëtanetsi. Tsipaji Dioso pejumelivaisibaxutota icatsia jumaiti mapacueniaje: “Pajivi pepacue Dioso pejumecovënëtsixae, jamatabëjumaiti: ‘Xanë pepacue Dioso neyavenonaena pacuenia najumecapanepaeya jumaiti,’ jamatabëjai, Dioso aneconijibia tanetsi. Bajarapajivi xainaena matababi apo pevereverecejave,” jai Dioso pejumelivaisibaxutota. <sup>12</sup>Dioso Moiséspijinëta penajumecopatsilivaisi jivi jumecovënëtsi ata, itsiata apo jumecovënëtsicapanepe daxita pacuenia itorobatsi bajarapalivaisita. Bajaraxuata Dioso Moiséspijinëta penajumecopatsilivaisi yabara, Dioso pejumelivaisibaxutota jumaiti mapacueniaje: “Pajivi apo jumecovënëtsicapanepe ata Dioso Moiséspijinëta penajumecopatsilivaisi, itsiata itsa jamatabëjumaiti tsane: ‘Xanë pepacue Dioso neyavenonaena pacuenia najumecapanepaeya jumaiti,’ itsa jamatabëjai tsane, apo jumecovënëtsicapanepe ata, bajarapajivi Diosojav-

abelia capanepaenatsi,” apo jai. Biji rajane Dioso Moiséspijinëta penajumecopatsilivaisi yabara, Dioso pejumelivaisibaxutota jumaitsi mapacueniaje: “Pajivi matapania jumecovënëtsicapanepeaena daxita pacuenia itorobatsi Dioso Moiséspijinëta penajumecopatsilivaisi, bajarapajivi capanepaenatsi Diosojavabelia. Itsa apo jumecovënëtsicapanepeae tsane daxita pacuenia itorobatsi Dioso Moiséspijinëta penajumecopatsilivaisi, nexata tēpaena. Naxuabiana Diosovecua,” jai Dioso pejumelivaisibaxutota Dioso Moiséspijinëta penajumecopatsilivaisi yabara.

<sup>13</sup> Vaxaitsi baja cajena naneconitatsi Diosojavabelia. Tshipaji apo jumecovënëtsicapanepeatsi Dioso Moiséspijinëta penajumecopatsilivaisi. Itsiata baitsi jane Cristo ita tēpa cruzata, nacaneconimatamota pijanata. Dioso Moiséspijinëta penajumecopatsilivaisi apo vajajumecovënëtsicapanepeaxae, naneconitatsi picani Diosojavabelia. Itsiata Cristo cruzata ita tēpa, nacavecuajibiaexana baja bajarapaneconimi. Nexata baja Dioso apo nacananeconitsiaexanae tsane. Cristo saya tsijumaxuabatsi vajaneconimi. Nexata Dioso tanetsi Cristo bepenaneconitsinë vajaneconi pejamatabēcueneta. Nexata vajaneconi yabara Cristo nacopata pebeyaxuabinexatsi pacuenia Dioso pejumelivaisibaxutota jumaitsi. Dioso pejumelivaisibaxutota jumaitsi mapacueniaje: “Pajivi bitso naneconita Diosojavabelia pibisiacuene pexanaeneconi yabara, bajarapajivi naejavajavabelia rutatsi,” jai. <sup>14</sup> Nexata Cristo pibisiacuene bepexanaenē vajaneconi yabara, nacopata cruzajavabelia pecobematabiabarutsinexatsi. Bajarapacuenia Cristo ita nacopata cruzajavabelia pecobematabiabarutsinexatsi vajaneconi yabara, copiajopa jane baja pacuenia tajēvelia Dioso najumecapanepaeya jumaitsi Abrahampijinējavabelia. Nexata apo judíovi ata Dioso capanepaenatsi Jesucristo pejamatabēcueneta. Vaxaitsi vajanamatabēcuenecopatsixae Jesucristojavabelia vajanacacapanepaenexa Diosojavabelia, nexata pacuenia Dioso tajēvelia najumecapanepaeya jumaitsi, bajarapacuenia Dioso nacatsijamatabēcaeyaexana Espíritu Santo.

**Pacuenia Abrahampijinējavabelia Dioso najumecapanepaeya jumaitsi,  
pacuenia ata icatsia cotocaevi Moiséspijinējavabelia  
najumecapanepaeya jumaitsi, yabara pelivaisi**

<sup>15</sup> Tajamonaē, livaisi pacatsipaebijitsiatsi paneyapētaenexa mapacuenije. Pepacuenē raja Dioso exanaena pacuenia bajayata tajēvelia Abrahampijinējavabelia Dioso najumecapanepaeya jumaitsi. Mapanacuapijinē ata, pecobecovē pexainaenē, petēpaevajēnaē bayaquina pecobecovē yabara. Nexata pecobecovē pexainaenē ita tēpa, pevēnamuto pexi penatsicobetsanaenexa. Nexata jumenamatamota pecobecovē pexainaenē peyaquinaelivaisi. Nexata acuenēbi itsajivi ata pejumaitsinexa: “Ajumematamobi mapalivaisije,” pejinexa. Mataropotsia ata itsanē peyaquinaponanexa, acuenēbi. Tshipaji pecobecovē pexainaenē peyaquinaelivaisi, jumenamatamota. <sup>16</sup> Bajara pijinia pacuenia Dioso jumenamatamota bajayata tajēvelia Dioso najumecapanepaeya pejumaitsijava Abrahampijinējavabelia. Baitsi Abrahampijinē pemomo pejamatabēcueneta, jivi ayaibitsaēto Dioso aneconijibia petaejanexa, Dioso jumenamatamota. Bajayata tajēvelia Dioso najumecapanepaeya jumaitsi Abrahampijinējavabelia ayaibitsaēto mapanacuapijivi Abrahampijinē pemomo pejamatabēcueneta Dioso aneconijibia petanexa. Ayaibitsaēto Abrahampijinē pemomoxi pejamatabēcueneta Dioso jivi aneconijibia petanexa, bajarapacuenia tajēvelia Dioso najumecapanepaeya apo jumaitsi.

Biji rajane caenë, Jesús, pejamatabëcueneta Dioso jivi aneconijibia petaenexa, tajëvelia najumecapanepaeya jumaitsi. “Abrahampijinë pemomo,” itsa jai, tajëvelia jumaitsi Cristo yabara. <sup>17</sup>Palivaisi pacatsipaebatsi, maitsije. Bajayatami copiaya Dioso tajëvelia najumecapanepaeya jumaitsi Abrahampijinëjavabelia pacuenia Dioso toexanaejitsia Abrahampijinëjavabelia. Bajaraxuacujinae icatsia cotocaevi, cuatrocientos treinta pavaibejecujinae, Dioso icatsia Moiséspijinëta najumecopata jivi pejumecovënëtsinexa. Itsiata palivaisi copiaya Dioso tajëvelia najumecapanepaeya jumaitsi Abrahampijinëjavabelia, bajarapalivaisi acuenebi Dioso penajumeamatobiaexanaenexa. <sup>18</sup>Nexata palivaisi cotocaevi Dioso Moiséspijinëta najumecopata, bajarapalivaisi jivi pejumecovënëtsixae, Dioso aneconijibia jivi itsa taejitsipa pecapanepaenexa pijaneconivecua, nexata palivaisi copiaya Dioso tajëvelia najumecapanepaeya jumaitsi Abrahampijinëjavabelia, ajumematamobi tsipae. Itsiata baitsi jane palivaisi cotocaevi Dioso Moiséspijinëta najumecopata, jivi jumecovënëtsi ata tsipae, itsiata Dioso apo capanepae tsipaetsi. Nexata yapëtanetsi pejumenamatamotsijava palivaisi copiaya Dioso tajëvelia najumecapanepaeya jumaitsi Abrahampijinëjavabelia. Tsipaji pajivi jumecovënëta pecapanepaejavanexatsi pacuenia Dioso tajëvelia najumecapanepaeya jumaitsi Abrahampijinëjavabelia, bajarapajivi Dioso aneconijibia tanetsi.

<sup>19</sup>Itsa baja jumenamatamota palivaisi copiaya Dioso tajëvelia najumecapanepaeya jumaitsi Abrahampijinëjavabelia, ¿detsa nexata xuajitsia icatsia Dioso Moiséspijinëta nacatonajumecopata bajarapalivaisi? Dioso raja nacatonajumecopata bajarapalivaisi saya vajanacueneyapëtaenexa pibisiacuene vajaexanavanapaejava Dioso pitabarata. Bajrapalivaisi Dioso nacatonajumecopata vajajumecovënëta vanapaenexa matapania Abrahampijinë pemomo, Cristo, pepatsimatacabitsicajavabelianexa. Tajëvelia Dioso najumecapanepaeya jumaitsi Cristo pejamatabëcueneta ayaibitsaëtoxaneto mapanacuapijivije Dioso aneconijibia petaenexa. Palivaisi Dioso Moiséspijinëta najumecopata, pijacuata Dioso apo jumaitsi Moiséspijinëjavabelia. Dioso saya itoroba ángelevi Moiséspijinë petsipaebinexatsi. Nexata juya Moiséspijinë tsipaeba jivijavabelia. Moiséspijinë jivi petocuaicuajainë Diosojavabelia. Dioso juya Moiséspijinë itorobatsi petocuaicuajainexa jivijavaberena. <sup>20</sup>Pamatacabi Dioso najumecapanepaeya jumaitsi Abrahampijinëjavabelia pacuenia Dioso toexanaejitsia Abrahampijinëjavabelia, Dioso pijacuata jumaitsi Abrahampijinëjavabelia. Dioso apo itorobi ángelevi petotsipaebinexatsi Abrahampijinëjavabelia. Dioso pijacuata najumecapanepaeya jumaitsi Abrahampijinëjavabelia pacuenia pepacuene toexanaejitsia.

### **Pajamatabëcuenelivaisi yabara bajayata Dioso Moiséspijinëta najumecopata yabara pelivaisi**

<sup>21</sup>Dioso icatsia cotocaevi Moiséspijinëta itsalivaisi najumecopatsi ata, palivaisi copiaya Dioso najumecapanepaeya jumaitsi Abrahampijinëjavabelia, itsiata apo ajumematamobiaexanae. Tsipaji Dioso Moiséspijinëta penajumecopatsilivaisi pejamatabëcueneta, jivi Dioso apo capanepaejitsiatsi. Jivi itsa caëjëpaejitsipatsi pejumecovënëtsicapanepaenexa daxita palivaisi Dioso Moiséspijinëta najumecopata, nexata Dioso jivi capanepaejitsipa pijaneconivecua Dioso Moiséspijinëta penajumecopatsilivaisi pejumecovënëtsicapanepaexae. <sup>22</sup>Itsiata baitsi jane itsajivi ata apo caëjëpaetsi pejumecovënëtsicapanepaenexa Dioso Moiséspijinëta

penajumecopatsilivaisi. Dioso pejumelivaisibaxutota jumaitsi pacuenia daxitajivi pibisiacue ne pexanaexae, Dioso naneconitsiaexanaejitsiatsi Diosovecua penaxuabinexa. Bajarapacuenia Dioso pejumelivaisibaxutota jumaitsi vajayapëtaenexa. Nexata yapëtanetsi vajanajamatabëcuenecopatsinexa Jesucristojavabelia, vajanacapanepaenexa pacuenia Dioso copiya tajëvelia najumecapanepaeya jumaitsi Abrahampijinëjavabelia.

<sup>23</sup> Cristo abaxë athëbëvetsica pepatsivajënaeyatsica, Dioso Moiséspijinëta penajumecopatsilivaisi nacayapëtaeyaexana pamatacabi Cristo patsica vajanajamatabëcuenecopatsinexa Cristojavabelia. Nacayapëtaeyaexananua pacuenia vajacuata vajaexanaejava pejamatabëcueneta, acuenebi Dioso vajanacapanepaenexa. Nexata Dioso Moiséspijinëta penajumecopatsilivaisi, nacajamatabëcueneevetapona matapania Cristo athëbëvetsica pepatsimatacabit-sicajavabelianexa. Nexata bajarapalivaisi vajanacajamatabëcueneevetsijavata, Cristo baja nacacaxitajaraba. <sup>24</sup> Pacuenia pejevaxi pevetsijivi, pejevaxi baeveta, bajarapacuenia Dioso Moiséspijinëta penajumecopatsilivaisi, nacajamatabëcueneeveta daxita vajajumecovënëtsivi bajarapalivaisi. Bajarapacuenia nacajamatabëcueneeveta matapania Cristo athëbëvetsica pepatsimatacabit-sicajavabelianexa. Nexata jane baja athëbëvetsica Cristo pepatsicujinaetsica, vajanajamatabëcuenecopatsixae bajaraponëjavabelia, Dioso aneconijibia nacatane. <sup>25</sup> Aeconoxae baja najamatabëcuenecopatatsi Cristojavabelia. Nexata pacuenia pejevaxi pevetsijivi, pejevaxi baeveta, bajarapacuenia baja Dioso Moiséspijinëta penajumecopatsilivaisi, apo nacajamatabëcueneevetsi.

<sup>26</sup> Paxamë rabaja Dioso papeximë panenajamatabëcuenecopatsixae Jesucristojavabelia. <sup>27</sup> Nexata baja daxita paxamë panabautisabame panetsitanaitajëtsinexa jivijavabelia Cristo papijajivicuenemë. Nexata Cristo, Dioso pexënatojavabelia, panenajamatabëcuenecopatsixae, paxamë ata baja Dioso papeximë. <sup>28</sup> Daxitatsi vaxaitsi vajanajamatabëcuenecopatsivi Jesucristojavabelia, pajudíovinë, apo pajudíovi atomë, aeconoxae baja Dioso najëpaeya nacatane. Paxamë ata pijinia dajubicuenia papecanajetsivi itsamonaejavabelia amoneya panetonacuenebavanapaenexa, apo patanecacanajetsivi ata itsamonaejavabelia amoneya panetonacuenebavana-paenexa, daxitatsi Dioso najëpaeya nacatane. Paxanë papebijivinë, paxamë pijinia papetiriavi atomë, bajarapacuenia daxitatsi Dioso najëpaeya nacatane. <sup>29</sup> Cristo pijajivixaetsi, nexata Abrahampijinë bepepo pemomoxitsi Dioso nacatane. Nexata pacuenia Dioso bajayata tajëvelia najumecapanepaeya jumaitsi Abrahampijinëjavabelia, bajarapacuenia Dioso nacacapanepaena.

**4** Mara pacuenia jitsipajë patacajumaitsinexaje. Pejevaxinëyo paxa itsa vecuatëpatsi, paxami riconë ata, abaxë apo rajutsitsi paxami pecobecovë pepitsinexa pijajavanexa. Tsipaji abaxë pejevaxinëyo. Pacuenia itorobabiabatsi pevetsijivitsi, bajarapacuenia exanabiaba. Daxitacuenë pexainanënenexa ata, bajaraponëyo jumecovënëtabiaba pevetsijivitsi pitorobicueniatsi. <sup>2</sup> Itsa abaxë pejevaxinëyo, pevetsijivitsi evetatsi. Xua ata pijajavanexa, tovetatsi. Matapania baja itsa tocopiapatatsi paxapijinë petocaëjëtsimatcabitsi, tocopatatsi jane baja petoevetsijavatsi pevetsinexa baja pijacuata. Pevetsijavatsi ata baja copatatsi. <sup>3</sup> Bajara pijinia paitsinë pajudíovinë Jesucristo abaxë athëbëvetsica pepatsivajënaeyatsica. Itsa abaxë apo payapëtaenë pexaniajailivaisi, Jesucristo pelivaisi, pajumecovënëtabiabajë pacuenia paneitoroba Dioso Moiséspijinëta penajumecopatsilivaisi. Nexata pacuenia pejevaxinëyo jume-

covënëtabiaba pevetsijivitsi pitorobicueniatsi, bajarapacuenia pajumecovënëtabi-abajë Dioso Moiséspijinëta penajumecopatsilivaisi. Jamatabëcuenenavëxaniabiaya pajamatabëjumaitsinë tsabiabi: “Pacuenia Dioso Moiséspijinëta najumecopata vajaexanaexae, nacacapanepaena Dioso,” pajamatabëjanë tsabiabi. <sup>4</sup>Itsiata Dioso pecaëjësimatecabi itsa copiapata, Dioso pexënato itorobica judíovata penaexanaenexa mapanacuataje. Nexata Dioso pexënato mapanacuataje judíonëcuenia ponapona. Nexata pacuenia itoroba Dioso Moiséspijinëta penajumecopatsilivaisi, bajarapacuenia Dioso pexënato exanaponapona. <sup>5</sup>Bajarapacuenia Dioso pexënato naexana mapanacuataje vajanacavecuajibiaexanaenexa pibisiacuene vajaneconimi. Nexata baja nacacopatsiaexana vajaexanabiabijavami pacuenia nacaitoroba Dioso Moiséspijinëta penajumecopatsilivaisi. Bajarapacuenia Dioso nacatoexana pexicueniatsi Dioso vajanacataenexa.

<sup>6</sup>Bjaraxuata paxamë Dioso papexicuenemë panenayapëtaenexa, Dioso pacaitorobica Espíritu Santo papecatsijamatabëjonenexa. Nexata Espíritu Santo pejamatabëcueneta: “¡Taxa!” pacajaiyaexana Diosojavabelia. <sup>7</sup>Nexata Dioso papexixaemë, aeconoxae baja apo pajumecovënëtsimë pacuenia pacaitoroba Dioso Moiséspijinëta penajumecopatsilivaisi. Dioso papexixaemë, itsamatacabi pacarajutsiana xua Dioso toxaina pexi perajutsinexa.

### **Pacuenia Pablo sivanajamatabëxaina Galacia nacuapijivi, Dioso pajumecovënëtavanapaevi, yabara pelivaisi**

<sup>8</sup>Pamatacabi abaxë Dioso apo payapëtaemë, panematabacabëta panubenabi-abame panevajëcabiabinexa bediosovi panetaevijavabelia. Bajarapamonae baja cajena apo diosovi. Nexata saya panacueratabiabame. <sup>9</sup>Itsiata baitsi jane aeconoxae baja payapëtaneme pepo Dioso. Bajaraponë jane xaniavaetsia pacayapëtanane. ¿Detsa xuajitsia nexata pajitsipame panejumecovënëtsinexa Dioso Moiséspijinëta penajumecopatsilivaisi? Pamatacabi abaxë apo payapëtaemë pepo Dioso, panematabacabëta pavajëcabiabame bediosovi panetaevijavabelia. Itsiata baitsi jane bajarapamonae apo caëjëpaetsi papecacapanepaenexa. Bajara pijinia itsi Dioso Moiséspijinëta penajumecopatsilivaisi. Pajumecovënëtsi atamë tsipae Dioso Moiséspijinëta penajumecopatsilivaisi, itsiata Dioso aneconijibia apo pacatae tsipae papecacapanepaenexa. <sup>10</sup>Judíovi nacueraevetabiaba penacueraevetsimatecabit. Exanabiabanua fiesta Dioso Moiséspijinëta penajumecopatsilivaisi pitorobicueniatsi. Bajara pijinia pacuenia paxamë ata paexanabiabame. Pajuametota, pavaita ata, judíovi nacueraevetabiaba, fiesta ata exanabiaba, bajara pijinia pacuenia paxamë ata paexanabiabame. Jamatabëcuenenavëxaniabiaya pajamatabëjumaitsimë tsabiabi: “Bajarapacuenia vaxaitsi ata itsa exanaenatsi, Dioso aneconijibia nacataena,” pajamatabëjamë tsabiabi. <sup>11</sup>Bajarapacuenia paneexanabiabixae, bitso pacasivanajamatabëxainatsi. Tsipaji paxamë yabara jamatabëjumaitsinë mapacueniaje: “Ayaicuenia Jesucristo pelivaisi tatsipaebabiabijava bajarapamonaejavabelia, saya meta nacueratajë,” jamatabëjanë paxamë yabara.

<sup>12</sup>Tajamonae, pacaitorobatsi paxamë ata panenajamatabëcuenecopatsinexa Jesucristojavabelia pacuenia xanë najamatabëcuenecopatajë. Tanajamatabëcuenecopatsixae baja Jesucristojavabelia, judíonë atanë, copatajë baja tajumecovënëtsijavami Dioso Moiséspijinëta penajumecopatsilivaisi. Nexata pacuenia paxamë, apo pajudíovimë, apo pajumecovënëtsimë picani Dioso Moiséspijinëta penajumeco-

patsilivaisi, bajarapacuenia xanë ata baja apo jumecovënëtsinë Dioso Moiséspijinëta penajumecopatsilivaisi. Nexata pëtsa baja pajumecovënëtame Dioso Moiséspijinëta penajumecopatsilivaisi. Pamatacabi copiaya pacatsipaebatsi Jesucristo pelivaisi, paxamë apo paneitsacueniabimë. <sup>13</sup> Paxamë baja cajena payapëtaneme macpacueneje. Tavitanexae, copiaya patajopajë paxamëjavata. Nexata bajarapacuenia paxamëjavata pacatsipaebatsi pexanialivaisi, Jesucristo pelivaisi, papecacapanepaelivaisinexa Diosojavabelia, palivaisi picani abaxë apo payapëtaemë. <sup>14</sup> Dioso baja cajena netocopata tanevaetabinexa bajarapavitane pataneyaaitajitsibinexamë picani. Itsiata baitsi jane bajarapavitane yabara bijiata apo panetaemë. Apo panenavecuaitorobimë patacavecuaponaenexa itsajavabelia. Biji rajane xaniavaetsia panecopiapitame. Pacuenia ángel xaniavaetsia pacopiapitsipame, itsa jume, pacuenia Jesucristo xaniavaetsia pacopiapitsipame, bajarapacuenia xaniavaetsia panecopiapitame. <sup>15</sup> Bajarapamatacabi bitso pajamatabëcuenebarëyamë patacatsipaebixae pexanialivaisi, Jesucristo pelivaisi. ¿Detsa baja aeconoxae paitsimë panejamatabëcuenebarëyajavami? Bajarapamatacabi meta itsa pacavajëtsipatsi, paneitaxuto ata panerajutsipame tanaitaxutorutsinexa. <sup>16</sup> Aeconoxae meta bepanijavajabit saënënë panetaejitsipame patacatsipaebixae pexaniajailivaisi, Jesucristo pelivaisi.

<sup>17</sup> Pamonaë saicayalivaisi Jesucristo pelivaisivecua petsipaebaponaevi, pata paxamëjavata bajarapalivaisi papecatsipaebinexa. Bajarapamonaë najamatabëxainabiaba pexanaenexa xua yabara pasivabarëyamëjitsia bajarapamonaë. Itsiata baitsi jane bajarapamonaë apo najamatabëxainae papecatsipaebinexa pexaniajailivaisi papecacapanepaelivaisinexa Diosojavabelia. Bajarapamonaë jitsipa paxanë patanevecuanasaicayabinexamë. Jitsipa panejamatabëcuenejëpaenexa bajarapamonaë. <sup>18</sup> Xanepana picani itsamonaë ata panesivabarëyanexa itsa pacayavenona, itsa baitsi jane pepacuene xaniavaetsia pacasivanajamatabëxaina papecayavenonaenexa. Bepacayavenona bajarapamonaë daxitamatacabijavabelianexa. Nexata paxanë ètapatsimatacabi paxamëjavata, apo bepacayavenonaë. <sup>19</sup> Paxamë bepataximë pacatanetsi. Petiriva itsa vixanotatsi penacueto pevecuanaexanaenexatsi, bitso banajamatabëxaina èpexanaejavabelianexa. Bajara pijinia pacuenia xanë ata bitso pacasivanajamatabëxainatsi. Tsipaji bitso patojitsipatsi, pacuenia Cristo jamatabëcueneitsi, bajara paxamë ata panejamatabëcueneitsinexa. <sup>20</sup> Bitso picani jitsipajë aeconoxae taponaponaejava paxamëjavata bitso patacasivanajamatabëxainaxae. Nexata itsa ponaponaejitsipajë paxamëjavata, apo patacatoyaquinaë tsiptaetsi. Pacabarëcuaiçaijatsi tsipae pexaniacuenia. Apo patacataexae, nexata abaxë xaniavaetsia apo yapëtaenë pacuenia exanaejitsianë paxamëjavabelia.

### Agarpijivabeje Sarapijivabeje yabara pelivaisi

<sup>21</sup> Paxamë pajumaitsimë tsabiabi: “Jumecovënëtsianatsi Dioso Moiséspijinëta penajumecopatsilivaisi Diosojavabelia vajanacacapanepaenexa,” pajamë tsabiabi. ¿Nexata panamuxunaevere xaniavaetsia paneyapëtaenexa pacuenia Dioso jumaitsi bajarapalivaisi yabara! <sup>22</sup> Dioso pejumelivaisibaxutota jumaitsi pacuenia bajayata Abrahampijinë xaina pexënatobeje. Abrahampijinë pexënatoto itsanë xaina Agarpijivata. Agarpijiva, Abrahampijinë bedajubicuenia pecomuatsiva amoneya petonacuenebaponaponaenexatsi pijabota. Nexata Agarpijiva jumecovënëtabiaba pijatuxanejivibeje pitorobicueniatsi. Bajaraxuacujinaë icatsia Abrahampijinë itsanë xaina Sarapijivata, pepo pijavata jane baja. Bajarapova apo pecomuatsiva.

<sup>23</sup> Panacuetonëyo Abrahampijinë xaina Agarpijivata, pecomuatsivata jane baja, xaina pacuenia baxaina pexi pexainaevi. Panacuetonëyo pijinia xaina Sarapijivata, pepo pijavata jane baja, mavecova ata bitso pepua perujvata, xaina. Bajarapanacuetonëyo xaina petocopiapatsixaetsi pacuenia Dioso tajëvelia najumecapanepaeya jumaitsi Abrahampijinë pexënato pexainaenexa. <sup>24</sup> Bajarapovabeje pelivaisita Dioso nacayapëtaeyaexana pacuenia Dioso jivi tane anijacueniabeje. Dioso Moiséspijinëta najumecopata Moiséspijinë pijajivi pebarëjumecovënëtsinexa bajarapalivaisi. Bajarapalivaisi Dioso najumecopata Moiséspijinëta Sinaivënë tsutojumata, Arabia nacuata. <sup>25</sup> Itsamonae abaxë mapamatacabi ataje tsiteca jumecovënëtavanapa Dioso Moiséspijinëta penajumecopatsilivaisi. Bajarapamonae abaxë tsiteca pejumecovënëtavanapaexae Dioso Moiséspijinëta penajumecopatsilivaisi, Abrahampijinë pecomuatsivami, Agarpijivami, cuenejëpavanapa. Tsipaji pacuenia Agarpijiva daxitamatacabi jumecovënëtabiaba pijatuxaneva pitorobabiabicueniatsi, bajara pijinia pacuenia bajarapamonae jumecovënëtabiaba Dioso Moiséspijinëta penajumecopatsilivaisi pitorobicueniatsi. <sup>26</sup> Vaxaitsi pijinia Jesucristojavabelia vajanajamatabëcuenecopatsivi, Abrahampijinë pepo pijavami, Sarapijivami, cuenejëpavanapatsi. Nexata itsamatacabi Dioso pijatomarata, pejanaJerusalén tomarata, jinavanapaenatsi. Tsipaji pacuenia Abrahampijinë pepo pijavami, Sarapijivami, itsajivi ata apo pijajivitova pitorobabiabicueniatsi pexanaenexa, bajara pijinia vaxaitsi ata itsitsi. Tsipaji Dioso Moiséspijinëta penajumecopatsilivaisi pitorobicuenia apo jumecovënëtavanapaetsi. <sup>27</sup> Nexata ayaibitsaëtotsi tsaponae Jesucristojavabelia vajanajamatabëcuenecopatsivi. Abrahampijinë pepo pijavami, Sarapijivami, yabara, Dioso pejumelivaisibaxutota tajëvelia jumaitsi mapacueniaje: Mavecovamë, nexi apo nexainaeva. Jamatabëcuenebarëyamë tsane. Caeto ata apo nenavixaetaeva ata, itsiata jamatabëcuenebarëyaya vavajamë tsaxuabi tsane, navixaetae atamë. Tsipaji nemomoxi ayaibitsaëto xainaename. Xainaename ayaibitsaëto nemomoxi, nijajivitova pemomoxi matatoxenetsia, jai tajëvelia Dioso pejumelivaisibaxutota ayaibitsaëtotsi Jesucristojavabelia vajanajamatabëcuene copatsijavanexa yabara.

<sup>28</sup> Tajamonae, pacuenia Abrahampijinë pepo pijavata, Sarapijivata, naexana Isaacpijinë pacuenia Dioso tajëvelia najumecapanepaeya jumaitsi, bajara pijinia pacuenia vaxaitsi ata Dioso nacatane. Jesucristojavabelia vajanajamatabëcuenecopatsixae, Dioso nacatane Sarapijiva bepepo pemomoxitsi. Nexata pacuenia Dioso tajëvelia najumecapanepaeya jumaitsi vajanacapanepaenexa, bajarapacuenia Dioso nacacapanepaena. <sup>29</sup> Bajayata Abrahampijinë pexënato, matapijinë, ponë naexana Agarpijivata, bajaraponë jamatabëitonotabiaba pejuyapijinë, ponë naexana Sarapijivata Dioso pejamatabëcueneta Espíritu Santo peyavenonaexaetsi. Bajara pijinia pacuenia aeconoxae ata, pamonae casaë tsavanapae pejumecovënëtsijava Dioso Moiséspijinëta penajumecopatsilivaisi, nacajamatabëitonotabiaba Dioso pejamatabëcueneta Espíritu Santo vajanacatsijamatabëcaevi. <sup>30</sup> Pijuyapijinë, pejamatabëitonotabiabinë yabara, Dioso pejumatsijava Abrahampijinëjavabelia Dioso pejumelivaisibaxutota jumaitsi mapacueniaje: “Ponë nexënato xainame necomuatsivata, apo rajutsimë tsane nexainaeyajuvënëjava nevënamuto pepitsinexa. Daxita rajutsianame ponë xainame pepo nijavata. Bajaraxuata nijabovecua pitsapaeyaexanaename necomuatsiva, nexënato yajava,” jai Dioso pejumelivaisibaxutota Abrahampijinëjavabelia Dioso pejumatsijava. <sup>31</sup> Tajamonae, Dioso apo nacatae Abra-



hampijinė pecomuatsiva bepemomoxitsi. Biji rajane Dioso nacatane Abrahampijinė pepo pijava bepemomoxitsi. Bajaraxuata vaxaitsi baja apo jumecovënëtsitsi Dioso Moiséspijinëta penajumecopatsilivaisi.

**Pacuenia icatsia apo bejumecovënëtsi Dioso  
Moiséspijinëta penajumecopatsilivaisi, pamonaе baja  
najamatabëcuenecopaba Cristojavabelia, yabara pelivaisi**

**5** Cristo pejamatabëcueneta nacacopatsiaexana Dioso Moiséspijinëta penajumecopatsilivaisi vajajumecovënëtsijavami. Nexata Dioso Moiséspijinëta penajumecopatsilivaisi panejumecovënëtsijavami panecopatsijava, tsiteca baja pacopatavanapare. Pëtsa icatsia caevëalia pajumecovënëtame Dioso Moiséspijinëta penajumecopatsilivaisi, bajarapalivaisi bepapijajivimë papecaitorobabiabicuenia paneexanavanapaeyaniva.

<sup>2</sup>Xanë Pablonë, panenamuxunaevere palivaisi pacatsipaebijitsiatsi. Jamatabëcuenenavëxaniabiaya pëtsa pajamatabëjumaitsimë: “Xanë rabaja taneperabëcaucutsinë. Bajaraxuata tajaneconivecua Dioso necapanepaena,” pajamatabëjamë pëtsa. Bajarapacuenia itsa panajamatabëxainaejitsipame, nexata Cristo papecasivatëpaejava papecacapanepaenexa panijaneconivecua, saya pacasivanacueratsipa. Nexata pajumecovënëre Cristo papecasivatëpaejava papecacapanepaenexa panijaneconivecua. <sup>3</sup>Icacia pacamuxujibatsi asaëyata. Pajivi jamatabëcuenenavëxaniabiaya jamatabëjumaitsi: “Xanë naperabëcaucutsiaexanaenajë tajaneconivecua Dioso tanecapanepaenexa,” jamatabëjai, bajarapajivi bejumecovënëtsicapaneпа daxita pacuenia Dioso Moiséspijinëta penajumecopatsilivaisi itorobatsi. <sup>4</sup>Jamatabëcuenenavëxaniabiaya itsa pajamatabëjumaitsimë tsipae: “Xanë jumecovënëtsianajë Dioso Moiséspijinëta penajumecopatsilivaisi. Nexata Dioso aneconihibia netaena tanecapanepaenexa,” itsa pajamatabëjamë tsipae, nexata pacopabijitsipame panejumecovënëtsijavami Cristo papecasivatëpaejava panijaneconi yabara. Dioso papecaitaxutotsoniataexae aneconihibia papecataejavami ata, pacopabijitsipame. <sup>5</sup>Vaxaitsi baja cajena yapëtanetsi Dioso vajanacacapanepaejavanexa. Tsipaji jumecovënëtsi Jesucristo vajanacasivatëpaejava vajaneconi yabara. Bajaraxuata Espiritu Santo pejamatabëcueneta vajanacayavenonaexae, evetavanapatsi Dioso vajanacajumaitsinexa: “Paxamë rabaja paneconihibimë,” vajanacajainexa, pamatacabi Dioso pitabarata nubenaenatsi. <sup>6</sup>Vaxaitsi baja Jesucristo pijajivitsi. Nexata nacaperabëcaucutsi ata, apo nacaperabëcaucutsi ata, itsiata bajarapacuenia amatamobi Dioso pitabarata. Namatamota rajane asivaya vajayavenonaponaejava itsamonae ata vajanajamatabëcuenecopatsixae Jesucristojavabelia.

<sup>7</sup>Pajumecovënëtavapanape baja picani pexaniajailivaisi. ¿Jipatsa nexata pacacopatsiaexana bajarapalivaisi panejumecovënëtsijavami? <sup>8</sup>Dioso raja apo pacacopatsiaexanae. Biji rajane Dioso pacajunata Jesucristojavabelia panenajamatabëcuenecopatsinexa. <sup>9</sup>Pëtsa panacofënëtame mapalivaisije. Pan pexanaematabënexa ayaimatabë ata, levadurajava pijinia tsiquirijavayo ata, itsiata pematajërëabijavata, bacaëjëpa daxitamatabëjava. Nexata bafufunaeyaexana daxitamatabë. Bajara pijinia itsi penajumetsënëtsilivaisi jivi petsipaebaponaevi. Penajumetsënëtsilivaisi jivi petsipaebaponaevi, caenëbeje ata, itsiata ayaibitsaëto Jesucristojavabelia penajamatabëcuenecopatsivi, jamatabëcuenebijianapona. <sup>10</sup>Yapëtaniji baja cajena mapacuenije. Paxamë baja Jesucristo papijajivimë. Nexata

Dioso pacayavenonaena. Xanë yapëtaniji pacuenia paexanaejitsiamë. Tsiteca pajumecovënëtavapaename patacatsipaebilivaisi. Dioso cajena itsamatacabi naneconitsiaexanaenatsi ponë Jesucristo pelivaisivecua pacajamatabëcuenebijiana penajumetsënësilivaisita.

<sup>11</sup>Tajamonae, Jesucristo pelivaisi apo judíovi tatsipaebabiabijavata, itsa jumaitsinë tsabiabi tsipae: “Paxamë apo pajudíovimë, Jesucristojavabelia panenajamatabëcuene copatsivi, bepanaperabëcaucubiaexaname Diosojavabelia papecapanepaenexa,” itsa janë tsabiabi tsipae, nexata judíovi apo nebejiobiaexanabiabi tsipae. Apo judíovi ata, Jesucristojavabelia penajamatacuene copatsivi, itsa itorobaponaejitsipajë peperabëcaucubinxatsi, nexata Jesucristo cruzata petëpaelivaisi tsipaebi atanë, itsiata judíovi apo nitoya tsipae. <sup>12</sup>Pamonae pacajamatabëitonotabiaba panenaperabëcaucutsiaexanaenexa, bajarapamonae tojitsipajë mapacueni-aje. Tojitsipajë bajarapamonae papecavecuapitsapaenexa, papecacopatsinexa baja papecajamatabëitonotabiabijava.

<sup>13</sup>Tajamonae, Dioso pacajunata panecopabinexa Dioso Moiséspijinëta penajumecopatsilivaisi panejumecovënëtsijavami. Itsiata baitsi jane pëtsa pajamatabëjumaitsimë: “Dioso Moiséspijinëta penajumecopabilivaisi tajumecovënëtsijavami, tacopatsixae baja, nexata exanaenajë daxita pibisiacuene pacuenia jitsipajë,” pajamatabëjamë pëtsa. Biji rajane Dioso Moiséspijinëta penajumecopatsilivaisi panejumecovënëtsijavami, panecopabixae baja, Jesucristojavabelia penajamatabëcuene copatsivi bepapijajivimë panataema namataenetsia panenayavenonabiabinexa. Bajarpacuenia namataenetsia panayavenonabiabianame panenasivaxae. <sup>14</sup>“Asivamëre itsamonae ata pacuenia nijacuata nasivamë,” pejailivaisi itsa pajumecovënëtsianame, nexata daxita palivaisi Dioso Moiséspijinëta najumecopata, pajumecovënëtsicapenapaename. <sup>15</sup>Itsa panaitoyamë, itsa panabaracuaicuajiamënu pibisiacuena, nexata xaniavaetsia panaitavere. Tsipaji itsa panaitoyamë tsipae, itsa panabaracuaicuajiamënu tsipae pibisiacuena, nexata Jesucristojavabelia panenajamatabëcuene copatsijava, namataenetsia panajamatabëcuene faefaenaeyaexanaejitsipame. Pacopatsipamenua baja Dioso pejumelivaisi yabara panenacaetuatabiabi-ava ata.

### **Pacuenia Espíritu Santo nacajamatabëcuene yavenona yabara pelivaisi**

<sup>16</sup>Mapacuenia pacajumaitstsije. Pacuenia Espíritu Santo pacaitorobabiaba, paexanabiabare daxitamatacabi canacujitsia. Pëtsa pibisiacuene paexanabiabame panijacuata panenajamatabëxainaejava. <sup>17</sup>Xua vajacuata vajajamatabëthëtota najamatabëxainabiabatsi pibisiacuene vajaexanabiabinexa, bajaraxua vajaexanaenexa, Espíritu Santo apo jitsipae. Xua pijinia Espíritu Santo nacaitorobabiaba pexaniacuene vajaexanabiabinexa, bajaraxua juya vajajamatabëcuene vajaexanabiabinexa apo jitsipae. Nexata vajajamatabëcuenebeje, Espíritu Santobeje apo najamatabëcuenejëpaebeje. Bajaraxuata pexaniacuene pajamatabëexanabiabi atamë, itsiata apo paexanabiabimë pexaniacuene. <sup>18</sup>Itsa baja paexanavanapaename pacuenia Espíritu Santo pacaitorobabiaba, nexata baja tsiteca apo paexanavanapaemë tsane pacuenia pacaitoroba Dioso Moiséspijinëta penajumecopatsilivaisi. Tsipaji baja pacuenia Espíritu Santo pacaitoroba, paexanavanapaename.

<sup>19</sup>Xua jivi pijacuata najamatabëxaina, itsa exana, yapëxanepana vajayapëtaenexa. Tsipaji xua jivi pijacuata najamatabëxaina itsa exana, pebi itsava

jaita pijavavecua. Petiriva pijinia jaita itsanë pamonavecua. Pamonae pevitota pibisiacuene exana pacuenia pijacuata najamatabëxaina, bajarapamonae jitsipania daxita xua pibisiacuene pexanaenexa. <sup>20</sup> Pamonae pibisiacuene exana pacuenia pijacuata najamatabëxaina, pematabacabëta nubenabiaba pevajëtabiabinexa jumapecataeya pexanaenëanëjavabelia. Junatabiabanua penajorobivi. Bajarapamonaeyajuvënëvi naexananua penajorobivi. Itoyanua tsabiabi itsamonae. Jumeanaenotabiabanua itsamonae. Cuenecaëbabiabanua itsamonae. Anaepanabiabanua apo vajabaranaepanaejavayo vita. Natoexanabiabanua daxitacuene ëpamonaenexa. Vecuanasaicayababiabanua itsamonae Dioso pejumecovënëtsivi. Caebitsaëto caejavata apo najuanacaetuanabiabi. <sup>21</sup> Pamonae pibisiacuene exana pacuenia pijacuata najamatabëxaina, jamatabëyacajërëtabiabanua itsamonae pexainaejava. Jamatabëbeyaxuababiabanua jivi. Aitajibinua tsabiabi pijabonëjava. Aitajibinua tsabiabi fiestajava ata. Itsacuenenua pematatsënëa, bajara bepitsipibisiacuene, exanabiaba. Pacuenia copiata pacamuxujobatsi, bajara icatsia pacuenia pacamuxujobatsi. Pamonae bajarapacuenia pibisiacuene exana, bajarapamonae apo jinavanapae tsane Dioso pijanacuatatsia.

<sup>22</sup> Pacuenia peubinae, pexaniae, pexaniacuai capitsapa, bajara pijinia pacuenia Espiritu Santo vajajamatabëëthëtovetsina capitsapa mapacuenije. Capitsapa itsamonae ata vajaanavajamatabëcuene. Capitsapa vajabarëyjamatabëcuene. Capitsapa Diosojavabelia, itsamonaejavabelia ata, barajamatabëcuenexanepanaeya vajataenexa. Capitsapa, itsamonae nacaitsacueniabi ata, vajavajënaeyabelia vajaanamatabësaëjamatabëcuene. Capitsapa itsamonae vajaitaxutotsoniatae jamatabëcuene. Capitsapa itsamonae pexaniacuene vajatoexanaejamatabëcuene. Capitsapa Dioso vajajumecovënëtsijava vajaanamatabësaëjamatabëcuene. <sup>23</sup> Espiritu Santo vajajamatabëëthëtovetsina capitsapa vajaanajepaebijamatabëcuene. Capitsapa vajanajamatabëcataitsi jamatabëcuene pibisiacuene vajaanaxanaeyaniva. Daxita bajarapajamatabëcuene, Espiritu Santo vajajamatabëëthëtovetsina pecapitsapaejamatabëcuene, xanepana. Itsalivaisi ata cajena apo itavetsi daxita bajarapacueni. <sup>24</sup> Pamonae Jesucristo pijajivi, bajarapamonae jamatabëjumaitsi: “Jesucristo cruzajavabelia itsa cobematabiabarutatsi, tajaperujujamatabëcuenemi vajavatëpa,” jamatabëjai. Nexata vecuaajibiaexanatsi pajamatabëcuene itorobabiabatsi pibisiacuene pexanaenexa. <sup>25</sup> Vaxaitsi Espiritu Santo nacayajavaponapona. Nexata betonacopatabiabatsi vajanacaitorobinexa pacuenia Espiritu Santo nacatojitsipa vajaanabiabinexa.

<sup>26</sup> Ayaijamatabëcuenejivitsi apo benataetsi. Namataenetsia itsacueni javayo ata pibisiacuene apo benatoexanaetsi vajanabaraanaepanaeyaniva, vajanacuenecaëbivaniva ata.

### **Pacuenia Dioso pejumecovënëtsivi itorobatsi namataenetsia penajamatabëcueneyavenonaenexa yabara pelivaisi**

**6** Tajamonae, itsa pacaxitajarabame Dioso pejumecovënëtsijavavecua pejpapajivi, paxamë pacuenia Espiritu Santo pacaitoroba panejinavanapaeivi, payavenonare bajarapajivi. Payavenonare bajarapajivi pijamatabëcuenesaënexa icatsia Dioso pejumecovënëtsijava. Itsiata baitsi jane pexaniajamatabëcuenia xaniavaetsia payavenonare. Paxamë ata pibisiacuene nayajivitaeya pajinavanapare. Belia paxamë ata Dioso panejumecovënëtsijavavecua, pajopajitsipame dovathi itsa paca-

jamatabëcueneëjêta pibisiacuene paneexanaenexa. <sup>2</sup>Namataenetsia panayavenonabiabare dovathi itsa pacajamatabëcueneëjêta, pibisiacuene paneexanaeyaniva. Namataenetsia itsa panayavenonabiabianame panenasivaxae, nexata pajumecovënët-sianame pacuenia Cristo pacaitoroba.

<sup>3</sup>Pajivi jumaitsi itsa vënëlivaisitane itsajivi Dioso pejumecovënëtsijavavecua pejopaejava: “Xanë cajena ayaijamatabëcuenenënë bajarapajivi matatoxenetsia. Nexata Dioso tajumecovënëtsijavavecua apo jopaenë tsane,” jai, bajarapajivi najamatabëcuene-capæba. Tsipaji bajarapajivi ata dovathi itsa jamatabëcueneëjêtatsi pibisiacuene pexanaenexa, apo ajamatabëcuenesaë tsipae Dioso pejumecovënëtsijava. <sup>4</sup>Caejivi canacujitsia benacuene-canaëjêta peyapëtaenexa xua exanaponapona Dioso pitabarata. Nexata pajivi pexaniacuene exanaponapona, bajarapajivi jamatabëcuene-barëya Dioso pitabarata. Itsiata baitsi jane bajarapajivi pexaniacuene exanaponaponaë ata, apo bejamatabëjumaitsi mapacueniaje: “Xanë itsamonaevēcua pexaniacuene Dioso toexanaponaponajë,” apo bejamatabëjai. <sup>5</sup>Caejivi canacujitsia baja cajena saicaya xaina pexanaponaejavanexa Dioso pitobobicueniatsi.

<sup>6</sup>Pamonae tsipaebatsi Dioso pejumelivaisi, bajarapamonae pexinaeyajuvënëjjava juya berajuta Dioso pejumelivaisi petsipaebinëtsijavabelia.

<sup>7</sup>Pëtsa pajamatabëcuenenavëxaniabame saicayacuenia paneexanaeyaniva Dioso papecaitorobicuenevecua. Tsipaji itsajivi ata apo caëjêpaetsi peyamaxëitojorobinexa Dioso. Xua jivi bauba pabita, pamatacabi baja navereta bajaraxua, icatsia banota. Bajara pijinia itsane Dioso ata. Pajivi pibisiacuene exana, bajarapajivi juya pibisiacuene tocopiapatsianatsi pamatacabi Dioso naneconitsiaexanaenatsi. <sup>8</sup>Pajivi pibisiacuene exanaponapona pijacuata penatojitsipaecuenia, nexata bajarapajivi itsa tēpaena, pepacuene Diosovecua naxuabiana. Pajivi pijinia pexaniacuene exanaponapona Espiritu Santo pesivabarëyanexatsi, nexata bajarapajivi tēpae ata, xainaena matacabi apo peverevere-caejava. <sup>9</sup>Vaxaitsi itsa apo yabaracueranaetsi tsane pexaniacuene vajaexanavanapaejava, nexata Dioso pecaëjêtsimatacabita nacarajutsiana pexaniacuene. Bajaraxuata pexaniacuene vajaexanavanapaejava, apo beyabaracueranaetsi. <sup>10</sup>Nexata itsajota nacacuenecaëjêpa, pexaniacuene betoexanabiabatsi itsamonaejavabelia. Pamonae Jesucristo vajanajuajumecovënët-sivi, bajarapamonae bitsoyo beyavenonaponatsi.

**Pacuenia Pablo pemuxujobilivaisi Galacia tomarapijivi toyaquina peveretsinexa baja petoyaquinaelivaisi mapabaxutotaje yabara pelivaisi**

<sup>11</sup>Pataema mapaayaiitanetonëje. Xanë raja Pablonë tajacuata pacatoyaquinatsi mapalivaisije. <sup>12</sup>Itsamonae judíovi ajumesaëya pacajumai tsabiabi: “Paxamë apo pajudíovi atamë, Jesucristo pelivaisi itsa pajumecovënëtame, bepanaperabëcaucubiaexaname papecacapanepaenexa Diosojavabelia,” pacajai tsabiabi. Pajudíovi bajarapacuenia pacajumai tsabiabi, jamatabëcuenenavëxaniabiaya jamatabëjumai tsabiabi: “Jesucristo pelivaisi apo judíovi itsa tsipaebianatsi, yajavaitorobianatsi penaperabëcaucubiaexanaenexa. Nexata bajarapacuenia itsa exanaenatsi, vajamonae judíovi nacasivajamatabëcuene-barëya tsane. Nexata vajamonae judíovi apo nacait-sacueniabi tsane, apo judíovi tsipaebi atatsi Cristo vajanacasivatēpaejava cruzata,” jamatabëjai tsabiabi bajarapajudíovi jamatabëcuenenavëxaniabiaya. <sup>13</sup>Pajudíovi bajarapacuenia pacajumai tsabiabi, pijacuata naperabëcaucubiaexanae ata, itsi-ata apo exanavanapae daxita pacuenia itorobatsi Dioso Moiséspijinëta penajume-

copatsilivaisi. Bajarapamonae jitsipa panenaperabëcaucubiaexanaenexa, saya papcevajunupaebinxexa pevëna judíovijavabelia: “Paxanë patajamatabëcueneta Galacia nacuapijivi naperabëcaucubiaexana,” pejainexa paxamë yabara. Tsipaji bajarapajudíovi jitsipa pesivajamatabëcuenebarëyjavatsi pevëna judíovi. <sup>14</sup>Xanë cajena bajarapacuenia apo exanaenë. Apo najamatabëxainaenë, xua exanajë, tanavajunupaebinxexa jivi saya tanesivabarëyanexa. Itsiata jitsipajë caelivaisiyo jamatabëcuenebarëyaya jivi tatsipaebinxexa. Jitsipajë jivi tatsipaebinxexa Jesucristo vajanacasivatëpaejava cruzata. Jesucristo cruzata tanesivatëpaexae, nevejamatabëcaeva baja tajitsipaejavami mapanacuapijicueneje. Mapanacuapijivi pijinia tanejitsipaejamatabëcuenemi ata ajibi baja. <sup>15</sup>Espíritu Santo vajanacaitorobicuenia itsa exanavanapatsi, nacaperabëcaucutsi ata, apo nacaperabëcaucutsi ata, najëpabeje. Tsipaji cajena amatamobi bajarapacuenie Dioso pitabarata. Vajanajamatabëcuenie pënëyorotsijava rajane pejanajamatabëcueniejavabelia, namatamota vajanacacapanepaenexa Diosojavabelia. <sup>16</sup>Nexata pamonaexanavanapa pacuenia pejanajamatabëcuenie itorobatsi, bajarapamonae jamatabëcuenexanepanaeya jinavana-paena Dioso pitabarata. Dioso itaxutotsoniataenatsinua. Bajarapamonae daxita Dioso baja pepo pijajivi tsane.

<sup>17</sup>Tavajënaeyabelia baja apo jitsipaeenë tanejamatabëitonotaponaenexa pamonaexa nejumaeaba Jesucristo taneitorobinëcuenie. Jesucristo pelivaisi yabara tanejumaconibabeyabiabijavata, nejumatatibabeyabiaba. Bajarapavajënëcovëanë tanetsijumarubenaexae, daxitajivi neyapëtane Jesucristo pijajivitonëcuenenë.

<sup>18</sup>Tajamonae, pacatovajëtabiabatsi Diosojavabelia vajatuxanenë Jesucristo papecayavenonabiabinxexa. Bajara itsi tsane.

## Mapabaxutoje San Pablo toyaquina Efeso tomarapijivijavabelia

### Pacuenia Pablo toyaquina mapabaxutoje Dioso pejumecovënëtsivi, Efeso tomarapijivijavabelia, yabara pelivaisi

**1** Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi pexanialivaisi tatsipaebaponaenexa. Pacatoyaquinatsi mapabaxutoje Dioso papijajivimë, Jesucristojavabelia panenajamatabëcuenecopatsivi, panejinavanapaevi Efeso tomarata. <sup>2</sup>Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

### Pacuenia Dioso jivi capanepaejitsia pijaneconivecua Jesucristo pesivatëpaexaetsi yabara pelivaisi

<sup>3</sup>“Pexaniacuene rabaja panetoexaname,” jaitsi vaxaitsi, vajatuxanenë Jesucristo paxa, Diosojavabelia. Jesucristo baja pijajivixaetsi, daxitacuenejavabelia Dioso nacayavenonapona vajanacajamatabëcuene asaëyaexanaenexa. Nexata Dioso nacajamatabëcuenexaniavaetapona vajanaponaenexa Dioso pijanacuayabetsia. <sup>4</sup>Dioso mapanacuaje pexanaevajënaeya ata, tajëvelia nacaitapeta pijajivinxatsi. Tsi-paji baja Dioso tajëvelia yapëtane Jesucristojavabelia vajanajamatabëcuene copatsijavanexa Jesucristo vajanacasivatëpaexae. Bajarapacuenia Dioso tajëvelia nacaitapeta pijajivinxatsi vajajinavanapaenexa aneonijibia Dioso pitabarata. <sup>5</sup>Dioso bitso vajanacajitsipaexae, tajëvelia najamatabëcuenevereta pexicueniatsi vajanacataenexa. Jesucristo nacasivatëpa Dioso petojitsipaecueniatsi. Bajaraxuata nexata Dioso nacatane pexicueniatsi. <sup>6</sup>Nexata Dioso pexaniacuena vajanacaitaxutotsoniataexae, daxitamatacabi canacujitsia Diosojavabelia jumaitsitsi tsabiabi. “Xanepana rabaja. Tsi-paji pexaniacuene panetoexaname,” jaitsi tsabiabi Diosojavabelia. Dioso pexënato piasivanë pijajivixaetsi, Dioso nacaitaxutotsoniatane. <sup>7</sup>Piniijicuenia Dioso vajanacaitaxutotsoniataexae, nexata pexënato itorobica mapanacuayabetsicaje vajanacasivatëpaenexa. Bajarapacuenia Dioso nacavecuaajibiaexana pibisiacuene vaxaxanaeconimi. <sup>8</sup>Dioso pinijicuenia vajanacaitaxutotsoniataexae, nacayapëtaeyaexana pexaniajailivaisi. Nacayapëtaeyaexananua pacuene nacatoxanepana Dioso pejitsipaecuenia vaxaxanavanapaenexa. <sup>9</sup>Xua Dioso tajëvelia najamatabëcuenevereta pexanaenexa, bajaraxua baja aeconoxae Dioso nacayapëtaeyaexana. Bajaraxua picani abaxë itsajivi ata apo yapëtae. Xua Dioso tajëvelia najamatabëcuenevereta pexanaenexa, maitsije. Dioso itorobijitsiatsica pexënato mapanacuayabetsicaje petoexanaeveretsinexatsi daxita pacuenia itoroba. <sup>10</sup>Pacuenia Dioso tajëvelia najamatabëcuenevereta, bajarapacuenia daxita Cristo pijajivitsi nacacaeuatsiana Dioso pecaëjët simatacabi itsa copiapatsiana. Dioso pecaëjët simatacabi itsa copiapatsiana daxitacuene mapanacuapijicueeneje, athëbëpijicueene ata, Dioso baja tocopatsiana pexënato juya pevetsinexa.

<sup>11</sup>Jesucristo pijajivinxatsi tajëvelia Dioso nacaitapeta. Bajarapacuenia Dioso tajëvelia nacaitapeta tsipaji baja cajena Dioso tajëvelia najamatabëcuenevereta bajarapacuenia pexanaenexa. Dioso daxitacuene exana pacuenia tsitaxanepanatsi. <sup>12</sup>Bajarapacuenia Dioso tajëvelia nacaitapeta vajanajamatabëcuenecopatsinexa Je-

sucristojavabelia. Nexata vaxaitsi Dioso tojinavanapatsi Diosojavabelia vajajumaitssabiabinexa: “Diosomë, ayaijamatabëcuenenëmë bitso,” vajajaitsabiabinexa Diosojavabelia. <sup>13</sup>Pexaniajailivaisi papecacapanepaelivaisinexa, paxamë ata itsa pajumetaneme, nexata baja panajamatabëcuenecopatame Jesucristojavabelia papijajivinexamë. Nexata pacuenia Dioso tajëvelia najumecapanepaeya jumaitsi, pacarajuta baja Espiritu Santo papecatsijamatabëcaenexa. Nexata bajarapacuenia panayapëtaneme Dioso papijajivicuenemë. <sup>14</sup>Espiritu Santo vajanacatsijamatabëcaexae, yapëtanetsi pexaniajaicuene Dioso vajanacarajutsinexa maticabi apo peverevereaejava. Yapëtanetsinua Dioso vajanacapanepaejavanexa pexënato vajanacasivatëpaexae. Bajaraxuata vaxaitsi bejumaitssi Diosojavabelia: “Diosomë, ayaijamatabëcuenenëmë bitso,” bejaitsi.

**Pacuenia Pablo tovajëta Diosojavabelia Dioso  
pejumecovënëtsivi, Efeso tomarapijivi, yabara pelivaisi**

<sup>15</sup>Pacavënëlivaisitanetsi panenajamatabëcuenecopatsijava vajatuxanenë Jesucristojavabelia. Pacavënëlivaisitanetsinua paneasivajava daxita pamonaë Dioso pejumecovënëtsivi. <sup>16</sup>Bajaraxuata itsa vajëtajë Diosojavabelia, pacatovajëtabiabatsi. Nexata pexaniajamatabëcuene rajutabiabajë Diosojavabelia paxamë yabara. <sup>17</sup>Ayaijamatabëcuenenë Dioso, vajatuxanenë Jesucristo paxa. Bajaraponëjavabelia pacatovajëtabiabatsi. Pacatovajëtabiabatsi Espiritu Santo pejamatabëcueneta xaniavaetsia panevajënaeyabelia papecayapëtaeyaexanaponaenexa pacuenia Dioso jamatabëcueneitsi. Nexata Espiritu Santo pejamatabëcueneta panevajënaeyabelia pacayapëtaeyaexanaponaena pacuenia Dioso jamatabëcueneitsi. Pacayapëtaeyaexanaponaenanua pacuenia Dioso nacatsitanajamatabëcueneitajëta. <sup>18</sup>Pacatovajëtabiabatsinua Diosojavabelia Dioso papecajamatabëcueneitayotsinexa panevajënaeyabelia paneyapëtaeponaenexa pajamatabëcuene yabara Dioso pacajunata papijajivinexamë. Pacatovajëtabiabatsinua Diosojavabelia paneyapëtaenexa xua Dioso pacarajutsijitsia, bitso ayaijamatabëcuenejava, maticabi apo peverevereaejava. Tajëvelia Dioso najumecapanepaeya jumaitsi Dioso pijajivitsi vajanacarajutsinexa maticabi apo peverevereaejava. <sup>19-20</sup>Pacatovajëtabiabatsinua paneyapëtaenexa Dioso bitso piasaënëcuene. Vajanacayavenonaenë vajanajamatabëcuenecopatsivi bajaraponëjavabelia. Dioso bitso piasaënëcuene jivi tsitanajamatabëcueneitajëta pamaticabi Cristo asaëyaexanatsi petëpaecujinae. Nexata baja Cristo paxa Dioso athëbëtatsia pemuxuneneta ecaeyaexanatsi pecujuanenia penajuaevetsinexabeje daxitacuene. Nexata bajarapasaëta vaxaitsi ata Dioso nacayavenonapona. <sup>21</sup>Bajarapacuenia Cristo athëbëtatsia, paxa Dioso pemuxuneneta, ecaeyaexanatsi pecujuanenia Cristo pevetsinexa daxitacuene. Nexata daxitanacuanëjava pevetsivi mata-toxenetsia aeconoxae jane baja daxitacuene Cristo pepo pevetsinë. Cristo baja daxitacuene eveta mapamatacabitaje. Pejanamatacabijavabelianexa ata evetsiana. <sup>22</sup>Dioso tocopatatsi Cristo daxitacuene pevetsinexa. Nexata Cristo pepo pitorobinë daxita pamonaë najamatabëcuenecopata bajaraponëjavabelia. <sup>23</sup>Daxita baja pamonaë najamatabëcuenecopata Jesucristojavabelia, Dioso tanetsi Cristo pijajivi. Cristo nexata itoroba bajarapamonae. Nexata Cristo bajarapamonae yajavaponapona daxita mapanacuajavaje.

**Pacuenia Dioso pijajivi, piasivaxae, capanepaejitsia yabara pelivaisi**

**2** Dioso baja cajena pacajamatabëcueneaitavayaexana Jesucristo pejamatabëcueneta. Paxamë abaxë bajayata Dioso itsa apo pajumecovënëtsimë, naxuabiaya picani Diosovecua pajinavanapame pibisiacuene paneexanavanapaeneconi yabara. Nexata pacuenia itsi petëpaevi, bajara picani pajamatabëcueneitsimë Diosojavabelia itsa abaxë Dioso apo pajumecovënëtsimë.<sup>2</sup> Pacuenia Dioso apo pejumecovënëtsivi, pibisiacuene exanavanapa, bajara picani pacuenia paxamë ata bajayata pibisiacuene paexanavanapame. Pajumecovënëtavanapame picani ëdovathi, ponë eveta pitaquirijamatabëcuene mapanacuataje. Aeconoxae dovathi jamatabëcueneasaëyaexanapona pamona Dioso apo pejumecovënëtsivi pibisiacuene pexanaenexa.<sup>3</sup> Daxita picani bajayata vaxaitsi pibisiacuene exanavanapatsi. Pacuenia vajajamatabëëthëtota jitsipatsi vajaexanaenexa, exanabiabatsi. Xua najamatabëxainatsi, exanabiabatsi. Bajaraxuata pacuenia daxita itsamonae naneconita Diosojavabelia, bajara picani pacuenia vaxaitsi ata naneconitatsi Diosojavabelia vajanacananeconitsiaexanaenexa.<sup>4</sup> Itsiata baitsi jane Dioso, bitso jivi pitaxutotsoniataenë, vaxaitsi bitso nacajitsipa.<sup>5</sup> Diosovecua naxuabiaya picani vajajinavanapaevimi ata pibisiacuene vajaexanaeneconi yabara, itsiata Dioso nacajamatabëcueneaitavayaexana, Jesucristo Dioso itsa asaëyaexanatsi petëpaeujinae. Bajarapacuenia Dioso nacatoexana vajanacaitaxutotsoniataexae. Nexata Dioso nacacapanepaena pibisiacuene vajaexanaeneconimivecua.<sup>6</sup> Jesucristo petëpaeujinae, Dioso icatsia asaëyaexanatsi petëpaejavavecua. Nexata vaxaitsi Jesucristojavabelia vajanajamatabëcueneocopatsixae, Dioso nacatane bevajanacayajavaasaëyaexanaevi. Dioso nacatanenua Jesús athëbëtatsia bevajanacayajavaeaevi daxitacuene vajanacabarëevetsinexa.<sup>7</sup> Bajarapacuenia Dioso nacatoexana vajanacatsitanajamatabëcuene itajëtsinexa daxitamatacabijavabelianexa vajanacajitsipaeuene. Nacatsitanajamatabëcueneitajëtanua vajanacaitaxutotsoniataeueene Jesucristo vajanacasivatëpaexae.<sup>8</sup> Dioso cajena bitso pacajitsipa. Bajaraxuata Jesucristojavabelia itsa panajamatabëcueneocopatame, Dioso pacacapanepaena panijaneconivecua. Bajarapacuenia Dioso papecacapanepaejavanexa, panijacuata apo panatoexanaemë. Biji rajane Dioso pejamatabëcueneta pacacapanepaena.<sup>9</sup> Itsajivi ata Dioso petonacuenebaponaponaejamatabëcuene, Dioso apo capanepaetsi tsane. Biji rajane Jesucristojavabelia penajamatabëcueneocopatsixae, Dioso capanepaenatsi. Bajaraxuata itsajivi ata beayaijamatabëcuenejivi apo benatae Dioso pecapanepaejavanexatsi yapëtae ata. Apo bejumaitsinua: “Xanë Dioso tatonacuenebixae, nexata necapanepaena,” apo bejai.<sup>10</sup> Vaxaitsi raja Dioso nacaexana. Nacaexananua Jesucristo pijajivitsi Dioso vajatoexanavanapaenexa pexaniacuene. Bajarapacuenia Dioso tajëvelia najamatabëxaina vajatoexanavanapaenexa.

**Pacuenia Dioso pejumecovënëtsivi jamatabëcuenexanepanaeya jinavanapa Jesucristo pejamatabëcueneta yabara pelivaisi**

<sup>11</sup> Panajamatabënapire pacuenia picani paxamë bajayata pajamatabëcueneitsimë tsavanapae itsa abaxë Dioso apo pajumecovënëtsimë. Paxamë apo pajudïovimë. Judïovi saicaya peperabëcaucubivitsi Dioso pijajivi penayapëtaenexa.



Nexata judíovi jumai tsabiabi: “Vaxaitsi vajanacaperabëcaucubivi, Dioso pijajivitsi nayapëtanetsi,” jai tsabiabi. Paxamë pijinia apo pajudíovixaemë, judíovi paxamë yabara jumai tsabiabi: “Bajarapamonae apo peperabëcaucubivitsi. Nexata Dioso apo pijajivi,” jai tsabiabi judíovi paxamë yabara. <sup>12</sup>Bajarapamatacabi abaxë apo pajumecovënëtsimë Cristo. Pasaicayavimë abaxë tsavanapae Diosovecua. Pasaicayavimë abaxë tsavanapae judíovi atavecua. Bajarapamatacabi abaxë apo payapëtaemë pacuenia Dioso pacayavenonaejitsia papecacapanepaenexa. Mapanacuata picani abaxë naxuabiaya Diosovecua pajinavanapame. “Pamatacabi tēpaenajë, pepacuenenaxuabianajë,” pajamatabëjamë tsabiabi. <sup>13</sup>Paxamë picani Diosovecua bitso naxuabiaya pajinavanapame. Itsiata baitsi jane aeconoxae baja Cristo papijajivimë. Cristo papecasivatēpaexae, aeconoxae baja payajavajinavanapame Dioso. <sup>14</sup>Paxanë pajudíovinë, paxamë apo pajudíovi atamë, Jesucristo pejamatabëcueneta daxitatsi Dioso nacajamatabëcuenexanepanaeyaexana namataenetsia vajanasivatsavanapaenexa. Jesucristo pejamatabëcueneta benacaemonaetsi Dioso nacaexana. Jesucristo daxitatsi vajanacasivatēpaexae, ajibi vajanayabaraitoyacuene vajanavecuanatsanaenexa. <sup>15</sup>Jesucristo cruzata itsa tēpa, copiarucaeyaexana baja namataenetsia vajanaitoyacuenemi. Tspijaji baja Jesucristo itsa tēpa, copiarucaeyaexana palivaisimi bajayata Dioso Moiséspijinëta najumecopata. Bajarapalivaisimi paxanë pajudíovinë bitso picani asaëyata pajumecovënëtavanapajë. Nexata bajarapalivaisimi Jesucristo baja copiarucaeyaexana. Dioso Moiséspijinëta penajumecopatsilivaisi itsa pajumecovënëtavanapajë, paxamë apo pajudíovimë apo pacabarajamatabëcuenexanepanaetsi. Aeconoxae baja Jesucristo vajajumecovënëtsixae, Jesucristo pijajivitsi nacaexana. Nexata baja Jesucristo pejamatabëcueneta nacanabarajamatabëcuene xanepanaeyaexana. <sup>16</sup>Jesucristo cruzata vajanacasivatēpaexae, copiarucaeyaexana baja namataenetsia vajanaitoyacuenemi. Nexata paxanë pajudíovinë, paxamë pijinia apo pajudíovi atamë, Cristo baja caebitsaëtotsi nacaexana pijajivinxatsi. Nexata baja Dioso jamatabëcuenexanepanaeya nacatane.

<sup>17</sup>Jesucristo patajopa mapanacuayabetsicaje. Nexata capatsica pexanialivaisi vajayapëtaenexa daxitatsi Dioso jamatabëcuenexanepanaeya vajanacataejava. Paxamë apo pajudíovimë bitso picani Diosovecua naxuabiaya pajinavanapame. Bajaraxuata Dioso pacatocopata Jesucristo pelivaisi panejumecovënëtsinexa. Paxanë pajudíovinë pajumecovënëtajë picani palivaisi bajayata Dioso Moiséspijinëta najumecopata. Nexata paxanë ata Dioso panetocopata Jesucristo pelivaisi patajumecovënëtsinexa. <sup>18</sup>Nexata Jesucristo daxitatsi vajanacasivatēpaexae, paxanë pajudíovinë, paxamë pijinia apo pajudíovi atamë, vaxa Dioso nacatocopata vajajonenexa Dioso pijatomarabetsia. Bajarapacuenia vaxa Dioso nacatocopata vajajonenexa pijatomarabetsia Espíritu Santo vajanacayavenonaexae. <sup>19</sup>Bajaraxuata apo pajudíovi atamë, aeconoxae baja Dioso panejumecovënëtsixae, bepasaicayavimë baja Dioso apo pacatae. Biji rajane itsamonae, Dioso pejumecovënëtsivi yajava, paxamë baja Dioso papeximë pacaexana Dioso pijanacuatatsia panenajuajinavapanenexa. <sup>20</sup>Palivaisi bajayata Diosojumepaebivi profetavi tajëvelia yaquina, Jesucristo baja cajena pelivaisi, bajarapalivaisi pajumecovënëtame baja. Paxanë ata Jesucristo papijajivinë, paapóstolevinë, paneitoroba patacatsipaebaponenexa bajarapalivaisi, Jesucristo pelivaisi. Nexata bajarapalivaisi panejumecovënëtsixae, panajamatabëcuenecopabame baja Jesucristojavabelia papecacapanepaenexa. Bajaraxuata Dioso baja papeximë pacaexana. <sup>21</sup>Nexata baja itsamonae ata ayaibitsaëtoxaneto

najamatabëcuenecopabapona Jesucristojavabelia. Nexata Cristo pejamatabëcueneta itorobaponatsi bajarapamonae. Daxita bajarapamonae Dioso baja pexi exanatsi. Nexata pacuenia Dioso tojitsipatsi, jinavanapa. <sup>22</sup>Bajara pijinia pacuenia paxamë ata, itsamonae yajava, pamonaes Jesucristojavabelia penajamatabëcuenecopabivi, caebitsaëto Dioso papeximë pacaexana. Nexata Dioso pacayajavaponapona Espiritu Santo papecatsijamatabëcaexae.

**Pacuenia Pablo itorobatsi pexanialivaisi, Jesucristo pelivaisi, petsipaebaponaenexa apo judíovijava yabara pelivaisi**

**3** Paxamë apo pajudíovi atamë, Dioso papijajivixaemë, pacatovajëtabiabatsti Diosojavabelia. Xanë Pablonë, Jesucristo pijajivitonënë. Nexata Jesucristo pelivaisi jivi tsipaebabiabjê. Nexata Jesucristo pelivaisi jivi tatsipaebabiabixae, nenanconitsiaexaneta penaneconitsivi pejebabiabibota. Jesucristo pelivaisi jivi tatsipaebabiabijavata, jumaitsinë tsabiabi: “Pamonae apo judíovi ata, itsa jumecovënëta Jesucristo pelivaisi, bajarapamonae ata Dioso pijajivi,” janë tsabiabi paxamë yabara. Bajarapacuenia Jesucristo pelivaisi jivi tatsipaebabiabixae, penaneconitsivi pejebabiabibota tavëna judíovi neeta. <sup>2</sup>Bepayapëtaneme xanë Dioso taneitorobicuene patacatsipaebinexa apo pajudíovi atamë Dioso papecaitaxutotsoniataejava. <sup>3</sup>Apo pajudíovi atamë, Dioso papecaitaxutotsoniataejava tayapëtaenexa, Dioso baja cajena neyapëtaeyaexana. Dioso papecaitaxutotsoniataexae papecacapanepaejavanexa ata tayapëtaenexa, Dioso baja cajena neyapëtaeyaexana. Nexata Dioso papecaitaxutotsoniataejava paneyapëtaenexa, pacatoyaquinarutetatsi caelivaisiyojeje saya. <sup>4</sup>Itsa palebianame, payapëtaename pacuenia Dioso neyapëtaeyaexana ëpajudíovinë Dioso apo patanitaxutotsoniataejava. Payapëtaenamenua pacuenia Dioso neyapëtaeyaexana, apo pajudíovi atamë, Dioso papecaitaxutotsoniataejava. <sup>5</sup>Bajayata abaxë itsajivijavabelia ata Dioso apo yapëtaeyaexanae, apo pajudíovi atamë, Dioso papecaitaxutotsoniataejavanexa. Aeconoxae baja paxanë Dioso papijajivinë, paapóstolevinë, Dioso paneyapëtaeyaexana, apo pajudíovi atamë, Dioso papecaitaxutotsoniataejava. Profetavijavabelia ata Dioso yapëtaeyaexana, apo pajudíovi atamë, Dioso papecaitaxutotsoniataejava. Aeconoxae baja bajarapacuenia Dioso paneyapëtaeyaexana Espiritu Santo pejamatabëcueneta. <sup>6</sup>Xua picani itsajivijavabelia ata Dioso apo yapëtaeyaexanae, bajaraxua maitsije. Paxanë pajudíovinë, itsa pajumecovënëtajê pexanialivaisi, Jesucristo pelivaisi, panecapanepaena Dioso. Bajara pijinia pacuenia paxamë ata, apo pajudíovi atamë, itsa pajumecovënëtame pexanialivaisi, Jesucristo pelivaisi, pacacapanepaena Dioso. Pajudíovinë, apo pajudíovi atamë, daxitatsi benacaemonatsi nataenatsi. Jesucristo pelivaisi vajajumecovënëtsixae, daxitatsi Dioso nacarajutsiana xua Dioso najumecapanepaeya nacarajutsipaeba.

<sup>7</sup>Piasaënë Dioso taneitaxutotsoniataexae, netocopata Jesucristo pelivaisi tatsipaebaponaenexa daxitajivijava. Dioso necaëjêpaeyaexananua xaniavaetsia jivi tatsipaebaponaenexa bajarapalivaisi. <sup>8</sup>Xanë itsiata beveliajamatabëcuenenënë nataniji daxita Dioso pejumecovënëtsivivecua. Itsiata baitsi jane mapapexaniacueneje Dioso netocopata. Dioso netocopata apo pajudíovimëjava patacatsipaebaponaenexa pexanialivaisi, Jesucristo pelivaisi. Nexata pacatsipaebaponatsi ayaicuenia Jesucristo vajanacayavenonaponaejavanexa. <sup>9</sup>Dioso nitoroba patacatsipaebaponaenexa, apo pajudíovi atamë, Dioso papecacapanepaejavanexa. Dioso daxitacuene pexanaenë

mapanacuataje. Dioso cajena tajëvelia najamatabëxaina paxamë ata, apo pajudïovi atamë, papecacapanepaenexa. Itsiata itsajivijavabelia ata Dioso apo yapëtaeyaexanae, apo pajudïovi atamë, Dioso papecacapanepaejavanexa. <sup>10</sup> Bajarapacuenia Dioso pacacapanepaena, apo pajudïovi atamë, petsitanajamatabëcuene itajëtsinexa athëbëtatsia pevetsivijavabelia. Nexata athëbëtatsia pevetsivi itsa nacataena daxitatsi Dioso vajajumecovënëtsivi, pajudïovinë, apo pajudïovi atamë, benacaemonaetsi vajanajuajinavanapaejava, athëbëtatsia pevetsivi yapëtaena bitso Dioso peyapëtaenëcuene daxitacuene pexanaenexa. <sup>11</sup> Pacuenia Dioso tajëvelia copiaya najamatabëxaina, mapanacua pexanaevajënaeya ataje, bajarapacuenia baja Dioso exanaevereta. Tsipaji baja Dioso itorobica vajatuxanenë Jesucristo vajanacasi-vatëpaenexa cruzata. <sup>12</sup> Vaxaitsi baja najamatabëcueneocopatsi Jesucristojavabelia vajanacacapanepaenexa. Bajaraxuata Diosojavabelia vajëtabiabatsi ajumejunavijibia. <sup>13</sup> Bajaraxuata Diosojavabelia asaëyata pacatovajëtabiabatsi patanesivajamatabëcuene cueranaeyanivamë abaxë naneconitsia taponaponaejava penaneconitsivi pejebabiabibota. Jesucristo pelivaisi jivi tatsipaebijavata, jumaitsinë tsabiabi: “Pamonae apo judïovi ata itsa jumecovënëta Jesucristo pelivaisi, bajarapamonae ata Dioso pijajivi,” janë tsabiabi paxamë yabara. Bajarapacuenia Jesucristo pelivaisi jivi tatsipaebabiabixae, penaneconitsivi pejebabiabibota tavëna judïovi nenaneconitsiaexaneta. Bajaraxuata panesivajamatabëcuenebarëyamëre naneconitsia taponaponaejava penaneconitsivi pejebabiabibota.

### **Pacuenia Pablo Diosojavabelia tovajëta Dioso pejumecovënëtsivi yabara pelivaisi**

<sup>14</sup> Itsa najamatabënapitabiabajë, apo pajudïovi atamë, Dioso papecacapanepaejavanexa, nexata tamatabacabëta nucabiabajë asaëyata patacatovajëtsinexa vajatuxanenë Jesucristo paxa Diosojavabelia. <sup>15</sup> Daxita Dioso pijajivi, pamonae athëbëtatsia jinavanapa, pamonae ata mapanacuataje jinavanapa, daxita bajarapamonae Dioso tanetsi benacaemonae. Caenë paxa exana Dioso. <sup>16</sup> Dioso baja cajena bitso piasaënë. Ayaijamatabëcuene pexinaenë. Bajaraxuata pacatovajëtabiabatsi Diosojavabelia Dioso pesaëta papecajamatabëcuene asaëyaexanaenexa Espíritu Santo pejamatabëcueneta. <sup>17</sup> Pacatovajëtabiabatsinua Jesucristo papecatsijamatabëcaenexa panesivanajamatabëcopatsixae bajaraponëjavabelia. Pacatovajëtabiabatsinua bitso paneasivanexa itsamonae ata, pamonae Dioso pejumecovënëtsivi. <sup>18</sup> Pacatovajëtabiabatsinua daxita Dioso panejumecovënëtsivi panejamatabëcuenyapëtaenexa Jesucristo bitso papecaasivajava. <sup>19</sup> Pacatovajëtabiabatsinua panijacuata xaniavaetsia paneyapëtaenexa Jesucristo vajanacaasivajava. Jesucristo vajanacaasivajava, bitso pexaniacuene, apo vajayapëtaecapanepaejava xaniavaetsia vajayapëtaenexa. Nexata itsa payapëtaename Jesucristo vajanacaasivajava, paxainaename pajamatabëcuene Dioso pacatojiitsipa.

<sup>20</sup> “Diosomë, bitso ayaijamatabëcuenenëmë,” jaitsi vaxaitsi Diosojavabelia. Bajarapacuenia jumaitsitsi tsipaji bitso Dioso pecaëjëpaenëtsi vajanacayavenonaeenexa. Dioso caëjëpatsi vajanacatoexanaenexa vajavajëtsicuenia. Vajanajamatabëxinaejava ata matatoxenetsia, Dioso caëjëpatsi vajanacatoexanaenexa. Dioso pesaëta nacayavenonabiaba. <sup>21</sup> Dioso pejumecovënëtsivi Dioso peyavenonaponaeaxetsi, itsamonaevajavabelia tsipaebavanapa Dioso bitso ayaijamatabëcuene pexinaenëcuene. Jesucristo ata itsa ponapona mapanacuataje, nexata Dioso

tsitanajamatabëcueneitajëta jivijavabelia Dioso bitso ayaijamatabëcuene pex-  
ainanenëcuene. Bajaraxuata daxitajivi bejumai tsabiabi Diosojavabelia: “;Diosomë,  
bitso ayaijamatabëcuenenëmë!” bejai tsabiabi Diosojavabelia daxitamatacabijav-  
abelianexa. Bajara itsi tsane.

**Pacuenia Espíritu Santo pejamatabëcueneta daxita Dioso pejumecovënëtsivi  
najamatabëcuenejëpaeya jinavanapaena yabara pelivaisi**

**4** Naneconitsiaponaponajë majotaje, penaneconitsivi pejebabiabibota, tajume-  
covënëtsixae vajatuxanenë Jesucristo taneitorobicuenia. Asaëyata pacamuxu-  
jibatsi panejinavanapaenexa pacuenia Dioso pacatojitsipa Dioso papecajunatsivi  
papijajivinexamë. <sup>2</sup>Itsamonaevécua beveliajamatabëcuenevi nataeya pajinavana-  
pare. Panajamatabëxainarenua pexaniajamatabëcuene daxitajivijavabelia. Paja-  
matabëcuenesaëmërenua tsavanapae bajayajebi, itsamonaë pacaitsacueniababiabi  
ata. Namataenetsianua panayavenonabiabare namataenetsia panenasivaxae. <sup>3</sup>Pa-  
jamatabëcuenesaëmëre tsavanapae najamatabëcuenejëpaeya panejinavanapaenexa.  
Bajaraxua yabara Diosojavabelia panatovajëtabiabare papecayavenonaenexa Es-  
píritu Santo. Nexata nabarajamatabëcuenexanepanaeya pajinavanapaename. <sup>4</sup>Je-  
sucristojavabelia vajanajamatabëcuenecopatsixae, vaxaitsi baja nexata caenë Je-  
sucristo pijajivitsi. Xainatsi baja caeEspíritu Santo Dioso vajanacajunatsivi.  
Bajaraxuata caejamatabëcuene xainavanapatsi. Evetavanapatsi pacuenia Dioso  
najumecapanepaeya jumaitsi vajanacacapanepaenexa. <sup>5</sup>Caenë rabaja vajatuxa-  
nenë Jesucristo. Daxitatsi najamatabëcuenecopatatsi caenëjavabelia. Nacabauti-  
sabanua caenë Jesucristo pevënëta. <sup>6</sup>Xainatsi caenë vaxa Dioso. Caenë Dioso  
daxitatsi vajanacanamatacaitorobinë. Dioso pijajivitsi, daxitatsi, nacayavenona.  
Nacayajavaponapanua.

<sup>7</sup>Caëjivitsi canacujitsia, Cristo pejitsipaecuenia nacajamatabëcuene caëjë-  
paeyaexanapona pecovëta vajatonacuenebavanapaenexa vajanacaitorobicuenia.  
<sup>8</sup>Tsipaji baja cajena Dioso pejumelivaisibaxutota tajëvelia jumaitsi Jesucristo  
yabara mapacueniaje:

Ayaibitsaëtoxfaneto pitoyavitsi pepuajamatabëcueneamoneyabi, athëbëabetsia navi-  
atsiania. Pijajivi pijinia pepuajamatabëcuenecaëjëpaeyaexanae pecaëjëpae-  
jamatabëcuenetsi pecovëta petonacuenebavanapaenexatsi, naviatsiania, jai  
tajëvelia Dioso pejumelivaisibaxutota Jesucristo yabara.

<sup>9</sup>Bajarapacuenia Dioso pejumelivaisibaxutota Jesús yabara tajëvelia jumaitsi.  
Tsipaji Jesús patsijitsiatsica mapanacuayabetsicaje. Bajaraxuacujinae icatsia Jesús  
naviatsijitsia athëbëabetsia. Mapanacuaje bevelianacua saya Dioso pijanacuave-  
cua. <sup>10</sup>Ponë yabara Dioso pejumelivaisibaxutota bajarapacuenia tajëvelia ju-  
maitsi, patsica baja mapanacuayabetsicaje. Bajaraxuacujinae icatsia bajaraponë  
naviatsia baja tajënacuyabetsia. Bajaraxuacujinae Jesucristo itorobica Espíritu  
Santo. Nexata daxitanacuanëjava Espíritu Santo yajavaponapona daxita Dioso pe-  
jumecovënëtsivi. <sup>11</sup>Nexata Dioso pejumecovënëtsivi, caëjivi canacujitsia, Espíritu  
Santo jamatabëcuene caëjëpaeyaexanapontsi saicayacuenia. Itsamonaë Espíritu  
Santo jamatabëcuenecaëjëpaeyaexanatsi apóstolevinexa Jesucristo pexanaëjavanë  
pevajunupaebaponaenexa. Itsamonaë pijinia Espíritu Santo jamatabëcuenecaëjë-  
paeyaexanatsi peyapëtaenexa pajamatabëcuenelivaisi xaina Dioso pejumeliv-  
aisi. Nexata tsipaeba itsamonaëjavabelia. Itsamonaë pijinia Espíritu Santo ja-

matabëcuenecaējēpaeyaexanatsi petsipaebaponaenexa apo peyapētaevi abaxē pexanialivaisi, Jesucristo pelivaisi. Itsamonae pijinia Espiritu Santo jamatabëcuenecaējēpaeyaexanatsi pevetsinexa Dioso pejumecovēnētsivi. Jamatabëcuene caējēpaeyaexanatsinua xaniavaetsia peyapētaeyaexanaenexa Dioso pijacuene. <sup>12</sup>Bajarapacuenia Espiritu Santo, daxita Dioso pejumecovēnētsivi, jamatabëcuenecaējēpaeyaexanatsi petonacuenebavanapaenexa Dioso pijacuene. Nexata daxita Dioso pejumecovēnētsivi, caejivi canacujitsia, ajamatabëcuenesaē tsaponae pevājēnaeyabelia. <sup>13</sup>Nexata belia daxitatsi bajarapacuenia najamatabëcuenejēpaeya jumecovēnētsianatsi Dioso. Jamatabëcueneyapētaenatsinua xaniavaetsia vajatuxanenē Jesucristo, Dioso pexēnato. Nexata daxitatsi Espiritu Santo nacajamatabëcuene caējēpaeyaexanaena Dioso vajajumecovēnētsinexa. Nacajamatabëcuene caējēpaeyaexanaenana xaniavaetsia Dioso vajatojinavanapaenexa. Nexata pacuenia Jesucristo jamatabëcueneitsi, bajara vaxaitsi ata jamatabëcueneitsitsi tsane. Nexata jinavanapaenatsi pacuenia Dioso nacatojitsipa. <sup>14</sup>Nexata pacuenia pejevaxi caejamatabëcuene apo najamatabëxainae, bajara vaxaitsi apo jamatabëcueneitsitsi tsane. Itsajamatabëcuene apo vecuanajamatabëxainaetsi tsane, palivaisi baja jumecovēnētavanapatsi. Nexata itsamonae penajumetsēnētsilivaisi bepexaniajailivaisicuenia nacatsipaebi ata tsane vajanacayamaxēitojorobinexa picani, itsiata apo nacayamaxēitojorobi tsane. <sup>15</sup>Nexata itsamonaejavabelia itsa tsipaebaponatsi pexaniajailivaisi, bajarapamonae asivaya betanetsi. Pacuenia Cristo vajanacaitorobinē jamatabëcueneitsi, bajara vaxaitsi ata vajajamatabëcueneitsinexa, benatojitsipatsi Cristo vajajamatabëcuenejēpaenexa. <sup>16</sup>Daxitatsi Cristo pelivaisi vajajumecovēnētsivi, caenē Cristo pijajivitsi. Vajaperabētota caevitoyo canacujitsia exanapona pacuenia Dioso tocopatatsi. Bajara pijinia pacuenia vaxaitsi ata, caejivitsi canacujitsia, Cristo nacatocopatapona vajatonacuenebavanapaenexa pacuenia nacatojitsipa. Nexata namataenetsia nayavenonaeya natonacuenebianatsi. Namataenetsianua navivatsi tsavanapae tsane. Bajarapacuenia nexata jamatabëcuenevitsabaponaenatsi Dioso vajajumecovēnētsijava.

### **Pacuenia Cristo pijajivi pejanajamatabëcuene xaina yabara pelivaisi**

<sup>17</sup>Jesucristo taneitorobixae, mapacuenia pacajumaitijsiatsijsje. Pētsa baja pajinavanapame pacuenia jinavanapa Dioso apo peyapētaevi. Dioso apo pejumecovēnētsivi najamatabëxainavanapa pexanaenexa piamatamobicuene Diosojavabelia. <sup>18</sup>Dioso apo pejumecovēnētsivi ajamatabëcueneitaquiri tsavanapae. Tsipaji apo yapētae Dioso. Bitso saya ajamatabëcuenetaja. Bajaraxuata Dioso pejitsipacuenia apo tojinavanapae. Diosovecua naxuabiaya jinavanapa. <sup>19</sup>Nexata apo yapētae piauracuene. Casaē bitso pexanaenexa daxita xua pibisiacuene. <sup>20</sup>Itsiata baitsi jane paxamē itsa pajumecovēnētame Jesucristo pelivaisi, apo pacaitorobi pibisiacuene paneexanaenexa. <sup>21</sup>Pajumetaneme baja cajena Jesucristo pelivaisi. Jesucristo pelivaisi panejumecovēnētsixae, nexata Jesucristo pijajivi pacatsipaeba pexaniajailivaisi pacuenia copiaya Jesucristo tsipaebatsi. <sup>22</sup>Nexata pacopabare panijaperujamatabëcuene. Bajarapajamatabëcuene bajayata abaxē Dioso itsa apo pajumecovēnētsimē, pacaitorobabiaba pibisiacuene paneexanaenexa. Panijaperujamatabëcuene cajena bitso abeje. Bajarapajamatabëcuene picani pacayamaxēitojorobabiaba panejitsipacuenia pibisiacuene paneexanaenexa. <sup>23</sup>Paxamē Diosojavabelia panajamatabëcuenepēnēyorore. Papejanajamatabëcuenevimē panaexanare.

<sup>24</sup> Pacuenia Dioso jamatabëcueneitsi, bajara paxamë ata pajamatabëcueneitsimëre. Nexata jivi xaniavaetsia patsitajinavanapaename pacuenia Dioso pacatojitsipa.

<sup>25</sup> Bajaraxuata pëtsa baja panajumetsënëtame. Pacaenëmë canacujitsia namataenetsia panatsipaebare pexaniajailivaisi. Tsipaji daxitatsi caenë Jesucristo pijajivitsi.

<sup>26</sup> Itsa panabaraanaepaname, pëtsa pibisiacuene panaexaname panenabaraanaepanaejavata. Pëtsa panasivajamatabëcuenetsitecame itsamatacabijavabelia ata. <sup>27</sup> Tsipaji itsa panasivajamatabëcuene tsitecaejitsipame, nexata dovathi pacayamaxëitojorobjitsipa. Nexata pibisiacuene paexanaejitsipame.

<sup>28</sup> Pajivi penacobetoxotsijivi, copatsi baja penacobetoxotabiabijava. Nacuenebi pepitsinexa xua namatavenona, peyavenonaenexanua bepejibivijavabelia.

<sup>29</sup> Pëtsa pacuaicuajamë pibisialivaisi. Biji rajane pacuaicuajamëre pexanialivaisi. Pexanialivaisi itsa pacuaicuajamë tsane, nexata papecajumetaevi pajamatabëcueneyavenonaename. Tsipaji paepatota jamatabëcuenefaefaena, itsa pacajumetaena, pacamuxunaajamatabëcuenesaë tsane. <sup>30</sup> Pëtsa itsacuene paexaname Espiritu Santo papecatojitsipaecuenevecua panejamatabëcuenebejibitsiyanima Espiritu Santo. Dioso pijaEspiritu Santo papecatsijamatabëcaexae, panayapëtaneme pepacuene Dioso papijajivicuenemë. Nexata Dioso pacacapanepaena pamatacabi Dioso pijajivi capanepaena mapanacuavecuaje.

<sup>31</sup> Daxita pibisijamatabëcuene pacopabare. Pacopabarena baja, itsajivi itsa pacaitsacueniaba, bajayajebi panejamatabësitecabiabijava. Pëtsa bajayajebi pajamatabësitecame paneanaepanaejava. Bepijia pajamatabëcaevare. Pacopabarena baja panejamatabëcuenebejjava ata. Pacopabarena baja panenabaraanaepanabiabijava ata. Pacopabarena baja itsamonae pibisiacuenia panebijataeyabiabijava ata. Pacopabarena baja itsamonae pibisiacuenia panebaracuacuajitsabiabijava ata. <sup>32</sup> Biji rajane pexaniajamatabëcuene paxainare. Namataenetsia panaitaxutobejibiatema. Pacuenia Jesucristo pejamatabëcueneta Dioso pacabarajamatabëcuenexanepana pibisiacuene paneexanaevi ata, bajara pijinia pacuenia paxamë ata panabarajamatabëcuenexanepanare, paxamëyajuvënëvi pacaitsacueniabi ata.

### Pacuenia Dioso pexi bejinavanapa yabara pelivaisi

**5** Paxamë Dioso papeximë. Pacuenia Dioso jamatabëcueneitsi, bajara paxamë ata pajamatabëcueneitsimëre tsavanapae. <sup>2</sup> Pacuenia bitso Cristo nacaasiva, bajara pijinia pacuenia paxamë ata bitso pasivamërë tsavanapae itsamonae ata. Bajayata judíovi Diosojavabelia pijaneconi itsa xaina, oveja pebito beyaxuababiaba. Nexata judíovi ofrendacuenia ovejavi rajutabiaba Diosojavabelia pijaneconi Dioso pevecuaajibiaexanaenexatsi. Bajara pijinia pacuenia Cristo bitso vajanacaasivaxae, nacopata pebeyaxuabinexatsi vaxaitsi vajaneconi vajanacavecuajibiaexanaenexa. Bajarpacuenia Cristo bitso vajanacaasivaxae, itsa nacopata vajanacasivatëpaenexa, nexata paxa Dioso bitso sivajamatabëcuenebarëyatsi.

<sup>3</sup> Paxamë rabaja Dioso papijajivimë. Bajaraxuata pëtsa baja paexaname daxita xua pibisiacuene. Pëtsa panajamatabëxainamenua pibisiacuene paneexanaenexa panevitota. Pëtsa panajamatabëxainamenua bitso panenaxainaeyabinexa daxitacuene mapanacuapijicueneje. <sup>4</sup> Pëtsa panabarëcuacuajiamënuu piauracuene yabara ata. Pëtsa panabarëcuacuajiamënuu saya jema natsiquejermalivaisixi ata.

Tsipaji apo pexanepanaeuene. Biji rajane Diosojavabelia pexaniajamatabëcuene parajutabiabianame. <sup>5</sup>Payapëtaneme rabaja pexaniajaicuene mapalivaisije. Pajivi daxita pibisiacuene exana, apo jone tsane Dioso pijanacuayabetsia. Ponë jaita itsava pijavavecu, pova pijinia jaita itsanë pamonavecu, apo jone tsane Dioso pijanacuayabetsia. Pamonae ata bitso jitsipa pexainaenexa daxitacuene mapanacuapijicueneje, apo jone tsane Dioso pijanacuayabetsia. Pamonae bitso jitsipa pexainaenexa daxitacuene mapanacuapijicueneje, jamatabëcuenejëpa pamonae vajëcabiaba jumapecataeya pexanaenëanëjavabelia. Bajarapamonae jamatabëcuenejëpa tsipaji bitso jitsipa saicayacuene Diosovecu. <sup>6</sup>Pëtsa pacayamaxëitojoroba itsajivi ata paxamë ata paneexanaenexa bajarapitsipibisiacuene. Tsipaji Dioso ayaicuena naneconitsiaexanaena pamonae Dioso apo pejumecovënëtsivi, bajarapitsipibisiacuene pexanaevi. <sup>7</sup>Bajaraxuata pëtsa payajavajinavanapame pibisiacuene pexanaevi.

<sup>8</sup>Paxamë picani bajayata pajamatabëcueneaitaquirimë tsavanapae itsa abaxë apo payapëtaemë pexanialivaisi, Jesucristo pelivaisi. Itsiata baitsi jane aeconoxae baja Jesucristojavabelia panenajamatabëcopatsixae, Dioso baja pacajamatabëcueneitayota. Bajaraxuata pajinavanapare Dioso pejitsipaecuenia, pacuenia Dioso pijajivi jinavanapa. <sup>9</sup>Dioso baja papecajamatabëcueneitayotsixae pexanialivaisita, paexanavanapare ëpexaniacuene. Pacanaëjëtaponarenu a ëpexaniajaicuene paneyapëtaenexa, xaniavaetsia panejinavanapaenexa Dioso pejitsipaecuenia. <sup>10</sup>Panevajënaeyabelia pacanaëjëtaponare paneyapëtaenexa xua yabara Dioso pacasivajamatabëcuene barëyajitsia. Nexata itsa payapëtaenexa xua yabara Dioso pacasivajamatabëcuene barëyajitsia, bajaraxua tsiteca asaëyata panevajënaeyabelia paexanavanapaenexa. <sup>11</sup>Dioso apo pejumecovënëtsivi pibisiacuene itsa exanavanapa, pëtsa panaexaname bajarapapibisiacuene. Biji rajane paitavetsianame bajarapamonae pibisiacuene pexanaeyaniva Dioso pitabarata. <sup>12</sup>Xua bajarapamonae exana muetsia, bajaraxua bitso pibisiacuene. Nexata itsajivi itsa cuenetaejitsipatsi bajaraxua pexanaejava, bajarapajivi bitso ajumeura tsipae juya petsipaebinxua itsamonaejavabelia. Tsipaji bitso pibisiacuene xua muetsia exana bajarapamonae. <sup>13</sup>Itsiata baitsi jane bajarapamonae itsa paitavetsianame Dioso pejumelivaisita, nacueneyapëtaena bajarapamonae bitso pibisiacuene pexanaejava. <sup>14</sup>Bajaraxuata pina bajarapamonae yabara, itsamonae Dioso pijajivi jumaitsi mapacueniaje:

Jamatejema saya pajinavanapame, pibisiacuene paexanavanapae atamë. Bajaraxuata Diosovecu naxuabiaya pajinavanapame. Pacopabare baja pitaquirijamatabëcuene. Nexata Cristo pejamatabëcueneta panijaneconivecu Dioso pacapanepaena. Pacajamatabëcueneitayotsiana, jai pina itsamonae Dioso pijajivi.

<sup>15</sup>Nexata baja xania tsane. Panayajivitaema pibisiacuene xaniavaetsia panejinavanapaenexa. Pëtsa pajinavanapame pacuenia bajinavanapa Dioso apo peyapëtaevi. Biji rajane pajinavanapare pacuenia bajinavanapa bitso peyapëtaevi Dioso pijacuene. <sup>16</sup>Dioso papecaitorobicuenia xaniavaetsia patojinavanapare daxitamatabacabijavabelianexa. Pamuxujobabiabare itsamonae ata Cristo pelivaisi pejumecovënëtsinexa. Tsipaji mapanacuapijivije, Dioso apo pejumecovënëtsivi, ëpibisiacuene exanavanapa. <sup>17</sup>Pëtsa pajinavanapame pacuenia Dioso apo peyapëtaevi jinavanapa. Pacaasaëmëre tsavanapae Dioso panejumecovënëtsijava, pacuenia Dioso pacatojitsipa paneexanavanapaenexa. <sup>18</sup>Pëtsa paitajibimë tsabiabi. Tsipaji ba-

jarapacue ne Diosovecua pacanaxuabiaexanaejitsipa infiernojavabelia. Biji rajane panacopatabiabare Espíritu Santo papecatsijamatabëvënëcaenexa, Espíritu Santo papecaitorobicuenia paneexanabiabinexa. <sup>19</sup>Namataenetsia panatsipaebabiabare vajatuxanenë ayaijamatabëcuene pexainaecuene. Bajarapacuenia namataenetsia itsa panatsipaebabiabianame, daxita panejamatabëëthëtovetsina panaxëanabiabianame pavajianë rubena Salmosbaxutota. Panaxëanabiabianamenua himnobaxutota ata pavajianë rubena. Panaxëanabiabianamenua pavaji ata Espíritu Santo jemata pacanaxëanaeyaexanaena. <sup>20</sup>Pajumaitsimë tsabiabi tsane Diosojavabelia: “Xanepana rabaja. Tsipaji bitso pexaniacuene panetoexaname,” pajamë tsabiabi tsane daxitacuene yabara vaxa Diosojavabelia vajatuxanenë Jesucristo pevënëta. Bajarapacuenia Diosojavabelia pajumaitsimë tsabiabi tsane pexanepanaecuene yabara, apo pexanepanaecuene ata yabara.

### **Pacuenia muxujiobatsi penapitsijivibeje yabara pelivaisi**

<sup>21</sup>Padaxitamë namataenetsia panajamatabëcueneevere, xua jamatabëpanaitorobame, namataenetsia panenaitorobabiabinexa Cristo panejumecovënëtsivixae.

<sup>22</sup>Paxamë papetiriavimë, pacuenia yaiyataeya pajumecovënëtabiabame vajatuxanenë Jesucristo papecaitorobicuenia, bajara pijinia pacuenia yaiyataeya pajumecovënëtabiabare paneamonajivi ata. <sup>23</sup>Pacuenia Cristo Dioso tocopatatsi daxita vaxaitsi Dioso vajajumecovënëtsivi vajanacaitorobinexa, bajara pijinia pacuenia pebi Dioso tocopatatsi pijava pitorobinexa. Cristo nacopata pebeyaxuabinexatsi vajanacacapanepaenexa daxita vaxaitsi vajanajamatabëcuene copatsivi Cristojavabelia. Daxitatsi caenë Cristo pijajivitsi. <sup>24</sup>Nexata bejumecovënëtavanapatsi pacuenia nacaitorobapona Cristo. Bajara pijinia pacuenia paxamë ata, papetiriavimë, bepajumecovënëtavanapame daxita pacuenia pacaitoroba paneamonajivi.

<sup>25</sup>Paxamë pijinia papebijivimë, pasivamëre panijavajivi. Bepaasivamë panivajivi pacuenia daxitatsi Cristo nacaasiva daxita Dioso vajajumecovënëtsivi. Vajanacaasivaxae, Cristo nacopata pebeyaxuabinexatsi vajanacacapanepaenexa vajaneconivecua. <sup>26</sup>Bajarapacuenia Cristo exana caenë Cristo pijajivitsi vajanacaexanaenexa. Nexata baja Cristo vajanacaajamatabëcuene xuirajibiaexanaejava, najamatabëcueneitajëtatsi vajanacabautisabijavata. Vajajumecovënëtavanapaxae Dioso pejumelivaisi, nacaajamatabëcuene xuirajibiaexanapona. <sup>27</sup>Bajarapacuenia Cristo exana daxita Dioso vajajumecovënëtsivi itsamatacabi vajanubenaenexa Cristo pitabarata. Nexata itsamatacabi nubenaenatsi Cristo pitabarata vajaneconijibivi, Dioso vajanacajamatabëcuene xaniavaetsivi. <sup>28</sup>Nexata pebijivi bitso biasiva pijavajivi. Pacuenia pijacuata naperabëasiva, bajarapacuenia biasiva pijavajivi. Nexata ponë asiva pijava, bajaraponë asiva pijava pacuenia pijacuata naperabëasiva. <sup>29</sup>Itsjajivi ata apo naperabëitoja. Biji rajane xaniavaetsia naperabëeveta. Bajara pijinia pacuenia Cristo ata nacaeveta daxita Dioso vajajumecovënëtsivi. <sup>30</sup>Tsipaji vaxaitsi Cristo pijajivitsi, ayaiBITSaëto atatsi, becaejivitsi Dioso nacatane. <sup>31</sup>Nexata nayapëtane pexaniajaicuene mapacueneje. Pebi petiriva itsa pita pijavanexa, naexanabeje becaejivi peperabëtocuenia. Tsipaji Dioso pejumelivaisibaxutota jumaitsi mapacueniaje: “Pebi itsa nacojioba, paxavecua, pena atavecua, bavecuanatsata pijavajavabelia. Nexata anijajivimibeje becaejivicuenia naexanabeje,” jai Dioso pejumelivaisibaxutota. <sup>32</sup>Mapalivaisije bitso ayapëbeje vajajumeyapë-



taenexa. Itsiata baitsi jane comparacióncuenia nacayapëtaeyaexana. Cristo vajanaasivaxae, vaxaitsi Cristo pijajivitsi Dioso nacatane becaenë Cristo peperabëtotsi. <sup>33</sup> Bajarapalivaisi comparacióncuenia pacayapëtaeyaexana nexata paxamë, pacaenëmë canacujitsia, paneasivanexa panijavajivi. Nexata panijavajivi pasivamëre. Pacuenia panijacuata panaperabëasivamë, bajara pijinia pacuenia panijavajivi pasivamëre. Panijavajivi ata pijinia bepacayaiyatane.

**6** Paxamë papeximë, Dioso panejumecovënëtsivixae, pajumecovënëtabiabare paneaxajivi, paneenajivi ata. Bajarapacuenia panijamonae pajumecovënëtabiabare. Tsipaji bajarapacuenia Dioso pacatocopata panejumecovënëtabiabinxea panijamonae. <sup>2-3</sup> Dioso pejumelivaisibaxutota jumaitis mapacueniaje: “Yaiyataema axa. Yaiyataema ena ata nejamatabëcuenebarëyanexa, neponaponaeanaxua bajayajebi mapanacuataje,” jai Dioso pejumelivaisibaxutota. Bajarapalivaisi Dioso itsa najumecopata jivi pejumecovënëtsinexa, yajavanajumecopata pacuenia Dioso yavenonaejitsia pajivi jumecovënëta bajarapalivaisi. Itsalivaisianë copiaya Dioso najumecopatsi ata, apo yajavanajumecopatsi pacuenia yavenonaejitsia pajivi jumecovënëta bajarapalivaisianë. Nexata matapania mapalivaisitaje Dioso yajavana-jumecopata pacuenia yavenonaejitsia pajivi jumecovënëta bajarapalivaisi.

<sup>4</sup> Paxamë panexi panexainaevi, anaeyacuenia pëtsa panexi paitorobabiabame papecabaraanaepanaeyaniva. Biji rajane xaniavaetsia panacoxivitsare papecajumecovënëtabiabinxea paneitorobijava. Pacujarubarenuua Dioso pejumelivaisi pejumecovënëtsinexa.

<sup>5</sup> Paxamë pijinia itsamonae papijajivimë, dajubicuenia papeccanajetsivi, itsamonae amoneya panetonacuenebavanapaenexa. Patoexanabiabare pacuenia panijatuxanevi pacaitoroba. Payaiyataema panijatuxanevi. Cujunaviaya panijatuxanevi patonacuenebabiabare asaëyata. Pacuenia Cristo panejitsipaexae, xaniavaetsia patonacuenebabiabame Cristo pijacuene, bajara pijinia pacuenia xaniavaetsia panijatuxanevi patonacuenebabiabare.

<sup>6</sup> Xaniavaetsia panijatuxanevi patonacuenebabiabare daxitamatacabi canacujitsia pacuenia patonacuenebijitsipame Cristo. Pëtsa matapania itsajota pacanaitaxutocaeveta panijatuxanevi, asaëyata patonacuenebame papecasivabarëyanexa panetonacuenebijava yabara. Patoexanabiabare panijatuxanevi pacuenia Dioso pacatojitsipa panetoexanaenexa daxita panejamatabëëthëtovetsina.

<sup>7</sup> Jamatabëcuenebarëyaya patonacuenebavanapare panijatuxanevi. Xua panijatuxanevi patonacuenebavanapame, bajaraxua yabara pasivajamatabëjumaitsimëre: “Maxuaje nacuenebajë apo ëtajatuxanenënexa. Taniji pepo tajatuxanenë, Cristo, betatonacuenebijava,” pasivajamatabëjamëre panijatuxanevi panetonacuenebijava yabara. <sup>8</sup> Payapëtaneme rabaja mapacueneje. Pajivi pexaniacuene toexana itsamonae ata, bajarapajivi matamotsianatsi Dioso. Pamonaeta dajubicuenia canajetatsi itsamonae amoneya petonacuenebabiabinxea, bajarapamonae ata Dioso matamotsianatsi pexaniacuene itsa toexana itsamonae ata. Pamonaeta apo pecanajetsivitsi, bajara pijinia pacuenia bajarapamonae ata Dioso matamotsianatsi pexaniacuene itsa toexana itsamonae ata.

<sup>9</sup> Paxamë pijinia papijatuxanevimë, pacamuxujibatsi mapacueniaje. Xaniavaetsia pataema panijajivi, papecatonacuenebivi. Pëtsa anaeya patiobabiabame panijajivi asaëya papecatonacuenebabiabinxea. Pacanaëjere pacuenia paxamë ata panijatuxanenë Dioso eca athëbëtata. Pamonaeta apo pecanaia. Bajaraponëjavabelia

pananeconitsipame. Bajaraponë panijajivi ata pijatuxanenë baja cajena. Bajaraponë saya najëpaeya nacatane daxitatsi. Nexata paneconivajëto xainatsi caejivitsi canacujitsia, bajarapaneconivajëtota nacananeconitsiaexanaponaena. Bajaraxuata panijajivi ata itorobajë xaniavaetsia papecatonacuenebabiabinexa.

**Pacuenia Dioso pejumecovënëtsivi itorobatsi  
penayajivitaenexa dovathi yabara pelivaisi**

<sup>10</sup>Tajamonaë, icatsi cotocaevi patacatoyaquinaelivaisita, pacajumaitsitsi macpacueniaje. Pajamatabëcuenesaëmëre tsavanapae vajatuxanenë pesaë paneyajavajinavanapaexae. <sup>11</sup>Vajabitsaënë banayajivinaxatata piatajajava pijavajabitsaënë pejorojoronaeyanivatsi. Bajara pijinia pacuenia paxamë ata panayajivinajamatabëcuenexatare Dioso pejumelivaisita. Nexata bajarapacuenia pajamatabëcuenesaëmëre tsane dovathi papecajamatabëcuene yamaxëitojorobiyanima.

<sup>12</sup>Tsipaji Dioso vajanacatojitsipaecuenia itsa exanavanapatsi, nexata dovathi jamatabënacaitacueniaba. Nexata bëpënëa vajajamatabëcuenesaëta asaëyata vajabitsaë bevanatsi, dovathi pijajivijavabelia, apo vajataevijavabelia. Dovathi cajena pijajivi ayaibitsaëtovaneto. Dovathi pijajivi xaina penamatacaitorobivitsi, bitso piagamatabëcuenesaëvi. Nexata dovathi pijajivi jinavanapa athëbëtsia. Jivanavanapa mapanacuata ataje. Nexata dovathi pijajivi itoroba daxitajivi pibisiacuene pexanaeyaexanaenexatsi mapanacuataje. Bajaraxuata bëpënëa vajajamatabëcuenesaëta, asaëyata vajabitsaë bevanatsi dovathi pijajivijavabelia. <sup>13</sup>Nexata paxamë dovathi papecajamatabëcuene yamaxëitojorobiyanima, panayajivinajamatabëcuenexatare Dioso pejumelivaisita. Nexata pamatacabi pibisiacuene pacatocopiapatsiana dovathi pejamatabëcueneta papecajamatabëcuenejëtsinexa, itsiata pajamatabëcuenesaëmëre tsane bajarapalivaisita. Nexata pibisiacuene apo paexanaemëre tsane. <sup>14</sup>Vajabitsaënë itsa nayajivinaxatata piatajajava, caecovëta banuca. Nexata pijavajabitsaë apo tixitsitsi pecovëvecua. Bajara pijinia pacuenia paxamë ata pajamatabëcuenesaëmëre Dioso pejumelivaisita dovathi papecajopaeyaexanaeyanima Dioso pejumelivaisi panejumecovënëtsijavavecua. Vajabitsaënë piatajajava itsa nayajivinaxatata, bayanaepacëta penaepacëtsijavata pesarabiyaniatsi penayajivinaxatatsijava. Bajara pijinia pacuenia paxamë ata Dioso pejumelivaisita, pexaniajailivaisita, panayajivinajamatabëcuenexatare. Vajabitsaënë piatajajava banamëpabëxatata pijavajabitsaënë pejorojoronaeyanivatsi. Bajara pijinia pacuenia paxamë ata Dioso pejumelivaisita panayajivinajamatabëcuenexatare. Pajamatabënajinavanapare Dioso baja aneconijibia papecataejava. Nexata dovathi nayajivitaeya pajinavanapare papecajamatabëcuene yamaxëitojorobiyanima. <sup>15</sup>Vajabitsaënë najamatabëcueneveretsiaya pexaniazapato banataxuxatata pijavajabitsaëjavabelia jamatejema peponaenexa. Bajara pijinia pacuenia paxamë ata panajamatabëcueneverere, jamatejema pexanialivaisi jivi panetsipaebavanapaenexa. Daxita baja pamonaë jumecovënëta bajarapalivaisi, Dioso baja barajamatabëcuenexanepanaeya tanetsi. <sup>16</sup>Panajamatabëcuenecopare Diosojavabelia papecayavenonabiabinexa. Vajabitsaënë banayajivicauponaa escudovënëjjava, pijavajabitsaënë itsa bixabajarabatsi piupiitarunutsipuyaeneta, penacaranatsinexa bajarapaescudota, penayajiviitacaëbinexanua. Bajara pijinia pacuenia paxamë ata dovathivecua Dioso pacajamatabëcuenecaranatsiana, itsa panajamatabëcuenecopatsianame Diosojavabelia papecayavenonabiabinexa. <sup>17</sup>Vajabitsaënë banamatax-

atata piatajajava, cascovënëjava, pematathinaxuabiyaniivatsi pijavajabitsaënë. Bajara pijinia pacuenia paxamë ata panayajivinajamatabëcuenexatare Dioso pejumelivaisita. Pajumecovënëre papecacapanepaelivaisinexa panijaneconivecua. Vajabitsaënë ita pona pijavajabitsaējavabelia, banayajivicapona espada. Bajara pijinia pacuenia paxamë ata panayajivicaponare Dioso pejumelivaisi, palivaisi baja pacayapëtaeyaexana Espiritu Santo. <sup>18</sup>Dioso pejumelivaisita najamatabëcuenexatatsiaya ita pajinavanapaename, nexata pacuenia Espiritu Santo pacaitoroba, daxitamatacabi canacujitsia Diosojavabelia pavajëtabiabianame Dioso papecajamatabëcuene yavenonabiabinexa. Pajamatabëcueneitatsacamëre tsavanapae dovathi papecajamatabëcuene yamaxëitorobiyaniiva. Nexata pacopatsinejevamë Diosojavabelia panevajëtabiabijava, ajamatabëcueneitatsacaya Diosojavabelia panayajivivajëtabiabare. Asaëyata patovajëtabiabarenua daxita Dioso pejumecovënëtsivi. <sup>19</sup>Xanë ata panetovajëtabiabarenua Dioso taneyapëtaeyaexanaenexa paepatota bajarapalivaisi tsipaebajë itsamonaejavabelia. Panetovajëtabiabarenua ajumeurajibia tatsipaebabiabinexa apo judíovi ata Dioso pecapanepaejavanexatsi. <sup>20</sup>Naneconitsiaponaponajë majotaje, penaneconitsivi pejebabiabibota, itsamonaejavabelia tatsipaebabiabixae bajarapapexanialivaisi, Dioso tanetocopatsilivaisi. Bajaraxuata Diosojavabelia panetovajëtabiabare, naneconitsiaponaponae atanë, ajumeurajibia jivijavabelia tatsipaebabiabinexa bajarapalivaisi pacuenia jamatabëtsipaebajë.

**Pacuenia Pablo toyaquina Efeso tomarapijivi peveretsinexa baja  
petoyaquinaelivaisi mapabaxutotaje yabara pelivaisi**

<sup>21</sup>Vajabananë Tíquico ita patsiana paxamëjavabelia, pacatsipaebiana daxita pacuenia netane. Bjaraponë bitso vajaasivanë. Xaniavaetsia paneyavenonabiaba ita patonacuenebabiabajë pacuene vajatuxanenë paneitoroba. <sup>22</sup>Bjaraxuata Tíquico pacatoitorobatsi baja paxamëjavabelia papecatsipaebinxaxa pacuenia pajinavanapajë. Nexata Tíquico ita pacatsipaebiana pacuenia pajinavanapajë, pamuxunaajamatabëcuenesaëmë tsane. <sup>23</sup>Pacatovajëtabiabatsi vaxa Diosojavabelia, vajatuxanenë Jesucristojavabelia ata, jamatabëcuenexanepanaeya panejinavanapaenexa. Pacatovajëtabiabatsinua namataenetsia panenasivanexa Diosojavabelia panenajamatabëcuenecopatsivixae. <sup>24</sup>Pacatovajëtabiabatsinua Diosojavabelia daxita paxamë Dioso papecayavenonabiabinexa. Paxamë abaxë tsiteca bitso pasivamë tsavanapae vajatuxanenë Jesucristo. Bajara itsi tsane.

## Mapabaxutoje San Pablo toyaquina Filipos tomarapijivijavabelia

### Pacuenia Pablo toyaquina mapabaxutoje Dioso pejumecovënëtsivi, Filipos tomarapijivijavabelia, pamatacabi naneconitsia ponapona penaneconitsivi pejebabiabibota yabara pelivaisi

**1** Xanë Pablonë, Timoteobeje, Jesucristo papijajivitonënëbeje. Pacatoyaquinat-sibeje mapabaxutoje padaxitamë paFilipos tomarapijivimë, Jesucristo pelivaisi pejumecovënëtavanapaevi. Paancianovimë, paxamë ata padiaconovimë, pacatoyaquinatsibeje. <sup>2</sup>Pacatovajëtatsibeje vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

### Pacuenia Pablo Diosojavabelia tovajëta Jesucristo pelivaisi pejumecovënëtsivi yabara pelivaisi

<sup>3</sup>Itsa pacanajamatabënapitatsi Diosojavabelia tavajëtsijavata, jumaitsinë tsabiabi Diosojavabelia: “Xaniavaetsia yavenonabiabame nijajivi, Filipos tomarapijivi,” janë tsabiabi Diosojavabelia paxamë yabara. <sup>4</sup>Itsa vajëtajë Diosojavabelia, nexata pacatovajëtabiabatsi jamatabëcuenëbarëyaya. <sup>5</sup>Bajarapacuenia pacatovajëtabiabatsi tsipaji Dioso pejumelivaisi, pexanialivaisi, panejumecovënëtsijavaveliacujinae, paneyavenonabiabame tanamatavenonaejavaxi yabara. Patsipaebabiabamenua Jesucristo pelivaisi itsamonaejavabelia. <sup>6</sup>Yapëtaniji baja cajena pacuenia Dioso pacayavenonaejitsia bitso pexaniajamatabëcuene panexainavanapaenexa. Tsipaji baja Dioso taxuxuaba papecajamatabëcuene xanepanaeyaexanaenexa. Bajaraxuata panevajënaeyabelia Dioso pacajamatabëcuene xanepanaeyaexanapon-aena copatsinejeva matapania Jesucristo icatsia pepatsimatacabitsicajavabelianexa. <sup>7</sup>Bajarapacuenia paxamë patacasivanajamatabëxainaejava, netsitaxanepana. Tsipaji bitso pacaasivatsi. Pamatacabi naneconitsiaponaponajë penaneconitsivi pejebabiabibota, panejamatabëcueneyavenoname. Panejamatabëcueneyavenonamenua pamatacabi nacuaeetsivi pitabarata nenuta Jesucristo pelivaisi jivi tatsipae-baponaejava yabara. Nexata bajarapamatacabi jumaitsinë bajarapamonaejavabelia: “Mara palivaisije, Jesucristo pelivaisi, pexaniajailivaisi cajena jivi pecapanepaelivaisinexatsi Diosojavabelia,” janë nacuaeetsivijavabelia. <sup>8</sup>Dioso cajena nejamatabëcueneyapëthane pacuenia bitso paxamë pacaasivatsi. Jesucristo neyavenona bitso patacaasivanexa. <sup>9</sup>Pacatovajëtatsi Diosojavabelia itsamonae ata bitso paneasivatsavanapaenexa panevajënaeyabelia. Pacatovajëtatsinua paneypätaenexa Dioso. Pacatovajëtatsinua paneypätaenexa xua Dioso pacatojitsipa paneexanavanapaenexa. <sup>10</sup>Nexata payapätaename paneitapetsinexa palivaisi bitso xanepana daxitalivaisivecua, panejumecovënëtsinexa bajarapalivaisi. Nexata bajarapacuenia pacacajëpaena xaniavaetsia panejinavanapaenexa aneconijibia. Matapania Jesucristo icatsia pepatsimatacabitsicajavabelianexa, bajarapacuenia panaevetavanapaename. <sup>11</sup>Nexata epexaniajamatabëcuene paxainaename panejamatabëthëtojavavetsina Jesucristo papijajivixaemë. Nexata itsamonae paxamë yabara jamatabëjumaitsi tsane Diosojavabelia: “Diosomë, ayajamatabëcuenenëmë bitso. Pexaniacuene bitso toexaname Filipos tomarapijivi epexaniajamatabëcuene pex-

ainaenexa pejamatabëëthëtota,” jamatabëjai tsane itsamonae Diosojavabelia paxamë xaniavaetsia panetsitajinavanapaexae.

### **Pacuenia Pablo jumecovënëtaaponapona Cristo yabara pelivaisi**

<sup>12</sup>Tajamonae, payapëtaneme rabaja pajamatabëcuene yabara naneconitsia ponaponajë penaneconitsivi pejebabiabibota. Jitsipajë paneyapëtaenexa mapacueneye. Majotaje penaneconitsivi pejebabiabibota neeta pexanialivaisi, Jesucristo pelivaisi, jivi tatsipaebaponaexae. Xanë neetsi ata penaneconitsivi pejebabiabibota, itsiata apo yacaranatsicapanepae pexanialivaisi, Jesucristo pelivaisi, peyacaëjëpaponaeenexa daxitanacuanëjava. Nexata baja aeconoxae bajarapalivaisi pevajënaeyabelia yacaëjëpaponae daxitanacuanëjava daxitajivi Diosojavabelia pecapanepaenexatsi. <sup>13</sup>Nacuaeveetsinë pijabopijivi, vajabitsaë, daxita itsamonae ata, neyapëtane majota naneconitsia taponaponaëjava Jesucristo pijajivitonëxanë. <sup>14</sup>Mapatomarataje ayabitsaëtoxaneto Dioso pejumecovënëtsivi, itsa nevënëtane tananeconitsiaponaponaëjava, najamatabëcuenesaëtavanapa. Diosojavabelia asaëy-ata najamatabëcuene copaba peyavenonaenexatsi. Nexata ajumejunavijibia Dioso pejumelivaisi tsipaebapona itsamonaejavabelia.

<sup>15</sup>Pamonae ajumejunavijibia Dioso pejumelivaisi tsipaebapona itsamonaejavabelia, bajarapamonaeyajuvënëvi, panecuenecaëba. Nexata itsamonaejavabelia asaëya tsipaebapona Cristo pelivaisi. Bajarapamonae xanë yabara jamatabëjumaitsi: “Pablo bitso ayaicuenia Dioso pejumelivaisi jivi nacatsutsipaebapona. Pacuenia bajaraponë tsipaebapona, matatoxenetsia vaxaitsi tsipaebaponaenatsi jivi vajanacayaiyataenexa,” jamatabëjai bajarapamonae. Itsiata itsamonae, bajarapamonaeyajuvënëvi, taneyavenonaenexa, itsamonaejavabelia tsipaebapona Cristo pelivaisi bajarapamonae ata xaniavaetsia pejumecovënëtsinexa. <sup>16-17</sup>Itsamonae tsipaebapona Cristo pelivaisi pejumetaevitsi saya peyaiyataenexatsi, pepënaponaenexatsinua. Bajarapamonae pejamatabëëthëtovetsina apo jumecovënëtsi ata Cristo, saya jema Cristo pelivaisi tsipaebapona. Jamatabëjumaitsi: “Vecae Pablo naneconitsiaponaponaë penaneconitsivi pejebabiabibota, pecovëta itsajamatabëcuene xainaeyaexanaenatsi Cristo pelivaisi pejumecovënëtsivi. Bajarapacuenia Pablo jamatabëcuenebëjaiyaexanaenatsi,” jamatabëjai bajarapamonae xanë yabara. Itsiata itsamonae xaniavaetsia tsipaebapona Cristo pelivaisi pejumecovënëtsixae Cristo. Bajarapamonae yapëtane Dioso tanetocopatsijava penaneconitsivi pejebabiabibota naneconitsia taponaponaëjavata, tajumaitsi javanexa nacuaeveetsivijavabelia mapacueniaje: “Jesucristo pelivaisi jivi pecapanepaelivaisinexatsi, pexaniajailivaisi cajena,” tajai javanexa nacuaeveetsivijavabelia, bajarapamonae yapëtane. <sup>18</sup>Majotaje nenaneconitsiaexanae ata, apo natsinajamatabëxainaenë. Itsamonae pejamatabëëthëtovetsina Cristo pelivaisi pejumecovënëtsixae, tsipaebapona jivi pejumecovënëtsinexa bajarapalivaisi. Itsamonae pijinia pejamatabëëthëtovetsina apo jumecovënëtsi ata, itsiata Cristo pelivaisi tsipaebapona jivi pejumecovënëtsinexa bajarapalivaisi. Bajaraxuata bajarapamonae ata jivi petsipaebaponaëjava yabara, itsiata sivajamatabëcuenebarëyanë.

Bitso orijibia tavajënaeyabelia jamatabëcuenebarëyanë tsaponae tsane. <sup>19</sup>Tsipaji yapëtaniji pacuenia panetovajëtaponame Diosojavabelia. Espíritu Santo, ponë Jesucristo itorobica, bajaraponë neyavenonapona. Bajaraxuata yapëtaniji daxita pacuenia netoxanepanaeijtsia. Nexata baja pitsapaenajë tananeconitsia ponapon-

aejavavecua. <sup>20</sup> Bitso jitsipajë ëpexaniacuene taexanaenexa. Apo jitsipaenë taexanaenexa itsacuenepavayo ata, xua yabara auranë tsipae. Cristo tajumecovënëtsijavaveliacujinae, aeconoxae ata, ajunavijibia jitsipajë taexanaenexa Cristo pejitsipaecuenia daxitamatacabijavabelianexa. Bajarapacuenia jitsipajë taexanaponaeenexa ëbajaraponënexa. Bajaraponë tanetojitsipaecuenia abaxë taasaëtsaponaponaeepato mapanacuataje, tatëpaeepatotanaxa ata, jitsipajë taexanaenexa xua pejamatäbëcueneta daxitajivi yayataejitsia Cristo. <sup>21</sup> Tasaëtsaponaponaeepato abaxë mapanacuataje, Cristo pejitsipaecuenia toexanaponaponajë. Itsa pamatacabi tēpaenajë, netoxanepanaejitsia mapanacuata tasaëtsaponaponaejava matatocenetsia. Tsi-paji Cristo yajavaponaponaeenajë athëbëtatsia. <sup>22</sup> Tasaëtsaponaponaeepato abaxë mapanacuataje, necaëjēpa tatoexanaponaponaeenexa Cristo tanetojitsipaecuenia. Itsiata apo yapëtaenë xua pepacuene jitsipajë. <sup>23</sup> Itsajavata bitso jitsipabiabajë tatēpaejava taponaeenexa Cristo pijanacuayabetsia. Bajaraxua bitso netoxanepanaejitsipa. <sup>24</sup> Itsiata paxamë panenamatavenoname abaxë taponaponaeenexa mapanacuata, patacayavenonaponaponaeenexa. <sup>25</sup> Yapëtaniji baja cajena abaxë taponaponaejava paxamënexa. Ponaponaeenajë abaxë patacayavenonaeenexa, paneajamatabëcuenesaënexa panevajënaeyabelia, panejamatabëcuenebarëyanexanua panejumecovënëtsixae Cristo pelivaisi papecacapanepaenexa panijaneconivecua. <sup>26</sup> Nexata pamatacabi Jesucristo neyavenonaena penaneconitsivi pejebabiabibovecua tapit-sapaenexa, ponaponaeenajë icatsia paxamëjavata. Nexata jamatabëcuenebarëyaya panevajunupaebianame itsamonaejavabelia pacuenia Jesucristo neyavenona tapit-sapaenexa penaneconitsivi pejebabiabibovecua.

<sup>27</sup> Pajinavanapare xaniavaetsia, pacuenia pexanialivaisi, Cristo pelivaisi, pacaitoroba. Nexata itsa pacataenatsi, apo pacatae atatsinua tsane, itsiata jitsipajë patacavënëlivaisitaeponaejava najamatabëcuenejēpaeya panecasaëtsavanapaejava Cristo pelivaisi panejumecovënëtanapaejava. Jitsipajë patacavënëlivaisitaejava asaëyata najamatabëjēpaeya jivi panetsipaebavanapaejava Jesucristo pelivaisi jivi pecapanepaelivaisinexatsi. <sup>28</sup> Pëtsa pacujunavame pamonaë pacaitoya. Dioso papecayavenonaexae, itsa apo pacujunavimë tsane itsamonae pacabejiobiaexanae ata, nexata bajarapamonae jamatabëjumaitsi tsane: “Pexaniajailivaisi cajena bajarapamonae tsipaebapona. Tsi-paji Dioso yavenonatsi. Nexata vaxaitsi bajarapamonae vajabejiobiaexanaexae, Dioso nacaverebiabiana,” jamatabëjai tsane. Yapëtaenanua paxamë papecacapanepaejavanexa Dioso. <sup>29</sup> Cristo pejamatäbëcueneta pacatocopata bajaraponë panejumecovënëtsinexa. Itsiata baitsi jane apo pacatocopatsi ëbajaraponë panejumecovënëtsinexa. Pacatoyajavacopatanua baja cajena itsamonae papecabejiobiaexanaenexa bajaraponë papijajivixaemë. <sup>30</sup> Pacuenia Cristo pijajivitonëxaenë itsamonae nebejiobiaexanapona, bajara pijinia pacuenia paxamë ata itsamonae pacabejiobiaexanaena. Pacuenia baja imata panetaneme itsamonae tanebejiobiaexanaejava, bajarapacuenia abaxë tsiteca nebejiobiaexanapona pacuenia baja panevënëlivaisitaneme.

**Pacuenia Dioso pejumecovënëtsivi itavetatsi  
beayajamatabëcuenevi penataeyaniva yabara pelivaisi**

**2** Payapëtaneme rabaja mapacuenije. Jesucristo paneyajavajinavanapaexae, panajamatabëcuenesaëtame panejumecovënëtsijava. Payapëtaneme rabaja. Jesucristo papecaasivaxae, pacajamatabëcuenebabata. Payapëtaneme rabaja Es-

píritu Santo papecatsijamatabëeceajava papecayajavaponaponaenexa. Payapëtaneme rabaja Jesucristo papecaitaxutotsonia taeyabiabijava. <sup>2</sup>Bajaraxuata nexata pacaitorobatsi mapacuenia panejinavanapaenexaje patacasivabarëyanexa. Namamatabëcuenejëpaeya pajinavanapare. Najamatabëcuenejëpaeya namataenetsia panaasivamëre tsavanapae. Xua paexanaejitsiamë Dioso pejamatabëcueneta, namamatabëcuenejëpaeya paexanavanapare. <sup>3</sup>Pëtsa panatoexaname itsacueneyavayo ata, xua ëpaxamënexa pacatoxanepana. Biji rajane paexanare xua itsamonae xua toxanepanatsi. Pëtsa paexanamenua itsacueneyavayo ata saya bepaayaijamatabëcuenevimë papecataenexa itsamonae. Biji rajane beveliajamatabëcuenevi panataeyabiabianame. Itsamonae paxamëvecua ayaijamatabëcuenevi pataeyabiabianame. <sup>4</sup>Pëtsa panajamatabëxainabiabame ëpaxamë panenatojitsipaecuene. Biji rajane payajavanajamatabëxainabiabianame itsamonae ata penatojitsipaecuene.

<sup>5</sup>Pacuenia Jesucristo jamatabëcueneitsi, bajara pijinia paxamë ata pajamatabëcueneitsimëre. <sup>6</sup>Pacuenia Dioso jamatabëcueneitsi, bajara pijinia Jesucristo ata jamatabëcueneitsi. Itsiata baitsi jane Jesucristo apo jamatabëjumaitsi: “Jitsipajë daxitajivi taneyaiyataenexa pacuenia taxa Dioso yayiatanetsi,” apo jamatabëjai. <sup>7</sup>Bajaraponë picani ayaijamatabëcuenenë. Paxa Dioso yajavaponapona athëbëtsatsia. Itsiata itsa patsica mapanacuayabetsicaje, naexana pacuenia vaxaitsi banaexanatsi mapanacuataje. Nexata paxa Dioso beprijajivitonë naexana, pacuenia Dioso itorobatsi pexanaenexa. <sup>8</sup>Bejivitonëcuenia itsa naexana, beveliajamatabëcuenenëcuenia ponapona. Paxa Dioso pitorobicueniatsi jumecovënëta. Pacuenia bitso pibisiacuene pexanaevi pijaneconi yabara cruzajavabelia bacobematabiabarutatsi pebeyaxuabinexatsi, bajara pijinia pacuenia Jesucristo ata nacopata cruzajavabelia pecobematabiabarutsinexatsi. <sup>9</sup>Bajaraxuata Dioso mëthëvetsina matacotatsi. Caponatsi athëbëbetsia peecaenexa paxa Diosojavatatsia, pebarëevetsinexatsi daxitacuene. <sup>10</sup>Nexata bajaraponë itsa vënëlvaisitaenatsi, pematabacabëta yayiataeya tonubenaenatsi daxitajivi. Athëbëtsatsia pejinavanapaevi, mapanacuapijivi ata, petëpaevimi ata, pematabacabëta yayiataeya tonubenaenatsi. <sup>11</sup>Nexata daxitajivi jumai tsane Jesucristo yabara: “Jesucristo rabaja cajena pepo petuxanenë,” jai tsane. Nexata daxitajivi yapëtaena pacuenia paxa Dioso bitso ayaijamatabëcuenenë.

### **Pacuenia Dioso pejumecovënëtsivi pexaniajailivaisi pejumecovënëtavanapaexae, bepecotia mapanacuataje yabara pelivaisi**

<sup>12</sup>Tajamonae bitso patacaasivavi, pacuenia panejumecovënëtame pamatacabi pacatsipaebaponaponatsi Dioso pejumelivaisi, bajarapacuenia matatoxenetsia Dioso pajumecovënëtavanapare, aeconoxae xanë tajë pacavecuaponapona atatsi. Pacaejivimë canacujitsia cjunaviaya Dioso pajumecovënëre. Nexata ëpexaniacuene paexanavanapaname. Tspiji Dioso papecacapanepaevinexa. <sup>13</sup>Dioso rabaja pajamatabëcuene yavenona panejamatabëëthëtovetsina jitsipaeya paneexanaenexa, pacuenia Dioso pacatojitsipa. Dioso pacajamatabëcuene caëjëpaeyaexanana paneexanaenexa bajarapacuene.

<sup>14</sup>Daxitacuene paexanavanapare pajamatabëcuenenatsipaebinejevamë. Pëtsa anaeya namataenetsia najumenotsia panabijatanemenua. <sup>15</sup>Bajarapacuenia itsa pajinavanapaname, nexata daxita paxamë aneonijibia jivi patsitajinavanapaname Dioso papexixaemë. Nexata mapanacuapijivi pibisiacuene pexanaevi tuatujëta pajinavanapae atamë tsane, itsajivi ata acuenebi tsane pibisiacuena pa-

pecabaracuaicuajainexa. Pacuenia pecotia itayota pitaquirijavata, bajara pijinia pacuenia paxamë ata paitsimë tsane. Bepapecotiamë tsane pexaniajailivaisi panejumecovënëtavanapaexae bajarapamonaevavata. <sup>16</sup> Bepapecotiamë tsane xaniavaetsia itsa patsitajumecovënëtavanapaename bajarapamonaevavata pexaniajailivaisi, Jesucristo pelivaisi. Bajarapacuenia itsa patsitajumecovënëtavanapaename, pacasivabarëyatsi tsane pamatacabi icatsia Cristo patsianica. Bajarapacuenia pacasivabarëyatsi tsane tsipaji baja yapëtaenajë apo tanacueratsijava asaëya tanacuenebijava paxamëjavata. <sup>17</sup> Dioso pacasivabarëya panenajamatabëcuenerajutsixae Diosojavabelia panetojinavanapaenexa bajaraponë papecatojitsipaecuenia. Itsamonae nebeyaxuabijitsia ata tsipae Cristo pelivaisi patacatsipaebixae, xanë itsiata nasivajamatabëcuenebarëyanë tsipae. Tsipaji Cristo pelivaisi bajarapacuenia patacatsipaebinxae, Dioso netocopata. Nexata daxita paxamë pacayajavajamatabëcuenebarëyatsi tsane. <sup>18</sup> Bajarapacuenia paxamë ata pajamatabëcuenebarëyamëre tsavanapae. Paneyajavabarëyamërenua tsavanapae.

### Timoteobeje Epafroditobeje yabara pelivaisi

<sup>19</sup> Itsa vajatuxanenë Jesús jitsipa, naxanitsiayo jamatabëitorobajë Timoteo papacataenexalia. Pepatsicujinaerena, itsa pacavënëlvaisitaenatsi pacuenia pajinavanapame, nejamatabëcuenebarëyaya exanaejitsia. <sup>20</sup> Bajaraponë caenë nejamatabëcuenejëpa. Bajaraponë bitso pacasivanajamatabëxaina xaniavaetsia panejinavanapaenexa. <sup>21</sup> Daxita itsamonae bitso najamatabëxaina ëpenatojitsipaecuenia pexanaenexa. Apo sivanajamatabëxainae Jesucristo petonacuenebinxae. <sup>22</sup> Paxamë baja payapëtaneme pacuenia Timoteo pacatsitaponapona pexaniajamatabëcuenia. Pacuenia itsamonae paxa penacuenebijava bayavenona, bajara pijinia pacuenia Timoteo neyavenona jivi tatsipaebaponaevava pexanialivaisi, Jesucristo pelivaisi. <sup>23</sup> Bajaraxuata jamatabëitorobajë Timoteo paxamëjavabelia papecataenexalia. Itsa yapëtaenajë pacuenia nexanaejitsia penaneconitsivi pejebabiabibota tananeconitsiaponaponaevava yabara, nexata bajaraxuacujinae pacatoitorobialitsi Timoteo papacataenexalia. <sup>24</sup> Xanë jamatabëjumaitsinë paxamë yabara: “Itsa Dioso netojitsipaena xanë ata taponaeenexa bajarabelia, nexata neyavenonaena bepajia taponaeenexa tataenexalia Filipos tomarapijivi,” jamatabëjanë paxamë yabara.

<sup>25</sup> Panetoitorobaremena rabaja vajabanenë Epafrodito pataneyavenonaenexamë bajarapacuenia tanamatavenonaeeapatota. Nexata Jesucristo patonajuanacuenebajëbeje. Asaëyata panajuanacuenXanë jamatabëjumaitsinë paxamë yabara: “Itsa Diosobajëbeje, Dioso apo pejumecovënëtsivi paneitsacueniababiabi atabeje. Nexata icatsia netsitaxanepana bajaraponë patacatoitorobinxalia. <sup>26</sup> Majotaje Epafrodito piavitaneucujinae, jamatejema baja. Nexata aeconoxae bitso jamatabëpona paxamëjavabelia papecataenexa. Bitso jamatabëpona tsipaji yapëtanepanevënëlvaisitaevava pebitsojava piavitaneucuenae. <sup>27</sup> Xaniajai rabaja picani. Avitane petëpaejavabelianexa. Itsiata baitsi jane Dioso itaxutotsoniatanetsi. Xanë ata Dioso nitaxutotsoniatane. Tsipaji itsa nevecuatëpaejitsipa, xanë bitso najamatabëxainaejitsipajë. Tsipaji penaneconitsivi pejebabiabibota taneetsixae tanajamatabëxainaejavata, nevecuatëpaejitsipa. <sup>28</sup> Bajaraxuata bitso jitsipajë bajaraponë patacatoitorobinxalia panetaenexa, nexata paxamë panejamatabëcuenebarëyanexa itsa pataneme icatsia bajaraponë. Nexata xanë ata paxamë yabara bevelia najamatabëxainaeenajë. <sup>29</sup> Pacopiapitsianame bajaraponë bitso jamatabëcuenebarëyaya Dioso



pejamatabëcueneta vajabananëxae. Pamonae jamatabëcuenetsi pacuenia bajaraponë jamatabëcuenetsi, payaiyataename.<sup>30</sup> Paxamë apo papatsi atamërena maber- enaje pataneyavenonaenexamë, itsiata panejamatabëcueneta bajaraponë pane- toitorobaremena taneyavenonaenexa. Nexata bajaraponë neyavenonabiaba Cristo pijacuene tatonacuenebijava. Bajaraxuacujinae itsa avitane, imoxo picani petëpae.

### Pacuenia jivi Dioso pejitsipaacuenia betojinavanapa yabara pelivaisi

**3** Tajamonae, palivaisi capanepaeya pacatoyaquinatsi baja, bajarapalivaisi pa- sivajamatabëcuenearëyamëre Cristo papijajivixaemë. Xanë apo pacasivac- ueranaetsi patacatoyaquinaenexa icatsia bajarapalivaisi. Tspijaji xanepana icatsia panejumetaenexa bajarapalivaisi.<sup>2</sup> Panayajivitaema pijamatabëcuenebejevi, pa- monae beaviri pianapeanaevi. Tspijaji raja bajarapamonae apo aura pexanaejava yabara. Bajarapamonae jamatabëcuenenavëxaniabiaya jumaitsi tsabiabi Jesucristo pijajivijavabelia: “Xanepana paxamë ata papecaperabëcaucubinexa judíovicue- nia Dioso pepacuene papecacapanepaenexa panijaneconivecua,” jai tsabiabi.<sup>3</sup> Nacaperabëcaucutsi ata tsipae, vajanacaperabëcaucutsijava yabara, Dioso pex- itsi apo nacaexanae tsipae. Vaxaitsi pepacuene vajanacapanepaevinexa Dioso- javabelia. Tspijaji vajamatabëthëtojavavetsina najamatabëcuenecopatatsi Diosojav- abelia vajanacapanepaenexa. Jamatabëcuenearëyatsi Jesucristo pijajivixaetsi. Yapëtanetsinua pacuenia Dioso apo nacacapanepae tsipae vajacuata vajaexanaejava pejamatabëcueneta.<sup>4</sup> Itsajivi itsa caëjëpaejitsipatsi pijacuata penacapanepaenexa Diosojavabelia judíonëxae, Dioso petonacuenebijava yabara ata, nexata xanë ata necaëjëpaejitsipa tajacuata tanacapanepaenexa.<sup>5</sup> Xanë picani mataitsinëje. Itsa baja xainajë ocho pamatacabibeje tanaexanaecujinae, tajasalinainëmi Israelpijnë. Ben- jamínpijnë pemomoxiyajuvënënenë. Taxa judíonë. Taena ata judíova. Xanë picani fariseonë. Pacuenia fariseovi bitso jumecovënëta Dioso Moiséspijinëta penajume- copatsilivaisi, bajara pijinia pacuenia xanë ata itsinë.<sup>6</sup> Daxita tajamatabëcuenesaëta caasaënë tajumecovënëtsijava Dioso Moiséspijinëta penajumecopatsilivaisi. Ja- matabëcuenenavëxaniabajë tsaena bitso. Jesús pelivaisi pejumecovënëtsivi yabara, jumaitsinë tsabiabi: “Dioso Moiséspijinëta penajumecopatsilivaisivecua saicayali- vaisi jumecovënëta. Nexata bajarapamonae bebeyejebatsi,” janë tsabiabi. Nexata Jesús pijajivi bejiobiaexanabiabajë. Dioso Moiséspijinëta penajumecopatsilivaisi, bitso xaniavaetsia jumecovënëtaapononajë. Nexata itsajivi ata acuenebi pejumait- sijava xanë yabara: “Pablo xaniavaetsia apo jumecovënëtsi Dioso Moiséspijinëta penajumecopatsilivaisi,” pejaijava.<sup>7</sup> Daxita bajarapalivaisi yabara xanë picani siv- abarëyanë. “Itsa jumecovënëtsianajë bitso, netonamatamotsiana Diosojavabelia,” jamatabëjanë picani. Itsiata aeconoxae yapëtaniji daxita bajarapalivaisi piamatamo- bilivaisicuene. Tspijaji baja najamatabëcuenecopatajë Cristojavabelia tanevecuaa- jibiaexanaenexa tajaneconi.<sup>8</sup> Aeconoxae baja yapëtaniji daxita bajarapalivaisi pia- matamobilivaisicuene. Daxita bajarapalivaisivecua netonamatamota tayapëtaenexa xaniavaetsia tajatuxanenë Jesucristo. Jesucristo taneyajavaponaponaxae, nex- ata piamatamobilivaisi tajumecovënëtsijavami, copatajë baja.<sup>9</sup> Dioso aneconijibia apo netae tajumecovënëtsixae Dioso Moiséspijinëta penajumecopatsilivaisi. Ae- conoxae baja Dioso aneconijibia netane tsipaji najamatabëcuenecopatajë Jesu- cristojavabelia tanevecuaajibiaexanaenexa tajaneconi.<sup>10</sup> Tavajënaeyabelia bitso jit-

sipajë daxitacuenevecua tayapëtaenexa pacuenia Cristo jamatabëcueneitsi. Pasaëta Dioso matacotatsi Cristo petëpaejavavecua, bajarapaasaë jitsipajë tayajavaponapon-aenexa. Cristo pijajivitonëxaenë, jitsipajë xanë ata tanebejibioaexanaenexa, tatë-paenexa ata. <sup>11</sup> Tsipaji xanë ata copiaevetaponaponajë Dioso tanematacotsinexa tatëpaejavavecua.

**Pacuenia Pablo najamatabëcuenesaëta xaniavaetsia  
Cristo peyajavaponaponaenexa, pepatsinexa  
Dioso pijanacuayabetsia, yabara pelivaisi**

<sup>12</sup> Xanë apo jamatabëjumaitsinë: “Daxita baja Dioso pejitsipaeucuenia toex-anajë. Nejamatabëcueneçaëjëpa baja tajumecovënëtsinexa pacuenia Dioso netojit-sipa taexanaenexa,” apo jamatabëjanë. Itsiata tavajënaeyabelia tanejamatabëcuene caëjëpaponanexa, caasaënë tsaponaponaë taexanaejava pacuenia Dioso neto-jitsipa. Jitsipajë bitso tajamatabëcuenexanepanaejava tavajënaeyabelia pacuenia Dioso netojitsipa. Tsipaji bajarapacuenë yabara Jesucristo nesivatëpa. <sup>13</sup> Tajamonae, apo jamatabëjumaitsinë: “Xanë rabaja nejamatabëcueneçaëjëpa Dioso tajumecov-ënëtsinexa pacuenia Dioso netojitsipa taexanaenexa,” apo jamatabëjanë. Jume baja cajena. Mapacuenia najamatabëxainajëje. “Daxita xua exanajë Jesús peliv-aisi tajumecovënëtsivajënaeya, nacofënëtajë baja,” jamatabëjanë. Najamatabëcu-nesaëtajë xaniavaetsia tatoaponaponaenexa Dioso. Pacuenia pebitsojinaenë pecu-jinaejinaejava penayacobijavata, nasaëta pepatsinexa petocaëjëtsijavabeliatsi, ba-jara pijinia pacuenia xanë ata najamatabëcuenesaëtajë xaniavaetsia tatoaponapon-aenexa Dioso. Tavajënaeyabelia najamatabëcuenesaëtajë taexanaenexa pacuenia Dioso netojitsipa. Bajarapacuenia najamatabëxainaponaponajë. <sup>14</sup> Pacuenia pecu-jinaejinaenë nasisaëta penacanabinexa perajutsinexatsi premiovënëjjava, bajara pi-jinia pacuenia najamatabëcuenesaëtajë. Najamatabëcuenesaëtajë xaniavaetsia tato-ponaponaenexa Dioso tanerajutsinexa athëbëtatsia taxainaejavanexa tayajavapon-aponaxae Jesucristo.

<sup>15</sup> Daxita pamonaë xaniavaetsia jumecovënëtavanapa Dioso, bajarapamonae ata benajamatabëcuenesaëtavanapa xaniavaetsia petojinavanapaenexa Dioso. Itsa abaxë paxamë saicaya itsajamatabëcuene paxainame, nexata Dioso pacayapëtaeyaexanaena saicaya abaxë itsajamatabëcuene panexainaejjava. <sup>16</sup> Nexata palivaisivajëto jumeyapëtanetsi pexaniajailivaisi, bajarapalivaisi bejumecovënëtavanapatsi. Beacaasaë tsavanapaetsinua vajavajënaeyabelia orijibia vajajumeyapëtaeponaenexa.

<sup>17</sup> Tajamonae, pacuenia baja pacatsitaponaponatsi, bajara pijinia pacuenia pax-amë ata pajinavanapare. Itsamonae paxamëyajuvënëvi xaniavaetsia jinavanapa pacuenia pacatsitaponaponatsi. Bajarapamonae ata panaitaxutocaevetsianame pax-amë ata xaniavaetsia panejinavanapaenexa pacuenia bajarapamonae jinavanapa. <sup>18</sup> Ayaibitsaëtoxfaneto paxamëyajuvënëvi apo jumecovënëtsi Jesucristo cruzata pe-sivatëpaejavatsi pecapanepaenexatsi. Bajarapamonae yabara pacatsipaebatsi baja anijatonë. Itsiata icatsia aeconoxae yaitaxutonueya pacatsipaebianatsi. <sup>19</sup> Ma-panacuaje pecopiarucaematacabita, bajarapamonae Dioso verebiabianatsi. Tsipaji bitso jitsipa pijacuata penatojitsipaeucuenia pexanavanapaenexa. Piauracuene ex-anabiabi ata, jamatabëcuenenavëxaniabiaya jamatabëjumaitsi tsabiabi: “Pexani-acuene bitso vaxaitsi exanavanapatsi,” jamatabëjai tsabiabi bajarapamonae. Èma-

panacuapijicuene saya sivanajamatabëxainabiaba. <sup>20</sup> Vaxaitsi baja cajena jinavana-paenatsi Dioso pijanacuatatsia. Bajaraxuata copiaevetavanapatsi vajatuxanenë Jesucristo pepatsijavatsica vajanacacapanepaenexa Dioso pijanacuayabetsia. <sup>21</sup> Vajaperabëto vereverecaena. Itsiata vajatuxanenë Jesús nacaperabëitothianaena. Nexata pacuenia bajaraponë perabëitsi athëbëtatsia, bajara vaxaitsi ata perabëitsitsi tsane. Nexata pasaëta Jesús caëjëpatsi pitorobinexa daxitacuene, bajarapasaëta nacaperabëitothianaena.

### **Pacuenia vaxaitsi besivabarëyatsi tsabiabi vajatuxanenë Jesucristo yabara pelivaisi**

**4** Tajamonae bitso patacaasivavi, pacaitaxanatsi. Bitso jamatabëpacatanetsi. Bitso pacasivajamatabëcuenebarëyatsi. Tshipaji xaniavaetsia pajumecovënëta-vanapame Jesús pelivaisi pacuenia baja pacatsipaebatsi. Pajamatabëcuenesaëmëre tsavanapae pacopatsinejevamë panejumecovënëtsijava Jesús pelivaisi.

<sup>2</sup> Papetirivamëbeje, Evodia Síntique, paxamëbeje pacatoyaquinatsibeje patacaitavetsinexabeje mapacueniaje. Pëtsa baja icatsia pematatsënëa namataenetsia panajumeanaenotamebeje. Panajamatabëcuenejëparebeje Jesús pelivaisi panejumecovënëtsivaxaabeje. <sup>3</sup> Xamë ata xaniavaetsia taneyavenonaenëmë Dioso pijacuene tanacuenebijava, catoyaquinatsi. Jitsipajë neyavenonaenexa bajarapapetirivabeje, penabaramatabëcuenexanepanaenexabeje namataenetsia icatsia panajumeanaenotsiyaniavabeje. Bajarapovabeje bitso neyavenonabeje tatsipaebijava itsamonaejavabelia pexaniajailivaisi pecapanepaelivaisinexatsi Diosojavabelia. Bajarapacuenia Clemente ata neyavenona. Itsamonae ata patanajuanacuenebivi, bajarapacuenia neyavenona. Daxita baja bajarapamonae vënërubena Dioso pijabaxutota, itsa pabaxutota vënëyaquinarubatsi pamona pexinaevinexa matababi apo peverevereceaeva.

<sup>4</sup> Jesús pelivaisi panejumecovënëtsivixae, pajamatabëcuenebarëyamëre daxitamatabacijavabelianexa. Icatsia pematatsënëa pacajumaitsitsi. ¡Pajamatabëcuenebarëyamëre tsavanapae! <sup>5</sup> Jamatabëcuenexanepanaeya xaniavaetsia pajinavanapaename daxitajivi papecajamatabëcueneyapëtaenexa. Tshipaji rabaja vajatuxanenë imoxoyo pevajënae pepatsinexatsica.

<sup>6</sup> Pëtsa pajamatabëcuenebëjamë itsacuenejavayo ata yabara. Biji rajane pavajëre Diosojavabelia daxitacuenejavanë yabara. Pexaniajamatabëcuenenua parajutabiabare Dioso papecayavenonaevavanë yabara. <sup>7</sup> Nexata Dioso pacajamatabëjemayaexanaena panejamatabëcuenebëjaiyaniva. Pexaniacuene bitso bajarapajamatabëcuene. Dioso itsa nacajamatejemayaexana vajajamatabëcuenebëjaiyaniva, itsiata apo yapëtaetsi pacuenia nacajamatejemayaexana vajajamatabëcuenebëjaiyaniva. Dioso itsa pacajamatejemayaexanaena panejamatabëcuenebëjaiyaniva, nexata apo pajamatabëcuenebëjamë tsane. Jesucristo itsa pajumecovënëta-vanapame, daxitacuene yabara panenajamatabëxainaejava atavecua Dioso pacaevetsiana.

### **Pacuenia benajamatabëxainabiabatsi ëpexaniacuene yabara pelivaisi**

<sup>8</sup> Tajamonae, pecotocaevilivaisi pacatoyaquinatsi mapacueniaje. Panajamatabëxainabiabare ëpexaniajailivaisi yabara. Panajamatabëxainabiabarenua panenayaiyataecuene ata yabara. Panajamatabëxainabiabarenua xua xanepana pa-

neexanavanapaenexa. Panajamatabëxainabiabarena Dioso papecajamatabëcuene barëyayaexanaenexa. Panajamatabëxainabiabarena xua jivi baracuaicuajijitsia pexaniacuena. Panajamatabëxainabiabarena daxita xua pexaniacuene. Panajamatabëxainabiabarena xua yabara Dioso pacabarëyataejitsia.

<sup>9</sup>Daxita pacuenia pacatsipaebatsi, pacuenia pacatsitaponaponatsinua, bajara-pacuenia paexanavanapare. Nexata Dioso, ponë pacajamatejemayaexanaejitsia panejamatabëcuenebëjaiyaniva, pacayajavaponaponaena.

### **Pacuenia Filipos tomarapijivi ofrenda tojebabiabatsi Pablonexa yabara pelivaisi**

<sup>10</sup>Vajatuxanenë bitso nejamatabëcuenebarëyayaexana. Tsipaji baja paxamë icatsia panesivanajamatabëxainame pataneyavenonaenexamë. Nexata baja icatsia ofrenda panetoitorobaremena. Bajayajebi apo panetoitorobi atamë ofrenda, itsiata paxamë yabara apo jamatabëjumaitsinë: “Apo jitsipae raeta icatsia taneyavenon-aenexa bajarapamonaë,” apo jamatabëjanë. Jume cajena. Yapëtaniji pacue-nia picani jamatabëpanetoitorobi atamë ofrenda pataneyavenonaenexamë, itsi-ata apo pacacuenecaëjèpae patanetoitorobinexamë. <sup>11</sup>Apo pacatoyaquinaetsi ma-pacueniaje ofrenda patanetoitorobivajënaeyamë bitso tanamatavenonaexae it-sacueniejavayo. Dioso tanejamatejemayaexanaexae tajamatabëcuenebëjaiyaniva daxitacuene yabara, sivajamatabëcuenebarëyanë saya xuayovajëto xainajë. <sup>12</sup>Yapë-taniji pacuenia ponaponajë, pamatacabi tsiquirijavayo xainae atanë. Yapëtani-jinua pacuenia ponaponajë pamatacabi ayaijava xainajë. Yapëtanijinua pacuenia ja-matabëcuenebarëyanëjitsia daxitamatacabijavabelianexa. Nexata itsa xainajë daxita tanamatavenonaejavaxi, barëyanë. Apo xainae atanë itsacueniejavayo ata, itsiata barëyanë tsabiabi. <sup>13</sup>Nejamatabëcuenecaëjèpa tanajamatabëcuenesaëtsinexa daxi-tacuene yabara. Tsipaji Cristo pesaëta nejamatabëcuenecaëjèpaeyaexana. <sup>14</sup>Itsiata baitsi jane paxamë pexaniacuene bitso panetoexaname itsa panetoitorobaremena bajarapaofrenda bitso tanamatavenonaejavata.

<sup>15</sup>Payapëtaneme rabaja mapacuenije. Pamatacabi copiaya tsipaebanajetar-u-cajë jivi pecapanepaelivaisinexatsi Macedonia nacuajava, paxamë paFilipos tomarapijivimë panijanacuavecua itsa ponajë, paxamë panerajutame ofrenda pataneyavenonaenexamë. Itsatomarapijivi, Dioso pejumecovënëtsivi ata, apo ner-ajutsi ofrenda bajarapacuenia taneyavenonaenexa. Èpaxamë itsiata paneyavenon-ame. <sup>16</sup>Nexata bajaraxuacujinae, itsa abaxë ponaponajë Tesalónica tomarata, panetoitorobabiabame icatsia ofrenda anijatonë tanamatavenonabibijavata. <sup>17</sup>Siv-abarëyanë tsabiabi itsa panetoitorobabiabame bajarapacuenia. Itsiata apo siv-abarëyanë tsabiabi tanetoxanepanaexae bajarapacuenia pataneyavenonaejavamë. Jume baja cajena. Biji rajane sivabarëyanë tsabiabi bajarapacuenia pataneyavenon-aejavamë. Tsipaji juya paxainaejitsiamë Diosojavabelia papecarajutsijavanexa athëbëtatsia. <sup>18</sup>Nexata pitajë daxita patanetoitorobijavamë Epafroditota. Xainajë baja nexata bitso ayaijava, tanamatavenonaejava matatoxenetsia. Xua pane-toitorobame ofrendacuena, tsitapexaniacuentsi Dioso. Bajaraxua Dioso sivaja-matabëcuenebarëya. <sup>19</sup>TajaDioso bitso paxainanë. Nexata pacarajutsiana daxita pacuenia panamatavenoname. Bajara pijinia pacuenia ayaijava Dioso pacarajut-siana Jesucristojavabelia xaniavaetsia panenajamatabëcueneocopatsixae. <sup>20</sup>¡Vaxa Dioso ayaijamatabëcuenenë daxitamatacabijavabelianexa! Bajara itsi tsane.

**Pacuenia Pablo tonajumeitoroba Dioso  
pejumecovënëtsivi pebajacobinexatsi yabara pelivaisi**

<sup>21</sup> Nebajacobiana paxamëjavata daxita Jesús pelivaisi pejumecovënëtsivi, pamonaë Dioso pijajivi. Dioso pijajivi, pamonaë xanëjavata jinavanapa, pacabajacobalia. <sup>22</sup> Daxita Dioso pijajivi, mapatomarataje pejinavanapaëvi, pacabajacobalia. Romanonacua pepo pevetsinë pijabota penacuenebivi ata bitso pacabajacobalia.

<sup>23</sup> Pacatovajëtabiabatsi Diosojavabelia, vajatuxanenë Jesucristo papecayavenonabiabinexa. Bajara itsi tsane.

## Mapabaxutoje San Pablo toyaquina Colosas tomarapijivijavabelia

### Pacuenia Pablo toyaquina mapabaxutoje Dioso pejumecovënëtsivi, Colosas tomarapijivijavabelia, yabara pelivaisi

**1**<sup>1-2</sup> Xanë Pablonë, Dioso tanetojitsipaexae, nitapeta Jesucristo pijaapós-tolenënexanë. Nexata Jesucristo nitoroba jivi pexanialivaisi tatsipaebapon-aenexa. Pacatoyaquinatsi mapabaxutoje xaniavaetsia Jesucristo pelivaisi panejumecovënëtsivi, Colosas tomarata panejinavanapaevi. Vajabananë Timoteo ata pacajamatabënajina. Aconoxae baja nacaemonaetsi, paxamë ata Jesús pelivaisi panejumecovënëtsixae. Pacatovajëtatsi vaxa Diosojavabelia papecaitaxutotsoniataenexa jamatabëcuenexanepanaeya panejinavanapaenexa.

### Pacuenia Pablo Diosojavabelia tovajëtabiaba Colosas tomarapijivi, Jesús pelivaisi pejumecovënëtsivi, yabara pelivaisi

<sup>3</sup> Paxanëbeje Timoteobeje pacatovajëtabiabatsibeje vajatuxanenë Jesucristo paxa Diosojavabelia. Nexata Diosojavabelia patacatovajëtsijavatabeje, paxamë yabara Diosojavabelia pajumaitsinëbeje tsabiabi mapacueniaje: “Pexaniajamatabëcuene pacarajutsibeje. Tsipaji pexaniacuenia yavenonabiabame Colosas tomarapijivi,” pajanëbeje tsabiabi Diosojavabelia paxamë yabara. <sup>4</sup> Bajarapacuenia paju-maitsinëbeje tsabiabi tsipaji pacavënëlivaisitanetsibeje xaniavaetsia panejumecovënëtavanapaejava Jesús pelivaisi. Pacavënëlivaisitanetsibenua paneasivatsavana-paejava daxita Jesús pelivaisi pejumecovënëtsivi. <sup>5</sup> Bajara pajamatabëcueneitsimë tsipaji baja xaniavaetsia payapëtaneme xua Dioso pacatoxaniavaeta athëbëtatsia papecarajutsinexa. Pamatacabi ajena pajumetaneme pexanialivaisi papecacapanepaelivaisinexa, bajarapamatacabi payapëtaneme baja xua Dioso pacatoxaniavaeta athëbëtatsia papecarajutsinexa. <sup>6</sup> Bajarapapexanialivaisi pajumetaneme baja pamatacabi copiaya Epafra pacatsipaeba Dioso papecaasivajava. Bajarapalivaisi baja aconoxae daxitanacuanëjava yacaëjëpaponna. Nexata daxitanacuanëjava, pamonaë jumecovënëta pona bajarapalivaisi, copataponna baja perujumatabëcuenemi. Nexata baja pejanajamatabëcuene xainaponna. Bajarapamonae pejanajamatabëcuene xainaponna, pacuenia paxamë ata pejanajamatabëcuene paxainame pamatacabi ajena pajumecovënëtame bajarapalivaisi. Bajara pamatacabijavaverenacujinae paxamë baja payapëtaeponame pepacuene Dioso papecaitaxutotsoniataejava. <sup>7</sup> Dioso papecaitaxutotsoniataejava, copiaya baja cajena vajaasivanë Epafra pacatsipaeba. Bajaraponë Jesucristo xaniavaetsia petonacuenebinë. Nexata bajaraponë panetoitorobaremena pataneyavenonaenexabeje Dioso patatonajuanacuenebinexa majotaje. <sup>8</sup> Nexata pamatacabi Epafra pata paxanëbejevaberena, panetsipaebabeje xaniavaetsia panejinavanapaejava. Panetsipaebabejenua Espiritu Santo papecayavenonaejava paneasivanexa itsamonae ata.

<sup>9</sup> Nexata patacavënëlivaisitaecujinaebeje, pacatovajëtabiabatsi Diosojavabelia. Pacatovajëtabiabatsi xua Dioso pacatojitsipa papecayapëtaeayaexanaenexa. Nexata Dioso itsa pacayapëtaeayaexana xua Dioso pacatojitsipa, bajaraxua paneexanavanapaenexa. Bajarapacuenia pacatovajëtabiabatsi daxitacuene, Dioso pijacuene ata, Dioso papecayapëtaeayaexanaenexa. <sup>10</sup> Pacatovajëtabiabatsinua xaniavaetsia

jivi panetsitajinavanapaenexa, Dioso papecasivabarëyanexa pexaniacuene pane-exanabiabixae. Pacatovajëtabiabatsinua Diosojavabelia panevajënaeyabelia Dioso panejamatabëcueneyapëtaeponaenexa. <sup>11</sup>Pacatovajëtabiabatsinua Dioso papeca-jamatabëcuene asaëyaexanaenexa pesaëta. Nexata bajayajebi itsamonaë pacait-sacueniababiabi ata, pacajamatabëcuenecaëjëpaena panejamatabëcuenesaë tsa-vanapaejava. <sup>12</sup>Pacatovajëtabiabatsinua paxamë panejumaitisabiabinexa Diosojav-abelia: “Xanepana rabaja. Tsipaji bitso pexaniacuene panetoexaname,” panejaitisabi-abinexa Diosojavabelia. Bajarapacuenia pajumaitsimë tsabiabi tsane tsipaji bajarap-onë pacavecuajibiaexana baja panijaneconimi. Nexata baja Dioso aneconijibia pacatane. Nexata paxamë ata Dioso pacarajutsiana xua xaina pijajivi perajutsinexa pijapenivenivenaenacuataatsia. <sup>13</sup>Vaxaitsi bajayata apo yapëtaetsi pexaniajailivaisi. Nexata picani bepitaquirinacuata vajajinavanapaevi. Tsipaji picani dovathi pija-jivitsi tsavanapae. Pibisiacuene exanabiabatsi pacuenia dovathi nacaitoroba. It-siata baja aeconoxae Dioso nacapita dovathivecu. Nexata baja Dioso pexënato, piasivanë, pijajivitsi nacaexana. <sup>14</sup>Nacasivatëpa Cristo. Nexata baja Cristo peja-matabëcueneta Dioso nacavecuajibiaexana vajaneconimi. Nexata baja aneconijibia jinavanapatsi.

**Pacuenia Dioso nacavecuajibiaexana pibisiacuene  
vajaexanaeneconimi Cristo vajanacasivatëpaexae yabara pelivaisi**

<sup>15</sup>Dioso cajena caeto ata apo vajataenë. Itsiata Dioso pexënato, Cristo, naex-ana mapanacuataje. Cristo paxa jëpa. Dioso daxitacuene mapanacuata pexanaeva-jënaeya ata, Cristo baja cajena ponapona athëbëtatsia. <sup>16</sup>Cristo baja cajena exana daxitacuene Dioso pejamatabëcueneta. Athëbëtatsia xua apo taetsi, Cristo exana. Daxitacuene xua tanetsi mapanacuata ataje, Cristo exana. Cristo daxitacuene itsa exana, ángelevi ata exana. Angelevi penamatacaitorobivinexa ata, Cristo exana. Bajarapacuenia Cristo ángelevi ata exana pacuenia Cristo jitsipa petonacueneba-vanapaenexatsi. <sup>17</sup>Daxitacuene Cristo pexanaevajënaeya ata, Cristo baja cajena athëbëtatsia ponapona. Daxitacuene xua Cristo exana, bajaraxua pexanaecujinae abaxë Cristo pesaëta mapamatacabita ataje tsitecanajetaruca. <sup>18</sup>Cristo baja cajena pevetsinë daxita Dioso pejumecovënëtsivi. Nexata daxita Dioso pejumecovënëtsivi Cristo penamatacaitorobinë. Cristo pejamatabëcueneta daxita Dioso pejume-covënëtsivi Dioso pijajivi exanatsi. Cristo taxuxuaba jivi petëpaecujinae icatsia jivi piasaëjavanexa. Bajaraxuata itsamonaë ata icatsia asaë tsane petëpaecujinae. Nex-ata Cristo daxitajivi matatoxenetsia bitso ayajamatabëcuenenë. <sup>19</sup>Bajarapacuenia Cristo bitso ayajamatabëcuenenë tsipaji Dioso pexënato tojitsipa pejamatabëcuene-jëpaenexatsi. <sup>20</sup>Daxitajivi, pamonaë jinavanapa mapanacuataje, naneconita Dioso-javabelia. Pamonaë ata jinavanapa athëbëtatsia, naneconita Diosojavabelia. Nex-ata Dioso jitsipa daxita bajarapamonaë pebarajamatabëcuenexanepanaenexa. Nex-ata Dioso itorobica Cristo mapanacuayabetsicaje cruzata pesivatëpaenexa daxita bajarapamonaë. Nexata daxita bajarapamonaë Dioso aneconijibia tane Cristo pe-sivatëpaejamatabëcueneta. Bajaraxuata Dioso baja barajamatabëcuenexanepana bajarapamonaë.

<sup>21</sup>Paxamë picani abaxë bajayata Diosovecu naxuabiaya pajinavanapame. Dioso bepajijavajabitsaëmë tsavanapae pibisiacuene paneexanavanapaexae. Itsi-ata baitsi jane aeconoxae baja Dioso pacabarajamatabëcuenexanepana. <sup>22</sup>Dioso

baja aeconoxae pacabarajamatabëcuenexanepana. Tsipaji Jesucristo bepejiobicue-  
nia cruzata pacasivatëpa. Nexata baja Dioso pacavecuajibiaexana pibisiacuene  
paneexanaeconimi. Bjaraxuata aeconoxae baja Dioso papijajivimë. Dioso baja  
pitabarata aneconijibia pajinavanapame. <sup>23</sup>Nexata panevajënaeyabelia aneconijibia  
Dioso pitabarata panejinavanapaenexa, asaëyata pajumecovënëtanapare Cristo  
papecasivatëpaejava panijaneconi yabara. Palivaisi baja pajumecovënëtame pa-  
pecacapanepaelivaisinexa, pëtsa pacopatame panejumecovënëtsijava. Bjarapali-  
vaisi baja yacaejëpa daxitanacuanëjava petsipaebaponaëjava. Xanë ata, Pablonë,  
tsipaebaponajë bjarapalivaisi.

### **Pacuenia Pablo itorobatsi peyavenonaenexa Dioso pejumecovënëtsivi yabara pelivaisi**

<sup>24</sup>Xanë Pablonë, majotaje penaneconitsivi pejebabiabibota, naneconitsiapon-  
aponajë paxamë apo pajudfóvimëjava Cristo pelivaisi patacatsipaebaponaexae. It-  
siata jamatabëcuenëbarëyanë tsaponaponaë, nebejiobiaexanabiabi ata. Pacuenia  
Cristo bejiobiaexanatsi pijajivi pecapanepaenexa, bajara pijinia pacuenia xanë ata  
itsamonae nebejiobiaexanabiaba. Bjarapacuenia Dioso netocopata tanebejiobiaex-  
anabiabinexa tavajënaeyabelia tajamatabëcuenesaëtsaponaenexa Dioso tajumecov-  
ënëtsijava. Nexata tanesivaajamatabëcuenesaënexa daxita pamonaë jumecovënëta  
Cristo pelivaisi. <sup>25</sup>Dioso netocopata tayavenonaenexa Dioso pijajivi, pamonaë Cristo  
pelivaisi jumecovënëta. Bjaraxuata paxamë ata pacayavenonatsi. Tsjipaji Dioso ni-  
toroba daxitajivi xaniavaetsia tatsipaebaponaenexa pexanialivaisi, Dioso pejume-  
livaisi. <sup>26</sup>Dioso nitoroba jivi tatsipaebaponaenexa pacuenia Dioso tajëvelia naja-  
matabëxaina pijajivi pecapanepaenexa. Dioso baja cajena nacua pexanaevajënaeya  
ata, najamatabëxaina pacuenia exanaejitsia pijajivi pecapanepaenexa. Abaxë picani  
itsajivi ata Dioso apo yapëtaeyaexanaë bjarapacuenie. Itsiata baitsi jane aeconoxae  
baja Dioso tocopata daxita Dioso pejumecovënëtsivi peyapëtaenexa pacuenia Dioso  
exana pijajivi pecapanepaenexa. <sup>27</sup>Dioso tojitsipa apo judfóvi ata peyapëtaenexa  
pexanialivaisi, palivaisi picani itsajivijavabelia ata Dioso apo yapëtaeyaexanaë. Ba-  
jarapalivaisi mapacuenia itsije. Cristo cajena pacatsijamatabëca papecayajavapon-  
aponaenexa. Bjaraxuata nexata payapëtaneme itsamatacabi Cristo paneyajavajina-  
vanapaejavanexa Dioso pijapenivenivenaenacuatsia.

<sup>28</sup>Paxanë patanecaëjëpacuenia, daxitajivi xaniavaetsia patsipaebaponaë Cristo  
pelivaisi. Pamuxujioabaponaëjava xaniavaetsia daxita bjarapamonaë pejumecov-  
ënëtsinexa Cristo pelivaisi. Bjarapacuenia pamuxujioabaponaë pevajënaeyabelia  
pijamatabëcuenesaëtsaponaenexa Cristo pelivaisi pejumecovënëtsijava. <sup>29</sup>Bjarax-  
uata asaëyata Dioso tonacuenebaponaë daxita pasaëta Cristo nerajutapona.

**2**Jitsipajë paneyapëtaenexa pacuenia bitso pacasivanajamatabëxainatsi. Nex-  
ata asaëyata Diosojavabelia pacatovajëtabiabatsti. Laodicea tomarapijivi ata  
tovajëtabiabajë. Itsamonae ata, pamonaë abaxë apo netae, bjarapamonaë  
ata tovajëtabiabajë. <sup>2</sup>Asaëyata Diosojavabelia pacatovajëtabiabatsti papecaja-  
matabëcuene asaëyaexanaenexa Cristo pelivaisi panejumecovënëtsijava. Pacatova-  
jëtabiabatstinua najamatabëcuenejëpaeya panejinavanapaenexa namataenetsia pa-  
nenasivaxae. Pacatovajëtabiabatstinua panejamatabëëthëtota ayailivaisi paneyapë-  
taeponaenexa xaniavaetsia itsa payapëtaneme Cristo. Bjarapacuenia pacatova-  
jëtabiabatsti xaniavaetsia paneyapëtaenexa pexaniajailivaisi, palivaisi picani Dioso



apo yapëtaeyaexanae itsajivijavabelia ata, baitsi jane baja Cristo pelivaisi. <sup>3</sup>Cristo pelivaisi xaniavaetsia itsa yapëtanetsi, nexata yapëtanetsi pacuenia Cristo nacatojitsipa vajatonacuenebavanapaenexa. <sup>4</sup>Bajarapacuenia pacatsipaebatsi itsajivi ata papecayamaxëitorobiyaniya, penajumetsënëtsilivaisi itsa pacatsipaeba, bepexaniajailivaisi itajara panejumetaeyaniya. <sup>5</sup>Apo pacayajavaponapona atatsi, itsiata pacajamatabënajinabiabatsi. Jamatabëcuenebarëyanë itsa pacavënëlivaisitanetsi najamatabëcuenejëpaeya panejinavanapaejava. Jamatabëcuenebarëyanënya itsa pacavënëlivaisitanetsi panevajënaeyabelia paneajamatabëcuenesaë tsavanapaejava panejumecovënëtsijava Cristo pelivaisi.

<sup>6</sup>Bajaraxuata pacuenia baja copiya panajamatabëcueneocopatame vajatuxanenë Jesucristojavabelia papecacapanepaenexa Diosojavabelia, bajarapacuenia tsiteca panajamatabëcueneocopatavanapare. Panajamatabëcueneocoparenua panevajënaeyabelia Cristo papecayavenonaponaenexa daxitacuene yabara. Nexata pajinavanapanaenexa Cristo papecatojitsipaacuenia. <sup>7</sup>Paxamë xaniavaetsia panajamatabëcueneocopare Jesucristojavabelia papecayavenonaenexa. Nexata Jesucristo pacajamatabëcueneasaëyaexanaena. Nexata papexaniajailivaisi itsamonae pacatsipaeba, tsiteca pajumecovënëtavapananame. Pajumaitsimënya tsabiabi tsane Diosojavabelia: “Xanepana rabaja. Tspiji bitso pexaniacuene panetoexaname,” pajamë tsabiabi tsane Diosojavabelia.

### **Pacuenia Cristo pijajivi pejanajamatabëcuene xainavanapa yabara pelivaisi**

<sup>8</sup>Xania. Nayajivitaeya pajinavanapare. Pëtsa panacopatame papecayamaxëitorobinexa pamonae tsipaebavanapa saicayalivaisi Dioso pejumelivaisivecua. Bajarapamonae apo tsipaebapona Cristo pelivaisi. Saya tsipaebapona mapanacuapijivi penajamatabëxainaelivaisi, penajumetsënëtsilivaisi, saya natsiquejemalivaisi.

<sup>9</sup>Pacuenia Dioso jamatabëcueneitsi, Cristo itajëta mapanacuata itsa ponapona. <sup>10</sup>Pacuenia Dioso jamatabëcueneitsi, bajara paxamë ata itsamatacabi pajamatabëcueneitsimë tsane. Tspiji Cristo payajavajinavanapame. Bajaraponë bitso ayaijamatabëcuenenë. Caëjëpatsi pitorobinexa daxitacuene. Caëjëpatsinua pitorobinexa daxitanacuanë pevetsivi ata. <sup>11</sup>Itsa panajamatabëcueneocopatame Cristojavabelia, nexata baja Dioso pacavecuajibiaexana pibisiacuene paneexanaeconimi papecacapanepaenexa. Pibisiajamatabëcuene ata baja pacavecuajibiaexana. Nexata pacuenia judfovi pijacuenia perabëcaucubatsi, bajarapacuenia paxamë apo pacaperabëcaucubi pibisiacuene paneexanaeconimi Dioso pacavecuajibiaexanaenexa. Jume baja cajena. Biji rajane Cristo papecasivatëpaejava panejumecovënëtsixae, Dioso pacavecuajibiaexana pibisiacuene paneexanaeconimi. <sup>12</sup>Itsa pacabautisaba, merata pacabubutaxuareca. Nexata papecabautisabijavata itsa pacabubutaxuareca, Dioso pacatane Cristo bepapecayajavamëthëtsivi itsa mëthëtatsi petëpaecujinae. Nexata papecabautisabijavata, papecabubutaxuabicujinaereca icatsia itsa pacamatacotsina menevetsina, Dioso pacatane Cristo icatsia bepapecayajavaasaëvi petëpaecujinae icatsia itsa asaë. Bajarapacuenia Dioso pacatane tspiji Cristo yabara pajamatabëjumaitsimë mapacueniaje: “Xaniajai rabaja. Dioso pesaëta Cristo asaëyaexanatsi petëpaecujinae,” pajamatabëjamë. <sup>13</sup>Paxamë picani abaxë bajayata bepanetëpaevi. Diosovecua naxuabiaya pajinavanapame pibisiacuene paneexanaeconimi yabara. Bajarapacuenia picani Diosovecua naxuabiaya pajinavanapame apo pajudfovixaemë. Itsiata baitsi

jane aeconoxae baja Cristo payajavajinavanapame papecacapanepaenexa. Tsi-paji baja Cristo pejamatabëcueneta Dioso pacavecuuaajibiaexana pibisiacuene pa-neexanaeconimi. <sup>14</sup> Bitso picani pibisiacuene exanavanapatsi. Tsi-paji apo ex-anaetsi pacuenia Dioso pejumelivaisita nacaitoroba. Itsiata baitsi jane Dioso baja nacavecuuaajibiaexana daxita bajarapaneconimi Cristo cruzata vajanacasivatë-paexae. <sup>15</sup> Bajarapacuenia Cristo cruzata vajanacasivatëpaexae, Cristo baja cue-neamoneyaba dovathi. Tsi-paji bajarapacuenia Cristo itsa nacasivatëpa cruzata, asaëjibiaexana dovathi, pijajivi yajava. Pacuene dovathi pijajivi barëevetaponapona pitorobinexa, bajarapacueene Cristo cueneamoneyaba. Nexata Cristo daxitajivijav-abelia tsitanacueneitajëta pecueneamoneyabijava dovathi, pijajivi yajava.

**Pacuenia Pablo muxujioba Jesús pelivaisi  
pejumecovënëtsivi pejamatabënajinavanapaenexa Cristo  
peecaejava athëbëtatsia yabara pelivaisi**

<sup>16</sup> Cristo baja pecueneamoneyabixae dovathi, pëtsa panacopatame itsajivi ata papecajaniitavetsinexa panexaejava, panematavëjëaapaejava ata. Itsamonae abaxë tsiteca jumecovënëtavanapa perujulivaisi, Dioso Moiséspijinëta penajumecopat-silivaisi. Nexata pacuenia itorobatsi bajarapalivaisita, fiestanë exanabiaba caevai canacujitsia. Itsafiestanë exanabiaba caejuameto canacujitsia, pejanajuameto itsa ecaica. Itsafiestanë exanabiaba penacueraevetsimatacabianë canacujitsia. Pëtsa pa-jumecovënëtame, itsajivi pacajunatsi ata panenaponaenexa bajarapafiestanëjav-abelia. <sup>17</sup> Bajayata picani jivi ponabiaba bajarapafiestanëjavabelia. Tsi-paji palivaisi bajayata Dioso Moiséspijinëta najumecopata, itorobatsi penaponabiabinexa bajara-pafiestanëjavabelia. Itsiata baja Cristo itsa patsica mapanacuayabetsicaje, Cristo baja copiarucaeyaexana bajarapacuenemi. Nexata pacuenia Cristo nacaitoroba, ba-jarapacuenia exanavanapaenatsi. <sup>18</sup> Pëtsa pajumecovënëtame itsamonae pacaju-maitsi ata mapacueniaje: “Beveliajamatabëcuenevi panataema. Pavajëtabiabarenaua ángelevijavabelia Diosovecuua panenaxuabiyaniava. Bemajitsinaebota baja cajena pataniji bajarapacuenia vajaexanabiabinexa,” pacajai ata, pëtsa pajumecovënëtame. Bajarapamonae beayajamatabëcuenevi nataeyabiaba pejamatabëcuenepijilivaisi saya petsipaebaponaejava yabara. <sup>19</sup> Bajarapamonae Cristo apo pejumecovënëtsivi. Daxita vaxaitsi Cristo vajajumecovënëtsivi, Cristo pijajivitsi. Nexata Dioso nacatane caenë Cristo bepeperabëtotsi. Caejivi canacujitsia peperabëtota vinamataropot-siarubenaponareca. Bajara pijinia pacuenia vaxaitsi ata caenë Cristo bepeperabëtotsi Dioso nacatane. Bajarapacuenia Dioso nacatane Cristo pejamatabëcueneta. Nex-ata Dioso nacajamatabëcuene yavenonapona. Nacajamatabëcuene vitsabiaexanapo-nanua pacuenia Dioso nacatojitsipa.

<sup>20</sup> Itsamonae jamatabëcuenenavëxaniabiaya jumai tsabiabi: “Vajanaca-capanepaenexa Diosojavabelia, pexaniacuene toexanavanapaenatsi itsamonaejavabelia. Jumecovënëtavanapaenatsinua daxita pacuenia nacaitoroba mapanacuapijivije,” jai tsabiabi itsamonae jamatabëcuenenavëxaniabiaya. Itsiata baitsi jane paxamë baja payapëtaneme bajarapalivaisi apo pexaniajjailivaisicuene. Cristo itsa tëpa, paxamë ata, Cristo bepapecajavatëpaevi, Dioso pacatane. Nexata baja picani paxamë mapanacuapijicuene yabaraje apo bepasivanaja-matabëxainaemë. ¿Detsa nexata xuajitsia itsiata pajumecovënëtavanapame mapanacuapijivi jamatabëcuenenavëxaniabiaya papecatsipaebilivaisije?

<sup>21</sup> Bajarapamonae jumai tsabiabi: “Dioso pitabarata panenajamatabëcuene bijianaeyaniva, pëtsa pajayatame maxuaje. Pëtsa paxaneme maxuaje. Pëtsa papitame panecobeta maxuaje,” jai tsabiabi bajarapamonae. <sup>22</sup> Bajarapamonae xua itaveta itsamonae pejayatsiyaniva, pexaeyaniva ata, pepitsiyaniva ata, bajarapacuenae daxita vereverecaena. Bajarapacuenia pitavetsicuene saya jivi pejamatabëcuene pijilivaisita itaveta. <sup>23</sup> Pamonae bajarapacuenia pacaitavetapona, bepacatsita peyapëtaevi itajara. Tsipaji bajarapamonae jamatabëpacaitoroba panevajëtabiabinexa ángelevijavabelia. Bajarapamonae pacaitorobanua beveliajamatabëcuenevi panenataenexa. Pacaitavetanua panijacuata panenatojitsipaecuene paneexanaeyaniva. Bajarapamonae papecaitavetsicuene pajumecovënëtaponae atamë tsipae, itsiata apo pacajamatabëcuene yavenonae tsipae papecavecuajibiaexanaenexa papibisijamatabëcuene paxainame panenamatabëëthëtota.

**3** Cristo petëpaecujinae Dioso icatsia itsa asaëyaexanatsi, paxamë ata Cristo bepacayajavaasaëyaexanaevi, Dioso pacatane. Bajaraxuata athëbëpijicuene pajamatabënjajinapanare, Dioso pijanacuapijicuene. Athëbëtatsia Cristo eca Dioso pemuxuneneta, pecujanenia, penajuaevetsinexabeje daxitacuene. <sup>2</sup> Pasivanajamatabëxainabiabare ëathëbëpijicuene. Pëtsa pasivanajamatabëxainabiabame mapanacuapijicueneje. <sup>3</sup> Cristo itsa tēpa, paxamë ata Cristo bepaneyajavatëpaevi, Dioso pacatane. Aeconoxae baja paxamë Cristo papecayajavaponaponaevajava, itsamonae apo tae. Apo yapëtaenua. Pacuenia Cristo Dioso yajavaponapona, bajara pijinia pacuenia paxamë ata Dioso payajavajinapanapame. <sup>4</sup> Cristo baja cajena nacayajavaponapona. Vaxaitsi ata pijinia Cristo yajavajinapanapatsi. Pamatacabi Cristo icatsia athëbëvetsica patsianica, paxamë ata paxainaename penivenivenaecotia Cristo papijajivixaemë.

### **Pacuenia Dioso pejumecovënëtsivi perujujamatabëcuenemi baja copata pejanajamatabëcuene pexainaenexa yabara pelivaisi**

<sup>5</sup> Mapacuenia pajamatabëjumaitsimëre tsavanapaeje: “Tajaperujujamatabëcuenemi baja copatajë. Nexata baja apo jitsipaenë icatsia taxainaejava perujujamatabëcuene, mapanacuapijijamatabëcueneje. Apo jitsipaenë baja itsapetiriva tajaitsijava tajavavecuja. Apo jitsipaenë baja piauracuene ata taexanaponaevajava. Apo jitsipaenë baja pibisiacuene ata tanajamatabëxainaejava. Apo jitsipaenë baja pibisijamatabëcuene ata tajitsipaejava. Apo jitsipaenë baja ayaijava taxainaejava tanaxainaeabinexa. Daxita baja bajarapajamatabëcuenemi copatajë. Nexata baja matavëjëa apo jitsipaenë bajarapajamatabëcuene taxainaejava,” pajamatabëjamëre tsavanapae. Tsipaji itsa pajitsipaejitsipame ayaijava panexainaejava pananaxainaeabinexa, nexata pacopabijitsipame Dioso panejitsipaejavami. Tsipaji Diosovecuja bitso pajitsipaejitsipame mapanacuapijicueneje. Nexata pajamatabëcuenejēpaejitsipame pamonae vajëcabiaba jumapecataeya pexanaenëanëjavabelia. Tsipaji bajarapamonae Diosovecuja jitsipa jumapecataeya pexanaenëanë. <sup>6</sup> Daxita pamonae Dioso apo pejumecovënëtsivi, bajarapitsipibisiacuene pexanavanapaevi, Dioso ayaiacuenia naneconitsiaexanaenatsi. <sup>7</sup> Paxamë ata picani daxita bajarapitsicuene paexanavanapame Dioso panejumecovënëtsivajënaeya. <sup>8</sup> Nexata baja aeconoxae pacopabare daxita mapajamatabëcueneje. Paneanaepanabiabijava itsamonaejavabelia, pacopabare. Pibisiacuene paneexanaenexa panenajamatabëx-

ainabiabijava ata, pacopabare. Pibisiacuenia itsamonae panebaracuaicuaijaisabi-abijava ata, pacopabare. Itsa pacuaicuaijamë, pëtsa pacuaicuaijamë pibisiali-vaishi. <sup>9</sup>Pëtsa namataenetsia panatsipaebame penajumetsënëtsilivaisi. Perujujamatatabëcuene picani bajayata panexainaexae, bajarapacuenia paexanavanapame. Itsiata baja aeconoxae pacopabame bajarapaperujujamatatabëcuenemi. <sup>10</sup>Nexata baja pejanajamatatabëcuene paxainavanapame. Panevajënaeyabelia payapëtaeponame paneexanavanapaenexa pexaniacuene. Dioso, ponë pacaexana, pacuenia jamatabëcueneitsi, bajara pijinia paxamë ata pajamatatabëcueneitsimëre tsavanapae. <sup>11</sup>Daxita pamonaë Dioso pejumecovënëtsivi, pejanajamatatabëcuene xaina. Nexata daxita Dioso pejumecovënëtsivi Dioso najëpaeya tane. Judïovi, apo judïovi na, daxita bajarapamonae Dioso najëpaeya tane. Pamonaë peperabëcaucubivitsi, pamonaë ata apo peperabëcaucubivitsi, daxita bajarapamonae Dioso najëpaeya tane. Saicayanacuapijivi ata, pamonaë ata dajubicuenia canajetatsi itsamonaëjavabelia amoneya petonacuenebavanapaenexa, pamonaë ata apo canajetsitsi itsamonaëjavabelia amoneya petonacuenebavanapaenexa, daxita bajarapamonae Dioso najëpaeya tane. Tsipaji bajarapamonae Cristo tsijamatabëcatsi peyajavajinavanapaenexa caejivi canacujitsia. Nexata bajarapamonae xaina baja pajamatatabëcuene Dioso tane bitso penamatamotsicuene mapanacuataje.

<sup>12</sup>Dioso bitso pacaasiva. Pacaitapetanua papijajivinexamë. Bajaraxuata paitaxutotsoniataeyabiabianame itsamonae ata. Nexata ëpexaniajamatabëcueneta pajinavanapaename. Beveliajamatabëcuenevi nataeya pajinavanapaename. Pajamatatabëcuenesaëmë tsavanapae tsane itsamonae, bajayajebi pacaitsacueniababiabi ata. <sup>13</sup>Namataenetsia panajamatatabëcuenyavenonare bajayajebi ata. Itsa pacaitsacueniaba itsajivi, bajarapajivijavabelia pabarajamatatabëcuenexanepanare. Pacuenia paxamë ata Cristo pacabarajamatatabëcuenexanepana pibisiacuene paneexanaevi ata, bajara pijinia pacuenia paxamë ata pabarajamatatabëcuenexanepanare itsamonaëjavabelia. <sup>14</sup>Matavëjëa mapacuenia paexanavanapareje. Namataenetsia bitso panaasivamëre tsavanapae. Bajarapacuenia nexata najamatatabëcuenejëpaeya pajinavanapaename. <sup>15</sup>Pavajëtabiabare Diosojavabelia papecayavenonaeenexa jamatabëcuenexanepanaeya panejinavanapaenexa. Bajarapacuenia panejinavanapaenexa, Dioso pacajunata caebitsaëto papecaexanaenexa Cristo yajava. Nexata Dioso itsa pacayavenona jamatabëcuenexanepanaeya panejinavanapaenexa, pajumaitsimë tsabiabi tsane Diosojavabelia. “Xanepana rabaja. Tsipaji bitso pexaniacuene panetoexaname,” pajamë tsabiabi tsane Diosojavabelia.

<sup>16</sup>Pavajëtabiabare Diosojavabelia Cristo pelivaisi itsamonae papecatsipaebijava papecajamatabëcueneenabiabinexa. Pavajëtabiabarenua Diosojavabelia xaniavaetsia Dioso panejamatabëcuenyapëtaenexa. Namataenetsia panatsipaebabiabare Cristo pelivaisi. Namataenetsia panajamatatabëcuene yavenonabiabarenua paneajamatatabëcuenesaënexa Cristo pelivaisi panejumecovënëtsijava. Daxita panejamatabëcuenevetsina pexaniajamatabëcuene rajutsiaya Diosojavabelia panaxëanabiabare vaji. Palivaisianë ata rubena Salmosbaxutota, panaxëanabiabare. Pavajianë ata rubena vajibaxutonëta, panaxëanabiabare. Pavajianë ata Espiritu Santo pejamatabëcueneta pacanaxëanaeyaexana, panaxëanabiabare. <sup>17</sup>Daxita xua paexanavanapame, paexanavanapare vajatuxanenë Jesucristo pejitsipaecuenia. Palivaisianë ata pacuaicuaijamë tsabiabi, pacuaicuaijamë tsane vajatuxanenë Jesucristo pejitsipaecuenia. Pexaniajamatabëcuene itsa parajutabiabianame vajatuxanenë Jesucristo

paxa Diosojavabelia, Dioso papecayavenonabiabixae, Jesucristo pevenëta pexania-jamatabëcuene parajutabiabianame.

### **Pacuenia Pablo Dioso pejumecovënëtsivi muxujioba yabara pelivaisi**

<sup>18</sup> Paxamë papetiriavimë, pajumecovënëtabiabarë pacuenia pacaitoroba paneamonajivi. Tsipaji bajarapacuenia vajatuxanenë pacatojitsipa paneexanavana-paenexa. <sup>19</sup> Paxamë pijinia papebijivimë, pasivamëre panijavajivi. Pëtsa anaeyacuena paitorobabiabame panijavajivi. <sup>20</sup> Paxamë pijinia papeximë, daxita xua paneaxajivi, paneenajivi ata, pacaitoroba paneexanaenexa, pajumecovënëtabiabarë. Tsipaji bajarapacuenia vajatuxanenë sivabarëya. <sup>21</sup> Paxamë pijinia panexi panexainaevi, pëtsa panexi anaeya paitorobabiabame papecayumecovënëtabiabinexa xua paitorobame. Tsipaji saya belia panexi jamatabëcuenefaefaenaejitsipa Dioso pejumecovënëtsijava. <sup>22</sup> Paxamë pijinia itsamonae papijajivimë, dajubicuenia papeccanajetsivi itsamonae amoneya panetonacuenebavanapaenexa. Pacuenia panijatuxanevi pacaitoroba, bajarapacuenia patonacuenebabiabarë panijatuxanevi. Pëtsa matapania itsajota pacanaitaxutocaeveta panijatuxanevi, asaëyata patonacuenebame papecasivabarëyanexa panijatuxanevi panetonacuenebibiava yabara. Biji rajane daxitamatacabi asaëyata xaniavaetsia patonacuenebabiabarë. Panejamatabëcuenevetsina cuenejitsipaeya panijatuxanevi patonacuenebabiabarë papecasivabarëyanexa vajatuxanenë. <sup>23</sup> Daxita xua panijatuxanevi patonacuenebabiabame, jamatabëcuenebarëyaya patonacuenebabiabarë panijatuxanevi. Xua panijatuxanevi patonacuenebabiabame, bajaraxua yabara pajamatabëjumaitsimëre tsabiabi mapacueniaje: “Xua tajatuxanenë tonacuenebajë, bajaraxua taniji Cristonexa betatonacuenebijava. Apo ëtajatuxanenënexa,” pajamatabëjamëre tsabiabi. <sup>24</sup> Payapëtaneme rabaja mapacuenieje. Vajatuxanenë pacarajutsiana pacuene pijajivi toxaina perajutsinexa, baitsi matacabi apo peverevere-caejava. Patonacuenebavanapame baja cajena Cristonexa. Bajara jane ponë pepacuene panijatuxanenë. <sup>25</sup> Panejumecovënëre pacuenia pacaitorobatsi. Tsipaji pajivi pibisiacuene exana, bajarapajivi itsamatacabi Dioso naneconitsiaexanaenatsi pibisiacuene pexanaeneconi yabara. Pamatacabi Dioso daxitajivi naneconitsiaexanaena, paneconivajëto caejivi canacujitsia xainapona, bajarapaneconivajëtota Dioso naneconitsiaexanaponaena caejivi canacujitsia. Nexata itsajivi ata apo vecuapanepae tsane Dioso jivi penaneconitsiaexanaecuene.

**4** Paxamë papetuxanevimë, xaniavaetsia paevere panijajivi, papecatonacuenebabiabivi. Panajamatabënapitabiabarë paxamë ata panijatuxanenë athëbëtatsia peecaejava.

<sup>2</sup> Daxita Dioso panejumecovënëtsivi icatsia pacatoyaquinatsi mapacueniaje. Diosojavabelia pavajëtabiabarë ajamatabëcueneitatsacaya pajamatabëcuenemajitsinejevamë. Itsa pavajëtabiabianame Diosojavabelia, Dioso papecayavenonabiabijava yabara, pajumaitsimë tsabiabi tsane mapacueniaje: “Xanepana rabaja. Tsipaji bitso pexaniacuene panetoexaname,” pajamë tsabiabi tsane Diosojavabelia. <sup>3</sup> Itsa pavajëtabiabianame Diosojavabelia, paxanë ata panetovajëtabiabianame. Panetovajëtabiabianame Diosojavabelia Dioso pataneyavenonaenexa nacuanë pevet-sivi patanitavetsiyaniava jivi patatsipaebaponaejava Cristo pelivaisi. Pajitsipajë jivi patatsipaebinexa pacuenia Jesucristo patsica mapanacuayabetsicaje vajanacasivatëpaenexa pibisiacuene vajaexanaeneconi yabara. Bajarapalivaisi jivi tatsipaebapon-

aexae, nenaneconitsiaexana. Nexata abaxë naneconitsiaya ponaponajë penaneconitsivi pejebabiabibota. <sup>4</sup> Cristo pelivaisi jivi itsa tsipaebabiabajë, jitsipajë jumenapebetsiaya tatsipaebabiabinexa. Nexata panetovajëtabiabanamenua Cristo pelivaisi jivi jumenapebetsiaya tatsipaebabiabinexa tanejumeyapëtaenexa xaniavaetsia.

<sup>5</sup> Paepatota pacatoxanepana pexanialivaisi, Cristo pelivaisi, panetsipaebinxeta itsamonaejavabelia, patsipaebabiabare. Xaniavaetsianua patsitajinavanapare pamonaë Dioso apo pejumecovënëtsivi. Tsipaji rabaja imoxoyo pevajënaë Cristo icatsia pepatsijavanexatsica. <sup>6</sup> Daxita palivaisianë pacuaicuanetsipaebilivaisi. Panajamatabëcuenevererenua xaniavaetsia panejumecanaviatsinexa caejivi canacujitsia bajarapamonaë itsa pacayanijobapona Dioso pejumelivaisi yabara.

### **Pacuenia Pablo toyaquina pecopatsinexa baja petoyaquinaelivaisi mapabaxutotaje yabara pelivaisi**

<sup>7</sup> Vajabananë Tíquico, bitso vajaasivanë. Bajaraponë xaniavaetsia tonacuenebabiaba vajatuxanenë. Vajatuxanenë pijacuene patonajuanacuenebajëbeje. Bajaraponë pacatsipaebiana daxita pacuenia xanë ponaponajë. <sup>8</sup> Bajaraxuata bajaraponë pacatoitorobaliatsi papecatsipaebinxeta pacuenia pajinavanapajë. Bajaraponë nexata itsa pacatsipaebiana, nexata panesivaajamatabëcuenesaëmë tsane. <sup>9</sup> Bajaraponë paxamëjavabelia yajavaponaëjitsia vajabananë Onésimo. Bajaraponë Onésimo panijatomarapijinë. Tonacuenebabiaba xaniavaetsia vajatuxanenë. Bajaraponëbeje pacatsipaebiana daxita pacuenia Dioso pejumecovënëtsivi jinavanapa majotaje Roma tomarata.

<sup>10</sup> Aristarcobeje naneconitsia paponaponajëbeje penaneconitsivi pejebabiabibota. Aristarco ata pacabajacobalia. Marcos ata, Bernabé pejuyapijinë, pacabajacobalia. Paxamë rabaja payapëtaneme pacuenia paexanaejitsiamë. Nexata Marcos itsa patsialia paxamëjavabelia, pacopiapitsianame xaniavaetsia. <sup>11</sup> Pacabajacobalia Jesús ata, ponë itsavënë, Justo. Judíovi picani ayailbitsaëto Jesucristo pelivaisi jumecovënëta. Itsiata bajarapamonaeyajuvënëvi, caenëbeje saya, neyavenona vajatuxanenë pijacuene tatonacuenebijava. Neyavenona saya mapamatabëxëyoje. Aristarco, Marcos, Jesús. Bajara saya pamatabëxëyo neyavenona. Bajarapamonaë bitso neyavenona. <sup>12</sup> Epafraas ata, Cristo pijajivitonë, panijatomarapijinë. Bajaraponë ata pacabajacobalia. Bajaraponë bitso pacatovajëtabiaba Diosojavabelia. Pacatovajëtabiaba ajamatabëcuenesaëya panejumecovënëtavanapaenexa Dioso pejumelivaisi. Pacatovajëtabiabanua xaniavaetsia paneexanabiabinexa pacuene Dioso pacatojitsipa. <sup>13</sup> Pacatsipaebatsi baja cajena pacuenia Epafraas pacatovajëtabiaba Diosojavabelia bitso papecajamatabënaajinaexae. Bajara pijinia pacuenia bitso tovajëtabiaba Dioso pejumecovënëtsivi, pejinavanapaevi Laodicea tomarata. Bitso tovajëtabiabanua Hierápolis tomarata pejinavanapaevi ata. <sup>14</sup> Vajaasivanë Lucas, ponë jivi vaëbabiaba, bajaraponë ata pacabajacobalia. Demasvënënenë ata pacabajacobalia.

<sup>15</sup> Nebajacobi vajamonae, daxita Dioso pejumecovënëtsivi, Laodicea tomarata pejinavanapaevi. Nebajacobi Ninfas ata. Pamonaë ata nacaetuatabiaba bajaraponë pijabota, nebajacobi. <sup>16</sup> Itsa baja paveretame panelebijava mapabaxutoje, patoitorobianame Laodicea tomarapijivijavabelia penalebinexa bajarapamonaë ata. Bajarapamonaë ata tatoyaquinaebaxuto juya pacatoitorobiana panenalebinexa paxamë ata. <sup>17</sup> Arquipojavabelia pajumaitsimë tsane mapacueniaje: “Dioso pecatocopatsijava netonacuenebinxeta, verere xaniavaetsia,” pajamë tsane.

<sup>18</sup> Xañë Pablonë, pacatoyaquinatsi baja cajena tacobeta mapalivaisiyoje pataneba-jacobinexamë. Pajamatabënëjinavanapare penaneconitsivi pejebabiabibota tapon-aponaejava. Pacatovajëtabiabatsi Diosojavabelia papecayavenonabiabinexa Dioso. Bajara itsi tsane.

## Mapabaxutoje San Pablo copiaya toyaquina Tesalónica tomarapijivijavabelia

### Pacuenia Pablobana, Silvanobana, Timoteobana toyaquina mapabaxutoje Dioso pejumecovënëtsivijavabelia yabara pelivaisi

**1** Xanë, Pablonë, Silvano, Timoteo, mapamatabëxëyoje pacatoyaquinatsi mapabaxutoje. Pacatoyaquinatsi Dioso panejumecovënëtsivi, paTesalónica tomara-pijivimë. Panenajamatabëcuenecopatsivi baja vaxa Diosojavabelia, vajatuxanenë Jesucristojavabelia ata. Pacatovajëtatsi vaxa Diosojavabelia papecaitaxutotsoni-ataenexa jamatabëcuenexanepanaeya panejinavanapaenexa.

### Pacuenia Tesalónica tomarapijivi Dioso pejumecovënëtsivi xaniavaetsia Dioso jumecovënëtsia jinavanapa yabara pelivaisi

<sup>2</sup>Itsa pavajëtabiabajë Diosojavabelia, pexaniajamatabëcuene parajutabiabajë Diosojavabelia paxamë yabara. Pacatovajëtabiabatsi Diosojavabelia daxitamata-cabi canacujitsia Dioso papecayavenonabiabinexa. <sup>3</sup>Itsa pacatovajëtabiabatsi vaxa Diosojavabelia, panajamatabënepitabiabajë Dioso pinijicuenia panetonacueneba-vanapaejava panenajamatabëcuenecopatsixae Diosojavabelia. Panajamatabënep-itabiabajënuua bitso pinijicuenia panejitsipaejava Dioso. Paxamë rabaja paja-matabëcuenesaëmë tsavanapae panecopiaevetavanapaejava vajatuxanenë Jesu-cristo icatsia pepatsijavanexatsica. <sup>4</sup>Tajamonae, Dioso baja cajena pacaasiva. Payapëtaniji baja cajena Dioso papecaitapetsijava papijajivinexamë. <sup>5</sup>Bajayata ita pacatsipaebatsi mapapexanialivaisije Diosojavabelia papecacapanepaelivaisinexa, saya patacuibovojotota apo pacatsipaebitsi. Jume baja cajena. Biji ra Espiritu Santo pesaë yajava pacatsipaebabiabatsi. Nexata baja payapëtaneme palivaisi pacatsi-paebatsi, pexaniajailivaisicuene. Payapëtanemenua pacuenia paxanë xaniavaetsia panajinavanapajë paxamëjavata patanitaxutua ajamatabëcuenesaënexamë.

<sup>6</sup>Pacuenia paxanë pajinavanapajë, pacuenia Jesús ata ponapona, bajarapacue-nia paxamë ata pajinavanapame. Barëyaya baja pajumecovënëtavanapame patacat-sipaebilivaisi Espiritu Santo papecatsijamatabëcaexae. Bajarapacuenia barëyaya pajumecovënëtavanapame patacatsipaebilivaisi, itsamonae bitso pacabejiobiaex-anabiabi ata. <sup>7</sup>Bajarapacuenia panejinavanapaejava daxita Dioso pejumecovënët-sivi, Macedonia nacuapijivi, Acaya nacuapijivi ata, ita pacavënëlivaisitane, ba-jarapamonae ata yapëtane bajarapacuenia xaniavaetsia Dioso petojinavanapaenexa. Nexata bajarapamonae ata xaniavaetsia jinavanapa pacuenia paxamë pajinavana-pame. <sup>8</sup>Itsiata ëMacedonia nacuapijivi, ëAcaya nacuapijivi ata, bajarapacuenia xaniavaetsia panejinavanapaejava, apo pacavënëlivaisitae. Tajë nacuapijivi ata pacavënëlivaisitane panenajamatabëcuenecopatsijava Diosojavabelia. Bajarapacue-nia ita pacavënëlivaisitane, bajarapamonae ata yapëtane baja Jesús pelivaisi pexa-niajailivaisicuene. Bajaraxuata paxanë apo pacavajunupaebitsi daxita bajarapamon-aejavabelia. Tspaji baja yapëtane. <sup>9</sup>Biji rajane bajarapamonae pijacuata panetsi-paeba paxamë xaniavaetsia patanecopiapitsijavamë pamatacabi pacanasivaxainatsi. Paxamë picani jumapecataeya pexanaenëanëjavabelia panavajëcabiabame. Itsiata baja aeconoxae pacopatame jumapecataeya pexanaenëanëjavabelia panenavajë-



cabiabijavami. Nexata baja pepo Diosojavabelia panajamatabëcuenecopatame. Patonacuenebavanapame pepo Dioso, ponë piasaëtsaponaponaenë daxitamatacabijavabelianexa. Bajarapacuenia paxamë yabara panetsipaeba baja cajena daxita bajaramonae. <sup>10</sup>Bajarapamonae panetsipaebanua panecopiaevetavanapaejava Jesús, Dioso pexë nato, athëbëvetsica icatsia pepatsijavanexatsica. Bajaraponë, Jesús, Dioso baja cajena asaëyaexanatsi petëpaecujinae. Jesús nacacapanepaena pibisiacuene va-jaexanae neconi yabara Dioso vajanacananeconitsia exanaejavaminexavecua.

### Pacuenia Pablo nacueneba Tesalónica tomarata yabara pelivaisi

**2** Tajamonae, apo panacueratsinë itsa pacasivaxainatsi. Bajarapacuenie paxamë panijacuata payapëtaneme. <sup>2</sup>Paxamë baja cajena payapëtaneme mapacuenieje. Paxanëbeje Silasbeje patapatsivajënae beje paxamëjavabelia, Filipos tomarata panenaneconitsiaexanabeje itsaneconi apo paxainae atanëbeje. Panebejiobiaexanabejenua bajarapamonae. Itsiata baitsi jane Dioso pataneyavenonaexaebeje, ajumeurajibia pacatsipaebatsi pexanialivaisi Diosojavabelia papecacapanepaelivaisinexa. Pacatsipaebatsi bajarapalivaisi, patanitoyavi picani apo panetocopatsi ata patacatsipaebinexa. <sup>3</sup>Palivaisi pacatsipaebatsi, pexaniajailivaisi cajena. Apo penajumetsënëtsilivaisi. Apo pacatsipaebitsi bajarapalivaisita patacayamaxëitorobinexa. <sup>4</sup>Biji ra Dioso paneitoroba. Panetocopatanua jivi patatsipaebinexa pexanialivaisi pecapanepaelivaisinexatsi Diosojavabelia. Bajaraxuata bajarapalivaisi jivi itsa patsipaebaponajë, apo patsipaebaponaenë saya jivi patanebarëyataenexa bajarapalivaisi patatsipaebijava yabara. Biji ra bajarapalivaisi jivi patsipaebaponajë Dioso patanebarëyataenexa. Tsipaji Dioso vajanacajamatabëcueneyapëtaenë. <sup>5</sup>Paxamë baja cajena payapëtaneme mapacuenieje. Caeto ata paxanë itsalivaisi apo pacabarëcuaicuajaitsi saya jema bajarapalivaisi yabara patanebarëyataenexamë. Yamaxëitorobiaya livaisi apo pacatsipaebitsi palata patacavecuapitsinexa. Dioso baja cajena daxita bajarapacuenie panejamatabëcueneyapëthane. <sup>6</sup>Cristo patanitorobixae, panejamatabëcuenecaëjëpa picani patacaitorobinexa pataneyaiyataenexamë. Itsiata baitsi jane caeto ata apo pacaitorobitsi pataneyaiyataenexamë. Apo paitorobinë itsamonae ata pataneyaiyataenexa. <sup>7</sup>Biji rajane pacuenia petiriva asivaya xaniavaetsia baevetaponapona pexi, bajara pijinia pacuenia paxanë ata asivaya xaniavaetsia pacaevetavanapatsi. <sup>8</sup>Bitso pacaasivatsi. Nexata pacatsipaebatsi Dioso pejumelivaisi. Bitso patacaasivaxae, itsamonae jamatabëpanebejejebabiabi ata, itsiata apo pacopatsinë patacayavenonaponaejava. <sup>9</sup>Tajamonae, panecuenecanaëjëre mapacuenieje. Pamatacabi paxamëjavata pajinavanapajë, pinijicuenia panacuenebabiabajë. Pinijicuenia panacuenebabiabajë patajacuata patanaevetsinexa. Pacatsipaebaponatsinua pexanialivaisi, palivaisi Dioso nacayapëtaeyaexana. Paepatota pacuenesajinajë, panatonacuenebabiabajë matacabita, meravi ata. Bajarapacuenia panatonacuenebabiabajë itsanë ata paxamëyajuvenënë petoayapëbejeyanivatsi patanevetaponaejava.

<sup>10</sup>Paxamë baja cajena paneyapëtaneme pacuenia pajinavanapajë. Dioso ata paneyapëthane. Paxamë baja cajena paneyapëtaneme paxanë pibisiacuene apo pataexanaevi. Paxamë baja cajena paneyapëtaneme paxanë bitso Dioso patajumecovënëtsivi. Paxamë baja cajena paneyapëtaneme paxanë itsacueneneconiyo ata apo paxainanenë, paneconi yabara pananeconitsijitsianë paxamëjavata itsa pacatsipaebavanapatsi Dioso pejumelivaisi. <sup>11</sup>Paxamë baja cajena paneyapëtaneme paxamë

pacaenëmë canacujitsia patacamuxujibaponaejava paneajamatabëcuenesaënexa Diosojavabelia. Pacuenia pexi pexinaenë nacoximuxujioaba, bajara pijinia pacuenia paxanë ata pacamuxujioabatsi. <sup>12</sup>Pacaitorobatsi baja cajena xaniavaetsia panetojinavanapaenexa Dioso papecabarëyataenexa. Dioso baja cajena pacajunata daxitacuene papecabarëevetsinexa pijapenivenivenaenacuatatsia.

<sup>13</sup>Itsa pacatsipaebatsi Dioso pitorobilivaisi, panenamuxunaevetame. Nexata panejumecovënëtime patacatsipaebilivaisi. “Xaniajai baja cajena. Dioso pejumelivaisi nacatsipaeba,” panejamatabëjaixae, panejumecovënëtime. Apo pajumetaemë saya bejivitonë pejamatabëcueneta pepaebilivaisi. Xaniajai cajena. Dioso pejumelivaisi pacatsipaebaponaetsi. Bajarapalivaisi panejumecovënëtsixae, panevajënaeyabelia paexanavanapame pacuenia Dioso pacaitoroba. Bajaraxuata paxamë yabara pexaniajamatabëcueneta parajutabiabajë Diosojavabelia. <sup>14</sup>Tajamonae, pacuenia Judea nacuata Dioso pejumecovënëtsivi bejibioaexanatsi pijanacuapijivi, judíovi, bajara pijinia pacuenia pacabejiobiaexana panijanacuapijivi. <sup>15</sup>Pacuenia bajarapajudíovi pijasalinaivimi bajayata beyaxuabapona Diosojumepaebivimi profetavi, bajara icatsia pacuenia bajarapamonaemi pemomoxi beyaxuaba pepo petuxanenë Jesús. Nexata Jesús papijajivixanenë, paxanë ata bajarapamonaepanecapitsapa judíovi penacaetuatabiabibovecua. Dioso apo pejitsipaecuene bajarapajudíovi exanapona. Bajarapajudíovi daxitajivi bitso itoya. <sup>16</sup>Paxanë pexanialivaisi itsa patsipaebabiabajë apo judíovijavabelia, apo judíovi ata pecapanepaenexatsi Diosojavabelia, nexata bajarapajudíovi panejumeitavetabiaba. Bajarapacuenia patanejumeitavetabiabixae, pibisiacuene pexanaeneconi pematatsënëa ayaineconi natsixaina Diosojavabelia. Nexata baja aeconoxae bajarapamonaetocopiapatatsi ayaicuenia Dioso penaneconitsiaexanaematacabinexatsi.

### **Pacuenia picani icatsia Pablo jamatabëtane Tsalónica tomarapijivi yabara pelivaisi**

<sup>17</sup>Tajamonae, patacavecuaponaecujinae, caematacabibeje apo pacatae atatsi, itsiata pacajamatabënajinavanapatsi. Bitso picani icatsia jamatabëpaponajë paxamëjavabelia patacataenexa. <sup>18</sup>Jamatabëpaponajë picani paxamëjavabelia. Xanë Pablonë, jamatabëponabiabajë picani. Itsiata dovathi apo panecopatsi. <sup>19</sup>Vajatuxanenë Jesucristo icatsia itsa patsianica, pacavajunupaebianatsi bajaraponëjavabelia xaniavaetsia Dioso panejumecovënëtsijava. Bitso pacasivajamatabëcuenenabarëya tsanetsi. <sup>20</sup>Paxamë yabara baja cajena pexaniajamatabëcueneta parajutabiabajë Diosojavabelia. Pacasivajamatabëcueneta barëyatsinua tsabiabi.

**3** Bajayajebi baja cajena apo pacataetsi. Nexata baja belia apo panajamatabëcueneta saëtaeponaejitsipañë matavëjëa pataevetaeponaejava patacataenexa. Nexata baja panajamatabëxainajëbeje ëTimoteo pataitorobinexabeje, peponaenexa paxamëjavabelia papecataenexa. Paxanëbeje Silvanobeje, Atenas tomarata panacopatsianajëbeje. <sup>2</sup>Nexata baja pacatoitorobatsibeje vajabananë Timoteo. Timoteobeje baja cajena Dioso patatonajuanacuenebinëbeje, jivi patatsipaebaponaenexabeje pexanialivaisi, Cristo pelivaisi. Pacatoitorobatsibeje Timoteo papecayavenonaenexa, papecajamatabëcueneta asaëyaexanaenexa Dioso panejumecovënëtsijava yabara. <sup>3</sup>Pacatoitorobatsibeje Timoteo papecayavenonaeya tsipaebabiabinexa pexanialivaisi, caenë ata paxamëyajuvënëne Dioso pejumelivaisi pejumecovënëtsijava pecopabiyaniva, itsamonae itsa bejibioaexanaponaetsi. Paxamë baja cajena payapë-

taneme Dioso vajanacatocopatsijava itsamonae vajanacabejiobiaexanaponaenexa. <sup>4</sup>Pamatacabi abaxë pacayajavajinavanapatsi, tajëvelia baja cajena pacatsipaebabi-abatsi itsamonae papecabebiobiaexanaponaevajanexa Dioso papijajivixaemë. Nexata jane baja bajarapacuenae aeconoxae pacatocopiapata. <sup>5</sup>Bajaraxuata baja apo najamatabëcuene saëtaponaejitsipaeñë matavëjëa taevetaponaejava patacataenexa. Nexata baja itorobajë Timoteo peponaenexa paxamëjavabelia papecataenexa pacuenia pajumecovënëtavanapame Dioso pitorobilivaisi. Xanë picani paxamë yabara jamatabëjumaitsinë: “Dovathi meta bajarapamonae jamatabëcuenejëtatsi. Othopaica meta baja. Nacueratajë meta baja bajarapamonaejavata pexanialivaisi tatsipaebabi-abijava,” jamatabëjanë picani paxamë yabara.

<sup>6</sup>Timoteo nexata itsa parena paxamëjavaverena, Tesalónica tomaraverena, panetsipaebabeje pexanialivaisi. Xaniavaetsia pina Dioso pajumecovënëtavanapame. Paxamë pina pasivamë tsavanapae itsamonae ata. Panejamatabëñajinavanapame pina pexaniajamatabëcuena. Bitso pina jamatabëpanetaneme picani pacuenia paxanë ata jamatabëpacatanetsi picani. <sup>7</sup>Tajamonae, panetocopiapata rajane baja pibisiacuenia itsamonae patanebejiobiaexanaponaenexa. Itsiata baitsi jane panajamatabëcuenesaëtavanapajë paxamë yabara. Panajamatabëcuenesaëtajë itsa pacavënëlivaisitanetsi asaëya Dioso panejumecovënëtsijava. <sup>8</sup>Itsa pacavënëlivaisitanetsi asaëya Dioso panejumecovënëtsijava, nexata pacasivajamatabëcuenesaëtatsi. <sup>9</sup>Nexata pexaniajamatabëcuene parajutajë Diosojavabelia paxamë yabara. Pexaniajamatabëcuene parajutajë Diosojavabelia bitso patacasivajamatabëcuenebarëyaxae Dioso pitabarata. <sup>10</sup>Matacabita, meravi ata, daxita patajamatabëëthëtovetsina pavajëtabiabajë Diosojavabelia patanetocopatsinexa icatsiata pataponaenexa paxamëjavabelia patacataenexa. Pacatovajëtabiabatsinua Dioso papecayapëtaeyaexanaenexa palivaisi abaxë pacatosaica xaniavaetsia panejumecovënëtsinexa Dioso pejumelivaisi.

<sup>11</sup>Pavajëtajë vaxa Diosojavabelia, vajatuxanenë Jesucristojavabelia ata, pataneyavenonaenexa pataponaenexa paxamëjavabelia. <sup>12</sup>Pacuenia paxanë pacaasivatsi tsavanapae, bajarapacuenia paxamë ata caejivi canacujitsia panevajënaeyabelia namataenetsia panenasivanexa, pacatovajëtatsi Diosojavabelia papecayavenonaenexa. Pacatovajëtatsi Dioso papecayavenonaenexa itsamonae ata paneasivanexa. <sup>13</sup>Pacatovajëtatsi Dioso papecajamatabëcuene asaëyaexanaenexa, jamatabëcuenexanepanaeya panejinavanapaenexa. Nexata paneconijibimë tsane. Paneconijibimë tsane Dioso pitabarata panenubenaevavata, pamatacabi vajatuxanenë Jesús, daxita pijajivi yajava, patsianica.

#### **Pacuenia Dioso pitabarata xaniavaetsia bejinavanapatsi Dioso vajanacasivajamatabëcuenebarëyanexa yabara pelivaisi**

**4** Tajamonae, nexata pinijicuenia pacamuxujibatsi. Vajatuxanenë Jesús pejamatabëcueneta pacaitorobatsi xaniavaetsia panejinavanapaenexa. Pacatsipaebatsi rabaja cajena pacuenia pajinavanapaejitsiamë Dioso papecasivajamatabëcuenebarëyanexa. Bajarapacuenia panevajënaeyabelia xaniavaetsia pajinavanapare daxitamatacabijavabelianexa.

<sup>2</sup>Payapëtanemenua baja cajena palivaisi vajatuxanenë Jesús pejamatabëcueneta pacaitorobatsi panejumecovënëtsinexa. <sup>3</sup>Dioso raja jitsipa xaniavaetsia panetojinavanapaenexa ëponënexa. Dioso raja pacatojitsipa panecopabinexa pibisiacuenae

panevitota paneexanaejava. <sup>4</sup>Dioso raja pacatojitsipa pacaenëmë canacujitsia paneyapëtaenexa mapacueneye. Petiriva itsa papitame panijavanexa, xaniavaetsia paevere. Payaiyataemanua. <sup>5</sup>Pëtsa petiriva papitame pibisiacuene saya panevitota paneexanaenexa bajarapovajavabelia pacuenia Dioso apo pejumecovënëtsivi baexana. <sup>6</sup>Dioso cajena apo jitsipae itsanë ata pevitota pibisiacuene pexanaenexa itsanë pijavajavabelia. Vajatuxanenë cajena pinijicuenia naneconitsiaexanaena daxita pamona exana bajarapacuene. Bajarapacuene yabara imata baja cajena pacatsipae-batsi pamatacabi abaxë pajinavanapajë paxamëjavata. <sup>7</sup>Dioso baja cajena nacajunata ëpexaniacuene vajaexanavanapaenexa. Dioso apo nacajunatsi pibisiacuene vajaexanavanapaenexa. <sup>8</sup>Itsamonae apo panejumecovënëtsi patatsipaebilivaisi. Bajarapamonae itsa apo panejumecovënëtsi paxanë, apo jumecovënëtsi Dioso, ponë nacarajuta Espíritu Santo.

<sup>9</sup>Paxamë rabaja namataenetsia panaasivamë tsavanapae itsamonae Dioso pejumecovënëtsivijavabelia. Dioso baja cajena pacayapëtaeyaexana bajarapacuenia panenasivanexa. Bajaraxuata apo namatavenonaenë baja patacatoyaquinaenexa patacayapëtaeyaexanaenexa bajarapacuene. Tsipaji baja payapëtaneme. <sup>10</sup>Xaniajai rabaja. Pasivamë tsavanapae daxita vajamonae, Macedonia nacujajava pejinavanapaevi. Itsiata icatsia pacaitorobatsi namataenetsia bitsoyo orijibia panenasivanexa. <sup>11</sup>Pacuenia baja cajena copiaya pacaitorobatsi, bajarapacuenia jamatabëcuenexanepanaeya pajinavanapare. Epanijacuene saya paexanare panejamatabëitonotsiyanima itsamonaejavabelia. Panijacuata panatonacuenebare bajarapacuenia panenaevetavanapaenexa. <sup>12</sup>Bajarapacuenia nexata Dioso apo pejumecovënëtsivi pacayaiyataena. Nexata apo pacatosai cae tsane itsacueneyavayo ata panenamatavenonaejava.

### **Pacuenia pepo petuxanenë Jesús icatsia patsijitsiatsica yabara pelivaisi**

<sup>13</sup>Tajamonae, pacatojitsipatsi xaniavaetsia paneyapëtaenexa pacuenia itsamatacabi itsijitsia Dioso pepua pejumecovënëtsivi petëpaevi. Pacatsipaebatsi baja cajena bitso panenajamatabëxainaeayaniva itsa pacavecuatëpa itsajiviyo. Pacatsipaebatsi baja cajena bitso panenajamatabëxainaeayaniva, pacuenia bitso banajamatabëxaina Dioso apo pejumecovënëtsivi itsa vecuatëpatsi itsajiviyo. Bajarapamonae jamatabëcuenenavëxaniabiaya bajumaitsi: “Petëpaevi rabaja peponaxuabi,” bajai Dioso apo pejumecovënëtsivi. <sup>14</sup>Vaxaitsi baja cajena jumecovënëtatsi Jesús vajanacasivatëpaejava. Jesús vajanacasivatëpaeujinae, Dioso icatsia asaëyaexanatsi petëpaejavavecu. Dioso icatsia itsamatacabi asaëyaexanaena daxita pamona Dioso pepua pejumecovënëtsivi petëpaevimi. Bajarapalivaisi vaxaitsi baja jumecovënëtatsi.

<sup>15</sup>Palivaisi pepo petuxanenë Jesús netsipaeba, bajarapalivaisi pacatsipaebijitsiatsi. Vaxaitsi abaxë mapanacuata vajaasaëtsavanapaevi pamatacabi pepo petuxanenë Jesús icatsia patsianica. Vaxaitsi athëbëabetsia apo namataxainaetsitsia tsane. Petëpaevimi rajane copiaya namataxainaenia. <sup>16</sup>Angelevi penamatacaitorobinë vavajai tsaxuabi tsane. Dioso pijatrompeta najumetsiana. Pepo petuxanenë jane baja pijacuata patsianica athëbëvetsica. Nexata pamona Cristo pepua pejumecovënëtsivi tēpa, bajarapamonae asaëyaexanaenatsi petëpaejavamivecu. <sup>17</sup>Bajaraxuacujinae vaxaitsi, abaxë mapanacuata vajaasaëtsavanapaevi bajarapamatacabita, itarërëbotatsia nacacatuatsiania petëpaevimi yajava. Caxitajarabianatsi jane baja

athëbëtatsia pepo petuxanenë Jesús. Nexata jane baja daxitamatacabijavabelianexa yajavajinavanapaenatsi bajaraponë. <sup>18</sup> Bajaraxuata panajamatabëcuenesaëtavana-pare mapalivaisitaje.

**5** Tajamonae, itsiata apo panamatavenonaenë patacatoyaquinaenexa patacayapë-taeyaexanaenexa pamatacabita, paepatota ata, copiapatsijitsia daxita bajarapacuenë. <sup>2</sup> Payapëtaneme baja cajena pepo petuxanenë Jesús icatsia pepatsijavanexatsica. Paepatota apo vajënaeevetsitsi, jemata patsianica. Pacuenia penacobetoxotsinënexa meravi bapata itsajota apo jamatabënajinaetsi, bajarapacuenia jemata patsianica pepo petuxanenë Jesús. <sup>3</sup> Pamatacabita jivi jumai tsaponae tsane: “Daxitanacuanëjava baja cajena xanepana. Daxitajivi xaniavaetsia jinavanapa,” jai tsane, bajarapaepatota jemata tocopiapatsianatsi Dioso apo pejumecovënëtsivi peverebiabinexatsi. Nexata acuenëbi tsane Dioso apo pejumecovënëtsivi pevecuarëcëpecaenexa bajarapacuenë. Pacuenia petiriva, penacoxitsiva, itsa vixaenotatsi penacueto pevecuanaexanaenexatsi, acuenëbi pevecuanajetabajiravijava bajarapavixae, bajara pijinia itsane pamonaë Dioso apo pejumecovënëtsivi. <sup>4</sup> Tajamonae, paxamë baja apo pajamatabëcueneaitaquirimë. Pacuenia Dioso apo pejumecovënëtsivi ajamatabëcueneitaquiri, bajarapacuenia apo pajamatabëcueneitaquirimë. Pepo petuxanenë Jesús pepatsimatacabinexatsica pacopiaevetavanapame. Nexata pamatacabita pepo petuxanenë patsianica, apo pajamatabëcuenenabenajacaemë tsane. Pacuenia penacobetoxotsinë itsa pata, basivajamatabëcuenenabenajacatsi, apo paitsimë tsane. <sup>5</sup> Tsipaji baja daxita paxamë pexanialivaisita pacajamatabëcueneitayota. Nexata baja daxita vaxaitsi pitaquirijamatabëcuene apo xainaetsi. <sup>6</sup> Bajaraxuata nexata vaxaitsi apo bejamatabëcuenemajitsitsi. Pacuenia Dioso apo pejumecovënëtsivi jamatabëcueneitsi, bajara apo bejamatabëcueneitsi. Biji rajane jamatabëcueneaitavaya bejinavanapatsi. Nayajivitaeya bejinavanapatsinua pibisiacuene vajaexanaeyaniva. <sup>7</sup> Pamonaë jamatabëcueneaitaquiri, jamatabëcuenemajitabiaba. Aitajibi tsabiabinua meravi. <sup>8</sup> Itsiata baitsi jane vaxaitsi baja pexanialivaisita nacajamatabëcueneitayota. Nexata nayajivitaeya jinavanapatsi pibisiacuene vajaexanaeyaniva. Najamatabëcuenecopatatsi baja ëDiosojavabelia. Asivatsi tsavanapae Dioso. Itsamonae ata asivatsi tsavanapae. Copiaevetavanapatsi Cristo vajanacacapanepaenexa Diosojavabelia. Bajarapacuenia itsa copiaevetavanapatsi Cristo vajanacacapanepaenexa Diosojavabelia, nexata dovathi pejamatabëcuenevecua nayajivinajamatabëcuenexatatatsi Dioso pejumelivaisita. Nexata pacuenia vajabitsaënë nayajivinaxatata piatajajava, namataxatatanua piatajajava pejorojoronaeyanivatsi pijavajabitsaënë, bajara vaxaitsi ata itsitsi dovathi vajanacayamaxëitojorobianiva. <sup>9</sup> Dioso apo nacaitapetsi vajanacananeconitsiaexanaenexa pibisiacuene vajaexanaeconi yabara. Biji rajane Dioso nacaitapeta vajanacacapanepaenexa pibisiacuene vajaexanaeconivecua pepo petuxanenë Jesucristo pejamatabëcueneta. <sup>10</sup> Jesucristo baja cajena nacasivatëpa vajanacayajavaponaponaenexa vajaasaëtsavanapaevi mapanacuataje. Vajatëpacujinae ata, Dioso pijanacuatatsia Cristo nacayajavaponaponaena. <sup>11</sup> Bajaraxuata pacuenia baja namataenetsia panajamatabëcueneasaëya exanaponame, bajarapacuenia panevajënaeyabelia tsiteca paexanavanapare.

### **Pacuenia Pablo Dioso pejumecovënëtsivi muxujioba yabara pelivaisi**

<sup>12</sup>Tajamonae, pinijicuenia pacamuxujiobatsi paneyaiyataenexa pamonae paxamë tuatuajëta Dioso tonacuenebavanapa. Bajarapamonae Dioso pitorobicueniatsi pacavetavanapa. Pacamuxujiobabiabanua. <sup>13</sup>Payaiyataema bajarapamonae. Asivaya pataema. Tsipaji bajarapamonae xaniavaetsia Dioso tonacuenebavanapa. Jamatabëcuenexanepanaeya panajuajinavanapare.

<sup>14</sup>Pacaitorobatsinua panemuxujiobinexa pamonae piafaetabivi. Pamonae pijinia jamatabëcuenecuerana itsamonae bepejiobiaexanaponaexaetsi Dioso pejumecovënëtsijava yabara, pajamatabëcuenesaëyaexanare. Payavenonare pamonae jamatabëcuenefaefaena Dioso pejumelivaisivecua. Itsa pamuxujiobianame bajarapamonae, itsa pamuxujiobianamenua itsamonaejavabelia ata, ajamatabëcuenesaëya pamuxujiobianame bajayajebi pacopatsinejevamë.

<sup>15</sup>Pëtsa bajarapamonaejavabelia pibisiacuene panamatamoexaname, copiaya pibisiacuene pacaexanae ata. Biji pajamatabënajinavanapare pexaniacuene namataenetsia panenatoexanaponaenexa. Pajamatabënajinavanapare daxitajivijavabelia ata pexaniacuene panetoexanaenexa.

<sup>16</sup>Daxitamatacabi pajamatabëcueneparëyamëre tsavanapae. <sup>17</sup>Daxitamatacabi Diosojavabelia pavajëtabiabarë pacopatsinejevamë. <sup>18</sup>Daxita pacuene apo panejitsipaeuene ata, Dioso itsa pacatocopata papecatocopiapatsinexa, nexata itsa pacatocopiapata bajarapacuene, itsiata pexaniajamatabëcuenë parajutabiabianame Diosojavabelia bajarapacuene yabara. Bajarapacuenia paneexanavanapaenexa, Dioso pacatojitsipa Jesucristo papijajivixaemë.

<sup>19</sup>Espíritu Santo itsa pacajamatabëcuenëitoroba itsacuenejavayo paneexanaenexa, pëtsa pajamatabëjumaitsimë: “Apo exanaenë tsane bajarapacuenia,” pajamatabëjamë pëtsa. <sup>20</sup>Pëtsa panamuxujematame Espíritu Santo peyajavacuaicuajiaivi, Dioso pejumelivaisianë pepaebivi. <sup>21</sup>Nexata pacuenia bajarapamonae pacaitoroba panejumecovënëtsinexa, copiaya pajaire Dioso pejumelivaisibaxutota paneyapëtaenexa. Nexata xaniajai bajarapacuenia Dioso pejumelivaisibaxutota itsa jumaitsi, bajarapacuenia paexanare. <sup>22</sup>Daxita xua pibisiacuene, panayajivitaema.

<sup>23</sup>Dioso baja cajena vajanacajamatabëcuenexaniavaetsinë. Bajaraponë pibisiacuene paneexanaeconimi pacavecuaajibiaexanaena. Dioso evetsiana panejamatabëcuenë, paneperabëto ata, pibisiacuene paneexanaeyaniva. Bajarapacuenia Dioso pacaevetsiana matapania vajatuxanenë Jesucristo icatsia pepatsimatacabitsicajavabelianexa. <sup>24</sup>Bajarapacuenia Dioso pacaevetsiana, ponë pacajunata paxexinexamë. Dioso cajena pacatoexanaena daxita pacuenia najumecapanepaeya pacajumaitsi.

### **Pacuenia Pablo jamatabënajina Tesalónica tomarapijivi, pacuenia ata tovajëta Dioso peyavenonaenexatsi, yabara pelivaisi**

<sup>25</sup>Tajamonae, Diosojavabelia panetovajëtabiabarë.

<sup>26</sup>Asivaya nebajacobiana daxita bajarajotalia Dioso pejumecovënëtsivi.

<sup>27</sup>Pacaitorobatsi Dioso pejamatabëcueneta. Patsimuxulebianame mapabaxutoje daxita Dioso pejumecovënëtsivi pejumetaenexa.

<sup>28</sup>Pacatovajëtabiabatsti Diosojavabelia vajatuxanenë Jesucristo papeyavenonabiabinexa.

## **Mapabaxutoje San Pablo cotocaevi toyaquina Tesalónica tomarapijivijavabelia**

### **Pacuenia icatsia Pablobana, Silvanobana, Timoteobana, toyaquina mapabaxutoje Dioso pejumecovënëtsivijavabelia yabara pelivaisi**

**1** Xanë Pablonë, Silvano, Timoteo, mapamatabëxëyoje pacatoyaquinatsi mapabaxutoje. Pacatoyaquinatsi Dioso panejumecovënëtsivi, paTesalónica tomara-pijivimë. Panenajamatabëcueneocopatsivi baja vaxa Diosojavabelia, vajatuxanenë Jesucristojavabelia ata. <sup>2</sup>Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

### **Pacuenia Dioso naneconitsiaexanaena pibisiacuenë pexanaevi pamatacabi Cristo icatsia patsianica yabara pelivaisi**

<sup>3</sup>Tajamonae, panevajënaeyabelia bitso orijibia panajamatabëcueneocopataponame Diosojavabelia. Pacaenëmë canacujitsia namataenetsia panaasivamënua tsavanapae. Bajaraxuata daxitamatacabi paxamë yabara pajumaitsinë tsane Diosojavabelia: “Xanëpana rabaja. Pexaniacuenia yavenonaponame Tesalónica tomara-pijivi,” pajanë tsane. <sup>4</sup>Diosojavabelia pajamatabëcuenesaëmë tsaponae itsamonae pinijicuenia pacabijataeyabiabi ata, pacabejiobiaexanabiabi atanua. Bajaraxuata paxanë barëyaya pacavënëlivaisipaebaponatsi itsatomaranëjava, Dioso pejumecovënëtsivijava. <sup>5</sup>Bajarapacuenia pacabejiobiaexanabiabi ata, Diosojavabelia paneajamatabëcuenesaë tsaponaexae, nayapëtane Dioso papecajamatabëcueneyavenonaejavanexa pamatacabi naneconitsiaexanaena pijaneconi pexainaevi. Bajarapamat-acabi Dioso papecasivajamatabëcuenebarëyaxae, pacatocopatsiana panejonenexa Dioso pijanacuayabetsia Dioso papecaevetsinexa.

<sup>6</sup>Dioso baja cajena najamatabëcuenevereta pacuenia exanaejitsia. Nexata juya Dioso bejiobiaexanaena pamonaë pacabejiobiaexanapona maparuaeje. <sup>7</sup>Paxamë abaxë pacabejiobiaexanaponaena pacuenia paxanë ata panebejiobiaexanapona. Itsiata Dioso nacayavenonaena bajarapacuenivecua. Bajarapacuenia Dioso nacayavenonaena pamatacabi pepo petuxanenë Jesús icatsia patsianica piasaëängelevi yajava, pitarunutsicotia ata yajava. <sup>8</sup>Jesús jane baja patsianica penaneconitsiaexanaenexa pamonaë apo yapëtae Dioso. Pamonaë ata apo jumecovënëtsi pepo petuxanenë Jesucristo pelivaisi, Jesús naneconitsiaexanaena. <sup>9</sup>Bajarapamonae pijaneconi yabara Jesús naneconitsiaexanaenatsi daxitamatacabi-javabelianexa. Dioso pitabaravecua tajë xuabianatsi. Bajarapamonae Dioso pijapenivenivenaëcotia apo tae tsane caeto ata. <sup>10</sup>Pamatacabi vajatuxanenë icatsia patsianica, pinijicuenia pijajivi yaiyataenatsi. Pinijicuenia sivajamatabëcuene nabenajacaenatsi daxita Jesús pejumecovënëtsivitsi. Bajarapacuenia tocopiapatsianatsi pamatacabi patsianica vajatuxanenë. Paxamë ata Jesús pijajivi payajavamë tsane patanejumecovënëtsixaëmë patacatsipaebilivaisi.

<sup>11</sup>Bajaraxuata pacatovajëtabiabatsi Diosojavabelia. Pacatovajëtabiabatsi vajaDiosojavabelia papecajamatabëcuene xaniavaetsinexa. Pacuenia bejamatabëcueneitsi Dioso pijajivi, bajara panejamatabëcueneitsinexa.

Pacatovajëtabiabsinua Diosojavelia pecaëjëpaejamatabëcuenetatsi papecajamatabëcueneyavenonaenexa, paneexanaenexa daxita pacuenia pajamatabëexanaponame. Pacatovajëtabiabsinua Diosojavelia papecajavenonaponaenexa daxita pacuene paexaname Jesucristo papijajivixaemë. <sup>12</sup>Nexata paxamë xaniavaetsia panejnavanapaejamatabëcueneta, vajatuxanenë Jesucristo daxitajivi yaiyataenatsi. Paxamë ata juya Dioso pacayiyataeyaexanaena daxitajivi. Bajarapacuenia pacayiyataeyaexanaena papecaitaxutotsoniataexae vajaDioso, vajatuxanenë Jesucristo ata.

### Pibisiacuene bitso pexanabiabinë yabara pelivaisi

**2** Tajamonae, pacatsipaebatsi baja cajena paneypëtaenexa pacuenia vajatuxanenë Jesucristo patsijitsiatsica. Pacatsipaebatsinua baja cajena pacuenia ata nacacaetuatsijitsia bajaraponëjavavelia pamatacabi patsianica. <sup>2</sup>Nexata pajivi najumetsënëtsiaya pacajumai tsane: “Espíritu Santo raja neypëtaeyaexana. Jesucristo rabaja patsica,” pacajai tsane, pëtsa pajumecovënëtame. Pajivi pijinia najumetsënëtsiaya pacajumai tsane: “Pepacuene rabaja Jesucristo patsica,” pacajai tsane, pëtsa pajumecovënëtame. Pajivi pijinia najumetsënëtsiaya pacajumai tsane: “Pabloana raja nacatoyaquina: ‘Jesucristo rabaja patsica,’ jai raja vajanacatoyaquinaebaxutota,” pacajai tsane, pëtsa pajumecovënëtame. Itsamonae najumetsënëtsia itsa pacatsipaeba Jesús pepatsijavatsica yabara, pëtsa panajamatabëcuenepatajërërëcame panejumecovënëtavanapae livaisivecua. Pëtsa pajamatabëcuenenabenajacamenua. <sup>3</sup>Pëtsa pajumecovënëtame pematatsënëa itsalivaisicuenia itsa pacatsipaeba Jesucristo pepatsijavatsica yabara. Jesucristo raja abaxë apo patsitsica tsane. Peneta raja itsa baja imoxoyo pevajënae tsane Jesucristo pepatsinexatsica, jivi ayaibitsaëtonë Dioso pejumelivaisi pejumecovënëtsijava copabiana. Bajara pijinia pamatacabi patsiana ponë bitso pibisiacuene pexanabiabinënexa. Bajaraponë itsamatacabi Dioso xuabiana isotuavelia, bitso bejiobiaya peponaponaenexa daxitamatacabijavabelianexa. <sup>4</sup>Bajaraponë cueneitoya tsane Dioso pijacuene. Pamonaeta vajëcabiaba bedioso petaevijavelia, itavetsiana pevajëcabiabianiva. Dioso pijatemplobota ata belia ecaena bediosonë jivi petaenexatsi. Bajaraponë jumai tsane: “Xanë rajane baja dionsonë,” jai tsane. Bajarapacuenia jivi ayaibitsaëto bajaraponë yamaxëitojorobiana.

<sup>5</sup>Pamatacabi abaxë paxamëjavata naponaponajë, tajëvelia baja cajena pacatsipaebabiabatsi bajarapalivaisi. ¿Panacofënëtame tsabaja bajarapalivaisi? <sup>6</sup>Payapëtaneme baja cajena pacuenia abaxë Dioso yacaranata pibisiacuene bitso pexanabiabinënexa pepatsianiva. Dioso petocaëjëtsimatocabita bajaraponë patsiana. <sup>7</sup>Mapamatacabita ataje jivi pibisiacuene pexanaejava navitapona pevajënaeyavelia. Itsiata abaxë apo patsi ponë bitso pibisiacuene pexanabiabinënexa. Matapania pamatacabi Dioso copatsiana pecaranatsijava bajaraponë pepatsianiva, patsiana jane baja pibisiacuene bitso pexanabiabinexa. <sup>8</sup>Bajarapamatacabi bajaraponë patsiana bitso pibisiacuene pexanabiabinexa. Nexata pepo petuxanenë Jesús pijumalisaëta bajaraponëmi beyaxuabiana. Pamatacabi Jesús patsianica, bajaraponëmi Jesús vereverecaeyaexanaena pijapenivenivenaecotiata. <sup>9</sup>Bajaraponë patsiana dovathi pejamatabëcueneta pibisiacuene bitso pexanabiabinexa. Nexata bajaraponë dovathi pesaëta pinijicuene pexanaejava exanaponaena jivi peyamaxëitojorobinexa, beayajamatabëcuenenë petaenexatsi. <sup>10</sup>Bajaraponë exanaena daxita xua pibisiacuene,



jivi peyamaxëitorobinexa. Nexata bajaraponë pejamatabëcueneta Diosovecua jivi naxuabiana. Jivi Diosovecua naxuabiana tsipaji apo jitsipae pejumecovënëtsinexa pexaniajailivaisi pecapanepaelivaisinexatsi Diosojavabelia. <sup>11</sup> Bajaraxuata Dioso tocopatsiana bajaraponë penajumetsënëtsilivaisi petsipaebinxatsi peyamaxëitorobinexatsi. Nexata bajarapamonae jumecovënëtsiana ëpenajumetsënëtsilivaisi. <sup>12</sup> Bajaraxuata nexata daxita bajarapamonae Dioso naneconitsiaexanaenatsi. Tsipaji apo jumecovënëtsi tsane pexaniajailivaisi. Caranata saya sivabarëya tsabiabi tsane ëpibisiacuene pexanaejava.

### **Pacuenia Dioso pijajivi itapeta pecapanepaenexa yabara pelivaisi**

<sup>13</sup> Tajamonae Dioso papecaasivavi, pepo bajayata abaxë itsa apo panaexanaemë, vajatuxanenë baja cajena tajëvelia pacaitapeta papecacapanepanexa. Dioso baja cajena pacapanepaena. Espiritu Santo pesaëta pacajamatabëcuenexaniavaetsiana panejumecovënëtsixae pexaniajailivaisi, Jesús pelivaisi. Bajaraxuata paxamë yabara pajumaitsinë tsabiabi Diosojavabelia: “Xanepana rabaja. Pexaniacuene exaname. Tsipaji tajëvelia itapetame Tesalónica tomarapijivi pecajumecovënëtsinexa. Nexata baja cajumecovënëta,” pajanë tsabiabi. <sup>14</sup> Dioso paneitoroba patacatsipaebinxata pexanialivaisi papecacapanepaelivaisinexa Diosojavabelia. Nexata baja pajumecovënëtamë bajarapalivaisi. Bajarapacuenia Dioso pacajunata panepatsinexa vajatuxanenë Jesucristojavabetsia, papecayjavaponaponanexa.

<sup>15</sup> Tajamonae, bajaraxuata panevajënaeyabelia pacaasaëmëre tsavanapae panejumecovënëtsijava Dioso. Pajumecovënëttavanapare patacatsipaebilivaisi. Palivaisi ata patacatoyaquinatsi panejumecovënëtsinexa, pëtsa panacofënëtamë. <sup>16</sup> Vajatuxanenë Jesucristo, vaxa Dioso ata, nacaasiva. Bajaraponëbeje nacaitaxutotsoniatane. Bajaraxuata nacajamatabëcueneasaëyaexanapona daxitamatacabijavabelianexa. Nacatocopatanua vajacopiaevetavanapaenexa pepo petuxanenë Jesucristo icatsia pepatsijavanexatsica. <sup>17</sup> Nexata pacatovajëtatsi vajatuxanenë Jesucristojavabelia, vaxa Diosojavabelia ata, papecajamatabëcuene asaëyaexanaenexa. Pacatovajëtatsinua jivi panetsipaebinxata pexanialivaisi. Pacatovajëtatsinua paneexanaenexa daxita xua pexaniacuene.

### **Pacuenia Pablo toyaquina Dioso pejumecovënëtsivi:**

#### **“Panetovajëre Diosojavabelia,” pejailivaisi yabara pelivaisi**

**3** Tajamonae, pecopiaruacelivaisi rabaja maje pacatoyaquinatsije. Panetovajëre Diosojavabelia Dioso pejumelivaisi bepijia peyacaëjëpaenexa daxitanacujava. Patovajërenua daxitajivi pejumecovënëtsinexa Dioso pejumelivaisi pacuenia baja paxamë pajumecovënëtamë bajarapalivaisi. Patovajërenua daxitajivi peyayataenexa Dioso pejumelivaisi. <sup>2</sup> Panetovajërenua Dioso patanevetsinexa pibisiamatabëcuenevivecua. Bajarapacuenia panetovajëre tsipaji raja daxitajivi Dioso apo jumecovënëtsi. <sup>3</sup> Itsiata baitsi jane vajatuxanenë nacayavenonabiaba. Bajaraponë pacajamatabëcueneasaëyaexanaena. Pacaevetsiananua dovathivecua. <sup>4</sup> Paxamë yabara baja cajena pajamatabëjumaitsinë: “Bajarapamonae vajatuxanenë yavenonaenatsi. Nexata xaniavaetsia exanavanapaena daxita pacuenia itorobatsi. Pevajënaeyabelia xaniavaetsia exanavanapaena pacuenia itorobatsi,” pajamatabëjanë baja cajena paxamë yabara. <sup>5</sup> Diosojavabelia pacatovajëtatsi xaniavaetsia paneyapëtaenexa Dioso papecaasivajava. Pacatovajëtatsinua panevajë-

naeyabelia paneajamatabëcuenesaë tsavanapaenexa Cristo papecajamatabëcuene yavenonabiabinexa.

### **Pacuenia daxitajivi benacueneba penaevetsinexa yabara pelivaisi**

<sup>6</sup>Tajamonae, vajatuxanenë Jesucristo pejamatabëcueneta pacaitorobatsi. Dioso pejumecovënëtsivi ata itsa piafaetabivi, bajarapamonae panavecuatsare. Bajarapamonae apo nacuenebabiabi penaevetsinexa pacuenia picani paitorobajë. <sup>7</sup>Payapëtaneme rabaja pacuenia paxanë paexanavanapajë pamatacabi panajinavanapajë paxamëjavata. Nexata pacuenia pacatsitajinavanapatsi, bajarapacuenia bepajinavanapame. Pamatacabi abaxë panajinavanapajë paxamëjavata, apo pafaetabinë tsavanapae. <sup>8</sup>Amoneya baja cajena itsajivi ata apo pavecuaxaenë itsacueneyavayo ata. Biji rajane panatonacuenebabiabajë pinijicuenia. Matacabita, meravi ata, panatonacuenebabiabajë patanaevetsinexa. Bajarapacuenia panatonacuenebabiabajë itsajivi ata paxamëyajuvënëvi petoayapëbejeyanivatsi patanevetsijava patanajinavanapaejavata. <sup>9</sup>Paxamëjavata pexanialivaisi patacatsipaebavanapaexae, vajatuxanenë picani panetocopata patacavajëtsinexa xua panamatavenonajë patanerajutsinexamë. Itsiata baitsi jane apo pacavajëtsitsi. Pacatsitanacuenebabiabatsi baja cajena. Bajarapacuenia paxamë ata panatonacuenebabiabare panenaevetsinexa. <sup>10</sup>Pamatacabi abaxë panajinavanapajë paxamëjavata, pacajumaitsitsi baja cajena: “Pajivi afaetabi, pëtsa naxane,” pacajaitsi baja cajena. <sup>11</sup>Pavënëlivaisitaniji pacuenia itsamonae paxamëyajuvënëvi saya jinavanapa nacuenebinejeva. Bajarapamonae pina bitso jamatabëitonotabiaba itsamonae. <sup>12</sup>Bajarapamonaejavabelia pajumaitsimë tsane: “Pablo raja vajatuxanenë Jesucristo pejamatabëcueneta jumaitsi: ‘Panacuenebianame pina panenaevetsinexa,’ jai raja Pablo,” pajamë tsane.

<sup>13</sup>Tajamonae, pëtsa pajamatabëcuenecueraname pexaniacuene paneexanavana-paejava. <sup>14</sup>Pajivi apo nacuenebi tsane penaevetsinexa, apo jumecovënëtsinua tsane palivaisi pacatoyaquinatsi mapabaxutotaje, bajarapajivi panavecuatsare. Pëtsa payajavajinavanapame. Nexata aura tsane apo penacuenebijava yabara. <sup>15</sup>Itsiata baitsi jane bajarapajivi bepanijavajabitsaëjivi pëtsa pataneme. Dioso panenajua-jumecovënëtsivixae, pexaniajamatabëcuenia pamuxujiobianame.

### **Pacuenia Pablo toyaquina peveretsinexa baja petoyaquinaelivaisi mapabaxutotaje yabara pelivaisi**

<sup>16</sup>Vajatuxanenë vajanacajamatabëcuene xanepanaeyaexanaenë. Pacatovajëtatsi bajaraponëjavabelia daxitamatacabi papecajamatabëcuene xanepanaeyaexanaenexa, itsamonae pacaitsacueniababiabi ata. Pacatovajëtatsi vajatuxanenë papecajavaponaponabiabinexa.

<sup>17</sup>Xanë Pablonë, tacobeta pacatoyaquinatsi mapalivaisiyoje patacajamatabëna-jinaexae. Paitanecuenia yaquinabiabajë daxita tayaquinaebaxutonëta, bajarapai-tanecuenia pacatoyaquinatsi mapalivaisiyoje paneyapëtaenexa xanë patacatoitorobicuene mapabaxutoje. <sup>18</sup>Pacatovajëtabiabatsi Diosojavabelia daxita paxamë vajatuxanenë Jesucristo papecajavavenonabiabinexa.

## Mapabaxutoje San Pablo copiaya toyaquina Timoteojavabelia

### Pacuenia Pablo mapabaxutoje toyaquina Timoteojavabelia yabara pelivaisi

**1** Xanë Pablonë, Jesucristo pijaapóstolenën. Dioso, ponë nacacapanepaejitsia, bajaraponë nitoroba pijacuenë tatonacuenëbinexa. Vajatuxanenë Jesucristo, ponë pejamatabëcueneta Dioso nacacapanepaejitsia, bajaraponë ata nitoroba pijacuenë tatonacuenëbinexa. <sup>2</sup>Timoteo, bepepo taxënatomë tacataenë, Jesucristo pelivaisi xamë ata nejumecovënëtsixae. Catoyaquinatsi mapabaxutoje. Catovajë-tatsi vaxa Diosojavabelia, vajatuxanenë Jesucristojavabelia ata, pecayavenonaenexabeje pecaasivaxaebeje. Catovajë-tatsinua bajaraponëbeje pecaitaxutotsoniataenexabeje pecajamatabëcuenë xanepanaeyaexanaenexabejenua.

### Pacuenia Pablo itoroba Timoteo pejumeitavetsinexa penajumetsënëtsilivaisi petsipaebaponaevi yabara pelivaisi

<sup>3</sup>Pamatacabi baja ponajë Macedonia nacuyabelia, capuenetatsi neponapon-aenexa Efeso tomarata. Nexata icatsia matavëjëa caitorobatsi tsiteca abaxë nepon-aponenexa bajarajota. Tsipaji itsamonae bajarajota tsipaebavanapa saicayacuenia Dioso pejumelivaisivecua. Palivaisi tsipaebavanapa bajarapamonae, apo pexaniajailivaisi cajena. Jumeitavetsianame bajarapamonae matavëjëa baja petsipaebaponaeyaniva bajarapalivaisi. <sup>4</sup>Itavetsianamenua bajarapamonae penajamatabëcainabiabiyanima saya jemalivaisixi, perujulivaisiximi. Itavetsianamenua pijasali-naivimi pevënëxi yabara ata penajamatabëcainabiabiyanima. Bajarapitsilivaisixi ajumematamobi baja cajena itsa nabarëcuaiquaijai tsaponae jivi. Bajarapalivaisixi apo nacajamatabëcueneyavenonae tsipae pacuenia Dioso nacaitoroba jumecovënëtsiaya vajatoexanaenexa.

<sup>5</sup>Bajarapacuenia caitorobatsi nejumetavetsinexa bajarapamonae pecopatsinexa bajarapalivaisi pecuaicuaijaitisabiabijava. Nexata juya pexanaenexa pacuenia Dioso jitsipa. Dioso cajena jitsipa jivi pejamatabëëthëtovetsina jamatabëcuenexanepanaeya namataenetsia penaasivatsavanapaajava. Dioso jitsipania jivi pejinavanapaenexa aneonijibia Dioso pitabarata. Dioso jitsipania jivi pejamatabëëthëtovetsina xaniavaetsia pejumecovënëtavanapaenexa Dioso pejumelivaisi. <sup>6</sup>Bajarapamonae pacuenia Dioso jitsipa apo pexanavanapaexae, Dioso pejitsipaejavami vecuanajamatabëcuenemuxufeta. Nexata jamatabëcuenenaxuaba natsiquejemalivaisixi pecuaicuaijaitisabiabinexa. <sup>7</sup>Bajarapamonae picani jamatabënaexana jivi livaisi petsipaebabiabivinxae. Palivaisi Dioso Moiséspijinëta najumecopata, bajarapalivaisi picani jivi asaëya jamatabëtsipaebapona. Itsiata baitsi jane bajarapamonae apo jumeyapëtae pajamatabëcuenelivaisi xaina bajarapalivaisi.

<sup>8</sup>Vaxaitsi baja cajena yapëtanetsi pexanepanaecuenë palivaisi Dioso Moiséspijinëta najumecopata. Bajarapalivaisi Dioso nacatocopata vajatsipaebinxae jivijavabelia, jivi peyapëtaenexa penaneconitsicuenë Diosojavabelia. <sup>9</sup>Pamonae pexaniacuenë exanavanapa, apo toyaquinabiabitsi pitavetsilivaisinexatsi. Biji rajane pamonae pibisiacuenë exanavanapa, toyaquinabiabatsi pitavetsilivaisinexatsi. Pamonae ata apo yayatae itsacuenëjavayo ata Dioso pijacuenë, toyaquinabiabatsi pitavetsilivaisinexatsi. Pamonae ata najamatabëcuenëbijiana Dioso pijacuenëve-

cua, toyaquinabiabatsi pitavetsilivaisinexatsi. Pamonaē ata jivibeŋi, paxa ata, pena ata, pebeyaxuabivi, toyaquinabiabatsi pitavetsilivaisinexatsi. <sup>10</sup> Pamonaē ata piŋajavi vecuanamatayajita itsavajavelia, toyaquinabiabatsi pitavetsilivaisinexatsi. Pamonaē ata peŋena pebiŋavelia pevitota pibisiacuene exana, toyaquinabiabatsi pitavetsilivaisinexatsi. Bajara piŋia pacuenia petiriavi ata. Pamonaē pamonaŋi vecuanamatayajita itsaŋjavavelia, toyaquinabiabatsi pitavetsilivaisinexatsi. Pamonaē ata peŋena petiriaviŋjavavelia pevitota pibisiacuene exana, toyaquinabiabatsi pitavetsilivaisinexatsi. Pamonaē ata jivi nacobetoxotsiaya pita, toyaquinabiabatsi pitavetsilivaisinexatsi. Pamonaē ata najumetsēnēta, toyaquinabiabatsi pitavetsilivaisinexatsi. Pamonaē ata itsamonaē yabara najumetsēnētsiaya baracuaicuaijai tsabiabi, toyaquinabiabatsi pitavetsilivaisinexatsi. Pamonaē ata apo jitsipae pexaniŋajilivaisi jivi petsipaebaponaenexa, toyaquinabiabatsi pitavetsilivaisinexatsi. <sup>11</sup> Bajarapalivaisicuenia xanē ata itavetaponajē itsa tsipaebaponaŋē palivaisi Dioso netocopata jivi tatsipaebaponaenexa. Bajarapalivaisi itsa tsipaebaponaŋē, tsipaebaponaŋē daxitajivi peŋapētaenexa pacuenia Dioso itaxutotsoniatanetsi pecapanepaenexatsi.

### **Pacuenia Pablo pexaniŋamatabēcuene rajuta Jesucristoŋjavavelia yabara pelivaisi**

<sup>12</sup> Pexaniŋamatabēcuene rajutajē vajatuxanenē Jesucristoŋjavavelia tanerajut-sixae pesaē tatonacuenebinexa. Jesucristo nesivanajamatabēxaina xaniavaetsia tatonacuenebinexa. Bajaraxuata pexaniŋamatabēcuene rajutajē. <sup>13</sup> Copiata abaxē itsa apo jumecovēnētsinē Jesucristo, pibisiacuenia picani baracuaicuaijanē tsabiabi Jesucristo. Piŋajivi ata tobarajinabiabajē tabejiobiaexanaenexa. Pibisiacuenia biŋataeyabiabajē Jesucristo piŋajivi. Bajarapacuenia taexanabiabinē ata, Dioso itsiata nebejiobiatane. Tsipaji ŋamatabēcuenenavēxaniabiaya bajarapacuenia exanabiabajē. Apo yapētaenē picani xua exanaponajē Jesucristoŋjavavelia. Tsipaji abaxē apo jumecovēnētsinē Jesucristo Dioso pexēnatocuene. <sup>14</sup> Nexata baja itsiata belia vajatuxanenē Jesucristo piŋicuenia neyavenona tanajamatabēcueneŋcopatsinexa bajaraponējavavelia. Bajaraxuacujinae piŋajivitonēxanē, neyavenona tasivanexa itsamonaē ata.

<sup>15</sup> Mapalivaisije pacatsipaebijitsiatsi. Bajarapalivaisi pexaniŋajilivaisi cajena. Nexata daxitajivi xaniavaetsia bejumecovēnēta mapalivaisije. Jesucristo baja cajena pat-sica mapanacuayabetsicaje pibisiacuene pexanaevimi pecapanepaenexa Diosoŋjavavelia. Xanē ata picani bitso pibisiacuene taexanaenēmi daxitajivi matatoxenetsia. <sup>16</sup> Xanē itsiata bajara taitsinēmi ata, Dioso itsiata nebejiobiatane. Bajarapacuenia Dioso nebejiobiatane daxitajivi peŋapētaenexa Jesucristo bajayajebi tanesivaŋamatabēcuenesaējaya tajumecovēnētsinexa, pibisiacuene taexanaenēmi ata. Nexata pamonaē beŋajavavelia ata Jesucristoŋjavavelia najamatabēcueneŋcopataponaeŋa, xainaena matacabi apo pevereveceajava. Bajarapamonaē nesivaŋamatabēcuenesaē tsane itsa nevēnēlivaisitaena Jesús taneitapetsiŋajava piŋajivitonēxanē, pibisiacuene bitso taexanabiabinēmi ata. <sup>17</sup> Bajaraxuata vaxaitsi pepo Dioso, daxitacuene peŋapētaenējavavelia, jumaitsi tsabiabi: “Xamē Diosomē bitso ayaiŋamatabēcueneŋemē. Bitso ayacuene nexanaenē,” jaitsi tsabiabi. Bajaraponē Dioso daxitacuene peŋapētaenē. Pepo pevetsinēnua daxitacuene. Apo petēpaenēxanua daxitamatacabiŋjavavelianexa. Apo petāenētsinua itsajivi ata.

<sup>18</sup>Timoteo, betaxënatomë tacataenë. Pacuenia caitorobatsi, exanaename. Bajayata baja cajena itsamonae Dioso pejumecovënëtsivi Dioso pejamatabëcueneta tajëvelia cavajunupaeba pacuenia exanaejitsiamë. Bajarapacuenia Dioso asaëy-ata tocanacuenebaponare mapalivaisije. Nexata bajarapacuenia Dioso pitorobilivaisi daxitajivi yapëtaena. Catoayapëbeje ata dovathi pecajamatabëcuenejëtsixae, ajamatabëcuenesaëmëre Diosojavabelia nenajamatabëcuenecopatsijava. Exanabiabare xua yapëtaneme pexaniajaicuene nenajamatabëcuenebijianaeyaniva Diosovecua. <sup>19</sup>Itsamonae baja yapëtae ata pacuenia Dioso itorobatsi, itsiata pibisiacuene exana. Nexata bajarapamonae Diosovecua naxuabiana pecopabixae Cristo pejumecovënëtsijavami. <sup>20</sup>Bajarapamonaeajuvënënëbeje Himeneobeje Alejandrobeje. Pibisiacuena Dioso baracuaicuajaiibeje tsabiabi. Nexata pecopatsinexabeje Dioso pebaracuaicuajaijavabeje, bajaraponëbeje copatajë dovathijavabelia. Nexata bexëa itsa najamatabëxainabeje pexanialivaisi, xaniavaetsia jane baja Dioso pejumecovënëtsinexabeje.

### **Pacuenia Dioso pejumecovënëtsivi daxitajivi betovajëta Diosojavabelia yabara pelivaisi**

**2** Timoteo, copiaya caitorobatsi mapacueniaje. Caitorobatsi panetovajëtabiabinexa daxitajivi Diosojavabelia. Daxitajivi Diosojavabelia patovajëtabiabinaname pitaxutotsoniataenexatsi Dioso. Itsa baja Dioso itaxutotsoniataenatsi bajarapamonae, nexata pexaniajamatabëcuene parajutsianame Diosojavabelia bajarapamonae yabara. <sup>2</sup>Patovajëtsianamenua Diosojavabelia presidentevi ata. Patovajëtsianamenua daxita gobierno pijalivaisi pevetsivi ata. Bajarapacuenia patovajëtsianame bajarapamonae Dioso peyavenonaenexatsi. Nexata xaniavaetsia jinavana-paenatsi avajabitsaëjibia. Nexata xaniavaetsia Dioso jumecovënëtavanapaenatsi. Nexata exanavanapaenatsi ëpexaniacuene. <sup>3</sup>Bajarapacuenia Diosojavabelia daxita bajarapamonae vajatovajëtsijava, xanepana Dioso, ponë nacacapanepaejitsia, vajanacasivabarëyanexa. <sup>4</sup>Bajarapacuenia daxitajivi vajatovajëtsijava Dioso jitsipa. Tspijaji Dioso jitsipa daxitajivi pecapanepaenexa bajaraponëjavabelia. Dioso tojitsipanua daxitajivi peyapëtaenexa pexaniajailivaisi, Jesucristo pelivaisi. <sup>5</sup>Nexata daxitajivi itsa yapëtaena pexaniajailivaisi, Jesucristo pelivaisi, yapëtaenana pacuenia caenë Dioso daxitajivi capanepaejitsia. Yapëtaenana pacuenia pijinia caenë Jesucristo daxitajivi petocuaicuajainënexa Diosojavabelia. <sup>6</sup>Jesucristo rabaja nacopata pebeyaxuabinexatsi. Nexata Jesucristo petëpaejavata, daxitajivi pijaneconimi matamota. Bajarapacuenia daxitajivi peyapëtaenexa, Dioso pecaëjëtsimatacabita pijajivi itoroba daxitanacuanëjava pexaniajailivaisi jivi petsipaebinexa. Tspijaji baja cajena Dioso jitsipa daxitajivi pecapanepaenexa. <sup>7</sup>Bajarapalivaisi jivi tatsipaebinexa Dioso nitoroba. Dioso nitoroba bajarapalivaisi tatsipaebinexa pamona apo judiövi ata penajamatabëcuenecopatsinexa Diosojavabelia. Nexata pexaniajailivaisi jivi tatsipaebinexa, itsa canavajunupaebatsi, xaniajanë cajena. Cristo tajumecovënëtsinëxæ, pexaniajailivaisi jivi tsipaebaponajë. Apo najumetsënëtsinë cajena.

<sup>8</sup>Bajaraxuata daxitanacuanëjava pebijivi, pamona baja Dioso pitabarata aneconi-jibi, itsa vajëta Diosojavabelia, jitsipajë nacobeyotsiaya pevajëtsijava Diosojavabelia. Bajarapamonae bevajëta Diosojavabelia anaepanaejeva itsajiviyojavabelia, jumeanaenotsinejevanua itsajiviyojavabelia. <sup>9</sup>Jitsipajë pijinia petirivi penaxatabinexa xanepanaeya. Pëtsa bitso naitabëtsiaya naxataba. Itsa nax-

aniavaeta, bitso pëtsa namataitabëta pexaniacuena. Pëtsa bitso naitabëta oronanitota pexanaejavanëta. Pëtsa naitabëta penamatamotsiviriaibotoxita ata. Pëtsa naitabëtsiaya naxataba bitso penamatamotsinavanë ata. <sup>10</sup>Petiriavi, pamonae baja xaniavaetsia najamatabëcuenecopata Diosojavabelia, pëtsa naitabëta bitso. Bajarapamonae Dioso pitabarata pexaniacuene betoexanabiaba itsamonaejavabelia penajamatabëcueneitabëtsinexa bëpënëajavaverena. <sup>11</sup>Dioso pejumecovënëtsivi itsa nacaetuata Dioso pejumelivaisi penamuxunaevetsinexa, petiriavi beveliajamatabëcuenevi nataeya ajumejibia benamuxunaevetena pejumecovënëtsinexa palivaisi tsipaebatsi. <sup>12</sup>Petiriavi apo tocopatsinë pemuxujiobinexa pebijivi. Apo tocopatsinëna petiriavi beayaijamatabëcuenevi nataeya pitorobabiabinexa pebijivi. Biji rajane petiriavi beveliajamatabëcuenevi nataeya ajumejibia benamuxunaevetena. <sup>13</sup>Bajarapacuenia itorobajë tsipaji copiaya Dioso exana pebi. Bajaraponë pevënë Adán. Bajaraxuacujinae cotocaevi Dioso exana petiriva. Bajarapova pevënë Eva. <sup>14</sup>Adán cajena picani dovathi apo yamaxëitojorobitsi. Biji rajane copiaya petiriva dovathi yamaxëitojorobatsi. Nexata petiriva copiaya pibisiacuene exana. <sup>15</sup>Bajaraxuata daxita petiriavi Dioso tocopatatsi pevixaeitonotsinexatsi penacueto itsa vecuanaexantsi. Itsiata baitsi jane bajarapamonae capanepaenatsi Diosojavabelia itsa casaë tsane penajamatabëcuenecopatsijava Diosojavabelia. Capanepaenatsi Diosojavabelia daxitajivi ata asivaya itsa taena, Dioso ata asivaya itsa taena. Capanepaenatsi Diosojavabelia xaniavaetsia itsa jinavanapanua pacuenia Dioso tojtsipatsi.

### Pacuenia ancianovinexa bejamatabëcueneitsi yabara pelivaisi

**3** Pexaniaajailivaisi cajena maje. Ponë jitsipa pitapetsinexatsi ancianonënexa, Dioso pejumecovënëtsivi pevetsinënexa, bajaraponë pexaniacuene, Dioso pijacuene, jamatabëtonacueneba. <sup>2</sup>Ancianonënexa, xanepana ponë apo xainae itsacueneneconi ata, paneconi yabara itsamonae neconitsijitsiatsi. Caevayo pepitsinë. Penajamatabëcuenereviabinë. Xaniavaetsia penajamatabëxainaenë. Peyaiyataenëtsi. Xaniavaetsia pecopiapitabiabinë pijaboyaberena pesivaxainaevitsi. Pecaëjëpaenëtsi xaniavaetsia jivi Dioso pejumelivaisi petsipaebinexa. <sup>3</sup>Ancianonënexa, xanepana ponë apo piapaenë piatajibinexa. Pevëna pebi apo pebenë. Apo pejitsipaenë itsajivi ata yamaxëitojorobiaya palata pevecuanacobetoxotsinexa. Biji rajane ancianonënexa xanepana ponë pexaniajamatabëcuenenë. Anaeya itsajivi ata apo pejumepitsinë pebarënajumeanaenotsinexa. Bitso pexainaenexa ata pexainaejava, apo penajamatabëxainaenë. <sup>4</sup>Ancianonënexa, xanepana ponë xaniavaetsia eveta pexi, pijava yajava. Pexi pejumecovënëtsinëtsi. Pejumeyaiyataenëtsinua. <sup>5</sup>Ponë apo caëjëpaetsi xaniavaetsia pexi pevetsinexa, pijava yajava, nexata bajaraponë apo caëjëpae tsipaetsi pevetsinexa Dioso pejumecovënëtsivi. <sup>6</sup>Apo xanepanae tsipae ancianonënexa ponë abaxë ajena jumecovënëta Dioso. Beayaijamatabëcuenenë itajara nataejitsipa bajaraponë. Nexata epatua Diosovecua jopaejitsipa. Bajarapacuenia bajayata dovathi penajamatabëxainaenë, Dioso vecuajopaica. Nexata dovathi daxitamatacabijavabelianexa naneconita Diosojavabelia. <sup>7</sup>Ancianonënexa, xanepana ponë peyaiyataenëtsi pamonae Dioso apo pejumecovënëtsivi ata. Bajarapitsinë xanepana ancianonënexa ancianonë pexanaecujinaetsi jivi pequenetsiataeyanivatsi, dovathi ata peyamaxëitojorobiyativatsi.

### **Pacuenia diáconovinexa bejamatabëcueneitsi yabara pelivaisi**

<sup>8</sup>Diáconovinexa pijinia, xanepana pamonaē penajamatabëcuenerēviabivi. Itaxutojema apo pecuaicuaijaivi. Apo piapaēvi piatajibinexa. Apo pejitsipaēvi itsajivi ata yamaxëitojorobiaya palata pevecuanacobetoxotsinexa. <sup>9</sup>Diáconovinexa, xanepana pamonaē xaniavaetsia najamatabëcueneocopata Cristojavabelia. Pejamatabëëthëtota peyapëtaēvi pexaniajaicuene palivaisi jumecovënëta. <sup>10</sup>Pamonaē diáconovinexa, copiaya bitorobatsi itsacuenejavayo pevetsinexa bajarapacuenia pejamatabëcueneëjëtšinxatsi. Nexata xaniavaetsia itsa eveta xua evetsiaexanatsi, diáconovi jane baja bexanatsi. Nexata jane baja bitorobatsi penacuenebinexa xua diáconovi banacueneba. <sup>11</sup>Diáconovi pijinia pijavajivi xanepana penajamatabëcuenerēviabinexa, apo bebaracuacuaijai itsamonaē. Xaniavaetsia benajamatabëxaina. Nexata xaniavaetsia bexanabiaba pacuenia itorobatsi. <sup>12</sup>Diácononënexa, xanepana ponë caeva pepitsinë. Pecaëjëpaenëtsinua xaniavaetsia pevetsinexa pexi, pijava yajava. <sup>13</sup>Diáconovi xaniavaetsia itsa eveta penacuenebijava, nexata diáconovi xaniavaetsia yaiyataenatsi daxitajivi. Ajumeurajibianua jivi javabelia navajunupaebiana Jesucristojavabelia penajamatabëcueneocopatsijava.

### **Pacuenia Timoteo toyaquinatsi peyapëtaenexa pacuenia exanaponaponaejitsia Dioso pejumecovënëtsivi tuatuajëta yabara pelivaisi**

<sup>14</sup>Timoteo, bepijia picani jamatabëponajë xamëjavabelia tacataenexa. Itsiata tavajënaeyabelia catoyaquinatsi mapacuene yabaraje. <sup>15</sup>Nexata abaxë itsa cuenena-jematsianajë tapatsijava xamëjavabelia, neyapëtaenexa pacuenia exanaponaponaejitsiamë Dioso pejumecovënëtsivi tuatuajëta. Pamonaē baja Dioso pejumecovënëtsivi, Dioso rabaja piasaënë pijajivi. Bajarapamonaē Dioso pejumelivaisi, pexaniajailivaisi, xaniavaetsia baja jumecovënëtavanapa. Daxita nacuanëpijivi ata pejumecovënëtsinexa bajarapalivaisi. Bajarapamonaē pexaniajailivaisi itsamonaējavabelia tsipaebapona. Bajarapamonaē apo tocopatsinua itsajivi ata pexaniajailivaisivecua saicayalivaisi pejumecovënëtsiyaniva. <sup>16</sup>Pepo pexaniajailivaisi cajena Cristo pelivaisi. Bajaraponë baja vaxaitsi jumecovënëtavanapatsi. Itsiata baitsi jane itsamonaē apo jamatabëcueneypëtaē bajaraponë. Bajaraponë Cristo ayaijamatabëcuenenë bitso:

Bajaraponë Cristo mapanacuata naexana bevaxaitsi jivitonëcuena. Espiritu Santo pejamatabëcueneta daxitajivi yapëtaēyaexanatsi Cristo planeconijibinëcuene. Angelevi ata Cristo tanetsi. Cristo pijajivi vënëlivaisipaebaponatsi daxitanacuanëpijivijava. Nexata daxitanacuanëpijivi najamatabëcueneocopabapona Cristojavabelia. Dioso pijanacuatsia ata Cristo copiapitatsi.

### **Dioso pejumelivaisi pejumecovënëtsijava pecopabivi yabara pelivaisi**

**4** Espiritu Santo baja cajena tajëvelia nacayapëtaēyaexana pacuenia bexëjavabelia itsamonaē copabijitsia Dioso pejumelivaisi pejumecovënëtsijavami. Bajarapamonaē nexata jumecovënëtsiana penajumetsënëtsilivaisi petsipaebaponaevitsi. Nexata bajarapamonaē asaëya jumecovënëtaponaeana itsamonaē dovathi pejamatabëcueneta petsipaebilivaisitsi. <sup>2</sup>Bajarapamonaē namuxunaevetsiana penajumetsënëtsilivaisi petsipaebaponaevitsi, betsitapexaniajamatabëcuenevitsi itajara tsane, pibisiajamatabëcuenevi ata. Bajarapamonaē tsipaebaponaena pena-

jumetsënëtsilivaisi. Apo acueneura cajena tsane. <sup>3</sup>Bajarapamonae itavetsiana penacasabicuene. Bajarapamonae itavetsiananua itsacuenejavanë jivi pexaeyaniva. Dioso cajena daxitacuene pexaejava exanae ata, jivi pexaeyaniva apo itavetsi. Bajaraxuata Dioso pejumecovënëtsivi, pexaniajailivaisi peyapëtaevi, jumai tsabiabi pexaejava yabara: “Xanepana rabaja,” jai tsabiabi Diosojavabelia pexaejava pexaevajënae. <sup>4</sup>Daxitacuene, xua Dioso exana vajaxaejavanexa, pexaniacuene bitso. Nexata apo biatsobitsi itsacuenejavayo ata Dioso pexanaejava. Biji rajane itsa pitatsi Dioso pexanaejava, “Xanepana rabaja,” bejai tsabiabitsi Diosojavabelia vajanacarajutsixae vajaxaejavanexa. <sup>5</sup>Bajarapacuenia Dioso pejumelivaisibaxutota pejumaitsixae, xanepana daxitacuene vajaxaenexa. Pexaniajamatabëcuene rajutatsi Diosojavabelia vajaxaejavanexa vajanacarajutsixae. Bajaraxuata Dioso nacatoxanepanaeyaexana vajaxaejavanexa.

**Pacuenia Timoteo itorobatsi xaniavaetsia peponaponaenexa, xaniavaetsia petsipaebinxanua Dioso pejumelivaisi, yabara pelivaisi**

<sup>6</sup>Itsa tsipaebianame pexaniajailivaisi Dioso pejumecovënëtsivijavabelia, penajumetsënëtsilivaisi petsipaebaponaevi pejumecovënëtsiyaniva, nexata xaniavaetsia Jesucristo netonacuenebinë tsane. Nijamatabëcuenesaënexa nevajënaeyabelia, asaëya jumecovënëtaponaponare palivaisi baja jumecovënëtavanapatsi. Pexaniajailivaisi, Dioso pejumelivaisi, palivaisi itsamonae catsipaeba, tsiteca asaëya jumecovënëtaponaponare. <sup>7</sup>Itsiata baitsi jane pëtsa jumecovënëtame mapanacuapijilivaisianëje, saya natsiquejemalivaisianë. Daxita nesaëta nacujaubare xaniavaetsia neponaponaenexa Dioso pejitsipaecuenia. <sup>8</sup>Vajajumalixanepanaenexa, xanepana picani vajaperabësaëta vajacujinaejinaejava. Itsiata baitsi jane daxitacuenevecua xanepana bitso vajajinavanapaenexa pacuenia Dioso nacatojitsipa. Bajarapacuenie nacatoxanepana tsipaji vajatëpacujinae ata Dioso nacajamatabëcuene yavenonaena xaniavaetsia vajajinavanapaenexa. <sup>9</sup>Bajarapalivaisi pexaniajailivaisi cajena. Nexata daxitajivi xaniavaetsia bejumecovënëta bajarapalivaisi. <sup>10</sup>Bajaraxuata Dioso tonacuenebaponaponatsibeje. Casaëtsibeje tsaponaponae Dioso vajatonacuenebaponaponaevajabeje, itsamonae pibisiacuenia nacabijataeyabiabi atabeje. Bajarapacuenia exanatsibeje tsipaji najamatabëcuene copatatsibeje piasaënë Diosojavabelia. Bajaraponë Dioso daxitajivi pecapanepaenë pijaneconivecua. Dioso capanepaena daxita pamonaenajamatabëcuene copata bajaraponëjavabelia.

<sup>11</sup>Bajarapalivaisi tsipaebaponare. Itorobaponarenuu bajarapacuenia pexanaenexa. <sup>12</sup>Pëtsa nacopatame pevëjëatoxaemë itsajivi ata pecaquenetsiataenexa. Biji rajane Dioso pejumecovënëtsivijava, xaniavaetsia tsitaponaponare. Cuaicuaijamëre xaniavaetsia. Livaisi ata itsa tsipaebame, tsipaebare xaniavaetsia. Ponaponare xaniavaetsia. Asivamëre daxitajivi. Najamatabëcopare xaniavaetsia Diosojavabelia pecayavenonaenexa daxitacuene yabara. Ëpexaniacuene yabara najamatabëxainare. Bajarapacuenia itsa tsitaexanaponaponaename, nexata Dioso pejumecovënëtsivi cacuenejëpaeyajinavanapaena. <sup>13</sup>Tavajënaelia bajarapacuenia exanaponaponare. Jivi penacaetuatsijavata, Dioso pejumelivaisibaxuto tsimuxulebabiabare. Tsipaebaponarenuu pacuenia jumaitsi Dioso pejumelivaisibaxutota bajarapamonae pijamatabëcuenesaënexa Diosojavabelia. <sup>14</sup>Dioso baja cajena carajuta pecacajëjëpajamatabëcuene xaniavaetsia jivi livaisi netsipaebinexa,



pecacaējēpaenexanua xaniavaetsia nevetsinexa Dioso pejumecovēnētsivi. Bajaraxua xaniavaetsia najamatabēcueneevetaponaponare. Pamatacabi ancianovi nacaetuata, catsimatanacobebuatsiaya catovajēta Diosojavabelia. Nexata bajarajota Dioso carajuta pecacaējēpaejamatabēcuene.

<sup>15</sup>Daxita nesaēta evetaponaponare daxita pacuenia caitorobatsi nexanaenexa. Nexata daxitajivi cayapētaena xaniavaetsia tanejumecovēnētaponaponaejavamē pacuenia caitorobatsi. <sup>16</sup>Pibisiacuene nayajivitaeya ponaponare. Palivaisi ata tsipaebaponame, xaniavaetsia tsipaebaponare. Saicayacuenia pētsa bajarapalivaisivecua tsipaebaponame. Bajarapacuenia nexanaejava casaēmēre tsaponaponae. Nexata Dioso cacapanepaena. Pamonaē ata cajumecovēnēta netsipaebilivaisi, Dioso capanepaenatsi.

### **Pacuenia Timoteo itorobatsi penaponaponaenexa Dioso pejumecovēnētsivijava yabara pelivaisi**

**5** Pētsa asaēya muxujiobame pamonaē nevajēnaeyapijivi. Biji xaniavaetsia yayiataeya beaxacuenia muxujiobare. Necovēpijivi pijinia benejuyapijivicuenia muxujiobare. <sup>2</sup>Petirivi ata nevajēnaeyapijivi beenacuenia muxujiobare. Necovēpijivaxi pijinia benejuyapijivaxicuenia muxujiobare. Ēpexaniajamatabēcuenia taema bajarapovaxi itsajamatabēcuene bēpēnēa nejamatabēēthētota sivanajamatabēxainaenejevamē.

<sup>3</sup>Pamona pevecuatēpaevatsi, Dioso pejumecovēnētsiva, yayiataeya yavenonare itsa bitso bejiobi. <sup>4</sup>Itsiata baitsi jane pamona pevecuatēpaevatsi, itsa xaina pexi, pemomoxi ata, bajarapamonaē xanepana pevetsinexatsi. Bajarapamonaē xanepana peyavenonaenexa pijamonaē. Bajarapamonaē juya beveta paxa, pena ata, pamo ata, pacue ata, pamonaē vitsatatsi. Bajarapacuenia itsa exana, exana pexaniacuene. Nexata Dioso barēyataenatsi. <sup>5</sup>Pamona pevecuatēpaevatsi, Dioso pejumecovēnētsiva, itsa apo xinaē itsajivi ata pevetsinexatsi, bajarapova najamatabēcuenecopataponaponae Diosojavabelia peyavenonaenexatsi. Navajētabiabi Diosojavabelia matacabita, meravi ata. <sup>6</sup>Itsiata baitsi jane pamona pevecuatēpaevatsi pejitsipacuēnia pibisiacuene itsa exanaponapona, Dioso tanetsi bepetēpaeva, abaxē asaē tsaponaponae ata. <sup>7</sup>Bajarapacuenia itorobare Dioso pejumecovēnētsivi pijamonaē peyavenonaenexa itsa bitso bejiobi. Nexata pamonaē Dioso apo pejumecovēnētsivi, toacuenebi tsanetsi pebaracuaicuaijajavatsi bajaraxua yabara. <sup>8</sup>Dioso pejumecovēnētsivi, pijamonaē beveta. Pajivi apo itaxutotsoniataē pevetsinexa pepo pijamonaē ata, bajarapajivi apo exanaē pacuenia Dioso itorobatsi. Nexata pijamonaē itsa apo evetsi, bajarapajivi bitso pibisiacuene exana Dioso apo pejumecovēnētsijivi matatoxenetsia.

<sup>9</sup>Petiriva sesenta pavaiabeje pexainaeva, caeto penacojiobicujinaē pamona pevecuatēpaevatsi, xanepana pevēnēyaquinarutsinexatsi pamona pevecuatēpaevitsi pevēnēyaquinarubibaxutota. Nexata daxita Dioso pejumecovēnētsivi peyavenonabiabinexatsi. <sup>10</sup>Pova pamona pevecuatēpaevatsi itsa cuenepātanetsi pexaniacuene pexanaejava, bajarapova xanepana pevēnēyaquinarutsinexatsi pamona pevecuatēpaevitsi pevēnēyaquinarubibaxutota. Mabaitsi pacuene pexanaeva xanepana pevēnēyaquinarutsinexatsije. Pexi xaniavaetsia pevitsatsiva. Jivi ata itsa sivaxainatsi, xaniavaetsia pijabota pecopiapitsiva. Ajamatabēcuenecovēbia Dioso pejumecovēnētsivi peyavenonaeva. Peyavenonaevanua itsamonaē

itsa bejiobiaexanatsi Dioso pejumecovënëtsijava yabara. Daxita xua pexaniacuene, pexanaeva, xanepana pevënëyaquinarutsinexatsi pamona pevecuatëpaevitsi pevënëyaquinarubibaxutota.

<sup>11</sup> Itsiata baitsi jane pova abaxë sesenta pavaibeje apo pexainaeva, pëtsa vënëyaquinarutame nevënëyaquinarubibaxutota peyavenonaenexatsi daxita Dioso pejumecovënëtsivi. Tshipaji bajarapova itsa jitsipa pexanaenexa pacuenia natojitsipa, copatsipa Cristo pejumecovënëtsijavami. Nexata icatsia nacojiobjitsipa. <sup>12</sup> Nexata pijaneconi xainaejitsipa Diosojavabelia. Tshipaji copatsipa Cristojavabelia penajamatabëcuenecopatsijavami: “Capanepaeya baja jumecovënëtajë Cristo,” jai ata. <sup>13</sup> Pematatsënëa bajarapova sivaxinarutsipa itsa bonëjava. Afaetabinua tsipae. Pematatsënëa baracuaicuaijai tsabiabi tsipae itsamonae. Jamatabëitonotabiabijitsipa itsamonae. Xuaxi yabara ata apo becuaiicuaijaisi, cuaiicuaijai tsabiabi tsipae. <sup>14</sup> Bajaraxuata pamona pevecuatëpaevatsi, pova abaxë bitso apo perujuva, jitsipajë icatsia penacojiobjiva pexi pexainaenexa, pijabo ata xaniavaetsia pevetsinexa. Nexata bajarapacuenia vajanacacueneyavi ata toacuenebi tsanetsi pebaracuaicuaijajavatsi bajarapitsiva. <sup>15</sup> Bajarapacuenia jumaitsinë tsipaji baja itsamonae pamonajivi pevecuatëpaevitsi copaba baja Cristo pejumecovënëtsijavami. Nexata pacuenia dovathi itorobatsi, exanavanapa.

<sup>16</sup> Dioso pejumecovënëtsivi, pebijivi, petiriavi ata, itsa pijamonaeayjuvënëva pamona vecuatëpatsi, nexata bajarapamonae bitaxutotsoniatane bajarapova. Bajarapacuenia nexata apo namatavenonae tsane peyavenonaenexatsi daxita Dioso pejumecovënëtsivi. Tshipaji baja pijamonae evetatsi. Nexata Dioso pejumecovënëtsivi cajëjpeajitsiatsi peyavenonaenexa pamonae bitso bepejiobivi, pamona pevecuatëpaevitsi pijamonae petoajibivitsi.

<sup>17</sup> Ancianovi, pamonae xaniavaetsia evetabiaba Dioso pejumecovënëtsivi, bajarapamonae xaniavaetsia bematamotatsi. Beyaiyatanetsinua. Ancianovi, pamonae Dioso pitorobilivaisi bitso tsipaeba, bitso cujarubanua, bajarapamonae xaniavaetsia bematamotatsi. <sup>18</sup> Dioso pejumelivaisibaxutota jumaitsi pacuenia bueyu copatatsi pexaejava pexaenexa penacuenebijavata. Jumaitsi mapacueniaje: “Pabueyu canacuenebame trigoxu pecatotanabataxuabinexa, pëtsa pumuxatatame nepumuxatatabiabijavata. Pëtsa pumuxatatame trigoxu pexaenexa pecatotanabataxuabijavata,” jai Dioso pejumelivaisibaxutota. Itsalivaisita pijinia Dioso pejumelivaisibaxutota xaniavaetsia pematamotsijavanexa yabara jumaitsi mapacueniaje: “Penacuenebinë bematamotatsi,” jai Dioso pejumelivaisibaxutota. Bajaraxuata bematamotatsi ancianovi Dioso pejamatabëcueneta bitso penacuenebivi.

<sup>19</sup> Pëtsa jumexaniantaneme caejivi pepaebijava ancianonë pibisiacuene pexanaejava yabara. Matapania anijajivibeje, acueyabi pajivibeje ata, petaevitsi catsipaebiana, jumecovënëtsianame. <sup>20</sup> Nexata xaniajai ancianovi pibisiacuene itsa exanapona, itavere daxita Dioso pejumecovënëtsivi pitabarata. Nexata pijinia itsamonae ancianovi itsa cacuenetane nitavetsijava pibisiacuene pexanaevi, cujunaviana pibisiacuene pexanaejava. <sup>21</sup> Dioso pitabarata, vajatuxanenë Jesucristo ata pitabarata, Dioso pijaängelevi ata pitabarata, xanë jamatabëcuenereviaya caitorobatsi pacuenia caitorobatsi nexanaponaponaenexa. Daxita ancianovi, pibisiacuene pexanaevi, najëpaeya itavetsianame. Ponë ancianonë, bitso pecayapëtaenë, pibisiacuene itsa exana, pëtsa sivaajumeuramë nitavetsinexa pibisiacuene pexanaejava. <sup>22</sup> Pëtsa itsanë ata bepijia exaname ancianonënexa. Tshipaji ponë bepijia an-

cianonënexa exanaejitsipame, bepíjia pibisiacuene itsa exana, nexata itsamonae cataejitsipa pibisiacuene pexanaevi benejamatabëcueneyavenonaenë. Daxita pibisiacuenevecua, xaniavaetsia naevetsiaya ponaponare.

<sup>23</sup>Xamë raja ajamatabëepatanemë tsabiabi. Nexata pëtsa apaeyabiabame ëpitaranae. Tsiquirijavayo vinorayo, pitaranae yajava, apaeyabiabianame.

<sup>24</sup>Itsamonae pibisiacuene itsa exana, bananeconitsiaexanatsi daxitajivi pepuacueneypëtaetsi. Itsamonae pijinia pibisiacuene exanae ata, bepíjia apo cueneyapëtaetsi. Bexëa matapania xaniavaetsia vënëlvaisinaitajëta pibisiacuene pexanaejava. <sup>25</sup>Bajara pijinia itsi itsamonae pexaniacuene itsa exana. Pexaniacuene itsa exana, daxitajivi cuenetanetsi pexaniacuene pexanaejava. Itsajavata pexaniacuene exanae ata, jivi apo cuenetaetsi. Itsiata baitsi jane bajarapajivi pexaniacuene itsa exana, acuenebi navënëmatayatsia peponaponaejava. Nexata bexëajavabelia daxitajivi vënëlvaisitanetsi pexaniacuene pexanaejava.

**6** Pamonaе dajubicuenia canajetatsi itsamonaejavabelia amoneya petonacuenebabiabinexa, bajarapamonae Jesús pelivaisi itsa pejumecovënëtsivi, yaiyataeya tonacuenebi pijatuxanenë. Bajarapacuenia tonacuenebi pijatuxanenë pesivajamatabëcuenenarëyanexatsi. Nexata pijatuxanenë Dioso pibisiacuena apo baracuaicuajiai tsane. Jesús pelivaisi ata, palivaisi vaxaitsi jivi tsipaebaponatsi, pijatuxanenë pibisiacuena apo baracuaicuajiai tsane. <sup>2</sup>Dajubicuenia pecanajetsivitsi pijatuxanenë, Dioso itsa pejumecovënëtsinë, pecanajetsivitsi pëtsa jamatabëjumaitsi pijatuxanenë yabara mapacueniaje: “Tajatuxanenë rabaja abaxë Dioso pejumecovënëtsinë. Nexata asaëyata apo tonacuenebi atanë tsane, itsiata apo nebijatae tsane,” jamatabëjai pëtsa. Biji rajane asaëya xaniavaetsia tonacuenebi pijatuxanenë. Tspaji raja Dioso pejumecovënëtsinë yavenonaeya tonacueneba Dioso penajuaasivavitsiyajuvënënë. Bajarapalivaisi tsipaebaponare. Itorobarenua bajarapacuenia pexanavanapaenexa.

### **Pacuenia Dioso pejumecovënëtsijivi jamatabëcuenenarëya yabara pelivaisi**

<sup>3</sup>Itsamonae saicaya itsalivaisi tsipaebapona. Bajarapalivaisibeje apo najamatabëcuenenarëyapaebeje palivaisi vajatuxanenë Jesucristo tsipaebapona. Palivaisi vaxaitsi jumecovënëtavapanatsi, apo nalivaisijëpaebeje. <sup>4</sup>Cueneyapëtanetsi pamonaе penajumetsënëtsilivaisi tsipaebapona. Bajarapamonae beayajamatabëcuenevi itajara natane. Itsiata bajarapamonae pexaniajailivaisi apo yapëtae. Bitso bepematajemabivitsi jinavanapa. Nexata bajarapamonae jitsipabiaba itsamonaejavabelia pejumeaneyanotabiabinexa saya jema itsacuenelivaisixi peyanijobijavata. Apo barënajamatabëcuenenarëyapae itsajivi ata. Bajarapamonae yajuvënëvi itsa xaina itsacueneyavayo, bajarapamonae nacobecaëbabiaba. Anaepanabiaba. Nabijataeyabiaba. “Itsamonae covë nitsacueniabijitsia,” jamatabëjai tsabiabi, itsamonae apo itsacueniabijitsia atatsi. <sup>5</sup>Bajarapamonae anaeya namataenetsia najumenotabiaba. Tspaji piajamatabëcuenenarëyapae. Bajarapamonae pexaniajailivaisi, Cristo pelivaisi, apo yapëtae xaniavaetsia jivi petsipaebinexa. Saya bajarapamonae jamatabëjumai tsabiabi: “Xanë raja Dioso pejumelivaisi tatsipaebaponaexae, palata nacanabianajë,” jamatabëjai tsabiabi bajarapamonae. Bajarapitsivi nayajivitsare. <sup>6</sup>Vaxaitsi Dioso vajajumecovënëtsivi, bitso cajena vajaxinaevi Diosojavabelia, itsa sivajamatabëcuenenarëyatsi xuyovajëto Dioso nacatocopata vajaxinaenexa mapanacuataje. <sup>7</sup>Pamatacabi

vaxaitsi naexanatsi mapanacuataje, itsacuenejavayo ata apo capatsitsi. Pamatacabi pijinia tēpaenatsi, apo caponae tsanetsi itsacuenejavayo ata mapanacuapijicueneje. <sup>8</sup>Bajaraxuata nexata itsa xainatsi vajaxaejava, vajanaxatabijava ata, besivajamatabēcuenēbarēyatsi. <sup>9</sup>Itsiaata baitsi jane pamonae najamatabēxaina ēpexainaejavanexa, bajarapamonae dovathi jamatabēcuenecētatsi. Nexata pibisiacuene exana palata pepitsinexa. Jamatabēcuenebijianatsi. Nexata bajarapamonae Diosovecua naxuabiaya jinavanapa. <sup>10</sup>Pamonae bitso palata jitsipa, daxita xua pibisiacuene exana palata pepitsinexa. Itsamonae bitso najamatabēxaina ēpexainaeacuene pexaināenexa. Nexata baja copaba Dioso pejumecovēnētsijavami. Nexata bajarapajamatabēcuenē bēpēnēa bitso yajamatabēcuenēbėjai.

**Pacuenia Timoteo muxujibatsi pīajamatabēcuenesaēnēxa  
Diosojavelia penajamatabēcuenecopatsijava yabara pelivaisi**

<sup>11</sup>Timoteo, xamē Dioso pijajivitonēmē. Navecuatsare mapanacuata jivi palata pejitsipaejamatabēcuenē. Biji jane ajamatabēcuenesaēmēre Dioso nejumecovēnētaponaponaējava. Dioso asivamēre. Diosojavelia najamatabēcuenecopatsiaya ponaponare. Itsamonae ata asivamēre tsaponaponaē. Itsamonae caitsacueniabibibi ata, bajayajebi casaēmēre tsaponaponaē Dioso nejumecovēnētaponaponaējava. “Xanē ayaijamatabēcuenēnēnē,” nejaiyaniva, beveliajamatabēcuenēnē nataeya ponaponare. <sup>12</sup>Catoayapēbeje ata Diosojavelia nenajamatabēcuenecopatsijava, ajamatabēcuenesaēmēre nepitsinexa xua Dioso carajutsijitsia, matacabi apo peverevereaejava. Pamatacabi navajunupaebame nejumecovēnētsijava Jesús Dioso pexēnatocuene, Dioso cajunata pecarajutsinexa matacabi apo peverevereaejava. Ayaibitsaētoخانeto Dioso pejumecovēnētsivi pitabarata, Dioso cajunata pecarajutsinexa matacabi apo peverevereaejava. <sup>13</sup>Dioso baja cajena pesaēta daxita vaxaitsi asaē tsavanapaetsi. Pamatacabi Jesucristo nutatsi Poncio Pilato pitabarata, ajumejunavijibia navajunuapaeba pexaniajailivaisita. Nexata Diosobeje Jesucristobeje pitabarata caitorobatsi aeconoxae mapacueniaje. <sup>14</sup>Caitorobatsi xaniavaetsia nejumecovēnētaponaponaenexa daxita pacuenia jumaitsi pexanialivaisi, Cristo pelivaisi. Nexata acuenēbi tsane itsajivi ata pecaitavetsinexa. Bajarapacuenia vajēnaeevetaponaponare vajatuxanēnē Jesucristo matapania pepatsimatacabitsicajavabelianexa. <sup>15</sup>Pamatacabi Dioso caējēta, itsa copiapatsiana, Cristo icatsia pat-sianica. Caenē Dioso bitso ayaijamatabēcuenēnē daxitanacuanē pevetsivivecua. <sup>16</sup>Caenē Dioso apo tēpae tsane daxita matacabijavabelianexa. Dioso peyacotiayaponaponaenē. Bajaraxuata itsajivi ata acuenēbi pimoxoyotsijava Dioso. Itsajivi ata cajena caeto ata apo tae Dioso. Tsi-paji apo caējēpaetsi petaejava. ¡Daxitamatacabi Dioso pijajivi yaiyatanetsi! ¡Dioso cajena ayaijamatabēcuenēnē daxitamatacabijavabelianexa!

<sup>17</sup>Pamonae bitso pexainaevi mapanacuapijicueneje, bajarapamonae muxujibare beayaijamatabēcuenēvi penataeyaniva. Muxujibarenua pejamatabējumaitsiyaniva: “Palata baja taxaināexae, apo namatavenonaenē itsacuenejava ata,” pejamatabējaiyaniva. Tsi-paji saya palata peverevereaejava. Biji rajane itorobare bitso pexainaevi penajamatabēcuenecopatsinexa piasaētsaponaponaenē Diosojavelia. Dioso nacarajuta daxita vajaxainaejava barēyaya vajacajinavanapaenexa. <sup>18</sup>Itorobarenua bajarapamonae pijapalata pecanacuenebinexa, itsamonaejavavelia pexaniacuene petoexanabiabinexa bajarapapalatata. Itorobarenua penajamatabēcuen-

everetsinexa palata perajutsinexa bepejiobivijavabelia, bajarapacuenia peyavenon-aenexa. Itorobarena peticobetsanaponanexa pexainaejava bepejiobivijavabelia. <sup>19</sup>Bajarapacuenia itsa exanaena, nexata athëbëtatsia Dioso tobuataponanatsi pepacuene penamatamotsijava pexainanexa daxitamatacabijavabelianexa. Xainanana matacabi apo peverevereceajava.

**Pacuenia Pablo Timoteo pemuxujiobilivaisi toyaquina, pecopatsivajënae petoyaquinaelivaisi mapabaxutotaje, yabara pelivaisi**

<sup>20</sup>Timoteo, exanaponanare daxita xua Dioso catocopata nexanaenexa. Pëtsa namuxunaevetame pamonae bitso pecuaicuaijaivi saya mapanacuapijicuene yabaraje. Pëtsa namuxunaevetame pecuaicuaijaivi natsiquejemalivaisixi. Pëtsa namuxunaevetame pamonae jivi tsipaebapona penajumetsënëtsilivaisi. Bajarapamonae tsipaebapona itajara pepacuene bepexaniajailivaisi. Itsiata cajena apo pexaniajailivaisi. <sup>21</sup>Itsamonae bajarapalivaisi jumecovënëta. Nexata baja copaba Dioso pejumecovënëtsijavami.

Catovajëtatsi Dioso pecayavenonaenexa.

## Mapabaxutoje San Pablo cotocaevi toyaquina Timoteojavabelia

### Pacuenia icatsia Pablo cotocaevibaxuto toyaquina Timoteojavabelia yabara pelivaisi

**1** Xanë Pablonë, Jesucristo nitoroba Dioso pejamatabëcueneta. Jesucristo nitoroba daxitanacuanëjava jivi tatsipaebinexa pacuenia Dioso najumecapanepaeya jumaisi vajanacarajutsinexa maticabi apo peveverecaeyava. Dioso nacarajutsiana maticabi apo peveverecaeyava, Jesucristo vajajumecovënëtsivi. <sup>2</sup>Timoteo, bitso tacaasivanë, betaxënatomëcuenia tacataenë. Catoyaquinatsi mapabaxutoje. Catovajëtatsi vaxa Dioso, vajatuxanenë Jesucristo ata, pecayavenonaenexa pecaasivaxaebeje. Catovajëtatsi pecaitaxutotsoniatanexabeje, pecajamatabëcuene xanepanaeyaexanaenexanua bajaraponëbejejavabelia.

### Pacuenia Pablo Cristo vajunupaeba yabara pelivaisi

<sup>3</sup>Pexaniajamatabëcuene rajutabiabajë Diosojavabelia. Dioso tonacuenebabiabajë pacuenia bajayata tajasalinaivimi ata Dioso tonacuenebavanapa. Pacuenia Dioso nitoroba, bajarapacuenia xaniavaetsia toponaponajë. Itsa canajamatabënapitatsi tavajëtsijavata Diosojavabelia, meravi, maticabita ata, Diosojavabelia pexaniajamatabëcuene rajutabiabajë xamë yabara. <sup>4</sup>Najamatabënapitabiabajë tanepënueyabaxuabijavamë pamaticabi navecuanatsatatsibeje. Bitso icatsia jamatabëcatanetsi tacasivajamatabëcuenebarëyanexa itsa catanetsi. <sup>5</sup>Najamatabënapitabiabajë pacuenia daxita nejamatabëëthëtovetsina najamatabëcueneocopatame Diosojavabelia. Copiaya acue Loidabeje, ena Eunicebeje, pejamatabëëthëtovetsina najamatabëcueneocopatabeje Diosojavabelia. Nexata yapëtaniji bajarapacuenia xamë ata nenajamatabëcueneocopatsijava Diosojavabelia.

<sup>6</sup>Bajaraxuata canajamatabënapitsiaexanatsi mapacueniaje. Exanaponaename pacuenia Dioso caitoroba pecavejamatabëcaeviyaniava Dioso pecacajëpaeyaexanaejamatabëcuene. Nexata xaniavaetsia evetaponaponaename Dioso pejumecovënëtsivi. Pajamatabëcuene Dioso cacajëpaeyaexana, Dioso carajuta pamaticabi catsimatanacobebuatatsi tacatovajëtsijavata Diosojavabelia. <sup>7</sup>Dioso cajena nacarajuta Espiritu Santo. Espiritu Santo nexata vajanacayajavaponaponaexae, apo cunjavitisi itsacunejava ata. Espiritu Santo pesaëta nacacajëpaeyaexana pacuenia Dioso nacatojitsipa vajaexanabiabinexa. Nacayavenonanua vajaasivanexa itsamonae ata. Nacanjamatabëcuene cataitsiaexananua pibisiacuene ata vajaexanaeyaniava. <sup>8</sup>Pëtsa ajumeuramë nevajunupaebaponaejava vajatuxanenë Jesús. Pëtsa ajumeuramë xanë ata tanevajunupaebijavamë, Jesucristo pijajivitonëxaenë penaneconitsivi pejebabiabibota taneetsijava. Biji rajane xamë ata tonacopare itsamonae pecabejiobiaexanaenexa, jivi Diosojavabelia pecapanepelivaisinexatsi yabara. Itsamonae pecabejiobiaexanaejavata, Dioso cajena cajamatabëcuenebatsiana. <sup>9</sup>Dioso cajena nacacapanepaena pibisiacuene vajaexanaeneconimivecua. Nacajunata vajatojinavanapaenexa xaniavaetsia. Itsacunejavayo pexaniacuene apo exanae atatsi, Dioso itsiata nacajunata. Nacajunata tsipaji Dioso jitsipa vajanacajunatsinexa. Dioso nacaitaxutotsoniatanenua Jesucristo pejamatabëcueneta. Pepo bajayatamicujinae, pamaticabi abaxë Dioso nacua ata apo exanae, Dioso baja ca-

jena nacajitsipa. <sup>10</sup>Dioso cajena nacatsitanajamatabëcueneitajëta vajanacaasivajava. Dioso vajanacaasivaxae, pexënato itorobica vajanacapanepaenexa. Nexata tēpae ata tsanetsi, apo nacatoitsacuene. Tsipaji itsa najamatabëcuenecopatatsi Jesucristojavabelia, nacacapanepaena Diosojavabelia. Nexata xainaenatsi matacabi apo pevevereceajava.

<sup>11</sup>Dioso cajena nitapeta jivi tatsipaebaponaenexa bajarapapexanialivaisi. Nitoroba apóstolenënexanë tatsipaebaponaenexa bajarapalivaisi apo judíovijavabelia. <sup>12</sup>Bajarapalivaisi jivi tatsipaebaponaexae, itsamonae nebejiobiaexanaxona mapacueniaje. Itsiata baitsi jane apo auranë tanebejiobiaexanaejava yabara. Tsipaji ponëjavabelia najamatabëcuenecopatajë, jamatabëcueneapëtaniji. Jamatabëcueneapëtaniji pacuenia bajaraponë jamatabëcuenecajëpatsi taneyavenonaenexa. Nexata bajaraponë neyavenonabiabiana pacuene netocopata taexanaxonaenexa matapania icatsia Cristo pepatsimatacabitsicajavabelianexa.

<sup>13</sup>Timoteo, casaëmëre tsaponapona nejumecovënëtsijava pexaniajailivaisi, paliivaisi baja catsipaebatsi. Pacuenia baja catsipaebatsi, bajarapacuenia juya itsamonaejavabelia tsipaebabiabianame. Bajarapalivaisi jamatabënaponaponare. Xaniavaetsia jumecovënëtsia ponaponare. Asivaya taeyabiabare itsamonae ata Jesucristo pijajivitonëxaemë. <sup>14</sup>Espíritu Santo cajena nacayajavaponaponabeje. Nexata nacayavenonaponaponabeje. Bajaraxuata pexaniajailivaisi xaniavaetsia tsipaebaponaponare. Pacuenia Dioso caitoroba, exanabiabare. Saicayalivaisicuenia pëtsa tsipaebaponame. Espíritu Santo cayavenonaena.

<sup>15</sup>Xamë baja cajena yapëtaneme pacuenia Asíavënë nacuapijivi, daxita Dioso pejumecovënëtsivi, nexuabarëcëpeca. Tanexuabarëcëpecaevi yajuvënënëbeje Figelobeje Hermógenesbeje. <sup>16</sup>Onesíforo, pijamonae yajava, Dioso pitaxutotsoniataenexatsi, tovajëtajë Diosojavabelia. Onesíforo nejamatabëcuenebabatabiaba. Penaneconitsivi pejebabiabibota ecae atanë, nesivaxaina anijatonë. Onesíforo cajena apo neyabaraaura, penaneconitsivi pejebabiabibota ecae atanë. <sup>17</sup>Biji rajane Onesíforo itsa patajopa Roma tomarata, nejaitaruta. Apo copatsi cajena tanejaitarutsijava. Matapania itsa necaxitajaraba penaneconitsivi pejebabiabibota, copata baja tanejajitsijava. <sup>18</sup>Diosojavabelia Onesíforo tovajëtajë Dioso pitaxutotsoniataenexatsi pamatacabi icatsia Cristo patsianica. Xamë baja cajena yapëtaneme pacuenia Onesíforo nacayavenonabeje pamatacabi ponaponatsibeje Efeso tomarata.

### **Pacuenia Jesucristo pijajivitonë jamatabëcueneitsi, ponë xaniavaetsia jumecovënëta, yabara pelivaisi**

**2** Timoteo, xamë betaxënatomëcuenia tacataenë. Catovajëtatsi Diosojavabelia pecajamatabëcuene asaëyaexanaenexa. Nacayavenonaena Jesucristo pijajivixatsi. <sup>2</sup>Xamë rabaja cajena nejumetaeyabiabame palivaisi tsipaebabiabajë jivi ayabitsaëtoxonetonëjavabelia. Bajarapalivaisi juya tsipaebare itsamonaejavabelia. Pamonaepo piacueniejitsibivi pexanaenexa pacuenia itorobatsi, pecaëjëpaevitsinua xaniavaetsia jivi livaisi petsipaebinexa, bajarapamonae itorobare juya mataropotsia bajarapalivaisi petsipaebinexa itsamonaejavabelia.

<sup>3</sup>Dioso pejumelivaisi jivi netsipaebaponaejavata, itsa catoayapëbeje, itsamonae itsa cabejiobiaexanaejitsianua, pëtsa najetabajiravame. Jesucristo pijajivitonëxaemë, jamatabëcueneevetaponaponare pacuenia caitoroba nexanaenexa. Pacuenia pexaniavajabitsaënë itsi, bajaraitsimëre. <sup>4</sup>Vajabitsaënë pitorobabiabinëtsi ja-

matabëcuenevetaponapona pacuenia itorobatsi pexanaenexa. Nexata apo vecuanajamatabëcueneepatajërëtsi saicayacuene pevetaaponanexa. <sup>5</sup> Bajara pijinia pacuenia peditsojinaevi pecujinaejinaejava, penayacobijavata, cujinaejina pacuenia itorobatsi pijatuxanevi. Penacanabinë jamatejema perajutsinexatsi itsacuenejavayo. Pajivi xaniavaetsia apo cujinaejinae pacuenia itorobatsi, bitsojinae ata pecujinaejinaejava, itsiata apo nacanabi. Nexata apo rajutsitsi pecujinaejinaematamo. <sup>6</sup> Ponë pijinia pabi nacueneba peubinexa peubijava, bajaraponë copiaya nacueneba asaëyata. Nexata peubijava itsa tonaveretatsi, pita baja penacuenebimatamo. Bajara pijinia pacuenia xamë ata asaëya tonacuenebare vajatuxanenë. Nexata vajatuxanenë carajutsiana netonacuenebimatamo. <sup>7</sup> Najamatabëxainare tacatsipaebilivaisi. Nexata vajatuxanenë cayapëtaeyaexanaena bajarapalivaisi.

<sup>8</sup> Canaëjère Jesucristo. Bajaraponë cajena Dioso asaëyaexanatsi petëpaecuinae. Bajaraponë cajena Davidpijinë pemomoxiyajuvënë. Bajaraponë pelivaisi jivi tsipaebabiabajë. Itsa jumecovënëta bajarapalivaisi, pecapanepaelivaisinexatsi Diosojavabelia. <sup>9</sup> Bajarapalivaisi tatsipaebaponaexae, penaneconitsivi pejebabiabibota neeta tavajënaeyabelia daxitanacuanëjjava tatsipaebaponaeyaniva. Cadenamaëtonëta xanë necëta, pacuenia bitso pibisiacuene pexanaenë bacëtatsi. Itsiata Jesucristo pelivaisi apo cëtsicapanepe. Nexata xanë majotaje naneconitsia ponaponae atanë, aeconoxae baja Jesucristo pelivaisi yacaëjëpaponaxitanacuanëjjava. <sup>10</sup> Bajaraxua tayapëtaexae, tonacaevetajë itsamonae ayaicuenia tanebejiobiaexanaenexa, Dioso pitapetsivitsi pecapanepaenexatsi Jesucristo pelivaisi pejumecovënëtsixae. Nexata bajarapamonae ata Dioso capanepaenatsi pexainanexa matacabi apo pevereverecejjava daxita matacabijavabelianexa. Nexata bajarapamonae Jesucristo yajavajinavanapaena pinijicotia yajava. <sup>11</sup> Palivaisi aeconoxae jumaitsinëjitsia, pexaniajailivaisi cajena:

Itsa xaniajai Cristo yajavatëpatsibeje, nexata icatsia Cristo yajavaasaëtsibeje tsaponaponae tsane. <sup>12</sup> Itsa casaë tsaponaponaetsibeje tsane Cristo pelivaisi vajajumecovënëtsijavabeje, itsamonae nacabejiobiaexanae atabeje, nexata daxitacuene Cristo cobenaevetsianatsibeje pamatacabi daxitacuene evetsiana pijanacuatatsia. Itsa vaxaitsibeje bajaraponë pelivaisi vajajumecovënëtsijavabeje nayavajunuaxainanatsibeje jivijavabelia, nexata juya bajaraponë pijajivitonëcuenetsibeje nacayavajunuaxainanabeje paxa Diosojavabelia. <sup>13</sup> Vaxaitsi itsajamatabëcuene Dioso vecuanajamatabëxainae atatsi, itsiata Dioso nacatoexanaena pacuenia baja cajena najumecapanepaeya jumaitsi.

**Pacuenia jamatabëcueneitsi xaniavaetsia  
Dioso petonacuenebinë yabara pelivaisi**

<sup>14</sup> Daxita Dioso pejumecovënëtsivi najamatabënapitsiaexanaename palivaisi catsipaebatsi. Vajatuxanenë pitabarata tsipaebare bajarapamonae. Pëtsa bajarapamonae anaeya jumenota saya itsamonae pecuaicuaijajjava. Pejumeanaenotsijava itsamonae, apo jamatabëcueneavenonae tsipaetsi itsajivi ata. Saya jamatabëcuenebijinaejitsipatsi daxita pejumetaevitsi. <sup>15</sup> Pacuenia cacaëjëpa, Dioso pecaitorobicuenia exanapononare. Nexata pamatacabi naitajëtsianame Dioso pitabarata, cabarëyataena xaniavaetsia nejumecovënëtsixae pacuenia caitoroba. Ajibi tsane neyabaraaurajava Diosojavabelia. Tsipaji xaniavaetsia jivi tsipaebaponaponame Dioso pejumelivaisi, pepo pexaniajailivaisi. <sup>16</sup> Pëtsa namuxunaeve-



tame pamonaē tsipaebapona natsiquejemalivaisi, mapanacuapijilivaisi. Tspaji raja bajarapamonaē petsipaebaponaēlivaisita, jivi Dioso pejumecovēnētsijavami copabiaexanapona pevajēnaeyabelia.<sup>17</sup> Bitso cajena abeje bajarapalivaisi. Pacuenia ayaivajēnē banaexanapona pevajēnētsabanajetarucaejava, bajara pijinia jamatabēcueneitsi bajarapamonaē petsipaebaponaēlivaisi. Tspaji pevajēnaeyabelia jivi ayaibitsaēto jamatabēcuenebijiānaponatsi bajarapalivaisi petsipaebaponaēxetsi. Bajarapalivaisi petsipaebaponaēvi yajuvēnēnēbeje Himeneobeje Filetoebeje.<sup>18</sup> Bajaraponēbeje copatabeje baja pexaniajailivaisi pejumecovēnētsijavami beje. Jamatabēcuene nāvexaniababeje saya. Tspaji jumaitisibeje tsabiabi: “Panepa rabaja jivi petēpaecujinaē icatsia Dioso piasaēyaexanaponaējavaminexa,” jai beje tsabiabi. Nexata bajarapacuenia Dioso pejumelivaisivēcua najamatabēcuene epatajērērecaponabeje. Nexata bajaraponēbeje itsamonaē ata Dioso pejumecovēnētsijavamivecua najamatabēcuene epatajērērecaeya exanaponabeje.<sup>19</sup> Pacuenia ibotoxaneto apo tixitsicapanepaetsi, bajara pijinia itsi Dioso pejumelivaisi, pexaniajailivaisi. Caelivaisi rabaja tsiteca. Nexata itsalivaisijavabelia apo tixitsicapanepaetsi. Bajarapalivaisijavata mapacuenia pejumaitsilivaisiyo rucaje: “Pepo petuxanenē cajena yapētane pijajivi,” pejailivaisiyo ruca. Itsalivaisijavata pijinia mapacuenia pejumaitsilivaisiyo rucaje: “Pajivi jumaitsi: ‘Xanē raja Cristo pijajivitonēnē,’ jai, bajarapajivi becopata pibisiacuene pexanaejava,” pejailivaisiyo ruca.

<sup>20</sup> Riconē pijaboxanetota jivi pecanabaninēanēnēxa, xaina daxitacuenevirianēanē. Itsanēanē penioponaēplatananitota pexanaenēanē. Itsanēanē oronanitota pexanaenēanē. Pamatacabi riconē topatatsi petuxanevi, ayaijamatabēcuenevi, pexaejava abatabiaba bajaraponēanēta. Itsanēanē bevelianēanē, naejavanēanē. Itsanēanē atsanāninēanē. Bajaraponēanē xaina daxitamatacabi jivi pecanabaninēxa.<sup>21</sup> Bajara pijinia jamatabēcueneitsi Dioso pejumecovēnētsivi ata. Pajivi xaniavaetsia najamatabēcuenevetaponapona pibisiacuene pexanaeyaniva, bajarapajivi jamatabēcueneitsi pacuenia oronanitota pexanaenēanē itsi. Baitsi baja ajamatabēcuene xuirajibi. Nexata pijatuxanenē tsitaxanepana pitorobinexatsi xua pexaniacuene pijatuxanenē petonacuenebinēxa. Timoteo, bajaraxuata xaniavaetsia be naevetaponaponame pibisiacuene nexanaeyaniva.

<sup>22</sup> Pacuene pevējēavi najamatabēxaina pibisiacuene pexanaenēxa, bajarapacuene vecuanajetabajiravaponare. Casaēmēre tsaponaponaē ēpexaniacuene nexanaponaponaejava. Diosojavabelia najamatabēcuene copatsiayaponaponare. Asivamēre tsaponaponaē itsamonaē ata. Jamatabēcuene xanepanaeya ponaponare Dioso pitabarata. Bajarapacuenia barēajamatabēcuensaēmēre tsaponaponaē, pamonaē xaniavaetsia penaevetavanapaēvi pibisiacuene pexanaeyaniva, penavajēcabiabivina Diosojavabelia peyavenonaenēxatsi.<sup>23</sup> Namuxujemare natsiquejemalivaisixi pecuaicuaijaivi. Yapētaneme rabaja. Bajarapitsilivaisixi jivi itsa cuaicuajiai, belia najumeanaenotabiabapona.<sup>24</sup> Jesús cajena pijajivitonē, itsamonaē apo bejumeanaenotsi. Biji rajane pexaniajamatabēcuene bexaina daxitajivijavabelia. Livaisi jivi betsipaeba xaniavaetsia. Bajayajebi ata apo becopatsi livaisi petsipaebaponaējava.<sup>25</sup> Xaniavaetsia muxujobiaya livaisi betsipaebaponaēponaē pamonaē Dioso apo pejitsipaēvi ata. Nexata beevetaponapona bajarapamonaē ata pecopabinēxa pibisiacuene pexanabiabijava penajamatabēcuene pēnēyorotsinēxa Diosojavabelia. Nexata bajarapamonaē ata Dioso yapētaēyaexanaenatsi Jesús pelivaisi pexaniajailivaisicuene.<sup>26</sup> Nexata icatsia najamatabēxainaena xaniavaetsia Dioso pe-

jumecovënëtsinexa. 25 Xaniavaetsia muxujiobiaya livaisi betsipaeabaponapona pamona Dioso apo pejitsipaevi ata. Nexata beevetaponapona bajarapamonae ata Nexata dovathi pejamatabëcuene itorobabiabijavatsivecua najamatabëcuene pënëyorotsiana Diosojavabelia.

**Pacuenia jivi itsane itsa baja imoxoyo pevajënae  
nacia pevereverecaenexa yabara pelivaisi**

**3** Timoteo, xaniavaetsia beyapëtaneme mapacueneye. Itsa baja imoxoyo pevajënae tsane nacia pevereverecaenexa, bajarapamatacabi bitso ayapëbeje tsane daxitacueneyavabelia. <sup>2</sup>Bajarapamatacabi cajena caejivi canacujitsia pexainaejava, natoasiva tsane ëbajarapamonae ayaijava pexainaeenexa. Navajunupaebiana saya peyaiyataenexatsi pejumetaevitsi. Beayaijamatabëcuenevivi nataena. Navajunupaebiana pexanaejava yabara peyaiyataenexatsi. Bajarapamonae pibisiacuenia baracuaicuajai tsane Dioso. Apo jumecovënëtsi tsane paxajivi, penajivi ata, pitorobicueniatsi. Vitsatsi atatsi, yavenonabiabi atatsi, apo jamatabënajinae tsane pijamonae. Bajarapamonae apo yaiyatae tsane itsamonae Diosojavabelia pevajëcabiabijava. <sup>3</sup>Bajarapamatacabita bajarapamonae apo asiva tsane pijamonae ata. Apo itaxutotsoniatae tsane itsamonaejavabelia ata. Najumetsënëtsiaya baracuaicuajai tsabiabi tsane itsamonae. Apo caëjëpaetsi tsane penajamatabëcuene cataitsinexa pibisiacueni pexanaejava. Anaepanabiabiana bitso pebejiobiaexanaenexa itsamonae. Itoya tsane daxita pexaniacueni pexanaevi. <sup>4</sup>Bajarapamonae canajetsiana penajua-jinavanapaevi ata pijavajabitsaë pecobeyabelia. Xaniavaetsia najamatabëxainaejeva, exanaena daxitacueni. Bijiaya naëcotsiana itsamonae. Dioso apo jamatabënajinae tsane. Jaitsiana biji pebarëyjamatabëcuene saya pebarëyanexa. <sup>5</sup>Bajarapamonae itajara najonena Dioso pejumecovënëtsivijavabelia. Itsiata baitsi jane apo jumecovënëtsi tsane Dioso pejumelivaisi, jumetae ata.

Bajarapamonae navecuatsatsianame. <sup>6</sup>Bajarapamonae navecuatsatsianame tsi-paji bajarapamonae yajuvënëvivi itsamonae pijabonëjavabelia joneyabiabiana. Nexata bajarapabonëpivivi, petiriavi, bajarapamonae yamaxëitorobabiabiana. Bajarapapetiriavi jamatabëcuenefaefaenaena. Daxitacueni pibisiacueni jamatabëxanabiabiana. Nexata pamatacabi bajarapapetiriavi pibisiacueni jamatabëxana, patabi-abiana penajumetsënëtsilivaisi petsipaebinxatsi. Nexata bajarapapetiriavi itsa tsipaebianatsi penajumetsënëtsilivaisi, beDioso itajara pejumelivaisi petsipaebivi taeyabiabiana. <sup>7</sup>Bajarapapetiriavi picani jitsipaena petsipaebibinexatsi Dioso pejumelivaisi. Itsiata baitsi jane apo tsijamatabëjonetsi tsane pepo pexaniajailivaisi pecapanepaelivaisinexatsi Diosojavabelia. <sup>8</sup>Bajayata penajorobinëmibeje, Janespijinëmibeje Jambrespijinëmibeje, nayajiviitavetabeje Moiséspijinë pexaniajailivaisi petsipaebiyativatsibeje. Bajara pijinia pacuenia pamona petiriavijavabelia penajumetsënëtsilivaisi tsipaebaponaena. Bajarapamonae nayajiviitavetaponaena pepo pexaniajailivaisi petsipaebiyativatsi. Bajarapapetiriavi apo caëjëpaetsi tsane penajamatabëxainaeenexa xaniavaetsia. Bajarapamonae saya yamaxëitorobiaya jumai tsabiabi tsane itsamonaejavabelia: “Paxanë raja Dioso patajumecovënëtsivi,” jai tsabiabi tsane. <sup>9</sup>Itsiata bajarapamonae ayabitsaëto jivi apo pënaponatsi tsane. Daxitajivi cueneyapëtanatsi bajarapamonae saya jema livaisi petsipaebaponaejava. Nexata pacuenia bajayata Janespijinëmibeje Jambrespijinëmibeje daxitajivi cueneyapëtanetsibeje pibisiacueni pexanaponaejavabeje, bajara pijinia

pacuenia bajarapamonae ata daxitajivi cueneyapëtaenatsi penajumetsënëtsilivaisi petsipaebaponaejava.

### **Pacuenia baja Pablo copatsijitsia Timoteo pemuxujibijava yabara pelivaisi**

<sup>10</sup>Timoteo, xamë baja cajena yapëtaneme palivaisi tsipaebabiabajë jivibitsaë-toxanetojavabelia. Yapëtanemenua baja cajena pacuenia xaniavaetsia ponaponajë. Yapëtanemenua pacuene yabara Dioso tonacuenebaponaponajë. Yapëtanemenua pacuenia Dioso jumecovënëtaponaponajë. Yapëtanemenua pacuenia itsamonaiejavabelia livaisi tsipaebaponajë bajayajebi copatsinejevanë. Yapëtanemenua pacuenia itsamonaë ata asivanë. Yapëtanemenua pacuenia casaënë tsaponaponae jivi livaisi tatsipaebaponaejava netoayapëbeje ata. <sup>11</sup>Yapëtanemenua pacuenia itsamonaë pibisiacuenia nebaracuaicuaijai tsabiabi Jesucristo tajumecovënëtsinëxae. Yapëtanemenua pacuenia nebejiobiaexanapona. Yapëtanemenua pacuenia nebejiobiaexana Antioquía tomarata, Iconia tomarata ata, Listra tomarata ata. Bajarapatomaranëpijivi bitso nebejiobiaexana. Itsiata baitsi jane Dioso necapanepa daxita bajarapacuenivecua. <sup>12</sup>Xaniajai cajena. Daxita pamonaë najamatabëcuenecopata xaniavaetsia petojinavanapaenexa Jesucristo, bajarapamonae bejiobiaexanaponaenatsi. <sup>13</sup>Nexata pibisiajamatabëcuenevi, pamonaë dovathi pejamatabëcueneta jivi yamaxëitorobapona, orijibia bitso pevajënaeyabelia pibisiacueni exanaponaena. Bajarapamonae dovathi pejamatabëcueneta jivi yamaxëitorobaponaena. Nexata pijinia bajarapamonae ata bitsoyo dovathi yamaxëitorobaponaenatsi.

<sup>14</sup>Timoteo, itsiata baitsi jane xamë casaëmëre tsaponaponae palivaisi baja capanepaeya jumecovënëtame. Tsipaji baja cajena xamë jamatabëcueneyapëtaneme pacuenia jamatabëcuenetsi pamonaë catsipaeba bajarapalivaisi. <sup>15</sup>Tsiquirinëyomëjavaveliacujinae baja cajena yapëtaneme Dioso pejumelivaisi. Bajarapalivaisi cayapëtaeyaexana pecacapanepaejavanexa Diosojavabelia nenajamatabëcuenecopatsixae Jesucristojavabelia. <sup>16</sup>Dioso pijajivi Espíritu Santo itorobatsi peyaquinaenexa Dioso pejumelivaisi. Nexata pacuenia Espíritu Santo itorobatsi, bajarapacuenia Dioso pijajivi yaquina daxita Dioso pejumelivaisibaxutonënexa. Nexata nacatoxanepana Dioso pejumelivaisi itsamonaë vajanacatsipaebinxaxa vajayapëtaenexa pexaniajailivaisicueni. Nacatoxanepanua Dioso pejumelivaisi vajanacaitavetsinexa apo pexanepanaecueni itsa exanatsi. Nacatoxanepanua Dioso pejumelivaisi vajanacajamatabëcuenetorobinxaxa ëDioso pejitsipaecueni vajatoexanabiabinexa. Nacatoxanepanua Dioso pejumelivaisi vajanacayapëtaeyaexanaenexa xaniavaetsia vajatojinavanapaenexa Dioso. <sup>17</sup>Nexata Dioso pejumecovënëtsinë itsa yapëtaneme Dioso pejumelivaisi, jamatabëcuenecaëjëpaenatsi daxita xua pexaniacueni pexanaenexa.

**4** Pepo petuxanenë Jesucristo patsianica penaneconitsiaexanaenexa daxita pibisiacueni pexanaevi. Naneconitsiaexanaena piasaëtsavanapaevi, petëpaevi ata. Bajaraponë itsa patsianica, daxitacueni pevetsinexa, patsianica. Jesucristo pitabarata, Dioso ata pitabarata, xanë jamatabëcuenereviaya caitorobatsi mapacueniaje. <sup>2</sup>Daxitamatacabi jivi tsipaebare Dioso pitorobilivaisi. Ajamatabëcuenesaëya Dioso pitorobilivaisi tsipaebaponare. Paepatota jivi jitsipa pecanamuxunaevetsinexa, tsipaebare. Paepatota ata apo jitsipae pecanamuxunaevetsinexa, itsiata tsipaebare. Dioso pitorobilivaisi jivi jumecovënëtsiaexanare. Itavere pibisiacueni pexanaejava. Muxujibare pijamatabëcuenesaënexa Diosojavabelia. Tsi-

paebaponare xaniavaetsia Dioso pejumelivaisi bajayajebi jamatabëcuene cueranaenejevamë.<sup>3</sup> Bjarapacuenia tsipaebaponare tsipaji raja itsamatacabi jivi apo namuxunaevetsi tsane pexaniajailivaisi petsipaebijavatsi. Biji rajane itsamatacabi jivi pijacuata natojatsiana saicayalivaisi Dioso pejumelivaisivecua ayaibitsaëto petsipaebinxatsi. Bjarapamonae pijacuata junatsiana petsipaebinxatsi palivaisi muxujitsipa.<sup>4</sup> Nexata pexaniajailivaisi petsipaebiyavatsi, navecuaitavetsiana. Jume covënëtsiana saya ênatsiquejemalivaisixi.<sup>5</sup> Itsiata baitsi jane xamë saicaya nayajivitaeyaponaponare. Daxita pacuenia Dioso catocopata nexanaenexa, veretsianame. Catoayapëbeje ata, itsamonae cabejiobiaexanae ata, casaëmëre tsaponaponae nevajënaeyabelia. Casaëmëre tsaponaponae jivi netsipaebijava pexanialivaisi peca panepaelivaisinxatsi Diosojavabelia.

<sup>6</sup> Xanë baja netoimoxoyo tsaponae tatonacaevetsinexa tanebeyaxuabinexa. <sup>7</sup> Pacuenia pebitsojinaenë pecujinaejinaejava daxitasaëta cujinaejinaeya pata, bjarapacuenia xanë ata xaniavaetsia daxita tasaëta tonacuenebajë tajatuxanenë. Toveretaponajë baja tatonacuenebijava taneitorobicuenia. Apo copatsinë cajena tanajamatabëcuene copatsijava Diosojavabelia. <sup>8</sup> Pacuenia penayacobijavata, pebitsojinaenë pecujinaejinaejava, barajutatsi corona pecujinaejinaematamo, bajara pijinia pacuenia xanë ata vajatuxanenë athëbëtatsia nerajutsiana pexaniacuene taneitorobicuenia tatoponaponaexae. Bjarapacuenie nerajutsiana pamatacabi vajatuxanenë patsianica. Itsiata baitsi jane ëxanë apo nerajutsi tsane bjarapacuenie. Daxita pamonae ata ajamatabëcuenesaëya vajënaeevetavanapa pepatsijavatsica Jesucristo, bjarapamonae ata rajutsianatsi bjarapacuenie. Vajatuxanenë itsa patsianica, naneconitsiaexanaena daxita pamonae naneconita bjaraponëjavabelia. Vajatuxanenë itsa naneconitsiaexanaena daxita pamonae naneconita bjaraponëjavabelia, itaxutojema apo naneconitsiaexanae tsane. Paneconivajëto caejivi canacujitsia xainapona, bjarapaneconivajëtota naneconitsiaexanaponaena.

### **Pacuenia Pablo jumaisi Timoteojavabelia yabara pelivaisi**

<sup>9</sup> Itsa cacuenecaëjëpa neponaejava, bepijiayo netaeyojopaeremena. <sup>10</sup> Demasvënënë rabaja nexuabatabajirava. Tsipaji Dioso pejumelivaisi matatoxenetsia jitsipa bitso mapanacuapijicueje. Pona baja nexata Tesalónica tomarabelia. Crescentevënënë baja itorobajë Galacia nacuyabelia. Tito pijinia itorobajë Dalmacia nacuyabelia. <sup>11</sup> Caenë Lucas xanëjavata ponapona. Jaire Marcos. Bjaraponë caëjëpatsi taneyavenonaenexa Dioso tatonacuenebijava. Nexata barërenamë tsane. <sup>12</sup> Tíquico baja itorobajë Efeso tomarabelia. <sup>13</sup> Itsa renamë tsane xanëjavaberena, Troas tomarata tajacamisajumavelia tanaxatatsijava netopitaponaeremena. Carpovënënë raja pijabota puenetarutajë. Tajalibronënu, tajacuyalatobaxutoxinua, netopitaponaeremena. Bitso tajacuyalatobaxutoxi namatavenonajë.

<sup>14</sup> Alejandro, cobrenanita daxitacuene pexanaenë, bitso baja cajena pibisiacuene nexana. Itsiata baitsi jane Dioso neyamatomotsiana tanebejiobiaexanaematamo. <sup>15</sup> Nayajivitaema bjaraponë. Tsipaji raja bitso itoya patatsipaebaponaelivaisi.

<sup>16</sup> Pamatacabi nayajivicuaicuaijanë majotaje Roma tomarata, nacua pevetsivi pitabarata, itsajivi ata apo neyavenonaeyacuicuaijai. Daxita nexuabanuta. Nexata bjarapamonae tovajëtajë Diosojavabelia penaneconitsiaexanaeyanivatsi tanexuabanutsijamatabëcuene. <sup>17</sup> Itsiata baitsi jane bjarapaepatota vajatuxanenë

neyavenona. Vajatuxanenë pesaë nerajuta daxitalivaisi tatsipaebinexa. Apo judfovi ata pejumecovënëtsinexa, bajarapalivaisi tsipaebaponajë Diosojavabelia pecapanepaelivaisinexatsi. Tanexuabanutsijavata picani netsiayai tanebeyaxuabinexa. Itsiata vajatuxanenë necapanepa tanebeyaxuabijavaminexavecua.<sup>18</sup> Vajatuxanenë cajena necapanepaponaena daxita pibisiacuene taneexanaeyaniva. Necaponaena athëbëabetsia bajaraponë pevetsinacuayabetsia. Vaxaitsi jumai tsabiabi tsanetsi Diosojavabelia daxitamatacabijavabelianexa: “Diosomë, pinijicuene baja cajena nexanaenë,” jai tsabiabi tsanetsi.

**Pacuenia Pablo Timoteo tonajumeitoroba Efeso tomarabelia  
pebajacobinexatsi peyapëtaevitsi yabara pelivaisi**

<sup>19</sup> Nebajacobiana Prisca. Prisca pamona ata, Aquila, nebajacobiana. Nebajacobiana Onesíforo pijamonae ata.<sup>20</sup> Erasto nacopatajopa Corinto tomaratalia. Trófimo pijinia puenetajë Mileto tomaratalia. Tspaji avitane.<sup>21</sup> Itsa cacuenecaëjëpa, naxanitsiayo renamë tsane emarapae pecopiajopaevajënaeya. Cajamatabënajina pina Eubulo, Pudente ata, Lino ata, Claudia ata, daxita itsamonae Dioso pejumecovënëtsivi yajava.

<sup>22</sup> Catovajëtatsi vajatuxanenë Jesucristo pecayajavaponaponaenexa. Daxita paxamë pacatovajëtatsi Dioso papecayavenonaenexa.

## Mapabaxutoje San Pablo toyaquina Titojavabelia

### Pacuenia Pablo mapabaxutoje toyaquina Titojavabelia yabara pelivaisi

**1** Xanë Pablonë, Dioso pijajivitonënë. Jesucristo ata pijaapóstolenënë. Jesu-  
cristo baja cajena nitoroba jivi tayavenonaenexa Diosojavabelia penaja-  
matabëcuencopatsinexa. Dioso baja cajena tajëvelia itapeta bajarapamonae pe-  
najamatabëcuencopatsinexa Diosojavabelia. Jesucristo nexata nitoroba bajarapamonae tatsipaebinexa pexaniajailivaisi Dioso pitabarata bajarapamonae xani-  
avaetsia pejinavanapaenexa. <sup>2</sup>Jesucristo nitoroba tatsipaebinexa pexaniajailivaisi  
bajarapamonae ata pexainaenexa matababi apo pevereverecaajava. Pepo bajay-  
atami, Dioso abaxë nacua ata itsa apo exanae, Dioso najumecapanepaeya ju-  
maitsi vajanacarajutsinexa matababi apo pevereverecaajava. Dioso baja cajena  
apo penajumetsënëtsinë. <sup>3</sup>Nexata baja Dioso pecaējëtsimatababita, bajarapalivaisi  
nacayapëtaeyaexana. Nexata Dioso, vajanacacapanepaenënexa, xanë nitoroba jivi  
tatsipaebinexa bajarapalivaisi. Nexata xanë daxitajivi tsipaebaponajë bajarapali-  
vaisi. <sup>4</sup>Tito, betaxënatomëcuenia tacataenë. Tsipaji cayavenonatsi xamë ata ne-  
jumecovënëtsinexa Jesucristo pelivaisi. Catoyaquinatsi mapabaxutoje. Catojitsi-  
patsi vaxa Dioso pecayavenonaenexa, Jesucristo ata, vajanacacapanepaenënexa,  
pecayavenonaenexa. Catojitsipatsi pecaitaxutotsoniataenexa, pecajamatabëcuene  
xanepanaeyaexanaenexana.

### Pacuenia Pablo Tito puenetanuta Cretatunaeto nacuata petonacuenebinexa Dioso pijacuene yabara pelivaisi

<sup>5</sup>Capuenetatsi baja cajena Cretatunaeto nacujavata. Capuenetatsi nexanapon-  
ponaenexa, xua abaxë catosajina nejamatabëcueneasaëyaexanaenexa Dioso pe-  
jumecovënëtsivi. Caitorobatsinua baja cajena caetomarapijivi canacujitsia ni-  
tapetsinexa ancianovinexa, Dioso pejumecovënëtsivi pevetsivinexa. <sup>6</sup>Nejumen-  
jamatabënapire pacuenia caitorobatsi. Itsa itapetsijitsiamë ponë ancianonënexa,  
itapetsianame ponë toajibitsi jivi peyabaraneconitsijavanexatsi. Caeva pepitsinë.  
Pexi Dioso petojumecovënëtsinëtsi. Pexi apo petoacujirubejenëtsi. Pacuenia ata pexi  
itoroba, pejumecovënëtsinëtsi. <sup>7</sup>Tsipaji ponë itapetsianame ancianonënexa, Dioso  
pijacuene tonacuenebiana. Bajaraxuata ancianonënexa, itapetsianame ponë xani-  
avaetsia peponaponaenë, pianeconijibinë. Beayaijamatabëcuenenë apo penataenë.  
Bepijia apo pianaepanaenë. Apo piapaenë piatajibinexa. Pevëna pebi apo pebenë.  
Apo pejitsipaenë itsajivi ata yamaxëitojorobiaya pevecuanacobetoxotsinexa palata.  
<sup>8</sup>Ancianonënexa, xanepana ponë xaniavaetsia copiapitabiaba pijabota pepatsivi.  
Pexaniacuene pexanaenë. Xaniavaetsia copiaya penajamatabëxainaenë pacuene ex-  
anaejitsia. Xaniavaetsia peponaponaenë jivi pitabarata, Dioso ata pitabarata. Pex-  
anaponaponaenë daxita pacuenia Dioso pejumelivaisita itoroba jivi pexanaenexa.  
Pecaējëpaenëtsi penajamatabëcuencataitsinexa pibisiacuene pexanaeyaniva. <sup>9</sup>An-  
cianonënexa, xanepana ponë casaë tsaponapona pejumecovënëtsijava palivaisi tsi-  
paebatsi, pexaniajailivaisi. Bajarapacuenia nexata bajaraponë caējëpaenatsi itsa-  
monae ata pejamatabëcuenebabatsinexa pexaniajailivaisita. Caējëpaenatsinua xani-  
avaetsia pejumecanaviatsinexa pamonae jamatabëcuenenavëxaniabiaya pibisiacue-

nia baracuaicuaijai Dioso pejumelivaisi. Nexata ancianonë xaniavaetsia itsa jume-canaviatsiana pamonaë pibisiacuenia baracuaicuaijai Dioso pejumelivaisi, bajarapamonaë ata jumecovënëtsiana Dioso.

<sup>10</sup> Bajarapitsijamatabëcuenevi itapetaponaename ancianovinexa. Tsipaji raja Cretatunaeto nacuata, Dioso pejumecovënëtsivi tuatujëta, ayaibitsaëto jinavanapa apo pejumecovënëtsivi pacuenia itorobatsi pevetsivitsi. Bajarapamonaëyajuvëni ayaibitsaëto judfovi. Bajarapajudfovi jumai tsabiabi: “Pamonaë apo judfovi ata Jesús pelivaisi itsa jumecovënëta, bajarapamonaë ata benaperabëcaucubiaexana,” jai tsabiabi. Bajarapajudfovi natsiquejmalivaisi saya cuaicuaijai tsabiabi. Nexata yamaxëitojorobapona Dioso pejumecovënëtsivi. <sup>11</sup> Bajarapajudfovi bejumeitave-tame. Tsipaji saya penajumetsënëtsilivaisi jivi tsipaëbapona Dioso apo pejitsipae-cuenia. Bajarapajudfovi, caëbopijivi canacujitsia, Dioso pejumecovënëtsivi, najamatabëcuene epatajërërëcaeyaexanapona Dioso pejumecovënëtsijavavecu. Bajarapajudfovi penajumetsënëtsilivaisi jivi tsipaëbapona saya pematamotsinexatsi palata.

<sup>12</sup> Bajayata pina livaisi bitso peyapëtaenëmi ponapona Cretatunaeto nacuata. Nexata pina bajaraponëmi jumaitsi Cretatunaeto nacuapijivi yabara mapacueni-aje: “Cretatunaeto nacuapijivi cajena bitso penajumetsënëtsivi. Bitso piacujirube-jevi. Ayaijavanua jamatabëxaeyabiaba. Bitso afaetabinua,” jai pina cajena bajayata Cretatunaeto nacuapijinëmi. <sup>13</sup> Xaniajai baja cajena pacuenia jumaitsi bajaraponëmi. Bajara jamatabëcueneitsi Cretatunaeto nacuapijivi. Tito, nexata xamë asaëyata itorobare bajarapamonaë xaniavaetsia penajamatabëcuene copatsinexa Dioso javabelia. <sup>14</sup> Itavere bajarapamonaë penamuxunaevetsiyaniva judfovi pijasali-naivimi pijalivaisixi. Itaverenua bajarapamonaë pejumecovënëtsiyaniva pacuenia itorobaponatsi pamonaë copaba pexaniajailivaisi pejumecovënëtsijavami.

<sup>15</sup> Pajivi jumecovënëta Jesucristo pesivatëpaejavatsi, bajarapajivi ajamatabëcuene xuirajibi. Bajarapajivi daxita xua tane, ëpexaniacuenia sivanajamatabëxaina. Nexata itsacuenëjavayo ata apo jamatabëcuene bijianaetsi. Pajivi pijinia apo jumecovënëtsi Jesucristo pesivatëpaejavatsi, bajarapajivi ajamatabëcuene xuire. Nexata bajarapajivi daxita xua tane, pibisiacuenia sivanajamatabëxaina. Nexata daxitacuenë jamatabëcuene bijianatsi. Pibisiacuenë exanabiabi ata, jamatejema saya ponapona. <sup>16</sup> “Xanë rabaja bitso Dioso yapëtaniji,” jai tsabiabi. Itsiata baitsi jane bajarapamonaë pibisiacuenë exanavanapa. Nexata nayapëthane Dioso apo peyapëtaëjava. Bajarapamonaë itoya Dioso. Bajarapamonaë apo jumecovënëtsi pacuenia Dioso itorobatsi. Nexata apo caëjëpaetsi itsacuenëjavayo ata pexaniacuenë pexanaenexa.

### **Pacuenia Pablo Tito itoroba pexanialivaisi jivi petsipaëbaponaenexa yabara pelivaisi**

**2** Tito, xamë jivi livaisi itsa tsipaëbabiabianame, tsipaëbabiabianame ëpex-aniajailivaisi. <sup>2</sup> Perujupebijivi muxujiobabiabianame penajamatabëcuene-reviabinexa. Muxujiobabiabianame xaniavaetsia pejinavanapaenexa jivi peyayi-ataenexatsi. Muxujiobabiabianame penajamatabëcuene cataitsinexa pibisiacuenë pexanaeyaniva. Muxujiobabiabianame pexaniajailivaisi, Jesús pelivaisi, xaniavaet-sia pejumecovënëtsinexa. Muxujiobabiabianame daxitajivi asivaya petaenexa. Mux-ujiobabiabianame, itsamonae bejiobiaexanae atatsi Dioso pejumelivaisi yabara, pe-vajënaeyabelia pecaasaënexa Dioso pejumecovënëtsijava. <sup>3</sup> Bajara pijinia pacue-

nia muxujobiabianame perujupetiriavi ata jamatabëcuenereviaya pejinavana-paenexa Dioso pitabarata. Bajarapamonae pibisiacuenia itsamonae apo be-baracuaicuajai. Apo biaitajibi tsabiabinua. Bajarapapetiriavi itsamonae pexani-acuene betsitaexanavanapa. <sup>4</sup>Nexata perujupetiriavi itsamonae pexaniacuene itsa tsitaexanavanapa, jamatabëcuencujarubiana pecovëpijipetiriavi ata xaniavaetsia pamonajivi piasivanexa, penacoxiasivanexanua. <sup>5</sup>Perujupetiriavi itorobianame pe-muxujobiabianexa pecovëpijipetiriavi ata penajamatabëcuenereviabinexa, pex-aniamatabëcuene ata penajamatabëxainanexa. Perujupetiriavi muxujobiabiabi-aname pijabo ata xaniavaetsia pevetsinexa, pexaniacuene ata pexanabiabinexa, pa-monajivi ata xaniavaetsia pejumecovënëtabiabinexa. Nexata juya perujupetiriavi muxujobiabianexa pecovëpijipetiriavi xaniavaetsia pejinavanapaenexa. Nexata ba-jarapamonae xaniavaetsia itsa jinavanapaena, itsajivi ata pibisiacuenia Dioso pe-jumelivaisi apo baracuaicuajai tsane.

<sup>6</sup>Bajara pijinia pacuenia muxujobiabianame pevëjëavi penaja-matabëcuencataitsinexa pibisiacuene pexanaeyaniva. <sup>7</sup>Xamë xaniavaetsia bajarapamonae ëpexaniacuene tsitaexanaponaponaenename. Nexata bajarapacuenia daxitajivi cacuenetaena xaniavaetsia neponaponaejava. Pexanialivaisi itsa tsipaebabiabianame, tsipaebabiabianame nejamatabëëthëtovetsina nexaniajajumeta jamatabëcuenereviaya. <sup>8</sup>Xaniavaetsia tsipaebabiabianame pexaniajailivaisi. Bajarapacuenia itsa exanabiabianame, pecaitoyavi ata aura tsane. Tsipaji ajibi tsane pecayabarananeconitsiaexanaejava.

<sup>9</sup>Pajivi bedajubicuenia canajetatsi petonacuenebabiabinexa amoneya pijatux-anenë, bajarapajivi muxujobiabianame pijatuxanenë pejumecovënëtsinexa daxita pacuenia itorobatsi. Muxujobiabianame xaniavaetsia pijatuxanenë pet-onacuenebabiabinexa pesivajamatabëcuenebarëyanexatsi. Pëtsa bajarapajivi apo je-jai pijatuxanenë pitorobijavatsi. Pëtsa jumaitsi pijatuxanenëjavabelia: “Jume raja. Bajarapacuenia apo xanepanae tacatoexanaenexa. Mara jane pacuenia xanepana tacatoexanaenexaje,” jai pëtsa. <sup>10</sup>Pëtsa bajarapajivi muetsia pita pijatuxanenë pi-jajava. Biji rajane pijatuxanenëjavabelia tsitanajamatabëcueneitajëtsi daxitacuene xaniavaetsia petonacuenebabiabijava nacobetoxotsinejeva. Bajarapacuenia itsa ex-anaena bajarapajivi, nexata daxitajivi yapëtaena Dioso vajanacacapanepaenënexa pejumelivaisi pexaniajailivaisicuene.

<sup>11</sup>Dioso baja cajena nacayapëtaeyaexana vajanacaitaxutotsoniataejava. Nexata Dioso nacacapanepaena daxitanacuapijivitsi. <sup>12</sup>Dioso vajanacayapëtaeyaexanaexae vajanacaitaxutotsoniataejava vajanacacapanepaenexa, nexata becopatatsi pibisi-acuene vajaexanaejavami. Bitso vajajitsipaejava ata mapanacuapijicuene vajax-ainanexa, becopatatsi. Dioso rajane jitsipa mapanacuata nayajivitaeya vajajina-vanapaenexa pibisiacuene vajaexanaeyaniva. Nexata Dioso pejitsipaecuenia be-toexanavanapatsi. Dioso cujunaviaya xaniavaetsia bejinavanapatsi. <sup>13</sup>Bajarapacue-nia Dioso cujunaviaya xaniavaetsia bejinavanapatsi paepatojebi Jesucristo copi-aevetavanapatsi icatsia pepatsijavanexatsica. Nexata icatsia pamatacabi Jesucristo patsianica, sivajamatabëcuenebarëyatsi tsane. Pacuenia Dioso tajëvelia najume-capanepaeya nacajumaitsi Jesucristo pepatsijavanexatsica, bajarapacuenia xani-ajai Jesucristo patsianica. Jesucristo rabaja cajena, pinijiDiosonë, vajanacaca-panepaenexa. Bajaraponë penivenivenaecotia yajavapatsianica. <sup>14</sup>Bajaraponë pi-jacuata tonacaeveta pijavajabitsaë pebeyaxuabinexatsi. Nexata Jesucristo itsa



beyaxuabatsi, pijanata nacacomuata pibisiacuene vajaexanaeconivecua. Nacave-cuaajibiaexana baja bajarapaneconimi Jesucristo pijajivitsi vajanacaexanaenexa. Nacajitsipaeyaexananua epexaniacuene Jesucristo vajatoexanaenexa.

<sup>15</sup>Daxita bajarapacuenia muxujobaponaename. Jamatabëcuenebabataponae-name asaëya bajarapamonae. Asaëya muxujobabianame pibisiacuene itsa ex-anapona. Bajarapacuenia muxujobabianame Dioso pecatocopatsixae bajara-pacuenia nexanaponaenexa. Pëtsa copatame itsajivi ata bijiaya pecataenexa.

### **Pacuenia Dioso pejumecovënëtsivi pexaniacuene bexanavanapa yabara pelivaisi**

**3** Dioso pejumecovënëtsivi, Cretatunaeto nacuapijivi, najamatabënapitsiaex-anaename yaiyataeya pejumecovënëtsinexa gobierno pitorobilivaisi, pejumecovënëtsinexanua gobierno pijajivi ata. Itorobianamenua bajarapamonae pex-anaenexa daxitaxua pexaniacuene. <sup>2</sup>Muxujobabianame bajarapamonae itsajivi ata pibisiacuenia pebaracuauicuijaiyaniva. Muxujobabianame bajarapamonae, itsamonae itsacueniabi atatsi, pecueneceaviatsiyaniva. Muxujobabianame bajarapamonae pexaniajamatabëcuenia pebarëcuauicuijainexa daxitajivijavabelia. Itorobianamenua daxitajivivecua beveliajamatabëcuenevi nataeya pejinavanapaenexa.

<sup>3</sup>Itsa abaxë vaxaitsi ata Dioso apo jumecovënëtsitsi, saya picani jema jinavana-patsi. Apo exanavanapaetsi pacuenia Dioso nacaitoroba. Apo exanavanapaetsinua pacuenia nacuaeetsivi ata nacaitoroba. Naxuabiaya saya jinavanapatsi Dioso pe-jumelivaisivecua. Pibisiacuene, pacuene vajavitota jamatabëexanatsi, exanavanapatsi. Pacuene ata nacajamatabëcuenebarëyayaexana, exanavanapatsi. Pibisiacuene bitso exanavanapatsi itsamonaejavabelia. Itsamonae cueneceababiabatsi. Daxitajivi nacaitoya tsabiabi. Vaxaitsi ata namataenetsia naitoyatsi tsabiabi. <sup>4</sup>Bajara vajaitivimi ata, itsiata Dioso, vajanacapanepaenënexa, nacayapëtaeyaexana vajanacaitaxutotsoniataecuene. Nacayapëtaeyaexananua pacuenia ata Dioso nacaasiva daxitatsi mapanacuapijivitsije. <sup>5</sup>Dioso nacacapanepaena vajaneconivecua. Itsiata baitsi jane pexaniacuene vajaexanaejava yabara, Dioso apo nacacapanepae tsane. Jume baja cajena. Dioso raja nacacapanepaena tsipaji nacaitaxutotsoniatane. Nexata nacajamatabëcuenequiata. Dioso vajanacaitaxutotsoniataexae, nacacapanepaena. Espiritu Santo pejamatabëcueneta pejanajamatabëcuenevitsi baja nacaexana. <sup>6</sup>Dioso baja cajena ayaiacuenia vajanacayavenonaenexa, Espiritu Santo nacatoitorobica vaxaitsijavabetsica. Bajarapacuenia Dioso Espiritu Santo nacatoitorobica Jesucristo vajanacacapanepaenënexa pejamatabëctsoniatane. Nexata nacajamatabëcuenequiata. Dioso vajanacaitaxutotsueneta. <sup>7</sup>Bajaraxuata Dioso vaxaitsi yabara jumaiti: “Bajarapamonae baja aneconijibia taniji,” jai Dioso. Tsipaji nacaitaxutotsoniatane. Nexata vaxaitsi xainaenatsi matacabi apo pevereverecea-  
java, xua copiaevetavanapatsi.

<sup>8</sup>Daxita baja palivaisi pacatoyaquinatsi, pexaniajailivaisi cajena. Nexata jitsipajë ajumesaëya jivi netsipaebaponaenexa bajarapalivaisi. Nexata Dioso pejumecovënëtsivi epexaniacuene pexanaenexa pejamatabëcueneenaenexatsi. Bajarapalivaisi bitso xanepana daxitajivi pejumecovënëtsinexa. <sup>9</sup>Nexata navecuaitavetsianame saya jema natsiquejemalivaisixi itsamonae pecabarëcuauicuijaiyaniva. Navecuaitavetsianamenua judíovi pijasalinaivimi pevënëxi yabara pecabarëcuauicui-

jaiyaniva. Navecuaitavetsianamenua Dioso Moiséspijinëta penajumecopatsilivaisi yabara anaeya pecajumenotsiyaniva. Bajarapacuenia pecabarëcuaijajava apo xanepanae tsipae itsacuenejavayonexa ata.

<sup>10</sup>Itsamonae penajumetsënëtsilivaisi jivi tsipaebapona. Nexata bajarapamonae penajumetsënëtsilivaisita Dioso pejumecovënëtsivi navecuanatsanaeyaexanapona. Bajarapapamonae jumeitavetsianame. Anijatobeje ata jumeitavetsianame. Nexata bajarapamonae copatsiana penajumetsënëtsilivaisi jivi petsipaebaponaejava. Jumeitavetsi atamë, itsiata itsa apo cajumecovënëtsi tsane, nexata bajarapamonae itorobianame itsajavabelia peponaenexa. <sup>11</sup>Yapëtaneme rabaja mapacueneye. Ponë peneta copata pexaniajailivaisi pejumecovënëtsijavami, pibisiacuenexana. Nexata bajaraponë naneconita Diosojavabelia pibisiacuenexana.

**Pacuenia icatsia Pablo itsalivaisi toitoroba Tito asaëya  
Dioso petonacuenebinexa yabara pelivaisi**

<sup>12</sup>Catoitorobialiamsi Artemas. Itsa jume, catoitorobialiamsi Tíquico. Bajaraponë itsa patsialia xamëjavabelia, nexata xamë bepíjia renamë tsane xanëjavaberena. Nacaxitajarabianatsibeje Nicápolis tomarata. Daxita emarapae raja ponaponae-najë Nicápolis tomarata. <sup>13</sup>Itsa baja pacavecuaponaena Zenasbeje Apolosbeje, nexata yavenonaename pacuenia namatavenonaenabeje pijanamutobejenexa. Zenas raja abogadonë, penaneconitsivi peyavenonaeyacuaijainë. Rajutsianame pacuenia namatavenonabeje, itsacuenejavayo ata petosajinaeyanivatsibeje itsa najetaru-cabeje namuto. <sup>14</sup>Pamonae vaxaitsi pexanialivaisi tsipaebatsi, bajarapamonae tojitsipajë peyapëtaenexa xua pexaniacuenexa. Nexata ëpexaniacuenexa pexanaenexa. Nexata bajarapamonae tojitsipajë asaëya penacuenebinexa, peyavenonaenexa pamonae bitso bepejiobivi. Pëtsa saya bajarapamonae jinavanapa nacuenebinejeva.

**Pacuenia Pablo itsamonae jamatabënajina yabara pelivaisi**

<sup>15</sup>Daxita pamonae yajavaponaponajë, cajamatabënajinalia. Pajamatabënajinali-ajë daxita pamonae pataniasivavi, Dioso pejumecovënëtsivi. Pacatovajëtatsi Diosojavabelia daxita paxamë Dioso papeyavenonaenexa.

## Mapabaxutoje San Pablo toyaquina Filemónjavabelia

### Pacuenia Pablo mapabaxutoje toyaquina Filemónjavabelia yabara pelivaisi

**1** Xanë Pablonë, Jesucristo pijajivitonëxaenë, Jesucristo pelivaisi jivi tsipae-babiabajë. Bajaraxuata nenaneconitsiaexana. Nexata penaneconitsivi pejebabiabibota naneconitsiaponaponajë. Filemón, paxanëbeje vajabananë Timoteobeje, bitso pacaasivatsibeje patacayajavanacuenebabiabinëxaebeje. Paxanëbeje, paca-toyaquinatsibeje mapabaxutoje. <sup>2</sup> Patoyaquinajëbejenua mapabaxutoje pamonaë Dioso pejumecovënëtsivi, nijabota penacaetuatabiavivi. Patoyaquinajëbejenua mapabaxutoje vajabanava Apiavënëva ata. Patoyaquinajëbejenua mapabaxutoje Arquipo ata Dioso pijacuene tonacuenebabiabajë, bajarapacuenia Arquivo ata Dioso pijacuene tonacuenebabiaba. <sup>3</sup> Pacatovajëtabiabat si vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

### Pacuenia Pablo tovajëta Filemón Diosojavabelia yabara pelivaisi

<sup>4-5</sup> Filemón, cavënëlivaisitanetsi niasivajava vajatuxanenë Jesucristo, daxita Dioso pejumecovënëtsivi yajava. Cavënëlivaisitanetsinua nenajamatabëcuenecopatsijava pepo petuxanenë Jesúsjavabelia. Bajaraxuata itsa cajamatabënajinatsi, catovajëtabiabat si Diosojavabelia. Nexata pexaniajamatabëcuene rajutabiabajë Diosojavabelia xamë yabara. <sup>6</sup> Pamonaë ata Diosojavabelia najamatabëcuenecopaba xamë pexanialivaisi netsipaebixae, bajarapamonaë ata tovajëtabiabajë Diosojavabelia. Tovajëtabiabajë bajarapamonaë xaniavaetsia peyapëtaenexa Dioso vajanacayavenonabiabijava Jesucristo pijajivixae. <sup>7</sup> Itsamonaë ata Dioso pejumecovënëtsivi niasivaxae, casivajamatabëcuenebarëyatsi. Cavënëlivaisimuxua najamatabëcuenesaëtsi. Tsipaji daxita Dioso pejumecovënëtsivi jamatabëcuenebabatabiabame.

### Pacuenia Pablo itoroba, Filemónjavata Onésimo itsa pata, xaniavaetsia Filemón pecopiapitsinexa yabara pelivaisi

<sup>8</sup> Xanë Cristo taneitorobinëxae, nejamatabëcuenecaëjëpa picani tacaitorobinexa xua bexaname Dioso pecasivabarëyanexa. Itsiata baitsi jane apo caitorobi tsanetsi. <sup>9</sup> Tacaasivaxae, saya pexaniacuenia cavajëtatsi pexaniacuenetaneoexanaenexamë. Xanë Pablonë, perujunëbaja. Maparucaeje naneconitsiaponaponajë penaneconitsivi pejebabiabibota Jesucristo pijajivitonëxaenë. <sup>10</sup> Majotaje, xanëjavata, nijajivitonë Onésimo patajopa, pecavecuanajetabajiravinë. Nexata cavajëtatsi pexaniacuenetaneoexanaenexamë Onésimojavabelia. Onésimo raja betaxënatocuenia tataanë pejumecovënëtsixae Jesucristo pelivaisi. Pexanialivaisi, Jesucristo pelivaisi, Onésimo tatsipaebixae, jumecovënëta baja Jesucristo pelivaisi. Jesucristo pelivaisi Onésimo jumecovënëta majotaje, penaneconitsivi pejebabiabibota.

<sup>11</sup> Onésimo baja cajena bajayata bedajubinëcuenia comuatame amoneya nijabota pecatonacuenebabiabinexa. Nexata bajarapamatacabi catonacuenebi ata, itsiata itsacuenëjavayo ata xaniavaetsia apo catonacuenebi. Itsiata baitsi jane maparucaeje Jesucristo baja pelivaisi Onésimo pejumecovënëtsixae, xanënexa

xaniavaetsia netonacuenebaponapona. Nexata baja aeconoxae itsa naviatsipa xamëjavabelia, xamënexa ata xaniavaetsia catonacuenebijitsipa. <sup>12</sup>Nexata icatsia Onésimo catoitorobaliatsi mapabaxuto yajavaje. Copiapitsianame xaniavaetsia. Tsipaji Onésimo bitso tasivanë. Itsa baja ponaponaena xamëjavatalia, jamatabënajinabibianajë bitso. <sup>13</sup>Naneconitsiaya ponaponajë penaneconitsivi pejebabiabibota pexanialivaisi, Jesucristo pelivaisi, jivi tatsipaebabiabixae. Bitso picani Onésimo asivanë xanëjavata peponaponaenexa. Nexata Onésimo itsa ponaponaejitsipa xanëjavata, neyavenonaponaponaejitsipa xaniavaetsia. Taneyavenonaponaenexa, betanetoitorobinëmëcuenia neyavenonabibijitsipa. <sup>14</sup>Itsiata baitsi jane apo jitsipaenë Onésimo taneyavenonaponaponaenexa copiaya cavajëtsinejevatsi. Apo jitsipaenëna tacavajëtsinexa tanetocopatsinexamë bajaraponë taneyavenonabibinexa. Biji rajane picani jitsipajë cavajëtsinejevatsi nijacuate tanetocopatsinexamë bajaraponë. <sup>15</sup>Onésimo picani itsa cavecuanajetabajirava, cavecuanatsata caematacabibeje. Itsiata baja icatsia aeconoxae xamëjavabelia naviatsijitsialia. Nexata jane baja daxitamatacabijavabelianexa nijajivitonë tsaponapona tsane. <sup>16</sup>Pëtsa baja taneme saya nijajivitonëcuenia. Biji rajane nijajivitonë ata, Dioso pejamatabëcueneta asivaya taename benejuyapijinëcuenia. Xanë picani bitso asivanë Onésimo. Itsiata xanë bajaraponë tasivajava matatoxenetsia, xamë bitso asivamë tsane. Tsipaji xamë bajaraponë nijajivitonë. Nejuyapijinëna baja Dioso pejamatabëcueneta.

<sup>17</sup>“Pablobeje rabaja patanajuaponaponaenëbeje,” itsa nesivajamatabëjamë tsane, nexata Onésimo xaniavaetsia copiapitsianame, pacuenia xanë necopiapitabiabame. <sup>18</sup>Onésimo itsa catonaneconita, itsa camoneyabanua, nexata xanë bajaraxuamatamo neyanijobianame. <sup>19</sup>Peneta raja paitanebërëtoyo jumaitsi: “Xanë Pablonë. Camatamotsianatsi cajena,” jai, xanë tajacuata tacobeta yaquinajë. Itsiata pijinia pacuenia niamoneyabame, apo catoitajëtsitsi. Tsipaji itsa catoitajëtsipatsi pacuenia niamoneyabame, nexata jitsipaejitsipame daxitanëmë, nejamatabëcuene yajava, tanerajutsinexamë. <sup>20</sup>Tajabananë, pacuenia cavajëtatsi, xaniavaetsia copiapitsianame Onésimo Jesucristo pijajivitonëxaemë. Xaniavaetsia Onésimo itsa copiapitsianame, bitso nejamatabëcuenebarëyaya exanaename.

<sup>21</sup>Catoyaquinatsi mapabaxutoje tsipaji yapëtaniji tanejumecovënëtsijavanexa tacaitorobicuenia. Casivajamatabëjumaititsi mapacueniaje: “Filemón cajena taitorobicuenia matatoxenetsia xaniavaetsia copiapitsiana Onésimo,” casivajamatabëjaitsi. <sup>22</sup>Caecuenia tavajënaeyabelia cavajëtatsi tavajënelia nijabota tanetoxaniavaetsinexamë, itsajota patsijitsianë itsa ponajë paxamëjavabelia. Tsipaji bajayajebi panetovajëcabiabame Diosojavabelia tapatsinexa paxamëjavabelia. Nexata jamatabëjumaitsinë: “Pacuenia bajarapamonae netovajëcabiaba Diosojavabelia, bajarapacuenia Dioso netocopatsiana,” jamatabëjanë taponaponaenexa paxamëjavabelia.

### **Pacuenia itsamonae jamatabënajinatsi Filemón yabara pelivaisi**

<sup>23</sup>Epafras, ponëbeje panajuaponaponaenëbeje penaneconitsivi pejebabiabibota Jesucristo pijinia pijajivitonëxae, bajaraponë cajamatabënajinalia. <sup>24</sup>Cajamatabënajinalia Marcos ata, Aristarco ata, Demas ata, Lucas ata. Cajamatabënajinalia daxita bajarapamonae patanajuanaacuenebivi Dioso pijacuene. <sup>25</sup>Pacatovajëtabiabatsi Diosojavabelia vajatuxanenë Jesucristo papecayavenonabibinexa.

## Mapabaxutoje Dioso pijajivitonē toyaquina judíovijavabelia

### Pacuenia Dioso pexēnato itoroba jivijavabelia petocuaicuaijainexatsi yabara pelivaisi

**1** Bajayatami Dioso anijatonē najamatabēcueneitajētabiaba Diosojumepaebivi profetavijavabelia. Nexata juya profetavi tsipaebabiaba vajasalinaivimijavabelia pacuenia Dioso itorobatsi. Bajarapacuenia Dioso najamatatabēcueneitajētabiaba profetavijavabelia matabiaba bemajitsinaebocuenia. Itsajavata Dioso najamatabēcueneitajētabiaba profetavijavabelia meravi majitsinaebota. Itsajavata pepacuene Dioso roviaľia barēcuaicuaijai tsabiabi profetavijavabelia. Nexata juya profetavi tsipaebabiaba vajasalinaivijavabelia pacuenia Dioso itorobatsi. <sup>2</sup>Nexata jane baja aeconoxae, mapamatacabitaje, Dioso itorobica pexēnato vajanacatsitanajamatabēcuene itajētsinexa, vajayapētaenexa Dioso vajanacatojitsipaejava. Bajayata Dioso itoroba pexēnato pexanaenexa mapanacuaje, daxitacuene yajava. Nexata daxitacuene mapanacuateje Dioso pexēnato tocopata pevetsinexa. <sup>3</sup>Nexata pacuenia Dioso bitso ayaijamatabēcuenenē, pexaniajamatabēcuenenēnua, bajara pijinia Dioso pexēnato ata jamatabēcueneitsi. Dioso pexēnato caējēpatsi daxitacuene pexanaenexa pijumesaēta. Nexata pijumeta itsa itoroba mapanacuaje penaexanaenexa, daxitacuene yajava naexana. Bajaraponē pexanaecujinae mapanacuaje, bajaraponē pejamatabēcueneta abaxē tsiteca xanepana mapamatacabijavaberena ataje. Bajaraponē nacasivatēpa cruzata vajanacavecuaxuabinexa pibisiacuene vajaexanaeconimi. Bajaraxuacujinae pona jane baja athēbēabetsia peecaenexa paxa Dioso pemuxuneneta, pecujanenia, penajuaevevtsinexabeje daxitacuene.

### Pacuenia Dioso pexēnato bitso ayaijamatabēcuenenē áņgelevi matatoxenetsia yabara pelivaisi

<sup>4</sup>Dioso pexēnato bitso ayaijamatabēcuenenē áņgelevi matatoxenetsia. Bajarapajamatabēcuene yapētanetsi. Tsipaji Dioso pexēnato tocopata daxitacuene pevetsinexa. Dioso saya áņgelevi tocopata beveliajamatabēcuenejava pevetsinexa. <sup>5</sup>Dioso baja cajena jumaitsi pexēnatojavabelia mapacueniaje:

Xamē raja taxēnatomē. Xanē raja axanē,  
jai Dioso.

Dioso icatsia jumaitsi pexēnato yabara mapacueniaje:  
Xanē raja bajaraponē paxanē. Xanē raja bajaraponē taxēnato,  
jai Dioso pexēnato yabara.

Bajarapacuenia Dioso apo jumaitsi áņgelevi yabara. Biji rajane Dioso pexēnato yabara jumaitsi. Bajaraxuata nayapētane Dioso pexēnato bitso ayaijamatabēcuenenēcuene áņgelevi matatoxenetsia. <sup>6</sup>Pacujinae Dioso itorobijitsiatsica pepo caenē pexēnato mapanacuata penaexanaenexa, Dioso jumaitsi pexēnato yabara mapacueniaje:

Daxita tajajivi, áņgelevi, pematabacabēta tonubenaena ayaijamatabēcuene perajutsinexa bajaraponējavabelia,  
jai Dioso pexēnato yabara.

<sup>7</sup>Dioso icatsia jumaitsi áņgelevi yabara mapacueniaje:

Tajajivi, ángelevi, tanelivaisipaebinexa, bepíjia pona pacuenia jovibo. Bajarapamonae beisotocotiata verebiabiana daxita pamonaē naneconita xanējavaberena,  
jai Dioso ángelevi yabara.

<sup>8</sup> Itsiata baitsi jane icatsia Dioso pexēnatojavabelia jumaitsi mapacueniaje:

Diosomē, daxita xua evetame, daxitamatacabijavabelianexa evetsianame. Xua xamē evetame, xaniavaetsia evetabiabianame. <sup>9</sup> Xamē jitsipame jivi pexaniacuene pexanaejava. Apo jitsipaemē pibisiacuene pexanaejava. Bajaraxuata xanē, nijaDiosonē, cajamatabēcuenēbarēyayaexanatsi. Cajamatabēcuenēbarēyayaexanatsi daxita itsamonaē matatoxenetsia, jai Dioso pexēnatojavabelia.

<sup>10</sup> Icatsia Dioso pexēnatojavabelia jumaitsi mapacueniaje:

Xamē petuxanenēmē. Itsa abaxē daxitacuene ajibi, xamē exaname mapanacuaje. Ne-saēta exaname daxita itaboxopijicuene yajava. Xua jivi apo tae, bajaraxua ata exaname. <sup>11</sup> Daxita bajaraxua, nexanaejava, vereverecaena. Itsiata baitsi jane xamē apo vereverecaemē tsane daxitamatacabijavabelianexa. Daxita xamē nexanaejava, perujujava naexanaena. Pacuenia jivi penaxatatsijava, perujujava ba-naexana, bajara pijinia itsi tsane nexanaejava. <sup>12</sup> Pacuenia jivi baquiona penaxatatsijava, bajarapacuenia itsamatacabi xamē quionaename itaboxo, ira yajava, pejananacua icatsia nexanaenexa. Itsiata baitsi jane xamē tsitecaename. Apo vereverecaemē tsane,

jai Dioso pexēnatojavabelia.

<sup>13</sup> Dioso baja cajena caeto ata ángeleviyajuvēnēnējavabelia apo jumaitsi mapacueniaje:

Ecare abaxē tacujuanenia daxitacuene vajanajuavetsinexabeje. Nijavajabitsaē abaxē copiaya vecatsivajēnaē jumecovēnētsiaexanaenatsi nitorobicuenianexa, apo jai Dioso ángeleviyajuvēnēnējavabelia.

Biji rajane Dioso pexēnatojavabelia bajarapacuenia jumaitsi. <sup>14</sup> Daxita ángelevi apo taetsi vajaitaxutota. Bajarapamonae saya Dioso tonacuenebabiaba pacuenia Dioso itorobatsi. Nexata ángelevi yavenona pamonaē jumecovēnēta Dioso pecapanepaejavanexatsi.

### **Pacuenia apo benamuxujematsitsi pexaniajailivaisi Dioso vajanacapanepaenexa yabara pelivaisi**

**2** Dioso pexēnato bitso ayaijamatabēcuenēnē ángelevi matatoxenetsia. Bajaraxuata vajanacatsipaebilivaisi xaniavaetsia benamuxunaevetatsi. Bitso baja cajena pexaniajailivaisi nacatsipaeba. Nexata vajavajēnaeyabelia asaēyata bejumecovēnētatsi bajarapapexaniajailivaisi vajajumecovēnētsijava, itsamatacabijavabelia ata vajacopatsiyaniva. <sup>2</sup> Bajayata palivaisi Dioso najumecopata Moiséspijinēta, Dioso najumeitoroba ángelevita. Nexata juya ángelevi bajarapalivaisi tsipaeba Moiséspijinējavabelia. Xaniajai baja cajena bajarapalivaisi. Pamonaē apo jumecovēnētsi bajarapalivaisi, paneconivajēto xaina, bajarapaneconivajētota Dioso naneconitsiaexanatsi. <sup>3</sup> Itsa namuxujematatsi papinijicueneta Dioso nacacapanepaejitsia, ¿detsa pacuenia nacacaējēpaejitsipa vajacuata vajanacapanepaenexa? Ajibi. Vajatuxanenē Jesucristo baja cajena copiaya tsipaeba itsamonaejavabelia pacuenia capanepaejitsia daxitajivi. Nexata bajarapamonae yapētane bajarapalivaisi pexaniajailivaisicuene. Nexata juya bajarapamonae vaxaitsijavaberena nacatsipaeba bajarapalivaisi. <sup>4</sup> Nex-

ata nayapētane bajarapamonae vajanacatsipaebilivaisi pexaniajailivaisicuene. Tsi-paji Jesucristo petsipaebilivaisitsi, jivi itsa tsipaebavanapa, Dioso pesaēta pini-jicuene pexanaejavanē tsitaexanapona. Bajarapamonae piavitanevi ata jamateje-mayaexanapona. Petēpaevi ata icatsia asaēyaexanapona. Espřitu Santo ata jamatabēcuene caējēpaeyaexanaponatsi, caejivi canacujitsia, bajarapamonae pex-anaenexa pacuenia Dioso tojitsipatsi.

### **Pacuenia baja Jesucristo naexana bejivitonēcuenia yabara pelivaisi**

<sup>5</sup> Papejananacua yabara pacatsipaebatsi, Dioso baja itsa exanaena bajarapanacua, Dioso apo tocopatsi tsane ángelevi pevetsinexa. Biji rajane jivi tocopatsianatsi pevetsinexa bajarapanacua. <sup>6</sup> Tsi-paji Dioso pejumelivaisibaxutota, tajēvelia jumaitsi pacuenia jivi ayaijamatabēcuenevi Dioso exanaejitsiatsi ángelevi matatoxenetsia. Bajaraxua yabara Dioso pejumelivaisibaxutota jumaitsi mapacueniaje:

Diosomē, jivi matatoxenetsia bitso ayaijamatabēcuenenē atamē, ¿detsa xuajitsia itsiata jivi sivanajamatabēxainame nevetsinexa? <sup>7</sup> Jivi itsa exaname, ángelevivecua jivi beveliajamatabēcuenevi exaname. Bajarapacuenia picani exaname. Itsiata baitsi jane aeconoxae jivi pecajumecovēnētsixae, ayaijamatabēcuenevi baja exaname ángelevi matatoxenetsia. <sup>8</sup> Nexata itsamatacabi tocopatsianame jivi pevetsinexa daxitacuene nexanaejava,

jai Dioso pejumelivaisibaxutota Dioso pejumecovēnētsivi yabara.

Bajarapacuenia Dioso itsa tocopatsiana daxitacuene Dioso pexanaejava jivi pevetsinexa, itsacueniejavayo ata Dioso apo vecuacopatsi tsane jivi pevetsiaexanaejava. Itsiata baitsi jane abaxē apo taetsi vajaitaxutota jivi pevetsijava daxita bajaraxua. <sup>9</sup> Pamatacabi Jesús bejivitonēcuenia naexana mapanacuataje, bajaraponē ata ángelevivecua beveliajamatabēcuenenē picani naexana. Dioso pitaxutotsoniataxae daxita mapanacuapijivije, Dioso pexēnato itorobica penaexanaenexa mapanacuata, pesivatēpaenexa daxitajivi pijaneconi yabara. Jesús baja daxitajivi pesivatēpaexae, aeconoxae baja Dioso tocopatatsi Jesús athēbētatsia peecaenexa paxa Dioso pemuxuneneta.

<sup>10</sup> Dioso baja cajena daxitacuene natoexana bajaraponēnexa. Dioso daxitacuene pexanaecujinae, Dioso abaxē pejamatabēcueneta daxitacuene tsiteca xanepana mapamatacabijavaberena ataje. Daxita pamonaе jumecovēnētatsi, pexicuenia petaevi, Dioso jitsipa pebarēevetsinexa daxitacuene Dioso pexanaejava. Bajaraxuata Dioso tocopata Jesucristo cruzata ayaicuenia bepejiobiaexanaenexatsi. Nexata Jesucristo capanepaena daxita pamonaе najamatabēcuenecopata Jesucristojavabelia, peyajavaponaponaenexa Dioso pijapenivenivenaenacuataatsia. <sup>11</sup> Jesucristo baja cajena jivi tsata Dioso pijajivinexa. Nexata pamonaе Jesucristo tsata Dioso pijajivinexa, bajarapamonae, Jesús yajava, benaceaxapijivi baja tanetsi Dioso. Bajaraxuata Jesús, Dioso pexēnato, pijajivi yabara itsa cuaicuaijai, apo ajumeura: “Tajuyapijivi,” peyajajava. <sup>12</sup> Jesús pijajivi yabara pejumaitsiyavanexa, Dioso pejumelivaisibaxutota tajēvelia jumaitsi mapacueniaje:

Taxa Diosomē, tajuyapijivijavabelia cavajunupaebianatsi. Nexata daxita bajarapamonae tabarēnacaetuatsijavata, xamēnexa catonaxēanaenatsi, tanaxēanaejavata ayaijamatabēcuene tacarajutsinexa,

jai Dioso pejumelivaisibaxutota Jesús paxa Diosojavabelia pejumaitsiyavanexa.

<sup>13</sup> Jesús icatsia pijajivi yabara pejumaitsijavanexa, Dioso pejumelivaisibaxutota tajëvelia jumaitsi mapacueniaje:

Xanë ata najamatabëcuenecopatsianajë taxa Diosojavabelia taneyavenonaenexa pacuenia najamatabëcuenecopaba tajuyapijivi, jai Dioso pejumelivaisibaxutota.

Jesús icatsia pijajivi yabara pejumaitsijavanexa, Dioso pejumelivaisibaxutota tajëvelia jumaitsi mapacueniaje:

Yajavaponaponajë baja mapamonaaje, Dioso pexi tanetocopatsivi tatoevetsinexa, jai Dioso pejumelivaisibaxutota.

<sup>14</sup> Vaxaitsi, Dioso pexitsi, mapanacuata jinavanapatsi. Bajaraxuata Jesús ata naexana mapanacuataje, pacuenia vaxaitsi banaexanatsi, peponaponaenexa mapanacuataje. Nexata Jesús penaexanaexae mapanacuataje pacuenia vaxaitsi banaexanatsi, caëjëpatsi pebeyaxuabinexatsi vajanacasivatëpaenexa. Jesús baja itsa nacasivatëpa, jamatabëcuenematatoxeneta dovathi. Nexata baja copiaruca dovathi vajanacaitorobabiabijava. Nexata jivi tëpae ata tsane, itsiata icatsia asaë tsane petëpaecujinae. <sup>15</sup> Bajarapacuenia Jesús vajanacasivatëpaexae, nacavecuajibiaexana baja vajacujunavabiabijavami, vajatëpaejava. Vajatëpaejava picani cujunavabiabatsi daxita vajajinavanapaematacabianë. <sup>16</sup> Jesús baja cajena patsica mapanacuayabetsicaje, jivi peyavenonaenexa, pamona Abrahampijinë pepo pemomoxi, baitsi Dioso pejumecovënëtsivi. Jesús apo patsi peyavenonaenexa ángelevi. <sup>17</sup> Bajaraxuata Jesús naexana mapanacuataje pacuenia vaxaitsi banaexanatsi, jivi petocuaicuajainexa Diosojavabelia. Jesús nacaitaxutotsoniatane. Nacatoexana pexaniacuene. Jesús nacatoexana pacuenia Dioso itorobatsi vajanacatoexanaenexa. Jesús pijacuata nacopata pebeyaxuabinexatsi, bajaraponë pejamatabëcueneta Dioso vajanacavecuajibiaexanaenexa pibisiacuene vajaexanaeconimi. <sup>18</sup> Nexata Jesús jamatabëcuenecaëjëpatsi peyavenonaenexa pijajivi, dovathi pejamatabëcuenejëtsivitsi. Tsipaji baja copiaya Jesús ata jamatabëcuenejëtatsi dovathi. Bejiobiaexanatsinua.

### **Pacuenia bitso Jesús ayaijamatabëcuenenë Moiséspijinë matatoxenetsia yabara pelivaisi**

**3** Tajamona, Dioso papijajivimë, Dioso pacajunata papijajivinexamë. Nexata xaniavaetsia pacanaëjère Jesucristo yabara. Bajaraponë Dioso nacatoitorobica vajanacatsipaebinexa Dioso pejumelivaisi, vajanacatocuaicuajainexanua vajatuxanenë Diosojavabelia. <sup>2</sup> Bajayatami Moiséspijinë daxita Dioso pijajivi tovetabibaba Dioso pitorobicueniatsi. Bajara pijinia pacuenia Jesús ata mapanacuataje jumecovënëta Dioso pitorobicueniatsi. <sup>3</sup> Nexata Jesús jivi pecapanepaenëxae, ayaijamatabëcuenenë Moiséspijinë matatoxenetsia. Pacuenia bo pexainaenë, ayaijamatabëcuene xaina pijajivitonë matatoxenetsia, bajara pijinia pacuenia Jesús ayaijamatabëcuenenë Moiséspijinë matatoxenetsia. <sup>4</sup> Caebocanacujitsia tanetsi jivi pexanajebixae bajarapabonë. Itsiata baitsi jane mapanacuata Dioso pexanaejavanëta, jivi exanejeba bonë. <sup>5</sup> Bajayata Moiséspijinë Dioso itorobatsi daxita Dioso pijajivi petoevetsinexa xaniavaetia. Nexata Moiséspijinë Dioso pijajivi itsa tovetaponapona, tajëvelia itorobatsi petsipaebinexa jivijavabelia pacuenia itsamatacabijavabelia Dioso jumaitsijsitsia pijajivijavabelia. <sup>6</sup> Cristo Dioso pexënatoxae, xaniavaetsia tovetapa Dioso pijajivi. Vaxaitsi baja Dioso vajajumecovënëtsivi, Dioso



nacatane pijajivitsi. Tsipaji baja nacayavavaponapona Jesucristo. Bajarapacuenia vajavajënaeyabelia Dioso nacataeponaena xaniavaetsia Jesucristo itsa jumecovënëta-vanapaenatsi vajatëpaejavabelianexa. Jamatabëcuenenëbarëyaya jinavanapatsi. Tsipaji yapëtanetsi Dioso pexaniajaicuene vajanacacapanepaenexa.

**Pacuenia Dioso pejumecovënëtsivi tocopatatsi pejonenexa  
Dioso pijanacuayabetsia yabara pelivaisi**

<sup>7-8</sup> Jesucristo baja cajena ayaijamatabëcuenenë Moiséspijinë matatoxenetsia. Angelevi ata matatoxenetsia ayaijamatabëcuenenë. Bajaraxuata Espiritu Santo Dioso pejumelivaisibaxutota jumaiti mapacueniaje:

Ajena, mapamatacabitaje, itsa pajumetaneme pacuenia Dioso jumaiti, pëtsa pajamatabëcuenetajamë panejumecovënëtsinexa. Pacuenia bajayata panijasalinaivimi ajamatabëcuenetaja baja, pëtsa paitsimë. Bajarapamonaemi pamatacabi petusato nacuata jinavanapa, apo jitsipae pexanaenexa pacuenia Dioso itorobatsi. Bajarapacuenia bajayajebi Dioso apo jumecovënëtsi ata, bajarapamonaemi itsiata abaxë Dioso apo verebiabitsi. <sup>9</sup> Bajarajota petusato nacuata panijasalinaivimi jamatabëitonotabiaba Dioso. Apo jumecovënëtsi pacuenia Dioso itorobatsi pejinavanapaenexa. Cuarenta picani pavaibeje Dioso ayaicuene pexanaejavanë, tsitaexanapona bajarapamona peyavenonaenexa. Bajaraxua panijasalinaivimi taeyabiabi ata, itsiata Dioso apo jumecovënëtsi. <sup>10</sup> Bajaraxuata Dioso baraanaepana panijasalinaivimijavabelia. Nexata panijasalinaivimi yabara Dioso najumecapanepaeya jumaiti: “Najamatabëxainabiaba saya ëpibisiacuene yabara. Apo jitsipae pejinavanapaenexa pacuenia picani tojitsipajë,” jai Dioso. <sup>11</sup> Bajaraxuata Dioso bitso baraanaepana panijasalinaivimijavabelia. Nexata Dioso najumecapanepaeya jumaiti: “Bajarapamona apo jone tsane xanëjavaberena. Nexata apo jinavanapae tsane itsajota picani toxaniavaetajë pejinavanapaenexa,” jai Dioso,

jai Espiritu Santo panijasalinaivimi yabara Dioso pejumelivaisibaxutota.

<sup>12</sup> Tajamona, dovathivecua panajamatabëcueneevetavanapare, paxamëyajuvënëjivi ata, pacuenia panijasalinaivi najamatabëxaina pibisiacuene pexanaenexa, penajamatabëxainaeyaniva. Tsipaji Dioso itsa apo pajumecovënëtsimë tsipae, nexata pacopabijitsipame panejumecovënëtsijavami Dioso, daxitamatacabijavabelianexa piasaëtsaponaponaenë. <sup>13</sup> Nexata namataenetsia panajamatabëcueneyavenonare daxitamatacabi canacujitsia panecasaëtsavanapaenexa Dioso panejumecovënëtsijava. Bajarapacuenia panajamatabëcueneyavenonare itsajivi ata paxamëyajuvënëjivi dovathi peyamaxëitojorobianivatsi pibisiacuene pexanaeyaniva. Panajamatabëcueneyavenonare itsajivi ata paxamëyajuvënëjivi pecopabianiva Dioso pejumecovënëtsijava. <sup>14</sup> Vajataxuxuabijavaveliacujinae Dioso vajajumecovënëtsijava, tsiteca abaxë Dioso jumecovënëttavanapatsi vajatëpaejavabelianexa. Nexata daxita xua Cristo Dioso rajutsianatsi, bajaraxua vaxaitsi ata Dioso nacarajutsiana.

<sup>15</sup> Bajaraxuata papecamuxujobinexa, Dioso pejumelivaisibaxutota jumaiti mapacueniaje:

Ajena, mapamatacabije, itsa pajumetaneme Dioso papecajumaitisijava, pëtsa pajamatabëcuenetajamë. Pacuenia panijasalinaivimi petusato nacuata ajamatabëcuenetaja, pëtsa paxamë bajarapacuenia paitsimë,

jai Dioso pejumelivaisibaxutota.

<sup>16</sup> ¿Detsa pamona bajayata bajarapacuenia jumetae ata Dioso pejumaitsijavatsi, itsiata apo jumecovënëtsi? Baitsi pamonaemi bajayata Moiséspijinë matabapona Egipto nacuverena. <sup>17</sup> ¿Detsa jane pamonaemijavabelia Dioso baraanaepana cuarenta pavaibeje? Dioso baraanaepana pamonaemijavabelia pibisiacuene exana petusato nacuata. Nexata daxita bajarapamonaemi pijaneconi yatëpa petusato nacuata. <sup>18</sup> ¿Detsa jane pamonaemijavabelia Dioso najumecapanepaeya jumaitsi: “Apo pajonemë tsane xanëjavaberena,” jai? Bajarapacuenia Dioso najumecapanepaeya jumaitsi apo pejumecovënëtsivitsijavabelia. <sup>19</sup> Nexata yapëtanetsi panijasalinaivimi apo pejonejava Diosojavabelia. Tsipaji apo jumecovënëtsi Dioso pitorobicueniatsi.

**4** Dioso baja cajena najumecapanepaeya jumaitsi vajajonenexa bajaraponë pijanacuayabetsia vajanacueraevetavanapaenexa, itsajotatsia nacatoxaniavaeta vajajinavanapaenexa. Bajaraxuata nexata benajamatabëcuenexaniavaetavanapatsi. Tsipaji itsamona paxamëyajuvënëvi apo jonecapanepae tsipae Dioso pijanacuayabetsia itsa apo jumecovënëtsi Dioso. <sup>2</sup> Vaxaitsi ata rabaja jumetanetsi pexanialivaisi vajanacapanepaelivaisinexa pacuenia bajayata vajasalinaivimi ata jumetane picani. Itsiata baitsi jane vajasalinaivimi apo toxanepanaetsi bajarapalivaisi pecapanepaenexatsi. Tsipaji jumetae ata, apo jumecovënëtsi. <sup>3</sup> Nexata vaxaitsi Dioso vajajumecovënëtsivi, nacacajëpaena vajajonenexa Dioso pijanacuayabetsia, itsajotatsia nacatoxaniavaeta vajajinavanapaenexa. Dioso apo pejumecovënëtsivi apo jone tsane. Tsipaji bajarapitsivi yabara Dioso bajayata jumaitsi mapacueniaje: Anaepanaenajë apo tanejumecovënëtsivijavabelia. Nexata najumecapanepaeya jumaitsinë baja: “Bajarapamona apo jone tsane xanëjavaberena,” janë, jai Dioso.

Dioso nacia pexanaejavaveliacujinae, toxaniavaetsi atatsi picani panijasalinaivimi pejinavanapaenexa bajaraponëjavatatsia, itsiata apo jone. <sup>4</sup> Yapëtanetsi pacuenia Dioso petoxaniavaetsicujinaetsi, copiaevetatsi picani panijasalinaivimi pejonenexa pejinavanapaenexa bajaraponëjavatatsia. Tsipaji Dioso pejumelivaisibaxutota jumaitsi mapacueniaje:

Dioso baja daxita mapanacuaje, daxitacuene yajava, itsa vereta pexanaejava, vemaxënacueraeveta siete matababita,

jai Dioso pejumelivaisibaxutota.

<sup>5</sup> Icatsia Dioso pejumelivaisibaxutota jumaitsi Dioso apo pejumecovënëtsivi yabara mapacueniaje:

Bajarapamona apo jone tsane xanëjavaberena, pejinavanapaenexa xanëjavata,” jai Dioso pejumelivaisibaxutota.

<sup>6</sup> Pamona baja picani copiaya jumetane pexanialivaisi pecapanepaelivaisinexatsi, itsiata apo pejumecovënëtsixae, nexata apo jone tsane Dioso pijanacuayabetsia. Itsiata baitsi jane Dioso najumecapanepaeya jumaitsi mapacueniaje: “Pamona tajajivi, jonena xanëjavaberena,” jai. Nexata pamona jumecovënëtapona Dioso, jonena Dioso pijanacuayabetsia. <sup>7</sup> Bajarapacuenia bajayata itsamona Dioso apo pejumecovënëtsixae, nexata icatsia Dioso caëjëta itsamatababi itsamona pejonenexa. Bajarapacuenia Dioso itsa caëjëta itsamona pejonenexa, mapamatababitaje cajena caëjëta itsamona pejonenexa. Bajayata Davidpijinë Dioso itorobatsi tajëvelia pevajunupaebinxae itsamona mapamatababitaje pejoneponaejavanexa Diosojavabelia.

Nexata bajayata Davidpijinē tajēvelia itsa vajunupaeba itsamonae mapamatacabije pejonejavanexa Diosojavabelia, jumaitsi mapacueniaje:

Mapamatacabitaje itsa pajumetaneme Dioso papecajumaitsijava, pētsa pajamatabēcuenetajamē panejumecovēnētsinexa Dioso, jai Davidpijinē tajēvelia.

<sup>8</sup> Bajayata Josuépijinē vajasalinaivimi petusato nacuajavaverena matabacopona Israel nacuajavaberena. Panacua bajarapamonaenexa Dioso toxaniavaetatsi pejonenexa, bajarapanacua daxitamatacabijavabelianexa. Bajarapanacua cajena xaina Dioso pijanacuatsia. Nexata panacua yabara jumaitsi: “Dioso pijajivi pejinavanapaenacuanexa, toxaniavaeta,” itsa jai, Israelnacua yabara apo jumaitsi. Itsa meta peneta Israelnacua yabara jumai tsipae, nexata mapamatacabitaje Dioso apo caējētsi tsipae itsamonae pejonenexa Diosojavabelia. Tsipaji baja vajasalinaivimi bajayata baja pata Israel nacuata. <sup>9</sup> Bajaraxuata yapētanetsi pacuenia abaxē Dioso tocopata mapamatacabitaje itsamonae ata Dioso pejumecovēnētsinexa pejonenexa Dioso pijanacuayabetsia. <sup>10</sup> Pajivi jonena Dioso pijanacuayabetsia peponaponaenexa Diosojavatatsia, bajarapajivi penacuenebabiabijava vemaxēnacueravevetsiana. Pacuenia bajayatami Dioso ata nacua baja pexanaejava itsa vereta, vemaxēnacueraeveta, bajarapacuenia vemaxēnacueraevetsiana. <sup>11</sup> Daxita vaxaitsi vajajitsipaejamatabēcueneta, bejitsipatsi Dioso pijanacuayabetsia vajajonenexa, bajaraponējavatatsia vajajinavanapaenexa. Bajayata pamonaemi Dioso apo jumecovēnētsi, nexata apo jone Dioso pijanacuayabetsia. Nexata vaxaitsi bajarapamonaemi apo becuenejēpaetsi.

<sup>12</sup> Dioso cajena pejumelivaisi bitso asaē. Nexata Dioso pejumelivaisi caējēpatsi ayaicuene pexanaenexa pijumesaēta. Dioso pejumelivaisi bitso pexiujailivaisi anijabarēneniabeje espada matatoxenetsia. Nexata bajarapalivaisi itsa yapētanetsi, nacayapētaeyaexana pacuenia pepacuene jamatabēcuenetsitsi. <sup>13</sup> Vaxaitsi Dioso vajanacaexanaevi, apo nacacaējēpae Dioso vajavecyanamatayabinexa. Bajaraponē tane daxita xua exanatsi. Nexata itsamatacabi bajaraponējavabelia navajunupaebianatsi daxita xua exanatsi.

### **Pacuenia Jesús ayaijamatabēcuenenē, jivi petocuaicuajainē Diosojavabelia, yabara pelivaisi**

<sup>14</sup> Jesús cajena Dioso pexēnato, ayaijamatabēcuenenē. Pepo sacerdotenē vajanacatocuaicuajainē Diosojavabelia. Jesús baja pona Diosojavabetsia vajanacayavenonaenexa. Bajaraxuata nexata vaxaitsi becaasaē tsavanapaetsi Dioso vajajumecovēnētsijava mapanacuataje. <sup>15</sup> Jesús, Diosojavabelia vajanacatocuaicuajainē, nacajamatabēcueneyapētane pacuenia vaxaitsi jamatabēcuenetsitsi. Nexata dovathi itsa nacajamatabēcuenējēta pibisiacuene vajaexanaenexa, Jesús nacajamatabēcueneyapētane. Bajarapacuenia nacajamatabēcueneyapētane tsipaji Jesús ata abaxē itsa ponapona mapanacuataje, jamatabēcuenējētatsi dovathi. Itsi-ata baitsi jane Jesús caeto ata pibisiacuene apo exanae. <sup>16</sup> Bajaraxuata ajumejunavijibia vajacuata benavajētatsi Diosojavabelia. Dioso nacaitaxutotsoniatane vajanacaasivaxae. Nexata nacayavenonaena paepatota vaxaitsi namatavenonatsi vajanacayavenonaenexa.

**5** Sacerdotevivyajuvēnēnē, caenē, itapetatsi sacerdotevi penamatacaitorobinēnexa, daxitajivi petocuaicuajaitsiabinexa Diosojavabelia. Nexata jivi Diosojav-

abelia ofrendacuenia perajutsijavanexa, capatabiaba sacerdotenëjavaberena. Nexata juya sacerdotenë rajutabiaba Diosojavabelia bajarapaofrenda. Dajubinë, pijana ata yajava, bajarapacuenia rajutabiaba Diosojavabelia, daxitajivi pibisiacuene pexanaeneconi Dioso pevecuaajibiaexanaenexatsi. <sup>2</sup> Sacerdotenë caëjëpatsi dovathi pejamatabëcueneëjëtsinexatsi pibisiacuene pexanaenexa. Tsipaji bajaraponë ata saya jivitonë. Nexata sacerdotenë jamatabëjumaitsi jivi yabara: “Jamatabëcuenyapëtaniji pamonae abaxë apo yapëtae Dioso pejumelivaisi. Nexata pibisiacuene exana. Jamatabëcuenyapëtanijinua pamonae dovathi jamatabëcueneëjëtsi pibisiacuene pexanaenexa,” jamatabëjai sacerdotenë. Bajaraxuata jivi pibisiacuene itsa exana, sacerdotenë itaxutotsoniatane jivi. <sup>3</sup> Sacerdotenë ata apo ajamatabëcuene-saë. Sacerdotenë dajubinë, pijana yajava, Diosojavabelia ofrendacuenia rajutabiaba jivi pibisiacuene pexanaeneconi Dioso pevecuaajibiaexanaenexatsi. Bajarapacuenia itsa rajutabiaba, bajaraponë ata pibisiacuene pexanaeneconi Dioso pevecuaajibiaexanaenexatsi, yajavarajutabiaba.

<sup>4</sup> Itsanë ata pijacuata pepo sacerdotenë apo naexanae daxitajivi petocuaicuajainexa Diosojavabelia daxitajivi peyaiyataenexatsi. Biji rajane sacerdoteviyajuvënënë, caenë, Dioso itapetatsi pepo sacerdotevi penamatacaitorobinë pexanaenexatsi, pacuenia bajayata Aarónpijinë ata Dioso itapetatsi pepo sacerdotenë pexanaenexatsi. Nexata bajayata Aarónpijinë ata daxitajivi yaiyatanetsi. <sup>5</sup> Bajara icatsia itsi Cristo ata. Pijacuata apo naexanae pepo sacerdotenë, vajanacatocuaicuajainexa Diosojavabelia. Biji rajane Dioso itapetatsi Cristo pepo sacerdotenënexa daxitajivi peyaiyataenexatsi. Cristojavabelia copiaya Dioso jumaitsi mapacueniaje: Xamë raja taxënatomë. Xanë raja axanë, jai Dioso.

<sup>6</sup> Icatsia itsabaxutota, Dioso pejumelivaisibaxutota, jumaitsi pacuenia Dioso itapeta pexënato pepo sacerdotenënexa. Jumaitsi mapacueniaje: Xamë raja pepo sacerdotenëmë tsane daxitamatacabijavabelianexa. Jivi netocuaicuajainë tsane xanëjavaberena. Pacuenia bajayatami itsi Melquisedec, bajara xamë ata itsimë tsane, jai Dioso pexënatojavabelia.

<sup>7</sup> Jesucristo abaxë itsa ponapona mapanacuataje, pinijijumeta yaitaxutonueya vajëta Diosojavabelia. Bajarapacuenia vajëta Diosojavabelia pecapanepaenexatsi petëpaejavavecua. Nexata Jesucristo xaniavaetsia Dioso jumetanetsi. Tsipaji Jesucristo jamatabëjumaitsi Dioso yabara: “Jitsipajë taneexanaenexa pacuenia taxa netojitsipa,” jamatabëjai. <sup>8</sup> Jesucristo, Dioso pexënato, ayaijamatabëcuenenë ata, itsiata paxa jumecovënëta. Nexata pijacuata nacopata pebejiobiaexanaenexatsi pacuenia Dioso tojitsipatsi. <sup>9</sup> Nexata Jesucristo paxa itsa jumecovënëta, nacopata pebeyaxuabinexatsi jivi pesivatëpaenexa. Nexata daxita pamonae jumecovënëtavanapa pacuenia Jesucristo itorobatsi, Dioso rajutsianatsi matacabi apo peverevereaejava. <sup>10</sup> Dioso baja cajena itapetatsi Jesús pepo sacerdotenënexa, jivi petocuaicuajainexa Diosojavabelia, pacuenia bajayata itsi Melquisedecpijinë.

### **Pacuenia Dioso pejumecovënëtsivi muxujibatsi pecopabianiva Dioso pejumecovënëtsijava yabara pelivaisi**

<sup>11</sup> Xainajë picani ayailivaisi patacatsipaebinxaxa paneyapëtaenexa pacuenia Cristo pepo sacerdotenë vajanacatocuaicuajainexa Diosojavabelia. Itsiata baitsi jane

ayapëbeje patacajumeyapëtaeyaexanaenexa bajarapalivaisi. Pacuenia pejevaxi beaxayo bayapëtaepona vajacujarubijava, bajara pajamatabëcueneitsimë. <sup>12</sup> Bajayajebi baja picani Jesucristo pajumecovënëtame. Juya baja picani bepatsipae-baponame itsamonaejavabelia. Itsiata baitsi jane abaxë panamatavenoname icatsia papecatsipaebinexa bajarapalivaisi. Palivaisi picani yapëxanepana, Dioso pejumelivaisi, itsiata apo pajumeyapëtaemë. Nexata abaxë panamatavenoname icatsia papecatsipaebinexa bajarapalivaisi. Pacuenia pejevaxinacuetoxi ëmitobarëmene apa, apo xae abaxë pexaejava, bajara pajamatabëcueneitsimë. Tsipaji palivaisi ayapëbejevajëto, apo pacacaëjëpae orijibia panejumeyapëtaenexa. <sup>13</sup> Pamona abaxë namatavenona petsipaebinexatsi peyapëxanepanaelivaisixi, Dioso pejumelivaisi, bajarapamonae pejamatabëcuene abaxë mito bepiapaenacuetoxi. Bajaramona abaxë apo yapëtae pexanaenexa pacuenia Dioso tojitsipatsi. <sup>14</sup> Pacuenia penaveretsivi pijacuata xane pexaejava, bajara jamatabëcueneitsi pamona pejamatabëcuenevitsabivi Diosojavabelia. Nexata pacuenia Dioso itorobatsi, jumecovënëta. Najamatabëxainabiaba pexanaenexa ëpexaniacuene. Apo jitsipae pibisiacuene pexanaejava.

**6** Vaxaitsi Dioso vajajumecovënëtsijavaveliacujinae, vajavajënaeyabelia jumecovënëtaaponatsi vajajamatabëcuenevitsabaponaenexa Diosojavabelia, pacuenia jamatabëcuenevitsabapona bitso Dioso pejumecovënëtsivi. Bajaraxua baja vaxaitsi yapëtanetsi. Nexata baja apo namatavenonaetsi icatsia vajanacatsipaebinexa Cristo pelivaisi, pacuenia copiaya nacatsipaeba pamatacabi ajena najamatabëcueneocopatatsi Diosojavabelia. Vaxaitsi baja copabatsi pibisiacuene vajaexanabiabijava. Najamatabëcuenepeñëyorotatsi baja Diosojavabelia. Bajaraxuata apo namatavenonaetsi baja icatsia itsajivi ata vajanacatsipaebaponaenexa bajaraxua vajayapëtaenexa. <sup>2</sup> Apo namatavenonaetsinua baja icatsia vajanacatsipaebaponaenexa vajayapëtaenexa pajamatabëcuenelivaisi xaina vajanacabautisabijava. Apo namatavenonaetsi baja icatsia vajanacatsipaebaponaenexa vajayapëtaenexa pajamatabëcuene yabara pijinia tsmatanacobeuata ancianovi Dioso pejumecovënëtsivijavabelia. Pacuenia ata icatsia Dioso asaëyaexanaejitsia petëpaevimi, vajayapëtaexae baja, apo namatavenonaetsi icatsia vajanacatsipaebaponaenexa. Pacuenia ata daxita pamona nanconita Diosojavabelia, nanconitsiajinavanapaejitsia daxitamatacabijavabelianexa, vajayapëtaexae baja, apo namatavenonaetsi vajanacatsipaebaponaenexa. <sup>3</sup> Dioso itsa nacatocopataponaena, vajavajënaeyabelia jamatabëcuenevitsabaponaenatsi pacuenia Dioso nacatojitsipa.

<sup>4</sup> Itsamona baja picani yapëtane pexaniajailivaisi. Jumecovënëtanua baja picani Jesucristo pelivaisi Dioso pecapanepaenexatsi. Espiritu Santo ata baja picani tsijamatabëcatsi. <sup>5</sup> Yapëtanenua baja picani pacuenia Dioso pejumelivaisi bitso xanepana. Yapëtanenua baja picani pacuenia taejitsia Dioso pinijicuene pexanaejava pamatacabi pejananacua Dioso exanaena. <sup>6</sup> Itsiata baitsi jane bajarapamonae itsa copaba baja Jesucristo pelivaisi pejumecovënëtsijavami, nexata baja acuenebi icatsia penajamatabëcuenepeñëyorotsijava pibisiacuene Diosojavabelia. Pecopabixae Jesucristo pelivaisi pejumecovënëtsijava, naexana quenetsiataeya bepecapocaponaevi Jesucristo pelivaisi. Bajaraxuata bajarapamonae jamatabëcuenejëpa pamonaemi bajayata Jesucristo beyaxuabatsi cruzata. Tsipaji pamonaemi Jesucristo beyaxuabatsi, quenetsiataeya capocaponatsi daxitajivi pitabarata. <sup>7</sup> Ema itsa runa mapairataje, Dioso pejamatabëcueneta pecopatsixae, runa bajarapaema. Nexata Dioso peja-

matabëcueneta perunaexae, bajarapaema banacale naxaniabiaexana mapairataje. Nexata capitsapa pexaniabanacale. <sup>8</sup>Itsiata baitsi jane mapanacuataje saya itsa juva piabejejava, apo xanepanae itsacuenejavayonexa ata. Nexata bajaraxua tajuatasi. Bajara pijinia itsi tsane jivi ata. Pamonae Jesucristo pelivaisi pejumecovënëtsicujinae, copabiana bajarapalivaisi pejumecovënëtsijavami, nexata tajuenatsi infiernojavabelia.

**Pajamatabëcuene yabara Dioso pejumecovënëtsivi casaë  
tsavanapae Dioso pejumecovënëtsijava yabara pelivaisi**

<sup>9</sup>Tajamonae bitso patacaasivavi, pacuenia itsamonae jumecovënëtsi ata Dioso pecapanepaejavanexatsi, itsiata copaba, bajara paxamë apo paitsimë tsane. Dioso panejumecovënëtsijava apo pacopabimë tsane. Yapëtaniji baja cajena paxamë xaniavaetsia panejinavanapaejavanexa. Dioso baja nexata panejumecovënëtsixae, Dioso pacacapanepaena. <sup>10</sup>Dioso ëpexaniacuene exana. Apo nacofënëtsinua xua baja paexaname paneyavenonaenexa itsamonae Dioso pejumecovënëtsivi. Tsiteca abaxë payavenonaponame bajarapamonae. Bajarapacuenia itsa payavenonaponame itsamonae, patsitanacueneitajëtaPONAME Cristo bitso panejitsipaejava. <sup>11</sup>Pacatojitsipatsi, pacaejivimë canacujitsia, itsamonae panetsitanacueneitajëtaPONAE nanaetaenetsia bitso panenasivajava panetëpaejavabelianexa. Nexata bajarapacuenia itsa paexaname, pacacapanepaena Diosojavabetsia. <sup>12</sup>Apo pacatojitsipaetsi paneayabarafaetabijava Dioso panejumecovënëtsijava. Biji rajane pacatojitsipatsi paneajamatabëcuenesaënexa, pacuenia itsamonae ajamatabëcuenesaë bajayajebi penajamatabëcuenecopatsijava Diosojavabelia. Bajarapamonae rajutsianatsi xua Dioso najumecapanepaeya jumaitsitsi perajutsinexatsi.

<sup>13</sup>Bajayata Dioso pexaniajajumeta tajëvelia najumecapanepaeya jumaitsi pacuenia Dioso toexanaejitsia Abrahampijinëjavabelia. Dioso navënëcacuaicuajijaiya jumaitsi mapacueniaje: “Xanë Diosonëxaenë, najumecapanepaeya cajumaitsitsi pepacuene tacatoexanaenexa pacuenia najumecapanepaeya cajumaitsitsi,” jai Dioso Abrahampijinëjavabelia. Bajarapacuenia Dioso najumecapanepaeya jumaitsi Abrahampijinëjavabelia pepacuene petoexanaenexa pacuenia najumecapanepaeya jumaitsi. Jivi namataenetsia penajumexaniataenexa Dioso pevënë bacacuaicuajijai. “Xaniajanë. Pepacuene Dioso pitabarata cajumaitsitsi,” banajai. Itsiata baitsi jane ponë pevënë Dioso cacuaicuajijajitsia, ajibi. Tsipaji baja pematatsënëa Dioso mata-toxenetsia ayajamatabëcuenenë ajibi. Bajaraxuata Dioso pexaniajajumeta navënëcacuaicuajijaiya jumaitsi pacuenia toexanaejitsia Abrahampijinëjavabelia. <sup>14</sup>Nexata Dioso jumaitsi Abrahampijinëjavabelia mapacueniaje: “Pepacuene xanë cayavenonabianatsi. Xainaenamenua ayaibitsaëto nemomoxi,” jai Dioso pexaniajajumeta. <sup>15</sup>Nexata Abrahampijinë Dioso jamatabëcueneevetsiaponapona bajayajebi. Nexata jane baja belia Abrahampijinë Dioso rajutatsi pacuenia najumecapanepaeya jumaitsitsi. <sup>16</sup>Itsamonae Dioso pevënë bacacuaicuajijai pejumexaniataenexatsi xua toexanaejitsia itsajivijavabelia. “Paxaniajanë. Pepacuene Dioso pitabarata pacajumaitsitsi,” bajai. Nexata bajarapacuenia itsa jumaitsi, acuenebi itsajivi ata pejumatsijava bajarapamonaejavabelia: “Apo pacajumexaniataetsi,” pejaijava. Tsipaji Dioso pevënë cacuaicuajijai pexaniajajumeta. <sup>17</sup>Dioso baja cajena pexaniajajumeta najumecapanepaeya jumaitsi jivi peyavenonaenexa. Dioso najamatabëcueneitajëta jivijavabelia xaniajai peyavenonaejava jivi pejumeaebiyaniavatsi, “Jemajai raja.

Dioso epatua itsajamatabëcuene xainaena,” pejaiyanivatsi. Bajaraxuata nexata Dioso tajëvelia navënëcacuaicuaijaiya jumaitsi Abrahampijinëjavabelia mapacueniaje: “Xanë Diosonëxaenë, najumecapanepaeya cajumaitsitsi pepacuene tacatoexanaenexa pacuenia najumecapanepaeya cajumaitsitsi,” jai Dioso Abrahampijinëjavabelia. <sup>18</sup>Bajarapacuenia Dioso najumecapanepaeya pejumaitsicujinae, acuenebi epatua itsajamatabëcuene pexainaejava. Tsipaji baja Dioso acuenebi penajumet-sënëtsijava. Nexata vaxaitsi Dioso vajanacapanepaejavanexa vajajumecovënëtsivi, bejamatabëjematsi. Apo bejamatabëcuenebëjaitsti. Tsipaji baja yapëtanetsi Dioso pexaniajaijava vajanacapanepaenexa, pacuenia baja bajayata tajëvelia najumecapanepaeya jumaitsi. <sup>19</sup>Cristo vajanacasivatëpaenë, athëbëtatsia peecaexae Dioso pemuxuneneta, nexata baja yapëtanetsi vajanacapanepaejavanexa Diosojavabelia. Nexata ajamatabëcuensaëtsi tsavanapae Dioso vajajumecovënëtsijava. <sup>20</sup>Jesús athëbëabetsia vajavajënaeyabetsia pona vajanacatoexanarutsinexatsia namuto. Nexata jane baja Jesús athëbëtatsia pepo sacerdotenë Dioso exanatsi, jivi petocuaicuaijainexa Diosojavabelia daxitamatacabijavabelianexa. Nexata Jesús pepo sacerdotenë pacuenia bajayatami itsi Melquisedecpijinë.

### **Pacuenia Jesús pepo sacerdotenë pacuenia bajayatami itsi Melquisedecpijinë yabara pelivaisi**

**7** Bajayatami Melquisedecpijinë ponapona. Salemtomara pevetsinëmi. Bajaraponëmi sacerdotenë, jivi petocuaicuaijainexa, athëbëtatsia peecaenë, Diosojavabelia. Nexata bajarapamatacabi Abrahampijinë vajabitsaë exana itsanacuanë pevetsivijavabelia. Itsa baja Abrahampijinë verebiaba pijavajabitsaë, naviarena. Nexata penaviatsinërena caxitajarabatsi Melquisedecpijinë. Nexata Melquisedecpijinë jumaitsi Abrahampijinëjavabelia: “Catovajëtsianatsi Diosojavabelia pecayavenonabibinexa,” jai. <sup>2</sup>Abrahampijinë pijavajabitsaë peverebiavimi pecobcovë penotsijavanë, caponapona. Nexata bajaraxua diez xuabejeyajuvënëjavanë tsaponae, Abrahampijinë caejavayo ofrendacuenia rajutapona Melquisedecpijinëjavabelia. “Melquisedec,” itsa jai hebreojumeta, mapajumetaje pejumaitsijume: “Dioso pitabarata aneconijibia xaniavaetsia jivi pevetsinë,” pejaijume. “Salemtomara pevetsinë,” itsa jai hebreojumeta, mapajumetaje pejumaitsijume: “Jamatabëcuenexanepanaeya tomara pevetsinë,” pejaijume. Nexata Melquisedecpijinë Salemtomara pevetsinëmi. <sup>3</sup>Melquisedecpijinë paxa yabara, pena ata yabara, pamojivimi ata yabara, Dioso pejumelivaisibaxutota apo jumaitsi. Penaexanaejava ata yabara, petëpaejava ata yabara, apo jumaitsi. Nexata pacuenia Dioso pexënato, Jesucristo, jivi petocuaicuaijainë Diosojavabelia daxitamatacabijavabelianexa, bajara pijinia itsi Melquisedecpijinë. Melquisedecpijinë jivi petocuaicuaijainë Diosojavabelia daxitamatacabijavabelianexa.

<sup>4</sup>Nexata aeconoxae pacanaëjère mapacuenije. Melquisedecpijinë bitso ayaijamatabëcuenenë vajasalinainëmi Abrahampijinë matatoxenetsia. Bajaraxuata Abrahampijinë ayaijamatabëcuenenëmi ata, ofrenda rajuta Melquisedecpijinëjavabelia. Pamatacabi Abrahampijinë pijavajabitsaë verebiaba, pecobcovë nota. Nexata Abrahampijinë itsa caxitajaraba Melquisedecpijinë, diez xuabejeyajuvënëjavanë tsaponae, caejavayo rajutapona Melquisedecpijinëjavabelia. <sup>5</sup>Bajayatami Dioso najumecopata Moiséspijinëta. Bajarapalivaisi juya itorobatsi Levípijinëmi pexi, pemomoxi ata, sacerdotevi penaexanaponaevinexa, jivi petocuaicuaijainexa Dioso-

javabelia. Nexata Levípijinē pemomoxi, sacerdotevi naexanapona. Nexata bajaramonae Dioso tocopatatsi perajutsinexatsi daxita judíovi pexainaeyajuvēņjava. Baitsi tocopatatsi pematamoyanijobinexa diez xuabejeyajuvēņjavanē tsaponae, caejavayo pevecuapitaponaenexa. Nacaeviriavi ata, daxita bajarapamonae Abrahampijinē ģpemomoxi ata, itsiata Dioso tocopatatsi nacaeviriavi ata pexainaeyajuvēņjavanē perajutsinexatsi. <sup>6</sup> Melquisedecpijinē picani Levípijinē apo pemomo. Itsiata Melquisedecpijinē ayaijamatabĕcuenenĕxae, Abrahampijinē ofrenda rajuta Melquisedecpijinējavabelia. Diez xuabejeyajuvēņjavanē tsaponae, caejavayo rajutapona. Nexata Melquisedecpijinē jumaitsi Abrahampijinējavabelia: “Catovajĕtsianatsi Diosojavabelia pecayavenonabinexa,” jai Abrahampijinējavabelia, ponĕjavabelia Dioso najumecapanepaeya jumaitsi peyavenonaenexa. <sup>7</sup> Pajivi jumaitsi: “Catovajĕtsianatsi Diosojavabelia pecayavenonaenexa,” jai, bajarapajivi ayaijamatabĕcuenĕjivi Dioso pitabarata pajiviyo tovajĕtsijitsia matatoxenetsia. Daxita baja cajena yapĕtanetsi bajarapacuenĕ. <sup>8</sup> Majotaje, vaxaitsijavata, itsamonae sacerdotevijavabelia ofrenda rajutabiaba. Diez xuabeje pexainaeyajuvēņjavanē, caejavayo rajutabiaba sacerdotevijavabelia. Pasacerdotevijavabelia rajutabiaba bajaraxuanĕ, petĕpaevinexa. Tspaji saya jivi. Itsiata baitsi jane Dioso pejumelivaisibaxutota Melquisedecpijinē yabara jumaitsi pacueniaje: “Melquisedec abaxĕ mapamatacabita ataje asaĕ tsaponaponaĕ. Nexata tsiteca jivi tocuaicuaijai tsabiabi Diosojavabelia,” jai. <sup>9-10</sup> Bajayatami Abrahampijinē ofrenda rajuta Melquisedecpijinējavabelia. Bajarapamatacabĭ abaxĕ Levípijinē apo naexanaĕ. Pexi ata abaxĕ ajibi. Pemomoxi ata abaxĕ ajibi, pamonaĕ jane baja mapamatacabitaje sacerdotevi naexana jivi petocuaicuaijainexa Diosojavabelia. Itsiata paofrenda Abrahampijinē rajuta Melquisedecpijinējavabelia, bajaraxua Dioso tane Levínexa, daxita Leví pemomoxinexa ata. Bajarapacuenia Abrahampijinē daxitanexa yaiyataeya ofrenda rajuta Melquisedecpijinējavabelia.

<sup>11</sup> Pamatacabĭ Aarónpijinē, pexi ata, sacerdotevi baja tsavanapae, bajarapamatacabĭ judíovi pejumecovĕnĕtsinexa Dioso Moiséspijinĕta najumecopata. Pamonaĕ Aarónpijinē pexi, Levípijinē baja cajena pemomoxi. Judíovi itsa jumecovĕnĕtsipa Dioso Moiséspijinĕta penajumecopatsilivaisi Dioso aneconijibia petaenexatsi, nexata Dioso apo itorobitsica tsipae Cristo, ponĕ beMelquisedecjamatabĕcuenenĕ, jivi petocuaicuaijainexa Diosojavabelia daxitamatacabĭjavabelianexa. Dioso Moiséspijinĕta penajumecopatsilivaisi pejamatabĕcueneta Dioso aneconijibia judíovi itsa taejitsipa, nexata icatsia Dioso saya mataropotsia pepo sacerdotenĕ exanaponaejitsipa Aarónpijinē pemomoxi. <sup>12</sup> Nexata Cristo sacerdotenĕ itsa exanatsi, jivi petocuaicuaijainexa Diosojavabelia daxitamatacabĭjavabelianexa, yajavacopatatsi pijinia itsalivaisi Dioso Moiséspijinĕta penajumecopatsilivaisivecua. <sup>13</sup> Vajatuxanenĕ, ponĕ Dioso pejumelivaisibaxutota tajĕvelia vajunupaebatsi, bajaraponĕ Levípijinē apo pemomo. Biji rajane saicayavirianĕ. Bajaraponĕ pijaviriavi bajayata caenĕ ata sacerdotenĕ apo naexanaĕ. <sup>14</sup> Vajatuxanenĕ itsa naexana mapanacuataje, daxitajivi baja cajena yapĕtane penaexanaĕjava mapanacuataje. Vajatuxanenĕ naexana Judápijinē pemomoyota. Daxitajivi yapĕtanenua pacuenia bajayata Moiséspijinē tajĕvelia vajunupaeba pamonaĕ sacerdotevi naexanaponaĕjitsia. “Judápijinē pemomoxi ata sacerdotevi naexanaĕna,” apo jai picani.

<sup>15</sup> Bajaraxuata vaxaitsi xaniavaetsia jane baja yapĕtanetsi pepatsijava itsaviri-  
asacerdotenĕ. Tspaji Cristo, ponĕ jane baja pepo sacerdotenĕ jivi petocuaicuai-



jainexa Diosojavabelia daxitamatacabijavabelianexa, bajaraponë beMelquisedecjamatabëcuenenë. <sup>16</sup> Levípijinë pemomoxi sacerdotevi exanaponatsi. Tshipaji bajayata Moiséspijinë tocopata bajarapamonaeyajuvënëvi sacerdotevi pexanaenexatsi. Itsiata baitsi jane Cristo, pepo sacerdotenë itsa exanatsi jivi petocuaicuajainexa Diosojavabelia daxitamatacabijavabelianexa, Levípijinë pemomoxae, pepo sacerdotenë apo exanaetsi. Jume baja cajena. Biji rajane Cristo pepo sacerdotenë exanatsi icatsia piasaëxae petëpaecujinae. <sup>17</sup> Dioso baja cajena tajëvelia pexënatojavabelia pejumait-sijava, Dioso pejumelivaisibaxutota jumaitsi mapacueniaje:

Xamë raja pepo sacerdotenëmë tsane daxitamatacabijavabelianexa. Pacuenia Melquisedec jamatabëcueneitsi, bajarajamatabëcueneitsimë tsane, jai baja cajena tajëvelia Dioso pejumelivaisibaxutota Dioso pejumait-sijava pexënatojavabelia.

<sup>18-19</sup> Nexata baja palivaisimi copiaya Dioso Moiséspijinëta najumecopata jivi pejumecovënëtsinexa, Dioso baja copiarucaeyaexana. Tshipaji bajarapalivaisimi apo caëjëpaetsi jivi pevecuaajibiaexanaenexatsi pibisiacuene pexanaeneconi. Nexata palivaisi aeconoxae Dioso nacatocopata, xanepana bitso bajarapalivaisimi matatoxenetsia. Tshipaji baja Cristo vajanacasivatëpaexae, bajaraponë pejamatabëcueneta Dioso baja aneconijibia nacatane. Nexata nacatocopata vajajamatabëcuene saya vajaimoxoyotsinexa Dioso.

<sup>20</sup> Dioso baja cajena tajëvelia najumecapanepaeya jumaitsi Cristo pepo sacerdotenë pexanaenexatsi, jivi petocuaicuajainexa Diosojavabelia daxitamatacabijavabelianexa. <sup>21</sup> Pamonami bajayata copiaya Cristo pevajënaeya sacerdotevi exanaponatsi, bajarapamonaemi yabara Dioso bajarapacuenia apo jumaitsi. Itsiata baitsi jane tajëvelia Dioso najumecapanepaeya jumaitsi Cristo pepo sacerdotenë pexanaenexatsi. Bajaraxuata tajëvelia Dioso pejumelivaisibaxutota jumaitsi mapacueniaje:

Dioso baja cajena najumecapanepaeya itsa jumaitsi, itsajamatabëcuene icatsia epatua apo xinae. Bajaraxuata tajëvelia Dioso pexënatojavabelia pejumait-sijava, Dioso pejumelivaisibaxutota jumaitsi mapacueniaje: “Xamë baja cajena pepo sacerdotenëmë tsane daxitamatacabijavabelianexa. Pacuenia Melquisedec jamatabëcueneitsi, bajarajamatabëcueneitsimë tsane,”

jai Dioso pejumelivaisibaxutota tajëvelia Dioso pejumait-sijava pexënatojavabelia.

<sup>22</sup> Bajarapacuenia tajëvelia Dioso najumecapanepaeya pejumait-sixae Cristo yabara, nexata yapëtanetsi xua Cristo nacatoexana, bitso pexaniacuene. Bajaraxua bitso pexaniacuene, palivaisimi copiaya Dioso Moiséspijinëta najumecopata matatoxenetsia. <sup>23</sup> Copiaya pamonami sacerdotevi exanaponatsi, ayaibitsaëto jonepona sacerdotevinexa. Tshipaji tëpaponna. Nexata apo caëjëpaetsi pevetsinexa daxitamatacabijavabelianexa. <sup>24</sup> Itsiata baitsi jane Jesús baja icatsia apo tēpae tsane. Nexata pepo sacerdotenë tsane daxitamatacabijavabelianexa. Nexata baja icatsia itsanë pepo sacerdotenë apo exanaetsi tsane. <sup>25</sup> Nexata pajivi najamatabëcuenecopata Diosojavabelia pibisiacuene pexanaeneconi Dioso pevecuaajibiaexanaenexatsi, daxitamatacabijavabelianexa Dioso vecuaajibiaexanaenatsi. Bajarapacuenia daxitamatacabijavabelianexa pibisiacuene pexanaeneconi vecuaajibiaexanaenatsi Jesús pejamatabëcueneta. Tshipaji Jesús daxitamatacabijavabelianexa asaë tsaponaponae tsane jivi petocuaicuajainexa Diosojavabelia.

<sup>26</sup> Pacuenia baja Jesús pepo sacerdotenē, bajarapitsinē vaxaitsi vajanamatavenon-  
 aexae, Jesús baja patsica. Jesús cajena Dioso pejamatabēcuenejēpaenē, planeconi-  
 jibinē Diosojavabelia. Pibisiacuene pexanaevi ata, apo jamatabēcuenebijaetsi.  
 Tocopatatsi peecaenexa athēbētatsia, paxa Dioso pemuxuneneta, penajuaevetsinex-  
 abeje daxitacuene. <sup>27</sup> Pacuenia itsamonae pepo sacerdotevi jamatabēcueneitsi, ba-  
 jara Jesús apo jamatabēcueneitsi. Itsamonae pepo sacerdotevi, daxitamatacabi  
 dajubi beyabiaba ofrendacuenia bajarapavi perajutsinexa Diosojavabelia, pera-  
 jutsinexa pijana ata. Bajarapacuenia sacerdotevi exanabiaba, pibisiacuene pex-  
 anaeneconi Dioso pevecuaajibiaexanaenexatsi, itsamonae ata pibisiacuene pex-  
 anaeneconi Dioso pevecuaajibiaexanaenexatsi. Bajarapacuenia Jesús apo exanae.  
 Jesús saya nacopata pebeyaxuabinexatsi ofrendacuenia penarajutsinexa Diosojav-  
 abelia. Bajarapacuenia Jesús itsa nacopata pebeyaxuabinexatsi, caecuenia mata-  
 mota daxitajivi pibisiacuene pexanaeonomi daxitamatacabijavabelianexa. <sup>28</sup> Ba-  
 jayata palivaisi Dioso Moiséspijinēta najumecopata, bajarapalivaisi Dioso tocopata  
 pepo sacerdotevi penaexanaenexa mapanacuapijivi. Bajarapamonae apo caējēpae  
 atatsi pejinavanapaenexa pibisiacuene exanaenejeva, itsiata Dioso tocopata pepo  
 sacerdotevi penaexanaenexa. Itsiata baitsi jane bajaraxuacujinae Dioso najumeca-  
 panepaeya jumaitsi Dioso pexēnato pepo sacerdotenē penaexanaenexa daxitamata-  
 cabijavabelianexa. Jesús caeto ata pibisiacuene apo exanae.

### **Pacuenia Jesús daxitajivi petocuaicuaijainē Diosojavabelia yabara pelivaisi**

**8** Xua yabara baja pacatsipaebatsi, maitsije. Aeconoxae baja xainatsi Jesús, pepo  
 sacerdotenē vajanacatocuaicuaijainexa Diosojavabelia. Bajaraponē ecaeyaex-  
 anatsi athēbētatsia, Dioso ayaijamatabēcuenenē pemuxuneneta, pecujanenia, pe-  
 najuaevetsinexabeje daxitacuene. <sup>2</sup> Nexata jane baja aeconoxae Jesús Dioso pi-  
 jatemplobota athēbētatsia nacueneba pepo sacerdotenē penacuenebijava. Bajara-  
 patemplobo Dioso pexanaetemplobo. Jivi apo pexanaetemplobo. <sup>3</sup> Daxita pamonae  
 pepo sacerdotevi, tocopatatsi perajutabibinexa ofrenda Diosojavabelia. Dajubi ata  
 beyabiaba ofrendacuenia bajarapavi perajutsinexa Diosojavabelia. Bajaraxuata Je-  
 sucristo ata, vajanacatocuaicuaijainē Diosojavabelia, ofrenda rajuta Diosojavabelia.  
 Nexata Jesucristo ofrenda itsa rajuta Diosojavabelia, pijacuata nacopata pebeyaxu-  
 abinexatsi ofrendacuenia penarajutsinexa Diosojavabelia. <sup>4</sup> Itsa abaxē Jesucristo  
 mapamatacabi ata ponaponaejitsipa mapanacuataje, apo sacerdotenē tsipae. Je-  
 sucristo apo exanae tsipae pacuenia itsamonae sacerdotevi exanabiaba. Bajarapa-  
 monae saya dajubi beyabiaba ofrendacuenia bajarapavi perajutsinexa Diosojav-  
 abelia Moiséspijinē pitorobicueniatsi. <sup>5</sup> Xua Jesucristo athēbētatsia exanaponapona,  
 bajaraxua saya sacerdotevi cuenecataeya exanavanapa templobota mapanacuataje.  
 Bajaraxua sacerdotevi cuenecataeya pexanavanapaenexa, Dioso tocopatatsi. Yapē-  
 tanetsi baja cajena xua Jesucristo athēbētatsia exana, bajaraxua mapanacuapi-  
 jisacerdotevi saya cuenecataeya exanavanapa. Tsipaji pamatacabi Dioso Moiséspi-  
 jinē itorobatsi mapanacuata pexanaenexa Dioso pijacarpaboxaneto, Moiséspijinē-  
 javabelia Dioso jumaitsi mapacueniaje: “Exanaename daxita pacuenia baja catsita-  
 jētatsi petsutojumata,” jai Dioso. Bajaraxuata mapamatacabijavaberena ataje sac-  
 erdotevi templobota exanapona pacuenia Moiséspijinē Dioso tsitajētatsi petsutoju-  
 mata. <sup>6</sup> Itsiata baitsi jane Cristo, ponē pepo sacerdotenē, xua Dioso athēbētatsia toco-  
 patatsi petonacuenebinexa, bajaraxua bitso ayaijamatabēcuene. Xua bajayata sacer-

dotevi Dioso tonacuenebavanapa mapanacuataje, beveliajamatabëcuenejava saya. Tsipaji Cristo jivi tocaicuaijai tsane Diosojavabelia daxitamatacabijavabelianexa. Cristo nacayavenonabiabiana. Pepacune baja Cristo pejamatabëcueneta Dioso nacavecuajibiaexana vajaneconimi. Cristo nacayavenonaenanua Dioso vajanacarasjutsinexa xua yabara Dioso najumecapanepaeya jumaitsi vajanacarajutsinexa, baitsi matabaci apo peverevereaejava. Bajaraxua bitso pexaniacuene. Palivaisimi copiaya Dioso Moiséspijinëta najumecopata, bevelialivaisimi saya.

<sup>7</sup>Itsa baja xanepanaejitsipa copiaya palivaisi Dioso Moiséspijinëta najumecopata, nexata baja icatsia cotocaevi itsalivaisi Dioso najumecapanepaeya apo nacatonajumecopatsi tsipae. <sup>8</sup>Israelpijinë pemomoxi xaniavaetsia apo jumecovënëtsi palivaisi bajayata Dioso najumecopata Moiséspijinëta. Bajaraxuata Dioso tajëvelia najumecapanepaeya pejumaitisijava, Dioso pejumelivaisibaxutota jumaitsi mapacueniaje:

Itsamatacabijavabelia icatsia najumecapanepaeya jumaitsinë tsane pejanalivaisi jivi pejumecovënëtsinexa. Pajivi jumecovënëtsiana bajarapalivaisi, rajutsianajë matabaci apo peverevereaejava. Bajarapacuenia najumecapanepaeya jumaitsinë tsane Israel nacuapijivijavabelia, Judea nacuapijivijavabelia ata. <sup>9</sup>Bajarapamonaepijasalinaivimi bajayata matabacarenanë Egipto nacuaverena. Bajarapamatabaci baja najumecapanepaeya jumaitsinë pacuenia bajarapamonaemi yavenonaejitsianë picani. Itsiata baitsi jane bajarapamonaemi apo nejumecovënëtsi. Bajaraxuata copatajë baja bajarapamonaemi tayavenonaejava, jai Dioso pejumelivaisibaxutota tajëvelia Dioso pejumaitisijava Israelpijinë pemomoxi yabara.

<sup>10</sup>Dioso icatsia tajëvelia pejumaitisijava, Dioso pejumelivaisibaxutota jumaitsi mapacueniaje:

Nexata icatsia itsamatacabijavabelia najumecapanepaeya jumaitsinë tsane Israel nacuapijivi yabara mapacueniaje: “Caejivi canacujitsia pejamatabëëthëtota yapëtaeyaexanaponaenajë pacuenia netojinavanapaejitsia. Nexata bajarapamonaepjamatabëëthëttojavavetsina jitsipaena tanejumecovënëtsinexa. Nexata bajarapamonaepijaDiosonënë tsane. Bajarapamonaepijinia tajajivi tsane.

<sup>11</sup>Nexata bajarapamatabaci itsajivi ata apo jumai tsane itsanëjavabelia, pijamonaenëjavabelia ata: “Xamë ata beyapëtaneme Dioso,” apo jai tsane. Tsipaji baja daxitajivi neyapëtaena. Neyapëtaena beveliajamatabëcuenevi. Neyapëtaena ayajamatabëcuenevi ata. Daxita bajarapamonaeneyapëtaena. <sup>12</sup>Xanë baja daxita tajajivi pibisiacuene pexanaeconimi, vecuajibiaexanaenajë. Apo najamatabënapitsinë tsane bajarapapibisiacuenemi,

jai Dioso pejumelivaisibaxutota bajayata tajëvelia Dioso pejumaitisijava.

<sup>13</sup>Bajarapacuenia Dioso itsamatacabijavabelia icatsia najumecapanepaeya pejumaitisijavanexa yabara jumaitsi. Tsipaji baja ajumematamobi palivaisimi copiaya Dioso najumecapanepaeya jumaitsi judfovi pijasalinaivimijavabelia. Pacuenia mapanacuapijicuene ajibi tsaponae, bajara itsi bajarapalivaisimi. Vereverecapona baja.

**Pacuenia mapanacuata eca Diosojavabelia jivi penavajëcabiabibo, bajara pijinia pacuenia athëbëtatsia ata peccaëbo, yabara pelivaisi**

**9** Dioso copiaya najumecopata Moiséspijinëta. Bajarapalivaisita itoroba Israel pemomoxi pexanaenexa Dioso pijacarpaboxaneto, bajarapabota Diosojavabelia

penavajęcabiabinexa. Itorobanua sacerdotevi Dioso pijacuene petonacuenebavana-paenexa bajarapacarpabota. <sup>2</sup>Itsa baja vereteta carboxaneto Diosojavabelia penavajęcabiabibonexa, bajarapabo ěnětuatuajě yatuucutsiaya epatajěrětsiarena rurena ayaipapaěběrěpana. Bajarapaěněyatuucutsijava jumavereca, paěnětuatuajě pevěně Lugar Santo. Bajarajota nuta candelerověnějĵava pitayotanucaenexa. Mesa ata nuta bajarajota. Bajarapamesajumata pejebinexa pan, papan ofrendacuenia rajutabiaba Diosojavabelia. <sup>3</sup>Bajara papapaěběrěpanacujinaereca, paěnětuatuajě, pevěně pijinia Lugar Santěsimo, itsajota baitsi Dioso peponaponaenexa yatuucuta. <sup>4</sup>Bajarapaěněyatuucutsijava tuatuajěta, nuca orota pexanaejĵava, altarvěnějĵava. Bajara paaltarjumata jĵava petuxujuvijavaně, inciensověnějĵavaně, petajuitsinexa. Bajarapaěněyatuucutsijava tuatuajěta boca baula, orota pexanaebaula. Bajarapabaula ěnětuatuajěta nuca orota pexanaebotellabě. Bajarapabotellaběta yanuca pexaejĵava, manĀvěnějĵava. Bajarapabaula ěnětuatuajěta bocanua Aarěn-pijiněmi pijanaeboyoy. Bajarapanaeboyoy bajayata Aarěnpijině: “Baxujuvare,” itsa jĵai, baxujuvatabiabiaba. Bajarapabaula ěnětuatuajěta bocabejenua ibopanabeje. Bajarapabopanatabeje Dioso jĵivi pitavetsilivaisi najumeyaquinabuata. <sup>5</sup>Bajarapabaula matatsěněta anijaněbeje pecorofeto pexanaeněbeje nucabeje. Bajaraponěbeje beĀngelněbeje, jumapecataeya pexanaenětsibeje. Bajaraponěbeje nutatsibeje Dioso pijapenivenivenaecotia pitajětsinexabeje. Bajaraponěbeje pecorofetota baula matatsěněcaranatanucabeje. Nexata pepo sacerdoteně caevai canacujitsia bajarapabaula jumatsicababiaba dajubině pijanata. Pepo sacerdoteně bajarabaula itsa jumatsicababiaba, jamatabějumai tsabiabitsi: “Dioso nacaitaxutotsoniataena. Nacavecuajibiaexanaena pibisiacuene vajaexanaeconimi,” jamatabějai tsabiabi pepo sacerdoteně dajubině pijanata baulajuma petsicababiabijavata. Itsiata aeconoxae apo necuenecaějěpae patacatoyaquinaponaenexa pajamataběcuenelivaisi xainapona daxita bajaraxua.

<sup>6</sup>Bajarapacuenia bajayata Diosojavabelia penavajęcabiabibonexa, vereteta Dioso pijacarpoboxaneto. Nexata sacerdotevi joneyabiaba daxitamatacabi canacujitsia bajarapabojavabelia. Bajarapabo pěněyatuucutsijava penamataxainaeěnětuatuajětatsina, sacerdotevi jinavanapabiaba. Sacerdotevi joneyabiaba penacuenebinexa Dioso pijacuene petonajumecopatsicueniatsi. <sup>7</sup>Nexata bajarapabo pěněyatuucutsijava penamataxainaeěnětuatuajětsina cujinaereca, paěnětuatuajějavabereca, sacerdotevi pepo penamatacaitorobině caeně joneyabiaba. Bajarapacuenia joneyabiaba caeto caevai canacujitsia. Itsa joneyabiaba, cajoneyabiaba dajubi pijana. Bajarapajanata sacerdotevi pepo penamatacaitorobině jumatsicababiaba bajarapabaula. Bajarapacuenia exanabiaba bajarapajana ofrendacuenia perajutsinexa Diosojavabelia. Bajarapacuenia exanabiaba pibisiacuene pexanaeneconi Dioso pevecuajibiaexanaenexatsi. Bajarapacuenia exanabiaba daxita itsamonae xua pibisiacuene exanae ata, itsiata apo nacueneyapětae, Dioso pevecuajibiaexanaenexatsi. <sup>8</sup>Espěritu Santo pejamataběcueneta nacayapětaeyaexana mapacueneje. Pamatacabi abaxě Dioso pijacarpoboxaneto piapiapapaěběrěpanaxanetota ěnětuatuajě yatuucutarurena, sacerdotevi Dioso pijacuene tonacuenebavanapa bajarapacarpoboxanetota. Bajarapamatacabi Dioso apo tocopatsi jĵivi pejonenexa Lugar Santěsimojavabelia pijacuata pevajětsinexa Diosojavabelia. Bajaraxua vajayapětaenexa Espěritu Santo pejamataběcueneta nacayapětaeyaexana. <sup>9</sup>Bajaraxua bajayata sacerdotevi exana comparaciěncuenia ajena mapamatacabijavaberenaje vajanacayapětaeyaex-

anaenexa bajaraxua yabara. Jivi dajubi beyabiaba ofrendacuenia bajarapavi perajutsinexa Diosojavabelia. Vaxaitsi baja yapëtanetsi mapacueneye. Bajarapacuenia jivi exanae ata, nacueratabiaba. Tsipaji jivi dajubinëvi ofrendacuenia rajutabiabi ata Diosojavabelia, tsiteca pijaperujumatabëcuene xainavanapa. <sup>10</sup> Paperujulivaisimi bajayata Dioso Moiséspijinëta najumecopata, jivi apo itorobitsi penajamatabëcuenexaniavaetsinexa. Biji rajane saya itorobatsi pexaejavanexa xaniavaetsia pevetsinexa, piapaeranexa ata xaniavaetsia pevetsinexa, xaniavaetsia penaperabëquiatsinexanua. Bajarapacuenia itorobatsi bajarapalivaisimi pejumecovënëtanapaenexa abaxë Cristo pepatsivajënaeyatsica. Nexata Cristo pepatsicujinaetsica, Dioso jane baja bajarapalivaisimi peverevereceaeyaxanaenexa pejanalivaisita.

<sup>11</sup> Capanepaeya baja pata Cristo, pepo sacerdotenë. Bajaraponë vajanacatocuaicuajinënexa Diosojavabelia daxitamatacabijavabelianexa. Aeconoxae baja Cristo pexaniacuene nacatoexana. Cristo baja pona athëbëabetsia, Dioso pepo pijaboyabetsia. Bajarapabo bitso pexaniabo mapanacuata jivi pexanaebo mata-toxenetsia. Dioso saicaya pexanaebo. <sup>12</sup> Bajarabetsia Cristo itsa junua bajarapabotatsia, caecueneta junua bajarapaboënëalia, Lugar Santísimojavabelia, itsajota baitsi Dioso peponaponaenexa yatuucuta. Cristo itsa junua, apo cajone chivojana, becerrojana ata. Biji rajane Cristo najanacajunua daxitajivinexa. Nexata baja caecuenia nacaneconimatamota daxitamatacabijavabelianexa Dioso vajanacapanepaenexa. <sup>13</sup> Xaniajai. Bajayata Israelpijinë pemomoxi itsa naneconita Diosojavabelia, abaxë apo tocopatabiabitsi penajonenexa Diosojavabelia penavajëcabiabibojavabelia. Nexata Israelpijinë pemomoxi copiaya matatsicababiabatsi chivojanata, torojanata ata. Becerrami altarvënëjavajumata petajuitsiipumana ata tsi-mataothoothotabiabatsi. Nexata jane baja xuacujinae tocopatabiabatsi icatsia penajonenexa Diosojavabelia penavajëcabiabibojavabelia. <sup>14</sup> Bajarapacuenia bajayata Dioso tocopatatsi dajubinë pijana pejamatabëcueneta Israelpijinë pemomoxi pejonenexa Diosojavabelia penavajëcabiabibojavabelia. Dajubinë pijana matatoxenetsia Cristo bitso caëjëpatsi vajanacayavenonaenexa Dioso pexënatoxae. Espiritu Santo, apo peverevereceaenë daxitamatacabijavabelianexa, Cristo yavenonatsi. Nexata Cristo nacopata pebeyaxuabinexatsi vajanacasivatëpaenexa. Cristo cajena caeto ata pibisiacuene apo exanae. Nexata Cristo pijanata nacavecuajibiaexana baja pibisiacuene vajaexanaeconimi. Bajarapaneconi yabara picani Diosovecua vajanaxuabiviminexa. Bajarapacuenia Cristo vajanacatoexanaexae, tonacuenebavana-patsi piasaëtsaponaponaenë Dioso.

<sup>15</sup> Nexata Jesucristo pejamatabëcueneta nacavecuajibiaexana baja vajaneconimi. Nexata baja aneconijibia Dioso nacatane. Bajaraxuata daxita pamonaë Dioso junatatsi, rajutsianatsi matacabi apo peverevereceaeyaxa, pacuenia baja Dioso najumecapanepaeya jumaitsi perajutsinexatsi. Cristo itsa nacasivatëpa, nacaneconimatamota baja. Nexata nacavecuajibiaexana daxita paneconimi xainatsi itsa abaxë jumecovënëtanapatsi copiaya palivaisimi Dioso Moiséspijinëta najumecopata. <sup>16-17</sup> Itsajivi petëpaevajënae, yaquina pecobecovë yabara. Bajarapajivi itsa tëpa, pijamonae pevënamuto penatsicobetsanaenexa. Nexata yaquina pacuenia caejivi canacujitsia pitaponaejitsia. Itsiata baitsi jane abaxë itsa asaë taponaponaë pecobecovë pexinaejivi, ajumematamobi abaxë bajarapalivaisi. Matapania baja itsa tëpa pecobecovë pexinaejivi, jumenamatamota jane baja bajarapalivaisi. Nexata jane baja xanepana pijamonae penatsicobetsanaenexa pacuenia petëpaejivi yaquina

petëpaevajënaeya pecobecovë yabara. <sup>18</sup> Bajara pijinia itsi paperujulivaisimi bajayata Dioso Moiséspijinëta najumecopata Israelpijinë pemomoxi pejumecovënëtsinexa. Jumenamatamotapona Israelpijinë pemomoxi dajubi pebeyabiabixae ofrendacuenia bajarapavi perajutsinexa Diosojavabelia. <sup>19</sup> Bajayata Moiséspijinë copiaya tsipaeba daxitajivijavabelia daxitajivi bajarapalivaisi pejumecovënëtavana-paenexa. Nexata Moiséspijinë pita hisopovënë naeboxi pepacëtetsicunuyo petso-bialanamaëtota. Bajaraxuacujinae bajarapacunuyo Moiséspijinë jabuta merata, be-cerrojatana, chivojanatanua, peyajavamatajërëabijanarata. Nexata Moiséspijinë tsi-matatsicaba pabaxutota itanerubena palivaisi Dioso najumecopata Moiséspijinëta. Bajaraxuacujinae Moiséspijinë daxitajivi tsi-matatsicabapona. <sup>20</sup> Nexata Moiséspijinë jumaitsi jivijavabelia: “Mara pacuenia pacamatatsicabatsije. Nexata patacamatatsi-cabixae, xaniavaetsia jane baja Dioso pajumecovënëtavanapaenexa. Nexata pacue-nia Dioso najumecapanepaeya pacajumaitsi, pacatocopiapatsiana,” jai Moiséspi-jinë jivijavabelia. <sup>21-22</sup> Bajaraxuacujinae icatsia Moiséspijinë tsicabanajaenajaeba Diosojavabelia penavajëcabiabibo ënëtuatujë. Xuanë bajarapabo ënëtuatujëta xaina pecanacuenebinexa Dioso pijacuene, daxita bajaraxuanë yajavatsicabanajae-najaeba. Bajarapacuenia pexanaenexa itoroba baja cajena Dioso Moiséspijinëta pe-najumecopatsilivaisimita. Itoroba dajubinë pijanata daxitacuene petsicabinexa, pet-sicabicujinae Dioso axuirajibia petaenexa daxita bajaraxuanë, jivi ata Dioso aneconi-jibia petaenexa. Tsipaji jivi pibisiacuene pexanaeneconi yabara, acuenebi Dioso aneconijibia petaenexatsi. Matapania dajubinë itsa beyaxuaba, pijanata itsa matat-sicabatsi, Dioso jane baja aneconijibia tanetsi.

### **Pacuenia Cristo nacopata pebeyaxuabinexatsi mapanacuapijivi pijaneconi pevecuaajibiaexanaenexa yabara pelivaisi**

<sup>23</sup> Diosojavabelia penavajëcabiabibota, xuabeje xaina pecanacuenebinexa Dioso pijacuene, dajubinë pijanata bajayata Moiséspijinë tsicabanajaenajaeba. Bajarapacuenia Moiséspijinë itsa exana, tajëvelia comparacióncuenia itajëtapona jivi pepapëtaenexa itsamatacabijavabelia Cristo pesivatëpaejavanexa mapanacuapijivi. Cristo dajubinë pijanata apo tsicabanajaenajaebi Diosojavabelia penavajëcabiabibo ënëtuatujë. Biji rajane Cristo nacopata pebeyaxuabinexatsi. Nexata Cristo pijana pejamatabëcueneta, mapanacuapijivi pibisiacuene pexanaeneconi, Dioso baja ve-cuaajibiaexanatsi. Cristo cajena bitso jananamatamota Dioso pitabarata, dajubinë pejana matatoxenetsia. <sup>24</sup> Cristo baja cajena vajanacasivatëpaecujinae, athëbëa-betsia pona. Aeconoxae baja Cristo athëbëtatsia eca, paxa Dioso pemuxuneneta, vajanacatocuaicuajitsecanenexa Diosojavabelia. Nexata Dioso pepo pijabotatsia Cristo nacatocuaicuajai tsaponae. Bajarapabo apo pexanaebo itsajivi ata. Apo be-mapanacuapijibo. Tsipaji pacarpoboxaneto mapanacuata jivi exana Diosojavabelia penavajëcabiabibonexa, bajarapabo saya cuenecataeya exana pacuenia athëbëtatsia Dioso pepo pijabo itsi. <sup>25</sup> Sacerdotevi pepo penamatacaitorobinë, bajaraponë judionë. Caevai canacujitsia cajoneyabiaba dajubinë pijana Lugar Santísimovënë-javabelia, itsajota baitsi Dioso peponaponaenexa yatuucuta. Itsiata baitsi jane Cristo bajarapacuenia apo exanabiabi caevai canacujitsia. Caeto penacopatsicujinae pe-beyaxuabinexatsi vajanacasivatëpaenexa, icatsia baja pematatsënëa apo nacopatsi petëpaenexa. <sup>26</sup> Dioso mapanacuaje pexanaejavaveliacujinae, Dioso itsa tocopatsipa Cristo jivi pesivatëpaponenexa caevai canacujitsia, nexata Cristo bitso anijatonë

jivi pijaneconi yabara sivatëpaponaejitsipa. Itsiata baitsi jane Cristo caeto petëpaecujinae, icatsia baja apo tēpae. Itsa baja copiarucaejitsia perujulivaisimi, Cristo naexana mapanacuataje. Nexata caeto nacopata pebeyaxuabinexatsi vajanacasivatëpaenexa, pibisiacuene vajaexanaeoneconimi vajanacavecuajibiaexanaenexa. <sup>27</sup> Bajara pijinia pacuenia vaxaitsi ata caeto tēpaponaeatsi. Bajaraxuacujinae jane baja Dioso naneconitsiaexanaponaena daxita pamonaе pijaneconi pexainaеvi. <sup>28</sup> Bajara pijinia pacuenia Cristo caeto nacopata pebeyaxuabinexatsi vajanacasivatëpaenexa, ayailbitsaëtoxanetotsi pibisiacuene vajaexanaeoneconi vajanacavecuajibiaexanaenexa. Bajaraxuacujinae Cristo baja athëbëabetsia pona. Icatsia patsianica cotocaevijava. Itsiata baitsi jane baja icatsia apo nacasivatëpae tsane pibisiacuene vajaexanaeoneconi yabara. Saya baja nacasivapatsianica vajavajënaeветavanapaеvi vajanacacaponaeenexa athëbëabetsia.

**10** Palivaisi bajayata Dioso Moiséspijinëta najumecopata, bajarapalivaisi saya Dioso najumecopata tajëvelia vajayapëtaenexa papexaniacuene aeconoxae Cristo nacatoexana. Pacuenia jumaitsi Dioso Moiséspijinëta penajumecopatsilivaisi, sacerdotevi exanabiaba Cristo pepatsivajënaeyatsica. Caevai canacujitsia dajubinë beyaxuababiaba ofrendacuenia pevi perajutsinexa Diosojavabelia, pibisiacuene pexanaeoneconi Dioso pevecuajibiaexanaenexatsi. Itsiata baitsi jane bajarapacuenia exanabiabi ata, pepacuene apo jamatabëcuenexaniavaetsitsi. <sup>2</sup> Pacuenia bajayata itorobatsi Dioso Moiséspijinëta penajumecopatsilivaisi, sacerdotevi exanabiaba. Dajubinë beyaxuababiaba ofrendacuenia pevi perajutsinexa Diosojavabelia. Bajarapacuenia pexanabiabixae, pepacuene Dioso itsa vecuajibiaexanaejitsipatsi pibisiacuene pexanaeoneconi, nexata bajarapamonae apo yanajamatabëxainae tsipae pijaneconi. Nexata baja itsa aneconi jibi tsipae, pematatsënëa dajubinë apo beyaxuababiabi tsipae ofrendacuenia pevi perajutsinexa Diosojavabelia pijaneconi yabara. Caeto saya ofrenda rajutsipa Diosojavabelia. <sup>3</sup> Bajarapacuenia dajubinë caevai canacujitsia beyaxuababiabi ata ofrendacuenia pevi perajutsinexa Diosojavabelia, itsiata jivi jamatabëcuenearëyaya apo jinavanapae. Biji rajane bajarapacuenia exanabiabi ata, pevajënaeyabelia tsiteca yanajamatabëxainapona pijaneconi. <sup>4</sup> Bajarapacuenia beyaxuababiabi ata toro, chivo ata, bajarapajana apo caëjëpaetsi jivi pijaneconi pepacuene pevecuajibiaexanaenexatsi.

<sup>5</sup> Bajaraxuata Cristo pepatsicujinaetsica mapanacuayabetsicaje, paxa Diosojavabelia jumaitsi mapacueniaje:

Apo jitsipaemë xamë xua jivi carajutabiaba ofrendacuenia. Apo jitsipaemënu dajubinë ata pebeyaxuababiabijava pevi pecarajutsinexa ofrendacuenia. Bajaraxuata xanë nitorobimica pacuenia banaexana mapanacuapijivi, tanaexanaenexa mapanacuata, mapanacuapijivi tasivatëpaenexa pijaneconi yabara. <sup>6</sup> Jivi picani dajubinë beyaxuababiaba ofrendacuenia pevi pecarajutabiabinexa, altarvënëjavajumata pecatotajuitsinexa. Jamatabëjumai tsabiabi bajarapamonae: “Tajaneconi Dioso nevecuajibiaexanaena mapacuenia itsa exanaenajëje,” jamatabëjai tsabiabi. Itsiata baitsi jane apo sivajamatabëcuenearëyamë bajaraxua yabara. <sup>7</sup> Bajara jane manucajëje pacuenia jitsipame tacatoexanaenexa, pacuenia nijumelivaisibaxutota tajëvelia jumaitsi xanë yabara, tasivatëpaenexa nijajivi,

jai Cristo paxa Diosojavabelia.

<sup>8</sup>Nexata bajarapacuenia Cristo pejumlahtsixae, aeconoxae baja vaxaitsi yapētanetsi mapacueneye. Dioso aeconoxae apo sivajamatabēcuenenarēya jivi dajubinē pebeyaxuababiabijava ofrendacuenia pevi perajutabiabinexa Diosojavabelia. <sup>9</sup>Icatsia Cristo jumaitsi paxa Diosojavabelia mapacueniaje: “Bajara jane manucajēje pacuenia jitsipame tacatoexanaenexa,” jai Cristo. Cristo baja manacuapijivi pibisiacuene pexanaeneconi yabara sivatēpa cruzata pacuenia paxa Dioso itorobatsi. Nexata sacerdotevi dajubinē pebeyaxuababiabijava ofrendacuenia pevi perajutabiabinexa Diosojavabelia, Cristo baja copiarucaeyaxana. <sup>10</sup>Pacuenia Dioso tojitsipatsi, Jesucristo nacopata pebeyaxuabinexatsi vajanacasivatēpaenexa cruzata. Bajarapacuenia Jesucristo nacasivatēpa vajanacavecuajibiaexanaenexa pibisiacuene vajaexanaeneconimi. Caeto baja Jesucristo nacasivatēpa daxita mapanacuapijivitsije.

<sup>11</sup>Caematacabi canacujitsia picani sacerdotevi nubenabiaba altarvënëjjava muxuneneta, dajubinē itsa beyaxuaba, ofrendacuenia pevi perajutabiabinexa Diosojavabelia. Itsiata baitsi jane bajarapacuenia exanabiabi ata, Dioso pepacuenie apo vecuajibiaexanaetsi pibisiacuene pexanaeneconi. <sup>12</sup>Jesucristo baja cajena nacopata pebeyaxuabinexatsi, vajanacaneconimatamotsinexa pibisiacuene vajaexanaeneconimi. Caeto baja Jesucristo tēpa pibisiacuene vajaexanaeneconi vajanacaneconimatamotsinexa daxitamatacabijavabelianexa. Bajaraxuacujinae Jesucristo athēbētatsia eca, paxa Dioso pemuxuneneta, penajuaevetsinexabeje daxitacuene. <sup>13</sup>Cristo abaxē aeconoxae athēbētatsia ecaya. Jamatabēcueneevetecaya abaxē pijavajabitsaē paxa Dioso petojamatabēcueneamoneyabinexatsi. Nexata Jesús pijavajabitsaēmi ata pacuenia itoroba, pejumecovēnētsinexatsi. <sup>14</sup>Caeto baja Cristo nacopata vajanacasivatēpaenexa. Nexata vaxaitsi, Cristo pelivaisi vajajumecovēnētavanapaevi, Cristo pejamatabēcueneta Dioso nacavecuajibiaexana pibisiacuene vajaexanaeneconimi daxitamatacabijavabelianexa. <sup>15</sup>Cristo baja cajena caeto vajanacasivatēpaejavanexa daxitamatacabijavabelianexa, Espiritu Santo tajēvelia nacayapētaeyaxana. Espiritu Santo tajēvelia nacayapētaeyaxana pexaniajaicuene, xua baja aeconoxae Cristo nacatoexana. Tspijaji baja cajena Dioso pejumelivaisibaxutota tajēvelia jumaitsi mapacueniaje:

<sup>16</sup>Najumecapanepaeya tajajivi yabara pejanalivaisi itsamatacabi jumaitsinē tsane mapacueniaje: “Caejivi canacujitsia pejamatabēēthētota yapētaeyaxanaponaponanajē pacuenia netojinavanapaejitsia. Nexata bajarapamonae pejamatabēēthētojavavetsina jitsipaena tanejumecovēnētsinexa,” jai Dioso.

<sup>17</sup>Bajaraxuacujinae icatsia Dioso jumaitsi mapacueniaje: Apo najamatabēnapitsinē tsane itsamatacabijavabelia ata daxita papibisiacuene bajarapamonae exana, jai Dioso tajēvelia pija-jivi yabara.

<sup>18</sup>Nexata jane baja Cristo nacasivatēpa pibisiacuene vajaexanaeneconimi Cristo pejamatabēcueneta Dioso vajanacavecuajibiaexanaenexa. Nexata baja pematatsēnēa dajubinē apo beyaxuababiabi tsanetsi ofrendacuenia pevi vajarajutabiabinexa Diosojavabelia, pibisiacuene vajaexanaeneconi Dioso vajanacavecuajibiaexanaenexa.



### Pacuenia saya vajajamatabëcuene imoxoyotsijitsiatsi Dioso yabara pelivaisi

<sup>19</sup> Tajamonaē, Jesucristo baja vajanacasivatëpaexae, aeconoxae baja Dioso nacatocopata ajunavijibia vajajonenexa Dioso pijanacuayabetsia. Nacatocopatanua bajarajotatsia vajajonenexa Lugar Santísimovënëjavabelia, itsajota baitsi Dioso ponapona. <sup>20</sup> Jesucristo nacatoexana pejananamuto vajaponaenexa athëbëabetsia, Dioso vajanacarajutsinexa maticabi apo pevereverecejave. Jesucristo baja itsa nacasivatëpa cruzata, nacasivatëpa vajapatsinexa Diosojavabetsia. <sup>21</sup> Bajayata sacerdotevi toevetavanapa Dioso pijacarpaboxaneto. Bajara pijinia pacuenia aeconoxae Jesucristo, pepo sacerdotenë jane baja, nacaevetaponapona vaxaitsi vajanacatocuaicuajainexa Diosojavabelia. <sup>22</sup> Bajaraxuata vajajamatabëëthëtojavavetsina vajajamatabëcuene saya bimoxoyotatsi Dioso. Bëpënëa vajajamatabëcueneta Dioso yamaxëtojobiaya apo bejumecovënëtsitsi. Tsipaji yapëtanetsi Dioso vajanacapanepaejavanexa. Bajarapacuenia Dioso nacacapanepaena tsipaji baja pibisiacuene vajaexanaeconimi Dioso nacavecuajibiaexana. Nexata baja nacaajamatabëcuene xuirajibiaexana Jesucristo vajanacasivatëpaexae. Vajanacabautisabijavata, nacaperabëquitanua piaxuirajibimerata. <sup>23</sup> Vajavajënaeyabelia asaëyata copiaevetavanapenatsi Dioso vajanacapanepaejavanexa. Bajarapacuenia asaëyata copiaevetavanapenatsi Dioso jumeaebinejevatsi. Nexata itsamonaejavabelia navajunupaebabibianatsi Dioso vajanacapanepaejavanexa. Tsipaji baja pacuenia Dioso najumecapanepaeya nacajumaitsi, xaniajai baja cajena. Dioso nacacapanepaena. <sup>24</sup> Nexata vaxaitsi namataenetsia benayavenonatsi vajanajamatabëcueneitajëtsinexa vajanasi vacuene. Namataenetsianua pexaniacuene benatoexanabiabatsi. <sup>25</sup> Itsamonae baja vaxaitsiyajuvënëvi copabapona penajoneyabiabijava vajanacaetuatabi-abibojavabelia. Vaxaitsi nexata bajarapamonae apo becuenejëpaetsi. Namataenetsia benajamatabëcueneasaëyaexanaponatsi. Aeconoxae baja bitsoyo biamatabëcuenesaëtsi tsavanapae. Tsipaji baja imoxoyo pevajënae vajatuxanenë pepatsinexatsica.

<sup>26</sup> Vaxaitsi tsiteca vajavajënaeyabelia pibisiacuene itsa exanaponaejitsipatsi, yapëtae atatsi Cristo vajanacasivatëpaejava, nexata nacatoacuenebi tsipae Dioso vajanacavecuajibiaexanaenexa pibisiacuene vajaexanaecononi. <sup>27</sup> Bajarapacuenia vajavajënaeyabelia tsiteca pibisiacuene itsa exanaponaejitsipatsi, nexata saya copiae vetavanapaejitsipatsi pinijicuenia Dioso ëvajanacananeconitsia exanaejavanexa. Pamaticabi Dioso pijavajabitsaë naneconitsiaexanaena pinijiisotojavabelia peverebiabinexa, bajarapamaticabi vaxaitsi ata, bajarapamonae yajava, pinijicuenia Dioso nacayajavananeconitsia exanaejitsipa. <sup>28</sup> Bajayata Dioso Moiséspijinëta najumecopata jivi pejumecovënëtsinexa. Nexata pajivi apo jumecovënëtsi Dioso Moiséspijinëta penajumecopatsilivaisi, beyaxuabaponatsi. Bijaivibeje, acueyabi pajivibeje ata, itsa jumaitsi pibisiacuene pexanaejivi yabara: “Pataniji pepacuene pibisiacuene pexanaejava mapajivije,” itsa jai, nexata bajarapajivi apo itaxutotsoniataetsi. Beyaxuabatsi pibisiacuene pexanaecononi yabara. <sup>29</sup> Pacanaëjère mapacueneje. Pajivi apo jumecovënëtsi Dioso Moiséspijinëta penajumecopatsilivaisi, naneconitsiaexanatsi. Nexata bajaraxua matatoxenetsia Dioso bitso naneconitsiaexanaenatsi pajivi copata pejumecovënëtsijava Dioso pexënato pesivatëpaejavatsi pijanecononi yabara. Pajivi copata pejumecovënëtsijava Dioso pexënato pesivatëpaejavatsi pijanecononi yabara, bajarapajivi tane Dioso pexënato pesivatëpaejavatsi bepiamatamobicujiru. Apo canaëjëtsinua Espíritu Santo piasivajavatsi. <sup>30</sup> Yapëtanetsi baja cajena Dioso pe-

jumaitsijava mapacueniaje: “Pamonae pibisiacuene exanapona itsamonaejavabelia, bajarapamonae xanë naneconitsiyaexanaenajë,” pejajjava. Jumaitsinua Dioso mapacueniaje: “Xanë Diosonënë, naneconitsiaexanaenajë tajajivi,” jai. <sup>31</sup> Pajivi Dioso apo jumecovënëtsi, nexata Dioso itsa naneconitsiaexanaenatsi, jbitso piayaicuene taeyaexanaenatsi piasaëtsaponaponaenë Dioso!

<sup>32</sup> Panajamatabënapire pacuenia pajamatabëcueneitsimë tsavanapae pamatacabi ajena Cristo pajumecovënëtame. Bajarapamatacabi pajamatabëcueneesaëmë tsavanapae panejumecovënëtsijava vajatuxanenë pelivaisi, itsamonae pacabejiobi-aexanae ata bajarapalivaisi yabara. <sup>33</sup> Paxamëyajuvënëvi baja cajena jivi ayaibit-saëto pitabarata itsamonae capocaponatsi. Ayaicuenia baja cajena bejiobiaex-anatsinua bajarapamonae pitabarata. Nexata pijinia itsamonae paxamëyajuvënëvi bitso sivanajamatabëxaina bajarapacuenia papecayajuvënëbejiobia exanaexaetsi. <sup>34</sup> Paxamë paitaxutotsoniataneme pamonae jebatsi penaneconitsivi pejebabiabibota Dioso pejumelivaisi yabara. Paxamë itsamonae pacavecuanotsi ata panijairanëmi, panecobecovëjavaximi yajava, itsiata paxamë pajamatabëcuenebarëyamë. Bajara-pacuenia pajamatabëcuenebarëyamë tsipaji baja payapëtaneme xua athëbëtatsia paxainaejitsiamë. Bajaraxua mapanacuapijicuene matatoxenetsia bitso pexani-acuenejava. Tsipaji daxitamatacabijavabelianexa apo peverevereaejavanexa. <sup>35</sup> Bajaraxuata pëtsa pacopabame panesivanajamatabëcueneecopatsijava Diosojavabelia papecayavenonaenexa. Dioso cajena athëbëtatsia pacarajutsiana ayaiacuenejava panenajamatabëcueneecopatsixae bajaraponëjavabelia. <sup>36</sup> Bajayajebi ata paneva-jënaeyabelia paexanaponare pacuenia Dioso pacatojitsipa. Nexata xua yabara tajëvelia Dioso najumecapanepaeya jumaitsi papecarajutsinexa, bajaraxua Dioso pacarajutsiana. <sup>37</sup> Cristo icatsia pepatsijavanexatsica yabara, Dioso pejumelivaisi-baxutota tajëvelia jumaitsi mapacueniaje:

Bepijia patsianica ponë patsijitsiatsica. Apo cuenenajematsi tsane pepatsinex-atsica. <sup>38</sup> Nexata pajivi Dioso aneconijibiatanetsi Diosojavabelia penaja-matabëcueneecopataponaponaexae, bajarapajivi xainaena matacabi apo pev-erevereeajava. Itsiata baitsi jane pajivi nevecuanaviata pecovëyabelia, apo sivajamatabëcuenebarëyanë tsane, jai Dioso pejumelivaisibaxutota.

<sup>39</sup> Itsiata baitsi jane vaxaitsi vajacovëyabelia Diosovecua apo naviabi tsanetsi Diosovecua vajanaxuabiyanima. Biji rajane vaxaitsi najamatabëcueneecopabatsi Diosojavabelia ëvajanacacapanepaejavabelianexa.

### **Pacuenia Dioso pejumecovënëtsivi apo jumeaebi xua Dioso najumecapanepaeya jumaitsi yabara pelivaisi**

**11** Itsa pepacuene vaxaitsi xaniavaetsia najamatabëcueneecopatatsi Diosojav-abelia, nexata najamatabëxainatsi mapacueniaje: “Abaxë daxitacuene apo copiapatsi ata, xua yabara Dioso najumecapanepaeya jumaitsi, itsiata yapëtaniji pexaniajaicuene. Pacuenia Dioso najumecapanepaeya jumaitsi, xaniajai baja cajena. Pepacuene Dioso exanaena,” jamatabëjaitsi. <sup>2</sup> Bajayata vajasalinaivimi jumecov-ënëta Dioso. Nexata bajarapamonaemi jamatabëjumaitsi tsabiabi: “Pacuenia Dioso najumecapanepaeya jumaitsi, pepacuene neyavenonaena,” jamatabëjai tsabiabi. Bajaraxuata bajarapamonaemi yabara Dioso jumaitsi: “Sivajamatabëcuenebarëyanë,” jai.

<sup>3</sup>Vaxaitsi ata jumecovënētatsi Dioso. Nexata yapētanetsi pexaniajaicuene macpacuenia pejumaitsilivaisije: “Dioso baja cajena nacua exana daxitacuene yajava. Dioso saya pijumeta daxitacuene exana. Daxita xua aeconoxae vajaitaxutota tanetsi, Dioso baja cajena exana. Abaxë pamatacabi ajibi itsacuenejavayo ata mapanacuataje, Dioso baja cajena exana daxitacuene,” pejaillivaisi yapētanetsi pexaniajaicuene.

<sup>4</sup>Bajayatami Abelpijinē najamatabēcuenecopata Diosojavabelia. Abelpijinē jumecovënēta pacuenia Dioso itorobatsi. Nexata Abelpijinē dajubinē beyaxuaba. Nexata ofrendacuenia pevi rajuta Diosojavabelia. Dioso nexata sivajamatabēcuenecobarēyatsi. Abelpijinē pijinia pematapijinēmi, Cañpijinē, apo jumecovënētsi pacuenia Dioso itorobatsi. Saicaya pijinia itsaviriajava ofrendacuenia rajuta Diosojavabelia. Dioso nexata apo sivajamatabēcuenecobarēyatsi Cañpijinē. Nexata Abelpijinē bajayatami baja tēpae ata, itsiata mapamatacabijavaberena ataje vënēlivaisitaeponatsi Dioso pejumecovënētsijava. Nexata baja voxaitsi yapētanetsi, voxaitsi ata Dioso itsa jumecovënētatsi, Dioso vajanacasivabarēyajavanexa.

<sup>5</sup>Bajayata Enocpijinē ata najamatabēcuenecopata Diosojavabelia. Bajaraxuata apo tēpaenejeva Dioso caponatsi athëbēabetsia. Jemata pitajarabatsi. Nexata itsamonae jaitsi atatsi, itsiata apo caxitajarabitsi. Dioso pejumelivaisibaxutota jumaitsi pacuenia Enocpijinē Dioso pepitsivajēnaeyatsi, Dioso sivajamatabēcuenecobarēyatsi.

<sup>6</sup>Pajivi apo najamatabēcuenecopatsi Diosojavabelia, bajarapajivi yabara Dioso apo jamatabēcuenecobarēya. Pajivi najamatabēcuenecopatsijitsia Diosojavabelia, bajarapajivi copiaya bejamatabējumaitsi mapacueniaje: “Xaniajai tsaena baja. Dioso ponapona. Bajaraponē jivi pitaxutotsoniataenē. Nexata pamonaē asaēyata vajēta Diosojavabelia pibisiacuene pexanaeconi pevecuaajibiaexanaenexatsi, bajarapamonae pijaneconi Dioso vecuaajibiaexanatsi,” bejamatabējai copiaya.

<sup>7</sup>Bajayata Noépijinēmi ata najamatabēcuenecopata Diosojavabelia. Nexata Noépijinēmijavabelia tajēvelia Dioso jumaitsi pacuenia mapairaje Dioso bubutsiaexanaejitsia. Nexata Noépijinēmi abaxë apo tae ata mapairaje pebubutsijava, itsiata jumecovënēta pacuenia Dioso jumaitsi. Nexata baja pinijibarcoxaneto exana pebarēpanepaenexa pijamonae mapaira pebubutsijavavecuaje. Bajarapacuenia Noépijinēmi pijamonae pebarējumecovënētsixae Dioso, nexata Dioso aneconi jibia tanetsi. Bajarapamatacabi daxita mapanacuapijivimi apo jumecovënētsi Dioso. Caenē Noépijinē pijamonae barējumecovënēta Dioso. Nexata daxita pamonaemi apo jumecovënētsi Dioso, nayapētane bitso penaneconitsijava Diosojavabelia.

<sup>8</sup>Bajayata Abrahampijinēmi ata najamatabēcuenecopata Diosojavabelia. Nexata Dioso itsa itorobatsi Abrahampijinē pevecuapitsapaenexa pijanacuami, jumecovënēta. Nexata baja Abrahampijinē pona itsanacuayabelia. Panacua Dioso rajutsiapaebatsi, bajarapanacuayabelia pona. Abrahampijinē abaxë apo natsivajēnaeyapētae ata panacuayabelia patsijitsia, itsiata vecuapitsapa pijanacuami Dioso pitorobixaetsi. <sup>9</sup>Panacuata Abrahampijinē Dioso patsiaexanatsi, bajarapanacuata itsiata Abrahampijinē pepo pijabo apo exanae. Carpabota saya ponapona. Becamatacabibejenexa saya pepatsinēcuenia carpabota Abrahampijinē ponapona. Itsiata bajayajebi bajarapanacuata carpabota ponapona. Abrahampijinē pexēnato ata, Isaacpijinē, bajarapaira Dioso rajutsiapaebi atatsi, itsiata Isaacpijinē ata carpabota ponapona. Bajara icatsia itsi Isaacpijinē pexēnato ata, Jacobpijinē, Abrahampijinē jane baja pemomo. Jacobpijinē bajarapaira Dioso rajutsiapaebi atatsi, itsiata

Jacobpijinē ata carpabota ponapona. <sup>10</sup> Bajarapacuenia Abrahampijinē bajayajebi carpabota saya ponapona. Tspaji abaxē vajēnaeevetaponapona pecaponaenexatsi athēbēabetsia, Dioso pexanaetomarabetsia, apo peverevereacetomarabetsia, daxitamatabacijavabelianexa jane baja peponaponaenexa bajarapatomaratsia.

<sup>11</sup> Bajayata Abrahampijinē pijava pevēnē Sara. Bajarapovami ata najamatabēcuenecopata Diosojavabelia. Bajarapova mavecova picani. Nexata bitso pepua perujuva ata, itsiata Dioso caējēpaeyaexanatsi pexēnato pexainaenexa. Jumecovēnēta pacuenia Dioso najumecapanepaeya jumaitsitsi pexēnato pexainaenexa. Bajaraxuata xaina pexēnatonēyo. <sup>12</sup> Bajarapacuenia Abrahampijinē bitso pepua perujunē ata, pexēnato xaina. Nexata Abrahampijinē pevēnamuto pemomoxibitsaēto baja tsaponae. Athēbētatsia, itaboxota, bitso navita tulupu. Mapanacuata pijinia tajetabota bitso navita tajetaboatsapērē. Nexata acuenebi itsajivi ata penamataējētsicapanepaenexa tulupu, tajetaboatsapērē ata. Bajara pijinia itsaponae Abrahampijinē pemomoxi. Bitso cajena Abrahampijinē pemomoxi navita.

<sup>13</sup> Daxita pamonaemi bajayata Dioso jumecovēnēta, tēpa baja. Bajarapamonaeami xua yabara Dioso najumecapanepaeya jumaitsitsi perajutsinexatsi, pitsinejeva tēpa baja. Abaxē apo tocopiapatsi atatsi xua yabara Dioso najumecapanepaeya jumaitsitsi perajutsinexatsi, itsiata sivajamatabēcuenēbarēya bajarapamonaemi. Jamatabējumai tsabiabi mapacueniaje: “Daxita pacuenia Dioso najumecapanepaeya jumaitsi, bajarapacuenia pepacuene Dioso exanaena,” jamatabējai tsabiabi bajarapamonaemi. Bajarapamonaemi namataenetsia najumai tsabiabi: “Mara panacuataje pepacuene apo jinavanapaetsi tsane daxitamatabacijavabelianexa. Vaxaitsi saya caematacabibeje bevajanajinavanapaevinexa. Bevajanapatsivi mapanacuataje,” najai tsabiabi bajarapamonaemi. <sup>14</sup> Pamonaemi bajarapacuenia namataenetsia najumai tsabiabi, itsamonae tsitanajamatabēcuenēitajētavanapa. Bajarapamonaeami tsitanajamatabēcuenēitajētavanapa pevetavanapaējava athēbēabetsia Dioso pecaponaejavanexatsi, bajarajotatsia jane baja pejinavanapaenexa daxitamatabacijavabelianexa. <sup>15</sup> Bajarapamonaemi apo najamatabēxainavanapae caevēalia icatsia penaviabinexa pijanacuamijavabelia. Itsa najamatabēxainaejitsipa caevēalia icatsia penaviabinexa pijanacuamijavabelia, nexata naviabijitsipa. <sup>16</sup> Biji rajane bajarapamonaemi najamatabēxainavanapa peponaenexa athēbēabetsia. Tspaji athēbētatsia panacua, bitso pexanianacua, mapanacua matatoxenetsia. Bajaraxuata bajarapamonaemi: “TajaDiosomē,” pejaijava Diosojavabelia, Dioso sivabarēyatsi. Vaxaitsi ata baja yapētanetsi bajarapamonaemi Dioso pesivabarēyajavatsi. Tspaji baja athēbētatsia bajarapamonaemi Dioso toxaniavaetatsi pepo pijatamaranexa.

<sup>17-18</sup> Copiaya Dioso tajēvelia najumecapanepaeya jumaitsi Abrahampijinējavabelia. Abrahampijinē pexēnato, Isaac, yabara Dioso jumaitsi mapacueniaje: “Nexēnato Isaac xainaena pexi. Nexata nemomoxi xainaename,” jai Dioso. Bajaraxuacujinae icatsia Abrahampijinē Dioso itorobatsi penacoxibeyaxuabinexa picani. Bajarapacuenia Abrahampijinē Dioso itorobatsi penacoxibeyaxuabinexa picani saya pejamatabēcuenējētsinexatsi. Abrahampijinē Dioso itorobatsi penacoxibeyaxuabinexa ofrendacuenia perajutsinexa Diosojavabelia. Nexata baja picani Abrahampijinē jejai. Nacoxibeyaxuabijitsia picani. <sup>19</sup> Bajarapacuenia picani Abrahampijinē exanaejitsia Dioso pitorobicueniatsi. Tspaji Abrahampijinē jamatabējumaitsi: “Dioso baja cajena caējēpatsi piasaēyaexanaenexatsi taxēnato icatsia piasaēnexa,” jamatabē-

jai Abrahampijinė. Ajena baja picani Abrahampijinė nacoxicacuatsijitsia cusiupata penacoxibeyaxuabinexa, nexata Abrahampijinė jamatabėjumaitis: “Taxėnato baja aeconoxae tėpaena,” jamatabėjai. Nexata bajarapaepatota Abrahampijinė Dioso itavetatsi penacoxibeyaxuabiyaniva. Nexata baja itsiata Abrahampijinė apo nacoxibeyaxuabi. Nexata itsiata Abrahampijinė bepetėpaenė baja nacoxitane. Nexata bajaraxuacujinae icatsia Dioso bepetoasaėyaexanaenėsi nacoxitane.

<sup>20</sup> Bajayata Abrahampijinė pexėnato ata, Isaacprijinė, najamatabėcuenecopata Diosojavabelia. Bajaraxuata Isaacprijinė itsa baja perujunė, pexėnatobejejavabelia tajėvelia najumecapanepaeya jumaitis: “Dioso pacayavenonabiabianabeje,” jai Isaacprijinė pexėnatobejejavabelia. Isaacprijinė pexėnatobeje itsanė pevěnė Jacob. Itsanė pevěnė Esaú. Jacobprijinė itsavėnė, Israel. <sup>21</sup> Nexata Jacobprijinė ata najamatabėcuenecopata Diosojavabelia. Nexata baja pamatacabi Jacobprijinė perujunė, itsa baja nayapėtane petėpaejavanexa, bajarapamatacabi Diosojavabelia tovajėta pemomobeje Dioso peyavenonabiabinexatsibeje. Ponėbeje Jacobprijinė pemomobeje tovajėta Diosojavabelia, Josėprijinė pexėnatobeje. Bajarapacuenia Jacobprijinė itsa tovajėta Diosojavabelia, pemomobeje, caenė canacujitsia, tovajėta. Pecobenaeboupita saya Jacobprijinė nayaėtanucaeya vajėtanuca Diosojavabelia. <sup>22</sup> Bajayata Josėprijinė ata najamatabėcuenecopata Diosojavabelia. Bajarapamatacabi Egipto nacuata Josėprijinė daxita pijamonae barėpona, Israelprijinė pemomoxi. Nexata baja Josėprijinė itsa nayapėtane petėpaejavanexa, tajėvelia vajunupaeba daxita Israelprijinė pemomoxi Dioso pejamatabėcueneta pecapitsapaejavanexatsi Egipto nacuavecua. Josėprijinė petėpaevajėnae, najumepuētanua pijamonae pesicaponaeenexatsi pamatacabi Dioso pejamatabėcueneta daxita Israelprijinė pemomoxi capitapatsi Egipto nacuavecua.

<sup>23</sup> Bajayata Moisésprijinė paxaprijinė, penapijiva ata, tajėvelia yapėtanebeje Dioso peyavenonaejavanexatsibeje. Nexata bajaraxuacujinae pexėnatonėyo xainabeje, Moisésnexa jane baja. Nexata matayatsia caponaponabeje acueyabi pajuameto-beje. Bajarapacuenia matayatsia caponaponabeje tsipaji bitso tsitapexanianėyotsibeje. Egiptonacua pepo pevetsinė itoroba picani daxita Israelprijinė pemomoxi penacoxibeyaxuabaponaenexa itsa tonaexanatsi pebinėyo. Itsiata bajarapajivibeje apo jumecovėnėtsibeje penacoxibeyaxuabinexabeje. Tsipaji apo jumecujunavibeje. <sup>24</sup> Bajaraxuacujinae Moisésprijinė jane baja vitsatatsi Egiptonacua pepo pevetsinė pexėnatoyo. Moisésprijinė bajarapova vitsatatsi bepexėnatonėyocuenia. Moisésprijinė baja itsa penaveretsinė, yapėtane Dioso peyavenonaejavanexatsi. Nexata Moisésprijinė apo jitsipae Egiptonacua pepo pevetsinė bepemomocuenia petaenexatsi. <sup>25</sup> Nexata Moisésprijinė najamatabėcueneveretsia jamatabėjumaitis: “Tajamonae, Israelprijinė pemomoxi, Dioso pijajivinexa. Nexata yavenonaenajė tajamonae. Egipto nacuapijivi nebejiobiaexanae ata tsane, pacuenia tajamonae bejiobiaexanabiabatsi, itsiata yavenonaenajė,” jamatabėjai Moisésprijinė. Nexata baja Moisésprijinė Egiptonacua pevetsinė bepemomocuenia petaejavatsi itsa vecuapitsapa, copata baja pibisiamatabėcuene, mapanacuapijijamatabėcuene. Tsipaji saya bajarapajamatabėcuene caepatoyonexa jamatabėcuenebarėya. <sup>26</sup> Moisésprijinė Dioso jumecovėnėta pacuenia tajėvelia Dioso jumaitis pijajivi pecapanepaenexa Egipto nacuavecua. Nexata Moisésprijinė tajėvelia jamatabėjumaitis: “Itsamatacabi Cristo itsamonae bejiobiaexanaenatsi. Bajarapacuenia xanė ata Egipto nacuapijivi nebejiobiaexanaejitsia ata tsane, itsiata Dioso pejitsipacuenia toexanaenajė. Tsi-

paji xua Dioso athëbëtatsia nerajutsijitsia, bajaraxua bitso pexaniacuene daxita Egipto nacuapijivi pexainaecuene matatoxenetsia,” jamatabëjai Moiséspijinajëvelia Dioso jumaitsi pijajivi pecapanepaenexa Egipto nacuavecua. Nexata Moiséspijinë tajëvelia jamatabëjumaitsi: “Itsamatacabi Cristo itsamonae bejiobiaexanaenatsë. <sup>27</sup> Nexata baja Moiséspijinë Egipto nacuavecua pitsapa. Tsipaji najamatabëcuenecopata Diosojavabelia peyavenonaenexatsi. Egiptonacua pepo pevetsinë Moiséspijinë baranaepanae atatsi, apo cjunavi. Pevajënaeyabelia ajamatabëcuenesaë tsanajetaruae pacuenia Dioso itorobatsi pexanaenexa. Moiséspijinë baja apo naviatsi pecovëyabelia. Tsipaji abaxë Moiséspijinë apo tae ata Dioso, itsiata yapëtane Dioso bitso piasaënëcuene Egiptonacua pepo pevetsinë matatoxenetsia.

<sup>28</sup> Moiséspijinë Dioso peyavenonaenexatsi, tajëvelia najamatabëcuenecopata Diosojavabelia. Bajaraxuata pamatacabi Moiséspijinë pijamonae barëpitsapa Egipto nacuavecua, ayaicuenia Dioso yavenonatsi pijamonae pebarëpanepaenexa. Bajaraxuata Moiséspijinë pacuenia Dioso itorobatsi, juya daxita pijamonae itoroba. Moiséspijinë pijamonaejavabelia jumaitsi mapacueniaje: “Daxita paxamë, pacae-bopijivimë canacujitsia, pabename ovejaxi, pejanapebitoxi. Nexata panijabobau-panë, caebaupa canacujitsia, pamuxunenetsicibianame ovejajanata. Nexata ajena, pameravi, ángelnë najetaruae ata tsane peverebiabinexa pebinacuetoxi, matapijinacuetoxi, itsiata apo pacoxitëpaemë tsane,” jai Moiséspijinë pijamonaejavabelia. Nexata Moiséspijinë pijamonae pijabobaupanë, caebaupa canacujitsia, tsicaba ovejajanata. Nexata ángelnë najetaruae ata peverebiabinexa pebinacuetoxi, matapijinacuetoxi, itsiata Moiséspijinë pijamonae apo coxitëpae. <sup>29</sup> Bajayata pamatacabi Moiséspijinë pijamonae barëpitsapa Egipto nacuaverena, Egipto nacuapijivi picani barajinatsi pebeyejebinxatsi. Nexata bajarapamatacabi Moiséspijinë pijamonae barënajamatabëcuenecopata Diosojavabelia peyavenonaenexatsi. Nexata ayaicuenia Dioso yavenonatsi. Bajarapamonae Dioso pejamatabëcueneta nicaba Rojovënë manuamenemaxërana tuatuajëalia. Dioso pejamatabëcueneta benamutocuenia totseviaexanaxualitsi. Nexata jane baja Egipto nacuapijivi, pamonae jane baja picani barajinatsi pebeyejebinxatsi, nanicabarubenapona. Ajena baja epatota najetarubena, mera baja icatsia avajubua tsaxuabi. Bubuna baja nexata Egipto nacuapijivi.

<sup>30</sup> Bajayata Jericó tomarapijivi pialtayaëibopanaxaneto exana pijatomara matatoyorotsia penayajivicanatsinexa pijavajabitsaëvecua. Bajara payacaranatsijavaxaneto mataropotsia catsanaruba ibopananë. Bajaraxua athëbëabetsia apia pacuenia pinijinaejavaxaneto apia. Nexata Israelpijinë pemomoxi vajabitsaë pexanaevajënaeya Jericó tomarapijivijavabelia, tajëvelia najamatabëcuenecopaba Diosojavabelia peyavenonaenexatsi. Israelpijinë pemomoxi itsa pata Jericó tomarata, jinanapa bajara payacaranatsijavaxaneto jumavelia. Nexata jane baja vajabitsaë exana Jericó tomarapijivijavabelia. Israelpijinë pemomoxi Dioso pitorobicueniatsi Jericótomara matatoyorotsia najetarubena seis xuabeje. Seis baitsi baja pijinia pamatacabibeje. Nexata jane baja siete matabacabita, caematabacabita, matatoyorotsia najetarubena siete xuabeje. Nexata jane baja siete matabacabita bajarapayacaranatsijavaxanetomi jopaica. <sup>31</sup> Bajayata Rahabpijiva, Jericó tomarata peponaponaeva, pibisiacuene pevitota pexanabiabiva ata, marapijivimi Dioso verebiabatsi. Itsiata baitsi jane Rahabpijiva bajarapamonae apo yajavatëpae. Tsipaji pexaniacuene exana. Dioso pejamatabëcueneta Jericó tomarapijivimi peverebiabivajënaetsi, Israelpijinë

pemomobeje yaenebabeje Jericó tomarapijivi. Bajarapacuenia yaenebabeje vajabitsaë jane baja pexanaenexa Jericó tomarapijivijavabelia. Bajarapamatacabi Rahabpijiva xaniavaetsia copiapita Israelpijinë pemomobeje. Bajaraxuata Jericó tomarapijivimi Dioso verebiabi atatsi, Rahabpijiva apo yajavabeyaxuabitsi.

<sup>32</sup> Apo necuenecaëjêpae baja pematatsênëa itsamonae pelivaisi patacatoyaquinaenexa patacamuxujobinexa, panenajamatabêcuenecopatsinexa Diosojavabelia papecayavenonaenexa. Apo necuenecaëjêpae patacatoyaquinaenexa Gedeónpijinë pelivaisi, Baracpijinë ata pelivaisi, Sansónpijinë ata pelivaisi, Jeftépijinë ata pelivaisi, Davidpijinë ata pelivaisi, Samuelpijinë ata pelivaisi. Apo necuenecaëjêpaenua patacatoyaquinaenexa itsamonae, Diosojumepaebivimi profetavi, pelivaisi. <sup>33</sup> Daxita bajarapamonaemi ata najamatabêcuenecopaba Diosojavabelia peyavenonaenexatsi. Bajaraxuata bajarapamonaemi Dioso yavenonaponatsi. Bajarapamonaemi itsa navajabitsaëtabuatapona itsanacuanëpijivijavabelia, bajarapanacuanëpijivimi verebabilia Dioso peyavenonaexaetsi. Bajarapamonaë pijanacuanëjava pijajivi itsa eveta, xaniavaetsia evetabiaba. Tsipaji Dioso yavenonaponatsi. Bajaraxuata xaniavaetsia pijajivi evetabiaba. Paepatota ata toayapêbejetsi itsacuenejavayo yabara, Dioso yavenonabiabatsi. Yavenonabiabatsi pacuenia Dioso tajêvelia najumecapanepaeya jumaitsitsi peyavenonaenexatsi. Bajaraxuata bajarapamonaeyajuvênëvi xuabi atatsi nevêthëbitsaëto penubenaebuyabelia, bajarapacuenia picani pebeyaxuabinexatsi, itsiata Dioso yavenonatsi. Nexata Dioso peyavenonaexaetsi Dioso pejamatabêcueneta nevêthêvecua cuibocataitatsi. Nexata baja nevêthê apo itsacueniabitsi. <sup>34</sup> Itsamonae pijinia bajarapamonaeyajuvênëvi xuabi atatsi pinijiisotualia, Dioso peyavenonaexaetsi, itsiata apo tajueti. Itsamonae pijinia jamatabêbeyaxuabi atatsi espadata, vecuapanepa Dioso peyavenonaexaetsi. Pamonaë pijinia apo aitasaca picani penavajabitsaëtsinexa, bajarapamonaë ata bitso baja piaitatsacavi naexanapona vajabitsaë penaexanabuataponaejavata Dioso peyavenonaexaetsi. Nexata bajarapamonaë pijavajabitsaë cueneamoneyaba. Vecuarêcêpecatsi. <sup>35</sup> Bajayata pijinia petiriavi penajamatabêcuenecopatsixae Diosojavabelia peyavenonaenexatsi, itsa coxitêpa, Dioso icatsia toasaëyaexanabiabatsi.

Bajayata pijinia itsamonae Dioso pejumecovênëtsiviyajuvênëvi bejiobiaexanatsi Dioso pejumecovênëtsixae. Bajarapacuenia pebejiobiaexanaejavatatsi, itsamonae têpabiaba. Bajarapacuenia yajuvênëexanatsi pecopabinexa picani Dioso pejumecovênëtsijava. Itsiata baitsi jane apo copabi Dioso pejumecovênëtavanapaejava. Bajarapacuenia apo copabi Dioso pejumecovênëtsijava. Tsipaji bajarapamonaë jamatabêjumaitsi tsavanapae: “Mapanacuataje taponaponaëjava matatoxenetsia bitso jitsipajê matacabi apo peverevereaejava Dioso tanerajutsinexa,” jamatabêjai tsavanapae bajarapamonaë. <sup>36</sup> Itsamonae pijinia Diosojavabelia penajamatabêcuenecopatsixae, itsamonae capocaponabiabatsi. Jumatitibabeyabiabatsinua penaneconitsivi pejumaconitabiabimacata. Itsamonae pijinia cadenamaëtota cêbejebabiabatsi. Penaneconitsivi pejebabiabibota jebabiabatsi. <sup>37</sup> Itsamonae pijinia ibotonêta saya tseconabiabatsi pebeyaxuabinexatsi. Itsamonae pijinia petêpaenexa, epacaucubatsi sierrata. Itsamonae pijinia jamatabêcuenêjêtatsi pecopabinexa Dioso pejumecovênëtsijava. Bajaraxuacujinae espadata beyaxuababiabatsi. Itsamonae pijinia pijabovecua capitsapatsi. Apo pexainaexae penaxatabijava, bajarapamonaë naxataba ovejaboco, chivoboco ata. Pexainaëjava ata apo xinae. Nexata bitso bejiobi bajarapamonaë. Barajinabiabatsi. Bejiobiaexanatsinua. <sup>38</sup> Bajarapamonaemi petusato

nacuanējava jinaruta. Petsutonē nacuanējava ata, jinaruta. Pitajanitonējava perubenaevajuanē jaita meravi pemajitabiabinexa. Bajarapamonae yabara itsamonae najumaitsi: “Mapamonaeje vajatamarata pejinavanapaenexa, apo betocopatsitsi,” najai. Itsiata bajarapamonaemi Dioso asivatsi. <sup>39</sup>Daxita bajarapamonaemi najamatabēcuenecopaba Diosojavabelia peyavenonaenexatsi. Bajaraxuata bajarapamonaemi Dioso aneconijibia tanetsi. Itsiata baitsi jane abaxē bajarapamonaemi itsa asaē tsavanapae, mapanacuataje Dioso abaxē apo rajutsitsi xua yabara Dioso najumecapanepaeya jumaitsi perajutsinexatsi. Matapania baja bajarapamonae itsa tēpa, Dioso jane baja rajutatsi matakabi apo pevereverecejava. <sup>40</sup>Dioso abaxē evetavanapaeyaexanatsi xua rajutsijitsiatsi bajarapamonae. Tshipaji Dioso apo najamatabēxainae ēbajarapamonaejavabelia perajutsinexa bajaraxua. Vaxaitsi ata mapamatacabita vajajinavanapaevi, bajarapamonae yajava, Dioso jamatabēnacarajuta bajarapapexaniacuene, matakabi apo pevereverecejava.

**Pacuenia vajavajēnaeyabelia becaasaē tsavanapaetsi  
Dioso vajajumecovēnētsijava Jesucristo  
cruzata vajanacasivatēpaexae yabara pelivaisi**

**12** Pamonae yabara pacatoyaquinatsi, bajayata najamatabēcuenecopaba Diosojavabelia peyavenonaenexatsi. Nexata bajarapamonaemi vajavēnēlivaisitaexae, bemuxunanajamatabēcuenesaētatsi vaxaitsi ata Dioso vajanacayavenonaenexa. Itsa nayacobijitsiatsi vajacujinaejinaejava, nexata najonotatsi piarevejava bitsojinaeya vajacujinaejinaenexa, vajapatsinexa itsabelia nacatocaejēta vajanacaitorobinē. Bajara pijinia pacuenia Dioso pitabarata xaniavaetsia bejinavana-patsi asaēyata vajatonacuenebinexa pacuenia Dioso nacaitoroba. Nexata copia benavecuacopatatsi papibisijamatabēcuenesaētatsi vaxaitsi ata Dioso vajanacayavenonaenexa. Itsa nayacobijitsiatsi vajacujinaejinaejava, nexata najonotatsi piarevejava bitsojinaeya vajacujinaejinaenexa, vajapatsinexa itsabelia nacatocaejēta vajanacaitorobinē. Bajara pijinia pacuenia Dioso pitabarata xaniavaetsia bejinavana-patsi asaēyata vajatonacuenebinexa pacuenia Dioso nacaitoroba. Nexata copia benavecuacopatatsi papibisijamatabēcuenesaētatsi vaxaitsi ata Dioso vajanacayavenonaenexa. <sup>2</sup>Itsa najamatabēcuenecopatatsi Diosojavabelia vajanacayavenonaponaenexa, nexata benajamatabēnapitabiabatsi Jesús. Tshipaji Jesús vajanacasivatēpaexae, Dioso aneconijibia nacatane. Jesús pejamatabēcueneta Dioso nacayavenonana vajaanamatabēcuenesaē tsavanapaenexa Dioso vajajumecovēnētsijava matapania vajanacacapanepaejavabelianexa. Pajivi naneconita, cruzata rutatsi pebeyaxuabinexatsi pijaneconi yabara. Bajarapacuenia itsa naneconitsiaexanatsi, bitso piauracuene. Itsiata baitsi jane Jesús nacopata bajarapacuenia pebeyaxuabinexatsi. Bajarapacuenia Jesús nacopata pebeyaxuabinexatsi tshipaji natsivajēnaeyapētane pejamatabēcuenebarējavanexa icatsia itsa asaē petēpaecujinae, daxitajivi pijaneconi pematamotsixae. Aeconoxae baja nexata Jesús tronovēnējavata athēbētatsia eca, Dioso pemuxuneneta, pecujuanenia, penajuaevetsinexabeje daxitacuene.

<sup>3</sup>Pacanaējēre Jesús pijamatabēcuenesaē tsaponaponaejava, pibisiacuene pexanaevi pinijicuenia bejiobiaexanae atatsi. Bajarapacuenia pacanaējētsianame itsamonae itsa pacabejiobiaexana Jesús panejumecovēnētsijava yabara. Nexata apo pacueranaemē tsane Dioso panetonacuenebijava. Apo pajamatabēcuenefaefae-naemēnua tsane. <sup>4</sup>Paxamē panajamatabēcuenesaētavanapame pibisiacuene paneexanaeyaniva. Bajarapacuenia panajamatabēcuenesaētavanapae atamē pibisiacuene paneexanaeyaniva, itsiata abaxē pibisiacuene pexanaevi apo pacayajuvēnēbeyaxuabi. Bajaraxuata panevajēnaeyabelia bepanajamatabēcuenesaētavanapame pibisi-



acuene paneexanaeyaniva. <sup>5</sup>Pëtsa panacofënëtame Dioso papecamuxujiobjiava papecajamatabëcueneasaëya exanaenexa itsa pacamuxujioba bepapeximëcuenia. Tsi-paji Dioso pejumelivaisibaxutota paxamë yabara jumaitsi mapacueniaje:

Taxi, xanëjavaberena panenaneconitsixae, itsa pacananeconitsiaexanaenatsi, pëtsa payaanaepaname. Pëtsa pasivajamatabëcuenefaefaenamenua itsa pacabi-jatanetsi xua yabara pananeconitame. <sup>6</sup>Pacananeconitsiaexanaenatsi. Tsi-paji xanë muxujiobiaya bananeconitsiaexanaxjê pajivi asivanë, baitsi daxita pamonaë taxicuenia tataevi,

jai Dioso pejumelivaisibaxutota paxamë yabara.

<sup>7</sup>Nexata patonacaevere Dioso muxujiobiaya papecananeconitsiaexanaenexa. Tsi-paji Dioso papeximëcuenia pacatane. Jivi ata baja cajena pexi muxujiobiaya banacoxivitsata. <sup>8</sup>Nexata Dioso muxujiobiaya itsa apo pacaevetsi tsipae, Diosojavabelia pananeconitsi atamë, nexata Dioso papeximëcuenia apo pacatae tsipae. Tsi-paji jivi ata, pexi pexainaevi, muxujiobiaya banacoxiconita. <sup>9</sup>Vaxaitsi abaxë pamatacabi pejevaxitsi mapanacuata, vaxajivi nacamuxujiobiaya banacaconita. Nexata vaxajivi yaiyatanetsi. Nexata biji vaxaitsi bitsoyo bejumecovënëtatsi vaxa Dioso, ponë eca athëbëtatsia, vajanacarajutsinexa matacabi apo peverevereaejava. <sup>10</sup>Itsa abaxë vaxajivi mapanacuata nacavitsata, muxujiobiaya banacaconita. Tsi-paji vaxajivi nacatojitsipa xaniavaetsia vajatojinavanapaenexa. Bajaraxuata nacamuxujiobiaya banacaconita pacuenia vaxajivi nacatojitsipa vajatojinavanapaenexa. Itsi-ata baitsi jane vaxa Dioso muxujiobiaya nacananeconitsiaexana pepacuene vajacopatsinexa pibisiacuene vajaexanaejava. Nexata bajarapacuenia Dioso nacajamatabëcuene yavenona vajaperujumatabëcuene mivecua vajanajamatabëcuene pënëyorotsinexa Diosojavabelia. Nexata pacuenia Dioso jamatabëcueneitsi, bajara vaxaitsi ata vajajamatabëcueneitsinexa. <sup>11</sup>Paepatotata vaxa Dioso nacamuxujiobiaya nacananeconitsiaexana, bajarapaepatotata abaxë apo sivajamatabëcuene barëyatsi xua nacatocopiapata. Itsiata baitsi jane pajivi Dioso muxujiobiaya naneconitsiaexanatsi, yapëtane baja xua yabara naneconitsiaexanatsi. Nexata baja copata bajaraxua. Nexata baja jamatabëcuene barëyaya xaniavaetsia ponapona.

### **Pacuenia tsiayaitsi tsane pajivi namuxujemata Dioso pejumelivaisi yabara pelivaisi**

<sup>12</sup>Pacopabare baja panejamatabëcuene cueranaejavami. Panevajënaeyabelia panajamatabëcuene saëtaponare. Tsi-paji baja panajamatabëcuene copatame Diosojavabelia papecayavenonaenexa. <sup>13</sup>Pëtsa pajumecovënëtame itsalivaisi Dioso pejumelivaisivecua. Èpexaniajailivaisi, Dioso pejumelivaisi, panevajënaeyabelia pajumecovënëtavanapare. Nexata itsamonae Dioso pejumecovënëtsivi, pamonaë abaxë apo ajamatabëcuene saë Dioso pejumecovënëtsijava, pacaitaxutua ajamatabëcuene saë tsaponae tsane.

<sup>14</sup>Daxitajivijavabelia pexaniajamatabëcuene patoxainare. Nexata aneconijibia pajinavanapaename Dioso pitabarata. Pajivi aneconijibia apo ponaponae tsane Dioso pitabarata, bajarapajivi Dioso apo yajavaponaponae tsane. <sup>15</sup>Xania baja panayajivitaema. Pëtsa pacopabame Dioso panejumecovënëtsijava, Dioso papecacopatsiyaniva papecaitaxutotsoniataejava panepuajumecovënëtsivi Dioso. Pacuenia piatsaxaënëboto daxitamera bijianaejitsipa, bajara pajamatabëcueneitsimë tsipae caenë ata, paxamëyajuvënënë, pibisiacuene itsa exanaejitsipa. Pacajamatabëcuene bi-

jianaejitsipa padaxitamē. <sup>16</sup> Panayajivitaemanua itsanē ata, paxamēyajuvēnēnē, pejaitsiyaniva itsava pepo pijavavecuā. Petiriva ata pejaitsiyaniva itsanē pepo pamonavecuā. Panayajivitaemanua panejumeaebiyāniva Dioso najumecapanepaeya papecajumaitsijava. Pētsa Dioso pajumeaebame pacuenia bajayata Esaúpijinē jumeaeba Dioso najumecapanepaeya pejumaitsijavatsi. Esaú picāni matapijinēxae, Dioso yavenonabiabijitsiatsi. Nexata itsajota Esaú bitso piājani, pejuyapijinējavabelia pexaejava caenabani namitsavajēta. Nexata pejuyapijinē jumaitsitsi: “Pacuenia nexaejava nevajētame, carajutsianatsi. Nexata xua Dioso cayavenonabiabiapaeba, bajaraxua juya xanē netocopatsianame,” jaitsi. Nexata Esaú jejai. Pejuyapijinējavabelia baja tocopata xua picāni Dioso yavenonabiabijitsiatsi. <sup>17</sup> Payapētaneme rabaja pacuenia Esaúpijinē exana pejuyapijinē petocopatsicujinae xua picāni Dioso yavenonabiabiapaebatsi. Esaúpijinē picāni paxa itoroba Diosojavabelia petovajētsinexatsi Dioso peyavenonabiabinexatsi paxa pevēnamuto. Itsiata baitsi jane paxa apo jumejejaisi. Nexata Esaúpijinē bitso nua pejuyapijinē petocopatsixae xua picāni Dioso yavenonabiabijitsiatsi. Itsiata baja acuenebi pexanaejava. Bajaraxuata paxamē ata pētsa pacopabame Dioso panejumecovēnētsijava Dioso najumecapanepaeya papecajumaitsijava.

<sup>18</sup> Paxamē panejumecovēnētsixae Dioso, pacatocopata roviaalia panevajētsinexa Diosojavabelia. Nexata apo panamatavenonaemē paneponaenexa itsanacuajavabelia panevajētsinexa Diosojavabelia. Bajayata Israelpijinē pemomoxi pata ibot-sutoxanetotabuyaberena. Nexata bajarapatsutotabuta navajēca Diosojavabelia. Nexata bajarapatsutojumatsia Israelpijinē pemomoxi tane beisotocotia itsajota aitaquiri. Bajarapaepatota bitso emaxaneto, ayaijovibo yajava. <sup>19</sup> Bajarapaepatota Israelpijinē pemomoxi jumetane penajumetsijava trompeta. Jumetanenua Dioso pecuaicuaijaijavatsica athēbēvetsica bajarapamonaejavabelia. Nexata judiovi pecajunavi bitso, vajēta Diosojavabelia Dioso pecuaicuaijaiyaniva pematatsēnēa. <sup>20</sup> Bajarapacuenia Israelpijinē pemomoxi vajēta Diosojavabelia tsipaji bitso jumecujunava Dioso pejumaitsijavatsicatsi mapacueniaje: “Pajivi ponaena mapatsutoyenepanajavaje, bajarapajivi tseconaenatsi ibotonēta. Itsa jume, becuerebonēta cacuatsianatsi pebeyaxuabinexatsi bajarapacuenia. Dajubinē ata itsa ponaena mapatsutoyenepanajavaje, bajarapacuenia exanaenatsi,” pejaijavatsica Dioso athēbēvetsica, Israelpijinē pemomoxi bitso jumecujunava. <sup>21</sup> Nexata Israelpijinē pemomoxi bajarapajume itsa jumetane, pecajunavi, bitso neconecojai. Moiséspijinē ata jumaitsi: “Xanē ata rabaja tacajunavi, bitso neconecojanē,” jai.

<sup>22</sup> Itsiata baitsi jane paxamē baja aeconoxae Dioso panejumecovēnētsixae, Dioso baja pacatocopata panepatsinexa Dioso pijatomarabetsia roviaalia panevajētsinexa Diosojavabelia. Bajarapatomaratsia eca Dioso, piasaētsaponaponanē. Bajarapatomara pevēnē Jerusalén. Eca Sióvnēnē tsutojumata. Bajarapatomaratsia Dioso pijajivi ángelevi, miles paángelevibeje, yajavaponapona. <sup>23</sup> Bajarapatomaratsia payajavanacaetuatsianame itsamonae, pamonaē panevajēnaeya jumecovēnēta Dioso. Bajarapamonaē vēnēyaquinarubatsi bajarapatomaratsia. Panacaetuatsianame Dioso pitabarata, ponē naneconitsiaexanaena daxita pamonaē naneconita bajaraponējavabelia. Payajavanacaetuatsianamenua daxita pamonaemi tēpa Dioso pepua pejumecovēnētsivi. <sup>24</sup> Panajamatabēcuenecopatame baja Jesucristojavabelia, ponē pejamatabēcueneta Dioso nacavecuajibiaexana vajaneconimi. Nexata Dioso aneconijibia nacatane. Bajayata Abelpijinē itsa beyaxuabatsi, ponē beyaxuabatsi,

juya picani xanepana peyamata mobeyaxuabinexatsi. Itsiata baitsi jane pamatacabi Jesús beyaxuabatsi cruzata, itsajivi ata apo najamatabëxainae Jesús peyamata mobeyaxuabinexatsi. Tspaji Jesús petëpaejava pejamatabëcueneta, Dioso aneconijibia taejitsia daxita pamona jumeconvënëta Dioso.

<sup>25</sup> Bajaraxuata Dioso pejumelivaisi vajanacatsipaebijava, bejumeconvënëtatsi. Bajayata pamona apo jumeconvënëtsi Dioso Moiséspijinëta penajumecopatsilivaisi, naxuaba Diosovecua. Dioso apo capanepaetsi bajarapamona. Vaxaitsi ata bitsoyo Dioso nacananeconitsiaexanaejitsipa itsa apo jumeconvënëtsitsi ponë nacajunata athëbëvetsica. <sup>26</sup> Paepatota pina Dioso athëbëvetsica Sinaivënë tsutojumavetsica cuaicuajiai, baja pina paepatota ira najëba. Nexata icatsia xuacujinae bexëa Dioso tajëvelia najumecapanepaeya jumaiti mapacueniaje: “Itsamatacabi icatsia ira najëbiaexanaenajë. Nexata jane baja caecuenia ira, itaboxo yajava, najëbiana,” jai Dioso tajëvelia najumecapanepaeya. <sup>27</sup> Xua yabara tajëvelia Dioso najumecapanepaeya jumaiti, maitsi tsaneje. Mapairaje, itaboxo yajava, itsa najëbiana, daxitacuenue xua Dioso exana mapanacuataje, vereverecaena. Itsiata Dioso pejumelivaisi, pijatomara ata, apo vereverecae tsane. <sup>28</sup> Xua itsamatacabi Dioso nacatocopatsiana athëbëtatsia vajatoevetsinexa, bajaraxua apo vereverecae tsane. Bajaraxuata vaxaitsi pexaniajamatabëcuene rajutatsi Diosojavabelia. Yaiyataeya vajajamatabëëthëtovetsina Diosojavabelia jumai tsabiabi tsanetsi: “Diosomë, bitso ayaijamatabëcuenenëmë,” jai tsabiabi tsanetsi Dioso vajanacasivajamatabëcuene barëyanexa. <sup>29</sup> VajaDioso jivi penaneconitsiaexanaenë. Pacuenia isoto vayafo itsa tajuenajetaruca, verebiaba daxita piabejjava petajuejavata, bajara pijinia pacuenia Dioso verebiabiana pamona pibisiacuene pexanaevi.

### Pacuenia bexanavanapatsi Dioso vajanacasivajamatabëcuene barëyanexa yabara pelivaisi

**13** Pëtsa pacopabame namataenetsia panenasivajava Dioso panejumecovënëtanapaevi. Panevajënaeyabelia namataenetsia panaasivamëre. <sup>2</sup> Pëtsa panacofënëtame xaniavaetsia panecopiapitabinexa apo paneyapëtaevi ata itsa pata panijaboyaberena. Bajayata pina bajarapacuenia xaniavaetsia jivi pecopiapitabivivi, xaniavaetsia copiapita ángelevi, apo yapëtae ata ángelevicuene.

<sup>3</sup> Panajamatabënapitabiabare pamona jebatsi penaneconitsivi pejebabiabibota Dioso pejumecovënëtsixae. Paxamë ata, bajarapamona yajava, bepanenjua naneconitsivi panataema. Pamona ata bejiobiaexanatsi Dioso pejumelivaisi yabara, bajarapamona ata pajamatabëcuenyavenonare. Paxamë ata, bajarapamona yajava, bepapecabejibiaexanaevi panataema.

<sup>4</sup> Daxitajivi beyaiyatane penacojiobijivi. Pajivibeje baja napitabeje, apo benavecuanamatayajitsibeje. Pebi apo bejaiti itsava pijavavecua. Petiriva pijinia apo bejaiti itsanë pamonavecua. Tspaji Dioso naneconitsiaexanaena bajarapitsipibisiacuene pexanaevi.

<sup>5</sup> Pëtsa bitso pajitsipame palata. Pasivajamatabëcuenebarëyamëre saya xuayovajëto paxainame. Tspaji Dioso jumaiti mapacueniaje: “Apo copatsinë tsane patacayajavaponaponaevajava,” jai Dioso. <sup>6</sup> Bajaraxuata ajumejunavijibia namataenetsia najumaititsi mapacueniaje:

Dioso cajena vajanacayavenonaenë. Nexata apo junavitsi tsane, itsajivi nacaitsacueniabijitsia ata,

najaitsi vaxaitsi namataenetsia.

<sup>7</sup> Panajamatabēnapitabiabare pamonaei bajayata pacatsipaeba Dioso pejumelivaisi. Pacanaējēre pacuenia bajarapamonaemi Dioso pejumecovēnētsijavaveliacujinae, xaniavaetsia jinavanapa Dioso pitabarata matapania petēpaejavabelianexa. Bajarapacuenia paxamē ata Dioso pitabarata xaniavaetsia pajinavanapare matapania panetēpaejavabelianexa.

<sup>8</sup> Jesucristo epatua itsajamatabēcuene apo xainae tsane. Pamatacabibeje ponapona, caejamatabēcuene xainaponaponaena. Pevajēnaeyabelia ata daxitamatabijavabelianexa, caejamatabēcuene xainaponaponaena. <sup>9</sup> Pētsa pacopabame panejumecovēnētsijava palivaisi baja pajumecovēnētame. Pētsa pajumecovēnētame itsalivaisi bajarapalivaisivecua. Paxamē baja Dioso panejumecovēnētsijava, pajamatabēcuenesaēmē tsavanapae Dioso asivaya papecayavenonaexae. Diosojavabelia apo pajamatabēcuenesaēmē tsavanapae tsipae, panexaejava paatsobi atamē. Itsamonae jumecovēnēta pexaejava piatsobinexa pitavetsilivaisi. Nexata pexaejava atsobiabiaba. Itsiata baitsi jane pexaejava piatsobijava pejamatabēcueneta apo jamatabēcuenesasaēyaexanaetsi Dioso pejumecovēnētsijava.

<sup>10</sup> Jesús itsa cobematabiabarutatsi cruzajavabelia, vaxaitsi nacasivatēpa. Nexata pamonae tsiteca ēperujulivaisimi sivajamatabējumaitsi: “Itsa jumecovēnētaponaponaenajē Dioso Moiséspijinēta penajumecopatsilivaisi, nexata xanē ata Dioso necapanepaena,” sivajamatabējai, bajarapamonae saya jamatabēcuenenavēxaniaba. Bajarapitsijamatabēcuene penajamatabēxainaevi, apo capanepaetsi tsane Diosojavabetsia. Tsipaji Jesús pesivatēpaejavatsi, apo jumecovēnētsi. <sup>11</sup> Sacerdotevi pepo penamatacaitorobinē dajubinē beyaxuababiaba. Nexata bajarapajana cajoneyabiaba Lugar Santísimojavabelia, itsajota baitsi Dioso peponaponaenexa yatuucuta. Bajarapayatuucutsijavaēnēta sacerdotenē dajubinē pijana rajutabiaba ofrendacuenia Diosojavabelia, Dioso pevecuaajibiaexanaenexatsi pibisiacuene pexanabiabineconi. Nexata bajarapadajubinē pevi sacerdotenē itsa tajuita, tomarapēnēyabelia tajuitabiaba. <sup>12</sup> Bajaraxuata Jesús ata Jerusalén tomarapēnēyabelia bejiobiaexanatsi. Bajaraxuacujinae beyaxuabatsi. Nexata daxita pamonae jumecovēnēta Jesús pesivatēpaejavatsi, bajarapamonae Jesús pijana pejamatabēcueneta Dioso vecuaajibiaexanatsi pibisiacuene pexanaeconimi. <sup>13</sup> Nexata vaxaitsi ata becopatatsi baja perujulivaisi vajajumecovēnētsijavami. Nexata bejumecovēnētatsi Jesús pelivaisi. Nexata pacuenia Jesús nacopata itsamonae pebejiobiaexanaenexatsi vajanacasivatēpaenexa vajaneconi yabara, bajara pijinia pacuenia vaxaitsi ata benacopatatsi itsamonae vajanacabejiobiaexanaenexa Jesús pelivaisi yabara. <sup>14</sup> Mapanacuataje apo xainaetsi patomarata daxitamatabijavabelianexa jinavanapaejitsiatsi. Biji rajane abaxē vajēnaeevetavanapatsi athēbēpijtomara, patomarata patsijitsiatsi athēbētatsia. <sup>15</sup> Jesucristo vajanacasivatēpaexae, Dioso nacatocopata vajavajētabiabinexa Diosojavabelia. Nexata itsa vajētabiabianatsi Diosojavabelia, jumaitsitsi tsabiabi tsane: “Diosomē, bitso ayajamatabēcuenenēmē,” jaitsi tsabiabi tsane Diosojavabelia. Bajarapacuenia vajajumaitsiabiabijava Diosojavabelia, Dioso taena ofrendacuenia bevajarajutaponaejava Diosojavabelia. Bajaraxuata itsa vajētabiabianatsi Diosojavabelia, bajarapacuenia jumai tsabiabi tsane. <sup>16</sup> Pētsa panacofēnētame pexaniacuene panetoexanavanapaejava itsamonaejavabelia. Itsajivi penamatavenonaejava, parajutsianame paneyavenonaenexa bajarapacuenia. Bajarapacuenia itsa

parajutsianame itsajivi penamatavenonaejava, Dioso pacasivajamatabëcuenebarëya tsane.

<sup>17</sup> Pamonaë ancianovi, xua pacaitoroba, pajumecovënëtabiabare. Itsamonae ata, pamonaë pijinia Dioso tocopatatsi papecaevetsinexa Dioso panejumecovënëtsivixae, xua pacaitoroba, pajumecovënëtabiabare. Bajarapamonaë yapëtanenua pacuenia Diosojavabelia naneconitsipa, xaniavaetsia itsa apo pacaevetsi. Itsa pajumecovënëtabiabianame papecaevetsivi papecaitorobicuenia, nexata papecaevetsivi jamatabëcuenevavenonaeya pajinavanapaename. Nexata pacasivajamatabëcuenebarëya tsane papecaevetavanapaejava yabara. Paxamë itsa apo pajumecovënëtsimë tsipae, nexata papecaevetsivi pacasivajamatabëcuenebëjai tsipae. Nexata papecaevetsivi toacuenebi tsipaetsi papecajamatabëcuenevavenonaenexa Dioso panejumecovënëtsijava yabara.

<sup>18</sup> Panetovajëtaponaename Diosojavabelia. Paxanë pajamatabëjumaitsinë: “Vaxaitsi baja apo naneconitsitsi Diosojavabelia, jivijavabelia ata,” pajamatabëjanë. Bajarapacuenia patavajënaeyabelia Dioso pitabarata aneconijibia patajinavapanenexa, panetovajëtsianame Diosojavabelia. <sup>19</sup> Panetovajëtaponaenamenua Diosojavabelia Dioso patanetocopatsinexa pataponaenexa paxamëjavabelia. Tsipaji icatsia pajitsipajë bepïjia patapatsinexa paxamëjavabelia.

**Pacuenia Pablo Dioso pejumecovënëtsivi tovajëta Diosojavabelia, pacuenia ata jamatabënajina itsamonae Dioso pejumecovënëtsivi, yabara pelivaisi**

<sup>20-21</sup> Jesucristo vajanacasivatëpaecujinae, vaxa Dioso icatsia asaëyaexanatsi. Bajaraxuata yapëtanetsi pexaniajaicuene Dioso athëbëbetsia vajanacapanepaejavanexa daxitamatacabijavabelianexa. Dioso yavenona daxitajivi jamatabëcuenevanepanaeya pejinavanapaenexa. Nexata pacatovajëtatsi Diosojavabelia papecarajutsinexa xua panamatavenoname, panetoexanavanapaenexa pacuenia Dioso pacatojitsipa. Vajëtajënuu Diosojavabelia Jesucristo pejamatabëcueneta vajanacajamatabëcuenevanebinexa pacuenia jitsipa. Pacuenia oveja pexainaenë xaniavaetsia evetaponapona pijaoveja, bajara pijinia pacuenia vajatuxanenë Jesucristo xaniavaetsia nacaevetaponapona. ¡Jesucristo bitso ayaijamatabëcuenenë tsaponaponaë daxitamatacabijavabelianexa! Bajara itsi tsane.

<sup>22</sup> Tajamonae, pacaitorobatsi xaniavaetsia panenamuxunaevetsinexa palivaisi pacatoyaquinatsi mapabaxutotaje. Tsiquirilivaisiyo saya pacatoyaquinatsi patacamuxujiobinexa panevajënaeyabelia paneajamatabëcuenesaënexa Dioso panejumecovënëtsijava. <sup>23</sup> Pexanialivaisiyo pacatoyaquinatsi patacatsipaebinexa mapacuenije. Vajabananë Timoteo rabaja pitsapa penaneconitsivi pejebabiabibovecua. Itsa patsiarena bepïjiayo xanëjavaberena, nexata barëponaenajë paxamëjavabelia.

<sup>24</sup> Nebajacobiana daxita Dioso pejumelivaisita papecaevetsivi, daxita vajamonae Dioso pejumecovënëtsivi yajava. Vajamonae ata, Italia nacuapijivi, pacajamatabënajinalia.

<sup>25</sup> Daxita paxamë pacatovajëtatsi Diosojavabelia papecayavenonaenexa Dioso. Bajara itsi tsane.

## Mapabaxutoje Santiago toyaquina Dioso pejumecovënëtsivijavabelia

### Pacuenia Santiago toyaquina mapabaxutoje Dioso pejumecovënëtsivi nacayajatsia pejinavanapaevi yabara pelivaisi

**1** Xanë Santiagonë, Dioso pijajivitonënë, vajatuxanenë Jesucristo ata pijajivitonënë. Pacatoyaquinatsi pajudfovimë patacabajacobinexa. Israelpijinëmi pexi doce ponëmimeje papemomoxiyajuvënëvimë. Pepo panijanacuata picani panejinavanapaevimi. Aeconoxae baja pepo panijanacuamivecua, nacayajatsia pajinavanapame daxita nacuanëjava.

### Pacuenia Dioso pejumecovënëtsivi itsa jamatabëyapëtane pacuene xanepana pexanaenexa, bevajëta Diosojavabelia yabara pelivaisi

<sup>2</sup>Tajamonae, pasivajamatabëcuenebarëyamë tsane daxitacuene, apo panejitsipaeuene ata, itsa pacatocopiapatsiana. Tsipaji raja bajarapacuene pacatocopiapatsiana papecajamatabëcueneëjëtsinexa Dioso panejumecovënëtsijava yabara. <sup>3</sup>Bajarapacuenia Dioso panejumecovënëtsivi pacajamatabëcueneëjëtaponae panejamatabëcuenesä tsaponaeenexa panevajënaeyabelia Dioso panejumecovënëtsijava. Payapëtaneme rabaja bajarapacuene yabara. <sup>4</sup>Apo panejitsipaeuene pacatocopiapatsi ata, pajamatabëcuenesäemë tsavanapae tsane bajayajebi. Nexata pajamatabëcuenevitsabaponaename Diosojavabelia. Nexata apo pacatosaiacae tsane it-salivaisi ata panejamatabëëthëtota.

<sup>5</sup>Paxamë itsa pajamatabëyapëtaneme pacuene xanepana paneexanaenexa, nexata bepavajëtame Diosojavabelia papecayapëtaeyaexanaenexa Dioso. Nexata Dioso pacayapëtaeyaexanaena pacuene xanepana paneexanaenexa. Dioso cajena bayapëtaeyaexana daxita pamonae vajëta bajaraponëjavabelia. Apo jumeitavetsi cajena itsa vajëtatsi. <sup>6</sup>Itsa pavajëtame Diosojavabelia, pajamatabëjumaitsimëre: “Dioso cajena nacayapëtaeyaexanaena xua vajëtatsi,” pajamatabëjamëre. Pëtsa pajamatabëjumaitsimë: “Dioso cajena itsiata apo nacayapëtaeyaexanae tsane xua vajëtatsi,” pajamatabëjamë pëtsa. Pajivi jumeaeba Dioso peyapëtaeyaexanaejavanexatsi, bajarapajivi xaniavaetsia apo najamatabëxainae. Bajarapajivi pejamatabëcuene bemalataca picani. Pacuenia malataca xaniavaetsia apo rucae jovibota, bajara saya jamatabëcueneitsi bajarapajivi. Apo najamatabëxainae caelivaisi, palivaisi Dioso yapëtaeyaexanaejitsiatsi. <sup>7-8</sup>Bajarapajivi anijajamatabëcuenebeje xaina. Najamatabëcuene epatajërërcabiaba itsa exana daxitacuene. Nexata pajivi jumeaeba Dioso peyapëtaeyaexanaejavanexatsi, pëtsa patocopatame pejamatabëjumaitsinexa: “Dioso cajena nerajutsiana tavajëtsijava,” pejamatabëjainexa. Dioso cajena apo rajutsitsi tsane xua vajëta bajarapajivi.

<sup>9</sup>Dioso pejumecovënëtsinë apo xainae ata pecobecovëjavayo, jivi apo yayiatatae atatsinua, itsiata bejamatabëcuenebarëya Dioso pejumecovënëtsinëxae. Tsipaji Dioso pejunatsixaetsi Dioso pijajivitonënexa, apo bejiobi tsane daxitamatacabijavabelianexa. <sup>10</sup>Dioso pejumecovënëtsinë itsa bitso pexainanë pexainaejava, itsamonae itsa yacajërëtatsi pexainaeuene, itsiata bejamatabëcuenebarëya Dioso pejumecovënëtsinëxae. Tsipaji pacuenia ponatoxi bepijia matonoverevereca, ba-

jara pijinia itsi tsane bitso pexainaeuene ata. Bepijia vereverecaena. <sup>11</sup>Itsa baja juameto tajë rucaina, icotia bitso ataju. Nexata ponatoxi tsaquena. Pematono ata othopa. Nexata pexaniamatonojavami ata verevereca bepijia. Bajara pijinia itsi tsane bitso pexainaejava pexainaevi ata. Yajavavereverecaena pexainaejava pecana-jetanucaepatota ata.

**Pacuenia Dioso jivi apo jamatabëcueneëjëtsi pibisiacuene  
pexanaeyaexanaenexa yabara pelivaisi**

<sup>12</sup>Pamonae jamatabëcueneëjëtsi atatsi, najamatabëcueneecataita pibisiacuene pexanaeyaniva, bajarapamonae jamatabëcuenebarëya. Tshipaji itsa vecuapanepa pejamatabëcueneëjëtsijavatsi, pibisiacuene exanaejeva, nexata bajarapamonae Dioso rajutsianatsi pexaniacuenejava. Rajutsianatsi matababi apo pevereverecajava. Bajarapacuene yabara Dioso najumecapanepaeya jumaitsi perajutsinexatsi pamonae jitsipa Dioso. <sup>13</sup>Itsa pacajamatabëcueneëjëta pibisiacuene paneexanaenexa, pëtsa jamatabëcuenenavëxaniabiaya pajumaitsimë: “Dioso raja nejamatabëcueneëjëta pibisiacuene taexanaenexa,” pajamë pëtsa. Dioso cajena apo jamatabëcueneëjëtsi itsajivi ata pibisiacuene pexanaeyaexanaenexa. Itsajivi ata pijinia apo caëjëpaetsi pejamatabëcueneëjëtsinexa Diosojavabelia pibisiacuene pexanaenexa Dioso. <sup>14</sup>Pajivi jamatabëcueneëjëtatsi pibisiacuene pexanaenexa, bajarapajivi copiaya pejamatabëthëtota jamatabënapona papibisiacuene jamatabëexana. Nexata jane baja itsa jamatabëcueneëjëtatsi pibisiacuene pexanaenexa, bajarapapibisiacuene exana. <sup>15</sup>Pajivi pibisiacuene exana, bajarapajivi exana pacuenia copiaya pejamatabëthëtota najamatabëxaina. Nexata tsiteca pibisiacuene itsa exanapona, pepacuene Dioso vecua naxuabiana bajarapapibisiacuene pexanaponaexae.

<sup>16</sup>Tajamonae bitso patacaasivavi, jamatabëcuenenavëxaniabiaya pëtsa pajamatabëjumaitsimë: “Dioso nejamatabëcueneëjëta pibisiacuene taexanaenexa,” pajamatabëjamë pëtsa. <sup>17</sup>Tshipaji daxita pacuene pepo pexaniacuene, Dioso baja cajena vajanacatoitorobicuenetsica. Bajaraponë pexanaenë daxita xua naitayotarubena itaboxotatsia. Dioso cajena daxitamatabacijavabelianexa caejamatabëcuene penajamatabëxainaenë. Caejamatabëcuene Dioso nacasivanajamatabëxaina vaxaitsijavaberena. <sup>18</sup>Dioso baja cajena copiaya najamatabëxaina pexanaenexa pacuenia jitsipa. Nexata nacayapëtaeyaexana pejumelivaisi pexaniajailivaisi. Bajaraxuata nacarajuta pejanajamatabëcuene pitavajamatabëcuene. Vaxaitsi copiaya Dioso itsa jumecovënëtatsi, Dioso pexitsi nacaexana. Pamonae ata cotocaevi Dioso jumecovënëta, bajarapamonae ata Dioso pexi exanatsi. Nexata vaxaitsi, copiaya Dioso vajajumecovënëtsivi, Dioso nacatane bematapijivitsi. Cotocaevi pijinia Dioso pejumecovënëtsivi, Dioso tanetsi bejuyapijivi.

**Pacuenia bexanavanapa pamonae xaniavaetsia  
jumecovënëta Dioso yabara pelivaisi**

<sup>19</sup>Tajamonae bitso patacaasivavi, pacanaëjëtsianame mapalivaisije, palivaisi pacatsipaebijitsiatsi. Daxita paxamë xaniavaetsia bepanamuxunaevetame Dioso pejumelivaisi. Apo bepacaicuajimë abaxë copiaya xaniavaetsia panajamatabëxainaenejevamë. Apo bepaanaepanaemënuata bepijia. <sup>20</sup>Tshipaji itsa anaepanatsi, Dioso apo toexanaetsi pexaniacuene, pacuene Dioso jitsipa. <sup>21</sup>Bajaraxuata pacopabare daxita pibisiacuene panenajamatabëxainaejava. Pacopabarenua daxita pibisiacuene

paneexanaejava itsamonaejavabelia. Dioso raja pejumelivaisi pacatsijamatabëuba. Bajaraxuata beveliajamatabëcuenevi nataeya pajumecovënëre Dioso pejumelivaisi. Bajarapalivaisi itsa pajumecovënëtame, nexata pacacapanepaena Diosojavabelia.

<sup>22</sup> Pacuenia Dioso pejumelivaisita jumaitsi, jumecovënëtsiya paexanaponare. Pëtsa pajamatabëjumaitsimë: “Pacuenia Dioso pejumelivaisita jumaitsi, apo exanae atanë, apo itsacuene,” pajamatabëjamë pëtsa. Tsipaji saya pajamatabëcuene-navëxaniabijitsipame. Nexata itsa apo paexanaemë tsipae pacuenia Dioso pejumelivaisita jumaitsi, pananeconitsipame Diosojavabelia. <sup>23</sup> Pajivi jumetae ata Dioso pejumelivaisi, itsiata itsa apo exanae pitorobicueniatsi, bajarapajivi jamatabëcueneitsi pacuenia itsi ponë naitabarata tsaxuta. <sup>24</sup> Ponë tsaxuta naitabarata, penaitabarataecujinae pona baja. Nexata bajaraponë bepija nacofënëta pacuenia itabarajumapeitsi. <sup>25</sup> Dioso cajena pejumelivaisi bitso xanepana. Caëjëpatsinua vajanacacapanepaenexa bajaraponëjavabelia. Pajivi daxita bajarapalivaisi pitorobicueniatsi exanaponapona copatsinejeva, bajarapajivi bitso Dioso yavenonaenatsi daxitacuenejavabelia.

<sup>26</sup> Pajivi jumaitsi ata: “Xanë bitso toexanaponaponajë Dioso pejitsipaecuenia,” jai ata, itsiata itaxutojema itsa cuaicuaijai tsabiabi, bajarapajivi saya jamatabëcuene-navëxaniaba. Tsipaji Dioso apo pejitsipaecuenia cuaicuaijai. Nexata bajarapajivi xua Dioso toexanaponapona apo tonamatamotsi tsanetsi Diosojavabelia. <sup>27</sup> Dioso pejumecovënëtsijivi, pajivi Dioso aneconijibiatanetsi, exanaponapona mapacueni-aje. Yavenona tsonijivixi. Yavenonana pama pevecuatëpaevitsi bitso itsa namatavenona itsacuenejavaxi. Pajivi Dioso pejumecovënëtsijivi, nayajivitaeyaponapona pibisiacuene pexanaeyaniva, pacuene exanabiaba mapanacuapijivi, Dioso apo pejumecovënëtsivi.

### **Pacuenia Dioso pejumecovënëtsivi muxujibatsi daxitajivi najëpaeya jamatabëcuenexanepanaeya petaenexa yabara pelivaisi**

**2** Tajamonae, ayaijamatabëcuenenë vajatuxanenë Jesucristo panejumecovënëtsixae, daxitajivi najëpaeya pataema. Pëtsa itsamonae bijiaya pataneme. <sup>2</sup> Nexata panenacaetuatsijavata, rionë, pexaniajava penaxatatsinë, napatsipa, oro anillo penacobexatatsinë. Bajarapaepatota pijinia bepejiobinë, perujuesetoyo penaxatatsinë, napatsipa. ¿Detsa pacuenia pacopiapitsipame bajarapitsinëbeje? <sup>3</sup> Caenë meta xaniavaetsia pacopiapitsipame, pexaniajava penaxatatsinë. Paecaeyaexanaejitsipame pexaniajavata. Ponë bepejiobinë, apo pacopiapitsimë tsipae xaniavaetsia. Saya panucaeyaexanaejitsipame. Itsa jume, paecaeyaexanaejitsipame irata. Nexata bajarapacuenia itsa paexanaejitsipame, pexaniacuene apo paexanaemë tsipae Dioso pitabarata. <sup>4</sup> Bajarapacuenia itsa paexanaejitsipame, najëpaeya bajaraponëbeje apo pataemë tsipae. Caenë payaiyataejitsipame. Itsanë saya bijiaya pataejitsipame. Nexata bajarapacuenia itsa paexanaejitsipame, pibisiacuena panajamatabëxainaejitsipame.

<sup>5</sup> Tajamonae bitso patacaasivavi, panejumetaema. Dioso raja itapetatsi pamona apo pexinaevi mapanacuataje. Bajarapamonae Dioso itapetatsi pexi pexanaenexatsi. Nexata bajarapamonae itsa najamatabëcuenecopatsiana Cristojavabelia, bitso pexinaevi tsane athëbëtatsia, Dioso pijanacuatatsia, itsajotatsia Dioso eveta daxitacuene. Bajarapamonae ata tocopatsianatsi Cristo pebarëevetsinexatsi daxitacuene, pacuenia Dioso najumecapanepaeya jumaitsi Dioso pijajivi yabara. <sup>6</sup> Itsiata baitsi



jane bajarapacuenia bepejiovivi yabara pejumaitsijava payapëtae atamë, paxamë bijiaya pataeyabiabame bepejiovivi. Ricovi baja cajena xainapona bitso pexainaejava panejumata. Bajarapamonae pacaneconitabiabanua juezmonaejavabelia juezmonae papecananeconitsiaexanaenexa. <sup>7</sup>Ricovi cuaicuaijai tsabiabi pibisiacuenia Cristo yabara, ponë vaxaitsi yayiataeya jumecovënëtavanapatsi.

<sup>8</sup>Dioso pejumelivaisibaxutota jumaitsi mapacueniaje: “Asivamëre itsamonae ata pacuenia xamë nijacuata nasivamë,” jai. Bajarapalivaisi pexanialivaisi bitso daxitalivaisianë matatoxenetsia. Nexata bajarapalivaisi pepacuene itsa pajumecovënët-sianame, pexaniacuene paexanaename. <sup>9</sup>Itsa payaiyataejitsipame itsamonae, itsamonae pijinia bijiaya itsa pataejitsipame, nexata paexanaejitsipame pibisiacuenie. Pananeconitsipame Diosojavabelia. Tspiji najëpaeya apo pataemë tsipae daxitajivi Dioso papecaitorobicuenia. <sup>10</sup>Pajivi jumecovënëtsi ata Dioso Moiséspijinëta penajumecopatsilivaisi, itsiata bajarapalivaisita caelivaisiyo itsa apo jumecovënëtsi, nexata itsiata naneconitsiana Diosojavabelia bajarapalivaisita caelivaisiyo apo pejumecovënëtsixae. Nexata bajarapajivi daxita bajarapalivaisi apo bepejumecovënëtsijivicuenia, Dioso taenatsi. <sup>11</sup>Dioso jumaitsi: “Pëtsa jaitame itsava nijavavecua,” jai. Petiriavinexa pijinia jumaitsi: “Pëtsa jaitame itsanë amonavecua,” jai. Dioso icatsia itsajumeyo jumaitsi: “Pëtsa beyaxuabame jivitonë,” jai. Nexata ponë apo jaiti ata itsava pijavavecua, itsiata itsa beyaxuaba jivitonë, Dioso tanetsi daxita bajarapalivaisi apo pejumecovënëtsinëcuenia. <sup>12</sup>Jesucristo papecaitorobicuenia itsa paexanaename, nexata apo pananeconitsimë tsane Diosojavabelia. Itsa apo pajumecovënëtsimë tsane, nexata pananeconitsianame Diosojavabelia. Bajaraxuata itsa pacuacuaijamë, pacuacuaijamëre pexanialivaisi. Paexanavanaparenua pexaniacuene pacuenia Jesucristo pacaitoroba. <sup>13</sup>Paxamë itsa apo paitaxutotsoniataemë itsamonae ata, nexata juya Dioso apo pacaitaxutotsoniatae tsane pamatacabi Dioso naneconitsiaexanaena daxitajivi pibisiacuene pexanaeneconi yabara. Itsiata baitsi jane itsa paitaxutotsoniataneme itsamonae ata, juya Dioso pacaitaxutotsoniataena. Nexata Dioso apo pacananeconitsiaexanae tsane.

### **Pacuenia Dioso pejumecovënëtsivi pexaniacuene bexanavanapa yabara pelivaisi**

<sup>14</sup>Tajamonae, pajivi jumaitsi ata: “Xanë jumecovënëtajë Jesús pelivaisi,” jai ata, itsiata itsa apo exanae pexaniacuene itsamonaejavabelia pacuenia Dioso nacaitoroba, bajarapajivi apo jumenamatamotsi Diosojavabelia. Bajarapacuenia saya itsa jumaitsi tsane pecuibota, bajarapajivi Dioso apo capanepae tsanetsi. <sup>15-16</sup>Itsamonae Dioso pejumecovënëtsivi bitso namatavenonaejitsipa penaxatatsijava, pexaejava ata. Nexata bajarapamonaejavabelia paxamëyajuvënëjivi jumaitsi ata tsipae: “Xaniavaetsia baja paponare. Dioso pacayavenonaena panenaxatatsijavanexa paneaqueyaniva. Pacarajutsiananua panexaejavanexa ata,” jai ata tsipae, nexata itsiata bajarapajivi apo jumenamatamotsi tsipae. Tspiji apo itaxutotsoniatae. Saya itoroba peponaenexa. <sup>17</sup>Bajara pijinia itsi Jesús pelivaisi vajajumecovënëtsijava. Pajivi pexaniacuene apo toexanae itsamonaejavabelia, bajarapajivi jumaitsi ata: “Xanë jumecovënëtajë Jesús pelivaisi,” jai ata, itsiata apo jumenamatamotsi. Tspiji pacuenia Dioso itorobatsi, apo exanae.

<sup>18</sup>Nexata pajivi Jesús pelivaisi jumecovënëtsi ata, itsiata pexaniacuene itsa apo toexanabiabi tsane itsamonaejavabelia, nexata meta itsajivi jumai tsane bajara-

pajivijavabelia: “Xamë jumaitsimë tsabiabi: ‘Xanë jumecovënëtajë Jesús pelivaisi,’ jamë tsabiabi. Itsiata pexaniacuene apo toexanabiabimë itsamonaejavabelia pacuenia Dioso nacaitoroba. Nexata apo cajamatabëcueneyapëtaetsi nexaniajaicuene nejumecovënëtsijava Jesús pelivaisi. Tspijaji pexaniacuene apo toexanabiabimë itsamonaejavabelia pacuenia Dioso nacaitoroba. Xanë rajane pexaniacuene toexanabiabajë itsamonaejavabelia pacuenia Dioso nacaitoroba. Bajarapacuenia pexaniacuene tatoexanabiabixae itsamonaejavabelia catsitanajamatabëcuenëitajëtatsi taxaniajaicuene tajumecovënëtsijava Jesús pelivaisi,” jai meta tsane itsajivi pajivijavabelia pexaniacuene apo toexanabiabi itsamonaejavabelia, Jesús pelivaisi jumecovënëtsi ata. <sup>19</sup>“Caenë rabaja tsaponapona Dioso,” pejalivaisi paxamë pajumecovënëtime. Xanepana rabaja picani. Itsiata pexaniacuene itsa apo patoexanaemë tsipae itsamonaejavabelia, pajemajamë tsipae. Tspijaji dovathi ata, pijajivi yajava, jumecovënëta: “Caenë rabaja tsaponapona Dioso,” pejalivaisi. Bajaraxuata dovathi pijajivi barëneconecojai pecajunavi. <sup>20</sup>Paxamë pajamatabëcuenelivaisijibimë. Vaxaitsi jumaitsi atatsi: “Xanë jumecovënëtajë Jesús pelivaisi,” jai paxamë pajumecovënëtime. Xanepana rabaja picani. Itsiata pexaniacuene itsa apo patoexanaemë tsipae itsamonaejavabelia, pajemajamë tsipae. Tspijaji dovathi ata, atatsi, itsiata pexaniacuene itsa apo toexanabiabitsi itsamonaejavabelia pacuenia Dioso nacaitoroba, ajumematamobitsi cajena Diosojavabelia. <sup>21</sup>Bajayata vajasalinainëmi Abrahampijinë xaina pexënatonëyo. Pevënë Isaac. Nexata Abrahampijinë Dioso jamatabëcuenëjëtisiaya itorobatsi penacoxibeyaxuabinexa picani. Dioso jumaitsi Abrahampijinëjavabelia: “Nexënatonëyo beyaxuare ofrendacuenia tanerajutsinexamë,” jai Dioso Abrahampijinëjavabelia. Nexata Abrahampijinë ajena nacoxibeyaxuabijitsia, Dioso itavetatsi. Abrahampijinë pejumecovënëtsixae pacuenia Dioso itorobatsi, nacoxicëtabuata picani penacoxibeyaxuabinexa. Bajaraxuata Abrahampijinë Dioso aneconijibiatanetsi. <sup>22</sup>Abrahampijinë cajena Dioso jumecovënëta pacuenia tajëvelia Dioso najumecapanepaeya jumaitsi. Bajaraxuata exana pacuenia Dioso itorobatsi. Bajarapacuenia itsa exana Abrahampijinë, najamatabëcuenëitajëta pepacuene Dioso pejumecovënëtsijava pejamatabëëthëtojavavetsina. <sup>23</sup>Nexata bajarapajamatabëcuenelivaisi yabara Dioso pejumelivaisibaxutota jumaitsi Abrahampijinë yabara mapacueniaje: “Abrahampijinë jumecovënëta pacuenia Dioso najumecapanepaeya jumaitsi. Bajaraxuata Dioso aneconijibia tanetsi,” jai baja cajena Dioso pejumelivaisibaxutota Abrahampijinë yabara. Nexata Abrahampijinë yabara jivi jumai tsabiabi: “Abraham raja Dioso piasivanëtsi,” jai tsabiabi.

<sup>24</sup>Nexata baja paxamë payapëtaneme mapacuenije. Pajivi jumecovënëtsi ata pacuenia Dioso najumecapanepaeya jumaitsi, itsiata itsa apo exanabiabi pexaniacuene, bajarapajivi aneconijibia Dioso apo taetsi. Pajivi jumecovënëta pacuenia Dioso najumecapanepaeya jumaitsi, nexata itsa exanabiaba pexaniacuene, bajarapajivi Dioso aneconijibia tanetsi. <sup>25</sup>Bajara pijinia pacuenia bajayata Dioso aneconijibia tanetsi Rahabpijivami pibisiacuene pexanabiabivami ata. Bajarapovami palata pepitsinexa, pibisiacuene exanabiaba pevitota. Itsiata baitsi jane bajarapovami pexaniacuene exana. Tspijaji copiapita xaniavaetsia Israelpijinë pemomobeje. Bajaraponëbeje jivi peyaenëbinëbeje vajabitsaë pexanaenexa bajara patomarapijivijavabelia. Rahabpijivami yavenonanua bajaraponëbeje peponaenexabeje saicaya namutua pijavajabitsaë pebeyaxuabiyativatsibeje. Bajarapacuenia Rahabpijivami pexaniacuene pexanaexae Dioso aneconijibia tanetsi. <sup>26</sup>Piasaëtsaponaponaejivi ata itsa

baja ajumalijibi, tēpa baja. Apo exanae baja itsacuenejavayo ata pexaniacuene pe-  
vajēnaeyabelia. Bajara pijinia vaxaitsi ata jamatabēcuenetsitsi Jesús pelivaisi vaja-  
jumecovēnētsivi. “Xanē jumecovēnētājē Jesús pelivaisi,” jai atatsi, itsiata itsa apo  
exanaetsi pexaniacuene pacuenia Dioso nacaitoroba, bevajajamatabēcuenetēpaevi  
Dioso tsitajinavanapatsi.

### Pacuenia itsi vajeabarēto yabara pelivaisi

**3** Tajamonae, paxamēyajuvēnēvi vēnēlivaisitaniji pacuenia ayaibitsaēto jitsipa pe-  
naexanaenexa Jesús pelivaisi jivi petsipaebivinexa. Itsiata baitsi jane ayaibit-  
saēto apo benaexanae jivi livaisi petsipaebaponaevinexa. Paxamē rabaja payapē-  
taneme mapacuneje. Paxanē Jesús pelivaisi jivi patatsipaebaponaevi, paitave-  
taponājē pibisiacuene pexanaejava. Nexata pibisiacuene pexanaejava pataitavet-  
sicujinae, bajarapapibisiacuene itsa paexanaejitsipajē, Dioso bitso ayaicuenia pa-  
nenaneconitsiaexanaejitsipa daxitajivi matatoxenetsia. <sup>2</sup>Daxitatsi vaxaitsi itsaja-  
vata banacajumemaba pibisiacuenia vajacuaicuaijainexa, pacuenia picani apo  
becuaicuaijaisi. Pajivi pibisiacuenia apo cuaicuaijai, bajarapajivi ajamatabēcue-  
nesaē baja Diosojavabelia. Nexata bajarapajivi caējēpatsi penajamatabēcue-  
saētsinexa daxita pibisiacuene pexanaeyaniva. <sup>3</sup>Caballo vajavēsimumuxufetsinexa  
tsicuiboxatatatsi freno. Nexata freno caballovecua tsiquirijavayo ata, itsiata caējēpa  
caballo vajavēsimumuxufetsinexa itsabelia jitsipatsi vajaponaenexa. <sup>4</sup>Bajara pijinia  
itsi barco ata, pinijimo ata. Jovibo ayai ata, itsiata petabufetaicaenē tsiquiritena-  
payo ata, barcotabufe cajēnagona itsabelia jamatabēpona peponaenexa. <sup>5</sup>Bajara  
pijinia itsi tsiquiriisotoyo ata. Itsa tajua, naexana ayaiisoto petajuenexa pinijiunu  
ata. Bajara pijinia itsi vajeabarēto ata. Tsiquirijavayo picani vajeabarēto. Itsiata  
caējēpatsi pecuaicuaijainexa ayailivaisi. <sup>6</sup>Vajeabarēto cajena ayai, pacuenia isoto  
ayai. Vajeabarētota raja pibisiacuene exanatsi daxita vajavi matatoxenetsia. Nex-  
ata vajacuaicuaijajava nacajamatabēcuenebijiana. Tsiquirijiviyotsijavaveliacujinae  
vajatēpaejavabelianexa, bajarapacuenia cuaicuaijaisi. Dovathi vajanacaitorobijava  
vajajumecovēnētsixae, cuaicuaijaisi pibisiacuenia. <sup>7</sup>Pacanaējēre mapacuneje. Jivi  
caējēpatsi penaitajuaniaexanaenexa daxitaviriadajubiyajuvēnēvi. Caējēpatsinua pe-  
naitajuaniaexanaenexa unupijivi ata, pepunaevi ata. Caējēpatsinua penaitajuaniaex-  
anaenexa pecotobēxēta pejinavanapaevi ata, manuamenepijidujuai ata. Itsamonae  
bajarapacuenia naitajuaniaexana baja pejumecovēnētsinexatsi. <sup>8</sup>Itsiata baitsi jane  
itsajivi ata apo caējēpaetsi penaabarētoitavetsinexa jumejemabiaya pibisiacuenia  
pecuaicuaijajava pecopatsinexa. Vajeabarēto cajena bitso abeje. Apo nacacaējēpae  
vajanajumecataitsinexa. Nexata pacuenia jomo pijaveneno xaina pebeyaxuabinexa,  
bajara pijinia itsi vajeabarēto. <sup>9</sup>Vajeabarētota pexaniacuenia jumaitsitsi vaxa Dioso-  
javabelia: “Xamē bitso ayaijamatabēcuenenēmē,” jaitsi. Vajeabarētota icatsia pibisi-  
acuenia cuaicuaijaisi itsamonaejavabelia. Bajarapamonae picani beyaiyatanetsi.  
Tsipaji Dioso nacuenecataeya pexanaevitsi. <sup>10</sup>Caeabarētota pexaniacuenia cuaicuai-  
jaisi Diosojavabelia. Pibisiacuenia ata cuaicuaijaisi itsamonaejavabelia. Taja-  
monae, apo bexanaetsi cajena bajarapacuenia. <sup>11</sup>Pacanaējēre mapacuneje. Mera  
pepitsapaemēthēatsina pitsapaina caera, pexaniara. Apo pitsapae pexaniara, piat-  
saxara yajava. <sup>12</sup>Bajara pijinia itsi peubijava ata. Higuernaejavaverena apo pit-  
sapae saicayacuai. Uvanaejavaverena ata apo pitsapae saicayacuai. Jume cajena.  
Bajara pijinia itsi mera pepitsapaemēthē. Caejavatsina apo pitsapae pexaniara, piat-

saxara yajava. Bajara pijinia itsi vajeabarëto ata. Caeabarëtota apo becuai cuaijaitsi pibisialivaisi, pexanialivaisi yajava. Nexata becuai cuaijaitsi ëpexanialivaisi.

**Pacuenia Dioso pijajivi yapëtaeyaexana  
pexanaenexa pexaniacuene yabara pelivaisi**

<sup>13</sup> Paxamë rabaja xaniavaetsia pajumeyapëtaneme Dioso pejumelivaisi. Nexata itsamonae pexaniacuene bepatsitaexanavanapame pacuenia pajumetaneme Dioso pejumelivaisita. Bajarapacuenia itsamonae pexaniacuene bepatsitaexanavanapame beveliajamatabëcuenevi nataeya. Nexata daxitajivi pacuene yapëtaena bitso panejumeyapëtaevicuene Dioso pejumelivaisi. <sup>14</sup> Itsiata baitsi jane bitso itsa pacuene caëbabiabame itsamonae, itsa pajitsipabiabamenua jivi paneevetsivinexa papecaexanaenexa, pëtsa jamatabëcuenenavëxaniabiaya pajumaitsimë mapacueniaje: “Xanë bitso xaniavaetsia yapëtaniji Dioso pejumelivaisi,” pajamë pëtsa. Tspaji saya panajamatabëcuene capaebijitsipame xaniavaetsia Dioso pejumelivaisi paneyapëtaejava. <sup>15</sup> Dioso pejumelivaisi itsa payapëtaejitsipame xaniavaetsia, nexata apo panajamatabëxainaemë tsipae bajarapacuenia. Dovathi rajane pejamatabëcueneta pacaitoroba panenajamatabëxainaenexa bajarapacuenia. Itsa jume, nexata paxamë panejamatabëcueneta panajamatabëxainame bajarapacuenia. <sup>16</sup> Itsajota jivi cuene caëba itsamonae, itsa jitsipabiabanua jivi pevetsivinexa pexanaenexatsi, bajarajota nexata jivi najamatabëcuenejëpaeya apo jinavanapae. Daxitacuene pibisiacuene ata exanavanapa. <sup>17</sup> Biji rajane Dioso itsa nacayapëtaeyaexana pexaniajamatabëcuene, nexata pexaniajamatabëcuene xainatsi. Apo namaxëvanitsitsi. Itsamonae yaiyatanetsi vajeaxanaeyaniva bajarapamonaejavabelia apo pejitsipaecuenia. Najamatabëxainatsi itsamonae ata vajanacamuxujobilivaisi vajejumeyapëtaenexa. Itaxutotsoniatanetsi itsamonae ata. Pexaniacuene exanatsi. Apo najamatabëcuene epatajërërëcaetsi. Apo yamaxëitojorobitsi itsamonae ata. Bajarapacuenia exanatsi Dioso pejamatabëcueneta pexaniajamatabëcuene itsa nacayapëtaeyaexana. <sup>18</sup> Vaxaitsi jivi itsa nabarajamatabëcuene xanepanaeyaexanaenatsi, namataenetsia penaitoyavi ata, nexata vaxaitsi ata nabarajamatabëcuenexanepanaeya jinavanapaenatsi. Pexaniacuenua exanavanapaenatsi.

**Pacuenia jamatabëcueneitsi pajivi jitsipa  
mapanacuapijicueneje yabara pelivaisi**

**4** ¿Detsa xuajitsia paxamëyajuvënëvi anaeya namataenetsia pijanajumeno tabiabi pecanabeyabiabi? Bajarapacuenia najumeanaenotabiaba tspaji pejamatabëthëtota bitso jitsipa pexanaenexa daxita xua pibisiacuene. Bajaraxuata nabeyabiaba. <sup>2-3</sup> Paxamë picani pajitsipame itsacueneyava panexainaenexa. Itsiata apo pacacaëjëpae panepitsinexa. Bajaraxuata nexata pexainaevi payabarabeyaxuababiabame. Pacobecaëbabiabame itsamonae pexainaeyava. Nexata pexainaevi payabarabeyabiabame paneyacajërëtsinexa pecobecovë. Paxamë apo paxainaemë panejitsipaecueni. Tspaji pavajëcabiabi atamë Diosojavabelia, itsiata apo pacarajutabiabi xua pavajëcame. Tspaji saya bajaraxua pavajëcabiabame paneexanaenexa daxita xua pibisiacuene. <sup>4</sup> Caejamatabëcuene Diosojavabelia apo paxainaemë. ËDioso pijacuene apo pajitsipaemë. Mapanacuata pexainaecueni ata bitso payajavajitsipame. Bajarapacuenia panenajamatabëxainaexae, pacuenia petiriva jamatabëcueneitsi, pova pamonavecua jaita itsanë, bajarapajamatabëcueneit-

simē. Payapētaneme rabaja mapanacuapijicuene bitso pejitsipaevi, bajarapamonae Dioso beprijavajabitsaē naexana. Bajara pijinia paxamē ata paitsimē. <sup>5</sup>Bajara-pajamatabēcuene yabara Dioso pejumelivaisibaxutota jumaitsi mapacueniaje vajacanaējētsinexa xaniavaetsia Diosojavabelia: “Espíritu Santo, ponē nacatsijamatabēeca, bajaraponē bitso nacaasiva. Bitso nacatojitsipa vajaasivanexa ēDioso,” jai Dioso pejumelivaisibaxutota vajajitsipaeyaniva mapanacuapijicueneje. <sup>6</sup>Dioso cajena nacayavenona vajanajamatabēcuene cataitsinexa pibisiacuene vajaexanaeyaniva. Dioso pejumelivaisibaxutota jumaitsi mapacueniaje: “Dioso yavenona pamonaē beveliajamatabēcuenevi natane. Pamonaē pijinia beayajamatabēcuenevi natane, Dioso apo yavenonaē,” jai Dioso pejumelivaisibaxutota. <sup>7</sup>Nexata beveliajamatabēcuenevi nataeya paexanavanapare pacuenia Dioso pacatojitsipa. Panavecuaitavere dovathi. Nexata dovathi pacavecuanajetabajiraviana. <sup>8</sup>Pavajēre Diosojavabelia. Nexata Dioso pacayavenonaena. Paxamē pibisiacuene paneexanaevi, pacopare bajarapacuene. Paxamē anijajamatabēcuenebeje panexainaevi, Dioso pijalivaisi, pibisiajamatabēcuene yajava. Pacopare bajarapajamatabēcuene Dioso papeccajamatabēcuene xaniavaetsinexa pibisiajamatabēcuenevecua. <sup>9</sup>Pibisiacuene paneexanaeconi yabara, bitso panatsinajamatabēxainare. Bitso payaauramērenua. Pētsa payabarēyamē. <sup>10</sup>Beveliajamatabēcuenevi panataema Dioso pitabarata. Nexata pibisiacuene paneexanaeconimivecua, Dioso pacajamatabēcuenyavenonaena. Nexata panajamatabēcuenyotsianame Diosojavabelia.

### **Pacuenia nacaitaveta itsamonae Dioso pejumecovēnētsivi pibisiacuenia vajabaracuaicuajaiyaniva yabara pelivaisi**

<sup>11</sup>Tajamonae, pētsa najumetsēnētsia namataenetsia panabaracuaicuajamē. Pajivi najumetsēnētsia baracuaicuajai Dioso penajuajumecovēnētsivi, bajarapajivi naneconita Diosojavabelia. Dioso penajuajumecovēnētsivi, pibisiacuene pexanaejava xaniavaetsia cuenyapētaenejeva, itsa jamatabējumaitsinua: “Bajarapamonae Diosovecua naxuabiana pibisiacuene pexanaexae,” itsa jamatabējai, nexata bajarapajivi ata naneconita Diosojavabelia. Dioso penajuajumecovēnētsivi, najumetsēnētsia itsa baracuaicuajai, nexata apo jumecovēnētsi pacuenia Dioso itorobatsi. Pacuenia Dioso itorobatsi, itsa apo jumecovēnētsi, nexata apo bepexaniajailivaisi tane. Caranata bajarapajivi jivi bepenaneconitsiaexanaenē natane. <sup>12</sup>Caenē Dioso nacatonajumecopata vajajumecovēnētsinexa. Bajara jane ponē nacaneconitsiaexanaena pibisiacuene vajaexanaeconi yabara. Bajaraponē caenē caējēpatsinua pejumaitsinexa itsajiviyojavabelia: “Xamē pepacuene naneconitame. Nexata nevecuanaxuabianame infernojavabelia,” pejainexa. Itsa jume, caējēpatsi pejumaitsinexa: “Xamē baja caaneconijibiaexanatsi. Nexata aneconijibia catanetsi. Nexata cacapanepaenatsi,” pejainexa. Bajaraxuata paxamē Dioso apo pacatocopatsi itsamonae yabara panejumaitsinexa mapacueniaje: “Bajarapamonae Diosovecua naxuabiana pibisiacuene pexanaexae,” panejainexa.

### **Pacuenia itsajivi ata apo natsivajēnaeyapētae pacuene meravia pitsijavata tocopiaatsijitsiatsi yabara pelivaisi**

<sup>13</sup>Panenamuxunaevere mapalivaisije. Paxamē abaxē xaniavaetsia payapētaenejevamē xua Dioso pacatocopatsijitsia paneexanaenexa, ayajamatabēcuenevi nataeya tajēvelia panavajunupaebabiabame. Tajēvelia pajumaitsimē tsabiabi: “Ajena. Itsa

jume, pepacuenē jane baja meravia, ponaenatsi bajarapatomarabelia. Bajarajotalia caevai nacuenebianatsi palata vajanacanabinexa,” pajamē tsabiabi. <sup>14</sup>Pētsa bajarapacuenia ayaijamatabēcuenevi nataeya tajēvelia panavajunupaebabiabame. Tsipaji raja apo panatsivajēnaeyapētaemē xua pacatocopiapatsijitsia meravia pitsijavata. Vajajinavanapaeepatoyo saya tsiquirimatacabiyota jinavanapatsi vajatē-paenexa. Pacuenia itsi nojobo, bajara saya itsitsi vaxaitsi. Nojobo pitsapa bajayacunua caeepatoyonexa saya. Bajaraxuacujinae icatsia ajibi baja. Bajara pijinia itsitsi vaxaitsi ata. <sup>15</sup>Nexata saya bepajumaitsimē: “Itsa Dioso nacatocopatsiana abaxē vajaasaētsavanapaenexa, jinavanapaenatsi. Exanaenatsi mapacueniaje. Itsa jume, itsacuenia exanaenatsi,” bepajamē saya. <sup>16</sup>Paxamē saya bepaayaijamatabēcuenevimē panataeyabiabame. Nexata paneexanaejavanexa, abaxē tajēvelia panavajunupaebabiabame panatsivajēnaeyapētaenejevamē xua Dioso pacatocopatsijitsia paneexanaenexa. Bajarapacuenia ayaijamatabēcuenenē nataeya panavajunupaebabiabijava, pibisiacuenē. Tsipaji panajamatabēxainabiabame bepanijacuata itajara paneexanaejavanexa. Apo pacanaējētsimē bajaraxua Dioso papecatocopatsijava, bajarapacuenia paneexanaenexa. <sup>17</sup>Pajivi yapētae ata pacuenia picani bexana, itsiata itsa apo exanae, bajarapajivi naneconita Diosojavabelia.

### **Pacuenia bitso pexainaevi muxujibatsi yabara pelivaisi**

**5** Bitso panexainaevi, jpanenamuxunaeverē mapalivaisije! Panatsinuema bitso ayaijumeta. Tsipaji raja Dioso pacabejiobiaexanaena. <sup>2</sup>Bitso panexinaecuene panexaniavaetsijavami, pacatotsabanaena. Pexaniaviriajavanē, panenaxatabijavanēmi ata, daxita pacatoucubaxaena. <sup>3</sup>Palatanēanē ata, bitso penamatamotsinēanē, pacatotasibianatsi. Nexata nayapētaena bajarapapalata apo panecanacuenebijava. Bajarapapalatata apo paneyavenonaexae itsamonae, pacatotasibianatsi. Isoto pacaveriajaviana daxita panexinaejava yajava. Pacaetuataponame picani papecatoayaijavanexa. Itsiata baitsi jane pamatacabi Dioso naneconitsiaexanaejitsia daxitajivi, imoxoyo baja pevajēnae tsaponae pecopiapatsinexa. Dioso pacananeconitsiaexanaena. Tsipaji ēpaxamēnēna panatoxaniavaetame panexinaecuene. <sup>4</sup>Panejumetaema. Pamonae pacatonacueneba panijacuene, bajarapamonae tsipaeba itsamonaejavabelia paneyamaxēitojorobijava. Apo pamamatotsimē xaniavaetsia pacuenia picani pamamatotsiapaebame. Nexata vajatuxanenē Dioso, daxita athēbēnacuatatsia pevetsinē, jumetanetsi bajarapamonae pepaebijava xaniavaetsia apo panematamotsijava. <sup>5</sup>Mapanacuata picani panatsitajinavanapame xaniavaetsia. Pacabarēyamē tsavanapae panexinaecuene. Paexanavanapame panejitsipacuenia. Pacuenia baca bitso penasitsiepatota beyaxuabatsi, bajara pijinia pacuenia paxamē ata pacatoimoxoyo baja Dioso papecananeconitsia exanaematacabinexa, bitso pananeconitsixae Diosojavabelia. <sup>6</sup>Jivi pananeconitsiaexanabiabame. Pabeyaxuababiabamenua pianeconijibivi ata. Bajarapacuenia paexanabiabame pamonaejavabelia apo caējēpaetsi papecanayajiviitavetsinexa.

### **Pacuenia icatsia petuxanenē patsijitsiatsica yabara pelivaisi**

<sup>7</sup>Tajamonae, pajamatabēcuenesaēmēre tsavanapae panecopiaevetavanapaejava vajatuxanenē matapania icatsia pepatsimatacabitsicajavabelianexa. Pabi penacuenebinē, vajēnaeeveta ema peubinexa peubijava. Peubiveretsicujinae peubijava, bajayajebi ajamatabēcuenesaēya evetaponapona petonaveretsijavabelianex-

atsi. <sup>8</sup> Bajara pijinia pacuenia paxamē ata bajayajebi itsamonae pibisiacuene pacaexanae ata, pajamatabēcuenesaēmē tsane. Pētsa pajamatabēcuenefaefaeaname. Tsi-paji rabaja imoxoyo pevajēnae tsaponae vajatuxanenē pepatsinexatsica. <sup>9</sup> Tajamonae Dioso panenajuajumecovēnētsivi, pētsa namataenetsia panabaracuaicuaijamē Diosojavabelia panananeconitsiyaniva. Tsi-paji rabaja Jesucristo, ponējavabelia panavajunupaebijitsiamē daxita pacuene paexanavanapame mapanacuataje, imoxoyo baja pevajēnae tsaponae pepatsinexatsica. Bajaraponē pacaejivimē canacujitsia pacarajutaponaena xuavajēto pacatoxainapona. <sup>10</sup> Tajamonae, pacanaējēre profetavimi, pamonaemi bajayata Diosojumelivaisi paeba. Bajarapamonaemi bajayajebi bejiobiaexanae atatsi, ajamatabēcuenesaē tsavanapae. Itsajamatabēcuenē apo xainae. <sup>11</sup> Pamonaē ajamatabēcuenesaē, bajayajebi bejiobiaexanae atatsi, bajarapamonaē aeconoxae baja topexaniacuenetsi tsane Diosojavabelia. Pavēnēlivaisitaneme rabaja pacuenia bajayata Jobpijinē bejiobiaexanae atatsi, itsiata ajamatabēcuenesaē Diosojavabelia. Pavēnēlivaisitanemenua pacuenia pejamatabēcuenējētsicujinaetsi, bitso Dioso yavenonatsi. Bajaraxuata nexata payapētaneme Dioso jivi pitaxutotsoniataenēcuenē.

<sup>12</sup> Tajamonae, palivaisi baja pacatsipaebatsi, matatoxenetsia mapalivaisiyoje bitso pajumecovēnētsianame. Itsa pacuaicuaijamē itsamonaējavabelia, pexaniajailivaisi pacuaicuaijamē tsabiabi tsane. Pētsa Dioso pevēnē pacacuaicuaijamē itsamonae papecajumexaniataenexa. Nexata pētsa pajumaitsimē mapacueniaje: “Xaniajanē raja. Cajumaitsi mapacueniaje Dioso pitabarata,” pajamē pētsa. Tsi-paji baja pexaniajailivaisi itsa pacuaicuaijamē tsabiabi tsane, itsamonae ata pacacueneyapētaena apo panenajumetsēnētabiabicuene. Nexata itsa pacayanijoba itsacuenējavayo yabara, roviaalia pajumaitsimēre pacuenia panajamatabēxainame. Itsa pajejamējitsia, pajejamēre roviaalia. Itsa jume, “iJume!” pajamēre roviaalia. Bajarapacuenia roviaalia itsa paxaniajamē tsabiabi tsane, nexata apo pananeconitsimē tsane Diosojavabelia. Tsi-paji Dioso pevēnē apo pacacuaicuaijamē tsabiabi tsane papecajumexaniataenexa itsamonae.

<sup>13</sup> Paxamēyajuvēnējivi itsa tocopiapatatsi pibisiacuene, bajarapajivi bevajēta Diosojavabelia. Itsa jume, barēyaya itsa ponapona, betonaxēana Diosojavabelia: “Xamē ayaijamatabēcuenenēmē,” bejai Diosojavabelia penaxēanaejavata. <sup>14</sup> Itsa jume, itsa avitane, bejunata ancianovi, Dioso pejumecovēnētsivi pevetsivi. Nexata ancianovi patsiana petovajētsinexatsi Diosojavabelia. Nexata ancianovi pivitanējivi aceiterata perabēcalirabiana vajatuxanenē pevēnēta. <sup>15</sup> Petovajēcaejavata, daxita ancianovi itsa jamatabējumaitsi: “Dioso cajena pepacuene jamatejemayaexanaenatsi mapajivije,” itsa jamatabējai ancianovi, nexata Dioso jamatejemayaexanaenatsi piavitanejivi. Piavitanejivi pibisiacuene itsa exana piavitanevajēnaeya, itsiata Dioso vecuaajibiaexanaenatsi bajarapaneconimi. <sup>16</sup> Bajaraxuata pibisiacuene namataenetsia itsa panatoexaname, namataenetsia panatsipaebare. Itsa pavitanemēnu, namataenetsia panatovajēre Diosojavabelia papecajamatejemayaexanaenexa Dioso. Xaniavaetsia peponaponaenē Dioso pitorobicueniatsi, daxita pejamatabēthētojavavetsina itsa vajēta, bajaraponē jumenamatamota Diosojavabelia. Ayaiacuenia Dioso pexaniacuene toexanaenatsi. <sup>17</sup> Diosojumepaebinēmi, profeta Elfaspijinē, bevaxaitsijamatabēcuenenēmi. Bajayata bajaraponēmi asaēyata vajēta Diosojavabelia ema pejopaeyaniva. Nexata acueyabi pavaibeje epatua ema apo jopae bajaraponēmi pijanacuata. Nexata daxita peubijavaximi, totē-

patsi. Nexata daxita bajarapanacuapijivi bitso janibo. <sup>18</sup>Bajaraxuacujinae icatsia asaëyata Elíaspijinë vajëta Diosojavabelia ema pejopaenexa. Nexata icatsia ema jopa. Ira icatsia capitsapa pexaejavanexa. Bajarapacuenia vaxaitsi ata asaëyata be-vajëtatsi Diosojavabelia.

<sup>19</sup>Tajamonae, paxamëyajuvënëjivi itsa copaba Dioso pejumelivaisi pejumecovënëtsijavami, nexata icatsia bepajumecovënëtsiaexaname bajarapalivaisi. <sup>20</sup>Bepayapëtaneme mapacueje. Pajivi icatsia copabiaexana itsamonae pibisiacuene pexanaejavami, pejumecovënëtsinexa icatsia Dioso, bajarapajivi jamatabëcueneyavenonaena bajarapamonae penaxuabiyanima pibisianacuayabelia. Jamatabëcueneyavenonaenanua bajarapamonae Dioso pevecuaajibiaexanaenexatsi ayaineconi ata, pibisiacuene pexanaeconimi.



## Mapabaxutoje San Pedro copiaya toyaquina Dioso pejumecovënëtsivijavabelia

### Pacuenia Pedro mapabaxutoje toyaquina Dioso pejumecovënëtsivi, nacayajatsia penaevijavabelia, yabara pelivaisi

**1** Xanë Pedronë, Jesucristo taneitorobinë. Nitoroba jivi tatsipaebaponaenexa Jesucristo pelivaisi. Pacatoyaquinatsi mapabaxutoje paxamë pepo panijatomarave-cua, Jerusaléntomara, nacayajatsia paneenarutsivi. Nacayajatsia pajinavanapame Ponto nacujava, Galicia nacujava ata, Capadocia nacujava ata, Asiavënë nacujava ata, Bitinia nacujava ata. <sup>2</sup>Vaxa Dioso baja cajena bajayata tajëvelia panenaexanaevajënaeya ata, pacaitapeta papijajivinexamë. Bajarapacuenia tajëvelia Dioso papecaitapetsixae, aeconoxae baja Espiritu Santo pejamatabëcueneta pacatsata Jesucristo panejumecovënëtavanapaenexa. Dioso pacaitapeta papecavecuajibiaexanaenexa, daxita pibisiacuene paneexanaeconimi Jesucristo papecasivatëpaexae. Pacatovajëtatsi Diosojavabelia ayaicuenia Dioso papecayavenonabiabinexa. Pacatovajëtatsinua jamatabëcuenexanepanaeya panejinavanapaenexa daxitacuenevecua.

### Pacuenia Jesucristo pelivaisi pejumecovënëtsivi Dioso rajutsianatsi matacabi apo pevereverecejava yabara pelivaisi

<sup>3</sup>Vaxaitsi vajatuxanenë Jesucristo paxa Diosojavabelia jumaitsitsi tsabiabi: “Xanepana rabaja. Pexaniacuene panetoexaname,” jaitsi tsabiabi. Ayaicuenia Dioso vajanacaitaxutotsoniataexae, pejanajamatabëcuenevitsi nacaexana Jesucristo vajajumecovënëtsixae. Jesucristo petëpaecujinae, Dioso icatsia asaëyaexanatsi. Bajaraxuata vaxaitsi ata evetavanapatsi vajanacarajutsinexa matacabi apo pevereverecejava. <sup>4</sup>Nexata Dioso nacarajutsiana xua nacatoxaina athëbëtatsia vajanacarajutsinexa. Bajaraxua apo vereverecae tsane. Apo abejenua tsane. <sup>5</sup>Bajaraxua Dioso nacatoxaniavaeta athëbëtatsia vajanajamatabëcuenecopatsixae Diosojavabelia. Nexata abaxë vajajinavanapaepato mapanacuataje, Dioso pesaëta nacaevetaponapona. Bajarapacuenia Dioso pesaëta nacaevetaponapona vajanacapanepaenexa. Pamatacabi mapanacuataje vereverecaena, nayapëtaena jane baja xua Dioso nacarajutsiana.

<sup>6</sup>Bajaraxuata paxamë Dioso papecacapanepaejavanexa, pasivajamatabëcuenekarëyamëre tsavanapae. Aeconoxae abaxë mapamatacabitaje pacajamatabëcuenekarëyibitsi ata daxitacuene papecajamatabëcuenëjëtsijava, itsi-ata pasivajamatabëcuenekarëyamëre tsavanapae. <sup>7</sup>Pacajamatabëcuenëjëtaponapae papecajamatabëcueneyapëtaenexa pepacuene panenajamatabëcuenecopatsijava Jesucristojavabelia. Oronanito ata itsa ëjëta, baseta isotota peyapëtaenexa itsa pepacuene orojava. Panenajamatabëcuenecopatsijava Jesucristojavabelia, bitso namatamota orojava matatoxenetsia. Nexata pijinia paxamë ata pacajamatabëcuenëjëtaponapona papecajamatabëcueneyapëtaenexa xaniavaetsia panenajamatabëcuenecopatsijava Jesucristojavabelia. Nexata itsa pavecuapanepaename papecajamatabëcuenëjëtsijava, panevajënaeyabelia pajamatabëcuenesaëmë tsaponae tsane Jesucristojavabelia panenajamatabëcuenecopatsijava. Nexata

pamatacabi vajatuxanenë Jesucristo patsianica, pacasivajamatabëcuenebarëya tsane. Dioso ata pacasivabarëya tsane. Daxitajivinua pacayaiyataena.

<sup>8</sup>Paxamë abaxë Jesucristo apo patae atamë, itsiata pajitsipame. Aeconoxae apo patae atamë Jesucristo, itsiata panajamatabëcueneocopatame bajaraponëjavabelia. Jesucristo bitso pasivajamatabëcuenebarëyamë tsavanapae. Jesucristo panesivajamatabëcuenebarëyajava, itsa panajamatabëcuenevajunupaebame itsamonaejavabelia, epatua saya payapëtaeyaexaname. Tshipaji xaniavaetsia apo payapëtaemë xaniavaetsia panenajamatabëcuene vajunupaebinxeta itsamonaejavabelia peyapëtaenexa pacuenia bëpënëa pajamatabëcuenebarëyamë. <sup>9</sup>Jesucristo papecasivatëpaexae, panajamatabëcueneocopatame Diosojavelia papecacapanepaenexa. Bajaraxuata Dioso pacacapanepaena Dioso papecananeconitsia exanaejavaminexavecua pibisiacuene paneexanaecononimi yabara.

<sup>10</sup>Bajayatami Diosojumepaebivimi profetavi bajayajebi livaisijaitapona peyapëtaenexa. Nexata baja profetavi itsa yapëtane pacuenia Dioso pijajivi capanepaejitsia, nexata profetavi tajëvelia vajunupaebapona jivijavelia. Profetavi tajëvelia vajunupaebapona pacuenia Cristo pejamatabëcueneta Dioso pacaitaxutotsoniataejitsia papecacapanepaenexa. <sup>11</sup>Espíritu Santo baja cajena pejamatabëcueneta bajayata tajëvelia profetavimi yapëtaeyaexanaponatsi. Nexata profetavimi bajayata tajëvelia yaquina pacuenia yapëtaeyaexanaponatsi Espíritu Santo pejamatabëcueneta. Nexata profetavimi yaquina pacuenia itsamonae Cristo bejiobiaexanaejitsiatsi pebexuabinexatsi. Yaquinanua pacuenia Cristo petëpaecujinae, icatsia itsa asaë, athëbëabetsia caponaejitsiatsi peecaenexa paxa Dioso pemuxunenetsia. Nexata bajarapaprofetavimi jamatabëjumai tsabiabi: “¿De tsaeta pacujinae copiapatsiana xua tajëvelia vaxaitsi vajunupaebaponatsi?” jamatabëjai tsabiabi. <sup>12</sup>Itsiata baitsi jane bajarapaprofetavimi Dioso yapëtaeyaexanatsi pacuenia bajarapamonae pevenamuto bexëa bajaraxua copiapatsijitsia. Nexata vaxaitsi, bajarapamonae pecovëpijivitsi, vajajinavanapaematacabita matapania jane baja copiapata pacuenia tajëvelia Cristo yabara vajunupaebapona profetavimi. Nexata baja paxamë bajarapalivaisi itsamonae pacatsipaeba papecacapanepaelivaisinexa. Espíritu Santo, ponë Cristo athëbëvetsica itorobica, bajaraponë pesaë pacayajavatsipaeba bajarapamonae. Angelevi ata bitso jitsipa xaniavaetsia peyapëtaenexa bajarapalivaisi.

### **Pacuenia Dioso nacajunata xaniavaetsia vajatojinavanapaenexa yabara pelivaisi**

<sup>13</sup>Panajamatabëcueneocopare Diosojavelia. Tshipaji rabaja payapëtaneme xua Dioso pacarajutsijitsia. Bajaraxua Dioso pacarajutsiana papecaitaaxutotsoniataexae pamatacabi Jesucristo icatsia patsianica. Bajaraxuata xaniavaetsia panajamatabëcueneverere paneexanaenexa daxita xua Dioso pacatocopata. Najamatabëcueneevetsiayanua xaniavaetsia pajinavanapare. <sup>14</sup>Pajumecovëñëtavanapare Dioso. Pëtsa panajamatabëxainame panenatojitsipaecuenia pibisiacuene paneexanaenexa, pacuenia paexanavanapame pamatacabi abaxë Dioso apo payapëtaemë. <sup>15</sup>Xaniavaetsia saya pajinavanapare pibisiacuene paexanaenejevamë. Tshipaji raja Dioso, ponë pacajunata papijajivinxamë, xaniavaetsia peponaponaenë. Pibisiacuene baja cajena caeto ata Dioso apo pexanaenë. <sup>16</sup>Dioso baja cajena pejumelivaisibaxutota jumaitsi mapacueniaje:

“Xaniavaetsia pajinavanapare. Tsipaji xanë apo jitsipaenë pibisiacuene paneexanaejava,” jai Dioso pejumelivaisibaxutota.

<sup>17</sup> Paxamë itsa pavajëtame Diosojavabelia, pajumaitsimë tsabiabi: “Taxa Dioso,” pajamë tsabiabi. Bjaraponë Dioso najëpaeya tane daxita pamonaе jumecovënëtatsi, ayaijamatabëcuenevi, beveliajamatabëcuenevi ata. Dioso cajena yapëtane paneconivajëto exanapona caejivi canacujitsia. Bjaraxuata Dioso cjunaviaya bepajinavanapame pamatacabibeje abaxë pasaëmë tsavanapae mapanacuataje. <sup>18</sup> Paxamë picani naxuabiaya Diosovecua pajinavanapame panijasalinaivimi abaxë pijacuene itsa pacaasaëmë tsavanapae. Itsiata baitsi jane aeconoxae baja bjarapacuevecua Dioso baja pacacapanepa. Payapëtaneme rabaja Dioso ayaimatamota papecaneconimatamotsijava papecacapanepaenexa. Apo pacacomuatsi baja cajena peverevere-caejavata, pacuenia oro itsi, palata ata. <sup>19</sup> Dioso baja cajena pacacomuata bitso penamatamotsijavata, Cristo pijanata. Pajivi pijaneconi xaina Diosojavabelia, bjarapajivi oveja, pejanapebito, peperabëxanepanaenë, beyaxuaba ofrendacuenia pevi perajutsinexa Diosojavabelia. Nexata bjarapajivi pijaneconi Dioso baja vecuaajibiaexanatsi bjarapaoveja pijana pejamatabëcueneta. Nexata pacuenia oveja, peperabëxanepanaenë, beyaxuabatsi, bajara pijinia itsi Cristo. Baitsi Cristo, planeconijibinë, nacopata pebeyaxuabinexatsi. Nexata Cristo petëpaejamatabëcueneta, pacavecuajibiaexana panijaneconimi. <sup>20</sup> Bajayatami Dioso mapanacuaje pexanaevajënaeya ata, Dioso itapetatsi Cristo papecasivatëpaenexa. Belia jane baja mapamatacabitaje Cristo patsica papecasivatëpaenexa. <sup>21</sup> Itsiata baitsi jane Cristo petëpaeaujinae, acueyabi matacabita, Dioso icatsia asaëyaexanatsi. Athëbëtatsia, paxa Dioso pecujanenia, Cristo ecaëyaexanatsi. Bjaraxuata panajamatabëcuenecopatame Diosojavabelia papecarajutsinexa matacabi apo peverevere-caejava.

<sup>22</sup> Nexata baja aeconoxae paxamë pajumecovënëtame pexaniaajilivaisi, Jesucristo pelivaisi, Espiritu Santo papecajamatabëcueneitayotsixae. Nexata pibisiacuene paneexanaeconimi, Dioso pacavecuajibiaexana. Nexata xaniavaetsia pasivamë tsavanapae itsamonae ata, Dioso pejumecovënëtsivi. Bjarapacuenia asaëyata namataenetsia bepanaasivamë tsavanapae daxita panejamatabëëthëtovetsina. <sup>23</sup> Pacuenia pejananaexanaenacuetooyo itsi, bajara paxamë pajamatabëcueneitsimë Dioso pejumelivaisita pejanajamatabëcuene panexainaexae. Itsiata baitsi jane bjarapapejanajamatabëcuene paneaxajivi apo pacarajutsi. Dioso raja pejumelivaisi, apo peverevereacelivaisinexa panejumecovënëtsixae, pejanajamatabëcuene baja paxainame. <sup>24</sup> Dioso pejumelivaisi apo peverevere-caejavanexa yabara, Dioso pejumelivaisibaxutota jumaitsi mapacueniaje:

Pacuenia vayafopijipona bepijia tsaquena, petsaquenaecujinae tëpa, bajara pijinia saya itsi jivi ata. Bepijia tëpa. Pacuenia pematono ata bepijia tsaquena, nexata othopa, bajara pijinia saya itsi ayaijamatabëcuene pexainaenë ata. Bepijia tëpa. <sup>25</sup> Itsiata baitsi jane Dioso pejumelivaisi apo verevere-cae tsane daxitamatacabijavabelianexa,

jai Dioso pejumelivaisibaxutota.

Bjarapalivaisi papecacapanepaelivaisinexa, itsamonae baja pacatsipaeba.

**2** Bjaraxuata pacopare baja daxita pibisiacuene paneexanabiabijava itsamonaejavabelia. Pacoparenuua paneyamaxëitojorobabiabijava. Pacoparenuua saya yamaxëitojorobiaya panecuacuajiaitsabiabijava. Tsipaji paxamë yamaxëitojorobiaya pacuacuajiamë tsabiabi itsamonae bepapexaniajamatabëcuenevimë pa-

pecataenexa. Pacoparenua panecuenecaëbabiabijava itsamonae. Pacoparenua panebaracuauicuaijaisabiabijava pibisiacuenia itsamonae. <sup>2</sup>Pacuenia pejananaex-anaenacueto bitso bajitsipa mitobarëmene piapaenexa, bajara pijinia pacuenia paxamë bitso pajitsipare Dioso pejumelivaisi. Bajarapalivaisi baja cajena bevajaxaejava tanetsi vajajamatabëëthëtonexa. Nexata bajarapalivaisi panelebabiabixae, pacatsijamatabëcuenevitsabaponaena pevajënaeyabelia. Nexata bajarapalivaisi pejamatabëcueneta Dioso pacajamatabëcuenene naveretsiaexanaena pacuenia Dioso pacatojitsipa. <sup>3</sup>Nexata baja pepacuenene pajamatabëcueneyapëtaename vajatuxanenë pexaniajamatabëcuenenëcuenene. Bajaraxuata pajitsipaponare orijibia panevajënaeyabelia Dioso pejumelivaisi.

**Pacuenia iboto apo vereverecae mapanacuataje, bajara pijinia pacuenia Cristo apo pevereverecaenë daxitamatacabijavabelianexa yabara pelivaisi**

<sup>4</sup>Vajatuxanenë Cristo raja bepiatajaiboto tsaponaponae. Apo pevereverecaenë daxitamatacabijavabelianexa. Nexata paimoxoyore bajaraponë. Vajatuxanenë Cristo itsamonae apo pejumecovënëtsixaetsi, pacuenia ibota bo pexanaevi pibisiaiboto naitaxutojematabuata, bajaraitsitsi. Itsiata baitsi jane Dioso tanetsi bepiatajaiboto, bepexania penamatamotsiiboto tsaponaponae. <sup>5</sup>Paxamë ata rabaja Jesucristojavabelia panenajamatabëcuenecopatsixae, bepaibotonëmë Dioso pacatane. Nexata padaxitamë Cristo papijajivixamë, Dioso pacatane bepijatemplobo, ibotonëta bepexanaetemplobo. Tsipaji pacuenia Dioso ponapona templobota, bajara pijinia pacuenia Espiritu Santo pacatsijamatabëeca. Paxamë rabaja cajena Dioso panetonacuenebavanapaevi, baitsi papijasacerdotevimë. Nexata Jesucristo pejamatabëcueneta aneconijibia papecataexae, Diosojavabelia najamatabëcuenegerajutsi-aya pavajëtabiananame Dioso papecasivajamatabëcuenenobarëyanexa. <sup>6</sup>Cristo, ponë athëbëvetsica Dioso itorobijitsiatsica jivi pecapanepaenexa, bajaraponë yabara tajëvelia Dioso jumaitsi: “Ponë itorobianajë, beiboto tsane,” jai. Nexata tajëvelia Dioso pejumaitsijava, Dioso pejumelivaisibaxutota jumaitsi mapacueniaje:

Taitapetsinë netoponaponaena Jerusalén tomarata. Bajaraponë beiboto tsane. Nexata pacuenia ibota bo pexanaevi, itsaiboto bitso tsitanepanatsi daxitai- botonëvecua, bajaraitsitsi tsane. Bepitapetsiibototsi tsane. Bitso bepenamatomotsiibotonua tsane. Nexata pajivi najamatabëcuenecopatsiana bajaraponëjavabelia, bajarapajivi apo nacueratsi tsane, jai mapacueniaje Dioso pejumelivaisibaxutota tajëvelia Dioso pejumaitsijava Cristo yabara.

<sup>7</sup>Paxamë Cristo pelivaisi panejumecovënëtsivi, pataneme Cristo bepiatajaiboto tsaponaponae, bitso bepenamatamotsiibotonua. Itsiata baitsi jane pamonaenë Cristo pelivaisi apo pejumecovënëtsivi, bajarapamonae bepiabejeiboto tanetsi Cristo. Tsi-paji baja copiajopa pacuenia Dioso pejumelivaisibaxutota tajëvelia najumecapanepaeya jumaitsi Cristo yabara. Tajëvelia Cristo yabara comparacióncuenia jumaitsi mapacueniaje:

Paiboto boexanaevi naitaxutojematabuata bepetsitaabejexaetsi itajara, bajarapai- boto itsamonae pita. Nexata bajarapaibotota xaniavaetsia yaëta botabu daxita itsaibo matatoxenetsia,

jai Dioso pejumelivaisibaxutota comparacióncuenia Cristo yabara.

Bajarapacuenia jumaitsi itsamonae Cristo apo pejumecovënëtsijavanexatsi yabara. <sup>8</sup>Copijopanua jane baja Dioso pejumelivaisibaxutota tajëvelia Cristo yabara pejumaitsijava mapacueniaje: “Bajarapaiboto jivi pefirapecaeyaexanaeiboto tsane,” pejaijava Cristo yabara. Bajarapacuenia Dioso pejumelivaisibaxuta jumaitsi jivi itsa apo jumecovënëtsi Cristo pelivaisi, Diosovecua penaxuabijavanexa yabara jumaitsi. Tsipaji tajëvelia Dioso yapëtane jivi apo pejumecovënëtsijavanexa pexanialivaisi, Cristo pelivaisi, pecapanepaelivaisinexatsi picani.

### **Dioso pijajivi yabara pelivaisi**

<sup>9</sup>Dioso apo pejumecovënëtsivivecua, paxamë baja Dioso pacaitapeta papijajivinemë. Dioso baja papijasacerdotevimë tsavanapaenua, daxitacuene pepo pevetsinë panetonacuenebavanapaexae. Dioso baja papijajivimë tsavanapae panevajunupaebavanapaenexa Dioso ayaiacuene pexanaejavanë. Dioso baja cajena pacajunata pibisijamatabëcuenevecua, mapanacuataje pitaquirijamatabëcuenevecua. Nexata baja pajunuame pexaniajamatabëcuenejavabelia, Dioso pitayotsijamatabëcuenejavabelia. <sup>10</sup>Paxamë abaxë Cristo panejumecovënëtsivajënaeya, Dioso picani apo papijajivimë. Itsajivi ata picani abaxë paxamëyajuvënëvi Dioso apo itaxutotsoniataetsi. Itsiata baitsi jane aeconoxae baja Dioso papijajivimë pacaexana papecaitaxutotsoniataexae.

### **Pacuenia Dioso pejumecovënëtsivi jinavanapa Dioso petonacuenebavanapaenexa yabara pelivaisi**

<sup>11</sup>Tajamonae bitso patacaasivavi, mapanacuataje abaxë pajinavanapae atamë, athëbëtatsia baja Dioso pijanacuatatsia bepanejinavanapaevi panataema. Saya raja caeapatoyonexa mapanacuataje pajinavanapame. Bajaraxuata pacatoyaquinatsi mapacueniaje daxita picani papibisiacuene jamatabëpaexaname panecopabinexa. Bajarapitsijamatabëcuene jamatabënacanaejamatabëcuene bijianaeyaexana vajajamatabëcuenejavavetsina. <sup>12</sup>Dioso apo peyapëtaevi petuatuajëa itsa pajinavanapame, xaniavaetsia patsitajinavanapaename. Aeconoxae pacabaracuaicuaijai ata bepibisiacuene paneexanaevi papecataexae, itsiata itsamatacabijavabelia itsa najamatabënapitsiana pexaniacuene paneexanaejava, bajarapamonae ata Dioso jumecovënëtsiana. Nexata bajarapamonae jumaitsi tsane Diosojavabelia: “Diosomë, bitso ayaijamatabëcuenenëmë,” jai tsane. Bajarapacuenia jumaitsi tsane itsa copiapatsiana pamatacabi Dioso naneconitsiaexanaejitsia daxita pamonaе Dioso apo pejumecovënëtsivi.

<sup>13</sup>Dioso papijajivixaemë, pajumecovënëre pacuenia pacaitoroba pamonaе nacua pevetaavanapaevi. Daxita raja bajarapamonae mapanacuapijivi pejamatabëcueneta evetsiaexanatsi. Nexata pajumecovënëre presidentenë, ponë jane baja daxitajivi pevetsinë. <sup>14</sup>Pajumecovënërenua nacua pevetsivi. Bajarapamonae presidentenë itorobatsi penaneconitsiaexanaenexa pibisiacuene pexanaevi. Itorobatsinua pejumaitsinexa pexaniacuene pexanavanapaevijavabelia: “Xanepana rabaja xua paexaname,” pejainexa. <sup>15</sup>Bajarapamonae pajumecovënëre. Tsipaji raja Dioso pacatojitsipa xaniavaetsia panejinavanapaenexa. Nexata bajarapacuenia itsa patsitajinavanapaename, belia moya tsane itsamonae papecabaracuaicuaijajjava, pamonaе apo pejumecovënëtsivi pexanialivaisi, Cristo pelivaisi.

<sup>16</sup>Paxamē picani pajumecovēnētavanapame Dioso Moiséspijinēta penajumecopatsilivaisi. Nexata picani paexanabiabame pacuenia pacaitoroba Dioso Moiséspijinēta penajumecopatsilivaisi. Aeconoxae baja Cristo pelivaisi panejumecovēnēt-sixae, apo pajamatabēcueneevetsimē baja pacuenia Dioso Moiséspijinēta penajumecopatsilivaisi pacaitoroba paneexanaenexa. Itsiata baitsi jane pibisiacuene paneexanaenexa apo pacatocopatsi. Biji rajane Dioso pacatocopata pacuenia Dioso jitsipa panetonacuenebavanapaenexa. <sup>17</sup>Daxitajivi yaiyataeya pajinavanapare. Itsamonae ata, pamonaē Dioso pejumecovēnēt-sivi, pasivamēre. Cujunaviaya Dioso payaiyataema. Payaiyataema presidentenē ata.

**Pacuenia itsamonae Cristo bejiobiaexanae atatsi, itsiata  
ajamatabēcuenesaē tsaponaponae, bajara pijinia pacuenia Cristo  
pejumecovēnēt-sivi ata itsamonae bejiobiaexanae atatsi,  
pajamatabēcuenesaē tsavanapaenexa, yabara pelivaisi**

<sup>18</sup>Paxamē itsamonae panetonacuenebavanapaevi, pacamuxujibatsi mapacueni-aje. Pajumeyaiyataeyabiabare pacuenia pacaitorobabiaba panijatuxanevi. Ēpexaniajamatabēcuenevi pētsa panijatuxanevi pajumeyaiyataneme. Pajumeyaiyataema panijatuxanevi, piacujirubejevi ata. <sup>19</sup>Panijatuxanevijavabelia itsacueneneconi apo paxainae atamē, panijatuxanevi pacabejiobiaexanabiabijitsipa. Nexata panijatuxanevi papecabegiobiaexanabiabijavata: “Dioso nitaxutobejiobiataena,” itsa pajamatabējamē tsabiabi tsipae, nexata Diosojavabelia pacatonamatamotsipa. <sup>20</sup>Itsa pananeconitsipame panijatuxanevijavabelia, nexata bajarapaneconi yabara panijatuxanevi pacaconitsipa. Nexata papecabegiobiaexanaejavata: “Dioso nitaxutobejiobiataena,” pajamatabējamē ata tsipae, itsiata Diosojavabelia pacatoamatamobi tsipae. Itsa jume, pexaniacuene paexanae atamē, panijatuxanevi pacaconitsipa. Nexata papecabegiobiaexanaejavata: “Dioso nitaxutobejiobiataena,” itsa pajamatabējamē tsipae Diosojavabelia, nexata Diosojavabelia pacatonamatamotsipa. <sup>21</sup>Bajarapacuenia itsacueneneconi apo paxainaenejevamē, itsamonae pacabejiobiaexanaponaena. Tsipaji Dioso bajarapacuenia pacatocopata itsamonae papecabegiobiaexanaponaenexa. Payapētaneme rabaja mapacuenije. Cristo itsa pacasivatēpa, bejiobiaexanatsi itsacueneneconi xainaenejeva. Nexata paxamē ata Dioso pacatocopata itsamonae papecabegiobiaexanaenexa. <sup>22</sup>Itsacuenējava ata pibisiacuene apo exanae Cristo. Apo yamaxēitojorobi cajena itsajiviyojavabelia ata. <sup>23</sup>Pibisiacuena Cristo bijatae atatsi itsamonae, itsiata juya pibisiacuena apo jumecanaviatsi. Bejiobiaexanae atatsi jivi, “Neyamatamotsiana Dioso,” apo jai Cristo bajarapamonaejavabelia. Biji rajane bajarapamonaejavabelia Cristo cujirucanaviatsinejeva, copata bajarapamonaē Dioso penaneconitsiaexanaenexatsi pamatacabi Dioso naneconitsiaexanaena pijaneconi pexainaevi. <sup>24</sup>Cristo cruzata itsa tēpa, tsijumaxuabatsi vaxaitsi pibisiacuene vajaexanaeneconi. Bajarapacuenia Cristo nacatoexana vajacopatsinexa pibisiacuene vajaexanaejava. Bajarapacuenia Cristo nacatoexananua vajavajēnaeyabelia vajajinavanapaenexa Dioso pejitsipaecuenia. Cristo pacasivavajēnērūbatsi paxamē papecajamatabēcuene xaniavaetsinexa pibisijamatabēcuenevecua, xaniavaetsia panejinavanapaenexa Dioso pitabarata. <sup>25</sup>Paxamē picani Diosovecua naxuabiaya pajinavanapame. Pacuenia oveja pevetsinēt-sivecua naxuabiaya jinavanapa, bajara picani paitsimē. Itsiata baitsi jane aeconoxae baja Cristo pejamatabēcueneta panaviabame Diosojavabelia. Pacuenia pijaoveja pevetsinē xaniavaetsia baeve-

taponapona pijaoveja, bajara pijinia pacuenia Cristo pacaevetaponapona. Panejamatabëcuene ata Cristo evetaponapona.

### **Pacuenia penacojobivi xaniavaetsia benabarëjinavanapa yabara pelivaisi**

**3** Paxamë papetirivimë, pacamuxujobatsi mapacueniaje. Pacaevamë canacujitsia paneamonajivi jumecovënëtsiaya pajinavanapare. Pova pamona abaxë apo jumecovënëtsi Jesús pelivaisi, bajarapova xaniavaetsia tsitaponapona pamona, pamona ata Jesús pelivaisi pejumecovënëtsinexa. Nexata bajarapova pamonajavabelia Jesús pelivaisi apo tsipaebi ata, pamona ata jumecovënëtsiana Jesús pelivaisi xaniavaetsia petsitaponaponaexae pamona. <sup>2</sup>Bajarapacuenia pamona ata Jesús pelivaisi jumecovënëtsiana, pijava itsa cuenetaena Dioso paneyaiy-ataejava, itsa cuenetaenanua pijava Dioso pitabarata aneonijibia peponapona-aejava. <sup>3</sup>Papetirivimë, pëtsa pajamatabëjumaitsimë mapacueniaje: “Bepexania- vanë jivi tanetaenexa, naxatatsianajë naitabëtsiaya. Namatafaratsianajë naitabëtsi- siaya. Oronanita pexanaejavanëta naitabëtsianajë. Itsa jume, nexata bitso pexaniaviriana naxatatsianajë,” pajamatabëjamë pëtsa. Pëtsa bajarapacuenia panajamatabëxainame saya naniavelia panenaitabëtsinexa. <sup>4</sup>Biji rajane bëpënëaverena panajamatabëcueneitabëre. Bëpënëaverena panenajamatabëcueneitabëtsinexa, xaniavaetsia aneonijibia pajinavanapaename Dioso pitabarata. Nexata itsamonae pacaitsacueniabi ata, pëtsa pacueneceaviatame. Nexata xua bëpënëaverena panajamatabëcueneitabëtame, apo pacatovereverecae tsane. Bajarapitsijamatabëcuene pexainaeva tonamatamotsianatsi Diosojavabelia. <sup>5</sup>Pamonaemi petirivi bajayatami Dioso pejitsipaecuenia exanavanapa, bajarapacuenia bëpënëaverena Dioso pejumelivaisita najamatabëcueneitabëta. Bajarapamonaemi najamatabëcueneecopata Diosojavabelia. Jumecovënëtavanapanua pamonajivi. <sup>6</sup>Bajarapamonaeyajuvënëvami, Sarapijivami, Dioso pejumelivaisita najamatabëcueneitabëta bëpënëaverena. Sarapijivami jumecovënëtsia ponapona pamona, Abrahampijinë. Itsa junata pamona, “Tajatuxanenë,” jai tsabiabi pamonajavabelia. Papetirivimë, panajamatabëcueneecopatavanapare Diosojavabelia. Paexanavanaparenua pexaniacuene. Pëtsa pacujunavamenua pacaitsacueniabijitsia ata itsajivi papecaito-axae. Nexata bajarapacuenia itsa paexanavanapaename, pajamatabëcuenejëpae- name Sarapijivami.

<sup>7</sup>Paxamë papebijivimë, pacamuxujobatsi mapacueniaje. Xaniavaetsia pabarëjivanavanapare panijavajivi. Pacuenia Dioso nacaitoroba, bajarapacuenia payaiyataema panijavajivi. Bajarapacuenia payaiyataema tsipaji raja bajarapamonae vaxaitsi pebi- jivitsi nacavecuasaëjibi. Payaiyataema tsipaji raja bajarapamonae ata yajava Dioso pacarajutsiana matacabi apo pevereverecaejava. Bajarapacuenia panijavajivi yayi- ataeya pabarëjivanavanapare paneajumeuyaniva panenavajëtsijava Diosojavabelia.

### **Pacuenia pexaniacuene pexanaevi ata itsamonae bejiobiaexanaenatsi yabara pelivaisi**

<sup>8</sup>Tajamonae bitso patacaasivavi, pematatsënëa pacamuxujobatsi mapacueniaje. Najamatabëcuenejëpaeya pajinavanapare. Paxamëyajuvënëjivi itsacuene itsa to- copiatatsi, nexata bajarapacuenia yabara bitso itsa najamatabëxaina, paxamë ata pacobenanamatabëxainare. Daxita Dioso panenajuajumecovënëtsivixae, namataenetsia panaasivamëre. Naitaxutotsoniataeyanua pajinavanapare. Beveliaja-

matabëcuenevinua nataeya pajinavanapare. <sup>9</sup>Itsajivi pibisiacuene itsa pacaexana, pëtsa pacuenececanaviatame. Pibisiacuenia itsa pacabijatanenua, pëtsa pajumecanaviatame. Biji rajane bajarapajivi patovajëre Diosojavabelia Dioso peyavenonaenexatsi. Tspaji pamatacabi Dioso pacajunata papijajivinxamë, bajarapacuenia paneexanaenexa, pacaitoroba. Nexata juya paxamë Dioso pacaitaxutotsoniataena pacuenia najumecapanepaeya pacajumaitsi papecayavenonaenexa. <sup>10</sup>Bajarapacuenie yabara Dioso pejumelivaisibaxutota jumaitsi mapacueniaje:

Pajivi jitsipa peponaponaenexa jamatabëcuenebarëyaya, bajarapajivi benaebarëtoeveta pibisialivaisi pecuaicuaijyaiyanaiva. Benaebaretoevetanua penajumetsënëtsiyaniva ata. <sup>11</sup>Bajarapajivi becopata pibisiacuene pexanabiabijavami pexanaponaenexa pexaniacuene. Beponapona xaniavaetsia itsajivi ata pebaraanaepanaeyanivatsi. <sup>12</sup>Bajarapacuenia beponapona. Tspaji raja Dioso naitaxutocaeveta xaniavaetsia pejinavanapaevi. Namuxunaevetanua penavajëtsijavatsi bajaraponëjavabelia. Dioso cajena baraanaepana pamona pibisiacuene pexanavanapaevi,

jai Dioso pejumelivaisibaxutota.

<sup>13</sup>Itsa pajamatabëcuenesaëmë tsavanapae tsane pexaniacuene paneexanavapaejava, nexata itsamonae pacabejiobiaexanae ata, itsiata apo pacajamatabëcuene bijianaecapanepae tsane. <sup>14</sup>Itsa pacabejiobiaexanaena xaniavaetsia pajinavanapae atamë, itsiata pajamatabëcuenebarëyamë tsane. Tspaji raja Dioso pacayavenonaena. Pëtsa pacujunavame bajarapamonae. Pëtsa panasivajamatabëcuenebëjamënu papecabejiobiaexanaejava yabara. <sup>15</sup>Biji rajane panejamatabëëthëtojavavetsina yaiyataeya pajumecovënëre vajatuxanenë Cristo. Panajamatabëcuene veretavanaparenua xaniavaetsia panejumecanaviatsinexa itsajivi itsa pacayanijoba vajatuxanenë Cristo panejumecovënëtsijava yabara. Nexata itsa pacayanijoba mapacueniaje: “¿Detsa xuajitsia xamë jumecovënëtame Cristo?” itsa pacajai, nexata xaniavaetsia pajumecanaviatsianame. Itsiata baitsi jane itsa pajumecanaviatame, paxamë beveliajamatabëcuenevi panataename. Nexata bajarapajivi yaiyataeya pajumecanaviatsianame. <sup>16</sup>Cristo papijajivixaemë, pexaniacuenia pajinavanapae name. Nexata payapëtaename Dioso pitabarata aneonijibia panejinavanapaejava. Nexata itsamonae najumetsënëtsiaya pacabaracuaicuaijai tsabiabi ata tsane, bajarapamonae belia najumecopatsiana papecabaracuaicuaijijava. Naurabiana papecabaracuaicuaijitsabiabijava yabara. <sup>17</sup>Pexaniacuene paexanabiabi atamë, Dioso itsa pacatocopatsiana itsamonae papecabejiobiaexanaenexa, nexata bajaraxua pacatonamatamotsiana Diosojavabelia. Itsiata baitsi jane itsamonae itsa pacabejiobiaexanae jitsipa pibisiacuene paneexanaejava yabara, nexata bajaraxua apo pacatonamatamotsi tsipae Diosojavabelia.

<sup>18</sup>Cristo ata bejiobiaexanatsi itsa nacasivatëpa pibisiacuene vajaexanaeconi yabara. Caeto rabaja Cristo tëpa. Pematatsënëa baja apo nacasivatëpae tsane. Bajaraponë pepo pexaniacuene pexanaenë. Itsiata bejiobiaexanatsi vaxaitsi yabara, pibisiacuene vajaexanaevi, vajanacacapanepaenexa Diosojavabelia. Peperabëtomii baja picani tëpa. Itsiata baitsi jane pepo pejamatabëcuene jane baja icatsia Dioso asaëyaexanatsi. <sup>19</sup>Nexata abaxë Cristo petëpaenë itsa boca, pepo pejamatabëcuene jane baja pona petëpaevijavabelia pexanialivaisi petsipaebinexa. Tspaji bajarapamonae naneconitsia jinavanapa petëpaevi pijanacuata. <sup>20</sup>Bajarapamonaemi bajayata jinavanapa, pamatacabi Noépijinë ponapona. Bajarapamonaemi petëpaevajë-



nae Dioso apo jumecovënëtsi. Noépijinë abaxë itsa exanabuatapona pinijibarcxaneto, Dioso picani bajayajebi jamatabëcueneeveta pejumecovënëtsinexatsi daxita mapanacuapijivije. Itsiata baitsi jane apo jumecovënëtsitsi. Saya ocho pajiviyobeje, Noépijinë, pijamonae yajava, bajarapamota Dioso capanepatsi mapanacuaje pebubutsijavavecua. Yajavacapanepatsinua mapanacuataje pibisiacuene pexanaejavavecua. <sup>21</sup> Bajara pijinia itsi itsa nacabautisaba merata. Vajanacabautisabicujinae, meravecua itsa nonotajunatsi, itajëtatsi vajacopabijava pibisiacuene vajaexanaejavami. Apo nacabautisabi baja cajena saya vajanacaperabëquiatsinexa. Biji rajane nacabautisaba vajanacajamatabëcuenequiatsinexa vajavajëtsixae Diosojavabelia. Nexata Dioso vajanacajamatabëcuenequiatsijava, pexaniajaicuene. Tsipaji Jesucristo vajanacasivatëpaecujinae, icatsia Dioso asaëyaexanatsi. Bajarapacuenia Jesucristo Dioso piasaëyaexanaexaetsi, nexata yapëtanetsi pepacuene Dioso vajanacacapanepaejavanexa. <sup>22</sup> Jesucristo Dioso piasaëyaexanaecujinaetsi, pona jane baja athëbëabetsia. Nexata athëbëtatsia Jesucristo eca paxa Dioso pecujuanenia. Daxita ángelevi Jesucristo jamatabëcueneevetatsi pitorobinexa.

**Pacuenia Dioso asaëyata betonacuenebavanapatsi, pacuenia Dioso nacajamatabëcuene caëjëpaeyaexana, yabara pelivaisi**

**4** Cristo abaxë itsa ponapona mapanacuataje, itsamonae bejiobiaexanatsi. Bajara pijinia pacuenia paxamë ata tajëvelia bepaevetavanapame itsamonae papecabejiobiaexanaenexa. Pajivi bejiobiaexanatsi Cristo pelivaisi pejumecovënëtsixae, bajarapajivi pevajënaeyabelia ajamatabëcuenesaë baja taponae. Copata baja pibisiacuene pexanaejava. <sup>2</sup> Pevajënaeyabelia jamatabëexanaponapona pacuenia Dioso tojitsipatsi. Pibisiacuene baja apo exanae pacuenia Dioso apo pejumecovënëtsivi penatojitsipaecuenia baexana. <sup>3</sup> Dioso panejumecovënëtsivajënaeya, pibisiacuene paneexanavanapaeneconi yabara, ayaiacuenia picani pananeconitame Diosojavabelia. Dioso panejumecovënëtsivajënaeya, panevitota pibisiacuene paexanabiabame. Panajamatabëxainabiabamenua ëpibisiacuene yabara. Paitajibimënua tsabiabi panijabonëjava. Paitajibimënua tsabiabi fiestajava ata. Jumapecataeya pexanaenëanëjavabelia ata panavajëcabiabame. Itsiata baitsi jane aeconoxae baja daxita bajarapacuene pacopabame. <sup>4</sup> Nexata pamonaе Dioso apo peyapëtaevi, pibisiacuene panenajuaxanabiabivimi, aeconoxae baja pacasivajamatabëcuenenabenajaca. Tsipaji papibisiacuene bajarapamonae exana, paxamë baja apo pajamatabëcuene yavenonaemë. Bajaraxuata bajarapamonae pibisiacuena pacabaracuaicuaijai. <sup>5</sup> Itsiata baitsi jane bajarapamonae itsamatacabi Dioso pitabarata nubianatsi. Nexata daxita bajarapamonae pibisiacuene pexanavanapaeneconi yabara, Dioso naneconitsiaexanaenatsi. Piasaëtsavanapaevi, petëpaevimi ata, daxita Dioso naneconitsiaexanaena. <sup>6</sup> Petëpaevimijavabelia baja picani bajayata itsamonae tsipaebatsi pexanialivaisi, Cristo pelivaisi, itsa abaxë asaë tsavanapae bajarapamonaemi. Itsiata daxita bajarapamonaemi apo jumecovënëtsi Cristo pelivaisi. Itsiata bajarapamatacabi itsamonae baja jumecovënëta Cristo pelivaisi. Nexata xuacujinae daxita bajarapamonaemi tëpapona. Itsiata baitsi jane pamonaе baja pepuajumecovënëtsi Cristo pelivaisi, tëpa, bajarapamonae xaina baja matacabi apo pevereverecejava.

<sup>7</sup> Imoxoyo rabaja pevajënae peverevereceaenexa mapanacuaje. Bajaraxuata itsacuenejava ata pibisiacuene paexanaenejevamë, xaniavaetsia pajinavanapare. Na-

mataenetsianua najamatabëcueneevetsiaya xaniavaetsia pajinavanapare panenajuavajëtabiabinea Diosojavabelia. <sup>8</sup>Namataenetsia panaasivamëre tsavanapae. Bajarapacue ne daxitacue ne matatoxenetsia bitso nacatoxanepana vajaexanaenexa. Tsipaji itsa asivatsi itsajivi ata, nexata pibisiacue ne nacaexanabiabi ata, bajarapajivi apo barajamatabësitecaetsi. <sup>9</sup>Namataenetsia xaniavaetsia panacopiapire panijaboyaberena jamatabëcuenexanepanaeya. <sup>10</sup>Pacaenëmë canacujitsia Dioso saicayacuenia pacajamatabëcuene caëjëpaeyaexanapona Dioso pijacue ne panetonacuenebavanapaenexa. Nexata namataenetsia panajamatabëcueneyavenonare xua Dioso pacaenëmë canacujitsia pacajamatabëcuene caëjëpaeyaexanapona paneexanaenexa. Bajarapacuenia Dioso patonacuenebavanapare xaniavaetsia. <sup>11</sup>Itsajivi itsamonaejavabelia itsa tsipaeba Dioso pejumelivaisi, bajarapajivi betsipaeba palivaisi Dioso yapëtaeyaexanatsi. Itsajivi pijinia itsa yavenonaëjitsia itsanë, bajarapajivi beyavenona pacuenia Dioso jamatabëcuene caëjëpaeyaexanatsi peyavenonaeenexa. Daxita xua paexanaëjitsiamë Jesucristo papijajivixamë, paexanare jivi peyayataenexa Dioso. Dioso baja cajena daxitacue ne pitorobinë, penivenivenaectotia pexainaenë daxitamatacabijavabelianexa. Bajara itsi tsane.

**Pacuenia Jesucristo pelivaisi pejumecovënëtsivi  
itsamonaë bejiobiaexanaponatsi yabara pelivaisi**

<sup>12</sup>Tajamonae bitso patacaasivavi, pëtsa pajamatabëcuenenabenajacame, itsamonae bitso pacabejiobiaexanaponaë ata. Bajarapacue ne pacatocopiapatsiana papecajamatabëcueneëjëtsinexa papecajamatabëcueneyapëtaenexa pepacue ne panenajamatabëcuene copatsijava Diosojavabelia. Nexata pëtsa pajamatabëjumaitsimë: “Xanë cajena Dioso tajumecovënëtsinë. Nexata bajarapacuenia caenënë netocopiapatapona,” pajamatabëjamë pëtsa. Tsipaji raja daxita Dioso pejumecovënëtsivi bajarapacuenia tocopiapataponatsi pejamatabëcueneëjëtsinexatsi pejamatabëcueneyapëtaenexatsi pepacue ne penajamatabëcuene copatsijava Diosojavabelia. <sup>13</sup>Nexata saya panasivajamatabëcuene barëyamëre tsavanapae paxamë ata itsa pacabejiobiaexanapona pacuenia Cristo bejiobiaexanatsi. Nexata pamatacabi pataename Cristo pepatsijavatsica pijapenivenivenaectotia yajava, pasivajamatabëcuene barëyamë tsane. <sup>14</sup>Pibisiacuenia itsamonaë itsa pacabijatane Jesucristo pelivaisi panejumecovënëtsivixae, pasivajamatabëcuene barëyamëre. Tsipaji raja paepatota itsamonae pacabijatane, ayaijamatabëcuenenë Espíritu Santo, ponë pacayajavaponapona, ayaiacuenia pacayavenonaena. <sup>15</sup>Pëtsa jivitonë pabeyaxuabame. Pëtsa panacobetoxotame. Pëtsa paexaname itsacue ne jiva ata pibisiacue ne. Pëtsa patoëvetame itsamonae pijacue ne pacajunatsinejeva panetoëvetsinexa, bajarapacuenia itsamonae panejamatabëitonotsianiva. Pëtsa bajarapitsicue ne paexaname itsajivi ata paxamë yabara pejumaitsiyaniva: “Pibisiacue ne pexanaevixae, bejiobiaexanatsi bajarapamonae,” pejaiyaniva itsa pacabejiobiaexana itsamonae. <sup>16</sup>Pajivi bejiobiaexanatsi Jesucristo pelivaisi pejumecovënëtsixae, bajarapajivi apo benacaura pebejiobiaexanaejavatsi. Pexaniajamatabëcuene berajuta Diosojavabelia Jesucristo pelivaisi pejumecovënëtsixae.

<sup>17-18</sup>Dioso yapëthane pacuenia daxita pijajivi tojinavanapatsi. Nexata aeconoxae Dioso tocopiapatatsi pijajivijavabelia pejumaitsinexa: “Paxamë xaniavaetsia panetojinavanapame. Pexaniacuenenua patoexanabiabame itsamonaejavabelia. Nexata pacasivajamatabëcuene barëyatsi,” pejainexa Dioso, pexaniacue ne pijajivi itsa toex-

anavanapatsi. Itsiata pamonaē Dioso pijajivi ata, xaniavaetsia Dioso apo tojinavanapae, pexaniacuenua apo toexanabiabi itsamonaējavabelia, bajarapamonaējavabelia Dioso jumaitsi tsane: “Paxamē apo pacasivajamatabēcuenebarēyatsi. Tsi-paji tajitsipaecuenia apo paexanavanapaemē,” jai tsane. Bajarapacuenia Dioso itsa jumaitsi tsane pejumecovēnētsivitsijavabelia ata, ¿detsa nexata Dioso jumaitsi tsane Dioso apo pejumecovēnētsivitsijavabelia? Nexata Dioso ayaicuenia naneconitsiaexanaena bajarapamonaē. Pamonaējavabelia Dioso jumaitsi tsane: “Pacasivajamatabēcuenebarēyatsi,” jai tsane, bajarapamonaē Dioso capanepaena pijanacuayabetsia. Pamonaējavabelia ata Dioso jumaitsi tsane: “Paxamē apo pacasivajamatabēcuenebarēyatsi,” jai tsane, bajarapamonaē ata itsiata tsiquirijavayota Dioso capanepaena pijanacuayabetsia. Bajarapacuenia Dioso itsa exanaena pejumecovēnētsivitsijavabelia ata, nexata biji pamonaē apo jumecovēnētsi Dioso pejumelivaisi, pamonaē pibisiacuene pexanaēvi, Dioso apo capanepae tsane pijanacuayabetsia. <sup>19</sup>Nexata paxamē Dioso pacatocopatsi ata itsamonaē papecabējiobiaexanapon-aenexa, pētsa pajamatabēcuenebējamē. Tsiteca panevajēnaeyabelia pexaniacuene paexanavanapare. Panajamatabēcuene copare papecaexanaenē, Diosojavabelia, papecayavenonaenexa. Dioso cajena pacuenia najumecapanepaeya jumaitsi, bajarapacuenia pacatoexanaena.

### Pacuenia Dioso pejumecovēnētsivi muxujiobatsi yabara pelivaisi

**5** Aeconoxae ancianovi papecayajavajinavanapaēvi, muxujiobijitsianē. Xanē ata rabaja ancianonēnē. Pacuenia itsi bajarapaancianovi, xanē ata rabaja itsinē. Taniji pacuenia Cristo cruzata bejiobiaexanatsi. Pamatacabi icatsia Cristo patsianica, daxitatsi, Cristo pijajivitsi, nacabarēevetsiana xua Cristo evetsiana. <sup>2</sup>Pacuenia oveja pevetsivi xaniavaetsia baevetavanapa, bajara pijinia pacuenia paxamē ata xaniavaetsia paevetavanapare Dioso pejumecovēnētsivi, pamonaē Dioso pacatocopata panetoevetsinexa. Jamatabēcuenebarēyaya Dioso pejisipaecuenia pato-evetavanapare Dioso pejumecovēnētsivi. Pētsa pajamatabējumaitsimē: “Apo jitsipae atanē tatoevetsinexa Dioso pejumecovēnētsivi, itsiata toevetsianajē. Tsi-paji Dioso netojitsipa tatoevetsinexa,” pajamatabējamē pētsa. Pētsa pajamatabējumaitsimēnua: “Tanematamotsinexa toevetsianajē,” pajamatabējamē pētsa. Paxamē panejamatabēēthētojavavetsina panejitsipaexae Dioso pejumecovēnētsivi paneto-evetsinexa, pato-evetavanapare. <sup>3</sup>Pamonaē Dioso pacatocopata panetoevetsinexa, bajarapamonaē pētsa bepapijatuxanevimē panataneme saya jema paneitorobabiabinexa. Biji rajane xaniavaetsia patsitajinavanapare pacuenia patojitsipame bajarapamonaē pejinavanapaenexa. <sup>4</sup>Nexata pamatacabi icatsia Cristo patsianica, ponē jane baja pepo vajanacaevetsinēnexa, nacarajutsiana pinijicuene. Xua Cristo nacarajutsiana, apo vereverecae tsane daxita matacabijavabelianexa.

<sup>5</sup>Paxamē papevējējavimē, pacuenia ancianovi pacaitoroba, pajumecovēnētabi-abare. Pacaejivimē canacujitsia namataenetsia panayavenonabiabianame beveliajamatabēcuenevi nataeya. Bajarapacuenia panataema tsipaji raja Dioso pejumelivaisibaxutota jumaitsi mapacueniaje:

Dioso apo yavenonaē pamonaē beayajamatabēcuenevi penataēvi. Itsiata baitsi jane Dioso pitaxutotsoniataexae, pexaniajamatabēcuena yavenona pamonaē beveliajamatabēcuenevi penataēvi, jai Dioso pejumelivaisibaxutota.

<sup>6</sup>Nexata saya paxamë beveliamatabëcuenevi panataema ayaijamatabëcuenenë Dioso pitabarata. Nexata Dioso pecaëjësimateacabita, paayaijamatabëcuenemimë pacaexanaena. <sup>7</sup>Dioso papecaasivaxae, pacaevetaponapona. Bajaraxuata daxita panejamatabëcuenebëjajjava, pacopare. Pavajëre Diosojavabelia papecayavenonaenexa.

<sup>8</sup>Nayajivitaeyanua pajinavanapare panijavajabitsaënë, dovathi, papecayamaxëitojorobiyani. Pacuenia nevëthë itsa piajani, jaitaponapona pexaeyabuatsinënexa, bajarajamatabëcueneitsi dovathi papecayamaxëitojorobinexa. <sup>9</sup>Paepatota dovathi jamatabëpacayamaxëitojoroba panecopabinexa Jesús pelivaisi panejumecovënëtsijava, bajarapaepatota pajamatabëcuenesaëmëre Jesús pelivaisi panejumecovënëtsijava. Diosojavabelia najamatabëcueneocopatsiaya dovathi panayajiviitavere. Itsamonae itsa pacabejiobiaexana dovathi pejamatabëcueneta, panajamatabënapire pacuenia itsamonae ata, Dioso pejumecovënëtsivi, daxitanacuanëjjava dovathi pejamatabëcueneta bejiobiaexanaponatsi. <sup>10</sup>Itsiata baitsi jane saya caeepatoyo Dioso pacacopatsiana papecabejiobiaexanaenexa. Bajaraxuacujinae Dioso pacajamatabëcueneasaëyaexanaena. Bajaraponë Dioso vajanacayavenonaenë daxitacuenëjavabelia. Nacajunatanua Jesucristo yajava athëbëtsia vajanacayajavaecaenexa, penivenivenaenacuatatsia, daxitamatacabijavabelianexa. <sup>11</sup>Dioso baja cajena daxitacuenë pevetsinë daxitamatacabijavabelianexa. Bajara itsi tsane.

### **Pacuenia Pedro toyaquina peveretsinexa baja petoyaquinaelivaisi mapabaxutotaje yabara pelivaisi**

<sup>12</sup>Silvano betajuyapijinë taniji bajaraponë ata Dioso pejumecovënëtsixae. Silvano yaquinaeyaexanjë palivaisi pacatoitorobijitsiatsilia. Bajaraponë ponaejitsia baja paxamëjavabelia. Nexata pacatoyaquinatsi mapabaxutoje patacajamatabëcuene asaëyaexanaenexa. Dioso vajanacayavenonabiabixae, yapëtanetsi baja xaniajai pepacuenë Dioso vajanacaasivacuene. Bajaraxuata pacabejiobiaexanabiabi ata, pajamatabëcuenesaëmëre tsavanapae paneyapëtaexae baja bajarapacuenë.

<sup>13</sup>Dioso pejumecovënëtsivi, Babilonia tomarapijivi, pacajamatabënajina. Pacuenia paxamë Dioso pacaitapeta pijajivinexamë, bajara pijinia pacuenia bajarapamonae ata Dioso itapetatsi pijajivinexa. Marcos, ponë betaxënatocuenia tataenë, bajaraponë ata pacajamatabënajina. <sup>14</sup>Namataenetsia naasivaya panabajacobare bepanacaemaemë panenataexae.

Pacatojitsipatsi daxita paxamë jamatabëcuenexanepanaeya panejinavanapaenexa Jesucristo pijajivixae. Bajara itsi tsane.

## Mapabaxutoje San Pedro cotocaevi toyaquina Dioso pejumecovënëtsivijavabelia

### Pacuenia Pedro mapabaxutoje cotocaevi toyaquina Dioso pejumecovënëtsivijavabelia yabara pelivaisi

**1** Xanë Simón Pedronë, Jesucristo taneitorobicuena tatonacuenebaponaponanë. Nitorobanua jivi tatsipaebabiabinexa Jesucristo pelivaisi. Pacatoyaquinatsi mapabaxutoje paxamë baja Dioso panejumecovënëtsivi. Jesucristo patanesivatë-paejava patajaneconi yabara patajumecovënëtsijava, paxanë panetonamatamota Diosojavabelia. Bajara pijinia paitsimë paxamë ata. Jesucristo papecasivatë-paejava panijaneconi yabara panejumecovënëtsijava, pacatonamatamota Diosojavabelia. Bajarapacuenia daxitatsi Jesucristo vajanacasivatëpaejava vajaneconi yabara vajajumecovënëtsijava, nacatonamatamota Diosojavabelia. Tsipaji vajatuxanenë Jesucristo, vajanacapanepaenë, nacaneconimatamota baja. <sup>2</sup>Pacatovajëtatsi Diosojavabelia bitso papecayavenonaponanexa daxitacuene yabara. Pacatovajëtatsinua jamatabëcuenexanepanaeya panejinavanapanexa. Bajarapacuenia Dioso pacayavenonaponana panevajënaeyabelia, Dioso itsa pajamatabëcueneyapëtaeponaename, vajatuxanenë Jesucristo ata itsa pajamatabëcueneyapëtaeponaename.

### Pacuenia Dioso pejumecovënëtsivi jamatabëcuenetsi tsavanapae yabara pelivaisi

<sup>3</sup>Dioso, ponë nacajunata pijajivinexatsi, yapëtanetsi baja bitso ayaijamatabëcuene pexainanëcuene. Bajaraponë Dioso bitso pexaniacuene pexainanë. Bajaraponë Dioso pesaëta pinijicuene pexanaejava, itsa exana mapanacuataje, nacatsitana-jamatabëcueneitajëta bitso ayaijamatabëcuene pexainanëcuene. Bajarapacuenia itsa yapëtaeponatsi Dioso, nexata Dioso nacarajutapona pesaë vajajinavana-paenexa xaniavaetsia pacuenia Dioso nacatojitsipa. <sup>4</sup>Bajarapacuenia Dioso pinijicuene pexanaejavanë pexanaexae mapanacuataje, nexata yapëtanetsi Dioso xaniajai vajanacapanepaejavanexa pacuenia najumecapanepaeya jumaitsi. Dioso vajanacapanepaejavanexa pinijicuene bitso. Jumecovënëtatsi Dioso vajanacapanepaejavanexa. Nexata Dioso nacayajavaponapona. Bajaraxuata Dioso pesaëta nacajamatabëcueneasaëyaexanaena vajajinavanapaenexa xaniavaetsia. Nexata nacajamatabëcuene caëjëpaeyaexanaena vajavecuapanepaenexa mapanacuata pibisiacuene vajanacaexanaeyaexanae jamatabëcuene. Nexata pacuenia Dioso jamatabëcueneitsi tsaponaponae, bajara vaxaitsi ata jamatabëcueneitsitsi tsavana-pae tsane. <sup>5</sup>Nexata pacuenia Dioso jamatabëcueneitsi tsaponaponae, bajara panejamatabëcueneitsinexa, asaëyata Dioso pajumecovënëtaponare. Asaëyata Dioso itsa pajumecovënëtaponaename, nexata icatsia itsajava payapëtaeponaename. Asaëyata paexanavanapare epexaniacuene. Asaëyata itsa paexanavanapaename epexaniacuene, nexata icatsia orijibia pajamatabëcueneyapëtaeponaename Dioso. Nexata payapëtaename pacuenia Dioso pacatojitsipa asaëyata panetoexanavanapaenexa. <sup>6</sup>Paneyapëtaecujinae pacuenia Dioso pacatojitsipa asaëyata panetoexanavanapaenexa, icatsia payapëtaename panenajamatabëcuenecataitsinexa pibisiacuene panenajamatabëxainayaniva. Paneyapëtaecujinae panenajamatabëcuenecataitsinexa

pibisiacuene panenajamatabëxainayana, icatsia payapëtaename dovathi pejamatabëcueneta bajayajebi pacajamatabëcuenëjëtaponae ata, asaëyata panenajamatabëcuenesaëtsinexa ëDiosojavabelia. Paneyapëtaecujinae dovathi pejamatabëcueneta bajayajebi pacajamatabëcuenëjëtaponae ata, asaëyata panenajamatabëcuenesaëtsinexa ëDiosojavabelia, icatsia payapëtaename xaniavaetsia panejinavanapaenexa pacuenia Dioso pacatojitsipa. <sup>7</sup> Paneyapëtaecujinae xaniavaetsia panejinavanapaenexa pacuenia Dioso pacatojitsipa, icatsia payapëtaename asaëyata panenayavenonaenexa itsamonae ata Dioso pejumecovënëtsivi. Paneyapëtaecujinae paneyavenonaenexa itsamonae ata Dioso pejumecovënëtsivi, icatsia payapëtaename asaëyata namataenetsia bitso panenasivanexa bajarapamonaejavabelia.

<sup>8</sup> Daxita bajaraxua asaëyata panevajënaeyabelia itsa paexanavanapaenexa, nexata pacuenia Dioso jamatabëcuenetsi tsaponaponae, bajara pajamatabëcuenetsimë tsane. Bajarapacuenia asaëyata itsa paexanavanapaenexa, nexata pajamatabëcuenetsabaponaenexa Dioso panejumecovënëtsijava. Nexata Dioso ata tsitanepanaenatsi xua patonacuenebavanapame. Nexata vajatuxanenë Jesucristo panejamatabëcueneyapëtaejava, apo panacueratsimë tsane. <sup>9</sup> Itsiata baitsi jane pajivi apo exanae tsane daxita bajaraxua, nexata apo yapëtae tsane Dioso pijacuene. Tspaji bajarapajivi nacofënëtsiana Dioso picani pevecuaajibiaexanaejavatsi pibisiacuene pexanaeconimi. <sup>10</sup> Tajamonae, bajaraxuata pacaasaëmëre tsavanapae Dioso panejumecovënëtsijava, jivijavabelia panetsitanaitajëtsinexa Dioso papecajunatsijava, papecaitapetsijava ata papijajivinexamë. Nexata bajarapacuenia itsa paexanavanapaenexa, Dioso panejumecovënëtsijavavecu, apo pajopaemë tsane. Pacapanepaena Dioso. <sup>11</sup> Nexata Dioso pacatocopatsiana panejonenexa vajatuxanenë Jesucristo vajanacapanepaenënexa, pijanacuayabetsia, apo peverevereacacuayabetsia, paneyajavajinavanapaenexa.

<sup>12</sup> Daxita rabaja bajaraxua payapëtaneme. Pajamatabëcuenesaëmënuja baja panejumecovënëtsijava pexaniajailivaisi. Itsiata icatsia pematatsënëa pacanajamatabënapitsiaexanaponatsi. <sup>13</sup> Abaxë tasaëtsaponaponaeepato mapanacuataje, netsitanepana patacamuxujobinexa, bajarapacuenia patacanajamatabënapitsia exanaponaeenexa. <sup>14</sup> Tspaji baja vajatuxanenë Jesucristo tajëvelia neyapëtaeyaexana bepijia tatëpaejavanexa. <sup>15</sup> Itsiata baitsi jane pacuenia necaëjëpa, xaniavaetsia paca-toyaquinaenatsi panenacofënëtsiyaniva. Nexata itsa tēpajë, paxamë tavënamuto panenajamatabënapitabiabinexa pacuenia pacamuxujobatsi.

### **Pacuenia Jesucristo pijajivijavabelia tsitanajamatabëcuenetitajëta ayaijamatabëcuene pexainanëcuene yabara pelivaisi**

<sup>16</sup> Imata vajatuxanenë Jesús pelivaisi itsa pacatsipaebatsi, xaniavaetsia pacatsipaebatsi mapacueniaje: “Vajatuxanenë Jesucristo baja cajena bitso pecaëjëpaenëtsi Dioso pesaëta pinijicuene pexanaejava pexanaenexa. Bajaraponë icatsia patsianica,” pacajaitsi. Saya jivi pejamatabëcueneta penajumetsënëtsilivaisi, apo pacatsipaebatsi. Tspaji baja pataitaxutota pataniji vajatuxanenë ayaijamatabëcuene pexainanëcuene. <sup>17</sup> Xaniavaetsia baja cajena pajumetaniji pamatacabi paxa Dioso athëbëvetsica barëcuaicuajaitsi. Bajarapaepatota daxitanë Cristo nivenivenareca. Athëbëvetsica paxa Dioso jumaitsitsica mapacueniaje: “Mara ponë taxënatote, tasivanë. Bitso sivajamatabëcuenebarëyanë,” jaitsica paxa Dioso athëbëvetsica. <sup>18</sup> Vajatuxanenë Jesucristo payajavanubenajë petsutojumata, itsajota jane baja

paxa Dioso athëbëvetsica barëcuaicuajajitsitsica. Nexata bajarapatsutojumata paxanë patajacuata pajumetaniji vajatuxanenë Jesucristo paxa Dioso athëbëvetsica pebarëcuaicuajajavatsitsica.

<sup>19</sup>Nexata pataniji. Payapëtanijinua. Xua bajayata Diosojumepaebivimi profetavi tajëvelia vajunupaeba pecopiapatsinexa, bajaraxua jane baja aeconoxae copiapata. Paxamë pibisiacuene panenayajivitaenexa, pajumecovënëre profetavimi pepaebilivaisi. Profetavimi pepaebilivaisi, pexaniaajailivaisixae, belâmpara picani. Pacuenia lâmpara itayota pitaquirijavata, bajara pijinia itsi profetavimi pepaebilivaisi pibisiacuene panenayajivitaenexa mapanacuataje. Pajumecovënëre xaniavaetsia profetavimi pepaebilivaisi. Nexata bajarapalivaisi pacajamatabëcueneyavenonaena pibisiacuene panenayajivitaevanapaenexa mapanacuataje. Bajarapacuenia pacajamatabëcueneyavenonaena matapania icatsia Jesucristo pepatsimatacabitsicajavabelianexa. Nexata bitso pabarëyamë tsane pamatacabi icatsia Jesucristo patsianica. <sup>20</sup>Xaniavaetsia pacanaëjërë daxitacuenevecua paneyapëtaenexa mapalivaisije. Daxita xua copiapatsijitsia mapanacuataje, tajëvelia Dioso pejumelivaisibaxutota vajunupaeba. Itsajivi ata cajena apo caëjëpaetsi saya pejamatabëcueneta bajaraxua xaniavaetsia pevajunupaebinxeta itsamonaejavabelia, itsamonae ata peyapëtaenexa pajamatabëcuenelivaisi xaina bajaraxua. Matapania pajivi Espiritu Santo yapëtaeyaexanatsi, caëjëpatsi xaniavaetsia pevajunupaebinxeta bajaraxua. <sup>21</sup>Bajayata Diosojumepaebivimi profetavi tajëvelia itsa vajunupaeba daxita xua copiapatsijitsia mapanacuataje, pejamatabëcueneta apo exanae bajarapalivaisi. Profetavimi Dioso pijajivixae, pacuenia Espiritu Santo yapëtaeyaexanatsi, paebabiaba.

**Pacuenia Dioso pejumecovënëtsivi muxujibatsi penajumetsënëtsilivaisi petsipaebaponaevi pejumecovënëtsiyaniva yabara pelivaisi**

*(Jud 4-13)*

**2** Bajayata itsamonae tsipaebapona penajumetsënëtsilivaisi Israel nacuapijivijava Dioso pejumelivaisi bepaebivi petaenexatsi. Bajara icatsia aeconoxae ata itsane paxamëjava. Itsamonae pacatsipaebiana penajumetsënëtsilivaisi. Bajarapamonae yamaxëitorobiaya pacatsipaebiana penajumetsënëtsilivaisi. Nexata bajarapalivaisita pacacopabiaexanaena Dioso panejumecovënëtsijavami. Bajarapamonae apo pejumecovënëtsivi tsane vajatuxanenë Jesucristo, ponë picani sivatëpatsi peca-panepaenexatsi. Bajarapacuenia pexanaexae tsane bajarapamonae, nexata bepijia Dioso verebiabiana bajarapamonae. <sup>2</sup>Bajarapamonae pevitota pibisiacuene exananapaena. Nexata bajaraxua yabara jumaitsi tsane: “Apo itsacuene itsiata, bajaraxua exanae atatsi,” jai tsane bajarapamonae. Nexata ayaibitsaëto paxamëyajuvënëvi jumecovënëtsiana. Naexanaenanua papibisiacuene bajarapamonae exana. Nexata bajarapacuenia paxamëyajuvënëvi pibisiacuene petsitaexanaexae tsane, pamonae Dioso apo pejumecovënëtsivi pibisiacuenia baracuaicuajajai tsane pexanialivaisi, Jesucristo pelivaisi. <sup>3</sup>Nexata pamonae penajumetsënëtsilivaisi tsipaebaponaena, bitso jitsipaena palata. Bajaraxuata pacatsipaebiana penajumetsënëtsilivaisi papecatsipaebijamatabëcuene papecavecuapitsinexa panijapalata. Itsiata baitsi jane Dioso tajëvelia najamatabëcuenevereta bajarapamonae penaneconitsiaexanaenexa. Nexata bajarapamonae bajarapitsixae tsane, pepacuene jemata Dioso naneconitsiaexanaena.

<sup>4</sup>Angelevi ata baja cajena itsa naneconita, aneconijibia Dioso apo copatsi. Angelevi ata itsa naneconita, nexata Dioso xuaba infernojavabelia. Nexata bajara-jota, pitaquirinacuata, cēbiaya Dioso jinavanapaeyaexana. Nexata bajarapaán-gelevi Dioso jane baja naneconitsiaexanaena pamatacabi Dioso naneconitsiaex-anaena daxita pijaneconi pexainaevi. <sup>5</sup>Dioso cajena aneconijibia apo copatsi ba-jayatami ata pamona pibisiacuene exana. Dioso ira bubutsiaexana bajarapamona pexaxuabinexa. Caenē, Noépijinē, Dioso capanepa pijamonae yajava, siete pa-jiviyobeje. Noépijinē picani itavetabiaba jivi pibisiacuene pexanaeyaniva. <sup>6</sup>Ba-jayata Dioso isotota verebiaba Sodoma tomarapijivimi. Bajara pijinia pacuenia Dioso verebiaba Gomorra tomarapijivimi ata. Nexata Dioso copiarucaeyaexana bajarapatomaramibeje. Tsipaji bitso pibisiacuene exana bajarapatomaramibejepi-jivi. Bajarapatomaramibeje nacopata ēipumana. Bajarapacuenia Dioso verebi-aba bajarapamonaemi, pamona cotoceavi jinavanapa, peyapētaenexa, bajarapa-monaē ata pibisiacuene pexanaeyaniva. <sup>7</sup>Pamatacabi Dioso verebiaba bajarap-atomaramibejepijivi, caenē, Lotpijinē, Dioso capanepa pexaniacuene pexanabi-abixae. Lotpijinē itsa taeyabiaba bajarapamonaemi bitso pibisiacuene pexanae-java, nexata bitso sivanajamatabēxainabiaba. <sup>8</sup>Lotpijinē pexaniacuene pexanaenē, bajarapamonaemi tuatujēta naponapona. Nexata caematacabi canacujitsia Lotpi-jinē bitso sivanajamatabēxainabiaba, itsa tane bajarapamonaemi pibisiacuene pex-anaejava, itsa vënëlivaisitanenua pibisiacuene pexanaejava. <sup>9</sup>Bajaraxuata vaxaitsi baja yapētanetsi mapacuneje. Vajatuxanenē caējēpatsi pejamatabēcueneasaēyaex-anaenexa pajivi najamatabēcuene copata vajatuxanenējavabelia. Nexata pajivi najamatabēcuene copata vajatuxanenējavabelia, dovathi itsa jamatabēcueneējē-tatsi, vajatuxanenē jamatabēcueneasaēyaexana. Vajatuxanenē caējēpatsinua pibisi-acuene pexanaevi, nabejiobitsiaya pejinavanapaeyaexanaenexa, mapanacuataje abaxē itsa asaē tsavanapae. Bajarapacuenia vajatuxanenē nabejiobitsiaya jinavana-paeyaexanaena penaneconitsiaexanaenexa icatsia petēpaecujinae ata, pamatacabi naneconitsiaexanaena daxita pijaneconi pexainaevi.

<sup>10</sup>Pamonaē bitso casaē tsavanapae pibisiacuene pexanaejava pijacuata penato-jitsipaecuenia, bajarapamonaē bitso ayaicuenia Dioso naneconitsiaexanaena itsa-monaē penaneconitsiaexanaejava matatoxenetsia. Pamonaē ata apo jumecovēnētsi vajatuxanenē pevetsicuenetsi, bajarapamonaē ata Dioso bitso ayaicuenia naneconit-siaexanaena. Pamonaē penajumetsēnētsilivaisi petsipaebaponaevi, apo yayatae it-samonaē ata. Ajamatabēcuenetajanua. Apo jumejunavinua bajarapamonaē pibisi-acuena pebaracuaicuaijainexa ángelevi. <sup>11</sup>Angelevi biji picani bitso piasaēvi pe-najumetsēnētsilivaisi petsipaebaponaevi matatoxenetsia. Nexata ángelevi vajatuxa-nenē pitabarata pejinavanapaexae, bitso piasaēvi ata penajumetsēnētsilivaisi petsi-paebaponaevi matatoxenetsia, itsiata pibisiacuena apo baracuaicuaijai penajumet-sēnētsilivaisi petsipaebaponaevi.

<sup>12</sup>Pamonaē penajumetsēnētsilivaisi petsipaebaponaevi, beveliajamatabēcuenevi saya. Pacuenia saya jinavanapa unupijidujuai, bajara saya jamatabēcueneitsi bajara-pamonaē. Apo najamatabēxinae pexanialivaisi. Saicaya xua jamatabēexana, exan-abiaba. Unupijidujuai saya jema bajinavanapa. Nexata jivi jemata itsa tane, vaetaba. Beyaxuabanua. Pamonaē penajumetsēnētsilivaisi petsipaebaponaevi, pibisiacue-nia baracuaicuaijai tsabiabi xaniavaetsia apo peyapētaejava ata. Nexata pacue-nia unupijidujuai baverebiabatsi, bajara pijinia pacuenia jemata Dioso verebi-



abiana bajarapamonae. <sup>13</sup>Nexata Dioso bajarapamonae juya bejiobia jinavana-paeyaexanaena. Tshipaji bajarapamonae itsamonae bejiobiaexanabiaba. Bajarapamonae pibisiacuene itsa exanabiaba, barëya tsabiabi. Bajarapamonae apo pacajamatabëcuenejëpae ata, nanacaetuatsiana itsa panacaetuatame. Nexata yamaxëitojorobiaya pacayajavanabanebiabiana fiesta paneexanaematacabi. Bajarapamonae pibisiacuene pexanabiabixae tsane, nexata panetuatuajëta bepiauxirajava tsane.

<sup>14</sup>Bajarapamonae itsa tane petiriva, pibisiacuene jamatabëexanabiaba pevitota bejarapovajavelia. Apo yabaracueranae pibisiacuene pexanaejava. Penajumetsënëtsilivaisi petsipaebaponaevi, pibisiacuene exanaeyaexanabiaba pamonae abaxë apo ajamatabëcuenesaë Dioso pejumecovënëtsijava. Bajarapamonae bitso jitsipa daxitacuene pexainajava ëpamonaenexa. Bitso yapëtanenua pepitsinexa xua jitsipa. Nexata bajarapamonae Dioso bitso ayaiucenia naneconitsiaexanaena. <sup>15</sup>Bajarapamonae baja Diosovecua naxuabiaya jinavanapa. Tshipaji baja copaba pexaniajailivaisi pejumecovënëtsijavami. Apo jumecovënëtsi Dioso. Nexata bajarapamonae cuenejëpa Diosojumepaebinëmi, profeta Balaampijinëmi, Beorpijinëmi pexënatò. Balaampijinëmi bajayata itsamonae tsipaebatsi palata pibisiacuene picani pexanaenexa. Nexata baja picani Balaampijinëmi jejai pibisiacuene pexanaenexa. <sup>16</sup>Itsiata baitsi jane Balaampijinë Dioso itavetatsi bajarapapibisiacuene bitso pexanaeyaniva Dioso pitabarata. Balaampijinë pijaburrota yanajetaruca. Dioso cuaicuajiyaxana burro. Nexata pacuenia jivitonë bacuaicuajjai, bajarapacuenia Balaampijinë pijaburro barëcuaicuajjai pitaavetsinexatsi pibisiacuene pexanaeyaniva. Nexata picani xua Balaampijinë jamatabëexana, copata baja.

<sup>17</sup>Pamonae penajumetsënëtsilivaisi petsipaebaponaevi, apo jumenamatamotsi. Yapëtanetsi pacuenia baitsi meramatathaibëmi itsa tseveca. Meramatathaibëmi itsa tseveca, apo jamatabëcueneyavenonae itsajiviyo ata. Tshipaji itsajivi mera jitsipae ata, piapaenexa apo puatsi bajarajota. Bajara pijinia itsi pamonae petsipaebaponaevi penajumetsënëtsilivaisi. Itsajivi ata apo jamatabëcueneyavenonae bajarapamonae petsipaebilivaisita. Pacuenia itarërëbo ata jovibota xaniavaetsia caecovëta apo rucae, bajara jamatabëcueneitsi bajarapamonae. Caejamatabëcuene apo xainae. Nexata Dioso bajarapamonae bitso ayaiucenia naneconitsiaexanaena. Bajarapamonae pitaquirinacuata naneconitsia jinavanapaena daxitamatacabijavelianexa. <sup>18</sup>Bajarapamonae ayajamatabëcuenevi nataeya cuaicuajjai tsabiabi. Itsiata baitsi jane saya natsiquejemalivaisi cuaicuajjai tsabiabi. Bajarapamonae yamaxëitojorobiaya jumai tsabiabi: “Apo itsacuene raja apo payaiyatae atamë petiriva. Pibisiacuene itsa jamatabëpaexaname panevitota petirivajavelia, paexanare,” jai tsabiabi bajarapamonae. Bajarapacuenia bajarapamonae othopaeyaexanapona pamonae pejanajumecovënëtsivi Dioso. Tshipaji pibisiacuene exanaeyaexanapona. <sup>19</sup>Bajarapamonae yamaxëitojorobiaya jumai tsabiabinua: “Itsa panejumecovënëtsianame patacatsipaebilivaisi, nexata pacatoxanepanaena paneexanabiabinexa daxitacuene,” jai tsabiabi pamonae penajumetsënëtsilivaisi petsipaebaponaevi. Itsiata baitsi jane bajarapamonae apo jamatabëcuenecaëjëpaetsi daxita xua pexaniacuene pexanaenexa. Saya ëpibisiacuene exanabiaba. Bajaxuata Dioso bajarapamonae verebiabiana. Tshipaji bajarapamonae pibisiacuene exanabiaba pijacuata penatojitsipaecuenia, pacuenia pejamatabëcuene itorobatsi. Caejivitsi canacujitsia vajacuata vajanatojitsipaecuenia itsa exanaponatsi, vajajamatabëcuene bepjjajivitonëtsi naexanatsi. Tshipaji pacuenia vajajamatabëcuene nacaitoroba, exanaponatsi. <sup>20</sup>Pamonae baja yapëtane vajatux-

anenë Jesucristo, ponë capanepaejitsiatsi pibisiacuene pexanaeeneconimivecua, bajarapamonae baja Dioso vecuaajibiaexanatsi pibisiacuene pexanaeeneconimi. Pajamatabëcuenemi ata jitsipaeyaexanabiabatsi pibisiacuene pexanaenexa, bajarapajamatabëcuenemi ata baja vecuaajibiaexanatsi. Itsiata baitsi jane bajarapamonaeya-juvëñevi icatsia pibisiacuene itsa exanapona, nexata icatsia bajarapajamatabëcuenepjumecovënëtaponaexae, bitso naneconitsiana Diosojavabelia. Nexata jane baja copiaya pexainaeneconimi matatoxenetsia, bitsoyo ayaineconi natsixainaena. <sup>21</sup> Pamonae copaba pexaniajailivaisi pejumecovënëtsijavami, bitso ayaineconi natsixaina Diosojavabelia. Bajarapamonae itsa apo tsipaebi tsipaetsi bajarapexaniajailivaisi, bevelia naneconitsipa Diosojavabelia. Tsipaji apo yapëtae tsipae bajarapalivaisi. Nexata baja peyapëtaexae bajarapalivaisi, pecopabixaenua pejumecovënëtsijavami bajarapalivaisi, naneconita bitso Diosojavabelia. Toxanepanaejitsipatsi meta bajarapamonae itsa apo tsipaebi tsipaetsi bajarapalivaisi bevelia penaneconitsinexa Diosojavabelia. <sup>22</sup> Bajayatapijilivaisi jumaitsi mapacueniaje: “Aviri peyacabicujinae, icatsia nayacabixane. Marrano pijinia tsorobota peboacaecujinae, itsa matavanetsi pexaniamerata, pematavaecujinaetsi, icatsia caevëalia tsorobota boca,” jai bajayatapijilivaisi. Xaniajai baja cajena bajarapalivaisi. Bajara pijinia jamatabëcueneitsi pamonae icatsia caevëalia pibisiacuene exana.

### **Pacuenia icatsia Jesucristo patsijitsiatsica yabara pelivaisi**

**3** Tajamonae bitso patacaasivavi, copiaya baja cajena pacatoyaquinatsi itsabaxuto. Nexata icatsia mapabaxutoje cotocaevi pacatoyaquinatsi. Pacatoyaquinatsi bajarapabaxutoje patacamuxujiobinexa nexata xaniavaetsia panenajamatabëxainenaenexa. <sup>2</sup> Panajamatabënapire pacuenia Diosojumepaebivimi profetavi bajayata tajëvelia jumaitsi. Panajamatabënapirenuu pacuenia baja cajena apóstolevi pacatsipaeba vajatuxanenë Cristo pelivaisi. Cristo, ponë papecacapanepaenënexa, copiaya tsipaeba apóstolevijavabelia. Nexata juya apóstolevi paxamëjavabelia pacatsipaeba. <sup>3</sup> Xaniavaetsia panamuxunaevere daxitacuenevcua paneyapëtaenexa mapacuenieje. Nacua pecopiarucaevajënaeyotanexa, najetarubenaena itsamonae pecapocaponaevinexa pexaniajailivaisi. Bajarapamonae exanavanapaena pibisiacuene pacuenia pijacuata natojitsipa. <sup>4</sup> Bajarapamonae Cristo pepatsijavanexatsica apo pejumecovënëtsixae, najumequenetsiataeya saya jumaitsi tsane: “¿Jica Cristo icatsia pepatsijavanexatsica pacuenia baja Cristo tajëvelia najumecapanepaeya jumaitsi? Bajayata vajavajënaeyapijivimi, pamonae jumecovënëta Cristo pepatsijavanexatsica, vajënaeevetavanapa picani. Itsiata Cristo apo patsitsica. Nexata bajarapamonaemi belia baja tëpa Cristo patsinejevatsica. Daxitanacua abaxë itsiata tsitecanuca Dioso pexanaecujinae,” jai tsane saya bajarapamonae apo pejumecovënëtsixae Cristo pepatsijavanexatsica. <sup>5</sup> Bajarapacuenia jumaitsi tsane tsipaji bajarapamonae apo canaëjëtsi tsane pacuenia bajayata Dioso itoroba saya pijumeta itaboxo penaexanaenexa mapanacua yajavaje. Nexata mapairanexaje, manuamene tuatuajëatsina Dioso ira jumapitsapaeyaexanaina. <sup>6</sup> Bajayata pijinia mapanacuae Dioso itsa bubutsiaexana, daxitajivi Dioso verebiaba merata. <sup>7</sup> Itsiata baitsi jane itaboxo, ira yajava, daxita xua tanetsi, Dioso pejamatabëcueneta abaxë xaniavaetsia tsitecanuca. Dioso abaxë xaniavaeta itsamatacabi isotota peveriapaenexa. Dioso isotota veriapaena mapanacuae, itaboxo yajava, pamatacabi naneconitsiaexanaena daxita pijaneconi pexainaevi. Ba-

jarapamatacabi Dioso naneconitsiaexanaena pibisiacuene pexanaevi. Dioso verebi-abiana daxitacuene.

<sup>8</sup>Tajamonae bitso patacaasivavi, pëtsa panacofënètame mapacueenje. Vajatuxanenë saya tsitacaematacabitsi mil pavaibeje ata. Mil pavaibeje ata apo tsitabajayajebitsi. Betsitacaematacabi tsanucaetsi saya vajatuxanenë. <sup>9</sup>Itsamonae jamatabëcuenenavëxaniabiaya jamatabëjumaiti: “Dioso bitso cuenenajemata pexanaenexa pacuenia najumecapanepaeya jumaiti,” jamatabëjai. Vajatuxanenë raja apo cuenenajematsi. Xua raja vajatuxanenë bajayajebi becuenenajematsi, abaxë saya eveta jivi pejumecovënëtsinexatsi. Tsipaji vajatuxanenë apo jitsipae itsajivi ata pevecuanaxuabijavatsi. Vajatuxanenë raja jitsipa daxitajivi pecopabinexa pibisiacuene pexanabiabijava, penajamatabëcuenepënyorotsinexa Diosojavabelia.

<sup>10</sup>Vajatuxanenë baja cajena icatsia jemata patsianica. Pamatacabi jivi jamatejema jinavanapaena, jemata vajatuxanenë patsianica. Pacuenia penacobetoxotsinënexa jemata bapata, itsajota apo jamatabënajinaetsi, bajara pijinia itsi tsane vajatuxanenë. Jemata patsianica. Nexata jane baja bajarapamatacabita itaboxo copiarucaena. Ayaijume najumetsiana. Daxita athëbëpijicuene vereverecaena isotota. Mapanacuamije, daxita xua tanetsi mapanacuataje, yajavatajuena isotota.

<sup>11</sup>Daxitacuene bajarapacuenia vereverecaena. ¡Bajaraxuata bitso xaniavaetsia bepajinavanapame Dioso papecatojitsipaecuenia! <sup>12</sup>Bepacopiaevetavanapame vajatuxanenë pepatsijavanexatsica. Vajatuxanenë pijacuene bepatonacuenebavana-pame bepijia pepatsinexatsica. Pamatacabita vajatuxanenë patsianica, itaboxo vereverecaena isotota. Daxita athëbëpijicuene veriajaviana isotocotiata. <sup>13</sup>Itsiata baiti jane xuacujinae Dioso icatsia pejanaitaboxo, pejanairanua, exanaena pacuenia tajëvelia najumecapanepaeya jumaiti. Nexata vaxaitsi evetavanapatsi vajataenexa pejanaitaboxo, pejanairanua. Itsamatacabi pejanairata daxitajivi ëpexaniacuene exanavanapaena, xua Dioso tojitsipatsi.

<sup>14</sup>Tajamonae bitso patacaasivavi, pejanaitaboxo, pejanairanua, panetaenexa, panecopiaevetavanapaepato xaniavaetsia pajinavanapaename. Nexata pamatacabi vajatuxanenë icatsia patsianica, pacasivabarëya tsane. Bajarapacuenia pacasivabarëya tsane itsa pacacaxitajarabiana jamatabëcuenexanepanaeya aneconibia panejinavanapaejavata. <sup>15</sup>Pacanaëjère xua yabara abaxë vajatuxanenë apo patsitsica. Abaxë raja apo patsitsica daxitajivi apo pejumecovënëtsixae Dioso. Tsi-paji daxitatsi vajatuxanenë jamatabënacacapanepa pijanacuayabetsia. Pacuenia daxitatsi vajatuxanenë jamatabënacacapanepa pijanacuayabetsia, bajaraxua va-jaasivanë, vajabananë Pablo, peyapëtaenexa Dioso yavenonatsi. Nexata Pablo peyaquinaebaxutonëta, pacatoyaquina pacuenia vajatuxanenë daxitatsi jamatabë-nacacapanepa pijanacuayabetsia. <sup>16</sup>Pablo baja cajena peyaquinaebaxutonëta, paca-toyaquina pacuenia vajatuxanenë daxitatsi jamatabënacacapanepa pijanacuaya-betsia. Pablo peyaquinaelivaisianë, itsalivaisi ayapëbeje tsabiabi vajajumeyapë-taenexa xua yabara Pablo yaquina. Nexata palivaisi apo jumeyapëtaetsi, apo yapë-taetsi pajamatabëcuenelivaisi xaina. Nexata pamonae xaniavaetsia apo jumeyapëtae Pablo peyaquinaelivaisianë, juya tsipaebabiaba itsamonaejavabelia apo jumeyapë-tae ata. Pamonae ata caejamatabëcuene apo xinae Dioso pejumecovënëtsijava, juya itsamonaejavabelia tsipaebabiaba Pablo peyaquinaelivaisianë. Nexata ba-jarapamonae itsamonaejavabelia itsa tsipaebabiaba, Pablo peyaquinaelivaisianë mataropotsia saicayacuenia tsipaebabiaba. Bajarapacuenia itsabaxutonëta ata, pe-

rubenaelivaisianë ata, bajarapamonae saicayacuenia mataropotsia tsipaebabiaba. Bajarapamonae itsamonaejavabelia itsa tsipaebabiaba, apo tsipaebabiabi pacuenia Dioso pejumelivaisibaxutota jumaitsi. Saicayacuenia saya tsipaebabiaba. Nexata bajarapamonae pijacuata naneconita Diosojavabelia. Nexata Dioso verebianatsi.

<sup>17</sup>Tajamonae bitso patacaasivavi, paxamë baja cajena tajëvelia payapëtaneme bajaraxua yabara. Bajaraxuata panayajivitaema pibisiacuene pexanaevi penajumetsënësilivaisi papecatsipaebiyanima. Tsipaji papecatsipaebilivaisita, pacajopaeyaexanaejitsipa Dioso panejumecovënëtsijavavecu. <sup>18</sup>Pacatojitsipatsi paneajamatabëcuenesaë tsavanapaenexa Dioso panejumecovënëtsijava Jesucristo papecaitaxutotsoniataexae. Panevajënaeyabelia payapëtaeponarena vajatuxanenë Jesucristo, ponë pacacapanepaejitsia pibisiacuene paneexanaeconivecu. Jesucristojavabelia daxitajivi jumai tsabiabi tsane: “¡Xamë Jesucristomë, bitso cajena ayaijamatabëcuenenëmë!” jai tsabiabi tsane daxitamatacabijavabelianexa. Bajara itsi tsane.

## Mapabaxutoje San Juan copiaya toyaquina Dioso pejumecovënëtsivijavabelia

### Cristo vajanacajamatabëcuene asaëyaexanaenë yabara pelivaisi

**1** <sup>1-2</sup> Pacatoyaquinatsi Dioso pexënato pelivaisi. Bajaraponë athëbëtatsia ponapona baja cajena pepo bajayatami ata, itsa abaxë Dioso apo exanae mapanacuaje. Nexata bajaraponë patsica mapanacuayabetsicaje. Bajaraponë itsa patsica mapanacuayabetsicaje, naexana pacuenia vaxaitsi baexanatsi. Nexata abaxë itsa ponapona mapanacuataje, bajaraponë patanetsipaebilivaisianë pajumetaniji. Bajaraponë pataniji baja cajena pataitaxutota. Pajayabajënuua patacobeta. Nexata bajaraponë pelivaisi pacatsipaebatsi. Bajaraponë matababi apo pevereverecejava pexainaenë. Paxa Dioso yajavaponapona. <sup>3</sup> Pacatojitsipatsi paxamë ata paneyajavajinavanapaenexa Dioso. Pacatojitsipatsi Dioso pexënato, Jesucristo, ata paneyajavajinavanapaenexa. Bajaraxuata pacuenia pataniji, pacuenia ata pajumetaniji bajaraponë patanetsipaebilivaisianë, juya paxamëjavabelia pacatsipaebaponatsi. <sup>4</sup> Nexata pacuenia pataniji, pacuenia ata pajumetaniji bajaraponë patanetsipaebilivaisianë, pacatoyaquinatsi mapabaxutotaje paxamë ata paneyapëtaenexa, bitso panesivajamatabëcuenebarëyanexa Jesús.

### Dioso pejumelivaisita vajanacajamatabëcueneitayotsinë yabara pelivaisi

<sup>5</sup> Palivaisianë rabaja Jesucristo panetsipaeba, bajara mapalivaisianëje juya paxamëjavabelia pacatoyaquinatsije. Dioso raja pejumelivaisita vajanacajamatabëcueneitayotsinë. Dioso raja apo pijamatabëcueneitaquirinë. <sup>6</sup> Bajaraxuata vaxaitsi jumaitsi atatsi: “Dioso raja vaxaitsi yajavajinavanapatsi,” jai atatsi, itsiata pibisiacuene itsa exanavanapatsi, nexata najamatabëcuenecepaebatsi. Najumetsënëtatsi saya Dioso vajayajavajinavanapaejava. Najumetsënëtatsinua pexaniacuene vajaexanaejava ata. <sup>7</sup> Itsiata vaxaitsi xaniavaetsia itsa jumecovënë-tavanapaenatsi Dioso pejumelivaisi pacuenia Dioso ata pijacuata bajarapalivaisi najumecovënëtaponapona, nexata vaxaitsi ata mapanacuata xaniavaetsia najamatabëcuenejëpaeya najuajinavanapaenatsi. Bajarapacuenia vaxaitsi itsa jinavanapaenatsi, nexata Jesucristo, Dioso pexënato, vajanacasivatëpaexae, nacavecuaajibiaexanaena daxita vajapibisijamatabëcuenemi.

<sup>8</sup> Vaxaitsi pibisiacuene exanae atatsi, itsiata itsa jumaitsitsi: “Vaxaitsi cajena aneonijibitsi. Tsiapaji pibisiacuene apo exanaetsi,” itsa jaitsi, nexata saya jamatabëcuenenavëxaniabatsi. Pexaniajailivaisi, Dioso pejumelivaisi, apo nacatsijamatabëceae. <sup>9</sup> Dioso baja cajena nacayavenonabiaba pacuenia najumecapanepaeya nacajumaitsi. Dioso pexanepanaecuene exanabiabanua. Bajaraxuata pibisiacuene vajaexanaejavami, itsa navajunupaebatsi Diosojavabelia, nexata Dioso nacavecuaajibiaexana pibisiacuene vajaexanaeconimi. Nacavecuaajibiaexananua daxita pibisijamatabëcuene vajaxinaejavami. <sup>10</sup> Vaxaitsi pibisiacuene exanae atatsi, itsiata itsa jumaitsitsi: “Vaxaitsi cajena caeto ata pibisiacuene apo exanaetsi,” itsa jaitsi, nexata saya jamatabëcuenenavëxaniabatsi. Dioso pejumelivaisi ata apo nacatsijamatabëceae. Bajarapacuenia itsa jumaitsitsi, nexata Dioso tanetsi bepenajumet-

sënëtsinë. Tsipaji Dioso pejumelivaisibaxutota jumaitsi pacuenia daxitatsi pibisiacuene ëvajaexanaevi.

### **Cristo vajanacatocuaicuaijainë Diosojavabelia yabara pelivaisi**

**2** Tajamonae, pacatoyaquinatsi mapalivaisije patacamuxujobinexa pibisiacuene paneexanaeyaniva. Itsiata baitsi jane cajena itsajivi pibisiacuene itsa exana, xainatsi Jesucristo, vajanacayavenonaenë, vajanacatocuaicuaijainë Diosojavabelia. Bajaraponë cajena caeto ata pibisiacuene apo pexanaenë. <sup>2</sup> Jesucristo vajanacasi- vatëpaexae, nacavecuaajibiaexana baja daxita pibisiacuene vajaexanaeconomy. Itsiata ëvaxaitsi apo nacasivatëpae. Daxita mapanacuapijivije pibisiacuene pexanaeconomy pevecuaajibiaexanaenexa, Jesucristo sivatëpa.

<sup>3</sup> ¿Detsa pacuenia nayapëtanetsi Dioso pijajivitsi? Itsa exanavanapatsi pacuenia Dioso nacaitoroba, nayapëtanetsi Dioso pijajivitsi. <sup>4</sup> Itsajivi jumaitsi ata: “Xanë raja cajena Dioso yapëtaniji,” jai ata, itsiata itsa apo jumecovënëtsi pacuenia Dioso itorobatsi, bajarapajivi saya najumetsënëta. Pexaniajailivaisi cajena, Dioso pejumelivaisi, apo tsijamatabëcaetsi. <sup>5</sup> Pajivi exanaponapona Dioso pitorobicueniatsi, bajarapajivi pepacuene jumecovënëta Dioso bajarapajivi bitso pejitsipaexae Dioso. Bajarpacuenia vaxaitsi ata itsa jumecovënëtavapanatsi Dioso, nexata nayapëtaevanapanatsi vajayajavajinavanapaejava Dioso. <sup>6</sup> Pajivi jumaitsi: “Xanë rabaja Dioso yajavaponaponajë,” jai, bajarapajivi xaniavaetsia beponapona pibisiacuene exanaenejeva. Pacuenia Jesús ponapona, bajarapacuenia bajarapajivi beponapona.

### **Palivaisi baja bajayata jivi jumecovënëta, bajarapalivaisi icatsia bepejanalivaisicuenia jivi pejumecovënëtsinexa, yabara pelivaisi**

<sup>7</sup> Tajamonae, pacatoyaquinatsi mapalivaisije panejumecovënëtsinexa. Apo pejanalivaisi ra picani. Itsiata baitsi jane palivaisi baja copiaya bajayata pajumetaneme, pamatacabi ajena pajumecovënëtame Jesús pelivaisi, bajarapalivaisi jumejëpa. <sup>8</sup> Nexata mapalivaisije pacatoyaquinatsi pejanalivaisicuenia panejumecovënëtsinexa. Mapalivaisije pexaniajailivaisi cajena. Cristo cajena pijacuata bajarapalivaisi natoexanaponapona. Paxamë ata baja pajumecovënëtavapame bajarapalivaisi. Nexata mapanacuapijijamatabëcuenemije, pitaquirijamatabëcuenemi, pacavecuaajibi baja tsaponae. Tsipaji bajarapalivaisita Jesucristo nacajamatabëcueneitayotapona.

<sup>9</sup> Itsajivi jumaitsi ata: “Xanë raja Dioso pitorobicuenia exanaponaponajë,” jai ata, itsiata itsa itoya itsajivi Dioso penajuajumecovënëtsivi, nexata bajarapajivi abaxë tsiteca ajamatabëcueneitaquiri tsaponaponae. <sup>10</sup> Pajivi bitso asiva itsajivi ata, Dioso penajuajumecovënëtsivi, bajarapajivi Dioso jamatabëcueneitayotatsi. Nexata bajarapajivi apo caëjëpaetsi itsacuenejavayo ata pibisiacuene itsajivi pexanaeyaexanaenexatsi. <sup>11</sup> Pajivi itoya itsamonae ata Dioso penajuajumecovënëtsivi, bajarapajivi abaxë tsiteca ajamatabëcueneitaquiri tsaponaponae. Apo yapëtae pibisiacuene pexanaejava. Apo yapëtaenua itsabelia caponaejitsiatsi pibisiacuene pexanaeconomy yabara. Bajara jamatabëcueneitsi tsipaji pevajënaeyabelia dovathi yajamatabëcueneitaquiriaya exanaponatsi pijamatabëcueneitaquirixae.

<sup>12</sup> Tajamonae, pacatoyaquinatsi mapalivaisije. Tsipaji baja Dioso pacavecuaajibiaexana pibisiacuene paneexanaeconomy Jesucristo papecasivatëpaexae. <sup>13</sup> Patava- jënaepijivimë, pacatoyaquinatsi mapalivaisije. Tsipaji baja payapëtaneme Jesu-

cristo, ponë baja cajena athëbëtatsia ponapona pepo bajayatami ata, Dioso daxitacuene mapanacuata pexanaevajënaeya. Paxamë ata papevëjëavimë, pacatoyaquinatsi mapalivaisije. Tsipaji baja dovathi pajamatabëcueneamoneyabame.

Bepataxicueniamë patacataevi, imata baja cajena itsabaxuto pacatoyaquinatsi. Tsipaji baja vaxa Dioso payapëtaneme. <sup>14</sup> Patavajënaeyapijivimë, imata baja cajena itsabaxuto pacatoyaquinatsi. Tsipaji baja payapëtaneme Jesucristo, ponë baja cajena athëbëtatsia ponapona pepo bajayatami ata, Dioso daxitacuene mapanacuata pexanaevajënaeya. Paxamë ata papevëjëavimë, imata baja cajena itsabaxuto pacatoyaquinatsi. Tsipaji baja pajamatabëcuenesaëmë Dioso panejumecovënëtsijava. Pacatsijamatabëca baja Dioso pejumelivaisi. Nexata baja dovathi pajamatabëcueneamoneyabame.

<sup>15</sup> Pëtsa pajitsipame mapanacuapijicueneye. Pëtsa pajitsipame mapanacuapijipibisiacuene ataje. Itsa pajitsipaejitsipame mapanacuapijipibisiacueneje, nexata apo pajitsipaemë tsipae Dioso. <sup>16</sup> Pajamatabëcuene jivi jitsipaeyaexanabiabatsi pibisiacuene pexanaenexa, bajarapajamatabëcuene apo pitsapae Diosojavaverena. Bajarapajamatabëcuene pitsapa mapanacuataje. Pajamatabëcuene ata jivi najamatabëxainaeaexanabiabatsi penaxainaeaabinexa xua itajitsipa, bajarapajamatabëcuene ata pitsapa mapanacuataje. Pajamatabëcuene ata jivi najamatabëxainaeaexanabiabatsi beayaijamatabëcuenevi penataenexa, bajarapajamatabëcuene ata pitsapa mapanacuataje. Daxita bajarapajamatabëcuene pitsapa mapanacuataje. Bajarapajamatabëcuene apo pitsapae vaxa Diosojavaverena. <sup>17</sup> Imoxoyo rabaja pevajënae tsaponae pevereverecaenexa mapanacuaje. Nexata daxita pajamatabëcuene jivi jitsipaeyaexanabiabatsi pibisiacuene pexanaenexa, yajavavereverecaena mapanacuaje. Itsiata baitsi jane pamona exanavanapa Dioso pitorobicueniatsi, jinavanapaena daxitamatacabijavabelianexa.

### **Pexaniajailivaisi, penajumetsënëtsilivaisi ata, yabara pelivaisi**

<sup>18</sup> Tajamonae, imoxoyo rabaja pevajënae tsaponae pevereverecaenexa mapanacuaje. Pavënëlivaisitaneme rabaja pacuenia najetarucaejitsia ponë cueneitoyatsi Cristo. Pata rabaja cajena ayailbitsaëto, pamona Cristo cueneitoyatsi. Bajarapamonae pepatsixae, yapëtanetsi imoxoyo baja pevajënae tsaponae pevereverecaenexa mapanacuaje. <sup>19</sup> Pamona Cristo cueneitoyatsi, bajarapamonae vaxait-siyajuvënëvimi picani. Itsiata baja nacavecuapitsapa. Bajarapamonae pepacuene apo vaxait-siyajuvënëvi cajena. Itsa peneta bajarapamonae vaxait-siyajuvënëvi tsipae, nexata tsitecaeya najinavanapaejitsipa vaxaitsita. Bajaraxuata bajarapamonae nacavecuapona baja. Nexata daxitajivi xaniavaetsia yapëtanee bajarapamonae pepacuene Dioso apo pejumecovënëtsivicuene.

<sup>20</sup> Cristo rabaja pacarajuta Espiritu Santo. Bajaraxuata daxita paxamë payapëtaneme baja pexaniajailivaisi, Dioso pejumelivaisi. <sup>21</sup> Pacatoyaquinatsi mapabaxutoje tsipaji baja payapëtaneme pexaniajailivaisicuene Jesús pelivaisi. Nexata apo pacatoyaquinaetsi matapania patacayapëtaeyaexanaenexa pexaniajailivaisicuene Jesús pelivaisi. Tsipaji baja bajaya payapëtaneme bajarapalivaisi pexaniajailivaisicuene. Payapëtanemenua baja Jesús pelivaisijavaverena acuenebi pepitsapaejava penajumetsënëtsilivaisi. Tsipaji pexaniajailivaisijavaverena acuenebi pepitsapaejava penajumetsënëtsilivaisi.

<sup>22</sup> ¿De jane peneta jumaitsi pepo penajumetsënëtsijivi? Pajivi peneta pepo penajumetsënëtsijivi, jumaitsi mapacueniaje: “Jesús raja apo Cristo, ponë Dioso athëbëvetsica itorobijitsiatsica vajanacacapanepaenexa,” jai. Bajara peneta pejumaitsiijivi, pepo penajumetsënëtsijivi jane baja. Bajarapajivi Cristo pijavajabitsaëjivi. Bajarapajivi apo jumecovënëtsi Dioso. Apo jumecovënëtsinua Dioso pexënato ata. <sup>23</sup> Pajivi peneta jumaitsi: “Jesús raja Dioso apo pexënato,” jai, bajarapajivi Dioso apo yajavaponaponae. Pajivi pijinia peneta jumaitsi: “Jesús raja Dioso pexënato,” jai, bajara jane pajivi Dioso yajavaponaponatsi.

<sup>24</sup> Bajaraxuata paxamë baja palivaisi pajumetaneme panejumecovënëtsijavaverenacujinae, panevajënaeyabelia tsiteca pacajinavanapare. Bajarapalivaisi tsiteca itsa pacatsijamatabëcaena, nexata panevajënaeyabelia payajavajinavanapaname Dioso. Payajavajinavanapenamenua Dioso pexënato ata, Cristo. <sup>25</sup> Jesucristo rabaja najumecapanepaeya jumaitsi vajanacarajutsinexa matababi apo peverevereaejava.

<sup>26</sup> Pacatoyaquinatsi mapabaxutoje patacayapëtaeyaexanaenexa panenayajivitaenexa pamonaë jamatabëpacayamaxëitoroba. <sup>27</sup> Paxamë rabaja Espiritu Santo pacatsijamatabëca, ponë pacarajuta Jesucristo. Bajaraxuata apo panamatavenonae më baja itsajivi ata papecatsipaebinexa paneyapëtaenexa daxitacuene. Tsipaji baja daxita xua Espiritu Santo pacayapëtaeyaexanapona, pexaniajaicuene baja cajena. Penajumetsënëtsicuene baja cajena Espiritu Santo apo pacayapëtaeyaexanapona. Pacuenia Espiritu Santo pacayapëtaeyaexanapona, bajarapacuenia pajumecovënëtaaponare panevajënaeyabelia paneyajavajinavanapanaenexa Cristo.

<sup>28</sup> Tajamonae, ajamatabëcuenesaëya yajavajinavanapanaenatsi Cristo. Bajarapacuenia yajavajinavanapanaenatsi vajacujunaviyaniva pamatababi bajaraponë patsianica. Nexata apo aura tsanetsi bajaraponëjavabelia pamatababi patsianica. <sup>29</sup> Paxamë rabaja payapëtaneme Jesucristo, Dioso pexënatoxae, pexaniacuene pexanabiabijava. Nexata bepayapëtaneme mapacuenieje. Pamonaë peneta pexaniacuene exana, bajarapamonae Dioso pexi.

### Dioso pexi yabara pelivaisi

**3** Pacanaëjere vaxa Dioso vajanacaasivacuene. Nacaasiva bitso. Bajaraxuata Dioso pexicueniatsi nacatane. Xaniajai rabaja. Dioso pexitsi. Mapanacuapijivije Dioso apo peyapëtaexae, nexata bajarapamonae vaxaitsi ata apo nacayapëtae Dioso pexicuenetsi. <sup>2</sup> Tajamonae bitso patacaasivavi, aeconoxae rabaja vaxaitsi daxitatsi Dioso pexitsi. Apo yapëtaetsi abaxë pacuenia itsamatababi vaxaitsi cueneitsijitsiatsi. Itsiata Cristo itsamatababi itsa patsianica, vaxaitsi cuenetaenatsi Cristo pacuenia cueneitsi. Nexata vaxaitsi itsa cuenetaenatsi Cristo, cuenejëpaenatsi. Tsipaji cuenetaenatsi pacuenia Cristo cueneitsi. <sup>3</sup> Cristo pibisiacuene apo pexanaenë caeto ata. Bajaraxuata daxita pamonaë copiaevetavanapa Cristo pepatsijavanexatsica, pevajënae tonajamatabëcuene xaniavaetavanapana. Pibisiacuene apo exanavanapae tsane.

<sup>4</sup> Pajivi pibisiacuene exana, apo jumecovënëtsi palivaisi Dioso najumecopata jivi pejumecovënëtsinexa. Pibisiacuene itsa exana, nexata Dioso pitavetsijava exana. <sup>5</sup> Payapëtaneme rabaja mapacuenieje. Cristo patsica mapanacuayabetsicaje vajanacavecuajibiaexanaenexa pibisiacuene vajaexanaeconimi. Cristo baja cajena caeto ata pibisiacuene apo pexanaenë. <sup>6</sup> Bajaraxuata pajivi baja Cristo yajavaponapona, pibisiacuene apo exanaponapona. Pajivi tsiteca pevajënaeyabelia pibisiacuene exanaponapona, bajarapajivi apo tae baja cajena Cristo. Apo yapëtaenua



cajena. <sup>7</sup>Tajamonae, pëtsa panacopatame itsajivi ata papecayamaxëitojorobinexa. Pajivi exanabiaba pexaniacuene, Dioso pejitsipaecuene, bajarapajivi Dioso aneconi-jibia tanetsi. Pacuenia Cristo jamatabëcueneitsi, bajarajamatabëcueneitsi bajarapajivi. <sup>8</sup>Pajivi tsiteca pevajënaeyabelia pibisiacuene exanaponapona, bajarapajivi dovathi pijajivitonë tsaponapona. Dovathi pibisiacuene pexanaecujinae, apo copatsi. Tsiteca pevajënaeyabelia pibisiacuene exanaponapona mapanacuataje. Bajaraxuata Dioso pexënat patsica mapanacuayabetsicaje daxitajivi dovathi pejamatabëcueneta pibisiacuene pexanabiabijavami pajibiaexanaenexa.

<sup>9</sup>Pajivi baja Dioso pexijivi exanatsi, bajarapajivi baja pibisiacuene apo exanaponapona. Tspaji baja Dioso najamatabëcuenerajutatsi. Bajarapajivi baja copata pibisiacuene pexanabiabijava. Tspaji baja Dioso pexijivi exanatsi. <sup>10</sup>Bajarapacuenia xaniavaetsia yapëtanetsi pajivi Dioso pexijivi exanatsi. Pajivi pijinia dovathi pexijivi exanatsi, yapëtanetsi. Tspaji pajivi Dioso pexijivi apo exanaetsi, pexaniacuene apo exanae. Apo asivanua itsamonae ata.

### **Pacuenia vaxaitsi namataenetsia benaasivatsi tsavanapae yabara pelivaisi**

<sup>11</sup>Dioso baja cajena panejumecovënëtsijavaveliacujinae, pajumetaeyabiabame pejumaitsilivaisi mapacueniaje: “Vaxaitsi namataenetsia benaasivatsi tsavanapae,” pejailivaisi. <sup>12</sup>Vaxaitsi nexata apo bitoyatsi itsamonae ata. Pacuenia bajayatami Cañpijinë itoya pejuyapijinëmi, bajara apo bitsitsi vaxaitsi. Cañpijinë dovathi pijajivitonë tsaponapona. Nexata beyaxuaba pejuyapijinëmi. Pacatsipaebijitsiatsi pacuene yabara Cañpijinë beyaxuaba pejuyapijinëmi. Cañpijinë dovathi pitorobicueniatsi, pibisiacuene exanaponapona. Pejuyapijinëmi pijinia pexaniacuene, Dioso pitorobicueniatsi, exanaponapona. Bajaraxuata Cañpijinë beyaxuaba pejuyapijinëmi.

<sup>13</sup>Tajamonae, pëtsa pajamatabëcuenenabenajacame paxamë ata itsa pacaitoya mapanacuapijivije. <sup>14</sup>Vaxaitsi picani bajayata Dioso pitabarata jamatabëcuenetëpavanapatsi. Itsiata baja aeconoxae Dioso nacajamatabëcueneasaëyaexana vajana-jamatabëcuene copatsixae bajaraponëjavabelia. Yapëtanetsi baja cajena Dioso vajanacajamatabëcuene asaëyaexanaejava. Tspaji itsamonae ata Dioso vajanajuajumecovënëtsivi, asivatsi tsavanapae. Pajivi apo asiva itsamonae ata, Dioso penajuajumecovënëtsivi ata, bajarapajivi Dioso pitabarata jamatabëcuenetëpaponapona. <sup>15</sup>Pajivi itoya itsajivi, Dioso penajuajumecovënëtsivi ata, bajarapajivi jamatabëcuenejëpaponapona jivibenë. Paxamë rabaja payapëtaneme mapacueneje. Jivibenë baja cajena apo xainae tsane matacabi apo pevereverecaejava. <sup>16</sup>Yapëtanetsi baja cajena mapacueneje. Jesucristo vajanacaasivaxae, nacopata pebeyaxuabinexatsi vajaneconi yabara. Nexata vaxaitsi ata vajaasivaxae Dioso vajanajuajumecovënëtsivi, bejamatabëjumaittsi mapacueniaje: “Itsamonae nebeyaxuabijitsia ata tsane, yavenonaenajë Dioso patanajuajumecovënëtsivi,” bejamatabëjaittsi. <sup>17</sup>Ponë Dioso pejumecovënëtsinë, bitso pexainaenë pexainaejava, tae ata itsanë pijinia Dioso pejumecovënëtsinë penamatavenonaejava, itsiata itsa apo yavenonae, nexata acuenebi pejumaittsijava: “Xanë bitso Dioso jitsipajë tajamatabëëthëtojavavetsina,” pejaijava. <sup>18</sup>Tajamonae, “Asivanë raja itsamonae ata,” apo bejaittsi saya vajacuibovojotota pexaniacuene toexanaenejevatsi bajarapamonaejavabelia. Biji rajane bajarapamonae vajanacayapëtaenexa pepacuene vajaasivajava, pexaniacuene betoexanatsi. Beyavenonatsi bitso penamatavenonaejavata.

### Pacuenia apo auratsi Dioso pitabarata yabara pelivaisi

<sup>19</sup> Daxitatsi vaxaitsi itsa asivatsi tsavanapae tsane itsamonae ata, Dioso vajanajuajumecovënëtsivi, nexata nayapëtaenatsi Dioso pexicuenetsi. Ajunavijibianua jinavanapaenatsi Dioso pitabarata. Dioso baja cajena pexaniajailivaisi jivijavabelia petsipaebinë. <sup>20</sup> Dioso baja cajena bitso ayajamatabëcuenenë. Dioso peypapëtaenë daxitacuene. Bajaraxuata vaxaitsi jamatabëjumaisi atatsi: “Xanë bitso ajamatabëcuenebejenë pibisiacuene taexanaejava yabara,” jamatabëjai atatsi, tsiaata xainatsi Dioso vajanacayavenonaenë. Dioso vajanacaitaxutotsioniataenë. Tsiteca nacaasiva. Nacaevetanua. <sup>21</sup> Tajamonae bitso patacaasivavi, vajajamatabëëthë-tota itsacueneneconì itsa apo xainaetsi, nexata apo auratsi Diosojavabelia vajavajëtsinexa. Jamatejematsi Dioso pitabarata. <sup>22</sup> Dioso nacarajutsiana daxita xua vajëtsianatsi Diosojavabelia. Bajarapacuenia Dioso nacarajutsiana tsipaji Dioso jumecovënëtavanapatsi pacuenia nacaitoroba. Pacuene yabara Dioso sivajamatabëcuenebarëya, bajarapacuene ata vaxaitsi exanavanapatsinua. <sup>23</sup> Dioso raja nacaitoroba vajajamatabëjumaisinexa mapacueneje: “Jesús baja patsica, ponë copi-aevetavanapatsi vajanacacapanepaenexa. Bajaraponë Dioso baja cajena pexënato,” vajajamatabëjainexa. Nacaitorobanua namataenetsia vajanaasivatsavanapaenexa. <sup>24</sup> Pajivi jumecovënëta Dioso pitorobilivaisi, bajarapajivi Dioso yajavaponaponaena. Bajarapajivi ata pijinia Dioso yajavaponaponaenatsi. Yapëtanetsi pepacuene Dioso vajanacayajavaponaponaejava. Tsipaji Espíritu Santo, ponë Dioso nacarajuta, bajaraponë nacayapëtaeyaexana pepacuene Dioso vajanacayajavaponaponaejava.

### Espíritu Santo yabara, Cristo pijavajabitsaë ata, yabara pelivaisi

**4** Tajamonae bitso patacaasivavi, itsamonae itsa pacajumai tsane mapacueni-aje: “Espíritu Santo raja, ponë netsijamatabëeca, netsipaeba. Nexata juya bajarapalivaisi pacatsipaebatsi,” itsa pacajai tsane, pëtsa abaxë caecuenia pajumecovënëtamë. Copiaya abaxë pajamatabëcueneëjëbianame paneyapëtaenexa itsa xaniajai bajarapamonae Espíritu Santo petsipaebilivaisitsi pacatsipaebiana. Bajarapacuenia pajamatabëcueneëjëbianame tsipaji raja daxitajava mapanacuajavaje yacaëjëpa penajumetsënëtsilivaisi petsipaebanajetarubenaevi. Bajarapamonae penajumetsënëtsilivaisi daxitajivijava tsipaebanajetarubena. BeDioso itajara pejumelivaisi petsipaebivicuenia, tsipaebanajetarubena. <sup>2</sup> Nexata bajarapacuenia copiaya itsa pajamatabëcueneëjëbianame, payapëtaename pamonaë tsijamatabëecatsi Espíritu Santo. Pamonaë raja peneta pepacuene Espíritu Santo tsijamatabëecatsi, jumaisi mapacueniaje: “Jesucristo itsa patsica mapanacuayabetsicaje, naexana pacuenia vaxaitsi baexanatsi mapanacuataje,” jai peneta pamonaë pepacuene Espíritu Santo tsijamatabëecatsi. <sup>3</sup> Pamonaë peneta jumaisi mapacueniaje: “Jesucristo raja Dioso apo pexënato,” jai, bajarapamonae cajena apo tsijamatabëecaetsi Espíritu Santo. Bajarapamonae tsijamatabëecatsi ponë cueneitoyatsi Cristo. Ponë baja pavënëli-vaisitaneme pepatsijavanexa, ponë Cristo cueneitoyatsi, bajaraponë pata baja. Ponapona rabaja mapanacuajavaje. <sup>4</sup> Tajamonae, paxamë rabaja Dioso papijajivimë. Nexata baja penajumetsënëtsilivaisi papecatsipaebivi, apo pacayamaxëitojorobicapanepae. Apo caëjëpaetsi papecayamaxëitojorobijava. Tsipaji ponë pacatsijamatabëeca, bajaraponë bitso piasaënë, ponë ponapona mapanacuajavaje, mata-toxenetsia. <sup>5</sup> Pamonaë tsipaebapona penajumetsënëtsilivaisi, bajarapamonae saya

Dioso apo peyapëtaevi. Bajaraxuata mapanacuapijicuene cacuaicuaijai. Nexata pamonae bitso jitsipa maëpanacuapijicueneje, namuxunaevetabiabatsi. <sup>6</sup>Vaxaitsi raja Dioso pijajivitsi. Pajivi yapëtane Dioso, vaxaitsi ata nacanamuxunaeveta. Pajivi Dioso apo jitsipae, vaxaitsi ata apo nacanamuxunaevetsi. Nexata bajarapacuenia nayapëtane pajivi tsijamatabëecatsi Espíritu Santo. Espíritu Santo baja cajena jivi pexaniajailivaisi petsipaebinë. Bajara pijinia pacuenia nayapëtane pajivi ata tsijamatabëecatsi dovathi. Dovathi baja cajena penajumetsënëtsilivaisi jivi petsipaebinë.

### Dioso vajanacaasivanë yabara pelivaisi

<sup>7</sup>Tajamonae bitso patacaasivavi, daxitatsi namataenetsia benaasivatsi tsavana-pae. Tsipaji Diosojavaverena pitsapa vajanacaasivajamatabëcuene. Pajivi peneta asiva Dioso penajuajumecovënëtsivi, bajarapajivi Dioso pexijivi. Bajarapajivi yapëtane Dioso. <sup>8</sup>Pajivi apo asiva itsamonae ata, bajarapajivi apo yapëtae Dioso. Tsipaji baja cajena Dioso bitso asiva daxitajivi. <sup>9</sup>Dioso raja vajanacaasivajava, nacayapëtaeyaexana mapacueniaje. Dioso athëbëvetsica nacatoitorobica pepo caenë pexënato mapanacuayabetsicaje. Bajarapacuenia Dioso pexënato nacatoitorobica matacabi apo peverevereaejava vajaxainanexa pexënato vajanacasivatëpaexae. <sup>10</sup>Bajarajamatabëcueneitsi Dioso bitso vajanacaasivajava. Vaxaitsi rajane bevelia Dioso jitsipatsi. Dioso ra picani bitso vaxaitsi nacajitsipa. Bajaraxuata Dioso nacatoitorobica pexënato cruzata vajanacasivatëpaenexa. Nexata Jesús vajanacasivatëpaexae, Dioso baja nacavecuajibiaexana daxita pibisiacuene vajaexanaeconimi.

<sup>11</sup>Tajamonae bitso patacaasivavi, itsa Dioso bajarapacuenia bitso nacaasiva, nexata vaxaitsi ata daxitatsi namataenetsia benaasivatsi tsavanapae. <sup>12</sup>Itsajivi ata cajena abaxë Dioso apo tae. Itsiata baitsi jane vaxaitsi namataenetsia itsa nasivatsi, Dioso baja nacayjavaponapona. Dioso vajanacatojitsipaecuenia itsamonae ata vajasivanexa, Dioso nacajamatabëcueneasaëyaexanapona. <sup>13</sup>Vaxaitsi yajavajinavanapatsi Dioso. Bajara pijinia pacuenia Dioso ata nacayjavaponapona. Yapëtanetsi pexaniajaicuene Dioso vajanacayjavaponaponaeva. Tsipaji baja Dioso nacarajuta Espíritu Santo. <sup>14</sup>Vaxaitsi baja cajena tanetsi Dioso pexënato. Nexata vaxaitsi tsipaebabiabatsi itsamonaejavabelia Dioso pexënato pitorobjavatsica mapanacuayabetsicaje pecapanepaenexa daxita mapanacuapijivije. <sup>15</sup>Pajivi jumaiti mapacueniaje: “Jesús raja Dioso pexënato,” jai, bajarapajivi Dioso yajavaponapona. Bajarapajivi pijinia Dioso ata yajavaponapontsi.

<sup>16</sup>Nexata vaxaitsi jamatabëcueneyapëtanetsi pacuenia bitso Dioso nacaasiva. Dioso cajena piasivanë daxitanacuapijivi. Pamonae itsamonae ata namataenetsia naasiva tsavanapae, bajarapamonae Dioso yajavaponapona. Bajarapamonae ata pijinia Dioso yajavajinavanapa. <sup>17</sup>Nexata pacuenia Dioso nacatojitsipa itsamonae ata vajanasivatsavanapaenexa, bajarapacuenia itsamonae ata asivatsi tsavanapae tsane. Nexata pamatacabi Dioso naneconitsiaexanaponaena daxita pibisiacuene pexanaevi, bajarapamatacabi vaxaitsi Dioso pitabarata apo junavitsi tsane. Apo junavitsi tsane Dioso pitabarata tsipaji baja mapanacuataje vaxaitsi asivatsi tsavanapae tsane itsamonae ata pacuenia Cristo daxitatsi nacaasiva. <sup>18</sup>Itsa yapëtanetsi Dioso vajanacaasivajava, apo cjunavitsi itsacuenejava ata. Tsipaji Dioso itsa nacaasiva, nacavecuajibiaexana vajajunavijavami. Pajivi Diosojavabelia naneconita, yapëtane Dioso penaneconitsiaexanaejavanexatsi. Bajaraxuata daxitacuene cjunava. Pajivi

cujunava daxitacuene, abaxë xaniavaetsia apo yapëtae pacuenia Dioso asivatsi. Bajaraxuata cujunava.

<sup>19</sup>Vaxaitsi Dioso asivatsi tsipaji Dioso copiaya nacaasiva. <sup>20</sup>Pajivi jumaitsi ata mapacueniaje: “Xanë raja Dioso asivanë,” jai ata, itsiata itsa itoya itsajivi Dioso pejumecovënëtsijivi ata, nexata saya bajarapajivi penajumetsënëtsijivi. Bajarapajivi itsa apo asiva itsajivi ata, petaeyabiabijivi ata, nexata biji bitsoyo bajarapajivi apo asiva Dioso. Tsipaji biji cajena caeto ata apo tae Dioso. <sup>21</sup>Pajivi asiva Dioso, bajarapajivi biasiva itsajivi ata, Dioso penajuajumecovënëtsijivi. Tsipaji baja cajena Cristo nacaitoroba vajaasivanexa itsamonae ata.

### **Pacuenia vaxaitsi mapanacuataje dovathi jamatabëcueneamoneyabatsi yabara pelivaisi**

**5** Pajivi jumecovënëta: “Jesús raja Cristo, ponë Dioso athëbëvetsica itoro-  
bijitsiatsica vajanacacapanepaenexa,” pejalivaisi, bajarapajivi Dioso pexi-  
jivi exanatsi. Pajivi asiva itsajivi ata, caejivi apo biasiva. Nexata bajarapa-  
jivi daxita pexi beyajavaasiva. <sup>2</sup>Bajara pijinia pacuenia vaxaitsi ata bexanatsi  
itsa asivatsi Dioso. Itsa jumecovënëtatsi pacuenia Dioso nacaitoroba, nexata  
beyajavaasivatsi itsamonae ata, Dioso vajanajuajumecovënëtsivi. Tsipaji bajara-  
pamonae Dioso pexi exanatsi. <sup>3</sup>Vaxaitsi itsa asivatsi Dioso, nexata pacuenia  
Dioso nacaitoroba, jumecovënëtatsi. Pacuenia Dioso nacaitorobapona vajatoex-  
anaenexa, apo nacatsitaayapëbeje. <sup>4</sup>Apo nacatsitaayapëbeje tsipaji baja Dioso  
pexitsi. Nexata caejivitsi canacujitsia Dioso nacacaëjëpaeyaexanapona vajaex-  
anaenexa pacuenia Dioso nacaitorobapona. Najamatabëcueneocopatatsi baja Cristo-  
javabelia vajanacayavenonaenexa mapanacuapijijamatabëcuenevecuaje. Nexata  
bajarapacuenia mapanacuataje dovathi jamatabëcueneamoneyabapontatsi. <sup>5</sup>Pa-  
jivi jumecovënëta Jesús Dioso pexënatocuene, bajarapajivi caëjëpatsi dovathi  
pejamatabëcueneamoneyabinexa.

### **Pacuenia yapëtanetsi Jesús pepacuene Dioso pexënatocuene yabara pelivaisi**

<sup>6</sup>Jesucristo baja cajena athëbëvetsica pepatsinë. Yapëtanetsi Jesús pepacuene  
Dioso pexënatocuene. Tsipaji copiaya bautisabatsi merata. Bajaraxuacujinae cruzata  
beyaxuabatsi. Nexata saya Jesús ëpebautisabicujinaetsi apo ponaponae. Biji ra-  
jane copiaya bautisabatsi. Bajaraxuacujinae cruzata beyaxuabatsi. Espiritu Santo  
ata nacayapëtaeyaexana Jesucristo pepacuene Dioso pexënatocuene. Espiritu  
Santo baja cajena pexaniajainë. Nexata Espiritu Santo vajanacayapëtaeyaexanae-  
java, Jesús Dioso pexënatocuene, bejumecovënëtatsi. <sup>7</sup>Athëbëtatsia jinavanapa  
acueyabi ponëbeje, penajamatabëcuenejëpaevi, pevajunupaebivi Jesucristo Dioso  
pexënatocuene. Pamonaë jinavanapa athëbëtatsia, mapamonaeje: Dioso, Jesu-  
cristo, Espiritu Santo. Bajarapamonae acueyabi ponëbeje, penajamatabëcuenejë-  
paevi, caenë rabaja picani tsaponaponae. <sup>8</sup>Mapanacuata ataje acueyabi xuabeje  
pejamatabëcueneta yapëtanetsi Jesucristo pepacuene Dioso pexënatocuene. Yapë-  
tanetsi Espiritu Santo pejamatabëcueneta. Yapëtanetsinua Jesús pebautisabijavatsi  
ata pejamatabëcueneta. Yapëtanetsinua Jesús cruzata pebeyaxuabijavatsi ata pe-  
jamatabëcueneta. Bajarapaacueyabi xuabeje pejamatabëcueneta yapëtanetsi Jesu-  
cristo pepacuene Dioso pexënatocuene. <sup>9</sup>Dioso baja cajena nacayapëtaeyaexana  
Jesús Dioso pexënatocuene. Mapanacuapijivi ata, itsa nacatsipaeba itsacueneliv-

aisiyo, nexata jumecovënëtabiabatsi pacuenia nacatsipaebabiaba. Itsiata baitsi jane Dioso itsa nacatsipaeba, bejumecovënëtatsi xaniavaetsia pacuenia nacatsipaeba. Tshipaji Dioso bitso pejumenamatamotsinë. Bitso pexaniajainë. <sup>10</sup> Pajivi jumecovënëta Jesús Dioso pexënatocuene, bajarapajivi pejamatabëëthëtota yapëtane bajarapalivaisi pexaniajailivaisicuene. Pajivi apo jumecovënëtsi Jesús Dioso pexënatocuene, bajarapajivi Dioso bepenajumetsënëtsinë tane. Tshipaji bajarapajivi Dioso peyapëtaeyaexanaejavatsi, apo jumecovënëtsi, Jesús Dioso pexënatocuene. <sup>11</sup> Dioso itsa nacayapëtaeyaexana Jesús Dioso pexënatocuene, nacayapëtaeyaexana mapalivaisije. Nacayapëtaeyaexana Dioso vajanacarajutsijavanexa matakabi apo pevereverecejava. Nexata Dioso pexënatocuene pejamatabëcueneta xainaenatsi matakabi apo pevereverecejava. <sup>12</sup> Pajivi yajavaponaponaena Dioso pexënatocuene, bajarapajivi xainaena matakabi apo pevereverecejava. Pajivi apo yajavaponaponaen tsane Dioso pexënatocuene, bajarapajivi apo xainae tsane matakabi apo pevereverecejava.

**Pacuenia Juan muxujioba pecopatsivajënae baja  
petoyaquinaelivaisi mapabaxutotaje yabara pelivaisi**

<sup>13</sup> Pacatoyaquinatsi mapalivaisije panejumecovënëtsivi Dioso pexënatocuene. Pacatoyaquinatsi paneyapëtaenexa matakabi apo pevereverecejava panexainaejavanexa.

<sup>14</sup> Yapëtanetsi Dioso vajanacajumetaejava itsa vajëtatsi vajanacatojitsipaecuenia. Bajaraxuata apo jumejunavitsi vajavajëtsinexa Diosojavabelia. Jamatejematsi Dioso pitabarata. <sup>15</sup> Yapëtanetsi Dioso vajanacajumetaejava itsa vajëtatsi. Nexata yapëtanetsi Dioso vajanacarajutsijavanexa xua vajëtatsi.

<sup>16</sup> Dioso panenajuajumecovënëtsivi itsa pataename pibisiacuene pexanaejava, patovajëtsianame Diosojavabelia, Dioso pejamatabëcuenexaniavaetsinexatsi pibisiacuene pexanaejivi. Bajarapacuenia Diosojavabelia patovajëtsianame itsa payapëtaename paneconi yabara abaxë Dioso apo vecuanaxuabijitsia. Itsajava raja jivi pibisiacuene itsa exana, bajarapaneconi yabara pepacuene jivi Diosovecua naxuabiana. Nexata baja itsa payapëtaename paneconi yabara pepacuene baja bajarapajivi Diosovecua naxuabijitsia, pëtsa patovajëtame Diosojavabelia. Bajarapitsineconi baja pexainaevi panetovajëtsinexa Diosojavabelia, apo pacaitorobitsi. <sup>17</sup> Daxitacuene xua apo pexanepanaecuene jivi exana, pibisiacuene baja cajena. Itsiata baitsi jane bajarapapibisiacuene jivi pexanaejava itsa copabiana, nexata bajarapaneconi yabara itsiata jivi pepacuene Dioso apo vecuanaxuabi tsane.

<sup>18</sup> Yapëtanetsi baja cajena mapacuneje. Pajivi Dioso pexijivi exanatsi, bajarapajivi copata baja pibisiacuene pexanaejava. Tshipaji baja Dioso pexënatocuene, Jesucristo, evetatsi bajarapajivi. Nexata dovathi apo itsacueniabitsi.

<sup>19</sup> Yapëtanetsi daxita vaxaitsi Dioso pexicuenetsi. Yapëtanetsinua itsamonae dovathi pitorobabiabijavatsi pibisiacuene pexanaenexa.

<sup>20</sup> Yapëtanetsinua baja Dioso pexënatocuene, Jesucristo, athëbëvetsica pepatsijavatsica. Patsica vajanacajumatabëcueneta yapëtaeyaexanaenexa pepo Dioso. Vaxaitsi baja yajavajinavanapatsi Dioso. Tshipaji baja yajavajinavanapatsi Dioso pexënatocuene, Jesucristo. Bajaraponë ata pepo Dioso baja cajena, vajanacarajutsinënexa matakabi apo pevereverecejava. <sup>21</sup> Tajamonae, panayajiviitavere papecatsipaebiyaniava palivaisi tsipaebapona pamonaen vajëcabiaba jumapecataeya pexanaenënejavabelia.

## **Mapabaxutoje San Juan cotocaevi toyaquina Dioso pejumecovënëtsivijavabelia**

### **Pexaniajailivaisi yabara, jivi ata penaasivacuene, yabara pelivaisi**

**1** Xanë ancianonënë, pacatoyaquinatsi mapabaxutoje Dioso peccaitapetsiva, nexi yajava. Xanë bitso pacaasivatsi. Itsamonae ata, pamonaë jumecovënëta Dioso pejumelivaisi, bajarapamonae ata pacaasiva. <sup>2</sup>Bajarapacuenia pacaasivatsi tsipaji paxamë ata Dioso pejumelivaisi pajumecovënëtamë. Bajarapalivaisi cajinavanapatsi vajajamatabëëthëtota daxitamatacabijavabelianexa. <sup>3</sup>Pacatovajëtabiabatsi Diosojavabelia, Jesucristo, Dioso pexënatojavabelia ata. Pacatovajëtabiabatsi papecayavenonabiabinexa, papeccaitaxutotsonia taeyabiabinexanua. Pacatovajëtabiabatsinua jamatabëcuenexanepanaeya panejinavanapaenexa. Bajarapacuenia Dioso pacatoexanaena pexaniajailivaisi, Dioso pejumelivaisi, itsa pacajinavanapame, itsamonae ata asivaya itsa pajinavanapamenua.

<sup>4</sup>Bitso sivajamatabëcuenëbarëyanë itsa caxitajarabaxuabajë nexiyajuvënëvi, pejumecovënëtavapanavevi pacuenia vaxa Dioso nacaitoroba. <sup>5</sup>Tajabanava, aeconoxae catsipaebatsi namataenetsia vajanasivanexa. Bajarapalivaisi apo pejanalivaisi picani. Bajayata palivaisi itsa copiaya jumetaneme Jesús pelivaisi, bajarapalivaisi jumejëpa. <sup>6</sup>Vaxaitsi itsa jitsipatsi Dioso, nexata pacuenia Dioso nacaitoroba, bejumecovënëtavapanatsi. Bajarapalivaisi papeccatsipaebijavaveliacujinae, pacaitoroba baja cajena namataenetsia panenasivatsavanapaenexa.

### **Penajumetsënëtsilivaisi daxitanacuanëjava petsipaebanajetarubenaevi yabara pelivaisi**

<sup>7</sup>Penajumetsënëtsilivaisi petsipaebanajetarubenaevi, ayailbitsaëto najetarubena daxitanacuanëjava. “Pacuenia vaxaitsi banaexanatsi, bajarapacuenia Jesucristo naexana mapanacuataje,” pejailivaisi, bajarapamonae apo pejumecovënëtsivi. Bajarapitsijamatabëcuene pexainaevi peyamaxëitojorobivi baja cajena. Bajarapamonae Cristo pijavajabitsaë. <sup>8</sup>Panayajivitaevanapare papecavecuaxuabiyaniava xua pasivanacuenebavanapame Dioso papeccarajutsinexa. Bajarapacuenia panayajivitaevanapare Dioso papeccarajutsinexa daxitajavayo panetonacuenebimatamo.

<sup>9</sup>Pajivi tsiteca pevajënaeyabelia jumecovënëtaponapona palivaisi Cristo tsipaebapona, bajarapajivi vaxa Dioso yajavaponaponatsi. Vaxa Dioso pexënato ata yajavaponaponatsi. Pajivi pijinia copata pejumecovënëtsijava palivaisi Cristo tsipaebapona, bajarapajivi Dioso apo yajavaponaponaetsi. <sup>10</sup>Nexata bajarapitsijivi itsa pona paxamëjavabelia livaisi papeccatsipaebinexa, pëtsa pacajunuame panijaboyaberena. Pëtsa pabajacobamenua bajarapitsijivi. <sup>11</sup>Pajivi bajacobijitsipa bajarapitsijivi, jamatabëcueneyavenonaëjitsipa pibisiacuene pexanaejava. Bajaraxuata pëtsa pabajacobame bajarapitsijivi.

### **Pacuenia Juan jumaitsi pecopiarutaponaelivaisita yabara pelivaisi**

<sup>12</sup>Xanë picani xainajë ayailivaisi patacamuxujjobinexa. Itsiata abaxë apo jitsipaenë bajarapalivaisi patacatoyaquinaenexa mapabaxutotaje. Evetajë abaxë

taponaejava paxamëjavabelia patacataenexa, patacabarëcuaicuaijainexanua, vajajamatabëcuenebarëyanexa bitso.

<sup>13</sup> Nejuyapijiva Dioso pitapetsivatsi pexi, catonajumeitoroba nebajacobinexa.

## Mapabaxutoje, acueyabibaxuto, San Juan toyaquina Dioso pejumecovënëtsivijavabelia

### Pacuenia Juan pexaniajamatabëcuenia tane Gayovënënë yabara pelivaisi

**1** Gayo bitso tacaasivanë. Xanë ancianonënë, catoyaquinatsi mapabaxutoje. Casivatsi bitso tsipaji xamë ata pexaniajailivaisi jumecovënëtame.

<sup>2</sup> Catovajëtabiabatsi Diosojavabelia. Catovajëtabiabatsi daxitacuenejavanë pecatoxanepanaenexa, jumalixanepanaeya neponaponaenexanua. Cavënëlivaisitanetsi rabaja Dioso pitabarata xaniavaetsia Dioso netoponaponaejava pibisiacue ne exanaenejevamë. <sup>3</sup> Itsamonae Dioso pejumecovënëtsivi parena xanëjavaberena. Nexata bajarapamonae xanëjavaberena cavënëlivaisipaeba xaniavaetsia neponaponaejava. Netsipaeba xaniavaetsia asaëya nejumecovënëtaponaponaejava pexaniajailivaisi, Dioso pejumelivaisi. Nexata bitso casivajamatabëcuenenabarëyatsi. <sup>4</sup> Pamona tsipaebabiabajë Dioso pejumelivaisi, bajarapamonae taniji betaxicuenia. Nexata itsa vënëlivaisitaniji bajarapamonae Dioso pejumecovënëtavanapaejava, nexata bitso sivajamatabëcuenenabarëyanë tsabiabi. Itsacuenejava ata pematatsënëa bajarapacuenia apo nejamatabëcuenenabarëyayaexanae.

<sup>5</sup> Xamë xaniavaetsia Dioso tonacuenenabiabame itsa yavenoname Dioso pejumecovënëtsivi. Bajarapamonae saicayanacuaverena pepatsivi ata, yavenoname. <sup>6</sup> Pamona Dioso pejumecovënëtsivi parena xanëjavaberena, daxita majotaje Dioso pejumecovënëtsivi pitabarata, cavënëlivaisipaeba bajarajotalia asivaya neyavenonaejava Dioso pejumecovënëtsivi. Bajarapamonae itsa ponaena pevajënaeyabelia, Dioso pejumelivaisi jivi petsipaebaponaenexa, yavenonaename pacuenia namatavenonaena pijanamutonexa. Bajarapacuenia bajarapamonae itsa yavenonaename, Dioso casivabarëya tsane. <sup>7-8</sup> Bajarapamonae naropoba Jesucristo petonacuenebinexa pexaniajailivaisi, Dioso pejumelivaisi, daxitajivijava petsipaebanajetarubenaenexa. Bajarapamonae apo jitsipae peyavenonaenexatsi pamona Dioso apo pejumecovënëtsivi. Bajaraxuata vaxaitsi Dioso vajajumecovënëtsivi, xanepana vajayavenonaenexa bajarapamonae. Bajarapacuenia itsa yavenonatsi, nexata Dioso nacamata bajarapamonaeta Dioso pijacuene bevajatonanacuenebivi.

### Pacuenia Diótreres pibisiacue ne exana yabara pelivaisi

<sup>9</sup> Xanë bajayata copiaya toyaquinajë Dioso pejumecovënëtsivi, panijatomarata pejinavanapaevi. Itsiata bajarapabaxutota taitorobicuenia Diótreres apo jumecovënëtsi. Jesucristo ata taneitorobinëcuene, apo jumecovënëtsi. Bajaraponë ayaijamatabëcuenenë jamatabënaexana papecanamatacaitorobinënexa. <sup>10</sup> Bajaraxuata itsa patsianajë xamëjavata, catsipaebianatsi daxita pacuenia Diótreres exana. Bajaraponë pibisiacuenia tanebaracuaicuajijajava, taneyabaranajumetsënëtsijava ata, catsipaebianatsi. Itsacuenejavanënu pematatsënëa pibisiacue ne exanabiaba. Diótreres apo copiapitabiabi xaniavaetsia pamona Dioso pejumecovënëtsivi. Itsamonae ata itaveta pecopiapitsiyaniya pepatsivi. Nexata picani pamona Diótreres itaveta, itsiata copiapitabiaba Dioso pejumecovënëtsivi. Nexata pamona Diótreres itavetsi ata, itsiata copiapitabiaba, bajarapamonae Diótreres jamatabëvecuacapit-



sapa Dioso pejumecovënëtsivi penacaetuatsibovecua bajarapamonae pematatsënëa penajoneyaniva bajarapabota.

<sup>11</sup> Gayo, pëtsa exanaponaponame pacuenia pibisiajamatabëcuene pexainaevi baexanavanapa. Exanaponaponare jane pacuenia pexaniacuene pexanaevi baexanavanapa. Pajivi Dioso pexijivi exanatsi, bajarapajivi pexaniacuene exanaponapona. Pajivi Dioso pexijivi apo exanaetsi, bajarapajivi pibisiacuene exanaponapona. Tsi-paji bajarapajivi Dioso apo yapëtae.

### **Pacuenia Demetrio pexaniacuene exana yabara pelivaisi**

<sup>12</sup> Daxitajivi pexaniacuena Demetrio vënëlivaisipaebatsi pexaniacuene pexanaponaponaejava. Espíritu Santo baja cajena pexaniajailivaisi jivi peyapëtaeyaexanaenë. Nexata Espíritu Santo jivi yapëtaeyaexanaponatsi pexaniacuene Demetrio pexanaponaponaejava. Paxanë ata baja cajena payapëtaniji Demetrio pexaniacuene pexanaponaponaejava. Nexata daxitajivijava patsipaebaponajë bajarapalivaisi. Paxamë ata paneyapëtaneme pexaniajailivaisi patatsipaebaponaejava.

### **Pacuenia Juan jumaitsi pecopiarutsilivaisiyota yabara pelivaisi**

<sup>13</sup> Xanë picani xainajë ayailivaisi tacamuxujibinexa. Itsiata abaxë apo jitsipaenë bajarapalivaisi tacatoyaquinaenexa mapabaxutotaje. <sup>14</sup> Tsi-paji jamatabëcatanetsi bepíjia. Nexata abaxë tajacuata cabarëcuaicuaijaitsi tsane.

<sup>15</sup> Catovajëtatsi Diosojavabelia pecayavenonaenexa jamatabëcuenexanepanaeya neponaponaenexa. Daxita pecayapëtaevi, majotaje pejinavanapaevi, cabajacobalia. Nebajacobiana caejivi canacujitsia, daxita vajayapëtaevibeje.

## **Mapabaxutoje San Judas toyaquina Dioso pejumecovënëtsivijavabelia**

### **Pacuenia Judas mapabaxutoje toyaquina Dioso pejumecovënëtsivijavabelia yabara pelivaisi**

**1** Xanë Judasnë, Jesucristo pijajivitonënë, Santiago pejuyapijinënë. Pacatoy-aquinatsi mapabaxutoje paxamë Dioso papecaasivaivi. Dioso pacajunata papijajivinexamë. Paxamë asaëya Dioso pajumecovënëtavanapame Jesucristo papecajavavaponaponaexae. <sup>2</sup>Pacatovajëtatsi Diosojavabelia bitso papecaitaxutotsoniataenexa. Pacatovajëtatsinua Diosojavabelia itsamonae ata Dioso pitabarata barajamatabëcuenexanepanaeya panejinavanapaenexa. Pacatovajëtatsinua Diosojavabelia namataenetsia panenasivanexa.

### **Pacuenia Judas toyaquina Dioso pejumecovënëtsivijavabelia pejumecovënëtsiyaniva penajumetsënëtsilivaisi petsipaebavanapaevitsi yabara pelivaisi**

(2 Pe 2.1-7)

<sup>3</sup>Tajamonae bitso patacaasivavi, jamatabëpacatoyaquinatsi picani matavëjëa paneyapëtaenexa Dioso papecacapanepaejavanexa panijaneconivecua. Jamatabëpatoyaquinatsinua picani paneyapëtaenexa paxanë ata Dioso patanecapanepaejavanexa. Itsiata bajaraxua yabara apo pacatoyaquinae tsanetsi mapabaxutotaje. Vënëlivaisitaniji paxamëjavata pepatsijava penajumetsënëtsilivaisi petsipaebaponaeivi. Bajaraxuata jitsipajë patacatoyaquinaenexa panejumecovënëtsiyaniva bajaramonae papecatsipaebilivaisi. Tsipaji bajarapamonae pexaniajailivaisi, palivaisi vaxaitsi jumecovënëtatsi, bajarapalivaisivecua, saicayalivaisi pacatsipaebavanapa. Nexata paxamë bajarapamonae ajumesaëya patsipaebare palivaisi vaxaitsi jumecovënëtavanapatsi. <sup>4</sup>Tsipaji bajarapamonae, penajumetsënëtsilivaisi papecatsipaebavanapaevi, paxamë tuatuajëta najoneyabiaba pacatsitanajamatabëcuene itajëtsinejeva. Bajarapamonae jamatabëcuenenavëxaniabiaya jumai tsabiabi: “Dioso baja cajena nacaitaxutotsoniatane vajanacacapanepaenexa. Bajaraxuata pibisiacuene exanae atatsi, apo itsacuene,” jai tsabiabi bajarapamonae. Bajarapamonae apo jumecovënëtsi caenë Dioso vajanacaevetsicuene. Apo jumecovënëtsinua caenë Jesucristo vajatuxanenëcuene. Bajarapamonae apo exanae pacuenia Dioso jitsipa. Apo exanaenua pacuenia Jesucristo ata jitsipa. Bajarapamonae itsamatacabi Dioso penaneconitsiaexanaejavanexatsi pijaneconi yabara, Dioso tajëvelia pejumelivaisibaxutota vajunupaebatsi.

<sup>5</sup>Payapëtaneme rabaja mapacueneje. Bajayata vajatuxanenë Dioso pijajivi capanepa Egipto nacuavecua, Israel nacuyaberena. Nexata baja payapëtae atamë bajarapacuene, itsiata jitsipajë panenajamatabënepitsinexa icatsia bajarapacuene. Bajarapacuenia vajatuxanenë Dioso pijajivi capanepae ata, pecapanepaecujinae icatsia verebiaba bajarapamonaemiyajuvënëvi. Bajarapacuenia verebiaba tsipaji bajarapamonae apo jumecovënëtsitsi. <sup>6</sup>Panajamatabënepirenuu pacuenia Dioso exana angelevijavabelia ata. Angelevi Dioso tonacuenebavanapa athëbëtatsia. Angeleviyajuvënëvi apo exanae pacuenia Dioso itorobatsi. Apo jinavanapaenua it-

sajota picani Dioso tocopata pejinavanapaenexa. Bajaraxuata Dioso ángeleviyajuvenëvi cëbiaya jinavanapaeyaexana itsanacuata, pitaquirinacuata. Bajarajota ángelevi copiaevetavanapaeyaexanatsi Dioso penaneconitsiaexanaejavanexatsi. Nexata pamatacabi Dioso daxitamatacabijavabelianexa naneconitsiaexanaena daxita pamonaenaneconita Dioso javabelia, bajarapamatacabi Dioso bajarapaángelevi atananeconitsiaexanaena daxitamatacabijavabelianexa.

<sup>7</sup> Panajamatabënapirenuua Sodoma tomarami ata, Gomorra tomarami ata, pemuxuneneta penaeotomaranëmi ata. Pamonaemi jinavanapa bajarapatomaranëta, bitso pibisiacuene exanabiaba. Bajarapamonaemi apo jumecovënëtsi Dioso. Apo jumecovënëtsinua ángelevi ata. Bajarapamonaemi pevitota bitso pibisiacuene exanabiaba pevëna pebijivijavabelia. Bajaraxuata Dioso verebiaba bajarapamonaemi. Bajarapacuenia Dioso verebiaba bajarapamonaemi, pamonaecotocaevi jinavanapamapamatacabitaje, peyapëtaenexa. Nexata bajarapamonaenata pibisiacuene pexanaeyaniva, apo pevereverecaesotojavabelia Dioso penaneconitsiaexanaeyanivatsi.

<sup>8</sup> Bajarapacuenia bajayata Dioso naneconitsiaexana pamonaemi pibisiacuene exanavanapa. Bajarapacuenia Dioso naneconitsiaexanaenata pamonaemi bajayata pibisiacuene exanavanapa, itsiata pamonaenapenajumetsënëtsilivaisi pacatsipaebavanapa, apocanaëjëtsi Dioso penaneconitsiaexanaejavanexatsi. Pamonaenapenajumetsënëtsilivaisi pacatsipaebavanapa, pibisiacuene exanabiaba. Bajarapamonaepina majitsinaebotane papibisiacuene bajarapamonaenaxanaejitsia. Bajaraxuata nexata bajarapamonaenapibisiacuene exanabiaba pevitota. Apo jumecovënëtsipacuenia Dioso itorobatsi. Dioso pijaángelevi atanabajarapamonaenapibisiacuena baracuaicuajjai tsabiabi. <sup>9</sup> Angelnë Miguel, ángelevi penamatacaitorobinë. Angelnë Miguel bitso ayajamatabëcueneenë ata, yayiatane dovathi. Pibisiacuena apo baracuaicuajjai. Apo bijataenua. Bajayata Moiséspijinë petëpanucaenë jamatabëpitatsi picani dovathi. Nexata ángelnë Miguel apo copatsi Moiséspijinë dovathi pepitsinexatsi. Nexata dovathibeje, ángelnë Miguelbeje, najumenotabeje Moiséspijinëmi yabara. Itsiata bajarajota ángelnë Miguel pibisiacuena apo bijatae dovathi. Saya xaniavaetsia ángelnë Miguel jumaitsi dovathijavabelia: “Dioso raja cabijataena,” jai. <sup>10</sup> Itsiata bailsi jane pamonaenapenajumetsënëtsilivaisi pacatsipaebavanapa, xaniavaetsia ángelevi apo tae ata, apo yapëtae atanua, pibisiacuena baracuaicuajjai tsabiabi. Nexata pacuenia unupijidujuai apo cujarubi atatsi, itsiata pijacuata yapëtane pexanaejavanexa, bajara pijinia pacuenia bajarapamonaenata saya pijacuata yapëtane mapanacuapijicuene pexanaenexa. Nexata exanavanapapibisiacuene pacuenia jamatabëexana. Nexata itsamatacabi Dioso verebiabiana bajarapamonaenabajarapapibisiacuene pexanaexae.

<sup>11</sup> Bitso bejiobi tsane pamonaenapenajumetsënëtsilivaisi pacatsipaebavanapal bajarapamonaenadioso naneconitsiaexanaena. Tspiji pacuenia bajayata Caínpijinë jamatabëcueneitsi, bajarapamonaenata jamatabëcueneitsi tsavanapae. Bajayata Caínpijinë pibisiacuene exanaponapona pacuenia jamatabëexana. Pacuenia bajayata Balaampijinë atanajamatabëcueneitsi, bajarajamatabëcueneitsi tsavanapae pamonaenapenajumetsënëtsilivaisi pacatsipaebavanapa. Bajayata Balaampijinë Dioso apo jumecovënëtsipacuenia itorobatsi. Balaampijine palata pepitsinexa, jivi matacapona pibisiacuene pexanaenexa. Pacuenia bajayata Corépijinë atanajamatabëcueneitsi, bajara jamatabëcueneitsi tsavanapae pamonaenapenajumetsënëtsilivaisi pacatsipaebavanapa. Bajayata Corépijinë apo jumecovënëtsipacuenia

Moiséspijinē itorobatsi. Nexata Corépijinē beyaxuabatsi Dioso. Bajara pijinia pacuenia pamonaē penajumetsēnētsilivaisi pacatsipaebavanapa, pibisiacuene pexanaexae, nexata Dioso verebiabiana bajarapamonaē. <sup>12</sup>Pamonaē penajumetsēnētsilivaisi pacatsipaebavanapa, payajavanacaetuatabiabame itsa panacaetuatabiabame panenabaninexa. Paxamē panacaetuatabiabame namataenetsia panenasi-vaxae. Nexata bajarapamonaē najoneyabiaba panenacaetuatsijavata. Bajarapamonaē pibisiacuene pexanabiabixae, bepiauxuirajava paxamē tuatuaĵeta. Bajarapamonaē aurajibia ayaijava xaeyabiaba. Petocopatsinexa itsamonaē ata penaxaenexa, apo najamatabēxainabiabi. Pacuenia pijaoveja pevetsivi xaniavaetsia baeveta pijaoveja, bajarapacuenia itajara pacaeveta. Itsiata apo pacaevetsi xaniavaetsia. Ēpamonaē saya naeveta. Bajarapamonaē pexanaejava, itsacuenejavayonexa ata apo xanepanaē. Yapētanetsi pacuenia itsi vaita. Vaita itarērēbo pitsapae ata, itsi-ata ema apo jopae. Jovibo saya caponatsi. Nexata itsamonaē peubijavaxi totsaquenae atatsi, apo jamatabēcuenejavenonaetsi. Bajara saya jamatabēcueneitsi tsavanapae pamonaē penajumetsēnētsilivaisi pacatsipaebavanapa. Tsipaji apo jamatabēcuenejavenonaē itsajivi ata. Peubinaē, ponae apo nacuaitabiabi penacuait-simatacabita ata, bajaraponaē apo xanepanaē itsacuenejavayonexa ata. Bajara saya jamatabēcueneitsi tsavanapae pamonaē penajumetsēnētsilivaisi pacatsipaebavanapa. Tsipaji apo jamatabēcuenejavenonaē itsajivi ata. Peubinaē, ponae apo nacuaitabiabi penacuait-simatacabita ata, bajaraponaē peubinē yatabutopaya juta petajuitsinexa isotojavabelia. Bajara pijinia pacuenia Dioso naneconitsiaexanaena pamonaē penajumetsēnētsilivaisi pacatsipaebavanapa pibisiacuene pexanabiabixae. Nexata bajarapamonaē Dioso xuabianatsi infiernojavabelia. <sup>13</sup>Pacuenia malataca caecovēta apo rucae, caponanua piaxuirapērē pitapayabelia, bajara saya jamatabēcueneitsi tsavanapae pamonaē penajumetsēnētsilivaisi pacatsipaebavanapa. Caejamatabēcuene apo xainabiabi. Bajarapamonaē piauracuene pexanabiabixae, nexata bepiauxuirajava paxamē tuatuaĵeta. Bajarapamonaē pejamatabēcueneta jamatabēcuenebijianabiaba itsamonaē Dioso pejumecovēnētsivi. Pacuenia athēbēvet-sica tulupu othopaena pevereverecaenexa, bajara pijinia pacuenia bajarapamonaē ata vereverecaena. Diosovecua naxuabiana. Tsipaji copaba pejumecovēnētsijavami pexaniajailivaisi. Bajaraxuata Dioso bajarapamonaē naneconitsiaexanaenatsi. Nexata bajarapamonaē pitaquirinacuata jinavanapaena daxitamatacabijavabelianexa.

<sup>14</sup>Enocpijinē bajayata ponapona. Bajaraponēmi Adānpijinē pemomoxiyajuvēnēnē. Nexata Enocpijinē Dioso pejamatabēcueneta bajayata tajēvelia vajunupaeba, pamonaē aeconoxae mapamatacabitaje penajumetsēnētsilivaisi pacatsipaebavanapa. Enocpijinē baja cajena bajayata tajēvelia bajarapamonaē yabara jumaitsi mapacueniaje: “Vajatuxanenē Cristo, pijajivi Ángelevi, ayaibitsaētoxaneto yajava, najetarucaena. <sup>15</sup>Najetarucaena penaneconitsiaexanaenexa daxita pamonaē apo exanaē Dioso pitorobicueniatsi. Najetarucaena penaneconitsiaexanaenexanua daxita pamonaē pibisiacuenia baracuaicuaijai Dioso,” jai baja cajena bajayata tajēvelia Enocpijinē. <sup>16</sup>Pamonaē penajumetsēnētsilivaisi pacatsipaebavanapa, apo sivajamatabēcuenebarēya itsacuenejavayo ata. Nexata pibisiacuenia baracuaicuaijai tsabiabi daxita xua bajarapamonaē tocopiapataponatsi. Apo jumecovēnētsi pacuenia Dioso itorobatsi. Nexata bajarapamonaē exanavanapa pijacuata penatojitsipacuenia. Bajarapamonaē ayaijamatabēcuenevi nataeya navajunupaebabiaba xua exana. Itsamonaējavabelia itsa cuaicuaijai, pexaniacuenia cuaicuaijai tsabiabi. Bajara-

pacuenia pexaniacuenia cuaicuajai tsabiabi saya pebarëyataenexatsi, perajutsinexatsinua penamatavenonaejavanë.

**Pacuenia Dioso pejumecovënëtsivi muxujiobatsi pejumecovënëtsiyaniva penajumetsënëtsilivaisi petsipaebavanapaevitsi yabara pelivaisi**

<sup>17</sup>Tajamonae bitso patacaasivavi, panajamatabënapire pacuenia baja cajena tajëvelia pacatsipaeba apóstolevi, vajatuxanenë Jesucristo pijajivi. Apóstolevi baja cajena tajëvelia pacatsipaeba pepatsijavanexa penajumetsënëtsilivaisi papecatsipaebivinexa. <sup>18</sup>Apóstolevi baja cajena tajëvelia pacajumaitsi mapacueniaje: “Nacua pecopiarucaevajënaeyota, itsamonae capocaponaena pexaniajailivaisi, Dioso pejumelivaisi. Bajarapamonae exanavanapaena pibisiacuene, pacuenia pijacuata natojtsipa,” pacajai baja cajena tajëvelia apóstolevi. <sup>19</sup>Pamonae penajumetsënëtsilivaisi pacatsipaebavanapa, bajarapamonae papecatsipaebilivaisita, Dioso panejumecovënëtsivi pacanavecuanatsanaeyaexanapona. Bajarapamonae saya najamatabëxaina ëmapanacuapijijamatabëcueneje. Nexata pibisiacuene exanavanapa pacuenia pijacuata natojtsipa. Bajarapamonae Espiritu Santo apo tsijamatabëcaetsi.

<sup>20</sup>Tajamonae bitso patacaasivavi, asaëyata Dioso pajumecovënëtavanapare. Pacuenia Espiritu Santo pacaitoroba, pavajëtabiabare Diosojavabelia. <sup>21</sup>Paxamë bitso Dioso pacaasiva. Bajaraxuata pacuenia Dioso pacaitoroba, pajinavanapare pibisiacuene paneexanaeyaniva. Bajayajebi pacopatsinejevamë, pacopiævetavanapare maticabi apo pevereverecejava papecarajutsinexa vajatuxanenë papecaitaxutotsoniataexae.

<sup>22</sup>Itsamonae jumecovënëtsi ata pexaniajailivaisi, Dioso pejumelivaisi, itsiata jumeabapona. Bajarapitsivi payavenonare xaniavaetsia pejumecovënëtsinexa bajarapalivaisi. <sup>23</sup>Bajarapamonae isotojavabelia bepejopaevinexa. Tsjipaji pibisiacuenejavabelia jamatabëjopa. Bajaraxuata payavenonare bajarapitsivi. Itsamonae pijinia bitso pibisiacuene exanavanapa. Bajarapapibisiacuene paitoyamëre. Bajarapamonae itsiata paitaxutobejiobiataema. Payavenonapona bajarapapibisiacuene pecopatsinexa. Itsiata baitsi jane xania. Panayajivitaema. Pëtsa paxamë ata bajarapamonaeta pibisiacuene panaexaname.

**Pacuenia apóstolenë Judas itoroba daxita Dioso pejumecovënëtsivi: “Dioso, bitso ayajamatabëcuenenëmë,” pejainexa Diosojavabelia yabara pelivaisi**

<sup>24</sup>Dioso caëjëpatsi papecaevetsinexa pibisiacuene paneexanaeyaniva. Nexata pamaticabi Dioso naneconitsiaexanaena daxita pijaneconi pexainaevi, paxamë ata pacanubenaeyaexanaena bajaraponë Dioso, penivenivenacotia pexainaenë, pitabarata. Itsiata baitsi jane paxamë paneconijibimë tsane. Bitso pabarëyamë tsane. <sup>25</sup>Bajaraponë pepo caenë Dioso. Bajaraponë Dioso nacacapanepaena vajatuxanenë Jesucristo cruzata vajanacasivatëpaexae vajaneconi yabara. Bajaraxuata daxitajivi bejumaitsi Diosojavabelia: “Diosomë, bitso ayajamatabëcuenenëmë,” bejai. Betsipaebaponanua itsamonaejavabelia Dioso bitso ayajamatabëcuene pexainanenëcuene. Dioso cajena daxitanacua pevetsinë. Betsipaebaponanua itsamonaejavabelia Dioso pecaëjëpaejavatsi pevetsinexa daxitajivi. Bajarapacuenia Dioso jamatabëcueneitsi tsaponapona mapanacuaje pexanaevajënaeya, mapamaticabi ataje, daxitamaticabijavabelianexa ata. Bajara itsi tsane.

## **San Juan peyaquinaelivaisi pacuenia tajëvelia Dioso tsitajëtatsi pacuenia itsijitsia mapanacuataje**

### **Pacuenia tajëvelia Jesucristo Dioso tsitajëtatsi, juya bajarapacuenia Jesucristo petsitajëtsijava Juanjavabelia yabara pelivaisi**

**1** Daxita xuanë Jesucristo tajëvelia Dioso tsitajëtatsi, daxita bajaraxuanë pelivaisi, xanë Juannë, yaquinajë mapabaxutotaje. Bajaraxuanë baja bepijiayo copiapatsiana. Xuanë tajëvelia Dioso tsitajëtatsi Jesús, bajaraxuanë juya Jesús tsitajëtsiana pijajivijavabelia. Bajaraxuata nexata Jesús itorobica pijaángel xanëjavabetsica. Nexata bajaraxuanë jumapecataeya tajëvelia netsitajëta Jesús pijaángel. Neyapëtaeyaexananua pajamatabëcuenelivaisi xaina bajaraxuanë. <sup>2</sup>Nexata daxita bajaraxuanë pacuenia taniji, pelivaisi yaquinajë mapabaxutotaje. Pacuenia Dioso nejumaitsi, yaquinajë. Pacuenia Jesucristo ata jumaitsi, bajaraxua ata yaquinajë.

<sup>3</sup>Pajivi tsimuxulebiana mapabaxutoje Dioso pejumecovënëtsivi penacaetuatsijavata, jamatabëcuenebarëya tsane. Pamonaë ata namuxunaevetsiana mapalivaisije, nexata itsa jumecovënëtsiana pacuenia Dioso tajëvelia jumaitsi, bajarapamonae ata jamatabëcuenebarëya tsane. Bajarapacuenia jamatabëcuenebarëya tsane tsipaji baja imoxoyo pevajënaë tsaponae pecopiapatsinexa daxita xuanë pelivaisi yaquinajë mapabaxutotaje.

### **Pacuenia Juan toyaquina siete patomarabejepijivi, Dioso pejumecovënëtsivi, yabara pelivaisi**

<sup>4</sup>Xanë rabaja Juannë. Pacatoyaquinatsi siete papabitsaëtomëbeje, Dioso panejumecovënëtsivi, Asiavënë nacuata panejinavanapaevi. Ajena, mapamatacabitaje, Dioso ponapona. Dioso nacia pexanaevajënaeya ata, Dioso ponapona. Daxitamatacabijavabelianexa ata Dioso ponapona. Pacatovajëtatsi Diosojavabelia papecajamatabëcuene barëyayaexanaenexa, papecayavenonaenexanua. Siete paespiritubeje nubena Dioso peecaejava, tronovënëjava, pitabarata. Pacatojitsipatsi bajarapamonae papecajamatabëcuene barëyayaexanaenexa, papecayavenonaenexanua. <sup>5</sup>Jesucristojavabelia ata bajarapacuenia pacatovajëtatsi. Jesucristo baja cajena pexaniajailivaisi, Dioso pejumelivaisi, jivi tsipaebabiaba. Daxita petëpaevivacqua, Jesús baja namataxainaeya Dioso asaëyaexanatsi petëpaejavavegua. Mapanacuata jivi pevetsivi ata matatoxenetsia, Jesús pepo pevetsinë daxitacuene. Jesús vajanacaasivaxae, nacasivatëpa. Nexata baja nacaveguaajibiaexana daxita pibisiacuene vajaxanaeconimi. <sup>6</sup>Nexata baja Jesús pijajivitsi nacaexana itsamatacabi vajanacabarëevetsinexa daxitacuene. Jesús baja nacaexananua sacerdotevitsi, Jesús paxa Diosojavabelia jivi vajatovajëtabiabinxexa. Nexata vaxaitsi daxitamatacabijavabelianexa ayajjamatabëcuene rajutabianatsi Jesúsjavabelia. ¡Apo vereverecae tsane Jesús daxitacuene pevetsijava! Bajara itsi tsane.

<sup>7</sup>¡Panenamuxunaevere mapalivaisije! Cristo raja najetarucaena athëbëvetsica itarërëbota. Pamatacabi Cristo najetarucaena athëbëvetsica, daxitajivi taenatsi. Pamonaë ata yenecacuatatsi, bajarapamonae ata taenatsi. Daxita nacuanëpijivi, pamonaë Dioso apo pejumecovënëtsivi, itsa taena Cristo penajetarucaejava athëbëvet-

sica, nuena pecajunavi. Bajara itsi tsane jivi itsa taena Cristo athëbëvetsica penajetaruaejava.

<sup>8</sup> Jesús nayabarajumaitsi mapacueniaje: “Xanë rajane baja daxitacuene pepo tataxuxuabinë. Xanë rajane baja icatsia daxitacuene tacopiaruaeyaexanaenënexa,” nayabarajai Jesús daxitacuene pevetsinë, daxitacuene pexanaenexa ata pecaëjë-paenëtsi. Ajena mapamatacabitaje Jesús ponapona. Dioso nacua pexanaevajënaeya ata, Jesús ponapona. Daxitamatacabijavabelianexa ata Jesús ponapona.

### **Pacuenia Juan Jesús yacotiaya tsitanaitajëtatsi yabara pelivaisi**

<sup>9</sup> Xanë Juannë, panijabananënë. Tsipaji najuajumecovënëtavanapatsi Jesucristo. Nexata pacuenia paxamë ata itsamonaë pacabejiobiaexanapona Dioso papijajivix-aemë, bajara pijinia pacuenia xanë ata itsamonaë nebejiobiaexanapona. Jesucristo pijajivitsi nacaexana itsamatacabi vajanacabarëevetsinexa daxitacuene. Jesucristo papecayavenonaexae, pacaasaëmë tsavanapae Dioso panejumecovënëtsijava. Bajara pijinia xanë ata itsinë. Dioso pejumelivaisi jivi tatsipaebabiabixae, naneconitsia ponaponajë Patmosvënë tunaetota. Jesucristo pelivaisi ata jivi tatsipaebabiabixae, naneconitsiaponaponajë. <sup>10</sup> Nexata Patmosvënë tunaetota domingota Espiritu Santo netsijamatabëvënëca. Nexata tapënëverena pecuaicuaijajava ayaijume, betrompetajume penajumetsijava, jumetaniji. <sup>11</sup> Pecuaicuaijajava nejumaitsi mapacueniaje:

—Xanë rajane baja daxitacuene pepo tataxuxuabinë. Daxitacuene icatsia tacopiaruaeyaexanaenënexa. Xua baja taneme, bajaraxua baja pelivaisi copiyaya yaquinare. Xuanë ata icatsia aeconoxae taeponaename, bajaraxuanë ata pelivaisi yaquinaename. Bajaraxuacujinae bajarapalivaisi toitorobianame Dioso pejumecovënëtsivi, siete patomarabejepijivijavabelia, Asiavënë nacuata pejinavana-paevi. Toitorobianame bajarapalivaisi Efeso tomarapijivijavabelia, Esmirna tomara-pijivijavabelia ata, Pérgamo tomarapijivijavabelia ata, Tiatira tomarapijivijavabelia ata, Sardis tomarapijivijavabelia ata, Filadelfia tomarapijivijavabelia ata, Laodicea tomarapijivijavabelia ata, nejai mapacueniaje tapënëverena pecuaicuaijajava.

<sup>12</sup> Nexata napënëyorotajë tatanexa ponë tapënëverena nebarëcuaicuaijai. Nexata taenubajë siete xuabeje orota pexanaejavanë. Bajaraxuanë pematatuta naitayotanubena. <sup>13</sup> Bajaraxuanë petuatuajëta taenutajë pebi. Bajaraponë yabara jamatabëjumaitsinë:

—Jesús raeta, Daxitajivi Pematapijinë, jamatabëjanë.

Bajaraponë penaxatatsijava apiareca. Nacrobëcëtanuca orota pexanaepana. <sup>14</sup> Mataniojai bitso pacuenia baniojai papaëputo. Pitaxutobeje naitayota. Pacuenia isotocotia bacotia itsi, bajara itaxutocotia itsi. <sup>15</sup> Petaxubeje ata nivenivenabeje pacuenia banivenivena broncevënëjava pesetsijava, beoronanitomi. Pecuaicuaijajava najumeta pacuenia banajumeta jonca. <sup>16</sup> Pecujanenia cobenanuca siete patuluputobeje. Pecuibuatsina pitsapa anijabarëneniabeje pexiujaiespada. Pacuenia matabapijijuameto itsa aitavajënae, xaniavaetsia baitayota, bajarapacuenia itabaranaitayota.

<sup>17</sup> Itsa taniji bajaraponë, betatëpaenë irataeya bocajunuajë bajaraponë pitabarata. Itsiata baitsi jane bajaraponë nejayarena pecujuacobeta. Nejumaitsi:

—Pëtsa necujunavame. Xanë rajane baja daxitacuene pepo tataxuxuabinë. Daxitacuene icatsia tacopiaruaeyaexanaenënexa. <sup>18</sup> Xanë rajane baja pepo tasaët-

saponaponaenē daxitamatacabijavabelianexa. Xanē picani tēpajē. Itsiata baitsi jane icatsia asaēnē tatēpaecujinae. Nexata baja asaēnē tsaponaponaē daxitamatacabijavabelianexa. Dioso netocopata tacapanepaenexa tajajivi peponaeyaniva infiernojavabelia. Netocopatanua tananeconitsiaexanaenexa pijaneconi pexainaevi peponaenexa infiernojavabelia. <sup>19</sup>Xua baja taneme, bajaraxua baja pelivaisi yaquinare. Xuanē ata icatsia aeconoxae taeponaename, bajaraxuanē ata pelivaisi yaquinaename. <sup>20</sup>Xuanē, siete patuluputobeje, tacujuanenia cobenanuajē, mapajamatabēcuenelivaisi xainaje. Siete rabaja pijinia patomarabejijivi Dioso pejumecovēnētsivi penamatacaitorobivi tsavanapae. Xuanē pijinia siete xuabeje orota pexanaejavanē pematatuta naitayotanubena, mapajamatabēcuenelivaisi xainaje. Siete rabaja pijinia patomarabejijivi Dioso jumecovēnētavanapa, nejai Jesús, ponē taenutajē, siete xuabeje orota pexanaejavanē tuatuajēta penucaenē.

**Pacuenia Juan vajatuxanenē Jesús itorobatsi petoyaquinaenexa Efeso  
tomarata Dioso pejumecovēnētavanapaevi  
penamatacaitorobinējavabelia yabara pelivaisi**

**2** Jesús icatsia nejumaitsi:

—Efeso tomarata peecaenē, Dioso pejumecovēnētavanapaevi penamatacaitorobinējavabelia, toyaquinare. Nexata daxita pijajivi yajava yapētaena mapalivaisije, nejai Jesús, ponē siete patuluputobeje pecujuanenia cobenanuca, siete xuabeje orota pexanaejavanē pematatuta penaitayotanubenaejavanē tuatuajēta penucaenē.

Jesús nitoroba Efeso tomarata peecaenē, Dioso pejumecovēnētavanapaevi penamatacaitorobinējavabelia, tatoyaquinaenexa mapejumaitsilivaisije: <sup>2</sup>“Yapētanjiji daxita xua paexanavanapame. Yapētanjijina ayaicuenia Dioso panetonacuenebijava. Yapētanjijina ajamatabēcuenesaēya Dioso panejumecovēnētavanapaejava. Yapētanjijina panecuenetaeajitsibijava pibisiacuene pexanaevi. Yapētanjijina nayajivitaeya panejinavanapaejava itsamonae papecayamaxēitojorobiyaniva. Itsamonae picani papecayamaxēitojorobinexa, pacajumai tsabiabi: ‘Paxanē raja paapós-tolevinē,’ pacajai tsabiabi. Itsiata penajumetsēnētsivicuene payapētaeyabiabame panenayajiviyapētaexae. <sup>3</sup>Paxamē bajayajebi pacaajamatabēcuenesaēmē tsavanapae Dioso panejumecovēnētavanapaejava, itsamonae pacabejiobiaexanabiabi ata. Ayaicuenia panacuenebame patacaitorobicuene. Apo payabaracueranaemē cajena. Bajarapacuenia panenacuenebavanapaexae, pacasivajamatabēbarēyatsi. <sup>4</sup>Itsiata baitsi jane caejavayo yabara pananeconitame xanējavaberena. Tspajiji aeconoxae apo panejitsipaemē pacuenia picani bajayata copiaya panejitsipame. <sup>5</sup>Panajamatabēnapire icatsia pacuenia bajayata panejitsipame. Panajamatabēcuenepēnēy-orore xanējavaberena. Panetonacuenebavanapare icatsia pacuenia bajayata xaniavaetsia panetonacuenebavanapame. Itsa baja apo panejitsipaemē tsane icatsia, nexata baja apo patajajivimē tsane. <sup>6</sup>Itsiata baitsi jane pacasivajamatabēcueneparēyatsi patanejamatabēcuenējēpaexaemē mapacuene yabaraje. Pacujiruitoyamē nicolaítavi pibisiacuene pexanaponaejava. Bajaraxua pexanaejava xanē ata cujiruitoyanē. <sup>7</sup>Itsa pamuxuvojorubename, panatojumetaema pacuenia Espiritu Santo jumaitsi Dioso pejumecovēnētsivijavabelia. Jumaitsi mapacueniaje: ‘Pajivi Cristo jumecovēnētaponapona epetēpaejavabelianexa, bajarapajivi Dioso tocopatsianatsi pejonenexa Dioso pijanacuayabetsia,’ jai Espiritu Santo,” pejailivaisi toyaquinare



Efeso tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

**Pacuenia Juan vajatuxanenë Jesús itorobatsi petoyaquinaenexa  
Esmirna tomarata Dioso pejumecovënëtavanapaevi  
penamatacaitorobinëjavabelia yabara pelivaisi**

<sup>8</sup> Jesús icatsia nejumlahtsi:

—Esmirna tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare daxita pijajivi yajava peyapëtaenexa mapalivaisije, nejai Jesús, ponë daxitacuene pepo petaxuxuabinë, daxitacuene icatsia pecopiarucaeyaexanaenënexa.

Bajaraponë picani tëpa. Itsiata baitsi jane icatsia asaë petëpaecujinae. Nexata baja asaë tsaponaponae daxitamatacabijavabelianexa. Jesús nitoroba Esmirna tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumlahtsilivaisije: <sup>9</sup>“Yapëtaniji daxita xua paexanavanapame. Yapëtanijinua itsamonae papecabebiobiaexanaponaejava. Yapëtanijinua bepanejobivicuene. Itsiata baitsi jane itsamatacabi Diosojavatatsia bitso panexainaevi tsane. Yapëtanijinua pibisiacuenia papecabaracuaicuaijajava judíovi, Dioso apo pejumecovënëtsivi. Bajarapamonae cajena saya dovathi pijajivi. <sup>10</sup>Pëtsa pacujunavame itsamonae, pacabejobiobiaexanaejitsia ata. Dovathi raja pejamatabëcueneta penaneconitsivi pejebabiabibota, pacananeconitsiaexanejebiana. Bajarapacuenia pacananeconitsiaexanejebiana dovathi papecajamatabëcueneëjëbinexa, papecajamatabëcuenyapëtaenexa xaniajai pepacuene patanejumecovënëtsijavamë. Pacabejobiobiaexanaponaena diez pamatacabibeje. Bajarapacuenia pacaexanae ata tsane, itsiata panejumecovënëtsianame matapania panetëpaejavabelianexa. Nexata xanë pacarajutsianatsi matacabi apo peverevereaejava. <sup>11</sup>Itsa pamuxuvojorubename, panatojumetaema pacuenia Espíritu Santo jumlahsi Dioso pejumecovënëtsivijavabelia. Jumlahtsi mapacueniaje: ‘Pajivi Cristo jumecovënëtaponapona ëpetëpaejavabelianexa, bajarapajivi apo itsacueniabi tsanetsi cotocaevi patëpaejava,’ jai Espíritu Santo,” pejailivaisi toyaquinare Esmirna tomarata peecaenë, Dioso pejumecovëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

**Pacuenia Juan vajatuxanenë Jesús itorobatsi petoyaquinaenexa  
Pérgamo tomarata Dioso pejumecovënëtavanapaevi  
penamatacaitorobinëjavabelia yabara pelivaisi**

<sup>12</sup> Jesús icatsia nejumlahtsi:

—Pérgamo tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare daxita pijajivi yajava peyapëtaenexa mapalivaisije, nejai Jesús, ponë pecuibuatsina pitsapa anijabarëneniabeje pexiujaiespada.

Jesús nitoroba Pérgamo tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumlahtsilivaisije: <sup>13</sup>“Yapëtaniji daxita xua paexanavanapame. Yapëtanijinua dovathi pijajivi tuatuajëta panejinavanapaejava. Itsiata baitsi jane pajamatabëcuenesaëmë tsavanapae patanejumecovënëtavanapaejavamë. Bajayata Antipaspijinë tajumelivaisi jivijavabelia tsipaeabiaba. Nexata Antipaspijinë paxamë tuatuajëta dovathi pijajivi pebeyaxuabija-

vatsi, patae atamē, itsiata apo pacopatsimē patanejumecovēnētavanapaejavamē. Bajarapacuenia patanejumecovēnētavanapaexaemē, pacasivajamatabēcuenēbarēyatsi. <sup>14</sup> Itsiata baitsi jane itsajamatabēcuenējavaxi yabara pananeconitame xanējavaberena. Bajarajota Pérgamo tomarata paxamēyajuvēnēvi muxubijiapenetapona itsamonaē pibisiacuene pexanaenexa. Bajayata Balaampijinēmi jivi peyamaxēitojorobabiabinēmi ponapona. Nexata Israelpijinē pemomoxi penaneconitsinexa Diosojavabelia, Balaampijinēmi itoroba Balacpjinēmi pemuxubijiapenetaponaenexa Israelpijinē pemomoxijavabelia. Nexata Balacpjinēmi muxubijiapeneta Israelpijinē pemomoxi penaponaenexa fiestajavabelia. Nexata fiestajavata itsamonaē dajubinē itsa beyaxuaba, jumapecataeya pexanaenēanējavabelia ofrendacuenia perajutsiyajuvēnēvi naxane Israelpijinē pemomoxi. Balacpjinēmi muxubijiapenetanua Israelpijinē pemomoxi pibisiacuene pexanaenexa pevitota. Bajara pijinia pacuenia aeconoxae paxamēyajuvēnēvi ata exanapona. Pérgamo tomarapijivi pibisiacuene pexanaenexa, muxubijiapenetapona. <sup>15</sup> Itsamonaē pijinia paxamēyajuvēnēvi nicolaítavi petsipaebaponaelivaisi jumecovēnētavanapa. Nexata tanejumecovēnētsivi pibisiacuene pexanaenexa, bajarapamonaē muxubijiapenetapona. <sup>16</sup> Bajaraxuata paxamē xaniavaetsia panajamatabēcuenepēnēyorore Diosojavabelia. Itsa jume, xanē nexata naxanitsiayo ponaeanjē paxamējavabereca tabarēnabenexa bajarapamonaē tacuibutsina pepitsapaeespadata. <sup>17</sup> Itsa pamuxuvojorubename, panatojumetaema pacuenia Espiritu Santo jumaitsi Dioso pejumecovēnētsivijavabelia. Jumaitsi mapacueniajaje: ‘Pajivi Cristo jumecovēnētaponapona ēpetēpaejavabelianexa, bajarapajivi rajutsianajē pexaenexa manāvēnējava, athēbēpijijava, pejamatabēcuenē asaēyaexanaejavanexatsi. Rajutsianajēnua penioponaēiboto. Bajarapaiboto pijumata bajarapajivi vēnērutsianajē pejanavēnē. Itsajivi ata apo vēnēyapētae tsanetsi. Caejivi, bajarapai-boto pepitsijivi, navēnēyapētaena,’ jai Espiritu Santo,’ pejailivaisi toyaquinare Pérgamo tomarata peecaenē, Dioso pejumecovēnētavanapaevi penamatacaitorobinējavabelia, nejai Jesús, siete xuabeje orota pexanaejavanē tuatuajēta penucaenē.

**Pacuenia Juan vajatuxanenē Jesús itorobatsi petoyaquinaenexa Tiatira tomarata Dioso pejumecovēnētavanapaevi penamatacaitorobinējavabelia yabara pelivaisi**

<sup>18</sup> Jesús icatsia nejumaitsi:

—Tiatira tomarata peecaenē, Dioso pejumecovēnētavanapaevi penamatacaitorobinējavabelia, toyaquinare pijajivi yajava peyapētaenexa mapalivaisije, nejai Dioso pexēnato, ponē pitaxutobeje naitayota. Pacuenia isotocotia bacotia itsi, bajara pitaxutocotiaitsinē, ponē petaxubejenivenivena ata pacuenia banivenivena broncevēnējava pesetsijava, beoronanitomi.

Jesús nitoroba Tiatira tomarata peecaenē, Dioso pejumecovēnētavanapaevi penamatacaitorobinējavabelia, tatoyaquinaenexa mapejumaitsilivaisije: <sup>19</sup> “Yapētaniji daxita xua paexanavanapame. Yapētanijinua itsamonaē ata paneasivat-savanapaejava. Yapētanijinua patanesivanajamatabēcuenē copatavanapaejavamē. Yapētanijinua panetonacuenebijava Dioso. Yapētanijinua paneajamatabēcuenēsaē tsavanapaejava, itsamonaē pacaitsacueniababiabi ata. Yapētanijinua pacuenia panetonacuenebavanapame pamatacabi ajena panejumecovēnētame. Yapētanijinua pacuenia jane baja aeconoxae bitsoyo panetonacuenebavanapame. Bajarapacuenia paneexanavanapaxae pacasivajamatabēbarēyatsi. <sup>20</sup> Itsiata baitsi jane itsaja-

matabëcueneyo yabara pananeconitame xanëjavaberena. Tshipaji apo pacujiruitavet-simë Jezabelvënëva pibisiacuene pexanaejava. Bajarapova beprofetava, Diosojumelivaisi bepepaebiva, natane. Nexata patajajivimë bajarapova pacayajuvënëyamaxëitojorobapona baja. Bajarapova papecayajuvënë yamaxëitojorobinexa jumai tsabiabi: 'Pebijivi pijavavecua jaitsi ata itsava, itsiata apo itsacuene. Bajara pijinia itsi petiriavi ata. Itsanë jaitsi ata pamonavecua, itsiata apo itsacuene. Bajara pijinia itsi pevi ata. Dajubinë itsa beyaxuaba ofrendacuena pevi perajutsinexa jumapecataeya pexanaenëanëjavabelia, bajarapaviyajuvënëjava xae atatsi, itsiata apo itsacuene,' jai tsabiabi bajarapova patajajivimë papecayajuvënë yamaxëitojorobinexa. <sup>21</sup> Bajarapova picani pecopatsijava pibisiacuene pexanabiabijavavecua, bajayajebi evetaponaponajë. Itsiata baitsi jane apo jamatabëcopatsi pevitota pibisiacuene pexanabiabijava. Apo najamatabëcuenepënëyorotsi xanëjavaberena. <sup>22</sup> Bajarapova nexata avitaniaexanaenajë camata pebocaenexa. Nexata pamonaë paxamëyajuvënëvi itsa apo copatsi tsane bajarapova pitorobicueniatsi pexanavanapaejava, pamatabëxëyo pevitota pibisiacuene exana bajarapova pitorobicueniatsi, nexata bajarapamonae ata bitso nabebiobitsiaexanaenajë. <sup>23</sup> Bajarapova pexi ata verebiabianajë. Nexata daxita Dioso pejumecovënëtsivi nejamatabëcueneyapëtaena. Nejamatabëcueneyapëtaena daxitajivi bëpënëa pejamatabëëthëtota, penajamatabëxainaeacuene ata, tayapëtaenëcuene. Pacaejivimë canacujitsia xuavajëto panetonacuenebavanapame, bajara pijinia pitsijavavajëto pacarajutsianatsi. Xuavajëto pijinia panijaneconi paxainame, bajara pijinia paneconivajëtota pacananeconitsiaexanaponaenatsi. <sup>24</sup> Paxamë apo panejumecovënëtsivi, Jezabel pacaitorobi ata pibisiacuene picani paneexanaenexa, mapacuenia pacajumaitsitsije. Paxamë apo pajumecovënëtsimë dovathi pijalivaisi, palivaisi Jezabel jivi tsipaebapona. Bajarapalivaisita cujarubapona dovathi pijacuene pevajënaeyabelia peyapëtaeyaexanaponaenexa. Bajaraxuata apo pacaitorobitsi panejumecovënëtsinexa pematatsënëa itsalivaisi, piyapëbejelivaisi. <sup>25</sup> Nexata pacaasaëmëre tsavanapae panejumecovënëtsijava Dioso pejumelivaisi matapania ëtapatstimatacabitsica javabelianexa. <sup>26</sup> Itsamonae ëpetëpaejavabelianexa, catsitecavanapaena tanesivanajamatabëcuene copatavanapaejava. Tajitsipaeacuene ata netoexanavanapaena. Bajarapamonae itsamatacabi tocopatsianajë pevetsinexa daxitanacuapijivi. <sup>27</sup> Bajarapamonae itsamatacabi daxitanacuapijivi itsa evetsiana, ajumesaëya itorobabiabiana pejumecovënëtsinexatsi. Pacuenia xanë ata taxa netocopata daxitanacuapijivi taevetsinexa, bajara pijinia pacuenia bajarapamonae ata pevetsinexa daxitanacuapijivi, tocopatsianajë. Pacuenia atsanano pefaratsicanalito toxobiaxuabatsi, hierronaebota itsa conitaxuabatsi, bajara pijinia itsanetsi pamonaë Dioso apo pejumecovënëtsivi. Tajajivi verebiabiana daxita Dioso apo pejumecovënëtsivi. <sup>28</sup> Pamonaë tajajivi, rajutsianajë pexainaenexa papinijicotia xainajë ayaijamatabëcuenevinexa. <sup>29</sup> Itsa pamuxuvojorubename, panatojumetaema pacuenia Espiritu Santo jumaisi Dioso pejumecovënëtsivijavabelia," pejailivaisi toyaquinare Tiatira tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavaanë tuatuajëta penucaenë.

**Pacuenia Juan vajatuxanenē Jesús itorobatsi petoyaquinaenexa Sardis  
tomarata Dioso pejumecovēnētavanapaevi  
penamatacaitorobinējavabelia yabara pelivaisi**

**3** Jesús icatsia nejumaitsi:

—Sardis tomarata peecaenē, Dioso pejumecovēnētavanapaevi penamatacaitorobinējavabelia, toyaquinare pijajivi yajava peyapētaenexa mapalivaisije, nejai Jesús, ponē xaina siete paespírítubeje, Dioso pijaespírítu, ponē cobenanuca siete patuluputobeje.

Jesús nitoroba Sardis tomarata peecaenē, Dioso pejumecovēnētavanapaevi penamatacaitorobinējavabelia, tatoyaquinaenexa mapejumaitsilivaisije: “Yapētaniji daxita xua paexanavanapame. Yapētanijinua itsamonae papecasivajamatabējumai tsabiabijava: ‘Bajarapamonae bitso tonacuenebavanapa Dioso pijacuene,’ papecasivajamatabējai tsabiabijava. Itsiata baitsi jane xanē yapētaniji pibisiacuene paneexanaejava. Yapētanijinua bēpēnēa panejamatabēcuenefaenaejava patanejumecovēnētsijavamē. <sup>2</sup>Nexata namataenetsia panajamatabēcuenesaēyaexanare. Panajamatabēcueneitsamonae papecasivajamatabējumai tsabiabijava: ‘Bajarapamonae bitso tonacuenebavanapa Dioso pijacuene,’ papecasivajamatabējai tsabiabijava. Itsiata baitsi jane xanē yapētaniji pibisiacusaēya exanaenamenua itsamonae ata, pamonaē pijinia jamatabēcuenefaenaepona tanejumecovēnētsijava. Tsipaji baja bajarapamonae imoxo pecopatsi tanejumecovēnētsijavami. Xua paexanavanapame, bajaraxua picani paxamē pacatsitapexaniacuene. Itsiata baitsi jane bajaraxua Dioso apo tsitapexaniacuenetsi. <sup>3</sup>Panajamatabēnapire palivaisi baja copiaya itsamonae pacatsipaeba xanē patacacapanepaejavanexa yabara. Pacaasaēmēre tsavanapae bajarapalivaisi panejumecovēnētavanapaejava. Pacopabare pibisiacuene paneexanabiabijava. Panajamatabēcuenepēnēyorore Diosojavabelia. Namataenetsia itsa apo panajamatabēcuenesaēyaexanaemē tsane patanejumecovēnētsijavamē, nexata jemata patsiarecajē patacananeconitsiaexanaenexa. Apo payapētaemē tsane paepatota patsijitsianēreca. Tsipaji paepatota apo panejamatabēnajinaemē, jemata patsiarecajē. Pacuenia penacobetoxotsinēnēxa jemata bapata, paepatota apo jamatabēnajinaetsi, bajara pijinia xanē ata itsinē tsane. <sup>4</sup>Paxamē Sardis tomarata panejinavanapaevi, itsamonae paxamēyajuvēnēvi pibisiacuene apo exanae. Pacuenia itsi pamonaē apo toaxuiratsi penaxatabijavanē, bajara pijinia jamatabēcuenetsi tsavanapae bajarapamonae Dioso pitabarata aneconijibia pejinavanapaexae. Itsamatacabi bajarapamonae xanējavata jinavanapaena. Bajarapamonae itsamatacabi xanējavata itsa jinavanapaena, planeconijibixae, naxatabiana penioponaejavanē. <sup>5</sup>Pamonaē nejumecovēnētavanapaena ēpetēpaejavabelianexa, bajarapamonae naxatabiana penioponaejavanē. Bajarapamonae apo vēnēiquinaenē tsane pabaxutota vēnērubena pamonaē matacabi apo peverevereaejava pexainaevinexa. Biji rajane pamonaē tajajivi, vēnēyapētaeyaexanaponaenajē taxajavabelia, taxa pijaángelevijavabelia ata. <sup>6</sup>Itsa pamuxuvojorubename, panatojumetaema pacuenia Espírítu Santo jumaitsi Dioso pejumecovēnētsivijavabelia,” pejailivaisi toyaquinare Sardis tomarata peecaenē, Dioso pejumecovēnētavanapaevi penamatacaitorobinējavabelia, nejai Jesús, siete xuabeje orota pexanaejavanē tuatuajēta penucaenē.

**Pacuenia Juan vajatuxanenë Jesús itorobatsi petoyaquinaenexa  
Filadelfia tomarata Dioso pejumecovënétavanapaevi  
penamatacaitorobinëjavabelia yabara pelivaisi**

<sup>7</sup> Jesús icatsia nejumaitsi:

—Filadelfia tomarata peecaenë, Dioso pejumecovënétavanapaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Jesús, ponë planeconijibinë, ponë copiaevetavanapatsi icatsia pepatsijavanexatsica vajanacacapanepaenexa.

Pacuenia bajayata Davidpijinë eveta Israelnacua, bajara pijinia pacuenia Jesús evetsiana mapanacuae. Evetsiana athëbëtatsia ata, Dioso pijanacua. Nexata it-samatacabi Jesús pijajivi itorobiana daxitanacuanëjava jivi petsipaebanajetarubenaenexa Diosojavabelia pecapanepaelivaisinexatsi. Nexata panacuanëjava Jesús pijajivi itorobiana, bajarapanacuanëjava pejinavanapaevi Jesús pijajivi tsipaebanajetarubenaena Diosojavabelia pecapanepaelivaisinexatsi. Nexata itsajivi ata apo caëjëpaetsi tsane Jesús pijajivi pitavetsinexa petsipaebanajetarubenaeyaniva bajarapanacuanëjava pejinavanapaevi. Panacuanëjava pijinia Jesús pijajivi apo tocopatsi tsane Diosojavabelia jivi pecapanepaelivaisinexatsi petsipaebanajetarubenaenexa, bajarapanacuanëjava pejinavanapaevi Jesús pijajivi apo tsipaebanajetarubena tsane. Nexata itsajivi ata apo caëjëpaetsi tsane Jesús pijajivi pitorobinexa petsipaebanajetarubenaenexa bajarapanacuanëjava pejinavanapaevi. Jesús nitoroba Filadelfia tomarata peecaenë, Dioso pejumecovënétavanapaevi penamatacaitorobinëjavabelia, tatoyaquinaenexa mapejumaitsilivaisije: <sup>8</sup>“Yapëtaniji daxita xua paexanavanapame. Apo pasaëmë. Itsiata panejumecovënétavanapame. Apo panayavajunuaxainaemë patajajivicuenemë. Bajaraxuata pacatocopatatsi talivaisi jivi panetsipaebaponaenexa panevajënaeyabelia. Nexata itsajivi ata apo caëjëpaetsi tsane papecacopatsiaexanaenexa talivaisi jivi panetsipaebaponaejava. <sup>9</sup>Panejumetaema. Itsamonae rabaja judíovi ata, dovathi pijajivi. Tsipaji apo nejumecovënëtsi. Bajarapamonae jamatabëcuenenavëxaniabiaya jumai tsabiabi: ‘Paxanë raja pajudíovinë, Dioso papijajivinë,’ jai tsabiabi. Itsiata baitsi jane Dioso apo pijajivi. Tsipaji apo nejumecovënëtsi. Bajarapamonae itsamatacabi paneitabarata pematabacabëta pacatonubenaeyaexanaenatsi. Nexata bajarapamonae yapëtaena paxamë patacaasivacuene. <sup>10</sup>Pacaitorobatsi patanejumecovënëtsijavamë bajayajebi panecasaëtsavanapaenexa. Nexata baja bajarapacuenia panejumecovënétavanapame. Bajaraxuata nexata pamatacabi daxitanacuapijivi piayaicuene taeponaena, paxamë pacaevetsianatsi. Nexata paxamë apo pacaitsacueniabi tsane. <sup>11</sup>Naxanitsiayo rabaja ponaenajë paxamëjavabereca. Xaniavaetsia baja pacaasaëmëre tsavanapae patanejumecovënétavanapaejavamë. Nexata itsajivi ata apo pacavecuapitsi tsane xua taxa Dioso pacarajutsiana athëbëtatsia. <sup>12</sup>Pamonae nejumecovënétavapanapena ëpetëpaejavabelianexa, bajarapamonae taxa Dioso bepijatemplobonaesiturutonë taenatsi athëbëtatsia. Bajarapacuenia taxa Dioso bepijatemplobonaesiturutonë taenatsi bitso pijamatabëcuenesaë tsavanapaexae tsane tanejumecovënétavapanapaejava. Bajarapamonae taxa Dioso athëbëtatsia yajavajinavanapaena daxitamatacabijavabelianexa. Nexata taxa Dioso pevënë yaquinarutsianajë bajarapamonaejavabelia. Yajavayaquinarutsianajë taxa Dioso pijatomara pevënë. Bajarapatomara, pejana Jerusaléntomara. Bajarapatomara athëbëvetsica patsianica, taxa Diosojavavet-

sica. Tavënë ata, pejanavënë, yaquinarutsianajë bajarapamonaevavabelia. <sup>13</sup>Itsa pamuxuvojorubename, panatojumetaema pacuenia Espiritu Santo jumaitsi Dioso pejumecovënëtsivijavabelia,” pejailivaisi toyaquinare Filadelfia tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatujëta penucaenë.

**Pacuenia Juan vajatuxanenë Jesús itorobatsi petoyaquinaenexa  
Laodicea tomarata Dioso pejumecovënëtavanapaevi  
penamatacaitorobinëjavabelia yabara pelivaisi**

<sup>14</sup> Jesús icatsia nejumaitsi:

—Laodicea tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Jesús, ponë copiaevetavanapatsi icatsia pepatsijavanexatsica vajanacacapanepaenexa.

Bajaraponë pexaniajailivaisi jivi tsipaebabiaba. Pexanaenënuax daxitacuene, xua Dioso exana mapanacuataje. Jesús nitoroba Laodicea tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: <sup>15</sup>“Yapëtaniji daxita xua paexanavanapame. Yapëtanijinua patanejumecovënëtsivi atamë, panejamatabëcuenevetsina bevelia patanejitsipaejavamë. Yapëtanijinua bevelia patanetonacuenebavanapaejavamë. Pacuenia apo tanejumecovënëtsivi jamatabëcueneitsi xanëjavaberena, itsiata picani bitso apo pajamatabëcueneitsimë. Pacuenia pijinia xaniavaetsia tanejumecovënëtsivi jamatabëcueneitsi xanëjavaberena, itsiata apo pajamatabëcueneitsimë. Pacuenia jamatabëcueneitsi pamonae apo tanejumecovënëtsivi, itsa pajamatabëcueneitsimë tsipae, nexata xanepanaejitsipa. Itsa jume, pacuenia jamatabëcueneitsi pamonae xaniavaetsia tanejumecovënëtsivi, itsa pajamatabëcueneitsimë tsipae, nexata xanepanaejitsipa. Tsipaji roviafia panajamatabëcuene yapëtaejitsipame pacuenia pajamatabëcueneitsimë tsavanapae xanëjavaberena. <sup>16</sup>Nexata pacuenia mera perëbënaera apo cainejebi, bitso apo atajunua, bajara pajamatabëcueneitsimë xanëjavaberena. Bajarapitsira apo jitsipaetsi vajaapaenexa. Nexata vajaapaeyaniva, navecuapatajarabatsi penaxuabinexa. Bajara pijinia pacuenia pacanavecuaxuabianatsi. Tsipaji apo jitsipaenë pacuenia bëpënëa panejamatabëcuenevetsina pajamatabëcueneitsimë tsavanapae. Baitsi apo jitsipaenë bevelia patanejitsipaejavamë. Bajaraxuata pacanavecuaxuabianatsi. <sup>17</sup>Paxamë pajamatabëjumaitsimë tsabiabi: ‘Xanë baja cajena bitso daxitacuene taxainaenë. Daxita xua nacuenebaponaponajë taxinaejavanexa, netocapitsapapona. Nexata itsacuenejava ata apo namatavenon-aenë,’ pajamatabëjamë tsabiabi. Itsiata baitsi jane Diosojavabelia apo panejamatabëcuene xanepanaexae, pepacuene apo pajamatabëcuenebarëyamë tsavana-pae. Apo payapëtaemënuax bitso bepenejibicuene Dioso pitabarata. Paxamë cajena Dioso pacatane bepeneitaxutotsëcënaevi bitso, bepenejumasajinaevinua. <sup>18</sup>Bajaraxuata pacamuxujibijitsiatsi. Panevecuapire bitso penamatamotsijava paricovinexamë jane baja Diosojavatatsia. Panevecuapirenuax penioponaenaxatatsijava panenaxatatsinexa, panenaperabëcaranatsinexa Dioso pitabarata paneaurajavave-cua. Panevecuapirenuax paneitaxutotsëcënaevaë panetaenexa jane baja xaniavaetsia. Nexata dovathi pijacuene panayajivitaenax papecayamaxëitojorobianiva. <sup>19</sup>Daxita pamonae tasivavi, muxujibajë peyapëtaenexa. Naneconitsiaexanajënuax

pecopatsinexa apo tajitsipaecuene pexanaejava. Nexata asaëyata panejumecov-  
 ënëre. Pacopabare pibisiacuene paneexanabiabijava. Panajamatabëcuenepënëy-  
 orore Diosojavabelia. <sup>20</sup> Panejumetaema. Itsajivi itsa pata panijabota, nexata itsa  
 pacajunata, patobaupatame pejonenexa. Bajara pijinia pacuenia xanë ata paneja-  
 matabëëthëto itsa panetobaupatsianame, pacatsijamatabëjjonensati. Nexata pacaya-  
 javaponaponaensati daxitamatacabijavabelianexa. <sup>21</sup> Xanë baja cajena taxa Dioso  
 taneitorobicuenia jumecovënëtaponaponajë étatëpaejavabelianexa. Nexata baja ae-  
 conoxae yajavaecajë taxa peecaejavata, pijatronovënëjavata. Pamonia pijinia ne-  
 jumecovënëtavanapaena ëpetëpaejavabelianexa, bajarapamonae pijinia tocopat-  
 sianajë tayajavaecaenexa tronovënëjavata. <sup>22</sup> Itsa pamuxuvojorubename, panato-  
 jumetaema pacuenia Espíritu Santo jumaitsi Dioso pejumecovënëtsivijavabelia,” pe-  
 jailivaisi toyaquinare Laodicea tomarata peecaenë, Dioso pejumecovënëtavanapaevi  
 penamatacaitorobinëjavabelia, nejai Jesús, siete xuabeje orota pexanaejavanë tuat-  
 uajëta penucaenë.

### **Pacuenia Juan tane Dioso pijajivi Dioso pijanacuatatsia yabara pelivaisi**

**4** Icatsia taniji baupa penabaupatanucaejava athëbëtatsia. Ponë baja copiaya  
 jumetaniji pecuaicuaijajava betrompetajume, bajaraponë icatsia pecuaicuaijaj-  
 java jumetaniji. Nejumaitsi mapacueniaje:

—Junaimina xanëjavabetsina. Catsitajëtsianatsi majotatsinaje pacuenia pe-  
 vajënaeyabelia itsi tsaponaejitsia bajarapanacuatareca, nejai ponë jumetaniji  
 pecuaicuaijajava.

<sup>2</sup> Nexata bajarapaepatota nayapëtaniji athëbëtatsia Espíritu Santo pesaë taya-  
 javaponaponaejava. Athëbëtatsia taniji tronovënëjava. Bajarapatronota Dioso  
 taeyetajë. <sup>3</sup> Dioso, ponë eca bajarapatronota, itabaracotiabatsi. Pacuenia cotiaitsi  
 penamatamotsiibotonë, bajara itabaracotiaitsi. Pacuenia cotiaitsi jaspevënëiboto,  
 pacuenia cotiaitsi cornalinavënëiboto ata, bajaraitabaracotia itsi. Bajarapatrono  
 matatoyorotsia aravalibo taenutajë. Pacuenia esmeraldavënëiboto cotiaitsi, bajara-  
 cotia itsanucæe bajarapaaravalibo. <sup>4</sup> Bajarapatrono matatoyorotsia taenubajënu  
 veinticuatro patronobeje. Caetronota canacujitsia ecapona ancianonëanë. Bajara-  
 paancianovi naxatabena penioponaejavanë. Orotaxanaecoronanë mataena. <sup>5</sup> Pa-  
 tronota eca Dioso, bajarapatronojavaverena yamaxë binebinejai. Najumetajunu-  
 junua. Siete xuabeje pitayotanubenaejavanë taenubajë bajarapatronoitabarata. Ba-  
 jarapaitayotanubenaejavanë mapajamatabëcuenelivaisi xainaje. Siete rabaja pijinia  
 patomarabejepijivi, Dioso pejumecovënëtavanapaevi, Espíritu Santo peyavenon-  
 abiabijavanexatsi. <sup>6</sup> Bajarapatronoitabarata taeyetajë bemanuamene picani. Itsiata  
 baitsi jane piatajajava. Pacuenia vidriojava nasaba, bajarapitsijava.

Bajarapatronojavata taenubajë cuatro ponëbeje piaithiavi, ayainëanë. Trono  
 matatoyorotsia nubena. Bajarapamonae pitabarayareca, pejumareca ata, itaxu-  
 torubenaponareca. <sup>7</sup> Copiaya ponë, benevëthë petsobianë. Bajaraxuacujinae coto-  
 caevinë, betoro. Bajaraxuacujinae acueyabinë, bejiviitaranë. Bajaraxuacujinae cu-  
 atronë, pacuenia cotsala itsa punanajetaruca baitsi, bajaraitsi. <sup>8</sup> Ponëanë, cuatro  
 ponëbeje piaithiavi taniji, xainapona seis pacorofetobeje caenë canacujitsia. Ba-  
 jarapamonae daxitanëanëreca itaxutorubenaponareca. Bëpënëaverena ata bajara-  
 pacuenia itaxutorubenaponareca. Matabajibebi, meravijebi ata, apo copatanubena  
 pejumaitsanubenaejava Diosojavabelia.

Bitso nianeconijibinē. Bitso ayaijamatabēcuenenēmē. Nexata cacaējēpa daxitacuene nexanaenexa. Ajena, mapamatacabitaje, ponaponame. Mapanacujaje nexanaevajēnaeya ata, ponaponame. Daxitamatacabijavabelianexa ata ponaponame, jai tsanubenaē bajarapamonae Diosojavabelia.

<sup>9</sup>Pamonae cuatro ponēbeje piaitothiavi, pexaniajamatabēcuenenua rajutabiaba Diosojavabelia. Bajarapamonae pexaniajamatabēcuenē itsa rajutabiaba Diosojavabelia, jumai tsabiabi mapacueniaje:

—¡Diosomē, nenivenivenaecotia bitso pinijicuene! ¡Ayaijamatabēcuenenēmē bitso! jai tsabiabi.

Bajarapacuenia jumai tsabiabi tronota peecaenējavabelia, daxitamatacabijavabelianexa peponaponaenējavabelia. <sup>10</sup>Pamonae cuatro ponēbeje piaitothiavi, bajarapacuenia itsa jumai tsanubenaē Diosojavabelia, nexata pijinia bajarapaepatota pamonae veinticuatro ponēbeje ancianovi pematabacabēta tonubenajunua Dioso pitabarata, daxitamatacabijavabelianexa peponaponaenē pitabarata. Bajarapacuenia tonubenajunua Dioso pitabarata peyayataexae. Bajarapaancianovi Dioso pijatronojavabelia topenelia pijacoronanē. Bajarapaancianovi Diosojavabelia jumai tsanubenaē:

<sup>11</sup>Patajatuxanenēmē, patajaDiosonēmē. Xanepana itsamonaējavabelia patacavajunupaebaponaējava nenivenivenaecotia pexinaejava. “Diosomē, bitso ayaijamatabēcuenenēmē,” pacajai tsaponaetsinua. Xanepananua patajumaitsaponaējava: “Dioso cajena bitso piasaēnē,” patajaitsaponaējava. Tspaji baja daxitacuene nexanaenē. Nejtisipaecuenia daxitacuene exaname. Mapamatacabijavaberena ata abaxē tsiteca daxitacuene nexanaejava nexanaecujinae. Bajarapacuenia abaxē tsiteca daxitacuene nexanaejava xamē nejamatabēcueneta, jai tsanubenaē ancianovi Diosojavabelia.

### **Pacuenia Juan athēbētatsia cobetaeyeta Dioso pequionaecuyalatobaxuto pecobenaecaejava yabara pelivaisi**

**5** Athēbētatsia taeyetajē Dioso. Tronota eca. Pequionaecuyalatobaxuto cobenaeca pecujanenia. Bajarapacuyalatobaxuto peboxoverena, pejumavelia ata, xaina pitane. Bajarapacuyalatobaxuto siete pasellotabeje upicatsanaruba. <sup>2</sup>Nexata taenu-tajē bitso piasaēángelnē. Bajarapaángelnē pinijijumeta jumaitsi mapacueniaje:

—¿Jipatsa nexata jamatabēcuenecaējēpatsi Dioso petocopatsinexatsi pesaracaenexa sellovēnējavaxi, bajarapacuyalatobaxuto piupicatsanarubiselloxi? jai.

<sup>3</sup>Itsiata baitsi jane ajibi pejamatabēcuenecaējēpaejivitsi bajarapacuyalatobaxuto piupicatsanarubiselloxi pesaracaenexa. Athēbēpijivi ata, mapanacujajivi ataje, petēpaevimi ata, apo jamatabēcuenecaējēpaetsi cajena. Nexata itsajivi ata Dioso apo tocopatsi pesaracaenexa bajarapacuyalatobaxuto piupicatsanarubiselloxi bēpēnēa paitane rubena petaenexa. <sup>4</sup>Nexata xanē bajaraxua itsa taniji, bitso cajena nuajē. Bitso nuajē tspaji baja ajibi pejamatabēcuenecaējēpaejivitsi bajarapacuyalatobaxuto pequionaejava pebaxuisinaenexa pelebinexa. <sup>5</sup>Nexata itsanē ancianoviya juvēnēnē nejumaitsi:

—Pētsa baja nuame. Caenē raja jamatabēcuenecaējēpatsi bajarapacuyalatobaxuto pequionaejava pebaxuisinaenexa. Bajaraponē Judápijinē pemomoxiyajuvēnēnē. Piasaēnē bitso. Nexata bajaraponē yabara itsamonaē jumai tsabiabi: “León,” jai tsabi-



abi. Bajaraponë nacuaevevtsinëmi Davidpijinë pemomoxiyajuvënënë. Bajaraponë jamatabëcueneamoneyaba baja dovathi. Nexata bajaraponë jamatabëcueneceaëjèpatsi pesaracaenexa bajarapacuyalatobaxuto piupicatsanarubiselloxi, nejai ancianoviya-juvënënë Jesucristo yabara.

<sup>6</sup>Nexata jane baja taenutajë Corderonë. Nuca veinticuatro ponëbeje ancianovi pitabarata. Nucanua trono pitabarata. Nucanua pamonaе cuatro ponëbeje pi-aitothiavi pitabarata. Cordero nayapëtane pebeyaxuabinëmitsicue. Tsipaji cruza-javabelia pecobematabiabarutsivajënëmitsi ruca pecobeta. Corderonë xaina siete pamataetobeje, siete pijinia paitaxutobeje. Xuanë, siete paitaxutobeje, mapajamatabëcuenevivaisi xainaje. Siete rabaja pijinia paespíritubeje, Dioso pijaespírituanë. Bajarapasiete paespíritubeje Dioso baja itoroba daxitanacuanëjava. <sup>7</sup>Nexata jane baja Dioso, ponë eca tronota, ponë pequionaecuyalatobaxuto cobenaeca pecujanenia. Corderonë cujitalialia. Corderonë jane baja vecuapita bajarapacuyalatobaxuto. <sup>8</sup>Corderonë baja itsa pita bajarapacuyalatobaxuto, nexata pamonaе cuatro ponëbeje piaitothiavi, Corderonë pitabarata pematabacabëta tonubenajunua. Bajara pijinia pacuenia pamonaе veinticuatro ponëbeje ancianovi, Corderonë pitabarata pematabacabëta tonubenajunua. Caeciano canacujitsia saicaya xainapona pi-jaarpa. Bajarapaancianovi capona orota pexanaecopanë. Bajarapacopanë vënëca petuxujuvijava. Bajarapatuxujuvijava xaina mapajamatabëcuenevivaisije. Dioso pijajivi pevajëtaponaejavami Diosojavabelia, Dioso tane bajarabepitsituxujuvijava.

<sup>9</sup>Nexata pamonaе cuatro ponëbeje piatothiavi, pamonaе pijinia veinticuatro ponëbeje ancianovi, daxita bajarapamonaе, naxëana Corderojavabelia mapapejanavajije. Penaxëanaejavata vajita jumaitsi Corderojavabelia mapacueniaje:

Cajamatabëcueneceaëjèpa rabaja Dioso pecatocopatsixae nepitsinexa mapacuyalatobaxutoje. Nexata baja cajamatabëcueneceaëjèpanua bajarapacuyalatobaxuto piupicatsanarubiselloxi ata nesaracaenexa. Bajarapacuenia cajamatabëcueneceaëjèpa baja tsipaji baja cabeyaxuaba pataneneconimata-motsinexamë. Nexata padaxitavirijumevi atanë, padaxitanacuanëpijivi atanënu, nijanata baja panecomuatame Diosonexa. <sup>10</sup>Paneexanamenua baja Dioso papijajivinë itsamatacabi Dioso patanebarëevetsinexa daxitacuene. Paneexanamenua baja pasacerdotevinë jivi patatocuaicuaijaitisabiabivinexa Diosojavabelia. Paneexanamenua baja nacuanë pataevetsivinexa, jai ancianovi Corderonëjavabelia penaxëanaejavata mapapejanavajije.

<sup>11</sup>Trono matatoyorotsia nubena cuatro ponëbeje piaitothiavi. Nexata piaitothiavi pepënëvelia matatoyorotsia nubena ancianovi. Bajaraxuacujinae jane baja ancianovi matatoyorotsia nubenatsi ángelevi. Angelevi bitso ayaibitsaëto, millones paángelbeje nubena. Nexata bajarapaángellevi pecuaicuaijajijava jumetaniji. <sup>12</sup>Angelevi ayajumeta jumaitsi mapacueniaje:

Corderonë, ponë picani beyaxuabatsi, bitso ayajamatabëcuenenë. Bajaraxuata Dioso tocopatsi pevetsinexa daxitacuene mapanacuataje. Tocopatatsinua daxitacuene pexainaenexa. Tocopatatsinua daxitacuene peyapëtaenexa. Tocopatatsinua pinijisaë pexainaenexa. Tocopatatsinua itsamonae pejumaitsinexatsi: “Xamë bitso ayajamatabëcuenenëmë,” pejinexatsi. Tocopatatsinua peva-junupaebinexatsi penivenivenaеcotia pexinaejava. Tocopatatsinua daxita pamonaе jumecovënëtatsi, pexaniajatabëcuene perajutsinexatsi bajaraponëjavabelia. Bajarapacuenia tocopatatsi tsipaji ayajamatabëcuenenë bitso,

jai tsanubenaē mapacueniaje ángelevi Jesús yabara.

<sup>13</sup> Jumetanijina icatsia daxita Dioso pexanaevi pecuaicuaijajava. Athëbëpijivi cuaicuaijai. Mapanacuapijivi ata cuaicuaijai. Petëpævimi ata cuaicuaijai. Manu-amenianëpijivi ata cuaicuaijai. Nexata daxita bajarapamonae Diosobeje Jesúsbeje yabara jumaitis mapacueniaje:

Diosomë, tronota neecaenë. Xamë pijinia Corderonëmë. Paxamëbejejavabelia pexaniajamatabëcuene pacarajutatsi. Paxamëbeje bitso ayaijamatabëcuene panexainaenëbeje. Panenivenivenaecotiabeje paxainamebeje. Nexata panenivenivenaecotiabeje panexainaējavabeje itsamonæjavabelia pacavajunupaebaponatsi. Pinijsaë bitso panexainaenëbeje. Bajarapajamatabëcuene panejamatabëcuenet-sitecaenëbeje daxita matabijavabelianexa,

jai daxita Dioso pexanaevi Diosobeje Jesúsbeje yabara.

<sup>14</sup> Pamonaē pijinia cuatro ponëbeje piatiothiavi jumaitis tsaponæ mapacueniaje: —¡Bajara itsi tsane! jai bajarapamonæ.

Nexata pamonaē veinticuatro ponëbeje ancianovi, pematabacabëta tonubena-junua Dioso pitabarata. Pexaniajamatabëcuene rajutanubena Diosojavabelia, daxitamatabijavabelianexa peponaponaenëjavabelia.

### Siete pasellobeje yabara pelivaisi

**6** Corderonë taenutajë. Penamataxinaesello sarananuca. Nexata pamonaē cuatro ponëbeje piatiothiaviyajuvënënë, caenë pecuaicuaijajava ayaijumeta, jumetaniji. Pecuaicuaijajava, beyamaxëjume najumeta. Nexata jumetaniji: “¡Naxanitsia!” pejaijava caballojumata peponaenëjavabelia.

<sup>2</sup> Nexata bajaraxuacujinae icatsia taniji perenajava penioponaecaballota peyanajetarucaenë. Caballojumata peecaenë, cobenaeca bitsabi. Rajutatsi corona penamataxatatsinexa. Bajaraxuacujinae pona pijavajabitsaë pebarënabenexa. Nexata pijavajabitsaë cueneamoneyabanajetaruca pepacuene ëpecopiarucaeya exanaejavabelianexa.

<sup>3</sup> Bajaraxuacujinae icatsia Corderonë sarananuca itsasello, pecotocaevijava. Nexata pamonaē cuatro ponëbeje piatiothiaviyajuvënënë, icatsia itsanë: “¡Naxanitsia!” pejaijava, jumetaniji.

<sup>4</sup> Nexata bajaraxuacujinae icatsia taniji perenajava petsobiacaballota peyanajetarucaenë. Caballojumata peecaenë, piapiaespada rajutatsi. Tocopatatsi pecopiarucaeyaexanaenexa mapanacuata jivi xaniavaetsia pejinavanapaecuenemi. Jivi jane baja namataenetsia nabeyaexanaejitsia daxita nacuanëjjava.

<sup>5</sup> Bajaraxuacujinae icatsia Corderonë sarananuca itsasello, acueyabijava. Nexata pamonaē cuatro ponëbeje piatiothiaviyajuvënënë, acueyabinë icatsia: “¡Naxanitsia!” pejaijava, jumetaniji.

Nexata bajaraxuacujinae icatsia taniji perenajava petsaebiacaballota peyanajetarucaenë. Caballojumata peecaenë, cobenaeca pepesabaponaejjava. <sup>6</sup> Icatsia jumetaniji pamonaē cuatro ponëbeje piatiothiavijavata pejumaitisijava mapacueniaje: “Janibomatacabixae, caedenariota pecomuatsinexa caëjëpa saya caekilo trigoxu. Itsa pijinia cebadaxu, caëjëpa saya acueyabi pakilobeje. Nexata caedenariota pecomuatsinexa aceitera, itsa jume, vinora, apo caëjëpae. Tspaji bajaraparanë bitso namatamota,” pejaijava, jumetaniji.

<sup>7</sup> Bajaraxuacujinae icatsia Corderonē sarananuca itsasello, cuatrojava. Nexata pamonae cuatro ponēbeje piaitothiavi, pecopiarucaenē jane baja: “¡Naxanitsia!” pejaijava, jumetaniji.

<sup>8</sup> Nexata bajaraxuacujinae icatsia taniji perenajava pevayanaecaballota peyanajetarucaenē. Caballojumata peecaenē, pevēnē Jivi Petēpaeyaexanaponaenē. Itsanē pēnaponatsi. Bajaraponē pijinia ponē pevēnē Infiernonē. Bajaraponēbeje Dioso tocopatsianatsibeje jivi ayaibitsaēto pebeponaenexabeje. Pitsibitsaētovajēto beponaenabeje, bajarapitsibitsaētovajēto matatoxenetsia nacopatsiana mapanacuataje. Daxita mapanacuajavaje bajarapacuenia exanaponaenabeje. Bajaraponēbeje pejamatabēcueneta beyaexanaponaenabeje jivi vajabitsaēcuenia, janibocuenia ata, piavitancuenia ata. Unupijinēanē piayainēanē pitsapaena. Nexata bajarapapiayainēanē jivi beponaenatsi. Bajarapacuenia itsi tsane mapanacuataje pamatacabi Dioso jivi nananeconitsiaexanaena pibisiacuenē pexanaeneconi yabara.

<sup>9</sup> Bajaraxuacujinae icatsia Corderonē sarananuca itsasello, cincojava. Nexata daxita pamonamei bajayata beyejebatsi Dioso pejumelivaisi yabara, taeyejebajē pebobenaejava altarjavabēxēpanata. Bajarapamonaemi bajayata beyejebatsi apo pecopatsiaxē Dioso pejumelivaisi jivi petsipaebaponaejava. <sup>10</sup> Daxita pamonamei bajayata beyejebatsi, Diosojavabelia pinijijumeta jumai tsanubenaē:

—Diosomē, pepo pexaniajamatabēcuenenēmē. Pacuenia najumecapanepaeya jumaitsimē, bajarapacuenia exanabiabame. ¿Detsa pamatacabibeje abaxē saica nananeconitsiaexanaenexa mapanacuata pejinavanapaevijje, pamonae panebeyejeba? jai tsanubenaē altarjavabēxēpanata pebobenaevi.

<sup>11</sup> Nexata jane baja bajarapamonae Dioso rajutatsi penioponaenaxatabijavanē. Abaxē Dioso itorobatsi bajarapamonae penacueraevetanubenaenexa. Tspajī abaxē saica itsamonae Dioso pijajivi, Jesucristo ata petonacuenebivi, pebeyejebinxatsi. Bajaraxuata bajarapamonae abaxē nacueraevetsiaexanejebatsi Dioso.

<sup>12</sup> Bajaraxuacujinae icatsia Corderonē sarananuca itsasello, seisjava. Nexata icatsia taniji bitso ira penajēabijava. Matabicabipijijuumeto bitso itaxutotsaebia. Pacuenia meravi bitso itsa aitaquiri, bitso batsaebia, bajara itaxutoitsi. Meravipijijuumeto pijinia bitso itaxutotsobia. Pacuenia pijana batsobia, bajara itaxutoitsi. <sup>13</sup> Nexata tulupu irabetsica othopaica. Pacuenia naejavacuai baothopaica, naejava itsa najēaba pinijijovibota, bajarapacuenia othopaica tulupu. <sup>14</sup> Pacuenia cuyalato baquiona, bajarapacuenia quiona daxita itaboxomi. Ajibi baja nexata itaboxo. Daxita petsutonēmi, petunaetonēmi ata, najēaba. <sup>15</sup> Nexata daxita mapanacuanējavaje jivi pevetsivi, namatayaba ibovajuanējava. Namatayaba ibotoxanetonē tuatujējjava ata. Daxita ayaijamatabēcuenenēanē, bitso riconēanē ata, namatayaba. Vajabitsaē penamatacatorobinēanē ata, piasaēnēanē ata, namatayaba. Dajubicuenia pecanajetsivitsi ata itsamonaejavabelia amoneya petonacuenebavanapaenexa, namatayaba. Apo pecanajetsivitsi ata itsamonaejavabelia amoneya petonacuenebavanapaenexa, namatayaba. Bajarapacuenia daxita namatayaba. <sup>16</sup> Nexata penamatayabivi jumaitsi ibotsutonējavabelia, ibotoxanetonējavabelia ata:

—Panetsimataothopare. Dioso, ponē eca tronota, bajaraponēvecua panematayatsianame. Pinijicuenia raeta pananeconitsiaexanaena Corderonē. Bajaraxuavecua panematayatsianame, jai picani pamonae penamatayabivi.

<sup>17</sup>Tocopiapatatsi jane baja pinijicuenia Dioso penaneconitsiaexanaemat-acabitsi. Itsajivi ata cajena apo caējēpaetsi pevecuapanepaenexa Dioso penaneconitsiaexanaecuenetsi.

**Pacuenia Juan tane athēbētatsia pacuenia itsamatacabi  
itapaitanerubijitsiatsi Israel nacuapijivi Dioso pijajivixae yabara pelivaisi**

**7** Icatsia taniji cuatro ponēbeje ángelevi. Bajarapaángelevi nacua matatoyorot-sia nubena. Caenē canacujitsia ángelevi caranatanubena jovibo. Irajava jovibo peponaeyaniva, caranatanubena. Manuamene atavecua caranatanubena. Caenae ata naejava penajēbibaniva jovibota, caranatanubena ángelevi. <sup>2</sup>Tanijinua icatsia itsaángelnē penajetarucaenē orientejavavetsina. Bajarapaángelnē caponapona pi-asaēnē Dioso pijasello. Bajarapasellota Dioso pijajivi pitapaitanerubaponaenexa. Bajarapaángelnē vavajai ayaijumeta cuatro paángelnēbejevavelia. Pamonaē cuatro ponēbeje, ángelevi, Dioso tocopatatsi pebijianaenexa ira, manuamene ata. Nexata orientejavavetsina paángelnē najetaruca, cuatro paángelnēbejevavelia jumaitsi mapacueniaje:

<sup>3</sup>—Dioso pijajivi yajava peitsacueneyaniva, pētsa abaxē pabijianame ira, naejavanē ata, manuamene ata. Matapania baja Dioso pijajivi Dioso pijasellota vaxaitsi itapaitanerubianatsi, bajara jane pabijianaename, jai ángelnē orientejavavetsina penajetarucaenē.

<sup>4</sup>Bajaraxuacujinae jumetaniji jivi ayaibitsaētoxaneto Dioso pijasellota pitapaitanerubijavatsi. Ciento cuarenta y cuatro mil pina pajivibeje itapaitanerubatsi Dioso pijasellota. Pamonaē itapaitanerubatsi Dioso pijasellota, daxita bajarapamonae Israelpijinēmi pexi doce ponēmibeje pemomoxiyajuvēnēvi. <sup>5</sup>Nexata Dioso pijasellota itapaitanerubatsi doce mil pajivibeje, Judápijinēmi pemomoxiyajuvēnēvi. Doce mil pijinia pajivibeje, Rubépijinēmi pemomoxiyajuvēnēvi. Doce mil pijinia pajivibeje, Gadpijinēmi pemomoxiyajuvēnēvi. <sup>6</sup>Doce mil pijinia pajivibeje, Aserpijinēmi pemomoxiyajuvēnēvi. Doce mil pijinia pajivibeje, Neftalípijinēmi pemomoxiyajuvēnēvi. Doce mil pijinia pajivibeje, Manasépijinēmi pemomoxiyajuvēnēvi. <sup>7</sup>Doce mil pijinia pajivibeje, Simeónpijinēmi pemomoxiyajuvēnēvi. Doce mil pijinia pajivibeje, Levípijinēmi pemomoxiyajuvēnēvi. Doce mil pijinia pajivibeje, Isacarpijinēmi pemomoxiyajuvēnēvi. <sup>8</sup>Doce mil pijinia pajivibeje, Zabulónpijinēmi pemomoxiyajuvēnēvi. Doce mil pijinia pajivibeje, Josépijinēmi pemomoxiyajuvēnēvi. Doce mil pijinia pajivibeje, Benjamínpijinēmi pemomoxiyajuvēnēvi. Nexata bajarapacuenia caejavata Dioso pijasellota itapaitanerubatsi ciento cuarenta y cuatro mil pajivibeje, Israelpijinēmi pexi doce ponēmibeje pemomoxiyajuvēnēvi.

**Pacuenia Juan athēbētatsia tane jivi ayaibitsaētoxanetonē,  
penioponaejavanē penaxatabivi, yabara pelivaisi**

<sup>9</sup>Icatsia taniji jivi ayaibitsaētoxanetonē. Bajarapamonae daxitanacuanēpijiviya-juvēnēvi, daxitaviriajumeviyajuvēnēvi. Bajarapamonae nubena Dioso peecaetrono pitabarata, Corderonē ata pitabarata. Jivi cajena ayaibitsaētoxanetonē bitso. Itsajivi ata cajena apo caējēpaetsi penamataējētsicapanepaenexa bajarapajivibitsaētoxanetonē. Daxita bajarapamonae ēpenioponaejavanē penaxatabivi. Cobenanubena benaxarebobaxutonē. <sup>10</sup>Daxita bajarapajivibitsaētoxanetonē vavajai tsanubenaē ayaijumeta. Jumaitsi tsanubenaē mapacueniaje:

VajaDioso, ponë Corderonë yajavaeca tronota, bajaraponë nacacapanepa pibisiacuene vajaexanaeconimivecua. Bajarapacuenia nacacapanepa Corderonë pejamatabëcueneta, jai tsanubenaë bajarapajivibitsaëtoxanetonë.

<sup>11</sup> Trono matatoyorotsia nubena cuatro ponëbeje piaitothiavi. Nexata piaitothiavi pepëñevelia matatoyorotsia nubena ancianovi. Bajaraxuacujinae jane baja ancianovi matatoyorotsia nubenatsi ángelevi. Daxita ángelevi ira taenubenaeya bobena irata Dioso peccaetrono pitabarata. Bobenaeya pexaniajamatabëcuene rajutanubena Diosojavabelia. <sup>12</sup> Bajarapaángelevi ira taenubenaeya jumai tsanubenaë mapacueniaje:

¡Bajara itsi tsane! PatajaDiosomë, pexaniajamatabëcuene pacarajutabiabianatsi daxitamatacabijavabelianexa. Nenivenivenaecotia nexainaejava, daxitacuene neyapëtaenëcuene ata, pacavajunupaebaponaenatsi daxitajivijavabelia. Daxitajivi casivajamatabëcuenebarëya tsabiabi tsane itsa yavenonabiabianame bajarapamonae. Daxitajivi cayaiyataeyabiabiana. Bitso cajena niasaëñë daxitamatacabijavabelianexa. Cajamatabëcuenecaëjëpa nexanaenexa daxitacuene ata daxitamatacabijavabelianexa. Bajara itsi tsane,

jai tsanubenaë irataeya daxita bajarapaángelevi Diosojavabelia.

<sup>13</sup> Nexata itsanë ancianonë nejumaitsi:

—¿Detsa mapamonae penioponaeyava penaxatabivije? ¿Detsa verena pata bajarapamonae? nejai ancianonë.

<sup>14</sup> Xanë nexata jumaitsinë:

—Xamë raeta jane yapëtaneme, janë ancianonëjavabelia.

Nexata ancianonë nejumaitsi:

—Mara pamonaeye nacua pecopiarucaevajënaeya, piayaijunavixaneto pecanicanubenaevimije. Corderonë pesivatëpaexaetsi, bajarapamonae pibisiacuene pexanaeconimi vecuaajibiaexanatsi baja. Bajaraxuata penioponaeyavanë naxataba.

<sup>15</sup> Bajaraxuata baja bajarapamonae nubena Dioso peccaetrono pitabarata. Copatsinejeva Dioso petonacuenebijava, tonacuenebavanapa Dioso pijatemplobota. Dioso, ponë eca tronota, bajaraponë evetsianatsi peyjavajinavanapaexae. <sup>16</sup> Bajarapamonae baja apo namatavenonae tsane pexaejava. Apo namatavenonae tsane mera ata. Icotia ata apo tsajavi tsanetsi. Icotia piatajuyava ata apo jamatabëitonotsi tsanetsi. <sup>17</sup> Bajara itsane tsipaji Corderonë, ponë nuca trono pitabarata, evetsianatsi bajarapamonae. Evetsianatsi xaniavaetsia. Pacuenia pijaoveja pevetsinë xaniavaetsia baeveta pijaoveja, bajarapacuenia evetsianatsi. Bajaraponë matacaponabiabianatsi itsabelia rubena iravetsina pepitsaparubenaemeranë, jivi piavitavayaexanaemeranëjavabelia. Daxita bajarapamonae Dioso pijanacuatatsia jamatabëcuenebarëya tsavanapae tsane. Tsipaji ajibi tsane peyabaranuejavanexa, nejai ancianonë mapacueniaje.

### Sietejava sello yabara pelivaisi

**8** Icatsia Corderonë sarananuca cuyalatobaxuto piupicatsatarutsisello, sietejava. Nexata jane baja athëbëtatsia ajumejibi. Bajayaepatovajëto ajumejibi. <sup>2</sup> Bajaraxuacujinae icatsia taniji siete ponëbeje ángelevi. Dioso pitabarata nubena. Nexata bajarapaángelevi rajutatsi siete patrompetabeje. <sup>3</sup> Icatsia xuacujinae itsanë ángelnë najetaruca. Cobenanajetaruca oroda pexanaevaxi. Bajarapavaxita pecaponaenexa pi-

tatsajaviitaire. Nexata nucojopa altarvënëjava pitabarata. Nexata jane baja rajutatsi ayaijava petuxujuvijava. Nexata bajarapatuxujuvijava Dioso tane daxita Dioso pijajivi pevajëtaponaejumemi Diosojavabelia bepematajërëabijava. Nexata bajarapatuxujuvijava ángelnë buata altarjumata. Bajarapaaltar, orota pexanaealtar, nuca Dioso peecaetrono pitabarata. <sup>4</sup>Nexata jane baja bajarapatuxujuvijavami ángelnë tajuita. Nexata petsëxë athëbëabetsia junaya. Patsëxë athëbëabetsia junaya altarjavavetsia, ángelenë pecobejavavetsia junaya Diosojavabetsia. Bajarapatsëxë yajavajunaya Dioso pijajivi pevajëtaponaejumemi Diosojavabelia. <sup>5</sup>Bajaraxuacujinae ángelnë altarjumavecua nota pitatsajaviitaire. Bajarapaitatsajaviitaire vënëta pijavaxi. Bajaraxuacujinae ángelnë bajarapaitatsajaviitaire bajarapavaxi ënëtuatujëvecua othotjarabareca irabereca. Nexata yamaxë iratareca najumeta. Yamaxë binebinejai iratareca. Iranë jane baja ayaiucuenia najëaba.

### Siete patrompetabeje yabara pelivaisi

<sup>6</sup>Siete paángelbeje canaveretanubena pijatrompetanë piobinexa.

<sup>7</sup>Nexata jane baja penamataxainaeángelnë oba pijatrompeta. Nexata bitso pecainejebimatarejetonë othopareca irabereca. Bajara pacainejebimatarejetonë matajërëaba isoto. Matajërëabanua pijana yajava. Nexata jane baja ira tajuepona daxita nacuanëjava. Panacuanëjava ira tajuepona, pairavajëto tajuepona matatoxenetsia itsiata yajuvënënacopatapona. Daxitaira apo veriajavapona. Nexata panacuanëjava ira tajuepona, daxita naejavanëmi, pejuvijavanëmi ata, yajavatajuepona.

<sup>8</sup>Bajaraxuacujinae icatsia pecotocaeviángelnë oba pijatrompeta. Taniji bepini-jitsutoxaneto petajueyecajava. Bajaraxua jopareca manuameniareca. Manuamenemi nexata pijana. Pamenevajëto ëpijanamene tsarucæ, bajarapamenevajëto matatoxenetsia itsiata pijananejeva yajuvënënacopata. <sup>9</sup>Pamanuamene ëpijanamene tsarucæ, bajara pamanuamenepijidujuaimi tëpa baja. Pamanuamene pijinia pijananejeva nacopata, bajara pamanuamenepijidujuai apo tëpae. Pamanuamene ëpijanamene tsarucæ, bajarapamanuamene perubenaebarcaxanetonëmi ata napeneta. Pamanuamene pijinia pijananejeva nacopata, bajarapamanuamene perubenaebarcaxanetonë apo napenetsi.

<sup>10</sup>Bajaraxuacujinae icatsia acueyabiángelnë oba pijatrompeta. Nexata pinijitutulputoxaneto jopareca irabereca. Bajarapatuluputoxaneto tajuerucaponareca. Pacuenia bepinijisotocotixaneto bacotia itsi, bajaracotia itsi tsarunaereca. Panacuatata jopa bajarapatuluputo, bajarapanacuata daxita perubenaemenianëmi, bijiana baja. Iravetsina mera pepitsaparubenaejavanëmi ata, bijiana baja. Nexata baja abeje daxita bajarapameranëmi. Panacuata apo jopae bajarapatuluputo, bajarapanacuata perubenaemenianë, apo bijiana. Nexata xanepana daxita bajarapameranë. Mera iravetsina pepitsaparubenaejavanëjava ata, xanepanarubena. <sup>11</sup>Bajarapatuluputo pevënë Ajenjo. Pamerajavareca jopareca bajarapatuluputo, bajarapamera atsaxa baja. Jivi ayaiBITSaëtoxanetonë tëpa penatsiapaexæ bajarapamera.

<sup>12</sup>Bajaraxuacujinae icatsia cuatroángelnë oba pijatrompeta. Nexata jane baja itaxutobijiana matcabipijjuameto. Itaxutobijiana meravipijjuameto ata. Itaxutobijiana tuluputonë ata. Nexata matcabipijjuameto bijiaya naitayota. Meravipijjuameto ata bijiaya naitayota.

<sup>13</sup> Bajaraxuacujinae icatsia taniji itsanë ángelnë pepunanajetarucaenë. Pepunana-jetarucaenë ángelnë jumai tsanajetarucæ ayaijumeta:

—¡Toabejtsi baja tsaponæ tsane mapanacuapijivije itsa obiana trompeta acueyabi paángelnëbeje penacopabivi! jai tsanajetarucæ ángelnë pepunanajetarucaenë.

**9** Bajaraxuacujinae icatsia cincoángelnë oba pijatrompeta. Nexata taniji athëbëvereca ángelnë perunæjavareca irabereca. Nexata bajarapaángelnë Dioso rajutatsi llave, iravetsina pepitsapaemëthëxaneto pijallave. <sup>2</sup>Nexata jane baja bajarapallaveta ángelnë mëthëxaneto vëpacasarana. Ángelnë jane baja vëpata mëthëxaneto. Nexata bajarapamëthëxanetojavatsina pitsapaina ètsëxëxaneto. Pitsitsëxëxaneto bapitsapa pinijipabixaneto itsa tajuita, bajarapitsitsëxëxaneto pitsapaina bajarapamëthëxanetojavatsina. Nexata bajarapatsëxëta matabipijijuametomi itaxutoaitaquiriayaexana. Itaboxo ata aitaquiriayaexana. <sup>3</sup>Bajarapatsëxëjavaverena pitsapa bosese. Bajarapabosese daxitanacuanëjva punanajetarubena. Bajarapabosese cajëpaeyaexanatsi jivi pecacuatsinexa pebosotota. Pacuenia aqueto cacuata pebosotota, bajarapacuenia jivi pecacuat-aponæenexa. <sup>4</sup>Bajarapabosese apo itorobitsi pebijianaenexa itsacuenëjava ata xua pejuvijava. Nexata bajarapabosese apo bijianaponæ pona. Apo bijianaponæ naejavanë ata. Tsipaji itorobatsi pecacuatsinexa saya ëjivi. Nexata pamonæ Dioso pijasellota apo itapaitanerutsitsi, bajarapamonæ pecacuatsinexa. <sup>5</sup>Itsia baitsi jane apo tocopatsitsi caecuenia pebeyaxuabaponæenexa. Tocopatatsi saya jivi itsa cacuata, penavixaetaeyaexanaenexa cinco pajuametobeje. Nexata bajarapabosese jivi itsa cacuatsianatsi, bitso jivi navixaetaena. Pavixaevajëto aqueto itsa cacuata, baatane, bajarapavixaevajëto jivi navixaetaena. <sup>6</sup>Nexata pamonæ cacuatsianatsi bajarapabosese, jitsipaena picani petëpaenexa bajayajebi penavixaetaeyaniva. Itsia baitsi jane bajarapamonæ Dioso abaxë apo tocopatsi tsane petëpaenexa. Penabeyaxuabinexa ata, Dioso apo tocopatsi tsane.

<sup>7</sup>Bajarapabosese ajumabocotaja. Pacuenia vajabitsaë itsa nabejtsia, pijacaballo bajumaxataba hierropananë pijavajabitsaë petojororonaeyanivatsi, bajara itsanubænæ bajarapabosese. Beorota pexanaecoronanë namataxatabanubena. Pacuenia pebi itabaraisi, bajaraitabaraisi. <sup>8</sup>Pematana xaina. Pacuenia petiriva matanaisi, bajara matanaisi. Pevonotonë pijinia benevëthëvonotonë. <sup>9</sup>Bajarapamonæ pejumabocotonë yajavanaexana baja cajena behierrojumabocotonë pejororonaeyanivatsi itsajivi ata. Pecorofe najumeta. Pacuenia vajabitsaë penabenexa itsa pona pijavajabitsaëjavabelia, caballo itsa roboboca carrozavënëmonë banajumeta, bajarapacuenia najumeta bosese pecorofe. <sup>10</sup>Bajarapabosese pebosotonëcopiata xaina peetonë jivi pecacuatsinexa. Pacuenia aqueto pebosotocopiata xaina peeto, bajnia benevëthëvonotara itsi. Tocopatatsi peetota pecacuatsinexa jivi, jivi penavixaetaenexa cinco pajuametobeje. <sup>11</sup>Bosese cajena xaina ángelnë pitorobinënexatsi, pinijimëthëxaneto pevetsinë. Bajarapaángelnë hebreojumeta pevënë Abadón. Griegojumeta pijinia Apolión, “Peverebiabinë,” pejaijume.

<sup>12</sup>Bajarapapiayaicue penamataxinaejava. Itsia baitsi jane abaxë saica anijavabeje.

<sup>13</sup>Bajaraxuacujinae icatsia seisángelnë oba pijatrompeta. Paaltar nuca Dioso pitabarata, bajarapaaltarjavaverena penajumetsijava, ayaijume, jumetaniji. Bajarapaaltar orota pexanaealtar. Bajarapaaltar cuatro pamataetobeje xaina. Cae-

upi canacujitsia mataerucazona. Bajarapamataetonē tuatuajēta jumepitsapa. <sup>14</sup>Bajarapaaltarjavaverena jumaiti seisāngelnē trompeta pexainaenējavabelia mapacueniaje:

—Isicare cuatro ponēbeje āngelevi, pamonaē cēbejebatsi pinijimenejavata, Eufratesvēnē menejavata, jai bajarapaaltarjavaverena.

<sup>15</sup>Nexata jane baja pecēbejebiāngelēvimiti isicatsi. Isicatsi bajarapaāngelēvi pebenexa jivi. Bajarapaāngelēvi jivi ayaibitsaētonē beponaejitsia daxitanacuanējava. Bajara saya cajena ēxuanexa, paāngelēvi Dioso jamatabēcuetā pexainaenējavabelia mapacueniaje:

—Isicare cuatro ponēbeje āngelevi, pamonaē eneevetanubena Dioso pitorobinexatsi jivi pebeponaenexa paepatota tocaējētatsi. <sup>16</sup>Nexata icatsia jumetaniji bajarapaāngelēvi pijajivi, vajabitsaēvi, pitorobijava peponaenexa caballota. Doscientos millones ponēbeje vajabitsaēvi pona jivi pebeponaenexa daxitanacuanējava.

<sup>17</sup>Bemajitsinaebota taniji bajarapamonae caballota peponaejava. Vajabitsaēvi namēpabēxataba hierropananē pejorojronaeyanivatsi pijavajabitsaē. Vajabitsaēvi penamēpabēxatabijavanē itabēta acueyabi paviriabejējavata. Itabēta mapaviriabejējavataje. Itabēta petsobiajavata. Itabēta perajenaējavata. Itabēta pevayanaējavata. Bajarapaviriabejējavata itabēta. Pacuenia nevēthēmatabocoto itsi, bajaramataboco itsi bajarapacaballuanē. Pecuibovojotonējavavetsina pitsapa pitarunutsicotia, ētsēxē yajava, azufre ata yajava. <sup>18</sup>Xuanē caballuanē pecuibovojotonējavavetsina pitsapa, bajaraxuanē jivi ayaibitsaētoxonetonē yatēpazona daxitanacuanējava. Pabitsaētovajēto tēpa, bajarapabitsaētovajēto matatoxenetsia nacopata mapanacuataje. <sup>19</sup>Bajarapacaballuanē caējēpatsi jivi pebeponaenexa pecuibovojotonēta, pebosotonēta ata. Bajarapacaballuanē pebosotonēupianē bejomomatabocotonē. Pacuenia jomo pematabocotota caējēpatsi jivi pesininexa pebeyaxuabinexa, bajara itsi bajarapacaballuanē pebosotonēupianē.

<sup>20</sup>Itsiata baitsi jane pamonaē peyajuvēnētēpaēvi, pamonaē penacopabivi, bajarapamonae tsiteca pibisiacuene exavanana. Apo copatsi dovathivijavabelia penavajēcabiabijava. Apo copatsinua pecobeta jumapecataeya pexanaenēanējavabelia ata penavajēcabiabijava. Bajaraxuanē saya pexanaenēanē oronanitonēta, platananitonēta ata, broncejavanēta ata, ibotonēta ata, naejavanēta ata. Nexata bajaraxuanē apo caējēpaetsi petaenexa. Apo caējēpaetsi pejumetaenexa ata. Apo caējēpaetsi peponaenexa ata. <sup>21</sup>Pamonaē peyajuvēnētēpaēvi, pamonaē penacopabivi, bajarapamonae apo copatsi jivi pebejava. Apo copatsi penajorobijava ata. Apo copatsi pevitota pibisiacuene pexanaejava ata. Apo copatsi penacobetoxotsijava ata.

### Pacuenia Juan tane āngelenē pecobenanucaejava cuyalatobaxutoyo yabara pelivaisi

**10** Icatsia taniji itsaāngelnē athēbēvetsica perunaējavatsica. Runaica mapanacuayabetsicaje. Bajarapaāngelnē bitso piasaēāngelnē. Itarērēbo tuatuajēta najetaruca. Natsimatatsēnērutanajetaruca aravalibo. Itabaranaitayotanajetaruca. Pacuenia matabapipijjuameto baitayota, bajarapacuenia itabaranaitayotanajetaruca. Petopabeje pijinia pacuenia isotocotia tsobia, bajarapacuenia cotiatsobia. <sup>2</sup>Cuyalatobaxutoyo baxupatanuca. Pecujianenia pataxu nataxunutanuca manuameneboxovereca. Petsavenonenia pijinia pataxu nataxunutanuca irajumavereca. <sup>3</sup>Nexata vavajai tsaxuabi ayaijumeta. Pacuenia nevēthē itsa fiaba



ayaijume, bajarapacuenia ayaijume. Pevavajaicujinae siete payamaxēbeje najumeta athēbētatsia. <sup>4</sup>Yamaxē penajumetsicujinae, yaquinaejitsianē picani pajamatabēcuene yabara yamaxē penajumetsijava neyapētaeyaexana. Itacarajeta athēbēvetsica tanejumaitsijava, jumetaniji. Nejumaitsi athēbēvetsica mapacueniaje:

—Muetsia saya xainare pajamatabēcuene yabara yamaxē penajumetsijava, cayapētaeyaexana. Pētsa yaquiname bajarapalivaisi, nejai athēbēvetsica.

<sup>5</sup>Bajaraxuacujinae ángelnē, ponē nataxunutanuca manuameneboxovereca, irajumavereca ata, bajaraponē nacobeyotanuca athēbēbetsia pecujanenia pacobe.

<sup>6</sup>Bajarapaángelnē nacobeyotsiaya jumai tsanuca:

—Dioso, daxitamatacabijavabelianexa peponaponaenē, caecuenia exana mapanacuaje, itaboxo yajava. Nexata caecuenia yajavaexana mapanacuapijicueneje, itaboxopijicuene ata yajava. Caecuenia yajavaexana manuamene ata, manuamenepijicuene ata yajava. Bajaraponē pitabarata najumecapanepaeya cajumaitsijitsiatsi mapacueniaje. Copiapatsijitsia rabaja pacuenia Dioso tajēvelia najamatabēxaina pexanaenexa. <sup>7</sup>Itsa rabaja paepatota siete ángelnē obiana pijatrompeta, bajarapaepatota Dioso jane baja taxuxuabiana pexanaejava pacuenia baja cajena tajēvelia Dioso najamatabēxaina pexanaponaenexa jivijavabelia. Muetsia pexainabuatsilivaisimi itajētsiana. Copiapatsiana jane baja pacuenia bajayata Dioso tajēvelia najumecapanepaeya jumai profetavimijavabelia, jai tsanucacae nacobeyotsiaya ángelnē.

<sup>8</sup>Copiaya pajume jumetaniji athēbēvetsica tanejumaitsijava, bajarapajume icatsia jumetaniji. Nejumaitsi icatsia athēbēvetsica mapacueniaje:

—Ponē ángelnē nataxunutanuca manuameneboxovereca, irajumavereca ata, bajarapaángelnē kujiremelia. Vecuapire pacuyalatobaxutoyo bajarapaángelnē baxupatanuca, nejai athēbēvetsica.

<sup>9</sup>Nexata kujiliajē ángelnē. Vajētajē nexata tanerajutsinexa bajarapacuyalatobaxutoyo. Bajarapaángelnē nejumaitsi mapacueniaje:

—Ājā, pire baja. Xaema necuiboxaicaenexa. Pacuenia jabēra xaica, bajara itsi mapacuyalatobaxutoyoje. Itsiata baitsi jane necotsorotubereca atsaxa tsane, nejai ángelnē.

<sup>10</sup>Nexata baja ángelnē bajarapacuyalatobaxutoyo vecuapitajē. Xaniji jane baja. Nexata jane baja cuiboxaicajē. Pacuenia jabēra xaica, bajara itsi. Itsiata baitsi jane taquijonicujinae tacotsorotubereca atsaxa. <sup>11</sup>Nexata icatsia ángelnē nejumaitsi:

—Tsipaebare pacuenia Dioso sivanajamatabēxaina daxitanacuanēpijivi. Tsipaebare pacuenia Dioso sivanajamatabēxaina daxitavirijumevi ata. Tsipaebare pacuenia Dioso sivanajamatabēxaina caenacua canacujitsia pevetsinēanē ata, nejai ángelnē.

### **Pacuenia itsamatacabi anijanēbeje jivi tsipaebaponaenabeje palivaisi Dioso yapētaeyaexanaenatsibeje yabara pelivaisi**

**11** Icatsia taniji ángelnē. Nerajuta piapianaēbo. Nejumaitsi mapacueniaje: —Nonotapunare. Caponare mapanaēboje necaējēbinexa Dioso pijatemplobo, necaējēbinexa altarvēnējava ata. Namataējētsianamenua pajivibeje bajarapatemplobota navajēca Diosojavabelia. <sup>2</sup>Itsiata pētsa caējētame templobopanabo. Tsipaji bajarapapanabo tocopata baja Dioso apo pejumecovēnētsivinexa, pamonaē saicayanacuaverena pepatsivi pejinavanapaenexa. Bajarapamonae jinavanapaena

Jerusalén tomarata cuarenta y dos pajuametobeje. Saicayanacuaverena pepatsivi, apo yayiatae tsane judíovi pijatomara. <sup>3-4</sup> Bajayata profetanēmi peyaquinaebaxutota, comparacióncuenia tajēvelia jumaitsi mapacueniaje: “Anijanaebeje, olivonaebeje, anijajavabeje pijinia pitayotanucaejavabeje, nubenaena mapanacuapijivi pijatuxanenē Dioso pitabarata,” jai. Bajarapacuenia comparacióncuenia tajēvelia itsa jumaitsi, tajēvelia vajunupaeba anijanēbeje jivi petsipaebanajetarucaejavanexabeje palivaisi Dioso yapētaeyaexanaenatsibeje. Nexata anijanēbeje Dioso itorobiana jivi petsipaebanajetarucaenexabeje palivaisi Dioso yapētaeyaexanaenatsibeje. Palivaisi bajaraponēbeje Dioso yapētaeyaexanaenatsibeje, bajarapalivaisi mil doscientos sesenta pamatacabibeje jivi tsipaebanajetarucaenabeje. Naxatatsianabeje piayopapaēbērējava. Bajarapacuenia naxatatsianabeje bitso pesivajamatabēcuenebējaixaebeje tsane pamonaē apo peyaiyataēvi Jerusaléntomara, nejai ángelnē.

<sup>5</sup> Itsajivi itsa jamatabēitsacueniabianatsibeje, bajaraponēbeje nayajivitajuitsianabeje pecuibovojotovetsina pepitsapaecotiata, pitarunutsicotiata. <sup>6</sup> Bajaraponebanajetarucaenabeje. Naxatatsianabeje piayopapaēbērējava. Bajēbeje caējēpaenatsibeje pitavetsinexabeje ema pejopaeyaniva. Pamatacabibeje jivi tsipaebanajetarucaenabeje palivaisi Dioso yapētaeyaexanaenatsibeje, bajarapamatacabibeje abaxē ema apo jopaeyaexanaebeje tsane. Caējēpaenatsibejenua mera ata pijanara pexanaenexabeje. Caējēpaenatsibejenua daxitaviria piayaicuene pecapitsapaenexabeje pamatacabita jitsipaenabeje. <sup>7</sup> Bajaraponēbeje itsa veretsianabeje palivaisi Dioso yapētaeyaexanaenatsibeje jivi petsipaebanajetarucaejavabeje, bitso piayainē pitsapaenina pinijimēthēxanetojavatsina. Bitso piayainē pitsapaenina pebenexatsibeje bajaraponēbeje. Nexata amoneyabianatsibeje. Nexata baja beyaxuabianatsibeje. <sup>8</sup> Nexata petēpaenēbeje bocaenabeje Jerusalén tomaraxaneto callejavata. Bajarapatomarata bajayatami vajatuxanenē ata cobematabiabarutatsi cruzajavelia. Bajarapatomara yabara jivi itsajavata: “Sodomatomara raja,” jai tsabiabi. Itsajavata: “Egiptotomara raja,” jai tsabiabi. Bajarapacuenia jumai tsabiabi Jerusaléntomara yabara tsipaji bajarapatomarapijivi bitso pibisiacuene exana. <sup>9</sup> Nexata bajaraponēbeje, Jerusaléntomara callejavata petēpaenēbeje, bocaenabeje acueyabi pamatacabibeje epatua. Tsipaji Jerusaléntomara pevetsivi apo tocopatsi tsane itsajivi ata pemēthētsinexatsibeje bajaraponēbeje. Nexata daxitaviriajumevi, daxitanacuanēpijivi ata, taeyabuatsianatsibeje. <sup>10</sup> Dioso apo pejumecovēnētsivi sivajamatabēcuenebarēyatsibeje tsane petēpanucaejavabeje. Bitso cajena barēya tsane Dioso apo pejumecovēnētsivi. Nexata pebarēyajamatabēcuene fiesta exanaena. Namataenetsia narajutsiana amoneya itsacuejavanē. Bajarapacuenia exanaena Dioso apo pejumecovēnētsivi bajaraponēbeje petēpaejavabeje yabara. Tsipaji Dioso apo pejumecovēnētsivi jumaitsi tsane: “Copiaruca rabaja maponēbeje livaisi vajanacatsipaebabiabijavaje. Copiaruca baja vajanacajamatabēitonotabiabijava,” jai tsane. <sup>11</sup> Itsiata baitsi jane petēpae-cujinaebeje, acueyabi pamatacabibejecujinae itsamatacabi epatua, icatsia Dioso piasaējumali rajutsianatsibeje. Nexata petēpaejavabejevecua namatacotsianabeje. Daxita cajena pamonaē taeyabuatsianatsibeje petēpanucaejavabeje, bitso kujunavianatsibeje. <sup>12</sup> Bajaraxuacujinae bajaraponēbeje jumetaenabeje athēbēvetsica pini-jijumeta pejumaitsijavatsibeje: “Pajunaiminabeje,” pejaijavatsibeje. Nexata bajaraponēbeje junaeniabeje athēbēabetsia itarērēbo tuatuaējavabetsia. Daxita pitoyavitsibeje pētaenubenaenatsibeje. <sup>13</sup> Bajara jane paepatota ira najēabiana. Nexata Jerusalén tomarata, itsajota diez pabobeje najuaenaena, caebo yajuvēnjopapon-

aena. Nueve nexata pabobeje nacopataponaena. Nexata Jerusalén tomarata ayaijava bo othopaena. Siete mil pijinia pajvibeje bajarapairanajëabita tēpaena. Jerusalén tomarapijivi, pamonaē nacopabiana, bitso cajena junaviana. Nexata bajarapamonaē pecajunavi, Diosojavelia jumaitsi tsane:

—Diosomē, ayaijamatabëcuenenēmē bitso, jai tsane pecajunavi Diosojavelia, athëbëtatsia peecaenëjavavelia.

<sup>14</sup> Anijapiayaicuenebeje rabaja panepaena. Itsiata bailsi jane icatsia itsajava pi-ayaicuenejava bepïjia najetarucaena, acueyabijava.

### **Sietenë baja ángelnë pijatrompeta piobijava yabara pelivaisi**

<sup>15</sup> Sietenë jane baja ángelnë oba pijatrompeta. Nexata athëbëvetsica pinijijumeta pejumaitsijava, jumetaniji. Jumaitsi mapacueniaje:

Daxitanacuanëpijivi rajane baja vajatuxanenë Cristobeje, Diosobeje, evetaponapon-aenabeje. Bajaraponëbeje evetaponaponaenabeje daxitamatacabijavabelianexa, pejajjava athëbëvetsica, jumetaniji.

<sup>16</sup> Nexata pamonaē veinticuatro ponëbeje ancianovi, pamonaē ena pijatronota Dioso pitabarata, daxita bajarapamonaē irataeya bobena. <sup>17</sup> Bajarapamonaē ancianovi irataeya jumai tsanubenaē Diosojavelia:

Xamë Diosonëmē, niajamatabëcuenesaënë daxita mapanacuanë pevetsivivecuaje. Ajena, pamatacabi, ponaponame. Bajayata mapanacuaje nexanaeva-jënaeya ata, ponaponame. Daxitamatacabijavabelianexa ata ponaponame. Pexaniajamatabëcuene pacarajutatsi. Tsipaji baja taxuxuabame pinijisaëta nevetaponaponaenexa daxita mapanacuanëpijivije. <sup>18</sup> Daxita mapanacuanëpijivije cabaraanaepana bitso. Bajaraxuata tocopiapatatsi baja nenaneconitsiaexanaenexa daxita bajarapamonaē. Tocopiapatatsinua baja petëpaevimi ata nenaneconitsiaexanaenexa. Tocopiapatatsinua baja nijajivi, xuavajëto catonacuenebavanapa, bajarapitsijavavajëto nerajutsinexa pecatonacuenebavanapaematamo. Pamonaē catotsipaebavanapa nijumelivaisi itsamonaëjavavelia, bajarapamonaē jane baja rajutsianame xua toxainame bajarapamonaē nerajutsinexa. Pamonaē ayaijamatabëcuene pexainaevi ata, cavënëlivaisiyaiyatane. Pamonaē beveliajamatabëcuene pexainaevi ata, cavënëlivaisiyaiyatane. Bajarapamonaē ata jane baja rajutsianame xua toxainame bajarapamonaē nerajutsinexa. Tocopiapatatsinua baja pijinia neverebiabinexa daxita pamonaē bïjiana mapanacuaje, pamonaē ata jamatabëcuenebïjiana pecajumecovënëtsivi, jai tsanubenaē irataeya ancianovi Diosojavelia.

<sup>19</sup> Nexata athëbëtatsia Dioso pijatemplobo nabaupata. Bajarapatemplobo ënëtatsia taeyabuatsiajë baula. Bajarapabaulaënëta jeba Dioso pejumelivaisi peyaquina-jebijava. Bajarapaitane jumai tsarubenaē pacuenia Dioso najumecapanepaeya jumaitsi pijajivi pecapanepaenexa pijaneconivecua. Yamaxë binebinejai. Najumetanua. Ira najëabanua. Bitso pecainejebimatarejetonë irabetsica othopaica pinijicuenia.

### **Pacuenia Juan athëbëtatsia tane dragón bitso pianapanaejava yabara pelivaisi**

**12** Athëbëtatsia ayaicuene naitajëta vajanacayapëtaeyaexanaenexa pacuenia it-samatacabi pevajënaeyavelia itsi tsaponaejitsia mapanacuataje. Athëbëtatsia

petiriva taenutajë. Petiriva jumanava naitayotanuca. Pacuenia matabicipijjuameto baitayota, bajarapacuenia jumanava naitayotanuca. Meravipijjuametojavavelia nataxunutanuca. Namataxatatatanuca doce patuluputobeje pexainae corona. <sup>2</sup>Bajarapova petiriva penacueto peyacotajinaeva. Pevixaenotsijavatatsi bitso yaaëäjai. <sup>3</sup>Nexata bajarajotatsia naitajëta piayainë, petsobianë, pinijnëxaneto dragón, baitsi dovathi. Xaina siete pamatabocotobeje, diez pamataetobeje. Caematabocoto canacujitsia namataxatatapona corona. <sup>4</sup>Bajaraponë, dragón, nabosovebacia. Nexata penabosovebabejavata tulupu ayajava penetsica irabetsica. Xuavajëto tulupu othopaica irabetsica, bajaraxuavajëto matatoxenetsia nacopabarubenaya athëbëtat-sia. Bajaraponë, dragón, nucojopa penacueto pevixaenotsivatsi pitabarata, bajarapova itsa vecuanaexanatsi penacueto, pecoxixaenexatsi picani. <sup>5</sup>Nexata jane baja petiriva vecuanaexanatsi pebinëyo. Bajaraponëyo caponatsi Diosojavabetsia Dioso pijatronota peecaenexa. Nexata baja bajaraponëyo apo xaetsi dragón. Bajaraponë itsamatacabi mapanacuata jivi pepo pevetsinë tsane. Itsa evetsiana, ajumesaëya itorobabiabiana pejumecovënëtsinexatsi. <sup>6</sup>Nexata petiriva penacuetonëyo pevecuanaexanaecujinaetsi, najetabajirava petusato nacuayabelia, itsabelia Dioso tsivajënaexaniavaetatsi peponaponaenexa. Bajarajota pexaejava baja Dioso rajutatsi mil doscientos sesenta pamatacabibeje.

<sup>7</sup>Bajaraxuacujinae athëbëtat-sia vajabitsaë exana. Angelevi penamatacaitorobinë, Miguelvënëne, pijaängelevi yajava, barënbacia dragónjavabelia. Dragón pijinia, pijaängelevi yajava, barënbacia Migueljavabelia. <sup>8</sup>Itsiata baitsi jane dragón cujirua-moneyabatsi. Nexata apo tocopatsitsi caenë ata dragón pijajivitonë penacopatsinexa athëbëtat-sia. <sup>9</sup>Dragón cajena ayainëxaneto. Itsiata baitsi jane xuabocatsi athëbëvetsica daxita pijajivi yajava. Nexata bajaraponë pevënë Dovathi. Itsavënë Satanás. Bajaraponë bajayata itsa naitajëta jivijavabelia, naitajëta bejomocuenia. Bajaraponë jivi yamaxëitojorobabiaba daxitanacuanëjava.

<sup>10</sup>Nexata jumetaniji pinijijumeta athëbëvetsica pejumaitsijava. Jumaitsi mapacueniaje:

—Copiapata rabaja Dioso vajanacapanepaejavanexa vajaneconivecua. Copiapata rabaja Dioso pesaëta jivi pevetaponaponaenexa. Copiapata rabaja Dioso pijajivi pitorobaponaenexa. Copiapata rabaja Cristo ata pitorobaponaenexa mapanacuajavaje. Bajarapacuenia copiapata baja daxita bajarapacuenia tsipaji baja ponë neconitabiaba Diosojavabelia Dioso vajanajuajumecovënëtavanapaevi, bajaraponë baja xuabocatsi athëbëvetsica. Baitsi dovathi. Bajaraponë picani Dioso pitabaratsia nuca. Nexata bajaraponë daxita matabacijebi, daxitameravijebi ata, Diosojavabelia neconitabiaba Dioso vajanajuajumecovënëtavanapaevi. <sup>11</sup>Dioso vajanajuajumecovënëtavanapaevi pejumecovënëtsixae Cristo pesivatëpaejavatsi cruzata, cueneamoneyabapona dovathi. Bajarapacuenia cueneamoneyabapona tsipaji navajunupaebaponanua itsamonaejavabelia Cristo pecapanepaejavanexatsi pijaneconivecua. Dioso vajanajuacovënëtavanapaevi jamatabëjumai tsabiabi: “Itsa nebeyaxuabiana Dioso pejumelivaisi yabara, jema baja nebeyaxuabiana,” jamatabëjai tsabiabi. <sup>12</sup>Athëbënacuatatsia panejinavanapaevi, pasivajamatabëcuenebarëyamëre Dioso mapanacuayabetsicaje papecavecuaxuabijavatsica dovathi. Mapanacuataje panejinavanapaevi, bitso cajena bepajjobimë tsane. Paxamë ata, manuameneta panejinavanapaevi, bitso cajena bepajjobimë tsane. Bajarapacuenia bitso bepajjobimë tsane tsipaji baja panetuatujëatsica dovathi xuabocatsi. Nexata baja aeconoxae bitso ba-

jaraponë anaepanaponapona. Tshipaji baja yapëtane caematacabibeje saya petonaco-patsijavatsi pexuabinoxatsi infiernojavabelia, pejajjume athëbëvetsica pinijijumeta, jumetaniji.

<sup>13</sup>Nexata dragón, ponë dovathi, itsa yapëtane athëbëvetsica pexuabijavatsitsica irabetsica, nexata barajinapona pova vecuanaexanatsi pebinëyo. <sup>14</sup>Itsiaata baitsi jane bajarapova rajutatsi anijacorofetobeje, becotsalacorofetobeje. Bajarapova nexata dragón vecuapuna tajëbelia, petusato nacuayabelia, bajarajotalia peponapon-aenexa. Nexata bajarajotalia Dioso rajutabiabatsi pexaejava acueyabi pavaibeje epatua. <sup>15</sup>Dragón pecuibovojotuatsina capitsapa mera, ayaira. Pecuibovojotuatsina pepitsapaemera naexana pepamene pecaponaenexatsi picani petiriva. <sup>16</sup>Itsiaata baitsi jane petiriva Dioso yavenonatsi. Ira nexata navoconareca ayaijava. Nexata pamerami dragón pecuibovojotuatsina pitsapaina, bajarapamëthëareca joneca. <sup>17</sup>Bajaraxuata nexata dragón bitso anaepana petirivajavabelia. Nexata baja icatsia dragón pona petiriva pexi penacopabivi pebeyejebinxexa. Bajarapamonae jumecovënëtavanapa Dioso pejumelivaisi pitorobicueniatsi. Bajarapamonae caasaë tsavanapaenua penavajunupaebijava Jesucristo pejumecovënëtavanapaejava. Nexata bajarapamonae dragón tsimaxëponatsi pebeyejebinxexatsi.

### Pacuenia piayainëbeje pelivaisi Juan yaquina yabara pelivaisi

**13** Nucajë manuamene tajetabota. Nexata taenucajë manuamenejavatsina pepitsapaejavatsina piayainë. Siete pamatabocotobeje diez pamataetobeje pexainaenë. Caemataeto canacujitsia xainapona corona. Caematabocoto canacujitsia Dioso apo pejitsipaevënëanë itanerubena. <sup>2</sup>Ponë piayainë taenucajë pepitsapaejavatsina, benevëthë picani. Itsiaata petaxu betsonëtaxu. Pecuibovojoto pininia benevëthë petsobianëcuibovojoto. Bjaraponë nasaërajutatsi dragón. Pijatrono ata rajutatsi. Jamatabëcuene caëjëpaeyaexanatsinua ayaicuenia pitorobinxexa daxitajivi mapanacuajavaje. <sup>3</sup>Piayainë caematabocoto matabocovajënëbatsi apo bepeyaasaëvajënënexa itajara. Itsiaata baja bajarapavajënë matanacëta. Nexata daxitanacuanëpijivi itsa tane bajaraponë pematavajënënacëtsijava, bitso jamatabëcuenenabenajaca. Nexata bajarapamonae jumecovënëta bajaraponë. <sup>4</sup>Dragón tocopatatsi pitorobinxexa daxitajivi mapanacuajavaje. Bajaraxuata daxitajivi pematabacabëta navajëcabiaba dragónjavabelia. Pematabacabëta navajëcabiabanua piayainëjavabelia ata. Bajarapamonae najumaitsi mapacueniaje:

—Ajibi cajena itsanë ata pejamatabëcuenecaëjëpaenëtsi pacuenia itsi mapapiayainëje. Ajibi cajena itsanë ata pecaëjëpaenëtsi pebarënenabexa maponëje pecue-neamoneyabinexa, najai bajarapamonae piayainë yabara.

<sup>5</sup>Piayainë tocopatatsinua pibisiacuenia Dioso pebaracuaicuaijainexa. Tocopatatsinua pejumaitsabiabinexa: “Xanë cajena bitso ayaijamatabëcuenenë Dioso matatoxenetsia,” pejaitsabiabinexa. Tocopatatsinua pitorobinxexa jivi mapanacuajavaje cuarenta y dos pajuametobeje, baitsi acueyabi pavaibeje epatua. <sup>6</sup>Bjaraponë exanapona pacuenia tocopatatsi. Bitso pibisiacuenia Dioso baracuaicuaijai tsabiabi. Dioso pijatemplobo ata pibisiacuenia baracuaicuaijai tsabiabi. Athëbëtatsia pejinavanapaevi ata pibisiacuenia baracuaicuaijai tsabiabi. <sup>7</sup>Tocopatatsinua vajabitsaë pexanaenexa Dioso pijajivijavabelia. Tocopatatsinua pecueamoneyabinexa vajabitsaë itsa exana Dioso pijajivijavabelia. Tocopatatsinua pitorobinxexa daxitaviriajumevi ata. Tocopatatsinua pitorobinxexa daxita nacuanëpijivi ata. <sup>8</sup>Nexata

daxita mapanacuapijivije pematabacabëta navajëcabiaba piayainëjavabelia. Dioso nacua pexanaevajënaeya, Dioso nacua pexanaecujinae ata, bajarapamonae apo vënërubena Corderonë pijacuyalatobaxutota. Corderonë jivi rajuta matacabi apo pevèverecaajava pesivatëpaexae cruzata.

<sup>9</sup>Itsa pamuxuvojorubename, panatojumetaema mapalivaisije. <sup>10</sup>Pamonae Dioso pijajivi naneconitsiaexanaena, nexata penaneconitsivi pejebabiabibojavabelia jebiana, bajarapamonae juya itsamonae naneconitsiaexanaenatsi. Pamonae pijinia Dioso pijajivi espadata bena, bajarapamonae juya itsamonae bajarapitsiespadata benatsi. Bajaraxuata itsamonae Dioso pijajivi bejiobiaexanabiabi atatsi, xanepana xaniavaetsia penajamatabëcuenecopatsinexa Diosojavabelia epatua copatsinejeva.

<sup>11</sup>Bajaraxuacujinae icatsia taenucajë iravetsina pepitsapaejava itsanë piayainë. Anijamataetobeje pexainaenë. Pacuenia oveja pebito mataetsi, bajara pemataetsinë. Itsiata baitsi jane pecuaicuajajajava, pacuenia dragón pecuaicuajajajava jumeitsi, bajarajumeitsi. <sup>12</sup>Papiayainë copiaya pitsapaina manuamenejavatsina, bajaraponë yajavaponapona. Nexata papiayainë copiaya pitsapaina manuamenejavatsina, nasaërjuta iravetsina papiayainë cotocaevi pitsapainajavabelia. Nexata papiayainë cotocaevi iravetsina pitsapaina, daxita mapanacuapijivi itoroba papiayainë copiaya manuamenejavatsina pitsapainajavabelia pematabacabëta penavajëcaenexa. Baitsi ponë apo bepeyaasaëvajënënexa itajara matavajënënaçëta baja, bajaraponëjavabelia daxita mapanacuapijivije pematabacabëta penavajëcaenexa. <sup>13</sup>Nexata papiayainë iravetsina cotocaevi pitsapaina, ayaicuene pexanaejava jivi tsitaexanapona. Pitatsajaviitaire ata athëbëvetsica othopaeyaexana irabetsica daxitajivi petaenubenaevajava. <sup>14</sup>Bajarapacuenia ayaicuene pexanaejava pexanaponaexae, yamaxëitojoroba mapanacuajava pejinavanapaevi. Bajarapaayaicuene exanapona, papiayainë copiaya manuamenejavatsina pitsapaina, pitabarata. Bajaraxuacujinae, papiayainë cotocaevi iravetsina pitsapaina, itorobapona Dioso apo pejumecovënëtsivi pexanaenexa pejumapecataenë. Nexata Dioso apo pejumecovënëtsivi, papiayainë copiaya manuamenejavatsina pitsapaina, bajaraponë jumapecataeya exana jane baja. <sup>15</sup>Nexata papiayainë cotocaevi iravetsina pitsapaina, caëjëpatsi piasaëyaexanaenexa Dioso apo pejumecovënëtsivi jumapecataeya pexanaenë. Nexata asaëyaexana. Bajarapacuenia asaëyaexana papiayainë copiaya manuamenejavatsina pitsapaina Dioso apo pejumecovënëtsivi jumapecataeya pexanaenë pecuaicuajainexa. Pamonae pematabacabëta apo nanavajëcae bajarapajumapecataenëjavabelia, beyaxuabiaexanapona. <sup>16</sup>Papiayainë cotocaevi iravetsina pitsapaina, bajaraponë jane baja pejamatabëcueneta, daxitajivi mapanacuata pejinavanapaevi, cobejumaitanerubaponatsi, pecujuanenia pacobe. Itsa jume, pitapathaitota ata itapaitanerubaponatsi. Nexata bajaraponë pejamatabëcueneta itanerubaponatsi daxitajivi. Itanerubaponatsi bevelijamatabëcuenevi. Itanerubaponatsi ayaijamatabëcuenevi ata. Itanerubaponatsi ricovi ata. Itanerubaponatsi bepejiobivi ata. Itanerubaponatsi pamonae ata dajubicuenia canajetatsi itsamonaejavabelia amoneya petonacuenebabiabinexa. Itanerubaponatsi pamonae ata dajubicuenia apo canajetsitsi itsamonaejavabelia amoneya petonacuenebabiabinexa. <sup>17</sup>Nexata pajivi aitanejibi, apo tocopatsitsi itsacuenejavayo ata pecomuatsinexa. Apo tocopatsitsinua itsacuenejavayo ata pecanajetsinexa. Paitanetota jivi itanerubaponatsi, papiayainë copiaya manuamenejavatsina pitsapaina, bajaraponë pevënë. Itsa apo pevënë, nexata pijanúmero. <sup>18</sup>Ma-

pajamatabēcuenelivaisi bepacanaējētameje xaniavaetsia paneyapētaenexa. Pajivi yapētane, canaējētsi piayainē pijanúmero. Tsipaji bajaraponē panúmero xaina pevēnēnexa. Panúmero bajaraponē xaina seiscientos sesenta y seis.

**Pacuenia Juan tane 144.000 pajivibeje Dioso  
pijajivi penaxēanaejava yabara pelivaisi**

**14** Taenutajē Corderonē penucaejava Siónvēnē tsutojumata. Barēnuca ciento cuarenta y cuatro mil pajivibeje. Bajarapamonae pitapathaitota itanerubena Corderonē pevēnē, Corderonē paxa ata pevēnē. <sup>2</sup>Bajaraxuacujinae jumetaniji athēbēvetsica pecuaicuaijajava. Pecuaicuaijajava najumeta pacuenia bitso banajumeta pinijjonca. Najumetanua beyamaxē penajumetsijume ata. Pecuaicuaijajava najumetanua pacuenia arpa banajumeta, ayaibitsaētoxaneto itsa najuaracata. <sup>3</sup>Corderonē pijajivi naxēananubena pejanavaji trono pitabarata, cuatro ponēbeje piaiiothiavi pitabarata ata, ancianovi ata pitabarata. Itsajivi ata cajena apo caējēpaetsi pecujaninexatsi bajarapavaji. Pamonaie ciento cuarenta y cuatro mil pajivibeje, ēbajarapamonae, caējēpatsi penaxēanaenexa bajarapavaji. Bajarapamonae neconimatamotatsi Corderonē pijanata. Nexata baja bajarapamonae Dioso capanepatsi mapanacuavecuaje. <sup>4</sup>Bajarapapebijivi penaexanaejavaverenacujinae apo naperabēquenetsiatae petirivajavabelia. Apo jamatabēcuenebijianaetsi itsajivi ata. Bajarapamonae pēnainavanapa Corderonē itsaxuayo ponapona. Bajarapamonae Corderonē pijanata neconimatamotatsi. Nexata baja bajarapamonae capanepatsi Diosojavabelia mapanacuavecuaje. Bajarapamonae baja namataxainaeya capanepatsi Dioso pijajivinexa, Corderonē ata pijajivinexa. <sup>5</sup>Bajarapamonae caeto ata apo najumetsēnētsi. Aneconijibi tsavanapae Diosojavabelia.

**Pacuenia acueyabi ponēbeje ángelevi vajunupaeba pacuenia  
itsamatacabi itsijitsia mapanacuataje yabara pelivaisi**

<sup>6</sup>Icatsia ángelnē taniji pepunanajetarucaejava. Canajetaruca pexanialivaisi, apo peverevereacaelivaisi. Tsipaebijitsia bajarapalivaisi mapanacuajava pejinavana-paevi. Tsipaebijitsia daxitanacuanēpijivi, daxitaviriajumevi ata. <sup>7</sup>Ángelnē pinijumeta jumai tsanajetaruca:

—Dioso cunaviaya pajinavanapare. “Xamē bitso ayaijamatabēcuenenēmē,” pajamēre tsabiabi Diosojavabelia. Copiapata rabaja Dioso penaneconitsiaexanapon-aenexa daxitajivi. Ponē itaboxo exana, ira ata, manuamene ata, mera pepitsaparubenaejavanē ata, bajaraponējavabelia panematabacabēta panavajētabiabare, jai tsanajetarucae ángelnē pinijijumeta.

<sup>8</sup>Icatsia cotocaevi taniji itsanē ángelnē pepunanajetarucaejava. Jumai tsanajetarucae bajarapaángelnē:

—Verebiabatsi rabaja Babilonia tomaraxanetomita pejinavanapaevimi. Tsipaji Babilonia tomarapijivimi navajēcabiaba jumapecataeya pexanaenēanējavabelia. Nexata belia daxita nacuanēpijivi ata navajēcabiaba jumapecataeya pexanaenēanējavabelia. Babilonia tomarapijivimi jumapecataeya pexanaenēanējavabelia penavajēcaejamatabēcueneta, jamatabēcuenebijianapona daxitanacuanēpijivi. Nexata pacuenia pevitota pibisiacue nepejanabiabiva pejamatabēcueneta, daxitajivi jamatabēcuenebijianapona, bajara pijinia pacuenia Babilonia tomarapijivimi ata jumapecataeya pexanaenēanējavabelia penavajēcabiabijamatabēcueneta, ja-

matabëcuenebijianapona daxitanacuanëpijivi. Bajaraxuata bajarapacuenia verebi-abatsi, jai tsanajetaruae ángelnë, ponë cotocaevi taniji pepunanajetaruaejava.

<sup>9</sup> Bajaraxuacujinae icatsia taniji acueyabiángelnë pepunanajetaruaejava. Bajarpaángelnë pinijijumeta jumai tsanajetaruae:

—Pajivi pematabacabëta navajëcabiaba piayainëjavabelia, bajaraponë jumapecataeya pexanaenëtsijavabelia ata, bajarapajivi naneconitsiana Diosojavabelia. Bajarapajivi itsa nacopatanua piayainë pevenëta pitapaitanerutsinexatsi, itsa jume, pecobejumata ata pecobejumaitanerutsinexatsi, nexata bajarapajivi naneconitsiana Diosojavabelia. <sup>10</sup> Dioso bitso pebaraanaepanaexaetsi, bajarapajivi bevelia apo naneconitsiaexanaetsi tsane. Ayaicuenia naneconitsiaexanaetsi isotojavabelia, azufre petajueisotojavabelia. Nexata bajarapajivi isoto petajuta bitso jamatabëfaenaena Dioso pijaánglevi pitabarata, Corderonë ata pitabarata. <sup>11</sup> Athëbëabetsia bajarapaisototsëxë junaenia daxitamatacabijavabelianexa. Ayaicuenia bajarapajivi Dioso penaneconitsiaexanaejavatsi, tsitecaena daxitamatacabijavabelianexa. Bajarapajivi isoto petajuta bitso pejamatabëfaenaejava, caepatoyo ata apo copatsi tsane. Bajarapacuenia Dioso naneconitsiaexanaenatsi pajivi pematabacabëta navajëcabiaba piayainëjavabelia, bajaraponë jumapecataeya pexanaenëtsijavabelia ata. Bajarapajivi itsa nacopatanua piayainë pevenëta pitanerutsinexatsi, bajarapacuenia Dioso naneconitsiaexanaenatsi. <sup>12</sup> Bajaraxuata Dioso pijajivi xaniavaetsia bejumecovënëtavanapa Dioso pitorobilivaisitsi. Becaasaënuua tsavanapae Jesúsjavabelia penajamatabëcueneocopatsijava, jai tsanajetaruae acueyabi ángelnë pepunanajetaruaejavata.

<sup>13</sup> Bajaraxuacujinae jumetaniji athëbëvetsica tanejumaitsijava. Nejumaitsi athëbëvetsica mapacueniaje:

—Yaquinarure mapacuenia pejumaitsiitaneje: “Mapamatacabijavaveliacujinaeje, pevajënaeyabelia ata, jamatabëcuenebarëya baja tsavanapae tsane pamonaë tëpaponna Dioso pepua pejumecovënëtsivi,” pejaiitane, yaquinarure, nejai athëbëvetsica.

Espíritu Santo ata nejumaitsi bajarapamonae yabara mapacueniaje:

—Xaniajai rabaja tsane. Bajarapamonae nacueraevetsiana penacuenibijava. Pamatacabi abaxë bajarapamonae asaë tsavanapae mapanacuataje, daxita xua pexaniacuenie exanavanapa, bajaraxuajamatabëcuene Dioso athëbëtatsia matamotsianatsi. Bajaraxuata jamatabëcuenebarëya tsavanapae tsane bajarapamonae, nejai Espiritu Santo.

### **Pacuenia itsamatacabi Dioso naneconitsiaexanaejitsia daxita pamonaë pijaneconi pexinaevi yabara pelivaisi**

<sup>14</sup> Icatsia taniji penioponaetarërëbo. Bajarapaitarërëbo tuatujëta jivitonë eca. Itarërëbo tuatujëta peecaenë yabara jamatabëjumaitsinë:

—Jesús raeta, Daxitajivi Pematapijinë, jamatabëjanë.

Namataxatateca orocorona. Cobenaeca bemasete pexiuaijjava pecaucubinexa penaveretsiruanë. <sup>15</sup> Nexata icatsia itsanë ángelnë pitsaparena temploboënëverena. Bajarapaángelnë asaëyata vavajai itarërëbo tuatujëta peecaenëjavabelia. Jumaitsi bajarapaángelnë:

—Caucubare jane baja penaveretsiruanë mapanacuayaberecaje. Copiapata rabaja pecaetuatsinexa penaveretsixu mapanacuatarecaje, jai ángelnë, ponë pitsaparena temploboënëverena.



<sup>16</sup> Nexata bajaraxuacujinae ponë eca itarërëbo tuatuajëta, bemasete pexiuajajava yota irajumabereca. Caucuba jane baja penotsinexa penaveretsiruanë. Pecaucubijava penaveretsiruanë penotsinexa, mapajamatabëcuenelivaisi xainaje. Pacuenia caucuba penaveretsiruanë penotsinexa, bajara pijinia pacuenia itsamatacabi daxita Jesús pijajivi pitsiana.

<sup>17</sup> Bajaraxuacujinae icatsia athëbëtatsia itsaängelne pitsaparena temploboënëverena. Bajaraponë ata capona bemasete pexiuajajava pecaucubinexa penaveretsiruanë. <sup>18</sup> Icatsia itsaängelne pitsaparena altarjavaverena. Bajarapaängelne altarpjiisoto pevetsinë. Junata pinijijumeta itsaängelne, bemasete pexiuajajava pecapon-aenëjavabelia. Jumaitsi bajarapaängelnejavabelia mapacueniaje:

—Mapanacuayaberecaje caucubaremecca daxita uvaruanë, penaveretsiruanë, jai.

<sup>19–20</sup> Nexata jane baja bajarapaängelne bemasete pexiuajajava yota irajumabereca. Caucuba jane baja uvaruanë, penaveretsiruanë. Nexata bajarapauvaruanë othotajarabaxuaba pinijivaxixaneto ënëabelia, bajarapavaxixanetoënëta pemarëbeneyujubataxuabinexa. Nexata jane baja uvacuaimarëbene yujubataxuaba tomara jumavereca. Nexata pemarëbeneyujubataxuabijavata, pinijijanaxaneto pitsapona. Nexata bajarapajanaraxaneto navotanicapona. Bajarapajanaraxaneto penavotanicaponaajava, piapiajava xaina trescientos pakilómetrobeje. Piavajubujava pijinia xaina bejamatabëcuene caemetro epatua. Xua taniji, uvaruanë penaveretsiruanë pecaucubijava, xua ata taniji, pinijivaxixaneto ënëabelia piothotajarabijava pemarëbeneyujubataxuabinexa, xaina mapajamatabëcuenelivaisije. Itsamatacabiängelne caetuatsiana daxita pibisiacuene pexanaevi penaneconitsiaexanaenexa. Nexata pibisiacuene pexanaevi ayabitsaëtöxanetonë tēpaena. Nexata bajarapacuenia ayajjana xuabiana.

**Pacuenia Juan tane athëbëtatsia siete ponëbeje Ángelevi, siete xuabeje piayajavanë pecaponaevi peverebiabinexa mapanacuaje, yabara pelivaisi**

**15** Icatsia taniji athëbëtatsia pinijicuene pitajëtsijava pacuenia itsamatacabi itsijitsia mapanacuataje. Pinijicuene pitajëtsijava itsa taniji, nabenjajajë bitso. Siete paängelnebeje capona siete xuabeje piayajavanë peverebiabinexa mapanacuaje. Bajarapapiayaicuene pepanepaeucujinae, Dioso bitso jivi pebaraanaepanaajava, copiarucaena baja.

<sup>2</sup> Nexata icatsia taeyetajë bemanuamene picani. Itsiata baitsi jane piatajajava. Pacuenia vidriojava nasaba, bajarapitsijava. Itsiata bajarapaboxoya pitarunutsicotia xaina. Tanijina jivi bajarapamene boxojumavereca penubenaevi. Bajarapamonae cueneamoneyaba piayainë. Cueneamoneyabanua bajaraponë jumapecataeya pexanaenëtsi ata. Tsipaji pamonaevi nubena bajarapamene boxojumavereca, itorobi atatsi bajaraponëbejevabelia pematatabacabëta pevajëcaenexa, apo jumecovënëtsi. Apo nacopatsinua pitanerubinexatsi piayainë pijanúmerota, panúmero xaina piayainë pevënënexa. Bajaraxuata bajarapamonae canubena arpa, Dioso perajutsiarpatsi. <sup>3</sup> Bajarapamonae naxëananubena Moiséspijinë, Dioso pijajivitonë, pevaji. Bajarapavaji Corderonë ata pevaji. Penaxëanaejavata, bajarapamonae vajita jumai tsanubena mapacueniaje:

Xamë Diosomë, nijamatabëcuenesaënë daxita mapanacuata jivi pevetsivi matatoxenetsia. Xua pinijicuene exaname, bitso pexaniacuene. Xamë daxitanacuanë nevetsinë. Daxita xua pexaniacuene, nexanaenë. Penajumetsënëtsicuene jivi

neyamaxëitojorobinexa, apo nexanaenë. <sup>4</sup>Daxitajivi xamë pecacujunavinë tsane. “Dioso cajena bitso ayaijamatabëcuenenë,” cajai tsane. Xamë rabaja cajena caenëmë nianeconijibinë, caeto ata pibisiacuene apo nexanaenë. Daxita nacuanëpijivi xamëjavaberena patsiana pematabacabëta xamëjavabelia penavajëcaenexa. Bajarapacuenia catoitsane tsipaji baja daxitajivi tane ëpexaniacuene nexanaponaponaejava,

jai tsanubenae Diosojavabelia bajarapamonae penaxëanaejavata.

<sup>5</sup>Bajaraxuacujinae icatsia taniji athëbëtatsia templobo ënëtuatuajëalia peyatuucutsipana penapatsijava. Bajara paënëyatuucutsijavaënëta bajayatami Dioso Moiséspijinëta penajumecopatsilivaisi peyaquinaeibopananë xaniavaetejeba. <sup>6</sup>Bajarapatemploboënëverena pitsaparena siete paängelnebeje. Bajarapamonae capona siete xuabeje piyaijavanë, bajaraxuanëta mapanacuae peverebiabinexa. Bajara paängelevi naxataba pexaniaviriapapaëbërëjavanë, piaxuirajibijavanë. Peniojaijavanë bitso. Nacorobëcëbanubena oropananë. <sup>7</sup>Bajaraxuacujinae pamonaе cuatro ponëbeje piaithiaviyajuvënënë, ángelevijavabelia rajuta copanë. Piayainë caeängelne canacujitsia rajutapona caecopa. Bajarapacopanë orocopanë. Dioso, ponë daxitamatacabijavabelianexa peponaponanë, ayaiacuenia anaeya naneconitsiaexanaena pamonaе naneconita bajaraponëjavabelia. Xuanë vënëba bajarapacopanë, bajaraxuanëta Dioso naneconitsiaexanaena bajarapamonae. <sup>8</sup>Bajarapatemplobo tuatuajëmi bitso vënëca ëtsëxë. Bajarapatsëxë pitsapa Dioso ayaijamatabëcuenenëjavaverena. Itsajivi ata cajena apo caëjëpaetsi pejonenexa bajarapatemplobo ënëtuatuajëabelia. Xuanë siete paängelnebeje capona, piyaijavanë, itsa baja panepaena, matapania jivi caëjëpaenatsi pejonenexa bajarapatemplobo ënëtuatuajëabelia.

**Pacuenia Juan tane athëbëtatsia pacuenia itsamatacabi Dioso naneconitsiaexanaejitsia daxita pijaneconi pexainaevi yabara pelivaisi**

**16** Icatsia jumetaniji templobojavaverena pinijijumeta pejumaitsijava. Siete paängelnebejejavabelia jumaiti mapacueniaje:

—Paponare baja iranëjavabereca paneepacaponanexa jane baja xuanë siete pacopabeje vënëca, piyaijavanë. Dioso jane baja anaeya ayaiacuenia penaneconitsiaexanaenexa, daxita pamonaе naneconita bajaraponëjavabelia, pejaijava, templobojavaverena jumetaniji.

<sup>2</sup>Nexata jane baja pona penamataxainaeängelne. Pecaponaera epatajaraba iranëjavabereca. Nexata daxita pamonaе piayainë pevënëitanetota itanerubatsi, daxita bajarapamonae bajarapaepatota bitso perabëtsabanareca. Nexata bitso aperabëtane bajarapamonae. Bajarapamonae bajarapapiayainë jumapecataeya pexanaenëtsijavabelia ata pematabacabëta penavajëcaevi.

<sup>3</sup>Bajaraxuacujinae icatsia pecotocaeviängelne pijacopapijira epatajaraba manuamenejavabereca. Manuamenemi nexata naexana bepetëpaenë pijanara. Daxita baja tëpa manuameneta pejinavanapaevimi.

<sup>4</sup>Bajaraxuacujinae icatsia acueyabiängelne pijacopapijira epatajaraba menianëjavabereca mera, iravetsina pepitsaparubenaëjavanëjavabereca ata. Nexata daxita bajarapameranëmi naexana ëpijanaranë. <sup>5</sup>Bajaraxuacujinae jumetaniji mera pevet-siängelne pejumaitsijava Diosojavabelia. Jumaiti mapacueniaje:

—Diosomë, caeto ata pibisiacuene apo nexanaenë. Ajena, pamatacabi, ponaponame. Bajayata mapanacuae nexanaevajënaeya ata, ponaponame. Pibisiacuene pex-

anaevi, paneconivajëto xaina, bajarapaneconivajëtota naneconitsiaexaname. Bajaraxuata meranëmi pijanaranë naexanaeyaexaname. Tobijianame meranë piayainë pijajivi bajarapameranë penatsiapaenexa. <sup>6</sup>Bajarapamonae bajayata beyejeba nijajivimi. Pamonae ata cavajunupaebapona, beyejeba. Bajaraxuata bajarapacuenia meranë pijanaranë naexanayaexaname penatsiapaenexa bajarapamonae, jai Diosojavabelia mera pevetsiángelnë.

<sup>7</sup>Icatsia jumetaniji itsaángelnë altarjavaverena pejumaitsijava. Jumaitsi mapacueniaje:

—Xamë Diosomë, nijamatabëcuenesaënë daxita mapanacuata jivi pevetsivi matatoxenetsia. Itsa naneconitsiaexaname jivi, paneconivajëto xaina, bajarapaneconivajëtota bananeconitsiaexaname. Itsa aneconijibi tsipae, nexata cajena apo naneconitsiaexanaemë tsipae, pejajjava itsaángelnë altarjavaverena jumetaniji.

<sup>8</sup>Bajaraxuacujinae icatsia cuatroángelnë pijacopapijira epatajaraba. Epatajaraba matababipijijuametojavabetsica. Nexata matababipijijuameto pecotiata jivi bitso ayaicuenia tsajavatsi. <sup>9</sup>Itsiaata bajarapamonae apo copabi pibisiacuene pexanabibijava. Apo najamatabëcuenepënyorotsi Diosojavabelia. “Xamë bitso ayaijamatabëcuenenëmë,” apo jai ata cajena Diosojavabelia. Biji rajane Dioso, ponë caëjëpatsi daxitacuene pexanaenexa, bajaraponë caranata pibisiacuenia baracuaicuaijai.

<sup>10</sup>Bajaraxuacujinae icatsia cincoángelnë pijacopapijira epatajaraba. Epatajaraba piayainë pijatronojavabereca. Piayainë jane baja pevetsinacuami aitaquiri tsanucacae. Piayainë jane baja pijajivi bitso penavixaetaexae, navonosine. <sup>11</sup>Itsiaata baitsi jane bajarapamonae apo copabi papibisiacuene exanavanapa. Apo najamatabëcuenepënyorotsi Diosojavabelia. Biji rajane Dioso, ponë athëbëtatsia peecaenë, bajaraponë caranata bajarapamonae pibisiacuenia baracuaicuaijai. Bajarapacuenia bajarapamonae Dioso pibisiacuenia baracuaicuaijai penavixaetaexae, bitso peperabëtsabanaexaenua.

<sup>12</sup>Bajaraxuacujinae icatsia seisángelnë pijacopapijira epatajaraba. Epatajaraba pinijimenexanetojavabetsica, Eufratesmenejavabetsica. Nexata Eufratesmenexaneto tsevajunua. Nexata bajarapacuenia namuto torucarenatsi iranë pevetsivi penicabinexa, penajetarubenaevi orientejavavetsina.

<sup>13</sup>Bajaraxuacujinae taniji acueyabi padovathibeje. Bajarapadovathivi becuaitoxicuenia pitsapa. Itsanë pitsapa dragón pecuibovojotuatsina. Itsanë pitsapa piayainë pecuibovojotuatsina. Itsanë pitsapa peyamaxëitjorobiprofetanë pecuibovojotuatsina. <sup>14</sup>Bajarapadovathivi pinijicuene pexanaejava, exanapona. Pona baja pecaetuatsinexa daxitanacuanë pevetsivi. Bajarapadovathivi caetuatapona jivi vajabitsaë pebarëxanaenexa Diosojavabelia. Dioso pijamatabëcuenesaënë daxitanacuanë pevetsivi matatoxenetsia. Bajarapamatababi Dioso exanaena daxita pacuenia tajëvelia najumecapanepaeya jumaitsi. <sup>15</sup>Bajaraxuacujinae jumetaniji Jesús pejumaitsijava: “Panenamuxunaevere. Itsajota apo panejamatabënajinaemë, bajarajota jemata patsianicajë. Pacuenia penacobetoxotsinë jemata bapata itsajota apo jamatabënajinaetsi, bajara itsinë tsane. Nexata pajivi jamatabëcuenaitavaya ponaponaena tanecopiapitsinexa, bajarapajivi barëya tsane. Pacuenia itsajavabelia peponaejivinexa, baxaniavaeta penaxatatsijava pecaponaenexa pejumasaajinaeyaniva, bajara itsi tsane bajarapajivi. Nexata pamatababi patsianicajë, apo aura tsane,” pejajjava Jesús, jumetaniji. <sup>16</sup>Nexata jane baja dovathi pijajivi caet-

uatatsi daxitanacuanē pevetsivi. Caetuatatsi caejavata penacaetuatsinexa. Itsajota nacaetuata daxitanacuanē pevetsivi hebreojumeta pevēnē Armagedón.

<sup>17</sup> Bajaraxuacujinae icatsia sieteanġelnē pijacopapijira epatajaraba. Epatajaraba itaboxojavabetsia. Nexata athēbētatsia templobo enētuaatujēta Dioso peecaetrono-javaverena pinijijumeta jumaitsi:

—Daxita rajane baja vereta, jai athēbētatsia templobo enētuaatujēta.

<sup>18</sup> Nexata jane baja binebinejai yamaxē. Pinijijovibo bitso najumeta. Yamaxē ata najumeta. Iranē ata najēaba pinijicuenia. Jivi pejinavanapaejavaveliacujinae mapanacuataje, caeto ata bajarapacuenia ira penajēabijava pinijicuenia apo tae.

<sup>19</sup> Pinijitomaraxanetomi, Babilonia tomarami, acueyabi xuabeje natsanaeya othopa. Bajarapacuenia itsanacuanēpjitomaranēmi ata othopa irata. Dioso nexata najamatabēnapita pinijitomaraxanetopijivimi, Babilonia tomarapijivimi. Ayaiacuenia Dioso baraanaepana Babilonia tomarapijivimijavabelia pibisiacuene bitso pexanaexae. Bajaraxuata pinijicuenia Dioso naneconitsiaexana Babilonia tomarapijivimi. <sup>20</sup> Itsa ira najēaba, daxitatunaetonēmi, daxitatsutonēmi ata, ajibi baja. Ira namatajēpa baja. <sup>21</sup> Athēbēvetsica othopaica jivijavabetsica bitso pecainejebimatarejetonē. Bajarapamatarejetonē xaina piarevejava cuarenta pakilobeje. Nexata mapanacuapijivi pibisiacuenia Dioso baracuaicuajjai. Tsipaji athēbēvetsica piiothopaejava, bitso pecainejebimatarejetonē, bitso piayaicuene.

### **Pacuenia itsamatacabi Dioso naneconitsiaexanaena pamonaē navajēcabiaba jumapecataeya pexanaenēanējavabelia yabara pelivaisi**

**17** Pamonaē siete paāngelnēbeje, siete pacopabeje pecaponaēvi, bajarapaāngeleviyajuvēnēnē, caenē rena xanējavaberena. Bajarapaāngelnē nejumaitsi:

—Naxanitsia. Catsitajētsianatsi pacuenia Dioso naneconitsiaexanaejitsia Babilonia tomarapijivi, patomaraxaneto eca menexanetonē imoxoyojavata. Bajarapatomarapijivi Diosojavabelia apo navajēcabiabi. Caranata saya navajēcabiaba jumapecataeya pexanaenēanējavabelia. Nexata pacuenia petiriva pevitota bitso pibisiacuene pexanabiabiva jamatabēcueneitsi, bajarajamatabēcueneitsi Babilonia tomarapijivi. Pova petiriva pibisiacuene pevitota exanabiaba, bajarapova pejamatabēcueneta jamatabēcuenebijiana itsamonaē ata. Bajara pijinia pacuenia Babilonia tomarapijivi ata pexanabiabijava pejamatabēcueneta, jamatabēcuenebijiana ayaibitsaētoخانeto itsanacuanēpijivi ata. <sup>2</sup> Tsipaji itsanacuanē pevetsivi patabiaba Babilonia tomaraberena. Nexata bajarapamonaē ata copaba Diosojavabelia penavajēcabiabijava. Caranata saya Babilonia tomarapijivi cuenejēpaeya navajēcabiaba jumapecataeya pexanaenēanējavabelia. Nexata jamatabēcuenebijianatsi bajarapamonaē ata, nejai bajarapaāngelnē.

<sup>3</sup> Bajaraxuacujinae Espiritu Santo netsijamatabēvēnēca. Nexata bemajitsinaebota āngelnē nebarēpona petusato nacuyabelia. Bajarajotalia taeyetajē petiriva. Bajarapova eca piayainē, petsobianē, pejumata. Bajaraponē peperabētuaereca, Dioso apo pejitsipaevēnēanē, itanerubena. Bajarapapiayainē xaina siete pamatabocotobeje diez pamataetobeje. <sup>4</sup> Nexata bajarapova penaxatatsijavareca itsajava pabanaeya saējai. Itsajava tsobia. Naitabēteca orojavanēta, perlavēnējavanēta ata, penamatamotsiibotonēta ata. Cobenaeca orocopa. Pibisiacuene bitso pexanaejava pevitota, bajarapajamatabēcuenelivaisi vēnēca bajarapacopata. <sup>5</sup> Bajarapova pithapathaitota vēnēyaquinarutatsi. Pajamatabēcuenelivaisi yabara bajarapova pita-

pathaitota vënëyaquinarutatsi, itsajivi ata apo yapëtae. Pejumaitsijume picani mapacueniaje: “Pinijitomaraxaneto Babiloniatomara. Bajarapatomaraverena pitsapa jivi pejamatabëcuenebijianaefjavatsi, jumapecataeya pexanaenëanëjavabelia penavajëcabiabinexa. Bajarapatomaraverena pitsapanua jivi pejamatabëcuenebijianaefjavatsi, daxitaxua pibisiacuene pexanaenexa mapanacuataje,” pejaijume, picani bajarapova pitapathaitota vënëyaquinarutatsi. <sup>6</sup> Taeyetajë icatsia bajarapova. Aitajibi tsecae Dioso pijajivimi pijanarata. Pamonae ata beyejebatsi pevajunupae-bixae Jesús, bajarapamonaemi ata pijanarata aitajibi tsecae bajarapova. Bajarapitse-caejava itsa taniji, bitso baja cajena jamatabëcuenenajunaviacajë. <sup>7</sup> Nexata ángelnë nejumaitsi:

—¿Detsa xuajitsia jamatabëcuenenajunaviacame? Cayapëtaeyaexanaenatsi pajamatabëcuenelivaisi xaina mapovaje. Ponë piayainë siete pamatabocotobeje diez pamataetobeje pexainanë, ponëjumata bajarapova eca, bajaraponë ata pajamatabëcuenelivaisi xaina, cayapëtayaexanaenatsi. <sup>8</sup> Mapapiayainë tanemeje, bajaraponë picani bajayata ponapona mapanacuataje. Itsiata baja aeconoxae bajaraponë ajibi. Itsiata baitsi jane itsamatacabi pinijimëthëxanetojavatsina pitsapaenina icatsia peponaponaenexa mapanacuataje. Bajaraxuacujinae bajaraponëmi beyaxuabianatsi pepacuene jane baja bajaraponë pecopiarucaenexa. Daxita mapanacuapijivije, pamonae Corderonë pijacuyalotobaxutota apo vënërubena Dioso nacua pexanaevajënaeya, Dioso nacua pexanaecujinae ata, bajarapamonae matacabi apo pevereverecejava apo xainae tsane. Bajarapamonae jamatabëcuenenajunaviacaena piayainë itsa pitsapaenina pinijimëthëxanetojavatsina, nejai ángelnë.

<sup>9</sup> Icatsia ángelnë nejumaitsi:

—Pamonae baja peyapëtaevi, pamonae baja cajëpatsi pejumeyapëtaenexa, bajarapamonae pejumeyapëtaenexa mapalivaisije. Papiayainë xaina siete pamatabocotobeje, ponëjumata taeyetame petiriva, anijajamatabëcuenelivaisibeje itajëta. Bajaraponë pematabocotonë, siete pamatabocotobeje, mapajamatabëcuenelivaisi xainaje. Siete rabaja pijinia patsutobeje eca Babilonia tomarata. Bajarapasiete pamatabocotobeje mapajamatabëcuenelivaisi yajavaxainaje. <sup>10</sup> Siete rabaja pijinia ponëbeje Babiloniatomara pevetsivi. Nexata Babiloniatomara pevetsiviyajuvënëvi cinco baja ponëbeje pitsapa. Seisnë abaxë aeconoxae eveta Babiloniatomara. Sietenë abaxë apo taxuxuabi pevetsinexa. Itsiata sietenë itsa evetsiana, bajayajebi apo evetsi tsane. <sup>11</sup> Papiayainë, petsobianë, taneme, mapajamatabëcuenelivaisi xainaje. Bajaraponë picani bajayata eveta Babiloniatomara. Itsiata baja aeconoxae bajaraponë apo evetsi. Tspaji baja tëpa. Itsiata baitsi jane icatsia bajaraponë pinijimëthëxanetojavavetsina pitsapaenina Babiloniatomara icatsia pevetsinexa. Nexata icatsia bajaraponë itsa evetsiana, ochonë baja evetsiana Babiloniatomara. Bajaraponë abaxë bajayata itsa ponapona, siete ponëbeje Babiloniatomara pevetsiviyajuvënëni baja cajena. Bajaraponë icatsia Babiloniatomara itsa evetsiana, pevetsicujinae bajaraponëmi beyaxuabianatsi pepacuene jane baja bajaraponë pecopiarucaenexa, nejai ángelnë.

<sup>12</sup> Icatsia ángelnë nejumaitsi:

—Ponë piayainë pemataetonë taneme diez pamataetobeje, mapajamatabëcuenelivaisi xainaje. Diez rabaja pijinia ponëbeje, itsamatacabi nacuanë evetsiana. Nexata bajarapamonae itsamatacabi nacuanë itsa evetsiana, evetsiana diez panacuabeje. Tspaji caenë canacujitsia evetaponaena caenacua. Bajarapamonae abaxë apo tax-

uxuabi bajarapanacuanē pevetavanapaenexa. Itsiata baitsi jane itsa taxuxuabijitsia nacuanē jane baja pevetavanapaenexa, copatsianatsi pijanacuanējāva pevetsinexa saya caeepatoyovajēto. Bajarapamonae itsa evetsiana pijanacuanējāva, piayainē barēevetsianatsi. <sup>13</sup>Pamonae diez ponēbeje, diez pijinia panacuabeje itsamatacabi itsa evetsiana, barēnajamatabēcuenējēpaenatsi piayainē. Nexata bajarapadiež ponēbeje jumaitsi tsane piayainējāvavelia:

—Xamē pacatocopatsianatsi patanematacatorobinēnexamē, jai tsane.

<sup>14</sup>Pamatacabi bajarapadiež ponēbeje evetavanapaena pijanacuanē, piayainē vajabitsaē barēexanaenatsi Corderonējāvavelia. Daxita pamonae Corderonē pijajivi, pamonae Dioso pejunatsivi, bajarapamonae pijinia Corderonē barēbena piayainējāvavelia. Nexata Corderonē cueneamoneyabiana piayainējāvavelia. Cueneamoneyabiana tsipaji Corderonē daxita petuxanevi pijatuxanenē baja cajena. Nexata Corderonē daxita nacuanē pevetsivi matatoxenetsia pepo pevetsinē, nejai āngelnē.

<sup>15</sup>Angelnē icatsia nejumaitsi:

—Pamanuameneboxovereca taeyetame pibisiacuene pexanaeva, bajarapamanuamene mapajamatabēcuenelivaisi xainaje. Mapanacuata jinavanapa jivibitsaētoxonetonē daxitavirijumevi, daxitanacuanēpijivinua. Bajarapajamatabēcuenē yabara taneme bajarapamanuamene. <sup>16</sup>Pamonae diez panacuabeje pevetsivinexa, bajarapamonae piayainē barēitoja tsane pibisiacuene pexanaevajāvavelia. Nexata bajarapamonae beyaxuabiana bajarapova. Jumasa xuababuatsiana. Xaeyabuatsiananua. Bajaraxuacujinae tajuitsiana isotota. <sup>17</sup>Pamonae diez ponēbeje itsamatacabi nacuanē itsa evetsiana, bajarapamonae najamatabēcuenējēpaena petocopatsinexa piayainē pijanacuanē petoevetsinexatsi. Bajarapacuenia najamatabēcuenējēpaena tsipaji baja cajena Dioso jamatabēcuenēitorobatsi bajarapacuenia pexanaenexa bajarapamonae. Nexata piayainē bajarapamonae pijanacuanē bajayajebi toevetsianatsi matapania pecopiapatsijāvavelianexa daxita pacuenia Dioso tajēvelia najumecapanepaeya jumaitsi. <sup>18</sup>Pova pibisiacuene pexanaeva taeyetame manuameneboxovereca, bajarapova mapajamatabēcuenelivaisi xainaje. Pinijitomaraxaneto Babiloniatomara. Bajarapatomarapijivi pejamatabēcueneta mapanacuanē pevetsivi pibisiacuene exanapona, nejai āngelnē.

### Pacuenia Babilonia tomaraxanetomi copiaruca yabara pelivaisi

**18** Icatsia itsaāngelnē taniji perunaejavatsica athēbēvetsica. Caējēpatsi pinijicuenia piayaicuene pitorobinexa. Bajarapaāngelnē pinijicotia yajavarunaica. Ira itayota daxitanacuanējāva. <sup>2</sup>Ayajumeta vavajai. Jumaitsi mapacueniaje:

—Verebiabijitsiatsi rabaja Babilonia tomaraxanetota pejinavanapaevi. Nexata baja ējoriminacua tsarucae tsane. Daxita xua pibisiacuene pexanaedovathivi, juya bajarapatomarata jinavanapaena. Bitso pibisiviavi pepunaevi, pamonae daxitajivi apo itajitsipae petaenexa, juya bajarapatomarata jinavanapaena. <sup>3</sup>Babilonia tomarapijivi navajēcabiaba jumapecataeya pexanaenēanējāvavelia. Nexata belia daxitanacuanē pevetsivi ata, pijajivi yajava, navajēcaponā jumapecataeya pexanaenēanējāvavelia. Nexata Babilonia tomarapijivi jumapecataeya pexanaenēanējāvavelia penavajēcabiabijamatabēcueneta, daxita xua pibisiacuene pexanaejamatabēcuenetanua, jamatabēcuenēbijanapona daxitanacuanēpijivi. Babilonia tomarapijivi bitso xainapona ayajava palata pibisiacuene pexanaejamatabēcueneta.

Nexata pijinia pamonaē Babilonia tomaraberena capatabiaba daxitacuene pecana-jetsinexa Babilonia tomarapijivijavabelia, bajarapamonaē ata baja bitso ayaijava palata xainapona. Bajarapacuenia Babilonia tomarapijivimi pibisiacuene pexanabi-abixae, ayaiacuenia naneconita Diosojavabelia. Bajaraxuata Babilonia tomarapijivi Dioso baja verebiabijitsiatsi, jai āngelnē.

<sup>4</sup>Bajaraxuacujinae icatsia athēbēvetsica jumetaniji itsajume. Jumaitsi mapacueniaje:

—Paxamē patajajivimē, papitsapare baja Babilonia tomaravecuā. Papitsapare baja pibisiacuene paxamē ata paneexanaeyaniva, bajarapatomarapijivi yajava Dioso papecananeconitsiaexanaeyaniva. <sup>5</sup>Babilonia tomarapijivi pijaneconi baja bitso ayaijava xaina. Pijaneconi itsa napebetsipa, itsa najumaetaponaējitsipa, nexata copiapatsipa itaboxojavabetsia. Dioso cajena yapētane daxita Babilonia tomarapijivi pibisiacuene pexanaejava. <sup>6</sup>Bajarapamonaē bejiobiaexanabiaba itsamonaē. Nexata Dioso itsa naneconitsiaexanaena, bajarapamonaē bitso ayaiacuenia bejiobiaexanaena. <sup>7-8</sup>Babilonia tomarapijivi bitso beayaijamatabēcuenēvi natane. Natocomuacabiaba ayaijava penamatamotsijavanē pibisiacuene pexanabiabimatamota. Bajarapamonaē pejamatabēēthētota jamatabējumaitsi tsabiabi: “Xanē raja majota ecajē nacua betaevetsinē. Nexata apo jamatabēcuenēbējanē tsane itsacuenējavayo ata yabara. Apo namatavenonaenē tsane itsacuenējavayo ata,” jamatabējai tsabiabi bajarapamonaē pejamatabēēthētota. Bajarapacuenia Babilonia tomarapijivi pejamatabējumaitsixae, ayaiacuenia Dioso bejiobiaexanaenatsi. Babilonia tomarapijivi caecuenia caematacabita Dioso tocopiapatsiaexanaenatsi petēpaecuene, pe-matanueyabicuene ata, janibocuene ata. Tajuenatsi isotota bajarapatomarapijivimi. Bajarapacuenia Dioso naneconitsiaexanaenatsi bajarapamonaē tsipaji vajatuxanenē Dioso bitso piasaēnē.

<sup>9</sup>Babilonia tomarapijivi pejamatabēcueneta daxitanacuanē pevetsivi jamatabēcuenēbijianapona. Nexata daxitanacuanē pevetsivi copaba Dioso pejumecovēnētsijavami. Natocomuacabiabanua ayaijava penamatamotsijavanē. Nexata bajarapamonaē itsa tsēxētaena Babilonia tomarapijivimi petajuejavatsi, yaitaxutonueya vavajai tsane. <sup>10</sup>Bajarapamonaē pecajunavi, tajē vecuanubenaena Babilonia tomarapijivimi itsa tajuenatsi. Bajarapamonaē najumai tsane:

—¡Bitso baja rovia bejiobi mapamonaēje! ¡Pinijitomaraxanetota, Babilonia tomaraxanetota, pejinavanapaevimi peyayataevimitsi! Caepatoyocujinae baja veriajavatsi Dioso penaneconitsiaexanaexaetsi, najai tsane bajarapamonaē.

<sup>11</sup>Daxitanacuanējava, pamonaē pecanajetabiabavanapaevi, yaitaxutonueya vavajai tsane. Bajarapacuenia yaitaxutonueya vavajai tsane tsipaji baja xua capatabiaba pecanajetsinexa, ajibi baja pecomuacaevitsi tsane. <sup>12</sup>Bajarapamonaē capatabiaba oronanita pexanaejavanē, platananita pexanaejavanē ata, perlavēnējavanē ata, penamatamotsiibotonē ata. Capatabiabanua pexaniaviriapapaēbērē ata. Itsapaēbērē linovēnējavanē. Itsajava sedajavanē. Bajarapapaēbērē itsajavanē perae-naejavanē. Itsajavanē petsobiajavanē. Capatabiabanua daxitavirianaejava petuxujuvinaejavanē. Capatabiabanua pexaniajavanē, marfilvēnējavata pexanaejavanē, penamatamotsinaejavanē ata, broncenani ata, hierronani ata, mármolvēnēibo ata. <sup>13</sup>Capatabiabanua canelavēnējavanē, especiavēnējavanē ata, inciensovēnējavanē ata, mirravēnējavanē ata. Capatabiabanua petuxujuviranē, vinoranē ata, aceitranē ata, pexaniaviriatrigobenonē ata, trigobultonē ata. Capatabiabanua baca,

oveja ata, caballo ata, perobobocaemonë ata, carrozavënëmonë. Jivi ata capatabi-aba dajubicuenia pecanajetsinexa itsamonaiejavabelia amoneya petonacuenebabi-abivinexa. <sup>14</sup>Nexata daxita bajaraxua pecanajetabiabavanapaevi, yaitaxutonueya najumai tsane Babilonia tomarapijivi yabara:

—¡Daxitacuene pejitsipaecuenemi tovereverecatsi baja! ¡Tovereverecatsi baja bitso pexinaejavami, xua picani mapanacuapijivi tane penamatamotsijava! najai tsane bajarapamonae yaitaxutonueya.

<sup>15</sup>Babilonia tomarapijivimi abaxë itsa apo tajuetsi, pamonaie pecanajetabiabavanapaevi, ayaijava palata xainapona, xua capata, pecanajetabiabixae Babilonia tomarapijivimijavabelia. Bajarapamonae itsa taena Babilonia tomarapijivimi petajuejavatsi, yaitaxutonueya vavajai tsane. Tajë vecuanubenaena pecajunavi. <sup>16</sup>Bajarapamonae daxita najumai tsanubenaie tsane:

—¡Bejibitatsi bitso pinijitomaraxanetota pejinavanapaevimi! Bajarapatomara-pijivimi naxatabiaba pexaniaviriapapaëbërë, linovënëjavanë. Itsajava peraënae-java. Itsajava petsobiajava. Naitabëtabiaba orojavanëta, perlavënëjavanëta ata, penamatamotsiibotonëta ata. <sup>17</sup>¡Caepatoyocujinae saya verevereca baja bitso pexinaejavami! najai tsanubenaie tsane daxita bajarapamonae.

Daxita pamonaie barcoxanetonë pevetsivi, bajarapamonëta penaponaevi ata, bajarapamonëta penacuenebivi ata, bajarapamonëta pecaponaejavanë pecanajetaponae ata, daxita bajarapamonae tajë vecuanubenaena pecajunavi Babilonia tomarapijivimi itsa tajuenatsi. <sup>18</sup>Bajarapabarcoxanetonëta peponae, tsëxëtaenubenaena Babilonia tomarami itsa tajuenatsi. Nexata vavajaiya najumai tsanubenaie tsane bajarapamonae:

—¡Itsanacuanëjava ata baja ajibi itsatomara mapitsipinijitomaraxanetoje! ¡Caetomarami baja maje pinijitomaraxanetomi, tajuatsije! najai tsanubenaie tsane.

<sup>19</sup>Pamonaie tsëxëtaenubenaena, natsimataothocaena atsabenonë, bitso pesivana-jamatabëxainaexae Babilonia tomarapijivimi. Yaitaxutonueya najumai tsanubenaie tsane:

—¡Bitso pinijicuenia bejibitatsi pinijitomaraxanetomita pejinavanapaevimi! Babilonia tomarapijivimi ayaijava palata pexainaexae, bitso pexinaevi naexana daxita pamonaie barco pexinaevi, pecanajetabiabixae xua capata bajarapatomaraberena. ¡Caepatoyocujinae saya bajarapatomarami verevereca baja! najai tsanubenaie tsane bajarapamonae.

<sup>20</sup>Dioso baja cajena itsamatacabi naneconitsiaexanaena Babilonia tomarapijivi pebejibiaexanabiabijamatabëcuene Dioso pijajivi. Nexata itsamatacabi, Babilonia tomarami itsa vereverecaena, pevevereceajava yabara, sivajamatabëcuenebarëya tsane daxita athëbëtsia pejinavanapaevi. Daxita Dioso pijajivi, mapanacuata pejinavanapaevi ata, sivajamatabëcuenebarëya tsane. Apóstolevi ata, Diosojumelivaisi pepaebivi ata, sivajamatabëcuenebarëya tsane Babilonia tomarami itsamatacabi itsa vereverecaena.

<sup>21</sup>Bajaraxuacujinae piasaëángelnë yotaxuaba ibotoxaneto. Bajarapaiboto pinijii-botoxaneto bitso. Nexata ángelnë manuameniabereca asaëyata xuabareca bajarapaibotoxaneto. Ángelnë jumaitsi mapacueniaje:

—Pacuenia asaëyata xuarecajë mapaibotoxanetoje, bajara pijinia pacuenia pinijitomaraxaneto, Babiloniatomara, itsamatacabi pinijicuenia xuabianatsi. Apo taetsi baja tsane icatsia matavëjëa. <sup>22</sup>Ajumejibi baja tsane pijacallejava arpa peracatabi-



abijava. Ajumejibi baja tsane flauta ata piobabiabijava. Ajumejibi baja tsane trompeta ata piobabiabijava. Itsajivi ata baja apo nacuenebi tsane bajarajota. Apo najumetsi baja tsane icatsia matavējēa trigoxu pecaquiatabiabijava pecaquiatabiabiibotoxanetota. <sup>23</sup> Itsalámpara ata baja apo naitayotsi tsane bajarajota. Ajumejibi baja tsane jivi penabarēcuaijaitisabiabijava. Penacasabifiesta ata baja pexanabiabijava, ajibi tsane. Bajarapatomarapijivi pexinaejava pecanajetabiabavanapevi, daxitanacuanējava pevēnējoneyabiabivimi, ajibi baja tsane. Ajibinua baja tsane bajarapatomarapijivi daxitanacuanējava yamaxēitojorobiaya penajorobabiabijava, jai bajarapaāngelnē.

<sup>24</sup> Dioso yapētane pacuenia Babilonia tomarapijivi pejamatabēcueneta, Diosojumepaebivimi profetavi beyejebiabatsi. Babilonia tomarapijivi pejamatabēcueneta, Dioso pijajivimi ata beyejebiabatsi. Bajaraxuata juya Dioso ayaicuenia naneconitsiaexanaena Babilonia tomarapijivi.

**19** Bajaraxuacujinae jumetaniji jivi ayaibitsaētoxfaneto athēbētatsia. Pinijijumeta jumai tsaponae mapacueniaje:

“Diosomē, ¡ayaijamatabēcuenenēmē bitso!” jaitsi vaxaitsi Diosojavabelia. Bajaronē nacacapanepa vajanekonivecua. Penivenivenaecotia pexainaenē. Pijamatabēcuenesaenē bitso. Daxitacuenē pexanaenexa pecaējēpaenētsi. <sup>2</sup> Itsa naneconitsiaexana jivi, paneconivajēto jivi xaina bajaraponējavabelia, bajarapaneconivajētota bananeconitsiaexana. Pajivi aneconijibi, apo naneconitsiaexanae cajena. Nexata baja Dioso naneconitsiaexana pibisiacuenē bitso pexanaevi, Babilonia tomarapijivimi. Bajarapamonaemi pibisiacuenē pexanaejamatabēcueneta jamatabēcuenebijianapona daxitanacuanēpijivi. Bajarapamonae pejamatabēcueneta Dioso pijajivimi beyejebatsi. Bajaraxuata Dioso juya naneconitsiaexana bajarapamona, jai jivi ayaibitsaētoxfaneto athēbētatsia.

<sup>3</sup> Bajaraxuacujinae bajarapamona icatsia jumaitsi:

—“¡Diosomē, ayaijamatabēcuenenēmē bitso!” jaitsi vaxaitsi Diosojavabelia. Athēbēabetsia petsēxējunaejavatsia Babilonia tomarapijivimi petajuetsēxētsi, apo vereverecanuca tsane daxitamatacabijavabelianexa, jai bajarapamona.

<sup>4</sup> Pamona veinticuatro ponēbeje ancianovi, pamona pijinia cuatro ponēbeje pi-aitothiavi, daxita bajarapamona Dioso yayataeya irata bobena. Ira taenubena. Bajarapamona irata jumai tsanubena Diosojavabelia, tronota pecaenējavabelia:

—¡Xanepana rabaja nexanaejava! ¡Bitso ayaijamatabēcuenenēmē! jai tsanubena irata bajarapamona Diosojavabelia.

<sup>5</sup> Bajaraxuacujinae icatsia tronojavaverena daxita Dioso pijajivijavabelia jumaitsi: Dioso panecujunavivi, ayaijamatabēcuenē panexinaevi, beveliajamatabēcuenē panexinaevinua, pexaniajamatabēcuenē parajutabiabare vajaDiosojavabelia, jai tronojavaverena.

### Corderonē penacasabifiesta yabara pelivaisi

<sup>6</sup> Icatsia jumetaniji ayaibitsaētoxfaneto jivi pecuaicuaijajava. Bajarapamona pecuaicuaijajava, jumetaniji bepiniijoncajume. Beyamaxējume ata, ayaijume, najumeta. Jumai tsaponae bajarapamona mapacueniaje:

VajaDioso pijamatabēcuenesaenē daxita mapanacuata jivi pevetsivi matatoxenetsia. Taxuxuaba rajane baja daxitanacuanējava Dioso jivi pevetsinexa. Bajarax-

uata vaxaitsi jumaitsitsi: “Diosomë, ¡ayaijamatabëcuenenëmë bitso!” jaitsi vaxaitsi Diosojavabelia. <sup>7</sup> Sivajamatabëcuenenarëyatsi Dioso. Nexata tsipaebatsi itsamonaevavabelia pacuenia sivajamatabëcuenenarëyatsi Dioso. “Diosomë, ¡bitso pinijicuene nexanaenë!” jaitsi vaxaitsi Diosojavabelia. Bajarapacuenia jumaitsitsi tsipaji baja copiapata fiesta pexanaematacabinexa, Corderonë penacasabifestanexa. Petiriva rabaja naxaniavaeta Corderonë penacasabivanexa. <sup>8</sup> Bajarapova rajutatsi bitso pexaniaviriapapaëbërëjava penaxatatsinexa, pi-xuirajibijava, bitso peniojaijava,

jai bajarapamona.

“Bajarapova rajutatsi bitso pexaniaviriapapaëbërëjava penaxatatsinexa,” itsa jai, comparaciöcuenia pejumaitsinexa picani mapacueniaje: “Dioso pijajivi aneconijibia tane Cristo pesivatëpaexaetsi pijaneconi yabara,” pejinexa picani. Bajarapajamatabëcuenelivaisi: “Bajarapova rajutatsi bitso pexaniaviriapapaëbërëjava penaxatatsinexa,” pejaijava comparaciöcuenia.

<sup>9</sup> Nexata bajaraxuacujinae ángelnë nejumaitsi:

—Yaquinare mapejumaitsilivaisije: “Jamatabëcuenenarëya pamona junatatsi Corderonë penacasabifestajavaberena,” pejailivaisi. Daxita xua catsipaebatsi, bajaraxua pepacuene Dioso taneitorobijava, nejai ángelnë.

<sup>10</sup> Nexata tamatabacabëta tonucajunuajë ángelnë pitabarata. Pexaniajamatabëcuene picani tarajutsinexa ángelnëjavabelia. Itsiata baitsi jane ángelnë nejumaitsi:

—Pëtsa bajaraxua exaname. Tsipaji saya xanë ata Dioso pijajivitonënë. Pacuenia xamë, pacuenia itsamona eta, Dioso panenajuajumecovënëtsivi xaniavaetsi pajumecovënëtavanapame papexaniajailivaisi Jesús pacatsipaeba, bajara saya xanë ata taitsinë. Nexata pexaniajamatabëcuene rajure Diosojavabelia, nejai ángelnë.

Papexaniajailivaisi Jesús pacatsipaeba, bajarapalivaisita jamatabëcueneasaëyaexanatsi pamona jivijavabelia tsipaebapona Dioso pejumelivaisi.

### **Pacuenia athëbëtatsia Juan tane Cristo penioponaecaballojumata peecaejava yabara pelivaisi**

<sup>11</sup> Taniji itaboxo penapatsijava. Tanijinua penioponaecaballo. Bajarapacaballojumata jivitonë eca. Ponë bajarapacaballojumata eca, pevënë Najumecapanepaya Pejumaitsicuenia Pexanaenë. Itsavënë Pepo Pexaniajailivaisi Petsipaebinë. Bajaraponë jivi naneconitsiaexana paneconivajëtota jivi naneconita. Vajabitsaë ata exana pibisiacuene pexanaevijavabelia. <sup>12</sup> Pitaxutobeje naitayota. Pacuenia isoto batiatsobia, bajara itaxutocotiaitsi. Bajaraponë matapona ayaijava coronanë. Pita-pata vënëruca. Itsiata baitsi jane itsajivi ata apo vënëyapëtaetsi. Èbajaraponë pijacuata navënëyapëtane. <sup>13</sup> Penaxatatsijavareca tsofia. Pijanarata pejabutsijava. Bajaraponë pevënë Diosojamatabëcuenelivaisi itajëtsinë. <sup>14</sup> Bajaraponë pënaponatsi vajabitsaë ayabitsaëtoxaneto, athëbëpijivi. Bajarapamona naxataba bitso pexaniaviriapapaëbërëjavanë, pi-xuirajibijavanë, bitso peniojaijavanë. Bajarapamona eta yapona penioponaecaballuanëta. <sup>15</sup> Ponë vajabitsaë barëexana, bajaraponë pecuibuatsina pitsapa pexiujaiespada penaneconitsiaexanaenexa daxitanacuanëpijivi. Bajaraponë daxitanacuanëjava jivi pevetsinënexa. Itsa evetsiana, ajumesaëya itorobabiabiana pejumecovënëtsinexatsi. Pacuenia uvaruanë ita barëmeneyubataxuba, ayabarëmene pitsapa pexanaenexa vinoranë, bajara pijinia pacuenia daxi-

tanacuanëpijivi, pijaneconi pexainaevi, Dioso itsa verebiabiana, ayaijana xuabi-ana. Dioso, ponë pijamatabëcuenesaënë daxitanacuanë pevetsivi matatoxenetsia, ayaičenja naneconitsiaexanaena bajarapamonae pebaraanaepanaexae. <sup>16</sup> Ponë vajabitsaë barëexana, bajaraponë pijacamisajumavelia penaxatatsijavata, pevëñitanebërëtoyo ruca. Pethaëtojumata ata pevëñitanebërëtoyo ruca. Jumai tsarucae bajarapaitanebërëtoyo: “Maponëje daxitanacuanë pevetsivi ata pepo pevetsinë. Daxita petuxanevi ata pijatuxanenë,” jai tsarucae.

<sup>17</sup> Bajaraxuacujinae taenutajë ángelnë, icotiata penucaenë. Pinijijumeta vavajai tsanucae daxita quequeremonaejavabelia. Jumai tsanucae mapacueniaje:

—Naxanitsia. Panacaetuanare payaibitsaëtoxanetomë ayaijava panabaninexa Dioso pejamatabëcueneta. <sup>18</sup> Naxanitsia. Daxita petëpaevi pevi panexaenexa. Paponaremena nacuanë pevetsivimi, vajabitsaë penamatacaitorobivimi ata, vajabitsaë piatatsacavimi ata, pevi panexaenexa. Caballuanëmi, caballuanëjumata peponaevimi ata, pevi panexaenexa. Pamonami dajubicuenia pecanajetsvivimitsi itsamonaejavabelia amoneya petonacuenebinexa, apo pecanajetsvivimitsi ata, beveliajamatabëcuene pexainaevimi ata, ayaijamatabëcuene pexainaevimi ata, daxita bajarapamonae pevi panexaenexa paponaremena, jai tsanucae ángelnë quequeremonaejavabelia.

<sup>19</sup> Bajaraxuacujinae taniji piayainë. Tanijinua daxitanacuanë pevetsivi pijajivi, vajabitsaë, pecaetuatsijava ata. Daxita bajarapamonae nacaetuana vajabitsaë penaexanaenexa. Nexata barënbabia penioponaecaballota peponaenëjavabelia, bajaraponë pijajivijavabelia ata. <sup>20</sup> Nexata penioponaecaballota peponaenë vaetaba piayainë. Vaetaba peyamaxëitojorobiprofetanë ata. Ponë peyamaxëitojorobiprofetanë, jivi peyamaxëitojorobinexa, bajayata pinijicuene exanaponapona piayainë pitabarata. Bajarapacuenia bajayata pinijicuene pexanaexae, peyamaxëitojorobiprofetanë jivi yamaxëitojorobapona. Nexata jivi nacaeveta piayainë pevëñitanetota pitanerubaponaenexatsi. Bajarapacuenia bajayata peyamaxëitojorobiprofetanë jivi yamaxëitojorobapona piayainë jumapecataeya pexanaenëtsijavabelia ata jivi pematabacabëta penavajëcabiabinexa. Bajaraxuata nexata piayainëbeje, peyamaxëitojorobiprofetanëbeje, xuabaliatsibeje abaxë piasaenëbeje isotopucabelia. Bajarapapuca tajueyabiaba azufre yajava. <sup>21</sup> Nexata daxita bajaraponëbeje pijajivi, pamonae nacopaba, beyejebatsi. Beyejebatsi penioponaecaballota peponaenë, pecuibuatsina pepitsapaeepadata. Nexata jane baja daxita quequeremonaenapenyaba bajarapomonaemi pevi.

**Pacuenia Juan tane pacuenia itsamatacabi Cristo mil pavaibeje evetsijitsia mapanacuaaje yabara pelivaisi**

**20** Icatsia taniji ángelnë perunaevjavatsica athëbëvetsica. Cobenarunaica pini-  
jimëthëxaneto pijallave. Cobenarunaicanua ayaiacadenamaëtoxaneto. <sup>2</sup> Bajarapaángelnë vaetaba dragón, ponë pevëñë Dovathi. Itsavëñë Satanás. Bajaraponë dovathi bajayata itsa naitajëta jivijavabelia, naitajëta bejomocuenia. Nexata ángelnë cëtabuata dovathi mil pavaibejenexa. <sup>3</sup> Pinijimëthëxanetojavareca xuareca. Yavëpaxatatabuata bajarapamëthëxanetojavareca. Pematatsënëa icatsia sellovëñëjavata yamëthëvëpajumacatsata. Nexata dovathi apo caëjëpaetsi tsane peyamaxëitojorobinexa mapanacuapijivi mil pavaibeje. Bajaraxuacujinae icatsia isinaenatsi caeapatoyo icatsia jivi peyamaxëitojorobaponaponaenexa.

<sup>4</sup>Bjaraxuacujinae icatsia taniji jivi tronojumata penaevi. Bjarapatronojumata penaevi, Dioso itorobatsi penaneconitsiaexanaenexa jivi, pijaneconi pexainaevi. Tanijinua itsamonae ata, pamonae bajayata vēsiucubejebatsi. Bjarapacuenia bjarapamonaemi bajayata vēsiucubejebatsi tsipaji jivi tsipaebapona Jesús pelivaisi. Tsipaebanajetarubenanua Dioso pejumelivaisi. Bjarapamonae apo navajēcaē pematatabacabēta piayainējavabelia, piayainē jumapecataeya pexanaenētsijavabelia ata. Apo nacopatsinua piayainē pevēnēitanetota pitapaitanerubinexatsi. Apo nacopatsinua pecobejumaitanerubinexatsi. Nexata bjarapamonaemi icatsia Dioso piasaēyaexanaejavatsi, taniji. Pacuenia ata bjarapamonae mil pavaibeje Cristo barēevetatsi mapanacuaje, taniji. <sup>5-6</sup>Bjarapamonae Dioso asaēyaexanatsi Dioso copiaya jivi piasaēyaexanaematatabita. Bjarapamonae Dioso asaēyaexanatsi caeuenia ayaibitsaēto. ¡Pamonae copiaya Dioso jivi piasaēyaexanaematatabita asaēyaexanatsi, bjarapamonae pejamatabēcuenēbarēyavi, planeconijibivinu! Cotocaevi patēpaejavanexa, acuenēbi baja itsacuene pexanaenexatsi bjarapamonae. Biji rajane bjarapamonae Dioso, Cristo ata, pijasacerdotevinexa, jivi petocuaicuaijaitabiabivinxata Diosojavabelia. Bjarapamonae Cristo barēevetsianatsi mapanacuaje mil pavaibeje. Itsamonae petēpaevimi, pamonae abaxē nacopabanubena, Dioso icatsia asaēyaexanaenatsi bjarapamil pavaibejecujinae.

<sup>7</sup>Itsa baja panepaena mil pavaibeje, dovathi icatsia isinaenatsi mēthēvecua pepitapaenexa. <sup>8</sup>Pitsapaena icatsia jivi peyamaxēitorobinexa daxitanacuanējava. Bjarapacuenia yamaxēitorobiana jivi ayaibitsaētoxonetonē, Dioso apo pejumecovēnētsivi. Nexata bjarapacuenia dovathi vajabitsaē caetuatsiana. Dovathi pija-jivi bitso ayaibitsaētoxoneto tsane. Pacuenia tajetaboatsapērē navita, bajara itsi tsane dovathi pijajivi, vajabitsaē. <sup>9</sup>Bjarapamonae vajabitsaē copiata jivi benajetarubenaena daxitanacuanējava. Bjaraxuacujinae matatoyoronaena jane baja Jerusalētomara peverebiabinexa picani Dioso pijajivi, Dioso piasivatomarata, Jerusalēn tomarata, pejinavanapaevi. Itsiata baitsi jane dovathi pijajivi Dioso tsixuabianicatsi isoto athēvētsica. Nexata tajuenatsi daxita vajabitsaēmi, dovathi jane baja pijajivimi. <sup>10</sup>Nexata dovathi, ponē jivi yamaxēitorobaponaena daxitanacuanējava, xuabialiatsi isotopucalia, azufre yajava petajueyabiabipucalia. Bjarapapucalia baja cajena copiaya xuabatsibeje piayainēbeje peyamaxēitorobiprofetanēbeje. Nexata bjarajota bjarapamonae Dioso naneconitsiaexanaenatsi daxitamatabijavabelianexa. Nexata bjarajota bjarapamonae isoto petajuta bitso jamatabēfaenaena. Bjarapamonae bitso pejamatabēfaenējava isoto petajuta tsitecaena daxitamatabijavabelianexa.

**Pacuenia Juan tane pacuenia itsamatacabi jivi nubenaejitsia penioponaetrono pitabarata Dioso penaneconitsiaexanaenexatsi yabara pelivaisi**

<sup>11</sup>Icatsia taniji penioponaetronoxanetojumata peecaenē. Bjaraponē nacua baja vereverecaeyaexana. Itaboxo ata baja vereverecaeyaexana. <sup>12</sup>Taenubajē daxita petēpaevimi penubenaējava Dioso pitabarata. Nubena Dioso penaneconitsiaexanaenexatsi. Bjarapamonae ayaijamatābēcuenē pexainaevimi. Itsamonae bevelijamatābēcuenē pexainaevimi. Taeyejebajēnua cuyalatobaxutonē. Bjarapacuyalatobaxutonē baxupanejeba. Bjarapacuyalatobaxutonēta itanerubena daxita petēpaevimi pacuenia exanavanapa petēpaevajēnaeya mapanacuataje. Itsacuyalatobaxuto ata taeyabuatajē. Bjarapacuyalatobaxuto ata baxupatabuata. Bjarapabaxu-

tota vënërubena pamonaē matakabi apo peverevereaejava pexainaevinexa. Nexata caejivi canacujitsia Dioso pijaneconi petorutaponaexaetsi, caejivi canacujitsia paneconivajëto xaina. Bajarapaneconivajëtota Dioso naneconitsiaexanaponatsi. <sup>13</sup>Manuameneta petëpaevimi ata, daxita pitsapaina. Jivi ata petëpaeujinae, pejinavanapaenacuajavavetsina, ira bëxëpanavetsina, daxita pitsapaina. Nexata caejivi canacujitsia paneconivajëto xaina, bajarapaneconivajëtota Dioso naneconitsiaexanaponatsi. <sup>14</sup>Bajaraxuacujinae jivi petëpaeayaexanaejamatabëcuenemi, jivi petëpaeujinae pejinavanapaenacuami ata yajava, Dioso xualia isotopucalia. Bajarapapuca jivi cotocaevi patëpaejava petëpaeayaexanaepuca. <sup>15</sup>Pamonaē apo vënërubena, pabaxutota vënërubena pamonaē matakabi apo peverevereaejava pexainaevinexa, bajarapamonaē peneliatsi bajarapapucalia.

**Pacuenia Juan tane pacuenia itsamatakabi Dioso icatsia  
pejanaitaboxo, pejananacua yajava, exanaejitsia yabara pelivaisi**

**21** Icatsia taniji pejanaitaboxo, pejananacua yajava. Paitaboxo, panacua ata, Dioso copiaya exana, ajibi baja. Manuamene ata ajibi. <sup>2</sup>Xanë rabaja Juannë. Taniji Dioso pijatomara, pejana Jerusalëntomara. Athëbëvetsica, Diosojavavetsica, runaica bajarapatomara. Daxita rabaja Dioso xaniavaeta. Pacuenia petiriva pamonanexa itsa sivapatsijitsiatsi, pevajënaē banaxaniavaeteca, bajara pijinia pacuenia Dioso xaniavaeta baja Jerusalëntomara pijajivi petojinavanapaneaxatsi. <sup>3</sup>Nexata jumetaniji pinijijume athëbëvetsica, tronojavavetsica. Jumaitsi mapacueniaje:

—Taema. Dioso rabaja jivijava ponapona. Dioso baja jivi yajavaponapona daxitamatakabijavabelianexa. Bajarapamonaē pepo Diosonë pijajivi tsane. Dioso pijinia bajarapamonaē pijatuxanenë tsane. <sup>4</sup>Dioso itaxutobarëmeneiquinaponaena bajarapamonaē. Ajibi baja tsane petëpaeuene, penuecuene ata, bitso penajamatabëxainaeuene ata, penavixaetaeuene ata. Daxita bajarapitsicuenemi copiarucaena jane baja, jai athëbëvetsica.

<sup>5</sup>Bajaraxuacujinae Dioso, tronojumata peecaenë, jumaitsi:

—Taema. Daxitacuene bajayata taexanaejavami, xuami baja picani verevereaeyaxanajë, pejanajava icatsia exanajë, jai.

Bajaraxuacujinae xanëjavaberena icatsia nejumaitsi:

—Yaquinare bajaraxuanë pelivaisi. Tsipaji baja palivaisi catsipaebatsi, bajarapalivaisi pexaniajailivaisi cajena. Xanepana nexata daxitajivi pejumecovënëtsinexa bajarapalivaisi, nejai.

<sup>6</sup>Bajaraxuacujinae icatsia nejumaitsi Dioso, tronojumata peecaenë:

—Daxita rabaja icatsia pejanajava taexanaejava, veretajë. Xanë rajane baja daxitacuene tataxuxuabinë. Daxitacuene icatsia tacopiarucaeyaexanaenënexa. Pacuenia jivi pejamatabëthëtojavavetsina bitso jitsipa mera piapaenexa, bajara pijinia pacuenia jivi bitso itsa jitsipaena tacapanepaejavanexa, nexata bajarapamonaē rajutsianajë matakabi apo peverevereaejava. Tocopatsianajë bajarapamonaē amoneya pexainaenexa matakabi apo peverevereaejava itsa jumecovënëta taxënato, Cristo, pesivatëpaejavatsi. Bajaraponë Cristo jivi pejamatabëcuenesaëyaexanaenë. <sup>7</sup>Pajivi tsiteca jumecovënëtaponapona tajumelivaisi ëpetëpaejavabelianexa, bajarapajivi xanë pijaDiosonënë tsane. Bajarapajivi pijinia taxënotojiviyo tsane. <sup>8</sup>Itsiaata baitsi jane pamonaē pejunavivi tajumelivaisi yabara itsamonaē pebejioiaexanaeyanivatsi, pamonaē ata apo tanejumecovënëtsivi, pa-

monae ata pitoyavi itsamonae, pamonae ata pevitota pibisiacuene pexanaevi, bajarapamonae ponaena petajueyabiabipucajavabelia. Pamonae ata penajorobivi, pamonae ata jumapecataeya pexanaenēanējavabelia penavajēcaevi, pamonae ata penajumetsēnētšivi, daxita bajarapamonae ponaena petajueyabiabipucajavabelia. Bajarapapuca tajueyabiaba azufre yajava. Bajarapatēpaejava cotocaevi jane baja petēpaejava tsane, nejai Dioso, tronojumata peecaenē.

**Pacuenia Juan tane pejana Jerusaléntomara  
pacuenia itsamatacabi itsijitsia yabara pelivaisi**

<sup>9</sup> Nexata jane baja rena caenē ángelnē. Bajarapaángelnē siete paángelnēbeje siete pacopabeje piayaijavanē pevenēcaecopanē pepacaeviyajuvēnēnē. Bajarapaángelnē nexata nejumaitsi:

—Naxanitsia. Catsitajētsianatsi pova Corderonē pijavanexa, nejai ángelnē.

<sup>10</sup> Bajaraxuacujinae Espírиту Santo netsijamatabēvēnēca. Nexata bemajitsinaebota ángelnē nebarēpona pinijitsutoxanetojavabelia, piapiatsutoxanetojavabelia. Nexata bajara patsutoxanetojavatalia ángelnē netsitajēta Dioso pijatomara, pinijitomaraxaneto, Jerusaléntomara. Athēbēvetsica Diosojavavetsica runaica bajarapatomara. <sup>11</sup> Bajarapatomara cotianiveniveneca Dioso pijapenivenivenaecotiata. Pacuenia penamatamotsiiboto jaspevenēiboto cotianivenivena, bajarapacuenia cotianiveniveca. Nasabanua pacuenia nasaba vidriojava. <sup>12</sup> Bajarapatomara matatorotsia yacaranata piatayaēibopanaxanetota. Bajara payacaranatsijavaxaneto mataropotsia catsanaruba ibopananē. Bajara payacaranatsijavaxaneto apia athēbēabetsia pacuenia pinijinaejavaxaneto apia. Bajara payacaranatsijavaxaneto matatorotsia xaina doce pabaupabeje. Nexata ángelevi, caenē canacujitsia, nucapona caebaupa canacujitsia. Bajarapabaupanējava Israelpijinē pexi, doce ponēmibeje, pevenēanē vēnērubena. <sup>13</sup> Acueyabi pabaupabeje xainapona caeyenepana canacujitsia. Estevēnēnenia payenepana xaina acueyabi pabaupabeje. Nortevēnēnenia pijinia payenepana xaina acueyabi pabaupabeje. Survēnēnenia pijinia payenepana xaina acueyabi pabaupabeje. Oestevēnēnenia pijinia payenepana xaina acueyabi pabaupabeje. <sup>14</sup> Jerusaléntomara matatorotsia peyacaranatsiibopanaxanetonexa, ibo penajumaetaponaejavata, copiaya pinijiibotoxanetonē sasavia jebapona, doce pabotoxanetobeje. Bajarapabotoxanetonē, caeibotoxaneto canacujitsia pejumavelia, Corderonē pijajivi doce ponēbeje, apóstolevi, pevenēanē rubena.

<sup>15</sup> Paángelnē nebarēcuaiquaijai, cobenaponapona oronaebo. Bajarapaoronaebota pecaējēbinexa Jerusaléntomara, pecaējēbinexa baupanē ata, pecaējēbinexa Jerusaléntomara matatorotsia peyacaranatsiibopanaxaneto ata. <sup>16</sup> Jerusaléntomara matatorotsia peyacaranatsiibopanaxaneto, daxitayenepananē namatajēpaeya apia. Pacuenia apiareca matonotsiareca payenepanabeje, bajara pijinia pacuenia apialia epatajērētšialia ata payenepanabeje. Nexata jane baja ángelnē pecaējēbinaebota caējēba Jerusaléntomara. Nexata Jerusaléntomara matonotsiareca piapiajava xaina dos mil doscientos pakilómetrobeje. Epatajērētšialia ata xaina bajarapacuenia, dos mil doscientos pakilómetrobeje. Athēbēabetsia ata piapiajava bajarapacuenia xaina, dos mil doscientos pakilómetrobeje. <sup>17</sup> Bajaraxuacujinae ángelnē caējēba Jerusalén tomara matatorotsia peyacaranatsiibopanaxaneto peyapētaenexa paitayaētovajēto xaina. Jerusaléntomara matatorotsia pey-

acaranatsiibopanaxaneto, piatayaējjava xaina sesenta y cuatro pametrobeje. Pavirianaebota mapanacuapijivi bacaējēba, bajarapavirianaebota ángelnē caējēba.

<sup>18</sup> Jerusaléntomara matatoyorotsia peyacaranatsiibopanaxaneto, exana jaspevēnēibota. Jerusaléntomara ěorojavanēta pexanaetomara. Nexata Jerusaléntomara nasaba bitso. Pacuenia bitso nasaba piaxuirajibividriojava, bajara itsi. <sup>19</sup> Jerusaléntomara matatoyorotsia peyacaranatsiibopanaxanetonexa, itsa taxuxuaba pexanaejava, copiaya pinijiibotoxanetonē sasavia tsvajēnaejeba. Bajarapaibotoxanetonē itabētsiaya jumacatsanaruba daxitaviria ibotonēta, bitso penamatamotsiibotonēta. Penamataxainaeibotoxaneto itabēta jaspevēnēibotonēta. Pecotocaeviibotoxaneto itabēta zafirovēnēibotonēta. Acueyabiibotoxaneto itabēta ágatavēnēibotonēta. Cuatroibotoxaneto itabēta esmeraldavēnēibotonēta.

<sup>20</sup> Cincoibotoxaneto itabēta ónicevēnēibotonēta. Seisibotoxaneto itabēta cornalinavēnēibotonēta. Sieteibotoxaneto itabēta crisólitovēnēibotonēta. Ochoibotoxaneto itabēta berilovēnēibotonēta. Nueveibotoxaneto itabēta topaciovēnēibotonēta. Diezibotoxaneto itabēta crisoprasavēnēibotonēta. Onceibotoxaneto itabēta jacintovēnēibotonēta. Doceibotoxaneto itabēta amatistavēnēibotonēta. <sup>21</sup> Doce rabaja pabaupabeje. Doce rabaja pijinia paperlavēnējavatabeje, bitso penamatamotsijavanēta, exana caebaupa canacujitsia. Bajarapatomarata caecalle ruca daxitacallevecua bitso ayaicallexaneto. Bajarapacalle ěorojavanēta pexanaecalle. Nasaba bitso. Pacuenia nasaba vidriojava, bajara itsi.

<sup>22</sup> Bajarapatomarata apo taenē templobo. Itsiata baitsi jane daxita bajarapatomara betemplo. Bajarapacuenia betemplobo tsipaji Dioso, daxita mapanacuatata jivi pevetsivi matatoxenetsia piagamatabēcuenesaēnē, Corderonēbeje, ponaponabeje bajarapatomarata. <sup>23</sup> Dioso ayaijamatabēcuenenē pijapenivenivenaectiata itayota bajarapatomara. Corderonē ata itayota pijapenivenivenaectiata bajarapatomara. Bajaraxuata apo namatavenonae bajarapatomarata pitayotsinexa matacabipijijuameto, meravipijijuameto ata. <sup>24-26</sup> Daxitanacuanēpijivi, pamonae baja Dioso capanepatsi pijaneconivecua, bajarapamonae itsamatacabi jinavana-paena Diosobeje Corderonēbeje pijapenivenivenaectiata. Daxitanacuanē pevetsivi pijatomaranējavaverena capatsiana bajarapatomaraberena bitso penamatamotsijavanē, Dioso yaityataeya perajutsinexa. Daxitamatacabi javabelianexa, bajarapatomara baupatanutsiana. Bajarapatomarata ajibi tsane meravi. <sup>27</sup> Itsiata baitsi jane bajarapatomaraberena pibisiagamatabēcuenepexainaevi, apo jone tsane. Piauracuene pexanaevi, penajumetsēnētsivi ata, apo jone tsane. Jonena ěpamonae vēnērubena Corderonē pijacuyalatobaxutota. Corderonē pijacuyalatobaxutota vēnērubena pamonae matacabi apo pevereverecejjava pexainaevinexa.

**22** Bajaraxuacujinae icatsia ángelnē netsitajēta pepamene, bitso pitaranaemene. Nasaba bitso. Pacuenia vidriojava nasaba, bajara itsi. Bajarapamene jivi petēpaejavavecua piatavayaexanaemene. Bajarapamene pitsaparena Diosobeje Corderonēbeje pijatronojavaverena. <sup>2</sup> Bajarapamene bocapona ayaicallexaneto tuatuajēareca. Bajarapamene itapayareca anijamuxubērēneniabeje nubena naejavanē, jivi petēpaejavavecua piatavayaexanaenaenē. Bajaraponaenē caevaita nacuaitapona doce panacuaitsibeje. Caejuameto canacujitsia nacuaitapona. Bajaraponaenē pebaxuta xanepana daxitanacuanēpijivi penavaēbinexa, pejamatejemanexa piavitanejavavecua. <sup>3</sup> Nexata bajarapatomarata ajibi tsane jivi pejamatabēcuenebijianaejavanexatsi. Nexata jivi pibisiacuene apo exanae tsane.

Diosobeje Corderonëbeje pijatronota ecaenabeje pijajivi pitorobabiabinexabeje daxitamatacabijavabelianexa bajarapatomarata. Nexata daxita pamonaē Dioso pijajivi, pexaniajamatabëcuene rajutsiana Diosojavabelia. <sup>4</sup>Bajarapamonae Dioso itabarataena. Dioso pevënë ata rucaena bajarapamonae pitapathaitota. <sup>5</sup>Bajarapatomarata ajibi tsane meravi. Pepo petuxanenë Dioso pijapenivenivenaēcotia itayotsiana. Nexata bajarapatomarata pejinavanapaēvi apo namatavenonaē tsane lám-paracotia, matacabipijijuametocotia ata. Pamonaē jinavanapaena Dioso pijanacuta, Dioso pijanacua barëevetsianatsi daxitamatacabijavabelianexa.

### **Pacuenia baja imoxoyo pevajënaē Jesucristo pepatsijavanexatsica yabara pelivaisi**

<sup>6</sup>Icatsia ángelnë nejumlahitsi:

—Palivaisi baja yaquiname, pexaniajailivaisi cajena. Daxita xua yabara yaquiname, pepacuenē copiapatsiana. Dioso baja cajena bajayata tajëvelia yapëtaeyaxana profetavimi peyapëtaenexa pacuenia itsamatacabi itsijitsia mapanacuataje. BajarapaDiosonë icatsia itoroba pijaángelnë. Nexata Dioso pijaángelnë tsitajëta Dioso pijajivijavabelia, Dioso pijajivi peyapëtaenexa pacuenia baja imoxoyo pevajënaē pecopiapatsinexa xua copiapatsijitsia mapanacuataje, nejai ángelnë.

<sup>7</sup>Icatsia ángelnë nejumlahitsi:

—Jesús raja jumaisi: “¡Bepijia patsianicajë!” jai. ¡Nexata pajivi jumecovënëta Dioso pejumelivaisi, neyaquinaelivaisi mapabaxutotaje, bajarapajivi jamatabëcuenebarëya tsane Jesús itsa patsianica! nejai ángelnë.

<sup>8</sup>Xanë rabaja Juannë, daxita baja palivaisi yaquinajë, jumetaniji. Tanjinua. Bajaraxuacujinaē ángelnë, ponë netsitajëta daxita bajaraxua, pitabarata yaiyataeya picani tamatabacabëta tonucajë. <sup>9</sup>Itsia baitsi jane ángelnë nejumlahitsi:

—Pëtsa bajaraxua exaname. Tsipaji saya xanë ata Dioso pijajivitonënë. Pacuenia xamë, pacuenia itsamonaē ata, pamonaē Diosojumepaēbivi profetavi, pacuenia ata pamonaē jumecovënëtsiana mapabaxutotaje neyaquinaelivaisi, bajara saya xanë ata taitsinë. Nexata Dioso yaiyataeya nematabacabëta tonucare nevajëtsinexa Diosojavabelia, nejai ángelnë.

<sup>10</sup>Icatsia ángelnë nejumlahitsi:

—Pëtsa nejumeyavajunuaxainame Dioso pejumelivaisi, neyaquinaelivaisi mapabaxutotaje. Tsipaēbianame daxitajivijava daxitajivi peyapëtaenexa. Tsipaji rabaja imoxoyo pevajënaē pecopiarucaenexa mapanacuataje. Pacuenia baja cajena Dioso tajëvelia najumecapanepaeya jumaisi, bajarapacuenia Dioso exanaena. <sup>11</sup>Neponaponaeepato abaxë mapanacuataje, tocopare pibisiacuene pexanaponaēvi, pibisiacuene pexanaejava pecatsitecaenexa. Ēpibisiacuene yabara penajamatabëxainaeivi ata, tocopare pecatsitecaenexa penajamatabëxainaejava ēpibisiacuene yabara. Itsiata baitsi jane pijinia pamonaē pexaniacuene pexanavanapaēvi, catsitecae pevajënaeyabelia pexaniacuene pexanavanapaejava. Pamonaē ata Dioso aneonijibia tanetsi pejumecovënëtsixae Jesucristo pesivatëpaejavatsi, casaë pevajënaeyabelia aneonijibia pejinavanapaenexa, nejai ángelnë.

<sup>12</sup>Icatsia ángelnë nejumlahitsi:

—Jesús raja jumaisi: “Panėjumetaema. Bepijia patsianicajë. Capatsianicajë tajajivi tarajutsijavanexa. Bajaraxua rajutsianajë caejivi canacujitsia, pamonaē xaniavaetsia netonacuenebavanapa. Pamonaē pijinia pibisiacuene exanavanapa,



naneconitsiaexanaenajë. <sup>13</sup>Xanë rajane baja daxitacuene tataxuxuabinë. Daxitacuene icatsia tacopiarucaeyaexanaenënexa, ”jai raja Jesús, nejai ángelnë.

<sup>14</sup>Icatsia ángelnë nejumlahtsi:

—Jamatabëcuenebarëya baja pamonaë pibisiacuene pexanaeconomie Dioso vecuaajibiaexanatsi, pejumecovënëtsixae Jesucristo pesivatëpaejavatsi. Bajarapamonaë itsamatacabi Dioso tocopatsianatsi penajonenexa Dioso pijatomara bau-pañëjava. Tocopatsianatsinua jivi petëpaejavavecua piaitavayaexanaenaë pecuaix-aenexa. <sup>15</sup>Itsiata baitsi jane daxita pamonaë Dioso apo pejumecovënëtsivi, nacopabanubenaena Dioso pijatomarajumavelia. Nacopabanubenaena pamonaë bitso ëpibisiacuene pexanaevi, penajorobivi ata, pevitota pibisiacuene pexanaevi ata, jivivevi ata, jumapecataeya pexanaenëañëjavabelia penavajëcabiabivi ata, bitso pe-najumetsënëtsivi ata. Daxita bajarapamonaë nacopabanubenaena Dioso pijatomara-jumavelia, nejai ángelnë.

<sup>16</sup>Nexata Jesús nejumlahtsi:

—Xanë rabaja Jesúsñë. Itorobajë tajaángelnë pecatsipaebinxë palivaisi baja catsipaeba. Bajarapacuenia itorobajë daxita Dioso pejumecovënëtsivi peyapëtaenexa palivaisi baja tajaángelnë catsipaeba. Xanë rabaja nacuaevetsinëmi Davidpijinë pe-momoxiyajuvënënë. Xanë rabaja tajamatabëcueneitayotsinë daxitajivi pexaniajaili-vaisita, nejai Jesús.

<sup>17</sup>Espíritu Santo jumaitsi. Petiriva ata, pova Corderonë pijavanexa, bajarapova ata jumaitsi. Jumaitsi beje Jesúsjavabelia mapacueniaje:

—Naxanitsiayo patsianimica, jaibeje.

Pamonaë jumetane bajarapacuenia pejumlahtsijavabeje Jesúsjavabelia, bajarapamonaë ata bejumlahtsi Jesúsjavabelia:

—Naxanitsiayo patsianimica, bejai bajarapamonaë ata.

Pacuenia jivi pejamatabëëthëtojavavetsina bitso jitsipa mera piapaenexa, bajara pijinia pacuenia jivi bitso itsa jitsipaena Dioso pecapanepaejavanaxatsi, nexata bajarapamonaë Dioso rajutsianatsi matacabi apo pevereverecejaveja. Tocopatsianatsi bajarapamonaë amoneya pexainaenexa matacabi apo pevereverecejaveja itsa jumecovënëta Cristo pesivatëpaejavatsi. Tsi-paji Cristo jivi petëpaejavavecua piaitavayaexanaenë.

<sup>18</sup>Daxita pamonaë leba Dioso pejumelivaisi, tayaquinaelivaisi mapabaxutotaje, jamatabëcuenereviaya tsipaëbijitsianë rovalia mapacueniaje. Mapabaxutotaje tayaquinaelivaisi itsajivi icatsia saicayalivaisi mataropotsia itsa yaquinaena, bajarapajivi naneconitsiana Diosojavabelia. Nexata Dioso naneconitsiaexanaenatsi. Papiayaicuene yabara jumaitsi mapabaxutotaje, bajarapacuenia Dioso taeyaexanaenatsi bajarapajivi. <sup>19</sup>Mapabaxutotaje tayaquinaelivaisi, itsajivi itsa xuabiana itsalivaisiyo, nexata bajarapajivi naneconitsiana Diosojavabelia. Nexata bajarapaneconijamatabëcueneta bajarapajivi vënëyaquinae atatsi pabaxutota vënërubena daxita pamonaë matacabi apo pevereverecejaveja pexainaevinexa, matacabi apo pevereverecejaveja apo xainae tsane. Dioso pijatomarabetsia ata pejonenexa, apo tocopatsi tsanetsi. Pabaxutota vënërubena matacabi apo pevereverecejaveja pexainaevinexa pelivaisi, Dioso pijatomara ata pelivaisi, jumaitsi mapabaxutotaje.

<sup>20</sup>Jesús, ponë itoroba pijaángelnë tanetsipaebinxë pacuenia itsamatacabi itsijitsia mapanacuataje, bajaraponë nejumlahtsi mapacueniaje:

—Bepijia patsianicajë, jai.

Nexata xanë jumaitsinë:

—Je. Xanepana rabaja. Jesús pepo petuxanenëmë, ¡naxanitsiayo patsianimica!  
janë.

<sup>21</sup> Pacatovajëtatsi daxita paxamë vajatuxanenë Jesucristo papecayavenonaenexa.  
Bajara itsi tsane.